



AMADIS
DE GAULE
10—3







Don J. F. Ferra 1891.

14 20/


facit 1- 4-


Coron
M
A


41/2 ...
4 ...
4 ...
4 ...

Re

85







LE DIXIESME LI-
VRE D'AMADIS DE
GAULE:


Auquel (continuant les haultz faitz d'armes, & prouesses admirables de Florisel de Niquee, & des inuincibles Anaxartes, & la pucelle Alastraxeree sa sœur) est traité de la furieuse guerre, qui fut entre les Princes Gaulois & Grecz pour le recouurement de la belle Helene d'Apolonie. Et des auentures estranges, qui suruindrent durant ce temps.

ENVIE D'ENVIE EN VIE.



EN ANVERS,
Par Guillaume Silvius, imprimeur
du Roy.

L'AN M. D. LXXIII.



A TRESILLVSTRE PRINCESSE MA

*Dame Marguerite de France, sœur unique du treschrestien Roy Henry
deuxiesme de ce nom, Duchesse de Berry.*

MA Dame, le cours des influences celestes me renga maintenant d'obeir à leur disposition premiere faite de moy à vostre seruice vn iour qu'estât entré en vostre chambre, j'entendy du Seigneur de la Hunaudaie le propos que luy en auiez tenu sur la parolle: dont il me remonstra que le labeur entier de mes muses deuoit estre adressé à vostre nom vnique: comme à celle, de qui la grandeur seule le merite, sans le bon vouloir que (comme experte es langues & sciences) portez à voz semblables, iusques à en departir à ceux que voiez seulement de franc cueur aspirer à l'amour de sapience. Je dirois que mon infortune, me transportant alors trop loing de vostre veuë, m'auroit destourné cest heur pour vn temps, liurant en autres mains tant la traduction des decades Romaines, que des discours Italiens formez sur icelles, avec le traité Latin de l'usage des chiffres. Mais plustost ie repete à bonne encontre d'auoir ietté telz coups d'essay au vent, pour me stiler & durer à pouuoir apres dresser mon chef d'œuvre à vostre gloire & honneur. Non que ie voufisse tenir encore ce romant Espagnol en tel conte, que i'y aye esté du tous les nerfs telz quelz de l'esprit, lequel seulement ay fait François pour m'exercer au l'agage Castilan, cōme aux deux autres: & ne va vers vous qu'en estat d'auant coureur, esperant bon recueil à cause du nom de Gaule qu'il porte, dont vous estes la premiere du sang. Je reserue plus volontiers tout ma reste à employer au suiet serieux, veritable, & illustre de l'histoire Françoisse, contenant les gestes & armes heroïques de voz fameux ancestres. Laquelle (si ie sentoie le moindre rayon de vostre faueur ioint au zele naturel du païs qui nuyt & iour me semble exiger quelque honneste tribut de ma naissance) i'esperois traïsser pour le moins au net d'un peu plus hardy pinceau, si ie n'auois la suffisance d'y mettre la derniere main, & l'ombrager & reuestir de ses propres couleurs. Mais comme ceux qui tirent les figures geomantiques ne tiennent apuy, ne fondement, que sur le mouuement du ciel, qui leur guide & conduit la plume: aussi telz ouurages ne peuuent estre menez à perfection, si quelque haulte puissance, ne preste la main fauorable à l'ouurier & entrepreneur. Vous me mettriez adonc (ma Dame) en passion du tout contraire à celle de Tite Liue, s'esouissant du respit que luy donnoient les premiers aages de la ville, à ne manier si tost les carnages, pilleries & autres horreurs enormes de son temps. Car mon cueur en celle histoire languiroit sur les vieilz commencement de desir & affection ardente de voler iusques à vostre siecle, pour se baigner en pleine ioye & liesse, descriuant les magnanimes emprises & autant heureuses conquestes de nostre tresexcellent Roy vostre fre re n'agueres en Boulognois, & Escosse, & aujourd'huy en la Flandre & Lorraine avec si brief & prospere succez (que lon peult ramenteuoir en luy la parolle de Sannarolle au petit Roy Charles) que Dieu le mene par la main, & le ramene de tous ses voyages: Voire, qu'à luy conuient proprement la deuise du grand Iules Cesar. *Venu, ay veu, & vaincu.* Ainsi qu'on doit esperer par raison pareille conformité entre eux en effet de hautes victoires: d'autant que Iules muny principalement de ses legions aguerries & forces Françoises avecques sa bonne discipline militaire, reduit le Empire à son obeissance. Et fut il iamais memoire de meilleure ordonnance & police de camp, ne de plus braues vieilles bandes (fussent les Falanges Macedoniques d'Alexandre) ne de gendarmerie mieux en poinct & en volenté. Pourquoy, ainsi ac-

compagné, pourra moins que l'autre deffaire vn Empereur, voire (comme iadis ses predecesseurs) porter son nom, & les armes iusques au plus loingtains & belliqueuses regions du monde? Veu mesmement que desia toutes nations & seigneuries, sentans sa felicité fatale, viennent de toutes pars requerir son amytié & alliance: tellement que souz ses fleurs deliz branle & marche à present, tant par mer que par terre, presque l'vniuerselle puissance de l'Europe, pour l'expulsion de la tyrannye: comme verrez en ce dixiesme liure d'Amadis, qu'elle fut assemblee deuant Constantinople pour le rauissement de la seconde Helene. Ie n'oublerois alors (Ma Dame) de blasonner, aussi voz royales vertus de toutes les facultez de ma langue, pour montrer deux miroërs de perfection d'un sang, es deux sexes, concurrens en vn mesme temps, resplendissans sur terre, ainsi que les deux planettes du frere de la sœur luisent au ciel par dessus tous les astres. Et comâderois à l'atiquité de se taire de Carmenta, Proba, Sapho, & autres Dames doctes: & de Sulpitia & Claudia les pudiques, lesquelles vostre charité par trop obscurcit & offusque tant en la haulteur de voz contemplations qu'en l'atrempance & mespris de pompes & delices mondaines, dont leur moindre condition ne leur presentoit si fort obiet à combattre. Et venant à ceste cronique, qui tant louë & magnifie son Oriane, Lucelle, Helene, Alastraxeree: Ie publieray hault & cler, que la grace, maiesté, chasteté, facôde de chacune, sont en vous coniointes (Marguerite precieuse) en vnion parfaite, par iuste accord de vostre nom au fait, qui comme la perle, excédez le pris de toutes autres, retenant sa principale propriété d'aymer singulieremēt le ciel, & (comme dit Pline) recognoistre de luy tout vostre estat & disposition entiere. Or i'espere que ne daignerez totalement ce fabuleux vulgaire des faitz & ditz insignes de ces gentiles Dames, & des gestes merueilleux de maintz vaillans Cheualiers, ains que le prendrnz pour deduyt & recreation après voz meilleurs liures Grecz & Latins: Au moins, quand vous ne voudriez ietter l'œil dessus y souffrant patiemment vostre nom par sō lustre le ferez passer pl^{us} agreable entre les mains des Gentilzhōmes & Damoiselles qui n'ont pas estomac à digerer plus graue & forte lecture: A l'intention, desquelz ont esté par bōne raison escritz ces Romans, pour leur former vn exemple & patron de Cheualerie, courtoisie, & discretiō, qui leur eleuast le cueur à la vertu, enseignant les actes qu'ilz doiuent ensayure ou euitier. Ce qu'ilz ne gouisteroient si volontiers en pleine instruction morale, non plus que les enfans (comme dit Lucrese) vn bruyage medicinal, si le bord du vaisseau ne leur estoit oingt de miel, tel q̄ leur est l'apais des contes ioyeux d'auentures estranges, & amourettes semez parmy telles histoires. Quant à ceux qui les desprisent, & reiettent, par-ce que le suiet n'est veritable: ilz blasmeroient par mesme moyen la Cyropédie de Zenophon, les muses d'Herodote, les apologues d'Esopé, & toutes les tragedies & comedies, cōme frivoles & inutiles: lesquelles ont esté tant aprouuees & honorees par la venerable antiquité. Mais que nous importe la verité ou fausceré du fait, moyennant que les choses soient possibles, bonnes & imitables: l'aiousteray d'auantage ce qu'ay ouy dire à quelques personnages de sçauoir rare & exquis: que tout ainsi que les sages anciens ont caché soubz fables de Dieux, & infinies fictions poetiques la cognoissancē sacree des secretz de nature (autrement, pourquoy eussent ilz celé l'institution de la vie & des meurs) comme au labyrinthe du Minotaure, dragon des Hesperides, toison de Colchos, labeurs d'Hercules, & telles inuentiōs admirables. Ainsi en ont vsé les Philosophes d'Italie, Apuleie en la metamorphosé de l'asne, Bocace en la genealogie, & au philocope, Polyphile en l'hypnerotomachie. Ce qu'auoient fait auant
eulx

enlx en la grād' Bretagne Merlin, Morgue, Zirphee, & autres souz figure de charmes & enchantemens de la table ronde, de la queste du saint Greal, du palays d'Apollidon, tour de l'vniuers, forteresses de Phebus & Diane, & telles autres magies (dont ce liure est remply) inuentees, & conchees par escrit de telle grace, suyte & variété, que tout bon entendement y trouuera ocaſion de douter quelque ſens miſtique: & ceux qui auront leu la Cabale, ou Phisique occulte notee de telz enigmes & hieroglyphiques, par le confrontemēt & rapport de leur chiffres & caracteres, les iugeront certainement auoir eſté tous forgez en vn coing, comme l'Abbé Trite-mi⁹ le declare par ſes Polygraphie & Steganographie, & l'Hermite de Maiorque en ſon Encyclopedie. Dequoy toutesfois (Ma dame) la reſolution appartient à voſtre ſingulier iugement, ſ'il ne vous plaist y appeller les ſieurs de l'Hospital, voſtre bon chancelier, & Perrot voſtre cōſeiller (deux lumieres du Senat de Paris) leſquelz ne ſont ſeulement iuges competens des controuerſes de droit (en quoy ilz ne cedent à Paul-le, ne Papinian) ains de toutes les difficultez plus arduës qu'on leur pourroit preſenter, meſmement de la preſente concernant les myſteres de la Poëſie, en laquelle quād ilz ſe veulent eſbatre tiennent contrecarre à Horace & Ouide. Mais à moy trop mieux ſierra (laiſſant queſtions ſi fantaſtiques & eſpineuſes) comparer par bon augure l'yſſuē du preſent mouuemēt de guerre, à celle qui en ce liure print fin par bōs acordz & mariages des Princes & Princeſſes: croyant fermement que ce que les deſtinees en ont iuſques icy retardé, & differé, à eſté pour agrandir d'autāt la conſommation par l'acroiſſement de la grandeur de celui, qui deſpend voz eſperances humaines. Dont l'ouuerture aujourd' huy ſe fait euidente par conſpiration de peuples pour ſa Monarchie, auſſi ample & ſuperbe, que les vœux mortelz oſeroient conceuoir & ſouhaiter. Dequoy fortune (Ma Dame) ne vo⁹ peult tollir ne diuertir le droit de communauté, que nature vous y a donné: ains ſe iouēra plutoſt à vous former paragon des heureuſes Princeſſes (comme l'eſtes deſia des vertueuſes) aiouſtant bien toſt aux tiltres que vous auez de fille de Roy, & ſœur de Roy, deux autres pareilz de compagne & eſpouſe Royale, & apres de mere: pour effacer en deux poinctz le loz de ſa proſperité de Lempido Lacedemoniēne & de Berenice iugees par les Annales les mieux fortunees Dames, de toute la memoire des hommes.

ENVIE D'ENVIE EN VIE

I. G. P.

LA TABLE DV DIXIESME

liure d'Amadis de Gaule.

Et premierement.



Comme les nouuelles de l'aventure du Tref & estrif (autre-
ment dit la Tente & contention) vindrent à la nef des
Princes Florisel de Niquee, & Falanges d'Astre: lesquelz
allerent à l'esprouue couuertz & deguisez, & de ce qu'il
leur auint en chemin.

Chapitre premier. Fueillet premier.

Comme l'aventure du Tref & estrif, des quatre freres fut acheuee.
chap. ii. fueil. 7.

Du deuis de Florisel avec Alastraxeree, en faueur du Prince Fa-
langes. chap. iij. fueil. 13.

Comme les nouuelles vindrent à la princesse Arlande que l'encha-
tement de la tour de l'Vniuers estoit deffait. chap. iiij. fueil. 16.

Comme le prince Birmartes arriua au royaume d'Apolonie, ou
fut tenu conseil sur le recouurement d'Helene. chap. v. fu. 17.

Comme le compte d'Armignac rerourna avecques la respõce des
lettres de Florisel. chap. vi. fueil. 24.

Comme le prince Falanges se perdit à la chasse, piquant apres vn
Faulcon. chap. vij. fueil. 29.

Comme la princesse declara à Falanges tout le fait pour lequel el-
le luy auoit demandé le don, &c. chap. viij. fueil. 33.

De ce qui auint en Constantinople depuis que le prince Falan-
ges en fut party. chap. ix. fueil. 38.

Comme Florisel se mist en queste de Garinter, & de ses estranges
auentures en chemin. chap. x. fueil. 42.

De la ceremonie qui fut celebree en la presence de Florisel au cha-
steau de l'Isle enuironnee. chap. xi. fueil. 47.

Des propos que le sage Astibel eut avecques la princesse Arlande
touchant les affaires de Florisel de Niquee, & comme elle remit les
deux princes en liberté. chap. xii. fueil. 49.

Comme la royne Zahara partit avecques ses deux enfans à grand
flote pour aller en Apolonie, chap. xiiij. fueil. 50.

Comme le fort Anaxartes arriua au palais doré, & des grandz
merueilles qu'il y vit. chap. xiiij. fueil. 55.

Comme la princesse Alastraxeree alla apres Anaxartes son frere,
& donnerent fin à l'aventure. chap. xv. fueil. 57.

Com-

Comme la grand' flotte de Lucidor arriua à veuë de Constanti-
nople. chap. xvj. fueil. 60. Côme la flotte se desbarqua, & de quel-
le magnificēce la Royne Zahara & ses enfans prindrēt terre. xvij. 62.

De la premiere iournee & des harāgues que firent les chefs prin-
cipaux à leurs armees. ch. xvij. fueil. 64. Du grand dueil qu'on
mena pour les mortz d'un costé & d'autre. cha. xviii. fueil. 68.

Côme le roy Sizirfan & dom Frises de Lucitanie avecques dix-
huit autres cheualiers de leur ost enuoyerent vn cartel de deffy au
bon Prince Amadis de Grece, &c. chap. xx. fueil. 70.

Côme vne grād'flote nouvelle arriua au port de Cōstātin. xxi. f. 72.

Côme la princesse Alastraxeree enuoya deffier le prince Falanges
par lettre & la responce quelle receut de luy. chap. xxij. f. 74.

De la bataille d'Amadis de Grece, &c. chap. xxij. f. 76.

Comme Macartes Roy de Thir despescha vn cartel de deffy au
Roy Amadis de Gaule. chap. xxiii. fueil. 81.

Côme damoysselle estrangement acoustree vint deuers les prin-
ces Grecz portant vne lettre de la Royne Cleofile. chap. xxv. f. 83.

Du bon recueil qui fut fait à la royne Cleofile. chap. xxvj. fueil. 84.

Du combat qui fut entre le Roy Amadis & celuy de Thir. xxvij. 86

De la confusion en laquelle la roine Cleofile se trouua. xxviii. f. 90

Côme les princes Grecz arrēterēt par deliberatiō de cōseil xxix. 92

Comme les amours de Lucelle se resneillerent au cuer d'Amadis
de Grece. chap. xxix. fueil. 93.

Des prodiges & presages qui auindrent auant la bataille. xxxi. 95.

Qui estoit le Roy Breon, & de la trahison, &c. ch. xxxij. fueil. 98.

Côme les princes grecz executerēt leur desseī nocturne. xxxiiij. 101

Comme les princes Grecz entrerent en la cité, &c. ch. xxxiiii. 105.

Du merueilleux acte de Silercie, &c. chap. xxxv. fueil. 107.

Comme Amadis de Grece desconfit les Russiens. cha. xxxvi. f. 108.

De la solitude d'Amadis de Grece, &c. chap. xxxvij. fueil. 111.

Comme le damoisel Florarlan mena Amadis de Grece. xxxviij. 113

Côme Amadis esprouua l'auēture de la queste d'Armide. 39. f. 115.

Des propos que la princesse Armide tint à Amadis de Grece. xl. 116

De la grieue passion d'Anaxartes, &c. cha. xli. f. 119.

Comme les princes Florisel & Falanges furent iettez par tempeste
en l'Isle de Guindaye. chap. xli. fueil. 120.

Comme la Royne vint au lieu ou les cheualiers cōbaroyent les-
quelz se rendirent à elle. chap. xliij. fueil. 125.

Du grand

Du grand danger des deux Princes, &c. chap. xliiij. fueil. 126.
Côme vn herault se vint presenter deuât la roine Sidonie. xlv. 130
Comme Moraizel & Falanges combattirent, &c. chap. xlvi. f. 131.
De ce qui auint au prince Zahir avec vn cheualier incésé. 47. 134
Côme Zahir alla au chasteau ou étoit la déloiale fême. xlviii. 137
De ce qui auint au Duc de Molasie par mer en la conduite de
la belle Oriane. chap. lxi. fueil. 139.

Comme le prince Lucidor avec sa sœur la princesse Lucelle, se
mist sur mer pour aller en Constantinople, &c. chap. l. fueil. 141.

Comme la princesse Lucelle esprouua l'aventure de la queste d'Ar
mide. chap. li. f. 144. Comme Amadis de Grece arriua en vne Isle
ou il fut en tresgrand danger. chap. lii. fueil. 149. Des propos que la
pucelle Artimire tint à la princesse Oriane. ch. liii. f. 151. Comme la
princesse Lucelle, Arlade & la duchesse Armide furēt volees. liii. 154.

Comme les princes furent portez par tempeste en l'Isle de la Cou
che enchantee, &c. chap. lv. fueil. 158. Comme les Dames qui
estoyēt demeurees au riuage vindrent trouuer les cheualiers. lvi. 162

Des grandz merueilles de la salle de Mirabelle, & de Monstruo
furon. cha. lvij. fueil. 163.

Comme les princes arriuerent à Constantinople, &c. lviii. f. 165.

Comme le beau damoisel Florarlan entra en la grand'salle au pa
lais avec vne lettre qui troubla grandemet la court. chap. lix. f. 169.

Comme le Roy Amadis, le prince Falanges, la pucelle Alastraxe
ree, & Florisel de Niquee, ayans pris terre, allerent chacun à part cō
batre les gardes des quatres chaucees. chap. lx. fueil. 172.

Comme Alastraxeree deliura les trois princes prisonniers. lxi. 174.

Comme Florisel s'arma pour faire entrer dedans le chasteau le
Geant Brosdolfe, &c. chap. lxij. fueil. 179.

Comme le Roy de Thrace vint au chasteau du Lac. ch. lxiiij. 181.

Comme le Damoisel Florarlan porta à Constantinople les nou
uelles de la victoire des princes. chap. lxiiij. fueil. 183.

Comme les fiançailles & nopces des princes & princesses furent
faites en grande magnificence. chap. lxv. fueil. 184.

De l'aventure estrange des Damoysselles de la Roine Sydonie. Et
comme le Roy Amadis fut enleué & transporté par les sages.
chap. lxvi. fueil. 187.

Fin de la table.

DIXIESME LIVRE D'AMADIS
DE GAVLE AVQVEL, CONTINVANT
LES HAVLTZ FAITZ D'ARMES ET PROVESSES ADMI-
rables de dom Florisel de Niquee, & des invicibles Anaxartes
& la pucelle Alastraxeree sa sœur, est traité de la furieuse
guerre qui fut entre les Princes Gaulois & Grecz,
pour le recourement de la belle Helene
d'Apolonie. Et des aventures estran-
ges qui suruindrent durant ce
temps. Traduit nouvelle-
ment d'Hespagnol
en François.

*Comme les nouvelles de l'aventure du Tref & estrif (autrement dit la Tente & contentis),
vindrent à la nef des Princes Florisel de Niquee, & Falanges d'Astre : le quelz allerent à
l'espreuve couvertz & deguisez & de ce qui leur auint en chemin.*

CHAPITRE PREMIER



Vous auez peu entendre par le discours du liure precedant comme le vieil Chevalier de Chipre conduisoit par pais la Tente de cristal enchantee: en laquelle on voyoit vne pucelle de grand'beauté, assise en vne riche chaire, garnie de deux coronnes, l'une pour la Dame qui se presenteroit, accomplie en toute perfection de nature: l'autre pour le Chevalier qui de l'espee fermant la porte double, vaincroit les quatre freres tous semblables de forme, contendans entre eux de la preeminence de son amour. Or estoit lors celle

A

Tente

Tente arriuee au Royaume de Niquee, auquel la tempeste auoit ieté la nef seule, ou estoient les princes Florisel & Falanges, avec les Dames Alastraxeree, Helene, & Timbrie, ayant escarté en mer le reste des vaisseaux de leur suite, hors de la route qu'ilz tenoient vers Constantinople. Mais gueres ilz n'eurent seiourné en ce port quand ilz entendirent les nouuelles de la Tente charmee. Si delibererent ensemble d'en aller esprouuer le sort, toutesfois le plus couuertement qu'il leur seroit possible: c'est à sçauoir les deux princes & Alastraxeree armez de toutes pieces, & Helene & Timbrie ayans la face couuerte de crespines d'or, espees de force riche garniture. En cest acord descendirent incontinent en terre, commandans à Darinel (aussy desguisé) de donner ordre à leur équipage pour le iour ensuyuant auquel ilz monterent à cheual. Et si tost que ilz entrèrent en la campagne, la princesse Alastraxeree (qui moins n'estoit faconde que vaillante & belle) premiere leur entama ce propos ioyeux. Je sçauois volontiers, messieurs & mes Dames, quel présent vous voudriez faire, à fin que ie n'y fassé que de l'un de mes estatz en ceste entreprise, & que par ce moyen quelqu'un de vous gagnast partie de ce hault pris. Le Prince Falanges ne fut sourd à ceste demande, luy respondant. Ma dame, ie sçay bien que ce n'est à moy que ce langage s'adresse, qui n'ay rien de quoy entrer en partage avec celle qui a daigné receuoir mon tout. A ah (dist lors Timbrie en souriant) Cheualier est-ce la faueur que me requeriez & en ceste auenture, veu que la part de vous dont ie faisois estat, s'est ainsi allé rendre quand & son tout. Ma dame (respondit il) estant venu en vostre puissance desnüé de tout le mien, ie suis excusé du tort que m'imposez de reuoker le don que vous aurois fait. Helene qui auoit assez presté l'oreille à leur debat leur dist alors: N'entrez ie vous prie plus auant en ce discord: car ie croy que ne conquerrez plus grand part de cest hon-

neur, que celle que le prince Florisel & moy vous taillerons. Et si pour vous iouer tour d'amis, vous ottroyons liberalement le droit d'en commencer l'espreue. Ma dame (dist Florisel) ie ne vous oserois desauouer de parole que portez tant à mon auantage. Ce sera donc à vous de la maintenir par raison contre ces Dames, me laissant la charge de le mettre en effet en tēps & lieu. Non non (replique Alastraxeree) seigneur Florisel si ie n'estois en habit de Cheualier ie ne lairrais ainsi passer les parolles de vostre maistresse. Et d'autre part si ie n'estois femme aussi peu sousterois-je la brauerie de vostre responce pour ma beauté: parquoy ie suys deliberee de quitter les armes à Falanges, qui emportera sur vous gloire de prouesse, à fin de faire rendre à Helene celle de beauté entre mes mains. Lors Florisel a sa contenance vn peu courroucé luy dist: Quant à l'honneur de cheualerie, qu'aurez vous fait, le faisant liurer à celui à qui est deu l'hommage? mais au regard du pris des Dames, pas ainsi ne le consentiray, m'assurant qu'elle releuera autāt vostre honneur de son costé, qu'il aura esté foulé du mien. Darinel voyant la meslee entr'eux si forte, tout beau (dist il) messeigneurs, j'ay trouué vn expedient pour vous apointer. Siluie ma maistresse est là, qui par son excellence vous mettra hors d'un debat sans doute, & sa veüe mettra en mon cueur telle magnanimité, que si j'ay loy de prendre les armes, ie vous despescheray de l'autre. Puis la discretion de ma dame Timbrie acheuera la tierce part de l'auenture. Timbrie alors comme piqué de ce que soubz l'emmiellement de prudence, il la tiroit hors du rang des belles. Vraiment (dist elle ie croy que vostre maistresse y ruera grand coup. Vous n'avez pas veu (respond Darinel quelle elle est au pourtrait qu'en ay figuré en ma teste par mes contemplations, lequel rebat en moy du mirouer de mon esprit, & lance les rayons dont ie suis enflambé sans relasche. Ce propos esmeut grand risée entr'eux, & telz les

les continuèrent en toute gayeré, iusques à ce qu'ilz aprocherent de la fontaine des amours d'Anastarax: ayant le Soleil descouru la moitié de sa iournee. La ilz aperceurent vne grande troupe de Cheualiers & Dames qui montoient sur les cheuaulx & pallefrois: parquoy de peur d'estre cogneuz se destournoient du chemin si vne pucelle de ceste cōpagnie ne leur eust tranché en diligence, laquelle apres vn salut courtois leur dist, Seigneurs Cheualiers, si vous tournez à costé pour n'estre descouuertz, ie croy qu'icy vous conuiendra changer propos, & faire ce que ne voulez: car là y a vn Cheualier qui vous mède par moy, que seurement vous pouez aller rafraichir à la fontaine moyennant que n'en partiez sans congé prendre par vn eoup de lance qu'il vous veult dōner, pour faire congnoistre que ce n'est crainte ne lascheté qui vous tire hors des grans chemins. Damoysselle (respond Alastraxeree pour tous) le Cheualier qui vous enuoye vers nous est (à ce que ie voy) bien autant affamé de la iouste, que nous degoustez de luy faire sentir qui nous sommes: mais puis qu'ainsi va, dites luy qu'il trouuera icy les mains pleines, & de quoy remplir les yeux, qui luy voudroit faire grace de la veuë, ce que ie ne consentiray de peur de vous faire autant de tort qu'il n'en pourchasse. La pucelle retourne avec sa responce, & Alastraxeree la voyant esloignée, leur dist: Vous m'avez fait vn passedroit que ie n'ay oublié de commencer l'essay du Tref enchanté, duquel i'entens vser à ceste heure en l'estrif, si m'e laissez conuenir cōtre ce braue Cheualier. Ma Dame (dit alors Falanges) ie ne croy pas qu'il y ayt personne d'entre nous qui n'atende l'issue de ce combat, telle qu'on doit esperer de vostre tāt vertueuse qu'heureuse main, mais l'heur qu'il ne sentiroit moindre d'estre vaincu par vous que vainqueur d'autres, me rend ialoux & enuieux de son bien. Pource vous supplie ne faire cest honneur par voz mains à qu'il n'est pas deu, ains en laisser la charge aux miennes

obligees perpetuellement à vostre seruice. Monsieur (respondit Alastraxeree) ie prédz vostre courtoisie en bonne part, mais quāt à la gloire que ne voulez qu'il ne recoiue de moy en son desauantage mesme, n'en ayez mal à la teste, cest armet l'en priuera du tout en descourant ce qui demeure reserué à celuy qui seul l'a peu meriter en ce monde. Sur ce deuis sortit d'aupres la fontaine vn Cheualier de fort belle taille, la lance au poing, grosse, au fer trespuisant, qui sembloit venir bien entalenté de la iouste. Si tost qu'Alastraxeree le voit, prend la sienne & va vers luy au pas de son cheual, & quand ilz furent assez pres, l'autre luy dist: Cheualier (cuidant parler à homme) vostre responce à tellemēt rechargé ma demande que ie viens au hazard des armes, en espoir de celuy de la veuë qu'avez mis en auant. Nous en sommes (dist la Princesse) venuz à l'experience, si en voyons l'effet. A ce mot se reculerent puis reuindrent les lances baissées, couuertz de leurs escuz se rencontrer de toute la puissance de cheuaulx, si vnement que les lances volees en esclat, ilz s'entreheurtenant & versent par terre eux & leurs maistres: dont Alastraxeree se releue legierement pleine de mal talent pour le meschef, qui onques ne luy estoit auenu, & l'espee nuë à la main marche contre son aduersaire qui ia estoit debout, aussi honteux qu'elle de son infortune.

Lors commencerent entr'eux vn si cruel & perilleux combat qu'en peu d'heure ilz dehacherent leurs harnois en maintes pieces, & les taignirent de leur pur sang, dont resterent trop espouuentez, tant eux de la vertu l'un de l'autre que tous ceux qui les regardoient spécialement dom Falanges à qui tel ieu ne plaistoit guerres. La Princesse fort indigné de se voir en cest estat, sentoit vn grief creue-cueur de la longueur du conflit, qu'illes cōtraignit à la fin de se departir pour prendre haleine, & bien affermoient les regards que c'estoit la plus estrange, & furieuse

charge que iamais ilz eussent veüe de deux champions, lesquelz ayans l'œil l'un sur l'autre. Alastraxee se print à dire à part elle. O Mars dieu belliqueux! à q. peut auoir esté prestee ta force nompareille, pour estre ainsi employee contre ta propre fille? dea si c'est toy mon pere que ie tiens icy deuant moy, ie te supplie ne me tenir plus longuement ta diuinité couuerte, non que frayeur aucune du danger present me tene le cuer (que la mort mesme ne scauroit estonner) mais pour ne perseuerer en ceste offence contre toy & reseruer l'effort de mes bras à execution plus iuste. contre les tyrans & monstres de la terre, sans le rompre contre toy, & briser par vaine violence comme le fer sur l'enclume. Le Cheualier ne faisoit moindres exclamations de son costé leur estant bien auis, & à ceux qui les veoient qu'impossible seroit que leur combat print autre fin que celle de leurs vies, neantmoins ilz recommencerent leur escrime trop plus furieuse qu'au parauant, voire de tel aspreté & vitesse, qu'eussiez iugé du iour n'auoir rué vn seul coup, & comme ilz alloient renforçant le chamilis de plus en plus, voycy arriuer en ce lieu grand' compagnie de Cheualiers & Dames, dont les chefs estoient les princes Amadis de Grece, & Anastarax, avec le preux Birmartes, & la princesse Niquee, & Silnie, avec la grand' royne Zahara, & la belle Onolorie, lesquelles auoient tiré ces seigneurs hors du chasteau de l'enfer d'Anastarax, pour aller voir l'auenture du tref & estrif, & desia auoient seiourné enuiron huit iours en ceste contree, l'ayant trouuee fort plaisante & delicieuse. Arrivez donc ceste part furent grandement esmerueillez de l'estrange rigueur du combat, & s'enquierent d'aucunes de la troupe qui estoient les Cheualiers du conflict, desquelz toute l'assemblée estoit si esmeue en desirs & regretz. Ceux à qui ilz s'adresserent ne les cognoissans, s'estonnerent tant de la grande representation des seigneurs, que de la singuliere beauté des Dames, & leur

respondirent que les deux combatans leur estoient incogneuz : mais l'ocasion du combat ilz leur deschiftrerent en briefz motz : d'autre costé les Cheualiers & Dames desguisees demâderent au prince Florisel qui estoient les soruenans, lequel leur en rendit bon conte, dont il mit Helene en grand trouble d'esprit meslé de pareille ioye pour la presence de ses parens : mais elle entra en grande amiration de la Princesse Niquee, qu'il luy sembla que nature eust formee pour vn chef d'œuvre de perfection extreme. Estant donc ainsi spectateur de ce camp si cruel, ne voyant aucun moyen pour les departir, & Alastraxee irritée de honte nouvelle à cause des soruenans, decharge vn si pesant coup sur la cresse de l'armet de son ennemy, qu'elle luy fit poser vne main en terre : mais il se redressa aussi tost & en rendit à la Princesse le change d'vn autre en pareil endroit, tel que sans la bonne trempe de son heaume, il luy eust pourfendu la teste, & de la rudesse merueilleuse du coup l'espée rompit, le heaume se descloua & tomba, elle mesme ploye vn genoil iusques en terre. Incontinent q. les Princes assistens luy virent le chef descouuert estimerent que c'estoit dom Florisel, dont se iettent à pied à grand haste, trop indignez de le voir ainsi atourné, & Niquee sur tous. Mais le Cheualier à q. elle auoit affaire la recognoissant beaucoup mieux fut saisi au cuer de grand aise, nonobstant le dueil qu'il portoit de l'auoir insciément si mal traitée, & courut à elle pour l'embrasser amyablement : mais elle qui le iugea venir aux prinsees pour la perte de ses armes, luy tira vn coup sur l'espaule dextre fort dangereux, si luy qui y prenoit garde ne l'eust fait glisser en gaucheaut : puis auant que luy donner loysir de redoubler, luy ieta les bras au col, escriât : O ma Dame & sœur germaine quel desastre m'a guidé par voye si inhumaine à vostre tant desirée rencontres qu'il nous ayt salu achepter ceste veüe au pris de nostre sang & esprouuer entre nous noz forces tât

experi-

experimentees contre les autres? O Dieux! ie vous rends graces, que d'un si rude coup de mon espee auez donné tel secours à nos vies. Alastraxeree qui l'auoit aussi lié de ses bras, & s'efforçoit de l'abatre à tour de lutte, quand elle entendit ce langage, mit la main à son armet qu'elle lui deslace. Lors recogneut le vaillant Anaxartes son frere, qui estoit le comble de tous ces desirs, lequel (comme auez entendu par l'auant cours de l'histoire) depuis qu'il partit d'auueq la Princesse Oriane, auoit passé par maintes fortunes dures & estranges, iusques au iour de ceste rencontre, & s'en alloient en habit couuert à la cité de Niquee le roi Artises, la pucelle Artimire, & lui, en intention de tenter le sort de la tente. Ainsi voïât venir les autres Seigneurs & Dames deguisees, les auoyent par gayeté semonds de la iouste, ne pensant que le ieu deust tourner en si fascheux termes, iusques à estre dechiquitez de tant de playes, vray est qu'elles estoient petites, à cause de la bonté de leurs harnois. Quant doncques la Princesse le cogneut pleurant de ioye, lui dist: A mon Seigneur & frere tres-cher ie vous supplie me pardonner ceste offence, dont ay souffert quant & quant bonne punition. Je ne vous scaurois exprimer suffisamment la milliesme part de l'aïse que ceste recognoissance apporta à la compagnie, & principalement à la Royne leur mere, laquelle hors de soy d'abondance de plaisir, les va accoler la larme aussi à l'œil, & ilz luy baïssent les mains, tous ravis de ioye. Vous pouuez imaginer quel contentement luy pouuoit estre deuoir sa fille, qu'auant ce iour elle n'auoit iamais veüe, & l'auoir en telle perfection, tant de beauté que de prouesse. Dieux immortels! dist elle, que de faueur ie sens maintenant que m'auez presté, m'eslisant à produire sur terre ce double paragon de toute grace & vertu humaine. Les autres Seigneurs & Dames là presens, les vindrent caresser, & arraisonner de tant de propos que ma plume ne pourroit fournir à les desdire. Bien

vous dy, que le Prince dom Falanges ne fust le plus mal parti de gloire & de liesse, & se fust volontiers donné à cognoistre à la Royne Zahara, & au Seigneur Anaxartes, sans le respect qu'il eust de ne descourir leur faict. Mais dom Florin, & les Dames estoient en grand doute, craignans que Alastraxeree (transportee de ioye) s'oubliait tant, qu'elle declarast qu'ilz estoient, laquelle (comme bien auisee) quand on le lui demanda, respondit qu'elle ne les cognoissoit, & les auoit rencontrez assez pres de là, allans (à ce qu'ilz disoyent) à l'essay du Tref & estrif, & se tenans tousiours couuertz, estoient arriuez ensemble en ce lieu: parquoy se deporterent de s'en enquerir plus auant. Mais le Roy Artises & la pucelle Artimire venans en cognoissance, furent plus que bien recueillis, si apliquerent quelque leger apareil aux playes des deux champions, & prindrent le chemin de la ville, ou ilz furent receuz, & traitez en grand magnificence, mesmement la Princesse Alastraxeree, qui de sa grace naïfue atrayoit sus elle les yeux de grandz & petits. Ce iour, en consideration des naurez on fit surceoir l'espreuue de la tente. Et peu apres que les chirurgiens furent sortis de leur chambre, tous les Princes & grands Seigneurs les allerent visiter. Lors Alastraxeree (apres auoir tenu long temps son regard fiché sur le Roy Amadis) adressa à lui sa parole. Roy sans per, le bruit de tes vertuz incroyables, me contraignent à desgorger en ceste compagnie la conception que j'ay de ta grandeur laquelle a monstre sa prouesse, à dompter les plus fiers, sa clemence, à soulager les vaincuz, sa iustice, enuers ses subietz, sa courtoisie, à l'endroit des Dames. Dequoy j'ay icy tant de tesmoings, que ie suis excusee de plus ample recit. Au moins rendray ie grace aux Dieux, d'auoir tant fauorise nostre siecle, que de l'aorner d'un tel Soleil, des rayons duquel sort la lumiere & splendeur de la Cheualerie. Le Roy receut grand plaisir de sa harangue, laquelle il

paya sur le champ, en pareille monnoye, disant : Ma dame, les vertuz que m'attribuez ie cōfesserois hardimēt n'estre pas en moy, si ie ne les cognoissoye vostres : parquoy voulant vser de largesse enuers moy, me les pouuez donner, comme chose dont la propriété vous est acquise. Et ne craindray d'offencer les aureilles de ceste assistance, vous blasonnant la fleur des Dames, & le miroir des Cheualiers : veu que de plus que vous eux & elles ne se vouldroient vāter : mais vous portez le chapeau tyllu de toutes leurs fleurertes, ayans en vous les graces & vertus des vns & des autres ensemble : lesquelles ont forcé ma volonté de m'abandonner pour se rendre vostre à fin que l'employez mieux vous mesmes en vostre seruice, que ie ne sçauois estant demeuré mien. Sur ce propos, entrerent en la chambre la Roynes d'Argenes & Alquif, avec Vrgande. Adonc Alastraxeree s'auisa de faire apeller le maistre d'hostel, qu'elle pria en secret de loger honorablement les Seigneurs & Dames venuz en sa compagnie, combien qu'ilz ne fussent de sa cognoissance. Ce qui fut fait & ainsi passerent la iournee les vns avec les autres, en toute liesse & resiouissance. Les deux bleffez garderent le liēt, iusques au cinquiesme iour qu'ilz se leuerent : dont fut arrestee au lendemain l'experience de la tente. Or ceux qui la longueur du delay ennuyoit le plus, estoient Florisel & Timbrie qui sur la crainte qu'ilz auoient d'estre cogneuz, s'entrecontoient maintes sornettes : mesmement Darinel qui en estoit le maistre luy disoit : Monseigneur vous ne considerez point le deuoir que ie fais de peur que soyez descouuertz par moy, qui voy ma dame Siluie presente, & la laisse sans parler à elle. Comment est il possible (dist Timbrie) ce que tu dis Darinel, que tu la laisses, veu que vous chantez tous des iours.

*Jamais ie ne m'eslongne d'elle.
Et voy tousiours hors de moy,
Pour estre en elle à requoy.*

Ma Dame (respond Darinel) biē le puis dire sans m'entretailier, selon le priuilege d'Amour, qui nous maintient entre peine & liesse, auant la iouissance : car ie porte iour & nuit l'ymage de m'amyē que i'ay forgee en mon cerueau, laquelle paist mō ame de force menuēs pensees : mais aprochāt de sa presēce (d'ou est ne ce fantosme) ie sens vn autre plaisir plus certain, duquel le fruit se perd en son absence, autrement de la laisser, mon cueur ne se consentiroit iamais ausi qu'il me faudroit emprunter la beaurē de monseigneur Falanges, pour causer telle enuie de ma personne que ie fusse souuent receu au change. De ce Timbrie se print à rire, disant : Il perd bien Darinel que sçauēz les muances du Seigneur Falanges, puis qu'en osez faire telle comparaison. Ma dame (respondit Falanges) ie vous assure que mon cueur ne fut iamais variable ne vagabond hors du lieu ou il se deuoit arrester. Je ne sçay qu'il en est, dist elle, mais ie iuge Darinel l'ynique, vray & loyal amant qui iamais n'a esté au change. L'en appelle, dit Florisel, & croy que ma Dame ne me souffrira ainsi exclurre hors du nombre des feaulx amans ayant tousiours possedē la seigneurie entiere de mon cueur. Je m'en raporte (replique Timbrie à Alastraxeree) de ce qui passa entre vous & Siluie, & ausi avec Arlande, parvoz importunitez enuers l'vne, & par la ruzē mesme de l'autre. Je luy ay tout pardonné, dist Helene, par ce qu'en vertu de la foy qu'il m'a vouēe, il a resistē à leurs assaultz, & renoncē leur alliance. Laissons ces belles raisons, dist Timbrie, & vous assurez, quiconques a vne fois franchy le sault il est bien aysē à y auoyer. Quant à moy, respond Florisel, ie croy que ma dame se tient certaine de ma volonté immuable, sçachant que ie ne pourrois trouuer obiet suffisant à me diuertir du sien. Nous entrerions, dit Darinel, en plus grande contention, que celle que nous auons demain à esprouuer, si vous ne vouliez auouer la verité du fait,

fait, & me laisser frâc le pris de loyauté, qui m'a esté adiugé. Quelles armes prendras-tu Darinel, dist Timbrie, pour soutenir ceste querelle? ma cornemuse, respond, & mes châsons, q̄ ie ferai hault resôner en ce camp contre les de loyaux. A l'heure la faist. Et vous l'aurez, dist il, toute fresche tiree du moule de mes rymes. Si commen ça à sonner & châter ensemble avec saultz & gambades, la chançon qui s'ensuit.

CHANSON DE DARINEL.

*Dieu fit l'homme au commencement,
Tout rond, auient qu'il se rebelle.
Dont le Seigneur pour son tourment,
(Sans tout deffaire l'œuvre belle)
En deux pieces net il le fend:
L'un est m'asle & l'autre femelle.*

*A se reioindre elles desirent,
Pour reuenir encor'en vn,
Faisant de deux vn corps commun,
Toutes à l'union aspirent,
En cherchant leur propre moytié,
Ou gist le vray fruit d'amytié.*

*Hommes & femmes se pourmeinent,
Et apres eux leur lien trainent,
Tant qu'un demy trouuant le sien,
Iouyssant du souverain bien.*

De ceste ioyeuse chançon n'y eut celuy d'eux qui ne s'eclatast de rire. Et dit Timbrie que par ceste sentence bien & meurement discutee, nul ne se pouuoit sentir greué. Si est ce, dist Falanges, que i'ay dres sé ma pensee à l'exemple de l'escueil de mer, qui les vents & les vndes batent: mais tousiours demeure ferme & constant. Puis qu'auiez descouuert mon pot aux roses, dist Florisel, & que Venus à laillé reueler mes larrecins, ie prendray pour ma deuise. *Le Roseau qui ploye assez, & ne rompt point.* Ie vous iure, conclud Timbrie, tous bons

& francs amoureux, & que deuez faire pais ensemble, pour mieux penser de fournir à la guerre que chacun à pour soy. En tel plaisir de menuz propos ces Seigneurs passerent le temps avec leurs Dames, attendâs le lendemain, que l'esprouue de l'auenture se deuoit commencer.

Comme l'auenture du Tref & estrif, des quatre freres fut acheuee.

CHAP. I-I.

VEnu le iour ordonné, auquel l'esprouue de la tente deuoit estre mise en effect, elle fust assise au milieu d'une grand' salle tapissée de haulte lice, & au dessus tant en la voute qu'au rabat, ornee de peinture exquise, ou les Princes se rendirent à l'issuë du festin en telle pompe, & magnificence que leur grandeur requeroit. Et peu apres y vindrent les Dames, & l'épèriere Abra la premiere, vestuë de surcot de drap d'or frizé, corset & manteau imperial, duquel portoyent la queue trois pucelles vestuës à la legere en guise de Nimphes, & sur son chef portoit vne coronne close, garnie de pierrerie de valeur inestimable. La belle Niquee la suiuit tenant Siluie par la main, ayant vne robe de veloux cramoyssi, enrichie de diuers fueillages & compartimens de broderie. Et sur sa cheueleure nuë, portoit vn cercle d'or bien assorti de Rubis & Emeraudes. Siluie auoit accoustrement de satin blanc fort plantureux, decoupé & raporté à gros boutons & fers d'or, & sur sa teste vne sumptueuse toque à l'Egiphtienne. La Roïne Oriane entra paree d'un veloux de haute couleur taillé en figures de Lyons sur sa doubleure de toille d'argent. La Princesse Oriane, & toutes les autres grâdes dames vindrent en parure riche & diuersë, decorees de maintz ioyaux & affiquetz. Mais la Roïne Zahara marchoit accompagnée de vingt Damoysselles (sans les deux qui portoyent le mirouër acoustumé deuant elle)

& sur tout auoit en sa carrure vn carcan de dyamans orientaux, au bout duquel pendoit vne enseigne du dieu Mars. Et menoit par la main la gentile Royne Gradaflee. La Princeſſe Alaſtraxeree, ſe ſentant bien guerrie n'y voulut pas failir, reſueillād à ſon arriuee les yeux de toute l'aſſiſtance, & les retenant ſus elle longuemēt raius d'admiration de ſa grace & beauré nōmpareille, fort auantagée encores par l'artifice ingenieux de ſon accouſtument. Elle entra en la ſalle avec vn port hautain, adouci neātmoins d'vn regard amoureux: Pour autour de cheſſes blonds cheueux eſtoient treſſez de laz d'or, ſemez de pierre-rie, dont luy batoit ſur le fronc vne Carboncle de merueilleux eſclat, taillé en eſtoille (pour ſignifiſſance du planete dont reclamoit ſa naiſſance) & deſſus portoit le bonnet garny d'vn cercle d'or & d'vne plūmē blanche. Sur ſa gorge polie vn riche colier, dont la ſingularité de l'ouurage paſſoit les pris des eſtoffes: Sa robe eſtoit de drap d'or ſur champ d'argent, & cueillie en Amazone, & les decoupures attachees de boutons & guipures d'or, tout autour de la robe vn bord large de frisons à ſes deuifes comme fleches, eſpees, dagues & autres pieces de trophée, & par deſſus portoit vn chamarré de toille d'or veloutée de verd, reietté en eſcharpe. Quand Niquee l'eut aſſez remiree de pied en cap, luy renouuella par ſa ſemblance la memoire de ſa Nereide, tellement que pleurant de ioye, l'alla embraffer, diſant: O ma chere Nereide, c'eſt vous meſme ſans autre, que ie tiens preſentement entre mes bras. Lors ſe tournant vers ſon pere, qui moins ne la contemploit que les autres. Mon Seigneur, diſt elle, ores que vous tenez Nereide de rechef en voſtre poſſeſſion, anifez vn peu de mieux prendre garde. Le Soudan lui reſpond en riant: Ma fille, ie croy qu'elle la prend telle de ſoy, que qui y voudroit aiouſter de plus, il ne perdrait que ſa peine. Alors elle ſ'atache à ſon mary, diſant: Monsieur, confeſſez verité, duquel

vous ſentez vous en plus grand danger, ou du combat que vous euſtes contre Amadis de Grece, ou de celui que vous auez maintenant avec Nereide? Ma Dame, reſpondit il, ie ne trouuerois aſſurance de gloire moindre à eſtre vaincu en ceſte guerre, que d'auoir eſté vainqueur en celle, ou voſtre faueur à plus grand' peur que moy. Mais ie vous ferois volontiers vne demande à mōtour, de qui la peur vous eſt plus grāde, ou des deux Nereides que voiez à ceſte heure ou des deux Amadis de Grece que vous viſtes vn iour enſemble? Niquee ſe prent à rire, toutesſois ne ſceut tant diſſimuler l'atante de ce petit eſguillō de ialouſie, qu'elle fut embellie de la pouuelle couleur qui lui en monta au viſage. Beaucoup de petits brocards facecieux ſ'enretreiettoyēt ſur ce propos, quād les Princes incogneuz entrerent en la ſalle, menās leurs Dames ſous les bras, qui par taille & auenance de leurs perſonnes iointe à leur geſte & maintien Seigneurial, cauſerēt vn merueilleux deſir aux aſſiſtans de les cognoiſtre, dont pluſieurs ſ'adreſſerent à la Princeſſe Alaſtraxeree pour le ſçauoir qui leur en rendit toute telle reſponce qu'elle auoit fait aux autres le iour de ſon combat. Toſt apres eux vint le fort Anaxartes non armé, que lon fit ſeoir entre l'Empereur Eſplandian & le Roy Amadis. Adonc marcherent en place pluſieurs Cheualiers pour tenter l'auenture, iuſques au nombre d'environ quarante, qui tous y laiſſerent leurs eſpees fichees en la tente, & les eſcuz pendans avec leur nom (ſuiuāt la loy de l'eſpreuue) les vns plus hault, les autres plus bas, ſelō le degré de la prouēſſe qu'ils auoyēt mōitree. A ceſte cauſe les armes du Prince Briant frere d'Helene, ſe voyant au plus pres du ſommet du pauiſſon, n'eſtans ſurmōtees que d'vnes ſeules, c'eſt à ſçauoir de Zahit, lequel au temps qu'il partit de Constantinople avec les autres Princes, rencontra la tente au royaume de Hongrie, de laquelle il emporta l'hōneur par deſſus tous cōbien qu'il ne dōnaſt fin à l'auenture. Or apres q̄ les Cheualiers qui là eſtoient eurent fait

fait leur effort en vain: le prince Anastarax survint tout armé d'un harnois richement doré & gravé subilemēt: lequel venant empoigner l'espee qui fermoit la porte double, la tira aisēmēt, & elle s'ouvrit, si ētra dedans, & soudain la Damoyelle se leua, luy faisant vne grand' reuerence, & luy à elle. Adonc les quatre freres cessans leur meslee se ruerent ensemble sur luy, qui les soustint longuement, par telle vaillance & adresse que le pere des Cheualiers enchantez dist, qu'il n'auoit encores veu son pareil à l'espreuue. Aussi passa il par vne force malgré les freres, & ieta les bras sur la Damoyelle charmee, pensant la tirer hors de la tente: mais il ne luy fut possible la mouuoir ne tant ne quant, & en s'y efforçant fut chargé par tous quatre de tant de coups & horions qu'à la fin tout elourdy il tomba par terre, & incontinent fut pouillé dehors, & son espee avec l'escu s'alla ficher en la tente au dessus de tous les autres. Et l'enchantee se remit (comme deuant) en son propre lieu. Dequoy Siluie sentit autant de douleur de son cueur, qu'il n'auoit mis l'auenture à fin, que Florisel en eut de ioye, esperant bien en l'acheuant, acheuer de faire entendre à Siluie, de combien sa vertu estoit plus grande que sa fortune, au regard de luy & d'elle. Et pource qu'il vid qu'Amadis de Grece s'en alloit armer tant pour l'ennuy que il conceut de l'accident d'Anastarax, que pour l'opinion qu'il auoit que l'honneur de ceste victoire ne fust destiné qu'à luy. A ceste cause craignant si son pere le deuançoit qu'il n'y mist la dernière main, dist en voix baillie à Helene: Ma Dame ie supplie vostre seigneurie me donner congé & faueur, pour non seulement essayer ceste auenture, ains l'acōplir du tout: car y allant appuyé & porté de la grace de Dame tāt accomplie, cest honneur ne me peult faillir, ia sache qu'il peult estre denié à ma valeur, comme desia à tant & telz Cheualiers. Mon seigneur & vray amy, respond elle, s'il ne tient qu'à ma faueur, vous sçavez bien que

pouuez aller seurement comme celuy qui me tenant toute sienne, ne peult auoir faute de rien qui soit en moy. A ce propos il luy voulut baiser les mains, puis vint dire à Timbrie Ma Dame, ie requier vostre benediction s'il vous plaist, pour acheuer ceste iournee. Allez allez, dist elle en riant, demander celle de vostre pere & mere icy presens: car c'est mō estat, ven la maison dont ie suis, donner faueur pour les armes, non pas benedictions comme vn euesque. Vous dites bien vray ma Dame, respond il, mais le bien estroit d'amitié entre vous & ma Dame Helene, & la part aussi que i'en touche, me donne quelque loy de cognoistre voz qualitez plus inestimables en vn endroit, & de tenir avecq' vous autre langage que ma liberte ne requerroit. Elle souzriant de ce propos, luy fit responce. Laissons ces belles raisons: car encores que l'esperance des effectz soit excluse d'entre-vous & moy, l'honnesteté des faueurs, selon le lieu que ie tien seroit bien permise, telle que ie l'otroye à ce gentil Cheualier, monstrant Falanges, pour l'obligation seule de l'honneste seruitude qu'il me porte: par laquelle il achenera l'essay à quoy vous aurez failly, le vous laissant à entreprendre premier, à fin que vostre comparaison luy serue de plus grand lustre. Ainsi chastié Florisel, se va presenter à l'auenture, au grand desplaisir de Falanges, qui fort desiroit gaigner le deuant, & non moins que luy, pour luy, Alastraxee, qui suyuant le motif de son affection, luy pouuoit bien souhaiter cest honneur plus qu'à autre, à qui en sa pensee elle offroit liberalement la victoire sur elle mesme. Florisel dōc avec vne humble reuerence aux Princes, passa armé d'un harnois blanc, poly & gravé delicatement, & surgeté d'or en la graueure, les laissant fort satisfaits de sa grace & contenance. Et venu à la porte arracha l'espee & l'ouvrit, puis entre dedans, ou la pucelle le saluē trescourtoisement, & luy elle: mais elle ne se remit en sa chaire comme de coustume

ains demeura debout, dequoy la compagnie commença à s'esmerveiller, ne luy aiant encores veu faire ce tour. Ce fait les quatre freres rompans leur combat luy coururent sus, & commencent vne meslee avecq' luy, la plus braue & terrible que iamis eust esté veüe pour tel nombre, lequel sembloit à ceux qui l'oyoient, veu l'horrible tintamarre de leur coups druz & durs estre de vingt Cheualiers. Eux estans en tel estat, Amadis de Grece & Bimartes entrerent en la sale armez de toutes pieces: la venue desquelz enfla tellement le cuer à Florisel, qu'il descharge vn coup sur l'vn des freres si vehement, que sans aucun sens il le couche tout plat, & du bond de la cheute, son heaume luy vole hors de la teste: mais assez tost il se releua, & s'alla agenouiller deuant la Damoysele enchantee. Les trois autres maintindrent long tēps leur bataille: toutesfois à chef de piece l'vn deux fut aussi renuersé, qui s'alla ranger en pareil deuoir que le premier. Sur ces entrefaites, la Royne Mabile se print à dire: En bonne foy ie croy que ce Cheualiers mescogneu sera à la fin fort cogneu. Autant m'en semble, dist Alastraxee combien qu'elle en fust trop mal contente en son cuer, à cause de son amy à qui elle eust mieux aymé ceste gloire. Ce pendant les deux freres qui restoient se vindrēt atracher aux prinſes avec Florisel, employāt tous leur pouuoir à le ietter dehors: mais au contraire, il recueillit tellement toutes ses forces à ce coup, que les leurs ne purent tant resister qu'il ne les prosternast en terre. A l'instant de leur cheute, la tente pleine par dedans de fumee aussi espeelee que quand on escure par le feu vne coupe de cristal tournee contre bas, au dessus de l'eau bouillante en sorte que rien ne se voyoit plus de ce qui estoit en la tente. Bien on oyoit vne melodie d'infinitz instrumens, la plus douce & delectable qu'onques eut receüe aurreille d'homme: laquelle cessant, la tente fut toute ceinte d'vne flamme, comme d'vn esclair de tonnerre.

Et apres (elle esuanouyē & perduē en l'air) le cristal demeura plus clair & pur que iamais, & lors on vid dedans Florisel sur ses piedz, & l'espee en la main, & les quatre freres à genoux deuant la pucelle, qui se tint tousiours debout, iusques à ce que dom Florisel se presentant à elle, receut sur sa teste la coronne qu' elle auoit entre ses mains. Adonc sortit de la tente ainsi corōné & armé, & saisit le fourreau de l'espee qui estoit de layet, autrement dit Rocaille, garnie d'or, & semee de force pierres precieuses. En ceste gloire retourne vers sa Dame, qui y sentoit bonne part, laissant toute l'assistance assez troublee d'enuie mesmement les deux Princes qui se venoient d'armer, fort couroucez en leurs courages. Or vint vers luy le pere des quatre freres qui se mit à genoux pour luy baiser les mains (ce qu'il ne voulut souffrir) dont se leue, & s'en va au parquet des Rois, qui estoient eleuē de trois degrez sur le plan de la sale, leurrequerant puis que l'essay des Cheualiers estoit acheuē, au grand honneur de leur court, qu'ilz permissent pareillement l'ouuerture de l'espreuue des Dames, ce qu'ilz acorderent sans difficultē, & eussiez veu incontinent Damoyseles en place, entrans en la tente, & sortans à la file: au moie de deux des freres qui ne faisoiet que se leuer à leur venue, & les prenans par les bras les remettre dehors iusques à ce qu'Helene l'vnique des belles, voyant qu'il ne restoit pucelle en la troupe qui ne s'y fust essayee, fors que la Royne Gradaflee, & la Princeſſe Alastraxee, par ce que les mariees ny estoient receuēs, dist à sa cousine: M'amye voulez-vous esprouer l'auenture? Non non, dist elle, ie n'y voy pas heurter ma teste contre vous, puyſ que le second Paris vous à desia adingē le pris de beaultē. Allez y vous: car l'heure de mon auenture n'est pas encores venue, ce dist elle: Helene avec vne honte virginale (dom Florisel la tenant par la main) marcha auant, & saluē au passer les Seigneurs, d'vne grace merueilleuse. Surquoy Alastraxee

ree assied à l'heure son iugement, que l'a-
uenture s'en alloit finir, & qu'il ne falloit
plus attendre. Or quand ilz furent à la por-
te du pauillon, dom Florisel la laisse, & el-
le entree. A son arriuee les quatre freres se
leuant en piedz à costé, & la Damoyfelle
enchantee va vn pas au deuant d'elle, la re-
ceuant avec vne reuerence fort basse, à qui
Helene rendit la pareille. Et les freres qui
s'estoient partiz d'un costé & d'autre à la
rencontre d'elles s'humilierent iusques en
terre. Lors la pucelle print la couronne que
elle portoit sur son chef, & la pose sur ce-
luy d'Helene, ou elle la tint longuement
sans retirer ses mains, au grand contente-
ment de dom Florisel, pensant voir la fin
de l'aenture, & pareil despit des Dames
qui estoient demeurees derriere. Mais ap-
pres que la Damoyfelle l'eut assez tenuë
sur la teste d'Helene, luy dist: Ma dame
si vous n'auiez perdu la premiere fleur de
vostre chapeau, ie vous presenterois l'hon-
neur de ceste couronne, pourtant conten-
tez-vous de l'auantage qu'emportez de la
beauté. Adonc remit la couronne sur sa
teste. Helene demeurant fort honteuse de
ses parolles: Si la print gracieusement par
la main, & la meine iusques à la porte du
Tref, ou apres vne grande reuerence, elle
la laisse, & retourne en sa chaire: Helene
aussi regaigne sa compagnie, fort fachee
du propos que chacun auoit entendu qui
luy auoit destourné le pris: combien que
lon ne sceust pas comme, ne par qui, hors
mis ceux qui auoient conduit & manié
l'affaire. Alors la royne Gradaflee passa
pour essayer l'aenture, conduite par l'Em-
pereur Lisuart, qui la lascia à la porte, & elle
entrant dedans, receut toute telle cerimo-
nie qu'Helene, & aprocha de la Damoy-
felle qui luy dist: Royne tresillustre, par
vous & par celle qui est tâtost sortie d'icy,
mon sort pouuoit prendre fin, si vons deux
estiez reduites en vne, or vous retirez a-
uec telle gloire de chasteté, qu'elle à em-
portee de beauté. Ainsi la print par la
main, & la mena dehors comme He-

lene: dequoy l'assemblée eust esté fort
esbahie (veu l'excellence qu'ilz trouuoient
en la royne) s'ilz n'eussent mieux consi-
deré la perfection extreme de la pucelle
charmee à l'heure qu'elle se monstra pour
la seconde fois à la porte de son pauillon.
Elle retiree en son siege, Alastraxeree luy
dist: Ma chere Dame quelle gloire puis-je
hormais esperer de la couronne egalle à cel-
le que vous avez gagné, ie pers le cueur
de plus rien y pretendre, puy qu'avez
conquis le loz principal que toutes Da-
moyfelles doyuent desirer. Ma Dame, dist
elle, trop plus en aquerra, quiconque en
emportera la double louange: pourtant
allez hardiment comme celle qui merite
seule toute la reputation du monde. Lors
le Roy Amadis la print par la main, elle
se leue, & toutes les Roynes la suyuent
iusques à la tente, espouuentees de la voir
si acomplie de toutes mesures, couleurs,
traitz, & lineamens, mesmement de sa haul-
te taille & corpulence: car elle passoit tou-
tes les autres qui estoient en la sale quasi
de toute la teste. Or quand elle se vit à la
porte du Tref tourna vers le Roy disant:
Si ce reste de fort se deuoit acomplir par
armes, i'auoys grâde confiance en la faueur
que me prestez pour y mettre fin, procé-
dent de celuy à qui tout le monde d'un
consentement en desere l'honneur: car si
peu d'opinion qu'on a de mes armes, i'y
renonce en vostre presence d'autant qu'el-
le disparoissent comme vne tenue nuë,
deuant le Soleil: mais puy qu'il est que-
stion de la preeminence de beauté, i'y
vois esprouuer la mienne, souz la faueur
aussi de celle de la Royne Oriane. Ce dit,
Amadis l'habandonne, & elle entre dedans
la tente, dont la Damoyfelle se leue, &
les quatre freres diuisez deça & delà, à son
arriuee ployent les genoux iusques en ter-
re, autant en fait à l'aprocher la Damoyfelle
enchantee (mais la Princesse bien peu s'hu-
milia) & l'autre ostant la couronne de des-
sus sa teste l'assied sur celle d'Alastraxeree.
Et soudain se leua vn son harmonieux de
musi.

musique, voire si grand bruit, que les escoutans demeurèrent quasi ravis en extase. Ainsi se sort Alastraxeree glorieuse de sa victoire. Et tous ilz la reçoivent à grand ioye, fors (comme pouez douter) Falanges seul qui ne sentoit moindre contentement de sa gloire qu'elle mesme. A l'heure le pere des quatre Cheualiers enchantez luy vint de grand ayse bayser les mains supliant que le dernier point fut expérimenté pour auerir, lequel des quatre auroit la pucelle à femme, qu'il eseroit (veu ce qui estoit passé) trouuer en ce lieu la fin heureuse de son long traual. Ce que les Princes acorderent. Incontinent y allerent plusieurs dames & damoyelles, dont pas vne ne sceut que dire aux quatre freres, & desia la plus part des principales y auoient esté, quand Florisel dit à Timbrie: Ma dame il est temps que le loz de vostre sagesse sorte en lumiere & cognoissance de tout le monde. Elle se leue à l'instant & luy respond: Icy verray-je si ie viz aussi abusée du sçauoir que de la beauté du pris de laquelle ie n'eusse voulu quiter ma part, s'il fut escheu en mon rang non plus que de ce residu. Or fut elle conduite par Falanges & à son entree receut bien grand honneur, tant de la Damoyelle, que des freres. Apres commença à leur dire. Que le puisné de vous quatre se presente, ce qu'il fit, & elle luy dit. As tu premier requis d'amour la pucelle? Ouy, dit il, elle demanda en quelz termes il luy auoit fait la harange. Qu'il luy pleust (respondit il) m'otroyer son amour. Lors luy remonstra qu'il ne disoit pas vray pourtant meritoit de la perdre. Si fay (maintient il) ie la supliay donner remede à ma passion. Voy tu comme tu te condamnes toy mesmes, replique Timbrie, tu as dit en premier lieu, que l'auois requis d'amour, apres tu confesses luy auoir demandé le don d'amoureuse mercy. Puis que souz faulce couleur d'amytié l'as sollicitée de deshonneur, va va, elle est perdue pour toy. Vienne maintenant le plus ieune apres luy. Quand il se mon-

stra, elle l'interroqua veux tu beaucoup de bien à ceste Damoyelle? Ouy, respondit il. En quoy, dist Timbrie, le cognoistrions nous. En ce que ie ne desiray iamais rien en ce monde tant q' l'ottroy de son amour. Desia as tu menty, dit elle, qui te vantes de l'aymer tant, & la requiers de faire pour toy chose contre son deuoir: ioinct que le vray amant doit preferer le bien de s'amie au sien propre: parquoy vuyde de deuant moy, car tu n'as nul droit en elle. Et vienne le plus ieune apres luy: auquel se presentant, elle dit: tu n'es pas second: mais le premier. Si suis, dit il, elle replique, n'as tu pas esté premier? il respond que non. Or voy, dit Timbrie, comme en recognoissant verité, tu as perdu la Damoyelle. Ne sçez tu pas que le premier qui l'a requise la doit auoir? Pourquoy donc as tu affermé estre le deuxiesme: sçachant que n'auôs à faire iugement sur l'ordre de vostre naissance, mais sur le temps de la requeste d'amour qui luy a esté faite? Respond, qu'aussi l'auoit il premier requise. Lors luy demande ou ce auoit esté, il dit que ce fut en vn iardin. Comme le prouueras tu, dist elle veu que ie bien sçay qu'il n'est pas ainsi: voire qu'elle estoit en son logis assise en vne chaire. Il assure auoir dit vray en tout & par tout. Sçay tu donc mieux (dist Timbrie) ce qui en est de cecy que moy? Ouy, dist il, en ce dont est question entre nous. Or regarde combien tu te foruoiez: car celuy qui biē ayme ne cognoist iamais en Amour tant que qui est libre de passion, & chascun est auéuglé en son propre fait. Ainsi par tes mensonges tu es exclus de prendre plus aucun droit en la Damoyelle, si te recule d'icy, ce qu'il fit. Et estoit la compagnie trop esbahie des demandes sutes de la dame desguisee qui poursuit, disant: Or vienne donc auant laisné: lequel s'offre, & elle l'interroge en ceste forme. Aymes tu ceste fille de vraye amour? ayant respondu que si: elle aiouste, comme le pourrons nous sçauoir? parce, dit il, que ie luy porte pure & chaste affection

affection en intention de l'espouser. A à ce n'est rien (respondit elle) la faute des autres ne fait sage, quelle raison meilleure veux-tu rendre? en quel lieu estoit elle, quand tu luy fis la requeste auant les autres? La ou elle est encores, respond. Comme est il possible (dist Timbrie) veu qu'il y a plus de mille lieues d'icy à la cōtree d'ou vous venez? Du lieu (dist-il) ou elle estoit alors, elle n'en est pas maintenāt plus estoignee. Timbrie enquerant cōme il se pouuoit faire. Mō cueur (il expose) est la place ou elle sied, en laquelle elle est encores, & oncq' n'en partira. A ce coup as-tu bien parlé, dist elle, ne reste qu'à sçauoir si tu l'aimes en ton cueur tant que tu affermes. Assez (dist adōc le Cheualier) vous respond de l'amour extreme que ie luy porte, l'inimitié presente que i'ay contre mes freres, à cause que ne puis plus auoir d'amitié avec eux, l'ayant toute logee en elle. Tresbonne preuue en as fait (conclud Timbrie) partant la pucelle doit estre tienne, ainsi ie l'ordonne. A ce mot commença tel bruit d'instrumens en la salle, sans en apercevoir les ioueurs, que tous en estoient esmerueillez. Incontinent la pucelle desenchantee se ieta à genoux deuant elle, luy requerans les mains, & les trois freres disparurent de ce lieu, ne demeurant que l'aisné. Auquel sur le champ la Damoyfelle fut espousée en tresgrand honneur. Et à cause que il estoit tard, on vint courir pour le souper. Parquoy la ban de mescoigne se retira. De laquelle furent tous les propos de ce soir, les vns auisans la prudēce singuliere de la Dame deguisee, les autres desirans affectueusement cognoistre le Cheualier qui emportoit le pris à quoy tant de gens de bien auoient failly. Et les Dames couuoitises outre mesure de sçauoir qui estoit celle si parfaite en beauté, que n'auoit peu gagner le tout par faute d'un point. Telle fin print l'auenture tant renommee de la Tente qui demeura en la salle fort claire & transparente & son entree depuis à tous libre & ouuerte.

Du deuis de Florisel avec Alastraxeree en faueur du Prince Falanges.

CHAP. III.

ENtre les Seigneurs deguisez Florisel sentoit vn merueilleux plaisir de la gloire qu'il auoit acquise en l'acheuement du sort de la Tente: mais Falanges portoit bien d'un costé quelque tristesse en son cueur, de ce que tel heur ne lui estoit auenu, & d'autre s'esuioissoit comme prenant part au bien & felicité de sa chere Dame Alastraxeree, pour laquelle il fust tout du long de la nuit trauaillé de diuerses pensees, Balançant entre crainte & espoir iusques à ce qu'il vid l'aube du iour esclarcir les fenestres de la chambre où ilz estoient couchez Florisel & luy qui le rendit plus hardi de l'esueiller, estimant qu'il eust suffisamment reposé. Si lui escrie, Monsieur, c'est trop dormi, le Soleil nous faict honte, qui desia nous vient rayer sur le ventre. Quoy Monsieur, mon compagnon (dist Florisel en s'esueillant) si vous auez la puce en l'aureille qu'en puis ie mais? le remede est de la tirer par quelque subtil moyen. A Monsieur (respond Falanges) n'aez vous appris par vostre passion propre à auoir autre pitié des miserables & lagueux amans? Gardez que le Dieu qui vous a tant departi de ses graces ne se courrouce de vostre ingratitude enuers ses loyaux subietz, & retire sa main, vous eslongnant autant de la faueur qu'à vous estes pres. Bref, i'ay le cueur si chargé de douleur & de tristesse, qu'il fault q'ie le desgorge presentement en vostre sein. Je considere que voici le iour q'le departemēt se va faire des Princes ici assēblez, & de celle sur tous qui, s'en allant semble me desmembrer & emporter plus de la moitié de moy. Ce qui m'afflige tans l'esprit, que ie ne sçay bonement quel parti prendre, d'autant que me separer d'elle ie ne puis, danger trop certain de ma personne. Et ie sens bien d'autre part l'obligation que i'ay de ne vous habandonner, en vostre si vrgent & impor-

tant affaire. Amour me tire d'un costé, qui a tant de puissance, que vous mesmes auez esprouvé: honneur qui est l'unique guidon de vertu me tourne de l'autre, qui ne permet que ie vous faille au besoing de vostre querelle, pour ne tomber en soupçon d'auoir suyuy tes voluptez & delices, fuyant la peine & travail qui s'offroit des haultes & belliqueuses entreprises. Que feray-je donc? Je suis resolu souffrir toutes les trences & angoisses de ceste langueur, iusques au dard de desespoir, plustost, foy, que iamais te fauce: Mais s'il estoit possible de trouuer quelque secours à mon desconfort ie vous supplie monsieur y auiser pour moy comme pour celuy qui a les yeux de l'entendement si offusquez de ceste taye d'affection, qu'ilz ne peuuent voir le remede de leur maladie. Florisel esmeu de compassion de son bon & fidele amy, luy respondit: Monsieur mon. compaignon, ie m'esbahy comme vous adressez un conseil à qui en a autant de mestier que vous estât troublé de passion semblable à vostre: car combien qu'amour m'ayt payé le iuste salaire & guerdon de mes traux, ma volonté enuers ma Dame en est plus encliné & ardente, & d'autant ay moindre vsage de ma raison. Si est ce qu'il n'est en son pouoir d'estaindre en moy le iugement & cognoissance que i'ay, de l'amitié seruiable que ie vous doy. Pourquoy pour satisfaire tant à celle que me portez, qu'au desir extreme que vous auez de vous asseurer de la faueur de ma Dame Alastraxeree. Je ne treuve meilleur moyen pour vostre prompte allegeance, que de luy porter parolle de vostre part auant son partement, à fin d'entendre la resolution finale du fait ou failly. Ce que ie m'offre à faire tresvolontiers (si le trouuez bon) comme celuy qui ne s'espargnera iamais en chose ou le voudrez employer, mesmement en ce cas icy, auquel auez sur moy speciale hypothecque de mutuelle recompense. Si Falanges se resioit de ce propos, il ne conuient douter, luy estant offert si liberalement ce qu'il

n'eust osé demander, dont le remercia cent mil fois, & de ce pas auiserent ensemble pour le mieux, que Florisel la prendroit apres souper, durant le bal. Ce qu'il fit allant en la sale bien caché & affublé de sa cape, si tira un page à part, qu'il pria aller incontinét dire à la Princesse qu'un de ces Cheualiers estranges venu en sa compaignie iusques à la fontaine des Amours d'Alastrax la supplie se vouloir rendre à une fenestre respondans sur la mer, pour entendre aucune chose concernant son seruice. Le page alla aussi tost vers elle faire son message, sur lequel elle pensa fort si c'estoit point Falanges, & sans tarder sort de la sale, ne contentant que personne luy fit compaignie, & s'en va droit à la fenestre que l'enfant luy auoit declaree, de laquelle elle fait loing tirer les torches. Lors vient Florisel, lequel s'estant donné à cognoistre, elle receut en grand liesse, & luy dist en riant: Cheualier si les armes m'essent esté permises en l'esprouue d'hier, ie vous eusse laissé autant d'enuie sur ma prouesse qu'a moy sur la beauté de vostre maistresse. Ma Dame (respond Florisel) quant aux pointz qui me touchent, ie les soubmetz de bon gré à vostre valeur: mais quant à elle vous me pardonneriez si ie recognois de sa faueur si peu de vertu que i'ay peu monstrier en l'auenture, laquelle si moindre eust esté d'elle enuers moy, ie n'eusse jamais fourny à l'effort extreme de la rente. Ainsi elle a mieux aymé ne gagner de sa part l'honneur antier, à fin que i'y paruinse de la mienne. Vous auez (dist Alastraxeree) pratiqué celà avec Falanges, qui a bien voulu ceder ce droit d'esprouue à la cognoissance secrette qu'il a de voz affaires. Je ne serois tenu (respond Florisel) que de la pareille, pour celle que i'ay de ses meilleures pées. Puis que vous cognoissez si priuement ses desirs interieures (dist elle) faites nous en quelque part. Tresvolontiers, dit il, ma dame, si vous n'en sçauiez rien: car c'est l'occasion propre qui m'amene icy maintenât. Lors tournerét les morz de risée

de rifee en parole vraye & ferieufe, & Florisel pourfuiuit, fi l'état de mes pl^a affectueux defirs ne vous eftoit cler & euident (Princesse gentile) ie n'aurois la hardieffe d'entreprendre l'embassade prefente deuers vous: mais la certitude que vous auez du fecret de ma vie ie vous respond de mon filen- ce, touchant le voftre par l'affurance reci- proque que pouuons en cecy prendre l'un de l'autre. Partant ne deuoit craindre le fage prince Falanges de me commettre feurement ceste charge, non plus que ie l'ay efpargné au fervice de ma Dame Helene, pour lequel ne vous defplaira, fi ie vous fay ce mot de remonftrance, que puis que l'excellence de vofre beauté (com- bien que defiree de tous) ne doit par rai- fon faire don de foy fors qu'à vn, vous auez à penfer pluftoft que tard (tandis que ceste tendre & fouëue fleur de ieuneffe eft verte & viue en vous) à qui entre les mor- telz vous deuez faire ce present precieux & irreuocable, & apres qu'en aurez bien confulté, ie fuis affeuré que ne trouuerez perfonnage au monde mieux doué de toutes les graces & bonnes parties defirables en vn grand feigneur tel qu'il eft. Et le point que ie trouue plus digne de confi- deration, c'eft qu'il vous ayme plus que foymefmes. Dont ayât fait facrifce deuot de fon cueur à vofre diuinité, merité, par pitié la recompense de ce que pouuez o- troier de la part qui eft humaine en vous. Voylà, ma Dame, la requeste que ie auois eue de vous faire auât noftre departemēt, tant pour vofre bien que pour le fien, la- quelle ie vous fuplie receuoir & respondre de telle difcretion qu'auuez acouftumé d'v- fer en toutes chofes. Ce dit Alastraxerec luy fit telle refponce d'une fort bonne gra- ce. Il fuyt grandement esbahie (monfieur) de la harangue que me faites presentement pour aultuy, veu que la princesse Siluie defia me l'auoit faite pour vous mefme, fi- nō que vueillez monftrer en ce comme te- nez ma volōté pour conquife en vofre en- droit, voire en telle forte, que ne vous con-

tentant de l'auoir pour vous, en voulez fai- re largelle aux autres. Voylà telle eft la condition de tous les biens de ceste mor- telle vie, lefquelz pourchaffans en opinion d'y trouuer entier contentement, quand fomme paruenuz au but de noftre atten- te, le defir y trouue peu du tout qu'il yma- ginoit, dont il auient que la iouiffance re- froidit ceste ardeur premiere tant violente par le defcouuemēt de l'imperfection des chofes que nous auons figurees totale- ment parfaites. Mais de ceste felicité a- complie, la chair fragile ne pouant iouir, il nous la fault esperer en la vie celefte feule- ment. Or vous fachant eftre affez auerty du droit que i'ay de nature diuine, par l'a- uantage de mon fang paternel: i'eftimois qu'aurez peu comprendre le fruit exquis qui peult eftre cueilly en moy, tenant par- tie de l'immortel, lequel on ne pourroit trouuer es autres de mon fexe, veu qu'il gift en l'abrassment des ames defia des- nuées de leurs corps. Pourtant ie n'euffe iamais creu qu'euffiez permis ne souffert à nul viuant d'entreprendre cest heur vni- que fur vous. Contrainte fuis finablement de hault louer l'amytie finguliere d'entre vous & luy, qui a eu tant de force en vous, que de donter vofre paffion propre, pour fatisfaire à la fienne. O heureux Falanges, non seulement de fcs hautes penfées: mais aufsi de la rencontre de fi rare & parfait amy. Touchant lequel ie vous acorde fran- chement les graces & vertuz qu'attribuez à fa perfonne, laquelle ie metz à fi hault pris qu'elle ne reçoit en chere, iufques à vous dire pour refponce derniere, confor- me tant au merite des prieres de l'embaf- fadeur, qu'au guerdon de l'affection fi ve- hement de celui qui l'enuoye, que fi ia- mais ma volōté defcend à alliāce d'hom- me, ie le tiens en reputation de Prince au- tāt vertueux & acompany que la terre porte, & de qui ie fouhaiterois la familiarité plus que de nul autre qui viue. Or ie vous prie presenter mes affectueufes recommanda- tiōs aux bones graces de mes Dames Hele- ne &

ne & Timbrie, les asseurant qu'elles peuent faire de moy & du mien autant que de leur propre, comme suis delibéré leur donner mieux à entendre par effect, quand l'occasion se presentera . Florisel plus que content de si bonne & fauorable responce, l'en remercia mille fois, luy offrant de sa part toute la subiection de si peu delibéré que la loy d'amour luy pouuoit auoir reseruee. Et n'oublia à luy requerrir, si de fortune apres la departie leur venue en ce lieu estoit descouuerte, de vouloir employer sa prudence à l'excuser, soutenir en leur cause . Sur ce poinct prindrent congé l'un de l'autre, avec grands adieux & regretz, & se retira chacun vers sa compagnie. Falanges qui attendoit le retour de son fidele ami en tres-grand deuotion, receut les nouvelles qu'il luy rapporta, en tel plaisir & aise, qu'il pensoit resuer en les oyant comme rauy & quasi ne les pouuoit croire. Ceste nuict ils gaagnerent leur nau, & ayant mer bonace prindrēt la route de Constantinople, & Darinel quant & eux, qui leur dist à l'embarquer qui les vouloit suivre en ce voyage,

pour aquiter la promesse qu'il leur auoit faicte de les conduire & rendre à saul, non obstant la satisfaction que ces yeux perdroyent de la veüe de Siluie, par ce que tel payement de ses pensees l'endebtoit tousiours d'auantage . Deux iours apres que ilz furent partiz de ce port, la Royne Zahara commanda qu'on donnast ordre à tout son equipage pour s'en retourner en ses pais, accompagnée de sa fille Alastraxee qui auoit recueilli toute sa flotte, & d'Anaxartes aussi, lequel auant que partir ne faillit, pas de bailler à vne des Damoyseles d'Artemire vne lettre escrite à Oriane. Pareillement Birmantes & sa chere femme s'en allerent en leur Royaume & tous les autres Seigneurs & Dames chacun en sa contree. Apres partit Amadis de Grece, & Niquee flotans vers Constantinople, & laisserent Anastarax & Siluie avec le Souldan, la Royne d'Argenes aussi print le chemin de son Isle, & Alquife & Virgande avec elle, fort tristes de la piteuse destinee qu'ils preuoyoiēt s'apareiller. Lesquelz nous laisserōs tous iusques en leurs temps & lieu.

Comme les nouvelles vindrent à la Princesse Arlande que l'enchantement de la Tour de l'Vniuers estoit deffaict.

CHAP. II II I.



LA compagnie qui estoit allée avecques Florisel (cōme vous a esté dist cy deuant) vint par ces iournees trouuer la Princesse Arlande en la maison de plaissance, luy rendant

dant la lettre qu'il luy escriuoit. Elle fust grandement troublée à leur venuë, & aussi tost qu'elle eust le paquet entre ses mains, l'ouurit, & y trouua telle teneur.

Ma Dame, le los des victoires belliques publié par tout à si clere trôpette, me semble de vil pris, à comparaison de celui qui merite, qui par prudence est vainqueur de soy-mesme. Car du premier, souuent la plus grand' part est deuë à la fortune qui est comme entre nous & noz Lieutenans, & Soldats. En l'autre, personne ne peut prendre aucun droit, fors celui seul à qui tout l'honneur appartient. Or le faict ia passé entre vous & moy vous semond & conuie au conquest de ceste glorie nompareille: veu les assaux que vostre propre volonté vous liure iour & nuyct, lesquelz deuez soutenir & repousser vertueusement par vostre grand sagesse: car vous sçauiez que de mon costé ie ne puis obeir à la loy de vostre vray Amour, ayant perdu ma liberté entiere: dont ne me reste plus aucune part que puisse employer en vostre seruitude. Je le voudrois, & si ne puis: ie confesse & recognois la debte: mais ie n'ay plus dequoy satisfaire, pour vne obligation precedente qui me tient engage corps & ame: Parquoy force vous est de prendre ma bõne volonté en payement, sans vous plaindre de moy, quant à faulte d'Amour enuers vous, d'autant que mon impuissance m'excuse, l'ayant tout mis parauant en autre endroit, ny desloyauté veu que ma foy estoit desia arrestee en lieu d'ou ne la puy retirer. Consideriez doncq qu'Amour, non moins que les autres choses naturelles, retient tousiours sa propriété. qui est d'exercer tyrannie enuers ses vassaux, comme il fit contre la Roine Dido, & plusieurs grandes Dames, lesquelles firent sacrifice à ce Dieu cruel de leur sang, & de la vie au bout. Prenez exemple & vous mirez en moy, pour obeir & sa force, ainsi q̃ voyez que ie n'y ay sceu resister, & gaignez sur moy (qui vis en continuëlle guerre) cest

auantage de demeurer en paix & repos d'esprit: laquelle vous souhaitez, avec accroissement de gloire, & prosperité, d'aussi bon cueur que presente ses tres-humbles recommandations à vostre bonne grace.

Celuy qui est tout vostre en ce qu'il est sien, Florisel de Niquee Prince des deux Empires.

La Princesse Arlande, ayant leu & relu tout du long ceste lettre, & encores entendu les nouvelles del'enchantement de ses parens dont elle auoir esté cause, à peine qu'elle ne mourut de deuil, & tant iettoit de plaintes & de regrets, que sa discretion ne la pouuoit sauuer de dire maintes folies voire elle se pasma plusieurs foys en vne heure, en sorte que contrainte fust de garder la chambre ne sçay quantz iours. A tant surserros à plus parler d'elle, pour irriter du conseil qui fut tenu sur le recouurement de Helene.

Comme le Prince Birmartes arriua au Royaume d'Apolonie, ou fut tenu conseil sur le recouurement d'Helene.

CHAP. V.

PEu de temps apres le rauissement de la belle Helene (duquel auez entendu le discours au liure precedent) le Prince Birmartes son pere arriua en Apolonie acompagné de sa femme, & de grand nombre des Seigneurs & Dames, conuoquez par eulx de diuerses contrees, en esperance de celebrer les noces de leur fille, à la plus grand' magnificence qu'ilz pourroyent auiser. A leur venuë, on ne laissa de mener ioye publique & solennelle, en disimulant par peu de iours la tristesse de ce grief infortune: d'autant que les playes si fresches receuoient à plus grand douleur le premier apareil: & (comme on dit com-

mutement) mauuaises nouvelles ne viennent jamais que trop tost. Toutes-fois estant le faict tel qu'il ne pouuoit longuement estre couuert, sans sortir en cognoissance, le vieil Roy delibera en faire luy mesmes la premiere ouuerture à toute l'assemblée, la pure & nuë verité de la fortune comme elle estoit passée. Ce qu'il fit, avec telle destresse & amertume, que sa harangue, ou, à mieux dire, douloureuse complainte fust toute plaine de regretz & lamentations rompuë de souspirs, & sanglorz menuz, arrosé de grosses larmes qui luy distilloyent le long de la barbe blanche, de telle sorte qu'il n'y eust cuer si dur en ceste compagnie qui ne fust esmeu à grand pitié & compassion, voire que ceux mesmes qui auoyent esté presens à l'accident, en sentirent recharge d'alteration nouvelle. Ma plume ne seroit suffisante à exprimer la moitié de si piteux spectacle: seulement vous diray, qu'il imprima es cueurs des Princes & Seigneurs assistens, un si merueilleux desir de vengeance, que depuis fust fort difficile à estaindre & assoupir sans abondance effusion de sang de deux parties: comme le succez de la guerre vous fera entendre cy apres plus à plain. Or ie vous laisse icy à considerer, comme les anciens maintenoient sainte & inuiolable l'auctorité de leur foy, & plus que tous ceux qui estoient par dessus tous, & exemplaires aux autres: veu le mortel creuecueur que les pere & mere d'Helene souffroyent de ce rauissement, à raison de la promesse qu'ils auoyent faicte au Prince Lucidor, touchant leur fille, sans que le respect de la qualité du ravisser, filz d'Empereur, & heritier de deux empires, & le party de mariage trop plus auantagieux pour elle, peust aucunement amoindrir n'adoucir l'aigreur n'ompaille de leur affection. Or les poursuivoit Lucidor, & sommoit de leur parole à grand instance, comme pour la chose que plus ardemment il desiroit en ce monde: tellement que son importunité contraignit le bon Roy d'or-

donner & publier vne assemblée des estatz de son Royaume, en la plus grád diligence qu'il luy fust possible: pour estre faict droit au Prince de Gaule sur sa demande & conclusion. Lequel y comparust acompagné de la noblesse Françoisse. Et comme Gentil homme tres-eloquent entama le propos en telle maniere.

*Harangue du Prince
Lucidor.*

SIRE, dist il, Princes, Barons, Capitaines, & Soldats Appolloniens, si noz sages ancestres (que les siecles passez ont porté en la succession de tant de bons enseignemens) nous eussent encore laissé la cognoissance certain du train & gouvernement de fortune, son inconstance ne me donneroit à ceste heure occasion de la blâmer ne sa certitude loy de dire ce que j'en dy: Mais d'autant qu'elle a prescrit l'auctorité d'executer elle mesme ses desseings les Princes de ce monde gaignent beaucoup moins de vouloir resister à ses efforts, qu'à obeir & s'aquiter de l'obligation que souuent elle leur impose. Non Sire, que ie vueille souz ceste couleur denier en rien celle que ie dois à vostre honneur, ne pareillement laisser à exiger de vous en iustice celle que deuez au mien, estat deliberé faire des deux pareille mise & recepte, au cas du rauissement de Helene vostre fille & mon espouse. Auquel n'a esté faict moindre force à vous qu'à moy, qui m'induit à requerrir presentement qu'à l'entreprise de la iuste vengeance vostre vouloir se conforme au mien pour la satisfaction mutuelle. Non pas que j'aye doute, (Seigneur Birmartes) ne des fiance aucune en ce cas de vostre franc & magnanime courage: mais crainte seulement du conseil qu'on vous pourroit dōner au contraire, soit pour vous en diuertir du tout, ou pour le moins retarder la diligence requise en tel affaire, à l'ocasiō de l'ancienne amitié

tié qu'avez tousiours eue avec les Princes Grecz, chose qui me tourneroit à perte inestimable si elle tiroit à longueur, veu l'arroy & equipage, auquel voyez que me suis mis, lequel me demeureroit inutile s'il n'estoit renforcé & augmenté par le vostre. Parquoy esbahir ne vous deués (Sire) vous princes, Barons, Capitaines, & soldatz Apolloniens que ie vous sollicite si vrgement à ceste entreprise, & moins refuser ma requête estant de telle consequence pour vous, qu'en la cuydant reietter comme mienne, vous vous trouverés en effect autant contrarié à vous mesmes. Qui est celuy qui pourroit dire que cest outrage n'ait esté fait autant à vous qu'à moi? Quand est de ma part, ie suis disposé à la vengeance, en laquelle si ie ne contente mon desir en satisfaction mon honneur, autant que fortune l'a mal contenté, ie tourneray sur ma personne le reste de l'effort, pour ne luy seruir plus de lûiet à autre cruauté nouvelle. A ceste cause, vous supplie tresaffectueusement (Sire) & vous autres Seigneurs Apolloniens, vouloir en cest endroit employer voz forces, & celles de voz amys & alliez à ioindre aux miennes: pour mettre sus vne telle puillance contre les Princes Constantins, que si de leur gré ilz ne s'offroient à la reparation du tort & iniures, nous soyons suffisans à l'exécuter sur eux & les forcer à la raison. Icy fay-je fin à ma demande, sans la faire de mon intention premier que de la vengeance, soit à bailler ou à prendre. Surquoy apres que le Roy Birmartes, & autres grans seigneurs eurent mis les têtes ensemble, fut ausé que Birmartes comme principale partie interellée, feroit la response: avec moderation, toutefois d'aucuns articles, tendans à tranquillité (si elle se pouuoit obtenir) sans se precipiter au hazard de la guerre, lequel commença ainsi.

Harangue du prince Birmartes.

Seigneur Lucidor, puis que le bon plai-

sir du Roy monseigneur & pere, & des Seigneurs assistans me charge de la response qu'ilz entendent vous estre faite. Ie vous diray en ce qu'il leur en semble, remettant neantmoins ma volonté & resolution à la vostre. En premier lieu, ie vous confesse que nous auons interest commun avecques vous en l'issue de ceste cause, laquelle n'est de condition en rien differente à celle qui fut iadis demeslée entre les Grecz & Troyens, pour le rauissement de leur belle Helene, de laquelle me deplaisoit extrêmement que ma fille porte le nom & effect de seconde. Ie ne denieray non plus l'amitié ancienne q'ay avecques les Princes Grecz. Si est ce qu'en la balance de mon iugemēt elle n'est de tel poix que le respect de mon honneur, & de celuy de ma fille, ne trebuche & l'emporte: lequel i'estime deuoir estre racheté à quelque pris que ce soit, tant des biens que de la personne. Toutesfois comme les affaires de telle importance requierent leur commencement estre diligemment consulté & debatue, de peur que la fin mal succede seruuant tel deuoir à la charge des Princes enuers Dieu & les hommes, principalement leurs subietz, en cas que la fortune tourne mal à point selon leur proget. I'ay aucunement egard aux choses qui sont contre mon propre goust: car delaisant toutes passions (comme lon doit en cas de conseil) i'estime qu'en ceste entreprise nous couchons la somme totale de noz estatz & finances, & les mettons en la main de Fortune, sans assurance de paruenir à la reparation pretendue, autre que de nostre bon droit, qui à souuent mestier d'ayde comme lûiet à l'inconstance de la variable deesse. Bon droit auoient les Princes Grecz cōtre la ville de Troie, qui souffrit neantmoins leur siege & assaut l'espace de dix ans, & eust soustenu (peult estre) iusques à la fin, sans la trahison si cauteleusement pourpensée, si vaillamment exécutée. Mais laissons à part la grande

effusion de sang que ie voy aprestee: considerons seulement quelle en sera l'issuë, car au vray l'effet des armes est quasi fortuit, ne iamais fondé en seurété quelconque, dont nous fault descendre spécialement à la conseruation de nostre honneur: touchant lequel (combien qu'ayt esté offensé à l'enleuement d'Helene) peult estre que raison nous sera faite de la reparation plus grande que n'esperons, apres que la partie aura bien entendu & discuté le fond de nostre complainte. Surquoy on ne pourroit asseoir aucun iugement legitime, auant qu'auoir ouy la deduction des deux parties. Poutce regardons à y proceder par meure deliberation, de peur de nous repentir trop à loysir de nostre temerité precipitée. A ceste cause serois d'auis (seigneur Lucidor) qu'auant que passer oultre vous füssiez entendre vostre intention par cartel, au prince Florisel, le sommant de reparation de l'outrage, à fin que par son refus, rendiez nostre cause d'autant meilleure. Lors luy pourrez sans difficulté denoncer guerre mortelle à feu & à sang, iusques à l'acomplissement de la vengeance. Et quant à le combattre vostre personne à la sienne, ie n'en serois d'opinion, d'autant que le faiz de si generale offése ne se doit charger sur les'espaules d'un seul, lequel perdant le reste de la poursuyte (touchant aux autres) demeurast sans amendement. Non que ie vueille en cecy reuoker en doute aucune la valeur de vostre personne, mais parce que la faueur de Mars est incertaine & commune (en laquelle on ne doit reposer sa confiance de chose si importate) l'eust il promis & asseuré par seing & seel autétique. Voylà à quoy tend l'auis du Roy, & de ceste assistance, d'attendre la responce que le prince Florisel fera aux ambassadeurs enuoyez de vostre part: pour sur icelle prendre fondement de nostre resolution finale. Ce pendant, ne requerir ne mettre encore en peine les amys (desquelz desirons le secours en cest affaire) iusques à ce que leur puissions môstrer le plus

que deuoir, auquel nous serons mis pour chercher paix & eiter l'horrible furie de la guerre, ce q les animera d'auantage à prendre les armes pour nous, quasi contre l'ennemy commun de droit, equité, paix & repos des peuples, sans que le laps de ce peu de temps vous puisse porter aucun preiudice, en expedition telle cōsequence, dont l'ordre & apareil requiert longueur & demeure, de peur que de soudaine entreprise nous encourions trop tarde repentance. Ceste oraison pleut fort à toute l'assistance suyuant laquelle fut ordonné que le cōte d'Armignac (qui acōpaignoit Lucidor en ce voyage) feroit ceste embassade, personnage de bon cerueau, & de grand' eloquence portât par aage desia la barbe blanche. Parquoy le iour prochain il partit d'Apolonie tenant par terre le chemin de Thrace iusques à Constantinople, la ou il trouua Florisel & Helene, Timbrie, & les autres Princes & Dames, qui auoient esté magnifiquement receuz de la princesse Oriane, & d'Onolorie, Iacoit que ce ne fust sàs quelque degoust d'amertume & tristesse, craignât chacun à la forme de leur venue le danger & misere qui en pourroit ensuyure. Icy la royne Zirfee ne fait plus ample mention de leur arriuee, ne voulant messer & confondre les matieres de plaisir avec celles de si triste consequence seulement vous dit l'acueil qui fut fait au conte d'Armignac ambassadeur lequel venu en Constantinople fut receu, selon l'estat de sa personne, ioint le respect de qui il estoit commis, luy acordans les princes Grecz à sa requeste, iour & assignation, pour proposer sa demande en plein conseil. Le iour escheu & l'assemblee faite, commença ainsi: Trèshautz & trespuissans Princes, Seigneurs, & noble assistance. Lucidor le Viudicatif, môseigneur m'a enuoyé par deuers Florisel de Niquee, pour luy presenter en presence de vous tous ceste lettre, iequant qu'il la face lire hault & cler, & m'en rendre responce, à fin qu'icelle obtenue ie m'en retouine. Ce disant luy bailla la lettre,

lettre, laquelle il ouvrit & leut à l'instant.

Lettres de Lucidor le Vengeur au

Prince Florisel de Niquee.

Seigneur Florisel, Lucidor le Vengeur, Prince naturel de France, & d'Apollonie par alliance, prie Dieu vous inspirer tellement que puissiez cognoître la faute qu'avez commise envers luy; & la repa- rer ainsi que droit & raison le commande. Ce qui m'a mené à vous escrire ce mot de lettre, est à fin que vostre erreur reconnu, & l'amende faite à mon contentement, ie puisse demeurer avec vous en telle paix & amitié comme deux princes Chre- stiens, de telle grandeur que nous sommes, deutoient, pour employer noz commu- nes forces contre les infidelles. Je desire fort sçavoir qu'elle excuse vous trouvez du grand tort que vous m'avez fait, & à vous mesmes (ce que ie puis dire) en vio- lant mon estat Royal, ensemble l'amitié que vous deviez au pere de ma fiâcee, vous supliant me la vouloir escrire par le menu, à fin que i'y puisse prendre consideration qui soit suffisante, pour accomplir la satis- faction de vostre part en mon endroit: car ou ie ne la pourrois recevoir de vous, de vostre bon gré, force me sera de la pren- dre au fil de l'espee, par le moyen des ar- mes, seulement entre vous & moy, iusques à outrance de vostre vie, ou la mienne. Je m'esbahy trop, & comme vostre vertu tant cogneuë iusques icy en si glorieux af- faire, s'est tât oubliée par apetit desordon- né de ieunesse effrenée, que de se decla- rer tant ennemy de la raison, mesmement de la paix inviolable que voz peres & pre- decesseurs ont tousiours entretenuë, avec les patens de mon espouse. Vous asseurant qu'à grand peine vous lavera toute l'eau de vostre mer, d'une si grande tache & ma- cule: car vostre estoffe estoit tenuë de re- sifter à si vilain acte, ne faisant chose que ne vouldrez que vous fit celuy qui est de vostre qualibre, dequoy ne vous pourriez descharger aucunement envers Dieu ne les hommes. Au moyen dequoy, encorcs

que ieusse bon droit de vous faire la guer- re, comme à violateur de ma femme, & de sa propre foy, si est ce qu'ayant Dieu de- vant les yeux, & les affaires de nos repub- liques Chreftiennes en recommandation vous ay bien voulu semondre de m'en fai- re raison de vous mesmes, considéré que les lois obligent les Princes quant à foy, à fin que par ce moyen on écheue vne si cruelle guerre comme ie voy estre aprestee non moindre que iadis vos predecesseurs eurent devant Troye, laquelle Dieu vueil- le détourner par sa grace, au moyen de vo- stre iuste satisfaction. En cas que non: ie proteste vous mener telle guerre, que l'un de nous deus y demeurera pour les gages. Après que la lettre eust esté leuë par le se- cretaire, le prince Constantin sentit vn grand mouvement de colere, qui luy fit vn peu rougir le frôc & rouiller les yeux en la teste: toute-fois la dissimulant au moins mal qu'il peut se leva debout, dit au conte d'Armignac. Combien que ma respon- se seroit suffisante de vous declarer qu'Helene d'Apollonie soit ma femme, & pour telle ie l'ay amenée, si est-ce (Seigneur comte) que ie vous entens respondre plus perti- nemment, & par meure deliberation de conseil: parquoy faites bonne chere ce pé- dant, & ie donneray ordre de vous despe- scher bië tost. Le Côte à ceste respôse se re- tira du côseil, ou demeura Florisel, avecq' les autres Seigneurs, presidés & conseillers, auquelz adressa telle parole. Tresexcellens Princes, Seigneurs, amis, & alliez. vous avez presentement entendu l'embassade de Lu- cidor, lequel ie ne veux ignorer avoir esté fiancé avec Helene par lettres de credêce: mais tant y a que moy qui l'ay espousée en propre personne pense n'y avoir fait faute qui ne soit remediabie, & espere que Dieu n'en prendra aucun mal contêtement. Seu- lement mesemble avoir mal vsé de la façõ de nostre partement d'autant que pour- roit concerner l'ancienne amitié de mes predecesseurs, avec les patens d'elle. Et vouldrois bien qu'il eust esté possible

le faire par leur consentement : mais puis qu'il ne peult estre autrement en vn mal fait ne gist qu'amende, vous supliant que il vous plaile me donner conseil, comme i'en puisse sortir à vostre plus grand honneur. Ce dit, se rasiéd en son siege, sur quoy y eût diuerses opinions, les vns disans, que lon deuoit mener la guerre, pour monstrer à Lucidor sa folie. Les autres n'en vouloient point, cherchans plustost paix & satisfaction aux deux costez, comme on a acoustumé de faire en semblable cas. Mais l'amiral Frandalo sage vieillart, qui se trouua à l'assemblée parla ainsi par l'ordonnance d'eux tous. Tresexcellens seigneurs, combien que la vieillesse que ie porte sur la teste, me donnast quelque licence de dire mon auis, toutesfois la presence de voz grandeurs m'en a retenu iusques à ce qu'il vous à pleu m'en faire le commandement, auquel obeissant ie dy, que ie ne croy pas que la guerre ait oncq' esté inuente, sinon pour plus grande assurance de paix, dont ne doit on iamais faire effort pour honneur, moyennant qu'il puisse demeurer satisfait : car quoy que le pris en soit grand, aussi est celuy de la conseruation de la paix, laquelle on perd quand on la met en balance, & bien souuent ceux mesmes qui la quierent le plus. En bonne foy i'estime que le moyen estat soit beaucoup meilleur en ayant paix, que les grans honneurs avecq' guerre : car le premier est comme seur & ferme, & l'autre tremble de peur de trebuscher. Parquoy prenons le bon & laissons le mauuais, cognoissans que plusieurs Princes ont conserué leurs Empires & Monarchies plus par gracieuseté amiable, que par bobance odieuse, pretendans souuent d'ocuper le leur & l'autrui. Et vous plaist croire que Cesar n'eust pas esté ainsi meurdry, ne Rome despoillée de la souueraineté du monde, si l'vn se fust contenté en la gloire de ses grans faitz sans vouloir vsurper ce qui ne luy appartenoit, & que les Senateurs & le peuple Romain n'eussent esté si superbes de vou-

loir supéditer tous les autres : car cela leur engendra vne naturelle discorde estant certain que Royaume diuisé en soy ne peult estre perdurable. Et vous autres messeigneurs les Princes estes autant tenuz à la clemence & bon traitement de voz suietz, qu'à la gloire de l'exécution de voz actes propres, & à garder leur sang, & celuy de leurs femmes & enfans par tranquillité, plustost que de l'espandre pour enuahir les terres d'autrui iniustement. Si vous assurez messieurs que ie serois d'opinion d'auoir bonne paix, qui la pourroit obtenir : mais cognoissant le naturel de noz ennemys, principalement des gés de Lucidor, qui sont querelleux, cherchans tousiours cinq piedz en vn mouton. Ie ressoix de plustost commencer la guerre sur eux, & la reculer hors de nostre territoire, que d'entendre icy le cry, pleurs, & lamentations des veues & orphelins, aupres de nous : de quoy ma vieillesse m'a donné assez claire experience, & vostre commandement la hardiesse de le vous dire. Son opinion fut trouuee bone de tous ceux qui demandoient la guerre. Et apres qu'il se fut remis en son lieu, se leua Amadis de Grece, qui leur fit tel discours. Il me semble (messieurs) qu'il feroit beau viure au monde, s'il n'y auoit ceste difference d'estatz & d'honneurs : mais d'autant que nostre gloire nous met tousiours en peines & trauaux, ie trouue que la paix dōne peu de seureté au repos, & qu'honneur ne se peult bonnement assurer sans guerre. Parquoy ie ne puis contredire que l'on ne doieue tousiours choyir la paix : mais ie debatiz que lon ne la doit demander telle que l'honneur y ayt interest, & qui seroit plustost vraie guerre, souz vsurpation du non paisible. Ce qu'elle faict souuent quand les articles que lon poursuit ne sont en la main des hommes : ains frustrant leur intention fais aucunesfois le contraire de ce qu'o espere. Mais en ce cas là il me semble qu'on la doit demander, & que le moien d'y paruenir est en requérant le contraire de ce qui nous a esté proposé, sans venir aux conditions

ditions de la satisfaction ou elle n'eschet. Parquoy (Seigneurs) ie suis d'avis si Lucidor ne me veut consentir qu'Helene soit femme de Florisel en demeurant en paix avec nous, qu'il se contente sur les cartes. Et s'il a si grand envie de menger de la guerre, ne face que venir, & on luy en donnera tout son saoul. Et voilà ce que j'en pense. Finy son propos, il se mit en sa place, & Falanges se leva pour en dire son opinion à son rang. Messieurs, dist il, la gloire de la paix est fort bone: mais celle de la guerre est beaucoup plus grande, quand on la mette en paix par honneur: Toutesfois par ce que la fin est incertaine, & trop plus seure à desirer qu'à aeventurer, attendu les doutes qui se peuvent presenter es commencemens, moyés, & fins, j'ay toujours aymé la victoire sans effusio de sang, non la guerre, sinon pour plus grande seurere, avec conseruation d'honneur: mais quand il est en branle de la fortune, lon le doit radresser à toute force, croyant trop bien que le bon cueur face beaucoup en telles entreprises, pourueu que lon regarde bien au temps & lieux, & moyens de l'exécution. Au reste ie n'ay memoire d'estre iamais entré en bataille contre mes ennemys, que ie n'eusse toujours egard que l'effusion de leur sang se devoit racheter par egale portion des miens. En quoy ie loue merueilleusement le dit de ce sage capitaine, lequel ayât occis six mil hommes, sans qu'il demeurast plus de huit de ses gens en la place regretta grandement leur mort: ingeant que telz huit soldatz estoient suffisans à conquerir toute l'Asie & la Grece: car à dire vray lon ne deuroit pas aeventurer vn seul amy pour dix ennemys, consideré que la vie d'un homme de bien ne tombe en estimation. Parquoy me semble que demeurât Helene ou elle est, on doit faire hardiment les excuses, principalement avec le prince Birmartes son pere. Lors tous les assistants prièrent le Prince Olorius de dire son avis: mais il n'y voulut oncq' entendre, pource que ce

fait icy luy sembla trop toucher aux deux parties, desquelles il estoit amy, ne voulant (comme lon dit) mettre le doigt entre le boys & l'escorce. Partant le surplus de toutes les opinions fut remis au Roy Amadis, qui parla en telle substâce. Signeurs lon a si bien proposé sur cest affaire, que le meilleur seroit de n'en faire plus ample mention ains se deuroit on du tout arrester à ce qu'en a opiné le Prince Falanges ioinct qu'il me semble, que quand l'amy est iniurié de l'autre, chacun est tenu de solliciter leur apointment. Mais qu'en fault il dire d'auantage? fors que lon sçait bien que tout le tort qui a esté fait redõde contre le prince Birmartes, hors mis lequel ne gist icy autre amende. Parquoy satisfaisons de nostre deuoir enuers luy, sans attribuer la louange de nostre gloire à personne qui viue. Si suys d'avis que Florisel doit respondre, & soy iustifier de la faute commise, en ce qu'il s'est marié, & emmené Helene sans le sceu de ses parens, s'excusant sur l'amour de l'excellente beauté d'Helene qui l'a conduit à telz termes. Offrât pareillement pour plus grãde descharge de luy & de nous, que nous donnerons à Lucidor autre personnage de nostre lignage, tant qu'il sera content, puy qu'il est maintenât impossible de luy donner Helene. De laquelle chose s'il ne se contente (comme il doit) nous suffise auoir fait tel deuoir, & prenons Dieu pour nostre iuge, & tous les hommes en tesmoignage, & noz amys pour nous ayder & nostre propre honneur pour ennemy, à cause duquel serons forcez iusques à la de remplir les campagnes & chemins pour resister à ceux qui nous voudront faire outrage. Car de ma part ie vous assure, que Florisel ne pourra trouuer raison qui l'excuse mieux q' la force d'amour, en quoy ie l'ayderay de ma personne, & mesmes son pere Amadis de Grece: monstrât par son exemple que la beauté de Niquee la peu contraindre de laisser la foy auât promise à Lucelle: A tât il seurent, & conclurēt ensemble

que Florisel respondroit selon le contenu de ceste dernière consultation. Qui fust leur negoce pour toute la iournee, pendât laquelle, Helene, & Timbrie ne cessoyent de prier Dieu, que son plaisir fust de mettre la paix entre leurs parens & Florisel. Le iour ensuiuant fust donnee la responce par vne lettre au comte d'Armignac en pleine sale, y estant Helene presente; laquelle il espousa lors avec toutes les ceremonies de l'Eglise, à fin que le comte le vist pour en faire le rapport à Lucidor, de

ne s'y attendre iamais. Avecques ceste lettre, le comte se partit de Constantino-ple, & peu apres luy, l'Empereur Lucencio & sa femme, & avecq eux le Prince Olorius, qui s'en alla en l'Empire de Babylone, aussi fit l'Empereur des Romains avec sa flotte, demeurans en ce lieu l'Empereur Lisuait, & l'Emperiere Abra, pour voir à quelle fin tendroyent ces affaires, acompagnez neantmoins de grand nombre des Seigneurs & bons Cheualiers.

Comme le Comte d'Armignac, retourna avecq la responce des lettres de Florisel.

CHAP. VI.



LE Comte Embassadeur exploita tant par ses iournees, qu'il arriua au Royaume d'Apolonie, ou il fust gracieusement receu du Roy, & de toute la signeurie. Et apres auoir rendu son paquet à Lucidor, se tira à quartier, & fust leu le cōtenu qui portoit cecy.

FLORISEL de Niquee, Prince de deux empires de la grand' Bretagne, & de Gaule, de Thebes & de Rhodes, heretier d'Apolonie : à Lucidor le vindicatif.

Seigneur Lucidor, ie m'esbahy de c'est outrecuidé surnom que voulez occuper, vous faisant appeller le vengeur, sçachant (ou deuez sçauoir) que tel tiltre n'appartient qu'à Dieu seul. Et pour pertinement respondre aux articles de la lettre que le comte d'Armignac vostre Embassadeur m'a presentee, ie dy que vous mesmes estes tenu de satisfaire aux paroles de presumption, desquelles visez contre moy, & Helene mon espouse. Quant à ce que vous dictes, que l'excuse n'est suffisante qu'A-

qu'Amour m'ayt induyt à telle faulte, inferant que personne d'estat comme vous ou moy, ne les deueroient commettre si lourdes. Le dy que l'excellente beauté de ma Dame Helene, ioinct le parentage & lieu dont elle est yssue, m'ont obligé à si nobles pensemens, m'ayant tousiours tiré hors de moy-mesmes, comme ententif continuellement en l'honeste Amour que ie luy portois souz pure loy de mariage, qui me doit seruir de descharge, pour effacer la coulpe que me voulez imposer, dont ne me sens aucunement reprehensible, si n'estoit de la faute que ie puis auoir faite à ses parens, de l'emmenier sans leur consentement, chose qui me desplaist beaucoup pour l'amour d'eux, à qui ie deuois bien ce respect. Sur ce que vous dites, que ie m'oste à moy-mesmes, ce que la bonne renommee m'a tousiours voulu ottrôyer: ie maintien ne l'auoir en rien violée ne diminuée: ains espere que ce que i'ay fait en ce cas me sortira à grande augmentation de gloire. Aussi de tout temps les Princes Grecz sont coustumiers de garder le point d'honneur & de bien venger les outrages qu'on entreprend de leur faire. Et maintenât que l'Empire est regy par les plus magnanimes & belliqueux Seigneurs qu'il eust iamais il n'est decheu du degré de sa reputation ancienne. Quand à vous, si voulez entendre raison, vous devez deporter de ceste querelle, voyant qu'Helene est ma femme & que le fait est irrenocable: mais pour la reparation enuers vous, Messieurs & parens ont conclu vous donner autre Dame, de grandeur, beauté, & richesse, telle qu'aurez raison de vous en contenter: sinõ, vous fusse remettre le fait à la discretion de voz parens, des miens, & de ceux de ma femme, promettât cõdescẽdre à toute cõdition raisonnable & honneste enuers le Prince Birmartes, & le Roy d'Apolonie. Autrement ie proteste deuant Dieu de deffendre ma iuste cause, tant q' l'ame me respirera au corps. Vous supliant par amytie, Seigneur Lucidor, prendre egard à la fin douteuse, &

incertaine, des batailles, & au grand nombre des amys de la Grece, sans celuy de ses propres vassaux: sans y comprendre les meurtres que suscitera contre vous, ce tiltre enorme de vengeance, que vous vsurpez sur la puissance diuine. Quand Lucidor eut leu la lettre de Florisel, il cuyda forcer d'ire & de mal talent comme celuy que la passion dominoit plus que la raison: neantmoins filant plus doux qu'il n'eust voulu, s'il eust esté chef vnique de l'entreprise, demanda aux Seigneurs leur auis, lesquelz commirent le Prince Birmartes pour faire la responce, qui dist ainsi. Seigneurs & Princes, ie voy le chemin ouuert, pour entrer en paix, ou en guerre, choisissez lequel vous voudrez, remettant quant à ma part, toute mon opinion en celle du Prince Lucidor, auquel toutes noz affectations sont deuës, moiennant l'ennuy que il a receu à nostre occasion, m'estant auis aussi que dom Florisel propose tous les articles de descharge que Gentilhomme ayant son honneur pourroit donner, tellement que considerant l'euement perillex des batailles, nous deuons laisser la guerre, pour suyure la paix, attendu le party qu'il nous fait de mariage, sans nous arrester du tout à ce que disoit Hector de Troye, qu'il valoit mieux auoir vne dangereuse guerre, qu'une deshonneste paix: car fust-il ores qu'eussions mené guerre dix ans, nous ne pourrions en fin auoir meilleur party que celuy qu'il nous offre. Parquoy messeigneurs, ayons l'œil sur l'instabilité de fortune, & que l'honneur ne suye qui le veult: mais celuy qui le fuit, & à qui il plaist à elle de le donner. Et me semble que ce seroit folie d'aller chercher à grand travail, en la maison d'autrui, ce que lon nous apporte à nostre huys. Et entendez que les conditions qui s'achetent au tranchant de l'espee coustent bien cher, & sortissent souuent leur effet tout au rebours de ce que les hommes proientent. Outre puis que Florisel se reprend d'auoir emmené Helene contre nostre vouloir, & qu'il pre-

sente à Lucidor vne autre aussi noble & riche, me semble qu'on la doit accepter (attendu que la chose faicte ne peut estre autrement) en prenant la plus honneste paix que sera possible : laquelle si vous refusez entierement, ie suis prest de vous secourir iusques à la mort, pour vous faire cognoistre, seigneur Lucidor que ie ne crains la guerre, ou i'ay pris nourriture. Ceste response plent assez à la pluspart des assistants : mais oncques ne peult enfoncer la raison dans l'entendement de Lucidor, auquel l'ymage d'Helene estoit imprimee si auant, avec ceste deliberation de vengeance, qu'il ne peult oncques entendre à l'offre qu'on luy faisoit, ains aspirait totalement à ceste furie, ne trouuant goust en aucune opinion contraire, si dist ainsi. Seigneur Birmartes, si la perte de vostre fille, pour estre si bien mariée comme vous dites faisoit à comparer à la mienne qui ay perdu ma femme, & la mort de tant d'hommes de bien qui sont periz en mon seruice ie croy bien que vostre braue courage ne nous eust donné tel conseil. Mais alleguant que vostre fille demeure bien mariée, ie ne m'esbahi pas que ne sentez le dommage que i'en souffre. Et quant à moy, ie ne demande plus mariage : car ie pense en estre pourueu, & vous requiers la femme que vous m'avez promise laquelle i'aurai, ou la teste de dō Florisel, pour la dispèce du sien avec ma satisfactiō. Et iusques à ce que celà auienne, ie iure Dieu iamaiz ne prendre repos & mourir à la poursuite, ainçois que ie ne recouure mon Helene : car ma grandeur ne le peult souffrir, q l'amour incomparable que lui porte. Parquoy Monsieur (parlant au Roy) & vous autres Seigneurs & Cheualiers si me voulez donner secours en cest affaire, vous ferez beaucoup pour vostre honneur : sinon soit Florisel si grand terrien qu'il peult estre, i'ay confiance en mon bon droit avec l'ayde des miens, de luy faire comparer sa folie. Lors il se teut au grand desplaisir de Birmartes, qui preuoyoit la grand ruine

qui en deuoit auenir, & la hayne mortelle qu'il failloit prendre contre ceux qui leur auoyent esté amys si intrinseques.

Si luy dist : Monsieur, puy qu'il vous en semble ainsi, voyez en quoy vous voulez que ma personne vous serue : car ie vous prometz ma foy que ie m'emploiray, moy & mes amys iusques à la fin : toutes-foys Dieu me soit tesmoing que ceste querelle me desplaist grandement voyant si bon remede, pour l'apointer. Ie vous remercie, dist Lucidor, ie ne pouuois pas autre chose esperer de tel Prince que vous estes. Parquoy i'envoieray deffier Florisel, & escriray à tous les Princes du monde qu'ilz nous aydent à l'amendement d'une telle violence. Ainsi sortirent du conseil, demeurant la charge à Lucidor d'ordonner ce qu'il vouloit estre faict.

Le desir de Lucidor estoit si extreme pour paruenir à l'execution de sa vengeance, qu'il ne pensoit iamaiz en autre chose, sinon qu'il luy peult seruir à ses fins. Or ne tarda il guetes à mander le deffoy à Florisel, & d'autre part, supplications à tous Roys & grands Seigneurs de se trouuer prests à certain iour pour entrer es terres & pais des Constantins, & les chastier de l'outrage par eux comis contre le droit commun des gens. Entre lesquelles en adressa vne à la Royne Zahara, & à ses enfans de telle forme & teneur.

*Lettres de Lucidor le Vengeur à Zahara,
Royne de Caucaſe*

Ma Dame, m'estant n'agueres auenu, que Florisel de Niquee ayt entrepris sur l'alliance faicte entre moy & la Princesse Helene d'Apolonie, me la rauissant par violence indeue, ie n'ay pensé meilleur recours qu'en vostre excellence, & celle de voz illustres filz & fille, pour obtenir secours à venger le tort & honte qu'il m'a pourchassé, lequel si ne le me vouliez accorder, nonobstant quelque amytié qui pourroit estre entre vous & luy, ou les siens ie vous prie auoir plus d'egard à la diuinité dont

dont vous participez, laquelle vous oblige à rendre iustice en terre à ceux qui la vous requierent. A tant, ma Dame, les haultz Dieux vous maintiennēt tousiours en leur communication, vous inspirant la volonté inclinē à ma iuste querelle.

*Celuy qui est tousiours prest de faire
service à vostre Royale maiesté
Lucidor le Vengeur.*

Et mille autres lettres enuoya deçà & delà, importunant tous les Princes du monde, pour entendre à son secours & renuoya en ce mesme temps le comte d'Armignac son Embassadeur porter les lettres de deffy ce que sembleroit estrange, attendu qu'un simple herault, suisoit: mais il le fit pour pratiquer intelligence par quelque voye, ou pour quelque mot extruagant, que le Comte eut bien peu semer entre gens de bien, qui eust peu servir à son intention. Si se transporta le Compte en peu de iours à Constantinople, la ou trouuant Florisel luy presenta le cartel de telle substance.

*Cartel de Lucidor le Vengeur à Florisel
de Niquee.*

Lucidor le Vengeur, Prince naturel de France, de Secile, & d'Apolonie par alliance. A toy Florisel de Niquee, malheur pour ton salut. Je t'auois n'agueres requis de me restituer amyablement ma femme & espouse Helene, que contre Dieu & raison tu m'as enleuee, en la maison de son ayeul. Ce qu'as refusé de faire contre toute loy diuine & humaine, au moyen dequoy ie dy que tu as fait acte de brigant, voleur, ravisseur, & malheureux adultre. Si te deffie à feu & à sang, toy, tes amys, fauteurs & alliez, pour avec les miens te renget à telle raison que bien tost viendras à ma mercy, pour recevoir punition à mon contentement. Pendāt qu'on lisoit ce cartel il n'est possible d'exprimer l'impatience de Florisel: car il eust biē voulu q'ceust esté de-

sia à faire, & s'escria à haute voix deux ou trois fois, qu'on y respōde, qu'on y respōde, qu'on y respōde. Ce qui fut ausi deuoir estre fait par escript, & enuoyé par un Roy d'armes.

Responce de Florisel au cartel de Lucidor Vindicatif.

Lucidor le Vindicatif, Florisel de Niquee, Prince des deux Empires, &c. a receu ton presumptueux cartel de deffy, sur lequel il te respond, qu'il ne fit oucques chose que Gentilhomme ayant son honneur ne deut faire, t'auertissant de rechef qu'Helene d'Apolonie est sa femme & espouse, laquelle il deffendra contre toy & tous autres qui la luy voudront quereller auecques telle recharge que toy, & les tiēs maudirez l'heure que iamais ceignites espée contre les Grecs pour la playe qui en seignera sur toute ta posterité, & celle de tes confederez. Car par l'inique refus des conditions & offres, ausquelles me sumettois, tu as fait de ton droit ton tort. Dōt auons Dieu de nostre costé, que par sa iustice punit & dōte tousiours les superbes, & ne te lairra vsurper sur luy le droit de vengeance qu'il a reserué nommement à sa diuinité.

Lucidor ayant leu le cartel, à peu qu'il ne bondit & saillit hors du sens de despir. Et n'eust esté la crainte qu'il auoit de rompre le desleing de tāt de grāds seignrs, ausquelz il auoit requis secours, il l'eust enuoyé defier de sa personne à la sienne: mais cela fut assoupy pour un temps, au moyen que j'ay declairé. Faisant tandis Florisel ses diligences de son costé, de solliciter ses amys, entre lesquelz escriuit vne telle lettre au Soudan de Niquee.

*Lettre de Florisel au Soudan de
Niquee.*

Mōseigneur, la fortune m'a voulu ce biē
de me

de me colloquer en mariage avec la Princesse Helene d'Apolonie, & combien que la forme soit aucunement legere, moyennant la force dont m'a falu user, pour l'emener à Constantinople: si estce que pour purger le forfait qu'on y pourroit pretendre, ie leur ay fait depuis tant d'offres equitables, que le droit est demeuré de ma part, ayant offert l'alliance de nostre maison, à Lucidor Prince de France, avec lequel y auoit eu quelque propos de mariage d'elle, d'autant que les choses desia faites, ne se pouuoient desfaire, il n'a laissé toutesfois de m'en importuner, iusques à enuoyer cartel de deffy à moy, mes parens, fauteurs, & alliez, à feu & à sang, par mer, & par terre, pretendant (comme il escript) ne me tollir seulement ma femme: mais ma teste aussi, dequoy j'ay bien voulu auertir vostre imperialle maiesté, esperant qu'icelle ne me faillira en ce besoing, Monseigneur ie prie le Createur donner à vostre hautesse bonne & longue vie.

Plusieurs courriers furent despeschez avecques missiues, pour requerir le secours des amys & alliez, demeurant la court en estat fort triste de tel mouuement, & plus que tous la belle Helene, cognoissât qu'elle estoit le motif de tout cest apareil, & de la desolation qui en pourroit escheoir. En ces troubles la Damoyelle de la pucelle Artemire ne laissa perdre la commodité qui s'offrit de presenter à la Princesse Oriane, la lettre du fort Anaxartes, luy disant qu'elle luy apportoit ce paquet de la part de sa maistresse, laquelle le receut, se doutant bien de qui elle venoit, & se retira en son cabinet seule pour voir la teneur qui estoit telle.

Lettre du Prince Anaxartes, à la tresexcellente Princesse Oriane.

Ma Dame, celui vous presente salut, à qui vous l'avez tollu, desirant le comble des heurs de ce monde, à celle qui l'a de-

iété au fond de tous infortunes, qu'il estime moindres que le desespoir de vostre bonne grace, ou l'avez plongé par vostre rigueur derniere, lequel s'il sentoit en luy quelque offence qui vous prestast occasion de luy tenir rudesse, non seulement ne s'ingeroit de vous en requerir mercy, ains vous en voudroit venger sur luy mesmes, faisant office de plus que Pellican pour ses petitz, mais si son affection desmesuree causée par vostre beaulté extreme il a, neantmoins, tousiours refrenée à bride desraison contre le naturel. Si oncques en ce peu d'accès & conseruation qu'il a eu pres de vous il ne fit seulement vn clin d'œil à l'interrest de vostre grandeur, tant s'en fault que la langue se soit hazardee de changer le faiz de son las cueur. Quelle raison puez vous pretendre pour le bannir ainsi de la fruition de vostre veuë, laquelle perdant luy semble viure en perpetuelles tenebres, si non d'autant que la flambe continuee de son cœur, luy peult esclaire, qui l'eut pieça ars & consummé en cendre sans les larmes ordinaires dont il l'amortit. Plaise vous doncques pour toute satisfaction que non pas moy: mais Amour merite pour moy me rappeler de cest exil. Au moins me faire entendre de vostre main la conception de vostre esprit que le mien ne peut comprendre si ne desirez la mort brieue de celui que le seul penser de vostre excellence soustient en langoureuse vie.

*Vostre ou plus nul Anaxartes
le Diuin.*

La Princesse leut ceste lettre avecques grâde esmotion de son chaste sang, laquelle dissimulant, fit responce à la Damoyelle qu'elle presentast ses affectueuses recommandations à la bonne grace de sa maistresse, parce qu'elle ne voyoit occasion de luy rescrire, dequoy la messagere partit fort mal contente.

Comme

*Comme le Prince Falanges se perdit à la chasse courant apres
vn Faulcon.*

CHAP. VII.



LA force de l'yuer commençoit desia à mettre sa blanche barbe, changeant la couleur des verdz preaux par vne iaunisse trop amortie, & les eaux dormantes de se descourrir d'une espesse glace, quand le Prince Falanges qui estoit demeuré avec les autres Seigneurs dans Constantinople, print envie de voler le canart: parquoy montant à cheual en ceste intention, alla aux champs, acompagné de son faucônier & trois ou quatre de ses gentils-hommes domestiques: ou ayant eu aucun deduit autour des glaces, se trouua par fortune en vne orece de la forest, en lieu marcescageux & aquatique, auquel la gelee n'auoit pas pris, par ce que tout le pourpris estoit fontaines & veines saillantes, etuees en sablon bouillant, chault de nature, & couuert d'une mōtaigne contre Septentriō dōt procede la gelee, & ouuert contre la ligne du Mydi, dōt le Soleil l'eschauffoit en celle saison. Si que pour la raison que i'ay dite, & pour estre ce lieu en bon abry, cest estang n'estoit pas gelé: parquoy il y auoit ordinairement des Herons, mesmes à ce-

ste heure là en y eut vn que le Prince Falanges fit leuer, iettant ses Faulcons, & vn bel Autour blanc qu'il auoit se leua contre luy si hault en l'air que lon en perdit presque la veue, & les oyseaux tousiours plus hault pour se garder du bec, duquel il se reuengea merueilleusement, se iettant sur le doz, & voletant les piedz contremont, & dōnant grans coups de bec pour les percer de part en part s'il les pouoit ataindre: ains comme il en y auoit trois bonnes pieces, principalement cest autour qui dominoit le dessus, & les deux autres luy bastoient les costes, le pauvre Heron fut tant maté qu'il tomba quant & les oyseaux en vne place ouuerte dedans le boys, à laquelle le Prince Falanges picqua en toute diligence, pour secourir ses oyseaux: mais le deuoir en estoit desia fait, par vne des belles Damoysselles du monde, qui se trouua en ce lieu acompagnee de douze autres, & de grand nombre de gentilzhommes, & auoir desia osté la proye aux oyseaux, & les paissoit d'une cuisse du Heron mesme. Si tost que le Prince la vid ainsi, luy estant bien

bié auis qu'elle estoit Dame de haute guise, & maîtresse de toute la troupe, il mit pied à terre, & la saluant, la remercia bien fort, de la bonne assistance qu'elle auoit fait à ses oyseaux, la soit, dist-il, que ie n'eusse iamais pensé que le Heron se deust trouuer si mal traité par main de Damoyelle : laquelle ne l'ayant encôres apperceu iusques à ceste heure là, fut fort esmerueillée de le voir si extreme en beauté, aussi furent tous les gentlizhommes & Dames de sa compagnie. Si luy fit vne gracieuse responce : Seigneur dist, elle, vous ne vous deuez esbahir de voir que i'vse de cruauté, ayant mon cuer surpris & opressé de plus cruelz pensemens que n'est le danger ou le Heron s'est trouué : car Amour & ses chiens me le rongent incessamment, aussi paroïssoit assez sa douleur intrinseque, par la paleur & maigreur de sa tendre chair. Lors le Prince estant estonné de son propos, & non moins desireux d'en cognoître la fin, comme celuy qui estoit passionné de la mesme angoisse. Ma Dame, dist il, ie vous supplie dites moy quelle chose vous entendez par vostre dite, à fin que m'estât possible de trouver remede pour vous secourir, ie le puisse faire de aussi bon cuer que ie voudrois que lon m'aydast. Il conuient dist-elle, sçauoir premieremēt qui vous estes, pour cognoître si vostre mal, & vostre personne, sont remediables par vne mesme consolation, comme ie pourrois estre secourue : parquoy vous me direz vostre nom s'il vous plaist, & vostre passion, pour la conferer avec la mienne. Ma bonne Dame (dist le prince) l'on m'appelle Falanges d'Astre : quant à l'estat de mes amours, mes pensees se sont si hault eleuees, que i'ay entrepris le seruice d'une Dame, laquelle merite estre reseruee aux Dieux immortelz, comme fille qui est procedee de leur lignee en acointance humaine, à cause de laquelle i'ay prins la hardiesse de m'offrir à elle, & dementier perpetuellement son treshumble vassal : si que mon mal est bien grand à cau-

se de sa diuinité, à quoy ie pense à grand' peine pouuoit paruenir, moy estant en ce monde, & si s'espere qu'entre les mortelz la princesse Alastraxeree ne doit iamais auoir d'autre que moy. Cē qu'oyant la Damoyelle tomba de son hault tout plat à terre, d'ou le prince la releua, & la tint entre ses bras cōme morte, perdāt entierement tout le tainct de si peu de couleur qu'elle auoit : à quoy acoururent aussi toutes les Damoyelles, auxquelles le Prince demanda si ce mal la tenoit souuent. Monsieur (dirent elles) il y a quelques iours qu'elle en estoit affranchie. Lors elle qui s'esueillit quasi comme d'un somme, iete son œil piteusement contremont pour regarder le Prince qui la tenoit embrassée, la teste d'elle reposant sur le bras droit de luy, & fondant en larmes soupira souuent pour celuy qui la tenoit : car elle s'estoit enamourez de luy, par la grande renommee qu'elle en auoit ouy. Si dist : Helas Monsieur Falanges d'Astre ne vous esmerueillez point de ce que m'avez veu faire : car celuy qui a en soy mesmes si belle experience de mal cōme vous avez, n'estimera pas grandement le beaucoup d'affliction qu'avez veu en moy. Ma Damoyelle, dist il, ie vous voy vne passion biē merueilleuse. Seigneur (respondit elle) or seray ie content de vous declarer le mal qui me tient, pourveu que me vueillez ottroyer vn seul don, en tant que vostre grand renom m'assure d'un desir de vengeance que i'ay ne doutant que n'en veniez à bout s'il vous plaist me faire tant de bien. Dites hardiment, luy dist le Prince, car ie le vous accorde volontiers. C'est, ce dist elle, que ie vous prie vous en venir quant & moy tout seul, dans ceste nef que vous voyez là au riuage de la mer : car allant en icelle en certain voyage q̄ ie veux faire, ie vous conteray tout à loysir ce que ie requiers. Alors despleut bien au prince d'auoir fait la promesse, toutesfois il estoit de si frāc courage qu'il n'e voulut onques faire semblāt : mais luy dist : Damoyelle faisons le ainsi que l'avez

l'avez ordonné. Surquoy suruindrent deux de ses valertz ausquelz il bailla ses oyseaux pour les rapporter en la ville, & leur enchargea de dire aux Princes l'auenture de son partement, les priant le luy pardonner attendu qu'il auoit necessairement à faire vn voyage pour secourir vne Damoyseile, au moyen dequoy & pour estre leur allee si breue, il n'auoit peu prendre congé, trop bien leur commanda de n'en sonner mot, iusques à ce que la nauire seroit tant esloigné de la riue que lon ne le peut choisir de veuë, à fin qu'aucun d'eux ne le retardast par priere, & ainsi les gens le firent: & luy la Damoyseile & leur troupe s'embarquerent, faisant leuer les ancrs, & haulser les voiles singlerent avec vn vent en poupe, tellement qu'ilz ne mirent gueres à tourner vn cap, derriere lequel lon ne le vit plus. Or ayant ainsi voyagé tout le long du iour iusques à la nuyt, le Prince estimant tousiours ceste Damoyseile estre de hault lieu, veu l'equipage des gens, seruiteurs, & la riche tapisserie d'or dont la nef estoit tendue, luy requist gracieusement luy dire la cause pourquoy elle l'auoit demandé, selon sa promesse qu'elle luy auoit faite en terre à quoy elle fondant toute en larmes luy dist: Monsieur vous scauez que Dieu le createur a donné remede à toutes choses fors qu'à la mort, & qu'il n'y a en ce monde plus grande douleur que celle que seussent ceux qui aiment, & lopt desdaigne de ceux ausquelz s'adressent tout leur desir: car le mal est tel, que d'autant plus poursuyt celuy qui aime tant plus aigrement se desdaigne le bien aimé: chose incurable, & tendant infalliblement à la mort. Et puis que vous (monseigneur) pouuez estre seru d'un mesme mal, comme le mien, j'espere que pourrez mieux trouuer remede pour mon mal qu'un autre, à raison dequoy ie le vous ay aussi bien librement voulu dire. Et est qu'il y eut vn Roy au Royaume de Sythie, à qui sa femme donna vne fille fort excellente en beauté, laquelle estant bien sage & endoctrinée en quelques parties de medicine, mesme-

ment en la cognoissance des simples, s'affectionna grandement en l'art de la magic en laquelle elle estudia si profondement, comme elle estoit autrement extreme en tous dons de grace. Et à fin qu'elle fust de plus insigne marque. Dieu permist qu'elle fust extremement amoureuse d'un sien cousin (comme le moyen qu'elle inuenta vous pourra donner cler tesmoignage) si bien qu'elle ne voulut onc entendre à autre amour que de luy qui se nommoit Danisel, & elle Damicene: auquel (rompant la loy d'honnesteté, qu'une Damoyseile est tenue d'observer) elle se desgorgea vn iour à luy declarer toute son intention, dont il fit peu de conte, estant desia son esprit occupé de l'amour de Calice, ieune Damoyseile parente du Roy. Dequoy Damicene se trouuant bien fachee & tourmentee puis voyant que ne sa beauté, ne les figures qu'elle faisoit ardoit au feu sculpees & graues: à l'heure de Venus, ne luy pouuoient valoir, desespera de ses attentes, & ayant consulté long temps à par soy, graua vne Fortune en plomp, heure & iour que Saturne estoit en son exaltation, par le moyen de laquelle elle pensoit occire, fichant vn poinson dans le cuer de l'ymage, qui representoit Danisel: toutesfois l'amour qu'elle luy portoit estoit si vehemente qu'elle pensoit bien ne viure longuement apres luy. Et notez bien qu'à la mesme saison que Damicene se trouua ainsi passionnee, elle fut aymee d'un Duc, autant qu'elle aymoit Danisel. De sorte que consultant vn iour en soy-mesmes le tort euidant qu'elle luy faisoit s'apperceust clerement, que le mal que le Ducq enduroit sans coulpe, estoit tout semblable au sien. Au moyen dequoy ymaginant vn iour, & contrepensant ce desordre qu'amour faisoit, delibera chercher remede de vengeance, tant pour les amans, comme pour les desdaigneux, la desirât faid'eille mesmes, aussi tost que de celui qui la faisoit ainsi languir. Et pour ce faire s'en alla en vne Isle surnommee l'Isle des Citez, qui n'est

est guerre grande, ou elle fit bastir vn chasteau qu'elle nomma de Vengeance & satisfaction d'Amours, & y dressa vne fort excellente chambre, dans laquelle si bien ouura par son art magique qu'elle y assied vne statue ou Idole le bronze à deux visages (dont l'un est de Damoyse, & l'autre de Cheualier) & à quatre bras desquelz l'Idole empoigne deux puyssans catquoys & deux poignantes fleches sur les arcs tenduz, prestes à descocher, dequoy sont ordinairement naurez tous ceux qui entrent en la chambre, c'est à sçauoir les hommes du costé de la Damoyse, & les Dames, du costé du Cheualier, apres laquelle blessure, iamais personne ne sort de là, & ne vous sçauois dire que c'est qu'ilz y font: sinon qu'on estime que chacun y est remedié par son contraire. Ce tabernacle ainsi dressé la pucelle y fit entrer Danisel par ses artz, & le Duc & Casile, & en fin y entra elle mesmes, mettant deuant le logis vn peron de marbre, sur lequel estoit graué la cause & fin de ceste auenture, & deuant la porte du chasteau trois autres perrons rengez, selon la voie, & chacun d'eux gardez par vn fort vaillant homme d'armes, si bien que personne n'y pouuoit entrer sans combat, les hommes chacun pour soymesmes, & les Dames avec condition d'amener Cheualier qui fist pour elles. Tellement (Monseigneur) qu'ayant entendu vostre bonne renommee bruyre parmy le monde, & ayant grande confiance en vostre vaillance & honnesteté, ie me suys auancee au grand besoing & desir que i'ay d'y entrer, m'en venir vers vous, supliant me faire tant de bien, & croire qu'onques Damoyse ne se trouua tellement tourmentée, comme ie me sens au moyen de quelqu'un que i'ayme de tout mon cuer, & combien qu'il semble que ie ne luy deurois vouloir tant de mal, n'a moy-mesmes, si est-ce que ie desire la vengeance de luy, pour la prendre de moy par vn mesme moyen. Voylà doncq' monsieur) partie de l'occasion de ma demande, reser-

uant le surplus à vous dire lors que ferons, au lieu, ou vous auez aussi bien affaire que moy. Le prince se trouuant fort estonné de si merueilleuse auenture: certes Damoyse (ditt-il) la fortune qui m'a ainsi surprins à pied leué pour venir avec vous, ne l'a point fait sans raison: car i'ay grandemēt besoing d'aller à tel festin: parquoy Damoyse m'ayme, tenez-vous toute asseuree que si la liberté se peult recouurer par ce moyen là, i'y employeray toutes mes forces, à fin qu'en me perdant ie me puisse retrouver. Si vous veu-x ie bien prier de me dire vostre nom, moiennant qu'il ne vous desplaie. Monsieur (ditt elle) ie suis contente de vous dire qui ie soie, souz condition que me ferez promesse de procurer mon remede par ceste entreprinse. Ce feray ie en bonne foy (ditt-il) & le feray sans faulte, comme chose ou ma part y va. Or sçachez donc, (ditt elle) que ie suis Arlande Princesse de Thrace, celle en qui la fortune a mys excessif amour, sans aucun amende: car i'estoye au contraire obligee à desdaigner, & desirer la mort de celuy que i'ayme, à cause de celle de mon frere qui fut occis par les mains de l'un des princes de Grece: tant y a que celuy que i'ayme s'appelle Florisel de Niquee, lequel non content de l'ingratitude qu'il m'a tousiours monstree, m'a fait encores trois ou quatre bons tours, & vn entre autres auquel la princesse Alastraxeree ioua son personnage à mon grand malheur, qui fut cause en la vous oyant nommer de me faire ainsi esuanouir. De ce le prince fut fort esbahy, & la consola au mieux que il peult, ne donnant à cognoistre l'estroite familiarité & conuersation qu'ilz auoient luy & Florisel, de peur de la plonger en desconfort, ains dissimula comme s'il eust eu hayne contre luy, avec vne esperance qu'il luy promettoit de son secours, navigans ainsi leur route, iusques à l'isle des Vengeances & satisfaction d'Amour, ou ilz vindrent surgir la deuxiesme nuit.

Comme la Princesse declara à Falanges tout le fait pour lequel elle luy avoit demandé le don : Et comme il esprouva l'aventure de l'Idole des Vengeances d'Amour.

CHAP. VIII.



LA Princesse doncques naviga ainsi avec le Prince Falanges, accompagnée des Damoysselles de sa troupe tant qu'ilz vindrent prendre terre en l'Isle des Vengeances, en laquelle toute la troupe desbarqua, & force chevaux & haquenées pour monter toute la compagnie, & sur tous vn coursier de Naples bien bardé & chanfrainé, avec sa selle dorée à la Damasquine, sur fond d'azur, & vn harnois de la mesme sorte qu'elle avoit fait apporter expres pour Falanges : car elle avoit toujours ouy dire qu'il estoit comme de la corpulence de Florisel ou d'Alastraxeree, lequelz elle avoit bien cogneuz. Et cheminerent en tel equipage environ vne journée, tant qu'ilz virent le chasteau, au milieu duquel aparoiſsoit vne tour plus grosse, haulte & massive que toutes les autres (dont y en avoit beaucoup) laquelle maistresse tour sembloit estre environnée d'excellens edifices de palais, balliz en triple ordre de colonnes à trois estages, percé, couronné & timpanisé d'une merueilleuse

beauté. Mais premier qu'arriuer audit chasteau, trouverent trois pavillons tenduz chacun devant son perron (dont nous auôs parlé) sur lesquels estoient penduz, les escuz des Cheualiers, tenans avec trois escriteaux dont celui du premier perron disoit : Si le desir de l'esprouve de l'Idole iusticier veult estre executé en entrant ceans, il conuient premierement toucher l'escu, & trouuera l'aventureux le commencement : car il sortira de ce pavillon tel homme qui luy pourra estre egal en loyauté d'Amours, à fin que par ce moyen il soit iustifié par devant l'Idole. Quand Falanges eut leu, il dit à la Princesse : Ma Dame puis que nous sommes icy arriuez, la raison veult que l'accomplisse ce que vous ay promis, & suis delibéré sonder le gué iacoit que mon desir repugne aucunement à faire outrage à telz Cheualiers qui sont mesmement forcez par iniustice d'Amours, comme chose qu'homme ne deuroit faire, ne fust seulement que pour satisfaire à la promesse, estant d'opinion que mieux vaudroit deffen-

C

dre

dre l'auenture, que l'assaillir. Monsieur, dist lors la Princesse, ie croy bien que vous dites la verité neantmoins ceste foy promise est tant excellente avec la necessité qui m'en est virgente, q̄ moimesmes me fache de vous importuner, vous supliant y forcer vostre propre naturel, & accomplir ma requeste. Sus donc, dist le Prince. Lors touchant l'escu, vit incontinent sortir du pavillon vn chevalier, aussi grād presque qu'un Geant, armé de toutes pieces, sur vn cheual fort puissant, qui luy dist: Cheualier vous ne pouuez maintenant eschaper du combat si ne vous voulez rendre pour vaincu, autrement il n'y a ordre de passer plus avant. Cheualier, dist Falanges, il me semble qu'il vous seroit aussi bon de me laisser passer pour esprouuer l'auenture sans combattre à fin que plusieurs puissent trouver le remede qui est leans, qui seroit ceuvre plus charitable: neantmoins quant à moy, puis que ie suys venu si auant, ie ne laisseray pour crainte d'en experimenter le hazard. Cheualier (dist l'autre) pour venir à la justification de nostre combat qui se doit faire avant toute chose, ie pense seurement que vous avez autant de raison d'assaillir en ceste querelle, comme i'ay à la deffendre car ceux qui entrent ceans se font eux mesmes la force de la deffence (si force y a) consideré le vouloir que ilz ont de ce faire, & nous autres desoustener. Quant à ce point (luy dist Falanges) i'en suys tout resolu, non seulement pour moy: mais pour l'obligation & deuoir dont ie suys tenu à ceste Damoyelle: parquoy prenons autant de la campagne comme il nous en fault, & ie suys prest à la bataille: ce qu'ilz firent, & baissent les lances en leurs arrestz, vindrent l'un contre l'autre d'une telle roydeur que le Cheualier soustenant rompit sa lance: mais le Prince le rencontra si bien, qu'il ietta homme & cheual par terre, le froissant si lourdement du coup, & de la chute, qu'il fut long temps sans mouuoir ne pied, ne main: au moyen dequoy le Prince descendit à pied, & luy deslaçant l'armet,

mit la pointe de son espee contre son visage, disant: deportez vous entierement de la force & resilience que m'avez voulu faire, en vous rendant à moy, autrement voicy vostre mort. A quoy le Cheualier luy respondit: Monsieur passez oultre, & esprouuez l'auenture contre les autres, quant à moy ie ne vous y feray plus d'empeschement: & sur cela Falanges luy bailla la main & le leua debout. Ce fait, le prince monta sur son cheual, & alla au second perron, ou il y auoit tel escrit. La condition de ceste auenture est desia declaree, & la peult la fortune leuer en auant, ou faire ce que le debuoir de chacun pourra aconsumyre sans autre chose. Parquoy le Prince toucha à l'escu qui estoit attaché au perron, sortant incontinent du pavillon vn fort Geant, lequel apres grand confit, fut surmonté par le Prince, qui passa outre, iusques au troisieme perron, ou le contenu disoit en ceste sorte: Garde toy de prendre orgueil encores que la fortune t'ayt aydé deux fois: car elle te pourra donner autant peu de seurété en la troisieme bataille, comme tu en as eu beaucoup es deux premieres: car c'est icy qu'il fault conter à l'hoste. Qui ne estonna aucunement le hardy Prince, ains touche l'escu du perron de la troisieme tente, d'ou sortit vn autre Geant, qui se rencontra avec Falanges d'une si grande force de cheualx, des corps, & des heaumes, qu'ilz furent aterrassez tous deux, demeurans quelque temps estourdis sur la dure: apres ilz commencerent l'escrime de l'espee, desmaillant decoupant, & froissant armetz, escuz & cuirasses: tellement que l'un & l'autre furent descouuertz en plusieurs endroitz, dont le Prince se trouua en grand hazard, n'eust esté sa legereté & adrette, de laquelle il destoba plusieurs coups au Geant, le frapant mesmes d'une viuacité si grande, qu'il le vainquit auant que l'heure fust sonnée. Parquoy il appella la princesse Arlande, & sans aucun contre dit la mena iusques à la maistresse porte du chasteau ou ilz

ou ilz trouuerent vn escriteau Latin, graué en vne frize de laspe, duquel le contenu estoit tel. Quiconques obtient la liberté, l'espere à plus grand guerdon de ce dont il desespere. Mais ne sçachans bonnement entendre ce que c'estoit à dire passerent outre; trouuans la court belle & quarree, toute enuironnee de galeries de blanc albatre, pauees en eschiquier, de marbre noir & blanc, & la place de la court mesmes, sauf que le pauement estoit plus menu & plus rude, à fin que les cheualx ne glissent. Et au milieu estoit la tour de vingt piedz en carré dans ceuvre, & la muraille de quatre piedz d'espaisseur auécq quatre petites tourelles cornieres s'ruans pour viz à monter aux autres estages, percee & liscée de belles molures à l'antique, & au dessus couronnée, endentilee, & enrichie de demi taille dans vne frize sous l'architraue, sur lequ l'estoit assis vn charpentage faict à mode de couronne close, couuert d'azur auécq vne pomme & girouette de fin or, ayant en la chambre de dessus l'Idole (duquel nous auons desia parlé) qui estoit assis, sur vn throsne fort riche. En laquelle ilz entrerent, trouuans à l'arriuee vn fort honorable vieillard qui les salua, & leur dist: Monsieur, & vous ma Damoyse, si voulez passer outre pour entrer ceans, encores que vostre vaillance vous ayt conduyt si auant, si vous fault il entendre les conditions de l'escriteau du dernier perron, lesquelles sont: Que vous aurez d'icy en auant autre opinion que n'ont les autres amoureux voire tout au rebours, si ce n'est celuy ou celle qui entre qu'aime également comme il est aymé: car vn tel pourra donner la liberté de l'entree à tous ceux qui viendront apres luy, d'autant que c'est le principal poinct, auquel consiste l'accomplissement de l'auenture, plus qu'en la victoire de ceux qui ont esté supeditez. Parquoy si n'avez bien entendu les propheties des trois perrons, ie suis icy commis pour expliquer leur contenu, si il en soud quelque doute, à fin que ceux qui

voudront entrer ceans, n'ayent apres occasion de se lamenter de ma maistresse, disans qu'elle auoit constitué nouuelle loy, contre les reigles d'amour. Si tost que le vieillard eut fini son propos, la princesse Arlande dit à Falanges: Monsieur, que deliberez vous faire, voyant que sommes si pres, vous d'auoir vengeance de vostre Dame dedaigneuse, moy, de mon cruel ami, & ennemi, ioinct que sçauéz, que vostre vaillance vous en a donné occasion, pour en deliurer vous, & autres qui sont icy venuz. Ma Dame, dist le Prince, si ma douleur estoit de mesme condition que la vostre, ie aurois raison de deffaire l'enchantement, mesmes pour le bien qu'y pretendez: mais veu que mon mal est consist en gloire, d'autant que la personne le vaut pour qui ie le souffre, i'aymerois plus d'auantage à croistre qu'à diminuer mes passions, sans consentir quasi que ie n'en aye ne plus ne moins. Ie ne me plains nullement de ce qu'elle ne m'ame pas, mais seulement me lamente, que mes seruices ne lui peuvent meriter sa bonne grace: car au surplus sa grand' valeur n'est comparee à la mienne qui est si petite, donne ailez de discharge de la coulpe que ie pourrais auoir, au cas que telz pensemens ne me fussent accordez: vous asseurant, ma Dame, que le plus grand point qui me tourment'est, que le tort que lon me faict me tire à vne raison de le deuoir endurer, moyennant sa beauté qui est tant excellente que la rouë de fortune m'a voulu partir tel desir pour mon partage, si auant, que ie contemple souuent mon infirmité (comme le paon regarde ses pieds) & toutefois ne m'en puis distraire, ains plustost à les augmenter quand i'y pense. O bien heuré mal, auquel la constance est si grande qu'elle craint le remede, ou tous autres ont coustume de le procurer. Parquoy ma Dame, ie vous prie excusez moy, si ie n'esproue ceste auenture, & m'employez en toute autre chose, comme celui qui vous desire obeir iusques à la mort. Si est ce, dist elle, que ie deman-

de la vengeance de celuy qui en vse de si grâde contre moy, par son desdaing & desfaueur. Et ce disant, se voulut lancer dans la chambre ou estoit l'Idole: mais oyant vn tresgrand bruit d'instrumens, lutz, guiterres, harpes, & violons, demanda premier, la cause pourquoy il se faisoit, & le vieillard luy dist: vous verrez maintenant yllir dehors tous ceux qui ont esté ceas enchantez, demonstans chascun son mal, par ceures & par effectz: puy ilz y rentrent environ la mynuit, ayans fait tout le tour du circuit du chateau, & du pourpris, des iardins, & vergers de ceans, comme verrez presentement, s'il vous plaist, vn peu attendre: qui fut cause que la princesse s'arresta, pour voir ce qui en auendroit. Tout soudain sortit par la porte de la chambre des Seigneurs & Dames, Cheualiers, & Damoyelles, & deuant tous marchoit la pucelle Damicene, vestue d'un fin drap d'or, ayant ses cheveux espars, & vne riche couronne d'ineffimable valeur, portant vne fiesche traueisee parmy son cuer, du costé fenestre de laquelle, elle sembloit estre autant ioyeuse come la beauté de son taint & semblant pouuoient tesmoigner, aussi ne faisoit elle que rire, en disant: O gloire de ma vengeance, qui reçois contentement, par le contraite de celuy qui estoit traité de moy en semblable cruauté. O cruel Amour & auéglé! personne n'est exempt de tes ruses, sinon ma science, qui à tant valu de te pouuoir surmonter. Sur mon Dieu, me recognoissant Danisel, tu payeras maintenant la fole enchere, & le mal dont le mien pouoit prendre guérison, sentant ce que tu pensois faire sentir à ta pauvre Damicene, l'assurant qu'il n'y a pitié qui tienne, puy que tu ne has voulu prendre de moy, en temps & heure. Or ie m'estime trop heureuse d'auoir allègement de mon mal, moyennant la vengeance pure de luy. Cesse hardiment de sollicitier ton remede: car par la loy dont as vse euers moy sera ta punition, en tant que mes yeux ne te peuuent regarder, ny

mon cuer porter bien-vueillance. Je m'ay suys entierement contempee de toy, comme l'estomac qui reiete les viandes, vn mesme forme que il les à auallees, mon gesse sera d'oresenauant comme qu'en a point, m'estant amer en bouche, tout ce que te semblera estre doux. Deporte toy desormais de me suyore, sans penser que ie preue compassion de ton mal, qui me tourne à singulier plaisir. Or la suyuoit Danisel bien pres de ses talôs armé de toutes pieces hors mis l'armet (gentil-homme de fort belle taille) ayant en son costé dextre vne fiesche ficee, laquelle sembloit ieter flamme ardente qui le cuidoit embraser. Helas (disoit il) ma Dame Damicene souuienne vous du temps que me souliez demander secours, en aussi grande amertume que ie souffre maintenant. Ie ne vous demande pas que vous sentiez mon tourment pour m'en descharger: mais seulement à fin que consideriez, que tel mal vous pourroit encores auenir. Amour, amour, comme tu me paies bien, par le mesme moien que ie l'auois delinqué. A à beauté souueraine, dont vient celà qu'en toy loge si extreme rigueur & cruauté? O mort viens moy secourir! A pres lui marchoit vne autre pucelle, iouissant de mesme gloire, & vñant des propres paroles de Damicene, & derriere elle vn Cheualier, faisant toutes telles plaintes que Danisel. Si ne tarda gueres qu'Arlande ne deuint bien peneuse, voiant son Florisel marcher au treisiesme reng, representant son personnage de telle fierté qu'il deuoit estre, au cas qu'elle y fust entree: mais l'amitié cordiale que la Princesse lui portoit ne peult oncq' tant souffrir pour l'amener au desir de sa vengeance, que plus elle peust voir en telle destrelle celuy qu'elle aymoit tant, ou plus que soimelmes, iagoit qu'elle eust sceu certainement paruenir à telle ioie que la princesse Damicene, si bien que iettant vn hault cry, & distillant les chaudes larmes des yeux, tomba toute plate. Le prince Falanges, pensant qu'elle fust pasmee, la print entre
les

les bras, & la releua lui & le bon vieil homme, qui alla querir de l'eau de la fontaine, & ben arrofa tant que elle reuint à foy. Mon Dieu (dist elle) qu'Amour est de farouche & estrange nature, sans aucune pitié, raison ny equité. O grandeur que tu obliges les hommes estroitement. O mal qui pourrois tant tourméter mon loyal amy, sans me faire aucun bien à moy-mesmes. En bonne foy ie suis bien abusée d'estre icy venue pour celà : car pensant trouuer guarison pour moy i'ay cōpāssion d'autrui, asséurant tout le monde que n'ay entrepris ce voyage pour entrer au feu : mais pour en sortir du tout, puis ay trouué plus grand mal ou chacun pretend si bon remede. Helàs mon grand amy Florisel, combien que vous me soyiez plus ennemy que la propre cruauté, si ne peut ma langueur ny tout l'abus & enchantement de ce lieu tant gaigner, que l'exécute contre vous aucune rudesse, delaisant le secours à qui le peut obtenir, & restant à iamais frustrée de tout bien, pour ne pouuoir mal vouloir à qui est cause du mien. Or demeureray donc seulete & solitaire, aimant le seul est vniue paragon de tous les vians & me régèreray en miserable solitude, pour m'exiler & bannir de tout soulas : promettant doreseuuant ne vouloir plus procurer mō salut, puis qu'il ne peut estre sans le dommage de celuy à qui ne le puis desirer. A ce mot se pasma encor vne fois : dont le Prince estant esmeu à grand pitié, dist au vieillart : Mon amy auez vous bien entendu la lamentation de ceste ieune Princesse. Oy Monsieur, dist il, & suis bien esbahy qu'elle n'a prins le remede au temps qu'elle l'esperoit le plus voyant mesme la gloire de celles qui sont en semblable estat, & dont elle a cogneu tant clere experience. Mon amy (respond le Prince) ne pensez pas que le mal que Damicene vostre maistresse a enduré soit à comparer à celui que souffre ceste Damoyelle : car on voit euidentement qu'elle fust son contrepoison qu'elle a tāt present, & Damicene la pour-

chasse par si longue espace : dont on peut aysément conclure, que voycy l'une des plus parfaites amytiés, que lon vid iamais attendu qu'elle postpose son propre bien à cil de celuy qu'elle ayme. Toutesfois i'auray plaisir de cognoistre ce qui en sera, & attendons icy iusques à la nuyct. Pendant lesquelz propos la Princesse reprint ses esprits & Falanges & luy dist : Ma Dame vous ne deuez entiermēt desesperer de vostre aise & soulas de peur de l'oster du tout à celuy qui n'a cure du vostre : car peut estre qu'il ne viendra iamais icy, parquoy vous ne deuez laisser à esprouuer l'auenture, considéré que cest homme m'a dist que la nuyct se change si bien que ceux qui ont esté en ioye le long du iour, retournent en desplaisance sur le soir, changeans leurs peines en gloire, & leur gloire en peine. Helàs Monsieur, respondit elle, comme distes vous que possible soit qu'il ne vienne iamais en ce chasteau, qu'il y est desia tout venu, & le porte continuëlement avecq moy, aussi que chose desia passée, ne peut estre qu'elle n'ayt esté. Parquoy ne me pēsez pas faire à croire tels songes, & me cōtenter de ce qui pourra suruenir vers la nuyct : car i'ay encores horreur de voir ce que ie voy en plain iour. Ma Dame, dist il, ie vous prie demeurons icy ce soir, puy nous partirons demain au matin, si vous assure que ie suis content de tenter l'auenture quand & vous : par ce moyen elle demeura, & voyans par la porte la chapelle de l'idole, furent fort esbahys de la grande richesse qui estoit leans, se donnans bō temps à visiter l'edifice par dehors, & toute l'œuvre du chasteau qui estoit de grande & ingenieuse architecture, iusques à ce que la nuyct les en tira : & retournans vers la chambre y virent vne infinité de torches & de flambeaux allumez sur chandeliers d'argent fin, lesquelz ne furent pas si tost mis à terre que Damicene ne retournast en la chambre, acompagnée de toute la troupe qui en estoit partie quand & elle. Si tost qu'elle entra se ieta deuant l'Idole.

le à deux genoux, disant O vindicateur (dist elle) de mes apetz aveuglez, puy qu'il vous a pleu me donner aujourdhuy ce plaisir de voir celuy tourmenté pour qui j'ay esté tant vexée & affligée, endurcissant vn cueur qui n'a peu auoir aucune compassion tout le long de ce iour, ie vous prie qu'en payement de ma cruauté comme iuste iuge chager mon inique plaifance, & la tourner en tristesse, à fin que ie face penitence de ma dureté inhumaine. Ce dit, l'Idole descocha la fleche de l'homme, dont la frapa au costé gauche d'un trait si enflambé que celuy de Danisel n'estoit rien au pris. Auquel les autres bras estans deuers le visage de la Damoyelle tirerent vn autre trait de lyesse, dont il fut conuert en ioye, & elle en doleance, tout au rebours de ce qu'ilz auoient esté le iour. Aussi fut bien la cerimonie contraire: car le Duc marchoit deuant avec vne gloire noppareille, & Damicene apres luy, faisant ses complaints, puy alloit Danisel menant grand ioye, & la pucelle Casile le suyuoit, pleine de pleurs & regretz. O douloureuse amertume (disoit Damicene) qui n'as moyen pour temperer tes extremitez & douleurs, excedans tous les limites de raison. Et toy raison si bien suffisante du payement d'une debte que n'ay voulu aquiter: cōme est bien employee en toy la vengeance d'Amours? ayant permis que la ioye du iour soit tournée en mescontentement de la nuict, pour rendre l'apareille à celuy qui n'a voulu escouter de iour. O Duc d'Astres mon vray amy, voyez icy vostre Damicene tant à vostre commandement par force qui la cōtraint, comme elle en souloit estre alienee de son propre gré: car j'ay moye lors Danisel, & luy Casile: payans tous ensemble le tribut au contraire moyennant nostre mesconnoissance, selon la loy qu'Amour a imposée, à ceux qui ne se vouloient reigler par icelles. Et disant telles & autres paroles, passa oultre: demeurant le Prince & la princesse fort esmerueillez de voir les

traitz que chacun receuoit l'un après l'autre: Parquoy le Prince dist à Arlande: il me semble ma Dame que Damicene vse d'aussi grande cruauté contre soy mesmes comme elle a fait contre ceux qui luy ont esté cause de ce faire. Il s'en fault beaucoup, dist elle, car elle a esté cause pourquoy ie n'ay voulu me contenter, selon l'appetit que j'auois de ma vengeance. Parquoy ne plaist aussi à Dieu, que Florisel gaigne aucune gloire sur moy, sinon celle que ie luy veux bien payer, par ma peine forcée. Vrayement ma Dame (poursuyt Falanges) ie m'estime bien heureux d'estre venu icy avec vous, si la gloire de mes pensees me pouuoit estre entierement otroyee. Neantmoins, comme le cueur me iuge, ie ne verray icy chose qui me deust plaie, & craignant irriter la diuinité, si ie pensois que ma Dame qui est celeste, deust estre suiuette à telz charmes & enchantemens, pour cōparoit en ce lieu, ie me repens de ma sole presumption, & prie aux Dieux me la pardonner, ayment trop mieux l'aymer & me donner peine par mes discours, en nulle ou fort petite esperance, que d'en estre reieté du tout par ma sole outrecuydace de l'atempter. Vous supliant, ma Dame, que retournions d'ou nous venons, puy que vostre part est assez esprouuee. A quoy la Princeesse s'accorda bien volontiers: car elle craignoit aussi bien perdre le sentiment du doux mal d'aymer que le Prince. Si s'en allerent de ce pas trouuerent leur troupe qui auoit fait acoustrer le souper.

De ce qu'il auint en Constantinople depuis que le Prince Falanges en fut party.

CHAP. IX.

Tous ceux de la court de Constantinople furent en grand esmoy, pour les mauuaises nouuelles de la guerre, & pour le partement impourueu de Falanges, spécialement Florisel, lequel depuis qu'il le sceut, n'eut plaie ne ioye, se voyant



se voyant sans celuy qui estoit la moytié de son ame. Or en ce temps arriva le Prince Zahir, & d'autre part le Prince Garin, tous deux venans à Constantinople, au moyen de la guerre que lon avoit desia crüe en plusieurs pais, & qu'at & eux grand nombre de barons & seigneurs, qui avoient avec eux couru le monde. Et tant de noblesse y survint de iour en iour qu'à peine y avoit il logis pour les gens & les chevaux. Si entendez que des que ces deux Princes virent la pucelle Timbrie, chacun d'eux y imprima tant son affection de la vouloir servir, qu'ilz n'atendoient que l'heure de luy pouvoir declarer, sans toutesfois que l'un sceust rien de l'autre : mais tât estoient outrez de sa bonne grace, conjoincte à son exquisite beauté, que l'un & l'autre en entreprint de merueilleux faitz d'armes, comme leurs histoires racontent particulièrement, le tout pour luy descouvrir chascun son cueur, dequoy elle s'aperceut assez tost à leur contenance : mais comme sage qu'elle estoit le dissimula, sachant assez plaisamment leur rendre à chascun son entretien. Si avint que le Prince Zahir trouva commodité de parler à elle, combien que ce fust avec vne telle alteration de fieur, qu'il perdoit geste & maintien, au moyen de la vehemence d'Amour qui le dominoit. Lors luy dit : S'il est ainsi

(ma Dame) que nature ayt mis ordre en ce que toute creature vivante soit rengee par la force d'Amours, combien donc plus deuriez vous croire, que vostre excellence peust avoir soumis tous mes espritz en vostre service? ie vous assure que i'en suis reduit en telz termes, que ie tremble deuant vous, comme celuy qui n'ose prendre la hardiesse de le vous faire entendre vous priant encores, ne prendre en mauuaise part la presente signifiante que ie vous en faitz, & croire que i'aymerois mieux mourir en vous obeissant, que de viure, & en riens vous desplaire. De ce propos la Princesse Timbrie rougit vn peu & luy rendit telle responce. Monsieur ie m'esbahy, que vous qui estes si bien apris en la cognoissance des choses, oubliez la loy d'honneur en mon endroit, sachant que ie suis fille, & publiant neantmoins l'affection que vous dites me porter. Or vous confesse bien que toutes choses naturelles sont par leur inclination incitees à aimer, si estce que le feu ne brulle que les choses combustibles, qui luy sont artifees, encores y a il moyen de l'estaindre par l'eau qui luy est contraire. Partant si auez trouué en moy quelque attrait d'amitié, l'occasion d'embrasement n'est si grande, que doit estre vostre attrempance à y resister, & vostre prudence à ne me requérir de chose q

sçavez n'estre en ma puissance, pour l'accorder, dont vous prie affectueusement ne vous en vouloit désormais deporter. Ma Dame (dist Zahir) ie vous prie ne vous fâcher, si vostre valeur & grandeur ont en ce vsé de leur office à me captiuer, n'estant demeuré en moy tât de discretion de pouuoir soustenir l'effort de vostre beauté: vous assurant qu'il n'est en mon pouuoir de me commander à moy mesmes qui suys desia entierement vostre. Je ne sçay (dist elle) comme vous l'entendez, de dire que soyez mien, puy que l'avez osé esuenter sans mon consentement. Et sur ce point, ne luy voulant tenir plus long propos, s'en alla fourrer parmi les autres Princesses, laissant Zahir trop melancolié de sa response, iacoit qu'il sentit son cuer allegé aucunement, de le luy auoir déclaré. Lors Garinter qui se trouua à l'autre costé de la salle, & ayant veu la contenance du prince Zahir tant à l'abordee, qu'il ne dansoit que sur vn pied, comme sur la retraire qu'il demeura tout pensif, cogneut assez tost ce qu'il y pouuoit auoir, receuant en soy-mesmes double peine, tât à cause qu'il doutoit estre preuenü, que d'une secrette ialousie qu'il conceut contre Zahir, pensant neantmoins de faire le semblable, & se descouurir à Timbrie, voyât le temps & le lieu, comme il fit: car il l'acosta bien tost apres, & luy dist: Ma Dame ie vous supplie me faire tant de bien, que nul autre soit receu en vostre bonne grace premier que moy qui la pense meriter, autât qu'homme qui soit, tant à cause du lieu dont ie suys yssu, comme pour la bonne affection que ie vous porte de long temps. A quoy Timbrie luy respondit: Seigneur Garinter, ie vous prie que le iugemēt que vous donnez des autres, soit aussi bien pour vostre contentement. Tandis suruint Darinel qui tenoit compagnie à Helene, qui abregea le propos, par ses ioyeux deuïs, auquel dist l'Emperiere Abra. Darinel mon amy, vous estes bien tenu à la princesse Helene, de ce qu'elle vous entretient si longuement

sans vostre Siluie, Vrayement ma Dame (dist il) ie ne suys donc pas grandement obligé à vous, de me iuger si leger, que ie soys separé de celle, sans qui ie ne me trouue iamais en moy-mesmes. Vostre grandeura tresmal apais l'experience d'amour, ou vous auez tout oublié ce que vous en sceustes au temps que vous en mesliez. L'emperiere se mist à rire, mon bon amy (dist elle) ie ie croy que voulez emporter l'auantage sur tous ceux qui aiment. Ma Dame (dist il) ie ne nieray ia que ie n'aye gaigné l'honneur contre vous tous: car la pluspart de vous n si bien colloqué ses pensées, qu'il n'y a plus que gagner avec eux. Je vous prie mon amy Darinel (dist Timbrie) dites nous comme vous l'entendez, est-ce pour moy que vous le dites, ne me voulez vous point? Il s'ust, dist Darinel, que ie le veux dire de moy-mesmes. Quoy doncques Darinel (dist le prince Zahir) il n'y a point d'amour en ceste salle, que le vostre ne supliast bien à tous, à vous ouir parler, & refusez-vous si belle Damoysele? Pourquoi non, dist Darinel, ie vous assure bien que la vehemence de mon affection est si grande qu'amour m'en fait largesse pour vous en prester à tous tant que vous estes. Et si vous mōsieur, le dites pour vous mesmes, on a bien cogneu en vous autant de faulte d'amytié, comme i'en ay plus qu'il ne m'en fault. Or quand vous en aurez affaire, i'en ay à vostre commandement, chacun se print à rire. Lors Florisel, y voyant la presse, vint & luy ieta son mot. Certes Darinel vous me deuez bien auoir oublié, de tenir si peu de conte de moy, au propos que dechifrez de voz amours, lesquelles nous auons esté compagnons d'armes, mesmes en la poursuyte q'sçavez. Depuis monsieur, dist il, vous en auez receu le salaire du dernier poinct, qui est le payement de tous voz maux: parquoy vous estes presentement moindre que moy, qui persiste sans esperance, laquelle vous auez maintenant perduë, en iouissant du bien pretendu. Surquoy Amadis de Grece se

rua à la traaverse . A ce que ie voy Darinel (dist il) vous nous rendez à tous nostre change. Certes sire (dist Darinel) ie n'ay pas beaucoup d'affaire à le gagner sur vous, quitez moy celà, ie vous quitte les armes: mais si le Roy Amadis en vouloit parler, nous orrions des faitz miraculeux enuers les vostres, iacoit que la beauté de ma dame Niquee fut si grande, que n'eussiez peu faire autrement que de la bien aymer . Ie vous mercie mon amy Darinel (dist elle) toutesfois ie voudrois bien sçauoir qui vous estimez plus belle, vostre Siluie ou moy. Celà s'en va sans dire, respondit il. Et s'il estoit ainsi que telle beauté deffailist en ma Dame, ie croy qu'elle ne vous doit rien en bonne grace, & en tout. Et vraiment i'ose bien dire de Siluie, que elle est tant belle, que beauté ne se deuroit nommer que par son nom . Quand il prononça ce mot, Helene dist à Oriane: Ma Dame deportons nous de disputer avec Darinel: car vous voyez que son affection est tant passionnee, qu'il ne laissera rien pour les autres. Ma foy dist lors le Roy Amadis, Darinel ne me fait moins de plaisir par ce propos, que fit quasi la gloire que ie receu à l'arc & la chambre enchantee attendu que ses deuiz amoureux n'ont apparence de moindre amitié, qu'auoit en son temps Apolidon, voire ie croy qu'il en y ait plus. Ie m'en assure bien sire (dist il) puis que ie pense emporter, le pris, voire par dessus vostre maiesté, laquelle à obtenu le renom de loyal amant, plus qu'autre qui iamais fut, ne sera: si ce n'est moy, qui ay obtenu cest honneur par sentence de vostre propre bouche (sauf à vostre grandeur, la preeminence de l'estat) quand vous m'avez preferé au Prince Apolidon, lequel vous fut egal, & moi plus sublime: parquoi, sire, vous me donnerez congé de celebrer le loz qu'il vous a pleu me faire, par vne chansonnette, dessus ma cornemuse, commençant de fait à chanter, sonner, & danser l'un par my l'autre, pour resiouyr la compagnie. Ainsi passerent plusieurs iours, esquelz Tim

brie fut fort importunee des deux Princes: mais elle se deffendoit honnestement, par paroles gracieuses & discrettes; combien qu'à mon auis, elle eust esté contente d'aymer ou l'un ou l'autre, à tiltre de mariage, principalement le Prince Zahir, qui estoit beau à merueilles & non moins disposé que Garinter, qui mesmes ne luy deuoit gueres en l'autre part. Or fut il ataint si au vif de son amour, qu'il commença à porter vne secreete enuie au Prince Zahir, tant qu'il determina vn iour trouuer ocaion de se ioindre à luy pour esprouuer ses forces, pensant par ce moyen gagner la bonne grace de Timbrie: toutesfois c'estoit conter sans son hoste, d'autant que le Prince estoit trop pour luy tenir contre care. Si est-ce qu'il se partit si secretement que personne n'en sceut rien, ne Florisel mesme, qui demoura fort ennuyé de son partement, doutant que il ne s'en allast mal content de luy, ne luy ayant dit ne quoy ne comment. Pour ce requit à sa Dame Helene, qu'elle luy voulsist permettre d'aller apres, souz promesse de retourner vers elle, avec luy ou sans luy auant que l'hyuer fut passé. Ce qu'elle luy otroya, combien que non sans difficulté, le priant fort auoir esgard au danger ou il se mettoit, à cause des inimitiez nouvelles, & qu'il retournaist bien tost, pour ayder à ceux qui se viendroient exposer en telle expedition pour l'amour de luy. Ce qu'il luy promist entierement, la requerât de ne declarer à personne son partement, à fin qu'il ne fust destourbé. Tant y à qu'il se partit vn soir, acompagné d'un seul Escuyer, auquel il auoit commandé mettre en ordre son equipage de cheual & harnois sans declarer par le chemin qui il estoit laissant la court assez troublee, pour l'absence de deux si bons Cheualiers: neantmoins chacun s'en consola, esperans que Florisel rameneroit bien tost Garinter.

Comme Florisel se mist en queste de Garinter, & de ses estranges auentures en chemin.

CHAP. X.

C 5

Or a-



OR aprochoir desia la feste de la natiuité d'iceluy vray Soleil, qui au iour de sa passion fit perdre la clarté à l'autre quand le Prince Florisel ayant cheuauché grand' partie de l'Empire de Grece à la poursuyte de Garter, pourchassa par mesme moyen s'il pourroit trouuer Falanges. Et vn iour des l'aube du matin se trouua en vne forest, ou il rencontra vne Dame acompagnée de douze Cheualiers & autant de Damoiselles pleurans & lamētās doloireusemēt la mort d'un Cheualiers qu'ilz couduisoient couché dans vne lictiere couuerte en dueil, lequel estoit encores tout armé, & son armet en teste, s'edu iusques à la barbotte, & aupres de lui estoit assise vne fort belle Dame, laquelle arrachoit ses cheveux à plein poing dessus le trespaslé, disant à haute voix. O mescognoissance fortune, pourquoy te monstres tu de prime face fauorable à celui que tu veux puis apres deffaire, à si grand' malheur? Helàs cruelle, ne te suffisoit pas le sacrifice tant de Cheualiers Grecz & Romains, sans prendre encores la possession de mon feu mari? Ha à Dieu, mon Seigneur mon

ami, Prince de Boëcie mon mari & espoux que l'inique mort t'a bien faict vn faulx bond, lors que pensois venir au plus hault degré de tēs nobles faicts d'armes! Helàs que Dieu n'a permis qu'il fust demeuré en moy, fruit de vostre succession, pour m'ayder à venger sa mort tant inhumaine, sans que contre l'ordre naturel le pere avecq Timbrieseule, soyent heretiers de tous les Royaumes & Seigneuries, à laquelle pleust ores à Dieu luy donner si bon mariage, que sa bonté fust de quelque part ressuscitée: Mais helàs, nous en sommes bien long, d'autant qu'elle demeure au pouuoir des Princes de Grece noz mortels ennemis en cōpagnie de sa cousine Helene: O mort m'as tu tollu mō mari à propos? lors que toute vengeance estoit en si beau train, moyennāt la liberatiō que Lucidor a faite de courir sus aux Princes Grecz en quoi le defunct eut peu faire grand deuoir à l'auancement de la satisfaction deuē à lui, à moi, & à sa posterité. Mais helàs! Artifile Princesse de Boëcie tu n'as pas esté si heureuse, ains cōuiet q̄ tu meures en viuāt voyāt ce q̄ tu veois deuāt tes ieux, & demenant,

ce disant vn geste d'extreme affection, iusques à tordre ses mains, pleurer & soupirer, tât que Florisel en eut grâd pitié, & plus à cause des propos qu'il auoit entenduz de ma Dame Timbrie, cousine de sa treschere Helene, coniecturant par ce langage qu'elle deuoit estre femme de feu son frere, occasion qui l'esmeut à plus grand' compalsion & à volonté de la secourir en tout ce qu'il luy seroit possible, pour l'amour de Timbrie, postposant l'aigreur qu'il eust peu prendre à cause de l'alliance qu'elle nommoit en faueur de Lucidor, nonobstant laquelle il luy dist : Ma Dame, ie vous prie prendre quelque peu de patience, & penser plustost à ce qui peut receuoir amendement, comme seroit de vous venger, & non pas vous arrester à ses larmes & lamentations, sçachant qu'en la mort n'y a point de remede. Et auisez au moyen par lequel ie vous y pourrois faire seruice, & me contenter moymesmes, pour aucune partie qui me touche en ceste vengeance: me disant s'il vous plaist la cause de sa mort pour me fonder en iustice, avec la raison qui sera de la vostre. La Princesse oyant Florisel ainsi parler, haussa les yeux, & l'estima soudain l'un des meilleurs Cheualier du monde, à la stature & proportion de ses membres. Helàs Cheualier (dist elle) Dieu vous vueille sçauoir gré de vostre bonne volonté, comme seul qui est pour vous en faire recompense : Mais consideré que ce fait icy doit estre reserué à plus grand effort que d'un seul Cheualier, ie doute que n'en pourriez venir à chef neantmoins ie ne veux pas estre si mal aprise que ie ne vous die bien du tout, comme il en va: esperant en Dieu que vous estes aparü à moi, pour me rendre le calme de ma tourmente. Or entendez doheq', que bien apres d'icy, sur les lisières de Boecie, y a vn Cheualier tant bien composé en beauté, & doué de telle force, que ie croy (selon mon iugement) qu'il surmonte tous les Princes du monde, en ces deux pointz se tenant presentement dans vn chasteau, qui appartient à vn sage personnage, duquel iusques icy nous sommes tresbien trouuez, sinon de puis quinze iours que de son chasteau sont sortis grand nōbre de Cheualiers dix à dix, & douze à douze, qui ont volé tout ceste contree prenans hommes & femmes ainsi qu'ilz les trouuoient pour mener au chasteau: & selon que l'ay peu entendre (d'aucuns qui en sont eschapez) on leur fait faire serment de declarer, s'ilz aiment ou s'il sont aymez: car pour l'un on les retient, pour l'autre on les laisse aller. Le chasteau est fondé en vne Isle que fait vne grosse riuere, n'ayant autre passage que d'un seul pont de boys, qui est gardé par trois Cheualiers ensemble. Or est ainsi, que venans à la chasse le Prince monseigneur & moy, pensant luy faire reparer la tyrannye qu'il exerçoit en ses limites sur ses vassaux & suietz, & plusieurs autres allans & venans par ce Royaume, delibera de combattre ces trois Cheualiers, mesmes (ce me disoit il) le faisoit plus volontiers pource que i'estois presente, à fin que ie visse sa vaillance, qui fut tant bien executee par luy, qu'ayant vaincu les trois gardes du pont, il trouua vn autre Cheualier, qui sembla plustost estre dyable qu'homme mortel, selon les grans coups qu'il donnoit, & comme pourrez voir par celuy de l'armet, lequel defendit fort & ferme la porte, que feu mon mary cuydoit gagner, tant qu'il y mourut à la peine: neantmoins l'ay prie qu'on me rende le corps mort lequel ie voys mener à Apollonie, pour esnouuoit le Prince Birmartes, ou Lucidor à m'en faire vengeance, ou Brion s'il y est. Or vous ay-je dit tout le fait: voiez si le cueur vous peut donner telle force ou hardiesse de le venger, à fin de m'oster hors de peine d'aller plus loing. Florisel ayant entendu les parolles d'Arfile, & par icelles men à pitié, mercia Dieu de l'auoir conduit si à propos, pour faire seruice à ma Dame Timbrie, en vengeance la mort de son frere, parquoy respondit à la Princesse. Ma Dame la raison que vous m'avez exposee est

suffisante.

suffisante pour mettre prouesse au cuer qui n'en auroit point : aussi la iustice que vous auez requiert que vous en soyiez satis faite : Parquoy croyez hardiment qu'ores que ie n'eusse vaillance en moy pour entreprendre vn tel acte, que ie mourrois de honte si ie ne le faisois. Commandez donques à quelqu'un de voz gés de venir avec moy pour me monstrier le chemin du chasteau, quand au surplus laissez m'en conuenir: car aussi bien partie de quelque autre deuoir vent que ie m'en aquite. La Princesse tant ayse que rien plus luy dist, quelle mesme luy feroit compagnie à fin que sa presence iustificast d'autant plus son champion. Et partant tournans la lictiere, prindrent le chemin deuers le chasteau, si requist la Princesse souuentefois Florisel d'oster son habillement de teste, comme les femmes sont tousiours curieuses de voir: mais il ne le voulut oncq, de peur d'estre cogneu, s'excusant qu'ils ne se descouueroient point iusques à ce qu'il auroit acheué la bataille, en laquelle (s'il mouroit) on le pourroit conter pour vn homme de son país depesché. Ainsi marcherent tout le iour en tel equipage, iusques à la nuyct qu'ilz arriuerent en vn petit village, ou Florisel s'alla loger à part, luy & son Escuyer. Le lendemain continuerent leur erre iusques environ les trois heures apres mydi au chasteau de l'Isle enuironnee (ainsi le mommoit on) lequel estoit basti de fort belles tours, & situé au milieu de l'Isle, ou arriua sonna la guette, faisant signe de gens de cheual, qui aprochoyent, au moyen dequoy y courut grand nombre de gens sur les carreaux & murailles, avec plusieurs Gentilz-hommes & Damoiselles, specialement en vne croisee de fenestre qui estoit plus basse, vne tresexcellente Damoiselle avec vn Cheualier qui l'entretenoit; mais ilz estoient si long outre le pont, que les suruenans ne les pouuoient cognoistre. Ce Cheualier voiant la lictiere presumpsa aussi tost que se pouuoit estre, & commanda que lon fist ouuerture d'un guichet, par lequel ne pou-

uoit entrer qu'un homme d'armes de frôte: disant l'un des gardes aux Cheualiers de la troupe. Messieurs s'il y a quelqu'un de vous autres qui vueille entrer ceans qu'il y vienne tout seul: car on ne laissera pas entrer d'auantage. Parquoy Florisel s'avança demourant la Princesse à l'entree accompagnée de sa suite, prians Dieu le vouloir preseruer de trahison, & luy donner victoire. Et comme il marchoit son petit pas, luy vindrent à l'encontre trois Cheualiers bien armez, montez sur grands coursiers, lesquels couchans leurs boys, trois ensemble, vindrent contre luy, & luy contr'eux si bien que du premier coup de lance qu'il donna, il en coucha vn tout royde mort par terre, & eux ne faillirent de leurs ataintes, mais il ne s'en esmeut onques ne peu ne prou, trop bien mettans les mains aux espees luy donnerent beaucoup d'affaires: mais Florisel les acoustra tellement en peu de temps, qu'il leur monstra bien qu'il scauoit faire, donnant à ceux de sa troupe vne ferme esperance de les venger par l'experience qu'ilz veoient en luy. Ainsi depesché Florisel de tous les trois, rendit ceux du chasteau fort esbahis de sa vertu nompareille: mesmement le Cheualier qui se tenoit debout deuant sa Damoysele, lequel demandant son cheual & ses armes, sortit bien tost apres armé de pied en cap, acoustré de verd sur vn destrier tout blanc, Or l'aperceuant venir ceux de dehors, commencerent à crier, à quoy Florisel cogneut que c'estoit le Cheualier qui auoit occis le Prince de Boecie, & le voyant si beau & tant adroit luy dist: Seigneur Cheualier si vostre discretion eust esté semblable à vostre force & vaillance selon sa representation, ie n'eusse presentement occasion de vous quereller l'inique loy icy obseruee aussi ne feroit la Princesse qui m'y a amené: tellement que si ne voulez prendre la correction de vous mesmes, en vous repentant, & luy requerant pardon, ie ne partiray de ce lieu sans vous y contraindre: vous requerant de rechef en faire la iustice de

ce de vostre propre instinct naturel: attendu qu'il vous sera plus honorable, que faire autrement. Le Cheualier tenant l'œil fiché sur Florisel, tandis qu'il parloit, se contenta fort de sa disposition & corsage: toutesfois luy respondit: Seigneur Cheualier ie pense bien que vous estimez auoir plus de droit en ceste entreprise, que vous n'en y trouuez à la fin, espétant quant à moy que ie la pourray deffendre à bonne equité. Aussi scay-je bien qu'il se fait plusieurs tortz au monde, que lon veut debatre par raison, & quelquefois à tort contre droit, moyennant les promesses que les Cheualiers font souuent, sans scauoir quoy ne comment: ce que ne devez ignorer, si vostre phisonomie ne me trompe; & d'autant estre plus tardif à contreroler les entreprises cheualeureses. Parquoy ie vous declare que celuy qui est la mort n'auoit iurisdiction en ce lieu, pour nous faire inhibition & deffence de delaisser la coustume que nous auons icy trouuee, & non mise sus par nous mesmes, vous assurant que la mort m'a autant desplu, qu'elle pourroit à vous: toutesfois vous scauez que tout homme est astraint aux choses, auxquelles l'honneur l'oblige: mais puis que c'est force, prenez vne lance, & moy vne autre, & finissons ce proces, Florisel qui n'oyt aucune aigreur en tout le propos du Cheualier, & l'estima fort, & luy dist: Monsieur à vostre parole, & aparence de vostre vertu, ie voudrois bien me pouuoit excuser de ce combat: mais la foy promise (comme auez dechiffré) m'a reduit à ce point, que il n'y a subterfuge pour moy, & si croy que vostre cause n'est pas du tout sans raison: toutesfois puis qu'il vous à plu egalier nostre droit remettant la iustification en noz forces, vous me ferez don d'une lance ou souffrirez que l'en aille querir en ma cōpagnie. Soudain escria à vn sien Escuyer qu'il en apportast vne; puis luy dist en la baissant. Or sus donc Cheualier voyons à ce coup le tort ou le droit que nous auons, à fin de le perdre, ou le gaigner l'un ou l'autre. Ce

disant desloge, courant à bride abatuë contre Florisel qui le receut, s'entredonnans si grans copps de lance, que sans leurs harnois s'entamerent aucunement la chair, & volans les pieces, se ioignirent si rudement de leurs corps & des cheuaults, qu'ilz tomberent ensemble à terre, y demeurans vne espace de temps tous estourdis: mais Florisel se leua premier, & empoignant l'escu & l'espee, s'en alla trouuer son aduersaire qui se mettoit en pareil arroy. Si commencerent ensemble vne si cruelle bataille que lon ne vid oncques vne telle entre deux Cheualiers, si bien que des mailles & pieces de leurs armieures, le pont estoit tout semé, estimans bien ceux qui les regardoient, que iamais pas vn deux n'en eschaperoit la vie sauue: car ilz furent ainsi plus d'une grande lieue sans reprendre haleine, dont ilz auoient grand besoing, toutesfois l'un ne l'osoit faire auant l'autre, de peur de monstrer signe de recreance. Ce pendant Florisel qui ne s'estoit veu iour de sa vie en tel destoir, sinon vne fois avec le Prince Anaxartes, pensant que ce fust luy, le reclamait, quelquefois, aussi faisoit l'autre, lequel se sentât en grand destresse, delibera s'en mettre hors à vn coup, lequel il ramena de telle force sur l'escu de Florisel qu'il le fendit depuis le chef iusques à la pointe, dont il tomba de la main, & descendit le coup si rudement sur la cresse de l'armet en croissant, que s'il n'eust esté de fin acier, il estoit en grand danger de sa fin: neantmoins il fut tel, que force fut à Florisel de mettre vne main à terre, dont il eut si grand honte que la colere luy redoubla sa force an bras: dont vint de furie luy pensant fendre la teste en deux, & le coup passa l'escu & l'espee qu'il auoit parée, & tomba sur l'armet, qu'il treucha tout iusques au taiz, dont le Cheualier vert donna de deux mains à terre: mais se releua bien tost, en volonté de rendre le change à son ennemy: mais le sang qui luy couloit sur les yeux luy portoit grand nuissance. Ainsi durerent trois heures sans cōnoissance d'auantage de l'un sur l'autre.

sur l'autre qui sembla tourner à la fin du costé de Florisel, tombant l'autre tout estendu au milieu du pont. De quoi la princesse Artifile & sa compagnie eurent grand' ioye, estimans le debat estre reduyt à fin, estans de l'autre part ceux du chasteau en grand' perplexité : toutesfois ne dura gueres que les deux parties ne fussent esgales en desplayance, parce que Florisel qui luy pensoit aller tollir les armes chancela en danger de choir du pont en l'eau, si les barrières ne l'eussent soustenu, si ne garderent elles pas de prendre sa mesure en la place : estimant vn chascun, qu'ilz fussent tous deux morts. A ceste occasion la Dame qui estoit apuyee à la fenestre, les commanda porter en la salle. Lors voyant Artifile que lon emportoit Florisel fut tant outree de n'y pouoir remedier, qu'à l'heure elle se pasma, & apres qu'elle se fut reuenue s'escria : O bon Cheualier, que vous auez fait pour moy de ne me dire vostre nom, qui me pourroit maintenât rengreger ma douleur. Ce disant & autres paroles piteuses ouyrent au chasteau force pleurs & crys, que faisoit la Damoyelle (qui durant le combat estoit apuyee à la fenestre) sur les deux naurez, spécialement sur Florisel qu'elle recogneut, en luy faisant oster son armet : car incontinent elle tomba comme morte, demeurans les assistants trop esmerueillez de la cause. Mais apres qu'elle reuint de pasmoison tordant ses mains, & iectant les grosses larmes. Helas Florisel de Niquee le meilleur des bons, dit elle, comme vous est auenu ceste malle fortune? sinon (comme ie pense) pour augmenter la mienne. O mon Dieu, comme vous a il pleu permettre qu'au temps que i'esperois aneantir mes infortunes, ie m'en sens plus acablee? A ha doux ennemy que vous estes presentement bien payé, de celle, à qui vous auez tousiours refusé le payement. O feu que i'ay moy mesmes allumé, tu me brusles en flamme ardente, laquelle est vne amitié, tendant à plus grande inimité : vne vie, pour plus forte mort : vne esperan-

ce, pour desesperer. Ainsi lamentant & plorant arrofa de si grande abondance de larmes, le visage de Florisel, que cela le refueilla comme d'un somme, ioinct le cry que faisoient les Damoyelles entour luy, lequel se trouuant en vne grand' salle, riche & bien tapissée, le fond estant d'Azur, & les ourages d'Argent, & au mylieu d'icelle vn throsne dressé, couuert de drap d'or sur lequel estoit posé vne statuë, assise en vne chaire representant l'ymage de luy-mesmes, si au vis qu'il estoit possible, & celle d'Helene aupres posée, en siege d'honneur, pour les causes que pourrez entendre cy apres. Or se trouuant à son refueil la teste couchee dās le giron de la Dame espleuree, la cogneut que c'estoit Artide de Thrace, parquoy se teut & faignit encorés le mort, pour le danger ou il se iugea, se voyāt entre ses mains : Dont elle continuant son dueil, le fit transporter en vne riche chambre, & le mettre sur vn lit, prenant garde comme il se porteroit, & l'autre Cheualier en vn autre lieu, commandant à ses medecins & chirurgiens mettre bon ordre à leurs playes : car le sage Astibel s'en messa, & assura la Princesse qu'ilz n'auroient que le mal. Et qui plus est ma dame (dist il) croyez que telle tormente n'est pas suruenue, sans esperance de mettre meilleure bonace en voz dolentes passions : parquoy prenez hardiment bon courage : car tout ne se portera que bien. Ha Astibel mon amy (dist elle) ne me donnez esperance en chose, laquelle reconurer est la perdre du tout : d'autant que ie sçay bien q le plus grand desplaisir qui me pourroit auenir, seroit la mort de ce Cheualier, & la conualescence me feroit du tout desesperer : car il s'en iroit, toutesfois i'espere que ie l'en garderay bien s'il peut reuiure, tant qu'autre personnage n'aura iouissance de ce qui m'appartient tant iustement. Ma Dame (dit il) vous parlez comme bien sçisee, & quant à sa vie n'ayez aucun doubte : mais reposez vous en sur moy, le delaisant la cerimonie de son iuge, sans craindre

craindre de luy faire mal : car j'espere que ce bruit mesmes le pourra esueiller. De quoy la Princesse fut ioyeuse pour la confiance de sa guarison, qu'elle manda à tous les prisonniers detenez iusques à ce iour, de s'aprester pour les ceremonies qu'elle vouloit celebrer ; s'acoustant elle mesme pour s'y trouver incontinēt. Florisel oyant tous ces propos, & estant entierement reuenu à soy, se sentant de telle force que peult estre celuy qui a perdu de son sang, pensa longuement s'il gaignerbit le hault, pour se mettre en liberté, estant trop courroucé d'estre tombé entre les mains d'Arlande, mesmes par l'effort d'un seul Cheualier, ioinct les menaces qu'il auoit entēduës de sa prison. Lās qu'est-cecy dist-il, que cuydant viure maintenant en repos avec ma chere espouse, la fortune me donne de si grandz trauerſes, me bannissant de la presence d'Helene, pour me renger en captiuité avec Arlande. Sur mon Dieu ie ne ſçay que ie face : car ie n'y voy nul moyen : & murmurant ainſi à par ſoy faisoit mille regretz d'Helene, & autant de chasteaux en Espagne pour eſchaper : estant delibéré de plus toſt mourir, que de faulſer ſa foy, neātmoins voulut biē voir les ceremonies, lesquelles il vid estant couché en ſon liēt, armé de toutes ſes armes, acompagné de dix Cheualiers commis pour ſa garde.

*De la cerimonie qui fut celebrée en la presence de Florisel au chasteau de l'isle. Environ-
née.*

CHAP. XI.

Incontinent que la nyxt fut venuē, on celebra la cerimonie accoustumee, en grand ſolemnité, ou il y auoit plus de cinquante torches allumees dans la ſalle, ou la princesse Arlande se presenta, veſtue d'une robe de veloux vert ſur toille d'or toute decoupee, & les tailla des reprises de S S d'or fort biē ouurees, ayant ſes cheueux deſuelopez, & deſſus vne belle

guirlande de riche pierrerie, marchant deuant elle vne fort belle Damoyſelle, qui iouoit de la harpe, & vn autre derriere portant ſa queue, avec grand nombre de Dames & Damoyſelles qui la ſuyuoient, chacune d'elles menees par la main de quelque gentilhomme auſſi magnifique-ment veſtu comme les Dames, hors mis Arlande qui n'auoit aucune conduite, ains marcha ſeule deuant toute la troupe juſques aux throſnes, ou elles ſ'agenouilla entre les deux ymages, & diſt en telle ſubſtāce. O ymage qui es representee en mon entendement, quelle force peult auoir eſtē ſi grande que tu ayes payē à ce Prince le tribut d'amours, que tu me deuois ſi iuſtement ? Ha à Florisel de Niquee que ne t'es tu contentē des cruantez dont tu as vſē en mon endroit, ſi auant que j'ay oubliē la mort de mon frere, qu'Amadis de Grece ton pere à occiſ, ſans que ta beaultē ayt tant captiue ma liberté que j'ay redoutē mon remede, craignant ta peine pour la recevoir en moy-mesmes plus grande, comme eſt apparu par experience de l'Idole des Vengeances. Helās mon amy, puyſ que raiſon de peine ne vous peult aucunement eſmouuoir, ie vous prie pour le moins prenez la en reſpect de celle que j'ay eu de vous, quand ie vous vis marcher derriere Damicene. Et vous figure qui eſtes mienne, & pour voſtre representation tranſmuez en moy-mesmes ; ie ſuys ſeure que ie vous ay, poſſede, & neātmoins ie vous perdz, attēdu que tout ce qui m'en demeure ne ſoit que douleurs : ie vous prie maintenant puyſ que ma voix n'eſt aſſez penetrante pour entrer en voſz oreilles, receuez au moins le ſon de ma harpe. Lors commença à ſonner & chanter de ſa gorge, en ſe complaignant de Florisel, & d'Helene. Et apres qu'elle eut acheuē, toute la compagnie commença à ſonner & chanter avec vn tel reuertiffement, qu'euffiez dit que la ſalle en trembloit, ſuplians par leurs acordz aux deux ymages, donner liberté à leur maiſtreſſe laquelle partit apres la
ceri-

cerimonie, laissant Florisel bien esbahy: lequel resolu d'mettre en effect la deliberation de eschaper par force, mist incontinent son armet en teste, & sortant de la chambre l'espee au poing, frapa premier sur les gardes qui regardoient la procession qui passoit. Ha a canaille (dist il) ia ne sera mon vostre intention de me faire demeurer icy par violence, donnant l'un d'eux si grand coup sur l'heaume qu'il n'eut oncques puy besoin de medecin, commençant tout soudain vne si cruelle bataille avec les autres, qu'il sembloit à voir cent Cheualiers quant à la moyne elle fut bien tost depeschée, esurant les autres à van de route, à quoy s'iront le Cheualier Verd desarmé, combien que guerres ny avoit qu'il estoit revenu à loy, & saillant contre Florisel l'espee au poing & vn escu en l'autre, qu'il avoit empoigné à la haste, pensa par sa dexterté faire vn coup de mainstre contre celui qui naguères l'avoit mis en tel estat. Florisel le recognoillât fut fort esbahy, & quant & quant ioyeux de le rencontrer en ce lieu. Si ne fit que parer à ses coups, sans luy en ruer vn seul. Aussi vous sçavez que c'estoit Falanges d'Astrelon vray & singulier amy: toutesfois ne se voulut donner à cognoître à luy, jusques à ce qu'il se vid du tout en liberté. Alors racourut de rechef le reste des fuyarts, lesquels Florisel acoustra d'estrange forte espaignant tousiours Falanges, lequel aussi ne frapoit guerres femme, à cause de la grande foison de sang qui l'avoit fort debilité. Finablement Falanges voyant tant de corps estenduz à l'estout de luy s'esbahit qui pouvoit estre celui qui tant estoit de courtoisie en son endroit, se tira à quartier. Adonc Florisel deslaga son armet, & Falanges le voyant à la face courut à luy, selon que là l'afecté souffrit, & se tindrent embraillez longuement sans pouvoir parler, d'exces de ioye. Et apres Florisel dit à son compagno. A a mon grand amy, qui seul auez puissance sur moy de m'eslogner de la veue de mon Helene, ie vous ay retrouvé, grace à

Dieu. Sur ce propos arriva la Princesse Arlande, laquelle n'avoit riens sceu de ceste dernière bataille, & voyant Florisel debout avecques Falanges, fut fort ayse de le voir en bon point: mais luy qui ne se fioit pas du tout en elle, demanda à Falanges s'il y avoit leas autres hommes de deffence que ceux là à fin qu'il ne receust autre outrage qu'Arlande luy pourroit procurer. A quoy Falanges luy respondit que non. Lors Florisel l'immoratif des bons tours qu'il avoit jouez à Arlande, s'alla mettre à genoux devant elle, & luy dist: Ma Dame je cognois & confesse l'ingratitude de l'Amour reciproque que ie vous devois, & les ruses dont il ay usé frauduleusement, pour eschaper de voz mains, me remettant presentement en leur puissance, comme forcé de vostre vertu, non pas de celle de voz gens: à condition toutesfois, qu'il ne vous plaise me traiter pis que ne devez ce bon Seigneur, qui est icy avec moy. La Princesse voyant Florisel en son pouvoir fut ravie de tel ayse, qu'elle ne fist aucun conte de ses hommes qui estoient mors devant elle. Certes (dist elle) Florisel, il semble bien que vous plus grande liberté que l'occasion ne veult puis que vous rendant à moy vous ne pretendez à autre fin sinon me vaincre & me tenir vostre prisonniere. Ha a Arlande, est il possible que celui qui a vaincu Helene se voullist rengier à vous? ma foy ie croy que non: mais cest vne discretion dont il m'abuse, pour effacer toutes les iniures que son pere & luy m'ont faites. A l'heure commanda aprestier les chambres pour les deux Seigneurs, & de les servir de tout ce qu'ilz voudroient demander si on en pouvoit fournir, non plus ne moins que sa propre personne. Ce qui fut accompli par les officiers qui en eurent la charge, en la forme qui leur estoit enjoinct.

Des propos que le sage Astibel eut avecq' la Princesse Arlande, touchât les affaires de Florisel de Niquee, & comme elle remit les deux Printes en liberté.

CHAP. XII.

E Stans les deux Princes logez en leurs châmbres, Arlande se retira en son quartier, ou le sage Astibel la vint voir biē ioyeux de ce que Florisel estoit en la puissance de la maistresse, si luy dist: Ma Dame vous devez desormais faire bonne chere, & prendre repoz de tous voz trauaulx, considéré qu'avez ceans celuy duquel pourrez desormais iouir à vostre contêtement: Car au cas qu'il fust si ingrat de ne recognoistre le bien que vous luy faites, & les passions qu'avez endurees pour luy, i'espere que mes sciences seront assez subtiles pour les vous rendre plus doux qu'un aigneau. Helàs Astibel mon amy (dist elle) il me sembleroit plustost le contraire: car i'ay tousiours eu opinion de le reduyre par sa force ou m'en deffaire du tout, iusques à l'heure presente que sa discretion m'a du tout vaincuë, me faisant vne si honneste requeste de pardon, que ie demeure plus conquise que iamais: voire tant, que sans la passion qui m'assuiettit à luy, ma grandeur Royale demeureroit obligee à ne luy faire aucun mauvais traitement, ayant sceu si bien iouer du plat de la langue, qu'il a desia imprimé en moy vne volonté de luy donner liberté. Tant y a Astibel que ma force n'est pas pour resister à la sienne, & ne croy que voz sciences puissent rien valoir contre personne si vertueuse. Aussi n'est raisonnable que ce qui consiste en franc vouloir de m'accorder ou non qu'il y soit rengé par fraude ou violence. Sur ce propos Astibel se retira en sa chambre, la laissant en la sienne avecq' ses Damoyelles, ou elle dormit bien peu de long de la nuytee. Parquoy se leuant le lendemain de bonne heure, alla voir les Princes qui estoient

desi debout en presence desquelz elle fit venir tous les prisonniers de leans, & leur dist: Si la force du cruel Amour a peu subiuguer vous autres mes amys, par les tortz dont il est coustumier d'vser enuers vn chacun, ie croy que receurez pour ma descharge ce qu'il a fait contre moi-mesmes, par le moyen de ce Cheualier qui vint hier icy. Et croyez que si i'ay detenu aucun ceans qui eust bien voulu estre autre part, ce a esté pour auoir compagnie en ma solitude ou ie me suys retirée en ce chasteau, comme vous voyez, vous priant à tous ne prendre en mauuaise part le tort que ie vous puy auoir fait, en vous retardant de voz affaires, sans vous esbahir que personne qui ayt tant aymé comme moy, ait en ce perdu la discretion. Pource vous rendz à tous presentement vostre liberté, pour vous en aller la part que bon vous semblera. Ce fair elle commanda à ses gens de leur restituer à chacun tout ce qu'ilz auoient apporté leans, dequoy ilz la remercierent humblement. Lors Florisel luy dist: la vertu que lon void en vous est si grande que vous en obligez voz auerfaires mesmes. Or sçavez vous la raison qui m'a conduit en ce lieu qui est pour obtenir raparation de la mort du Prince de Boecie, en quoy sa femme & ses seruiteurs qui vindrent avecq' moy ne sont aucunement satisfaitz de ma promesse: à laquelle ie vous prie auoir egard, & me faire tant de bien de m'en acquitter enuers eux. Mon grand amy (dist-elle) la coulpe du Prince m'a aboly la faulte qui y pourroit auoir esté commise, combien que sois marrie de son trespas: mais puy qu'on ne le peult remedier, il fault supleer par discretion à ce qui est impossible. D'auantage il n'y a plus personne qui vous en poursuyue: car vous ne fustes pas si tost mis ceans, que la Dame & ses gens s'en allerent, & ne sçay qu'ilz sont deuenuz: neantmoins i'en remetz la satisfaction en vostre main. Florisel se contenta fort & luy dist: Ma Dame vous parlez si bien que ie ne me puis mal contenter de vous. Je vous prie

D

pour

pour ma descharge enuoyer quelque gentil-homme vers la venue luy dire de vostre part, qu'il vous desplaist grandement de l'accident de son mary. Ce que la Princesse fit incontinent. Or se tindrent les Princes enuiron quinze iours en ce chasteau, pour acheuer de guerir leurs playes, Arlande les visitant plus qu'à toutes heures du iour. Lors declara Falanges à Florisel tout ce qui estoit passé entre luy & Arlande à l'auenture de l'Idole des Vengeances d'amour, avec la requeste qu'elle auoit faicte à l'ymage d'auoir la garde de ce chasteau, & que son intention n'estoit que de luy attraper, tenant pour certain qu'il viendrait si tost qu'il scauroit les nouvelles de l'iniuste loy du passage, mise sur par elle. Or aprochoit le temps que Florisel auoit besoing de retourner à Constantinople, pour satisfaire au deuoir dont tout le faiz reposoit sur luy: Mais il n'y scauoit qu'y faire, craignant que la Princesse ne luy donneroit sa liberté, parquoy en communiqua avecques Falanges, qui ne luy en sceut que conseiller, voyant la grande amytié qu'Arlande luy portoit: toutesfois considerant la tresvigente necessité, fut d'auis qu'il sondast le gué quand il la trouueroit en ces bonnes, ce qu'il estoit prest de faire: mais la Princesse le preuint par vn moyen qui fut tel. Elle se voyant ordinairement iouir de la presence de Florisel, qui de plus en plus l'enflamboit sans allegeance, delibera domter son desir, & ne lui en parler iamais, estimant que son mal lui seroit plus leger à souffrir loing que pres de sa cause, le print à part, & lui dist. Ia sçache Florisel que ie ne doie aucun respect d'amytié à vostre Helene, qui m'a priuee de tout mon bien qu'elle vsurpe, si est-ce qu'ayant egard à l'effusion de sang de voz suietz qui pourroit auenir pendant vostre absence, ie vous remetz en vostre entiere & franche liberté, demeurant toutesfois vostre ennemye quant à ce point pour donner secours à Lucidor, contre vous selon la ligue, en laquelle ie suys cōprise. Florisel lors autant

surpris d'aïse que de merueille, voyant la chose ressortir à son souhait, respondit: Ma Dame, vous me faites de iour en iour plus cognoistre le malheur qui m'a réduit incapable de vostre bonne grace, en me saisissant auant d'vne autre, laquelle si à commencer estoit, ie ne croy pas que mon cueur se peust endurcir contre vous en telle ingratitude: mais puy que mon astre m'a reduit avec Helene en telz termes que vous voyez, force nous est de piller patience. Et quant à l'assistance qu'avez promise à Lucidor contre moy, ie louë la foy que vous lez garder, receuant plus de contentement de la vous voir obseruer pour luy, que si vous la fausiez pour moy, d'autant que ie desire vostre honneur. Finablement ma Dame, puy que c'est vostre plaisir de nous remettre en liberté, ie prens congé de vous pour donner ordre à mes affaires, demeurant au reste en tous lieux ou ie me trouueray prest de vous faire seruice. Ce dict, luy baïsa la main, & ainsi partirent luy & Falanges.

Comme la Royne Zahara partit avec ses deux enfãs à grand flotte pour aller en Apollonie, & de l'estrange auenture qui leur suruint.

CHAP. XIII.

VN iour cōme le rayant Soleil commençoit à descourir le sommet de la montaine de Caucase, la Royne Zahara qui auoit receu les lettres des Princes Constantins, reuerans elle & ses deux enfans de leurs secours auoit desia equippe grand' flotte de nauires à qui elle fit haulser les voylles & singler en mer, acompagnee de trente mille Amazones, & le Prince Anaxartes fist autre armee de grand nombre de bons Cheualiers qu'il commanda suyure celle de sa mere, & d'Alastraxerree sa sœur. Ainsi flotoient trois belles armees ensemble, courans la mer d'aussi loing que lon la pouuoit voir, & fut fait commandement expres aux Capitaines & pilotes, qu'au cas que fortune de temps les separast



separast les vns des autres, chascun auist de tirer la route d'Apolonie, ou leur intention estoit de faire vne algarade. En ceste deliberation nauiguerent enuiron quinze iours, depuis l'entree de Tanais en la mer Euxine, & de là par le bras saint George en la mer mediterrancee, puis passerent à la veüe de Constantinople sans se donner à cognoistre. Mais au bout de quinze iours le temps tournant sa robe, menaça la flotte de naufrage par contrarieté de ventz, & la mer en tel danger que les nauz furent escartees, l'une çà & l'autre là, en tel desordre qu'il n'en resta deux ensemble, & voguoient les voilles aussi pleins des ventz que leurs cueurs de crainte, fors la Royne & les enfans qui esperoient que Neptune Dieu de la mer auroit respect à la race de Mars Dieu des batailles. Or estoit la mer si enflée que l'on voyoit quasi les nuës couchées sur les vndes & les vaisseaux nageâs entre deux eaux, & regnoit vne bruine espesse induisant de iour la nuit toute noire. Ceste malace ilz coururent deux iours entiers, au bout desquelz la tourmente ietta la nef des Princes cõtre vne petite Isle (pauvre & infortuné abordement) maigre & desolée, sa verdure fennée, le feuillage sec

au perterre, les arbres couchez, froislez & brisez cõme si Typhon par son exhalation en eust renuersé la racine, & ne s'y voyoient que chouettes, chahuans, chauues souriz, & autres oyseaux de tenebres solennifans la tristesse du lieu par leurs voix douloureuses. De quoy la Royne & les enfans furent fort esbahiz, & desirans scauoir par quel desastre ceste Isle estoit si deserte, firent ietter soudain l'esquif en mer, & ancrer en vne rade qui se trouua garantie du vent par l'abry du hault rocher. Ce fait prindrent teire eux trois seulement avec leurs cheuaux, harnois & quelque petite provision atachée à l'arçon de leurs selles, d'autant qu'ilz n'esperoient pas en trouuer par la contree. Marchant doncq par ces landes desolées, & par ces boys foudroyez, decouurirent de loing quelques burons caudis, comme loges de bergers, dans lesquelles ilz trouuerent plusieurs hommes & femmes de grand aage, aussi iaunes, flattriz & desigurez que s'ilz eussent esté nouvellement desterrez. Anaxartes s'auança de leur demander le nom du pais, & la cause de sa desolation: mais ilz luy firent signe qu'ilz n'entendoient son langage, luy respondans par vn autre qu'il ne com-

prenoit pas mieux: mais ilz luy môstrerent de la main vn chasteau & vieil edifice fondé sur vne roche, à fin qu'ilz y allassent chercher adreſſe, & homme qui parlaſt à eux: au moyen dequoy marcherent vers le chasteau, deuant lequel ilz trouuerent vne fort belle foreine & sur le bord vn vieillard aſſis, tenant vn liure en ſa main, lequel ſe eſtoit mis là pour s'eſchauffer au Soleil qui commençoit à rayonner, le liure qu'ilz luy virent leur donna eſpoir qu'il pourroit parler, à tout le moins figureroit des caracteres, par leſquelz on l'entendrait, lequel ſe leua quand la Royne arriua & ſon filz, & ſa fille, leur faiſant la reuerence, & les ſalua en langue Grecque: laquelle ilz ſçauoient, & luy demandans la cauſe de la pauvreté de l'Isle, leur pria de ſe mettre à pied & qu'il leur en declareroit l'occaſion entiere. Ce qu'ilz firent, & fut fort eſbahy le vieil homme de leur beauté & richelle, luy eſtant bien auis que ce deuoient eſtre perſonnages d'eſtat que la fortune auoit là amenez, & leur commença à dire tout le faiet de l'Isle, ainſi que vous orrez raconter. Iadis meſſeigneurs (diſt il) que Troye la grande fut deſtruyte, les Dieux enuoyerent pardeça le capitaine Atrides qui ſubiugua ceſte Isle, ayant lors vn filz de luy qu'il engēdra en la fille du Roy y regnant en ce temps là, lequel filz fut nommé comme luy, demeurant apres ſon pere & ayeul ſeul ſeigneur de la prouince, duquel ſont depuis deſcēduz tous les Roys ſucceſſeurs en droite ligne iuſques à noſtre tēps (y a enuiron douze ans) que l'Isle eſt ainſi degaſtee: car du dernier Roy nommé Titannides, luy demeura vne ſeule fille apellee Franciane heritiere de ce Royaume, qui ſe trouua de ſi excellente beauté, que ie ne croy ſa pareille au demeurant du monde. Si auint qu'vn iour elle eſtant ſeule arriua en ceſte Isle vn Cheualier des parties Occidentales, tant beau & vaillant que la nature ſembloit en auoir voulu faire vn parangō, lequel trouua noſtre Roy ſur le point de perdre ſon Roy-

aume, par vn Geant qui tendoit à l'occuper à main forte, laquelle ce Cheualier (qui oncques ne nous diſt ſon nom) repouſſa, & deſconfit le Geant. Or deuint il apres amoureux de Franciane, & elle de luy pareillement, toutesſois comme ſage pucelle ne luy maniſeſta ſon amour, combien qu'il luy en fiſt ſouuent ouuerture, ains pluſtoſt le renuoyoit par quelque couleur d'excuse, nonobſtant qu'elle l'aymaſt ardemment, comme eſt depuis aparū. Ce que elle faiſoit tant pour euitier affection de honneſte, à quoy il euſt peu tendre & aspirer, que pour le peu d'eſpoir qu'elle auoit de mariage avecq' celuy que lō cognoiſſoit pour vertueux & vaillant homme. L'amour de luy croiſſant de plus en plus (ſans apercevoir vn ſeul grain du bon vouloir mutuel de la pucelle) le rendit à la fin fort triſte & melancolique, au moyen dequoy le Roy qui l'aymoit grandement chercha tout les paſſetemps, dont il ſe pouoit auifer pour le recreer, tant qu'vn iour il le mena luy & ſa fille à la chaeſſe, & de là en vne maiſon de plaiſance qu'il auoit ſituee au mylieu d'vn lac d'eau douce de bien trois lieues d'eſtendue, dans laquelle eſt vne tour carree, ayant vne belle chambre au bas, en laquelle eſtoit vn tombeau de marbre noir, clos d'vne eſpee avec ſon epitaphe engravē en lames de cuiure tant effacees qu'on ne les pouoit plus lire, ne ſçauoir qui eſt là inhumē. Or auint vn iour que ſe trouuāt ce Cheualier ſeul à ſeul, avec la Princeſſe en la chambre, la pria d'amour plus fort que iamais, ſurquoy elle luy fiſt reſponce de grand deſdaing, dont le pauvre amant luy diſt, Franciane vous avez peu d'egard à l'amytie que ie vous porte: parquoy preferāt voſtre vouloir au mien, ie veux ce qu'il vous plait & degainant ſon eſpee miſt le pommeau cōtre terre, & fourra ſa poitrine parmy la pointe dont ſe tranſperça de part en part, tombant pour mort en ſa preſence: dequoy elle eut ſi grand' pitié, que mettant tout ſoudain la main à l'autre eſpee qui eſtoit fichee dans le tōbeau, & l'arrachant de force

force plus que feminine, en fit tout autant que son amy. A cest instant suruint le Roy son pere qui vid ce pitoyable accidēt: mais aussi tost se leua vne grand' flamme en la chambre qui le chassa dehors & personne n'y osa rentrer, & se mist luy & ses gens à faire tant de plaintes & clameurs que tout le lieu en retentissoit: voylà comme nostre Isle est demeuree en si miserable estat. Or deuez sçauoir qu'à l'autre costé de l'Isle y a vn perron, auquel sont engrauēz certains mortz, par lesquels on a encores esperance que ces deux amans reuiuront: aussi lon void chacun iour au matin les deux espees sortir de leur cueur, & eulx se pourmener sur le cay qui est autour de la maison, sans toutesfois que lon puisse aller à eulx, à cause du feu que vous ay dit, & du lac qui est plus impetueux qu'une furieuse mer, tellement que quasi personne ne l'osa passer onques puis. Ces choses sont causes du mal & solitude que nous souffrons icy, & combien que plusieurs Cheualiers, conuoitans par honneur esprouuer l'auenture, soyent passez delà, nous n'auons iamais sceu nouvelles de leur retour. A raisō dequoy le Roy, qui vit encores, a ordonné que personne n'y aille, ce que lon n'a faict y a plus de six ans, tant pour la deffence, que pour ce que le lieu est desert & inaccessible: car voylà le lieu (dist-il) messeigneurs sur le sommet de ceste haute montaigne qui est plate & vnue au dessus, & au mylieu d'icelle le lac avec la maison appelée le Palais doré, à cause qu'elle semble de pur or quand le soleil y rebat au matin ou au soir. Ainsi ne demeurent en toute ceste Isle que vieilles gens, qui prennent plaisir à estre solitaires. Certainemēt (dist la Royne) vous nous contez merueillez: mais dites nous ie vous prie, que deuiēnt ces Cheualiers q'essayent l'auēture. Nous n'e sçauons riēs (dist il) qui leur causa plus grand desir d'y passer, avec la confiance qu'ilz auoient en leur diuinité presmee, qu'il leur seroit octroyé, ce que nature denie à tous.

Au moyē dequoy Anaxartes dist à sa mère: Ma Dame, s'il vous sembla onc que ma grādeur m'obligeast à entreprendre haultz faitz d'armes, ie supplie vostre maiesté & ma sœur Alastraxeree me ceder le droit de ceste esprenue, & si d'auēture, ie ne venois demain au soir, vous passerez apres si bon vous semble. Mon filz (dist la Royne) faites en ainsi que vostre diuin esprit vous conseille comme celuy à qui sont reservees choses plus qu'humaines, combien qu'eussions mieux aymé vous tenir cōpagnie pour participer en la fortune telle que vous pourroit auenir: par ce que vostre absence nous pourra faire plus de mal en craignant vostre peril, que ne feroit la mort mesme. Ma Dame, dist il en souzriāt, ie vous mercie humblement pour tout ce qu'il vous plaist me dire, vous asseurāt que pour ceste seule occasion veux-ie aller sans compagnie, à fin qu'en obtenant victoire (comme i'espere) ma gloire ne soit amoindrie d'y auoir esté vous & ma sœur presente, ainsi m'en voys, recommandant vostre grandeur en la garde de ceux que ie pense m'estre favorables en ceste entreprise.

Cedit: demanda le chemin au vieil homme qui luy monstra assez à regret, comme celuy qui auoit pitié de si belle ieunesse. Et Anaxartes chemina tāt qu'il arriva au pied de la haute montaigne, sur laquelle il monta à grand malaise, descendant de cheual, son escu troussé sur ses espauls, & faisant si bonne diligence qu'il se trouua en la plaine de dessus enuiron les trois heures apres mydi, que le Soleil commençoit à descendre, donnant vn lustre d'or a toute la fabrique, voire tel qu'il ne permettoit à l'œil de le regarder, apparoiſſant au mylieu du palais vn feu noir, avec vn bruit & estincelles de grās brandons, comme si l'air eust voulu faire resistēce au hault element, qui est le feu, & que chacun d'eux eust tashé à conseruer la preeminēce de son pouoir, veu la merueille de leur debat, en se demenant, deschirant les nuēs avecques vn son si outrageux que les oreilles en deu-

noient sourdes, & la veuë en auengloit tellement que toutes les puissances & sens naturelz commencerent à defaillir à Anaxartes, ce dont il ne se fust iamais douté: Parquoy s'agenoillant en terre tendit les mains au ciel, disant: Deesse de mes souveraines pensées qui auez peu tollir les armes à Mars mon pere invincible, par vostre extreme beauté, ie supplie vostre grâde clemence qu'il luy plaise m'otroier la gloire que ie voy icy aprestee deuant mes yeux remerçant en moy mon sens & entendement, à fin que ceste aventure ne me soit deniee. Et toy luyfant Apollo donne à ma veuë resistance contre la reflection de tes raiz, à ce que les cieux & tourbillons de cest espouventable lieu ne me puissent faire dommage. Finie sa priere il se leua, & alla droit vers le lac, sur le riuage duquel trouua vn pilastre de cuyure, ou estoient lettres grauees contre la souz base, & vn Cheualier apuyé, armé de toutes pieces, & vestu de iaune, hors mis la teste qu'il auoit descouuerte, & l'armet deuant ses piedz, & autour de luy tout encloz d'armures, haches, picques & lances, testes de mortz, & autres ossemens. Ce Cheualier auoit vne playe à la poitrine, de laquelle sembloit sortir le sang qui auoit taint toutes ses armes, son visage estoit pale: mais d'assez belle lineature, & sa teste reposant sur son coulede, homme de moyenne stature, de fort bonne proportion, les yeux fermez l'eau distillant d'eux en grande abondance se mesloit parmy ce sang, & composoient ensemble (en decoulant) les rubis orientaux, & autre pierrerie. Lors pensa bien Anaxartes que ceste entasseure d'armes estoient de ceux qui auoient auant luy trouué toute l'auenture à leur dam, desquelz ce Cheualier pleuroit ainsi la mort infortunee auenuë par sa main: dequoy le Prince ne fut sans frayeur, puy rememorant que celà, luy promettoit argument de plus grand' gloire, reprint courage, & approchant plus pres ouy ce Cheualier prononçant ces paroles avec grands soupirs, telle-

ment que sa poitrine s'enleuoit & rabaissoit, comme vn soufflet quand il se renfle pour rebouffer le vent qu'il a encloz en soy. O douleur si grande (disoit il) que son extremité ne me la laisse sentir? O Amour que tu m'as cher cousté! Helas Franciane, ne te suffisoit pas que ton amour commandast à mon espee faire de moy sacrifice, sans que ce mesme glaive t'occist quāt & moy, pour me liurer vne viue mort? Helàs me failloit il venir des regions d'Occident chercher ma fin en Orient, en voyant es yeux de ma Dame la perle qu'achetent les marchans de leuant? n'estoit-ce assez qu'un tel mal me vint de plus grand bien pour me delecter en la peine, iusques à me troubler l'entendement pour me tuer, à cause de celle pour qui ie deuois plus desirer ma vie? outre, avec vne telle rigueur que tous les bons Cheualiers qui viennent en ce lieu pour me remettre en liberté & franchise, ne tombent en moindre incoquienient que de la mort. Or aprochera tantost la nuyt qui me donnera vn peu de repos pour me soustenir plus longuement en langueur, ne souffrant encores ma fortune que ie meure estant desia trespasé. Adonc ouurant lors ses pauures yeux, vid deuant luy le Prince tout armé qui enlaçoit son heaume, fort triste de voir ce piteux spectacle & aussi de la memoire que telles paroles luy renouelloient de la peine qu'il souffroit incessamment pour sa maistresse. Mais ce Cheualier apuyé le voyant ainsi équipé, leua l'armet qu'il auoit deuant ses piedz & le mist en teste, puy embrassant son escu, & metant la main à l'espee, ha Cheualier, dist il, quelle force me faites vous contre tout droit & raison, pour le recevoir de moy plus cruelle que ie ne voudrois: & ce disant, s'en vint contre le Prince, qui luy respondit: Cheualier, la force dont vous me menacez ne sera iamais si grande qu'elle me face peur, esperant qu'il n'y a personne mortelle à q. victoire soit donnée sur moy, pourtant ne doutez à faire vostre pouuoir: car la moitié de la peur m'en est desia passée. Et

see. Et sans autres propos mirent la main aux armes, commençans entr'eux si cruel combat, que peu de temps apres la terre estoit couverte des lames qu'ilz auoyent trenchees de leurs harnois, & eux baignez en sang, autant Anaxartes que le Cheualier de la colonne, dont il se trouua en aussi grand destresse que iamais il auoit esté au parauant, si ce ne fut vne fois avec Florisel, deuant la tour de l'Vniuers, tellement qu'au vray il douta de sa personne. A la fin las d'escrimer vint à ioindre son ennemy de si pres qu'ilz s'entresaisierent au corps, lutans si viuement qu'ilz tombèrent tous deux par terre; ou ils demeurent vn temps embrassez, iusques à ce que par lasseté ilz perdirent la force des prinles.

Lors le Cheualier nauré mettant sa main en la grand' playe qu'il auoit au parauant s'escria horriblement, & ce fait, saulta dans vn petit bateau, qui estoit attaché au pied de la colonne & le destachant le poulsa arriere de la riuë, disant au Prince: Cheualier ie n'ay plus de temps pour me combatre contre vous, parquoi vous pourrez ici demeurer iusques à demain au matin, vous assurez d'auoir obtenu plus de gloire cōtre moi que nul autre a eu depuis q'ie suis ici. Ce dit, s'en alla de rādō au palais doré, dās lequel Anaxartes le perdit incontinent de veüe, estant aussi lassé, froissé, & entamé de coups & de playes qu'il auoit iamais esté. Or combien que le Soleil fust desia couché lui sembla impossible ainsi atourné de durer iusques au lendemain pour l'attendre, au moyen du sang qu'il auoit perdu & perdrait toujours. Neantmoins se leua debout, & approchant à la colonne leust le dicton Latin, qui contenoit telle substance. Le souverain des Amantz durera iusques à ce qu'il luy sera permis par deux procedans d'un ventre: auquel temps le profond de la sepulture sera manifesté, avecq' le secret des secretz, gardé si celerement pour l'immortel renom de ceste plaine. Le Prince demeura fort effonné de telles lettres, qu'un homme vivant n'auoit leues

que lui: mais comme il ne les pouuoit entendre, & ne sçachant que faire, vid venir la bac flotant deuers lui, non plus ne moins que si quelqu'un l'eust amené, se venant rendre au propre lieu de la colōne, dont il estoit parti. Ce qui donna tant de courage au Prince, qu'oubliant toute la peine passée, il s'apresta pour s'exposer à tout le danger qui en pourroit auenir.

Comme le fort Anaxartes arriva au Palais Doré & des grands merueilles qu'il y vid.

CHAP. XIII.

ANaxartes doncq' entrant en la barque, se vid sur vne eau plus noire & hideuse que n'est la mer en sa tempeste, mais les rais de son Soleil vnique, Oriane reuerberans sur son cœ̃ur, en tiroient tant de vapeurs tournees en pleurs & soupirs, qu'il n'en craignoit moins la suffocation que du lac horrible: toutesfois fit telle diligence à voguer des deux rames qu'il paruint en peu d'heure au cay: mais quand il y fut, foulé & rompu du travail de la rame outre la debilité de ses blessures, il eut fort à faire à mettre le premier pied sur terre, ce qu'il fit droitement à l'heure que le vespre commençoit à paindre le ciel de sa couleur obscure entrant dedās la basse court, en laquelle il regarda assez longue ment l'architecture du palais, qui estoit fort excellemment ouuré & figuré de diuerses sortes animaux releuez à demi taillé, & la couuerture & toute l'autre estoffe du bastimēt estoit tant clere & luisante, qu'elle esblouissoit la veüe des regardās: mais sur tout estoit la chambre de grand splendeur, en laquelle se trouua vn tableau de pur Cristal, auquel paroissoient certaines lettres noires, vn peu effacees par antiquité, & au dessus pendoit vne espee trauersant sur deux chesnettes, & dessous vne pucelle appuyée contre le mur, qui sembloit belle en perfection, vestue d'une robe toute semée de beaux Dyamans sur toille



d'or, & ses blonds cheveux entrelacez pendans aux deux costez sur ses espauls, & crespis au dessus, comme si on l'eust faict à propos, avecq vn fer chault, portant vne belle guirlande sur le chef, & des perles pendues à ses oreilles, & tenoit en sa main vne harpe, qui sembloit estre de fin or de laquelle elle iouoit fort armonieusement avec vne voix & grace qui aydoit beaucoup à sa beauté: tellement que le Prince eut tant de plaisir de la voir & ouir chanter qu'il ne sentoit nulle de ses playes. Si se tira vn peu à quartier à fin de ne troubler sa musique. Et quand elle eut finy sa chanson, lascha la harpe, tordant ses mains, & versant grande abondance de larmes, avec telles paroles. O force vigoureuse d'honneur & grandeur, que vous me vendez cher la reuerence que ie porte à Amour. O excellente beauté, combien me vaudroit mieux ne t'auoir iamais conquise, qu'ayant par toy perdu la liberté. Lors le Prince Anaxartes luy tint bonne compagnie au plus secret de son cuer, reduysant à sa memoire la beauté de la Princesse qui l'auoit du tout conuertie en elle. Helas, ma Dame disoit-il, bien serois asseuré de perpetuelle misere, si ie n'auois en vous la seurété que ceste Damoyelle demonstre si clerelement à son amy. Et si ie la tenois en ma main, ie me soulcirois peu de tout le mon-

de. Finy son propos ainsi que le iour se vouloit clorre, vid'entrer dans la chambre le Cheualier contre qu'il auoit eu le conflict, qui estoit richement acoustre, sans autres armes, que son espee qu'il auoit ceinte, lequel se presentant à la pucelle fust mal receu d'elle par vn faulx semblant, dont se mettant à genoux, il luy dist avec grands souspirs & gemissemens: Ma treschere Dame Franciane ie vous supplie auoir egard à ma longue & ferme foy, par laquelle i'ay esperé meriter vostre bonne grace, & mettez fin à la cruauté dont avez vü continuellement enuers moy. Il n'eust à peine acheué quand la pucelle luy respondit en colere, Cheualier qui m'aymeroit craindroit mon deshonneur, pource de portez-vous de plus m'importuner contre raison. Lors le Cheualier luy dist: Franciane, puis que vous ne voules de moy, ie veux vouloir ce qu'il vous plait: ce disant, degaigna son espee, & s'en trauersa à iour, comme vous a esté conté cy dessus. Ce que voyant la pucelle commença à tordre ces mains, & distiller les grosses larmes, disant: Je supplie voz diuines maiestez que ma complainte puisse monter iusques au plus hault de voz cieux, puis qu'il vous a pleu me mettre en telle peine que ie ne demande que la mort, pour chose q'ay faite, pesant qu'elle vo^{us} fut agreable, qui est la cōserua-

uation de mon honneur: tant y a que ie ne puy plus denier, à mon loyal amy qui gist icy mort deuant mes yeux, le payement de pareille amytié, me donnant à moi-mesmes semblable mort en tesmoignage de ma pureté, & salaire de ma cruauté. Ce disant & autres paroles assez lamentables, pensa arracher l'espee de laquelle le Cheualier s'estoit occis: mais ne la pouuant auoir, ietta la main incontinent à celle qui estoit pendue entre les deux chaines, & l'ayant empoignée se coucha dessus la pointe, avecq' toutes les circonstances qui vous ont esté desia declarees. Anaxartes fut grandement estonné de la flamme & fumee espesse qui sortit du tombeau, & du bruyt ensuyuant, & perdit quasi la force de se soutenir sur ses piedz. Lors fut tout le paue arrousé du sang des deux amans, qui nageoit dessus aussi vermeil & fleurant que la rose. Lequel le Prince regardant bien ententiuement y vid vne figure aussi semblable à la Princessse Oriane, que si elle eust esté representee d'as vn beau miroër faisant exclamations & regretz pour l'amour de luy telz qu'elle faisoit vraiment, quand elle se trouuoit aucunesfois toute seule. De ce secret il n'eut moindre deul que ioie, & dist en ceste sorte. O precieux sang icy espandu sur les blanches pierrees, entremeslé des larmes de ces deux loyaux amans, auquel ie voy le portrait de ma Dame, de laquelle ie me lamentois à si grand tort. Certes sang, tu es ma redemption, m'ayant ce iourd'huy donné ocaseion de patience, voire iusques à mourir en souffrance, puy que ie voy apparence que mes peines ne seront perduës. O Anaxartes, que tu es obligé à procurer le bien de celuy qui t'a rendu tant d'ayse, & se iettant sur le Cheualier empoigne l'espee qui luy passoit parmi le corps, & l'entire à force, qui ne fust si tost faict, qu'il reuint du tout en son sens, & se dressa debout. Adonc cogneust il que s'amie s'estoit feruë de l'espee pour l'amour de lui, dont il eut si grand douleur qu'en soupirant se lamenta douloureusement: O

mort qui m'es retournée en vie, pour plus mourir. Et voyant le Prince qui tenoit encores en sa main l'espee qu'il lui auoit ostee du corps. O Cheualier, dist il, puis que tu as vsé de telle pitié en mon endroit, que i'en reçois presentement plus grand cruauté, ie te donneray guerdon de douleur, tel que tu m'as deliuré, receuant de moy-mesmes vne autre mort pour mon repos, & ce disant, se lance apres l'espee, de laquelle la Dame estoit trauessee: Mais le Prince l'embrasse si serrement, & l'autre luy que les playes s'ouurent luitans fort & ferme, tant que le prince terrassa en fin le Cheualier tombant quand & lui, tant estoit las, où ilz demurerent longuement comme vous orrez.

Comme la Princessse Alastraxeree alla apres Anaxartes son frere, & donnerent fin à l'auenture.

CHAP. XV.

LA Royne & sa fille qui estoient demeurees avec le vieil homme, ouyrent vn si grand bruyt à l'instant que le Prince auoit tiré l'espee du corps du Cheualier, qu'ilz eurent grande crainte qu'Anaxartes n'eust quelque mal, & d'autant plus que le bon homme leur dist qu'elles n'auoit entendu vn tel tonnerre de leans: au moyen dequoy Alastraxeree dist à sa mere: Les Dieux, ma Dame, demonstrent assez clerement par si euident prodige quelque accident auenu à Anaxartes mon frere, puy que les combles du hault Ciel en sont percez: parquoy s'il vous plaist ie ne seiourneray plus icy sans me mettre en mon deuoir pour sa deliurance. Ce disant, elle s'achemine par le sentier qu'Anaxartes estoit allé, acompagnée de la Royne qui ne la voulut abandonner, ains voyagerent ensemble quasi toute nuyt au cler de la Lune, iusques enuiron l'aube du iour, qu'ilz arriuerent au bord du lac du Palais doré, où le terroër & les seiches herbes n'e-

stoient seulement peintes & semées du sang harnois & ossemens des Cheualiers trespassés en ce lieu long temps : mais encores de plus fraiz de ceux qui auoient combattu le iour precedent. Et n'y trouuans à qui parler, pour demander que signifioit ce petit parc entaillé d'os & armures l'une sur l'autre, comme signes de Trophee, en desir de cognoistre l'auenture, & des nouvelles d'Anaxartes, marcherent auant, tant que l'une d'elles auisa le tableau pendu à la Colonne, lequel elles leurent puy voyas aussi le bac qui y estoit attaché, prindrent confort en esperance d'en sçauoir plus auant. Parquoy la Princesse Alastraxeree requist sa mere, qu'atendu que la barque estoit si perite, qu'il ny auoit siege que pour vne personne seule, que son plaisir fust la laisser aller au Palays doré : ce que la Roynie luy acorda bien enuis, demeurant toutesfois sur le riuage, & sa fille se met à ramer, assez estonnée du grand bruit qu'elle oyoit, de l'estrange feu & flamme qui se mesloit parmy les nuës, puis approcha si pres qu'elle vid la reflection du Soleil, batant contre l'edifice, & paignant les nuës prochaines à l'Orient, d'un tel email rougeastre & doré que lon void au col du paon. Or se resioissoit grandement la Princesse Alastraxeree voyant ceste lumiere & clarté, laquelle donne naturellement grande assurance en cas d'horreur & l'obscurité de soy mesmes frayeur, si bien que cela luy acreut le cuer, & commença à dire : O tresluy sans messagers des Dieux, mes peres & Seigneurs voitre aduenement me sert de signifiante qu'ilz ont reserué à leur fille l'issue de ceste auenture, ie ne sens aucune crainte à cause de la gloire que vous me denoncez, que par moy les campagnes de ceste Isle seront reuerdies, & les arbres secs bouteront & fructifieront. Lors son espee au poing se lança dans le palais, & passant la court, entra dedas la chambre, ou premier elle aperceut la pucelle faussee, de part en part, de qui la beauté singuliere l'esmeut à grande compassiō, parquoy mit

la main à l'espee qui luy passoit parmy son corps, & l'arracha, aussi tost la flamme qui sortoit du sepulcre commença à diminuer peu à peu. Et Franciane & les deux Cheualiers retournerent ensemble en leur esprit vital, duquel ilz n'auoient eu que quelques interuales iusques à cest heure là & à l'instant mesmes le terroir de tout le pais se reuestit de sa belle verdure, & gayeté naïue, dont l'enchantement l'auoit ainsi despoillée. Apres l'air se remplit de nouvelle musique des doux oyseletz, au lieu des autres nocturnes de mauuais presage, avec vn bruit de tant de menestriers que lon oioit par dedans le sepulcre, que les Cheualiers & Dames demurerent vne espace de temps comme rauiz de l'armonie. Adonc voyant Franciane son amy vis, beau comme elle l'auoit cogneu, & luy elle d'autre costé, il est impossible à langue d'exprimer la ioye qu'ilz conceurent tous deux, & les actions de grace qu'ilz rendirent l'un & l'autre à ceux qu'ils voyent auoir esté cause de leur resurrection : combien que Fraciane dissimulat le plus qu'elle pouuoit l'exces de son plaisir, si bien qu'Alastraxeree luy dist. Ma Dame, pourquoy ne monstrez-vous aussi bon visage que vous en auez l'occasion ? A quoy elle respondit : Ma Dame, la peine que j'ay soufferte ne me peut faire oublier l'office de mon sexe, & plustost que de le violer serois aussi preste qu'iamais à receuoir mort nouuelle. Ma chere amye, dist Alastraxeree, ne vous arrestez pas là, regardez la punition diuine qu'auiez vne fois encouruë, & gardez qu'en l'irritant de rechef, ne vous enuoye vne mort sans resusciter. Le Prince Anaxartes s'y vint mesler : disant, ma sœur (vueille ou non) le secret de son cuer est icy depaint en ce pauë arrosé de leur sang, comme si tout y estoit escrit de la main, comme j'ay veu l'experience de l'amitié que me porte ma Dame Oriane, dont ay receu grande consolation. Alors Alastraxeree baissa la teste pour se mirer aux carreaux : mais elle ne sceut rien voir, partant

tant que celà ne seruoit qu'à ceux qui estoient aymez, & aymoient pareillement: mais le Cheualier y veoit trop clerement les secrettes pensées de Franciane, esquelles il print reconfort, n'y ayant sceu rien cognoistre auant que Anaxattes luy tirast l'espee hors du corps. Ces choses ainsi passées ilz alloient tous quatre à la tumbé, quand arriua sur ce poinct la Royne Zahara, que la barque estoit retournée querir, aussi tost que sa fille eut passé le lac & mis pied à terre. Et apres le recueil honorable qui luy fut fait tant par ses enfans, que par le Cheualier & Franciane, vont visiter le tombeau ouuert, ou ilz virent vn vieillard ayant la barbe blanche & la teste chauue, acoustré en Philosophe, lequel tenoit en sa main vn roleau de lettres qui disoit ainsi: Semisthenes, homme sage & grand Philosophe, fist faire ceste sepulture & paué, pour le remede de dom Frises de Lusitanie, & de la belle Frâciane, lesquelz passeront iournellement par sacrifice ordinaire, elle maintenât tousiours sa cruauté iusques à ce que suruiédra en ce lieu vn gentilhomme qui le surmonte en vaillance, & vne Dame qui passe Franciane en beauté, lesquelz les pourront lors deliurer de la mort, dont ie les ay preseruez par ma science: moyennant toutesfois que de leur sang demeurera vne impression es carreaux de ceans, que tous ceux qui sont aymez, & aiment aussi parfaitement y pourront cognoistre (comme en vn papier escrit) toute la secrette pensée de leur partie, ores qu'elle la voulsist celer, & à l'heure sera veüe sans estre cognüe la cause de mō enterrement. Fort esbahis ilz furent de telle esécriture, & prenans le Philosophe l'un par la teste, l'autre par les piedz (lequel estoit enbaumé) la releuerent de là, & virent souz luy vne eschelle par laquelle on descendoit plus bas, ce qu'ilz firent, & trouuerent vne belle selle enrichie de statues d'or, taillées au vif, selon les ymages de plusieurs Roys, entre lesquelz & au plus hault y en auoit vn de pl⁹ belle corpulēce, & de meil-

leure grace & douceur de visage que les autres, lequel estoit assis en vne grande chaire vestu d'une robe de drap d'or, & la barbe luy pendoit iusques à la ceinture, blanche comme neige. Or cestuy n'estoit que comme endormy & au vray estoit tout plein de vie, ayant sur son chef vn escript gravé de telle substance. Tous ces Roys cy sont de la genealogie de Bretagne iusques au present Roy Artus icy enchanté par Simisthenes Philosophe, iusques à ce que luy fera compagnie celuy qui luy succedera, ne deuant rien aux precedans en force ne loyauté d'amour. Autour de luy estoient plusieurs chaires vuydes, & oyoit on en la salle grand bruit d'instruments, sans voir personne qui en iouast. Ainsi sortirent de là les seigneurs & Dames, & remirent le sage tout ainsi qu'ilz l'auoient trouué. Et quand ilz voulurent sortir du palais doré, ouyrent vn coup de tonnerre fort horrible, par lequel toute l'eau du lac fut desechée en vn instant, trouuans toute prairie verde, en laquelle ilz rencontrèrent le pere de Franciane qui acouroit à la nouveauté du bruit qu'il auoit entendu: car il esperoit tousiours que l'auenture prendroit fin de son viuant. Ce qu'estant auenu, n'est pas possible d'exprimer la ioye qu'il sentit, rendant mil mercis aux Seigneurs qui luy auoient fait ce bien: lesquelz il mena de là à vne sienne Cité fort noble, ou ilz trouuerent les vielles gens tous raieuniz. Lors le Cheualier declara au Roy son nom à sa requeste & instance, comme il estoit de Lusitanie region d'Espagne, que lon appelle presentement Portugal, gentilhomme de maison Royale: mais decheu de l'ancienne richesse de ses predecesseurs. Ce qu'entendu par le Roy, en contemplation principale de sa vertu, l'accorda avec Franciane, laquelle s'excusa grandement de la rigueur qu'elle luy auoit tenuë, pource qu'il ne luy auoit déclaré le lieu dont il estoit extrait: sur quoy il respondit: Ma Dame, si ie vous ay cele mon nom & mō lignage, ce n'a pas esté pour autre occasion,

casion, sinon que i'eusse bien voulu mon-
strer autant de bien & vertu de ma person-
ne, que i'eusse peu meriter de vostre amour
duquel ie me suis estimé indigne: car la
gloire qui me pourroit proceder de mon
sang, on la doibt plustost attribuer à mes
predecesseurs qu'à moy. Les nopces faites

& celebrees, la Royne Zahara & ses enfans
prindrent congé du Roy, retournans à leur
nef pour aller retrouver leur flotte: estans
acompagnez de dom Frises, qui mena de
là sa femme en son pais en quoy nous les
lairrons pour vn temps.

*Comme la grand flotte de Lucidor arriva à venë de Constantinople, laquelle les
Grecz voulurent empescher de prendre terre.*

CHAP. XVI.



LEs raiz du Soleil s'estendoient sur la
fresche rosee d'une matinee, paignât
les gouttes en fines lacintes, à l'heure
que le bras saint George se vid tout cou-
vert de galeres, galions, hulques, rubarges,
flouins, & mil autre sorte de vaisseaux de
Ponant, sur lesquelz venoit le Prince Lu-
cidor, acompagné de Roys, Barons, & au-
tres grands Seigneurs, qui luy donnoient
secours, desquelz l'equipage en leur hault
appareil d'armes, estandars, & pennon-
ceaux, rendoit vn merueilleux esclat sur
la marine, & monstrant assez la maiesté
des chef de l'armee: laquelle arriva & co-

gneué par les Grecz, coururent incontineât
aux armes, se rengens les vns aux galeres
& autres nauires qui estoient dedans le port,
les autres dressans esquadrons sur le riuage
au meilleur arroy qu'ilz pouuoient, son-
nans trompettes & clairons des deux co-
stez: tellement qu'estans comme ie vous
dy les armées rengées, tant par mer que par
terre, les Princes Grecz se tirerent à part
pour prendre conseil, si lon souffriroit aux
ennemys mettre pied à terre, pour les com-
battre en campagne, ou si lon leur deffen-
droit la descente: surquoy y eut de diuer-
ses opinions: mais à la fin fut auisé de re-
sister

sister & tenir bon au riuage : pource qu'au fort aller ilz ne pourroient que prendre terre malgré eux, sans recevoir en ce notable dommage. Aussi fut ordonné que Florisel de Niquee seroit tenu pour capitaine general des Grecz, & de tous ceux qui estoient venus à son secours : qui ordonna incontinent tous ses esquadrons correspondans les vns aux autres, à l'opposite de l'ordonnance que Lucidor auoit faite. Si commanda incontinent au Roy Frandalo d'inuier premier avec son armee de mer (charge bien adreesee, pource qu'il estoit fort utile au fait de la marine) aussi fit il si bon deuoir à l'acorder qu'il porta grand dommage de prime encontre. Quand au surplus de la gendarmerie on la departit en trois bataillons : dont le premier fut conduit par Florisel & son pere le vaillant Amadis de Grece. Le second fut mené par les deux Empereurs Esplandian & son filz Lisuart de Grece, avec plusieurs autres Roys & Princes. Et le troisieme demeura au treshault & trespuissant Roy Amadis de Gaule, avec ses freres & allies, l'Empereur des Romains & le Prince Anastarax, & le surplus des Roys & Princes de leurs secours à pied & à cheual. L'auantgarde de Lucidor fut donnee à la Royne Zahara & ses deux enfans, avec dom Frises de Lusitanie, à cause du grand nombre d'arcs qu'auoient les femmes Amazones, & apres elles venoient les autres nauts avec Lucidor & Birmartes. Le Roy des Scithes fut le premier qui resista de la part des ennemis, contre les Grecz, estat luyuy de plusieurs Roys qu'il auoit amenez. Or estoient desia toutes les Dames de Constantinople montees au plus hault des clochers & des tours de la ville, voyans assez ayement les armées espanduës; tant par la mer que par les champs, & les harnois reluisans sur le riuage de la mer, les prouës des nauires peuplées de grand nombre d'archers, tirans fleches aussi dru que gresse, les mariniers caler les voiles pour prendre port, les autres ietans les esquifs en mer pour descen-

dre gens en terre, mettant en iceux les plus fortz & robustes hommes que lon pouoit trouuer pour exploiter tel effect, tandis que lon les soustenoit à force de traitz qui volloit de tous costez, l'un empesché pour ancrer, l'autre montant sur la gabie : l'un rampant sur l'antheme, l'autre à trousser & detrousser les cordages, bref le tumulte y estoit si grand que lon n'eust bonnement sceu auquel entendre, dont les pauures femmelettes effrayees commencerent à pleurer & crier par toute la ville, principalement Helene, qui voyant si grande quantité de Princes, tant Orientaux qu'Occidentaux, assemblez pour elle, pour mener si cruelle guerre, le dechiroit la face tendre, & tiroit ses cheveux dorez, & en fin tomba pâmee dans le giron de la Princesse Oriane, laquelle la fit solliciter & apporter de l'eau, tant qu'elle se reuint, & lors commença à exclamer. O Dieu createur & Seigneur des lumieres, ayes pitié de tes peuples, & tourne sur moy tout l'infortune de ceste predestination. Las pourquoy m'as tu voulu doter de ceste beauté, pour celebrer l'immortalité de ma renommee en secondant la grecque Helene, par l'insiny carnage de tant de nations venues icy de si loing chercher leur sepulture ? Ha beau paisage (ierant l'œil tout à l'entour) i'ay grand peur que ne seras gueres sans estre taint de bien autre couleur. Ce disant, se laissa choir encores esuanouye : Parquoy les Dames se retirerent des carreaux & fenestres, & la porterent en bas, qui ne fut pas si tost fait, qu'il plus de dix mille femmes de la Royne Zahara approcherent si pres du cay du port qu'ilz combattoient quasi main à main, des nauires avec ceux de terre, qui estoient les gens de Florisel, s'estendant de la en auant toute la flotte du lög du riuage, sur lequel toutes les armées estoient aussi ordonnees pour les recevoir : comme firent les deux Empereurs & le Roy Amadis, lesquels soustindrent le Prince Birmartes & Lucidor si viuemēt qu'ilz depescherēt beaucoup de leurs gens, qui pensoient prendre terre

terre, les vnes faisans rempar de l'eau, les autres courans le riuage de leurs corps, & la mer raignans de leur sang. D'autre part Frádalo & ceux qui estoient cōtre lui, firent grād deuoir de s'acrocher les vns aus autres & cōbatre, & se mettre à fons. Ce cōst du ra assez longuement, auquel quasi furēt toy employez, tant pour assaillir q̄ pour faire resistance, dont chacun se trouua tant las & trauaillé, qu'il fut besoing de sonner la retraite des deux costez, sans que lon vous puisse declarer au vrai, lequel des deux parties emporta l'auantage, se trouua le nombre des morts & naurez presque pareil du costé des assaillans que des tenans. Ce faict, & les Grecs retirez en la ville, les François prindrent terre, tant que la nuit dura, ce que la Royne Zahara differa iusques au lendemain.

Comme la flotte se desbarqua, & de quelle magnificence la Royne Zahara & ses enfans prindrent terre.

CHAP. XII.

LE iour venu, la plus grande part de la flotte estoit desia desbarquee, quand on vint amener en terre vn chariot triumphal, que la Royne Zahara auoit ordonné estre equipé pour elle & ses enfans chose de telle presumption & arrogance qu'elle pensoit lui appartenir. Il estoit faict à dix belles arcures de marfil cheuanchans l'un sur l'autre à mode de Sphere, par excellente symmetrie, en tailles de molures, & entre deux remply de miroirs d'acier enchassés de fin or, & par dessus le chariot estoit figuré le Dieu Mars armé d'un harnois blanc enrichi de pierrerie ayant autour de luy les principaux Dieux que les gentilsz adoroyent, compartiz sur les connexes des arceaux, par dessous lesquels estoient trois riches sieges en façon de thronnes couverts de drap d'or, sur lequel estoient bordez tous les nobles faicts d'armes d'elle, d'Anaxartes, & Alastraxeree,

Or estoit le chariot atelé de six Licornes avecq' leurs selles & garnitures de grande richesse, & leurs cornes chargees de force paillettes d'or, portans chacune vne Damoysselle qui les manyoit, vestue de toille d'argent. Et deuant marchoyent douze Roys d'armes & heraultz portans les costes d'armes, selō la deuise du Dieu Mars, voltigeans à l'entour les Dames & Damoysselles de la cōpaignie de la Royne Zahara toutes armées, & montées sur cheuaulx legers, fort richement parez, avecq' vne infinité de menestriers, lesquels ne furent pas si tost sortis des nauires pour mettre à terre, que lon ne vint incontinent attacher l'escu de Zahara au deuant du grand arc du chariot, celuy mesmes qu'elle portoit quant elle deliura Lisuart de Grece, & aux deux costez furent penduz les escuz du filz & de la fille, & le sien pareil à celuy qu'il auoit lors qu'il combatit contre Florisel deuant la tour de l'Vniuers: celuy d'elle estoit verd ayant au mylieu la pourtraicture de Mars. Incontinent apres sortit la Royne Zahara, & ses deux enfans, armez de harnois singuliers, avec les surcortz de fin drap d'or traynans en terre, ouuers par deuant: leurs testes estoient desarmées & chargees de coronnes d'or. Si se mist la Royne la premiere dans le chariot en chaire du mylieu, & ses deux enfans aux deux costez: qui ne furent pas si tost assis, que tous les Roys & Princes payens ne se iettassent à genoux pour les adorer, laquelle reuerence faicte monterent sur le chariot enuiron douze Roys infidelles lesquels se coucherent sur le plancher, deuant les piedz de ces trois diuines personnes, tenant chacun vne espee nue en sa main. Qui fust l'ordre auquel la Royne Zahara estant desbarquee, marcha droit deuers la ville, allans deuant elle Lucidor, & les autres Roys & Princes de leur ligue, tant que la campagne estoit toute couuerte de maicsté & magnificence. Laquelle ne pretendoit autre chose que de recognoistre la ville avec telle brauade. Ce qu'en-

entendans ceux de dedans : contre ceste vaine pompe ne firent aussi autre effort , se tenans tousiours sur leur gardes , & estoient apuyez aux fenestres , tours & carneaux , pour voir le triomphe. Mais si ceux de dehors auoient l'œil eleué pour regarder contre mont le Prince Anaxartes qui y auoit le cœur quant & quant pour voir la princesse Oriane , laquelle n'eut moindre ioye de l'honneur en quoy elle voyoit celui à qui elle portoit vne affection incroiable : tellement qu'apres auoir fait quelques voltes autour de la ville , la Royne Zahara fit dresser ses tentes & paviillons au plus pres de la muraille , toutesfois hors la portee du trait : & plus loing se camperent les princes & Roys venuz au secours de Lucidor . Estant la Royne descendue fit conuoquer tous les principaux pour tenir conseil : mais suruint vn Roy d'armes de la ville , auquel fut accordé audience , qui parla en ceste maniere. Tresexcellente Royne de Caucase , & vous Roys , Princes & Seigneurs , de ceste assemblee , sçachez que mon souuerain seigneur Florisel de Niquee , prince des deux Empires & gouverneur de Constantinople , m'a enuoyé par deuers vous pour vous dire que la grande amytie qu'il vous a pleu autresfois porter à luy & ses predecesseurs le semble obligé à vne courtoisie (nonobstant la guerre iuree contre luy) qui est de vous presenter pour voz personnes les logis de plaisance qu'il a à l'entour de la ville : vous supliant d'auantage vous venir rafraichir en la ville , & il vous baillera telz hostages que vous tiendrez pour asseurez de tout bon traitement. Surquoy la Royne respondit : mon amy dites au seigneur Florisel vostre maistre , que si nous estions seulz nous ne refuserions ceste offre : mais parce que (comme lon dit communement) qui a compagnon à maistre , nous n'oserions bonnement abandonner la troupe , s'il nous veult venir voir icy il nous fera tresgrand plaisir. Florisel , leur response receüe , s'arma de toutes pieces , hormis

l'armet , & ainsi alla au camp de ses ennemis , acompagné de plusieurs grans seigneurs , ou il arriua à heure que le conseil n'estoit encores sorty : toutesfois y entra par consentement des princes , qui le receurent à grand' carelle , & luy faisant mettre vne chaire pour s'asseoir , se mit avec eux & les plus aparens de sa bande. Or se tenât là Florisel assez bonne piece à les regarder pour voir s'ilz luy diroient rien , & les autres s'attendans qu'il commençast à proposer de sa part , Lucidor changea souuent couleur , en voyant celui qu'il hayoit le plus au monde , combien qu'il confessast en luy mesmes de n'auoir oncques veu Cheualier de plus belle disposition : de quoy Florisel s'aperceuant , adresia sa parole à la Roine Zahara. Ma dame , & vous monsieur Anaxartes , & ma Dame Alastraxeree , j'ay eu grand plaisir de pouuoir venir icy pour vous saluer , comme mes bös seigneurs & amys du temps passé , vous asseurant qu'encores m'eust-il esté plus gräd s'il vous eust pleu me faire tât de bien d'accepter pour voz logis les cöditions que ie vous ay mandees : ce que i'entens bien que ne m'auez sceu acorder , à cause d'aucuns qui souz ie ne sçay quel pretexte de raison viennent quereller & reuoker vne chose qui ne peult estre deffaite : qui me desplait grandement de ce qu'ilz n'ont voulu condescendre aux offres legitimes , sans chercher la rigueur des armes , dont l'ysue est en la main de Dieu. A quoy ie les prie d'entendre pour la derniere fois : sinon i'en remetz la vengeance à celui à qui elle appartient. Seigneur Florisel (respondit la Royne Zahara au nom de tous) ie ne tiës pas nostre amytie estainte , en ce qui pourroit estre hors ceste querelle : quant au surplus , Fortune mettra ordre & fin aux choses à venir vous declarant que sommes deliberez vous reduire par nostre effort es termes , que vous demandons , puy que ne vous y rengez de vous mesmes . Florisel print congé d'eux demeurant encores le conseil arresté , qui n'entendit

n'entendit en autre chose, sinon à fortifier & remparer leur camp; & aux moyens d'assaillir la ville, en quoy les Grecs ne furent negligens de leur part, & la nuyt mesmes les conseils contraires d'un costé de l'autre furent tous d'une opinion, c'est à sçavoir de demander à son ennemy iournee au len demain. Pour laquelle les Grecz firent deux batailles de toute leur gent: dont la premiere estoit de cinquâte mille cheuaux conduite par le Prince d'Amadis de Grece, avecq son filz Florisel, & l'autre de tout le reste de la cavallerie & infanterie fut sous la charge au Roy Amadis de Gaule. Ce qui fust ainsi publié, au grand regret des Dames, qui ne firent que pleurer toute la nuict prians Dieu pour leurs maris & amys. En pareil arroy estoit le camp de Lucidor, qui sceust l'apprest de ses ennemis par ses espies, au moyen dequoy il ordon-

na semblablement deux bataillons: dont le premier estoit à la Royne Zahara, & ses deux enfans, avecq les Roys de Perse, & autres payens, environ de soixante mil cheuaux, & l'autre au fort Birmartes, & à Lucidor: auquel y eust plus mil Elephans, portans chasteaux avecques gens dessus, garniz d'arcz & fleches lesquels furent retenuz pour donner aux flancs, quand les armées seroyent iointes. Ceste fut la délibération de terre & semblable desseing le Roy des Schytes & Frandalo, chacun de sa part pour le faict de la mer Amiraux des deux costez. Ce soir les Chrestiens se mirent en bon estat, faisans deuoir Catholique, & les payens en leurs ceremonies & sacrifices d'encens & autres perfums aromatiques, avec infinité d'instrumens, attendans ainsi la venue du iour, tant d'un costé que d'autre.

De la premiere iournee & des harangues que firent les chefx principaux à leurs armées.

CHAP. XVIII.



OR fut le iour ensuivant cler & beau & l'air tendu des nuës vermeilles: au point, duquel les deux ostz estoient desia en ordonnance de bataille, qui redoubloit au Soleil sa clarté, par la

splendeur des harnois infinis, dont la campagne estoit toute couverte. Estant doncq les deux osts en veüe l'un de l'autre, escarmouche commença tresaspre par les avant coureurs, pendant laquelle les Grecz vol-

rigeoyent peu à peu pour gagner d'un plain fault vne montagne, à fin d'encrer leurs ennemis entr'eux & la ville : dequoy s'aperceuant les autres leur allerent fermer le pas en diligence. Lors le Prince Florisel se mettant au front du grand bataillon comença à dire en telle sorte: Trespuissans Empereurs, Roys, Princes, vaillans Capitaines & Soldats, si le tēps passé ne nous eut delaisé la memoire des nobles & vertueux faictz de noz predecesseurs, mesmes de plusieurs qui sont encores en vie, & presens en ceste bataille, i'eusse estimé assez raisonnable que moy, (qui vous à pleu elire chef de ceste armee, combien qu'indigne au pris de plusieurs d'entre vous) vous eusse faict vne harangue, pour exciter les cueurs à magnanimité & prouesse: mais vostre vertu desia cogneuë entre les Troyens, Romains, & Carthaginois, qui ont souuent experimenté les forces de voz bras, m'excuse de ceste peine, & tourne mon oraison enuers nostre Dieu, luy suppliant par sa grace vouloir maintenir hardiesse en ceux d'ou elle ne partit iamais. Si ainsi luy plaist, nostre victoire est indubitable, laquelle auenant ie vous prie (mes Seigneurs & amis) persister en voz rengs, moderant l'ardeur de l'execution, de sorte que la rapine & butin (qui apres ne nous peult eschapper) ne mette personne en deserroy, par lequel on pourroit perdre le certain, & reuelter Fortune. Plus vous auise de ne mespriser & contemner vostre ennemi, ains l'estimez bien autant, que vous mesmes pensez valoir. Comme à la verité les François à qui aujourd'huy aurez affaire, sont de la pl^e belliqueuse nation du mōde, qui à tousiours desconfit toutes celles qu'elle a voulu assaillir. Vous suppliant au surplus faire mieux que ne vous pourrois dire: & considerer que ceste victoire sur les vainqueurs de tous les autres peuples, vous dresse vn trophée de gloire inestimable, effaçant ou obscurcissant à vn coup les plus illustres de noz ancestres. Ceste remōstrance anima merueilleusement les Grecz à

bien faire autant que fit celle du Prince Anaxartes à ses payens. Seigneur, dist il, Capitaines & Soldatz on voit souuent que les Dieux monstrent leur puissance au fait des batailles, en ce que plusieurs fois le grand nombre des gens est rompu par le moindre. Mais combien doiuent voz courages estre asseurez de tout le hazard & danger, cognoissans pour certain que le bon droit est de vostre costé: mesmes vous ont icy enuoyé leur filz & fille pour executer leur victoire, de laquelle personne ne doit faire aucune doute, voyant la multitude de noz allies, & cognoissant la vaillance non pareille des conducteurs de l'armee. A tant me tairay, asseuré qu'estes plus promptz à l'effect dds œures, qu'à escouter telz sermons. Lucidor ne s'oublia de son costé à faire vne particuliere harangue aux Chrestiens en ces termes. Mes Seigneurs, ie ne vous veux vser de grand langage, pour accroistre en vous la hardiesse qui vous est naturelle & tant experimentee iusques icy par tous voz ennemis. Seulement vous veux reduire en memoire que deuez apuier vostre assurance en la maiesté diuine, laquelle cogneuë certainement roidira voz nerfs, & redoublera voz haleines pour executer sa iustice par noz mains, sur les iniques vsurpateurs de l'autrui. Si est-ce toutesfois que bon droit à m'estier d'aide: parquoy regardez sur toute chose à maintenir l'ordre militaire, qui vous sera ordonnee par voz Capitaines & chargens de bandes. Estans certains que ce seul poinct nous peult tollir la victoire que tenōs quasi desia entre noz mains. Considerez ausi outre le droit commun de ceste entreprise, l'obligation qu'avez d'assister chacun à son Prince naturel, pour luy aider à maintenir l'honneur qu'ilz ont de long temps aquis, ioinct le vostre mesme tant celebré & timpanisé, lequel seroit du tout aboli & aneanty par la perte de ceste iournee. Auisez encores combien moins nous nous hazardons en ceste bataille que ne font noz ennemis: iagoit (que Dieu ne vueille) que

E

nous

nous fussions rompuz par eux, le dommage ne pourra estre si grand de nostre part combatans en ceste capagne, noz femmes, enfans, parens, & amys demeurent en leur entier, sans perdre vn seul pied de terre, & si noz ennemis deuiennent à estre deffaitz (comme i'espere) nous serons tous riches, occupant leurs terres & seigneuries, avec glorieuse satisfaction de nostre iniure. Les harengues finies, le prince Anaxartes & la princesse Alastraxeree firent amener deux Licornes sur lesquelles ilz monterent. Si vont conduisans leur gros bataillon au petit pas vers leurs ennemys iusques à la distance du trait, fort bel à voir estoit vn frôt si large qu'il prenoit d'vn costé, depuys la greue de la marine, & de l'autre aboutissoit à vne aisse des mile Elephans, avec leur trait à main, pour deffendre la gauche: & si estoit renforcé d'vn nombre de trespuissans Geans, qui estoient de la garde de la Royne Zahara laquelle marchoit devant tous acompagnee de dom Frises de Lusitanie qui auoit tresgrand desir de s'esprouuer contre dom Florisel de Niquee, auquel il s'adressa suyuant les enseignes qu'on luy auoit donnees de son acoustrement. Apres marchoit l'arriere garde de Lucidor, qui chargerét la teste baissée, leurs ennemis opposites de si grande impetuosité, que la terre trébloit souz eux: mais premier qu'ilz ioignissent vous eussiez veu l'vne des plus merueilleuses pluyes de fiesches que lon vid onques choisir sur les Grecz, tant de celles que tiroient les Amazones de Zahara, que les autres qui estoient establis sur les Elephans: de sorte qu'elles cachoiert la clarté du Soleil, par leur infinie quantité, dont plusieurs Grecz moururent à l'ombre, & y demeura beaucoup auant qu'aborder. Mais aussi tost que les armées furent acouplees, se fit vn si merueilleux chameilliz que les montaignes & valles de là à l'entour retentissoient comme forges faisant incontinent par la campagne vn harat de cheuaulx sans maistres. Or se rencontrerent Florisel & dom Frises, qui

esclatans leurs lances l'vn sur l'autre, outre passerent comme vaillans champions: aussi n'y eut aucun Cheualier de nom & d'estime qui ne donnast son coup de lance brauement, dont il trebuchait quasi tousiours quelqu'vn d'vn costé ou de l'autre: enquoy Amadis de Grece ne faillit pas, qui abatit l'vn de ses gros lourdaux Geans royde mort par terre. La Princeesse Alastraxeree terrassa de son coup le prince de Brandalie, qui (outre le coup qui estoit mortel) ne se peut oncq' releuer de dessus la presse, qui se vint ioindre aux espees & aux masses, de si pres qu'on ne voyoit plus l'vn pour l'autre. Et fut la tuerie si horrible qu'on ne vous pourroit représenter par escript: mesmement à l'arriuee de Elephās qui flanquerent de leur trait le costé droit du bataillon de Florisel, & luy porterent gros dōmage, tellement que malgré leurs Capitaines, les Grecz commençoient à perdre de la pleine, sans le Roy Amadis, qui les voyant en tel danger, envoya incontinent le prince Anastarax, qu'il fit mettre à pied luy & tous ses gens, pour l'odeur des Elephans que les cheuaulx ne peurent endurer, desquelz à sa venue il rembarra d'vne merueilleuse hardiesse, avec l'ayde que luy donnoit son cousin Zahir, monstrant bien à ce coup là, combien on les deuoit estimer: car en moins que rien ilz rompirent ceste aisse d'Elephans & entrerent pêle melle parmy eux, leur coupans les iambes, dont ilz trebuschoient soudain, & faisoient bon marché des soldatz qui estoient sur leurs chasteletz, demy vaincuz par la cheute. Qui fut vn grand auantage pour les Grecz, tant à cause du dommage que telles bestes portoient en ce confit, que pour la consequence de leurs ennemys, qui se virent descouuertz d'vn costé ou leur faisoit le plus de besoing: les Elephans mesmes se sentans heurtez de telle furie, avec quelques flambeaux de feu gregois, coururent à vau de route, rompans le gros bastillon de Lucidor, dont peu s'en falut qu'il n'en perdist la bataille. Le tresvaillant Amadis de

dis de Gaule voyant ce desordre fist hastier le pas de son ost pour surprendre les ennemis, mais il ne peut si tost y venir que les autres ne fussent aucunement reserrez : car Lucidor & Birmartes mirent si grande diligence à les reünir & rallier, voyant le danger si apparent. Adoncs'escria Lucidor. Auant Seigneurs, auant Soldats, auant compagnons ferrez vous, & reparez ce mauuais heurt. Et ce disant (iaçoit que tout ne fust trop bien ordonné) soustindrent si viuement le Roy Amadis, acompagné de deux Empereurs, s'entresdonnans les vns tel choc à la rencontre que la vaillance des soustenans au premier reng donna loisir de reparer le desordre que les Elephans y auoyent fait, non toutesfois que la marque du dommage ne fust notable, à cause des grands armes du Roy Amadis & des Prince de son sang & de plusieurs Cheualiers nouveaux, dont ceste histoire fait mention. Lucidor aussi ne dormoit pas, donnant à cognoistre l'effort de son hault courage, & le desir qu'il auoit de forner le surnom qu'il portoit. Le champ estoit tant plein de morts d'une part & d'autre, que l'on marchoit en quelques endroits en sang iusques aux genoux, & q̄ la mer estoit tainte des ruisseaux decoulans de la terre, sans le cruel exploit que Frandalo & le Roy de Scithie faisoient les vns contre les autres, ou l'on voyoit plusieurs nauz ardre par les feuz artificielz que l'on iettoit dedans, tellement que c'estoit grand pitié de voir les pauvres gens se lancer dedans l'eau pour euitier le feu, à la misericorde de l'element qui n'en a point, voire que la grande quantité de nageans nuisoyent les vns aux autres. Ainsi furent longue piece sans rien gagner l'un sur l'autre par mer ni par terre ains eutonplustôt dit que la mort seule les deuoit tous separer sans autre victoire, que de demeurer tous pour les gaiges de leur honneur. Bien est vray qu'il y eut quelque peu plus de carnage en l'ost de Lucidor qu'en l'autre, à cause du grand nombre de tant de vaillans Cheualiers qui estoient

en la compagnie des Grecz solénifans sanglantement la pompe de la couche nuptiale de la seconde Helene, laquelle ne s'y espargnoit en pleurs & lamentations, sur le hault destours de Constantinople. Finablement l'effusion du sang fust si grande & l'execution de la bataille tant cruelle, qu'il n'y auoit cote d'armes, caparaçon, harnois de cheval, enseigne, guidon, n'y autre deuise de qui l'on peult recognoistre les couleurs, estans toutes surtaines de vermeil : & estoient les Soldatz si meslez, les vns avec les autres q̄ l'on ne les eust sceu discerner sans leurs criz. Les vns reclamans Grece, Grece, les autres Espagne, France, Perse : mesmes à peine les pouoit on entendre, tant y en auoit de diuerses sortes. Et n'est possible de vous raconter les merueilleus faicts du Prince Anaxartes & de la Princeesse Alastraxeree, laquelle esclarcissant les rengz, se vint ioindre au Roy Amadis de Gaule, qu'elle cogneust plus qu'à sa deuise, aux armes qu'elles lui voyoit exploicter, & les contempla longuement puis elle lui dist : Tres excellent Seigneur la gloire de voz illustres faicts incite mon courage à experimenter mes forces contre les vostres, m'estimât montee au feste de la renommee bellique, si ie puis gagner le dessus sur celui qui l'a tousiours eu de tous les plus vaillans du monde. Le Roy Amadis l'oyant ainsi parler, la regarda si ententiuement qu'il la recogneust & lui dist : Tres haulte Princeesse ia Dieu ne plaise qu'il me fust reproché sur mes vieilz ans vn seul acte de couhardie : mais quand à vous si i'ay quelque prouesse elle se pourroit monstrier à cause de l'amitié speciale que ceste querelle commune ne peult estaindre en moy, que pour la reuerence que ie porte à vostre vertu, plus que humaine. Alastraxeree fort contente de sa responce, passa outre se fourrant en la plus grand presse. A l'heure mesme se fort Birmartes, & plus de dix mil hommes à cheval avecq lui gaignerent le hault d'un tertre, tant pour estre en lieu plus auantageux, qu' aussi pour la

disposition de la bataille, laquelle reconnoistât quasi egalle & entre deux fers pour la faire trebucher du party contraire, deuailla du terre à bride abatuë, & donna vne charge aux flancz du bataillon des Grecz si furieuse qui leur tailla assez de besongne, & leur fit perdre terre: mais le nombre exquis des bons Cheualiers dôt ce flanc fut bien tost renforcé rallia la multitude, & non seulement firent resistance à cest effort ains par leur prouësse recouurerēt trois fois autant de terre sur leurs ennemys qu'ilz auoient perdu. Le Soleil s'alloit coucher à l'heure que vous eussiez dit que la bataille proprement recommençoit, aussi aspre qu'en la prime rencōtree, à cause de Florisel & Lucidor qui se rencontrent, s'estans recherchez toute la iournee l'un l'autre. Lors s'entredonnerent deux telz coups de lances, que les cheuaulx ne les sceurent porter, & tomberent tous deux: mais bien tost furent remontez, & commencerent le chamaillis des espees plus rude qu'autre qui eust esté en toute la bataille, tant pour la prouësse extreme des combatās qu'à cause de l'inimytie intrinseque qui les faisoit euerter iusques au bout: mais la nuit suruenant les separa, qui fit sonner la retraite d'un costé & d'autre, à laquelle ilz eurent tous deux affaire à recueillir leurs gens, à la reuene desquelz ilz ne sceurent cognoistre de quel costé estoit tourné l'auantage. Or y mourut de la part des Grecz, le Roy Mamely, le roy de Hongrie, le prince Brunadame, le roy Cildadam, avec autres Cheualiers d'estoffe. Et du costé de Lucidor y demeura le Roy d'Apolonie, le Roy de Boecie, & le Roy de Lacedemonie, avec six Roys payens de la compagnie de la Royne Zahara, & autres grans seigneurs & gentils-hommes de nom, & bien peu en eschaperēt sans estre blesez. Pareillement au combat de mer n'estoit le dommage moindre, tant pour le nombre de ceux qui auoient esté tuez du trait, que de la main, q̄ des réuersez en l'eau, ou estaintz & suffoquez, avecques leurs vaisseaux brus-

lez & mis à fond. Estant la nuyt seule cause de leur departement, sans aucune apparence de victoire, retournerent chacun en ses loges, ou ilz firent depuys ce qui vous sera déclaré.

Du grād dueil qu'on mena pour les mortz qui furent trouuez d'un costé & d'autre, Et comme la treue fut accordee pour trente iours.

CHAP. XIX.

LA retraite faite ceux de la cité voulurent sçauoir quelle perte il y auoit de personnes notables occis en la iournee. Et trouuans à dire les Roys que ie vous ay nommez & quelques autres Cheualiers, d'estime, le commun deul fut grād pour l'infortune de si grandz seigneurs, & la particuliere lamentation ne se trouua gueres moindre à l'endroit d'un chacun, l'un pour son amy, l'autre pour son seigneur, tel pour son seruiteur: tellement que lon commença par tout les sons & chantz funebres, & autant en firent ceux du camp de leur costé. Aussi fut donné ordre aux naurez & malades, entre lesquels se trouua le Roy Galaor, le Roy Garinter, l'Empereur de Rome, & Florens. Et apres que les Princes eurent fait ce deuoir d'enqueste, & visité leurs speciaux amys, chacun se retira en son logis pour prendre leur repas & repos. Le lendemain aussi tost que le iour fut venu ceux de la ville ouyrent sonner force trōpettes & clairrons au camp de leurs ennemys, & ayant demandé la cause à leurs espions, sceurent que ceux de l'ost auoient esleu le Prince Birmartes roy d'Apolonie, & le prince de Macedonie aussi Roy par le decēz de leurs peres. Ce que venāt aux oreilles d'Helene & Timbrie, redoubla grādement leur douleur, nature ne pouuant mētir en ce qui leur touchoit de si pres, du trespas desquelz elles auoient esté cause. Et cōbien que Timbrie eust biē voulu celebrer la cerimonie du dueil de son pere le Roy de Boecie: qui estoit aussi decedé, toutes-
fois.

fois contre sa volonté pour obeir aux seigneurs de Grece elle fut parée, & nommée Royne de Boëcie, reprenant aussi tost que le festin fut passé les acoustremens de deuil, comme firent aussi toutes les Dames & Damoyelles qui estoient lors dedans Constantinople, d'autant que lon n'en eust pas trouvé une entre toutes qui n'eust receu quelque notable dommage de pere, mary, ou parent: mais sur toutes estoient dolentes & espleurees: la princesse Helene & la nouvelle Royne Timbrie, lesquelles la gracieuse emperiere Abra reconfortoit aux mieux qu'il luy estoit possible: mes Dames (disoit-elle) vous devez tenir pour vray, qu'es cas de fortune, ou lon voit clement qu'il n'y a point de remede, est le plus expedient de couvrir son mal tant que lon peut, par ce qu'en le publiant on l'accroist tousiours d'avantage, principalement en tel lieu ou la raison s'en trouue obligee à cause de voz estatz: mais si me voulez croire vous obeyrez desormais à vostre tristesse par la seule cerimonie des habitz, sans plus vser de pleurs ny exclamations par lesquelles vous donnez double deuil à ceux qui sont assez dolens d'autres mortz particulieres, remplissant ceste court de melancolie au temps qu'aurions plus affaires de reconfort, vous vous feriez cognoistre vostre dileretion, sans perdre la reputation de la pitié naturelle que chacun peut ymaginer sans la voir: parquoy faites honorablement celebrer les exseques, louant Dieu de ce que il les a ostez de ceste vie transitoire pour les colloquer en la sienne perdurable. Or donc mes grandes amyes voylà mon aui: premierement de moderer voz criz & complaints acoustumees: & d'autre part envoyer au camp requerir les Princes de dehors, qu'il vous vueillent envoyer le corps de vostre ayeul & vous ma Dame Timbrie celuy de vostre pere, à fin de leur donner sepulture selon leur grandeur. Ce conseil comme bon fut incontinent mis en effect: le duc Guillaume fut commis pour aller en l'ost des ennemys de-

mander les corps des deux Roys, lesquels luy furent delivrez promptement. Or pour inhumer tous les mortz, & pour guarir les blesez, les plus sages & anciens adviserent de faire treves pour vn mois, en esperance que quelque bon acord pourroit estre forgé, lesquelles furent acordees au grand contentement de deux parts. Lors commencerent les payens à bruster les corps de leurs Rois & princes avec leurs sacrifices & immolations de bestes, & les autres qui estoient Chrestiens à les enterrer à leur mode, comme firent aussi ceux de la ville, aians esté à croix & banniers au cap requerir leurs Roys & autres des plus notables. Aux funerailles qui furent celebrees la Royne Zahara voulut assister, accompagnée de son filz & sa fille tous acoustrez de noir, en faueur de leur ancienne amitié, laquelle fut magnifiquement receuë de tous les Princes de la cité, venant au devant le Roy Amadis, & l'empereur de Rome, qui prindrent Anaxartes au milieu d'eux: la roine Zahara & Alastraxetee furent receuës entre les Emperieres Abra, & Leonorine, avec la Roine Oriane femme du Roy Amadis: car la pucelle Oriane marchoit derriere avec celles de son aage, de dessus laquelle ie vous assure qu'Anaxartes ne destourna gueres son œil tant qu'il eut temps & occasion de ce faire, & elle n'e fit moins de son costé, iacoit que ce fust le plus secrettement qu'il leur estoit possible de peur d'estre apperceuz l'un ou l'autre. Ceste veuë, sans pouvoir venir au parlemēt que devez estimer, mit bien le feu aux estoupes, dequoy nous deporterons de parler plus avant à ceste heure, pour reuenir à la princesse Helene: laquelle ayant le cuer trop serré de douleur de se voir occasion de la mort de son grād pere, ne se peut tenir de s'escrier à haulte voix sur le cercueil: Seigneur Dieu (dist-elle) pourquoy m'as tu mis en ce monde pour ne servir que de matiere & suget de meurdres & boucheries de tes creatures: Helàs tu me paye bien selon ma deserte des corps de mon

aieul & de mon oncle! O Seigneurs Grecz n'y a il entre vous vn seul amateur du bien public qui me sacrifie & immole, pour destourner toutes les miseres qui pourroient encôres auenir. Alors se lailla choir de foiblesse au giron de la princesse Alastraxeree, ou elle fut tousiours iusques à ce que l'office fut acheué: lors luy dist pour la consoler: ma grand' amye il vous fault prendre autre patience en voz auersitez (à cause du lieu que vous tenez) que ne fait le commun populaire: pensez que le monde a tant duré tousiours iminunde, & la fortune tousiours vne, n'abandonnant iamais la possession de sa propriété & inconstance. Considerez que comme les hautz arbres & les tours sont plus suiuettes aux ventz, foudre, & tempeste: aussi sont les hautz estatz plus exposez à perilz & ruines: & au contraire, d'autant qu'ilz surpassent les autres en degré de dignité, pareillement doiuent en toute vertu resister ou porter plus magnanimet les influéces fatales. Sur ces paroles elle vid sa mere faisant ses adieux pour se retirer au camp: si print congé d'Helene, & de Timbrie, & s'alla ioindre à son frere Anaxartes, lequel sortant de Constantinople y laissa son cueur captif es mains d'Oriane. Or furent conuoiez par tous les Seigneurs iusques au dehors de la cité, en laquelle par toutes les rues le dueil continua l'espace de cinq iours tant que tous les corps furent enseueliz.

Comme le Roy Sisirfan & dom Frises de Lusitanie avec dixhuit autres Cheualiers de leur ost enuoyerēt vn cartel de deffy au Prince Amadis de Grece, à Florisel de Niquee, & dixhuit Cheualiers de la ville, lequel fut acépté par eux.

CHAP. XX.

A Pres que les treues furēt passees de six iours, tous les Princes se trouuās vn iour ensemble dans le logis du Roy, dom Galaor (estant au liēt à cause de ses plaies) entra leās vn Roy d'armes vestu de sa coste aux deuises de Scythie, lequel

faisant la reuerence demanda aux premiers qu'il trouua lesquels d'entreux estoit Amadis de Grece, & son filz Florisel: ausquelz il presenta certaines lettres closes, disant que le Roy des Scithes les enuoyoit & demandoit responce.

Cartel & deffy du Roy des Scithes adressāt à Amadis de Grece & à Florisel de Niquee.

Estans venuz en ce camp pour Fauoriser Iustice, contre le tort qui par vous deux a esté faict au sang Royal de France, specialemēt par toy Florisel, vsurpateur du vray liēt du Prince Lucidor, nous estans à ceste cause trouuez en la bataille passée, nous semble chose enorme que tāt de gens de bien soiēt mors, & autres encores prestz à les suyure, & tout à cause d'une femme: Ce consideré iugeons raisonnable, que vous deux qui estes la source & origine du fait, deussiez aussi porter le faiz enuier de l'entreprise. Parquoy dom Frises de Lusitanie & moy auons deliberé de vous combattre vous deux, avec dixhuit Cheualiers des nostres contre autant des vostres: esperans que Dieu nous donnera vengeance sur vous, avec le fruit de toute vostre gloire redondant par mesme moyen à la nostre. Et ce à la condition que les vainqueurs pourrōt ieter hors du camp tous les vaincuz, & ceux qui sont dessouz leur charge tandis que la guerre durera: vous offrant feureté de camp de nostre part, telle que la desirons de la vostre partissant le Soleil par egal auantage, tant aux assaillans que defendeurs: les iuges de nostre costé sont, le Prince Anaxartes & la Princesse Alastraxeree: & ceux de vostre part seront telz que voudrez nommer dedans le troisieme iour de la date de ces presentes ausquelles mettons fin, comme esperans la mettre à toute la guerre. Apres que la lettre fut leuē il y eut diuerses opinions si lon receuroit le cōbat ou non, d'autant que ce seroit chose perilleuse de harzarder telz seigneurs en vn temps si diuers: & qu'à la verité la force des Constantins consistoit toute en leurs chefs,

chefz, estant leurs ennemys trop meilleur-
re gent de guerre qu'eux. Aussi qu'on
sçauoit que les pères de ce Roy de Sci-
thie estoient Geans demesurez: toutesfois
à la fin fut acordé, pour ne leur laisser opi-
nion de couardie, que lon accepteroit le
combat & furent denommez pour deffen-
deurs ceux qui s'ensuiuent, c'est à sçauoir,
le Prince Anastarax, le Roy Quedragant,
le Prince Zair, Timbrie d'Egipte, Esperane
de Chipre, Hermine de Sicie, Brauart de
Commagene, Espes de Fenicie, Astibel de
Pentapoli, Belart de Carabadinon, Arnault
le Serre Senecie, Lucidor de Numide, Her-
mes de Ganamante, Albior de Bugie, Fri-
fel d'Arcadie, Bassinel d'Antiochie, Fenix
de Cornicie, Lucibel de Mesopotamie. Ces
dix huit Seigneurs furent esleuz avec Ama-
dis de Grece, & Florisel pour entreprendre
la bataille laquelle denōcerent par vn Roy
d'armes qui emporta la responce retournāt
quant à l'autre. Et trouua le Roy des Schi-
tes, & dom Frises dans le pavillon de la
Royne Zahara, non sans s'estonner de la
forme fiere & hideuse de ce Roy, auquel
il bailla la lettre & la fist lire hault & cler.

*Responce d'Amadis de Grece & de Florisel
au deffy du Roy des Schites.*

Le Souuerain Dieu a tellement reserué
sa Superintendence en chacune des choses
par luy créées, que fortune ny a autre pou-
uoir que tant qu'il luy plaist permettre: il
est le seul apuy de sa sainte foy, laquelle il
soutiendra contre toutes les inuasions des
infidelles, & des faulx Chrestiens prenants
leur alliance sans laisser transporter sa lo-
uange, à qui elle n'affiert. Et pour res-
pondre à vostre Carrel, Amadis de Grece
& Florisel de Niquee acceptent le combat
avec dixhuit Gentils hommes qu'ilz ont
choisiz contre les dixhuit vostres, avec telle
seureté de camp departement de Soleil,
vent ou poudre, & autres de conditions
qu'auetz capitulees, auquel nous denōmons
pour noz inges tres-haultz & tresexcellens

Princes le roy Amadis, & les Empereurs Es-
plandiā & Lisuart de Grece. Surquoy nous
faisons fin, remettant en la disposition di-
uine celle de nostre combat.

Le lettre acheuee de lire, le Roy de Schi-
tie, & dom Frises de Lusitanie s'esiouirent
fort de ce que la bataille estoit acordee, &
rendant au Roy d'armes vne confirmation
du passé, il se retourna à Constantinople, le-
quel ne fut plustost hors du pavillon que
le Roy dist à Lucidor: Seigneur vous deuez
bien rendre graces aux Dieux de ce qu'ilz
acheminent vostre vengeance à l'aparance
d'vne fin honorable, avec les testes de voz
ennemis. Monsieur, dist Lucidor, ie prie
Dieu vous en donner la grace, & à moy ce
repos d'esprit. Peu y eut en la compagnie
qui prinsrent goust aux paroles de ce braue
Roy se vantāt ainsi des testes des deux tels
Cheualiers qu'Amadis & son filz, mesme-
ment ma Dame Alastraxeree qui ne se peut
tenir de lui dire: Roy, de Scithie croi moy
que les deux Princes que tu as deffiez sont
d'autre estoffe que tu n'estimes: & que fai-
sant tel estat de leur deffaicte, tu contes
solement sans ton hoste, ie le te dy en amy
que douce parole n'escorche gorge: car au-
cas que tu perdes la iournee ceste iactance
redoublera ton vitupere: & si tu la gagnes
la bobance & fierté la diminuera d'autant
que la modestie l'augmenteroit. Ces paro-
les ne despleurent seulement à luy, ains à
Lucidor grandement, & à tous ceux de sa
ligne qui estoient presens, doutans vn peu
de la foy d'Alastraxeree enuers eux, ioinct
l'intelligence qu'ilz craignoyent avecques
les Grecz depuis ceste visitation nouuelle:
parquoi le Roi de Scithie lui dit: Ma Da-
me ie vous remercie du conseil qu'ilz vous
plaist me donner: toutesfois si autre q vous
s'en fut ingeré, ie lui monsterois qu'il est
biē en mō pouuoir de faire ce dōt ie me vā-
te, cōme par effet ie le vous ferai biē tost co-
gnoistre: & q la force d'Amadis & de Flori-
sel, s'est mōstree contre des hōmes telz que
iusques ici: mais qu'il ne fust iamais à telles
nopces que lon leur prepare.

*Comme vne grande flotte nouuelle arriva au port de Constantinople, que fort espo-
uanta ceulx de la ville.*

CHAP. XXI.



VN matin des l'aube du iour on descourrit de Constantinople la mer tant couuerte de bateaux & nauires de toutes sortes qu'il estoit impossible de les nombrer, venans avec vent en poupe si à propos sans aucune fortune, que lon eust dist estre vne des plus grandes citez du monde qui flotloit, tant alloient les vaisseaux serrez, estant leur ordonnance aussi carree qu'un de, ayant vingt grosses nauz de frond, & en tous costez, qui sont quatre cens: & sur le angles, autres petits carrez, qui seruoient comme boulleuarts pour flanquer & secourir les autres contre ceux qui vouldroyent inuestir aucun d'eux, & de trois grosses caragues sur les pointes & l'entre deux des pointes qui faisoient les courtines des petits boulleuarts entrelacez de douze galeres pour chacun, puis aux huit flancz qui correspondoyent l'un à l'autre, six bonnes galeres bastardes, la reste faisant le nombre iusques à deux cës galeres que grosse que communes. Or

cinquante d'elles marchoyent auant, deuant la troupe cōme vne demie serpentine pourroit atteinre en deux ordonnances: car les quarante marchoyent en forme triangulaire, vne grosse qui faisoit la pointe puis deux vn petit apres, puis trois, puis quatre, puis cinq, puis six, cōtinuāt l'ordre iusques à neuf si bien que celà faisoit vn vrai triangle. Le surplus de galeres, qui estoient dix marchoyent à leur volonte deuant ou derriere, avec quelque nombre de fustes & brigantins que l'on enuoyoit en course, & pour descouvrir les isles ou caps qui se iettent en mer, à fin de n'estre surprins de quelque embusche, non pas que telle armee deust craindre tout le reste du monde, montant bien en tout de mil à douze cens voyles qui couuroient la mer de long & de lez, de sorte que lon ne voyoit autre chose que mas & gabies, voilles & trinquerz, avecq vn son de trompettes & clerons, enseignes, & pennons, representans vne couleur tant diuersifiee comme des prez au ioly

ioly mois de mai, ou vn paterre de toutes fleurs. Et menoyent vn bruit quand les aubades se donnoient au point du iour que lon n'eust pas ouy dieu tonner. Ceste armee se monstra à veüe de Constantinople de grand matin, donnans frayeur aux deux autres ancrees, car nulles d'elles ne sçauoit en faueur de qui elle venoit, si bien que les vns & les autres tant par mer que par terre se mirent en equipage pour se defendre, aprofondissans ceux du camp leurs trenchees, & renforceans leurs rampars, & ceux de la ville à fortifier, & porter sur les murailles, pierres, huille boullant, cendres, eaux chaudes, & autres aprestz pour louer & estuer les assaillans. Quand le iour fut plus grand, les seigneurs & Dames de la ville monterent sur les hault des tours pour voir la flotte qui aprochoit, aparouillant en icelle les enseignes de l'estendard Royal, & autre infinité de pennons, & bannerolles, portant les harpies d'or en champ de sinople, avec les chasteaux de poupe & de prouë paintz de mesmes deuises, lesquelles Florisel recogneut incontinent, & tressaillant de ioye: Sur mon Dieu, dist il, voycy Falanges d'Astre qui vient à nostre secours, aussi estoit celuy. Ce qu'estât cognen pour vray, Dieu sçait quel triomphe firent ceux de la cité. Si tost qu'ils les vid approcher tous les principaux de la cité allerent au port, & entrans en galeres, fregates, fustes & esquifs, ainsi qu'ilz les trouuerent à leur commodité pour bienueignier le prince Falanges, lequel ilz trouuerent en sa galere capitaineresse, armé d'un harnois doré sur azur, gravé en ourage moresque, avec enchaufleurs de force diamans de grand pris autour des bordures de la cuirasse, de la grande piece, sur les cuissotz, auant bras, & sur les rouelles mesmes, & par dessus auoit vne robe de drap d'or figuré de verd fourree de martres sublimes longue à la marinesque, & sur sa teste vn beau bonnet bordé de perles avec vne harpie d'or pour medalle, estant sa personne acompagnée de six Roys

comme les vassaux, dont l'un portoit son eicu, & vn autre son armet, & vn troisieme les gantelctz. Il est impossible de vous dire la moytié de la magnificence en laquelle il fut receu par tous ces princes, qui luy firent au débarquer amener au port vne coche triumphale avecq' douze cheualz tous blancz, pour le mener au Palais Imperial. La coche estoit couuerte de douze arcz triumphaux de grand pris, reuestuz de drap d'or, sur le sommet desquelz ou ilz s'entrecroysoient fut mise à sa requeste vne ymage de la belle Princeesse Alastraxeree supportee de douze anges d'or qui tenoient chacun vne torche de cire blanche allumee: marchant quant & luy tous ses Cheualiers aux deux reings des rues, acoustrez de fort riches harnois avecq' livree verde semee de harpies d'or, & conduitz par ses heraulz qui les faisoient marcher en aussi bon ordre que si c'eust esté vne procession avec vne infinité d'instrumens (tant des siens comme de ceux de la cité) qui sembloient quasi troubler l'harmonie, tant estoit le son des siens trop plus melodieux: aussi y auoit des encensoirs d'or en grand nombre, avecq' le grand dont nous auons parlé qu'il vloit en son temple de Colcos pleins d'odeurs & parfums & autres choses soueues: vous assurant qu'il ne fust si tost débarqué, qui se iera à deux genoux deuant l'ymage, faisant ses oraisons & ceremonies pour remercier la Deesse d'estre arriué au port. Ce faict le Roy Amadis & l'Empereur Esplandian le receurent, & montans tous deux sur le chariot quand & luy, le firent asseoir au mylieu: tous ceux qui le regarderent passer en si grande maiesté, avec l'honneur que luy faisoit le pere des Princes de ce mode le grand Roy Amadis, ne luy pensoient plus rester que l'adoration pour estre Dieu entre les hommes: Lesquelz arriuez au Palais, ont fait auant toute chose parer vne grande salle en maniere de temple, pour y poser l'ymage en digne estat. Falanges alla apres faite la reuerence aux Princeesses, desquel-

quelles il fut honorablement recueilly : & les tables dressees s'assirent à table pour dîner , auquel ilz furent fort bien serui de metz & entremetz ou le Prince Falanges sceust en deuillant toutes les choses, comme elles estoient passées depuis que les ennemis auoient planté le siege, ayant grand regret de n'estre venu plustost, pour se trouver en ceste grande bataille, parlans au surplus du deffuy & assignation de la iournee.

Comme la Princesse Alastraxeree enuoya deffier le Prince Falanges par lettre : & la responce qu'elle receut de luy.

CHAP. XXII.

L'Ennuy fut grand de ceux du camp de l'arriuee de Falanges avec si grande flotte : & sur tous en fut desplaisante Alastraxeree luy estant bien auis que Falanges estant de sa loy payenne ne deuoit suyure le party contraire, veu encores qu'il l'adoroit en ses pensées comme publioit par ses ceremonies & sacrifices : Pourtant elle demanda incontinent papier & ancre, & luy escrivit vne lettre qu'elle enuoya par la Royne d'Hyrcanie, à l'auen de tous les princes du camp : Laquelle partant de l'ost fort bien acompagnée vint trouver les seigneurs Constantins au sortir de table deuillans avec les Dames pour les reconforter de la crainte qu'elles auoient de la bataille prochaine, voire à l'heure qu'elle entra l'Emperiere Abra remostroit à Niquee, Siluie & Helene de ne plorer tant pour leurs marys qui s'y trouueroient, d'autant qu'elle n'auoit pas doute d'y mettre le Prince Zahir son filz : car, ce dist elle, les Princes sont plus tenus de mourir pour garder leur honneur que de viure en infamye & souffrir vitupere. Il est bien vray (respondit lors Siluie) mais ma Dame vous ne vous deuez esmeruiller ne nous donner le tort, si nous desirons conseruer de peril ceux que scauons estre desia assurez de la renommee. Lors Darinel se trouuans la

dist à Siluie : Ma Dame si le plus grand danger de ceux qui se trouueront au conffit fut celui de vostre mary, & des deux autres Princes, vous auriez grand raison de vous plaindre : mais ou ceux là demeureront il fault qu'il en demeure beaucoup d'autres, mais leurs victoires ordinaires vous peuuent assurer de leur gloire & triumphe : iointz qu'estans apuyez & portez de la faueur & bonne grace de trois telles Princesses ilz n'autont pas le bras engourdy : & moy pauvre Darinel oserois bien l'entreprendre contre le plus hardy des ennemis, voire en penserois venir au dessus si i'auois vostre faueur. Or tenez vous certaines que ces trois seigneurs ont esté vaincuz par vous pour ne l'estre iamais par autres. Le Prince Anastarax se print fort à rire de ce propos, & dist à Darinel : mon amy les experiences sourdent des dangereux passages : qui a paour des fucilles ne doit aller au boys. Sur ce poinct entra la Royne d'Hyrcanie en la salle, laquelle fut receüe à grand honneur : & apres que chascun eut prins son lieu, elle commença à parler, s'adressant au Prince Falanges : Seigneur, la princesse Alastraxeree ma maistresse m'a icy enuoyee vous apporter ce mot de lettre, & à elle vostre responce : Falanges la receut en grande reuerence, & la mist sur la teste en signe d'obeissance, puis la baissa & l'ouurit trouuant telle teneur.

Lettre de deffuy de la princesse Alastraxeree au Prince Falanges d'Astre.

La iustice humaine condamne en grosse reparation le vassal commettant felonnie contre son seigneur ligé : mais ceux qui encourent le crime de leze maiesté diuine sont puniz cruellement eux & toute leur posterité. Ce que ie dy pour toy Falanges qui est ataint de ces deux vices enormes : car tu ne peux nyer que ne m'ayes présenté ton seruice avec foy & hommage : & pour tout droit & deuoir tu te rebelles, & prens maintenant les armes contre moy & les

& les miens. A quoy tend la cerimonie & adoration de mon image que tu publies, me faisant honneur diuin, si tu tasches à meruyner & deffaire en guerre ouverte? Ceste audace tant outrecuyede me contrainct à te denoncer par ce cartel combat mortel de ma personne à la tienne: pour te faire recognoistre celle que tu as trop mescogneuë. Pour iour ie t'affine celuy auquel noz Cheualiers combatrôt contre les vostres, à fin que la memoire de ta temerité & orgueil soit celebree en ce theatre de tant de gens de bien. Je t'assure le camp de mon costé, ne demandant point de seurété du tien, le Soleil se partira iustement, si celuy de mes luyfantes armes ne t'esblouyst la veuë. La lettre acheuee de lire; ie vous laisse à penser combien elle esmeut le cueur à Falâges: toutesfois le dissimulant par grande prudence respondit d'un vilage riant: Il y a vn bien en mon fait, c'est qu'on dit communément, qui bon l'achete, bon le boit: aussi toutes choses grandes se treuvent meilleures d'autant qu'elles coustent cher: mais vn point que i'ay peculier garde m'esprit d'estre troublé, c'est que ie ne m'asseuray oncq' de fortune, dont suis tousiours plus prest à soustenir ses traueses, & ses dardz desia preuenz m'offencet beaucoup moins. Apres se retourna vers la royne d'Hircanie à qui il dist: Ma Dame, vous vous en pourrez retourner quand il vous plaira, & dire à ma Dame ce qu'auiez entendu, & que ie luy enuoiray incontinent responce. Ainsi despeschee partit de la cité, ou elle laissa les princes Grecz en consultation pour respondre à la princesse. Et fut d'auis Florisel que Falanges allast faire la reuerence à Alastraxeree, luy portant sa responce luy mesme: car iagoit (dist il) que vous soyiez icy venu pour me donner secours, i'entens les loix d'amour, qui ne permettroit iamais vne si cruelle empri se tomber en cueur de ses suiertz, estoit coustumier de reduyre les plus fors à telz termes, que tous prestz de prendre les armes, il les fait dancier au son de sa Guyter-

ne. A quoy le prince Falanges luy respondit: Monsieur l'obligation de l'amour des Dames (entre personnes d'honneur) a tousiours vne clause de reserve, laquelle toutes affections suruenâs à l'homme ne doit aucunement enfreindre: si vous supplie me donner congé de luy escrire vn mot, tel que mes pensees diesteront: ce qu'il fit à l'heure mesme, & l'enuoya par la Damoyelle Carmelle, qui se transporta soudain au camp du Lucidor, ou elle trouua la princesse Alastraxeree, à laquelle elle dist: ma Dame le prince Falanges se rcommande treshumblemēt à vostre maiesté, à laquelle il presente par moy ceste lettre, qu'il vous plaira lire, & m'en rendre la responce, à fin qu'il se puisse du tout reigler selon vostre commandement, & faisant vne reuerence iusques en terre, baïsa la lettre, & la presenta à la princesse, qui luy dist: Damoyelle ie la verray, & vous despescheray sans delay: Si l'ouurit & la trouua telle.

*Responce de Falanges d'Aspre au deffy de la
princesse Alastraxeree.*

Ma Dame i'ay receu la lettre de deffy adressant à moy de vostre part, laquelle ne veux (par ce que ne puy) accepter en aucune sorte: car l'offence que pretendez en moy en vostre prime colere, irritée par des blasonneurs qui sont entour vous, i'espere en vostre discretion de l'effacer quand m'aurez receu en ma iustification. Je suys venu (dient ilz) à Constantinople secourir contre eux le Prince Florisel, vous leur ayant fait l'honneur qu'ilz n'ont merité de vous camper pour leur deffence: en quoy vous n'estes ignorante de telz cas souuent auenuz entre les Roys alliez, prenans aucunes fois armes contraires à cause de quelque obligation precedente, telle qu'est la mienne enuers le prince Constantin. Pensent ilz ces lourdaux, réger contre vous en cōflit mortel celuy, qui pour vous meurt tous les iours mille foys: Cuydent ilz acoupler ainsi le seruiteur fidelle contre sa treshonoree maistresse? A ceste cause

ma treschere Dame ie vous supplie par l'honneur que m'avez fait de me recevoir pour vostre Cheualier, ne leur vouloir plus prester l'aureille, & vous contéter de ma mort ordinaire, sans m'en pourchasser autre, laquelle ne prend respit en sa langueur que par la cōtemplation de vostre diuine pourtraiture: vous suppliant traiter plus humainement desormais celuy qui (vueillez ou nō) ne peult estre iamais que vostre. Quand la Princesse eut acheué de lire ceste lettre: Puis (dist elle) que Falanges ne veult recevoir de ma main le chastiment qu'il a merité, ie le luy procuray d'autre part tel, qu'il luy sera necessaire. Quant à l'ymage qu'il honore à ma semblance, ie l'en desauouē, & ne prends sa sainte ydolatrie en gré. Parquoy Carmelle m'amyte retournez vous enuers luy, & luy portez ces paroles pour responce: Ce qu'elle fit. Et à part soy disoit: O faux amour! ce sont les poisons que tu

brasses tousiours à tes vassaux pour les faire languir aux pourchas de tes biens, & les tenir en aleine. Ha traittre tu scauois biē que ie ne pouois de moins que de secourir mō parfait amy au besoing! Et as trouué le moyen de la faire rengier cōtre luy, de qui elle estoit plus amye que d'eux tous, à fin de me reduire en telle perplexité & agonie. Si estce qu'elle est si prudēte & vertueuse q̄ quād ce premier mouuēment d'yre sera passé & qu'elle viendra à recueillir ses espritz, i'espere qu'elle me scaura bon gré d'auoir en ce fait acte d'hōme de bien, mettant en dāger sa grace qui est le cōble de tous mes delirs. Sa magnanimité fut grādēmēt louee pour toute l'assistance. Et le soir Amadis de Grece, Florisel & les autres chāpions qui deuoient cōbatre le lendemain, firent toute nuyt la vieille en la chapelle de l'Empeteur se mettans entel estat que bons Chrestiens doivent faire en hazard de telle importāce.

De la bataille d'Amadis de Grece, Florisel, & dixhuit Cheualiers: contre le Roy de Scythie, & autant d'autres Grans.

CHAP. XXI II.



Le iour ensuyuant, le Soleil se leua bel & cler avec vne attempance d'air nonpareille: auquel les Princes Grecz qui deuoient combattre furent armez & montez

montez à iour poignant cheminans droit au lieu ou la bataille se deuoit faire, qui n'estoit gueres loing de Constantinople, & en tel endroit que les Dames de la ville le pouuoient voir, lesquelles à ceste fin monterent sur le hault d'une tour, ou elles voyoient leurs hommes d'armes qui marchoient au petit pas, acoustrez tous de verd pour mieux s'enrecognoistre excepté leurs escuz esquelz chacun portoit sa deuise differente: car Amadis de Grece auoit au sien le pourtrait du combat qu'il eut cōtre Furio Cornelio, & Florisel portoit le pas qu'il tint deuant la tour de l'vniuers, pour le plus insigne de ses gestes. Anastarax auoit en son escu de gueules la peinture d'un enfer ou il auoit esté enchanté, avec l'histoire de sa deliurance par sa Siluie: Le Roy Quedragant portoit son escu acoustumé, & tous les autres chacun le sien à sa poste, estans tous comme ie vous dy vestuz de draps d'or frizé de verd, tous empennachez de mesmes, tant sur leurs armetz que sur les chanfrains de leurs cheualx, & portoitent eux mesmes leurs lances & escuz: accompagnez toutesfois de tel nombre de seigneurs & gentils-hommes que la raison requeroit en tel affaire, & de trompettes marchans deuant eux reuestuz de leur liuree, lesquelles auertirent leurs ennemis de leur venue, qui à cheual armez & equipez de couleur rouge semee d'aigles d'or, ayans les caparaçons & autres paremens de cheuaux tous de veloux rouge cramoyssi. Dom Frises portoit en son escu la pourtraicture de Franciane tiree au naturel: & le Roy, deux Geans figurez sur le sien, avec six autres Cheualiers, qu'il auoit occis tous ensemble en vn confit. Ce Roy Scithien cheuauchoit vn grand animal de son pais, duquel nous ne scauons le nom: aussi estoit il tant corpulent & membru, qu'on n'eust sceu fournir rousin qui l'eust peu porter: il estoit du lignage de Furio Cornelio, ce qui plus l'emouuoit à mettre fin à ceste guerre. Or allerent luy & dom Frises avecq' leurs compagnons

d'armes au lieu de la campagne ou l'on auoit dressé les eschaffaux pour les Iuges, rous couuers de drap d'or, deuant lesquelz les champions comparurent d'un costé & d'autre: Et les deux armées se rengerent de ça & delà en ordre de bataille (ne se confiant qu'au gros de l'arbre) prians Dieu de tous costez donner la victoire à leurs champions. Le Soleil leur fut également departy par les Iuges (qui commençoient à se leuer) metant les combatans les vns le doz contre le mydi, & les autres contre Septentrion, tellemēt que les raions passioient entr'eux par le mylieu: Ce fut apres quand ilz se vindrent ioindre à qui le liureroit à son ennemy en face. Or furent les iuges montez sur les eschaffaux deuant lesquelz les tenans vindrent faire la reuerence & les assaillans aussi, & à chacun d'eux fut ordonné son auersaire contre qui il deuoit combattre: car à mesure que ceux du camp de Lucidor en presentoient vn, les Grecz luy mettoient aussi tost son homme en barbe. Ainsi fut Florisel député pour tenir contrecare au Roy, auquel dist lors Alastraxeree: Monsieur, faites si bien que confermez le iugement que i'ay fait de vous, Ma Dame, dist-il, ie n'entens pas pourquoy vous le dites, neantmoins mettray peine à ne desmentir l'opinion q' m'auuez tousiours montré auoir de moy: mais ie vous prie me faire plus de droit & iustice que n'auuez fait au Seigneur Falanges: laissons celà à vne autre foys, dist elle: Ce disant aiant desia son frere Anaxartes ordonné Amadis de Grece contre son homme, & ainsi chacun au sien. Les iuges firent publier sur peine de la hart par vn commun acord que personne ne fust si hardy de monstrier sa faueur à aucun des combatans ny en fait, ny en dit. Adonc ilz monterent en leurs sieges pour faire donner le signal aux champions d'un costé & d'autre, lesquelz estoient apalliz de naturelle frayeur, chacun estimoit son ennemy comme il deuoit iusques à ce que les iuges firent sonner
les trom-

les trompettes, au son desquelles chacun Cheualier se courrit de son escu, & chargea son homme si dextrement, que de prime encontre pas vn ne faillit de coup, qui fut tresbelle iouste à voir, & au ioindre des corps moururēt treize cheuaulx cōpris l'animal du Roy de Scithie, qui fut si lourdement rencontré par le destrier de Florisel portant bardes de fer, & vne pointe asferee sur le chanfrain qu'il fourra si auant parmy les flancz de ceste grosse beste qu'il l'aterraça avec les autres, & la iābe de son maistre dessouz, tellement qu'il ne se pouuoit releuer, demeurant Florisel comme gentil Cheualier sans perdre l'estrier, de quoy Helene qui veoyt de loing, & les autres Dames Grecques furent aussi resiouyes que ceux du camp faschez. A l'instant Florisel voyant le coup qu'il auoit fait, & son pere tombé & plusieurs autres avec luy estre desia debout, & cōmencer la bataille aux espees, mesmes que le Roy Que-dragant descendoit du cheual pour combattre son ennemy qu'il auoit abatu, ne voulut pas moins faire que les autres: ains mettant pied à terre alla droit au Roy, qui ne se pouuoit rauoir de dessouz la beste, ce que voyant ses gens commencerent à douter de sa vie, pensant que Florisel l'alloit occire, mais il en fit bien autrement car il luy ayda à releuer, & si le laissa la tout derompu & froissé de la cheute à reprendre aleine: tour de courtoisie, qu'on ne scauroit assez hault louer ce que fit Florisel, à fin que sa victoire ne fust plus attribuee à la faulte de cest animal, qu'à sa propre vertu, se voulant bien monstrier es yeux de telle compagnie aussi franc & humain que preux & vaillant. Le Scithien doncq' se trouuant en tel estat, & ainsi traité par son ennemy capital, ceste courtoisie extreme força tellement son naturel auant si fier & superbe, que comme sage & bien aprins dist à Florisel, qui tenoit son espee au poing. Gentil prince remettez hardiment vostre espee au fourreau & ne me pensez pas vaincre deux fois pour

vn iour suffise vous vne foys que ie demeure vostre vaincu pour toute ma vie: car à ce coup cognois-ie biē que vostre vertu est fee & inuincible par la singuliere faueur des Dieux, & q̄ peu profiterois ie à talonner contre l'esperon: parquoy secourez-voez compagnons à vostre plaisir car quant à moy ie ne me feray plus partie. Et ce disant deslaça son armet & le ietra par terre, auquel Florisel, qui n'atendoit de luy si gracieux retour, respondit: Monsieur ce que i'ay fait presentement en vostre endroit n'est que l'office de vray Cheualier, de n'offencer celuy qui n'est en estat de se pouuoir deffendre: Pourtant vous est loysible d'acheuer vostre effort cōtre moy, sans vous imputer autrement cest accident, qui souuent, auient à preud'hommes, car ie me tiendrois vaincu de vous souz telle maniere de vous rendre. A quoy le Roy luy fit responce: Seigneur Florisel, vous auez gaigné sur moy double victoire à vn coup, l'vne par vaillance, & l'autre par humanité: qui me semble occasion suffisante pour vous contenter: Quant à moy, ie me sens tant outré de vostre main, que ie vous prie prendre mon espee (la luy offrant) comme victorieux, & desormais me commander vostre plaisir, que i'exercuteray à iamais de toute ma puissance. Ce que suys prest de faire entendre premier à Lucidor. Adonc luy dist Florisel: monseigneur ie ne puys refuser l'amytie qu'il vous plaist m'offrir: mais quant à Lucidor, ie ne quiers vous estre cause de rompre la foy que luy auez promise en ceste siege, ne voulant que vostre honneur y soit interessé. Sur ce s'embrasserent & caresserent grandement, au grand esbahissement des deux camps qui les regardoient. Cependant les autres Cheualiers faisoient leur deuoir en la bataille, entre lesquelz Amadis de Grece monstra bien (à qui ne l'auoit veu) que la renommee de luy espandue par le monde n'estoit pas faulse, si combattit contre dom Frises pres de deux heures, sans qu'on sceust à qui aiuger l'auantage, & ayans

ayans mis leurs corps à nu en plusieurs endroits, escrimoient de plus grande adresse, pour eüiter les viues ataintes l'un de l'autre. Tous les autres Cheualiers estoient si couuertz de sang qu'on n'y cognoissoit plus liuree ne deuise aussi n'y auoit celuy d'eux qui ne fust digne chef d'une iuste armee. Quant au Prince Anastarax, il menoit tellement son champion qu'il le contraignit de se rendre, en acordant les conditions de la bataille laquelle Florisel regardoit lors avec le Roy de Scythie, n'estans deliberer se mettre en la meslee l'un ne l'autre si vne extreme necessité ne les y rengeoit. Le vous laisse ce pendant à penser si Siluie deuoit estre marrie, de voir à son mary l'honneur de la premiere victoire, qui luy auint à l'heure que tous les combatans s'estoient retirez par acord pour se refraischir & prendre aleine, excepté Amadis de Grece & dom Frises, lesquels on n'eust pas iugé auoir besoing d'aucun repos, dequoy chascun s'esbahissoit merueilleusement & sur tous la princesse Alastraxeree qui dist lors au Roy Amadis : Mon seigneur que vous en semble du Prince dom Frises de Lusitanie, ma Dame, dist il, plus que ie ne voudrois pour l'heure: Sur ces entrefaites les Cheualiers reposez commencerent leur meslee aussi aspre qu' auparauant: adonc le Roy Quedragant monstra sa valeur telle qu'il fit rendre son Cheualier qu'il tira à quartier pour voir l'issue des autres choses: qui descouragea grandement les allies de Lucidor, & enhardit d'autant ceux de Florisel, lesquels s'efforcerent plus que deuant pour en venir au dessus: mais ce fut en vain, à cause de la preud'homie incroyable de ceux à qui ilz auoient à faire, qui se maintenoient si vaillamment qu'on pouoit peu gaigner sur eux. Or les deux paragons Amadis de Grece, & dom Frises, auoient combatu sans interualle iusques à ceste heure là que dom Frises sembla vn peu affoibly & lassé, dequoy s'aperceuant Amadis se tira à quartier, & luy dist: Cheualier reposez vous, car ie croy qu'en auons bõ me-

sier, vous assure que ie vous trouue cheualier tant hardy & vaillant que ne vous voudrois faire outrage, si prenons aleine, le iour est à Dieu & à nous: Dom Frises qui sage estoit & fort discret à ces paroles iugea que son ennemy pretendoit sur luy, dont luy respondit: Monsieur il semble à vous ouir parler que me tenez desia pour vaincu, m'offrant grace de reposer comme si i'en eusse besoing & non vous, dequoy ie vous remercie, vous protestant en recompense que tant que l'ame me respirera au corps ne vous donneray loysir ne relache. Ainsi indigné, charge Amadis de nouveau: mais de plus grand cueur que de force, lequel ne faisoit que parer aux coups, si non aucunes fois pour mōstrer qu'il n'estoit faillily, & quand il vid que leur estour tiroit à telle longueur, vint de vigueur rembarer Frises tout d'un trait si viuement qu'il le fit reculer trois ou quatre pas: Ce qu'il fit toutesfois en telle façon de desmarcher qu'enuers ceux qui n'estoient maistres de l'art, son honneur y estoit sauué. Si ne peut il si bien faire qu'à la fin ne se descourrist l'auantage qu'Amadis de Grece auoit sur luy: Lequel voyant la Princesse Alastraxeree qui craignoit l'inconuenient de dom Frises, dist au Roy Amadis: Monseigneur, s'il vous sembloit bon nous departirions ce combat d'Amadis & de dom Frises: car es termes ou il est ilz n'y peuuent mettre autre fin que de leurs vies, qui seroit vn dommage inestimable, le Roy s'y consentit assez volontiers, tant pour gratifier à la Princesse, que d'autant qu'il estoit evident que l'honneur en demeueroit à son filz. A ceste cause descendirent ensemble de l'eschafault & entrèrent au camp, ou ilz dirent aux deux champions: Cheualiers, les iuges ayans veu vostre prouesse incomparable vous mettent hors de camp & de combat, avec compensation de vostre honneur lors Amadis de Grece se tira à quartier. Amadis avec la conscience de son auantage dit lors à la princesse Alastraxeree: Ma dame lon peut facilement cognoistre combien

vostre

vostre excellence desirer conseruer l'amitié de Florisel de Niquee m'ayant par sa faueur en telle recommandation que de m'oster de ce conflit, mon honneur sauf, duquel ie n'estois pas trop asseuré: parquoy ma Dame l'accepte cest offre, moyennant le consentement de ce Cheualier. Dom Frises apres auoir quelque peu debatue au contraire, en fin il dist, puis qu'ainsi plaist aux iuges, ie ne veux contredire à leur sentence: Lors se tirerent à quartier pour regarder les autres combatans qui se maintenoient fort vaillamment, donnans grande admiration de leur prouesse. Vray est que les champions Chrestiens auoient tous iours l'esperance meilleure, moyennant les victoires de leurs compagnons, & de la defaute de quatre de leurs ennemys qu'ilz occirent en peu d'heure, si bien qu'ilz commencerent à gaigner sur eux vne bonne piece du camp qui estoit semé de mailles & escailles de fer, que lon ne veoit herbe ny verdure. Ce que contemplant le Roy des Scithes, & craignant de pis à ceux qui tous estoient ses parens & amys, ausquelz il auoit failly de chef à l'emprise faite souz sa conduite: hola seigneurs Cheualiers (dit il se mettant entre deux) ie vous otroye la condition de la bataille, puis que fortune nous a voulu si mal dire, vous priant n'exercer plus de cruauté. Les Princes Grecz se tirans lors à l'escart luy dirent, q si les iuges se cōtentoient de leur deuoir, ilz estoient prestz de convertir leur rigueur en clemence. Ce que les iuges firent proclamer à l'honneur des Grecz, & deliurer cheualx à tous les Cheualiers d'un costé & d'autre, retournans les vaincueurs en grand triumphe à Constantinople, ou ilz furent amiablement receuz des Dames, & sollicitez de leurs playes, dont tous en auoient quantité, excepté Florisel qui n'estoit aucunement bleisé, non plus que le Roy de Scythie qui se retira avec ses gens au camp de Lucidor, auquel le dueil n'estoit pas moindre, que la ioye & ließe en la ville: mais la nuyt en ses premieres tenebres leur apor

ta vn soudain reconfort, par deux flottes qui arriuerent en leur faueur: dont l'une estoit au Roy de Thir, & l'autre à celuy de Sidonie, deux vaillans preud'hommes, & desirant conquerir honneur: lesquelz furent honorablement recueillis par la Royne Zahara & ses enfans, avec leurs ceremonies payennes, desquelles le Roy de Thir n'eust voulu perdre vn seul point, comme celuy qui n'estimoit auoir son pareil au monde: Auquel quand on eust fait le rapport de la bataille qui auoit esté ce iour mesmes, & du reuers de la fortune tombé sur le Roy de Scythie. Ne soyez en peine (dist il mes amys) car i'espere que bien tost on luy fera changer sa robbe: de quoy ilz furent tous grandement consolez celle nuyt, laquelle ne fut si fauorable au Prince Falanges qui ne reposa onques, pensant au desdain de sa dame Alastraxeree déclaré par son mandement rigoureux, qu'elle conferma en ce que tout ce iour la qu'il se trouua à veoir le combat, elle ne l'auoit daigné regarder. Or s'il en portoit en son cuer grand' melancolie, moins n'en auoit Anaxartes, attendant la responce de la pucelle Artymire qu'il auoit enuoyee en certain voyage concernant son remede & la deffaueur d'Oriane, pour laquelle il souffroit beaucoup, dont faisoit mille exclamations à toute heure. Amour tiroit à la mesme cordelle le Prince Zahir pour la graue Timbrie, à laquelle se vindrent presenter plus de deux mille Cheualiers tant domestiques que vassaux de son pere, pour rendre obeissance à leur Royne nouuelle, demeurant le surplus des Boëciés au camp de Lucidor, en faueur duquel, ilz estoient venuz avecques leur Roy: ce qu'ilz firent du consentement du Roy Birmartes & de Lucidor, qui veilloient à donner ordre à toutes choses necessaires apres la treue allée expirer dedans cinq iours.

Comme

*Comme Macartes Roy de Thir depeſcha vn cartel de deſſy au Roy
Amadis de Gaule.*

CHAP. XXIIII.



LE cinquiesme iour apres la bataille, se transporta à Constantinople vn Roy d'armes, lequel vint trouuer les seigneurs à l'heure qu'on vouloit leuer les tables, & s'adressant au haut bout vne lettre au poing demanda qui estoit entr'eux le Roy qui iusques à ce iour auoit môté plus pres du feste de la gloire mortelle, pour ce (dist) qu'on voudroit vn peu resueiller ses forces, & veoir s'il est encores aussi vaillant qu'il souloit estre: Mon amy luy dist l'Emperiere Abra, vous nous donnez si bñ nes marques qu'il est aysé à cognoistre: dōc luy monstra le Roy Amadis, auquel il presenta le cartel, disant: Sire vostre maiesté pourra entendre par le contenu de ceste lettre la cause de ma venue, vous supliant m'en donner breue responce. Le Roy la print & incontīnēt la fit lire qui se trouua telle.

*Cartel de deſſy de Macartes Roy de Thir, au
Roy Amadis de Gaule.*

Macartes Roy de Thir, à Amadis Roy

de la grand' Bretaigne salut. La fortune indis contraire à mes ancestres en faueur des vostres & des Macedoniens, ayant maintenant tourné la rouē à ma poste, m'a commandé maintenant venir prendre vengeance du sang de mes Syriens passez par le trenchant de voz espees, suyuant l'ocasion de la nouvelle iniustice par vous commise à l'encontre du Prince François Lucidor auquel ie m'aioin pour la restitution de la seconde Helene, en espoir de pareille yssuē que vous eustes contre les Troyens pour la premiere. Parquoy ayant entendu que vous Roy Amadis, estes chef de la race de ceux qui font ceste guerre, vostre nom resonant par toute l'Asie, m'a incité de venir en ceste armee, pour esprouuer si l'effet de vostre vertu respond à son incroyable renommee: entrant contre vous en camp clos à outrance, dont la victoire me seroit chemin abrégé au souverain pris des armes si ie puis vaincre le vainqueur de tous les autres. La lettre leuē, le roy dist

F

au He.

au Herault qu'il s'en pouuoit retourner, & que tost apres il enuoyroit la responce par le sien expres. La cause fut mise en delibération, surquoy y eut diuerses opinions, dõt la plus part tẽdoit à ce q̃ le Roy ne deuoit accepter tel deffy de gaieté de cuer pour y hazarder sa personne, desia exempte des armes à raison de l'aage, & qui plus est toute la gloire que fortune luy auoit bastie par si long cours d'annees: s'il auoit telle enuie d'en menger, qu'il se trouuast en la bataille avec les autres. Mais le Roy notwithstanding leurs remonstrance delibera ne refuser la luite: disant que il estoit ia trop vieil pour faire aprentissage du mestier de couardie. Et au sortir du conseil s'en alla en la chambre de l'emperiere Abra ou estoit la Royne Oriane & les autres Dames toutes fachees de la venuë de ce Roy de Thir, & de son mandement si indiscret. Mais le Roy Amadis (qui peu s'en soucioit) leur vint à raconter sa resolution d'accepter le combat moiennt (dist il) que l'aye quelque faueur nouuelle de Dame qui me regaillarde les espritz: & s'adressant à l'emperiere Abra, luy demanda si elle le voudroit recevoir pour son Cheualier, dequoy elles se prindrent fort à rire. Adonc elle luy respondit: Monsieur, ie ne sçay qui seroit la Dame si mal gracieuse de vous esconduire fors que moy, car ie ne le feray iamais que vostre loyale Oriane ne le consente, laquelle luy dist, trop, ma Dame, ie vous tiens si iuste & raisonnable que ne me voudriez faire aucun tort. Sur ce propos le Roy demanda vn secretaire, & contre l'opinion de tous luy dict à l'acceptation qu'il bailla à son nain Ardan luy disant, mon amy il n'est pas raison que ie t'oste la possession qu'as tousiours eue de mes ambassades. Parquoy vaten au Roy de Thir & luy porte ce mot de lettre, le nain la print, si monte à cheual & pique au camp de Lucidor, lequel il trouua au pauillon de la Royne Zahara avec le Roy de Thir, & tous les autres princes, ausquelz aiât fait la reuerence, demanda lequel d'entreux e-

stoit le Roy de Thir, qui luy fut monstré. Le nain apres l'auoir bien contemplé, il luy sembla de haute representation, puy luy dist Sire, le Roy Amadis mon maistre vous enuoye ceste lettre, par laquelle verrez comme il souz-signe vostre requeste, ce qui vous tourne à grand honneur, quelque fortune qui vous auienne du reste. Le Roy la prenant luy dist en raillant: Nain mon amy ie ne pensois pas que chose tât hautaine deust estre portee par si petite personne que tu es. Sire (dist il) lon ne mesure pas les hommes à l'aune, aussi les vertuz de courage n'occupent gueres de corsage. Lors le Roy leur la lettre de telle teneur.

Responce du Roy Amadis de Gaule, au cartel de Macaries Roy de Thir.

Roy de Thir, Si vous attribuez au Dieu souverain la gloire que tenez de fortune, & de la force de voz braz, ie vous aurois en trop plus grande estime: mais ie cognois que cest abus procede plus de la faulse créance de voz Dieux, que d'autre imperfection de cerueau & iugement. Pour venir au point i'accepte le combat que me presentez, avec les conditions specifiees, choyissant iour au troisieme apres cestuy en vous asseurant le camp de ma part. Je demande pour mes iuges la princesse Alastraxee & le prince Falanges d'Asire, demeurant à vostre choix ceux que voudrez elire pour vous. Le Roy fut ioyeux de ceste responce, aussi fut Alastraxee, toutesfois que mal content du cõpagnon qu'on luy donnoit, dist à Ardan. Mon amy dites au Roy vostre seigneur, que ie ne sçay à quelle occasion il a apariez deux iuges si peu acordans que Falanges d'Asire & moy, si ce n'est à fin que les articles des difficultez soient mieux debatuz. Surquoy le Nain partit du camp, aiant obtenu la confirmation des conditions precedentes, & des mesmes iuges par tous deux: Et raporta assez de plaisir aux Dames, quand il leur conta le message de la Princesse.

Comme

*Comme vne Damoysselle estrangement accoustree vint deuers les Princes Grecz
portant vne lettre de la Royne Cleofile.*

CHAP. XXV.



Sur la nuyt à l'heure que les Seigneurs & Dames estoient en deuiz ioyeux apres souper, se presenta en la salle vne tresbelle Damoysselle habillee d'une façon estrange, à l'entree de laquelle chacun se tint coy, pour la regarder, & entendre ce qu'elle vouldroit dire. Si tira vn pacquet de son sein escrit en lettres Latines, & leur dist: Mes Seigneurs & Dames, tant de Grèce que d'autre region que soyiez ie suis enuoyee par deuers vous tous, tant ceulx qui estes de ce party comme aux autres tenans le cōtraire, pour vous faire entendre le vouldoir de ma maistresse: adoncq se teut, & les Princes leurent la lettre.

*Lettres de la Royne Cleofile de Lemnos
aux Princes de Grece.*

Cleofile Royne de l'Isle de Lemnos, salut & paix aux Princes de Grece: Messieurs combien que soys yssue du noble sang Troyen, de la souche du vaillant Roy Gedeon, ie ne vous viens à present renouveler l'ancienne querelle de vostre Grèce: que Helene: mais ayant eu nouuelles en

mon Royaume de la merueilleuse assemblée faite en cest Empire, à l'ocasion du ravisement de la seconde Helene, & du grand nombre de Princes & Gentils Cheualiers qui s'y trouuoient tant du costé de voz ennemis comme du vostre, ie suis partie de mon Royaume pour la venir voir, acompagnée seulement de Damoiselles, pour demeurer neutre de tous voz differentz: & atriuee en ce port vous ay enuoyee ceste embassade pour vous auertir de la cause de ma venue, qui est pour iuger des prouesses & haults faicts, qui seront exploitez d'un costé & d'autre, à fin d'employer mes terres & seigneuries, avecq le gage de la beauté dont les Dieux m'ont voulu donner en tel Cheualier que ie verray estre accompli d'estat, vertu, & perfection de sa personne. Parquoy s'il vous plaist me donner sauf conduit pour moy & ma troupe de femmes, ie mettray pied à terre, & vous iray visiter à Constantinople pour veoir ce braue tournoy que lon solemnise aux nopces d'Helene d'Apolonie.

Les Princes furent esbahis de ceste lettre, dont la Damoiselle auoit portee la pareille

au camp de Lucidor : Et lui estant demandé ou elle auoit laissé sa maistresse, dist qu'elle auoit surgi à trois lieues de là ou elle atendoit leur responce, deliberee de les venir voir le lendemain avec leur congé, lequel lui fut volōtiers accordé, & qu'elle seroit plus que la bien venue. Toute telle responce lui auoyent faicte Lucidor, & la Royne Zahara, dont la messagere se retira ioyeuse vers sa maistresse: de laquelle, pour mieux vous faire entendre l'occasion de sa venue, deuez sçauoir qu'en l'Isle de Lemnos y eut iadis vn Roy descēdu du sang du Roy Priam de Troye en ligne masculine nommé Gedeon, Prince vaillant & de race & de disposition de corps qui espousa vne Royne de beauté nompateille, duquel liēt fut engendree Cleofile si belle que nulle de son temps n'en aprochoit que de biē loing encores qu'on eut mis en ieu les Princesses de Grece. Or deceda son pere, demeurant ceste pucelle orpheline en l'aage de six ans & lors estoit paruenue à seize avec accomplissement de beauté, bonne grace, & prudence, & vn sçauoir de la harpe si exquis que quand elle y ayoustoit sa voix faisoit voltiger & danser les cueurs des escoutans inuisiblement en leur ventre : Ce qui la fit (avec sa grande richesse) requérir de plusieurs grands Princes en mariage: mais elle les desdaignoit tous, disant que celui seul seroit son ami qui se pourroit comparer en prouesse & vertu à l'excellence de sa beauté. Tellement qu'en ceste deliberation ayant ouy resonner le bruit la grosse assemblée qui se faisoit deuant Constantinople à l'occasion de la beauté d'une Helene, elle estoit là venue pour voir tant la fleur de ceste Cheualerie que la perfection des Dames de Grece. Et par ce que son intention ne fust donner port, faueur, n'assistance aux vns n'aux autres, n'amena homme quelconque que les pilotes & matelotz, pour conduire ses nauires, contre le conseil de ses vassaux, lesquelz tous elle laissa au port,

De bon recueil qui fut fait à la Royne Cleofile tant en la ville que dans le camp.

CHAP. XXVI.

LA Royne Cleofile receut grand ioye à la venue de sa pucelle, à laquelle elle s'informa amplement de la beauté & maintien des Princesses Grecques: Si mit pied à terre le iour ensuiuant, accompagnée de deux mille Damoyelles, qu'elle fit monter sur vne espee de cheuaults ayās le col hault & droit comme Dromadaïnes tous enharnachez de soye blanche semée de boutons d'or, & elles vestuēs de longues robes de mesmes, les cheueulx blācs espars & crespis, qu'on les eut dist porter vne toyson d'or sa la teste avecq' bagues de grand pris leur pendans aux oreilles. Et quarante d'elles marchoyent aupres de la Royne, sonnans de diuers instrumens. Elle avecq' quelque nombre de principales aussi montees sur vn pareil animal, mais beaucoup plus grand que les autres, toute couuerte de toille d'or semees de perles Orientales, avecq' les boutons d'or taillez en espargne, & la bordure d'embas de pierrie. Deuant elle marchoyent quatre pucelles en bahitz de heraux aux armoyries de leur Royne, qui estoient, langousses de sable en champ d'or, & sa deuisē vn Phenix & le dicton (AVEC L'VN IQVE O V SE V L E) En telle magnificēce alloit le droit chemin de Constantinople, faisant mener en son bagage deux cens cheuaults chargez de riches tentes, pavillons, liētz de camp, tapisseries, & autres choses necessaires au seruice de telle Princesse qu'elle estoit: lesquelz furent dressēz en vn quartier entre la ville & le camp, sur vn tertre fort eminent, car elle vouloit estre à part à son priuē, & veoit la meslee quand le temps s'y adonneroit. Ceste troupe arriua à vne lieue pres de la cité. Adoncq' fut dressē vn petit poisle de drap d'or soustenu sur quatre bastons, de peur du halle, & au dessus d'iceluy vne riche coronne d'or au milieu de



de laquelle estoit le Phenix oiseau vnique, preparant son feu de canelle & autres boys aromatiques, qui s'allumoit par vne flamme comme d'eau de vie, sans consumer le bois n'y l'oiseau, tenât la devise en s^{on} bec, & le rouleau entortille au tour du col. Marchant doncq la Royne en telle magnificence, lon vid esleuer deux tracz de poudriere monstrans apparence de quelques gens de cheual qui venoyent en deux troupes avec grande nombre de trompettes & clérons que lon oyoit de tous costez, les vns du long de la marine, les autres plus hault de l'endroit du camp, qui deuancerent les Constantins, entre lesquelz venoyent la Royne Zahara avec son filz & sa fille, qui receurent honorablement la Royne Cleofile, laquelle leur rendit semblable reuerence. Lucidor & les Seigneurs de sa compagnie estoient tous tres richement armez, hors mis l'habillement de teste, sur laquelle chacun portoit sa coronne ou chapellet de Duc ou de Comte. Qui furent tous merueilleusement esbahis de sa beauté, spécialement Alastraxeree, de laquelle la Royne Cleofile ne demeura aussi moins estonnee craignant auoir rencontré sa pareille. Apres les bien venues & caresses s'acheminerent vers le camp aupres duquel trouuerent les Princes Grecz : dont le premier venoit Amadis de Grece & le Prince Fa-

langes d'Astre, costoyez des Empereurs Lifuart & Esplandian, & derriere eux tous ceux de leur lignage & leurs principaux amis. A la rencontre la Royne Cleofile s'arresta, & fit ouurir les rangs de ses Damoselles. Si contempla longuement le Prince Florisel de Niquee, & Falâges d'Astre, & sur tous le grand Roy Amadis, lequel nonobstant la barbe blanche estoit fraiz & vermeil comme la rose, representant mesme vn doux trait de face, qui gaignoit les cueurs de tous ceux qui le veoyent. Auquel la Royne Cleofile (apres que chascun eut fait son deuoir de la saluer) Monseigneur, dist elle, la maiesté de vostre barbe, avec la memoire des nobles faits d'armes qu'avez executez en vostre temps ne semblent pas encores estre mortz en vous, à voir le beau taint de visage que portez: mais croy qu'en pourriez encores attirer les Dames aussi bien que iamais, & aussi tost que ces ieunes gentils hommes avec leurs perruques dorees. Certes ie ne croy pas qu'oncques Prince ayt eu tant d'heur à dompter les plus furieux hommes, & ensemble conquerir les tendres Damoselles. A ah ciel tu me deuois faire naistre y a cinquante ans pour iouyr du bien que tient presentement celle qui se peut reclamer la plus heureuse Dame du monde. Tandis qu'elle parloit le Roy la regardoit

entièrement & tous les autres Seigneurs, qui la iugerét bien la plus belle qu'ilz eussent onc veüe. A quoy le Roy lui respondit: Ma Dame ie vous mercie grandement de ce qu'il vous a pleu enrichir mon merite par comparaison que faites à vostre grand valeur: mais tel que ie puis estre, ie m'estimerois heureux, d'auoir moyen de vous faire seruice agreable. En telz propos vindrent iusques au pres de la ville ou elle ne voulut loger, quelque priere & instance qu'on lui en sceust faire. Bien leur promist que dans vn iour ou deux, qu'elle se seroit reposée elle iroit veoir les dames de Grece, tant renommées en beauté, ainsi se retira au quartier ou lon auoit dressé ses pavillons, & luy contenterent en chemin le combat assigné au iour ensuiuant, dont elle fust fort aise d'estre arriuee si à temps. Tant y a tous les Princes, tant Grecz que les autres, prindrent congé d'elle à l'entree de sa tente, voltigeans & penadans à qui mieulx, pour se monstrier le, vns aux autres. En quoy dom Florisel regardoit à Lucidor, & dom Falanges auoit tousiours l'œil sur la Princesse Alastraxerce qui ne le daignoit recognoistre. Mais bien vous veux dire que si tost qu'Amadis de Grece vid Lucidor il n'en peut retirer sa veüe, lui estant auis qu'il lui représentoit la propre figure de la Princesse Lucelle: la memoire de laquelle eust tant de force sur lui qu'elle replanta en sa memoire vn nouveau souci d'elle, rallumant le vieil feu couué vn temps souz les cendres, tellement qu'il demeura comme rai & immobile, dequoy Lucidor s'aperceust bien, mais il pensoit que ce fust vn mauuais regard de là haine qu'il lui portoit. Quant au Prince Anaxartes il y auoit sa part du plaisir, en ce qu'il la veüe de la Roine Cleofile lui rafraichissoit le souuenir de sa dame Oriane. Tous les autres cheualiers s'entremiroient les vns aux autres, & se recognoissoient aux armes & deuises. Or estoit le Roy Birmartes souuent en pensées s'il parleroit aux princes Grecz se trouuant doncq si pres d'eux, mais s'attendant

à qui commenceroit, departirent sans aucun parlement. Si qu'ayans conduit la Roine Cleofile iusques à son pavillon chacun se retira à sa place. Ce soir là l'Emperiere Abra fit dresser de grands eschaffaulx tenduz de riche tapisserie, au lieu ou lon deuoit combattre, disant au Roy Amadis, que puis que sa maiesté entreprenoit le combat pour elle que elle se vouloit monstrier au lieu pour lui dōner faueur. Faisans les deux champiōs veilles & sacrifices toute la nuit. Le Roy Amadis des le soir mesmes enuoya le Comte Gandalin vers la Roine Cleofile lui dire, puis qu'elle estoit venue de si lo-tain pais pour iuger des faitz d'armes des combatans tant des vns que des autres, qu'il luy prioit biē fort vouloir faire la troisieme de leurs iuges: Surquoy la Roine respondit, qu'elle estoit excusée de ce iugement qu'elle tenoit pour desia fait, veu la vertu inuincible de son maistre, qu'elle se reseruoit au lēdemain pour iuger en sale de la beauté des princesses Grecques, & avec telle responce le compte s'en retourna en la cité.

Du combat qui fut entre le Roy Amadis & celui de Thir.

CHAP. XXVII.

AV point du iour le Roy Amadis fut armé par les mains de tous les Princes, ie dy d'vne maille qu'il endossa par dessus la cuirasse, laquelle avec son gorgerin d'acier, la grand' piece, les auantbras, cuissotz, gantelerz, & armet luy furent apportez à l'instant par l'emperiere Abra, qui luy vint presenter le harnois complet tout blanc à la mode des nouveaux Cheualiers, & l'escu au camp d'or avec la portraicture des preuues de l'arc d'Apollidō, & de la chābre deffenduē, lors elle luy dist: Monsieur puy que vostre maiesté me fait cest honneur d'entreprendre le combat en mon nom, il vous plaira me faire ce biē de vous armer de ce harnois, vous certifiant



fiant que l'ay fait portraire ceste histoire de vostre loyauté qui acompagne vostre promesse: Et vous apporte ces armes blâches, parce qu'il semble à vray dire q la vertu raieuint en vous. Ma dame, dist le Roy, ie vous mercie grandement de la faueur que me prestez, comme à Cheualier nouveau reuerdi par les pensees qu'il a nouuelles sur vostre beauté, qui par amour m'incitera à mon deuoir, sans qu'Oriane ma femme soit marrie de la faueur & affection que i'emprunte de vous, m'assurant que sa fermeté n'en fera que croistre d'auantage. Ce dit, requist les Dames soy trouuer à l'espreuue de sa ieunesse, ce qu'elles firent. Le Roy comparut au camp monté sur vn cheual blanc enharnaché & caparaçonné de drap d'or frizé sur satin blanc, avec force laz d'amours brodez de perles que l'Emperiere luy auoit fait faire, & auoit ceinte sa verde espee, menant les trompettes & cleçons tel bruit qu'on ny eust ouy Dieu tonner. Toit apres vint le puissant Roy de Thir armé d'un harnois verd fort riche, semé de tressles d'or, avec sa cote d'armes & caparaçon de son cheual tout de soye verde, l'escu de mesme couleur, & en iceluy vne rouë de fortune, au dessus de laquelle au plus hault lieu estoit figuree sa personne, comme pour dire qu'elle l'auoit colloqué au plus hault degré: il estoit de fort bel

le stature & proportion, & promettoit bien quelque grand effect de sa personne. Or que le Roy Amadis venoit au petit pas, la Princesse Alastraxeree, qui estoit vne des iuges alla au deuant de luy, & le rencontra acompagné de l'Empereur Esplandian qui portoit sa lance, & l'Empereur Lisuart son heaume, & l'Empereur de Rome son escu: il auoit alors vne escharpe blanche, dont la houe luy pendoit retroussée sur le doz, & le tafetas estoit eslargy deuant sa barbe, tellement que lonne la veoyoit point, avec vn chapeau de velours noir, enfoncé en sa teste, qui luy couuroit ses cheveux blancs, en sorte qu'il ne monstroient que le taint de son visage tant bel & fraiz qu'il n'y aparoissoit aucune ridure, au moyen de certaine eau qu'Vrgande la descogneuë luy auoit donné, dont, il vsoit tous les iours: Parquoy le voyant la Princesse Alastraxeree ainsi equipé & armé d'un harnois blanc luy dist saignant le mescognoistre: Comment seigneur Amadis, pèlez vous ainsi faire passer Grece pour Gaule hâ ie ne souffriray pas, puis que ie suis iugé establie. Ma dame, dist-il, nouuelle pèlerenouuelle la personne: car Amour est la vraye fontaine de iouuence: ce propos luy fut déclaré, dont elle se print fort à rire. Et sur ces entrefaites, dom Falanges alla au camp de Lucidor pour amener le

Roy de Thir, à telle heure que la Royne Cleofile estoit montée sur les eschafaux, accompagnée de ses Damoyelles toutes acoufrees de satin bleu, semé de Soleil d'or, qui sembloit rendre la propre lustre du col d'un paon. Le prince Florisel, l'auoit esté querir pour la mener aux eschafaux, & rencontrèrent Lucidor qui se joignit avec eux, tellement que la Royne estoit au mylieu d'eux laquelle considerant la disposition de Florisel, iuge n'auoir encores veu son pareil en sa vie, si leur dist: Certes messeigneurs ie me tiendrois trop heureuse si les dieux m'auoient fait tant de grace, de pouuoir mettre la paix entre vous deux, comme ie fers maintenant de barre, & conséquemment entre tant de princes & gentils-hommes que ie vous voy icy assemblez, Ma Dame (luy dist Florisel) vostre beauté porte bien tesmoignage du contraire, estant si excellente qu'elle mettroit plustost entre tous deux particuliere discord. De telle guerre comme celle là (dist Lucidor) ie pense que sa clemence ne la nous voudroit mener si cruelle qu'elle n'en procurast quelque paix, veu la douceur naïue qu'elle représente. La roine se prenant à rire: or bien leur dist, puis que voulez tenir ma veüe pour occasion de guerre, me semble qu'il sera bon que ie n'en empesche voz personnes, à fin que la paix ne tienne à moy. Ma Dame, dist Lucidor, nostre guerre est de autre qualité, comme yssüe d'une branche de renommee, tellement que la vostre nous donneroit plus d'occasion de guerroyer que d'apointer: vrayement (dist elle) ie suis donc bien loing de mon conte, qui pensois que mes allarmes fussent suffisantes pour defaire la guerre que vous avez commencee. Aussi est il vray ma Dame (dist Florisel) car les playes qui en viennent sont tant incurables qu'elles tiennent longuement le patient au lit, Sur mon Dieu, dist Lucidor, j'en voudrois bien auoir trouué la medecine. En bonne foy, dist la royne, ie croy que vous en estes tous deux bien blesez, selon que j'entends à voz paroles ce

qu'elle leur dist de si bonne grace, qu'ilz se mirent tous deux à rire: chose qui fit esmerueiller ceux qui les regardoient, comme la Royne les entretenoit si bien qu'elle les faisoit deuifer ensemble comme amys, combien qu'ilz s'estrehaissent mortellemet: mais comme sages & discretz ilz estimerent impertinent de contester de paroles en la presence d'elle. Or arriuant aux eschafaux elle preuint l'inconuenient qui pourroit suruenir à cause du seruice que l'un & l'autre s'ingeroit de luy faire pour la descendre de son cheval, & la mener sur l'estage. Parquoy elle dist à Florisel: Monsieur, pour ce que vous estes le premier venu à mon seruice, ie me veux mettre entre voz braz, vne autrefois si Lucidor vient plustost que vous, ie l'y voudrois employer. Elle à terre ilz la conduyrent par dessouz les braz iusques au lieu, ou elle fut treshonorablement receüe des Dames Grecques, fort esbahies de sa singuliere beauté, & elle aussi de la leur, principalement de Niquée, Siluie, Helene, & de la princesse Oriane: elle prenant place entre les Emperieres Leonorie & Abra. Quant à Helene qui vit lors Lucidor en la presence, & luy elle, ie vous laisse à penser les ceillades qu'ilz se ieterent: mais celà ne dura gueres, par ce que les seigneurs ayans conuoyé les Dames en hault descendirent incontinent pour monter à cheual & se rēdre en leurs bandes. Adonc entra la royne Cleofile en deuis avecq' l'Emperiere Leonorie: Je croy ma Dame, luy dist, que les souverains dieux ont icy laissé leurs femmes & amyes, tant ie voy de beautez plus que humaines: Qui luy respondit, ma Dame, la vostre est si excellente, que ne pouez rien voir de nouveau à la comparaison. Les trompettes commencerent à sonner, qui rompirent leur propos: car les deux armées s'estoient rengées en bataille pour assauter leur camp, d'autant qu'il n'y auoit autre seurreté fors celle que l'honneur peult donner de luy mesmes. C'estoit belle chose à voir toute la campagne rase parée d'enleig-

d'enseignes & guidons voletans, avecq' les deuises & couleurs de tant de seigneurs & barons regardans le Roy Amadis, qui se presenta premier au camp, tournoyant vn tour ou deux par deuant les Dames, si bien à cheval & tant à droit, que sa contenance donna grand contentement aux assistans.

Gueres ne tarda apres que le prince Falanges amena le roy de Thir qu'il mist à l'autre costé du cāp, oposite à celuy ou la princesse Alastraxeree auoit assis le roy Amadis. Ce fait les iuges laissant les chāpions, monterent en leurs sieges : commandans incontīnēt publier sur peine de la hait toute seurētē necessāire pour le droit des deux parties : mais auant que donner le signal, Falanges dist à la pucelle Alastraxeree: Ma diuine Dame ie vous supplie treshumblement prendre garde au iugēmēt des coups des Roys combatans: car quāt à moy, i'ay tant à faire à la guerre que me liurez, que ie suis quasi hors de moy, plus disposé à estre iugé de vous, qu'à prononcer sentence contre personne, me submettant entierement à vostre celeste clemence. Prince (dist elle) le proces de ceste matiere pend encores au clou, & n'a garde d'estre si tost iugé, parquoy entendez à vous: & quant à la mercy que demandez, le temps n'est pas encores veu: le party que vous tenez contre moy la bien desseruy en mon endroit.

Ma Dame (dist il) c'est beaucoup pl^s auoit mon ame en vostre pouuoir avec ma volonté, que ne seroit de posseder mon corps, duquel ie suis obligé par la loy de société d'armes à quoy vous prie auoir esgard. Je ne voy nulle aparence de cueur en gaigne, dist elle, puy que les œuures n'en donnent aucun tesmoignage, parquoy laissons celà iusques à vn autre temps. Si fit sonner les trompettes, au son desquelles les deux Roys deslogerent l'vn contre l'autre, de telle roideur, que s'entredonnans des lances contre leurs escuz en firent esclatz sans autre dommage: tournans bride, celuy du Thir dist au Roy Amadis : Monsieur ie vous prie reprenons encores vne lance, &

me donnez ocaſion d'honneur en la iouſſe, pour esprouuer si peu que ie vauz, contre celuy de qui la valeur est trop cogneue. Pen suis content (dist il) faites en comme il vous plaira, puy que ceste entreprise à esté vostre : Ainsi en reprindrent d'autres qu'ilz esclaterent comme deuant, mais ilz se vindrent ioindre des corps & des cheualz, de si grand' roideur que les monſtres tomberent ſouz leurs maiſtres, leſquelz ſe releuerent ſoudain, & embrassans leurs eſcuz mirent les mains aux eſpees, dont ilz commencerent enſemble vn dur eſtour, eſtans leurs coups ſi peſans & lours qu'ilz faiſoient ſortir les eſtincelles de feu de leurs harnois : qui dura bien l'eſpace d'vne grand' heure, ſans que nul d'eux fiſt aucun ſemblant de vouloir prendre aleine n'y repos: dont chacun ſ'esbahissoit, principalement du roy Amadis, auquel l'age ſembloit denier telle verneur : mais en luy eſtoit vne vertu heroique qui ne tomboit en nulle cōparaifon de nul autre du monde, & ne ſe pouuoit encores amortir par le cours des ans. L'heure paſſee le roy de Thir ſe tira vn peu à quartier, & dist au roy Amadis : Roy de la grand' Bretagne, ce ſeroit bien fait de nous reposer vn peu, attendu que nous auons du temps aſſez pour finir noſtre bataille. Je vous ay dit reſpondit il) que ie ne feray rien en ce cōſlit qu'à voſtre vouloir hormis la conſuſion ſeule qui conſiſte en la main de Dieu, de donner la victoire à qui luy plaira, parquoy reſpons nous puy que le voulez. Ainſi ſ'eſſonnans vn peu l'vn de l'autre, ſe tindrent aſſez bōne piece, reſoſans les deux mains ſur les croiſees de leurs eſpees. Ilz auoient quelques petites playes, dont le ſang qu'ilz perdirent leur embleſmit le viſage, qui cauſa vne extreme deſplaiſance à la royne Oriane de veoir ſon cher ſeigneur en tel danger lequel ietant l'œil vers elle & la voyant toute pale de frayeur, lors eſmeu cōme ſeroit vn Dogue d'Angleterre quād il ſ'eſt eſchauffé ſur la beſte, & que le veneur le detient au colier, commença à

marcher vers son ennemy qui le receut vaillamment, & demenerent long temps leur escrime: en laquelle toutesfois on cognoissoit euidemment l'auantage du Roy Amadis par dessus luy: dont la princesse Alastraxeree, trop esbahye s'escria: O renommee, de combien defaut ta voix à exprimer la grandeur des vertus supernaturelles, telles que la venë en descouure l'effect. Le Roy de Thir ennuyé de la longueur du combat, y pensa faire vne fin, moyennant vn coup ou il desploya toutes les forces de ses bras, prenant son espee aux deux mains pour charger sur la teste du Roy Amadis, mais il n'ataignit que son escu qu'il luy para au denant, de telle sorte qu'il le coupa en deux pieces. Le Roi luy voulut bien rendre chaudement, aussi il luy ietta son escu my party en terre, & l'espee descendit sur le creste de l'armet si auant, qu'elle estourdit le Roy de Thir, tellement qu'il chancela pour tomber, & l'armet se deslaca & cheut, dont il demeura le chef nud. Ce que voyant Amadis luy dist, Roy de Thir, choisissez de deux choses l'vne, ou de vous rendre mon prisonnier sans autre condition, ou de prèdre vostre armet pour donner fin au combat, à cause de vostre prouësse. Monsieur (respondit il comme sage & courtois) ie cognois que tout Cheualier vous doit foy & hommage au fait des armes: parquoy ordonnez moy telle rançon que i'en puisse meriter vostre amitié: il me suffit de la gloire que i'ay eue d'auoir vne fois satisfait à ma volonté, d'en treprendre vne iournee contre le prime du monde: parquoy disposez de la prison de celuy qui est prest d'y obeir. Je vous en mercie dist le Roi, & puis qu'ainsi va, vous irez rendre à l'empereire Abra & faites son commandement. Les iuges voyans ceste fin descendirent de leur eschafault, & les escuyers des Roys leur amenerent des cheuaux. Adonc fut remené le Roy Amadis en la ville & celuy de Thir s'y en alla apres pour acomplir sa cōdition enuers l'empereire de Trebifonde, à laquelle il dist: Ma

dame, ie m'en viens icy presenter à vostre grandeur de la part du trespreux Roy de la grand' Bretagne, pour tenir prison telle qu'il vous plaira, en vous obeissant en tout & par tout. Monsieur, dist elle, ie la vous donneray telle que vostre vaillance merite: Et le prenant par la main le mena deuant la Roynes Cleofile, disant, ie vous donne à ceste excellente Roynes pour serf & esclave: Ma Dame, respondit il, ie vous remercie humblement du bien que me faites, en me donnant si doulx emprisonnement, ou ie me submettrois volontiers, encorës que ie n'y fusse tenu. Dequoy la Roynes Cleofile soubriant: Quant à moy, dist elle, ie vous remetz en pleine liberté, attendu qu'il ne m'appartient comme à fille de tenir tel prisonnier que vous estes. Certes, madame, repliqua le Roy, la prison m'eust esté plus agreable que ceste clef des champs, toutesfois ie vous remercie, & l'empereire de l'honneur qu'il vous a pleu me faire, vous assurant que iour de ma vie n'esparneray les biens ne la personne en vostre seruice. Apres ces propos il s'en alla en son pauillon, ou il fit penser ses playes. Prenant d'autre part toutes les Princesses leur congé de la Roynes Cleofile, laquelle fut remenee par Florisel & Lucidor, comme elle estoit venue, demeurans fort contentes de la preud'homme extreme du Roy Amadis.

De la confusion en laquelle la Roynes Cleofile se trouua, & de la harangue qu'elle fit en la presence des Princes Grecz auant son partement.

CHAP. XXVIII.

Plusieurs autres combatz singuliers furent faitz pendant le temps des treues desquelz les Grecz furent souuent vainqueurs, & quelquefois succumberent. Entre autres le Roy de Sidonie en eut vn contre le Prince Zahir, lequel à la cause de sa ieunesse emporta l'honneur de la victoire, se trouuant tousiours la Roynes Cleo-

Cleofile presente à tous les confitz pour iuger la valeur des combatans, laquelle ne luy sembloit du tout rien au regard de la prouesse & d'exterité du bon roy Amadis demeurant tant satisfaite de luy, qu'elle l'ayma secrettement en son cueur, tant qu'elle en perdit tout plaisir & repos accoustumé, & d'autant plus estoit vexee qu'elle auoit assis son amour en personne de qui elle ne pouuoit esperer remede, aussi eust elle plustost voulu mourir que de donner lieu à ses pensees enuers autre que son legitime espoux: d'autre part elle consideroit que la loyauté du Roy tât cognue par le mode l'empescheroit encores qu'elle voulsist consentir à ses apetitz: tellement qu'elle en fut en grâd perplexité, & faisoit mille exclamations apart elle ne sçachant que faire pour trouver allegeance, n'au fort qu'elle punition elle pourroit prendre de soy mesme, d'auoir employé son affection en tel lieu contre son hōneur & grandeur: Concluant neantmoins en son esprit qu'elle yroit vn iour en la cité pour voir les Dames, ce qu'elle fit, allant à la propre heure que le Roy se leuoit, & les Dames estoient venuës à son leuer, desquelles elle fut honorablement recueillie, & assise au mylien de toutes. Et apres quelques propos communs, adressa sa parole au Roy: Monsieur i'ay ouy dire aux sages que les Dieux ont mis au mouuemens du ciel & en ses lumieres vne force par dessus toute creature, & que les choses fatales ne peuvent faillir de tomber ou elles sont destinees, sans qu'il soit en la puissance des hommes d'y resister: mais il y a des accidens de grand' violence, lesquels peuvent estre surmontez par magnanimité, telz que ceux que vous auez mis à chef, à la grande admiration de tous les viuans. Aussi me semble qu'une Dame d'estat ne merite pas moins de gloire à soustenir les assaux d'amour: Et que celle en obtient encores plus que toutes, qui en est plus cruellement affligée par sacrifice irreuocable de sa foy, ayant plus cher mourir que de l'en-

tacher & souiller. Ce que ie dy, pour vous declarer l'inconuenient ou ie suis tombee par influence d'amour que ie pense inenitable à l'effi & duquel suis deliberee resister pour la cōseruation de mon honneur. Car, monsieur ie vous prie croire que des le iour que ie veis vostre maiesté venue au deuant de moy, acompagnée des Princes de vostre sang, il n'y eut personne qui me pleust tant en toute la troupe, & y imprimé tellement mon affection qu'il seroit impossible de l'effacer, & si tiens à grâd dâger de demeurer longuement en vostre presence, attendu la loyauté tant esprouuee en vous, & la raison de mon estat & sexe, qui m'oblige par tous moyens à m'en deporter: & ayant fait vœu de ne me marier iamais qu'à celui que ie trouuerois Paragō de tous les hommes (tel que ie vous iuge estre) pour n'associer autre indigne des dons & graces que nature & fortune m'a largement departis: vous trouuant aparié à autre Dame, ie demeure tormétée de maladie incurable, laquelle reçoit quelque allegement en vous descouurant mon cueur. Ce fait ay proposé partir de ce pais pour retourner en mon royaume consideré qu'il n'y a desormais plus que voir digne de memoire, & que les plus grandz coups sont ruez des combatz des vaillans hommes des deux armées. Ainsi ne pouuant mon desir accomplir en vostre endroit, vous supplie ne le vouloir prendre en mauuaise part ains attribuez la faute à amour duquel cognoissez la puissance, qui est telle sur moy que iamais ma volonté ne sera régee en autre que par vostre consentement, auquel ie me sumetz toute, mon honneur sauue. Le Roy fort esbahy de tel discours, comme aussi to⁹ les assistants, luy dist: Ma Dame, ie vous remercie humblement de la bonne affection qu'il vous plait me monstrier, & loue Dieu que la vous donnant telle soyez adressee à celui qui l'accepte, avecques la discretion & iugement tel qu'il est conuenable pour vostre honnesteté, promettant y respondre de bon cueur iusques

à ce que ie me sois aqité enuers vous d' aussi bon Cheualier que ie pense estre, à fin que vostre foy n'en soit plus longuement en charge. Monsieur (dist elle) ie me remetz encores à vostre bonne grace & toutes mes volonte. Ce propos finy, & congé pris à grand regret, la Roïne retourna en sa tente, laissant tous ceux qui estoient en la chambre du Roy, fort estonnez de

son deuiz, leur estant bien auis que cela parloit d'un grand cuer de femme. Laquelle apres auoir fait donner ordre à son equipage pour le partement, s'embarqua à telle pompe & magnificence qu'elle estoit premiere descendue faisant voyle vers son Royaume ou nous la laisserons iusques à temps oportun.

Comme les Princes Grecz arrestèrent par deliberation de conseil que Flerisfel ouvroit quelque proposition de bouche à Lucidor, auant que retourner à l'exploit de leur guerre.

CHAP. XXIX.



LEs treues faillies les Princes Grecz entrerent en conseil pour scauoir qu'ilz auroient à faire au bout du terme Auquel apres plusieurs opinions fut conclu de sortir vn iour pour donner la bataille, auant laquelle Florisfel iroit parler entre deux camps au Prince Lucidor, pour se iustifier d'autant plus vers Dieu, vers luy & tout le monde, luy requerant paix amitié si obtenir se pouoit. Laquelle resolutiō faite au iour de la bataille furent ordonnez trois bataillons du tosté des Grecz, dont l'un seroit conduit par Florisfel & Amadis de

Grece son pere: le second par Falanges d'Astre avec ses gés, & les Rois de sa troupe: Le troisieme, par le Roy Amadis avec les Princes de son sang, ses amys & alliez Or fit le prince Falanges dresser vn stratageme contre les Elephans, par le moyen de cent charrettes que les cheuaux trainoient chargez de force feu Gregeoys qui rendoit vne flamme espouventable avec deux pointes acerees au bout des charrettes, & hommes bien experts pour leur conduite pour les faire partir à point & fourrer au mylieu des Elephans. Aussi de l'autre costé ceux du par-

du party de Lucidor firent trois bataillons, dont il estoit conducteur du premier avec la Royne Zahara & ses enfans : Le second estoit mené par les Roys de Scythie & de Thir : & le troisieme conduisoit le roy Birmartés avec ses confederez : ayans ordonné le front de leur avant-garde & arriere-garde tout d'une mesme largeur, enfermés les Elephans au mylieu d'eux. Suyuant laquelle deliberation ilz mirent ordre à leurs preparatifz, faisans grandz sacrifices d'un costé & d'autre, specialement le prince Falages q fit immoler plus de deux mille boeufz avec une infinité d'oyseaux en lieux spacieux & ample deuant la cour du Palays Royal, ou plusieurs Princes Chrestiens se trouuerent pour voir la magnificence, seruant son chariot triumphal pour autel en tous lieux ou il alloit hors son pais: En la presence desquelz il fit telle oraison: O gloire de mon heur souverain, ie prie ta maiesté par la partie humaine que tu as receüe du ventre de Zahara ta mere, vouloir comme diuine moyenner les Dieux tes parens une bonne paix entre ces Princes icy, ou pour le moins garder le droit que nous auons par l'issue de la bataille. Quât à moy ie te supplie regarder d'œil piteux l'integrité de mon cuer que tu martires innocent, comme i'ay fait les cueurs de toutes ces bestes à ton honneur. Sa priere finie tous ses vassaux firent semblable requeste à la deuotion de leurs seigneurs, mettans fin au sacrifice par mille parfums odorans, & force instrumentz de musique. Lequel acheué esmeut plusieurs assistens à nouuelles pensees, & entre autres Amadis de Grece, en qui la vieille playe des amours de Lucelle auoit desia commencé à se r'ouuir & entamer, comme ie vous ay dit, au moyen de la veüe de Lucidor son frere : car les exclamations & ceremonies de Falanges luy sererent tant le cuer en ceste souuenance renouvellee, qu'il faisoit de son cuer hostie quasi semblable. Ainsi passerent le soir d'un costé & d'autre en ceremonies, iusques au lendemain que la bataille se deuoit donner.

*Comme les amours de Lucelle se resueille-
rent au cuer d'Amadis de Grece: & comme
Florisel parla à Lucidor, & de la responce
qu'il luy fit.*

CHAP. XXX.

A Pres qu'Amadis de Grece eut si long temps que vous sçaez iouy de la beauté de Niquee, engendrant en elle ce noble prince Florisel (duquel est intitulée ceste hystoire) Amour par son inconstance acoustumée atisa en luy l'estincelle non du tout amortie de la princesse Lucelle, par le moyen que ie vous ay déclaré, & l'empoisonna tellement de ces herbes venimeuses du Dieu malin, que l'amytie de sa treschere Niquee couchée à ses costez, ny sa vertu & discretion, luy peu seruir de contrepoison à vomir & ietter hors ceste ymaginatio fantastique: en laquelle se tournant, virant dedans son lit (comme celuy qui ne pouuoit dormir) s'escrioit: ha à amour que cauteleuses sont tes trafiques, que non content du nouueau feu que tu allumas en moy au commencement par les yeux de Lucelle, tu me vins depuis embraser de l'affection de Niquee non seulement pour m'en faire souffrir le mal present de l'abandonner, ains à fin qu'en redoublant ma peine tu me fisses mourir par desespoir de ne pouuoir paruenir à l'autre à cause de la desloyauté dont i'ay usé enuers elle. O Dieu quelle punition meritay-je faulxant la foy maintenant à si belle & gracieuse Princesse! O trahistre amour que tu te sçays bien faire payer des iniures que lon te cuyde faire? Làs ma Dame Lucelle! ou prendray-je la hardiesse de vous presenter un cuer tant desloyal? & ou se trouuera langue si prudente qui pour vous expliquer mes passions, peult de vous impettrer audience, sans estre tenue pour suspecte & double en parlant pour un traïeur infidelle que ie vous ay esté: Et posé le cas que ie m'osasse trouuer en vostre presence, & vous declarer la force de ma dou-

douleur, requerant mercy de mon offense, les grandes inimitiez engendrees entre vostre lignage & le mien ne le permettoient pas: mesmement la necessité qu'on a de ma personne en ce grand besoin ne me donneroient pas le congé. En semblables regretz & plaintes il passa la nuict iusques à ce que le Soleil aparut fort blefme & descoulouré en signifiante de la triste iournee qui deuoit estre pour les vnes ou les autres, car ses rayons detenuz en noires nuees espesses, causoient vn bruit de tonnerre, avec horrible siffement de ventz. Les Cheualiers & soldatz desia en ordonnance estoient chargez de bruiue noire, & les enseignes toutes amorties de leurs couleurs. A ceste cause les payens enquirent de leurs augures & deuins l'exposition du prodige, qui virent vn Aigle noir voltant par dessus l'armee des Grecz, lequel iettant criz espouuentable, fondit roy de mort au mylieu des esquadrons: qui fut estimé à grãd augure selon les decretz de leur science. Ce que voyant Falanges, qui en vloit aucunesfoys selon la loy payenne, vint à Florisel comme capitaine general du camp, & luy dist: Monsieur, ie serois d'auis de surseoir la bataille pour ce iour cy, veu les signes que les dieux nous monstrent de grand infortune à venir sur nous l'accident de cest oyseau. Le mieux sera (suyuant l'arrest du conseil) requerir Lucidor de parlement, & passer tous deux entre voz avant-gardes le surcez des precedentes iournees, voyant ceste cy presente le pourra inspirer à apointement. Au fort vous pourrez si bien parler & prolôger vostre discours que perdrons pour ce iour l'occasion de la bataille, comme fit le sage Caton au senat de Rome. Florisel n'ayant esgard à l'oyseillerie de Falanges, mais à la deliberation qui auoit esté arrestee de parler auât la meslee, depefcha incontinent vn herault vers Lucidor à ceste fin. Lequel pensant Florisel auoir plus de la moytié de la peur, & venir aux conditions de la reparation pretendue, acorda d'y aller acompagné de

la Royne Zahara, ses enfans, & du Roy Birmartes, lequel il mada de l'arriere garde: & Florisel y vint avec son seul compagnon Falanges lequel commença ainsi: Lucidor ie vous ay desia par lettres fait entendre suffisamment le peu droit qu'avez en ceste querelle, vous offrant au par-sus conditions plus liberales que n'y estois obligé, pour le respect de la tranquillité de noz peuples, lesquelles maintenant ie ne vous viens ores augmenter ne diminuer, ains entêdre seulement si les iournees ia passees (esquelles avez cogneu vostre desauantage) vous rengerioient point à la raison, voylà la somme de ce qui m'amaine. Lucidor fort irrité de ceste harangue luy respondit sur le champ, sans autre auis de conseil. Dō Florisel, si i'eusse eu le courage si failly que vous m'imposez, i'eusse premier mis en auant le parlementer, ou n'eusse accepté la iournee: nostre contenance & equipage vous fait assez foy du contraire: Quant à l'auerité de fortune que nous alleguez auoir esprouuee en quelques combatz, vous sçavez bien qu'en avez par foys senty bonne part. Et quand il seroit ainsi, le hazard de sa varieté ordinaire me la feroit ores esperer propice: comme i'ay fait, ioinct le nouueau secours que Dieu nous a enuoyé par le vaillant Roy de Thir: Par quoy ne pensez pas me conuertir par tel langage, vous tenant certain, qu'en la confiance que i'ay en luy, & en la iustice de ma cause, j'attendray la fin telle qu'il nous vouldra donner en la bataille, vous laissant l'assurance que tenez en fortune qui vous a esté favorable par-cy deuant, en vous esleuans au plus hault de sa rouë pour vous ruiner tant plus bas. Puis qu'ainsi est, replique Florisel, que persistez en vostre obstination de vengeance, nous nous tiendrons sur noz gardes en nostre corps defendant, estimant bien qu'il ne nous auendra pis à la conseruation de nostre Helene qu'à noz ancestres au recouurement de la leur: sinon qu'ilz y furent longuement au siege, & nous esperos de ne vous y laisser tât lăguir.

Mais

Mais nous (dist Lucidor en colere) ne seront autant de moys à mettre vostre ville à sac, que furent d'ans voz Grecz à prendre Troye; encore que ce fut par fraude & tromperie, indigne de gens magnanimes. Partant retirez vous, & ne perdons plus en paroles le temps que voulôs employer en iuste effect.

Des prodiges & presage qui auindrent avant la bataille, & des harangues faites par les Capitaines generaux à leurs gens avant que la commencer

CHAP. XXXI.



LEs deux armées se trouuerent fort es-
tonnées de voir qu'il falloit iouer des
cousteaux, ne se trouuât aucun moyē
d'apointement. Adonc les Capitaines ge-
neraux se retirerent à leurs bataillons, met-
tant force trait sur les ailles; allans deçà &
delà par les rangs, pour voir si tout estoit
bien ordonné: mais sur ces entrefaites, a-
uindrent les plus merueilleux prodiges dōt
homme ouyt oncques parler: car à l'instāt
aparut vne innumerable quātité d'oyseaux
blancz, & de l'autre part vne semblable vo-
lee de gris, voletans sur les esquadrons de
Lucidor, lesquelz se rencontrerēt de si gran-
de furie les vns contre les autres, qu'en
moins de rien on en vit le pais tout cou-
uert entre les deux bataillons. Apres on a-
perceut venir de deuers la mer vn autre
grand nombre de corneilles, qui se mirent
cōtre les oyseaux blancs en faueur des gris
dont ilz occirent plusieurs mettant le sur-
plus en fuite. Ce fait les gris & noirs com-

mencerent à huer assez longuement, com-
me en signe de leur commune victoire: cō-
bien que peu apres les mesmes Corneilles
assaillirent les oyseaux gris & les massacra-
nt sans aucune resistance; mais à l'heure les
blancz qui estoient à la polade pendant le
dernier cōflit, reprindrent leur vol tournās
si furieusement contre les Corneilles, avec
vne partie des gris qui leur donnerēt ayde
qu'il n'en eschapa quasi pas vne. Alors les
blancz & noirs se departirent les vns des
autres tant estoient las & trauaillez, se tirās
vn peu à l'escart pour reposer. Chose qui
donna grands signes de prodiges par les de-
uins d'vn costé & d'autre: tellement que
les Capitaines des deux parties se deportē-
rent de leur demander, craignants causer
effroy à leur gent, & les augures ne s'osoiet
ingerer d'en parler. Mais fut auisé, tant par
ceux de dedās que de dehors q̄ chascū chef
feroit en son bataillō vne remonstrance le-
gere pour les animer, & assoupir la crainte
qui

qui en pourroit estre conceuë. Ce que Falanges commença le premier de son party. Seigneurs, Princes, & Soldatz les Dieux ont donné à vous & à moy par cy deuant de grandes victoires, par lesquelles auons fait en maintz païs trembler la mer & la terre. Je ne doute pas d'en faire autant ou plus icy avec la fleur de Cheualerie du monde, qui pour nous assurer & honorer nous ont donné charge de la bataille, voulans soustenir l'auant garde & arrieregarde pour nostre seurteré. Bien que ie pense que plusieurs d'entre vous desireroient plus le premier-rang, auquel ilz pourront venir selon la rencontre. J'ay senty qu'aucuns de vous mal instruits, ont paour des signes de Coulon, & Corneilles qui ont ce iourd'huy combattu en vostre presence. Or ie vous donne qu'il soit ainsi que ce soit mauuais presage. Je vous dy que les Dieux nous ont enuoyé telz signes celestes pour nous donner marque de plus grande victoire, ayantz menacé noz courages pour les couronner des plus haute gloire, d'auoir eu en eulx la magnanimité de resister à si douteuses tentations qu'ilz nous ont voulu monstrer pour nous esproouuer. L'assurance vraye des armes ne se doit prendre des oyseaux, qui ne nous combattront pas pour noz ennemis, mais en la force des bras des Soldatz, & bon art militaire des Capitaines en laquelle ie vous veux bien auertir, touchant la besongne que ie voy nous estre taillee pour ce iour, que les esquadrons (côme pouez voir) vont ouuertz large, & estenduz loing l'un de l'autre, pour représenter plus grande multitude, & nous fault au contraire marcher serrez l'un pres de l'autre comme nous sommes. Ce qu'il faignit à propos, pour leur oster la crainte du nombre de leurs ennemis. Ce fait j'ay esperance que nostre bon ordre (qui est le principal poinct de la guerre) les rompra bien tost estans ainsi ouuers, peult estre par nonchaloir & negligence, leur prouenant de la fiance q̃ leurs Magiciens leur auroiēt donné par ceste vaine & friuolle vrollerie.

Or voyez vous desia leur desordre à l'œil, qui est vostre auantage certain si le scauez prendre. Voylà compagnons ce que ie vous ay voulu dire, en vous recomandant mon honneur & le vostre. Le Roy Amadis & Florisel en firent autant en leur endroit, remonstrans que la possession de si longue gloire des armes ilz deuoient tenir & recognoistre de Dieu seul, lequel n'ayant offensé, ilz ne craignoient auoir contraire, qu'ilz se deuoient du tout confier en luy: toutesfoies que par raison ilz auoient grande occasion de seurteré, estans conduitz par Capitaines qui auoient monstré de fresche memoire, cōbien ilz surpassoient leurs ennemis: auquelz s'ilz obeissent (côme tenuz estoient) tant par la discipline des armes, que par l'amitié dont ilz leur estoient redevables à cause du bon & humain traitemēt que d'eux ilz auoient tousiours receu, ne deuoient aucunement douter ce iour de la victoire. A tant finirent, & les plus prochains leuerent vn cry d'aplaudissemēt disans tous d'une voix. Marchons, marchons, à eulx à eulx, qui fut suiuy par tout le reste de l'armee, & entendu de celle de Lucidor, dont plusieurs s'esbahirent que pouuoit estre.

Les chefs ayans chacun encouragé les siens par vne breue harangue, les batailles commencerent à marcher d'un costé & d'autre, avec vn tresbon ordre. A la routure & froisis des lances es premiers rangs le bruit fut si grand qu'il en fit retentir les prochaines vallees. Et la meslee se leua tellement obscurcie qu'il leur sembloit combattre de pleine nuit. Le nombre fut tel de cheualx qui alloient mourir hors la presse, les vns avec leurs maistres, les autres sans eulx, qu'ilz firent vne droite voirie tout à l'entour du camp. A la premiere rencontre des deux auantgardes la presse fut si grande qu'elle ne laissoit cognoistre les faitz particuliers des Cheualiers de pris: car le Prince Falanges voyant branler la bataille que menoiēt les Roys de Scythie, & de Thir, fist mouuoir la sienne, au choc

choc desquelles tomberent par terre plus de quatre mil hommes d'armes. Qui eust veu lors le bras sanglant de Falanges brandir par dessus les autres, & esclater puis çà; puis là, comme il couroit par les rangs pour donner cueur & ordre ou besoing estoit, l'eust à bon droit iugé vn des plus vertueux Capitaines du monde: Contre lequel remedioient de leur costé les deux Roys payens par grand valeur & prudence en sorte qu'ilz s'entresoutindrent l'ans auantage iusques au midy, estant la multitude des morts si grande qu'ilz ne marchoient que sur iceux. Ceux de dehors voulans rompre à vn coup tout l'effort de leurs ennemis, commanderent faire marcher les Elephans qui estoient aux ailles, avec petits chasteletz garnis d'archers: contre lesquelz Falanges mist au deuant des chariotz armez de faux de fer trenchantes, tirez par bufflez, d'autât que les cheuaux ne pouuoient endurer la senteur des Elephâs, & en chacun chariot vn Soldat équipé de gros iauclotz, entour desquelz estoit quelque artifice de feu qu'ilz lancerent contre les grands bestes, qui leur fut vn grand remede à les repousser, car autrement leur auant garde eut esté rompuë. Ce qui auint à leurs ennemis par leurs bestes mesmes, que ces feux chasserent à trauers leur armee: en sorte qu'ilz vindrent iusques à celle de Birmartes, lequel marcha incontinent au secours des deux Roys: Et le Roy Amadis à l'encôtre, ou fut le chamaillis trop plus fort que deuant, qui par l'instincellement & splendeur des harnois mieux fourbis, & des espees plus luisantes que ceux des Payens, esclarcirēt les tenebres de la pouldriere precedente. A ce choc l'effusion du sang fut si grande qu'il couroit par ruisseau iusques en la mer, donnant tainture au riuage avec le renfort de celui des deux flottes, qui au mesme temps se estoient iointes en trop plus cruel confit: moyennant qu'outre les armes ilz estoient combatuz par les elements tant de l'eau (ou vne partie se n'oyoit) que du feu, ou l'autre estoit rostie mi-

serablement. En celle de terre la princesse Alatraxeree faisoit merueilles, laquelle recontrant le prince Falanges le desfia, mais deschayna son espee pour lui presenter qu'elle refusa, puis deslaça son armer, & par le visage nud (beau sanper) rompit sa durté & rigueur. Ausquelz suruenant vn Prince Payen luy donna sur la teste par derriere, si elle n'eust receu le coup sur son espee, luy disant que c'estoit son prisonnier, lequel rechargeant Falanges soustint sur son escu, & elle indignee luy pourfendit le chef iusques aux dens. Puy se partit de Falanges faisant armes nompareilles de son costé, & luy du sien, fort content de ceste rencontre. C'estoit peu que des actes de tous, à comparaisson de ceux du grand Roy Amadis, & Cheualiers de son lignage qui estoient sa garde de corps: Et aussi d'Amadis de Grece & de Florisel contre le vaillant Lucidor, lequel par l'effort tant de preux Cheualiers sur le vespre commēçoit à perdre terre quelque deuoir qu'il fist de tressage hardi Capitaine, quand leur arriua secours du costé de la mer, qui tint les vns & les autres en grand doute, iusques à l'approcher qu'ilz se rengerent cōtre les Grecz qui desia las de la longue iournee, eurent beaucoup à souffrir contre vne armee fresche, dont enuiron cinquante Geans faisoient le front, crians Rufsie, Rufsie, Lors les Princes Grecz ne faisant plus estat de leurs vies, proposerent de les vendre cher, reprenant tel cueur & animant leurs gens, de sorte qu'ilz tindrent vne espace de tems contre eulx à leurs ennemis: semblant plus tost face que mortelle la force qu'ilz monstroyent encores. Et se plantoyent tous ces Seigneurs comme vn rampart deuant leurs pauvre Soldatz: mais la multitude s'iruint si grande de ces Rufsien qu'il ne fut plus possible de les soustenir. Et demeurēt renuersez par la foule & encloz l'Empereur Esplandian, le Roy de Sardaigne Florestan, avecq l'Empereur de Rome son filz, Angriote d'Astraux, Guylan Duc de Brittoye, Sarquiles son cousin, & quelques

autres Cheualiers de la grand' Bretaigne: lesquelz à leur extremité firent armes non croyables, car tel d'entr'eux occist ce iour cent Soldatz de sa main: mais à la fin furent tous taillez en pieces, hors mis les deus Empereurs, & le roi Florestā, qui se mirent doz à doz faisans vne vraye boucherie d'autant de Russiens qui en aprochoyēt. A la fin ne demeura que l'Empereur Esplandian sur les piedz, les deux autres estenduz sur l'herbe de lasseté & foiblesse de leurs playes.

Or cerche (dist il lors) ma vie l'immortalité par la mort des autres. Et recommença vne fiere deffence, puis à genoux puis debout. Mais c'estoit faict de trois sans Alastraxeree qui les recogneust à leurs riches armes, qui les prenant prisonniers les fit porter en les tentes. La nuyt suruint qui sauua le reste de la coronne Grecque, qui se retira en la ville en grand' tristesse. Et leurs ennemis en leur camp avecques les fanfares de victoire, & telles caresses aux Russiens que pouuez estimer à la grandeur de l'obligation.

Qui estoit le Roy Breon, & de la trahison qu'il machina pensant estre Monarque. Et la harangue du Roy Amadis, apres la perte de la bataille.

CHAP. XXXII.

AV pais de Russie regnoyt vn Roy, de race de Geans nomme Breon, homme malheureux & ennemy de toute vertu & grand terrien, ne fut appelé par nulz des Princes à leurs secours, dōt il eust grand despit. Et conuoquant plusieurs grands Princes ses subietz leur tint propos que l'occasion se presentoit à luy pour se faire le plus grand Seigneur du monde: car (disoit il) vous voyez toute la puissance des Princes d'Orient & Occident assemblee deuant Constantinople, ne reste sinon de fauoriser à la partie plus foible pour defaire les plus fors qui sont les Grecz. Ce faict nous autons apres trop bon marché

des autres, si bien qu'il n'y aura personne qui en reschape. Je pourrai auoir à femme la pucelle Alastraxeree, moyennant laquelle & la force de voz braz, ie me ferai facilement Monarque de toute la terre: qui fust conseil assez persuasif, qui leur pleust bien à tous. Et mettans en deliberation de l'executer, vindrent trouuer la Roine Cleosile qui s'en retournoit en son pais: laquelle estant par eux prise prisonniere fut tombee en grand danger, si sa beaulté ne l'eust sauuee, qui rauit soudain le Roy Breon. Et à son honneur (qui s'en alloit confi(qué) elle trouua remede par sa grande prudence, luy disant qu'elle voudroit estre assuree de sa vaillance premier que lui octroyer son amour: car iacoit, dit elle, Sire, que ie ne doute aucunement de vostre vertu, si est ce que le veu que i'ay fait y repugne & met obstacle, vous supliant ce pendant prendre ma parole en gage de ma volōté, laquelle pourrez librement vsurper lors que tout le monde cognoitra clerement vostre prouesse. De telle forbede paroles biē forgees elle endormit le Roy, en sorte qu'il fust content de sa conuenance sur ce point la fist tenir dedans sa chambre de poupe de sa galere, iusques à ce qu'ilz vindrent surgir au mesme port dont la Roine estoit n'agueres partie, ou sa flotte ne fut aperceue des autres deux estans deuant Constantinople, pour la grāde obscurité qu'il faisoit ce iour là en la mer, au moyen de laquelle ilz eurent loisir d'acrer tout à leur aise, & de mettre en terre à grand diligence leurs homes & cheualx, pour se trouuer en la bataille qu'il scauoit estre ce iour mesme. Tan y à qu'il arriua sans estre aperceue, vsant en son abordee du stratageme qu'auiez entendu, à iouer de faulse compagnie iusques à la noire nuyt que les batailles furent separees par les tenebres: ausi firent celles de la mer leur retraicte, ayans soffert grand perte de gens & de nauires, principalement ceux de Lucidor lequel remercia fort le Roy Breon du secours qu'il luy auoit donne tant apropos, & s'efforça grandement de luy faire honneur

honneur & à tous ses gens. Or firent ceux de dehors autāt de festins & signes de liesse, comme ceux de dedans auoient ocasion de tristesse & melancolie, comme ceux qui estoient tous perdus, quant on sceut la perte des deux Empereurs, & de tant de Cheualiers de nom occis, avecq' le Roy Florestan, estimant plus seure leur mort qu'aucune esperance de leur vie, chose qu'on ne voulut pas declarer aux Dames pour ce soir, à fin de ne les contrister plus qu'elles estoient. Et iacoit que la douleur fust extreme à tous, toutesfois nulle estoit egale à celle du Roy Amadis, & de son lignage à cause de leur deffaite qui toutesfois mirent peine à la conurir & dissimuler pour n'oster le courage à leurs gēs. Or ne voulurent ilz oncq' reposer de toute la nuyt i'acoit qu'ilz en eussent bon mestier au moyen du travail de la iournee passée. Ains le preux & vaillant Roy cognoissant la foyblesse de ses gens, & le bon besoin que chacun auoit d'estre animé, fit renforcer le guet de la ville par les habitans & bourgeois, à fin que les Soldatz se reposassent à leur aise: ausquelz auant qu'aller d'ormir il fit scauoir de main à main sans sonner trompette ne tabour, que sa maieslé desiroit parler à eux, & qu'ilz eussent à s'assembler à la place, à laquelle comparurent quasi tous ceux qui n'auoient esté naurez, & grād partie de ceulx mesmes qui nonobstāt estoient portatifz, là ou le Roy Amadis de Grece vint incontinent, acompagné de tout les Seigneurs principaux avecq' force torches & flambeaux: lequel monstrans par dehors vn semblant plus gay que le cuer ne portoit, leur fist telle harangue consolatoire. Seigneurs, Cheualiers, & Soldatz, ie vo' veux proposer icy le fait d'autrui pour faire cōparaison au nostre: qui est qu'ayant egard à la forte & cruelle bataille de Pharsalie, en laquelle Iules Cesar deffit Pompee, apres plusieurs victoires qu'il eut contre luy, comme pensez vous qu'il eust esté possible aux enfans de Pompee ramasser le peu de gens qu'il auoient de reste, n'eust

esté que crainte & lacheté n'ocupa oncq' son courage? qui le remit depuys en estat de conquerir l'Empire, s'il eust bien sceu suyure sa fortune. Et posé que ie ne voye en vous maintenāt que douleur & desplaisance à cause de ceux qui sont mortz: si est ce que ie ne penseray iamais en vous telle faute de cuer, q' chacun ne desire se venger de son ennemy & vendre sa peau bien chere. Or il nous conuient vn peu dissimuler nostre dueil, & prendre patience par force, pour ne descourager les autres.

Vous pouuez croire que la plus grand' partie de l'ennuy repose en mon cerueau: mais ie l'eferme pour la manifester par force redoublee, quand la saison & le temps m'en donneront occasion. Pource vous commande à tous d'aller reposer vn peu, pour tout aussi tost que la belle Diane se leuera vous mettre en train d'aller assaillir noz ennemis, prenant chacun vn chemise blanche par dessus son harnois, pour nous entre-cognoistre: vous assurant que la ioye qu'ilz auront eue de nostre deffaite les pourra auoir assoupis en nonchaloir: Au moyen dequoy nous leur pourrōs donner vne si estroite main qu'il leur en souuendra. Et ce sera demonstration que le petit troupeau que nous sommes n'a le cuer failly contre si grād ost, voyant que nostre execution de vengeance n'a esté surmise pour le travail & peine recente. Quant à moy mes'amys, combien que i'aye esté blessé au confit cōme les autres, ie ne sēs ces playes là, que celle, que i'ay au cuer de despit & maltalent: en croyant autant de vous autres, & que plusieurs d'entre vous qui ne sont naurez mortellement ne laisseront à venir en ceste camisade, laq̃lle ie voudrois deux heures apres minuyt le plus secretement que faire se pourroit, de peur de refuseiller noz ennemys, ains les berfer si bien qu'ilz endormēt à iamais. Ce que i'estime facile veu la grād chere qu'ilz firent hier au soir, & le peu de guet qu'ilz feront en confiance de nostre infortune. Incōtinent que le Roy eut achené chacun se retira, excepté

le Roy & l'Empereur Lisuatt, lesquelz ayans fait appareiller leurs playes n'en sentirent aucune douleur, tant estoit extreme celle qu'ilz portoient de la perte de l'Empereur Esplandian. Sur ce point vn Gentil-homme leur vint dire que la royne d'Hircanie estoit devant la porte de la ville, & demandoit seureté d'entrer pour parler à eux. Parquoy de ce passé rendirent à l'ouverture de la porte, ou ilz la trouverent armee de toutes pieces hors mis l'habillement de teste, avecq' vingt Damoyelles aussi armées, & vne liètiere couverte de drap d'or environnee de douze hommes de pied portât les torches, laquelle ayant honorablement recueillie, leur dist. Sire la Princesse Alastraxeree m'enuoye par deuers vostre maïesté, vous auertissant qu'il luy à grandement despleu de l'aerse fortune qui vous est auenuë, & à dire le vray qu'autant qu'elle pourroit esté ioyeuse de la victoire tournée de son costé au moïe de l'amytié qu'elle vous porte & à vostre sang: vous renuoyant en gage & signification d'icelle le tres excellent Empereur Esplandian vostre filz, non toutesfois en si bonne disposition de sa personne comme elle voudroit: estimant que le bon Prince est autât prest de sa mort naturelle, comme elle est loing de ne mourir iamais, par mortalité de la renommee qu'elle espere du bon tour qu'elle vous iouë. Si ne vous enuoye pas à ceste heure l'Empereur Florestā ne son filz qui sont mortz parce qu'elle sçait bien que vous ferez ceste nuyt plus empeschez à faire solliciter les malades, que d'enterrer les mortz. Et pource que ces deux Seigneurs (q'ie vous ay nommez) sont trespassez au lièd d'honneur, finissans leurs iours avec telle gloire que leurs haultz faitz d'armes leur peuuent auoir acquise, vous supplie les vouloir tenir plus pour vifz que decedez. Aussi tost que la Royne eut acheué sa harengue, les Princes s'aprocherent de la liètiere, trouuans l'Empereur Esplandian tant blesme pour la perte de son sang, qu'il ne sembloit plus

tenir de vie. Le Roy Amadis outré de douleur ne fit que dire à maistre Elizabel (qui estoit aupres de luy) maistre voylà de la besongne pour vous, ou il faut desployer le secret de vostre science: faites l'emporter sans que sa mere ne sa femme le sçachent. Adonc se tournant vers la Royne d'Hircanie, luy dist: Ma Dame ie vous prie me recommander affectueusement à la bonne grace de vostre maistresse, la remerciant bien fort de la compassion qu'elle à de nostre misere, esperans en Dieu de voir encores l'heure que nous pourrons recognostre ceste courtoisie. Or luy dites m'amyie que ce q'noz ennemys ont à ce coup gagné sur nous par la main d'autroy qui les renforça au besoin, nous esperons leur faire rendre bien tost avec grosse vsure, ou nous y mourrons tous à la poursuyte. Avecq' ceste responce se retira la messagere au camp de Lucidor, auquel le Roy Breon (qui iusques à l'heure auoit esté en la chambre de la Royne Zahara) s'en alloit en son quartier, faisant conuoyer en sa tente la plus grand part des Seigneurs de sa troupe, auquelz il parla secrettement en ceste maniere: Messieurs vous voyez l'estat en quoy nous auons aujourd'huy miz les Grecz, donnant faueur à leurs ennemys de Frace, lesquelz sont tant diminuez de leur victoire que nous les auons maintenant à bon marché vous asseurant que ne pourrions auoir le vent mieux à gré pour auancer nostre entreprise, laquelle plustost nous executerons & mieux se portera, à cause du travail qu'ilz ont soustenu tout du long du iour: à raison duquel nous leur demanderōs la charge du guet, à fin qu'aussi tost que la Lune sera leuee, que nous en puissiōs faire vn tel massacre, que leur boucherie surmonte encore celle des Grecz. Suyuant ceste ordonnance vont deuers le Prince Lucidor luy requerir la charge du guet, qui leur fut trop volontiers acordee, & sans aucun soupçon de leur menée: firent soudain auertir tous leurs Capitaines à ce q'chascū se tint prest à l'heure assignee.


Mais

Mais il en aduint bien long de leur conte: Car Dieu qui ne laisse iamais ceux qui ont bonne fiance en lui fist venir vn secours non attendu aux Grecz sur les dix heures de nuyct par vne grosse flotte, laquelle auoit marqué sa route, sur le feu des nauires qui brusloyent du iour precedant, laquelle vint surgir droitement aupres de celle des Grecz, en laquelle ilz enuoyerēt incontinent vn Gentil-homme à l'Amiral Frandalo pour l'auertir que le Roy de Taprobane & Sabba, le Roy Magadan & Furlutin estoient arriuez à leur secours en iuste armee: dequoy Frandalo receut grand ioye, & en manda aussi tost les nouuelles à la cité, qui grandement recōforterent les

Princes Constantins, dont leur firent scauoir la deliberation de la faille qu'ilz vouloyent faire apres minuyct, les requerans de les secourir sur le poinct du iour pour renforcer l'aubade qu'ilz preparoyent à leurs ennemys. Ceste ambassade voulust faire Amadis de Grece, pour auoir la premiere veuë & accolade de ses bons amys, avecques lesquelz il consulta la maniere de leur conduicte en ceste entreprise, puis reprint le chemin de la ville, pour s'y trouuer des premiers. De la suruenue de ceste flotte le camp ne peust rien entendre à cause de la nuyct, & qu'elle ancrā entre l'armee de Lucidor & la terre, pour leur oster le passage.

Comme les Princes Grecz executerent leur dessein nocturne, & qu'elle en fust l'issue.

CHAP. XXXIII.



LEs deux parties de la nuyct estoient passees, quand la Lune commença à monstrier ses cornes. Et les Princes de Grece encores couuertz du sang du iour passé, sortirent aux champs, ne faisant

qu'auant garde & bataille à cause du nombre de leurs gens tant apêtissē, lesquelles firent marcher toutes d'un front cōme doit aller camillade, à fin de plus estōner les ennemis à leur reueil de voir si large armee. or

eussiez veu sortir les Soldats hors de Constantinople en contenance de vainqueurs plus que de vaincuz, du desir qu'ilz auoyent de venger leur honte & restablir leur honneur, lesquels ilz acirent plus par la seurte qu'ilz donnerent à leurs ennemis propres, que s'ilz les eussent tous occis, comme aperra à la fin de la trahison du Roy Breon lequel comēçoit desia à couper les gorges aux gens de Lucidor, quand les Grecz sortirent de la ville: faisant ce trahistre vne telle mortalité que courans desia peste melle, les gens mesmes se mescognoissoient, s'en tretuans les vns les autres. Ce qu'entendāt le Roy Birmartes & le prince Lucidor furent en grand esmoi en ce lursault, pensant que ce fussent les Grecs: mais tost apres en furent acertenez par deux ou trois prisonniers qui leur declarerent la conspiratiō, dont ilz furent merueilleusemēt estonnez, mais comme sages princes auiserent de gagner quel que quartier de leurs tranches, & se fortifier de leur charroi par l'autre côté, à fin de retirer le plus de leurs gēs qu'ilz pourroyent en sauueté en attēdāt le iour. Le Roy Breon exēcutoit vne extreme cruauté, iusques à ce qu'ilz vindrent trouuer la troupe que Birmartes & Lucidor auoyent ramassez sur le plus hault de leur champ. Et voyant que s'ilz eussent voulu faire dōmage à ses gens qui couroyent esbanduz sans ordre par la campagne ilz le pouuoient faire facilement s'arresta sur leur cul commençans les rallier pour pousser outre. Mais le Prince Anaxartes & Lucidor resolurent de les rompre premier qu'ilz se peussent assembler. Si commencerent à escrier France, France, & chargeans dessus furent tresbien soustenuz par les gens du Roy Breon, crians à haute voix Rulsie, Rulsie, si bien qu'en peu d'heure il y eust plus de six mille Cheualiers par terre. Or estoient les Princes Grecz desia sortiz de la cité, & se tenans en bataille rengeē sans autre chose faire à cause du bruit qu'ilz oyoyent, ne sçachant que penser, sinon que ce peult estre Perion Roy de la grand' Turquie de qui ilz attendoyent la

venue de iour en iour, dont auiserent que si d'aucture c'elloit lui, on pourroit aussi tost porter domage à l'ami comme à l'ennemi, ne pouuant entrecognoistre les enseignes. Parquoy se tenans cois enuoyerent quelques auantcoureurs sçauoir que se pouoit estre, lesquels trouuerēt à l'escart trois Soldatz du Roy Breon, & les amenant deuant les Princes ilz sceurent par eux toute l'entreprise, dont ilz furent bien esbahis. Si consulterent ensemble ce qu'ilz auoyent à faire: car quant à souhaiter ilz n'eussent sceu mieux, sinon que les vns eussent tous les autres au ventre: dequoy se rapporterent du tout à l'opinion du Prince Falanges, qui leur dist: Messieurs si nous estions possesseurs de la derniere victoire, mais en estant allē autrement selon le vouloir des Dieux, me semble que mieux vaudra vser d'un acte vertueux, en faisant assistance à ceux qui souz tiltre d'honneur nous sont venuz faire la guerre, & repousser ceux qui sans estre appelez ne d'un costé ne d'autre commettent vne si malheureuse trahison, de laquelle nous chastieus & correcteurs, par mesmes moyen pourrons tellement gagner les cueurs des Princes Occidentaux q̄ ce seroit cause de quelque bō apointement, voyant ceste grand' iustice Royale, laquelle gardant si parfaictement avecq l'ennemi assēurer bien l'entretenir enuers ses subietz & amis. D'auantage ce faisans nous nous vaincrons nous mesmes, forçans nostre volonté contre la force que nous receusmes hier de leur main, en quoy cognoistront nostre clemence de reseruer que leur sang ne soit esbandu en vengeance du nostre dequoy ilz nous demeurerōt obligez. Ce conseil fut tresagreable à tous les Princes comme Zelateurs de la vertu. Et tout soudaine leur ost commença à marcher la teste basse iusques à vn trait d'arc des deux armees meslees enlēble, & à leur clere venē par ce qu'ilz venoient vers leurs fiācs dōnāt par ce moyen vne grād' terreur aux vns & aux autres coupables du traictement du iour precedent. Lors marchās

les Grecz plus outre: trouuerent la campagne toute couuerte des corps François meurdrez par le faulx Breon qui leur augmenta le courage par pitié de se ioinde à eulx. Parquoy sonnans leurs trompettes se fourrerent parmy les gens du trahistre Roy, tellement qu'à leur venuë firent terrible bresche à son bataillon en laquelle furent executez si merueilleux faitz d'armes par tous les Seigneurs que leur nombre & grandeur ne donna lieu de les particulariser. Tant y a que voyans ceux du party de Lucidor le secours que les Grecz leur faisoient eurent tant de ioye qu'ilz donnerent clerement à cognoistre la volonté qu'ilz auoient de reparer leur dommage, faisans vn horrible carnage des Russiés. Or n'est il possible de vous raconter les armes que faisoit la pucelle Alastraxeree, laquelle combatant vn fort Geant secondé de trois autres qui de deux trait auoit nauré son cheual souz elle pour la terracer, à l'heure suruint le Prince Falanges d'Astre à l'endroit, qui voyant la chose que elle aymoît le mieux en ce monde en tel danger, fendit la presse & la teste de l'vn des Geans quant & quant, pour trouuer sa maistresse, à laquelle il dist: Ma Dame ie vous supplie me faire tant de bien que de vous vouloir seruir de mō cheual, à fin que la faueur que memonstrerez en le prenant me face aujourd'huy faire tant de prouesse que ie me puisse à bon droit reclamer vostre seruiteur: A tout le moins vous plaise le prendre en consideration du secours que les Princes Grecz dōnent à vostre party. Or estoit Alastraxeree tant eschauffée à fraper d'estoc & de taille qu'elle n'auoit pas veu ce que le prince Falāges auoit fait, mais l'oyant parler & le cognoissant à son escu verd semé d'harpies dor & aux riches armures qu'il portoit tousiours plus excellentes que nul prince du monde. Falanges mon amy (dist elle) ie reçois de vous le present que vous me faites iusques au rendre, & avec le cheual l'accepte de bon cueur vostre seruiteur, puy que ie

voy l'usage du corps maintenant suyte de mon costé le veu de l'ame. Or pert bien ou repaire honneur quād nous sommes au grand besoin tellement secouruz, par noz propres ennemys. Ce disant elle saisit l'autre Geant par la courroye de son escu qu'il auoit pendu au col si ferme qu'elle le fit tomber par terre, & luy donna si terrible coup de masse qu'elle luy aplatit la teste cōme vn pigeon. Et dist au Prince qui desia estoit à pied: Or prenez doncq' le cheual & me liurez le vostre, & montans eux deux malgré tous ceux qui frapportoient sur eux, la pucelle pique (priāt le Prince de la suture, ce qu'il fit la secondant de telle hardiesse que ceste faueur ne se monstre pas de vain effect, qu'elle augmenta de beaucoup quand elle luy dist en partant ie m'en vois trouuer le Roy Breon pour luy oster la fantasie de l'amour qu'il me porte, & de la hardiesse des'oser nommer mon seruiteur publiquement: car i'ay entendu qu'il a dit hault & cler que ie luy fais tort de non luy permettre lieu en mon amytie. Lors se fourrerent en la plus grād' presse en grād' enuie de monstrier leur prouesse l'vn à l'autre, mais le tumulte fut tel que bien tost les conuint departir: trouuant bien peu apres Alastraxeree le Roy Breon (qui estoit de taille demesuree) à l'instant qu'il auoit prins prisonnier Lucidor, lequel vn de ses Geans trouffoit sur l'arçon de sa selle & le souleuoit d'vn bras. Adonc alla pour le recoure, mais plustost y arriua Florisel qui le voyant prisonnier emmené par mes-croyās de telle sorte s'auāça premier qu'Alastraxeree, donnant rel coup d'espee sur le bras du Geant qui emportoit Lucidor, que le bras du Geant, & le Prince tomberent tous deux à terre, estant le coup si horrible que Lucidor mesme en fut fort blessé au bras, tant que le sang ruissela de la playe: dequoy Florisel fut fort troublé cuydant l'auoir occis en le pensant sauuer, si se ietta soudain en terre (comme s'il n'y eust eu personne au tour de luy) & embrassant Lucidor le metit sur son cheual duquel il e-

estoit descendu : puy malgré tous ceux qui
 l'environnoient monta sur celuy du Geant
 qui estoit tombé d'angoisse. Lucidor co-
 gnoissant lors Florisel à son escu, & consi-
 derant en soy mesme la grande humanité
 dont il auoit vſé en son endroit : ha Florisel
 de Niquee (dist-il) il pert bien que la for-
 tune est plus amye, à vostre lignage,
 qu'à tous les princes de ce monde, voyant
 la condition en laquelle elle vous main-
 tient sans aucune varieté, tât que ie la tiens
 pour suiette à vostre vertu, vous m'au-
 nauré au bras, mais bien autremēt au cuer,
 y ayant rompu le dur cal de Vengeance
 obstinee contre vous. O vertu que tu as
 grand' puissance de me vaincre sans me fe-
 rir: Pourtāt Florisel faites que mō honneur
 sauisie demeure vostre : & prenez ma foy
 que ie remet en vostre main, avec tout le
 droit de ma querelle. Lucidor (respōd Flo-
 risel) i'ay fait peu pour vous au regard de
 ce que voudrois. I'accepte vostre amytie
 de bon cuer, & me raporte de ma satisfac-
 tion enuers vous aux princes Anaxartes,
 & Falanges d'Astre. Vrayement dist Luci-
 dor i'en suys trescontēt. Qui fut le moyen
 de paix entr'eux traitēee par eux mesmes,
 qui par autre n'eut iamais esté faite. Nostre
 matiere nous tire ailleurs & ne nous donne
 loysir d'en faire plus long discours, non
 plus qu'ilz eurent eux-mesmes. Pour re-
 tourner à la pucelle Alastraxeree qui alloit
 querant le Roy Breon, en fin le trouuant
 luy dist: Roy Breon, voycy Alastraxeree
 qui t'apprendra à grandz coups d'espee de
 parler plus sobrement de mariages de telles
 que moy & ne conter aussi sans ton hoste.
 Ce disant, haulse son espee pour luy rame-
 ner sur la teste, mais il para de son escu sur
 lequel tomba le coup si royde qu'apres l'a-
 uoir fendu le Roy en fut si estourdy qu'il
 cheut à terre, ou la pucelle descendit &
 luy coupa les lacx de l'armet pour en fai-
 re autant de la gorge, mais elle fut empes-
 chee par ses gens qui ne s'espargnerent pas
 pour sauuer leur maistre. Lors suruin-
 drent Florisel & Lucidor qui de deux coups

en ietterent deux mortz par terre, donnant
 loysir à Alastraxeree de trencher ceste mal-
 heureuse teste, & la prenant par les che-
 ueux monta à cheual malgré tous ses auer-
 saires, emportāt quant & quāt la cotte d'ar-
 mes du Roy. Là rencōtra la presse s'effor-
 çant plusieurs de le venger, mais ce fut à
 leur dommage, par ce que le Roy Ama-
 dis y suruint avec Falāges, Amadis de Gre-
 ce, & quelques autres Cheualiers qui les
 rembarrerent si bien que lon en vit bien
 tost vne brieue despesche: Aussi firent l'Em-
 pereur Lisuart dom Frises de Lusitanie, &
 les deux Roys de Sidonie, qui chargerent
 les ennemys par les flancz de telle roydeur
 qu'ilz leur firent bien perdre vn arpent de
 la campagne. Lors Alastraxeree voyant
 Florisel aupres d'elle print la teste de Breō,
 & luy baillant, Monsieur (dist elle) voylà
 la teste du Roy Breon, ie vous prie presen-
 tez là de ma part à vostre grand amy Fa-
 langes, en recompense du seruice qu'il m'a
 fait auourd'huy. Florisel (combien qu'il
 n'entendist pas pourquoy elle disoit celà)
 neantmoins la remercia grandement de sa
 part, & la prenant fist tant qu'il trouua
 Falanges à qui il en fist present en propres
 termes. De quoy Falanges fut aussi ayse,
 que si lon l'eust fait Monarque de tout
 le monde commandant incontinent qu'on
 la meist au bout d'une Lāce avec la susdite
 cotte d'armes: & que renforçant vne bonne
 charge on criaist hautement Grece, Grece.
 Ce qui estonna tant les Russiens que co-
 gnoissant leur chef occis ilz tournerent in-
 continent doz, tirans pour se sauuer vers
 leurs nauires, aussi ne leur eust il sceu mieux
 prendre: Par-ce que les Roys de Maga-
 dan & Sabba qui leur venoient serrer la
 queue les receurent si à propos que bien
 peu en eschapa, demourans en la place plus
 de quarāte mille Russiēs, ou apres la batail-
 le les princes Grecz firēt sonner la retraite,
 & les autres aussi, se retirans à quartier les
 vns des autres. Or faisoit beau voir les
 princes Grecz avec leur cauallerie tenans
 vne partie de la campagne tout couuers de
 sang.

sang, & de l'autre costé environ vn trait d'arbaleste celle de Lucidor avec ses confederes sonnans force trompettes d'allegresse, quand arriuerent lors les Roys de Magadan & de Taprobane qui furent tres-amyablement receuz par le Roy Amadis & les autres Seigneurs. Et apres les caresses declara Florisel tout ce qui auoit esté passé entre luy & Lucidor, comme aussi Lucidor, en auertissoit les siens. Adonc eussiez veu les deux armées marcher l'un vers l'autre au petit pas. Soldatz manier la pique: & iouer des espees en signe de ioye, & les princes & Capitaines d'un costé & d'autre aller deuant leur esquadron avecq' bonne troupe de cheuaulx confirmer & iurer l'amytié desia promise: entre lesquelz Florisel & Lucidor alloient les premiers qui s'embrasserent à cheual. Apres eux l'un bailloit la main, les autres ostioient l'armet, ou baïssoient la teste en signe de reuerence, selon les amytiéz qu'ilz auoyent eues le temps passé: Car en ceste assemblée se trouuerent plusieurs Cheualiers errans qui s'estoient veuz & cogneuz en diuers lieux. Lucidor doncq' vint à commencer telz propos. Le fond de noz affaires (tresexcellens princes & Seigneurs) vous est assez notoire: ceste mutation de volonteé pourroit estre estrange à ceux qui ne cognoistroient comme l'estat du Roy Amadis & de sa lignee icy presente est exempt du hazard de fortune: Bien peult on dire q' la main de dieu y a touché, à tourner vne hayne mortelle en amytié si cordiale: Et ce par occasion si inopinee, laquelle m'a rendu de complaignant debteur quasi non soluable, lors se teut. Et Florisel print la parole: Monsieur nous auons bien à le remercier de nous auoir deliurez du peril ou nous estions enlerrez par vostre puissance. Si le tort a esté nostre en quelque endroit, vous en auez faict iuste chastiement. Soit doncques la paix confermee entre nous: les articles serons differez iusques à vn autre iour car nous auons maintenât besoing de nous reposer, & faire aparceiller noz playes, &

vous aussi: Qui nous fait vous prier affectueusement prendre logis en la ville, pour vous mettre vn peu mieux à vostre aise, vous & ceste compagnie esleue. Ilz s'entr'acolerent de rechef a ce mot. Lucidor le remerciant de ceste cffie à cause de l'ordre qu'il auoit à donner en son camp. Ce cas despesché le Roy Amadis entra en son palais, & apella Amadis de Grece & luy dist: Mon filz vous voyez que ie suis nauré & desormais mal portatif: Or ay-ie vne expedition à faire qui m'importune fort, que ne puis par raison adreiser à homme qui viue pluslost qu'à vous qui heritez de mon nō, & d'autant de valeur que on m'a attribuee. Si vous prie me faire ce plaisir de prendre la flotte de vostre pere avec celles des Rois venuz n'agueres qui sont voz grandz amis, pour mettre peine de recouurer la Roynie Cleofile, car ie ne voudrois souffrir pour tout l'or du monde qu'elle eust mal ou ie peusse remedier. Je feray ceste requeste à ces deux rois, pource que leurs gens sont les moins trauaillez, & à vous q. ne fustes oncques las de bien faire. Amadis de Grece remercia son bisayeul de l'honneur qu'il luy faisoit, & pria Fulurtin de faire rembarquer ses gens: ce qui fut fait en grand diligence sans qu'Amadis voulüst mener aucun de tous les Seigneurs avecq' luy, à cause d'un autre voyage qu'il proiettoit en son esprit, dont le discours vous sera fait cy apres. Ain si les Princes Grecz se retirent en leurs logis, & Amadis de Grece s'alla rendre à la flote. Ce iour là on ne vaqua qu'à enterrer les mortz mesmement les gens du Roy Breō, à fin qu'ilz n'infectassent l'air de leur charongne.

Comme les princes Grecz rentrerent en la cité, & des lamentations que fist Helene.

CHAP. XXXIII.

LEs Princes Grecz au retour furent receuz des Dames en grand ioye, pour le bon accord qu'ilz rapportoient.

toient. Si allerent visiter l'Empereur Esplandian avant qu'ilz se fissent desarmer, & leur donna maistre Elizabel grand espoir de sa conualescence, lequel le Roy Amadis enuoya au camp pour penser des Seigneurs de recommandation. Puy ilz le renuoyerent avec les corps des Empereurs Florestan & celuy de Rome son filz, avecq quelques autres des Cheualiers principaux mortz en leur compagnie. Ce qui renouuella les pleurs & lamentations à Constantinople, principalement à la princesse Helene, voyant tant de misere auenné à cause d'elle. Là mon Dieu (disoit elle) par le don que tu m'as fait de beauté ie suis surnommée la seconde Helene, mais en effect d'occision & desolation ie puis bien gagner le nom de premiere, & effacer sa memoire. Ha Seigneur que ne m'as tu plustost crée la plus laide & desfiguree de tes creatures, voire au reng des pauvres & simples bergeres ? Ou m'ayant voulu mettre telle sur terre, que ne m'as tu plustost coupé le fil de mes ans, sans me faire seruir de si detestable occasion. La sage Emperiere Abra qui la tenoit aupres d'elle la reconfortoit au mieux qu'il luy estoit possible : luy remonstrant que c'estoit simplese de se plaindre des choses ia faites qui ne se peuuent reuoker : Aussi qu'elle pourroit irriter d'auantage l'ire diuine contre elle à contreroller ainsi l'ordre de ses fatales destinees. Quant à elle que le fait de la guerre ne luy estoit aucunement imputé par son iugement : mais au Prince qui l'a emmenee, lequel amour excuse assez, & que Dieu a voulu que telz maux auinsent pour faire de plus grands biens, c'est à sçauoir de deux belles alliances pour vne, veu le propos desia tenu avec Lucidor de mariage en leur maison. De plusieurs corps qui furent raportez partie furent embasmez pour les enuoyer en leurs pais, & les exeques retardees iusques à l'entiere garison de tous les naurez. Depuis en grand pompe & solemnité n'y faillirent les Princes du camp. Entre lesquelz entamerent le premier propos Falanges, Anaxartes du traité de la paix

entre Florisel & Lucidor, moyennât le mariage de luy avec la pucelle Leonorine fille de l'Empereur Lisuart & Abra : A quoy ilz s'ingererent volontiers pour destourner le party d'Oriane fille du Prince Olorius, laquelle le Prince Anaxartes reseruoit pour luy mesmes, car il aymoit affectueusement & de long temps. Ces deux bōs trafiqueurs iouerent si bien leur personnage que leur dessein succeda, y employant Falanges ses cinq sens de nature, pour assouuir le desir d'Anaxartes, duquel il pourchassoit aussi l'amytié & à ses fins. Le festin de leur nocces avecques toutes ses solemnitez abolirent quasi le dueil vniuersel, & fist tant la belle Leonorie par sa bonne grace qu'elle alluma vn tel feu au cueur de Lucidor, qu'il estaignit entierement l'estincelle d'Helene : luy venant à considerer qu'elle ne l'auoit point aymé prenant vn autre en son lieu & que ce n'estoit plus que le demeurât d'autrui. De s'amyte nouvelle il cueilloit la prime fleur, & elle l'aymoit comme sa grandeur & valeur pouuoit meriter. Peu à peu s'engēdra entre luy & Florisel vne aussi grande amytié que l'inimytié auoit esté au parauāt par le soigneux pourchas d'Anaxartes & de Falanges, qui d'autre part estoiet en grand peine à la poursuyte de leurs amours n'en receuant autre auātage que de la seule veuē, & si nō aucunefois vne pauvre parole à la defrobee. En quoy Lucidor monstra biē son franc courage François, qui ne daigna oncques parler à la princesse Helene, fors qu'en termes de salutation cōme à la rencontre, tant pour le tort qu'elle luy auoit fait q̄ de peur de susciter quelque fantaisie à Florisel, de qui il prisoit plus l'amytié q̄ d'elle. L'Empereur Esplandian par le soing de maistre Elizabel perdit biē tost la fieur, entrāt en la dispositiō moyēne entre sain & malade, & desia se pourmenoit vn peu. Parquoy les seignrs Apolloniens de la cōpagnie de Lucidor vindrēt saluer sa maiestē, & prédre cōgé pour retourner en leur pais : ce q̄ firēt tous les autres apres, excepté la Royne Zahara qui demeura quelque tēs en Constantinople avecq ses deux enfans.

Mais

Mais auât q̄ tous les departemēs se fissent arriva Perion Roy de la grand Turquie, lequel ayant rencōtré en la route quelque reste des fuyars en auoit mis la pluspart en fond, & les autres amenez captifz. A tāt lair rons ces bons princes se donner vn peu de bō tēps en recōpense de tāt de maux qu'ilz auoiet souffertz, pour aller rescoute labelle roine Cleofile qui estoit en grād perplexité

Du merueilleux acte de Silercie damoyſelle de la Royne Cleofile pour sauuer sa maistresse des mains du neuue de Breon : Et du secours que luy donna Amadis de Grece.

CHAP. XXXV.

LA Royne Cleofile estant demeuree prisonniere en la galere du Breon, il la laissa en la charge de son neuue Roy des Gorgones, lequel n'eut tant de vertu en luy de s'en aquiter loyallyment: ains si tost qu'il eut perdu son oncle de veuē descourrit son affection à la roine, la tentant de douces persuasions pour l'atirer à sa volonté: duquel elle craignant la force & outrage temporisoit le plus discretēment qu'il estoit possible sans l'esconduyre du tout, le tenant cōme l'oïseau sur la branche & pour mieux moderer ceste furie, qu'elle cogneust prestē à la violence en cas de refus, elle luy dist: Monsieur, encores qu'il vous pleut ainsi me forcer à vostre desir, ie vous prie croire que vous n'en viendriez à bout, pource que ie me occirois plustost que de le souffrir, comme celle qui aymeroit myeux mourir que viore en deshonneur: Mais puis qu'ainsi est que m'aymez tant que vous dites, donnez moy temps de vous goustier & cognoistre, à fin que l'amytie soit mutuelle: car autrement la pensant obtenir par rigueur, vous la perdriez, & moy quant & quant, qui vous supplie auoir vn peu de patience, en temperant vostre ardeur. Et vous assure foy de Royne que i'aurois, vostre amour trop plus chere que de vostre rude oncle & rebarbatif, qui ne me reuient nullement: ce qu'elle luy disoit pour luy donner vne amorce de fause esperance. De tel langage si bien le mena (comme les femmes sont

stiles) qu'il se rendit du tout à son vouloir. Mais vn iour elle print son luz quelle manioit diuinement, avec sa clere voix angelique l'accompagna de tant de soulpirs & œillades lancees sur ce ieune Roy, que se mettant aupres elle, se coucha en son giron si transporté de ses espritz qu'il s'y endormit: Ce qu'elle voyant & considerant que la vie se deuoit postposer à l'honneur, ierte le luz & desgaigne l'espee que le Roi auoit ceinte, formant en soy-mesmes vn tel discours: S'il est ainsi que les Princes vertueux se sacrifient si volontairement pour occasions à eux peu importantes, doy-je craindre moy à m'immoler, pour sauuer mon honneur que lon me veut raurir? O dieux immortelz acceptez ce sacrifice que ie vous fais de ceste espee à trauers ma poitrine, pour preuenir l'outrage qui m'est preparé & m'achiné, & ensemble garder la foy qu'Amour m'a fait vouer au Roy de la grand' Bretagne le premier du monde: A qui mes amies (parlant à ses Damoyſelles) vous en porterez tesmoignage. Sur ce point l'horreur de la mort vint espouuenter son tendre cueur, tant qu'elle sentit la force luy faillir aux nerfz, & l'espee luy cheut du poing. Parquoy dist lors à Silercie sa plus familiere Damoyſelle. Ie te commande par puillāce absolue, reprendre ceste espee pour executer en moy ce que ie ne puis pas moimesmes rassurāt que ce dernier seruice sera plus agreable que tu me fis iamais. Ma Dame (respōd elle en la releuant) si ie vous ay esté iusques icy loiale seruāte, ie ne vous voudrois cōmencer maintenāt à desobeir: & vous tenez certaine que ie vous vois mettre hors de ce danger que craignez tāt. Lors dōne de l'espee à la gorge du Roy en dormy de si droite atainte, qu'elle l'esgorge cōme vn moutō. Ma dame (dist elle) ce coup là est pour vous deliurer de peine. Il en reste vn pour m'exēpter de la cruauté de ses gēs: & ce disant apuie le pōmeau cōtre vn coin de mur, & se fourra la pointe au dessouz du tetin, ou a esté trouué par les Phisiciens vn pas de la mort quasi incensible. La Royne fut si eſtraice de ceste double hardiesse qu'elle se pas-

le se pasma : puis estant remise en soy par ses femmes s'escria, ha Silercie quelle magnanimité as tu mōstree estre en cuer de fille, pour faire seruice à la maistresse qui tant t'aymoit : lās t'achete trop chèrement ceste deliurance, au pris de ton chaste sang : Je seray à iamais coupable de ta mort, n'ayant eu la vertu en moy de l'executer par mes mains, comme tu as fait par les tiennes. Maintenant Silercie ie te porte enuie qui as gagné les deuans, & m'as apais le chemin que ie doy prendre : Adonc voulut tirer le glaive hors du corps, quand ses femmes luy vindrent tenir le bras : & à ce cry suruindrent les gens du Roy estonnez de ce spectacle comme vous pouuez penser : lesquelz le manderent incontinent au roy Breon : & quand ilz entendirent l'entreprise du trespaslé sur les affections de son oncle, ne trouuerent le cas si estrange, & n'en traiterent la Royne & les femmes si rigoureusement qu'ilz eussent fait. Laquelle leur monstra couragement la deffence que le Roy auoit faite de ne laisser entrer personne de l'armee en la nau ou elle seroit : Et que s'il y auoit aparence de force au contraire, qu'ilz missent le feu es premiers qui les aborderoient. Ce qu'ilz firent de rechef publier, craignant d'offencer leur maistre, si autre q̄ lui aprochoit de la Roine. Celui qui fut enuoyé vers Breon, fut prins par vn flouin de Fulurtin qui alloit descouvrir loing deuant l'armee, & amené à Amadis lequel sachant du messaier l'accident à la verité. Or allons mes amys (dist il) secourir ceste magnanime Dame, ensemble chastier les trahistres comme Dieu nous les a reseruez. Lors firent diligence de ioindre les Russiens, lesquelz recognoissans les banderolles imperiales de Grece en trop plus grand nombre qu'ilz n'estoient se mirent à la fuyte, qui peu leur valut à cause de la vistesse d'aucuns brigantins, ou entre-rent Amadis, Fulurtin, & la fleur de leur armee. Et s'adresserent premier à la nau ou estoit la Royne Cleofile comme à la plus aparente, pensant que le chef de la flotte y

fust. Tant vous puis dire que peu de Russiens eschapperent de leurs mains, par ce que detenans les ennemys ilz donnerent loysir à toute leur puissance de les aborder. Et entra Amadis le premier à la grand'nau ou il trouua la Royne tant combatue de tristesse & de ioye qu'elle estoit quasi transie, laquelle mise en sauf alla donner ordre à la bataille qui fut plus en chaste qu'en resistance. Ce pendant Cleofile qui le voyoit trop esloigner à la poursuyte voulut demeurer derriere pour atēdre son retour : mais le patron fut d'auis de gagner Constantinople, pour la refraischir de tant de maux qu'elle auoit souffert, pensant qu'Amadis ne tardast gueres apres eux. A laquelle y ayant seiourné quelques iours, lui fut donné bonne conduite par le Roy Amadis pour retourner en ses pais :

Comme Amadis de Grece deconfit les Russiens avec l'ayde de Fulurtin, se departit de luy, & des merueilleuses auentures qu'il rencontra.

CHAP. XXXVI.

OR fut le Roy Amadis de Grece cinq iours & autāt de nuitz à poursuyre les gens du Roy Breon, au bout desquelz le vent se tourna contraire aux Russiens, & à luy commode, tellemēt qu'ilz se vindrent rendre au piege, & n'en eschapa vn seul, pour emporter les nouuelles en leur pais. Apres laquelle victoire Amadis ne desirant rien tāt que d'estre solitaire pour entretenir & gouverner à son ayse ses amoureuses pensées : vint remercier Fulurtin du plaisir qu'il auoit fait au Roy & à luy, prenant congé pour retourner en Constantinople faire entendre ce qui leur estoit auenu. Fulurtin ne le vouloit souffrir qu'il ne luy fist compagnie à son retour : mais il ne le sceut impetier. Si le laissa embarquer en vn brigantin qui singla avec vent en poupe & à force des rames si vistemēt qu'il faisoit cinq ou six lieues en vne heure, doncq eslongnerent bien



bien tost la flotte qui s'estoit arrestee pour partir le butin. Allant donc Amadis de Grece en ce petit vaisseau cōme meilleur pour faire diligence, combien qu'il ne valut gueres contre la tempeste : tant y a fortune se leua de telle sorte, que peu à peu, l'eau cōmença à gagner sur la proue mouillant les hommes de bonne voile qui vogoyent, & apres passa sur la corsie : finalement s'enfla tant que force estoit nager entre deux eaux : car les vagues donnoient de proue en poupe de telle sorte qu'il n'y auoit personne qui eust vn seul fil de sec, & le pauvre Patron qu'Amadis auoit prins avec lui ne rachoit tousiours que gagner le droit fil contre les vndes, à fin qu'une, qui pouuoit venir de trauesse ne les gestast tout à bande, & fist culbuter le brigantin dessus dessous, mais il ne le sceut si biē garder pour la lasseté des vogueurs que le vaisseau ne renuersast d'un costé. Ce qu'Amadis de Grece, preuoyant s'estoit tousiours tenu en poupe, comme au lieu plus eminent, tout disposé au peril auāt le coup. Si ietta soudain son gabban qui l'auoit longuement garanty de l'eau, & empoignant vn aiz laige se recommāde aux ondes, tellement qu'estant fort & robuste tant

dura en aleine qu'il gaigna la prochaine rade, ou ses mariniers tēdoient à nager : mais recreuz & rompus par le travail passé, se noyèrent assez pres de lui. Amadis se voyāt seul sauué, remercia Dieu du bon du cuer mais re. aidant la coste si droite que quasi estoit inaccessible, fut derechef grandement troublé : toutesfois comme vertueux & magnanime graut des ongles & grimpa à quatre pates contremōt le rocher iusques au sōmet auquel il paruint ainsi que le soleil se leuoit, qui lui descourrit le païs, c'est à sçauoir vne assez belle plaine bornée de de montagnes, d'une desquelles aperceust vne belle fontaine, ou estoit vn Damoyse assis, de l'age d'enuiron huit à neuf ans, qui dormoit dessus la verdure le plus beau & mieux fermé qu'il eust oncques veu en sa vie, autour duquel estoient douze Lyons & vne Lyonne, qui se leuerent à grand furie si tost qu'ilz aperceurent Amadis, tellement que le ieune Damoyse s'en esueillit : Et voyant deuant le Cheualier qui auoit desia son espee nuë pour attendre les bestes se leua, & d'un baston qu'il auoit menaçā les Lions de sorte qu'ilz obeirēt à son cōmādemēt cōme feroiēt chiens domestiques, se couchās tout plat à terre deuant ses piedz.

Lors.

Lors fort esbahy de voir en ce lieu persōne viuāte, &encores plus de la belle taille du Cheualier alla droit vers lui & le salua aussi courtoysēmēt qu'eust peu faire vn de plus grād aage, disant: Sire Cheualier quelle fortune vous amene ceste partīcar il y a vn an que i'y suis sans auoir veu creature humaine, ains seules bestes brutes, fieres & terribles qui repairent en celieu. A quoy Amadis de Grece luy respondit. Beau mignon encores suis-ie plus esbahy de me trouuer icy, que vous n'estes de m'y voir: parquoy ie vous prie de me dire en quel pais ie suis, & la cause qui vous y tient ainsi seuler.

Monsieur, dist le ieune Damoyse, il vous plaira donc asseoir aupres de ceste fontaine: car ie voy bien que deuez estre lās d'auoir eschellē cestē roche aux griffes, puis ie vous donneray à manger de la viande que i'ay, & vous diray partie de ce que me demandez. le vous en remercie (dist Amadis) car i'en ay bon besoin: & se metant bas sur l'herbe, l'enfant print vn panier que l'vn des Lyons estoit coustumier de porter & luy bailla vne piece de venaison, non pas cuyte: mais quasi autant valoit, car les Lyons estoient duitz & instruitz par celui qui les auoit là commis, à chacune fois qu'ilz prenoient quelque proye d'exprimer le sang de leurs pates, puis le Damoyse la lauoit, & la laissoit seicher au Soleil, & se norrissoit ainsi. Or croiez qu'Amadis trouua tresbonne ceste viande, & en ayant mangē quelque peu le Damoyse print vne coupe d'or, & lemplissant de l'eau de la fontaine luy presenta. Lors Amadis regarda ententiuelement sa phisonomie & principalement les deux yeux qu'il auoit, tous faitz comme ceux de Niquee, qui luy causā vne telle alteration qu'il laissa quasi tomber la coupe, recognoissant en soy-mesmes la faulte qu'il faisoit à sa loyale Dame, si bien qu'il en plora amerement disant entre ses dentz, ha a amy Niquee comme m'auēz-vous voulu mōstrer ceste auenture, pour me manifester l'erreur q'ay commis contre vous? helas amour, pour le

moins m'eussiez-vous laissē avec la premiere faulte q'ie fis enuers Lucelle, sans me mettre en ce tormēt d'vne seconde, pour vous venger plus de moy. Ha braue cueur tu r'abuses bien d'ozer entreprendre vn tel cas, auquel la plus grāde hardiesse que ie pourrois employer sera vne tresgrande couardie, cognoissant le peu de raison que i'ay de mon esperance, ostant ma desloyauté, laquelle a bien meritē que fortune la loge icy entre les bestes, ou ie fais presentement estat de ma demeure, Puis que ma destinee le veut ainsi, atendu que ie ne m'oserois trouuer deuant ma Dame Lucelle, & moins retourner deuers Niquee: ains conuiendra que ie pleure mes pechez entre ces Rochers, iusques à ce que la mort me deliure de tout angoisse. Or pour couurir sa passion il print la coupe & beut, avec resolution de sejourner en ces montagnes pour la necessitē qu'il y reduysoit à cause du peu d'aparence qu'il veoit en son affaire. Ce pendant l'enfant, qui auoit contemplē ceste laschetē, qu'il auoit monstře auant que boyre luy dist: Monsieur vous deuez estre bien lās à vous veoir faire si maigre chere. Beau filz (respōdit Amadis) vous dites vray: mais ie vous prie puis que i'ay desia disnē (dequoy ie vous remercie) dites moy le surplus de ce que ie vous ay requis. Mōsieur (dist-il) ie vous en diray tout ce q'ie sçay. Premier le fait de ma naisāce m'est incogneu: on m'appelle Florarlan, qui ne cognois pere ne mere: car ie fuz portē, en ceste montagne fort petit par vn sage qui me dist que quand ie seray Cheualier il faut que ie m'aille trouuer le plus grand prince & le plus vaillant qui portast onc espee, à fin de procurer vengeance sur luy d'un autre qui fut occis par les mains. Or la cause qu'il me dit pourquoy il me fait icy viure en ce desert, cest pour de uenir plus robuste & endurcy à toute peine, m'ayant laissē acompagnē de ces Lions à fin que ie perde toute crainte. Ainsi ie vis entre Lions apriuoisē par sa science, avec lesquelz ie vois à la chasse, & me retire le plus souuent à ceste fontaine pour la frescheur.

ſcheur. Vrayement diſt Amadis de Grece vous me contez merueille : voire mais dites moy qui eſt le Prince contre qui vous devez combatre. Certes monſieur, reſpond il, ie ne le vous ſçauois bonnement nommer, ſinon que i'ay bien ouy dire au ſage ſelon l'eſtime qu'il fait de luy, que ce ne peult eſtre ſinon de deux l'un, Amadis de Grece, ou Floriſel ſon filz. Trop bien vous ſçauray dire que la mort qu'on veut venger eſt celle du Prince Balart le frere de la Princeſſe Arlâde fille du Roy de Thrace noſtre ſouuerain Seigneur. Lors entendit Amadis de Grece aſſez clerement que c'eſtoit luy meſme à qui tout ſ'adreſſoit, & diſt: En bonne foy mon mignon ſi vous parlez d'Amadis de Grece vous vous pouez quaſi tenir ſeur de voſtre vengeance : car vous reſſemblez merueilleuſement bien à celle qui la deſia ſceu prendre de luy plus cruelle que vous ne pourriez iamais faire, & par plus dangereuſe mort. Comment doncq, diſt le Damoyſel, Amadis de Grece eſt il mort? helas me voyla donc debouté de tout eſperance de gloire que ie pretendois auoir contre luy. Amadis de Grece le regarda en ce diſant, & ne ſe peut tenir de rire. Ce m'aïſt dieux mon enfant (diſt il) Amadis de Grece eſt deſia mort, & au moyé de ce a deſia obtenu la gloire que merite la peine qu'il endura en mourant : toutesſois vous veux bien dire que le ſage fait peu pour voſtre beaulté de vous nourrir à telle fin. Ie ne ſçay cōme il en auiedra, diſt le ieune filz: lors Amadis de Grece luy demanda à qui appartenoit le païs, & il luy dit : au philoſophe eſtant aupres du Royaume de Calidonie. Or bien donc (diſt Amadis) puis que ma deſtinee m'a voulu conduire en ce lieu propre à mes penſées i'y voudrois biē demeurer à ſeruir Dieu pour le reſte de ma vie, deſirant auſſi que perſonne du monde ne ſceuſt rien de moy. Parquoy ie vous prie monſtrez moy quelque lieu entre ces Rochers ou ie me puiſſe retirer de nuit. ſire Cheualier (diſt le Damoyſel) vous pouvez eſtre ſeur, q̄ nul vous deſcouurira icy:

Et ſur celle pointe de roche qui regarde la mer y a vn beau creus entaillé dans la pierre avec une belle fontaine, qui ſera voſtre logis, ſ'il vous plaïſt : & quant à moy, ie vous ferai tout le ſeruice qu'il me ſera poſſible ſollicitant voſtre prouiſion neceſſaire en mon deduit de la chaſſe, afin que ſoyez du tout plus ſecretement. Dequoy Amadis le remercia grandement, lui diſant qu'il eſtimoit beaucoup telle adreſſe, & prioit Dieu de lui donner la grace de le pouuoir ſatisfaire en lui aidant à prendre plus grande vengeance d'Amadis de Grece qu'il ne l'eſperoit Dieu le vueille, dit l'enfant, qui le conuoya iuſques à la cauerne, en laquelle le Amadis fut trescontent de paſſer la ſolitude, priant le Damoyſel de le laiſſer là, & le vouloir viſiter chaſcun iour vne fois, ce qu'il luy promiſt. Puis partit pour aller à la chaſſe, laiſſant Amadis trop eſmerueillé de ſa diſcretion, qui le meut à vne ſinguliere affection, avec autre cauſe occulre, de laquelle il eſtoit ignorant : mais ie la vous veux declarer. C'eſt enfant cy eſtoit filz de Floriſel de Niquee, dnquel Arlande eſtoit demouree enceinte (comme auez entendu au Neufieſme liure) laquelle lui auoit impoſé tel nom, compoſé de celui du pere & du ſien propre. Celui qui le nourriſſoit eſtoit le ſçauant Aſtibel, à tel ſin que lui meſme auoit recité, lequel deuint extremement beau & auſſi bien appris. Et ſuiuant ſa promeſſe ne declaira iamais à Aſtibel ce qui eſtoit paſſé entre luy & Amadis : lequel ſ'endormit ſi toſt qu'il fut en la cauerne, tant eſtoit làs & derompu de la tourmente.

De la ſolitude d'Amadis de Grece, & de ce qu'il fit avec le Damoyſel.

CHAP. XXXVII.

DEſia les tenebres de la nuyt com-mēçoyent à embrunir les câpagnes amenans vne naturelle triſteſſe apres.

pres la gayeté du iour, & la frescheur du vent renforçoit ses effectz, faisant murmurer les ondes de la mer, quand le gentil Prince Amadis s'esueillant se trouua au lieu ou le beau damoyfel Florarlan l'auoit laissé qui se voyant en telle solitude sans autre compagnie que de ses pensées, dont la memoire de Lucelle auoit allumé son ancien desir, plorant & gemissant commença à dire: O force qui me forces contre ma propre volonté à rompre la foy que ie deuois plus garder, combien me l'as tu fait changer, en me changeant moy mesme: certes ma peine en est grandement redoublée par le bien qui me fait tant de mal. O gente Lucelle qu'est ce à dire, que lors que vostre beauté souloit tormenter mon cueur par vn mortel desir ie le portois patiemment alaiété de bonne esperance: mais maintenant que ie n'en ay plus, hélas ie souffre vn mal insupportable! Las espoir que me soulois entretenir la vie en ton absence, qui me la soustient maintenant? fault bien que ce soit quelque espoir, contre espoir pour me liurer plus griue punition de ma desloyauté que me bannir de la presence de celle de qui la vertu inestimable me promettoit quelque pitié: ie suis moy-mesme contraire à moy ne pouant auoir repentance pour vous requérir pardon de ma foy faucee, quand me souuiens de ma treschere Niquee de qui i'ay tant receu de gloire & de contentement: O mort! acheue ia ma vie pour finir mon travail: & toy vie ne m'entretiens plus pour faire durer ma langueur. O flots marins, que ne m'avez vous englouty n'agueres en voz abismes pour m'exempter de ceste trop plus horrible tormente? O fontaine (regardant celle de la cauerne) tu es heureuse en faisant ton cours ordinaire, & mes yeux infortunez à distiller incessamment par contrainte non naturelle. Ta liqueur fresche m'oste bien la chaleur venue du Soleil commun: mais le feu que cause Lucelle (mon vray Soleil) nulle eau ne peult estaindre, qu'une piteuse l'arme d'elle espā-

dué sur moy. Niquee, Niquee tu me dois bien le pardon de ceste offence, dont tu as oublié l'obligation de mes premieres amours! Lucelle, Lucelle, resiouissez vous maintenāt que le temps est venu que vous auez vengeance de vostre desloyal Cheualier de l'ardente espee avecques satisfaction de la faulte q son filz à peu faire cōtre vostre frere. En telz discours il passa la nuit iusques à l'heure que Florarlan le vint visiter, acoustre d'un casquin de drap d'or la trompe perdue en escharpe, acompagné des Lions, dont l'un luy portoit le panier à la viade, de laquelle il bailla part au prince Amadis qui en gōsta quelque peu, s'arrestant à contempler en cest enfant l'image de Niquee: lequel luy demanda comme s'il estoit porté toute la nuyt: Bien (dist-il) depuys que i'ay trouué lieu ou ie desire seruir Dieu mon createur, & compagnie si bonne que la vostre. Monsieur, dist le damoyfel, faites bonne chere, n'espargnez rien, car nous auons de la prouision assez ie viens maintenant de courre vn cerf que i'ay eslacé biē pres d'icy, nous n'aurōs pas faulte de viures. Dieu soit loué (dist Amadis) q n'oublie iamais ses seruiteurs, m'aiāt amené en ce desert, ou ie suis si bien secouru de vous: car ie croy fermement q le soucy me feroit mourir de male mort auāt que i'eusse le soing pour soustenir ma vie. Monsieur (dist Florarlan) ie vous prie ne prenez tant de fantasie, mais resiouissez vous: & quand il vous plaira venir à la chasse ie vous ameneray icy monture: car quant à moy ie suis desia si acoustumé d'aller a pied que ie n'ay besoin de cheual. Je vous en remercie (respond Amadis) vous asseurant que quand i'y voudrois aller ie le ferois beaucoup plus pour vous faire plaisir qu'a moymesmes, sinon pour celuy que i'ay de vostre compagnie, par le sçauoir qui est en vous, tel q l'aage vous deuroit denier par nature. Le Damoysel ne faillit à le prendre au mot, & le lendemain vint à la cauerne à cheual, & mettant pied à terre dist au Cheualier solitaire: Monsieur montez sur ce cheual

Chalier folitaire : Monsieur montez sur ce cheual s'il vous plaist pour voir ma chaffe & le país à l'entour qui n'est pas tout ainsi que le voyez icy : ce qu'il fist pour luy complaire, & alloit apres l'enfant qui marchoit deuant luy allaygre, comme vn baste. Parquoy pensoit Amadis que lon ne deueroit pas autrement nourrir les filz des Princes pour les rendre robustes & moins delicatz. Or le mena il en telle part ou ilz trouuerent venaison, & eurent le passe-téps des grandz Ours que ces Lyons prindrent à force. Amadis retourna au soir en sa loge, & fut enuiron deux moys menant ceste vie, & couchoit sur vn petit liét qu'il auoit fait de mousse d'arbres.

Comme le Damoyfel Florarlan mena Amadis de Grece voir les nauires d'Armide.

CHAP. XXXVIII.

Entre les chasses qu'Amadis de Grece continua avec Florarlan, il le mena vn iour à quartier des montaignes, ou ilz trouuerent vn parc, circuit de murailles qui sembloient bien estre de trois lieues de tour ou enuiron, ioignant lequel estoit vn beau boys planté des grandz ormes & vieilz chesnes, aboutissant au bout d'vne belle riuere, qui redoubloit toute l'affiete & l'edifice au rebat de sa perspective, lequel pleut grandement à Amadis de Grece, & demanda au Damoyfel quel logis c'estoit. Monsieur (dist-il) s'il vous plaist nous y pourrons aller & voir les plus estranges choses de ce monde. Voire mais, dist Amadis ie ne voudrois estre cogneu. Ne craignez dist Florarlan vous n'avez garde, car ceux qui sont dedans ne cognoissent pas eulx-mesmes. Amadis en eut d'autant plus d'enuie : Si alla quand & Florarlan pour voir les secretz de ceste maison, ou à l'arriuee ilz ne oyrent dedans que pleurs & lamentations de gens grieuement naurez : puy entrans en vne grand' salle virent vne geolle de fer, & là dedans plus

de deux cens Cheualiers qui iettoient force criz piteux : & auoient tous la main senestre persee cōtre l'endroit du cuer, comme s'il y eussent esté blesez cruellement, sans auoir aucun intervalle de douleur, tant bleśmes & attenez que c'estoit horreur de les voir : Entre lesquelz Amadis de Grece cogneut Garinter dōt il fut trop esmerueillé, & l'eust volontiers tiré hors de là s'il luy eust esté possible. Pourtāt dist au Damoyfel : Certes mon enfant c'est grand pitié de voir ces pauures gens qui ont tant de peine, mais n'y a nulle fin à leur tourment ? Si à mōsieur (dist il) ilz ont quelque relasche, mais si courte qu'ilz ne l'estiment rien. Comme ilz parloient ainsi l'vn à l'autre veirent sortir d'vne chambre qui respondit à la salle vne fort belle Damoyfelle, qui estoit vestuē de drap d'or, ayant ses cheueux espars, & sur iceux vne guirlande de riche pierrerie, portant en sa main vne harpe qui sembloit estre de fin or, & derriere elle marchoient autres Damoyfelles richement vestuēs dont l'vne portoit la queue de la Princesse, & l'autre deux coiffins de drap d'or qui furent mis à l'entree de la geolle. La pucelle fut fort esbahie de voir vn si beau Cheualier qu'Amadis, n'ayant iamais veu son pareil cōbien qu'il fust bien maigre & palle : parquoy demanda à Florarlan qui estoit ce Cheualier : le Damoyfel, baissant la veuē en terre avec vne grand'reuerence, respondit. Ma Dame ie ne le cognois non plus que vous, sinon que ie l'ay trouuē entre ces mōtaignes, & m'a prié que ie vinsse avec luy pour voir ceste auenture. A quoy la Damoyfelle ne sonna mot encōres que le Cheualier luy pleust tant qu'elle n'en pouuoit retirer sa veuē pour la semblance qu'elle y trouuoit de celuy qu'elle ymagineoit le plus, comme si s'eust esté luy mesmes : q fut cause qu'elle alla faire son office avec grande solemnité, c'est à sçauoir que se mettant bas sur les coiffins commença à toucher sa harpe, & chanter doucement quelques chansonnettes en complainte d'amours avec

H

si pro-

si profondz souspirs yssans de ses entrailles qu'ilz engendroient en hault les larmes decoulans le long de sa belle face. A la contemplation desquelles elle ramena à la memoire d'Amadis de Grece, celle qui estoit si fort grauee en son cueur, tellement qu'elle le fist plorer de compassion. Ce qui augmenta grandement l'affectiō de la pucelle de le voir ainsi larmoyer. Or entendez que des que la Princesse commença à chanter & sonner, tous les Cheualiers patiens tomberent à terre comme gens endormis, demeurans tous coiz iusques à ce qu'elle eut finy la musique. A quoy le Prince print bien garde, & disoit apart soy: hélas ma Dame Lucelle, cōbien est plus grand le mal que ie seuffre pour la faute commise contre vous, que n'est celui de ceux qui sont icy tourmentez: car le son de la pucelle leur oste la passion pour quelque temps, & la mienne n'a point de ceste, & si rengrege à ce son melodieux. Adōc elle bailla sa harpe à vne des autres, qui en commença à iouer, y aioustant la gorge comme elle auoit fait, mais non pas si bien. Ce pendant elle s'adresse à Amadis de Grece, & luy dist. En bonne foy Cheualier ie pēse que soyez amoureux par le tesmoygnage que ie voy de voz larmes. Ma Dame (respondit-il) la douce armonie de l'instrument avec vostre voix ont tant de vertu, moyennant les parolles qu'avez prononcees, qu'elles fussent à engendrer passion à quiconques en seroit vuide, parquoy ne vō^s esbahissez si elles ont effet en moy, ou elles ont trouué matiere disposee: car si amour m'a voulu faire sentir ses effortz, qu'elle raison peult il auoir maintenant de m'en monstrier de tous contraires? hélas Cheualier (dist-elle) ie ne m'esbahy plus si voz larmes ont esté contraires aux miennes sur ma musique: puy que ie trouue conformité de passion en noz cueurs. Ma Dame le tort que ie voy estre fait à vous (belle par excellence) chasse mon desespoir, me seruant de recōfort en pareille infortune, & receurois grande allegeance si

ie me pouuois trouuer icy toutesfois que vous ferez la musique aux patiens: parquoy vous supplie me vouloir dire l'heure ordinaire, à fin que ie n'y faille point. Cheualier, dist-elle, si vous auez plaisir en ce mistere, d'autant que vostre mal est semblable au mien, i'ay autant de mestier de vostre cōpagnie, que vous de la mienne. Parquoy ne faites difficulté d'y venir toutes & quantesfois que bon vous semblera. Ma Dame (dist-il) ie vous remercie humblement, vous suppliant d'auantage me dire la cause de ceste auēture, pour laquelle ces Cheualiers sont si mal traitez. La cause est (respond-elle) qu'il y a en ce parc vne tresexcellente pucelle nommee Armide, qui iadis fut enchantee par sa mere à raison de sa parfaite beauté à fin que princes ny Roys ne vinsent en contention à qui l'auroit par force: Et quiconque y vient en telle intention demeure icy traité cōme vous voyez: & moy qui ay compassion de leur peine à cause de la miēne semblable, viens souuent icy d'un chasteau que i'ay assez pres, pour parler à vn Philosophe, & conférer avec luy mes affaires, & par mesme moyen leurs faitz le bien que vous auez veu, ou si ie n'y puis venir, i'y enuoye la Damoysselle qui iouē presentement. Vous me contez merueilles (dist Amadis de Grece) mais ou se tiēt ceste pucelle que vous dites? n'est il possible que Dame ou Damoysselle y entre, combien qu'il ne soit permis aux Gentilz-hōmes? Non, dist-elle, pource qu'aussi tost qu'elles y aprochent de vingt piedz il se fait vn bruit si espouuentable qu'elles en sortent incontinent: & si elles y viennent en cōpagnie de Cheualiers, elles les perdent en entrant. Or est il tard, si vous donneray le bon soir: parquoy enseignez ce Damoyssel l'endroit ou il vous pourra trouuer, & ie vous feray sçauoir par luy le iour q̄ ie seray icy. Amadis la remercia grādement, & dist qu'il le feroit. Ainsi la princesse avec ses Damoysselles & les Cheualiers recōmencerēt leur pitieuse armonie: lesquelz Amadis laissa, s'en allant avec le Da-

le Damoisel, auquel il s'enquist en chemin s'il cognoissoit la Dame qui auoit parlé à luy si courtoysémēt. Ouy mōsieur, respond c'est la Princesse Arlande, ma Dame & maistresse à laquelle le Royaume de Trace appartient de droit apres le deces du Roy son pere, elle passe souuent par cy pour parler à l'astrologue qui me nourrit: & la Damoiselle que vous voyez plus priuee d'elle est sa cousine appelée Arlinde fille du Duc de Crette, & l'autre grande ouuriere de pourtraiture, est nommée Grise, & pour vous en dire la verité elle est fort amoureux: mais nous ne sçauons de qui. Il me le semble bien, dist le Prince, vrayement elle est douee de grand' beauré. Voire, dist Florarlan, & plus la frequenterez plus vous la louerez de son acointance, parquoy ie vous auertiray tousiours de sa venue. Lors luy demanda Amadis s'il n'y auoit nul remede au monde pour deliurer ces pauvres affligez, si à (respond) selon q̄ vous pourrez voir es escreteaux des parrons qui sont icy deuant. Adonc delibera en faueur d'amour entreprendre l'auenture, & pria Florarlan de le mener aux petrons, lequel comme se doutant de la resolution du Cheualier luy dist qu'il ne voudroit pas qu'il l'esprouuast à cause du peu de profit que les autres en auoient rapporté. Sur quoy Amadis de Grece iettant vn grand sospir. helas mon mignon, dist il, que ie gagnerois beaucoup s'il me pouuoit auenir de perdre mon entendement, à fin de ne sentir mon martire, auquel tous autres maux seruēt d'allegeance. L'enfant voyāt sa conclusion, l'alla conduyre au circuit de l'esprouue d'Armide, ou il ne sceut lire vn seul mot, & le pria de se retirer, & que si l'auenture luy disoit bien il luy feroit sçauoir, sinon il ne sera besoin de l'attendre iusques à ce que les autres sortiront. Je vous iray, dist Florarlan, rechercher en la maison des naurez d'amour, ainsi estoit nommée. Amadis le baisant en la face se departit de luy, n'ayant autres armes que son espee, monté sur le cheual qu'il lui auoit amené: & va entrer par la poterne

ou pourpris, si nauré de sa premiere playe qu'il ne craignoit dāger d'autre plus grāde.

Comme Amadis de Grece esprouua l'auenture de la queſte d'Armide & de ce qui luy auint.

CHAP. XXXIX.

LEs nuës de l'Occident monstroient desia par leur rougeur la retraite du Soleil vers elles, quand l'excellent Prince Amadis de Grece se print a cheminer dans la basse court, ou il ne passa gueres auant sans trouuer grand nombre de harnoyz de Cheualiers qui y estoient espādus en l'entreprise de l'esprouue: & combien qu'il y en eust plusieurs qui luy eussent bien peu seruir selon sa corpulence, & qui estoient de grande valeur, si est-ce qu'il n'en voulut endosser pas vn, estimāt qu'armures peuuent bien peu valloir contre les enchātemētz: Et de la mort n'auoit tant de soucy que du danger de son esperance esperdue. A l'instant luy sembla voir deuant luy vne nuë espesse comme fumee d'une tuillerie avec terribles esclairs comme de tonnerre. Et ceste nuë s'estendoit depuys le ciel iusques en la terre, dequoy il fut fort esbahy, encor que coustumier de voir choses espouuentables, neantmoins passa il dedans la nuë, ce que nul n'auoit onques fait si auant, de laquelle se trouuant envelopé, le cuer luy creut contre la paour: si pique son cheual lequel restiue & souffre de frayeur: mais il le broche si viuement qu'à bride aualee luy fait trauerser la nuë iusques à la clarté tenant l'espee nuë à la main là ou il aperceut vne grand' troupe de Damoyſelles richemēt acoustrees s'entretenaus par les mains. Qu'est-ce cy Sire Cheualier (dirēt elles) voulez vous emploier vos forces contre les tendres pucelles: remettez hardimēt vostre glaiue au fourreau, car vous estes en lieu pour receuoir plustost playe q̄ la liurer: à quoi il obeit, disant, mes dames, vous vous pourrez bien mesconter parlant à celui qui

est tant nauré qu'il n'y a place en lui pour nouvelle blessure. S'il y a quelque honnêteté en vous, respondirent, mettez pied à terre & venez quant & nous : Ce qu'il fist, mais il ne l'eust si tost fait, qu'il perdit & Damoyelle & cheual, & vid vn escadron de Cheualiers venans à course desiriers la lance baissée contre lui, disans : Cheualier vous payerez maintenant la maletoste des volontez qu'avez portees contraires à celles de noz Damoyelles. Lors il desgaina son espee & se mit en deffence sans aucune crainte, delibéré pour le moins de chèrement leur vendre sa peau, & qu'il y en demeureroit pour les gaiges : mais le nombre d'eux estoit si grand qu'ils l'environnerent de tous costez, le naurant deuant & derriere, dont sortit tant de sang de son corps que lui mesmes s'esbahissoit comme il pouuoit viure, iusques à ce que la nuit suruint, & se pensant retirer à quartier, se trouua pres d'une porte du chasteau ou il entra iusques en la court quarree, & y trouua autre grand nombre de Cheualiers sortans par les quatre coings, lesquels le vindrēt assaillir leurs espees au poing, disans : Cheualier, il n'y a maintenant personne qui vous peult deliurer de noz mains : Lors le rechargerent de rechef, lui estât auis que leurs espees ne tréchoyēt pas, trop bien en sentoit il les coups orbes sans se pouuoir reuenger, d'autant que les siens ne portoyent point. Estant Amadis de Grece en cest estour, suruint vn Cheualier hault outre mesure qui dist : Retirez vous mes Gentilz-hommes, car ie le vous ietteray par terre, puis lui trenchez la teste à vostre aise. Adoncq embrassa Amadis & luterent longuémēt pour s'aterrasser l'un l'autre, n'ayant Amadis rencōtré homme de plus grād force : toutesfois à la fin il lui fit ployer vn genou, & escrier.

Helàs ! les vainqueurs changeront presentement leurs forces pour les vaincuz. Lors Amadis se trouua estre aux prises avec vne belle Damoyelle paree precieusement, & veid tous les autres Cheualiers ainsi transmue, & vn grand nombre de torches al-

lumees à l'encontre de lui, & force pucelles tenans harpes, lutz, & guitermes, dont il fut grandement esbahy & iur tout de l'excellente beauté de celle qu'il tenoit lyee entre ses bras à la lute, lui estant bien auis qu'il n'en auoit oncq veu de plus & y fust Niquee en comparaisō, laquelle luy dist : Monsieur vous soyez le bien venu, & plaise à Dieu que ce soit pour meilleur remede à celle qui l'a osté à tous iusques auourd'hui : mais ie crains que le donnez aux autres & non à moy. Ceste parole Amadis ne sceut bonnement entendre, toutesfoys luy respondit : Ma Dame ie me reputerois trop heureux de vous pouuoir faire seruice vous asseurant qu'il ne tiendra à moy de tout ce qu'il me sera possible. Vrayement (dit elle) ie vous remercie, auſsi ne deuroit on moins esperer de si bon Cheualier, vous certifiant qu'il est bien en vostre puissance. I'en serois bien aise, dist il, qui suis couſtumer exposé la vie pour les Dames. Or doncques, dist elle, venez vous reposer, & ſçaurez apres tout l'estat de mes affaires. Allons ma Dame, respond, ou il vous plait, laquelle le prenant par la main le mena en vne ſalle tapissée de drap d'or, ou les tables estoient desia dressées, ausquelles ilz se ſeirent pour ſouper, & furent ſeruis de viandes exquisés, mais durāt le festin la pucelle ne retira iamais l'œil de dessus le prince, qui la regarda auſsi ententiuemēt, pour la ſouuenance qu'elle lui renouelloit de ſa Lucelle, tellemēt que les l'armes lui pendoyent aux ieux grosses comme poix, dont elle se reſiouit fort en ſon cueur les appliquant à ſon profit, à tort & ſans cauſe, mais les haults boys commencerent à ſonner à la deſſerte, qui les diuertirent de leurs œillades.

Des propos que la Princeſſe Armide tint à Amadis de Grece, & comme elle demeura enchantée.

Les tables leues, la Princesse print Amadis de Grece par la main, entrant avec luy en vne belle chambre ou ilz s'assirent sur vn lit verd & elle demanda à vne de ses Damoyelles sa harpe, dont elle commença à iouer fort doucement & à chanter quant & quant, demeurant elle & le Prince seulerz en la chambre avec vne torche allumee, laquelle ainsi belle & de bonne grace luy reduit en memoire l'estat auquel il estoit quand il faisoit la court à sa Niquee en tel habit, souz le nom de Nereide dont il se print à l'armoyer disant. Helas Niquee quelle offence ie commetz contre vous, en m'esloignant ainsi de vostre compagnie. Et vous Lucelle à q' i'ay fait la premiere faute. Or en feray ie penitence si austere que quant vous l'entendrez la prendrez en iuste satisfaction. Elle pensa que l'effort de sa beauté caust en Amadis ceste passion, aussi certes n'y eust il eu cuer si dur au monde qui ne se fust atendry à la douceur de sa voix & atmonye de l'instrument. Or ayant achené sa chāçon luy commença ce langage. S'il est ainsi monsieur que ma beauté ait eu pouuoir de vaincre les forces de rāt de Cheualiers qui estoient icy auant vostre venue, par laquelle vous ayez donné liberté à tous. Pourquoy me laissez vous seule captiue me voyant telle & de maison que pouuez cognoistre par renommee? I'ay refusé tant de Roys, Ducz & Princes desirans ma compagnie & la communauté de mes terres & seigneuries. Or vous faisie present de moy & de tous mes biens si me le voulez faire de vostre personne: Et sachez qu'en vostre ouy ou nenny gitt la fin & consommation des enchantemens de feu ma mere, ou vn nouveau commencement de charme sur vous, auquel trouuerez aussi peu de grace & mercy que prendrez de pitié de moy. Tel propos rendit Amadis de Grece fort perplex voyant le peu de remede qu'il y pouoit mettre estant desia marié, & d'auantage son amour tant engaigé en lieu d'ou il n'esperoit nul remede:

mais apres y auoir vn peu pensé determina luy respondre selon la verité de son fait. Ma Dame, il n'a pas pleu à fortune me permettre tant de liberté, que ie peusse accepter la grace que me voulez faire m'ayant lyé en autre lieu qui me rend incapable de vostre faueur. O Dieu à quelle fin m'avez vous mōstré l'ocasion de tant de bien sans aucun moyen d'en auoir iouissance: adonc se teut & ietta vn profond soupir, auquel la Princesse tomba de son hault & toutes ses Damoyelles en vn mesme instant, mettant les mains contre leurs poitrines & commençās à gemir & se plaindre comme faisoient les Cheualiers de la maison des naurez si douloureusement que le Prince en fut esmeu à grād cōpassion. Et faist lors Armide entre ses bras, luy disant plusieurs paroles de reconfort: mais elle n'en cessa ses pleurs & lamentations. Ce que voyant Amadis dist en soy-mesme: Lās que ie suis né souz constellation infortunee. A à belle Armide, si vous auez compris l'estat de mes malheurs vous ne vous plaindriez du peu de secours que trouuez en moy, qui n'en ay aucun pour moy-mesmes. O Lucelle que ne voyez vous la peine que i'endure du mal de ceste Princesse dont ie suis cause pour le prendre en payement du bien qui ne me peult proceder que de vous. Apres ceste exclamation ne scāchant bonnement que faire pour le mieux, s'aui-sa de prendre la harpe de la princesse pour voir si c'estoit enchantement qui se peult apaiser par la musique, ou adoucir pour le moins comme il auoit veu par celle d'Arlāde: Si commēça à sonner & la Princesse avec toutes ses Damoyelles demurerent aussi coyes que si elles eussent esté roydes mortes: parquoy il cogneut qu'elle payoit la débte en telle monnoye que lon auoit fait la despence: helas que telle experience fust tombée sur Lucelle (dist il) de souffrir à son tour pour moy cōme ie fais pour elle. A Armide ne cherchez le medecin qui ne peult pas guarir sa maladie: & renforçant ses regrets puis laissant la harpe,

la princesse & ses Damoyelles retournerent à leurs premiers gemissemens, sanglotz & cris pitoiables, & sortirent hors du chasteau, & Amadis apres elles : mais sachez qu'elles ne firent que courrir iusques à vn grand trait d'arbaleste là ou sembloit qu'elles se fourrassent dedans vne obscurité espesse, en laquelle le Prince ne pouuoit entrer quelque peine qu'il y mist non plus que s'il y eust eu vne forte muraille, dont contrainct fut demeurer là, les oyant crier iusques à ce qu'elles s'esloignerent tant que l'ouye ne receuoit plus leur bruit : Et y passa toute la nuit en complaintes vers Lucelle. Le iour venu voyant la beauté du chasteau tout enuironné à vn trait d'arc à l'entour d'un gros brouillas qui montoit iusques au ciel, il essaya de rechef à passer, recherchât de tous costez s'il y auoit ouuerture, ou lieu plus penetrable l'un que l'autre. Parquoy s'en retourna au chasteau ou il ne trouua personne à qui parler, & le veid fort bien en ordre & richement tapissé & emmeublé, dont avec sa fâcherie se resioyut aucunement de ce qu'il luy sembloit estre enchaté en ce lieu ou il pourroit confier sa vie solitaire iusques à la mort en penitence de sa desloyauté enuers Lucelle, à laquelle il ne cessoit tous les iours de parler, puis à Niquee, & viuoit du fruit du iardin, & de l'eau des froides fontaines, esquelles mirant souvent sa figure disoit : O ymage de celuy qui n'est desia plus, puis qu'il est hors de son sens, dis moy es tu la figure du Cheualier de l'ardente espee, lequel vainquit les gardes du chasteau d'Argines, pour estre vaincu de la beauté de Lucelle à qui il a fausé sa foy ? Es tu Amadis de Grece qui a tant acquis de gloire au monde, & puy l'as toute perdue par vne seule faute ? si tu l'es, ie te combattray pour effacer vne portraiture tant enlaidie. O clere source que plus tu aurois de raison à me susoquer en tes ondes, que tu n'euz au beau Narcissus : venimeux basilic qui imprimes en moy ta propriété au danger de la belle Armide, retourne tout ton venin

vers ma propre representation, à fin que ie meure en me voyant moy mesmes : là tu sçais bien que me donnois la vie en mourant, dont refuseras ma requeste. En telz regretz passoit son temps en perdant grand part de sa beauté, à cause qu'il deuenoit foible de ceste nourriture de fruiçtages & d'eau simple : mais sur tout l'amaigrissoient les ennuytz, mesmement de voir la princesse Armide tous les iours trois foys passant deuant luy avec ses Damoyelles qui apres se fourroient par my la bruyne, le laissant la fort dolent de leur continuel martire. Or deuez entendre qu'à l'instant Amadis de Grece lutant avec la princesse la faisant agenouiller, le Cheualiers qui estoient au seiour des nauez, reuindrent tous en leurs bons sens, sans auoir souuenance aucune de ce qui leur estoit auenu : Ce qui fut aussi tost raporté à la princesse Arlande, laquelle y vint incontinent accompagnée de son petit filz qui luy dist que le Cheualier solitaire auoit esprouué l'auenture, dequoy tous les Cheualiers furent fort esmerueillez deliberans tous ensemble l'aller voir au iour ensuyuant, mais à l'heure qu'ilz en deuisoient virent venir Armide de là ou elle auoit laissé Amadis de Grece, & passa deuant eux accompagnée de ses Damoyelles avec leurs criz & plaintes acoustumees. Parquoy dolens de voir vne si belle Dame & si mal traictée, vouèrent l'un à l'autre de s'employer à sa deliurance, laquelle consistoit en ce qu'entendrez cy apres. Lors Arlande demanda sa harpe pour monstrier aux Cheualiers ce qu'elle auoit fait pour eux durant leur enchantement. Si atendirent le lendemain pour aller voir les escriteaux des perrons, qui estoient depuis l'entree d'Amadis tous nouueaux car ilz disoient. Celle qui vouldra deliurer Armide pourra entrer seurement : mais pas ne sortira quand bon luy semblera iusques à ce qu'elle recoiue telle force qu'elle à liuree pour le renfort de l'enchantement. Ayant leu le dicton, cogneurent que l'esprouue de ceste auenture n'estoit permise qu'aux Dames

Dames, toutesfois les Cheualiers ne laisserent à esprouuer l'aventure. Armide donc manda en ce lieu toutes les Damoyelles à l'esprouue vne à vne, lesquelles y entrerent librement, iusques à voir Amadis de Grece, & les plus belles le plus seurement, mais nulles d'elles la peult acheuer. A raison dequoy fut auisé que tous les Signeurs qui estoient presens yroyent chercher les plus belles Dames du monde pour les y amener acheuer le sort. En laquelle deliberation chacun partit prenant congé de la Princeesse Arlande qui leur donna cheuaulx & armes: Et ne demeura q̄ Garinter derriere, qui étoit fort dolé de ne s'estre trouué en la bataille deuant Constantinople, de laquelle il estoit parti pour l'amour de Timbrie & ayant ouy parler ceste aventure en passant l'auoit voulu experimenter, dont il luy en print comme auez entendu. Or les laisserons nous aller iusques à ce que l'histoire les rameine en ieu.

De la griefue passion d'Anaxartes, & des propos qu'il eust avec la Princeesse Oriane.

CHAP. XLI.

GRand' peine souffrit le Prince Anaxartes pour l'amour de son Oriane, laquelle de son costé moins ne l'aymoit en son cueur & a croissoit leur martire de iour en iour à cause de leur consolation ordinaire, en laquelle ilz cachoyent leur affection, secrette le plus qu'ilz pouuoient, dont elle augmentoit d'auantage, comme le feu couuert rend la chaleur plus forte. Puis quand au Prince il se trouuoit quasi forclos d'esperance, veu qu'il estoit Payé & elle Christiène, ce qu'il craignoit pouuoit donner empeschement au mariage: dequoy elle aussi ne portoit moindre ennui. Toutesfois auint vn iour entre autre que toutes les dames s'alloyent pourmener au iardin de l'Empereur, que le Prince eut quelque peu de commodité de parler à elle plus grande qu'il n'auoit en-

cor'eue: de laquelle voulant faire son profit, luy fist vne brieue harangue, mais d'une voix tremblante avec changement de couleur d'une part & d'autre, qui fust telle. Je vous supplie ma Dame excuser la hardiesse que ie prens à vous descourir le mattire que ie souffre par vostre excellence, d'autant plus grief que ie le tiens clos & couuert: car quelque reuerence que ie porte à vostre grandeur, la force d'amour est si vehemente que ma raison n'y peult plus resister: & pour le bien le vous donner à entendre, il est tel que dire ne le puis pour l'excellence de sa violence: sinon que par luy ie seniz en moy comme en vn petit monde selon le dist des anciens sages toutes les passions diuerses des elemens: làs mes pauures yeulx monstrent bien les courantes de la mer en mes larmes continuëles: & mes profonds souspirs vollent comme les vents en l'air: le tout esmeu par l'ardeur du feu caché en mon cueur, qui sans vostre pitié conuertira tout vostre corps en terre seiche & cendres. Anaxartes ne pouuant plus parler, de douleur qu'il sentoit elle pour l'allegier vn peu luy respondit.

Môseur le lieu que tenez, tel que nous cognoissons, vous donne loy de parler à moy priuément: mais de l'affection que me voulez declarer, vous me pardonnerez si ie suis deliberee d'en croire, ce que i'en pourray iuger par effect plus que par l'angage qui est aysé à deguïser. Combien que i'estimeroy la Princeesse heureuse à qui Dieu dōneroit vn Cheualier auquel tant de vertu abonde, laquelle i'estime & honore en vous selon son merite. Sur ce point suruindrent tous les Princes & Princeesses au lieu ou Anaxartes estoit à dire le mot à sa Dame, dont il fut grâdement indigné. Or s'en vont tous asséoir aupres d'un estag desmeslans maintz gracieux propos, entre lesquels Darinel s'adressa au Seigneur Falanges: Monsieur il n'y a icy personne entre tant de Seigneurs & Gentilz-hommes qui soit demeuré avec si peu d'esperance d'amour que vous & moy: car à vray dire, c'est tout

vn maintenant de nous deux, comme si c'estoit auant la guerre, dont amour nous tient grand tort, ayant esté occasion de plusieurs accords, & amitez de guerroyer nous deux seulement. Falanges se print fort à rire, & lui respondit: voilà doncq Darinel vne grand' occasion de gloire appareillée pour nous qui faisons sacrifice de noz corps sans esperance: mais, seulement par vn instinct de paruenir à la victoire de noz pensees. Monsieur, dist Darinel, vous riez: pensez vous que vostre grâdeur vous face plus sentir les angoisses amoureuses? Non, non: toutesfois ie remercie les Dieux du reconfort qu'il me dōnent, me faisant compagnon d'un si grād Seigneur en mesme dance. Siluie à qui le ieu touchoit oyāt ce propos lui dist de fort bonne grace. Certes Darinel aussi n'estime-ie moins voz seruices que ma Dame Alastraxee peut faire ceux du Prince Falanges, voire, ie m'y sens plus tenuē d'autant que vous n'avez cause de tant vous y assuiettir, & que ne vous en puis faire meilleure recompense, que de vous en estimer beaucoup. Ma Dame, dist Darinel, ie baise vostre blanche main pour la faueur qu'il vous plait me prester, que i'accepte plus que si m'eussiez aujourd'hui fait Seigneur de tout le monde. Ce disant print sa cornemuse & commença à iouer, chanter & dancier plaisamment, donnant grande recreation à toute la cōpagnie, fors qu'à la princesse Niquee qui trop estoit pensue sur la longue demeure d'Amadis de Grece, ne pouuant y-maginer quelle peult estre la cause, & plus le fust quand le Prince Fulurtin retourna vers eux sans lui: car lors lui commença le cueur à liurer les assaux de soupçon sur la Princesse Lucelle qui lui croissoient de iour en iour. Et considerans les Seigneurs sa continuēlle tristesse delibererēt plusieurs d'aller à la queste d'Amadis, principalemēt Florisel ayant obtenu congé de son Hele-ne, auquel Falanges voulut faire compagnie, ne menans que chacun vn escuyer. Le Prince Anaxartes & sa sœur Alastraxe-

ree conclurent d'y aller à part'eulx, & maintz autres Gentilz-Cheualiers bien deliberez d'esprouer les nouuelles aventures desquelles lors le bruit couroit par le monde. Et iurerent tous se rendre à Constantinople dedans vn an, pour celebrer les no-es de Florisel & celles de Lucidor remises à ce temps là, mesmes celles de Zahir & de la gracieuse Timbrie pour qui Florisel fust intercesseur enuers l'Empereur son pere, qui s'y accorda voyant leur affection indissoluble. Ayans doncq tous prins congé de leurs Dames, les vns se mirent sur mer, les autres allerent par terre, tellement qu'il ne demeura ieune Cheualier en la cité qui ne fust retenu par affaire trop vrgent. Dont fust la court en vne solitude pleine de certaine tristesse, de laquelle la Princesse Oriane portoit sa part à cause du partement de Zahir qu'elle aymoit affectueusement, mais elle dissimuloit acortement quelle en eust beaucoup à souffrir, comme la grand' cronique de ce Prince le declare tresamplement.

Comme les Princes Florisel & Falanges furent iettez par tempeste en l'Isle de Guindaye & de l'estrange auenture qu'ilz y trouverent,

CHAP. XLII.

OR entrerent les Princes Florisel & Falanges en vn petit Flouin le plus leger qu'ilz peurent choisir pour aller à la voile, & singlants en haute mer commanderent aux mariniers ne tenir autre route que celle que Dieu & Fortune les guideroit, puis qu'ilz ne scauoyēt en quelle part prendre adresse: & cueillirent vent en poupe pour faire diligence. Au bout de six iours se leua vne tormentte qui leur en dura plus de huit, etrans & vagans par la mer, à chef desquelz ilz surgirent pres d'une belle grand' Isle par vn matin que le Soleil commença à descouuoir de ses raiōs dorez force villes & chasteaux, laquelle leur pleust grandement. Apres ceste fortu-



ne commanderent aux mariniers prendre terre, disposas leur vie à tout le hazard qui leur pourroit aduenir p'ustost que de s'aller enseuelir es vndes : ce qu'ilz firent contre l'opinion de leur pilote, à qui la coste sembloit quasi inaccessible. Or y descendirent armez de harnois peu enrichiz à fin de n'estre cogneuz : & estans desbarquez s'en vont par vn petit sentier qui les conduit en peu de temps pres d'un beau temple, basti au milieu de la campagne à vn quart de lieuë d'une grosse ville, de laquelle ilz veirent sortir vn nombre de Cheualiers tirans vers ce temple, acompagnez des Dames pour le conuoy du chariot triumpfal, qui alloit au milieu d'eux attelé de six Licornes, & comme ilz aprocherēt plus pres, veirent que le chariot estoit d'yuoire avec feullages d'azur à la moresque, & les selles & garnitures des Licornes de veloux cramoy si : le chariot fut couuert de quatre arceaux d'un mesme ourage, sur lesquels estoient posees douze testes enchassées, en fin or comme reliquaires, d'or la plus haulte estoit marquee des armes Royales de Clarence : dessous estoit assise vne pucelle autant belle qu'on eust sceu choysir vestue

d'un satin violet decoupé sur vn fond de drap d'or, & les taillades reprises avec boutons d'or subtilement faicts en façon de trousses de fleches, liés de gros tortiz de soye bleue sa robe estoit fort lōgue & ceinte, & les manches estroites pres des espaulles venoyent à s'essargir en bas : ses cheueux espars, sur lesquels vne coronne Royale estoit assise avec infinité de perles, portant en la gauche vn arc Turquoy, & en l'autre trois fleches mignonnement empennees. Aux deux costez d'elle estoient deux pucelles richement parees garnies aussi d'arcs & de flesches : & environ trois marches plus bas sur le chariot estoient assis trois Cheualiers vestuz de robes longues de toille d'or, atachez au chariot à grosses chaines & colliers d'or, & les mains lyees par deuant de grosses cordes de soye : & tous les Cheualiers du conuoy auoyent chacun vne espee longue d'une aulne & d'une palme de large. Et en telle ceremonie marcherent iusques au temple, ou la Royne fut descendue & menee, marchant les trois Cheualiers captifs deuāt elle : & ceux de sa suyte rengez aux deux costez pour faire passage, Florisel & Falanges estoient

fort esbahis de telle pompe, ne sçachans imaginer que ce peult estre: Et desirans voir descendirent, & entrerent au lieu saint, ou ilz veirent vn throsne eslené de vingt degrez, sur lequel estoit vn autel, & dessus l'image de la deesse Ven^e & du dieu Cupido son filz de fin or, ainsi que les anciens auoient acoustumé de les paindre, & autour de l'autel grand nombre de chandeliers d'argent, avecq^t torches de cire blanche, estat tout le tour du temple richement tapissé. La Royne acompagnée de ses deux archeres & de ses trois pucelles portans sa queue, alla iusques au premier degre de l'escallier du throsne, ou elles s'arrestèrent toutes trois ensemble, tenās chacun sa fiesche encochee, si firent passer les trois Cheualiers iusques à l'autel, ou ilz s'appuyerent du doz, ayans les visages tournez vers la Royne, laquelle se faisant oster la couronne de dessus le chef commença à parler aux Idoles: Souuerain Dieu & deesse Cupido & Venus qui auez voulu monstrier par moy vostre puilliance, ie vous offre ce present sacrifice, vous suppliant ne l'adresser cōtre moy mesme au preiudice de mon honneur: Pour lequel i'ameine ces trois hosties en vostre temple, qui par leur temerité ont attenté à le violer & corrompre en nous trois filles: En payement dequoy ainsi qu'ilz se sont vantez leurs ames estre naurees de nostre veuē, leurs cueurs allons ferir de noz fiesches, à fin qu'ilz recoiuent l'apareil de la main dont leur a esté faite la playe, comme ceux qui sont frapez par les scorpions trouuent le remede en eux mesmes. Parquoy receuez (ô Dieux) les ames de voz martirs, desquelz la loy fait passer les corps par ō glaue. Si tost qu'elle eut finy sa priere, descocha la fiesche, & tira si droit au cueur de celui des Cheualiers qui estoit au mylieu des autres qu'elle luy perça de part en part, dont il tomba mort deuant elle. Apres ce coup les deux Damoyelles tenans chacun vn arc en leur main en firent autant aux deux autres, avec protestation que telle cruauté se faisoit

suuant les loix de leur maistresse, lesquelz ne furent si tost à terre qu'on leur arracha les cueurs du ventre, qui furent mis dans vn grand rechaufoir & bruslez sur l'autel avecq^t petfums de diuerses odeurs. Pendant lequel sacrifice la Royne demanda vne harpe pour elle, & deux autres pour ses deux archeres desquelles toutes trois ensemble commencerent à sonner & chanter doucement chansons conformes à leur sacrifice, en offrant aux dieux les cueurs des pauures martirs, & recommandans leurs ames: Les cueurs ainsi cōsommez, lon coupa les testes des corps pour les mettre en chasses, faisant porter celle de l'occis par la Royne aux arcz de son char, & les deux autres furent penduz au parement de l'autel, aupres de plusieurs autres. Apres que la ceremonie fut ainsi passée, la Royne alla monter sur son chariot en habit de dueil, dont elle s'acoutra au reuestoir, & marcha en tel ordre qu'elle estoit venuē droit vers la cité, laissant les deux Princes bien esbahis de si estrange cas, & fort desireux d'en sçauoir les raisons: qui leur furent declairees par vn vieil homme demeuré au temple pour enterrer les corps, leur disant: Que la beauté de la Royne Sidonye Dame de l'isle avec sa grandeur, auoient engendré tant de presumption en elle, qu'un an y auoit ou environ que le Prince de Clatence vint en ce lieu, incité seulement de la renommee de sa beauté excellente pour luy faire la court, lequel fut magnifiquement receu & traité cōme son estat requeroit, iusques à vn certain iour qu'il se trouuant outré de l'amour de la Royne luy osa declarer sa pure & hōneste affection tendant à fin de mariage, dont elle fut si esmeuē cōtre luy, que pour monstrier vne exemple de chasteté extreme, & pour chastier la hardiesse dont le Prince auoit vsé vers elle, le fit sacrifier en telle façon qu'auēz veu depescher ces trois icy. Et incontinent en repentance de son fait porta le dueil de luy: ordonnant deslors certaines loix & constitutions, qui s'appellent

communement les gloires de Sidonie, con-
tenans que de là en avant personne ne fut
si hardy de demander fille en mariage sin-
en public & en presence de gens, sur peine
de passer en sacrifice, par la main de celle
à qui il aura fait la requelle : & au cas que
les requerans soient parens de la Roïne,
leurs testes sont mises sur le chariot, tou-
tes les autres pendues pres des ydoles.
Aussi porte la loy que si quelque pucelle
estoit vaincuë de l'amour d'un gentilhom-
me, & elle luy en fist requelle, laquelle il
escondit, qu'il fust perpetuellement ban-
ny du Royaume, pourueu qu'on puisse
prouver qu'ilz soient esgaulx en estat &
maison, & s'il est estranger sera sacrifié en
punition de son desdain, exceptez les ia-
mariez. Et que des filles requises par les
Cheualiers on en doit faire pareillement
execution selon les conditions dessus de-
clarees, mais si quelque Damoysele estoit
secrettement poursuyue qui ne le declara-
st, elle passeroit par le mesme sacrifice. A
cette cause est ceste Isle appelée l'Isle des
sacrifices d'amours, par les loix de Sidonie.
Et n'y en a eu beaucoup d'immolez au cō-
mencement, car chascun se gardoit d'en-
freindre la loy, sinon puy n'a gueres que
le Duc Alfaires vaincu de son amour pensa
que ceste cruauté seroit cessée, dont luy
& deux Cheualiers ses cousins, amoureux
de deux pucelles de la Roïne osèrent en-
treprendre les requestes, ayants trop mieux
estre sacrifiez que de durer en langueur. La
Roïne declara qu'elle aymoient le Duc, tou-
tesfois beaucoup plus tenoit chere l'obser-
uation de sa loy. Voilà pourquoy se fait
route la ceremonie qu'avez veüe. Certes
dist lors Florisel, vous nous comptez mer-
veilles, & se tournant vers Falanges luy dit:
Monsieur, il sera bon de vous retirer d'icy,
à fin que vostre beauté ne soit cause de vo-
us faire demander en mariage, car les Damoy-
selles choisissent volontiers ceux qui vous
ressemblent. Je n'ay garde de ce danger
en vostre compagnie, respond Falanges,
mais ie m'esbahy fort de la grand' cruauté

de ceste Roïne. Messieurs, dist le vieillart,
ne vous estōnez tant de celà, ne de la raison
pourquoy elle le fait: car s'a esté à iuste can-
se, par ce qu'elle ne veult estre abusée,
comme lon dit que quelque Prince a fait
à l'endroit de la fille du Roy de France
nommee Lucelle: aussi n'y a il Seigneur
qui viue auourd'huy à qui nostre Roïne
se daignast marier, si ce n'est avec Falan-
ges d'Astre des vertuz duquel elle a ouy
grand tesmoignage, & aussi de sa beauté.
Lors ne se peut Florisel tenir de rire, disant:
Je croy que ce n'est pas pour elle que le
four chauffe. Le vieillart iugeant que Flo-
risel se moquast de la presumption de la
Roïne: Cheualier, dist il, ne vous gab-
bez pas d'elle, car elle est assez belle & ri-
che pour faire tel souhait. Ouy vraye-
ment respond Falanges. Lors remercians
le bon homme prindrent congé de luy, &
remonterent à cheual pour s'en retourner
en leur vaisseau, craignans que quelque
desastre ne leur auint, suyuant les propos
que le vieillart leur auoit tenus: mais ainsi
qu'ilz tournoient bride, voicy venir vers
eux dix Cheualiers armez, lesquels leur
firent à sçauoir que la Roïne les mandoit.
Surquoy Florisel leur fit responce que vo-
lontiers feroient son commandemēt, mais
que quelque fortune leur estoit suruenue,
qui les forçoit de tirer ailleurs. A quoy
les autres repliquerent que voulsissent ou
non il leur y conuenoit aller. Il pourroit
estre que non, dist Florisel. Et comme ilz
suyuoient leur voye les dix Cheualiers vin-
drent à pleine course contr'eux, qui soy re-
tournans avec trois ou quatre pas de leurs
cheuaux, les choquerent si viuement qu'
ilz abatirent les deux premiers qui les a-
borderent roides à terre. Puis metrans la
main aux espees eurent l'estour avec les
huyt autres, desquelz l'un eut le continent
la main droite trenchée, qui se retira à la
ville, & auertit ses compagnons de la me-
ssee, & de la rude rencontre du prime
choc: qui fit beaucoup penser de la bon-
té des deux Cheualiers, dont plusieurs cou-
roient.

roient à la fille au secours des autres : mais ce fut trop tard pour ceux là qui n'auoient plus besoing de mîre . Les deux seigneurs en depescherent autât qu'il en pouuoit venir, tant que l'ost creut iusques à trente Cheualiers en vne troupe: lesquelz chargeans les Princes d'une grand' furie, leur tuerēt leurs cheualx de l'ouz eux : A raison dequoy les Princes n'estans gueres loing du cimeterie, se voiās à pied, franchirent iusques à la muraille pour gaigner le portail du temple ou ilz s'aculerent atendans les ennemys qui se mirēt tous à pied à la poursuyte, qui fut si mal commencee par les deux premiers, qu'ilz y laisserent bras & iambes pour hostages, & partie des

autres apres ainsi qu'ilz s'auançoient de trop pres. Toutesfois la multitude y vint si grande qui lançoient dardz & pierre, que force fut aux Princes gaigner vne chapelle dont l'entree estoit deffensible estant estroite de trois ou quatre degrez, aussi que lon n'y pouuoit venir que de front, ou le conflit recommença plus fort qu' auparauant. Mais Florisel & Falanges firent vn rami-part deuant eux des corps qui tomberent l'un sur l'autre à l'entree de la chapelle : & fut le massacre si grand que la Royne en fut auertie, qui monta incontinent sur sa haquenee avec douze Damoyselles. Et voyant ceste boucherie de ses gens fut grandement troublee & irritee.

Comme la Royne vint au lieu ou les Cheualiers combatoient lesquelz se rendirent à elle.

CHAP. XLIII.



LA Royne fut fort esbahie des grandz faitz d'armes qu'ilz executoient deuant ses yeux, & des merueilleux coups qu'ilz donnoient : Et cognoissant que les gens se mettoient en danger à cause qu'il faillloit passer par là ou par la fenestre, sans esperance de pouoir venger les autres, s'aprocha bien pres, & les fit tous retirer, disant aux deux Princes: Seigneurs Cheualiers vous pouuez bien cognoistre

qu'à la longue vous ne pourriez maintenir le conflit, car au fort aller ie ferois venir tant de gens que ne pourriez durer en haleine, ou assiegés ceans pour vous faire mourir de faim, dequoy ie serois marrie veu vostre prouesse: Parquoy choyissez le meilleur party, qui est de vous rendre à moy sans rien reseruer, & peult estre vous feray ie grace, selon la confiance que ie vous voirray auoir en ma clemence, rendez

dez moy donc voz especs & venez avec moy la part q̄ ie vous meneray. Ma Dame (dist Florisel) si le cas estoit que n'eussions autre crainte que de la prison en laquelle vostre excellence nous pourroit mettre au moyen de sa beauté, nous ne deurions avoir peur de tomber en voz mains: toutesfois ayans veu que voz loix sont icy tres cruelles contre ceux qui pourroient estre engagez de cueur en autre lieu, nous en sommes en quelque doute, pour ne violer nostre foy obligee enuers d'autres. La Roine entendit tresbien leurs raisons, toutesfois elle leur dist: Cheualiers ie pose le cas qu'il fust ainsi que vous dites, si croy ie que n'auriez à grand regret de mourir par mes mains, ou par la main de mes Cheualiers, pour vous garantir de la mienne. Et pendant qu'elle parloit les deux Princes la regardoient ententiuement, qui la iugerent l'une des plus belles Dames qu'ilz eussent iamais veüe. A la Roine (son propos finy) Falanges fit ceste responce: Ma Dame si vous nous assurez de tout ce danger qui nous pourra auenir, hors mis celui de vostre personne, nous nous rendons à vostre merci, vrayement dist-elle ie vous en assure. Parquoy les deux Cheualiers prenans leurs especs par la pointe les rendirent à la Roine qui les bailla à deux de ses Damoyelles, & dist: Cest honneur, cy appartient aux filles puy que ie l'ay peu acquérir, estant telle à quoy tant de Cheualiers ont failly. Lors se tournant vers les Princes les pria d'oster les armetz, ce qu'ilz firent, & tous eschauffez qu'ilz estoient firent trouuez tant beaux que la Roine & les assistants en furent grandement esbahis, leur estant bien auis que telz Chenaliers valloient bien la peine pour enfreindre ses loix, parquoy elle ne se peut tenir de dire: Vrayement Cheualiers selon que ie voy vous avez eu raison d'auoir crainte de mes loix, & les prenant par la main d'un costé & d'autre tout à pied comme elle estoit les mena en son palais en la ville, bien ioyeuse d'emmener si bon butin

imaginant en foy-mesmes que ceste grande beauté ne pouuoit estre sans Falanges d'Astre, que tant elle desiroit. Au desarmier on leur bailla de riches acoustremens, puy allerent vers la Roine, qui leur demanda qui ilz estoient: Ma Dame, dirent ilz, nous sommes encores si peu cogneuz, & auons tant peu exercé le fait des armes pour aquerir renom, que vous supplions nous excuser de ceste demande seulement vous plaise croire que sommes Cheualiers de sang Royal, & au reste assez pourueuz des biens de fortune. Celà me suffit (dist-elle) puis qu'ainsi le voulez. Ce pendant les tables furent mises, ou la Roine s'assied au mylieu des deux Princes qu'elle estimoit tant que durant le disner elle ne fit autre chose que les contempler, principalement Falanges qu'elle pensoit recognoistre aux enseignes qu'on luy auoit racontées, de quoy ilz s'aperceurent, dont ilz ne furent gueres contens. Parquoy si tost que les tables furent ostées, Florisel dist à Falanges le plus secrettement qu'il peut, pensez maintenant à vostre conscience: car quant à moy il me semble que i'en suis eschapé par vostre beauté. Vrayment (dist Falanges) ie n'ay encores garde de ce coup, d'autant que la vostre m'assure. Sur ce propos la Roine les appella, & les fist seoir aupres d'elle sur vn petit list verd, leur demandant qu'elle auenture les pouuoit auoir amenez en son pais. Ilz luy firent responce que ce auoit esté desir d'aquerir bruit & honneur, & qu'allant par la mer, la fortune les auoit iettez en son Isle, dont ilz mercioient les Dieux de leur auoir donné ocasion de cognoistre son excellence. La Roine fort contente de leur responce auoit l'œil fisché sur Falanges qui la rendoit fort gracieuse enuers eux, dont ilz prindrent la hardiesse de luy demander congé, pour aller en quelque affaire qui leur touchoit grandement. Surquoy la Roine leur dist qu'ilz se reposassent quelques iournees, pour se rafraischir du travail de la marine & qu'ilz auroient

encores

encores du temps assez pour aller à leur entre-
prise : Si commanda aussi que lon fist
desbarquer leurs gens, & qu'on leur four-
nist tout ce qu'il leur seroit necessaire, leur
donnât la Royne liberté de prendre le de-
duit de la chaise en telle part qu'ilz vou-
droient de son Royaume, sur leur foy &
parole de n'en partir sans son consentemēt
& leur fist faire tout l'honneur & courtoy-
sie dont elle se peut auiser. Pendant ce
temps, la Royne se trouua tant esprisē de
l'amour de Falanges, qu'elle tenoit ferme-
ment pour celuy qui deuoit estre son mary
autrement ne si fust elle iamais rengeē, qu'
elle ne pouoit plus reposer, ne faisant tou-
tes les nuitz que penser en luy, & comme
elle en pourroit cheuir, lequel de son costē
auoit toute sa pēsee logee en sa dame Ala-
straxeree, pour la semblance de laquelle il
arrestoit quelquefois sa veuē sur la Royne
qui presumoit que ce fust pour l'amour d'
elle, & qu'il ne l'osoit descouurir pour la
crainte de la rigueur de ses loix, dont elle
se complaignoit en elle mesme. O Royne
Sidonie qu'il est bien employē que vous
payez maintenant la cruauté de laquelle
vous auez vsē enuers le Prince de Claren-
ce & le Duc Alfayres par l'arrogance de
vostre chasteté! Or estes vous amoureuse
pour cognoistre le tort qu'auez fait aux au-
tres par voz editz inhumains. O Dieux si
i'auois la puissance de rompre mes consti-
tutions ie le ferois pour cestuy seul, lequel
si ie pers ie ne quiers viure vne seule heure:
mais que dy-ie plustost vous deuerois re-
mercier du bien qui m'en peult aduenir:
car si ce Cheualier auoit liberté de me re-
querir d'amour peut estre que ma pureté
en seroit corrompue au moyen de sa con-
uersation si familiere; Parquoy puis que
mes loix m'asseurent de ce point, ie m'y
veux submettre entierement forçant ma
volonté, de paour de tomber en cest in-
conuenient ou mon desir me tire; Et en-
dureray ceste angoisse en satisfaction de
ceux que i'ay sacrifiez si cruellement, pour
recompense de leur amytiē cordiale. Elle

passa plus de trois sepmaines en ceste opi-
nion, se confermant tousiours de plus en
plus. Dequoy les Princes furent trop fa-
chez, d'autant qu'ils ne pouoyent impe-
trer leur congé qu'elle leur prolongeoit
de iour à vn autre, tant q̄ Florisel fut con-
traint de dire à Falanges: Mon compagnō
ie crains que la Roine vous demande pour
mari, veu le visage qu'elle vous monstre,
dont ie serois mari, à cause de la gentile A-
lastraxeree: Pource me semble que deuons
penser à ce que nous auons à faire. Mon-
sieur, respondit Falanges, ie ne croy pas
qu'il y ayt en moy cause de si grand' affe-
ction, laquelle ie tiendrois à grand heur
pour tout Prince tant grand peult il estre.
Mais plustost que d'y condescendre soye-
seur que ie me lairrois sacrifier: plustost dy
ie, que de faulser la foy à ma treschere Da-
me: tant y à Monsieur, quand elle vien-
droit en ces termes, à lors nous prendrions
conseil du remede. La passion gaigna tant
à la fin sur sa virginité obstinee que mis a-
riere tout respect, la Royne delibera des-
couurir sa playe à celuy de qui elle espe-
roit guarison: seulement craignoit qu'ils
excusast d'estre vouē à autre sainte: car bien
lui estoit aduis que le Prince lui respōdoit
en amour, veu ses gestes & contenance,
ioinct l'opinion qu'elle auoit de sa beauté,
l'estimant digne d'estre adoree par le plus
grand Seigneur du monde. Ainsi resolut
le prier de mariage avecques vne solennité
merueilleuse. A ceste fin manda tous les
Ducs, Marquis & Barons de ses pais, & fist
dresser vn eschaffault en la grand' place de-
uant son palays tout couuert de drap d'or
pour y celebrer son intention,

*Du grand danger auquel les deux Prin-
ces se trouuerent avec la Royne Sidonie à cau-
se de ses loix.*

CHAP. XLIIII.

LE theatre prest & tapissé au iour as-
signé, on mist dessus vn autel vne
partie des Idoles plus reuerrez en ce
lieu



lieu, & à l'entour grand nombre de chandeliers d'argët, avec cierges blâcs flâboyâs comme brandons & toutes les testes tant du Prince du Duc, que des autres Cheualiers fichees sur lôgues pointes acerees: environ deux degrez plus bas que l'autel furent assises trois chaires de grand pris. Alors la Royne enuoya prier les deux Princes de la venir conduire au lieu ou elle vouloit faire quelque festiuité, à quoy ils obeïrent. & leur furent apportez accoustremens de veloux verd, decoupé sur fond de toile d'or, & les allerent querir les Ducz, & plus grands Seigneurs qui les conuoyèrent iusques au palais ou la Royne les attendoit toute preste vestuë de mesme, elle & cinquante Damoyelles: ilz luy firent la reuerence, & elle les receust fort courtoisement. Puis la menerent par dessous les bras comme vne espousée iusques au lieu du sacrifice, ou elle se mist en la chaire du mylieu priant les deux Princes de se soïr aux deux costez es deux sieges parez ioignans au sien: tous les Ducz, Comtes & Barons sur les escalliers du theatre, selon leur degré d'auctorité, chascun vne Dame aupres de lui de sa qualité & grandeur: quatre heraulx aux pieds de son siege, portans

cottes à ses blâfons, & vne pucelle deuant elle tenant vn fin estoc nud en sa main: laquelle apres auoir donné signe de silence au peuple, la Royne parla en ceste maniere. Si les excellentes Dames Romaines & Grecques ont parci deuât fait sacrifices d'elles mesmes pour conseruer leur pureté à fin d'aquerir par telle mort la gloire d'immortalité, moindre raison n'y a es loix par moy constituées & establies en ceste Isle, pour la conseruariõ de la chasteté de moy & de mes filles, les preseruant de plusieurs abuz que les hommes leur machinent, pour les attirer à leurs affections impudiques, par promesses & persuasiõs efficaces, au moyen du mesme feu d'amour par nature semblable embrasé es cueurs d'elles mesmes. Parquoy ay seulement reserué liberté aux filles de choisir mariz, & aux Cheualiers d'eslire femmes: m'ayant moy mesme souzmise à la loy pour en vser ainsi selon mon desir & le bien de mon Royaume, lequel est en ma puissance pour dõner à qui me plaira comme à mary, & espoux. Ce qui ie fais à vous Cheualier (prenant la main de Falanges) vous requerant par amytié me vouloir prendre en mariage, & ie vous fais Seigneur de ma personne, & de tous

mes.

mes pais, à cause de la grace, force, valeur, & beauté, que ie cognois en vous, lesquelles ie n'estime moindres que celles qu'on m'a rapportees de l'excellent Prince Falanges d'Astre. Parquoy choysissez maintenant, ou de passer par le contentement que ie vous presente, ou par la rigueur de mes loix en punition du refus. Car d'anuler mes ordonnances ie ne puis, moy qui les ay faites, mais le mary dont ie seray pourueüe aura pouuoir les abolir. A tant elle se teut, demeurant Falanges (à qui le cas touchoit) fort estonné entre deux telles extremitez, c'est à sçauoir de mourir pour conseruer sa loyauté, ou prendre en mariage autre que celle qui estoit si viuement engrauee en son cuer. Parquoy luy fit telle responce, Ma dame i'entendz tresbien la somme de voz constitutions, tendans à la conseruation de l'honneur mortel: mais de ma part ie suis astrainct à garder inuiolement les diuines pensees infuses en moy de la celeste princesse Alastraxeree, fille du dieu Mars, & de la Royne Zahara, mais si on me veult forcer du contraire, i'aymie mieux mourir en la foy de ma deesse & plus par si belles mains que les vostres. Parquoy ma dame ie metz ma vie entre voz mains, car l'ame & la volonté demeure à celle à qui elle est dediee de long tēps. Au surplus, ie remercie les Dieux & vous de l'honneur que m'auiez offert, que ne puis accepter. Si se teut, & la Royne se voyant esconduite changea incontīnēt de couleur, demeurant palle comme si elle fust trespassee, dissimulant toutesfois son courroux en la meilleure contenance qu'elle pouuoit. Lors dist, Ie prononce doncques contre vous la sentence de la loy, vous asseurant que le sacrifice ne sera pas si tost acheuē de vous que ie ne le face aussi de moy mesmes par l'espee que tient ceste fille. Si fais commandement à tous mes vassaux souz peine de mort de ne me tenir propos au contraire pour destourner mon intention qui est immuable: car l'edict liure à mort ce Cheualier qui me refuse, & sa

mort causera la mienne par regret incurable. Tout le peuple à ce mot se meit à crier & plorer, mais Falanges n'en monstra en riens plus triste semblat. Assez en monstroist Florisel pour tous deux, qui estoit presque forcenē de ceste condemnation, dont se tournant vers Falanges, luy dist: Mon grand amy que puy-je faire pour vous deliurer de ce danger, Dieu y vueille mettre lam ain, car ie ne voy lieu à puissāce d'hōme. Monsieur (respond il) ne vueillez contreuenir à ce que les Dieux ont ordonnē de moy, lesquels ie remercie du bien qu'ilz me font de me faire immoler pour la foy que ie doy à ma diuine Dame: Estimant qu'ilz m'appellent en leur compagnie pour rendre mes pensees en pure diuinité, dont elles ne sont capables, logees en ce corps terrestre: ce qu'il disoit d'une telle constance que Florisel en fut estonné que son esprit transporté le lascia sans nul sentiment comme endormy à la veuē de tous: mais au refuseil luy va tomber en fantasie vne subtilité: dont il dit à la Royne: Ma Dame voz loix me sembleroient iniques à vouloir rompre la parole d'un Gentilhomme, desia obligee en autre lieu, plustost deuroit guerdonner telle loyauté, qui mieux ayme recevoir la mort que nouuelles pensees. Que trouuez vous plus vertueux que ceste constance & fermeté si rare entre les viuans? mais si estes resoluē d'observer voz loix si rigoureusement, vous y estes la premiere suiette. Parquoy ie Moraizel Prince de Trapelonne naurē du traict empennē de vostre beauté exquisite (se leuant & ostant le bonnet) vous demande en mariage, insistant à ce que ma requeste me soit acomplie, ou la cruauté de vostre ordonnance contre vous mesmes. La Royne ouyt ce propos le regarda, & ne luy sembla de moindre beauté que Falanges, ioint la memoire des faitz d'armes qu'elle auoit veuz tant amirables, l'ennuy du refus present de Falanges poullā fort à la rouē, en sorte que voyant en ce cas son honneur recouuré, & sa vie sauue, luy respondit. Prince

Moraizel,

Moraizel, ayant cogneu vostre force, vaillance, & lignage, ne voulant plus leur témoignage que de la haute representation que ie voy en vous, ie rendz graces aux Dieux du bien qu'ilz me font, de me donner tel amy & espoux, auquel presentemēt ie me liure toute. Lors vint vn Euesque de leur loy qui les maria à leur mode & à l'instant fut Moraizel couronné Roy de Guindaye. Quel plaisir pensez-vous que recevoit Florisel de telz honneurs? mais tout il oublia lors, pour preseruer son loyal amy de ceste violence. Or luy (estans renduz les hommages) auant que partir du theatre parla au peuple en ceste maniere. Chers & bien aimez suietz, vous sçauiez que les Roys ont puissance d'establi loix & abolir: Parquoy ie (comme vostre Prince) reuoque & aduile pour ceste foys seulement: l'arrest que ma treschere femme & espouse auoit prononcé contre ce Gentilhomme, sans preiudice de ses loix en tout le reste qu'elle & vous consentirez desormais estre observé. La commune fut grandement resiouye de ce moyen de leur sauuer leur Royne, & aussi le Prince Falanges qu'ilz ne trouuoient bon de voir ainsi mourir à credit, lequel estoit rai d'aise du bon tour de son compagnon: se tenant bien recompensé à vn coup de tous les plaisirs qu'il luy auoit iamais faitz, & luy deuoit assez de retour. Ce fait la Roine descendit de son eschaffaut commençans les trompettes & clairons à sonner, qui ne cesserent iusques au palais, ou lō auoit couuert pour le disner, combien qu'il fust apresté en fueur du Prince Falanges. La Royne s'asseyd au mylieu du Roy Moraizel & de luy & furent fort magnifiquement seruiz. A pres elle entra en plusieurs deuis gracieux avec Florisel, à son tresgrand contentemēt: leur propos finy alla vers son compagnon qui luy dist, A ha Florisel que grande est l'amytié que me monstrez à ce coup, vous faisant oublier toutes les autres obligations & deuoirs. Ie n'ay regret (respondit) qu'en ce que ie me forçais enuers Dieu, d'autant

que la Royne est payenne: car le tort que ie fais à ma chere Helene me semble estre compensé par l'important secours que ie donne à mon amy & le sien, lequel à tant fait pour elle. Monsieur (dist lors Falanges vn peu resiouy) ce peché nous tiendrons si secret qu'il sera à demy pardonné. A l'heure vint la Royne vers eux qui print son mary par la main, les haultx-boys sonnerent, & il la mena vn bal de fort douce grauité, es pauses duquel, elle trop embrasée de sa bonne grace, s'excusa enuers luy dequoy elle auoit ainsi choysy son compagnon, & que c'estoit par malheur, ayant ietté sa premiere veuë sur luy, qui luy toucha soudain au cueur, desia esbranlé par la renommee du Prince Falanges, à qui il luy sembloit estre du tout conforme selon le commun rapport, mais depuis qu'elle auoit contemplé Florisel, & remis deuant les yeux sa prouesse extreme qu'elle veit dedans le temple, se repentait de sa faulte, & supplioit luy pardonner. Ma Dame (respondit Florisel) de la beauté ie quite le los à mon compagnon, des armes l'effort venoit de vostre regard, qui peult imprimer hardiesse es plus couardz. Au fort vous deuez asseurer de plus d'amitié en moy que n'avez trouué en luy. Les haultx-boys recommençans leur rompirent ce propos: mais à la pause du second bal, elle plus gaillarde par cest exercice, luy declara estre tant esprise de sa beauté, qu'elle le prioit ne la laisser en langueur toute celle iournee, qui luy sembleroit durer plus d'vn an. A quoy Florisel, qui ne eust peu ne s'eschauffer si pres de tant beau feu, s'accorda assez volontiers. Là Helene, ce n'est à tort maintenant que tu doutes de l'estat de ton amy le cueur ne te iuge il point par naturelle sympathie, la trahison qu'on te machine? Voylà la force que peult auoir vn obiect present, encores que moindre contre l'absent de la plus grāde excellēce. Apres ce bal & vn biē court deuis, la Roine se desroba la premiere, acompagnée seulement de deux de ses plus familières

milieres Damoyelles. Et gueres ne tarda Florisel à la suyure, luy protestant Falâges de faire telle entreprise à l'honneur diuin, qui leur seroit à remission de ceste offence Il n'est besoing de vous dire d'auantage comme elle le receut amoureusement: sinon que ces Damoiselles estâs retirees en la gaderobe, il cômêça par vn baïser qu'elle redoubla puis mettât la main au sein poly, en maniant les deux blâches pōmettes, fut saisi d'un desir si ardât que quelq̃ priere qu'elle luy fist d'appeller ses femmes pour se coucher nudz à leur aise, il en print les atres sur le bord du liêt, nonobstant vne demye resistēce qui l'ēflâba d'auantage, iusques à la tierce acollée. Et remetât le surplus à la nuit, retournerēt en la salle se tenâs par les mains, au grand plaisir de tous les Seigneurs & Dames. La nuit il se môstra si vertueux, & tant rompit de lances, qu'elles l'estima beaucoup plus qu'elle n'auoit fait au temple.

Cōme vn herault se vint presenter deuant la Roïne Sidonie, la sommât de certain tribut, & de ce que Moraizel luy respondit.

CHAP. XLV.

Ainsi le saint Moraizel & la roïne Sidonie, se donnerent du bon temps iusques à certain iour, qu'il vint vn herault troubler la feste, lequel entra en salle à l'issuë du repas, & sans reuerence ne demye parla ainsi: Ma Dame, le Roy Astradolphe des Isles Astrades, m'enuoie deuers vous pour receuoir de sa part le tribut que luy deuez tous les ans, pour la protection en quoy il vous tient. Plus ma commandé vous dire qu'il en veult d'oresenauant estre payé au double: & si vous y faillez qu'il vous osterà la coronne. Moraizel qui n'eut la patience d'attendre que la Roïne respondit, dist au herault. Dy à ton maître que le temps est changé, auquel il faut qu'il paye à l'Isle de Guindaye le tribut qu'il exige de la Roïne, laquelle vault tant

que tout le monde luy deueroit par raison estre tributaire. Et s'il est refusant de le faire, qu'il ne preigne la peine de venir icy, & que nous l'irons trouuer en son royaume. Ceste responce pleut fort à la Roïne, & l'emploia pour sienne. Auecques laquelle le Roy d'armes partit. Lots s'enquirent les princes à la Roïne qui estoit ce Roy, & la cause de sa demande: qui leur dist qu'Astradolphe estoit vn Geant aussi grand & puissant qu'il y en eust es parties Orientales, ayant vn frere pareil, auec lequel il auoit ocupé plusieurs Isles, & composé à aucunes pour certain tribut du nombre desquelles ceste Isle estoit taxee à mille besans d'or par an, & maintenant en demande deux, pour auoir couleur de saisir ma terre & s'en emparer. Je ne m'en esbahy point, dist Falanges, car ces monstres cy sont coustumiers d'user de telles braueries & iniustices: mais leur outre cuydance leur pourroit faire perdre le leur & l'autrui. Or Falanges qui tenoit ce propos n'estoit gueres contēt de couuer si long temps les cendres, sachant que leurs personnes estoient requises en autre lieu. Mais la roïne estoit si affriandee de ce Moraizel, lequel elle traitoit avec tous les plaisirs dont se pouuoit auiser, sans le perdre vne heure de veuë, fust il à la chasse ou autre part à soulas incontinent la voyoit aupres luy. En sorte que luy ne voulant attendre la responce du Geant ains dresser vne armee de mer pour l'aller visiter, elle pour ne l'esslongner si tost, le pria differer iusques au retour du herault qui gueres tarder ne pouuoit, d'autant qu'en l'Isle du Geant par Bonace on pouuoit passer en deux iours: Parquoy eut patience ceste foys. Neantmoins manda tous les Seigneurs du pays, leur exposant le motif de la guerre, & que ce pendât que chacun se tint prest, aussi commanda d'adouer & calfeutrer les galeres & nauires, & munit de toutes choses necessaires, dequoy ilz eurent bon besoing, au moien q̃ le Geant Astradolphe & son frere ne tarderent gueres à aborder en l'Isle de Guindaye en si

en si grand' flotte, qu'il ne fust possible de leur deffendre la descente, acompagnez de plusieurs Roys & Seigneurs leurs vassaulx, bien deliberez de destruire l'Isle. A laquelle ilz ne furent si tost abordez, qu'Astradolfe manda à la Royne qu'elle luy enuoyast incontinent la teste du Cheualier qui auoit blasphemé contre sa maiesté, quant à elle & ses subiects il les prendroit à mercy, moyennant qu'elle mist entre ses mains la souveraineté du Royaume, sinon mettroit tous ses pais à feu & à sang. Florisel cuida yssir du sens oyant cest outrageux mandement, & dist au messager dy à ton maistre qu'il ayt patience de deux ou trois iours, au bout desquelz ie luy porteray la teste qu'il demande pour rapporter la sienne. Le lendemain Florisel fist assembler le peuple en la maitresse place de la ville, auquel il remonstra les menaces du tiran, & que le tribut qu'il exigeoit n'estoit iuste ne raisonnable. Parquoi s'ilz esloyent disposez à le refuser & se bien deffendre, il les asseuroit en peu de tems de chasser leur ennemis hors du pais, à leur grande confusion & dommage. La cōmune s'escria toute d'une voix, Viue nostre bon Roi, Moraizel, que les Dieux nous ont donné par leur grace miraculeuse. Ce voyant Florisel ordonna deux batailles de ses gens, dont il conduisit l'une, & bailla l'autre à Falanges: si sortirent aux champs l'enseigne desployee. Et la Royne l'accompagna iusques à la porte de la cité, puis monta sur le hault de la tour pour le conduire tant que l'œil pourroit porter, duquel lui decouloyēt les chaudes larmes. Marchans doncques ainsi pour trouver leur ennemi ne firent deux lieues, qu'ilz le virent venir en si grand nombre que toute la campagne en estoit couuerte, & les deux geans apparoissoient par dessus les autres, comme deux ballineaux en vn taillis, ou deux toureaux en vn troupeau de brebis. Adonc Florisel tira vers vn lieu assez auantagieux, s'adossant d'un boys pour n'estre assailly que de front à cause de ceste grande multitude qui les

eust peu enuironner, laquelle marchoit à grand pas iusques à ce qu'ilz aprocherent d'un traict d'arc. Lors Florisel fist eslargir les premiers régs pour deux raisons, l'une à fin d'auoir place pour la picque, l'autre pour se garantir des archers qui tirerent en telle quantité à l'abordee que lon eust dist proprement qu'il pleuuoit boys. La bataille fust fort cruelle & le carnage grand des deux parties iusques à la nuyct qui les separa. Mais Florisel ayant cogneu la crainte que ses gens auoyent des Geans, à cause de leurs corps horribles, le dist à Falanges & s'il le trouuoit bon qu'il seroit d'avis de les deffier eux deux de combat singulier. Ce que la Royne ne pouuoit goustier, pour le peril qu'elle craignoit de son amy, mais tant la persuaderent qu'elle s'y accorda, & enuoya son herault aux deux Geans, qui en furent fort esbaudis, comme tenans la victoire seure en la main. Et la Royne pria Moraizel, qu'il luy permist d'assister. Ce pendāt lon ne fist toute la nuyct q̄ supplier les Dieux des deux costez pour l'auantage des combatans,

Comme Moraizel & Falanges combattirent contre le Roy Astradolfe, & son frere, & de ce qui en auint.

CHAP. XLVI.

LE iour venu Florisel & Falanges furent armez, & monterent à cheual avecq tout leur ost pour la seureté du camp. La Royne se para tres-richement, & y alla sur vn char triumphal accompagnée de ses Damoyelles, si bien en ordre que le Soleil qui ne se faisoit que leuer leur sembloit rire & donner lustre à leurs beauttez. Ils trouuerent Astradolfe & son frere de-ia sur les rengs: & fut la Royne fort espouuantee de veoir ces deux Geans si gros & membruz, dont elle se print à re-clamer ses Dieux pour estre en ayde à Moraizel & son compagnon, lesquels se presenterent & conuindrent de condition de la victoire, q̄ les vainqueurs demureroyēt



Seigneurs des vaincuz, & de tous leurs biens & possessions. A quoy Astradolfe consentit volontiers tenant l'issuë comme certaine à son desir. Or estoit il armé de grosses lames de fer par dessus vn iacque de maille cloué à double, & vn colet de Bufle au dessouz, & son frere de mesmes, tellement qu'il failloit quasi vn grand pied de lance pour les ataindre à la chair ioinct l'escu qu'ilz auoient au deuant, sur lequelz rompirent tous quatre, & du rude hurt de leur cheuaulx vuiderent tous les arçons. Mais noz deux Princes se monstrent les plus dispositz, & attendirent que les Geans fussent releuez, dequoy la Roynne n'estoit gueres contente en son cueur, estimât que telles courtoisies n'estoient deuës ne bien employées à telz animaux. L'escrime des espees fut aspre & cruelle contre les massues des Geans, desquelles ilz tirerent bien tost le sang vermeil entre les iointures des harnois, puis prindrent garde à se tenir seulement en deffence, & euites les coups énormes de ces môltres, en ce desrobât de vitesse, autrement c'estoit fait d'eulx du premier coup qui eust porté. Le confit dura longuement, iusques à ce que le Geant deschargeant sur Florisel de toute sa puissance à deux mains perdit son coup par l'adresse de son ennemy, lequel donna en terre si lourdement que la massue luy volà hors

des poings. A l'instant entra Florisel sur luy d'vn estoc qui luy iette entre les lames & les cuissorz, si auant qu'il y laissa son espee, & se tire d'vn sault en arriere. Lors tombe ceste grosse tour ietant vn horrible cry & vne fumee espessie par la veuë de l'armet, comme d'vne fornaisie estouffee, vous l'eussiez veu de rage se veautrer sur le sable, & tant se demena que l'espee & apres les tripailles luy sortirent du ventre laquelle Moraizel saisit incontinent, & luy en vint trancher la teste, qu'il bailla à son escuyer qui la porta à la Roynne, qui en receut autant de plaisir qu'elle en auoit eu de crainte. Si tost que ses gens le veirent sans teste, n'ayans esgard à la seureté du camp iuree d'vne part & d'autre, se mirent en effort pour venger leur Seigneur, & de fait le firent si chaudemêt, qu'à peine peut Florisel à tēps môter sur son cheual. Ce q voyant Falāges reprint bon cueur, au coup que le geant luy descharge fait vne desmarche à costé ensemble luy fauce le iarrer, dōt il tōba par terre. Et Falanges, sans s'arrester à luy monte à cheual s'allāt ioindre à Moraizel, pour soustenir les ennemis qui venoient la teste baissée contre leurs gens. La rencontre fut dure, & la boucherie grande, qui tourna à la fin sur les Astradolins perdans courage par faulte de leur chef. Or allerent à vau de route par la prouesse des deux

deux Princes, & bien heureux se tint celuy qui peult gagner la mer à la courie, ou il y eut telle foule que plusieurs se noyent à l'embarquer. Mais deux Roys se rendirent au chariot de la Royne pour sauver leurs vies qui leur valut beaucoup, car autrement ilz estoient depeschez en l'exécution de la victoire. Apres laquelle les princes vindrent trouver la Royne qui estoit presque raye de ioye. Si s'en retournerent en la ville ou lon fit les feux de liesse & actions de grace publiques à leurs dieux. Apres on donna ordre à faire enterrer les mortz, & penser les naurez: entre lesquelz estoient les deux Princes qui demurerent pres de trente iours entre les mains des medecins & chirurgiens. Aubout desquelz conclurent d'aller au pais du Roy mort, pour le conquerir & rendre à l'obeissance de la Royne. Ce qu'ilz firent à son grand regret (les ayant trop mieux aupres d'elle) & beaucoup plus en eust eu si elle eust sceu ce que depuys luy en avint. Car apres qu'ilz eurent mis quelque temps au recouvrement des Isles des deux Roys: & receu les hommages au nom de Moraizel & de la Royne Sidonye, Ilorisel rameneuant l'offence qu'il avoit commise envers Dieu, & la femme Helene, pensa qu'il luy seroit impossible se deffaire de la Royne s'il retournoit à Guindaye, veu l'amour extreme qu'elle luy portoit. Ce qu'il declara à Falanges, qui fut de cest advis, & qu'ilz devoient partir de là & renvoyer leurs gens, avecques charge de dire à la Royne qu'ilz alloiet à vn affaire auquel ilz ne pouoient faillir sans preiudice de leur honneur: luy suppliât excuser leur absence pour peu de tēps, autant assuree de leur retour qu'elle estoit de la volonté affectionnee du Roy Moraizel. Ceste cōclusion fut mise en effet. Si monterent au mesme vaisseau auquel ilz estoient venuz, & firent voyle par autre route quen'alloient leurs gens. Lesquelz raportans à la Royne leur partement, la douleur est incroyable qu'elle en conceut, en sorte que peu s'en falut qu'elle n'yist

hors du sens. Et commanda incontinen^t que tous les principaulx estans retournent sans le Roy Moraizel fussent serrez en estroite prison iusques à sa venue, lequel si trop tardif estoit il y pourroit aller de leurs testes. Ha Moraizel (disoit elle) comme auez vous le cuer d'ainsi laisser celle à qui vn iour de vostre absence est vn an de martire? O Dieux pourquoy m'avez-vous donné vn tel espoux pour me l'oster si soudain? comme pourray-je porter vie sans celuy qui m'emporte le cuer? Beaucoup mieux m'eust valu de ne cognoistre vn si grand bien, que d'ē sentir si tost la perte. En ceste tristesse elle ne passoit iour sans sacrifices solennelz pour son retour, & se reuestit de deuil, & souuēt alloit sur les rochers ou la mer batoit, pour voir si rien ne viendrait de la part ou lō luy auoit dit qu'ilz auoient singlé: tellement qu'un seul oyseau ne voloit sur la mer qui ne la mist en sursault de la chose tant desirée. Or peu de temps apres elle se sentit enceinte: parquoy fit bastir vne maison sur les rochers pour ne se travailler tāt du chemin, en laquelle elle se tint long temps en solitude, sans permettre à nulle de ses Damoyelles de la venir seruir, ne voulant autre compagnie que de celuy qui peu s'en donnoit d'esmoie. La parloit souuent à luy, comme s'il eust esté present: & en contemplant le riuage & les vndes qui menoient bruit cōtre la racine des rochz. O profondes eaux, disoit elle, il semble qu'ayez enuy d'assourdir l'oie de celle qui ne demande autre chose que d'entendre la voix de son amy. Ventz impetueux faites moy ce bien si Moraizel est en vostre puissance de me le ramener bien tost par deçà vueille ou non. A ha belle Diane, pleust ores aux Dieux que ie fusse en vostre cercle pour veoir celuy que vous descouurez souuent. La Royne se tint tousiours en ce lieu iusques au temps de ses couches qu'elle enfanta vne fille d'excellente beauté, laquelle voulut estre nommee Diane, pour la frequentation qu'elle auoit avecque la Lune en ses contemplations nocturnes,

nes, de laquelle l'histoire fait aussi ample
recit au liure subsequnt que de Dame qui
fust iamais celebre par le monde. Elle fut
fort consolee de cest enfant, pour la repre-
sentation de son pere, & la fist nourrir en

grande magnificence : laquelle nous
laisserons maintenant pour retourner aux
autres Seigneurs allans en queste d'Ama-
dis de Grece.

De ce qui auint au Prince Zahir avec vn Cheualier incensé.

CHAP. XLVII.



ENtre plusieurs Cheualiers d'estime,
qui partirent de Constantinople, pour
trouuer Amadis de Grece, fust le
Prince Zahir, accompagné de dom Felix,
& Astibel de Mesopotamie qui allerēt en-
semble avecq' leurs escuyers iusques à vn
chemin fourché en trois voyes, ou le Prin-
ce Zahir print la main dextre, par lequel il
cheuaucha enuiron trois iours, sans ren-
contrer auenture digne de recit, mais au
quatriesme se trouua au pied d'vne mon-
tagne ou il y auoit vn grand lac aboutis-
sant d'vn costé à vne belle forest, à l'orree
de laquelle estoit vn chasteau, de grande
monstre sur le bord de ceste eau, auquel
se tenoit vn Cheualier de belle taille, qui

venoit armé de toutes pieces, son espee en
la main, battre l'eau aussi furieusement que
s'il eut esté son ennemi mortel, puis d'estoc
puis de taille pour la troubler incessam-
ment, car aussi tost qu'elle l'estoit celloit
sa frenaisie, iusques à ce qu'estant reposee
elle luy remettoit quelque chose deuant
les yeulx, qui lui faisoit recommencer ce
seruice. Or y auoit lors au riuage de ce
lac six damoyelles plorans ameremēt, dont
l'vne se relloit la teste qu'elle auoit toute
sanglante & se plaignoit grieuement, tant
que le Prince s'esmerueillā, & voulut sça-
uoir que se pouuoit estre, dont s'aprouchant
pres du Cheualier, luy dist. Que faictes
vous là Cheualier à battre l'eau ? il haülse
la teste

la teste & respond. Quoy? me veux tu encores icy rompre la teste pour deslourner la vengeance de celuy qui m'a nauré le cueur: va t'en si tu ne veux que ie t'en face tout autant, & sans plus recommence à battre l'eau. Vrayement, dist le Prince, ie croy que cest homme est fol & insensé, qui voyant l'eau bouillonner par ces coups, ne cesse de frapper, & quant elle est quoye, recharge, comme deuant: car lors il veoyt sa propre figure à laquelle il disoit: ne te fustoit il pas homme peruers de m'auoir priué de la chose que i'aymois le plus en ce monde, sans me quereller & mouuoir proces. Le Prince oyant ce propos ne se peut tenir de rire. L'autre voyant qu'il se mocquoit de luy, vint ferir son cheual entre deux oreilles. qu'il tomba plat souz son maistre, tellement qu'auant que Zahir peust retirer la iambe de dessouz le cheual, le chargea de plusieurs coups: mais si tost qu'il fut à deliure le repoussa asprement, & luy dist: Maistre fol i'espere te donner si bonne recepte de chastiment que te feray perdre ta folie: si le manie si dru, que l'autre ne pouuant soustenir se fourre en l'eau & le Prince apres: mais le Cheualier y estât entré quatre ou cinq pas, commença à frapper sur son image de nouveau, comme s'il n'eust autre affaire. Comment, luy dist le Prince, penses-tu folastre dissimuler ainsi le tort que tu m'as fait de tuer mon cheual & m'assaillir si outrageusement: garde toy de moy, ou tu es mort. Laisse-moy (dist le Cheualier) acheuer mon combat contre mon ennemy que i'ay deuant moy, & il y aura apres du temps assez pour le faire contre toy. Adonec les Damoyelles du riuage commencerent à s'escrier au Prince Zahir qu'il le laissast par ce qu'il estoit fol. Ce qu'il fist, & s'en va au deuant des Damoyelles qui venoyent vers luy toutes esplorées, & apres les auoir saluées leur demanda la source de ce beau ieu. Sachez dirent elles Cheualier que c'est la pire auenture qui fut oncques veüe: car ce Gentilhomme est Seigneur du chasteau

du lac que vous voyez. Or estoit il marié à vne fort excellente damoyelle, Dame d'un autre chasteau assez prochain: mais hier au soir bien tard, passa par cy vn mauvais Cheualier, comme nous estions seules avecq' nostre maistresse, pres d'une fontaine, lequel la voyant si belle la requist d'amour, & elle qui le veit beau à merueilles s'accorda soudain d'aller avec luy, car à vray dire elle n'aymoit pas son mary: de sorte que le Cheualier la print deuant luy sur son cheual, & l'emmena au grand galop, nous ne peusmes mieux que de crier qu'il la laissast: lors son mary y acourut, & sachant le fait, s'arme pour la recouurer & va apres sur son cheual, & nous quant & luy sur noz haquenees & le suyuismes iusques à vn chasteau, auquel nous vismes entrer le voleur & nostre maistresse fermans la porte apres eux, à laquelle il commença à heurter du pommeau de son espee pour entrer dedans, & se venger de l'outrage deffiant ceux de leans, & leur disant mil iniures, mais ilz vindrent se mettre aux fenestres & carneaux sans mot luy respondre ains se mocquoient de luy, & la femme mesmes: dont le Gentilhomme fut tant irrité que toute la nuyt gemissant ne faisoit qu'aller & venir parmy ceste forest, & nous le suyure, & cogneusmes à ces propos nouveaux qu'il estoit hors de son bon sens, & fusmes toutes certaines quand arriua à ce lac, dans lequel voyant son ymage parla à elle & luy dist. Atendez moy trahistre malheureux, car volcy le tēps que tu seras payé de ta desserte, & rompit sa lance contre le fond de l'eau en deux tronçons & continuant poindre le choc du gros bour qui luy estoit demeuré le desarçonna par dessus la croupe emmy le lac ou reuoyant sa representation commença à refraper d'estoc & de taille tant que l'eau fut esmeuë & sa figure perdue, & l'eau ralsise il recommença comme deuant: nous allasmes luy demander pourquoy il le faisoit, mais il nous ramena si bien à grandz coups d'espee, qu'il acoustra ceste Damoyelle

en tel estat que la voyez. Le Prince fust fort estonné de la fortune & leur dist: En bonne foy mes Damoyelles voilà le plus plus estrange cas dont i'ouïsle jamais parler, & plains bien le Chevalier de prendre ainsi le sens pour vne telle Dame: mais ie vous iure que i'emploieray mon pouuoir à le venger du faulx raiſſeur qui la detient, car amour m'a mis au nombre de ces vassaux: dont ie suis tenu à luy faire seruice au beſoing de mes compagnons. Parquoy nous fault conduire premier ce Cheualier en sa maison, si faictes venir ses gens & nous essayerons de l'emporter à force de bras: adoncq l'vne d'elles y courut, & amena six valetz. Comme pensez vous, dist le Prince, qu'il accoustreſeroit son galant s'il le tenoit icy: mais ie vouë à Dieu, & à celle que i'ayme le mieulx, de faire tant qu'il tombera entre ses mains: Les Damoyelles le remercierent grandement. Arriuant sur ce poinct les seruiteurs du chasteau, lesquels s'estoyent couuerts de quelque vieilles brigandines pour se garantir de ses coups comme ilz auoyent bon mestier, car vn de eux s'apſoſchant vn peu plus pres qu'il ne deuoit, receut de lui vn tel horion sur son cabasset qu'il fust trenché par la moitié & partie de sa teste, dont il tomba mort dans le lac: ce qui garda les autres de l'aborder, iusques à ce que le Prince Zahir le vint saisir au coup & luttâ avecq lui, tellement qu'ilz cheurent tous deux en l'eau dessus dessous: Dont les Damoyelles les voyans ainsi culbuter ne se peurent tenir de rire, mais sur ces entrefaictes vindrent les cinq valets avecq l'escuyer de Zahir lesquels le prindrent & emporterent, & le desarmant il crioit comme d'esperé qu'on lui donnast secours & aide contre les meschans qui le vouloyent tuer. A son cry accoururent deux Cheualiers passans, lesquels voyans ceste meslee cuyderent qu'on l'outrageast, tellement que l'vn d'eux chargea sur Zahir, & l'autre abatit vn des seruiteurs d'vn coup de lance, qui n'en releua oncques puis. Le Prince tira d'vn

reuers telles iartieres au cheual de celui qui l'auoit feru qu'il tomba lui & son maistre, lequel sautant legerement de bout vint l'espee au poing contre lui: vous n'avez occis mon cheual, dist il, mais i'espere auoir le vostre en change: Nous verrons, dist Zahir, lors commencerent à chamailler l'vn sur l'autre pendant que le compagnon poursuiuoit les valets, lesquels auoyent laissé le fol courrir les champs qui se voyât en liberté print escu & espee, & gaigna l'eau à la courſe & y batit son ymage comme il souloit, dont les Cheualiers furent esmerueillez, toutesfois vint l'autre au secours qui pensa choquer Zahir de son cheual pour le terrasser, mais il se destourna, & le Cheualier passa oultre, puis descendit à pied, & se vint ioindre à son compagnon mais ils furent traitez de si bonne main que l'vn fust renuersé par terre d'vn coup despee qui luy fust donné sur l'armet ou il entra & bien auant en la teste. Ce que voyant l'autre se ietta à genoux deuant Zahir lui presentant son espee, laquelle Zahir lui rendit moyennant qu'il iureroit de iamais n'assaillir hōme sans ſçauoir ou entendre l'occasion: ce qu'il promist, & apſint des Damoyelles tout le faict du Cheualier forcené. Si alla oſter l'armet de son compagnon, & lui banderent sa playe. Lon r'appella ceux du chasteau pour reprendre leur maistre fol qu'ilz emporterent au chasteau, mais leur donna du passe tems assez auant que se laisser empoigner si le mirent en vne chambre avecq les manicles aux mains, & fers aux pieds, & logerent aupres de lui les deux Cheualiers naurez, faisans bonne chere au chasteau iusques au lendemain que Zahir leur declara qu'il vouloit aller trouuer le Cheualier raiſſeur à quoy les autres dirent qu'ils luy feroient compagnie. Ils auoyent grand de esperance en sa prouesse veu les armes qu'il auoit executées à l'encontre d'eux.

Comme Zahir alla au chasteau ou estoit la desloyale femme, ou luy suruindrent auēures diuerses.

CHAP. XLVIII.

OR alla Zahir avecq' sa compagnie droit au chasteau ou le voleur auoit emporté la femme de son voisin. Auquel arriuez ouïrent grand bruit de menestriers comme pour bal & dance, & aprochans de plus pres, luy mesme heurta au marteau du guichet & escliant à haute voix qu'on luy fît ouuertute: dont vindrēt aux carneaux plusieurs Cheualiers & Dames, & entres autres le rauisseur & la rauie qui furent monstrez à Zahir par les Damoiselles de sa bande: si luy dist. Voleur outrageux des femmes d'autrui, si tu sens en toy autant de hardiesse qu'il y a de peruersité fors de là pour le faire recognoistre. Surquoy le Cheualier luy respondit petarades, & baisa la Dame deux ou trois fois, puis les instrumens commencerent à sonner, & la compagnie à dancer, dont le prince fut fort fâché, ne voyant aucun moien d'exercer sa vengeance. Vraiment dist l'un des Cheualiers, il semble que ceux de leans font peu de cas de vostre venuë: mais beaucoup dirent les autres veu qu'ilz n'osent saillir. Par ma foy, dist Zahir, s'il plaist à dieu ie les feray tantost chanter autre note, & ce disant descendit de cheual, & apuia sa lance contre la muraille du chasteau qui estoit assez basse, delibéré de monter avec encor vne, moiennant l'ayde des autres qui toutesfois luy desconseillerent ceste entreprise comme trop hazardeuse: mais oncques l'en sceurent destourner qu'il n'y grimpast son escu pendu au col. Les Damoiselles voians sa hardiesse se prindrent à ploter, & luy dirent. Bon Cheualier, Dieu vous vueille donner aide selon le droit de vostre querelle. Bien tost gaigna Zahir le hault de la muraille, ou il fut soudain aperceue par ceux de dedans qui commencerent à crier trahy, trahy, parquoy le Prince se

hastia de descendre pour se trouver en tēps en la salle avec les danceurs, & qu'on ne lui serrast le passage, mais il ne peut faire si bonne diligence qu'ilz ne se sauassent, excepté la Dame qu'il cherchoit laquelle ne peut entrer en la foule si tost que les autres laquelle combien que belle fust, pource qu'elle estoit meschante, le Prince ne salua, & la laissoit là, mais elle se print à crier au meurdre, à l'aide mon ami Magazan, ie suis morte. Le Prince voiant que personne ne sortoit à son cry, l'empoigne & emporte sur le mur, & l'aualla en bas la baillant en garde à sa compagnie, lesquelz furent fort esbahis de sa prouesse: si est-ce que les deux autres Cheualiers lui dirent qu'il en auoit assez fait, & qu'il deuoit descendre: car on oyoit vne grand' esmeute d'alarme dedans le chasteau: mais lui qui auoit intention de mettre à fin son entreprise demeura là, & veit sortir quinze Cheualiers armez de pied en cap qui l'assaillirent tous ensemble, disans. A ceste heure maistre fol on t'apprendra à escheller les maisons, il ne leur respondit que du bras & de l'espee, les soustenans si vertueusemēt que nul n'en aprocha qu'il n'emportast sa marque, tant que le voleur y vint qui luy dist, attend-moi, grimpe-mur c'est pour moi qu'as prins ceste, raison veut que ie t'en paye aussi: lors tira vn rude coup à Zahir lequel pare l'escu dont il emporta vne grand piece, mais le Prince lui en ramene sur le morion vn si pensant, qu'il lui en fend si bonne part que le chef lui demeura nud: sus lequel Zahir oubliant en la fureur sa promesse de le rendre au Cheualier forcené, redouble & lui trenche net: de quoi les autres irritez outre mesure enuahirent Zahir plus animes que parauant: mais le premier en receut le loier sur l'espaule que le bras sembloit vne manche pendant. Alors voyās qu'il ne faisoit pas bon si pres de luy, se reculerent & luy lancerent dardz & pierres. Lors prend la teste du Magazan & la gette dehors ou sa compagnie estoit. Les Damoiselles la voiant, & que les deux autres ne montoient pour secourir le Prin-

ce, leur reprochoient leur couardie : mais la desloyale la recognoissant s'escria comme desesperee si haut que deux Cheualiers cheuauchans par la forest l'ouyrent & accoururent au secours, lesquelz cogneurent l'escuyer du Prince, l'un estoit Fenix, & l'autre Astibel de Mesopotamie, qui ayant acheué deux auentures de grande importances estoient rencontrez sur ce chemin. Si tost qu'ilz entendirent le danger ou estoit Zahir, remercia Dieu qui les auoit amenez si à propos, mirent pied à terre & monterent sur la muraille entre deux lances plus viste qu'on ne feroit en vn escallier, & à telle heure y arriuerent que Zahir ne pouuoit eschaper de mort sans leur venue, car ilz le trouuerent aculé en vn coing, & toute ceste canaille autour de lui avec feu paille & boys pour le brusler: Zahir voyant les deux Cheualiers descendre cuyda que ce fussent ceux qu'il auoit laissé dehors: mais de plus pres recognoissant ses compagnons aux armoiries de leurs escuz, pensez quelle ioye lui fut en telle extremité. Or ne mirent gueres à massacrer ceux qui estoient entre lui & eux pour aller embrasser le gentil Prince, tant las qu'à peine leur pouuoit tendre les bras. Ainsi qu'ilz estoient ensemble, toutes les femmes du chasteau sortirent en grand' troupe d'une chambre, & voyans leurs marys & amys en tel arroy, chacune choysit l'espee du sien & s'en donna à la poitrine pour les suyure comme loyales. Lors Zahir fist ouvrir la porte à toute sa cōpagnie, fors qu'à la fauce femme qui menoit son dueil sur la teste de Magazan. Zahir monstra aux Damoyelles le carnage leur demandant se il restoit rien encores à l'accomplissement de leur vengeance. Cheualier, dirent elles, Dieu le vous vueille rendre. Or estât, comme ie vous ay dit, la desloyale demeuree deuant la porte avec la teste de Magazan, laquelle elle baignoit en ces larmes, passa par là d'auenture vn Cheualier de fort belle apparence, lequel voyant ceste Dame si esploree s'approche d'elle lui demandant la cause

de sa douleur. Helas Cheualier dist-elle, c'est pour la teste que voyez icy coupee par vn trahistre qui est en ce chasteau, & elle estoit d'un personnage que j'aymois le plus en ce monde. Parquoy mōsieur s'il y a en vous quelque prouesse, ie vous supplie m'en vouloir venger : pendant qu'elle parloit il la regardoit enrentiement: voire mais ma Dame, dist-il, si ie vous en venge quelle recompense en auray ie: Monsieur respondit-elle, telle qu'il la vous plaira de moy. J'ay donc vostre amour (dist il) par la vengeance: suyuez-moy donc, & me montrez le meurdrier de vostre amy. Elle marche deuant, & lui apres, qui entrât au chasteau eut grād' pitié des mortz qu'il trouua en la court: puyt veit les trois Princes la teste nue, parquoy les recogneur incōrinent, biē ioyeux de les auoir rencontrez, pour l'occasion que vous entendrez cy apres: toutesfois dissimulāt la cognoissance, dist à la Damoiselle, m'amie lequel est-ce de tous qui vous a fait ce tort, elle lui monstra Zahir, disant, voylà le meschant qui m'a tolu tout mon bien, parquoy faites m'en la raison selon vostre promesse, & ie suis toute vostre. Le Cheualier fort content dist lors à Zahir. Cheualier si vous estes hōme de bien prenez voz armes m'assurant de vostre cōpagnie: car le temps est venu qu'il vous fault satisfaire du dōmage qu'avez fait en ce lieu. Cheualier, respond Zahir, ie croy qu'estes ignorant du fait, & que l'ayant entendu ne me blâmez ainsi. Ceste femme qui vous irrite est peruerse & malheureuse. De celà ne vous chaille (dist l'autre) vous n'estes pas son confesseur. Or la veu- ie venger, si vous deffendez, sans que ces Gentilzhommes s'en messent, montez à cheval à fin qu'on voye q̄ vous sçauiez faire. Zahir fut fort irrité de ces paroles. Par Dieu Cheualier (luy-dist) tu dois aussi peu valoir que la Dame, puyt que tu entreprends si iniuste querelle: mais puyt que tu as si grād' enuie d'en menger, ie mettray peine à t'endonner ton saoul. Lors sortit du chasteau au grand regret de sa cōpagnie, confi-

considerant que l'autre le suprenoit ainsi las, trauaillé, & nauté. Leur combat fut fort tant aux lances qu'aux espees. Et tant dura qui leur conuint reposer, tournant toutesfois l'auantage du costé de Zahir: lequel dist à son auersaite: Cheualier le peu de droit que vous auez vous denie la victoire qui vous pourroit auenir par vostre prouesse: ce que l'autre escouta, & iacioit qu'il fut mal cōtent de se retirer sur sa perte, luy dist qu'il luy racontast le fait comme il alloit, d'autant que ses paroles ne s'accordoient à celles de la Dame. Quand Zahir luy eut recité, le Cheualier cogneut sa faute, dont le pria luy pardonner l'outrage qu'il luy auoit fait estant si mal informé & qu'il l'equitoit du cōbat. C'est la raison respond Zahir, mais ie ne vous quite pas ainsi, si ne me declarez vostre nom, à fin que ie cognoisse vn tel preud'homme: ce que l'autre ne voulut faire, ains s'en alla de honte d'auoir soustenu si mauuaise cause. Parquoy la femme du forcené voyant que son cas se portoit si mal, va prendre vn tronçon de lance à fer esmoulu sur la pointe duquel se iettant de grand roydeur se fauça le pis de part en part, dont elle mourut sur le champ, disant qu'elle aymoit mieux passer le pas que retourner à son mary, & finit ainsi aupres du corps de son amy. Ce fait le Prince Zahir se retira en la salle, ou il fit apareiller ses playes: puis monte & s'en retourna au Chasteau du Cheualier forcené, ou il le trouua deschayné par vn Cheualier, lequel entrant leans l'auoit trouué sans garde, & l'auoit destaché, pensant que ses ennemys l'eussent ainsi lyé & garroté: toutesfois ne l'eut si tost deliuré qu'il ne donnast si grand coup à son homme, qu'il le coucha mort par terre, & alla droit au lac recommencer sa baterie, ou Zahir le trouua en estat qu'il perdoit sa figure, à cause que les ondes bouillonnaient, ça ça maistre galant, disoit il, ie vous apprendray à vous cacher, & laschant son espee se laissa cheoir à bras ouuertz pour l'embrasser faisant le plongeon en l'eau, dont ilz se

mirent tous à rire, mais tant dura le ieu, qu'il se fourra en vn boubier ou il fut suffoqué, de sorte que quand on le voulut secourir il n'estoit plus temps: dequoy ilz eurent tous grand douleur, si le firent honorablement enterrer & seiournerēt là les princes quinze iours pour se refraischir, pendant lesquels les voyfins d'alentour le vindrent remercier du bien qu'il auoit fait au pais en le purgeant de ce faux Cheualier qui auoit commis mille cas execrables. Les princes assez repolez acorderent tous trois ensemble, d'aller en questte du Cheualier qui auoit combatu contre Zahir desirans sçauoir qui il estoit. Si s'en allerent apres Garinter qui estoit celuy qui auoit pris ceste ocaſion de meslee avec Zahir, à cause de l'inimitié qu'il luy portoit secretemēt pour l'amour de Timbrie: lequel au partir de là s'alla fourrer en vn chasteau à l'escart ou il fit guerir ses playes, tellement que les Princes ne sceurent iamais qui ce auoit esté.

De ce qui auint au Duc de Molasie par mer en la conduite de la belle Oriane.

CHAP. XLIX.

L'Ennuy procedant de l'absence d'Amadis de Grece, se rengregeoit de iour en iour à raison des pertes nouvelles que la court souffroit de l'vn, puis de l'autre en diuerses auentures: mais les douleurs de toutes les Dames n'estoient riē au pris de celles de la princesse Niquee laquelle voyoit tant de Cheualiers partir & n'en reuenir vn seul apportant aucunes nouvelles. Pendant ce temps le Prince Onolorius qui se tenoit en Babylone ayant entendu les differendz de la guerre passee, auoit enuoyé en Constantinople pour auoir sa fille Oriane, requerant ses ayeulx ne prendre en mauuaise part qu'il la demandoit pour tenir cōpagnie à sa femme: à quoy ilz s'accorderent tresvolontiers, & l'enuoyerēt incontinent apres la guerre finie parce que plustost ilz n'eussent peu seurement,

rement, estans desia les passages clos, & tous les iours armées flottans deçà & de là, tellement que la Princesse eust peu tomber en quelque incôuenient, dequoy on nauoit plus de paour apres la paix publiee, moyennant le bon ordre qu'on donna à rendre la mer libre de pirates & escumeur. Parquoy Oriane fut baillee en charge au Duc de Molatie, personnage fort prudent & venerable, & allerent quant & elle plusieurs Damoyelles, entre lesquelles les Dames Polandre & Cattibelle. Pendant l'aprest de ce voyage arriva en la court la pucelle Artimire laquelle requist les Seigneurs luy accorder heure assignee pour leur declarer la cause de sa venue, chose qui luy fut facilement consentie esperans tous qu'elle apportast nouuelles d'Amadis de Grece, seulement Oriane se douta (quoy qu'il en fut) qu'elle luy en diroit de celuy qu'elle en aymoît si secretement & d'autant plus parfaitement. La princesse Artymire fut honorablement receüe, & au iour ordonné leur tint tel propos. Sçachez mes Seignrs & mes Dames que partant d'icy pour aller trouuer la Roïne Zirfee & luy conférer quelque mien affaire d'importance, ie fus conduite par fortune en l'Isle des Vengeances, & satisfaction d'amours ou lon me laissa entrer moyennant le serment que ie fis, de n'amener aucun Cheualier qui entreprint combat pour moy, si bien que ie fus serue de l'idole, & demeuray avec telles conditions que la Damoyelle ouuriere de la magie, & que les autres qui estoient avec elle, de la sorte que le Prince Falanges vous peult auoir declaré comme il l'a veu lors qu'il se trouua avec la Princesse Arlande de Thrace. Tant y a que fortune, qui semble reseruer toutes les meilleures portions d'honneur à l'excellent prince Anaxartes, & sa sœur Alastraxeree les y amena tous deux peu apres, qu'ilz furent partiz de ceste court. En l'Isle le vaillant prince Anaxartes passa les trois perons vainquant en moins d'une heure trois Geans grands outre mesure qui gardoient

l'entree. Parquoy la Princesse Alastraxeree le voyant desia entré dedans la court du chasteau alla apres, pensant que l'enchantement n'auoit aucune force sur luy: mais elle ne fut pas si tost en la chambre de l'Idole qu'il ne la frapast d'une felsehe si bien que nous la vismes aller apres le Prince Falanges, tout ainsi que s'il eust esté en vie, lequel marchant deuant elle auoit le geste assez alaigre, & elle toute embrassée de feu. luy disoit mon parfait amy ie vous prie auoir compasïon de moy, en ce que ie souffre pour vous, car ie vous assure que ie sens vne ardeur me brussant iusques aux os vous supliant auoir souuenance du temps q̄ vous l'estiez autant pour moy. Voyez le cuer si cruellement nauré par vostre image me donnant telle gloire en mon travail, comme vous m'avez souuent declaré auoir eue pour l'amour de moy. A quoy le Prince luy respondoit desdaigneusement qu'il n'en auoit pas plus de pitié qu'elle auoit eu de luy. Comme nous la voyons Anaxartes & moy, vne autre image comme de luy vint apres moy plorant & lamentant tant que i'entray en la chambre enchantee ou ie n'euz pas si tost mis le pied avec l'image qui me suiuoit que l'Idole ne fut incontinent deffaite, & tous les autres personnages enchantez, comme Alastraxeree moy & les autres remis en leur estat & celle mesme qui auoit ordonné l'auenture. Laquelle acheuee, le prince Anaxartes vint trouuer sa sœur, & tout en riant l'embrassa & luy dit. Vrayement ma Dame il n'y a gueres que ie vous veis si amoureuse que postposant vostre grandeur, reueriez misericorde à celuy qui ne l'auiez voulu faire: mais sur mon Dieu i'en fus bien ayse à fin que vous sceussiez que c'est que d'amour. Mon frere (respondit elle) ne pensez pas que ce que i'en ay fait fust à autre fin que vous me voyant enchantee vous emploissiez à la deliurance de tous ceux qui l'estoient ainsi, pour vous donner occasion de gaigher reputation d'un tel fait enuers vostre mieux aymee. Sur ce propos y eut
longue

l'oguerisee, iusques à ce que la pucelle vint deuers lui la recevoir en grand magnificence, & encores plus en fit qu'ad elle sceut qui il estoit : car elle lui monstra particulièrement tous les secretz de leans, & maintes choses de plaisir durant le temps qu'il fut là, ou il ne sejourna gueres pour aller en la queste d'Amadis de Grece, m'ayant icy renuoyé pour vous rendre conte de son aventure, laquelle il prend à grand contentement pour l'amour de celle qu'il aime parfaitement, & de qui il se tient aussi tout assuré. Pendant ce discours si quelqu'un eust pris garde à la contenance de la princesse Oriane il eust facilement cogneu à ses gestes que ce recit ne lui desplaisoit pas : aussi n'y auoit il personne en toute la court qui ne fust tresayse, spécialement la Royne Zahara: aupres de laquelle se trouua lors Darinel, & iura le grand Dieu des Bergers s'il scauoit ou trouuer le prince Falanges qu'il ne failliroit pas de luy en porter les nouuelles, comme les plus agreables qui lui scauroiēt venir: puy se retournant vers Siluie lui dist : Pleust à Dieu ma Dame que vous y fussiez trouuee pour veoir comme ie vous eusse fait courir apres moy. Apres s'adressa au Roy Amadis: Sire si l'auēture n'estoit acheuee il y feroit beau voir vostre maiesté, & la Royne Oriane, la Royne Cleofile, & moy apres. Mais làs les Dieux ne m'ont iamais voulu tant de bien : si est-ce que suis aussi ayse de celui du Seigneur Falanges le bon amy du Prince Florisel, quasi que s'il me fust auenu : & ce disant commença à faire gambades, vistes virades, & donner du passe-temps beaucoup à la compagnie. Le lendemain la Princesse Oriane s'embarqua, prenant congé des Princes & Princesses, non sans piteuses larmes, promettant retourner aux noces de Florisel s'il estoit en sa puissance. Lors Artimire faignant auoir à trouuer le Prince Anaxartes en Babylone partit quāt & elle, à fin q̄ soubz ombre du voyage elle lui peust dire en chemin la principale cause de sa venue, tresioyeuse de l'opportunité

qu'elle en auoit.

Comme le Prince Lucidor avec sa sœur la Princesse Lucelle, se mist sur mer pour aller en Constantinople consommer son mariage, & des estranges rencontres qu'il eut en chemin.

CHAP. I.

L'uyver estat desia passé, & le tēps approchoit auq̄l on deuoit celebrer les nocces du prince Lucidor. A ceste cause auoit equipé vne grād flotte pour y aller en magnificēce telle que sa grādeur requeroit, menant avecques lui plusieurs Ducz, Cōptes & seigneurs de son royaume. Sa sœur Lucelle sachant desia le bruit cōmun qu'Amadis de Grece estoit perdu, fist requeste à ses pere & mere que leur plaisir fust de luy donner congé d'aller en la cōpagnie de son frere, pour veoir les singularitez de la Grece, & pour leur ramener sa femme: ce qu'elle impetra facilement. Si lui fist Lucidor apprestier vne chambre en son nauire, & alla avecques elle sa plus chere Damoyelle, nommee Anastaziane, fille du Duc de Sarnie, à qui seule ouuroit l'escrain de ses plus importants secretz. Or furent elles accoustrees de drap noir comme nonnes, portans sur leur teste vn voyle blanc, de fine toille de Hollande, sans bagues d'or ne ioyaux quelconques. Car la princesse ne voulut laisser cest habit pour quelque pompe, ou elle alast. Ceste compagnie alla par terre iusques au port ou est maintenāt Marceille, ou ilz embarquerent tenās la route de Grece, & rencontrerent en leur voyage l'Empereur de Rome Arquifil nouuellement eleu depuis le deces de son pere qui mourut deuant Contantinople. Or y alloit il alors pour recevoir l'acollée de cheualerie par la main du Roy Amadis, mesmement en intention de lui demander en mariage la belle Oriane fille d'Onolorius. Il fut fort ayse d'auoir trouué si bonne compagnie, & pour passer le temps avec eux entra en la nef de Lucidor, ou ilz menerent ioyeuse

vie iusques ce à qu'ilz arriuerent à venê de Constantinople, ou la fortune (coustumiere de se reuolter plus lourdement au temps de la plus grande esperance) ioua vn tour de queuê, esmouuant les ventz de Nort en furie extraordinaire de sorte qu'il ne demeura vaisseau l'vn aupres de l'autre, ains furêt tous espartz ça & là: Et celuy mesme des princes courut six iours sans gouuernal, bouffol, n'y autre conduite quelconque: Au bout desquelz se trouuerent iettez en vn port peu cogneu & frequenté: Parquoy estimâs que le pais deust estre hazardeux selon l'apparence, delibererent saillir en terre tous armez, & mener les Dames quant & eux comme ilz firent: mais guerres n'eurent cheminé, quand ilz trouuerent vne belle fontaine, à laquelle ilz descendirent pour boire & se rafraeschir du travail de la mer, mandans à leurs gens qu'ilz leur apportassent là ce qu'ilz auoient de viure esnaux & du biscuit pour tremper en l'eau.

Et bien leur sembloit qu'ilz recouureroyent plustost venaison en lieu si sauuaige que pain fraiz n'y autre prouision. Et n'eurent à peine acheuê de disner, qu'ilz veirent venir celle part vn faon de Biche fort recreu, & incontinent aperceurent trois fiers Lyons à sa queuê qui le desmembrent sur le champ, & s'en firent curee, rugissans treshorriblement: dequoy les pauvres femmelettes estoient toutes transies, de peur: au deuant desquelles le prince se mist en deffence si d'auenture besoing en estoit. Mais soudain veirent arriuer là vn damoyfel en guise de veneur, vestu d'une Iupe de satin broché, sonnans vne trompe d'yuoire, garnie d'or, pendue en escharpe: c'estoit le gentil Florarlan qui venoit tant enyuré de sa chasse, qu'il n'aperceut oncq' les princes lesquelz contemplerent fort la grace qu'il auoit à traiter ces furieuses bestes. Peu apres luy suruint en ce lieu mesme la princesse Arlade, avecques deux Damoiselles & trois Cheualiers, qui alloit à la chasse, voyât ceste compagnie tourne vers eux, qui considerans son riche atour, avec-

ques sa beauté la saluèrent courtoisement, & elle leur rendit leur salut, s'esbaissant fort aussi de la beauté de la princesse qu'elle iugeoit la plus excellente qu'elle eust veuê apres Alastraxeree, & considerant la tristesse de sa contenance, estima qu'elle eust fait quelque perte sur la mer; si leur dist: Messeigneurs quelle fortune vous à tirez en ce pais? Celle mesme ma Dame (dist Lucidor) qui sur cest element maintient plus la possession de sa propriété incôstante. Mais vous requerons de grace, nous apprendre vostre estat, à fin de ne meprendre, ne vous faisant l'honneur qui vous est deu. P'en suis contente, dist-elle, moyennant que me rendez la pareille, ce que luy ayât promis leur declara qu'elle estoit Arlande princesse de Tracé, qui me tiens en ce lieu bocageux pour le deduit de la chasse, & comme propre à la vie solitaire que j'ayme. Le prince fut fort esouy d'entendre qui elle estoit, ayant autrefois d'elle receu beaucoup de secours en ses affaires, parquoy luy fist de rechef la reuerence luy disant de chere lye. Ma Dame sçachez qu'avez icy deuant vous vn de voz meilleurs seruiteurs & amys Lucidor de Frâce qui par tempeste à esté emporté en ceste rade avecques sa Sœur que voyez icy, & l'Empereur de Rome. A ce nom elle saulte du pallefroy en terre remerciât Dieu de la bonne rencontre, & de l'amytié qu'il auoit mise entre les princes Grecz & luy, auant ennemys mortelz, dôt son cher frere auoit payé la fole enchere, duquel la souuenance luy fist monter quelques larmes aux yeux, qui furent accompagnees de celle de Lucelle, pour la memoire qu'elle luy renouuella de celuy que sô cueur ne pouuoit oublier. Or se vindrent elles caresser d'une grande humilité. Puy Arlade la reconforta de l'ennuy qu'elle auoit de ces gens escartez aux perilz par la tormête, & q' quant à eux avec le plaisir de Dieu, ilz estoient mieux adresez qu'ilz ne pensoient. Adonc s'aprocha Florarlan & va baiser les mains à Lucelle, laquelle pour le trait qui rappor-

toit à

toit à Amadis de Grece tressaillit toute & perdit la couleur. Ce qu'aperceuant Arlāde luy demanda dont luy procedoit ce tremblement, si elle sentoit qu'elque douleur. Aussi grieue, respōd, que la mort par la beauté de cest enfant qui me ramētoit par semblance celle d'un Seigneur qui m'a rauy le cuer par la siēne souz couleur de vraie amitié. Arlāde fut fort troublee de ce propos dequoy Lucelle s'aperceuaūt lui dist: Ma Dame il semble que mes paroles ne vous aient moins esmeuē que m'auoit la veuē de ce Damoyse. Je vous prie me dire qui il est, par ce que ne puis croire que sa presence m'ait peu donner tant d'ayle sans cause. Mamie (respond Arlande) ie ne vous puis dire de luy sinon qu'un sage le nourrit & instruit en vn chasteau pres d'icy, à fin que quand il sera en aage il prenne vengeance sur Amadis de Grece à laquelle vous & moy pretendons part. Lucelle ne luy sceut pas trop bon grē de ce dernier mot, ne pouuant hair en son cuer celui de qui elle auoit receu tant de seruices. Si dist à Florarlan, beau filz Dieu vous soit en aide, car vous auez entrepris grand' besongne. Ma Dame, respond l'enfant, le bon droit de ma dame la Princesse suppliera le de fault de ma valeur enuers celui qui est tant renommē. L'Empereur à qui ce parlement ne plaisoit gueres, luy dist qu'il en auoit bon marché attendu qu'il estoit mort, veu que tant de gens qui l'auoient recherché n'en raportoient aucunes nouuelles. A ce propos les deux Princes ieterent profonds soupirs, combien qu'en intention fort differente. Apres long deuis Arlande les pria que, pendant que la mer deuiendroīt nauigable, & qu'elle enuoyroit enquerir es prochains portz si quelqu'un de leur flotte y seroit arriué, luy fissent cest honneur de soy venir rafraischir avec elle au chasteau d'Asibel le sauant, la ou Florisel & Falanges auoient eu le combat. Or tandis que le souper s'aprestoit leur dist, qu'elle leur vouloit montrer quelque chose de ce qui estoit leans. Si print Lucelle par la main

(les Princes marchans deuant) & les mena en la grand' sale ou les trosnes de Florisel & d'Helene estoient asleuez au naturel par ce grand Philosophe, à l'entour desquelz estoiet graué tout ce que Florisel auoit fait en ce chasteau, dequoy ilz furent fort esmerueillez. Lors qui eust contemplé la cōtenāce de Lucidor il eust aysement descouuert par les couleurs qu'il prenoit & perdoit en regardant la remembrāce si viue de ces deux personnes, la haine extreme qui leur portoit: en quoy Arlande luy faisoit bonne compagnie: mais Lucelle qui ne pēsoit qu'en la perfectiō de la beauté des images, se tourna vers son frere disant. Monsieur en ce que ie voy de la statuē d'Helene, ie vous trouue & Florisel aussi excusables de ce qu'auiez fait pour elle, & que s'il auoit bon droit vous n'auiez pas tort. Le tout gissoit (respōd Lucidor) en ce qu'elle estoit obligee à moy, non à luy: mais laissons le passé ou plus n'y a de remede: car ie me tiens pour bien satisfait de celle que j'ay conquise en pourchassant vne autre, ce qu'il disoit toutesfois au plus loing de sa pensee. Adōc suruint le sage Asibel leur faire la reuerēce le quel ilz louerent grandement de ce bel ouurage, puis allerent souper, ou ilz furent seruis tresplanteusement selon la saison: auquel la princesse Lucelle, & le Damoyse Florarlan, ne se repeurent gueres q' d'œilades fort enflambez de la beauté l'un de l'autre, discourant le Damoyse en son petit cerueau que s'il fust Cheualier iamais à autre sainte ne voueroit son cuer. Les tables leues Arlande pour entretenir ses hostes, print la harpe, dont elle leur sonna & chanta vn strambor tel à propos de Lucelle.

CHANSON.

*La ieune vierge est semblable à la rose
Au beau iardin sus l'espine naue,
Tandis que seure & seuletie repose
Sans que tropeau ne berger y arriue.
L'air doux l'eschauffe, & l'aurore l'arrose.*

*La terre, l'eau, par sa faueur l'auue
Les ieunes gens, & Dames amoureuses
De la cueillir ont les mains enuienses.*

Après chanta plusieurs autres lais & vi-relais d'amour si piteux qu'il n'y eust celui à qui elle ne tirait la larme de l'œil si ce ne fut à l'Empereur qui estoit libre de passion & se rioyt de leurs pleurs. La musique finie, Florarlan se leue & se va agenouiller deuant Lucelle la suppliant lui octroyer vn don pour le premier qu'il eust oncques requis à Seigneur ne Dame. Elle l'embrassa & luy dist, mon mignon demandez hardiment ce que voulez, car si c'est chose qui soit en mon pouuoir ie le feray tresvolontiers. Ma Dame (respond l'enfant) ie vous remercie humblement, & sçachez que ce que m'avez promis est que demain au matin esprouuez l'auenture, ou la deliurance de la Duchesse Armide, d'autant que ie m'assure que si vostre beauté fault à la mettre en liberté elle & ses Damoiselles, estans comme prisonniers auecq' vn Cheualier quer'ayme bien qui est leans, & par lequel ont esté mis à deliure ceux qui y estoient auant luy, ie croy que l'auenture ne sera iamais acheuee: car la chose que plus ie desire en ce monde c'est la deliurance de ce Cheualier, pour laquelle ie vous fais ceste requeste. La Princesse s'enquist à l'heure qu'elle estoit ceste auenture, de laquelle Arlande luy fist le discours entier, dont ilz furent tous esbahis & conuoiteux de voir le lendemain le mistere. Alors se tourne Lucelle vers Florarlan luy respondant: Damoyzel c'estoit à ma Dame Arlande non pas à moy, que vous deuiez adresser de qui le plus comble non moins, toutesfois ie suis prest de vous accomplir ma parole. Grand merci ma Dame (respōd Florarlan) ie vous promets en recompense, si Dieu me donne iamais cheualerie & vietoire d'Amadis de Grece, de vous enuoyer sa teste en payement du tort que dites qu'il vous a fait. Elle ne prenant grand oust à ce propos, lui dist toutes-fois en

riant qu'elle le quittoit de ceste promesse du cobat de paour qu'elle auoit despersonne, à quoy il respondit, qu'il ne vouloit dispenser de sa part, de quoi il resioit fort la cōpagnie de le voir affectiōné eūers la princesse, & desia si bien emparlé pour son aage. L'heure vint de reposer, si retirerent chascun en la chambre qui leur fust apprestee. Et les Princeses coucherent ensemble, ou elles entrerent en deuis familier de leurs menues pensees, si auant qu'Arlande descourrit à Lucelle sa maladie, lui prouenant du peu d'amour de Florisel, laquelle print là soupçon que l'enfant Florarlan fut issu de lui & d'elle, & lui rēdit la pareille en racōtāt l'amour qu'elle auoit porté à Amadis de Grece qui lui estoit tourné en haine. Nous sōmes, dit lors Arlande, mal adreeses pour receuoir consolation l'vne de l'autre, sinon qu'il me semble qu'un cheualier ne meritoit pas vne si belle & gracieuse Dame. A quoy lui respondit Lucelle, que sans la faulte qu'il luy auoit faicte, elle ne pensoit en bonté, beauté, & valeur, son pareil au monde, si ce n'estoit son filz duquel elle lui auoit monstřé l'ymage. De là tomberent en propos de l'excellence de la Duchesse Armide, de qui elle deuoit le lendemain esprouuer l'auēture, puis le sommeil les surprint iusques à la poincte du iour.

Comme la Princesse Lucelle esprouua l'auenture de la queste d'Armide à la requeste du Damoyzel Florarlan.

CHAP. XLI.

LE iour venu les Princes & Princeses se leuerent, & vestuz de riches acoustremens monterēt à cheual pour aller au logis de la Duchesse Armide. Laquelle quand ilz l'eurent veuë, & ses Damoiselles aussi furent tous esmeuz à grand compassion, mesmement l'Empereur Arquisel du premier regard deuint si enflambé de son amour que des l'heure il la fit
Dame



Dame & maistresse de son cuer. Arlande se fist apporter sa harpe de laquelle tandis qu'elle s'ona & chata Armide se tint quoye cōme morte, mais la musique acheuee elle retourna à son office comme deuant : dequoy prenant pitié l'enfant Florarlan somma Lucelle de promesse, qui luy respondit : Beau Damoyfel, vostre volonté sera faite, puy que ma parole m'y oblige, toutesfoys vous auertissant de vous tenir prest d'une autre qui viēne racheter celle qu'enuoyez à la deliurance de la duchesse. Ce dit marcherent vers les perrons, ou la princesse voyant la nuē espeeille perdit quelque peu de sa viue couleur. Neantmoins s'eueruant, print par la main sa Damoyfelle Anastasiane pour compagne, & passant à trauers de la nuē bien tost auisa le beau chasteau ou Amadis estoit demeuré, se trouuant en vn air pur & serain, parmy les vergers plantez de toutes sortes d'arbres, sur lesquels mille sorte d'oyseaux degoysoient leurs plaisans rimages. Ce lieu remeit en memoire le palais de l'isle d'Argines, ou Axiane luy auoit fait si bon traitement en la cōpagnie de celui qu'elle auoit si cordialement aymé, dont ne luy fut possible d'empescher les larmes de distiller le long de ses iouēs vermeilles, & les gros souspirs de sortir quant & quant. Dequoy Anastasiane luy demandant la cause, elle

luy dist: ma chere amye ce que voyez sont tesmoignages manifestes du secret toutmēt que mon cuer souffre, lequel ne sera iamais descouuert par moy à autre qu'à vous, sinon par les habitz & vie solitaire que j'ay vouee, telle q̄ meine la loyale tourterelle ayant perdu son pareil. A quoy lui respondāt sa bonne damoyfelle, q̄ les choses qui sont hors de nostre puissance n'auoient meilleur remede que l'oubly. M'amy (repliqua) c'est oubly n'a pas pouuoir d'effacer ce qu'amour à graué de son ciseau tāt acéré. Mais la faute d'Amadis de Grece ne trouuera iamais excuse deuant tout iuste iuge, & enuers moy aussi peu de pitié, ie dy si fortune luy adressoit, que ie n'espererai la mort doncq' seule y donnera telle fin qu'à ma vie. Sa compagne faisant son deuoir de la cōsoler, entreterent au chasteau lequel elles reuistērēt hault & bas, & le trouuerent bien garny de tapisserie, & tous autres meubles precieux, voire ouyrent des voix & instrumentz melodieux, sans toutesfoys y veoir persōne quelcōque dequoy fort estonnees, vont au iardin delicieux qui leur sembla comparty de merueilleuse inuention, & fourny de toutes les plantes rares & singulieres dont on fait cas par le monde : au my lieu duquel trouuerent la belle fontaine, ou Amadis desolé venoit d'heure à autre faire ses piteux regretz. Et

à leur arriuee gisoit là estendu sur l'herbe, foyble & deffiguré, avec sa barbe longue, & les cheueux pendans iusques au col: qui garda la Princesse de le recognoistre, parce qu'en la saison de ses premieres amours il n'auoit poil au méton, ioinct le long téps qu'elle ne l'auoit veu. Mais oyât qu'il parloit à luy mesmes, s'aprocha vn peu pour mieux entendre ses cōplaintes qui estoient telles. Làs de moy, sans moy d'autant que suis tout en elle! Amour, Amour! combien tu prendz de qui tu veux vengeance plus cruelle que Mars ne fait par ses armes tranchantes, qui ne tuent qu'vnē foys, & tu me fais mourir cētfois par iour, pour souffrir pl^{us} lōg martyre. Làs amyie quelquetort q̄ ie tiēne, ie pense que si me veois en cest estat, ie croy que tu en prēdrois quelque pitié. Ha Dieu si quelque vent pouuoit porter iusques à ses oreilles mes cris & gemissemens continuelz, elle se tiendroît à bien vengée de celuy qui a tant mespris, & le sachant mon cueur receuroit quelque confort. Cōme dy-ie confort, de l'esperer d'vn ne le puis auoir: voire qu'elle esperance, ou ie ne voy occasion ny moyen de desespoir? Ha vie desplorée en desir perpetuel, sans apparence de iouir! Apres ces plaintes iettoit les gros sanglotz, & rouloit sur l'herbe, puyz demeueroit sans mouuement d'aucun sens, par l'extremité de sa douleur, laquelle fit la Princesse fondre en larmes, par la souuenance, de celuy qu'elle estimoit en pareil estat enuers elle de lamēter & requerir pardon. Parquoy dist à Anastasiane que ce Cheualier luy sembloit bien feru d'amour: qui luy respondit qu'elle en auoit grand' pitié, veu sa beauté & grace, que son piteux estat ne pouuoit du tout cacher & effacer. Telle penitence seroit plus cōuenable (dist Lucelle) à celuy qui s'est si mal aqité du deuoir d'amytie en mon endroit, qu'à nul autre. Si vous le voyez tel ma Dame (replique Anastasiane) n'y seriez vous point de misericorde? Sa desloyauté est trop grande, dist Lucelle: Si est-ce (dist-elle) que cestuy paye beaucoup, ie ne sçay pas combien il

doit. Plus ie souffre (respond la Princesse) sans l'auoir meritē. Il est vray respondit la Damoysele) si est-ce que seroit grand' cruauté de laisser ainsi mourir vne personne qui tant ayme. A ce mot Lucelle ietta vn profond soupir, la priant de ne parler plus de celuy qui est tant loing d'elles, lequel aussi elle ne pense auoir telle repentance de sa faute, veu le peu d'affection qui lui a monstree. Adonc le Prince sentāt nouveaux assaux de son torment, ses bras croissez sur sa poitrine, se print à rouller de rechef, comme tout transporté: dequoy elles eurent grande frayeur, & le coururent tenir de peur qu'il ne tombast en la fontaine. Incōtinent monta au cueur de Lucelle vn soupçon qui il estoit, sans toutesfois assurance certaine. Mais luy se tourmentant sans cesse baignoit tout en sueur, & traualloit à destacher ses acoustremens par deuant pour soy donner air. Si luy ayda elle à ce faire, & luy ouurant sa chemise aperceut le signal de l'ardente espee, qu'il auoit en la poitrine, dōt aussi tost elle perdit couleur, & cheut esuanouye aupres d'Anastasiane: laquelle fort estonnée, ne sachant la cause de tel & si soudain accēz luy ietta de l'eau de la fontaine au visage, qui la fist reuenir à soy. Lors luy print les mains, & sans dire vn seul mot distille les grosses larmes, apuyant en la fin sa teste en son giron. Anastasiane la supliant de plus en plus luy declarer son mal, comme à celle qui y vou droit pourchasser le remede. Ha m'amyie, lui dist en soupirāt, c'est Amadis de Grece sans point de faute. Ce disant se pasma de rechef, & secouruē par sa bonne Damoysele (comme parauant) quand elle se sentit se leua en sursault pour s'enfuyr de là, auant que le Prince reuint à lui, tant la poignoit & chassoit le vray amour, q̄ n'est iamais sās ceste crainte. Mais elle estoit abattue de fine angoisse avec vn certain remors de conscience, qu'elle ne sceut faire quatre pas en auant, tellement que cōtrainte fut se laisser cheoir sur Anastasiane. Adōc s'estoit Amadis cōme reueillé au cry d'Anastasiane, qui

qui auisant les Dames, recogneut incontinent celle de qui il portoit l'ymage si bien esprainte en son cueur, dont tout rauy s'escria: Ah seigneur Dieu, ou suis ie, q̄ voy ie, est-ce sōge ou verité, q̄ ie tiēne ma dame si pres de moy: lors lui empoigne les mains, q̄ elle ne sceut retirer de lacheré, & les baisant mille foys, se leue sur les genouz deuant elle, sans parler de long temps, comme personne trāsie, sinon par pleurs & soupirs. Elle tenoit les yeux fichez sur luy sans mot sonner. A la fin il exclama: O vif suget de l'esfigie que ie porte grace en mon ame tant au naturel, te veux tu desguiser & cacher à moy qui sens de toy les effectz si vrayz & certains, sentant mon cueur enflambé par les rays de ta veuë rebatus en luy de ma memoite, comme fait le boys de morce, ceux du Soleil par le mirouer ardent? O Lucelle quel autre vous transporte icy, me seroit-il gracieux & bening: ie ne le puy's croire, veu l'yre vniuersel du ciel que i'ay esprouuē en mal longue misere: plustost seroit pour rafraischir & animer mes playes en augmentation de ma douleur mortelle. Lās ma Dame ie confesse vous auoir offensee si griefuemet que ne merite pardon: mais c'est le lieu propre ou la clemence est le plus glorieusement employee. Helas voyez celuy qui tenoit si honorable reng, entre les plus grans. Ores pour vous est reduit en la compagnie ordinaire des bestes brutes, s'estimant indigne de l'humaine conuersation tant qu'il viura hors de vostre bonne grace: faites-moi (ma Dame) au moins ceste derniere faueur de parler à moy: non pour aleger mes douleurs (que ie n'ay desferuy) mais pour les acroistre par rigoureuse responce, si elles peuuent receuoir accroissement en plus toismentant celui à qui par coustume elles seruent de nourriture. La Princesse l'oyant si piteusement complaindre, iette ses bras au col d'Anastasiene, la requerant toute exploree luy donner conseil en ce grand estroy, comme elle pourra eschaper de ce lieu, si troublée qu'elle n'en peut cog-

noistre le moyen. Mon Dieu (dist elle) qu'è ce cy, que celuy que tout le monde quiert & ne le peult trouuer? ie le trouue ainsi sans l'auoir cherché? N'est ce pas pour augmenter ma peine en me representant l'obiet de sa cause. Alors elle print courage, & s'eslongna de luy quinze ou seize pas, lequel tout esperdu se leue, & à la course la deuanee, & s'agenouillant luy dist: Ma Dame ie vous supplie ne desdaigner de parler à moy, ou au moins de mesconter encores: vous souuienne de l'espee que tiraistes, de mon cueur, & ne luy refourrez pas au double par rigueur si cruelle. Que dy-ie mon cueur: mais le vostre, car tel il viura & moura: parquoy plaist vous le traiter humainement, non pas comme mien, mais vostre. Lās ma Dame parlez à moy, à fin que i'entende si vous estes la Princesse Lucelle, au nom de qui estant son Cheualier, ie deffois les freres Geans de l'Isle de Silancie pour la deliurer de prison, en m'enfermant estroitement en la sienne. Dites moy s'il vous plaist, si c'est vous qui vainquistes en moy les sept gardes de l'Isle d'Argines. Ramenteuez-vous les seruices que ie vo'ay faitz autresfoys, en compensation du tort dont me voulez charger. Receuez le Cheualier de l'ardente espee vainqueur des autres pour vostre vaincu ou prisonnier, vsant de mercy qui est trop plus louable, mesmement à vostre sexe, que la rudesse. Sera il possible que sa dame Lucelle ne l'ayant veu de si long-temps luy denie si estrangement sa parole. A tout le moins pronōcez moy la sentence finale de de ma vie ou ma mort. La Princesse ne mōstroit aucun geste de s'y consentir, quād Anastasiene considerant la grād' beauté d'Amadis avec l'agoisse extreme qu'il souffroit en parlant à elle (de façon qu'il sembloit qu'a chacū mot le cueur lui deust sortir par la bouche, veu les gros batemens d'aleine apparens dessus l'estomac, cōme les vagues de la mer esleuees par les ventz) esmeuē de grand pitié se prosterne en terre deuant sa maistresse, la suppliant ne vouloir estre à

tel personnage ingrater de sa seule parole. Adonc Lucelle poussée de plus grand' force. latêre (qu'elle dissimuloit toutesfois) comme gagnée par importunité lui respôdit. Si ie tenois ce Cheualier pour Amadis de Grece ie parlerois volontiers à lui, mais selon les nouvelles que j'ay entendues de cestuy ie croy qu'il est Damoysselle, non pas Cheualier, ains esclau du Soldan de Niquee nommée Nereïde. Car s'il fust autre il m'eust pas ainsi fausé sa foy, & violé l'obligation en laquelle il estoit astraint à mon amour & au sien dont par tout il se vantait. Parquoy s'il veult que ie parle à luy comme à Nereïde, ie l'acorde, combien que sans raison, veu qu'elle a occis mon loyal amy Amadis de Grece, de qui j'auois tant receu de seruice & d'honneur. Le bon Seigneur alors reprenant cuer par ce dernier mot, luy respondit: Ma Dame, est ce à vous (si tant auez aymé) de chercher raison en amour, qui est en possession de n'en tenir que tant qu'il luy en plaist? S'il m'a voulu faire vn coup Amazone, vous sçavez quantesfois les sages escriuent qu'il a transformé les Dieux mesmes, pour nous faire entendre qu'il n'est au pouuoir des homes de luy resister. Ie suis vostre Amadis, qui confesse ma faute, dont ay fait longue penitence, & ores vous clame mercy. Ma Dame ma Dame, mitez vous à la diuinité qui estend sa clemence comme exemplaire sur les plus enormes pecheurs, tel que j'ay esté en vostre endroit: Et ne laissez mon ame ainsi desesperée partir de ce foible corps, qui ne se soustient plus depuis long temps que de vostre seule contemplation. Lucelle de contenance vn peu aduocée, luy dist alors en riant. Or puis que me donnez tant puissance sur vous Nereïde, ie vous commande desloger incontinent de ce lieu, de peur de tomber es mains de celle qui en est Dame, c'est à sçauoir Arlande, qui iamais ne vous pardonneroit, non plus que moy la mort d'Amadis de Grece. Et tant y à ceans de Cheualiers captifs venuz de diuerses contrées, que ne pourriez faillir à estre cogneu.

Car ie ne veux tant de mal à Niquee que de luy vouloir faire payer ce que vous me deuez. Or est-il tard dont suis contrainte me retirer vers ceux qui m'attendent. Amadis quasi resussité, la remercie de tant de faueur, la supliant auant que partir vouloir encores entendre en vn mot l'estat de sa penitence. Ce qu'elle luy faignit acorder, plus pour cognoistre la forme de l'auenture d'Armide. Surquoy lui respondit, que depuis sa venue la chance auoir tourné, elle estât rendue captiue, & les Cheualiers deliurez: & toutes celles qui entroient leans se rendoient à l'office solemnel, avec la Duchesse. Qui lui faisoit estimer sa deliurée par son arriuee si libre, Sur ce propos ouirent grand bruit de menestries & de chantres, disans,

*Vine la belle Princesse
Qui remet nostre maistresse
En sa pleine liberté.
Par autre captiuité
On le captinant delaisse.*

Adonc iugerent certainemet, que estoient chantz de liesse, pour le desenchantement de la Duchesse Armide. Parquoy mirent fin à leur deuis pour le danger qu'Amadis eust encouru de sa vie, & elle de son honneur s'ilz eussent esté trouuez en ce lieu. Si lui commande pour congé de partir de là: & pour l'amour de Niquee, de retourner à Constantinople, plustost qu'il luy seroit possible. Il la remercia de ses bons commandemens. Ainsi s'en va fort content d'auoir rencontré sa tant aymée Lucelle, laquelle s'en alla la part ou elle entendoit l'armonie. Et luy prenant son espee se coule couuertement d'autre costé souz la montaigne du boys tant qu'il vint au riuage de la mer, ou nous le lairrons iusques à ce que vous ayons recité ce qui auint depuis que la princesse Lucelle esprout l'auenture. Or vous dy ie que à l'heure propre qu'elle parla à Amadis, Armide & ses Damoysselles furent desenchantees sans aucune

aucune souuenance de tout le passé. Dont sonnerent les instrumens de ioye, au son desquelz suruindrent les Princes & Dames & entre tous Lucidor bien le plus content pour l'honneur que sa Sœur auoit conquis à acheuer l'auenture, laquelle fut receuë par la Duchesse en grand pompe & magnificence se reclamant sa captive. Mais l'Empereur Arquifil, la contemplant de nouveau en ceste gayeté, la trouua plus belle que'au-parauant, & s'enferma en ces prisons, par autre partie que les piedz, ou il eust souffert d'auâtage, sans l'asseurance qu'il se donnoit de n'estre refusé pour sa grâdeur, quâd il la voudroit prendre à femme. En ce chasteau passa ceste cōpagnie quinze iours en plaisirs & delices, durât lesquelz Lucelle deuisa maintes fois avec Anastasiane de son Amadis, faisant resolutiō, puis qu'une y auoit tel le part, de ne lui presenter iamais sont tout resistant vertueusemēt aux effortz de l'affection qui la tiroit au contraire.

Comme Amadis de Grece arriva en vne Isle, ou il fut en tresgrand danger.

CHAP. LII.

PEu apres que le Prince Amadis eut laissé sa chere Lucelle, il se trouua au riuage de la mer, tout pensif sur son commandement qu'il deuoit acomplir. Estant par ce point reculé de l'esperance qu'il auoit eue de iouyr de sa veuë à son aise à Constantinople es nopces de Lucidor. Si ce pourmeine tant qu'il trouue vne nassele de pescheur en laquelle il entre, ayant mieulx reposer son pied soubz le travail des braz, à l'auiron duquel il ioua le long de la coste tout ce iour, iusques au soir qu'il se leua de terre vn tourbillon de vent si terrible que les vagues combloient par fois, partie du petit vaisseau qu'il espui-soit en diligence: de sorte le bon Prince ne s'estoit iamais veu en tel peril. Auquel ne trouua antre remede, que de recommander

son ame au Seigneur des elementz: à qui en tant de dangers il auoit pretenté le sacrifice de son corps. Le iour venu il se veit en plaine mer, sans aparence d'aucune rade, dont delibera laisser aller sa barque à l'auenture souz la guide de Dieu, qui la luy gouuerna ce iour, & la nuyt ensuyuant iusques à l'aube, qu'il aperceut vne Isle laquelle il luy sembloit recognoistre: dequoy graces renduës à Dieu il auisa vne nef ancrée à l'abry, ou il conduyt son bateau. Et quand il fut à bord, esclia plusieurs foys hode la nef: mais personne ne luy respondant, entra dedans ou il trouue planté de viandes, dont il print sa suffisance: puy reuisitant les chambres trouua vn riche harnois verd, tout semé d'aigles d'or, l'escu de mesme, dequoy il se reuestit tresbien: car il lui estoit fait comme de cire & pensant que ceux de la nef seroiēt en l'Isle pour leurs affaires, descendit en terre pour les aller chercher, à fin de leur requerir le don de ces armes. Et que pour n'estre cogneu qu'ou bon lui sembleroit, mit l'armet en teste, & attachâ sa barque, entre vn petit sentier peu hâté, lequel il luyuit à grand malaise, pour la foiblesse de son corps, procedant de la vie austere, qu'il auoit si long tēps menee pour l'amour de la Princesse Lucelle. Or guerres n'eut cheminé qu'il rencontra six hommes de pied, la halbarde au poing, & le cabacet en la teste: qui recognoillans les armes du Duc Rufian leur maistre luy demanderent fierement, de qu'elle hardiesse il les auoit prises. Mes amys (respondit) ce n'a esté par larrecin, pource vous prie m'enseigner vostre seigneur à fin q'ie parle à luy. Vrayement nous le ferons (dirent ilz) à vostre dam. Lors le meinent vers vn gué entre deux haultz rochers, ou estoient vingt Cheualiers à table, tous armez hormis la teste, excepté vn, assis au hault bout. Auquel les vilains dirent: Monsieur, nous venons de trouuer ce sot Cheualier vestu de vostre harnois, lequel vous amenons à sa requeste, pour se purger de les auoir desrobées. Mais c'est à vous autres (dist-il) co-

quins à vous iustificier de ce que ne l'avez chastié selon son merite. Or me le depechez si ne voulez vous-mesmes perdre les testes. A ce mot les vilains luy courent sus de tous costez, desquelz le premier trop hasté s'eschauda, receuant la menace de son maistre. Et aux autres, à l'un il auala vn bras, à l'autre coupa les iaretz: bref, il les mit en peu d'heure en tel estat, que les Cheualiers disans, veirent qu'ilz auoient assez regardé l'escrime, & qu'il leur en falloit estre. Si prénent tous leur armet pour secourir leurs gens, venâs vers Amadis, qui les voyant gaigna le pas entre les deux rochz, lequel il leur deffendit si vertueusement, nonobstant la debilité de ses membres, qu'il en fist vn rampart de quatre abatuz à ses piedz: Parquoy les autres espouuentez luy tirent de loing coups de fleches, voire tant que son escu en estoit tout herissonné, Alors le duc trop esbahy de sa prouesse, les fist cesser & luy dist: Cheualiers vous avez tant monstre icy de valeur & bonté, que la mienne seroit interessée si ne vous prenois à mercy, moyennant que vous y mettiez: car si voulez estre à moy ie vous donne la vie, avec mon harnois que i'estime beaucoup, autrement vous payerez celle de mes gens par la vostre, sans que ceux-cy vous laissent iamais en repos. Le Prince luy respondit: Cheualier, comme pensez vous que ie me fie en vous de ma vie, qui a commandé ma mort pour des armes seules: la composition que ie feray, sera que ie vous rende le harnois, veu qu'il n'est mien, & que me laissez aller en paix. Adonc eussiez veu rouiller au Duc Russian les yeux en la teste, tempester des poings sur la table, laquelle il renuersa furieusement, & s'escria à ses gens: Sus, sus compagnons, qu'il me soit mis en pieces le fier pautonnier. Alors Cheualiers, Escuyers, & varletz recommencerent l'assault si chault, que c'estoit fait du bon Prince, si Dieu n'y eust pourueu. Car l'alarme alors fut si fort euecq' le retentissement des rochers, que trois Cheualiers passans y

acoururent à bride abatuë: lesquelz voyans la vaillâce nompareille du seul contre tant, vn qui passoit les autres quasi de toute la teste, cria au Duc qu'il estoit bien lasche de partir si mal le combat. Et que par droit de Cheualerie il donneroit ayde à ce Cheualier, s'il ne luy rendoit raison de son fait. Raison (respond le Duc tout forcené) sera de te traiter encores mieux que luy. A l'instant commande à ses gens qu'on luy print ce Cheualier mort ou vif. Parquoy laissant le Prince vont combattre l'autre, qui les paya tellement à l'abordee, avec l'ayde des deux autres qui estoient venuz avecques luy, qu'ilz n'y eurent pas grand acquest. Car le premier qui s'adressa à luy, ne s'en mesla oncques puy, & gueres mieux n'eurent les deux autres. Lors voyans leurs ennemys, comme ilz les repoussioient delibererēt tuer son cheual souz luy, ce qu'ilz firent, dont il tomba l'un de ses piedz acroché en l'estrief qu'il n'en pouuoit rauoir. Adonc le chargerent si diu & menu, que nonobstant la deffence que les deux autres faisoient pour le secourir, tout eust bien peu valu, sans Amadis de Grece qui estant abandonné pour plus mal traité qu'il n'estoit, leur vint si rudement serrer la queue, que force fut au gens du Duc se retirer d'entour. Le grand Cheualier se releua incontinent, pour les contenter de leurs peines. Lors eulx quatre ensemble menerent tellement leurs ennemys, qu'il se sauua qui peut, & leur Seigneur gaigna le hault du roch avecques peu des siens, le reste demeurant en la place, auquel n'y auoit qu'un seul chemin droit & estroit, qu'un homme seul pouuoit deffendre, contre plusieurs, d'autant qu'il ne faillait, que rouller des pierres contre val, ou il se tint tout ce iour en deffence. Or le grand Cheualier voyant l'autre au secours duquel il estoit venu, & de qui il auoit veu tant de vaillance, eut grand' enuye de sçauoir qui il estoit, si luy dist: Sire Cheualier, s'il ne vous desplaisoit, ie vous prierois m'apprendre vostre nom, à fin que ie vous

vous sçache gré du bon tour que m'avez fait. Tresvolontiers (dist Amadis) & deslaça son armet, le grād Cheualier le recogneut incontinent, & le vint embrasser disant, ha monseigneur Amadis: que les Dieux nous ont fait d'honneur d'auoir trouué celuy qui a esté quis par tāt de gēs, de bien & son encores en queste par le monde. Au nom d'Amadis, le Duc qui estoit sur le roch, oyāt qui estoit celuy que ses gens auoit failly, cuyda creuer de dueil, d'autant qu'il le hayoit mortellement, comme il le monstra tout à l'heure: Car ausi tost eussiez veu gresler pierres du hault en bas pour les asfommer: mais les gentils Cheualiers parent si bien de leurs escuz, qu'ilz ne receurent aucun dommage, ains essayèrent tous moyens de gagner la montaigne, qui leur fut impossible. Toutesfois ne voulans ainsi laisser le Roy impuny, le grand Cheualier qui se descourrit (& estoit la Royne Zahara de Caucaſe) māda ses gens de sa nau qui estoit pres pour assieger la mōtaigne, lesquelz l'enuironnerent par deux iours tant que le Duc se rendit par famine. Mais pour belles paroles ne menaces ne voulut oncques declarer la raison de la haine qu'il portoit si grande à Amadis de Grece, combien qu'il fust son prisonnier de iuste guerre. La Roine entendit de Amadis tout ce qui luy estoit adueni avecques Lucelle, passans en celā & autres propos leur chemin iusques à sa nef, en laquelle ilz entrerent, ou receut Amadis tant de plaisir en sa compagnie, qu'il fut allegé de grand' partie de ses ennuys. Car la Royne estoit pleine d'une ma gesté non commune es autres Dames du monde. Dont il luy dist, & redist souuent, que ce n'estoit à tort q̄ les Dieux l'auoient honoree par leur conuersation, plus que nulle autre, pour les graces & vertuz plus que humaines reluisans en elle. Auquel propos elle souzrioit, comme luy chatouillant l'oreille bien doucement. Mais l'histoire se taira d'eux, iusques à leur lieu oportun.

Des propos que la pucelle Artimire iunt à la princeſſe Oriane allant sur la mer: & du danger ou elles se veirent.

CHAP. LIII.

OR alloit Artimire bien ayſe avecq' le train de la Princeſſe Oriane: eſperant auoir oportunité de luy declarer son meſſage en temps & lieu, comme elle fiſt. Car vn iour trouuant la Princeſſe retiree à part, elle s'aproche, & apres autres propos communs luy diſt. Ma Dame, iaçoit que l'auenture de l'idole des vengeance d'amours ayt aſſez clerement decouuert la grande amytie que le Prince Anaxartes vous porte, auſſi qu'il ſçait par ce moien la bonne volonte dont vous lui reſpondez. Si eſt-ce qu'il ne ſe tiendra iamais aſſez ſeur, ſi ceſt arreſt ne luy eſt prononcé de voſtre propre bouche, vous ſupliant par moy qu'il vous plaiſe me le faire entendre, & ie vous aſſeure pour luy, que vous eſtes l'vnique en ce monde à qui il a voué & deſtiné ſon cueur, ſa vie, & ſon ſeruice. La Princeſſe aiant ouy Artimire, voulut vn peu diſſimuler ce qu'elle en penſoit, & luy diſt. Certes ma grand' amye ie cognois bien la grande vertu du Prince Anaxartes, & le lieu & reputation qu'il tient au iourd'huy entre les premiers Cheualiers deſlite, ce qui me fait l'aymer, comme tous ceux de ſon qualibre: mais d'en rendre autre conte ſelon ce que vous fondez en l'eſpreue d'Armide, ie vous reſpondz par l'exemple d'Alaſtraxeree de qui lon cognoiſt l'affection contraire à l'enchantement. Ainſi luy vſa d'une gracieuſe deffaite pour ce coup. Cinq iours apres ilz firent touſiours bon voiage, au bout deſquelz arriuerent vn matin à venü d'un gros nauire, qui venoit contre eulx a demy voile & d'un autre encores qui venoit la volte meſmes leur aparoiſſant les chaſteaux de poupe & de proué reluisans de harnois, & pluſieurs Cheualiers dedans, qui cognoiſſans les bannieres imperiales de Grece, furent fort ioyeux



d'auoir rencontré si bon burin, dont commencent à crier qu'ilz se rendissent, & allaissent souz vent en signe d'obeissance, les menassant de mettre à fond s'ils resistoyēt. Le Duc de Molosie conducteur de la Princesse se mist sur le tillac, & comme vaillāt Capitaine s'apresta avecques ses gēs, les animant de garder l'honneur, & des dames qu'ilz conduisoient. Ce qu'ilz firent & luy premier inuestissant de telle fureur de trait que les voyles & gabies en estoient toutes herissonnees, iusques à ce qu'estant leurs vaisseaux accrochez à mains de fer les vns aux autres vn grand Cheualier s'attacha au Duc, qui le repoulsa vne bonne heure, mais à la fin le bon Seigneur tomba demy mort, & l'autre luy passa sur le ventre. Ce que voyans les gens du Duc furent tant effrayez qu'ilz se retirerent vn peu, sustentans le mieux qu'il leur estoit possible: mais peu dura leur resistance, car le grand Cheualier & sa bande estans desia dedans le vaisseau, occirent tous ceux qui se mirent en deffence. Lors la princesse Oriane effrayee (comme pouuez ymaginer) se monstra toutesfois vertueuse, en ce qu'oyant le Cheualier plus aparent de tous

demandeur qui estoit le chef de la nef: mais qui estes vous (dist elle) qui me faites tel outrage en mes gens? le suis celuy (respond) qui pour vostre grand beauté vous feray tout honneur & seruice, & à voz parens & amys. Tout le contraire à lors repliqua Oriane, qu'elle le quittoit volontiers de l'un à cause de l'autre, & qu'il se retirast en son nauire, laissant le sien en paix, & que le temps pourroit venir qu'il cognoistroit à son dam, à qui il auroit fait ce tort. On dist bien vray (respond le Cheualier) que grand' beauté est souuent logee en grand simpleesse, elle voit que puis faire d'elle ma volonté, & m'ose bien menasser. Le vous prie la belle contentez-vous sans me donner occasion de me monstrier plus mal aprins en vostre endroit. Ainsi qu'elle luy vouloit respondre, ceux de l'autre nau (dont ie vous ay parlé) approcherent si pres, qu'il veirent quelque mal contentement de la princesse, & entendirent partie de leurs propos, & puis aperceurent les mortz gisans sur le tillac. Si la recogneurent incontinent, & commanderent à leurs mariniers de les accrocher à sa nef, ce qu'ilz firent. Et aussi tost de

deux vaillans hommes & dispositz franchirent le bord, & saillirent dedans, nonobstant la resistance du Cheualier, lequel ilz firent bondir en mer, & ses Satrapes apres, pour donner le plaisir du plongeon à Oriane, qu'elle eut fort agreable. Adonc luy vindrent faire la reuerence le genou en terre, sans soy donner autrement à cognoistre: & elle estoit fort desiruse de sçauoir qui ilz estoient, pour les mercier du bon secours qu'ilz luy auoient donné à son grand besoin. Ma Dame (dist l'un d'eux) ce ne sera pas le dernier que j'espere vous faire. Dequoy le cuer luy iugea que ce deuoit estre celuy qu'elle soupçonnoit, & d'autant plus qu'incontinent apres il luy vint dire qu'il estoit heure de se sauuer, & passer en leur barque, à cause que sa nau s'en alloit à fondz: Dont la prenant entre ses bras la porta en son vaisseau, luy disant bas en l'oreille: heureuse charge, ie te prise autant que celle du ciel que soustenoit Athlas. Qui conferma encores plus l'opinion qu'elle auoit de son cher amy. Si luy respond, Seigneur ie ne doute que ne vous fussiez faire beaucoup pour moy veu ce qu'en auez demonstré. Pource vous prie en continuant, commander que mes Dameselles soient secourues, qu'elles ne perissent. Lors à grand diligence les Cheualiers, Escuyers, & Matelots s'y employerent de sorte que la Princesse perdit bien peu de ses bagues. Surquoy arriua tout aussi tost vn autre nauire équipé en guerre, chargé de Cheualiers armez à couuert dessouz leurs gabaus, & de harnois teintz de sinoples, semez de trouffes & fleches d'or, lesquels voyants ce grand vaisseau aux armes de Grece qui enfondroit, pensans que ceux qui auoient fait la recouffe fissent la violence, hastèrent tellement leurs aproches que deux Cheualiers d'entr'eux se vindrent ioindre bort à bort aux deux premiers, de telle furie que les coups glissans entamerent le bord & les cordages. Disans les suruenans aux autres: vraiment corsaires vous estes venuz à point

pour paier to^r les outrages qu'auez iamais faitz en ceste coste: Et de fait les chargerent de grãde hardiesse: mais si biẽ estoit assailly mieux estoit deffendu, faisans eux quatre vne bataille fort cruelle, q^d dura pl^{us} de deux heures, sans qu'on cogneut l'auantage d'un costé & d'autre: souuent donnoient du nez contre le bord, souuent s'enclauoient en danger de tomber en l'eau. A la fin voyans qu'ilz ne se pouuoient autrement endommager, vn des premiers sauta dedans la nef des autres, desquelz l'un le harpa, & s'entrebraissans cheurent sur le tillac, roulans dessus dessouz longuement, iusques à ce que le Cheualier aux armes verdes & l'autre par le choc contre le bois desclaurent leurs heaumes. Si furent cogneuz Falanges d'Astre & Alastraxeree: lequel se voyant entre les bras de celle qu'il aymoit mieux que soy mesme, pour l'outrage qu'il luy auoit faite se ietta à deux genoux, disant. Ma Dame ie vous supplie me pardonner ceste offence: vous asseurant que mes playes ie tiens bien heurés m'estanz venues de vostre main. La pucelle fort contentee de l'auoir esprouuë si vaillant & adroit, le tenant ainsi entre ses bras luy fit response: le ne trouue autre satisfaction, sinon de vous auoir captif, mais remettons ce chastiment à vne autre fois, & allons desmesler ces deux Cheualiers, car ie doute que celuy qui meine mon frere de ceste façon, soit le seul qui fait la part à tous. C'est luy certes ma Dame (dist-il) Florisel de Niquee qui a esté abusé comme moy. Adonc elle escrie aux deux Cheualiers qui se combattoient aux bras, hola, hola Cheualiers cessez ces acollades si rudes, & les changez en embrassemens amyables. A ces paroles ilz ieterent l'œil sur les deux autres, lesquels se recognoissans leuerent incontinent leurs veuës, presentans les espées l'un à l'autre en confession de victoire. Surquoy Alastraxeree vint caresser Florisel, puy luy dist, monsieur deportez vous de ce second combat de cerimonie, car vous deuez estre vaincu cōme vainqueur au pre-

mier. Ma Dame (respond Florisel) ie pense que Dieu a voulu paragonner vous & vostre frere, pour vne paire extreme en toute perfection. Laissons celà, dist elle, c'est le plus fort que sommes eschapez à si bon marché. Alors survint la princesse Oriane, & la pucelle Artimire, tât ioyeuse que plus ne pouoit : Et apres quelques petitiz mortz de recreation, firent apareiller leurs playes. Ce fait Florisel, ayant sceu de la princesse son auenture, ie fais bon veu à Dieu (dist il) de ne charger iamais Cheualier que ie ne sache comment, & à qui i'auray affaire, car à qui lon voudroit faire plaisir, on porte souvent grand' nuyssance. Le bon vouloir (dist Alastaxeree) excuse, toutesfois ie trouuerois ceste discretion fort louable. Ie ne vis onques chose mieux à propos (dist Anaxartes à Falanges) que vous qui auez eu tant de soing de solemniser sacrifices à ma sœur, & l'auez à ceste fois voulu immoler elle mesme par effusion de son propre sang. En bonne foy c'est tresbelle récompense de la peine qu'elle a eu pour courir apres vous au tēple de l'Idole des vengeāces. A quoy Alastaxeree luy fist response, ne vous en moquez mon frere peut estre q̄ celle qui vous ayme en secret n'e mōstre pas grand semblant, de quoy Oriane rougist. Quant à Falanges (dist Florisel) il deust estre content d'auoir esté si doucement embrassé de sa dame, qu'elle luy a cuydé creuer le cueur au ventre. En telz propos mirent en oubly la tristesse passee, entre lesquelz eurent grand plaisir d'entendre le discours des amours de la Roynie Sidonye, mais le bon Seigneur oublia bien à leur dire le meilleur du côté pour son honneur. Mais vous croyez bien qu'Alastaxeree trouua bon ce qu'auoit fait la Roynie à l'endroit de Falāges pour luy laisser sa part saine & entiere. Or commanderent ilz à leurs pilotes de tenir la route de Babylone, & peu apres le Duc de Molosie reuint à soy demy rauy d'ayse du bon secours qu'il cogneur, & s'enquerant dont estoit procédé le dommage, fut declaré par vn des pri-

sonniers q̄ c'estoit du cousin du roy Breon qui ayant veu son roy occis, s'estoit mis en course luy troisieme pour courir ceste mer & piller & desrober, & faire le plus de tort aux Grecz que possible luy seroit.

Comme la Princesse Lucelle, Arlande & la duchesse Armide, furent volees, & de ce qui leur aduint.

CHAP. LIIII.

LE Prince Lucidor, ma Dame Lucelle sa sœur, & la Princesse Arlande firent grand chere en la maison de la duchesse Armide, deuenant l'empereur de iour en iour plus espris de son amour comme il luy donnoit à cognoistre par sa contenance. Or quelques iours apres que l'auenture fut acheuee la Princesse Lucelle dist à Arlande de Trace que le Cheualier enchanté estoit Amadis de Grece, de quoy elle fut fort couroucee, & plorant tēdremēt disoit. Helas fortune qui te meut de me mettre à chacune foys être les mains de mes mortelz ennemys, pour faire tes ieux de moy? A ha Amadis de Grece, meurdrier de mon trescher frere, ne te contentes tu de sa mort, sans me la renoueller par ta presēce, pour me tirer au cueur si dur estoc? Ce n'estoit pas sans cause, que tu me fis celer ton nom : n'ay-ie pas cause de me plaindre de vous, qui m'auez teu vostre ennemy & le mien? Ma Bōne amy (respond Lucelle) vous ne le deuez prendre de moy en si mauuaise part : car combien que soye indignee contre luy, pour la foy qu'il m'a faucee, si est-ce que les bons tours qu'il a fait aux miens & l'alliance nouuelles avecques les siens, ne me laissent tirer à vengeance si sanglāte que la desirez. Car quant à la mienne ie ne la pourchasse sur luy, que par sa propre main. Arlande s'apaisa vn peu, par la sage remōstrance de Lucelle, & estoient tous fort esbahis de la vie solitaire qu'Amadis auoit mené en ce lieu. Lucidor depescha incontinent vn courier à Constantinople, pour auertir les Princes de Grece

Grece comme ilz l'auoient trouué, estimant qu'il ne pouoit enuoyer meilleures nouvelles à sa fiancée, à laquelle escriuoit qu'il esperoit de bref estre là, n'attendant que la rassemblée de sa flotte pour partir.

Et ainsi le mist en effect au plustost qu'il luy fut possible: mais auant son partement la duchesse Armide luy fist vne chere extreme par tout son país en faueur de l'Empereur de Rome, auquel elle estoit affectionnée cordialement, comme elle luy monstra par quelque peu de faueur familiere. Dôt elle & Arlande conclurent ensemble qu'après eux elles partiroient aussi accompagnées de six Damoyelles seulement pour aller voir la magnificence de Constantinople, & la pompe des noces de Florisel, & de Lucidor, sans se donner à cognoistre.

Mais elles proposoient, & Dieu en disposa bien autrement: car vn iour que la Duchesse auoit ordonné à ses veneurs de tendre les toilles pour courre le cerf, en vn lieu non loing de la marine, elle ordonna que lon dressast quelques tentes & pauillons, au plus pres de la greue, en vn endroit fort plaisant couuert de verdure, ou la mer regorgoit souuent en la bouche d'un fleue sur la riuie duquel estant venuz auecques les Princes & Princesses que vous ay nommees, faisoient estat de tout deduyt. Or commença la course fort chaulde, à laquelle Lucidor & les autres gentilzhommes avec Florarlan ne faillirent & se trouuerent à la poursuyte & mort du cerf, qui les tira fort à quartier du lieu ou estoient les Dames, ioinct qu'on leur fist raport d'une grand laye que les veneurs auoient desbuissonnée de son fort. Or auint durant ceste chasse, que les deux autres Geans cousins du Roy Breen, lesquels auoiēt entrepris l'escumage de la mer contre les Grecz, & leurs alliez, vindrent par cas fortuit descendre en ceste coste, pour rafraischir d'eau leurs galeres. Et ayās ouy hannir les haquenees des Princesses, & sonner la mort au Cerf, tirerent celle part, pour voir s'il y auoit butin. Parquoy voyās

les tentes & pauillons ou les Princesses, estoient, approcherēt si couuertemēt, qu'on ne les aperceut aucunement, iusques à ce qu'ilz fussent dedans. Les Princesses les voians si grandz & demesurez. Dieu scait quelle frayeur elles eurent, quand ilz les vindrēt empoigner: tresioyeux d'auoir pris si belle proye, si ne tarderent gueres en ce lieu, ains troussians bagage en diligence, rembarquerent, faisans voile, & vogans en haulte mer, ou les trois princesses se trouuās es Galeres en pouuoir de ces corsaires, demenerent vn deul si extreme, que c'estoit vne pitié de les voir tordre leurs mains, leuer les yeux esplomez vers le ciel, requerans à Dieu secours. Ce qui n'esmeut les fiers geans à aucune compassion, ains leur imposoient silence: & disoient que si elles estoient sages elles despouilleroient toutes leurs affections precedentes: & que chacū d'eux en choisiroit vne pour amye, qui leur engregea leur douleur, ayant mieux que la nef perist, & elles quant & quant que telle infortune leur auint. Dont disoit Lucelle à Arlande: helas ma Dame de combien nous serions mieux es mains de vostre cruel ennemy Amadis de Grece, que de ces mastins sans verru, ny honneur quelconque. Làs (disoit Arlande) Florisel si maintenant nous venois secourir, ie te pardonnerois toutes les offences de ton lignage. O Amadis! iamais ne me desiray oncq' en ton pouuoir qu'à ceste heure: Et me tiendrois trop satisfaite, de la mort de mon frere, si à ce coup par toy, ou par les tiens, mon honneur estoit racheté. A ha disoit Armide à Lucelle, de quel mal vous estes cause, m'ayāt pēsē faire plaisir veu l'inconuenient present, auquel ie voys perdre tout le loz de ma beauté si bien gardee, pour estre employee en tel endroit? Pendant qu'elles lamentoient ainsi, esloignans le lieu ou estoient leurs bons amys, aucunes de leurs Damoyelles qui estoient eschapees par la fuyte, firent tant qu'elles trouuerent les Seigneurs à la chasse, ausquelz elles racōterent la fortune: qui leur fist aussi

toft tourner bride vers la cofte, ou ilz cuyderent forcener, quand ilz aperceurent les brigands pirates, fi loing que leur veuë pouoit porter. Alors l'Empereur outré iuf au cueur, requift au Prince Lucidor l'ordre de Cheualerie, lequel luy donna, fous veu de l'employer fuyuant la trace de ces anceftres, ce qu'il luy iura. Incontinent enuoyerent gens en diligence au prochain port, pour auoir vaiffeau à fuyure les larrons Geans. Bien reuindrent ceux qui eftoient allez querre les armes, & au mefme instant les autres amenerent vn flouin armé à la legere, & le meilleur voellier qui fust en celle mer, dans lequel Lucidor entra luy cinquantième & l'Empereur, demeurant Florarlan, efgaré à la poursuyte d'un grand fanglier qui ne fçauoit rien de tout cecy. Pour retourner aux deux Seigneurs leur flouin singla bonne route, en esperance de rataindre les galeres des corsaires, fi le temps leur eust voulu durer: mais il se mist du tout à calme, & les vents cheurent de tous coftez, dont les Galeres allans à rames eurent l'auantage, & leur petit vaiffeau demeura tout court. Si Lucidor en fut courroucé, le Prince Romain ne l'estoit moins lequel requeroit aux vêts leurs aïlles pour voler apres s'amyé, puis qu'ilz ne les en vouloient feruir. D'autre costé Lucidor se plaignoit de fortune, si elle feroit iamais foudre des tormens & travaux de luy & de son lignage. Seigneur Dieu, disoit, vueillez sauuer l'honneur de la gēte Lucelle, ou me permettez aborder ceux qui l'ont ainfi rapie, pour la racheter aux despens de mon fang. L'obfcurité de la nuyt les surprint sur ces doleances, durant laquelle ilz ne prindrent nul repos, iufques à l'aube du iour, qui commença à defcouvrir la pleine mer, en laquelle ilz aperceurent de loing deux naux faifans refte l'une à l'autre, avecques fi terribles aubades d'artillerie, qu'à peine les veoit on s'enueftir, qui fut fait de telle dextérité, qu'en vn moment on les veid atachees, vers lesquelles firent dieffer leur vaiffeau, effi-

mât que l'une d'elles pourroit estre à ceux qui auoient volé les Princesses, comme elle estoit. Car quelques Cheualiers qui venoient en l'autre ayans entendu les crys des dames demanderent aux corsaires à quel tiltre ilz les emmenioient: lesquels leur firent refponce, qu'à eux ilz n'en rendroient conte: mais leur manderent declarer s'ilz estoient Chrestiens, amys ou alliez de la maison de Grece, à fin de les coffrer quant & quant. Les Cheualiers ne souffrirent pas telle brauerie fort patiemment, ains fans autre langage commencerent à les festoyer de trait & feuz d'artifice. Puys aprocherent de plus pres, tant qu'ilz faillirent dedans le vaiffeau, avecques telle hardiesse que celui qui auoit à faire au principal Geant luy aualla vne main, dont soudain s'enfuyt en la chambre ou estoient les Princesses, & le Cheualier les fuyuit de si pres, que le fuyant heurtant de la teste contre l'huy qui estoit bas, son armet se deflaça & cheut & le Cheualier à l'inftât lui trêcha la teste, qui alla tôber es piedz d'Arlande qui ploroit tendrement, non pas la mort du Geant: mais le danger ou elles pensoiēt estre. Ce que voyant le victorieux & la recognoiffant, & ses compagnes aufsi (pourtant ne se descourrit à l'heure) flesc hit vn genou deuant, la princesse Lucelle, difant: Ma Dame ie ne dy pas que ce soit moy qui vous face ce present, c'est la Royne Zahara qui est au fait presente. Elle cognoiffant fa voix tant à cause du temps pallié, comme par ce que n'aguères elle auoit parlé à luy: Amadis de Grece (respond elle) ie remercie la Royne, du bien qu'il luy à pleu me faire, & voftre feruice, quand au travail du corps, ie l'adrefse à ces deux Dames, pour le prendre de leur part en recompense, & abolition des tortz qu'elles pretendent auoir receuz de vous. Il la remercia du bon partage qu'elle faisoit de fa personne, comme s'ayant refervé fecretement le cueur pour fa portion. Et se tournant vers Arlande s'encline à genoux deuant elle, difant: Ma Dame fi la bonne inten

intention iuge les ceuures, ie vous supplie humblement pardonner à celuy qui a toujours plus eu de desir de faire seruice qu'injure à telles personnes que vous. Pendant qu'il parloit Arlande contemploit sa grace qui luy representoit celle de son tant aimé Florisel, qui fist fort ployer sa rigueur enuers luy par telle responce: Monsieur, si sans autre consideration vous, & tous ceux qui vous ressemblent, se mettoient à ma mercy, mon estat ne commanderoit la clemence mais l'obligation presente, de l'honneur qu'avez sauué à ces Dames, & moy (que tenons plus cher que noz viez) vous aquite plus que suffisamment enuers moi de la mort que vous querellois. Apres l'auoir remerciee, s'adressa à Armide sur le propos de ce qu'ilz auoiēt endure l'un pour l'autre en l'auenture, qui ne fut sans faire à Lucelle monter la couleur au visage. Sur ces deuis suruint la royne Zahara à qui elles firent grand acueil, & voulans conter l'un à l'autre de leurs fortunes ouyrent vn grand bruit au chastellet de la nef, qui fist soudain reprendre l'armet à elle & Amadis & monter en hault en diligence, ou ilz virent la nef de Lucidor bord à bord, lequel demandoit s'il y auoit en la leur aucunes Damoselles, qu'ilz eussent incontinent à leur liurer. Amadis qui ne les cognoissoit ainsi couuert de leurs armes, leur respondit. Certes Cheualiers, ce seroit à nous grande liberalité, de vous donner ainsi promptement, ce qui nous à tant cousté à conquerre. Si les aurons nous (dist l'Empereur) par amour ou par force, De ce nous garderons nous, respond Amadis: Et soudain vindrent acrocher leurs nauz à grandz pates de fer. Et Lucidor s'atache à Amadis & l'Empereur à Zahara, qui donna a son apprentissage de cheualerie grande esperâce à l'auenir, de ne desmentir en tien sa bonne race. Lucidor aussi fit vn merueilleux deuoir de son costé, ayant à faire à si forte partie. Tous leurs gens se meslerent pareillement les vns aux autres. Mais pendant ce conflit passerent ceux du Duc Brabron qui

entrèrent en la nef de la Royne & d'Amadis, la voiant vuide de toute deffence. Aussi ne trouuerent homme que le Duc Russian qui estoit vn des trois qu'avez entendu. Si luy desclouerent les gros fers qu'il auoit aux piedz, & luy denoncerent la mort de son cousin, dont il conceut grande tristesse. Toutesfoys comme bien auisé, voyant la forte meslee des deux n'aux, commanda leuer les aneres de celle ou il estoit pour singler à plein voile, dequoy personne ne s'aperceut qu'Amadis de Grece, qui laissa aussi Lucidor, & faillit en sa nau, mais elle estoit desia desancree, & l'emporta quant & eux ainsi armé, dequoy le Duc eut ioye nō pareille de tenir son ennemy tant en son pouuoir, pensant bien que l'heure de sa vengeance fust venue. Si esclia à haute voix. Or à luy mes amys, dessus, dessus, celuy qui est cause de toute ma perte, lequel despesché nous n'auons plus que craindre. A son commandement allerent tous charger le bon Cheualier qui les soustint courageusement, & en abatit deux au premier choc, qui oncques puy ne ceignirent espee. Toutesfoys force luy fut pour le nombre qu'ilz estoient contre luy seul, soy retraire au chastel de poupe, ou ayant le doz en sauf, leur fist barbe longuement, & en mist quatre à ses piedz: dequoy le Duc Russian forcené, s'arma du harnois d'un des occis, & vint vers luy criant, retirez-vous canaille, pour me laisser la vengeance qui m'est deuë: Si haulse l'espee & luy en ramaine vn si pesant coup sur l'armet, qu'il la fendit iusques à luy entamer la chair, dont il fut tellement esmeu, que de toute sa force luy en descharge vn, pour luy trencher la teste en deux. Ce qu'il eust fait, sans l'escu que le Duc luy mist au deuant, lequel alla en pieces, & le bras quāt & quāt qui le portoit, Adonc le Duc de rage de la douleur qu'il sentit, luy ieta vn estoc si violent qu'il entra fort auant en l'escu d'Amadis, tāt que le Russian ne le peut si tost retirer, que son ennemy n'eut loisir de luy donner vne taillade sur le bras droit, qui lui cou-

pa net, & demeura tant l'espee qui pendoit en l'escu d'Amadis. Le miserable manchot à ce coup se retira, inuocant tous les Dieux ou diables à son ayde. Et voyant qu'il ne pouuoit auoir la raisõ du preux Amadis se iette dedans l'esquif de fuyte, commandant à ses gens de mettre le feu en la nef, & se lancer avec lui. Ce qu'ilz firent, dont estoit fait d'Amadis, si Dieu ne lui eust enuoyé prompt secours, par ceux qu'il auoit laissé combatans, qui cessèrent leur conffit, par la recognoissance que Lucelle eut de son frere à son escu, & scachans le danger en quoy il pouuoit estre seul, le suyuirēt si à propos qu'ilz arriuerent comme à poinct nommé de son extremité. Adonc il se sauua, non en leurs grandz vaisseaux : mais en vn petit le plus viste qu'il peut choytir, auquel il alla gagner le faux Russian, qu'il ietta en mer, disant. Tu m'as voulu tuer par feu, or reçois la punition par eau, de laquelle guerres ne tarda à fonder le fond, par sa pesanteur de ses armes. Je ne vous scaurois assez exprimer la chere qu'ilz luy firent au retour & les louanges qu'ilz desgorgerent de luy en sa presence, ne l'ayse que les Seigneurs eurent de recouurer leurs Dames : mesme l'Empereur qui se tenoit fort heureux de l'auenture, qui lui auoit donné tel comencement de Cheualerie, en s'esproouuant contre la vaillante Roïne, puis que tout estoit à la fin ramené à bon port. Ce qui le mist plus auant en la grace d'Armide, enuers laquelle il ne pouuoit dissimuler sa bonne volonté, par maintes caresses honnestes, dont il estoit gaudy par les autres, lui rendans ainsi ce qu'il leur auoit presté, de raillerie auant sa passion semblable. Or firent tous regarder à leurs playes, qui n'estoient grâdes, ne dangereuses, ordonnans que tout fust prest, pour le lendemain cōduyre Arlande & Armide en leurs terres, & quant à eulx pour tenir la route de Constantinople. Mais il en auint bien au contraire de leur dessein, comme vous entendrez.

Comme les Princes furent portez par tempeste en l'isle de la Couche enchantee, ou ilz eurent vne merueilleuse rencontre.

CHAP. LV.

Fortune guidée par les mouuemens du ciel, souuentefois tire ses fins à toute autre yssue que ses commencemens ne promettent. Comme elle monstra à ceste noble charge de Seigneurs & Dames, allans ensemble mesme route. Entre lesquelz Amadis de Grece portoit vn grand contentement du bon secours qu'il auoit donné à sa chere Lucelle. Or eurent ilz vent fauorable iusques à la mynuir, que Diane leur monstra ses cornes rouges comme feu, & les Daulphins commencerent leurs carrieres par les ondes, aussi viste que traitz d'arbaleste : Et deuers Occident aparoissoient certains rayons de flâbes, par l'emotion des ventz. Ces signes auertirent les mariniers d'incontinent caler voile, pour euitier la furie de l'orage : mais force leur fut d'abaisser mast & antennes & d'auantage ieter en mer le laitage dont ilz estoient chargez. Au reste se recommanderent à la misericorde diuine ne voyâs esperance aucune en leur art & pilotage. Les Princes à qui leur prouesse seruoit peu en tel endroit, monstroient neantmoins vne magnanimité de courage en leur contenance, pour asseurer leurs Dames & ne troubler leurs nautonniers, par leur cris & lamentatiōs. Elles se mirent toutes en oraisons qu'elles arrosoient de chaudes larmes, vous asseurant que le pire de la troupe estoit lors fort bon Chrestien. Le mieux qui leur auint en ce peril fut que la tēpeste les porta en plaine mer hors du danger des rochz & escueils. Et telle fortune coururent deux iours avec leurs nuitz, au bout desquelz sur le tard, comme à iour faillant, relascherēt en la rade d'vne Isle, en laquelle ilz prindrent terre sans trop cōsulter, cōbien qu'ilz ne la cogneussent, ayant plus cher tout autre dāger nouveau, que de con-

tinuer



tinuer en iceluy dont ilz sortoient . Chacun s'arma & tirerent les dames dehors la nef, tant effrayees quelles ne se soucioyent d'inconuenient qui leur peust auenir . Si firent tendre pres du riuage deux pavillons dedans lesquelz ilz s'asirent sur l'herbe, l'Empereur & Lucidor avecq' Arlande & Armide & Amadis de Grece aupres de sa tant aymee Lucelle . Et lors que le soleil leur failloit de lumiere ilz la recouroient de la lueur des clers visages de ces belles Princesses . Aussi ceste demye obscurité leur donnoit ie ne sçay qu'elle priuauté quasi couuerte pour dire & faire vn peu plus hardiment ensemble . De laquelle Amadis voulant yser apres auoir esté longuement l'vn & l'autre fichez en regard sans aucun propos , le commença tel la larme à l'œil . Ma Dame, ie cognois certainemēt qu'outre le desir ardent que la beauté telle que la vostre cause en toute personne biennee, il y a encores vn naturel plus semblable entre aucunes qui les tire à vne affection mutuelle (que les sages appellent sympathie) qui engendre vne amitié entiere, feruente & inuiolable, de laquelle entre vous & moy noz premieres amours donnent leur tesmoignage, combien que ma

longue absence vous puisse sembler y auoir mis quelque refroidissement, tandis que i'ay esté allié à vn autre par quelque effort des secretes destinees . Mais vo^z voyez que ceste conionction n'est durable, & que vostre astre rapelle le mien à la prime influence qui vous doit faire estimer que mon desir ayt dormy seulement comme le feu couuert souz la cédre qui se refueille maintenant, plus fort & vehement que iamais . Et ne pensez, ma Dame, qu'il y en ayt au monde plus d'vn aparié à vne en telle extremité de volonte, ne qui puisse auoir autre per que moy sur la terre . Nous sommes comme les deux lutz acordez en mesmes tous : tellement qu'en sonnant l'vn, les cordes non touchees de l'autre (qui est mis vis à vis) s'esmeuent & branlent la paille si luy mettez dessus . Ma Dame, si ces raisons n'auoient lieu en vostre entendement, au moins considerez la cigoigne, dont les petitz nourrissent leur mere à leur tour, ainsi recognoissant les plaisirs & seruices que vous ay premier auancez : sinon ceste rigoureuse penitence acheuera mes miserables iours . Tenant Amadis ce propos, il aperceut quelques gouttes pitoyables decouler des yeux de sa Dame: qui toutes-

fois

fois luy rendit fort froide responce, luy disant qu'il ne deuoient plus longuement deuiler ensemble, pour ne mettre les autres en pensee. Adonc s'allèrent ioindre à eulx, & sousperent de ce qu'ilz auoient.

Mais pour musique suruint vne volée de chauteforis, chatz huans & autres oyseaux de nuyt si espesse qu'elle couuroit l'Isle comme vne nuë iettant criz & chantz si hideux que c'estoit horreur de les ouyr. Puis soudain aperceurent d'un costé de l'Isle vne si grand flambe qu'elle leur donnoit clarté, telle qu'eust fait la pleine Lune. Adonc ouyrent comme d'assez pres vn cry de femme si douloureux qu'ilz en eurent grand pitié. Parquoy Amadis de Grece print vn cheual pour aller au secours, ce que fist pareillement la Royne Zahara, disant qu'elle ne l'abandonneroit, puy qu'elle l'auoit trouué la premiere. Si monterent & s'en allerēt ensemble à course de cheualx du costé du cry, mais ilz n'eurent gueres esloignee de leurs cōpagnons, quand il leur fut auis qu'ilz entendoient vn grād cliquetis & chammaillis. Dont l'Empereur Arquifil & Lucidōr, ne seiournerent trop à aller apres pour leur dōner ayde, laissant les dames en la garde de leurs gens fort tristes ainsi delaissees pour les accidens qui leur pourroient suruenir en leur absence. Or Amadis & la royne n'eurent cheuauché gueres loing ensemble suyuant le ton du cry quand ilz se trouuerent pres d'un chasteau, ou ilz virent vn Cheualier traināt vne Damoysselle par les cheueux qui lamētoit fort piteusement, auquel ilz esclierent qu'il la laissast, mais il n'en fist conte, & la tira iusques au dedans du chasteau, si courent apres à bride abatuē pour la sauuer, ne craignans sinon qu'on leur fermast la porte au nez, laquelle ilz trouuerēt ouuerte. Si mirent pied à terre, & menans leurs cheualx en main entrerent dedans la court, ou ilz ne veirent que toute ruine, sans rencontrer personne de qui ilz peussent scauoir que le Cheualier estoit deuenue. Parquoy furent contrainctz d'aller à ratons par

les tenebres, iusques à ce qu'ilz gaignerent vn huis d'un iardin au quel ilz remōterent à cheual & suyurent assez longuement vn chemin tirant vers vne riuere, tant qu'ilz vindrent à vn perron, sur lequel estoit vne iamage tenant vn roulleau en la main qu'ilz ne sceurent lire à cause de l'obscurité: mais si tost qu'ilz l'eurent outre passé sentirent vn mouuement extreme d'affection mutuelle l'un enuers l'autre, telz qu'ilz auoient eu l'autresfoys qu'ilz y furent conduitz au trac du sang à la vengeance cruelle de Mirabelle, dequoy le tēps leur auoit osté la souuenance. Tout en la sorte allerent à la fontaine des perrons, là ou le serain estoit vn peu morne, avec vn doux bruyt de veriouant parmy les arbres, qui les conuia à se coucher au riche lit, autresfoys par eux foulé (cōbien que non recogneu) si se desarmēt l'un l'autre & en grand plaisir & iouyssance de leurs amours y passerens grand partie de la nuyt. Adonc leur reuint en memoire le deduyt qu'ilz auoient auant pris, dont estoient sortis les deux excellens Princes Anaxartes & Alastraxeree. Dequoy Zahara premiere parla à Amadis, bien esbahis, comme ilz l'auoient ainsi oublié au sortir de ce lieu, le benyissant du precieux fruit qu'il auoit porté, non sans requerir à Dieu de leur conseruer la souuenance de ceste gloire. Sur ces entrefaites passe par là vn Cheualier monté & armé de toutes pieces qui les aperceuant tant à leur aysé, leur dist de grand fureur. En manlieu soyez vous logez qui tāt m'auiez dōné de peine ceste nuit pour vostre plaisir. Sus sus, debout dam Cheualier si ne voulez que vous trenche la teste sur ce cheuet. Amadis de Grece peu coustumier de porter patiemment telles brauades, ioint le tort qu'il luy faisoit de luy rōpre ses delices, luy respond. Je croy par ta fiere parole que serois bien celuy qui nous auroit si bien pourmené à la recouisse d'une Damoysselle q tu outrageois lachement, dōt tu eschapas au soir le chastiment par ta fuyte, lequel (comme Dieu veult)

tu es reuenu chercher à la mal'heure. Le Cheualier lors sans repliche se recula vn peu, pour luy donner loysir de s'armer. Ce qu'il fist à l'ayde de la Royne qui desiroit la vengeance de l'injure qui leur auoit faite les ostant si tost de leur paradis. Et elle se recouche pour voir du liēt tout l'esbat. Aux rayōs de la Lune Amadis s'en va vers celui qui luy dist incontinent. Monsieur du braue liurez ceste Dame entre mes mains, à fin que sçache si luy auez fait force, sinon gardez-vous de moy. A quoy Amadis trop irrité, ne fist autre responce que de s'essoigner & retourner la lance baissée, & l'autre pareillement. Si se rencontrerent de telle roydeur, que leurs lances vollerent en esclatz, & les hommes & cheualx roullèrent tous en vn mont, ou ilz furent vne espace estourdis, puy se releuans cōmencerent le plus dur estour qu'on eust veu iamais de deux Cheualiers : car il sembloit qu'ilz ardisent pour le feu qu'ilz faisoient saillir de leurs armes, lesquelles tant ilz dehacherent qu'ilz vindrent à tirer le cler sang de leurs corps: qui mist Amadis en grand' doute de l'ysuē de son combat, assēré de n'auoir oncq' rencontré son pareil, moins ne descouroit l'autre de sō costé, toutesfois s'esuertuoiet de tout leur pouuoir pour ne monstrier apparence de crainte l'vn à l'autre: tellement que de la charge de leurs coup s'entre faisoient agenouiller, puis mettre les mains en terre. Dequoy Amadis trop estonné, disoit entre ses dens : Seigneur Dieu preseruez-moy de ce diable cy : car si ce n'estoit personne face, il n'eust tant duré contre mon fer de si bonne trempe. Seigneur ie croy que tu me l'as enuoyé pour me chastier des offences que ie commetz contre ma bonne Niquee. O Lucelle, puy que tu en es cause, depars moy quelque faueur, & rien ne me pourra plus resister, c'est par faute d'elle qu'vn seul Cheualier me peut faire telle honte. L'autre estoit en grand' doute de sa personne si leur combat duroit plus gueres, qu'ilz auoient continué pres

d'vne heure, combien qu'il n'en monstirast aucun semblant. Et à l'instant ouyrent vn aussi horrible bruyt assez pres d'eux, comme si vn roch fust tombé, auquel tous deux allerent par terre, se tenans embrassez à la lute, & y furent vne grand piece pasmēz, ne remuans bras ne iambes non plus que mortz. Et sçachez qu'à l'heure mesme qu'ilz tomberent à ce tintamarre la chambre & les perons de la Royne furent totalement deffaitz & aneantiz, elle se trouuant en chemise sur la verdure, bien memoratiue de la fortune qui luy estoit là aduenū (comme il nous souuiendrait d'vn songe) dequoy elle fort honteuse & courroucée en son cueur, se print à dire : O faulx Dieu qui m'auēz si longuement abusée en vostre creance, contentez-vous à ce coup, d'auoir ainsi violé ma chasteté, souz le masque du Dieu Mais, de qui ie pensois auoir conceu mes deux enfans. Desormais prends congé de vostre malheureuse idolatrie, me rengant à la foy que tient celui que j'estime plus que vous autres, comme le prime de tous les mortelz, dnquel la vertu courra ma faute d'vn precieux manteau, avecques l'excellence du fruiēt qui en est yssu. Ie vous renonce à iamais, & m'en voys secourir celui à qui ie suys tant tenue & obligee. Alors elle s'arme, & monte à cheual pour aller vers luy : le Soleil estoit leué, & eulx aussi pour recommencer leur meslee. Si aperceut vn Cheualier qui venoit la mesme part qui l'estimant venir au secours de l'autre contre son compagnon, si la deffia de loing. Contre qui (pour le vous faire court) elle eut vn trespas confit, tant des lances que des espees qu'ilz maintindrent longuement sans auantage, non plus que les deux premiers qui chamailloient sans relasche. Adonc suruindrent en ce lieu l'Empereur Arquissil & Lucidor, qui toute la nuit s'estoient fouruoyez, voulans suyure Amadis & la Royne : Et à la pointe du iour auoient trouuē la porte du iardin qui les auoit ren-

duz la au trac des cheuaux. Ilz cogneurēt incontinent leurs compagnons à leurs armes. Mais au deuant leur vindrent d'autre costé deux Cheualiers qui leur trencherent le passage : contre lesquelz ilz eurent leur ieu party comme les autres quatre.

Ainsi combattirent hniēt Cheualiers en ce lieu, menans plus gran bruyt, que ne feroient vingt cerfz en rut, s'entrechoquans dans le boys. Comme les derniers tous fraiz batailloient ensemble, Amadis & son auersaire tant lās, tant vuydes de leur sang, que plus ne se pouuoient tenir en piedz, cheurent tous deux comme mortz, pres l'un de l'autre. Ce que voyant la Royne & celuy contre qui elle combattoit, renforcerent leur conflict de furie, deliberez de ne partir sans la vie de leur enemy, en vengeance chacun de celuy qu'ilz iugeoient auoir rendu l'ame. Autant en firent les quatre derniers. Mais peu dura la Royne (tant fut troublee de la cheute de son Amadis) qu'elle tomba royde en la place. Lors son ennemy se ieta sur elle & luy arrache l'armet, en volonté de luy trencher la teste, laquelle recognoissant, tout pasmé s'estendit aupres d'elle. Alors les deux Cheualiers qui combattoient contre Lucidor & Arquifil furent tellement esmeuz, pensans leurs compagnons estre occis, que ilz rechargerent les deux si rudement, que malgré eux leur connint perdre quelque peu de terre, combien qu'ilz tinssent tousiours bon. Et plus leur fust mesauenu, si la partie de la Royne ne fust reuenue à soy, qui se descouuroit le chef pour prendre air. Et commença à gemir.

Lās moy chetiue, qui de mes propres mains ay meurdry ce q̄ plus i'aymois en ce mode. Lucidor la recogneut aussi tost (& sachez que s'estoit Alaſtraxeree) si se tira vn peu arriere : dequoy son ennemy luy dist reproches de couardie: mais il luy respondi qu'il le faisoit voyant la Dame à qui il estoit tant redevable, qu'il debuait prendre les armes pour elle & non contre. Tāt pis pour vous (replique l'autre) car à moy seul

apartient le tiltre de son Cheualier. Et qu'estes vous si hardy de l'ysurper? Quand il se fut nommé, cestuy le courut acoller, qui estoit Falanges d'Astre. Puy luy demanda qui estoit le premier qui cōbatoit contre le Cheualier sās per. C'est le Prince Amadis de Grece (dist Lucidor. O Dieux immortelz (s'escrie adonc Falanges) comme auez vous permis que le pere & le filz se soient ainsi entrepriuez de ceste lumiere, desquelz le monde la receuoit plus grāde que du Soleil mesme. Lors s'en va Florisel, auquel il oste l'armet, & luy pose le chef en sō giron, que voyant tant pale & refrigeré arrose de ses chaudes larmes. Arquifil lors & sō auersaire (qui estoit Anaxartes) laisserent leur combat, qui s'en alla à sa mere: & Arquifil à Amadis, les plorās tous pour vrayement mortz. Si vous raconteray maintenant quelle fortune les auoit ainsi assemblez en ce lieu auentureux.

Comme les Dames qui estoient demeurees au riuage vindrent trouuer les Cheualiers sur lesquelz elles firent pitieuses complaintes.

CHAP. LVI.

LEs Princesses qui estoient demeurees au riuage de la mer passerent la nuit en grande crainte, qui leur diminua vn peu la pointe du iour. Puy l'affection qu'elles portoiēt aux Cheualiers, leur dōna hardiesse de se mettre en leur queste. Si allerēt au chasteau qu'elles traueserent, & de là entrerēt au grād verger ou elles apercurēt de loing reluyre leurs harnois, y arriuant à l'heure qu'ilz estoient en l'estat que vous ay raconté. Arlande qui y arriue la premiere, si tost qu'elle auisa Florisel tellement atourné, gisant au giron du Prince Falanges qui lui baignoit toute la face de ses larmes, elle perdit si biē sa vertu qu'elle tomba ius de son pallefroy, par l'extremité d'amour qui la surmōra. Moins n'en auint à la princesse Lucelle, voyant Amadis de Grece en si piteux arroy. Car sa grādeur ne

l'india

l'indignation qu'elle auoit contre lui, ne le respect de Lucidor son frere qui le tenoit entre ses bras, ne la sceurent contenir de mettre en euidence la vraye amour qu'elle luy portoit secrettement en son cuer. Oriane fut aussi saisie de grande douleur de voir en telle ordre le pere & le filz: tellement que toutes trois donnerēt peine aux autres de les secourir par remuement & eau fresche qu'ilz leur ietterent au visage, tant qu'elles reuindrent en leurs sens, d'autant plus tourmentees que quand elles ne sentoient leur affliction. Lors commencerent à faire si grieues lamentations qu'elles faisoient les assis sans fondre en larmes: en descourrant clerement en ceste extremité ce qu'elles auoient long temps celé par la loy cruelle d'honneur. La Royne Zahara fist sa harengue apres les autres, pleine de grand' prudence, declarāt la cognoissance qu'elle auoit du long abus, auquel elle auoit vescu avec action de graces au grand Dieu qui luy auoit daigné enluminer l'entendement, laquelle faisant fin, au grand esbahissement de tous, mesmement de ses deux enfās, lors qu'ilz luy cuydoient respondre furent acablez d'une nuē, avec vn horrible tintamare, qui les priua tous de leur sentiment. Et apres se trouuerent en vne salle carree de richesse inestimable, dont le lambris estoit d'Or & d'Azur, & les verrieres clers comme cristal, peintes d'ymages excellēs, & au mylieu estoit toute l'histoire de Mirabelle en pleine bossē, de la sorte qu'Amadis de Grece & la Royne l'auoient trouuee, aussi estoiet les voutes de la sale soutenues de belles statues de bronze taillees de main exquisite, qui representoient tous ceux qui auoiet loyaument aymē, desquelles le pis estoit ouuert à l'endroit du cuer, qui se mōstroit comme de fin acier, graué des effigies de celles qu'ilz aymoient, embrasē de viues flambes. Et en deux coings de la sale veirent deux litz de camp, auquelz gisoient Amadis de Grece & Florisel de Niquee retournez de pasmoison, cōbien que foibles & debilitēz

fussēt. Et entre les litz estoiet assis d'un costé la Royne Zirphee, avec le sage Alquif & Virgande, & de l'autre le bon vieillard maistre Elizabeth. Au dehors tout au circuit de la salle y auoit cinquante pucelles toutes richement vestuēs, sonnās de diuers instrumentz, qui donnoient grand plaisir à la compagnie, principalement à Anaxartes & Alastraxeree, quasi rauiz de ioye, voyans leur pere en telle gloire, apres l'extremité ou ilz cuydoient tenir. Alors le sage Zirphee commença à dire: Auant toute œuvre, que les peres, enfans, & freres, parlent ensemble. Adōc la Royne Zahara prenāt son filz & sa fille à ses deux mains, s'en va au lit d'Amadis, & luy dist: receuez désormais la possession de ce qu'avez peu prendre de moy, cōtre la propriété de mon honneur. A ce mot luy voulurent baiser les mains, ce qu'il ne souffrit, ains les embrasse l'un apres l'autre, demeurans longuement ainsi sans mot sonner, quasi transis de contentement. Et de là allerent vers Florisel, qui leur donna pareilles acollades, & Oriane à son tour, ayāt la larme à lœil de lyesse extreme. Or est raison que ie vous deuise plus à plain la vraye forme de cest auenture, & comme tous ces Seigneurs & Dames se peurent ainsi rencontrer en ce lieu.

Des grands merueilles de la salle de Mirabelle & de Monstrucuron.

CHAP. LVII.

VOUS avez cy deuant entendu, comme les Princes Florisel & Falanges se rencontrerent avec Anaxartes & Alastraxeree, à la rescouite de la princesse Oriane: & depuis comme tirant la route du port, furent portez par tempeste en l'Isle de Rhodes: non toutesfois du costé ou estoit Amadis de Grece: mais en la rade vers le grād chemin qui alloit au chasteau principal de l'entree du boys, ou ilz furent tresbien recueilliz & traitez par le Duc Hordā, gouuerneur du país: Là ilz apprirent

les nouvelles des auentures du chasteau de Mirabelle : qui tomberent incontinent es cueurs du Prince Anaxartes & de sa sœur, comme leur appartenans, & non à autre, à cause de la partie diuine qu'ilz s'estimoient tenir. Si resolurent sur le champ de l'aller esprouer. Dont prenans congé des autres seigneurs monterent sur leurs cheuaux, arriuant le iour mesme que les mitteres auindrent, & à l'heure de la nuict, que toute l'Isle leur sembla peuplée de ces oyseaux nocturnes de chant si espouuentable, & en ceste ceremonie, veirent maintes choses monstrueuses, & hideuses, que l'on n'y auoit veu depuys Monstruofuron, ainsi qu'il vous a esté discouru en la seconde partie d'Amadis de Grece : entre lesquelles leur aparut la pucelle que le Cheualier sembloit traîner apres luy, criant & gemissant: laquelle aussi Florisel & Falages rencontrerent (ayans laissé la Princeſſe Oriane au chasteau) furent toute la nuyt à la pourſuyte, iusques à l'heure, que Florisel trouua son pere au liſt de la fontaine avec la Roynne, lequel il print pour le Cheualier outrageux, iugeant qu'il forçoit lors la pucelle. Amadis pareillement iugea que ce fust celuy, qui luy auoit tant donné de peine à queſter, qui fut cause de la dure meſſee qu'ilz eurent ensemble. D'autre coſté Anaxartes & Alaſtraxeree eſſans au chasteau, ou ilz ne trouuerent autre entree que par les portes d'Ambre, y veirent l'eſcriteau qu'ilz voulurent prendre, mais incontinent s'embrasa de flambes ardentes, quisemblerent monter iusques au ciel: qui lors donnerent ceste grand' clarté aux Princes qui estoient au riuage de la mer. Et tandis que les portes bruſſoient, les gemeaux ouyrent dedans des crys merueilleux. Puis les portes du tout arſes, aperceurent en la ſale vne grād' lumiere, & y cuydant entrer, furent longuement repouſſez par vn grand nombre de Cheualiers. A la fin entrerent, & veirent les ſtatues enflambees du feu de leurs cueurs, & Mirabelle enuironnee de ſes Damoyſelles, ſonnās pi-

teuſe melodie, qui les retint là vne grand' eſpace, iusques à ce qu'ilz apperceuren vne porte faite en arc, paincte de toutes les couleurs, que fait le Soleil es nuës chargees de pluye. Par laquelle ilz entrerent en vne autre ſalle, toute muree de belles verrieres, eſquelles eſſoiēt pourtraites les hſtoires de tous ceux qui bien ayans auoient donné fin glorieuſe à leurs vies, eſtant au centre de la place le combat d'Amadis de Grece contre Monſtruofuron, eſleué en boſſe ſur vn plan de laſpe, que ſix Lyons ſoute-noient. Et à coſté y auoit vne ſtatue de Geant à phiſonomie d'vn ſage, couuert d'eſcriteaux, diſans en lettres Grecques.

PROPHETIE.

Au temps que les artz d'Aſtrabon le magicien, ſeront acheuez par les deux baſtardz Lyon & Serpente, les peres celeſtes perdront la gloire de leurs enfans terreſtres, eſtant tourné à celuy qui l'a furtiue-mēt conquiſe de ſa belle eſpouſe, ſon honneur ſauf. Et recourira en terre la poſſeſſion de ce dont le ciel avec ſes citoyens à iouy. En ce temps le legitime Lyon rencontrera ſon pere en la queſte du Lyon & de la Serpente, ſans s'entrecognoiſſre iusques au poinct de la mort. Puyſ à leur cognoiſſre ſera entenduē la ſuſtāce de la Prophetie de Monſtruofuron, & de Mirabelle.

Ces eſcriteaux les gemeaux leurent & releurent, ſans les pouuoir comprendre. Et lors auint le grand bruit, qui rua ius tous les Cheualiers de la ſalle: hors mis Amadis de Grece qui eſtoit plātē au mylieu & les enchantemēs furent d'eſſaitz, dont il ſouuint à Amadis & la Roynne de ce qui leur eſtoit auenu par le paſſé. Parquoy le frere & la ſœur fort contens de l'honneur qu'ilz auoient gaigné à l'acōpliffement de ceste auenture, ſortirēt du chasteau. Et elle monta à cheual pour aller aduertir ſa compagne de ceste belle rencontre. Mais en chemin auſa le conſict du pere & du filz, ou elle print part, en s'adreſſant à ſa mere,

com-

comme vous a esté déclaré. Puy y surue-
nans Lucidor, & l'Empereur, Falanges &
Anaxartes, ilz eurent l'escarmouche ensem-
ble. En ce temps les sages dessus nommez
se firent porter en vn char en l'air par deux
dragons, iusques à Constantinople, ou l'og
temps auoit que le roy Amadis sejournoit.
Si luy dirent, qu'ilz auoient necessairemēt
affaire de maistre Elizabel, lesquelz ilz
emmenerent au lieu de la bataille, ou ilz
donnerent tel secours, que lon auoit me-
stier, rendans le pere & filz combatans sans
sentiment, iusques à ce qu'ilz furent portez
en la sale carree à part, & les autres en di-
uerses chambres du chasteau, ou ilz reuin-
drent les premiers de leur esuanouissement:
puis allerent en la salle celebrer le resueil
des deux principaux, avec deue ceremonie.
Je laisse icy à vous deschiffrer par le menu,
les longs propos qui furent tenuz entr'eux
apres ceste recognoissance: & la grand' lies

se qu'ilz demenerent au sortir de telle an-
goisse, tandis que les deux Princes ache-
uoient de guerir. Si sejournerent en ce lieu
enuiro vn moys. Puis delibererent d'ailer
tous en vne troupe, au Royaume de Thra-
ce, & de la à Constantinople, pour porter
eux mesmes leurs ioyeuses nouuelles. Or
conclud la Royne Zahara qu'elle & ses
deux enfans yroyent pour estre baptisez, &
autant en delibera Falanges, combien qu'il
ne s'en vantoit pas: Parquoy s'embarque-
rent tous ensemble, en tresgrand' ioye, &
regagnerent le Royaume de Thrace, dont
n'agueres ilz estoient parriz, ou ilz trouue-
rent les flotes de l'Empereur, & de Lucidor
ralliees. Ainsi acompagnez prindrent con-
gé d'Arlande & d'Armide, avec promesse
d'assister à leurs nopces. Puis singlirent la
route de Constantinople, ou ilz furent re-
ceuz en la plus grād' pōpe & lyessē, qui fust
au mōde possible, cōme pourrez entendre.

*Comme les Princes arriuerent à constantinople, & comme Lucidor alla porter les premieres
nouuelles de toutes leurs auentures.*

CHAP. LVIII.



LE Soleil sembloit d'vne clarté non la saison tenoit druē & entrepeinte de
acoustumee egayer la verdure, que couleurs infinies, par le pinceau du plai-
lant

fant moys de May, quād les deux flottes arriuerent à telle distance de la grand' cité que lon les pouuoit descouurir en mer, sās toutesfoys pouuoir deschiffrer ne specifier leurs bannieres & pennons, qui effraya grandement les Roys Amadis & Galaor, & les deux Empereurs Ffplandian & Lisuart, & maintz autres Princes & Seignrs, arriuez de diuerses contrees au iour assigné des noces, de la belle Helene, lesquelz tenoient toute la prairie à l'entour, couuerre de têtes & pauillons vn peu plus ioyeux, que ceux de l'an passé. Les Princesses Grecques à ces nouvelles estoient montees es haultes tours du palays, qui eurent leurs tendres cueurs tous transis de telle veuë.

Mais à ceste surprinse les Roys & Empereurs ne furent tardifz à prendre les armes, & aller atendre les estrangers sur la greue, lesquelz venoient en la plus grand' pompe & brauerie qu'on scauroit ymaginer, les vaisseaux rebatans le Soleil de la lueur des harnois pollis, & des couleurs des estandartz & pannonceaux fichez es chasteletz & rambades. Mais à l'aborder fut le plaisir, par ce que tous leurs engins à trait & artifices de feux ilz tirerent au hault & au loing à coups perduz par dessus le peuple Grec rengé en bataille: qui leur osta la moytié de la paour, laquelle passa toute quand ilz furent plus pres, & cōmencerent à sonner trompettes & clairons de salut. Aussi ceux de terre recogneurent au certain les armes, & blasons des galeres & nauires, puy ouyrent les cris ioyeux.

Rome, Rome, France, France. Qui les asseurerent entierement du surfaulx qu'ilz auoient en de prime face. Les Princesses à l'heure seicherent leurs chaudes larmes & cōmencerēt à tressaillir de ioye d'estre abusees tant à propos, dequoy les mains iointes rendirent graces à Dieu. Estans les nauigans à vn trait d'arc du riuage, le Prince Lucidor leur requist luy faire ceste grace d'estre l'ange annonciateur des bonnes nouvelles de leur venuë, en recompense de celles qu'il auoit apoitees l'annee prece-

dēte, ce qui luy fut acordé tresvolontiers. Si descendit en vn esquip tout vestu de drap d'or acompagné de douze, tant Ducz que Cōptes François, ensemblable parure, hors mis l'enrichissement de pierrerie qui esclatoit merueilleusement sur luy. Si fut bien venu & caressé de bon cuer: ne le vous conuient declarer, veu les occasions si grādes. Toutesfoys luy demāderent pourquoy il desembarquoit seul de ceste flote, estimant bien qu'il y eust encores autres chefz. Messieurs (respondit-il) allons s'il vous plaist en la ville, là ou ie vous rendray conte deuant les Dames, de ce que requerez, payans les vsures de ma premiere triste venuë en vostre port, par les plus ioyeuses nouvelles qu'eussiez peu iamais esperer à vn coup. A quoy luy dist le Roy Amadis: Mon bon Seigneur, vous ne les scauriez apporter meilleures que de vous memes. Or allons, & soit vostre volonté faite à laquelle la nostre ne sera iamais differente. Lors le mettent au mylieu d'eux, se deuisans avecq' luy de la bonne basque qu'il leur auoit baillee, arriuat en tel equipage, sans auertissement prealable. Si le menerent droit en la grand' sale du palays, ou les Dames estoient assemblees pour les attendre, scachans desia par quelque auant-coureur que c'estoit le Prince Lucidor, lequel elles receurent en grand' solemnité & lyesse, mesinement, sa chere fiancée, à qui apres auoir dit le petit mot, il vient vers les princes Grecz, ausquelz il dist, estant escouté de tous: Messeigneurs, le Dieu souverain architecte de ce monde, nous y fait iouer les tragedies tristes & sanglantes quād il luy plaist, puy les comedies & farces ioyeuses, quand son diuin vouloir le porte. A quoy nous fault renger noz volontez suiettes, faisans de necessité vertu, sans regimber contre l'esperon, en se plaignant de ses ordonnances fatales. Les grandes auersitez il nous enuoie, pour nous faire cognoistre sa grandeur, & nostre imbecillité: & apres la pluye le beau temps, en tesmoignage de sa bonté, qui ne nous veult

veult abismier & destruyte selon sa puissance, & nostre demerite. Je ne vous ramèteray les miseres passees mais vous annonceray telles nouvelles, dont ie croy que nul de vous ne me plaindra les grandz : car en telles choses Dieu a vsé de moy pour moyen comme du Scorpion qui a fait la playe se tire apres le remede. Je m'adresseray à vous premiere, ma Dame Niquee vous declarât que vostre Amadis de Grece estant enchanté en la queste de la Princesse Arlande, à caute de son frere qu'il auoit occis pour l'amour de vous, non seulement fut desenchanté par ma sœur Lucelle: mais auerty du danger, dont il se sauua, voire depuys luy presta telle ocaſion, qu'il rendit à vn coup à ma sœur le plaisir que elle luy auoit fait : & conuertit la haine mortelle d'Arlande en vraye & cordialle amytie, les deliurant des mains d'un Duc Payen, qui les emmenoit en vengeance de son cousin le Roy Breon. O quelz ieux de fortune ! nous apres arriuant au secours de ces Dames, nous atachons à lui sans le cognoistre, ou eusmes tel affaire que sa vertu vous peult inger. Ce pendant luy eschappoit le faulx Duc, s'il ne se fust lancé dedas sa nef, qui l'emporta seul entre tous ses ennemys. Ou c'estoit fait de lui sans l'heure que Dieu nous dôna de l'aller tirer de peril si certain. De là fortune de tēps nous porta en l'Isle de Rhodes, ou par rencontres estranges, ce vaillant Prince eut tel conflit contre le preux Florisel son filz, qu'ilz demurerent en la place tous deux pour mortz. En la faueur du pere la braue royne Zahara soustint contre la Princesse Alastraxeree. Et l'Empereur de Rome contre le fort Anaxartes. Et moy cōtre le hardy prince Falanges. Mais l'inconuenient auenu du pere & du filz, la Royne fut recogneuë, qui mist fin à tous noz combatz: Jaquelle nous declarant (apres les larmes solempnelles, espanduës sur les deux Princes roides gisans) comme par force de sort & enchantement, que ie vous certifie (regardant Niquee) ilz s'estoient assemblez vne

autrefois, dont estoient yssus les gemeaux Anaxartes & Alastraxeree: dequoy elle n'auoit eu cognoissance ne souuenance, sinon à la seconde fois, retrouuez ensemble en ce mesme lieu, qui leur remist la premiere en memoire par le desfinement du charme. Ainsi que nous estions en ce descōfort fumes tous enchantez, iusques à la venue de la Royne d'Argines, du sage Alquif, Virgāde, & maistre Elisabeth, lesquelz nous remirēt en nostre estat, ioint l'auertissement du sage de Mirabelle, par lequel tous les secretz du chasteau furent descouuers : le pere & le filz guaris de leurs playes & les gentilz bastardz cherez par le pere si long temps incogneu. Or viennēt tous ces Seigneurs & Dames en nostre flote, mesmement la princesse Oriane qui fut rencōtree sur mer, & deliuree par estrange auenture. Ilz m'ont fait honneur de la presente ambassade, reste à moy de retourner vers eulx pour les liurer entre voz mains en verification de ma parole. La ioye fut si grande de ces nouuelles, qu'il n'y eut celuy ne celle à qui la larme n'en vint à l'œil de plaisir extreme. Si escrierent tous d'une voix, les cheuaulx, les cheuaulx. Les Dames n'eurent la patience de les atēdre de pied quoy ains monterent quant & les Princes qui les menerent de bride iusques au riuage: ou la troupe tant desirée vint à force de rames. Desquelz vous pouuez estimer les bien venuës & caresses, selon les grandes affections reciproques, mesmement d'Amadis de Grece & de Niquee, & de Florisel & d'Helene : qui furent long temps aux bras, sans pouuoir parler les vns aux autres tant estoit la langue saisie de l'emotion du cuer. Les gemeaux recogneuz vindrent faire la reuerence aux Roys & Empereurs les genoux en terre, requerans les mains à ceux qui les baisèrent & rebaisèrent plusieurs foyz en la face. En ceste lyesse s'en vont chacun Seigneur costoyant sa Dame, en la grand' cité, avecq' tant d'instrumens de Musique qu'ilz ne s'entendoient pas parler : qui furent encores renforcez

en la ville, ou ilz trouuerent les ruës si peuplées de gens, qu'à peine pouuoient ilz passer: lesquels à haute voix crioient: Bien viennent les excellens Princes qui tant honorent la region de Grece. Benoist soit le iour que le Cheualier de la verde espee y mit le pied, duquel nous est venu le tresnoble sang, parlans du vieil Roy Amadis. En la salle du palays furent encores les acollades renouuelles & chascune voulut entendre de chacun tout le discours de leurs auentures, tout par le menu, mesmement Niquee, qui tira la belle Lucelle à part, de qui elle trouua la beauté merueilleuse, & l'autre se miroit en la sienne, excusant fort en son cueur son Amadis, de l'effort que sa volonté auoit peu souffrir. La ioye fut pareillemēt de Siluie, se voyant de nouuel si bien aparentee de la Royne Zahara, & de ses enfans. Mais toutes les aydes de ceste cōpagnie ne reçoient recit special, non plus que les faitz d'une pleine bataille. Tant vous puis dire que la feste publique de ce ioyeux retour dura l'espace de quinze iours: au bout desquelz la Royne Zahara, son filz, & sa fille furent baptisez, puis le prince Falanges à l'enuy: lequel le soir apres le festin se vint presenter denant les princes, avec telle harenque. Treshaultz & trespuissāz Seigneurs, la hardiesse de mes pensées, qui s'estoient par cy deuant adressees à vne diuinité presumptiue, ne me baïsse auourd'hui les aïsses, la cōnoissāt tournée en lignage humain exauce par vertu heroïque, par dessus la fragilité mortelle: aussi ne perdz-je le cueur de l'atenter comme parauant, moyennant l'ay de q̄ ie trouue nouuelle en voz maiestez, par la recognoissance de la parenté de celle à qui de long temps i'ay voué mon cueur, mon honneur, & mes biens. Laquelle (si vous iugez, que i'ay iamais rien mérité de vous, & si ne m'estimez trop indigne d'elle) ie vous requiers, cest la gentille Princesse Alastraxeree, à vraye & loyale espouse: sommans en ce cas premier le Prince Florisel, de s'acquiter enuers moy

du deuoir mutuel d'amour, en me rendant pareil confort & secours, qu'il sçait auoir receu de moy en son affaire. Mō grād amy (respond Florisel) ie ne me puis excuser que ne vous sois trop redevable: C'est à vo^{us} d'aïser, en quoy me voulez employer. De vostre parole seule, replique Falanges. Lors s'adresse à Alastraxeree disant: Ma Dame, en ceste assemblee ou la valeur, bonté, & excellence du monde est vnüe, ie vous supplie m'octroyer ce dō pour le premier que ie requis iamais: Monsieur, respond elle) vous vous pouuez asseurer de tout ce qui est en ma puissance. Adōc voulant Falanges redoubler à Florisel sa sommatioⁿ, de declarer presentement la response que la Princesse luy auoit faite vn iour, sur la seruitude affectionnee de Falanges, elle comme sage pour rompre ce coup luy dist: Monsieur, vostre vertu & grādeur m'est si bien cogneuë (comme à tous elle est notoire) que de ma part ie la tiens en telle reputation que ie doy: seulement vous aïse que toute ma volonté est remise es mains de monseigneur & pere: auquel, & non à moy, deuez adresser vostre requeste. Amadis de Grece fort ioyeux la remet à la Royne Zahara: Et apres leurs honnestetez reciproques leur firent ioindre les mains ensemble en promesse solemnelle. Mais elle en s'acordāt avecques vne douce honte & rougeur virginale, supplia que la ceremonie, & pompe nuptiale fust differee, iusques à la venuë de tous les Seigneurs qui se deuoient trouuer à Constantinople: pourpésant de requierir au Prince Olorius, qui y viendrait, la belle Oriane, pour Anaxartes son frere, à quoy cōsentirent volontiers. Puis fut acordé que Florisel & Lucidor se vouëroient pour le iour saint Ian, en attendant la venuë des autres Princes.

Comme le beau Damoyse Florarlan entra en la grand' salle du palays avec vne lettre qui troubla grandement la court.

LEs circōstances des mariages ainsi arrestees, entra en la salle du palays vn ieune mignon vestu de dueil, portant vne trompe d'or, pēduē en escharpe, qui de sa beauté & grace singuliere rauit les yeux des asistans: & les eust remplis d'un grand contentement, sans la façon de sa contenance, qui sembloit fort pressée & affaittee. Il fut incontinent recogneu par aucuns de la compagnie: & à son arriuee chacun fist silence, pour entendre son ambassade. Et il iette son oeil de tous costez, tant qu'il apperceut la Princesse Lucelle deuant laquelle (mettant vn genoil à terre) luy requist les mains. Et elle l'embrassant, lui dist: Beau Damoisel qui à il, qui vous haste ainsi d'aller? Ma Dame (respond il) Dieu m'a enuoyé icy en autre habit que ie ne desirois venir. Si vous prie me enseigner en ceste troupe le prince Florisel de Niquee, à qui mon message s'adresse. Elle luy monstra, & ils'en va mettre à genoux deuant luy, tirant de son sein vn pacquet qu'il luy presente, luy suppliant le vouloir lire oyant tous. Florisel le prenant le fait leuer, considerant fort sa beauté & bien seance avec vne emotion de cuer: par le sang naturel qu'il sentoit ocultement son semblable. La lettre ouuerte, il aperçoit estre escrete de sang, qu'il le fist tressaillir de frayeur, craignant quelque desastre auenu à celle de qui il cognoissoit la main: c'est à sçauoir la princesse Arlande. Toutesfois il s'efforça de couurir sa passion au mieux qu'il luy fut possible: mais non tant q̄ l'assistance n'en cogneut partie, qui les estonna par compassion de volonré.

Lettre de creance de la Princesse Arlande.

Arlande de Thrace, desheritee de ses terres, pour auoir fait heritier de son cuer celuy qui auoit la propriété de sa liberté tant alienee, qu'il ne pouuoit plus accepter part en la sienne. A Florisel de Niquee, Prince de Gaule, de la grand

Fortune à tellement conspiré contre moy, qu'elle ne m'a seulement donné autre ancre, que sang pour escrete, ny autre porteur qu'un enfant, ny adresse de secours qu'enuers le filz de mon ennemy mortel à cause de mon frere, luy plus mortel encores ennemy, pour ne pouuoir estre amy à moy mesme. Mirez-vous Dames en moy, qui vous plaignez de tours legers de son inconstance acoustumee: & prenez exemple à esperer en desespoir. Elle ne m'a laissé seulement mon surnom, lequel i'ay emprunté pour ne vous estonner trop en la prime veuē de la surscription de ma missiue: Aussi bien q̄ le salut que mal peult enuoyer celle qui de long temps à le cuer captif & affligé comme bien sçaez, & puy n'agueres le corps emprisonné. Je n'ay plus grand loist d'enuoyer mes plaintes de la main, la ou la bouche ne les peult faire entendre. Vous suppliant vouloit du surplus croire ce Damoisel de ma part comme la raison le veut en vostre endroit.

Vostre qui n'a peu estre à iuste tiltre
Arlande la prisonniere desheritee.

La lettre leuē, & peu entendu le suiet de sa doleance, Florisel dist au Damoisel qu'il s'aquitast de sa charge, en lui exposant la specialité de l'affaire qui l'amenoit. Monsieur, respond l'enfant, le cas est: que au temps que la Princesse ma Dame, vous eut laissé en l'Isle de Rhodes, & fut de retour en la court du Roy mon seigneur: elle y trouua le Duc Madasanil, tyran des Isles prochaines, fier Geant, grand & puissant à merueilles, acompagné de quatre siens cousins semblables à luy, tous yssuz du lignage de Furio Cornelio, soy reclamans les vengeurs de son sang. Ce Duc la requist au Roy à femme souz condition de la vengeance qu'il entreprenoit sur le Prince Amadis de Grece: pour laquelle i'auois esté nourry & instruit, si l'obligation depuys

suruenue n'eust effacé ceste inimytié cruelle, au moyen du secours que le Prince luy donna en son besoing extreme, lequel ie aymois & honorois sans le cognoistre, & desirois seruir de tout mon cuer. Mais le Roy ayant entendu ceste reconciliation nouuelle de ma dame avec celuy qui auoit occis son frere, la liura aussi tost es mains de ce Duc, luy commandant de l'espouser. A l'heure estoit prestee avec la Duchesse Armide, qu'elle auoit retenuë, pour venir à voz nopces. Donc se oyant renvoyer en telles autres, respondit au Roy: Ne croyez (Monsieur) que la faute que i'ay fait à ma grandeur, de ne pouuoir resister à l'effort de l'amour du filz, ie la face maintenant de ma parole enuers le pere: vous assurant que ie n'aurai iamais autre mari que le filz, ny plus grand ennemy que celuy qui m'a pourchassera au pere, à qui i'ay iuré la foy de paix & accord. Le Roy fut tant irrité de sa responce, que sur le champ il la desherita: & fit faire le sermēt à Madanasil le Prince de Thrace, remettant ma Dame en son pouuoir, pour la loger incontinent en la forteresse du lac des quatre chaucees: qui est l'une des plus fortes places que lon estime au monde. Si luy en donna la garde, & des quatre chaucees aux Geans ses cousins: leur commandant la tenir en ceste prison vn an entier, si plustost elle ne rengoit sa volonté vers luy. Ce que ne faisant dedans ce terme, vouloit qu'elle eut la teste trenchee, pour l'apointement qu'elle auoit fait de celle de son frere. Le fier pautonnier ne faillit à accomplir ceste ordonnance diligemment, menant ma Dame plorant & gemissant au chasteau, ou il l'enferma seule, avec sa cousine Arlinde, baillant les clefz de la prison à vn grand mastin Geolier, soy reseruant l'entree du chasteau mesme, ses cousins establis es quatre chaucees, lesquels font iurer tous ceux qui viennent là, de se trouuer à la végèce de la mort de Furio, sinon les enferrent en basses & cruelles prisons. La nuit ilz ferment les portes de leurs chaucees, & par des caues souz

terre se rendent au chasteau, distant du lac de deux traitz d'arbaleste, duquel le Duc mesme leur ouure & clost les portes. Or l'auois ie suyue dedans la forteresse, ou ilz me laissoient pourmener à mon aise: mais ie forcenais de dueil de la voir en tel estat, sans y scauoir remede. Vn iour qu'elle mist la teste en vne petite fenestre treillissée m'auisa en bas: Si me dist, Florarlan informe toy du moyen, par lequel tu puisses parler à moy. A l'instant ie monte droit en hault laissât le Duc en bas, avec ses gēs: & prie Bocarel le Geolier me faire ceste gracieuseté, de me laisser vn peu parler à ma Dame la princesse: qui me respondit q si plus l'en preschois il me lacerait du haut du mur. Dam ribault, lui dy-ie, si i'auois armes comme toy ie te rengourmerois bien le groin. Lors iettant ma veuë de toutes parts apercen vne espee pendue, que soudain i'empoigne, & le vilain s'en vient à moy vne guisarme en la main, dont il me tire vn coup que i'eutray d'vn fault à costé tellement qu'il ne me persa que la cazaque de veloux de part en part: autrement il me fauçoit le corps à iour. Lors ie luy donnay vne iartiere au iarret, si droit à la ioincture qu'il tomba incontinent en la place, & me ietta les bras pour me harper: mais ie couché l'espee entre luy & moy, qu'il se fourra parmy le ventre, iusques à la croysce. Adonc s'estendit de douleur & moy craignant que ceux d'embas le sentissent, prins vne hache dont ie l'esgorgeay, comme vn gros boeuf. Si prens les clefz, & vois ouvrir la porte de la prison, ou ie trouue ma Dame toute tremblante de la paour qu'elle auoit du combat qu'elle ouyt entre Bocarel & moy: qui m'embrasse & baise cent fois, disant: Làs Florarlan que sera de ta vie, si le Duc entend ton fait? mon mignō Dieu te vueille preseruer & garder à plus grands choses. Ma dame (dis-ie) ce qui est fait ne se peult deffaire: mais ie voy le remede, d'aller au Duc luy dire que m'avez mandé par Bocarel de le prier m'enuoyer vers le Roy, luy faire vne requeste, apres laquelle

laquelle vous rengerez à sa volonté : Ainsi ie sortiray & eschaperay. Elle m'acolle de rechef en souriant de mon inuention. Lors ie luy dis qu'il n'y auoit que tarder, & qu'elle regardast que i'auroys à faire pour sa deliurance estant hors de là. Il faudra (respond elle) que vous alliez à Constantinople porter vne lettre de ma part au Prince Florisel de Niquee: mais nous n'auons icy dequoy la faire. A cela (dy-je) ne tiendra: & voys prendre vn roseau en la chambre de Bocarel, que ie pare, & le trempe au sang de ce brigand, duquel elle vous escrit la presente. Incontinent ie luy bayse les mains, elle me faisant la benediction, me recommanda à Dieu. Je ferme sa porte, & remetz les clefs en la ceinture du Geolier, à fin qu'on ne aperceust que i'eusse parlé à elle. Je vois au Duc qui m'acorde tresvolontiers ma demande, & me fait ouvrir la porte, & deliurer vn rousin, sur lequel i'exploicte iusques icy, sans tenir aucun chemin, iusques à ce que ie fusse eslongné de Thrace, & ay employé vn chesnon de ma trompe pour ma despence, & pour cest habit que i'ay prins conforme à l'estat de ma dame. Voylà mōsieur ce que i'auois charge de vous dire. La compagnie resta fort contente du gentil discours de cest enfant qui promettoit beaucoup à l'auenir, autant qu'elle fut troublee des pitieuses nouuelles qu'il apportoit. A quoy Florisel qui auoit tousiours l'œil fiché sur luy durant son propos, se sentant tout esmeu de sa presence, fist telle responce. Mon mignon, ie suis tant redeuable à la Princesse, qui vous enuoye, que ne me puis excuser, de faire pour elle, ce qui sera auisé pour le mieux. Monsieur (dist Florarlan) ie ne doute pas de vostre bon secours en son endroit, lequel iamais ne refusastes aux plus simples Damoyelles. Lors Florisel se tournât vers sa chere Helene luy dist: ma Dame vous plaise me donner congé d'aller payer à ceste Princesse (au hazard de ma vie) la recompense de sa parfaite amour, que n'ay peu satisfaire de ma liberté qui vous estoit tou

te engagée. Monsieur (respond Helene) le desir que ray de vostre honneur (qui est le mien) me desnue d'autant de pouuoir sur vous en cest endroit, comme vous m'en auez donné en l'autre. Parquoy suis deliberée souffrir de mon costé le dāger de vostre personne pour elle, cōme auez repoussé les assaux de sa beauté pour la mienne. Or iray-je donc ma Dame, replique Florisel, à vostre congé deliurer la gentile Princesse, ou il me coulera la vie. La court fut fort fāchee de ce troublement de feste. Toutesfois considerans que l'entreprinse estoit necessaire selō le deuoir de Cheualier (sans le suicroist d'autre obligation) Alastraxeree parla premiere: Messieurs, il est temps que les armes que i'ay portees au seruice de noz faux Dieux, ie les tourne contr'eux & leurs adherans, ioinct l'amytie particuliere que ie porte à la Princesse. Je prends à ma charge vne des quatre chaucees, pour faire compagnie à monseigneur & frere Florisel, comme ie luy fis à le deliurer de sa prison. Je ne pourrois trouuer plus belle emploicte du dernier exploict de mes armes, que mon nouveau seigneur & espoux me contraint laisser. Falanges oyant le propos de sa chere Dame. Ia Dieu ne plaise (dist il) que ie demeure derriere, ou ma Dame marche: puis qu'elle exposant sa vie n'espargne peu la mienne. Pource entreptēdie pour ma part la tierce chaucee du chasneau. Adonc parla le grand Roy Amadis: Puy que tant de magnanimité se mōstre en ceste emprise, raison veult que pour pl^e solēniser le delais & renouvellemēt des armes de ma vaillante fille Alastraxeree, ie les accompagne des miennes, desquelles l'age me dispence, comme elle son habit: parquoy ie prends pour moy la quatriesme chaucee. Et moy donc le soucy & ennuy de toutes les quatre, dist la Royn Oriane. Quand on veid qu'il n'y auoit ordre de les en destourner, on fist en diligence equiper vne belle galere pour les quatre champions, à fin que le secours d'Arlande ne fut retardé. Et cinq ou six iours apres partirent

tous.

tous les grand Seigneurs pour assister à ce que besoin seroit. Le beau Florarlan ne se pouuoit contenir de ioye, d'estre si bien venu au dessus de son ambassade, & s'en alla baïser les mains aux trois Princes entrepreneurs. Et dist à la Pucelle Alastraxeree. Ma Dame ie vous seruiray d'Escuyer s'il vous plaist en ceste iournee, pour m'acquiescer felicité par la vostre. Ce qu'elle accepta

en le remerciant. Ainsi departirent les tresredoutez champions, apres les deuotions publiques, prenant le temps qui leur estoit propice à leur voyage, comme firent peu apres la pluspart des Princes, qui lors estoient à la court, laissant les Dames fort melancoliques de voir si souuent hazarder ainsi ces Royalles personnes.

Comme le Roy Amadis, le Prince Falanges la pucelle Alastraxeree, & Florisel de Niquee, ayans pris terre, allerent chacun à part combatre les gardes des quatre chaucees.

CHAP. LX.



LA galere des quatre vaillans Princes singla de bon vent à voile & rame, tant qu'arriuee à port ilz accorderent ensemble, que pour mieux conduire leur fait à bonne fin, ilz yroyent en vn mesme iour & heure assaillir chacun sa chaucee, & que celui qui premier paruiendroit à l'entree du chasteau, attendroit l'auenture de ses compagnons. Ce complot ainsi pris, chacun s'arme & monte, ne menant que son escuyer qui portoit la lance & l'escu. Dequoy le beau Damoisel Florarlan seruit ma Dame Alastraxeree. Vray est qu'elle auoit vne damoiselle qui lui portoit en vne valize vne paire d'acoustremens qu'elle prenoit quant elle se vouloit monstrier en son propre estat, qui luy vint à point plustost

qu'elle ne pensoit, comme vous orrez cy apres. eulx departiz, ie vous diray premier ce qui en auint au Roy Amadis de Gaule, lequel arriué à la porte d'une des caues, se print à contempler l'assiete & disposition du lieu, qui luy sembla imprenable par force humaine. Lors le Geant nommé Braforan, cousin du Duc oyant le hannissement du cheual du Roy, vint à luy armé de toutes pieces, luy demander qui l'amenoit. A quoy le Roy respondit, qu'il auoit entendu le tort & outrage, que le Duc Madasani tenoit à la princesse Arlande, de lui forcer sa volonteé par prison & mauuais traitement: sur quoy il luy voudroit remonstrer sa faulte, ainsi que droit de chaulerie l'obligeoit, pource le pryoit de le faire parler à luy.

ler à luy. Braforan ne fut fort content de ouyr ainsi blasonner son Seigneur & cousin, si dist au Roy Amadis : Dam Cheualier, ie croy que soyez tombé de la manche de quelque prescheur de la loy, qui vous venez icy fonder en raison, laquelle vous n'entendez: mais demeurez vn peu, ie voys querir vn cheual pour le vous faire comprendre. Guerres ne tarda le Geant qu'il reuint monté sur vn puillant destrier, la lance en l'arrest, & sans autre deffy, picquerent l'vn cōtre l'autre, de telle vigueur que les lances rompues, s'entredonnerent d'escez & de heaumes vn choc si lourd, que les cheuaux ne les sceurent soustenir ains verserent par terre, & maistres aussi. Amadis se releua le premier, & alla l'espee au poing vers Braforan, qui auoit vne iambe si foulée souz son cheual, que possible ne luy estoit de se mouuoir. Parquoy voyant son ennemy en tel auantage, se rendit à mercy, s'offrant à faire du tout sa volonté. Ma volonté est (dist le Roy) que tu me conduises au chasteau pour parler à ton Duc. Je m'y acorde dist le Geant: mais ie ne vous assure pas de luy. Amadis qui ne demandoit ceste assurance, luy ayda à leuer. Apres qu'il se fut vn peu reposé, mena le Roy en sa caue, iusques à la porte du chasteau ou pendoit vne buccine d'yuoire qu'il entonna trois fois. Or deuez sçauoir, qu'à chacune des quatre portes, en auoit vne que les geans ne sonnoient qu'vn coup, quand ilz apportoint au Duc bonnes nouvelles de quelque plaisir ou seruice: & si eux mesmes vouloient entrer, deux fois l'embouchoient: mais trois quand la garde estoit vaincue & amenoit son vainqueur. Parquoy le Duc oyant les trois, vint à la fenestre qui respondoit sur la porte, & demanda à Braforan: quelles nouvelles? Monsieur (dist il) i'ameine ce Cheualier qui m'a vaincu, & veult esprouuer vostre valeur. Ouy dea (dist le Duc) la porte luy sera ouuerte; s'il a en luy tant de hardiesse d'y oser entrer. Madasil (respond Amadis) la hardiesse ne gist pas à entreprendre

choses impossibles à la vertu de l'homme, ce seroit temerité: mais si tu me veux assurer de tout, fors que de toy, i'entreray volontiers: Par mes Dieux ie t'en assure (dit le Duc) qui descend pour luy faire ouuir. A quoy ne diffiera Amadis: mais si tost qu'il eust passé le guichet marcha sur vne faulx trape, qui luy faillit souz les piedz, d'ou il tomba en vne basse fosse, qui enuironnoit tout le donion de la forteresse, ou il fut fort froissé à la cheute, pour la pesanteur de ses armes. C'estoit la seurété que Madasil luy auoit apreslee, si tost qu'il eut ouy le son triple de la buccine. La trape se releua & ferma incontinent, laissant le Roy en vne obscurité hideuse, aussi estonné qu'il fust oncques depuis la prison d'Arcalais l'enchanteur, qui par semblable trahison l'auoit enfermé avec son pere, & Florestan son frere qui luy reuint alors en memoire, supliant nostre Seigneur le vouloir deliurer de ceste captiuité, comme il auoit fait de l'autre, cognoissant l'intention equitable qui l'auoit precipité en ce danger. Ainsi qu'il estoit en ce desconfort, de ne voir moyen de sortir, ne cōtre qui en pourchasser la vengeance, Florisel auoit fait pareil deuoir à la chauce contre le geant Zambanel, qui l'auoit mené à la porte du chasteau de la mesme sorte que Braforan auoit fait le Roy, sonnant par trois fois le cor pendu à la porte, parquoy luy fust l'autre porte ouuerte ou il tomba en pareille trape. Et à la cheute, le Roy qui estoit souz la sienne l'entendit, parce que ce n'estoit qu'vne fosse. Si luy escriua soudain, qui est là? Qui c'est, respond Florisel, qui vous fera cher comparer vostre malheur à se trahison. Je croy q'la venez payer vous mesmes, dist le Roy, ne le recognoissant point. Sur ces paroles se viennent entrechercher aux espees trenchantes, à tort & à trauers, si desesperement qu'ilz se naurerent l'vn l'autre en mainte partie de leur corps. Et las de chamailler, s'embrasserent à la lute si furieusement qu'ilz tombèrent tous deux par terre, ou ilz se roulloyent & for-
geoient

geoyent l'un sur l'autre, comme sur vne enclume, chascun delibéré de ne cesser avant la mort de son ennemi: Si à l'heure le Prince Falanges qui auoit esté cōduit cōme eux par le tiers Geant nommé Madafaran) ne fust tombé par autre trape: lequel les deux combatans n'ouyrent cheoir, pour le bruyt qu'ilz menoyent ensemble, que la resonance de la fosse renforçoit tellement qu'il sembloit estre plus de vingt Cheualiers. Parquoy Falanges comme bien fort brisé de sa cheute, si tost qu'il les ouyt s'en va à tastons les trouuer, s'escriant: Quelz diables sont cecy qui dressent chaucez trapes aux Cheualiers, comme à loupz? les combatans l'oyant se separent, & le Roy luy de manda, qui il estoit luy mesmes: Je suis celuy (dist il) qui vous punira de vostre lacheté frauduleuse, si sans elle vous osez defendre. Laissez moy acheuer ce conffit que i'ay contre ce Cheualier (dist le Roy) puis ie te respondray. Falanges se douta de le cognoistre à la parole: Parquoy luy repliqua: ie suis bien abusé, si vous n'estes trompés comme moy meschamment. Je le suis vraiment (respond le Roy) adonc Florisel entendit à la voix qui c'estoit: Bien le suis ie moy (dist il) plus que tous, ayant lenué les mains contre celles qui m'ont bien chastié de ma folie. Lors dist au Roy: Aa monsieur pardonnez moy l'offence que vous ay faite, veu la penitēce suffisante que i'en porte quant & le peché: qui deuois cognoistre vostre splendeur, voire parmy ces espesses tenebres. Remercions Dieu (dist le Roy) qui ne nous a laissé passer outre, le prians nous vouloir donner telle yssue de ce lieu, qu'il me donna autresfois des prisons d'Arcalaus & à mon pere & vostre oncle Florestan Roy de Sardegne. car nous en auons grand mestier, veu la façon de laquelle ceste obscurité nous a fait acoustier l'un l'autre. Moy mesmes ne suis guerres myeux (dist Falanges) du combat que i'ay eu contre le mastin, souz la parolle duquel ie suis venu icy, que trop mieux m'eust valu luy auoir trenché la teste. Alors

chascun rendist conte de son auenture, s'esuertuans de prendre cueur contre la fortune. Au reste s'ilz pouuoient sortir de là eux trois ensemble, ilz ne craignoient tout le monde. Alors vint le Duc faire ouurir son souspiral de la fosse par lequel il leur cria: Cheualiers rendez les armes, & acceptez ma prison, & ie vous feray tirer de là, pour vous estre administré ce qu'il vous fait besoing. Ia Dieu ne m'ayde, respond Amadis, si ie me fie iamais à telle canaille: Mais si tu es si bon que ie te iuge au contraire, laisse moy saillir d'icy seulement sans autrement m'asseurer de ta mesgnie, & tu verras quelle rançon ie te payeray, combien que i'aye plus grand mestier, de repos que de bataille. Je n'ay que faire (dist Madafanil) d'esprouuer ta force, puis que ie te tiens à si bon marché: mais tu tremperas encores là, avecques tes compagnons, iusques à ce que la faim te face parler autre langage. Adonc fist fermer le souspiral, les laissant là en grand desconfort, se remettant à attendre ce que Dieu ordonneroit de la pucelle Alastraxeree, craignans sur toute chose qu'ilz ne fussent cogneuz par le Roy de Thrace, de qui il ne s'asseuroit q̄ de la mort

Comme la pucelle Alastraxeree deliura les trois Princes prisonniers, par subtile invention.

CHAP. LXI.

LA vaillante Princesse ayant pris son chemin vers la chauce, qui luy estoit assignée, n'y peut pas si tost arriuer que les autres, au moyen du destourbier qui luy suruint d'un Cheualier voulant forcer vne fille qu'elle occist, puis entra en vn sentier, ou elle rencontra vn page vestu de satin verd bandé d'incarnat, cheuauchant au galop: lequel si tost que Florarlan l'aperceut, dist à la Princesse: Ne me croyez iamais s'il n'est auenu quelque nouueauté au chasteau, que ce page (qui porte la liuree du Duc) va en diligence annoncer

cer au Roy de Thrace. Il sera doncques bõ dist elle, que sçachons de luy, que c'est à fin de mieux auiser à nostre affaire. Alors s'escarta Florarlâ de peur de gaster les feintes. Et Alastraxerce se met au deuant du page, luy demandant ou il alloit si hasté. Cheualier vous ne le sçauerez pas, respond il, mais laissez moy passer: car ie n'ay pas cause de m'amuser. Si me le direz-vous, replique Alastraxerce, ou ie vous abattray ceste blonde teste de dessus les espaulles. Et soudain mist la main à l'espee pour l'espouuenter. Ha, dist il, Cheualier ne me vueillez occire & ie vous conteray le tout. Sçachez que le duc Madafanil mō maistre m'enuoye vers le Roy l'auertir de venir incōtinēt au chasteau: parce que ce matin y sont arriuez trois Cheualiers par trois chaucees, ayās en vn moment deffait les trois gardes: la bōté desquelz luy fait iuger que ce soient Florisel de Niquee, Amadis de Grece: & l'un des deux gemeaux, qui puis n'agueres ont esté recogneuz: qu'il estime estre amenez icy par le damoisel Florarlâ, qui a tué son Geolier Bocarel, pour le change, duquel il a iuré la teste du mignon s'il peut estre empoigné, pour l'acoupler à celle des trois autres si les personnes qu'il pense sont maintenāt en ses prisons. Alors s'enquist Alastraxerce de la maniere de leur prinse, que l'enfant luy raconta à la verité, c'est à sçauoir du secret de la faulce trape. Dequoy elle fut fort faisie au cueur, dont toutesfois elle ne mōstra aucun semblant: ains continua à luy demander comme il alloit d'Arlande. Le plus mal du monde, dist il, car selon qu'elle se gouerne enuers le Duc, nous n'en esperons que la mort au bout de l'an: veu que pour seruice & bon traitement qu'il luy face, il ne la peut conuertir à son amour, & aussi peu par menaces, dont il commence à vser. Puy que tu nous as tout conté, va t'en à la bonne heure querir le Roy, q̃ Dieu vueille bien amener au profit d'elle. Ie le voudrois dist le page. Si s'en va, & elle aussi tost fait appeller Florarlân, à qui elle dit: Mon mignon, à nouuel affaire, nouveau cō

seil. Si Dieu m'ayde, ie m'atēs aujourd'huy faire la meilleure iournee du mōde. Ainsi luy plaist, respond Florarlâ, vostre bõ heur & prouesse le peuuent bien. Ie considere q̃ par hardiesse nous ne paruiendrons pas, à ce en quoy trois telz Cheualiers ont failly, au moyen de la trahison. Si fault il trouuer remede à leur deliurance, lequel i'ay auisé tel, que ie me vestiray de mes propres acoustremens de femme, & monteray sur vne haquenee, menāt ma Damoiselle avecques moy sur la sienne, & porteray mon escu au col, & mon armet en teste, mais vous demeurez en ceste forest, iusques à ce q̃ soyez auerty de ce qu'auyez à faire. Ainsi m'e iray vers le Duc, souz couleur de luy porter le present de ces armes cy, avecques nouuelles d'importance. Parce moyē i'espere entrer dedans la forteresse, & du remenant ay bien peu de soucy. Et au cas que ma ruse faille, ie retourneray en ce boys espier le Roy au passage, pour essayer à le prendre, à fin que pour luy les Princes soient deliurez, & ma Dame Arlande. Le Damoyseil ayant ouy ceste cautelle, la trouua si bonne que de ioye lui alla baiser les mains, disant: Ma Dame le cueur me disoit bien à qui ie denois offrir mon seruice en ceste entreprise, à qui ou par prudence, ou par magnanimité l'honneur ne pouuoit eschaper. Alors elle se tire hors du chemin pres d'un buisson, ou elle s'affubla par dessus ses armes d'une longue robe à femme de veloux violet, bordee de bastōs d'or, & atachee de boutons par deuant, pour aysément la despouiller au besoing. Puy print son escu & son heaume, & bailla son espee à la Damoyseille à cacher dessouz sa robe, pour lui rendre quād'elle en auroit affaire. Adonc Florarlân prenant congé luy dist: Ma Dame, il ne vous fauldroit oster la robe: mais le harnois plustost, pour vaincre tous les Cheualiers du mōde. Et n'ay pas peur que Madafanil en reschape, si ce n'est par faute du iugement. Elle se souzriāt de ce propos, le recommanda à Dieu, bien marry de demeurer derriere: ce qu'il n'eust fait pour

craintē.

crainte quelconque, sinon de descouvrir l'embuche. Ainsi s'en va la vaillante Alastraxeree à la quatriesme chauce, ou elle trouua la garde à la porte nommé Brostolfe, qui de prime face s'estonna fort de sa beauté. Et elle luy dist: Bon Seigneur, nous ne venons pas icy pour raur voz armes, ains pour en porter à monsieur le Duc, de la part de tel qui moult le prise, comme celuy à qui la couronne royale s'apreste. Pour ce mettez moy de grace deuant sa seigneurie, pour luy presenter ces armes, qui sont inestimables en bonté, comme est en sagesse celuy qui les luy enuoye, avecques auertissement de grand' consequence. Le geant non moins rauy de sa beauté singuliere, que de son propos, luy dist, qu'elle estoit la bienvenue, comme celle de qui il s'asseuroit que son Seigneur seroit autant resiouy de sa bonne grace, que de ses presens, de quelque pris qu'ilz puissent estre. Je m'en tiendrois trop heureuse, dist elle, de pouoir complaire à tel preud'homme que luy, m'honneur sauf. Or allons donc ma mignonne (dist Brostolfe) & vostre compagne aussi, que ie vous meine droit à luy. Au nom des dieux soit (respōd elle pour mieux courir sa mencee) ainsi s'en va par la chauce qui longue & large estoit: mais le Geant feru de son amour, luy dist en chemin: Ma Dame ie vous voy telle, que si vouliez adresser vostre cueur en mon endroit, ie me reputerois plus tenu aux Dieux, que s'ilz me faisoient monarque de l'vniuers. Aussi de vostre part ne seriez trop abusée, veu la maison d'ou ie suis, & la force que j'ay, ne redoutant homme qui viue, si feu Furio Cornelio mō cousin n'est resuscité, duquel pour le moins la vengeance ne peut guerres tarder, ne celle de Balarte Prince de Thrace: Parce que tenons prisonniers d'hier leurs meurdriers mesmes: qui est biē pour confermer l'embassade que vous luy portez. Je serois fort heureuse, dist elle, de venir à temps de veoir la vengeance de si bō Cheualier que fut Cornelio, d'autant que ie n'ay moindre raison de haïr ceux

qui l'ont occis, que ses propres parens, & à moy & aux miens n'est deuē moindre vengeance sur les Seigneurs de Grece. Quant au mariage de quoi me parlez, nous aurons loysir d'en deuiser plus amplement apres que j'auray fait mon exploit vers monseigneur: car vous portez representation de Gentilhomme, tel que la Damoyelle me sembleroit bien fortunee, qui vous auroit à mary. Je vous bayse les mains de ce mot, dit Brostolfe, & ainsi gay de ses nouvelles amours la conduit à la porte du chasteau: elle supplia Dieu en allant lui vouloir donner entree par quelque moyē, peu souciee du surplus. Eux arriuez, le geant prend le cor qu'il entonne vne fois seulement. Qui fist venir celle part Madasani loyeux à la fenestre, estant dessus ceste porte, & encorcs plus quand il aperceut la taille, & le beau trait de visage d'Alastraxeree. Cousin (dist adonc le Duc) quelle bonne nouvelle est ce cy? Ceste belle Damoyelle, respond il, vous apporte vn present d'armes, avecques quelque aduertissement d'vn sage, qui vous importe. Si la receuez dedans, à fin que ie retourne à ma garde. Le Duc descend à grand haste, & lui fist ouurir la porte, & les Damoyelles entrerent sur leurs palefrois: dont Alastraxeree se lance soudain en terre, qui estonna Madasani de sa haute corpulence, nō sans quelque sursault en son cueur que ce fust elle, selon les enseignes de sa renommee. Toutesfois sans s'y fonder d'auantage luy demāda la cause de sa venue. Monseigneur respond elle, pour vous faire present de ces armes, desquelles l'armet, outre son pris, a telle vertu que celuy qui le met en teste, change à l'instant sa premiere forme, comme vous en verrez maintenant l'experience. Adonc le lace, & deboutonnant sa robe, se monstre toute armee: dequoy il eut quelque frayeur, mais il ne s'y arresta, estimant que ce fust enchantement. Voulez vous voir encorcs vne autre merueille? Volontiers, respond Madasani: C'est, dist elle, qu'vn cauteleux & malicieux paillard cō-

me vous, ne s'est peu garder de l'invention d'Alastraxeree. Ce disant sa Damoyfelle luy met l'espee en la main, & le Duc gaigne le hault par vn escallier, criant trahy, trahy seconrez moy Cheualiers. Ceux qui l'entendoient coururent incontinent aux armes, & premiers de tous les trois Geas ses cousins, q lors estoient au chasteau. Ce pendant la pucelle courut apres Madafanil, lequel se sauue en vne salle haulte, dont il n'oublia à tirer l'huys apres lui. Et comme elle cuydoit chercher autre entree, fut assaillie de pl⁹ de vingt Cheualiers, sans les trois Geans, lesquelz elle receut d'une hardiesse nompareille, abatant à ses piedz deux Cheualiers en deux coups, & faisant teste aux autres, sans leur laisser gagner auantage sur elle. Mais il n'eust esté possible à force humaine de soutenir tel effort iusqu'à la fin, si sa Damoyfelle, effrayee de voir venir celle troupe de gens en armes, ne fust fuyee pour se sauuer, laquelle trouua vn petit huys de fer ferré par dehors d'un gros verroil, l'ouurit pour se cacher, la ou trouuant vne viz de pierre de taille, descend quelques marches, en plorant & gemissant tendrement. Or estoit vne des portes par ou on deualoit en la fosse, ou les Princes estoient, qui l'entendirent gemir. Et Florisel escria qui est celà qui pleure? la pauurette cogneut incontinent sa voix, & luy dist: Helas monsieur, ie suis Galandrie, iamais plus à point ne fustes trouué, pour secourir ma maistresse, qui est la hault assaillie de tous ceux du chasteau. Il n'est possible d'exprimer la ioye qu'eurent les bons Princes, de sentir la Damoyfelle en l'escallier, s'assurans de pouuoir sortir par ou elle estoit entree. Si mirét soudain armetz en teste, qu'ilz tenoient en leurs mains, & vont à tastons trouuer l'escallier ou elle estoit, qu'ilz monterent sans nombrer: courans si tost qu'ilz furent en la cour, la part ou ilz entendoient le chamaillis. Ou ilz aperceurent Alastraxeree, ne faisant plus que parer aux coups, tant estoit lassé de resister à tant de gens en-

semble. Dequoy forcenez, comme Lyons rugissans, se vindrent atacher à ceste canaille, en ruant ius les trois premiers qu'ilz rencontrerent. Lors le Roy (qui se voyant si bien acôpagné n'en eust redouté trois fois autant) cria Gaule, Gaule, voicy Amadis de Gaule l'ennemy des tyrans, & leur sequele. Ce nom les effraya grandement, & d'autât redoubla le cueur à la gentille Princesse, soy tenant à leur venue hors de tout danger: mais elle sentit ouurir la porte à son dos par ou le Duc s'estoit sauué, lequel elle auisa armé de toutes pieces, ayant l'escu au col peint en champ d'or de la figure d'Arlande, & vn grâd cimenterre en sa main, qui luy dist: voycy dequoy ie viens deffaire les enchantemens des femmes: & comme il vouloit sortir, elle le repousse si rudement qu'il fait cinq ou six pas en arriere, & ferme la porte sur eux, laissant les Princes à traiter la multitude. Lors se trouuant en vne grand' salle, commença à escrimer contre Madafanil, & luy de son costé fort furieusement, comme hardy & puissât qu'il estoit: & dura leur meslee longuement d'autât qu'Alastraxeree ne pouuoit tirer ses coups de si verde veine, à cause du travail precedant: mais si peu qu'elle en tira furent adressez en si bon endroit, qu'elle le coulora tout de son sang, tellement que de foiblesse il s'estendit emmy la place demy mort. Adonc ne fut paresseuse de l'acheuer, sans le laisser trop languir: si le traine par vne iambe à la fenestre, puis le souz leua & ietta du hault en bas, ou il se rôpit le col. Ce fait voulât retourner au secours de ses compagnons, ne sceut ouurir l'huys qu'elle auoit fermé, en façon quelconque. Lors auisant vn petit huisset l'ouurit aisément, par lequel le Duc souloit aller prescher Arlande, Pour la conuertir à son desir, qui fut fort estonnee de voir entrer vn Cheualier tout armé en sa chambre, ne sçachant que penser de sa vie, ou de sa mort: ayant bien entendu la grand'esmeutè du chasteau. Alastraxeree qui la recogneut incontinent, combien qu'elle fust palle, &

fort amaigrie de la prison, leuant vn peu sa veüe la vint acoller. Laquelle Arlande, en sursault prenant pour Florisel, luy ietta les bras au col, disant: làs cruel, la prison ou vous me tenez m'est pl^{us} rigoureuse que celle ou me trouuez la moytié. C'est chose estrange que la consolation ne me vienne que du costé d'ou pend mon principal torment. Plusieurs autres plaintes vouloit faire à la pucelle, si elle ne luy en eust coupé la broche, songeant l'affaire qu'on pouuoit auoir d'elle en lieu pl^{us} necessaire: Parquoy luy dist, en se descourant du tout la face, ma grand' amye vous me prenez bien pour vn autre: mais il nous conuient penser d'autre chose: c'est de me mettre hors d'icy, se sçauz les estres de ceans, pour aller secourir les bons Princes qui combattent en ce chasteau pour vostre deliurance. Ce disant print Arlande par la main (bien marrie d'auoir esté ainsi trompee) & la mene à l'huis qu'elle n'auoit peu ouurir, d'ou elles entendoient le bruit des grans coups qui se donnoient par les Princes & les Geas, avec leurs Satrapes garnis de haches, iauelines, & chapeletz d'acier q^{ui} vous pouez penser que les trois preud'hommes traitent selon leur merite: mais depuys qu'ilz sentirent l'escrime trop chaude, se tirerent arriere, lâçans de loing dardz, & gros carreaux, cōtre ceux qui s'estoient mis pres vn mur pour eiter la ceinture. Lors Florisel, à qui l'affaire deuoit toucher au cuer plus auant qu'aux autres, s'enflâba d'ire, & de mal talent: dont s'auança d'vn sault contre Zambanel qui l'auoit trahy, empoignant son espee aux deux mains, de laquelle il luy tire vn coup d'estoc au-dessouz de l'escu, si violent qu'il luy perse la cuirasse luy trauersant tout le ventre, dont les tripes luy saillirent à la retraite de l'espee. Et le matin s'en va roullât le long des degrez iettans cris horribles de la mort. Le bon Roy, & Falanges en auoient dix gisans à leurs piedz: mais pour rien n'estoient cōtez, s'ilz ny terrassoient les deux autres Geans, desquelz apres le coup de Florisel, ilz eu-

rent trop meilleur marché. Si les viennent saisir chacun le sié propre de sa chauce, de si pres qu'ilz eurent le moyen de se harper à leur escuz, par lesquelz ilz les deroquerent à leurs piedz, tant auoient le cuer recreu & failly par l'exemple de leur compagnon. Et gueres ne tarderent à le suyure à tous les diables, leur estans leur leur grosses testes trenchees par ceux mesmes ausquelz ilz anoient fait la faute. Florisel ce pédant soustenoiēt le reste de la mesgnie, laquelle aux espouuentables criz de Braforā & Madafar, se mit à vau de route, fuyant par le chasteau, l'vn ça, l'autre là, ou ilz pensoient mieux garentir leurs vies. Ceux qui furent atrapez rendans les armes, furent receuz à mercy des bons Princes qui sçauoient aussi bien pardonner aux vaincuz que deffaire les outrecuydez. Alastraxeree (comme vous ay dit) suruint sur la fin, encores assez à temps pour donner sur la queue, laquelle apres l'execution de la victoire, les Princes vindrent embrasser amoureusement: disans que sa prouesse acompagnée de telle prudence, qu'elle auoit monstree en ceste auenture, leur faisoit honte? exauçant & esleuant son sexe par dessus le loz des hommes: Bien heurée fille que Dieu m'a donnée, disoit le Roy: Bien heurée sœur, disoit Florisel. Lors Falanges, & qui me passe donc en felicité, ayant telle Dame & espouse. Adonc Florisel alla faire la reuerence à la Princesse Arlande, la remerciant de l'honneur qu'elle lui auoit fait de s'adresser à lui en son extremité, luy donnant occasion de s'aquiter en quelque endroit de l'obligatiō d'amour, dont il luy estoit tant redevable, sans pouuoir payer en sa monnoye. Elle qui ploroit de ioye luy respond: Helas cher amy, assurez-moy de voz playes auant que vous puisse tenir autre propos: car i'en tremble tout de frayeur, Ma dame (dist il) ie ne me sens en dāger aucun: mais regardez à rendre graces au roy Amadis monseigneur & au Prince Falāges d'Astre, & à ma Dame Alastraxeree, qui ont exposé leurs vies pour la vostre. Ce qu'elle alla faire,

D'AMADIS DE GAVLE.

faire la larme à l'œil les esmouuans tous à grande compassion, du piteux estat ou ilz la voyoient tant amortie & desfiguree, qu'à peine la pouuoient recognoistre. Et plus en eurent de son amour incurable enuers Florisel, qu'elle ne pouuoit celer ne dissimuler deuant eux sa passion, chassant tout autre respect, comme l'ardant Soleil met à neant les legeres nuës. Elle donna ordre à les mener reposer, & faire regarder & appareiller leurs playes, par le Chirurgien du

Duc. Et luy redoubla sa ioye, quand elle entendit le discours du voyage du Damoy sel Florarlan, disant qu'elle estoit bien tenuë à si bel enfant. Au souper Alastraxeree dechifra la maniere de sa conduyte pour gagner l'entree du chasteau, & du surplus: dequoy leuerent tous les mains au ciel, de grande admiration. Et feirent rechercher la pauvre Galandrie, encores mucee en la fosse: la paour de laquelle auoit mis la forteresse en leur subiection.

Comme Florisel s'arma pour faire entrer dans le chasteau le Geant Brostolse, qui seul des quatre estoit demeuré vis.

CHAP. LXII.



LE premier ordre que le Roy Amadis donna au chasteau, fut de garder que personne n'en faillist, qui peut porter nouuelles au Roy de Thrace, de ce qui estoit auenu. Parquoy suruenant le Geant Brostolse, qui restoit vis des quatre cousins du Duc Madasani, parce qu'apres auoir cōduyt la Princesse Alastraxeree il estoit retourné à sa garde, fut auisé que Florisel (le moins nauré) s'armeroit pour luy ouurir la porte, le prenant à mercy s'il se rendoit en son pouoir, sinon qu'il en disposast par raison. Qui en eust creu Arlande vn au-

tre eust eu ceste commission, laquelle le suyuiſt tousiours de pres, & voyant en passant les gens du Duc plorans à l'entour du corps de leur maistre, dist hault & cler. O Madasani, que ie ne tiens vis pour tourmenter ton corps à mon aise, comme tu as fait mon ame. Je laisserois de toy exemple aux hommes, de n'atenter iamais outrageusement la volonté des dames. De là allerent à la porte pour receuoir Brostolse, qui se trouua fort esbahy du nouveau portier qu'il vit armé de pied en cap, & pl^{us} des corps qu'il cogneut de ses cousins, gifans
M 1 emmy la

my la court, mesme voyant Arlande deliuree pres de ces Cheualiers, ne douta plus de la fortune escheuë en son absence: Ha malheureuse (cria sur la Princeſſe) degaignant quant & quant son grand cimeterre, c'est par toy que tout ce meschef est auenu, duquel sur toy i'en prendray la vengeance. Lors desmarchoit pour l'ataindre, quant Florisel se lança au deuant, receuant le coup sur son escu, qui en volà en pieces: mais Florisel luy chargea le bras mesme qui luy cheut sur le champ, avecq' le brand, d'acier, luy disant, grosse beste c'estoit ton cas de t'adresser aux femmes: mais tu as rencontré Cheualier, qui fera de toy tel carnage que de tes trahistres cousins. Le Geant apres vn horrible cry, de la douleur qu'il sentit du bras abatu, luy ieta l'autre pour l'empoigner, duquel Florisel fist autant que du premier, dont le gros diable tomba en la place, se veautrant & roulant comme vn gros Ours renniant Lupin, Teruagant, & tous ses autres Dieux, & maugreant celuy des Chrestiens, qui auoit esté le maistre. En quoy auint que Florisel luy cüyda trencher le col, luy pourfedit la teste à trauers des machoirs, tellement que la lague luy pendoit sur la poitrine, par mistere de la iustice diuine, voulant qu'il fust puny en la partie coupable. Estant ainsi depesché de ce truant, oste son armet, & s'en va vers Arlande presque pasmee de la peur de Brostolfe, laquelle toutesfois luy dist: A, ah, mon cher amy, qu'aussi bien fusse ie satisfaite par vous, que vengée, ie m'estimerois de l'abisme de malheur, esleuee au feste de toute felicité. A quoy respondit: Ma dame, il me desplaist de mon impuissance: au reste n'espargnez la vie de celuy qui ne peult disposer de son cueur ia asseruy. Là ie le cognois bien, dist elle, & ne me puy plaindre que de mon astre tant contraire à mon heur. Or allons (le prenant par la main) conter au Roy ceste bonne depesche. Ainsi vont en la grand' chambre, ou les Princes estoient couchez en diuers lietz,

pour se mieux resioüyr par compagnie. Lors Florisel en entrât dist au Roy. Monsieur plus de morts, moins d'ennemys: ie viens d'enuoyer la guide de ma Dame ma sœur porter vn paquet aux enfers à ses bös cousins. Si l'auiez vous mal acoustré en porteur (aiouste Arlande) ne luy ayant laissé bras dont il se puisse aider: dequoy se prendrent fort à rire. Or luy dist adonc le Roy Amadis: Ma dame, il faut penser de la reception du Roy vostre pere qui ne peult plus gueres tarder. Auquel ie serois d'auis que la porte fust ouuerte, de la sorte qu'elle a esté au Geant, i'entens sans luy faire outrage: mais le laissant entrer seul, pour auoir par ce moyen raison de luy en vostre endroit, bon gré mal gré, quand il se verra en nostre puissance. A quoy Arlande: làs monsieur mal sied à vostre serue & captiue de contredire à vostre opinion: mais le sang qui ne peult mentir, vous requiert que s'il vient, vous luy laissez yser enuers moy de tel pouuoir que nature luy a donné prenant garde au demourant à vostre seurété, car ie me sens tant persecutée de tout defastre, que vèulx desormais lascher la bride à fortune, à tout ce qu'elle voudra ordonner de moy. Les Princes louerent grandement la naïue affection de la fille si mal traitée; à quoy le Roy lui respondit. Ma dame, estàs venuz icy en vostre faueur, ne sommes deliberez nous esloigner en rien de vostre vouloir, mesmement en ceste sainte & naturelle intention enuers vostre seigneur & pere. Elle adonc loi fist telle replique: ie recognois par la violéce d'amour enuers celuy qui est cause de tout mon mal, & tout mō bien (iettant l'œil sur Florisel) auoir offencé le Roy mon pere, adressant mō cueur à celuy, de qui le sang de mon frere me clamoit vengeance: de quoy ie puis trouver excuse enuers vous qui estes la fleur des loyaux amās, laquelle luy passionné du zeile paternel enuers l'ymbre & memoire de son filz, ne peut prendre en payemēt. De ce propos elle tomba aux regretz sur Florisel non tāt couuertz q' la com-

la compagnie ne les entendist, dont ilz auoient tous grand pitié, quand voicy venir le gentil Damoyse Florarlan à la porte du chasteau qui heurte, estans les Escuyers avec luy, qui estoient aussi demeurez dehors auquel Galandrie enuoyee, auoit conté en chemin le discours de toute l'histoire, dont il mist les genoux en terre, regrant Dieu de sa iuste clemence, disant telles paroles, en l'honneur du Roy Amadis, & de son lignage, qu'elles ne seroient croyables en son age: & comme raconta la Damoyse il l'embrassoit en parlant, & luy faisoit reiterer souvent vne mesme chose du plaisir extreme qu'il en auoit. Florisel affublé d'un manteau de nuit, fourré de matres sebelines, alla luy mesme ouurir la porte, ne s'en voulant fier à personne: à laquelle il acolla l'enfant par plusieurs fois: Puis monterent en la chambre, ou la reuerence faite aux Seigneurs s'alla agenouiller deuant sa mere, qui le baise & rebaise cent fois, luy baignant la face vermeille de chaudes larmes & luy à elle qui tant estoit rauie de le tenir entre ses bras, que peu s'en salut que d'exces d'ai-

se, elle ne descourist à l'heure la verité de sa naissance, en le presentât à son pere: mais elle s'en garda, reseruât le declarer apres qu'il auroit fait acte digne de la race dont il estoit yllu. A ah (disoit elle) Florarlan que ma nourriture a esté bié employee en toy, de qui en cest aage ie reçois desia tel seruice: plaie à Dieu me donner vn iour moyé de le rendre. Adonc luy commença à dire: Ma Dame ie vous dois bien d'auantage, si i'auois puissance de satisfaire. Lors s'en va baisser les mains au Roy & aux deux Princes: puis venant à la pucelle Alastraxee, luy dist: Ma dame ie scauoy bien qu'il n'y auoit forteresse inexpugnable à vostre triple force, de beauté, discretion, & vaillance: ie vous remercie de l'honneur que m'avez fait, me receuant pour escuyer en si heureuse auenture. Mon mignō, respōdit elle, c'est à vostre bōheur que ceste fortune est deuē si vous en sçache gré ma dame Arlande plus qu'à moy. En telz propos passerent le soir, soupans ensemble en grand plaisir de leur victoire, dont ceux du chasteau auoient tresmauuaise part.

Comme le Roy de Thrace vint au chasteau du Lac aux quatre chaucees, ne scachant rien de ce qui y estoit auenu.

CHAP. LXIII.



E Nuiro mydi le iour ensuyuant on descourist de loing le Roy de Thrace, qui venoit acompagné de douze

Cheualiers seulement: Parquoy les Princes, combien qu'ayans bon mestier de re-
pos, se leuerent pour l'aller recevoir à la

porte, cōme ilz auoient auisé. Or venoit le Roy sans rien sçauoir de la fortune passée, au moyen du bō ordre qu'on y auoit mis. Auquel fut leuee vne porte coulisse par les seruiteurs du Duc, & abatuë aussi tost, se trouuant bien esbahy d'entrer ainsi seul, & ses gens d'auoir visage de boys: beaucoup plus le fut, quand il vit sa fille soy prosternant à genoux deuant luy, luy requerant pardon de l'offence qu'il estimoit luy auoir faite, environnée des Princes non armez que de leurs espees.

Monseigneur, dist Arlande, i'ay vn temps employé tout mon pouuoir à pourchasser la vengeance de Balarte mon frere sur ceux qui l'auoient occis comme chacun peult auoir entēdu: depuys, mes ennemys m'ont rencontré en tel peril, que sans leurs secours perdois l'hōneur ou la vie. Qui donc seroit le cuer si inhumain, de procurer la mort de celuy de qui la vie il tiendroir? veu mesmement que l'accident de mon frere ne les charge d'aucune trahison, ne desloyauté, & n'est à imputer qu'au hazard ordinaire de la guerre. A ceste cause estant par vous liuree contre mon gré à Madasani, soubz condition de vengeance sur les Princes de Grece, ausquelz i'estois redevable de ma deliurance, à tout le moins eux quités enuers moy, par compensation du bien au mal, ilz m'ont secouruē en la captiuité ou i'estois: de telle sorte q̄ vo^r voyez, nonobstant les trahisons du Duc, comme ce noble sang est tousiours en la protection de Dieu. Pource vous supplie mōseigneur, considerer mon fait par raison, appaisant vostre courage en mon endroit, & faisant apointement avec ceux de qui l'alliance ne reçoit comparaison de celle de Furio Cornelio. Quand à moy, ie m'offre à vous pour en disposer à vostre volonté, comme Isaac fist à Abraham son pere. Et d'eulx ie vo^r assure q̄ ne serez empesché en vn seul point de vostre liberté Royale. Voyez cy le grand Roy Amadis de Gaule, voilà Florisel de Niquee de qui le pere m'a sur la mer sauué la vie, voilà le Prin-

ce Falanges d'Astre, & la vaillante Alastraxee, qui ne desirent que vostre amytie, combien qu'il vous tiennent entre leurs mains. Le Roy en oyant la sage requeste de sa fille, fut esmeu du suiet présent & naturel, tellement qu'il lui fist oublier l'enuy passé de son filz: considerant la courtoisie extreme de ses ennemys, qui luy vindrent faire la reuerence, en tel auantage qu'ilz auoient sur lui. A ceste cause se resolut de faire apointemēt avec eulx, leur disant: Messieurs, ce seroit grand simpletise à moy d'appeller de sentence de iuge souverain, & sans superieurs, i'entens de nostre Seigneur, que ie voy vous favoriser en toutes voz entreprises spécialement en la presente, qui me rend vostre obligé, de l'honnesteté dont vous vsez à l'endroit de celuy que renez en vostre pouuoir. Partant vous declare, qu'en effaçant du tout la memoire des choses passées, ie desire vostre alliance & confederation eternelle, s'il vous plaist me l'ottroyer. Et à vous ma fille, veu vostre repentance & satisfaction, ie remerz toute l'indignation que ie pouuois auoir contre vous. Lors elle luy embrasse les genoux, & il la leue, & baise en la face, arrosant sa barbe blanche de grosses larmes meslees avec celles de sa fille. Apres vint au Roy Amadis, & aux autres Princes donner les acollades, de quoy fut demené grand' ioye par le chasteau. Si monterent en la grand' sale, là ou se reposans, conterent au Roy de Thrace la forme de leur venuē, prise & victoire: dōt il fut fort esmerueillé. Alors entra le Damoysele Florarlan qui se vint mettre à genoux deuant le Roy, qui luy bailla la main, disant: mignon, quand ie fus auerty de la mort du Geolier, ie ne te la pensois pardonner si ioyeusement, mōseigneur (respondit il) tout est conduyt par la main de Dieu, & à bon port, comme vous voyez. Les Princes merueilleusement contens de l'esprit & de la grace de cest enfant, demanderēt à Arlande qui il estoit: laquelle respondit que elle n'en sçauoit autre chose, sinon que le sage

Asibel.

Astibel lui auoit donné, l'assurant qu'il estoit sorty de hault lieu come lon cognoistroit, quand son temps seroit venu. Il en porte bié la phisionomie (dist le Roy Amadis) Dieu le face aussi bon qu'il est beau, & bien apris. Alastraxeree n'en dist pas ce qu'elle en pensoit, l'ayant sceu d'Arlande mesme, vn iour qu'elle la print pour Florisel au treillis du verger, & pour myeux l'atraire à son desir, lui declara qu'elle auoit vn bel enfant de lui : mais la sage pucelle n'en voulut rien descouurir, iusques à ce qu'il fut recogneu : comme il sera raconté en la tierce partie de ceste histoire cōtenant ces faitz encores plus cheualereux en son aage d'hōme, que sa petite ieunesse n'auoit esté discrete. Les tables furent couuertes pour souper, qui fut fort recreatif selon la fortune. Apres lequel, le Damoyfel mettant vn genoil en terre deuant le Roy Amadis, le supplia luy octroyer vn don.

Ouy, foy de Prince mon beau filz, demandez hardiment. Monseigneur, c'est d'aller à Constantinople porter aux Dames les premieres nouvelles de vostre bonne auenture, pour leur rendre autant de ioye, que leur ay donné de tristesse. Ce que lui estāt accordé trop volontiers, partit le lendemain en grād diligence. Le Roy de Thrace fist faire enterrement, & sepulture solemnelle au Duc Madasani, & à ses cousins à la mode Payenne : & seiourna enuiron quinze iours en ce chasteau, tandis que les Princes se guerissoient de leurs playes : Vn iour desquelz Arlande sa fille lui declarant le desir qu'elle auoit d'aller aux noces des Princes Florisel & Lucidor, il delibera y aller lui mesme, tant estoit satisfait de l'honorable cōpagnie des Princes Grecz : mais auant qu'ilz fussent passez, arriua la flotte de l'Empereur de Rome & de Lucidor, lesquelz descenduz en terre marcherent en ordonnance de bataille iusques à la forteresse du lac, au grand espouuement de tout le pais, & du Roy mesme, quand il descouurit du chasteau les enseignes Romaines & Frāçoyses, si les Seigneurs ses hostes

ne l'eussent assuré d'eulx, comme de ses amys, desquelz les chefs vindrent au chasteau, qu'ilz cogneurent si fort que leur grand' puissance y eust de peu seruy, sans la subtile inuention de la pucelle Alastraxeree. Or fut acreuë la ioye à leur venuë, & apres quelques iours de repos, les Nauz de Thrace estans apareillees firēt voyle toutes ensemble par bon temps la route de Constantinople, passant l'ennuy de la mer en tous les deduitz, dont ilz se peuuent auiser.

Comme le Damoyfel Florarlan porta à Constantinople les nouvelles de la victoire des princes,

CHAP. LXXIII.

LE Damoyfel Florarlan arriua en peu de iours à Constantinople, là ou ne vous fault declarer la chere qui luy fut faite par les Dames, veu les ioyeuses nouvelles qu'il portoit : pour lesquelles furent faitz feuz de liesse en la ville, auecq' dances publiques à l'entour, iusques à l'arriuee de la flotte des Roys & Princes, qui fut auecques tant de fanfares pompes & magnificences, que trop longues seroient à reciter. Grand recueil fut fait au Roy de Thrace en la cité par les Empeurs & par les Princesses, & à Arlande pareillement : laquelle estant caressée par Helene luy dist : Ma Dame, l'assurance que pouuez auoir de vostre beauté par dessus toutes celles du monde, & de la loyauté de vostre amy, vous garde de sursault pour ma venuë. Si le dernier (dist elle en souzriāt) ne me asseuroit plus q̄ le premier, i'aurois ocasion de crainte, pour la perfection que ie voy en vo^s. Là dessus suruint Darinel qui rompit leur propos, par ces ioyeux discours acoustumez de glorieuses pensees de sa maistresse Siluie : laquelle aussi venāt recevoir la Princesse Arlande lui fist monter la couleur au visage, par la memoire du bon tour qu'elle auoit ioué à Florisel en la forest s'affublant du manteau de Siluie. Le

lendemain arriva la Duchesse Armide, bié acompagnée de damoyelles & Chevaliers & en tresp magnifique arroy, n'ayant rien oublié n'obmis de ce qui pouvoit servir à quelque tesmoignage de sa grandeur. Au deuant laquelle les Princes sortirent hors de la cité, pour la recueillir honorablemēt. Entre lesquels vous devez croire que l'Empereur de Rome ne demeura derriere, qui se tint bien pour le mieux party, de la ioye de sa venuë, à cause de l'accomplissement du desir qu'il auoit de la prendre à femme, qui fut acordé quant & les autres. Peu de iours apres vint le Prince Olorius & Luciane sa chere espouse. A la reception desquelz, la pucelle Alastraxeree ne fut paresseuse & son frere Anaxartes, duquel elle eut en peu de paroles pratiqué le mariage

avec la belle Oriane, qui fut assigné au iour nostre Dame de Septembre, dont la ioye estoit nonpareille de luy & du Prince Falanges, qui ne cessoient chascun iour de faire armes diuerses pour l'amour de leurs Dames. Les derniers qui arriuerent fut l'Empereur Lucencio, & Axiane sa femme: puis Perion, Seigneur de la grand Turquie, & la Roynne Gricelerie. Iamais la ville de Cōstantinople n'auoit esté si pleine de peuple & autant y auoit de tentes & paviillons tenduz en la campagne, & bien tel nombre de vaisseaux au port, qu'il y auoit eu au cruel siege de Lucidor: Car il n'y eut Prince ne Cheualier qui en peut sçauoir les nouuelles, qui ne s'y trouuast pour voir la pompe extreme de tant de nopces illustres & s'exercer es braues ioustes & tournois.

Comme les fiançailles & noces des Princes & Princesses furent faites en grande magnificence.

CHAP. LXV.



L'Assemblée parfournie de tous les Seigneurs & Dames qu'on attendoit, furent faites les fiançailles du Prince Falanges avec la pucelle Alastraxeree, du fort Anaxartes, avecq' Oriane: & de l'Empereur Arquifil, avecq' la Duchesse Ar-

midé. Esquelles ie ne vous pourrois suffisamment exprimer le contètement de ces six personnes, se voyans venuz au port de leur souhait, apres tant d'angoisses & tourmens. Or devez sçauoir qu'outre tant de grâds seignrs qui s'y trouuerēt, ceux qui eurent

rent empeschement, y enuoyerent (selon la coustume de leur temps) leurs ymages tailles pres du naturel, qui furent toutes assises en vn hault trosne erigé en la maistresse sale, & donnerent grand plaisir à les contempler. Dehors la ville furent dressez force beaux theatres & eschafaux, pour les solemnitez de la pompe nuptiale, & appareil des ioufftes, & autres entreprises d'armes. L'ordre ainsi donné à tout trois iours apres les fiançailles, les nouveaux fiâcez parez & atournez de drap d'or, d'argent, & de pierrerie infinie, furent conduitz du Palais iusques au temple (qui pres estoit) chacun par ses parrains & marraines: c'est à sçauoir, Falanges & Alastraxere, par le Roy Amadis & la Royne Oriane: Lucidor & la Princesse Oriane, par l'Empereur Esplandiâ & sa femme: Anaxartes & son Oriane, par l'épereur Lisuart & l'Empereire Abra: Florisel & Helene, par l'Empereur Lucencio & femme: Zahir & Timbrie par dô Frises & Silue. Ce qui dôna le plus de plaisir fut Darinel, qui marchoit deuât, vestu à la pastorale, sa houlette en vne main sa cornemuse en l'autre, de laquelle il ne sonnoit à cause des haultz-boys: mais alloit dansant par les rues à mesure & cadence, faisant iambes routes, mouliner, avec hossettes, pas de cheual, & maintz autres faultz, passages, & tours de pied, voire d'vne telle grace, que les plus sages ne se pouuoient tenir de rire. Au temple ilz furent voilez en grande ceremonie par vn Legat enuoyé expres par le Pape. Apres les benedictions, retournerent au palais Imperial, ou ilz trouuerent les tables couuertes pour le festin: auquel furent seruiz selon leur grandeur, avec melodie des rares & diuers instrumens. Estans leuees, Darinel vint à gambader en place, lequel le Roy Amadis apella luy disant: Mon amy Darinel, ie voudrois bien eutendre la raison de l'habit de berger qu'avez prins au iourd'uy: d'autât que l'estime plus l'inuention de voz deuises, que celle de tous ces Seigneurs cy. Monseigneur (respondit il)

c'est pour signifiânce de reuenir au premier estat des hommes, puis que ie voy mon esperance faillie, le iour que chacun a iouissance de la sienne. Le Prince Falanges, qui tousiours luy menoit la guerre, luy replique. Quel besoin as tu de cornemuse en telle ocaion de desespoir? Pour me reconforter moy-mesme (dist il) en me contentant sur le ieu, en plus grand' gloire de mes pensees que les vofues, ayans aspiré plus hault que la puissance ne pouuoit ataindre. La rîsee fut grande, du bon payement qu'il auoit rëdu au prince Falanges. Et de là s'alla coucher aux piedz de sa belle maistresse Silue, sonnant & chantant ses passions & amourettes rustiques, en grolîeryme champestre.

Chant rustique de Darinel.

*A Dieu ville vous command,
Il n'est plaisir que des champs.*

*L'autr'hier ie trouuay Siluette
Son petit troupeau gardant,
Quand ie l'auisay seulette
S'amour allay demandant.*

A Dieu &c.

*A quoy pensez vous bergere
En ceste fleur de quinze ans,
La beaulté passe legere
Comme la Rose au printemps.*

A Dieu &c.

*Fille qui ne fait amy
De tout son desir content,
On ne fait cas ne demy
De son teint ne son corps gent.*

A Dieu &c.

*Il vous donnera ceinture,
Demy ceint ferré d'argent,
Rouge cote & la doubleure,
Plus l'herbe verdoyant.*

A Dieu &c.

*A la feste auez la dance.
Et le ioyau triumpuant:
Lors vy à sa contenance
Qu'elle s'alloit eschauffant.
Adieu ville vous command,
Il n'est plaisir que des champs.*

*Que de soif allois mourant:
Me meine à la source claire
Ou luy dis le demourant.
Adieu ville vous command,
Il n'est plaisir que des champs.*

Nul ne se pouuoit tenir de rire, de ce ioyeux chant, acompagné d'un geste de mesme, avecques menuz souspirs, sanglotz & ceiliades vers sa maistresse. Lors il se leua pour le dancer quant & quant, en battant les sonnettes d'argent, dont son gaban estoit semé, & ses brodequins aussi. Adonc continua.

*Respond qu'elle est si ieunette
Que n'entend mon preschement,
Mais qu'on dist qu'en amourrette
N'y a que peine & tourment.
A Dieu &c.*

*Depuys l'espie au passage
Tant que la trouue filant,
A l'oree du boschage
Pres de son troupeau bellant.
A Dieu &c.*

*Dieu gard (dis) la filandriere
Et celuy qui la surprend:
Elle regarde derriere
Et un doux salut me rend.
A Dieu &c.*

*Belle (dy ie) à ce solage
Vous baslez vostre teinct blanc:
Vous seriez mieux à l'ymbrage
De ce petit couldre franc.
A Dieu &c.*

*Voicy un chapeau de paille.
Un cœuurechef banolant:
Combien que le don peu vaille
Le cueur est franc & vaillant.
A Dieu &c.*

Le l'affuble, & luy declaire

Chascun prenoit grand plaisir au passe-temps que Darinel leur donnoit, disans à Siluie (demy pâmée de rire) que son honneur restoit soupçonné s'il n'en dechifroit la fin. Il ne veut oublier à vous dire, qu'on auoit desia couuert pour le souper, qui fut tresmagnifique, & le bal apres, ou vindrēt plusieurs bandes de masques de diuerses façons: qui fut assez tost finy, pour la haste qu'auoient ces loyaux amans d'aller recevoir le doux loyer de leurs longs & angoisfeux seruices, que leurs histoires particulières racontent. Si fut chascun couché solemnelement, avecq sa nouvelle espouse iusques au lendemain, qu'au retour de la messe arriuerent en court six pucelles, toutes vestuës de drap d'or, dont la plus aparēte des premieres portoit vne ymage d'or, de taille fort exquisite: laquelle la reuerence faite, leur dist: Tresexcellens Princes, la Roine Cleofile ma maistresse saluē voz magestez, vous auertissant qu'elle ne s'excuse d'absence par cest enuoy, qui est sa vraye effigie naturelle: ains estime bien accomplir par luy l'obligation de sa venue: d'autant qu'en luy la pouuez voir comme presente. Car les traitz & lineamens sont si propres, qu'on n'y pourroit aiouster ne diminuer. Et elle n'estime en rien plus viue que la statuē, ayant laissé son ame en ce palais: laquelle suplie estre remise en ce corps, par celuy qui en est demeuré propriétaire. Tous les Seigneurs & Dames furent esbahis de ceste harangue estrange, & priferent fort l'image, dont la façon passoit le pris de l'estoffe. Si fut assise au plus honorable lieu du throsne, ou entre tous elle fut contempee à loysir, par le beau Damoyfel Floran: en telle sorte q de son regard fainct & simulé, elle lança en son ieune & tendre cueur, rayons plus ardens d'affection veritable,

table, que ne fit iamais la Venus de marbre faite iadis par Praxiteles. Dequoy depuis portèrent tesmoignage suffisant, les peines & traux quasi incroyables par luy souffertz pour l'amour de la belle Royne

Cleofile, qui auoit remis la disposition entiere de sa personne es mains du Roy Amadis: desquelz la tierce partie de ceste histoire fera ample & special discours,

De l'auenture estrange des Damoyelles de la Royne Sidonie. Et comme le Roy Amadis fut enleué & transporté par les sages.

CHAP. LXVI.



LE lendemain à l'ysuë du dîner entrèrent en la grand' sale du palais six pucelles vestuës en long ducil, avec contenance bien conforme à leurs habitz. Deux desquelles, apres deuë reuerence, despleyèrent vn parchemin, auquel estoit pourtrait & paint en or & azur, les faitz de Florisel de Niquee, & de Falanges d'Astre en l'Isle de Guindaye, & leurs personnages, tant au vif qu'il ne sembloit rester que la parole. Ce qui troubla fort le Prince Florisel, mesmement quand vne d'entr'elles, pendant que les autres tenoient le parchemin tendu, vint ouurir vne lettre, & auant que la lire, leur dist: Oyez tous & toutes la seule vëgeance que la roy-

ne Sidonie peut prendre de celuy, qui luy a fait offence mortelle. Lors commença.

Lettre de la Royne Sidonie.

Sidonie Royne de l'Isle de Guindaye, fondatrice des loix glorieuses, à sa honte. A toy saint Moraisel ce salut enuoye, pour mieux t'en pouoir priver. T'ayant fait present de ma personne & Seigneurie royale, suyuant la rigueur de mes ordonnances, tu l'as frauduleusement acceptee, non obstant l'incapacité de la tienne, te seruane d'vne partie de l'edict, en violant l'autre. Et ayant ainsi iniustement vsurpé l'honneur de mon liët Royal, in'as laissée en l'og:
regress:

regret de ton absence, sans oncques puy
m'auertir de l'abus que m'auois brassé.
Mais du nouveau lit par toy pratiqué quel-
le excuse en peulx tu forger? sinon d'auoir
voulu racheter la vie du gentil Prince Fa-
langes d'Asire. A à l'amitié t'obligeoit
bien à exposer pour luy la tienne, non pas
ton honneur & le mien: dequoy i'appelle
les Dieux à ma vengeance que tu as pariur-
rez en uoz espousailles: & la pourchasseray
enuers les hommes par le fruit mesmes yf-
su de toy d'une fille, dont m'as laissée en-
ceinte: laquelle pour l'avantage de beauté
qu'elle a sur toutes les belles du monde,
ay nommée Diane, à la semblance de cel-
le, dont la planette efface au ciel les autres.
Laquelle ie nourriz pour pris & loyer de
ta teste, la promettant à femme avec mon
royaume, à quiconque le present m'en a-
portera. Pource ay fait bastir les tours de
de Phebus & Diane, ou elle sera enclose,
sans estre veuë d'homme vivant, iusques
à la venue de mon vengeur son mary: qui
lors luyra en ton lieu, elle eclipsant au
mien, apres la compagnie que mon ame
ira faire à la tienne. Pour assurance des-
quelles conditions, ay signé ceste lettre
de mon nom, & l'enuoye sceller de son
sang en ta presence, aussi innocent que
le tien est lasche & coupable.

La pucelle ayant acheué la lecture de la
lettre, tira vne dague de dessous sa robe,
& ses compagnes pareillement chacune la
sienne qu'elles se fourrerent à deux mains
parmy les poitrines, tombans dessus mor-
tes en la place, qui fut toute tainte & souil-
lee de leur sang. Or telle estoit en ce temps
la rigueur de seruitude, que les suietz fran-
chement immoloient leurs corps au sim-
ple commandement de leurs Seigneurs,
principalement es contrees des mescreans
& payens. Ce qu'elles firent soudain qu'on
ne peut auoir loysir de les en destourner.
Dequoy tous les Seigneurs & Dames fu-
rent tellement troublez, qu'ilz demeurerēt
long tēps comme statuës fichez sans mot

sonner. Mais Florisel à qui le cas touchoit
specialement, estant saisi d'une douleur ex-
treme apres quelque pause parla en ceste
maniere. Si, tresillustres Seigneurs, par la
loy de vraye amitié, on ne doit espargner
corps ne biens à quelque besoin de l'amy,
que pouuons nous reseruer au point de
l'extremité de sa propre vie: auquel estoit
tombé le prince Falanges par les loix ri-
goreuses de l'Isle de Guindaye, si ie ne luy
eusse donné secours soudain: cōbien qu'au
preiudice de la foy que ie deuois à Dieu
premier, puy à ma chere Dame Helene,
de laquelle ie n'espere moindre pardon
que de la maiesté diuine ensemble offen-
cée, la Roynes qui m'acuse est douee de
tant de grace & perfection que seule pou-
uoit forcer tout cueur humain à son vou-
loir, & si elle se plaint du lieu trop solemn-
des saintes nocces, à elle mesme doit impu-
ter le meschef auenu, par la contrainte de
son ordonnance. Toutesfoys pour satisfac-
tion de son honneur (dont on me vou-
droit charger) ie consens que le present
pourrait soit ataché en vn perron qui sera
esleué en la court de ce palays, & l'acci-
dent de ces pauures pucelles en vn autre,
pour mienx publier le fait, à fin que par
ignorance Cheualiers ne luy faillent à l'en-
treprise de sa querelle: pour laquelle des
maintenant ie iure & prometz assurance,
telle qu'il conuient en tel deffuy, à tous
ceux qui sont ores en ceste cité, lesquelz
voudront contre moy entrer en camp pour
elle, à fin que si la vengeance luy est deuë
de ma part ne soit differee. Ainsi acheua
Florisel sa responce, qui trop luy cousta de
son sang (comme l'histoire deduira ample-
ment en la tierce partie) la beauté souue-
raine de la fille, seruant d'experience plus-
grande de pareille bonté & valeur du pere.
Ce iour les Damoyelles furent inhumées
honorablement, & le pourtrait de leur
mort affiché en vn des perrons. Le lende-
main fut continuee la feste, qui dura enui-
ron vn mois. Adonc les Princes estranges
prirent cōgé des Seigneurs Grecz, pour
retour-

retourner en leurs terres, qui firent à tous de beaux & riches presens. Apres aussi partit la Roynie d'Argenes, & le sage Alquif, & Vrgande, ayans planté vis à vis du grand Palays chascun vn perron de cuyure, avecques telles propheties en lettres Grecques.

Prophetie de la Roynie d'Argenes.

Quand le seul avec sa seule sera seul,
sçaura le seul que seul peut estre seul.

Prophetie d'Alquif.

Quand la belle Diane sera pleine du resplandissant Apollo, la maison de sa premiere exaltation sera vuyde pour la plus grande impressiõ de sa conionction, disposée à plus haultz sacrifices que les litz des apareilleurs.


Prophetie d'Vrgande.

Quand le filz de la braue Lyonne prendra vie des criz de sa mere, ceux qui ont logé la gloire en Grece la perdront pour ailleurs l'aquerir plus grande.

De ces propheties demurerent tous fort esbahis, ne pouant nul rien comprendre de leur substance : & ainsi durerent lōg tēps avant que d'estre deschifrees. Ce fait les sages depeeschèrent leurs adieux, enuers tous les Seigneurs & Dames, emmenans quant & eux le Roy Amadis, & la Roynie Oriane: lesquelz (n'osans en rien desobeir à leur commandement) les suyurent au grand regret de toute leur lignee, qui ne sçauoit ou les sages les transportoient. Si

les acompagnerent en pleurs & douleurs iusques à leur nef qui les atendoit au port, équipée & garnie de toute prouision necessaire, ou ilz prindrent les doux baisers & accolées : leur faisant le Roy auant qu'embarquer vne brieue remonstrance de l'observation de la loy diuine, & du iuste gouvernement de leurs peuples. Puy entra en la nef & aussi tost firent voile, les bons Princes au haure, les conduysans de l'œil tant qu'il peut porter. Ce fait tristes & dolens retournerent en la ville : d'ou dedans peu de iours se retira chascun en ses pais: c'est à sçauoir Esplandian & sa femme en la grand' Bretaigne (laissant Lisuart & Abraham Empereurs de Constantinople) Amadis de Grece & Niquee en leur Empire. Ou peu apres Florisel & Helene les suiurent, lesquelz l'annee mesme eurent fruyt de lignee vn beau filz nommé Rogel de Grece. Autāt en eut à mesme terme Falanges en Colchos, de sa chere Alafraxeree: qu'ilz nommerent pour ses vertuz estranges Agesilan. De Lucidor pareillement naquit Lucendos de Gaule. Et du fort Anaxartes, dom Arlanges d'Espaigne, pour le droit successeur qu'il y auoit du chef d'Olorius son aieul. Desquelz Galeris le grand croniqueur, auteur de la tierce & quarte partie de ceste histoire deduyra à plain cy apres les faitz & gestes cheualereux, entremeslez de maintes amoureuses poursuytes, continuant le fil du discours precedent escrit par la Roynie d'Argenes, laquelle en cest endroit acheua sa vie & son lūre.

Fin du dixiesme liure d'Amadis de Gaule.



L'ONZIESME LI-
VRE D'AMADIS DE
GAULE:

Continuant les entreprises cheualereuses, & auen-
tures estranges, tant de luy que des Princes de son
sang: ou reluisent principalement les hauts faitz
d'armes de Rogel de Grece, & ceux d'Agefilan de
Colchos, au long pourchas de l'amour de Diane,
la plus belle Princesse du monde.

ENVIE D'ENVIE EN VIE.



EN ANVERS,
Par Guillaume Silvius, imprimeur
du Roy.


L'AN M. D. LXXIII.

THE HISTORY OF THE
CITY OF LONDON

FROM THE
MIDDLE AGES

TO THE
PRESENT TIME

BY
J. G. K.



LONDON


PRINTED

THE HISTORY OF THE
CITY OF LONDON
FROM THE
MIDDLE AGES
TO THE
PRESENT TIME
BY
J. G. K.

THE HISTORY OF THE
CITY OF LONDON
FROM THE
MIDDLE AGES
TO THE
PRESENT TIME
BY
J. G. K.

A TRESILLVSTRE DAME DIANE DE POI-

TIERS DVCHESSE DE VALENTINOIS

mbien (Ma dame) que vostre bonté & liberalité, nourrice des artz & sciences, attire les meilleurs espritz à vostre seruice (par la faueur que vostre deite de Lucine preste à l'enfantement de leur fruit spirituel) ceste hilttoire de Diane m'adresse spécialement à vostre grandeur, cōme proprement destinee, par la conformité de son nom. Laquelle figure vne Idee de toute perfection de beauté & grace, representāt vostre semblable excellence: qui est vne forme imaginaire d'harmonie, de proportion, de couleur, & lineature: rauissant le cueur d'admiration naturelle & y artizant vn ardāt desir de iouissance, qu'on dit Amour. Ceste Idee exprimee naïuement par Pigmalion en sa statue, & par Praxiteles en sa Venus, eut puissance d'allumer realement ce feu par le froid marbre: & depeinte en nostre Diane du pinceau de nature, attira par douce violence les Cheualiers de son temps à lui immoler leurs ames sanglantes (comme iadis à la deesse Diane de Theranné. Elle fut longuement gardee en vn chasteau de singuliere architecture retrayant à vostre Anet: par lequel gaignez à bon droit le tiltre d'Anetis attribué en Perse à Diane: bastiment certes non moins admirable que son tēple d'Ephese, construit par l'espace de cc. xx. ans aux despens communs de toutel'Asie. Or le brusla Herostratus pour acquerir renommee: & ie desire au contraire honorer & celebrer le vostre, en esperance de louange eternelle à mes escritz par l'immortalite de vostre nō. Auquel i'adresse mes vœux purs & netz d'adulation & avarice, sçachāt qu'autres ne seroient receuz ny acceptez de vous: nō plus que l'eau de la fontaine de Diane en Sicile se mesloit au vin, estāt puissee de main impudique. Si est ce que ie cognois bien vostre pouuoir infiny (cōpris au nō d'Hecate) par lequel pouez d'vne seule parolle chasser des hommes la misere de pour ellē (ennemye capitale de vertu) aussi bien que Diane deliura Candie de pestilēce, en lui edifiant vn temple. Mais à autre but ie ne tends qu'a vous faire seruice agreable: de liberé d'ensuyure les Phocēses, qui assiegez par les Thessaliens dresserēt vn haut bucher de bois pour y ietter & cōsumer tous leurs biens (en cas de meschef de guerre) toutesfois leur succedant à souhait, celebrerēt vn anniuersaire à Diane Dequoy i'ay trop plus d'espoir, que crainte du cōtraire à raison de vostre humanité accoustumee: me confiāt de trouuer encore meilleur visage à l'issuē, qu'à l'entree: cōme sembloit q̄ la Diane de Chios monstraist à ses adorateurs. Pas ne me sera (ie croy) mō astre si cōtraire q̄ ie rapporte iugement de defaueur, tel que l'imager Agoracrit sur sa statuē de Diane: dont il la surnōma Nemesis par vengeance, la cōdemnant à n'estre iamais portee à Athenes. Marchez donc hardiment belle Diane de Guyndaye, & vous presentez à l'illustre Diane de France, vous asseurant de ne trouuer en elle que courtoysie & gracieuseté debonnaire. Saluēz-la accompagnee de vostre Agefilan deguisé en damoiselle, comme iadis en quelque contree les hommes sacrifioient à la deesse de son nō en habit de femmes, & elles d'hōmes. Ne craignez point les fausses langues des calumniateurs, estant dediee à si haute Dame, qui les peut punir d'aussi grieuz tourmens que Diane d'Elide les sacrileges Sambic & Anthioc Epiphanez.


A tant maintienne Dieu en prosperité la magnifique Duchesse: de laquelle seule desormais i'inuoquerai la grace: d'autant que d'autres dieux ou deesses on peult obtenir secours en aucun lieu, mais d'elle par tout, estāt Lune au ciel, Diane sur terre, & Iuno au centre du monde.

Vostre treshumble seruiteur

I. G. P.

ENSUYT LA TABLE DES CHAPITRES CONTENVS EN CE PRE- SENT LIVRE.

Et premierement.



- Comme la Royne Sidonie se sentit grosse d'enfant: & de la naissance de la belle Diane. chap. 1. fueil. 1.
- Description du chasteau de Febus & de Diane, avec toutes singularitez. chap. ij. fueil. 3.
- De la naissance du Prince Rogel de Grece & de sa philionomie avec ses meurs & conditions. chap. iij. fueil. 6.
- Comme le Prince Agesilan nasquit & de sa figure & complexion. chap. iiij. fueil. 7.
- Comme Florarlan de Trace rauy d'Amour par l'image de la Roine Cleofile, pourchassa à estre Cheualier pour auoir moyen de luy faire seruice. chap. v. fueil. 9.
- Comme Florarlan party de Trapezonde, eut combat contre quelques Cheualiers, & debat avec vne Dame & vne damoyelle. vj. 12.
- Comme le Cheualier enuoyé par Florarlan avec l'escu du Duc de Galde, vint à Trapezonde. Et du deffuy que le Roy de Gaze presenta à Florisel. chap. vij. fueil. 17.
- Du combat entre le Prince Florisel de Niquee & le Roy de Gaze pour la querelle de la Royne Sidonie. chap. viij. fueil. 19.
- Comme le Cheualier du Fenix fut porté par tourmente en l'Isle de Dardanie, & de ses fortunes. chap. ix. fueil. 24.
- Comme estant le cheualier du Fenix assis deuant le chasteau, veid reuenir le Nain qu'il en auoit veu sortir la nuit precedente, & de ce qui en auint. chap. x. fueil. 26.
- Comme les Cheualiers qui auoyent combatu contre celui du Fenix allerent faire leur plainte à la Royne de Dardanie de la Princesses sa fille. chap. xj. fueil. 29.
- Comme le Geant Madarā vint avec son armee liurer l'assaut à la ville de Dardanie. chap. xij. fueil. 31.
- Du combat du Cheualier du Fenix contre le fort Geant Madaran, avec heurense victoire. chap. xij. fueil. 33.
- Comme le Roy de Gaze s'alla presenter à la Royne Sidonie, & qu'elle estoit la perfection de la beauté de sa fille Diane. ch. xiiij. 35.

Comme

Côme le prince Agefilan s'enamoura de Diane, par la seule veüe de son ymage: & du conseil que dom Arlanges d'Espagne son compaignon luy donna. chap. xv. fueil. 38.

Comme Daraïde & Garaye aborderent en l'Isle de Guindaye, & de ce qui leur auint à l'arriuee. chap. xvj. fueil. 40.

Comme Daraïde & Garaye depeschees du Cheualier de l'escriteau, recôtrérét deux damoiselles, & de ce qui passa entr'elles. xvij. 43

Comme Daraïde & Garaye rencontrerent vn Cheualier qui emmenoit le pallefroy d'une Damoiselle & de l'issuë. ch. xvij. f. 46.

Côme Daraïde & Garaye arriuerent en la ville de Guindaye, & de là allerent trouuer la Roïne Sidonie en son logis de mer. xix. 48.

Comme la Roïne Sidonie mena Daraïde & Garaye à la ville, & les donna à la princesse Diane sa fille. chap. xx. fueil. 51.

Du passetéps du luth que print Diane avec Daraïde & Garaie. xxi. 54.

Côme la Roïne de l'Isle de Dardanierequit le cheualier du Fenix d'espouser la princesse Lucenie sa fille, & de sa responce. xxij. 56.

Comme le Roy de Lacemone vint vers l'emperiere Niquee de la part du soudan son pere pour la mener vers luy, & du succez de leur voyage. chap. xxij. fueil. 58.

Côme les nouuelles coururét par le mōde que l'emperiere Niquee estoit perie en mer, & du merueilleux dueil qu'o en mena. xxiiij. f. 59.

Comme l'Empereur Amadis de Grece alla voyager par mer & par terre en queste de Niquee & de ses auentures. chap. xxv. f. 61.

Comme Amadis de Grece & sa Damoysele Finistee reprindrent leur chemin & de ce qui leur auint avecques la belle Angelee à l'occasion d'un Cheualier. chap. xxvi. fueil. 65.

Comme le prince Florisel fut porté par tempeste en l'Isle de Garaye & des auentures estranges qui luy auindrent. cha. xxvij. fue. 68.

Côme Florisel sortit de la prison ou la Naine l'auoit enfermé, & entra en vn beau verger & de ce qui depuis luy auint. ch. xxvij. f. 70.

Du cruel combat de Florisel contre le Gean Bazarán & ses Cheualiers. chap. xxix. fueil. 72.

De la braue bataille du prince Anastarax & de Filisel son filz contre le gean Brosdolf: & du secours que Florisel leur donna. xxx. 75.

Comme les princes Florisel & Anastarax arriuerent au chasteau: & de la mort de la geante Batalaze. chap. xxxj. fueil. 77.

Comme Fenix de Corinte & Astibel de Mesopotamie rencontrèrent deux damoyseles, & qu'elle en fut l'issuë. ch. xxxij. f. 78.

De la triste vie que Daraïde menoit en l'amour de Diane. xxxiiij. 81.
De l'entree & reception sumptueuse de la Roine Cleofile en la ville
de Guindaye, & le motif de sa venue à voir Diane. cha. xxxiiij. f. 83.

Comme la Roine Cleofile alla dîner avecques Diane, ou Garaic
se donna à elle. chap. xxxv. f. 84.

Comme les Roines & leurs damoïselles esprouuerent l'auenture
de la caue des deux tours & avec quelle yssuë. chap. xxxvj. f. 87.

Du plaisir que print la roine Cleofile es diuises & peintures histo-
riees au palais de Diane. chap. xxxvij. f. 89.

Côme arriua à la cour vn beau ieune cheualier menant la duchesse
de baviere: & de la requeste qu'ilz firēt à la roine Sidonie. xxxviij. 91.

Comme Fenix de Corinte & Astibel de Mesopotamie vindrent à
la iouste cōtre Rosaran, & y perdirent leur damoïselles. ch. xxxix. f. 92.

Du combat perilleux entre le cheualier du Fenix & Rosaran &
la fin d'iceluy par vn estrange enchantement chap. xl. f. 93.

Du lignage de Rosaran & la cause du chasteau enchâté. xli. f. 96.

Comme les Roynes & Daraïde, & Garaye esprouuerēt l'auentu-
re du chasteau enchanté. chapitre xliij. f. 97.

Comme l'Empereur Amadis de Grece deliura vne Damoysselle
des mains de deux cheualiers qui la vouloyent forcer. ch. xliij. f. 100.

Du mauuais tour qu'une Damoïselles brassa à l'Empereur Amadis
qui auoit la nuit refusé sa compagnie. chap. xliij. f. 101.

Comme l'Empereur Amadis de Grece deuissant avec Finistee en
chemin, rencontra vne litiere que deux geans conduysoyent avec
plusieurs cheualiers. chap. xlv. f. 102.

Comme les cheualiers du geant saillirent derechef sur Amadis,
qui les rembarra. chap. xlvi. f. 105. (siane. ch. xlvij. f. 107.)

Des discours de la princesse Lucelle avec sa damoïselles Anastarax.

Comme l'Empereur & Mandroc le geant, gueris de leurs playes,
s'ēbarquerēt à la persuasiō de Lucelle pour aller en frāce. xlvij. f. 109.

Comme Florisel & Anastarax avec leur compagnie partirent du
chasteau des geans, &c. chap. xlix. f. 110.

Comme Florisel, Anastarax & leur dames furent pris par fraude
de la dame de l'Isle & de ses enfans. chap. l. f. 112.

Comme les Roys de Gaze & de Bugie enuoyerēt Galtazar de Bar-
berousse & ses freres, &c. chap. li. f. 114.

Comme Galtazar de Barberousse executa son embassade enuers
la Roine Sidonie, &c. chap. liij. f. 115.

Des propos que Dianetint à Daraïde sur le combat qu'elle auoit
accepté, &c. chap. liij. fueil. 118.

Du combat des trois freres contre Daraïde, &c. chap. liij. f. 119.

Des choses estranges que Florarlan & Artaxeres, virent au palais
de Mars ou la Roïne les fit loger. cha. lv. fueillet 122.

Des deuis de Diane avec Daraïde estant au lit nauree & d'une da-
moiselle qui vint en cour requerir vn don à la Roïne. ch. lvi. f. 123.

Comme nauigant la roïne Cleofile & Garaye, &c. ch. lvij. f. 127.

Côme Garaye decouurit à la roïne Cleofile qu'elle estoit hōme,
& du debat qui fut entr'eux sur ce propos. chap. lvij. f. 130.

Côme allant Daraïde avec la damoiselle Galtazire descēdirēt pres
d'une fōtaine ou suruīt vn cheualier qui leur ioua vne trouffe. lix. 131

Comme Daraïde & sa compagnie se mirent à rechercher le frau-
deur, & de leur succez. chap. lx. fueil. 133.

Côme les cheualiers que Daraïde enuoia à la roïne Sidonie, se pre-
sēterēt à elle lui faisāt le discours ioieux de l'acte du fraudeur. lxi. 137

Côme l'Emperer Amadis de Grece & la princesse Lucelle travail-
lez & ennuyez de la mer prindrent terre, &c. chap. lxij. f. 140.

Comme allant la princesse Lucelle avec le geant Mandroc en
queste de l'Emperer Amadis se virent en grand peril & quelle fut
l'issuē. chap. lxij. fueil. 143.

Comme Amadis de grece partit sans parler à elle, & comme elle
alla apres luy. chap. lxiiij. fueil. 146.

Côme l'Emperer Amadis par sa haute cheualerie conquist le cha-
teau d'argatas & deliura les prisonniers. chap. lxv. fueil. 148.

Comme le prince Falanges n'ayant nouuelles de son filz Agefilan-
ne de l'Emperiere Niquee, &c. chap. lxvi. fueil. 150.

Côme Gādaſte le braue roy de Frigie vint à Trapēſode pour entrer
en cōbat singulier cōtre Florifel sur la querelle de Sidonie. lxvij. 151

Comme Rogel guery de ses playes deliura trois damoiselles des
mains de trois cheualiers qui les vouloyent forcer. cha. lxviij. f. 154.

Comme Rogel prenant son chemin, abatit à la iouſte les cheua-
liers de la dame des quatre chasteaux, & des amourettes qu'il deme-
na avec elle. chap. lxix. fueil. 156.

Comme le prince Falanges d'Aſtre arriua en vne Ile ou il fut en
extreme danger, & de l'estrange secours qui luy suruint. lxx. f. 160.

Côme Rogel de Grece s'enamoura de la belle Leonide. lxxi. 163.

Comme Galtazire conta à Daraïde l'auenture pour laquelle elle
l'em-

l'emmenoit.

chap. lxxij. feuil. 166.

Comme Daraïde fut receuë de la Roïne de Tessalie, laquelle apres auoir veu les deux princes enchantez, s'achemina vers le chasteau du mont.

chap. lxxij. feuil. 169.

Côme Daraïde cōbatit cōtre le geā du chasteau du mōt. lxxiiij. 171

Comme Rosafat & Artifire estans desenchantez allerent voir Daraïde au chasteau des Rochers.

chap. lxxv. feuil. 175.

Comme l'Empereur Amadis de Grece, & la princesse Lucelle vindrent trouuer le Roy Lucidor.

chap. lxxvi. 176.

Comme l'Empereur Amadis & Finistee aborderent en vne Isle, ou il seiournerent long temps & de l'estrange auenture qui leur y auint.

chap. lxxvij. feuil. 178.

Comme la Nef en laquelle estoit l'emperiete Niquee, & les autres princes fut ietee par tempeste en l'Isle incogneuë. lxxviiij. f. 180.

Comme Alquif & Vrgante monstrerent aux princes & princesses dedans le miroër de la tour de leur chasteau vne plaisante auenture lors auenant en l'Isle de Guindaye.

chap. lxxix. feuil. 182.

Comme les sages monstrerent encore aux princes & dames dedans le miroër de la tour vne autre plaisante auenture de l'Isle de Guindaye.

chap. lxxx. feuil. 185.

Comme estans les sages partiz de leur Isle quand & les princes furent lancez en vne autre par tempeste, ou l'emperiere Niquee eut fort, estrange rencontre.

chap. lxxxi. feuil. 189.

Comme Galtazire arriua en la ville de Guindaye. ch. lxxxij. f. 192.

Comme Daraïde, partit du royaume de Tessalie, fut par fortune lancee au royaume de Galdap, & de ce qu'il y auint. ch. lxxxiiij. f. 197

Du Roy Galinides de Galdap amoureux de Daraïde, iusques à en perdre le sens.

chap. lxxxiiij. feuil. 199.

Des tours d'extreme affection dont vsa la Roïne Salderne à Daraïde.

chap. lxxxv. feuil. 202.

Comme le Roy de Galde auerty de la forcenerie du Roy de Galdap, entra en ses pais à grosse armee.

cha. lxxxvj. feuil. 205.

De ce qui auint à Daraïde en chemin depuis qu'elle fut hors du royaume de Galdap.

cha. lxxxvij. feuil. 209.

De la vie amoureuse que menoit Garaye en l'Isle de Lemnos avec la Roïne Cleofile.

chap. lxxxviii. feuil. 211.

Du moyen de reconciliation & apointement de dom Arlanges avec la roïne Cleofile.

chap. lxxxix. feuil. 214.

Fin de la Table.

L'ONZIESME LIVRE D'AMADIS DE GAVLE, TRADVIT D'ESPA.

GNOL EN FRANÇOIS,

Continuant les entreprises cheualereuses & auantures estranges, tât de luy que des Princes de son sang: ou reluisent principalement les haultz faitz d'armes de Rogel de Grece, & ceux d'Agésilan de Colchos, au long pourchas de l'amour de Diane, la plus belle Princeſſe du monde.

Comme la Royne Sidonie se sentit groſſe d'enfant: & de la naiſſance de la belle Diane.

CHAPITRE PREMIER.



Vous avez entendu par le Liure precedent, cōme estās les deux princes Florisel de Ni quee & Falanges d'Astree, portez par fortune de mer en l'Isle de

Guindaye: Falanges fut en danger d'espouser la Royne du lieu nommee Sidonie, par la loy du païs qui l'y cōdannoit: en estant requis en public par personne digne & sortable. Et comme Florisel pour sauuer le mariage d'Alastraxeree & de luy, se presenta en son lieu & requit la Royne à femme se furnōmant Moraïzel Roy de certaines Isles: laquelle fut contrainte par la loy, mesmes de l'accepter (puis qu'elle ne vouloit executer la rigueur d'icelle sur l'autre Prince, en qui elle auoit mis son cuer) Qui apres auoir seiourné quelque temps amoureuxment avec elle, la laissa groſſe, sans luy faire oncque puis ſçauoir de ses nouuelles. Elle tant triste & deconfortee de son absence receut merueilleusement grand soulas & allegeance de ses douleurs quād elle se sentit groſſe & enceinte de luy, & beaucoup plus encores les neuf moys

passiez que luy naquit vne fille, en laquelle nature sembloit auoir deployé tous ses trefors de beauté & de grace. Qui fut causē à sa mere de la nommer Diane pour l'auantage que la lune tiēt sur les autres estoilles du ciel, comme elle fut toutes les pucelles de la terre: aussi que comme la lune est la lumiere de la nuit, elle par la consolation de sa veuē esclaircissoit les tenebres des ennuyes de sa dolente mere. Laquelle tenant entre ses bras ce précieux ioyau venu de celuy que tāt elle aymoît & haïssoit ensemble (comme l'auenture des six Damoyselles avecques la lettre de la Royne vous a declairé au liure precedent) alors fichant ses yeux sur ceste belle creature nouveau nee degorgea du fond du cuer telles complaints. O vraye semblance de celuy qui souz l'image & nom d'autrui cueillit la prime fleur de ma ieunesse: que tu m'aportes de ioye me donnant le moyē d'estaindre ou amortir le feu de son amour par la vengeance que ie pourchasseray sur luy de l'outrage & rauissement de mon hōneur. Car i'ay conclu & arresté de te donner avecque mon Royaume, à quiconque presentera la teste du pere à la fille pour la satisfaction de la mere. Ce que vous supplie dieux immortelz vouloir consentir en

A punition

punition iuste de ce faux Prince Grec, & tesmoignage de ma chasteté par luy cauteleusement violee, sans que mon vouloir en fut souillé ny entaché. Apres ceste douceance elle demoura vn espace sans parler, versant grosses larmes de ses yeux acompagnees de profondz soupirs. Puis recommença: O cher Moraïzel en quel excez de tourment m'as-tu plongee, de forcer ma volonté tant affectionnee enuers toy à te iurer & brasser vne mortelle vengeance, comme de sacrifier ta teste à mon honneur rigoureux pour apres immoler ma vie à ton ombre? Qui vid iamais telle confusion d'amour & de haine, ne deux telles exultez pour attaindre le moyen d'honnesteté? Ces regretz acheuez: la fillette fut portee au temple & nommee Diane. Puis Sidonie depescha les six Damoysselles à Constantinople avec vne lettre adressant à Florisel, ainsi que l'histoire precedente vous a raconté. Et quant & elles enuoya secretement vn excellent peintre pour luy rapporter le pourtrait au viay de ce piteux acte, avec les figures naïues de tous les Princes & Princesses de Grece qu'il y verroit. Sur lesquelles (quand les parchemins luy firent desployez) elle fit tant de plaintes qu'il n'y auoit cuer si dur de qui elle ne tirast les larmes de compassion, principalement à la veüe des effigies de Florisel & d'Heleine: il n'est possible à orateur d'exprimer les gries clameurs qu'elle ieta, tant est froide la plume au pris de la langue elancee de compassion. O dieux (disoit) que ne m'auiez-vous comblee d'heur pareil à celluy de ceste Dame en la iouissance de si excellent seigneur? ou si ne me vouliez faire tant de grace, quelle raison y auoit il de me donner à sentir & gouter vn emmiellement de ses perfections pour apres me laisser vne amertume affamee de ceste douceur de volupté? Amour ie me plaindrois volontiers de toy qui m'as si desloyalement traittee, si tu ne portois ton excuse par le preuilege de ta desraison naturelle, parquoy i'aurois tort de me fonder en raison contre celuy

qui point n'en vse. Puis exclamoit: Ie suis en paix & en mortelle guerre: ie crains, i'espere, i'ardz froide, comme glace: ie vole au ciel, tout estenduë en terre, & rien n'estraïns de fait & tout i'embrace: en prison suis qui ne s'ouure ne serre: d'vn mesme laz on me lace & delace: Amour m'enferme ensemble & me deferre, m'ayant donné & puis m'ostant sa grace. heur & malheur me suyuent en ma chaste: Ie veux mon bien, & à mon mal ie cours: egaleme la vie & mort ie suis: voire la vie & la mort ie pourchasse: & veux perir & demande secours: en tel estat pour Florisel ie suis. Or fit la Royne Sidonie (si tost qu'elle fut releuee de sa geline) porter sa fille Diane en vn chasteau qu'elle auoit fait cōstruire d'vn art merueilleux par Cinisides le magicien, comme il vous sera amplement descrit au chapitre ensuyuant, duquel la maçonnerie estoit de forte pierre de taille de perpetuelle blancheur espeüe de vingt piedz dont les quatre angles estoient de quatre grosses tours s'entre regardas & battas en flan pour la defence: & chascune estoit attribuee à vn planette special: L'vne à Mars, l'autre à Saturne, la tierce à Iupiter (là où se tenoit la Royne) la quatrieme à Febus, qui estoit la plus belle, comme destinee au plus beau & plus acomply prince du monde, laquelle par le dehors estoit ymagee à demy relief, & doree es treillis, gargoullez, & girouettes, & dedans meublee de plus riche estoffe que les autres. En ceste tour la porte principale estoit tousiours ouuerte, & vne vis pareillement qui descendoit en vne caue en laquelle y auoit vn soutpiral respondant vers le dedans du quarré à l'endroit d'vn des trois palays (faisans le donion rōd au mylieu de ce quadrangle) lequel estoit pareillement le plus orné des trois & voué à Diane, comme le monstroït l'effigie possee sur le portail, ainsi que celles des deux autres tours les approprioient à Venus & Mercure. Ceste caue que ie vous dy respondant vers le palais de Diane estoit cleue de nuit comme en plein iour, au moyen des

des flambeaux artificielz qui y ardoient continuëlement sans se consumer tant ne quant comme il s'est trouué des lampes es sepulchres antiques. Or souz le simulachre de Diane assis sur son portail y auoit lettres Grecques grauees, contenâtes en substance:

La clarté de Diane durera couuerte en eclipse, iusques à ce quelle soit esclaircie par la lueur de l'obscur Apollo.

Semblablement en la grand' chambre de Febus (ou l'histoire des amours de Sidonie & de Florisel estoit depeinte au vray) y auoit vne escriture Arabique de telle teneur:

Cinistides Magicien a basti ceste tour en l'honneur de Sidonie royne de l'Isle de Guindaye, laquelle tiendra seure l'entree de son obscure caue & defendue à tous, iusques à tant que le gage de la teste Grecque defface l'eclipse de Diane par la communication des rays de Febus.

Ceste caue estoit en la tour de Febus & se rédoit souz terre en celle de Diane, dont le passage estoit nyé à tous fors qu'à celuy que le ciel auoit doué & acomply de toutes ses richesses pour digne compagnon de la plus diuine qu'humaine Princeesse. Or fut elle logee en ce donion au palais de son nom auecques femmes & filles de tous estatz pour son seruice: sans q' corps d'homme y entraist iamais ny la peut voir aucunement: ne voulant sa mere profaner la fleur de ceste veuë angelique, ains la reseruer à celuy qui seul en meritoit le surplus. Mais la Royne auoit en son palais de Iupiter vn huis de fer enchanté du costé du logis de Diane, qui ne s'ouuroit par autre moyen quelconque que par la simple parole. Si tost que Diane eut attainit l'aage de six ans, la Royne la fit contrefaire au naturel & enuoya les pourtraitz par toutes les contrees du monde, auec tel escrit signé de sa main & scellé de son seau Royal.

Je Sidonie royne de Guindaye prometz la personne de ma fille Diane auec la succession de ma coronne au Cheualier qui fournira par arres la teste du pere à la fille en satisfaction de la mere. A ceste fin ie leue la rigueur de mes loix donnant seureté à tous ceux qui viendront à l'esprenue de la tour de Febus.

Courriers furent depeschez par toutes les parties de la terre auecques les pourtraiz & promesses, qui inciterent vne infinité de Cheualiers à tenter la fortune de party si bel & auantageux: tellement qu'en peu de tems l'Isle de Guindaye en fut aussi peuplée qu'oncques fut la grand' Bretagne pour la beauté d'Oriane: dont sortirent maintes auantures estranges, qui vous seront deduites cy apres en leur lieu.

Description du Chasteau de Febus & de Diane, avec toutes ses singularitez.

CHAP. II.

LE palais d'Apolidon & la tour de l'Vniuers n'aprocherent iamais à la centiesme part de l'excelléce du chasteau de Febus & Diane: lequel fut construit par Cinistides, le plus grand architecte & magicien de son temps. Premier il bastit le donion de Diane contenant trois corps d'hostelz, chacun garny de toutes les pieces requises à la commodité du logement & seruice d'un grand Seigneur ou dame. Vray est que celuy qui estoit propre à Diane fut plus orné & enrichy que les deux autres, c'est à sçauoir de Venus & de Mercure, qui furent assemblez en vn corps, comme leurs planettes sont plus prochains au ciel. Or le plus singulier point & digne de consideration estoit le departement des choses concernans l'usage de chacun logis: c'est à dire, tant des trois sans le donio, q' de quatre autres qui cōpo-

soient le pourpris d'iceluy estans assis comme quatre bouleviers es coins de la carrure de la court : lesquelz estoient tous attribuez à Febus pour principal, ainsi que les trois du donion à Diane. Toutesfois y en avoit vne spécialement attribué & dédié à luy, qui se presentoit à main dextre, en entrant par la maistresse porte. Or y avoit en ce merueilleux edifice vne si grande variété de tout ce que le desir humain peut souhaiter, que Diane n'estoit la dedans en guise de prisonniere (comme fut iadis Danaë en la tour d'airain) ains n'eust fait que se travailler en vain de chercher dehors quelq̃ plaisir ou nouveauté : car en son logis particulier, elle avoit la grand' sale, à lambris doré, taillé en arcz turquois, trouffes & croissans entrelassez, le planché de beau bois, auquel en l'espace entre deux solives estoient releuees les armoiries de toutes les illustres maisons de son temps, & sur les poutres & solives estoient peintz des dardz entour lesquelz vn rouleau disoit : *Elle atteint tout ce ou elle vise* : le tout doré si richement, que chascun espace entre deux solives reuenoit au pris de cinquante escus. Puis contre la paroy opposite à la cheminee y avoit vn buffet de cypres à huit ou neuf estages en forme de hemicycle, enrichi de chiffres dorez & cloz d'une barriere. Toutes les pieces estoient fort percees & les vitres historiees à blâc (en signe de la virginité propre à la deesse de ce nom) estans les figures de transmutions diverses auenues par le pouuoir d'icelle, soit à ces Nymphes ou autres avec Epigrammes dessus & dessous en Grec & Arabe. Ce qui pareillement fut practiqué es fenestres des chambres, galleries, garderobes & cabinetz : mesmement en la tapisserie de chascun lieu, dont l'une estoit l'Endimion, l'autre d'Acteon & d'autres semblables. Et y vſa Cinistides de curiosité des couleurs lunaires es meubles & utensiles, tellement que toute la vaisselle estoit d'argent & les dars, cielz, courtines, couuertes de litz, tapis de tables, & buffetz

estoit tous de soye blanche, & tous les gentils hommes seruans & officiers reueſtuz de ceste couleur, comme ceux des autres logis, de leur propre & peculiere. Le cabinet du ſiē estoit plein de trompes, cors, espieux, toiles, retz & de tous autres instrumens de venerie, en quoy elle s'adonnaient naturellement & en prenoit le deduit en vn parc de haut boys compris avec son logis, qui estoit remply de toutes bestes noires & rouffes : & y alloit vestue & equipée comme les Poètes descriuent Diane, avec ses Damoysselles en parure de Nymphes. Ce que l'ouurier remarqua en la table du portail, ou la Deesse gisoit en basse taille de bronze enuironnée de cerfs, sangliers & autres animaux, aussi au manteau de la cheminee de la sale, ou son ydole estoit affichée. Mais quand la Princeſſe estoit lasſe du plaisir de la chasse, elle alloit passer le temps au logis de Venus, qui estoit fort recreatif en iardinages garnis de toutes fleurs avec allees couuertes de berceaux de roses muscades & iossemins, souef fleurans & petites fontaines ruisselantez par lieux touffuz, ombragez d'arbres fruitiers, & en vn endroit la belle voliere pleine de tous oyseaux rares & estranges. Les peintures des fenestres & ouales des cheminees estoient de diuers deduits & plaisirs d'amours, & la principale de Venus mesme avecques Mars quand Vulcan les print sur le fait par sa subtile ret d'acier. La dedans estoit le cabinet des eaux de naf, de damas, de parfums, d'onguens precieux, & de mille artifices de fars, combien que la Princeſſe n'eust aucun besoing de s'en seruir. Aussi en ce logis estoient les baignoires & estuves autant industrieuses que celles de la Roynne Eleuterilide. Toute la vaisselle de cuyure ou laitton, & les draps de veloux, ſatin ou taffetas verd. Les vitres aussi furent peintes de verd cler, comme celles de Mars de rouge cler (qui ne sont aujourd'huy en congnoissance) c'est à dire, de couleur receuant le rayon du Soleil à trauers, sans porter ombre. Aucunes fois elle s'alloit pour-

pourmener au logis de Mercure, à cause de la librairie qui y estoit, remplie d'autant de liures en toutes langues & sciences que jadis celle de Ptolomée Filadelfe en Alexandrie: desquelz elle lisoit ou escoutoit ceux qui pour l'heure luy venoient plus à gré. Puis alloit voir le cabinet, tendu de tous les engins & instrumens, tant des mathématiciens que de tous les ouuriers & artisans du monde. Les peintures de leans estoient des courses de Mercure, comme heraut des Dieux, & des bons tours qu'il auoit jouez en diuers lieux à Argus, & maints autres. Les couleurs estoient d'azur, bleu ou violet, & la vaisselle d'électron tant blasonné par Pline, nommé par les Arabes *attincar*. Aussi la dedans y auoit vn autre cabinet, ou le sage Ciniſidés faisoit jouer à Nature en vaisseaux artificiels le personnage de Proteus, deuenât eau, puis air, puis tournant en mille formes de monstres horribles. Quant aux autres quatre logis composans la ceinture de la court, elle ny alla point jusques après l'accomplissement de son destin chanté par les prophetes, à cause des hommes qui y estoient pour le seruice des logis: dont l'un estoit de Mars auquel estoit la grand' escuierie de la Roine & l'armurerie, la vaisselle de fer blanc, les deuises & histoires des plus furieuses batailles & combat qui jamais eussent esté. L'autre estoit de Saturne, bâti en forme de tēple, auquel se celebroident les ceremonies des religions & sacrifices antiques, & y auoit vne chappelle la plus excellente qui fut jamais tant en paué qu'en voute, vitres, statues, & tableaux. La draperie estoit de gris brun: la vaisselle de plomb, hormis celle de cuisine, qui estoit de terre, en memoire du premier aage doré. Le tiers de Iupiter seruoit de palais à la Roine, auquel se tenoit le conseil des affaires du Roy aume, selon l'influence propre de ce planete. Les tapisseries & autres draps estoient tous de soye grise blanche: les histoires des metamorphoses de ce Dieu en beuf, en aigle & autres: fors qu'en la grand' sale, ou

fut pourtraite la guerre des geans voulans assaillir le ciel, & foudroyez par luy: La vaisselle y fut d'estain. Reste le plus excellent de tous, celui de Fébus: duquel les meubles estoient d'or: vn cabinet de tous les instrumens de musique: vn autre de toutes eaus, huilles, & onguemens de medecine: desquelz le beau jardin fournissoit les herbes, gommes & fruits: estans les quarreaux d'iceluy departis selon les propriétés diuerses, l'un pour les playes, l'autre pour les fieures, ici les plantes chaudes, ici les froides & ainsi des autres. Or l'entrée de ce logis estoit ouuerte (comme nagueres vous a esté dit) & la caue d'iceluy. Et du logis de Iupiter ou demouroit la Roine, y auoit vn huis repondant vers le donion, par lequel elle alloit voir sa fille: qui entre les beaux lieux ja deduis, auoit vn verger au logis de Mercure (qui n'est à oublier) auquel quand elle fut vn peu en aage elle alloit fort souuent, pour le plaisir de la belle & grosse fontaine, qui faisoit plusieurs Isles par le verger, en pareille facon que la mer fait en ce monde, departant les regions de la terre, Europe, Asie, & Afrique, comme vne vraye carte terrestre & marine. Et là elle se faisoit porter sus l'eau en petites galeres, ou ses filles ramoiēnt & d'un instant (qu'elle n'entendoit) prenoit voluntiers port au quartier de la Grece, ou sa destinée luy promettoit repos & fin de ses desirs. Telle estoit la superbe & ingenieuse structure du chasteau de Fébus & Diane: auquel y auoit vne ordonnance de despence fort notable, que Luculle pratiqua depuis à Rome. C'est à sçauoir que l'estat estoit dressé de chacun logis pour y vser d'un traitement certain & ordinaire: de sorte qu'en celui de Mars le festin montoit à tant de mille, avec telles pompes & sumptuosités: en celui de Mercure estoit d'une autre somme avec ses circonstances, & es autres pareillement: qui estoit pour receuoir les signeurs suruenans selon leur grandeur & l'affection de la Roine, sans auoir à faire commandement que

d'un mot à ses maistres d'hostel, de courir à Mars, Mercure ou autre. Aussi que chascun estoit logé selon son estat, les capitaines à Mars, les gens de lettre à Mercure. Le laisse à vous deschiffrer par le menu (de peur de prolixité) les marbres, porfres, jaspes & autres pierres exquisés dôt ce chasteau fut enrichy, & les singularitez des plantes, comme moly, panace, lothos lunaria: aussi des huiles incombustibles, du baume naturel, or potable, sphere d'Archimedes, & autres choses rares & precieuses q̃ le sage Cinistides auoit semées & dispersées par les jardins & cabinets des sept logis. Le tais l'espece de son architecture qui estoit Eustyle c'est à dire en juste & raisonnable distance de colonnes, tellement que par estre trop pres elles n'empeschoiēt les veuës ne les passages, & par estre trop esloignées ne mettoient en danger de ruine & decadence le fais qu'elles soustenoient. Semblablement que au logis de Diane les trois faces du corps d'hostel estoient chacune de structure diuersē pour donner plaisir de varieté à la veuë: & celle du mylieu (ce est à sçauoir qui le presentoit droit à l'œil en entrāt en la court) auoit dedans le haut du mur vne statue cheualeresse rendant le prince Agefilan au naturel, & que les festieres de chacun des sept palais portoient les caracteres de leurs planetes grands & visibles en fer doré. Somme tout bien calculé on peut (à brief dire) estimer cest edifice, sans comparaison, plus admirable que les sept tant fameux & renommez miracles du monde.

De la naissance du Prince Rogel de Grece & de sa phisionomie avec ses meurs & conditions.

CHAP. III.

TOut le cours du long aage d'Amadis de Gaule ayant esté continué en l'exercice & entretien des armes & bonnes meurs (tel qu'auiez entendu par sa

chronique, la vertu estoit esleuē en si haut degré au temps de la naissance des deux Princes Rogel de Grece & d'Agefilan: qu'il ne se faut esbahir s'ilz vindrent sur terre comme deux chefs d'œuvre de nature, surpassans leurs peres en toutes perfections. Quand à Rogel qui sortit de Florisel de Niquee & d'Heleine (la plus belle couple du monde) il montra aussi en luy telle forme de beauté, que le moule deuoit porter. Or fut baptizé en la pompe & solennité que sa grandeur requeroit & nommé Rogel de Grece: & fut nourry & esleuē en la maison de l'Empereur Amadis de Grece & de l'Emperiere Niquee ses ayeulz, en la magnificence deuē à vn heritier naturel de telz Empires & Royumes. Si tost qu'il eut aage de quelque petite congnoissance luy furent baillez maistres les plus excellens qu'on peut recouurer, qui l'instruirent peu à peu selon sa portee, les vns es arts & langues dignes de tel signeur, les autres le dresserent & dui- rent à tous les jeux & escrimes de guerre. Car telle estoit l'opinion du grand Roy Amadis en l'institution des Princes de son sang, pour les rendre si bien douez, & appris que leurs sugetz leur obciſſent volontiers, en les cognoissant si dignes de l'estat & lieu qu'ilz tenoient: & à fin que quand ilz se trouueroient entre les estrangers, ilz gagnassent par tout le point de préeminence par leur vertu. Ainsi estant le Prince Rogel conduit & endoctriné, avec le bon naturel qu'il tenoit de race, paruint à l'excellence que vous entendrez au discours de ce liure. Il fut de taille plus moyenne que haute, tresbien proportionné de ses membres, le teint vn peu brunet, les yeux noirs bien fenduz, le nez assez pointu, la bouche proprement de sa mere, la barbe & les cheveux cler-bruns & crespes: bref il auoit le corps membru & nerueux, & neantmoins merueilleusement disposé & agile, & sur tout estoit bien à cheual. Au surplus vne contenance pleine de maiesté, vne grace de parler attrayante & persuasue, qui

qui luy seruit grandement au train de ses amourettes, qu'il demena gayer & variables, battant les vnes, puis les autres du plat de la langue, jugeant indigne de celui qui veut emporter le nom de victorieux, soy laisser vaincre & asservir son cœur par vne femme : D'avantage entre les vertus il eut la liberalité en singuliere recommandation, tellement qu'on pouvoit dire que ses biens luy appartenoient en propriété, mais la possession & l'usage en estoit commun à tous ceux qui luy faisoient service. Sa magnanimité le faisoit en sa jeunesse quelque fois entrer en cholere (combien que non trop souvent) apres laquelle il tenoit longuement son cœur, comme estimant mal seant à son auctorité de quitter si legerement la raison qui l'auoit esmeu à courroux : toutesfois il attempa fort ceste ire avec la meureté de l'age. Or n'y eut en son temps Cheualier au monde que Rogel ne denançast beaucoup en courtoisie & prouesse, fors Argefilan son cousin, lequel en toutes bonnes parties le costoyoit de si pres, qu'ilz sembloient à maintes gens voler quasi tout d'une aile. Que vous en diray-je d'avantage, sinon (comme escrit Galeris le Croniqueur ancien) que son enfance en tous ses faits & dits portoit signe & promesse des grands gestes qu'il commença de l'heure qu'il eut receu l'ordre de Cheualerie : c'est à sçauoir, en l'age de dix-sept ans aux quelz nous le lairons parcourir, sans nous arrester à ses actes puerilz : apres vous auoir auisez qu'incontinent qu'il se sentit quelque petite force, son plus grand passetemps estoit en la venerie contre les ours, sangliers & autres bestes furieuses, noires & rousses, ou il s'accoustumoit à s'enhardir & chasser toute peur arriere, dequoy ses parens estoient tresayses, le voyant de bonne heure endurcir son corps au travail, pour le disposer à pouoir soustenir vn jour le grand fais des armes : lesquelles ilz luy mettoient tousiours deuant les yeux, luy monstrant plus

d'amour à l'instruire & enseigner les points d'honneur qu'à le cherer & mignarder à nostre mode, dont ilz luy en ramenteuoient vn sur tous autres : qu'il y auoit vn dominateur au ciel, donnant & departant toutes les Seigneuries de la terre : lequel tous Princes doiuent recognoistre, & pour ce estimer qu'ilz sont autant nais à seruir leurs suietz de bons & justes gouuerneurs, qu'iceux sont obligez à leur bien & loyaument obeir. Lesquelles remonstrances Rogel retint tresbien & acomplit fidelement, ne dementant en rien la franche tige dont il estoit yllu ne la bonne nourriture qu'il auoit prise : comme vous connoistrez par le recit de sa vie.

Comme le Prince Argefilan nasquit, & de sa figure & complexion.

CHAP. IIII.

EN l'Isle de Colchos (tant renommee par la conqueste de la toison d'or) s'estoit retiré (comme vous a esté dit) le gentil Prince Balanges d'Asie avec sa chere espouse ma Dame Alastraxeree : ou ilz furent receuz, par le Roy Tarsis & la Royne Iris en toute ceremonie d'honneur, & de liesse publique. Là ilz se trouuerent du tout à leur souhait pour le bon moyen qu'ilz eurent de jouir en leur priué du fruit de leurs amoureux desirs qui sortirent à si bon effect que la Princesse se sentit grosse, & à chef de terme se deliura du plus bel enfant que la terre portast, qui fut nommé sur les sons Argefilan, pour l'affection singuliere que son pere portoit à la mesme memoire du Roy Lacedemonien de ce nom. En la naissance d'Argefilan auint vne grande merueille en la ville capitale de Colchos : Sur le port y auoit vne forteresse, & en icelle vne vieille tour, que jadis Medee la magicienne auoit bastie, sur laquelle à l'instant qu'Argefilan vint à naistre descendist vn coup de foudre du ciel, qui

la mit toute en poudre : & au dessus de ce haut monceau apparut vn tableau d'ambre, auquel estoient engrauees lettres Grecques de ceste teneur.

Quand le fort simulacre aura esté decapité par le fis de la serpente espouventable, & que les sistemens de la mer reueilleront le fis de somnmeil mortel alors la splendeur de la belle Diane esclairera, aprez que l'eclipse de la maison gregoisie (par obstacle opposé au rayant Fébus) fera passée : des rayons duquel la beauté de Diane redoublera en clarté, pour estre deux lumieres de l'univers, esclairs par gloire depuis le fond de la terre iusques au comble celeste. A ceste fin la sage Medee donnera la ruine de la tour en tesmoignage des merueilles qui seront deffaites pour l'exaucement de la couronne Grecque.

Sur ceste prophetie on fit diuers iugemens & pronostics, dont nul ne toucha au but, iusques à ce que l'escriture fut verifiée & accomplie par œuvre. Or pour venir à Agésilas : quand la Princesse Alastraxeree sa mere se vid en Colchos si bien voluë du Roy & de la Roynie, elle les mit sur le propos de la loy du vrai Dieu, & tellement les mena qu'elle les couertit à la raison de soy baptiser, & d'y renger tous leurs vaissaus & fugetz tant grands que petits, fors que Galeris l'historien qui s'obstina d'acheuer sa vie en la creance de ses Dieux selon le dit commun, que bien souuent les plus grands clercs ne sont pas les plus sages d'autant que la science enfle & enorgueillit, & l'orgueil auugle l'entendement. Tout d'une main elle fit vne assemblée generale au temple metropolitain, ou elle auoit esté tant religieusement adree par son loyal Falanges durant ses ardentés amours (comme vous auez entendu par le liure precedent) ordonnant qu'il n'y seroit desormais adoré que le Dieu des Chrestiens, & pource y establisant prestres richement fondez & douez pour faire le seruice diuin. Ce fait auiserent le Prince son cher mari & elle à

soy donner du bon temps, & estoient si espris l'un de l'autre qu'ilz ne se perdoient vne seule heure de veuë, tellement qu'Alastraxeree y rompit en peu de temps sa ceinture, se sentant faisie de la maladie des neuf moys, laquelle decouvrant à son mari au secret de leurs deduis : O amy (dit il) de combien de liens d'obligacion tenez vous enchainé vostre esclau, que premier vous auez recompensé de sa foy par dessus son merite, puis l'auetz tire de ses veilles erreurs, & rengé à la vraye loy diuine, maintenant luy donnez fruit de lignee, ia voué par les destinees, au souuerain los des armes. Monsieur, respondit elle, les obligations que vous dites sont si reciproques, que l'un ne doit parler de retour à l'autre, mesinement en ce nouveau mal que ie sens, vous auez si bonne part, que lon vous en doit sauoir autant de gré qu'à moy : prions Dieu seulement qu'il sauue & garde le don commun qu'il nous a fait, tant à l'augmentation de son seruice qu'à l'honneur de nostre maison. Or quand le terme escheut de ses couches, & les merueilles declairees cy dessus, l'enfant (comme dist a esté) sortit si beau qu'il ne sembloit fait que pour regarder, & ceste beauté (qui change & se perd en plusieurs à la croissiance) creut tousiours en luy de plus en plus quant & l'aage. Il fut esleué tendrement sous l'œil de sa mere iusques à six ans, & eut vne condicion trop admirable, estant presque encore en enfance de ne faire quasi nul acte de puerilité, & nul compte de tout ce que naturellement la petiteesse prise & ayme. Parquoy au bout du sistieme an fust de son gré mené à Athenes, & assorti de bons maistres, tant pour les sciences liberales & dignes de grands Seigneurs, que pour l'exercice des armes, à quoy on ajouta d'auantage quelque vsage du luth & du chant de musique, pour luy adoucir vn iour le maniment des graues & serieus affaires : en quoy il monstra vne singuliere d'exterité à tout comprendre. Comme

me Agefilan estoit si ententif à ses estudes, le fort Anaxartez enuoya pareillement son filz à Athenes nommé dom Arlanges d'Espagne à fin qu'ilz aprinsent ensemble: qui aussi fut beau Prince & bien nay en toutes choses grandes & dignes de son estat: dont soudit entr'eux vne amitié nonpareille, & auoient tant de grace à combattre l'un contre l'autre (quand ilz furent en l'age de dix ans) en toute escrime, lutte, & autre essay du corps, que es festes publiques le principal desir, qui amenoit maintes gens aux eschaufaus, estoit pour voir jouter ou tournoyer ces deux petitz champions, & ne se parloit que d'eux & de leurs jeux par toute la Grece. Toutesfois nous cesserons de plus en dire, pour entrer plus auant en matiere, mais que ie vous aye dit quel fut Agefilan quand il eust pris le ply de son aage. Premièrement il fut de la haute stature de sa mere, excédant la commune des hommes, tous ses membres fort pleins & ossus: le teint eut blanc doucement couronné au visage, la barbe blonde, & les cheveux de mesme, les yeux vifs & ardents, l'entr'œil bien large, le nez vn peu aquilin, toutesfois sans deformité: au reste la poitrine releuee, le foy du corps gēt. la croisée des espaules large, la grē bien faite, tellement qu'on le blasonnoit en meurs, vn second Agefilaus, en corpulence vn autre Herculés, & semblablement Arlanges vn nouveau Theseus, comme son compagno d'armes. Car la force corporelle fust admirable, bien respondant à la vertu de son cueur: voire le travail luy estoit plaisir & aysé & le repos oyssif comme peine. Aussi quant à ses meurs il fut tant gracieux & debonnaire que raison à peine le pouoit forcer à le faire monter en cholere, la langue il eut tresdiscrete, & la simple parole valoit ferment: l'amour & reuerence de Dieu luy fut tousiours principalemēt deuāt les yeux, qui luy refrenoit souuent sa fureur de peur de l'offencer, comme au contraire il entreprenoit sans crainte tout ce qui estoit iuste & raisonnable. Depuis qu'il fust Roy, se

monstra quasi plus suget que seigneur, en l'obseruance des loix, estimant plus grieue punition à vn Prince, la honte de rompre les ordonnāces que au peuple le chastimēt qu'il peut encourir pour les auoir enfreintes. En sa frequentation familiere il se rendit fort compaignable, sans toutesfois se faire tort de trop s'abaisser. En sa ieunesse il adonna grandement son esprit à la philosophie, & à la cognoissance de diuerses langues, mesmement de la Grecque & Latine, prisant plus ceux qui auoient esté excellens es bons arts & sciences, que plusieurs grands princes & Seigneurs terriens. Finalement quāt au fait d'amours il tint beaucoup du Roy Amadis de Gaule en son maintien, grace & loyauté, comme la preuve de son martire vous fera ample foy au long pourchas de la belle Diane.

Comme Florarlan de Thrace rauy d'amour par l'image de la Royne Cleophile, pourchassa à estre Cheualier pour auoir moyen de luy faire seruice.

CHAP. V.

L'Histoire vous a raconté au Liure precedent, comme la Royne Cleophile enuoya son image aux noces du Prince Florisel, & comme le beau Damoyzel Florarlan de Thrace (voyāt l'extreme beauté de sa semblance) fit resolutiō que iamais autre Dame ne signeuriroit son cueur que ceste belle Royne. Ce penser le tint long temps en grande detresse, ne l'osant manifester, d'autant qu'il ne se pouoit dire de lieu assez haut pour ataindre à telle pensée: car il ne scauoit de quel sang il estoit yssu, dont il se plaignoit souuent à par soy, disant: Hainfortuné Florarlan, tu as le courage de voler iusques au ciel, & par faute d'ailes te vois bien taillé de ne bouger de terre. Las ma Dame Cleophile auriez vous pas cause de vous moquer de la hardiesse que i'ay de vous vouloir presenter mon seruice, sans sentir en moy autre me-

rite que l'affection ardente qu'Amour a fichée en mon cuer? Certes vostre grandeur desdaigneroit mon peu de valeur, si ne venez à considerer que ce petit Dieu qui domine les ames des viuans, n'a aucun esgard aux estatx ne dignitez, apparant souuent les patures avec les riches, & les petits avec les grands. A a Florarlan tu es maintenant en la peine ou futele Troyen Paris menant vie pastorale auant qu'il eust congnoissance du Roy Priam son pere & d'Hecube sa mere. Ainsi se lamentoit le desolé Florarlan seul à soy-mesmes, & continua en ceste tristesse secreete jusques à ce qu'il se veid en l'aage d'environ dixsept ans, assez grand pour recevoir l'ordre de cheualerie. La princesse Arlande qui l'aperceut souuentefois pensif & melancolique, l'auoit arraisonné pour en scauoir l'ocasion qu'il luy auoit celee & dissimulee vn espace de temps: mais vn iour estant pressé par elle plus fort que de coustume, il luy dist: Ma Dame, force m'est doncq vous confesser vn creue-cueur qui me tourmente, de ce que ie considere auoir receu de vostre grace vn si bon traitement iusques icy: duquel l'obligation me charge d'un fais insupportable, par tant que ie ne scay encores qui je suis, ny de quelz pere & mere extrait: lesquelz si ie scauois estre de basse condition, ie recongnoistrois d'autant plus de vostre seule faueur la liberale nourriture que m'avez donnee, sans nul merite de moy ne des miens: & au cas qu'ilz fussent autres, ie m'y adresserois pour les prier de la satisfaction que je vous doy pour tant de bien & d'honneur que vous me faites. Pource, ma Dame, ie vous supplie m'allegier du grand ennuy que i'en porte, me faisant certain de tout ce qu'en pouuez scauoir. Florarlan (respondit Arlande) ie vous puis assurer qu'estes sorty de race Royale ou Imperiale, comme le sage Abstibel me l'a asseuré: mais de quel Roy ou Roine vous estiez engendré, il ne m'en a rien reuelé. O ma Dame (dist alors le Damoyse) si

peu qu'il vous a pleu m'en declarer me charge grandement & oblige de m'acquitter du deuoit que le lieu que ie tiens requiert. Parquoy me conuient au plustost pourchasser à estre fait Cheualier, pour me forligner par lascheté & pusillanimité, vous supliant à ceste fin me vouloir donner vne lettre de vostre part à l'Empereur Amadis de Grece, à ce qu'il luy plaise m'octroyer l'acolee, laquelle ie n'ay volonté de recevoir iamais d'autre main. La Princesse toute troublée de l'entreprise que le Damoyse faisoit encore trop verde pour ses tendres forces, essaya en mainte maniere à l'en destourner & luy rompre ce coup, mais ce fust en vain: car l'affaire dont il ne se vantoit pas, luy poignoit, & aguillonnoit iour & nuit trop viuement le cuer, tellement que vaincue à la fin par son ferme & obstiné vouloir luy fit dresser tout l'equipage necessaire à son desir, luy baillant deux escuyers pour le seroir. Si tost qu'il vid son apareil prest, plus ne fut possible de l'arrester vn seul iour: & au departir eussiez bien iugé au piteux maintiè d'Arlande, de combien le mignon luy touchoit pres du cuer: lequel prenant par la main, à l'heure qu'il aloit monter à cheual, la larme à l'œil luy dist: Beau filz puis qu'ainsi est, or allez en la sauuegarde des dieux. & faites si bien que vostre bonté decouure le sang illustre qui à present vous est caché & incogneu. Le Damoyse aussi de son costé (si saisi d'une naturelle emotion, qu'il ne luy peut respondre vn seul mot) seulement luy baïse les mains & prèd la lettre qu'elle escriuoit au Prince Florisel. Si s'en va le gentil Florarlan le chemin de Trapezonde, bien entalenté d'employer si vertueusement la cheualerie qu'il vaquerant que la renommee des ses faitz luy donnera hardiesse d'adresser ses pensees vers la Roine Cleophyle. En telz discours arriva au port, ou il s'embarqua & singla en peu de jours par bon vent iusques à l'Empire de Trapezonde: ou il print terre, & alla trouuer l'Empereur Amadis

Amadis de Grece la part ou il estoit : de qui il fut fort bien receu , & de Florisel pareillement : lequel luy demanda des nouvelles de la princesse Arlande : & pendant qu'il luy en rendoit conte , Florisel auoit l'œil fiché sus luy , avec vn plaisir plus affectueux qu'il n'en comprenoit la cause. incontinent Florarlan luy presenta son paquet que le Prince ouvrit & trouua la lettre telle :

A Florisel Prince des Royaumes de la Gaule & grãd Bretagne, Arlande de Trace enuoye salut dont il l'a prinnee, le tenant tout en sa main.

Monsieur ie vous enuoye vn joyau que vous ay autrefois derobé, sans neantmoins auoir rien rai du vostre, qui fust suggeré à la loi commune de larrecin, toutefois m'emparant & saisissant du plus grand bien que souhaittois en ce monde. l'espere que la confession que vous en fais me deschargera de la coulpe, veu que la restitution en fuit Tandis que l'ay eu en ma possession, je l'ay gardé tressoigneusement pour la part que j'y auois, maintenant est raison que vous en preniez soin pour la vostre: dequoy suis contrainte vous auertir, à fin que plus n'en pretendiez cause d'ignorance. Ce porteur Florarlan le beau damoyfel voulant acquérir los ensuyuant la trace de ses ancestres, desire estre fait Cheualier de la main de l'Empereur vostre pere. Je vous prie faire tant pour vous, pour luy & pour moy, que de le luy présenter Ce pendant me recommande tres affectueusement à vostre bonne grace sans en auoir esperance, priant Dieu (Monsieur) vous rendre le loyer de vos fraudes, en pareille mesure qu'avez mesuré aux autres.

Florisel ne refusa gueres sus le jargon de la lettre sans conceuoir le secret qui y estoit caché, lequel il tint couuert à l'Empereur en la requeste qu'il luy fit de donner l'ordre de cheualerie au damoyfel tou-

tefois il ordonna de l'honneur & solennité, comme s'il eust eu la matiere assez affectée, combien que lon ne le iugeast proceder que de sa courtoisie acoustumée ioint la grandeur de la Dame qui le luy auoit adressée. L'Empereur luy accorda plus que volontiers: enioignant à Florarlan de veiller les armes en sa chapelle, & le lendemain luy donna l'accolée. Ses armes furent tres-riches & blanches comme affierent à nouveau Cheualier : la Princesse Helene luy donna vne espee de grand pris que son mari luy auoit baillee : son escu fust d'asur à vn fenix d'or (qui estoit la deuise de sa maistresse) avec telles parolles : **L'VNIQUE, NON QUE POUR VN** L'empereur le benissant en la ceremonie de l'ordre, luy dist : Or vous doit Dieu Damoyfel, d'estre aussi vaillant, & bon que vous estes beau & iamais estat de Cheualerie ne fust mieux employé qu'il sera en vous. De là s'en allerent en la sale du palais, ou lon auoit couuert pour le dîner, qui passa en plusieurs propos sus la Princesse Arlande: aprez lequel, le nouveau Cheualier (à qui la passion vehemente ne permettoit aucun seiour) fait la reuerence à l'Empereur, le remerciant de l'honneur qu'il auoit receu de luy, protestant de s'euerner de tout son pouuoir à se rendre digne de si haute faueur. l'en ay tresbonne esperance, respondit l'Empereur: puis alla prendre congé de Ma Dame Helene, luy promettant si bien emmancher son présent, qu'elle n'auroit occasion de se repentir de sa liberalité. Florisel, au departir, luy fit vne brieue & affectueuse remonstrance (non sans continuel battement de cœur, qui luy entre-roïoit la parolle) luy commandant d'oresenauant faire estat de luy, tel que de celui, qui luy vouloit seruir de pere iusques à ce qu'il eut autre cognoissance du sien (qu'il leur auoit confessé n'auoir non plus q de sa mere.) Ainsi partit le Cheualier du Fenix, delibérant tirer vers l'Isle de Guindaye, ou il pouoit plus trouuer à quoy s'esprouuer & gagner, los & pris, à cause
du

du grand nombre de Cheualiers qu'il sca-
uoit aller celle part suyuant le motif des
perrons (qui vous ont esté dechifrez à la
fin du dixiesme liure) c'est à scauoir pour
prendre assurance de la Royne Sidonie,
touchant le mariage de la belle Diane sa
fille, & auoir droit par son commandemēt
d'appeller Florisel au combat. Pour ceste cau-
se Florarlan print le chemin de ceste Isle, en
intention de s'essayer contre ces braues en-

trepreneurs : bien deliberé de les piquer si
au vis par remonstrance de leur folie & te-
merité, qu'ilz seroient trop lasches s'ilz ne
s'atachoient à luy : car il esperoit par ce
moyen gratifier grandement à la princesse
Arlande, qu'il cognoissoit affectionnee en-
uers Florisel, & à luy mesme qui l'auoit
tant obligé par sa recente courroisie, avec
l'offre speciale, qui luy sentoit quelque
chose de ciuilité non commune.

*Comme Florarlan party de Trapezonde, eut combat contre quelques Cheualiers, & debat
avec vne Dame & vne Damoyelle.*

CHAP. VI.



FLorarlan sorty de la ville de Trape-
zonde en intention de s'aller embar-
quer en la nef mesme ou il estoit venu
ne cheuaucha gueres plus de deux lieues
qu'il descouurit trois Cheualiers venants
du costé ou il alloit. Alors se saisit incont-
inent de ses armes, pour estre prest à leur
respondre, s'ilz luy vouloient rien deman-
der. Quand ilz furent pres de luy il aper-
ceut l'un d'eux armé d'un fort riche har-
nois, portant en son escu l'image de la prin-
cesse Diane, grauee delicatement avec un
escribeau au dessus contenant LE VAIN-

CV DE DIANE. Aussi conuiēt scauoir
que tous ceux qui marchent en ceste que-
relle portoient tous semblable deuise, qui
fut cause à plusieurs d'y laisser les vies les
uns pour les autres : tellement que la beau-
té diuine de ceste Dame se pouoit bien di-
re vne pestilence generale courant parmy
les Cheualiers de son temps, lesquelz elle
tenoit tous ravis de l'opinion de son excel-
lence & embracez de vives flambes de son
amour, sans qu'ilz eussent jamais eu le seul
heur de sa veüe, ne qu'elle aussi se souciait
aucunement de leurs angoisses & passions,
qui

ne pensoit qu'à prendre ses deduits & plaisirs dedans le pourpris delieueux de son palais avec ses Damoyelles, se pourmenant par les beaux vergers, en y cueillant fleurettes à tiffir chapeaux & bouquetz, ore s'allant rasteschir à la fontaine aucunesfois se seant sur la verdure au mylieu de ses filles comme la Deesse Diane entre ses nymphes, prenoit vn luth & en sonnoit si melodieusement qu'il n'y auoit aureille escoutant qui ne demeurast enchantee de l'harmonie, comme iadis on estoit sur la mer du chant de Sereines. Outre ce qu'adonc elle estoit ia peruenuë à l'aage de douze ans, estant peinte par la grande ouuriere nature de traitz si parfaits de son pinceau & reuestuë de couleurs si naïues que les yeux des femmes mesmes qui la regardoient restoient tous suspends en extaze. Or pour retourner à nostre propos quand ces Cheualiers, ces beaux amans à credit, eurent rencontré Florarlan le plus apparent d'entr'eux l'arraisonna: cheualier venez vous de la court de l'Empereur Amadis de Grece. l'en viens voirement (respondit Florarlan) mais pourquoy le demandez-vous? C'est pour entendre (dist l'autre) si le Prince Florisel y est, ou s'il se tache point, pour s'exempter de l'accusation qu'on luy va dresser, du tort & outrage qu'il a fait à la Roynne Sidonie. A ces paroles Florarlan cuyda yssir hors du sens, dont repliqua promptement au cheualier: A la male heure fier pautonnier auez vous eu l'outrecuidance d'outrager vn tel preud'homme par vostre fauce langue, lequel ne fit oncques tort ny iniure à personne: Et n'est pas en vous, ny en autre qui viue de luy faire peur, ains le trouuez à vostre dam si y osez aller. Le Cheualier peu content de la braue response de Florarlan luy respondit: Certes iouuëceau vous estes trop presumptueux pour vn nouveau Cheualier tel que voz armes demonstrent de vous attacher à moy en ceste façon. Et à fin que soyez desormais plus discret enuers ceux à qui denez honneur ie chastieray presentement vostre folle

ieunesse. Ce disant recule en arriere pour auoir espace de course, puis reuint au Florarlan la lance baissée, qui l'atendoit bien couuert de son escu, auquel l'autre donna de droit fil & le fausa, mais le harnois resista qui estoit de bonne trempe & le boys vola en esclatz. Florarlan qui ne se voulust espargner à son premier coup d'essay, luy adresse si viue atainte, que perçant escu, haubert, cotte de maille, la lance luy passa vn pied hors de l'espaule, dont il tomba ainsi embroché ius du cheual en terre. Ce voyât Florarlan leue les yeux vers le ciel priant ainsi: Dieu souuerain donne moy la grace de continuer mes coups selon ce commencement, que ie reconnois de ta puissance, non de la mienne. Lors tourne sa parole aux autres: ie croy que le galand ne fera meshuy si grand peur au prince Florisel de Niquee, qu'il craigne à se laisser voir: mais les nouveaux cheualiers ont bien perdu leur bon maistre d'escole. Les deux compagnons trop irritez luy viennēt courir sus comme lyons enragez, les lances couchees, qu'il receut en son escu, sans estre demeurant ne quant de la selle: puis ayant parfait leur carriere retournēt à luy les espees nuës en main, dont ilz menerent belle escrime, & s'il y eut bië assailly, mieux fut defendu, comme par celuy qui fut l'vn des plus vaillans cheualiers de son temps. Lequel apres longue & dure messee en abbatit l'vn à ses piedz, qui n'eut oncques puis besoing de chirurgien: ce que l'autre voyant se rendit à mercy, qu'il obtint souz condicion de prendre la teste du premier cheualier & la porter à Florisel, de la part de celuy au Fenix (ayant resolu de se surnommer ainsi, iusques à ce qu'il fust suffisamment conneu par ses oeures) & à la charge aussi de luy declairer qui estoit le cheualier occis: c'estoit (respondit il) le duc de Galde, que le bruit de la beauté de Diane a rengé en ce piteux estat, avec la presumption de sa proesse: quant à trencher la teste (à luy qui estoit monsieur lige) pour sauuer la mienne, ie ne le feray pas quoy qu'il m'en doive

ne auenir: au surplus i'obeiray volontiers à vostre commandement: Vrayement cela ne vous part (dit Florarlan) q̄ de bon cœur, si vous en excuse & porterez son escu en lieu de la teste: ce qu'il iura, & faisant leuer l'escu par son escuyer, print congé pour aller en Trapezonde accomplir autre dessein de voyage qu'il n'auoit premieremēt pourpenié. Florarlan d'autre costé s'achemine vers le port pour trouuer sa nef, mais vne damoyelle luy vient au deuant, de la forest prochaine, qui auoit bien quelque bon & friant trait de beauté. Si l'aprouche estant mōtée sur vn palestroy, & luy dist. Seigneur Cheualier la bonté que i'ay congneue en vous en la récontre de ces Cheualiers, ayāt veu de l'oree de ce boys tout ce qui a passé entre vous & eux, m'incite à vous requerir vn don, s'il vous plaist me l'octroyer de vostre grace: Florarlan ne fut fort content de ceste requeste, estimant que ce luy feroit quelque destourbier du chemin ou il tendoit: toutesfois par sa grande courtoisie luy respondit: Ma Damoyelle le peu de droit & l'orgueil de ces Cheualiers, qui ont esté les causes de ma victoire, vous pourroient bien abuser, au iugement que faites de ma vertu: neantmoins touchant le don que me requerez, dites & ie m'y employeray à mon pouoir, combien qu'il me pose trop de rompre le trac que ie tenois. Je suis seure, dist elle, de vostre valeur & bonté: mais pour m'asseurer autant de vostre beauté, ie vous prie auant que ie passe outre, d'oster vostre armet de la teste: ce que Florarlan ne refusa. Et quand elle le vid si ieune, & de si bonne grace, trop plus contente de luy, que de gentil'homme qu'elle eut iamais veu luy dist: la Dieu ne plaie que ie sois plus soigneuse de la vie d'autrui, dōt ie vous voulois requerir, que de la mienne, parquoy la requeste que ie vous fais, est que me faciez tant de bien que de me recevoir pour vostre amie: considerant que mon aage & le reste de ma personne est assez sortable à la vostre. Florarlan fort troublé

du propos de la Damoyelle, luy respondit: Je ne scay si vostre beauré est conforme à ma façon: mais vostre visage & contenance est fort contraire à voz parolles: quant à l'amitié que desirez de moy, ie la vous accorde de bon cuer pure & vraye, pour garder vostre honneur: & pour exposer ma personne (puis que le vous ay promis) en tout ce qui sera de raison pour vostre affaire. Alors luy repliche la damoyelle, ne pensez me deguiser ainsi les matieres, eomme ceux qui n'ont pas volonté d'accomplir leur promesse, ou i'iray publiant par tout le monde qu'avez failly de vostre parolle. Vous ne m'avez pas requis d'amitié dit Florarlan: si ay vrayment, respondit elle: Puis qu'ainsi est (dit il) à la conseruation de vostre integrité, ie suis prest à la vous tenir: vous estes vn peu trop ieune (repliqua la damoyelle) pour me seruir de curateur avecques vostre sage cōseil. Laissez (pour dieu) à rechercher les sens de mon langage, & auez seulement à executer ce que m'avez otroyé. Sur ce different la damoyelle dit qu'elle s'en remettrait au iugemēt d'une sage dame vesue qui se tenoit en vn chasteau pres de la, à quoy force fut à Florarlan de consentir. Si le mene l'amoureuse par vn sentier destourné, au manoir de la dame, & en chemin l'arraisonne que c'estoit qu'il trouuoit en elle qui le degoustast de son amour: rien en bonne foy, respondit, que ma volūtė desia engagee en autre lieu. O ô, dist elle, estes vous de ces habiles gens la? vous voulez ensuyure les belles loyautez des princes de Grece. Vous l'estimez dōc à fortie (dit Florarlan) & seriez vous bien aise que vostre amy vous faust la foy? La damoyelle adonc luy respondit, qu'elle seroit bien contente n'en sauoir rien, mais qu'elle iugeroit son amy trop lourdaut s'il ne pouoit aquerir credit en plus d'un lieu, quand la commoditė s'offriroit. Dequoy Florarlan pensa bien faire son profit, luy disant, puis qu'il luy sembloit si beste, qu'il n'estoit pas donc son homme, & qu'elle le quittoit bien par ce propos. Non non (dit elle

(dit elle lors) ie vous excuse par ce que vous estes encores ieune, & que vous osteray bien ceste folle opinion par mon conseil. Ainsi devisans arriuerent à la porte du chasteau, ou elle luy fit mettre pied à terre, & ses escuyers prindrent son cheual. Si entrerent eux deux dedans, & allerent trouver la dame qui auoit bien cinquante ans passés : laquelle voyant la damoyelle accompagnée de si beau cheualier (qui plus luy reuenoit qu'autre qu'elle eust iamais veu) luy demanda: Galace m'amy (ainsi elle auoit nom) qui vous meine. Ma dame Palarce (respôdit) i'ameine ce cheualier icy par deuant vous pour vuidier vn debat qui est entre luy & moy, duquel nous vous auons fait iuge, comme celle que ie tien pour si sage que nous en pronôcerez la verité: Dequoy est il question? dit la dame, lors s'auance Galace de faire le recit du cas disant ma dame Palarce ayant rencontré ce Cheualier pres de vostre forest, ie l'ay requis de m'otroyer vn don, ce qu'il a fait, puis luy ay declairé mon intention, qui est d'estre acceptee de luy pour amy, dequoy il fait refus, si die ses defences, & vous apres vostre auis, auquel auons conuenu ensemble d'obeir entierement. I'ay oy vne des parties, dist Palarce, maintenant Cheualier qu'alleguez vous pour voz excuses. Ie confesse, respond Florarlan, l'otroy du don, & m'offre à l'accomplir, en luy portant amitié honneste, iusques à luy faire seruice au hazard de ma vie. Galace proteste qu'elle n'entend point ce bageois d'honneur, ains que clerement & appertement vouloit ioir de sa beauté, d'autant que de luy elle n'auoit affaire en nul autre endroit. La dame durant leurs proces auoit sa veuë arrestee sur le beau Florarlan, qui luy toucha si viuement au cuer qu'elle oublia iustice & le respect de son aage, & pour cautelement paruenir à ses fins, leur dit, qu'elle entendoit tresbien le neu de la matiere, mais qu'elle n'en dōneroit aucun iugemēt s'ilz ne iuroient auant qu'ilz tiendroient sa sentence pour arrest irreuocable, y obeïssans

totalement l'un & l'autre: ce qu'ilz firent. Adonc la vieille condenna Galace à soy deporter du don tel qu'elle prétendoit du cheualier, pour les raisons qu'il auoit deduites pertinemment au contraire, le declairant quitte & libre de sa promesse. Et par le serment qu'il auoit fait à l'heure d'accomplir du tout son iugement, le prononce obligé à faire sa volonté. Vous pouez ymager si Galace fut alors bien estonnée, & frustrée de son attente: En mal an, dit elle, soit la faulse & peruerse iuge, qui s'approprie le droit des parties ou elle n'a rien, & autant en pregne au iouuenceau, si estant au choil il prend le pire. En bonne foy, dit la dame, vous estes adressez à moy (ce dites vous) comme à femme sage & auisée: mais ie serois bien folle de tenir vn tel bien en ma main, & le laisser eschapper aux autres. N'en estruez ia tant (dit Florarlan, fort tané de leur caquet) ie vous en mettray tantost toutes deux d'accord, en faisant aussi bonne part à l'une qu'à l'autre. Ce dit deuale par l'escalier du chasteau, la vieille dame criant apres luy, qu'il ne seroit quitte à si bon marché de sa parolle faulse, ains luy en pourroit couster la vie. Florarlan descend tousiours, & va gaigner son cheual sur lequel il monte, & la Damoyelle aussi tost, ayât trouué son palefroy prest. Ainsi s'en vont, & la vieille cria qu'on luy selle le sien diligemment pour les suyure, mais ce ne peust estre si tost qu'ilz ne fussent ia bien loing, Galace costoyant tousiours son bien aymé, qu'elle traualloit fort à conuertir par son babil, en fin le voyant si dur à l'esperon, au bout de ses prietes, le tenta de menaces dequoy il s'excusoit doucement que les premiers veux empeschoient les derniers. Or cheminans ensemble en telz propoz, apperçoient six Cheualiers venans à l'encontre, ausquelz Galace s'escria: A à gentilz Cheualiers s'il y a quelque courtoisie en vous, dont cestuy-cy na tache, qui ma failly de promesse, ie vous supplie le contraindre à me la tenir, sinon luy en dōner telle discipline que sa de loyauté

loyauté dessert. Les folastres à la requeste de la Damoysselle somment à l'instant Florarlan de fournir sa parole s'il vouloit garantir sa teste: qui leur remonstra qu'ilz ne faisoient iustemēt d'entreprendre vne querelle sans entendre la raison: mais Galace luy rompit son propos, leur disant que pour Dieu ilz ne l'escoutassent ne le creussent, car c'estoit vn causeur qui les amuseroit iusques au lendemain par son flaiol.

Sus, sus, monsieur le prescheur (dit adonc l'un des six) il faut voir si serez aussi grand faiseur que beau diseur. Florarlan qui se sentoît piqué de sa gaudissierie ne s'en fit trop prier, ains s'esloigne aussi tost, & retourne la lance en l'arrest contre le cheualier de telle roideur que tous deux briserēt leur bois, mais l'autre vuyda les arçons & trebuchâ si rudemēt en terre, qu'il y fut vn long tēps cōme mort, sans remuer pied ne main. Alors les cinq cōpagnons coururent sus tous ensemble au gentil Florarlan, dont vn seul rōpit sur son escu, & luy qui auoit l'espee au poing donna tel reuers à l'un sur l'armet qu'il passa tout estourdy chancelāt sur son chenal: Les autres quatre reuiennent vers luy trop irez de l'inconuenient du premier qu'ilz tenoient pour occis. Si commence entr'eux & Florarlan vne dure meslee, qui n'y oublia rien de ce qu'il scauoit faire & se deffendit si dextremēt, qu'il tira à tous le pur sang de leurs corps, sans recevoir au sien que quelque petite playe. Adonc suruint la vieille Dame à grand haste sur son palefroy, qui toute effrayee de ce conflit si mal party, quand elle en eut entendu l'occasion par la Damoysselle, & veu comme se maintenoit celuy que tant elle aymoît, conquisse encore plus par sa hardiesse iointe à sa beauté, vint escrier aux Cheualiers, hola, hola Seigneurs escoutez vn mot seulement. Eux qui ne sentoient grād auantage en ce combat, se tirent volontiers arriere, & elle leur dit: Ce Cheualier cōtre qui vous combattez est mien de bon droit, quoy que ceste damoysselle pretende. Vous en auez menty faulse vieille (dit Galace)

il est mien non pas tien, & n'est pas en toy de me tollir par ta ruse ce qu'il m'a promis. Si tu y as eu quelque droit, respond Palarce, tu l'as remis entre mes mains; le penſes tu si sot, dit la damoysselle, qu'il laisse le verd pour le sec, & la fleur gaye pour l'herbe fennee. Allez vieille ridee & cheuē, qui estes sur le bord de vostre fosse, voulez vous estre deux foys aussi bien vous siet à faire l'amour, qu'à vn vieil cinge la mouē. Palarce à ce mot ne se peut plus cōtenir, disant qu'elle abbatroit bien son orgueil tout sur le champ. Lors viennent ioin dre leurs palefrois & s'attachent leurs coiffures, puis se harpent aux cheueux, les vns blondz, les autres blancz, & si bien se tiraillent qu'elles vont par terre bien liees ensemble par le poil: la ou le combat rengrege aux ongles, aux dens, se saboulans l'une dessus, l'autre dessous, mais la vieille se trouuoit vn peu foible de riens pour la ieune & auoit du pire. Dequoy les cheualiers, combien qu'estans assez mal de leurs personnes, mesmement le premier qui estoit reuenue de pamoison: se prirent toutesfoies à rire, s'enquerans de Florarlan d'ou sourdoit ceste querelle, qui leur exposa en deux motz. Vrayement (dirent ilz) Cheualier nous vous auons fait grand outrage, si vous priions le nous vouloit pardonner, veu que sommes quasi payez contāt de nostre iournee. Seigneurs (respondit Florarlan) ce n'est que l'vsance des hommes de se laisser ainsi abuser du chant des femmes, pour le moins elles nous rendēt partie du passe temps que leur auons donné, i'ay trop veu (dit l'un d'entr'eux) de cheualiers combatans pour les Dames, mais aujourd'huy ie voy nouuel estour entre les Dames pour vn gentilhomme: ie ne plains point du tout ce qui m'en a cousté de ma peau, pour voir vn ieu si nouueau. En acheuant, il pique vers leurs palefrois, lesquelz il debride, puis leur donne du plat de l'espee sur la croupe, de sorte qu'ilz s'enfuyent à trauers champs, sautans, hannissans & penadans à plaisir. Et reuenant à la compaignie qui rioit à gorge

deployee, c'est, dit il, pour rassoir leur coliere, par l'exercice qu'elles feront de leur pied retournans en leurs maisons : mais en chemin dit vn autre, se puissent les mastignes rompre le col qui nous ont fait payer la folle enchere de leur riote. Or signeur cheualier (parlant à Florarlan) ie vous pèse aussi courtois que vous auons esprouué vaillant, & que pour ce coup excuserez nostre temerité vous assurant de moy & me faisant fort pour mes compagnons, de vous obeir en ce que nous voudrez commander. Florarlan les remercia, & se departirent amys, sans toutesfois s'estre donnez à connoistre les vns aux autres, eux suyans leur chemin & Florarlan entrant en la forest, qui le mena iusques au riuage de la mer, ou sa nef l'atendoit. En laquelle il monta, & nous l'y laisserons pour quelque temps ainsi depeesché à son honneur de ces honnestes amantes : lesquelles apres auoir tât cougné l'vne sur l'autre qu'elles n'en pouoient plus, se separerent lasses & depites, & à fort grand peine regaignerent chascun son chasteau (qui n'estoient beaucoup distans l'vn de l'autre) sans soy vanter de ce qui leur estoit auenu, fors que d'estre cheutes de leurs palefrois qui auoient gaigné les champs.

Comme le Cheualier enuoyé par Florarlan avec l'escu du Duc de Galde, vint à Trapezonde. Et du deffy que le Roy de Gaze presenta à Florisel.

CHAP. VII.

LE Cheualier que Florarlan auoit enuoyé à Trapezonde porter l'escu du Duc de Galde y fut lendemain, & trouua l'Empereur en sa sale sur la fin de son disner à l'heure qu'on vouloit leuer les nappes. Apres la reuerence deuë, demanda haut & cler qui estoit le Prince Florisel de Niquee, lequel estant assis à costé de l'Empereur, luy respond: Cheualier qu'est ce que vous luy voulez, ce suis-ie. L'estran ger alors s'agenouillant deuant luy, l'escu en la main, luy dist: Prince excellent des

deux empires, le cheualier du Fenix (l'outrepasse de tous les autres) vous enuoye par moy cet escu du duc de Galde monseigneur, qui venoit prendre vengeance de vous au nom de Sidonye royne de Guindaye, pour auoir la princesse Diane vostre fille en mariage : laquelle vous pouez voir figuree & pourtraite icy au vif, suyuant le patron que la royne sa mere en a donné. Or venant deça le duc monseigneur acompagné de deux cheualiers que nous estions en l'intention que vous ay ditte, rencontrames à vne iournee d'icy le cheualier du Fenix, à qui nous attachasmes à la malheure, de sorte qu'il n'en est demeuré que moy pour vous en porter les nouvelles. Adonc leur raconte le cas en la forme qu'il auoit passé, dont Florisel receut vne grand ioye en son cueur, s'assurant d'autant plus que vraiment il estoit sien. L'empereur qui pareillement en estoit trefaise, dit alors: ce maideux s'il sortoit beaucoup de telz cheualiers de nostre court, il en soulageroient maintz autres du trauail de vous venir chercher iusques icy. Aussi feroient ilz bien moy respôd Florisel de la peine de les y attendre & recevoir. Mais monsieur contemplez vn peu ceste effigie, si vous y pourrez rien connoistre : l'Empereur prend l'escu, & regardant la figure de la pucelle, qui estoit lors de viij. ans ou enuiron, tout le corps luy fremit, luy semblant tenir deuant ses yeux proprement le parchemin mesme des images que le damoyzel luy auoit montrées pres de la cité d'Antiochie : tant ce pourtrait ressembloit à celuy de l'empereire Niquee. Alaquelle (estant aupres de luy) il dit en souztriant, ma dame voyez icy la figure par laquelle me fistes vne foys defigurer & transformer en Nereïde. Dieu vueille que la beauté de ceste princesse ne soit cause de plus cruelle mort au filz que la vostre fut au pere. L'empereire iettant sa veuë dessus en riant du petit mot ioyeux de l'empereur, s'esbahit grandement de la merueilleuse perfection de Diane & de la semblance don si entieremēt elle raportoit.

B à son

à son visage de pareil aage, laquelle dit, après l'auoir assez considéré, certes ie trouue ce pris digne des trauaux & hazardz des cheualiers amans; mais trop inique & de-raisonnable, que si beau pourtrait rende si maigre salaire au bon peintre. La princesse Heleine (à qui l'euure touchoit) recueillit ce mot, luy disant, Ma dame, Dieu est iuste iuge, qui ne laisse iamais les fautes impunies, & qui mesure son chastiment selon la repentance qu'il connoist au delinquant, & volonté de ne plus rencheoir au peché. Qui peut aileurer ce loyal mari (regardant lors son Florisel d'œil mignard) que s'il est preud'hôme il n'en aura que le mal: lequel luy respondit, ma dame, si i'ay commis quelque offence, ie vous certifie que la penitence & punition la suyront de pres, selon l'appareil que ceste image monstre de ceux qui le portent (comme Laodamie celuy de son Proteuslaus en cire) & qui pour elle pourchasseront ma mort. Surquoy repliqua Heleine: monsieur si i'estois aussi asseurée de vostre loyauté passee fait de ceste effigie, comme ie suis de vostre vertu en ce qui cōcernera les armes, ie serois deliure de toute crainte. N'en parlons plus, dit l'empereur, car c'est simplese de se vouloir fonder en raison sur le fait d'amour qui n'en porte point. Voire voire, monsieur, dit Heleine, vous en parlez d'affection, comme pour vostre interest en la cause de la princesse Lucelle: mais force sera de me taire, estant seule contre vous tous. Comme ilz passoient le temps en ceste ialousie, entra en la sale vn cheualier de taille demesuré armé fort richement, suiuy de six autres, le visage auoit noir d'une care braue, le poil crespé, & les membres gros & fournis, tellement qu'il n'estoit gueres moins que geant, & luy pendoit au col vn escu ou la belle Diane estoit empreinte apres le naturel, enrichie de mainte pierrerie, & enclose en vn cōpartiment d'or de relief, auquel vn rolleau s'entrelaçoit, contenant **LE VAINCV DE DIANE**, comme celuy du duc de Galde. Son

escu fit assez entendre la cause de sa venue, pour laquelle Florisel dit à Heleine, avec vn riz de bonne grâce: Ma dame voicy l'un de voz cheualiers qui veut entrer au camp contre moy, pour vous faire rendre satisfaction de la faute que m'imputez, auiuez à le fauoriser comme il merite en vostre endroit. Elle qui estoit toute en tranche de la veuë de ce grand & puissant cheualier, ne sceut pas bonnement continuer le ieu, sinon en luy respondant: comme le tort m'a esté fait, ô que la vengeance en fust aussi bien toute en mon pouoir, au contraire ceux qui la veulent prendre sur le malfacteur, me filent du premier mal vn autre, punissant quand & luy la personne mesme offence. Le cheualier ce pendant la regardoit ententiuement, & l'empereure Ni quee, fort emerueillé de leurs singulieres beautez, qui lors demanda d'une grosse organe: Qui est icy le prince Florisel de Ni quee: il se leua debout à cesté parolle estimant le cheualier estre de haute guise à son port & maniere, à qui il respond c'est moy, que me demandez-vous. Combat dit l'autre, au nom de la royne Sidonie (suyuant l'offre que vous auez faite de le soutenir contre tous venans) à fin d'accomplir la condition des noces de sa fille par la teste du pere, rachetant ma vie (qui depend de sa bōne grace) par le pris de la vostre: de seureté ie ne vous en requiers point, bien auerty que l'auiez otroyee en general. Florisel comme celuy qui estoit autant courtois & bien apris que prince du monde, sans monstrier aucun signe de courroux pour les fieres parolles de l'estranger, luy respondit gracieusement: Seigneur cheualier chacun entend le fond de la querelle de la Royne contre moy, qui n'est de qualité pour estre tiré en si cruelz termes: mais si raison n'est de mon cousté contre elle, autant de-faut elle à vostre beauté, pour vous acoupler ainsi par mariage avec la fleur des belles, tellement que vostre condition peut faire en ce cas de mon tort mō droit. Pourtant vostre desir de combattre ne sera par moy

moy delayé, le iour soit à vostre vouloir, l'assurance tenez pour toute donnée. Encores nous diriez vous bien auât qui vous estes, à fin que connoissions si la grandeur de vostre sang peut excuser l'outrecuidance de vostre lagage. Le cheualier fut fort irrité de ceste raillerie, à laquelle il respondit, la beauté des mignons dameretz est caduque & de peu de duree, cōme sugette à maladie, vieillesse & mort: celle doit estre prisee entre personnes magnanimes, que la renommee graue de son burin, sur laquelle le tēps & tous autres accidens mortelz n'ont puissance. Et par ceste vraye beauté suis venu à te leuer le voile de la presumption de l'autre, & requiers que nostre conffit soit demain à heure de prime: aussi pour satisfaire au reste de ton propos, ie t'auise que ie suis nommé Bruneon, Roy de Gaze, yssu en droite lignee de la race des Dieux. Alors l'Empereur se leua de son siege, & luy alla faire honneur, tant pour le lieu qu'il tenoit, que pour le renom qu'il auoit de cheualerie: mais il ne se voulut assoir avec eux, ny arrester prou, ne peu. Parquoy l'Empereur commanda en sa presence qu'il fut bien logé & seruy de tout ce que besoing seroit, dont le Duc d'Alafont eut la commission & le Prince Anaxartes, estant lors en court venu voir la pucelle Alastraxeree, la sœur qui estoit avec l'Emperiere. Lesquelz apres auoir fait leur charge, reuindrent en la sale, ou ilz trouuerent les Dames fort troubles du combat qui se deuoit faire le lendemain. Mais Florisel les reconfortoit à son pouoir les suppliant d'alsister es eschafaux, tāt pour monstrier au Roy de Gaze leur beautez gayer & assurees en son bon droit, q̄ pour recevoir faueur de la veuē de sa chere Heleine. Le camp fut dressé en diligence au deuant du palais Imperial, circuy de barrières, & toute la nuit se passa en oraison, Florisel se mettāt en estat de bon & vray chrestien, pour la confiāce qu'il auoit plus grande en la puissance diuine, qu'en la verueur de ses bras.

Du combat entre le prince Florisel de Niquee et le Roy de Gaze pour la querelle de la Royne Sidonye.

CHAP. VIII.

LE soleil cler & serain commençoit à lancer ses rayons sur la terre, quand le prince Florisel & le roy de Gaze se faisoient armer de toutes pieces: vers lequel l'Empereur enuoya le prince Anaxartes, accompagné des ducz d'Antile & d'Alafont, qu'il establit inges du camp avec mille cheualiers pour la garde & seureté d'iceluy. Ilz le trouuerent desia tout armé, & prest à monter sur vn grand moreau, caparaçonné de satin noir: si le menerent ces seigneurs au camp, les trompettes marchans deuant luy & le mirent dedans. Il le faisoit fort bon voir, & eust esté merueilleusement agreable au peuple, s'il eust esté là en meilleure intention, mesinement à l'Emperiere Niquee & à la princesse Heleine: qui desia s'estoient renduës avecques force dames & Damoysselles aux fenestres du palais respondans sur le lieu du combat, Estant le Roy de Gaze attendant son ennemy, auisa le conffit espouventable de l'Empereur Amadis de Grece & de Furio Cornelio qui la estoit représenté apres le naturel. Sur lequel il se mit à penser profondement, puis leuant les yeux vers les fenestres y apperceut l'Empereur, qui le meut à dire: O dieux immortelz qui m'auiez daigné faire naistre de vostre lignage, ne permettez que ma hardiesse me tourne en honte & confusion, pour auoir iournee contre la race de cet Amadis, lequel semble qu'ayez fee & destiné à tout heur & prosperité (veu les succez admirables de toutes ses entreprises) & qu'ilz ayent quelque participation de vostre deité. Lors pour s'encourager contre ce sursaut d'effroy, baissa la teste vers son escu en cōtemplant le pourtrait de sa Diane, & puis dit: Ma déesse, quand ilz auroient ceste faueur des dieux comme naturelle, encores s'aioindra elle à la mienne par vostre moyen. Adonc ses es-

pritz tout esbâudis) il pique son cheual par le camp d'une grande dexterité, luy faisant faire pennades, ruades, viste virades. Sur ces entrefaites voicy arriuer Florisel avec les iuges, tout armé à blanc d'un fort riche harnois, avec cotte d'armes de satin carmoysi decouppé sur toile d'argent, & les taillades reprises à boutons & houpes meslees des deux couleurs, qui estoient celles de sa chere Heleine, de qui il eut aussi sur son armet une faueur de mesme: en son escu il portoit (comme de coustume) l'auenture de la tour de l'univers. En tel arroy il fut mis dedans le camp, & apres toutes les solennitez requises, & le soleil party par les iuges, ilz monterent en un echaufaut qui leur estoit dressé. Incontinent les trompettes sonnerent, au son desquelles les deux champions couuers de leurs escuz se viennent rencontrer à course de cheuaux: mais à l'approcher, Florisel retenu par la veüe de sa fille Diane, hausse son boys pour ne la ferir: ce que voyant le Roy en fit autant du sien, & ainsi passans l'un apres l'autre sans soy toucher, leur pointe acheuee, tournent bride, & Bruneon vient à Florisel: Comment Florisel, cuydez vous me vaincre en me faisant auantage? pas ne vous donneray ce point d'honneur sur moy, & ne combattray qu'en iuste & egale raison: vous asseurant que bien vous feront besoin toutes vos forces auant que le ieu departe. Roy de Gaze (respond Florisel) ie suis coustumier d'honorer & defendre les dames & d'exposer la vie pour elles: & me penserois faire tort de les offencer, mesmelement celle qu'avez en vostre escu, à raison de ce que ie me doy à moy-mesme. A quoy le Roy: pas ne debattray l'honneur que voulez faire à ma Princesse, qui bien luy est deu: si appelle un heraut pour luy demander un autre escu aux iuges qui luy fut soudain deliuré & d'un tresfin acier: mais le sié il ne le voulut bailler à personne, ains le va luy mesme pendre par ses attaches en un coin de l'echaufaut disant: Ma dame puis qu'il ne m'est loisible de vous tenir mainte-

nât entre mes bras, ie vous auray au moins deuant mes yeux à fin que le regard de vostre excellente beauté m'inspire renfort de proësse. Ce fait, les trompettes sonnerent, & ilz coucherent l'un contre l'autre à pointe d'esperons, de telle randon que les lances rompuës en leurs escuz, ilz s'entrehurtaient des corps si rudement que le Roy culbura cheual & tout en un monceau: & Florisel perdant les estriers vola par dessus les arçons en la place. Ou il trouua le Roy soudain sur ses piedz l'espee en main qui le receut brauement: dont commença entre eux un dur estour, par coups si rudes & violens que leurs armetz sembloient ardre en flamme que leurs espees en faisoient saillir. Ce qui dura plus de demye heure, auant qu'on peust cōnoistre qui en auoit le meilleur, estant le champ semé des mailles de leurs haubertz, & eux naurez en quelques parties de leurs corps: car le Roy de Gaze estoit trespuissant & preux cheualier. Mais que luy pouoit seruir sa proësse cōtre le prime de la plus vaillante race du monde: lequel peu apres luy acoutra son escu tellement qu'il n'en auoit quasi pour couvrir sa poignée: alors receut de Florisel de dāgereuses touches, que son sang cler tesmoignoit en maintz endroitz: qui en eut aussi quelque tainture du sien fort apparente sur ses armes blanches: laquelle chassia bien tost ce qu'il y auoit de pareille couleur es visages des Princeses qui les regardoient. Or estoit l'heure entiere desia passée, & le Roy auoit beaucoup perdu du sié par ses playes: dont il se sentit si vain & affoibly, que se tirant un peu arriere, dit à Florisel: Le tēps qu'il y a qu'auons commencé nostre iournee requiert pause, pour reprendre haleine à ce que la renouuellions plus verde. Qui luy respondit, ie ne voy aucune raison d'user de courtoisie enuers celuy qui marchā de ma teste, à fin que ne me sachez gré de ce que i'ay fait d'entree touchant vostre escu, en faueur d'autre que de vous. Le Roy trop irrité de ces parolles, ore te gardes de moy (dit il) qui te feray cōnoistre promptement

ment quel bien t'eust esté de reposer : lors luy decharge vn si pesant coup sur la creste de l'armet, contre lequel Florisel haussa son escu ou il entra enuiron vne paume, tellement qu'il ne fut en la puissance du Roy d'en retirer son espee & en si efforçant, Florisel luy donna vn tour de main qui la mit en deux pieces: dont le Roy se trouua fort estonné, demeurant aussi mal garny d'armes offensiuës, n'ayant pas la moytié de son espee, que defensiues, veu son escu rongné bien court de tous costez. Au contraire les assisstens en furent fort resioiuz qui redoutoient la grand' force corporelle du champion si haut & membru. A qui dit lors Florisel (se gaudissant) Roy de Gaze l'ardeur de vostre affection est pour se manifester grandemēt à ce coup que solenniserez les noces de la belle Diane par l'effusion de vostre sang, il faut bien iuger que l'ame est merueilleusement esprise de passion, quand elle immole le corps si volontairement. Le Roy à qui il ne tenoit de gaber & railler, ains pensoit au moyen de garentir sa vie en si gros danger, nauré, las & defarmé, s'en va d'vn saut saisir l'escu qu'il auoit pendu en l'echaufaut (auquel Diane estoit pourtraite) iettant ce qui luy restoit de l'autre, puis leue de terre vn tronçon de lance garny du fer, & ainsi remplumé vient affronter Florisel disant: vecy ma Diane qui m'a mis dedans le camp, qui est bien pour m'en tirer hors : A quoy il luy respond : Certainement vous neussiez sceu choyrir meilleur parrin en ce combat pour escheuer les coups. Le Roy s'aproche qui luy en iette deux ou trois de son boys: contre lesquelz Florisel ne fait que parer, sans luy en tirer vn seul pour le respect de la figure: mais à la fin ennuyé de la recharge, quitte l'espee, & vient empoigner le Roy à la lutte, qui pensa estre au comble de son desir, à cause de sa robuste corpulence. Toutesfoys Florisel le demaine vne espace au bras, ne receuant secoussé sans la rendre: puis faisant peu son profit le vient saisir au corps si vertement qu'il luy esprint le

sang par les playes comme à vne piece de venaison entre les branches d'vn arbre tellement que tout euanouy il tombe en la place, & Florisel dessus luy, qui luy delace aussi tost le heaume chacun estimoit qu'il luy voulsist trancher la teste. Lors le trouuant paliné se leue sus reprenant son espee, puis peu apres le voyant reuenu à soy luy dit : Roy de Gaze vous auez pris de tresbons parrains pour vostre defence qui vous sauuent maintenant la vie : Pourtant leur pouez bien accorder ce que vous veux enioindre en payement de vostre teste, dont ie vous fais grace, c'est que m'estimant reueuable de courtoisie à la mere qui vous a enuoyé icy, aussi bien qu'à la fille de qui vous portez l'ymage en cest escu, en faueur d'elle ie suis delibéré d'vser de toute la gracieuseté qui me sera possible (ma teste sauue) aux cheualiers qui me viendront assaillir de sa part: laquelle promesse leur sera signee de mon sang & du vostre espenduz presentement. Si irez vers elle l'auertir du vouloir que i'ay de luy renuoyer tous les champions qu'elle depeschera contre moy, à fin de luy faire entendre le tort qu'elle a de pourchasser la mort de celuy qui ne defend sa vie que pour luy faire seruire.

Desquelz vous menerez la dance, luy allant presenter vostre teste viue, en satisfaction de la mienne morte que luy desiriez liurer: ce que me iurerez sur le champ, sans me rendre autre confession de victoire à raison de la proesse qu'ay esprouuée en vous. Il ne conuient douter quelle ioye receut le pauvre Bruneo, qui ne faisoit plus aucun estat de sa vie, quand il entendit les humaines paroles de son ennemy, à qui il respondit. Prince excellent ie me tiens & tiendray à iamais vaincu de vous deux fois, l'vne par vostre vaillance incomparable, l'autre par vostre courtoisie pareille: vous iurant ne faire faute d'aller la part que me commandez publier vostre gloire avecques ma honte, pour leuer l'abuz & follie de ceux qui voudroient suivre ma trace en ceste querelle: en leur donnant à connoistre vostre

valeur invincible, qui doit faire muer courage aux plus sages entrepreneurs. Adonc Florisel luy ayda à leuer & le fit conduire à son logis : & luy en triumphe & fanfare fut remené au palais, au grand contentement de tout le peuple de Trapezonde, nō moins esbahy de sa debonnaireté & discretion, que de sa vertu & hardiesse. On donna ordre à bien traiter le Roy de Gaze, & à faire penser ses playes, autant que celles de Florisel, qui n'estoient de beaucoup si dangereuses : desquelles estant en peu de iours presque guery, Darinel le playant arriva en court, enuoyé par la princesse Siluie, pour sçavoir nouvelles de la disposition de tous les Seigneurs & dames : lequel l'Empereur mena par la main en la chambre de Florisel pour le resjouir. Darinel se vint ieter à genoux pres du lit, à qui Florisel fit grand' caresse, s'enquerant de l'estat de ma Dame sa tante & du prince Anastarax. A à (dit Darinel) il est bon à voir monsieur qu'avez perdu beaucoup d'entendement & de sens avecques vostre sang, qui ne connoissez pas que parlant à moy, vous parlez à Siluie mesme. Pardonne moy Darinel, respond Florisel, si l'ayant conneuë avec si grand' beauté, ie la mesconnois sous figure si layde & difforme, ne ses blondz cheveux souz ta grise perruque, qui mieux ressemble à laine blanche qu'à sa toison angelique. O seigneur, respond Darinel, pour ce qu'estes ainsi blessé au corps vous ne pouvez comprendre les playes de l'ame, ne cōme la forme de Siluie est transformee en la mienne. Mais bien vous veulx dire que la gloire que rapportez de vostre combat, que la devez à elle, de qui les premieres pensées vous eleuerent le courage, pour rendre & paruenir à celles de ma Dame Heleine. Sur ce propos voicy entrer Mardochee en la chambre gay & falot, pour bien veigner Darinel son compagnon d'armes, de qui il avoit senty la venue. Ce fut vn plaisir de voir les salut & acollades qu'ilz s'entredonnerent : ça, ça (dit alors Florisel à Darinel) voicy vn champiō qui pour l'ex-

cuse que i'ay de maladie defendra ma querelle contre toy. Ouy des, dit Mardochee, dequoy est le différent entre vous deux? En ce qu'il maintient afferme qu'il est Siluie & non Darinel, au moyen que son ame est conuertie en elle, respond le Prince. Vrayement (commence Mardochee) il me semble qu'il seroit meshuy temps à toy Darinel de laisser ces soties d'amourettes, veu l'age & le poil blanc qui t'en dispense: tu ne l'entendz pas bon homme, respond Darinel, mes pensées sont de telle nature qu'ilz ne peuēt enuieillir, & mes amours sont toujours comme fresches & nouvelles: quant à moy, dist l'autre, sans point de faute ie me sens scandalizé de telle façon de viure: marye toy de par Dieu, sans plus ainsi l'offencer: ô preud'homme que ne fais-tu ce que me conseilles, replique Darinel. Moy, dit l'autre, pourquoy m'irois-je tourmenter en mariage, puis que i'ay si bien à boire & à manger & ma vie toute gaignee sans autre soucy veu que iamais ie ne fus embabouyné de ce semenin. Dequoy Heleine se print à rire, disant: Mardochee, il nous vaudroit mieux retourner au iardin d'Apollonie, & là mander la Royne Timbrie. Pay trop de regret (respond) à ce temps la, & à la douceur des graces de ma bōne maistresse. N'es-tu pas plus aysé icy? dit elle, non certes, respond, i'auois le plaisir d'aller au matin sur les montz saluer le beau soleil leuāt, & avant luy l'aube auancoureuse: puis me rafraîchir en la rosee des prez & paistre mon œil des diuerfes couleurs de leurs fleurettes: apres allant par les forestz me pourmener, ie receuois mon aubade des gorges melodieuses des rosignolz, chardonneretz linottes & autres oyillons: & quand l'heure de l'appetit venoit ie cueillois des fraizes au boys, & aux champs des cerises, pommes, & autres fruitz des arbres selon les saisons, & allois estancher ma soif es fontaines ruisseleues d'une eau argentine dont le doux bruit par leur fond pierreux souuent me conuoit à vn souéf sommeil. Et au resueil sentāt la chaleur du iour allois gagner l'ombre

l'ombre au plus espais des bocages, dont ie voyoy le deduit naturel des bestes sauvages entre elles & leurs franches amours tost guerdonnées de leur desir qui m'incitoit à rire des faueurs, dedains, appointemens, traucises d'estrageté nouvelle & mille miseres des pauvres hommes amoureux. Au soir ie souppoys des marrons, de pomes de pin, d'orenges & citrons, avec la salade d'aux, serfueil & baulme ayant pareillemēt ma musique de grillons sur la nuit : durant laquelle contemplois l'ourse & les autres estoilles du ciel, & remarquois leur place pour mesurer le lendemain la diligence de leur cours. Et aucunesfois en mes ioyeuses pensees faisois vn iustrumēt de double chalumeau, duquel ie chantois (couché souz vn arbre) mon rural contentement.

C H A N S O N.

*O combien est heureux
Celuy qui se contente,
Des biens si plantureux
Que nature presente:
Autres biens que ceux cy,
Sont pleins de griefsoucy.
I'ay toute suffisance
Que la vie requiert:
Qui abonde en cheuance
Pour autruy en aquiert.
Tresors de plus qu'assez,
En vain sont amassez.
Qui se fonde en l'honneur
A fortune se iouë,
Qui du haut de bon heur
Iette au bas de sa rouë
Plus la foudre tousiours
Frappe les hautes tours.
Guerre, dol, ny enuie,
Ne repaire en ce lieu:
Qui meine ceste vie
Est fort semblable à Dieu.
L'homme du tout à soy,
Vit plus heureux qu'un Roy.*

En voz maisons seigneuriales ie voy tāt

de viandes, que mon estomach en est degoutté & me trouue si chargé la nuit que ne puis prēdre repos, & le iour si apesanty, que mon corps n'est dispos à rien faire, ne moy a riē penser ne deuiser qui vaille. Auseriez vous dire qu'il y ait vne aussi gaye, pure & heureuse vie ? O que de gens s'y rengeroient (toutes autres laissées) s'ils auoient gousté comme moy la saueur des saintes viādes & bruūages que nature fournit, sans tant de deguisemens que l'art des humains inuēte, au preiudice de leur santé. Pendant que Mardochee faisoit ses discours rustiques le pauvre Darinel fondoit tout en l'armes. Ce qu'aperceuant Florisel, riant d'aise luy dist : Quoy Darinel, le soulas des champs qui tous nous resiouyt, vous tire les chaudes gouttes des yeux. Ha monseigneur, respond, comment ne m'auroit ce propos touché au cueur ? me remettant en memoire les prez, fontaines & riuieres de Tirel : ou ma Dame Siluie (gardant les brebis) attiroit le prince Florisel en habit pastoral, à venir dācer au chant & armonie de Darinel. Puis il me ramentoit les herbes dont ie me paissois es prochaines prairies du fleue de Nil, pour soustenir la gloire de mes pensees, au bannissement de ma dame Siluie. Outre le ramage des oyseaux, auquel j'accordoys ma cornemuse, les montz dont il parle me representēt la hauteſſe de mon desir : & les vents y soufflantz, mes souſpirs & sanglotz : & les sources coulātes, mes pleurs continuelz : & les fucilles qui cheēt mon esperance morte, qui par trait de tēps resſourt & renouuelle. Ma foy Darinel dit Mardochee, ce n'est pas nostre cas que ſes richesses cy, retournons nous en iouyr de la felicité des champs : A mon amy, dit l'autre, mō cueur va trop accompagné de roya le noblesſe, engravee en luy profondement pour la pouoir oublier ainſi. A moy au contraire, respond l'autre, toute compagnie deplaiſt & maudit ſoit qui n'aymeroit mieux eſtre Seigneur du taudis de l'hermitage & des prayries d'Apolonie (ou ie me promenois à plaisir) que d'eſtre monar-

que de toute la Grece . Adoncluy dit Helene : Mardochee ne te melancolie point, nous te rendrons bien tost au iardin tant desiré , la ou tes souhaitz seront acompliz . En bone foy, respond, ma Dame ie ne sçay si vous vous moquez , mais du temps que vous pourmeniez sur le bord des estangs & humiez l'air des champs à soulas, vostre teint naif estoit plus vif la moitié qu'il n'est maintenant . Mardochee (replique Heleine) tien bien le temps qu'il ne passe , & ie garderay ma couleur de passer: Ce n'est pas celà, dil il , mais estant accasane en ces palais, tousiours close & couuerte comme en vne boiste vous empirez comme les choses qui trop long temps enfermees sentent le remugle . Vous ne bougez d'vne chambre, vous ne faites point d'exercice , dont la digestion de vostre nourriture est beaucoup pire , acueillant vn amas de grosses humeurs qui amortit le sang causant la bõne couleur . Ainsi que Mardochee se fendoit en medicine avecques grand' risede de la compagnie on vint auertir les Princes qu'on auoit couuert pour le souper , dont ilz prindrent congé de Florisel, lequel nous laisserons guerir de ses playes .

Comme le Cheualier du Fenix fut porté par tourmente en l'Isle de Dardanie , & de ses fortunes .

CHAP. IX.

LE Cheualier du Fenix ayant regagné sa nef, commande au patron de tenir la ronte de l'Isle de Guindaye, ce qu'il fit l'espace de huit iours entiers par vent prospere : au bout desquelz le temps (qui apreste par son changement les destinees de chacun selon sa constellation) se vint tourner si contraire & impetueux qu'il les mania tresperilleusement . Car ilz coururent fortune trois iours avecques les nuitz, sans sçauoir quelle part ilz alloient & sans vser d'autre art ny industrie de pilotage que de se commettre à la mercy des ondes . Mais Dieu eut regard aux prieres du gentil Floratlan, & luy monstra vne ra-

de apres mydi , ou ilz surgirent , combien qu'ilz ne conneussent qu'elle region pouuoit estre . Et luy qui estoit fort las & trauaillé de la marine , descendit legèrement sur la riue , faisant tirer ses cheuaux du vaisseau , avec son harnois , dont il se fit armer, & monta accompagné de ses escuyers, commandant aux mariniers de l'attendre la , iusques à ce que la tourmente fut appaisée . Si entre en vn sentier peu fraié & batu , lequel il continua iusques à iour faillant qu'il mit pied à terre pres d'vne fontaine pour souper de ce que ses gens auoient apporté du nauire , faisant paistre l'herbe à ses cheuaux . Apres ce repas le sommeil le surprint bien tost , à cause du trauail de la tempeste : si se couche sur la verdure , faisant aureiller de son escu, ou il dormit profondement la plus grand' partie de la nuit . Alors il s'eueilla à quelque bruit qu'il ouyt assez pres de la , & ouurant les yeux aperçut six flambeaux allumez : dequoy fort esmerueillé se leue en sursaut mettant armer en teste , & prenant son escu , sans reueiller ses escuyers qui gisoient aupres de luy . A tant s'en va droit la part ou il voit les lumieres : desquelles aprochant , trouue vn chariot ou estoient quatre cheuaux blancz attellez , & sur le limonnier vn nain endormy tenant vn fouët en sa main : Les flambeaux en six torchouers au circuit du chariot, dedans lequel estoient six Damoyelles de tresriche parure & de beauté singuliere : dont l'vne estant eueillee sonnoit melodieusement d'vne harpe , & chantoit quand & quand le rommant .

*Neron voyant de Tarpee
Rome comme elle brusloit :
Oyoit le cry & huee,
Et de rien ne se douloit .*

A ce mot elle lacha l'instrument , & tordant ses blanches mains de mere angoisse, dit en souspirant :

Las s'il eust ven

*Le feu qui me consume ,
Pitié eut eu ,
Fust il dur comme enclume .*

Ce dit, appuye sa teste sur sa main acoudee, versant les grosses larmes le long de sa belle face. Florarlan fort esbahy de l'auenture & curieux de sçauoir qui estoit la Damoysselle, s'aprophe du chariot, & luy dit: Ma Damoysselle (que Dieu vous sauue & gard) qu'auuez vous à pleurer ainsi & lamenter. Elle à ce parler sursailloit comme en reueil & apperceuant Florarlan, cria à haute voix: Arden ho dors-tu, ou que fais tu? lequel l'oyant se reueille d'effroy & donne du fouët à ses cheuaux, qui s'en vont le haut du chemin à la course, demeurant Florarlan fort estonné de la façon de telle rencontre, & desireux d'entendre que ce pouoit estre, & d'autant fasché de ce qu'il n'auoit la son cheual pour suyure la coche à bride abatee, dont il resolut de ne partir de ce quartier auant que sçauoir tout ce qui en estoit. Parquoy vient à ses escuyers qui dormoient fermement, leur commandant luy amener son cheual: ce qu'ilz cuydent aller faire tant endormiz & encores estonnez du basteau, que quand ilz le pensèrent brider, il leur eschapa, & furent long temps auant que le reprendre, au grand ennuy & deplaisir de leur maistre. Et comme ilz estoient si empeschez apres ce cheual, le iour poignoit desia quand ilz aperceurent trois damoysselles sur trois haquenees venants à coups de houcines: ausquelles il escria qu'il leur pleust de grace s'arrester vn peu: mais elles s'entrerewardans & rians ensemble ne s'en retarderent vn seul pas, ains passerent outre laissant Florarlan merueilleusement despité qui iure Dieu que quand il luy deueroit couster la vie il sçaura la fin de ce mystere. Si met peine à faire prendre son destrier, mais le iour estoit ia fort auancé quād il fut pris. Lors il monta dessus, & ses escuyers sur leurs roucins, & entrent au chemin qu'auoit tenu la coche, qu'ilz continuerēt iusques à vne petite riuere qui auoit

à l'autre bord vne belle grand' plaine & en icelle force chasteaux, au mylieu desquelz estoit situé le principal. Florarlan ne songea gueres à passer l'eau à gué, mais quand il fut de l'autre costé, ne veid aucune trace ny apparence de voye ou sentier: neantmoins dist à ses escuyers: allon vers ce chateau le plus eminent pour y apprendre quelques nouuelles de ce que ie cherche: ce qui fait, & en aprochant veid vne troupe de belles ieunes filles toutes en habitz blancz dançās & chantans sur l'herbe & ayans chapeaux de fleurs sur leurs testes, lesquelles si tost que le descourirent, deployent leurs iambes & vont gagner le chateau, fermans la porte apres elles, & de ce pas monterent au haut des murs. Luy trop esbahy de ceste estrangeté, ne voyant en place homme à qui parler, va iusques à la porte & leur escrie: Mes Damoysselles qu'est-ce qui vous fait ainsi fuyr, deuant moy qui suis cheualier estrange, porté par tempeste en vostre contree? elles se mirent à rire de son propos, & se retirerent des carneaux sans qu'il fust possible de les plus y reuoir pour criz que les escuyers peussent faire. En bonne foy, dist Florarlan, ie n'ouy oncques parler de plus plaisante & diuerse auanture. Tirons doncques à ces autres chasteaux pour têter si nous y ferons point mieux noz besongnes. Ainsi qu'ilz en estoient sur le chemin virent sortir du chateau principal (qu'ilz venoiēt de laisser) vn nain monté sur vn courtaut piquant à bride abatee, & entrant dedans vne forest: que Florarlan reconneut estre conducteur de la coche, & dist à ses gens: le croy que serons peu iuformez de nostre queste par ce coureur, veu la haste qu'il a. Parquoy poursuit son chemin vers vn des petitz chasteaux auquel il eut visage de boys comme au premier: & de la va à deux autres ou il n'eut pas meilleure rencontre, dont il dist à ses gens: vistes vous en iour de vostre vie gens plus farousches, & vn païs ou lon ne void que femmes & toutes de si bas aage. A quoy luy respond l'vn d'eux par ioyeuseté:

monſieur il vous faut aller au dernier chasteau ſans armet en teſte, & quelque Damoyſelle vous voyant au viſage nu vous requerra vn don comme nagueres a fait l'autre, & ainſi pourrez eſtre inſtruit de ce que deſirez, dequoy Florarlan ſe ſouztit diſant: Celles cy ſont trop deſdaigneuſes à la contenance qu'elles nous ont ia monſtree, & trop peu priſent les Cheualiers: mais ia Dieu ne m'ayde ſi ie ne retourne au grand chasteau, & ſi i'en partz iamais que ie n'en aye ſceu le court ou le long. Auſſi tournēt bride, & ſi en reuont en intention de mourir au pied du mur, ou en auoir le cueur net: & quand ilz furent pres de la porte il met pied à terre, & ſe va aſſoir ſur vne pierre qui eſtoit vis à vis: là ou il ne fut gueres (ayāt le chef decouuert ſelon le conſeil de ſon hōme) qu'une tresbelle Damoyſelle ſe mōſtra aux carneaux avec vne autre vieille qui ſe mirent à contēpler ſa grace & beauté exquiſe. Mais ſi toſt qu'il eut leuē les yeux en haut pour les regarder, comme fort indignees deſlogerent de là ſans y reuenir pour parole ne raiſō qui leur ſceut dire. Or luy ſembla que la Damoyſelle eſtoit celle qu'il auoit veuē au chariot, dont il ſe reſolut d'auantage de ſe tenir là iuſques à ce qu'il entendroit tout le myſtere.

Comme eſtant le Cheualier du Fenix aſſis deuant le chasteau, vid reuenir le nain qu'il en auoit veu ſortir la nuit precedente, & de ce qui en auint.

CHAP. X.

Florarlan ne muſa gueres ſur la pierre pres du chasteau qu'il decouuroit le nain ſaillant de la foreſt, & quand & luy deux cheualiers venans armez de toutes pieces. Si reprend ſon heaume & monte à cheual pour atendre ceux qui luy dirent à l'aprocher: Nous vous trouuons tout à point cheualier, pour payer la folie qu'auiez faite d'entrer en lieu ou ne deuez. Ie ne puis, reſpondit, eſtre culpable de choſe que i'ignoreis. La punition (di-

rent ilz) qu'en receurez ſur le champ vous fera ſentir la faute qu'auiez commiſe: parquoy penſez de garder voſtre teſte, car à moindre pris ne puez racheter vne telle temerité: l'y mettray bonne peine replique Florarlan: mais donnez vous bien garde des voſtres, puis qu'y venez de telle audace. Sur ce pourparler, toutes les damoyſelles du chasteau ſe monſtrèrent aux carneaux pour regarder le combat, meſmement la belle qu'il y auoit deſia veuē, & les cheualiers recullēt pour prendre leur courſe, puis decochent enſemble contre Florarlan qui receut leurs lances en ſon eſcu, ou elles eſclatterent ſans gueres l'offencer: mais de la ſienne il enferma l'vn tellement qu'il l'eſtendit à terre avec le tronçon bien auant en l'eſtomach: l'autre retourne à luy l'eſpee nuē en bonne deuotion de venger ſon compaignon: lequel Florarlan receuant avec la ſienne en main, du premier coup qu'il luy tire luy abbat le poing dont il la tenoit, qui tombe avec l'eſpee en la place. Le cheualier ſe voyant ainſi accouſtré broche à l'inſtāt par le chemin meſme qu'il eſtoit venu, & maistre nain d'arpenter apres luy. Florarlan luy crie, reuenez cheualier reuenez, veu que vous rēportez mauuiſe garentie ſans ma teſte: mais il ne luy tenoit de retourner querir des coups, ains va touſiours à courſe de cheual, tant qu'il ſe fourre dedās la foreſt, laiſſant les dames (& principalement la plus belle) fort emerueillee & ſatisfaite de la bonté du cheualier au Fenix lequel ne les auoit à peine perduz de veuē qu'il aperçoit le nain reuenir à pointe d'eſperon, ſuiui de ſix cheualiers qui à l'arriuee luy ecrient: Ne penſez pas ho montieur du braue vous ſauuer à la fuite vous ne ſcauriez icy aller en lieu ou puiſſiez eſchaper de noz mains. Florarlan qui n'entendoit qu'à les recueillir, & ſoy deffendre, ſ'aſſiche en ſes eſtriers pour ſouſtenir leur effort, qui fut ſi grand de ſix ſur luy qu'il vuyda de la ſelle toutesfois ſans perdre les reſnes de la main: Dequoy corroucé outre meſure, remonté de viſteſſe, & comme vn Lyon enragé

enragé se fourre parmy eux l'espee au poing en alpre & terrible meſlee : tellement qu'en peu d'heure il en coucha deux mortz par terre, & les autres l'enuahirent de tous coſtez redouſtans toutesfoys aſſez ſes peſans coups. Alors le nain qui en veid deux deſia couchez en tel lit par ſi rude valet de chābre, recourt vers la foreſt criant, ſortez cheualiers en diligence pour deſaire ce diable (qui autre ne peut eſtre) Sur ce le cheualier du Fenix diſoit entre ſes dens, ie ſuis en danger de ma vie, au fort ie la leur vendray cherement : adonc entoife ſon eſpee de toute ſa force ſur la cime de l'armet d'un des quatre qu'il pourfend iuſques aux yeux, dont il verſe emmy le pré rougiſſant piteuſement la verdure. Les trois autres irritez plus que parauant, l'aſſaillent de toutes partz, tant qu'ilz luy tuent ſon deſtrier. Ce que ſentant Florarlan ſaut en terre & ſe va adoffier contre la porte du chateau pour faire rempar à ſes eſpaulles de peur du hurt des cheuaux, qui luy ſeruit grandemēt, à cauſe qu'ilz ne l'oſoient aborder de front, meſmemēt apres qu'il eut vengé la mort de ſon courſier, ſur celui qui luy fut preſenté le premier. A tant yſſent de la foreſt plus de vingt cheualiers, & bien autāt de gens de pied garnis de haches & moriōs leſquelz le nain amenoit, leur criant: Tue tue, à mort à mort ne prenez de luy aucune mercy. Contre ceſt aſſaut nouveau Florarlan ſe recommande adieu, & trop luy valut le cheual qu'il auoit occis giſant à ſes piedz qui eſpouentoit ceux des cheualiers & les gardoit d'approcher : les pauures eſcuyers furent incontinent empoignez qui pleuroiēt leur ſeigneur cōme pour mort lequel n'en attendant que l'heure (toutesfoys bien deliberé de vendre cher ſa peau) receut les gens de pied de telle hardieſſe qu'il ne tarda gueres à en terracer deux. Mais tout ſon effort eſtoit vain cōtre vn ſi grand nombre de cheualiers, qui tous deſcendoient pour le charger, ne pourpenſans que ſa mort (cōbien qu'ilz fuſſent trop eſbahis de ſa proeſſe) quand la belle damoyſelle e-

ſtant aux carneaux eut ſon tendre cueur eſmeu à compaſſion d'un ſi bel & vaillant cheualier ſeul aſſailly de tant. Auſquelz elle eſcria qu'ilz ceſſaſſēt de plus le ferir mais ilz ne luy obeirent, ains le vindrent enuahir, dequoy elle trefmal contente, les dieux (dit) me faillent ſi ie laiſſe ſi vilainement meurdrir le meilleur cheualier du monde. Parquoy deualle ſoudain en la court du chateau & fait ouurir le guichet de la grād' porte ou le gentil Florarlan eſtoit adoſſé, lequel elle tire à ſoy par les laz de derriere de ſon heaume, luy diſant : entrez cheualier, entrez ceans receuant ſecours des dames contre la laſcheté des hommes. Il ne conuient demander ſ'il fut pareſſeux à accepter offie tant à propos en ſon extremité: mais quand il fut dedans, il fait teſte à ceux de dehors, peu trauaillé à leur deſendre l'entree, d'autant qu'il n'y en pouoit venir qu'un à la fois : mais la damoyſelle le prioit de ſe retirer & qu'elle leur feroit fermer la porte au nez par ſes femmes, & commanderoit aux cheualiers ſe deporter du conſlit. Ce que n'eſtant accompli par Florarlan, pour ne monſtrer vn ſeul point de couardie, ne par ſes ennemys tant acharnez ſur luy, elle fort marrie enuoye ſes damoyſelles en haut pour aſſommer à coups de pierres ceux de dehors, ce qu'elles firent ſi viuement que force leur fut de ſe retraire. Alors la belle damoyſelle avec l'ayde des ſiennes tira le cheualier du Fenix au dedans, qui vid que ſes ennemys auoient quitté la place: ſi fut le guichet ferré, & luy ſe voyant deliuré de tel peril par la courtoisie de la damoyſelle, oſte ſon armet & luy va rendre graces diſant: Ma dame ie ne ſçay quelle recōpenſe ie vous puis offrir pour la courtoisie dont auez maintenant vſé à l'endroit de celui qui ne ſe reputé vous eſtre detteur de moins que de la vie : laquelle il preſente & met entre voz mains pour vous en ſeruir en ce que voſtre bon plaſir ſera. Elle qui durant ſon propos le regardoit ententiement & le trouuoit fort à ſon gré, luy reſpondit, cheualier vous
ne me

ne me deuez remercier de ce que i'ay fait en ce cas, veu que mon honneur m'obligeoit à ne souffrir tel outrage de tant de gens contre vn seul, plustost que l'amour de vous, de qui ie n'ay nulle connoissance fors que celle qui est apparue par vostre singuliere valeur. Ma Dame (poursuit Florarlan) pour le moins à ce conte suis-je redevable à vostre vertu, de tout le seruice que ce corps par vous garenty pourra iamaiz faire: & en cela (disoit il souzriant) me demeurerez aussi obligee de vostre part d'autant que vous aurois seruy d'occasion d'un acte si vertueux & honorable. La damoyelle fort satisfaite de son gracieux remerciement, oyant encores du bruit dehors la laisse en la compagnie de ses Damoyelles & monte au haut de la muraille la ou si tost que ceux de dehors l'auiserent le chef d'entr'eux luy dist: Ma Dame Lucenie, ie ne sçay comment vous estes fait ce tort de fauoriser ainsi cest estrange, contre les loix de ceste contree tant viles & louables. l'eusse esté, respond elle, plus digne de blasme d'auoir enfraint celles de la vertu, en vous permettant rompre le droit de cheualerie. Je suis celle qui veut maintenir les loix, mais avecques raison: autrement la rigueur de iustice tourneroit en iniustice & iniquité telle qu'avez voulu pratiquer contre ce Cheualier estrange, qui ne peut auoir violé les ordonnances d'un pais qu'il ignoroit. Mais ie vous tiens pour grandement coupables de la desobeissance dont auez vsé en mon endroit, de laquelle vous feray chastier selon voz merites, si la Royne ma dame & mere ny dōne ordre premiere. Pource partez d'icy promptement, si non ie vous prometz par les dieux immortelz que vous apprendray à regimber contre l'esperon. Ce dit descend en bas, ou elle auoit laissé Florarlan, & les cheualiers craignans de trop mesprendre deloierent incontinent pour en aller porter les nouuelles à la Royne de Dardanie qui n'estoit pas alors fort loing de la. Florarlan desia auerty que ma Dame Lucenie estoit

filie de la Royne, quand elle reuint luy dist: Je vous supplie ma dame me pardonner l'enuy que vous ay donné aujourd'huy, & outre me vouloir faire tant de bien que de me declarer si c'est vous que i'ay veu la nuit en vne coche, & la cause de ceste course durant les tenebres, à fin que par ignorance ie ne faille contre le deuoir de vostre seruice. Cheualier, respond, certes ie suis celle que vous y vistes, & vous deduiray le surplus, pour vous oster l'opinion que pourriez auoir conceüe en mauuaise part sur les parolles que m'ouistes chanter. Entendez donc que ceste Isle est nommee Dardanie, & la Royne d'icelle Darfise (de qui ie suis fille, heritiere vniue) aussi que ceste region est gouvernee par les anciennes loix que Licurge establit iadis à Sparte: entre lesquelles la principale est, que les femmes n'ont à fournir autre dot en mariage que de seule vertu, & les mariz leur sont douaire conuenable à leur qualité. Pour à quoy paruenir & rendre les filles du pais bien douees de ceste richesse d'esprit, ma Dame ma mere a fait bastir les chasteaux qu'avez veuz, esquelz toutes les pucelles de l'Isle demeurent iusques à l'aage mariable, en compagnie de vieilles femmes d'honneur, qui les dressent & endoctrinent. Et pour mieux conseruer l'honesteté de nous toutes qui sommes logees en ces chasteaux n'est loysible à homme souz peine de la vie d'entrer en tout ce quartier compriz de l'orée de la forest iusques à la mer. Et ainsi l'obseruons & gardons rigoureusement, s'il n'y a quelque congé & consentement de la Royne. Souz ombre dequoy nous y esbatons franchement, & prenons noz deuits pudiques sans crainte d'œil d'homme comme ie faisois quand me rencontraistes la nuit passée venant de me pourmener à soulas avec aucunes de mes Damoyelles. Quand aux parolles que ie desgorgeay apres la chançon de la harpe, vous ne me les deuez imputer à amour, car hayne & inimitié me les faisoit dire contre Madaran l'orgueilleux, seigneur de l'Isle d'Artase as-

sez prochaine, lequel j'ay refusé à mary à cause de ses mauvaises conditions, & auons eu aduertissement qu'il dresse vn grand appareil de guerre pour venir prendre nostre Isle par force, & moy conséquemment: ce que lon dit qu'il a iuré, comme moy au contraire, de me liurer la mort, ainçois que de l'espouser, qui est la cause du trait douloureux que vous entendites de ma bouche.

Quant à ce que ne vous fy responce, la loy m'empeschoit qui est capitale aux pucelles parlementans aux hommes, aussi bien qu'à eux l'entree de ce quartier, comme l'avez connu par experience. Pourtant ne nous attribuez pas à rusticité ne lourderie ce qui estoit d'importance de la vie, laquelle ie pourchasseray à vous sauuer, au moyen de vostre ignorance qui vous excuse, & moy pareillement de ce que j'ay fait pour vous: combien que comme Princesse i'eusse plus de pouoir & liberté q̃ les autres filles, mais ie m'y suis soumise de mon gré & assugetie pour mener le train de pure chasteté.

Voilà ce que desirez scauoir de moy, reste à penser de la leuteté de vostre personne.

Le Cheualier du Fenix s'esbahit fort de la coustume de celle contree, bien ioyeux des nouvelles qu'elle luy contoit du geāt pour l'occasion qui se presentoit de reconnoistre le plaisir qu'il auoit receu d'elle, à qui il dit: Ma Dame ie vous remercie humblement de l'honneur que me faites de me communiquer de voz affaires: l'espere en Dieu & en la iustice de vostre cause, vous rendre le bien que m'avez fait du pris de ma vie, en l'offrant à celuy qui vous attriste le cueur, au hazard de la mienne. La princesse receut grand contentement de ce propos, pour l'estime qu'elle faisoit de luy, par la preuue euidente de ses œuures: & le remerciant de son offie se retira en haut en sa chambre, commandāt à ses officiers d'auiser à le traiter & seruir de tout ce que mestier luy seroit. Ce qu'elles firent le mieux qu'il leur fut possible, fors qu'elles ne l'entretindrēt point de deuis familiers à cause de la defense. Ce pendant Lucenie entra en grand pé-

see si son hoste pourroit venir au dessus de son ennemy Madaran, & le cas auenant s'il y auroit point moyen de l'auoir à mary (tant beau & tant vertueux) au lieu de ce fier & rude pautonnier. Et en ceste fantasia demeura attendant les nouvelles qu'elle s'asseuroit receuoir bien tost de la Royne sa mere.

Comme les Cheualiers qui auoient combattu contre celuy du Fenix allerent faire leur plainte à la Royne de Dardanie, de la princesse sa fille.

CHAP. XI.

LEs Cheualiers qui auoient eu la meslee avecques Florarlan, allerent droit vers la Royne Darsise luy porter les nouvelles de ce que la princesse Lucenie sa fille auoit fait: lesquelles la cuyderent mettre hors du sens, suruenans apres celles de Madaran l'orgueilleux (qu'on luy auoit apportees) comme il estoit desembarqué avec toute sa puissance, & auoit desia emporté deux petites villes: maintenant tiroit l'enseigne deployee vers la cité de Dardanie, la ou elle estoit alors. Pour à quoy obuier la sage Royne auoit mandé au Duc d'Agas son vassal, qu'à la plus grande diligence que possible luy seroit il assemblast toute la gent de son Royaume, & la mit dedans la ville: d'autant qu'elle connoissoit ses forces n'estre pareilles à celles du geant, pour l'attendre en champ de bataille. Mais quand elle entendit les nouvelles du fait de sa fille, monta incontinent sur sa haquenee accompagnée des cheualiers mesmement du nain, & s'en vint au grand chasteau ou Lucenie estoit qui ne fut sans luy redoubler son ire quand elle vid les corps morts de ses gens gisans à terre. Si fait heurter lourdement à la porte, dont on vint dire à la Princesse qu'e s'estoit sa mere, venuë à Soleil quasi couchant: parquoy elle monta aux carneaux, se montrant en telle grace (par le lustre que le Soleil foible donnoit sur ses ionës verineilles & cheueux dorez) que c'estoit assez pour moderer vne partie de



de l'ennuy de sa mere, qui toutesfois luy dist: Lucenie ie n'eusse pas pensé que du sang Royal de Dardanie deust ylsir person ne qui voulsist abolir les honnestes & chastes loix de Lycurge: mais fay moy ouurir la porte, & me liure ce chevalier entre mes mains si tu ne veux receuoir sur toy-mesme l'execution de la loy: qui est cause de la punition que les hautz dieux exercent sur nous par Madaran l'orgueilleux, qui a desia pris & pillé de noz villes, & fait marcher son armee vers Dardanie. Rendz moy donc celuy qui est cause de ce mal, pour apaiser par son immolation l'ire diuine. La Princesse (combien que fort troublee des parolles de la Roynie, neantmoins d'une magnanimité plus que feminine) luy respondit: le m'esbahis trop, ma Dame, comme vous dites que ie viole les bonnes & louables coustumes de vostre contree, moy qui n'ay rien fait en ce cas que pour les garder, d'estre enfrainctes par ceux qui les vouloiēt practiquer sur les estrangers ignorans, contre leur vraye propriété qui est d'assoudre les innocés & de punir les malfaiteurs. La porte, pardonnez moy si ie ne la vous ouure, auant qu'ayez ouuerte celle de vostre fureur, pour y laisser entrer la raison: qui vous fera entendre le tort qu'avez de me charger. Ouure, ouure sans plus causer, dit la Roynie, si tu ne veux que ie la force. Florarlan estoit venu à ce bruit &

monté en haut, qui autant satisfait des paroles braues de la Princesse, que mal content de celles de sa mere, luy dit: Ma Dame faites hardiment ouurir la porte, s'il vous plaist, à elle & ses Cheualiers, à fin que ie deliure son esprit de la faulse opinion qu'elle a de ma forfaiture, en faisant sacrifice à la deité du sang de ceux qui sont si friantz du mien, à quoy elle respōdit, qu'elle ne se resioüilloit point de cruauté. Puis qu'ainsi est (adiouste Florarlan) dites doncques à la roynie q̄ ie suis prest de me mettre entre ses mains, pour faire iustice de moy, moyennant qu'elle me laisse auant payer ce que ie vous doy de seruice, en faisant mō effort de chasser Madaran le geant hors de ses terres, ou luy oster la teste, s'il ne preuient la mienne: & ie l'assure en foy de chevalier de ne sortir hors son poucir, tant que i'ays accomply ma promesse: par ce moyen les loix s'executeront avec celle qui m'oblige à exposer ma vie pour vous qui me l'avez donnee. La princesse ne faut à deduire à la Roynie ces propos de Florarlan: adioustant qu'elle auoit tesmoignage suffisant des mortz estēdus en la place, pour se confier en sa prouesse, & qu'il sembloit que les Dieux miraculeusement l'eussent enuoyé en saison si necessaire. Ces remonstrances persuaderent la Roynie, considérāt qu'elle perdrait plustost que ne gagneroit à y proceder autrement. Pource promet & iure

iure les conditions requises par le Cheualier, & la porte luy fut ouuerte: à l'entree de laquelle il luy alla faire la reuerence vn genoil en terre & elle le contempla viuement, s'esmerueillant de sa beauté, & pareillement de sa vaillance en si grand'ieunesse: dont elle luy dit: Cheualier leuez-vous, vostre phisionomie merite clemence: puis vous & voz effaitz me donnent assurance. Alors se leue, & Lucenie aussi s'humiliant luy vint baiser les mains, & de ce pas montent tous à cheual pour aller à la cité, Florarlan menât de bride la princesse. La Royne manda par vn courrir qu'on luy vint au deuant avec force luminaire. A quoy le peuple informé de tout le discours precedent, ne se monstra endormy, ains si presenta en tel nombre, pour voir le Cheualier, qu'on ne pouoit passer par les rues: estimant quand il le vid (outre le rapport qui en auoit esté fait) que c'estoit vne creature plus celeste qu'humaine, enuoyé par les dieux à leur secours: dequoy il iettoit quelques motz d'admiration tandis que la Royne passoit, qui en receuoit grand plaisir, & le tenoit comme à certain presage & prognostic de sa bonne fortune. Ainsi allerent iusques au palais, ou Florarlan trouua ses escuyers quasi transis de ioye de voir leur seigneur, qui ne faillit à mettre soudain pied à terre, & aller descendre la Royne de cheual, puis la princesse. Si trouuerent les tables couuertes pour le souper, & fut baillé bon logis à Florarlan dedans le palais, ou il fut seruy plantureusement de vin & viandes exquisés, dont il s'aquitta legerement pour aller trouuer les dames encorres souppans. Or y alla defarmé & vestu d'un manteau de fine escarlatte bordé de fenix entrefemez de flambes d'or, qui le leur fit sembler trop plus beau qu'auparauant: & l'ayant fait soir aupres d'elles, il leur dit: Mes Dames il me semble (sauf vostre correction) qu'il seroit bon que le matin on assemblast tout ce que pouez auoir en la cité de gens de guerre, à fin d'estre prest à receuoir Madaran. Et si vous le trouuez bon

ie desirois que ma Dame la Princesse luy mandast que pour esprouuer s'il y a en luy valeur qui merite son amour, elle voudroit qu'il entraist en camp cloz contre vn Cheualier qu'elle presentera: souz condition que s'il est vaincu, il sortira hors de l'isle, avec satisfaction des dommagés de sa venue: & s'il est vainqueur il acquerra grande reputation en son endroit, ce que ie m'assure qu'il acceptera suyuant l'outrecuidance des geans: dont (Dieu aydant) pourra par le cosist des deux personnes estre destournée & euitee l'horrible effusio de sang de deux armées meslees en plaine bataille. La Royne eut cest auis tresagréable, attendu qu'elle n'y auenturoit rien du sien. Mais Lucenie qui n'y osa contredire en eut le cueur fort sayssi de peur, pour celuy à qui tout son desir aspiroit, en esperance de le prendre à mary s'il se trouuoit de lieu sortable & digne d'elle. A tant ce point conclu, se retirerent en leurs chambres, ou leurs penses vehementes ne leur permirent pas de reposer toute la nuit.

Comme le geant Madaran vint avec son armee liurer l'assault à la ville de Dardanie.

CHAP. XII.

L Endemain au matin les nouuelles vindrēt à la Royne que le geant n'estoit qu'à deux lieues de la ville, & que ce iour mesme il y logeroit son camp. Le Duc d'Agas auoit donné le meilleur ordre q̄ luy auoit esté possible à remparer & munir la muraille & les tours, ayant r'allié avec soy tant qu'il auoit peu de gens. Mais l'effroy estoit si merueilleux en la cité pour l'armée de Madaran, que le Cheualier du Fenix en oyant le bruit & tumulte se leua & alla en la châtre de la Royne (ou aussi la Princesse estoit) lesquelles trouuant grandement troubles, il reconforta par remonstrances de bon espoir: puis s'en va en la maistresse place pour essayer à encourager le peuple, auer.

auertissant le duc d'appaiser pour le moins les crieries huez publiques & tempestatiues, comme portans signe aux ennemys de crainte & lascheté. De la retourne vers les Dames pour depescher l'ambassade qu'il auoit auisé & resolu : mais l'esmeute se leua encores plus forte, qui le contraignit à demander par vne fenestre du palais, qu'est-ce que brait ainsi ceste canaille? Quoy? respondirent plusieurs d'une voix, le geant avec puissance est desia à veuë de la cité, & ne tardera demye heure de heurter à noz portés. Laissez le venir, dit il, que s'il vient ce sera à son dommage & confusion. De ce pas s'alla armer, puis monte sur son destrier & se va rendre au marché ou estoit le bataillon de la ville, auquel il fit vne brique harangue pour les animer & enhorter à aller donner vne bien-venue à l'armee du geant lasse & affoiblie par le travail du chemin. Mais il ne vid apparence d'homme qui y voulsist entendre, ains, assez eust de peine à les faire tenir sur le mur & aux forteresses pour repousser l'effort des ennemys venans iusques aux mains par les eschelles, & sans doute ilz estoient pour y entrer, sans l'ordre qu'il y mit, & le courage que les plus couardz prindrent à son exemple: tellement que l'assaut dura enuiron deux heures, auquel mourut grand nombre d'Artaois du traict d'arc & get de pierre, dont furent à la fin contrainctz de se retraire, & d'aller assoir leur camp, & ceindre toute la ville, dressans au plus beau lieu le pauillon de leur seigneur. Le Cheualier du Fenix apres leur retraite va trouuer les Dames qui luy firent vn tresgrand recueil en leur tristesse, connoissant par le rapport du Duc comme par son moyë auoit esté rompu le premier essay des ennemys. Neantmoins luy qui auoit suffisamment sondé la portee & hardiesse de ceux de la cité, leur dit : Mes Dames ie suis d'auis qu'on ne differe plus nostre ambassade vers Madaran. En soit fait du tout à vostre discretion, dit la Rôyne, & enuoyons presentement le nain de ma fille. Parquoy son instruction luy fut don-

nee, & il l'alla trouuer incontinent en son pauillon, ou il forcenoit d'ire & colere de ce que ses gens s'estoient si pauuement portez en l'assaut : il escumoit comme vn ver-rat, & rouilloit les yeux en la teste, leur commandant avec grosses menaces de ne cesser iusques à ce qu'ilz l'eussent prise: car il auoit desia fait estat de la belle Lucenie pour ceste nuit, delibéré d'en faire sa volonté par amour ou par force, & de mettre la Royne en prison, à cause du refus qu'elle luy en auoit fait. Le pauvre nain fut si espouenté de la furieuse contenance du geant, que quand il l'interroguua qui le menoit, il fut vne longue pause transporté de frayeur sans pouoir mot sonner ny exposer sa charge. De laquelle le geant se monstra tant gay & esbudy que rien plus, & luy respondit par grande fierté: Petit monstre va dire à ta maistresse que pour luy donner tesmoignage de ma vaillance ie ne refuserois la bataille contre trente les meilleurs combatans du monde, tant s'en faut que contre ceste chetive creature. Et à fin de luy bien faire entendre cōbien i'estime son champion, j'accepte la iournee avec toutes ses conditions, offrant d'auantage s'il est vainqueur qu'il me tranche la teste, en luy quittant toutes mes terres & seigneuries : ce que ie luy iure & prometz par les grands dieux du ciel : & des maintenant le te feray ratifier par mes barons, en lettres patentes signees & sceellees autentiquement. Or dy à ce fol cheualier qu'il se haste de venir querir ma coronne, pource que trop me tarde l'heure de la iouissance de ma bien aymee. Le nain qui trembloit de peur, cōme s'il eust le frisson de fieure quarte, ne se iourna gueres là apres sa responce : de laquelle Florarlan fut fort content & dit à la Royne : Oyez, ma Dame, la brauerie de ce fier brigand, si elle n'est pas conforme à ce que i'en auois iugé : Je vous prie de me permettre apres disner de luy aller abatre son orgueil, puis qu'il a si grande enuie de sa malheureuse fin. Ce qu'il leur dit en ce langage trop hautain, non tant par presumption

sumption qui fust en luy, que pour renforcer le cueur aux dames qu'il vid tant esperduës & desolees : lesquelles s'accorderent à son vouloir, combien que fort craintives de son meschef, principalement Lucenie qui s'estimoit elle mesme aller à ce conflit pour l'vñion secrette de son cueur au sien. Et apres le repas il les pria se vouloir mettre en la tour respondant sur le lieu du combat. Bon cheualier, dit la Roïne, plaïse aux Dieux supplier vostre inegalité cõtre ceste grand' beste par la iustice de ma querelle. Florarlan n'en fit que rire (nonobstant qu'il le redoutast fort, ne s'estant encore attaché à tel horrible animal) pour rassurer la princesse à qui la peur auoit derobé la vermeille couleur de ses rondes ionës, qu'elle mouilloit de grosses larmes, à qui il dit : Ma Dame ie vous supplie de chasser ceste tristesse, & vous monstrier à vostre cheualier gaye & gaillarde, à fin que l'aspect de vostre beauté m'inspire vne vertu plus qu'humaine pour accomplir l'effect de vostre seruice

& le deuoir de mon obligation. De ce propos Lucenie fut merueilleusemēt resiouye, le voyant garny de telle hardiesse, dont luy respondit qu'elle prioit les dieux de luy prestier faueur (& s'aprouchant vn peu pres de de luy acheua en voix basse) car vne mort en porteroit vn autre : vous asseurant que ie payerois de la mienne le pris de la vostre : puis dit assez haut, & me deliurerois de celle que ie reputerois souffrir en la vie de sa detestable compaignie. Le bon Dieu n'oublia point le bon droit, respond Florarlan. Adonc plus animé la moytié par les paroles fauorables de la Princesse, prend congé d'elles qui l'embrassent piteusemēt, & s'en vont de ce pas à la tour regardāt sur le lieu ou le ieu se deuoit iouer, pour lequel les murs estoient tous couuertz des gens de la ville, recommandās leur champion à leurs dieux, & ceux de dehors attendoient sa venue se moquans de luy comme qui auroit entrepris ce que vingt telz que luy ne pourroient executer.

Du combat du Cheualier du Fenix contre le fort geant Madaran, avec heureuse victoire. CHAP. XIII.



LE cheualier du Fenix desirant s'employer pour la belle Lucenie ne sejourna gueres sans faillir hors de la ville accompagné de plusieurs cheualiers. Il estoit monté sur vn grand coursier blanc,

caparaçonné de satin blanc aussi (que la royne luy auoit donné) avec pennache en la testiere du cheual, & sur le timbre de l'armet de mesme couleur. Il donnoit plaisir à le regarder, duquel la princesse en prenoit bié

C

la

la meilleure part, tant qu'elle ne se peut tenir de dire: A a mō cheualier, plaife au dieu Mars te garnir d'autant de force pour vaincre les hommes, cōme Venus t'a pourueu de beauté & bonne grace pour cōquerir les dames. Or s'en va le gentil Florarlan trouver son ennemy, marchant deuant luy le duc d'Agas qui luy portoit vne grosse lāce. Le Geant ne tarda gueres apres à se presenter sur vn grand & puissant roucin bay, fier, & impetueux, estant armé de fortes lames d'acier, & branlant vne lance ayant le fer large d'vn bon pied: il n'y auoit cueut si hardi qui n'eust tremeur à cōtempler son terrible maintien. Si dit à son arriuee d'une voix de taureau: Petit champion tu as assez acquis d'honneur d'auoir osé seulement apparoir icy deuant moy. Sus, sus descen & t'encline à ma misericorde, que tu ne recouureras apres q'auras vne fois refusee. Florarlā sans s'amuser à sa verue, sa lance couchee donne des esperōs à son cheual: ce que Madaran voulant faire de son costé, son roucin faute, tourne & vire avec telles secouffes qu'il cuida desarçonner son maistre. Sur quoi Florarlan le vient ataindre de droit fil au dessous de l'escu si roidement qu'il luy enferme le ventre d'une grand' paume, & l'ayāt surpris de costé par les ruades de sō destrier, n'eust force de se tenir aux arçons, ains alla prendre la mesure à terre, avec aussi grand tintamarre que si vne grosse tour fut tōbee. Qui leuant adonc l'œil vers la tour ou les dames estoient, vid bien les signes apparés de liesse, & le cry leua du haut de la muraille: Or a desia le grand diable perdu sa selle. Sa cheute fut si lourde que l'heaume luy en sortit dela teste, lequel Florarlan ne luy voulut donner loysir de reprēdre, ains au retour de sa carriere le vint à hurter de randon telle qu'il n'eust pas espace de degayner son grand cimenterre, seulement luy lance vne main à l'arçon tachant de l'autre à le happer à l'armet & le tirer à terre: mais Florarlan passe outre luy laissant sa poignée d'vn bord de l'arçon, puis retourné court le choquer de toute la puissance de son coursier si

lourdement qu'il le renuersa par terre ou il roule deux ou trois tours. Vray est que la rencontre fut si rude qu'il conuint Florarlan mesme couler en bas (à faute du derriere de l'arçon) par dessus la croupe de son cheual: dequoy ceux de la cité eurent grand' frayeur pour leur champion, qui monstra son agilité, estant soudain en piedz l'espee au poing, dont il va rechercher son homme qui mettoit peine à se releuer: & luy voulant descharger vn coup sur la teste nuë, il para de son escu non toutesfois si bien que la pointe de l'espee ne luy fit vne assez bonne egratignure au front: qui luy fut plus domageable playe que grande, à cause du sang qui luy en ruisseloit sur les yeux & luy empeschoit fort la veuë, dont il plus souuent escrimoit à coup perdu de son grand glaiue, & Florarlan se deroboit de viffesse, estant deça, quand il le pensoit de là. En sorte que le geant comme enragé, tant de l'aveuglement que luy causoit celle petite blessure, que de l'empeschement aussi que luy donnoit le tronçon de lance qu'il portoit fiché en son ventre, commence de rage à ieter vne fumee espesse de la bouche & des nazeaux, disant par extreme angoisse. O Mars iniuste comme permetz tu que par vne si vile & petite creature ie soys si mal mené? Alors tire de sa main gauche l'esclat qui luy destourboit le maniment de l'escu, avec lequel sortit vne grand' partie de ses trippes trainans iusques en terre qui luy nuysoient encore plus que tout, d'autant qu'il marchoit aucunesfois dessus. Et alors que Florarlā le vid ainsi embrouillé estoit tousiours prest à luy descharger quelque coup; & Madaran luy en tiroit à tort & à trauers (qu'il euit d'adresse) tant que toute la place à l'entour de luy en estoit comme labourée: autrement c'estoit fait du cheualier au Fenix s'il l'eust vne fois ataint à plain coup. Et quand il aperceut que nul ne portoit sur son ennemy par l'agilité dont il se destournoit, de despit s'arracha la barbe renyant tous ses dieux & deesses. Bref Florarlan au premier auantage qu'il luy presta, l'assena droit

droit sur l'oreille fenestre qu'il luy auale avec la iouë, dont le grand vilain se rempsta plus que parauant, & Florarlan saute legerement sur le derriere & luy rameine à delcouuert sur le chinon du col, tellement qu'il luy abat la teste. Ce fait se iette de genoux en terre rendant à maints iointes graces à Dieu de la victoire qu'il luy auoit donnée. A tant se leue & baille la teste au nain qui la fiche au bout d'une pique, & il remonte à cheual. Adonc les Dardaniens se rallient tous en armes autour de luy, & il fait conuoquer les principaux des Artaisois pour sonder leurs volontez, qui se declarerent estre prestz à luy prester le serment de fidelité, en vertu de la capitulation du combat: que neantmoins ilz se tiendroient heureux de faire sans obligation comme au meilleur cheualier du monde, qu'ilz ne pouoient croire estre extraict que de haut lieu, veu l'excellence rare de ses vertuz, & meritoit plus grand gouuernemēt que le leur. La cruauté & tyrannie de leur precedent seigneur les inuitoit assez à changemēt qu'ilz ne pouoient esperer que doux & gracieux d'un si gentil personnage. Dequoy le rapport fait à l'armee, s'escria toute à haute voix: Benist soit nostre nouveau Prince: viue la fleur de cheualerie. Alors les Artaisois se mettent à faire feux de ioye en l'ost, & grands cheres le reste du iour. Et Florarlan s'en va à la ville en compagnie du Duc d'Agas & des plus eminens de ses nouueaux vassaux. Et quand il entra le peuple Dardanien chanta: Bien vienne le Cheualier du Fenix, viue le pere du pais: Puis disoient par tout si clerement qu'on le pouoit entendre. Plus ont gaigné nos ennemys que nous en ceste iournee d'auoir un tel seigneur. C'est tel mary, qu'il faudroit à nostre Princesse: noz dieux les vueillent bien apparier. Le vous laisse à imaginer de quelle douceur ces parolles chatouilloient les oreilles de Lucenie, laquelle estoit à la porte du palais avec sa mere pour recueillir & honorer leur bon champion, lequel luy dit à son arriuee: Ma dame, ie vous supplie pren-

dre de moy ce chef de Madaran avec tous ses droitz, biens & terres, pour commencement de la satisfaction du seruice dont ie vous suis redevable. Apres s'adressant à la royne luy dit: Ma dame ayant acomply ce que j'auois promis, ie me rends en vostre pouoir, à fin d'attendre la sentence de voz loix telle que leur iustice ordonne en mon endroit. La royne Darfise pleurant d'ail luy respondit: Mon bon seigneur, vous auez monstré que vous estes prodigue de les administrer aux autres, & non endurer sur vous: que ie desirerois pour souverain heur en mon Royaume: mais cē n'est icy le lieu d'en parler, pensons d'aller faire bonne chere & de vous reposer selon le besoin qu'en deuez auoir. Ainsi le menent en la salle ou les tables estoient dressees pour le souper, & apres l'auoir fait desarmer & reuestir de riches acoustremens, la Royne le fit soir entre elle & sa fille. Si furent seruis de metz & entremetz les plus delicieux que lon peut fournir, avec melodie de diuers instrumēs, desquelz aussi ny auoit faute par les places & rues de la cité, où ilz menoient tant de bruit, & faisoient tant de sortes de ioyeuseriez qu'ilz sembloient estre tous hors du sens. Durant le festin la princesse Lucenie (à qui amour auoit bien apresté sa pasture) ne se reput que d'œillades, souspirs, & réueries que Florarlan contrechifroit sobremēt: qui apres le soupper luy fit iurer la foy & hommage par les principaux des Artaisois, laquelle ilz presenterēt l'endemain solēnellement. A tant l'huitoire s'en taist iusques à son lieu, pour reuenir au Roy de Gaze que nous auons laissé tenāt la route de l'Isle de Guindaye suyuant le commandement de Florisel.

Comme le Roy de Gaze s'alla presenter à la Royne Sidonie, & quelle estoit la perfectiō de la beaulté de sa fille Deane.

CHAP. XIII.

SI tost que le Roy de Gaze fut guery de les playes, print congé de l'Empereur & du Prince Florisel qui luy

bailla vne lettre adreſſee à la Royne Sidonie. Ainſi part portant grand' triſteſſe en ſon cuer de l'inconuenient qui luy eſtoit auenu, & monté en ſa nef, gaigne l'Isle de Guindaye: la ou ſe preſentant deuant la Royne la fit toute treſſaillir de peur à ſa veuë, penſant qu'il luy apportait la reſte de Floriſel, dont elle le recueillit aſſez farouchement iuſques à ce qu'il luy euſt rendu la miſſiue diſant quant & quant: Royne treſſilluſtre, comme vous ſçauiez que la Diane du ciel fait augmenter & diminuer les eaux de la mer, auſſi deuez vous croire que la vertu de la beauté parfaite de voſtre fille Diane eſt nee en ce monde pour eſtendre la renommee du prince Grec par toutes les parties de la terre, amoindriſſant conſequemment le bruit de tous ceux qui l'iront rechercher pour voſtre querelle infortunee. Sachez certainement ma dame que la vail lance de luy eſt egale à la beauté d'elle, & à ceſte vail lance meſme ſa courtoisie eſt pareille, lequel vous enuoye ma teſte ſur mes eſpaules en payement de la ſienne que demandiez toute tranchee, me l'ayât ainſi laiſſee eu egard à mon intention tédant à vous faire ſeruiſſe: pour lequel meſme il a voulu de defendre la ſienne. Voila la charge de mon embaiſſade, qui vous peut decourir l'abus de voſtre eſperance que ne deuez plus fonder ſur les bras d'autre quelcōque, puis que les miens y ont ployé, & fuſſent rompus ſi bon luy eut ſemblé. La royne fort troublee de ces paroles ouurit la lettre auant que rien luy reſpondre, qui eſtoit telle.

*Lettre du Prince Floriſel à la
Royne Sidonie.*

Ma Dame ie vous enuoye le ſalut qu'auiez pourchaffé à me tollir par ce porteur, à qui ie l'ay donné en faueur de voſtre ſeruiſſe, comme ay en volonté de faire à tous ceux qui ſe reclaimeront de vous, à quelque danger que ce ſoit de ma vie. Laquelle ie garentiray à mon pouoir, pour eſtre cauſe de faire pèſer d'autre meilleur douaire pour Diane & de plus honneſte hanap

pour boire à ſes noces que dedans le taiz de ſon pere. Parquoy ie ſouſtiendray ceſte guerre que me liurez, tant que l'aye gaigné paix avecques vous & que luy aye trouué mary plus humain que celuy que voulez luy faire ioindre la main ſouillée en mon ſang qui eſt le ſien meſme.

Quand la Royne eut acheué de la lire, tordant ſes mains & ſouſpirant tendremēt ſe complaint: A a Moraïſel que les dieux ont mis de force en ton corps, & de ſageſſe en ta parolle: O faux honneur (à qui noſtre grandeur eſt tant ſugette) qui me fais procurer vengeance hayneuſe ſur celuy que l'ayme ſi ardamment. O Dieux pourquoy m'auiez vous rengee en deux telles extremitez ſans moyen? Ce qu'elle diſoit larmoyant piteuſement, dequoy le Roy de Gaze tiré à compaſſion luy dit ſouz vmbre de la reconforter. Ma dame il ne vous faut tormenter de ce que voyez ne dependre de voſtre vouloir ne puisſance. Il nous conuient laiſſer emporter aux cours des deſſi nees fatales comme à la violence d'un torrent. Prenez exemple à moy-meſme qui deſirois l'amitié de voſtre fille ſur tous les biens de ce monde, de laquelle (combien que mon deſaſtre m'eſt forclus) ie ne me veux pourtant deſeſperer. Mais ſi la volonté qu'auiez conneuë de moy prompte à expoſer ma vie en l'obeiſſance de voz commandemens, vous peut toucher & attédrir le cuer vers voſtre affectionné ſeruiteur, ie m'eſtimeray trop heureux ſi ayant failly à la fille, ie puis auoir acquis la bonne grace de la mere. Comment (reſpond la Royne grandement corroucée de ceſte harangue) cuydez vous donc Roy de Gaze que Sidonie fauſſe la foy à ſon Moraïſel, pource qu'elle luy braſſe ce meſchef par la rigueur de la loy d'honneur, cōtre ſon gré? Ne vous abusez pas non, ſur la hayne qu'il ſemble que ie luy porte. En moy y a vne diſcorde interieure de luy vouloir bien, & procurer ſon mal qui me tient en vne martire le plus cruel que ſouffrit onques amante. Parquoy allez

allez ailleurs presenter voz offrandes qu'à celle qui a voué son cueur à vn qui n'a son pareil au monde. Comment dōques l'irois ie maintenant donner a autre sans luy faire tort ? Le Roy ne trouua pas en ces parolles grande occasion de se contenter, & luy sembla estre trop mal traité par elle, veu le seruice, auquel il auoit si franchement employé sa personne: aussi qu'il estimoit bien monsieur valoir ma dame, & qu'il ne luy faisoit iniure de la requerir. En hayne dequoy proposa luy machiner quelque malheur: & en ceste deliberation se retire en ses païs. La Royne depechee de luy pour passer son ennuy s'en va au palais de sa fille, qui pouoit estre lors de l'aage de neuf ans, autant iolye & auisee que belle: la mere d'arriuee l'embrasse amoureuxment, & la baise & rebaise cent foys la grosse l'arme à l'œil, disant: Ah fille de celui qui m'a rauy mon honneur & liberté, pourrois-tu bien estre nee si excellente pour la ruyne & confusion de celui qui t'a engendree? ie croy que non, & que ta perfection n'est qu'un suget, seruant d'occasion pour mieux entonner la trompette de ses louanges. O Moraïsel, si ie pouois iouir de toy avec ce precieux ioyau que tu m'as laissé, ie serois bien la plus heureuse dame du monde. A la fille seul reconfort de toutes mes douleurs, & aussi cause d'icelles, ie ne sçay par quel moyen satisfaire à l'amour incroyable que ie porte à ton pere, meslee d'inimitié contrainte, sinon en me liurant la mort à moymesme, pour le deliurer de celle qui la luy pourchasse contre son cueur. La fillette voyant ainsi pleurer sa mere la prend par les iouës de ses mentes blanches, & la baise luy disant: Ma dame, voulez vous que ie chante à fin de chasser vostre melancolie. La Royne ne se peut tenir de souzrire, & respond: Je crains mignonne que vostre chant me soit comme celui du cigne, qui par le sien celebre la ioye qu'il reçoit de finir ses iours. Ne pleurez pas (ma dame) dit la petite Diane, si ne voulez que ie pleure aussi, ie feray

appeller mes seurs & chanterōs & balerons à plaisir: Faittes donc m'amy, dit la Royne s'esjouissant de ses ioliz propos: & elle fit incontinent venir deux ieunes fillettes qu'elle aymoît plus que toutes les autres, fort gentilles & de grand' maison dont l'une se nommoit Lardanie duchesse de Nubrus & l'autre Galardie Marquise de Lastes, lesquelles estoient orphelines & heritieres de deux riches isles pres de Guindaye, & se mirent à sonner le bal, & a le dācer de la meilleure grace qu'il estoit possible selon leur petit aage: enquoy la Royne prenoit grand esbat & estoit le remede ordinaire de ses douleurs de venir voir Diane & babiller avec elle. Aucunesfoys parloit à elle en colere comme à la personne de son Moraïsel, dont la pucelette (qui n'en tendoit pas la farce) se prenoit à pleurer: puis la mere se rioit & l'appaisoit par mignardies & flattemens. Or creut ceste fille tousiours en beauté avec les ans, & en sagesse & bonne grace: tellement que Galeris le croniqueur dit en ce passage, que pour suffisamment la decrite il faudroit auoir le sens de Zeusis l'ymager qui si bien sceut recueillir la forme parfaite de Venus, de l'exemple des neuf dames qui luy furent exhibees a nud, dont Diane seule luy eust suffy pour toutes: Ou telle connoissance qu'eust le berger Paris, iuge accordé par les trois deesses pour le pris de la pomme d'or, laquelle il luy eust adiugée sans doute, si elle eust fait la quatriesme au val d'Idée. Neantmoins i'esclairay a vous deduire vne partie de son excellence au plus pres du naturel que mon esperit pourra toucher.

Premierement elle fut (au ply complet de son aage) de taille assez haute & droite, de foy de corps gent, qu'on eust presque empoigné a deux mains, le sein doucement releué, avec deux pommettes rondes & fermes, fort distantes l'une de l'autre: le visage auoit sa largeur & longueur bien compaïsees, auquel les deux yeux verdz esclairoiēt comme estoilles, garnis de cil & sourcil noir: le front large & poly comme yuoire,

bordé de cheveux dorez à tresse ondee : le nez luy descendoit traittif, & dessous : la bouche petite à leures vn peu grossiettes, de viue couleur sanguine : les dens serrees blanches comme albastre, les iouës delicates & vermeilles, la gorge pleine & polie : Le tout assis & fondé sur deux iambes façonnees depuis le haut de la cuisse d'une proportion telle que les pilliers faitz au tour par Fidias. Le surplus des autres membres plus secretz se peut aisément imaginer à la raison de ceux cy. Quand à son geste il estoit si graue & seigneurial qu'il distrayoit tout courage d'y oser dresser le desir, auquel sa beauté admirable l'attiroit.

Vray est que par foys selon les occasions elle adoucissoit ceste mageste d'une façon gracieuse & bien-seante. Dont ne se faut esbahir si tant de grandz seigneurs & cheualiers firent emprises d'armes pour le conquest d'un tel chef d'œuvre de nature, de laquelle vous entendrez cy apres les graces singulieres qu'elle aquit par art & songneuse maistrise.

Comme le prince Agefilan s'enamoura de Diane, par la seule veüe de son ymage. Et du conseil que dom Arlanges d'Espagne son cōpaignon luy donna.

CHAP. XV.

LE prince Agefilan & dom Arlanges d'Espagne continuèrent leurs estudes à Athenes iusques à l'aage de douze ans, ou ilz aprindrent beaucoup de doctrine pour l'instruction des affaires & consolation des facheries humaines. S'ilz creurent tousiours en sçauoir, moins ne firent en beauté, especialement Agefilan à qui fortune aussi presenta bien bille pareille. Car ayant la royne Sidonie fait pourtraire Diane apres le naturel (comme dit a esté) sur quoy les cheualiers entreprenans la querelle contre Florisel faisoient prendre le patron des effigies qu'ilz portoient grauees en leurs escuz: le bruit estoit si grand tant des armes emprises pour elle, que de la merueille de sa beauté que les

paintres cōbatoyent aussi entr'eux à beaux pinceaux pour sa pourtraiture : Dont y en auoit vn lors à Athenes des plus experts de la memoire des hommes descendu de la race du noble Apelles, de qui le tableau fut fiché en lieu honorable au palais des Areopagites, & tant contemplé par tout le peuple, & tant admiré de tous les meilleurs espritz, qu'il ouurit semblablement vne guerre entre les orateurs & poëtes estant proposée vne coronne de guy de chesne pour le pris du vainqueur : à cause de la domination que la deesse de ce nom obtient sur les forests. A quoy les deux princes Agefilan & Arlanges n'eurent pas la plume plus endormie que les autres. Mais Agefilan la voulant comprendre parfaitement en son esprit, pour d'autant mieux commander à la main de suyure sa conception, tant & si ententiuement la regarda, & imagina, qu'il luy en auint comme au statuaire Pigmalion de son image, & à plusieurs spectateurs de la Venus de Praxiteles : c'est à sçauoir d'en deuenir amoureux à outrance. Or les vers qu'il en fit, estoient de telle substance.

*Deux vifz soleils, or fin, Ebene rare:
D'un Amour arc, & retz, & torche prend.
Deux pōmes qu'autre humain venger ne rend,
Que cache vn voile enuieux & auare.*

*Double coural qui formant vn doux ris
Le ciel rend clair, & la mer calme & seure,
Et descourant des perles l'enfileure,
Ouvre d'un mot en terre vn paradis.*

*Douceur naïue entee en magesté
Dont l'une attrait, l'autre chasse & estonne:
Diane belle, autant soyex vous bonne
Au cueur que vouë à vostre deité.*

Agefilan par ceste vehemente imagination sentit entrer en son ieune & tendre cueur vne emotion non acoustumee, pleine d'un plaisir nouveau, confit toutesfois en ie ne sçay quel soucy. Et trop esbahy de ceste mutation en luy soudaine : qu'est ce (disoit à par soy) que ie sens en mon ame de passion estrange, ce n'est pas aise, car quel-

quelque douleur y a sa part : ce n'est pas douleur veu la ioye que i'y reçoÿ . A à ie croy que c'est la maladie en pleine santé, l'esperoir en crainte, le doux tourment que les sages ont appellé Amour. O Diane me voi la disposé à recevoir desormais vostre seule influence : vostre ymage est si profondement empreinte en mon cueur que nulle autre pensée ny pourra plus trouver place. Je suis bien veritablement hors de moy, quand il me semble que mon ame est avec vous, & que la vostre est desia maistresse & gouvernante de mon corps . Je me sens commencer vne vie languoureuse & affoiblie quasi tendant à la mort . Las Diane comme les pensées vont & viennent maintenant en mon cerueau, de la maniere que la mer flue & reflue par vostre disposition: mon desir croist, mon espoir apétisse, ma vie s'accourcit & ma mort s'avance: le vouloir s'augmente & la hardiesse diminue. Que puis-je faire, ô deesse souveraine, sinon sacrifier mon cueur à vostre ymage, comme mon seigneur & pere à immolé les bestes à sa chere Alastraxeree ? Ainsi qu'il acheuoit ce discours passionné, dom Arlanges entre en la chambre qui en auoit entr'ouÿ quelque mot, & luy demande: Que faites vous de bon icy monsieur ? Que ie faiz (respond Agefilan) ie me defaiz à mon veu & mon sceu : & me fonde en raison sur déraison, & chose qui n'en porte point. Je n'entens pas cecy, dit Arlanges . Lors Agefilan : Mon cousin ie ne vous veux rien celer : l'ay trop veu l'effigie de la nouvelle deesse Diane, j'ay peur qu'il m'en preigne tout ainsi que iadis à Acteon l'ayant veu se baignant en la fontaine : car ie sens desia de grandz accez de transformation de ma nature d'homme en beste: l'estude des sciences me sert de fantasie, l'exercice des armes semblablement : Je ne desire plus que resuer, songer & demeurer solitaire, morne & pensif : à quoy Arlanges Monsieur mon cousin, a ce que ie puis voir, vous en auez ce qu'il en faut à vn amoureux . Mais que dira lon en la cité de ceste

mutatiō soudaine de vostre gayeté en nouvelle melancolie ? Allon, allon aux champs piquer & volter noz cheuaux, & au retour rire en bonne compagnie, ceste opinion passera : vous sçauiez que les poëtes (qui sont medecins de telle maladie) nous ordonnent ce remede, veu mesmement que la vostre procede seulement d'une veüe fausse & ymaginaire, ie ne iuge vostre fieure que diaire ou efemeridiale . Las ! mon cousin (replique Agefilan) ce sont paroles perduës, mon mal est de telle qualité que ie n'enquiers guerison autre que la mort qui deliure de tous maux . Ce qu'il disoit avecques souspirs profonds & durz sanglotz, luy dechiquetans ses morz, en quoy Arlanges conneut qu'il estoit frappé au vif : neantmoins pour essayer à l'en diuertir luy rechargea, Vous & moy monsieur sommes fort neufz en ce mellier, & nous pouons estonner de peu de chose . Si la playe dont vous plaignez estoit venuë d'un trait vif du regard de Diane, ie la iugerois dangereuse & paraenture mortelle: mais vous n'estes feru qu'en peinture, vous vous faites malade à credit, ce n'est qu'une legere escarmouche du petit dieu volant, qui vous sera aisée à soustenir si voulez penser vn peu à vous . Agefilan auoit l'oreille sourde à cet oyseleur, tant sceut il bien sonner . Or à vous dire vray le consolateur en eut eu bon besoin d'un pour luy mesme: car il auoit aussi conceu vn merueilleux plaisir à la contemplation de la figure, & eust bien désiré l'original de si bel extrait, mais il n'en auoit pas si auant dedans les oz & parmy les moëles que son cousin, & vouloit bien quitter telles affections, & les donner à l'amitié vraye & sincere qu'il luy portoit : parquoy luy dit pour conseil final . Monsieur quelle allegence esperez vous à vostre mal, demeurant tousiours en ce lieu ? d'ou attendez vous que vous en vienne icy la medecine ? Puis que vous en estes en ces termes, sus sus, bottes aux iambes, il nous la faut aller voir, vn de noz docteurs escrit, que ceste blessure est

semblable à celle du scorpion, & qu'il conuient prendre (comme lon dit) du poil mesme de la beste qui a fait le dommage. A a gentil cousin (respond Agefilan vn peu recreé de ce bon vouloir) ie croy que vous dites tresbien, mais vous scauez quelle est enfermee en lieu, ou les hommes n'entrēt aucunement. A quoy Arlanges, si, si, il y a bon remede, & nous y entrerons puis que le Soleil y entre. le vous diray comment: Nous sommes tous deux encores sans poil au menton: nous nous acoustretons en Damoyelles, & en cest habit irons presenter nostre seruice à la Royne Sidonie pour nous donner à sa fille, de qui dirons que la renomée nous aura là amenees: ainsi nous la verrons nostre saoul, & le temps nous donnera conseil du surplus. Argefilan oyāt le bon auis de son cousin, saute en place, & le va acoller de ioye, disant: Cousin, cher cousin, il pert bien qu'Amour transporte le sens & l'entendement, veu que ne me pouois auiser de si bon moyen. C'est, respond Arlanges, pourquoy on a defendu aux medecins de ne s'ordonner à eux mesmes en leurs maladies: & sans cela vous l'eussiez trop mieux inuētē que moy. Agefilan s'excusa qu'il ne le prenoit pas ainsi, comme celuy qui luy voudroit deferer en toutes choses, mais qu'il faillloit pardonner aux resueurs, dont il commençoit à estre du nombre. Or ça & de quel mestier nous vanterons nous? de menestriers dit Arlanges, vous estes excellent sonneur & chanteur, & ie m'en melle passablement pour vous seconder: Nous dirons que sommes seurs ou cousines qui auons appris la musique de ieunesse, & qu'il nous a semblé ne la pouoir mieux employer qu'au seruice de ma Dame Diane. Adonc Agefilan, voyla le meilleur conseil du monde, & le faut executer sans dilay: desia m'est auis que ie suis vne autre Nercide en la presence de ma Dame: en quoy ie ne feray que mon deuoir d'ensuyure la trace de mon ayeul. Si nous despechons d'aller, & partons des ceste nuit quand tout dormira ceus, de peur que le

temps ne decouure nostre entreprise: nous emporterons tout ce qu'auons de ioyaux precieux, & quand nous serons esloignez d'icy achatterons haquenees & habillemens de femme & passerons sans seiour en l'Isle de Guindaye. Ainsi l'exploiterent la nuit mesme, & monterent secretement à cheual & firent telle diligence que lendemain ceux qui entrerent en leur quēste, se traouillerent en vain, car à force de piquer gaignerēt vne ville de Grece, ou ilz se fournirent de beaux palefrois & riches acoustremens de soye, lesquelz ilz vestirent dedans vn boys, & se regardans l'vn l'autre en cest estat ne se peurent tenir de rire. Lors dit Arlanges à Agefilan: par ma foy ma cousine il vous faut bien tenir armee de cache-nez de peur de rencontre d'amoureux qui nous destourbent nostre chemin. N'oubliez d'vser de vostre conseil pour vous mesmes, respond il, à fin que n'ayons à mettre les mains aux cousteaux & faire cognoistre ce que nous sommes. En cest auis s'allerent rendre à vn port de mer, la ou s'embarquerent en vne nef marchande, practiquant avec le maistre vne chambre à part pour elles: & se reclamans damoyseiles de la Royne Sidonie, Agefilan se nomma Daraide, & dom Arlanges Garaye, & se tenās les plus couuertes que possible leur fut, par bonace leuerent les ancras, & prindrent la route de Guindaye.

Comme Darayde & Garaye aborderent en l'Isle de Guindaye, & de ce qui leur auint à l'arriuee.

CHAP. XVI.

DAraide & Garaye singlerent tousiours par bon temps iusques à ce qu'ilz commencerent à descouurir l'Isle de Guindaye: lors vn vent contraire les destourna vn peu de la droite route qu'ilz tenoient, & les mena costiers, tellement qu'ilz ne peurēt prendre port que biē bas en l'Isle, en vn endroit esloigné de bien cinquante lieues de la cité ou la Royne faisoit sa residence. Adonc descendent en terre, &



re & montent sur leurs palefrois en grand plaisir à cause de la precedente fâcherie de la marine : & vont heberger en l'hostel d'une vieille dame ou elles se reposerent vn iour entier . Or auoit la Dame vne fille ieune damoyelle, qui se monstra fort seruiable à elles , tant estoit esprise de leur beauté & sa mere pareillement : à qui elles demanderent quelles nouvelles elle scauoit de la court, qui leur respondit : Il n'y a gueres que ma fille en est venue, qui vous en pourra conter : car quant à moy qui suis vieille ie me soucie plus de la court des dieux (ou i'espere aller bien tost) que de celle de nostre royne, ne de ses folies . Quelles folies, dit Daraïde . En voulez vous des plus grandes , respondit elle , que d'enuoyer autant de cheualiers qu'elle peut recouurer , à sa vengeance contre le prince Grec : veu qu'elle y gaigne & profite si peu, que desia plus de dix y ont esté vaincuz ? Et nonobstant elle s'est opiniastrée de ne donner sa fille en mariage à autre que à celui qui luy en apportera la teste pour les arres : & que iusques à ce temps elle ne sera veüe d'homme qui viue . Pource l'a enfermee es tours de Febus & Diane (qui sont vrayes tours de veul) & enuoye son pourtrait par tout le

monde, lequel attrait tant de cheualiers par le renom de sa beauté qu'il n'y a pas quasi place en l'Isle pour nous loger & eux. Alors sa fille print la parole : certes c'est chose trop estrange des auentures qui viennent à la Royne chascun iour & de celles dont tous les chemins sont pleins . Vous nous dites merueilles, respond Daraïde, mais venôs au point, vistes vous la royne quâd vous fustes la ? Ouy (dist elle) & ne puis pèser que sa fille puisse estre plus belle , & bien naissent à la malheure toutes celles qui leur ressemblent en telle perfection . Elle dit viay (poursuit la dame) mais ce n'est rien de la royne sidonie au parangon de Diane, selon le rapport que m'en a fait vne de mes cousines qui l'a veüe & afferme que tel degré que la lune tient au ciel sur les autres estoilles , Diane l'obtient semblable dessus toutes les belles dames de la terre : Ces paroles saisirent Daraïde au cuer , à qui la ieune damoyelle dit encores . En bonne foy vous nous escoutez bien deuïser , mais ie n'ay point veu de si belle creature que vous si ce n'est la Royne, & vostre cōpaigne aussi en a bien bonne part . Ainsi passerent le temps en ce logis noz deux damoyelles faites a haste , qui le lendemain prindrent

congé de leurs hostesses, tenans le grand chemin de la ville de Guindaye : sur lequel rencontrerent au troisieme iour vn cheualier entrant en leur chemin d'une voye trauersante, qui portoit en son escu l'ymage de Diane comme tous les autres de l'emprise. Li les salua courtoisement, & elles luy rendirent son salut: puis ayant entendu ou elles tiroient, leur dit, qu'il en estoit trefayse pource qu'il tendoit là pareillement pour esprouuer sa fortune. Fortune (respōd Garaye) mais infortune, veu le peu d'aquest qui trouuent ceux qui s'y hazardent, à cause que le tenant de Diane (à ce qu'on m'a recité) est le meilleur cheualier du monde. le le croy, dit il mais ce sera d'autant plus grād' gloire à qui le pourra vaincre, & par ce moyen conquerir la plus belle pucelle de mere nee. Garaye (qui estoit facetieuse) luy demanda s'il estoit du nombre de ceux qui auoient telle pensée. Ce que luy confessant, elle replique que la deffiance de sa propre beauté le mettoit en ceste peine. Comment, dit le cheualier, vous semble ie donc si laid? non dea, respond, mais vous n'estes pas d'excellence sortable à celle de l'effigie que portez en cest escu, pourtant voulez suppleer ce deffaut par vostre proesse, en fournissant la teste de Florisel, le gage d'un fol. Daraïde rioit à souldas souz son cachenez des ioliz propos de Garaye. Ausquelz le cheualier rechargea vn peu de colere: certainement ma damoyelle en ce qui touche la force & hardiesse ie vous informeray suffisamment si nous cheminons gueres ensemble, veu les rencontres qui se presentēt par tout en ceste contree: & quād au point de la beauté, assez de dames m'ont porté bon vouloir qui presumoient biē autant de leur personne que vous pourriez de la vostre. Que scauez vous combien i'estime de moy (dit elle) peut estre que ie ne suis moins presomptueuse que vous estes de vostre vaillance: Mais ie vous prie abaissez vn peu vostre visiere (luy dit le cheualier) que ie voye si vous auez dequoy vous moquer ainsi des laidz. La dessus se

meut entr'eux vn ioyeux debat, elle disant que tant de mal ne luy vouloit faire, de peur de luy faire trop de bien. Ce qu'elle exposa à sa requeste, de ce que par la venē de sa beauté elle le retireroit du meschef de sa fantasie plongee en l'amour de Diane, par mesme moyen le retirant hors de la maladie incurable dont (suyuant le prouerbe) il n'y a saint qui guerisse. A quoy le cheualier: vous ne mescauriez gueres plus honnestement appeller sot, ma damoyelle, mais en quoy me iugez vous tel? En ce (respond Garaye) qu'aspirez à la bonne grace de Diane, faisant vostre conte de luy donner la teste de Florisel pour les arres: & contant en cela sans vostre hoste. Alors luy dit qu'il ne la iugeoit gueres plus sage de se reputer si belle qu'elle luy peust effacer & diuertir l'affection de sa Diane: & que luy, iagoit qu'il ne meritaist si haut pris, toutesfois se mettoit en la main de fortune qui ne depart pas tousiours les biens & heurs par raison. A à (dit lors Garaye s'esclattant de rire) ie me dedy, & vous tiens pour trop bien auisé de choisir l'amour & fortune pour vous guider là, qui sont deux auengles. Le cheualier ne se peut tenir d'en rire de compagnie, & la poursuuant instamment de luy faire grace de sa venē: elle luy dit qu'elle luy feroit vn meilleur party, ne luy faisant voir que sa seur qui estoit beaucoup moins belle, à fin de ne le raier si fort, & luy oster la hardiesse de s'adresser apres à elle: ce qu'elle impetra de Daraïde, qui abaissa son cachenez & rendit le cheualier demy transporté de sa face angelique, confessant qu'il n'eust pas cuydé vne si parfaite creature sur terre. Dequoy Daraïde le gaudit, luy reprochant qu'il auoit froidement imaginé l'excellence de Diane, & qu'il n'auoit son pourtrait si bien graué en son cueur qu'en son escu, puis qu'il en perdoit si tost la memoire. Nō que memoire, dist il, on perdrait vie & tout, à vous contempler. Neantmoins la priant de ne le priuer si soudain de ce bien par le mal de son cachenez qu'elle auoit rehaufé disoit

ny auoit raison de tenir caché vn tel chef d'euvre mis par nature en euidence, & Garaye contredisoit par ce qu'amour y estoit logé dont elle le vouloit exempter. Ah dit il, ma gente damoysselle il faudroit donc courir les yeux quant & quant d'ou ce petit dieu decoche ses traitz aguz de l'arc ten du au dessus. Ce que Daraïde refusant pour en auoir mieux leur passetemps, Garaye luy dit qu'elle se veut monstrier à ce coup puis qu'elle l'aperçoit si muable, pour luy chasser du cerueau Diane & sa compaignie aussi : mais sa seur l'empescha luy reprochant qu'en cela elle luy rendroit mauuaïse recompense du plaisir qu'elle luy auoit fait en se decourant si elle luy tollissoit son nouuel amy. Lequel à la verité alloit naïré au vif de sa beauté, & luy proteſtoit qu'il la priſoit trop plus q̃ celle qu'il n'auoit veüe qu'en peinture, & qu'elle n'en deuoit auoir mal à la teste, veu les difficultez qui destournoient tant d'y paruenir. Dequoy ces fines Damoysselles prindrent bien leur esbat, en trompant ainſi le trauail du chemin iusques à l'issuë d'vne forest ou ilz rencontrerent vn grand cheualier de belle representation armé de toutes pieces, n'ayant autre figure en son escu qu'vn escriteau LE VAINCV DE DIANE. Et auoit avecques luy deux Escuyers portant chacun trois escuz penduz à l'arçon de la selle tous grauez d'images de Diane. Ce cheualier aprochant de celuy qui venoit quand & les Damoysselles luy dit en haute voix : En malheure galland auez vous en vostre escu l'effigie que ie porte empreinte en mon cuer pour l'auoir plus au naturel : à tant vous deliuray de ceste outrecuydance ou moy de lan goisse que ie souffre en viuant. Daraïde oyant cecy se souhaittoit en habit de cheualier pour abatre l'orgueil mesme de cest amant de sa Diane, qu'elle ne pensoit estre destinee ne vouee à autre saint qu'à elle. Et Garaye se riant de leur cheualier luy dit qu'il s'aquittast de sa promesse, de leur monstrier par effect sa valeur. Lequel sans s'arrester à elle, ayant lacé son armet re-

spond à l'autre : monsieur le braue vous pourriez bien perdre de l'ame celle que vous lez arracher de mon escu : ce disant pique contre l'autre si rudement qu'il rompt sa lance sur celuy qui le fait bondir par dessus les arçons en terre, d'vn sault si lourd qu'il n'auoit force en luy de soy releuer. Parquoy l'estranger descend de cheual & luy va delacer le heaume pour luy trancher la teste, quand Garaye y accourut, criant ha seigneur cheualier s'il y a autant en vous de courtoisie que de vaillance faites moy present de la vie de cestuy : ce qu'il luy accorda soy reseruant l'escu pour le porter avec les autres. Dequoy elle le remercia grandement, le priant d'auantage luy vouloir apprendre son nom, à fin qu'elle sceust de qui reconnoistre ce don : qui luy respondit estre le cheualier à l'escriteau. Parquoy elle connoissant qu'il ne vouloit estre conneu, le recommande à dieu, se retirant à sa compaignie, & il s'en va son chemin faisant pendre l'escu avec les autres qu'il auoit gaignez de mesme sorte, pour la cause que vous entendrez cy apres en son lieu.

Comme Darayde & Garaye depeſchees du cheualier de l'escriteau, rencontrerent deux Damoysselles, & de ce qui passa entr'elles.

CHAP. XVII.

Pres que le cheualier de l'escriteau fut party, Garaye alla prendre le cheual du vaincu qu'elle luy amena, disant : Cheualier si fortune vous estoit autant fauorable que la force & la beauté, Diane ne vous pourroit estre refusee, ne le prince Grec comparé à vous. Or prenez vostre destrier & enuoyez les amours paistre. Le cheualier fort courroucé luy respondit : ma Damoysselle il ne faut pas iuger la vertu par les yssues & accidés l'heur des armes ne fuyt pas tousiours la vaillance, ains souuent le dieu Mars prend les plus hardis pour les gages. C'est parlé treslagement (dit Garaye) & puis que vous estes si discret, regardez à pourchasser heur & prosperité par

par prudence, lequel vous deffaut au maniment des armes. Ainsi Garaye à Dieu le commande, & il s'en va fâché outre mesure prenant autre chemin & elles poursuivent le leur en grand' risée de leur chevalier, estimant beaucoup la bonté & courtoisie de celui qui auoit emporté l'escu. Si entrèrent en vne forest ou elles rencontrent deux damoyelles à l'heure qu'elles montoient sur leurs haquenees: auxquelles demanderent si c'estoit là le chemin de la ville de Guindaye, qui leur respondirent que si, mais qu'elles ne trouueroient logis que bien loing de là: & l'heure de mydi approchoit, étant lors le mois d'Auril & le pais fort chaud. Qu'est il de faire donc, dit Daraide, pour eiter la chaleur du iour, ie sçay le remede, respond l'une, par ce qu'il y a cy aupres vne touffe d'arbres à l'entour d'une belle fontaine, ou nous irons rafraischir ce pendant que la grand' ardeur du soleil passera. Dieu soit loué, dit Daraide, qui nous a enuoyé tel auertissement avecques si bonne compagnie. Adonc suyuent leurs guides & vont trouuer la frescade en vn destour du grand chemin: là ou elles descendent de leurs palefrois qu'elles laissent paistre & s'assient sur l'herbe. Et quand noz damoyelles vindrent à oster leurs cache-nez, les autres firent trop esbahies de leur singuliere beauté, qui les meut à leur dire: En bonne foy mes belles amyes vous faites beaucoup pour les Cheualiers errans par ceste contree de couurir voz beaux visages lesquelz leur esmouueroient guerre & huttin entr'eux ou en eux. Comme en eschapperez vous vous mesmes? dit Garaye. Aysement, respondit l'autre, par ce que ne portons pas vn tel objet de passion & desir vous assurant que me semblez telles que si ie fusse chevalier ie hazarderois franchement ma vie, pour iouyr de si exquisés beautez. Mais laissons cela: nous voudriez vous dire que c'est que vous portez en ces estuiz pendans es arçons de voz selles? Ce sont luthz, respondit Daraide, desquelz nous faisons mestier de sonner: endea ve-

la qui va tresbien, dit l'autre, pour passer icy ioyeusement le midy, puis que nous auons instrumens pour baller. Alors se mettent à disner sur l'herbe de ce qu'elles auoient de prouisiō: puis apres la pance, la dance: que leur fournit Garaye à leur grand' requeste. Et elles se mettent à baller sur la verdure avec beaux chapeaux de fleurs sur leur chefz. Mais Daraide ny prenoit aucun plaisir, qui gisoit estenduë sur l'herbe, pensue en sa Diane. A qui dit l'aînée des autres: ma Damoyelle m'amye auez vous veu vostre face en la fontaine qui vous passionne par vostre beauté mesme? ou si vous sentez quelque ennuy? à quoy elle luy respond, auoir veu vne beauté qu'elle portoit en son cœue, que voirement trop desiroit voir en sa propre source. Ce qu'oyant la Damoyelle s'adressa à Garaye & lui dit: Sans point de faute vostre compagne est folle, ou de sens ou d'amour qui la tourmente excessiue de quelque personnage. Garaye luy confirme qu'elle est certainement insensée par affectiō extreme: mais ne sçait de qui, & qu'elle luy demande elle mesme. Ce qu'elle fait incontinent, la priant de luy exposer son langage. Dequoy Daraide s'excuse, luy remontrant estre impossible d'entendre d'elle la chose qui l'a prinnee d'entendement. Neantmoins l'autre luy voulant faire confesser que ceste reuerie melancolique luy procedoit de mauuais traictement d'amours (que Daraide disoit ne sentir que bon & heureux) Garaye la retire de là, luy disant qu'elle la laissast, & que c'estoit humeur de folie, qui par fois s'esmouuoit en elle. Retournons donc (respond elle) à nostre dance, & allons toutes faire les folles à l'ennuy. Si redacent de nouveau au son du luth: lequel amena la deux cheualiers passans, qui les surprindrēt si court que noz deux Damoyelles n'eurent loisir de se couurir de leur touret de nez, dont ilz eurent moyen de les voir, & les trouuerent tāt excellentes à leur gré qu'ilz descendirēt soudain, & ayant attaché leurs cheuaux aux arbres, viennent à elles. Desquelles

quelles l'une leur dit, qu'ilz beussent de l'eau leur saoul s'ilz auoient soif, ou prissent leur part de la dance, puis tirassent leur chemin, parce qu'elles ne vouloient plus grande compagnie que la leur. A quoy le plus apparent des deux: nous ne sommes icy venus chercher conseil, ains pour nous rafraichir selon la fortune, qui nous semble fort à souhait. Je ne vous croy pas (respond elle) si mal appris, de vouloir rien attenter contre le gré des damoyelles: Non, non, dit son compagnon, mais c'est leur stile d'user de quelque forme de refus ou resistance, pour montrer tousiours que ce soit force, a fin de couvrir leur hōneur. Daraide oyant ces propos, se leue pour aller à son palfroy, desirant euitier l'occasion de se faire connoistre autre que son acoustrement ne monstroient. Le cheualier principal (qui estoit enflammé de sa grace naïue) ne se vouloit arrester aux parolles, & l'alloit empoigner pour la mener à l'escart, quand vne des damoyelles se mit au deuant, l'auertissant qu'elle n'estoit pas en son bon sens. Si elle est folle ou sage, dit il, ie n'en conte pas vn chou, ie n'ay besoin des discours de son cerueau: Alors Daraide qui se vid si pressée: puis qu'ainsi va dit elle, on verra qui sera le plus fol de nous deux. A tant il s'approche d'elle, disant a son compagnon qu'il pensast de se pouruoir a son plaisir de celle des autres qui plus luy seroit agreable: lequel toutesfoys se cuida attacher a luy, parce qu'il choyissoit la plus belle. Mais voyant la cōtenāce de Daraide qui marchoit quād & luy, il se va adresser aux autres. Or elle commença a dire au sien, que s'il estoit homme vertueux & courtois, il s'en allast son chemin, sans pretendre à faire violence aux dames, à fin de ne se mettre en danger de connoistre de quel país elle estoit, c'est à sçauoir de Sarmatie, ou les femmes sont duittes & exercees aux armes. Ceste belle remonstrance ne le sceut destourner (tant estoit feru de sa beauté) de luy vouloir faire force. Contre laquelle (quand Daraide vid que raison n'y auoit plus de lieu) elle le

saist au corps si brusquemēt, qu'apres quelques tours de lutte, le terrassa a ses piedz. Et aussi tost luy tire l'espee hors du fourreau, laquelle tenant nue en la main, le menace de mort, s'il ne iure de ne forcer desormais damoyelle. Adonc il essaye a se leuer: mais elle luy met le genoil sur le ventre, & il s'escrie, cousin, cousin secourez moy: lequel accourut au cry, & Garaye apres luy pour defendre sa compagne. Lors Daraide (craignant d'auoir affaire a deux en si mauvais equipage qu'elle estoit) donne tel coup sur la teste du premier qu'elle tenoit couché qu'il n'en parla onques puis. Ce qui plus irrita son compagnon, lequel vint vers elle murmurant: A à que i'auray maigre vengeance d'une si grand perte, si luy tire vn grand coup de son espee, qu'elle reçoit sur la sienne, & la iettant emmy le champ, a l'instant le vient ioindre de si pres qu'elle le lye de bras & iambes, & luy donne le saut de breton. Car vous deuez sauoir qu'elle en auoit appris toutes les ruses & liaisons a Athenes, & estoit desia robuste & ferme de reins. Il ne fut plustost par terre qu'elle luy estourdit la ceruelle de coups d'une pierre quelle trouue là: puis se releue viste & reprend son espee dont elle luy fend la teste ainsi qu'il se releuoit. Alors les damoyelles estrangeres suruindrēt avecques Garaye qui luy dirent: Comment? est cecy la folle que vous nous disiez? par noz ames c'est bien la plus sage, belle, & vaillante damoyelle qui iamais fut ne sera, laquelle aussi quoye & rassise que si elle n'eust rien fait, leur dit: Mes damoyelles l'outrecuidance outrageuse des cheualiers contrainst les dames à faire choses contre le propre de leur estat. Bienheureux soient (respondent elles) qui tant ont mis de grace & de vertu en vous, qui effacez la memoire de la puissante Alastraxeree, ayant autant fait enveloppee de voz habitz de femme, qu'elle estant armee de toutes pieces: ora elle trouué sa vraye heritiere. Sans doute (dit Garaye, se souzriant de ce mot) vous en dittes la pure verité: elle luy succede de bon droit & naturel. Les

rel. Les estrangeres (grandement esmerueillées de cest acte) leur amenant les cheuaux des morts, comme cōquis de iuste guerre, & la chaleur estant attrempee, prennent congé d'elles, pour s'en aller en leur chasteau, où elles firēt le recit de ce fait merueilleux: & nos Damoyelles retournèrent en leur chemin.

Comme Darayde & Garaye rencontrèrent vn cheualier, qui emmenoit le palefroy d'une Damoyelle & de l'issüe.

CHAP. XVIII.

NOs Damoyelles, Daraïde & Garaye, reprenant leurs erres, s'en alloient deuifans sus l'auēture passée, en quoy Garaye se plaignoit de son long habillement qui l'auoit empeschée de de-uancer ou atteindre le second Cheualier, courant au secours de son compagnō. Mais Daraïde luy fit entendre qu'elle s'asseuroit trop plus de son amitié, & que Dieu mercy, il n'en auoit esté grand besoing. Or estāt sorties de la forest, voyent venir vn cheualier à l'encontre menant de bride la haquenée d'une Damoyelle, qui venoit apres toute espleuree, disant: Seigneur Cheualier, puis que ie ne vous ay en rien offensé, contentez vous de la peine que m'avez donnée à vous suiure iusques icy, sans m'enlener ainsi mon palefroy, & me contraindre de continuer mon chemin à pied. Le galand ne faisoit que secouer les oreilles, se moquant d'elle: & sans luy respondre, gaignoit tousiours pais: & la pauuettē troussant sa robe, le suyuoit à grand ttavail, comme celle qui auoit oncques apris le mestier de laquay, & se hastoit de tout son pouoir, craignant de le perdre lors qu'il entreroit dedans le boys: quand les nostres aperceurent ce mystere, voycy dit Daraïde, vn cheualier bien peu courtois: Ma foy voire, dit Garaye, s'il n'a plus de raison que le fait ne demonstre. Auquel estant ia assez pres Daraïde demande pourquoy il vsoit de telle inhumanitē enuers la Damoyelle:

parce qu'il me plaist, respond il. Ce n'est pas tour de cheualier (replique Garaye) de piller l'autrui, ne de croire sa volonté contre raison: & que c'estoit bien loing de pourchasser tout plaisir & seruice aux dames, & de repousser l'iniure qu'on leur voudroit faire. Vous serez vne bonne precheuse, respond il, si vous m'en faites daujourdhuy lascher la prise: Il semble a vous oyr raisonner qu'ayez fort hanté les clerz, de ce mot elles se prindrent a rire souz leur cachenez, & Daraïde continuē: Vrayement cheualier vous estes allez mal gracieux: si vous me requeriez de chose qui fust en ma puissance, ie ne vous esconduirois ainsi. Et ie vous prie (dit il) d'abatre vostre touret de nez, à fin que ie voye si vous valez tant que d'estre obeïe, ce qu'elle fait: & la voyant si belle luy dit: Par mon ame si vous m'eussiez rencontré en autre saison ie vous trouuasse digne de n'estre refusée d'aucun preud'homme. Quelle occasion vous donne la saison (respond Daraïde en se iouāt) de me dedaigner, qui est maintenant la plus propre de l'annee a tout deduit & lieüe: ou toute nature reuerdit & s'esgaye. Alors il se defendit d'un serment qu'il auoit fait nagueres de ne faire iamais plaisir à femme, ains de leur procurer tout le meschef qui luy seroit possible: parrant estoit empesché de l'aymer, de peultide luy faire tant de bien que de luy ottroyer sa personne. A quoy respondit Daraïde qu'elles auoient trop perdu a ce conte de ne s'estre rencontrees avecques luy auant ce iurement, pour ioir de l'heur d'un tel personnage. Ainsi qu'il s'estoit arresté deuifant avec elles, la damoyelle y arriue hors d'aleine, qui met la main à la bride de sa haquenée le priant de la luy laisser sans la vexer d'auantage. Lequel luy respondit qu'elle se deportast elle mesme de le facher de peur de s'en trouuer vn peu plus mal traittee. Dont elle craignant qu'il ne l'outrageast en sa personne, quitte les refnes, disant: En mal an soit le cheualier, & quiconque donna l'ordie si indignement. Comme

il la menassoit de chastier son caquet, vcy saillir vn cheualier de la forest d'une grace qui promettoit beaucoup: auquel la damoyelle écria incontinent. A à bon cheualier vueillez me faire droit de ce fier & outrageux qui me volle mon palefroy, à quoy l'autre ne faillit & interroqua le galand, qui le mouuoit à iouer ce tour à la damoyelle, lequel allegua le serment qu'il auoit fait contre autant qu'il y en auoit au monde qui pourroient tomber en ses mains.

Dequoy l'autre voulant entendre la raison, il luy raconte en ceste sorte. Vous deuez sauoir que i'estois extremement amoureux d'une qui m'ottroya l'accomplissement de mon desir, moyennant que ie la tirasse hors d'un chasteau ou elle ne viuoit à son contentement. Ce que ie fis par vne nuit, & la menay loing de là souz la faueur des tenebres pour l'esloigner de ses gens, sans vser de la commodité de mon plaisir: tellement que le iour ouurant rencontrons vn cheualier qui me la querelle, disant quelle luy sembloit belle & qu'il la meritoit aussi bié que moy: parquoy auisasse de la defendre, & qu'elle seroit butin du vainqueur. Je luy remonstre que nous sortirions bien de debat à meilleur marchè que de combattre, remettant à la volonté d'elle lequel elle voudroit choisir. Dequoy il me declare estre content: pensant voluntiers que s'il le perdoit par le iugement d'elle, la cause luy demeureroit entiere à demesler contre moy. La bonne dame (comme leur courage naturellement est muable) alla tresbien dire que son vouloir n'estoit d'aymer iamais, ne suyure cheualier si couard que moy. Et moy dy-ie (estât outré iusques au cueur de si soudain changement) aussi peu aymeray-ie vne si déloyalle & inconstante femme: Ainsi la quittay au cheualier: & alors iuray de ne porter iamais foy ny amour à dame ne damoyelle, ains de leur machiner & faire tout le mal dont ie me pourray auiser. Foy de gentilhomme (dit adonc celuy à qui il faisoit le conte) vous auiez assez bonne raison, si elle ne l'eust eu

meilleure au moyen q̄ fistes de vostre droit vostre tort. Parquoy renoncez à ce serment qui est contre bonnes meurs, estant fait au preiudice d'autrui (qui n'en peut maiz) & rendez presentemēt à la damoyelle son palefroy, si ne voulez auoir le combat contre moy, que refusastes d'entreprendre pour vostre amye. Adonc il luy respond qu'il estoit prest de soustenir son sermēt: pourtant qu'il mist pied à terre, veu qu'il n'auoit point de lance, & il luy feroit cōnoistre son iniustice. L'autre luy demanda pourquoy il ne combattoit aussi bien à cheual, & il luy fit entendre qu'il l'auoit pareillement iuré, à fin que la faute des bestes ne fut imputee aucunesfoys à l'hōme de bien. A ceste cause le cheualier de la forest descend, & cestuy s'approche de son destrier, disant qu'il vouloit attacher la hacquenee avec luy pour estre le pris du victorieux: Souz ombre dequoy il le debride d'une main, & le palefroy de l'autre, qui s'en vont courans & sautans à trauers champs. Alors ce bon palefrenier luy dit: Cheualier vous deuiez connoistre si eussiez esté bien auisé cōbien ie vous estois affectionné comme au defendeur de la querelle des dames: mais puis qu'estes tant leur seruiteur aydez à ceste cy à reprendre son cheual, & elle à vous pour le vostre en recompense du bon vouloir que luy auez monstré, & vous souuienne vne autrefoys de n'estre si fol à laisser la selle pour combattre, auant que la selle vous ait laissé. Ce cheualier estoit demy enragé de la trousse que l'autre luy auoit iouee, grinsoit les dens de mal talent, montrant que s'il l'eust peu tenir en place marchade, l'eust salarié largemēt de sa trahison. Mais l'autre luy dit qu'il regardast à auoir la raison de son destrier, puis on discuteroit le tort qu'il met en auant: si l'attendist en ce lieu ou il reuiendroit luy respondre. Lors s'en va au galop par la campagne: dequoy Daraïde & Garaye ne se purent tenir de rire. Sur ces entrefaites sort de la forest vn cheualier compagnon du premier lequel estoit vn peu demeuré derriere, & quand il ap-

il aperceut son compagnon à pied & son destrier debridé penadant par les champs & l'autre fuyant sur le sien : sans s'amuser à entendre d'ou se pouoit estre auenu, pique apres luy escriant qu'il luy s'arrestast pour parler vn mot à luy : l'autre alloit tousiours cuydant le preualoir à la course, mais le poursuuant estoit mieux monté que luy : lequel se sentant chausser les esperons de trop pres, tourne bride doux comme vn aigneau, disant : Seigneur cheualier ie vous estime tel que si i'ay bon droit vous le me garderez. A ceste charge ayie receu l'ordre de cheualerie, dit l'autre. On n'en doit pas moins esperer de la phisionomie que vous portez (replique le fuyart) & en parlant s'ap proche de luy, comme pour luy reciter le cas, & luy va debrider son cheual comme au premier : puis deloge à toute bride, & le cheualier descend, à qui l'autre vient, riât malgré luy du tout de son compagnon, disant aux Damoyelles qu'il pardonnoit au galand la tromperie qu'il luy auoit faite, puis qu'il en auoit distribué part à son compagnon, & que s'il le tenoit à l'heure à sa discretion il le remerciroit de ce qu'il luy auoit appris à estre mieux auisé en ses affaires. Fieure quartaine au paillard, dit la damoyelle, qui m'a fait faire mon apprentissage de laquay la logueur d'vne bône lieüe. A tant viennent les escuyers des deux cheualiers qui reprennent les chevaux de leurs maistres à quelque peine, ensemble le palefroy de la damoyelle. Ce pendant Daraïde à qui ilz sembloient gens de mise, les pria de dire leurs noms : ce qu'ilz firent volontiers, & le premier estoit nommé Fenis de Corinte, & l'autre Astibel de Mesopotamie : lesquelz elle reconneut par leur renom, & print congé d'eux pour la haste qu'elles auoient de s'aller rendre au seruice de la Royne Sidonie : demeurans eux & la damoyelle long temps apres à se remonter, qui se mirent ensemble au mesme chemin de la ville de Guindaye se raillans de la plaisante fortune qui leur estoit auenuë.

Comme Daraïde & Garaye arriuerent en la ville de Guindaye, & de la allerent trouuer la Royne Sidonie en son logis maritime.

CHAP. XIX.

LEs deux damoyelles deguisees poursuirent leur chemin avec maintes rencontres diuerses, qui seroient longues à deduire, tant qu'elles paruindrent à la cité au commencement du moys de May comme à iour faillant. Là elles entendirent que la Royne Sidonie estoit en son logis qu'elle auoit basti sur le riuage de la mer (comme vous a esté declairé par le liure precedent) pour contempler sur son Moïsaël, en lieu secret & distrait de gens sans aucun destourbier. Et souuent la nuit se mettoit en vne galerie respondant sur la mer, là ou elle faisoit ses complaints & exclamations contre celuy qui d'vn feu latent luy rongeoit & mynoit le cuer sans cesse & de despit & desespoir l'incitoit à conclusion de vengeance, quand autre esperance ne voyoit de reconfort. A telle heure elle se rendoit aux fenestres d'icelle galerie comme on auoit auerty noz damoyelles qui se deliberent d'aller au dessouz sonner de leurs luthz & quant & quant mesler leur musique de gorge. Et considerant que la nuit n'estoit encore du tout close, s'auisent d'employer le temps qui leur restoit, à aller voir les tours de Febus & de Diane. Si remontent sur leurs haquenees à face decouuerte, vestues à la Sarmatique de robes legeres de satin verd, leur chef couuert de crespines d'or, enrichies de menuës perlettes : En telle guise passerent par les ruës de Guindaye faisant esbahir le peuple de l'estrangeté de leur parure, & beaucoup plus de leur singuliere beauté, specialement Daraïde, qu'ilz n'estimoient moins excellente que leur Royne mesme. Quand elles furent à la porte de la tour de Febus, virent l'escriteau qui estoit au dessus, mais Daraïde n'y sceust arrester son ceil, ains tourna vers la tour de Diane, qui luy sembla d'architecture

architecture exquisite. Puis, pensant que la dedans demeureroit celle qui faisoit aussi certain sejour en son ame, commença a dire a part soy: Dieu souverain, soir vostre plaisir qu'a vostre service & mon honneur ie puisse conquerir (avec ces fausses armes que ie porte) la gloire de ceste fortune, prepare pour mon infortune, si la victoire ne m'est ottroyee, avec le contentement de ma deesse Diane. Faites moy, seigneur, pareille grace que faites au chef de mon lignage Amadis de Grece, qui parvint a la fruition de sa divine Niquee la conquerant sous le masque de Nereide l'Amazone. Ce dit print courage, & semond sa cousine a aller voir la caue de Febus. Si descendent de leurs palefrois qu'elles baillent a tenir a leur guide, & montent au chasteau par vn escalier qui puis les mene a la caue, la ou y auoit vne statue de cheualier accompagnée de lumieres perpetuelles (comme vous a esté deschiffré) lesquelles ne s'estant jamais estaintes pour personne qui y fust encores entree, se soufflerent toutes a leur venue, dont elles demurerent en vne horrible obscurité, avec bruit espouventable tât en la caue qu'en la sale de la tour. Toutesfoys Daraide (a qui amour inspiroit hardiesse trop plus grâde que son aage ne portoit) dit a Garaye qu'elle vouloit passer outre, pour voir si elles trouueroient point quelque clarté pour connoistre ce qui estoit là dedans. A quoy s'accordant sa seur, se recommandent a dieu, & se tenans par la main, entrent cinq ou six pas dans la caue, & soudain par la bouche d'icelle qui se rendoit en la tour de Diane, se degorge vn vêt si impetueux, avecques si terrible bruit, que les bonnes damoiselles pensoient que la forteresse ou elles estoient, deust a l'heure tumber en ruyne: & ce furieux tourbillon les accueillit de telle force qu'il les reietta hors la porte par ou elles auoient entré. Alors Garaye bien estonnee: ce n'est pas icy a ce que ie voy l'espreuue de damoiselles. Mez que fortune, dit Daraide, nous ait reuestues de meilleurs & plus durs

atours nous y reuiendrons fonder le gué. Ainsi deuissans remontent en haut, & aussi tost cessa leans la tourmente, & la lueur y reuint comme parauant. Dequoy elles furent fort esbahies, & se mirent a contempler le bâtiment des tours qui leur sembla superbe avecques la ceinture des parcs & iardin: puis tournerent leur regard sur la ville, dont elles estimèrent grandement tant l'assiette que la structure. En telles occupations attendoient la nuit, laquelle voyant close, commandent a leur guide les conduire au logis solitaire de la Roynie: ou il les rendit & posa iustement au dessous des fenestres de la galerie qui estoit du costé de la mer. Alors la Roynie Sidonie (a sa mode accoustumee, apres s'estre deshallee prestee a se coucher) auoit pris son manteau de nuit, & s'estoit mise a ses fenestres respondant sur la mer, pour celebrer l'office ordinaire de ses regretz & gemissemens, en contemplant la lune ou Diane esclaireissant les ondes par ses rayons, ensemble la route qu'auoit tenuë son Moraïsel au departir, qu'elle auoit remarquee & trassée sur l'eau par ymagination, comme les Astrologues ont leurs cercles au ciel: tellement qu'elle tenoit le trait de ce cours de nauigage pour sa voye lactee, comme eux leur blanc chemin de saint Iacques. Or a l'heure que noz damoiselles arriuerent au pied de l'edifice elle se complaignoit en ceste maniere. Làs Diane celeste, qui monstre maintenant ta face tant clere, ne me donneras-tu point moyen par celle qui en terre te represente de iouir vn iour de la veuë corporelle de celuy que ie voy tousiours en esperit: mettras tu point fin, ou a mon amour incroyable, ou a la hayne mortelle que ie luy porte en decharge de mon honneur? O Moraïsel qu'il faut bien qu'il y ait eu de merueilleuses extremitez de graces & perfections en toy, pour me renger & reduire en passions si estrangemēt extremes. Daraide qui l'oyoit & contemploit semblablement la lune & Diane, luy ramenteuant la siennē qui luysoit en ses pensees en la

nuict de son absence : A tant commence à toucher du luth & Garaye pareillemēt, d'une douceur si melodieuse (incorporant la voix parmy) que la Royne fut toute transportee de plaisir par ceste armonie non esperée : laquelle luy sembloit ie ne sçay comment succer l'ame par l'oreille ; de mesme façon qu'elle le sentoit de la melodie de sa fille : dont elle disoit en elle mesme : certainemēt vecy le droit corps de l'ame d'Orfeus, car tel soubriquet auoit Diane par sa musique. Ce pendant noz pucelles triomphoient de fredonner & passer de leurs doitz, & à propos entreiettoient des traitz rosignolesques de leurs douces gorges, chantans ensemble ce dixain.

CHANSON.

*Comme l'argentaine face
De la Lune du ciel, rend
L'onde puis haute puis basse
Par son aspect different:
Ainsi ma Diane en terre,
Qui mon cueur lye & desferre,
Le plongeant de ioye en deuil:
Les mouuemens de mon ame,
Agite en glace & en flame,
Par traitz diuers de son oeil.*

Dieu sçait si la Royne prestoit l'oreille ouuerte à ces paroles, sonnans tel loz de sa fille Diane: laquelle impatiente de plus les entendre de si loing, appelle ses damoyselles pour enuoyer vn page en bas de sa part à celles qui sonnoient des luthz. Cela fut fait diligemment, & noz pucelles monterent en haut bien aysees ou elles trouverent la Royne en vne chambre tapissée & meublee precieusement, & enluminee de six flambeaux en autant de chandeliers d'argent. A l'entree elles font vne grande reuerence, puis se vont mettre à genoux deuant elle, luy baisant les mains: qui fut trop esmerueillée de leurs beautez comme elles aussi de la sienne. Principalement elle arresta son oeil sur Daraide, qui

luy reueilla vn soudain souuenir de son Meraisel, & bien luy sembla n'auoir, iamais veu ny ouy parler de creature si accomplie de toutes parties de beauté apres sa fille: dōt toute en tremble adressa sa parole a elle: Helas m'amy d'ou estes vous! dea qui vous peut icy amener tant belle & si estrange-ment acoustree, & tant bien sonnante & chantante. Daraide deiny rauie en contemplant la mere de celle qui occupoit toute sa pensee & memoire, luy respondit vn peu tard (comme celle qui decouroit par l'excellence du moule qu'elle voyoit, quel pouoit estre l'image qui en auoit esté tiré) Ma dame ie suis tant esbahie de la perfection que ie voy en vous, que ie ne sçay que dire ne penser. Quant à ce qu'il vous plaist enquerir de l'estre de ceste damoy-selle & de moy: nous sommes seurs, natiues du Royaume de Sarmate, de mesme loy que vous qui auons appris de ieune aage le mestier de sonner & chanter: lequel n'auons estimé pouoir employer en meilleur endroit qu'en vostre seruice, & de madame Diane, si c'est vostre bon plaisir de nous y recevoir. A qui la Royne: Mes amyes vous soyez les tresbien venuës: vous asseurant que ne vous pouviez adresser en lieu ou fussiez mieux traittees & salariees. Je vous sçay fort bon gré du travail du long chemin qu'auiez pris si volontiers pour venir au seruice de ma fille: à laquelle vostre sçauoir singulier estoit deu plus qu'a autre quelconque, veu l'excellence de musique que trouuerez en elle respondant à la vostre. C'est-ce qui nous a amenees icy (respond Daraide:) lors elle leur demāda leurs noms: puis poursuivit (la couleur luy montant au visage) A a Daraide, que ie fais contente de ta venue, me representant par semblance celui pour qui mon cueur languit incessamment. Ce dit voulut ouir encore vne chanson, qui fut de ton & accord si doux, avec la grace des voix, & l'inuention des paroles que la Royne & ses damoy-selles demouroient quoyes & immobiles, cō-
me s'elles eussent eu les oreilles enchenees
aux

aux instrumens de noz deux pucelles. Apres ce plaisir la Royne souppa, & commanda qu'on dressast vne petite table plus basse assez pres de la sienne pour les deux estrangeres, à fin de paistre ses yeux de Daraide, comme sur l'image propre de Moraisel: A qui elle dit en son souppant, que l'endemain elle iroit à la ville pour les mener à sa fille: dequoy vous pouuez penser combien Daraide fut courroucée, voyant l'ouverture de iouir si tost de la veuë tant desirée de sa Diane. Les tables leues, la Royne voulut derechef leur musique, tant estoit affriandee au ieu & thant de noz pucelles. Ausquelles elle ordonna la prochaine chambre de la sienne: La ou Daraide se voyant, embrassa incontinent Garaye, disant: Trescher cousin comme recognoistray-ie le bien que ie suis prest de recevoir par vostre bon conseil & ayde? Laissons cela (respond il) & desaccoustumez ce langage de peur de nous descouvrir à malheur: aussi qu'il nous vaut mieux reposer pour ne faire tort à la Royne, voire en nous faisant estimer incōsiderees & mal apprises: nous pouons bien dormir sur les deux costez, puis que noz affaires sont desia en si bon train. A tant elles se couchent, combien que Daraide reposa peu ayant la puce en l'oreille de ce qu'elle esperoit voir l'endemain.

Comme la Royne Sidonie mena Darayde & Garaye à la ville, & les donna à la princesse Diane sa fille.

CHAP. XX.

LE iour venu, apres que la Royne eut pris encor' vn trait de leur harmonie pour son aubade, elle se leue & mande au duc d'Alfarce qu'elle vouloit aller en la ville lequel se rendit aussi tost au logis marin, suyui de maintz cheualiers pour accompagner la Royne: qui ne tarda gueres apres leur venue à monter sur sa haquenée, & ses dames & Damoysselles quand & quand, dont Daraide & Garaye ne furent des dernieres, qui par la cité attrayoient les

yeux de chacun sur elles. A peine fut la royne descendue en son palais qu'elle s'en va voir sa fille pour luy liurer les deux belles menestrieres. Si y entra par la porte que nous auons dit, respondant vers la tour de Diane: lors elle leur dit: Mes amyes ie vous veux mener presentement à ma fille pour vous rendre a son service. Quand Daraide ouyt ce mot, son esperit saisy de pensée soudaine s'esperdit tellement qu'elle n'eut pouuoir de respondre, voire ne sauoit plus qu'elle faisoit, ny ou elle alloit, sans Garaye qui la tenoit & guidoit par la main. Ainsi arriuerent à l'auanchambre de Diane, ou elles trouuerent Lardenie duchesse de Lumbruz, & Galardie marquise de Lastes, qui estoient tresbelles pucelles & de bonne grace & les plus fauories de Diane: à qui elles estoient egalles en aage, venans toutes trois à la dixiesme annee. Toutesfoys voyas les deux nouuelles filles qui accompagnoient la Royne furent vrayement estōnees de leur beauté, specialement de Daraide, de qui dit la duchesse Lardenie: Qu'est-ce cy, ma dame, il semble que venez du ciel, veu la compagnie angelique que vous menez avecques vous, qui luy respondit: Ce sont deux filles plus parfaittes la moytié en chant & son de musique qu'en l'apparece exterieure que voyez. Pardonnez moy ma dame (dit Lardenie) & de ce pas va accoller & baiser Daraide affectueusement, disant: Mais, ma dame, voilà pas la bouche toute formee de ma dame la princesse, & ses propres yeux retraitz au vray naturel. Ce pendant Galardie se coule en la chambre de Diane, pour auoir le present des premieres nouuelles: & la duchesse continuoit sa parolle: I'ay grand paour deormais que ma compagne & moy serons cassees de l'estat de nostre faueur par la suruenue de ces excellentes damoysselles. Ce qu'elle disoit avec vn geste de si grand aise que la Royne ne se pouoit contenir de rire, & les deux filles en receuoient merueilleux plaisir: mais ce ne fut rié a comparaïson de celui qu'elles eurent à l'heure q

Diane vint à sortir de sa chambre, qui s'acheuoit d'habiller quand la marquise luy apporta ces nouuelles & vestoit vne robe de veloux violet decouppé sur vn fond de royl le d'or par dessus vne cote de satin cramoyssi, dont Galardie luy portoit la queue : & auoit conceu telle ioye a son rapport (par vn presage du destin) qu'elle oubliâ se coiffer, ne mettant qu'un chapeau de roses sur ses cheveux, qu'une de ses filles luy venoit de cueillir toutes fraisches. Seulement reietta vn peu ses cheveux derriere ses oreilles, ou pendoient deux moyennes escarboucles de pris inestimable, qui rendent lueur en l'obscurité des tenebres. Au sursaut de sa veüe Daraïde fut ranie iusques au tiers ciel (qui est la sphere de Venus) & commença à dire entre ses dens: Dieu immortel secourez moy, car ie voy ma tant belle & exquisite mort presente. O mort que tu as pris vn bel accoustrement de masque, pour defaire vn gentilhomme masqué aussi & deguisé. A l'heure que Diane entra en l'auanchambre, la Royne luy dit en riant: Ma fille voyez quel beau present ie vous ameine pour vostre recreation: à quoy elle respondit (ayant l'œil fiché sur Daraïde) ma dame à ce que ie voy il est tresbeau, & ne sçay comme vous remercier du grand soing que prenez de moy, à me pourchasser tant de plaisir. Lors Daraïde & Garaye se ietterent à genoux deuant elle, & luy baisèrent les mains, & elle pour les faire leuer prend Daraïde par la sienne qu'elle sentit froide & tremblante comme en vn frisson, & la regardant au visage, luy vid tout blesme & decouluré: parquoy la princesse s'assit sur vn carreau de veloux, & la Royne en vne chaire leur commandant se soir, ce qu'elles firent sur vn tapis de turquie estendu par terre. Mais Daraïde adressa ses yeux sur sa deesse qui luy demâde qu'elle auoit, & quel mal l'auoit saisie si soudain. A quoy ne luy fut possible de respondre vn seul mot: ains demouroit les yeux ouuertz cōme immobile & priuee de tout sens, fors que le cuer luy battoit si

fort qu'il sembloit deuoit rompre & forcer la poitrine. Si s'enquiert Diane à Garaye que ce pouoit estre & si elle estoit sugette à cet inconuenient, qui respondit que non. Adonc la princesse la tire par vn bras, & la Royne par l'autre: Puis luy font frotter les mains qu'elle auoit froides comme glace: en fin vne damoysele luy vient ietter tant deaux de senteurs au visage qu'elle reuient à soy. He dieux (disoit la princesse ce pendant) ma presence luy peut elle porter ce malheur non accoustumé? auendroit il bien que ie la perdissi le iour propre que ie l'ay aquis? Quand Daraïde se resentit, voyant tant de damoyseles empeschees entour elle, de honte qu'elle eut de son accident le sang luy remonta en la face, qui la rendit semblable à la blanche aurore que le soleil matinal couloure de moderee rougeur. Si dit à la Princesse: ma dame pardonnez moy s'il vous plaist la peine que vous ay donnee à ma bienueuë, d'autant que la cause a procedé de vostre excellence, laquelle n'a moins transporté & egaré mes sens que la clarté extreme du soleil eblouit la veüe mortelle: car sans doute autre chose que ceste nouveauté incomprehensible de vostre perfection n'a troublé & aneanty la vigueur de mon corps. A quoy Diane: M'amy vous portez en vous mesme telle part de ce que m'atribuez, que ne pouuez auoir trouué en moy rien de nouveau ny estrange: mais dites si voulez prendre quelque substance pour renforcer voz esperitz. Je vous remercie treshumblement ma dame, respond Daraïde, car la puissance qu'auiez monstree à me raur ainsi & destraire mes forces, vous deuez par raison auoir pareille à me les rendre & restaurer. Pendant que la princesse luy repliquoit que si elle eust eu ce pouoir, elle ne l'eust laissée si longuement en peine: la Royne commanda qu'on fit haster le disner. Si prend sa fille par la main pour aller en la sale ou lon auoit couuert: & la duchesse Lardenie va embrasser Daraïde d'vne singuliere affection luy disant:

O ma

O ma mignonne, ô mon ange que ton mal m'a nauré le cueur : prend courage m'a-mye & t'efforce à faire bonne chere : car ie fâsseure que nous menerons ioyeuse vie ensemble, sans iamais engendrer vn seul grain de melancolie. Daraïde conceut grand amour enuers la duchesse pour la gracieuseté affectueuse dont elle luy vîoit : tellement quelle recôneut ceste obligation en tel payement que sa qualité requeroit (côme l'histoire vous deuîsera en son lieu). Si luy dit : ma dame vous me rendez toute honteuse de la faueur que me prestez : ie ne me sens pas soluable pour y pouoir satisfaire. Qui luy respôd qu'elle s'en tiendroit trop satisfaite, mez qu'elle la vit seulement gaye & ioyeuse : ainsi deuîsans suyuoient la Royne & la princesse. Et quand elles furent en la salle, Diane qui tousiours auoit l'œil assis sur elle pour l'affection secrete qu'elle auoit embuë en ses veines au premier obiet de sa veuë, luy dist avec vn souriz gracieux : Ma Daraïde declarez moy ie vous prie ce qu'avez senty en ceste palmoison. Il ma semblé (dit elle) ma dame que ie sentoîs venir vne douce mort emmiellée de ie ne sçay quel aîse indicible que la mort naturelle ne peut auoir. Je ne puis entendre cecy, dit Diane. Par ce (respond Daraïde) que ceste semblance de mort est reuestue de l'ymage de vostre beauté excellente, & son dard empenné de vostre grace nompareille, qui par-ce moyen liure vn souf martire auquel i'eusse desiré de languir ainçois que de reuenir a cet vsage de vie occupé d'autres fantasies empeschans le bien vnique de ceste heureuse contemplation. Lors adresse sa parolle à la Royne. A à ma dame combien vous avez fait pour tous les cheualiers de la terre, en leur deniant la veuë de ma dame Diane, qui ne leur pouoit estre moins que mortelle, veu le pouuoir qu'elle a de raurir & transporter les damoyelles, & les mettre au chemin de la mort. Toutesfois ie les estimerois mieux fortunez d'auoir ce grâd bien de la voir au hazard de mourir pour estre

siens. La Royne qui auoit conceu vn merueilleux plaisir à regarder Daraïde pour la souuenâce qu'elle luy raportoît de son Florisel, luy dit qu'elle n'eust pas pensé que femmes tōbassent en affectiō d'autres femmes, si elle mesme ne l'eust experimenté en Daraïde, comme elle confesse estre touchée de celle de Diane. Puis aiousta : Or ça m'a-mye vous serez donques blasonnée LA VAINCUE DE DIANE aussi bié que les cheualiers qui suyuent l'ètreprise, à quoy Daraïde : Ma dame plus grand honneur ne reputerois d'estre victorieuse de tous les viuans que d'estre vaincue d'elle, moyennant que ce nom me soit accordé par elle mesme, en vertu duquel ie protesterois de viure & mourir en son seruice. La princesse consentit volontiers a ce titre, disant qu'elle estoit fort contente de la connoistre amoureuse d'elle, esperant par-ce lyen la tenir enchesnee en sa compagnie. Si se mirent à disner la Royne & Diane & la duchesse & marquise : ou ne furent seruies que des plus delicates viandes iugees par les medecins les plus digestibles pour entretenir ce beau teint & la tendre complexion de la princesse, qui fit dresser vne petite table pour les deux damoyelles qui mangerent legerement a fin de donner leur premiere aubade a Diane. Ce que refusa Garaye pour sa part souz bonne couuerture de ce qu'elle disoit que le ieu froid d'elle non amoureuse ne symboliferoit bien avec celui de la VAINCUE. Alois Daraïde prend le luth & sonne d'une telle agilité de main, decouppant la musique par tant de fredons & passages que lon ne pouoit ymaginer qu'Orfeus y eust rien peu aiouster. Et quand à la seconde foys elle mesla sa voix argentine parmy le son de l'instrument (tenant son regard fiché sur la princesse) qui luy voyoit parfoys descendre des yeux les larmes perlees, & les gros souspirs debonder de l'estomac a la rencôte des mortz douloureux : tellement que la princesse se sentit outree de passion deormais incurable, pleurant & souspirât de compagnie. Et

gueres moindre part n'en print la Roïne, pour la memoire que la chançon parlant d'Amadis, luy renouueloit de son Moraisel, avec la semblance de la personne qui sonnoit. La chançon fut de ces deux couplets:

CHANSON.

*Nonobstant qu'Amadis esprouue
Sous l'arc d'Amour sa loyauté
Si est ce qu'encores il trouue
En Oriane cruauté.*

*Qu'esperez-tu doncq Darayde
Veu que tu n'as d'arc null'ayde
Pour rendre certaine ta foy,
Aussi nul maniment des armes.
De la mort (lasse) assure toy
Si lon n'a pitié de tes larmes.*

Ceste chançon ramenteuant à la Roïne son Florisel: A a (dit elle, en soupirant) de pareille rigueur vse le petit filz enuers moy, qu'Oriane vn temps enuers son grand pere: mais ie m'en vengeray en telle sorte qu'il seruira d'exemple à tous les abuseurs de dames. Diane oyant ce propos, estant incitée d'amour naïue enuers son pere, iette les bras au col de sa mere, & toute espleuree, la supplie vouloir pardonner à son pere son offence en faueur de sa fille. Mais la Roïne luy respondit qu'elle ne se souciait que de se donner du bon temps, & que la decharge de son honneur luy exigeoit ceste vengeance de laquelle elle remettoit l'effect en la main des dieux qu'elle connoissoit tousiours si fauorables à la race d'Amadis que Diane n'auoit encore que crainte en vain. En ce propos le disner s'acheua, & la Roïne se retira en son palais, laissant sa fille en compagnie qui fort luy agreoit.

Du passetemps du luth que print Diane avec Darayde & Garaye, & de leurs menus propos ensemble.

CHAP. XXI.

Diane se voyant en possession de deux Damoyelles, qui tant estoient à son

gré, s'alla esbatre apres disner, au iardin du palais de Venus, qui sembla à noz deux pucelles le plus beau, dont elles eussent iamais ouy parler, mesmement la frescade estant droit au milieu, ou les oyseaux de toutes sortes le rendoient volontairement en aussi grand nombre qu'on les eut peu assembler en vne voliere, & degoysoient vne melodie merueilleuse: la belle fontaine couroit sous la coudroye, ou la princesse se vint soir, & ses dames alentour. Entre lesquelles Lardenie luy dit que le lieu estoit propre à sonner, à cause du faux bourdô de l'eau bruyante, & des fleutis des oyssillons. Diane entendoit qu'elle le dit pour ouir de rechef Daraïde & sa compagne: mais elle luy remonstrant qu'elle mesme leur deuoit faire connoistre sa perfection en musique, pour voir l'acces nouveau que Daraïde en pourroit recevoir. Aquoy la princesse s'accorda, & print son luth, dont elle esonna les maistresses mesmes, especialement Daraïde, de qui l'esperit estoit tant ravi de ceste armonie (iointe l'amorce de la main qui la causoit) qu'il luy sembloit depestré des liens du corps chercher issue pour aller trouuer celuy qui l'attiroit commel'Aymant le fer: qui meut Garaye à dire à la princesse. Làs madame, c'est assez, si ne voulez voir encor vne extase d'une pauvre amante selon sa cōtenance que l'aperçoy de-ia y tendre. Cōment (dit Diane à Daraïde) m'amie, ou en estes vous logee? En paradis, & en enfer, respond elle, en enfer gist mon corps, que l'ame torment, & desire habandonner, dôt elle le rend souuent ainsi morne & transi. Et elle lors se sent comme en vne gloire celeste, participant vne volupté spiriuelle en ses pensees incorporelles, ne souhaittant plus que d'estre iointe à la vostre inseparablement. Las, ma dame, ie considere que ce pourra estre des miserables cheualiers quand ilz auront fruition de vostre vision pure & vraye, veu l'effort de vostre seule image qui leur fait courir les champs, teindre les herbes de leur sang, & embraser les cueurs des flammes ardentes. Ce disant, les

les larmes luy arrosoient ses palles iouës, iufques à ce qu'elle auisa quelque soupir eschapé à Diane, non obstant la dissimulatiō dont ella le cuida couvrir : qui luy auint en repliquant à Daraide que c'eut esté de son amour, si elle fut homme, veu les signes extremes qu'elle en demonstroir. Sur lesquels elle la vint arraisonner (connoissant qu'elle auoit surpris son soupir) lesquels elle estimoit plus leurs tesmoings de la douleur secrette, les pleurs ou les soupirs. A quoy Daraide : ma dame ie confesse qu'il y a des larmes procedans d'abondance d'honneur propre au sexe des femmes, dont on dit qu'elles les ont à commandement, pour abuser leurs langoureux amans. Mais le corps ou telle fontaine est desia tarie par pleurs continuelz, ce qu'il vient à distiller de ses yeux sont les vitales vapeurs que le feu cruel du cueur exhale & chasse en haut consumant en ce la racine de la vie. Alors Diane : le dis Daraide que les soupirs (qui d'autant sont plus communs aux hommes) rendent conte plus suffisant de ceste ardeur vehemente, qui ne trouuant plus de liqueur qu'elle puisse enuoyer aux yeux, y pousse vn air sec, & vent enflammé, qui se produit par amour, qui vient euentier de ses aëles le cueur embrasé, le voyant en termes d'expirer sans ce rafraichissement. Ainsi prenoit la princesse grand plaisir à deuiser avec Daraide, mais pour ne m'espriser du tout Garaye, l'interroge si c'estoit la coustume de son pais, que les femmes fussent amoureuses les vnes des autres. Qui luy respondit que la region de Sarmatie donnoit les vñances des hommes aux femmes, en leur mettant les armes aux mains pour combattre : parquoy leur seroit aussi moins estrange cest office viril d'aymer les dames qu'à celles des autres contrees : mais quoy qu'il en fut que l'outrepasé de son excellence ne laissoit sexe ny aage exempt de son amour. Apres ces deuils ioyeux, Diane reprit le luth pour acheuer sa chançon que la compassion de Daraide luy auoit rōpue : & pensant que le mot l'auoit troublee, estât

conforme à son estat : pour ne la mettre en desespoir, luy declara qu'elle la sonnoit plus à cause de la musique que de la lettre, combien qu'elle l'eut faite à propos d'elle, la cuydant estre femme.

CHANSON.

*De iour en iour ma vie diminuë
Je perds mes sens, & change ma couleur
Tant sa beauté diuine continuë
A me naurer d'ennuy & de douleur.
Voyant sachant me plains de ce malheur
Et veux languir en cest' aspre souffrance
Tant que j'auray de vie au corps vñance.
O grief tourment, O dure nouveauté
Quand en ce cas ie n'ay nulle esperance
De iouir onc du fruit de sa beauté.*

Daraide receut vn contentement secret de ceste chançon quand elle l'eut bien considéré. L'heure estoit venue que la princesse auoit accoustumé de soupper, qu'elle fit apporter aupres de la fontaine : commandant à Daraide luy seruir d'eschançon, & à Garaye d'Escuyer trenchant ce qu'elles firent de fort bonne grace : puis s'en allerent soupper. Et la princesse aussi tost demanda à Lardenie & Galardie (qui auoient mangé avec elle) qu'il leur sembloit de ses deux damoyelles, à quoy la duchesse : Ma dame ie me recuse en la cause de Daraide pour l'amour que ie luy porte aussi seruent qu'elle à vous : tant oser ie dire que c'est vne des plus accomplies pucelles pour son aage que les dieux creerent iamais, soit en beauté, grace, ou discretion. Vous dites vray (respond Diane) & ie me tiens plus fiere de l'auoir que qui m'eut donné vn roy aume. En ce deuils continuèrent tant que noz filles reuindrent : & Lardenie va acoller Daraide, luy demandant comme elle estoit en sa bonne grace, qui luy respondit : comme celle que par raison ie doy priser & aymer sur toutes les dames du monde apres ma dame Diane. Je suis bien abusée

(replique la Duchesse) qui pensois tenir le premier lieu en vostre endroit. Daraïdes s'excusant qu'il y auoit des creatures naturellement nees à dominer & seigneurier les autres: & que la princesse auoit tellement asseruy son cuer qu'elle n'en pouuoit plus disposer que de telle portion qu'il luy plaisoit. Diane souzriant luy dit qu'elle vouloit estre aymee d'elle souverainement comme aussi elle l'aymoit sur toutes. Me voyla (poursuit la duchesse) tombee de fieure en chaut mal, qu'il ne suffit pas à ma Dame d'emporter la preeminence sur Daraïde, sans encores la preferer à moy. En quoy la princesse luy remōstra qu'il n'estoit raisonnable de moins rendre que le plus à celle qui aurt en liuroit de son costé. Daraïde ne fut paresseuse à la remercier de ce grand mot qu'elle ne mit pas en oubly: ains quand elle print le luth avecques sa seur en donna tesmoignage par ceste chanson respondue à la precedente de Diane.

CHANSON.

*Làs vain desir, interdite esperance,
Làs faux penser & auengle vouloir,
Larmes, souspirs, pitense doleance
Souffrez ormais mon esprit paix auoir.
Mais si par force, ou par quelque oubliance,
De ce fort neud mon cuer ne puis rauoir:
Vien mort, de moy pren ton dernier deuoir,
Mettant à fin ma cruelle influence.
Cōsume (ô ciel) en moy ta grande puissance:
De ma douleur telle est la vehemence
Que ton effort ne me sera que ieu.
Iette (ô amour) ton arc fleches & feu,
Et dresse ailleurs ta force & violence:
Playe nouvelle en moy n'a plus de lien.*

La princesse fut fort satisfaite de ce lay pieux, & print son luth & ioua avec elles: qui fut la plus delectable armonie & la plus replie que iamais eust esté ouye, ny aussi touchée de si belles & hautes mains. Auquel plaisir nous les laisserons avecques la Roynie Sidonie (qui n'en perdoit pas vn iour) pour retourner au cheualier du Fenix.

Comme la Roynie de l'Isle de Dardanie requit le cheualier du Fenix d'espouser la Princesse Lucenie sa fille, & sa responce.

CHAP. XXII.

LE cheualier du Fenix qu'auons laissé en l'Isle de Dardanie y fut deux iours (depuis la victoire qu'il eust contre le geant) en grand' pensee touchant le party de Lucenie, qu'ilcognoissoit bien que la Roynie luy vouloit offrir. Mais combien que la princesse luy semblast beaucoup à estimer, toutesfois son cuer desia engagé en autre lieu ne si pouuoit bonnement renger: ioint son aage qui estoit encores plus propre au trauail des armes pour acquerir loz & gloire, que pour s'accasner avec vne dame, & se mettre en mue à engresser comme vn oyson. Au troisieme iour la Roynie ne faillit à l'issuë du dîner de luy entamer le propos, disant que le seruice qu'il auoit fait à elle & sa fille de les auoir deliurees de l'assaut du geant, & rendu leur terre paisible, la sembloit charger d'ingratitude si elle ne le reconnoissoit le plus hautement que sa puissance portoit. Bref que sa vertu consideree avec les autres graces dōt elle le voyoit doué autant que cheualier du monde, elle ne le reputoit digne de rien moins que de la cōpaignie & conioinctiō de sa fille avec le droit successif de sa coronne: ce qu'elle luy presentoit de tresbō cuer comme le fond & comble de tout son pouoir. Florarlan fut fort troublé de la requeste de la Roynie la sentant liberale & si affectueuse qu'il ne voit moyen de s'en demesler honnestement: Toutesfois luy fit responce qu'il ne se sentoit capable de si grande offre, ne scachant le lieu de son origine, & n'ayant connoissance aucune de pere ne de mere. D'auantage qu'il estoit de loy trop differente à la sienne qui ne luy promettoit alliance avec gens de contraire creance. Finalement que ce seroit honte à luy estant de tel aage de s'arrester si tost au repos & delices du corps auant que l'auoir employé en l'exercice & conqueste d'honneur. La Roynie se trouua par ceste responce fort deceuë

ceue de son opinion , cuydant qu'il deust accepter son offre de franche volonté , & luy repliquoit que fortune ou le ciel luy auoit fait telle grace de gloire bellique en sa ieunesse que son apprentissage equipoloit le chef d'œuvre des autres & son commencement, la fin . Lors Lucenie qui vouloit franchir le saut, ajouta : que puis que la royne sa mere auoit declaire son consentemēt, que de sa part aussi elle diroit vn mot du sien : c'est à scauoir quant au lignage & pauvreté qu'il pretendoit , que l'interrest n'en redondoit que sur elle qui n'en faisoit aucune difficulté : Quant à la diuersité des loix , que si il luy faisoit entendre la raison & le fondement de la sienne estre meilleur, elle ne se voudroit obstiner en vne fause & peruerse : mais si non obstant tous ses pactions & conuenances il estoit resolu de n'y entendre, qu'elle protestoit d'acheuer le reste de ses iours en vie solitaire , sans iamais se marier , pour demeurer seule, à cause du seul . A ceste parole reuint à Florarlan en memoire l'escrit de la proferie de la Royne d'Argenes au perron de Constantinople, duquel a esté fait mention au liure precedent :

Quand le seul sera avec la seule seulement, scaura le seul qui peut estre seul.

Parquoy pensa que ce fait estoit mené & conduit par destinees . Puis suruindrent les barons du pais qui se prosternerent à ses pieds , le suppliant ne refuser ceux qui de si bon zeile se donnent à luy , & n'estre cause que la lignee de leurs seigneurs perisse . La Royne & la belle Princeesse se deconfortoient extremement , en sorte qu'à la fin l'obget present de la gracieuse Lucenie effaça la iouuenance imaginaire de Cleofile qu'il n'auoit conueü ny aymee qu'en peinture . A raison dequoy apres auoir pensé vn espace, se leue de sa chaire . & s'en va à Lucenie, qui s'estoit iettée (comme faillie de cueur) sur vn lit verd , à qui il dit : Ma dame, ie vous prie de pardonner à vostre cheualier la mesprison qu'il semble auoir comise enuers vostre grandeur, reuquant en difficulté le bien dont il n'est pas

digne lequel finalement vaincu de vostre affection singuliere se rend tout a vostre discretion pour executer voz commandemens . La dolente princeesse se leue a ce mot en sursaut , en tel aise que le prisonnier oyant prononcer l'arrest de sa deliurance, & pour toute responce le va baiser la larme a l'œil avec vne humble reuerence . La Royne voyant ceste nouueauté non attendue y vient & renforce les accollades à Florarlan, lequel alors leur dit : Il ne m'est possible ne pour amour que i'aye desia assis en autre lieu, ne pour autre respect quelconque mettre en arriere l'obligation de vostre bienueillance tant euidente enuers moy : qui me contraint vous promettre ma dame (parlāt a Lucenie) puis que tant d'honneur me daignez faire, de ne bailler iamais la foy à autre dame qu'a vous, comme vostre loyal mary & espoux : moyennant que me donnez congé (auāt que passer iusques a l'effect des noces) d'aller en queste quelque temps sur la connoissance de ma race : veu que vostre aage & le mien ne donnent occasion de rien importuner ne haster . Lucenie qui eust bien voulu ceste promesse sans telle condition, delayant la iouissance de son desir, s'y accorda puis qu'autrement ne pouuoit : le suppliant y vouloir vser de la plus grande diligence que possible luy seroit . Si le retint encore deux iours souz ombre de luy faire equipper son vaisseau , & appareiller tout ce qui luy estoit necessaire en son voyage : durant lesquelz il leur prescha si bien la loy de dieu qu'elles se firent baptiser , & tout leur peuple apres . Aussi y eut maintz honnestes amoureux propos entre luy & elle , accompagnez par fois de gracieuses caresses , ris , & baisers , tant que le point d'honneur pouuoit souffrir : ce qui laissa la Princeesse d'autant plus grand regret de son partement, apres auoir gousté si familièrement la douceur de sa compagnie : mais le cours fatal le tiroit bon gré mal gré a ses auentures , auxquelles il s'exposa le troisieme iour , s'embarquant avec mille pleurs & souspirs reciproques.

Et la fortune le guida en maintz lieux avant qu'il arriuaſt en l'Ifle de Guindaye: la ou il fit tant d'armes ſouz le titre de Fenix, que ſa renommee volant par le monde cauſa grand contentement à Lucenie ſa fiancee, à Arlande ſa mere, & à Floriſel qui en ſon cueur ne le deſauouoit à filz. Vray eſt que de ſes faitz nous paſſerons vn peu legerement, renvoyant les lecteurs au liure propre de ſa cronique.

Comme le Roy de Lacedemone vint vers l'empriere Niquee de la part du Soudan ſon pere pour la mener vers luy, & du ſuccez de leur voyage.

CHAP. XXIII.

PEu de iours apres que Floriſel fut guery des playes qu'il auoit receuës au combat contre le Roy de Gaze, le Roy de Lacedemone arriua à Trapezonde pour prier l'Empereur Amadis de Grece au nom du Soudan de luy enuoyer ſa fille Niquee pour vn peu de temps comme le principal ſoulas & reconfort de ſa vieillesſe. Ce que l'Empereur luy accorda combien que non ſans regret. Si la conduit au port avec Floriſel & Helene, qui s'entredonnerent mille baiſers & accolées à la departie. Or ſinglent ilz en haute mer, laiſſans la cour fort troublee par l'abſence de l'empriere: & trois iours durans voguerent par bonace, mais au quatrieme la furie des ventz s'eleva qui les porta coſtiers de leur route, & les alla ietter en vne des Ifles Ciclades, en laquelle commandoit vne dame de la lignee de Furio Cornelio, qui hayoit mortellement Amadis de Grece & tous ſes adherens. Si toſt que l'empriere Niquee ſe vit abordee en terre voulut deſcendre pour ſe reposer du trauail de la mer. Le Roy luy fit compagnie avec vne partie de leurs gens, qui furent incontinent deſcouuertz d'vn chateau non lointain, d'ou ſortit vn nombre de ſalades & guiſarmes qui vindrent prendre l'empriere & la pucelle Anazare qui l'accompagnoit avec quelques autres filles de ducz & contes, &

le bon Roy auſſi. Ceux de leur troupe qui ſe mirent en deſence furent ſagementez, les autres menez priſonniers: puis vindrent cinq ou ſix vaiſſeaux armez aſſaillir la nef de Niquee qui leuoit les ancras en intention de faire voyle en Trapezonde, pour aller porter les nouuelles de leur meſchef: mais poſſible ne leur fut d'eſchapper que partie d'eux ne fuſſēt priſ, les autres noyez, & la nau miſe a fond. La dame de ce chateau (qui Garçarace auoit nom) fut fort ioyeuſe de voir de ſi belles damoyſelles en ſon pouuoir: beaucoup plus le fut quand elle entendit par vn des priſonniers qu'elle tenoit l'empriere Niquee. Alors s'en va incontinent voir celle qui ne penſoit eſtre deſcouuerte & luy dit la iugeât à ſon maintien maiſtreſſe du chateau: ma dame ie croy = voſtre phiſionomie qu'eſtes pout yſer pluſtoſt de pitié que de rigueur enuers ceux que fortune a liurez en voz mains: pour ce vous prie de nous laiſſer aller noſtre voye: vous aſſurant que (combien que ne ſoyons pas du plus haut lieu de ce monde) vous ne perdrez rien à nous faire plaiſir au moyen des bons amys que nous auons. A quoy Garçarace dit: ma dame ne vous penſez déguifer enuers moy qui vous connois pour emperiere de Trapezonde, plus contente de vous tenir que la valeur de toutes voz ſeigneuries: car ie ſuis de la race du vaillant Furio Cornelio qui a eſté meurdry par les voſtres, & le duc Brabon mon filz apres. Dont ay inimitié iuree contre voſtre lignage, laquelle ie n'executeray enuers vous par inhumanité quelconque, fors que de vous retenir icy, pour donner à l'Empereur Amadis voſtre mary (par voſtre abſence) le plus grief ennuy q'ieſtime luy pourroit auenir. Niquee luy voulut remonſtrer qu'elle n'auoit eſté cauſe des accidens dont elle ſe plaignoit, & que ce ſeroit contre raiſon qu'elle portast la peine de l'oſſence qu'elle n'auoit commiſe, mais ce fut en vain: Garçarace luy reſpondit qu'elle miſt ceſte eſperance hors de conte, & au reſte ſ'aſſuraſt de receuoir d'elle tout le meilleur

leur traitement qui luy seroit possible. Ainsi laisse l'empereure Niquee demy desesperée, qui se mit à faire de piteuses doléances puis à son Amadis, puis à Florisel son filz. O Amadis de Grece lumiere des chevaliers ou estes vous maintenant que ne venez secourir vostre desolée compagne.

Làs ie suis certaine que si estiez auerty de ma triste prison, vous seriez bien tost volé icy pour deliurer vostre loyalle amye. Voire quand vous y vindriez seul toute l'Isle ne pourroit repousser vostre effort invincible. Làs Florisel qui tant avez employé voz forces au secours des dames, que ne sçavez vo^s l'infortune de vostre mere pour la secourir & tirer hors de la main de ses ennemys. O Rogel mon petit filz, si tant duroit ma captivité qu'elle attendist la vigueur de tes bras, ie m'assure sur les propheties de ta grandeur que l'iniure qu'on me fait seroit chet vendue. Helas chere seur

Alastraxee cōbien qu'avez quitté les armes en mariage si les reprendriez vous encores à ce besoing si vous en entendiez les nouvelles. Apres ces grandz regretz elle embrassoit la pucelle Anaxare disant, à ma mignonne que ie fais grand tort à vostre belle ieunesse de l'avoir tirée en ce malheur, au lieu qu'elle deuroit estre en tout plaisir & soulas, qui luy respondit: Madame ne vous tourmentez point ainsi, recommandons nous à dieu seulemēt qui jamais n'a delaisé le sang de Grece, & il nous enuoyra en brief quelque moyen de deliurance. Garçarace qui entendit par ses gens qui les alloient servir au repas, le dueil que Niquee menoit, fit tirer le vieil Roy de Lacédemone de la chambre ou elle l'auoit fait mettre à part, & l'enuoya tenir compagnie à l'empereure: dequoy elle fut vn peu consolée à cause des remonstrances qu'il luy fit de ne pleurer & gémir comme les simples femmelettes, ains d'vser de constance sortable à son estat qui requiert vne grandeur de vertu pareille au reng qu'elle tient. Et qu'en celà elle doit imiter à son pouvoir la patience de son mary tant esprouvée &

recommandée: autrement se diroient les gens de basse condition plus heureux que les seigneurs, d'autant que comme plus grands ilz les verroient sūgerz à plus grandes ruynes si la magnanimité ne vous sostenoit contre les assaux d'aduersité. Quoy qu'on luy sceust dire ny alleguer elle ne voulut boire ne manger le premier iour.

L'endemain qu'elle sentit de grandz elancemens du fruit qu'elle auoit au ventre qui crioit à la faim, pour le sauuer elle print quelque peu de refection. Tant vous puis dire qu'il vint à sortir sur terre durant cest emprisonnement, & fut vne fille de singuliere beauté nommée Fortune: à raison du lieu & fortune de sa naissance. Ce pendant Garçarace fortifia sa coste & son chasteau, donnant ordre que les nouvelles de ceste prise ne puissent estre portées au prince Grecz.

Comme les nouvelles coururent par le monde que l'empereure Niquee estoit perie en mer, & du merueilleux deuil qu'on en mena.

CHAP. XXIIII.

NE venāt aucunes nouvelles du Soudan touchant l'arriuee de sa fille, on enuoya vers luy en diligence pour en sçavoir la verité. Alors on s'assura que l'empereure estoit perie en mer, dont fut la douleur incroyable en tous les lieux de sa connoissance. Tellement que la princesse Lucelle mesme n'en fut exempte, laquelle s'estoit toute retirée à dieu, & employoit sa vie à œuvres de charité & hospitalité accompagnée de sa bonne damoysele Anastasiane, à qui elle fit de grādz plaintes sur la mort de Niquee: dont l'autre trop esbahye, luy remonstra qu'elle auoit plus grande occasion de ioye que de tristesse, veu l'esperance qui pouuoit estre de iouir de son taint aymé Amadis à l'heure franc & libre. A à m'amy (disoit Lucelle) quand son cueur s'y rengerait non feroit pas le mien qui se sent trop offensé d'avoir esté postposé à vn autre: si est-ce que ie l'ayme outre mesu

tre mesure, & pleure & gemis pour l'ennuy que ie le scay porter de la perte de sa Niquee. Elle disoit bien vray : car iamais mary ne souffrit plus amere angoisse de la mort de sa femme : tellement qu'il se tint huit iours en sa chambre sans vouloir voir personne que Florisel & Helene, & vsant de telle abstinence & diete, qu'il perdoit desia force & couleur. Sur ce deuil luy vindrent lettres consolatoires de plusieurs princes & Dames, mais la principale de toutes fut celle de l'empereire Abra qui l'enuoya par le Roy Frandalo, dont le dessus estoit.

Lettre de l'empereire Abra.

*Au tresredouté Empereur de Trapezonde,
Prince de Grece, de Gaule, de la grand'
Bretaigne, & Roy de
Rhodes.*

Monsieur si vous ne souffriez douleur extreme du decez de vostre bonne compagnie l'empereire Niquee, vous seriez entaché de trop grande inhumanité & ingratitude, veu le regret que les estrangers mesmes en portent, que devez auoir senty de plus pres que nul autre. Vne si douce & loyale conionction ne se peut departir sans vn grand naturel creuecueur. Mais apres que le premier mouuement a donné son alarme il faut que l'esprit vienne à se recueillir en soy & reprendre aleine, considerant que les larmes sont perdues sur chose non recourable, & le tourment vain en cas qui est sans remede. La desirez-vous encores en ce monde ? vous seriez enuieux de son bien : gemissez-vous son mal ? elle est en vne vie immortelle plus heureuse que la vostre : souhaitez-vous à la suyure au lieu ou elle est allee ? vous offenceriez dieu de tascher à partir d'icy auant qu'auoir executé tout ce qu'il a ordonné estre acheué par vous en ce monde. Vous auez renom de magnanimité entre tous cheualiers : mais si vous laissez ainsi abatre de vous mesme, vous perdrez à vn coup toutes les victoires acquises sur les autres : aussi vous monstrât

vertueux à resister à ceste griesue passion, aiousterez le feste & comble au trofee de tous voz faitz illustres. Cest acte de lamen ter est indigne d'un homme, encores plus d'un prince qui doit seruir de lumiere exemplaire. Au reste vous sçaez qu'elle estoit nee mortelle & que ne tarderons gueres apres elle à franchir le pas. Auisez donc à secher voz larmes par prudence, que le tēps essuye par longueur aux ignorans, en vous conformant du tout au diuin vouloir.

*Abra Emperiere de Constantinople, &
Princesse des regions orientales.*

Amadis ayant leu ceste lettre dit à Frandalo qu'il remercioit grandement l'Empereire du bon reconfort qu'elle luy donnoit, & qu'il s'euertueroit à obeir à ses remonstrances de tout son pouuoir. L'endemain partit Frandalo, & Amadis discourant seul la nuit sur sa Niquee, commença à penser qu'elle ne pouuoit estre trespassee, & que veu leur amitié intrinseque son ame luy fut venu dire à dieu, ou donner quelque autre signifiante de son partement: ou si les ames n'vsent de cest office, l'influence du ciel l'eut affligé à l'heure qu'elle persecutoit sa prisonniere, comme il auient à plusieurs en quelque distance de lieux qu'ilz soient, de sentir l'heure propre du decez de leur parer ou amy cordial. Et sur ceste opinion se fait armer secretemēt par vn page d'un harnois noir, luy enchargeant de dire l'endemain à Florisel & non plustost, qu'il estoit party en fantasie que l'Empereire estoit viuante & alloit à sa queste, priant ses amys de luy estre aydans pour plustost la trouuer en s'escartant en diuers pais : si monte à cheual sans estre aperceu. Florisel ne le trouuant point en sa chambre fut en grand' angoisse, craignant qu'il fut allé mener quelque vie solitaire en lieu lointain & deser iusques au lendemain que le page luy declaira ce qui luy auoit esté commandé. A l'instant Florisel vn peu plus content, demande congé à sa chere Heleine qui en fut fort deplaisante

sante, estimant que leur peine fut vaine & inutile à chercher celle que lon tenoit pour perie. Mais à l'heure qu'il fut armé & prest à monter sur son destrier voicy arriuer trois cheualiers qui n'estoient pas compagnons mais s'estoient rencontrez en chemin, portant tous la figure de Diane en leurs escus. Entre lesquelz y en auoit vn de taille & corpulence de demy geant qui premier parla: Prince Florisel tu connois assez au blason de mon escu la cause de ma venue: Je me reputé bienheureux de t'auoir rencontré si à propos auant ton partement qui me semble fort lasche, veu la querelle que tu as emprise à soustenir iusques à la fin: mais ie suis arriué à point nommé pour arrester ta fuyte. Or es-tu en equipage de combatre, si ne differe point que n'allions de ce pas demesler nostre different. Je suis Bultazar Roy de Frigie, filz de Breon, de qui le sang espandu par tes mains me crie vengeance. Le prince fut trop ennuyé du destourbier que luy donnoit ce Roy à son voyage neantmoins voyant la necessité que s'estoit d'en passer par là, luy dit en peu de paroles que lon scauoit assez l'ocasion de son partement sans luy imputer à couardie, & qu'il luy feroit connoistre en peu d'heure combien il a de crainte de telles gens que luy. Adonc commande au duc d'Aquil & d'Alafont de les mener au cap. Ce qu'ilz firent avec vne merueilleuse suite de peuple: mais Heleine estoit tant affoiblie de tristesses les vnes sur les autres qu'elle n'eust courage de voir le combat & y enuoya Rogel qui y print plus grand plaisir qu'a ieu ne passer temps quelconque. Or fut le conflit tant des lances que des espees fort rude & aspre, sans que l'auantage se conneut d'une heure entiere, mais Florisel finablement luy eblouit tant la veüe par subtilités d'escrime qu'il luy coupa d'un reuers le bout des doigts du pied gauche, dont luy sortit tant de sang qu'il vint à perdre sa vigueur: toutesfois Florisel impatient de si longue demeure, euitât un des coups de Bultazar, le vint heurter de telle puissance qu'il le coucha par ter-

re. Lors luy delace l'armet, luy commandant d'aller porter sa teste viue à la royne Sidonie en satisfaction de la sienne: ce que le paillard refusoit (disant qu'il fit son deuoir) par ce qu'il s'asseuroit sur la courtoisie que Florisel auoit mandé à la Royne qu'il vseroit enuers ses cheualiers. En estes vous là (dit le prince) puis donc que ny voulez aller de vostre gré ie vous y enuoyray prisonnier par force. Ainsi le fit empoigner par les gardes du camp & mener à un logis avec charge de le faire bien penser de ses playes. Les deux autres cheualiers se presenterent que Florisel ne voulut refuser sous ombre du travail precedent, connoissant a peu pres leur portee: Aussi ny durerent ilz gueres, & leur en chargea de mener Bultazar son captif en l'Isle de Guindaye, faisans eux-mesmes l'offre de leurs testes à la Royne à la charge de la sienne. Mais auant qu'ilz fussent tous gueriz de leurs blessures, & le prince mesme, y suruint neuf autres champions de Diane qui furent depeschez par lui en telle forme que les trois premiers (desquelz l'histoire ne fait mention des nös d'autant qu'ilz n'estoient de haut lignage ne renommee) fors que tous leurs escuz furent pendus avec ceux des deux Roys, & eux tous ensemble renuoyez en Guindaye. Ce fait Florisel ne tarda à se mettre en la queue de sa dame & mere: laquelle maintz ieunes cheualiers entreprirent apres luy.

Comme l'Empereur Amadis de Grece alla voyager par mer & par terre en quête de Niquee & de ses auentures.

CHAP. XXV.

L'Empereur Amadis party de Trapezonde desiroit s'en esslongner le plus qu'il pourroit, & gaigna en diligence une ville maritime, ou il fit peindre en son escu l'horrible figure de la mort, avecques escriteau dessous MEMOIRE DE MON ESPERANCE. Si entra en une nef qui alloit à Venise, se surnommant le cheualier de la mort, pour l'espoir de son remede qui ne fondoit qu'en elle, & comme celuy



celuy qui desia en sentoît les accès en la vie, en vsurpoit le titre, & s'en reclamoit sien. Or n'ayant nulle nouvelle ny auertissement decelle qu'il cerchoit, n'en quelle contree elle pouuoit estre, se mit en ce vaisseau à l'auenture, tout delibéré d'employer vn an en ceste queste, pour s'asseurer de la vie ou de la mort de sa chere Niquee. Et au cas qu'il n'en peut auoir certaine connoissance, de s'aller retirer en quelque isle loingtaine, & escartee, pour y acheuer ses iours en ieusne & oraison au seruice de dieu, ayant ainsi perdu celle que plus aymoît en ce monde: laquelle il s'achemineroit de suyure au ciel si plus elle n'estoit en terre. En telle resolution fit ce voyage, rendant trop esbahis ceux de la nef de sa continuelle tristesse, sans apercevoir en luy vn seul point de reiouyssance. Quinze iours ou enuiron voguerēt par bon tēps, au bout desquelz la tormente les empoigna qui les porta plus d'une semaine à la mercy des ventz, tellement qu'ilz ne faisoient plus tous, tant qu'ilz estoient ne misē ne recepte de leurs vies. Vray est q̄ le cheualier de la Mort ne s'en soucioit gueres, estimant que ce fût par myssere dont il atendoit ou la mort prochaine qui le deliure-

roit de son ennuy mortel ou d'estre ietté en quelque terre inconnue, la ou il meneroit sa vie solitaire. A la fin de la tempeste ilz furent portez en vn port de Grece du costé d'Hongrie. Lors Amadis voulut descendre en intention de trauerser tout le Royaume par terre: & sur le mydi passant par vne forest auisā vne damoysselle assez belle apres d'une fontaine combien qu'elle fut pale & defaite. Elle beuuoit de l'eau au creux de ses mains quand il arriue & la salue: lors elle apperceuant en son escu l'ymage de la mort luy dit. Ha seigneur cheualier vous foyez le bien veru puis que vous portez celle que ie cherche tant pour derniere guerison de mes maux. Damoysselle respond Amadis, nous sommes donc tout d'un desir: mais il auient volontiers aux personnaiges infortunees de ne paruenir point à ce qu'elles desirent, d'autant que routes choses leur viennent au rebours. Il nous faudroit donc, dit elle, souhaiter la vie longue & heureuse à fin d'obtenir le contraire. Ouy mais, replique Amadis, comme seroit il possible à celuy qui a la vie en horreur. Or, dit la Damoysselle, ie vous prie cheualier puis q̄ noz volontez & intentiōs sont si cōformes, de me mener en vostre cōpagnie & ie

& ie vous serviray d'ecuyer & porter vostre lāce & escu. Vous sçavez bien que c'est cōsolation aux miserables de voir leurs semblables, A quoy Amadis : vous requerez de chose que iamais ie ne refusay a personne: beaucoup moins a vous qui me semblez meriter d'avantage: si montez sur vostre haquenee & nous en allons. Ainsi s'en vont, & pour tromper ses ennuyx par le chemin, il l'interroge qui estoit la cause de sa tristesse si grande, quelle luy declara estre mal traitement d'amour : Nous voilà (dit il) feruz tous d'un glaive, sinon que peut estre vostre playe est curable, & la mienne non. Alors la damoyelle : en cela ie croy que ne sommes non plus differens: car il faut que ie vous confesse ma simplese bien la plus estrange du monde, que ie n'auois en fantaisie de declarer onques a hōme. Je suis dame d'un chasteau qui n'est gueres distant de Constantinople: la ou il y a vn an ou enuiron q̄ ma mere me mena voir vn combat de deux cheualiers qui se faisoit deuant le palais de l'Empereur. La ie vy le confit espouventable representé au naturel, d'entre nostre vaillāt prince Amadis de Grece, & Furio Cornelio, qui me toucha si viuement au cueur tant pour la merueille du fait, que pour la beauté & disposition de nostre prince, qu'onque puis mon ame n'eut autre pensee ne desir: & me retiray incontinent à ma maison & cerchay tous les plaisirs dont me peu auiser pour diuertissement de ma passion, mais ce fut en vain. Amadis eut grand pitié de la damoyelle (qui luy dit que Finistee auoit nom) d'autant qu'il s'entendoit estre source de son mal, & luy disant que c'estoit dommage de sa belle ieunesse ainsi perdue en peine & torment : elle aiouste, que plus il l'a plaindroit encores s'il l'eust veüe auant qu'elle fust ainsi blesme & maigre de melancolie: car adonc elle ne cedit a femme ne fille de l'empire, hormis les princesses. Amadis luy recharge: qu'a son conte il ne enuidoit pas sa maladie sans remede & esperance: à quoy Finistee: vous ne connoissiez

pas dōc la folie des princes Grecz qui tiennent vne loy de ne sçay quelle loyauté qui ne leur permet d'aymer en plus d'un lieu. Ceste folie (dit Amadis) leur couste cher a ce que puis comprendre: par ce que toute leur affection racueillie en vn endroit cause le feu comme les rayons du soleil amassez au miroir ardent. Alors elle le pria de luy raconter pareillement son martire, & d'oster son armet pour se mettre plus a son aise. Ce qu'il fit esperāt qu'elle ne le reconnoistroit, tant il estoit passe. deffait & amaigry. Mais aussi tost qu'elle vid sa face (combien que fort changee) luy donna vn sursault de la semblance de celui qu'elle portoit empreinte en son cueur, qui luy va faillir, tellement qu'elle s'en alloit tomber si Amadis ne l'eust retenuë & arraisonnee dont luy pouoit venir ceste faillance soudaine. A à, dit la damoyelle, ne vous en esbahissez seigneur car vous ressemblez au prince Amadis comme vn œuf à l'autre. Lās que ie me treuve contente de vostre rencontre, veu noz maladies pareilles, & la semblāce que rapportez a celui que plus j'ayme que moy mesme, voire au bruit qui court de la perte de sa chere espouse, encores le suyuez vous en conformité de douleur: vray est que son tourment est mal fondé sur vne personne morte, veu que ceux qui se marient sont comme champions qui entrent en cap cloz ou ilz attendent la fin l'un de l'autre. Ouy mais dit Amadis aucunesfoys ilz y demurent tous deux, ce que ie croy que vostre prince voudroit luy estre auenu quand & sa Niquee. Ainsi deuisans cheminerent tousiours, & trouverent en leur chemin vn cheualier mort, & vn autre qui tiroit vne damoyelle par le bras, laquelle s'arrachoit les cheveux & lamentoit piteusement, & il la menassoit pour la faire monter sur sa haquenee. Ce que voyant Amadis print sa lance & son escu de Finistee auant que s'approcher, & si tost que la damoyelle l'aperceut luy escria: Seigneur cheualier pour la foy que deuez à Dieu deliurez moy de ce pau-

ce pautonnier qui à meurdry le preud'homme (que voyez-gisant) par trahison, pour m'enleuer & deshonorer. Amadis le somme incontinent de se deporter d'outrage enuers la damoyelle, & il luy respond (en montant sur son destrier) qu'il luy alloit enseigner à s'entremesler si auant des affaires d'autrui : si empoigne vne lance qui estoit appuyee contre vn arbre, laquelle au ioindre il tronçonna contre Amadis qui en recompense le fit sauter & bondir par dessus la selle emmy le pré : & estoit ia descendu pour luy delacer le heaume, & luy trancher la teste, quand deux autres suruindrent les lances baissées luy criant qu'il se gardast de l'offencer. A la course desquelz il gaudit tellement qu'il leur fit perdre leur coup, soudain remonte & les reçoit avec leurs lances qu'ilz esclatterent en son escu sans l'embrasser nom plus qu'une tour, mais il ataint l'un des deux sur l'espaule, qu'il entama bien un bon doigt de profond. Toutes-fois retournent sur luy furieusement, & il se deffend comme besoing luy estoit. A tât il oyait crier hault la damoyelle, & tournant vers elle son regard, aperçoit le chevalier qu'il auoit abatu qui la trainoit rudement par un bras, luy estant desia à cheval. Parquoy Amadis entre en colere contre ceux qui l'empeschoient de la secourir, tellement qu'il pourfend à un les yeux d'un reuers, & à l'autre abbat la teste de dessus les espales : puis court vers les tiers qui auoit couché la damoyelle sur le col de son cheval lequel le voyant venir quitte sa prise, & aise à sauuer sa vie à pointe d'esperon. Alors Finistee esmerueillée de la bonté de son chevalier, amene le palefroy à la Damoyelle, la conuiant de suyure celui qui alloit pour son droit : ce qu'elle fait, combien que lasse & rompuë, remerciant Finistee du bon secours d'elle & de son chevalier. Ainsi s'en vont apres Amadis, qui suyuant son homme en rencontre un autre qui le veut arrester, pour sçauoir la cause de la faute du premier. Lequel Amadis pria de ne le destourner du chastiment qu'il alloit faire

d'un malheureux paillard, & qu'il pourroit entendre le fait par les damoyelles qui venoient apres. Ce pendant le ribaut entra en vne forest, ou Amadis en perdit la trace : toutes-fois ne laissa à passer outre, tant qu'il entra en vne prairie pres d'un chasteau ou il trouue force gentils-hommes & damoyelles dancans : ausquelz il demande s'ilz auoient point yeu un chevalier fuyant deuant luy, à quoy vne d'entre elles qui estoit belle & de bonne grace luy respondit en riant qu'elle ne sçauoit qui seroit si fol de ne s'enfuyr deuant la mort. Si ie tenois (dit Amadis) vne beauté entre mes bras dôt la vostre me fait souuenir, ie jetterois au loing ceste laide figure que j'ayme. Si vous l'aymez tant (respond elle) gardez la pour vous, sans la presenter à ceux qui ne sont si las de viure que vous. Mais dites moy, poursuyt Amadis, si sçauiez nouvelles de celui que ie cherche : Eux ne tenans conte de luy respondre se remettent à la dance, de quoy luy se plaignant comme de gens rustiques & mal appris, l'un des gentils hommes (qui estoient huit en la troupe) luy dit qu'il tirast son chemin, s'il ne vouloit qu'on luy liurast le vray effect de l'image qu'il portoit. Venez, dit Amadis, & ie vous monstreray vne note que ne sçait point vostre menestrier. Sur ces entrefaites Amadis aise le cheval de son fuyard qu'un valet pourmenoit pres de la porte du chasteau : Si pique droit là pour trouuer son homme, & sans contredit entre en la court du chasteau, ou il voit le galand desia la teste nuë qui se vouloit desarmer, à qui il escrie. Damp Cheualier, voyci celui qui punit les raiisseurs de dames : l'autre à l'instant qui l'apperçoit gaigne vne châtre ioignant à la sale, criant à l'ayde mes amis à l'ayde : mais Amadis le suyit de si pres qu'il ne luy donne loysir de fermer l'huys, & sans grande resistance luy coupe la teste, laquelle tenant par les cheueux descend en la court, d'ou il entend un grand bruyt par le chasteau, c'est à sçauoir de chevaliers n'agueres dancans qui s'estoient venuz armer pour secourir

secourir leur compagnon quand ilz virent entrer l'estranger. Mais il eut loysir de monter sur son destrier & sortir dehors avant qu'ilz fussent prestz. Vray est qu'il ne fut gueres loing quand le ioignerent huit cheualiers & douze cabacerz avecques haches, contre lesquelz (luy qui en auoit trop veu d'autres) ne s'estonna en rien, ains en peu d'heure abbatit deux des cheualiers qui onques puis n'en releuerent, & aualla bras, oreilles, machoires aux gens de pied. Toutesfoys le nombre estoit grand contre vn seul, & craignant qu'on luy occist son cheual entre les iambes descendit, & en escrimant s'alla adosser contre la muraille du chasteau, pour n'auoir ses ennemys qu'en barbe : mais il eut grand peine a les soustenir iusques a la nuyt, sans le cheualier de rencontre que les deux damoysselles auoient informé de la querelle, qui a son arriuee faussa la poitrine a vn des cheualiers, puis se vint mesler parmy les autres l'espee au poing : de sorte qu'Amadis reprenant courage par son secours en tailla la motié en pieces, & l'autre deploya les iambes pour gagner franchise au chasteau. Amadis & son compagnon les suyuent, & à l'entree de l'esclaire rencontrent la Damoysselle de la danse a qui il auoit deuise en passant, qui luy dit : Helas bon cheualier si estes aussi courtois que vaillant, ie vous prie ne mettre tous mes gens a l'espee, & me donner les vies de ceux qui restent. Je les vous donne dit Amadis, mais dites moy qui vous estes. Je suis, respond, duchesse de Dalmatie nommée Darande. Ma dame (replique Amadis) ce n'est pas acte digne de vostre estat de supporter & fauoriser les trahistres rauisseurs de dames. Elle s'excusant qu'elle n'auoit eu aucune connoissance des crimes dont il luy parloit, les deux damoysselles arriuent, dont celle à qui on auoit tué le frere, voyant la teste de son ennemy, bien resiouye de sa vengeance, recite à la duchesse le cas en la forme qu'il auoit passé. Sur quoy protesta la duchesse que si elle en eust esté auertie elle eust puny le malfaiteur selon ses deme-

rites, sans tel danger & trauail des deux cheualiers estranges, ne telle perte de ses gens. Adonc elle pria Amadis de luy dire son nō, qui respondit qu'on l'appelloit pour lors le cheualier de la mort. Je le sçay tresbien par experience (dit la duchesse) & comme ceux la reçoient presente quis'atachent à vous : mais ie vous prie vous venir reposer pour ce iour en mon chasteau, & vostre compagnon aussi, vous assurant que (non obstant la fortune) vous feray toute la meilleure chère qui sera en mon pouoir. Amadis & l'autre pareillement s'excusans sur l'urgence de leurs affaires : elle luy dit qu'en sa faueur donc retiendroit en sa compagnie la damoysselle qui auoit esté outragée en sa terre, & la traiteroit si bien qu'elle auroit occasion de se contenter, Amadis remerciait grandement la duchesse & remercié par la damoysselle, prend congé & s'en va avecques Finistee & le cheualier qui l'auoit secouru, auquel il demanda son nom, qui l'ayant connu preux & vaillant (qu'il l'estimoit estre des princes de Grece) ne luy voulut celer qu'il estoit Lucidan de Numidie. Dequoy Amadis fut tresayse, combié qu'il ne se voulut faire connoistre pour lors : apres s'estre offert à luy de rendre la pareille quand l'occasion se presenteroit, se departirent pour tenir chascun son chemin, laissant la Dalmatie ou Darande se pourme-noit de ville en ville pour passer le temps, comme celle qui ieune estoit & orfeline de pere & de mere, & ne pensoit qu'a mener ioyeuse vie, sans se soucier de mariage, iacoit qu'elle en fust requise de maintz grāds seigneurs.

Comme Amadis de Grece & sa damoysselle Finistee reprindrēt leur chemin & de ce qui leur auint avecques la belle Angelee à l'ocasion d'un cheualier.

CHAP. XXVI.

Amadis de Grece & Finistee ayāt repris leurs erres, elle entra en grande opinion que ce fust celuy mesme
E que

que tant ardamment elle aymoit, veu les armes qu'elle luy auoit veu faire, qui n'estoient aysement croyables d'autre que de luy. Pource desirant en sçauoir la verité le mit sur ce propos & le cheuala de tous costez, sans en pouuoir tirer vn seul mot. Or auint que la nuyt prochaine comme il estoit endormy songeant en sa loyalle Niquee, il la reclama trois ou quatre foys en resuant. Ce qui l'assëura tousiours d'auantage, tellement que l'endemain comme ilz cheminoient (elle le pressant encores sur ce point) il luy respondit. Or ça Finistee qui vous m'eut de tant m'importuner de mon nom, veu que si i'estois cest Amadis de Grece que tant aymez, vous n'aurez nulle esperance de son amytié, à cause de la fidelité accoustumee des princes Grecz? Monsieur, respond, ie suis contente de ma seule pensee assise en tel endroit que mon ame s'y paist par vne satisfaction secrette. Et desirerois (si i'auois rencontré Amadis comme vous) luy faire loyalle compagnie, sans rien entreprendre sur sa loyauté enuers Niquee, ne laisser perdre du droit de mon honneur. Quand Amadis entendit la bonne & chaste volonté de Finistee, le cuer luy attendrit, & haussant sa lumiere, luy dit: Damoiselle vostre affection tant honneste m'a gagné & rengé à vous confesser que ie suis vrayement celuy que vous aymez si parfaitement. La pauvre pucelle à ce mot s'esuanouit incontinent, & tomba du haut de son pallefroy toute pâmee. Dequoy Amadis fort estonné, met aussi tost pied à terre, & la tire, pinse, & soufflette pour la faire reuenir: soy plaignant à fortune de ce que non contente de son principal torment à cause de sa Niquee, elle luy brassoit encores ces autres trauerses. Sur ces entrefaites voicy passer vn cheualier qui luy demande si s'amie est morte ou euanouye seulement: & il respond qu'il ne l'estime que pâmee. Ie m'en vois dont, dit l'autre, monter sur vostre cheual qui est plus frais que le mien pour vous aller querir de l'eau au plus pres pour la secourir. Amadis luy disoit qu'il

n'estoit mestier qu'il print tant de peine. L'autre respond que ce luy seroit plaisir, sinon qu'il yroit deuant, luy faite apprestier vn lit. Et ce disant, monte sur le destrier d'Amadis qui estoit grand & puissant, luy laissant vne meschante aridelle qu'il cheuaugoit en eschange: Si s'en va le cheualier au galop, se moquant du prince, qui ne se doutoit point qu'il luy deust iouer ce tour: & pour y remedier tourmente tant la damoyelle quelle reuiet de pamoyson, bien marrie de voir l'inconuenient auenu à Amadis à son occasion. Or, dit il, il nous faut aller apres essayer si nous le pourrons recouurer. Si monte sur le miserable grison qui n'auoit que la peau & les os, & fuyt le larron au trac. Lequel Amadis poursuyuat à la plus grād' haste que possible luy estoit, à l'ysue du boys, auise deux belles ieunes damoyelles assises pres d'une fontaine, & vn gentilhomme à genoux deuāt l'vne, qui luy dit à l'approcher, en riant: venez ça cheualier, ie vous prie, & m'emenez celuy qui est icy deuant moy. Amadis luy demandant la raison: Comment (dit elle, avec vn souzris) n'estes vous pas la mort? car outre la figure qu'en portez en vostre blason, vostre personne mesme y ressemble fort & la monture aussi: à quoy le prince qui entendoit qu'elle se railloit. Et pourquoy le deuroy-je emporter quand ie serois la mort? Par ce, respond elle, que long temps à que ce cheualier se vante qu'il est affolé de mon amour, & entre autres follies me prioit maintenant de luy faire ceste grace de luy ottroyer son desir, ou la mort: à ceste cause ie vous le liure pour m'en deliurer, vous requerant d'vsr de vostre office. Ce maistdieux, respond le prince, si ce fust bié mon office, i'eusse commencé à l'exercer en moy-mesme, qui en ay aussi grād besoin qu'homme viuant. Adonc le cheualier se leue qui luy demande s'il se voudroit maintenir plus vray amant que luy: qui luy respondit, qu'vn temps auoit esté qu'il l'eust soustenu contre tout le monde, mais à l'heure n'estoit plus champion que de la mort, à cause

cause de la parte de son suget. Dequoy le cheualier se print à rire & dit à la pucelle (qui Angelee auoit nom) madame iugez vous les paroles de cestuy beaucoup plus sages que les miennes? Il me semble, dit elle, que generalmente tous ceux qui aiment, sont folz, & pour me garantir de ce mal ie fuy & euite l'amour: mais (se tournant vers Amadis) cheualier descendez icy pour donner laoyne à vostre roucin, si ne luy voulez dōner la mort q̄ ne pouez pas à vous mesme, ou d'auature la voulez prēdre de luy qui en est vne vraye anatomie. L'empeur ne se peut garder de rire des soubriquetz de la damoyelle, toutesfois serroit ses leures pour ne le monstrier, dequoy elle s'aperceuant, recharge: vrayement vous sçauiez mal la contenance de vostre personnage de la mort, q̄ ne decouurez ce beau ratelier de dens: l'aymerois mieux (respōd Amadis) descouurir mon cheual qu'un pāillard m'a emmené cauteleusement en me laissant le sien. Le cheualier ayāt entendu qu'il estoit moreau, fort & corsu, le luy monstra en vn destour, & l'homme dessus songeant creux adonc Amadis bien ioyeux le prie de luy prester le sien pour aller à la recousse, de peur qu'il ne luy eschappe de vitesse: mais le mignon n'y voulut entendre, & demandant gages d'assurance, ne se vouloit fier en la foy de gentilhomme qu'Amadis luy iuroit, quand la damoyelle courtoise & bien aprise, dit à son courtisan qu'elle luy en respondoit. Dequoy Amadis la remerciant affectueusement, monte dessus & broche vers son hōme qui resuoit encores tout fiché à qui il escrie: Paillard rend moy mon cheual, si tu ne veux en recevoir la punition presente, l'autre qui se refuseille de sa mufardie: vela le cas, dit il, vous estes homme de conscience qui m'en amenez encor' vn autre pour la surualeur du mien. Ce pendant Angelee qui regardoit Finistee, & la veoit de trop beau trait & tant decouloree, luy disoit: M'amy c'est grand simplesse à vous de suyure ceste compagnie qui vous diminuē ainsi vostre en bō

point & viue couleur: Beaucoup plus respond Finistee l'estimeriez-vous, si vous sçauiez ce qui en est: mais ie ne le puis aban donner sans la vie. Ha (dit Angelee) ie croy que vous estes du nombre des amoureux à ouyr vostre discret langage. Adonc iettāt leur venē du costé des cheualiers qui commencerent leur carriere, rompent leur propos & voyent comme ilz s'entreuiennent chocquer aux lances, dont l'autre adresse au poitral du cheual d'Amadis ou il luy en met pres de la moytiē dedans le corps, & Amadis luy faulse escu & haubert, & l'en uoye les piedz contremont fort nauré: puis trop irē du cheual qu'il auoit tué soubz luy va vers luy qui le receut fierement. Lors se plaint l'amoureux à la dame d'auoir presté son destrier à vn mauuais escuyer qui desia l'auoit laissé mourir. Et elle lors respondāt qu'elle luy en rendroit vn meilleur. Je ne le diz pas à ceste fin, respond, ie le tiens pour bien employé, estant mort souz vostre commandement: voire suis prest (si le trouuez bon) d'aller secourir le cheualier mesme de ma personne. Ne vous en mettez en peine (luy dit Finistee) car il en sortiroit bien en eust il vingt telz à combattre. Je le croy bien (dit la pucelle) s'il est tel que son escu chante. Assurez vous en replique Finistee, qu'il est le cheualier de la mort pour tous ceux qui s'y frottent. Ce disāns elle voyent que l'autre ne faisoit plus que parer aux grands coups que luy tiroit Amadis, entre lesquelz il luy en toyse vn si lourd sur le heaume qu'il en demeura tout estourdy & Amadis le voyant chanceler le vient hürter pour luy ayder à tomber, & de ce pas luy arrache l'armet & luy tranche la teste: Soudain monte sur son bon moreau, & retourne vers le cheualier à qui il presente le sien. Ce que la pucelle ne voulut consentir pour la bonté qu'elle auoit veüe presentement en luy: disant qu'il n'estoit raisonnable que si bon cheualier fust mal monté; & qu'elle recompenserait l'autre. Aussi qu'elle le prioit en reconnoissance de

ce plaisir ne faire encores son deuoir enuers elle qu'il exploitte si mortellement, par-ce qu'elle ne desiroit encore mourir. L'Empereur la remercie du cheual, luy promettant valoir si l'occasion s'offroit & au respit de la mort qu'elle requeroit, qu'elle s'en pouoit asseurer comme de celuy qui la receuoit de telles figures de beauté que de la sienne, & estoit en trop piteux estat pour rendre la pareille. Elle le pria instamment de vouloir heberger ce iour en son chasteau qui estoit pres de là : mais il s'excusa de peur d'estre conneu. Et s'en va son chemin avec son escuyere, layssant Angelee, à qui depuis il donna vne ville en payement du cheual, & la maria au filz du duc Alafont, l'ayant trouuee si gracieuse & liberale à sa necessité, & si facetieuse en son parler qu'elle l'auoit incité & contraint à rire malgré qu'il en eut : ce qu'il n'esperoit pas luy deuoir auenir de lan.

Comme le prince Florisel fut porté par tempeste en l'Isle de Garye & des aduentures estranges quiluy auindrent.

CHAP. XXVII.

Florisel sortit de Trapezonde ne menant quant & soy que Busando le nain de l'empriere Niquee pour luy seruir d'escuyer, lequel estoit bien aise d'aller en la queste de sa bonne maistresse. Il s'embarque au premier port, commandant au patron d'aller razer la coste de la routte de Liquie : estimant que si fortune ny estoit auenuë en nauigant il en sauroit quelques nouuelles sur les passages. Parquoy si tost qu'il descouuroit quelque Isle en mer il faisoit tourner là & s'enqueroit de sa queste : & tant en escuma & visita, qu'un iour il en apperceut vne qui depuis a esté submergée d'eau comme souuent la mer couvre maintes terres, & en descouure d'autres : Si fait adresser celle part ou ilz trouuerent vne nef à la rade, mais il n'y auoit personne dedans, Pource Florisel fait tirer son cheual, & armé de toutes pieces monte dessus, & Busando sur son courtaut, cōman-

dant au reste aux gens du vaisseau de l'attendre. Adonc entre en l'isle, ou il n'eut gueres cheuauché qu'il rencontre vn chemin fourcheu qui l'arresta, ne sachât lequel il deuroit prendre. Busando pique vn peu à trauers champs, ou il apperçoit vn viel berger gardant son troupeau : dequoy il faut signe à Florisel qui le suyt & arraisonne le berger qu'elle terres s'estoit & qui en estoit seigneur, qui luy respondit, que l'isle s'appelloit Garye, & y dominoient deux geans freres, fiers & cruelz outre mesure : l'un nommé Brosdolf, & lautre Bazaran qui mettoient tous ceux qui arriuent là, ou a mort, ou en prison : & si vous dis que Bazaran qui est le plus ieune (toutesfoys le plus corpulent) y a deux iours qu'il amena le plus beau butin que ie vy onques : c'estoit vne dame & vne damoyelle de beauté nompareille. Et il print le chemin à la fenestre pour aller voir son frere en son chasteau, enuoyant au sien sa proye par l'autre voye, souz la conduite de trois cheualiers avec quelques gens de pied. Florisel tressaillit tout oyant le conte du vieillard, doutant que ce fut l'éperiere Niquee, & la peu celle Anaxare. Si laisse là le berger, dūant qu'il alloit sçauoir si c'estoient celles qu'il cerchoit : qui luy voulut conseiller de se retirer plustost, de peur de trouuer la mort, comme tant d'autres par chacun iour. Florisel s'en va gagner la droite voye, au bout de la quelle il vid vne forteresse taillee en vn roc, en vne profonde vallee qui estoit espouventable a regarder, si descendent & trouuent d'entree vne longue caue estroite, ou ne pouuoit passer qu'un cheual de front. Parquoy dit à Busando qu'il ne bougeast de là, tandis qu'il iroit voir quel il faisoit la dedans. La dieu ne plaise (respond le nain) que ie vous fausse si tost compagnie, moy qui entray en la porte de l'enfer de madame Niquee vostre mere, ou l'Empereur Amadis n'osa : perdrais-ic icy le courage, qui ne peut estre qu'une caverne de brigandz ? Au nom de dieu soit (dit Florisel en riant) ainsi entre en la caue, & Busando apres.

apres luy , & vont tant qu'ilz oyent en vn destour le bruit de gens parlans ensemble. Là va Florisel & baïsse la teste souz vn guichet , par lequel il veid plus de quinze vilains mangeans en vne cuisine orde & obscure comme vn droit enfer , ausquelz il crye : qui est la dedans ? & vn d'eux luy respondit , qui est dehors qui le demande ? Cest moy , dit Florisel , qui suis cheualier estrangier , voulant sçauoir quelles damoyelles vous auez ces iours cy amenees ceàs. Qui vous meut beau sire de vous en soucier , dit l'un des vilains : Pour amender l'outrage qui leur pourroit auoir esté fait , respondit il . A la malheure , dit l'autre , estes venu icy vous tourmenter du fait d'autrui qui ne vous touche en rien , pour estre payé de ce qui vous est deu . Ce disant enteste vne coiffe de fer & ses compagnons apres , & sortent sus Florisel , qui les attendant estoit descendu de cheual , commandant à Busando de le mener dehors & l'attendre , lequel s'en va en trop plus grād effroy qu'il n'y estoit entré . Alors viennent les truans assaillir le gentil prince qui les reçoit de telle viuacité qu'ilz gagnerent bien peu sur luy , au moyen du lieu estroit , qui ne les presentoit pour le plus que deux de front. Ces coups furēt si pesans qu'il n'atrainoit cabacer sans le fendre iusques au nez ou plus auant & s'il portoit a nud , ne faillloit a faire d'une teste deux pieces , en sorte qu'ilz ne durerent gueres contre luy . Le nain qui s'estoit retiré dehors oyant le chapelis des haches si dru & menu qu'il sembloit d'une forge , conceut telle frayeur qu'il fut prest deux ou trois foys a s'enfuyr & quitter là son maitre . En fin il print vn peu meilleur auis de laisser ses cheuaux & grimper amont le roc & se cacher en quelque trou . Florisel ayant massacré ces marrouffes si bien qu'il n'en restoit plus que deux qui gagnerent le haut , par-ce qu'il tenoit le costé de la porte , tellement que nul ne peut sortir pour en porter les nouvelles. Il s'assid sur vne pierre pour se reposer vn peu , puis appelle plusieurs foys Busando

qui ne respond point . Lors marche auant , & ouure vn huys de la forteresse qui n'estoit fermé qu'a vn courail , & auise vne vieille naine laide cōme vne diableffe portant maintes clefz en sa ceinture . Laquelle le voyant ainsi taint de sang sus son harnois , fut si effrayee qu'elle n'eut force d'aller en auāt ny arriere & Florisel l'approche luy demandant gracieusement si elle luy diroit rien des nouuelles d'une dame & vne damoyelle que n'agueres on auoit amenees leans : elle ne faillit à s'enquerir pourquoy il en parloit , & comme il auoit peu venir iusques la , veu la garde de la porte , & sachans de luy que leur resistance ne l'auoit sceu empescher , demeura toute estonnee sans mot sonner , puis luy dit : En bonne foy cheualier vous meritez tant (à ce que ie voy) que me ferois tort de ne vous faire plaisir a mon pouuoir . Pourtant ie vous veux mōstrer la dame & la damoyelle que desirez voir , souz condition qu'apres auoir parlé vn peu a elles , vous sortirez incontinent du lieu ou elles sont , à fin que lon ne sache que ie vous y ayes mené : autrement ce seroit fait de ma vie . Ne vous souciez de cela , dit Florisel , car l'exposeray la mienne pour la defence de la vostre . Grand mercy , dit elle , mais ce que lon peut faire seulement , c'este folie de hazarder la personne quād l'honneur ne nous y oblige point , car vous deuez sçauoir que les gēs de ceans sont sans foy ne vertu , pource vous faut vser de diligence , de peur qu'ilz ne nous surprignent , à quoy Florisel : vous me semblez femme si auisee que ie veux suyure du tout vostre conseil . Or venez donc dit elle , & va ouurir vne petite porte de fer , luy disant qu'il entrast en ceste prison obscure , & y trouueroit ce qu'il cherchoit . Le prince qui en auoit si grand desir , & qui ne se deffioit de la naine , entre hardiment , & soudain elle clost l'huys d'un grand verrouil sur luy , tellement qu'il ne voit leans nō plus qu'en noire nuyt . Parquoy luy esclie qu'elle laissast l'huys ouuert afin qu'il veist la dedans a se conduire : vous deuez

auant auoir mieux veu à vous conduire (respond la fauce nabotte) apres auoir sacmenté les gens de ceans. A, a, dit il (congnouissant qu'elle l'auoit trahy) vieille matine ta deformité tant marquee par nature m'auertissoit assez d'une ame pareille logee en cest horrible vaisseau, si ie n'eusse esté si simple de bien presumer de toy, & m'y fier. Or sus dit elle, aprenez a estre plus sage, & meurrissez vostre cerueau trop ieune & folastre, tandis que ie m'en vois à mes affaires. Adonc acheue de fermer l'huy à la clef & s'en va au haut du chasteau auertir huit cheualiers qui y estoient, de la prinse qu'elle auoit faite. Si s'arment incontinét pour aller voir s'il y estoit plus que craindre, & trouuerent les vilains gisans & saignans comme veaux en vne boucherie. Puis prindrent le destrier & le courtaut, mais ilz ne virent point Busandor tant bien il estoit caché en sa taniere: & il les voyoit à cler, & ne cessoit de pleurer croyant que son maistre fust occis. La nuy contraignit les cheualiers de se retirer, deliberez d'attendre le retour du geant leur Seigneur, pour faire du prisonnier à sa volonté: leur semblant que ce pendant il estoit en seure garde: lequel se tourmenta fort leās estimant qu'on l'y lairroit mourir iusques à la minuit qu'il trouua quelque siege à taton, ou il s'assit ostant son armet qu'il met aupres de soy, luy souuenant du chasteau des quatre chaussees, & priant dieu le vouloir tirer hors de cestuy autant à son honneur que de l'autre. A tant voit ouuir vn haut souspiral, & abaïser vne lanterne, par laquelle la vieille racourcie l'apperçoit le vilage descouuert, qui luy sembla aussi beau qu'elle en eust iamais veu, & luy dit qu'elle luy vouloit apporter vne paillace à fin de reposer plus mollement en ceste belle chambre: qui respondit n'auoir occasion de se fier en rien qui procedast de sa main, veu l'estat en quoy elle l'auoit mis. Si est-ce, dit elle, que le remede de vostre danger (qui n'est moindre que de la mort) ne gist qu'en ma puissance: duquel vous estes deliuré si me voulez aymer. Le prince cuyda force-

ner oyant le propos de ceste diablesse, allez dit il carongne, allez vous faire fourbier à tous les diables qui vous ressemblent. Dequoy elle irritée d'auantage, s'en va & reuiet incontinent: mon amoureux farouche voicy du parfyn que vous apporte pour vous donner plus grand plaisir à dormir, lors iette en la caue vn pot allumé plain de souffre & autres puanteurs, & luy dit: vous portez bien icy tousir sans auoir auallé plume. Ainsi le laisse en aussi mauuaise nuit qu'il eust passée de sa vie à raison du peu d'espoir qu'il auoit de sa deliurance. Or le nain Busando estoit dedans le roc, ou il faisoit de fort piteux regretz à Niquee la iugeant heureuse d'estre morte auant que de receuoir ce deuil mortel de son Florisel. Puis à Amadis, disant que son ame desia tant esbranlée par la perte de son espouse, sortiroit sans delay si elle sentoit la seconde de son filz. O dolanté Helcine veue de tel mary! O infortuné Rogel si tost orfelin d'un tel pere. Quant à moy ie grauiray encores plus haut pour mieux descouuir tout ce qui ce fera au chasteau: & si demain ie connois sa mort certaine, j'auray peu de peine à pourchasser la mienne, en me laissant choir du haut de ce roc en bas.

Comme Florisel sortit de la prison ou la naine l'auoit enfermé & entra en vn beau verger, & de ce qui depuis luy auint.

CHAP. XXVIII.

Florisel qui estoit en prison (telle qu'avez entendu) n'ayant moyen de prendre repos, se pourmenoit doucement par la caue, suyuant la muraille: tellement qu'il aperceut quelque lueur de la lune (qui lors estoit pleine) ou il s'adresse & trouue vn petit huy de fer: auquel il employe toutes ses forces pour l'ouuir, mais il n'y auoit ordre. Parquoy se met à quatre pieds cherchant s'il trouueroit rien de quoy s'ayder, & de fortune trouue vn gros coin de fer, qu'il empoi-

emprigne & en besongne si bien qu'il rōpt la serrure, & entre en vn beau iardin auant le point du iour, si se va coucher sur des sieges herbuz, gay & esbaudy comme demy resuscité de mort a vie : & de ce premier point en esperant vn autre de sa deliurance, fait vn cheuet de son armet pour reposer vn peu, apres auoir regratié le haut dieu de ses merueilles. Et apres qu'il eust dormy vn petit somme, il commence en songeant a parler a Niquee, puis a Helaine, & debatre contre la vieille nabotte qui l'auoit si mal traité. Les deux damoyelles que le geant auoit amenees leans de nouueau, auoient esté logees en vne chambre au dessus de la caue, respondant sur ce iardin. Auint qu'a l'heure que le bon Prince reposoit en resuant, la plus ieune estoit à la fenestre de ce costé, qui ouyt le cheualier se plaignant, & le regardant apperceut son harnois tout sanglant, qui luy fit penser que c'estoient ses playes qui luy causoient ces souspirs & gemissement. Le iour croist, & elle void d'autant mieux, avec vn sursaut que ce fut Filisel de montespin son frere, dont elle appelle sa mere qui toute vestue estoit couchee sur vn lit: luy disant qu'elle ne pouoit croire que son frere ne fust en ce verger. La dame vient a la fenestre, & iettant l'œil sur le cheualier, lās dit elle, c'est Florisel de Niquee que ie voy & nō autre. Dieu quel miracle monstrez vous icy pour voz paaures creatures de leur enuoyer ce secours non esperé, le plus certain qui leur eust peu venir. Elle ne se peut contenir plus longuement sans l'appeller. Florisel, Florisel, A à cher neveu quelle fortune vous a mis là. Qui oyant ceste voix assez haute, s'esueilla en sursaut, & regardant vers la fenestre, reconneut incontinent la princesse Siluie, sa grande amye du tēps de sa premiere iunesse. Mais il fūt si esbahy de la voir qu'il ne la scauoit bonnemēt s'il dorroit encores, & que ce fust vne visio. Toutesfoys se leue de la, & s'en va au pied du mur souz la fenestre, d'ou il iage plus certainement sa Siluie, a qui il dit: O ma che-

re dame quel astre nous a ainsi assemblez, vous enserree en haut, & moy en bas? A à Florisel, dit elle, i'estois plongee au desespoir, & ie commence a bien esperer en vous voyāt: ma dame, respond, ce m'est vn grand heur d'auoir occasion de vous faire seruice en me deliurāt moy-mesmes, mais les murs de ce iardin sont si hautz que ie ne voy moyen de saillir d'icy. Il vous faut auiser si auez dequoy me tirer la haut avecques vous, & puis nous conterons de nostre fortune. Je croy qu'auuez quelques draps a vous coucher, & n'estes pas voluntiers degarnies de cousteaux ou ciseaux, regardez à les tailler de long assez larges & nouër vn bout à l'autre, & se lyer encor de voz iartiers & ceintures, par ce moyen vous tirerez premierement mes armes, puis ie monteray moy-mesmes & dieu nous ayderay au demeurant. Les dames executent son auis, & ce pendant il se desarme & leur garrotte son harnois qu'elles tirent a mont: puis il s'aide tant de piedz que de mains, en sorte qu'il gaigne la fenestre, & les va accoller l'vne apres l'autre amourensement, & estonné de la pucelle (qui Leonide estoit nommee) demande à Siluie qui elle estoit. Mon amy, respond elle, du prince Anastarax i'ay eu filz & fille, dont voyez vne piece: l'autre est vn filz desia de dixsept ans, qui a esté nōmé Filisel de montespin à cause que i'en acouchay à la chasse des porcz espicz. Or deuez scauoir que ie n'agueres estant à la fontaine des amours d'Anastarax, & luy à la chasse, accompagné de son filz, suruint en ce lieu vn fier geant qui nous empoigna ma fille & moy & le pauvre Darinel (s'estans mes damoyelles sauuees dedans le boys) lequel nous a enuoyez icy, allant querir son frere aisié pour le mettre au choix de nous deux pour femmes ou amyes, prenant pour luy la seconde: ma dame, dit Florisel, la tenant tousiours embrassée, & baissant par foys (selon le cours des propos) vous auez entendu par Darinel (car il l'auoit enuoyé vers elle) le triste accidet de ma dame ma mere,

pour laquelle ie m'estimois mis en queste, apres mon seigneur & pere tellement que recherchant les Isles, ie suis venu en ceste cy ou i'entendy vne prise de dames, qui me fit entrer en ce lieu doutant que ce peut estre l'Emperiere Niquee, & la pucelle Anaxare, selon le rapport qu'un berger me fit de voz beautez, & apres auoir combatu les gardes de ce chateau, vne vieille nabotte souz couleur de bonne foy, & de me monstrier les dames prisonnieres, me logea hier en ceste caue, ou i'ay passé vne tresmauuaise nuit. Apres il luy conta les amourettes de la vicille, & les parfums odorans, dequoy elles se mirent fort à rire: vray est qu'auant autre chose Siluie luy auoit demandé (à cause de la peinture de ses armes) s'il estoit nature, dequoy il l'auoit ailleuree. Et ainsi passoient le temps ensemble grandement reconfortez de leur infortune. Mais Florisel (qui n'auoit mägé tout le iour precedēt) s'enquit si elles n'auoient rien dequoy repaistre: & Leonide luy apporta vn plat ou y auoit quelque volaille, dont elles n'auoient sceu manger le soir de melancolie. Si seruerent tous trois dessus reprenans courage, & burent assez ioyeusement ensemble, selon la qualite du lieu, disant Florisel à Siluie: Ma dame que ie me sens tenu à dieu qui me fait ceste faueur, puis que mes pensees ne sont paruenues à la fin de vostre fruitiō: au moins de me prester les opportunitiez de contenter mon esprit à vous faire quelque seruice. Sur ces deuis il la baisoit volontiers (comme les premieres affections ont vne ardeur) qui ne se peut esteindre: & elle le vouloit refuser, tant pour le debuoir d'honesteté, que pour exemple à sa fille: mais Florisel se fondoit sur la possession du tēps de leurs amourettes à Tirel, quand ilz portoient l'habit pastoral luy & elle, & appelloit les arbres & ruisseaux en tesmoignage, dequoy ilz rioient de bon cuer. Puis il s'adressa à Leonyde qu'il accolla par plusieurs foyz disant: O belle cousine que vous causerez de perilz trop plus grands que cestuy ou nous sommes presentement. Aussi

cesle prophetie tomba sus Rogel de Grece comme l'histoire vous dedura cy apres, qui fut seruiteur affectionné de sa beauté: Or dit alors Florisel, il est temps que ie m'arme pour atēdre le hazard tel qu'il plaira à dieu nous enuoyer. A quoy elles se diligentent de le seruir.

Du cruel combat de Florisel contre le geant Baxaran & ses cheualiers.

CHAP. XXIX.

A Peine estoit Florisel commencé à armer, quand la faulxie vieillotte survint pour voir les dames, qui ouurit l'huyz soudain, & si tost qu'elle voit Florisel, & il s'en aperçoit d'un fault la va saisir, de peur qu'elle n'en allast donner auertissement auant qu'il fust acheué d'armer. Mais la meschāte se voyant entre ses mains commença à crier & glatir comme vn mar mōte, & desesperément qu'elle mist tout le chasteau en effroy: parquoy il fut contraint de la prendre par les cheueux, & la laisser choir le plus doucement qu'il peut dedans le iardin, & il s'arme en diligence avec l'aide des dames, qui peu l'auancoient tant estoient esperduēs de crainte & frayeur. Quand il fut prest, descend incontinent en bas pour ne se laisser assieger en la chambre, & entre en vne grand' salle ou il ouyt bruit de gens, & y treuve huyt cheualiers, les vns desia armez, les autres à demy: ausquelz il dit qu'il les venoit chercher pour les mettre hors de peine de suyure le cry de la guenō. Dam cheualier (respond l'un d'eux) vous soyez le bien venu, pour estre payé contāt de vostre temerité, mais vous (dit Florisel) de voz cruantez & trahisons. Ce disant, descharge vn tel coup sur la cime de l'armet de celuy à qui il parloit qu'il le pour fend iusques aux yeux: Dequoy les autres trop irritez luy courent sus de tous costez, tellement qu'il n'auoit iamais eu meilleur besoing de s'ayder de tous ses membres. Si se mesle entr'eux, & fiert à dextre & à senestre, aualant bras à l'un, teste à l'autre: dont il fit vn peu redoubter ses coups, & se faire large: toutesfois il receut des coups & horions

horiōs innombrables. A quoy bien luy seruit la bonne trempe de son barnois, qui estoit des plus dures du monde : c'estoit merueille d'ouyr retentir leur chammailliz en ceste salle : c'estoit chose horrible de voir le pauë arrolé de sang, & semé de pieces de harnois. Mais l'un d'eux s'auisa pour auoir meilleur marché de luy de crier à ses compagnons sortons, sortons & me laissez faire. Dequoy ne se firent gueres prier, & estoit l'intentiō de l'auteur de ceste retraite d'enfermer Florisel en la sale, lequel les suyuit de si pres qu'ilz ne peurēt exēcuter leur dessein, & gaigna cest auantage estant dedans la porte de ne pouoir estre assaillly que d'un à la fois : qui luy ayda à reprendre aleine, en parant & soustenant quelque temps, dōt il auoit fort grand mestier. Et apres auoir pris ceste forme de repos, recommence (cōme tout fraiz) à leur dire : A ceste heure paillardz vous mourrez tous de male mort & les charge d'une furie telle que s'il n'eust du iour combatu en sorte qu'il ne leur fut possible de le soustenir : ains se mettent en fuite par la cour du chasteau, & luy apres, qui oyant les dames en vne galerie reclamans Dieu à sa faueur, reprend tel courage qu'il saute puis ça puis la, faisant de ces mastins vne horrible boucherie, tant qu'il ne luy en demeure vn seul debout en la place. Adonc s'assiet sur vne pierre pour soy reposer, & siluie luy demande comme il luy estoit de son corps, craignant que la tainture de ses armes fust de son sang : ma dame, respond, dieu m'a tenu en sa sauuegarde, pour la iustice de vostre querelle, la mercy duquel ie n'ay nulle playe. Elle luy conseilloit de monter en haut pour soy venir desarmer & refreschir. Mais à l'instant il entend vn grand tintamarre à la maistresse porte du chasteau : c'est à sçauoir du geāt Bazaran qui venoit auant son frere en haste pour depescher le galand, de qui l'un des vilains de la garde luy estoit allé toute nuit porter les nouuelles, & s'estoit auancé à fin que Broldolf à sa venuë ne trouuast leans occasion que de tout plaisir avecques les

dames, sans q̄ la feste fut troublee de meurdres ou combatz. Or trop remaint de ce que fol pense, comme il apparut à l'endroit du geant, à qui vn des valetz qui s'estoit caché durant le conflit, s'enhardit d'aller ouuir, oyant à la grosse voix de taureau que c'estoit son maistre, à qui il dit à l'entree : Seigneur à la bonne heure estes arriué pour combatre vn diable qui est ceans, & autre ne peut estre veu ce qu'il a fait de carnage & destruction. Sus, sus, dit Bazaran, coquin mène moy droit ou il est, que ie ne le laisse trop languir. Quand il est en la court ou il voit ioncee de cors & membres de ses gens, à peu qu'il n'enrage de mal talent puis auisant Florisel qui se leuoit pour luy venir au deuant, s'escria : O Iupiter que tu me donnes maigre suget de vengeance pour si grande perte. Grand mastin (dit Florisel) tu conte sans ton hoste : car tel cuyde venger sa honte qui l'accroist, & tes faux dieux ne te sçauoient garantir de ma main guidée par le vray dieu du ciel, non plus qu'ilz en ont preserué ta malheureuse canaille. Bazaran souffloit & ietoit la fumee espee par ses nazeaux de l'ardeur dont il brusloit, & luy dit : A chetive creature n'auray ie autre satisfaction que de ta vie pour tout le dommage que tu as fait ceans? Gros animal (respond Florisel) tu sçais bien qu'il n'est pas raisonnable que ta miserable troupe aille à tous les diables ou ie les viēs d'enuoyer, sans leur capitaine. Le geant perdit patience & sans se coiffer que d'un morriō, estant armé de grosses lames d'acier degaine vn grand cimenterre, & vint à Florisel qui ne pouoit eschapper de mort, si l'en eut ataint à plain coup, mais il estoit stilé aux adresses necessaires contre telz monstres, ayant bon pied bon oeil, pour se desrober de leurs coups, comme il fit à cestuy que Bazaran luy ramenoit sur la teste. Et l'eut fendu iusques à la ceinture : si le lance à costé, & le cimenterre descend sur le carreau de la court, dont il fait saillir le feu & volle hors des poings de son maistre. Florisel ne faut en se detournant de luy dōner vne

iartiere qui luy couppa le muscle : tellemēt
 que quand il voulut marcher pour releuer
 son glaive si diligemment ne peut que Flo-
 sel ne luy donnast vn autre coup sur le bras
 dont il le vouloit prendre, & ne le peut sau-
 uer son gros braçal, qu'il ne luy incisast
 deux grosses veines en bon barbier, dont le
 sang pissoit, comme d'une fontaine. Adōc
 Siluie qui estoit es fenestres de la galerie,
 voyant Florisel marcher contre luy, crie,
 qu'il laisse saigner ceste beste qui perdra la
 vie d'elle mesme, sans qu'il mette plus la
 sienne en danger. Ce qu'oyant Bazarā, le-
 ue son regard vers elle, & sentant nauré à
 mort par l'effusion de son sang, d'une rage
 treme luy dit: Faulse affectee, tu es cause de
 de ma mort: adonc luy darde son cimeterre
 qui par la volonté de dieu passa entre elle
 & Leonide sa fille, & alla entrer vn demy
 pied dedans vne pierre dure: elles tombent
 de frayeur en la place. Alors Florisel qui
 en pensoit vne des deux morte, va comme
 vn lion enragé vers le geant tenant son es-
 pee à deux mains, dont il luy tranche l'au-
 tre iarret tout net, & le grand animal tum-
 be fut le carreau, menant aussi grand bruit
 que la ruine d'une grosse tour. Ce fait Flo-
 risel monte en haut pour s'asseurer de ses da-
 mes, lesquelles il treuve comme demy mor-
 tes à terre en leur seant, se regardans l'une
 l'autre. Le haut dieu soit loué, dit il, puis
 qu'auons deffait noz ennemys, sans perdre
 nul de noz amys. Or entrons en quelque
 chambre pour vn peu noz reposer. Ainsi
 s'en alloit le long de la galerie quand ilz
 rencontrerent vne grande geante vieille ri-
 dee, qui estoit mere de Bazarā & de Bro-
 dolf nommee Batalaze: laquelle ayant veu
 de sa chambre la mort de son filz estoit en-
 tree en ceste forcenerie (l'affection naturel-
 le enforçant son aage) de s'aller attacher
 au merdrier au dens & aux vngles. Et pre-
 mier en hurlant hideusement le vient saisir
 au corps, & luy elle, vous eussiez veu vne
 plaisante lute, mais à la fin Florisel luy don-
 na vn tour de iambe qui la coucha souz luy
 elle pourtant ne laschoit la prise tant qu'il

fut cōtraint de luy marteler la teste a coups
 de poing garny de gantelet, & l'ayant ainsi
 estourdie se leue & la trayne par les che-
 ueux en la prochaine chābre, fermant l'huis
 sur elle avec vn verrouil par dehors. Or
 des l'heure que Florisel poutsuivant les che-
 ualiers vint en la court du chasteau, Busan-
 do qui estoit haut iuché le reconneur, &
 tout reconforté se couloit tout bellement
 en bas: mais la suruenue de Bazarā le fit
 retourner en son nid: duquel ayant veu la
 fin telle que des autres descend hardiment,
 & se vint ieter aux piedz de Florisel à l'in-
 stant qu'il enfermoit la geante, luy disant:
 Aa, monsieur, comme vous portez vous:
 lāsie vous auois pensé mort. Tout va bien
 Busando, respond il, vien voir les dames qui
 sont en ceste chambre: ilz sy en vont, &
 dieu sçait les admirations que fit le nain
 voyant la princeste Siluie & Leonide sa fi-
 le: lesquelles dirent à Florisel qu'il falloit
 fermer les portes du chasteau & s'asseurer
 de la valetaille qui estoit leans: par ce que
 l'autre geant Brodolf ne tarderoit gueres
 à le venir caresser, Busando y va avec luy,
 & montans en vne haute tourelle du por-
 tail: descoururent vne grosse meslee de
 gens en la campagne, & Brodolf appa-
 rent sur tous de plus de quatre piedz.
 Dequoyumba au cueur de Florisel que ce
 pouuoit estre Anastarax venant en quesse de
 sa femme. Si descend legerement & entre
 en l'escuyrie ou il trouue son cheual que Bu-
 sando luy selle en diligence tandis qu'il cer-
 che vne lance. Puis sort & Busando ferme
 la porte apres luy, & s'en retourne vers les
 dames à qui il recite ce qu'ilz auoient veu
 de l'eschauguette: qui leur en fit autant pen-
 ser qu'à Florisel, que c'estoit son cher ma-
 ry qui venoit à sa recouffe. Hée dieu (disoit
 elle) fut il oncques vn tel cueur que celuy
 de Florisel de Niquee: est il possible qu'un
 corps humain porte plus de travail qu'il
 en a soustenu au iourd'huy. Iesus Christ
 vueillez preseruer & garder le bō champiō
 de vostre foy, la perle de tous les cheualiers
 que sa magnanimité ne luy tire le dernier
 souf-

souspirant son cours naturel. Sur ceste priere la geante Batalaze cognoit & tempestoit en la prochaine chambre ou lon l'auoit enserree. Dequoy Busando tout effrayé se mit à genoux les mains iointes, suppliant le createur qui les auoit ce iour deliurez des parties de Lucifer, le vouloir garantir de celles de Proserpine. Les dames le voyant en ceste deuotion, combien qu'elles eussent leur part de la peur, ne se peurent contenir d'en souzrire. Puis ilz oyent la vieille marmotte recommençant sa iappetie au iardin : de laquelle ayant entendu le fait par les dames, il se met à la fenestre, & luy dit : ma belle dame ne vous deconfortez ainsi : regardez moy ie ne suis pas le cheualier nierz qui a refusé ceste nuyt vostre amour : ie suis de vostre taille, & paraenture de voz parens du pais des cinges & magotz, qui desire grandement vostre bonne grace. La vieille guenon hausse sa veuë vers luy, & de despit se leue, & luy jette des caloux du iardin. A a, dit il, ce sont amours rechignees : c'est le vieil ieu, gens qui s'entrayment pierres s'entrerucent. Les princesses ryoient à gorge deployee des bons propos de Busando le nain à la naine qui les entretenoit la ioyeusement.

De la brane bataille du Prince Anastarax & de Filisfel son filz contre le geant Broldolf & du secours que Florisfel leur donna.

CHAP. XXX.

VOUS auez entendu le recit que fit la Princesse Siluie à Florisfel de la forme de leur prise. Or ses Damoyelles qui s'en estoient fuyes dedans le boys racontèrent au Prince son mary & à son filz la fortune qui estoit auenuë en leur absence. Qui s'allèrent de ce pas embarquer, & seurent par quelques pescheurs la route que tenoit le vaisseau qui emportoit leurs Dames. Si le suyirent à la plus grande di-

ligence que possible leur fut, tant qu'ilz aborderent en l'Isle de Garye, à la saison que Gazaran vint en son chasteau qui rien n'en auoit veu ne sceu. Ilz n'arriuerent pas du costé ou estoit la nef de Florisfel, mais par vn païs qu'ilz rencontrerent aux champs furent asseurez de la prise des Dames. Parquoy s'acheminans vers le chasteau ou lon leur disoit qu'elles estoient, apperceurent le geant Broldolf venât accompagné de plus de trente cheuaux : vray est que la plupart des cheuaucheurs n'estoient armez que d'espieux & iasques pour la venerie, ne se doutans d'aucune rencôtre. Aussi les deux princes n'auoient avec eux que demy douzaine de gentilhombres qui leur faisoient compagnie à la chasse quand le meschef auint. Or a l'approcher Anastarax s'adresse à Broldolf à qui il dit : Geant c'est toy qui as enleué ma femme & ma fille, comme vn trahistre & voleur : Si me les ren presentement ou ie te puniray selon tes demerites. Tu as menty (respond Broldolf) c'est mon frere qui les a conquises, & ie m'en voys esbaudir avecques celle qui plus me viendra a goust. Adonc Anastarax (qui plus n'en peut oyr) broche contre luy la lance baissée, & se rencontrerent si viuement qu'ilz rompēt tous deux, puis mettent les mains aux espées (estant le geant fort esbahy de celuy qui l'auoit peu soustenir) & s'entre charpenterent d'une estrange façon. Ce pendant Filisfel s'adresse au plus eminent de la troupe, à qui il fourre son boys au trauers du corps. Chacun de leurs Cheualiers fait son deuoir d'abatre son homme a l'arriuee : mais quand se vint à la meslee ilz furent enuahis de tant, qu'ilz eussent eu fort a souffrir, si ce grand nombre eust esté bien armé, combien qu'Anastarax de sa part arrestoit Broldolf sus le cul : & Filisfel de montespin faisoit merueilles pour son aage : en sorte que plus de quinze Garians gisoient desia sur l'herbe. Or voyant trois ou quatre des veneurs leur maistre combatant à part contre vn seul qui luy resistoit si vaillamment, le viennent avecqs dardz & iauelotz assaillir : tel-

tellement qu'ilz luy tuerent son cheual, dont il se trouua en grand peril, si Filisél (qui par fois gettoit l'œil sur luy) ne s'en fust apperceu, qui y courut, nonobstant tous ceux qu'il auoit deuant luy: & donna à son arriuee si grād coup d'espee au geant sur la iointure du bras dont il tenoit son coustelas que le poing luy cheut en la place. Lors Filisél le hurte de costé & l'enuoie par terre, prenant son destrier par la bride qu'il meine a son pere qui se defendoit brauement cōtre trois ou quatre: mais Filisél les escarta bien à sa venue, & luy donna loysir de remonter. Adonc retrouuent le geant debout tenant son glaiue en l'autre main qu'il manioit assez puissamment pour enfoncer le plus fort armet du monde (iaçoit que non de telle dexterité qu'il faisoit auant de la droite) Filisél le va escarmoucher d'agilité & adresse, pendant qu'Anastarax va au secours de ses cheualiers, desquelz trois estoient meurdrez lachement par la multitude de ceste canaille: autant en restoit encores tous a pied qui auoient grand besoing d'ayde. A tant viennent deux cheualiers luy couper le chemin & s'attacher a luy: puis autant de vilains avecques halebardes le charger par derriere, tellement que le prince & les siens estoient en piteux estat, quand voicy arriuer Florisél a bride abatue, criant Grece, Grece, & monstrant la teste de Bazaran fichée au bout de sa lance, qui trop espouuenta les Griens en voyans l'un mort & l'autre manchoit. Adōc la iette parmy eux & de sa lance en abat trois auāt que rompre. Puis se fourre ou estoit la plus grande presse qu'il esclaireit bien de son espee, n'asfenant homme a droit a qui pour le moins il n'auallast vn membre. Et auisant le geant qui combattoit luy vient escrire: Faux brigand c'est fait de toy, aussi bien que de ton frere de qui ie t'ay apporté la teste. Dieu ne peut plus endurer tes outrages & inhumanitez. Filisél qui pensa que ce cheualier luy rauiroit sa gloire, surprend Broldolf estonné de ceste nouuelle, & se cou-

urant de son escu (comme il estoit a pied) luy va fourrer son espee souz la cuyrace dedans le ventre iusques a la croisee. Adonc le geant iette vn ruissement aussi espouuenta-ble qu'un lyon, tōbant a la renuerse. Ce que voyans ses gens, deslogēt l'un deça, l'autre dela, la pluspart se sauue en vne mōtagne. Et Anastarax s'en va à Florisél, luy disant: Cheualier à qui nous deuons les vies ie vous supplie nous dire qui vous estes. A, a, respond Florisél, (qui le vient embraser in'esconnoissez vous vostre compagnō Florisél de Niquee? A ce nom Anastarax hausse sa visiere, disant qu'il auoit eu tort certainement de ne le connoistre à ses faits nōpareils. Adonc suruiuent Filisél à qui se renouellent les accolades. Or nous en allons, dit Florisél, au chasteau ou vous trouuez ma dame Siluie & Leonide saines & sauues (qui leur fut redoublement de ioye) dont luy dit Anastarax: Monsieur, le ciel a reserué tous les actes plus illustres pour vostre grandeur. Vous entendez que ce fait excède tout pouoir de reconnoissance, sinon en ce qu'il vous plaira commander à moy, & aux miens pour vous faire seruire. Laissons cela, respond il, long temps à que j'ay esté payé auant la main par ma dame Siluie de tout ce que luy pouois rendre d'obeissance, en bouquetz & chapeaux de fleurs, quand nous estions bergers à Tirel. En cheuauchant vers le chasteau ensemble avec deux de leurs cheualiers seulement, Anastarax exclama, O Emperiere Niquee à qui suis-je plus redevable qu'a vous? qui en vostre viuant par l'enfer de voz amours m'avez donné le moyen de ioir de la gloire de ma Siluie, & ores à l'occasion de vostre mort, nous enuoyez secours, qui nous redonné vne seconde vie. Ainsi deuissans ensemble arriuerent à la porte du chasteau.

Comme les princes Florisél & Anastarax arriuerent au chasteau: & de la mort de la geante Batalaxe.

Les prin-

CHAP. XXXII.

LEs princes arriuaus au chasteau, trouuerent les portes fermees, & pour hurter à puissance & rehurter, nul ne leur venoit ouurir. Dequoy ilz furent fort troublez, craignans que quelques gens ny fussent entrez durans leur bataille qui voussissent tenir fort, & mal traitassent leurs dames. Car elles & Busando estoient si loing de la porte qu'ilz ne pouuoient oyr le bruit & y eussent eu long temps visage de boys, sans la geante à qui vn laquay de leās auoit deuerrouillé l'huy de la chambre ou Florisel l'auoit logee. Et oyant hurter si lourdement, vint à la porte cuydant sans doute que ce fut Brosdolf son filz, à qui elle parloit en ouurant : luy disant, venez mon filz, venez à la bonne heure venger la mort de vostre frere, & l'iniure qu'un meschant cheualier m'a faite. Ainsi elle ouure, & les voyant entrer, & comme elle estoit abusée, s'ensuyt, criant horriblement, & va saisir vn grand coustelas, avec lequel elle reuiet rechercher Florisel, que bien elle reconneut & luy en alloit descharger vn coup à deux mains de toute sa force sur le chef qu'il auoit nud, sans son escu dont il se couurit, ietant encores Anastarax le sien au deuant : duquel elle fit deux pieces, & si entra fort auant en celuy de Florisel, d'ou elle ne le pouant retirer, s'ensuyt derechef vers la sale, ou Florisel la suy, & la trouue tenant vne halebard dequoy elle luy tire de grands coups & le fache fort, d'autant qu'il ne la vouloit blesser estant femme, & si en faloit faire vne fin. Parquoy apres vn coup qu'elle luy tire il entre de pied & demain sus elle, luy donnant du pommeau de son espee sur la teste, dont toute estourdie rebucha sur le paue. Et vn des cheualiers d'Anastarax (ennuyé de la peine que ceste mastine donnoit) l'egorge comme vne truye, dequoy Florisel ne fut pas content, disant que l'espee ne se deuoit employer en lieu d'ou elle ne rapportast honneur. Mais Anastarax l'excusa, parce que telz monstres ne meritoient de iouir du priuilege des autres femmes. Ce

pendant leurs dames estoient en merueilleuse crainte, oyans ceste nouuelle noise en bas, & n'osoient sortir, ne Busando pareillement pour scauoir que c'estoit. A tant Florisel mene les princes en la chambre ou il les auoit laissees. A qui le nain vint ouurir tout gay & faloit quand il entendit sa voix. Je ne vous scaurois exprimer les baisers, accolées, le silence des personnes toutes transportees de ioye incōprehensible, les pleurs, puis les ris, les actions de grace des vns & des autres à Florisel. Lequel laissant le pere & le filz avec la mere & la fille, prend avec luy les deux cheualiers pour aller faire receuë de tout le chasteau, à fin d'y loger & sejourner en seureté : aussi pour chercher le pauvre Darinel : mais ilz trouuerent vne partie des chambres fermee, & vne prison ou ilz entendirent les voix de plusieurs personnes lamentans & gemissans, à qui Florisel annonça salut & liberté, qu'il ne restoit que les clefs, desquelles il luy souuint auoir veu vn grand clavier à la vieille marmorte. Si retournent en la chambre des dames, à qui il dit le besoing qu'il auoit de faire la court à sa maistresse du iardin. Lors se met à la fenestre d'ou il la void veautrer en terre comme vne beste, & il l'apelle : ma mignonne ho, voicy vostre amoureux de la nuyt passée qui vous veut bien traiter, & vous prie de venir à luy par la caue (ou vous le logeastes) luy apporter les clefs que vous auez pendues à vostre ceinture. La meschante quand elle l'oyoit, glapit, se roule & sabouille sans respondre vn seul mot. Adonc Busando se represente, disant à Florisel qu'il ne scauoit pas le stile & le iargon dont on vsoit au Royaume des marmotz & guenōs d'ou il estoit comme elle : qu'il luy quitast la place, car c'estoit son droit gibier, ce qui luy fut acordé, & luy deualé par la fenestre, lequel la vieillotte sentant se leue sur ses pieds toute eschauffee, & le va empoigner encores pendant à la corde, & le frota en homme de son país. Busando en endura vn peu (voulant trancher de l'honneste) sans vouloir outrager vne femme : mais elle le bastoit

bastoit si lourdemēt qu'il se lassa du ieu. Si la saisit au poil, & elle aux ongles, & se tiraillent, conignent, & egratignent sans remission. Aucunesfois luttent aux bras, puis se saisissent au corps: c'estoit vn tresplaisant spectacle de ce combat, semblable à celui d'un chien & un chat: mais à la fin la meschante vint mordre le pauvre Busando en la main, si ferme qu'elle la luy cuyda troncir. Dont il s'escria comme un enfant, & Florisel descendit en haste qui les separa, & print les clefs de la Naine: avec lesquelles il passa par la caue, & alla deliurer les prisonniers, dont Darinel estoit, qui fut tout rauy en voyant son bon seigneur, & à chef de piece qu'il peut parler disoit: qu'est cecy dieu eternal, dors-ie, ou si ie veille? est ce songe ou verité que ie vous voy mon bon prince comme Castor & Polux suruenans à la tempeste. Sus, sus, Darinel, dit il, resiouy toy: ta maistresse Siluie fait bonne chere la haut avec Anastarax son mary, & Filisfel & Leonide. Les prisonniers s'agenouillerent deuant luy hommes & femmes crians tous d'une voix, viue nostre seigneur & nostre pere: car à la verité ilz n'attendoient que la mort, ou quelque seruitude aussi miserable. Or leur dit Florisel: mes amys prenez ces clefs, & me chassez de ceans toute la harpaille qu'y trouuerez encores de la geanterie, & auisez à vous traiter de ce qui sera ceans comme du vostre, & que ceux mettent la main à la paste, qui y scauent quelque chose. Son commandement fut accompli volontairement par ceux qui n'eussent peu mieus souhaiter. Desquelz les vns se tuerent en cuyfine, les autres visiterent les caues pour seruir les Princes à soupper: lesquels ce pendant s'esbatoient avecques le Nain, & la Naine que les dames apriuoiserent & recoifferent. Et quand Darinel y arriva, le créèrent arbitre, & appointeur amiable de leur differend, sur lequel y eut mainte risce, tant au recit des parties qu'aux sentences du iuge. L'heure du souper venue ilz furent fort bien seruis de tout ce qui se trouua en la maison, là ou ilz seiournerent

huit iours en grand soulas ensemble, & l'histoire les y laisse pour deduire ce qui passa ce pendant en autres lieux.

Comme Fenix de Corinte & Astibel de Mesopotamie rencontrent deux Damoyelles, & quelle en fut l'issue.

CHAP. XXXII.

Desia vous a esté deduit comme Fenix de Corinte & Astibel de Mesopotamie apres auoir repris leurs cheuaux se remirent en leur chemin avec la damoïelle du palefroy. Puis ilz logerent la nuyt en la maison d'un forestier, ou Fenix laissa la damoyelle qui estoit sa cousine. Au moyen de laquelle ilz y furent fort bien recueillez & traittez. L'endemain au matin prindrent congé de leur hôte, & accompagnés de leurs escuyers vont reprendre leurs erres, lesquelles ilz ne suyrent longuement, sans rencontrer deux damoyelles vestues de robes de fine escarlate, bandées de large passemens d'or. Elles estoient montées sur deux bonnes haquenees blanches, & estoient toutes deux fort belles, cointes & iolyes. Les cheualiers les saluèrent, à qui elles rendirent leur salut courtoisement. Lors Fenix les arraisonne qu'elle part elles tendoient, qui luy respondirent, à la cour de la royne Sidonie, pour voir les auentures estranges qu'on nous à dit y auenir tous les iours. Dieu en soit loué (dit Fenix) de nous auoir donné si bonne compagnie, car nous y allons aussi: nous en irons plus seurement (dirent elles) souz vostre rempar. Et ainsi s'en vont ensemble leur chemin, deuïsant à grād plaisir chacun à sa chacune: s'estant Fenix emparé de la plus belle, à qu'il commença à dire que son malheur l'auoit amené en ce pais, si elle n'auoit pitié de luy qui estoit desia feru & naïré profondement de sa beauté. Elle luy demande de quelle contree il estoit, & oyāt qu'il estoit natif de Grece, aussi suis-ie moy, respond elle, mais voyons quelle playe c'est que dittes auoir receu de ma main.

Ce n'est

Ce n'est pas blessure qui se voye (dit Fenix) des yeux corporelz, ains seulement se comprend en esperit, c'est à sçauoir amour. La damoyelle (à qui il sembloit beau & de bonne grace) poursuit à l'interroger comment elle pourroit entendre la verité de son mal. En vous mirant (respond Fenix) & voyant vostre beauté qui a puissance de tuer les hommes. Je ne pensois pas, dit elle, estre si pestilentieuse de ma veüe : mais confessez moy beau sire si vous touchez point de parété aux princes Grecz, luy respondant que si elle replique que d'autât plus trouuoit estrange qu'il fit la court aux damoyelles veu la complexion contraire du lignage de l'Empereur. Comment (dit Fenix) en estimez vous de plus amoureux au monde? Non (respond elle) mais leur amour est tousiours lié & attaché en vn seul lieu, sans se communiquer a plusieurs, ne seruir a autre que celle qu'ilz aiment. A quoy repliquant Fenix) qu'il estoit vrayement frappé à ce mesme coing, & qu'il n'auoit entores aymé autre qu'elle. Elle ne le vouloit croire qu'il eust tant attendu a gouter les delices de Venus, quand il luy confessa auoir bien senty l'eguiillon de la beauté de Diane, qui l'auoit attiré en son Isle. Alors la damoyelle luy remonstre qu'il est de la condition du paon qui deffait sa rouë en regardant ses piedz comme il rompoit ses pensees de Diane, par la veüe de sa l'aideur. Fenix oyant ceste subtile rencontre, luy escrie que pour dieu elle ayt mercy de luy, en luy auanceant le remede d'esperance: d'autant que sa face l'auoit naïré, & sa langue faceticuse mettoit le feu a sa playe. A quoy elle (qui Arlaye auoit nom) il fieroit mal a vne pucelle d'estre sans pitié enuers ceux qui la meritent. Pour ce ne voudrois denier sedours a vostre maladie si ie pensois estre bien recompensee de mes peines & vacations. Luy offrant corps & ame: i'entends (dit elle) que me seruiiez de bon chirurgien a la playe que ie pourrois receuoir de vous, sans forligner en la loyauté de vostre race. Fenix luy iure & promet autant qu'elle en veult: dont ilz prindrent vn baiser sauoureux pour les arres du marché. Ce que voyant Astibel qui preschoi la sienne de tout son sçauoir, laquel le luy prestoit l'oreille assez ouuerte. Quoy dit il, ma damoyelle, serons nous plus facheux à ferrer que noz compagnons? ne passeros nous point nostre contract cōme eux? vous voyez qu'ilz marchent deuant, & nous seruent de lumiere qu'il nous faut suyure. Elle persuadée semblablement de la grace & disposition de son champion, luy donna vn baiser sur le champ pour closture de compte. Ainsi cheminerent en deuis ioyeux, ne desirans que la nuyt pour prendre possession des choses conuenues, laquelle esperans plus secrette & paisible hors le grand chemin de la cité, se destournerent à costé, ou ilz n'eurent gueres cheuauché qu'ilz trouuerent vne riuiere non gueable en cest endroit, tellement qu'il leur salut aller trouuer vn pont pour passer. A l'autre bout duquel y auoit vn chasteau d'ou ilz oyrent sonner vn cor à l'approcher, & vn escuyer leur venir au deuant, qui leur defendit de par son maistre Grandoin le fier de ne passer outre, s'il ne vouloient accomplir les conditions du passage, qui sont telles: qu'un cheualier doit laisser son escu ou combattre: & s'il meine dames les liures vne nuyt au seigneur Grandoin pour le peage: ces loix cy ne me semblent point bonnes (respond Fenix) i'ayme trop mieux aller chercher autre passage que perdre ma damoyelle: L'escuyer luy respondât qu'il ne la perdrait que pour vne nuyt seulement, & que Grandoin ne les aymoit iamais plus longuement. Quant à moy, dit Fenix, ie ne preste point ainsi mes amours, & n'ay que faire de voz mauuaises coustumes: à vous & à mon compagnon le debat, il me sembleroit trop grand simplet de hazarder les choses seures. Astibel estant de cest auis: c'est bien fait à vous (dit l'escuyer) d'euitier le danger: à dieu vous command, ie m'en voys rapporter vostre response. Adonc ilz tournēt bride, & les damoyelles

selles quand & eux : mais elles n'estoient contentes de la couardie de leurs cheualiers & alloient toutes pensües sans plus deuïser ne rire avec eux : se repentans d'auoir donné leur amour à si lasches personnes . De quoy Fenix se doutant, demande à Arlaye qu'elle occasion elle auoit d'estre si triste, qui luy respondit, à dire vray, pource qu'elle le connoissoit alors autant couard que bel & auenant : & quil se pouuoit asseuer d'estre aussi loing de sa grace qu'il en auoit esté pres . Autant en dit de sa part Greste sa compagne : de quoy Fenix & Astibel se rioient l'un à l'autre, s'excusans enuers elles que c'estoit folie d'auenturer vn si grand bien que leur amour au combat, ou il n'y a que gagner pour eux s'ilz estoient vaincueurs. Toutesfois elles ne prenoient leurs raisõs en paiemēt disans qu'elles ne pouoiēt appeller autrement q̃ couardie de s'en fuyr d'un passage de peur de la iouste : & que si elles n'auoient tesmoignage de leur bonté tel que de leur beauté ilz pouuoient bien pourchasser autres amyes . Si estce vn grād tourment pour nous, respond Fenix, que nous differer & retarder le bien de vostre faueur quasi present . Ainsi debatans rencontrerent deux cheualiers menans aussi deux damoyelles asses passables, qui les conuient à la iouste, souz condition que les vaincueurs auroient toutes les quatre. A quoy respondit Astibel, qu'ilz en auoient chascun assez d'une, & que la cause du combat estoit mal fondee . Or à dieu donc (diēt les autres) puis que voulez si peu faire pour voz dames que ne leur monstrez vostre valeur . Fenix qui auoit ceste opinion de ne combattre volontiers à credit & sans raison : leur donna encore ceste charge : Cheualiers il me semble qu'avez assez forte partie à vaincre sans vous mettre en danger d'auoir chacun à faire à deux pour vne. En bonne foy (dit l'un) ie ne vous deffieray sur ceste querelle, car vous auriez le droit de vostre costé. Et ainsi se departent, demourans Arlaye & Greste d'autant plus conformees en leur opinion contre leurs cheualiers . Par-

quoy s'arresterent vn peu derriere, se plaignans de l'extreme lascheté qu'elles auoient veüe en eux pour la deuïsieme foyz consultants de reseruer la fleur de leur ieunesse en meilleur endroit, sans la permettre cueillir de mains si indignes . A quoy elles se resolurent, accordans ensemble comme deux testes en vn chaperon (aussi estoient elles seurs . Ce conclu, dient à leurs champions que dieu les vueille conduire, & qu'elles ont à faire autre part . Ceux à qui il faisoit mal de perdre ce beau butin, contestent avec elles, que c'est vn tour d'inconstance, veu la promesse & la foy qu'elles leur ont iuree . Nous pensions, dit Arlaye, aller en compagnie de cheualiers, que nous auons conneuz estre femmes : si nous faut pourueoir d'hommes pour la seureté de nostre conduite . Alors Astibel s'adresse à Greste : ayez patience iusques a demain, & ie vous feray sentir par effect que ie suis vray homme. Il le faut auant, respond elle, experimenter contre les hommes . Ma dame (dit Fenix à Arlaye) ne nous abandonnez pas si legerement sans mieux nous connoistre. Et quand vous pourray-ie mieux esprouuer, respond . A la premiere occasion iuste de combattre, dit il, à laquelle le prend-homme ne doit reculer non plus que d'entreprendre chaudement vne querelle sans cause. Sur ce differēd auquel les deux seurs persistoient pour ce departir, voici suruenir quatre cheualiers à pointe d'esperon, desquelz Grandoin le fier estoit le premier, & les trois autres ses cousins : qui s'estoient armez en diligēce au rapport que l'escuyer leur auoit fait de la beauté d'icelles. Si leur esclierent Mauuais cheualiers quitter vous conuient ses damoyelles que n'estes pas dignes de mener, ayans fuy la lice pour elles à mon pont . Surquoy Arlaye leur dit : mes amys ie suis marrie que n'avez accepté le combat raisonnable d'un contre vn quand il vous fut présenté : car de ceste charge mal partie vous pourrez tousiours excuser. Non, non (respond Fenix) mieux vaut s'offrir au grand peril par raison : qu'au moins.

moindre follement & sans consideration, ce disoient ilz en prenant leurs lances & escuz de leurs escuyers. Puis broche Fenix contre Grandoin, & froissèrent tous deux l'un sur l'autre : mais Grandoin & son cheual cullebuterēt de la puissance du coup, & Fenix en perdit les estriers qui se harpa au col du sien, & soudain se reietta en selle (comme bon besoin luy fut) pour soutenir le cousin de Grandoin, qui n'eust failly à le porter par terre, mais il ne le meut des arçons. Dōt Arlaye trop esbahie, dit à sa seur, qu'elle auoit eu grand tort de dedaigner & desestimer son champion, & elle aussi le sien. Car Astibel auoit de sa lance percé l'espaule à iour à son aduersaire, au retirer de laquelle il rendit l'ame, & estant demeuré à cheual deuant luy, auoit fait faillir le coup à son cousin qui le suyuoit. Parquoy se viennent rencōtrer de nouueau à la iouste, & leurs lances volerent en esclatz. Puis tirēt les espees, desquelles ilz s'entretastent fort brusquement. Fenix de son costé tenoit le sien de pres, tandis que Grandoin estoit couche souz son courtier sans se pouoir releuer. Brief noz deux cheualiers les accoustrent tellement en peu d'heure, qu'ilz leur firent confesser la victoire, & iurer de n'ayder iamais à maintenir mauuaises vsances. Ce fait Fenix met pied à terre & delace l'armet à Grandoin, luy disant qu'il se rendist, & fist tel serment que les autres s'il vouloit sauuer sa vie, ce qu'il fit promptement, puis le tira de dessous son cheual, & l'amenant aux damoyelles la teste nue pour leur monstrier sa deformité incroyable, leur dit: Certainement que si l'eust veu au pont a descouuert comme a l'heure qu'il n'eust refusé le conflit en faueur des belles qui souffroient trop a coucher avecques vne si laide personne. Les damoyelles s'en rirent, & luy & ses cousins remercierent Fenix & Astibel de la courtoisie dont ilz vserēt enuers eux en leur victoire, s'offrās toute leur vie à leur faire seruice, & noz cheualiers leur promettans amytié se departirent, eux emportās le corps de leur cousin.

Alors Fenix vient à Arlaye luy demander si elle le veut ainsi laisser, qui respond auoir bien changé de volonté par l'experience de sa vertu, & que maintenant ne le voudroit auoir perdu pour tout l'or du monde. Et autant en ptotesta sa seur Greste d'Astibel son cōpagnon: disant que la verdeur qu'on void en vn cheualier à la meslee promet beaucoup plus d'exploit aux dames & de bon seruice, que des iouuenceaux douilletz & effeminez Gardez (respond Astibel) d'estre aussi bien abusée en cecy qu'auiez esté en l'autre. Quoy qu'il en soit, dit elle i'ay maintenant plus de peur d'estre abandonnee par vous que ie n'auois vouloir de vous laisser. A quoy Astibel: ie ne sçay qu'il en auiedra veu que vous estes si muable. En telz deuils cheuaucherent iusques à iour failly, qu'ilz s'escarterent vn peu du chemin, & allerent en vne petite vallee herbuë à l'abry d'une colline: ou ilz estendirent leurs manteaux sur l'herbe & souppeerent de ce que les escuyers auoient de provision, lesquelz se retirerent loing de leurs maistres avecques les cheuaux, lesquelz passerent la nuyt ioyeusement avec leurs damoyelles, qui les tindrent beaucoup plus vaillantz qu'au parauant par ceste espreuue, & tant trouuerent de contētement les vns avec les autres, que de trois moys n'allerent à la cour, ains se donnerent du bon temps ensemble, se pourmenans par l'isle qui fort estoit delectable, & gaignans pris & honneur en maintes belles rencontres: là ou nous les faut laisser, pour traitter de ce qui ce pendant auint en la cour de la Royne.

De la triste vie que Darayde menoit en l'amour de Diane.

CHP. XXXIII.

DArayde estant pres de l'obget de son desir, accroissoit de iour en iour son ardeur sans voir ouuerture d'aucune esperance. Si s'en complaignoit à Garaye en leur priuē, qui luy remonstroit d'attendre l'heure, & s'armer de patience: mais

F

elle

elle ny estoit forte à prendre pour la vehemence de son affection. Souuent s'en alloit seule aux iardins faire ses doleances, & en l'escorce des arbres engraui le nom de Diane & le chiffre du sien (Agefilan) & les entrelaçoit de laz & neudz infiniz. Surquoy Diane entra en grand' resuerie ne le pouant dechiffrer, & elle ne l'auoât à fait. Et quelquefois la Duchesse Lardenie qui l'aymoit cordialement la surprenoit en ces piteux discours : & la voyant pleurer & soupirer tendrement en auoit telle compassion qu'elle s'offroit à faire pour son allegence tout ce qu'elle pourroit auiser. Qui fit penser plus d'une fois à Daraïde si elle luy descouvroit sa passion: mais à la fin delibera de nō, craignant de tout perdre (si elle l'auoit trouué mauuais) ce qui estoit en termes d'espoir estant conduit secretement. Si est-ce que vaincuë par son importunité tant affectueuse, elle luy confessa que c'estoit amour qui ainsi la tormentoit. Lardenie en auoit grand pitié, par ce qu'elle luy voyoit la couleur passer & l'embonpoint diminuer à veuë d'œil, & ne luy eust gueres differé le remede s'il eust esté en sa puissance. Et tant la poursuyuit, voulant sçauoir pour quel chevalier elle souffroit, qu'elle luy declara que c'estoit vne dame, dont sa maladie demeurait incurable. Finablement luy nomma Diane, avec vn soupir qui sembloit luy deuoir rompre la poitrine. Ne vous affligez ma mignonne (dit alors Lardenie) vous estes plus en sa grace que pucelle du monde, & vous y pousseray & maintiendray tousiours de plus en plus à mon pouuoir. Et ce disant l'embrassoit & baisoit mille fois : qui seruoit de quelque reconfort à Daraïde, sentant les caresses d'une si belle fille & de si haut lieu. Toutesfois luy disoit: A a ma dame que vous m'obligiez de l'honneur & bon traitement que me faites, lequel ie ne recognois qu'en fâcherie & ennuy q'ie vous donne. Mais comme pourrois-je faire autrement qui suis la plus infortunee amante de la terre: contre qui semble que le dieu d'amour mesme ait conspiré pour me plen-

ger au fond de la malheur, torment & desespoir. Car quel soustien peut auoir le desir amoureux sans esperance, qui est le laid de sa douce nourriture? Et que peut esperer celle à qui il a présenté vn obget non capable d'aucune ressource de mutuel plaisir? Fille aymer fille, hélas qu'est-ce sinon estre amoureux de la Lune qu'il faudroit prendre aux dentz? Las Pasiphae ne fut iamais si malheureuse pour auoir aymé vn taureau, combien que beste indigne de son affectiō. Ne Myrrha semblablement en son amour incestueux. Ne Pigmalion amoureux de son ymage que Venus luy viuifia & anima. C'estoient ordes & honteuses concupiscences: mais assouuies de leur ardent appetir, & le mien estant sans tache de vice est sans effect de son ardeur: qui me minera & consumera sans remede, ny ayant moyen de iouissance aucune qui le sçeut estaindre ny amortir. Lasse chetive que feras tu donc? retirer ton cueur du lieu ou il est vouë, dedié & destiné, c'est entreprise vaine & impossible. Que te reste ormais, fors que languir en pleurant, & gemissant continuellement ta playe incurable, & attendant la mort qui seule peut mettre fin à ton martire extreme. Or vn iour qu'elles estoient ensemble sur ces cōplaintes (car la duchesse espioit curieusement ses retraittes) la princesse Diane y suruint qui ne se peut tenir de larmoyer, la voyant estenduë au giron de Lardenie comme demy morte, les yeux tant mortifiez de pleurer, la couleur tant blesmee sa parolle foible, ne mouuant bras ne iambe non plus qu'une statuë. Las qu'est cecy (disoit la belle princesse) ma Daraïde, qui a il ceans qui vous cause tristesse? m'amie estes vous point ennuyee d'estre icy sans voir les compagnies qu'avez acoustumees? ne vous contraignez point, ie vous prie, & allez voir la Royne quand vous en aurez enuie: car ie veux vostre bien & ayse, non moins que le mien propre. La dolente Daraïde ne parloit point, & la duchesse print la parolle pour elle, disant: Ma dame ie voy bien que n'entendez pas son mal, veu l'appareil

pareil qu'y pensez appliquer. Helas elle languit la pauvrete aupres de vous par vne passion inestimable, & banie de vostre presence ne viuroit pas vn seul iour. Diane qui l'aymoit ardamment (toutesfois avecques le frein de l'opinion qu'elle auoit de son sexe & qualite) ne pouuoit comprendre ceste violence d'amour de fille à fille : neantmoins se met à la reconforter, puis la baise doucement, qui ne fut sans retour de Daraïde : en luy succant le miel de sa bouche pourpree, & apres vn profond soupir dit: Las ma deesse comme vous me tuez en me guerissant. Sus ma mignonne (respond Diane) resioüillez-vous, car si c'est pour mon amour que vous endurez (comme m'a dit Lardenie) ne faites qu'aüiser le remede, & ie le vous donneray. A ce grand mot Daraïde ne fut pas sourde, mais eut soudain la langue si serree qu'elle ne peut rien dire, seulement prend la main de Diane qu'elle baise à longue pause. Apres elle luy dit : Madame vienne ores la mort quand elle voudra, elle me trouuera preste à la suyure puis q' i'ay receu de vous ceste precieuse parole, de laquelle ie vous supplie estre memoratiue. Diane l'en assurant, elle continuë: ma dame en vertu de ceste faueur, si tost que ie seray en aage de porter armes à la mode de nostre nation, & recevoir l'ordre de cheualerie, j'espere vous faire tant de seruice que me la confermerez. La princesse se riât de voir ce gentil courage, luy remonstra qu'elle se contentoit bien de son seruice domestique, que mestier ne luy estoit de s'exposer en danger pour acquerir sa bonne grace, de laquelle elle se deuoit tenir seure plus que personne viuante. D'autant me puis- ie donc vanter (respond Darayde) de passer tous les viuans par armes de vous fauorisee, en l'exaltation de vostre nom & gloire: voire en sorte que la fameuse Alastraxeree ne mettra l'enchere sur ma prisee. M'amie, dit Diane, ie serois marry de vous voir tant belle & delicate, entreprendre ces lourdes peines, perilz, & triaux, mieux seans aux hommes robustes, & vous proteste que i'en

souffrirois trop pour vous. Sur ces deuis amoureux, voicy venir la Royne apportant à sa fille les nouuelles de l'arriuee de la royne Cleofile que la renommee de sa beauté auoit attiree à la venir voir. Dequoy Diane respōdit estre tresaise pour le rapport qu'elle auoit pareillement ouy faire de son excellence. Mais Daraïde ne luy voulut laisser passer ceste la, disant qu'elle n'auoit rien à chercher dehors de ce dont nature auoit thesaurisé si richement en elle. Or dit Diane par modestie, que si seule à seule elle deuoit perdre la partie contre la Royne Cleofile, elle l'esperoit gagner ayant Daraïde de son costé, qui respondit qu'il seroit vray si la fenestre estoit ouuerte au droit de son cuer (comme desiroit Momus) d'autant que lon verroit l'image de Diane : & ainsi sa beauté redoublée pourroit mieux vaincre la simple de Cleofile. La Royne Sidonie prenoit grand plaisir aux propos affectionnez de Daraïde enuers sa fille: à qui elle dit au partir qu'elle s'apprestast lendemain pour recevoir la Royne estrangere : puis comme en se raiuant : mais i'ay peur dit (pour tousiours mettre le feu aux estoupes) que Daraïde ne vous laisse pour suyure Cleofile quand elle verra sa perfection. Qui releua incontinent la parole, disant, que son vouloir estoit inmutable, & q' le change n'estoit à craindre la ou vne perfection vniue ne souffroit aucune comparaison. Sidonie fort contente de ces gentes responce, retourne à son palais pour y faire dresser, & ordonner les pompes necessaires à la receptiō de Cleofile : & sa fille demeure en deuis avecques ses dames sur la façon de sa parure & acoustrement.

De l'entree & reception somptueuse de la Royne Cleofile en la ville de Guindaye, & le motif de sa venuë à voir Diane.

C H A P. . X X X I I I .

Vous auez à sçauoir que la Royne Cleofile ayant entendu le bruit de la plus diuine qu'humaine beauté de

Diane, & en voyant l'apparée par les pourtraicts de son ymage, conceut telle fantasie d'aller voir vne merueille du monde, que la distance des pais & le travail du chemin ne l'en sceut diuertir. Si fit armer trois nauz pleines de bons cheualiers, & d'autres chargées de cinquante damoyelles qui entrerent en l'isle de Guyndaye, toutes montées sur bestes estranges de sa region, telles que quand elle vint à Constantinople: toutes ses femmes furent vestues de veloux verd semé des deuises du Fenix qui par sa mort se resuscite, & ainsi vit eternellement. La Royne eut sa robe de satin verd toute couuerte comme d'une ret pleine de ses oyseaux vniques tissus de diuerses couleurs selon la diuersité naturelle de pennes du Fenix les serres & le bec d'or, les flammes ou il se brusle estoient de soye cramoysie, sa ceinture & son colier tout de pierrerie enchassée richement. Elle estoit assise en vn char triumphal composé de huit pilliers reuestuz de veloux, aboutans en haut en vn centre couuert de sa couronne royale. Ce char tiroient six licornes regies par six geans chacun portant vn gros estoc en vne main, & vn sceptre d'or en l'autre: deux cent cheualiers de sa garde alloient entour le char garniz de force pennaches en la testiere des cheuaux & signalz sur les armerz. En ceste magesté la Royne partit du port pour venir à la cité, marchant deuant elle vn grand nombre de menestriers. Cependant Diane se paroît pour la recueillir, & tout par le conseil de sa Daraïde, qui luy vestit vne robe de satin blanc decoupé sur toile d'or repris à boutons rondz garnis de fins rubis: ses cheueux luy laissa en partie espars, partie vers le front tressez comme nonchallement avec vn chapeau de roses sur son chef, & vn carquan de gros diamans sur son sein descouuert. C'estoit pitié que de voir les gestes de Daraïde en contemplant sa deesse en cest estat, à qui elle dit: Ha ma dame nous ressemblons icy les peintres trop diligens qui ne peuuent oster la main de dessus le tableau, ains tousiours y aioustant

quelque remplissage: car tant plus que nous vous couurons, nous empitons la besongne, qui en sa perfection se voudroit voir à nud, au contraire des belles plumes qui ailleurs font le bel oiseau. Quand Diane fut accoustree de l'ordonnance seule de Daraïde, luy dit, qu'elle la vouloit semblablement habiller à sa fantasie: Si luy fit apporter vne robe de toile d'argent dechiquetée sur toile d'or, & la coiffa d'une crespine enrichie de grosses perles orientales, avec vn guirlande de fleurs & maintz autres affiquetz qui rendoient sa beauté admirable apres celle de Diane, sinon qu'elle estoit vn peu passée comme de maladie. Dequoy la princesse disoit auoir occasion d'estre bien aise, de peur que si elle fust en ses beaux iours elle ne leust effacée par son lustre. A à (respond Daraïde) ma dame vous estes exempte de tous ces dangers: mais quant à la perte de mon teint elle témoigne l'embellissement de l'ame qui ne se fait sans diminution du corps. O Daraïde (dit alors la duchesse) si tu fusses homme qui est la dame qui eust peu résister à tes raisons non plus qu'à ta beauté: ie ne sens point en moy tant de force que i'en puisse soutenir les efforts. Diane (craignant la ialousie de Garaye) luy fist bailler de pareilz acoustremens & atours, avec lesquels il la faisoit fort bon voir. La royne Sidonie ne se vestit que de veloux noir, à cause de son triste vefuage de Moraizel, & fit preparer le logis de Venus prochain à celui de la fille pour la Royne Cleofile.

Comme la Royne Cleofile alla dîner avecques Diane, ou Garaye se donna à elle.

CHAP. XXXV.

Estant le palais de la Royne préparé du tout pour recevoir la royne Cleofile, & tapissé de veloux à bordz historiez de l'embassade mortelle de ses six damoyelles à Constantinople: la Royne Sidonie enuoya les ducz d'Alfarce & de Ganiez

Ganiez au deuant d'elle à vnelieu de la ville, ou ilz la rencontrerent en l'ordre & magnificence qui vous a esté declairée, dequoy ilz s'esbahirent grandement & beaucoup plus de sa beauté singuliere. Ilz luy firent vne harégue courte de sa bienuenue, & luy baisèrent les mains: puis l'amenerent tousiours costoyans son char & deuisans avec elle l'un deça l'autre de la, & luy rendans conte de tout ce qu'elle voyoit en passant & desiroit sçauoir. Elle s'arresta vn peu à contempler la ceinture de la ville, & le superbe bastiment du chasteau. Apres entra en la cité où elle fut louée & admirée de tout le peuple: Les Ducz la descendirent du char à l'entree du palais royal, & la menerent souz les bras iusques au lieu ou la Royne Sidonie l'attendoit: qui la receut en grande pompe & honneur, puis la mena en sa sale, ou elles s'assirent en deux chaires de veloux souz vn ders de drap d'or. Lors Cleofile commença: Ma dame ie me conte pour seule au mode, par ce que le seul qui est la fleur des chevaliers ie n'ay sceu meriter: & comme seule ay désiré de chercher les choses vniques: ce qui m'a attiré en voz pais pour voir vostre fille unique en beauté. A quoy Sidonie: ma dame ie ne vous sçauois assez remercier de l'honneur que ie sens receuoir de vous en ce voyage: mais ie crains que n'en partiez aussi contente qu'y estes venue, trouuant Diane (que voulez voir) beaucoup moindre que sa renommee, à cause de l'excellence qui est en vous-mesme, comme le peintre ou statuaire n'admire pas tant l'œuvre d'un autre que le peuple qui ne sçait rié de l'art. Or ma dame il est heure de disner, puis ma fille recevra le bien & honneur de vostre arriuee. Cleofile qui estoit venuë de si loing pour la voir la pria ne luy differer la veüe de celle qu'elle estimoit tant. Ainsi allerent ensemble par la porte secrette au palais de Diane sans estre suyues d'homme quelconque: laquelle elles trouuerent en sa sale avecques ses dames & se leua de sa chaire pour venir au deuant de Cleofile. Sis'en-

trebaisèrent & embrassèrent amiablement: puis s'assirent la mere & la fille aux deux costez de Cleofile, qui fut long temps à regarder Diane par grande admiration, l'estimant plus vne creature feeë que mortelle, tant elle la trouuoit accomplie en toute perfection de beauté, & ne se peut tenir d'exclamer selon qu'escriit Galeris, la beauté est montée iusques au feste de son excellence: Dieux immortelz vueillez la apparier à vertu virile pareille & digne d'elle. Adonc Sidonie qui la remercioit de l'honneur qu'elle faisoit à sa fille par dessus son merite, luy dit, qu'il falloit qu'elle vist sa compagne: & fit signe à Daraïde de se leuer, qui se vint mettre à genoux deuant Cleofile avec vne grace & contenance nompareille, & luy requerant les mains à baiser, la Royne estonnée de sa beauté l'accolle & baise en la face, luy disant que sa bouche n'estoit faite pour baiser rien moindre qu'elle mesme: puis la tenant par sa main blanche & mollette, s'enquit de Sidonie d'ou elle estoit, ce qu'ayant entendu, elle s'adressa à Diane: Je voy cy comme les singularitez naturelles s'entr'attirent l'une l'autre voyant auprès de vous la princesse Alastraxeree, à qui ceste pucelle ressemble comme font deux gouttes d'eau. Adonc Daraïde dit: madame la comparaison qu'il vous plaist faire sera admise comme de la vassale à la dame ligee: car ie suis gëtifemme du royaume de Sarmate qui luy est subget. Quoy qu'il en soit (respond Cleofile) vous meritez estre dame vous mesmes, pour les graces dont nature vous a douée si hautement. Alors Diane: ma dame encores vous faut il voir sa seur qui ne l'empire point & appelle Garaye qui se vient agenouiller en semblable maniere (Daraïde luy faisant place) & regardant la Royne qui ne cedit à dame du monde (sinon à Diane) puis receuant d'elle pareille faueur du baiser que sa seur, s'enamoura si fort qu'onque puis sa pensée ne s'adressa en autre lieu, ains en souffroit amere angoisse & martire, comme l'histoire vous deduira cy apres: non sans mutuelle affection

tion de Cleofile, qui se contenta fort de sa taille, maintien, & lineature. Dont elle luy dit: M'amy il me semble que ne devez gueres à vostre seur en singularité de vostre personne. Qui respondit: ma dame ie remercie les dieux de m'auoir fait presentement ceste grace non esperée de voir en vous le plus que puis ymager: dont ie me sens rester moins de ma liberté qu' auparauant. Cleofile se print à rire de ce langage. Mais Diane luy dit qu'elle le faisoit à l'enuy de Daraïde sa seur qui en vsoit ainsi en son endroit. Pleust aux dieux, respond Cleofile, qu'elle eust autant de desir d'estre à moy que sa seur vous porte d'amour.

Garaye incontinent prend la parole: Ma dame ie le tiendrois au plus grand heur du monde, s'il plaisoit à ma dame la princesse me l'ottroyer, moyennant que ie fusse la plus priuée de vostre personne, comme ma seur est de la sienne. De celà, dit Cleofile, vous pouuez assurer ni amie si ma dame vostre maistresse vous le veut permettre, ensemble me faire vn si beau present. Adonc Diane: Ie voy bien que c'est la ialousie qu'elle a de la familiarité que ie monstre à sa seur qui luy fait desirer autre party que le mien: vray est que son vouloir adressé en si bon lieu me l'excuse grandement. Parquoy pour l'amour de vous ma dame a qui son seruice est agreable, aussi pour consentir au desir d'elle (à qui ie souhaite tout bien) ie m'en priueray pour vous en inuestir. Dequoy Cleofile fut tresaise, mesmement l'ayant ouy iouer du ieu de la harpe, auquel elle mesme passoit le temps. Et moins ne le fut Garaye, pensant en elle qu'elle n'estoit pourueüe de gueres moins belle maistresse que Daraïde. Car combien qu'elle eust peu pratiquer l'amitié de la duchesse Lardenie, ou de la Marquise, en y employât ses cinq sens, son cueur ne se pouuoit camper en lieu moindre q royal. Or dit Sidonie qu'il estoit heur de disuer & vouloit remener Cleofile en son palais ou'il estoit apresté: laquelle la pria de ne la distraire si tost de la compagnie

de Diane avec qui elle mangeroit plus volontiers. Parquoy la Roynes fit en diligence apporter par ses damoyelles les plus exquisés viandes, la faisant seruir ce pendant de ce qui estoit leans prest pour sa fille. A ce festin les deux seurs seruirent de leur office, tant que Cleofile s'auisa avec le congé de Diane d'employer Garaye en son endroit à luy seruir de hanap, comme Daraïde à sa maistresse. Dequoy la risée fut grande: & Garaye la remercia de la possession en laquelle elle la mettoit desia de sa promesse. Après le disner, les tables leuees, les deux allerēt manger legerement, pēdant que les Roynes deuisoient de leur ialousie, des deux seurs qui leur donoit grād plaisir. Et à leur retour (par le commandement de Diane) prindrent leurs luthz dont elles sonnerent si melodieusement que Cleofile en estoit toute ravie: qui d'autant plus prisla la proye qu'elle auoit conquise, pour le soulas qu'elle auroit de iouer & accorder avec elle. Si se leuerent Cleofile & Diane & dancierent ensemble au son de leurs pucelles. Puis prindrent elles mesmes des instrumens, & en sonnerent fort delicatement. Mais ce fut vne armonye diuine quand elles y appellerent les deux seurs & sonnerent toutes quatre: car on ne pouuoit ymager que les hierarchies des anges pussent rendre au ciel vne melodie plus exquisite. Apres cest esbat Sidonie mena Cleofile en son logis c'est à sçauoir au palais de Venus, qu'elle trouua tapissé & meublé de ses couleurs, & l'admira plus qu'autre qu'elle eust iamais veu n'ouy raconter. Là elles souperent selon l'ordonnance de la despence du logis qui estoit la plus somptueuse de tous, eu egard à la complexion des personnes veneriennes auxquelles il estoit destiné, qui ont en espediale deuotion Ceres & Bacchus. Il fut bien tard quand Sidonie la laissa, à cause du plaisir qu'elles prindrent à la musique: & Diane luy donnant le bon soir, luy recommanda en riant Garaye qui demouroit avec elle: la priant de luy continuer la priuauté qu'elle luy auoit promise.

promise . Ainsi se pensoient iouer de celle qui l'entendoit en bon escient , & qui n'en dormoit pas toutes les heures de la nuyt pour l'accez premier de sa nouvelle passion .

Comme les Roynes & leurs Damoyelles esprouuerent l'auenture de la caue des deux tours & avec quelle yssue.

CHAP. XXXVI.

Plusieurs iours passa la Roynie Cleofile avec Diane en grand deduit & soulas, tant pour le lieu qui leur en fournissoit de toutes les sortes , que pour Daraïde & Garaye qui les resuilloient souuent par leurs piques amoureuses . Long seroit a vous reciter tous leurs plaisirs & passeréps par le menu . Tant vous dy-ie qu'au bout de dix ou douze iours , Cleofile qui en visitant toutes les tours auoit veu la voute prenant du palais de Febus iusques à celui de Diane , en laquelle on luy auoit déclaré que lon ne pouuoit passer combien que l'entree fust ouuerte . Elle eut enuie de tenter que ce pouuoit estre , & pria la roynie Sidonie de l'esprouuer ensemble . Or falloit que les dames y entraissent par la tour de Diane , & les hommes par celle de Febus : & desia y estoient venuz plusieurs cheualiers de renom qui entroient tous facilement en la caue ou estoit la statue du Cheualier , mais quand ilz vouloient passer outre en la voute obscure au premier pas qu'ilz faisoient ilz estoient repoussez rudement par vn fort tourbillon de vent avec vn bruit horrible . Et s'il auenoit à quelqu'un d'y entrer vn peu auant , ce n'estoit que selon la mesure de son amour : & à l'endroit ou le vent l'accueilloit , se posoit vne ymage en vne niche du mur avecques son nom & celui de s'amy . Vray est que ces ymagés ne furent veus sinon apres que l'auenture fut acheuee . Les dames pareillement pouuoient venir à l'esprouue par la tour de Diane , & l'enchantement estoit accompli quand la dame passeroit iusques en la caue de la statue en la tour de Febus , &

que le cheualier allast par la voute iusques en la tour de Diane : ce fait le passage seroit libre & ouuert à tous venans . La Roynie Cleofile (comme ie vous disois) eut volunré de tenter le sort , & Diane l'accompagne iusques en la chambre ou respondit la bouche de la voute . Sidonie y estoit aussi pour assister a l'esbat qui fut premierement des damoyelles de Cleofile qui y entrerent vne à vne , non sans grand peur d'aller en ceste obscurité . Mais la plus auancee ny conta plus de cinq ou six pas , soudain le tourbillon bruyant les reboutoit si vistemment que les attendans y auoient trop de quoy rire . Les filles de la princesse y furent apres , qui n'y conterent chacune qu'un seul pas . Voila (dit Cleofile) comme la retraite & solitude des damoyelles leur ostent les occasions d'aymer : mais voyons comme il en ira de Daraïde & Garaye , & si leur affection est conforme à leur parole . Alors Diane commanda à Daraïde de marcher , qui respondit qu'elle n'en esperoit heureuse yssue , par ce que son amour estoit d'autre qualibre que les ordinaires , toutesfoys pour obeir marche vers la voute , au grand ennuy de Garaye , estimant qu'elle deust mettre fin à la preue : mais elle ny sceut entrer ne peu ne prou , quelque effort qu'elle fist , dont elle retourna fort honteuse & confuse . Et la princesse luy dit pour la reconforter , qu'elle auoit eu raison de ne se vouloir fier aux demonstrations exterieures de la passion que son cueur se plaisoit a tenir close & couuerte : puis dit il faut voir que pourra faire Garaye , & si la Roynie gaignera cest honneur sur moy d'estre mieux aymee d'elle que moy de vous . A quoy Daraïde y aille hardiment ma dame , car ie suis seur que de plus en ce cas nul ne me peut deuanter . Sus donc (dit Cleofile à Garaye) courage m'amy efortuez vous avec ma faueur dont vous pouez à iamaïs asseurer , & me conqueuez ce pris sur ma dame la princesse d'estre mieux aymee qu'elle , en recompense de celui qu'elle a sur moy de beauté . Garaye y va , qui s'en reuiet

avec sa courte honte, sans y auoir rien plus fait que sa peur. Dequoy Sidonye les voyant trop fâchées & melancoliques, & leurs dames esbahies de l'experience de leur peu d'affection que leur langue & autres signes declaroient tant, à ceste cause leur dit qu'elles ne se deuoient esmerueiller de cest accident des pucelles de Sarmatie, à raison de la propriété de l'aventure que le sage Cinistides luy auoit exposée : c'est à sçauoir que la damoyelle qui ne seroit amoureuse d'un cheualier n'entreroit vn seul pas en la voute par le costé de la tour de Diane, aussi peu que le cheualier par celuy de Febus, qui n'aymeroit dame ou damoiselle. Surquoy Daraide & Garaye connurent incontinent d'où procedoit la faute, & qu'il leur eust falu esprouuer par la tour des hommes : combien qu'elles ne s'en vanterent pas pour l'heure, se sentans assez excusées par la declaration de Cinistides. Adonc Cleofile pria la princesse Diane de vouloir esprouuer l'aventure, laquelle s'en exempta par faute d'amour dont les obietz luy estoient deniez. Parquoy s'adresse à Sidonie, qui luy respond qu'elle ne vouloit monstrer tant de faueur d'amour à celuy de qui elle pourchassoit la mort. Cela vous doit plus inciter (dit Cleofile) à fin de le rendre d'autant plus coupable du tort qu'il vous a fait, veu l'amytie extreme que vous demonstrez. Finalement apres longue dispute Sidonie si accorde, moyennant que Cleofile marche la premiere : ce qu'elle fait, se representant à la memoire le grand roy Amadis de Gaule, à qui elle auoit donné son cuer. En vertu dequoy elle entre en la longueur. Puis fut chassée par le tourbillon imperueux aussi rudement que les autres, qui luy en rendirent la risée qu'elle leur auoit prestée. Et elle mesme riant dit à la Roynie qu'elle allast faire son deuoir, la priant en se raillant de luy iouer aussi bon tour de compagne à sa saillie comme Garaye à Daraide à son entree. Alors Sidonie marche parlât à son Moraizel : O deloyal ! que ie serois seure d'acheuer ceste auentu-

re par l'extremite d'amour que ie te porte, s'il n'estoit rebatu & recoigné par la haine pareille. Ce disant entre en la tenebreuse galerie voutée, & passe sans resistance iusques à l'autre bouche & ouuerture de la chambre de Febus, ou elle vid a cler la statue & toute l'histoire de ses amours avecques Florisel : mais elle ne peut entrer dedans nom plus que s'il y eust en vn mur. Parquoy voyant en ce lieu la representation de ses douleurs, tordant ses mains & versant maintes larmes exclame : O ymage de celuy que i'ayme plus ardemment qu'onques dame cheualier, reçois en icy le témoignage visible en recompense de l'injure que ma faitte ton moule, plus lasche que receut iamais dame de si haute guise. O trahistre quand tu faucas ma chasteté & ta verité, que ne rompy tu quand & quand le neud de l'amytie q'ie te porte encores ? Pendant qu'elle estoit en ces doleances, les dames qui l'attendoient voyans sa longue demeure, estoient qu'elle auoit mis l'aventure a chef. Parquoy Diane dit à Cleofile que si par amour elle se deuoit acheuer, il s'en falloit asseuer par celuy que la Roynie sa mere portoit à son seigneur & pere Florisel. A ceste cause, disoit elle, entron dedans, car seurement le pouuons estant le sort failly : qui est le seul moyen de me tirer hors de la prison ennuyeuse ou ie suis. Ainsi se prennent par la main & se fourrent parmi ces tenebres & leurs damoyelles apres, & y entrerent à l'heure que Sidonie finissoit ses plaintes, & tournoit les espaulles pour le retour : auquel le vent debonde qui l'éporte & sa suite d'une merueilleuse violence iusques en la caue de la tour de Diane : dont elles se mirent à rire & se gaudir ensemble. De là s'en vont soupper au palais pour festoyer vn grand nombre de cheualiers arriuez, dont on auertit la Roynie. Et à l'heure de la retraitte Cleofile alla voir Diane, à qui elle conta tout ce qu'elle auoit appris de nouveau des gentils hommes suruenus, puis s'en alla reposer en son logis.

Du plai-

Du plaisir que print la Royne Cleofile es deuises & peintures historiées au palais de Diane : principalement en vne transmutation de Nymphe en biche blanche, faite par la deesse Diane. CHAP. XXXVII.

VN iour que la Royne Cleofile estoit alle assez matin au palais de Diane pour la contempler à loysir en toutes ses singularitez, elle ne la trouua encore leuee, mais Daraide bien, qui luy seruit de guide la menant par tout haut & bas accompagnée seulement de sa Garaye. Beaucoup y vid de choses qui luy plurent mesmemēt les fables & histoires figurees tant es verrières & fenestragés qu'es murailles des cabinetz & galeries. Mais vne sur toutes retint & arresta longuement son œil & son entendement aussi, qui estoit en vne longue galerie du iardin, d'autant qu'elle estoit nouvelle, & non veüe ailleurs, voire nō encores auennē. Car le grand Cinistides l'ayant preuē & conuē par ses artz Astrologiques l'auoit fait peindre en ce lieu si apparent en l'honneur d'une Diane qu'il scauoit estre à venir es siecles lointains & en region fort distante, laquelle nē tiendroīt le monde en moindre admiration de son excellence que la Diane de Guindaye.

Or vous descriray briuelement l'histoire fatidique pour la dignité & rarité de son sujet. En premier lieu y estoit peint vn gentilhomme en accoustremens de chasse, entrant seul avecques deux chiens en vne grande forest peu hantee, lesquelz il perd sur le soir à la sūyte d'une beste. Parquoy apres lōgue queste sans en sentir nouvelles, mōte au haut d'un chesne pour passer la nuit hors de dāger des bestes furieuses dont ce boys estoit plein. Ou apres qu'il eut esté vn espace regrettant ses bons chiens que tant il ayamoit, aperceut lumiere en vn cousteau, qui l'incite à descendre de l'arbre & droit tire celle part comme les nautonniers au faros d'Alexandrie. La il trouue vn bon hermite qui le reçoit humainement & le traite des petitz biens que le lieu produysoit, c'est à scauoir de fruitz & herbes venās sans main

d'homme & de l'eau claire d'une fontaine, courant au pied du teitē. L'hermite estoit nommē Eubul, qui apres le sobre repas fondant l'estat du gentilhomme & le but de sa vie, luy remonstre les abuz des bobans, pōpes & excès mondaines, luy enseignant le train de la vraye vie guydee & conduite par raison. Le matin Fregos (qui estoit le venneur) prend congé de luy pour sūyre la queste de ses chiens, & trauersant l'espeſse forest arrive en vn beau pré, par le mylieu duquel passoit vne grosse fontaine. Si auise vn venerable vieillard estendu sur l'herbe aupres de la source à qui il s'adresse pour scauoir nouuelles de ses chiens. Desquelz le vieillard (qui Apuan auoit nom) luy donna bonnes enseignes comme il les auoit yeuz passer par l'oree de ce pré à la suite d'une biche blanche, à qui nature n'auoit onques formé la semblable en beauté, & la poursuyuoient si viuement qu'il en craignoit merueilleusement l'issuē, & quasi desia deploroit la pourette. Fregos luy ayant lors demandé la sente qu'ilz tenoient, estoit delibéré d'aller apres : mais Apuan ne le voulut souffrir à cause de la nuyt qui estoit prochaine ioint l'enuie qu'eut aussi Fregos d'entendre l'estre de ceste biche & l'occasiō que pouuoit auoir le vieillard d'en redouter la prise ou la mort. Sur lequel propos il le mit (apres luy auoir accordé d'heberger en son hostel) & Apuan en chemin luy raconte : Mon gentilhomme (combien que vous deduire ce cas soit rouvrir & r'entamer mes vieilles playes) toutesfois ie souffriray ceste douleur pour vous satisfaire.

Or sçachez donc que m'estant retiré en ce lieu solitaire escarté de toute frequentation & connoissance des hommes, fors que de ceux que l'auenture y transporte comme vous. I'y ay basti vn chasteau (que pouez voir) sur ce mont, ou ne defaut guere chose que l'usage de la vie humaine requiere : & y ay retiré avecques moy vn personnage seul, lequel les meurs semblables aux miēs & la volonté vertueuse, m'auoient rendu amy indissoluble. Nous auons nombre de

valerz necessaires pour nostre seruice & passons le temps à la chasse, à la volerie, au iardinage, & à lecture des liures de toutes sciences, selon que les occurrences nous donnent le desir des vnes ou des autres. Bien vous veuil dire que i'ay en mes ieunes ans suyuy les armes, hanté les cours des princes, connu l'estat de marchandise & de iustice. En fin, las de tout ay fait ceste retraite avec le seul amy, loing des enuies, sollicitudes, peines, rancunes, curiositez du monde, ayant ainsi seul avec vn autre moy-même tout le contentement qu'un millier de peuple me pouuoit donner. Mais tant fus-je icy bien caché mon fort m'y a retrouvé: au moyen (qu'un iour que i'estois descendu à ceste fontaine comme m'y auez rencontré) i'y trouue vne nymphe belle à merueilles que la chaleur extreme du iour y auoit amenee & conuiee à soy baigner, laquelle ie saluë & elle honteuse d'estre veüe si auant, d'autant que l'eau clere ne cache rien à noz yeux, me pria quelque peu de me retirer & ne luy rompre son plaisir du bain. Mais la supliant de me permettre ce bien incomparable, comme à celuy que l'age mettoit hors de soupçon de lubricité: nous entrons en deuis de l'amour, qu'elle disoit pouuoir encores loger en ma verde vieillesse, comme le feu deffous la cendre grise, selon qu'elle auoit ouy deuiser aux deesses & demy dieux: pource que l'homme est né & yssu d'amour en forme de fruit sortant de la conionctiō amoureuse par laquelle il est engendré, & que par ce moyen l'amour dure autant en luy que la vie, voire que moins y a raison de le chasser de la possession tant plus elle est ancienne comme de droit prescrit & acquis par laps de temps: que l'age meur en vse beaucoup plus discretement & que telles amours procedent du ciel & des Genies estans de semblable nature, qui sont les gouuerneurs des estoilles dominâtes en la naissance des deux personnes. Tandis que i'escoutois ceste belle & sage nymphe & que mes oreilles pendoient de sa bouche tant faconde, vecy ar-

riuer deux de ses compagnes desquelles ie ne pensay a eiter la suruenue à cause du privilege de ma barbe blanche: mais elles luy firent vne salutation maigre qui me fit retirer triste & confus, & depuis ay entendu que par leur acculation la grand' Diane l'a conuertie en vne biche blanche, qui est celle mesme que voz chiens ont elancee. La royne Cleofile print grand plaisir à ceste metamorphose & au partement que fit Fregos lendemain du chasteau inconnu: & comme desirant retrouver les chiens & voir aussi la biche, entra en vn quartier de la forest, ou il fut pris par des coureurs & mené prisonnier au chasteau d'Amour: duquel sortant souz sa foy, fut de rechef pris, lyé & garrotté par les gardes du chasteau de Diane (qui auoit guerre continuëlle contre celuy d'amour) ou il vid la biche blanche & ses leuiers. Puis se retirât vers Apuā moyennerent par sacrifices ordinaires à l'honneur de la grād deesse & par traitement gracieux de ses nympthes (que l'ardeur du iour destournoit souuent à la fontaine) moyennement dy-je la restitution de la nymphe en sa premiere forme: Et estoit grace en l'autel qu'il fit eriger.

DE TOVS AVTELZ DE DEESSES
ET DIEUX
LE VOSTRE SEVL (DIANE) ENCENSERAY
CAR PAR LUX SEVR EN VN
SEVL LIEV SERAY
ET PAR VOVS TRIPLE EN LA
TERRE ET AUX CIEUX.

Cleofile s'arrestoit à regarder la diuersité de la contree de Diane seche & deserte & de celle d'amour tousiours verde & fleurie: quand la princesse y suruint, qui la mena au parc voir les bestes noires & de compagnie, & les rouffes & hardres en attendant l'heure du disner.

Comme

Comme arriva à la court vn beau ieune cheualier, menant la duchesse de Bauiere : & de la requeste qu'ilz firent à la Royne Sidonie.

CHAP. XXXVIII.

LEndemain la Royne entendit par aucuns de ses gens venans de deuers le port, les trains des cheualiers, & dames dont les chemins rompoient : qui la fit tenir sur ses gardes, & prier Cleofile de venir dîner ce iour en son palais. A l'issue duquel entra en la sale vn tresbeau cheualier fort ieune & de haute taille, armé d'un riche harnois damasquin fors le chef & les mains : à qui deux escuyers portoient la lance & l'escu, & il menoit par la main vne pucelle de beauté exquisite, vestue sumptueusement, ayant sur ses cheueux tressez en rond vne guirlande enrichie de maintes perles & autres pierres precieuses, & six damoyelles la suyuoient. Les Roynes les iugeans de haut lieu à leur port & parure, se leuerēt à leur arriuee, & les estrangers s'humilierēt bien fort: puis estant le silence grand à cause de la nouveauté, & les Roynes rassises en leurs chaires, le cheualier comença en ceste façon. Royne excellente, ie suis cheualier, à qui l'obligation de mon lignage commande de celer mon nom, iusques à ce que l'experience de mes œuvres le permette. Ceste belle damoyelle avec qui ie viés icy est la duchesse de Bauiere nommee Siluerne, laquelle j'ayme de tout mon cœur: & pour luy faire connoistre, sommes venuz en vostre court vous faire vne requeste, c'est à sçauoir qu'avec vostre cōgé ie puisse planter vne tente en la grand' place deuant vostre palais, ou ma dame Siluerne se rendra pour estre iuge de mon deuoir enuers tous les cheualiers qui oseront maintenir autre dame estre plus belle, ou cheualier ayant plus cordialemēt que moy. Et au cas qu'ilz soyent vaincuz emporteront mon escu en signe de victoire pour eux & la guirlande de la duchesse Siluerne pour leur dame, sans que ie leur demande rien de ma part, me

tenant assez payé de la iustificacion de mon droit. Vne seule condition ie requiers, que celuy qui tombera en la ioute ne puisse demander le combat aux espees. Or ay choyssi de m'adresser en vostre court plustost qu'à autre du monde, pour le bruit qui court du grand amas de cheualiers que la souveraine beauté de vostre fille y attire : me cōfiant en vostre courtoisie de n'estre escondit de ma demande. La Royne Sidonie luy respondit fort gracieusement qu'elle le remercioit & la Duchesse, de l'honneur qu'ilz estoient venuz faire à sa court de leur presence & magnanime entreprise. Et quant à la seureté qu'il luy demandoit, elle luy deuoit & à tous ses semblables : que du reste il en ordonnast à sa discretion, sans espargner chose qui luy fut duisante. Le cheualier (qui Rosaran auoit nom, comme entendrez cy apres) remercia la Royne treshumblement & avec vne grande reuerence se retire, estāt la duchesse fort esbahie de l'excellence des deux Roynes de qui elle n'auoit iamais veu les pareilles. La Royne leur fit bailler logis au palais de Mars, ou ilz furent seruis exquisement par le maistre d'hotel ordinaire. Ce pendant ses gens dressoient la tente en vn coing de la grand' place, laquelle estoit fort spacieuse & diuisee en deux pavillons : desquelz l'un estoit pour la Duchesse & ses Damoyelles, l'autre pour luy & ses escuyers. Au deuant de la tente ilz posèrent vn perron auquel pendoit son escu, ou Siluerne estoit pourtraite au naturel. Et faloit que l'assaillant vint toucher l'escu, & le cheualier sortoit de son pavillon auquel il tenoit deux coursiers tous prestz, & vn attelier de lances. Mais ce iour il ne combatit (combien qu'il y eut assez de cheualiers, qui le desiroient deffier) à cause qu'il fut tard auant que la tente fut dressée.

Comme Fenix de Corinte & Astibel de Mesopotamie vindrent à la joute contre Rosaran, & y perdirent leurs Damoyelles,

Le iour

CHAP. XXXIX.

LE iour ensuyuant des le matin les roynes apres auoir desieuné allerent aux fenestres du palays respondans sur la grand' place pour voir les ioustes de plusieurs cheualiers qu'on leur auoit annoncé estre desia prestz à combattre. Huit se presenterent de la premiere volée, qui tous hurerent l'escu de Rozaran l'un apres l'autre. Lequel (pour le vous faire court) les abatit tous d'une seule lance. Apres en vindrent quatre autres qui n'en eurent pas pire marché : en sorte que lon le prisoit tant qu'on l'estimoit estre chose enchantée. La duchesse Siluerne n'en estoit pas trop mal contente, ains se reputoit heureuse d'estre aymée de si vaillant cheualier : duquel vous puis dire que soustenant huit iours son emprise, il porta cinquante cheualiers par terre, sans qu'il perdît oncques la selle : dequoy les nouuelles estoient rapportées à Diane, voire qu'il y auoit en ce nombre plusieurs champions de son image. Ce qu'oyant Daraïde, luy dit : Mal auienne à telz vauneans qui osent concenoir si hautes pensees. Il n'y a nulle raison, ma dame, de souffrir si longuement ce deshonneur qu'on vous fait en vostre court, de maintenir qu'il y ayt dame qui vous surpasse en beauté, & qu'il ne s'y trouue personne qui chastie l'orgueil de ce fol estranger en si iuste querelle. Les dames rirent vn bon coup du despit de Daraïde : à qui Cleophile demanda quel remede elle connoissoit à tel meschef : qui respōdit qu'il falloit que Garaye ou elle prissent l'ordre de cheualerie comme leur naturalité leur promettoit, pour desabuser cest outrecuidé cheualier, ou se mettre hors de leur martire y laissant la vie. A quoy Diane dit qu'elle ne consentiroit veu son peu d'aage, & que c'estoit amour qui luy enflait le cuer plus gros que le ventre en faueur duquel elle ne la souffriroit entrer en si grand danger. Daraïde continuë qu'elle ne scauroit plus endurer ceste honte, & que l'obget souuerain de son amour qui estoit sa beauté parfaite luy inspiroit assez de hardiesse pour entre-

prendre ce fait, & luy redoubloit la force outre la vigueur des ans. La Roynie Sidonie conclud que Daraïde auroit l'ottroy de sa requeste, si dedans huit iours ne suruenoit autre qui la deliurast de ceste peine. Ainsi s'esbatoiēt les Roynes avecques noz deux pucelles : car Garaye aussi ne s'en voulut taire, pour l'interest de Cleofile sa chere maistresse. Ce iour apres le disner (qui fut au palais de Venus) les Roynes allerent aux Fenestres de la grand' place, & y menerent Daraïde & Garaye. Guerres ny eurent esté que voicy arriuer deux cheualiers de belle taille, ausquelz deux damoyelles vestuës d'escarlade portoient la lance & l'escu. Si viennent toucher à celui du cheualier tenant, à qui ilz dirent : Cheualier cōfessez que noz damoyelles sont plus belles que la vostre, puis que la veuë en decouure le fait, sans entrer en combat à mauuais droit. Lequel leur respondit en riant : Certes ie ne suis pas encores au lit la chandelle au poing, pour auoir necessité de confession, mesmement de telle mensonge. Alors s'eslongne l'un d'eux contre luy les lances en l'arrest, lesquelles ilz rompirent en leurs escuz, passans l'un deça, l'autre delà, puis reprindrent deux autres lances plus grosses, & la deusieme rompirent comme deuant : mais ile s'entrehurterent si lourdement que le cheualier assaillant fut renuersé avec son cheual, sans que l'autre fust en rien d'esmeu de la selle. A l'heure la damoyelle qui luy auoit seruy d'escuyer s'en va à luy ainsi qu'il se releuoit, disant qu'elle le commandoit à dieu, pour aller chercher autre qui mieux soustiendrait la cause de sa beauté : & sans attendre responce donne de la housine à son palefroy, & s'en va, laissant vne grand rifee au peuple de son propos. Et Cleofile s'adreila à Daraïde qui estoit debout aupres d'elle, l'interrogeāt si elle le voudroit entreprendre le combat pour la princesse Diane à telle condition, qui respondit que sa beauté constante l'en exemptoit, mais elle replique à la Roynie si elle l'otroyoit voluntiers à Garaye : laquelle s'auan-

l'auança de dire qu'elle l'accepteroit en toutes les formes qu'il plairoit à la Roïne luy commâder. Sur ce point la iouste commēce entre le cheualier de l'autre damoyse (qui estoit Fenix de Corinte & le premier Astibel de Mesopotamie) si se rencontrerent si rudement, qu'aupres le froissis des lances ilz s'entrechoquerent des corps, en telle maniere que l'assaillant vuida les arçons en la place, & Rosaran perdit les estriers, en danger de trebucher s'il n'eust embrassé le col de son coursier: dequoy le cry des assistants s'esleua. La le diable robuste a perdu les estriers: mais il se remist incontinent en la selle, voyant son aduersaire venir vers luy l'espee en la main, qui luy dit s'il estoit si preux combatant qu'il descendist, à fin de ne s'attribuer à gloire la faute de son cheual. Qui respondit, qu'il estoit d'autant tenu au sien s'il auoit eu par luy quelque a-

uantage, & qu'il luy auoit fait grand bien en suppléant la faute de sa valeur enuers luy. Pourtant qu'il se tiendroit aux conuenances de son emprise: si ne laissast pas de remettre son espee au fourreau. Sur leur dispute suruint l'autre damoyse demander à son champion s'il auoit que mander à sa compagne, priant Dieu luy enuoyer plus d'heur en autre affaire qu'il n'auoit eu en la defence de sa beauté. Si chassa sa haquence apres l'autre, dont la huec fut grande: & deuez sçauoir que les bonnes commeres auoient senty du refroidissemēt en leurs cheualiers, qui se commençoient à lasser de ce mestier mener, comme on se degoute aisement de telles prouisions de facile conqueste, & elles n'atendoient que l'occasion de preuenir le congé qu'ilz leur vouloient donner, allant au pourchas de fresche compagnie.

Du combat perilleux entre le cheualier du Fenix & Rosaran & la fin d'iceluy par vn estrange enchantement.

C H A P. X L.



PEu apres le partement des deux damoyse, arriue en la grand place vn cheualier fort bien fait sur vn destrier rouan, monsrant vn port de quelque rare bonté. Il auoit deux escuyers, dont l'vn portoit sa lance, l'autre son escu à la figure

du Fenix. Qui vous doit faire entendre que c'estoit le gentil Florarlā, lequel apres auoir acheué maintes grands auentures en diuers lieux, dont sa renommee voloit par tout le monde, estoit venu en ceste Isle, auerty que la Roïne Cleofile y estoit, pour qui son

cœur

son cueur souffroit tant par admiration du bruit de son excellence. Si piqua du costé des fenestres d'ou les Roynes regardoient, leuant sa veuë vers celle qu'il reconnut par son pourtrait, à qui il dit : Ma dame voicy vn châpion que vostre cler renom vous a aquis, qui vous vient icy rendre graces de la valeur que la seule pensée de vostre perfection & contemplation de vostre ymage a peu mettre & influër en luy. La Royne qui auoit ouy celebrer ses haurz faits d'armes (non sans mentiõ de son beau trait, proportion & auenance) luy respondit qu'elle se sentoit fort honoree de si brave champion de sa deuise, & qu'elle estoit par luy satisfaction de l'entrepreneur estrange. En celà (respond Florarlan) le bon droit de vostre preeminence m'assure. Si baise la figure de son escu en sa presence, puis rabaisant sa visiere s'en va vers Rosaran. Ce pendant Daraide s'attache à sa seur Garaye luy disant qu'elle la voyoit hors de peine d'entrer au combat pour la cause de la Royne, veu la reputation du cheualier au fenix : voire qu'elle ne se resioissoit gueres de luy voir suruenir vn tel concurrent au seruice de sa maistresse. A quoy la royne s'ingera de respondre que Garaye n'auoit que craindre en cest endroit pour l'assurance qu'elle auoit de sa faueur commune à nul autre, qui ne fut paresseuse de l'en remercier treshumblement, & la Royne a luy affermer encores plus fort. Vray est que lon l'interpeta à ieu & raillerie pour l'heure, mais le temps ne tarda trop à le verifïer par effet. Or va Florarlan toucher à l'escu de Rosaran, lequel a sa venuë monta sur vn cheual frais, l'estimant beaucoup par sa renommee. Si l'aborda Florarlan avec tel langage : Cheualier qui tant avez conquis d'honneur en ceste emprise, regardez à ne le perdre par faute de bon droit que ne pouez auoir cõtre moy estant champion de la royne Cleofile que voyez en ces fenestres, qui est l'outrepasse des belles dames du monde : pource contentez vous de ce qu'avez fait iusques icy pour la

duchesse Siluerne, sans la mettre en comparaison iniuste avecques la Royne, sinon elle me pardonnera si ie rends le deuoir à mes conceptions. A quoy respondit Rosaran non moins gracieusement : qu'il le remercioit de la courtoisie dont il vsoit enuers luy & sa maistresse, de laquelle la perfection l'obligeoit à la soutenir contre tous avec la reuerence qu'il deuoit à la Royne. Adonc se departent, puis reuiennent l'un contre l'autre de telle furie que leurs lances volerent en esclatz, leur ayant faucé les escuz, & ilz se viennent rencontrer de telle verdeur qu'ilz vont par terre cheualiers & cheuaux ensemble : dont fut grand le cry du peuple : Or est Lucifer tombé du ciel. Dequoy si la royne Cleofile receut grand' ioye, autant la duchesse Siluerne en porte de tristesse : mais les deux champions se releuent & embrassans leurs escuz se ioignent aux espees nues, desquelles ilz se chamaillerent d'une cruelle sorte, abbatant pieces des escuz, mailles des hauberts, plus d'une grosse heure sans apparence qui d'eux auoit l'auantage : tellement que les assistans disoient qu'ilz auoient trouué leur pareil. Apres ceste longue escrime ilz se retirerent vn peu à quartier pour reprendre haleine : & Rosaran regardant s'amy qui auoit perdu la couleur d'ennuy & de crainte, tout iré retourne vers Florarlan, qui le reçoit brusquement & recomencent l'estour plus chaut qu'auparauant, s'entrechargeant de coups si lourdz que chascun fit mettre la main en terre à son ennemy, & faisoient saillir les viues flammes de feu de leurs harnois. Ainsi combattoient les deux braues champions sans qu'on y connust autre conclusion de leur conflit que par la mort de tous deux. Lors aint vne estrange merueille qui les despartit ayãt duré leur combat deux heures entieres. Voicy venir en la grand place vne vieille dame de plus de cinquante ans, vestuë de drap noir avec voiles blancs de dueil à la mode des vesues. Elle estoit sur vne hacquenee suyvie de douze damoyelles de semblable parure, & firent

& firent la procession a l'entour des cheualiers & de la tente au galop de leurs palefrois. Et quand elles eurent fait quatre voltes, à la dernière toutes ensemble lancent en l'air chacune vne fiole qu'elles tenoient en leurs mains, qui retombans en terre se cassent, & en sort vne fumee noire & espoisse comme des fours de tuillerie, que occupe vne partie de la place, & se va estendre iusques au haut des nuës. Adonc on veid la dame & son train retourner la voye qu'elles estoient venuës, lesquelles ne furent suyuies de personne, tant auoit chacun grand desir de voir la fin de ce mystère. Or la fumee alla long temps en espoississant tousiours, puis soudain s'aluma en vne flamme claire en maniere d'un esclai, qui espouuenta merueilleusement tout le peuple, comme font la nuyt les comettes flamboyãs à l'impourueu par les tenebres. Apres ce feu toute fumee disparut, & apparut au lieu mesme vn beau chasteau maçonné de pierre reluisante comme fins miroërs d'acier. Le corps du chasteau estoit party en deux tours, l'vne pres de l'autre, & ceintes d'un mur de semblable pierre. Au feste des tours vn grand nombre de menestriers sonna longuement, puis ilz cessèrent, & Florarlan se trouua vis à vis du portail : auquel auisa vn escriteau en lettres grecques de telle substance.

Cinistene duchesse de baviere magicienne, en memoire & vengeance de sa fille Siluerne & du gentil cheualier descendu du lignage de Grece a basti ce chasteau à la gloire de ceux qui prouueront l'auenture avec tiltre de loyauté d'amour: lesquels y seront acertainez du secret de leur partie, mais se gardent d'y entrer sur la vie ceux qui frauduleusement pretendent & usurpent le nom d'amour. Ceste preuue durera iusques au temps que la paire des plus beaux & loyaux amans y entrera, qui remettront les deux enchantez en leur estre naturel.

Quand Florarlan eut leu l'escrit, ne sentât en soy aucun point de desloyauté, entre

sans crainte par la porte du chasteau, & les menestriers recommencēt à sonner en haut. Là dedans il se trouua en la plus belle chambre ou il eut onques mis le pied : qui estoit painte de toutes les histoires amoureuses du monde. Et vid vn nombre de damoyelles toutes droittes contre vn mur, ayans chacune l'arc en main, & la fiesche entoisée dessus, toutes tournees pour descocher vers l'huys de la chambre. Au mylieu de laquelle estoit la duchesse Siluerne assise en vne chaire de drap d'or : ayant sa precieuse guirlande sur son chef descheuelé, appuyant sa iouë sur sa main, accoudée sur vn oreiller de veloux. Elle se plaignoit douloureusement les yeux clos, d'ou sortoient larmes en abondance. Dequoy Florarlan esmeu a compassion prend son armet à la main & se va planter à genoux deuant elle disant : Madame d'ou vous procede l'angoisse tant amere? à son parler Siluerne ouure les yeux, & sembla à Florarlan que se fust la royne Cleofile, qu'il luy fit telle responce : Florarlan n'abuse point ton cueur en mon amour, d'autant que le mien est saisi de celuy du roy de la grand Bretagne, qui ne veut ceder a nul autre. Tu aymes Cleofile qui ne t'ayme point, & es aymé de Lucenie de tout son cueur, a qui tu dois le tien. Ce dit referme les yeux sans plus mot sonner, pour quelque propos que Florarlan luy peust tenir. Dieu de paradis, dit il, la belle auenture que voicy, qui met les amans hors de vaine esperance: Or suis-je à ceste heure sans aucun remord en liberté de rendre amitié mutuelle a celle qui si affectueuse me la porte, & a estre vray & fidele mary à ma bonne & sincere espouse. Auant que partir de là il araisonna les damoyelles archieres sur la tristesse de leur dame, qui ne luy firent aucun semblant de vouloir respondre, ayans tousiours leurs yeux fichez vers l'huys de la chambre. Il s'obstinoit à importuner de rechef la duchesse, quand il sentit vn esclai violent qui luy esblouit la veuë, & tost apres se trouua deuant le portail en la grand place : là ou tout le

ou tout le peuple attendoit son retour pour en sçauoir des nouuelles : mesmement les Roynes qui l'enuoyerent prier de leur en venir côter. Dequoy il s'excusa sur ses plaies (mal content de ce qu'il auoit entendu de Cleofile) leur mādāt aussi bien q̄ les choses estoiet telles qu'elles ne se deuoiet reueler, ains aprēdre personnellemēt en l'esprouue. Ainsi se retira en son logis, ou la Roynes luy enuoya ses chirurgiens luy offrant le palais de Mars s'il y vouloit heberger. Ce iour nul n'entra au chasteau de Cinistene, mais on ne parloit par toute la ville d'autre chose. Et Daraide courut la premiere vers Diane pour luy raconter tout ce qui estoit auenu la iournee. Dequoy elle fort estonnee se plaignoit des dieux qui l'auoient ainsi condamnée à continuēlle prison, sans auoir la liberté de voir les choses publiques comme la gent menuē, regrettant qu'elle n'estoit de basse condition pour iouir des plaisirs & deduitz communs. En quoy Daraide taschoit à la reconforter à son pouoir : luy demandant congé pour aller lendemain esprouuer l'auenture du chasteau, à fin de luy rapporter le conte de tout ce qui y pouuoit estre de merueille : ce que la princesse luy acorda fort volontiers. Mais auant vous veux ie declarer la source & origine de cest enchantement.

Du lignage de Rosaran & la cause du chasteau enchanté.

CHAP. XLI.

LA seconde partie de la cronique d'Amadis de Grece vous a deduit comme Perion de Gaule estant Seigneur du Royaume de Turquie y mena sa chere compagne & espousse la roynes Gricilerie, apres la mort du Roy Alizaran, de laquelle à succession de temps il eut vn beau filz nommee Rosaran, lequel parceu en aage de receuoir l'ordre de cheualerie le receut de la main de son pere, fors que l'espee qu'il

ne voulut prendre que de la main de la duchesse Siluerne pour la renommee de son exquise beauté ornee de pareille vertu. Parquoy part incontinent de la cour de son pere, ne menant avec luy que deux escuyers & s'en va droit en Bauiere, ou de fortune la vieille duchesse mere de Siluerne n'estoit pas pour lors : estant allee aux montaignes artifizies, pour recouurer certaines herbes necessaires aux ceuures de magie, dont elle estoit grande ouuriere. En son absence gouuernoit le pais vn sien frere vaillant preud'homme nommé Galdan de Playarte : souz la puissance duquel estoit la ieune duchesse Siluerne en l'aage de seize ans quand Rosarany arriua. Lequel se presenta deuant elle, requerant l'espee de sa main : qu'elle se tint heureuse de luy donner, sachant le lieu d'ou il estoit, & le voyāt autant beau & de bonne grace q̄ nature auoit peu former. Si deuint extremement amoureuse de luy des l'heure premiere qu'elle le vid (vray est qu'en intention de mariage) & il s'embrassa de son costé à outrance, la supliant le recevoir pour son cheualier. Or seiourna il aupres d'elle enuiron vn moys, durant lequel il eut loysir de luy decouurir ses amours, & requerir remede pour sa vie. Elle n'en fit pas moins de sa part, si bien qu'ilz se fiancerent secretement : à la charge de ne le manifester auant qu'elle eust le consentement de sa mere : aussi que ce pendant il ne la toucheroit point de plus pres que le droit de fiançailles permettoit. Rosaran fut si fier des faueurs de sa dame, que pour luy faire connoistre sa valeur, vn iour apres maintz deuiz amoureux il luy requist vn don qu'elle ne luy osa refuser : c'est à sçauoir que sans en rien communiquer à personne ilz s'en iroient secretement en l'isle de Guindaye pour maintenir qu'il n'y auoit dame sur terre qui luy fut egale en beauté, & en ce luy monstrent par experience qu'il auoit en luy vertu pour meriter sa bonne grace. Elle si accorde & par vne belle nuyt (en tel train & equipage que vous a esté dit) s'esloignerent de la cité : tellement que son oncle

oncle Galdan n'en sceut rien que l'endemain assez tard. Dequoy il cuyda forcener, & monte incontinct à cheual avec quatre chevaliers, & tant piquerent qu'ilz les attraynerent sus le soir: la qu'y eut vne dure meslee entre luy & Rosaran pour la duchesse Siluerne, lequel y fit tant d'armes qu'il naitra & demonta Galdan & ses chevaliers: Puis continuèrent leur chemin iusques à la mer, ou ilz s'embarquerent & parvindrent en fin en l'isle de Guindaye en laquelle ilz s'equipperent de tout ce qui estoit necessaire à leur entreprise. Galdan de Playarte (qu'il laissa fort blecé) s'en retourna en la cité avec deux de ses chevaliers, car les deux autres moururent. Peu apres la vieille duchesse reuint de dehors qui fort le courrouça du fait de sa fille: & se rendit au combat avec ses femmes, à l'heure que Rosaran & Florarlan auoient grãd besoin de departement pour l'importance de leurs vies. Et ainsi dresta ceste belle prison pour sa fille & son amy, en punition de ce qu'elle auoit fait sans son congé, & de l'offence que Rosaran auoit faite à Galdan son frere. Par ce moyen retardoit la iouissance de leurs desirs, & les separoit lvn d'auec l'autre. Et pour rendre le charme plus propre & plus conuenable, establit que luy & elle prendroient la forme & figure des seigneurs ou dames dont seroit question en la preuue: ausquelz descouuriroient le secret que plus desiroient sçauoir pour la consequence de la poursuite ou abandõ de leurs amours, ainsi qu'il en auint à Florarlan & à tous ceux & celles qui l'esprouuerent: s'accomplissans les choses du tout selon la teneur de l'escritteau qui estoit au dessus du portail graué en vne lame d'or. Ce qu'ayât fait la vieille duchesse s'en retourna en sa ville de Bauiere.

Comme les Roynes & Darayde, & Garaye esprouuerent l'auenture du chasteau enchanté.

CHAP. XLII.

DAraïde l'endemain au matin s'habilla le plus proprement & iollement qu'il estoit possible d'vne robe de satin cramoysi que Diane luy donna, sans oublier le chapeau de pierreie sur ses cheueux, & la riche ceinture & le colier, tellement qu'apres la princesse nulle des belles luy faisoit honte. Si s'en va en la grand place pour esprouuer l'auenture: ou elle rencontra les Roynes qui y alloient & Garaye apres elles fort richement parée. Les gens de la ville homes & femmes (qui accoururent pour les voir) estimerent fort les beautez de Sidonie leur Roynes, & de Cleofile. Mais Daraïde en ceste fleur de ieunesse garnie de ie ne sçay quelle vigueur plus que feminine, attrayoit des cueurs infinis à son amour. Or vont les deux Roynes s'entretenans par la main entrer à la porte, laquelle elles ne sceurent passer vn seul pas: dont elles connurent qu'il n'estoit permis d'y aller qu'vne a vne: & apres la dispute qui yroit la premiere, Sidonie marcha auant, & incontinct les menestriers commencerent à sonner d'vne grand douceur. La Roynes monte en l'escalier, & trouue vne chambre fermee; puis va à l'autre qui estoit ouuerte ou elle vid force cheualier au circuit du mur ayans tous l'arc tendu & la fiesche dessus tournée vers la porte. Elle eut grand peur à les voir en cest arroy, mais ilz fleschirent tous vn genouil en terre par reuerence, & se tindrent ainsi tant que la Roynes fut là. Alors entre seurement, & apperçoit le ieune Rosaran assis en vne chaire au milieu de la chambre acoudé sur vn oreiller, desarmé de la teste & des mains, son armet & escu es deux costez de son siege. Son chef ainsi appuyé & les yeux clos il faisoit de piteuses doléances, qui resueillerent à Sidonie les sienes: encores plus quand elle auisa entre autres hystoires peintes es verrieres, celle des amours de son Moraizel, qui la tira en merueilleuses complaints, que les lamentations de Rosaran luy rompirent semblans pressées & requerir soudain confort: duquel

G

elle

elle s'approche luy demandant quelle douleur il sentoit. Adonc ouure les yeux, & prend à l'instant la forme & semblance de Florisel: dont Sidonie fut si estonnée qu'elle s'assid à terre ne se pouuant soustenir sur ses piedz, puis iettant l'œil sur luy, commença: A à traittre Moraïzel que tu as grâd' confiance en ta beauté, de t'oser icy presenter deuant moy, à qui tu as ioué vn tel tour de deloyauté. Adonc ce personnage d'vn visage gay luy respondit: ma chere dame Sidonie, la force de l'obligation de l'amitié du Prince Falanges d'Astree me fit vser en vostre endroit de celle dont vous plaignez sur moy, de sorte que ie receu effort auant que vous en liurer. De vous maintenir amour, vous sçavez que le mariage de mon Heleine m'empesche, à qui ie fauterois la foy plus qu'à vous: vous assurant que ie sens neantmoins souuent vn esguillon & remord de la fruition de vostre beauté qui fortiroit en euidence sans l'obstacle manifeste que vous voyez: qui ne me tient en moindre martire que vous, pour la distraction forcee de vostre presence. Ce dit, le personnage retourna soudain en sa premiere figure: dequoy la Royne outree de dueil luy esclie: A à Moraïzel comme tu augmentes mon tourment, de me faire entendre vne amitié mutuelle, là ou ie pensois qu'il ny eut que contemnement & oubliance. Là si tant tu m'aymes pourquoy te transportes-tu si tost hors de ma veüe: laisse moy vn peu iouir de ta figure, puis qu'il ne m'est loysible en ta propre personne. Apres elle prioit de respondre, mais en vain: car le rayō de splendeur vint barre sus elle, dont elle se trouua hors du chasteau en la troupe ou Cleofile l'attendoit qui l'interroga en riant, la voyant toute espouuētee, que c'estoit qu'elle auoit veu. A quoy elle respondit que chacun y estoit pour soy, & que ce n'estoient choses à diuulguer ne publier, sinon qu'elle la pouuoit assenrer estre la plus estrange & plaisante auenture qui iamais fut moyennant que la gloire qu'on y sent ne se perdist si tost. Puis qu'ainsi est (dit Cleofile) ie ne

voy que reculer. Si s'en va à la porte ou elle eut son aubade comme les autres puis monte en la mesme chambre d'ou Sidonie venoit de sortir. Là elle receut grand plaisir de recognoistre es histoires des vernieres la pompe en laquelle elle auoit fait son entree à Constantinople, & le combat des Roys Amadis & de Tir, & (d'vne suite) l'acte memorable de sa damoyfelle Silerfie trenchant la teste au cousin du Roy Breon. Sur laquelle, elle fit de grands regretz, que ceux de Rosaran luy firent cesser. Auquel elle va, luy demandant qu'il auoit à gemir & lamenter. A l'instant il ouure les yeux & prend la forme du grand Roy Amadis de Gaule, & luy dit: Excellente Royne de Lemnos l'affection de mon Oriane me priue de liberté pour le seruice de vostre valeur & vertu: reste d'accomplir ma parole de subroger en mon lieu vn Prince de mon lignage à vostre contentement. Ce dit Rosaran reprend sa face: dequoy Cleofile trop esmerueillée luy dit: O Roy sans per qui m'ordonnez vous pour mary, veu que n'avez pareil au monde? respondes moy, & me le faites connoistre, puis que ie le dois prendre de vostre main. Mais Rosaran ne s'en esmeut en rien, & l'esclair vint rayer sur elle, dont elle se trouue avecques Sidonie, qui luy demanda si elle en auoit à conter, qui luy respondit soufisant, que c'estoient affaires à bouche close. Adonc elles firent marcher Daraïde, qui receut vne aubade fort melodieuse à l'entree de la porte: & trouua l'huy de la tour de Rosaran fermé, & celui de Siluerné ouuert. Si entra en la chambre ou il s'adressa droit à elle, la voyant espleuree & desconfortee, & luy en demanda l'occasion: Incontinent il luy fut auis qu'elle voyoit Diane en personne, deuant laquelle elle s'agenouille, qui luy dit: Daraïde ie t'ayme d'aussi seruente amour que dame ayma iamais autre, auis le remede de ta langueur qui ne te sera denyé. Ce mot acheué Siluerné se represente comme paraissant, au grand ennuy de Daraïde, qui luy vouloit discourir les afflictions, mais c'estoit temps

temps perdu : parquoy se mit à lamenter grieuemēt : Là ou suis-je réduit, qui par tāt de peines & longues dissimulations n'ay acquis vn seul point de faueur qui rien me vaille ? O infortuné Agefilan que tu fis peu pour toy , quand suyuant le conseil de ton cousin Arlanges tu te vins icy brusler comme le papillon à la chandelle. Tu t'es approché pres du feu pour mieux t'embraser, trop plus eusses gagné de prendre les armes vertueusement & pourchasser son amour par faitz & gestes insignes en estat de cheualier. En ce deguisement tu rabuses le premier, & elle apres : qui sera fonde sur ses premieres excuses & defences quand tu commenceras à assaillir sa chasteté. Que feras tu maintenant ? si tu ne te descouures, tu te perdz en peine & langueur : si tu le fais, tu te mets en danger de la perdre & toy-mesme par ce moyen. Aussi de perir en ce martire sans estre conneu te feroit moins regretter & estimer pour n'auoir hazardé son nom à quitte ou à double à espoir ou desespoir. Daraïde s'y fendoit si auant qu'elle y fust trespassee, si l'esclair ne l'en eut iettée dehors, estonnée & rauie trop plus que les autres. Parquoy Sidonie luy dit qu'elle retournast à foy en estant si loing transportee. A quoy elle respondit, qu'elle voyoit bien que c'estoit influēce commune à tous ceux qui reuenoient de ce lieu, veu qu'elle estoit tousiours ainsi hors de foy pour estre mieux en vn' autre, dequoy la Royne ne s'estoit aperceue qu'à l'heure. Or fut le reng de Garaye qui y alla, & eut son aubade, & arraisonna Siluerne comme les autres, qui se transmua soudain en Cleofile, disant: Garaye tu te peux asseurer d'estre aymee de moy plus que damoyelle qui viue. Dequoy elle peu contente vouloit plaider sa cause, mais elle perdit la veuē de sa maistresse, ne voyant plus que la duchesse Siluerne. Si este (dit elle) qu'il me faut perdre la vie en estat de cheualier, ainçois que de tant languir souz ce masque de damoyelle. Lors la lueur du rayon la rend en la grand' place, ou elle eut sa part de la risée pour l'estonne-

ment qu'elle monstroït. Puis les Roynes se retirerent en leurs palais, & Daraïde en celui de Diane, à qui elle dechifra la singularité du chasteau, & comme elle l'y auoit veuē en propre figure, & le propos qu'elle luy auoit tenu de l'aymer plus que damoyelle du monde. A quoy la princesse respondit qu'elle n'auoit en rien auancé son credit par l'aenture, qui luy estoit seur & certain en son endroit. Dequoy Daraïde luy baïsa les mains humblement, & Diane souspiroit tendrement, disant: Lasse chetue à qui la destinee est si contraire qu'elle bannit & prie ma grandeur de tant de plaisirs & joyes, sans que ie voye moyen d'issir de ceste captiuité, ne que ie le doïue ne puisse desirer, veu que ce ne peut estre sinon par le mariage de celui qui aura occis mon pere, auquel mon cueur creueroit ainçois que de iamais consentir. Daraïde & la Duchesse Lardenie s'employèrent à la consoler, luy remontrant qu'elle se deuoit asseuerer en la proësse incomparable de Florisel de Niquee son pere : qu'il ne seroit en la puissance de cheualier quelconque de luy oster la teste. Et qu'au reste elle ne pouoit tarder veu sa perfection nompareille d'estre bien tost apparée à quelque grād' Prince de la terre. Par ces remonstrances elle appaisa son dueil, les priant de ne rien dire de ce propos à la Royne sa mere. Et Daraïde demeura ficee en son dessein de vouloir prendre les armes pour combattre avec le congé de la Royne tous ceux qui viendroient en la querelle contre Florisel : estimant par ce moyen rendre seruice tresagrea- ble à sa dame, & luy donner connoissance de sa vertu. En laquelle intention nous la lairrons encore quelque temps entretenant la playe de sa douleur, & Floratlan faisant penser celle de son corps.

Comme l'Empereur Amadis de Grece deliura vne Damoyelle des mains de deux cheualiers qui la vouloient forcer.

CHAP. XLIII.

L'Empereur Amadis de Grece & sa damoyelle Finistee apres qu'ilz se furent departis d'auec la belle Angelee continuerent leur chemin rendant iustice à plusieurs qui l'en requeroient, & defendant maintes damoyelles des tors & outrages qu'on leur vouloit faire. Desquelles la derniere il recontra en vne forest sur le midy, estant sur son palefroy entre deux escuyers montez sur leurs rousins & assez pres leurs maistres combattoient à outrance à qui l'auroit pour sa proye. Ce que voyant l'empereur, irrité grandement s'approche d'elle pour scauoir l'occasion de ce conflit. Qui luy respond, qu'es ces faux cheualiers l'auroient prise en chemin & combattoient pour l'enleuer contre sa volonté, l'ayant mise ce pendant entre les mains de leurs Escuyers, à fin que celuy l'emmeine de qui le maistre sera vainqueur. Adonc Amadis dit aux Escuyers qu'ilz la laissent, où il leur feroit laisser à leurs despens. Lesquelz s'escrierent à haute voix qu'on leur tollissoit la damoyelle, qui fit cesser le combat aux deux cheualiers, & venir ensemble vers Amadis le menacer, s'il ne se deportoit du fait auquel il n'auoit aucun interest. Amadis leur respondit que tout preud'homme estoit obligé par loy de cheualerie à soustenir le droit des dames, & les preseruer d'iniure. Ilz luy repliquent qu'il luyue sa voye auecques la sienne, sans empescher ceux qui se veulent pouruoir comme luy. A quoy Amadis: la mienne me suit de son bon vouloir, & vous voulez raurir ceste cy par force. Les deux cheualiers voyans qu'ilz ne se depescheroient de luy sans coups ruer, s'accordent de le charger ensemble, l'un quittant la damoyelle à l'autre qui s'emparerait de Finistee. Alors viennent les espees nues contre l'Empereur disans qu'ilz luy aprenroient à exercer iustice sur ceux qui n'estoient de son territoire, par-ce qu'il auoit deliuré la damoyelle des mains de leurs escuyers à coups de plat d'espee laquelle, vint à Finistee l'aue-

tir de fuyr auec elle pour le danger ou elles estoient, n'ayant qu'un champion à les defendre contre deux. De qui Finistee l'asseurait, voire y en eut il quarante telz. Or commençoient leur combat, quand les escuyers qui les voyoient en la meslee retournent & faisoient chacun la sienne, dequoy elles s'escrierent, Amadis tourna la teste vers elles qui la luy eschaufa tellement qu'il l'ameine vn coup sur l'armet de l'un à qui il le fend iusques aux yeux: dont l'autre espouuenté, tourne les espaulles & broche à trauers champs. Mais Amadis bouillant de colere pique apres & par l'auantage de son cheual l'attraint sur le chinon du col, tellement qu'il trebuche mort à terre. Les escuyers ne se firent prier à l'heure de quitter les damoyelles qui s'en vont fuyans comme si tous les diables les emportassent. Alors Amadis va à elles, demandant à l'estrangere quel chemin elle auoit à tenir. Qui luy respond (apres vne humble action de graces de son honneur qu'il luy auoit garenty) qu'elle tenoit le sien iusques à vn chasteau d'une de ses parentes, qui seroit iustement leur giste, l'assurant qu'il y seroit bien traité. Au nom de dieu soit (dit Amadis) & ainsi s'en va ayant les deux damoyelles à ses costez, desquelles Finistee prend son escu: & l'autre qui auoit veu sa grand' prouesse, & contemploit son port & sa taille luy dit: Quelle te sentoient tant redevable a luy & tant conquise de sa bonne grace, que son cuer desiroit se vouer à luy pour son premier seigneur sans vn certain destourbier: à quelle fin? respond l'Empereur. De vous choisir pour amy, dit elle, mais ie craindrois faire tort à ceste Damoyelle que menez quand & vous d'entreprendre sur les marches, il luy respondit, qu'elle se pouoit assurer de vraye amitié de sa part (elle luy remettant deuant les yeux la difficulté de satisfaire a deux) il promettoit d'en faire entierement son deuoir. Dequoy l'estrangere fort contente le laisse vn peu passer, & tire Finistee par le manteau pour en appointer auec elle.

Qui

Qui luy presta volontiers l'oreille pour en donner l'esbat à Amadis, qui ne les deuâçoit gueres à fin d'entendre la farce. Si demanda l'autre à Finistee: Ma bonne amye que vous semble de nostre propos, en auez vous point froid aux piedz? Finistee ne se pouuoit tenir de rire, dequoy elle luy demandant la cause: par ce, dit elle, que vous estes fort loing de ce que cuydez tenir de pres. Ha vrayement (respond l'estrangere) ie le croy bien s'il depend de vostre volunté. Finistee respondant que tout gisoit en celle du cheualier mesme. L'autre luy repliquoit qu'elle presumoit donc estre si belle qu'il ne la deust iamais changer pour autre. Lors Finistee luy declaira qu'il auoit son cuer obligé en vn lieu qui le priuoit de toute liberté. Ainsi comme elles en alloient deuisans, rencontrèrent vn cheualier fort laid & difforme, qui requit Amadis de luy faire part de ce dont il auoit trop, en luy donnant vne des damoyelles pour soy solacier: qui luy respond que c'estoit à elles qu'il se deuoit adresser pour sçauoir leur vouloir. Son visage n'y est pas fort attrayant, dit l'estrangere: à qui le cheualier indigné: Si n'auiez vous pas beauté pour faire mourir beaucoup de gens. Nous voila d'accord, dit elle, moy de n'aymer si beau que vous, & vous dedaigner si laide que moy, si allez à la bonne fortune. Ce sera donc en m'eslongnant de vous, respond il, puis dit adieu à Amadis, luy ramenteuant que qui trop embrasse peu estraint, & qui trop embrasse feu estaint, dequoy il se mit à rire. Et Finistee dit à la damoyelle, c'est nostre desastre, nous refaisons celuy qui nous desire, & desirons celuy qui nous mesprise. Sur ce propos arriuent au chasteau ou la damoyelle estoit bien connue, qui les y fit loger & seruir honorablement.

Du mauuais tour qu'une damoyelle brassa à l'Empereur Amadis qui auoit la nuit refusé sa compagnie.

CHAP. XLIIII.

LA dame du chasteau auertie par la Damoyelle (qui estoit sa parente) de la vertu du cheualier qu'elle amenoit leans, & de la rescousse de son honneur par son ayde le bienueigna & traitta à son pouoir. Or y auoit la dedans de belles filles avecques la vieille dame, desquelles l'une deuint fort esprise d'Amadis durant le soupper. Elle le seruoit songneusement à la table, & se plantoit vis a vis de luy ne retirant l'œil de dessus sa face: qui le causa de la regarder quelquefoys s'en riant en son cuer, ce qu'elle print à son auantage, comme si ce fust œillade d'affection reciproque. Parquoy apres le soupper elle s'adresse à Finistee, la priant de luy faire cest honneur de la receuoir a coucher avec elle, souz ombre de vouloir entendre de l'estat & des auentures des cheualiers errans telz que celuy qu'elle suynoyt: & pensoit bien que Finistee seruiſt au sien de bonne compagnie tant de nuyt que de iour. Finistee si accorde, & couchees ensemble, apres auoir mis Amadis en son lit, elle aprint son nom, & entendit par menuz propos qu'elle n'estoit pas l'amy de ce gentilhomme. Mais si tost que la sentit endormie se leue & va en la chambre ou Amadis dormoit profondement à cause du travail de la iournee. Si se couche ntē en sa chemise aupres de luy & le commence à baiser & entreietter la iambe coquine: dequoy il se resueille en sursaut demandant qui c'estoit qui le prenoit pour vn autre. A quoy la galande mon amy c'est vostre Finistee. Comment Finistee (respond Amadis) est-ce la promesse que m'auiez iuree si saintement? vuidez, vuidez d'icy & ne vous trouuez iamais en ma compagnie. Adonc l'honneste fille qui conneut Finistee ne luy estre fort agreable, luy dit qu'elle se moquoit & estoit celle qui l'auoit seruy à soupper, & l'auoit veu ietter l'œil sur elle, qui l'incitoit à luy venir remedier à sa passion. M'amie (replique l'Empereur) puis qu'estes venue à ma faueur ie vous en remercie, & ne m'oublierois tant que de honnir vostre chasteté

pour la recompense du bon traitement que j'ay receu ceans. Mon gentilhomme (respond elle) ie ne vous puis nyer que ie ne sois attainte au vif de vostre bonne grace, vous priant d'auoir pitié du mal que ie souffre pour vous, sans reietter honteusement celle que plusieurs desirent à credit, qui se liure toute vostre. Amadis qui auoit ses pensées trop haut assises pour les abaisser là, luy dit qu'il estoit interessé d'une maladie secrette, luy ostant la puissance de luy faire tel service. Dequoy elle ne se tint à bien payee, ains l'importuna tant qu'il luy dit, que si elle n'estoit plus bonneeste & ne sortoit de son liét il seroit contraint d'estre peu courtois en son endroit. Alors la bonne damoyelle craignant quelque rudesse, faye dehors & s'en retourne, non pas en son liét, car il ne luy tenoit plus de reposer, mais se reuestit du tout, attendant le iour pour se venger de luy. Sur l'aube duquel arriuerent quatre cheualiers au chasteau parens de la dame, desquelz l'un estoit fort affectionné seruiteur de ceste damoyelle. Qui la voyant si triste & les yeux tout batus d'auoir pleuré, l'interrogea de la cause, qu'elle luy dit estre pour vn cheualier logé leans qui l'auoit voulu forcer comme elle alloit en sa châtre luy porter quelques besongnettes. Ce que l'amoureux declare à ses compagnons, qui sans tarder montent en la viz grognans & murmurans hautement. Amadis de bon heur estoit desia habillé, & oyant ce bruyt met armet en teste, & prend son escu en vne main, & l'espee en l'autre qu'il n'auoit a peine degainée quand les cheualiers entrerent: crians à mort, à mort le trahistre. Le courtisan de la damoyelle marche le premier qui discharge sur l'escu de l'Empereur, & il luy rend son change sur le siéne de telle force qu'il le detranche iusques au courroies. Ce qui refroidit vn peu les autres, & il va vers eux demandant qui les mouuoit à telle trahison: mais vous paillard (dirent ilz) vous la comparerez. Alors l'éuahissent de toutes parts & il escrime frappant & parant de tel-

le adresse qui les blessa tous sans receuoir vne seule playe en son corps. Finablement s'esuertue en telle façon que d'un reuers il coupe la moytié du col à l'un. Ce que voyans les autres gagnent l'huys à la course: mais il les suit de si pres qu'il fauche les iaretz à l'un, & l'autre qui descendoit l'escalier il pousse du haut en bas là telle premiere: dont il demeura long temps en guise de mort, sans mouuoir tant ne quant. A ce tumulte la dame estoit accourue avec ses damoyelles, qui voyant ses parens en tel arroy, & luy l'espee sanglante au poing: Dea, dit elle, cheualier est ce cy l'escot que payez à voz hostes. Bonne dame, respond, ilz sont payez de la trahison qu'ilz ma'uoient machinee pour me meurdri, sans que ie sache pourquoy. Ce dit, doutant qu'il y eust encores a qui parler, remonte en sa chambre & Finistee apres, qui luy ayde à armer. Puis descendent en la court & prennent leurs cheuaux & s'en vont, sans qu'Amadis comptast onques à Finistee le bon tour de la damoyelle: lequel fut declairé au contraire à la dame du chasteau par les cheualiers qui en rechaperent. Mais elle qui prudente estoit consideroit le fait, & comme son hoste n'estoit pas armé, aussi qu'elle ne luy en auoit premier fait la plainte, iugea qu'il en alloit autrement & rendit la damoyelle à ses parens, presumant que la faute deuoit proceder de son costé,

Comme l'empereur Amadis de Grece descendant avec Finistee en chemin, rencontra vne litiere que deux geans conduyssoient avec plusieurs cheualiers.

CHAP. XLV.

L'Empereur cheuauchoit en grand melancolie & tristesse pour le peu de nouuelle qu'il aprenoit de sa chere Niquee: & en faisoit de douloureux regretz que Finistee luy appaisoit à son pouoir: de qui il prenoit les remonstrances en bonne part, pour l'affection honnestee qu'il connoissoit en elle. Toutesfoys sa resolution estoit si au bout de l'a qu'il s'estoit

prefix

prefix s'il n'en auoit asseurance, de s'aller redre solitaire en quelque desert pour y acheuer ses iours en deuotion & contemplation de la diuinité. Or auint que par leurs iournees ilz se trouuerent au pais de Vienne, membre dependant de la couronne de France. Laquelle il entendit auoir esté posée de nouveau sur le chef de Lucidor son beau frere, comme successeur legitime du Roy son pere que dieu auoit appelé, & qui estoit lors en grand guerre contre vn duc de Bourgogne pour le duché de Sarne. Surquoy pensa qu'il deuoit secours à sa seur Leonorine, puis que fortune l'auoit porté la si à propos : à quoy l'epoinçonnoit d'auantage la vieille playe de Lucelle qui saignoit encores & ne se pouuoit consolider ne cloire pour laps de temps ne distance de lieux. Mais Finistee luy contredisoit & debatoit ce voyage, d'autant qu'il ne deuoit oublier sa chere espouse qui pouuoit encores estre viuante, ne rechercher ses premieres amours qui sont si gluantes & aisées à renouer : parquoy deuoit fuir l'occasion de sa presence, pour euitter le peril de ce qui en pouuoit auenir. L'Empereur trouua ce conseil si sain qu'il l'embrassa de ioye, determinant d'en passer du tout par son auis. Or auint qu'un iour en cheuauchant qu'ilz entrerent en vne campagne ilz choisirent d'assez loing vne belle forteresse, ou ilz virent approcher par vn autre chemin vne litiere couuverte de veloux cramoyssi que deux geans conduisoient armez de toutes pieces, & accompagnez de plusieurs cheualiers, & deux nains gouernoient les mulets. Amadis s'arresta pour les voir passer, & dit à Finistee qu'en tel temps il eust peu rencontrer ceste auenture qu'il en eust sceu tout ce qui en estoit. Et elle luy conseilla de ne s'en mettre en peine & danger pour si leger occasion, à quoy il s'accorda: puis les voyant entrer dedans le chasteau se r'auisa d'espier s'il sortiroit quelqu'un qui leur en peust raconter. Ce qui echeut aussi tost par vn page qui estoit demeuré derriere. L'Empe-

reur luy coupe le chemin, & luy demande ou il alloit si hasté, & qu'il y auoit dedans la litiere que deux geans conduisoient. Le page dit que c'estoient deux damoyelles, dont l'une estoit la plus belle qu'il eust iamais veüe. Ce dit, donne du fouët à son rousin, & s'en va apres ses maistres au chasteau, laissant Amadis en grand' pensée sus ces dames, si ce seroit point de fortune sa Niquee & Anaxare, & apres y auoir pensé determina d'aller enquerir la verité par amour ou par force, quelque remonstrance que Finistee luy sceust faire au contraire, qui trouuoit ceste entreprise grandement perilleuse : laquelle il pria d'attendre la dehors en quelque lieu comme la fortune luy succederait: si s'en va droit à la porte du chasteau heurter fort & ferme d'un marteau de fer qui y pendoit. Au bruit vint un cheualier à vne fenestre sur le portail qui luy demande qu'il vouloit a hurter ainsi. Il respondit qu'il desiroit parler aux geans pour entendre quelles gens ilz auoient amenez en vne litiere. Vrayement, dit l'autre, c'est bien a vous qu'ilz en doiuent rendre conte: si attendez vn peu & ie les vous feray venir presentement. Lors se retire, & voicy incontinent vn des geans à la fenestre la teste desarmee qui crie à Amadis d'une grosse voix de taureau Cheualier qui te meut de nous vouloir icy contreroller? ie croy que ne soies pas en bon sens: Pour-cette conseille de t'en aller diligemment faire guerir ton cerueau, si n'aymes mieux maltraitter icy ton corps en dure prison, ou en brieue mort. La courtoisie dont i'vse enuers toy maintenant c'est à raison du besoin que nous auons de cheualiers pour le present. A quoy Amadis: Geant ie ne te doy scauoir aucun gré de ceste humanité forcee dôt tu vles pour ton affaire plus qu'à ma faueur: car la vertu ne regarde autre fin que le droit de bien faire: mais si tu me veux oubliger d'une autre plus grande, laisse moy entrer dedans à fin de parler à toy de plus pres. Il luy respōd, que s'il auoit autāt de prouesse que de philosophie il feroit

folie de luy ouvrir la porte: toutesfoys que pour luy faire plaisir il luy donneroit la veüe de la forteresse. Amadis repliquant que c'estoit luy qu'il desiroit voir & affronter, non pas le bastiment, moiennant qu'il l'esseurast de tout autre fors que de luy.

Ce que le Geant luy accorda en se riant: & retourne prendre son armet, puis luy fait ouvrir & le reçoit en la cour avecques Finistee, qui ne le peut abandonner, estant resoluë de suyure. telle fortune, q̃ Dieu luy enuoyroit prospere ou diuerse. Or ça (dit le Geant folastre) puis que tu en veux manger plus n'en seras escondit: & le ieu me plaist à cause de ceste damoyelle que l'emporteray pour le pris si ie gaigne. Je mettray peine (dist Amadis) de la garder, & garde bien ta teste. Adonc estoit venu l'autre geant nommé Mandroc, seigneur de ce chasteau d'Aldarin: à qui son frere dit: Mandroc ie vous vois doner le passetemps d'un debat finy par un seul coup, & si i'y fauz ne m'estimez iamais cheualier.

Ce qu'ayant prononcé par maniere de prophetie, hausse à deux mains son grand cimeterre, enyuant tailler Amadis en deux pieces, lequel comme peu aprenty de tel mestier, se lance à costé d'une merueilleuse agilité: tellement que le Geant descharge sur les carreaux, & son glaive luy vole des poings. Et à l'instant l'Empereur employe les deux mains avec toute la force, & luy fauche le foy du corps qui n'estoit couvert que de la maille: en sorte que le troncchet d'un costé & les iambes de l'autre.

Surquoy dit Galeris le croniqueur qu'Amadis de Grece fut le plus rude spadacin de tout son lignage, & qui de l'espee donna en sa vie de plus horribles coups. Que vous diray-je de la contenance de Mandroc quand il veid l'accomplissement du presage de son frere? sinon qu'il fut d'une part autant outré de douleur qu'homme pouvoit estre par la mort de celui qu'il aymoit fraternellement: & d'autre estonné desmesurément de l'estrangeté de la viffesse ensemble & force du cheualier. Dont il s'es-

cria: O Iuppiter! qu'est-ce que ie voy sinon que nulle puissance n'a lieu contre la mort qui est icy venue souz la figure d'un cheualier, comme le monstre le blason de son escu & l'effect de ses oeuvres. En ceste ire demande ses armes, & ce pendant qu'on l'armoist Amadis s'approche qui luy dit: Geant, crainte de toy non plus que de ton frere ne m'induit à te prier de te deporter du combat duquel ie sçay que la fin gist en la main de dieu, non pas en la puissance de tes bras: la seule honnesteté dont toy & ton frere auez usé envers moy de ne me haller voz mastins a un coup à la mode de vostre race, m'incite à l'estimer & desirer plus ton amytié que ta hayne.

Declaire moy seulement ce que ie demande, à sçavoir quelles dames auiez en la littere que conduisiez ensemble. A quoy Mandroc: Cheualier l'experience de ton fait me force de te priser beaucoup, & te veux asseurer (quant à nostre conflit) de tous mes gens autant que l'as esté contre mon frere, & ie les en auertis maintenant sur peine de leurs vies: mais le sang de mon frere que tu viens d'espandre me crie vengeance que nulle raison ne me peut diuertir. A l'heure estoit acheué d'armer, & descend de la galerie consultant en son esperit de se tenir mieux sur ses gardes, sans entoiser ces grandz coupz & lourdz qui font beau ieu à l'ennemy. Parquoy au premier choc il attrempe sa fureur, en vifant autant d'art que de force contre celui qui en estoit le maistre, luy rendant tousiours deux pour un par sa dexterité: tellement qu'ilz continuèrent plus de demye heure a chapelier & chamailler l'un sur l'autre, abbatans pieces de leurs harnois & sentretastans souuent la viue chair, dequoy le sang vermeil portoit tesmoignage. A la longue le Geant comme pesant & lourd, commença à se lasser par la viuacité d'Amadis qui le contraignoit à vne promptitude non accoustumee, & ne manioit plus son coustelas de la premiere verdeur. Ce que ses gens apperceuans (nonobstant ses defences) de-

scendent

scendent pour le secourir, & enuahissent l'Empereur de toutes parts, qui s'escrime parmy eux d'une hardiesse plus que d'homme mortel, dont il en abbat de trois coups trois à ses piedz. Le Geant n'en fait pas moins sur ses gens mesmes, leur criant, pail lardz, coquins, aymez vous ma vie mieux qu'à mon honneur? n'obéirez vous point à mes commandemens? fuyez, fuyez, ou ie feray de vous tous piteux carnage. Ainsi les repousserent hors de la court. Or dit Mandroc, ie t'ay gardé ma parole, parfour nissons nostre querelle. Amadis luy remonstroit qu'il se contentast du deuoir qu'il auoit fait pour satisfactiō de l'ombre de son frere: quant à luy qu'il se reclamoit vaincu de sa courtoisie, qu'il deuoit reputer à plus grande victoire que celle du corps. Mais le geant ny peut renger son entendement, & recommence à le charger comme deuant, & Amadis beaucoup moins, l'espargnant pour la franchise naïue qu'il auoit veu en luy. Vray est que l'effort de Mandroc estoit trop amoindry, & estoit aysé à l'Empereur de le soutenir. Ce qu'il fit, parant plus que le chargeant, & de luy mesme le reduit hors d'aleine & si flac que de lascheté il s'estendit de son long sur les carreaux. Soudain Amadis iette les mains à son armet pour luy delacer: ce que voyant vne ieune geante (qui fort belle estoit) accourt d'une sale basse, escliant: A a gentil cheualier ayez pitié de ma vie que tollirez quand & la sienne. Elle estoit femme de Mandroc nommee Gandaleise, de nature douce & benigne, & pensoit que l'empereur allast trancher la teste à son mary, ce qu'il faisoit pour luy donner air, luy dit: M'amy ie le vous donne tel qu'il est, combien que ie l'espere vif: vous assurant que s'il en rechappe, il aura par ce conflit vn bon amy en moy, tant sa vertu m'a conquis. La dolente femme luy pose la teste en son giron qu'elle baigne de ses chaudes larmes. Lors y vient Finistee qui luy remonstre qu'elle ne s'amuse à pleurer, ains à le faire desarmer hastiuement & luy bander ses playes,

par lesquelles il perdoit son sang qui de plus en plus l'affoiblissoit. Ce qu'elle fit, & ses gens luy vindrent ayder, qui apres le porterent en vne chambre & coucherent sur vn lit pour luy appareiller ses playes, dont il n'en auoit nulle mortelle.

Comme les Cheualiers du Geant saillirent de rechef sur Amadis, qui les rembarra. Et Et comme il trouua leans la princesse Lucelle.

CHAP. XLVI.

LEs cheualiers du chasteau qui s'estoient retirez en quelques chambres pour euitier l'ire de leur seigneur, quand ilz entendirent l'estat auquel il estoit, sortirent dehors & vindrent courir sus à l'Empereur, à l'heure qu'il auoit plus grand besoing de reposer que de combattre. Qui les traitta selon leur deserte, coupant les bras aux vns, les iambes aux autres, bref n'assenant coup à moins que de la perte de quelque membre. Et en la colere ou ilz le mirent ne s'en fut pas sauué vn, si la geante oyant le bruit n'y fut venue, qui requit misericorde pour eux, laquelle Amadis à sa faueur leur ottroya. Mais quand Mandroc eut entendu leur temerité obstinee, enuoya prier l'Empereur de parler à luy, qui y alla promptement. Lors le Geant l'importuna extremement (veu qu'il n'auoit force d'excuter la punition sur ses gens qui tant l'auoient offensé d'enfreindre ses commandemens, voire en assaillant celuy à qui il deuoit la vie) qu'il les mist tous à l'espee & s'en fit la raison par ses mains: autrement il se pouuoient assurer (s'il guerissoit) de la recevoir de la sienne & n'en perdre que l'attente. L'Empereur luy contredit, remonstrent que cela leur partoist de bon cueur pour l'ennuy qu'ilz portoient de l'accident de leur maistre, aussi qu'il leur auoit pardonné, & d'autant qu'il y auoit le principal interest, que Mandroc le deuoit tenir à fait pour son regard. A la fin s'y consentit puis qu'ainsi plaisoit à Amadis, à qui il

donnoit plein pouuoir & auctorité en sa maison de disposer de tout à son vouloir.

Puis le suplia luy declarer son nom, à fin de sçauoir de qui il se reclameroit toute sa vie serf & esclaue. Quand l'Empereur luy eut respondu qu'il estoit cheualier nommé Amadis de Grece, le pauvre Mandroc se souzleua par effort la larme à l'œil, luy requerant les mains à baïser. O cheualier voirement (dit il) & la fleur de cheualerie, que ce nom me semble de plus haut pris que la grandeur des estatz desquelz fortune iuste a paré & orné vostre vertu: laquelle ie remercie de m'auoir fait ceste grace d'expérimenter l'vnique proëlle du monde à si bon marché. Heureux ie me sens d'auoir tel confort en la perte de mon frere & de mes gēs, & en tel arroy de ma personne, que ce ne me soit auenu par ceste victorieuse & triumpante main du plus vertueux & illustre prince de la terre. A à sire ie vous supplie me pardonner ce que ie vous puis auoir fait d'offence, & sans y auoir egard me receuoir au nombre de voz tresaffectionnez seruiteurs, & me conuertirez tout ce malheur en tresgrand heur & felicité. Amadis prisa fort la prudence & debonnaireté de Mandroc, lequel il assura de sa part d'amitié entiere & indissoluble. Surquoy s'entredonnerent les accolades: puis il se retira pour faire aussi penser de ses playes. Et estant en vne bonne chambre ou Gandalesse le mena & ayda à Finistee à le coucher, elle retourna vers son mary, & ne tarda gueres à ramener à l'Empereur sa chirurgienne qui beaucoup entendoit de ce mestier. Lors estant la geante assise aupres de luy, il la pria de luy dire qui estoient les damoysselles arriuees leans ce iour mesme en vne litiere. Qui luy respondit que si sa disposition le souffroit elle les feroit venir en sa chambre, à fin d'entendre d'elles mesmes qui elles estoient: estimant en cela luy gratifier (comme elle auoit proposé en tout ce qui luy seroit possible) d'autant qu'elle sçauoit que ceste demande auoit esté le fondement de toute la messee. Or auoient elles veu par les galeries les

grands armes de l'Empereur, mais ne l'auoient sceu reconnoistre ainsi couuert, & ne l'eussent iamais deuiné en celle contree, combien que sa vaillance extreme leur causa grande admiration. Gandalesse les vovoir, qui les auoit recueillies fort honorablement, ainsi qu'il luy estoit commandé par son mary, & sans leur declairer l'estre du cheualier qui auoit iuré amitié intrinsèque à Mandroc: pria la princesse vouloir souper avecques luy, d'autant qu'elle l'estimoit personnage de haute guyse, & quelle seroit meilleure chere en telle compagnie. Ce que la princesse à la fin luy accorda (apres quelque petite difficulté) desirant grandement connoistre qui pouuoit estre le tant preux & hardy cheualier qui de taille & de vaillance ressembloit si fort à son Amadis de Grece. Dequoy elle deuïsa avec Anastasiane si tost que la geante fut partie: mais il ne luy pouuoit tomber en la pensée que l'Empereur peust estre en ce pais. L'heure venue du soupper elle fut en la chambre de Mandroc comme dame bien apprise & dediee à l'hospitalité & charité, & de la Gandalesse la mena en celle de l'Empereur, lequel elle ne peut voir de loing par ce qu'il estoit en lieu sombre: mais quand elle fut si pres qu'elle le peut reconnoistre deuint plus morte que viue, & sans Anastasiane qui l'assid en vne chaire pres du cheuet du lit, elle s'alloit de foiblesse loger bien plus bas. Amadis d'autre costé voyant si pres de luy celle du monde qu'il aymoit alors le plus (dormant vn peu la Niquee, comme le feu souz les cendres) bien luy seruit d'estre couché pour ne chercher plus dur giste: long temps furent tous deux sans pouuoir parler: & Anastasiane commença à dire: Seigneur Dieu que tes merueilles sont incomprehensibles. Peu à peu l'Empereur reuint à soy & prenant la main de la Princesse: Madame, lās ma dame, dit il, est-ce songe ou verité! que ie tiennē aupres de moy ce à quoy mon cuer aspiroit nuyt & iour sans relasche? Ne suis-je point trop heureux à qui le malheur de ma Niquee ait presté tel le occa-

le occasion de vostre tant desirée rencontre? Elle toute transportée luy respondit: Monsieur ie ne sçay si ie doy conter ceste fortune à bonne ou mauuaise, ou pour ce que ie suis tant endurcie en meschef & auerfité que ie n'ay plus de goust en la prosperité, ayant perdu naguères mon seigneur & pere: ayant laissé mon frere en guerre forte & dangereuse: & moy captiue avecques son filz que vous voyez. Je tais le plus grief mal de tous qui me procede de vous mesmes. Parquoy ne me puis resiouir de vous auoir trouué cōme la source de mon cruel martire: qui me fait mener vne vie penitente & recluse indigne de mon estat & ieu nesse. I'ay mis grand peine à distraire mon esprit de vostre souuenance, maintenant l'obget se presente qui ne seruira qu'a rengreger mes douleurs. Dieu qu'est-ce à dire que quand fortune m'assaut & plonge en quelque destroit, tu m'enuoye tousiours secours par ceste main seule sans iamais choysir autre heraut de ta diuine clemence? A quoy Amadis: ma dame le iuste createur m'ayant osté le moyen de vous rendre le seruice q̄ vostre beauté meritoit au moins me preste les occasions de vous seruir en voz plus vrgens affaires, de si peu que ce corps peut exploicter: qui m'est le plus grand contentement que ie sçauois receuoir en ce monde. Sur ces propos suruindrent les officiers qui courrirent, & tost apres ceux qui apportoiēt la viande, de laquelle ilz ne firent pas grand degast, tant ilz auoient les ames rauies en profondes pensees. La geante les vint voir à la fin ayāt souppé avec son mary, bien aise de voir leur connoissance. En la presence de laquelle (l'Empereur qui ne vouloit rien deguifer) demanda à la Princesse quelle chere faisoit Leonorine sa seur. Elle la feroit meilleure, respond, si elle estoit auertie de la nostre. Puis il embrassa le petit Lucendos & le baisa plusieurs fois, le benissant en souhait qu'il peut ressembler à son pere. Apres quelques autres deuils la princesse donna le bon soir à l'Empereur qui ne dormit gueres la nuit

pour redoublement de playe sur playe, ayāt à vn coup le corps & l'ame affligez trop griuement.

Des discours de la Princesse Lucelle avec sa damoyelle Anastasiane, et apres avec Amadis, à qui elle recita l'occasion de sa venue au chasteau d'Aldarin.

CHAP. XLVII.

QVand la Princesse Lucelle fut retirée en sa chambre, & que Lucendos fut couché elle commença à faire de merueilleux discours avec Anastasiane, se plaignant de son dessein qui l'auoit adressé si mal pour elle entre les mains de l'Empereur, iacoit que ce fut au grand bien de son frere, & de tout le Royaume de France. La bonne damoyelle luy remonstroit qu'elle auoit tort de se plaindre du plus grand heur qui luy eust sceu auenir, veu l'amour incroyable qu'elle portoit à Amadis de Grece: auquel fortune ne pouoit aprestier opportunité plus souhaitable. Que vous vaudr dissimuler ce que ie connois si certainement par vostre confession, ce que vostre vie deuote tesmoigne: bref ce qui est notoire à tout le monde, que vous aymez l'Empereur Amadis de Grece plus que vous mesmes? n'est-ce pas grand folie de desirer vn bien desesperement pour en euitier la fruition quand elle se presente? vsez, vsez de l'occasion au front cheuelu, à qui si laissez vne fois tourner le dertiere de la teste qui est chauue, vous ne la pourrez plus empoigner au poil. Vous voyez que la Niquee est en termes de perdue ou bien egaree: si elle est morte, vous voila au comble de voz desirs pour estre mariez ensemble: si elle vit encores, au moins est elle demy oubliée en luy qui l'estime morte: dont ne sera plus son affection bridee de ce mordz, ains libre & pleine s'espandra en vous. La Princesse en l'escoutant se couche & Anastasiane aupres d'elle la pressant d'en faire vne resolution qui la mit à ce coup hors de tant de langueur. A quoy elle respondit: M'amy bien

bien sçay que ne vous sçauois deguïser l'amour de l'Empereur dont ie brusle & ards miserablement : mais le dedain de m'auoir postposée à vne autre & violé le gage precedent de sa foy, puis la conscience de ma grandeur, ce sont clous qui repoussent l'autre. Si ie voyois l'assurance de legitime conuersion, ie ny ferois difficulté aucune: mais ia mon cuer ne consentira à vne destrouffise & derobée d'amour, la ou ie sen le merite de vray mariage. En telz deuis passerét la plus grande partie de la nuit: & lendemain vn peu auant l'heure de disner alla faire ses visitations commençant à Mandroc & s'arrestant avec l'Empereur, qui se plaignit à elle du peu de repos qu'elle luy auoit laissé la nuit: & elle en soubriât luy respondit, qu'elle n'en auoit pas eu trop grand prouïson pour en faire largesse. Or, dit il, ma dame vous excuserez, s'il vous plaist, la vehemen ce de ma passion, qui ne me permit hier d'entendre la cause de vostre venuë en ce lieu. A quoy Lucelle, c'est le moins qu'on peut deuoir à l'auteur de la deliurance, que de luy reciter l'occasion de la prison. Sçachez donc monsieur que contre le nouveau Roy mon frere à son auènement à la couronne le duc de Bourgogne s'est eleué avec plusieurs autres de ses vassaux pour la contention du duché de Sarne. Et estant entré dedans le Royaume à main fortée, enuoya de nuit vne embuche pres d'vn chasteau ou il sçauoit que la Roïne estoit & cest enfant & moy: pourpensant (comme il auint) que ne nous deffierions pas de luy si loing de son camp. Brief à l'ysuë de la voulans aller en la ville prochaine, ilz nous surprindrent en vne litiere & nous menerent au duc qui les en guer donna magnifiquement: & nous liura aux deux geës comme à ses plus feaux amys pour nous transporter en ce chasteau hors de connoissance de gens. Qui luy fait esperer non seulement le duché de Sarne qu'il querelle, ains la moytié du royaume pour nostre rançon. O Dieu (dit Amadis) oyant ce conte, ie te requiers comme iadis Philippe roy de Macedonie (ayant receu

trois nouuelles de succez tresheureux) de ne me troubler ceste grande prosperité que par leger infortune, pour le cours ordinaire de fortune qui empoisonne tousiours ses biens de quelque amertume de mal. Ie l'ay assez ouy dechiffrer telle (respond Lucelle) mais ie ne l'ay iamais conceüe qu'ennemie, dont ay à luy faire requeste toute contraire à la vostre: qu'elle me vueille recompenser tant de rudesses & assautz par vn bon heur qui tous ces maux efface. A quoy Amadis: Si ce bien que desirez, ma dame, estoit en ma puissance la iouissance ne vous en seroit tardieue. Ie n'ay pas occasion de le croire, respond, par ce que i'en ay connu par cy deuant. Làs ne me remettez, dit il, le passé deuant les yeux duquel ne me sçauois purger que par la longue penitence que i'en ay faite, mais pensez aux seruices cōsecutifz, vrais tesmoings de la repentance qui suyuit de près le peché. Sur ce point la dispute estoit forte entr'eux, qui fut rompue par les seruiteurs suruenans pour le disner. Mais la table offee recommença plus aspre, luy poursuyuant roidement & elle se defendant de telle force qu'amour luy departoit. Ce qu'auisant Anastasiane, tira Finistee plus loing en vn coin & l'entretenoit des meilleurs propos qu'elle pouoit inuenter. Bien vous dis que quand la princesse eut assez escouté les prieres, plaintes & instances de l'Empereur, & connu l'estat auquel il estoit par ses larmes & souspirs, elle ne fut de si dure paste de son costé qu'elle ne souffrit sa part de l'esmotion, qu'Amadis sentit bien au tremblemēt de la main qu'il tenoit avec chaleur, puis froideur successiue. Parquoy elle craignant qu'il ne s'oubliait en ceste alteration, luy alla attemper son ardeur par vne grand ruse, disant: Helas monsieur, ou tendez vous par voz raisons, sinon a combattre celle qui se confesse vaincüe? au fort ie croy que vous ne m'aymiez pas plus qu'estes aymé de moy. Mais cuidez vous que j'aye le cuer de me donner à vous toute, pour receuoir de vous vne part: Quand vostre Niquee n'aura plus rien en

en vous, faites alors estat de Lucelle. Car vous ne devez pas esperer vne legere despouille de volonte dissolue, de celle que protestez repouter digne de vostre lit nuptial. Amadis eut quelque satisfaction de ceste responce, & tellement la pressa qu'ilz se donnerent parolles de fiançailles, souz condition du decez de Niquee: en vertu desquelles il gaigna plus de priuauté enuers la princesse qu'il n'auoit iamais eu: qui luy auança fort sa guerison, estant visité d'elle deux foys chascun iour: & prenant aucune fois de sauoureux baisers: puis coulât la main dedans le sein ferme & poly contre vne petite resistance, se maintenoit en aleine, en attendant la fin qui couronne l'œuure.

Comme l'Empereur & Mandroc le geant gueris de leurs playes, s'embarquerent à la persuasion de Lucelle pour aller en France.

CHAP. XLVIII.

L'Empereur garda quelque iour la chambre auant qu'estre guery de ses playes & fut seruy & honoré par Gandalesse au mieux qu'il luy fut possible. Toutesfois se leua deux iours plustost que Mandroc & l'alla visiter & deuiler avecques luy fort ciuilement, comme tresbien le scauoit faire. Ou entre autres propos le Geant luy declaira qu'il estoit du sang de Furio Cornelio & qu'il auoit gaigné sus ceste race double victoire, l'une par armes, l'autre par courtoisie. Et venant l'heure de disner, le supplia luy faire cest honneur de le vouloir prendre en sa chambre, par ce qu'il receuoit tât d'ayse de sa presence qu'il en auanceroit beaucoup sa guerison, laquelle il deuoit desirer come du plus cordial seruiteur qu'il eust oncques acquis. Gadalesse l'en pria pareillement, disant qu'elle alloit querir la princesse pour mieux se resiouir tous ensemble: ce qu'elle fit au grand ennuy de Lucelle qui n'en scauoit point de gré à Amadis, la priuant ainsi de la commodité qu'ilz auoient d'en conter plus familièrement en

sa chambre. Neantmoins y vint, menant le petit Lucendos par la main & passerent le temps assez ioyeusement avecques Mandroc & sa femme: à qui ilz ne tindrent longue compagnie apres disner, & l'Empereur conduit la princesse en sa chambre, à qui il liura de rechef vne chaude alarme d'amour se sentant trop mieux de sa personne que le iour precedent, & entrât en plus grand chaleur par les libertez & prerogatiues des baisers & attouchemens que leurs secretes fiançailles luy permettoient. A quoy Anastasiane ne failloit à prester opportunité, tirant Finistee en la garderobe souz couleur de luy monstrier mille nouueautez d'affiquetz & atours à la françoise. Trop estoit grief à Amadis d'estre si pres du pommier comme Tantalus sans en mager du fruit, & en l'eau iusques au menton sans en boire. Mais la sage princesse qui n'en sentoit moindre escarmouche en son cueur que luy, refrenoit ses appetits, souz esperance d'en iouir bien tost à son honneur: doutant aussi que le cōtētemēt qu'il prendroit sur elle en tāt moins du mariage l'en peust destourner & degouter, ou par assouuissement d'une concupiscente desordonnee, ou par opinion mauuaise de celle qui se setoit laissé aller de façon non legitime. Parquoy le voyant en excez de desir, luy dit: Mon cher & ancien amy, si vostre affection a tousiours continué en mon endroit depuis l'heure de sa naissance (comme vous me donnez à entendre) vous auez bien encores la constance de differer l'accomplissement de vostre volonte iusques à peu de iours que ie vous assigne pour terme. C'est que i'ay pensé que deuous persuader à Mandroc (qui de rien ne vous esconduira) de nous remener en France au plustost que sa disposition le pourra souffrir, pour ne laisser long temps le Roy mon frere en affliction de nostre prise. Auquel ie declaireray mon vouloir conforme au vostre, dont il sera plus content que nous mesmes. Car au lieu de pere qu'il me tient, ne seroit raisonnable à moy de passer vn tel fait sans son conseil & consentement: ce que
Lucelle

Lucelle luy disoit tant pour luy amortir son feu à l'heure, que pour le vray desir qu'elle auoit que les choses fussent accomplies en la forme qu'elle disoit. Làs (respondit Amadis) ma grand' ayme il ne me semble pas que ie puisse viure au tourment que ie sens iusques à ce iour : car la patience que me preschez & ramentenez que i'ay eue iusques icy, estoit trop plus aisee en vostre absence que pres de vous, ou ie suis batu des rayons continuëz de vostre beauté, contre lesquelz la debilité de ma raison est eblouye, comme nostre foible veüe au regard direct du soleil. Lucelle pitoyable en ce martire luy auançoit en cent baisers & mignardiers les vsures de la sōme principale retardee & atermoyee. Dequoy force luy fut de se contenter à faute de mieux, en esperant le bien total qui ne pouuoit gueres tarder selon le dessein de leur voyage. Pendant lequel la Princesse luy dit qu'elle estoit d'auis de trouuer moyen secrettement de faire entendre au roy Lucidor la fortune de leur deliurance, de peur qu'à loccasion de leur captiuité il ne condescende à termes trop desauantageux. Ce qu'Amadis loua grandement, & ainsi fut executé: ie laisse à vous dire avec quel aise du gentil Roy qui desia auoit offert au Duc de Bourgongne son ennemy le duché de Sarne qu'il querelloit, dont il ne s'estoit voulu contenter. Auquel (apres auoir receu ces bonnes nouvelles) manda que puis qu'il n'auoit entendu à la raison, qu'il n'estoit plus delibéré de luy rien offrir ne liurer. Or ce soir Lucelle faignit se trouuer vn peu mal pour s'exēpter de souper avecques Mandroc, mais l'Empereur y alla pour dissimuler son affection, & en se retirant en sa chambre fut donner le bon soir à la Princesse non sans grand soupçon de Finistee, voire plus grand que la verité, comme elle luy sceut bien reprocher à son coucher (ne voulant prendre de luy aucune excuse en payement) & que sa Niquee si elle viuoit y estoit outrageusement offensee: si elle estoit decedee, auoit bien meritē pour le

moins qu'il en portast le dueil plus longuement. Surquoy elle accusoit la legereté & inconstance des hommes, & l'hypocrisie de la race des Princes grecz qui se vantaient de loyautē en peinture. Lors elle pleuroit & souspiroit, le suppliant luy donner congé de se retirer de sa compagnie: ou elle souffroit tant, pour le respect de sa fidelité qu'elle s'estoit persuadée. Amadis eut beaucoup de peine à luy oster ceste opinion: combien qu'à la fin elle creut aux sermens & adiurations qu'il luy en fit. L'endemain se trouuerent l'Empereur & la Princesse à sa requeste à disber avecques Mandroc pour luy entamer le propos de son retour en France vers son frere: lequel eut tel secours en sa guerre de la part des empereurs Lisuart & Esplandian, qu'il occit le Duc son ennemy & s'empara de ses terres. Mandroc qui n'eust voulu desobeir en rien à Amadis de Grece, luy respondit qu'il en ordonnast du tout à sa volonté: & sur le champ commāda à sa femme de faire tenir preste vne nef, estimant le plus seur d'aller par eau, d'autant qu'il scauoit tous les chemins estre gardez par les ennemys du Roy. Si s'embarquerent deux iours apres laissant Gadaleffe avec quelques cheualiers pour la garde du chasteau d'Aldarin, & voguerent par bonace: passans le temps fort gayement ensemble. Car Mandroc estoit facetieux & bien apais, & l'Empereur & sa compagnie ne voyoient occasion que de faire tresbonne chere.

Comme Florisel & Anastarax avec leur compagnie partirent du chasteau des Geans, & par tourmente furent iettez en vne autre Isle.

CHAP. XLIX.

Les Princes Florisel de Niquee, Anastarax & Filisfel sejournerent l'espace de quinze iours au chasteau des geans avec la Princesse Siluie & Leonide: durant lesquelz tous les habitans de l'Isle vindrent rendre foy & hommage à Florisel comme à leur seigneur lige, qui y laissa pour capitaine

capitaine & gouverneur vn des cheualiers d'Anastarax nommé Gastab. Iamais n'estoient là sans plaisir, que leur aprestoient Darinel, ou Busando le nain avec Ximique la naine qui estoit toute apriuoisée de la main de Siluie, & gazouilloit plaisamment d'amourettes avecques Busando cōme à bille pareille. Et Darinel si voulant entre-mesler, estoit attaché quelquefois par tous les deux. Il leur reprochoit leur haute corpulence, & eux à luy sa beauté (car il estoit difforme & assez contrefait) laquelle il disoit auoir toute en l'ame. Voluntiers à cause de vostre sagesse, disoit Busando. Non respond Darinel, mais pour la figure de ma dame Siluie qui y est pourtraitte au naif. Quant à toy tu es si petit que tu monstras peu de sens à te cacher dedans le rocher: car ces diables de geans ne t'eussent apperceu non plus qu'une vermine. Busando se cuida courroucer de ceste railerie qui touchoit trop au vif & passoit les bornes de ieu, si la naine n'eust adoucy cest aigreur regrettant qu'elle ne le connoissoit alors pour le mieux loger & traiter: iugeant qu'il y auoit trouué vn dur giste, & ieuné vn ieune non commandé. Ha dit Darinel la vraye amour ne se peut guerres celer, oyez vous la pitié qu'elle a de sa fortune. Vrayement Busando tu faillirois bien à mieux rencontrer ton party qu'avec Ximique, veu la semblance de voz personnes, & ie croy que les meurs ensuyuent le corps, & qu'accorderez bien vous deux de complexions pour faire vn bon mesnage. Va va (replique Busando) nous sommes tous d'un païs comme les perroquetz: que sçais-tu si sōmes parens proches? pour le moins est elle ma mere d'age si autrement non, & quād i'y entendrois ie penserois faire plus sagement que toy qui te bastis des amours en l'air, ou tu ne bees qu'aux grues, & ie croy que ma mignonne (prenant Ximique par le menton) ne me traiteroit pas mal si nous estions mariez ensemble. De telz propos ces folz apprestoient à rire aux princes: lesquelz voyans le temps opportun

s'embarquerent en leurs nauz. Tant tournerent & virerent à l'entour de maintes Isles qu'ilz vindrent entre autres surgir à vne, pour s'enquerir tousiours du fait de leur queste touchant Niquee. Si prindrent terre & s'allèrent assoir sur l'herbe en vn pré deuifans les Princes & Princesses ensemble & rians de Busando & Ximique qui auoient les chapeaux de fleurs sur la teste & balloient de fort bonne grace au son de la cornemuse de Darinel. Estans en tel arroy, arriue vne vieille dame vestue de ducil & atournée de voiles blancz & larges, montée sur vne haquenee, & sentoit bien sa dame d'honneur, & vn ieune Geant la menoit de bride, & six vilains à pied les suyuoient laquelle auisant ceste belle compagnie dit tout bas au Geant: Il nous conuient icy suppleer par subtilité la faute des armes, car nous auons vne belle proye en nostre main. Si s'approche de la troupe les saluant courtoisement & leur demandant: Mes bons seigneurs qu'elle bonue fortune vous emmene en ceste contree? La mer, respond Florisel, qui tient les nauigans sugetz à son vouloir contre le leur. Ce ne sera pas contre le mien, dit la dame, qui suis aise d'auoir occasion de seruir & honorer telles personnes que me semblez estre. Grand mercy, respond Florisel, vous portez aussi le maintien de dame de qui lon ne doit esperer que tout bien. Or mes bons seigneurs (dit elle) ie vous prie de venir prendre la patience avecques moy en mes tentes qui sont dressees pres d'icy, & ie vous y feray la meilleure chere qui me sera possible, iusques à ce que la mer s'acalme pour vostre voyage. Ilz s'accordent à son offre, à demy par necessité, & elle enuoye deuant vn des vilains nommé Marsupion à qui elle commande de faire aprestier vne des tentes pour ceste troupe, & donner ordre qu'ilz trouuassent le soupper prest & les nappes mises. Marsupion y court qui estoit fait au badinage, & la dame & le geant mettent pied à terre pour monstrier caresse & gayeté à la compagnie, qui estoit encore plus

plus grand interieure que par dehors, pour l'opinion qu'elle auoit d'auoir fait vne belle prise se doutant qu'ilz fussent de la maison de Grece. Surquoy elle les interrogea, & ilz luy respondirēt qu'ilz estoient gentilzhommes de Tunis qui alloient faire vn mariage d'vne pucelle de leur lignage (monstrant Leonide) avec vn gentilhomme de Sicile. Elle leur repliqua qu'ilz deuoient estre de bon lieu veu leur accoustrement: en quoy s'excuserent qu'ilz n'auoient pas oublié de se parer du plus beau & du meilleur de leurs coffres pour honorer leur mariee. Adonc sonnoit Darinel de sa cheurie & les nains dançoient: à quoy elle faisoit semblant de prendre grand plaisir. Puis les conuia d'aller à ses tentes ou elle fit entrer les chevaliers, commandant au Geant son filz, nommé Bazaranc de les faire defarmer & bailler manteaux à se vestir, cependant qu'elle entretenoit les dames aupres de la fontaine qui la estoit: ou les seigneurs se rendirent n'ayans que l'espée au costé & les manteaux d'escarlate sur les espaules. Guerres n'y furent qu'on leur dist que la viande estoit sur table, si allerent soupper & la dame & Bazaranc leur firent compagnie avecques toute ciuilité & courtoisie. Les tables leuees ilz ne tarderent guerres à s'aller reposer es litz qui leur estoient accoustrez en leur tente, ou ilz dormirent de profond somme à cause du trauail de la marine.

Comme Florisel, Anastarax & leurs dames furent pris par fraude de la dame de l'isle & de ses enfans.

CHAP. I.

EStans les princes & princesses repousans en la tente de la dame en toute seurété (ce leur sembloit) arriuerēt douze chevaliers armez avecques deux Geants que le valet Marsupion auoit esté auertit au prochain chasteau souz ombre du mandement en chiffre que la dame luy fit de faire aprestre le soupper. Laquelle entra la premiere & fit saisir les espees, qu'ilz auoient pres de leur cheuet puis les esueilla. Dieu sçait

en quel effroy se voyaus nudz, & tant de gens en armes à l'entour d'eux, & ne trouuans leurs espees: parquoy auisāns la dame qu'ilz connoissoient luy demanderēt que vouloit dire cest alarme en lieu ou elle les auoit asseurez. Qui leur respondit qu'ilz ne se missent en peine de se couvrir enuers elle qui les tenoit pour princes Grecz, ou leurs parens & allies & pour ce les prenoit prisonniers. Florisel qui vid la force & vaillance ny aucir lieu, voulut iouer du plat de la langue, remonstrant qu'elle s'abusoit de les estimer de la race de Grece, & qu'elle se faisoit grand tort de rōpre la foy qu'elle leur auoit iuree, mesmement pour butin qui ne le valoit pas. Mais ce fut en vain, car elle leur dist qu'ilz auisassent à s'habiller soudain s'ilz ne vouloient estre menez tous nudz: dont se virend contrains de faire rempar de seule patience contre le present coup de fortune, & se vestirent sans monstrier aucun estonnement. Pareillement furent les princesses menées qui ne deguisoient point leur deconfort en telle trahison: & les nains crioient & hurloient comme qui les eust trainez à l'escorcherie. En mesme instant la dame enuoya à leur nef & fit amener leurs gens (de peur qu'ilz n'en allassent porter les nouvelles) souz couleur de leurs seigneurs qui les mardoient pour leur seruice, lesquels furent si auisez qu'on ne leur sceut tirer les vers du nez de l'estat & nom de leurs maistres. Or furent tous logez en vn quartier du chasteau, & les nains en vne basse fosse: les princes en vne chambre serree à grilles de fer: les princesses en lieu assez honneste. Lesquelles la dame alla voir incontinent, les sommant de se declairer, si elles vouloient estre bien traitées & selon leur dignité. A quoy Siluie luy respondit qu'elle ne voyoit occasion de se fier aucunement en sa parole, quelque promesse qu'elle leur sceust faire veu son infidelité manifeste. Ma dame (respond elle) dol ou vertu en l'ennemy est tout vn, c'est à sçauoir pour le fait important d'hostilité, mais au reste ie vous trait-

teray

teray humainement: Elles ne firent que rire & hocher la teste de ses propos, parquoy les laissa en leur chambre passer la nuyt assez maigrement: en laquelle ne leur fut possible de cliner l'œil pour l'ennuy qu'elles portoient de leur prise, & la peur qu'elles auoient de l'issue qui en pourroit ensuyuir. Lendemain la dame les reuint voir tascant tousiours à les connoistre au certain: ce que ne pouant faire par la ruse de sa langue, leur dit par ce qu'elle les trouuoit trop desolees, quelle leur donneroit compagnie pour les resiouir. Si sort & retourne tantost amenant par les mains deux fort belles dames (qui estoient l'empriere Niquee & la pucelle Anaxare) car la dame de l'isle estoit Garçarace mere du duc Brabon, nommee en ses titres Duchesse de Gazen. Or quand la Princesse Siluie aperceut l'Emperiere qu'elle tenoit pour morte (estant Garçarace sortie pour les escouter parlans en leur priuë) luy tend les bras au col, & Leonide à Anaxare, faisans piteux regretz meslez toutesfoys de ioye pour ceste heureuse rencontre. Possible ne fut aux vnes ny aux autres en si soudaine veüe & n'esperee de rien faindre ne dissimuler leurs noms. Lesquelz Garçarace ayans entenduz, court le rapporter à Gandalat & Masfaudel les deux geans qui en menerent grand ioye: estimans que ces Princeses fussent accompagnees des Princes de leur sang. Ce pendât l'Emperiere Niquee embrasoit Leonide plaignant sa belle ieunesse si mal employee en captiuité & souffrance. Qui luy respōdit, qu'il n'estoit raisonnable qu'elle ne sentit sa part du meschef auenu à elle qui estoit chef de leur lignee. Adonc luy fut raconté le cours de leur fortune & la suruenue du Prince Florisel qui les auoit deliurees de si grād peril, & aussi d'Anastarax & Filisfel. Dequoy l'Emperiere fut fort estonnee craignant (comme elle deuoit) d'auoir trop parlé à l'accollée de Siluie, & les auertissant d'auoir bon bec au demeurât, de peur que les Princes fussent descouuertz par elles. Ce qui leur seruit grandement contre

la seconde embusche que Garçarace leur dressa. Qui par le conseil des geans les laissa ensemble pour vn peu les reconforter, & le iour ensuyuant leur amena les Princes qui tindrent bonne morgue, se desfiens de la trahison de la fauce femme: à qui les dames demanderent comme ilz se trouuoient de la fortune presente. Qui respondirent: de la sorte que gens de cuer doiuent porter les semblables: quand à nous (dirent elles) nostre dueil ne nous a gueres donné de relasche à penser au vostre. Lors prièrent Garçarace de les bien traiter comme gentils hommes de bon lieu qui estoient leurs seruiteurs domestiques, considerant que nulle courtoisie n'est si mal semee qu'un iour elle ne rapporte quelque fruit. Ce que Garçarace leur promit: qui remmena les Princes liez & garrotez en leur châbrie grillée & fermée à huis de fer. Toutesfoys elle & les geans perdirēt l'opinion qu'ilz auoient qu'ilz fussent des Princes de Grece. Apres le partement desquelz Niquee à qui le cuer creuoit de voir son filz en cest estat si pres d'elle, sans qu'il luy peust liurer aucun secours, pleuroit & lamentoit tendrement: plaignāt d'autre costé son cher espoux Amadis de Grece que Siluie luy auoit conté estre allé errant par le monde en la queste: ce qu'elle se repentit bien de luy auoir declairé, pour la peine qu'elle eut à la rappaiser, luy remonstrent qu'il leur falloit vser de magnanimité en ce desastre qui n'auient iamais moindre aux plus grandes personnes & au demeurāt esperer brieue deliurance en la misericorde diuine coustumiere de fauoriser & soulager leur maison. Puis embrace & baise la petite Fortunie luy souhaitant heureux progres de si miserable naissance, & en leur infortune si douloureux, se consoloient tant elles que les bons Princes de s'estre rencontrez ensemble: & quelquefoys Garçarace les menoit en la chambre des dames pour leur donner quelque resiouissance en leur prison.

H

Com-

Comme les Roys de Gaze & de Bugie enuoyerent Galtazar de Barberouffe & ses freres deffier la royne Sidonie, au cas qu'elle & sa fille ne les voussissent accepter pour mariz.

CHAP. LI.

VOus avez entendu cy deuât comme Bruzeō roy de Gaze auoit esté fort irrité des parolles de la royne Sidonie, outre le dueil qu'il portoit du deshonneur du combat pailé entre luy & Florisel: lequel auerty depuis de la pareille fortune esceü à Bultazar roy de Bugie, se transporta en son royaume & communiqua avec luy de la honte que tous deux auoient receü à l'occasion de la royne de Guindaye & de sa fille: qui ne luy sembloit deuoir demeurer sans vengeance. Que le moyen seroit de les demander en mariage, & à leur refus entrer en l'Isle avecques leur puissance, & s'emparer d'elles par force puis qu'amour ny auoit lieu. Ce Roy qui estoit feru à outrance par l'image de Diane ne fut trop difficile à conuertir & persuader a ceste emprise. Mais apres y auoir pēsé vne nuyt, luy dit lendemain qu'il auoit trouué vn moyen de paruenir à leur fin, à moindres frais & travail de leurs personnes: c'est à sçauoir d'enuoyer vers elles nostre ambassade, pour requérir leur alliance au hazard du combat de trois cheualiers que luy presenterons de nostre part contre trois de la sienne: souz condition que si les nostres sont vaincuz, nous ne les importunerons desormais sur ceste demande: & s'ilz sont vaincueurs qu'elles nous accepteront pour mariz: sinon qu'eux denōcons guerre mortelle à feu & à sang. Quand à noz trois champions, i'en fourniray de telz que tous les Princes Grecz ne seroient pas pour soustenir leur force desmesuree: car ie manderay Galtazar de Barberouffe & deux de ses freres qui n'ont point leur pareilz au monde en vaillance & hardiesse: lesquels ne me refuseront point, & d'autant deuons desia tenir nostre dessein pour ac-

comply. Le Roy de Gaze trouua ce conseil fort bon, qui gueres ne luy coustoit, connoissant la cheualerie des trois freres, mesmement de Galtazar qui estoit filz du Duc Brabon & d'une belle damoyelle non geäte: aussi ne l'estoient ilz pas, mais bien mébruz & de haute taille, ayans les yeux grâds, & les nazeaux gros & patuz, les leures grosses, & le poil roux, & estoient tous d'une ventree. Et dit Galeris qu'ilz estoient arriere neueuz d'Arjan Canile le redouté à qui Amadis de Gaule eut affaire en la ville de Fenuse pour la querelle de Madasime touchant l'isle de Mongase, & estoient neueuz de Dinarde, qui par fraude tira le Roy Perion & ses enfans en la prison d'Arcalaüs l'enchanteur apres la bataille du Roy Aravigne, ainsi que la tierce partie de ceste grande histoire vous a raconté. Or ne faillirent tous trois à venir incontinent au mandement du Roy Bultazar, & aussi peu firent de difficulté d'entreprendre pour luy le confit sur le party de leurs dames: n'estimans cheualiers au monde pouoir resister à leur effort, veu que trois ans y auoit que nul n'osoit entrer en camp contre eux, ne les geans mesmes contre le plus grand. Parquoy leur fut équipé vne nef en laquelle ilz vindrēt aborder en l'Isle de Guindaye, assez long temps apres le partement de la Royne Cleofile qui auoit emmené sa Garaye quand & elle: laissant la cour peuplée de plusieurs cheualiers venans avec diuerses auentures. Entre lesquels celui du Fenix auoit deffendu l'emprise de Diane contre tous ceux qui recherchoient Florisel, & y auoit conquis cinquante escuz à sa figure qu'il auoit fait pendre sur le portail de la tour de Febus, avec tel los & reputation que plus ne se trouuoit qui luy osast faire teste. En ceste saison arriuerent en cour Galtazar & ses deux freres avec leurs escuyers portans leurs heaumes & escuz, armez au reste de toutes pieces fort richement. Et deuez sçauoir qu'eux leurs escuz ne portoiet autre peinture qu'un dictō en lettres d'or: LES VENGEURS DV SANG RYSSIAN.

Passans

Passans par la ville furent suyuis du peuple pour leur fierte, & corpulence rare & peu veuë, tant qu'ilz vindrēt à la place ou estoit le chateau enchanté du ieune Rosaran & de la Duchesse de Bauiere, ou ilz trouuerent le cheualier au rouleau, ayant gagné plus de viugt escuz qu'il auoit attachez avec ceux du cheualier au Fenix : & estoit lors en propos de vouloir prouuer l'auenture luy & vn autre cheualier freschement arriué. Ce qui arresta les trois freres pour en voir l'issue laquelle fut merueilleusement estrange : car ce cheualier se confiant en sa bonté seulement, sans lire l'escriteau de la porte, entre dedans le chasteau. A l'instant on veid vne nue noire & espesse se leuer à mont, circuye de flammes de feu en guise d'esclairs, paroissans & cessans incontinent, avec si grand bruit de tonnerre qu'il sembloit que la terre se deust ouvrir. A l'heure entra le cheualier en la chambre de Siluerne, sur lequel toutes les damoyelles archeres décocherent leurs fleches, de sorte que tout herissonné de trait fut reieité deuant la porte roide mort. Alors la nue disparut, & fut veu sur le feste du chasteau l'arc des loyaux amans en forme de l'arc en ciel, & sur iceluy le grand roy Amadis de Gaule armé, hormis le chef, son escu en la main gauche, & en la droite sa verde espee qu'il tenoit haute & nuë en geste de vouloir ferir comme executeur de la iustice presente pour la desloyauté d'amour : de laquelle le trosne du iugement luy appartenoit sur tous les humains. Vray est que tous les assistans ne le virent pas pour ce qu'il disparut soudain) mais le cheualier au Fenix l'apperceut & celuy du rouleau pareillement. Ceste punition horrible retarda maints cheualiers d'esprouer l'auenture, s'ilz ne se sentoient seurs de leur loyauté. Et la Royne en memoire du cas, fit enterrer le cheualier en la place mesme, & luy eriger vne tumbé de marbre, sur laquelle fit entailler : LA FAYTE DE LOYAVTÉ SENT L'EXPLOIT DE CRVAVTE. Toutesfoys le cheualier

du rouleau ne perdit pourtant le courage d'y entrer, & eut son aubade douce & melodieuse. Puis montant en la chambre de la Duchesse, la voulut consoler comme les autres : & fut tout esbahy qu'il auisa Diane, qui luy dit : Artaxerxes ie ne te connois ny ayme, & ausi tost sa figure euanouit. Et il exclama : ô beauté plus diuine qu'humaine ie confesse ne meriter la fruitiō d'vn si haut bien : si est-ce que ie t'adoreray toujours en mon cueur, sans esperance de ta bonne grace : & te remercie de l'auertissement que me donnes à fin de ne m'abuser en vain pourchas. Adonc la splendeur le vint battre, & il se trouua planté deuant la porte.

Comme Galtazar de Barberousse executa son embassade enuers la royne Sidonie : & comme Florarlan, Artaxerxes & Darayde, accepterent le deffy contre les trois gemeaux.

CHAP. LII.

A Pres l'esprouue de l'auenture, Galtazar de Barberousse accompagné de ses freres monta au palais, & plusieurs cheualiers apres luy, pour sçauoir l'occasion de sa venuë. Si se presenta deuant la Royne à qui il exposa sa charge, montrant la promesse des Roys signee & sceelée autentiquement. Dequoy Sidonie fut grandement troublee, leur respondant, que les Roys ne faisoient en ce acte de cheualiers, de vouloir vsurper sa fille & elle par force : toutesfoys qu'elle assembleroit son conseil pour leur faire responce. Ce pendant les enuoye loger au palais de Mars, lequel ilz trouuerent le plus beau, & mieux garny de tous biens meubles precieuz qu'ilz eussent iamais veu, iusques aux officiers & valetz, qui tous estoient habillez de la liurée martiale, c'est à sçauoir de soye de couleur rouge ou cramoyse. La beauté de la royne leur sembla singuliere & digne du combat qu'ilz en auoiet entrepris, ioint le bruit qui couroit de la perfectiō de Diane sa fille : laquelle la Royne alla voir toute

triste de ceste nouvelle : & la trouua en son iardin pres de la fontaine avec Daraïde qui lors estoit de l'aage de quinze ans ; & de plus haute stature que cheualier qui fust en la cour , & à vray dire , portant en son cuer vn aussi grief faiz de passion croissant en elle quand & les ans . Or n'osoit elle la descouvrir à Diane , craignant que son honnesteté offensee de tel propos , la bannist à iamais de sa presence . A ceste cause refusoit creux toute pensue pres de sa belle maistresse quand la Royne y suruint : qui s'adressa premier a elle , luy requerât conseil en son vrgent affaire , comme à celle que les dieux auoient douee de tous dons de grace . Ce dit , elle se mist à pleurer & sa fille par compagnie , luy demandant qui estoit la cause de sa destresse : laquelle la Royne luy declaira briuelement : comme trois cheualiers de fierté & puissance estrange , voire plus diables que hommes estoient venuz de la part des Roys de Bugie & de Gaze pour les auoir à femmes souz la condition de leur victoire en combat de trois contre eux : ce qu'elle n'estoit deliberee de iamais consentir , ne de faulser la foy à son Moraisel , non plus que liurer sa fille à autre qu'a qui sa parolle publique & notoire l'auoit obligee , ains que plustost endureroit l'extremité de toute misere . De ce propos Daraïde fut si esmeuë que les yeux luy rougirent tout enflambez , & respondit à Sidonie : ma dame la saison n'est pas de vous desconforter ainsi & monstrez vostre courage failly alors qu'il se doit plus esuertuer : mais assemblez voz barons pour auiser sur ce cas : & ce pendant vous diray , qu'il me semble que deuez accepter ce deffy : vous assurant qu'il se trouuera assez de champions pour soutenir vostre querelle mesmement de ceux qui portent l'ymage de Diane : ayans iuste raison de combattre ceux qui pretendent à leur fin mesme d'espouser vostre fille . Aussi qu'ilz ne doiuent craindre de faire teste a cheualier quelconque , ayans empris de s'attacher au prince Florisel . Lequel en faute d'eux

i'iray chercher & les Empereurs Lisuart de Grece , & Amadis , ou le fort Anaxartes les requerans de ce don comme damoysele . La royne l'embraca de grande affection , luy disant que bien elle moultroit au besoin la vraye amour qu'elle portoit à sa fille : auquel si elle auoit la force pareille avecques deux autres cheualiers , elle ne douteroit de mettre son droit entre ses mains . A quoy Daraïde : ma dame , i'ay appris le mestier des armes en ma jeunesse & suis de pais qui me permet l'ordre de cheualerie : or vous plaise trouuer les deux & vous reposer sur moy pour le troisieme : car la beauté de ma dame Diane m'influera vne force autre que dameresque . Elle oyant ce mot , luy ietta les bras au col , disant : Làs m'amie en quel danger vous m'exposerez quand & vous entrant en si perilleux confit . Qui respondit , qu'elle n'en pensoit de grand , apres celuy ou elle estoit pour son amour tousiours à vn pas pres de la mort . Finalement la Royne fort contente de Daraïde retourne en son palais , & mande son conseil , qui fut de cest auis mesme , consideré qu'elle demeueroit en son entier apres le combat de deffendre ses pais , & le hazard de trois personnes len pouuoit garentir . Parquoy elle enuoye querir Galtazar & ses freres , ausquelz elle accorda le combat , prenant terme de dix iours pour nommer ses champions . Dequoy Galtazar trop esboudy luy requit les mains à baiser comme à royne de Gaze , l'estimant desia telle par l'acception du combat , & sa fille royne de Bugie : aioustant que par-ce moyen elle assureoit de vie les deux Roys , & de mort les champions qui seroient si hardis de soy presenter . La Royne irritée de l'outrecuidance de sa parolle luy dit , qu'il auroit plus d'honneur à bien faire qu'a tant dire , & qu'il seoit mieux à vn bon cheualier estre humble & modeste que braue en langage . A l'instant elle se leue comme fâchée & se retire en sa chabre . Les nouvelles coururent incotinēt par la ville du combat qui estoit accordé
aux

aux trois freres, mais nul de toute la cour o-
soit s'offrir à leur faire teste, sans le cheua-
lier au Fenix, & celuy du rouleau, qui guer-
res ne tarderent à venir vers la Roynie cou-
uerts de leurs manteaux seulement. Laquel-
le s'estonna fort à la veüe du second, qui
luy lança vn souuenir du prince Fa-
langes par sa semblance, qui estoit la sour-
ce de tout son mal. Si les fit a Toir comme
personnes de grand lieu, & Artaxerxes
print la parole pour eux deux. Roynie ex-
cellente nous auons entendu presente-
mēt le deffy qui vous à esté enuoyé & ac-
cepté par vous: pour lequel auez à fournir
trois cheualiers: nous voicy deux tous
prestz de vous y faire seruices'il vous est a-
greable de nostre main. Et connoissons tant
la fierté accoustumee de ceste nation de ge-
ans, & la droiture de vostre cause, que
nous espérons, souz la grace de dieu, vous
deliurer de leurs outrageuses menaces.
La Roynie assuree de la prouesse singuliere
de ces deux champions, receut grand' ioye
de leur offre, & les remercia treshumaine-
ment: & depuis les festoya ordinairement
au palais de Mars selon leurs dignitez.
Plus ne restoit que le tiers à trouuer pour
acheuer la partie: mais nul ne s'y inge-
ra de tous les cheualiers qui voltigeoient
par l'isle de Guindaye, iusques au penul-
tiesme iour du terme: auquel Sidonie trop
triste & esperdue s'en alla chez Diane passer
sa melancolie. Ce que Daraïde apperceuant
se mit à genoux deuant elle luy requerant,
& à sa fille pareillement, vn don, qui estoit
le premier qu'elle eust oncques requis à
Prince ne dame, les suppliant de le luy
ottroyer. Ce qu'elles luy promirent pensans
qu'elle leur voulsist demander quelque cho-
se à son profit & auantage. Lors leur de-
clara Daraïde que le don que la Roynie
luy auoit accordé estoit de luy faire donner
l'endemain l'ordre de cheualerie par les
mains du cheualier au Fenix (quelle prisoit
grandement) à fin de le tiercer au combat
contre les trois freres. Et vous madame, s'a-
dressant à Diane, entendez que m'avez pro-

mis par cest ottroy de fauoriser mon em-
prise de vostre presence, vous rendant en
tel lieu qu'il plaira à ma dame pour voir
sans que puissiez estre veuë: à fin que la pen-
sée de vostre assistance m'influe la vertu ne-
cessaire à la defence de vostre querelle,
pour exploiter souz l'habit feint de cheua-
lier en la façon que le Prince Grec en ac-
coustrement de Nereïde. Les Princesses
furent troublees du don qu'elle leur exposa:
& se plaignoit fort Diane à elle de ce
qu'elle l'auoit trompee à donner en lieu
de receuoir. A qui elle respondit, que pour
elle ne deuoit auoir aucune doute comme
estant assuree & enhardie par la dange-
reuse guerre qu'elle auoit ordinairement
auec sa beauté. Or dit la Roynie: force nous
est de luy tenir promesse, & i'espere (la
contemplant de pied en cap) quelle sortira
de ce combat auec tiltre de seconde Ala-
straxeree. Peu apres la roynie se retira, en
son palais, pour ordonner des armes de son
tiers champion. Auquel Lardenie vint in-
continēt ietter les bras au col en larmoyant
piteusement: A à m'amie quel cueur vous
auez, d'oser entreprendre ce dont ie trem-
ble en le pensant & ymaginant. O couardz
cheualiers qui presûmez de porter l'effigie
de Diane, ou vous cachez vous, que vous
ne venez defendre son droit, sans qu'il fail-
le que par vostre faute vne tendre pucelle
preigne les armes? Toutes les damoyelles
suruindrent admirans la magnanimité de
Daraïde, laquelle la Roynie manda apres le
soupper, y estant Florarlan, auquel elle cōta
la volonté de la Damoyelle à l'accompa-
gner au combat, & à desirer auant l'accollee
de sa main. Elle venuë, s'alla mettre à ge-
noux sur vne marche au dessouz du siege de
la Roynie qui luy tenoit les mains. Lors dit
Florarlan: ma dame ie croy qu'il ne fau-
droit que ce champion seul, & sans autres
armes, pour vaincre & defaire voz enné-
mys: & qu'il nous feroit de mauuaise com-
pagnie, comme nous combatans nous mes-
mes par son excellence: vous nous la voulez
bailler pour tierce, mais ie ne sache hom-

me qui ne la souhaittaſt pour premiere. Adōc Daraide le regardāt & trouuant fort à ſon gré : Seigneur cheualier, peu puis-ie faire des armes q̄ vous dittes, aupres de ma dame Diane, mais ſi voulez demain mettre les autres au poing, j'eſpere par l'influence de ſa beauté, & de voſtre compagnie en eſlogner fort loin les preſumptueux qui la cuydent tenir de ſi près. Apres quelques autres ioyeux propos, elle fut reconduitte au palais de ſa maiſtreſſe, & la Royne appella le Duc d'Alfarce, luy enchargeāt de donner ordre à tout ce qui ſeroit neceſſaire lendemain pour Daraide, meſmement du harnois qu'elle luy commanda choiſir le meilleur de ſon armurie, comme pour celle en qui ſon cuer luy iugeoit que ſon honneur giſoit & la vie.

Des propos que Diane tint à Darayde ſur le combat qu'elle auoit accepté : & comme elle receut l'ordre de cheualerie par la main de Flo ralan.

CHAP. LIIL.

DAraide retournant vers Diane la trouua plus penſiue qu'onquemaſ: ce qu'elle luy dit eſtre à cauſe du peril ou elle la cōſideroit entrer pour l'amour d'elle: & qu'elle ne ſ'eſtimoit auoir le cuer d'aſſiſter à ſi dangereuſe meſlee. A quoy Daraide reſpondit que la grand gloire ne pouuoit redonder que des grandes auentures & hazardeuſes: & qu'il eſtoit conuenable de commencer le train des armes par vne belle entrepriſe, meſmement pour le ſeruiſe de la prime Princeſſe du monde. Diane vaincue de ſes raiſons l'embraça, priant les dieux monſtrer en elle autant de vaillance qu'ilz y auoient logé de beauté. A quoy Darayde: madame ſi voſtre deſir eſt tel, faites q̄ ie ſache le lieu ou vous rendrez, à fin que i'en tire hardieſſe: ce que Diane luy promit. Lors la duchefſe Lardenie la prend par vne main, & la contēplant vne eſpace (comme en extaſe) avec vn grād ſouſpir luy dit. A à ma mignonne que les dieux vous ont creēe admirable avec

deux perfections ſi contraires, de delicate beauté, & dure force: le les ſupplie vous donner telle yſſue de ce combat que ie deſire. Apres quelques autres menuz deniz elles allerent repoſer iuſques au iour enſuyuant, que Daraide ſe rendit matin au palais de la Royne, ou elle trouua les Ducz d'Alfarce & de Ganiez qui l'armèrent d'un harnois inestimable. La Royne y vint bien toſt, portant vne eſpee de bonté & richeſſe nōmpareille, qui auoit eſté au feu Roy ſon pere. Les cheualiers du Fenix & du Rouleau arriuerent, qui priſerent beaucoup ſon port & diſpoſition en armes. Si deſcendirent en la place, & la Royne auſſi pour l'honorer, ou on luy tenoit vn deſtrier blanc comme neige, enharnaché de garniture de haut pris. Le cheualier du Fenix la baiſe en la face, puis la laiſſe monter, diſant, qu'avec telle compagnie il ne redoubteroit d'entreprendre ſi grand acte q̄ ce peult eſtre. Lors luy chaulſe l'eſperon droit, & receuant l'eſpee de la main de la Royne luy dit: A dieu plaiſe vous rendre, autant parfaite cheualiere, qu'il vous a donné de beauté. Grand mercy (dit elle) j'eſpere que le bon heur de voſtre main tirera à bonne & heureuſe fin pour vous bien ſeruir en l'eſtour. Adonc ſonnerent les haubois les remenans en la ſale, & Daraide ſe retira en vne chambre pour ſe deſarmer, puis retourne en la ſale veſtue d'une robe de ſatin blanc decouppé ſur toile d'argent, ſes cheueux trouſſez de laz de ſoye blanche avec vn chapeau de groſſes perles pour ſuyure la liuree de ce iour. La Royne manda incontinent les trois freres, pour ce que le temps de ſon delay expiroit, auſquelz venuz elle dit: qu'ilz ſçauoient l'accord fait entre eux & elle touchant le combat de trois contre eux trois, leſquelz elle leur monſtroit preſentement: c'eſt à ſçauoir, les cheualiers du Fenix, & du Rouleau, & la damoyſelle de Sarmate pour tierce: par quoy auſſaſſent quand bon leur ſembleroit d'entrer en camp, veu que ſes champions eſtoient preſtz. Ilz furēt eſbahis de trouuer

gens

gens qui les osassent affronter, mesmement de Daraïde, qui sembla si belle à Barberousse, qu'il dit avoir plus de peur de sa face nue que des deux autres cheualiers armez de toutes pieces. Voire qu'il s'estimerait heureux si en lieu de combattre en camp cloz à outrance, elle le voudrait recevoir plus mollement entre les courlines, & parler ensemble vne capitulation de plus douce guerre, d'amour pour mort, & de noces pour combat. Aussi qu'il luy seroit reproché à grand honte de s'estre adressé à vne tède pucelle, ayant accoustumé d'espouenter les geans de sa seule contenance & geste. Surquoy Daraïde apres l'auoir considéré du haut en bas, & iugé homme que lon ne deuoit mespriser luy dit : Galtazar i'estime plus vostre dedans que le dehors: vostre langue fait tort au demeurât de vostre personne : si ie suis telle que vous effraye plus que les geans, tant plus acquerrez vous d'honneur à vaincre celle qui ose attentér ce qu'ilz craignent à entreprendre: & à fin que ie vous conferme ceste opinion, ie vous requiers que la partie du conflit soit entre vous & moy, à fin de vous faire ceste grace pour l'amitié que me monstrez, de vous tirer des mains furieuses de mes deux compagnons, pour vous traiter des miennes que iugez tant souues & delicates. Ma damoysele, dit il, bien me plaist moyennant que ce soit à condition d'estre vostre mary si ie suis vainqueur. Peu ie hazarde en cela (respond elle) de mal-lit d'un si bon cheualier: parquoy ie vous accorde de tout le pouoir que i'y ay: & ce dit luy iette vn des ses manchons de crespé doré pour gage que Galtazar receut le plus ioyeux du monde d'auoir (ce luy sembloit) conquis desia la plus belle pucelle qui fust sur terre. Sur cest accord de combattre l'endemain, chacun se retire en son logis: & la Royne commande aux Ducz d'Alfarce, & de Ganiez de dresser les barrieres du camp vis à vis de la tour de Saturne ou elle vouloit faire venir sa fille pour voir le combat & qu'ilz s'y trouuassent comme iuges avec

cinq cens cabacetz. Quand à Diane & ses damoyseles elles ne passerent la nuyt qu'en prieres & oraisons pour Daraïde, qui se leua fort matin, & alla baiser les mains à sa chere maistresse, s'agenouillant deuant celle qui la baisa pleurant en la face: & luy dit, qu'elle ne pouoit esperer en elle que toute faueur des dieux, veu celles qu'ilz auoient si largement deployees sur sa personne. Ainsi leur plaist (respond elle) pour vostre seruice. Alors vindrent la Duchesse & la Marquise l'accoller, puis toutes les filles l'vine apres l'autre. Puis se departit de Diane, qui en vne litiere s'en va au palais de Saturne estant desia la Royne aux fenestres du sien, & le peuple en la place, attendant la venuë des combatans.

Du combat des trois freres contre Daraïde & les cheualiers du Fenix & du Rouleau.

CHAP. LIIII.

DAraïde venât au palais de la Royne fut armee de toutes pieces par les mains de Florarlan & d'Artaxerxes, portant son signal blanc en guise de nouveau cheualier. Puis ilz se firent armer & la conduirent en la court souz les bras, ou elle monta sur vn coursier blanc harnaché de mesme, sa testiere garnie de pennache de pareille couleur, & son armet aussi, lequel fut porté par le cheualier du Rouleau, elle ayant la toque espagnolle sur son chef, & ses cheveux tressés en vne coiffe d'or. Son escu porta le cheualier du Fenix, auquel estoit escrit à l'entour. LA VRAIE VAINCUE DE DIANE, POUR ESTRE VICTORIEUSE. Ces deux champions estoient montez sur deux bös destriers moreaux, & armez d'armes noires, & menerent Daraïde au milieu d'eux pour luy faire honneur, les trompettes marchans deuant entrerent au camp criant le peuple qui la voyoit si belle: voicy la creature enuoyee du ciel pour effacer les dames en beauté & les hommes en prouesse. Dequoy la royne Sidonie sentit grand plaisir,

plaisir, prenant à bon presage la voix de la multitude estimée celle de Dieu. Diane & ses filles d'autre part conceurent vne grand ioye à la contempler, tât bien à cheual & de telle fierté en ses armes. Ces deux compagnons luy liurerent escu & armes: puis chacun print le sien de son escuyer. Si furent posez en vn costé du camp par les iuges; & guerres ne tarderent à venir les trois freres, Galtazar de barberousse, Galtier, & Aurizan, qui furent parquez de l'autre costé, ayans leurs cottes d'armes verdes, & la parure de leurs cheuaux pareille. Ilz causerent vn triste silence a tout le peuple à leur arriuee, par leur braue maintien & corpulence membruë: & mençoient entr'eux Galtazar pour l'opposer à Daraïde. Les lances tant des vns que des autres furent grosses, & les fers luy sans & bien acerez: desquelles (apres que les iuges furent en leurs eschaufaux, & les trompettes eurent sonné) ilz se vindrent rencontrer tous six, dont nul ne faillit d'attainte. Car Aurizan & Galtier rompirent contre Florarlan & Artaxerxes (qui n'en firent pas moins) & se portèrent tous quatre par terre, hommes & cheuaux en vn mont, si estourdiz qu'ilz n'en releuerent pas trop soudain. Galtazar adressa en l'escu de Daraïde qu'il luy faussa entre le bras & le corps sans l'offencer, paroissant vne grãd' partie de la lãce par derriere: qui estonna grandement ceux qui regardoient de loing, cuydans qu'elle en eut à trauers le corps: mais elle luy perça l'escu & s'arresta au harnois qui estoit de bonne trempe, toutesfoys couchant de droit fil luy fit vuyder les arçons, & elle passe outre sans rien varier ne chanceler en la selle: puis saute en terre legere comme vn oyseau, & tire le tronçon hors de son escu qu'elle iette loing emmy le camp, de quoy la Roïne & sa fille eurent vne ließe incroyable. Elle embrassant son escu, & son espee au poing, va vers Galtazar, qui s'estoit releué a grand despit de sa cheute. Si marche au deuant d'elle & s'entretastent des espees si brusquement qu'ilz faisoient

estinceler leurs harnois, lesquels pour le rebat de la lueur du soleil en ostioient souuent la veüe aux regardans. Les quatre qui estoient rumbes avec leurs cheuaux, se releuent a chef de piece, & viennent à marteller les vns sur les autres, de telle impetuosité qu'il sembloit que ce fust vne forge, & maintindrent leur estour sans reposer plus d'vne grand' heure, tant ilz estoient tous preux & hardiz cheualiers. Toutesfoys ilz auoient fort detrenché leurs armes, & entamé leurs corps en diuers lieux, ce qui les affoiblissoit peu a peu. Mais Daraïde qui n'auoit encores accoustumé la saignée) s'eschauffa fort contre son ennemy par la premiere playe qu'elle sentit: lequel elle recharge aussi freschemēt qu'auoit fait à l'entree, & le paya avec si grosses vsures que toute sa parure verde fut bien tost teinte en vermeil: & il perdit tant de son sang qu'il auoit plus besoin de repos que de bataille. Les iuges du camp s'esmerueillerent trop de la dexterité que Daraïde monstroït à l'heure que tous les autres estoient las & recreuz: car les deux freres & leurs aduersaires s'estoient retirez à quartier pour reprendre haleine. Galtazar s'estonnoit sur tous de l'agilité de sa partie, & de l'adresse tant à luy titer les coups, qu'à rabatre & parer aux siens. Parquoy la redoutât plus que geant, ny autre à qui il se fust onques attaché, luy dit qu'ilz deuoient faire vn peu de pause comme leurs compagnons, veu qu'ilz auoient assez encores de tēps pour acheuer leur cōbat. A quoy Daraïde: ie me sens tant mal traittee de vous qui desirez mō amour, & le connois auoir eu si peu de force en vostre endroit, que ie ne reposeray iusques à ce que vous ayez recōnu que mes mains en ont plus que ma face. Dequoy Galtazar irrité luy respond qu'il luy fera entendre promptement le contraire, & qu'il auoit voulu au parauant espargner sa beauté. Si luy decharge vn si pesant coup, que si Daraïde n'eust ietté l'escu au deuant, il luy eust pourfendu la teste: car il en fit deux pieces, & l'estonna si fort qu'elle en chancela vn peu.

vn peu. Mais reprenant ses espritz elle luy en rameine vn tel qu'il en ploya vn genouil en terre, ne luy demeurât nō plus de son escu qu'elle. C'estoit merueilles de voir cōme apres ce coup elle redoubla si dru & menu, que son ennemy ne sçauoit de quel costé tourner, tellement elle voltigeoit à l'entour de luy, derobant ses coups, & mettant tous les siens à profit. Pas ne faut demander quel aise en sentoit la Princeesse Diane & la Duchesse Lardenie qui en trepignoit à la fenestre & perdoit toute contenance, disant: Ma dame, vous auez veu vostre Daraïde bien manier le luth & en tirer les douz accords: maintenant vous luy voyez remuer les doitz d'autre façon & sonner vne tresproude note. A qui dit Diane: vous dites vray m'amie, mais le sang que ie voy issir de son corps m'altère le mien & trouble la ioye que pourrois auoir de son auantage. Certes (respond Lardenie) elle reçoit les playes, & il me semble que ie les sents. O mon ange que n'es tu hors de la, pour les appareiller soudain à fin que n'en tombes en danger de ta personne? Puis disoit: ma dame, sans doute si Daraïde estoit cheualier la terre n'en porte vn plus digne de vous que luy. Lās (dit la Princeesse) ie ne le doy souhaitter, Lardenie, pour la seureté du Prince Florisel mon seigneur & pere. Ce pendant elle & Galtazar forgeoient l'vn sur l'autre, comme sur vne enclume: mais la vifteisse de Daraïde le travailloit & surprenoît merueilleusement. Dequoy trop indigné, & qu'vne damoyelle luy durast tant, empoigne son espee à deux mains, pensant la fendre iusques aux dentz: ce que certainement il eut fait, si par sa legere demarche elle ne eust euité ce lourd & dangereux coup, lequel estant ainsi donné à faux & en vain, emporta l'homme par terre adenté & estendu de son long comme mort. Alors ses deux freres qui n'auoient encores recommencé leur meslee, desirans voir la fin de celle cy, quasi forcenez de ceste cheute, vont recharger les deux champions de la Roïne d'vne estrange furie qui ne les receurent de cueur

failly. Et Daraïde approchant de Galtazar le roulle & tourne, puis luy delace l'heaulme pour luy donner air: si luy dit: Galtazar tu te vois à ma mercy qui ne te sera denyee pour la valeur que i'ay esprouuee en toy: moyennant que tu te departes des conditions du combat: & ne t'ennuye d'estre vaincu par moy comme damoyelle, car du naturel de ma naissance ie suis cheualiere. A quoy Galtazar: ie ne doy refuser la grace que me voulez faire, & connois tresbien à ma grand' honte quelque naissance que puissiez auoir qu'auiez vraye nature cheualereuse. Au fort, bien vous deuez contenter del'heureux commencement de vostre cheualerie, auquel ie vous sers de suger de gloire. Pourtant vous accorde les articles du combat, & vous voue mon amytié immortelle. Adonc elle le leue, & en signe de ceste confederatiō s'embrassent l'vn l'autre, qui dura pure & loyale ainsi qu'il l'auoit iuree. Si deuiennent de combatans spectateurs des quatre autres, qui se maintindrent longuement sans qu'on vid au certain qui en auoit le meilleur. Mais Florarlan & Artaxerxes, qui estoient deux des plus vaillans & adroitiz cheualiers de ce temps, vserent de tant de tours & ruses d'escrime à leurs ennemys (qui ny alloient que de pleine force & puissance) que la fortune tournoit de leur costé, quand Galtazar l'apperceuant clerement vint vers eux les prier de l'escouter vn mot: qui fut de remonstrer à ses compagnons de suyure son exemple, en laissant l'estour ou il ne voyoit plus que gagner pour eux. A quoy ilz luy respondirent fierement que telz exemples que le sien n'estoient fort honorables à imiter, & qu'il se tint à son deshonneur & confusion, sans y attirer les autres. Si renouellent vn charmaillis aussi braue que du commencement: mais à la fin Florarlan charpenta tant Galtier qu'il le rengea à la raison: dont Aurizan perdit le courage, se voyant seul à en soustenir trois auant qu'obtenir la victoire: parquoy il se rendit, renonçant à la querelle des deux Roys: remercia luy & son

compagnon les deux vainqueurs, qui ne voulurent executer leur pouoir sur leurs vies. Incontinent par le commandement des Iuges les trompettes sonnerent: & les trois champions de la Royne remonterent à cheual en grand pompe & triomphe eslés les espees des trois freres portees deuât eux: lequelz furent menez honorablement au palais de Mars & traittez & seruis de tout ce que mestier leur fut. La Royne descendit iusques au bas de la court pour recueillir ses cheualiers, qu'elle baïsa & accolla en grand ioye. Mais à peine furent en la sale haute, qu'il y entre vne damoyelle de Diane suppliant la Royne ne vouloir tenir & arrester Daraïde, iusques à ce qu'on eust mis ordre à ses playes: & qu'il luy pleust enuoyer ses chirurgiennes & medicines incontinent apres elle: car la Royne en estoit garnie pour les inconueniens qui pouuoient auenir à la princesse ou à ses filles. Le vous laisse à penser si Daraïde fut mal contente de connoistre le soin & soucy que sa dame auoit d'elle. A laquelle la Royne donna congé, souriant de l'affection de Diane, & demeura pour entretenir & traiter Florarlan & Artaxerxes, qui s'estoient si vaillamment employez en son important affaire. Daraïde trouua la princesse à l'entree de la sale basse, deuant laquelle elle se ietta à genoux disant: Ma dame, vous plaise me donner les mains à baiser, qui ont peu mettre force & vigueur es miennes pour vous faire seruice. Diane toute troublee de la voir ainsi en sang, l'embrace & baïse en la bouche, luy commandât de s'aller reposer pour penser de ses playes, & puis elle parleroit à elle à loysir. Adonc la Duchesse & la Marquise la menent souz les bras en sa chambre, & la desarment elles mesmes, la baïsant plus de cent foys par grand amour. Surquoy Daraïde dit à Lardenie en raillant qu'elle se faisoit tort de luy prester telle priuauté de faueurs en l'habit que lors elle auoit, lesquelles elle ne deüroit pour son honneur à nul Prince du monde. Il ny a remede (respond la Duchesse) i'vse & vse-

ray de telles faueurs à Daraïde qui qu'elle soit. Apres vindrent autres femmes à la despouiller & coucher en vn riche lit: & tost suruindrent les chirurgiennes qui l'appareillerent, & firent sortir toutes les damoyelles pour la laisser en repos.

Des choses estranges que Florarlan & Artaxerxes veirent au palais de Mars ou la Royne les fit loger.

CHAP. LV.

LA Royne ayant (comme vous a esté décrit) gaigné la iournee contre les trois gemeaux, en partie par la vertu de Florarlan & Artaxerxes, n'oublia à les heberger au palais de Mars selon leur qualité: auquel ilz furent seruis à souhait de tout ce que mestier leur fut par officiers & valetz tous en liuree rouge. Long temps demurerent au lit pour la griueté de leurs playes: mais si tost qu'ilz se peurent leuer & pourmener allerent visiter les singularitez du palais qui estoit basti en façon de forteresse: & auoit la grande carriere ou ilz voyoient de leurs fenestres piquer les courriers, cheuaux turcz, ienetz & courtaux. La dedans veirent l'armurerie garnie de corselets & armes sans nombres graues & dorees exquisement, harnois à pieces doubles & simples, autres de maille, autres à la legere, salades, morions, armetz, targues Albanoises, boucliers, escuz, paois & toutes sortes d'armes offensives. En vne autre galerie estoient selles de guerre, selles de iou, fle, selle à la ienette & caramane, selles turquesques, franchoises, bardes d'acier de toutes pieces, comme chanfrains à corne, & sans corne, crinieres, poitrines, flancars, croupieres de fer, bardes decuyer, caparaçons de maille, criniere & testes de mailles, resnes couuertes de chaynes, & mordz de façons infinies. Qui estoient choses peu conues en ces marches la en si grande diuersité, que Cinistides auoit recueillie de toutes nations pour rendre le lieu acomply autant es meubles qu'en l'architecture. Beaucoup de plaisir aussi leur donna la tapisserie des sales

sales & chambres, historiee des gestes & faitz insignes de tous les grâds Empires qui auoient esté, comme des Perses, Medes, Assyriens, Babiloniens, Romains, c'est à sçauoir de tous ceux que comprenoit la visio de la statue de Nabuchodonozor. Mais en vne grand' sale ou estoient plusieurs diuers engins de batterie & machines de guerre leur entrent es verrieres vne histoire prophetique d'un Empire auenir qui defferoit & ruyneroit tous les autres comme la pierre tombât de la môtaine exposee par Daniel: & estoit châtée en vers Latins par vne nymphe Chloris en vn boys assez pres d'une ville de grandeur admirable es parties de l'Europe Occidentale. Ceste nymphe estant sur la cyme d'un roc dedans la forest (laquelle ha à son oree vn chasteau de plaissance nommé de fontainebelleau) se tormentoit & escumoit par esprit fatidic: au plus beau iour de l'esté la tempeste se leue en ce boys, puis se rassied & aquoise soudain, signifiant l'arriuee de quelque deité: lors commence à chanter vn refrain sonnante en françois:

*Tordex, tordex ô parques infernales
Fatalement voz fusees finales.*

Adonc descript les enormitez & crimes detestables dont toute la terre estoit polue, les infidelitez, vsurpations & cruautez de guerre dont l'Europe principalement ardoit en feu impiteux & baignoit toute en sang. Puis estoit peinte vne harpie d'hesperie qui voloit par tout & ne laissoit rien exempt de sa proye, d'autre part vn coq royal combattant vn serpent en Insubrie, & trois lyepars insulaires en antre costé fuyans deuant luy à cause de la propriété qu'a cest oyseau de la vertu solaire par dessus le lyon. Apres demouroit le combat à demesler entre le coq royal à la grâd creste & le cheual ture, & par vn fusil s'allumoit vn flambeau pour brusler l'Europe que cest oyseau fee souffloit & estaignoit du vent de ses ailes: Qui en fin victorieux repose en vn delicieux iardin entre les fleurs de lis celestes: & l'aage doré

regne par l'vniuers. Les deux cheualiers s'arrestèrent longuement à considerer ceste peinture qu'ilz ne peurent entendre: ce qu'ilz desiroient ardamment pour sçauoir à quelle gent ceste grande monarchie à triple couronne estoit reservee. Et dirent bien que cest edifice de Guindaye estoit sans controuerser la souueraine merueille du monde.

*Des deuis de Diane avec Darayde estant
au lit nauree & d'une Damoysselle qui vint
en cour requerir vn don à la Roynne.*

CHAP. LVI.

PRes d'un mois demeura au lit Daraïde auant que pouuoit estre bien guerrie de ses playes: & Florarlan & les quatre autres plus d'un & demy, si viuement s'estoient entretaschez en ce combat, ioint la longueur d'iceluy qui grandement les debilita par la perte de leur sang. La Roynne les visita tressoigneusement & riglement, & Daraïde sur tous qui guerres n'estoit sans la compagnie d'elle ou de Diane à qui ce long seiour oyssif engregea beaucoup la passion: considerant à par elle comme elle n'auoit auancé le succez de ses amours d'un seul point plus qu'au commencement, & que c'estoit bien pour brusler à petit feu, & mourir en fin d'une mort obscure sans que on conneust le nom & merite de si vray & loyal amant. Il entroit en ses plaintes douloreuses si tost qu'il perdoit la presence de sa dame: & elle l'y surprint vne fois iusques à auoir baigné l'oreiller de ses larmes, dequoy elle fort esmeue luy demanda s'il sentoit si griue douleur de ses naurures. Ouy ma dame, respond il, iusques à approcher du pas de la mort, laquelle me voyant si pres, me le ferme pour me laisser languir & souffrir plus longuement: mais ce ne sont pas les blessures que j'ay receues en mon corps de l'espee de Barbarousse: ce sont les traitz de fleches empennees de vostre beauré diuine que sans cesse decochez au pro-

au profond de mon cuer, qui plus ne pourra soustenir ce martire s'il ne luy vient quelque remede & confort. Diane ne pouuoit penser le sens misterial de ce propos, ne iuger ceste affection de mesuree autrement que folie ou rage d'une fille à autre : toutesfois en auoit grande compassion, se connoissant en estre la cause & en luy maniant la main, & luy essuyant les larmes de son mouchoir l'araisontoit qu'elle raison pouuoit auoir d'ainsi lamenter, veu l'amitié reciproque qu'elle voyoit & connoissoit certainement, veu la compagnie ordinaire qu'elle luy faisoit, qui luy sembloit estre le comble du desir d'une femme amoureuse de l'autre. A quoy Daraïde : ma dame ce que me proposez pour soulas, m'est réfort de mes maux & vn continuel attifement de mon feu que vostre veüe ne laisse aucunement refroidir ny amortir. Làs estimez vous que le sage Cinistides (par l'ordonnance duquel vous estes icy enclôlé) estimez-vous bien qu'il l'ait conseillé à la Roïne pour autre raison que de la connoissance qu'il auoit de la puissance de vostre beauté, qui eust mis tout le monde en passion & tourment : le dy pour ceux qui seulement vous eussent vené Mais moy que (de vostre grace) vous regardez souuent & qui reçoï de si pres les rayons & esclatz de vostre splendeur, qu'estimez vous que ie sente moins que de l'œil du basilic ? moins que d'un éclair celeste qui ofusque aucunes fois les yeux mortels ? Est il, à vostre auis, vn plus grand enforcellement & auenglement de veüe que par l'œil ou amour semble iouër & volleter en personne qui de la lance des dardz ardens à ceux qui trop ouurent les leurs pour les receuoir : suyuant l'opinion des philosophes qui diēt que l'acte de voir se fait par iet de rays, lesquels entrent aysement en matiere à eux semblable, & se meslent parmy ceux d'un autre œil qu'ilz infectent & corrompent du venin qu'ilz peuuent auoir, comme le tesmoignent les taches des miroirs des femmes en certaine saison du mois : & les fascinations dont les bergers magiciens gastēt

les tendres aigneletz. Diane estoit esbahie de la subtilité des propos de sa Daraïde, & ne s'ennuyoit gueres en ceste escole. Si luy respondit (pendant qu'elle luy tenoit les mains contre la bouche, les bairant & rebairant sans cesse) mais ma mignonne que voulez vous dire ? que voulez vous de moy pour vostre contentement ? vous ay-je tenu quelque rudesse ? auez vous oncques apperceu aucun refroidissement de mon amour en vostre endroit ? Que puis-je faire d'auantage pour assouir vostre desir ? pensez le, dittes le hardiment : vous asseurant de tout le pouoir de la Roïne & du mien en ce que voudrez souhaitter. Pour ce ie vous prie de ne pleurer ainsi, me donnant occasion de mutuelle tristesse. Las ma deesse (respond Daraïde) les pleurs que voyez sont eaux distillées des fleurs de voz graces estans en ma poitrine, & montans à mes yeux, comme par vn alembic, quand le feu de vostre amour les chasse en haut. Mon ame (dit la Princeesse, en la baisant doucement) ie me tiens plus fiere de l'amitié tant honneste que me portez, & plus satisfaitte de la liqueur & odeur des fleurs que ie voy disteler, que le Roy Amadis ne fut oncques au palais d'Apolidon, ou il fut si souuent embasme, passant souz l'arc des loyaux amans : lequel vous me representez par celui duquel vous plaignez de receuoir tant de trait de mes yeux. Parquoy tenez vous ioyeuse, & me declarez entierement vostre desir, à fin que ie le puisse contenter. A l'heure Daraïde perdit la force de plus luy tenir la main, & ietta vn soupir comme si la compaction de tous ses nerfs se deust rompre, & à coup luy faillit la parole, & la couleur luy fuit du visage. Dequoy Diane fut si essayee qu'elle sortit pour appeller Lardenie qui y accourut, & à quelque peine restaura les sens esgarez de Daraïde. Puis pria la Princeesse en recompense des seruices de la patiente, de vouloir prendre le luth pour la resiouir, pour essayer à trouuer quelque armonie qui peut guerir ses maladies, comme fut celle de Saul par David l'Hebrien

brieu & en vne contree, ceux qui sont piquez des serpens nommez Tarantes. A à (dit lors Daraïde) ie n'estime point de musique qui tant puisse recreer l'ame amoureuse que la gracieuse parolle de la personne qu'il ayme. Lardenie estonnee de ceste estrange forme de passion, dit à Diane: mais ma dame, si Daraïde estoit aussi bien cheualier qu'elle est damoyelle, en bonne foy quelle pitié auriez vous de sa langueur. Telle, respond, que son estat & valeur meriteroit, pour luy donner ma foy en amitié & conionction de mariage, en le receuant pour mien & me liurant toute sienne. O ma dame (s'escrie Daraïde) mes oreilles ont esté si heureuses de recueillir le son de ceste melodieuse parolle. Ma dame me voudriez vous promettre de ne prendre iamais mary s'il ne me passe en dispositiō naturelle & en armes & en amours enuers vous. Cōmēt, respōd Diane avec vn gracieux souzris, vous ne me pourriez mieux vouër nōne en chasteté perpetuelle q̄ de me cōditionner vn mary de vertuz & qualitez impossibles, puis qu'elles auroient à surmonter les vostres. Mais il me semble que les articles de mes noces batisez par ma mere vous en doiuent assez asseurer, quand mon espoux a si forte partie que Florisel de Niquee à combattre. Je remercie les dieux, dit Daraïde m'auoir donné tel champion pour defendre ma vie quand & la sienne. Car si ie sētois autre que moy auoir accez à vostre bōne grace, ie ne pourrois iamais viure vne seule heure. Telz propos continuerent souuent durant la guetison de Daraïde, laquelle reduire en pleine conualescence eut congé de Diane d'aller visiter Florarlan & Artaxerxes, qui furent fort aises de la voir, la vertu suppleant en eux la faute de leur connoissance, estans tous trois cousins. Apres, elle eut congé de la Roynes d'aller voir Galtazar & ses freres, le Duc d'Alfarce luy faisant compagnie & la menant de bride. Les louanges du peuple estoient admirables par ou elle passoit, disant, les dieux sauuent & gardent celle qu'ilz ont enuoyee icy de leur

troupe: dequoy elle sentoit grād'ioye, que neantmoins disimuloit deuisant avecques le Duc. Arriuez au logis des trois freres, elle visita Barbarouffe premier, puis les deux autres qui receurent grand plaisir de sa venue, principalement Galtazar (qui en estoit amoureux, suyuant l'opinion qu'il auoit de son sexe) lequel luy dit entre autres propos qu'elle pouuoit à bon droit comme Alexander le grand: ne conter pas les iours ains les victoires, d'autant qu'il luy affermoit auoir vaincu cinquante cheualiers de nom, & douze geans, lesquelz elle auoit tous defaitz en le vainquant. Dont à bonne raison le disoit ce sage Prince considerant le merite des gestes plus que le nombre. Aussi l'honneur que i'ay conquis en si long espace de temps, vous l'avez acquis de moy en vne heure. Mais ie pense en perdant y auoir trop plus gaigné que vous, y faisant conqueste de vostre amour. Daraïde luy respōdit fort gracieusement, le laissant trescontēt de sa bonne grace: puis alla visiter ses deux freres, qui en receurent grand plaisir. Or estant retournée de la vers sa Diane (à qui elle rendit conte de tout) arriua en la sale de la Roynes sur la fin du soupper, vne damoyelle portant le dueil accompagnee de deux anciens cheualiers armez fors la teste & les mains: laquelle se vint mettre à genoux deuant la Roynes, disant: Ma dame la renommee de vostre courtoisie & debonnaireté m'a induite à prendre adresse vers vostre grandeur pour vous supplier m'otroyer vn don en allegeance de ma destresse. La bonne princesse qui en eut compassion, & qui la iugea de façon meritant confort & ayde, luy accorda. Lors la damoyelle la remercie treshumblement, luy declairant que le don par elle requis estoit que lendemain matin Daraïde partirait avec elle pour la secourir en vn sien affaire d'importance, de laquelle elle auoit ouy faire merueilleuse estime, venant à sa court pour luy faire demander quelque vaillant cheualier. La Roynes entendant la substance de ceste requeste, fut grandement troubee, & se repentoit

pentoit assez d'auoir ainsi promis en general sans sçauoir quoy: remōstroit à la damoiselle qu'elle ne pouoit faire plus grād tort à elle & à sa fille que de les priuer de la compagnie qu'elles auoient plus chere & agreable: ioint que pour son affaire elle luy pouoit fournir de tresbons cheualiers de sa court. Mais la suppliante ne la voulut quitter de sa promesse, ains la pria de rechef affectueusement de vouloir commāder à Daraïde de se tenir preste pour lendemain, à fin de la luy rendre d'autant plustost, qu'elle feroit diligence de partir. Parquoy la Royne se leue triste & pēsiue sans mot luy respondre & s'en va au logis de Diane qu'elle trouue sonnante avecques sa Daraïde. Guerres ny fut sans que sa fille s'apperceust de son ennuy, duquel luy demanda l'occasion. Laquelle ayant entenduë, en fut saisie au cueur extremement: & cuydoit persuader à sa mere qu'elle se pouoit honnestement excuser de la promesse qu'elle auoit faite à la damoiselle, d'autant que Daraïde ny pouuoit estre comprise, comme estant à sa fille, non à elle: mais Daraïde qui vint la dessus à considerer qu'il luy estoit necessaire de se departir de sa Diane quelque tēps pour publier sa vertu (qui demeureroit là cachée & enseuelie en tenebres) & pour mettre son sexe viril en lumiere, lequel luy donneroient apres la hardiesse de descouurir son cueur à sa chere maistresse, estant son nom connu, & le haut lieu de sa naissance: pour ce dit à Diane q̄ la Royne ne deuoit en riē desmentir sa parole, ne pretendre couleur ne couuerture, que les gens ne iugeroient raisonnable: que c'estoit elle mesme qui y sentoient perdre le plus & le disoit contre son desir pour la raison que l'enuie qu'elle auoit de son brief retour la feroit esuertuer outre mesure, pour accourir le temps de son absence. Estant ceste departie accordée, la Royne se retire en son palais & assure la damoiselle de sa requeste, qui s'alla reposer attendant le matin. Las Daraïde n'en fit pas ainsi: ains apres que Diane fut couchée descend secretement au plus espois du iardin,

cuydant y faire ses adieux aux arbre, & à la fontaine: mais Lardenie qui auoit plus grand regret à son parterment que nulle autre, l'espie & la suit pour l'escouter vn peu & la surprendre. Ou suis-je reduyte, disoit Daraïde, d'auoir tant pené & dissimulé, sans donner telle connoissance de moy que j'en puisse rapporter aucun guerdon de mon amoureux seruite? Las si en l'entreprise (qui m'est demain preparee) il auient que ie meure (comme les yssuës de Mars sont douteuses & variables) de quelles larmes & trophées sera decoré mon sepulchre? Que regrettera Diane? pour tout sa douce menestriere, & vne femme au plus qui auoit quelque humeur de folie de l'aymer passionnément, sans effect voire ny esperance. Ce propos fit donter à Lardenie (ioint la preuue de prouesse non feminine) que Daraïde estoit homme. Parquoy pour essayer si à la faueur des tenebres & commodité du lieu si secret, elle en pourroit d'auenture cueillir le premier fruit du demasquer, s'aproche d'elle, disant: Aa Daraïde est-ce le salaire de l'amour si vehemēt qu'auuez peu connoistre de moy, de vous retirer ainsi, & deffier de moy au lieu de me rechercher pour donner les piteux adieux? Assurez vous de moy que n'aurez iamais plus loyale amante, quoy que plus grande la rencontriez: & q̄ ne pouuez auoir secret de si grosse consequence que ne deuiez hardiment respandre & vomir en mon sein. Sur ces propos la baise & accolle, luy arrosant la face de ses chaudes larmes, tellement que l'amour de Diane fut en hazard de recevoir playe veu la ieunesse & beauté de la Duchesse, & l'affection violente qui forceroit vn cueur d'acier à reconnoissance mutuelle. Mais l'idée de la diuine perfection de Diane se representant alors en son ame, fit desparoit & euanouir ceste passion comme vne nue ou fumee. Le ne dy pas que s'assayans l'vne aupres de l'autre, quand Daraïde vint à luy descouurir la verité de son estre & estat, qu'il ny eut quelque tour de playeur & priuauté non accoustumee, tou-

toutesfois la borne ny fut passée. Si se retirèrent en leurs chambres, Daraïde la priant de ne vouloir rien faire entendre à Diane de son pere le prince Falanges d'Astre & d'Alastraxeree sa mere, ne comme il estoit devenu amoureux d'elle à Athenes, dont il se deguisa en ceste sorte pour iouir de sa veuë: sinon au cas qu'elles receussent nouvelles de sa mort auant qu'il eust eu le moyen de se faire connoistre luy mesmes. Lardenie le tenant en sa chambre en se desabillant le cuyda encores solliciter, remonstrant la cruauté & ingratitude qu'il auoit si long temps courree contre son amytié si ardente & nō feinte: neantmoins il ne passa outre quelque baisers friands & attouchemens voluptueux, au grand déplaisir de la Duchesse: à laquelle il iura de faire tant qu'il recompenseroit ceste feruente amour par moyen dont elle se pourroit contenter, comme il accomplit par effect. Lendemain auant que le soleil fust leué, Daraïde va en la chambre de Diane encores couchee, & se iettant à genoux pres de son lit luy baise les mains pour prendre congé: elle se souzleue & la baise au visage amoureuxment, luy enchargeant expressement de diligenter son retour sur l'amour qu'elle luy porte. A qui Daraïde: ma dame ie ne scay comme voulez commander de reuenir à celle qui ne part point car il n'y a que le corps qui s'en aille, & l'amé vous demeure, que ie vous supplie de bien traiter comme elle merite pour estre vostre. Ainsi se separe d'elle toute transie de douleur, & va baiser & accoller la Duchesse & la Marquise, puis toutes les autres filles qui ny auoient moindre regret que si on leur eust rauy leur propre seur: tant elles auoient de plaisir en la douce & affable compagnie de Daraïde maudissant bien la damoyelle qui leur cauoit ce grief ennuy. Ce fait, armee de toutes pieces alla trouuer la Roynie en son palais: en la cour duquel estoit desia l'estrangere avec ses deux cheualiers attendant sa venue en grand' deuotion. Or print elle congé de la Roynie, non sans pleurs reciproques, &

monta à cheual, ayant (par le recit de la damoyelle) à cheminer vint lieues de terre auant que s'embarquer en mer. Je n'oubliay à vous dire que les damoyelles qui luy auoient veu sans armes defaire les cheualiers en vn boschage, & depuis oyant de ses meruellles en la cour de Guindaye y estoient veuës, & furēt receuës par la royne en faueur d'elle. Ces deux suplierēt la royne d'auoir congé d'accompagner Daraïde, & luy porterent ses acoustremēs & son luth. Si s'en alla la gentile Daraïde, apres auoir pareillement pris congé des cheualiers du Fenix & du Roulleau, puis de Galtazar & de ses freres: lequel luy afferma auoir grand regret de ne se sentir en estat de luy pouoir faire compagnie: l'asseurant que si tost qu'il le pourroit faire il iroit en sa queste. Dequoy elle le remercia, luy disant qu'elle l'auoit fort agreable. Ainsi part, tournant souuent la teste vers la tour de Diane, ou elle laissoit son cueur en hostage, iusques à ce qu'elle la perdit de veuë. Tant vous dy que le long du chemin elle auoit la langue si serree d'angoisse qu'elle ne parla vn seul mot à personne, iusques à tant qu'elle paruint au port: ou nous la laisserons quelque temps, pour reuenir à sa compagne Garaye.

Comme nauigeant la Roynie Cleofile & Garaye, rencontrerent en mer vn coursaire nommé Grandan le bossu, qui leur liura vn perilleux assault.

CHAP. LVII.

EN grand' peine & gloire entremeslee alloit Garaye avecques la roynie Cleofile non moins vaincuë de sa beauté qu'elle auoit laissé Daraïde de celle de Diane. Cleofile de son costé prenoit grand plaisir en sa compagnie, & passoient le temps ensemble à sonner & chanter: ne perdant Garaye l'occasion de faire connoistre sa passion es times de sa musiq. Or singlât vn matin en haute mer virēt aprocher quatre naux armées



armees en guerre que les mariniers recongneurent de loin estre à vn braue & fier corsaire nommé Grandan le bossu, à cause d'une excellence de chair qu'il auoit sur le dos en façon de Chameau : lequel si tost qu'il eust decouvert le vaisseau de la Royne, adressa à luy, & monté sur le chastelet du sié, escrie qu'ilz ayent à se rendre. La Royne se met au plus haut du sien pour encourager ses gens qui se mirent en quelque appareil pour receuoir l'ennemy, plus par honte que par hardiesse ne volonté bien deliberée de combattre redoutans trop la force de cest escumeur, au rapport que les pilotes en faisoient. Neantmoins firent ilz testes trois nauz de la Royne: es deux desquelles auoit deux capitaines preud'hommes, & en la sienne vn viel Conte son vassal. Elle tenoit Garaye par la main, qui desiroit fort en son cuer de se voir en autre habit que de femme pour luy seruir en ce peril. A qui dit Cleofile: ma mignône ie voy d'un cōflit l'appareil le plus dangereux qui peut estre: Je te prie & commāde si tu voys que la fortune nous soit contraire de me trancher incontinent la teste, à fin que ie ne rumbe es mains de telz brigands qui souilleroient mon honneur que i'ay trop plus cher que

la vie: ainsi ie suyuray l'exemple de ma loyale Silerisie, & l'iray trouuer la part ou elle est allée deuant preparer mon logis. A ce Garaye ne respondit rien, voyant que les nauz s'affrontoient, & venoient au trait qui voloit dru & espais comme neige. Puis Grandan qui auoit choisi celle de la Royne la connoissant pour principale, apres les flesches, commanda aux siens d'approcher & ietter les mains & croz de fer pour s'atacher de pres: ce que firent tous ses vaisseaux. Lors eussiez veu dur combat, les vns s'efforçans d'entrer, les autres à les repousser, qui dura longuemēt. Mais à la fin le meschef tournoit sur ceux de la Royne, quelque resistan ce que fissent ses capitaines & souldatz, estans les autres en plus grand nombre & mieux aguerris à ce mestier. Sur toutes estoit la nef de Cleofile en grand danger ayant à soustenir l'effort de Grandan mesme qui en abatoit autant qu'il s'en presentoit deuant luy. Parquoy Garaye en tire vn des mortz au bas du nauire, & le fait desarmer legerement par les damoyelles, puis s'en reueist soudain avec leur ayde (estāt lors de l'aage de dixsept ans) si mōte l'espee au poing & l'escu en l'autre, toute esbahie de rencontrer trois cheualiers descendans

au contraire: à qui elle reproche leur coura-
die, demandât qui les chassoit ainsi honteu-
sement: qui luy dirent que tout estoit per-
du au moyen que Grandan le bossu estoit
desia entré en la nau qui mettoit tout à
sang, comme il estoit vray. Adonc s'estoit
la Roynes retirée au chasteau de proué avec
quelques cheualiers qui soustenoient Grada
tellement quellement, ayant estendu sur le
pont le bon conte Rodan tout estourdy.

Or (dit Garaye à l'un des cheualiers fuyas)
ça done moy l'ordre de cheualerie puis que
tu le veux abandonner, & que ne le puis
recevoir de qui bien ie voudrois: ce que
l'autre fit à l'instant, & elle monte sur le
tillac encourageant les fuyartz à la fuy-
ure. Si s'en va charger le doz des Grandan-
nois qui point ne se doutoient de telle em-
busche, & en furent grandement espou-
ventez. Car Garaye commença à y faire
vn horrible apprentissage d'armes, elle fiert
à dextre & senestre, taillant braz & iambes:
tellement que Grandan fut contraint oyât
le bruit de tourner visage celle part, ou il
aulse. Garaye faisant merueilles sur sa mes-
gnie. Pour-ces'adressa à elle qui ne cherchoit
autre que luy, sachant que le point de la
victoire ne consistoit qu'en luy seul. Si luy
entoise Grandan vn pesant coup qu'elle re-
çoit sur son escu, ou il enfonça iusques à la
moytié: & elle avant qu'il en peust retirer
son glaiue, luy donne sur le bras qu'elle luy
coupe iusques au coude, & tombe à ter-
re laissant l'espee pendue à l'escu. Lors se
voyant ainsi manchot, monstre les espa-
les pesant gagner sa nef: mais Garaye trop
contente de ce bon commencement, le
voulut coronner de pareille fin, & fuy-
uant Grandan luy tire tel coup sur la bosse
quelle luy entre fort avant dedans l'espau-
le, & le couche mort à ses piedz. A l'heure
tous ses soldatz esperduz fuyent vers leur
vaisseau, & Garaye en fait vn cruel carnage,
moyennant le secours qui luy vint de ren-
fort des gens que la Roynes anima de fuy-
ure, outre la volonté qu'ilz en prenoient de
son exemple. Parquoy vsans de leur fortu-

ne, non seulement chasserent leurs ennemys
hors de leur nau, ains entrèrent en leurs
vaisseaux pêle melle quand & eux, les met-
tans tous à l'espee, ou les jettans en l'eau.

Puis transporterent tous les meubles pre-
cieux, dedans les nauires de la Roynes: à
laquelle Garaye se vint presenter l'armer
hors de la teste, dont elle fut trop esmer-
ueillée, ne l'ayant conueüe durât le conflit.
Si la reçoit les bras ouuerts en la plus grâd'
ioye du monde, disant: A à ma chere Ga-
raye, à la bonne heure les dieux me don-
nerent cōnoissance de vous, ayât mon hon-
neur & ma vie à estre sauuez par vostre
main. Et qu'elle satisfaction vous pour-
ray-ie jamais faire de tel bien? A quoy Ga-
raye: Ma dame elle est toute faite me te-
nant en la meilleure part de vostre bonne
grace. Alors la Roynes apperceut ses armes
toutes teintes en sang, dont elle luy dit: lās
m'amyne faites vous soudain desarmer qu'o
appareille voz playes, comme ie voy que
vostre harnois en porte tesmoignage par
l'esmail de vostre glorieux sang. Adonc Ga-
raye: Ma dame vous auez raison de pen-
ser que ie sois naïree, veu que vostre beau-
té mesme m'a donné le coup mortel, mais
la blessure n'est pas si heureuse d'en espan-
dre signes extérieurs, lesquels vous incite-
roient à plustost consentir ma guerison: aussi
estoit il vray qu'elle n'auoit autre playe sur
son corps & le sang estoit de celuy mesme
de qui elle auoit pris le armes. La Roynes
fut fort contente de sa responce, luy
disant qu'elle se resioüissoit de son tourmēt
qui l'asseuroit de ne la perdre point. De
celà ne deuez douter, dit Garaye: apres
commanda qu'on iettast tous les mortz en
mer, & qu'on defferrast les nauz de Gran-
dan, puis fit mettre le feu dedans. Ceste
fortune augmenta tellement l'affection de
Cleofile enuers Garaye, qu'elle ne scauoit
quelle chere & bon traitement luy faire:
dont Garaye conceut la hardiesse de luy
vouloit descourir son estat, sans luy dis-
simuler plus longuement ayant excuse du
passé sur Daraide, à qui elle eust fait tort en

se declairant plustost. Sur laquelle pensee laissa couler quelques iours, passant le tēps ioyeusement avecques la Royne, au tablier ou aux cartes.

Comme Garaye descouurit à la Royne Cleofile qu'elle estoit homme; & du debat qui fut entre eux sur ce propos.

CHAP. LVIII.

Ainsi auint qu'un soir (qui estoit fort serain) apres que la Royne & Garaye eurent acheué leur ieu, & le soleil sa iournee: lors que les nuës d'occident coulouroient les ondes par le rebat de leur vermeille lueur: elles se tirerent seules en poupe, là ou Garaye print occasion de luy declairer entierement son estre (sans plus differer) en telles parolles. Ma dame, la douleur que ie souffre par l'effort de vostre beauté est si vehemente qu'elle me consumerait interieurement, si ie ne luy faisois ouuerture pour l'exhaler. Et à fin que ie ne vous laisse plus longuement en erreur de moy & de mon estat, j'ay icy à vous confesser que ie ne suis pas fille, comme mon acoustrement demonstre, ains suis Arlanges prince d'Espagne voué & destiné à vostre perpetuel seruice. Ce que ne vous ay peu faire plustost entendre à l'occasion de Daraide mon compagnon qui est deguisé pres de Diane en pareille façon, nous deux ayans fait ceste entreprise pour l'amour d'elle. En quoy ie vous supplie (au cas que mon amour ne vous fust agreable) de ne vouloir pourtant diuulguer ce fait, au preiudice de la foy que luy ay iuree. Ce que toutesfoys ie n'espere de vous, veu le bon accueil dont m'avez tousiours vŕé, duquel le merite n'est point amoindry par la vraye cognoissance de mon sexe, lequel me donne trop plus de moyē de m'employer pour vous & d'exploiter voz cōmandemens. Cleofile qui l'aymoit de vraye amour sentit vne estrāge alteration en son esperit de ce propos inopiné, qui la tint vne espace sans parler. Puis discourant en elle mesme la beauté de don Arlāges, sa vaillance n'agueres esprou-

uee, son amitié sincere, le lieu dont il estoit issu, estima qu'il n'estoit pas à refuser. Encores luy vint à souuenir de ce que le ieune Rosaran luy auoit dit souz l'ymage du Roy Amadis luy permettant de se marier. Ce qui sembloit estre fait par maistre, s'offrant tel party qui attouchoit à son sang: si luy respondit: Don Arlāges i'ay occasion de me plaindre de vous, de vous estre occultement rengé avecques moy, vous estant homme, & moy femme de telle esloffe. Vous pouuez penser quelle tache peut mettre ce tour en mon honneur, par les opinions & soupçons volūtiers plus enclins à la mauuaise part. Mais entendu le conte de vostre menue avecques Daraide, ie me voudrois exempter de la subiection d'amour si ie n'allouois ceste excuse. Au fort puis q̄ le cas est ia ainsi passé, reste à en sortir au plus honneste moyen qu'il sera possible. C'est que vous me declairiez vostre estre en presence de mes gens, comme si i'en fusse encores ignorante, alleguāt qu'aurez pris ce deguisement pour accompagner Daraide. Ce qui ne sera en danger d'estre descouuert à son desauantage, veu la distance des lieux & la defence que i'en feray apres à toute ceste troupe. Alors pourrez neantmoins conuerŕer avecques moy, gardant le point d'honneur que sçauēz estre deu à ma grandeur, vous assurant que ie trouue voz conditions tant aymables que si mon destin me tiroit au lien de mariage, à peine se destourneroit mon ame en affection d'autre quelconque. Vous auez à ymager quel aise receut don Arlanges de ceste gracieuse responce. Aussi ne laissa il passer lendemain sans faire ceste declaration deuant tous ceux des nauz: luy requerant pardon de sa longue dissimulation: lequel elle luy otroya sans grande difficulté: & ainsi l'accepta en son seruice, comme celuy qui luy en auoit desia fait, & estoit pour luy en faire encores. Disant d'auantage (sans declairer son origine) que quant aux biens de fortune s'il n'en estoit gueres pouruen, elle luy en donneroit des siens

des fiens largement. Adonc Arlanges luy baïse les mains, & par telle ruse demeure son chevalier domestique: receuât tousiours d'elle gracieux traitement, iusques à tant qu'ilz arriuerent es pais de la Roïne: auquel elle fut receuë à grand' liesse par ses vassaux, non sans grãd contentement d'Ar-
langes, qui sembloit participer à son bien, viuant en esperance de conquerir tellement sa bonne grace, qu'il seroit vn iour son es-
poux. Parquoy ne cessoit de dresser iou-
stes & tournois pour luy faire de plus en plus connoistre sa valeur, iusques à ce que fortune le separa d'elle quelque tẽps, com-
me il vous fera cy apres raconté.

Comme allant Daraide avec damoysselle Galdazire descendirent pres d'une fontaine ou suruint vn chevalier qui leur ioua vne trouffe.

CHAP. LIX.

DEux iours apres que Daraide partit de Guindaye & sa cõpagnie, vn ma-
tin qu'ilz sentirent l'ardeur du soleil trop violente, mirent pied a terre en vn lieu fraiz & ombrageux pres d'un canal d'eau viue, & repurent des viandes qu'ilz auoient portees. Vray est que ce ne fut pas en trop grande liesse, au moyen que Daraide ne se pouuoit resiouir, essongnee de ce que plus elle aymoit au monde; & Galtazire songeoit creux en son affaire. Mais les deux damoysselles Galinde & Sirende escuyeres de Daraide voulans diuertir les fantasies de leur maistresse, luy presenterent le luth, la priant de leur sonner vn bal. Ce qu'elle fit par sa courtoisie naïue, & elles se mirent à sauter & volier sur l'herbe de fort gente grace: dont les deux anciens Cheua-
liers eurent grand plaisir, qui Barbaran & Moncan estoient nommez. Et apres auoir demené cest esbat vne demie heure, ilz estoient prestz à monter à cheul pour con-
tinuër leur chemin, quand voicy arriuer vn chevalier armé sur vne pauvre aridelle & vn laquais à pied quand & luy, qui les saluë disant: qu'il auoit trouuë là beaucoup plus

de ioye qu'il n'en portoit. A quoy luy res-
pondit Galinde qu'il en pouuoit prendre la part avecques elles s'il vouloit descen-
dre pour refraischir son cheual qui sembloit en auoir besoin. A à (dit il) j'aurois plus grãd mestier de la compagnie de ces hono-
rables viellardz que de la vostre s'il leur plai-
soit m'en faire la grace. Daraide qui l'esti-
ma à son port quelque honneste cheualier, ne taillit à luy offrir incontinent sa person-
ne, laquelle il refusa, pretendait auoir plus affaire de conseil que de force, pour vn different entre vne damoysselle & luy, tou-
chant sa fille qu'il auoit fiancee & s'entr'ay-
moient parfaitement, toutesfoys la mere ne vouloit consentir la consoñmation du mariage. Vrayement en ceste cause d'a-
mour vous ayderois-je voluntiers (dit Da-
raide) si j'y auois quelque puissance: vous m'y pouuez faire vn bon tour d'amy, res-
pond l'autre) si me voulez prester vostre cheual, à cause que le mien est laz, & n'y a que demy lieuë d'icy à son manoir: & tant mieux ie seray monté, plustost vous ra-
menray ces bons seigneurs s'il leur plaist me faire ce bien d'y venir. A cela ne rien-
ne (dit Daraide) puis que c'est si pres: l'au-
tre la prend tresbien au mot, & monte in-
continent sur son bon cheual, & les deux viellardz le suyuent pour l'aller appoin-
ter avec la belle mere. Or gueres n'eurent che-
uauché qu'il les fourre dedans vne forest, ou il leur cõte en allant qu'il y auoit vne fon-
taine de merueilleuse proprieté (mais co-
gnue à peu de gẽs du pais) c'est à sçauoir qui noircissoit le poil de ceux qui en beuuoient & en l'auoiët leurs barbes & cheueux. Cer-
tainement il y a de grandes vertuz es eaux (respond Moncan) comme lon void es baingz naturelz qui passent par terres sul-
phurees ou alumineuses. Mais celle que vous dites seroit vne vraye fontaine de iou-
uence, comme celle ou lon dit que les sages philosophes transportent par interualles le
vieil Roy Amadis, pour le cõseruer en santé & vigueur par dessus ses ans: ou telle que contrefit Medee par son art pour ramener

le pere de Iason en fleur d'aage. Ainsi qu'ilz en aprochoient : l'experience dit l'estranger vous en coustera peu pour le moins vous seruira d'autant de rafraichissement. Les deux viellardz descendirent rians soit qu'ilz doutassent de la vertu de l'eau soit q la chaleur les y conuiast. Ce sera (disoit l'estranger) vn plaisir quand voz damez au retour ne vous reconnoistront plus, ayans ainsi changé de poil. Si tost que Barbaran & Mōcan furent couchez à terre pour soy lauer, le valet du cheualier monte sur vn de leurs cheuaux, & prend l'autre en bride. Puis s'en va deuant, & son maistre demeure derriere, disant aux viellardz : Beueuz d'autant hardiment mes amys, & congnoistrez ma parolle veritable: lavez fort, tellement que tout s'en sente, à fin que ne soyez bailletz. Ouy mais (dit Barbaran regardant derriere) vostre valet amene noz cheuaux. Non fait non (respond l'autre) il les promeine. Si se leue Barbaran, & luy escrie qu'il retourne, mais il luy hoche la teste & cheuauche plus roide. Dequoy ilz commencerent à contester avecques le cheualier, luy disant que le ieu estoit plaisant iusques là, moyennant qu'il ne passast outre. A quoy l'autre: Ne voyez vous pas qu'estes raieunis promptement, faisans desia telz actes de ieunesse. Contentez vous pour ce bien que vous ay fait, de me prester voz cheuaux pour vn mien vrgent affaire, & m'attendez au lieu ou ie vous priz si desirez sçauoir de mes nouuelles. Aussi vous requiers dire à vostre ieune compagnon (iugeant Daraide cheualier à cause de les armes) que ie vous ay donné charge de luy departir de vostre sens qu'auetz laissé en raieunissans icy en recompense de son destrier qu'il m'a presté. Ie vous laisse à penser si les deux viellardz demeurerent courroucez de ce tour inespéré. Toutesfoys apres qu'il fut party s'entre-regardans ne se purent contenir de rire & se moquer l'un de l'autre, dequoy en peu d'heure ilz estoient ainsi deuenuz ieunes & nices. Si s'en retournent à pied chargez de leurs harnois à la frescade ou ilz auoient

laissé leur compagnie, laquelle estoit en grande doute de leur longue demeure. Et quand ilz les virent retourner à beau piedz las & suans dahan & qu'ilz eurent entendu le discours de leur voyage, ne sçauoient bonnement s'ilz en deuoient rire ou gemir. Alors souuint à Daraide qu'elle l'auoit veu autrefoys, & ç'auoit esté quand il debrida les cheuaux de Fenix, & d'Atibél, & les damoyelles Galinde & Sirende, oyant son nom qu'il mandoit estre le trompeur des plus auisez, dirent qu'il faisoit estat de baillet de telles trousses aux cheualiers errans, & qu'on ne pouuoit sçauoir le lieu de sa retraite. Or apres que le feu de la prime colere en fut ietté, dieu sçait comme les viellardz furent gaudis, principalement par les deux damoyelles qui leur offroient liberalement leur amour comme à iouuenceaux. Lors ilz exposerent leur melliage à Daraide qui en rit, & respondit que pour le bon auertissement qu'il luy enuoyoit il meritoit quelque salaire: & que ce qu'il cuydoit auoir conquis par fraude bien luy pourroit à la fin estre cher vendu. I'ay peur, dit Barbaran, qu'il soit fort malaisé à trouuer, à cause qu'il s'embosqua au trauers d'une espaisse forest. A qui Daraide l'ancienneté qu'il m'a enuoyee par vostre despouille vous inuestissant de ceste iouuence me viét d'inspirer le moyen de retrouver le paillard: car ie mōteray sur son aridelle, que i'estime sçauoir le chemin de son logis, & la laisseray aller à sa volonté, vous deux menerez mes escuyers en croupe sur leurs palefrois pour vous remettre sur les erres du seruice des femmes à cause de vostre nouuel aage. Ilz se mirent tous à rire tant de ce ioyeux propos, que de l'auis de Daraide, qu'ilz accorderent de suyure & exploiter promptement.

Comme

Comme Darayde & sa compagnie se mirent à rechercher le Fraudeur & affineur des fins, & de leur succez.

CHAP. LX.



A Vsi tost qu'ilz l'eurent approuvé l'executerent par effect : montant Daraide sur le courtaut, à qui elle mit la bride sur le col pour aller ou bon luy sembleroit. Si les mena droit à la fontaine, que les vieillards confesserent estre celle de leur iouence. Surquoy leur dit Sirende qu'ilz auoient lors conspiré de les mettre toutes en tourment pour leur beauté. Mais Daraide dit qu'il ne les en faloit pas tormenter d'auantage, ayant punition suffisante de mener les filles en telle peine que Tantalus en l'eau iusques à la bouche sans pouoir boire, & si pres du pommier sans pouoir pouoir gouter du fruit de vie. De ce rioient tous & routes, alors que passa vn cheualier qui se gaudit encore d'eux, disant: En bon ne foy mes bons peres vous monstrez bien estre fermes en l'amour continuant en son seruice si pres du bord de vostre fosse. Mais ie ne sçay si les dames trouvent aussi bonne vostre volonté qu'elles ont fait autresfois. Barbaran tout honteux luy respond, qu'il ne faloit iamais se lasser de bien faire: mais qu'il luy feroit plus grand plaisir de luy dire, s'il auoit point rencontré vn cheualier avecques vn valet menant deux cheuaux: de quoy ilz auoient plus de besoing que de

ses railleries. Ouy voz damoyelles (dit l'autre) que vostre ieunesse met en trop grande tentation. Quant au cheualier que querez, ie ne l'ay point veu, & à dieu vous command. Si pique outre, & Galdazire leur dit: Nous n'aurons point faute de bon propos de tous ceux que nous rencotreron en cest equipage: qu'en mal an soit le boufon qui nous cause cest esbat, au grand desloubier & retardement de mon affaire. Et auoit la Damoyelle enuie de s'en degorger à plein sur les deux vieillardz (si Daraide ne l'eust appaisée) & disoit que ce leur estoit grand' honte d'auoir ainsi perdu le sens sur la fin de leur aage, & de l'esloigner de l'exploit de son affaire au lieu de l'auancer. Rien (dit Daraide voyant que sa beste s'alloit embosquer en vn sentier egaré de la forest) ma damoyelle ne vous en tormentez plus, car nous allons droit par ce chemin chercher le sens qu'ilz ont perdu. Ainsi deui sans, or en ioye, or en tristesse, le cheual à iour faillant les rendit en vne vallee pres d'un chasteau: en laquelle trouuerent vne damoyelle assez aagée, accompagnée de six autres, se promenant à la frescheur de la serree: qui ne faillirent à l'arriuee de se gaudir des vieillardz, par le prouerbe qu'on

ques bon cheual ne deuint rossin : mais la maistresse leur imposa silence . Et ayant salué la compagnie , Daraide luy demanda s'elle luy pouuoit dire nouuelles d'un cheualier qui luy auoit emmené vn puissant destrier luy laissant ceste aridelle . A qui elle respond en riant qu'il n'auoit pas esté trop fol au troquer : mais qu'il estoit desia tard , & s'ilz vouloient heberger en son chasteau qu'elle les traitteroit à son pouoir, voire leur rendroit bon conte de ce qu'ilz alloient querans . On ne pourroit pas moins esperer de telle damoysele que vous , respond Daraide , ie ne refuse pas offre si liberale . Je me fay fort (dit elle) de vous monstrier le galand , moyennant que me iuriez que ne l'offencerez aucunement : par ce que ie ne voudrois pour vous faire plaisir qu'il en receust ennuy ne dommage , puis qu'il s'est venu rendre en ma maison comme en franchise , dont ie luy doy ceste seureté . Daraide le luy iure , & descend de cheual , & les deux vieillardz quand & elle suyans la damoysele chastelaine , qui dit aux femmes de leur troupe qu'elles attendissent vn peu la . Si s'en vont apres elle & passent en vne cour, puis entrent en vneallee fort obscure: ou elle dit à Daraide qu'elle la saisist à la queue , de paour de huer ou tomber . A la fin furent esbahiz qu'elle se deffit d'eux & ferma vn huys de fer menant grand bruit . Qu'est ce cy? dit Daraide . Patience, respond Moncan: la dame me semble honneste , elle estallee appeller de la lumiere . Peu apres reuint vers eux avec trois flambeaux , & le fraudeur son filz quand & quand . Lequel commença à les saluer , & reprocher à Daraide qu'elle auoit mal receu la vieillesse de ses deux compagnons , qui auoient si bien recourré ieunesse à la fontaine . Or se virent alors logez en vne grand cage de fer à gros barreaux , aussi mal contens que pouuez estimer: & le fraudeur leur vint dire qu'il estoit bon maistre de transmutation, veu qu'il auoit les vieilz rendu ieunes & les hommes oiseaux en cage . Sus, sus, dit

il, chantez chacun vostre ramage , en voicy l'heure & la saison . Ma damoysele vous auez la trois beaux papegays, deux gris , & le tiers d'aussi belle couleur que i'en vy onques . Alors Daraide: Gens de bien vous ferez mieux d'améder vostre vie, que d'offencer les cheualiers , il vous en pourra mescheoir . A qui l'affineur des fins: Je n'ay garde de prédre conseil de vous iouuencel qui en auez v'sé si mal pour vous mesmes: on dit bien vray que chacun est abusé en son fait, & void mieux aux affaires d'autrui : aussi est ce raison que parliez maintenant gentil perroquet , & voz compagnons parleront le matin à leur tour . Ainsi les laisse , & enuoye dérober à leurs damoyseles les palefroids & les valises : puis se monstre à elles par vne fenestre, escliant que leur depesche estoit faite, & pouuoient partir quand bon leur sembleroit , par ce que leur compagnie demeueroit avecques eux, pour aprendre certain langage qu'ilz ne scauoient pas . Ce dit fit entrer les damoyseles du chasteau . puis fermer la porte aux estrangeres , qui de meurerent dehors tristes & desconfortees à merueilles . Si passerent la nuyt en ce lieu sans dormir ne manger aucunement, attendant la matinee pour prendre tel party que Dieu leur inspireroit . De Galdazire, ie vous dy que sa douleur estoit si vehemente & sa lamentation, qu'elle augmentoit beaucoup celle que les autres sentoient de leur part . Elle maudissoit sa fortune qui tant luy estoit contraire , & la simplessede ses vieillardz qui l'auoient reduitte en telle extremité . D'autre costé, Daraide, Barbaran, & Moncan estoient fort confuz de se voir ainsi pris & deceuz tellemēt que ces deux ploroient comme femmes, cōsiderans qu'ilz estoient cause de ce meschef , duquel ilz ne voyoient esperance d'issuē . Lors Daraide se mit à les consoler remonstrant que les larmes ne seruoient de rien , ains faisoient tort à ce qu'ilz deuoient à cheualerie , & que c'estoit en tel temps que se mōstroit la magnanimité de l'homme . Sur ces entrefaites estant mynuit passé, voyent venir

vne

vne chandelle qu'une ieune fille portoit en vn chandelier deuant la dame du chasteau qui leur dit : mes papegays nous vous venons voir à ceste heure que ne voyez goutte, à fin de mieux faire entrer en voz oreilles le chant que vous voulons aprendre, quand l'ouye n'est point deslourbee par la veuë. A qui Daraïde: Vrayement telle parolle ressemble au vray son de l'oiseleur, qui nous a trahys souz couleur de bonne foy.

A quoy la vieille: Que mangerez vous bien mes oyseaux? ie vous voys faire apporter du pain trempé en l'eau, c'est vostre propre mangeaille. Ie m'esbahy (dit Moncan) qu'il n'y a plus de honte & vergongne en si vieille personne. Et moy (respond elle) qu'il ny a plus de sens en testes si grisës: mais puis que tranchez ainsi des braues, il se trouuera moyen de vous abaisser vostre orgueil. Lors les laisse, & s'en va conter ce beau deuïs à son filz le fraudeur. Ce pendant, la damoyelle qui luy auoit esclairé, rauie de la beauté de Daraïde, reuint secrettement à la cage, leur disant, qu'il luy pe-soit de l'outrage qu'on leur faisoit en ce lieu, & que volontiers leur donneroit secours si elle pensoit en auoir quelque recompense. De celà vous pouuez asseurer la belle (respond Daraïde) que n'aurez employé vostre courtoisie en gens ingratz. A à (dit elle) i'en voudrois auoir asseurance de vostre parolle mesme: & sachez que ne vous requiers autre guerdon que vostre amour cordiale & entiere. A quoy Daraïde m'amy ce que me demadés est engagé en tel endroit qu'il n'est plus en ma puïssance d'en disposer. La fille oyant sa responce, s'en alla fort mal contente pour l'enuie qu'elle auoit d'estre couuerte de la race d'un si beau gentilhomme: lequel passa aussi piteuse nuyt leans avec ses compagnons que firent leurs pauures damoyelles dehors sans reposer, ne boyre, ne manger, iusques à ce que le iour fust venu, qui leur ramena le fraudeur menant sa mere en danse avec six gentilz hommes, & autant de damoyelles qui menerent leur bransle en rond à l'en-

tour de la cage de fer au son d'un psalterion & d'une flüte, regardans par grand moquerie les trois prisonniers & se rians d'eux. Puis firent cesser leurs instrumens, pour dancier ceste chanson à gorge deployee.

Qui vid onques tels oyseaux?

Ny en telle cage?

Qui ouit onq' estourneaux

De si beau ramuge?

Et au bout s'esclaterent tous ensemble en vne voix de risée. Qui esmeut Daraïde à si terrible fureur que degainant son espee que la Roïne luy auoit donnee dacier damasquin en donna deux telz coups sur les barreaux de fer, qu'elle les trancha & passa à trauers. Mais ces beaux danc-eurs gaagnerent bien tost au pied, & se sauuerent en la prochaine sale, dont ilz tirent la porte apres eux. Barbarâ & Moncan ne se firent gueres prier à sortir de la cage apres Daraïde: & firent ensemble leur effort d'entrer en la sale pour chastier le fraudeur, mais l'huys estoit si fort & si bien barré, qu'il ne leur fut possible de le forcer. Ce voyans cercherent par tout, & trouuerent les paquetz & malles de leurs damoyelles: puis entrans en l'escuyrie recouurerent leurs cheuaux & haquenees, & incontinent sortirent hors du chasteau & virent leurs femmes couchees à terre, acou-dees sur leurs mains, loin du chasteau à vn iet de pierre. Aufquelles Daraïde escria qu'elles prissent courage, & que les trompeurs auoient esté trompez. Elles se leuent soudain & viennent au deuât receuoir leurs hardes & leurs montures: mais adonc Moncā pensoit retourner au chasteau pour y mettre le feu quand il auisa vn valet fermant la porte, & le fraudeur incontinent en vne fenestre, qui les voyant monter à cheual, crie: voilà mes papegaux laschez ilz s'en vont à l'effor. A qui Barbaran: Si tu voulois sortir de l'eau cannepetiere, tu trouuerois faucon à tempier d'une estrange maniere. Attien moy (respond il) &

ie m'en voyz armer. Ce sera donc pour dancier quelque morisque, dit Barbaran. Si picquerent & s'en vont racontas aux damoyelles le traitement qu'ilz auoient receu leans, & la façon de leur deliurance par la main de Daraïde. Or n'eurent gueres cheuauché plus de demye lieuë qu'ilz oyrent crier apres eux: Attendez cheualiers, car il vous conuient laisser ce que vous portez à cause de ce qu'avez pillé & enléué. Parquoy tournans incontinent visage apperceurent que c'estoit le fraudeur malicieux qui les poursuoyoit, accompagné de six autres armez de pied en cap: & leur reprochoit en ces parolles de larcin quelques menuës hardes que Barbaran & Moncan auoient prises par mesgarde avecques les leurs. Daraïde ne fut pas la plus marrie de sa venue, pour le desir qu'elle auoit de le tenir à son gré, & remercier de sa bonne chere d'hoste. A ceste cause le recongnouissant ne faillit d'adresser à luy, & les deux viellardz à deux de sa compaignie. Si rompit le fraudeur en l'escu de Daraïde laquelle luy faulse le sien & harnois & cotte de maille iusques en la chair viue bien auant, tellement qu'il vole par terre. Et elle parfait son poindre nonobstant les autres quatre qui la chargerent apres luy, dont les vns rencontrerēt brisans leurs lances: les autres gauchirent leur coup sans l'attaindre. Sur lesquels elle retourne l'espee brandissant au poing, & au premier qu'elle s'iert pourfend la teste iusques aux dents. Ce que voyant le fraudeur à qui en sa cheute la bride estoit demeuree en la main, se leue & remonte, estimant grand folie de vouloir attendre telz coups, à qui en pouuoit eschapper bagues sauues. Si broche & s'en va fuyant, laissant deux de ses compagnons enmy le camp, abatus par les deux viellardz (qui pour leur age estoient encores bons Cheualiers) toute fois ilz se releuent assez tost, & viennent à l'escrime des espees, tandis que Daraïde traittoit brusquement les trois autres, les semonnant de dancier à la note qu'elle leur sonnoit, pour voir s'ilz

l'entendoient aussi bien que celle d'entour la cage de fer: & pelue de mal talent (par la souuenance de ceste honte) tranche le col à vn d'vn reuers: dont les autres espouuantez tournent le doz & decochent de viffelle. Lors pensoit bien retrouver le fraudeur ou elle l'auoit estendu, quand elic l'auise fuyant à bride abatue: parquoy va vers les deux qui maintenoient fierement leur conflit contre Barbaran & Moncan, lesquels la voyant approcher se jettent de genoux en terre, luy presentans leurs espees, & requerans mercy de la vie. Ce que Daraïde par son humanité accoustumee leur otroya: souz condition qu'ilz iureroient de ne suyre ne hanter desormais la compaignie de ce trahistre fraudeur & d'auantage qu'ilz s'iroiēt rendre prisonniers de la royne Sidonie au nom de Diane sa fille, luy racontant tout ce qui leur estoit aduenu en leur endroit. Ainsi le iurerent, & prindrent congé: Puis Daraïde & les viellardz vont retrouver leurs femmes, trop esbahies de ce qu'elles luy auoient veu faire. Si luy dit Galtazire: ma dame Daraïde ie n'estimeray d'oresenauant gueres bien conseil le qui vous viendra faire fascherie & ennuy puis qu'en sçauiez prendre telle satisfaction. C'est (respondit) le vice qui tousiours à la fin paye son maistre. Mais ie vous supplie (replique elle) de ne vous empescher plus d'autre auenture qui nous puisse des tourner & retarder nostre chemin, d'autant que la longueur de ma demeure me porte trefgriue nuyfance. I'en suis la plus deplaisante (dit Daraïde) ayant plus d'enuie de retourner que d'auoir de me mener. Adonc entre en ses profondz pensers de Diane iusques à ce qu'ilz vindrent au port ou ilz s'embarquerent en la nef de Galtazire qui les attendoit: & incontinent font voile au grand contentement de la maistresse qui cognoissoit le bon secours qu'elle menoit.

Comme les cheualiers que Daraide enuoya à la Royne Sidonie, se présenterēt à elle luy faisant le discours ioyeux de l'acte du fradeur: Et comme Lardenie descouurit à Diane le secret d'Agésilas.

CHAP. LXI.

LEs cheualiers à qui Daraide enchargea d'aller vers la Royne Sidonie accomplirent leur promesse, & arriuerent vn iour qu'elle acheuoit de dîner en compagnie des cheualiers estrangers qui tous estoient gueriz: lesquelz à l'heure tenoient avec elle vn propos recreatif, & deuoient de la bonte extreme de Daraide, que la Royne disoit auoir laissé sa fille & elle en grand ennuy par son absence. Les autres entrèrent en la sale & s'agenouillans deuant elle luy exposèrent le contenu de leur charge, laquelle receut grand plaisir pour les nouuelles de Daraide, & pareillement ceux qui estoient avec elle: non sans bien rire du tour qui auoit esté ioué aux veillardz. Elle les remist en pleine liberté, dequoy l'ayant remercie hautement, ne firent gueres long sejour en la ville. Apres lesquelz, prend aussi congé le cheualier du Fenix & les autres, les vns pour aller chercher les auentures de l'Isle, les autres pour trouuer Daraide ainsi qu'ilz luy auoient promis. Adonc s'en va la Royne au palais de sa fille: à qui elle demanda d'entree quel present elle luy feroit pour les bonnes nouuelles qu'elle auoit à luy dire. La Princesse la voyant si gaye luy demande si Daraide estoit venuë. Non, dit la Royne, mais gueres plus ne tardera à venir, & vous puis apprendre de grandz preuues de sa vertu. A quoy Diane: ma dame ce n'est rien de nouveau pour moy que le tesmoignage de sa proesse que j'ay tant cogneüe. Et quant à son retour que promettez si brief il ne me pourra sembler que long: veu le desir que j'ay de la reuoir, qui me fait durer chacun iour de son absence autant que mille. La Royne faignoit alors de ne luy en vouloir rien declarer puis que ce n'estoit nulle nouveauté pour elle, quand elle respondit que la

valeur de Daraide ne luy pouuoit estre nouuelle, mais ses faitz & gestes elle entendroit volontiers qu'elle esperoit les plus estranges & admirables du monde, la suppliant luy en declarer ce qu'elle en sçauoit.

Ce que fit la Royne, luy narrant tout ce que les cheualiers luy auoient raconté: dequoy elle rit merueilleusement & railleurent fort ensemble sur l'accident ioyeux de Moncan & son compagnon: spécialement Lardenie (qui rencontroit fort bien, dit à Diane: Ma dame que donnerez vous à ce cheualier affineur pour vous apporter ces trois papegaux en cage à mettre en vostre iardin? le ne sçay rien (respond) que ie ne luy donnasse, & si luy lairrois les deux gris pour en disposer à son gre, car ie me contenterois du plus beau, lequel ie vous assure que si nous retenons vne fois icy, il ne nous eschappera plus ainsi pour estre pris par autre au trebuchet. Aumoins vous seruiroit il de pie (dit Lardenie) car de papegay ne peult il. A quoy Diane respondant que les dieux luy auoient fait ceste grace quelle fut fille non pas homme, à fin de pouoir iouir de sa douce cōuersation. Mais combien vous l'eussent il faite plus grande (replique la duchesse) s'ilz vous eussent enuoyé vne autre Nereide deguisee: la Princesse se souzriant respond que ce n'eust pas esté grace, ains tromperie qui eust esté commune à elles toutes. Vrayement ie le croy (dit elle) & qu'elle eust tiré les secretz de beaucoup de belles damoyelles selon le stile qu'elle auoit. La Royne s'en print à rire, disant: par ce moyen elle eust bien sceu qui choisir, sans estre abusée aux atours. A quoy Lardenie: ma dame vous auez grand raison de le dire: car souuent apres que ma dame la Princesse estoit couchee nous en allions iouër au verger à la lune, demenans ensemble mille ieux en cotte sur la verdure: mais ie vous assure que pour damoyelle le secret embonpoint ne respondoit à l'apparent, ie ne m'en esbahy pas (dit la Royne) ven qu'il n'y a pas quatre ans qu'elle vint icy tāt gresse & menue, & sa

croissance s'est estendue en longueur, que l'aage remplira après & fournira. Ma dame, dit Diane, on dit que la Princeſſe Alaxerree eſtoit ainſi: au fort fut il cheualier, pas ne ſe vantéra (ny autre) d'auoir veu de moy à nu plus que le viſage & les mains (ce diſant à ſa mere quaſi que ſon honneſtete la rendiſt eſtrange, voire à ſes femmes meſmes) Mais au cas (recharge Lardenie) que c'eult eſté vne autre Nereide qu'en diriez vous? que ſ'il eult eſté, reſpōd elle, de tel lignage que le Prince Amadis de Grece, ie n'eulle rien perdu à eſtre vne autre Niquee. La Duchefſe ſe reſiouit fort de ceſte reſponce, & luy dit: Quoy qu'il en ſoit ma dame, pleuſt à dieu qu'elle fuſt icy, pour continuer les eſbatz que prenions avec elle durant voſtre repos en ce iardin danſans en cōttes & nous baignans à la fonteine. Et me ſouuient qu'un iour que nous debates qui eſtoit la mieux garnie pour fille de ce que la robe cache elle nous diſoit que pour le moins elle auoit vn auantage ſur nous d'eſtre en meilleure diſpoſition de cheualier quand elle ſi vouloit acouſtrer: ce que nous ne ſçauions faire que ne fuſſions touſiours cogneuës pour damoyſelles. Et il vray, dit Diane, que me derobiez ces eſbatemens: en bonne foy ſi ie l'eulle ſçeu ie vous y euſſe ſurpriſes pluſieurs fois. Vous y auez trop perdu, reſpond Lardenie, de n'auoir veu noz folies, & comme nous luy faiſions contrefaire le cheualier pour nous faire la cour. Dieux quelle grace elle auoit à iouer ce perſonnage & nous requerrir d'amours? C'eſtoit triomphe de voir les paſſions que nous faiſions d'une part & d'autre, les requestes, les petites coleres: ore ſ'adreſſoit à la Marquiſe, ore à moy, & monſtrons ſemblant d'eſtre ialouſes de luy l'une & l'autre. Finablement nous eſpouſiōs, & de ſon luth elle faiſoit dancer toutes voz damoyſelles à noz eſpauſailles, & banquetions des fruitz du iardin beuans à la fonteine en vn ſi grand plaſir que ſouuent le ſoleil ſe vouloit leuer auant quaſi que fuſſions couchees que mal en ayt qui nous la

ainſi ſouſtraite, car onques puis n'eumes aucun bien ny aye, & toutes tant que nous ſommes ne valons pas maille ſans elle. Alors Diane: vrayement mes gentes dames vous ne faiſiez pas mal voz partages de prendre tout le plaſir de Daraide, & ne m'en laiſſer que la triſteſſe: comme vous ſçauiez que deuant moy touſiours eſtoit morte ou penſue, dequoy ie ſouffrois beaucoup pour l'amour d'elle: mais aſſeurez-vous que vous ne m'y tromperez plus. A quoy Lardenie: ie vous iure ma dame, par les dieux en qui ie croy qu'elle eſtoit trop plus melancolique hors de voſtre preſence: mais malgré qu'elle en euſt la tirions à noſtre cordelle & la contraignons de rire, encores qu'elle euſt enuie de pleurer, & comme gracieuſe & bien ariſe ne nous pouoit reſuſer ny eſconduire. Et penſe, ſi elle eſt aujourd'huy viuante qu'elle ne tient vie que de nous qui la faiſions ainſi reſiouir par force. Si eſt-ce qu'au mylieu du ieu biē ſouuent elle iettoit des gros ſouſpirs qui ſembloient luy deuoit arracher le cuer de la poitrine, ſ'eſcriant, hélas ma deſſe comme la gloire de mon martire m'acroche & eſface tout deduit. Ce que nous oyans nous laiſſions toutes tomber de rire: puis luy venions remonſtrer quelle deuoit auoir grande honte en compagnie de tant de belles ieunes dames & ſi fort à ſon commandement de reſuaſſer ainſi en vne autre laide & rebelle. Voila comme nous luy reſueilliōs les eſperitz quand elle entroit ſur ſes ſonges creux. La Royne prenoit grand plaſir à entendre le paſſetemps des filles avec Daraide. Si ſe retira en ſon palais, & incontinent Lardenie prend Diane par la main à qui elle voyoit que ce conte plaſoit, & la mene au plant du iardin ou elle luy dit: Ma dame ſi vous me baillez la foy de tenir ſecret tout ce que ie vous diray ie vous apprendray merueilles de voſtre Daraide. La Princeſſe eut vn ſurſaut au cuer de ceſte parole, toutesfois promit à Lardenie de ne reueler choſe qu'elle luy diroit, laquelle commença. Sçachez donc ma dame que
la nuit

la nuit precedent le partement de Daraïde, elle qui me portoit grand' amitié & non sans retour, me prie d'aller au iardin ensemble ou nous passames presque toute la nuit assises aupres de la fontaine : & devisant de la dure departie de vous qui estoit si prochaine, faisoit des exclamations tant douloureuses & se pasmoit si dru en mon giron que j'eusse bien voulu estre hors de la pour la peur que j'auois qu'elle ne rendist l'ame entre mes bras. Las, disoit elle, que sera ce de moy? comme pourray-je viure & me soutenir sans ame? que ne me puis-je mettre en deux parts pour en laisser vne icy tandis que l'autre s'absente? Ce disant s'esuanoüissoit de rechef, & dieu mercy nous estions pres du secours de l'eau dont ie luy baignois la face. Apres qu'elle estoit reuenüe à soy ie luy demandois que ce pouoit estre qui la rangeoit en telle agonie, qui n'estoit croyable proceder d'affection de fille à autre, & la priay de se fier en moy, & me declarer hardiment le fond de sa pensee. Alors apres apres m'auoir aiuree plusieurs foyes de ne vous en parler aucunement si ie n'entendois nouvelles de sa mort, à fin de vous faire connoître par icelle le respect quelle auroit porté à vostre honneur, ayant mieux souffrir continuellement que de s'exposer au hazard de vous offencer en pourchassant son remede. L'ayant donc asseuree de le celer à son vouloir, elle me conte comme elle n'estoit pas fille, mais gentilhomme nommé Agefilan filz du Prince Falanges d'Astre & de la Princesse Alastraxeree, & comme en sa tendre ieunesse il n'auoit sceu denier le tribut que tout le monde deuoit à l'image de vostre beauté: qui l'auoit meü pour iouir de la veüe d'icelle à se deguïser, & estre ainsi avecques vous sans soy descourir de crainte d'encourir vostre indignation. Ce qu'il me deffendoit sur l'amour que ie luy portois de ne vous dire auant sa mort, laquelle i'estime estre auenuë à son departement, & que ma foy est deliée pour le vous pouoir faire entendre. Or confiderez maintenant si la Da-

raïde deguïsee doit rien à la Nereïde & si la Diane trompee doit ceder à la Niquee. Que vous dirons nous de Diane? quand elle entendit ce propos elle discourt sur le sang d'Agefilan, sur sa beauté & vaillance, sur la grande honnesteté qu'il luy auoit gardée contre la complexion de l'amour si ardent que la longue penitence acertenoit. Adonc l'amour qu'elle luy auoit porté comme à fille ouure les portes de son cueur & oste les tayas dont parauant il estoit couuert, s'embranchant d'un flamme nouvelle nō moindre que celle dont son amy brusloit, perdant des l'heure sa liberté & souffrant aussi bien à celer son alteration que Daraïde auoit fait pour la sienne. Pour ce demoura quelque pause sans pouoir parler: puis dit à la Duchesse: Ma grand' amye ie ne scaurois dissimuler que les perfections d'Agefilan ne meritēt beaucoup: aussi ne pourriez vous nyer que quand le fait sera decouvert qu'il ne me laisse vn chapeau sur la teste d'opinion fenestre qu'on pourra concevoir de nostre si longue conuersation. A ceste cause ne suis pas d'avis que luy faciez cognoître que i'en aye esté auertie par vous d'autant que ma grandeur me contraindroit de le rudoyer & chastier de telle hardiesse comme fut Acteon pour auoir veu la deesse de qui ie porte le saint nom. Car quant à moy la continence dont il a vsé en mon endroit tant de fait que de parole me tiēt lieu de satisfaction: & l'amour que i'ay cogneu si pur & si cordial ne me permet de tourner ceste occasion en hayne & malveillance, mais ie trouueray bien moyen de l'estranger d'icy doucement. A quoy Lar denie: ma dame il me semble que tenez le vray langage que vostre estat vous commande, mais que la faute ou audace dont blasmez Agefilan doit estre imputee à la Roïne vostre mere qui vous tient ainsi prisonniere, & enuoye par le monde les pourtraitz de vostre excellence, pour allumer le desir de vostre veüe. Quant à reculer & estranger vn tel Prince (que n'en pourriez trouuer souz la lune vn plus digne de vous
pour

pour mary & espoux) ie n'en puis comprendre la rayson, veu que son amour seule si feruente & sincere, merite meilleur traitement. Parquoy deuez (à mon iugement) le receuoir d'aussi bon visage que iamais, & le retenir avec vous (de peur qu'un autre ne le vous volle) attendant l'opportunité de vous marier ensemble. Diane (quoy que ces remonstrances luy agreassent) respondit à Lardenie, que son conseil luy sembloit perilleux & contre son honneur, d'autant qu'en si estroite frequentation entre parties si desirables falloit craindre le danger de quelque fragilité: & qu'il ne conuenoit soy fonder sur l'esperoir des noces, qui pourroient estre destournees par quelque meschef, & l'honneur de la dame en demurerait là pendu au croc. Adonc Lardenie: c'est tresbien hablé ma dame, si vostre langue & le cueur sont d'accord, que ie trouue (pardonnez moy) vn peu dur à croire: considéré que rien ne sçauroit empescher le mariage de vous deux, soit qu'on regarde à la hauteſſe des maisons, ou à la prouesse & va leur. Lors Diane: bien vous confesseray m'amy que i'ayme Ageſilan autât, ou plus que ie pense estre de luy aymee, mais que feroit ce des dames si elles ne combattoient pour la chasteté contre l'appetit sensuel, ainsi que les cheualiers font les effortz pour les iustes querelles? Si la beauté d'Ageſilan me brulle & enflamme, aſſeurez vous que ie feray ſalemandre, & que mon integrité ſe maintiendra viue en ceſte fournaſſe. A ce coup la Duchesse vaincuë de raiſon quitta les armes, admirant le cueur pudique de la Princeſſe egal au merite de l'affection vehemente d'Ageſilan: concludant qu'elle eſperoit voir en eux la plus parfaite paire qu'amour euſt onques acouplé de ſes liens, ainſi que l'effect enſuyuit, tant y euſt d'honneur du coſté de Diane, & de loyauté de la part d'Ageſilan.

Comme l'Empereur Amadis de Grece & la Princeſſe Lucelle travaillent & ennuyent de la mer prindrent terre: & comme par mal cō-

tentement il ſe deroba d'elle qui le ſuyuit avec Mandroc.

CHAP. LXII.

L'Empereur & la Princeſſe Lucelle vengerent deux iours par bonace, au bout deſquelz le temps ſe tourna qui leur fit prendre terre avec leurs cheualiers & damoyſelles. Ilz paſſerent ce iour en vne foreſt prochaine, eſtant touſiours Amadis pres de Lucelle, de qui il tenoit la plus part du temps les mains dedans les ſiennes, les baiſant ſouuentefois, ce qu'elle conſentoit, pour donner plus grand couleur à la fineſſe qu'elle luy braſſoit: combien que de ſon coſté elle ne ſentiſt moindre chatouillement d'amour. De tout cecy rien ne plaiſoit à Finiſtee, croyant pour certain que le mariage ſe conſommeroit entr'eux, veu la gayeté non accouſtumeë qui giſoit en la face de l'Empereur. Mais auint la nuyt que la Princeſſe ſe retira à part avec le Prince Lucendos & Anaſtaſiane, & Amadis & Mādroc d'autre coſté. Or l'Empereur (qu'amour ne laiſſoit en repos) ſe reueille auant mynuit, & tout bellement ſe leue pour aller voir que faiſoit la Princeſſe: ſi ſ'en va iuſques à vn buyſſon, ou il la ſentit deuiſant: parquoy le coulla ſi auant qu'il la pouoit bien entendre, & ouyt qu'Anaſtaſiane diſoit: Et bien ma dame qu'avez vous déterminé de faire avecques l'Empereur quād aurez trouué le Roy voſtre frere? Ne vous l'ay-ie pas dit tant de fois, reſpond, que ie luy porte affection plus cordiale qu'onques dame à cheualier: mais mon deſaſtre voulut qu'il me delaiſſaſt au tēps qu'il me pouoit meriter pour me reduire à ne le prédre iamais pour mary ny autre quelconque. Comment (dit Anaſtaſiane) maintenant qu'il eſt veuf & libre ne vous mariez vous pas avec luy. Mon cueur (dit elle) ne me peut permettre d'accepter celuy qui m'a deſdaignée. Je ne puis trouuer bon, reſpond l'autre, que vous iouyez ainſi à abuſer vn tel ſeigneur en luy faiſant tant de faueurs, pour



pour luy redoubler sa peine, en le desespérant. A quoy la princesse: Ce que i'en fais est pour moderer doucement sa passion tandis que suis en sa puissance, de peur de l'esmouuoir à m'vser de quelque force. Ha ce n'est pas vn personnage (dit Anastasiane) de qui vous devez craindre qu'il vsurpe rien de vous contre vostre gré, pourtant luy en deuriiez faire entendre vostre vouloir. Nous auiserons (respond Lucelle) lequel sera meilleur de faire, vous assurant que ie me fais plus grand' force qu'à luy mesme en luy en faisant. L'Empereur qui escoutoit cecy à peu qu'il ne desespera, & se tirant vn peu à quartier (apres auoir discoursu en maintes pensees) se leue & va là ou estoit la Princesse, laquelle sentant le bruit demanda qui c'estoit: c'est celuy (dit il) de qui le corps vient chercher son ame ou il l'a laissée. Elle qui gisoit sur son manteau se mettant en son seant luy dit: O monsieur est-ce vous? venez-vous soit icy vn peu avec nous: à quoy il obeit tant douloureux & plaintif que la Princesse en souffroit grand angoisse, & luy en demanda la cause, à qui il respond, qu'elle qui l'estoit elle mesme ne la pouoit ignorer, luy rendant si peu d'amour en recompense de l'extreme qu'il luy por-

toit, auquel si elle ne donnoit bref secours la mort rendroit tesmoignage de son martire & de la cruauté d'elle: pour cela supplioit auoir pitié de luy, & puis qu'elle auoit promis de l'espouser que secrettement Anastasiane leur prinst là les mains, & quelle donnast allegeance à son cuer, comme honnettement elle pouoit faire souz telle condition & cōuenance. La Princesse fort troublée de ces paroles, certes monsieur (respondit) ie n'eusse pas pensé que l'amour que me portez fust si leger que n'eussiez autant d'esgard à me contenter qu'à vous mesmes: puis qu'avez eu patience si long temps; ne pourriez vous encores vn peu durer en aleine, à fin que tout se face sans offence de nostre honneur? car quant à moy ie ne pense satisfaire au mien accomplissant vostre vouloir, sans le congé du Roy mon frere. Ceste responce transperça le cuer à Amadis si viuement qu'à demy mort posa sa teste au giron de Lucelle, laquelle sans mot sonner l'arrosa de tant de larmes qu'elle le fit reuenir de pasmoison: Lors il luy dit: puis que ie cognois vostre volonté ma dame, ie vous prometz mettre la mienne en tel lieu que la vostre se pourra tenir seure. Si se leue, & la Princesse demeure plorant avec sa damoy-

damoyſelle, qui la tence de quoy elle n'auoit ſatisfait à l'Empereur, & elle ſ'excuse de n'auoir eu la hardieſſe: mais quelle cercheroit l'opportunité de ce faire, & à chef de piece laſſez de conteſter & gemir elles ſ'endormirent. L'Empereur ſe retire en tel deſconfort que n'eust eſté vn autre il ſe fut fait violence à ſa perſonne, & diſoit que ce torment luy eſtoit bien employé pour auoir voulu faucher l'amour à celle qui tant l'auoit aymé qu'il ne luy deuoit moins de loyauté apres la mort qu'en la vie, auſſi qu'il ſ'en payeroit par les mains, & de ce pas bride ſon cheual & va eſcueiller Finiſtee ſans mener bruit, luy commandant de prendre ſon palefroy, ce qu'elle fait bien eſbahie quelle mouche l'auoit piqué. Et Amadis eſtant à cheual ſ'en va au lieu ou Mandroc repoſoit qu'il eſcueille de la hante de ſa lance, lequel ſe reueillant tout eſtourdy & voyant vn cheualier ainſi monté luy demâda qui il eſtoit qui luy venoit rompre ſon repos. Mon bon amy Mandroc c'eſt moy, dit Amadis. Le geant qui le recognoit à la parole ſe leue ſur piedz & le voyant ainſi preſt à cheminer avec ſon eſcuyere luy demanda tout eſmerueille que ce pouuoit eſtre qui le haſtoit ſi matin. Il luy reſpond que force luy eſtoit partir de là en diligence, le priant affectueuſement de vouloir conduire la Princeſſe & ſon neveu, & l'excuser au Roy Lucidor de ce qu'il ne l'eſt allé voir. Au ſurplus qu'il n'auertit la Princeſſe de ſon parlement iuſques au iour, luy diſant qu'il eſtoit allé accomplir ce qu'il luy auoit promis pour la deliurer de la deſſiance qu'elle auoit de luy, en qui ſi elle auoit cogneu faulx de loyauté ne deuoit toutesfois douter de ce qui concernoit le deuoir de tout Prince ou cheualier. Adonc commande à Dieu Mandroc, lequel eſtonné de ce propos luy dit: Monſieur comme me laiſſez vous ainſi ſeul avecques la Princeſſe? En mon lieu vous y laiſſe, dit Amadis, car en meilleure garde ne la puis mettre, vous priant, mon bon amy que la ou me ſçaurez de ſejourner venez voir. Mandroc luy dit à Dieu,

l'affeurant de la charge qui luy donnoit eſtant bien faſché de ſa departie, & luy monta incontinent en la fantaſie que quelque deſauoir de Lucelle le banniſſoit ainſi. Or ſ'en va l'Empereur avec ſa damoyſelle, & Mandroc demeure attendant que le ſoleil fut leué, mais il trouua la Princeſſe dormât encores & ayant patience qu'elle fut eſueillee: alors luy dit: Ma dame vous n'eſtes pas ſi diligente à vous eſcueiller que l'Empereur a eſté à deſloger d'icy. Quand elle ouyt ce langage, toute troublee luy dit: qu'eſt-ce que vous dites à Mandroc luy deduit ſa pitieufe ambassade, laquelle ayant entenduë en eut le cuer nauré demeuſurement, & tor dant ſes blanches mains, ha dit elle, quel creue cuer m'a voulu liurer Amadis de Grece à ce coup! A à Dieu, que tes iugemens ſont iuſtes de me punir encores de la folie que ie fis en ma tendre ieuneſſe de mettre mon amour en ce Prince. Lors elle pleure & ſouſpire: en quoy Anaſtaſiane & le petit Lucendos luy tiennent compagnie. Helas, diſoit elle, Amadis de Grece ſi i'eufſe eu ſens & entendement, ie deuois comprendre que le dernier ſeruiſſe que me fiſtes ne pouuoit eſtre que de la condition des autres paſſez, c'eſt à ſçauoir pour me tourner finalement en quelque malheur & tourment. O vray amy! & comme me laiſſez vous ainſi ſeule au pouuoir de mes ennemis: ſi amour ne vous induiſoit à faire tant pour moy que de me rendre à port de ſalut à tout le moins le vous commandoit la loy de courtoisie & cheualerie. Anaſtaſiane m'a mye, que vous en ſemble de nous auoir ainſi abandonnées en ce danger? Ie croy (dit elle) qu'il ait ouy tous les propos que la nuit nous tenions de luy. Ie n'en fais doute (dit Lucelle) veu ce qu'il m'a mandé par Mandroc: mais quand bien i'y penſe ie ne trouue autre ſons en ceſt affaire que de la fortune qui touſiours me court ſus. Adonc ſuruiuent Mandroc à qui elle dit: l'as mon bon amy & qui pourroit aller apres luy pour le ſupplier de ma part de ne ſ'en aller ſans parler à moy, il ne ſera ſi mal gracieux qu'il

ne le face. Apres que le geant luy eut respondu qu'il estoit en grand doute de ne le pouuoit trouuer, par ce qu'il l'auoit veu embolquer au plus espois de la forest, elle ne se pouant contenter luy demande si ce luy seroit point ennuy qu'ilz mōtassēt tous à cheual en sa queste. Mandroc luy respondant que c'estoit le moindre seruice qu'il luy vouldroit faire, ioint le grand desir que luy mesmes auoit de le trouuer, adonc les mene la voye qu'il luy auoit veu prendre, mais il estoit desia trop loing d'eux, & auoit descouuert vne plaine à main gauche ou il fit son conte de passer la nuit, toutesfois il ny voulut entrer auāt soleil couché de peur d'y estre trouué si la Princesse l'enuoyoit poursuire, parquoy se retire en vn halier, ou de foiblesse s'estendit sur l'herbe faisant aussi piteuses doleâces que s'il eust esté aux traitz de la mort. La pauurette Finistee n'oublia à le reconforter à son pouoir se feant aupres de luy pour luy faire cheuet de son giron, à qui il ne tenoit autre propos que du dernier à dieu, regrettant n'auoir eu le moyen auant que de mourir de recognoistre ses bons seruices. Comment (disoit elle) vous vainqueur des plus braues, feriez vous bien vne fin si pusillanime? M'amy, respond il, ie suis assailly de deux si fortes lances, de Niquee morte, & de Lucelle viue, que iamais ie n'espere releuer de la place ou ie suis: vous priant que si tost qu'auray l'ame renduë (qui n'est pas pour voir plus autre lumiere) d'en porter aussi tost les nouuelles à celle qui m'a mis les armes mortelles au poin: ce dit, s'esuanouyt & ne parla de longue pause apres.

Comme allant la Princesse Lucelle avecques le geant Mandroc en queste de l'Empereur Amadis se virent en grand peril, & quelle fut l'issue.

CHAP. LXIII.

LA Princesse avecques Lucendos & Anastasiane luyuoient Mandroc, & alloit par la forest Lucelle pleine de

grand angoisse d'estre ainsi separee de la compagnie de son Amadis, combien que sa volonte ne se peut condescendre à luy verser de plus estroite faueur. Or cheminerent iusques à soleil couchant qu'ilz arriuerent à la grande plaine que vous auons dit, & tenans vn sentier qui costoyoit l'oree de la forest, voyent venir vn chariot à quatre cheuaux, auquel estoient plusieurs dames & damoyelles plorans amerement. Au deuant du chariot marchoient deux grands & terribles geans armez de toutes pieces, & derriere venoient dix cheualiers. La Princesse en receut grand effroy, & Mandroc non moindre ennuy, voyant le danger qui leur pouoit estre appareillé: mais ilz furent surpris de si pres qu'il n'y auoit lieu de conseil, ains l'vn des geans leur cria à haute voix: cheualier vien en prison toy & ta compagnie, si l'as plus chere que la mort. A qui Mandroc, la mort ne craindray iamais tant que seray obligé de la payer à mon honneur. Or en es tu donc venu au payement dit l'autre: & à ce mot la Princesse demye morte, tombe du haut de son palefroy: & sa damoyelle non gueres moins esperduë, descend & se va seoir aupres d'elle, laquelle Lucelle embrace disant: Anastasiane m'amy que cher me couste tousiours l'amour d'Amadis de Grece. Or sommes nous bien perduës: laisse moy qui voys cherchant celuy qui me fuyt pour si tost trouuer mon meschef. Anastasiane ne luy respondit que de larmes, & le petit Prince estoit sur sa haquenee comme transi quand les deux geans couuertz de leurs escuz & les lances baissées se vindrent rencontrer: leurs escuz furent bons sur lesquelz rompirent leurs boys de telle force qu'ilz en firent maintes pieces, & outrepassans l'vn l'autre reuolent leurs grands coustelas es mains, desquelz ilz s'entrechamaillerent si horriblement que le retentissement redoublé par la resonnance de la forest avec les criz des femmes estans dans le chariot vint iusques aux oreilles d'Amadis qui estoit couché en vn fort halier, à qui dit Finistee: Mon.

Monsieur le cueur me iuge qu'il y ayt icy pres vn estour ou vostre Mandroc peut estre que la Princesse aura enuoyé apres vous.

Làs Finistee, respond il, ie suis plus en estat d'estre secouru que de secourir les autres, & ne sentz force ne vigneut en moy pour resister au plus failly & chetif cheualier de la terre : & telle estoit la verité pour la debilité que la tristesse mortelle auoit causee en ses mēbres. La pauvre damoyelle le voyant en tel estat ioignant les mains vers le ciel, les yeux fichez sur luy qui estoit estendu sur l'herbe disoit larmoyant : Hee dieu comme permettez vous ainsi mourir le meilleur Prince & cheualier du monde. Alors ouyrent plus grād bruit que parauant, au moyē que celle du chariot crioit à la desesperade voyant les deux geans ensemble aux prises avec Mandroc, & que les cheualiers mennoient la Princesse prisonniere avec le Prince & sa damoyelle. Car vous deuez scauoir que gueres n'auoit duré le combat entre Mandroc & le geant, quand l'autre geāt voyant le desauantage de son compagnon l'estoit venu secourir. Dont Finistee oyant les voix plaintiues des femmes escria en surfaut : A à monsieur roy vostre Lucelle en danger. A ce nom l'Empereur comme s'esueilland de profond sommeil se leue & à coup enlasse son heaume, & pend son escu au col, puis monte à cheual, qu'il n'eust gueres piqué la part ou le bruit le tiroit qu'il veit le piteux desordre lequel le transporta en telle extremite de fureur que si la campagne eust esté pleine de cheualiers aussi peu de conte eust il fait de les assaillir, & eut si grand' haste d'y courir qu'il ne luy souuint de sa lance : parquoy l'espee au poing à l'heure que le soleil s'absconsoit, & que la Princesse estoit desia coffree dedans le char, il arriue à pointe d'esperon criant à haute voix : trahistres brigands & volleurs, à la bonne heure estes vous tōbez es mains de vostre preuost des mareschaux, Anastasiane qui l'aperceust se cuyda pasmer de ioye, & dit à la Princesse (qui cōme morte auoit la teste en son giron) en la tirant par les

maines : Hee dieu ma dame efforcez vous & verrez nostre secours venu quand & celui que nous cerchons. Lucelle leua le clef & le vid au plus grand reconfort qui luy eust seu auenir. Les dix cheualiers vont à course de destriers au deuant de luy, dont les vns rompent leurs lances en son escu (les autres faillantz de rencontre) sans le mouoir non plus qu'une tour il passa outre en portant vn bien essourdé par terre du choc de son corps : & comme s'il n'eust trouué aucun destourbier voyant les geans acharnez sur Mandroc qu'ilz ne pouuoient faire rendre, broche vers eux & entoile vn tel coup de toute sa force sur le haut de l'armet de l'vn qu'il luy pourfend la teste iusqu'au dens. Et voyant le coup de marque qu'il auoit fait, escria : Grece, Grece, amy Mandroc prenez courage, voicy vostre Amadis de Grece. Le geant tomba par terre qui fit meilleur marché de son compagnon à Mandroc : lesquels recommencerent leur conflit comme deuant, bien qu'un peu alentis pour le trauail qu'ilz auoient eu en l'effort de la lutte. L'Empereur les laissa pour faire contre care aux cheualiers qui le venoient assaillir, lesquels il rembarre d'une furie nō pareille : car il ne tiroit coup à droit qu'il n'en occist ou abbatist quelqu'un : de sorte qu'en peu d'heure quatre d'eux gisoient sur l'herbe. Anastasiane voyant ses merueilles dit à sa maistresse : & qui est le cueur de dame qui peust tenir fort contre celui, deuant lequel fondēt les braues cheualiers & fiers geants comme la neige au soleil : pour dieu regardez ses faitz merueilleux, & les voyāt verrez le tort que luy tenez. A quoy elle respond que les prouesses d'Amadis ne luy estoient nouuelles, ne la merueille d'estre elle mesme viue, depuis la faute qu'il luy auoit faite. Et quand au tort qu'elle luy faisoit estoit en souffrant aussi grand' martire que luy, & pour euitier la playe mortelle de son honneur. Adonc Amadis auoit repoussé les cheualiers iusques aupres du char la ou voyant sa dame, abat à l'vn le bras avecques l'espee, & à l'autre trenche le quartier

rier gauche de l'espee, & à l'autre trenche le quartier gauche de l'espaule iusques à luy ouvrir la moytié du cuer. Alors Anastasiane dit à Lucelle que c'estoit bien raison d'ouvrir le cuer à celuy qui luy monstroic celuy des autres ainsi ouvert pour son service. Qui respondit qu'il n'estoit besoin d'ouvrir ce que de long temps estoit ouvert, sans le grand obstacle qu'il avoit mis au deuant. Et comme la damoysele luy repliquoit qu'il n'y avoit deffence qui sceust tenir contre tel cheualier, alors ceux que si mal il menoit ne l'oserent plus attendre, & luy faisant voye il pique vers Mandroc qu'il trouva traittant le geant presque à sa volonté. Lequel voyant arriuer Amadis tourna ses yeux vers luy, craignant ce qui estoit auenu à son compaignon, qui donna lieu à Mandroc de luy descharger vn coup à descouvert du gorgeriz, dont il luy trencha la teste. Alors luy dit l'Empereur: En bone garde sauois- ie bien Mandroc, que ie laissois ma Lucelle à qui ie te prie de dire qu'elle couche ce secours en ligne du conte des autres services que luy ay fais, & que ie m'en voys accomplir le reste de sa volonté, & me payer en pitieuse monnoye du trop d'amour que ie luy porte. Or a dieu mon bon amy Mádroc (combien que fort nauré & trauaillé) s'auance pour l'empoigner par le bord de sa cuirace, luy disant: Monsieur pour la part que me touche vostre bon secours ie vous en remercie treshumblement: mais quand à elle, si vous auez esté cause du remede, vous l'auiez esté de l'inconuenient, l'ayant mise en ce dâger pour aller en vostre queste: pour ce ie vous supplie ne vouloir partir ainsi sans parler à elle, car vous luy redoubleriez l'énuy qu'elle a receu de vostre premier depart sans prendre congé, la laissant seule en telle contrée. A quoy Amadis: Si ie pensois, Mandroc, que ma demeure luy seruist ie ne luy faillirois, veu que ma volonté ne se gouerne que par la sienne: & pour ce que ce que ie fais, luy est agreable vous me pardonnerez la saluant en mon nom. Ce

dit, tourne bride, & s'en va & sa damoysele Finistee (acheuant de conter à la Princesse l'angoisse ou elle auoit veu l'Empereur depuis qu'il l'eust laissée) le voyant partir donne de la housine à son pallefroy & va apres. Ce que voyant Lucelle fut tant troublée qu'elle ne scauoit que penser ne dire. A laquelle vint Mádroc ainsi qu'elle estoit descendue du char, & luy ayant fait son embassade elle dit: Certes s'il faisoit ma volonté il m'useroit de plus grand' courtoisie que de me fuyr quand ie le quiers: mais puis que ma compagnie ne luy plaist ie serois bien simple de plus chercher la sienne: ce qu'elle disoit avec si grâd destresse qu'elle en estoit quasi hors de son sens. Adonc dit Anastasiane: & ia dieu ne m'aide s'il s'en va ainsi, sans qu'il ait l'estour à moy & que ie ne le rameine malgré ses dens. Si monte sur sa haquenee & court apres Amadis. Ce pendant la princesse & Mandroc deslierent & mirent en liberté celles qui estoient dedans le char entre lesquelles y auoit vne dame avec deux siennes filles qui les priaient de venir heberger en leur chasteau qui prochain estoit: ce que la princesse luy accorda apres le retour de sa damoysele, & se coucherent sur l'herbe deuisans de la façon que ceste dame auoit esté prise: qui luy conta que ce auoit esté en la chassie par vne grande surprise, d'autant qu'elle auoit treues & abstinéce de guerre avec les geans, dont l'vn auoit nom Gourdau & l'autre Lazon estans seigneurs du fort chasteau d'Argantas situé en vne presqu'isle, c'est à scauoir tenât d'vn costé à la terre duquel l'approche estoit vne deffente de maintes tours & boulleuers: & de la faisoient plusieurs saillies pour piller & rober le pais. Or sont punis de leur deserte (respond la Princesse) mais ma dame (dit l'autre) on ne croyroit pas la richesse qu'ilz auoient amassée en ce chasteau par leurs pilleries & larrecins. Surquoy la Princesse luy disoit que dieu par sa iustice acheuroit d'y donner ordre comme il auoit commencé. Ainsi deuisoient ensemble, & vne de ses filles qui

entédoit la chirurgie se mist à estancher le sang & bander les playes de Mandroc en attendant le retour d'Anastasiane.

Comme Amadis de Grece (apres avoir deliuré de dāger la Princesse) partit sans parler à elle, & comme elle alla apres luy.

CHAP. LXIIII.

L'Empereur ayant laillé Mandroc tâtir piqua, & Finistee apres luy, qu'ilz arriuerent à l'oree d'une forest, là ou estant passée la chaleur de son ire, se voyant ainsi esloigné de sa dame, son cueur ne peut porter qu'il nes'atendriit comme parauant: parquoy rencheut en sa debilité premiere & ne se pouuoit plus tenir à cheual, duquel il descend & se iette sur l'herbe ou il se tourne & roule douloureusement: ce que voyant Finistee met soudain pied à terre, & craignant qu'il eust rapporté quelque playe mortelle du conflit, luy dit: Làs monsieur estes vos fort nauré? Comment Finistee (respond) r'est-ce chose nouvelle que ma playe? n'as-tu point veu ce que j'ay senty & souffert? ne congnois-tu pas la blesseure qui est si vieille & renouvelle & engrege tous les iours? car Dieu mercy sur mon corps ie n'en sens nulle. Finistee se rassura de la peur qu'elle en auoit, le reconfortant & priant de s'esuertuer pour remonter, à fin d'aller gagner les logis, par ce qu'il estoit tard. A quoy il respond qu'il auoit deliberé de loger par les champs & montaignes, aussi qu'il n'auoit pas en luy la force de se pouoir leuer de là. Sur ces entrefaites voicy venir Anastasiane qui le voyant en cest esbat eut pareille crainte que l'autre, que ce fust quelque coup qu'il eust receu en la meslee: si descend & s'assied aupres de luy prenant ses mains qu'elle trouue mouillees d'une sueur froide. Alors luy demande s'il estoit blessé, qui recognoissant sa parolle luy dit que si cruellement l'estoit, qu'il estimoit ce iour la auoir fait à la Princesse le dernier seruice qu'il pourroit iamais: pour-ce ma bonne amye portez luy les nouuelles de ma

fin comme celle qui en auez tousiours procuré le remede. A quoy la pauvrette pleurant: monsieur efforcez vous & nous vous banderons voz playes, puis irons trouuer ma dame au lieu ou l'auiez laissée d'ou elle ne partira iamais qu'elle ne vous ayt veu. A à (dit l'Empereur) il n'y a qu'une qui puisse estancher mon sang. Quand elle entendit que son mal n'estoit qu'en l'ame: sus (dit elle) monsieur fiez vous en moy car i'en ay trouué le moyen: pour-ce vous supplie de monter promptement à cheual pour l'aller prendre. L'Empereur iettant ses bras à son col se met en son seât, & s'esforça de toute sa puissance pour se leuer ce qu'il ne peut faire. Dont il luy dit: m'amy ie ferois volontiers ce que me dittes, mais la vertu me deffaut, vous iurant la foy que ie dois à dieu & à elle que ie n'ay le pouoir tant ne quant, & que ie ne pense durer en vie iusques au matin: pour-ce la priez de me pardonner & d'attendre mon esperit qui s'ira rendre la ou le corps ne peut plus. Ce disant il se pisme entre les bras d'Anastasiane qui le remet doucement entre ceux de Finistee, & pensant qu'il ny auoit autre remede que d'amener la Princesse en ce lieu remonte sur son palefroy, & à bride abatué l'alla retrouver luy disant: Ma dame j'ay à parler à vous, pour-ce vous prie de monter sur vostre haquence, à fin que nous promenions vn peu: ce qu'elle fait, & si tost quelles furent vn peu loing des autres luy demanda qu'il y auoit, & qu'elle estoit toute troublée de son effroy. C'est (dit Anastasiane) qu'il faut que veniez presentement quand & moy si voulez iamais voir vostre Amadis de Grece en vie. La Princesse sentit vn dur estoc de ceste parolle & son cueur n'auoit encore soustenu vne si rude esprouue. Helàs (dit elle) son remede est il venu, & le mien aussi? pensant qu'il fut feru à mort, & qu'elle ne viuroit gueres apres luy. Or ma dame, dit Anastasiane, à ce coup sa vie est entre voz mains. La Princesse fut vn peu consolee quand elle entendit que sa maladie estoit de l'espece de la sienne, & dit: Al.

dit : Allon de par dieu car il ne mourra par faute de secours qui dependra de moy. Adonc s'en vont en grand diligence & le trouuerent la teste couchee dedans le giron de Finistee, qui ne cessoit de larmoyer sur luy. Anastasiane descend & reçoit la Princesse entre ses bras & s'en vont soir aupres de l'Empereur, à qui elle demande comme il se trouuoit. Helàs ma dame (dit Finistee) de puis qu'Anastasiane partit d'icy il n'a remué pied ne main : A l'heure la lune se monstroit au ciel quand l'Empereur (qui rien ne leur respondit) comme estant hors de soy tenât les yeux fermez, s'escria: ô abuz pour me desabuser, qui eust pensé que ma dame eust eu si peu de fiance en ma vertu que de craindre vilennie la ou onques ne repaïra. Ce dit, fut encores long temps sans parler. Mais la Princesse sentit vn grief choc en son cuer de ceste parolle, tellement que resister ne peut à vne soudaine deffail-lâce qui luy en print. Ainsi estoient les deux amans estenduz tous transiz l'vn aupres de l'autre, dont Amadis reuint à soy le premier, à qui dit Finistee : En quoy monsieur ne voulez vous autrement penser de madame Lucelle qui est icy en telle disposition pour l'amour de vous? A ce nom il s'efforce tant qu'il se releue en son seant, & la voyant aupres de luy comme morte luy prend les mains qu'il luy baise sans cesse, & tant la tire & manye qu'il luy refueille les sens & luy dit: Làs, ma dame, auez vous voulu tât faire pour vostre ancien cheualier que d'assister à son trespas! Je vous supplie me pardonner le trauail que ie suis cause de vous auoir fait prendre, vous assurant que i'en porte la peine sur le champ, d'autant que par vostre uisitation me prolongez la vie en langueur, qui n'eust pas encore duré cesté nuit. Làs laissez moy mourir pour mettre fin à mon cruel martire, sans me tuer si souvent par vostre rigueur, & puis me resusciter par quelque faueur sainte & émiellée de vaine esperance: en quoy ie ressemble à Prometheüs de qui le foye reuenant d'autant qu'il est rongé sert de continuëlle

viande à l'Autour de Caucaïse. La Princesse se trouua en plus grande perplexité qu'onques mez. Toutesfoys luy estant bien auis que la responce qu'elle luy feroit ceste heure seroit l'arrest de sa vie ou sa mort, & aussi vaincue de l'amour à qui nul ne peut en fin resister, luy respondit. He Amadis de Grece, si ie rendois le payement deu à vostre deloyauté vous seriez chastié de vostre faute de m'auoir delaissee, & moy de la mienne de vous auoir trop aymé: ce qui ne se pourroit faire sans la mort de tous deux. Mais obeïssant à la puissance d'amour qui me priue de liberté, ie suis venuë vous chercher (& n'é sachez gré à autre) plus pour vous sauuer la vie que pour fuyr ma mort, estant deliberee de ne partir de vostre compagnie, tant qu'ayons trouué le Roy mon frere, avec le contentement duquel ie me rendray vostre de tous points par le lyen de mariage, dont à present ie vous donne la foy, & de plus ne me requerez car ie n'en feroys rien. L'Empereur oyant ceste sentence ne sçauoit s'il songeoit ou resuoit, ne la pouant quasi croire, ne s'en fier à ses oreilles, si dit à fin de piece: O bienheureux tourment qui es couronné de si glorieuse recompense: Heureuse bataille de qui sort tât precieuse victoire. Anastasiane estoit merueilleusement aise de ce bon appointment, & voyant qu'ilz s'oubloient en ce plaisir, les auertit qu'il estoit temps d'aller retrouver Mandroc & la compagnie des damoyelles. Ce que l'Empereur accorda, ainsi monterent tous à cheual, mais ilz rencontrerent le bon Mandroc en chemin, lequel Amadis embrâça par grâd' amour, disant: Ha à cher amy, n'auiez vous pas ce iour assez fait pour moy sans vous donner ce trauail, à l'heure qu'auiez si grand besoin de repos? A quoy le geant: vous sçauiez bien monsieur, que ie suis vostre iusques au dernier soupir. Or estoit il trop content de voir l'Empereur retourner avec Lucelle, & ainsi s'en vôt ensemble tous resiouiz au lieu ou le char estoit demeuré, dedàs lequel la Princesse monta avecques les autres pour aller

gagner le chasteau ou ilz denoient loger celle nuyt qui n'estoit qu'à deux petites lieues de la: auquel ilz furent fort honorablement receuz & traitez. Or ay-ie à vous dire qu'ilz rencontrèrent pres de la vn des cheualiers des dix qui estoient de la journee, que la foiblesse d'une playe par effusion de sang auoit la arresté en fuyant. Si l'empoigna Amadis à qui il se rendit & l'emenerent au chasteau, ou il sceut de luy tout l'estat de la forteresse d'Argantas, qui estoit imprenable par force humaine, & qu'il n'y auoit dedans qu'une vieille geante accompagnée de quatre cheualiers pour la garde du lieu, avec quelque menue gent de seruite. A ceste cause péta l'Empereur qu'il le conuiendroit surprendre par quelque ruse auant qu'ilz sceussent plus amples nouvelles du conquerant. Parquoy apres souper print congé secrettement de la Princesse (qui le luy eust volontiers refusé) & ne meine quand & luy que son prisonnier à qui il promet sa deliurance, moyennant qu'il le mette dedans le chasteau. Ainsi s'en va vers Argantas qui n'estoit qu'à vne lieue de la, voire si fier & braue de son nouveau contentement qu'il ne pensoit entreprise au monde qu'il ne mist incontinent à fin.

Comme l'Empereur Amadis par sa haute cheualerie conquist le chasteau d'Argantas & deliura les prisonniers.

CHAP. LXV.

A Madis de Grece & le cheualier arriuant pres du chasteau d'Argantas entendirent de grans criz & gemissemens dedans, & se douterent assez tost que ce pouoit estre, car trois autres cheualiers qui estoient fuiz de la meslee auoient apporté les nouvelles de la mort des deux geans, qui estoit la cause de doleance & lamentation que faisoit leur mere & les seruiteurs. Amadis fit hurter le cheualier à vn gros marteau de fer qui estoit à la porte, qui fit venir vn homme à vne fenestre au dessus, leur demandât qui ilz estoient

& qu'ilz alloient querant. Le suis Bresco, respond le cheualier, qui par grand auenture suis eschappé de l'estour avec mon compagnon que voicy, pour-ce ouure nous, à fin qu'allions faire nostre deuoir de mener le deuil de noz seigneurs avecques les autres. L'homme qui le recogneut luy dit qu'il attendist, & reuint incontinent avec les clefz par le commandement de la geante avec deux valetz portans deux chandelles. Lesquelz si tost qu'Amadis fut entré le cognurent aux enseignes que les cheualiers de leans en auoient baillees: parquoy ietterent sur luy leurs chandeliers & s'enfuyoient au dedans crians à haute vois. Trahy, trahy, seigneurs cheualiers sortez, ou nous sommes perdus. A ce bruit l'effroy fut grand par le chasteau, & les trois cheualiers qui ne s'estoient encores desarmez estoient prestz de saillir au secours pendant q'les quatre de la garde s'armoient, & huit vilains couroient à leurs haches & cabassetz de fer. Mais Amadis ayant soudain mis pied à terre print vne des chandelles & à grand pas marche droit vers la salle ou il les trouua avec la geante. Quand ilz l'apperceurent, s'escrierent: Dame Foralaste nous sommes tous mors, car voicy la mesme mort qui a tolly la vie à voz enfans. La vieille leur dit: mettez le à mort, il n'euadera point de noz mains. Adonc ilz l'enuahirent de tous costez, & il les escarmouche tellement qu'auant que ceux de la garde vinsent il en auoit desesché deux. Alors arriuent les quatre autres qui recommencerent le confit, lesquelz en peu d'heure Amadis charpentera en piteuse sorte. A ceste cause Foralaste comme vne Lyonne enragée fait allumer vne torche par vn valet & s'en va en vne loge ou elle tenoit deux tigres enfermées les plus terribles bestes de la terre: si les met dehors esperant par elles la vengeance du cheualier. Mais la premiere chose qu'elles firent fut de deschirer leur maistresse & la despecer à beaux ongles & dêts. Ce que voyant le seruiteur quitte sa torche & s'enfuit en vne chambre ou les femmes

mes du chasteau s'estoient retirees . Les Tigres ayās mis la geante en pieces vōt par la court ou elles rencontrent les huit vilains encapelinez allans vers la sale pour charger Amadis de renfort: desquelz elles en demembrerent & escorcherent deux piteusement, contraignans les autres gaigner le haut par les escaliers . De la les bestes tirerent vers la lumiere ou Amadis combattoit , & s'attacherent à deux des cinq cheualiers qui n'en eurent pas meilleur marché que les autres . Mais les trois qui restoiēt les voyās ainsi acharnees sur les corps de leurs compagnons s'adresserent à elles à leur dam : car elles en firent hideuse boucherie, hormis vn qui se sauua de vitesse. Adonc Amadis : la dieu ne plaise (dit il) que ie m'efface à ses animaux qui tant m'ont fait de bien : & de ce pas empoigne vne torche & s'en va amont la viz laissant les tigres en leur pasture qu'il enferme en la sale: & va à l'autre ou les vilains s'estoient retirez de peur des bestes. A l'huys de lequel le trouua le cheualier qui s'en estoit fuy : le quel aussi tost qu'il le vid se prosterne à ses piedz luy requerant mercy, qu'il luy ottroya, moyennant qu'il fist ouurir celle porte aux vilains. Ausquelz il parla, leur remonstrāt qu'il ne pensassent tenir fort contre ce luy qui seul auoit mis en rotte & fait euvre de cent cheualiers, autremens faisans ceste folie ilz ne se pouoient asseurer que de la mort. Les pauures diables qui iugerent à ce langage que tout estoit souzmis à la puissance de l'estranger, dirent que sur sa parole ilz ouureroyent. Lors Amadis leur promet sur sa foy de ne leur faire aucun outrage. Parquoy ilz luy ouurent & se iettent à genoux deuant luy, s'offrans à son seruice. Il les reçoit, & de la descend en la sale basse ou ilz trouuerent les Tigres mortes des playes qu'elles auoiēt receuës. Si s'en va à la chambre ou les femmes s'estoient retirees qui pleuroient tendrement, ausquelles il fit ouurir l'huys sur sa promesse, & eut grand' compassion de leur tristesse . Puis se met à vne fenestre

qui regardoit dehors & appella le cheualier la guide, lequel n'auoit osé entrer dedans le chasteau, iusques à ce qu'il veid comme le fait succederoit. Adonc luy demanda qu'il vouloit de luy. Que vous allicz soudain vers ma dame la Princesse luy dire que le chasteau d'Argantas est à nous, & qu'elle m'enuoye gens à mettre dedans pour le garder, puis ie les iray trouuer incontinent. Le cheualier fit diligence, & dieu sçait la chere qui luy fut faite de si bonne embassade, pour laquelle fournir Mandroc enuoya vn homme du chasteau ou ilz estoient à sa nau pour amener partie de ses gens qui estoient demeurez, lesquels ne faillirent l'endemain de se rendre au chasteau d'Argantas. Amadis ne dormit gueres celle nuyt, combien qu'il en eust grande necessité, ains l'employa à faire enterrer la geante & ses gens, & à faire traiter les prisonniers qui estoient en grande souffreté. Si leur fit le matin rendre tout ce qui leur auoit esté pris, & leur en donna encores autant des grandes richesses qu'il trouua leans, les commandant tous à dieu. Et ilz s'en allerent le benissant & remerciant de tout leur cueur. De moindre largesse il n'vsa enuers les damoyelles du chasteau, & arriuant les cheualiers de Mandroc les mit en possession du chasteau, receuant hommage d'eux au nom de Mandroc qu'il en faisoit seigneur. Ce fait part de là & va trouuer la Princesse qui le recueillit fort gayement comme si elle eust senty sa part de la gloire de la cōqueste faite par celui qui tant estoit sien. Or dit l'Empereur à Mandroc qu'il luy donnoit le chasteau avec tous les biens qui y estoient en grande affluence comme à celui qui l'auoit bien acheté au pris de son sang: Mandroc le remercia vn genoil en terre, disant que ce n'estoit que le commencement & arres de ce qu'il auoit enuie de faire pour luy, & que trop estoit payé de son seruice du seul tiltre d'estre son vassal, mais puis que sa grandeur luy faisoit ce don, il le tiendrait d'elle non plus ne moins que sa personne

& le reste de ses biens. Amadis l'embrassa tout riant & luy dit: La fin des richesses ne gist pas à les posséder, mais à les distribuer par liberalité, & le trésor de ceste largesse est le plus grand que les Princes puissent auoir, sur lequel le temps, la fortune, ne la mort n'ont aucune puissance. Brief il n'est richesse que d'amys que vous acqueriez par bienfaitz, sans lequelz vous ne pouez assureur la iouissance & garde de voz biens. L'Empereur & la Princesse tindrent bonne compagnie à Mandroc iusques à ce qu'il fut guery. Lois remercièrent la Dame du chasteau du bon traitement qu'ilz auoient receu d'elle. A qui Amadis fit présent d'un précieux ioyau qu'il auoit apporté d'Argantas. Puis firent voile par bon temps pour reprendre leur route passans le temps ensemble en la nef à plusieurs jeux & esbatz.

Comme le Prince Falanges n'ayant nouvelles de son filz Agesilan ne de l'Emperiere Niquee & de tous ceux qui estoient allez en sa queste, s'exposa à la fortune pour les aller trouuer, & la Princesse Alastraxeree sa femme avec luy.

CHAP. LXVI.

A Madis de Grece (comme auez entendu) estant ainsi hors de cognoissance, & Florisel pareillement avec tous ceux qui les auoient suyuis, causoient grand tristesse à leurs amis. Entre lesquels vous auez cogneu par ceste histoire que Falanges estoit des principaux: lequel outre ceste perte en auoit fait vne plus grande de son propre filz Agesilan, duquel depuis tant d'annees il n'auoit sceu aucunes nouvelles, ne de dom Arlanges son compagnon. Parquoy vn iour qu'il estoit sur ce propos avecques la Princesse sa chere espouse luy dit qu'il ne pouoit plus souffrir ce grief ennuy de la si longue absence de tous ceux qui luy touchoient de plus pres au cuer, mesmement de leur filz vnique. Dont estoit deliberé avec son bon conseil de monter sur mer au premier iour & tenter l'auen-

ture de leur queste. A qui Alastraxeree respondit qu'ilz n'estoient pas nez pour viure tousiours en voluptez & delices, & qu'elle estoit d'avis qu'il fit ce que l'honneur & le deuoir d'amitié luy commandoit. Dequoy il fut tresaise, & donna charge à l'instant qu'on luy tint vne nef prestee & equippee pour le lendemain. En laquelle (apres auoir pris congé du bon Roy & de la Roynes) il entra accompagné de trois cheualiers seulement. Et commanda à son patron de ne tenir aucune route, ains aller à la fortune puis qu'il ne scauoit quelle part il deuoit plustost tirer, esperant que Dieu le guideroit. Vous devez croire que la Princesse (combien que magnanime) eut grand regret à son partement. A laquelle la nuyt prochaine auint vn songe qu'il luy sembloit ouyr la voix de son cher mary, l'appellant à son ayde comme s'il fut en extreme danger! qui la fit reueiller en sursaut, mais considerant que c'estoit vanité que songes, se remit à dormir, ou gueres elle ne fut que ce mesme songe luy reuint. Alors se leue le cuer fort triste, estimant que ce deuoit estre quelque auertissement diuin, puis qu'il auoit esté ainsi rechargé pour la deuxiesme foys. Et si tost qu'il fut iour alla vers le Roy & la Roynes leur raconter, qui remirent tout à sa discretion. A ceste cause enuoya choisir le meilleur vaisseau qui fut au port & y mettre ses armes, dedas lequel elle monta vne heure avant la nuyt ne menant quand & elle que deux damoyelles & douze cheualiers. Si fait leuer l'ancre & singler sans quadran ne bussolle comme le Prince auoit fait, ainsi que les vents & ondes la porteroient, se mettât en la main de Dieu, & le peuple fort triste l'auoit suyue iusques au port les larmes aux yeux de voir ainsi partir leus deux princes sans scauoir ou ilz alloient, ayans desia perdu leur filz Agesilan, dont la coronne de Colchos estoit en danger de forligner & cheoir en main estrange.

Comme Gandaſtes le braue , Roy de Frigie vint à Trapezonde pour entrer en combat ſingulier contre Floriſel ſur la querelle de Sidonie. Et comme Rogel de Grece le vainquit en la deſſeſſe de ſon pere.

CHAP. LXVII.



D'Autre coſté grand eſtoit l'ennuy de la Princeſſe Heleine pour le lōg temps qu'elle auoit eſté ſans entendre aucunes nouuelles de Floriſel ſon mary ne del'Empereur Amadis. Et n'auoit autre ſoulas en ſa triſteſſe que du Prince Rogel ſon filz, qui adonc eſtoit en aage pour eſtre cheualier, eſtant doué & accompli de graces & perfections, telles que vous ont eſté deduites au commencement de ce liure. Or commençoit deſia à courir l'ordre de ſes deſtins contenu par les propheties eſcrites en ſon nom : auſquelles fortune fit ouuerture par vn accident non eſpéré par luy, qui ne penſoit alors qu'en l'ordre de cheualerie qu'il deſiroit receuoir de l'Empereur Amadis de Grece ſon ayeul. Mais ſa longue abſence luy tarδοit trop, & à cette cauſe ſupplia la Princeſſe ſa mere pluſieurs fois de luy donner congé d'aller à Conſtantinople pour le receuoir de l'Empereur Liſuart. Ce qu'elle luy detourna tant qu'elle peut, n'ayant autre plaiſir ne reconfort que de ſa compagnie, auſi le voulant reſeruer pour le ſouſtien de la maiſon de Gre

ce au cas que ſon pere & ayeul fuſſent periz, en la queſte deſquelz il vouloit aller. Or auint vn iour qu'il eſtoit en ce propos avec elle qu'un cheualier entra en la ſale du palais, fort grand & membru, & monſtrant apparence de pareille prouèſſe : deux eſcuers luy portoient ſes armes, & auoit en ſon eſcu l'ymage de Diane. Si demanda fierement lequel eſtoit Floriſel de Niquee, & la Princeſſe luy reſpondit qu'il n'y eſtoit pas. Je ſçauois bien, dit il que ma fortune me le deſtourneroit au temps que ie le cercherois, mais il ne gaigne rien à ce cacher de moy, par ce que ie le trouueray toſt ou tard pour garnir ma main de ſa teſte. Rogel fut grandement eſmeu de ces braues parolles : toutesfois comme ſage & bié apris attrempa ſon ire, & luy reſpondit : Cheualier le Prince monſeigneur eſt en reputation pour tout le monde de ne ſe deuoir cacher & abſconſer pour autre qui viue : & croy quelque part qu'il ſoit qué plus grands faitz & empriſes le detiennent que la voſtre : pour ce deportez vous d'vſer de ce langage, que ſans la ſeureté qu'il

a donnée à ses assaillans, on ne le vous souffriroit pas. Le cheualier fut fort irrité de ce que Rogel luy disoit, & luy respondit: Damoyse! reservez telles parolles d'audace à quand vous aurez moyen d'en monstrier les œuvres, & que serez cheualier: car vous ne sçavez pas que vous parlez à Gandastes Roy de Frigie, qui vous en donneroit bon chastiment si vous estiez en estat pour le recevoir. A quoy Rogel: Gandastes, ie garderay mes menaces iusques au temps que m'assignez, vous promettant de vous aller recercher d'aussi bon cueur que querez le prince Florisel mon seigneur. Quant à vous cugnoistre, ie croy qu'aussi peu me cognoissez vous: car vous n'entreprendriez iamais correction sur le filz de tel que celui à qui ie suis, qui tient luy & les siens de plus grands seigneurs à vassaux que vous n'estes: pour-ce auisez à parler plus sobrement de telz princes. Gandastes cuida enrager de ceste respōce, & luy dit qu'il le vint hardiment cercher, & qu'il ne se cacheroit comme son pere de luy. Adonc Rogel faisy d'impatience s'agenouille deuant sa mere la suppliant luy permettre d'estre cheualier par la main du roy de Bregne, pour le deliurer de peine d'aller cercher ce Roy qui estoit tout porté, & que son aage & l'honneur d'elle ne pouuoient souffrir telz outrages. Heleine (combien que fort ennuyee des braueries de ce Roy) ne luy voulut accorder sa requeste, craignant trop la puissance de Gandastes selon sa corpulence, qui (à la verité) estoit tresuaillant & hardy, n'ayant eucore rencontré cheualier ne Geant qu'il n'eut outré & vaincu. Parquoy elle adresse à luy sa parole: Roy de Frigie le prince Florisel n'est pas en ce pais, à son retour y pourrez venir, tout asseuré qu'il ne se celera point pour vous: ce pendant ce n'est acte de cheualier d'outrager vn autre (mesmement tel prince) en son absence, & dire parolles au preiudice de son honneur. A quoy il respondit n'auoir rien dit qu'il ne maintint de fait, & que si tost qu'il sentiroit nouuelles de sa venue il le

viendroit trouuer. Ce dit, sort de la sale & monte à cheual tenant le chemin d'un port distant de vint lieuës de là ou sa nau l'attendoit. Rogel le voyant ainsi partir ne se pouuoit contenter, & de fascherie ne voulut soupper, quelque instance qu'Heleine luy en fit, & disoit: Ma dame qu'elle raison auez vous de me diuertir de mon deuoir & me garder de prendre les armes au temps qu'elles me sont deuës? puis qu'ainsi va faittes moy bailler vn accoustrement de damoyse, à fin que ie m'asseye sur les carreaux aupres de vous avec mon eguille, & qu'aumoins ie vous serue de quelque chose. Elle (se souzriant d'une bonne grace) luy respondit qu'elle ne le faisoit pour des fiance qu'elle eust de sa vertu, ains à fin de ne perdre sa presence en l'estat solitaire ou il la voyoit, luy tenant maint autre propos pour luy destourner ceste fantasie: mais il n'estoit pas possible veu l'ardeur qui luy rongeoit le cueur: tellement que la nuyt (estant Rogel retiré en sa chambre) fit sortir tous ceux qui y estoient fors qu'un damoyse nomé Seruid filz du duc d'Anrile (qu'il ayroit plus que nul autre) à qui il fait prendre un flambeau & s'en va au cabinet de l'Empereur ou il choisit un harnois blanc de fort bonne trempe, duquel s'arme, & prend la meilleure espee qu'il y trouue & la baille à Seruid à porter: puis descendent tout bellemēt en l'escuyrie ou il choisit les deux plus braues destriers à son gré. Et ainsi sortirent hors la ville, suyuant le trac du Roy de Frigie, & si bien piquerent qu'ilz furent à quatre lieuës de Trapesonde auant le iour, pres d'un chasteau ou il estima que Gandastes auroit logé, veu l'heure qu'il estoit party de la cité, comme aussi auoit il fait. Parquoy dit à Seruid qu'il leur faillait passer outre iusques à l'entree d'une forest qu'ilz voyoient, pour feindre de venir de l'autre costé quand le Roy sortiroit, de qui il ne vouloit estre cognu tant qu'il eust fait son dessein. Ainsi le font, & gueres ne tarda Gandastes à se mettre aux chāps. Dequoy Rogel aise extremement lace son
armet

armet & va au deuant du Roy qui luy demande à la rencontre s'il alloit à Trapezon de. I'y allois (respond Rogel) mais Dieu mercy que ie vous trouue icy vous me faites surleoir ceste peine: car i'auois grand desir d'estre armé cheualier de la main de l'Empereur Amadis de Grece, lequel i'ay entendu n'estre pas de present en ce pais, & ensemble que vous y estiez arriué: qui estes celuy pour vostre renommee de qui ie me tiendrois plus heureux de recevoir cest honneur. Vous n'en ferez pas refusé, dit le Roy, & à l'instant luy donna l'accollée, & Rogel print l'espee de la main de Seruid luy voulant faire ceste faueur. Alors commença à dire à Gandastes: Roy de Frigie si l'ordre de cheualerie se prend en intention d'exécuter les hautz faitz ie n'y veux faillir de ma part. Et pour ce ayant delibéré de vous chercher, ores que ie vous trouue: i'estime le meilleur de vous deffier presentement, pour adresser mon coup d'essay en bon endroit. Gandastes se print à rire comme par dedain luy disans que ce commencement luy sembloit tresbeau mais qu'il sortist pareille yssuë, & luy conseilloit de differer ceste folie iusques à ce qu'il eust vn peu plus de poil au menton. Du poil on ne combat pas (respond Rogel) i'espere le vous faire cognoistre. Puis qu'ainsi va (dit Gandastes) esloigne toy & tu en auras le cuer net. Ce qu'il fait, & brochent l'un contre l'autre de telle furie que leurs lances rompent & se rencontrent de piedz & de testes si lourdement que le Roy va par terre, & Rogel perd les estriers saisissant le col de son cheual comme le plus adroit cheuaucheur qui fut en son temps. Toutesfois le cheual sentant ses resnes lasches ainsi eschauffé qu'il estoit, tant saute & bondit que Rogel ayina mieux se ietter en terre: voyant le Roy venir vers luy à pied l'espee au poin il se presente garny de la sienne, & adonc commencerent vn combat autant cruel qu'il en eust iamais esté, trenchans leurs escuz en pieces faisans voler le feu de leurs armets, & à beau ieu beau retour sans qu'on peult cognoistre au-

cun auantage de l'un sur l'autre de plus d'une heure. Dequoy Seruid estoit en grand angoisse pour le peu d'experience du ieune Prince s'attachant pour son apprentissage à vn si braue champion: lequel aussi estoit trop estonné de la verueur qu'il trouuoit en son nouveau cheualier, & principalement de l'adresse & legereté dont il euitoit ses coups & luy en donnoit par surprise. Le sang sortoit à tous deux par maintz endroits de leurs corps, dont se sentit le Roy fort affoibly, & monstroit contenance de vouloir faire pause, quand Rogel (qui auoit le cuer plus gros que le ventre, combien que gueres moins de besoin il n'en eust) luy vint reprocher qu'est cecy Gandastes? il semble comme m'auiez tantost iargoné que voulez mettre la fin au commencement du conflit. Vous deuez sçauoir que le chef de Florisel ne se conquiert point par repos, & faut maintenant qu'on sçache de qui de nous deux les parolles & ceuures sont plus reprehensibles. Alors le Roy cogneut que c'estoit le damoyse & filz de Florisel à qui il en auoit eu à Trapezonde, & le pris fort en son cuer. Neantmoins irrité de ces reproches, luy dit: Comment Rogel de Grece penses tu en ceste enfance auoir subiugué en moy les forces qui ont esté inuincibles aux plus puissans cheualiers & geans de la terre? Ce dit, luy descharge vn coup sur le heaume, que Rogel pare de son escu, mais il luy en fit deux pieces, & la pointe de l'espee luy ataignit au dessus de l'oreille ou elle l'entama grieuement, & l'eslourdit en sorte qu'il cuyda tomber: toutesfois se resueillant & eueruant plus que parauant en ramene vn autre sur l'armet de Gandastes lequel il fendit (nonobstant l'escu) iusques à la chair viue, qu'il esgratigna assez profondement au front, dont le sang commença à couler sur l'œil droit du Roy, qui luy porta tant de nuyssance à la veuë que Rogel eut moyen de luy redoubler vn autre coup à deux mains dont il l'estourdit grandement: & le voyant chanceler le heurte & renuerse emmy le champ. Lors ne fut

pareilleux de luy couper les las du heaume, & luy mettre l'espee sur la gorge, criant qu'il estoit mort s'il ne faisoit son commandement. Qui luy respondit que bien fol seroit de n'y obeir, n'esperant de si bon chevalier chose qui peust tourner à l'intérest de son honneur. Je veux (dit Rogel) que tu ailles vers la royne Sidonie luy dire comme au nom de mon pere (de qui n'avons nouvelles depuis long temps) ie luy fay present de ta teste, & qu'à la mesme condition que mōseigneur le Prince ie soustiendray tous ceux qu'elle ennoyra en son absence soit icy ou la part qu'ilz me trouveront. Gandastes luy iura d'ainsi le faire: & Rogel monte sur son cheual, & s'en va par un destour au logis d'un forestier pour faire appareiller ses playes, n'estant delibéré de retourner si tost à Trapesonde. La princesse Helene fort dolente de son depart, enuoya le duc d'Antile apres luy accompagné de nombre de chevaliers, lequel arriva le soir au chateau mesme ou s'estoit retiré Gandastes pour soy faire penser. De qui il entendit le combat passé, dont il se resjouit merueilleusement de si hault commencement de son Prince. Puis l'ayant cherché es villes prochaines sans en rien entendre, retourna vers la Princesse qu'il reconforta par l'esperance grande de ses premiers faitz. Ce pendant Gandastes guerissoit, qui ne faillit si tost qu'il peut mōter à cheual d'accōplir son embassade en Guindaye.

Comme Rogel guery de ses playes deliura trois damoyelles des mains de trois chevaliers qui les vouloient forcer : & des menux propos qui passerent entre luy & elles

CHAP. LXVIII.

Estant Rogel de Grece guery de ses playes commanda à dieu le forestier, luy deffendant expressement de ne revealer qu'il eust esté en sa maison. Si part avec Seruid son escuyer, tirant au port le plus prochain pour s'exposer à la mercy des vens & courir sans routier ne compas.

Deux iours cheuaucherent sans aventure trouver digne de recit, & au troisieme comme ilz entrèrent en vne forest ouyrent un cry de femmes, qui luy fit mettre armet en teste & prendre ecu & lance de Seruid pour aller voir que c'estoit: si trouva trois ieunes damoyelles perchees en un arbre, & trois chevaliers qui les poinçonnoient de leurs lances pour les faire descendre. Ausquelz il demanda pourquoy ilz leur faisoient fâcherie: qui respondirent: pour ce qu'elles leur sembloient belles & ilz en desiroient iouir ceste nuit. A quoy Rogel repliqua, que ce n'estoit acte de chevalerie de pourluyure les dames outre leur gré, & qu'ilz s'en devoient deporter. Qui nous a amené ce prescheur? dirent ilz: passez, passez vostre chemin sans vous entremettre du fait d'autrui qui en rien ne vous touche, vous estes encores bien ieune pour mettre police au pais. Aumoins en vous la mettray ie bien (repond Rogel) si vous retirez de la, ou ie vous en tireray par force. A ceste parolle s'esloignerent de luy & tous trois viennent les lances couchees, desquelz le premier rompit sur luy, & il luy passa la sienne à travers du corps plus d'une brasse: puis acheuant sa carriere rencontra le second qu'il choqua & renversa par terre, une jambe prise souz son cheual. Adonc tire l'espee & vient vers le tiers qui luy estoit demeuré au camp. Ce que voyans les filles esbahies de sa proesse. Dieu benye (dient elles) le bon archer, qui a d'un coup abbatu deux passereaux. Le troisieme le voyant venir vers luy fut sage par l'exemple de ses deux compagnōs, & pour le plus seulpiqua au loing sans retour: nonobstant la huce des damoyelles qui luy crioient qu'il reuinst & qu'elles luy ottroyroient leur amour s'il vengeoit la honte de ses compagnons. Rogel & Seruid ne se peurent tenir d'en rire, & il descend de cheual & va à celui qui estoit couché souz le sien (cognoissant que l'autre estoit mort) auquel il fit semblant de vouloir trancher la teste. Ce que l'autre craignant luy requiert pardon,

don, que Rogel luy accorde, souz le serment de ne faire iamais outrage à dame: puis luy ayda à soy releuer. Ainsi s'en va, & les filles luy dient qu'il les recommande à son compagnon qui estoit si hardy contre les femmes & fuyoit deuant les cheualiers. Ils s'en alla la teste baissée sans leur respondre, entendant bien qu'on battoit le chien deuant le lyon. Lors Seruid amene le cheual à Rogel, luy disant: Montez monsieur, ie croy qu'effacerez le renom de vostre pere. Ie feray beaucoup (dit Rogel) si ie luy puis ressembler de quelque partie. Les damoyelles descendirent à l'heure de l'arbre & le saluerent courtoisement, le remerciant du bien qu'il leur auoit fait, & monterent sur leurs palefrois: puis le prierent (estant heure de soupper) de venir prendre la patience en leur chasteau qui prochain estoit. Ce qu'il ne refusa, & se met entre elles qui luy semblerent toutes trois cointes & iolyes: & en chemin leur demanda comme ceste fortune leur estoit auenuë. A quoy l'aisnee: Monsieur sachez que nous sommes seurs & filles d'une dame chastelaine du lieu ou vous menons. Or estions sorties apres dîner de nostre chasteau sur noz haquenees pour prendre l'air, & estions montees en cest arbre pour cueillir des pommes quand ces trois gallans arriuerent qui nous requierent d'amours, & voyans que ny voulions entendre nous molestoient ainsi qu'auiez veu pour nous faire descendre. Ilz en ont esté chastiez selon leur merite, dit Rogel. Ouy (dit elle) & nous fort satisfaites de vostre bon secours: mais ie vous prie de vouloir oster le heaume puis que n'auiez plus à combattre, & vous mangerez avec nous du fruit que portons en noz manches qui est fort beau. A quoy Rogel: il s'en pourroit cueillir avecques vous de trop plus delicieux, & vostre beauté peut liurer vn dur assaut, toutesfoys ie feray vostre volonté. Quand il fut descouuert elles furent esmerueillées de sa beauté, & de la vaillance qu'il auoit montrée en si grand ieunesse: dequoy l'une d'elles luy dit, qu'elle accontoit à double bien

d'auoir esté deliurée de si bonne main. Elle est tousiours prestre (respond il) à s'employer pour telles que vous estes, belles & de bonne grace. Mais vous (monsieur) estes tel que vous nous dites, qui moins ne conquerez les dames que vainquez les hommes. Car pour le peu que vous ay veu ie ne voudrois iamais partir de vostre compagnie. Ne moy pareillement de la vostre, dit il. Vous voila tresbien d'accord (dit l'une des autres) s'il estoit raisonnable que vous eussiez tout ma damoyelle, sans que nous y eussions aucune part. Puis qu'il le veut (dit elle) ie ne vous fay point de tort, & remettons nostre differend à luy mesme. Rogel prenoit grand plaisir à leur debat, & leur dit qu'il les trouuoit toutes trois si gentilles qu'il ne sçauoit bonnement laquelle choisir. Comment (dit l'aisnee) monsieur, souz vmbre de nous appointer vous nous mettez en plus grand discord: sachans bien que si nous sommes trois à vn, nous entreuerons de ialousie. Il faut donc ietter au fort, dit la troisieme. Ce que la premiere ne voulut consentir, ayant mieux y auoir par certaine, que se hazarder à n'y auoir rien du tout. Ainsi rians & gaudissans à souldas arriuerent en leur chasteau: là ou leur mere (qui estoit treshonorable dame) recueillit Rogel fort humainement, & ne sçauoit quelle chere luy faire quand elle eut entendu de ses filles ce qu'il auoit fait pour elles, dont l'aisnee auoit nom Sinide, l'autre Galinde, & la troisieme Sirese. Elles le menerent en vne bonne chambre ou il fut desarmé: puis luy apporterent vn manteau d'escarlare bordé de passement d'or, & le conduirent en vn iardin ou les tables estoient dressées pour le soupper: lequel attendant sonnerent des luthz assez melodieusement, & les ayans lasschez il en print vn & sonna vne chacon sur le propos de l'amour des trois ensemble, composee par vn des meilleurs poëtes de son temps.

*D'en aymer troïsee m'est force et cōtrainte:
 L'une m'aymant trop, pour ne l'aymer point.
 Et l'autre m'a donné si vne atainte,
 Que plus la fuis, plus sa grace me point,
 Et l'autre tient son cueur vny & ioint,
 Voire ataché de si trespres au mien,
 Que ie ne puis ne veux estre que sien.
 Ainsi Amour me tient en ses destroitx:
 Et me contraint à toutes vouloir bien
 Mais ie sçay bien à qui le plus des trois.*

Elles eurent grand plaisir à l'ouïr sonner
 & chanter, comme celuy qui bien le sçauoit
 faire. Mais ce fut à recommencer la plai-

sante noise, laquelle il preferoit aux autres.
 Ce qu'il refusa à leur dire, à fin de les tenir
 toutes en aleine, pour meriter la preeminence:
 car il n'y auoit celle qui ne fut ferue de
 son amour, & qui volontiers ne luy eust
 obeï son honneur sauf. Or fut le soupper
 plantureux & bien seruy: apres lequel ne
 fut pas question que de dancier sur l'herbe
 & passer le temps iusques à l'heure de repos.
 Mais ce fut la pitié quand les filles cogneurent
 que Rogel estoit, & comme elles le foruoyent
 de vouloir pour mary ou amy leur seigneur ligé.

Comme Rogel reprenant son chemin, abatit à la iouste les cheualiers de la dame des quatre chasteaux, & des amourettes qu'il demena avec elle.

CHAP. LX.



Rogel ayant repris ses erres deuisoit
 avec son escuyer des trois seurs qui
 le gignoient de bon œil, & ne han-
 nissoient à autre auoyne: quand ilz se trou-
 uerent pres d'un chasteau ou ilz virent en
 vne prairie dix cheualiers armez & autant
 de damoyelles s'esbatans ensemble. Ro-
 gel les voyant se voulut destourner du che-
 min à fin d'euiter l'occasion de quelque de-
 stourbier & demeure, n'ayant enuie de iou-
 ste ne cōbat sans grande & iuste cause pour
 le desir qui l'esperonnoit à la queste de son

pere & ayeul. Les cheualiers qui l'appere-
 ceuoient tirer à gauche luy enuoyent vn
 escuyer pour le deffier. A l'approche du-
 quel il prit son armet de peur d'estre cog-
 neu, & l'escuyer luy dit: Seigneur cheua-
 lier, ces cheualiers vous mandent que sor-
 tiez de ce sentier, laissant vostre nom pour
 enregistrer, si ne voulez vous auenturer à
 gaigner le pris des abatuz. A qui il respon-
 dit: Mon amy dites leur qu'ilz me pardon-
 nent, car ie n'ay à present loisir de iouster.
 Il vous conuient donc sortir de ce chemin.
 dit

dit l'escuyer. A cela ne tienne (respond Rogel) & en va prendre vn autre. Ce pendant l'escuyer retourne à ses maistres avec la responce, qui iugerent que c'estoit quelque couard qui ne demandoit qu'amour & simplese. Pourtant l'un d'eux monte à cheual diligemment & luy va trancher le pas, criant: demeurez cheualier vostre lacheté ne vous exemptera pas ainsi de la iouste. Rogel oyant ce langage couche contre luy sans parlementer; & ayant l'autre rompu en son escu il le fait voler par dessus la croupe du cheual les iambes contremont. A sa cheute vne des damoyelles dit qu'il luy sembloit que meilleur eust esté d'auoir laissé aller ce cheualier sa voye. Je suis de vostre auis (dit vn autre) tant il se monstre adroit & vaillant. Bon mestier luy sera (dit vn des cheualiers qui montoit pour aller contre luy) & aprochant luy escria qu'il attendist (car il s'en alloit pensant en estre quitte pour vne iouste.) Or deuez vous sçauoir qu'a cestuy en auint autant qu'a son compagnon, voire aux autres huit qui vindrent apres, lesquelz Rogel desarçonna tous luy demeurant sa lance entiere. Adonc s'en vouloit aller, combien que les cheualiers honteux de leur cheute le voussissent combattre à l'espee: dequoy il s'excusa, disant que ce n'estoit la coustume de venir aux espees sans occasion de plus forte querelle. Ainsi les laissoit fort empeschez à reprendre leurs cheuaux qui penadoient par la campagne: & les dames en grande risée de leurs cheualiers tresbuche, quand vne damoyelle les suyuit sur son palefroy qui luy dit de bonne grace: Sire cheualier, Sardenie dame des quatre chasteaux (qui est en ceste troupe) vous requiert affectueusement de ne partir d'icy sans parler à elle, & quelle desire cognoistre si la supplication des dames vous (que la force des hommes n'a sceu contraindre à cause de vostre vaillance) pourra gagner à raison de vostre courtoisie. I'obéiray volontiers, dit il, à cest effort comme celuy qui ne desire que seruir telles dames. Parquoy tourna avec la damoyelle, & entrant

en la prairie void de tresbelles filles, mesme ment vne sur toutes vestue de satin blanc portant vn chapeau de fleurs sur son chel nud, qui estoit Sardenie dame des quatre chasteaux riche & belle en perfection, & requise en mariage de maintz haultz & puissantz barons. Or estoit elle ieune, & ne pensoit qu'à soy donner du bon temps, & estoient toutes les damoyelles de sa maison & pareillement tous ses cheualiers luy faisoient la cour pour l'auoir à femme. Rogel la salua, iugeant bien que c'estoit la maistresse: & elle le prie d'oster les armes (comme ayât gaigné la seureté de ses cheualiers) & apres elle luy diroit le surplus. A quoy il respondit: qu'il estimoit à pareil honneur de rendre les armes à sa beauré que de les defendre contre les hommes: & que pour entendre ce qu'elle luy vouloit dire, il feroit son commandement. Soudain oste son armet qu'il baille à son escuyer, demeurant en couleur si vermeille de l'eschauffement de la iouste qu'il mist toutes les pucelles en admiration: pour lesquelles Sardenie print la parole, disant: Certes cheualier vostre veuë n'a moins de puissance sur les dames que vostre vertu sur les cheualiers. Je suis, respond il, à en attendre l'experience. Or, dit elle, puis qu'avez gaigné le loz de la iouste c'est raison que sçachez les conditions d'icelle, pour ne perdre le pris & loyer que si vaillamment auez conquis. Entendez donc que ces dix cheualiers m'auoient fait requeste de leur permettre de garder ce passage dix iours en ma presence & de ces filles, souz telle loy que ceux qui refuseroient la iouste auroient à laisser leur nom, & de ceux qu'ilz abbatroyent, les cheuaux seroiēt à eux. Et ie leur promis de ma part que celui qui les renuerseroit tous auroit pouoir de requerir vn don à qui mieux luy plairoit de mes damoyelles, quelle seroit sugette à luy ottroyer: voyla ce que vous auez gaigné & nous ausi n'auons pas perdu à cognoistre vn si gentil personnage. A quoy Rogel: Ma dame, quant aux cheuaux ie les donne à leurs premiers maistres d'autant que

que i'en suis pourueu de ce qu'il m'en faut. Quant aux filles ie les trouue toutes si belles que sans en preferer vne aux autres, les prie pour don de se seruir de moy en ce qui sera en mon pouoir. Je vous en remercie pour elles, dit Sardenie: & puis que leur voulez requierir autre don, ie vous en requier vn, c'est de demeurer icy avecques nous pour ce soir. Je reçois plus que ie ne donne en cecy, dit Rogel, pour ce ne vous en esconduiray-je pas. Alors met pied à terre & elle le prend par la main, fort ioyeuse de le tenir, & luy gueres moins d'elle: & à cause qu'il estoit heure de souper s'en vont tous au chasteau, ou il fut mené en vne chambre pour se desarmer, puis alla trouuer Sardenie en la sale ou l'on auoit couuert. Rien ne fut oublié à le bien traiter, & les dix cheualiers soupperent avecques luy, qui considererent leurs contenances, & virent qu'ilz ne retiroyent les yeux l'un de dessus l'autre. Les tables lenees elle le mene à vne fenestre regardant sur la riuiere, ou leur furent apportees deux chaires. Estans ainsi assis loing des autres, elle commença à le prier de luy dire son nom. L'esclau de Sardenie (dit il) tant vostre beauté me captiue. Elle souzriant luy demande s'il auoit pas autre nom. A quoy respondit que non, iusques à ce qu'il eust recouuré le pouuoir qu'il auoit perdu par sa veuë. Qu'est il de faire, dit elle, pour le recouurer: qu'ayez pitié de moy respond. Lors Sardenie trop aise de cest amoureux deuis (luy demandant de quoy elle deuoit auoir pitié) il luy expose comme il souffroit beaucoup pour elle en son cuer, & que la playe estoit profonde & perilleuse de la main dont elle venoit. A quoy elle contredisoit, à raison du peu de temps qu'ilz se cognoissoient, aussi que ces autres cheualiers auroient trop grande occasion de mal contentement de voir yn si nouueau venu, en iouissance de ce qu'il leur auoit esté refusé nonobstant leurs si longs seruices. Rogel luy repliqua, que ce n'estoient pas gens (comme ilz l'auoient bien monstré) qui meritaient vn si grand heur. Mais comme peut

(dit elle) estre vostre douleur ainsi extreme? Comme vostre beauté, respond. Ce sont (dit Sardenie) menuz propos & doleances qu'estes filé de feindre entre les dames. Lors Rogel la suppliant de ne tenir à moquerie ce qu'il disoit au meilleur escient qu'il eust, elle luy dit que la nuyt luy en donneroit conseil, & que le matin à son partement elle luy rendroit responce. A la fin poursuyue roidement se laissa tant aller qu'elle luy dit, qu'elle luy en manderait nouvelles sur le tard par vne de ses damoyelles. Gueres ne tarderent depuis à se retirer chacun en sa chambre, ou Rogel estoit en grand passion de l'ardent desir qu'il auoit de iouir de la beauté de Sardenie, & en cueillir (à son auis) la prime rose. Toutesfois il se couche en son lit, & Seruid en vn autre: mais il ne faisoit que tourner, virer, sans pouoir cligner l'œil: estimât à chascun bruit qu'il oyoit que ce fust son embassade: laquelle vint à la fin (bien attenduë) c'est à scauoir, vne des dix damoyelles nommee Gandile vint hurer à son huys, à qui il demanda qui c'estoit, & elle respondit, Gandile que ma dame enuoye vers vous. Pensez s'il fut paresseux de se leuer, & luy aller ouurir, pendant que Seruid dormoit profondement en son premier somme: qui toutesfois esueilla oyant ouurir & fermer sans en faire aucun semblant. Or fit Gandile son message court, que sa maistresse vouloit parler à luy secretement en tout honneur, sans qu'autres de sa maison en eussent cognoissance, & que s'il vouloit tant faire pour elle qu'il la suyuit promptement. Mais pour moy (dit Rogel s'affublant de son manteau & prenant son espee) marchez deuant m'amy, garde nay de faillir à si bon mandement. Ainsi le mene en la chambre de Sardenie, ou ardoient deux cierges de cire blanche en deux chandeliers d'argent elle estant en son lit fort mignonement attiffée, à qui ceste lumiere sombre cauait vn plaisant lustre. La seruante fidele l'ayant mis dedans, sort & tire la porte apres elle, retournant en la chambre

bre de Rogel ou elle raconte le fait à Seruid, & iouèrent leur ieu ensemble, pendant que Rogel & Sardenie se tenoient embracez au plus grand solas du monde, les bouches iointes comme deux pigeons: qui y passerent la plus grande partie de la nuit, sans discontinuer les sauoureux baisers que par quelques propos mignardz & riz amoureux de leur besongne. La damoyelle (qui bien en auoit fait son deuoir d'autre costé) ne s'oubliâ pas à l'aller denicher, & le ramena au lieu ou elle l'auoit pris bié d'let de si soudaine departie, & guerez moins q' luy celle qu'il laissoit femme, pour fille qu'il l'auoit trouuee. Or sçachez qu'il ne luy fut possible d'obtenir lendemain son congé, tant il l'auoit nauree au vif, ains le retint la dame encores six iours en contant les nuitz qui leur valoient trop mieux. Mais si couuertement ne peurent conduire l'affaire que les autres cheualiers ne s'en doutassent premierement; & à la fin deux de la troupe (qui plus y eurent l'œil) ne le tinssent pour certain: aussi vn feu si allumé se void tousiours clèrement, qui plus que parauant s'embrâça en elle, quand elle sçeut que Rogel estoit, estimant la faute couuerte de l'auctorité d'un tel seigneur: vray est qu'il la pria grandement de le tenir secret. Ceste affection si enflammee lâcha la bride à l'indiscretion, tellement qu'ilz estoient presque tout le long iour ensemble, fust à soy promener, ou à se recreer à quelque ieu. Qui conformoit les deux principaux contréroleurs en leur opinion, connoissans le peu d'affaire que l'estrange auoit en ce lieu. Le pis fut au sixiesme iours apres soupper qu'elle fit d'anger ses filles en vn iardin aux chançons, ou elle dit la sienne qui estoit telle, tenant Rogel par la main.

Qui dames chantera si ie ne chante.

Qui de tout mon desir suis si contente.

Vien donc Amour de mō bien source entiere,

De tout espoir & tous ioyeux esbas

Chantons ensemble vn pen

Non de soupirs, ou quelque peine amere

Qui fait plus doux me sembler les soulas

Mais de ce tien cler feu

Auquel ardant vix en ioye & en ieu

Dont telz honneurs qu'a vn Dieu te presente.

Qui dames chantera &c.

Deuant mes yeux tu me mis en bon heur,

Le premier iour qu'en ce tien feu entray

Vn iouenceau, mais quel

Que de beauté, hardiesse & valeur

Plus excellent onc ie ne rencontray

Voire ne son pareil:

Tu m'as de luy causé vn plaisir tel

Que d'en chanter à bon droit ne m'exempte.

Qui dames chantera &c.

Et qui sur tout m'est souverain plaisir

C'est que d'autant qu'il me plaît ie luy plais,

(Amour la grace à toy)

Dont en ce monde ay mon total desir

En bon espoir d'auoir en l'autre paix:

Par ceste entiere foy

Que ie le tiens: Dieu ainsi que ie croy

De ses hautz biens me fera iouissance.

Qui dames chantera &c.

Ceste chançon avecques les œillades de la dame les assœura plus que iamais, ne luy ayans ouques ouy dire telle rythme, ny autre de contentement. Parquoy tellement les espierent le soir mesme, qu'ilz le virent entrer en la chambre de Sardenie, & attendirent que Galinde en sortit pour les tuer tous deux ensemble, sans que le bruit s'en leuast par le chasteau. Or crocheterent ilz la serrure, qu'ilz ne peurent faire si quoyement que Rogel ne les sentist, qui soudain saute hors du lit, & enueloppant son manteau autour du bras, prend son espee & s'en va à l'encontre de ceux qui desia estoient dedans la chambre, & luy disoient: ça ça galand nous venons vous monstrer comme à ieune aprenty que la douceur d'amour a tousiours quelque degoust amer sur la fin. Rogel sans respondre les chargea & para tellement de son espee, que finalement l'un d'un coup en la iambe, & l'autre d'un en la gorge y laisserent les vies. Ce que voyât Sardenie

denie (qui toute tremblante s'estoit mussée en la ruelle du lit) vient alors, & est d'avis sans en mener autre noise de les ietter par la fenestre hors du chasteau, & prend leurs espees qu'elle trempe en leur sang, puis Rogel les traine & iette dehors & leurs espees aussi. A Galinde quand elle vint luy firent estendre vn tapis par terre, pour cacher l'effusion du sang, dont elle fut fort espoventee, mais Sardenie luy narra l'accident. Lendemain tous ceux du chasteau furent trop eslonnez des deux corps qu'on trouua dehors, & n'en sceurent penser autre occasion que de quelque debat qu'ilz auroient eu l'un contre l'autre. Le iour venu Rogel voulut partir de la, mais Sardenie le retint souz couleur de ne faire soupçonner quelque chose de ce fait. Parquoy lendemain print congé d'elle qui le supplia (pleurant & souspirant) de ne la mettre en oubly, veu le gage qu'elle luy auoit liuré de bonne souuenance. Ce qu'il luy promit, & alla gagner vn port distant de six lieues, ou il entra en vne nef marchade qui tiroit en Guin daye, & vogua trois iours par bonace, qui changea au quatriesme, & les porta en vne Isle que vous entendrez cy apres.

Comme le Prince Falanges d'Asie arriva en vne Isle ou il fut en vne extreme danger, & de l'estrange secours qui luy survint.

CHAP. LXX.

LE gentil Prince Falanges depuis qu'il partit de Colcos, passa quelques iours avant que d'arriuer en vne tresbelle Isle: en laquelle il descendit avec aucuns des siens, & tout ce iour se refraischit de la marine. Mais lendemain au matin print ses armes & monta à cheual ne menant quand & luy qu'un escuyer, commandant à ses gens de l'attendre là iusques à ce qu'ils sceussent de ses nouvelles. Ainsi s'en va & gueres n'eut cheuauché qu'il rencontre vn vieillard muet labourant la terre: à qui il s'enquiert du nom de la contree, lequel luy

fit signe qu'il se retirast de belle heure, par ce qu'au chasteau prochain on emprisonnoit & tuoit tous ceux qui estoient trouuez. Ce que le Prince oyant, aillez (dit il) auons entendu de charge d'honneur pour ne retourner arriere. Si passe outre, & environ deux heures le soleil approche d'un grand & fort chasteau ceint de fossez coblez d'eau à fond de cuue, duquel à l'heure la porte estoit fermee. Parquoy va hurter à vn gros marteau de fer qui y pendoit: & au son viét vn valet luy demandant qui il estoit & qu'il vouloit. Je suis, dit il, vn cheualier estrange qui veux scauoir la raison des rançonnemens & voleries qui se font icy. Lors le garçon: attendez donc & on la vous viendra faire entendre par effect. Le Prince s'esloigne vn peu, & incontinent se monstre vn geant à la fenestre fort braue de representation, qui le semond d'entrer dedans s'il vouloit estre logé en paix & amour, sinon qu'il sailliroit dehors pour le chastier de sa folle curiosité. A quoy le Prince: Geant ie suis excusé d'entrer en lieu ou la force s'exerce, informé par l'exemple de ceux que tenez leans souz telle seureté. Puis que tu as si grand peur, dit le Geant, de t'emmurer, sans t'oster la clef des champs, ie te vois promptement rendre bon conte de ce que demandez. Adonc se retire & gueres ne tarde à sortir armé de toutes pieces sur vn grand roucin: crollant vne grosse lance, & dit en sortant: Rendz toy chetif si quiers sauuer ta vie, car ta mort est au bout de ce boys. Le Prince ne s'amuse à luy respondre, ains couche sa lance, & se viennent rencontrer fausant leurs escus, esclattant contre les harnois par telle impetuosité que les cheuaux avec leurs maistres tombent par terre. Falanges qui estoit leger tost se releue l'espee au poin allant vers son ennemy qui s'estoit leué à peine, toutes fois l'attendoit son coustel en main. Si demement entre eux vn tres-furieux combat, qui n'eust gueres duré du costé du Prince si par vitesse & dextérité il n'eust euadé les pesants coups du Geant, à l'entour duquel il voltigeoit come vn courrier

fier cōtre vn roncín. Dequoy le mastin de-my forcené iettoit la fumee espoisse par les nazeaux qui le couuroit tout. Ce qu'appercheuant l'autre geant de la fenestre du portail, fait sortir vn nombre de lances & de salades, leur escriant qu'ilz le missent à mort sans auoir mercy da sa vie. Falanges voyant la bōne sēureté qu'ilz luy gardoient, iette les yeux de toutes parts & auise vn haut rocher duquel l'entree estoit fort estroite, lequel il gaigne & en deffend fierement la porte aux cheualiers & vilains qui le vindrent assaillir, dont nul n'y vint baïser le babouyn qui s'en peust vanter au retour: car le premier qui approchoit seruoit de paué au seuil de l'huys. Le Geāt n'y pouuoit entrer pour sa grosse masse de chair, mais les vilains luy tiroient de leurs arcz tant de feschés qu'il en estoit tout herissonné: & voyant qu'ilz y proffitoient peu commençoïēt à escheler le dos du roc pour l'assommer de hault à coups de pierres & de trait. Or c'estoit fait à l'heure de l'excellent Prince Falanges, si dieu ne luy eust enuoyé à point nommé vn secours inespéré, c'est à sçauoir de la braue Alastraxeree sa femme, que le mesme vent (auquel elles estoit exposée) auoit porté en pareille rade que son mary, & estoit arriuee le matin peu apres le partement du Prince: lequel ayant entendu par les gens de sa nau, sans arrest desloge accompagnée de ses douze cheualiers, & trouua le muet qui les mist au chemin du chasteau: duquel approchant rencontra l'escuyer de son mary piquant à bride abatee pour amener qu'elque secours de la nef. Si l'arreste tout espleuré, & encores plus esbahy du mistere de la suruenue de celle qu'il recogneut à l'escu: à qui il dit: A à ma dame, hastez-vous de secourir monseigneur le Prince si le voulez voir en vie! Elle fort troublée de ce langage donne des esperons à son destrier, tellement qu'elle arriue iustement à l'heure que les vilains esfayoient à gaigner le dessus du rocher. Mais elle fut de loin descouuerte par la guette du chasteau, dōt sortirēt plus de tren-

te bourguinottes suyues de plusieurs halebardes & casquetz d'acier: en sorte qu'il n'estoit demeuré en la forteresse que l'autre Geant acheuāt de s'armer. Celuy qui estoit sorty l'apperceuant prend vne lance pour la soustenir, laquelle il rompt, & elle la sienne pareilemēt. Ses douze cheualiers ioignēt ceux du geant desquelz ilz firent vn merueilleux carnage: mais en fin estans si peu contre tant furent tous miserablement taillez en pieces. En quelle extase pensez vous que tumba le bon Prince recognoissant sa loyalle espouse venue tant à propos, quand plus il n'esperoit la voir? Outre ce qu'il s'esbahissoit des armes plus admirables qu'onques-mais estant transportée de fureur non accoustumee à cause du pri: pour lequel elle combattoit: car elle rembarroit le geant vaillamment, & si auoit à se garentir des vilains qui l'ennahissoient de tous costez, & à la fin luy occirent son cheual. Ce qu'elle sentant donna à celuy du geant entre les aureilles qui cheut quand & le sien. Or estoit alors en danger extreme, si son loyal espoux ne fut soudain sorty à la rescousse, qui luy dit: A à vraye amye bien pert comme m'avez aymé en la vie quand me venez tenir cōpagnie en la mort, de laquelle ie ne voy pas que puissions huy eschapper. Monsieur (respond) aumoins attrempérons nous leur victoire par bonne effusion de leur sang. Adonc atoiēt les vilains releué leur diable de maistre qui vint charger ceste braue couple, tant qu'il les contraignit de regagner leur roc. A l'entree duquel la Princesse trouua vn cheualier qui luy defendoit le pas, qu'elle abbatit du premier coup à ses piedz. Si entre le Prince & elle s'auançant apres: le geant la saisit par le bord de la cuirace pour la tirer arriere, à qui Falāges aualle le bras dont il la tenoit, & elle luy redouble sur la teste qu'elle luy fend iusques aux yeux. A la cheute du geant ses gens getterent vne huee montant iusques au ciel & tāt tirerent de leurs arcs que les deux amants en combattoient à l'ombre ausquelz les arcz gifans en leurs armes ser-

uoient de barriere à la porte du rocher. Mais possible ne leur estoit de plus gueres durer, si Dieu n'eust fait vn second miracle à leur faueur: c'est à sçauoir du Prince Rogel de qui la nef arriua au mesme riuage, ayant perdu la route de Guindaye, voire à l'instant que l'escuyer du Prince venoit reclamer les cheualiers pour son secours: de qui il entendit l'affaire auquel son maistre estoit. Dont il descend incontinent en terre & monte sur son destrier allant au galop apres sa guide. A tant approche le chasteau à l'heure que les vilains vouloient comme deuât pour la seconde foys gagner le haut du roc. Et ensemble l'autre geant desmesuré sailloit du chasteau la lance au poing: lequel Rogel apperceuant le va ioindre auant qu'il eust passé le pont, & l'attaignt si droit dedans le ventre qu'il trebuscha tout embroché en terre, d'ou onques puis ne releua. Et apres ce coup retournoit arriere, s'il n'eust ouy des voix d'enhaut luy criers: bon cheualier entrez ceans & fermez apres vous, car vous ne trouuerez homme qui destourbier vous face, puis nous deliurez & vous donnerons ayde. Il leua la veüe en haut & vid plusieurs personnes es fenestres treillissées de fer: entre lesquelles recogneut l'Emperiere Niquee & le Prince Florisel. Aussi estoit cel' Isle de Gazen en laquelle ilz auoient esté pris par la ruse que cy dessus a esté dechifree amplement. Parquoy se ietta soudain à pied & entre au chasteau, en la sale duquel trouua la duchesse de Gazen avec ses damoyelles qui s'en voulurent fuyr en le voyant, estimans que tout fust perdu puis que ceux de dehors estoient ia dedans. Mais Rogel l'arresta, luy cōmandant de luy liurer promptement les clefz des chambres ou les prisonniers estoient, ce qu'elle refusoit & ne vouloit faire, sans les menaces de mort qui luy fit, luy mettant l'espee pres de la gorge. Ainsi par force le mene au lieu ou Florisel, Anastarax, Filisfel de Motespin, & le Roy de Lacedemonie estoient ensemble, qui n'auoient pour compagnie que Busande & Darinel

pour le resiouir. Le gentil Rogel pensant à l'affaire si vrgent ne fit autre recognoissance à son propre pere, leur disant: messieurs il n'est saison de deuiser ne parler, allons en diligence secourir le Prince Falanges d'Astre & son Alastraxeree qui sont assiegez outrageusement. Chacun d'eux fut prompt à y entendre & se pouruoit de harnois parmy le chasteau. Lors sortirent cinq ensemble qui en valoient vn cent: criers à l'approcher: fuyez mastins, fuyez canaille, voz trahisons & malheuretez auront icy leur dernier metz. Ce disans, se fourrēt parmy eux ny faisans moindre boucherie que lyons affamez entre brebis. Falanges & sa vaillante compagne d'armes ausi bien que de liēt, voyans ce propice secours, en regrant le haut Dieu, & se maintiennent sur lurs defences, n'ayans plus vigueur en eux que de parer aux coups. Desia estoient depeschez ceux de la nef du Prince que l'escuyer auoit amenez, cōme qui eust ietté vne paille en vne fournaise ardente, veu le grand nombre de gens de qui ilz furent enuahiz de pres & de loing. Mais quand ilz eussent esté encores autant, ilz n'eussent eu le bout de sept telz personages que ceux cy: desquelz la charge non attendue tant les estonna avec la mort des deux geans leurs seigneurs, que voyās desia la moytié d'eux enmy le chāp, & la furie incroyable des cinq suruenuz (qu'ilz tenoient plus pour diables qu'hommes charnelz, ioint qu'ilz craignoient qu'il en deust tousiours venir ainsi d'autres à la fille) les principaux d'entre eux commencerent à mettre les armes ius, & les genoux en terre, se rendās à la mercy des seigneurs: lesquelz (ne sachans moins soy vaincre eux mesmes & leur ire, que desfaire leurs ennemis) les receurent à misericorde, souz serment de n'exercer iamais cest estat de briganderie. Long seroit à vous reciter par le menu les cheres & accolées de ces seignrs: specialement le plaisir qu'eut Florisel d'auoir veu tel commencement de cheualerie en Rogel son filz. Aussi d'Anastarax & Fi-

& Filisél, qui se donnerent à cognoistre au prince Falanges & à sa femme. De là s'en vont ensemble au chasteau pour deliurer leurs dames Niquee, Siluie, & les deux belles pucelles Leonide & Anaxare.

Comme Rogel de Grece s'enamoura de la belle Leonide. Et Filisél de Montespain d'Anaxare. Et comme l'Emperiere laissa à la duchesse de Gazan son Isle, la faisant battiser, & sous les habitans d'icelle.

CHAP. LXXI.

VEnuz au chasteau, ilz eurent de la duchesse les clefs de la chambre où leurs dames estoient, vn peu plus humainement qu'elle n'auoit baillé les premières. Là fut la recharge des baisers & embrassemens, qui ne furent entre telz parens & amys sans maintes larmes d'œil. Et elles s'adressans à remercier le prince Falanges, qui auoit fait l'ouuerture de leur deliurâce: ce n'est à moy (dit il) que la devez, ains à ce chevalier blanc la deuons aussi nous mesmes (monstrant le gentil Rogel) qui bien se peut vâter d'auoir au iourd'uy obtenu, autant glorieuse victoire que nul de ses ancestres. Rogel respondit que peu y eust monté sa iournée sans ceux qu'il auoit mené quand & luy. Et apres auoir fait la reuerence à l'Emperiere & aux autres dames, arresta son œil & son cueur en Leonide, qui luy sembla bien la plus accomplie en beauté & bõne grace qu'il eust onques veüe. Moins n'en auint à ce coup mesmes à Filisél à l'endroit de la pucelle Anaxare, laquelle de ce iour il fit maistresse de sa liberté entiere: entrans ces deux ieunes princes en nouvelles prisons de celles qu'ilz deliuroient d'autres vieilles. Grand plaisir prindrent les suruenans, principalement Alastraxere à contempler l'enfant Fortunie qu'elle faisoit entre ses bras, la baisant & benissant, & luy souhaitant meilleure fin de vie & plus heureuse que n'auoit esté sa naissance. Quand elle l'eut laissée, la petite se remet à iouir avec la nabotte, ne se souciâs gueres de leurs affaires. Apres les caresses & bienue

nues on donna ordre à appareiller les places des naurez, mesmement de Falanges & la cõpagnie qui trop plus l'estoient que les autres. Les dames faisoient deuoir de les seruir & traiter de tout ce qui se pouuoit trouuer leans, voire de leur donner recreation durant le temps de leur guerison. A ceste occasion Niquee mettoit Busando en diuers propos d'amourettes, & Siluie son Darinel, qui estoit chose tresplaisante à ouïr. Madame (respondit Darinel) O que i'eusse souffert en ceste prison par la priuation de vostre diuine veüe, sans le reconfort que ie receuois de la uisitation de Ximiaque qui me la representoit au naturel. A quoy elle leur respondit, qu'autant de bien auroit receu d'eux quand elle ne pouuoit entretenir le Prince Florisél, trouuant en Busando & luy sa vraye ymage. La petite Fortunie couroit parmy la chambre, à qui la nabotte faisoit quelquefois de si laides grimaces, que de paour elle s'enfuyoit cacher au giro de l'Emperiere. Voy là (dit Darinel) les gracieuses œillades qui nous brulent les entrailles. Ce sont (dit Busando) les vrayes dardz de Cupido. A quoy elle respondoit: que pour eux ne pouuoient faillir à estre telz, selon le pied la forme: & les seigneurs & dames en ryoient trop. Ouy pour Busando, dit Darinel: qui luy replique, qu'il se defende luy mesme sans charger sur luy, & qu'il n'estoit pas Mardochee. Le le sçay bien (dit Darinel) car il s'en fault plus de deux aunes de bonne mesure: mais au contraire ce n'est pas à moy que te dois comparer en gloire de hautes pensees, qui ay aquis tant d'honneur entrant en son enfer, ou n'osa entrer le plus hardy prince du monde. Quoy qu'il en soit (respond il) ie ne prends point de goust à tes gaudisseries qui retumbent en trop bon lieu. Comment (dit Darinel) es-tu marry que lon blasonne tes amours, puis qu'il n'en deplait à ma dame l'epieriere? Tout beau (dit Siluie alors pour les mettre d'accord) mon bel amy Darinel, vous traitez Busando vn peu rudement: aussi que ce n'est la raison de dechiffrer si clere.

clerement les affectiōs des dames mariees. A quoy il s'excusa qu'il pensoit estre permis es personnes dont les mariz sont hors de danger d'auoir mal à la teste. Busando se sentant piqué, & ta beauté (dit il) nous donne elle point pareille asseurāce que la mienne ? Non, respond il, d'autant que par vniō d'amour ie suis conuertie en elle. Vrayement, dit Busando, encores seroit son mary plus asseuré de tous si elle estoit semblablement conuertie & transformee en toy. La compagnie rit fort de ce mot. Dont Darinel rechargea pour ne demeurer vaincu, le priant de conter en conscience que c'estoit qu'il pouuoit auoir veu en sa maistresse, pour estimer qu'elle abbaissat tant sa grandeur, & qu'il deust tant esleuer sa petitesse. Autant (respond) que tu veis en ma dame Siluie. Adonc estoient en termes de s'empoigner au poil, quand Ximique se mit entre deux, leur disant qu'ilz n'entraissent en si gros debat pour l'amour d'elle, & qu'elle choyiroit celuy qui pl^s seroit à son gré. Ces railleries ioyeuses faisoient souvent passer le temps aux malades, qui au bout de douze iours furent sains de leurs playes, pour les baumes artificielz qui leur furent appliquez, de pres secondās le naturel, desquelz ces grandes princesses n'alloient iamais desgarnies. Adonc l'Emperiere s'auisa d'aller visiter la duchesse de Gazen leur hostesse qui s'estoit tousiours tenuē close à part pour demener son dueil avecques ses femmes. Les autres dames la suyurent sans aucū des seigneurs, pour ne luy rafraischir ses douleurs par la veuē de ceux qui en estoient cause. Ce fut pitié d'ouir les criz qu'elle fit à leur entree. Que tardez vous, disoit à l'Emperiere, a me liurer à mort, puis que m'avez priuee de tout mon bien & ma ioye ? Que puis-je plus voir en ce monde qui me reconforte, sinon vn autre filz que fortune à exempté de ceste rencontre, le reseruant à quelque pire ? Ma dame ie sçay bien que vous ay fait tort, mais le zele naïf me forçoit à exercer ceste vengeance sur vous & les vostres pour le Duc Brabon mon filz

& plusieurs autres de mō lignage occis par leurs mains. La passion m'a auenglee, mais confidez qu'il estoit bien en moy de vous faire beaucoup pis que n'ay fait. Toutes les dames eurent les cueurs attendriz de compassion de la duchesse qui hors celle inimitié s'estoit monstree enuers elles tres-dobonnaire & courtoise, sans rien esparagner de bon traitement pour leurs personnes. Parquoy l'Emperiere luy respondit : Duchesse, nous ne sommes pas venuēs icy pour vous donner ennuy, ains pour vous consoler & vous faire tousiours mieux cognoistre quelz nous sommes. L'accidēt passé ne se peut reuoker, le temps, au moins, vous en otera la souuenance & douleur, si par cueur vertueux ne le preueniez : Ou plus ny a de remede, c'est simplese d'arrester la pensee & soy contrister. Au fort ceux que deplorez sont morts combatans vaillamment, & les nostres les ont deffaitz en iuste guerre, qui sont fortunes ausquelles tous bons cheualiers sont sugetz, & autāt en pend a l'œil à ceux qui ont esté victorieux quand la chance tournera. Noz inimitiez il faut abolir, & esleuir en oubly perpetuel : & si le faites & en requerez les seigneurs, ie me fais forte qu'ilz vous traiteront bien, vous laissant dame paisible de vostre Isle, & vous receuant & vostre ieune filz en leur amitié & protection. La pauvre Princesse oyant ceste consolation accolla les genoux de l'Emperiere sās pouoir dire vn seul mot de remerciement. Parquoy l'Emperiere manda à l'instant les seigneurs, qui vindrent pareillement consoler la duchesse, & l'asseurer qu'il ne luy seroit tollu vn seul pied de toutes ses terres & seigneuries : dont on commença à s'esioir communement par le chasteau : & la duchesse de la en auant mangea avecques les Princesses, esquelles elle ficha autant d'amour que parauant leur auoit porté de haine & rancune mortelle : voire & son filz Bazaran qui suruint en ce lieu deuint seruiteur affectionné de la maison imperiale de Grece, & toute leur race consequemment. Tandis que ces affaires

affaires se manyoient les deux nouveaux amans Rogel & Filisél, entendoient bien à d'autres, tousiours costoyans leurs maistresses & prestz à les servir & obeir en tout ce qu'ilz pourroient penser qui leur vint à gré. Le ieu se demena quelques iours du coin de l'œil seulement, si d'aventure aux rencontres ne se iettoit quelque parollette à la traverse, iusques à ce que les naurez furent debout, & que la compagnie apres soupper s'alla pourmener par les iardins, ou chacun ne faillit à mener la sienne souz le bras. Dont Rogel print vne allee à part pour sa carriere, ne voulant perdre ceste occasion de descouvrir son cueur à Leonide: mais quand il voulut entrer en ce propos le sang luy fuyt du visage, & deuint passe comme vn trespaslé. Ce qu'apperceuant la Princesse, luy demanda quel mal soudain l'auoit faisy. Dequoy luy trefaise qu'elle luy auoit fait ouuerture (d'autant qu'il n'y a rien en tel cas plus difficile que le commencement) luydit: Ma dame vous avez beaucoup fait maintenant pour moy, car i'estois devenu muet par transport de mon esperit. Elle qui coniectura assez que pouuoit estre (toutesfoys le dissimulant) respondit: que le mal deuoit estre grand qui faisoit ainsi perdre la parole. A quoy Rogel: Ma dame c'est vn mal de fort estrange nature & tant meslé de bien que ie crains l'auoir mal nommé: mais tel qu'il est il procede de si noble source que ie ne delibere iamais me mirer en autre fontaine, non plus que Narcissus en celle ou sa vie print fin. Vray est que n'ay pas en moy la hardiesse de la vous exprimer pour le peu de merite que i'ay d'en approcher seulement non pas y boire & puiser. Ma ieunesse m'en retire qui n'a encores donné temps ne lieu à mon vouloir de sortir en lumiere: mais si tant vous plaçoit luy auancer de guerdon que de me recevoir pour vostre cheualier, la faueur de ce haut nom me fera esuertuer en sorte que ce tiltre ne vous tournera à deshonneur. Leonide ayant ouy sa harangue luy respondit d'une grand' froideur. Monsieur ie croy

qu'avez adressé vostre pësee au lieu que me declairez comme à celuy qui par faute de prudence meure, fust mieux pour succomber à voz assaux: ou que vous esbatez à la mode des autres à m'entretenir de cest honneste propos. Je sçay qui vous estes & comme meritez beaucoup selon l'esperance que forme vostre apprentissage. Pourtant me pardonnerez si ie ne vous rend response conforme à vostre desir, considerant vostre aage qui peult encores concevoir apprehensions legeres: aussi tost passées que venuës. Et si vostre affectiō est telle que me voulez faire croire, elle n'ẽ pirera point au meürir, ains s'enforcera plustost. Ce pendāt si elle est autant vertueuse & honneste que vehemente, ie vous prie la dissimuler, & n'en mettre pas d'auantage en euidence soit par fait ou par dit. Rogel ne fut gueres content de sa response: & luy repliqua qu'il auoit & auroit toute sa vie l'honneur d'elle aussi cher que le siẽ propre: & qu'il desiroit sçauoir sa volunté en intention d'amour & societé perdurable par le lien de mariage. En quoy elle luy clouit la bouche, disant qu'elle n'auoit encores pour son aage volunté d'y entendre: & que la saison venue c'estoit propos à cōmuniquer à ses pere & mere: le suppliant de le supprimer ou differer iusques à tẽps plus opportun & cōuenable. D'autre costé se pourmenoiẽt semblablement Filisél de Montespın & la belle Anaxare, à qui il ne sceut faire entẽdre sa passiō de bouche, tant le cueur estoit serré, quād la langue cuidoit iouer son rolle. Seulement l'entretint de menuz deuis de iardinages, luy ferrant le bras aucunesfoys avec vn soupir langoureux, & au bout de l'allee fichant ses yeux sur elle longuement sans mot sonner. Qui luy fit assez sentir ce qu'il ne luy pouoit dire dont elle demeura de sa part fort contente, luy portant volunté reciproque, combien qu'elle le courist sagement en sa contenance. Vray est que depuis luy & Rogel eurent quelques autres parlemens auecques leurs dames sur le voyage de leur retour en Constantinople (ou ilz entrerent)

apres le batifement de la Duchesse, de son filz, & de tous ceux de l'Isle, mais ilz en rapporterent tous aussi maigre responce, que la premiere.

Comme Galtazire conta à Darayde l'aventure pour laquelle elle l'emmenoit: & comme elles arriuerent au Royaume de Tessalie, ou elle deliura vn chevalier des mains de deux Damoyelles.

CHAP. LXXII.



DAràide apres avoir nauigé quelques iours avec Galtazire & sa compagnie, se print à enquerir d'elle quelle part elle la menoit, & pour quelle occasion. A qui elle declaira tout de point en

point en ceste maniere. Sçachez ma damoyelle que vous venez pour vn cas de la plus estrange fortune dont ouïsiez iamais parler. C'est qu'au Royaume de Tessalie y a vne royne vesue à qui n'est demeuré de son mary

mary qu'une seule fille de merueilleuse beauté nommée Artifire: laquelle a esté requise en mariage par un Geant ieune & braue qui le tient en un fort chasteau sur la croupe d'une montaigne es confins de Tessalie. Et ce geant ha sa mere vieille & fort experte es artz magiques, qui repaire en une caue ou lon ne peut entrer que par ce chasteau que son filz garde, voire à l'entree d'icelle y a deux rochers seruaus de deux tours naturelles, entre lesquels loge & repaire une hideuse & horrible beste nommée Caualyon, d'autant qu'elle a la teste, crin & encolure d'un vray cheual, & le corps, bras & iambes d'homme: avec lesquels il en a encores autant d'autres semblables à ceux d'un lyon armez de si fortz ongles & si trenchans qu'il n'y a chose si dure qu'ilz ne transpercent: & quand il court, s'ayde de tous ses huit membres, tellement qu'il deuance les tigres de viffesse. D'auantage il est si haut, qu'estant sur ses piedz n'y a geant qu'il ne surpasse d'une brasse, & est couuert d'escailles en forme de poisson dures & fortes merueilleusement. Or si la façon & corpulence est bien estrange, trop plus l'est encores sa naissance: car il est engendré de ceste vieille & d'un autre geant son propre filz qui est desia mort. Et croyons que Dieu le mit sur terre en forme si monstrueuse pour l'exemple de l'horreur de ce peché. Son frere qui est auourd'hui viuant ha (comme vous ay commencé à dire) demandé à femme la belle Artifire à la Roynie sa mere, laquelle (n'en ayant volonté aucune) s'excusoit par belles paroles & delayoit tousiours le temps d'y auiser. A tant arriue en Tessalie un cheualier extreme en valeur, & non moindre en beauté, appelé Rosafar filz du Duc de Sauoye, & neveu du Roy de la grande Turquie, lequel deuint amoureux d'Artifire & elle pareillemēt de luy. Ce qui vint à la cognoissance de la Roynie qui le trouua bon & les maria ensemble. Quand les nouuelles vindrēt au geant Gadalon seigneur de ce chasteau du mont il cuyda forcener & enrager, & enietta de si horribles & espouventables criz &

hurlemens que ceste vieille forcierre Gregaste les entendit de sa caue (car d'y aller n'y a ordre à cause du Caualyon, qui ne cognoist personne que sa mere qui le pense & nourrit) si luy fit responce que bien le vengeroit & qu'il n'en print autre soucy ne melancolie en sa teste: & la malheureuse a executé sa promesse en une piteuse façon. Un iour que le beau Rosafar & la ieune Roynie Artifire estoient seuletz en leur chambre prenant le deduit des amans en grand soulas, soudain leur fut auis qu'ilz auoient la poitrine ouuerte & que leur cuer vouloit sortir par la: parquoy l'un estoupe le passage à l'autre de sa main droite, & des bras gauches se tiennent embrassez, & les bouches iointes ensemble: sur lesquelles decoulent les grosses larmes des yeux s'entrepriās d'oster la main de deuant le playe, à fin que le cuer faille qu'ilz sentent bondir querant yssuē. Et est chose de trop grāde pitié d'ouïr les tristes propos qu'ilz se tiēnent l'un à l'autre, desirans une brieue mort pour euer ce long & cruel martire. Mais depuis q̄ ce iour les eusmes veuz & ouyz nul n'a sceu entrer en la chābre ou le sort est auenu, que lon appelle en nostre pais magique ligature, quand on empesche par charmes l'assemblee charnelle de deux coniointz. Car en leur chambre sourdit une chaleur embrassée comme d'une fornaisie ardente, que nul viuant pourroit endurer. Biē void on au dessus de l'huys en un tableau d'ambre tel escreteau.

*Ninguno podra aqui entrar
Ni despues dalle salida
Si no el que en pena de amar
Tuuiere maior herida.*

*Nui ne presume auoir icy entree:
Ne de donner aux deux amans yssuē
Qui n'a d'amour plus grād peine cōceue
Et de grief coup l'ame plus penetree.*

Voila le piteux discours de l'affaire, pour lequel ie vous meine: vous auertissant que la vieille regente (qui en meurt sur le pied) a ainsi enuoyé plusieurs autres damoyelles en diuerses contrees pour tirer cheualiers

qui entreprennent ceste auenture, nous accompagnant d'hommes anciens pour le respect de nostre honneur, & toutes vestues en dueil, tant celles qui vont dehors que le reste de la cour. Et le fier Gandalon non content de ce que la faulx diablesse sa mere a fait pour luy, pille, destrouffe, & enleue en son chasteau tout ce qu'il peut de gés & de biens du plat païs. Reste à vous, ma damoyelle, d'auiser à subinguer le geau, pour tirer de luy le remede de ce miserable enforcellement: auquel si vous faillez ie tiens le fait hors de toute esperance. Daraïde demeura fort esbahie de cest estrange conte, & conuoiteuse de voir ces deux ieunes Princes en tel estat, interroge Galtazire si on ne leur auoit point demandé, les voyant si naurez, ce qu'ilz sentoient. Si auons, dit elle, mais ilz ne respondent rien: bien oyôs vne partie de leurs plaintes tant douloureuses qu'il n'y a cueur qui n'en attendrisse de pitié & fonde en larmes. Ilz sont leués assis l'un pres de l'autre en deux chaires de drap d'or souz vn riche poile de satin cramoisi. Mais la regente ma maistresse à fait clorre la tour ou est leur chambre, à fin de n'entendre plus de leurs lamentables propos, qui ne luy font que regreger la douleur amere qu'elle en porte. L'ay grande volonté de les voir, dit Daraïde, pour la prendre & conceuoir plus grande à les venger. Dequoy i'ay ferme confiance en la playe mortelle que ma dame Diane m'a empreinte au cueur, non pas en la poitrine seulement à laquelle ie suis seure que nul amant n'en a de pareille, luy deffaillant telle excellence d'obget qui cause la mienne. L'en ay bien opinion, respond Galtazire, & dieu vous y vueille fauoriser par sa grace. Lors voyant que Daraïde s'estonna vn peu de ce langage, la pria luy pardonner dequoy elle ne luy auoit osé plustost confesser qu'elle estoit chrestienne de peur de le degouster de l'affaire qui se presente pour gens de loy & creance contraire. A quoy Daraïde: M'amie celà ne peult destourner le bon office & secours qu'on doit rendre à

chacun. Sur ces propos vindrent à saluer le port, & incontinent Daraïde descendit en terre pour enuie qu'elle auoit de hastier la deliurance qu'elle auoit emprise des deux amans: veu mesmement que Rosafar luy appartenoit de parenté comme filz de Florelus d'Austriche, & heritier aussi du duché de Sauoye. Parquoy se met sans delay au chemin de la maistresse cité de Tessalie: auquel il entendoit comme plusieurs des autres damoyelles de la Roïne auoient amené plusieurs champiôs qui tous auoient esté deffaitz par le geau. Pour ce les gens qui voyoient passer Daraïde tant belle & si bien formee en la compagnie de Galtazire: Hee dieu disoient quelle pitié de mener ceste excellence creature à la boucherie apres les autres. Or auant qu'arriuer en la ville (approchans d'une forest) oyrent la voix d'un homme soy complaignant & criant hautement: si tirerent celle part, & trouuerent que c'estoit vn cheualier nud, lyé à vn chesne que deux ieunes damoyelles fouëttoient à grandz sions d'arbres verdz & ployâs, & ny alloient de main morte: car il y auoit ia perdu sa peau, comme le serpent sa despouille, & estoit tout en sang. Quand Moncan vid ceste bourrelerie: Dieu de paradis (dit il) & que feroiét elles à nous pauvres viellardz puis qu'elles traitrét ainsi ce beau ieune homme? si au verd, que feroit-ce au sec? Elles estoient si ententiuës à leur besongne que la compagnie fut tout aupres d'elles sans qu'elles la vissent. Et Daraïde commença à leur demander d'ou venoit ceste nouuelle cruauté aux douces pucelles. Qui luy respondirent en riant: que cestoit pour le chastiment d'un malfaitteur, & exemple à tous autres. Daraïde continuant à s'enquerir quel crime il auoit commis l'une respond, que c'estoit vn faux & desloyal cheualier qui auoit fait la cour à elle & à l'autre (qui sa cousine estoit) faisant entendre & iurant à chacune qu'il l'aymoit souverainement & vniquement: & souz ceste couleur les auoit toutes deux reduites au point, en leur promettât mariage.

Ce que sçachant naguères l'une de l'autre fismes le complot de le conuier à ce iour de venir passer le temps en ce boys, ou nous l'auons endormy apres boire en nostre giron : puis lyé piedz & mains & accoustré tel que le vöyez : & n'en partira sans nous faire serment de ne nous pourchasser iamais de la satisfaction qu'auons prise sur luy selon sa desserte. Vrayement (dit alors Daraide) si ainsi est il auoit meritë punition : & s'adressant au patient : Or prenez la peine en patience des mains de celles de qui auez receu la ioye. Qui respond (en rechignant) maudit soit la ioye qui tourne en tel deplaisir & torment. Vous ne disiez pas cela (dit la plus affectée) quand vous iouissiez du fruit de vostre plaisir : ains que Dieu n'auoit pas plus de gloire en son ciel : & que vous sembloit y estre tenant vn ange entre vos bras. Je ne pensois pas lors (dit il) que deussiez deuenir diablelle contre moy. C'est vostre desloyauté (replique l'autre damoyse) mauvais cheualier, qui corrompt nostre naturel debonnaire. Comment, dit le cheualier, suis-je pour ce cas mis au reng des chetifs, veu qu'Amadis de Grece & Florisel de Niquee n'en ont perdu leur reputation, & Galaor sur tous ceux. Adonc la plus grande : Si nous tenions icy Amadis de Grece il n'auoit ne pis ne mieux que vous, pour la vengeance de Lucelle, & Florisel pour celle de son Helene. Car quant à Galaor nous ne trouuons occasion de le blasmer de ce qu'il a fait comme cheualier errant en toutes les occurrences qui luy ont esté offerres : la honte en redonde sur les Dames non pas sur luy, qui ne fit iamais profession de loyauté & ainsi n'a trompé personne. Pourtant cheualiers (dit elle) ie vo⁹ prie poursuyuez vostre chemin & nous laissez executer nostre iustice. Adonc le cheualier les supplie de le tirer des mains de celles qui ne se peuuent souler de son sang. Et Daraide leur remonstre qu'elles ont cause de se contenter : à quoy à grandes prieres elles consentirent à la fin souz condition du sermēt de ne les recercher. Et dirēt à Da-

raide qu'elles luy donnoient pouoir de s'ab soudre en vertu de la penitence precedente toutesfois qu'il ne se hastast de le deliier qu'elles ne fussent montees. Et elles donnent du fouët à leurs palefrois, & s'eslognent pendant qu'on delye le pauvre cheualier, & que Barbaran & Moncan luy seruēt de valetz de chambre à le vestir : car de harnois il ne le peut souffrir à cause de ses cicatrices & le troussa deuant luy remerciant la compagnie qui tant de bien luy auoit fait. Laquelle d'autre costé tire le chemin deuisant de ceste iustice de femmes, que Galtazire louoit & approuuoit grandement, disant que si toutes en faisoient ainsi, tous les hommes ne feroiēt pas tout ce qu'ilz font. La nuyt les surprint pres d'un chasteau distant de quatre lieues de la cité (à cause de l'amusement qu'ilz auoient eu en ce boys) ou ilz furent bien logez & seruiz.

Comme Darayde fut receuë de la Royne de Tessalie laquelle apres auoir veu les deux Princes enchantez, s'achemina vers le chasteau du mont.

CHAP. LXXIII.

LEndemain Daraide dit à Galtazire qu'elle vouloit entrer en la ville en ses habitz puis qu'il en estoient si pres qu'ilz ne pourroient tomber en danger sur le chemin. Si s'accoustra en parure de Nym phe fort richement, puis monte sur vn fier destrier enharnaché de mesme sa robe, & les deux vieillardz Barbaran & Mōcan portoient son escu & sa lance, & quelques escuyers de ce chasteau son harnois. Ceux de la cité qui la virent passer furent esbahiz de sa beauté, & demādoient à quelqu'un de la troupe qui elle estoit. Et oyant que c'estoit Daraide nēe au monde pour la plus parfaicte dame en beauté & valeur, venant esprouuer la liberté de leur Prince. & Princesse, la recommandoient à Dieu deuotement. Ainsi passa elle (louee & benie de tout le peuple) iusques au palais de la Royne, ou elle fut descenduë par les deux anciens cheualiers : & Galtazire monta en di

ligence en la chambre de la Royne pour l'aertir du secours qu'elle luy amenoit, qui estoit Daraïde la nouriture de la Princeſſe Diane traittee d'elle & de la Royne ſa mere comme leur propre ſeur ou fille: & en prouèſſe eſtoit vrayement vne autre-Alaſtraxeree, ayant vaincu en camp cloz le tant fameux Galtazar de Barberouſſe, & fait tant d'armes ſur le chemin que c'eſtoit choſe incroyable. Bref qu'elle ſe reſiouïſt, car ſ'il y auoit remede en ſon affaire par humaine vertu elle l'auoit amené. Sur ces entrefaittes voicy entrer Daraïde, ſuyuie de grand nombre de cheualiers que tous elle paſſoit de la teſte: qui mit la Royne en grande admiration de ſa taille & beauté Dont ſe leua de ſon ſiege pour la recevoir, voulant honorer celle qui venoit expoſer ſa vie pour ſon ayde, & qui eſtoit douee de ſi bonnes parties, Daraïde ſ'agenouilla deuant elle luy requerant les mains, que la Royne ne luy voulut bailler, ains la leue debout & l'embrasſe diſant: Ma belle damoyſelle dieu vous doint bon ſucces à la ioye que mon cueur conçoit de voſtre venuë. J'ay confiance qu'ainſi le fera, reſpond Daraïde. Lors la Royne la mene ſoir apres d'elle, à qui elle dit: Ma dame vous ſçaez l'occafion de mon arriuee: ceſt à ſçauoir la deliurance du Prince Roſafar, & de voſtre fille Artifiere: pour-ce vous ſupplie me faire mener au pluſtoſt la part ou ilz ſont. A quoy elle luy reſpondit qu'il falloit diſner, & apres elle meſme l'y feroit compagnie. Mais Daraïde repliqua du peu de temps qui luy eſtoit prefix & limité par la Royne Sidonie: auſſi (dit en ſouſtriant) ma dame ie ſouffrirois trop en ſi longue abſence de ma deeſſe Diane, & ne voudriez tant eſloigner le bien de celle qui pourchaſſe le voſtre car apres diſner ſuis deliberee d'aller droit au chasteau du mô. La Royne ſi accorde & la prend par la main la menant en la tour des martirs, ainſi l'auoit on baptiſſee. Venuz à la porte de la chambre Daraïde vid les deux amans veſtuz de drap d'or: Roſafar la teſte nue blonde & creſpe: & Ar-

tifiere ayant ſur ſes cheveux dorez vn cercle enrichy de mainte pierrerie: & luy ſemblerent tous deux fort beaux & de bonne grace. Dont elle ſentit griene douleur de les voir en ceſt eſtat, ſ'entrerégardans la main contre la poitrine l'vn de l'autre, cômme Galtazire luy auoit raconté. Adonc leut l'eſcriture du tableau qui eſtoit ſur la porte, puis print congé de la Royne pour y entrer, qui luy dit: En bonne heure ma bonne amye puiſſiez vous faire ce à quoy tât de preudhommes ont failly: mais j'ay grand doute de voſtre perſonne, veu la chaleur de leans que ne pouuons quaſi endurer d'icy. Lors Daraïde. Ma dame, à qui les dieux veulent ayder nul ne peut nuyre: & luy laſchant la main avec vne grande reuerence, entre ſur le ſueil de l'huys, & dit (au raport de Galerſis le croniqueur) feu qui embrasés mon ame par trop plus grande vehemence, procedant de la beauté de ma dame Diane, monſtre maintenant la ſeigneurie que tu tiens ſur toutes autres flâmes, à fin que par ta ſouueraineté mon corps ſoit preſerué du preſent ſacrifice. Ce dit, marche à grand pas avec vne haute contenance, & luy fut auis qu'il eſtoit au lieu le plus fraiz du mô. Ce que moins ne ſentit la Royne & les autres qui regardoient de la porte: parquoy elle entra diſant: qu'afſez voyoit au premier bien que Daraïde luy appreſtoit, occaſion de bon preſage du plus qui pourroit auenir par ſon moyen. Adonc ouirent enſemble les propos douloureux des deux amâs ſ'entreprians l'vn l'autre d'oſter la main de la fente par ou ſon cueur vouloit paſſer: diſant Roſafar: Làs amye ſi vous m'aymez ne me retenez plus longuement en ceſte mortelle angoiſſe, & ouurez la porte à mon ame, ou tât vous la faites huer. Helàs amye (reſpondit Artifiere) ſi voſtre amour eſt telle que touſiours m'avez fait entendre, commencez le premier à me faire le bien q tant deſirez pour vous, à fin que paſſant deuât ie ne meure que d'vne mort ſans voir la voſtre. Apres ce piteux debat ſe taiſoient vne eſpace, puis recommençoïet ceſte meſme re-

me requeste en autres termes, sans rien respondre à Daraïde de chose qu'elle leur demandast. A ceste cause (dit à la Royne qui pleuroit tendrement) ma dame, la compassion que j'ay de ces deux princes me chasse hors d'icy tant pour ne les pouoir voir plus longuement que pour deligemment pourchasser leur remede. Elle ne pouât parler de destresse, la prend par la main, & sortent ensemble hors de la chambre, en laquelle reuint la precedente chaleur, que ceux qui alloient apres sentirent tresbien. Daraïde en allant vſa de grandz raisons de consolation à la Royne, qui conceut grande esperance de bonne fin par si heureux commencement. A tant trouuerent les tables couuerts & dînerent. Puis dit Daraïde qu'elle vouloit partir incontinent. En quoy la Royne la pria, que si dieu luy faisoit grace de vaincre le geant, elle se desistast de passer plus auant dedans le chasteau à cause du Caualyon. Et elle respondit qu'elle essayeroit à faire ce qui seroit necessaire pour la liberte de ses enfans & qu'il ne luy falloit qu'une guide qui la menast au chasteau du mont. A quoy s'offrit Galtazire, remonstrant qu'elle qui auoit eu la peine de l'amener ne deuoit estre fraudée des gantz des bonnes nouuelles de sa glorieuse victoire qu'elle esperoit. Autant en dirent les deux vieillards, à qui la Royne en sceut bon gré: & ainsi prend Daraïde cōgé de la Royne (qui l'accolla & baïsa doucement) & des principaux de la cour prians dieu enforcer & vigorer son bras, pour executer la deliurance de leurs seigneurs.

Comme Darayde combatit contre le Geant du chasteau du mont, & contre le fier & cruel Caualyon, & qu'elle en fut l'Issue.

CHAP. LXXIIII.

LE chasteau du mont estoit distant de la ville de dix grosses lieues. Pourtant Daraïde surprise de la nuyt logea à vne lieue pres: ou quand elle fut couchée se mit en oraison, priant Dieu luy dai-

gner ottroyer pareille victoire contre le Caualyon qu'il auoit au Roy Amadis contre l'Endriague: car elle estoit resoluë de l'assailir s'il venoit au dessus du geant: & le redoutoit fort pour le rapport de sa grandeur & fierté outrageuse. Le reste de la nuyt elle passa en la contemplation de sa maistresse Diane, & en regret d'estre si long tēps bannie de sa veue, tellemēt que chacun iour de son absence luy duroit mille ans. L'aube se monstrant au ciel elle se fit armer de toutes pieces, & cheuaucha avec sa suite iusques à deux traitz d'arbalestre pres du chasteau: alors dit à ses damoyelles: Mes amyes si ceste auēture dōne fin à ma vie, ie vous prie de porter mon cueur à la duchesse Lardenie, pour le presenter à celle à qui il est, avec le secret que ie luy ay communiqué. Elles plorans respondirent que les dieux luy enuoyroient meilleure issue. Adonc les embrasse tous & toutes qui demeurent en ce lieu attendans la fortune. Et elle pend son escu au col, & prend sa lance: si s'en va vers le chasteau par vne profonde & estroite vallee à l'heure que le soleil descouuroit sa luyſante face sur la terre. Aupres du portail trouua vn pilier de marbre ou pendoit vn cor à vne chayne de fer, lequel elle sonne trois fois, ayāt leuē la veue de son armet. Dōt auise soudain vn vilain en vne corchie-re, qui l'ayant veuē se retire incontinent. Et peu apres furent ouuertes les portes du chasteau, d'on sortit vn grand & desmesuré Geant sur vn cheual de mesme: lequel luy dit d'une voix espouventable: Ne t'en fuy pas vile creature, car il faut que compares la folie que tu as faite de m'auoir esueillé.

Puis que tu en as peur (dit Daraïde) il vaut mieux que me mettes dedās pour t'en assurer. Entre, dit il, car ce sera la moytié fait de te tenir en prison, ou ie te liureray plus de tormēt q̄ par la mort. Elle ne s'en fit gueres prier, & il rentre pareillemēt, puis on ferme les portes. Quand elle se vid dedans la premiere court (qui ample & spacieuse estoit) luy commença à dire: Gadalon rend moy les prisonniers que tu tiens ceans à tort: & m'en-

& m'enseigne le moyen de la deliurance du Roy Rosafar & de la Roïne Artifire, & ie te quite de ce combat. Le geant cuyda enrager de ceste offre, dont il getta vn cry qui retentit iusques au bout du chasteau, en respondant: chetive chose garde toy de la responce que ta sortie requiert. Alors broche contre elle, & elle contre luy, romps chascun sur l'escu de son homme: puis reuiennent les brancz d'acier aux poings, desquelz ilz meinent vn dur & dangereux conflit: mais s'estoit merueille d'y voir l'adresse de Daraïde à volter son cheual deça, dela, à l'vne & à l'autre main: tellement qu'elle donnoit tant de coups au Geant à descouuert qu'elle vouloit, qui pour la pesanteur de luy & de son roucin ne voltigeoit non plus qu'vn pilier. Ce ieu dura enuiron demy heure sans que Gadalon sceust assener vn seul coup à droit sur Daraïde, qui luy en tira tant entre les fortes lames de la cuirace que l'homme & cheual estoient tous peintz & coulorent de sang. Si est-ce qu'elle ne se peut du tout garentir qu'elle ne receut de luy quelque horion qui ne portoit point si peu qu'il n'entamast & harnois & la viue chair. Toutesfois Dieu qui la tenoit en sa garde la preserua de playe dangereuse come bien besoing luy fut: au moyen que le geant se sentant faillir de cueur par la grande effusion de son sang, reclama ses gens qui regardoient le combat des galleries d'ou accoururent plus de vingt à son cry, les vns avec iauelines, les autres garniz de haches ou d'arcz: mais ilz ne sceurent y arriuer de si bonne heure que le grand mastin n'eust pris la fuyte par vne porte qui alloit vers le logis du Caualyon, la ou il cuydoit que Daraïde n'auroit la hardiesse de le suyure. Ce que neantmoins elle fit & aperceut bien tost le furieux animal qui voloit quasi comme vn oyseau vers eux (pour les criz qu'il auoit entendu de ce costé) couuert de fumee qui luy sortoit des nazeaux comme d'vne nuë. Elle s'esmerueillait de la force & puissance de la beste, & eust bien voulu estre plus fresche & mieux en aleine

pour se presenter contre elle, pensant auoir ensemble affaire au geant & à elle. Or en auint beaucoup mieux qu'elle n'esperoit: au moyen que le Caualyon qui (comme dit est) ne connoissoit autre que sa nourrice, s'adressa au premier qu'il rencontra, qui fut Gadalon mesme: lequel empoignant de ses mains d'homme, despeçoit de ses pattes de lyon, quand Daraïde voyant ce bon secours inesperé descend de cheual pour mieux exploiter besongne. Et apres auoir reclamé sa dame Diane (comme la chose du monde par sa beauté extreme plus contraire à la deformité de ce monstre) s'adresse l'espee au poing au Caualyon qui desmembroit à plaisir le geant & son cheual. Parquoy auisant que tout son effort consistoit en ses pattes de Lyon, luy en trenche vne par la premiere iointure, qui luy causa si grieve douleur que du hurlement qu'il en ietta fit resonner les prochains rocz & valles en sorte que Galtazire & sa compagnie l'entendirent: qui s'escria en iointes mains: Bon Dieu ayez pitié de la plus belle & vaillante dame de la terre, que ie pense estre ores en la meslee avec l'horrible Caualyon. Or ne laissa il pour ce coup sa prise ou il estoit ia acharné, donnant loisir à Daraïde de redoubler autre coup qu'elle luy deschargea à deux mains de son espee entre ses deux grands oreilles: mais ce fut en vain, car elle reboucha sur ses dures escailles nō plus ne moins que si elle eust doné sur vne enclume. Toutesfois la beste sentant ce chammaillis luy rue vn coup de pied de derriere si violent qu'elle iette Daraïde par terre toute estourdie: qui se releua soudain (tant estoit viue) & considerant que son espee faisoit si peu sur ses escailles, luy tire vn estoc de toute sa force au ventre, ou elle auise qu'il n'y auoit que du poil, tellement qu'elle l'y fourre dedans iusques à la croix. L'animal feru à mort tourna vers elle & la saisit de ses mains d'homme pour en faire telle bouche rie que de Gadalon & son cheual qui estoient la par pieces: mais la vertu luy faillit, estant son cueur transpercé, dont il lascha sa prise & tumba

& tumba mort sur Daraïde, que sans le har-
nois il eut acrauantee de son poix. Beau-
coup de peine elle eut à soy tirer de dessouz
tant l'auoit fouillee de sa lourde cheute. Et
aussi tost qu'elle fut debout & eut regardé
l'estrange monstre, & le carnage qu'il auoit
fait deuant luy, & son destrier mesme qui
de frayeur & horreur auoit le crin herissé, &
s'estant desbridé ne faisoit qu'hannir & bon-
dit: adonc met les genoux en terre, & les
yeux leuez vers le ciel, remercie le seigneur
de l'auoir deliuré de deux telz perilz tant à
son honneur & sauueté. Puis allant tirer
son espee hors du ventre du Caualyon le
sang en sortit à gros bouillons qui dura lon-
guement, & en taignit tout Daraïde. Lors
cuydant estre en quelque repos, voicy arri-
uer la vieille geante à cause des criz & ru-
gissement qu'elle auoit ouïz de son filz, qui
sembloit formee & compolee d'escorces
d'arbres, tant estoit sèche & haue: grande
elle estoit & vestuë de peaux des bestes, fors
que les bras & iambes qui estoient nudz.
Elle alloit toute descheuelee & meslee, res-
semblant vne droite Proserpine ou furie
d'enfer: & quand elle auisa le geant tout
desmembré, & le Caualyon gisant mort
aupres, se deschire le visage à beaux ongles,
& arrache ses cheueux gris, brayant: O for-
ce sans per, comme vous puis-ie voir morte
& demeurer viue? O fortune quel tour me
iouës tu de me monstrier mes enfans occiz
par vne si petite & vile chose? ô dieux in-
iustes qui tel outrage me faites. A l'heure
Daraïde l'approche & luy dit: Femme c'est
simplesse de plaindre & gemir ce qui est ir-
reparable: or vous conuient penser de vous
mesmes que n'en aurez pas moins qu'eux
si tout maintenant ne me donnez le moyen
de deliurer le Roy & la Roïne de Tessalie
du torment ou les auez plongez. Non, non
(dit la vieille) malheureuse creature, tu n'es-
chapperas pas de mes artz, comme tu as
fait des mains de mes infortunez enfãs. Ce
dit, s'enfuyt d'ou elle estoit venuë, & entre
en vne bouche de caue obscure & horrible.
Daraïde la suy: à grand peine, tant pour le

faiz de ses armes, que pour le traual de ce
iour. Toutesfois pensant que c'estoit le plus
fort de son affaire que tant elle desiroit men-
ner à fin, se recommandant à Dieu entre
apres la geante en ce trou, pres duquel el-
le void la loge du Caualyon toute tendue
de peaux de diuerses bestes prises es pro-
chains boys & montaignes. En ceste caue
on ne voyoit non plus que de nuit, & si
tost qu'elle y eut mis le pied ouyt des coups
comme d'artillerie assez pour intimider les
plus hardiz. Mais celle qui estimoit estre
matiere de magnanimité plus grande la ou
y a plus d'occasion de perdre le courage, va
la dedans à taston suyuant vne paroy qui à
la fin la conduit en vne chambre taillee de-
dans le roc, ou n'y auoit aucune clarté que
celle qui sortoit des yeux de la geante com-
me de deux chandelles, laquelle estoit as-
sise en vne chaire au mylieu de la chambre
lamentant ses enfans, ayant ses liures tout
à l'entour d'elle. Trop fut esbahye la vieil-
le quand elle apperceut Daraïde si pres d'el-
le, qu'elle n'estimoit pouoir auoir le cueur
de passer par l'horreur des tenebres de sa ca-
ue avec l'espouventable bruit & tintamarre
qu'y si faisoit. Si desloge de vifesse & Da-
raïde apres, suyuant tousiours le mur de la
main pas à pas: tellement qu'elle trouue vn
petit huys & vn escalier de pierre par le-
quel elle paruient en haut en vne belle plat-
te forme descouuerte de tous costez, sou-
stenuë de douze gros pilliers de marbre:
La y auoit deux statuës composees & for-
gees par certain artifice, du tout rapportans
à la semblance naturelle de Rosafar & d'Ar-
tifire, lesquelles auoient les poitrines trans-
percees d'un espee dont le pommeau estoit
d'un fin rubis, & la poignée d'esmeraude,
& la gayne d'une estoffe incogneuë, le tout
de pris inestimable. Vne autre effigie sem-
blable à la vieille geante donnoit le coup
de ceste espee, tenant en l'autre main vn ta-
bleau d'airin ou estoit engraué.

*Gregaste garde des statuës transpercees à
appresté l'espee sans per pour celuy qui nasquit
sans*

sans pareil en vertu. C'est pour celuy que le destin heureux feroit monter en ce lieu si possible estoit à force humaine de passer à trauers ce fort deffendu, par la puissance de mes enfans & subtilité de mes artz: lors guigneroit le brâc precieux, & le tireroit à sa grand' gloire & allegeance des deux royaux amans, qui autrement recouurer ne la pourront.

Daraïde ayant leu & entendu l'escrit en receut grand' ioye: Si se prend à contempler la beauté de la gayne, & adonc suruiet la vieille geante qui la vient harper au corps esperant la precipiter quant & elle du haut en bas. Dequoy Daraïde se doutant eut grand peine à se deslier des bras de la forcierre qui encores roide estoit: toutesfois à la fin la renuerse par terre: laquelle voyant tous les moyens luy faillir, ne desirant mourir par la main du plus grand ennemy qu'elle eut au monde, se iette en bas ou elle tomba en plus de mille pieces. Lors Daraïde va aux ymages & en tira l'espee, qui fit leuer vn tel bruit & si terrible qu'on l'ouit à dix lieues à la ronde, mesme en la cité ou il n'y eut personne qui ne cheut de frayeur à la renuerse. A mesme instant sortit de la chambre ou estoient les amans enchantez, vn gros tourbillon de flambe comme vn esclai de tonnerre, qui alla ceindre toute la ville à l'entour, courant en forme de comete. Puis se deffit, & adonc les amans requindrent en leur premier sens, & tous ceux qui estoient tombez pareillement & Daraïde aussi: laquelle se trouua la riche espee en vne main & la gayne en l'autre: dequoy trop fiere descend & retourne au chasteau ou la canaille s'estoit tenuë quoye de peur du Caualyon, estonnee de ce qu'elle oyoit comme si ce fussent visions. Et voyant reuenir Daraïde victorieuse & tout sanglante, luy coururent sus, mais à leur grand meschef, pour les horribles coups qu'elle donnoit de la nouvelle espee, telz que quiconque en receuoit n'auoit plus besoing de myre. Apres qu'elle en eut deffait la moytié, l'autre se redit à sa mercy, qu'elle receut

d'aussi grâd' clemence qu'elle auoit mōstré de force à les vaincre: toutesfois avecques telle assurance d'eux que le cas requiert. Puis se sentant lasse & vn peu nauree (comme vous a esté dit) commande à deux du chasteau d'aller faire venir sa compagnie. Ce pendant s'asied sur les degrez d'vn peron, reposant sa teste sur ses mains appuyees sur son espee. Galtazire & les autres receuans ce mandement y accoururent quasi comme folz & insensez de ioye. A l'arriuee elle leur cuyda tourner en grand' tristesse, la trouuans ainsi couuerte de sang: mais voyant le grand nombre des mortz emmy la court & la gayeté dont elle les recueilloit s'asseurèrent qu'elle estoit hors de danger. Si leur dit qu'elle auoit mestier de repos & de quelque appareil pour ses playes, qu'il luy fut appliqué presentement en vne belle chambre, ou ilz la couchèrent sur vn bon lit. Et la laissant reposer vont voir le Caualyon, qui leur fit si grand peur qu'ilz ne l'osioient approcher tout mort qu'il estoit. Galtazire retourne diligemment vers Daraïde avec gratulation de la glorieuse victoire: luy demandant congé d'en aller porter les premieres nouuelles à la Roïne. Ce que Daraïde luy accorda, l'assurant (à cause de l'escrit du tableau) qu'elle trouueroit la court en meilleur estat qu'ilz ne l'auoient laissée. Ainsi part la Damoyelle laissant Daraïde à se guerir & refaire: qui manda des l'heure qu'on allast escorcher le monstrueux animal etemplir de paille pour l'enuoyer à sa dame Diane, en qui reposoient toutes ses penſees, & tendoient tous ses faitz comme à son but vnique: ne songeant iour & nuit qu'à recouurer la felicité de sa diuine veuë. Apres donna ordre que tous les prisonniers qui leans estoient fussent deliurez, lesquelz luy en vindrent tous rendre graces.

Comme Rosafar & Artifice estans desenchantez allerent voir Darayde au chasteau des Rochers.

CHAP. LXXV.

LE Roy Rosafar & la Roïne Artifire se trouuans deliurez du douloureux charme s'ébrasserēt ainsi qu'ilz estoiet & baisèrent mille foys espendans aussi chaudes larmes de lyesse, qu'ilz auoient auparavant de douleur. Et apres auoir esté quelque espace ainsi ravis & transportez, commença Rosafar à dire à sa dame: ma grand' amye que i'estime maintenant heureux ce mal qui me fait goûter vn si sauoureux biē. Que pleust à Dieu de nous liurer vn autre charme qui nous tint ainsi perpetuellement l'vn avec l'autre, sans distraction de ceste souveraine ioye. A quoy elle respondit: Mon cher amy le grand bien que ie reçois de ce mal est d'auoir cogneu la franchise & integrité de vostre cuer, sans qu'ayez eu faute de cognoissance du mien. Mais ie vous prie de n'empescher ma langue d'auantage à vous declairer ce que mon ame prend plus grand plaisir à penser seule, & ma bouche à iouir & goûter. La vieille Roïne suruint sur ces entrefaittes qui rompit leurs propos, & les vint accoller tous deux ensemble, disans maintes choses folles & ridicules par excez de ioye. Elle leur baisoit la face, & eux les mains. Et tant de Seigneurs & dames suruindrent de la ville à leur gratuler ceste ioyeuse deliurance avec tant de sonneurs & instrumens, qu'ilz firent passer & oublier l'heure de soupper: Or estoit bien minuit quand Galtazire arriue en grand haste, ayant changé de deux palestois en chemin. Trop ne fut esmerueillée de voir tant de luminaire par la cité, tant de feuz d'allegresse, tant de musique & melodie au palais, comme celle qui bien en sçauoit la cause. Et quand on la vid venir en si grand' diligence chacun couroit apres pour entendre les nouuelles qu'elle apportoit. Grand plaisir fut aux seigneurs & dames de la voir arriuer: & elle leur alla baiser les mains, suppliant faire imposer silence pour entendre le discours de son embassade. Chacun se retint aussi coy que s'il ny eut personne, & elle parla en ceste ma-

niere. Monseigneur & mes dames ie vous vien annoncer la forme de la deliurance dont vous iouissez, sans sçauoir comme elle vous est auenuē: c'est à sçauoir par la belle & vaillante Daraide sans per, qui arriua au chasteau des Roches, à l'heure que le soleil decouuroit sa gaye face à la terre pour la ioye speciale de Tessalie. Car sur le midy qu'entendistes icy le bruit & le son terrible, le geant & le monstre Caualyon estoient mortz par sa main. Et à l'heure que fustes desenchantez & reduitz en vostre premier estat la geante Gregaste estoit depeschée, & l'espee heureuse tirée hors des corps des statues de vostre representation ainsi que la victorieuse Daraide m'a raconté: qui en reuint tant teinte & vermeille de sang que nous en fusmes tous troublez de prime veuē. Mais ie vous puis asseurer qu'elle n'a blessure dangereuse, & est la demeuree pour vn peu se rafraischir. Ce que ie vous dy du geant Gadalon & du Caualyon, vous en pouez asseurer par moy, comme par celle qui les à veuz gifans & meurdrez de ses propres yeux. L'assistance fut si estonnée de ce recit, que Galeris dit qu'elle leua vne voix commune remerciant le grand Dieu qui tant auoit mis de déité en vne creature humaine, voire & par grande admiration ceste assemblée de peuple debonda de la & sans delay issit de la ville comme vne procession toute nuyt pour aller voir ceste merueille incroyable. Le Roy & les deux Roynes delibererent d'y aller l'endemain puis qu'elle ne pouoit venir, mais ilz n'y arriuerent qu'au soir, & vn peuple infiny y fut auāt eux qui alloit droit baiser les mains à Daraide, & apres voir le geant & le Caualyon, duquel ilz s'estonnerent grandemēt voyant tant sa chair que sa despouille. Mais quand Daraide sceut la venue de Rosafar elle se leua, & habilla fort mignonement & à leur arriuee sortit en vne sale ioignant à sa chambre: à qui elle causa grande admiration de sa beauté iointe à si grand' proesse. Elle s'humilia fort deuant eux, & sa maiesté naturelle ne les contrai

contraignit moins à luy rendre de reuerence. Si s'embraserent tres affectueusement, puis allerent ensemble en sa chambre, ou, quand ilz furent assis, elle leur dit: Mes seigneurs vous m'avez fait tort d'auoir pris la peine de venir icy: c'estoit à moy de vous aller rendre conte de mon succez. A quoy le Roy Rosafar: Gentile Daraïde ce nous est grand soulagement de vous tenir si pres de nous, pour cognoistre vostre perfection admirable, que tous les Princes du monde deuroient rechercher à voir des plus lointaines regions de la terre. Or me sens-je (dit lors Daraïde) en disposition pour vous accompagner en la cité quand il vous plaira. La Roïne blanche ne le voulut consentir, disant qu'ilz estoient bien tenuz de pourchasser son repos, veu le travail qu'elle auoit pris pour eux, tant à leur bien & auantage. Ce pendant elle ietta sa veüe sur Artifice qui luy sembla d'excellence rare, & qui pour la souuenance de sa dame Diane luy tira les grosses larmes de l'œil. Ce qui la meut à luy dire qu'on la mettoit en mesaise & qu'elle sentoit quelque angoisse de ses playes. A quoy, respondit Daraïde, que du mal qu'elle auoit senty le corps n'en souffroit rien, ains l'ame seule, par la remembrance que sa beauté luy cauſoit de sa Diane. Grande doit estre la sienne, dit Artifice, qui à peu faire tel effort en la vostre estant fille comme elle. Telle, respond Daraïde, que ie n'en ose parler de peur d'en offenser la grandeur par l'imperfection de ma louange: car les dieux ont mis en elle comme en la Pandore tous leurs dons & graces, l'esleuant en ce monde pour vn miroir & exemple de leur diuinité. Las ma souueraine deesse de qui la contemplation seule me soustient en vie: allegeant tous mes maux & ennuys, ie ne crains (disoit en soupirant) sinon que Venus jalouse de vous comme de Psiché ne nous liure beaucoup de trauers & tormens. Les Seigneurs la voyant en si profonde ymagination, l'en diuertirent par autres propos ioyeux, & commanderent qu'on couurist pour le soup-

per en sa chambre, d'ou ilz ne luy permitrent de sortir de trois iours l'y faisans tousiours bonne compagnie. Apres souper ilz allerent voir le Caualyon, dont ilz furent fort esbahiz de la figure, & de la vailance de celle qui l'auoit peu deffaire. A laquelle au retour en vindrent donner grâds louanges: luy disant Rosafar, qu'elle auoit tant fait pour eux & exposé sa personne en tel hazard, qu'elle pouoit faire estat de tout ce qui estoit en leur puïſſance comme de son propre, les ayant restitué en estat, sans lequel tous leurs biens & delices leur estoient vains & inutiles. Dequoy elle les remercia humblement: disant, que le seruite qu'elle leur auoit fait estoit deu à toutes personnes de leur estoffe par ceux qui maintenoient cheualerie: & quelle ne meritoit recompense de l'office qu'elle auoit presté selon son deuoir. Aussi quād ilz furent retournez ensemble en la cité, & qu'elle print cōgé d'eux ne voulut rien accepter de tous les riches presens qu'ilz luy offrirent. Mais quatre ou cinq iours auant son partement auoit enuoyé à sa dame Diane la despouille du Caualyon: dont Galtazire & les deux vieillards auoient pris la charge & conduite. Et elle peu apres s'embarqua en mer tirant la route de Guindaye, ayant laissé grand regret d'elle au partir de Tessalie, dont le Roy la vint accompagner iusques à l'embarquement. Or la laissons voguer pleine de desir de receuoir sa souueraine maistresse, pour retourner à l'Empereur Amadis de Grece.

Comme l'Empereur Amadis de Grece, & la Princesse Lucelle vindrent trouuer le Roy Lucidor: & du songe qu'eut l'Empereur qui le fit departir d'elle & aller en la queſte de Niquee.

CHAP. LXXVI.

EN grand ioye & consolation alloit l'Empereur Amadis avecques sa chere Lucelle, esperant si tost qu'il seroit en France de consommer leur mariage. Cela les entretint tout le voyage en douce con-

conuersatiō, tant qu'ilz arriuerent à vn port François, auquel ilz prindrent terre, & s'acheminèrent droit à la grand ville de Paris ou le Roy estoit: lequel sachant leur venue sortit au deuant d'eux & les receut en grand liessé, comme la raison vouloit.

Si les mena en son palais Royal ou il les festoya tresmagnifiquement. Chacun y fit bone chere fors la Princesse Lucelle, eitant en grande perplexité pour la foy de mariage qu'elle auoit iuree à l'Empereur, lequel au contraire en sentoit grand' ioye en son cuer, combien que de tout ce iour il n'en entama aucun propos. Mais quand chacun se fut retiré la nuit en sa chambre, en son premier somme luy sembla qu'ainsi qu'il alloit espouser Lucelle, l'Emperiere Niquee se presentoit, qui luy chantoit ceste leçon en grand colere. Amadis, Amadis, & qu'est cecy que vous allez faire, est-ce la façon en ce cas de conter ainsi sans son hôte, & de prendre vne secōde femme, la premiere viuante encores? Est-ce la recompense de l'amour loyalle que vous ay portee, & du grief martire que ie souffre de vostre absence? Aumoins si n'avez autre respect à vostre Niquee, regardez l'offence qu'allez commettre cōtre Dieu. Il luy fut auis à l'heure qu'il la vouloit accoller la larme à l'œil, mais quelle luy tourna visage comme fort courroucée, dont il luy commença à dire: Helas, ma dame ne tenez ceste rigueur à celuy qui n'eut iamais attéré cest affaire sans l'opiniō qu'il auoit q̄ fussiez morte. Vous en deuiez (dit elle) auoir plus certaine assurance si folle amour ne vous eust auéglé & transporté. Ce dit, elle disparut, & il demeura si penetré & outré qu'il s'esueillit en sursaut, resolu par ceste vision que sa Niquee viuoit encores, & qu'il ne cesseroit de la chercher tant qu'il l'eut trouuee: aussi qu'il romproit le fil qu'il auoit ourdy & traîné avecques Lucelle, pour ne faire tort à vn coup à deux telles dames desquelles il portoit tant d'obligation d'amitié qui l'astreignoit à fidelité & l'oyauté pareille. Plus il ne peut durer sur la plume, & se leua &

promena par la chambre, assablé seulement d'vn maectau de nuit, basillant le discours qu'il auoit à faire avecques Lucelle, pour partir de là le iour mesme. Si s'en alla le matin au leuer de la royne Leonorine sa seur, laquelle il pria de mander la princesse: qui y vint incontinent fort triste & pensue, estimant que ce fust pour mettre fin aux noces, de luy tant desirées, & d'elle non. Elle venue il la prend par la main & la tire à part en vn coin de la chambre, ou ilz s'alsirent l'un aupres de l'autre, & il luy commença ceste harengue: Ma treschere dame vous n'estes du tout ignorante de la puissance d'amour: à laquelle les plus sages du monde n'ont iamais sceu resister. C'est à luy le blâme du pourchas trop importun dont ie puis iusques icy auoir usé en vostre endroit, avec l'exculé legitime que me peut donner la singularité de vostre obiet qui faisoit impresion en moy si vehemente.

Mais d'autant que des personnes grandes (telz qu'a pleu à Dieu nous faire) tous les faitz doiuent estre exemplaires, conduitz & reiglez par raison: i'ay par icelle combattu & refrené mon affection si violente enuers vous, en considerant le tort que i'estois prest de vous faire, vous espousant sans autre certitude du decès de l'Emperiere Niquee dont auendroit grād scandale & trouble au cas qu'elle se trouuast pleine de vie. Pour ce ay arresté de vous remercier, & ensemble quitter & descharger de la promesse que ma'uez faite, qui maintenant estoit preste à accomplir. Ce sera pour vous faire cognoistre l'iniure que faisie à vostre Amadis de vous defier de sa vertu, & de presumer en luy vilenie qui onques n'y repaïra. Voylà ce que i'auois à vous dire, pour prendre congé de vous, & vous deliurer du pesant fais que bien vous voyois porter de ce fait cy comme esloigné de vostre volonté & accordé bon gré mal gré à mon instante poursuite. Lucelle fut autant esbahye de ce propos que iamais auoit esté, oyāt tout le contraire de ce qu'elle attendoit veu leurs parolles & conuenances precedentes:

M

& com-

& comme rauie d'aïse de ce coup ainsi rôpu à son souhait, respondit à l'Empereur: Monsieur si tous voz faitz n'auoient tousiours esté admirables, i'aurois à ceste heure grande occasion de m'esmerveiller du propos qu'ores m'avez tenu: auquel me semble qu'avez autant d'honneur qu'en toutes les victoires dont vostre renom vole par l'univers. Car es autres cōfins vous avez vaincu les plus vaillans du monde, & en cestuy avez surmonté Amadis de Grece vainqueur de tous les humains. Et quant à moy trop plus m'avez rendue vostre que parauant, & plus contente & satisfaite d'auoir assis mon cuer en lieu si prudent, constant & vertueux. On parle de gens qui iadis se sont lancez en feu ardent pour quelque fin glorieuse, mais vous estant embrasé en vne flamme d'amour à nulle autre seconde, l'estaignez d'une façon trop estrange & quasi incroyable, monstrant que ne la sentez non plus que les trois enfans hebreux qui chantoient en la fournaïse. Que vous puisie dire d'auantage? sinon qu'en ce cas vous monstrez autant sage qu'on vous a cognu preux & vaillant. Dequoy pour mon regard ne vous sçauois rendre graces suffisantes.

Or allez mon loyal amy voguer en la mer amoureuse, & le dieu d'icelle vous y doint bon vent. Pésez que nauiguerez desormais entre deux nortz, que quand l'un apparoiſtra, vous perdrez l'autre: vostre Niquee est l'Artique, & moy l'Antartique: si vous la trouuez, vous me perdrez: & si elle est perdue, me trouuez la plus vostre que fut iamais amante. Amadis fut fort content du contentemēt qu'il vid que sa chere Lucelle conceut de sa resolution: luy repliquāt que si aucun honneur y auoit en cest affaire, elle seule le meritoit tout, qui par sa constante honnesteté auoit abbatu ses assaux & attrempé ses enflambez desirs, que dieu auoit depuis inspirez & regez en meilleure voye. Ainsi finirent leur deuis, au grand regret de tous deux, pour le brief departement qui s'alloit faire, que toutesfoys ilz dissimulerent, parāt de l'escu d'honneur aux

coups mortelz de l'amour. Adonc s'en allerēt chez la Royne qui estoit prestē de sortir de sa chambre. A laquelle l'Empereur declaira le vouloir qu'il auoit de partir, puis qu'il leur auoit rendu Lucelle a port de salut, tellement qu'il ne fut possible à Leonorie sa seur de l'arrestier plus que ce iour, luy ayant fait entendre le soucy continuēl qu'il auoit de sa chere Niquee, de laquelle il retournoit à la queste, qui luy auoit esté destournée par l'heureux recouurement de la Princeſſe. Le roy qui ne l'oloit retenir d'auantage, craignant faire tort à ses desseins, le conduit l'endemain plus d'une lieue. Et ainsi s'en alla au grand regret de sa bonne seur qu'elle n'en pouuoit iouir plus longuement, & à trop plus grād de la Princeſſe Lucelle, qui ne luy sceut desserrer vn seul mot, & ne luy dit a dieu que des mains jointes aux siennes, & de l'œil baignant en piteuses larmes. Or s'en va il accompagné de sa seule Finistee, laissant encores là le geant Mandroc, à qui Lucidor fit de grans dons: puis il se retira en son chasteau ou la belle geante Gadaleſe sa femme l'attendoit en grand deuotion.

Comme l'Empereur Amadis & Finistee aborderent en vn Isle ou ilz seiournerent long temps & de l'estrange auenture qui leur y auint.

CHAP. LXXVII.

L'Emperer party de Paris avec son escuyere Finistee, gaigna la mer, & cheuaucha long temps sur la riuē. Puis vn iour voyant vne barque de peſcheur s'auisā & dit à sa damoyſelle qu'il luy prenoit enuie de soy mettre sur mer, & de s'abandonner à la mercy des vens pour attendre telle fortune que Dieu luy vouldroit enuoyer pour punition de ses offēces. Ce qu'il luy disoit pour l'auertir du party qu'elle auoit à prendre, ou de le ſuiure, ou de le laisser. Mais elle luy respondit, que tant que sa compagnie luy seroit agreable, elle ne partiroit iamais d'avec luy, si la mort ne l'en ſeparoit. Dequoy il fut tresaiſe, pour le

serui-

seruite cordial qu'elle luy faisoit & rencon-
fort en ses ennuy: luy disant qu'il en estoit
tresioyeux, & que depuis qu'il l'auoit ren-
contree il ne tenoit vie que d'elle. Si
entrerent en la barque, quelle paya au dou-
ble, de l'argent dont la Roïne Leonorine
l'auoit bien garnie. Et ainsi s'en vont com-
me le vent les pousse, non sans grād frayeur
de Finistee pour les vagues qui quelquefoys
les iettoient çà & là: tant qu'ilz aborderent
au bout de quinze iours en vne Isle, avec
telle impetuosité que leur vaisseau se mit
en maintes pieces. Toutesfoys Amadis
se sauua & Finistee, & leurs montures aussi.
Dequoy ilz remercierent Dieu & monte-
rent à cheual pour aller cognoistre en quel-
le terre ilz estoient descenduz mais ilz la
trouuerent toute deserte sans y voir vne seu-
le personne qui leur en querellast le dom-
maine. Parquoy s'en reuiennēt au lieu d'ou
ilz estoient partiz: ou l'Empereur fit reso-
lution de vaquer à oraison & faire peniten-
ce, iusques à ce qu'il pleust à dieu de le tirer
de là, ou de ce mode: ear il voyoit bien que
ceste contree estoit fort esquaitee en mer,
& peu hantee des navigateurs, veu la desola-
tion du pais, ioint que leur barque estoit
rompue, qui les priuoit de toute esperance
d'en pouoir sortir. Finistee qui n'auoit
autre but en sa vie ny autre contentement
que d'estre tousiours pres de celuy que son
ame pensoit, contemploit, & adoroit iour
& nuit, luy dit qu'elle estoit toute disposee
à mener telle vie avecques luy qui ne luy
pouuoit estre dure ne grieve veu qu'elle
y auoit son tout, sans aucun regret de cho-
se qu'il fust au demeurant du monde. Et
qu'assez il se pouuoit asseurer d'elle quant
à concupisence deshonneste, veu la compa-
gnie qu'elle luy auoit fait iusques là sans
aucun signe de vilennie. Amadis s'esioit
grandement du bon cuer de sa damoyelle
qui luy allegoit fort le sien, en se complai-
gnant à elle de ses amours & raisonnant
souuent, comme si sa Lucelle ou Niquee
eussent esté presentes. Ceste determination
donques faite entre eux, ilz se mirent à

commencer mesnage: Amadis de son espee
acoutire vne loge entre des arbres: elle avec
vn fusil allume du feu & amasse des fueilles
seches pour leur couche & du boys pour
leur cuyfine, qui fut des fruitz qu'ilz trou-
uerent en quelques arbres, & des oyseaux
que l'Empereur tuoit d'vn arc qu'il fit, du
quel il s'esbatoit apres qu'il auoit acheué
sa deuotion. Or deuez entendre qu'ilz
menerent longuement ensemble ceste au-
stere & sainte vie: tant qu'vn iour se pour-
menant vn peu au loin au pourchas de leurs
viures, Finistee rencontra vn fruit de grand
sauer qu'elle apporta à Amadis, comme
Eue la pomme à Adam: duquel quand ilz
eurent bien banqueté ilz eurent le cer-
ueau ausi layssi & enyuré que s'ilz eussent
beu d'autant des plus forts & fumeux vins
du monde. Tellement qu'ilz commence-
rent à rire & gaudir & s'entredire sonnettes
voire passerent si auant qu'ilz se baisent &
accollent, iettans finalement le froc aux
orties. Que vous diray-ie d'auantage? tant
dura le vin, tant la feste, qui fut enuiron vn
moys que ce fruit de vie tournit leur table.
Dieu sçait si Finistee estoit lors conten-
te, iouissant du bien que seulement elle
n'auoit iamais osé esperer, & s'il luy de-
pleut quand ceste douce pitance leur fail-
lit. Bien est vray que tous deux auoient
perdu l'entendement, & estoient comme
noyez en vne oubliâce & mescognoissance
de soy-mesme: En sorte que l'Empereur
ne pensoit & ne se souuenoit estre Amadis
de Grece, & ausi peu se recognoissoit Fini-
stee. Ce fut le beau du ieu quand le ventre
enfla à la damoyelle: car ilz estimerent que
ce fut de quelque maladie pour auoir trop
mangé de ce fruit, au moyen qu'il ne leur
souuenoit de chose qu'ilz eussent faite du-
rāt ceste nourriture & yraison. Puis au ter-
me naturel qu'elle sen tir mouuoit l'enfant
y eut bien des admirations des deux costez:
Amadis se fondant en philosophie qu'el-
le auroit conceu de quelque vent qui en-
grosse les iumens en Espagne. Encores plus
beaucoup y en eut quand l'enfant vint à

naître, portant en la poitrine la marque de l'espée ardente comme Amadis. O dieu (dit alors) quel miracle montres-tu icy à ces pauvres seruiteurs solitaires? Bien faut (disoit à l'accouchee) que cecy soit procedé de la vertu de l'ymagination assidue de vostre amour enuers moy, que les medecins dient causer d'estranges & prodigieux effectz en nature. Somme l'Empereur la gouerna & traitta fort amiablement en sa gesine, comme il y estoit bien tenu: & esleuerent l'enfant soigneusement, qui estoit beau à merueilles: auquel le bon pere ignorât passoit le temps apres ses prietes & oraisons. Finistee en estoit toute assottee le voyant ressembler à celuy que tant elle aymeroit, & le nommerét Silues du desert, à raison du lieu de sa naissance. Lequel creut tousiours en beauté quand & l'aage, & seruit de grand deduit à l'Empereur tandis qu'ilz furent en ceste Isle: la ou pendât qu'ilz acheuent leur temps destiné, retournerons à l'Emperiere Niquee qu'auons laissée en la compagnie des princes ses bien aymez, singlans en haute mer.

Comme la nef en laquelle estoit l'Emperiere Niquee, & les autres princes fut ietee par tempeste en l'isle incognüe: & des estranges merueilles qui leur apparurent auant que la voir.

CHAP. LXXVIII.

LA nef en laquelle voguoit l'Emperiere Niquee avecques Florisel & les autres seigneurs & dames, nauiga par bonace ne scay quâts iours, puis leur suruint la tourmente qui en dura bien huit: au bout desquelz les lança en certain quartier de mer qui sembloit tout plein d'escueilz, rocz, bancs, & abismes. Parquoy craignans en vn endroit de l'aborder les mariniers ietterent la sonde pour scauoir la profondeur de l'eau qu'ilz ne trouuerent que d'environ huit brasses, adonc calerent voile de peur que le vent ne les allast eschoüer en quelque banc & ietterent les ancres & surgirent la, attendans changement de

temps pour en sortir. Estans ainsi à l'ancre sans voir autre chose que ciel & mer s'enuyoyent grandement quand ilz furent tous esbahis d'ouïr vn grand nombre d'instrumens de musique sonnans tresmelodieusement: qui les attira tous au bord du nauire du costé ou l'armonie s'entendoit: & virēt la mer escumer en cest endroit à grosses ondes, puis leur apparurent infinies belles Seraines chantans d'vne douceur incroyable, qui estoient belles pucelles depuis le nombril en haut, & tout le bas en poisson. Ayans cessé leurs accords elles s'escarmoucherent sur l'eau, les vnes courans deça, les autres de là, de viffesse de vrays dauphins, & s'entrecroisans en guise d'ieu des barres. Apres auoir bien couru s'esleuerent en l'air en forme d'oyseaux & degoiserent leurs ramages les plus delicieux & plaisans que iamais rossignolz & linottes degorgerent parmy les bois. Adonc au lieu d'ou elles estoient leuees apparut vne fort belle grosse tour, & peu à peu s'en descouurirent quelques autres moindres, qui toutes ensemble rendoient la forme d'vn tresbeau chasteau: duquel leur sembla sortir vne grande troupe qu'ilz cognurent à l'approcher estre dragons volans, qui commencerent à batre la mer de queue & d'ailes si furieusement que les ondes en regorgeoient hautement, & à la fin toute la place qu'ilz occupoient se monstra vne belle Isle, & les dragons conuertiz en beaux arbres. Du port de laquelle virent incontinent partir vne galere tendue & tapissée de draps de soye, & conduite à la rame par douze filles de bonne voglie, toutes vestues de fine escarlade, & en poupe seoit vn venerable vieillard, les cheveux & barbe blancz comme neige paré de veloux bleu, qu'ilz cognurent bien tost estre le sage Alquif. Adonc dit Florisel, ne vous fiez iamais en moy si nous ne sommes arriuez en l'isle incognüe qui se cache & descouure à la seule volonté d'Vrgande la mescognue. Aussi estoit il vray & les sages les y auoient attirez pour les raisons qui se dirōt cy apres: lesquelz auoient

auoient induit le songe à la Princesse Alastraxeree, qui l'amena au secours de Falanges son mary : pareillement leuerent la tempeste qui porta Florisel à leur ayde pour la deliurance de l'Emperiere & des autres Princes & dames. Ce que ces grandz magiciens n'auoient cessé de bastir par leurs artz & sciences, depuis qu'ilz eurent transporté le Roy Amadis & Oriane, songeans continuellement à la conseruation de ceste treslustré & excellente maison. Il n'est possible d'exprimer la ioye qu'eut ceste noble compagnie, recognoissant leur bon amy Alquif, lequel entra en leur nau & voulut baiser les mains à l'Emperiere & à toutes autres Princesses & seigneurs ; mais ilz ne luy souffrirent, ains l'embrasserent tous par grand amour, louans dieu de si heureuse rencontre. Or quand il s'adressa à Rogel fort esbahy de sa beauté singuliere, luy demanda s'il le tiendrait pas en tel lieu que ses peres. Mon bon seigneur (respondit) ie suis obligé par eux à vous coucher en estat du meilleur amy que nous ayons, & à vous honorer comme vn des premiers hommes du monde. Autant en demanda le vieillard à Filisel, Leonide, & Anaxare : de laquelle il dit au Prince Falanges que dedans peu de temps il tomberoit en ses lacs sans preiudice toutesfoys des amours de ma dame Alastraxeree. Mon bon amy (respond le Prince) il ne faut attendre iour n'y heure, tant ie suis desia seruiteur de sa bonne grace.

Dequoy la pucelle rougit, disant qu'ilz luy faisoient plus d'honneur qu'elle ne pouoit meriter. La compagnie fut fort esbahie de ce propos, ne sçachant quel sens y donner : mais gueres ne tarda à estre verifié & entendu. Apres print Alquif la petite Fortunie entre ses bras, qui lors auoit bien huit ans, car autant fut sa mere en prison, disant : Mignonne seconde Diane en naissance, & sans premiere en beauté, puis que Fortune vous à battisé de son nom, vous iouirez d'elle sans luy estre sugette, ains tout ployera souz vostre excellence. Ce qu'il disoit à cause de sa perfection n'ompareille

qui subiugua par amour tous les cheualiers de son temps, sans en sentir onques vne seule estincelle d'affection, d'autant qu'elle faisoit son conte, puis que dieu l'auoit creée & formée plus belle que nulle autre, qu'elle ne vouloit laisser souiller ceste parcelle de deité aux mains humaines. Parquoy voua & consacra sa virginité à dieu & se rendit en religion vn peu sur l'age, à cause que ses parens ne luy voulurent plustost permettre, pour l'honneur que la Grece receuoit par son moyen, étant peuplée des meilleurs cheualiers de tous pais, venans presenter leur seruite à sa beauté. La perite leur donna plaisir s'effrayant de sa figure vieille & chenuë, & tendant les bras à l'Emperiere qu'elle accolloit & baisoit, puis tournoit la face vers Alquif, soudain se cachoit au sein de sa mere. Alors dit le bon vieillard aux seigneurs, qu'il les prioit de venir au chasteau à cause qu'Virgande pour son indisposition ne leur pouoit faire la reuerence. A quoy ilz s'accorderent tres-voluntiers. Si entrèrent en la galere pour prendre terre, & trouuerent le chasteau de tresbelle architecture, avec le plaisir des grosses fontaines pissans en la maistresse court. Alquif les mena par vne sale en la chambre d'Virgande qui estoit au lit fort passe & deffaitte par longue maladie : & receut si grand aise de leur venue qu'elle fut long temps sans pouoir parler. En fin apres les amiables embrassemens on leur apporta des sieges à l'entour du lit, & elle leur dit. Làs mes bons seigneurs & dames comme vous pourrois-ie suffisamment remercier du bien & honneur que me faites que ie vous aye peu voir encores ceste foys auant ma mort ? Or vienne maintenant quand elle voudra, car mon ame partira toute allegee, & pense bien estre en voye de saluation, voyant icy mon lit tât circuy & environné d'anges : qui me donnent vne gloire me faisant quasi auant goûster celle que j'espère au ciel. Adonc saisissant l'Emperiere d'une main, & la petite Fortunie de l'autre leur dit : Ma dame ne pouuant ores iouir du corps de mōseigneur l'é-

peteur, vous menez quād & vous son ame: car elle l'est sans point de faute, comme la plus belle creature qui onques nasquit, aussi du plus beau & vaillant prince qui fut iamais ne sera. Et ne desplaist à tous les seigneurs du monde de ceste iuste preference de l'incomparable Amadis de Grece. Nous en receuons plus de gloire que d'enuie respond Falanges: mais Florisel & son filz mesme n'en furent gueres contens, combien qu'ilz n'en montraient le semblant. Lors Vrgande se tourne vers Alastraxeree, disant: Ma Dame il y a auourd'huy au monde vne seconde Alastraxeree en beauté & valeur portant nom de Daraïde, à qui vous estes comparee par tous ceux qui la voyoient: & vous dy que ne recouurez ce qu'avez perdu iusques à ce que Daraïde ait perdu son nom, laissant toute sa gloire en la main d'Agefilan: mais trop luy coustera de son sang à gagner ceste victoire. La compagnie fut grandement esmerueillée de ces paroles, ayant desia cognoissance des faitz de Daraïde, laquelle ilz entendoient deuoit estre vaincue par Agefilan. Les deux princesses auoient la larme à l'œil pour la memoire qu'elle leur auoit rafraischie, à l'une de son mary, à l'autre de son filz: à qui elle dit en continuant: Mes Dames resiouissez vous d'autant que les grands affaires rapportent les grands honeurs. Et sçachez vous Rogel de Grece Cheualier bien fortuné, per de la Daraïde sans autre per, que par vostre accouplement la parfaite espouse sera esmaillee du vermillon du precieux sang de Grece: dont la gloire de voz pensees par tel martire sera exaltee. Plus esbahis encores furent tous de ce propos que de l'autre, & iugeoient le mariage de Rogel avec Daraïde. Et telles autres profeties chanterent les sages à tous les seigneurs & dames de la compagnie, qui trop longues seroient à reciter, sans toutes-foys leur en ouuir l'intelligence: disans, que l'ordonnance du cours fatal & communiee à peu, demeurant la disposition en la main diuine. Apres ce deuis il fut heure de soupper, qui fut tresom-

ptueux & delicieux, estant ceste troupe esleue, serui par belles filles & en sales, qui leur estoient magnifiquement appareillees. De sorte que point ne leur ennuyoit en ce lieu, & y sejournerent en grand soulas l'espace d'un mois: leurs donnans les sages des passe temps nom-pareilz que vous deduiray presentement.

Comme Alquif & Vrgande monstrent aux Princes & Princesses dedans le miroir de la tour de leur chasteau vne plaine aventure lors auenant en l'Isle de Guindaye.

CHAP. LXXIX.

AYans ces Princes & Dames esté en l'Isle incogneue desia huit iours, Alquif & sa bonne femme pour leur faire euitier ennuy leur preparerent un singulier esbat: mais auant que leur liurer, il leur dit, estans assemblez pres du lict d'Vrgande. Messeigneurs & Dames vous avez eu quelque cognoissance par le passé, de la volonte qu'auons ma femme & moy disposee à vous faire seruice: laquelle augmentant de iour en iour nous a induit à chercher par noz arts depuis huit ans en ça le moyen de vous prolonger les vies outre le commun cours des hommes: & tant y auons pené & traouillé ne laissant ny oubliant en contrec qui soit, pierre ny herbe, beste, ou oyseau, ne mineral seruant à cest effet. Or pour le vous donner à entēdre, vous sçavez que le temps qui tout fait, tout defait semblablement: contre lequel auons dressé nostre artillerie de bains & esleutaires dont il vous faudra vser, & ilz vous conserueront iusques au bout prefix & limité de Dieu à chacun comme en fleur & vigueur de trente ans. Ce que nous donnerons à tous ceux de vostre lignage: voire & à ceux & celles qui y prendront alliance de mariage iouront de pareil priuilege: c'est à sçauoir qu'au cas qu'ils ne deussent viure, que quarante ou cinquante ans, à cause de la corruption qui s'engendre es humeurs du corps par plusieurs excez ou inconueniens de maladies, le remede par nous inuenté (appellé la liqueur

queur aeree & diuine) purgera tellement toute ceste superfluité ou putrefactiō qu'ilz vivront cent ans ou plus, & en verdeur d'age, combien que celà n'empeschera la blancheur de la barbe & cheueux en sa saison.

D'auantage nous avec la Roynie d'Argenes ayans retiré & transporté le Roy Amadis, & la Roynie Oriane en lieu preseruatif de leur fin, & considerant que pour la retarder il nous les conuenoit tenir tousiours enchanterez & comme en vn continuél somme: qui priuoit leurs parens & amys du fruit de leur tant vtile & honorable compagnie, & eux pareillement du plaisir de la conuersation de leurs descendans. A ceste cause auons quiz per long estude & trouué le secret de les conseruer avec toutes ces commoditez tant desirables. Vray est que leur desenchancement ne sera present, ains reserué au dernier de la race que tous cognoissez (& ietta l'œil sur Rogel de Grece) avecques sa nouuelle amye qui n'est pas loin d'icy. Du surplus vous me pardonnerez si ie ne vous deuise plus amplement, pour ce que les destinees fatales nous sont defendues à decouurir. Rogel oyant ce propos en conceut vn merueilleux contentement, qu'il dissimula le plus qu'il luy fut possible, mesmement sentant la communication de cest honneur tomber sur sa Leonide, à laquelle la couleur en monta au visage, quelque peine qu'elle print à cacher l'affection extreme qu'elle luy portoit. Or apres ces discours prophetiques Alquif les conuia à venir voir le secret cabiner de la tour qui leur auoit esté fermé iusques à ce iour. Auquel ilz virent vne grosse pomme ronde assise sur vne colonne estant d'une certaine matiere luyfante qui rendoit les ymages comme vn miroer. A l'entour y auoit vne ceinture de banc, ou il les fit tous assioir, & qu'ilz verroient en la boule quelque auenture occurrant par le monde, car ilz ny voyoient seulement que ce que bon sembloit à Alquif. Adoncq chacun d'eux desirant voir ceste merueille, iette l'œil curieusement sur la pomme, & voyent comme le cheualier du Fenix & ce-

luy à l'escriteau estans partiz de la cour de la Roynie Sidonie, en intention de roder l'Isle de Guindaye pour esprouuer les auentures & aquerir los & pris, entrent en vne plaisante forest, demeurans leurs escuyers fort loing derriere, à cause qu'ilz voyoient leurs maistres prendre plaisir à deuiler seulz. Si rencontrent vn Cheualier souz vn arbre armé de toutes pieces fors du heaume sur lequel il auoit la teste appuyee, estant couché sur le doz pour cueillir la frescheur à l'ombre, & tenoit par les resnes vn cheual fort las. Eux approchans de luy le saluèrent, & luy eux: puis luy demanderent qu'il faisoit la: i'atten, dit il, les Cheualiers errans à passer, pour les auertir d'une tresbelle auenture qui n'est pas loing d'icy. Ilz le prient de la leur enseigner. Et celuy qui estoit gracieux & courtois leur respond, qu'il feroit plus pour eux, car il leur seruiroit de guide par ce que c'estoit en lieu destourné ou ilz se pourroient esgarer, & qu'en chemin il leur raconteroit que c'estoit. Il nous faudroit vn peu attendre noz escuyers (dit Florarlan) de peur qu'ilz ne nous perdent. L'autre respond qu'il n'auroit pas loysir, mais qu'apres leur auoir monstré le lieu les remettrait en chemin ou ilz les trouueroient. A quoy eux s'accordans il les mene par la forest en vn destour, & ilz le prient de leur dechiffrer le cas. C'est, dit il (leur monstrant desia le logis situé au mylieu d'une prairie, ou y auoit vne petite porte & vne fenestre au dessus fort haute) que ceux, qui montent en la chambre dont voyez la fenestre, ilz scauent le secret du cueur de tous ceux qui sont en leur compagnie. Vrayement, dit Artaxerxes, onques n'ouy parler de plus belle auenture.

Assurez vous qu'il est ainsi (dit le cheualier) & bien tost en cognoistrez la verité.

Ainsi arriuerent à la tourelle, & il s'offre à tenir leurs cheuaux tandis qu'ilz yroient la d'autant que quant à luy souuente fois auoit esprouné l'auenture. Eux allans à la bonne foy, descendent incontinent & le remercient de la peine quil vouloit prèdre. Si

entrent en la tour & par vn escalier montent en la haute chambre. Le cheualier si tost qu'il les vid dedans met pied à terre & va fermer la porte du logis sur eux d'un verrouil qui estoit dehors, puis remonte sur vn de leurs cheuaux & mene l'autre en bride. Adonc appelle à haute voix ceux qui estoient en la châtre s'entregardas comme iouans à l'esbahi, & mirent la teste à la fenestre au cry qu'ilz ouïrent. Ausquelz dit le cheualier: Messieurs sçavez vous pas desia bien ce que ie vous auois promis que sçauriez? Et Florarlan luy respond: qu'il voudroit biē sçauoir pourquoy il auoit pris son cheual en laissant le sien. Je le vous diray (replique l'autre) à fin que ne vous plaignez de moy que vous eusse failly de parole. Vous devez entendre qu'estes montez la haut comme gens mal auisez desirans voir choses impossibles, & ie vous y ay adressé pour auoir voz cheuaux qui me sembloient beaucoup meilleurs que le mien. Ainsi voyez vous cōme auez appris ma pensee & celle l'un de l'autre. Eux bien fachez d'estre tellement trompez & abusez luy dirent qu'ilz pensoiēt bien que ce qu'il en auoit fait estoit par gayeté de cuer. Ony (dit il) & pour vous donner vne troufse & affiner les fins. A ce mot ilz cognurent que c'estoit le fraudeur: & Artaxerxes fort courrouché luy dit: Paillard si ie te puis tenir entre mes mains ie te feray payer à vn coup toutes tes fraudes & trahisons. Je suis aussi asseuré (respōd le fraudeur) que ne me tiendrez maintenant comme ie tien & emmene vostre cheual, & que le mien (tant bien est stilé) viendra apres. Mais en troque ie vous dōne en ceste tour à chacun vne place de morte paye: car c'est raison que soyez traittez selon l'vlsance de la terre ou vous estes appartenant au fraudeur. Ce dits'en va avecques ces cheuaux: & ilz le rappellent à gorge deployee. Parquoy reuient à eux leur disant qu'ilz auoient iuste occasion de le rehucher d'autant qu'il ne leur auoit du tout accomply sa promesse, c'est à sçauoir de leur monstrier la voye pour ne perdre

leurs escuyers, qui est de les mener tousiours quant & eux, sans plus les laisser derriere. Toutesfoys ne laissez pas à les reclaimer, par ce que s'ilz sont aussi legers & volages que leurs maistres ilz ont alles pour venir au reclā. Or demeurez en malauenture puis qu'elle estoit necessaire à la mienne bonne. Ainsi deloge le bourdeur, & les deux cheualiers demeurent estonnez regardans l'un l'autre. Mais en fin avec tout leur ennuy ne se purent tenir de rire: disant Florarlan: Par dieu mon compagnon il est quasi bien employé que soyons ainsi gabbez & deceuz d'auoir creu vne si grand folie: ce chastiment nous rendra desormais plus discretz & moins credules. Puis luy monstrant la belle veüe du païs: & que nous faut il en ce lieu de si plaisante situation? c'est (respond Artaxerxes) grand viande pour nostre soupper. Or dit Florarlan: Je suis d'avis qu'vnsions du conseil de nostre ennemy mesme, en appellant noz escuyers à haut cry, attendu que la voix retentira par le boys & ne sommes pas si loin du chemin qu'elle ne porte bien iusques là: ou pour le moins qu'ilz ne l'entēdent s'ilz s'escartent tant soit peu deça pour nous chercher. Lors appellē leurs escuyers par leurs noms, & quand l'un cesse l'autre recommence: tellement qu'à ceste hueue vindrent force bestes paissans en ce boys, que lon clamoit ainsi ordinairement pour leur bailer quelque pasture. Dequoy Florarlan se print fort à rire, disant à son compagnon voylà pas bien dequoy viure, & vous auez peur que terre vous faille? Apres ilz continuērent tellement à hucher que leurs gens en ouïrent le son & y accoururent, fort esmerueillez de les voir nichez la haut. Si leur ouurent la porte & ilz descendent & leur en font le conte, maudissans le diable de fraudeur. Lequel se presenta à eux sur le chemin estans montez sur les roucins de leurs escuyers qu'ilz portoient en croupe: Mes bons seigneurs, dit il, d'assez loin, i'estois venu voir si par quelque ruse pourrois auoir les cheuaux de voz escuiers, parce que les

que les vostres ne font qu'hannir de regret. Artaxerxes creuoit de despit qu'il ne pouoit auoir la raison du galand, qui voltigeoit pres d'eux monté à l'auantage & sur le leur: à qui il dit, que puis qu'ilz ne luy vouloient faire ceste liberalité des roucins, les commandoit à Dieu avec leurs Damoyelles crouppieres. Eux sans rien luy respondre, de dueil gaignent l'hostel du forestier, qui leur fit bonne chere de ce qu'il eut, pendât que l'un de leurs escuyers retourna vers la Royneluy porter ces nouuelles (dont elle rit merueilleusement) la requerant de deux autres cheuaux qu'elle leur enuoya volontiers, lesquelz arriuez, allerent continuans leur entreprise par l'Isle. Moins aussi n'en riront les princes & princesses qui tout cecy voyoient au miroir d'Alquif, lequel prieret de leur monstrier Diane dont il estoit si grand bruit de beauté par le monde: laquelle ilz virent accompagnée de la Duchesse & Marquise en contenance fort triste pour l'absence de sa Daraïde toutesfoys la iugerent telle que la renommee portoit sans recevoir comparaison d'autre quelconque. Et de sa perfection furent tous leurs deuiz du soupper qui fut avec Vrgande, & apres se retirerent pour reposer en leurs chambres.

Comme les sages monstrent encore aux Princes & dames dedans le miroir de la tour vne autre plaisante auenture de l'Isle de Guindaye.

CHAP. LXXX.

EN grand soulas estoient les seigneurs & dames en l'Isle incognue avec Alquif & Vrgande: & pendant qu'elle se rēforçoit de la lōgue maladie, il mettoit peine de donner de iour en iour nouueau passe temps à la compagnie, à fin qu'il ne leur en nuyast en ce lieu, ou il leur cōuenoit attēdre la parfaite conualescēce d'Vrgāde qui leur dressoit vn voyage. A ceste cause le sage les voulut mener de rechef en la tour du miroir pour leur y monstrier quelque autre plaisante auenture, auenant en l'Isle mesme de Guindaye. Mais auant leur demanda

s'ilz pourroient passer vne nuyt sans dormir pour prendre cest esbat: ce qu'ilz luy promirent volontiers, disans que ce seroit au danger que ceux qui ne pourroient veiller en perdroient leur part. Parquoy vn soir apres soupper les meine au secret cabinet de la tour, ou ilz s'assirent comme deuant, & virent au miroir ce qui s'ensuit. Vous auez desia entendu comme la damoyelle Galtazire partit de Tessalie accōpagnée des deux vieillardz Barbaran & Moncan portans à Diane vne lettre de sa Daraïde avec le present du Caualion. Or arriuerent par bon temps en vn port de l'Isle de Guindaye, en uiron trois iournees loin de la cité ou la Royné estoit. Si montent les vieillardz armez sur leurs cheuaux, & Galtazire sur son palefroy, menans l'horrible beste en vn chariot, qui par le chemin espouuentoit tous ceux qui la voyoient. Auint que comme en cheuauchāt ilz deuisoient du bon tour que leur auoit ioué le fraudeur à l'autre voyage: & moncan disant que celà leur auoit seruy d'vne leçon pour ne croire pas vn autre foys de leger: Surquoy la damoyelle aioustoit que ce seroit trop grand' honte à eux de faire pis, que le chien eschaudé ne retournant à la cuisine. Sur ces propos entrerent en vne forest ou ilz apperceurent vn cheualier & deux damoyelles souz vn arbre acheuans de monter à cheual, lesquelz furent grandement esmerueillez de l'estrangereté de cest animal, & le cheualier apres auoir vn peu parlé à elles (comme de conseil) saluē courtoisement la compagnie: qui luy rendit son salut: & s'enquiert de la forme de ceste auenture, qui luy fut racontee de point en point. C'est vne dame trop admirable que ceste Daraïde (dit le cheualier) la preune que vous en portez. Puis ayant entendu qu'ilz l'alloient presenter à la Princesse Diane, leur demanda s'il leur seroit ennuy de leur y faire compagnie avec ses deux seurs, disant qu'il y alloit pour desfier vn cheualier à outrance qui luy detenoit s'amy, & luy auoit fait iurer par force (le surprenant à son auantage) de ne des-

M s couvrir

couurer la face d'un an à autres qu'à ses deux seurs. Ce vous est vne tresfacheuse suiection, dit Galtazire: mais bien pire, dit Moncā, de luy auoir tollu ses amours. Vous dittes bien vray (respond il) & en suis en tel martire qu'a peu que ie n'en sois hors du sens, d'autant que n'en puis auoir raison que par ce seul moyen de combat mortel, ou il faudra qu'il en couste la vie à l'un ou à l'autre. Ce pendant ie n'ay autre remede à mon tourment que d'estre tousiours en cōpagnie recreatiue pour me distraire de ceste triste pensee. Galtazire luy dit qu'elle estoit fort ioyeuse de si bonne rencontre, & s'estudioit à le consoler de cest infortune d'amour, cōme celle qui gracieuse estoit & bien aprise. Si s'en vont ensemble, & Barbaran & Moncan s'accostent des deux damoyelles demeurans vn peu derriere pour mieux offrir leur seruice & conter à loysir leur petit affaire: car ilz estoient gays & verdz vieillardz, & trouuoient ces deux pucelles tresbelles à leur gré & de fort bonne grace. Lesquelles leur rendoient bien leur change, disans qu'il ne leur sembloit pas raisonnable de donner leur amour (elles si ieunes) à hommes vieux & chenuz, & que ce n'estoit bille pareille. A quoy Moncan respondoit, qu'elles se trompoient de les estimer telz, à cause que c'estoit le naturel de leur pais d'estre ainsi gris en l'aage de trente cinq ans & moins. C'est vne mauuaise proprieté de contree (dit l'une) trop mieux vaudroit auoir le poil noir en la viellesse que le blanc en ieunesse. Qu'il soit ainsi comme ie vous dy, replique Moncan, vous le cognoistrez par experience, si me voulez ceste nuit enteriner ma requeste. I'en croyrois biē quelque chose (dit l'autre pucelle) veu voz propos amoureux, qui ne peuuent bōnement sortir que d'un cueur gaillard de chalureux masse. Certes (poursuyt Moncan) vous parlez en femme d'esperit, & deuez penser quand nous serions vn peu d'aage que telz sont plus sages & plus loyaux amās qu'un tas de ieunes auolez. Or (dit elle) ie m'accorde d'estre vostre

amye, au cas que ma compagne vueille autant de bien à vostre compaignon. Laquelle luy respondit d'en faire tout ce qu'elle voudroit. Dequoy Barbaran la remerciant, elle luy dit qu'il le meritoit: cest donques dit il, d'autant que ie vous adresse mon seruice plus volontiers qu'a nulle autre. Puis que nous voilà tous d'accord (dit Moncan) ne reste mes damoyelles qu'a auiser le lieu & le moyen comme nous pourrons ceste nuit deuiser ensemble en priuauté. A quoy la premiere: nous approchons d'un chasteau qui est à nostre frere ou nous sommes tenues de court & fort sugettes par vne vieille mere que nous auons: qui nous garde si estroittement que ie ne puis penser comme il soit possible, sinon par vne voye trop difficile & hazardeuse. Barbaran disant que c'estoit tout vn, & qu'elle ne fist qu'ordonner par quelle voye & qu'ilz l'excuteroient hardimēt. Elle declare que leur chambre estoit la plus haute du chasteau qui respondoit sur la porte: parquoy s'ilz auoient le courage de l'entreprendre elles leur ietteroient vne corde & ainsi les tiroient à mont: & qu'il faudroit quand chacun se retireroit pour reposer qu'ilz sortissent tous deux hors de la porte. A quoy s'offrāns deliberément: maintenant commence ie à croire (dit la seconde) la complexion de vostre region, tant ie vous voy brusques & prompts à l'esperon. S'il falloit (continue Barbaran qui s'eschauffoit en son harnois) descendre aux bas enfers nous ne craindrions rien pour iouir de telles beauttez: comment donques refuserions nous de monter au ciel pour habiter en la gloire de telz augez? Elles repliquans que bien les y tireroient s'ilz ne poissent trop: respondirent qu'ilz se sentoient voler de ioye, & qu'ilz se desarmeroient pour estre plus legers. Le cōplot ainsi fait, elles furēt d'opinion de piquer pour attaindre leur frere, à fin d'oster tout soupeon: lequel ne faillit pas de presenter le logis à eux & Galtazire quand ilz en furent pres, leur remonstrant que la nuit estoit prochaine, & ne trouueroient logis

a sept ou huit lieus de la . La vieille dame les recueillit & festoya honorablement , & les deux filles seruirent à soupper. Apres lequel (estant chacun retiré en sa chambre) les vieillards qui auoient la puce en l'oreille, ne s'endormirent pas , ains disoit Barbaran: Allon, allon monter en nostre paradis, car ie suis feru au cueur de l'amour de ceste fillette, qui outre sa beauté & gente grace me semble fort sage & auisée. Si est-ce qu'elles le montrèrent assez mal (respond Moncan) de liurer la fleur de leur ieunesse à telz vieux rocards que nous . Laissons cela (replique l'autre) & considerez le peu de semblant qu'elles ont montré au seruice de la table de l'amour qu'elles nous portent: car la dissimulation qui s'en fait deuant les gens & fiction est signe de merueilleuse affecton: vous suffie qu'une bonne nuit s'apreste pour nous . Ouy & non pas pour elles, respôd Mōcan, si l'extremité de leur amour ne supplée la faute de nostre aage . Entelles risées sentans que tout dormoit au chasteau, s'en vont les braues amoureux au lieu assigné: ou Moncan voyant les damoyelles en haut à la fenestre & la corde auallée qui roide & fermée estoit) se mit incontinent en chausses & gippon, puis se lya de la corde par dessous les bras, & leur dit qu'elles tirassent. Ie vous laisse à penser le plaisir qu'auoient lors les Princes & Princesses qui regardoient au miroir d'Alquif, & en quel desir ilz attendoient l'issue de ceste menée, quand ilz virent soudain le galland guindé en haut (cōme on dit de Virgile en la corbeille) que les filles faignoient de tirer à grand peine . Et le tenant au dessus du premier estage nouèrent la corde à l'entredeux de la cloison des fenestres luy disant à voix basse que ne sçauoient à quoy il tenoit, mais possible ne leur estoit de le tirer plus haut: & qu'il falloit essayer si mieux tireroient son compagnon à fin qu'apres il leur aydast à le monter . Dequoy Barbaran (qui desia estoit en pourpoint) ne se fit gueres prier, ayât peur que la nuit leur fust trop courte à l'accoplissement de leur desir. A qui

elles ietterent vne autre corde, & quand l'eurent esleué à la mesme hauteur de Moncan, attacherent la corde semblablement, leur disans qu'elles auoient entendu quelque bruit, & craignoient que ce fust leur frere: mais qu'ilz eussent vn peu de patience & elles retourneroient aussi tost. Adonc elles se retirent: & ces deux mignons de couchette se voyans ainsi en l'air, l'un commença à dire que son esperit luy disoit qu'ilz en auoient d'une. Pleust a dieu, respôd l'autre, qu'il n'y eut que l'esperit interessé, & que le corps ne fust point en ce beau spectacle. Non auons d'une, ce dittes vous ouy bien de deux: car il nous fait asseurer que c'est le mesme rustre qui nous embla noz cheuaux, qui nous fait ceste iolie recharge. Pourquoi se cacheoit il le visage? sinon de peur que le recognussions? Il vaut mieux que nous laissions choir (dit Barbaran) aussi bien nous fera il quelque malheureux tour de son mestier, & serons descriez le matin comme faulce monnoye. Rien, rien, respond Moncan, les fautes d'amour portent tousiours leurs excuses, joint qu'il considéra que si nous auons failly & offensé, nous en auons desia souffert la punition par ceste amende honorable: aussi que noz amoureuses chaleurs auront esté refroidies & attrempees par la fraischeur de la nuit. Sur ces entrefaites voicy reuenir les filles à la fenestre, disans qu'elles leur alloient bailer compagnie propre & sortable: & soudain deualerent le Causlyon & le pendirent entre eux deux. Puis virent saillir deux pages portans deux torches, & le fraudeur apres qui leur cria . Dea messieurs est ce la façon de gens de bien, en recompense du bon traitement que vous ay fait, descheler ainsi mon chasteau, & vouloir violer mes seurs? Et puis vous estes plaintz que vous auois trompez & deceuz à la fontaine dont vous fy boire pour rajeunir, & monstrez icy euidemment l'effet d'icelle en l'Emprise d'amour sentant sa ieunesse frisque & gaillarde. Or pour l'amour que portez à Daraïde, & l'honneur que ie luy veux & desire, j'ay mis

mis ceste beste pour ses armes sur la porte de mon chasteau, ausquelles vous deux de chacun costé seruirez de sauages à les tenir: si mieux n'aymez le prendre de moy comme de chasseur qui pend les hures & peaux des bestes qu'il a prises. Les deux vieillardz de honte ne luy sceurent rien respondre: lequel retiré, les deux pucelles reuindrent les gaudir & railler sans tirer d'eux vn seul mot. Et sur le point du iour sortirent tous ceux du chasteau dançans, chantans, & s'entretenans par les mains, dont le fraudeur marchoit le premier. A l'heure commença Galtazire à s'esueiller, de qui les pauvres amans penduz craignoient plus la reproche que le reste de leur mal. Car quand elle sceut la fortune par les valertz qu'elle menoit, elle cuyda forcener de dueil, maudissant les folz vieillardz & soymesme de les auoir amenez. Et fut encores le pis quand de sa fenestre elle entendit les propos que le fraudeur leur tenoit, apres qu'il eut bien dancé & balé: qu'ilz les estimoit bien niez & prestz à voler pour chappō qui le leur presenteroit. Dequoy Moncan enrageoit priant de plustost luy liurer la mort que telle vergoigne: laquelle il respondit leur estre assez prochain par cours de nature sans l'auancer autrement: & que ce seroit grand dommage de priuer les dames de si iolis & cointz amoureux, voire si alagres & disposz que les piedz ne leur touchoiēt point en terre. Lors auisant Galtazire (qui les regardoit de mauuais œil) luy escrie comme il auoit descouvert les amours de ses deux cheualiers, & ne restoit plus qu'a elle d'y prester consentement. A quoy elle luy respondit, qu'il deuoit penser que telle moquerie s'adressoit à Daraïde qui luy en feroit rendre bon conte: il s'excusa d'autre costé que c'estoit pour la seruir & honorer ses armes. Sur ces entrefaites arrive là vn cheualier de belle taille & bien monté que Barbaran requiert par l'ordre de cheualerie de les deliurer de ce mauuais traitement, dont ilz luy firent en brieuf le discours. Parquoy il en pria instamment le fraudeur, qui estoit rentré dās

son chasteau le voyāt venir & tous ses gens apres luy, & estoit soudain monté en vne chambre regardant celle part. Mais il ne luy respondit que chançons: & l'auisant noir comme vn more, luy dit entre autres choses, qu'il estoit trop differend du blanc pour y mettre le moyen d'appointement. Dont l'autre irrité le semōd de saillir aux champs pour voir s'il auoit autant d'effect que de parole. Et le fraudeur luy dit qu'il eust patience de l'attendre, ce qu'il fit plus d'une grosse heure, disant aux vieillardz qu'il n'esperoit plus qu'il deust sortir. Qui luy respondirent que c'estoit la coustume de ce paillard de n'vser que de mensonges & trahisons, & qu'il feroit œuvre trop meritoire d'en purger & nettoyer le pais. Adonc il se monstra à la fenestre & s'excusa de l'auoir cuydé oblier en desliuant, ioint qu'il l'auoit auerty d'auoir patience telle que doit quiconque assiege vne place. En quoy le cheualier apperceuant certainement de sa moquerie, pique & va trouuer quelques paisans à qui il fait apporter des eschelles qu'ilz vouloit asseoir au pied du mur, si le fraudeur ne les eut eschaudez de lessine bouillante. Toutesfois il ne rompit pourtant l'obstination du cheualier, qui leur commanda de mettre le feu à la porte qui fut estaint par l'abondance de l'eau qu'on ietta de dedans, & eux repoussez à coups de pierres, d'autre iect & trait. Et n'y auoit ordre d'entrer leans sans les valertz de Galtazire, qui voyans tous les seruiteurs du chasteau empelchez à la deffence sur le mur, vindrēt ouvrir la porte & mirent le cheualier dedās: mais le fraudeur se retira au plus fort de la tour qui fermoit à gros huys de fer: auquel le cheualier escria que s'il ne deualloit les deux vieillardz, il mettroit le feu au chasteau. Ce qui effraya la vieille dame à qui le cas touchoit, d'autant que le chasteau luy appartenoit, auquel elle receuoit le fraudeur fauorisant ses fraudes & trōperies. Si lascha les cordes, & eux descēduz reprindrēt leurs armes & cheuaux, s'e allās de la avec le cheualier au grād desplaisir de leur bō hoste.

Comme

Comme estans les sages partiz de leur Isle quand & les Princes furent lancez en vne autre par tempeste, ou l'Emperiere Niquee eut vne fort estrange rencontre.

CHAP. LXXXI.



A Pres que les Princes eurent veu la plaisante fortune des vieillardz, descendirent en grand rísee & se retirèrent en leurs chambres pour recompenser la nuítee en reposant iusques à grand iour. Peu de iours apres estant Virgande en bonne disposition pour faire voyage ilz entrerent tous avec Alquif & elle en vne nef faite & equippee de main de maístre, garnye de châbres, garderoberes & cabinetz: en sorte qu'il y auoit presque toutes les pieces de logis requises à la commodité & vsage d'un grãd seigneur: & par dehors (à ceux qui la voyoient vogand en mer) sembloit vn chasteau accompagné de plusieurs tours. En ceste navigation les sages leur firent raser la coste de l'Isle ou estoient enchantez le grãd Roy Amadis & la Royne Oriane, qui deuoient (comme vous a esté dit) estre rescuillez par Rogel de Grece & la belle Leonide. Dequoy Alquif leur toucha quelque mot couuertement qu'ilz entendirent à peu pres par le propos des iours precedens. Là ilz se re-

fraischirent vn peu du trauail de la marine: puis rembarquerent & firent voile par vn temps huit iours durans, au bout desquelz se leua vne tempeste qui fort les estonna, mesinement les dames quelque assurance que les sages leur sceussent promettre: & coururent fortune trois iours, tant qu'ilz furent iettez en la baye d'une Isle: en laquelle Isle prindrent terre à grand ioye: & Alquif leur y fit dresser vn riche pauillon, avecques litz & tables. Or auint que l'Emperiere Niquee tenant sa petite Fortunie par la main s'alla pourmener le long d'un gros canal d'eau, se voulant escarter de la trouppes pour vaquer à oraison, & pour gouverner seule ses tristes pensees de l'absence de son cher Amadis de Grece. Et si loing marcha resuant profondement qu'elle trouua vne croix, & au pied d'icelle vid vn homme estendu dormant de fort sommeil, & aupres de luy vn petit garçonnnet couché se iouant tout seul de menuz cailloux, qui luy sembla fort beau & de grace iolye. A qui elle

elle demande qui estoit ce personnage: c'est mon pere, dit il, & continuoit son ieu, quand elle l'interroge de rechef comme il le nommoit, de quoy l'enfant se riant luy respond: & vous ay-ie pas dit que c'est mon pere? lequel auisant la petite Fortunie court à elle l'embrasser & elle luy, comme s'ilz se fussent cognuz de longue main, s'entrefaisans vne grand chere. Ce qui donna plaisir merueilleux à Niquee: à qui la façon du riz de l'enfant liura vn surfaict au cueur de son Amadis qui l'auoit tout tel. Et tandis que Silues se iouoit avec la filette & luy taioit sa robe de soye par merueille, & ses autres beaux affiquetz & dorures, l'Emperiere approche du gisant qui tant estoit defiguré & blefme par ennuy & mauuais traitement: & si mal en ordre de sa vesture, qu'il ne luy fut aisé à recognoistre. Toutesfois pour la doute que le trait des lineamens luy donna, le regarda ententiement: & pour s'en assurer luy ouure l'habillement du deuant de la poitrine, ou elle apperçoit la fameuse marque de l'ardante espee: qui luy fit perdre toute vigueur en se laissant tumber la teste dessus luy: puis à chef de piece retourne à soy & le baise & accolle, criant: He Dieu qu'elle merueille est cecy? est-ce songe ou fantosme ce que ie voy & ie tiens? est-ce quelque illusion d'esperitz, ou mon vray & fidelle espoux, la fleur des Princes & chevaliers du monde, mon Amadis de Grece? Helas quelle couleur au pris de sa naturelle, quelz habitz royaux? car il n'auoit qu'une pauvre cazaque d'elcarlate toute vlee & pendant par lambeaux. Tant embrassa la bonne Emperiere celui qui dormoit, & tant de plaintes & clameurs fit sur luy qu'il s'esueilla en colere sentant la bouche de sa chere espouse cõtre la sienne, la repoussant de ses mains rudement, disant encors tout endormy: A à Finistee & quel tour est cecy? vous estes vous gardee si honnestement avecques moy iusques icy pour vous obliger si tard à me commencer ceste vilenie, me faisant tort, & à ma chere Niquee & à vous mesmes! Lors l'Emperiere

luy dit (bien ayse du tesmoignage qu'elle oyoit de sa loyauté sans faulxise) Las mon amy parfait reiettez vous ainsi vostre loyale compagne ne me cognoissez vous plus? Si fay vrayement (respond il les yeux encors mal ouuers) pour la plus fauce & peruerse damoyse de la terre: & vous retirerez à coup si ne voulez mourir de ma main presentement. Ce langage plaisoit fort à Niquee, & se nommant à luy il commence à la regarder autant esbahy ou plus que si vn ange luy fut apparu du ciel. Dieu immortel (s'escrie) ou suis-je, dors-je, ou si ie veille? vueilles par ta grace me preseruer de vision & tentation comme il t'a pleu iusques à ceste heure. Adonc l'Emperiere: Mon trescher amy ie suis vostre Niquee, n'en ayez doute, aussi esmerueillee de vous auoit trouué icy, que vous de moy. L'Empereur la recognoist, estonné de la rencontre pour l'estrangeté du lieu (tel qu'il vous a esté déchiffré) si luy tend les bras au col & la baise sans bouger l'un ne l'autre d'une grand' piece, arrosans leurs visages de chaudes larmes. Puis se retirans pour rendre à l'œil le bien qu'il perdoit pendant le plaisir de la bouche, Niquee recommence contemplant ses longs cheveux & barbe meslez & espais, son teint bazané, sa pauvre & chetive parure: Helas amy faut il qu'ayez tant enduré pour moy miserable? Faut il que le monde ayt souffert eclipte de tel soleil à l'occasion de moy comme lune obscure? Helas amy ie voy comme estes testonné, fardé, reuestu pompeusement pour entretenir les amours nouuelles qu'avez faites en mon absence. O Prince unique tant en affection & fidelité enuers les dames qu'en vertu & prouesse entre les hommes. O corps passe & maigre q̃ bien monstrez qu'ayez laillé vostre ame en moy, oubliant ses offices en vous. Ma treschere dame, respond l'Empereur, ie n'ay fait chose pour vous à quoy ie ne fusse obligé & à plus, en recognoissance de vostre amour incomparable. Mais ie vous prie me dire la maniere comme avez esté transportee en ceste

ceste Isle deserte, tant esloignée des grandes routes de la mer. Ce qu'elle luy narra brievement, dont il fut trop esbahy, desirant aller trouver la noble troupe arrivée avec elle. Et en se levant sur les genoux rendit graces à dieu du present reconfort qu'il luy avoit enuoyé si loing de son esperance. Puis demanda à Niquee qui estoit ceste belle petite fille. C'est (dit elle) le gage que me laissastes à nostre dure departie. Adonc se leue & la va prendre entre ses bras, la baisant plus de cent fois & la petite effrayée de sa barbe horrible & face tant haslée & defaite, le repoussoit d'une main, se cachant les yeux de l'autre. Dequoy se prendrent fort à rire : & la remettant à terre elle s'en va incessamment retrouver le petit Silves. De qui Niquee demanda pareillement à l'Empereur qui il estoit. Qui luy respondit qu'elle le scauroit bien tost, & que le discours en estoit trop long pour avoir la patience de le faire auant que d'aller trouver la compagnie que tant il desiroit à voir. Or y alloient ensemble portant chacun leur enfant, quand Finistee survint pour avertir l'Empereur de disner, bien estonnée de la dame de si haute apparence qu'elle avise avecques luy. Amadis à sa venue luy tend les bras, disant à sa Niquee : Ma bonne amye voicy celle qui m'a tousiours suiuy, seruy & consolé depuis que suis entré en vostre queste : & luy raconta lors en brief les accidens de sa peregrination, la deliurance de sa Lucelle, & l'arrivée en ce lieu inhabité en intention d'y acheuer ses iours en pleurs & prieres, menant le deuil d'elle qu'il tenoit pour morte. Et ie croy (dit il) que pieçà le fusse moy mesme, sans le soulas & confort qu'ay receu de ceste bonne & sage damoyelle : en laquelle vous puis iurer par la foy que ie vous doy, que ie n'ay onques veu ne cognu acte indigne de l'honneur d'une fille chaste & pudique : & est celle à qui ie cuydois parler quand vous ay premièrement sentie pres de moy. L'empereur ayât entendu de luy la forme de son accointance & devotion amoureuse & sainte, la va

embrasser par grand amitié & compassion en ses penailons delabrez, luy disant qu'elle ne pouvoit moins faire pour elle que de l'accoler Roïne de Thebes avec le congé de l'Empereur : qui l'eut autant agreable que chose qu'elle eut iamais faite pour luy. Or s'en vont ensemble vers les seigneurs & dames, qui trop estoient esbahis de la longue demeure de l'Empereur & l'alloient chercher, si les sages ne les eussent asseurez de son retour soudain, avec les plus estranges & meilleures nouvelles qu'ilz pourroient penser. Et quand ilz la choisirent venant avec un personnage si mal en point & réfort de suite furent fort esbahis. Mais tost le reconnut Falanges à l'approcher à son marcher & sa taille, nonobstant le deguisement du visage. Et luy au devant : tout transporté d'aise qu'il ne peut mot sonner. Florisel ne demeura gueres derriere, ne Rogel & Filisiel apres : l'un l'embrasse, les autres luy baissent les mains. Puis les dames se presenterent qu'il baise amoureusement : fort resiouy de la belle Leonide & Anaxare. Et apres ceux qui luy touchoient du sang, plus grand ioye n'eust sceu recevoir que de la veüe d'Alquif & Vrgande, qu'il accolla affectueusement disant : O mes seconz pere & mere, comme me pourray-je aquitter de tout ce que ie vous doy, qui ne m'avez iamais laissé sans secours en mes perilz extremes : Encore croy-je qu'il y ait de vostre main en ceste tant estrange & heureuse rencontre. Ce que les sages confesserent & avoir esmeu la tēpeste expres pour les ietter en ce lieu destourné. Or ne fut question que de reueſtir l'Empereur & Finistee qu'ilz saluèrent humblement sçachāt qui elle estoit & le reng qu'elle tenoit par le don nouveau de l'Empereur. De laquelle Amadis leur fit le discours ample à l'issue du repas, sans y obmettre la naissance, incroyable du petit Silves qu'il protesta estre conceu miraculeusement par Finistee, sans ayde d'homme : iurant qu'en toute l'Isle n'avoient trouvé corps de creature humaine vivant, & que luy & elle n'a-

voient

noient autrement vescu que feroit le frere avec la seur : parquoy attribuoit ce cas merueilleux à la puissance de l'ymagination, & moins la marque que l'enfant mesme en portoit. Adonc le mit sur la table & leur monstra le sein de l'ardente espee à son estomac, & quelque escripture dessus qu'il n'auoit sceu lire. Dequoy toute la troppe pria les sages, qui y trouverent. **SILVES DV DESERT, FILZ D'AMADIS DE GRECE ET DE FINISTEE, SANS VICE NY OFFENCE DE L'VN NE DE L'AUTRE.** La merueille du fait redoubla par ce tesmoignage, & les sages confermerent estre veritable, sans toutesfois leur declairer pour l'heure le moyen comme il estoit avenu. Si sejournerent en ce lieu vne semaine entiere en toute liesse & deduit dont ilz se pouoient auiser, comme il est naturel apres vne si longue & grieve tristesse. Puis par ordonnance de leurs sages guides rentrent en leur vaisseau pour regagner l'Isle qu'ilz auoient doublee en leur prime routte : la ou vous a esté dit que le grand Roy Amadis & Oriane deuoient estre desenchantez par ce beau ieune perfa-uorisé des astres : comme cy apres vous sera deduit amplement.

Côme Galtazire arriua en la ville de Guindaye, & presenta à Diane la lettre de Darayde & le Canalyon.

CHAP. LXXXII.

DEpuis que le cheualier noir & Galtazire avecques ces vieillardz eurent regagné leur chemin, elle ne se peut tenir de les rudoyer de maintes parolles & arguer de legereté indigne de leur aage. A quoy mot ne luy respondoient, tellement auoient la langue cousue de honte & plus long sermon leur en eust fait la bonne damoyse, si le cheualier n'eust appaisé sa colere par la satisfaction qu'elle deuoit prendre de leur repentance, aisée à lire en leurs contenance. Lors elle le pria de vouloir dire son nom : qui respondit estre Lazar de Tarsis filz du Roy Fulur-

tin, venu en quelle de l'Empereur Amadis de Grece, à qui il desiroit faire seruice comme par obligation hereditaire du Roy son pere. Aussi estoit vray qu'il venoit de Trapezonde, ou ne l'ayant trouué, s'estoit acheminé vers Guindaye pour le bruit qui couroit des auentures estranges de l'Isle, esperant y sçauoir quelques nouvelles de luy. Galtazire le remercie de tant qu'il auoit fait pour elle, en remettant plus grande reconnaissance à Daraide à qui le cas touchoit. Lazar desia abbrué de sa renommee, pria la damoyse de luy raconter tout le fait du Canalyon dont il demeura grandement esbahy. Mais voyant la Damoyse cointe & iolye, ne fut si nierz qu'il ne luy fist vn peu la court en chemin. A quoy elle souriant luy rendit bien son chage : disant qu'elle le pensoit n'auoir garde du coup, d'autant que l'archer Amour ne pourroit en luy viser au blanc (par ioyeuse rencontre sur la noire couleur. Dequoy il rit de bon cuer : & en tel deuis cheminerent iusques à la ville, ou la foule de la menuë gent fut si grande pour voir cest estrange animal qu'à peine pouuoient ilz passer par les rues. Et auisans que c'estoit la damoyse & les vieillardz qui auoient emmené Daraide, plusieurs coururent annoncer à la Roynne les nouvelles de leur venuë, laquelle à l'heure estoit à receuoir le Roy de Frigie au nom de Rogel de Grece, avec le mandement qui vous a esté exposé cy dessus. Ce qu'ayât fait au rapport de l'arriué de Galtazire, oyant le tumulte du peuple se mit incontinent à vne fenestre d'ou elle entendit les cris populaires : *Vive, vive nostre Darayde, qui sçait les monstres subiuquer.* Alors veit arriuer le chariot ou la beste estoit, dont elle fut trop espouuantee : & si haut s'esleua le bruit des citoyens qu'il fut senty du palais de Diane, laquelle ne se peut tenir de dire : O Iupiter & quelle ioye m'enuoyez vous si c'est que ma Daraide soit venuë ? Ma dame (dit la Duchesse Lardenie) enuoyez sans tarder quelqu'une vers la Roynne pour entendre que c'est au certain. Aussitost le commande à vne

à vne de ses Damoysselles, à qui Sidonie répondit n'en sçauoir encores non plus qu'elle. Et à l'instant monte Galtazire au palais (les portes fermées au peuple) qui presenta Lazar, comme filz du Roy de Tarsis, de Saba & Arabie (non sans mention du grand plaisir qu'il leur auoit fait) lequel la Royne honora grandement. Puis voulut entendre l'embassade de l'estrangere, qui luy dit n'auoir charge de l'exposer qu'à la presence de la Princesse Diane. De ce pas Sidonie l'y meine (laissant au Duc Alfarc Lazar à entretenir) ou apres les reuerences deuës, elle baise son paquet & le presente à Diane, qui l'ouurit & leut incontinent deuant sa mere, non ce que Lardenie apperceut en elle quelque esmotion. A qui la messagere s'acquitta des recommandations affectueuses de Daraïde, & à la marquise pareillement puis ouyrent le recit de sa lettre.

Lettre de Darayde à la Princesse Diane.

Ma Dame, ne souffrant moins en vostre absence par la distance des lieux entre vous & moy, que la Diane celeste par l'obstacle de la terre entre le soleil & elle: mon ame priuee à l'œil du bien de vostre venë commande à la main de luy donner ceste allegiance. Vray est que par vehemente impressiō elle a tousiours vostre ymage diuine cōme presente, non moins q̄ ceux qui voyoiēt leur figure deuant eux rebatue en l'air par debilité des yeux. Mais tandis qu'elle est logee en ce corps ne se peut bonnement contenter d'ymaginer la vostre en esperit simplement, pour le desir à quoy son hoste l'attire de jouir pareillement de son semblable. Las ce n'est merueilles'il est affamé du plaisir que ses sens reçoient de la perfection du vostre, en contemplant ceste beauté plus qu'humaine, oyant ceste voix sucrée, & quelque-foys touchant par honneur ses souuës & delicates mains. Car il cueille en celà les pures fleurs de volupté, & ma pauvre ame seule se pique aux espines, portant toutes les passions de l'appetit embrasé

du sur-plus, & de la patience du retardement de son attente. Mais c'est pitié de mes tristes discours à raison que la fin de la langueur du corps en ceste absence, me seroit commencement de plus grief mal de l'ame en vostre presence: de laquelle m'estant hardiment approchée souz opinion de Diane m'y suis trouuee deceuë en vne terrestre Venus: ainsi que Dido huma l'aleine feruente & venimeuse de Cupido sous la semblance d'Iulus. Aussi trop y a de conuenance pour abuser les mieux voyans, non seulement l'aimant au cugle: car l'arc que portez & les fiesches i'estimois estre pour exploit sur les bestes sauvages, quand i'en ay senty le trait au trauers de mon cuer: qui le me fait reconnoistre emprunté du petit dieu comme de vostre filz. Me sentant par vous transmué de ma franchise en seruage, ie l'attribuois à la deité de Diane, qui moins n'auroit fait d'Acteon & de maintz autres: mais ie cognois que ce changement de mon estre procede de la puissance de celuy qui a reduit Iuppiter mesme en mainte forme de bestes. Ores le prie (ayant egard qu'ainsi suis vostre prisonniere par dol & surprise, non par iuste guerre & ouuerte) de retourner le fer de vostre trait contre vous mesmes, par vne playe secondant celle de Mars: & si contre le coup vous faissiez pauois de mon cuer ioint de si pres au vostre qu'il vise au trait fiché parmy le mien comme à sa broche, l'enforçant si auant que le vostre en soit vnement enfermé. Finalement ie vous supplie ma Dame, me pardonner le tort que pourrois auoir fait à vostre chasteté seuerie par mon escrit amoureux, vous asseurant que trop plus ie m'en fais de commettre mes ardantes pensées à la froide plume.

Les parolles de Daraïde n'entrèrent moins auant au cuer de Diane que le seau en la cire molle, tellement que toute sa dissimulation n'eut assez de vertu pour empêcher le sang de luy teindre par fois la face, & par fois l'apassir à sa retraite aux pointz de quelque crainte. Ce q̄ pour mieux cou-

urir s'adresse à Galtazire disant, que Daraïde ne luy escriuoit rien de nouveau, ne continuant que ses deuis acoustumez d'amour: que volontiers elle s'estoit remise à elle du demeurant. Sçachez ma dame (dit la damoyelle) que le point plus important de ma charge est contenu en la lettre: toutesfoys quant aux autres nouuelles, elle a vaincu en moins de trois heures le fier Geant du chasteau du mont, & tous ses gens: puis la beste espouventable Caualyon de qui elle vous enuoye par moy la despouille. Et apres a deliuré le roy Rosafar & la royne Artifire du plus cruel & douloureux enchantement dont il fut iamais memoire, gaignant l'entree de la caue de la geante Gadalaſte, & la plus precieufe espee qui fut onques veüe. Mais à vous dire quād nous fusmes entrez apres les combatz au lieu ou estoit le carnage, & la trouuafmes toute couuerte de sang assise sur vn degré le chef appuyé sur le pommeau de son espee, nous la tinsmes pour aussi bien morte que les corps gisans à l'entour d'elle: mais elle est en bõne disposition sans playe aucune perilleuse, & noz bons Princes luy tiennent compagnie en ce chasteau: d'ou elle fait conte de partir dedans peu de iours pour venir chercher guerison de la naurte de vostre beauté qui plus l'afflige que celle des glaiues trenchans. Diane desuoioit souuent sa contenance au recit de Galtazire, & la Royne mesme & les autres damoyelles presentes en sentoient grande alteration de ioye & de douleur selon les parties des hazardz & issues. Mais la belle Princesse ne se contenta pas de si brief & maigre rapport de la messagere, la requerant instamment luy en faire plus ample discours, qu'elle rompoit souuent par diuerſes demandes: combien elle auoit de playes, & en quelz endroitz de son corps, de quelle profondeur & largeur, avec vn amortissement de couleur, comme si elle les eust recenës en sa personne.

Si luy dit'en fin de conte: ma chere amye, ie ne ſçay quelle recompense nous vous

puissions faire suffisante pour les bonnes nouuelles que nous apportez de ma Daraïde, dequoy ie supplie ma Dame de m'aquitter. A quoy Galtazire, outre ce que suis trop heureuse de faire seruice à la Royne & à vous ma dame, ie demeure encore obligee à la vaillante Daraïde de ce qu'elle a fait pour ma maistresse par vostre congé & permissiõ. Lors Sidonie: Damoyelle, vous dittes ce que modestie vòus apprend, & à nous touche de faire ce que vertu nous encharge: comme elle accomplit de fait, luy donnant si riches presens qu'elle eut occasion de s'en louer. Or la meine la Royne en son palais, ou par vne fenestre duquel, elle luy fit exposer au peuple (la amassé entour l'animal) toute l'histoire ainsi que l'auuez entendue, qui luy presta silence ausi coy que s'il n'y eust eu personne, pleurans tous de ioye & crians: *Gloire & honneur à l'unique Daraïde*: puis chargerent la fiere despouille sur leurs espaules (les trompettes marchans deuant) & la porterent en pompe par toutes les rues de la cité, les dames se mettans aux fenestres, louans & benissant la gentile damoyelle qui reduyſoit le los de leur sexe à lequilibrium des homes, tellement qu'eussiez iugé ce peuple forcené de liesse. Mais bien autre excez en sentoit la belle Diane, à qui fort auoit tardé que la Royne se retirast pour en degorger son cuer à Lardenie, & en deuifer teste à teste. Si l'empoigne incontinent par la main, & s'en vont en vn secret paillon du iardin, ou elles s'assient sus l'herbe, & Diane commence. Certes Lardenie ma bien aymee si l'amour que ie portois à Daraïde comme fille, n'estoit moderee & attrempee en moy par la cognoissance de son estat viril, ie ne croy pas que sortisse hors de mon sens par le rapport de ces bonnes nouuelles. Comment (dit Lardenie) madame puez vous bien resister aux efforts de celui à qui les terribles geans cedent, & les plus espouventables monstres de la terre? veu que cognoissiez par vous mesmes que les forces de la beauté (telle que la sienne) ab-

ne) abbat toutes les autres, comme voyez ses armes quasi pendues devant l'autel de la vostre. Non non, il n'y a icy pres de nous autres tesmoins que les arbres muetz, mais ne cuidez pas me persuader de vous vne vertu si austere, ne me faire si grue que ne vous estimiez bien-heureuse de l'amour d'un si excellent Prince qui vous adore en telle deuotion. A à ma dame, les dieux n'ont mis en la personne d'Agésilas moins de grace à conquerir les pucelles que de vigueur à dompter les cheualiers. A qui Diane: duchesse m'amie nous auons cest auantage sur les hommes qu'en leurs batailles le plus fort l'emporte selon la verueur des corps: & au conflit de noz passions gisans en l'ame, nulle n'est vaincue que de son gré & pure volonté. Parquoy assurez vous Lardenie que ie n'espere me rendre en ce cas comme le commun des femmes par lascheté & faute de cuer, puis qu'il est en ma main de le faire ou non: bien pourra Agésilas par sa beauté priuer Diane de vie par le martire de son amour, mais d'integrité nul ne pourroit. Adonc Lardenie: Ma dame c'est vn abus de se confier en liberté de vouloir sus l'amour lequel a triumphe des dieux & des hommes, bref domine toute nature brute & raisonnable. Aussi peu est possible à l'esprit humain de soustenir ses assaux, qu'il est au corps de repousser la mort, tant l'un est semblable à l'autre, pour-ce les peintres mettent à tous deux le dard ineuitable à la main: la mort est passe, & telle est la couleur des amans, lesquelz aussi s'amortissent & euanouissent cét fois le iour par distraction de l'ame d'avec le corps, qui seroit entiere & finale n'estoit l'immortalité de son sujet. Amour outre ses fiesches est armé de flambeaux & qui est la chose en ce monde que la violence du feu ne consume? ioint que le rendre cuer des royales pucelles est mesche plus aisée à embraser de ceste ardeur, comme vous peut estre clér par l'exemple de tât de Roynes, Emperieres, & hautes dames qui viues ont este bruslees de ce

brandon. Parquoy ma dame pardonnez moy si en ce cas ie n'aiouste foy à voz ditz, que vous l'aymez moins en ceste cognoissance de son vray estat, & il me semble, que pour maintenir & exalter vostre honneur voulez tant abbatre & confondre mon sens & iugement. Alors Diane (luy iectant en riant les bras au col) croyez moy, (dit, Lardenie, à confesser ce qui en est) que ie n'ayme en rien moins Agésilas que Daraïde, mais ie ne me dispose, (veu mon desastre conditionnant mes noces sur la victoire impossible du Prince Florisel) de suivre l'exemple de la deesse de mon nom en virginité perpetuelle, & en ce dur courage reboucher les traitz aguz de vostre archerot, car pour mary pourroit Agésilas estre receuable, mais d'amy Diane n'en peut cognoistre: toutesfoys soit la parolle qui m'est eschappée, enseuelie au secret de vostre cuer, que luy ou autre n'en voulsist faire son profit. La duchesse adonc, craignant estre trop importune en la defence de l'absent qu'elle aymoit singulierement, respondit entre deux & as, qu'il ne luy conuenoit recommander ce silence, mais qu'elle ne pourroit qu'alléger son ennuy en le communicant ainsi à personne loyalle.

Or dit Diane, voyant arriuer quelques damoyelles de la Roynie, metton fin à ce propos, vous assurant que ne puis estre si ingrate que ne vueille plus de bien à Agésilas qu'à gentilhomme du monde, à cause de l'amour vehemente qu'il me porte, voire trop plus s'en souffre que luy, estant contrainte de tenir ce feu cloz en ma poitrine, auquel il donne air & l'euafore par l'ouuerture qu'il en fait en ses demonstrations. Lors s'embatent sur elles les filles qui luy apportoint la peau du Caualyon, dont elle fut fort espouantee, avec l'accroissement de l'estime de Daraïde qu'elle ne nommoit plus sienne si hardiment que souloit par crainte qui suit volontiers amour de pres. Si commanda qu'on l'allast pendre au comble de la tour de Febus, comme en lieu digne du conquerant: en faueur duquel

elle retint Galtazire à soupper avec elle, pour luy ouïr dechiffrer par le menu l'estat, & contenance de Daraïde en ceste absence: qui luy conta comme elle n'auoit que son nom continuellement à la bouche, & sembloit toute outree d'affection: que la Royne sa maistresse & sa fille en estoient merueilleusement eshabies: & elle leur disoit n'estre pas la premiere fille amoureuse d'autre, & que Sapho la lirique l'auoit esté d'Amytone & Arthis, & que sa nation y estoit plus suiuite que les autres, pour le cuer viril que mesme elle monstroït au maniment des armes. Quant à moy i'en suis plus estonnée que toutes (disoit Galtazire) à raison du long temps qu'ay conuersé avec elle en ce voyage: car sur les chemins elle me recitoit ses faueurs, disant: Làs m'amie quel heur pensez-vous que ce m'estoit de l'accompagner à la chasse, ou le vent luy leuoit aucunes-foys la cotte, descourant à nud l'iuoyre poly de ses membres? aucunesfoys les branches des arbres luy arracheroient la coiffe de soye & ses cheveux dorez vouloyent sus ses espauls. Mais que vy-ie vn iour quand elle se voulut baigner en la fontaine de son verger? à l'vne bailla son arc & sa trouffe: la marquise la deuestit: la duchesse luy tressa sa chevelure: & adoncq me plaignant de n'estre employee comme les autres, en sous-riant me commanda d'approcher & luy espendre l'eau sur la part haute ou l'onde ne touchoit. En bonne foy (disoit) mon œil fut si esperdu en regardant ce col d'albastre, ce sein releué de boules gemelles, que ie versois l'eau avec le vase de porcelaine à plus d'un pied long de ses espauls, dont elle & toutes ses belles Nymphes eurent bon ieu: mais quand en repuisant souuent ie miray à trauers de la claire eau la part depuis la ceinture en bas comme vne ymage de marbre blanc dedans vn cristall, ie fus soudainement surprise de telle passion avec resolution de nerfz que ie tombay en la fontaine la teste la premiere, de quoy toute la troupe se cuida pasmer de rire. Celà n'est rien (disoit elle) au pris

del'heur que i'ay senty plusieurs-foys de sa bouche contre la mienne quand Amour me liiroit si durs assaux en sa presence que le cuer me falloit, & elle esmeuë à pitié me donnoit telz baisers que la chaste deesse Diane à Apollo son frere: & croy en verité que mon ame estoit desia au bout de mes lieures preste à partir, si elle ne l'eust arrestee & cloz le passage par les siennes m'inspirant vne douce chaleur d'haleine qui me remettoit l'ame & la vie au corps. Diane presta bonne audience à ce discours & sentit si chaude alarme du petit dieu, par la souuenance des extremités amoureuses de son Agefilan qu'elle ne peut manger, & les tables leuees print la Damoyelle estrangere par la main, luy demandant à part quelz auoient esté les derniers propos de Daraïde à la departie. A quoy Galtazire dit: Sachez, ma Dame, qu'elle me chargea affectueusement de vous supplier de sa part vouloir tant faire pour elle que ne chasser aux grandes bestes iusques à sa venue, ou elle ne craindroit aucun danger pour vous comme me disposée à faire targe de son corps deuant le vostre: vous priant de passer le temps en son absence à la course des lieures ou dains & à la volerie, d'autant que voz tendres forces ne sont à hazarder à si furieux animaux, de peur qu'il ne vous en preigne comme au bel Adonis déchiré par les defences du cruel sanglier. Làs (disoit) ie suis tousiours en trance & treneur qu'il ne luy mesauienne piquant à bride abatuë par quelque estoc faisant trebucher son cheual en danger de luy fouller quelque membre, ou teindre la terre de son sang precieux, ou que quelque branche ne luy froisse le visage, ou vn cerf eschauffé ne la hurte de ses rameurs. Diane fort esmeuë des doutes & soucis amoureux de sa Daraïde, promist à Galtazire d'ainsi le faire. A tant nous tairons vn peu d'elle pour exposer les auentures qui ce pendant auindrent à son cher amat.

Comme Darayde partye du Royaume de Tessalie, fut par fortune lancee au Royaume de Galdap, & de ce qui l'y auint.

CHAP. LXXXIII.



EN grande liesse fortit Daraide du pais de Tessalie, & beaucoup plustost q̃ les chirurgiens n'esperoient, tant eut l'ame de force à auācer la guerison du corps (par la vehemence du desir de voir sa belle maistrresse) augmentant toutes ses vertuz & puissances. Or s'estant mise sus mer l'eut quelque iour assez propice, & apres le vent se tourna en Ponant de telle furie qu'il les rengea en necessitē pour leur remede de defaire les œuures mortes, & pour tout gouuernement ne tendre que la voile de trinquet. Cest orage les agita l'espace de quinze iours, & à la fin les ietta en vne contree, qui en ce temps estoit nommee Galdap, en laquelle ilz prindrent port à grand' ioye, & y eust tant de l'apareil du nauire à refaire, que pour tout radoubier, & calfretter, & le fournir & equipper de tout ce qui estoit necessaire, ne leur faloit moins d'une semaine. Daraide delibera d'employer ce temps à voir le pais où fortune les auoit portez. Si monte à cheual armē de toutes pieces & ses damoyelles sur leurs palefrois garnyes l'une de son luth, & l'autre de ses accoutremens. deux iours se promena sans auenture, digne de recit, & au troisieme des-

couure vne grosse ville, & à vne demye lieuē pres vne fort belle fontaine au milieu d'une touffe de boys, ou elle auise vn pavillon tendu sur quatre arbres pour piliers. A l'approcher elle veid qu'il estoit de satin broché & vn riche lit dedans, duquel se commençoit à leuer vne dame bien semblant de haute guise, entourree de douze Damoyelles vestues de fine escarlate à broderie d'or, chacune d'elles tenant vne couple d'espagneulz, & autres petitz chiens, esans leurs haquenecs liees es arbres prochains.

Daraide fut esbahie de la rencontre, & fort estima la beauté de la Dame à qui on affubla vn manteau de la façon des autres, fors qu'il estoit de veloux cramoyssi. Elle ne fut moins estonnee de la venue de Daraide & de sa grace singuliere & port seigneurial : qui luy dit apres tel salut que son estat sembloit requerir : Ma Dame, ie vous supplie comme personne estrangere me vouloir dire qui vous estes, & porquoy logez en ce lieu, à fin que ne faille à vous rendre l'honneur que meritez. A quoy elle respondit : Cheualier puis que m'en priez si courtoisement, raison veut que le vous die. Scachez donc que suis Salderne Roy-

ne de Galdap qui prendz ainsi le deduit de chasse aux chiens courans, & y suis tellement adonnee que la nuit souuent m'y surprend, & ie la passe ou ie me trouue. Or ay satisfait à vostre demande, si vous prie de partir incontinent d'icy, de peur que le Roy mon mary ne vous y surpraigne, car tout le monde ensemble ne vous garentiroit pas: par-ce qu'il ne veult que ie sois en cōpagnie d'homme quelconque s'il n'y est luy mesme, & ne me baille que ce nombre de femmes pour ma suite. Or a il eu auer tissement du lieu ou i'ay anuité, & ne peut gueres tarder à estre icy: mais nous serons ce soir en la ville, ou vous nous pourrez trouver, & seray trefaite de vous cognoistre & parler à vous plus à loysir, pour la bonne opinion que vostre physionomie me donne de vous. Ce qu'elle disoit estant frappee au cueur de la veuë de Daraide, qui luy respond: ma dame ie feray vostre commandement, combien qu'il me semble que le Roy vous traite indignement pour vne si haute dame, de vous tenir ainsi souz bride contre le droit de vostre liberté: & est ceste vñance trop rude & barbare, non receuë en regiōs policees & ciuiles de faire de l'espouse & cōpaigne sa serue & esclau. La Royne auoit l'oreille fort ouuerte à ce propos quand le Roy Galinides (vestu d'une cazaque de chaf se de la mesme estoffe & ourage que la robe de la Royne) suruient, accompagné d'une douzaine de gentils hommes: auquelz (trouuant sa femme deuillant avec vn cheualier) tout furieux commande à coup de le tailler en pieces. Si l'enuahirēt promptement ceux qui estoient mieux en point d'armes, & Daraide les reçoit d'une façon non veuë ny vñitee en leurs pais, escarmouchant si dextrement qu'elle auoit donné dix coups auant qu'en recevoir vn, voltigeant puis ça puis là, & chargeant souuent les plus essognez & qui moins s'en doutoient. De sorte que ia y auoit maintes testes abatus, & bras, & iambes semées sus l'herbe, quand Galinides s'approche courroucé de la mort de ses gens, escriant qu'il se rendist

& il luy doneroit la vie à cause de sa prouesse. Dequoy Daraide ne fit conte, ayant eu autresfois de trop plus dangereux ennemys en barbe, estans la pluspart de ceux qui estoient sans autres armes que les espees & boucliers. Parquoy le Roy depefche vn laquais pour faire venir du secours de la ville, & ce pendant encourage ses gens le plus qu'il luy est possible, faisant aux vns ietter pierres, aux autres darder bois, tellement qu'il conuint à Daraide s'aller adosser contre le paillon de la Royne, ou ilz n'oserent plus rien lancer à cause d'elle, dont ilz furent contraintz de ioindre plus pres à leur grand dommage, car elle ne tiroit gueres coup qu'il ne leur portast perte de quelque membre, & se fourroit aucunesfoys parmy eux, comme vn lyon enragé en vn troupeau de brebis. La bonne Royne trembloit toute de peur qu'elle auoit pour le cheualier estranger, tant sa beauté l'auoit soudain conquise, & considerant qu'il n'estoit force humaine qui peust à la fin resister à ceux qu'on auoit mandez, crie à Daraide qu'il se mette à sa mercy ou ce'st fait de sa vie, & que se rendant à elle, l'asseuroit du Roy son mary, qui n'auoit sur luy (comme estrager) iuste occasion de mal talent. Le Roy si accordant, Daraide presente sa bonne espee à la Royne, & la veuë de son armet haussée, luy dit: Ma dame ie me rends en vostre prison, pour vous faire cognoistre combien ha plus de puissance la courtoisie des dames que l'effort des homes. Laquelle le voyant en la viue couleur (que le combat luy auoit enrichie) en fut espris outre mesure, & respondit: Certes cheualier ie tiens à grand honneur d'auoir obtenu de vous ce à quoy le Roy & ses gentilzhommes ont failly. Qui adonc mit pied en terre, s'elinerueillāt tant luy que tous ses gens de la beauté de Daraide, non moins que de sa vaillance. A tant respond à la Royne, que (pour luy faire entendre le tort qu'auoit eu le Roy de la commander à occire sans l'auoir ouye, & pourquoy s'estoit plus volontiers rendue à sa mercy) elle estoit damoy selle non cheualier,

ualier, & son nom Daraïde, & le plus beau de ses titres, LA VAINCUE DE DIANE, comme paroïssoit à son escu. A ce mot auint vne fort estrange chose, en ce que le Roy qui tant auoit ouy renommer Daraïde, la voyant deuant luy accomplye de telles perfections, en fut à l'instant rauy extrêmement, comme sa femme estoit de son costé, qui ne se pouuoit persuader qu'elle peut estre fille. Ainsi couuroient leur amour, l'un de peur de l'autre : & le Roy s'accoste de Daraïde, disant qu'il se tenoit bien fier de telle prisonniere, dont le bruit voloit si grand par le monde. Lors fit enleuer de là les moirtz & naurez, mandant à ses officiers qu'il y vouloit soupper avec la Royne & Daraïde pour la plaïssance du lieu : ce qu'ilz firent en grande passion des deux vers nostre pucelle.

Du Roy Galinides de Galdap amoureux de Darayde, iusques à en perdre le sens.

CHAP. LXXXIIII.

LE Roy (en attendant le soupper) pria Daraïde d'oster son harnois, & s'accoustre de ses habillemens propres : en quoy elle luy voulut bien complaire en espoir d'obtenir de luy en bref sa deliurance. Si se tira à quartier, ou se fit desarmer, puis reuestir d'une robe de satin violet par ses Damoysselles, deliant ses blonds cheveux & mettant vn riche chapeau de pierrierie sur son chef, & sa precieuse espee pendue en escharpe à la Sarmatique : & ainsi s'al la presenter au Roy, qui tout transporté luy dit : Quoy Daraïde, avez vous mestier d'autres armes pour conquerir les Cheualiers, que de celles que ie voy presentement ? O dieux souverains, quelles deux extremités de beauté & de force vous auez cy logees ensemble. Trop poïsa à Daraïde ce langage avec la contenance du Roy, voyant qu'il la tenoit pour Damoysselle, & estoit feru de son amour, qui pouroit estre cause de

luy retarder le congé de son partement. Salderne de sa part ne prenoit moindre plaïsir à la voir en cest habit, estimant qu'elle se desguisast ainsi à cautelle. A tant s'assind eux troix à table ou ilz furent seruiz plantureusement : mais sçachez que tout du long du repas le Roy & la Royne ne flechirent les yeux de dessus Daraïde : qui de son costé ietta maintes œillades sus Salderne pour la souuance que les parties de sa beauté luy causoient de Diane, discourant en son esperit en quoy elle luy ressembloit, & en quoy elle defailloit de sa comparaison. Nō, sans quelques piteux souspirs tirez comme a poulie du fond de l'estomac, que la pauvre Royne prenoit à son auantage au moyen du regard qu'elle auoit fiché sur elle. La nuyt venuë, Galinides fit mettre six flambeaux de cire blanche en autant de chandeliers d'argent à l'entour de la fontaine, ou il se va soir avec sa femme & Daraïde, laquelle il pria soy resiouir comme en pais d'amis sans vser d'estrange-té aucune & de sonner du luth pour euitier melancolie : ce qu'elle fait si mignonement, aydant l'instrument de la gorge & touchant vn lay si lamentable accompagné de geste douloureux, que tous trois fendoient en larmes, combien que meuz de diuerses causes. Le Roy & la Royne auoient leurs oreilles comme pendues aux cordes du luth, à qui sembloit voir & ouir choses plus diuines qu'humaines. De façon que Galinides transporté extremement se pose de genoux deuant elle exclamant : O deesses Venus & Pallas pardonnez moy si ie porte l'honneur & veneration que ie vous doy à celle pucelle en qui vous auez voz graces si largement infuses : puis luy imposant nom formé des deux deitez, ie l'adore (dit il) terrestre Palla-venus, te suppliant exaucer d'oresnauant mes vœux & accorder mes deuotes requestes. Daraïde en estoit toute honteuse, & se vouloit leuer de la place, mais forcée luy fut d'en receuoir autant de Salderne par le commandement du Roy, qui toutes-

toutesfoys ne luy fut pas si grief qu'au reste de la troupe, qui apres elle adora pareillement la nouuelle deesse. Ce quil auoit proposé d'ordonner & publier par tout son Royaume si fortune trop auerse ne luy eust rompu son dessein. Or allerent l'endemain à la cité, ou le Roy la logea treshonorablement en son palais, luy baillant gardes iour & nuyt comme à la Royne, dequoy elle menoit grand dueil en son cueur pour le destourbier qu'elle voyoit s'aprestier à son tant désiré voyage: car tout du long du iour elle estoit costoyee & caresee de Galinides & de Salderne, tellement que l'un empeschoit les menées & entreprisede l'autre: qui estoit cause de donner à leur feu secret espace & moyen de croistre & s'allumer de plus en plus. Elle portoit bien autāt d'ennuy qu'eux en son cueur à l'occasion de sa prison, qui luy faisoit ietter de piteux regretz de sa Diane, & parler aucunes-foys à elle deuant eux comme si elle fust la presente. Cela entretenoit d'autant plus la Royne en opinion que Daraïde fust homme, ne voyant raison de croire qu'estant femme elle en eust aymé si ardemment vn'autre. Ainsi sont le Seigneur & la Dame plongez en merueilleuse angoisse: tellement que la nuit estans couchez en vne mesme chambre (selon la coustume qu'il auoit eue de la tenir tousiours de pres) si Galinides pensant en Palla-venus perdoit tout repos, Salderne d'autre costé estoit en contrinuelle inquietude: ce que le Roy estimoit luy proceder de ialousie conceüe sur l'estrangere, la iugeant par luy mesme à l'exemple de celle dont il auoit parauant esté si tourmenté. Sur quoy exclame Galeris le croniqueur: O malheureuse passion ainçois rage de ialousie, que les ignorans cuident sortir d'amour, ainsi que du feu la cendre, & le suyure naturellement comme l'ombre le corps: voyez icy que le fondement estoit peu ferme & solide, qu'une veüe soudaine d'autre obiet a demolly en vn moment & fait fondre comme la neige au so-

leil. Vray ne peut on dire auoir esté l'amour de Galinides, que lon void si peu durable, ains ourdir la toile de l'affectio de la Royne autre part adresee. Car, quelle amitié parfaite pouuons nous fonder en defiance? qu'est ce qui donne plus d'occasion d'offence que la deffence? Ainsi plus appete le malade ce qui luy est prohibé & interdit: ainsi le cheual courageux quand on luy tient la bride trop roide souuent prend le mordz au dents & se met à la course laquelle il cesse en luy laschant vn peu le frein. A tant finirons le discours de Galeris, pour vous deduire celuy qu'en fit la Royne à Daraïde, ayant le iour ensuyuant gaigné l'opportunité de parler à elle, s'estant le Roy sur le matin endormy de l'asseté iusques à haute heure: & elle descendit en la sale si tost qu'il luy fut raporté par vne damoysselle qui en auoit charge, que Daraïde y estoit, de qui (apres les bons iours) print la main de la sienne tremblante, & la pouraïne deux ou trois tours avec mains propos, puis l'arreste en vne fenestre regardant sur vne fort belle ruiere, & luy commence à dire: Seigneur cheualier, ie suis telle en grandeur d'estat & en dons de nature, que ne vous pense faire tort de vous prier me descouurir la verité de vostre estre, car des l'heure premiere que vous vey à mon pauillon, ie fu esprise de vostre amour sans remede: & quand rendistes vostre corps en ma prison, i'enfermay mon cueur en la vostre. Si ne puis croire que force de femme peult iamais faire les armes, que i'ay veuës de vous contre noz Cheualiers: ne que fussiez tant naïree de la beauté d'une Dame si l'estiez vous mesme, pour ce vous requiers n'en deguiser plus rien à celle qui vous ouure & manifeste son cueur totalement: l'enuahie qui vous fut faite à tort au boys, vous porte seur tesmoignage du traitement soupeonieux de mon mary. Vous seul aussi estes vray iuge comme il n'a tenu à luy que ie n'aye esté par vous femme viotee: qui me conuie (si i'ay quelque cueur) à en pourchasser ma reuenche

che, Daraïde fut fort esbahye de la parolle de la Royne, combien qu'elle eust desia veu quelques signes de ceste volonté : parquoy deliberee (nonobstant qu'elle la veüst douee de grande perfection) de garder sa loyauté pure & entiere à sa Diane, luy respondit: ma dame ie ne senty iamais occasion de me plaindre de nature (qui m'a creée telle) que maintenant qu'un tel heur m'est offert de si haute main sans que j'aye puissance de l'accepter : mais ayant egard à vostre grandeur & à ma basse qualité, j'ay doute que m'vriez de ces termes par dessus mon merite, pour me tenter & essayer ma constance, considéré qu'avez un Roy mary vous aymant si extraordinairement qu'à peine vous croit ou il vous void, dont il vous tient en soigneuse garde, comme les choses plus precieuses sont serrees souz plusieurs clefs. S'il a quelque soupçon sur vous, c'est d'autant qu'il tient le iouyau si cher & precieux que souffrir ne pourroit qu'un autre y eût part. Vray est que ceste cage & ces fers de contrerolle esueillent un desir naturel de s'affranchir, mais la vertu & sagesse d'une dame peut estaindre telz instinctz, tant pour le respect de la foy iuree que pour crainte de blâme qui en peut ensuiuir : car si vous faites amy qui soit de vostre contree, danger y a qu'il faille en sa conduite ou en sa taciturnité : si vous adressez à un estranger, vous bastifiez un edifice leger & non durable, que le premier vent propice emportera par mers lointaines. Je ne louë pourtant les façons des facheux mariz qui tiennent si estroittement leurs femmes par leurs umbrages, se fians plus en serfs ou serues commises à les espier & garder qu'en elles mesmes, & croy que ce soit un maigre moyen pour faire ou maintenir une preude femme par force. Bien y parut à Argus pourueu de cent yeux à la garde d'Io, qu'amour trompa qui ne voyoit goutte. Bien parut à la belle Danaë enclosée en une tour de bronze, la ou entra l'amant par les gouttieres. Plus on conuoitte naturellement ce dont la iouissance nous est plus empeschée, & fait on

communement moins de conte de tout ce qui est en abandon. L'appetit de franchise naist avecques nous que tant plus qu'on nous reserre, plus voulons eslargir & estendre. Mais de pourchasser amy à cause du mauvais & rude traitement du mary, ce seroit en lieu de se venger accroistre sa honte, & faire le tour du fol qui ne pouvant offencer son ennemy tourne ses armes contre soy-mesme. Quoy qu'il soit de mon vouloir, ma dame, si est-ce force d'excuser en ce mon impuissance : vous asseurant en recognoissance du grand honneur qu'il vous a pleu me faire, de vous servir perpetuellement des armes que les dieux m'ont mises aux mains. La Royne espluchant la response de Daraïde par le menu ne se pensa esconditte, persistant en ferme opinion que c'estoit un cheualier, ioint qu'il luy debatoit un peu la franchise des dames, au contraire du propos qu'il en auoit entamé au boys. Si luy repliche, que l'offre qu'elle luy faisoit estoit de toute seureté sans aguet ny embusche, & luy en donneroit telle cognoissance qu'il desireroit: pource estat hardiment son masque en son endroit, qu'elle tiendroit secret à iamais, pour en iouir seule secretement. Alors survint le Roy pour disner, qui ne se desfia en rien de sa femme, l'estimant estre avec un'autre, toutesfois luy oste Daraïde, à qui il monstre infinis signes d'amour demesuré, iusques à tant qu'ilz se mirent à table, ou il la seruit de bon escuyer trenchant, sans manger aucunement & boire que bien peu, tant auoit le cœur saisi de passion. Parquoy ne pouvant plus differer de faire entendre sa pensée (les tables leuees) la tira à part sur un lit verd, ou il luy dit : Ma deesse Palla-venus ie remercie les dieux de vous auoir apporté en mes pais, comme le plus grand bien qu'ilz m'eussent sçeu departir : car ie veux que sçachez que j'ardz tout vif d'une flamme attisée par vostre veüe, qui me cōsumera en cendre si ne l'estaignez biē tost par vostre grace & pitié: ce que faisant, faites ensemble estat de la couronne de Galdap, comme desia posée sur

seesur vostre chef: celle qui l'a, en portera le nom accoustumé, & vous en iouirez de l'effet & autorité totale. Daraïde ne fut gueres contente de ceste harengue, qui luy estoit vn dur accrochement & arrest de son nauigage: pour ce luy en cuidant du tout abolir la fantasie, respond: qu'elle ne peut croire (veu l'amour extreme qu'il portoit à la Roïne, cōme aussi son excellence meritoit) qu'il luy voulsist faire vn tel tort pour vne estrangere incognüe, & sa captiue: & que de sa part elle ne consentiroit iamais de son gré à tel outrage enuers elle en la main de qui elle s'estoit renduë. Quant à la contrainte (que comme tiran il pourroit exercer) que l'usage des armes, qu'elle auoit accoustumée pour la deffence de sa vie, elle scauroit bien exploiter au point d'honneur, à l'imitation de la Romaine Lucresse: sinon en tant qu'icelle se tua apres l'iniure receüe, & elle la preuiendroir volontairement. Ce dit se leue d'aupres de luy, qui n'en bougea du iour par debilité de ses membres quasi destituez de la vigueur de l'ame affoiblie de ce dur refus, tellement qu'il y conuint le soir dresser son lit, car son soupper fut aussi sobre que le disner auoit esté, & plus ne se paisloit que de l'harmonie du luth & chant de Palla-venus, à qui souuent il tendoit les mains iointes, aussi muet & immobile qu'une statuë. Le iour suuant & l'autre encores il continua ceste rigoureuse diette & abstinence, sans prédre aucun repos nuyt ne iour, dont fut son cerueau tant mat & attenué (auec desespoir de son desir) que son sens se troubla, & se mit à faire tant de folies & grimaces hydeuses qu'on l'enferma en vne chambre, ne sortant plus autre parolle de sa bouche que. A à cruelle Palla-venus, mercy Palla-venus: parquoy Daraïde fut tresdolente, de ne luy auoir descouvert son sexe auant l'inconuenient, qui eust esté remede infallible de sa frenaisie. Salderne aussi n'en fut pas sans ennuy pour le fais du gouvernement qui luy retomboit sur les bras: toutesfoys se recōfortoit en l'auantage qu'il

le gaignoit sur Daraïde (l'encombre de son mary tollu) à qui elle fit trespas estre compaignie, esperant que la continuë l'emporteroit à la récontre (comme on dit de l'heure du berger.

Des tours d'extreme affection dont vsa la Roïne Salderne à Daraïde.

CHAP. LXXXV.

Oyez icy vrayz amans; & considerez les estranges miracles du dieu d'amour, qui priue d'entendement le Roy de Galdap, au parauant trespas Prince, comme au contraire souuent aguisse & affine les plus gros & lourdz espetitz. Voyez comme il enhardit vne dame (craintive par nature & honteuse) à porter parolle d'amour, qui la deuroit troubler à escouter d'une autre: voire la rengen à vn estranger, la faisant rechercher en luy & demasquer le personnage qu'il cachoit & couuroit si soigneusement & dextrement. Voyez comme ce dieu pour plus monstrier la grandeur de son empire, exerce volontiers sa tyrannie sur les plusgrandz seigneurs, à fin de tollir aux moindres tout courage de desobeissance & rebellion. Car estant le miserable Galinides par amour trop indiscrette, premierement tormenté de ialousie de sa femme, & puis tourné en fureur par Daraïde, presta opportunité à la Roïne de poursuyure sa volonté amoureuse: laquelle ordonna plus estroittes gardes à Daraïde nuit & iour que le Roy n'auoit fait, de peur qu'elle ne luy eschappast, & ne mangeoit iamais sans elle, & l'alloit voir en sa châtre presque à toutes les heures du iour. Dont Daraïde portoit plus grand ennuy qu'on ne pourroit exprimer, se voyant si long temps bannie du lieu ou estoit le tresor de son cueur. Helàs (disoit) ma lune en quelles tenebres suis-je logee, estant ainsi eslognee des rayons de vostre diuin regard? comme les fruitz de la terre ne prosperent ne prouffitent sans la faueur du soleil, ainsi

ainsi ie me chesme & chagrine tant en vostre absence que ne la puis faire longue, si dieu n'y met bien tost la main. Telles plaintes faisoit seule à par soy: & quand Salderne venoit pour luy continuër ses requestes desordonnees, elle luy respondoit tousiours qu'elle perdoit temps de la requerir de chose impossible, & qu'elle estoit ornee de telz dons de beauté qu'il n'y auoit loy que ses attraitz ne pussent inciter à vouloir rompre, ne tant grand Prince qui ne s'estimast tresheureux de si haute fortune. Penseriez vous, disoit, ma dame qu'un homme naturel peust refuser vne telle esmorce de volupté: & qu'un bon cueur faillist à l'occasion de telle gloire? mais puis qu'ainsi est que ne puis en rien satisfaire à vostre desir, iugez par vous mesme le tort que me tenez de m'emprisonner icy, en me priuant de la veüe de ce que j'ayme, plus qu'autre scauroit iamais aymer. La Royne oyant ces parolles ne scauoit bonnement qu'en croire, & si ne luy pouuoit entrer du tout en la fantasie: parquoy s'auisa d'enuoyer secretement à vne magicienne pour en scauoir la pure verité: à qui elle escriit vne lettre à fin de n'euenter en public ce dont elle vouloit iouir en priué souz couuerture de l'opinion commune, qu'elle estoit damoy selle. La deuine suyuant ses artz luy fit response conforme à son souhait, dont elle fut la plus resiouye femme du monde: & des l'heure fit loger Daraide plus pres de sa chambre, & la nuyt alors que chacun reposoit se leue, prend la plus riche de ses chemises ouuree de fil d'or & parfumee se peignant & attiffant ses passefillons avec vn cofion de soye fort chargé de pierrerie: iette sur ses espaulles vn mâteau de satin cramoy si fourré de martres seblines, bref prenant du miroër tout le conseil de son auantage. Ainsi attournee par soin & curiosité sur l'excellence naiue de sa personne, asses pour esmouuoir vn Narcissus, ou Hypolite, & tous les autetes & reuesches philosophes abhorrens les ceuures de nature commandé à sa plus fealle damoy selle de prendre

vn torchis, & s'en va surprendre Daraide en son lit. Laquelle veillant lors en sa Diane fut fort esbahie & deplaisante de voir venir Salderne à telle heure: qui s'assied en vne chaire aupres du cheuet, rendant par sa beauté & parure plus grand lustre que les lumieres de la chambre. A tant commence ce propos: Daraide pardonnez moy si i'oublie la courtoisie accoustumee, à vous rompre maintenant vostre repos, mesurant l'effort de l'amour que ie vous porte à l'aune de celle que dittes auoir occupee en autre endroit. Et en cela iugez l'extremité de la mienne qui depece le voyle de ma grandeur, expose mon honneur en danger, & humilie enuers vous ma hauteesse. Vostre deguisement ne vous peut plus excuser, m'estant descouuert par le moyen des intelligences diuines, ausquelles rien n'est caché ny obscur. Adonc luy iette vn bras nud blâc & poly dans le lit sur sa poitrine, disant: Gentil cheualier ouurez l'oreille à celle qui vous prie de ce dont tout autre seroit fortuné de la prier, dressez vostre oeil vers celle de qui le seul regard deüiroit suffire à vous vaincre: & elle vous iure par les dieux souverains que si voulez tourner vers elle ce cueur qu'elle sent battre souz sa main, elle mettra en la vostre tout ce que tenoit le Roy son martyr. Ne vueillez donc par vostre refus inhumain la reduire en telle fureur que luy (ou desia vostre cruauté l'auoye) ainçois la deliurez de ce peril par doux ottroy avec tel auantage de seigneurie & richesse. Daraide trop courroucée d'estre pressée & importunée outre mesure, luy repousse la main, soy tournant sur l'autre costé avec vn gros soupir, sans luy respondre vn seul mot, tant estoit confuse de son estre manifesté par inuocation. Parquoy Salderne merueilleusement troublée de sa dureté, s'approche de luy par la ruelle plorât sur son visage, & recharge encores: Helas beau cheualier ces chaudes gouttes tumbans de mes yeux ne feront elles point eschauffer la glace de vostre cueur? auront elles moins d'effet sur ceste face delicate que l'eau com-

mune sur la dure pierre qu'elle caue? La Royne le voyant muet, & faire le sourd à ses gracieuses prieres, à recours aux menaces, disant: Donc Daraide auray-ie à boire ceste honte sans confort d'une seule parole? Et ie vous proteste que si ne me receuez es lyens de vostre amitié, ie vous mettray en vne autre prison qui me vengera de ceste indignité, & vous fera res sentir vostre faute. Alors Daraide: Nulle prison (ma dame) ne puis sentir par dessus celle ou ie suis enfermé long temps: nulle mort peut craindre de vous qui à sa vie bien loin. Ie suis cheualier, ie le confesse; & si ne vous ay menty de m'auouer damoyelle, d'autant que tout ce qui peut estre de viril en moy est dédié à vne & fait propre à elle, tellement que ce qui me reste est vraiment féminin, n'ayant non plus de puissance d'homme enuers les autres dames que si i'estois femme vraye. Puis ie suis en telle sorte ioint & vny de cuer à elle, que comme le fion entré en vn arbre ne prend vie & ne porte fruit que de luy, aussi suis-ie tellement planté en ma dame Diane que ne puis estre autre chose que ce qu'elle est. Ainsi toutes les ceuures que ie fais qu'on estime miennes sont d'elle, de qui ie reçois toute ma vertu: car sa beauté m'a rauy & transporté en elle, dont ie ne vis ma propre vie, & ne prends plus substance que de la sienne: pour ce ne puis rien faire que par son influence; & ne puis penser qu'en sa perfection: finalement de moy ne peut aucun fruit estre produit qui ne procede de sa racine. Quel ordre y a il donc, ma dame, de conuertir en vous mes faitz ou pensées? La Royne par ceste responce estoit en voye de desespoir, & en danger de suyure le train de son mary, si amour ne luy eust accru le courage & forgé quelque esperance de rompre ceste fermeté obstinée par plus obstinée importunité, pensant qu'à la longue il n'y a place tenable. A tant luy redouble de plus aspres assautz que les premiers pendant que sa damoyelle faisoit le guet à l'huis: car elle se tette sur le lit aupres de luy, l'embrassant

de rechef, toute tremblant d'ardeur, & luy dit encores: Helas Daraide si mon desastre garde ceste fontaine ou ne puis estancher ma soif, au moins diminuez vostre rigueur iusques à tant de clemence que i'en ais quelques gouttes sur la langue pour estaindre vn peu le brazier qu'avez allumé en moy. Puis qu'il n'y a lieu en vous de mary ne d'amy, au fort receuez moy pres de vous comme amye. Lors se renuerse sur luy & le baise delicatement, l'estraignant de ses bras par vne demy rage, si fort que Daraide en souffroit beaucoup: mais il ne pouuoit refuser ce peu à celle qui l'aymoit tant, laquelle le manioit dessous les draps & luy redou bloit les baisers secz, moettes, en maintes manieres cuydant par ce moyen appaiser son mal qui plus en empiroit. Or continua Salderne ceste visitation plusieurs nuytz, au grand ennuy de Darayde, qui toutesfois ayant quelque compassion du martire dont il estoit cause, luy rendoit aucunes fois le baiser: la suppliant de soy deporter de tel remede qui augmente la maladie, & remontrant que le souverain seroit de choisir quelque beau gentilhomme du Royaume d'autant que les sages estimoient qu'une Venus tue l'autre, mais c'estoit en vain, & elle en tiroit iour & nuyt le plaisir qu'elle pouuoit de la parole, de la veüe, & au plus du baiser, esperant tousiours qu'à vne bonne heure le feu se pourroit mettre aux estoupes. A ceste fin s'estudioit plus que iamais à se parer, crespillonner & façonner en toute gorgiaseté pour luy plaire. Ce qui eust esté impossible à tout autre que luy d'euer qui en magnanimité & constance n'auoit per que le grand Roy Amadis, & qui en la place que Salderne taschoit à occuper, trop grande ymage tenoit nichée, sans qu'il peut suruenir autre deité plus forte pour l'en desloger. O rare fermeté d'homme & loyauté: O tiers miracle de Cupido en mesme lieu & obget. La Royne voyant par l'espace de quinze iours son propos immuable, & le feu mis en sa playe par l'atouchement de ce qui plus y estoit contagieux, print
nouveau

nouveau conseil de la tenter par rudesse, & l'enferma en vne tour close de grille de fer, sans qu'elle veist plus personne que celle qui luy portoit à manger. Dequoy fut Daraide vn peu allégée, pour la crainte qu'elle auoit de tóber (par quelque mouuement glissant) en la fosse de l'offence de Dieu & de sa maistresse, laquelle inuquoit incessamment, & deuisoit à elle comme si eust esté en ce lieu. Ce que Salderne oyoit aucunesfoys sans se monstrier, & receuoit de cest emprisonnement beaucoup de douleur, mais Daraide en souffroit d'auantage à cause de l'eslongnement de sa Diane.

Comme le Roy de Gelde auerty de la forcenierie du Roy de Galdap, entra en ses pays à grosse armee: & du danger ou estoit la Royne et son royaume sans le secours de Darayde.

CHAP. LXXXVI.

LE bruit courut par toutes les contrees circonuoyfines de Galdap, comme Galinides estoit tumbé en frenesie & deuenu fol & insensé par amour: surquoy le Roy de Gelde print occasion d'enuahir le Royaume ainsi priué de chef, ne faisant conte des Galdapois qui se mettroient en defence, fussent ilz lyons souz la conduite d'vne cheure. Ce Roy estoit fier & braue geât de la race des Ciclopes qui n'ont qu'un œil au front, & auoit vn frere qui de guerres ne l'empiroit, auquel il donne la charge de son armee, & il vient à l'impourueu ancrer en vn port ou lon ne se doutoit aucune ment de leur venue. Chaudement les Geldiens débarquent, dont partie court & pille tout le plat pais, sans rien oublier de la rigueur de guerre mortelle à brusler, saccager, & tuer tout ce qui se encontra hors des forts. Le grád ost ne fut plustost venu qu'il eust vaincu & pris portz & villes, tant les habitans perdirent courage en si soudaine surprise. Les nouuelles en furent incontinent portees à la Royne Silderne, qui toutesfois n'arriuerent guerres auant l'embassa-

de Geldienne, signifiens ensemble à la pauvre Princesse le degast & destruction de ses terres, & la volonté du Roy Ciclop, faisant estat de son lit en amour gaye. Ce pendant marchoit tousiours le Geant à banniere deployee ne se trouuant ville ne forteresse qui luy osast resister pour l'exemple de cruauté qu'il donna de quelque place, ou y eust vn vieil preud'homme deliberant de soy defendre, mais abandonné par la lâcheté de ses soudarts qui tous passerent par le feu & l'espee. Parquoy tous les autres chasteaux & bourgs se rendirent de peur de semblable meschef, les capitaines des vns, ourans les portes volontairement par faute de cuer, les autres par corruption d'argent: aucuns vaillans homes par la foiblesse des lieux mal fortifiez & muniz au cuer du Royaume, souz la seureté qu'on auoit des frontieres: qui sont inconueniens ordinaires auenans en region mal gouuernee, en necessité non preuenüe, souz capitaines ayans l'auarice plus que leur deuoir en recommandation. Brief, le geant passa avec la croye quasi marquant ses logis iusques à la veuë de la maistresse ville, ou residoit la Royne: laquelle espouuentee de si estrange infortune, auoit commandé à deux ducz ses vassaux de faire le plus grand & soudain amas de gens que l'vrgence du cas requeroit: mais ce ne peut estre si tost que le Geldien n'eust loysir d'assiéger la ville & soy camper à demye lieue faisant ses auenues pour aprocher ses belins ou moutons, vignes, & autres engins de batterie de ce tēps la: d'autant que son frere ayant recogneu la place, vid que la muraille estoit hors d'eschelle, & que besoin luy seroit de faire bresche: car il s'assüeroit que la meilleure gent de guerre de Galdap se seroit retiree pres de la Royne, & que selon la preuue qu'ilz auoient fait autresfois de leur hardiesse ilz estoient pour soustenir iusques à la mort. Les deux ducz n'auoient pas pris autre resolutiō avec vn nombre de soldatz aguerriz, qui enhardirent le reste de peuple craintif. Si donnerent ordre à remparer aux endroitz

les plus foibles & suspectz, ruiner les edifices des faux-bourgs, de peur que l'ennemy ne s'en preualust, faire dedans pavezades, parapectz, manteletz, vn terrain servant d'espaule à couvrir le portail: en quoy ilz n'espargnerent la peine de la tourbe des païsans & manouvriers de la cité: & comme deliberez d'attendre la fortune du siege, mirent dehors secretement par vne nuit les bouches inutiles des vielles gens, femmes, enfans & malades. La Royne renuoya bié tost l'ambassadeur Geldien avec responce de preferer la mort honneste à l'amour deshonneur de son ennemy, qui somma le jour mesme la ville par vn herault de se rendre à luy comme à Roy & seigneur & droiturier, leur offrant fort humain traitement & descharge de plusieurs tribus dont ilz estoient vexez & rançonnez. Ce qu'il ne faisoit sans pretext de quelque droit & motif coulouré de ceste guerre (comme est aisé à bons fonteniers de trouver eau en terre apparent seche) ioint que les principaux fondemens des empires gisent aux armes. Les ducz respondirent pour la Royne, que le Geldien chalangeoit terre non sienne, en quoy les Galdapoïs esperoient les dieux fauorables à la iustice de leur querelle: & que s'ilz auoient emporté quelques fortz sur leurs gens estonnez de leur arriuee non attendue, ilz ne guerpiroient pourtant la cité capitale, suffisante à les acculer & arrester. Dequoy le frere du Roy irrité vint en son pavillon, le priant de se reposer sur luy de tout, & qu'il luy liureroit dedans trois iours la belle Silderne entre ses bras & le couronneroit Roy de Galdap. De là va faire afuster toute son artillerie vers la partie de la muraille qu'il entendit de quelques prisonniers estre la plus foible: qui estoit telle & en si grand nombre que la multitude de la ville nourrie en longue paix en fut grandement estonnee, regardant des carreaux les champs d'alentour ayans changé la plaisante verdure en vne splendeur de harmois estincelans au soleil, estant la pleine couuerte de trefz, tentes & gens, tant que

leur veü se pouoit estendre. L'endemain le frere du Roy de Gelde enuoya vn trompette à vne des portes, signifiant qu'il vouloit parler aux ducz pour leur offrir conditions raisonnables, lesquelles s'ilz refusoient ilz leur en faudroit en brief souffrir de trop pires, & passer par la discretion des vaincueurs. Mais les ducz respondirent au trompette qu'il se retirast legerement & que vile qui parlementoit estoit demy rendue. De ce fut aigry d'auantage le frere & lieutenant du Roy qui fit battre la muraille si furieusement par ses engins qu'il en abbatit vn pan large de plus de cinquante pas: car ilz iettoient des pierres dont dix hommes n'eussent sceu souleuer la moindre. Ceux de dedans faisoient leur deuoir de reparer aux dommages, & de les offencer pareillement de leurs machines. Les deux chefs dispoient leurs gens es tours & quartiers des murs, icy moins, & la plus selon le besoin: en vn lieu les archers, en l'autre arbalétriers, deça les fondiers. Les ennemis continuent à battre, tant qu'ilz ruinent vne grosse tour à rez de chaussée, laquelle combla tellement les fosses que les Geldiens pouoient venir aux mains sans beaucoup monter: Dequoy ilz esleuerent vne huc à leur mode iusqu'au ciel, comme faisant feste de victoire ia gaignee: incontinent les bandes ordonnees pour l'assault deslogent comme vne volée d'estourneaux en vne vigne meure, qui furent repoussees viuement à coups de trait, & de iet, & ceux qui plus pres approcherent du mur eschaudez de l'esuiue bouillante, les autres fricassez par maintz artifices de feux, potz sulfurez, cercles de poix & resines. Tous ces dangers n'empescherent quelques soldatz de venir donner coups d'espees, pour l'esperance du pris que le Ciclop fit publier à son de trompe pour celuy qui premier monteroit sur le rempart: mais l'effort des assaillans fut vain pour ce iour par la vaillance des defendans. Les ducz ordonnerent ce qui est à faire, comme massif de terre avec force poutres & pieces de boys à boucher la bresche la nuyt font la

ronde

ronde, visitent corps de garde & sentinelles : Leur bonne Royne ne bougeoit des temples à faire sacrifices & immolations, suppliant ses dieux de tenir en leur protection & sauvegarde le bon droit qu'ilz ont estably au monde, & si rien elle les auroit offencez soy contenter de la satisfaction des tourmentz & angoisses d'amour qu'elle souffroit par Daraide. Daraide oyant le bruit & tumulte de l'assaut, entendit de ses gardes que c'estoit, avec grand' ennuy du peril de la Royne, à qui elle ne pouuoit (sans ingratitude) ne porter quelque bon vouloir reciproque, aussi en sentit ensemble quelque esiouissance pour l'espoir qu'elle auoit de trouuer moyen par ceste guerre d'eschapper de ses mains, & s'aller rendre aux tant desirées de sa Diane. Au tiers iour l'assaut fut trop plus aspre que le premier, pendant lequel, le Roy indigné de la resistance, fit battre d'un autre costé & tenir les eschelles prestes pour les dresser si tost qu'on auroit demoly leur surhauteur de muraille. Ce qui mit la ville en grand danger, estans tous les gens de guerre tengez à la bresche & le populaire troublé en tel affaire à eux non accoustumé. Toutesfoys l'un des ducz y alla & rallia ce qu'il peut des plus forts : qui soustindrent l'effort des ennemys par l'auantage du lieu iusques à ce que la nuit les contraignit à sonner la retraite. Adoncq cognurent les Ducz le peril imminent, & assemblerent le conseil des Capitaines, pour auiser de l'ordre & de remede qui s'y pourroit donner : ou les gens de guerre s'offrirent à tenir bon, moyennant qu'on fust asseuré de quelques troupes d'elite de bourgeois pour les seconder & rafraichir à l'assaut. Les princepaux des iusticiers, & marchans vserent d'autre langage, remonstrans par la viue representation du danger, qu'il estoit meilleur entendre d'heure à quelque accord que de s'obstiner en vain contre vne telle force : veu le peu de defense qu'ilz auoient (dont partie estoient desiablestiez & trauaillees) veu que s'ilz differoient d'auantage, le reste de la muraille iroit par

terre à la premiere batterrie, & y viendroient les Geldiens avec le remplissage de fascines la lance sur la cuisse, dont à la fin (quelque vertu qui fust en eux) ilz ne pourroient durer si peu contre tant, & seroient tous mis à feu & à sang par l'ire du cruel geant que leur Roy ne valoit mieux que mort en l'estat ou il estoit, & quand ilz auroient rembarré celuy de Gelde, tous les iours auroient à soustenir nouvelle puissance d'autres Princes voylins. Sur ceste diuersité d'opinions la Royne fut mandee, qui loua premierement & remercia tous ses suiuez du deuoir qu'ilz auoient fait à sa defense, qui estoit la leur mesme, que s'ilz perseueroient encore quelques iours, seroient perdre toute esperance à leurs ennemys, lesquels verroient se retraire bien tost à leur honte, & alors on recouriroit les autres places plustost qu'on ne les auoit perduës. Que ceux qui parloient d'appointement, luy sembloient excusables par la timidité naturelle es gens non experimentez & visitez aux armes. Qu'au temps du bon sens du Roy son mary, ilz n'auoient redouté aucun de leurs voisins, maintenant confesseroient que tout cest honneur ne dependoit que de leur seul seigneur qui leur procedoit d'une trop grande ignorance, & simpleste : car quant à la conduite, elle la cognoissoit si bonne des Ducz, qui leur commandoient, qu'ilz n'auoient occasion de s'en plaindre ne mal contenter, & que si la presence du Prince les animoit, elle prendroit plustost les armes comme Tomiris, en espoir de defaire aussi bien le Ciclop, qu'elle Cirus. Au fort s'il y en auoit de si laches que rien ne les peult asseurer, que mieux seroit qu'ilz vuydassent d'heure pour aller prendre le party qu'ilz conseilloyent aux autres, sans infecter le reste des gens de bien par leur couardie, comme on coupe un membre ystiomené de peur qu'il ne corrompe le reste du corps. Que s'ilz ne sortoient & renouelassent de rechef telz propos, elle seroit informer si diligemment des auteurs que l'auarice seroit descouuerte de ceux

ceux qui font porter la parole aux innocés dont ilz attendent le profit par les traffiques & intelligences qu'ilz ont es terres prochaines. Les Galdapois furent grandement reconfortez de la harégue de Silderne, & crièrent tous d'une voix : *Vive la Royne, pour la couronne de qui nous n'espererons noz vies.* Au quatrielme iour l'assaut recommença plus vif & furieux que parauant, qui fut tresvaillamment soutenu par ceux de la cité : mais le ieune geant enflamblé de choleure pour les siens qu'il voyoit trebucher des eschelles & renuerfer dans les fossez, court le branc d'acier au poing sur les gens mesmes, dont il abbat les premiers fuyans à ses piedz, tellement que les pauvres soldatz entre le marteau & l'enclume choyissent de deux craintes la moindre, & retournent visage contre les Galdapois : luy mesme oste l'escie à celui qui la portoit & la va ficher sur le répar. Adonc fut suiuy par les Geldiës, tant de honte, que de peur de ses menaces, qui cuyderent bien ce coup forcer leurs ennemys & estoit fait de ceux de dedans si la terre (par fortune) ne luy eust failly souz le pied, qui le bouleuersa dans le fossé à vn bout de la bresche. Vous eussiez veu lors ce fier geant soufflant, escumant, & se vautrant en la bourbe comme vn sanglier, dont il fut tiré à chef de piece par quelques soldatz : & adonc enragé plus que iamais reuiet à la bresche & detranche les premiers qu'il rencontre, puis gaigne terre suiuy des Geldiens, tant que le Duc ancien luy vient faire teste, qui resista longuement mais à la fin il luy descharge vn tel coup sur l'armet qu'il luy fait saillir la ceruelle. Alors huent les Geldiens cognoissans le duc à ses armes, & les Galdapois demy esperduz tiennent piteux silence, quand on couit le dire à la Royne estant lors avecques Daraïde, qui la prioit se seruir d'elle en si important affaire : mais elle craignoit de l'exposer en tel hazard, l'ayant plus chere que son propre Royaume. Toutesfois à ceste nouvelle cria Daraïde : Et quoy ma dame m'aymez vous tant, pour laisser la porte ouuerte au

geant qui vous vient raurir, & m'emmener captiue ? Si tire l'espee du costé du soldat qui les auertissoit de la mort du duc & pallie à trauers ses gardes qui la suyuient en lieu de la retenir : & la Royne confuse d'effroy luy enuoye sa bonne espee & son harnois dont elle fut vestue emmy la rue, encourageant tous ceux qu'elle voyoit, de mettre toute peur arriere & l'accompagner. Ce qu'ilz font ne voyant autre refuge à leurs vies, & Daraïde se fait guider à la bresche, ou arriuant elle trouue les Geldiens desia descendans le rempar. Alors d'une halebarde se fait faire place & ne demeure Geldien debout deuant elle. Si crie (Diane) & s'adresse au geant qu'elle void faire horrible massacre de Galdapois, auquel d'un reuers elle couppa les iaretz, & il cheut soudain de son long, le sang luy saillant à gros bouillons comme l'eau d'un sourgeon de fontaine. A sa cheute s'esleua vn haut cry des citoyens, reclamans tous, Daraïde, Daraïde, & reprenans cueur ceux qui l'auoient quasi perdu repoussent les Geldiens vers les fossez. Mais bien vous puis dire qu'ilz n'osoient encores approcher du ieune geant de tant que son cimetierre se pouuoit estendre, lequel ses gens emporterent à force en leur camp, ou il ne fut gueres sans rendre l'ame par la grand' effusion de son sang. Toute la menuë gent conceut tant de hardiesse par le bruit des proüesses de Daraïde & de la cheute du geant, qu'ilz vindrent au secours des soldatz avec telles armes que la fureur met aux mains, en sorte que par l'ayde de Daraïde ilz rechasserent les Geldiens & les menerent battans iusques à leurs trenchees. Elle donna ordre au guet de la nuit & s'en alla au palais de Silderne, suiuy du peuple non moins que si elle fut leur propre Royne, laquelle luy fit par dessus tous vne chere incroyable. Or pour le faire court, l'endemain elle fut d'auis d'aller recueillir le Ciclop des le matin à l'heure que moins s'en douteroit à cause de l'assault du iour precedent. Dequoy la Royne luy laissa toute disposition & puissance, luy ayant

Daraïde

Daraïde remōstré qu'il estoit necessaire pour son propos final d'auoir encores la teste de l'autre geant : à quoy elle ne faillit point, allant droit à son pauillon, & auertissant ses gés de ne s'arrester en autre lieu quelcōque. Le Cyclop n'eust loysir que de s'habiller, & prendre vne massue de fer: de laquelle il assomma les deux premiers Galdapois qui entrerent en son pauillon esperans le surprendre dormant : car autrement n'eussent osé penser de luy donner le bon iour de si pres. Daraïde luy adroissa aux iambes comme à son frere les voyant nuës, lesquelles luy faucha pareillement, & à sa cheute se faysit incontinent de la lourde masse. Puis aux principaux de sa troupe liura le present de la grosse hure pour porter à la Roïne, & s'en alla à la derobee rendre au boys ou elle auoit premierement rencontré la Roïne, ayant cōmandé à ses damoyelles de s'y trouuer secretement. La Roïne fut tresioyeuse de ce don, qui la deliuroit de la seruitude de ses ennemys: mais la douleur qu'elle sentit de l'absence de Daraïde emportoit ceste ioye au contrepois de la balance, laquelle elle fit suyure, mais en vain, car elle auoit piqué si roide tout le iour & la nuyt sans repos prendre, que gagné auoit le royaume de Gandil, ou elle & ses Damoyelles descendirent en vne espoisse forest & se coucherent sur l'herbe attachant leurs cheuaux aux arbres. Grand fust le regret de Salderne quand elle veid Daraïde perduë pour elle, de sorte qu'elle en tumba en pareille folie & troublement de sens que son mary : mais vn sage philosophe les guerit tous deux & remit en bon entendement, qui depuis (considerant la perte de ce qu'ilz aymoient estre hors d'esperance) se reconcilierent en parfaite amytie ensemble. Et Galinides non content de l'execution de la victoire faite sur les Geldiens par le ieune duc iusques à les chasser hors de ses pais, entra en grand puissance dedans le Royaume de Gelde, qu'il soumeit en deux moys à son obeïssance, les prenant aux retz qu'ilz luy auoient tenduz. A tant nous tairons d'eux

afin de poursuyure ce que depuis auint à Daraïde.

De l'auenture de Darayde en chemin, depuis qu'elle fut hors du Royaume de Galdap.

CHAP. LXXXVII.

DAraïde acompagnée de ses Damoyelles exploittoit chemin iour & nuit pour gaigner le port ou sa nef la deuoit attēdre : quand le soleil luy faulloit, vsant de la conduite de la lune, vers laquelle en cheuauchant elle leuoit les yeux & disoit : O déesse celeste, benigne guide par les tenebres des amoureux larrecins, fauorisez de vostre lumiere, le voyage de celuy qui vous adore sur tous les humains en vostre ymage de la Diane de Guindaye. Laquelle (ainsi que vous receuez en vostre corps luisant tous les dons & vertus des estoilles du ciel) aussi est vn vray recueil & tresor de toutes les beautez & graces mortelles : qui seule eust suffy, pour patron, & exemple au peintre Xeusis au lieu des neuf Dames de Crotone. Lās trop elle vous ressemble à mon gré, d'autant que vostre propriété est froide, son honesteté est tant glacee que les plus ardentz flambeaux d'amour si estaindroient : vous auez domination sur toute l'humeur des elemens : helàs comme les miennes sont agitees en diuers flus & reflux par elle, & comme ie sens son influence dans la moëlle de mes os. Au fort rien ne me feront tous les maux & tormens qu'ay à souffrir pour elle, moyennant qu'en fin i'en aye telle faueur que de vous (O déesse) receut vostre Endimion. Ses damoyelles qui l'escoutoiēt, auoient grāde compassion de son amour, & sentant leurs palefrois recrus, l'auertirent de ne mesurer sa traite à l'aune de son desir, ains auoir egard à la portee des cheuaux qui quitteroient bien tost son seruice si elle continuoit à les piquer ainsi en amoureux. Daraïde qui pensoit bien ailleurs, s'accorda à leur auis, & tournerent bride au logis d'un forestier, ou elles desployerent vaillamment leur appetit sur vn quartier de cheureul. L'ende-

main matin partirent de là pour aller trouver leur vaisseau, & gueres n'eurent cheminé que rencontrèrent deux damoyelles sur leurs haqueenes demenant fort grand deuil. Lors Daraïdes'enquerant de l'occasion: A à (dit l'une) seigneur cheualier, la plus grande lascheté qui fut iamais commise: Icy pres meurt malheureusement le meilleur cheualier que vismes onques, sur qui estoit sorty d'un chasteau vn autre fort grand & puissant lequel cestuy a mené à outrance, puis sont sailli: vingt conseleztz avecques haches & iauelines qui luy ont d'abordee occiz son cheual, & en fust desia autant de luy s'il n'eust gagné vne vieille mesure ou il leur tient estail, & l'auons laissé là, n'ayans le cuer de voir meurdir si meschamment vn tel preud'homme comme le commandoit vne damoyelle par vne fenestre du chasteau. Daraïde (desirant secourir les oppressez) pique incontinent celle part à toute bride & ses damoyelles apres au gallop: les autres pareillement rebroussent le chemin qu'elles estoient venues, esperant beaucoup de la taille & contenance de Daraïde. Qui à l'issüe de la forêt choisit les combatans & esperonne plus viuement, criant à l'approcher: trahistres paillardz retirez les mains de dessus ce bon cheualier, dequoy ilz ne firent conte, & il l'apperçoit faisant deuoir d'homme de bien, en ayant trois à ses piedz ne remuans plus bras ne iambes: & las de la longueur du combat ne se soustenoit plus que sur les genoux: de sorte que sans la venue de Daraïde il ne pouuoit plus gueres durer. Qui de sa lance couche le premier par terre, & du choc du cheual en reuerse deux: puis au retour, de la hante rompué leur descharge relz horions, que le plus roide en baïsa sa grand mere. Adonc craignāt qu'ilz ne tiraissent à son destrier, descend legerement, & le tronçon ietté, met la main à sa bonne espee (qu'il nommoit Tessale) de laquelle il trencha le bras net pres du coude à celui qui plus estoit acharné sur le preud'homme: le bras tomba sur l'herbe, & le

manchot descoche de douleur craignant par plus attendre perdre le reste: car l'acier de ceste espee estoit de si fine trempe, avec la verueur des neïfz qui la manyoient, qu'elle fendoit & perçoit les hauberts & mailles de fer aussi facilement que si ce fussent escorces d'arbres. Peu se soucia Daraïde de suyure se fuyart, ains s'adresse aux autres cōme vn loup affamé en vn troupeau de brebis, ne tirant coup à droit dont elle ne tué ou mehaygné son homme. Le pauvre cheualier (iaisoit que nauuré & travaillé à l'extremité) s'esuertua pour ayder à celui qui luy sauuoit la vie, s'attachant au premier ou sa force le peut porter, auquel il donna de rouges iartieres. Et Daraïde y ouura de telle furie qu'en peu d'eure ioncha la place des corps de plus de la moytié de ses ennemys: surquoy le reste prit auis d'euader de vïstesse, si Daraïde ne les eust suivis de si pres que les derniers ne passerēt iamais plus outre, ains choysirent la place pour sepulchre ou elle le ataignit. Les mieux courans gaignerent franchise au chasteau sans oublier de tirer la porte apres eux. Lors Daraïde retourne arriere le pauvre cheualier que le cuer seul trainoit de loin apres luy: & à l'heure mesme arriuerent ses escuyers, & les damoyelles estrangeres trop esbahies de sa vaillance. Le cheualier qu'elle auoit secouru se couche adonc sur l'herbe & reconnoissant Daraïde, qui pour prendre air haussa la lumiere de son armet, commence à s'escrier: O Iuppiter! quelle grace me fais-tu apres le travail de Mars de planter deuant moy tour ce que ie desirois en ce monde. Daraïde ne pouuant penser qui estoit le personnage tāt resiouy de sa rencontre, met pied à terre & s'assied pres de luy, qui de rechef exclame: He Daraïde, que ie tiens mes peines heureuses aquerans telle fin à mon souhair. Ce disant luy iette les bras au col & les damoyelles luy delacēt le heaume, dōt Daraïde le cognust pour Galazar de Barberouffe, qui luy dit s'estre mis en sa queste suyuant sa promesse, adōc elle l'embrasse, disant: Gentil seigneur trop m'obligez

igez de voz labeurs, ie remercie les dieux de m'auoir donné le moyen de secourir celui à qui i'estois cause d'encombre. A l'instant les femmes le desarment & bandent ses playes à leur pouoir: apres il monte sur vn des cheuaux de ses ennemys, prenās ensemble le chemin de l'hostel d'vn gentilhomme dont il estoit party le matin avec ses deux freres, qui auoient pris (comme il racontoit à Daraïde) deux autres voyes par accord de soy rendre tous au cinquiesme iour au mesme lieu pour rendre conte de leur auenture. La dame du chasteau) tant qu'ilz la peurent ouïr) ne cessa de vomir sus eux toutes les iniures & maudicons qu'une cholere de femme peut forger: & quand elle les eust perduz de veuë passa vn cheualier venāt d'autre costé qu'elle adiure sur l'ordre de cheualerie de la venger du tort qu'auoit receu de deux faux cheualiers qui s'en alloient la part qu'elle luy monstra, promettant luy enuoyer secours pour amender son outrage. Le cheualier qui la creut luy proteste y faire son plein deuoir, & elle despesche aussi tost trois des siens qui estoient sains & entiers pour aller à son ayde-

De la vie amoureuse que menoit Garaye en l'Isle de Lemnos avec la Royne Cleofile.

CHAP. LXXXVIII.

TAndis que Daraïde s'achemine au retour vers sa Diane, i'ay à vous dire en quel estat viuoit sa compagne Garaye avecques la Royne Cleofile: laquelle arriuee en son Isle de Lemnos fut grandement festoyee par ses sugetz, faisant part de tous honneurs & deduitz à son cher dom Arlanges, iagoit qu'en plus grand respect & estrangeté qu'auant la cognoissance de son estre. Dequoy il ne se pouuoit bonnement contenter en son esperit, & se retirant quelque heure du iour à l'escart pour gouverner ses menuës pensees, s'arguoit luy mesme de cowardie, & que (veu la ieu nesse de la Royne & la sienne) le desir ne pouuoit estre q̄ mutuel & semblable, mais

que les dames (par la honte que nature leur a baillees pour garde de leur virginité) ay moient mieux estre à demy rauies par force de l'amy que de cōfesser iamais la dette, & desserrer vn ouy à plat d'entre leurs dets. Le luy diray (discouroit à part luy) que de mon affection elle n'a occasion de douter, que ma race n'est indigne de la sienne, que si i'eusse voulu m'alaitter de simple veuë de beauté sans autre contentement, ie n'eusse quitté la presence de Diane pour la sienne, si elle me vouloit ainsi laisser languir & brusler à petit feu que i'auois plus cher, avec son congé, de pourchasser ailleurs ma bonne auenture: neantmoins auoit bien resolu en soy de ne prendre ce congé quand elle luy voudroit donner.

Et vn iour qu'il l'a veid en plus gaye contenance que de coustume, proposa luy deduire au long tout son discours, & commença: Ma dame, ie souffre tant pour l'amour qu'il vous ie porte, que ne me sens pouoir plus gueres viure sans vostre reconfort.

A quoy la belle Royne luy respondit en soupirant: mon amy chacun sent son mal, & croy que vostre peine & langueur n'est pas egale à la mienne. Ce mot troubla tellement l'esperit de dom Arlanges, qui auoit basti sa harengue contre vn refus, que toutes ses remonstrances auant pourpensees s'en allerent en fumee: & ceste parolle luy creua le cuer, de sorte que la langue serree de passion perdit son office à re pliquer. Parquoy toute son entente fut d'ores-enauant à la seruir & honorer, & luy cōplaire en tout, iusqu'à vn soir qu'apres souper il l'a menoit souz le bras pour mener au riuage de l'Isle, verd & mol de mouce: là ou regardans ensemble la mer tempestueuse, il luy dit de rechef: Sçauiez vous, ma dame, pourquoy les poëtes ont dit que Venus estoit nee en la mer? A quoy, elle respondant auoir entendu de quelque sage que ce fust à cause que l'humeur est matiere de generation: Non non, dit don Arlanges, c'est pour-ce que rien ne ressembe mieux à l'amour que le nauigage: qui fut occasion

à vn gentil esperit de peindre Cupido (se trouuant en danger d'estre noyé des larmes de quelques amans) dese soir sur son carquois comme barque , fichant au mylieu vn de ses traitz pour mast, tendant pour voile son bandeau (auec sa corde pour vergue) qu'il emplissoit de ses souspirs en lieu de ventz, & pour auirons vsoit de deux autres fiesches . Car (ma dame) disoit il, ceux qui bien ayment, trop cognoissent les tempestes d'amour semblables à celles de la mer : les refus & desdains sont les vens contraires, & les craintes, despitz, ialousies & autres pensees fascheuses, sont les vagues impetueuses. La raison y ha aussi peu de puissance que le tymon en la nef en temps de fortunat & orage. Les pauvres mariniers se resiouissent voyans au haut de la hune apres la tourmente flamboyer Castor & Pollux , aussi me tiendrois heureux apres les tenebres de mes ennuyx & angoisses de voir vn esclatir de vostre pitié & mercy. A quoy Cleofile : Je croy Arlanges que l'amour peut auoir quelque conformité à la mer , mais c'est à l'aymer vulgaire plein d'amer, de ceux qui s'y laissent precipiter sans frein ne bride suyuant l'amour auetgle qui ne donne lieu à raison ny conseil non plus q̃ ceux qui tendent à quelque port faisans voile sans egard de tēps, & choisissans les rûbz à la boline pour la routte batue. Ce n'est merueille si telles gens sont desuoyez du point ou ilz aspirent & s'ilz eschouent en quelque blanc, ou font naufrage contre vn rocher. Adonc Arlanges: l'amour que blasmez comme auetgle (ma dame) est loué d'estre nud, d'autant qu'il ne peut viure couuert de trop longue dissimulation, autrement ses pensees seroient telles que le cypres, hautes, comme les miennes en vostre endroit, mais steriles & infructueuses . Pour ce contraint suis, apres y auoir bien pensé & contrepensé, de vous declarer que m'en vois mourant sans vostre soudaine mercy : tant mon ame est affamee de la delicieuse viade que les dieux appellent ambrosie, dont mon œil & mes autres sens fleu-

rent l'odeur continuëlle estant tousiours si pres de vous . Alors Cleofile de face fort troublée : l'auois ; Arlanges , estimé iusques icy, que vostre desir fust fondé sur toute honnesteté, dont m'estonne grandement qu'elle occasion ma vie vous ait depuis pu donner de changer propos à me machiner tel esclandre & tache à ma renommée, que toute l'eau de ceste mer ne pourroit lauer n'y effacer . Sçachez que ie vous aymoies sincerement & en esperance de nocces, laquelle me tranchez maintenant par ceste indignité, considerant quel est le but de vostre vouloir, auquel ceux qui visent, ainsi que vous, venans au dessus de leur intention brutale, rassasient tout leur appetit, & leur affection s'estaint & meurt en la iouissance . Bien est esblouy vostre entendement, bien auetglé vostre amour que m'auez pallié de si fainte discretion, prenant la cargue si longue pour m'attirer en voz agez . Làs ie loue les dieux de mē les auoir descouuertz temprement auant que i'y sois tombee, comme i'auois pourgetté, Arlanges, de requerir le grand Roy Amadis de nostre mariage: & i'eusse pris, ainçois esté prise par vn amoureux, pour mary, de ceux qu'on meine deux à deux à la foire, qui bastissoit toute son amour sus vne rosee de volupté tost sechee . Ce disant, tourne court au chemin de son palais, se demeslant du bras dōt Arlanges la soulageoit: & apres auoir fait cinq ou six pas en silence, luy recharge: Je n'auray plus opinion (Arlanges) que la conionction puisse iamais auenir de nous deux que i'auois esperee, d'autant que ma foy est obligee à ce grand Roy, qui me voulant pouruoir dignement ne choisira le personnage hors de son sang, lequel en cecy vous desmentez trop en forlignant de l'honnesteté & loyauté grecque . Car ie tendois de ma part à vne amitié parfaite & eternelle, comme sont les esperitz qui s'en lient & embracent, & vous tirant à ie ne sçay quel plaisir du corps, cesseriez d'affection au plus à la premiere maladie ou à la vieillesse ternissant & flaistrissant
ceste

ceste fleur qui maintenant paist & recree vostre veuë. Je vous puis asséurer qu'à ce propos Arlanges fut merueilleusement effrayé & si la Roynes ne l'eust avant lasché elle eust senty vn nouveau tremblement de tous ses membres, & marcha vne longue pause sans parler, puis respondit: Si ie ne cognoissois, ma dame, vostre bonté accoustumee (qui ne voudroit condamner vn criminel sans l'ouïr) ie serois en telle trance de ceste parole, que celui à qui on a prononcé l'arrest de sa mort. Mais ie vous prie ma dame, d'examiner mon fait plus patiemment, & si ne voyez mon amour net comme la perle orientale, cler plus qu'une source d'eau cristaline, sans bourbe & ordure quelconque, alors l'exillez pour mal-faïtteur, rejettez-le comme faux, foulez le aux piedz comme ord & fangeux. Premier, le temps qui desnue toutes choses cachees, pourroit il en vostre presence asiduë auoir maintenu en moy d'hypocrisie malicieuse que m'imposez d'auoir tant enduré de soif sans boire, estant si pres de la fontaine de ma vie, voire sans en auoir encores osé requérir vne goutte. Tant de constance, tant de patience ne peut auoir la volunté souillée que m'imputez qui n'est restraïnte de raison aucune, ains brusle & ard à l'instât qu'elle sent le feu, non moins que la nasse ou il se prend & vole de loing. L'amitié qui me rend vostre, brusle en la froideur de vostre integrité, à la forme du cancre en l'eau, & tant y bruslera que vous viurez, comme la mesche autant que dure son huile. Car, ma dame, ceux de qui l'amour passe quād & la fruition, son gens d'es petit volage, qui ne desiroient que ceste legere conqueste & despouille: & estans ainsi paruenus à leur fin, retirent le pied de la poudre pour varier ça & la en reprenant appetit par changement, à la mode du bon glouton qui de tout goust. Mais ceux que fortune adresse à celles qui vous ressemblēt, sont trop loing de ce remuement de menage, par ce que leur affection est nee au ciel sans estre en la disposition des hommes de

la laisser non plus que de la prendre: les ames sont esprisées entr'elles que l'approchement des corps ne peut assouuir, la source en est immortelle qui ne peut tarir, d'autāt que ce fait gist en contentement eternal qui fait oublier aux sens leur folle conuouitise. Au contraire est des sotties & ignorantes, esquelles l'amy trouue & void en vn coup tout ce qui y est, elles ne pouans rien fournir d'arriere boutique, ains deployans tout leur tresor à la premiere monstre de leur personne. Les sages, vertueuses & bien apprises, ont tant de reserue & d'espargne de grace, courtoisie & prudence, que par leur communication priuee on y cognoist encore plus qu'on n'auoit sceu imaginer: tellement que le desir de l'amy est allaitté & entretenu par espoir de cognoissance (comme tousiours nouuelle) de ses perfections infinies. Comment, ma dame, ne sçauiez vous pas que le premier motif d'amitié procede de la veuë? & qu'apres l'œil mille penſees volent par la fantasie qui allument d'auantage nostre desir: en sorte, que tendans à iouir de plus en plus de la beauté, voulons laisser l'ombre, & de tous noz sens embrasser la realle verité. Et quand au changement, il ne peut tumber en moy enuers vous, à cause que sommes nez en telle proportion & conuenance l'un avec l'autre, qu'Arlande ne sçauoit aymer autre que la Roynes Cleofle, & elle ne pourroit trouuer plus vray amant & propre à son destin qu'Arlande. Parquoy estans si semblables de corps & d'ames se ioignent en vnion parfaite, quasi de deux en vn, que les anciens ont appellé homſenin, qu'il n'est possible que le chose du monde puisse iamais separer ne desioindre. La Roynes estima fort en ce discours l'esprit du ieune prince qui n'oublioit en son besoin à se seruir de la nourriture & instruction d'Athenes: & comme ilz approchoient du palais (ou la compagnie se rallioit pres d'eux) elle luy dit comme vn peu rappaisée: Arlande, ie ne sçauois (quand tout est dit) prendre en mauuaise part l'affection que vous me portez, q

toute grand Dame seroit heureuse de recevoir de telle personne que vous. Aussi vostre sexe vous donne loy de pourchasser voz aventures, & le nostre nous enjoint au contraire de nous tenir sur noz gardes, & d'estouper noz oreilles comme le serpent contre le charme de vostre doux chant. Au fort si vostre amour est tant ferme & constante, soit doncques ceste requeste respiree iusques à l'assurance que pourrons avoir l'un de l'autre : par la main du grand Roy Amadis, qui n'est frein ne bride de contrainte ennuyeuse, à ceux qui n'ont enuie de changer ou varier. Ce mot resioit grandement Arlanges, l'enhardissant de dire encores : Ma Dame, vous me comblez d'heur & felicité par ceste haute parolle en laquelle gist la somme de mon souhait : mais elle n'emporte point de delay à l'effet de vraye amour, seulement conserue l'honneur en public quand on la veut demener sans secret ne couuerture. Plus vous diray, que l'amour (à qui bien l'enrend) apres qu'il a tiré aux amans les traitz dorez de son arc ne veut qu'ilz soient liez que de sa corde. Il est de la loy de nature, qui à cause de son antiquité & prééminence ne veut estre bridée par celle des hommes. Employez (respond Cleofile vn peu renfrognée) ces menuz propos en voz gayes ieunesces, et croiez les Dames de ce climat aussi glorieuses en chasteté que les Princes de vostre sang en loyauté. Adonc entrerent en la sale ou ilz s'assirent & le vin de collation fut apporté, mais la Royne ne but à Arlanges, comme elle souloit, & si ne voulust qu'il la vinst entretenir à son coucher ne leuer comme auoit de coustume : Dequoy il conceut telle melancolie que toute la nuyt ne cligna l'oeil pour dormir, faisant tant de regretz de ce deuis trop hardy, & avantageux que la plus dure pucelle du monde eust eu pitié d'ouir sa repentance.

Du moyen de reconciliation & appointement de don Arlanges avec la Royne Cleofile.

CHAP. LXXXIX.

Cleofile continua quelques iours ce mauuais visage à Don Arlanges qui luy fut tres-grieue punition de son audace, se voyant autant long de son bien qu'il auoit auant pensé d'en estre pres : car la Royne parloit fort peu à luy & non que de propos cōmuns, sans autre faueur ne familiarité qu'au plus estrange homme d'Inde. Toute-foys apres auoir porté si long temps en son cuer ce pesant fardeau, vn iour qu'il veid la Royne se pourmener seule en vneallee de son parc, les Damoyelles s'amusans à faire bouquetz & chapeaux de fleurs, il prend occasion de luy en porter vn fait de sa main, tout de roses muscades, & en le presentant luy dit (voyant qu'elle l'en remercioit maigrement) ma Dame lequel trouuez vous meilleur de parler ou mourir : telle pourroit estre la parolle (respond Cleofile) qu'il vaudroit mieux à l'homme de bien mourir de cent mortz qu'il la delascher. Le sens fort bien (dit Arlanges) mais amour trop puissant me l'a tirée malgré moy du fond du cuer donnez luy en la faute. A quoy elle repliqué : qui fait enuis ce qu'il ne doit, est en danger de frequente rencheute : Amour n'est à encoulper de rien, ains celuy qui en abuse pour ce qu'il est tel qu'on le fait, de soy ne bon ne mauuais : s'il tumbé en vn esperit fol, c'est vne rage : si en vn sage & auisé, c'est vn aisé conduit par raison. Alors Don Arlanges : Ma Dame le cuer me creueroit si ne le degorgeois, à vous dire, qu'au cas que le dedans rapporte au dehors ie me voy du tout banny de vostre grace, & cest exil me tournera en vraye mort naturelle : par ce que l'amour qui parauant estoit en nous deux, retombe maintenant toute sur moy, qui m'est vn fais importable, veu que me sentoies de la mienne seule chargé outre mes forces. Cleofile regardoit le Prince ententiuement, & pour responce luy dit qu'il estoit heur d'aller disner dont il demoura en grande perplexité. Ainsi reortne la Royne au palais ou l'on auoit desia couuert & mangé fort melancholiquement, monstrant vne face

face sombre & morne, & passant ce repas sans aucun deuis & le soupper pareillemēt. L'endemain alla à l'assemblée en la forest prochaine, ou fut rencontré vn grand lyon qu'Arlandes (mettant soudain pied à terre) enferra du premier coup d'espieu, dequoy les veneurs luy donnoient grand los au dîner, que Cleofile attribua plus à la fortune de la beste qui se presenta de flanc plustost que de pis. Le Prince considerant la continuation de sa defaueur en estoit sur espines & depassionnoit redoutant merueilleusement l'issuë. Les tables leuees il s'escarta vn peu en vn fort buisson pour en faire ses plaintes à son aise. Le iour estoit chaut comme au plus haut de l'esté pres des caniculiers qui empescha la Roynie de chasser si tost, & alla chercher avec deux de ses plus familières damoysselles, vn ombrage pour reposer vn peu à la fraischeur, lequel elle choisit aupres du buisson ou d'auenture estoit dom Arlandes, & oppressee de sommeil dit à ses filles qu'elles se pourueussent de reposer quelque part la entour. Guerres ne fut là qu'elle entendit la voix douloureuse de son cheualier disant: A à amour'en quoy t'ay-ie offencé pour me traiter si cruellement? es-tu pas d'estrange nature de tourmenter & martiriser si durement ceux qui te celent & retiennent au clos de leurs poitrines? & s'ilz t'en mettent hors pour te donner air les salarier de desdains, refus & eslozgemēt du bien qu'ilz auoient approché. Amour si c'est pour essayer la constance de tes sugerz, la mienne n'est elle point assez esprouuee par la longueur du temps? Si c'est pour mieux faire sauouer le sucre de ton ambrosie par l'amertume de tes entrees & premiers metz, ceste cy est si grande qu'elle pourroit tant hebeiter le goust du palais qu'il n'auroit plus vertu de sentir la douceur de ta celeste viande. Je ne dy pas que l'appetit ne s'esueille, par ieune & abstinence, mais tant peust on endurer de faim que les boyaux restroississent & quel'appetit se perd par trop attendre. Apres ce discours il fut assez longue

pause sans plus parler, ainsi gémissoit & souspiroit tendrement, puis recommença: Amour ie recognois mon crime d'auoir osé vser de ce lāgage amoureux à dame si chaste, bien me deuois contenter de sa bonne chere, de ses propos amiables, de son doux regard, brief du simple bel accueil en attendant à sa discretion le don de gracieux ortroy. A à fauce langue que tu affliges tout le reste du corps par ton forfait, d'auoir ainsi vommy à la volée ce qui valoit mieux teu que dit: ores te troncirois volontiers entre mes dents si n'esperois que peusses encores par amende honorable enuers elle reparer ta faute, & rendre vn iour à ce las corps quelque plaisir en loyer du mal que luy fais maintenant souffrir: Et dieu quel mal? d'estre priué de tout le bien que ie receuois de son œil riant, de sa bouche d'or, de sa main prenant la mienne. Car de dame mieux emparlee & mieux moriginee, ie croy qu'il n'en soit point, & ne fut ne sera iamais. Se vāte Diane de sa beauté, Cleofile ne luy en doit gueres, face cas de sa blācheur effaçant la nege, la couleur brune de ma Roynie la vaut bien nuée de vermeil qui n'est tant fade ne mignarde: le foy du corps elle a gresle & aussi rond que s'il fut fait au tour: vne dispositiō si gaye qu'il semble (Amour) que sois attaché au bout de tous ses membres & que tu danSES & iouēs en tous ses gestes & mouuemens. Car elle ha vne grace parfaite, vne certaine bien-seance en tout ce qu'elle fait & dit (qui n'a point de nom) laquelle enrichit tousiours de moytiē la beauté ou elle se rencontre, & ou y en auroit quelque defaut le couure par la splendeur diuine: tellement que ie croy que Venus vostre mere ne soit autre que la grace, ou que ce soit sa compagne vniue. Et qui ne periroit par la veuē de tel basilic: qui ne s'esblouiroit à la lueur de ce soleil? Cleofile prenoit grand plaisir d'escouter de ses propres oreilles la vehemente affection de dom Arlandes qu'elle n'estimoit pas sainte en lieu ou il ne se doutoit d'aucun tesmoin, & ouit qu'il acheua

en ceste sorte : Somme (Amour) tu sçais que ma maladie est extreme qui m'a contrainct suyuant le conseil des medecins d'vser de remede perilleux: voire elle est incurable & mortelle sans brief secours . Adonc se teust Arlanges avec vn long soupir, & la Roynes se retira sans mener bruit, & estant assez eslogee demanda les chevaux pour aller à la chasse rongean à par soy les piteux propos de dom Arlanges , & quel ordre elle y donneroit . Les cors & trompes des piqueurs sonnerent & les meutes des chiens retentirent par le bois : qui firent à coup leuer le Prince de son buisson & se renger pres de sa chere maistresse qu'il n'abandonna oncques de peur du danger des bestes furieuses . Car bien tost fut vn grand cerf elancé par les chiens apres lequel la Roynes se met à courir de cheual qui fut suyui selon que chacun fut bien ou mieux monté . Or l'estoit elle à l'auantage & brosse seule parmy le bois: mais Arlanges qui la suyuoit tousiours de l'œil veid qu'elle tira à main gauche, combien qu'on ouit glapir les chiens d'autre costé: parquoy laisse passer les damoyelles & les veneurs , puis tourna au chemin de Cleofile qu'il suyuit aux esclortz du palefroy au plus desuoyable endroit de la forest : & allant le pas pour l'espier sans estre senty, arriva à l'heure que d'assez loin il la veid descendre, & alors luy mesme en fait autant attachant son cheual à vn chesne ; en luy lyant la langue de peur de hannir . Puis la va approcher sans bruit à costé iusques à vn gros arbre : d'ou il la void couchee sus l'herbe en lieu fort dru & espais faisant cheuet de son manteau d'escarlata souz sa teste : elle s'estoit trouuee appesantie pour le sommeil qu'elle auoit diuertie & repoussé en oyant les regretz de son amant, ioint la tristesse qu'elle en auoit conceüe , comme celle qui (nonobstant sa rigueur & dissimulation) ne luy deuoit rien de retour. Guerres ne fut là sans exclamer piteusement , honneur, honneur faux meurdrier des pucelles en quel estat m'as-tu reduitte de me faire

liurer la guerre à celuy en qui gist ma paix, de me composer en toute rudesse de contenance & mauuaise chere contre celuy sans qui ne la puis iamais faire bonne ? Helàs que ie sens de destresse pour celle que luy voy endurer, & que ie crains qu'il me laisse & quitte n'esperât plus trouuer d'amour en moy. Amour, ie l'ay bien desseruy, mais pardonne moy & me garde de si grief encombre. Je croy (veu son bon esperit) qu'il aura bien apperceu à ma maniere que i'ay peine à luy donner peine, & que ma fiction est affection mesme . O quel plaisir sentit Arlanges de la repentance de s'amy & de la part qu'elle portoit de cest ennuy : combien de foys il eust enuie de l'aller reconforter voyant qu'elle fendoit en larmes & disoit : Làs s'il m'auoit fait tort, sa penitence a esté dure & longue , avecques preuue certaine de sa vraye amytié (O quelle satisfaction luy sembla receuoir par ce mot de tout son tourment) & qu'il plaيدا en soy pour & contre s'il se monstreroit ou s'il ne bougeroit de l'embusche iusques à la fin . Mais l'excellence de la Princesse avec l'opportunité du lieu le pousserent hors de là & l'attirerent iusques à elle , à qui il dit comme suruenant à l'heure : Ma dame i'ay tant routé le bois çà & là que vous ay trouuee , craignant que seule ne fussiez en quelque peril de ses bestes . Elles furent fort estonnees de celuy qui la surprenoit, & honteuse de doute qu'il eust ouy sa franche confession . Lequel se met à genoux deuant elle le chef enclin, disant à mains jointes: Làs, ma dame mercy vous requiers de l'offence que vous ay commise , imitez les dieux en clemence, desquelz vous tenez tant d'autres partis de vertu , ou me donnez congé de m'en aller si loin que plus ne soit nouuelle de moy: car possible ne m'est de viure encor vn seul iour en vostre presence, & soustenir ceste face tant terrible & mal animee contre moy pour trop vous aimer, & de moins vous aimer iamais ne seroit en ma puissance. Cleofile voyât celuy qu'elle aymoit plus q̄ soy mesme humilié, tréblant deuant

deuant elle, la larme à l'œil, ne peut pas respondre à l'instant que de pareilles larmes avec vne frequency de poulz comme par accez de fieur. Si le releue & fait soy sur le tapis mol de verdure aupres d'elle, luy disant d'une vois foible rompuë de menuz sanglotz : le vous fay iuge Arlanges, si estant telle que ie suis n'ay eu raison de vous dire, ce que i'ay dit. A quoy il respond : le confesse que c'est moy qui ay failly, & me presente à vostre misericorde : en signe de laquelle (ma dame) vous requier vn baiser : quant & quant il s'auance pour le prendre, l'approchant à soy d'un bras non obstant quelque petite defence. Il tint se long baiser n'ayant pouoir de soy retirer du lieu ou gisoit son cuer, puis elle le repoussa doucement, & se maintindrent long temps regardant l'un l'autre. Lors il saisit les blanches mains les serrant & estraignant entre les siennes : Lors souspirs failloient des deux bouches longs & drus : les cueurs leurs battoient comme s'ilz eussent voulu sortir de leurs poitrines pour se ioinde ensemble : le sang montoit aux visages, puis les laissoit passer & decoulourez. Ainsi furent vne heure sans parler. Arlanges retournant au baiser, puis se retirant pour repaistre la veuë, comme si les yeux fussent ialoux de la bouche, remaniant par fois les mains de celle qui estoit demy morte : en sorte que tous leurs sens transportez & esperduz donnerent place aux ames de s'unir par le moyen du corps, demeurans chacun mort en soy & vif en l'autre, quasi yures de la liqueur de volupté (nommée nectar des dieux) quasi fondans de douceur comme au feu la cyre, quasi rauiz en extase, s'embrassans d'une ardeur gloute comme s'ilz eussent voulu estre tous entiers l'un en l'autre, & par ce moyen iouissans du souverain bien de ce monde, lequel les vrayz amans seulz cognoissent, & comme l'imperfection de ceste masse enuolpe les esperitz, tellemēt qu'une part prenant plaisir priue l'autre des rayons d'amour, ainsi que le soleil eschauffant & enluminant la terre en un endroit

& hemisphere laisse l'autre en froideur & obscurité. A eux autrement auint & non en façon bestiale, ains estoient leurs sens corporelz comme serfz endormis, pendant que les ames maistresses s'entrecherent & visitent au plus pres que leurs prisons permettent. Or en telle pasmoison scauent les nymphes Hamadriades seules ce qui auint aux deux amans en ce lieu du bois : dequoy eux mesmes (estans lors euanouys) ne se souuindrent pour en scauoir apres parler ne tesmoigner. Dont scahent ceux qui de telz deduitz ont cognoissâce & memoire, qu'onques ne furent en telles noces, ains qu'en leur festin amoureux ont esté seruis de gros metz & entremetz & de glan pour blé, dōt ilz se saoullent souuent & lassent, la repentance suyuant de pres le fait. Telz rompent la parolle par le baiser, & le baiser par elle mesme, la veuë par l'attouchement & au contraire, sans que leurs sens s'assouissent iamais iusques à goustier l'heur du rauissement, d'autant que la splendeur de la deité d'Amour ne peut enfoncer en estoffe si grossiere, ainsi que la chaleur du soleil perce peu auant la terre espoisse & dure. A tant se leuerent de la Arlanges & Cleofile comme s'esueillans d'un profond sommeil ou ilz auoient esté environ deux heures sans qu'il leur semblast y auoir demeuré un quart. Si vont reprendre leurs cheuaux & retrouver ensemble la troupe des veneurs qui rapportoient le cerf sur un chariot ayant esté à tous la iournée d'heureuse rencontre. La Roynie renforça deslors à Arlanges son estrangereté auant commencee, qui s'en recompensa bien en priué deux iours apres la surprenant seule endormie au plus secret lieu de ses vergers. Dequoy au resueil toute farouche entra en plainte & cholere contre luy disant : Helas Arlanges quelle trahison m'avez vous faitte de me dérober ainsi ce que vous ne tout le monde ne me scauroit plus restituer ? A grand Roy Amadis si ie vous ay failly de parolle vostre race mesme en est cause, qui m'a vollé par larrecin ce que de bon gré ie n'eusse iamais

O s consenty.

consenty . Las chetive que ie me sens de-
chéuë de ce que i'estois, qui plus ne se peut
restaurer: ayant perdu la precieuse coronne
de virginité. Làs Diane (à qui ie cedoïis mal
volontiers) quel auâtage ores as-tu sur moy
par la modestie de ta moins audacieuse Da
raïde . A quoy dom Arlanges: Ne me blas-
mez, ma dame, de chose que i'aye faite icy
estant si troublé d'aïse que ne sçay bonne-
ment que ie suis, ne que ie fais, ne pense,
sinon que nageant au torrent d'Amour ie
tends à ancrer au port de salut (qui gist en
vous) ou est le repos de tous mes labeurs.
Ce disant iouë des mains sur elle, qui le prie
de se contenter de la langue à dire ce qu'il
voudroit, & du bien de s'entrevoir & d'e-
stre l'un pres de l'autre (comme elle mesme
en estoit satisfaite) sans vser d'approche
plus cruelle, & qu'en amytie honneste, ou
les esperitz iouissent de la veuë & parole, le
surplus n'est à rien conté: mais il ne fut pas
en luy de tant soy commander: & apres, luy
dit que c'estoient les arres du mariage fu-
tur duquel ilz se deuoient asseurer puis qu'il
dependoit de l'auis du Roy Amadis qui de
sang luy estoit si proche. Ainsi la reconfor-
ta le gentil prince à son pouuoir, & depuis
continua tant à espier les retraïttes qu'il eust
occasion d'en rymer vne chanson qu'il chā-
ta vn iour estant prié de sonner du luth
en sa presence, deguisant vn peu les noms
seulement.

CHANSON D'AR-
LANGES.

*Arlang par foy, trauaux & larmes,
Liura telz assaux & alarmes
A Clyo que son dur cuer,
Par temps amollit la rigueur.
Et qui eust esté la cruelle,
Voyant mourir l'amy fidelle,
Qui sa vie n'eust rachetté,
Fust ce au pris de sa chasteté?
Ce fut au secret cabinet
D'un delicien iardinet*

*Qui contoye vn clair ruisseau,
D'une viue & argentine eau.
D'autre costé le verd bocage
Le couuroit de son frais ombrage:
Donc les oyseaux au bruit & son
De l'onde accordoient leur chanson.
La terre estoit, là par fleur mainte
D'odeur plaine & de couleur painte
Mais tout effaçoit vne rose
Qui par amour y fut enclose.
Arlang trouua Clyo s'amy
Sus l'herbette mol endormie
De qui ses yeux tant se repeurent
Que du tout eblouys en furent,
Elle tiroit souspirs diuers
Tesmoin de ses desirs coeuers,
Et dormant reclamoit par foy,
Arlang, Arlang de foyble voix.
Ce mot le fait à terre fondre,
Ou d'un baiser luy va respondre
Decouvrant la blanche poitrine,
D'ou sortit vn odeur diuine.
Son beau sain doucement vndoye.
Comm'au riuage de la mer quoye,
Comm'vndoye vn champ de haut blé,
Par le vent battu & soufflé.
Clyo s'esueille au baiser prendre,
Qui n'est pas ingrate à le rendre,
Entr'ouurant l'œil dont elle voit
Celuy à qui seule deuoit.
Tandis que la vermeille bouche
Des amans l'une & l'autre touche:
Les esperitz sont confus ensemble.
Tant corps de pres à corps s'assemble.
Les deux ames ne sont plus qu'une
Spirans vne alaine commune,
Et sont par vnion d'esperitz,
Les membres de fureur esprits.
Car l'ame d'Arlang au corps entre
De Clyo iusques en son centre:
Et l'ame d'elle en luy se reuge
Pour à la sienne faire eschange.
A chascune ensemble plus beau
Que le sien, ce logis nouveau
Et luy plaist y faire demeure
Quoy que riuant là en soy meure
Làs quand salut l'ame rauie*

Repre-


Reprendre sa premiere vie,
 Que sa naturelle maison
 Luy sembla horrible prison
 Vrays amoureux seulz vous scauez.
 (Qui de ce miel gousté auex)
 Comme vne doublé voluté
 S'vnt confite en volupté
 Venus (de qui tient ma victoire)
 Pour en consacrer la memoire,
 Je pendz à l'autel de ton temple
 Vn cueur iumeau des deux exemple.

Grande ioye sentit Cleofile en son cueur
 de ce secret discours de ses amours, qui peu
 à peu s'appriuoierent & furent maintenues
 par accord des deux parties en diuers lieux
 destournez, sans toutes-foys que personne
 en eust cognoissance ne doute quelconque,
 au moyen du bon ordre qu'ilz donnoient à
 la conduite de leur affaire : ioint qu'on
 n'en pouuoit auoir mauuaise opinion veu
 l'esperance du mariage. Or allerent plu-
 sieurs-foys (sous couuerture de la chasle) au
 lieu de la forest ou auoit esté la naissance

de leur soulas, & y entaillerent les deux
 noms de la chanson es arbres prochains,
 entrelacez de mille lacqz d'amours, qui
 prindrent telle croissance avec le bois com-
 me leur affection augmenta tousiours quād
 & l'aage iusques au dernier soupir de leur
 vie. A tant les laisse Galeris le croniqueur
 en cest aise à leur singulier contentement,
 pour vous raconter au douzieme liure en-
 suyuant, la peine que souffroit Diane d'au-
 tre costé par ialousie de la longue absence
 de sa Daraide, & quelle fut la fin de leurs
 amours, & pareillement de celle de Rogel
 de Grece & de la belle Leonide, avec main-
 tes auentures plus estranges & entreprises
 d'armes plus hautes que toutes les prece-
 dentes, au pourchas des mariages de ces ex-
 cellentes Princesses. Desquelz ie quitte
 le peinceau à plus heureux peintre que moy
 qui aura cogneu par effet & cueilly le fruit
 de pareille iouissance de son desir : laquelle
 couste trop à tant penser & exprimer, a ce-
 luy qui y aspire quasi hors d'haleine en foy-
 ble & tardive esperance.

*Fin de l'Onsieme liure d'Amadis
 de Gaule.*






LE DOVZIEME LI-
VRE D'AMADIS DE GAVLE,
TRADVIT NOUVELLEMENT
D'ESPAGNOL EN FRAN-
ÇOIS,

Contenant quelle fin prindrent les loyalles amours
d'Agefilan de Colchos; & de la Princesse Diane
& par quel moyen la Royne Sidonie se rapaisa, a-
pres auoir longuement pourchassé la mort de dom
Florisel de niquee, avec plusieurs estranges auen-
tures non moins recreatiues que singulieres, & in-
genieuses sur toutes celles qui ont esté traitees es
liures precedents. Traduit d'Espagnol en Fran-
çois par G. Aubert de Poitiers.



EN ANVERS,
Par Guillaume Silvius, imprimeur
du Roy.
L'AN M. D. LXXIII.



A TRESHAVTE ET TRESILLV.

STRE DAME MA-DAME DIANE DE POI-
tiers, Duchesse de Valentinois.

G. Aubert de Poitiers.



IOUT ainsi que les anciens mariniers auoyent accoustumé en se hazardant à quelque longue navigation, de se vouër à celui de leurs Dieux, ou à celle de leurs Déeses, dont ilz esperoyent plus de secours contre les furies de la tourmente. Aussi, Ma-dame, voulant hazarder ce mien labeur au iugement d'une infinité de personages, qui sont le plus souuent tous contraires en leurs opinions, ie me suis voulu vouër & mettre en la sauuegarde de telle, qui peut par sa seule ombre, & par la souuenance de ses autres faits genereux, espouâter tous mes aduersaires. Car s'ilz se souuiennent de la vengeance que Diane vostre deuâciere prit de l'indiscret Oenee, & du mal fortuné Acteon, de l'un pour l'auoir oublié en son magnifique festin, & en ses solennelz sacrifices, de l'autre pour l'auoir ozé regarder nuë en la vallee de Gargaphie. Je croy, Ma-dame que vous cognoissant de mesme nom, de pareille grandeur, & de non moindre courage, ilz seront autant craintifs à vous offencer en mesdisant des choses qui vous seront consacrees, comme les autres deux furent nonchalans à honorer celle qui vous ressemble dans le ciel, & que vous ressemblez sur la terre. Mesmement qu'en ce discours ou sous le nom de Diane, & sous la peinture de toutes les excellences qu'il est possible de desirer, vostre grandeur semble auoir esté prophetizee de long temps. Il ne se trouuera homme lequel en defauorisant vostre historiographe, ne se montre rebelle aux celestes destinees, qui ont voulu que l'histoire de voz perfections fut entendue par les Espagnolz deuant vostre naissance, & descouuerte aux François en vostre vivant. Par lesquels propos, Ma-dame, ie croy que vous entendez de-ia assez l'ocasion qui m'a meu à vous dedier ceste histoire de Diane : car outre ce que vostre genereuse vertu en toutes choses, & singuliere affection aux bonnes lettres, & benignité enuers vn chacun, m'en estoient raisons tres suffisantes, le sujet de soy-mesmes m'y contraignoit, & ne pou-

E P I S T R E.

uoit iustement s'auouer à autre que de vous. Je pourrois dire plus: Ma-dame, que le liure precedent vous aiant esté présenté, cestuici, qui en est le paracheuement, vous estoit encores deu, afin que vous eussiez le discours entier des fortunes de Diane. Mesmement qu'au prochain liure les douleurs de celle excellente Princeesse estoient seulement recitees, & partant vous les ayant receuës, il estoit tresraisonnable que vous en receussiez pareillement la consolation. Or est ce moy, Ma-dame, qui apporte la ioye, le contentement, le bonheur, la liberté, & l'entier acomplissement des desirs de vostre Diane, pour recompense des ennuis, du mescontentement, de l'infelicité, & de la langueur ou l'on l'auoit premierement abandonnee. Et si ie ne craignois de trop me vanter, i'ozerois franchement vous asseurer, Ma-dame, que d'autant que le plaisir est plus agreable que la douleur, & la reioissance plus gracieuse que l'ennui, d'autant le present Liure vous sera plus agreable, & plus gracieux que le precedent. Car s'il vous plaist lui prester tant de faueur, que de le faire lire deuant vous à quelques heures, vous trouuerez que l'autheur Espagnol s'est de tout son pouuoir efforcé à rédre le discours plaisant, l'histoire bien continuee, les propos bien suiuis, les harangues bien apropiées aux personnes, à la matiere, au lieu, & au temps, autant que l'opportunité le pouuoit souffrir. Mais i'ayme mieux reseruer le iugement de ces choses à vne autre fois, que la manifeste aparence de la verité me deliurera de tout soupçon de vanterie. Et ce pendant, Ma-dame, i'atendray le moyen de m'employer à vostre seruice, és endroitz que ie penserai vous estre plus agreables: vous supliant, prendre ces arres de ma bonne volonté pour le futur effect d'icelle, & receuoir en ce mien essai d'une plus haute entreprise, autant benignement & gracieusement, comme mon affection a esté humble & entiere à vous le dedier & consacrer. De Paris ce xxviiij de Iuillet.

DISCOVRS DE G. AVBERT SVR

SA TRADVCTION DV DOVZIESME LI-
ure d'Amadis de Gaule.

AV LECTEV R.



EV s'en a fallu, amy lecteur, qu'en discourât à part-moy les considerations qui ont meu les anciens autheurs à mettre leurs liures en lumiere, ie ne me soye au contraire resolu delaisser les miens en tenebres, & mes estudes en repos. Car si les anciens ont escrit pour estandre leur renommee, ou pour profiter au public, ou pour gagner le pris proposé à la vertu, ou pour faire entendre à la posterité les faitz genereux de leurs chefz de guerre: en ce miserable siecle, duquel nous ne pouuons, esperer en lieu de louange, sinon vne calumnieuse risee, & lieu de guerdon de noz trauaux, le desdaing d'une vile ingratitude: Il ne nous est resté aucune ocasion (si nous scauions bien reigler noz affections) de faire le profit de ceux, qui n'ont aucun soucy du nostre, ny de rediger par escrit les faitz memorables de tel, lequel (encores qu'il le merite pour sa prouësse) le demerite pour la paresse, & pour le mespris dont il vse en l'honneur & entretenement des personnages doctes & vertueux: Les sciences veulent estre honorees de tous, & remunerees par les Princes, & Seigneurs, qui en recoyuent leur plus durable gloire: ou s'ilz les mesprisent, elles ne les honoreront, ains se tiendront en ie ne scay quelle arrogance, avec laquelle elles ont acoustumé de mespriser, tous ceux qui les ont en mespris. Ce q' i' ay voulu dire à fin de descourir la raison qui a meu plusieurs François, Espaignolz, & Italiens, à laisser chacun en sa langue, tant de Romans, & si peu d'Histoires: car (cōme il est vray semblable) voyans qu'aucun honneur n'estoit constitué aux gens doctes, plus qu'aux ignorans, & se despitans contre le malheur de leur siecle, ilz ont mieux aymé estancher l'extreme soif d'escire qui les alteroit, en contant les gestes d'un Fierabras, d'un Amadis, des Cheualiers de la table ronde, & de telles autres personnes fantastiquees à leur plaisir, qu'employer leur eloquence à reciter les haults faitz d'armes, & les triomphantes victoires de leurs Princes, qui ne tenoyent aucun conte de leur scauoir. De là est venue la disette de noz histoires, dont les autheurs (excepté quelques vns) ont esté autant indignes de parler de leurs Roys, comme leurs Roys mal preuoyans qu'ilz ne faisoient enuers telz historiens, ce qu' Alexandre le grand fit enuers les statuaires & peintres de son temps, ausquelz il deffendit rigourensement qu'aucun d'eux ne taillast

son ymage, ny paignist son effigie, sinon Lisippe & Apelle. Ainsi sommes nous demeurez iusques aujour d' huy sans auoir aucune histoire acomplie en sa perfection, & si le temps ne change, nous n'en deuons iamais esperer: car les riches aymeront mieux passer en delices ce peu de vie qu'ilz ont à viure, que prendre vne pene certaine souz vne incertaine esperance de gagner quelque peu d'honneur par vn fort grand travail: Mais ceux qui ne se contenteront de leur fortune, s'ilz ont le bon esprit & sain iugement qui est necessaire en telle entreprise, ilz aymeront mieux les employer a la medicine, à la iurispudence, voire aux traffiques de marchandise, qu'à labourer en vne terre si sterile, dont ilz ne peuvent esperer que des ronces pour leurs moissons: car tout ainsi que l'homme auare ne se peut contenter de richesse qu'il puisse auoir, aussi l'homme bien né, & de bon sens, ne peut souffrir la vile pauvreté sur ses espaules, ains la rechasse de toute sa force, considerant que le pauvre (quelque excellence qui soit en luy) n'est entre les riches (encores qu'ilz soient les plus ineptes personnes du monde) sinon vn asne entre des singes seruant de risée à toute la compagnie: par ce qu'aujour d' huy lon ne mesure plus la grandeur de l'homme, par la grandeur de ses vertus ains par la grādeur deses richesses. Et pour finir ce propos, ie ne me puis engarder de dire que ie m'esmerueille de plusieurs de nostre tēps, doctes certainemēt es bonnes lettres, mais mediocres en fortune, qui ont osé entreprendre de porter tous seulz le fardeau d'vne grāde histoire, ou d'vn autre semblable labeur de lōgue aleine: Car ie leur predy, que si pour les soulager en vn si grād travail, ilz n'ot le moyē d'ētrete- nir soubz eux quatre ou six personnes (sinon des plus doctes, à tout le moins qui ne soient des plus ignares) il leur sera impossible de venir à chef de leur entrepri- se, tout ainsi qu'à l'Architecteur, lequel, ayant entrepris quelque superbe Pa- lais, voudroit luy mesmes tirer les pierres de leurs pierrieres, foussoyer les fonde- mens de l'edifice, porter la hote & le mortier, & faire telz autres actes, ou la seule durté du travail est necessaire, & non l'excellence de l'esprit. Or a- yant descouuert mon opinion de la multitude des Romans, & pourquoy noz hi- stoirs sont ainsi demeurees en arriere, choses qui selon mon iugement n'ont point esté recitees en ce lieu mal à propos, ie croy que i'auray assē fait pour ceste heure, si ie respon: à ce qu'un chacun qui aura quelque cognoissance de moy, & de mes escritz, ou de l'un des deux, me pourra obietter en voyant ceste mienne traduction. Les plus modestes diront que n'ayant point mal em- ployé mes premiers ans aux bonnes lettres, ie pouuois bien employer ce pre- mier labeur de ma ieunesse en lieu ou i'eusse deduit quelque doctrine meilleure que celle qui est traitée dans le douziēme liure d'Amadis, par laquelle i'eusse peu augmenter le profit du lecteur, & la louange que ie pouuois atendre de mon travail, ie leur respons que sans auoir bien experimēté sa force, lon ne doit temerairement

rement entreprendre les choses de grande importance: à raison dequoy ayant delibéré de faire vn iour les ouurages qu'ilz desirent, i'ay premierement voulu essayer le petit iugement de mon esprit, & tout ce peu qui pouuoit estre de bon en moy, en lieu, ou sans peril, i'ay peu faire mes essays tout à loisir, sans en esperer aucune louange, ains le seul contentement de plusieurs miens amys, ausquelz voire à tous, i'ay mieux aimé monstrier mon ignorance en leur obeïssant, qu'en ne leur obeïssant point, leur laisser quelque occasion de m'appeller ingrat & peu affectionné à leur complaire. Quelques autres diront que i'eusse beaucoup plus fait pour moy, si i'eusse employé aux estudes de ma vacation, le temps qu'il m'a fallu employer en la traduction d'un Roman: & que le tumulte du barreau, & des affaires qui tournoyent entre mes mains, ne me permettoit d'ocuper mon temps ailleurs: A ceux-cy ie ne veux respondre par plus grande rigueur, sinon que ie les remercie treshumblement dont ilz ont mon profit en plus grande recommandation que moy mesmes, & que par auanture ilz n'ont le leur propre: Toutesfoisie leur veux bien dire en passant, qu'ilz ne doiuent trouuer mauuais si i'ay employé à la traduction de ce liure, le temps qu'ilz ont le plus souuent consumé aux cartes, aux deX, aux tarauts, à la paume, & à leurs autres menus plaisirs, voluptez ausquelles i'ay esté si peu enclin depuis ma naissance, qu'il m'a esté facile de poursuyure ma vacation, & me recreer en la cour du Roy Amadis, sans que l'un ayt empesché l'autre, comme ceux qui me connoissent & hantent familièrement pourront tesmoingner à vn chacun qui sera tant de sejour que de s'en enquerir. Il s'en trouuera encores d'autres qui diront que les Romans sont du tout inutiles, & ne seruent que d'amusement à ceux qui les lisent: Je ne sçay s'ilz seront beaucoup de ceste opinion, mais ie m'assure bien qu'ilz sont vn fort grand nombre qui croient le contraire: Car si pour voir la purité & naïfueté d'une langue, se recreer en considerant les diuerses humeurs & passion des humains, representer l'experience de l'art militaire, s'encourager aux armes par la louange de la prouesse, & par la vituperation de la couardie, contempler (comme en vn theatre de tout l'uniuers) les variables changemens de la fortune, les remuements des affaires du mode, l'inconstance des choses humaines, les hazards de la guerre, les trophées des Princes victorieux, & la vergongne des vaincuX (choses qui se depaignent beaucoup mieux en vne narration inuentee, qu'en vne histoire veritable) lon pense le temps estre perdu & mal employé, Il faudroit dire que tout le temps qui est employé à la lecture de plusieurs autres bons liures qui ne tendent qu'à mesmes instructions, seroit pareillement inutile aux lecteurs: opinion tant inepte, que ie ne sache homme si effronté qui l'osast soustenir, sans se mettre en danger d'estre accusé d'une trespitoyable faute de sens. S'ilz se vouloient opiniastrer & dire que les Romāns sont choses fabuleuses, & qui ne contiennent que mensonges: Pour mesme occasion il faudroit
encore

encores chasser Homere, Virgile, & tous leurs semblables, voire la plus grande part de ceux qui ont fait semblant de ne s'estre proposé autre but que la verité : car quelque mine qu'ilz ayent faite, le plus souvent ilz n'ont point tant escrit ce qui estoit vray: comme ce qu'ilz pensoient estre au gré de ceux ausquelz ilz vouloient plaire, faisans tourner & retourner inconstamment leurs voyles deuers tous les costez dont ilz esperoient auoir le vent plus fauorable : A l'ocasion dequoy, ie ne fais autre difference entre les uns & entre les autres, sinon que ceux-cy racontent des mensonges manifestes, & ceux-la les desguisent au mieux qu'ilz peuuent. Quant à ceux qui diront confusement qu'en ce liure les manieres de parler sont trop vulgaires, ou trop obscures: que les harangues des capitaines à leurs soldatz, des amans à leurs Dames, & des Dames à leurs amans, qui sont les principaux ornemens de ce genre decrire, y sont trop briefues ou trop longues: que les deuiz des Damoselles & des Cheualiers y manquent en plusieurs endroitz, & sont superflus en plusieurs autres : & infinies semblables opinions selon la diuersité de leurs fantasies: Ie respons à ceux-cy que ie ne suis deliberé de leur respondre, car en leur respondant, tout ainsi que leurs auis sont infinis, il faudroit que mes responses fussent infinies : Qu'ilz se contentent donc de scauoir (s'ilz ne le scauent desia) qu'il y en aura qui trouueront bon, ce qu'ilz trouueront mauuais, & d'autres qui trouueront mauuais, ce qu'ilz trouueront bon, voire eux mesmes trouueront mauuais au soir, ce qu'ilz auoient trouué bon au matin: & trouueront mauuais au matin, ce qu'ilz auoient trouué tresbon le soir au parauant: tant est variable & incertain le iugement des hommes, mesmement de ceux qui ne se reiglent que par leur seule opinion: Ou s'ilz ne veulent prendre ces raisons en payement, à fin de ne leur laisser aucun moyen de se plaindre de moy que i'aye trouble leur repos par mes opiniastrs disputes, i'ayme mieux leur donner gaigné, & confesser franchement mon impuissance & l'insufisance qui est en moy pour leur respondre, que perdre beaucoup de temps en vne grande contention de bien petite importance: car au surplus ie receuray assez de contentement, si m'eschapant de ceux que la nature à forme d'esprit reuesche, & d'humeur querelleuse, i'entens que quelque petite troupe de personages doulx & benigns, lise par plaisir, ce que i'ay escrit par recreation en essayant si i'oserois vn iour m'auanturer à quelque plus haulte & plus laborieuse entreprise.

De Paris, au moys de Iuillet,

F I N I S.

LE DOVZIESME LIVRE D'AMADIS DE GAVLE TRADVIT NOUVELLEMENT

D'ESPAGNOL EN FRANCHOYS, PAR

G. AVBERT DE POITIERS.

Contenant quelle fin prindrent les loyalles amours d'Agefilan de Colchos, & de la Princeſſe Diane, & par quel moyen la Royne Sardonie ſe rapaiſa, apres auoir longuement pourchaffé la mort de don Floriſel de Niquee, avec pluſieurs eſtranges auentures, non moins recreatiues, que ſingulieres & ingenieuſes ſur toutes celles qui ont eſte traitees es liures precedens.



Comme don Rogel de Grece, acompagné de l'Infante Leonide alla eſprouuer l'auenture de la roche enſlâmee, & cōme il vainquit toutes les gardes du chasteau, et le cruel geāt Galpatraf.

CHAPITRE PREMIER



Amadis de Grece, & ceux qui estoient avecq' luy, estās departiz de l'Isle deserte, auoient lōg temps singlé à pleine voyle, selon qu'il plaisoit aux sages Alquif & Virgande les conduire, se tenans tresheurenx

de leur compagnie, quand à la fin ilz arriuerent en vne Isle, ou ilz prindrent port, & descendirent en terre. Alors les sages commanderent à don Rogel de s'armer, pour l'ornement de sa prouesse, & à l'Infante Leonide se parer de ses plus mignons acoutremens, pour illustrer d'autant plus les perfections que la nature luy auoit donnees, parce (disoient les sages) que vous estes maintenant arriuez en lieu, ou l'un n'a

A

moindre

moindre besoing de sa vertu, & haute chevalerie, que l'autre de la singuliere beauté. Incontinent le prince Rogel s'estant armé de toutes pieces, monta à cheual: & l'infante Leonide fut presque aussi tost habillée d'une riche robe de velours cramoisy decoupee sur une doubleure de toile d'or, & toute semée de petits lassetz, faitz de fil d'or, & de soye incarnate, entrelassee en las d'amours fort mignonnemēt, & se rencontrās par ordre égal sur le mylieu de chacune decoupeure, dont les bors estoient enrichis de fin email, elabouré de diuerses couleurs biē apropiées à la couleur du vestement. Ceste robe auoit de long tēps esté gardée par Vrgāde & par Alquif, à fin que la Princesse peust mettre à fin l'estrange auanture à laquelle ilz la conduisoient. Ses cheveux blonds & crespes, estoient annelez par demys ronds d'une fort bonne grace, & portoit sur le chef une couronne de precieuse pierrerie, marchant en cest equipage avecques telle beauté, qu'il n'y auoit Damoysele au monde qui se peust comparer à elle, excepté seulemēt Diane, & l'infante Fortune. Puis apres, on lui amena un braue pallefroy enharnaché de pareille parure à la sienne, sur lequel elle monta incontinent. Le petit dom Silues du desert, & l'infante Fortune la voyans en si braue arroy, ne cessoient de sauteler de ioye à l'entour d'elle. Autant en faisoit Darinel, laquelle commençant à s'enamourer d'une si excellente beauté, commençoit aussi à oublier les anciēnes amours de sa maistresse Siluie, faisant desia maintes ioyeuses exclamations, à fin d'acquerir la bonne grace de sa nouvelle amoureuse. Mais les sages lui acourcirent sa liesse, car apres auoir dit aux Princes qu'ilz les attendissent là, mōterēt chacū sur son pallefroy, & prindrent la lance & l'armet de Rogel, qui conduisoit l'infante Leonide. Ainsi partirent eux quatre ensemblement, estant dom Rogel si ioyeux, & tant rauy en la contēplation de la beauté de sa Dame, qu'il n'estimoit pouuoir trouuer en tout le mōde chose tant espou-

uentable, qu'elle lui peust donner aucune crainte en sa presence, ains se tenoit asseuré moyennāt sa faueur, de mettre à fin les plus estrāges auātures qui luy pourroient suruenir. En ces entrefaites ilz vindrent trauerser une plaisante forest, par laquelle les sages marchoiēt un peu deuant, pour leur estre guides du chemin. A raison dequoy Rogel voyant le tēps & l'ocasion assez propres pour parler de ses passions, dist à l'Infante. Si par la grandeur de vostre beauté, vous connoistez la grandeur de mon martire, ie suis certain, ma Dame, que vous excuserez facilement la grande hardiesse que ie me donne, pour vous declarer mes grandes douleurs. Mais ce qui me red beaucoup moins craintif, c'est qu'ayant mis en vous seule l'entiere esperance de mon plus grand bien, ie ne puis penser que vous ayez le cueur de me faire un si grand mal, comme seroit celuy que ie receurois si vous me frustriez de la consolation laquelle ie reçois maintenāt en vous racontāt ma misere. Toutesfois quād pour ce regard ie tūberois en quelque offense, il vous plaira considerer que le respect que tout homme deuroit auoir, à une si grande princesse que vous estes, ne pourroit resister au desir d'un amant, & encores moins au feu cruel qui le consume iusques à ce qu'il ayteu le bien de descourir son mal à celle qui luy en peut donner la guerison. Et quād vostre rigueur me voudroit entierement denier le remede convenable à ma maladie, à tout le moins ne me defendez de manifester le mal que ie souffre pour vostre beauté, à fin q̄ vous le cognoissant, i'aye à part-moy ce contentement de vous l'auoir fait cognoistre, combien que ie n'en atēde autre secours. Au surplus, ma Dame ie vous supplie que seulement pour le iourd'huy ie me puisse nommer vostre Cheualier, car avecques ceste faueur, ie me rouueray asseuré contre tous dangers: & dautāt plus volontiers, ma dame, me deuez vous acorder ce don, parce qu'ayant mis toute ma puissance en vous, il ne me reste plus aucune force, oultre celle qu'il plaira à vostre

à vostre bonne grace me departir. L'infante qui ne portoit moindre affection à Rogel, que Rogel à elle, voulât par vne fainte résister en public à l'amour, auquel tresueritablement elle s'estoit renduë esclau en secret, luy respondit, Monsieur, contentez vous de la hardiesse de voz pensées, & sachez que comme Damoyse que ie suis ie n'ay moindre besoin de ma chasteté pour la conseruation de mon honneur, que vous (comme vous dites) de ma bonne grace, pour venir à chef de voz entreprises. Pour donc nous esprouuer tous deux en l'auanture, à laquelle les sages nous conduisent main tenant, ma presence vous suffira, si vous en deuez recevoir tant de bon heur comme vous dites: car quant à moy ie me contéteray de la vostre. Ainsi deuilsans sortirent de la forest, & se trouuerent en vne belle plaine, au milieu de laquelle ilz virent en forme de chasteau, vne treshaute roche, qui alloit tousiours en estreissant depuis le pied iusques au feste. Au plus haut se voyoit vne grand flamme de feu, meslée de fort espoisse fumee, d'ou lon oyoit assez souuent sortir vn espouventable tonnerre, & tel que l'ont acoustumé rendre les plus grosses pieces d'artillerie: Le bas de la roche estoit enuironné d'vne forte muraille bien terrassée par le derriere. Estās là arriuez, les sages Alquif & Vrgāde dirent à dom Rogel qu'il luy falloit passer plus outre, sans auoir autre sūyte que l'Infante Leonide, l'auertissant de biē la deffendre: par-ce que s'il luy auenoit de la perdre, il la luy faudroit recouurer par celle haute fournaise de laquelle il voyoit sortir la flamme, ou bien qu'il ne la reuerroit iamais. Ilz luy dirent aussi que ceux qui luy empescheroient l'entree, estoient forts & braues Cheualiers, non enchantez, ains naturelz, comme ceux ausquelz pour leur prouesse, la royne d'Argenes auoit donné ceste Ile, apres les auoir fait iurer de deffendre le pas de la roche contre tous les Cheualiers qui voudroient s'esprouuer en l'auanture. Assurez-vous (dist lors dō Rogel) que ie deffendray tou-

sours ma Dame tant que ie viuray, car ie crains trop plus sa perte, que celle de ma propre vie. Mais si la fortune me vouloit estre tant contraire, que de me la faire égarer, vne plus grande flamme qui me consume, m'ostera la peur de passer à trauers la moindre. A tant les sages le recommanderent à Dieu, puis luy ayās donné ses armes, & lassé son armer, rentrent en la forest, pour retourner à la cōpagnie des Princes, qui les atendoient sur le riuage. Dom Rogel parlāt avecquel l'Infante Leonide, commençoit desia à s'aprocher de l'entree de la roche, quād il entendit sonner en la tour du portail, quatre trōpettes bien acordantes, lesquelles rendoient vn plaisant & harmonieux son. Elles auoient esté mises là par enchātement, à fin que ceux du dedans peussent cognoistre par leur son quand il y auroit quelque Cheualier qui voudroit es-sayer l'auanture, car alors elles sonnoient d'elles mesmes par la seule force du charme. Incontinēt que ces trompettes eurent sonné, six cheualiers armez de lāces & d'escuz, saillirent dehors, crains orgueilleusement à dom Rogel, Cheualier outrecuydé, vien toy rendre en la prison de nostre maistre Galpatraf, si mieux tu n'aymes recevoir prōptement la mort, pour le guerdon de ta folie. Je meine ma prison, & ma mort avecques moy (dist dom Rogel) qui me causent telle douleur, & telle ioye, qu'elle me rendent assez asséuré contre la plus foible prison, & la plus gracieuse mort, de laquelle vous me menacez. Puis se tournant vers l'infāte Leonide, Ma dame (dist il) ie vous supplie me dōner la faueur de vostre beauté, puis qu'il m'est promis par les destinees, cōme estant vostre Cheualier, & non autrement, mettre à fin vne tant estrāge auanture. En disāt ces paroles il haussa la visiere de son armer, & prenāt vne main de sa Dame, la baisa, encōres qu'elle en fist qlque refus: mais ainsi qu'il prenoit sa lance, ceux de la roche luy escrierent, Cheualier, puis que tu ne veux entrer en noz prisons, haste toy de mettre tes mains en besōgne, & ne t'amuse

baïser celles des Damoysselles, car elles ne seruent de rië icy. Vous le verrez (dist dom Rogel) & soudain baïssant la lance courut contre eux, & eux contre luy le rencontrans d'assez droit fil, tellement que tous rompirent sur luy, sans toutesfoys l'ebranler non plus que s'ilz eussent failly d'atainle. Mais il en rencontra l'un d'eux si rudement, qu'il le fit sauter tout estourdy en terre par dessus la croupe de son cheual, se trouuant si estonné de la cheute, qu'il demeura vn fort long tēs sans se pouoir aucunemēt remuer, non plus que s'il eust esté mort. Ainsi dom Rogel passant au trauers des six ayāt encore sa lance entiere, retourna sur ceux qui restoiēt, lesquelz lui aprestoient desia le cōbat des espees, & en rencontra l'un si bien à point qu'il le renuersa mort par terre, luy laissant vn grand tronçon de lance au trauers du corps. Puis sacquant la main à l'espee, se vint ioindre aux autres quatre, & entre eux se commença vne fort hazardeuse meslee, laquelle neantmoins dura peu: car dom Rogel estant l'un des plus adroitiz Cheualiers qui furēt oncques, & se sentant d'heure en heure redoubler ses forces par la presence de sa Dame, les reduit en peu de temps à telle extremité, qu'en ayant occis deux sur le champ, ceux qui restoiēt cōmencerent à s'enfuyr vers le chasteau: & lui pareillement à les suyure. L'infante estoit fort esmerueillée & contente de ses hautz faitz d'armes & s'estimoit bien heureuse d'estre aimée d'un tel Cheualier, esperant l'auoit vn iour pour mary. Or sachez qu'incontinent apres la fuyte des Cheualiers, les trompettes commencerent de rechef à sonner dans le chasteau, en mesme sorte que si lon eust voulu donner vne allarme. Adonc sortit vn geant desmesuré, armé de toutes pieces, monté sur vne haute & terrible beste, portant vne grosse & pesante masse de fer, avec vn furieux visage tout descouuert, sans auoir autre armeure de teste qu'un morrion de fin & reluyfant acier: Au surplus il auoit les

eures fort grosses & réuersees, les naseaux

larges & ouuers, les yeux grands & hydeux, lui sortans horriblement hors de la teste.

L'infante voyant vne chose tant contrefaite, trembloit de grand' peur: mais elle eut encores trop plus de crainte, quand elle l'ouyt d'une grosse & espouventable voix, parler en ceste sorte à son Rogel. Malheureuse & chetifue creature, donne moy ceste belle Damofelle: car tu ne pourras apaiser le dedain qui me meut maintenant à te meurtrir d'une miserable mort, sinon en obeïssant à ceste mienne volonté. Dō Rogel plus coléré de ces parolles, qu'il n'auoit encores onc esté iour de sa vie, lui respondit, Sorte, superbe, orgueilleuse, & mōstrueuse beste, arreste toy, & m'atens: car ceste espee te donnera vne fin condigne à tes demerites. Incontinent le Cheualier lui courut sus, & le geant haussa sa masse, le regardant par grand orgueil, sans se remuer ny ça, ny là. A l'aprocher dom Rogel le frapa dans le bras, duquel il gouernoit les resnes de sa grand' beste, & le blessa en la chair viue: Le geāt s'essaya à l'ataindre de sa masse sur l'armet lui pensant casser la teste en pieces: ce que veritablement il eust fait, si Rogel ne se fust tout renuersé en arriere, tellement qu'il toucha presque de l'echine sur la croupe de son cheual. Ainsi le coup passant en vain sans trouuer rencontre, il fut impossible au geant de pouoir retenir sa masse, tant estoit demesuree la roideur du coup, qui vint finablement tomber entre les deux oreilles de la grād' beste qu'il cheuachoit, tellement qu'elle fut renuersée par terre de la douleur, & son maistre dessous, lequel tresbuchant avec le mesme bruit qu'une tour violement enleuee par la furie de la mine, se cassa & brisa entierement la iābe sur laquelle il vint à tomber. Dom Rogel voulant vser de sa bonne fortune sauta legerement en terre: mais il ne fut si tost descendu pour fraper le geant, qu'il vid sortir du chasteau & courir à toute bride contre lui, vn autre geant trop plus espouventable que le premier. Cestuy estoit Galpatraf seigneur de l'Isle, & frere de celuy qui gisoit

renuer.

nerfé sous fa monture: Il portoit vne longue hache d'acier, & s'en venoit à grand hafte, hurlant ces parolles à haute voix, O miferable Cheualier, fi tu n'es fufifant pour me fatisfaire du dommage que tu m'as fait, à tout le moins tu y fatisfieras felon le pouuoir qui fera en toy, car tu payeras la vie de mes gens par la perte de la tienne: tire toy arriere, & ne foyz tât outrecuydé que d'outrager le Cheualier lequel eft tombé deuant toy. Mais dom Rogel eftant encores tout coléré des parolles que le geant abatu luy auoit dites, & tenant peu de conre de celles dõt cest autre le menaçoit s'aprocha de celuy qui gisoit eftendu par terre, & cōme il s'effayoit à fe releuer, blaphemant & reniant Mahon, Iupin, Teruagant, & tous les autres dieux, le Cheualier vifant droitement au collet, luy donna tel coup, que la tefte faura d'vn costé, & le tronc du corps demeura mort de l'autre. Que vous diray-ie de Galpatraf quand il vid ce piteux fpectacle? finon que rugiffant comme vn lyon, & iettant de grande rage vne epouffe fumee par la bouche, & par les narines il vint à l'encōtre de Rogel q̄ l'atendoit fans aucune crainte. Le geant au paffer lui rua vn horrible coup de hache, q̄ pouuoit mettre fin au combat, & à la vie du Cheualier, s'il n'eust agilement demarché à gauche, iettāt enemblement vn coup de taille tant à propos, que n'ayāt peu ataindre le geant, il trancha les iarretz de derriere de la beste qu'il cheuauchoit: au moyen dequoy elle mit les deux fesses en terre, fans pouuoir marcher ny ça ny là, tellemēt qu'elle estoit preste à trebucher ne plus ne moins que la premiere. Dom Rogel voyant le geant ainfi empestre avecques fa monture, lui redoubla vn coup fur la cuiffe, duquel il la luy ouurit iufques à los, par-ce qu'il ne l'auoit armee que d'vne simple maille seulement. Mais le geant voyāt que ny fa beste ny lui ne pouuoient s'aprocher de dom Rogel, commença à blaphemer epouentablement tous les dieux, & regardant retourner son ennemy pour le fraper la se-

conde foyz, luy darda la hache qu'il tenoit entre ses mains de telle furie, qu'il lui perça l'efcu de part en part, & l'ataignant de la pointe dans l'estomac, le renuerfa par terre de son lōg, sans toutesfois l'auoir autrement endommagé que par la cheuté. Dom Rogel se leua, tenant tousiours son efcu embracé, dont premierement il arracha la hache, puis s'en retourna à l'encontre de son ennemy, lequel eftant defnué de toute esperance de secours, s'effayoit à delasser son morrion pour le ruer contre luy, quand dō Rogel le furprenāt en ces entre-faites, luy tailla la main & le morrion, avec la tefte en deux parties, & luy fendit vne grāde piece de la cuiralle, & de la poitrine. Le geant tombāt avecques grand bruyt sur la plaine, apres auoir respādū vn large ruiffeau de fang, donna le figne de la mort, laissant dō Rogel non moins ioyeux de la victoire, qui lui estoit auenuē deuant celle qu'il laymoit le mieux en ce monde, que fa chere Leonide recōfortee de la peur qu'elle auoit eue au parauant, l'ayant veu en fi grand danger. Incontinent apres ceste victoire, les trompettes du chasteau recommencerent à sonner, & au son d'icelles sortirent deux grāds lions, dont l'vn s'adressa furieusement à dom Rogel, qui le receut courageusement, tenant son efpee de pointe: au moyē dequoy le lyon qui venoit fort impetueusement, se la passa lui mefme dans la poitrine iufques à la croifce. De ce coup mortel le lyon ayant perdu toutes ses forces, encores qu'il eust defia serré les griffes sur vne cuiffe de dom Rogel, fut contraint d'abandonner fa prinse, car les douleurs de la mort l'eurent incontinent renuerfé par terre. Le Cheualier ainfi deliuré de l'vn des lyons, retira son efpee à fin de s'adresser à l'autre, lequel eftant acharné sur le pallefroy de l'Infante le dechiroit en infinies pieces, la pauurette s'ēfuyant toute efperduē par la plaine, par-ce que son cheual l'auoit fait tomber en bas pour la crainte qu'il auoit eue. Dom Rogel craignant que le lyon se vint adresser à fa Da-

me apress'estre à son gré esbatu du pallefroy, le vint prendre sur le flanc, & le trancha par le mylieu du dos en deux parties, rendant par sa mort la vie de l'Infante assée. Adonc apres auoir releué, & lassé son armer, comme se doutant de quelque encombrer encores que pour lors il n'eust plus aucun ennemy à combattre, s'en alla vers elle, & luy dist, Je vous supplie, ma Dame, retourner maintenant vers vostre Rogel, & tant qu'il vous plaira le laisser en vie, rechasser de vous toute crainte, tout ainsi que vous l'avez rechassée de luy, se trouuant en l'extremité de ces perilleuses rencontres. L'infante tournant le visage auif les deux lyons morts, & s'en reuint fort ioyeuse deuers le chasteau, d'ou elle s'en estoit fuyé, estant neantmoins si esperdué qu'il ne lui restoit aucune couleur au visage. Dom Rogel la voyant en tel estat, luy dist, Il apert bien, ma Dame, que vous vous estes priuée de toute vostre puissance, à fin de l'actioistre d'autant plus en moy. Sur ce propos la Princesse commença vn peu à s'asseurer, reprenant en vn mesme instant sa naïue couleur, & sa beauté acoustumée. Puis elle luy dist, Je vous supplie, monsieur, en l'honneur de Dieu allons nous en d'icy, car ie crains que nous ne tombions encores en plus grands dangers que nous n'auons fait par cy deuant. N'ayez point de peur, ma dame (respondit dom Rogel) car ces bestes estant ainsi mortes, nous n'auons plus aucune occasion de craindre : allons nous en vers le chasteau pour voir s'il nous sera permis de mettre à fin ceste auenture, veu l'honneur que l'ysuë d'icelle nous en promet, ioint que la necessité nous y contraint, estat vostre pallefroy mort, & n'ayàs le moyé de nous en aller plus loing à pied. L'infante toute craintifue respond, Allons ou il vous plaira, puis que maintenant vous m'avez assez monstré, que ie ne me dois douter de rien estant en si bonne compagnie comme la vostre. C'est de vous, ma dame (respondit-il) que ie tiens toute ma puissance, car en rechassât de moy la crain-

te, vous avez fait que ie vous en puisse mieux asséurer.

Comme dom Rogel perdit l'Infante Leonide, puis se ietta dans l'ardante bouche de la roche enflammée pour la recouurer.

CHAP. II.

Entre ces gracieux propos, le Prince dō Rogel prit l'Infante par la main, & la mena vers le chasteau, lequel ilz trauserent, & s'en vindrēt iusques au pied de la roche, sans trouuer personne quelconque : puis se promenant à l'entour par vne belle prairie esmaillee de diuerses fleurs, trouuerent du costé du soleil leuant, vn petit sentier, tournoyant autour du roc, en la façon d'vne vis ronde, & s'en alloit rendre au plus hault sommet, duquel lon voyoit sortir le feu & la fumée. Aupres de ce petit sentier, ioignant le pied de la roche, y auoit vne fresche & souëfue fontaine, fort plaisante, tāt pour la belle & claire eau qu'elle rendoit en grande abondance, comme aussi par ce que les bords vn peu enleuez par dessus la prairie, estoient embellis de maintes fleurettes. Dom Rogel se trouuāt en ce lieu tāt propre à ses desseins, osta son armer pour se rafraichir, & fit asseoir l'Infante aupres de luy, la priant luy dōner vn peu loysir de se reposer. Adoncq' le ieune Prince se trouua trop plus éperdu pour les souueraines perfections de sa Dame, qu'il n'auoit esté au parauant pour les perilleuses auentures lesquelles luy estoient suruenues. Et finablement surmonté de la passion qui le tourmétoit, parla à elle en ceste sorte, Helas, ma Dame, comme voz celestes beautés, accompagnées de mes ardents desirs, me contraignent entre ces lieux solitaires ou nous sommes, à vous requérir vn don, duquel ie ne vo^s ose à grād' peine tenir aucun propos, pour la crainte q' i'ay de vous offencer. Je vous supplie, ma Dame (par la foy que ie vous prometz de ne prēdre iamais autre espouse que vo^s) me donner

donner le courage lequel vous me voyez defaillir, à ce que désormais ie n'aye occasion de me plaindre de ma couardie, pour n'auoir sceu iouir de l'ocasion que la fortune semble m'auoir apareillée à fin de recevoir le souverain bien de mon plus heureux contentement. L'Infante fut tellement troublée par ces propos de dom Rogel, qu'elle n'eust la puissance de luy répondre vn seul mot, ny de luy oster ses belles mains, lesquelles il baisoit sans cesse, les baignant de continuelles larmes. Et ainsi s'embrasant tousiours de plus en plus en ses desirs, il luy dist: Je vous supplie, ma dame, ne blasmer ma hardiesse, si l'exécute en vostre endroit, ce que mon ardente affection me commande, à fin que ie ne me puisse blasmer moy-mesmes à l'auenir, si maintenant ie ne scauois prendre la felicité que la bonne fortune m'a moyennée. Alors l'Infante retournant à soy comme de pasmoyson, luy respondit: Je vous supplie, monsieur, que le deuoir duquel vous estes obligé à vostre royalle lignee, & le parentage qui est entre nous, vous destourne de ceste fantasie, & ne me soyez point occasion que ie tesmoigne par la fin de ma vie, la confiance que i'ay eue en vostre vertu, m'en venant seule avecques vous: car combien que vous ayez parauéturé la puissance de me violer, si est-ce que ie vous assure bien qu'après ie ne pourray plus viure long temps, sans donner à cognoistre par ma mort, combien mon vouloir, & ma chasteté, estoient rebelles à ce dont la foible force du corps ne m'auroit sceu garantir. Nonobstant toutes ces remonstrances dom Rogel descouuroit assez par les diuerses couleurs qui luy alteroient le visage, de quelle affection il auoit deliberé d'exécuter son entreprise, mesmement en ceste solitude tant conuenable à ses affections: & desia la Princesse commençoit à trembler de peur, voyant les apareilz du ieune amant pour mettre sa deliberation en effect, quand ilz entendirent sur le hault du rocher vn espouuentable bruyt, auquel il leur fut auis

que le pied de la roche ou ilz estoient, vint à s'entr'ouurer en la façon d'un beau portail au trauers duquel ilz voyoient vne riche salle pleine d'un grand nombre de tresbelles damoyelles, vestues de satin blanc, & echeuelees, sans auoir autre acoustrement de teste qu'une guirlande de fleurs. Celles qui marchoient les premieres iouoient de diuers instrumens, lesquelz elles acompagnoient de leurs voix avec vne fort bonne grace: les dernieres balloient deux à deux au son en bel ordre, s'entrelassant par fois fort estrangement les vnes entre les autres, sans neantmoins iamais faillir de se rencontrer chacune deuant sa compagne à toutes les marches des cadences: & lors elles se reprenoient encores deux à deux, comme elles estoient sur le commencement du bal ou bien continuoient leur danse seule à seule selon que le son des instrumens le requeroit. En telle façon elles commencerent à sortir par le nouveau portail vers la prairie: & ayant tousiours l'œil sur dom Rogel, commencerent toutes ensemble à chanter ces vers:

CHANSON.

*La sacree chasteté
N'est serue du cuer volage,
Ny de la temerité,
Ny de l'amoureuse rage,
Ny des arcs, ny des brandons,
De cent & cent Cupidons.*

*Pour auoir gardé la foy
Aux cendres de son Sichee,
Didon garde encore en foy
Son los, & sa renommee:
Bien que les communs discours
Luy faignent des vains amours.*

*Iadis Lucretse au renom
Pour sa chasteté rauie
Sacrifia son cler nom
Et sa poitrine, & sa vie,
Seur tesmoignage laissant
De son courage innocent.*

*Contre le chaste vouloir
Les mesmes dieux n'ont en force ,
Comme en celle lon peut voir
Qui souz vne verde esforce
Recela ioignant les bords
Paternelz son chaste corps.*

*Auecques Daphné encor
S'accompagnera la Fee
Siringue aux beaux cheueux d'or,
Et l'amoureuse d'Alphee,
Ces trois par le vueil des dieux
Resisterent à trois dieux.*

*Bien peu deus sert ton effort
Vers ceste foible pucelle ,
Car pour reuenger son tort,
A ton angeisse mortelle,
Hors des enchantex seiours
Nous venons à son secours.*

Dom Rogel & l'Infante se leuerent debout fort esmerueillez de la nouueauté de la chose, n'estant le Cheualier moins fâché de leur arriuée qui luy destournoit son plaisir, que l'Infante resionie, sentant delirer son honneur de la force que luy aprestoient son amant. Bien tost apres (le bal delaisé) deux des des plus belles Damoyelles prindrent l'Infante souz les bras, & luy dirent: Ma Dame, venez vous en auecquous, & nous vous mettrons en la compagnie de ceux q̄ vous méritez, & q̄ cherchez: vous ostant à cest outrecuydé, lequel bien tost par sa repentance receura le guerdō de ce qu'il a osé atêter cōtre la chasteté de vostre hōneur: & ne cessera d'estre tousiours tourmēté de la tristesse, & du repentir qu'il receura de son forfait, que premierement il ne vous ayt recouuree, aumoins si sa hardiesse luy peut otroyer vn si grand heur. A ces mots l'vne des Damoyelles trefcourroucée se retourna vers dom Rogel, & luy dist: Maintenant nous verrons si voz forces vous peuuent autant profiter contre les Damoyelles, comme contre les Cheualiers. Apres ces propos elles menerent l'In-

fante auecq' elles dans la roche, & entrerent en mesme pompe qu'elles estoient venues, par le portail, lequel se referma cōme auparauant incontinent qu'elles furēt entrees. Qui vous pourroit reciter l'extremē douleur de dom Rogel, quand il se vid ainsi demeuré seul sans sa dame: peu s'en fallut qu'il ne sortit hors de son sens: il destestoit sa male auenture, & maugreoit la folle hardiesse dont il auoit voulu vser contre la volonté de sa dame, estimant que ce fust l'ocasiō qui luy auoit ainsi fait perdre. Helàs ma dame (disoit il) comme maintenant vous me recompensez du temeraire vouloir que i'auois follement conceu contre le vostre! Là quel tourment pourrois- ie choyrir, pour vous donner iuste vengeance de mon forfait, puy que ie ne sçay aucun moyen qui puisse assez chastier le desir que i'ay eu de vous gaigner oultre vostre gré, sinon en vous perdant, comme ie vous ay maintenant perduë? Las que feray- ie pour vous reconurer, si vne chose de si peu de valeur, comme ie suis, n'est suffisante pour en conquerir vne tant precieu se comme vous estes? Ainsi se lamentant luy va souuenir de ce que les sages luy auoient dist, que s'il perdoit l'Infante, il ne la pourroit autrement recouurer sinon en passant par la bouche du feu, au trauers de laquelle il falloit qu'il se iettast à fin de l'aller secourir. Impossible seroit de vous dire la grand' ioye qu'il eut apres s'estre souuenu de ce dont les sages l'auoient auerty: & ne pēsant point qu'il y eut aucune crainte qui luy peut deffendre l'entree de la bouche du feu, ietta son escu au col, & prit son armet en la main, & s'en courut à mont la roche par le petit sentier que ie vous ay dist qui tournoyot tout à l'entour. Mais par ce qu'il demeura bien vne heure à mōter, tant pour la difficulté & longueur du chemin, comme aussi parce que la pesanteur de ses armes le contrainst à se reposer souuent: ce pendant ie vous veux dire ce qui auint à la Princesse Leonide, laquelle apres estre entré dans la roche avec les autres

tres Damoysselles, & s'estant le portail fermé sur elles, se trouua en vn belle châtre longue d'un ier d'arbaleste, & ayant la pointe de la voute d'une pareille hauteur. Ceste voute alloit tousiours en estroicissât deuers le hault en forme de pyramide & sembloit estre faite de cieres & luy santes verrieres, au trauers desquelles les rayons du soleil donnoient vne grand' clarté à toute la châtre, & principalement aux endroitz d'icelle lesquelz estoient enrichis d'un grand nōbre de statues, tant bien taillees & peintes de leurs naïues couleurs qu'il n'y a celuy qui ne les eust estimees viues, si le mouuement & la parole eussent esté acōpagné les excellēces de l'ouurage. L'Infante le trouuant assez estonnee entre tant de choses merueilleuses, vne des pl^{es} belles Damoysselles de la troupe la prit par la main, & l'ayāt mennee au mylieu de la sale, luy mōstra vne colōne d'or massif, sur laquelle estoit l'effigie d'une vieille Dame, ayant vne couronne sur le chef, & aupres d'elle vn assez large tableau. Lors dist la Damoysselle à l'Infante: Ma belle Dame, voylà la statue & vraye ressemblance de la grande magicienne Zirfee Roynne d'Argenes, laquelle par sa science de Magie a basty ce bel edifice à l'honneur de vostre lignage: lisez l'escriture de ce tableau, & puis nous vous monstrerons icy maintes choses, esquelles vous prēdrez grand plaisir. L'Infante croyant que tout ce qu'elle voyoit veritablement, ne fust autre chose qu'un songe, lui respoudit: Ma Damoysselle, ie feray ce qu'il vous plaira: mais ie vous supplie premierement me dire qui vous estes, & toutes ces autres excellentes Dames que ie voy avec vous. Ma Dame (respondit elle) nous sommes toutes Damoysselles, lesquelles auons iadis vescu au monde en grand honneur, & sommes icy venuēs en noz premiers corps par le commādement de la Roynne d'Argenes, à fin de tenir compagnie à ceux que vous verrez tantost. Or puis qu'il vous plaist nous cognoistre, sachez que ie suis la belle Polixene, que le cruel Pirre sacrifia deuant

Troye à l'vmbre de son pere. Ceste belle Roynne qui vous tiēt par la main, est la tant renommee Helene, qui fut cause de la ruine des miserables Troyens. Et suyuant son propos, lui nommoit toutes les Damoysselles qui estoient en ceste sale, declarant vne grand' partie de ce qu'elles auoient fait de memorable en leur viuāt. L'Infante estoit fort esmerueillee, & mesmement pour la beauté des deux premieres, dont elle auoit autrefois tant ouy parler, & lui sembloit biē (excepté la Princeesse Diane, & l'Infante Fortune) n'auoir iamais veu fille qui fust si belle que Polixene, ny femme tāt accomplie en toutes les perfectiōs de beauté, cōme estoit Helene, excepté seulement Niquee, & la secōde Helene d'Apolonie, qu'elle estimoit fort ressembler à la premiere.

Alors l'Infante toute rauie en ses contemplacions, leur dist: Mes Dames, ie suis fort esmerueillee de me voir en si belle compagnie, ou ie peu cognoistre q̄ ce que i'ay autrefois ouy dire de vous, n'est que bien peu, au pris de ce que i'en voy maintenāt. Or puis qu'il vous a pleu ma dame (dist l'Infante à Polixene) satisfaire à ce que ie vous auois demandé, ie vous supplie que nous facions ce que premierement vous m'auiez dit. Sur ces propos l'Infante s'approcha du tableau, auquel elle trouua escrit ce qui s'ensuyt.

A l'honneur des Roys Amadis, & Oriane, & de toute leur lignee, Zirfee roynne d'Argenes leur ayant seans donne pour compagnie le Roy tāt desiré & attendu en la grand' Bretagne leur a basty ce superbe edifice, lequel durera iusques au temps qu'un seul Cheualier de leur race meslee du sang Gregeois, apres en auoir vaincu les gardes par sa prouesse, viendra suyuant son destin fatal, par la bouche de la roche enflammee au secours de l'Infante perduë, donnant fin à mes enchantemens, au grand renom des Princes de Grece & de ceux de la grand' Bretagne.

L'Infante ayant leu ceste escriture, leur
A 5 dist.

dist. Mes Dames, i'entés bien peu en ceste profecie, & vous supplie me la declarer, s'il y a quelqu'une de vous qui l'entéde. Elle veut dire (respondit Polixene) qu'il vous fault demeurer icy avecques nous, iusques à ce que l'avanture soit mise à fin, en la façon qu'il vous n'esté recité. Je suis (dist lors l'Infante) celle qui y gagnera le plus. Et par-ice q tout autour de la sale y avoit diverses peintures, qui representoient maintes choses avenues, & assez d'autres q estoient encores à venir: l'Infante pria Polixene lui monstrier celles dont elle avoit ouy parler, luy declarant ce qu'elle ne pourroit entendre. Polixene donc laissant à costé gauche de la collonne de Zirfee, les avántures qui devoient arriuer au temps du Roy Artus, & des fameux Chevaliers de la table rôte, par-ce qu'il n'estoit permis de les entendre auant qu'elles fussent avenues, se tourna à la main dextre, ou estoient peintes toutes les choses memorables qui vous ont esté, & seront deduites en ceste grande histoire: Et conduisant la princesse d'une main, & luy montrant les peintures de l'autre. Voyez (dist elle) côme Perion Roy de Gaule s'amoura de la belle Elisene, & comme Dariolette fait les messages des deux costez, à fin de les faire iouir de leurs amours, & un peu plus bas, comme elle iette le petit enfant en une riviére, d'ou il fut mené dás la mer. Voyez icy la bataille qu'il eut contre le Roy d'Yrlande bien tost apres qu'il eut receu l'ordre de cheualerie, & comme il fut cogneu pour filz du Roy Perion, & de la Royne Elisene, perdant le nō de Damoyse de la mer, pour prédre celui d'Amadis de Gaule. Voyez là le trahistre Arcalaüs l'enchanteur, qui le retient en ses prisons. Regardez icy comme il passe souz l'arc des loyaux amás: puis côme il esprouve l'avanture de la chambre defendue, Et pour n'estre plus lōg en ce discours, elle luy mōstra tous les hautz faitz d'armes, & belles avantures qui vous ont esté deduites es liures precedás: en quoy l'Infante prit un singulier plaisir, mesmement quand elle vid entre les

autres peintures, la Princesse Silvie sa mere, en habit de Bergere, gardāt les brebis es chāps de Tirel, avecques les Bergers Florisel & Darinel. Puis concernant plus ententivement celle histoire, commēça à pleurer de ioye, disant: Helàs, ma Dame, vous peustes bien gagner autant avecq ces armes chāpestres, comme vous pouvez faite maintenant, estāt du rang des plus grādes Princesses du monde. L'Infante ayāt considéré assez long tēps les faitz & gestes des Princes & Princesses de sa parenté, vid un peu plus outre maintes autres peintures, continues en un mesme ordre iusques au bout de la sale, lesquelles lui estoient incogneues & pareillement à toutes les Damoysselles, par ce qu'elles estoient encores à venir: sinō que Polixene disoit avoir ouy dire à Zirfee que le grand Empereur lequel y estoit representé le premier, devoit un iour estre le plus grand Seigneur de toute la Chrestienté: & à laverité (selon que recite le croniqueur Galeris) en ce costé de sale estoient peintes tout au long, les grādes & fureieuses batailles q le roy Charlemagne, & ses pairs devoient mener contre les mescreās & infidelles: avec tous les faitz memorables de ses successeurs les treschrestiens Roys de Frāce, lesquels estoient tous là representez au vis iusques à celui q doit regner au iour du iugement: & avoit chacun d'eux aupres de soy un petit tableau, contenant en une brieve profecie les choses qui luy devoient avenir. Entre ces histoires l'Infante ayant avisé en passant, q lques croissants entrelassez, pour la souvenāce qu'ilz lui donnerent de Diane, elle arresta plus longuement sa veuē sur celui qui les portoit en ses armoiries, & ayant veu parmy les autres hautz faitz d'armes, un Empereur fuyāt plusieurs foys devant lui, portant les deux collōnes du destroit de Gibaltar en sō escusson, avec un rouleau tout deschiré, sans y pouvoir rien entendre, elle eut recours au tableau du Roy, lequel sembloit estre attaché par trois petites chaines d'or à trois des cornes des trois croissants qu'il avoit aupres de lui pour ses

ses armes. En ce tableau elle trouua la profecie de la roine d'Argenes de ceste teneur:

A ces fatales cornes.

Je ne mets nulles bornes:

Leurs croissans s'acroïstront

Jusqu'à ce que la terre,

Vaincuë en eux, se serre

Ayans remply leur rond.

L'Infante voyant qu'elle ne pouoit sçauoir par l'escriture du tableau, ce que la peinture luy auoit celé, passa plus outre, & souz la conduite de Polixene sortit de ceste grand' sale, & vint en vne autre plus petite faite en pareil ordre d'architecture que la premiere. Au mylieu de ceste cy l'Infante vid vn throsne triumphal, couuert d'un riche poile de drap d'or, rayonné de fil d'argent: & dessouz y auoit trois chares de rang, en deux desquelles estoient assis deux Roys anciens, ayans la barbe & les cheueux blancz comme neige, & habillez de leurs Royaux vestemens: & au milieu d'eux estoit assise vne Roine, belle en toute perfection, encores qu'elle se monitraft assez aagée. Lors Polixene dist à l'Infante, Ma dame voyez vous bien ces deux Roys? l'un est le Roy Artus, qui doit vn iour regner en la grand Bretaigne: L'autre est l'excellent Roy Amadis de Gaule, & celle qui est assise entr'eux deux, est la belle Roine Oriane. A ces mortz Polixene & toutes les autres Damoysselles disparurent, laissant l'Infante toute seule au pied du trosne, laquelle grandement esbahie monta au haut & s'agenouillant deuant ses ayeulz, leur baïsa les mains: mais ilz ne faisoient autre chose, que la regarder, avec vne ioyeuse contenance. Dea mes Seigneurs (disoit elle) pourquoy ne parlez vous à vostre fille! O moy miserable! qui en vn mesme temps me trouue heureuse, & malheureuse, l'un pour l'aise que j'ay de vous voir, l'autre pour l'ennuy que ie sens de vous voir ainsi enchantez, & pour me trouuer seule en ce lieu, duquel ie n'espere iamais partir.

Ce pendât dō Rogel estant par grand travail monté sur le coupeau de la haute ro-

che, fut fort estonné, voyant de pres ceste horrible bouche de feu, laquelle avec vn bruyt espouuentable vomissoit ses flammes ardantes meslees parmy vne fort espoisse & tenebreuse fumee, & rendoit si grande chaleur qu'il n'estoit possible de dix grands pas la pouuoir endurer, ny soustenir le terrible bruit, lequel on ne pourroit comparer sinon aux plus furieux tonnerres de l'estié. Le Cheualier voyant ce gouffre tant effroyât, & qui ressembloit beaucoup plus la gueule d'enfer, qu'aucune autre chose, ne peut auoir en luy assez de force pour se hazarder à vn si dangereux passage. Il demeura lōg temps en ceste crainte, & delibérant quelquefois de s'y auenturer, marchoit quatre ou cinq pas en auant, avec intention de se ietter dedans la flamme, mais soudain qu'il en aprochoit, l'horrible bruyt luy faisoit telle peur, qu'il s'en retournoit tout estonné en arriere, sans auoir aucun sentiment quelconque. Apres auoir long temps demeuré en ce travail delibera de s'en retourner du tout. Mais commençant à descendre il luy souuint que sa Dame demeuroit en ceste fornaise, sans qu'il eut iamais autre moyen de la reuoir, selon qu'il luy auoit esté dit par les sages Alquif & Vrgande. Lors comme s'il fut sorty de quelque pasmoïson, commença à s'iniurier luy mesmes par ces paroles, O lasche Rogel, & ou est maintenant ce franc courage de la lignee dont tu es descendu, pour endurer que tu vses de telle couardie? Ou est l'amoureux feu dont la beauté de ma Dame Leonide m'embrase le cuer, avecques si grande flamme que ie ne dois redouter ceste cy qui est beaucoup moindre? Ou s'en est fuyé la souuenance de ma Dame, à fin que ie puisse demeurer vne seule heure séparé d'elle, ayât le moyē de l'aller voir? D'ou me vient ceste memoire de craindre le mourir, pour me faire oublier q̄ la vie me sera trop plus odieuse que la mort, ayant à viure continuellement en pleurs & en souspirs, sans iamais reuoir ma chere Leonide? Las pourquoy crains ie, puis

puis qu'il n'y a crainte qui puisse égaler celle, que ie dois auoir, si maintenant ie n'ay la hardiesse de faire ce que ie crains? Non, non, ma Dame, il n'y a, & n'y aura crainte qui m'empesche maintenant que pour vostre liberté ie ne vous sacrifie mon corps en ce feu, tout ainsi que ie vous ay desia immolé mon ame dans le plus grand feu de vostre diuine beauté: car me perdant à vostre seruice, ie ne seray point tant perdu, comme ie serois ne me perdant point en vous perdant & mon honneur avecques vous. Et puis que d'autant que la crainte est grande en faisant ce à quoy le deuoir nous oblige, d'autant l'honneur du fait en est plus grand, ô bien heureuse crainte qui me donne telle hardiesse, accompagnée d'une si douce louange, laquelle ie m'efforceray de garder, puis que maintenant ie la cognois, & payeray franchement par ma mort, la vie que la renommée m'acquerra pour ceste hardie entreprise, digne de perdurable memoire. Incontinent qu'il eut acheué ces propos, il remonta fort hastiement sur le sommet de la roche, & ayant mis toute son esperance, en vn acte plain de desespoir, lassa son armet, embrassa son escu, & estraignant l'espee nuë au poing, prit sa course tât roide qu'il peut, & se vint lancer en la gorge flamhante, disant à haute voix, Receuez ma dame, le sacrifice du corps, pour racheter celui que vostre beauté fait de l'ame. Ainsi qu'il se iettoit au trauers de la flamme, vn bruit tant espouuenable sortit de la bouche de feu, & avec si grand tremblemēt de terre, que les Princes qui se pourmenoiēt pres de la mer, tōberēt pasmez sur le riuage, & pareillement tous ceux de l'Isle. L'air demeura long tēps tout obscurcy de fumee fort espoissē & tenebreuse, cōme lon voit apres auoir tiré vne grād quantité de grosses pieces d'artillerie. Mais incontinent q̄ les Princes furent retournez de pasmoison, les sages Alquif & Vrgāde leur dirent qu'ilz mōtassent à cheual, pour s'en aller deuers la roche, d'autant q̄ l'auātūre estoit acheuée par la prouesse de

dō Rogel, ayāt fait l'vn des pl⁹ hardis actes qui auint onc à Cheualier. Et à la verité sans l'Infante qui demeueroit, il n'eust peu estre assez courageux pour essayer vne entreprise tant perilleuse, & pour ceste seule occasion les sages l'auoient enuoyee avecques luy. Or dom Rogel s'estant iettē dās ceste flamme, il luy sembla estre tombé en vne profonde mer, & qu'avec la pesanteur de ses armes, il vint de peu à peu au fond de l'eau sans oser prendre son aleine. Mais apres auoir mis les piedz en terre, il se trouua en vn beau pré, au lieu de la roche, laquelle disparut incontinent, sans iamais depuis estre reueuē. Deuant soy il vid en deux riches chairez, le Roy Amadis de Gaulle, & la Royne Oriane, en tous leurs sentimens, avecques l'Infante Leonide qui estoit agenouillée deuant eux. Or estoit dō Rogel si ioyeux d'auoir ainsi acheué l'auenture à son grand honneur, qu'il en estoit presque hors de soy. L'Infante n'estant moins esmerueillée de le voir là, que de voir les Rois Amadis & Oriane se remuer avecque tous leurs sens, leur dist: Dites moy ie vous supplie, mes Seigneurs, pourquoy vous n'avez voulu parler à moy? car vous deuez sçauoir que ie suis vostre fille, & de ma Dame la Princesse Siluie. Quand ilz l'ouirent ainsi parler, ilz la prirent gracieusement entre les bras, & la baisèrent plusieurs fois par grand amour, la voyant tant belle, & de si bonne grace. Dom Rogel pareillement ostant son armet se vint agenouiller deuant eux, & leur baïsa les mains: puy ayans sceu de l'Infante qui il estoit l'embrasserent & baisèrent en la face. Lors dist le Roy: O mes enfans, quel honneur ce n'est en ceste vieillēse ou ie suis, de voir telz personnages de ma lignee: ie vous prie me dire qu'elle auenture vous a icy mis, & qui vous y a amenez. Mes Signeurs (respondit dom Rogel) c'est nous qui receuons le plus grand honneur pour estre yssuz de deux si excellentes personnes cōme vous estes. Quant à ce que me demandez, ie vous diray ce que i'en sçay. Lors il luy

luy raconta tout ce qui luy estoit auenu cy dessus, les laissant grandement esbahis de sa prouesse, & fort resiouys pour la bonne compagnie des Princes, qu'ilz esperoient reuoir bien tost, & qui n'estoient plus guerres loing. Car apres estre partiz du riuage de la mer, ilz firent bonne diligence, & trauersans le chasteau, les vns avec grande admiration, & les autres avec grand' enuie, aperceurent les marques que dom Rogel y auoit laissees en sa haute Cheualerie: parce que les Geans mortz: & les deux lyons leur en pouuoient donner suffisant tesmoignage. Eulx donc arriuant au lieu ou estoient le roy Amadis, & la royne Oriane, & les deux ieunes Princes agenouillez deuant eulx, vous pouuez penser quel plaisir eut toute celle noble troupe à ceste rencontre tant desiree. Quant à moy ie ne vous en puis dire autre chose, sinon que ce fut grand' merueille comme ilz ne moururent d'extreme ioye, les vns pour voir ces nobles Roys leurs peres & ayeulz desenchantez, & eux pour voir vne si belle compagnie descendue de leur sang: car on les pouuoit estimer la vraye essite de toute la Cheualerie du monde. Estans donc les Princes descenduz de cheual, & les Princesses de leurs pallefroys, ilz allerent baïser les mains du grand roy Amadis, & de la royne Oriane, avec tant de caresses & paroles de ioye d'une part & d'autre, qu'il seroit impossible les vous reciter. Puis ayans rendu graces de ceste auenture aux sages Alquist, & Vrgande ilz entendirent tout ce qui estoit auenu à dom Rogel, & à l'Infante, dequoy ilz furent fort esmerueillez. Mais sachez que l'ayse de dom Rogel estoit bien temperee par le mauuais visage que sa Dame luy monstroït, car elle ne le regardoit comme de coustume, se souuenant de ce qu'il auoit osé entreprendre contre sa volonte. Or tous ces excellentz Roys, Empereurs, & Princes, ayans demeuré dans le chasteau en grãde ioye l'espace de quinze iours, pendant lesquelz les habitans du pais vindrent recognoistre dō Rogel pour Sei-

gneur de l'Isle, ilz s'embarquerent tous ensemble dans leur nef. Adonc les mariniers voyans le temps propre pour nauiguer, haucèrent les voyles, & prindrent la route de Constantinople, ou nous les lairrons voguer pour ceste heure.

Comme le prince Agefilan continuant ses haultz faitz d'armes souz le nom & habit de Darayde, eut vn perilleux combat contre vn Cheualier incogneu, & de la grande passion que souffroit dō Galtazar de Barberousse pour son amour.

CHAP. III.

A Pres que Daraïde eut asseuré le Royaume de Galdap des armes du Roy de Geldes, & secouru dom Galtazar de Barberousse (à sō grãd besoing) contre les Geans de la desloyalle Damoyse, comtue il vous a esté recité sur la fin du liure precedent, elle n'aspiroit plus à autre bon heur sinon à iouyr en brief de la venue de sa tant desiree Diane. Et parce que l'occasion du dāger ou elle auoit trouuē Galtazar luy estoit incogneuē, le pria luy raconter comment il estoit tombé en tel hazard. Scachez ma dame (respondit il) que mes freres & moy estans gueris des playes avec lesquelles vous nous laissastes, nous departismes incontinent de l'Isle de Guindaye, pour aller rendre conte à Baltazar Roy de Rulsie de ce qui s'estoit passé entre nous. Puis ayant pris congé de luy, pour nous mettre en vostre queste, selon ce que ie vous auoys promis à vostre depart, d'autant que nous estions incertains en quel lieu nous vous pourrions trouuer, laissasmes voguer nostre nef à l'auanture, de sorte que finablement nous nous sommes trouuez en ce pais. Ayans pris terre apres plusieurs & diuerses rencontres, ce matin mes freres & moy sommes arriuez en vn chasteau, ou nous allions ce soir heberger, le Seigneur duquel estoit en fort grãd ennuy, & extreme angoisse, parce qu'un las-

che

che Cheualier (celuy auquel vous auez trahé le bras) acompagné de plusieurs autres siens parés qu'il auoit assemblez pour executer sa trahison (qui sont ceux contre lesquels nous auons combatu) luy auoient enleué sa femme: laquelle (selon les enseignes qu'on m'en a donnees) doit estre celle que nous auons laissée se lamentant. Ce qui leur fut facile à faire, par ce qu'ilz auoient pris le pauvre mary au depourueu, & ne se doutant de rien à cause de leur ancienne cognoissance. Incontinēt que mes freres & moy fusmes aduertiz de ces outrages, nous suyuismes les Cheualiers pour leur faire reparet l'iniure faite à nostre hoste, & ayans rencontré trois chemins à fin de ne faillir, chascun de nous suyuit le siē. La fortune voulut que l'execution de ceste entreprise s'adressast à moy, de sorte qu'ayant rencontré ceux que ie cherchois, ie requis le Cheualier raiisseur qu'il eut à redre la Damoysselle à son mary, ou bien que i'estois prest de le combattre pour luy faire cognoistre son tort. Le Cheualier accepta le combat, & me donna assēurance des siēs. Ie l'auois presque vaincu quand ses gens s'aperceuant de sa foiblesse rompirent la seureté du camp, courans tous ensemble sur moy seul, & n'auoient reduit en telle extremité, que sans vostre secours i'estois beaucoup plus prochain de la mort, qu'au parauant ie n'auois esté de la victoire. Ie remercie les Dieux (dit Daraide) pour m'auoir donné le moyen de vous ayder, combien que ie pense vous auoir plustost soulagé de peine en ce combat, que vous auoir donné vn secours tant necessaire comme vous dites, sçachant que telle canaille n'estoit pour durer à la longue contre vostre prouesse assez experimentee en plusieurs autres meilleurs endroitz. Au reste i'ay delibéré incontinent que voz playes seront gueries, & auant que partir de ce pais, de contraindre ces trahistres à rendre la Damoysselle au Seigneur du chasteau son mary. Apres telles & autres paroles Daraide à la requeste de dom Galtazar raconta en

brief ce qui luy estoit auenu depuis son depart de Guindaye: mesmement comme elle auoit vaincu l'espouuentable Cauahō, avecques les autres auantures ou elle s'estoit trouuee au Royaume de Galdap. Mais leurs propos furent troublez par l'impourueuē arriuee d'un Cheualier, lequel venant par derriere leur escria qu'ilz se gardassent de luy, les menaissant de telles parolles, Arrestez vous, meschans & trahistres Cheualiers: car voicy l'heure que ie vous feray achepter bien chere la trahison laquelle vous auez commise. Daraide estimant que ce fust quelque Cheualier parēt de ceux contre qui elle auoit combatu, lassa son heaume, & prit vne des lances quē ses Damoysselles auoient recouuettes au combat passé, priant dom Galtazar qu'il la laissast seule en ceste entreprise, veu qu'elle estoit saine & entiere, & luy fort endommagé du premier combat. Ainsi feray-ie (respondit il) puis que le me cōmandez, cō bien qu'il me soit assez ennuyeux: car il me semble que nous deuons seiourner icy long temps, d'autant que le Cheualier cōtre qui vous auez affaire, doit estre de fort grande prouesse, au moins si la valeur est aucunement conforme à sa representation. Desia le Cheualier estrange couroit à bride abatuē, bien couuert de son escu, avecque la lance en l'arrest, quand Daraide luy vint à l'encontre pour le recevoir de semblable furie. Les lances se briserent en leurs escuz, s'entrehurtans si roidement de corps & de testes, que tous deux pensans auoir heurté contre vn rocher, tomberent esgalement en terre renuersez souz leurs cheuaux, & si fort estonnez de la cheute, qu'ilz demeurerēt vn lōg tēps sans remuer ny pied ny main. A chef de piece Daraide se releua la premiere, fort esmeuē de colere se voyant ainsi lourdement renuersee deuāt dom Galtazar. Lors embrassant son escu & mettant la main à l'espee vint cōtre son ennemi qui s'estoit pareillemēt releuē. A l'aprocher lon peut biē voir l'un des plus braues & furieux cōbatz qui fut iamais veu entre vn

entre vn per de Cheualiers les plus parfaictz & accomplis qui fussent pour lors au demeurant du monde. Vous les eussiez veu desmailler leurs hauberts tailler leurs escuz & s'entrechamailler si rudement qu'en peu d'heure le pur sang ne sortit moins abondamment de leurs corps, que les vives étincelles de leurs harnois. Dom Galtazar qui regardoit ententiuelement ce merueilleux combat, fut fort esbahi de la prouesse des deux Cheualiers, estimant que Daraïde eust lors trouué son pareil aux armes veu mesmement que les Damoyelles & escuyeres commençoient à auoir crainte du danger de leur maïtresse. Ainsi se maintindrent les combatans vne grand' heure sans que lon eust peu iuger lequel d'eux deux auoit plus d'auantage. Ce pendant arriuerent trois Cheualiers que la Damoyelle desloiale enuoyoit, au secours de celui qui combattoit contre Daraïde, mais incontinent que dom Galtazar les eut apperceuz, combien que le repos luy fust plus propre que le combat, il print neantmoins l'autre lance, que portoit l'vne des Damoyelles de Daraïde, & brochant des esperons contre les trois, qui briserent leurs lances en son escu, en rencontra l'vn de si droit fil, qu'il le transperça de part en part, & le renuersa mort par terre. Puis mettant la main à l'espee, courut aux autres deux, entre lesquels commença vne assez aspre meslee. Mais par ce que dom Galtazar estoit robuste & bien à droit, les reduit incontinent en telz termes, qu'en ayant mis l'vn à mort sur le champ, fit tourner le doz à l'autre qui plus ne pensoit en rien moins qu'à renoueller ce combat: au moyen dequoy dom Galtazar s'en retourna voir celui de Daraïde, & da Cheualier incogneu, lesquels sembloient ne faire encores que commencer, & voians qu'ilz ne se pouuoient vaincre en ceste sorte, laisserent perdre leurs espees aux chesnettes, & s'entreprendrent bras à bras, se donnans tant de tours de luite, qu'ilz tomberent tous deux en terre, se tournoyans tantost l'vn dessus,

puis l'autre dessous, iusques à ce qu'ilz se soufleuerent tous lassiez, & se reposerent sur les croisees de leurs espees, chacun d'eux s'esmerueillant de la prouesse de son compagnon, & estimans qu'avecques le combat leurs vies deussent pareillement prendre fin. Les Damoyelles de Daraïde plo-roient tendrement voyant leur chere maïtresse toute couuerte de sag, & de pouldre les combatans se regardoient aussi par grande admiration l'vn l'autre: mais incontinent que Daraïde eut apperceu les pleurs de ses Damoyelles elle retourna assaillir le Cheualier incogneu, de la mesme furie que le lyon se rue sur son aduersaire. Il la reçoit courageusement, & lors commença le combat beaucoup plus cruel qu'au parauant, & continuèrent tout vn long temps sans pouuoir rien gagner l'vn sur l'autre. Finablement Daraïde sembloit auoir quelque peu d'auantage sur le Cheualier estrange, quand avec vn grand desdain il luy vint donner tel coup sur l'armet: qu'il luy pourfendit par la moytié l'escu avec lequel elle pensoit rabatre le coup, la rechargeant si souuent qu'il la fit agenouiller du genou droit. Daraïde enflammee de colere, & de vergongne se releua incontinent, avecque bonne volonté de luy rendre la pareille: & pensant luy fendre la teste en deux, luy ietta si pesant coup, que l'escu du Cheualier volant en pieces, l'espee vint bon gré maugré luy descendre sur l'armet, la bonté duquel garantir lors la vie de son maïstre. Mais elle redoubla ses coups si asprement que force fut au Cheualier de mettre les deux mains en terre, & par ce que les courroyes de l'armet estoient tencees en plusieurs pars, il luy sortit hors de la reste pour la grand' Roydeur de la cheute. Le Cheualier estourdy de ces horribles coups, se releua furieusement, & marcha par grand' audace tout desarmé qu'il estoit à l'encontre de Daraïde, bien delibéré de reuanger sa perte, ou de l'acroistre par la fin de sa vie. Si hance le bras pour ferir la pucelle, laquelle le recogneut inconti-

nent qu'elle luy vid le visage au descouvert & laissant passer le coup, le courut estraindre & embrasser fort amoureusement, n'estant moins ioyeuse de le voir, que desplaisante de s'estre atachee avec luy en vne si outrageuse rencontre. Adonc elle luy dit, O ma bien aymee seur Garaye, deuois-je donc demeurer si long temps sans vous voir, à fin d'acheter maintenât vostre veuë si chere? Mais dom Arlanges lequel auoit esté la conduit par la fortune, en la maniere que nous vous conterons cy apres, n'entendant bien les paroles de Daraide, s'efforçoit de tout son pouuoir à la renuerfer par terre, quand elle luy dist, Ma dame ma seur, esprouuez voz bras en autre meilleure intention contre moy, car vous deuez sçauoir que c'est vostre Daraide laquelle vous tenez maintenât embrassée. Quand dom Arlanges d'Espagne ouyt ces paroles en l'extremité ou il estoit, il ne receut iamais telle ioye, & lui dit, ô ma chere dame & ma tresaimée seur Daraide, quelle auenture vous ici acheminée à fin q'ie receusse vn si grand bien, & vn si grand mal ensemblement, l'vn pour vous auoir trouuee, l'autre pour ne vous cognoistre point? Le vous supplie, ma seur oster vostre armet, car à peine me peux ie faire à croire vn tel bonheur, encores que vostre prouesse de laquelle j'ay fait bonne espreuue, m'en donne suffisant tesmoignage. Daraide ayant delassé son heaume, s'en retourna embrasser dom Arlanges luy disant, ma seur Garaye, c'est moy qui ay le plus gagné en cede recognoissance, car il estoit facile à voir que ie ne pouuois plus guere durer contre vostre haute valeur, veu que vous estiez tant enflammée contre moy. Dom Arlanges estimant que pour ne descouurir Daraide, il seroit pour le mieux de faindre qu'il estoit Damoyse, & auoit nom Garaye comme il auoit tousiours fait depuis qu'il estoit party d'auec la Roynie Cleophile, pour les raisons que nous vous deduirons tantost, respondit, Laissons ie vous prie ces propos, car lon cognoist as-

sez l'auantage que les dieux ont en toutes choses donné à Daraide par dessus Garaye: maintenant le meilleur sera de nous en aller tous trois faire appareiller noz playes. Apres ces propos les deux Damoyseilles, & dom Galtazar monterent à cheual, chacun demeurât fort ioyeux d'auoir ainsi departy leur noyse par vne si agreable recognoissance. Ilz arriuerent sur le soir au chasteau du gentilhomme auquel on auoit rauy sa femme, lequel les receut fort gracieusement, & les fit coucher en trois riches lits conuenables à leur grandeur, commandant à vne sienne niece de penser leurs playes, parce qu'elle estoit bien experimētée en la chirurgie, & leur fit faire tout le bon traitement qu'il luy fut possible, pour la grand' ioye qu'il auoit d'estre par leur moyen vengé de ceux qui luy auoient emmené sa femme. Daraide luy disoit qu'incontinent apres leur guerison ilz trouueroient moyen de la luy faire rendre. Le gentilhomme les remercia, leur disant qu'il se tenoit assez satisfait de la vengeance qu'ilz en auoient prise & que ce luy seroit vn grand plaisir de ne se voir plus en la compagnie d'vne si meschante creature comme estoit sa femme, la vouant deslors à toutes males fortunes, & priant les Dieux luy departir les guerdons condignes à ses demerites. Ilz passerent ainsi le temps dans le chasteau iusqu'à ce que leurs playes fussent gueries, & en ces entrefaites suruindrent les deux freres de dom Galtazar, qui furent receuz à la grād' ioye de toute la troupe. Darayde se leua huyt iours deuant Garaye, luy tenant bonne compagnie sans parler ensemblement d'autre chose q' de leurs maistresses. Garaye luy recita tout ce qui estoit auenu à la Roynie Cleofile & elle, selon qu'il vous a esté décrit par le discours de la presente histoire & comme elle s'estoit departie d'auec elle pour combattre vn Geant, lequel en vne prochaine Isle auoit fait plusieurs violences à vne pauvre Damoyseille, luy ayant pris par force le principal de ses chasteaux. Puis elle aiou-

sta com-

remis la Damoyfelle en fa liberté, pensant retourner vers Cleofile, elle fut iettée par tourmente en ce pais, ou ayant pris terre, luy estoit auenu ce qui s'estoit passé entre elles. Darayde luy raconta pareillement ses estranges auantures, dont Garaye fut fort esmerueillée, combié que le commun bruit luy en eust desia beaucoup appris. Ainsi s'entretindrent les deux Damoyfelles iusques à ce que leurs playes fussent entièrement consolidées. Or vous veu-x-je dire que dom Galtazar estoit tant enflammé de l'amour de Darayde, que la passion qu'il souffroit luy faisoit perdre tous plaisirs, mesmement qu'avec la grandeur du courage qui estoit en elle, il la voyoit tant chaste & honneste, qu'il ne luy restoit aucun moyen ny hardiesse pour luy descouurir son tourment. Ne s'osant donc plaindre à sa Dame, il se plaignoit à soy mesmes en ceste façon : O miserable Galtazar, te conuient il donc ainsi mourir, sans pouuoir tesmoigner ton mal que par ta mort ? Je ne veux ma dame Daraide, vous deceler plustost les passions de mon ame, que ie ne voye ma mort prochaine, pour vous montrer que ie ne les ay voulu faire entendre, sinó avec l'honneur deu à vostre vertueuse prouesse, & avec la reuerence que merite vostre chaste pudicité, à fin que si vous estiez offensée de me voir prendre mon vol trop hault sur vostre beauté diuine, ie puisse à tout le moins par ma mort satisfaire à l'offense commise contre vous, & tout d'une main mettre vne certaine fin à mes douleurs. Daraide le voyant empirer & amaigrir de iour en iour pour la continuelle lagueur qui ne le laissoit seiourner en aucun repos, à fin de luy donner tout le secours dont elle le pouuoit ayder en telle maladie vn matin à la leuee du lit, le prit fort gracieusement par la main, comme celuy qu'elle aymoit & estimoit beaucoup, tant pour son bon vouloir enuers elle comme pour sa courageuse prouesse au fait des armes. Elle donc vestuë d'une robe de soye pourfilée toute de fil d'or, le tira à l'escart des

autres, & laissant Garaye avec ses freres, le mena promener à la fraischeur l'oree d'une belle riuere qui passoit au pied du chasteau. Dom Galtazar tresioyeux de ceste faueur, se voyant seul avec elle, & la regardant en vn habit auquel il pouuoit entièrement cognoistre la perfection de ses beautés, commença à changer souuent de couleur sans toutesfois auoir la hardiesse de luy descouurir aucune chose de son amour. Lors Darayde se doutant assez de ce qui estoit vray, luy dist, Seigneur Galtazar ie vous prie dites moy l'ocasion de vostre tristesse, & vous tenez assésuré pour l'amour que ie vous porte, & pour la bonne reputation en laquelle ie vous ay, qu'il n'y a chose en ce monde que ie ne face de bien bon cueur, pour vous donner le remede conuenable à vostre mal, aumoins s'il est en ma puissance. A ces paroles dom Galtazar prenât la hardiesse qui luy deffailloit au parauant, respondit, Ma dame, ie vous remercie treshumblement de la promesse que vous m'avez faite, laquelle m'est d'autant plus agreable par ce que c'est le seul moyen qui peut donner guerison à ma lagueur, & accepte le gage de voz paroles avec la reuerence que ie vous doy, vous promettant la fidelité de loyal espoux, puis qu'il vous plaist me prendre pour tel. Daraide qui par ceste responce cogneut la verité de ce dont elle s'estoit tousiours douteé, delibera mettre fin à sa douleur en luy descouurant son secret, & luy dist d'un ioyeux visage, Mon loyal amy, ie ferois fort mal pouuant guerir la maladie d'un si accompli Cheualier comme vous estes, si ie vous abandonnois sans secours : partant ie vous prie vous assésurer de ma promesse. Quand dom Galtazar ouyt ceste responce, peu s'en salut que l'extremité de la ioye ne le fist sortir hors de son sens, voulât à toutes forces luy baiser les mains pour la remercier avec plus grande reuerence. Mais elle en souffrant l'empeschement, disant qu'il attendist par ce que le remede qu'elle luy vouloit donuer n'estoit tel qu'il pensoit. Seigneur

Galtazar, dist elle, le moyen que i'ay pour vous depeſtrer de ce martire, eſt, q̄ ie vous ſuplie chāger ceſte feruēte ardeur d'amour, en vne autre plus vraye amytie. Et l'ayant mainteſois coniuſſé de tenir ſecret ce qu'elle diroit, continua ainſi, Sachez que ie ſuis Cheualier, nommē Ageſilan, filz du Prince dom Falanges d'Aſtre, & de la Princeſſe Alaſtraxeree. Puis lui fit l'entier diſcours de ſes amours, & lui declara la raiſon de ſon habit. Quand dō Galtazar eut eſcoute tous ces propos, vous pouuez penſer en quelle perplexité il ſe trouua, voyant la froide alegeance de ſes douleurs: neantmoins il fut aſſez conſolé, cognoiſſant qu'il auoit eſté vaincu par la prouēſſe d'un tel cheualier, & non d'une ſimple Damoyſelle, comme il auoit touſiours creu iuſques là. Adoncq̄ il lui reſpondit, Monſeigneur Ageſilan, ie m'eſtime tresheureux d'auoir ce iourd'huy receu de vous trois ſi grandes faueurs, qu'il ne ſera iour de ma vie que ie ne m'eſſaye à les recognoiſtre; L'une, pour m'auoir monſtré le bon vouloir que me portez, en vous ſiant en moy d'une choſe ſi ſecrete comme eſt celle que m'avez decelee: L'autre, pour le confort que vous auez donné à ma miſere, faiſant changer l'ardeur de mon mal, en vne loyale amytie, que ie m'eſſorceray d'entretenir tant que l'ame me respirera dās le corps: La troiſieſme, en me donnant à cognoiſtre que la victoire laquelle vous auez eue ſur moy, ne peut tourner qu'à ma grande gloire, ayant eſté vaincu d'un tant noble & excellent Prince. A ces motz dom vers Galtazar lui voulut baiſer les mains, mais Daraide ne le permit, ainſi l'embrassa par grād' amour, puis retournerēt enſemble vers Garaye. Toutesfoys celle force q̄ la beauté de Daraide, comme Damoyſelle, auoit conquiſe ſur Galtazar, ne ſe peut ſi legerement amortir. Car chacuneſois qu'il la regardoit à l'impourueue, il ſentoit rallumer en ſon cueur les meſmes flammes qui l'auoiēt au parauāt embrasé pour ſon amour, demeurāt en continuelle angoiſſe, iuſques à ce qu'il fuſt reuenu à ſoy, tellement qu'on

l'eut peu comparer à ceux leſquelz ſur la nuyt ayans veu quelque eſtrāge fantaume, ou eſtans eſchapez de quelque dangereuſe rencontre, trēblent encores de peur à chaſque ſoys qu'ilz les recitēt, ou qu'elles leurs retournent en la memoire. Or ſe voyans gueris, ſ'acheminērēt de compagnie en l'Isle de Guindaye, & apres auoir pris du ſeigneur du chasteau vn congé acōpagné de mille mercys, tāt pour le bon traitement, q̄ pour l'honneur qu'il leur auoit fait en ſa maiſon, ſ'en allerent au port ou Daraide auoit laiſſé la nef que le roy de Teſſalie luy auoit donnée. Les mariniets la receurent à grāde ioye avec toute ſa troupe, car ilz l'auoiēt long tēps attendu en bon vouloir, comme ceux qui ne vouloiēt departir ſās ſçauoir premieremēt de ſes nouvelles. Elle les remercia de leur courtoyſie, puis voyans le tēps propre, monterent ſur mer, & hauſſerent les voyles tenans la route de l'Isle de Guindaye.

Comme Daraide, Garaye, dō Galtazar, & ſes freres eſtans débarquez en l'Isle de Guindaye, ſe departirent par le moyen d'une Damoyſelle, & d'un Cheualier à demy mort, qu'ilz rencontrerent en leur chemin.

CHAP. II II.

LA nef en laquelle eſtoit Daraide, Garaye, dom Galtazar, & ſes freres ſingla quelques iours par bon vent, tenant touſiours la route de l'Isle de Guindaie: mais à la fin la tēpeſte les detourna aucunemēt de leur chemin, car encores qu'ilz arriuaſſent en l'Isle, ilz prindrent port à plus de cinquante lieues loing de là ou la Roynne Sidonie eſtoit. Partant tirans leurs cheuaux & palleſſes hors de la nef, ſe delibererent aller par terre iuſques à Guindaye. Or eſtoit Daraide tāt ioyeuſe par ce qu'elle deuoit biē toſt reuoir ſa maiſtreſſe Diane, que la compagnie ſe peut facilement apercevoir de ſon contentement. Ayans ainſi cheuauché deux iours entiers, vn ſoir q̄ le ſoleil commēçoit de ſia à ſe coucher, en traueſſāt vne foreſt rencōtrerent vn Cheualier dure-

duement nauré, & vne Damoyfelle apres de lui, qui pleuroit fort amèrement & luy apareilloit ses plaies. Et luy demandans la raison de ses doleances, & pourquoy ce Cheualier auoit ainsi esté blessé, elle leur respondit: Lâs! Seigneurs Cheualiers, s'il y a encores en vous quelque prouesse pour secourir les oppressez, ie vous supplie prendre compassion de moy, & de la force qu'on m'a faite: car vous deuez sçauoir qu'en passant mon chemin par ceste forest, deux trahistres Cheualiers m'ont osté vn petit eserin, avecques quelques beaux ioyaux, que le magicien Cinistide m'ont pere enuoioit à la belle Princesse Diane, sans qu'il m'ait rien serui de dire à qui ie les portois. Et comme ie me plaignois du tort qu'ilz m'auoient fait, icy arriua le bon Cheualier q^{uo} voiez si mal en point, lequel ilz ont mal traité en ceste sorte, par-ce qu'il me vouloit faire la raison de leur volerie: puis s'en sont allez par ce chemin il y a enuiron demie heure, & ont emporté l'eserin avec eux. Daraide fort desdaignée de ces nouvelles, tât pour la lascheté des deux Cheualiers, que pour l'outrage qu'ilz auoient fait à sa Diane, dist à la Damoyfelle: M'amie venez vous en avecques moy car mes Damoyfelles sçauront bien apareiller les plaies du Cheualier nauré, & ie vous prometz par la foi q^{ue} ie doy à l'ordre de cheualerie, de ne prendre aucun repos q^{ue} ie ne vous aie fait recouurer vostre perte, reparer l'injure q^{ue} ces outrecuidez Cheualiers vo^{us} ont faite, & à ma maistresse Diane. Las! seigneur Cheualier (dist la Damoyfelle) ie prie les dieux vous donner le iuste guerdon de ce q^{ue} vous entreprenez pour moy. Or marchons d'oc viste, car ie suis preste de m'en aller avec vo^{us} Daraide comâda à ses Damoyfelles d'apareiller les plaies du cheualier nauré, & le mener en vne bourgade, qu'elles auoient laissé à main gauche, pour retourner puis apres à leur chemin: ce qu'elles firent. La Damoyfelle de la forest estant montée sur son palefroy, prit au grand gallop la voye qu'elle auoit veu tenir aux deux Cheualiers, & n'alla gueres loing avecq^{ue} la noble

côpagnie qui la suyuoit, qu'elle trouua vn carrefour ou le chemin se fourchoit en cinq sentiers assez larges. Au moyen dequoy à fin q^{ue} ne cinq Cheualiers ne faillissent à trouuer ceux qu'ilz cherchoient, prirent chacun le leur, apres auoir acordé ensemble qu'ilz se retrouuoient au mesme lieu dedans huit iours, & que ceux qui y seroient arriuez les premiers, y attendroient vn iour leurs cōpagnons, puis prendroient le chemin de la ville de Guindaie, ou ilz se deuoient tous retrouver. Ainsi separez avec bonne intention d'executer leur entreprise, Daraide donna son armet à la Damoyfelle de la forest, qu'elle prit pour toute compagnie, & ayant quelque temps cheminé ensemble, commença à lui demander quels dons c'estoient qu'elle portoit à la Princesse Diane. C'estoit vne guirlande (respondit elle) qui ne se pourroit esimer, tant elle est enrichie de pierres precieuses, & de fines perles, qui sont de telle vertu que la Damoyfelle qui en sera coronnee, ne se montrera plus aagée de seize ans tât qu'elle sera Damoyfelle. Vous dites merueilles de ceste guirlande (dist Daraide) & vous assure que vous la portiez en vn lieu ou elle eust esté tresbien employee. La Damoyfelle ayant assez regardé Daraide, s'esmerueillla fort de son excellente beauté, & luy dist: O Seigneur Cheualier, si vostre prouesse est conforme à vostre beauté, ie suis bien assuree que vous me ferez facilement auoir la raison de mon bon droit, & vous supplie me dire vostre nom, à fin q^{ue} ie puisse raporter à la Princesse Diane, qui est celuy lequel s'employe maintenant d'un si bon cueur en son seruice. Je ne sçai (respondit Daraide) quelle est ma prouesse: mais ie vous aduise bien que le desir que i'ay de seruir ma dame Diane, est si grand, que par ce bon vouloir i'espere supleer aysément à ce, en quoy la prouesse me pourroit deffaillir. Quant au seruice que ie lui fais ie lui dois, comme aiant lōg temps esté nourrie en sa maison. A ces motz la Damoyfelle la regarda de rechef, & la cognoissant au plus pres par les

enseignes que lon lui en auoit donnees : O dieux immortelz (dist elle) n'estes vous pas celle excellente Daraïde dont le renom a desia tant de foys environné toute la terre ? Si suis (respondit elle) mais non point tant excellente comme vous dites, sinon en ce que ie desire fort seruir ma maistresse Diane, plus qu'autre personne qui se puisse trouuer en tout le monde. Je remercie les dieux (dist la Damoysselle) dont ilz m'ont amené en lieu, ou ie voye celle que i'auois tant désiré voir & cognoistre. Vrayement ie croy à ceste heure n'auoir perdu ce que ie cherche, puis que i'ay rencontré si bon secours. Adonc regardant de rechef Daraïde tout vn long temps, & esmerueillée de sa grand' beauté acompagnée de la haute Cheualerie dont elle l'auoit ouy renommer: Làs ma Dame (dist elle) n'eustes vous point peur de cest horrible & espouuentable Cauailon que vous enuoyastes à ma Dame la Princeſſe ? Ennenda en songeant tant seulement à son estrange figure, ie tremble encotes toute de grand' frayeur. Daraïde luy respondit en souzriant. I'ay maintenant plus de crainte de ne pouuoir trouuer les Cheualiers q' emportent vostre guirlande. Mais laissons celà, & parlōs d'autre chose : car on ne pourroit pas acquerir grande louange, en executant les haultz faitz d'armes, si l'ocasiō de la crainte n'autoriseroit la hardiesse qui est requise pour tenir fidelle compagnie à la force: par ce que celui qui n'a point de crainte, n'a pareillement point de hardiesse, d'autant que la vraye hardiesse ne consiste en autre chose, sinon en la vertu de sçauoir bien domter la crainte, pour gagner l'hōneur d'une noble entreprise : autrement si la force s'exerce sans estre temperée par ceste hardiesse, qui prend sa source de la crainte, encotes que quelque heureux euénement s'en ensuyue, elle meritera plustost le nō de temerité, que de prouesse. O ma Dame (dist la Damoysselle) & ou auez vous appris tant de philosophie ? Daraïde en souzriant luy respondit : Es escolles d'Athenes, & encotes en v-

ne plus veritable estude, qui est de sçauoir que la vertu se doit experimenter par son contraire. Ainsi cheminerent parlant de diuerſes choses iusques au soir assez tard, qu'elles arriuerent auprès d'une riuere, ou elles trouuerēt vn Cheualier armé de pied en cap, lequel s'arresta soudain qu'il les vid, s'amusant à contempler la beauté de Darayde, laquelle luy dist : Cheualier, ainsi puissez vous adoir quelque bonne fortune, me pourriez vous dire des nouuelles de deux Cheualiers qui s'en vont icy deuant avec vn eserin qu'ilz ont osté à ceste Damoysselle? Ouy bien (respondit il) car il y a assez long temps que ie les ay icy rencontréz: Mais il faut que vous sçachez l'édroit ou vous pourrez passer la riuere a gué: autrement il vous seroit impossible de les suyure. Et par ce que vous me semblez bon Cheualier, ie suis content de me destourner vn peu de mō chemin, pour vous enseigner le gué ou il vous cōuient passer l'eau. Je vous remercie bien fort, dist Darayde, & incontinent le Cheualier commença à luy seruir de guide, & dist : Mais pourquoy cherchez vous ces Cheualiers que vous dites? Pour faire reparer le tort (respondit Darayde) q' lon a fait à ceste Damoysselle: car vous sçavez bien que lon prend l'ordre de Cheualerie à fin de cōseruer principalement le droit des Dames, lesquelles d'elles mesmes ne sont suffisantes pour se deffēdre. Je faudrois grādement (dist le Cheualier) si ie ne vous enseignois le plus court chemin, attendu le bon courage de conseruer le droit d'une Damoysselle qui vous meut à ceste entreprise. Puis estans arriuez ou le Cheualier les conduisoit, il fit descendre Darayde, & la Damoysselle sur le bord du fleuue, & leur dist: Il est temps maintenant, seigneur Cheualier, que vous entriez dans la riuere, car voicy le lieu ou vous la pourrez passer à gué, puis vous tournerez au chemin que vous auez laissé vn peu plus hault. Ce pendant ie vous diray à dieu: car ie m'e reuois à certaines affaires, lesquelles ie ne pourrois abandonner sans mon grād dom-

dommage. A tant s'en retourna sur ces pas & Daraïde & la Damoiselle entrèrent hardiment en la riuere se confiât en ses paroles : mais si tost qu'elles furent entrees dedans enuiron douze pas, le cheual, & le palefroy commencerent tellement à s'embouer qu'ilz ne pouuoient plus marcher en auant, ni retourner en arriere. Au moyē dequoy se trouuant en ce piteux estat, Daraïde fort ennuyee appella le Cheualier à haute voix, lequel retourna soudain vers elle, & lui dist: Qu'est ce là, Seigneur Cheualier? Ne voyez vous pas (respondit elle) que nous sommes si auant en ce borbier, que nous ne pouuons marcher ni deçà ni delà? vous en esbahissez vous (dist le Cheualier) puis que pour ceste occasion vous avez pris l'ordre de Cheualerie? Pourquoi dites vous celà? dist Daraïde, Auez vous pas dist (respondit le Cheualier) que vous avez pris l'ordre de Cheualerie pour rendre à vn chacū le droit qui lui appartient. Ouy ie l'ay dist, respondit elle. Puis donc (dist le Cheualier) que vous avez receu l'ordre de Cheualerie pour faire droit à vn chacun, faites le maintenant à le bouē, ne plus ne moins que vous le voulez faire à ceste Damoiselle. Je ne vous entens point, dist Daraïde: Il me le semble, dist il, que vous ne m'entendez point, & que vous ne m'ayez point entendu: & afin que vous m'entendiez, sçachez que vous m'avez gardé mon droit, & celui du borbier, ou vous estes: celui du borbier, en lui conseruant son priuilege, qui est de ne laisser sortir si facilement ceux qui y sont vne fois enfoncez: le mien, en souffrant que le tour lequel ie vous voulois iouer sortist si heureusement son effect. Et combien qu'en ceci vous ayez fait vostre deuoir, comme vaillant Cheualier que vous estes, si est-ce qu'en mon auis vous n'eussiez point voulu estre si bon iusticier, comme ie vous ay fait, si vous eussiez esté auerti de mon entreprise. Je vous di plus, qu'en ceci vous vous estes encores fait droit à vous mesmes, en me guerdonnant de ce que vous

me deuez, pour m'auoir desarçonné, & nauré fort grieuemēt apres que vous m'eustes volé mon chasteau. Si donc vous venu ici, pour garder le droit de ceste damoiselle vo' auier fort biē de garder encores le miē pareillement. Daraïde par ces propos cogneut que cestui estoit Fraudeur des ruses, dont elle estoit en telle angoisse qu'elle eust voulu estre morte, se voyant en vn si piteux estat, & ne sçachant que dire, ni que faire. Mais le Cheualier voyant quelle ne respondoit point continūa ces gaudisseries en ceste façon: Ma Dame Daraïde, ie vous veux donner vn bon conseil. Vous direz à ceulx qui viendront ici, afin qu'ils ne pensent que vous soyez en vain dans ceste bourbe, que ce n'est par là qu'il fault passer l'eau, mais qu'il fault prendre le gué vn peu plus hault: & quant à vous, que vous demeurez ainsi embouee avec vostre Damoiselle, afin de les oster de doute, & leur monstrier la verité par l'experience que vous en faites. Daraïde ne sçauoit si elle lui deuoit respondre, ou se taire, voyant quel vn ni l'autre ne lui pouuoit de guerres profiter à l'encontre de ce moqueur.

A la parfin elle lui dist: Vrayement Fraudeur, ie ne sçay si ie vous ay gardé vostre droit: mais ie n'ay bien sceu garder le mien, me laissant abuser par deux fois: car la premiere tromperie me deuoit seruir d'exemple, pour me garder de la seconde. De là vous pouuez voir, dist il, combien est grande l'affection que ie vous porte, puis que ie vous aprens par force d'usage, ce que la premiere experience ne vous auoir peu enseigner. Je vous l'adonnerai l'experience, respōdit elle, & le chastiment que vous en meritez, si ie vous puis vne fois rencontrer à mon loysir. Sortez seulement de ceste riuere (dist il) car puis que ie vous voy si bien logée pour ceste nuit, il vaudra mieux que j'aille ailleurs chercher logis, ou j'aurai quelque meilleur moyen de vous attendre. A tout le moins si vous n'auiez rien que manger, vous ne vous plaindrez de moy, que ie ne vous aye assez apa-

reillé que boire. Or demeurez donc là en la male aventure, puis qu'autresfois vous me l'avez donnée tant mauuaise. Allez vous mesmes (dist Daraide) en male rencontre, avecq' voz tromperies. Ainsi le Fraudeur s'en alla, mais vn peu apres il retourna encores, & dist: Ma dame Daraide, par ce que lon m'auoit auerty que vous estiez fort enflammee de l'amour de la Princesse Diane, i'ay bien voulu retourner vous dire que vous ayez à me remercier du bon remede, lequel ie vous ay apresté pour attemper vostre chaleur: car comme vous pouuez sçauoir, il n'y a chose plus contraire au feu n'y à la flamme, que l'eau, en laquelle vous pouuez maintenant vous rafraischir tout à vostre ayse. Et par ce moyen ie pense vous laisser autant bien auisee, comme les vieillards voz compagnons, desquelz ie temperay fort bien les flammes, & furies amoureuses, en les tenant atachez au serain, ou ie les fy deuenir si coys, que de toute la nuyt ilz ne bougerent d'vne place. Autant en ferez, s'il vous plaist, pour l'amour de moy, attendu que vous auez compagnie qui vous pourra rendre plus ioyeuse, à fin que sur la matinee à la fraischeur de la riuere, vous puissiez mieux degoyser, & iargonner quelque mignonne chansonnette. Car puis qu'estant en la cage ou ie vous auois enclose, vous ne me voulustes seruir d'oyseau des champs, vous me seruirez à ceste fois d'oyseau de riuere, pour me faire rire plus alaigrement: vous oyant rosignoler vostre ramage dans ceste bouë. Le Fraudeur acheuant ce propos, prit son Escuyer, & vn sien page par la main, puis mōstrans du doigt les deux Damoysselles chacun à leur tour, commencerent à dancer, chantans & rechantans maintesfois ceste chanson.

*Qui vid iamais éturgeons
Nouer en telle maniere.*

*Qui vid iamais telz plongeons
Sonder si bien la riuere?*

Après que ce beau danseur eut assez pris de passetemps pour ce soir, il s'en retourna

avecques ces deux seruiteurs, laissant les Damoysselles en grand ennuy qui neantmoins quelquefois ne se pouuoient garder de rire. Daraide ne sçachant à grand' peine par quel moyen se tirer de l'eau, s'auisa finalement de jeter ses armes piece à piece sur la riuere: puis se lançant dedans le fleuve, s'en vint à nage au mesme bord d'ou elle estoit partie. Et comme son cheual fust par ce moyen plus leger qu' auparauant, il se tira en sursault hors du boubier, & sortit dessus le riuage. Autant en fit le palefroy de la Damoysselle, qui tomba presque avec sa charge dans la riuere. Adonc Daraide ayant repris ses armes, monta sur son cheual, & la Damoysselle sur son palefroy: puis passerent l'eau par le gué duquel le Fraudeur les auoit destournées sans s'amuser beaucoup à le suyure pour ne perdre les Cheualiers qui emportoient la guirlande. Ainsi cheuaucherent assez long temps en grand ennuy, combien qu'elles ne se peussent tenir de rire des tours de souplesse, dont le fraudeur abusoit ordinairement les Cheualiers errans. Assez long temps apres s'en vindrent heberger en la maison d'vn villageois & la passerent le surplus de la nuit, iusques au lendemain qu'elles retournerēt sur leurs brisées.

*Des estranges rencontres qui auindrent à
Daraide, à Garaye & à dom Galtazar en
la queste de l'escrin que le magicien Ciniſide
enuoyoit à la Princesse Diane.*

CHAP. V.

DAraide estât retournee en sa queste avec la plus grād' haste qu'il luy auoit esté possible, apres auoir cheminé long temps, entra en vne forest, ou elle trouua six Cheualiers combatans, quatre contre deux: & parce que le combat ne luy sembloit raisonnable, les aborda & leur dist: Tout beau, Seigneurs Cheualiers, tout beau, & me dites la raison pourquoy vous combattez ainsi. S'estans vn peu tirez arriere les quatre luy respondirent, Si la partie vous semble mal faire, mettez vo⁹ du costé de

des deux: car nous tarderions beaucoup d'avantage à vous declarer le motif de nostre noyse, qu'à paracheuer nostre combat. Cella feray-ie bien (respondit Daraide) s'ilz ont receu quelque outrage de vous. Approchez vous doncq', dirent ilz. Desia Daraide auoit laissé son heaume, & mis la main à l'escpee pour secourir les deux, Cheualiers quād la Damoysselle qui venoit avecq' elle, laquelle auoit nom Belenie, luy dist: Pour Dieu n'aydez point à ces deux meschans Cheualiers, car ce sont ceux qui m'ont osté ma guirlande. Incōtinent que Daraide ouyt ces propos, elle fut fort ioyeuse, & leur dist: Cheualiers faites rendre la guirlande à ceste Damoysselle, ou autrement il vous sera force que vous preniez tous deux le cōbat contre moy, auant que vous l'ayez acheué cōtre les quatre. Vous ferez beaucoup plus pour vous (respondirent ilz) si vous suyuez vn Escuyer auquel nous l'auons laissée en garde, pour la donner à celuy de nous qui emportera la victoire: d'autant qu'il a gagné le hault incōtinent qu'il nous a veuz attachez ensemble en ce combat. Daraide ayāt peur de perdre la guirlande, & voyant que le longer ne luy estoit profitable, leur respondit: Je le suyuray doncq', de meilleur cueur que ie ne combatrois avecq' personne de vous. Ainsi s'en alla à grand haste apres l'Escuyer, & les quatre luy escrierent: Cheualier, gardez bien la guirlande: car vous ne l'acheterez moins que de la vie, si nous la perdons par vostre moyen. Daraide ne se soucia beaucoup de leur respondre, ains suyuit tousiours son chemin selon que sa Damoysselle Belenie la conduisoit, & les Cheualiers retournerent à leur combat cōme deuant: mais en peu d'espace les quatre ayans vaincu les deux commencerent à le suyure. Tantost apres à la sortie de la forest, elle aperceut le trac du cheual del' Escuyer vn peu à l'escart du grād chemin, & l'ayant suyuy quelque temps, entra en vne profonde vallee, sortant de laquelle de rechef entra en vne autre forest, & là aperceut trois Cheualiers qui auoient

osté le coffret à l'Escuyer, contre lequel estoit acouru vn seul Cheualier pour le defendre: car il s'estoit escrié à haute voix que lon le vouloit desrober. Le Cheualier seul qui combattoit fort courageusement contre les trois, fut soudain recognu par Daraide, laquelle receut vn grand plaisir, voyant la haute Cheualerie de sa Garaye, c'est à sçauoir de dom Arlanges d'Espagne. Mais bien tost il luy conuint perdre le passetēps de ce cōbat: car l'Escuyer voyant les Cheualiers acharnez l'vn sur l'autre, auoit repris l'escrin, qui estoit demeuré en terre, & estant remonté à cheual s'en fuyoit à bride abatuē. Daraide le suyuit, laissant Garaye en son combat, qu'elle auoit presque mis à fin, quād les quatre Cheualiers qui suyuoient Daraide & l'Escuyer arriuerent là, lesquelz fort esmerueillez de la prouesse de Garaye, cōmencerent à dire: Seigneurs Cheualiers, arrestez vous vn peu, & escoutez ce que nous vous voulons dire. Que querez vous dirent les cōbatans. Que vous nous disiez (respondirent ilz) si vous n'avez point veu passer icy vn Escuyer, lequel emporte vn coffret qui est à nous, car il nous l'a desrobé. Il s'en va là deuāt (dist Garaye) mais le coffret n'est ny à vous, ny à ceux, q pareillement luy vouloient oster. Pour maintenant (respondirēt ilz) nous voulons suyure l'Escuyer, & puis nous disputerons à qui le coffret appartient. Ainsi s'en allerent, laissant Garaye, & les trois Cheualiers en leur meslee, laquelle dura bien peu: car voulant suyure les quatre à fin qu'ilz ne s'en fuyssent apres auoir osté à l'Escuyer ce qu'ilz demandoient, elle reduit les trois en si pitieux arroy qu'ilz se rendirent, estans presque mortz pour le grand nombre de leurs playes. Garaye apres sa victoire suyuit incōtinēt les quatre Cheualiers qui s'en alloient apres Daraide, laquelle ayant presque attainct l'Escuyer, luy cria à haute voix qu'il s'arrestast; à raison dequoy l'Escuyer se voyant rallonner de si pres, laissa tomber son larrecin, puis s'en fuyt au trauers d'vne espoisse forest. Daraide n'eut soucy

de le suyure, ains attendoit la Damoyfelle laquelle encores qu'elle fust demourée assez loing derriere, arriua bien tost, & fust fort ioyeuse d'auoir retrouvée son escrin. Alors Darayde luy dist qu'elle le ramassast, sans plus demeurer si loing d'elle, à fin qu'elle ne le perdist encores vn coup. La Damoyfelle estant descendue de son palfroy, prit l'escrin & demeura quelque tēps assise à terre pour se reposer. Mais ainsi qu'elle vouloit remonter, les quatre Cheualiers arriuerent, qui luy dirent Damoyfelle c'est bien raison que vous nous donniez cest escrin, puis qu'il nous a donné tant de trauail à le chercher. Non fera (dist Darayde, elle ne le vous donnera pas. Pourquoi, dirent ilz. Parce (respondit Daraide) qu'il est sien, & que ie suis prest de la deffendre si vous voulez vser de force en vne chose tant iniuste. A ceste heure verrez vous, dirent ilz, que vous profitera vostre deffence. Et soudain mirent la main aux espees, marchans fort brauement contre Darayde, laquelle les receut de pareille grace & commencerent tous ensemble vne fort sanglante meslee. Belenie les voyant ainsi combattre furieusement, eut peur qu'à la longue Darayde ne fust pour leur resister, & partant commença à chasser son palfroy tant qu'elle peut emportant son escrin avec elle. Les Cheualiers qui combattoient contre Darayde sentans & craignās les horribles coups dont elle les marteloit sans aucun repos, luy occirent son cheual la laissant à pied dans la plaine pour suyure l'escrin. Je vous laisse à penser si Darayde fut ennuyee voyant son cheual occis sans auoir aucun moyen de suyure les Cheualiers pour secourir la Damoyfelle. Mais ce pendant qu'elle estoit en ceste angoisse, Garaye qui venoit au grand gallop, arriua en ce mesme endroit, & recognoissant Darayde à son escu, fut ioyeuse de l'auoir rencontrée, & luy dist, Je vous prie, ma seur Darayde, me dire quelle auenture vous a ainsi laissée à pied. Suyuez, respondit Darayde, quatre meschans Cheualiers qui

m'ont tué mon cheual, à fin qu'ilz n'ostent l'escrin à la Damoyfelle qui ne peut estre encores gueres loing deuant eux, car pour maintenant ie n'ay le loysir de vous en raconter d'auantage. A tant Garaye la laissa galopant par le chemin que luy auoit enseigné Daraide, qui la suyuoit tout bellement, selon que la pesanteur de ses armes, & le trauail de tout ce iour lui pouuoient permettre. Ce pendant Garaye ataignit les cheualiers au mesme instant qu'ilz auoient osté l'escrin à la Damoyfelle; & plo- roit fort piteusement sa perte. En la malheure (dist lors Garaye) auez vous esté si peu courtois, que d'outrager ainsi ceste Damoyfelle par voz volleries: Rendez, brigans, ce que vous luy auez osté. Ce sera vo^r mesme (respondirent ilz) qui en la malice encontre nous aurez fait telle demāde: Et soudain les deux premiers mirēt la main aux espees, & commencerent vn assez aspre cōbat. Mais Garaye les reduit biē tost en telle extremite, que l'un estant occis, & l'autre presque vaincu, les deux qui restoiēt delibereēt de s'en fuyr avec l'escrin: ce qu'ilz firent. Garaye les eut volōtiers suyuy, mais le Cheualier contre qui elle cōbatoit, luy blessa son cheual en la teste, & le voyant prest à tōber vint avecque si grand desdain ferir le Cheualier sur l'armer qu'elle luy pourfendit la teste iusques aux yeūx, & le renuersa royde mort par terre. Adonc elle descendit de son cheual, lequel fut aussi tost tōbé, cōme elle descendue, & ainsi qu'elle se travailloit fort à suyure à pied l'un des cheuaux des deux Cheualiers occis, Daraide suruint, laquelle voyant Garaye, & la Damoyfelle qui pleuroit, receut vne partie de leur ennuy: mesme quand elle fut auertie de l'ocasion: puis montant sur le palfroy de la Damoyfelle, fit tant qu'elle prit l'un des cheuaux eschapez, sur lequel Garaye monta & ayāt ataint encores l'autre, Darayde rendit le palfroy à la Damoyfelle, & luy dist, Suyuez nous de par Dieu, & ne faites plus ce que vous auez fait, vous en ayant auerty pour la seconde fois, car si vous ne m'

cussiez

eussiez doint habandonné, encores que lon m'eust tué mon cheual, vous n'eussiez pas perdu vostre coffret. Qui eust pensé, dist la Damoyelle, que vous seule vous fussiez peu deffendre contre quatre? Vous deuez auoir esperance, respondit Daraïde, que vostre bon droit supléroit au default de ma prouesse. Ainsi deuisans cheuaucherent à grād' haste iusques à soleil couchant, & lors aperceurent à l'oree d'une forest, les Cheualiers qui s'en estoient fuis combatās contre vn seul, lequel les auoit desia tant mal meniez que quand elles arriuerent là, les virent estenduz mors par terre. Daraïde & Garaïde fort esmerueillées de la prouesse du Cheualier seul, le recogneurent incontinent, car vous deuez sçauoir que c'estoit dom Galtazar de Barberousse, lequel estoit là venu en suyuant le chemin qu'on luy auoit assigné au milieu des cinq: par ce que chacun auoit suyui le sien; comme n'agneres vous a esté dit. La ioye qu'ilz eurent de s'estre ainsi rencontréz ne fut moindre que celle de la Damoyelle, quant elle aperceut son escria qui estoit auprès de l'un des Cheualiers morts. Elle donc toute esperduë de grand' aise, sauta de son pallefroy en bas, pour le ramasser, rendant mille merces à ces nobles Cheualiers, lesquels delibererent de s'en aller heberger pour celle nuit en vn chasteau qui estoit assez pres de là; ce qu'ilz firent deuisans par grand plaisir sur leur chemin, des traueses & variables rencontres qu'ilz auoiēt euës en ceste auanture nō sans rire de la trousse que le Fraudeur auoit ioué à Daraïde. En tel deuis arriuerēt au chasteau, ou ilz furēt fort humainemēt receuz, & bien traitez par vn ancien Cheualier qui en estoit seigneur. Le lendemain s'en retournerent le mesme chemin qu'ilz estoient venuz, à fin de ne faillir à trouuer les Damoyelles de Daraïde, si par fortune elles venoient par quelqu'un des trois chemins: ce qui aint ainsi, car dom Galtazar les recontra, & les fit fort ioyeuses des nouuelles qu'il leur dist de leur maistresse. S'estans donc retrouuez ensemble au carrefour au-

quel ilz s'estoient separez, les freres de dō Galtazar arriuerent pareillement au iour qui auoit esté dit entr'eux. Puis d'un commun acord, & en grand plaisir de toute la compaignie commencerent à tenir le chemin de l'Isle de Guindaye. Le iour ensuyuant rencontrerent vne Damoyelle mōtee sur vn pallefroy, à laquelle Daraïde demāda si elle venoit de la cour de la Royne Sidonie. Ouy (respondit elle) mais pourquoy me le demandez vous? Par ce (dist Daraïde) que ie serois fort ayse de sçauoir ce qui s'y est fait de nouveau ces iours passez, & me feriez grand plaisir de me le reciter, si vous en sçauiez quelque chose. Je vous le diray tresvolontiers (dist la Damoyelle) car ie pense que par ce moyen ie ne vous donneray moins de recreation, que de merueilles, en vous recitant choses fort dignes d'estre sceuës. Entēdez donc, seigneurs Cheualiers, qu'entre les autres infinies & estranges auantures qui arriuent ordinairement en la cour de la Roine, ces iours passez y en est auenuë vne memorable sur toutes: Qui est que le Roy & la Royne de Corit, tous deux geans ont laissé vne seule fille presque géante, laquelle leur a succedé au Royaume, & est tellement acomplie en toutes les perfectiōs qui sont requises à vne souveraine beauté, qu'au reste de la grand' Asie il n'y a Princeesse ny Damoyelle qui se puisse égaler à ceste Royne que ie vous dy laquelle on nomme Briangie. Or pour le renom de son excellente beauté & bonne grace, vn géant nommé Bruzart Roy de Cores s'est enamouré d'elle, & combien qu'il soit de visage laid, on le dit neantmoins estre tant preux, & tant hardi, qu'en tous les pais de leuant lon n'a encores ouy parler d'un géant si braue, ny tant horrible. Luy enamouré de ceste belle Royne, la fit demander à femme: mais elle n'en tint compte, à cause de sa laidure, combiē qu'il fust grand seigneur, & sien voyfin: & ne voulut aucunement accepter le mariage, ains le dedaigna par maintes risees, es responses qu'elle luy enuoyoit par ses ambas-

sadeurs. Le Roy de Cores enflammé de colere, & tournant sa premiere amytié en cruelle felonnie, delibera d'auoir par sa force, ce que sa difformité & mauuaise grace luy refusoit: & de fait passa avec grâde puissance dans les tetres de la Roïne, & en peu de temps la reduit en telle extremité, qu'elle luy fist presenter ces conditions du futur mariage: Cest à sçauoir qu'il la meneroit en la cité de Guindaye, ou abordent plus de Cheualiers errans qu'en autre part du monde, & là l'espace de six mois maintiendrait qu'aucune beauté n'estoit égale à celle de la roïne de Briangie. Et si dās ces six mois il se trouuoit Cheualier qui le vainquist, elle demoureroit quite du mariage qu'il demandoit: ou le contraire auenant, qu'il l'auroit à femme & espouse, pour le guerdon de sa victoire. Et dit on que la Roïne Briangie luy auoit acordé telles condtions, comme estant bien asseuree qu'elle n'auroit faute de bons Cheualiers pour l'acquiter de cest iniuste mariage. Les choses ainsi acordees entr'eux, vindrent en la cité de Guindaye, ou ilz furent receuz en grande magnificence. Or deuez vous sçauoir que la Roïne Briangie n'est veüe d'hōme du mōde, par ce (cōme lon lit) qu'elle est si belle qu'il ne se pourroit trouuer aucun Cheualier qui l'ayant veüe voulust combattre contre la raison, & contre la force du Roy de Cores. Au moyen dequoy la Roïne Sidonie la fit loger incontinent qu'elle fut arriuee avec la Princesse Diane, qui se resiouyt fort de sa compagnie, d'autant qu'en beauté, bōne grace, & autres excellēces, elle luy represente presque entierement sa Daraide, dōt elle est en fort grand ennuy, pour auoir esté lōg tēps sans ouir de ses nouuelles. Encores dit-on que la Roïne Briangie est tresdolente pour ne sçauoir ou elle peust enuoyer chercher Daraide, car attendu la grandeur de sa renommee, il luy semble qu'elle pourroit abatre l'outrecuidance du Roi de Cores, & luy monstrier que Diane est plus belle que celle pour qui il a entrepris tant de combatz. Or ces iours passez, quand ilz arriue-

rent le Roy fit dresser ses tentes au pres du lieu ou Rosaran & la duchesse de Bauieres sont enchâtez, & tout deuāt est enleuee vne statuē d'or representant la Roïne au naturel: & autour de la base, & piedestal, sur lesquelles la statuē est enleuee, sont peintes toutes les sortes d'armes qu'il est possible de penser, d'autant qu'avecques toutes le Roy est deliberé de maintenir la beauté de la roïne à fin que celui qui voudra combatre, preigne telle façō d'armes que bon lui semblera choisir. Mais sachez q̄ iusques auicour d'huy ne s'est encores trouué Cheualier q̄ ayt osé entrer au combat avecque luy. Or vous ay-ie dit tout ce que i'en sçauois maintenant il vous plaira me laisser passer mon chemin. Les dieux vous conduient (respondit Daraide) car veritablement vous nous avez conté merueilles, & m'avez beaucoup acreu le desir que i'auois de bien tost arriuer en la cité, à fin que personne ne me puille deuancer en vne si belle auanture. A tant la Damoysselle se departit d'eux, les laissant assez esbahis de ces nouuelles. Mais Daraide estant fort conuoiteuse d'oster la Roïne Briangie du soucy de son mariage, & par mesme moyen de chastier la folie du Roy de Cores pour l'injure qu'il faisoit à Diane, apres auoir quelque temps esté toute pensue, ne se peut tenir de dire à ses cōpagnōs que pour asseurer la Roïne de la cōfiance quelle auoit eue en sa renommee, elle auoit deliberé de combattre le Roy auant que la princesse Diane fust auertie de son retour. Garaye eust esté fort contentee que ceste entreprise luy fust demouree, pour en acquerir l'honneur à la roïne Cleofile sa dame, Dō Galtazar aussi se resētāt tousiours des plaies dont la beauté de Daraide l'auoit nauré, commença à luy dire, ma dame Daraide ie serois fort ioyeux qu'il vous pleust vous decharger sur moy de ce ttauail, car ie pourrois par vne seule victoire porter tesmoignage de vostre beauté, & de vostre force: de vostre beauté en faisant cōfesser au Roy que vous estes plus belle q̄ la roïne Briangie, & de vostre force

en vainquant ce braue Geant de Cores, lequel auroit esté surmonté par ce dom Gal tazar iadis doublement vaincu de vous, par vostre prouësse, & par l'excellence de vostre beauré & bonne grace. Daraide lui respondit, mon bon Seigneur, moy estant vaincuë par vostre courtoisie, vous receurez de ma victoire les mesmes louanges que vous me proposez par la vostre: & partant il sera tresraisonnable que vous me laissiez cest honneur, au moins s'il plaist aux Dieux me l'ottroyer en m'employant au seruice de ma Dame Diane. Par tels gracieux propos ils soulageoyent la fascherie du chemin & continuants leurs deuils delibererent se deguïser en entrant dans la cité de Guindaye, tellement que les Cheualiers ne peussent estre recogneuz, ni les Damoiselles qui les suiuyent.

De la triste vie que la Princesse Diane menoit pour l'absence de Daraide: & comme le Roy de Cores, & la belle Roynne de Corit arriuerent en la cité de Guindaye.

CHAP. VI.

LA Princesse Diane estoit en grand' ennui voyant le long temps que Daraide demeueroit à retourner vers elle: car l'amour qu'elle lui portoit, lui faisoit proposer mille dâgers, qui lui pouuoïent auoir empesché son retour: à raison de quoi elle n'eust sceu penser en aucun des perils lesquels ont accoustumé d'auenir, ou sur la mer, ou sur la terre, qui ne lui fist changer la couleur, & qui ne lui régeast sa crainte. Ces soucis l'auoyent aucunement amaigrie & affoblie, passant tout le iour en travail & la nuit sans dormir que bien peu de temps, pendant lequel souuentefois il lui sembloit voir son loyal ami, & lors en tresfaillant de ioye elle se reueilloit en sursaut toute estonnée, & disoit. Làs! Agefilan vous vous deuiez contenter du nô de Daraide, & de l'amitié qu'une damoiselle porte à l'autre, sans acroïstre ainsi mes passîos

amoureuses par le changement de vostre nom, à fin qu'en vostre absence ie souffrie la crainte de cent dâgers, esquels parauanture vous n'estes point. Mais que di-je? car si vous m'aymez d'un pareil amour comme ie vous aime, vous endurerez pour moi le mesme trauail, que maintenant i'endure pour vous. Làs mon cher ami ie pense qu'amour veult que ie paye par l'ennui lequel ie reçoÿ de vostre absence, la douleur que maintenant vous deuez endurer pour estre tant éloigné de moy: Or pleust aux Dieux que ie peusse tenir mon cueur en ma main, à fin que ie peusse ausi bien contépler des yeux du corps, mon Agefilan qui y est si viuement empraint, comme ie l'ay de iour & de nuit represente deuant les yeux de ma pensee. Helàs! Amour, pourquoy as tu voulu que ma souffrance surpassat celle de celui qui m'aime, en me contraignant à tenir secret, ce que tu lui permets manifester: car en me donnant pareil auantage ie suis asseuree que la publication de mes douleurs, me pourroit preparer quelque repos en lieu que les tenans cachees, de iour en iour ie le sens acroïstre, en la façon que le feu estroitement reserré dans la fornaisie redouble continuellement ses forces. O fontaines de mes larmes, secourez ma vie en ce dâger des flâmes alumees esquelles voyez consumer, & ardre mon cueur: & vous, tristes souspirs, fidelles tesmoings de mes doléances, donnez quelque peu d'air à mô embrasée poitrine, à fin que ie ne meure, & qu'en mourant ie ne face pareillemēt mourir celui, pour lequel seul ie m'efforce à me maintenir en vie. Làs! Daraide, vous m'avez ostee de celle trôperie, par laquelle vous iouissiez de mon amour sans me decourir voz pensees, à fin de plus tourmenter les miennes par la cruelle flamme, laquelle decelee ne vous à peu dōner moins d'allegeance, qu'elle me donne maintenant deconfort en m'essayant de la vouloir tenir couuerte. Helàs Agefilā, cōme vous tiédrez voz peines pour bien recōpensees, s'il m'estoit promis de vous faire scauoir auāt que mourir.

mourir, q̃ la crainte de perdre la vie n'a peu tant gaigner sur moi, que ie voulusse vous reciter l'extreme passion laquelle i'endure pour vostre amour. Consolez vous, mon Seigneur & ami, par la consolation que ie reçois en vous oyant seulement nommer, encores que ie tiene ceste ioye secreete à part moy. Làs! Duchesse Lardenie, pourquoy auez vous descouvert ce que Daraïde vous auoit commandé celer? O que la reuerence, & l'esgard quelle a eu à mon honnesteté, ont bien surpassé vostre obeïssance, puis qu'avec ses cruels martires elle ne m'a osé descouvrir, ce que sans aucune peine qui vous y meut, vous m'avez osé manifester! O combien ie deurois haïr le plaisir par lequel vous auez tant rendu Agesilan vostre redeuable, & moy tât trauaillée de douleur! O combien Daraïde vous est obligée, moy à elle, & bien peu à vous! O la griesue tristesse! car ie me veux taire, mais en ce faisant, ie paye par mō silence, ce que ie doy à ma douleur, puis que ie l'endure sans en esperer autre guerdō: & l'endureray à l'auenir, avecques la raison que i'ay de l'endurer, en rechassant toutesfois tous les moyens par lesquels ie pourrois paruenir au repos, que les autres amantes desirēt & attendent de leurs amours. Telles & plusieurs autres parolles disoit Diane à part elle, passant tout le surplus du temps en la cōpagnie de la Duchesse Lardenie: & souuent mōroit avec elle au haut de la tour de Diane, & de là estendant sa veuë sur la marine, soupiroit profondement & disoit. Helàs! Lardenie, quel soulas peut recevoir mon ame en iettant la veuë par ses larges mers, puis que mon cuer est renfermé en vne si estroite prison. Disant ces parolles les grosses larmes lui couloyēt des yeux sur ses vermeilles ioues, & accroïssāt de beaucoup son excellente beauté par ceste clere roussee de fines perles, disoit. Làs! pourquoi estce que les Dieux m'ont fait naistre d'une si grande Princeesse, & d'un si grand Prince pour me voir en vne si lōgue prison, & en captivité tāt miserable, qu'il n'y a personne qui

me puisse oster de ceste seruitude, ni me rendre en ma naturelle liberté, sinō en l'achetant au pris de la tēte de mon pere: chose qui me seroit vn trop plus grand malheur sans cōparaison, qu'autre qui me pourroit auenir. La Duchesse sachant bien que sa douleur lui procedoit d'une autre playe, & ne pouuant plus souffrir tel deguïsemēt de parolles, lui dist vne fois entre les autres: Je vous supplie, ma Dame, ne dissimuler point ainsi les matieres, mais plustost prendre bon courage pour vous donner quelque repos, & à moy quelque contentemēt, attendu que vous ferez vostre deuoir si en me declarant le secret de vostre cuer, vous recompensez les seruites que ie vous ay faictes iusques ici: pour guerdon desquelz ie ne demande rien plus sinon vostre bonne grace. Helàs Lardenie (disoit Diane) pourquoy dites vous celà? Le le dy (respondit la Duchesse) pour le tort que par ce moyen vous faites, & à vous, & à moy: à vous, en accroïssant la douleur que vous pouuez facilement alleguer, & à moy, pour la defiance que vous auez que ie ne descouvre voz secrets, en me dissimulant souz autres excuses le ferme amour q̃ vous deuez à la prouesse, à la beauté d'Agesilan. Je vous supplie donc, ma Dame, ne me donner point l'ennui de vous voir deffier de ma fidelité, veu que ce dont ie vous suis redeuable, vous en peut donner bonne assurance. La Princeesse ne pouuant plus souffrir ses angosties, sans leur donner quelque repos en les communiquant, comme il auient à ceux qui aimēt de vraie amour, entrelasāt ses belles mains autour du col de la Duchesse, lui dist, Ah! Lardenie, il apert bien que vous fustes l'occasion de mon mal, puis que ses effectz ne vous ont peu cacher ce que ie voulois tenir le plus secret. Je vo' prie à tout le moins auoir quelque pitié de ma douleur, non tāt pour ce q̃ ie souffre cōme par ce q̃ mō honneur me fait fuir tous les remedes, lesquels ie pourrois apareiller à ma souffrance. Que pleut aux dieux, m'amie Lardenie, qu'en ce douloureux mal ou ie suis, ils me fissent auoir

ma guerison en horreur, sans iamais me recompenser de ce dont ie pourrois desirer estre recompensee, pour le guerdon de l'amour que ie doy, & porte à la vertu & beauté d'Agefilan. Lardenie aiant grande compassion de la Princesse, luy respondit, Ma dame, prenez courage, & ayez confiance aux dieux qu'ilz vous enseigneront par quel moyen vous pourrez donner repos à voz peines, & à celles d'Agefilan, avec l'honneur de vous deux, en vous otroyant les plaisirs que voz hautes pensees meritēt veu que vous pouuez estre mariez ensemblement. Il sera pour le meilleur (respōdit Diane) que ie croie ce que vous dites, car telles esperances pourront donner quelque confort à mes douleurs: mais cōment se pourra il faire, attendu que vous sçavez ce que ma dame ma mere à iuré, & promis, & fait publier par tout le mōde: Le temps (dist la Duchesse) aura le soucy de remedier par ses diuers changemens à tout ce que vous dites: & l'inconstance de la fortune pourra faire venir à bōne fin, les choses qui sont en sa disposition. Et bien (dist Diane) quand toutes autres choses nous deffaudroient, au moins ce pendant ie me consolerais en ce que ie me sens estre aymee, & honoree par vn si noble Cheualier, auquel ie payeray la bōne volonté qu'il me porte, par celle que ie luy porteray toute ma vie: vous assurant que la recreation laquelle ie reçois par ce moyen, me pourroit parauanture, contenter, si elle n'estoit moderee par la grand' peine que ie souffre pour son absence, & par la crainte des perilz qui se representēt iour & nuyt deuant mes yeux, pour luy empescher son retour. Ma dame (dist lors la duchesse) vous faites vostre deuoir d'aimer celuy qui tāt vous aime: & au surplus la prouesse d'Agefilan, acōpagnée du bon heur qui le suyt pour estre vostre, vous doit assuer de toute la crainte que vous pourriez auoir de luy, car i'ay bonne esperance qu'il retournera bien tost vers vous. Ainsi puisse-il auenir (respondit Diane) car la veue de ma Daraide donnera quelque repos à ma tristesse.

Mais ie vous coniure par la foy laquelle vous deuez aux dieux & à moy, que vous n'ayez à luy declarer quand elle sera venue le moindre de ces secretz, & ne luy donner aucun moyen de sçauoir par vous, ce qu'elle ne sçaura par moi autrement, ains lui direz que ie l'aime cōme Daraide: car ie vous iure, & promes sur la foi de celle que ie suis que si tost qu'elle sçaura que ie suis auertie de son sexe, & de son estre, ie ne la laisseray iamais demeurer vne seule heure en ma compagnie, encores que ie sache bien que par ma mort, ie deusse paier la force laquelle ie me ferois à moy mesmes, à fin q mon honneur ne demeurast aucunemēt maculé. Je le promets ainsi, ma Dame, dist Lardenie Entelz propos elles passoiet grād' partie du iour, & de la nuit, Diane receuāt grāde allegiance de son mal, en le cōmuniquant à la Duchesse: mais bien tost Dieu la secourut en ceste absence de son amy, par la venue de la Roine de Corit, laquelle (comme la Damoyelle a recité cy dessus) fut tresbien receuē par la Roine Sidonie, vers laquelle elle estoit venue, ayant le visage, couuert d'vn voile, & aucunement deguisee, à fin qu'elle ne fust veuē de personne, & qu'on ne la peust recognoistre. A sa requeste la roine la fit loger avecq' sa fille Diane, ou elle la cōduit elle mesme. Briangie donc habillee d'vne robe de drap d'or frisé, entra en la chambre de la Princesse avecq' celle grandeur de corps, & mesme disposition de corsage q Daraide: puis ostāt le voile dont elle estoit couuerte, mōstra ses beaux cheveux tressez & annez fort mignonemēt, avec vne belle guirlāde de fine pierrerie sur son chef: & en to^s les habitz, beauté, contenāce, & bonne grace, ressembloit tant à Daraide, qu'on l'eust pensē auoir esté painte sur elle, & retiree au naturel. A raison dequoy Diane l'ayant assez long temps regardee, pensa que la Roine sa mere luy auoit dit pour la tromper que c'estoit la Roine de Corit, & en ceste opinion souriant d'une fort bonne grace la courut embrasser, & luy dist, O ma chere Daraide, est il possible que vous

vous puissiez deguïser enuers celle, qui vo^{us} a si bien representee, & empreinte au vif dans son cueur. La Royne Briangie voyât les caresses que luy faisoit Diane, l'embrassa pareillement, & luy dist, Ma Dame, ie ne pers rien en ce que ie ressemble en beauté, à celle laquelle (apres vo^{us}) on dist estre nee sans pareille, & dont la prouesse, plus que la beauté m'a fait venir en vostre cour. Diane pensant tousiours qu'on la voulust deceuoir, luy respondit, Vous ay-ie pas dist, Daraïde, que la bonne souuenance que i'ay de vous, ne vous permet vser enuers moy de tromperie, ny à moy de vous mesconnoistre? La Royne Sidonie rioit de fort bon courage voyât sa fille qui pensoit qu'elle l'eust voulu abuser, & luy dist, Ma fille, receuez ceste grâde Royne avec l'honneur qu'elle merite, & ne vous trompez plus ainsi car ce n'est pas vostre Daraïde. Vous serez bien ioyeuse, dist Diane, si souz ces paroles vous me pouuez auoir trompee. La Royne riant encores plus fort, luy dist, Ma fille, ie vous iure ma foy, & par noz Dieux, que ce n'est pas Daraïde. Diane oyant iurer la Royne, recogneut son erreur, luy montant vne petite rougeur au visage, qui de beaucoup acreut la naïfueté de sa couleur, puis elle dist à la Royne Briâgie, Ma dame, pardonnez moy si l'amytie que ie porte à Daraïde m'a engardé, par ses beautez que i'ay recogneuës en vous, de faire à vostre grandeur, la reuerence qui vous est deuë pour estre celle que vous estes. A ces motz la Princesse s'enclina iusques en terre deuant elle, & la Royne fit le semblable, luy disant d'une fort bonne grace, Ma dame, tant s'en faut que i'aye rië perdu en ce que vous m'avez prise pour vne si excellente personne, que plustost i'estime y auoir beaucoup gaigné en m'embrassant du mesme amour que vous eussiez embrassé vostre Daraïde: qui m'est vne faueur laquelle ie ne veux perdre, ains la garderay à mon pouoir en recompense des seruices que i'ay esperance de vous faire. En ces entrefaites la Royne Sidonie les prit toutes deux par la main, &

les mena vers vn petit lit, sur lequel elle s'assit avec elle. Diane ne pouoit oster l'œil de dessus la Royne Briangie, & encores moins la Royne de dessus elle, pour le grand plaisir qu'elle prenoit à contempler vne tant singuliere beauté: dequoy Diane s'aperceuât commença à se soupçonner de rechef que c'estoit Daraïde, & dist à sa mere Helas, ma dame, ie vous supplie par la foy q^{ue} vous deuez aux dieux, me dire si vous me voulez tousiours tromper, car veritablement ie le pense ainsi. La Royne souzriant & faisant signe de l'œil à la Roïne Briâgie, luy respondit, Sachez, ma fille, que c'est Daraïde qui est avecq^{ue} nous, mais nous auons voulu faindre que c'estoit la Royne de Corrit pour vous abuser, & pour voir si vous la mesconnoistriez. Quand Diane entédit ces paroles, elle fut tant esperduë de ioye, que soudainemēt elle acola & baïsa la Roïne en la face, & luy dist, O m'amyë Daraïde cōme auez vous peu estre si lôg tēps sans me voir? & maintenant que vous me voyez, comment pouuez-vous tant dissimuler vostre ioye? vrayement il est facile à cognoistre que le long temps que vous auez esté absente de moy, a bien amoindry le grand amour lequel vous me portiez par cy deuant. La Royne Briangie rioit si fort qu'il luy estoit impossible de respōdre. Mais Lardenie, la Marquise & toutes les autres Damoselles qui estoïēt au mesme erreur que Diane, commencerent incontinent à l'enuirōner, & toutes ioyeuses disoiēt à la Princesse: Aumoins, ma dame, laissez la nous à nostre rang, car nous la voulons embrasser aussi bien cōme vous. Alors Diane la laissa, & voyant qu'elle rioit si fort, dist à la cōpagnie, Mais voyez de quelle grace Daraïde se vult railler de moy cōme si ie ne l'eusse point cogneuë. Ce pendât la Duchesse embrassoit la Roïne, & luy disoit: O dieux, ma dame Daraïde, cōbien i'auois grand' enuie de vous voir! Apres elle la marquise la vint embrasser, puis toutes les damoiselles à leur tour. Mais les deux Roynes rioyēt si demesuremēt qu'il leur estoit impossible de dire

vne seule parole. Alors Diane dist : Je suis fort contente ma chere Daraïde, que vous ayez changé en si grand ioye, la tristesse en laquelle i'auois acoustumé de vous voir: Mais la Royne lassée de rire, lui respondit: Ma Dame ie ne vous veux plus celer la verité maintenāt que i'ay assez eu la iouissance du plaisir d'estre prise pour Daraïde, car vous deuez sçauoir pour certain que ie suis Briangie Royne de Corit, & vous assure que la renommee de vostre Daraïde m'a fait venir en ce pais, sachant qu'en deffendant vostre beauté, elle me deffendrait encore du Roy de Cores, afin que ie l'esporte outre mon gré. Puis la Royne poursuivit au long toute l'occasion de sa venue, dont Diane, & ses Damoyelles ne furent moins esbahies, que vergongneuses de ce qu'elles auoyent fait avec la Royne, laquelle demeura en la compagnie de la Princeesse: car elle lui portoit vn si grand amour par ce qu'elle ressembloit à sa Daraïde, que la presence de l'vne lui donnoit quelque consolation en l'absence de l'autre: tellement qu'elles estoyent tousiours ensemble de nuit, & de iour, & couchoyent en vne mesme lit. Or auoit la Roine Briangie delibéré si le Roi de Cores ne trouuoit Cheualier qui le peut vaincre, de demeurer tousiours avec Diane: aimant mieux faucher sa promesse, & perdre son royanme, que d'entrer en vn mariage qui tant lui venoit à contrecueur. Ce pēdant vingt iours se passerent en la mesme façon que la damoiselle auoit recité à Daraïde & à Garaie, sans que le Roy de Cores eust trouué personne qui osast entreprendre le combat contre lui. Mais Lardenie & la Roine demenoient entre elles diuerses gaudisseries sur la cautelle qu'elle leur auoit iouee. La Roine disoit que la Princeesse Diane en estoit cause & quant à elle que son intention n'auoit point esté de venir en la cour de Guindaye pour vser de telles tromperies. Diane lui respondoit qu'il n'y auoit chose qu'elle desirast tant comme la venue de Daraïde, afin que lon peust mieux iuger, quand elles se-

royēt l'vne aupres de l'autre, de cōbiē elles se ressembloyent, disant qu'elle les feroit toutes deux voir en vn mirouer, pour leur faire cognoistre la iuste occasion qu'elle auoit eue d'estre ainsi abusée. Les nobles Dames passerent plusieurs iours en tels gracieux deuis sās auoir autre recreation pour lors iusques à ce qu'vn matin à soleil leuant, vne damoiselle de la Royne Sidonie entra en leur chambre, laquelle adressant sa parole à la Princeesse & à la Roine Briangie, commença à leur dire: Mes Dames, la Royne Sidonie vous mande qu'vne compagnie de cheualiers est arriuee à ce matin dont l'vn a d'effié le Roy de Cores, qui s'ar-me pour le receuoir. Et partant s'il vous plaist voir le combat, vous viendrez sur le mur, duquel vous le pourrez voir à vostre aise, sans estre veuēs de personne. Les Dames fort resiouies de ces nouuelles, & mesmement la roine de Corit, & toutes bien deliberees de voir ce qui en auiedroit se leuerēt incōtinēt, & s'en allerēt à l'endroit du mur que la damoiselle leur auoit enseigné, duquel elles virent les cheualiers pres de la statuē de la roine Briangie. Car vous deuez sçauoir que Daraïde, & ses compagnons estoyent la venuz, deguisez comme nous vous auons dit par ci deuant, afin que personne n'eust occasion de les detourner du cōbat. Or quand ilz furent en la grand place, Daraïde eut volontiers choisi l'espee seule pour toutes armes, si elle n'eust eu crainte d'estre cogneuē, mesmement pour l'autorité qu'elle deuoit tenir combatant cōme damoiselle. Au moyen dequoy, elle toucha dans le piēdestal de la statuē, les armes acoustumees entre les Cheualiers errans. Le Roy de Cores, lequel estoit lors desarmé, voyant qu'elle le diffioit au combat, commença à prendre ses armes dans vne riche tente qui estoit tout aupres de là: & ce pendāt Daraïde & ses cōpagnōs s'amusoient à regarder la statuē de la roine de Corit superbemēt enleuee sur le piēdestal, ou toutes les façōs d'armes estoyent peintes. Garaye lors s'aperceuant de combien ceste ymage ressem-

ressembloit à Daraïde, lui dist: Je croy que vous voulez combattre contre vostre propre beauté. Vous dictes vray (respondit Daraïde) & laisserois volontiers le combat pour ceste raison, si ie n'auois la beauté de ma Dame en trop plus grande recommandation que la mienne. Alos la Roine Sidonie avec ses Damoiselles s'estoit desia mise aux fenestres: & la Royne Briangie, & Diane en lieu d'ou elles pouuoient voir le combat sans estre veuës. La Princesse voyant le Cheualier assaillant de si belle taille, & tant bien proportionné de tous les membres, dist à sa compagnie: Si ie ne craignois que lon se gaudist encores vne fois de moy, ie dirois que ce Cheualier ne resseble moins en sa braue cōtenance, & belle disposition, à ma Daraïde, que la Roine Briangie en la souveraine beauté de visage. Ma Dame (respondit la Royne) ie gaignerois bien autāt si ce Cheualier ressembloit à Daraïde en prouësse, comme ie fais pour la ressembler en beauté. I'en serois ioyeuse (dist la Princesse) moyennant que ce ne fut ma Daraïde, laquelle ie ne voudrois voir en tel peril car ie serois autant en hazard de perdre, cōme vous seriez de gaigner. Tandis qu'elles tenoyent entre elles ces propos, le Roy de Cores sortit de sa tente, armé de fortes & reluisantes armes, puis mōta sur vn puissant coursier, donnāt beaucoup de frayeur à vn chacun, tant pour sa grandeur demesuree, que pour la felonnie qui lui apparoissoit dans le visage. Adonc prenant son escu, qui estoit grand & de fin acier bien trempé avecques vne grosse lance ayant le fer fort long & bien esmoulu, s'en alla au pas de son cheual vers Daraïde, & elle pareillement vers lui: car il n'auoyent point encores parlé ensemble. Le Duc d'Alfarze monta lors sur son eschaffaut,

d'autant que la Royne
Briangie l'auoir
nommé Iuge
du cāp.

Du cruel combat qu'eut Daraïde contre le Roy de Cores & comme apres sa victoire elle se donna à cognoistre à la Royne Sidonie, qui la mena en grand' ioye vers la Princesse Diane.

CHAP. VII.

QVand ces deux vaillans champions forent assez pres l'vn de l'autre: Daraïde commença à parler à son ennemi en ceste façon: Roy de Cores il te fault confesser que la beauté de toutes les Dames & damoiselles du monde, ne peust receuoir aucune comparaison avecq celle de ma dame Diane, ou bien il te sera force venir au combat avecques moy. Je ne tiens pas grand conte de ces menaces (dist le Roy) car ie n'ay accoustumé de me desdire si facilement, & te maintiens que la beauté de la Royne Briangie n'a point sa pareille en toute la terre. Tu le verras maintenant, dist Daraïde. Incontinent ilz se reculerent arriere, & le Soleil leur ayant esté departi, vindrent l'vn contre l'autre les lances baissées & bien couuerts de leurs escuz, & par ce que leurs cheuanx estoient autant prompts a la course qu'il seroit possible de penser, ils s'entrerencontrerent presque aussi tost qu'ils eurent donné les premiers coups d'esperons. Les lances volerent en esclats, & leurs escuz furent tellement faucez, que celui du Roy demeura coustu avec son bras, & celui de Daraïde percé au trauers, de sorte qu'elle sentoit le fer de la lance de son ennemi dans la chair viue. Mais les cheuaux s'estoyent entrehurtez de telle roideur front contre frōt, que se reculans trois grands pas en arriere, ilz tōberent tous deux morts en terre, laissant leurs maistres renuersez souz eux. Daraïde se depestra soudainement de dessouz le sien, & arracha le tronçon de la lance, qui lui passoit au trauers de l'escu, & du harnois, iusques dans la chair, puis metrant la main à l'espee vint à l'encontre du Roy, avec telle vîtesse qu'elle ne lui donna le loisir de decoudre son bras d'aucq son escu, qu'il

qu'il auoit enferrez ensemble. A raison de-
quoy voyant Daraide tant pres, mit aussi
la main à l'espee, & commencerent en-
tre eux vne des plus belles escrimes qu'il
estoit possible de voir entre deux Cheua-
liers. Or estoit le Roy fort trauaillé, & em-
pesché pour le trôçon qui luy estoit demeu-
ré dans le bras, tellement qu'il ne pouuoit
pas se couvrir de son escu comme il vou-
loit: parquoy Daraide le frapoit souuent au
descouuert, & d'autant que son espee estoit
l'une des meilleures du monde, luy tail-
loit souuēt les armes & la chair ensemble,
mēt, de sorte qu'en peu d'heure elle le cou-
urit tout de son propre sang, qui sortoit en
grande abondance à trauers les decoupures
de son harnois. Daraide estoit aussi aucu-
nement blessée, mais s'estoit bien peu, à cause
de la dextérité & alaigresse dont elle scauoir
tresbien rabatre, ou laisser passer les forts
coups de son ennemy. Ainsi dura le combat
assez long temps, sans cognoistre qui auoit
l'auantage, sinon que Daraide marteloit le
Roy si souuent, & tant menu, qu'on l'eust
dit estre tout en flammes pour les estin-
celles qu'elle faisoit incessamment sortir
de son harnois, qui estoit de fin acier.
Mais le Roy, comme l'un des plus accomplis
Cheualiers de toute l'Asie, se maintint vne
grand' heure sans s'estonner, & sans mon-
trer aucun signe de foyblesse, combien
qu'auēques le sang qu'il perdoit, ie ne sca-
che autre que luy qui eust peu si loguement
resister aux puissans coups de Daraide. La
Royne de Corit voyant le Roy en si piteux
estat, & tant mal mené par son ennemy,
lequel donnoit à tous les regardans vn
grand esbahissement de sa prouesse dist à
Diane: Regardez, ma dame, le tesmoignage
de vostre beauté, & auēques combien de
sang la raison de vostre bon droit, & la ius-
tice de mon desir se descourent. Ma dame
(respondit Diane) la iustice de vostre beau-
té, qui ne doit point estre assemblée par
mariage à vne creature si difforme, se mō-
stre plus en ce combat qu'aucune autre
chose q̄ vous pourriez dire: car ie cognois

assez de cōbien voz perfections surpassent
les miennes, & combien ma beauté est pe-
tite, si lon la cōpare à la vostre. Làs ma da-
me (respondit la Royne) ie vous supplie ne
faindre iamais vne chose dōt nous cognois-
sons si facilement la verité, tant par le seul
regard de voz diuines excellences, com-
me par le tesmoignage que nous en donne
le present cōbat. Laissons ces propos pour
cette heure (dist la Princesse) & voyons
quelle fin prēdra ceste querelle, car ce Che-
ualier estrange ne me represente moins
Daraide en prouesse, que vous me la repre-
sentez en beauté. A lors trop plus ententi-
uement qu'au parauant elles se mirent à re-
garder le combat, lequel sembloit ne faire
encores que commencer. Mais enuiron v-
ne heure & demye apres, le Roy affoibly
de ses playes, & fort empesché par le tron-
çon de lance qui luy trauersoit l'escu & le
bras, afin d'auoir quelque moyen de l'atra-
cher du lieu ou il luy faisoit tant de dou-
leur, & si grand ennuy, se tira vn peu arrie-
re, & dist au Cheualier assaillant qu'ilz re-
prirent quelque peu leur alaine. Comment
(dist lors Daraide) qu'est-ce que vous vou-
lez faire, Roy de Cores? sentez vous si peu
les playes lesquelles vostre Dame vous a
faites en l'ame, q̄ vous vueillez donner re-
pos à celles du corps, qui doiuent estre de
beaucoup moindres? Considérez que les
excellences de ma dame Diane, lesquelles
i'ay viuement empraintes en mon cuer,
ne me permettent aucunement, de reposer,
ny à vous delayer le combat qu'auēz entre-
pris contre le bon droit de sa souueraine
beauté. Par tant si vous voulez gagner
quelque repos, il vous fault quitter la vi-
ctoire, car autrement vous ne le pouuez ac-
querir que par la mort d'un de nous deux.
Le Roy fort colere de ces propos luy res-
pondit: Faites vous donc si peu de conte,
Cheualier, de la beauté de ma dame, & de
ma prouesse, que vous pensiez q̄ ie ne vous
face plus d'honneur en vous présentant le
repos, que ie n'en scaurois receuoir de pro-
fit? Or gardez vous, car maintenant ie vous

donneray à cognoistre si i'ay rié voulu prendre pour moy, qui ne fust trop plus nécessaire pour vous. En disant ces motz, il vint furieusement fraper sur la teste de Daraïde, laquelle estant bien auisee & fort à dextre aux armes, comme celle qui n'auoit sa pareille, haüça s^{on} escu pour recevoir le coup, & par le dessouz se couurit encore de son espee tenant la pointe droite en l'air, sur laquelle la maille d^{oit} l'essailé du Roy estoit armee, se perça de la mesme force dont il ruoit le coup, en façon que la pointe de l'espee de Daraïde luy passa au trauers du bras, avec vne si gr^{ande} douleur qu'il fut cōtraint d'abandonner la sienne dans l'escu de son ennemy, qu'il auoit presque fendu par la moytié. Daraïde retirant son espee acreur de beaucoup la playe qu'elle auoit fait au Roy: & le voyant tellement nauré dans les deux bras qu'il luy estoit impossible de plus se deffendre, elle se tira vn peu arriere, & luy dist: Roy de Cores, vous voyez comme la beauté de Diane, plustost que ma prouesse, vous a rendu en tel estat que chacun vous peut tenir pour vaincu. Otroyez moy donc la cōdition de nostre combat, si vous n'aymez mieux que vostre teste m'otroye ce que le hault courage d'un si bon Cheualier cōme vous estes, ne me voudroit otroyer. Le Roy se trouua en telle extrémité, & en si mortelle angoisse, q^{u'} sans plus estimer rien sa vie, il luy respondit en ceste sorte, Cheualier, ie suis content de payer par la perte de ma vie, ce que vous avez acquis sur moy par vostre prouesse, ayāt esté si mal auisé de mettre entre les mains de la fortune, & au hazard du combat, ce qui dependoit de ma seule volonté: Mais puis que la vraye vaillance consiste en la force de l'ame, vous ne me pouuez rien faire autre chose sinon me contraindre à payer par la mort du corps, ce que ie doy à la vie de ma renommee, en me donnant par mesme moyé la guerisō d'une plus mortelle playe, que ie sens en mon esprit, pour auoir perdu l'esperance de iouyr de la beauté de madame Briangie. Ainsi doncques ne pou-

uez vous rien plus prendre de moy, outre ce que la fortune vous en ottroye, puis que ce qui depēd de mon vouloir en me faisant moy-mesme la violence que vous me voudriez faire, reuient à mon entier contentement, sans en souffrir aucune force qui puisse preiudicier à mon honneur. Daraïde commença alors à n'estimer moins le Roy pour ses bons propos, qu'elle l'auoit au parauant estimé pour sa haute cheualerie, de laquelle les playes qu'elle auoit receuës en ce combat luy donnoient assez bonne experience: & partant elle respondit: Roy de Cores, vous parlez en tresbon Cheualier: & puis que vous ne me pouez denier celle volonté qui est remise au iugement de nostre combat, ie la reçois en vous donnant la mienne pour recompense, afin que vous vous reseruiiez la vie, sans en faire autre sacrifice comme vous auiez intencion de faire. Et avecques ces conditions ie veux demeurer en vostre amytié, & partant allez faire apareiller voz playes, car ie vois faire ainsi des miēnes. Le Roy fut si contēt de ceste courtoisie de Daraïde, que depuis il luy porta tousiours grand' amytié, sans iamais oublier le plaisir qu'il auoit receu d'elle en cest endroit. Alors il fut mis hors du camp, & l'honneur de la victoire donné par les iuges au Cheualier estrange, souz le nom de la beauté de Diane. Le combat finy au grād plaisir de la Royne Briangie, Daraïde dist au duc d'Alfarze, qui la venoit conduire hors du camp, Seigneur duc, mes compagnons, & moy auant que faire apateiller mes playes, voudrions fort aller faire la reuerence à la Royne, & partāt s'il vous plaist, vous nous conduirez deuant elle. Allons (dist le Duc) car ie suis asseuré qu'elle & sa fille vous receurōt d'un fort bon cueur, veu qu'elles vous sont de beaucoup reueuables, pour l'honneur lequel vous avez au iourd'huy acquis à la Princesse, & à toute la cour de la Royne. Ainsi s'en allerent au palais, estās suyviz de plusieurs Cheualiers, & d'autres gēs qui ne pouuoïēt retirer la veuē de dessus Daraïde

pour la merueille qu'ilz auoient de sa prouesse. Plusieurs monterent avecq' eux pour sçauoir qui pouuoit estre le Cheualier vainqueur, esperans bien qu'il se donneroit à cognoistre à la Roïne : & de fait Daraide s'agenouilla deuant elle incontinent qu'elle fut montée en la grand' sale, & luy dist: Ma dame, si le retardemēt de vostre Daraide merite quelque pardon, pour le seruice qu'elle a fait au iourd'huy à ma dame la Princeſſe vostre fille, ou pour vous auoir amené avecq' elle sa sœur Garaie, & le preux dom Galtazar & ses freres: il plaira à vostre maiesté no⁹ presenter voz mains, à fin qu'avecq' vostre cōgé ma sœur Garaye & moi aillons puis après faire la reuerence à ma dame Diane. A ces motz Daraide & Garaye osterent leurs armetz de la teste, estant tousiours agenouillees deuant la Roïne, laquelle receut vn plaisir si delimeſuré en les voyant, que sans pouuoir respondre vn seul mot, elle se mit à les embrasser toutes deux par grand amour. Et apres les auoir assez long temps ainsi tenues embrassées, pleurant de grand' ioye, elle dist: O ma chere Daraide, ie croy que les dieux vous ont renduë à nous ainsi couuerte de sang, à fin que par la tristesse que nous aurions de vous voir en ce piteux point, nous peusiōs temperer la ioye excessiue, qui nous eust parauanture fait mourir à vostre arriuee. Or allons toutes trois voir ma fille, car ie ne veux qu'autre que moy luy porte ces nouvelles. Adonc apres auoir humainement receu dō Galtazar, & ses freres, avec les Damoiselles de Daraide, & ayant commandé au Duc d'Alfarze les loger en son grand Palais, elle prit Daraide & Garaye par la main, & les mena en la chambre de Diane. Ce pēdant ceux qui auoient mōté avec Daraide, incontinent qu'ilz l'eurent recogneuë descendirent du Palais à grand' haste, & en grand plaisir, criant tous par la ville à haute voix: Viue, viue nostre Daraide qui n'a son pareil au monde, soit en prouesse, ou en beauté. Les voix, & le grād bruit peuple firent aucunement tressaillir Diane, laquelle

le lors s'estoit retirée avec la Roïne Brian-gie en sa chambre, & deuisoit du cōbat passé à la grande louange du Cheualier incogneu. Or cōme elles vouloient enuoyer vne de leurs Damoyſelles pour sçauoir l'occasion du bruit qui se faisoit, la Roïne entra à la mesme heure que la Damoyſelle commençoit à sortir. Mais quand Diane eut recogneu Daraide qui venoit avec la Roïne elle receut vne si grand' ioye, qu'il luy fut impossible de se leuer pour faire la reuerence à sa mere: tellement que Daraide vint premierement s'agenouiller deuant elle, & luy baiser les mains. Diane eu larmoyāt de ioye l'embrassa & acola par grād amour tenant sa bouche sur sa iouë teneſtre: & ainsi demeura presque pāmee assez long temps, avecq' si grand plaisir & contentement de Daraide, qu'elle en estoit du tout hors de soy, perdant le sentiment des playes qu'elle auoit au corps, pour la faueur de laquelle sa Dame lui medecinoit celles de l'ame. En ces entrefaites Garaye baisa les mains de la Princeſſe: & lors Diane retournant à soi, la receut & embrassa fort gracieusement, laissant vn peu Daraide à part que Lardenie prit soudain entre ses bras, la baisant & rebaisant sans cesser, comme toute esperduë du grād plaisir qu'elle receuoit en la voiāt. Apres vint la marquise, & toutes les autres Damoyſelles qui firent maintes caresses à Daraide, & Garaye. Leurs embrassemens finis, Diane comença à dire: Ma Daraide ie vous prie de uāt toutes choses baiser les mains de la Roïne de Corit, pour l'agreable seruice que vous luy avez fait au iourd'huy, & vous verrez que Daraide ira retrouver celle autre Daraide, la compagnie de laquelle m'a tant bien consolee en vostre absence. Daraide obeissant au commandement de Diane, se tourna deuers la Roïne, qui la regardoit avec grande admiration de sa beauté, mais encores plus de sa haute Cheualerie: & Daraide l'ayant pareillement bien regardee, estima qu'excepté Diane, il estoit impossible de voir plus de beauté & de singulieres

perfections en vne seule personne: & partant se mettant à genoux, lui dist: Si la beauté de ma dame la Princesse Diane, comme chose diuine & celeste, m'a ce iourd'hui fait prendre les armes contre la vostre, ie vous supplie, ma dame, me le pardonner, pour recompense du seruice que ie vous ay peu auoir fait, en destournant vn mariage tant desraisonnable, comme eust esté celuy qui eust assemblé vostre souueraine beauté, avecq' vn des plus difformes persónages de tout le monde. La Roine luy respondit d'une fort bonne grace. Tresbelle & tres-excellente Daraide, vous avez raison de mettre au rang des choses celestes, & diuines, la diuine beauté de ma dame la Princesse Diane, par ce qu'il n'y a Damoysselle au móde qui puisse iustement estre apelée belle à sa comparaison. Au moyen dequoy par vn seul combat, & sans auoir offensé personne, vous avez fait reparer deux iniures que le Roy de Cores faisoit à ma dame Diane, & à moy: à elle, pour blasphemer contre sa diuine beauté: à moy en me voulant espouser outre mon vouloir. Or suis ie doncques par vous remise en ma liberté desirée: dont ie me sens tant vostre redevable, que ie n'estime tout mon Royaume, ny autre chose qui soit en moy, pouoir satisfaire à la recompense que vostre prouesse merite, si vous mesmes ne vous tenez pour bien recompensée de l'honneur immortel que vous avez acquis par la victoire en surmontant vn tant preux & redouté Cheualier, comme estoit le Roy de Cores. La Roine acheuant ces propos, la baissa gracieusement, & apres elle sa sœur Garaye: puis Diane dist: Ma chere Daraide ie ne scaurois souffrir que lon tarde plus lōg tēps à apareiller voz playes. Ma dame (respondit elle) si vostre cōpagnie, & vostre regard ne me donnoient quelque soulagemēt aux plus grandes playes que vostre beauté m'a faites en l'ame, vous auriez raison de vous soucier des autres remedes qui sont requis aux playes du corps, desquelles ie ne sens maintenant aucune douleur pour le grand

plaisir que ie reçois de vostre presence. Diane en souriant luy respondit: Ma bien aymee Daraide, le bien que vous dites recevoir par mon regard aux playes que ma beauté vous a faites, ne vous peut donner les apareilz que les playes du corps demandent: & partāt a fin que ie puisse longuement iouir de la ioye que ie prens en l'amour, duquel ma beauté vous a nauree, ie veux faire remedier aux playes que vous avez reçues à mon seruice, & à celuy de la belle Roine Briangie. Ma dame (dist lors la Roine) ie vous remercie de la louenge que vous nous donnez par voz propos à la belle Daraide, & à moy. Apres ces gracieux deuis lon conduit Daraide en vne chambre dans laquelle elle fut desarmee, & couchée en vn riche lit ou ses playes lui furent acoustrees par les mesmes Damoysselles qui l'auoient desia medecinee vne autre fois: & luy ayant donné tous ses apareilz, la laisserent seule pour reposer plus à son aise. Mais elle dist à la duchesse qui auoit esté presente à la voir apareiller, qu'elle la supplioit demeurer encores quelque temps avec elle. Et partant toutes les autres Damoysselles s'en estant allees, la duchesse s'appuya sur le lit, & lors Daraide luy dist: Helas! ma dame, quel bon reconfort me promettez vous pour alleguer mes passions, lesquelles vous sont assez cogneuës, puis qu'e ce point vous me voulez abandonner, & me priuer de vostre compagnie, de laquelle ie reçois tant de consolation? Mō seigneur Agefilan (dist la Duchesse) ie ne scaurois vous dire autre chose, sinon que si ma dame Diane vous eust recompensé comme Cheualier, par le dueil qu'elle a receu pour vostre absence, de l'ennuy que vous pouuez auoir enduré pour la sienne, vous ne seriez moins bien guerdonné de voz douleurs, que satisfait & cōtent de vousmesmes pour auoir adressé voz pensees en si hault lieu: vous assurant que vous vous deuez beaucoup resiouir d'estre, comme Damoysselle aymé d'une si haute Princesse avec l'esperance de ce qui s'apareille à vostre contentement

rentement par l'amitié & continuelle fréquentation que vous auez maintenant ensemble, qui vous pourront vn iour estre deux grands moyens pour paruenir à ce q̄ vous desirez, lors que vous aurez descouvert qui vous estes: ce qu'il vous fault toutesfois celer maintenant à vostre pouuoir, car i'ay cogneu par les paroles de Diane, qu'au mesme instant que vous vous seriez donné à cognoître à elle pour Cheualier, qu'elle vous denieroit à iamais le plaisir que vous receuez par sa presence, sans vous laisser aucune esperance de plus la voir.

Helas (dist l'ots Daraide) ie voy bien maintenant que ma seule mort me donnera à cognoître à ma dame, puis que ie ne luy ose descouurir qui ie suis, craignant de perdre entierement les faueurs que ie recoi d'elle. Làs, ma dame Lardenie, si vous ne pouuez me secourir par aucun remede, à tout le moins secourez moy par la pitié q̄ ie vous supplie prendre de mon malheur. Si vous ne pouuez me donner aucune esperance, donnez moy quelque consolatiō, à fin que du tout ie ne desespere en ce trauail auquel vous me voyez. O que mes destinees sont miserables! car ce que ie cerche pour mon confort, qui est la veüe de ma dame Diane, m'acroist de plus en plus mon martire. Làs ma chere Lardenie, quel assez bon conseil me pourrez vous donner, puis que ma douleur ne le souffre? quelle consolatiō puis que le moyen d'ou ie la deurois receuoir, qui est la presence de ma dame, me fait redoubler mō ennuy? quel remede, puis que ie n'en ay seulement l'esperance? quelle vie, puis que ie me voy en vne continuelle mort? Helas, ma dame la Duchesse, ie sçay que vous ne me pouez dōner ce q̄ ie vous demande, mais aussi ne le vous demande ie à autre intention, sinon à fin que vous preniez de moy la pitié qui du tout defaut en ma dame. O combien ie desire la mort de foy, & combien en mesme heure ie la crains, à fin de ne perdre l'ocasion de tousiours continuer en mes mortelles angoisses. O combien ie serois plus heureux si

i'auois du tout perdu l'entendement! & neantmoins ie ne le veux perdre, craignant de perdre encores avecque luy, la lounance de la raison que i'ay de sortir hors de mon sens, pour le trop grand orgueil de mes pensees. Helas il lera meilleur de me taire, à fia que ie ne me face tort en disant ce que ie ne sçay point & le sachant que ie ne pourrois dire, pour les estranges douleurs dont l'enuie de mourir, & le vouloit de viure, me tourmentent. Auecques ces tristes paroles Daraide respandoit tant de larmes qu'elle en fit plorer la Duchesse par grande compassiō, combien qu'elle s'efforçast de la consoler au mieux qu'elle pouuoit. Et par ce que Daraide la prioit de luy donner le moyen de parler seule à seule à sa Dame, la Duchesse luy dist qu'elle oubliast celle fantasie pour se reposer plus à son aise, par ce (disoit elle) que force vous est de laisser à la merci du temps auenir, ce que le present vous refuse. A tant Lardenie s'en retourna vers les deux Roynes, & vers la Princesse, au mylieu desquelles elle trouua Garaye, qui leur racontoit tout ce qui estoit auenu à Daraide, mesmement au Royaume de Galdap: dont Diane fut fort resiouie se voyant aymee d'un si preux & si beau Cheualier, pour l'amour duquel les Roys & les Roynes forcenoient, tellement que la Princesse ne desiroit sinon l'heure de se voir seule avec la duchesse Lardenie. Mais parce qu'il estoit desia tard, les tables furent dressees, & apres que lon eut couuert pour le souper, les deux Roynes & la Princesse repeurent en grande ioye, pour les bonnes auentures qui ce iour estoient auenuës en leur cour.

Des propos que Diane & la Duchesse Lardenie eurent ensemble sur les amours de Daraide, & comme elles l'allerent visiter tous les iours iusques à ce qu'elle fust guerrie des playes receues au combat precedent.

CHAP. VIII.

A Pres que les tables furent leuees, Diane laissant la compagnie des deux Roynes, prit la duchesse par la main, & l'emmena toute seule dans le iardin, puis luy dist en l'embrassant par grande affection, Estes vous maintenant satisfaite, Lardenie, des folies que Daraide m'a contrainct de faire, atedü que ie ne me suis contentee, pour la grande amytié que ie luy porte, d'auoir fait rire toutes les Damoyelles de ma dame à la venué de la royne Briägie, si au iourd'huy sachant qu'elle estoit Cheualier, ie n'eusse vü en vostre presence de tant de faueurs enuers elle. Ma dame (respondit la Duchesse) vous ne me pourrez contenter par quelques faueurs q̄ vous faciez à Agefilan, veu la haute Cheualerie, & son noble lignage, iusques à ce qu'il soit aduertý que vous les luy faites comme à vostre Cheualier, & non comme à vne simple Damoyelle: car par ce seul moyen, avecque tant peu de voz graces qu'il vous plaira luy départir, vous me pouuez rendre contente, & luy satisfait de l'amour qu'il vous porte. Comment Lardenie (dist Diane) me conseilleriez vous de faire ce que vous me dites? Je ne vous le conseille pas (respondit elle) car l'amour que ie porte à Agefilan m'empesche de pouuoir donner aucun asseuré conseil en vne matiere qui le touche de si pres comme ceste cy: mais ie vous veux bien dire que quäd vous feriez ce que i'ay dit, ie ne m'en trouuerois point plus descöfortee. La princesse en riät lui respondit, Il apert bien, Lardenie, combien vous estes plus obligee à Agefilan, qu'à moy, puis que pour faire son profit, vous pourchassez mon dommage. Je ne pourchasse point vostre dommage (dist la Duchesse) si ie vous aduertis d'aymer en toute hōnesteté, celuy qui vous ayme d'un si bon cueur: car si vous l'aymez, comme vous le deuez aymer, vous ne permettez qu'il recoyue la mort, laquelle luy est desia apareillee, s'il ne vous plaist le secourir par qlque faueur de vostre bonne grace. Et à fin que

vous sachiez mieux l'extremité en laquelle vostre beauté l'a reduit, ie vous veux dire ce qui au iourd'huy a esté passé entre nous. Et lors elle luy raconta les propos qu'elle auoit euz avecque luy, avec telle compassion que la Duchesse en les recitant, & la Princesse en les escoutant, acompagnoient d'une grande abondance de larmes les tristes regretz de Daraide. Las duchesse Lardenie (dist lors Diane) ne satisfais- ie pas assez à l'amytie que me porte Agefilan, par la force que ie me fais en m'efforçät de resister aux douloureuses playes, döt sa prouesse & sa beauté me naurent continuellement? A fin donc que i'aye quelque satisfaction de la force laquelle ie fais à ma grandeur il est bien raisonnable q̄ Daraide pregne quelque patience en ses douleurs, tout ainsi que ma chasteté me contrainct de la prendre es miennes: car ce seroit vne chose fort indigne d'elle, que sa vertu, laquelle a voué & sacré toutes ses pēses à mon honneur, s'auilist maintenāt iusques à me pourchasser ce qui n'est moins contraire à son deuoir, qu'à celuy dont ie suis redevable à ma grandeur. A l'ocasion de quoy pour ne faire tort à ma pudicque volōté, ny à la raison, i'ay delibéré de ne luy departir faueur quelconque, si ce n'est souz le nom de Daraide, souz lequel ie luy donneray toutes les faueurs qu'une telle Priucesse comme ie suis, peut honnestement departir à vne tant belle & vertueuse Damoyelle comme elle est. Toutesfois, Lardenie, par ce que vous sçanez tous mes plus grans secretz, ie suis bien contente que vous receuiez souz le nō d'Agefilan, les faueurs que ie luy otroyray souz celuy de Daraide. Ma dame (dist la Duchesse) i'accepte pour luy le gräd bien qu'il vous plaist luy faire en cecy, & de sa part ie vous supplie que me donnez voz belles mains, à fin qu'en les baissant souz le nom d'Agefilan, ie commence à entrer en possession d'une tant grande & agreable faueur. Diane luy ayant otroyé sa requeste, lui dist, Vous ne pouuez plus vous plaindre de moy, Lardenie, que ie n'aye fait vne gran-

grande faueur à Agefilan puis que souz le tiltre de mō Cheualier ie vous acorde vne grande partie de ce que me demandez. Ma Dame (dist la Duchesse i'estime) le bien que maintenant vous lui auez fait si grand & en reçoï vn si grand plaisir, qu'il me semble que vous vsez enuers lui d'une pitié fort equitable, en me donnant vne si grande faueur en son nom, sans qu'il la sache, pour remedier au peril, ou la grande ioye hazarderoit sa vie, si par fortune il en estoit auerti. O bien heureux Agefilan, qui en receuât vn si extreme plaisir, à peu rendre sa vie assuree! & moy pareillement bien heureuse, qui l'ay peu receuoir en son nom! Or sus (dist Diane) ie feray encores d'auantage pour Agefilan, car ie veux q̄ maintenant nous l'allions visiter sans auoir autre compagnie, à fin de sçauoir comme il se porte. De cecy (respondit la Duchesse) ie ne vous remercieray pas beaucoup, car ce que vous en faites, est plus pour le plaisir lequel vous en receurez, que pour luy donner quelque nouuelle faueur en le faisant iouir de vostre presence. Diane en souzriant embrassa Lardenie avec vne fort bonne grace, & luy dist, Vrayement vous me monstrez assez par ces propos qu'une Damoiselle ne se doit descouurir à l'autre, puis que la hardiesse de vostre malice ne vient d'autre lieu que de la. On ne me peut pour cela estimer malicieuse (dist Lardenie) veu qu'en cecy ie ne dy chose qui ne soit trop claire & veritable. En la male heure (dist la Duchesse) me racontez-vous telles follies. Il n'est pas de merueilles que ie les conte, ou que ie les face (dist la duchesse) veu que ie reçoï au nom d'Agefilan, des faueurs, lesquelles pour l'extreme plaisir que i'y prens, sont suffisantes pour me faire sortir hors de moi. O quel gracieux Cheualier vous eussiez esté, Lardenie! dist lors Diane. Je eusse bien esté plus gracieuse Damoiselle (dist la duchesse) si vn tant beau & preux Cheualier cōme Agefilan m'eust aussi bien aymee cōme il vous ayme. Qu'eussiez vous fait par vostre foy? dist Diane. Par ma foy

ma dame (dist Lardenie en riant) i'eusse fait tout ce dont il m'eust suppliee: N'auiez vous point de hôte (dist Diane) d'vser de propos si follastres, mais ie vous prie belle dame, dites moi, me cōseilleriez vous q̄ ie fisse ainsi? Ce ne seroit pas grande merueille (dist Lardenie) que quelqu'un donnast à vn autre, le conseil qu'il voudroit prendre pour luy-mesmes. Diane en riant luy dist, Exercez donc vostre conseil avecques Agefilan, & faites tout ce dont il vous suppliera, puis que vous dites que vous l'aymez tant. Faites pour voir (respondit-elle) qu'il vous laisse en arriere pour m'aimer, & vous venez cōme i'entens mieux que vous les apareilz dont il faut medeciner ses playes. Ne vous semble-il pas, dist lors Diane, que ie le guer donne assez bien de l'amour qu'il me porte? Non vrayemēt, dist elle, il ne me le semble pas, & ne m'en tiens pour bien contente. Diane se souzrit, & luy dist en l'embranchant, Puis que vous ne vous en contentez pas, delaissons donc nostre marché, & me rendez les faueurs que vous auez receuës pour luy. Mais au contraire (dist Lardenie) ie veux encores auoir toutes les autres que vous ferez à Daraide, lesquelles ie receuray souz le nom de vostre Cheualier Agefilan, que ie vous représenteray: & en le representant, si vous ne me teniez pour Cheualier trop outrecuydé, ou pour Damoiselle trop layde, ie ne me voudrois pas contenter de vous baiser tant seulement vous tenant ainsi seule avecques moy. Diane se prit fort à rire de ce propos, & luy dist, Or allons maintenant vers Daraide, car ie ne vous veux plus faire tant de faueur, que de demeurer ainsi seule avecques vous, craignant par tel moyen vous donner la hardiesse qui vous deffault, & que la trop grande liberté, laquelle ie vous pourrois otroyer, ne vous fist vser enuers moy de quelque violence en pourchassant le bien de vostre Agefilan, dont vous estes tant amoureuse. En se gabant ainsi l'une de l'autre, elles vindrent en la chambre de Daraide, qui ne pensoit en autre chose

qu'en la dame Diane, laquelle comme en sursaut la vint embrasser amoureusement, & baiser, dans le lit ou elle estoit couchee, sur lequel la belle Princeſſe s'apuya, ſans luy pouuoir dire choſe quelconque, ains la regardoit ſeulement, monſtrant auoir grande compaſſion de ſon mal. Daraide rauie du grand plaifir, qu'elle receut à l'impourueuë arriuee de ſa Diane, ſe tira vn peu hors du lit, & la regardant d'un œil moderé entre la ioye & la triſteſſe, luy diſt, Helàs, madame, par quel moyen pourray ie iamais recognoiſtre la grande faueur dont il vous à pleu maintenant viſer enuers moy? O bien heureuſes playes du corps, puis qu'elles ſont cauſe d'un ſi grand allegement aux plus grandes playes de l'ame! A ces motz Daraide prit les mains de la Princeſſe entre les ſiennes, & les baignant de maintes larmes, les baiſa, & rebaiſa ſouuentes fois, puis avecq' vn grand ſouſpir telmoing de ſes plus ſecrettes paſſions, elle continua ſon propos en ceſte ſorte, O celeſtes mains, qui par voſtre diuine beauté pouuez faire couler deux ruiſſeaux de larmes de mes yeux, pour remedier aux cruelles flâmes dont ie me ſens toute embrasée, helàs par quel moien vous recompensetay ie du bon ſecours que preſentement vous donnez à ma mortelle triſteſſe! Et vous, ma dame, ie vous prie veu que les paroles me deſſaillent en ceſte douleur, & que ie ne puis dire ce que i'endure, qu'il vous plaiſe ſupléer ce deſaut, & comprendre par ce diuin eſprit q̄ les dieux ont mis en vous le mal que ſi cruellement i'endure, & que tant peu ie vous declare, pour eſtre égal en ſon extremité aux perfections dont les cieux vous ont ennoblé par deſſus toutes les autres Princeſſes du monde. Helàs ma dame, il me ſemble que ie me face iniure à moy meſmes, pour me maintenir ſi long temps en vie, aiant vn ſi iuſte ocaſion de mourir. Je ſens deſia ma vie ſe plaindre & lamenter en moy, par ce que mes paroles vous veulent monſtrer les douleurs que ie ſouffre pour voſtre amour, encores qu'el

les ne ſe puiſſent autrement deſcouriſſer que par ma mort. Helàs ie meurs, & voy bien que ie meurs, & neantmoins ie ne puis faire cognoiſtre la prochaine fin de ma vie. Je ſuis du tout reduite en cendre, & le feu ne ceſſe pourtât de me martirer. Làſ! ma dame, par donnez moy ſi ie ne ſçay quelz propos ie vous tiens, car il ne ſe fault eſmerueiller ſi ne ſachant que ie doy faire, ie ne ſçay encores que ie doy dire. Puis donc qu'en cecy me manque le plus grand bien que ie ſçauois point auoir en ce mode, qui eſt de vous faire ſçauoir mon mal ie vous ſuplie, le conſiderer par mon ſilence, & par le peu de pouuoir que i'ay de le vous declarer: ou bien vous-meſmes employer les ſouueraines graces que les dieux vous ont donnees, à penſer ce qui deſaut en mes propos, car par ce moyen ie me ſens aſſeuree que vous cognoiſſerez ce que i'endure, encores que ie ne le puiſſe exprimer. Diane courrant par la gracieuſeté de ſon viſage, la douleur, & la compaſſion, dont l'amour, & ces triſtes doleances la faiſoient alterer en ſes penſées, ſa Daraide en la face, & luy reſpondit, Ma grand' amye, que voulez vous que ie vous faſe, ny que ie vous die autre choſe? ſi non que ie vous ayme autant comme vous m'aymez, ſans vous nyer aucune de faueurs qu'une telle Princeſſe comme ie ſuis, peut iuſtement donner à vne tant vertueuſe Damoyſelle comme vous eſtes. Il me ſemble que vous, & la duchefſe Lardenie en voſtre nom pour l'amour qu'elle vous porte, deuez enſemble vous contenter, ſi ne faiſant tout ce que vous voudriez bien, ie fais ce que ie puis, avecques l'egard que ie doy auoir au rang, ou il a pleu aux dieux de m'appeller. Sur ce propos avecq' vn ioyeux ſemblant, elle ſe retourna vers la duchefſe, laquelle luy diſt, Ma dame i'accepte la faueur de voſtre bonne grace, en paiement d'une partie de ce qui m'eſt deu, comme ayant le gouuernement des affaires de Daraide. O ma dame Lardenie (diſt lors Daraide) combien ie vous ſuis obligée en m'aydant à receuoir le bien,

le bien, qu'il plaist à ma dame nous departir, car veritablement ie ne le sçauois comprendre en moy seule, pour la tristesse qui resiste iour & nuict à tous les plaisirs qui me pourroyent estre offerts. Si vous entendiez bien ce que vous distes (dit Lardenie en souzriant) vous estimeriez les faueurs que ie reçoÿ en vostre nom beaucoup plus que vous ne faictes. Mais ces gracieux deuiz furent delaissez pour l'arriuee des Roynes Sidonie, & Briangie, qui venoyent visiter Daraïde, accompagnees de Garaye, & de la marquise de Lastes, & de quelques autres damoiselles: puis les Roines, & la Princesse estant assises sur les bords du liect, la Roïne Sidonie demanda à Daraïde comme elle se portoit. Ma dame (respondit Daraïde) vous pouuez assez penser comme ie me porte, veu les faueurs que ie reçoÿ, estant visitée par si grandes Princesses, & iouissant de la veüe de ma dame Diane. Adonc la Roïne lui dist, Daraïde, le seruice q̃ vous auez faict à ma fille Diane a esté bien recompensé par la douleur qu'elle mesme a receuë en vostre absence, & qu'elle eust peu receuoir trop plus rigoureuse, si la Roïne Briangie par la naturelle representation de vostre beauté, n'eust donné quelque consolation à sa tristesse. Daraïde se retournant vers la Roïne de Corit, & esmerueillée de sa bonne grace, pensa presque en la regardant, se regarder en vn mirouer, & lui dist: Comment fera il possible, ma dame, que iamais ie puisse satisfaire aux graces que i'ay receuës des dieux, & de vous: des dieux, par ce qu'ilz m'ont tant faict ressembler à vostre diuine beauté, de vous, pour la grande faueur que vous m'avez faicte en m'entretenant toujours par vostre presence en la memoire de ma dame Diane, & receuant en mon nom les gracieusetez qu'elles vous a departies, en prenant vostre personne pour la mienne. O moy bien heureuse! de qui les dieux ont voulu enchaîer la ressemblance en vne si haute & si excellente Roïne comme vous estes, à fin de supleer à ce qui me

deffailloit pour meriter la bonne grace de ma dame. Ce pendant que le Prince Agésilan disoit ses paroles, la Roïne Briangie le regardoit extensiuement, puis elle lui respondit d'une fort bonne grace. Tresexcellente Daraïde, c'est moy qui en ce que vous auez dist, ay esté la plus fauorisee des dieux, par ce qu'ilz m'ont faict ressembler à vne tant belle damoiselle comme vous estes, & souz telle portraicture, receuoir en vostre nom les graces de la diuine & celeste Diane. Ce seroit plus tost moy (dit lors Diane) qui aurois gaigné toutes ces belles faueurs que vous distes, si le plaisir que i'en receu, n'eust esté temperé par la tromperie, laquelle depuis ie cogneu m'auoir esté faicte en la ressemblance de vous deux. Toutes rioient de ce propos quand Daraïde recommença, disant, ma dame Diane, auecques vostre congé ie vous veux demander, si la Roïne Briangie, & moy, fussions entrees ensemble, que eussiez vous faict ne pouuant recognostre Daraïde d'auec la Roïne, pour la grande ressemblance qui est entre nous. Diane lui respondit, ie vous eusse embrassees toutes deux, car en faisant faueur à celle qui estoit Daraïde, i'en eusse pareillement receu de celle qui estoit la Roïne de Corit. Apres plusieurs autres gracieuses railleries, Garaye prit vne harpe, dont elle ioua avec grande harmonie, augmentant la douceur de la musique par celle de sa voix, en chantant ces vers de la puissance d'Amour.

CHANSON.

*L'age de l'or precieux
Delaisant la terre ronde,
Saturne chassé des cieux
Laisa l'empire du monde:
Et lors ses trois filz peruers.
Auantans leur heritage,
Departirent l'vniuers,
Prenant chacun son partage.
Iupiter eut par hazard*

*Le ciel tournoyant la terre,
Et fortifia sa part
De foudres, & de tonnerres.*

*Neptune fust president
Des mers pleines de naufrages,
Et s'arma d'un fort trident,
De tempestes, & d'orages.*

*A Pluton le fort donna
L'enfer plain de felonnie,
Lequel il environna
D'eaux noires, & de furies.*

*Il sembloit qu'à Cupidon
La terre fust reservee,
Mais non content de ce don
Il prit tout gay sa volée,*

*Et vint au milieu des cieulx
A Iupiter mener guerre,
De son feu domtant les feux
Des foudres, & du tonnerre.*

*De là vers le president
Des mers vint ce Dieu volage,
Et fit ardre son trident,
Sa tempeste, & son orage.*

*Puis es enfers tenebreux
Il vint elancer ces flammes,
Maugré tout le peuple ombreux,
Maltant le fier Roy des ames.*

*Ainsi tu peux enflammer,
Amour, de tes estincelles,
Le ciel, l'enfer, & la mer,
Et les choses plus rebelles.*

*Donc à bon droit nous humains
Adorerons ta puissance,
Veu que les Dieux souverains
Te rendent abeyssance.*

Ceste chanson pleust tant à ces nobles Dames, que quelques vnes d'elles sentirent secrettement renforcer les passions de l'amour duquel elles estoient embrasées, mesmement la Roine Sidonie. Puis à la requeste de la Roine Briangie, Diane prit la harpe, & commença à iouer d'une tât bonne grace, & avec telle d'exterité, que les Roines, & toutes les damoiselles n'estoient moins resiouies de sa gracieuse contenance, que rauies par la douceur de ses acords.

Mais Daraide entre les autres fut tellement esperduë de celle douce melodie, & de quelques petits souspirs que la Princesse entremesloit parmi son chant, que quelque fois elle s'esuanouissoit préque de ioye, puis soudain l'armoyoit pour la force de l'amour dont elle se sentoit estaindre en façon que lon cognoissoit facilement la diuersité de ses passions par l'inconstance de son maintien. Or ne pouuant plus se tenir en silence, avec un profond souspir elle commença à dire à la Princesse. Helàs, ma Dame, combien est grand le pouuoit que voz yeux & vostre celeste voix ont sur moi, veu que ie ne me sens aucune force, qui puisse suffire pour soutenir leurs doux efforts! O Dieux immortels, comme vous auez sceu departir voz celestes dōs en lieu ou ils peussent si bien estre cogneuz, à fin de nous faire voir en terre la même gloire dōt vous iouissez dans le ciel! Helàs, ma dame, ie vous supplie ne me donner plus telles faueurs, si par l'excèsif plaisir il ne vous plait me donner encores la fin de ma vie. Permettez seulement que l'ame ayt la peine de vous desirer, & la gloire de vous contempler, & ne souffrez point que le corps soit participant d'un si grand bien, puis que par le danger, ou il est en oyant vostre diuine voix, il donne assez de tesmoignage combien il est indigne de receuoir si grande faueur. Helàs mes yeux, & mes oreilles, comme choses corporelles, ne peuvent faire qu'il ne se perdent, en voyant des choses tant souveraines comme sont voz diuines beautés, & oyant les emmiellees douceurs de vostre chant. Toutes se mirent à rire des parolles de Daraide, & des gestes passionnez avec lesquels elle les prononçoit. Mais Diane ne sentoit moins ces complaints en son cuer que celle mesmes qui les disoit: car elles redoubloyent en son courage le feu amoureux qu'elle y auoit embrasé, qui croissoit tousiours d'autant plus qu'elle s'efforçoit à le tenir secret: dequoy la duchesse Lardenie s'aperceuoit assez aisémēt, comme celle qui n'estoit du tout libre de la beauré

beauté de Daraïde. En pareilles visitations se passerent tous les iours ensuyuans iusques à ce que Daraïde fust du tout guerrie de ses playes, & leuee du lit, & par ce qu'alors elle se trouuoit volontiers en la compagnie de la Royne Briangie, il n'y auoit celui qui les peut recognoistre l'une de l'autre, tellement que plusieurs fois estant habillées d'une mesme façon, la Royne Briangie se faignant estre Daraïde, fit maintes gracieuses tromperies à Diane : au moyen dequoy elle prit vne fort grâd' amitié avec Daraïde, continuant tousiours de plus en plus en celle de Diane, laquelle la faisoit toutes les nuitz coucher avec elle, pour la grande consolation qu'elle en receuoit en l'absence de sa plus grande amye, ayant auprès d'elle son ymage tant bien représenté au naturel, que la Royne fut long temps apelée le pourtrait de Daraïde, & Daraïde le pourtrait de la Roine Briangie. Or Diane & elle estât la nuit couchees ensemble, tenoient maints gracieux deuis entr'elles, de ce que Daraïde estoit tât passionnée des amours de la Princesse, laquelle toutesfois dissimuloit fort sagement son amour, & neantmoins pour mieux iouir de la veüe du portrait de son amy, faisoit tenir toute la nuit vn grand flambeau de cire alumé au mylieu de sa chambre, souz couleur qu'elle disoit auoir quelques estrâges visions en dormant, dõt elle se defendoit par le moyë de la lumiere. Quelquefois Daraïde se trouuoit avecque les autres Damoyelles, & à leur coucher se seant sur le bord du lit, prenoit son luc, & iouoit maintes iolies chansonnettes, les vnes de ses passions amoureuses, les autres à la louange de Diane, non sans quelquefois accroistre ses peines par la trop grande contemplation de ses beautez, ressemblant en cecy au rossignol renfermé dans la cage, lequel par ses tristes plaintes ne fait que resiouir celui qui le detient en ces prisons, sans se donner aucun plaisir à sa miserable captiuité. Or vn soir entre les autres Daraïde se trouuât plus ioyeuse que de coustume, pour quelque nouuelle fa-

ueur qu'elle auoit receüe de sa dame, la vint voir en sa chambre, ou elle la trouua couchée avec la Royne Briangie. Lors approchât le flambeau auprès du lit, pour mieux contempler ses beautez, elle s'assit dans vne chaise tout deuant elle, & apres quelques gracieux deuis, faisant aucunement de la folastrie pour ce soir, & chatouillant la Princesse de tous costez, prit son luc, puis avecq' maintz gracieux souspirs, & quelques friandes ceillades apropiées sur les parties de sa dame dont elle parloit, commença à iouer, & chäter avec vne telle grace, qu'elle rendit lors la pareille à Diane, pour les passions que quelquefois elle luy auoit donnees par ses douces chansons, quand elle estoit au lit naüree de playes receües au combat du Roy de Cores. Daraïde donc regardât premierement les beaux yeux de sa dame, puis ses autres beautez selon qu'il luy estoit permis les regarder, commença à dire vne partie des ocafies de son amour, chantant ces vers d'une fort bonne grace.

CHANSON.

*Ces yeux estoient les fleches estoillees,
Fleches d'ou vint ma premiere douleur,
Qui de ces arcs d'ebenine couleur
Par tous mes sens furent esparpillees.*

*Ces cheueux d'or, ces tresses annelees,
Estoient les rets tenduz en mon malheur,
Quand de sa voix la celeste valeur
Me rechassoit des vmbreuses vallees.*

*De ces tetons les rons delicieux
Estoient l'appast pour abuser mes yeux:
Ces pieds estoient les guides de ma trace:*

*De ceste main les rameaux longs et blancs
Seruoient d'épieux pour transpercer mes flâcs
Ma liberté fut prinse en telle chace.*

Après auoir acheué ces vers elle baïsa les mains de la Princesse, & se retira en fort ioyeuse contenance dans le iardin, ou la duchesse Lardenie l'atendoit. Ainsi ces deux amâtes passoiēt le tēps ensemblemēt
ne se

ne se donnant garde que leur continuëlle frequentation accroissoit tousiours les flâmes amoureuses embrasées en leurs poitrines. En ces entrefaites par ce que la Roïne Briangie dist vouloir demeurer quelque tēps en vne si bonne compagnie, le Roy de Cores s'en retourna bien fâché en son pais. Pareillement la-Damoyelle Galtazire s'en retourna avec lettres de Daraide au Roy Rozafar, & à la roïne Artifire, & emmena pour sa conduite les deux vieillards qui l'auoient acompagnée. En tel estat demoura la cour quelque temps, ctoissât tousiours la peine de Daraide & de Diane d'autât plus que l'esperance leur defailloit. Or presque tous les iours auenoit quelque nouuelle & belle auanture en l'Isle de Guindaye, pour les infinis Cheualiers que la beauté de Diane, & la renommee des prouesses & excellences de Daraide y atiroient de toutes parts. Au moyen dequoy il n'y auoit cour de Prince quelconque, qui fust tant bien acompagnée de preux & hardis Cheualiers comme celle de la roïne Sidonie. Sachez aussi q̃ la Damoyelle enuoyee par le magicien Cinistide pour porter la guirlande à Diane, s'en retourna en mesme tēps, apres auoir fait son messlage, & raconté tout ce qui lui estoit auenu par les chemins, mesmement avec le Cheualier Afronteur.

Comme Diane, & la Roïne Briangie allerent vne nuit espier ce que faisoit Daraide dans le iardin avecq' les autres Damoyelles.

CHAP. IX.

LA peine que Daraide souffroit au long pourchas de ses amours, n'estoit moindre que le plaisir qu'elle prenoit en la compagnie de sa dame Diane: laquelle estat en vn pareil trauail, entre la ioye, & la tristesse, passoit la plus part du iour avec elle, & toute la nuit avec la Roïne Briangie. Or vn soir bien tard, Diane estant ia couchee avecques la Roïne, apres plusieurs autres propos, luy dist: Vous

plaist-il que sans estre venës nous aillions voir ce que Daraide, & Garaye, & toutes mes autres Damoyelles font au iardin? Al-lons, dist la Roïne. Et soudain ayant pris chacune vn manteau de nuit sur elles, s'en allerent au iardin: & apres auoir trauerseé quelques allees se vindrent assoir aupres d'vne fontaine faite par grand artifice d'architecture, sur laquelle estoit assise vne belle Nimphe echeuelee qui tournoit le derriere vers ce costé du iardin ou elles estoient, Au dessus de la fontaine passoit vn arceau, enuironné de trois haultz arbres de chacun costé, qui estoient fort plaisans à voir & bien ombrageux, tant de iour contre les rayons du soleil, que de nuit contre la splendeur de la lune. La Princesse, & la roïne Briangie sans s'aprocher d'auantage, commencerent de là à regarder le maintien de toutes les Damoyelles: & virent que les vnes amassoient des fleurs, & les autres tissoient des chapellets. Mais de l'autre costé du timbre de la fontaine, elles aperceurent Garaye apuyee sur la harpe, & là marquise de Lastes tout aupres deuisant ensemble, & ainsi que Diane regardoit affectueusement de toutes parts, pour recognostre Daraide, elle l'auisa assez loing en la prairie couchee dans le giron de la Duchesse, pres de laquelle estoit vne autre Damoyelle avecques diuers instrumens de musique à l'entour d'elle, par ce qu'elles en auoient ioué vn peu au parauât. Alors Daraide regardant la belle Diane du ciel (c'est à sçauoir la lune) respendre ses clers rayons en tout ce beau iardin, apres plusieurs souspirs commença ses plaintes si hault que la Princesse les pouuoit entendre: & parla en ceste sorte à la Deesse qui portoit le nom de sa Dame, & lors illuminoit les noires tenebres de la nuit: Helas, belle Diane, combien la clarté de tes rayons espanduz negligemment en ceste prairie accroist mes angouisses & tristes pensees! car par ta lueur argentine tu me renouuelles la memoire de celle, qui reluyt avec trop plus grande beauté sur mon cueur, que tu ne fais maintenant

nant sur la terre: & laquelle avec moins de soucy que toy, darde de iour par sa vené, & de nuit par sa souuenance, sa continuelle clarté sur moy. O ma dame Diane les trop cruelz Dieux ont voulu que la nuit vous iouissiez du pourtrait de vostre Daraide, laquelle vous auez en vostre compagnie, & que Daraide separee de vous, eust seulemēt le moyen de contempler celle qui reluyt par tout le mondé avecques mesme nom que vous, mais non pas avecq' mesme beauté. Durant ces propos, Garaye estant ve nuë avec la marquise de Lastes au lieu ou estoit sa sœur Daraide, se coucha dans le giron de sa compagne la marquise: & se souuenant de la Roynie Cleofile commença pareillement à faire ses doleances: Helas ma sœur Daraide (dist elle) voz regrez sont cause que maintenant ie sens vne passion pareille à la vostre. En la male heure (dist Lardenie) fustes vous oncques si folles estans dans le giron de deux si excellentes Damoyelles comme nous, & en auoir encores d'autres en vostre souuenance, veu que nous sommes assez belles pour vous contenter de nous mesmes. Helas ma dame Lardenie (dist Daraide) comme voulez vous que celle qui s'oublie pour se souuenir de sa dame, puisse auoir autre chose en la memoire que celle qui la fait oublier de soy-mesmes. Alors la Duchesse dist: Mais qui vid onc telles folles? allez vous en dōc à celles qui vous tourmentent tāt la fantasia, car ie serois trop mal auisee d'aymer en vn lieu ou ie ne suis aucunement aymee: Acheuant ces paroles elle se leua, & dist à la marquise: Ma grand'amy, venez ça, & dansons ensemble, à fin que ces sottises cognoissent combien nous auons peu de soucy de leurs sottises: car par ce moyen nous les recompenserons du peu d'eslime qu'elles font de nostre beauté: Et ainsi se mirent toutes deux à sauter, danser, & chanter d'une fort bonne grace: & apres s'estre en ceste façon mocquées d'elles quelques tēps la duchesse dist à Daraide: Or sus, ie veux que vous croyez que ie suis Diane, à fin d'

ouir vn peu de voz folies amoureuses: mais i'entens que vous faciez voz doleances cōme Cheualier & non comme Damoyelle. Or la doncq', & nous verrons comme vous sçauiez bien dire. Toutes les Damoyelles se prirent à rire de ce propos, mais encores plus la Princesse Diane, & la Roynie Brian-gie qui escoutoient ententiuelement la Duchesse, laquelle s'asit comme au parauant, & la marquise avecq' elle, reprenant les deux amoureuses en leur giron. Mais Daraide plus pour complaire à ses passions, qu'aux paroles de Lardenie, sans penser (cōme il auient souuent aux amoureux) qu'elle seruoit de risée à toutes les Damoyelles, commença ses complaints en ceste sorte: Puis qu'il est ainsi, ma dame Diane, que les dieux ont donné à vostre hauteur vne beauté suffisante pour embrasser toutes les creatures qui la peuuent comprendre tant soit peu, comment pourrez vous acuser les flammes esquelles ie brusle par vostre moyen, veu qu'elles se descourent en la presence de celle qui les a elle mesme alumees. Helas, ma dame, regardez comme vostre cheualier est presque desia reduit en cendres: & comme toutes les larmes qui roulent de ses deux yeux, ains plustost de ses deux ruisseaux, le long de sa triste face, ne peuuent suffire pour temperer les feux de vostre iniuste & obstinee cruauté. O moy miserable! que feray-ie puis qu'en vous faisant sçauoir mon mal, ie me defais & en me retardant de le vous dire, ie retarde aussi d'autant l'esperance de mon remede! O Amour, ie te supplie donnet delormais quelque repos à mes douleurs, ou par vne plus heureuse vie, ou par vne prochaine mort. Helas ie meurs, & vous ma dame, qui en estes l'ocasion, n'auiez aucune pitié de celuy lequel languist pour l'amour de vous en vn desesperé martire. Considérez que si pour quelque temps vous mettiez en oubly voz grandes & souveraines perfections, bien toit il vous souuiendrait de la grandeur de mes merites, & de ce en quoy l'extremité de ma passiō

vous.

vous a obligee enuers moy. Helas, ma dame, combien vous cognoistriez mieux mes tourmens, mes martires, mes douleurs, mes soupirs, mes traux, & les ardantes flammes de mon amour, si vous y vouliez auoir esgard sans regarder à celle diuine beauté, qui empesche que personne ne puisse estre digne de vous, si ce n'est quelqu'un des plus haultz & souverains dieux immortelz. Mais helas! mon extreme malheur veult qu'à la façon du paon, ie deface la belle rouë conceüe par l'esperance de mes pensées, en regardant à la laidure des pieds qui est le peu de merite que ie recognois en moy mesme. Ainli ma dame, la cognoissance de vostre grandeur vous garde d'estimer ma petitesse. Alors Daraide ietta vn grand soupir adioustâr encores ces motz: O dieux enuoyez moy la mort pour viure puis que maintenant ie ne vy sinon pour mourir. Elle prononçoit ces paroles avec telle solemnité d'angoisses & de larmes, que la Duchesse Lardenie en eust grande compassion: toutesfois le dissimulant, luy dist: En male heure vous ay- ie dit que vous me fîsiez voz prieres comme à vostre dame: car vous m'avez rédu mon passertemps bien cher, ou à tout le moins à ma robe, qui est toute gastee par voz belles pleurs amoureuses. Ma dame (dist elle) personne ne vous a fait tort qui n'ayt bien le moyen de le recompenser. Et qui me l'a fait ce tort? dist la duchesse. C'est celle (dist Daraide) qui en reçoit vn plus grand contentement, q̃ vous n'en scauriez auoir de domnage. Je n'entens rien en ce contentement (dist Lardenie) puis que ma robe en est gastee. Si vostre robe, respondist Daraide, eust peu auoir quelque sentiment, ie ne l'eusse tant sceu endommager par mes larmes, comme eile en eust receu de plaisir, attendu q̃ ces pleurs ne sont que souëfues & douces eaux distillees de fleurs odoriferâtes, que i'ay cueillies par mes pensées en la beauté & bonne grace de ma dame Diane: Je n'ay que faire de celà (respondit la Duchesse) ny de voz fleurs odoriferâtes, car si ma robe n'a point

de sentiment pour sentir le bien que vous luy faites, i'en ay assez pour cognoistre le dommage que i'en reçoÿ. Toutes les damoyelles rioient tresvolontiers de ces paroles, excepté Diane qui auoit senty les complaints de son triste amant iusques au cuer: au moyen dequoy par grande contrainte afin de dissimuler sa douleur enuers la Roine, elle faisoit semblant de rire avec elle des folies amoureuses de Daraide, combien qu'elle n'en eust aucune volonté: & deuez sçauoir que la Roine Briangie, le vray pourtrait de son amant, qu'elle regardoit comme vn ombrage pendant ces discours, fist beaucoup accroistre en elle la force des douloureuses lamentations de Daraide: car elle les pouuoit facilement entendre. Or apres auoir assez eu le passe-temps de ses railleries, qui toutesfois estoient prises à bon escient par ceux qui estoient passionnez de l'amour: la Royne Briangie & Diane s'en retournerent coucher. Et parce qu'il estoit desia bien tard, vn peu apres toutes les autres damoyelles se retirerent pareillement. Mais Diane & Daraide dormirent bien peu toute celle nuit: Diane pensant aux paroles qu'elle auoit ouy dire à son amy dans le iardin: & Daraide ne sçachâr comment se resoudre si elle se deuoit declarer à Diane, ou non: car elle craignoit que le temps ne descourist ce qu'au moyē de sa ieunesse elle luy auoit peu cacher iusques là. Elle continua quelque temps en ces incertaines deliberations, & en communiquoit souuent avecques Garaye, & avec dom Galtazar de Barbarousse qu'elle alloit presque voir tous les iours à fin d'en auoir son aduis. Or la laisserons nous en ces pensées, à fin que nous pensions de nostre costé aux autres grands Princes de la presente histoire.

Comme la nef des sages Alquis & Vrangande, avecques les nobles Princes qui estoient en icelle, vint surgir deuant la cité de Constantinople.

Desia

DEsia les cleres rayons du soleil com mençoient par vn beau matin à se respandre sur la marine, quand la nef en laquelle estoit le Roy Amadis, & la Royne Oriane, vint surgir deuant la cité de Constantinople. A l'aborder tous ceux de là ville ne furent moins esbahiz de la richesse & magnificence de celle grande nef, qu'espouuentez de l'horrible tonnerre d'un infini nombre d'artillerie, qui fut delaché du dedans en si grande abondance, que l'og temps apres lon ne voyoit goutte tout autour de la nef, tant estoit grande la fumee. Mais seulement on entendoit vne infinité de trompes bastardes, & Italiennes, entremeslees de hauts bois, de cornets à bouquin, & d'autres semblables instrumens haurains, qui par la plaisante douceur de leurs acords temperoyent l'horreur de l'artillerie. Mais à chef de piece, la fumee s'evaporant parmi l'air, lon vid les tours de la nef haucez iusques aux nuës, & sur le sommet aparoissoit vne grand' troupe de Damoiselles qui chatoient fort doucemēt, & iouoyent de luts, harpes, violons & autres instrumens de delicate harmonie. Alors l'Empereur Lisuart, & l'Imperatrix Abra estoient montez dans la plus haute tour de leur palais, pour voir ce spectacle tant estrange & merueilleux. Pareillement toutes les murailles de la ville, & tout le riuage de la mer estoient plains de peuple, qui acouroient de toutes parts. Or l'Empereur ayant assez contemplé les tours de la nef, il lui souuint de les auoir veuës arriuer vne autrefois en mesme lieu, & en mesme maniere, au temps que le Roy Amadis, & les autres Princes de son sang auoyent esté desenchantez : & partant il dist à l'Imperatrix Abra, & à la belle Roine Gradaflee qui estoient avecque lui : Certainement nous auons en nostre port les sages Alquis, & Virgande la descogneuë, avec quelques bonnes & ioyeuses nouvelles. Ainsi plaist à Dieu, dist l'Imperatrix, car nous en auons

bien besoing, veu le long temps qu'il y a que nous n'auons receu aucunes nouvelles de tant de Princes de nostre sang, qui sont respanduz deçà & delà par tout le monde. Pendant ces deuiz ilz virent ietter de l'une des tours, vn esquif plein de Cheualiers, dames & damoiselles richement en ordre : & soudain que l'Empereur les eut aperceuz, il monta à cheual, avec vne grande troupe des siens, & s'en allerēt tous ensemble vers la marine, ou ilz ne furent si tost arriuez, qu'ils trouuerent tous ces nobles Princes descenduz en terre. Or ne vous pourroit on reciter la ioye que receut l'Empereur Lisuart, quand il les recogneut à l'impourueuë, ni l'alagresse qu'ilz receurent pareillement les trouuans en tresbonne disposition. Apres les reuerences & caresses acoustumées en telles rencontres, les Princes & Princesses estans montez sur leurs cheuaux & pallefrois s'en allerent vers la grande cité : mais la foule du peuples, le tonnerre des artilleries qu'on delaschoit de toutes les tours de la ville, le son des trompettes, & les cris de ioye qui se faisoient de toutes parts menoyent si grand bruit qu'il estoit impossible aux Princes de s'entrouir en aucune maniere : car il sembloit que tous les habitants de la ville fussent sortis hors de leurs sens pour l'extremité de la ioye. En tel arroy, & avecques assez de peine pour la grande presse, le Roy Amadis & tous les Princes arriuerent au palais, en la basse court duquel trouuerent l'Imperatrix Abra, & la Roine Gradaflee, avec plusieurs autres dames & damoiselles, qui estoient descenduës pour les recevoir : par ce qu'elles auoyent esté aduerties de leur venue par Darinel, Mordachee & Busando, qui estoient couruz deuant pour leur anoncer ces bonnes nouvelles. Or n'y a il homme si bien disant, qui peust assez bien vous reciter les paroles amoureuses, les acolees, les reuerences & mille autres gracieuses caresses, lesquelles ces Princes & Princesses se firent lors les vns aux autres. Parquoy le meilleur sera en cest endroit nous imposer à nous-mesmes.

mesmes vn excusable silence, que parler d'auantage de ceste belle arriuee, aussi ne vous la scauroit on descrire tant elegamment, que l'eloquence des paroles, ne fust de beaucoup surpassée par l'excellence de la chose. Et à ceste raison nous ne vous en dirons rien plus, sinon que les Princes ayans esté receuz avecques les solennitez requises à leur grandeur, monterent dans le palais, & furent festoyez en grand' pōpe & magnificence: puis quelque temps apres furent depeschez plusieurs messagers, pour faire scauoir leur venue à tous les Roys, Princes, & Seigneurs de leur cognoissance, lesquels pour voir le Roy Amadis, la Roine Oriane, & l'Imperatrix Niquee, vindrent tous en la ville de Constantinople, incontinent qu'ils furent auertiz de leur arriuee: & entre autres l'Empereur Esplandian, & sa chere espouse, la Princesse Helene, le Roy Galaor, & sa Briolanie, le Roy Anaxartes, & Oriane, le Roy Olorius d'Espagne, & la Roine Luciane, l'Empereur Lucencio, & l'Empetiere Axiane, le Roy Birmartes, & la Roine Onorie l'Empereur Arquisil, & l'Imperatrix Arimde, le Roy Zair, & la gracieuse Timbrie, Perion Roy de la grand' Turquie, & la Roine Gricellerie, dom Florel Duc d'Austrie, & la Duchesse sa femme, & Ailande nouvellement Roine de Thrace, par ce que son pere estoit decedé vn peu au parauant. Apres ceux cy vindrent finalement tous les autres Roys, Princes & Seigneurs, dont nous auons faict mention en ceste grande histoire, lesquels estoient fort conuoiteux de reuoir l'Imperatrix Niquee, par ce qu'ilz auoyent esté long temps sans en entendre aucunes nouuelles. La belle Princesse Lucelle se trouua pareillement à ceste assemblée, avec le Roy Lucidor, & la Roine Leonorie, & trois ou quatre moys apres arriuerēt tant de Princes & Signeurs dans Cōstātinople, qu'il y en eut assez qui furent contrains de se loger dehors la ville dessous les rantes, en façon que le champs & les verdes prairies n'estoyent pour lors

moins peuplées, que du temps que Lucidor, souz le furnom des vengeancees, y estoit venu avecq' toutes ses forces cuidant recouurer la belle princesse d'Apolonie sa fiancée. Les festes, les banquets, les estranges auantures qui de ce temps arriuerent en celle noble cour, furent choses merueilleuses, trop plus diuines qu'humaines. La Roine Finistee fust lors fort prisee & honorée de tous les Princes & Princesses, tant pour son excellente beauté, comme pour sa louable vertu: au moyen de quoy ses parents & alliez receurent vne grand ioye, car ilz estoient appelez à maints hauts honneurs pour l'amour d'elle, que long temps au parauant ilz estimoyent estre perduë. Mais l'Infante Fortune faisoit plus esmerveiller la cour par sa seule presence, que toutes les autres auentures qui y peussent arriuer: tellement que ceux qui scauoient comprendre ses perfections, presageoyent à bonne raison qu'elle seroit vn iour le basilic de la nature humaine pour tous ceux qui oseroyent prendre la hardiesse de cōtēpler sa diuinité. En ces entrefaites les Princes estans assemblez en la grande sale du palais, les sages Alquis & Vigande leur dirent, que pour donner à cognoistre leur bonne volonté enuers eux ilz auoyent delibere leur alōger la vie de cent ans, outre le commun cours de nature: & ce pendant les maintenir tousiours en la naifue beauté de leur premiere ieunesse. Les sages ayans acheué leur propos, les Princes furent incontinent menez en vn riche baing, & les Princesses en vn autre, ou chacū d'eux fut lauē de certaine eau composee & odoriférante, & pareillemēt les sages qui l'auoyent faite. Apres le baing, leur fut donné à manger d'vne conserue de tresexcellēte saueur laquelle Galeris & les autres croniqueurs disent auoir esté faicte des fruits de l'arbre de vie, qui est en paradis terrestre, que les sages auoyent sceu recouurer par le moyen de leurs arts, pour en faire ceste noble conserue, qui pouuoit alonger la vie d'vn homme iusques à cent ans outre son naturel.

son naturel. Quand les Princes en eurent mangé, ilz reuestirent leurs riches acoustremens, & retournerent en la grand' sale, s'esmerueillans, & pareillement tous ceux qui les regardoient, de se voir en la mesme beauté & fraischeur qu'ilz auoient en l'aage de trente ans, excepté seulement que les barbes, & les cheueux des Cheualiers ne se changerent point en autre taint, ains leur demeura la blancheur naturelle pour donner autorité & maiesté à la fraische couleur de leur visage: de ceste faueur des sages, participerēt tous les Princes & Princesses du lignage d'Amadis, & pareillement tous ceux & celles qui estoient mariez en leur maison. Ainsi se passoit le temps en Constantinople, avecques vne si grand' ioye de tous, qu'il seroit impossible vous le raconter, & mesmement de la Princeesse Lucelle, qui se voyoit deliuree de tant de dangers, & perilz ou elle s'estoit veüe au parauant: mais sçachez qu'Amadis de Grece pour sa présence sentoient secretement en son cueur renouëller de plus en plus l'ancienne playe de ses premiers amours. En mesme estat se trouuoient dom Rogel, & dō Filisel pour estre continuellement avecques leurs Dames: & comme leurs passions se rengregioient d'heure en heure, auint vn iour qu'une Damoyseille assez belle, vestuë de deuil, entra dans la sale, & se mettant à genoux deuant l'Empereur Lisuart, le supplia puis qu'il auoit en sa cour tant de bons & nobles Cheualiers, qu'il luy pleust luy en donner deux, qui en sa faueur voulussent aller combattre pour elle en Athenes sur la querelle d'un chasteau dont elle auoit iniustement esté despoillée, d'autant que le Duc d'Athenes auoit ordonné que le combat fist aux parties raison de ce different. Incontinent que la Damoyseille eut fait sa requeste au Roy, dom Rogel, & dom Filisel, comme ieunes hommes preux & bien hardiz, & conuoiteux d'acquérir honneur, suplierent l'Empereur leur donner congé de s'en aller avecques la Damoyseille. L'Empereur leur acorda facilement ceste de-

mande, par ce qu'il la voyoit estre conuenable à leur ieunesse: à raison dequoy dom Rogel fit incontinent apporter ses armes: puis estant armé, & dom Filisel pareillement, prindrent congé de toute la cour au grand regret des Princes, & mesmement de leurs Dames, desquelles ilz se departirēt fort tristes, pours'esloigner de leur presence. Estans doncques montez à cheual, sans autre compagnie q̄ de leurs Escuyers, ilz suyurent la Damoyseille, qui n'estoit moins ayse d'auoir recouuert deux si nobles & vaillans champions, que toute la cour triste de leur depart, encores que tous les iours y auint quelque estrange auanture qui la rendoit honorable & luperbe par dessus les cours de tous les autres Princes du monde. Mais nous laisserons pour ceste heure Constantinople en ses triumphes, & parlerons des deux courageux Princes, qui s'en alloient avecques la Damoyseille d'Athenes.

Des gracieuses paroles que dom Rogel tint par les chemins à la Damoyseille Agreste qui le conduisoit.

CHAP. XI.

DOm Rogel, & dom Filisel estās sortiz de Constantinople, auertirent la Damoyseille Agreste qui les cōduisoit (car tel estoit son nom) de ne dire à homme du mode qui ilz estoient, d'autāt qu'ilz ne vouloient estre cogneuz. Et par ce qu'elle estoit belle & gracieuse, ilz tenoiēt eux trois ensemble maintz ioyeux propos: de sorte que dom Rogel deuint amoureux de sa bonne grace, & tirant vn peu à quartier son compagnon, commença à luy dire: Si vous ne faisiez point l'amour à ceste Damoyseille, ce me seroit vn grand plaisir que de luy faire: car ie la trouue de si beau maintien & d'une si douce contenance, que peut estre elle pourroit temperer la peine que ie souffre pour l'absence de ma Dame. Celle que ie souffre pour

D

l'amour

l'amour de la mienne (dist Filifel) ne scauroit permettre que ie prinse tant de liberté sur moy : mêmement que la beauté de ceste Damoyse ne pourroit estre assez excellente en mon endroit , pour me faire oublier la loyauté : que ie doy aux amours de ma Dame, & partât faites ce que bon vous semblera . Dieu soit loué (dist dom Rogel) puis que ie peux iouir d'un si grand bien sans vous faire aucun desplaisir. Vous dites vray (respondit Filifel) si la Damoyse le veult : Ouy elle le voudra, dist dom Rogel . Luy en auez vous desia tenu quelque propos : dist Filifel . Non, respondit dom Rogel . Comme scauez vous donc (dist dom Filifel) que sa volonté s'acordera si facilement à la vostre ? Par ce (dist dom Rogel) que ie iuge de son courage , par la comparaison que i'en fais au mien. N'y-vez iamais de ces iugemens (dist dō Filifel) car Amour ne garde aucune raison, & puis que vous vsez de tromperie enuers luy, pour ne maintenir la loyauté tant acoustumee entre voz ayeulx, ne vous esmerueillez point si vn iour il vous en fait souffrir la peine, que vostre inconstance merite. Ce sont folies (dist dom Rogel) voudriez vous que par vne trop grande loyauté, ie perdisse la iouissance de maintes belles Dames, & Damoyseles, quand ie les pourray trouuer à mon commandement ? L'estime ceux de trop meilleur auis qui prennent leurs bonnes fortunes à toutes les occasions qui s'offrent : & quand à moy, desormais i'en veux faire ainsi, moyennant que ma dame n'en soit aduertie. Or demeurez vn peu derriere, car ie suis cōtent d'essayer si ie ne pourray point faire quelque bonne trafficque avecque ceste Damoysele. Vrayement (dist lors dom Filifel) si vous prenez vostre inconstance pour le meilleur auis, vous me semblez bien le personnage mieux aduisé que l'aye point encores veu : allez donc & cherchez vostre bonne auanture, car ie me contēte de la mienne. Lors dom Rogel se prit à rire, & luy dist, Amusez vous à contempler vostre Dame en voz

penſees, & ce pendant s'il m'est possible, ie traiteray ceste-cy d'une autre façon . A tant dom Rogel s'aprocha de la Damoysele, & lui dist, Ma dame Agreste, vous n'auiez point tant affaire de moy pour le soustenement de vostre droit, comme i'ay maintenant affaire de vous pour estre deliuré de la force que vous me faites. Comment, monsieur, dist elle, & quelles forces sont-ce desquelles ie vous peu deliurer. C'est (dist dom Rogel) du peril auquel vostre grande beauté m'a reduit . A ces motz la Damoysele prit vn taint qui de beaucoup acreut sa naïfue & vermeille couleur, puis d'une gracieuse contenance luy dist, Ah monsieur, ie n'estime point ma beauté si grande, qu'elle vous ayt peu faire aucune force, arendu que vous estes du sang de ces grandz Princes de Grece, qui ne fut iamais suiet à telz changemens . Pourquoy dites vous celà ? dist Rogel . Je le dy (respondit Agreste) par-ce que ceux de vostre lignage se sont tousiours maintenuz en loyauté fort grāde enuers leurs Dames, qui me fait penser que ce seroit tresmal fait à moy, si ie vous estois occasion de commencer à rompre vne tant louable coustume. Et cōment cognoissez vous (dist Rogel) que ie suis amoureux en autre part ? Je l'ay cogneu, dist elle, par la contenance que ie vous ay veu faire depuis que nous sommes partiz de Constantinople : car les gestes de vostre visage m'ont facilement donné à cognoistre les pēſees de vostre cuer. Que scauez vous (dist lors dom Rogel) si vostre beauté m'a point mis en ces penſees que vous dites. Je ne ſçay si i'en suis cause (respondit elle) mais iusques à ceste heure vous ne me l'auiez pas beaucoup donné à cognoistre. Sachez, ma Dame, dist il que vous seule auez esté l'ocasion de mes douleurs, & qu'autre que vous ne peut commander à mes desirs. Dieu soit loué, dist elle en riant, puis que ie suis la maistresse d'un si preux Cheualier. Ainsi pouuez vous bien dire (dist dō Rogel) puis que vous auez entiere puissance sur mon cuer ; partant, ma Dame, ie vous

vous supplie si ie suis venu avecques vous pour vostre bien, que ce ne soit point pour mon mal, ce qui auindra s'il ne vous plaist m'otroyer la iouissance de vostre amour. La Damoiselle respondit en souzriant, Voz amours nous viendront fort bien à propos car par ce moyen nous aurons assez de quoy parler, & passer le temps par les chemins. Làs! ma Dame (dist-il) pour Dieu ne prenez point en raillerie, ce que ie vous dy à bon escient, si vous ne voulez estre cause de ma mort. Ie ne vous voi point encores en si grand peril (respondit elle) mais quand ie vous verray en telle extremité, lors i'auiseray à ce qu'il me conuiendra faire. Et que sçavez vous (dist le Cheualier) si estant venu en telle extremité, vous aurez le moyen de me donner quelque remede, ny moy de le receuoir? parquoy, ma Dame, faites que ie le reçoynie tout maintenant, tandis que vous avez l'opportunité de me l'otroyer, & moy la puissance d'en iouyr. La Damoiselle se prit à rire, & luy dist, Vrayement ie voy, & croy à ceste heure q'iamais vous n'avez esté amoureux en autre part, A quoy, dist le Cheualier, le cognoissez vous mieux que n'agueres? A la haste (respondit elle) que vous avez de receuoir la guerison de vostre mal: car ceux qui iamais n'ont esté malades, desirent ainsi recouurer promptement ce qu'ilz demandent, sans regarder si la briefueté du temps est point contraire à leurs desirs. Ie vous prie, ma Dame, dist dom Rogel, ne parler iamais de prolōger le temps à ceux qui sont en vn perpetuel desir, puis qu'ilz ne sçauroient auoir le temps si brief, qu'ilz ne le trouuent encores trop long. Sachez aussi que le mal de l'amour est de ce naturel, que d'autant que l'esperance s'esloigne d'autant plus la fin de la vie s'aproche. En pareilz & autres gracieux propos ilz continuerēt leur chemin tout le iour, la Damoiselle se deffendant d'une fort bonne grace, & dissimulant par grande sagesse la bonne affection qu'elle portoit secretement à son nouuel amy. La nuyt apres dom Rogel, &

dom Filisfel passerent entre eux maintes railleries & gaudisseries sur ces amourettes. Mais quel plaisir seroit-ce disoit Filisfel, si ceste Damoiselle ne vous ottoiroit point la iouissance de sa bonne grace, & que vous eussiez enuers moy perdu la bonne reputation que i'auoys de vostre loyauté? Ie ne croy pas, dist dō Rogel, qu'elle me voulust faire ce tort, car encores qu'elle se deffendist assez de paroles, si est-ce que i'ay facilement cogneu par ses gestes, que ie ne luy estois point trop desplaisant. O Dieu (dist dom Filisfel) qu'à bonne & iuste occasion lon à acoustumé de paindre le dieu d'Amour au eugle, puis que vous voulez prendre par vn faux semblant, l'esperance que les paroles vous denient. N'en faites aucune difficulté, dist dom Rogel, car l'experience m'a desia rendu maistre, Filisfel se prit assez à rire des propos de son cōpagnō & luy dist, L'aage ne vous permet encores à grand peine d'estre amoureux, & neantmoins vous pensez estre desia bien sage, & bien experimenté en l'amour. Dom Rogel en riant luy respondit, Et bien de par Dieu le tēps vous donnera à cognoistre si ie suis deceu ou non. Avecques ces ioyeux propos ilz continuoient leur chemin, mais tant ya que dom Rogel sceut si bien conduire ses affaires, qu'au troisieme iour il obtint ce qu'il demandoit de la belle Agreste, n'estant moins ioieux d'auoir trouué à quoi esbatre sa ieunesse en son voyage, que la Damoiselle ieuiue pour estre aymee d'un si vertueux Cheualier autant à droit aux ioustes de la nuyt, comme courageux à celles du iour. En ce deduit apres auoir fait reparer plusieurs outrages que lon faisoit par les chemins à maintes Dames & Damoysselles ilz arriuerent en la cité d'Athenes.

Comme dom Rogel & dom Filisfel estans arriuez en Athenes, dom Filisfel s'en amoura d'une belle & gracieuse Dame, nommee Marsire, & d'une lettre qu'il luy escriuit.

CHAP. XII.

LEs deux Princes estans arriuez en Athenes, la Damoysselle Agreste les mena deuant le Duc, & le suplia qu'il lui pleust mander les deux Cheualiers freres, qui tenoient son chasteau par force, disant qu'elle auoit expressement amené ces deux Cheualiers pour la deffense de son bon droit. Le Duc fit incontinent appeler les deux freres, qui s'esbahirent assez, & toute sa cour pareillement de la braue representation des deux Cheualiers qu'Agreste auoit amenez avec elle. Or les deux freres venuz, le combat fut acordé au iour ensuyuant, avec condition que si les deux freres estoient vaincuz, ilz rendroient le chasteau de Valcaçar à la Damoysselle Agreste, & s'ilz estoient victorieux, le chasteau leur demeureroit, sans que la Damoysselle fust plus receuë à le quereller à l'auenir. Ainsi se donnerent les gages du combat les vns aux autres, passans tout le reste de ce iour en diuers passetemps, mesmement les deux Princes ausquelz le Duc faisoit grand honneur, comme à ceux qu'il estimoit estre de quelque haut lignage, encores qu'il luy fust incogneu pour lors. Le lendemain vn ancien Cheualier par le commandement du Duc s'en alla avecq' cinq cens Cheualiers deuers les deux freres & les mena en vne grande place ou se deuoit faire le combat. A leur arriuee le Duc avec tous ses Cheualiers monta en son eschauffaut, & en plusieurs autres monterent les Dames & Damoysselles, tant celles de la cour du Duc, comme celles de la cité, entre lesquelles y auoit vne Dame fort excellente mariee avec vn Cheualier nommé Landanin. Elle estoit encores ieunette, & accomplie, en bonne grace, & en beauté sur toutes les Dames d'Athenes, de sorte qu'on l'apelloit communément la belle & gracieuse Marfire: & ce qui l'auoit meué à venir voir le combat, estoit que les deux Cheualiers freres auoient le renom d'estre les deux plus vaillantz champions qui fussent en la cour du Duc. Le

Cheualier ancien les ayant mis dans le camp s'en vint pareillement conduire dom Rogel, & dom Filisfel, lesquelz se presenterent deuant leur aduersaires avec si braue contenance que tous les asistans en furent esmerueillez. Adonc Filisfel commençant à faire laisser son armet, leua les yeux en haut, & aperceut la gracieuse Marfire, laquelle il trouua tant belle, & tant excellente qu'il n'y eut en luy chose assez forte pour empescher que la violéce d'une si parfaite beauté ne le rendist entierement son esclau: lors il dist à part soy, O Dieu ie ne sçay pourquoy ie me sens tant cruellement nauré, & captif, si ce n'est à fin que par le bon courage qui s'acroistra en moi pour estre ainsi vaincu, ie puisse gaigner la louange d'estre le vainqueur de tous les autres. En disant ces motz il regarda de rechef la belle & gracieuse Marfire, laquelle, comme sage & bien auisee qu'elle estoit, s'aperceut incontinent de la playe amoureuse dont elle auoit nauré le cuer du ieune Cheualier. Or les combatans ayans lassé leurs armetz, & estans mis dans le camp, le soleil leur fut departy également, & apres que les solemnitez acoustumees en tel cas furent paracheuees, la Damoysselle Agreste monta en son eschauffaut, & les trompettes donnerent le signe du combat, Alors le quatre Cheualiers bien couuertz de leurs escuz se vindrent rencontrer les lances baissées avecques toute la force des hommes & des cheuaulx. Mais sachez que ceste iouste fut fort admirable, car les Cheualiers acheuans leur carriere, le combat fut pareillement acheué, par ce que les deux freres rompirent leurs lances dans les escuz de leurs aduersaires, mais dom Rogel & dom Filisfel les ataignirent de si droit fil, qu'ilz leur faucerent les escuz, & perçans la cuirasse & la maille, les firent sauter en l'air plus d'une toise par dessus les croupes de leurs cheuaulx, ayant chacun d'eux vn grand tronçon de lāce au trauers de la poitrine, tellemēt qu'ilz tomberent tous mortz en terre, sans plus remuer ny pied ny main.

main. Les deux Princes estans passez outre fort dispostement, mirent soudain pié à terre, & vindrent vers les deux freres, ausquelz ilz ostèrent les heaumes, mais voyâs qu'ilz estoient desia morts, s'en allerent deuant l'eschauffaut du Duc, & luy demanderent s'il ne leur restoit plus rien à faire pour remettre la Damoyelle en la possession de son chasteau. Le Duc leur respōdit qu'ilz auoyent assez fait, tant pour la Damoyelle Agreste, que pour eux, pour la Damoyelle, en luy reconurant son chasteau, pour eux en conquerant l'immortelle louange d'auoir si facilement occis deux tant preux & hardis Cheualiers, comme estoient estimez les deux freres. Ilz ont esté occis, dist dom Rogel, par les mains de la iustice diuine, qui sont de trop plus grande puissance que le nostres. En ces entrefaites Agreste vint par deuers eux, avec telle ioye qu'elle sembloit estre hors de son sens, & leur vouloit baiser les mains, mais ilz ne le permirent, ains l'embrasserent fort gracieusement, mesmement dom Rogel. Avecques ceste victoire les deux Cheualiers furent conduitz hors du cāp en grand triomphe, au son de plusieurs fifres, trompettes, clairons, & tabours. Et par ce qu'ilz auoient osté leurs armetz, dom Filisfel ne pouuoit aucunement retirer sa veuë de dessus la belle & gracieuse Marfire, laquelle dissimuloit fort sagement ce qu'elle souffroit pour sa beauté, le cognoissant vaincu par la sienne. Or les deux Princes estans retournez en leur logis, le Duc fit rendre aux parens d'Agreste en son nom, le chasteau de Valcaçar, & bien tost apres alla luy mesmes visiter les deux Cheualiers, & les pria demeurer en sa cour pour quelque temps. Dom Filisfel qui ne demandoit autre chose pour l'amour de la belle Marfire, & craignant que dom Rogel n'en fist quelque difficulté, respondit incontinent au Duc, & luy dist, Seigneur Duc, ce nous sera grande faueur de demeurer en la compagnie d'un tel Prince comme vous estes, & partant si mon compaignon

est de cest auis, ie seray fort ioyeux de demeurer pour quelques iours en vostre cour. Ceste responce ne pleut beaucoup à dom Rogel, & en estant aucunement émerueillé, luy dist, Ce qui vous plaist me plaist bié aussi, mesmement ce ou monsieur le Duc pourroit prendre quelque plaisir. Le Duc les ayant remercié, les mena en son palays, ou il leur fit tout l'honneur qu'il luy fut possible, & commanda que lon leur donnast un beau corps de logis qui estoit aupres du sien: toutesfoys pour tout le bon traitement du Duc ilz ne voulurent iamais descourir qui ilz estoient. La Damoyelle Agreste demeueroit lors au logis de la Duchesse, pour iouyr de la presence, & de l'amour de dom Rogel: mais dom Filisfel estoit en extreme ennuy pour ne scauoir en quelle façon il feroit entendre ses passions à la belle & gracieuse Marfire, car il n'auoit aucun moyen de la voir en lieu du monde, sinon en un temple ou elle alloit tous les iours à la messe accompagnée de ses Dames & Damoyelles: La premiere foys qu'il l'y vid, elle estoit vestuë d'un habillement noir, avec vne coiffure de dueil, par les franges de laquelle aparoissoient quelques petites tresses de ses cheueulx annelez & frisez d'une tant bonne grace que dom Filisfel tout esperdu ne scauoir qu'elle contenance tenir. Quelquesfoys quand elle s'en vouloit retourner de la messe, il l'atendoit de propos delibéré en la rue ou elle deuoit passer, & neantmoins faignoit l'auoir rencontrée par fortune: puis la conduisoit en sa maison, combien qu'avec vne grande honnesteté elle le vouloit empêcher de prendre tant de peine. Estans arriuez à son logis, il prenoit congé d'elle avecq' maintes gracieuses reuerences, & s'en retournoit autant outré de douleur cōme s'il eust laissé son ame & sa vie avecques la belle Marfire: puis se voyant seul se plaignoit ainsi tout à part luy: Helas! madame Marfire! combien fut mal-heureux pour moy le iour que ie vy vostre souveraine beauté, veu que par ce moyen ie voy

maintenant ma mort tant proche, & tant esloigné le remede que ie desire, & que vostre honnesteté me refuse. Est il possible, ma dame, qu'auecques telle nonchalance vous puissiez considerer mô soucy? & que d'un si ioyeux visage vous puissiez regarder ma douleur? Helas! faudra il donc que ie me travaille à vous faire sçauoir ce que mon aparent martire, & vostre sage discretion vous peuent trop facilement faire entendre? Plusieurs autres & semblables propos tenoit dom Filisfel à part soy, souffrant vne douleur desmesuree pour ne sçauoir à qui descouvrir & communiquer ses angoisses. Or pour donner quelque soulas à son tourment, il trouua moyen de prendre amitié anecques le Cheualier mary de la belle & gracieuse Marfire, lequel souuent il alloit voir, tellement que souz ceste couuerture il iouyssoit de la compagnie de sa dame, sans toutesfois auoir autre moyé de luy declarer son tourment, & la douleur qu'il enduroit pour l'amour d'elle, sinon par ses continuelles œillades, & autres signes amoureux. Et voyant comme elle sçauoit bien dissimuler la cognoissance de ses affections, & cōme elle le mettoit en plusieurs sages & chastes propos fort esloignez de son vouloir il disoit à luy mesmes? Ah trahitresse Marfire, auecques quelle grace tu sçais dissimuler ce que ta discretion ne te peut aucunement couvrir! O moy malheureux, qui reçois tout le plaisir que lon pourroit dire en iouyssant de ta compagnie, & toute la tristesse qu'on pourroit penser en te voyant tant iniustement vser d'une si grande dissimulation enuers moy! Helas! ma dame si vous voulez continuer en ces cautelles, ie voy bien que ma seule mort vous donnera le vray tesmoignage de mes martires. Mais ie me trompe, & ne puis maintenant penser que vous cognoissiez mon bon vouloir, car il est impossible si vous l'entendiez, qu'au moins vous n'eussiez quelque compassion de ma langueur. Ainsi parloit à luy mesmes dom Filisfel, comme s'il eut parlé à sa dame, sans pou-

voir apprendre ny penser aucun moyen de luy faire entendre ses douleurs, & sans les oser descouvrir à personne du monde. Il passoit les iours en travail, & les nuytz sans aucun repos. Entre plusieurs & diuerses pensees, il s'auisa finablement de luy rescrire, & faire en sorte que sa lettre luy fust donnee de la part de quelque sienne amye, qui pour lors n'estoit en Athenes. L'execution de ceste ent reprise de Filisfel fut entierement correspondente à son vouloir, car vn iour que Marfire estoit seule auecques ses dames & damoyelles, il luy enuoya sa lettre par vn sien page. Marfire l'ayant receuë, l'ouurit & la trouua de ceste teneur.

*Lettre de dom Filisfel de Montespín
à Marfire.*

A la belle & gracieuse Marfire, dom Filisfel de Montespín enuoye le salut & le bonheur que luy mesmes a perdu par la violence de sa diuine beauté. Je ne sçay, ma dame, dequoy ie me doy plaindre d'auantage, ou de la peine que ie souffre pour vostre amour, ou de ce que ie ne vous la puis faire cognoistre telle que ie la sens, car par ce moyen ma peine est autant trauaillee voulant s'exprimer par mes paroles comme ie suis moy mesmes trauaillé pour ne la pouuoir exprimer. Mais, o moy bienheureux! puis que la puissance que j'ay eue d'endurer mon mal, a tousiours iusques icy supleé au deffault qui estoit en moy de le vous pouuoir faire entendre. Je croy neantmoins, ma dame, que vous pouuez facilement cognoistre l'extremité de la douleur que ie ne vous puis declarer, au moins si vous voulez auoir esgard à la grande beauté & aux bonnes graces dont vous surpassez toutes les autres dames de nostre temps, & desquelles ie serois indigne, si mon courage voué à vostre perpetuel seruice, & la force de ma douleur ne m'eussent donné quelque occasion de les meriter & la hardiesse de vous descouvrir mes passions

sions, pour vous supplier les guerir par le remede que vous pouuez sçauoir estre necessaire à vn tel mal. Ce sera, ma dame, vne chose fort bien seante à vostre gracieuseté acoustumée, si tout ainsi que maintenant vous estes l'ocasion de ma maladie, vous estes pareillement à l'auenir l'ocasio de ma santé. Et partant, ma dame, ie vous prie prendre quelque compassion du mal que vous me faites souffrir si iniustement, & m'assigner lieu auquel ie puisse auoir le moyē de vous faire ouyr par ma bouche, & vous tesmoigner par mes larmes, ce que i'endure en vostre seruice. Car selon vostre response, ie pourray puis apres continuer ma vie avec vne nouuelle ioye, ou bien la finir avec mes anciennes douleurs, à fin que par ma miserable mort ie laisse à vo^s, & à tout le monde vn asseuré tesmoignage de vostre inhumaine cruauté, & de mes mortelles angoisses. Ie vous supplie donc, ma dame, apres auoir mille foys baisé & rebaisé voz belles mains, me donner le remede qui depend entierement de vostre pitié, si mieux vous n'aimez faire cruellemēt mourir,

*Ce luy qui n'a enuie de viure, que pour
meriter vostre bonne grace.*

La belle Marfire ayant leu ceste lettre, fit semblant de n'y auoir rien entendu, & renuoya le messager sans tenir aucun conte ne de lui ny de celuy qui l'auoit enuoyé par deuers elle: au moyen dequoy l'ennuy de dom Filisfel se rengregea de beaucoup voyant que sa dame ne faignoit seulement de n'auoir point receu sa lettre, mais encores fuyoit sa compagnie par tous moyēs de sorte qu'estant à sa fenestre, si par fortune elle voyoit passer son triste amant, elle destournoit le visage, faignant ne l'auoir point aperceu. Avec ce mauuais traitemēt le cheualier demeura par quelques iours en si grand langueur, qu'il en deuint tout maigre, & desfiguré, sans retenir aucune aparence de son alegresse acoustumée. Il passoit les nuitz entieres sans dormir, par-

lant continuellement à Marfire, & se plaignant de sa cruauté. Il lui enuoya aussi plusieurs autres lettres auxquelles elle ne fit response non plus qu'à la premiere, faignant tousiours ne les auoir ocques receuës, & de ne sçauoir q̄ c'estoit qu'il vouloit dire partant de messages & de missiues. A raison de quoy dō Filisfel estoit reduit en telle extremité qu'il n'esperoit pl^{us} q̄ la mort pour son secours, tāt il voyoit sa Dame peu sociouse de sa douleur. Ce pēdāt dom Rogel passoit tout son temps à la chasse avec le Duc, & à deuiser avecq̄ la Duchesse, & maintes belles Damoiselles de sa cour, dissimulant par sa courtoisie le peu de plaisir qu'il prenoit en la ville d'Athenes à fin de satisfaire à son cōpagnon qui ne s'en vouloit aucune mēt esloigner. Or se doutoit-il bien que dō Filisfel fust amoureux de quelque dame Athenienne, mais il pensoit que de peur de quelque honte il ne luy voulust descourir ses amours, combien qu'il ne les luy peust longuement celer pour le changement de sa couleur, qui pallissoit & flestrissoit de iour en iour, car d'autant plus que les passiōs du triste Filisfel s'acroissoient, d'autant plus son esperance se diminueoit, tellement qu'il ne se vouloit plus trouuer sinon es lieux solitaires, pour mieux estre acompagné de sa Dame, avec laquelle il parloit comme si elle eust esté presente, & se plaignoit d'elle, disant, Helàs! ma Dame, comment pouuez vous ainsi esloigner vostre bonné grace de moy, vœu qu'en elle gist ma vraye ame, & que mon corps n'en recognoist d'autre pour le soutenir plus long temps en vie. En telles & semblables exclamations le Cheualier passoit ses iours, s'estimāt du tout oublié, & hay de la belle Marfire, sans plus pourchasser son amour, sinon que la voyant quelquefoys, il luy donoit à cognoistre par son pale taint, & par sa mortelle tristesse, la douleur, & le desespoir de son courage. Elle dissimuloit tousiours discretēmēt d'entēdre son mal, & dissimula long tēps apres d'une fort bonne grace, & par grande sagesse, couurant souz

vne fainte honnesteté, la compassion qu'elle auoit de la miserable vie ou elle le voyoit réduit pour l'amour d'elle.

Comme la belle & gracieuse Marsire enuoya vne sienne Damoysselle nommée Cardoine vers dom Filisfel pour le consoler en sa lāgueur, & du surplus qui en auint.

CHAP. XIII.

LA dissimulation de la belle & gracieuse Marsire ne sceut tant resister aux forces de l'amour, ny à la pitié qu'elle deuoit aux passions de dom Filisfel, que finalement apres auoir long temps experimenter auecques quelle fidelité il l'aymoit & honoroit, elle ne se sentist obligee à luy faire quelque faueur, à fin de maintenir en vie celuy qui pour l'amour d'elle estoit tant prochain de la mort. Ainsi forcée de ceste contrainte pitié, estant desia dom Filisfel desesperé de tout secours, & n'attendant, plus que la fin de sa vie pour mettre fin à sa douleur, elle enuoya secretement vers luy pour le consoler, vne sienne Damoysselle nommée Cardoine, qu'elle auoit nourrie en sa maison des sa premiere ieunesse. Parquoy la Damoysselle suyuant le commandement de sa maistresse, s'en vint vers dom Filisfel, & luy demanda s'il la cognoissoit. Je ne scaurois (respondit-il) me cognoistre aucune des choses appartenantes à celle, qui si long temps à me cogneu la douloureuse vie que ie souffre pour sa beauté: partāt, Cardoine mamye, dites moy s'il vous plait l'occasion pour laquelle vous estes venue par deuers moy. Seigneur dom Filisfel (dist elle) ie suis icy venue pour vous consoler en vostre tristesse, & vous faire entendre de la part de ma dame Marsire, comme hier estant à vne fenestre, elle vous vid passer auecques tāt d'ennuy & de douleur qu'estat meue à pitié de vous voir en si miserable estat, elle vous prie prendre cueur, & vous conforter, car ie vous assure qu'elle souffre grande tristesse pour vo-

stre mal, comme celle qui vous ayme d'un ferme & loyal amour, & qui toutes les foys qu'il luy sera possible, sera fort ioyeuse d'estre en vostre compagnie, s'asseurant que vous aurez tel égard à son honnesteté, comme sa grandeur & sa bonne renommée le meritent. La ioye que receut dom Filisfel de ses nouuelles fut si grāde, que bien peu s'en salut qu'il n'en sortist hors de son tēns, & lui dist, Helās, mamye Cardoine, cōme ay- ie tant peu meriter enuers Dieu qu'en vne si grande douleur ma dame Marsire me soit venue secourir, alors que desesperé de tout remede, ie n'atēdois plus que la mort pour resinoigner sa cruauté & ma misere. Dites luy que ie la remercie treshumblement de la grande faueur qu'elle m'a faite, & s'il lui plait m'en faire d'auantage que ce soit auecque la diligence que ma necessité le requiert: car ie me sens en telle angoisse estant ainsi esloignée de ma Dame, qu'il n'y a temps pour brief qu'il puisse estre, qui ne me semble durer plus de mille ans. Je vous prie doncques, m'amy Cardoine, me moyennier quelque bon remede enuers elle: & puis que vous cognoissez ma douleur, prenez en compassion, & suppliez ma dame Marsire de ma part qu'elle ne refuse point à ma tristesse, la pitié dont elle luy est obligee, d'autant qu'elle est la seule occasion de mō mal. Seigneur Filisfel (dist Cardoine) resiouissez vous seulement, & prenez bon courage, puis que ma Dame le veut ainsi, & ie la supplieray de tout ce que me venez de dire. Las! m'amy Cardoine (respondit il) ie ne puis aucunement me resiouir, ny me reconforter estant ainsi esloigné de ma Dame: & par tant si vous desirez, & si elle desire ma vie, faites que ie puisse bien tost recevoir d'elle quelque meilleure consolation, en luy declarant moy-mesmes la peine que ie souffre pour l'amour d'elle. Je le feray (dist Cardoine) mais ce pendant esloignez de vous ces douloureuses penſees, & reprenez vostre premiere couleur, en oubliant le mal qui est cause de vostre peine, & ensemble de celle

celle de ma dame pour l'ennuy auquel elle vous voit. Helas ma grâde amie (dit Filisfel) ne me dites point que j'oublie le mal duquel ie reçoÿ vn si grand heur, puis que les beautez & les bonnes graces de ma dame Marfire ne donnent point tant de liberté à ceux qui peuuent comprendre sa diuine beauté. Làs! vous pouuez cognoistre que mes playes ne peuuent receuoir aucune guerison de lieu du monde, sinon de celuy auquel elles prindrent leur naissance: par tât tâtis que ce remede me sera differé, ie vous prie auoir souuenance de moy, & me visiter, & consoler souuent en mes martyres: & ce pendant m'entretenir tousiours en la bonne grace de ma dame. En acheuant ce propos il l'embrassa, & elle prenant son cōgé se departit de lui le laissant en bonne esperance de receuoir bien tost quelque meilleure fortune. Auecques grand contentement de ceste faueur, dom Filisfel passa trois iours entiers & le quatriesme au matin Cardoine revint à luy avec maintes affectueuses recommandations de sa maistresse, le priant qu'il se resouist & laissast sa douleur acoustumee, d'autant que ma dame Marfire fort compassionnee de sa douleur luy donnoit congé de la venir voir sur le tard, & que s'il les trouuoit toutes deux seules, il pourroit bien parler à elle, l'assurant qu'elle l'escouteroit volontiers auecques l'honnesteté qui luy deuoit estre gardée. Dom Filisfel fut fort resiouy de ces nouuelles & apres auoir prié Cardoine de dire à la dame qu'il luy rendoit mille mercis de ceste faueur, la Damoyelle prit son congé, le laissant en extreme plaisir. Ce iour luy dura cent ans à passer, & sur le soir s'en alla au logis de la belle & gracieuse Marfire, qu'il trouua en vne sale richement tapissée, sans auoir auec elle autre compagnie que Cardoine. Adonc contemplant ses diuines beautez, & voyant le temps si oportun pour luy declarer sa bonne volonté, il entra en telle confusio qu'il ne scauoit que dire ny que faire. Finablement s'estant assis aupres d'elle, il luy dist: Je vous supplie

ma dame, me presenter voz belles mains, à fin qu'en les baisant ie vous remercie de la faueur que vous m'avez faite, me donnant le moyen de vous descouurir la miserable vie que ie meine pour l'amour de vous. Seigneur dom Filisfel (respondit la belle Marfire) ie serois fort contente que vous ne souffrissiez point la peine q̄ vous dites, & que l'amour que vous me portez, fust tel qu'il me laissast auec mon honneur sans en rien diminuer ma chasteté acoustumee: car autrement ie n'estimerois que l'amour duquel vous me parlez fust amour, mais plustost quelque autre chose contraire, veu qu'il me priueroit du plus heureux contentement que ie demande, qui est de m'entretenir tousiours en ma bonne renommee. Et quand bien ie voudrois ce que vous voulez, encores ne pourrions nous auoir autre commodité pour executer nostre vouloir, que celle laquelle nous auons maintenant, qui seroit de parler quelque fois ensemble: partant ie vous prie vous contenter de ce que ie vous ayme avec l'amour que ie vous dy, & non autrement. Làs ma dame (dist lors Filisfel) ie vous prie ne me tourmèter plus de telles paroles, veu q̄ ma douleur ne les peut endurer, & que pour mon regard ie ne veux, & ne puis destourner de moy ce grand amour que ie vous porte: ie vous supplie doncques me faire tant de faueur que me permettre de baiser voz belles mains. Marfire voyant la douleur de dom Filisfel, & l'affection de laquelle il la supplioit, auecques vne fort bonne grace acompagnée de quelque grauité biéseante à sa discretion, luy presenta ses blanches mains, lesquelles il prit entre les siennes, & les baisant & rebaisant souuentefois auecque si grande ioye que lon ne vous la pourroit exprimer, il disoit: O ma dame combien ie reçoÿ maintenant de plaisir en iouissant d'une si grande faueur, comme de baiser ces mains ceteſſes & de contempler leurs excellentes beautez. O Dieu, combien par ceste belle & diuine main ie peu facilement cognoistre la diuinité de celles

par lesquelles cestes-cy peurent estre produites au monde! En acheuant ces propos il commença à ne se contenter plus de ceste faueur, ains (comme il auint souuent aux vraye amans de n'estre iamais bien satisfaitz pour l'accomplissement de leurs premiers desirs, iusques à ce qu'ilz ayent acōply le dernier & plus affectionné) dom Filisfel voulut passer plus outre se trouuant en si beau chemin, & dist à la belle Marfire; Vous plaist il, ma dame, me recompenser de toutes les douleurs, les angoisses, les passions, & de tous les trauaux que i'ay endurez pour l'amour de vous? & non seulement m'en recompenser, ains encores me rendre obligé à vous seruir & honorer tout le temps de ma vie? Marfire prudente & bien auisee, luy respōdit d'une fort bonne grace: Je ne suis pas encores deliberee de vous donner la recompense que me demandez. Je vous supplie, ma dame (dist dom Filisfel) me laisser pour bien guerdonné de tout ce que i'ay iamais enduré pour vostre amour, en me permettant de receuoir cest heureux guerdon de vostre belle & vermeille bouche. Il n'eut si tost dit ces paroles, qu'il les mit soudainemēt à execution avec si grande ioye, qu'il sembloit estre rayuy de ce monde, tant il baisoit affectueusement sa Dame, sans pouuoir separer sa bouche de la sienne pour l'extreme plaisir qu'il en receuoit. La grauité de Marfire meslee avecq' vn dedaigneux courroux, commença à embellir son beau visage de quelques nouvelles couleurs, pour le tort qu'elle pensoit luy auoir esté fait par dom Filisfel, & luy dist: Ce soir sera le premier, & le dernier que vous vous serez trouué avecques moy, puis q' vous auez osé prédre tant de hardiesse contre ma volonté. Dom Filisfel sentant vne douleur pareille à la mort voyant sa Dame tant irritée, luy respondit: Pour Dieu, ma Dame, ne me reprenez point d'auoir fait vne chose à quoy la force de l'amour m'a contraint. Que pourrois-je faire moins estât ainsi rayuy & éperdu par la contemplation de vostre souuerai-

ne beauté? Je vo^s supplie, ma dame, me pardonner si en celà i'ay cōmis quelque offense. Marfire avec vne bonne grace, que luy donnoyent son saint courroux, & son ire dissimulée, luy dist, Or sus (seigneur Filisfel) sortez dehors car pour vn coup vous auez assez receu de faueurs, sans attendre que lon vous les ayt donnees: vrayement ie ne vy iamais vn tant audacieux ny outrecuidé Cheualier comme vous estes. Puis que ie ne doy iamais retourner à vn si grād heur (dist dom Filisfel) ce pendāt que i'en ay l'opportunité, ie suis d'auis d'en prendre maintenant si bonne part, qu'à l'auenir ie n'aye aucune occasion de me plaindre de ma couardie, n'y d'auoir laissé passer ma bonne fortune sans en receuoir quelque plaisir. En acheuant son propos il serra Marfire fort amoureusement entre ses bras, lui baisant la bouche, les yeux, & le front au mieux qu'il pouuoit, sans la vouloir laisser pour qlque resistance qu'elle luy peust faire des bras & des mains tellement que Cardoine comme toute estōnee le vint tirer par le derriere, & luy fit abandonner sa maistresse. Combien que Marfire se monstroit lors fort courroucée, toutesfoys en regardant sa Damoyelle qui faisoit mille signes de croix, comme esbahie de l'audace du Cheualier avec toutes ses dissimulations elle ne se peut garder de rire d'une fort bonne grace. Dont Filisfel l'aperceuant luy dist, Helàs, ma dame, dequoy me pourrez vous maintenant le plus accuser, ou de ce que i'ay fait estāt rayuy par vostre beauté, ou de ce que ie feray cy apres ayant considéré vostre gracieuse contenance. En disant ces paroles il la prit de rechef entre ses bras & se mit à la baiser & rebaiser comme au parauant, & s'accoutuma deslors si bien à ces mignardes caresses que de là en auant en peut iouyr tout à son aysé avecques le consentement de la belle Marfire, laquelle neantmoins luy défendoit que sur sa vie il n'eust à passer plus outre, veu que ny sa volonté ny la commodité du lieu ne luy en pouuoient permettre d'auantage, l'assurant au reste que toutes

les fois qu'il luy seroit possible elle seroit fort ioyeuse de l'auoir en sa compagnie; mais s'il auenoit qu'il voulust prendre quelque plus grand gage de son amour outre le baiser, qu'elle luy osteroit tous les moyens de receuoir iamais aucune faueur d'elle. Dom Filisfel ayant iouy long temps de ce plaisir, avec tel contentement qu'il seroit impossible le vous exprimer, prit congé de sa Dame, apres auoir acordé avec elle qu'il la viendrait voir le cinquiesme iour ensuyuant, auquel ne faillit à la venir retrouver en son logis, pour continuer les faueurs qu'il auoit desia acoustumées. Ainsi iouissant entierement de sa compagnie, & d'une partie de sa beauté, la suplioit continuellement lui donner le congé & le moié de prendre d'elle le deinier point de son amour: disant qu'il ne pouuoit croire, si elle l'aymoit comme il l'aymoit, quelle ne fust contente de luy octroyer l'entier accomplissement de ses desirs. La belle Marfire luy respondit qu'il pouuoit facilement cognoistre si elle l'aymoit ou non, faisant pour luy ce qu'elle faisoit, sans prendre esgard à sa grandeur, ny au hazard auquel elle abádonna sa renommée: & partât qu'il ne fust plus si ozé de luy demander rien d'auantage. Helàs ma Dame (disoit-il) pleust à Dieu que ie vous peusse monstrier mon cueur au descouuert, à fin que vous y vissiez, & vous, & moy: & pareillement le feu duquel vous m'y embrasez, & duquel vous vous y embrasez vous mesmes, car par ce moyen en prenant pitié de vous, vous prendriez encores pitié de moy. Las! ma Dame, ayez compassion de ma douleur, & regardez comme ie m'en voyz piteusement mourir, si bien tost il ne vous plait m'ayder de vostre secours. Considérez que vostre amour me tenât en tel desespoir, est suffisant pour me mettre hors de mon sens, & pour m'inciter à faire quelque folie dôt vo^s & moy pourrions estre perdus à tout iamais. Tant d'autres choses sceut dire dom Filisfel à la belle Marfire, & avec tant de larmes & de soursirs, que la gracieuse Dame

ne pouuant plus par son honnesteté resister à la naturelle compassion qu'elle deuoit prendre de son amant, lui promit trouuer quelque lieu plus oportun, auquel avecques son plus grand contentement, il pourroit auoir d'elle les mesmes faueurs qu'il auoit eues d'elle auparauant, sans toutesfoys entendre de luy en vouloir donner d'auantage, & qu'en ce pendant elle l'enoueroit querir à toutes les fois qu'elle auroit le moyen de parler à luy. Dom Filisfel la remercia humblement de sa promesse, & depuis la retourna voir en mesme façon les deux ou trois iours ensuyuans: mais se trouuant ainsi souuentefois en la compagnie de sa Dame, receuant tousiours d'elle ces gracieuses faueurs, il abandonna tellement la crainte & prit tant de hardiesse, qu'un iour la tenant entre ses bras, il s'eschauffa de sorte que comme hors de soi, & sans se pouoir aucunement arrester, encores que sa Dame toute troublée se déffendist au mieux qu'elle pouuoit, il luy osta le dernier gage de son amour, & prit malgré elle la parfaite recompense de ses travaux. Au moyen dequoy Marfire fut fort despitée, & luy dist par grand courroux, le vous iure & promets par la foy que ie doy à Dieu, que iamais vous n'abuserez en moy de ceste faueur, ny d'autre quelcōque pour la sole outrecuydance dont vous m'avez maintenant outragée. Acheuant ces propos elle se leua pour s'en aller, mais dom Filisfel la retint, & se ietta à genoux deuant elle, disant: Helàs! ma Dame, ie vous supplie apres auoir receu de vous vn si bon traitement, ne me monstrier vn si rigoureux visage, puis que ie n'ay peu m'engarder de faire la faute que ie pourrois auoir commise contre vous. Il vous plaira donc, ma Dame, me pardonner ceste offense, si mieux il ne vous plait qu'avec ceste, espee, ie vous donne la vengeance de mon forfait, & à moi le chastiment de mon audace. Au nom de Dieu, ma Dame, ie vous supplie ne vous monstrier plus ainsi coleree contre moy, car ie ne puis souffrir vostre courroux.

sans.

sans endurer vne douleur trop plus douloureuse que la mort. Respondez vous doncques en la douceur des faueurs que m'auiez octroyees, veu qu'au moyen d'icelles vous auez mis en moy la hardiesse, & le bon courage, qui autrement me deffailloyent du tout sans vostre secours. Tant d'autres choses lui sceut dire dom Filisfel, & avecques tant de larmes la suplia de lui pardonner, que finalement forcee de ses prieres, elle lui dist : Or sus leuez vous, car ie vous pardonne, mais c'est avecques telle condition que vous n'abusiez plus ainsi de la priuauté, ny des faueurs que ie vous donneray desormais. Ma Dame (respondit dom Filisfel) ie le vous prometz ainsi vous supliant me presenter voz belles mains, à fin que ie vous rende graces du pardon qu'il vous a plu m'octroyer de mon offence. Adonques Marfire d'une fort bonne grace lui presenta ses blanches mains, & apres qu'il les eut baisees en grande reuerence, elle le fit leuer : & lors il la retourna acoler, baiser, & embrasser comme au parauant, & apres l'auoir long temps suppliee, elle lui promit trouuer quelque moyen par lequel ils pourroyent parler ensemble en moindre crainte, & avecques plus de liberté. Ainsi apres auoir assez long temps iouy de sa gracieuse compagnie, il prit congé d'elle, laissant de iour en iour acroistre ses amours, & augmenter ses desirs par ces visitations destobees. Or auint que quelques iours se passerent sans que la belle Marfire eust donné aucun moyen au Cheualier de pouuoir parler à elle, & l'esloignoit tousiours d'un iour à l'autre, le passant de vaines esperances, combien que par quelques messages de sa Damoyelle Cardoine, elle s'excusast enuers luy, disant qu'elle ne pouuoit trouuer aucune oportunité de le faire venir en sa maison pour l'heure. Mais dom Filisfel estimant que celà auint par faute d'amour, plustost que par faute d'opportunité, apres lui auoir rescrit en vain plusieurs autres missiues, finalement comme deses-

peré pour le retardement de son remede, lui en rescriuit encores vne autre de ceste teneur.

Lettre de Florisfel à Marfire.

A la cruelle & rigoureuse Marfire, le deffortuné & miserable Filisfel enuoye le salut, duquel il est lui mesmes abandonné pour vostre ingratitude. Làs ! ma Dame, avec combien de gloire & de plaisir vous m'auiez enleué aux plus haultz degrez de mon contentement ! Vrayement il m'estoit aduis que vostre grandeur ne se fust iamais deu abaisser iusques à me faire si grandes faueurs, si ce n'eust esté pour le grand amour duquel ie pensois que vous m'aimisiez. Mais qu'ay-ie maintenant peu faire contre vous pour en receuoir vn si rigoureux traitement ? Quelle offense ay-ie peu commettre contre ma Dame Marfire, puis que ie ne pensay oncques seulement à l'offencer ? Quel bon droit pouuez vous auoir eu, ma Dame, pour me faire maintenant vn si grand tort. Voyez, ie vous prie, voyez l'outrage que vous me faictes, en lieu des faueurs dont vous m'estes redevable pour le bon vouloir que ie vous portez. Helàs ! pourquoy recompensez vous mon tant extreme amour par vne tant extreme hayne. Regardez, ma Dame, comme iusques à tant que ieusse receu voz faueurs, i'estois obligé à viure en perpetuelle langueur pour auoir osé entreprendre de gaigner la bone grace de vostre souveraine beauté, laquelle lors ie ne meritois. Mais depuis qu'il vous a plu me departir vostre faueur, & par ce moyen cauter en moy vne vertu laquelle me rend digne des plus hautes & glorieuses entreprises que lon pourroit dire, vous deuez croire, ma Dame, que maintenant vous estes obligee à m'entretenir en ceste plaisante gloire que vous mesmes m'auiez fait meriter. Je vous supplie donc donner à mon mal le remede que luy deuez, & lequel vous m'auiez promis tant de fois : ou bien m'oster de la tropie

rie en laquelle ie me voy pour l'ennuy que i'endure, dont ie ne peu comprendre, ny penser aucune autre ocaſion, ſinon qu'il vous plaist par vne tant rigoureuſe hayne, me guerdôner du ferme & loyal amour q̃ ie vous porteray toute ma vie. Ainſi ie demeureray en ceſte mortelle guerre iuſques à ce qu'il vous plaieſt enuoyer la paix à celui qui en l'atendant baiſe & rebaiſe mille fois voz belles & blanches mains.

Dom Filifel ayant eſcrit & enuoyé ceſte lettre à la belle Marfire, demeura en grâd ennuy, iuſques à ce que le iour meſmes il euſt receu la premiere reſponce qu'elle luy euſt encores enuoyee. Auant qu'auoir leu la lettre de ſa dame, il ſe trouua en grande perplexité entre le plaifir & la crainte: l'un pour la grande faueur que ſa dame luy auoit faite en luy reſcriuant: l'autre pour ne ſçauoir ce qui eſtoit contenu en la lettre. Avec ceſte confuſion, la decacheta, & la leut comme il ſ'enſuyt:

Lettre de Marfire à dom Filifel de Montefpin.

Vous n'avez aucune ocaſion, dom Filifel, de vous plaindre de moy comme vous vous plaignez: car ſi vous m'aymez, vous ne pouuez nyer que ie ne vous ayme pareillement. Et ſi i'ay demeuré quelques iours ſans faire tout ce que vous euſſiez bien voulu, ce n'a eſté par faute de bon vouloir, comme vous dites en voſtre lettre: mais bien par faute du temps, & de l'opportunité, qui abondent en vous, & defaillent en moy. Vous me mandez auſſi que ie vous oſte de la tromperie en laquelle vous eſtes pour l'ennuy que vous endurez de mon amour: Je vous reſponds qu'il ne tient en rien que ie ne le face ſinon à la faute de la uiſſance: & vous aſſeure que ſi vous le pouuiez faire vous meſmes, ce me ſeroit vn des grands biés qui me pourroit auenir: & plaieſt à Dieu que vous le puiſſiez ainſi faire, car par ce moyen vous m'auriez deliurée de la peine, & du travail

ou ie ſuis pour vous donner le remede que vous me demandez. Toutesfois puis que ie le vous ay promis, i'accompliray ma promeſſe ſ'il m'eſt poſſible, & parauenture pluſtoſt que vous ne penſez.

Dom Filifel fut fort ioyeux, & tourmenté par la lecture de ceſte lettre: ioyeux, pour la bonne eſperance que ſa dame luy donnoit: & tourmenté, croyant que le peu d'affection l'auoit contrainte à luy reſcrire qu'elle ſe tiendrait fort heureuſe de n'eſtre point ayinée de luy, en priant Dieu qu'il peut oublier ſon amour, pour eſtre deliurée de ſa promeſſe. A raiſon dequoy il prit ſoudain papier & ancre pour reſpondre à ſa lettre, & luy en reſcriuit vne autre de telle teneur:

Lettre de Filifel à Marfire.

A la belle & gracieuſe Marfire, dom Filifel de Montefpin enuoye le ſalut que la confuſion ou voſtre lettre la mis luy denie. Si ie me ſuis deceu en la lettre q̃ ie vous ay enuoyee, vous ne vous eſtes moins deceuë en la voſtre, en laquelle vous croyez qu'en vous ſupliant m'oſter de tromperie, i'aye voulu parler de ce ou il n'y en peut auoir, comme de fait il n'y en a point: c'eſt à ſçauoir du ferme & loyal amour que ie vous porte, pour le regard duquel ie n'ay peu eſtre trompé en voſtre endroit, tout ainſi vous ne le fuſtes oncq' au mien: attendu que ſi nous nous ſommes entr'aymez, noſtre amour a eſté bien employé d'une part & d'autre. Seulement ie vous mandois, parce que ie ne pouuois penſer l'ocaſion pour laquelle vous m'auiez eſlongné de vous ſi long temps, qu'il vous pleuſt m'oſter de tromperie pour le regard de l'amour que vous me portiez, ou pour mieux dire que vous me deuiez porter: car il me ſembloit ſi vous m'eufſiez autant aimé, comme ie vous aymoïs, que vous n'eufſiez tant diferé la guerifon de ma maladie cōme vous avez fait. Helas, ma dame, combien vous eſtes deceuë ſi vous pēſez que i'aye iamais

la puissance de me repentir, ou de m'esloigner du grand amour que ie vous ay porté, & que ie vous porteray tant que l'esprit me respirera: car veritablement il n'y a chose au monde qui me fust plus impossible. Ne pensez point, ma dame, qu'en vous ayant comme ie vous ayme, ie puisse iamais tomber en aucune repentance de vostre amour: attendu la gloire, & le plaisir ou ie me treuve pour vous aymer. Je vous supplie doncques me donner la vie par voz faueurs à ma grande ioye: ou bien tost m'enuoyer la mort par voz faueurs pour mettre fin à mon ennuy, & à la douleur en laquelle ie demeureray tousiours iusques à ce que m'ayez donné le repos, & la tranquillité que vostre lettre me promet: & en attendant vn si grand heur ie baise mille fois voz belles & delicates mains.

Comme le iour d'une grand' feste dom Filisfel s'en alla en habit desguisé voir ma Dame Marfire dans sa chambre, selon qu'elle luy avoit mandé par sa damoyelle Cardoine.

CHAP. XIII.

DEpuis que dom Filisfel eut enuoyé ceste lettre, il demeura en quelque repos pour l'esperance qu'il auoit receuë par la responce de la belle Marfire: & en grand ennuy par ce qu'en attendant ceste bonne fortune chascun iour luy sembloit durer plus de mil ans, car entre les autres peines de ceux qui ayment, il n'y a chose qui les tourmente si griefuement comme le temps qu'ilz passent avec la continuelle esperance de iouir bien tost de ce qu'ilz desirent. Et par ce qu'en cest espoir ilz attendent le comble de toute leur felicité, ilz ont d'auantage d'ennuy, & trauaillét beaucoup plus à laisser passer le temps, qu'ilz ne faisoient auparauant viuans en leurs angoisses, sans esperer aucun remede à leur langueur. Estant doncq' Filisfel en cest estat vn iour de grande feste auquel tous les habitans de la ville s'assembloient aux réples

avecques plusieurs solempnitez: **M**arfire luy manda par Cardoine que ce pendant elle auroit l'oportunité de parler à luy, par ce que toutes ses autres damoyelles estoient pour lors au diuin seruice: & à ceste cause qu'il s'en vint par deuers elle en habit desguisé, à fin qu'il ne peut estre recogneu de personne. Dom Filisfel ioyeux au possible pour ces bonnes nouuelles, se mit soudain en equipage à fin d'aller voir la belle Marfire: mais le grand plaisir & l'esperance de bien tost auoir le remede qu'elle luy auoit promis, le mettoit en trop plus grande perturbation que s'il eust deu entrer dans vn camp pour combattre son ennemy. A son arriuee il trouua Cardoine sur la porte qui le mena en vne belle chambre bien tapissée ou y auoit vn beau & riche lit, dans lequel estoit couchee ma dame Marfire, laquelle n'eut si tost veu son amant ainsi desguisé qu'elle se prit à rire d'une bien bonne grace. Mais luy se despouillant en grand' haste se ieta tout nu dans le lit avec elle, & se couplans tous deux corps à corps en vne fort gracieuse luite, commencerent à s'entrebaïser, mignarder, & caresser de si ardante affection qu'en bien peu de temps ilz redoublerent assez de fois l'extreme plaisir q' le Dieu Amour a ordonné à ses suiétz pour le noble trophée de leur victoire. Dom Filisfel sentoît vne ioye tant demesurée, que luy mesmes ne vous la pourroit exprimer par ses paroles, ny moy par mon escriture, sinon que premierement quelque seconde Marfire m'eust fait iouir d'un si grand heur car peut estre qu'alors l'experience du plaisir recompenseroit la faute du sçauoir, laquelle ie recognois maintenant en moy, pour vous représenter assez bien vne felicité qui m'est incogneue. Je ne vous diray donc autre chose en cest endroit, sinon que dom Filisfel contemplant avec grande deuotion, tantost le vermeil visage de la belle Marfire, puis sa blanche & delicate poitrine, pouuoit assez comprédre par ses apparentes beautés, combien deuoient estre parfaites & bien accomplies celles qui luy estoient

estoyent cachees. Elle toutesfois temperant son plaisir par la memoire du brief temps que pour lors son amy deuoit demeurer avecques elle, luy dist en souzriant : Maintenant dom Filisfel, vous n'aurez plus ocaſiõ de vous lamenter que ie ne vous ayme autant comme vous m'aymez : puis que n'ayant qu'à ce seul iour l'oportunite de vous donner ceste faueur, i'ay voulu faire semblant d'estre malade, pour auoir le moyen de me trouuer seulette avecques vous, mettant (ainsi que vous voyez) mon honneur, & ma vie en vn danger, auquel ie ne me fusse voulu abãdonner si ie n'eusse esté autant affectionnee enuers vous, que vous le pourriez estre enuers moy. Puis donc que vous estes maintenant asseuré de mon amour, ne m'importunez plus desormais par voz lettres & ambassades, car toutes les fois que l'ocasion s'offrira, ie seray fort ioyeuse d'estre en vostre compagnie comme ie suis à ceste heure, combien que vous n'y puissiez plus gueres arrester, car vous n'estes pas venu si tost que ie le vous auois mandé. Je cognois bien ma dame (dist Filisfel) & me tiens maintenant bien certain de vostre bon vouloir, & sçay bien qu'il n'y a chose en moy qui peut meriter de vous vn si grand bien, si la faute de mon merite n'eust esté suplée par le ferme amour duquel ie voy que vous m'aymez. Contentez vous donc (dist elle) puis que ie fais ce qui est en ma puissance, & ce que me permet l'oportunite, laquelle encores que ie la cherche, ne se pourra de long temps offrir telle que nous l'auons maintenãt, au moins que ie puisse sçauoir. Dom Filisfel receut telle douleur de ces paroles, que Marfire fut cõtainte de le consoler, luy promettant que le plus souuent qu'il luy seroit possible, elle luy donneroit moyen de la voir en ce mesme apareil. Lors Filisfel la baïsa fort amoureusement, & la remercia de sa promesse. Il n'auoit encores demeuré vne bonnẽ heure en ces plaisirs, quand Cardoine leur courut dire que les damoyelles arriuoient: au moyen dequoy Filisfel ne fut seu-

lement contraint d'abandonner la iouissance de sa dame, mais encores de se tenir long temps caché, iusques à ce qu'avec grand' peine lon trouua moyen de le faire sortir. Ainsi s'en alla non moins ioyeux de sa bonne fortune, que triste pour la brieffueté du temps. Mais il ne fust si tost esloigné de sa dame qu'il commença à la desirer, & souhaiter, & à se passionner pour l'amour d'elle plus que iamais, de sorte que pour trouuer quelque consolation à son ennuy, le lendemain il lui rescriuit vne lettre telle comme il s'ensuit.

*Lettre de dom Filisfel de Montespın
à Marfire.*

A la belle & gracieuse Marfire, dom Filisfel de Montespın enuoye le salut qu'il a perdu par la plus douloureuse maladie qu'il ayt encores esprouuee. Helas, ma dame, si iamais ie vous ay aymee de bonne affection, maintenant ie meurs du tout pour vostre amour, & si iamais i'ay eu quelque esperance de iouir de voz diuines beautez, maintenãt ie suis au dernier desespoir pour le long temps qu'il me faudra demeurer sans plus auoir la iouissance du bien, duquel par vostre grace i'ay gousté & saouuré la tranquille & gracieuse douceur. Si i'ay eu quelques desirs par cy deuant, i'ay desiré de façon que ie ne sçauois ce que ie desirois : mais maintenant estant appris par l'experience, ie sçay que ie desire le plus grand bien qu'il est possible de desirer, sans qu'vn autre que moy sçache, ny puisse sçauoir, combien est extreme le plaisir que ie desire. Iusques icy, ma dame, ie me suis tourmenté pour voir les graces aparentes de vostre beauté, par lesquelles vous pouuez assuiettir à vostre seruice les cueurs des hommes plus barbares : mais maintenant ie me tourmente pour iouir de voz graces secretes, desquelles seul entre tous i'ay merité la iouissance. Helas, ma dame, faites ie vous supplie, que les grandes faueurs q̃ vous m'avez faites, ne me retour-

nent en vn plus grand dueil, & ne me deniez point le remede, lequel en baïsant voz belles & blanches mains, ie vous supplie m'ottroyer aussi tost comme la douloureux se passion en laquelle ie suis le requiert.

Après que la belle & gracieuse Marfire eut receu ceste lettre, elle enuoya dire à dō Filisfel qu'il la vint reuoir ainsi qu'il auoit acoustumé au commencement: ce qu'il fit & la trouua seule avecques Cardoine dans vne sale, & l'embrassant par grand amour, luy baïsa mille fois ses beaux yeux, & sa vermeille bouche, la supliant luy donner lieu oportun pour parler plus priuément ensemble. Elle luy promettoit facilement tout ce qu'il demandoit, sans neantmoins tenir sa promesse l'entretenant tousiours d'esperances. Ainsi se passerent plusieurs iours en continuelles lamentations, lettres, ambassades, & autres importunités de dom Filisfel, la supliant maintesfois de se descourir à vne de ses Damoysselles, nommee Carie, qui estoit fort priuee d'elle, & gracieuse: Ou si elle ne se vouloit deceler elle mesme qu'elle luy permist de ce faire, car autrement il ne voyoit pas beaucoup de moyen pour paruenir à ce qu'il desiroit. Mais tant s'en fault que Marfire luy voulust acorder ceste demande, qu'elle faignoit estre courroucée de l'en ouyr seulement parler. Toutesfois elle se decourrit finablement à sa damoysselle Carie, & acorderent entrelles de faire venir dom Filisfel de nuyt à fin d'apaiser son ennuy. Mais si tost qu'il fut auert de ces nouuelles, peu s'en fallut qu'il ne perdît le sens de grande ioye: car il estoit presque sur le point de mourir, pour ne pouuoir plus endurer l'ardante affection qu'il auoit d'aller voir sa dame, en lieu, auquel il peut téperer sa douleur par la iouissance de ses desirs. En ce temps dom Rogel n'estoit plus en Athenes, par ce qu'il auoit esté mandé de Constantinople: & d'autant qu'il vouloit emmener dom Filisfel, il faignit si bien d'estre malade que dom Rogel s'en alla tout seul, s'aperceuant

toutesfois assez bien de la maladie de son compagnon encores qu'il ne luy en eust rien descouuert. Ainsi demeura dom Filisfel en Athenes, pour mieux iouyr de ses amours, lesquelles le grand croniqueur Gallesis a ainsi voulu d'escrire tout au long, par ce que les beautés & bonnes graces de Marfire, qui peuvent causer tant de peines & de plaisirs à dom Filisfel, luy sembloient dignes d'estre mises en perpetuelle memoire. Au moyen dequoy nous poursuyurons à vous en reciter tout ce qui nous en a esté laissé par escrit.

Comme dom Filisfel alla voir de nuyt la belle Marfire, & des gracieux propos qu'il eut avec elle, & la Damoysselle Carie.

CHAP. XV.

Marfire n'estant moins amoureuse de dom Filisfel, que luy d'elle, combien qu'elle n'en fust semblant, luy manda que de nuyt il vint parler à elle, & qu'il entrast par vne fenestre où Carie l'attendoit pour le mener en sa chambre incontinent que les autres Damoysselles se seroient retirees, par ce qu'elles estoient costumieres de se coucher assez tard. Soudain que la nuyt fut venue, dom Filisfel ne fut paresseux à se trouver au lieu acordé, & estant monté par vne eschelle trouua la Damoysselle Carie, laquelle il embrassa comme celle à qui il portoit grand amytié, par ce qu'elle luy auoit mandé qu'elle l'entre-tiendrait par tous les moyens qu'il luy seroit possible en la bonne grace de sa maistresse. Adonc Filisfel la tenant entre ses bras, & la baïsant, luy dist, Helas ma chere fille, comme vous pourray-ie iamais récompenser du grand bien que vous me faites aujourdhuy? Seigneur dom Filisfel (dist Carie) ie ne scaurois tant faire pour vous que vous ne meritez beaucoup d'auantage, & vous assure que des la premiere fois que ie vous vy, & que ie m'aperceu de la peine laquelle vous souffriez pour l'amour de ma dame

Dame Marfire ma maistresse, ie commençay à vous porter vne grande amitié, & à prendre compasison de vostre mal: partant regardez l'endroit ou il vous plaira m'employer, car il n'y a chose pour grande qu'elle soit, laquelle ie ne face tresvolontiers à fin d'obeir à voz commandemens. Ce pendant qu'elle vloit de ces gracieux propos, dom Filisfel la tenoit embrassée, & lui disoit Las dites moy, ma dame Carie, en quelle façon ie pourray recognoistre le plaisir que vous m'avez moyenné, veu que ie ne l'estime moins que de m'auoir sauué la vie. Celà n'est rien (respondit elle) car i'ay bien encores à faire d'auantage pour vous, puis que ma Dame me le commande: & me plaist bien, veu que quelquefois elle deuoit estre amoureuse, que cessoit d'un si preux Cheualier comme vous estes, car vous ne meritez moins sa bonne grace pour vostre prouesse, q par la ferme & loiale affection que vous luy portez. Le vous prie (dist il) ne tenez iamais telz propos, car à la comparaison de ma Dame, ie ne pourrois rien meriter outre ce dont elle m'a rendu digne par ses faueurs. Monsieur (dist la Damoiselle) ie ne puis pl^{us} demeurer avecque vous, car ie crains d'estre demandee: mais attendez moy iusques à ce que ie retourne & quand il sera temps ie vous viendray querir, & vous meneray là ou vous desirez. A tant s'en alla la Damoiselle, & dom Filisfel demeura tout quoy en attendant le temps de sa bonne fortune, sans laisser passer vn seul quart d'heure qui ne luy durast plus d'un an, tant estoit ardent le desir qu'il auoit de se trouuer biē tost avecques sa Dame. Ayant ainsi attendu quelque espace de temps, elle retourna portant en sa main vne chandelle allumee dans vn chandelier d'argent doré. Apres elle venoit la belle Marfire presque toute nuë, sans auoir autre habillement qu'un manteau de satin blanc sur sa chemise. Incontinent que dom Filisfel l'eut auisee il la courut acoler & baiser d'une fort bonne grace, disant Las: ma Dame, combien est grande la fa-

ueur que vous me faites en me venant ainsi voir avecq' vn flâbeau. Marfire luy respondit, Le m'en voys coucher, atendez vn peu que mes Damoiselles se soient retirees, & puis Carie vous viendra querir: à Dieu soyez, car ie ne puis arrester icy plus long temps. Ainsi s'en alla la belle Marfire sans ouyr la response de dom Filisfel, lequel attendit enuiron vne heure & demye, puis ouyt en vne prochaine chambre quelque bruyt de piedz que faisoit la Damoiselle Carie, laquelle le venoit voir, & luy dist tout bas, Ou estes vous seigneur Filisfel.

Est-ce vous (respondit il) ma chere amye, ma dame Marfire? Le suis, dist Carie, celle qui bien tost vous menera vers vostre Dame. Lors dom Filisfel s'aprouchant d'elle l'embrassa par grand affection, & luy dist, N'est il encores temps, ma grande amie, que ie m'en aille iouyr de la plus grande gloire que ie scaurois receuoir en ce monde. Monseigneur (respondit elle) atendez moy vn peu icy, car Laurence, & Fabrine ne sont pas encores retirees, & si ont accoustumé de se coucher les dernieres. Malencontre leur puisse auenir (dist dom Filisfel) puis qu'elles me sont cause d'un si grand mal. Le m'en voys, dist Carie, & incontinent qu'elles seront couchees, ie vous retourneray querir: ce pendant faites de sorte que vous laissiez icy voz habillemens, & vous les y reprendrez demain au matin à vostre depart. Ainsi s'en alla la Damoiselle, & dom Filisfel tantost apres despouilla tous ses vestemens, attendant Carie, laquelle ayant trouué son oportunité ne faillit à le venir retrouver, & luy dist, Donnez moy la main, & vous en venez avecque moy, car ie vous mettray au lieu ou vostre cueur repose. Ainsi s'en allerent tous deux à tastons iusques en la chambre ou la belle Marfire reposoit, & lors dom Filisfel se ietant nu dedans son lit, elle le receut entre ses bras, & commença à le baiser fort amoureusement, avec vn si grand plaisir du Cheualier qu'il seroit impossible le faire croire à autres qu'à ceux qui ont expérimenté

rimenté vne si gracieuse fortune. Entre ces amoureux embrassemens, la belle Marfire en soupirant luy dist, maintenant, dom Filisfel, pouuez-vous croire que ie vous ayme autant ou plus que vous m'aymez, puis que pour vostre amour, ie me mes en vn si grand danger qu'il n'y a partie en moy qui ne tressaille de grande crainte. Ma dame, (dist il) ie croy que ie suis le plus heureux Cheualier qui oncq' nasquit de mere, me voyant ainsi iouyr des grandes excellences que le souverain Dieu vous a donnees. O moi bien fortuné, qui ay par cy deuant peu meriter vn si grâd bié, & qui en peux maintenant iouyr avec l'assëuree cognoissance de la parfaite affection que vous me portez. Ainsi iouyt tout vn long temps dom Filisfel des amours de la belle & gracieuse Marfire, & avecq' vne ioie que lon ne vous pourroit exprimer, luy disoit alors qu'ilz s'entr'embrassoient le plus affectueusement. Helàs, ma Dame, que n'auons nous icy vn flâbeau allumé à fin d'accompagner le grâd plaisir que ie receurois en contemplât voz excellences, avec celly lequel ie reçoys maintenant, étant priué de vostre veuë: veritablement, ma Dame, ie finirois ma vie en vne si grâde gloire, si ie ne temperois ma ioye par la douleur q' ie sens desjà en moy, considerant que deuant le iour, ie seray contrainct à me departir de vous. En ces amoureuses caresses les deux amants passerent le surplus de la nuyt, iusques à ce que la lumiere du iour aparut pour mettre en plus grâdes tenebres dom Filisfel, le contrainct à perdre de veuë la belle lumiere de sa Dame. Il eust volôtiérs demeuré encorés tout ce iour avec elle, si elle l'eust voulu consentir, mais voyant qu'il luy estoit forcé de s'en aller, il prit son congé d'elle l'embrassant, baisant, & caressant en toutes les manieres dont il se pouuoit auiser. Adonc Carie l'emena au lieu ou il auoit laissé ses habillemens, mais il n'estoit encore reuestu, quâd la belle Marfire toute en chemise le vint trouuer, auertissant sa Damoyelle de ne mener que le moins de bruyt

qu'elle pourroit. Dom Filisfel embrassa sa Dame par grand amour, puis descêdit avec elle & Carie en vne chambre, qui estoit deslous celle ou ilz estoient premierement. Alors il prit de rechef cōgé de sa Dame, & au departir Carie luy dist qu'il s'asist en vne chaite qui estoit aupres de luy, ce pendant qu'elle iroit ouurir vne fenestre par laquelle il deuoit sortir. Mais auant que la fenestre fust ouuerte, la belle & gracieuse Marfire reuint de rechef voir son amy, lequel la baisant plusieurs fois luy dist, Ma dame ie vous supplie retournez vous coucher car vous pourriez bié morfondre. Je n'en feray rien (dist elle) car ie n'auray point le cueur assëuré iusques à ce q' ie vous voye dehors. Et bien ma dame, dist-il, quand est ce que ie vous retourneray voir? Quand i'en auray l'opportunité (dist elle) ie le vous feray sauoir. En ces entrefaites ilz se departirent apres maints amoureux baisers, non sans le grâd ennui de dom Filisfel pour se voir ainsi esloigner de sa Dame, laquelle s'en retourna en son lit, & luy en son logis. Or le lendemain il se trouua tant ioyeux & tant alaigre contre sa coustume, que chacun fut esmerueillé de ceste nouuelle & tât soudaine mutation de son visage. Ce iour mesmes il disna & soupa avec le Duc, en si grand plaisir & gayeté de cueur, qu'il resouilloit toute la compagnie par mille sornettes & gracieuses railleties, tellement qu'il descouuroit assez par son ioyeux maintien le contentement de son cueur. Le soir de ce mesme iour se promenât par la ville il aperceut à vne fenestre, la belle & gracieuse Marfire, au moyen dequoy tout incontinent il luy rescriuit & enuoya par son page vne lettre de telle teneur:

Lettre de Filisfel à Marfire.

A la belle & gracieuse Marfire, dom Filisfel de montespin enuoye le salut duquel il iouyst à son grand contentement. La ioye en laquelle ie suis, est si grande, que ie ne sçay avecq' qu'elles paroles ie la doys louer,

louër, à fin que sa louange puisse estre comparee à sa grandeur. O moi le plus heureux de tous les Cheualiers du mōde! puis qu'il vous à pleu, ma Dame, me faire digne par voz faueurs de ce que par moy-mesmes ie ne pouuois aucunement meriter. Ceste lettre seulement est pour vous faire enrēdre ma grande liesse, par laquelle vous m'estes maintenant redeuable de ce qu'elle ma fait meriter, qui est que ie retourne bien tost par deuers vous, pour prendre la mesme iouyssance de voz beautez qu'il vous a pleu m'otroyer la nuyt passée, à fin que par ceste nouvelle ioye ie puisse guerdonner l'ennuy que i'endure au temps que ie ne puis trouuer l'opportunité d'un si grād bien. Parquoy, ma Dame, ie vous supplie m'entretenir tousiours en vn tel heur, à fin que vous qui auez esté la cause dont ie suis enleué en vn tant hault degré pour le present, ne soiez la cause de ma miserable ruine pour l'aue-nir. Mais à fin que vous ne me puissiez reprendre de vous importuner par trop, ie mettrai fin à ma lettre, en baisant mille fois voz blanches & delicates mains pour la memoire de la paix qui s'est ensuyue de la guerre passée. Je me recommande aussi à ma chere Carie, la supliant me pourchasser en bref, le temps tant désiré auquel ie puis renouveler l'heureuse occasion de ma gloire.

Comme dom Filisfel alla voir de iour la belle Marfire, & des gracieux propos qu'il eut avec elle, & la Damoysele Carie.

CHAP. XVI.

DOm Filisfel ne se peut contēter d'auoir enuoyé ceste lettre à la belle Marfire, ains le lendemain l'alla encores vois, & l'ayant trouuee en la sale avecques Cardoine & Carie, & apres luy auoir fait les reuerences acoustumees, elle luy dist en souzriant, Il apert bien, dom Filisfel, quel'acomplissement de voz desirs vous

à fait tout autre que vous n'estiez, car ie veux bien que vous sachez que ie ne vous trouuay oncques si beau, ny si ioyeux comme ie vous ay trouué hier, & comme ie vous voi encores maintenant Vrayemēt, dame (dist le Cheualier) il estoit bien raisonnable que par la iouyssance de vostre beauté, la mienne s'acreust & que ma nouvelle ioye fust le tesmoignage de mon nouveau contentement. Il me plaist bien (dist elle) de vous voir en si bonne disposition, car desormais vous cesserez de m'importuner par voz infiniz messages, attendu qu'il ne vous reste rien que vous me puissiez plus demander, ny à moy que ie vous puisse otroyer, ayant entierement abandonné mon vouloir au vostre, & mon honneur à la discretion que i'ay pensé estre en vous. Helàs, ma dame (respondit Filisfel) ne me dites iamais que doreseuuant ie ne pourray plus vous supplier de me departir voz faueurs, veu que i'en auray trop plus de necessité que ie n'euz onc, car au parauant qu'auoir iouy d'une telle gloire, mes desirs tendoyent à vne chose dont ie n'auois la cognoissance pour ne l'auoir experimentee: mais maintenant ie desire vn bien, duquel ie sçay & cognois la grandeur vous asseurant que le bon sens me defaudra plustost, que le desir de le continuer.

Comment (dist Marfire d'une fort bonne grace) voz desirs ne doyuent donc iamais acheuer? vous sçauiez bien mon bon amy, qu'un iour, & peut estre bien tost, force vous sera de cesser voz ardantes affections, tant pour vostre bien, comme pour le mien. Puis donc que par contrainte il vous y faut mettre vne fin, il seroit meilleur que ce fust des maintenant, que le parfait acomplissement de voz desirs ne vous laisse rien plus que desirer. Ma dame (dist Filisfel) la fin dont vous parlez ne se pourra trouuer en mes desirs: & quant à moy, ie ne la sçau-rois otroyer au ferme & loyal amour que ie vous porte, iusques à ce que la fin de ma vie donne pareillement fin à toutes mes autres affections. Partant, ma Dame, si

vous m'aymez comme ie vous ayme, ie vous supplie ne me dire plus que ie cesse hardant desir qui est en moy de continuer la iouissance de vostre diuine beauté, veu que ie n'ay autre bié que celuy là qui puisse recompenser le mal, lequel ie souffre alors que ie suis separé de vostre cōpagnie. Adonc d'une fort bonne grace Marfire luy dist, Vous n'estes point trompé en l'amour que vous me portez, car s'il m'estoit possible, ie ne voudrois iamais iour de ma vie estre eslongnee de vous vne seule heure, tant est grand le plaisir que ie reçois de vostre beauté & de voz bonnes graces. Dom Filisfel la remerciant mille foys de son bon vouloir, & disant que son grand amour ne pouuoit estre guerdonné que par vn pareil, la prit entre ses bras luy baissant & rebaisant tantost ses beaux yeux, puis sa vermeille bouche, & quelquesfoys sa blanche & delicate poitrine. Ce pendant la Damoysselle Carie s'aprocha aupres d'eux, & dom Filisfel l'embrassa & baisa par grand affection, disant, O ma chere & gracieuse Carie, combien ie suis ioyeux de vous voir. Seigneur dom Filisfel (dist lors Carie) vous auez raison de m'aymer, car ie vous iure sur ma foy qu'apres ma dame Marfire ma maistresse, il n'y a personnage au monde que j'ayme de si bon cuer comme vous, tant pour l'amour que ie scay qu'elle vous porte, cōme pource que vous meritez beaucoup plus que l'amour d'une simple Damoysselle comme ie suis. A tant s'en alla la Damoysselle Carie apres auoir encores tenu quelques autres gracieux deuis à dom Filisfel, lequel apres qu'elle fut departie dist à Marfire, l'ayme tant ceste Damoysselle, & me semble tant gracieuse, & bien auisee, que bien peu s'en fault que ie ne meure pour son amour. Marfire luy dist en riant, Puis qu'elle vous vient tant bien à gré, prenez là, & me laissez en arriere. Las! ma dame (dist Filisfel) ne tenez iamais telz propos, & vous assurez que pour ce regard ie n'ay autre amour que le vostre, comme aussi ie n'en pourrois auoir, at-

tendu que ie vous ay donné toute l'affection qui pouuoit estre en moy: car si j'ayme vostre Damoysselle Carie, c'est pour les grandes obligations dont ie luy suis redevable à vostre occasion, & aussi pour la pitié qu'elle a tousiours eue de moy en ma douleur. En bōne foy (dist Marfire en souzriant) ie seroys bien contente qu'il n'y eust point vn si grand amour entre vous deux comme voz caresses le monstrent. Dom Filisfel l'embrassa gracieusement & luy dist, Ma dame ie ne puy aymer que ce que vous ayez, car ma volonté depend entierement de la vostre. Puis la suppliant de luy donner lieu plus propre pour parler à elle, & pour renouveler la iouissance de ses desirs, & elle luy promettant qu'elle le feroit à toutes les foys qu'il luy seroit possible, leurs gracieux propos, & leurs amoureux baisers furent interrompus par la venue des Dames & Damoysselles de Marfire, qui la trouuerent trop plus belle qu'elle ne l'auoient laissée, pour la naïue & vermeille couleur que les caresses de son amy luy auoient fait monter au visage. A tant nous laisserōs ces deux amāts en Athenes avecques tout le plaisir qu'il leur estoit possible de prendre l'un de l'autre à la desrobée, & retournerons dans Constantinople, en la compagnie des plus grans Roys, Empereurs, & Princes, qui furent onc en tout l'vniuers.

Comme Bruzerbe le cresselu Roy de Massagettes, vint à Constantinople deffier le Prince dom Florisfel sur l'offense de la Royne Sionie.

CHAP. XVII.

LEs Roys, Empereurs, & Princes estans dans Constantinople, passoient le temps en grand pompe & magnificence avecques tous les plaisirs dont ilz se pouuoient auiser: & lors la Grece estoit tant bien fournie de Cheualiers errants, qu'il ne se passoit matin ny soir, que

lon ne veit arriuer en la cour, maintes belles & estranges auentures. Entre lesquelles vn iour comme les Princes se leuoient de table, ilz virent entrer en la sale du festin, vn Cheualier presque de hauteur de geant combien qu'il semblast estre de plus grande force, par ce qu'il estoit bien membru & de fort gros ossemens. Il auoit le regard superbe & furieux, les yeux gros & enflez hors de la teste, le nez large & aplaty, avecques les narines fort ouuertes, les lèures grosses, & les cheveux noirs & crespelus à la maniere des mores. Il estoit armé d'vnes riches armes, & deux Escuyers portoient l'vn son armet, l'autre son escu, auquel estoit representee & portraite au naturel la belle Diane. Je ne sçay lequel des deux causa plus d'esbahissement aux Princesses grecques, ou la beauté de ce portrait ou la laydure du Cheualier: mais le doute qu'elles auoient de sa venuë, ne fut moindre, encores que des son entree toute la compagnie cogneat assez par son escu ce qu'il auoit en son courage, neantmoins le Cheualier leur demanda avec vne horrible voix, lequel d'eux estoit dom Florisel de Niquee. Dom Florisel cognoissant la haute cheualerie de Bruzerbe par son braue maintien, se leua, & dist Cheualier ie suis celuy que vous demandez, y a il chose que vous vueillez de moy? Je remercie les dieux (dit il) de ce qu'ilz m'ont icy conduit en temps oportun pour gaigner la gloire que ie desire, s'il plaist à la fortune me l'otroyer, en me faisant Seigneur de vostre teste. Et quand encores le contraire auendroit, si est ce que j'auray dequoy me contenter en ma perte, me voyant tenir compagnie à vn infiny nombre de nobles & preux Cheualiers, lesquels ont pareillement perdu leur ancienne renommee, pour acroistre d'autant la vostre. A raison dequoy, tresexcellent Prince, avecque la reuerence qui est deuë à vostre grandeur, & que ie vous garderay par tout ailleurs fors en ceste querelle, ie Bruzerbe le crespelu Roy des Massagettes, dy que vous

avez faucé la foy, de laquelle vous esliez redeuable à la Roine Sidonie, pour le vray & chaste amour qu'elle vous portoit, en iouyssant de sa beauté par vostre tromperie, contre le deuoir qu'un si grand Prince comme vous estes, deuoit à vne si haute & excellente Princesse comme elle est: ce que ie vous maintiendray ma personne à la vostre: à fin que s'il plaist à la fortune me fauoriser, ie puisse par vn seul combat me conquerir trois grandes gloires: l'vne en vainquant vn tel Cheualier, qui n'est encores acoustumé qu'à estre vainqueur: l'autre en me donnant ma liberté, & en espousant la plus belle Princesse du monde: la derniere en prenant la vengeance du tort que vous avez fait à la Roine Sidonie. Apres que le Roy eust acheué de parler, dom Florisel luy respondit fort doucement: Seigneur Roy Bruzerbe, j'ay occasion de vous remercier des louanges que vous m'avez donnees: & veritablemēt vous monstrez biē que vostre force de corps est acompagnée d'vne bonne discretion de l'esprit, en louant la prouesse de vostre ennemy: à fin que si vous estes vainqueur, vostre louange soit d'autant plus grande: & si la fortune vous est contraire, que la honte en soit d'autant moindre. Quant à ce que vous dites que j'ay offensé la Roine Sidonie, & le deuoir d'un si grand Prince comme ie suis: ie vous respons, & en appelle Dieu à tesmoing, que la ruse dont j'vlay enuers elle, ne fut ianais pour l'offenser: mais seulement pour sauuer de la rigueur de ses loix, mon cher amy, le tresexcellent Prince dom Falanges d'Astres, pour l'amour duquel ie souffry la force qui luy estoit preparee. Mais cela, & tout le surplus qui se passa entre la Roine Sidonie & moi, fut contre ma volonté, & seulement pour garantir la vie à mon compagnon. Cecy vous maintiendray ie estre vray: & neantmoins, pour la reuerence que ie porte à celle qui vous enuoye à vne tant cruelle & iniuste entreprise, ie pourchasseray en defendant courageusement ma teste, que la

vostre vous demeure encores asseuree . Auecques ces conditions , & l'asseurance en tel cas requise , i'accepte le combat : Le cap sera au lieu acoustumé deuant ce palais , & vous y assigne iour à demain au matin , vous promettant par ce gage que si vous m'y attendez , ie m'essayeray à satisfaire à vostre demande , & à mon honneur . Adonc il bailla son gant pour gage , que le Roy prit : & ainsi demeura le combat acordé au lendemain . Incontinent apres , le Roy Bruzerbe fut mené en vn beau logis , qui regardoit sur les iardins du Palais : mais neantmoins ce combat ne pleut gueres à toute la compagnie , mesmement à la Princesse Helene , ny à Arlande Roine de Thrace : car le Roy leur sembloit de fort grande prouesse , comme de fait il estoit l'vn des plus excellens Cheualiers de son temps . Or ainsi qu'il sortoit hors de la sale , dom Florisel s'en vint au lieu ou estoient les dames assemblees , & dist d'vne fort bonne grace à la Princesse Helene son espouse : Ma dame ie vous supplie me dōner demain au matin quelque faueur de vostre beauté , à fin que la force laquelle ie receuray par ce moyen , supplie à ce qui me pourroit defaillir contre la prouesse du Roy . Monsieur (dist elle) vostre haute cheualerie vous pourra asseurer du danger du combat , car quant à moy en vous otroyant ce que demandez , ie vous asseurerois plustost contre mon offence , que contre celle dont la Roine Sidonie vous accuse . Et se tournant vers la Roine Arlande qu'elle tenoit par la main elle luy dist : Tresexcellente Roine , ie supplie vostre beauté donner au Prince dom Florisel mon Seigneur , la faueur qu'il a voulu auoir de moy , car il se tiendra tresheureux de la receuoir d'vne si belle & noble Princesse comme vous estes . Arlande luy respondit fort gracieusement : C'est vne chose trefraissonnable que ie face ce que vostre grandeur me commande , attendu mesmement que ie ne deniay iamais mes faueurs au noble Prince dom Florisel , encores qu'il ne les ait voulu receuoir qu'apres les vo-

stres : & partant ma dame , à fin de vous obeir , ie luy donneray demain au matin toutes les faueurs que vous mesmes auiserez . En ces gracieux propos ilz passerent presque le iour entier , durant lequel par toute la ville ne se parloit d'autre chose que du combat qui estoit acordé au lendemain . Sur le soir dom Rogel arriua dans Constantinople , & fut receu au grand plaisir de tous , mesmement de la Princesse Leonide encores qu'elle dissimulast aucunement sa ioye : mais la Princesse Siluie se trouua en fort grand ennuy pour l'absence de dom Filisfel , croyant qu'il deust estre demeuré malade : & en mesme fâcherie estoit l'Infante Anaxare , qui l'aymoit de tout son cueur , comme celuy qu'elle estimoit deuoir estre vn iour son espoux . Dom Rogel fust fort ioyeux d'estre arriué en vn temps si oportun , pour assister au braue combat lequel se deuoit faire le lendemain .

Or dom Florisel se confessa sur la minuit , & demeura en prieres iusques au point du iour qu'il receut le corps de nostre Seigneur Iesus Christ , le supliant par grand deuotion , qu'il luy donnast la victoire de son ennemy , comme il la luy auoit donnee en tous les autres combatz qu'il auoit soutenus pour ceste mesme querelle . Les Roys dom Quedragant d'Irlande , & Frandalo , par le commun accord des combatans , furent constitués les iuges du combat , auecques neuf cens Cheualiers pour la seureté du camp .

Du cruel combat que dom Florisel eut à l'encontre du Roy Bruzerbe le Crespelu en la presence des Princes & Princesses de Grece.

CHAP. XVIII.

DEsia les rayons du cler soleil cōmençoient à resprendre leur lumiere sur la terre , quand l'excellent Prince dō Florisel de Niquee , & le puissant Bruzerbe

zerbe Roy des Massagettes, se firent armer de leurs belles & fortes armes. Tantoit apres les deux iuges acompagnez de leur canallerie, & de plusieurs fifres & tabours, s'allerent conduire dans le camp le Roy Bruzerbe, lequel estoit monté sur vn hault & fort cheual, enharnaché de drap d'or, avecques toutes ses garnitures à l'auenant. Ce Roy portoit les mesmes armes qu'il auoit le iour au parauant, excepté le seul escu: car sçachant la gracieuseté dont Florisel auoit usé enuers la pourtraiture de Diane sa fille, au combat qu'il auoit eu contre le Roy de Gaze, il prit vn autre escu, auquel estoient paintz deux forts geants ételtez, & vn Cheualier, qui le representoit, tenans leurs deux testes par les cheveux, lesquelles il donnoit à vne damoyelle. A bonne occasion le Roy des Massagettes portoit celle deuise: car il auoit occis ces geans en camp de bataille, soustenant luy seul contre les deux le party de la Roynes de Tolchon, à laquelle ilz auoient desia osté vne grand' partie de son Royaume: & partant elle estoit aussi pourtraite en son escu. En telle maniere le puissant Roy fut mis dans le camp, estans desia tous les Princes & Princesses aux fenestres, & galleries du palais pour regarder le combat. Or ce pendant que les Iuges alloient querir dom Florisel pour le conduire en pareil arroy, Bruzerbe demeura long temps elinerueillé, quand il apercent la peinture de l'espouventable combat d'Amadis de Grece, & de Furio Cornelio. Adoncques leuant les yeux vers les galleries du Palais, il le recongneut entre tous les autres Princes par la ressemblance de sa pourtraiture: & se mit à le regarder si ententiement, qu'il ne pouuoit retirer sa veüe de dessus luy: tât auoit de force le souuenir des haultz & incroyables faitz d'armes, dont sa clere renommee auoit desia plusieurs fois environné toute la terre. Mais si le Roy Bruzerbe s'esbahit de la prouesse de l'empereur Amadis, il ne fust moins estonné de la beauté de l'Infante fortune, laquelle estoit

entre les bras de la Roynes Finistee: car la petite fillette l'aymoit tant, qu'elle ne pouuoit iamais estre en lieu ou elle ne fust. Le Roy donc ayant aperceu sa diuine beauté, laquelle auoit grande ressemblance avecques le portrait de Diane, dist à part soy: O vraye ymage de celle qui est la maistresse de mon cuer, donne moy la force & le courage qui me sont necessaires pour mettre heureusement à fin vne tant haute & glorieuse entreprise. En ces entrefaites les Iuges amenerent dom Florisel dans le camp armé d'vnes riches armes blanches, & portant vn grand pennache blanc sur son armet. Il estoit monté sur vn hault cheual de mesme couleur, ayant la testiere embragée de pareilz plumages, & enharnaché de Sarin blanc decoupé sur vn fons de toile d'or, avec plusieurs petits las d'amours semez en égalle distance sur le mylieu de chascune decoupure. Florisel entrant dans le camp en tel equipage avecques vne fort belle disposition & alaigresse de corps, donna grand contentement à tous ceux qui le regardoient & mesmement à son aduersaire, car il luy sembloit bien n'auoir iamais veu Cheualier tant bien proportionné de tous ses membres, ny tant disposé de sa personne. Bien tost apres les iuges ayans mis fin aux solennitez acoustumées, & apres auoir esgallement departy le soleil aux deux nobles chápions, ilz monterent dans leur eschauffaut, sans ouir faire plus grand bruyt à la multitude là assemblee, que s'il n'y eust eu personne aux enuironz. Les combatans estoient tous prestz, tenans leurs grosses & roydes lances en la main, l'vn à vn bout du camp, & l'autre à l'autre, en attendant le son des trompettes, lequel ne fut plustost encommencé qu'ilz commencerent pareillement à se mettre en leur deuoir. Si laisserent courre leurs cheuaux de toute leur roideur, & les lances baissées vindrent à s'entrecroiser si viuement sans qu'aucun d'eux faillist d'atainte, que les lances faucherent les escuz, & passerent plus de deux grands piedz par le derriere entre

le corps, & entre le bras gauche, puis vollerent en esleatz, & les Cheualiers passerent outre en fort brave contenance sans s'esbranler ny tant ny quant, non plus que s'ilz eussent esté coléz entre les arçons. Les regardans furent beaucoup troublez & esbahiz, car ilz pensoient que les lances leur fussent passées au trauers du corps: mais ilz leur virent bien tost arracher & ietter ces tronçons hors de leurs escuz, Adonc ayans mis les mains aux espees retournerent l'un contre l'autre maintenant se courans & rabatans les coups par grand' dextérité, tantost s'entr'estoquans d'une admirable allegresse, puis auancans leurs cheuaux, & tantost se reculans, se hauçans, & se baissans avec un des plus braues combatz qu'il sçauroit estre possible de penser entre une couple de deux tant nobles & adroitiz Cheualiers comme ilz estoient. Au moyen dequoy leurs escuz de fin acier, martellez des coups continuelz, sembloient estre embrasés de vives flammes, tant ilz se donoient peu de repos l'un à l'autre. Mais la legereté & allagresse dont Florisel sçauoit manier son cheual, le faisant sauter, & resauter, deçà, & de là pour mieux euer les coups de son ennemy, & mieux luy faire sentier les siens, estoit chose tresplaisante à voir, & en laquelle il surpassoit beaucoup le Roy Bruzerbe, qui estoit un peu lourd & malhabille de sa personne. Lui donc voyant l'auantage que dom Florisel auoit à cheual, afin de remedier à telle necessité, donna si horrible coup sur la teste de son destrier, qu'il luy treucha la testiere avec une grande partie des mandibules, tellement que le cheual outré de douleur, commença à fuir de tous costez avecques telle furie, qu'il eust emporté dom Florisel hors du camp, s'il ne l'eust arresté d'un coup du pommeau de son espee, qu'il luy donna entre les deux oreilles, le faisant tomber roide mort en la place. Mais auant qu'à tendre la cheute, dom Florisel qui le sentoit tomber, abandonna les estriers, & sauta legerement hors des arçons d'une fort

bonne grace. Puis embrassant son escu s'en vint à l'encontre du Roy, qui venoit pareillement à l'encontre de luy, & luy dit: Roy Bruzerbe, laissez vostre cheual, si vous ne voulez que ie le vous tue tout ainsi que vous m'avez tué le mien. Le Roy auant seulement à soy, sans mot luy respondre, donna viuement l'esperon à son destrier, pensant réuerfer dom Florisel dessous ses piedz. Mais se tirant legerement à costé, il euita le heurt du cheual, & en passant luy treucha les deux cuisses de derriere iusques aux moëllles de l'os. Le Roy voyant son cheual prest à tomber, s'en depestra au mieux qu'il peut: puis embrassant son escu vint à l'encontre de dom Florisel, & alors commencerent entr'eux une des plus belles escrimes de tout le monde, en laquelle ilz continuèrent deux grosses heures, sans que lon peust recognoistre lequel auoit plus d'auantage, excepté que le Roy estoit fort durement nauré, à cause de l'alegresse de dom Florisel, moyennant laquelle il sçauoit tant bien assoir ses coups, qu'il n'en laissoit escha per un seul en vain. Les endroitz ou ilz auoient combattu estoient tous rouges de leur sang, & tous semez des pieces de leurs escus, & des mailles de leurs haubertiz, tellement qu'il n'y auoit celuy des regardans, & des combatans mesmes, qui ne fussent fort estonnez comme ilz pouuoient tant durer l'un contre l'autre, pensant dom Florisel à tout par soy qu'il auoit rencontré l'un des plus rudes Cheualiers auquel il se fut onc esprouué. En ces entrefaites dressant la venue vers l'eschauffaut des Princeesses, il vid defaillir en leurs visages, la couleur qui tousiours croissoit en ses armes, car elles estoient toutes vermeilles de son sang: & entre les plus tristes il aperceut Helene, Arlande, & Siluie, à raison dequoy la colere & la force luy acirent tellement, que serrant son espee au poing, delibera fendre d'un seul coup la tette de son ennemy, ne se souuenant plus de la promesse qu'il auoit faite de la lui laisser en assurance. Et de fait il luy rua un coup dont il eust

il eust facilement acheué sa deliberation, & le combat, si le Roy ne se fust couuert de son escu, lequel estant trenché par la moytié, la pointe de l'espee de Florisel tomba sur son armet, & entra assez auant dans le test de la teste du Roy, qui fut si estonné & estourdy de cest horrible coup, qu'il se laissa tomber par terre, sans aucun sentiment avec le grand plaisir de tous les regardans, excepté de dom Florisel, lequel pensant l'auoir tué se vint incontinent resouuenir de sa promesse, & partant luy osta soudain l'armet de la teste. Mais voyant qu'il respiroit encores, & que la playe n'estoit mortelle, il atendit quelque temps, apres lequel le Roy retourna à soy fort honteux de se voir en tel estat. Adoncques dom Florisel luy dist: Roy des Massagetes, quitez moy les conditions de ceste querelle, car vous voyez bien que vous n'estes plus suffisant pour la deffendre. Je feray (dist le Roy) tout ce que vous voudrez, puis que ie n'ay plus de puissance pour resister à vostre vertu, & encores moins de volonté pour m'opiniastier contre la bonne fortune qui vous acompagne en toutes voz entreprises. Ce que ie veux que premierement vous faciez, dist Florisel, est que vous donniez ordre à faire apareiller voz playes, afin qu'estant guery vous vous en alliez vers la Roynie Sidonie lui presenter vostre teste au lieu de la mienne, selon la reuerence que j'ay tousiours portee à sa grandeur. Je vous prometz accomplir tout ce que vous me dites, respondit le Roy, car ie voy bien que la renommee & la louange laquelle iusques icy il auoit pleu aux Dieux me faire acquerir par le passé, n'estoit que pour maintenant vous acroistre d'autant la vostre. Adoncques le Prince Florisel lui presenta la main, & l'ayant souzleué sur les piedz, les Roys Iuges du camp acompagnerent le vainqueur en grande pompe iusques dans la grand sale du Palais, ou il fut receu par les Princes & Princesses en grand' ioye de tous. Estant desarmé, il fut conduit en vne belle cham-

bre, & couché en vn riche lit, ou ses playes lui furent apareillees. Le Roy semblablement fut emmené hors du camp, & au bout de deux moys que ses playes furent gueries, prit congé de ces nobles Princes, & s'en alla en l'isle de Guindaye pour accomplir enuers la roynie Sidonie ce qu'il auoit promis à dom Florisel. Telles & autres infinies auantures auenoient presque tous les iours dans la ville de Constantinople, ausquelles ces grans Roys, Empereurs, & Princes employoient la pluspart du tēps & le surplus aux assemblees, & veneries, ou à la dance, & au bal, & autres gracieusetez amoureuses.

Comme le Roy Amadis s'estant esgaré à la suyte d'un sanglier, rencontra vne Damoyelle laquelle ploroit vn Cheualier mort, & de ce qui en auint.

CHAP. XIX.

VN iour que les Princes alloient à l'assemblée selon leur coustume, ayās chacun vn habit de chasseur, avecq' vn espieu au poing, auint qu'ilz se departirent par plusieurs petitz destours, pour attendre quelques sangliers au passage. Or n'eut-on si tost commencé la huer, qu'un grand sanglier vint passer assez pres du Roy Amadis, qui laissa aller vn leurier qu'il tenoit en laisse. Le chien s'en alla soudain assaillir le pourceau sauvage, lequel par ce qu'il estoit hault & fort, lui donna telle dentee dās l'espaule senestre, qu'il en mourut sur le champ. Le Roy faché de la mort de son leurier, naura le sanglier de l'espieu, mais il se mit soudain à fuir, se sentant frappé, & le Roy le suyuit tousiours tellement qu'il le fit descendre de la montaigne dans vne plaine, sans qu'autre que lui s'en aperceust. Finablement le sanglier entra dans vne prochaine forest, ou encores que le Roy l'eust perdu de veüe, neantmoins croyant qu'il ne pourroit demeurer long temps sans tomber, se mit à le chercher

deça & de là, le suyuant à la trace du sang. Or le Roy se trouuant à l'autre bout de la forest en grand' peine, pour s'estre tant travaillé pour neant, entendit vne voix fort douloureuse: à raison dequoy piquant celle part, auisa vne Damoysselle mōree sur vn pallefroy, laquelle ploroit amerement, de sorte que le Roy en eut grande compassion. Aupres d'elle estoit vn Cheualier mort, ayant vn tronçon de lance au trauers de l'estomach. Adonc le Roy lui demanda quelle estoit la raisō de sa douleur, & comme ce Cheualier auoit ainsi esté occis. Hela, seigneur Cheualier (dist elle) il est impossible de voir encores au surplus du monde vne pauvre Damoysselle tant miserable comme ie suis: car vous deuez scauoir qu'ayant pris port icy pres avec vne troupe de Damoysselles, qui acompagnoient quelque grande Dame, laquelle s'en alloit voir le preux & noble Roy Amadis de Gaule, vn fier & horrible Gean, & dix Cheualiers qu'il menoit avec luy ont mis à mort presque tous noz gēs, puis ont enleué ma maistresse, & quelques siennes Damoysselles, car la pluspart s'en sont fuyes. Or estant venué par fortune dans ceste forest, ie rencontray le Cheualier que vous voyez icy mort, lequel ayant entendu l'infortune de ma Dame, me dist que ie le suyuisse, & qu'il s'en iroit prédre six autres Cheualiers ses cousins en vn chasteau qui estoit assez pres d'icy pour l'acōpagner en ce besoing. Nous en allans ainsi ensemble, rencontrâmes vn Cheualier, qui sans aucune ocaſion demanda le combat a celui qui me conduisoit, lequel l'accepta, & pour chose que ie lui peusse dire, ne le sceu onc engarder de combattre. Mais son desastre & le mien voulurent qu'il fust rencōtré au descouuert de son escu, & ainsi renuersé mort par terre comme vous le voyez. Voylà, seigneur Cheualier, comme ie suis icy demeuree seule, pour y plaindre mon malheur, & la mort de ce Cheualier. Le Roy ayant grande cōpasion de la Damoysselle, & desirant faire reparet le tort qui auoit esté fait à sa

maistresse pour l'amour de luy, avec ce brave & noble courage q'iamais ne lui defailloit, mit pied à terre, & laissât son habillemēt de chasseur, dist à la Damoysselle qu'elle lui aydast à s'armer des armes du Cheualier mort, & qu'il vouloit qu'elle le guidast au lieu ou sa maistresse auoit esté enleuee, & que Dieu leur enuoyeroit quelque bon secours selon la faueur dont il a acoustumé vser enuers ceux qui sont en telle necessité. La Damoysselle voyant le Roy assez biē disposé de sa personne, & l'estimât beaucoup pour ce qu'il vouloit entreprendre, encores qu'à la barbe, & aux cheueux il lui semblast assez aagé, lui dist: O Seigneur Cheualier combien preux & hardy vous deuez estre en vostre ieune aage, puis qu'en ceste viellesse vous voulez encores vous hazarder à vne si dangereuse entreprise. Certainement vostre beau taint ne vous denie point tant la force qui est necessaire contre les Damoysselles, comme les cheueux blancs, & la barbe blanche semblent vous denier celle qui est requise contre les Cheualiers: partant ie supplie Dieu que par nostre iuste querelle, & par la grandeur du bon courage que ie voy en vous, il recompense le deffaut de vostre premiere ieunesse, laquelle (cōme ie croy) vous n'avez laissé passer sans auoir acquis quelque haute renommee au fait des armes. Le Roy en souz-riât luy dist: Laissons celà pour ceste heure, car ce qui me manquera par mon aage, sera suplee par vostre bon droit. Adoncq' il s'arma des armes du Cheualier occis, & prit sa lance qui estoit encores entiere, puis montant sur son cheual, & la Damoysselle sur son palefroy luy dist: Guidez moy maintenāt au lieu ou vous pensez que nous puissions trouuer les voleurs qui ont enleué vostre maistresse. Il seroit paraenture meilleur (respondit elle) que nous atendissions plus grāde compagnie, car l'entreprise me semble trop mal aysée, & trop dangereuse pour vous seul. Vous ne dites pas mal (dist le Roy si nous auions le loysir d'atēdre quelque nouveau secours:

secours : & partant faites ce que ie vous dy sans faire plus long seiour en vn temps que nous auôs si bon besoing de nous hastier: car i'espere en Dieu qu'il ne nous abandonnera point, & estime beaucoup plus sa faueur que l'ayde de toutes les compagnies du monde. Et bien (dist la Damoysselle) puis qu'il vous plaist, au noõ de Dieu soit, à moy ne tiendra. A ces paroles elle fit trotter son palestroy le plus tost qu'elle peut, & le Roy la suyuit par vn petit sentier, lequel trauestoit la forest: mais auant qu'il en peust estre sorty, rencontra vn Cheualier bien monté, & armé de toutes pieces, lequel luy dist: Cheualier, qui vous fait auoir si grand hastel Suyuez moy (dist le Roy) si vous le voulez sçauoir, car ie n'ay le loysir de le vo⁹ dire. Celuy de la forest iugeant par la belle contenance du Roy que ce deuoit estre quelque noble & hardy Cheualier, le suyuit disant: Par sainte Marie ie veux voir qu'elle si grand' haste vous auez. Allans vn peu plus auant, ilz rencontrerent deux autres Cheualiers, qui emmenoiẽt par force vne Damoysselle, laquelle soudain qu'elle vid le Roy & celuy qui le suyuoit, leur esclia: Las, Seigneurs Cheualiers pour Dieu secourez moi contre ces trahistres qui pour chassent mō deshonneur. Le Roy tourna la teste vers le Cheualier qui le suyuoit, & lui dist: Secourez ceste Damoysselle, car quant à moy ie n'ay pas le loysir d'arrester. Je croy (dist l'autre) que ce que vous en faites n'est sinon pour fuir plus à vostre ayse, puis que vous deniez ainsi vostre secours à vne Damoiselle qui le vous demande à son tant grand besoin. Le Roy suyuit tousiours son chemin sans luy respondre, & le Cheualier s'en courut vers les autres deux, & leur dist: Laissez, trahistres paillards, ceste Damoysselle, si vous ne voulez auoir entrepris à vostre mal'encontre vne si grande villainie. Les deux s'en vindrent les lances baissées à toute course contre luy, disans: Par dieu vous maudirez l'heure pour la folie que vous faites en vous souciant de ce dont vous n'auẽz que faire. Il ne leur

respondit autrement, ains brochant son destrier des esperons, s'en vint contre eux la lance baissée avec desmesuree roydeur. Les deux rompirent sur luy, mais il en ataignit tellement l'vn au descouuert de son escu, qu'il luy passa la lance au trauers du corps, & le desarçonna tout roide mort par terre: Puis mettāt la main à l'espee, se tourna cōtre l'autre, lequel le receut courageusement & commencerent à s'entretaster assez auif. Toutesfois le combat dura bien peu, car le Cheualier qui vouloit violer la Damoysselle ne pouuant plus endurer les braues coups de son aduersaire, delibera par la fuite de l'abandonner en repos, & se mettre hors du danger: ce qu'il fit, mais le Cheualier n'eut aucun soucy de le suyure, & dist à la Damoysselle: Suyuez moy, à fin que ce mal'heureux ne vous reuienne encores faire quelque outrage: car i'ay si grande fantasie de trouuer mon autre fuyart, qui galoppe deuant moy, que ie n'ay deliberé de m'arrester iusques à ce que ie voye à qu'elle fin resortira sa couardie. Couard me semble il bien (dist la Damoysselle) puis que me voyant en telle necessité, il ne m'a osé secourir, ains vous a laissé seul prendre le combat contre deux. Que sçauẽz-vous (dist le Cheualier) s'il n'auoit point meilleur besoing de remedier à sa crainte, que de soutenir vostre bon droit. Vous dites vray (respondit la Damoysselle) & partant allons là ou il vous plaira, car ie ne suis deliberée de vous laisser, craignant tomber encores en quelque autre malheur. Suyuez moy doncq', dist il. Ainsi s'en allerent apres le Roy, qui estoit desia bien loing de uāt: mais tantost apres le Cheualier le voĩāt r'entrer dans vn petit bocage, dist en riant Je prie Dieu qu'il ne nous laisse point perdre ce beau cerf, car il a trouué vn haye fort propre pour se cacher. Tenez-le pour perdu (dist la Damoysselle) si vous ne voulez encores perdre la peine que vous employerez à le suyure. Ces huyssons ne m'empeschẽront point que ie ne le trouue, dist le Cheualier. Et ainsi deuisans entrerent dans,

dans le petit bocage, ou ilz auoient premierement veu entrer le Roy, & le suyurent au trac de son cheual: mais le bon Prince acompagné de la damoiselle qui le guidoit n'eust si tost passé dans la pleine qui estoit par delà ceste petite forest, qu'il auisa vne listiere, & à l'entour d'icelle vne grande compagnie de Damoiselles qui ploroient & se lamentoient fort piteusement. Elles estoient suyues d'un grand geant, & de dix Cheualiers, qui les menaçoient fort rudement à battre si elles ne se vouloient taire. Incontinent la Damoiselle guide du Roy les aperceut, & dist: Helas, voilà ma dame ma maistresse, & ses Damoiselles que lon emmene prisonnières: ie vous prie me laisser icy, car ie ne scaurois auoir le courage d'aller plus auant. Faites (dist le Roy) ce qu'il vous plaira, puis que i'ay deuant moy ce que ie demande: Il sera donc meilleur (dit la Damoiselle) que ie m'en retourne sur mes pas, car ce me seroit trop grand folie d'attendre icy le mesme malheur, auquel ie peux voir mes compagnes. Ainsi s'en retourna par le mesme chemin qu'elle estoit venue, sur lequel tantost apres elle rencontra le Cheualier, & la Damoiselle qui suyuoient le Roy, lesquelles l'ayans aperceue, la recogneurent incontinent, & luy dirent, D'ou vient celà, Damoiselle, que vous fuyez de celuy qui fuyt? Dites, ou auez vous laissé vostre compagnie? Ie ne fuy point de celuy qui fuyt (dist la Damoiselle) mais ie fuy bien de celuy qui va entreprendre l'un des plus dangereux combatz qu'il scauroit estre possible de penser, non pour s'en fuyr de moy, mais pour sauuer ma dame ma maistresse, & ses Damoiselles mes compagnes. Que voulez vous dire par là? dist le Cheualier. Ie veux dire, respondit la Damoiselle, que si vous estes autant hardy comme voz paroles le monstrent, vous alliez secourir l'un des plus hardis Cheualiers que i'aye encores oncque veu, à fin de vous desabuser de la mauuaise reputation en laquelle vous l'avez: & ce pendant ceste damoiselle & moy vous atē-

drons icy, pour voir ce qui auindra de luy & de vous. Le Cheualier oyant ces paroles eut trop plus grande enuie que deuant, de voir qu'elle yssuë il auroit de sa queste, & partant il dist aux Damoiselles, A Dieu soyez donc, car ie veux vn peu entendre ce secret. Ainsi s'en alla au grand gallop apres le Roy, lequel bien tost apres que la Damoiselle qui le guidoit l'eut abandonné cria au geant, & à ses Cheualiers qu'ilz l'attendissent. Le geant fort coléré dist à sa troupe, Allez vous en tousiours vostre chemin, car ie vous rataindray facilement aussi tost que i'auray chastié la folie de ceste vile & chetive creature, qui s'en vient ainsi hurlant apres nous. Auecques telles & autres menaces le geant s'en vint contre le Roy, & le Roy contre luy, tenant la lance baissée, fort bien couuert de son escu, & courant d'un si droit fil qu'il s'en alloit ataindre le geant par le mylieu de la poitrine, si de sa cimenterre il n'eut aucunement destourné la lance, laquelle neâtmoins vint passer par l'espaule du cheual, & luy transperçant les flancz tomba tout roide mort par terre, & son maistre souz luy, lequel comme lourd & mal habille qu'il estoit, se brisa vne iambe de la roideur de la cheute. Le Roy passa outre, & paracheua sa carriere, puis retourna, & voyant le geant en tel desroy, il eut volontiers mis pied à terre, pour se depescher de son miserable corps auant qu'il eut le loisir de se releuer. Mais les dix Cheualiers voyans leur maistre en ce danger, coururent à bride abatuë à l'encontre du Roy, luy escrians qu'il ne touchast au geants'il ne vouloit mourir sur la mesme heure. Le Roy ne se souciant trop de leur menaces, mit courageusement la main à l'espee, & se vint ieter pesse messe entr'eux. Quelques vns rompirent leurs boys sur luy, mais il ne le firent esbranler dans la selle non plus que s'ilz eussent hurté contre vn rocher, & partant commencerent à l'environner de toutes parts, le frappant fort outrageusement deuant & derriere, sans luy donner aucun repos. Là eussiez

fiez-vous peu voir la noblesse, & la vertu du bon Roy, lequel souttenoit fermement leurs assautz, & ne ietoit aucun coup en vain, car du premier il abatit le heaume & la teste de l'un des dix, & du second il transperça le plus prochain de luy par le milieu de l'estomac, tellement que ces deux trebucherent mors par terre entre les iambes des cheualx. Ce pendant les Damoyelles voyant qu'elles n'auoient plus aucune garde à l'entour d'elles, commencerent à s'en fuyr deçà & delà sur leurs palefroys & abandonnerent la litiere de leur maistresse, ou elle demeura acompagnée de deux Damoyelles seulement, sans iamais vouloir prendre la fuite, pour quelque chose que lon luy peust remonstrier, disant que si le Cheualier incogneu deuoit vaincre elle seroit assez à temps en liberté, sinon, qu'elle ne vouloit point estre pl⁹ heureuse que celui qui d'un si noble courage s'estoit mis en tel danger pour l'amour d'elle, & partant qu'elle se contenteroit de sa bonne & de sa mauuaise fortune, à fin que selon l'issue du combat, les Dieux disposassent d'elle tout ainsi qu'ilz auroient premierement disposé de luy. Auecque ceste persuation la vertueuse & noble Dame regardoit par grande merueille la haute cheualerie du Roy, lequel combatant contre les huit dont il estoit enuironné, ne monstra iamais vn seul gette par lequel on peust seulement coniecturer en lui aucune crainte ny faute de cuer, encores que le combat fust si mal departy. Ce pendant le Cheualier qui le suyuoit sortit de la forest, & voyant le Geant renuersé ieter vne espoille fumee par la visiere de son heaume pour la grande douleur qu'il sentoit ne se pouuant arracher de dessouz son cheual, puis regardât les autres deux Cheualiers mortz, & la puissance, & la hardiesse auecque laquelle le seul Roy combattoit contre les huit, dit à parsoy, O Dieu ne sçay par quel moyen ie pourray desormais recompenser la mauuaise reputation que i'ay eue du meilleur Cheualier du monde, puis

que ie voy en luy tant de prouesse qu'en la grande extremite ou il est, il a bien peu affaire de mon secours. Toutesfois en faisant maintenant pour luy ce qui me sera possible, ie m'essayeray à luy payer vne partie du tort que ie luy pourrois auoir fait, en attendant que quelque autre meilleure occasion se presente pour le satisfaire du surplus. Acheuant ces propos il commença à mettre la main à l'espee, & s'en courut secourir le Roy : & d'autant qu'il estoit fort braue & excellent Cheualier avec son ayde les huit furent bien tost reduytz en telz termes, que les quatre estans abatus morts par terre, les autres quatre s'en fuyrent. Adonc le Cheualier de la forest les poursuivit assez rudement, mais le Roy s'en retourna deuers le Geant Bruzo Cornelio (car il auoit ainsi nom) lequel s'estant finablement tiré de dessouz son cheual, combien qu'il ne se-peust autrement tenir sinon appuyé d'un genou en terre, néantmoins il n'auoit encores perdu l'esperance de la victoire, ains de sa cimenterre épouuentable menassoit horriblement le Roy, lequel ne tenant grand conte de ses furieux gestes piqua viuement son cheual, & luy fit passer par dessus le ventre. Mais le Geant au passer tout renuersé qu'il estoit donna tel coup de son coutelas dans les deux cuisses de derriere du cheual, qu'il en trécha l'une entiere ment, & ouurit l'autre iusques à los, puis se releua comme deuant sur le genou ayant laissé tomber son armet en terre. Le Roy sentant tomber son cheual tira soudain les piedz hors des estriers, & se ieta auecq' grande legereté dans la campagne, puis bien couuert de son escu vint à l'encontre du Geant esperant lui fendre la teste en deux, par ce qu'il la lui voioit desarmee. Tant fut le Roy adroit & prompt à ruer son coup, que Bruzo Cornelio n'eut aucun loisir de jeter son escu au deuant, ains auança seulement le bras fenestre qui luy fut taille auec son armure iusques dâs la chair viue, en sorte que la pointe de l'espee luy entama encores vne par-

tie de la teste. Le geant outré de la douleur du coup en vint ruer vn autre contre le Roy auecques telle roideur qu'il lui fit voler son escu en deux pieces, sans pouuoir retenir si bien sa cimetterre, que pour la grâde force dont il l'auoit brandie, elle n'entraist plus de la moytié dans la campagne, sans la retirer oncques puis. Lon se pourroit esbahir comme le Roy n'eut le bras coupé de ce merueilleux coup: mais vous deuez sçauoir que le voyant venir de si grande roideur, il vouloit se retirer arriere pour le laisser passer, ce qu'il ne sceut faire si promptement, que la pointe de la cimetterre n'entraist en fendant environ trois doigtz dans son escu, à raison dequoy le coup s'en ensuyuit tel qu'il vous a esté recité. Or le Roy voyant Bruzo Cornelio desarmé de la teste, & des mains, ne fut paresseux à prendre sa bonne fortune, auant qu'il eust le loisir de releuer sa cimetterre, & partant luy donna tel coup sur le mylieu du chef, qu'il luy fendit iusques aux espaules, mettant par ce moyen fin au combat, & à la vie de l'horrible Geant. Adonc ayant rendu grace à Dieu d'une si belle & heureuse victoire, Il aperceut le Cheualier qui l'auoit secouru, en vne aspre & dangereuse meslee auecques les quatre qui s'en estoient premierement fuyz, car ilz estoient retournez contre lui, le voyans seul à les poursuivre. Et partant le Roy prenant vn cheual & vn escu des Cheualiers morts, le courut secourir, & à son arriuee des deux premiers coups renuersa les deux premiers morts par terre, & incontinent apres, les autres deux naurez de maintes mortelles playes qu'ilz auoient premieremēt receuës en ceste meslee, cōme n'ayans plus aucune esperance, faillirent de cuer, & tomberent de leurs cheualz en bas donnans le dernier signe de la mort. La merueille que le Cheualier de la forest receut de la prouesse du Roy fut si grāde, qu'il pensoit songer voyant en si peu de tēps le cruel Bruzo Cornelio aueque les dix Cheualiers, occis & estenduz sur la verdure. Mais s'il eust

sceu par la main de qui estoient faites ces grandes merueilles, il ne s'en fust point esmerueillé, veu que la merueilleuse renommee du tresexcellent roy Amadis de Gaule, auoit desia tant de foys fait esmerveiller tout l'vniuers, que désormais on ne s'esmeruilloit plus de ses merueilleux hautz faitz d'armes, veu qu'il y estoit acoustumé, & pareillement ceux de son lignage, cōme engendrez du vray Fenix, lequel en cheualerie, liberalité, saintes meurs, & toutes autres vertus qu'on pourroit penser, surpassoit facilement tous les plus excellens Roys qui regnerent onc sur la terre.

Comme le roy Amadis recogneut la belle Dame qu'il auoit deliuré d'entre les mains du fier Geant Bruzo Cornelio, & le Cheualier qui l'auoit secouru.

CHAP. XX.

NE restant plus personne à qui combattre, le Cheualier estrange dist au Roy, Seigneur Cheualier pardōnez moy si pour vn tēps j'ay eu quelque mauuaise opinion de vous, car ie vous assure que ie vous tiens maintenant pour le plus excellent Cheualier qui oncques ceignit espee, & vous supplie me dire qui vous estes à fin que ie puisse recognoistre par son nom, celuy auquel par experience j'ay cogneu tant de haute cheualerie. Le Roy luy respondit, c'est moy qui ay receu ayde & faueur de vous, & partant ie suis autant obligé à vous cognoistre, & à poursuyure vostre amitié, comme vous à chercher la mienne. Mais auant qu'entrer plus auant en ces propos, ie suis d'auis q nous aillons voir qui sont les Damoyelles, lesquelles nous auons deliurees d'entre les mains de ces brigans. Ainsi s'en allerent le Roy & le Cheualier de la forest vers les trois Damoyelles, qui sortirent incontinent de leur litiere pour venir au deuant d'eux, d'autant qu'elles auoient grād' enuie de les cognoistre, mesmemēt le Roy, auquel pour sa prouesse elles estoient redeuables de leur honneur,

neur, & de la vie ensemblémér. Or quand ilz furent assez pres les vns des autres, le Roy auisant l'une des trois fort belle, & de bien bonne grace, le cueur lui tressaillit, car il la pensoit recognoistre comme, celle qu'il auoit veüe long temps au parauant: mais s'estant encores aпроché plus pres, il osta son armet de la teste, & dist à haute voix, O Dieu! combien est grande la bonne fortune que i'ay receuë ce iourd'huy, puis que i'ay eu le moyen de faire quelque agreable seruice à celle qui merite autant que lon l'honore qu'aucune autre Princesse du monde. Vrayement, ma Dame, si ie ne m'abuse, ie vous suis de beaucoup plus redeuable que ie ne fus oncq' par cy deuât, car ie ne pense point que vous soyez venuë en ceste contree, sinon pour continuer les faueurs dont vous auez tousiours vsé enuers moy. Sachez que ceste belle Dame à qui le Roy parloit, estoit la royne Cleofile, & partant soudain qu'elle l'eut recogneu, & entendu ces gracieux propos, elle lui dist. O Dieux immortelz! comme vous m'avez fait rencontrer celuy que ie cherchois! & en vn temps si oportun qu'aucune le tesmoignage de vostre excellence, Monsieur, vous auez encores gardé mon honneur de la violence qui luy estoit apareillee. Adonc s'embrassans & baisans par grand' amour, le Roy lui dist, Je vous prie, ma Dame, me dire quelle fortune vous auoit cōduit en ce desastre pour m'en acquerir vn si grand heur. Monsieur (dist elle) le desir de vous voir & la royne Oriane, m'a fait abandonner mon Royaume, pour vous venir satisfaire de tout ce en quoy ie me suis réduë vostre redeuable depuis le iour que ie vous donay mon cueur, avecques le plus loyal & chaste amour que iamais Damoysselle ayt porté à Cheualier. A raison dequoy ie suis sortie de mes terres acompagnée de trois nauires bien equipées, & fournies de tel nombre de Dames & Gentilz-hommes que ma personne le requeroit. Mais estans assez pres d'icy, mes nauz ont esté separees pour quelque

petite tourmente de mer, de sorte que celle en laquelle i'estois avecque mes Damoysselles, a seulement pris terre au prochain port, dans lequel nous ne fusmes si tost descenduës pour nous reposer du travail de la mer, que le Geant & les Cheualiers que voylà morts, nous prindrent, & emmenerēt toutes, excepté celles qui pourrēt gagner leur liberté à la fuyte. Ma Dame (dist le Roy) ie suis autant assuré de la valeur de vostre personne pour ne perdre aucune gloire de celles qui vous peuuent estre otroyees, comme de vostre sage discretion pour les scauoir conquerir à toutes les occasions qui s'en offrent. Ainsi le croyie (respondit elle) puis que ma fortune s'est peu acompagner avecque la vostre: & partant au moyen de ce qui m'est deu pour l'amour de vous, il n'y a louage que ie ne puisse meriter. C'est de vous (dist le Roy) dont ie tiens ces louanges, au moins si aucunes me sont deuës pour ce regard. Ce pendant le Cheualier estrange cognoissant que celuy estoit le roy Amadis, osta son armet, & encores qu'il fust noir de visage, si monstroit il vne fort belle disposition de corps, car c'estoit dom Gazar de Tarsis, qui en ce temps auoit laissé l'Isle de Guindaye, pour venir voir la belle assemblée des Princes qu'il auoit entendu estre lors en Constantinople. Le Roy ne voulut lui presenter les mains que premierement il ne se fust donné à cognoistre à lui, & lors l'embrassa de bon cueur, non sans le priser beaucoup pour sa prouesse, qu'il auoit nouvellement cogneuë à l'essay. Adonc ayant fait signe aux autres Damoysselles qui estoient espādūës çà & là, elles retournerent en grand plaisir pour se voir ainsi deliurées du danger ou elles estoient au parauant. Puis la Royne estant remontée en salitiere, le Roy & le Prince se mirent chacun à son costé, & entre plusieurs gracieux deuiz, prirent leur chemin vers le lieu, ou le Roy auoit abandonné la poursuyte du sanglier. Mais ce pendāt les autres Princes ne le trouuans point, & n'en pouuans sca-

uoire

voir aucunes nouvelles, se mirent à le chercher par la trace du pourceau sauvage, & artiuans aupres du Cheualier mort, aperceurent son habillemēt de chasse qu'il auoit despouillé, dont ilz ne sceurent que penser, & entrerent en fort grāde crainte que quelque encombrer ne luy fust auenu. De là suyuant la trace des cheuaults, trouuerent les deux Damoyelles qui s'estoient cachees dans la forest, lesquelles au degaisner des espees, eurent vne si grande peur qu'elles s'en estoient fuyes bien loing du lieu ou elles auoient promis à dom Gazar de Tarsis d'arendre l'ysue du combat. Les Princes aduertis par elles du danger ou estoit le Roy, se mirent à bride abatuë au chemin qui leur fut monstré: pour l'aller secourir. Amadis de Grece, & dom Falanges d'Astre acoustrez de leurs habillemens de chasse faitz de toile d'or, estoient les premiers en ceste queste: au moyen dequoy ilz furent pareillement les premiers qui trouuerent le Roy & la Roynie Cleofile avecques le Prince dom Gazar de Tarsis. Alors ilz firent premierement à la Roynie les reuerences que vous pouuez pēser, puis à dom Gazar, qu'Amadis de Grece embrassa plusieurs foys fort affectueusement, par ce qu'il estoit filz du roy Fulurtin son grand amy. Ainsi de cōpagnie s'en retournerent vers la ville avecques le grand contentement du roy Amadis, tant pour la bonne auanture qui luy estoit auenuë, comme pour amener de celle chasse vne tant agreable & gracieuse proye, aux Imperatrices & Princesses, desquelles elle fut receuë en grande ioye, & mesmement de la roynie Oriane, car elles deuisoient toutes deux ensemblement en grand plaisir, d'autant que la roynie Cleofile, outre sa grande beauté, estoit encores fort sage, & bien aprise en celle premiere ieunesse ou elle estoit, tellement que toutes les Princesses se plaisoient fort en sa compagnie. Quelque tēps apres son arriuee ses autres nauz prirent port deuant la cité, dont elle fut fort resiouye. Ainsi se maintenoit la cour en

grand plaisir, pour les diuerses & estranges auantures qui y arriuoient tous les iours, & mesmement pour la presence de la belle & excellente roynie Cleofile, qui demeura là quelque temps comme vous entendrez cy apres.

Comme Bruzerbe le crespelu roy des Massagettes, se presenta à la roynie Sidonie: & comme l'extreme douleur qu'elle en receut, luy fit demander vn don à Daraide, dont elle se mit, & toute sa cour en vne merueilleuse confusion.

CHAP. XXI.

BRuzerbe le crespelu Roy des Massagettes estāt arriué en la cité de Guindaye, s'en alla incontinent faire la reuerence à la roynie Sidonie de la part de dom Florisel, & lui recita toute l'ysuë de leur combat. Mais la Roynie l'ayant escouté assez long temps, sentit vne angoisse demesuree, voyant que la fortune estoit du tout rebelle au desir qu'elle auoit de mourir, & de se venger de dom Florisel par la recompense de sa teste. Adonc la douleur cōmença à la tourmenter de telle furie, que si elle eust demeuré plus lōg temps en la presence du Roy, on l'eust veuë abandonner le respect de sa magesté, & autorité royalle iusques à perdre toute patience. Au moyen dequoy se contraignant aux mieux qu'il luy estoit possible, elle prit congé du Roy, puis s'en alla en la chambre ou sa fille estoit, avecques Daraide, la roynie Briangie, & Garaye, lesquelles furent fort estonnees quand elles la virent entrer toute enflammee de cruel feu, qui naissoit du travail de son magnanime cuer, avec lequel par vne force contrainte, elle auoit tousiours iusque là resisté à la secreete douleur qui la martiroit au dedans, à fin de la descouuir puis apres par le dehors en vne double angoisse, qu'elle tesmoignoit assez par les grosses & infinies larmes qui luy tomboient des yeux: Mais son

son maintien esmeut tellement le tendre cueur de Diane, qu'elle commença à tenir compagnie aux pleurs de la Roine sa mere avecque pareille solemnité de larmes: puis mettant en grand trouble toutes les dames & damoiselles qui estoient presentes, elle lui dist: Helàs, ma dame qu'elle chose peut-ce estre qui vous cause si grand ennuy? La Roine ne respondoit point, ains avecques plusieurs alpres sanglots, accroissoit le dueil, & le desdaing qui lui bouillonnoient en la poitrine: dequoy Diane commença à croistre pareillemēt son travail, acompagnant tousiours les angoisses de la Roine sa mere avec pareille doleance des siennes. Mais Daraïde ne pouuant plus se contenir de monstrier le vray amour dont elle estoit embrasée, voyant sa dame mener tel dueil pour celui de sa mere, elle se mit à genoux deuant la Roine, & baïsant premierement ses belles mains, lui dist, Ma dame ie supplie vostre grandeur me dire l'ocasion de l'ennui auquel ie vous voy: & ie vo^s promets & iure par le loyal seruice que ie doy à ma dame Diane, de m'essayer à vous satisfaire ou de mourir en mon deuoir. La Roine la regarda ainsi agenouillée deuant elle assez long temps, & finalement en grand' peine la releua par la main, & luy dist, Helàs Daraïde, ie veux que vous me donniez vn don, à fin de voir si vous me voudrez dōner le secours que iusques icy vo^s n'avez encores denié à aucū de ceux qui vous en ont requis à leur besoing. Ma dame (dist lors Daraïde) ie vous supplie en me comādāt requerir de moi ce qu'il vo^s plaira, car ie vous promets d'accomplir ce que vous me commanderez, ou de satisfaire au seruice que ie vous doy, en m'y employant iusques à la perte de ma vie, veu par yne chose moindre il ne me seroit iamais possible de m'acquiter enuers vous de ce en quoy ie suis redevable à vostre grandeur. Daraïde (dist la Roine) j'accepte voz paroles, & voz promesses, à fin qu'en les mettant à execution, vous satis-

faciez à l'iniure qui m'a esté faite, & à ce en quoy ie me suis redevable enuers moy mesmes, pour la recompense de l'amour, que ie ne puis refuser à celui, duquel par vostre aide j'atens la raisonnable vengeance pour mon dernier contentement. Je vous requiers donc la teste de dom Florisel de Niquee, & veux qu'aussi tost que vous l'aurez mise en ma puissance, vo^s me tranchiez pareillement la mienne, à fin que moy estant satisfaite du tort dont il m'a abusée, il demeure semblablement satisfait de l'ardāt amour que ie luy ay porté toute ma vie, comme son ame se pourra asseurer, me voyant mourir d'une volontaire mort, pour ne pouuoir plus viure apres la sienne. Et ne faites, Daraïde, aucune difficulté de m'otroyer ce que ie vous demande, car il ne me reste plus aucun autre remede, par lequel en mettant fin à la vie desolée ou ie suis, ie puisse mieux satisfaire à l'obligation en laquelle ie suis redevable à mon honneur, ny à l'amour que ie porte à celui duquel ie desire ceste iuste vengeance. Daraïde oyant ainsi parler la desesperée Roine, & considerant d'un costé son impitoyable requeste, & de l'autre la promesse qu'elle lui auoit faite, se trouua en telle perturbatiō qu'elle fut long temps sans lui pouuoir respondre vn seul mot, comme celle qui remuoit en son entendement vn milion de responces inconstantes, & toutes contraires les vnes aux autres. Et partant la Roine luy dist, Parlez Daraïde, que respōdez vous à ce que ie vous demande? Ma dame (respondit elle) la grandeur de ce dont vous me requerez, & le respect que j'ay eu à ce que ie doy au Prince dom Florisel à cause de ma dame Diane, m'ōt fait ainsi demeurer long temps sans vous respondre. Maintenant, ma dame, ie vous puis dire, attendu la haute Cheualerie du Prince Grec, que par la perte de la vie ie pourray facilement satisfaire à la promesse que ie vous ay faite, encores que ie ne puisse autrement acōplir vostre demāde.

Toutesfo'is si la fortune veult que la teste de Florisel tombe en mon pouuoir, apres vous l'auoir presentee, ie vous requerray d'une chose laquelle vo' m'acorderez s'il vous plaist, à la charge que si vous ne l'accomplissez, ie ne seray pareillemēt tenuē d'accomplir vostre seconde demande, qui est de couper vostre teste, apres vo' auoir donné celle de dom Florisel. La Roine lui respondit, I'accepte voz promesses, avecques les conditions que vous auez proposees, moiennant que ce dont vous me requerrez auāt que mē faire iouir du secōd don que ie vous demande, n'empesche point mon contentement. Ainsi le vous promets- ie, dist Daraide. Qui vo' pourroit reciter la peine qu'endura la Princefse Diane, quand elle entendit ces conuenances, & ces trois extremitez tāt malaysees, esquelles il n'y auoit aucun remede pour empescher que sa chere Daraide n'e receust la mort, ou bien son pere & sa mere, ou paraenture les trois ensemble? La triste Diane ne pouuāt soustenir celle miserable angosse, qui luy auoit esté iusques à lors incogneue, se laissa tomber toute pasmee entre les bras de la Roine de Corit: Bien tost apres Daraide voyāt la douleur de sa dame, & meslant la pitié qu'elle prenoit d'elle avecques la confusion ou elle estoit desia reduite au parauant, se laissa pareillement tomber en sursaut dans le giron de la Roine Sidonie, ne monstrant non plus de sentiment en tous ses membres, ny plus de couleur en son visage, que ceux lesquels on conduit au sepulcre: tellement que pour eau, ny autre liqueur froide qu'on peult ieter sur elle, ny sur Diane, il estoit impossible de les faire retourner à foy: au moyē dequoy elles estāt tenuēs pour trespassēes, parce qu'aucune des damoiselles là presentes n'auoit iamais veu pasmoison durer si long temps, ce fut vne chose fort estrange & encores plus pitoyable à ouir, que les pleurs, les criz, les plaintes, & les lamentations dont la tour de Diane retentissoit de toutes

parts. La Roine de Corit plorant tendrement & tenant sa bouche sur le froid visage de la Princefse, rendoit les gemissemēs des autres damoiselles beaucoup plus pitoyables par les siens. Mais la Roine Sidonie voyant sa fille, & sa Daraide en si pitieux estat, tordant les mains d'une angosse mortelle, cōmença à se lameter en ceste façon, O graue honneur de mon hault & royal lignage, comme tu m'as cōduite en vn defaire duquel ie puis receuoir le iuste guerdon de ma folie! O amour, & cōme tu fais aparoir en moy ta force trōperesse, en me faisant vsler de haine & de cruauté enuers celuy que i'aime trop plus q moymesmes! O fortune avec quelle incōstance & legereté tu tes changee, en me mettant en tel desespoir, à lors que ie cōmençois à conceuoir l'esperance d'accomplir bien tost ce que plus ie desirois en ce monde! O Dieux immortelz, avecques cōbien de rigueur vous auez voulu recōpenser le fier orgueil, & la superbe presumptiō de la Roine Sidonie! O ma chere fille, & encores fille de celui qui desroba les saints droits de ma chasteté. Helas comme vous m'auiez voulu payer de ce que vo' me deuiiez pour l'amour que vo' auez tousiours porté à vostre pere, en recōpense des outrages, & des iniures q ie luy ay tousiours pourchassēes! O ma fille la premiere du monde, & la nompareille en beauté, à fin de rendre pareillemēt nompareille la douleur que i'endure maintenant de ta mort! O cruelle mort, cōme me laisses tu en vne tant miserable vie! O vie cruelle, comme me laisses tu en vne mort tant miserable! O Dieux immortels, pourquoy permettez vous vne si grande iniure cōme est celle que ie reçoys par ma vie en voyant ma fille Diane morte? Mais que dy- ie? il est iuste que comme iustes que vo' estes, vous me faciez vne si rigoureuse iustice, pour me faire prendre la vengeance de moy, en me confondant en vne douleur que ie me suis causée moymesmes. Helas Daraide comme tu donnes, à moy & à ma fille, le

deuoir.

deuoir duquel tu nous estois redevable: A moy, en me donnant avecques ta fin, la fin de la folie de ma vengeance, & en estaignant par ta mort, l'esperoir que j'auois en ta vie: A ma fille, en recompensant sa mort par la tienne, qui est le dernier payement dont tu estois obligee à l'amour que tu lui portois, & à celui qu'elle te portoit. O bien heureuse Damoiselle, qui par ta mort as peu payer ce que tu deuois à ma Diane par ton amour, encores que sa mere n'en ait tant sceu faire pour le sien. O saint Moraïsel, comme tu es maintenant bien vengé de moy, & bien satisfait de la vengeance que ie t'ay si lōg tēps pourchassée! O dieux immortels, puis que vous me refusez la iustice en me laissant en ceste miserable vie, ie ne la refuseray point à mes mains, & garderay le priuilege de ma franche & libre volonté que j'ay receu de vous à ma naissance. Or sus doncques, & qu'en me donnât la mort de mes propres mains, ie me dōne la vie, laquelle vous m'avez si long tēps deniee pour ne m'auoir assez prōptement donné la mort. La Roine en disant ces paroles degaine l'espee q̄ Daraïde pasmee en son giro auoit pendue au col. Mais cōme elle pensoit en apareiller la pointe contre sa poitrine pour s'enfermer, Garaye & les autres damoiselles lui acoururent en grand effroy: & par ce que nonobstant leurs remonstrances elle estoit deliberee de mourir, & que ses damoiselles de toutes leurs forces se tourmentoïēt pour l'empescher de ce cruel sacrifice: les voix, & les trepemens des piedz rendirēt si grand bruit, que Diane toute effrayee retourna de sa pasmoison. Mais elle s'effraya beaucoup d'auantage, quād elle vid la Roine se debatre entre ses damoiselles avec vne espee en la main: Lors se faisant faire place, la conrut embrasser, & luy dist: Helàs, ma dame, qu'est-ce que vous voulez faire de ces armes? La Roine voyant sa fille en vie, qu'au parauant elle auoit tenue pour morte, receut tel plaisir que ce fust grāde merueille, comme celle soudai-

ne ioye ne luy donna la mort qu'elle cherchoit avecques tant de trauail. Or ne peut elle tant resister à ceste nouuelle alterat.ō qu'elle ne tombast esuanouie sur la poitrine de Daraïde. Mais Diane les voyāt toutes deux ainsi pasmées l'une sur l'autre, avecques pareilles lamentations que sa mere n'agueres auoit faites, & en paroles pleines d'une graue maïesté, commença à tesmoigner la douleur qu'elle souffroit pour les voir en vne si mortelle destresse. Garaye la consoloit au mieux qu'il luy estoit possible, luy remōstrant qu'elle ne se donnast tant d'ennui, & que ce n'estoient que petites pasmoisons qui ne pouuoient plus durer long temps. Adoncques la Roine retourna à soy, à force d'eau froide, dōt on lui aspergea le visage, puis embrassa & baisa sa fille plusieurs fois par grand amour. Mais Diane ne pouuoit se resiouir aucunement voyāt tousiours en pareil estat sa Daraïde, laquelle toutesfois reuint finablement à elle, en la mesme sorte que si elle fust reueillee de quelque profond sommeil. Alors voyant sa dame releuee, elle receut si grand plaisir qu'il seroit impossible de vous l'exprimer: car son excessiue ioye lui causa presque vne pareille violence que la precedente douleur, en facon que bien peu s'en falust que de rechef elle ne retombast en pasmoison. Biē tost apres elle aperceust aupres de soy la Duchesse Lardenie, & la Marquise de Lastes, & toutes les autres damoiselles fort tristes qui estoïēt à l'entour d'elle pour la consoler. Mais leurs propos furent interrōpus par vne grande emotion que lon entēdit en la ville, avec plusieurs cris de tristesse: dōt la Roine & toute sa cōpagnie demurerēt en grād trouble. Daraïde & Garaye se leuerēt, pour aller voir que ce pouuoit estre, & en passant par la galerie qui respōdoit au grād palais, elles virēt la salle toute pleine de cheualiers armez, criās à haute voix: Ou est la Roine & la Princesse sa fille? quel bruit, quels cris sont ce que nous auons entendu ceans? En mesme trou-

ble estoit encores toute la ville car vous deuez sçauoir qu'aux soudains cris & lamentations que lon auoit ouy faire aux damoisselles en la tour de Diane, tous les citoyens s'estoient esmeuz: & pèlans que ce fust quelque trahison, les Cheualiers & autres gens de guerre de la cité estoient acouruz tous armez vers le palais, à la persuasion, & souz la conduite des Ducs de Gamez & d'Alfarce: & lors iusques aux plus simples gens, tout le peuple courroit en armes par les rues, en criant: Trahison, trahison, on veut desrober la Roine & sa fille. Ils aioustoient encores maintes autres nouueutez, comme il auient communement en telles esmotions du vulgaire, ou chascun tient propos cōformes à ce dont il a plus de crainte. Par les rues aussi couroient maintes femmes, & petits enfans qui ploroient & se lamentoient de grād' peur, acroissant de beaucoup le trouble, & les diuers doutes du danger, tellement que lon ne sçauoit quel conseil prendre. A tant Daraide & Garaye arriuerent à la porte, par laquelle personne ne pouuoit passer sans la volonté de la Roine: & aperceuant les Ducs de Gamez & d'Alfarce, Daraide leur dist: Qu'estcecy? qui cause vne si grande mutinerie? C'est (dist le Duc d'Alfarce) par ce que nous auons entendu là dedans plusieurs haults cris: & craignans que ce ne fut quelque trahison, ou quelque autre mauuaise fortune, nous sommes icy acourus en armes à l'emotion du peuple, cōme vous no^s voiez. Et partant dites nous, s'il vous plaist, quel bruit c'est que nous auons ouy. Daraide cōprenāt bien ce qui en pouuoit estre cause lui respōdit: C'est ma dame Diane laquelle estāt tōbee en pasmoison, & semblāt estre morte, a ainsi fait troubler & espouuēter ses damoisselles: mais maintenant elle est reuenue à soy, & se porte bien. Les Dieux en soiēt louez (dit le Duc) car no^s estions en grand ennui. Il sera bon que vous vo^s mettiez à quelque fenestre qui regarde sur la grād' place, à fin qu'en vo^s

voyant le peuple s'apaise, & que vous lui distiez comme les choses se sont passees. Suiuāt ces paroles du Duc, Daraide & Garaye s'en allerēt à vne fenestre qui regardoit sur la grand' place, & montrās assez ioyeux vilage, firent signe aux citoiēs de se taire: ce qu'ils firent incontinent, pour entendre ce qu'elles leur vouloient dire. Alors Daraide parla à eux en ceste sorte: Seigneurs citoiēs, resiouissez vous, & laissez le souci auquel nous vous voyons, car le bruit que vous auez entēdu ceās, n'est procedé que d'une petite pasmoison, laquelle est arriuee à ma dame la Princesse Diane, qui maintenāt (graces aux Dieux) se porte fort biē. Au surplus la Roine m'a enchargé de vous remercier en son nom, de ce que vous auez fait pour l'amour d'elle comme bons & loiaux suiets que vous estes. Le peuple ayant ouy ces paroles, s'est retourna en grand plaisir, ietans maints cris de ioye à leur depart, & remercians les Dieux de ce que la Roine & la Princesse estoient en bōne disposition de leur personne, & sans aucun danger. Quelque temps apres le tumulte commēça à se rapaiser peu à peu: mais ce ne fut si soudainemēt qu'en quelques endroits de la ville, il ne durast encores plus de trois grosses heures. Or Daraide & Garaye aians rapporté à la Roine l'ocasiō de ce bruit, elle fut assez resiouie de la fidelité & amour que par tel moyen elle recognoissoit en ses suiets. Adonc Garaye commença à tenir maints ioyeux propos à Daraide & Diane, pour leur oster la memoire de leur ennui. Ce pendant la Roine Sidonie les laissā, pour aller remercier les Ducs & les Cheualiers de leur loyal seruice. Entēdez en passant que les Astrologues & Augures de la Roine tindrēt le tumulte de ce iour pour vn mauuais prodige, & pour signe de quelque malheur auenir sur l'Isle de Guindaye: à raison dequoy ils en taiserēt l'interpretation iusques à quelque temps apres, que l'ysuē des choses descouurit la verité de leurs presages.

Des propos que Diane eut avecq' Daraïde sur la promesse qu'elle auoit faite à la Roine: et comme elle se donna à cognoistre à sa dame Diane pour Agésilas de Colchos.

CHAP. XXII.

INcontinent que la Roine fut sortie, Diane dist à Daraïde : Ah ma grand' amie , ie n'eusse iamais pësé que vous me deussiez causer vn tel infortune, comme est celuy que i'atens par la promesse que vous auez faite à la Roine : car en l'accomplissant, si vous estes vaincuë, ie ne puis faillir à vous perdre: & si vous demeurez victorieuse, ie perdray le Prince Florisel, & la Roine, qui sont ceux desquelz i'ay receu ma naissance. La Princesse en disant ces paroles ploroit à grosses larmes. Ma dame (respondit Daraïde) ne croyez point que les Dieux consentent iamais que vous receuiez aucun ennuy, ny desplaisir par mon moyen : car ie ne croy point qu'en ce bon heur auquel ie suis pour estre vostre, la fortune vueille me tourmenter d'vn tel outrage : & ne puis penser qu'en lieu ou les Dieux ont assemblé tant d'amoureuses pensées comme en moy, ilz ne vueillent encores accompagner tout ce qui m'est deu pour l'amour d'elles à fin de m'employer en vostre seruice: tellement que i'espere que ce dont la fortune nous menace, qui nous semble maintenant douleur & destresse, se couuertira en ioye & en recreatiõ pour l'auenir. En disant ces paroles, Daraïde monstroït vn riant & gracieux maintien pour consoler la Princesse, laquelle se ressiouit vn peu comme s'asseurant, pour la grande discretion de Daraïde, qu'elle se scauroit bien mettre hors de tel peril à son honneur. Quelque tẽps apres la Roine estant retournée dans la chambre de Diane, Daraïde lui dist qu'elle vouloit aller accomplir sa promesse, & partant qu'elle lui donast cõgé & à sa sœur Garaye. La Roine ne sçachant par quel autre moyen

donner repos à ses douleurs, que par sa mort, & par celle de dom Florisel, dont elle se tenoit desia asieuree, luy donna conge de partir de là à quatre iours : & pensoit à part soy, qu'elle ne pourroit songer vn autre meilleur moyen que cestuicy, tant pour satisfaire à sa vengeance, & à son honnesteté, comme pour se deliurer du cruel feu auquel l'amour de Florisel la tenoit embrazee. Pendãt ces quatre iours Daraïde considerãt que son aage ne pourroit desormais plus celer souz vn habit de Damoïsselle, ce qu'elle auoit tousiours tenu secret iusques là: & luy semblant qu'il seroit beaucoup meilleur de declarer elle mesmes à Diane, la tromperie à laquelle son loyal amour l'auoit contrainte, que de la laisser descourir par le temps, & par la nature qui estoient pour bien tost luy embellir le menton des fleurs de sa premiere barbe : le iour auant que partir, elle pria Diane de la vouloir ouïr seule à seu le dans le iardin pres de la fontaine des ieussemins, & qu'elle ne se vouloit esloigner d'elle sans premierement lui deceler quelques choses que iusques là elle luy auoit tousiours cachees. Diane se doutant presque de la verite, laissa la Roine avecq' la Duchesse Lardenie, & la Marquise de Lastes, & vint au iardin se soir aupres de la fontaine acompagnée seulemẽt de Daraïde, laquelle s'asit aupres d'elle. Or voyant le lieu & le temps assez propres pour declarer son vouloir à sa Dame, elle commença par deux ou trois fois à parler sans iamais pouuoir acheuer ny pronocer trois mots entiers: car certainemẽt elle estimoit ceste entreprise plus hardie, & plus perilleuse, qu'aucune autre ou elle se fust onques retrouvée: d'autãt que si es autres elle s'estoit mise en hazard de perdre la vie pour gagner l'honneur & la renommee de la victoire, en ceste-cy elle hazardoit à perdre sa dame, à fin de gagner par sa perte, la pl'douloureuse mort qu'il luy eust esté possible de souffrir. En ceste confusion elle changeoit de diuer-

les couleurs en son v'sage, & Diane pareillement, laquelle craignoit beaucoup plus la violence que pour ion honnesteté elle se deuoit faire à elle mesme, à fin d'en faire autant d'auantage à Daraide, que le secret qu'elle lui vouloit raconter, duquel elle estoit desia assez auertie au parauât. Finablement Daraide monstrant par ceste alteration, vn signe manifeste de ce qu'elle vouloit dire, avec plusieurs trauallez & passionnez souspirs, commença à parler ainsi:

Harangue de Daraide se donnant à cognoistre à Diane, pour Agefilan de Colchos.

Si les grandes entreprinſes n'estoient acompagnees de grād danger, croyez, ma dame, que bien petite seroit la louāge de ceux qui en pourroient auoir obtenu la victoire: & pour ceste raison, d'autāt qu'il y a plus de peril, d'autāt aussi il y a pl^{us} d'honneur, de gloire, & d'immortelle renommee. Ne pensez point que les grandes choses se puissent acheter par les petites, ny qu'avec peu de traual lon puisse gagner beaucoup de louange. Ainsi ma dame, vous puez cognoistre ce qui pour vous conquerir doit estre mis à l'auēture, puis que m'essaiant maintenant à vous gagner, ie me metz au hazard de vous perdre. Helās! voylà l'ocasion qui donne tant de crainte à mes paroles, par ce que pour vouloir faire vn grand gaing, ie suis en danger d'vne grād perte: & crains que vous cerchant par trop, ie ne vous perde encores d'auātage: car pour me hazarder à me perdre moy mesmes en ceste queste, i'auenture bien peu de chose, puis qu'il y a desia si long temps que ie suis perdu en voz amours: cobien toutesfois qu'en part du monde ie n'aye iamais eu tāt de gaing comme en vne si heureuse perte. La cause de mes passions amoureuses vous est manifeste par l'excellence de vostre beauté. Les douleurs passees que i'ay souffertes en vostre seruice, vous dōnent asseuré tesmoignage du respect & de la reuerēce

que i'ay tousiours eue à vostre grandeur. La hardiesse que ie prens maintenāt, s'excuse sursammet par ma peine, & l'outracuidance de mes pensees, par mon Royal lignage, acompagné du chaste & loyal desir avec lequel i'ay tousiours garde la reuerence deuē à vostre honneur: & la garderay toute ma vie sans vous vouloir supplier de departir aucun remede à mes angoisses, q̄ ce ne soit souz le tiltre de fidele espoux, & en vous gardāt vostre chasteté telle que vous la puez auoir maintenāt. Or, ma dame, avecques ces cōditions il vo^{us} plaira sçauoir que souz le nō, & souz l'habit de Daraide, vo^{us} auez en vostre presence Agefilā, filz du grād Prince le preux Falāges d'Astre, & de la forte Princeſſe Alastraxeree. Ne vo^{us} esbahissez si ie me suis ainsi déguisé, & couuert de telles armes pour gagner vostre bonne grace: car en autre habit, sinō en vn pareil au vostre, ie n'eusse sceu me hazarder en entreprisē tāt perilleuse, au moins avec quelque esperance de la victoire. Vous sçauiez maintenāt ma dame, ce que iusques icy ie vous auois tousiours tenu secret. Vo^{us} voiez les plaies douloureuses desquelles en ceste cruelle guerre d'amour vostre beauté excellente m'a cruellement nauré. Ie me suis desia assez long temps deffendu, me courrant souz l'escu d'vne Daraide deguisee: maintenant ma dame, ie vous confesse victorieuse, & vous ren mes armes pour en leuer vn trophée à la force de votre immortelle beauté: vous supliant me prendre à mercy, en vous gardant la fidelité, & la reuerence que ie doy à vostre grandeur, & que ie vous promets, & iure par mon Dieu immortel, vo^{us} garder toute ma vie souz le tiltre de mariage. Mais si par la rigueur de vostre responce vous me voulez refuser la pitié dōt ie vo^{us} supplie, croyez, ma dame, que gueres lōg temps vous ne me pourrez estre rigoureuse, & que bien tost mō piteux trespas vous fera regretter celui mort, auquel durant sa vie vous aurez esté tāt cruelle. Ainsi mō ame iadis infortunee

runee se cōsolera par vostre plainte apres l'enfeuillement du corps . O moy donc bien heureux ! qui ay mis mon cuer en si noble lieu, que la iouissance de mes desirs me rend le plus heureux de toute la terre, & le dernier de mes malheurs me promet encores quelque consolation. Or auez vous ouy, ma dame, le peu que ie sçay dire de la grande douleur que ie souffre : mais si ie ne vous puis assez exprimer le mal que j'endure, vous le pourrez aisement comprēdre si vous l'estimez autant grād en moy, comme les beautez, & les excellences sont grandes en vous : Puis donc que par ce moi en vous pourrez sçauoir de vous mesmes les immortelles angouilles qui me tourmentent, encores que vous ne les peussiez entendre de moy : ie vous supplie de rechef par la iuste pitié que le vainqueur doit auoir du vaincu, me prendre à mercy veu que ie me rens : & me traiter en vostre seruice comme celui duquel la mort ou la vie depend de vostre cruauté, ou des faueurs de vostre bonne grace.

Daraide disant ces dernieres paroles s'estoit mise à genoux deuant Diane en pleurant à grosses larmes par grand' compassion . Or deuez vous sçauoir que ce iour elle s'estoit vestue de ses plus riches acoustremens, car pour mieux auoir la victoire de ce combat, elle s'estoit armee des plus propres armes qui fussent lors en sa puissance . Apres qu'elle eut acheué de parler, Diane toute transie & sans aucune couleur, demeura long temps sans luy respondre vn seul mot : toutesfois à la fin elle luy dist à quelque peine :

La cruelle response de Diane à Daraide.

Sçachez Daraide, qu'en changeant vostre nom vous auez encores changé en haine, l'amour, duquel par voz tromperies vous auez eu vne si longue iouissance : & si la prochaine parenté qui est entre nous, & ma benignité acoustumee ne

resistoient à l'exécution de mon corroux, ie vous ferois chassier d'vn tel tourment que l'affronterie de laquelle vous m'auez abusée le merite. Mais pour ne laisser aucune occasion à personne de pēser que vostre outrecuidāce ait trouuē en moi quelque fragilité, ie n'vserai enuers mon honneur de la pitié que ie lui deuerois, pour le guerdonner par vostre mort de l'offense que vo^s auez cōmise : car ie ne veux point que lō publie q̄ vostre folle temerité vous ait causé vne si grande gloire, que de m'auoir seulemēt veuē : mais aussi ie ne veux pas que vo^s demeuriez sans estre aucunement puni, encores que la peine soit trop mal égallee à vostre offense, quoi que vo^s vous en vueillez excuser. Et partāt ie vo^s defens de vous trouuer iamais deuāt moi en quelque part que ie puisse estre, puis qu'il ne se peut faire comme Daraide, & cōme Agefilan mon hōneur ne le souffre.

Diane acheuant ceste dure response, & monstrant vn fort rigoureux visage, se leua, & s'en alla : mais Daraide ne pouuant plus souffrir la face corroucee de sa dame tomba de grand douleur à la renuerse esuanouie sur la verdure. Diane sentant vne peine pareille à la mort pour la voir en si piteux estat, se contraignit tant, & dissimula si fort son ennui, qu'il seroit impossible de croire qu'autre damoiselle quelconque ait iamais fait le semblable . Elle abandonna sa chere Daraide ainsi pāmee sans lui donner aucun secours, & s'en alla vers la Roine de Corit, avecque laquelle estoient la Duchesse Lardenie, & la Marquise de Lastes. Mais Lardenie la voiant tant oubliee en elle mesme, & si ententisue à faindre par la contenance du visage, ce qu'elle auoit dessus le cuer, se douuta incontinent de la maladie que ce pouuoit estre, d'autant qu'elle l'auoit veuē aller en la compagnie de Daraide, & qu'elle estoit retournée seule . La duchesse donc abandonnāt ses compagnes, courut vers la fontaine ou elle trouua la desolee Daraide en la façon que vous auez ouy :

puis luy mettant avecq grand dueil la teste en son giron, luy ieta sur le visage de l'eau de la fontaine, tellement que quelque temps apres elle la fit retourner de pasmoison. Adonc Daraide avec grande abondance de larmes & de souspirs, commença à se plaindre ainsi, O douce mort, pourquoy me laisses tu encores retourner en vie? O vie miserable, pourquoy me refuses-tu la mort? O amour, combien i'experimente en toy de haine! O cruelle haine, pourquoy prens tu le nom d'amour? Ay, ay, moy malheureux! en cherchant amour, i'ay trouué son contraire: & en pensant donner le remede necessaire à ma maladie, ie l'ay accru sans aucune comparaison. O ma dame Diane, combien i'ay tousiours eu crainte de la cruauté laquelle maintenant i'experimente en vous! Puis dōc que tel est vostre vouloir, ia à Dieu ne plaise de faire auenir vne chose qui m'est tant impossible cōme de demeurer plus longuement en vie avecq la male grace de ma dame. O malheur trop miserable! car ie ne demande chose qui ne me soit refusee par ce que ie la demande: et ne suis chose qui ne mesoit otroyee par ce que ie la suis. Là! ma dame Lardenie, ie vo⁹ supplie ne prēdre pl⁹ aucun pitié de moy, puis que ie n'en prēs pas moy mesmes, à fin de conformer ma volonté à celle de ma dame: car ie ne puis vouloir, sinon ce qu'elle veult, & me hays moy mesme, puis qu'elle me hayt: mais si vous m'aimez, il fera raisonnable que vous vueillez ce que ie veux, qui est seulement de m'en aller accomplir la promesse que i'ay faite à la Roine, à fin que toutes les choses que ie feray desormais, se facēt contre ma volonté: car ie sçay bien qu'en accomplissant ce que ie luy ay promis, i'accompliray encore le vouloir de ma dame Diane. Or maintenant m'aperçoy-je assez que la Roine sans occasion ne me fit vne si estrange requeste comme elle m'a faite: car ce fut à fin que par la mort que i'en receurois, elle vsast enuers moy, de la

pitié que ma dame Diane me refuse en me faisant mourir plus cruellement. Certes ie ne puis moins esperer de la prouesse & haute cheualerie du Prince Grec, en ce combat que i'ay entrepris contre luy, sinon par la mort d'une si foible & defauiorisee creature comme ie suis, il satisfera à sa glorieuse renommee, & à ce que comme noble Cheualier il estoit tenu de faire, en réparāt le tort que ie reçooy pour durer plus long temps en vie. O bienheureux Prince! puis que toutes choses s'appareillent à la gloire de son bon heur: & moy pareillement bien heureux: veu que la fortune, & la Roine, & la volōté de ma dame Diane m'ōt appareillé par les mains d'un si grād seignr, la mort que selō ma loi ie ne pouois pourchasser de mes propres mains. O Dieu puissant, comme par tout tu monstres ta sage prouidence! car en ce iugement de ma mort prononcé par la bouche d'un si noble & excellent Iuge, comme est ma dame, il estoit bien raisonnable que tu luy secourusses d'un si excellent ministere pour executer ta iustice souueraine, avecques l'arrest lamentable de mes cruelles destinees. Lardenie voyāt les angouilles mortelles de Daraide, ploroit par si grande pitié qu'elle ne luy pouoit respondre vne seule parole: & ainsi demeura assez long temps pendāt lequel Daraide s'esuanouit souuēt dans son giro & à chacune fois qu'elle retournoit à soy, elle recommençoit de nouvelles plaintes sans pouuoir aucunement se rapaiser par aucune consolation que luy peut donner la Duchesse, qui entendoit assez l'occasion de sa douleur. Ce pendant quelques autres Damoiselles qui par fortune se promenoient dans le iardin, la voyant en pl⁹ piteux estat qu'elles ne l'auoient oncques veüe, s'en coururent à la Princesse Diane, qu'elles trouuerent avec la Roine de Corit, & Garaye, & leur dirent comme toutes effrayees: Helàs, mes dames, Daraide se trouue tant mal que nous n'esperōs qu'elle puisse viure encore vne heure, car elle

car elle se monstre tant passionnée qu'il semble que par la seule mort elle doive mettre fin à sa langueur. Ces paroles entrèrent tellement au cœur de Diane, qui aimoit Daraïde trop plus que soy-mesme, qu'elle ne sceut onc se lever du lieu où elle estoit, encores que la Roine de Corit & Garaye la voulussent emmener avec elles voir que ce pouoit estre : ains leur dist qu'elles allassent les premières, & qu'elles les suiviroit incontinent apres avoir fait quelques supplicatiōs à ses dieux pour le salut de Daraïde. Adonques Diane se voyant seule, & ne pouvant plus souffrir vne tant cruelle experience de l'amour de Daraïde, cōmença avecque plusieurs soupirs à se plaindre de sa peine & de celle de son amant. O cruelle amour (disoit elle) comme tu me sçais recompēser du tribut que tu me demandes, & que ie te refuse, pour mieux garder celuy que ie doy à ma pudicité ! Las ! Agésilas, comme avez vous vſé enuers moy de telle hardiesse, à fin qu'en me forçant moy-mesmes, ie vous tinſſe vne si cruelle rigueur ! Helàs ! si estes vous beaucoup plus heureux que ie ne suis, car vous pouez alleguer vostre ennui en publiant voz doléances : mais ie ne puis recevoir celle consolation pour estre contrainte à vous tenir tousiours les miēnes cachees. En descourant voz passions vous pouez avoir assez d'excuses, lesquels ie n'oserois, & ne pourrois alleguer mes amours estant descouvertes. Vous plaignez seulement vostre travail sans avoir aucun souci du mien, mais avecque le mien ie lamente encore le vostre. Las si vous sçauiez & souffriez ce que ie sçay, & ce que ie souffre, vous voudriez temperer vostre douleur, & vous deffendre contre elle par vne discrete patience : & considerant la force que ie me suis faite à moy mesmes en vous esloignant de moy, vous cognoistriez que ie ne vous ay point fait de violence, sinon à fin de ne violer point mon honneur. En voulant continuer ses lamentations, Diane

ouyt quelques haultz cris avec vne nouvelle plainte de ses Damoyſelles à l'entour de Daraïde, au moien d'une palmoison, laquelle depuis que les Roines de Corit & Garaye estoient arriuees, lui avoit doné au visage vne couleur mortelle, & tant blesme que toute la compagnie commençoit à la plorer pour morte. Adonc Diane oiant leurs plaintes & gémissements, comme hors de soy se leua en sursault, & acourut vers la fontaine où Daraïde estoit pâmee. La marquise voyant la Princeſſe, lui dist en plorant, Helàs, ma dame, nostre Daraïde se meurt. Quand Diane entendit ces paroles, sans point de doute elle fut trespassee sur le champ, si Daraïde à son arriuee ne fust reuenue de palmoison : & voyant sa dame le cœur lui creut vn peu, & commença à la regarder par grande pitié, comme lui demandant mercy de son offense. Alors Diane continuât en ses dissimulations, lui dit, Quelle douleur est-ce que vous avez ? Helàs ! ma dame (respondit elle) c'est Pourrage que me fait la mort, pour me laisser plus long temps en vie : voylà la seule peine que ie sens, en ce peu de douleur que ie voy en vous, pour vous resentir & prendre pitié de la mienne. Alors Diane lui dist, Je croy Daraïde que vous ne m'estimez point si cruelle, que ie ne sente beaucoup de peine & de douleur pour le travail auquel ie vous voy. Mais la Roine Sidonie qui venoit à grand' haste de son palais fort troublée des nouvelles que lō lui avoit dist de Daraïde, empescha les propos de Diane, & voyant Daraïde retournée de palmoison, lui dist, Quelle maladie estoit-ce, m'amie Daraïde, par laquelle vous nous avez donné tant de crainte. Las ! ma dame (respondit elle) quelle autre maladie pourroit-ce estre sinon celle qui m'a tousiours tourmentee ? Or pour y remedier, veu que ie ne puis ici recevoir la mort que j'atens pour la seule guérison de mon mal, ie veux sans plus longue demeure Paller chercher au lieu, auquel

quel ie latiens assuree: car ie suis certaine que la bonne fortune du Prince Grec, me donnera, ce que mon malheur me refuse. Et partant ma dame, ie vous supplie me donner vostre congé, car s'il vous plaist ie partiray tout maintenant. La Roine luy respondit. Les dieux vous donneront meilleure issue de ce combat que vous ne pensez, & ainsi ie les en supplie: mais par ce que vous me semblez fort trauailliee, il sera meilleur de vous reposer vn peu auant vostre depart. Ie vous supplie, ma dame (dist lors Daraïde) s'il vous plaist me donner quelque repos, ne me refuser mon cōgé: car si ie demeure plus lōg temps, ie me trauailleray tousiours d'autāt plus, pour l'enue que i'ay de departir. La Roine luy respondit, puis que le trouuez bon Daraïde, faites ainsi comme il vous plaira. Adonc Daraïde se leua, & avecques ses deux damoiselles alla au cabinet ou elle auoit acoustumé de laisser ses armes, & estant armee retourna au lieu ou estoient les Roines & les Princesses, & les autres dames & damoiselles de la cour, & s'agenouillant deuant elles leur dist, Mes dames, ie vois accomplir ma promesse & mon deuoir: Si iamais vous ne reuoyez le corps de l'infortunee Daraïde, sçachez qu'en son lieu, elle vous a laissé son ame. Diane sentit au plus profond du cueur ce qu'elle vouloit dire par ces paroles, car c'estoit par ce qu'elle luy auoit deffendu de ne se trouuer iamais deuant elle. Or apres que la Roine eut respondu pour toutes, & embrassé Daraïde, Diane fit le semblable, mais elle leur baïsa les mains. Apres la duchesse Lardenie la vint embrasser en plorant si amerement, qu'elle ne luy sceut onc dire vn seul mot. Autant en fit la Roine de Corrit, la Marquise, & toutes les autres dames & damoiselles. A ceste departie de Daraïde, & de la Princesse Diane, lon obserua vne chose fort difficile à croire, c'est que ny l'vne ny l'autre ne plorerent vne seule larme: ains la gentile Daraïde se cōtraignant par grande force monstra vn

ioyeux visage, & vn maintien riant pour faire cognoistre à sa dame Diane qu'elle n'estoit point ennuyee d'obeir à ses commandemens les plus rigoureux dont elle eust peu vser enuers elle. Diane pareillement desguisant son maintien d'vne ioye dissimulee, resistoit vertueusement par la force de sa grandeur, à celle que le cruel Amour luy redoubloit en son courage d'autant plus qu'elle la vouloit cacher en son semblant. En ces entrefaites arriua Garaye toute armee, laquelle apres auoir prins cōgé de celle noble compagnie, s'en sortit dehors avec grande tristesse. Adonc les deux braues guerrieres estant montees sur leurs cheuaux, & les damoiselles sur leurs palefrois, prindrent leur chemin vers vn port, qui estoit à vne iournee de là, ou elles auoient fait aprestre vne nef pour passer en Constantinople. Avec elle fortirent les Ducs d'Alfarce, & de Gamez, acompagnez des Cheualiers d'honneur de la Roine Sidonie & de plusieurs autres. Ilz conduirent quelque temps Daraïde & Garaye, tenans diuers propos, puis, apres maintes caresses, ilz s'en retournerent en la ville. Or la Roine ayant veu la ioyeuse contenance de Diane sa fille au depart de Daraïde, luy en demanda l'ocasion, Ma dame (respondit la Princesse) ie sçauois qu'elle s'en alloit par vostre commandement, & pour celle raison i'ay ainsi force ma volonté, à fin de mieux complaire à la vostre. Acheuant son propos la douleur retenüe en son courage, avecque la force du feu amoureux dont elle auoit l'ame & le cueur embrasé, luy apareillerent la medecine necessaire pour defendre sa vie contre ceste douloureuse passion, par les grosses larmes qui lors tomberent de ses yeux, à fin de donner quelque repos aux deux contraires qui combattoient au parauant en sa poitrine: tout ainsi comme au tirer de l'artillerie, les furieux boulerz chassiez en l'air, mettent en paix les elemens contraires qui estoient renfermez ensemblement. Diane donc

donc par la grande abondance de ses larmes, remedia au danger de sa vie, entre les contraires pensees & diuerses affections qui la trauailloient en toute extremite. Apres auoir quelque temps continué ces pros, la Roine s'en alla, puis Diane se retira à part avecque la duchesse Lardenie, & lui conta tout ce qui s'estoit passé entre Daraïde & elle, avec autant de larmes, cōme elle auoit au parauant espargné pour mieux couvrir sa peine, au lieu ou son hōnesteté ne luy permettoit de la monstrier. Puis embrassant la duchesse, lui disoit, He làs! Lardenie, comme pour garder à ma grandeur ce que ie luy dois, & pour refuser ce dont ie suis redeuable à l'affection que ie porte à Agefilan, ie me suis miserablement sacrifiée en ces cruelles flammes d'amour! Regardez ie vous supplie, si iamais il y a eu dame Romaine, ny Grecque qui en se faisant mourir, ayt iamais approché d'une si vertueuse constance, car en leur mort, elles donnoient repos à leur vie, mais moy au rebours, en ma vie, ie ne peux donner aucun repos à ma cōtinuelle mort. Las! ma chere Lardenie, supleez par vostre discretiō à celle qui deffault en moy, pour souffrir ceste absence desolee de ma Daraïde, & m'aidez de vostre recōfort, d'autant plus que ie n'ay iamais esperance de la reuoir, car selon ce que ie pense, elle voudra accomplir mon commandement, & ne retournera iamais en lieu ou ie puisse iouir de sa presence tant desiree. O dieux immortelz! pourquoy m'auuez vous recommandé l'honneur, si ie deuois aimer? Pourquoy m'auuez vous fait tāt hautaine de courage, si ma grauité me deuoit causer tant de douleurs? & tāt chaste, en vne maladie qui n'a chose tant cōtraire comme la chasteté? Pourquoy me faites vous chercher conseil en vn endroit qui ne s'en acompagne non plus que la folie de la raison? Qui vous a meuz à me faire aimer la bonne renommee, si la guerison de mes douleurs l'ont en horreur? Et outre ces iniures, pourquoy me tenez vous

si lōg téps en vie, puis que i'ay vne si iuste ocalio de mourir? O que ne peux ie en ce feu auquel ie brulle & m'enflāme de moy mesmes, me conuertir en tiede cendre, de laquelle (comme en celle du Fenix) peust renaistre vne autre Diane, pour s'abandonner aux loyales amours de mo Agefilan? à fin que par mō sacrifice, ie puisse satisfaire à mon hōneur, & par ma renaissance à l'amour dont ie suis cruellement enflāmee. Ma dame (dit lors Lardenie) vo⁹ pouuiez satisfaire aux deux, & vous contenter de ce qu'après vne si lōgue experiēce du noble cueur d'Agefilan, il vous requeroit de cōsentir à sa volōté, en iouissant pareillemēt de la vostre, souz le tiltre d'une fidele & loyale aliance. O Lardenie (respondit la Princesse) que vous parlez veritablement s'il estoit p̄mis à celles qui aimēt la vraye vertu, de vouloir seulemēt entrer en soupçon d'une chose de si grande importance, cōme l'hōneur, ou d'vser de quelques cauetelles pour excuser le contentement, que par tel moyen elles pourroient auoir pourchassé à leur volages desirs. Et partant encores que ie deusse estre son espouse, si est ce que pour l'heure il m'a esté tresbiē scāt de ne satisfaire point à sa volōté, à fin de demeurer satisfaite de mon deuoir. Puis qu'ainsi est (respōdit Lardenie) preparez vous à resister par vostre patience, contre tout le mal qui vo⁹ pourroit auenir de vostre rudesse: & quāt à voz autres plus grādes angoisses, cōsolez vous par l'esperāce de deuoir estre quelque iour espouse de celui, lequel outre ce mariage n'a autre remede, ny vo⁹ pareillemēt, pour estaindre le feu amoureux auquel ie vous voy tant enflāmez l'un pour l'amour de l'autre. O Lardenie (dist la Princesse) cōbien ie trouuerois bō vostre cōseil de me nourrir en si douce atainte, pour ainsi cōsoler ma douleur, si ce remede ne defailloit poit en mō Agefilan, lequel s'estāt departi de moy en desesper, m'oste pareillemēt toute esperāce, preuoyant que par la fin de sa vie, il donnera encore fin à la miēne: car ja ne seray point.

point tant ingrate lui mourant pour l'amour de moy, que ie ne satisface par ma mort, à la pitié que ie lui ay refusée durant ma vie. Or sus (dist la Duchesse) car i'espère avecque le plaisir des Dieux, que voz entreprises prendront quelque meilleure issue que vous ne pensez: & que le temps nous apprendra ce que nous aurons à faire à l'auenir. Mais, Lardenie (dist lors Diane) que respondes vous au danger que ie crains pour le combat lequel doit estre entre Agefilan & le Prince Florisel mon seigneur, car la victoire de l'un des deux ne me pourroit apporter que dommage. Je vous respōs (dist la Duchesse) qu'Agefilan est assuré de la prouesse de vostre pere, attendu ce qu'il a promis à la Roine: & si vous considerez la discretion, & le grand desir de vous faire seruice, que vous auez si bien expérimenté en vostre Agefilan, ie n'atens point de lui autre chose, sinon qu'il gardera vne pareille assurance au Prince Grec, si la fortune lui otroie vn si bracie & noble triumphe. Adonc la Princesse Diane embrassa la Duchesse par grand amour, & lui dist, O Lardenie, ie cognois maintenant que les haultz dieux me fauorisent puis que pour me consoler en ceste absence d'Agefilan, il vous ont enuoiee à moi, avec la Roine Briangie, vous pour m'aider par vostre discretion, & la Roine pour me représenter celle Daraide de laquelle toutes mes fortunes dependent. Allons doncques la voir, car il y a desia long temps que nous l'auons laissée seule, Ainsi Diane passa quelques iours, souffrant si grande peine qu'il ne me seroit moins impossible de l'exprimer, qu'à vous de la comprendre: & à dire vray sans le bon espoir que lui promettoit la Duchesse, & sans la consolation qu'elle receuoit, voyant la Roine de Corit, elle fut bien tost trespassée pour l'extremité de sa douleur. Or là laisserōs nous en ceste guerre pour vous déclarer ce qui auint à Daraide & à Garaye depuis qu'elles furent departies de la cour.

Comme par le conseil de Garaye, Daraide esprouua l'auenture de la tour de la Duchesse de Bauiere, dont elle receut grande consolation.

CHAP. XXIII.

QVand Daraide & Garaie furent de meures seules avecques leurs Damoyelles, Daraide recita à sa compagne tout ce qui s'estoit passé entre elle & Diane, dont elle se trouuoit en si grand ennui, que veritablement elle fust morte n'eust esté le recōfort de Garaie, qui lui disoit que sa dame luy auoit faite vne si rigoureuse responce, pour satisfaire à son honnesteté, plus que par faute d'amour, & de bonne affection qui fust en elle: & que si Daraide le vouloit experimenter, ce luy seroit vne chose assez aysee. Comment celà dist lors Daraide. Je vous le diray (respondit Garaye) c'est que ceste nuit vous aillez esprouuer l'auenture du chasteau de la Duchesse de Bauiere, car elle vous assurera de la fainte, & de la cautelle dont vostre dame a vsé enuers vous. Daraide fut fort ioyeuse de ces paroles, & embrassant Garaie par grand amour, lui dist, O mon bon Seigneur! ie croy que vous estes quelque bon ange de Dieu enuoie vers moi miraculeusement: car vous m'auiez donné vn conseil duquel, encores que ie le sceusse, ie ne me fusse peu auiser de moi mesmes. En ceste deliberation ilz passerent le surplus du iour iusques à la nuit que Garaie, & les Damoyelles se mirent à l'oree d'un petit bocage, & Daraide desarmée de la teste & des mains, couura le surplus de ses armes d'un petit marteau s'en retourna vers la cité, & leur dist qu'elles l'attendissent là. Or estant arriuee apres des tours de Febus & Diane, elle arrestà vn peu son cheual, & regardant la tour ou Diane estoit refermée. Helas, ma dame (dist elle) si en ceste auenture vous me niez vostre faueur, la mort ne me deniera point le dernier remede de mes trauaux. Je vous supplie donc, ma dame, puis qu'avec

qu'avecque vostre honneur & le mien, ie vous demande vostre amour, que vous ne le refusez point à vostre Ageilan, en l'aventure que ie m'apareille d'esprouver.

Acheuant ces paroles Daraide s'en alla vers la tour enchantee, ou elle se mit à pied, & entrant dans la porte plusieurs diuers instrumens commencerent vne fort douce & gracieuse melodie: puis elle se trouua dans la chambre de la Duchesse, avec vne aussi grande clarté comme si eust esté de iour. Adonc Daraide se mit deuant la Duchesse & luy dist. Ma dame ie vous prie me dire la raison de vostre tristesse, à fin qu'apres vous me declariez aussi les occasions de la mienne. Adonc la Duchesse enchantee ouurit les yeux & se changea soudainement en la ressemblance de Diane, & parla ainsi à Daraide laquelle s'estoit agenouillee deuant elle. Ah mon cher Ageilan, si vous souffriez ce que ie souffre, ie croy que vous laisseriez vne partie de vostre souffrance, vous contentant de la gloire d'estre autant aymé de moy, comme ie scaurois estre aymée de vous, Sachez mon cher amy, que ie vous ayme plus que damoiselle n'ayma onc Cheualier, mais mon honnesteté engendra en moy la haine, laquelle me fit premierement vser d'une grande rigueur contre moy mesmes, à fin d'en exercer encores vne plus grande contre vous. Si vo^s regrettez mon absence, ie regrette la vostre, si vous m'aymez, ie vous ayme, si vo^s me voulez pour espouse, ie vous veux pour espous, ceste esperance de la fin de noz douleurs vous face prendre patiemment le travail que vous souffrez pour mon absence, & vous entretenez en ce mesme espoir auquel ie m'entretiens, en attendant quelque meilleure fortune. Or puis que ie vous ay ainsi descouvert le secret de mon cuer, duquel vous ne serez iamais absent, soyez ioyeux pour la peine que vous me laissez, laquelle sera d'autant plus grande que la vostre doit estre moindre, pour le plaisir que vous devez rece-

voir de la douleur laquelle vo^s me voyez endurer pour vostre amour. Vous entendez maintenant ma bone affection, tout ainsi que ie cognois la vostre, soyez donc désormais content de moy, car ie suis contente de vous. La duchesse enchantee acheuant ce propos laissa la ressemblance de Diane & se retourna ainsi comme elle estoit au parauant. Que vous dirons no^s de Daraide quand elle l'eut ainsi ouy parler? sinon que sa ioye estoit aussi grande d'un costé, come sa peine de l'autre, pour la douleur en laquelle elle delaissoit sa dame. Adonc elle dist, O ma dame Diane come me vous avez voulu temperer la grâdeur de ma ioye, par la recordation de vostre peine: car en me pësant oster d'une douleur vous m'avez mis, encores en vne plus grande, d'autant que ie vous ayme trop plus que moy mesmes, & que ie souffre plus pour vostre mal, que pour le mien propre. Adonc l'esclair fit son office acoustumé, & Daraide se retrouua hors du chasteau, puis montant à cheual & regardant la tour ou estoit Diane, luy rendit graces du secret qu'elle luy auoit déclaré. Ainsi Daraide plorant de ioye abandonna la ville de Guindaye, & s'en retourna au lieu ou elle auoit laissé Garaye avecque ses deux damoiselles.

De l'estrange tromperie que deux damoiselles firent à Garaye, apres que Daraide l'eut laissée.

CHAP. XXIIII.

Bien peu apres que Daraide eut laissé Garaye, deux damoiselles montées sur deux pallefrois qui venoient de la cité de Guindaye, la rencontrèrent au lieu ou elle attedoit Daraide, & apres l'auoir saluée, luy dirent Seigneur Cheualier, ne nous pourriez vous point asseurer si les deux excellentes sœurs Daraide & Garaye, sont encores gueres loing d'icy? Pourquoy le demandez vous? dist Garaye. Parce (respondit l'une d'elles) que nous

nous auôs grand affaire de Daraïde, ou de Garaye, ou des deux ensemble: mais les ayans esté chercher vn peu trop tard en la ville de Guindaye, lon nous a dit qu'elles estoient departies. Et pour quelle raison les queriez vous? dist Garaye. A fin que l'une d'elles (respondit la damoyse) vint faire reparer quelque tort que lon fait à ma tante, lequel nous ne vous pourrions dire iusques à ce qu'elle mesme le declare à celui qui doit maintenir son bon droit. Est-ce vne chose fort hastiue dont vous parlez? dist Garaye. Non (respondirent les damoiselles) par ce q̄ demain tout le long du iour lon pourra donner fin à ce que nostre tante desire. Or bien (dist lors Garaye) ie m'en iray auecques vo^s, puis que ma sœur Daraïde n'est pas icy. O Dieux (dirent les Damoiselles) vous estes donc celle Garaye que nous cerchons. Auons nous bien peu rencontrer vn si grād heur sans l'auoir sceu recognoistre? Je suis Garaye (respondit elle) mais ie ne voy point que vous m'ayez rencontrée à vostre si grand heur comme vous dites, iusques à ce que l'experience vous en donne certain tesmoignage, ce qui sera bien tost comme ie croy: & partant ie veux aller auecque vous. Adonc se tournant vers les Damoiselles de Daraïde, elle leur dist, Mes amies attendez icy ma sœur, & luy dites comme ie m'en vois auecques ces deux damoiselles, & que demain au soir ie ne faudray à l'aller trouuer au port de Granfe, ou elle m'atendra s'il luy plaist. Les Damoiselles assez fachees d'estre separees d'elle, luy respondirent qu'elles feroiēt ce qu'elle leur commandoit. Adonc Garaye s'en alla auecques les damoiselles estrangeres, car la lune rendoit assez grāde clarté pour les conduire entre les tenebres de la nuit. Tantost apres elles prindrent vn chemin lequel trauerroit celui ou elles estoient premierement. Les damoiselles portoiēt l'escu, & l'armet de Garaye, & en se riant l'une d'elles luy dist, Madame, qui vous rencontreroit à ceste heure ne sçachant

point que vous estes Damoiselle, que pēsez vous que lon estimeroit de vous & de nous, attendu vostre grande beauté. Rien de mal (respondit Garaye) car vous estes deux, & partant la compagnie de l'une osteroit le soupçon que lon pourroit auoir de moy si lon me veoit seule auec l'autre. Vous dites vray (dist la damoiselle) mais combien que personne ne doie auoir aucun doute ny soupçon de nous, si ne sera il point mauuais, comme il me semble que nous soyōs tousiours en doute & en crainte de rencontrer en nostre chemin Fraudeur des ruzes, à fin qu'il ne nous face quelque tromperie. Malencontre luy puisse auenir (dist l'autre damoiselle) car vne fois il me desroba subtilement mon pallefroy, sans que ie l'aye peu recouurer oncques puis. Garaye se print à rire, & dit Par ma foy ie luy en ay veu oster vne autre à vne damoiselle, & faire la plus ioyeu se tromperie que lon pourroit pēser, deux Cheualiers qui le luy vouloient faire rendre. Pleust aux dieux que nous le puissiōs rencontrer en nostre chemin, car ie lui ferois laisser son cheual en recompense de vostre pallefroy, L'autre Damoiselle luy dist en riant, Il me semble que ce sera le meilleur de ne le trouuer point, à fin de ne vous mettre en danger de perdre le vostre, car il pourroit bien auenir qu'en pēfant recouurer vn pallefroy, nous en perdriōs encores deux & vostre cheual ensemblemēt. Cela ne se peut faire (dist Garaye) veu que nous nous tenons sur noz gardez, & que nous sommes trop bien auisees de ses tromperies. Nous en auons tresbon mestier (dist la Damoiselle) attendu les ruzes dont il vse. Laissons ce prodos (dist Garaye) & me dites s'il y a encores loing d'icy iusques au lieu ou nous deuons aller ceste nuit. Non (respondit la damoiselle) car nous arriuerons tantost à deux panillons qui ne sçauoiēt estre qu'à demie lieuē d'icy, ou nostre tante nous attend. Là vous pourrez vous reposer toute ceste nuit, & sçauoir l'ocasion pour laquelle

quelle nous vous estiös allé chercher dans Guindaie, puis demain au matin vous execterez la volonté de nostre tante. Voilà qui va bien (dist Garaye) car d'autant que j'auray plus tost acompli la promesse que ie vous ay faite, d'autant ie seray plus ioyeuse. Ce fera bien tost, dist la Damoiselle. Ainsi deuisant entrerent en vne grande prairie, ou il y auoit deux pauillons dressiez. Vne des damoiselles marcha vn peu deuant pour aller dire à sa tante la venue de Garaye, laquelle estant arriuee bié tost apres la trouua de rechef à l'entree de l vn des pauillons, & luy dit, Ma dame mettez pied à terre, car j'ay desia auerti ma tante de vostre venue. Garaye descendit, & deux valets prindrent son cheual. Adonc estant entree dans le pauillon, elle trouua plusieurs dames & gentils-hömes deuisans ensemble à la clarté de deux fläbeaux ardents au milieu de toute la compagnie. Dans vne charze estoit assise vne dame fort ancienne, reuestüe de noir, & aiant la teste enuironnee de linges bläcs, & pendans iusques en terre. Si tost que Garaye fut entree elle se leua & lui dit, Ma bonne dame ie vous veux embrasser pour acomplir ce que j'ay desiré il a si lög temps. Adonc la vieille dame embrassa Garaye, non auecq force de damoiselle, mais de la puissance d vn Cheualier qui estoit deguisé en tels habits: puis s'escria: Sortez mon fils, & me venez venger de ce Cheualier qui m'embrasse tant deshönestement. Garaye oyant ces paroles se soupçonna de trahison, & se voulut depestrer d'entre ses bras, mais elle ne sceust oncq; car le Cheualier ne la voulut laisser eschaper, de sorte que ce pendant dix ou douze Cheualiers armez vindrent de l'autre tente, lesquels en vn instant la desarmerent, & lui osterent son espee, puis luy ayans lié & garroté les pieds & les mains, l vn d'eux commença à se mocquer d'elle, en ceste sorte, Il n'eust esté que bien fait, Garaye, si vous eussiez esté mieu auisee, puis que lon vous auoit auertie de Frau-

deur des ruzes: & ne pourrez vous plaindre de moy, si ie vous chastie d'estre ainsi venue en mes tentes pour embrasser mö pere, & iouir de son amour sous l'habit desguisé de Damoiselle auquel vous l'avez rencontré: mais ie vous iure que si ie n'eusse craint d'offencer autre que vous, ie vous eusse ostee d'entre les bras d vn si mignon iouuenceau, & vous eusse fait prendre de moy la iouissance de l'amour que vous desiriez de luy. Garaye estoit tant contristee qu'elle eust voulu estre morte, & ne se peut engarder de lui dire, Certainement Fraudeur, selon voz trahison il ne sert de riens d'estre bien auisé à fin de se garder de vous. L'Afronteur (car c'estoit luy qui parloit) respondit. Vrayement Garaye ie n'eusse pas creu que telles paroles si mal gracieuses fussent peu sortir d vne Damoiselle tant courtoise, pour iniurier si outrageusement vn Cheualier, lequel vous porte si bonne affection. Je vous supplie, ma Dame, que vous ne prenez point en fächerie ce dont ie reçooy si gräd plaisir pour le ferme amour, que ie porte à Daraide vostre seur, & si son absence vous ennuye, ie m'essayeray à la mettre demain au matin en vostre compagnie. Garaye estoit despitée iusques au mourir pour les gaudisseries de Fraudeur lequel voiant qu'elle ne lui respondoit mot, dist à ses compagnös, Donnons luy vn peu de pälletemps, à fin de lui faire oublier le desdain & le courroux dont elle semble nous menacer. Adonc il commença à iouer d vn psalterion, & vn sien page d vne fluste, puis le vieil Cheualier habillé en Damoiselle se mit à gambader, & regardant Garaye, il faisoit resonner allegrement en l'air le pource avec les autres doigts, & s'acordant assez mal au son des instrumens, chantoit à pleine gorge ceste chanson.

*Si voz promesses, & brauades
N'ont trouuë mon amour trop doux.
Riez au moins de ses gambades
Que ie fais pour l'amour de vous.*

Ce pen-

Ce pendant que le vieil Cheualier chantoit ces vers, tous ceux de la tente rioient demesurément, puis luy respondoient en rechâtant la mesmes chanson. Ayans assez long temps iouy de ceste recreation, ilz alieirent Garaye en vne chaize, ou ilz l'atacherent si bien qu'elle ne se fut sceu remuer ny çà, ny là: puis l'ayans coiffée des grands linges que le vieil Cheualier portoit en la teste, Fraudeur luy dist, A fin que vous ne vous plaignez de moy, qu'estant damoiselle, & vous ayant osté les armes ie ne vous aye laissée auecque l'honneur que vous meritez, ie vous enuironne le chef de ces belles & mignonnes guirlandes: & desormais faisant l'office de la duchesse de Bauiere, vous assurerez ceux qui viendront icy de l'amour que Fraudeur des ruzes leur porte, & à ceste occasion, ie vous laisseray en ceste tente. Toutesfois à fin que vous ne demeuriez seule, ie vous donneray la compagnie d'un image lequel vous amuserez à contempler, comme si vous estiez Daraïde vostre sœur, laquelle i'ayme du mesme amour que ie vous ayme, tellement que l'amour lequel vous voyez que ie vous porte, vous assurera des peines & angoisses que i'ay souffertes pour le sien. Adoncq' il pendit deuant elle vn escu, auquel Diane estoit portraite, avec deux chādelles de cire allumées aux deux costez: puis il lui dist, en contre-faisant le prophete, Vous demeurerez tousiours là, Garaye, iusques au temps qu'auecque la veuë de Diane, s'assemblera celle qui par vne double prison donnera liberté à la vostre, en mettant fin à mes enchanemens, lesquels dureront à iamais en leur force, iusques à ce qu'un autre que moy les defface. Auecques ces conditions, ie veux que ce noble auenture se maintienne à ma grād' gloire, & à vostre grand ennuy. Ces paroles acheuées, ils laisserent Garaye seule, & sortirent tous de celle tente, puis allerent enleuer l'autre, emportans tout ce qui estoit dedans

sans y oublier les armes ny le cheual de Garaye laquelle demeura ainsi que nous vous auons recité, sans se pouuoir tenir de rire en son ennuy, pour la tromperie qui luy auoit esté faite. Ayant demeuré long téps en cest estat, sans pouuoir trouuer aucun moyen de s'oster de là, ny de se venger du Fraudeur, elle entendit autour de la tente, les pas d'un Cheualier: & le voyant entrer au dedans armé de toutes pieces, luy dist, Cheualier; s'il y a en vous autant de courtoisie, comme il y a de trahison en celuy qui m'a icy laissée, ie vous supplie me deliurer de la peine en laquelle vous me voyez. Le Cheualier la regarda quelque temps auecque son voile blanc, & dist, Maudite soit la fortune qui si tost à rendu vefue vne tāt ieune & gracieuse damoiselle. Or s'il vous plaist me promettre la iouissance de vostre amour, ie vous promettray aussi de vous remettre en liberté, puis en m'ottroyant ma demande ie vous ottroyray pareillement la vostre. A ces paroles Garaye cogneut que cestui estoit l'Afronteur, & pensant l'induire à la deslier, faignit ne le cognoistre, & lui dist, Je vous prie, seigneur Cheualier, me mettre tant seulement hors d'icy, puis ie vous ottroyray tout ce qu'il vous plaira auoir de moy. Quel plege m'en donnerez vous? dist il. La louenge de vostre bien-fait (respondit elle) qui me rendra suiette touté ma vie à recognoistre vostre bonté. Ainsi comme vous estes (dist le Fraudeur) ie vous tiens assez pour ma suiette, & n'ay besoing d'autre meilleur plege pour vous garder de vous enfuir d'entre mes mains. Mais ie vous prie seigneur Cheualier (dist Garaye) laissons ces railleries, & me desliez. Je n'eusse iamais pensé (dist il) que vous eussiez esté tant folle: sçauiez vous pas bien que le temps auquel ceste auenture doit estre acheuée n'est encores auenu, & qu'elle ne peut estre mise à fin iusques à l'arriuee de celle, à qui les destinees la doiuent ottroyer. Partant s'il vous plaist que ie la

voise

voise querir, il n'y a chose qui me puisse plus resiouir que de la ranger en vostre lieu pour vous remettre en liberté. Or sus Cheualier (dist Garaye) desliez moy, & abandonnez ces railleries. Je ne suis pas icy venu (respondit il) pour les abandonner, mais pour les chercher, à fin de me donner du plaisir, & à vous de la fâcherie. Je vo^s supplie (dist Garaye) vous cōtenter du plaisir que iusques icy vo^s avez prins de moy à si bon marché : & ne vueillez par le mal que vous me faites souffrir au corps, faire vne si large playe à vostre bonne renommee. Faites moy mieux entendre celà (dit il) car ie ne sçay pas bien ce que vous voulez dire. Je veux dire (respondit Garaye) que pour vn peu de plaisir que vous prenez en ceste vie, laquelle se doit bien tost acheuer, vous ne faciez rien cōtre vostre honneur, lequel peut durer eternellemēt. C'est vn tresbeau point de Philosophie que vous traitez (dist le Cheualier) & si vous continuēz encores vn peu, vous me pourrez bien inciter à faire vne chose, en laquelle ie ne pensay oncques & partant ie vous prie preschez moy encores de ceste vertu, car ie me voy desia tāt bien persuadé de voz propos, que ie suis presque deliberé de faire pour vous beaucoup pl^{us} que ie n'auois pensé par cy deuant. Qu'auiez vous pensé, dist elle. De vous laisser icy (dist il) iusques à ce que ie vous y eusse amené Daraïde. Et maintenant que pensez vous, dist Garaye. Je delibere (respondit il) de vous emmener ainsi liee en vn mien chasteau, ou ie vous tiendray plus asseuree qu'icy, iusques à ce que ie vous aye donné vostre sœur Daraïde pour cōpagnie : mais ce pendant il me plaist fort bien de vous voir mieux auisee en voz paroles, que vous n'estiez quand ie vous laissay : & par ainsi ie puis cognoistre que le mal ne retourne souuentefois qu'en vn plus grand bien. Pourquoy dites vous cela? dist Garaye. Par ce que de superbe & arrogante que vous estiez, ie vous ay sceu rendre vne treshumble & gracieuse Da-

moiselle : & vous ay bien voulu enseigner ceste vertu, à fin de vous obliger à m'apprendre celle que vous m'avez depuis enseignee. Mais il est temps que ie m'en aille reuoir mes compagnons : ce pendant ie vous prie m'attendre icy, & n'en bouger iusques à ce que ie retourne, car ie vous ameneray par auenture vostre sœur, pour voir si avecque les ruzes dont ie l'ay affinee, elle fera autant biē aprise comme ie vous laisse bien auisee en cest enchantement, qui fait que vous ne puissiez porter enuie à la duchesse de Bauieres. Toutesfois si vous ne pouuiez deceler à ceux qui viendront esprouuer l'auēture, le courage de celles qu'ilz aimēt, vous leur pourrez au moins declarer le courage de celuy qui vous hait en vostre malencōtre. Voylà comme les auentures sont differentes. Or à fin que le serain ne vous face mal, ie vous veux laisser ceste tente pour ce soir iusques à demain au matin que ie vous l'osteray, à fin q^{ue} vous puissiez à loisir iouir de la clarté du Soleil. Je pense que désormais vous ny vostre sœur ne vous pourrez plaindre si le Fraudeur des ruzes vous a trompees apres vous auoir autresfois tant bien auerties : ce qui ne fut auenu si vostre sottise ne vous eust fait perdre le souuenir de ses sages enseignemēs. Demeurez donc patiēment en la contemplation del' image duquel ie vo^s ay acompagnée, & si la faim vous tourmente, vous pourrez ouuir la bouche, & ainsi vous repaistre d'air & de vent deux ou trois iours, iusques à ce que ie retourne par deuers vous. A tant l'Afronteur laissa Garaye, & s'en alla chercher Daraïde pour essayer à auoir pareillement ses armes, ou à tout le moins son cheual. Mais apres estre sorty de la tente, il n'eust gueres cheminé par la prairie estant desia plus de minuit, qu'il rêcōtta Daraïde, laquelle à son retour n'ait point trouué sa sœur Garaye, la suiuiot, acompagnée de ses deux damoiselles, pensant qu'il seroit plus facile de venir au dessus de toutes les auētures qui leur pour-

roient auenir en ce voyage, si elles ne se separoient plus l'une de l'autre. Elle donc aiant rencontré l'Afrôteur qui auoit son armet en telle, ne le recogneut point, mais bien luy elle. Lors Daraïde l'aborda & luy dist, Seigneur ne me pourriez vous dire aucunes nouvelles d'un Cheualier, lequel s'en va icy deuant, en la compagnie de deux Damoiselles. L'Afrôteur qui la cognoissoit, luy respondit, Je ne vous sçauois rien dire du Cheualier que vous me demandez, mais bien d'une Damoiselle qui est là, dans celle tente en la plus belle auenture qu'il sçauoit estre possible de penser. Quelle auenture est-ce dont vous parlez? dist Daraïde: Esprouuez là si bon vous semble (respondit il) car elle est bien pres d'icy, & ie vous assure que vous verrez vne des plus estranges choses que vo' ayez encores oncque veüe. Vous me contez merueilles (dist Daraïde) & me faites grād' enuie d'aller voir que c'est. S'il vous plaist d'y aller (dist le Fraudeur) ie vous feray compagnie iusques à la tente & vous tièdray vostre cheual iusques à ce que vous soiez sortie. Je ne vous veux pas donner tant de trauail (dist Daraïde) mes Damoiselles le tiendront bien: car le Fraudeur des ruzes m'a vne fois appris à ne laisser iamais mon cheual en garde à celui duquel ie n'aurois cognoissance. Vous ne luy estes de peu obligee (dist il) puis qu'il vous a appris un si beau secret, Si vous le sçauiez aussi bien comme moy (dist Daraïde) vous en parlez beaucoup mieux. L'Afrôteur (respondit il) ne me trompa oncques, à fin de me faire trouuer ce seruice de tenir vostre cheual tant estrange comme vous le faites: & si m'assure bien, si ie ne me trompe, qu'il ne me sçauoit iamais tromper. Je le pèsois ainsi (dist Daraïde) la premiere fois qu'il me trompa, iusques à ce qu'il me vint encores trôper la seconde. Gardez vous d'oc (dist il) de la tierce, car ainsi que disent les sages, il n'y a plus grande ignorace que celle de ceux qui ne prenēt

exemple à leurs propres fautes, pour ne faillir point vne autresfois. Or ie vous dy que i'estime le Fraudeur des ruzes si cault que quand vous penserez estre le mieux auisé, ce sera lors qu'il aura plus de ruzes pour vous deceuoir. Prenez donc ce conseil de moy, & le mettez au rang de celui que d'autresfois il vous a fait sentir par experience. Je vous en remercie (dist Daraïde) mais allons no' en esprouuer ceste belle auenture. Allons, respōdit il. Ainsi s'en allerent deuers la tente, à l'entree de laquelle Daraïde descendit, & donna son cheual à tenir à ses Damoiselles. Mais quand elle aperceust Garaye en la façon qu'elle estoit, elle se douta incontinent de ce que ce pouuoit estre. Adoncques comme toute effrayee, s'escria à haute voix: O Dieu qu'est ce que ie voy. Garaye la recognoissant, sentit en elle vne extreme ioye, & luy dit: ma chere sœur, lon m'a ioué la plus grande trahison dont vous ayez iamais ouy parler. Or ce pendant que Daraïde tranchoit les cordages dont Garaye estoit atachee, le Fraudeur des ruzes se mit à pied avecques les deux Damoiselles, & s'apochât d'elles il leur dist: Croiez mes damoiselles qu'il y a la dedās vne des merueilleuses auentures que vo' ayez iamais entendues: & partant ie vous prie m'ouïr, car ie vous la veux dire auāt que vostre Cheualier sorte. Les Damoiselles conuoiteuses d'ouïr le conte, cōmençoient à escouter si ententiuelement, qu'elles ne pensoient en autre chose: mais l'Afrôteur les aperceut ainsi rauies, desbri da le cheual de leur maistresse, lequel estoit deslié, & courant deçà & delà, le Fraudeur se mit à l'entree de la tente, & dist à haute voix: Ma dame Garaye, vo' ne vo' plaindrez point de moy que ie ne vous aye dist verité, & que la profecie que ie vous donnay en m'en allant, n'ait esté de tout acomplie, en quoy vous cognoistrez que si le Fraudeur des ruzes v'se de trôperies, à tout le moins il n'v'se point de men songes. Et vous ma dame Daraïde, puis que

que ie vous ay si bien auertie les deux autresfois que ie vous ay rencontrée, auisez à ceste troisieme voz escuyeres, de prendre vne autresfois mieux garde à elles. Et à finq vous & elles soyiez encores mieux auisees à l'auenir, puis que le sçauoir ne se peut aquerir sans trauail, employez en vne partie pour rataindre vostre cheual: mais par ce que ie profetizois q la pesanteur de voz armes pourroit par trop empescher la legereté dont vous auez maintenant besoing, i'ay voulu emporter celles de vostre sœur Garaie, à fin qu'elle vo⁹ peut plus facilement faire seruice en cest endroit. Partant detachez là, & la laissez courir apres vostre cheual: car ie m'en vois apres le sien, & voudrois bien que le vostre s'en vint encores apres le mien. Or demeurez en la male auenture, puis qu'avec tant de bons conseilz que ie vous ay donnez il y a si long tēps, & encores nouvellement ceste nuit, vous estes tousiours tant mal auisees. En acheuant ces paroles il picqua au grand gallop, sans que Daraïde & Garaye se peussent contenir de rire pour ces façons de faire. Alors Daraïde dit à Garaye en la desliant: Il me semble que nous deuons pardonner à ce folastre, puis qu'il sçait tant bien ordōner ses cautelles & le laisser en la mal auenture. Cest à moi à qui il l'a dōnee (dist Garaye) toutesfois puis que, selon le commun dire, lon doit prendre le premier cōseil de son ennemy. ie veux premieremēt ayder à prendre vostre cheual, puis ie vous conteray le surpl⁹ qui m'est auenu. Ainsi Garaye sortit de la tente pour aider aux damoiselles, & apres vn long trauail le cheual de Daraïde fut pris à course de pallefrois, & ramené par les damoiselles, lesquelles puis apres se retirerent en la tente ou vne partie de la nuit fut employee au repos, & l'autre à rir des auentures qui estoient auenuës à Garaye, lesquelles elle leur raconta assez de fois, & Daraïde lui disoit: Si l'on m'eut laissée en vne telle compagnie de l'image de Diane comme lon vous laissa, ie n'eul-

se sceu endurer aucune douleur iouissant de la ressemblance de tout mō bien. Apres maints autres gracieux propos elles dormirēt ce peu de temps qui leur restoit de la nuit, en bonne deliberation de s'embarquer le lendemain, ce qu'elles firent: car Garaye mōta sur le pallefroy de l'une des Damoiselles qu'elle porta en croupe iusques au port. Ainsi les laisserons nous nauiguer vers Constantinople, & pareillement no⁹ cesserōs de parler du Fraudeur des ruzes, lequel auoit apareillé tout ce q vous auez ouy pensant prendre Daraïde, car il estoit bien auerty de sa departie de Guindaye, cōme celuy lequel tenoit iour & nuit ses espions en la cour, pour mieux executer ses cautelles, & ainsi il auoit preparé ces deux Damoiselles qui emmenerent Garaie dans les tentes, ou elle trouua le Cheualier ebarbé, semblant vne vieille Damoiselle.

Comme les deux vaillans Cheualiers, dom Florarlan de Thrace, & Artaxerxe, furent iettez par la tempeste en l'Isle de Colchos, au moyen dequoy lon cogneut dō Falanges estre filz du Roy Gradamart.

CHAP. XXV.

LEs deux excellens Gheualiers, dom Florarlan de Thrace, & Artaxerxe. estans partis ensemble de Guindaie, furent cōduitz de la fortune en plusieurs lieux, ou ilz acheuerent maintes hautes & perilleuses auentures à leur grand hōneur & immortelle renommee: comme il est plus au lōg recité en l'histoire de ces deux Princes, par ce qu'en ceste cy ne se parle presque que d'Agefilan, & de dom Rogel. Et pour vous confesser la verité, d'autāt que Galeris qui escriuit ceste partie de nostre histoire, estoit natif suget du Prince dom Falanges d'Astre, il recita plus au long les faitz & gestes d'Agefilan, que d'aucun autre: tant pour ceste raison, comme aussi pour la diuine beauté de Diane, & pour les estranges & merueilleuses amours qui furent entre elle & Agefilan.

Au moien dequoy ceste histoire ne parle gueres que de luy, si ce n'est de dom Rogel, dont vous entendrez pareillement les haults faits d'armes, comme de celui qui estoit lors le premier du sang roial de Grece & de la grand' Bretagne. Mais retournans aux deux nobles Princes dont nous parlons: apres auoir acheué à leur honneur plusieurs perilleuses rencontres, ils prindrent la route de l'Isle de Dardanie, à fin que dom Florarlā peut reuoir sa chere & bien aimée espouse, la Roine Lucene, Princeſſe veritablement digne de louage immortelle, tāt pour ses rares vertus, que pour sa singuliere beauté. Elle estoit lors en fort grād' peine pour la longue absence de son mary, cōme celle qui ne passoit aucun temps (pour brief qu'il fust) qui ne lui durast mille ans en ceste triste solitude. Or ces deux Princes aians le vent cōtraire furent iettez par la tourmente en l'Isle de Colchos, peu de iours apres que le Prince dom Falanges & la Princeſſe Alaſtraxeree en furent departis. Là ils trouuerēt la Roine Iris en grand ennui, tant pour la nouvelle mort du Roy Tarsis son espoux, cōme pour l'absence de son fils le Prince Falanges, & de la Princeſſe Alaſtraxeree, lesquels elle auoit fait declarer Roy & Roine de l'Isle de Colchos, apres la mort du Roy Tarsis. Les deux Princes dom Florarlan & Artaxerxe aians pris terre, pour se reposer du trauail qu'ils auoient eu surmer, delibererent d'aller faire la reuerēce à la Roine, & la consoler en sa tristesse: ce qu'ils firent, & la trouuerēt en son palais. Mais quand elle vid Artaxerxe si bien ressembler au Roy son fils dom Falanges d'Aſtre, pēsant que ce fust lui, & qu'il se voulut celer par ce qu'il estoit à genoux, elle receut vn plaisir extreme, & comme hors de soy de grande ioye, lui dist: Mon cher fils dom Falanges d'Aſtre, si vous vous cachez de moy par ce que ie vous ay tousiours caché vostre vray pere, vous me faites tort: car vous ne me deuez point blâmer si ie vous ay tenu couuert, ce que mō

honnesteté, & l'offensé que ie cōmis contre mon mary estant vaincué de la beauté & prouesse du Roy Gradamart, m'ont def fendu de vous descourir iusques icy qu'a pres la mort de celui lequel vo' estimoit son fils, il m'a esté permis de vous donner à cognoistre vostre pere veritable, à fin que vous vous donniez semblablement à cognoistre à moy pour mon fils. Si tous ceux qui estoient lors presents furent esmerueillez de ces propos de la Roine Iris, Artaxerxe n'en fut moins ioyeux pour le grand plaisir qu'il receut d'auoir vn si preux & excellent frere. Adoncques il respondit à la Roine: Ma dame, ie vous supplie me permettre de baiser voz mains, puis que maintenāt ie le puis faire à trop meilleure ocaſiō qu'au parauant, comme celui lequel est frere de vostre fils: en quoi vous pouuez pēser que la fortune ne m'a icy conduit en ce temps, sans le vouloir des destinees, car ie suis enfant du Roy de l'Isle de Taprobane. Quand la Roine eut ouï parler Artaxerxe, elle l'embrassa par grād' amour, & le receut fort gracieusement, & dom Florarlan avecques luy. La renommee courut incōtinent par toute l'Isle de Colchos que dom Falanges estoit fils du Roy Gradamart, ce qui n'auoit encores esté ſceu: au moyen dequoy vn ancien Cheualier du lignage du feu Roy Tarsis, luy voulut quereller le Royaume, tellement que la pluspart des habitans de l'Isle commencerent à le cognoistre pour Roy, d'autant qu'il estoit grand Seigneur & de fort bonne renommee. Et partāt il mit vne puissante armee en campagne pour prendre les villes lesquelles de leur bō gré ne se voudroiet rēdre à luy. Mais les deux Princes Florarlan & Artaxerxe, acompagnez d'une bonne troupe de Cheualiers, & d'autres gens de guerre, qui tenoient le party de dom Falanges, delibererēt luy faire teste, disans pour leurs raisons que le Prince estant né & nourry en la maison du Roy, & en la reputation de son enfant, s'estoit acquis le droit

le droit de la couronne. Sur ceste querelle ils sortirent en la campagne, en bataille rangee, & combattirent avec le nouveau Roy trefaprement, & avecq' vne grande effusion du sang d'une part & d'autre. Mais sur la fin de la iournee le nouveau Roy fut tué, & son armee mise en route, tellement que tousiours depuis dom Falanges demeura Roy paisible de toute l'Isle, par le secours des deux nobles Cheualiers dom Florarlan & Artaxerxe, lesquels par leur grande prouesse suplèrent au petit nombre de gens qu'ils auoient à la comparaison de l'ennemy. Aians ainsi apaisé les affaires du Roiaume de Colchos, ils prindrent congé de la Roine, & s'embarquerent tenans la route de Dardanie, en laquelle estans arriuez, vous pouuez pèser le plaisir & la ioye que receut la Roine Lucene, laquelle auoit desia perdu l'esperance de plus reuoir son Florarlá, pour le long temps qu'il auoit demeuré sans retourner. Les deux nobles Princes furent receuz avecques tout le bon accueil dont il fut possible de s'auiser, & avecques la reuerence que leur haute Cheualerie meritoit: & quelques iours apres à la requeste de la Roine Lucene, Florarlan l'espousa secretement pour receuoir l'un de l'autre la desirée iouissance de leurs amours: mais le Prince ne voulut que le mariage fut publié, iusques à ce qu'il eut la permission de la Roine Arlande, estimant qu'il deuoit cest honneur & reuerence à sa mere. Les deux Princes ayans seiourné plus de deux mois en l'Isle de Dardanie, avecques tout plaisir & recreation, prindrent congé de la Roine, non sans resandre maintes larmes à leur depart: puis estans arriuez dans Constantinople, ils furent receuz fort humainement de tous les Princes & Princesses, & mesmement dom Florarlan de la Roine Arlande, laquelle le voyant desia tant renommé pour sa haute cheualerie, publiâ par toute la court qu'elle ne se vouloit iamais marier, & qu'elle vouloit reseruer son Royaume à Florarlá

qu'elle adoptoit pour son fils. Mais elle fit entendre secretement à dom Florisel qu'il estoit fils de luy & d'elle, & luy ramentent ses anciennes amours, dont il auoit produit vn si beau fruit. Florisel fort ioyeux de sçauoir ces nouuelles, voulut que le lendemain les ceremonies fussent solemnisées, pour faire iurer & proclamer dom Florarlan Prince de Thrace. Ce qui ayant esté fait, le ieune Prince demanda congé à sa mere d'espouser la Roine Dardanie, lui remostant combien il lui estoit redeuable. La Roine Arlande en fut fort ioyeuse, & enuoya soudain ses ambassadeurs bien acompagnez en l'Isle de Dardanie, à fin qu'ils amenassent la Roine sa fille dans Constantinople, pour y celebrer les nopces d'elle & de son fils en grande magnificence, par ce qu'elle desiroit fort la voir & l'auoir quelque temps en sa compagnie, pour luy faire cognoistre les Princesses de Grece, & aussi pour la faire cognoistre à elles. Les ambassadeurs furent receuz dās la cité de Dardanie, avecques grande solemnité, & apres que la Roine Lucene eut prins congé de sa mere, ils l'amenerent en Constantinople acompagnee de plusieurs dames & damoiselles fort belles & richement acoustrees. Elle fut receüe en grand triomphe par les Princes & Princesses de Grece, avecques l'honneur, & bon accueil que ses vertus & ses beautez le meritoient. La Roine Arlande estoit si ioyeuse de sa venue, qu'elle ne s'esloignoit iamais d'aupres d'elle, dom Florisel lui monstroient pareillement grand amour, & vn gracieux visage comme à celle qui estoit sa belle fille. Mais q'vous dirōs no^u du Prince dom Falanges, quand on le recogneut pour enfant de Gradamart? sinō que la Roine Gradafillee estoit la plus ioyeuse du monde voyant vne si prochaine parenté entre lui & elle: & lui pareillemēt le plus content que lon pourroit penser, se voyant des freres tāt excellens comme Artaxerxe, & l'Infante Anaxare: & eux aussi ioyeux au possible, pour auoir vn

frere tant renommé comme le preux Falanges d'Astre. Mais par dessus tous, le plaisir d'Amadis de Grece estoit extreme, voyant son singulier amy Gradamart avoir vn tant noble & vertueux enfant, avecque la parenté qui estoit entr'eux. Et partant il enuoya bien tost apres ses ambassadeurs vers luy, avecques lettres du Roy Falanges, & de la Roine Alastraxeree, l'auertissant de ces ioyeuses nouvelles, desquelles il se resiouit d'auantage que qui l'eust fait monarque de tout le monde. Tous ces Princes dont ceste grande histoire a fait mention estans ainsi assembles dans Constantinople, il ne leur restoit plus pour la perfectiō d'une si belle compagnie qu'Agésilas & dom Arlanges d'Espagne, & Filisfel de Montespain, lequel estoit lors empesché entre les amours de la belle Marfire, desquelz pour les merueilles d'iceux nostre histoire recommencera encores à parler, tandis que les desguisees Daraide & Garaye s'approchent de Constantinople, avecques le grand plaisir de l'une d'elles pour l'espoir qu'elle a de bien tost y reuoir sa bien aimée dame la tresexcellēte roine Cleofile

Comme la belle Marfire abandonna les amours de dom Filisfel : & de la triste & douloureuse vie qu'il en menoit.

CHAP. XXVI.

LA fortune tousiours preparee à hauser & abaisser les choses sugettes à son inconstance, sans espargner les grands non plus que les petits, & n'ayant aucun soucy de se gouverner par la raison, voulust mōstrer sa legiereté acoustumée à dom Filisfel de Montespain, à fin de luy donner par le soudain changement de ses amours, les douleurs & les angoisses d'autant plus ameres, que son contentement n'aguieres luy auoit esté plus doux. Car dom Filisfel iouissant (comme vous auez entendu) des beautés & bonnes grâces de Marfire, ceste volage fortu

ne luy voulut donner sur le cōmencement toute la gloire qu'il pouuoit esperer de ses desirs, pour luy faire sentir sur la fin le plus grand martire qu'il estoit possible à homme de souffrir, par ce que sa Dame commença à le haïr alors qu'elle le deuoit plus aimer, & à se monstrier plus ingrate, lors qu'elle deuoit luy estre plus affectionnée, & ainsi le rendit plus malheureux qu'il ne fut oncq', alors que sa felicité deuoit estre plus grande. Luy dōcques aiāt iouy enuiron vn mois de toutes les delices amoureuses, & de tout le contentement qu'il luy estoit possible de souhaiter, pensant estre autāt aimé de sa dame, comme elle estoit aimée de luy, il tomba en vne si grieve maladie, qu'il fut cōtraint se mettre au lit par quelques iours durant lesquelz il souffroit beaucoup plus de douleur, pour ne voir point sa dame Marfire, que pour la maladie en laquelle il estoit. Et partant il luy fit assez de fois entēdre par plusieurs lettres & messages la peine & le tourment qu'il enduroit en son absence : & comme la plus grande douleur qu'il souffroit pour n'auoir aucun moyen de la voir, luy faisoit perdre le sentiment de la lāgueur qui le retenoit dans le lit. Mais tout cela ne fut rien iusques à ce qu'il s'aperceust clerement de la defaueur de sa Dame, car elle ne luy respondoit à lettre ny à message quelconque : qu'il peut enuoyer par deuers elle : au moyē dequoy il deuint tāt triste, & hors de soy, qu'il ne sçauoit que dire, ny que faire, & encores moins que penser, par ce qu'il ne se pouuoit aperceuoir d'aucune occasion que la belle & gracieuse Marfire peust auoir eue de le haïr, à lors qu'elle le deuoit aimer le plus. Or estant releué de sa maladie, il l'alla visiter come de coustume, mais la ioye qu'il pensoit recevoir en iouissant de sa presence, se tourna en vne double douleur, car il cogneut à son visage & à son maintiē qu'elle ne luy portoit plus si bon vouloir comme au parauant. Adōc s'en retournāt à son log s'en grand

grand ennuy, il luy rescriuit vne lettre, par laquelle il la suplioit de recôpenser le ferme amour dont il l'aimoit non par vne si cruelle haine, mais avec vne affectio qui se peut comparer à la sienne, & partât qu'il lui pleust dōner lieu oportun, auquel il eut le moien de iouir de sa compagnie, & de la contemplation de ses excellētes beautez. Mais la belle Marfīre ne respondit nō plus à ceste lettre qu'à trois ou quatre autres qu'il lui enuoya encores depuis, dōt Filisfel entra en si grand desespoir, qu'il se fust volontiers fait mourir de ses propres mains, si avecque la perte du corps il n'eust eu crainte de perdre encores son ame. Tout le iour il ne faisoit que se tourmenter, & passoit la nuit sans aucun repos: finablement il se delibera de l'aller voir quelque chose qui en peut auenir, ce qu'il fit, & ayant trouuē l'opportunitē de parler à elle, encores qu'elle refusast entieremēt de luy tenir aucun propos, il lui dit. Las! ma dame, quelle cruauté, quelle hayne peut ce estre dont vous vſez ainsi enuers moy? dites (ie vous supplie) quelle ocasion ie vous ay dōnee pour me traiter si rigoureusement? Marfīre avecque vne rude grauitē luy respondit. Qui vous fait tant fol & audacieux que de me tenir propos tant hors de raison? Par ce, ma dame (dist Filisfel) que vous me tourmentez avec vne cruauté trop grande, il vous peut souuenir de la promesse, laquelle vous m'avez faite, de me donner l'opportunitē de receuoir la iouissance de voz faueurs à toutes les fois que l'ocasion s'en offrirait: ce que vous n'avez seulement fait, ains encores n'avez daigné respōdre à lettre, ny à message que ie vous aye peu enuoyer. Ainsi m'avez vous dōné maintes mortelles angouisses en recôpense des faueurs lesquelles vo' m'auiez promises. Je n'ay pas peu faire ce que vous dites, respondit Marfīre. Je vous supplie ma dame (dist Filisfel) ne dites point que vous n'avez pas peu, dites seulement que vous n'avez pas voulu. Adonc Marfīre preuāt vn visage fort en-

flammē de colere, luy dist, Et vrayement beau sire, puis que vo' voulez que ie parle si auant, ie vous dy que ie ne l'ay pas voulu, & ne le veux, & ne le voudray, mais pour maintenant ie veux bien vous mettre hors de doute, & vous auertir que sur vostre vie desormais vous n'ayez plus à m'importuner cōme vous avez fait par cy deuant, car il ne vous profitera de rien d'autant qu'il me poise fort d'auoir fait pour vous ce que i'ay fait, cōbien que nul autre l'ayt peu mieux meriter que vous, puis que ie deuois faire vne telle playe à mon honneur. Toutesfois il me desplaist de m'estre ainsi deshonorē moy mēmes pour vous complaire, & attendu que ces vaines amours ne sont pour durer long temps, & que quelque iour il leur faut dōner vne fin, il sera meilleur q̄ des maintenant vous commenciez à leur imposer vn eternal silēce, à fin que vous mettiez par ce moyen vostre vie hors de danger, & mon hōneur en paix. Vous pouuez desia penser quel desespoir receut Filisfel de ces rigoureuses paroles, & vous assure bien qu'il fit alors beaucoup pour luy, & monstra vn signe de grāde cōstance, pour ne sortir point hors de soy, en aiāt si iuste ocasion. Luy donc perdant toute la couleur du visage, & transsissant cōme vn criminel que lon conduit aux fourches, respondit en ceste sorte, Ma dame, ie vous remercie du bon auertissemēt que maintenant il vous a pleu me dōner: Au moins en mon desespoir i'ay encores trouuē la fin de l'vne de mes esperances, car ie n'esperois pas vn moindre guerdon q̄ cestuy cy, du vray & loyal amour lequel ie vous ay tousiours porté depuis l'heure que ie vous vy premierement. Toutesfois vous aiāt tousiours obeï iusques icy, ie suis encores prest à vous obeïr pour ceste heure & de prédre plaisir en ce qui vous plaira, encores que ce soit ma prochaine mort, puis q̄ vous m'avez tāt biē voulu mettre hors de doute. Soit pour le plaisir q̄ Marfīre receut des doléances de dō Filisfel, ou

la pitié qui la contraignoit, elle se prit à rire à lors qu'il mōstroit plus de douleur, & partant il lui dist, Ma dame, retournez dire encor' vn coup les rigoureuses paroles lesquelles tantost vous m'avez dites. Adonc Marfire commença encores à se colerer, & lui pareillement à se plaindre de sa cruauté en la présence de Carie, & Marfire se prit encor' à rire plus fort que deuant, & lui dist, Or sus apaisez vous, car ie vous enuoieray querir à toutes les fois que j'auray le moien de parler à vous. Me le promettez vous ainsi, ma dame, dit Filisél. Ouy (dist elle) ie le vous promets. Je vous supplie donc, ma dame (dist Filisél) mē presēter voz belles & delicates mains à fin qu'en les baisant ie preigne le gage de vostre promesse. Adonc Marfire tira l'un de ses gants & luy presenta sa main blanche d'une fort bonne grace. Dom Filisél la receut entre les siennes, & la baisa souuentefois; mais parce qu'il estoit tard & que les damoïselles & autres seruiteurs de la maison venoiēt couvrir pour le souper, il prit congé de sa Dame, & s'en allāt trouua les deux damoïselles Carie, & Cardoine, en vne galerie par laquelle il passoit, & lui semblant le lieu assez propre pour leur descouvrir ses douleurs, comēça à se plaindre à elles de la cruauté de leur maistresse. Mais Cardoine qui desiroit fort son amour, & estoit ialouze de lui, se monstra fort cōtraire à ce qu'il demandoit, disant que le meilleur seroit de finir plustost que plus tard ce qui vn iour deuoit prendre fin. Dom Filisél fort ennuyé de ses paroles, lui dist, Je vous supplie ne me tenez iamais tels propos, car ce seroit assez, pout me faire donner à ma vie de mes propres mains la fin que ma Dame Marfire a desia dōnée à mon bō heur. Dites seulement que la haine laquelle ma dame a conceu contre moy sans aucune raison, est l'ocasion de tout ce trouble, & ne me cherchez point d'autres excuses. En ces entrefaites Marfire apella ses Damoïselles, par ce qu'elle ne vouloit pas qu'il

parlast à elles plus long temps, parquoy apres auoir pris congé, il se retira en son logis sentant iusques dans l'ame le malheur qui lui estoit auenu ce iour. En cest estat il continua enuiron vn mois estant fort defauorisé de sa dame, car si quelque fois il passoit deuant ses fenestres, si tost qu'elle le voioit venir, elle tournoit le dos & les lui fermoit au visage. Au moien de quoy il souffroit vn tourment difficile à croire, à ceux qui n'ont expérimenté le semblable: neantmoins il prenoit patience au mieux qu'il pouuoit, esperant avecque le temps recevoir quelque meilleure fortune, veu l'extremité de son amour, car il ne pouuoit croire que la belle Marfire ne se lassast de lui estre si rigoureuse, puis que pour son courroux, & pour sa rigueur il ne se lassoit point de l'aimer. Or le laisserons nous en ceste esperance, iusques à ce que nostre histoire retourne encores à parler de luy.

Comme apres que le Roy dom Falanges et sa chere espouse, furent partis de la court, Daraïde & Garaye prindrent port deuant la cité de Constantinople, & des caresses que les Princes & Princeesses leur firent à l'arriuee.

CHAP. XXVII.

Peu de temps apres que dom Florarlan & Artaxerxe furent arriuez dās Constantinople, le Roy dom Falanges, & la Roine Alastraxeree sa femme retournerent en leur Roiaume, à raison des troubles qui y estoient auenus, craignans qu'il n'y en auint encores d'auantage. La court fut autāt triste de leur depart, comme eux desolez pour n'auoir de lōg temps ouy aucunes nouuelles de leur filz Agefilan, qu'ils pensoient estre mort; iusques à ce que les sages Alquis & Vrgan de les aduertirent de n'en prendre plus grand ennui, & que bien tost ils en scauroient nouuelles. Avec cest espoir ils se cōsolerent aucunement en son absence. Biē
tost

toſt apres leur depart, Daraïde & Garaye prindrent port deuant la cité de Conitanrinople, & apres auoir aſſez long temps deliberé en quelle façon elles ſe preſenteroient deuant les Princes de Grece, leur derniere conſuſion fut de prendre l'habit des Damoifelles, & leur ſembla que ſous ceſte ruze elles ſeroient moins cogneuës de ceux qui les auoient veuës en leur enfance: au moyen dequoy pour demander aſſurance, elles enuoierent deuant vne de leurs damoiſelles, laquelle ſe preſenta aux Princes en la grand ſalle du palais ſur l'yſſuë de leur diſner. Quand ils entendirent qu'ils auoient en leur port celle noble Daraïde, la renommee de laquelle auoit deſia tant de fois enuironné toute la terre, & ſa ſœur Garaye, qui n'eſtoit gueres moins eſtimee, ils receurent telle ioye, & les Princeſſes ſi grand plaifir qu'il ſeroit impoſſible de vous l'exprimer tant les vns auoiēt grand deſir de cognoiſtre leur haute cheualerie, & les autres de voir leur diuine beauté. Parquoy le Roy Amadis reſpondit pour tous fort gracieuſement à la damoiſelle meſſagere, M'amie dites aux deux ſœurs Daraïde & Garaye qu'elles peuuent venir quand bon leur ſemblera en ceſte cour, & que ceux qui les y verront aurōt meilleur beſoing d'aſſurance contre leur ſouueraine beauté, qu'elles n'en ont beſoing pour ſe trouuer entre Princes, leſquels ont la gracieuſeté & la courtoifie en ſi grande recommandation. Dites leur auſſi que toutes noz vies nous eſtimerōs ce iour heureux, auquel les deux plus cheualereuſes & renommées ſœurs de tout le monde aurōt embelly noſtre cour de leur preſence. Auecq' ceſte reſponce la damoiſelle ſ'en retourna, laiſſant grand plaifir à toute la troupe des Princes & Princeſſes, & meſmement la Roine Cleoſile. Puis aiant recité l'yſſuë de ſon meſſage à Daraïde & à Garaye, elles ſ'acouſtrèrent incontinent en grand apareil, & magnificēce, comme celles qui n'eſtoient venues d'eſpourueuës

d'aucune choſe qui leur peuſt eſtre neceſſaire en ce voyage. Daraïde eſtoit veſtue d'un acouſtrement de ſatin blanc, gautfré à petites decoupures, leſquelles eſtant reſprinſes par le dedans, rendoient la figure d'un ret ſur un fons de toile d'or. Au milieu de chacune maille reſuiſoit vne fine perle Orientale, & ſur chacun neu, un petit bouton d'or tiſſu en pointe de diamant & embelly de fin & ſubtil eſmail ſemé de diuers fueillages. Sa robe auoit la queue fort longue, & les manches fort eſtroites au deſſus du coude, & pendantes iuſques en terre ioignant la main, & fourrees par le dedans d'une ſoye qui changeoit d'autant de couleurs comme le col du Paon preſenté aux rayons du Soleil. Elle portoit aux poignets, deux braſſeleſ de fine & precieuſe pierrerie. Ses cheueux eſtoient eſpandus aſſez au large ſur ſes eſpaules, & ſeparez en douze parties qui finiſſoient chaſcune en un las d'amour, auquel pendoit un riche ioyau de beaux rubis. Elle auoit ſur ſon chef vne couronne d'eſcarboucles & de Saphirs, to⁹ taillez par merueilleuſe induſtrie en maniere de fleurs de giroſlee: ceſte couronne eſtoit atachee de chaſcun coſté de ſon chef, à deux laiſſetz de ſes cheueux, chacun deſquels ſe refermoit en un beau & gros diamant, qui rendoit vne excellente clarté ſur ſon viſage. La Roine Sidonie auoit voulu moſtrer ſa grandeur aux Princes de Grece, en leur enuoiant la noble Daraïde embellie de toutes ces richesses. Garaye eſtoit veſtue d'une meſme façon, car le plus ſouuent les deux ſœurs eſtoient toujours de meſme liuree. Eſtans ſorties de la nef en ceſt equipage, elles monterent ſur deux Licornes blanches, aians les ſelles & les houſſes avec toutes les garnitures faites d'un ouurage conforme à celui des habillemens de leurs maiſtreſſes. Leurs damoiſelles les ſuiuoient, veſtues de robes de ſatin iaune decoupees ſur vne doublure de toile d'argent, rayonnee de fil d'or. Or Daraïde & Garaye n'eurent gueres long

temps cheminé sur le riuage, qu'elles rencontrerent la plus grand part des Princes de Grece, avec vn infiny nombre de Seigneurs & Cheualiers qui venoiēt au deuant d'elles, pour les receuoir plus honorablement: car soudain que la damoiselle fut partie du palays, dom Florisel de Niquee dist qu'il vouloit aller au deuant de la renomēee Daraïde, tāt pour sa prouēse cōme pour l'honneur qu'il lui deuoit à cause qu'elle auoit esté nourrie en la maison de la Roine de Guindaye: & partant tous les ieunes Princes & Cheualiers de la cour, sortirent avecque lui, entre lesquels estoit dom Rogel de Grece non moins plaissant à voir pour la fleur de sa premiere ieunesse, que pour la belle representatiō de sa personne. Mais ie vous laisse à penser si tous ces grands Seignrs furent esbahis quand ilz aperceurent les beautez des deux sœurs acōpagnees de si grādes richesses cōme nous vous auōs recité. Or apres auoir entēdu qui estoient ceux lesquels leur venoient au deuant, elles leur firēt la reuerence qui estoit deuē à vne si noble compagnie de Princes: & apres les caresses faites d'une part & d'autre, dom Florisel conduit Daraïde, & dom Rogel, Garaye, & ainsi s'en allerent vers le palais parmy la cité, non sans grād travail, à cause de la foule du peuple qui s'estoit mise dans les rues pour voir passer celle Daraïde dont ilz auoient tāt de fois ouï parler au parauāt. Dom Florisel regardoit Daraïde fort ententifuelement, & elle luy, s'esmerueillans assez l'un de l'autre. Les premieres paroles que dom Florisel luy dist, furent telles, Combien ma dame, qu'en contemplant vostre diuine beauté, ce me soit vne trop grande liberté de penser en autre part, toutesfois ie ne laisseray à vous suplier de me dire en quel estat vous auez laissé la roine Sidonie. Monsieur (dist Daraïde) ie l'ay laissée en bonne disposition, & avecque vne beauté si grande qu'apres ma dame Diane sa fille, ie n'ay encores veu Princeesse en tout le

monde qui se puisse comparer à elle: & par ce que ie vo^e estime si discret, que vo^e n'estes pour la mettre si facilement comme vous mōstrez, hors de vostre memoire, vous me pardōnerez si ie vous dy que vous ne vo^e estes deu excuser pour auoir eu deuant moy en vostre souuenance, celle que la iustice des Dieux, & la raison des hōmes, ne vous doiuent iamais laisser mettre en oubly, en quelque part de la terre, & en quelque fortune, que vous vous puissiez rencontrer. Vous m'auertissez (respondit dom Florisel) de ce que ie doy, & que ie confesse deuoir à la Roine Sidonie: en quoy ie ne veux vous contredire pour le desir que i'ay de la seruir & honorer, combien qu'elle ne vueille recognoistre ma bonne volonté, & encores moins la receuoir. Laissons celà (dist Daraïde) car nous aurons assez de temps pour en parler, puis que ie ne suis icy venue à autre intentiō. Dom Florisel se douta par ces paroles, qu'elle luy vouloit demander le combat, & pour luy complaire ne luy voulut plus parler de la roine, ains luy dist, Je vous suplie m'asseurer si la beauté de la Princeesse Diane est aussi grāde comme on nous lā represente en ses portraitz. Elle est si grande (respondit Daraïde) que les dieux semblēt s'estre efforcez entieremēt à paindre en ma dame la Princeesse, toutes les perfections qu'il est possible de voir au mōde: & ne vous en sçauois tant raconter de louanges, que pour dire trop peu, ie ne cōmise vne trop griefue offence contre celle qui rend les langues de ceux qui la voyent, muettes, & leurs entendemens esperdus, & qui de paroles & de pēses se fait reuerer, & honorer comme vne chose celeste, & en laquelle les Dieux ont voulu employer vne grand' part de leur diuinité, pour la manifester entre les hommes. Dom Florisel receuoit grand plaisir de ces propos: mais Daraïde d'heure en heure ne pouuoit aucunement retirer sa veuē de dessus dom Rogel, car il luy sembloit qu'il aprochoit fort

fort de la beauté de sa maistresse Diane, tellement qu'il detenoit sur luy les yeux de Daraïde par force, encores qu'elle s'ef forçast de les en detourner à son possible. Dō Rogel pareillemēt prenoit fort grād plaisir à regarder Daraïde, & voyāt qu'elle le regardoit il sentoît beaucoup plus griefuement en luy la douce violence de la beauté: dequoy Garaye s'aperceuant (comme gracieuse qu'elle estoit) luy dist: Monsieur ie ne puis souffrir qu'en me cōduisant, vous occupiez ainsi les yeux en autre part. Ma Dame (dist il) puis que les yeux de l'ame sont occupez entierement à vostre seruice, c'est bien raison que vo^z donnez quelque liberté à ceux du corps, pour mieux couvrir en mō visage ce que vostre excellēte beauté me fait secretemēt endurer en mon cuer. Adonc Garaye lui respondit d'une fort bonne grace, Je ne reçoÿ point les secretes pēsees d'un amāt, si par effect & preuues manifestes il ne me les fait encores cognoistre: car ma beauté ny mō ambitiõ ne permettent point que ie laisse prendre sur moy ceste gloire à ma sœur, ny à aucun Prince de la terre. Maintenant que ie sçay vostre volonté (dist dō Rogel) ie ne feray plus de faute en vostre seruice. Vous m'en auez laissé bon gage (respondit elle en riant) mais si la vostre se deuoit gagner par les armes, tout ainsi qu'auēcques la beauté, ie croy que ny vo^z par vostre prouēse, ny ma sœur par sa beauté singuliere, ne pourriez emporter riē sur moy. Dom Rogel luy respondit en riant. Quant aux armes, ie vous les ren, atendu la gloire que ce me sera d'auoir esté vaincu de vous: mais quant à la beauté, debitez en auēcque vostre sœur si bon vous semble. Vrayement (respondit Garaye) vous deuiez bien tenir telz propos, car par là ie cognois bien qu'en beauté vous ne me voulez donner aucun auantage. Ma dame (respondit il) si vous le peniez auoir, il n'est besoing que ie le vous donne. Vous ne me semblez point bon amy, dist Garaye. Pourquoi? respondit dō

Rogel. Par ce (dist elle) que vous ne me voulez point oster de la folie en laquelle ie suis, d'autant que ie m'estime estre pl^{us} belle que ma sœur. Je n'en puis pas gueres bien iuger, dist dom Rogel. Pour quelle raison? dist elle. Par ce (dist dom Rogel) que ie me sens si ataint de vostre amour, que la veuē commence à me faillir pour bien parler d'une chose qui est sugette au iugement des yeux. Qui vo^z fait dire cela? dist Garaye. Sçauēz vous pas bien (respondit il) qu'Amour est aueugle? comme pourra il donc iuger de ce qui se iuge par la veuē, & encores moins suivre la raison pour l'entretienement de ses loix, qui ne sont que vraye folie? A ceste heure (respondit Garaie) ie vous dy que ie ne veux point de vostre seruice. Pourquoi? dit Rogel. Par ce (respondit elle) que vous n'auēz point veu qu'auēcque la raison de mes bonnes graces, & de ma beauté, celuy qui m'aymera, pourra tousiours se deffendre cōtre les iniustices de l'Amour. Que sçauēz vous ma dame, dist dom Rogel, si auant que ie vinsse ici ie n'estois point aueuglé. Vous l'auēz bien monsté, dist Garaye, en riant d'une fort bonne grace. Entre telles & autres gracieuses railleries, Daraïde & Garaye marcherent par la ville, laissant maints Cheualiers, & grands Seignrs enflāmez de leur beauté: & ainsi arriuerent au palais, aux fenestres & galleries duquel les Princesses Grecques s'estoient desamises, à fin de les voir arriuer.

Cōme Daraïde & Garaye furent receūz des Princesses de Grece, & de ce qui se passa entre Daraïde, & entre la belle Infante Fortune.

CHAP. XXVIII.

DAraïde fut fort esbahie voyāt vne si grande beauté, cōme estoit celle qui reluisoit à son arriuee, en chancune.

cune fenestre du palais. Mais elle s'esmerueilla encores d'auantage, quand elle aperceust au bas dans la grand place l'horrible combat representé au naturel, que l'Empereur Amadis de Grece auoit eu à l'encontre de Furio Cornelio: car il estoit paint dans Constantinople, tout ainsi que dans Trebisonde. Adonc Daraïde dist à dom Florisel, Quels hauts faits d'armes nous restera il plus à faire desormais, qui puissent meriter aucune louange à la comparaison de ceux cy? les Cheualiers pourront d'oresenauant s'abandonner aux hazardeuses auentures, pour faire leur deuoir & acquerir honneur, mais non pas en intention de gaigner les plus grands triomphes, puis que les Dieux (comme ie voy) les ont tous reseruez aux cheualiers de vostre lignage. Dom Florisel luy respondit, il me semble que pour acquerir vne renommee immortelle, il restoit encor assez dans le chasteau du mont, auât que l'espouëtable Caualion eust donné à tout l'vniuers assureé tesmoignage de vostre prouësse, au moins cōme ie puis cognoistre par les peintures qui sont en ceste paroïs, que vous voyez icy deuant vous. Alors il monstra à Daraïde le combat qu'il eut cōtre le Caualion, representé au naturel, avecque maintes autres auentures qui luy estoient encores auenuës, car on paignoît deuant le palais la pluspart des choses memorables qui se faisoient par tout le mōde. Entre lesquelles estoit painte l'histoire des Amours de dom Florisel & de la Roïne Sidonie, avecques les six Damoiselles qui se tuerēt apres auoir fait le message de leur maistresse. Daraïde aiât assez regardé toutes ces peintures, dist à dom Florisel, Il est bien seant que les petites entreprises (comme celle du Caualion) soient mises en ce rang, à fin de rendre d'autant plus illustres celles dont les Princes de Grece ont gaigné leur immortel renom par dessus tous les Princes de la terre. Ainsi deuisans ils arriuerēt à l'entree du palais, ou Daraïde descendit de

dessus sa Licorne avec l'aide de dom Florisel, qui à la descendue la receut entre ses bras. Autāt en feit dom Rogel à Garaye. Puis les prenant par la main, monterent dans la grand' sale, chacun s'esmerueillāt de la disposition & hauteur de Daraïde, qui de toute la teste passoit ceux qui l'accompagnoient, excepté dom Florisel & Garaye qui n'estoient gueres moindres. A la porte de la sale ils rencontrerent le Roy Amadis, avecques les Empereurs & Rois qui lui tenoient compagnie. Adonc Daraïde aiant sceu par dom Florisel que c'estoit le Roy, s'agenouilla deuant luy, & dist, Trespreux, & trefexcellent Roy, il plaira à vostre maïesté me presenter voz victorieuses mains, à fin qu'en les baisant ie vous rende le tribut lequel vous est deu, plus pour la gloire des estranges auentures lesquelles vous auez courageusement entreprises, & heureusement executees, que pour le hault degré auquel vous estes enleué par la fortune, car encores qu'elle vous ayt beaucoup fauorisé, si ne vous a elle fait assez grand, atēdu que la monarchie de tout le monde ne pourroit suffire pour le iuste guerdon de ce qui est deu à voz merites. Le Roy esmerueillé de sa beauté, & de sa forte corpulence ne lui voulut presenter les mains, ains l'embrassa gracieusement, & luy dit. Tresbelle & trefexcellente Daraïde, ie suis plus content & tiens à trop plus grād honneur, qu'une tant renommee damoiselle comme vous estes, m'ait en si bonne reputation, que ie ne ferois d'estre Scigñr de tout ce que maintenāt vous venez de dire. Avecque pareilles ceremonies Daraïde se presenta aux Empereurs Esplandian, Lisuart, & Amadis de Grece: mais sçachez qu'aux autres Rois, elle ne fit autre careffe sinon vne petite reuerence. Tout le semblable fit Garaye, de laquelle le Prince Anaxartes ne pouuoit retirer les yeux: pour la souuenance qu'elle lui donoit d'Arlāges d'Espagne son fils: mais par ce qu'il y auoit long temps qu'il ne l'a

noit veu, & que Garaye estoit si grande, & masquee d'un tel habit, il n'eut iamaïs aucun soupçon de la verité. Or Daraïde estant entree dans la sale, vint à la compagnie des dames, & s'agenouillant deuant la Roïne Oriane, luy voulut baiser les mains, mais la roïne ne le voulut cōsentir ains l'embrassa & la fit leuer. Elle voulut pareillement baiser les mains aux Emperieres, mais elles la receurent en pareil honneur que la Roïne Oriane auoit fait. Garaye obserua pareilles ceremonies que Daraïde, & la Roïne & les Imperatrices la receurent en luy faisant l'honneur qu'elles auoient aussi fait à sa compagne : puis les firent assoir au milieu d'elles. Adōc Daraïde se mit à contempler si ententifuelement la beauté de Nicquee, & Nicquee semblablement à la regarder par si grande affection, qu'elles sembloient toutes deux rauies hors de ce monde, l'une pensant voir sa Diane, l'autre pensant reuoir sa Nereïde. Mais entre autres choses, toutes s'esmerueilloient avec combien de bōne grace la riche espee de Daraïde lui pen doit du col en escharpe, & se souuenās des hautes auētures qu'elle en auoit paracheuees, ils la regardoient par grande admiration, sans pouuoir oster les yeux de dessus elle. Quelque temps apres elle commença à parler à la belle Niquee, & luy dist : Il apert bien que voicy le ciel de la beauté, puis que ma dame Diane s'y peut monstrer : ô moy bien heureuse, à laquelle les dieux ont ottroyé le bon heur de ce qui me restoit encores à voir, pour auoir veu toute la beauté que le ciel peut communiquer à la terre. Niquee luy respondit : Tresbelle Daraïde, vous auez beaucoup plus d'ocasion de remercier Dieu de la beauté qu'il vous a donnee, que de celle laquelle maintenant vous pouuez voir : mais c'est à moy à le remercier de ce qu'il m'a enuoyé vne si vraye ressemblance de ma Nereïde, & de ma tant renommee fille la Roïne Alastraxeree, laquelle ie souhaite fort icy, afin qu'elle re-

cogneust en vous son vray portrait qui ne represente moins au vif sa beauté, que sa haute cheualerie. Daraïde prit vne fort belle couleur en son visage pour ces paroles de l'Emperiere, & se contristant pour ce que ses pere & mere n'estoient lors en la cour, lui dist : Ma dame, ie vous remercie tres humblement de la louange qu'il a plu à vostre grandeur me dōner par voz propos, & me plains de la fortune, laquelle m'ayant fait tant de bien que de me dōner la gloire ou ie me voy pour estre en vostre compagnie, m'a neantmoins voulu monstrer qu'en ceste mortelle vie n'y a aucun plaisir parfait, puis qu'elle n'a voulu que j'aye icy trouué la forte Roïne Alastraxeree, ny son mary le preux dom Fa langes, lesquelz j'auois fort grand' enuie de voir. A tant l'Imperatrix Niquee se tourna vers l'Empereur Amadis de Grece & luy dist : Monsieur que dites vous ? ne voyez vous point comme Dieu m'a encor' vn coup renuoyé ma Nereïde, afin de me faire souuenir de ce temps les peines & douleurs, duquel nous sont depuis ressorties en si grand heur ? L'empereur en souz-riant luy respondit : C'est moy à qui Dieu a enuoyé ceste faueur, en m'ayant autresfois fait ressembler à vne si belle & vertueuse Damoiselle. Daraïde regardoit la belle proportion de l'Empereur, & luy sembloit bien n'auoir iamaïs veu Cheualier, lequel eust la representation d'un homme tant vertueux ny tāt adextre comme luy : & de fait, excepté les Cheualiers de son lignage, il n'y eut iamaïs homme qui peust estre comparé à sa haute cheualerie. Ce pendant la Princesse Oriane regardoit fort Garaye, pour la souuenance qu'elle luy donnoit de son filz : mais elle auoit tousiours les yeux sur la roïne Cleofile, qui l'auoit receuē par grand amour, comme celle qui s'estoit extrememēt resiouie de son arriuee. En ces entrefaites Darinel entra en la sale, menant Mordachee par la main, & s'aprochant des Dames, il dist à pleine teste : O Dieu ! & quel
beau :

beau printemps a ainsi peu reuestir ce pré de tant belles & nouvelles fleurs? Ma dame Siluie, ma dame Helene, ma dame Timbrie en vistes vous onc de pareilles parmy les champs de Tirel, ou dans les prez d'Apolonie? Ainsi que le folastre Darinel disoit ces propos, la Roine Finistee entra en la sale, menant par la main la tresbelle petite Infante Fortune, laquelle rendit Daraïde fort esmerueillée de sa beauté qu'elle estimoit estre egalle à celle de sa dame Diane. Là auint vne estrange chose, c'est que la petite Princeesse n'eust si tost aperceu Daraïde, qu'elle la courut embrasser comme si elle l'eut cogneue de long temps. Daraïde fort ioyeuse de ce q'la petite fillette lui auoit fait, la prit entre ses bras & la baisa par grand amour pour la souuenance qu'elle lui donnoit de sa Diane. O ma dame (disoit Daraïde) comme recognoistray-ie enuers vous la grande faueur que maintenant vous m'avez faite. La petite Infante se rioit sans lui respondre vn seul mot, & entortillant ses petits bras à l'entour de son col, la baisoit & acolloit, trepignant & sautelant en son giro comme rauie de grand'ioye, tellement que pour chose que l'Emperiere Niquee, ny la Roine Finistee lui peussent dire, elle ne voulut iamais s'oster d'entre les bras de Daraïde: & quand on l'en pësoit tirer, elle l'embrassoit encores d'auantage, & crioit de toute sa force, dôt toutes les Princeesses se prindrēt à rire, Daraïde fort ioyeuse des folastries de l'Infante, se tira du col vn beau & riche dyamāt, avecques quatre gros rubis, & plusieurs fines perles qui estoient enfilées dans vn delié cordō de soye cramoisie, puis les mettāt à deux tours dans le col de l'Infante, & faisant pendre le diamant sur le milieu de sa poitrine, qui estoit à demy descouuerte, luy dist: Madame receuez de moy ce ioyau à fin que toutes les fois que vous le porterez il vous souuienne, en le voiant de la faueur que vo' m'avez faite auourd'hui, & que par celle souuenāce i'acroisse d'au-

tant d'auantage la gloire que i'ay receuē par voz faueurs. Ce deuis de Daraïde fut entrerompū par Darinel, lequel lui vint dire: Et bien, ma dame, que dites vous de ce bouton, s'il est vne fois rose parfaite? Sa beauté, dit Daraïde, sera pareille à celle des Rosiers qui ont peu produire deux si belles roses, comme sont ma dame Diane, & ma dame Fortune. Puis regardant l'Infante, luy dist: Respondez moy, ma dame, vous en voulez vous pas venir avecques moy en mon païs? Ouy, respondit elle, moiennant que nous emmenons ma dame ma mere, & ma Finistee avecques nous. Daraïde se prit à rire, & luy dist: Vous dites bien, ma dame, mais elles ne voudront me faire tant de faueur que de venir avecques nous. Si feront si, dist l'Infante, car ie les emmeneray biē. Nous irons doncques quand il vous plaira, dist Daraïde. Ie suis contente, dist la fillette, que nous aillons tout à ceste heure: & puis nous estans arriuez ie vous monstreyray comme ie sçay baller. Adonc toute la compagnie se prit à rire: mais la petite Infante aiant demandé sa harpe à la Roine Finistee, dist à Daraïde: Voulez vous pas que ie die vne chanson pour l'amour de vous. Ouy vrayement ma dame, respondit Daraïde, & vous remercie dont il vo' plaist me faire si grāde faueur. Adonc l'Infante Fortune cōmença à iouer & à chanter fort doucement ces vers, lesquelz autresfois Alquif & Vrgande auoient faitz sur ses destinees.

CHANSON DE L'INFANTE FORTUNE.

*La trop inconstante Fortune
Aux peuples & aux Roys, commune
Dontant la gloire, & le renom,
Me voulut lors que ie fu nee,
Estant ma mere infortunee
De Fortune prester le nom.
Le nom seul est en moy volage,
Car le vouloir, & le courage*

Constante

Conſtans en moy ſeront touſiours:

Maints incoſtans, en ma conſtance

Verront maugré leur reſiſtance

Finir leur vie, & leurs amours.

Mais comme la Fortune auare

Depart à peu ce qui eſt rare,

Eſpargnant chichement ſes dons.

Vn ſeul ainſi aura la gloire

Qu'en ſa trauaillée victoire

Il preigne ſes iuſtes guerdons.

Et comme la Fortune apreſte

Aux plus grands Rois mainte tempeſte.

Ainſi aux Princes de renom,

Je ſeray tempeſte commune,

Monſtrant en moy de la Fortune

La force, la grace & le nom.

L'Infante aiant mis fin à ſon chant, pria l'Imperatrix ſa mere de iouer & l'importuna tant que finalement elle prit la harpe & chanta vne chāçon des angoiſſes, qu'elle auoit endurees, ce pendant qu'elle eſtoit tenuë comme eſclaue au lieu ou elle auoit acouché de l'Infante.

Après elle, l'Empereur ſon mary prit la harpe, & chāta vne chāçon qu'il auoit faite en l'Isle ou il s'eſtoit delibéré de mourir pour auoir perdu l'eſperāce de plus reuoir ſa chere Niquee. Mais l'Empereur n'eut ſi toſt acheué ſon chant que l'Infante Fortune reprit la harpe, & la preſentāt à Daraide lui diſt: Puis que j'ay chanté vne chanſon pour l'amour de vous, c'eſt bien la raiſon que vo⁹ en chantez maintenant vne autre pour l'amour de moy. Vrayement ma Dame, diſt Daraide, la perſonne ſeroit trop mal gracieuſe qui oſeroit reſuſer vne choſe requiſe de tant bōne grace, & par vne ſi excellente Princeſſe comme vous eſtes. Adoncques la preſence de l'Infante Fortune luy ayant fait reſentir iuſques au plus profond du cuer l'amour duquel Diane la tenoit embrasſee, elle prit la harpe & entrerpompant ſon chanter de pluſieurs ſouſpirs, commença en ceſte ſorte.

CHANSON.

A quelle autre peine plus dure

M'atend encores le malheur,

Si la douleur qu'ores j'endure

Surpaſſe toute autre douleur?

Après vne longue ſouffrance.

Lon peut en tous autres amours.

Se conſoler par l'eſperance

Qu'on a du deſiré ſecours.

Mais mon mal eſt de telle ſorte

Eſtant perdu l'eſpoir en moy,

Que choſe qui me reconforte

En tout l'vniuers ie ne voy:

Vierge ſuis de ſens deſpourueë,

Qui vois vne autre vierge ayman:

O flamme par trop incogneuë!

O trop miſerable tourment!

Si tu voulois, Amour, qu'en cendre

Mon foible cuer fuſt conſumé,

Au moins content te deuoit rendre

Quelque martire acouſtumé:

Douces m'euffent eſté les flames,

Doux m'eust eſté le trait vainqueur,

Qui d'un amour commun aux Dames.

Eust peu faire embraser mon cuer.

La biche à la biche ne donne

Ny ſon ardeur, ny ſes amours,

Ny la lyonne à la lyonne:

L'ourſe fuyt l'ourſe, & fuyt ſon ours:

Son colomb fuyt la colombelle:

La geniſſe fuyt ſon thoreau,

Son tourtereau la tourterelle,

Et la paſſe ſon paſſereau.

En l'air, en la mer, en la terre,

Au cler ciel, & vmbreux enfers,

Seule ie ſuis en ceſte guerre

Incogneuë à tout l'vniuers:

Seule ie ſuis d'un feu rauie

Du feu naturel ennemy,

Seule ie ſuis qui d'une amye

Suis amye en lieu d'un amy.

L'Asſirienne dereglee

Après maint combat triomphand

Ayma, de l'amour au euglee,

Et iouyt de ſon propre enfant:

Bien que Biblis aymaſt ſon frere,

L'eſpoir conſoloit ſa douleur:

Mirra

*Mirre iouissant de son pere,
Sentoit quelque heur en son malheur.*

*O cinq & six fois plus heurenſes
Elles, qu'un volage deſir
Rendoit de leur ſang amoureuſes
Perdant l'honneur pour le plaifir!
Paſiphee de ſa miſere
Voulant les ardeurs alleges,
S'acointa du beuf adultere
Deſſous un pourtrait menſonger.*

*Mais quoy? ces peu chaſtes femelles
Le maſle ont ſeulement aimé:
Et bien qu'un vil amour, comme elles
Ne m'ait le courage enſlamé,
Toutesfois celui qui m'enſlame
M'eſt trop plus felon & cruel,
Sans eſpoir martyrant mon ame
Par un mourir continuel.*

*Car ſi vers moy ie voyois ores
A mon ſecours tant deſiré
Dedale reuoler encores
Auecque ſon dos enciré:
Quand à mon vouloir la pucelle
Qui m'enſlame, s'inclinerait.
Et quand la terre vniuerſelle
A mon bon heur s'acorderoit.*

*Si ne pourroit on iamais faire
Ce cruel martyre plus doux,
Puis que la nature eſt contraire,
Nature plus forte que tous.
A quelle autre peine plus dure
M'atendra donc plus le malheur,
Si la douleur qu'ores j'endure
Surpaſſe toute autre douleur.*

La compagnie ne prenoit moins de recreation pour la douce muſique de Daraïde, que de pitié pour ſes regretz & douleurs: car d'autant que l'amour d'un Cheualier à vne Damoiſelle leur eſtoit commun, d'autant l'amour ſi enſlamé d'une Damoiſelle à vne autre Damoiſelle, leur eſtoit eſtrange. Or apres qu'ilz eurent tenu diuers propoſ ſur ces amours nouuelles, le ſurplus du iour fut employé en diuers paſſetemps, iuſques à ce qu'il fut nuit. Alors on donna un bon logis

dans le palais à Daraïde & à Garaye, ou elles allerent ſouper. Mais l'Infante ne voulut iamais laiſſer Daraïde, ains alla ſouper avec elle, & durant le repas ne fit preſque autre choſe que raconter ce qu'elle voyoit tous les iours faire à la Roine Finiſtee, & aux autres Damoiſelles des Princeſſes: puis elle diſt à Daraïde: Dites moy, ie vous ſuplie, ne ſuis-ie doncq' pas plus belle que l'Infante Leonide? Daraïde en ſouziſſant l'embraſſa, & luy diſt: Ouy vrayement, ma dame, vous eſtes plus belle. Mais voyez (diſt l'Infante) elle diſoit qu'elle eſtoit plus belle que moy: & en voſtre païs, y en a il d'autant belles comme ie ſuis, à fin que quand i'y ſeray ie me puiſſe eſbatre avec elles? Ma Dame (diſt Daraïde) ne vous ſouciez, car il y en a d'afſez belles. Ouy bien (diſt la petite fille) mais emmeneroſ nous pas auſſi dom Silues du deſert, car il eſt mon frere, & près un grand plaifir à me iouer avec luy. En telz & autres gracieux propoſ elles continuerent iuſques à ce qu'il fuſt heure de dormir; qu'elles s'en allerent coucher, & l'Infante Fortune avec elles, mais quand ſe fut ſur la minuit, elle s'eſueilla & ſe trouuant ainſi en tenebres ſans la Roine Finiſtee, & ne recognoiſſant point Daraïde, elle ne voulut pas arreſter là, ains commença à plorer, tellement que les Damoiſelles de Daraïde furent contraintes de la leuer, & l'éporter avecques ſes veſtemens en la chambre de la Roine Finiſtee, qui ſe prit fort à rire, la voyant ainſi reuenir ſi tard, & toute en chemiſe. Or apres ſa departie, Daraïde ne dormit plus de toute la nuit, ains ſe miſt à penſer en ce qu'elle deuoit faire le lendemain, pour ſ'aquiter de la promeſſe qu'elle auoit faite à la Roine Sidonie. Apres infinies & contraires penſees elle s'arreſta à ſa premiere deliberation, eſtimant que ce fuſt le meilleur conſeil qu'elle pourroit prendre: & de fait elle la ſuyuit comme vous entendrez cy apres.

Comme

Comme en la presence de tous les Princes & Princesses de Grece, Daraïde demanda vn don au Prince Florisel, lequel luy otroya, au grād desplaisir, & ennuy de toute la cour.

CHAP. XXIX.

LE iour ensuiuant sur l'apresdinee to^u les Princes & Princesses estās assemblez dans la grand' sale, Daraïde & Garaye richement vestuēs leur vindrent faire la reuerence. Les Princes les voulurent faire assioir: mais Daraïde les supplia ouir certains propos qu'elle vouloit dire à dom Florisel en leur presence. On lui respondit qu'elle dist ce qui bon lui sembleroit: puis chascun se teust en grand silence pour ouir ce qu'elle vouloit dire, & les Princes s'assirent en leurs chaizes, excepté dom Florisel, & pour l'amour de lui dom Rogel & tous les ieunes Princes lesquelz ne se voulurent assioir pour faire plus d'honneur à Daraïde: & lors elle cōmença à parler ainsi: Quand il me souuint illustre Prince, des grandes & dangereuses entreprinſes qui par vous ont esté mises à fin, & de tāt de cheualereux & puissans Roys, lesquelz vous auez renuoyé vers la roine Sidonie, monstrant la noblesse de vostre courage non seulement par vostre force, mais aussi par la discretion dont vous auez sceu vser en voz victoires. Il semble que desormais ce soit plustost temerité & sole audace, q̄ vraye & louable vertu, de vous appeller encor au combat sur vne querelle, ou tant de fois la fortune vous a departy sa faueur. Mais parce que souuent les Cheualiers promettent ce qu'ilz ne sçauent qui leur doit estre demandé, il auent que leurs promesses les font hazarder à maintes incroyables auentures, esquelles, ilz aimēt trop mieux receuoir la mort, que faillir à ce qu'ilz ont promis. Sçachez dōc que souz vn don incogneu, la roine Sidonie m'a demandé vostre teste, & si m'a fait promettre qu'aussi tost que ie lui aurois

luree en sa puissance, ie lui trenchasse encor la sienne, à fin que par la vostre elle demeure satisfaite de la ruzes dont vous auez vsé enuers elle, & que par la sienne elle satisface au vray & ardent amour lequel elle vous porte, & qu'elle ne vous peut nier, esperant par tel moien trouuer quelque paix à la cruelle guerre que lui meinent deux choses tant contraires, comme l'amour & la desiree vengeance de son honneur. Or apres qu'elle m'eut ainsi déclaré le don que ie luy auois promis sans en cognoistre l'importāce, ie lui respondi que ie m'efforcerois d'accomplir ma promesse, encor que ie me tinſse bien assuree de ne pouuoir faire autre chose par mes effortz, sinō vous laisser avec la victoire tout ce peu de louange q̄ ie pourrois auoir acquis par cy deuant, pour croistre d'autant la gloire immortelle de vostre clere renommee. Toutesfois en reçoipense du don que i'auois promis à la roine, ie lui en demanday pareillement vn autre, lequel elle m'otroyoit lors que ie lui aurois liuré vostre teste en sa puissance, aumoins si la fortune me vouloit ottroyer vne si heureuse issue du combat. Elle m'acorda facilement ce do, que ie me reserue à lui demander au tēps que les Dieux auront disposé de vostre fortune, & de la mienne. Mais à fin que vous satisfaciez aucunemēt à vostre deuoir, & moy au mien, auant que nous entrons en si aspre & cruel combat, ie vous supplieray m'otroyer premieremēt vn dō, lequel vo^{us} ne me deuez refuser, tāt pour l'assurance que ie vo^{us} prometiz qu'il ne retournera point à vostre perte, comme aussi pour ce que c'est le premier dō que i'aye encor requis à Prince, ou à Cheualier de ce monde. Au moie dequoy il vo^{us} plaira auant toutes choses me faire en cecy entendre vostre volonte, protestant quant à moy deuant ceste tresnoble & tresillustre assemblee de Princes, qu'en aucune auenture ou ie me soye oncques trouuee, ie ne sy i'ay iamais chose tant contre ma

volonté, cōme celle que i'entrepris maintenant contre vous par la contrainte de ma promesse. A tant Daraide mit fin à son parler, laissant tous les Princes assez estonnéz de sa demāde: puis dom Florisel avec vn gracieux visage lui respōdit: Tresbelle & trescheualereuse Daraide, ie vous remercie de l'honneur que vous me faites par voz propos, & ne refuse point de vo^r celle louange, à fin que la vostre soit d'autant plus grande, si en ceste querelle de la Roine Sidonie, la fortune vous veut autant fauoriser comme elle m'a fauorisé par cy deuant: car d'autant que la victoire s'aquiert avec plus grand travail & par vn homme de grand renom au fait des armes, d'autant l'excuse du vaincu est plus receuable, & mieux venuë entre les hōmes. Parquoy ie m'estimeray biē heureux d'auoir ce combat contre vous, cōme celui duquel la cōtraire fortune poura suffisamment estre excusée pour celle haute cheualerie, avec laquelle vo^r auez peu vaincre, non seulement les plus braues cheualiers de la terre, mais encores les plus horribles mōstres, qui sembloiēt estre créés contre la nature, en despit & à la miserable ruine des hommes. Mais puis que vo^r ne pouuez moi faire que me demāder, ny moy plus que me deffendre, ie vo^r promerz ce que i'ay tousiours promis à la Roine, laquelle se deuoit contenter de la cognoissance qu'elle peust auoir de son peu de droit par tāt de braues cheualiers qu'elle m'a enuoyez, lesquels veu leur grande prouesse, il m'eust esté impossible de vaincre si la raison, & la iustice, n'eussent supléé au deffault de mes forces. Cecy deuoit suffire à la Roine Sidonie sans pourchasser ainsi la mort de celui qui ne desire la vie que pour auoir le moie de s'emploier en son seruice. Elle se deuoit aussi cōtēter de la force laquelle comme Damoiselle vous me pouuez faire en l'ame par vostre beauté, sans l'accompagner de celle qu'encores vous appareillez au corps par vostre haute cheuale-

rie. Or atendu que ie n'accepte ce cōbat par moindre cōtrainte que vous auez dit le me presenter, ie vous otroye non seulement le don que vous me demādez, mais encores tous les autres dōt il vous plaira me requerrir. Adonc Florisel se taisant, Daraide lui dist: Mōsieur, ie vous ren graces de la louange que vous m'auez donnée. Sçachez que le don duquel premieremēt ie vous veux requerrir, c'est que demain au matin vous vous embarquiez avecq^y moy dans ma nef, pour nous en aller ensemble en l'Isle de Guindaye, à fin que le combat qui s'apreste entre nous, soit fait en la presēce de la roine Sidonie: & pour vostre assurance, afin que vous ne soyiez en aucun doute de trahison, ie vous laisse ma foy & ma sœur Garaye, laquelle demeurera icy pour ostage, iusques à ce que lō sçache comme il aura pleu aux Dieux disposer de vostre auenture, & de la mienne. Adoncques toute la cōpagnie fut fort troublée pour le peril de dom Florisel, mais se monstrant beaucoup plus ioyeux qu'auparauant, il respondit: Tresbelle Daraide, ie vous otroye ce que vous me demandez, car ie suis celui lequel y gaigne le plus, estant en si bonne compagnie cōme la vostre, dont la prouesse me rendra assure de tous les dangers que lon pourroit penser, excepté de ceux ou ie me puis trouuer pour vostre excellēte beauté, laquelle laissant peu assure ma dame la Princeesse Helene mon espouse, montre encores le peu d'assurance que i'en auray, me retrouvant seul en vostre compagnie. Daraide d'une fort bonne grace, luy dist: Excellent Prince, ie vous remercie de la confiance que vous auez en moy, & parce que vous n'estes point assure de ma beauté, pour vous en assurer, ie vous laisse icy en ostage ma dame la Princeesse Helene, & vne plus grande beauté q^{ue} la mienne, laquelle vous trouuerez en la roine Sidonie, si tost que nous serons arriuez en Guindaye. Ainsi se tindrent plusieurs diuers propos entr'eux & entre tous les autres

autres Princes, chacun estimât fort la gracieuseté & bonne contenance de dō Florisel, lequel le lendemain au grand regret de tous, aiant fait porter ses armes en la nef de Daraïde, prit congé de toute la cour, non sans maintes larmes des roines & Emperieres, & mesmement de la Princesse Helene. Les Princes l'accompagnerēt iusqu'en la mer ou estant entré avec vn seul escuyer, lon commença à haulser les voiles, & les Princes retournerent en la cité, ou ilz trouuerent Garaye fort triste, pour se voir separee de sa sœur, encores qu'elle fut fort ioyeuse de demeurer avec sa dame. Ce iour mesmes arriua dans Constantinople la belle Angelee, que l'Empereur auoit enuoyé querir, à fin de lui rendre la recompense du cheual qu'elle lui auoit donné. Et partant apres l'auoir fait Duchesse de Cartan, il la maria le lendemain avec le filz du Duc d'Alafont: mais la feste des noces ne fut fort pompeuse, à cause de la tristesse ou toute la cour estoit pour l'absence de dom Florisel, auquel Daraïde s'essayoit de complaire, & de l'honorer par tous moïens, comme celui qu'elle estimoit l'vn des plus excellens & mi-eux acōplis Cheualiers de tout le monde.

Comme le Roy Amadis donna l'ordre de cheualerie au filz de l'Empereur de Rome, & au filz du Roy de Beocie, lesquelz ce iour mesmes prindrēt leur chemin vers la cité de Sparte, en la compagnie de dom Rogel, & à la requēte de trois Damoysselles.

CHAP. XXX.

QVelque tēps apres le depart de dō Florisel & de Daraïde, le roy Amadis avecques grāde solemnité, arma Cheualier vn filz de l'Empereur de Rome, apellé dom Florestā, lequel depuis fut trefexcellent & adroit aux armes, cōme descendant d'une lignee d'ou il n'en pouuoit sortir d'autres. Il arma encores Cheualier vn beau damoisel filz du Roy Zahir, & de la roine Timbrie, nomé dom

Brianges de Beocie, lequel ne fut moins cheualereux que dom Florestā. Ces deux ieunes Princes prindrent l'espée de la roine Oriane: & apres auoir ouy la messe avecques les ceremonies acoustumées, ilz allerent en la grand' salle, ou les tables estoient dressees. A l'yssiue du disner, trois damoiselles biē belles & vestuēs de dueil, vindrēt se presenter deuāt les Empereurs: puis chascun se taisant pour ouir ce qu'elles vouloient dire, l'une des trois cōmença à parler ainsi: Treshaultz & tressouuerains Princes, nous venons vous demander vne chose que vous n'avez encore refusée à personne, cest la iustice, & le bon droit, que les preux cheualiers comme vous estes, gardent aux foibles damoiselles comme nous sommes. Il vous plaira donc entendre que nous sommes toutes trois filles d'un noble Cheualier & de hault lignage, lequel mourant nous laissa trois beaux chasteaux, à chacune le sien, desquelz il estoit seignr en son viuant. Apres sa mort nous demeurāmes orphelines, car il y auoit desia long tēps que nostre mere estoit trespassee: au moien de quoy estant demeurees sans apuy, trois cheualiers de nostre lignage no^s ont osté nois trois chasteaux, & les detiennent par force: & comme quelquefois nous les fusions allē requerir de nous les rendre, ilz n'en ont onc rien voulu faire, ains ont respondu que chacune de nous menast à chacun des chasteaux vn cheualier, lequel seul oast entreprendre le combat à l'encontre des trois ensemble, & que si les trois estoient vaincuz, ilz no^s rendroier le chasteau, sinon, que le chasteau leur demoureroit avecque la testede celui qui auoit combatu pour nous. Aiant ouī ceste iniuste responce nous allāmes au Roy de Sparte demander iustice, mais d'autant que les trois Cheualiers sont grands Seigneurs, il iugea qu'il nous falloir passer par les conditions qu'ilz nous auoient proposees pour le recouūement de noz chasteaux: tellement que n'āians encores

seu trouver aucuns Cheualiers qui vou-
lissent entreprendre vn combat si mal
departy, nous sommes venuës en vostre
cour, ou il n'y iamaïs faute de ces nobles
& vertueux personages, qui hazardent
volotiers leur vie, tât pour acquerir vne
renommee digne de leur ancienne no-
blesse, que pour faire reparer les outrages
que lon fait aux foibles damoiselles
qui n'ont le moië de leur deffendre. Voy
là tressouuerains Princes, ce que nous a-
uions à vous dire, maintenant nous vo-
suplierons nous donner vostre secours,
lequel vo^s ne pouuiez gueres mieus em-
ploier qu'e faisant redre la iustice à trois
innocentes & desheritees Damoiselles.
Toute la cour fut compassionnee pour le
tort qui se faisoit aux trois sœurs: & par-
tant aussi tost qu'elles eurent acheué leurs
remonstrances dom Rogel suplia ces grâds
seigneurs luy otroyer ceste entreprise &
aux deux nouueaux Cheualiers: ce qui
leur fut acordé, chascun louât & estimât
dō Rogel pour sa courtoisie & hardiesse.
L'emperiere Armide, & la Roine Tim-
brie eussent bien voulu que leurs enfans
n'eussent point comencé leur cheualerie
par vne entreprise tant hazardeuse, tou-
tesfois elles prindrēt patience en conside-
rāt que lhonneur & le deuoir de leurs filz
deuoit estre preferé à la crainte qu'elles
auoient de leurs auentures. Incontinent
ces trois ieunes Princes s'allerēt armer de
de toutes pieces, puis retournās en la sale
prindrent congé, laissant maintz ieunes
Princes & Princesses tristes pour leur de-
part, & mesmemēt l'Infante Leonide, la-
quelle aimoit dom Rogel trop plus que
soymesmes. Eux donc estās mōtez à che-
ual avecque leurs escuyers, & les Damoi-
selles sur leurs pallefrois, ilz sortirēt de la
ville & prindrēt leur chemin vers Sparte.
Après leur depart, Darinel s'aperceuaēt q
la roine Timbrie estoit ainsi fāschée pour
l'absence de son filz, à fin de la resiouir,
lui dit, Si vous auiez autāt de pensees cō-
me moy, ie pense, ma dame, que vous ne

seriez pas en si grand oubly cōme vous
estes. La Roine avec vne fort bōne grace
lui respondit, Sçays tu pas bien, Darinel,
que dans les iardins du monastere d'Apo-
lonie, ou tu no^s retrouuas, tu me dis vne
fois que l'oubli vient souuent de trop ar-
dentes pensees: ce que maintenāt ie trou-
ue veritable, car atēdu les pensees qui me
font oublier de moymesmes, ce n'est pas
grand cas si ie semble absente de là ou ie
suis, pour estre là ou mes pensees me trāf-
portent. Ma dame (dist il) c'est la raison
pour laquelle il me semble souuent esfois
estre la mesme personne de ma dame Sil-
uie, laissant d'estre celui que ie suis, à fin
qu'avecque la gloire d'une telle persua-
sion, ie souffre mes angoisses en patiēce.
Ainsi en considerāt la gloire qui s'apareil-
le à mō seigneur dō Brianges vostre filz,
souffrez patiēmēt le trauail ou vous estes
pour le danger ou il se hazarde, puis que
iamaïs sans grād-peril, & sans grande har-
diēse lon ne peust acquerir grande louā-
ge. Mais, ma dame, laissons ces soucis, &
sachōs ce que Mordachee estime des pro-
poz que ie viens de tenir. Mordachee qui
estoit la present lui dit, l'estime que tu
parles beaucoup pl^s qu'il ne te seroit de
besoing. Qu'est-ce (dist Darinel) qu'il se-
roit. besoing? Que tu te teusses (dist Mor-
dachee) deuant ceux qui sont plus sages
q toy. Dis tu cela pour toy? dist Darinel.
Quād ie le dirois pour moi (dist Morda-
chee) ce ne seroit mie grand chose, car ie
ne pense point que tu aies sur moy aucū
auantage. Quel plus grād auantage veux
tu que i'aye sur toy (dist Darinel) outre
celui que tu me donnes en pensant estre
plus sage que moy? car par ceste seule rai-
son lon cognoist que tu n'es qu'un fol.
Tu monstres bien (dist Mordachee) q tu
ne sçais plus que respondre, puis que tu
m'vies ainsi de ces folles philosophies. Da-
rinel se prit à rire & lui dist: Pourquoi dis
tu cela? le le dy (respondit Mordachee)
par ce que tu dis que ie pense sçauoir pl^s
que toy, & partant que ie sçay moins:
comme

comme si tu sçauois quelque chose. En tel les & autres railleries Darinel & Mordachee continuèrent leurs propos assez long temps. Ce pendant Garaye receuoit vn fort grand plaisir en la compagnie de sa Dame la Roine Cleofile, laquelle luy promettoit demander congé au Roy Amadis de se marier auant qu'elle departist de la cour. Ainsi estoit Garaye fort ioyeuse & sa mere la Princesse Oriane la plus triste que lon pourroit penser en la voiant, pour le desir qu'elle auoit de reuoir son cher filz qui estoit deuant elle sans le pou uoir lors recognoistre.

Des propos que dom Rogel tint avecques l'vne des damoïselles : & comme luy & ses cōpagnons en gaignerent encores trois autres en vne certaine auenture.

CHAP. XXXI.

DOm Rogel & les deux nouveaux Cheualiers qui estoient allez avec les trois Damoïselles, cheminerēt enuiron deux iours apres qu'ilz furent partis de Constantinople sans trouuer aucune auenture digne de raconter. Seulement par le chemin ilz prenoient plaisir à deuïser avecque leurs Damoïselles, qui estoient fort gracieuses, mesmement la moienne d'age, avec laquelle dom Rogel parloit volontiers, comme celuy qui se sentoït aucunement ataint de sa beauté & bōne grace. Aussi n'estoit elle moins contēte de lui encores qu'elle n'en fist aucun semblant. Le troisieme iour dom Rogel commença à l'araisonner, & lui dit, Je vous supplie, ma Damoïse, puis que i'ay entrepris ce cōbat pour vostre bien, que ce ne soit point pour mō malheur, & me donnez quelque allegeāce en ceste guerre plus cruelle, laquelle me rēd tout esperdu par la douce force de vostre beauté. Elle se prit à rire, & lui dit: Je prie Dieu, monsieur que les trois Cheualiers contre lesquels vous deuez combattre, ne vous

mettent point en plus grand danger que vous estes maintenant pour nous trois. Ne me parlez point de celā (dit dom Rogel) car la mesme difference qui est entre les plaies du corps, & entre celles de l'ame est pareillement entre les plaies que ie reçoÿ de vostre beauté, & entre celles que ie pourrois recevoir de trois si lasches Cheualiers comme sont ceux qui vo^r detiennent vostre chasteau. Mais dom Rogel voiant que pour l'heure elle se sçauoit bien defendre, ne voulut luy tenir plus long propos: & comme les autres deux Princes deuïsoient gracieusemēt avecque les autres deux damoïselles, ilz aperceurēt à l'entree d'vne forest ou plusieurs diuers chemins s'assembloient, vne tente armee dont les pantes estoient leuees sur les cordages, aupres de laquelle il leur cōuenoit passer. Dedans estoient trois Cheualiers armez de toutes pieces, & trois Damoïselles avec eux, & trois Escuyers qui tenoient leurs cheuaux, sur lesquels ilz mōterent aussi tost qu'ilz virent arriuer les trois Princes, qui les voians venir vers eux, laisserent incontinent leurs heaumes, & prindrent leurs lances, puis s'estans approchez les vns des autres, vn de ceux de la forest leur dist: Cheualiers vous ne pouuez passer icy, si premierement vous ne confessiez que ces trois Damoïselles qui sont dās nostre tente, sont plus belles que les trois qui sont avecque vous. N'aiez point de combat pour vne si legere occasion (dist celle qui estoit avecque dom Rogel) par ce que nous leur acorderons celā volontiers, car si elles ont ceste auantage sur nous, nous ne leur donnons rien, & si elles ne l'ont nous leur donnons encores moins, veu que nous n'en serons moins belles, ny elles plus belles qu'auparauāt. Le Cheualier de la tente adiousta, Cela n'est assez, il vous fault encores faire plus que vous ne dites. Et quoy plus (dist dom Rogel) car il me semble que lon vous a dit tout le plus que vous pourrez obtenir de nous à ce passage. Vous deuez sçauoir

noir (dist le Cheualier) que ces trois Damoiselles sont noz amies, & de grâde beauté, en laquelle aians leur nance, & no^e en nostre prouesse, nous sommes venuz garder ce carrefour avecq^e telle conditiō qu'aucun Cheualier ne puisse icy passer en compagnie de Damoiselle sans auoir combat avec l'un de nous, à la charge que si nous demeurons victorieux, la damoiselle du Cheualier sera nostre, & si elle est moins belle que nostre premiere amie, elle sera tenue de la seruir vn mois entier, & si elle est plus belle, elle sera amie du Cheualier qui l'aura gaignee, & la premiere amie sera tenue de la seruir vn autre mois: puis de là en auant le Cheualier vainqueur demeurera avecque celle des deux à laquelle il sera plus affectionné. La mesme condition est proposee à ceux qui nous vaincront. Maintenant regardez si vous voulez passer plus outre avecques ces conditions, ou si vous aimez mieux tourner arriere. Dom Rogel se prit à rire & dist: Vrayement vous n'avez pas mal choisi les meilleures conditions pour vo^{us} lesquelles ne seroient point encores pires pour nous, si les Damoiselles qui nous suivent vouloient s'auenturer à perdre ce qu'elles n'ont point encores perdu, c'est à sçavoir leur chasteté. Au moié de quoy pour le peu de pouuoir que nous auons sur elles, sans leur volonté nous ne pouuons satisfaire à la vostre: & partant no^{us} ne sommes deliberez de vous cōbatre sur ceste querelle, mais nous vous maintiendrons bien que vous faites icy vn grand tort aux Damoiselles & aux Cheualiers errans. Si vous voulez combattre (dirent ceux de la forest) sur ce que nous vous auons dit, nous voicy prestz, sinon, retournez arriere car lon ne vous empeschera point de fuir. Dom Rogel se delaignât vn peu dōt ilz le vouloient faire tourner arriere, leur dist, Je vous dy que si noz damoiselles veulent de leur part auenturer le plus, nous sommes prestz à auenturer le peu que c'est de combattre trois Cheua-

liers tant outrageux comme vous estes, qui sans aucune ocaſiō empeschez le chemin aux passans. Adonc l'aînee des trois sœurs dist à dom Rogel en souzriât: C'est nous qui auenturons le moins, atadu qu'en vostre compagnie nous sommes hors de tout danger; cobien que ceux qui veulent combattre pour nous auoir, semblent desia craindre le plus cruel combat de la beauté des Damoiselles qu'ilz peussent acquerir pour amies. En la malle heure forte Damoiselle, distes vous onc telles folies. (dist le Cheualier de la forest) car noz amies sont de si grande beauté que nous sommes assez asseurez de la vostre, & ensemble de nostre victoire: & vous asseurez bien que vous ne vous auenturez à perdre rien, ains à gagner la faueur de seruir vn mois, celles qui pour leur beauté & bone grace meritent estre seruies de tout le monde. Dom Rogel coléré de ces propos, lui escria, Or sus gardez vous de moy, car ie vous deſſie. A ces paroles s'estans reculez arriere, ilz vindrent à s'entrecouuier les lances baïſſees, & bien couuertz de leurs escuz. Le Cheualier de la forest rompit son bois, mais dom Rogel desarçonna & le fit voler en terre par dessus la croupe de son cheual. Les autres deux Princes n'en firent moins aux autres deux Cheualiers lesquels s'estans releuez à grand peine, demanderent le cōbat aux espees. Adonc les trois Princes se mirent à pied pour n'auoir aucun auantage, mais l'escrime dura bien peu, car eux estans des plus fortz & cheualereux que lon eust peu desſrer, ilz eurent incōtinēt nauré & decoupé leurs aduersaires de telle façon, qu'ilz se rendirent nō tāt faschez pour leurs plaies, ny pour la perte du combat, comme pour la perte de leurs amies, lesquelles estoient assez belles, & arriuerent là sur le point qu'ilz redirent les armes. Dom Rogel & ses compagnons aians desia laïſſé leurs heaumes pour se rafraichir, voians le dueil que les Cheualiers menoient pour la perte de leurs

leurs dames, leur dirent qu'ilz se rapaisassent, & qu'ilz leur remettoient les conditions du combat pour en disposer à leur volonté, & de leurs amies ensemblemēt. Mais elles voyant la beauté des Princes, & cognoissant qu'elles estoient plus belles que les autres trois Damoiselles qui estoient avec eux, leur dirent, Nous ne leurs remettrons pas les conditions du combat, car nous sommes trop plus contētes de vostre prouesse & beauté, que de la couardie de ceux qui nous ont perdues: puis donc qu'avecque si bō droit ilz ont eu si peu de force pour nous garder, qu'ilz s'en aillent à leur bōne & à leur mauuaise fortune ainsi que bō leur semblera: car ce nous seroit trop grāde folie de laisser trois si beaux & preux Cheualiers cōme vous estes, pour suivre vne si lasche canaille. Dom Rogel se prit à rire de ces paroles, & voiāt que les Damoiselles de la forest estoient assez belles, & encores ieunettes, il se tourna vers celles avec lesquelles il estoit venu, & leur dist, Et biēmes Damoiselles, que vous semble il de ceste demande? Celle qu'il auoit requise d'amours lui respōdit, Il me semble que nous aions trouuē assez de quoy vous oster de passion, & moy de soucy. Scachōs (dist dom Rogel) ce qu'il en semble à mes compagnons. Dom Florestan qui estoit fort gracieux, lui respondit en riant: Il me semble q̄ ces trois damoiselles ont assez de beauté pour nous donner quelque cōtentemēt: parquoy ie suis d'auis puis que celles que nō^s anōs vouluēs, ne nous ont vouluz, que nous preignons maintenant celles qui nous veulent. A la bonne heure seigneur Cheualier (dist l'vne des Damoiselles de la forest) car encores que vous soyez bien ieune d'aage, vous ne monstrez point estre moins sage, que quelqu'un des renommez Princes de Grece, auquelz vous ressemblez & en prouesse & en beauté. Ce pendāt les Cheualiers vaincuz fort tristes & esperduz mōterent sur leurs destriers & s'en allerent chercher qu'ilz pourroient faire apareiller leurs plaies:

mais leurs amies estat remōtees sur leurs pallefrois suivirent dom Rogel & sa compagnie. Sur le chemin dom Rogel leur demanda comme elles auoient ainsi voulu abandonner ces Cheualiers qui s'estoient tant mis en leur deuoir pour l'amour d'elles. La plus belles des trois lui respondit, Sachez, seigneur Cheualier, que nous sommes toutes trois sœurs, & ces cheualiers que vous avez vaincuz, freres, lesquels vn iour cōtre nostre vouloir nous deslioberent dans vn chasteau de nostre mere, ou par fortune ilz nous auoient trouuees seules. Bien tost apres ilz prindrēt de nous par force, ce que iamais nō^s ne leur eussions otroyē de nostre bō grē, & y a enuiron demi an q̄ nō^s sommes en leur compagnie, sans qu'aucune de nous ayt iamais aimē aucun d'eux, tāt ilz estoient laidz & de mauuaise grace. Il y a maintenant quinze iours entiers que nous acordāmes ensemble de garder ce carrefour avecque les cōditions que vo^s avez entenduēs, ou pour nostre bonne fortune (ainsi que ie croy) Dieu vous a enuoyē pour nous remettre en liberté & pour les chastier de leur folie, & du dommage qu'ilz nous firent en nous enleuāt de la maison de nostre mere. Puis que les choses vont ainsi (dist dom Rogel) ie serois fort ioyeux dont nous auons fait repārer ce tort, n'estoit que vous nous ayez tous mis en trouble. En quel trouble? dist la Damoiselle. Par ce (dist il) que noz damoiselles ne se plairont pas beaucoup en vostre compagnie. Dieu soit louē (dist la damoiselle) car selon ce que ie voy vo^s estes plus contens de nous que de voz premieres cōpagnes, lesquelles par ce moien suivant la condition de l'aucture seront cōtraintes de nous seruir vn mois, & nō pas nous elles. Adonc la Damoiselle que dom Rogel auoit requise d'amour, dist aux trois Damoiselles de la forest. Nous ayons mieux vous seruir en ceste facon, q̄ non pas en celle que vo^s deuez seruir ces

trois ieunes Cheualiers, puis qu'il est necessaire à vous & à nous, d'obeir aux conditions de l'aventure. Nous voilà bien d'accord, dist l'autre damoiselle. Il nous reste encores beaucoup plus à faire, dist dō Rogel. Et quoy, dist la plus belle des trois damoiselles de la forest. Il nous fault deliberer (dist dōm Rogel) comme nous vous deuons departir, à fin que mes cōpagnons & moy, n'entriens point en debat sur le choix. Je vous donneray vn bon conseil en cela, dist elle. Quel conseil? respondit dōm Brianges. C'est (dist la Damoiselle) que le plus beau de vous preigne la plus belle de nous. En la malle heure (dist dō Brianges) car à voz paroles il semble q' vous ayez desia choisi. Or sus (dist elle) seigneur Cheualier, ie vous veux donner encores vn autre meilleur conseil que le premier, c'est que vous ne vueillez iamais sinō celles qui vous veulent: & par tant ne vous scādalisez point si i'ay choisi vostre cōpagnon, comme celuy qui me plaisoit le mieux, car en vous laissant avecque l'vne de mes sœurs, peut estre que vous luy viēdrez pareillement plus à gré qu'vn autre, & ainsi auendra à mon autre sœur & à vostre autre cōpagnō. Vrayement c'est raison (dirēt les deux sœurs) & pourquoy aurez vous ainsi la liberté de choisir par dessus nous? Parce (dit elle) que celuy que i'ay choysi me semble assez plus aligre & dispos de son personnage, que non pas ses cōpagnons, & partant ie l'ay voulu prendre la premiere, d'autant que chascun est plus obligé à soy que non pas à aucū autre. Alors dōm Brianges dist en souzriant, Je vous assure, seigneur dōm Florestan, que ny vous ny moy ne deuons plus aller en la compagnie de nostre cousin, car vous voyez que toutes le demandent & fuyent de nous pour le suiure. Elles ne me semblent point estre trop sottes en cela (dist dōm Florestan) & partant puis que nous ne pouuons en sa cōpagnie auoir des plus belles, il sera le meilleur de nous contenter de celles que

nous pourrons auoir. Comment, dirent les autres deux sœurs, il ne vous semble donc point que nous soions autant belles comme nostre sœur. Sauf vostre grace, dist dōm Florestan, nous nous contentōs fort bien de vous, mais non pas de vostre sœur, par ce qu'elle ne nous a pas voulu choisir. Il me suffit, respondit elle, que i'aye choisi à ma volonté. Ainsi deuisant ensemblement, ilz rencōtrèrent trois autres Cheualiers lesquels voians les trois Princesses mener avec eux six belles Damoiselles, apres les auoir saluez, leur dirent, Seigneurs Cheualiers, vous vseriez d'vne louable courtoisie avecque nous, puis que vous auez assez (& peut estre trop) de trois damoiselles, si vous nous donniez les autres trois. Cela depend de leur volonté, dist dōm Rogel, & non pas de la nostre: acordez vous avec elles si vous pouuez, car nous ne les empeschons de faire ce qui bon leur semblera. Adon la Damoiselle que dōm Rogel auoit requis d'amour leur dist en riant, Ce nous est vn grand malheur d'estre obligees à seruir ces damoiselles ce mois entier & de ne vous auoir trouuez vn peu plustost: car à ce que ie puis cognoistre, elles ne sont deliberees de vous suyure, ny de laisser ceux avecq' qui elles vont, & de nostre part nous n'auons aucune liberté sinon pour leur redre le seruice que nous leur deuons. Nous vous mettrons en liberté (dirent les trois Cheualiers) & si reuengerōs le tort que lon vous pourroit auoir fait. Et comment le reuengerez vous? dist elle. En vous mettant en liberté, respondit il. O seigneur Cheualier, dist la damoiselle, ne vous mettez point en cest ennui, car nous ne voudrions voir en si grand danger: aiez seulement patience iusques à la fin du mois, car alors parauenture nous pourrons nous contenter de vous. Vous ne vous en contentez donc pas à ceste heure? dist le Cheualier. Ne vous en esmerueillez point, respondit la Damoiselle, car nous sommes fort en-

ennuyees dont ces trois Cheualiers nous ont abandonnees pour ces trois autres damoiselles qui vont avec eux: & partât nous ne pourrions nous contéter de chose du monde iusques à ce que nostre colere soit passée. Vous nous cognoissez mal (dist le Cheualier) car nous sommes tels personnages que vous pouuez regagner avecque nous beaucoup plus de contentement, que vous n'en pourriez auoir perdu par cy deuant. Sauf vostre grace, Seigneur Cheualier (dit la Damoiselle) nous n'en croyons rien. Par Dieu, dirent les Cheualiers fort colerez, à fin de parler en plus bref langage, par amour, ou par force trois de vous s'en viendront avecque nous. Par amour (dist lors dom Rogel) faites avec elles tout ce que vous pourrez, car vous ne leur ferez rien par force, moyennant que nous puissions vous en empescher. Alors les cheualiers se tirans arriere, leur dirent, Maintenant vous verrez cōbien il vous eust esté meilleur de nous en donner trois, que non pas de le perdre toutes six. Et ces disans biē couuertz de leurs escuz, s'en vindrēt rencontrer les trois Princes de toute la force des cheuaux: mais maugré eux ilz tomberent fort lourdement tous trois en terre, tellement que les deux furent fort naurez, & l'autre se tordit le col d'autant qu'il estoit cheut sur la teste. La plus belle des Damoiselles de la forest les voyant en si piteux estat, leur dist, A cette heure, Seigneurs Cheualiers, vous pourrez bien permettre à ces Damoiselles d'acheuer leur mois de seruice, puis qu'il vous en fault bien autāt à fin de faire guerir voz playes, Ilz ne respondirent vn seul mot de grand vergongne. Ainsi les Damoiselles les laisserent, & ilz s'en allerent chercher ou ilz pourroient faire apareiller leurs plaies. La nuit venue les Princes herbergerent en la maison d'un forestier, ou chascun iouyt secretement des beautez de sa damoiselle, les auertissans de ne se descouvrir aux autres, à fin qu'elles n'en

fussent enuieuses. Le lendemain au point du iour ilz retournerent à leur chemin, chacun se tenant fort content de sa bōne fortune.

Des gracieuses tromperies que la Dame d'un chasteau ou les trois Princes estoient logez, & vne Damoiselle firent à dom Rogel & à son Escuyer.

CHAP. XXXII.

DOm Rogel & ses compagnons estans retournez sur leurs erres, apres auoir cheuauché tout le lōg du iour, arriuerent sur le soir en vn beau pré, ou ilz trouuerent vne grande compagnie de Cheualiers, de Dames & Damoiselles, lesquelles couronnees de guirlandes de fleurs, s'entretenoiēt par les mains & s'en alloient dançant, & chantant en grande ioye. Elles n'eurent si tost aduisé les trois Princes & les six damoiselles, qu'elles les saluerent, & la plus belle d'entre elles, leur dist, Seigneurs Cheualiers, il est desia tard, mettez pied à terre, car s'il vous plaist, vous hebergerez ce soir avecque nous, & ce pendant que lon apresterà le souper, nous nous esbatrons icy tous ensemble. Les Princes qui en celle gaye ieu nesse ou ilz estoient desiroient assez leur plaisir, les remercierent & descendirent de cheual: puis ayans laissé leurs armes, & pris les habillemens que leurs escuyers leur donnerent, ilz se mirent en la danse, & commencerent à danser, chanter & folastrier avecque ceux du chasteau d'une fort bonne grace, tellemēt qu'il n'y auoit gentilhomme ny damoiselle en toute la compagnie qui ne print grand plaisir à les voir, & mesmement la Dame du chasteau plus belle que toutes, qui se contētoit fort de l'alairesse & beauté de dom Rogel. Apres auoir ainsi dansé assez long temps en grand soulas, ilz s'en allerent au logis, ou le souper estoit apareillé en grande sumptuosité & magnificence. Ce

iour fut passé avec tout le plaisir duquel lon se peut auiser: car la dame du chateau s'estant mariee le iour auparauât, la feste & solemnité des noces leur cauſoit ceste resiouissance. Or la ieune dame se trouuant fort esprise de la beauté & bone grace de dom Rogel, se mit à songer par to⁹ moiens comme elle pourroit celle nuit iouir de l'amour de son nouuel amât sans que son mary s'en aperceust. Apres diuerſes pensées qui lui faisoient prédre & laisser mille deliberations en mesme instant, bien peu deuant le ſouper, elle apella vne ſienne chambriere, & lui dist: Viença m'amie Gante, l'amour lequel ie te porte est si grand que ie me veux confier en toy d'une chose qui ne m'est de moindre importance que de la vie, à fin que tu me faces l'un des plus grands ſeruices que tu me pourrois iamais faire. Elle respondit qu'elle commandast ce qui bon lui sembleroit, & qu'elle estoit preste de se hazarder iusques à la perte de sa vie, pour lui rendre l'obeissance dont elle lui estoit redevable. Sa maistresse l'embrassa, & lui dist: Avecques ceste confiance ie te deceleray mon courage, & t'assure que ie te guerdonneray fort bien de ce que tu feras pour moy en cecy. Je veux doncques, Gante ma bié aimée, qu'entre ces damoiselles estrangeres, tu me ſçaches donner à cognoistre par nô, & autrement, lequel est l'amie du plus beau, & du plus disposé de ces trois cheualiers errans que tu vois là: & m'en aiant aduertie, il faut que tu donnes ordre que ceste nuit aucune des Damoiselles ne puisse aller vers son amy: puis les chandelles estaintes, & mon mary estant couché, faignant d'estre moy tu t'en iras coucher aupres de lui, & n'en bougeras iusques au point du iour: lors faisant semblât de te leuer pour quelque autre chose, tu me donneras le moien de me recoucher à son costé. Voilà, m'amie, ce que ie veux que tu faces pour moy. Ma dame, dist elle, vous me commandez une chose fort rigoureuse, toutefois puis

qu'il vous plaist, ie suis preste d'employer ma virginité en vostre ſervice. Or sus dōc (dist la dame) fais si ſecretemēt, & en telle diligence, que ce cheualier ne s'en aille sans que j'aye premierement iouï de sa beauté, car ie me ſens merueilleusement nuree de son amour. Ma dame (respondit Gante) laissez moy tout ce ſoucy, car i'entens bien ce que vous voulez dire, & suis bien deliberee de vo⁹ apareiller vne nuit en laquelle vous n'aurez aucune ocacion de porter enuie à mô bon heur. Tes fortes ſieures (dist la dame) le cheualier duquel tu auras la iouissance, est l'un des plus disposés & gaillardz cheualiers qui se ioua oncques à damoiselle, aumoins à ce que i'en ay peu experimenter pour vne nuit. Ma dame (dist Gante en riant) si vostre mary est tant gaillard comme vous dites, gardez le pour vous, & ie pratiqueray pour moy ceste ruze, avec le cheualier estrange. La dame lui dit: Il me semble, Gante, que tu aïmes mieux ton profit q le mien. Ma dame (dist elle) ie ne veux ſi non ce que vous voulez, mais ie vous ay dist cela à fin de vous assurer de ce que ie vous auois dist premieremēt: c'est que vous n'auriez point ocacion de me porter aucune enuie. Or sus (dit la dame) laissez ces railleries, car nostre entreprinſe est bien faite: fais ſeulement ce que tu as à faire, & que le tēps ne ſe paſſe en vain. Adonc la dame s'en alla ſouper, & assez tost apres le repas, le nonueau espouſé de ſirant iouir bien tost de son espouſe, ſit apareiller le lit à grand' haſte, mais l'espouſee faignant n'estre tant conuoiteuſe de ce plaisir, comme il estoit, lui dist qu'il s'allast coucher le premier, & qu'elle l'iroit trouver incōtinēt qu'elle auroit fait coucher les damoiselles estranges: Le mary lui obeit. Or deuez vous ſçauoir que pendât le ſouper, Gante auoit tiré à part, Sirind, Eſcuyer de dom Rogel, lui diſant: Par la foy q vous deuez à Dieu & à vostre maistre, me direz-vous la verité d'une chose que ie veux demander? Regardez ce que

ce que vous me voulez demander (dit Sirind) car ie vous iure de le vous dire, si la chose n'est de trop grande importance, moiennant aussi que ie le sçache. Ce que ie vous demande (dist elle) est que vous me disiez lesquelles de ces damoiselles sont les amies de ces cheualiers, à fin que quand chacun sera couché, ilz ne perdent le plaisir qu'ilz ont acoustumé de prendre avecques elles, car ie feray que chascun d'eux se trouuera avec la sienne, d'autant que nous ne voulons leur laisser aucun moien de se plaindre, que pour auoir hebergé ceans ilz ayent perdu l'occasion de iouir de leurs amoureuses. Sirind pensant que Gante dist verité, lui môstra lesquelles c'estoient: puis Gâte le pria de lui dire encores leurs nôs, à fin de les sçauoir mener chascune vers son amy. Adoncques Sirind lui dit qu'elles auoient nom Brinde, Sindre, & Orade, & que celle Orade estoit l'amie de son maistre, & la plus belle de toute leur compagnie. Or sus (dist Gâte) à fin que nous ne faillons: Je feray faire trois litz dans la chambre ou coucheront les cheualiers, car elle est large & spacieuse: faites de sorte que vostre maistre se couche dâs celui lequel est iognât la cheminee, & les deux compagnons dans les autres deux litz, car ie feray puis apres en façon que chascun aura son amie entre ses braz, si tost que le temps & l'occasion se pourront permettre. Sur tout gardez vous de leur en dire mot, afin que ceste courtoisie leur soit d'autant plus agreable. Je feray tout ainsi que vous voudrez (dit Sirind) mais parce que ie vous voy tât courtoise enuers mon maistre, & enuers ses compagnons, ie voudrois bien que vous vissiez encores d'une pareille courtoisie enuers moi. Gante se prit à rire, & lui dit: Est il possible qu'un si ieune garçonnet comme vous, soit desia tât ruzé entre les dames? toutesfois si vous me promettez de faire ce que ie vous diray, ie feray pareillement que vous dites. Je le vous prometz, dit Sirind. Or bien, dit Gante, vous

demeurez d'oc iusques à ce qu'il soit grand iour avec moy dedans le lit, & laisserez le uer voz compagnons les premiers, car ie veux auoir le plaisir de voir tout nu entre mes braz, un si beau & bien auenant iouuenceau côme vous estes: mais il fault que tout soit secret, & partant vous coucherez seul, en un des litz de la chambre, qui est aupres de celle ou couchera vostre maistre, à fin que nous puissions prendre ensemble nostre plaisir tout à nostre aise, & voz compagnons coucheront à part en l'autre lit, qui est sur main droite tirât du costé de la gallerie. Cela se portera le mieux du monde (dit l'escuyer) mais ie vous supplie ne faillir de vostre part, car ie n'y faudray de la mienne. Il n'y aura point de faute (dist Gante) Dieu vous vueille donner le bon soir. Et à vous bonne nuit, ma grand' amie, dist Sirind. Adonc elle le lascia & vint trouuer une chambriere More, aiant les leures grosses, & renuerfées, le nez tout aplaty, & les narines fort larges & ouuertes. Ceste More, qui en toute sa personne n'auoit rien blanc que les dents, estoit souillarde de cuisine dans ce chasteau. Gante l'ayant trouuee lui dist: Barucelle apres que tous serons couchez, il faut que tu t'en ailles en la chambre ou couchent les Escuyers des cheualiers estranges, & que tu couches dans le lit qui est à main fenestre, avec le plus alaigne & disposé d'entr'eux: car il m'a dist qu'il estoit fort amoureux de toi. Barucelle fut fort ioyeuse de ces nouuelles, & dist à Gante qu'elle n'y faudroit point. Quand tous ceux qui estoient dans le chasteau se furent retirez pour reposer, Gante vint à sa maistresse, & luy dit comme leurs entreprises estoient encômentees, & la finesse qu'elle auoit apareillie à l'escuyer, en payement de ce qu'il auoit ozé la requerrir d'amour. La dame du chasteau l'embrassa en riant, & lui dist: Or sus donc commençons à executer noz entreprises: despoille toy toute nue, côme tu vois que ie suis, & t'en va coucher avecques mon mary: & quand
à moy.

à moy i'iray là ou i'ay deliberé. Adonc Gante se despoulla, & alla trouuer le nouveau marié, qui la receut en fort grand plaisir, pensant que ce fut la femme: & se mit à l'acoler & baïser, comme celui qui iamais n'auoit experimenté ce plaisir, sinon celle nuit & l'autre precedente. La Dame du chasteau laissant les six damoïselles estranges couchees avec les siennes & s'en alla pareillemēt en la chambre de dom Rogel sur le premier somme, lors que lui & ses compagnons dormoient du plus profond sommeil: puis entrant tout bellement dans le lit de son amy, commença à s'estendre de son long entre ses bras, à le baïser, acoller, & chatouiller si folastrement que dom Rogel s'esueilla comme en sursaut demandant, qui est là? mais elle luy dist: Comment, mon seignr, estes vous deuenu si farouche que vous ne recognoissiez plus vostre Orande? A ces motz dom Rogel reuint en son bon sens, & commença à recompenser les baïfers de ceste ieune dame, par quelques carresses trop plus douces & agreables qu'un simple baïser. Ce pendant le ieune Prince disoit à son amie incogneue, Ma chere Orande, comment estes vous peu maintenant venir icy? Elle lui respondit, I'y suis venue pour le grand amour que ie vous porte, auquel il n'y a chose en ce monde qui puisse faire resistente. Voz sœurs (dist Rogel) sont elles venuees avecques vous. Non (dist elle) ie les ay laissees endormies dans le lit. Vous m'avez fait vne grande faueur (dist le Cheualier) de venir maintenant vers moy. Ennenda (dist elle) ie conceu hier si grande ialousie cōtre vous que ie ne me suis onc seu assseurer iusques à maintenant que ie vous tie ns entre mes bras. Adonc dom Rogel la caressant plus mignardement que de coustume, lui dist: Et quelle ialousie pouuiez vous auoir de moy? En la male heure, respondit elle, puis qu'il le faut ainsi dire: vous ne pouuiez oster les yeux de dessus la Dame de ce chasteau, encores

que i'y fusse presente. Ie le faisois (dist il) à fin de mieux dissimuler noz amours. Maudites soient telles dissimulations (respondit elle) Il est biē vray toutesfois que vous ne vous preniez point sinon à la pl^e belle de toutes les dames & damoïselles qui soient à present dans le chasteau. Encores qu'il fust ainsi comme vous dites, respondit le Cheualier, & que ie lui eusse porté quelque affection, si est-ce que le peu de cognoissance que i'ay d'elle, & elle de moy, vous pouuoit assez rendre assseuree. Quelle assseurance? dist elle en se moquant, si vous la regardiez de bonne affection, elle vous regardoit encores de meilleur courage, & d'un œil trop plus gracieux & attrayant, qu'elle ne regardoit son propre mary, combien qu'elle ne soit espousee que d'hier. La peur que vous en auiez, dist dom Rogel, vous faisoit refuser ainsi fantastiquement, car ie ne pense point que la Dame de ce chasteau ayt iamais pensé en telles choses. Vous dissimulerez tāt qu'il vous plaira (dist elle) mais par ma foy ie vous dy bien que i'ay songé mille fantasies iusques à ce que ie soye venue vers vous: car aux gracieuses œillades dont ie vous auois veu vser l'un enuers l'autre, ie ne pouuois moins penser sinon que maintenant ie la deusse trouuer couchee entre vos bras. Comment estoit cela possible? dist dom Rogel. Cōment? respondit elle, en la maniere que ie pensois que telle chose se peust faire. En quelle maniere, par vostre foy (dist il) pensiez vous que telle chose se peust faire? Vrayement (respondit elle) ie le vous diray, c'est qu'elle pouuoit venir la nuit à vous saignāt que c'estoit moy. O Dieu (dist dom Rogel) quelles folies vous allicz songer, & comme eust elle laissé son mary, estant la seconde nuit de ses nocces? Adonc le baïant fort amoureusement, & ayant assez long temps tenu sa bouche sur la sienne, elle lui dist: Làs! mon grād amy que vous n'estes gueres ruzé en tel les matieres, & apert bien que vous n'es-

des encores qu'un enfant ! Pouuoit elle pas bien, par vostre foy, enuoyer en sa place coucher vne de ses Damoiselles avecq son mari ? Ceste ruze est peu pratiquee, dist do Rogel, qu'une femme enuoie vne Damoiselle qui est vierge en sa place coucher avecques son mari. Elle se prit à rire, & luy dit : Pensez vous qu'il ne se trouue pas assez de Damoiselles, lesquelles n'ayant rien de virginite outre le nom, peussent pour vne nuit tenir la place de leur maistresse ? Dom Rogel se prit à rire, & lui dist : Je vous prometz ma chere amie que ie ne me fusse iamais auise d'une tromperie si grande. Si fusse bié moy, dist elle, & à ceste occasion ie suis icy venue pour en sçauoir la verité. Dom Rogel pour se railler avec elle, lui dist : Mais estes vous point la dame du chasteau qui me soiez ainsi venue tromper ? toutesfois ce seroit moy qui gagnerois le plus en ceste tromperie. Elle en souzriant lui donna la main & lui dist : En la male heure distes vous oncq' telle folie, car par là vous estimez qu'elle soit plus belle que moy, mais ie vous prometz pour belle qu'elle puisse estre, que ie m'estime bien autant comme elle. Puis elle fit semblant de se facher, mais dom Rogel l'embrassa & baïsa par grand douceur, & lui dist en riant : Or sus, ce que ie vous ay dist n'est que par maniere de passer temps : car vous me semblez beaucoup plus belle que celle dont vous estes ialouse. Je ne profite rien à celà, dist elle, en tournant la teste. Ne vous en fuyez point de moy (dist do Rogel) ou bien ie m'en iray coucher avecq la dame de ceans. Allez vous y en (dist elle) car ie vous asseure qu'il n'y a chose que ie desire d'auantage. Dom Rogel par grand amour continua tousiours ses gracieux propos iusques à ce qu'elle s'en allast. Mais l'heure estant venue qu'il leur conuenoit se separer, la gracieuse Dame assez plus lassée que rassasiée des amoureuses caresses de dom Rogel, faignant qu'elle ne vouloit que ses sœurs la

trouuassent absente, prit congé de lui avec grand' peine. Puis estant retournée Gante sortit du lit de son mari, & l'espouse se coucha entre ses bras, sans qu'il en receust aucun soupçon, & tous deux embrasiez ensemblement, dormirent ce peu qui leur pouuoit rester de la nuit. Ce pendant Gante atendoit que Barucquelle la More lui vint conter ce qui s'estoit passé entre elle & Sirind, lequel des le soir si tost que Gâte l'eust laissé, s'en estoit couru trouuer les autres deux escuiers ses compagnons, & leur dist : O la bonne & heureuse nuit que nous aurons en ceste-cy ! Comment dirent ilz. Par ce (respondit Sirind) qu'il est acordé que l'une des plus belles Damoiselles de ce chasteau viendra ceste nuit coucher avecq moy, apres que chascun sera retiré. Frere mon amy (direr les escuyers) ne nous en feras-tu pas part mais que tu en ayes eu les premieres entrees ? I'en suis content (respond Sirind) mais il faut que ce soit de sorte qu'elle n'en sçache rien : parquoy i'ay auisé qu'apres en auoir eu quelque temps mon plaisir, ie me leueray sans faire semblant de rien, & viendray apeller l'un de vous, lequel en fera puis apres autant à l'autre : mais regardez que le dernier se leue auant iour, & me viéne querir, car ie lui ay promis de demeurer avec elle iusques à ce qu'il fist clarté, d'autant qu'elle me veut voir tout à nu entre ses bras, disant qu'elle se tient fort contente de ma beauté. Les escuiers fort ioyeux de ceste bonne fortune, s'allerent coucher incontinent que l'heure en fut venue : mais Sçachez que Sirind ne pouuoit dormir, & atendoit tousiours la venue de sa Damoiselle Gante. Bien tost apres Barucquelle la More se vint coucher entre ses bras, avec laquelle il commença à s'egaier d'une fort bonne affection, & pensant tenir la Damoiselle Gante, se rauit tellement en la iouissance de ses amours, que cōbien que l'un de ses compagnons le tiraist pour le faire leuer, il le dissimuloit. Toutesfois à

la fin s'estant plus leué par cōtrainte que pour acomplir sa promesse, il dist à son cōpagnon lui parlant à l'oreille: O mon frere mon amy, comme ceste damoiselle à la charnure delicate, douce & polie: ie croy qu'elle n'est en rien moindre, que les plus excellentes Princesses de Grece. Va te coucher (dist l'autre) car me voicy bien apareillé pour experiméter si tu dis vray. Adonc il se coucha avec Baruquelle, & quelque temps apres l'autre escuyer vint qui le fit presque leuer par force, & se mit à sa place. Mais enuiron sur les deux heures apres minuit, Sirind craignant que le iour ne s'aprochast, vint à lui, & le tira tout vn long temps en vain, car il faisoit semblant de n'en sentir rien: à raison de quoy il lui dist tout bas à l'oreille: Leue toy, de par Dieu, leue toy, & ne me fais point faire vne si grande faute, car il est desia presque iour. Adonc l'escuyer se leua, & Sirind se recoucha avec Baruquelle qu'il commença à rebaiser & acoller iusques à ce qu'il fut grand iour: & lors pensant iouir de la veüe de sa belle corpulente, il la tira hors du lit, & l'assit sur ces genoux toute nuë: mais quand il l'aperceust tant hideuse, & aussi noire que fin veloux, avecque toute la fascherie qu'il auoit d'estre ainsi trompé, il ne se peut tenir de rire, & dist aux autres deux escuyers: Venez mes compagnons, voir la plus belle damoiselle de tout le monde, dont nous auons eu la iouissance ceste nuit. Que mallencontre puisse auenir à celui qui conquerra la bonne grace de la tant renommee Diane, car nous ne lui de uons porter aucune enuie, sinon que ceste nostre Diane me semble estre eclipsée & obscurcie, ie ne sçay pourquoy, si ce n'est que les rayons du soleil qui sont desia respenduz sur la terre, l'ayent ainsi renduë noire & tenebreuse, en lieu qu'ilz la deuoient rendre plus claire. Quand Baruquelle eust entendu son propos, elle fut fort coloree, & s'en fuyt à grand haste. Les escuyers qui la virent ainsi vilaine

& orde demeurerent long temps sans se pouuoir tenir de rire, & aians passé maintes railleries sur la finesse que lon leur auoit iouee, se leuerent & allerent trouuer leurs maistres. Ce pendant la damoiselle Gâte se gaudissoit par grād' risée de Baruquelle, laquelle se plaignoit fort d'autant qu'elle l'auoit ainsi abusée, lui faisant à croire que Sirind estoit amoureux d'elle. Apres que chascun fut leué, dom Rogel & ses cōpagnons, avecques leurs escuiers & leurs six damoiselles prindrent congé de leurs hostes, & retournerēt à leur chemin au grand regret de la dame du chasteau pour l'absence de son nouuel amy, combiē que tour ce iour, & le lendemain elle ne se peut tenir de rire avecque Gante, des ruzes & fineses qui la nuit passée auoient esté faites en sa maison, & dont elle s'estoit assez bien trouuee. Or la nuit ensuiuant dom Rogel estant couché avecques s'amie Orande, en parlant de ce qui lui estoit auenu dans le chasteau, il s'aperceust de la tromperie que la dame d'iceluy lui auoit faite. Ses fortes fieures (dist lors Orande) c'estoit la raison pourquoy elle nous auoit si bien renfermees avecque ses damoiselles. C'est vne ruze (dist dom Rogel) qui ne merite point estre ceele à nostre compagnie. Et de fait le lendemain il la recita par les chemins, dont les trois escuyers se prirent si fort à rire; que dom Rogel fut contraint de leur demander qu'ilz auoiēt. Adoncques Sirind lui respondit, La finesse que vous a esté iouee, monsieur, est biē telle que ie vous veux reciter ce qui m'en est auenu, à fin que vous cognoissiez combien vous en auez eu pl^d d'auantage que ie n'ay pas. Lors il lui raconta ce qui s'estoit passé entre lui & Baruquelle, dōt tout le lōg du iour les Princes & les Damoiselles ne cesserēt de se gaudir, cognoissant de quelle bonne grace ilz auoient esté festoyez dans le chasteau.

Comme les trois Princes se separerent des trois Damoiselles qu'ilz auoient conquises: & comme ilz arriuerent en la ville de Sparte, & declarerent au Roy l'ocasion de leur venue.

CHAP. XXXIII.

CEs trois excellents Princes suiuan leur chemin trouuerent le matin ensuiuant, vn peu apres soleil leue, quatre cheualiers, lesquelz n'eurent si tost aperceu Orande & ses sœurs, qu'ilz crièrent à haute voix aux trois Princes: En la malheure, faux cheualiers emmenastes vous onc les damoiselles desrobees, car voicy le temps venu auquel vous achetez bien cher le tort que vous auez fait à nous & à elles. Dom Rogel colere de ces propos lassa son armet, & les deux Princes pareillement, & respondit aux quatre cheualiers, Ce sera vous qui receurez icy la malencontre, car nous n'emmenons aucunes damoiselles desrobees. Vous le verrez (dirent ilz) tout maintenant. Adonc bien couuertz de leurs escuz & les lances baïssées, se vindrent rencontrer de toute la force des hommes & des cheuaux, tellement que trois des cheualiers volerent en terre assez estourdis de la cheute. Dom Rogel avecques l'espee nuë vint vers celui qui estoit demeuré dans les arçons, sans se soucier des abatuz qui demandoient le combat des espees: mais parce que le heaume estoit tombe à l'vn d'eux, & auoit le visage descouvert, les damoiselles le recogneurent incontinent: parquoy Orande voyant que dom Florestan lui vouloit trencher la teste, se fourra hardiment en la meslee, & s'escria aux Princes. Pour Dieu messeigneurs, ne faites d'auantage de mal à ces Cheualiers car vous deuez sçauoir que ce sont noz freres: Et vo^{us}, mes freres, ne pourchassez plus ceux qui ont tant fait pour vous, & pour nous, en nous deliurant d'entre les mains de ces trahistres voleurs qui nous auoient desrobees dans la maison de no-

stre pere. Les Princes receurent grand plaisir sçachans que les damoiselles de leur compagnie estoient sœurs de ces cheualiers: au moien de quoy aiant tous osté leurs heaumes, ilz se demanderent pardon les vns aux autres: & avec maintes larmes les freres embrasserent leurs sœurs par grand amour: & aians entendu d'elles la façon comme elles auoient esté deliurees, ilz rendirent fort affectueusement graces aux Princes pour le bon secours qu'ilz auoient donné à leurs trois sœurs: puis tous ensemble s'en allerent dîner en vn prochain village, ou Orande & ses deux autres sœurs craignant que leurs dernieres amours fussent descouuertes, dirent à leurs freres qu'elles vouloient retourner à leur chasteau: Mais si elles furent contristees pour se separer des Princes, ilz ne furent moins ioyeux d'auoir trouué le moien pour se departir d'elles honnestement, car ilz cōmençoient à s'en facher selon la coustume de ceux qui souuent perdent le goust des plus delicates viandes, pour leur estre trop communes & familiares. Aians donc prins congé les vns des autres, chacū reprit son chemin: & lors la damoiselle que dō Rogel auoit premierement requise d'amour, lui dist: Maintenant nous ne serons plus en seruitude, & pourrons auoir le plaisir de vostre compagnie, car par cy deuant nous n'en auons onc sceu iouir tant vous estiez affectionné à faire la cour à ces damoiselles. Vous ne voulustes pas faire ce dont ie vous suppliai (dist dom Rogel) car si vous l'eussiez fait, vous estiez mieux pour estre maistresses que seruantes, d'autant que ie me contentois trop plus de vostre seule beauté, que de celle des trois sœurs ensemble. Elle se prit à rire, & lui dist: Et bien, bien, maintenant qu'elles s'en sont allees, vous dites tout ce qui bon vous semble. Auant que nous les eussions rencontrees (respondit dom Rogel) ie vous dy le semblable, & vous le dy encores à cestel heure, vous suppliant de ce dōr
ie vous

ie vous ay premierement suppliee. Je vo^y ay bien assez experimenté (dist elle) pour croire que ie ne doy point faire pour vo^y ce dont maintenant vous me requerez. Pourquoi dites vous cela? dist dom Rogel. Par ce (respondit elle) que vous m'avez si tost abandonnee pour vne nouuel le suruenue, laquelle s'estant separee de vostre compagnie, vous avez encores pl^{us} tost mise en oubly: à raison dequoi ie serois bien fole, si vne telle experience de vostre legereté ne me laissoit biē auisee. Vous en fustes cause, dist dom Rogel: Je ne sçay (dit elle) mais ie m'assure bien de ne me mettre iamais en peine d'aimer vn Cheualier, lequel va si souuent au chāge. Vray est que ie ne sçay de quel auis seroient mes sœurs. Nous sommes d'auis (respondirent elles) attendu que nous ne faisons sinon sortir de seruice que desormais nous soyons maistresses. Comment entendez vous cela? dist dom Brian ges. Fort bien (dist l'une d'elles) par ce qu'estant maistresses de nousmesmes en defendant nostre honnesteté, nous demeurerons tousiours libres: là ou faisant autrement nous serions serues & esclaves. Au moien dequoi nous refusons la puissance & seigneurie que vo^y nous voulez donner, attendu qu'elle menace nostre honneur d'un seruice beaucoup plus vil, que celui auquel n'agueres nous estions. Continuans gracieusement telz & autres plusieurs plaisans propos, au deuxiesme iour ensuiuant ilz se trouuerent à la veüe de la cité de Sparte: & partant tout le surplus du chemin, ilz ne firent que deliberer s'ilz iroient premiere ment faire la reuerence au Roy, ou s'ilz prendroient pour guide chacun sa Damoiselle, à fin de faire à chacune d'elles la raison de son chasteau. Finablement ilz acorderent d'aller premierement faire la reuerence au Roy, à fin que les conditions du combat fussent plus assurees: ce qu'ilz firent, & apres lui auoir declare l'ocasion de leur venue, ilz le prierēt

que les conditions proposees en celle querelle, fussent executees au profit du vainqueur, selon l'ysuë du combat, d'autant qu'ilz estoient prestz de soustenir le bon droit des trois Damoiselles. Le Roi desirant cognoistre si la prouesse des trois Cheualiers estoit correspondante à leur representation, commanda que lon leur donnast vn bon logis dans son palais, & respōdit qu'il enuoiroir querir les trois freres, avec ceux desquelz ilz entendoiet s'aider, d'autant qu'il vouloit auoir la veüe & le passetemps d'un si beau & estrange combat. Les trois Princes furent fort ioyeux de ceste responce du Roi, lequel le iour mesme mādā querir les trois freres, qui vindrent soudain à son mandement avecques six autres Cheualiers en leur compagnie. Le Roi les ayant fait appeller deuant lui, avec les trois Princes, & les trois Damoiselles, leur dit à tous, attendu que les conditions du combat estoient telles que les Damoiselles auoient recitees, qu'il vouloit que le lendemain le combat des trois contre les neuf, se fist deuant son palais, en la grād' place de la ville. Les Cheualiers s'estans acordez au iugement du Roi, & aians donné leurs gages, se retirerent chascun en son hostel. Ce soir le Roy commanda que lon appareillast le cāp avec des fortes barrieres tout à l'entour: ce qui fust incontinent fait, pour la multitude des ouuiers que lon y emploia. Tout ce iour lon ne parloit en la ville d'autre chose que de la furieuse meslee qui estoit apareilliee au lendemain. Le Duc de Gandé par le commandement du Roi fust establi iuge du camp avec mille cheualiers pour la seureté d'icelui.

Du combat que les trois Princes eurent contre les neuf Cheualiers, & comme dom Brianges s'enamoura de l'Infante Griande fille du Roy de Sparte.

CHAP. XXXIIII.

LE iour ensuiuant environ vne heure apres Soleil leué, les Cheualiers qui deuoient combattre s'armerent de toutes pieces : & en mesme instant le Duc de Gande alla premieremēt vers les neuf, lesquelz il amena dans le camp to⁹ armez à blanc, montez sur cheuaux de mesme couleur, enharnachez & caparassonnez de fine pourpre à franges de fil d'or, montrās au surplus vn si beau maintien qu'il n'y eut celui qui ne prit grand plaisir à les voir. Quand ilz arriuerent, le Roy s'estoit desia mis aux fenestres, & aussi la Roine avecq⁹ ses Dames & Damoiselles, & l'Infante Griande sa fille autant parfaite & accomplie en beauté & bō ne grace, qu'autre Damoiselle qui fut onques veüe dans Sparte. Incontinent apres le Duc de Gande alla querir les trois Princes, lesquelz vindrēt armez d'vnes riches armes azures, & fucillages de diuerses couleurs : leurs cheuaux estans enharnachez & caparassonnez de velours cramoisi rayonné de fil d'or. Les trois sœurs vestues d'vn acoustrement de satin bleu, decoupé sur vn fons de tafetas iaune, portoient leurs lances & leurs escuz, & en tel equipage entrerēt dans le camp du costé du palais, ou la Roine & sa fille estoient apuyees aux fenestres, tellemēt que dom Brianges auisant la belle Infante fut tellement nauré de sa veüe, & la regarda avec tel amour, qu'il ne fut moins enflammé d'elle pour sa beauté, qu'elle de lui pour sa bonne representation, & pour les amoureuses & affectionnees œillades dōt il l'auoit regardée premierement. En ces entrefaites les Princes ayans lassé leurs heaumes, & prins leurs escuz, le Soleil leur fust departy & rangez viz à viz de

leurs auersaires, entre lesquelz les trois freres faisoient le premier rang des neuf, d'autant qu'ilz estoient les plus grands & les plus adroitx aux armes. Apres les autres solemnitez en tel cas requises, le Duc de Gande monta en son eschaufant, & les trois sœurs se retirerent avecque la Roine & l'Infante Griande, qui les fit assoir aupres d'elle, pour sçauoir qui estoient leurs champions. Adonc la multitude du peuple faisant pareil silence come s'il n'y eust eu personne, les trois freres voyans les trois Princes deuant eux, commanderent à leurs compagnons de non se bouger iusques à ce qu'ilz vissent l'ysuē de la premiere course : & en ceste façon chacun attendoit le son des trompettes, lesquelles n'eurent si tost commencé à sonner que les trois Princes & les trois freres bien couuertz de leurs escuz, les lāces baissées, & de toute la force des hommes & des cheuaux, se vindrent rencontrer de telle roideur sans qu'aucun d'eux faillist d'atainte que leurs bois estans volez en esclartz, les freres maugré eux furent renuersez en terre tout de leur long, & les trois Princes, estant tousiours dom Rogel au mylieu, passerent outre fort dispositz & braues Cheualiers sans estre aucunement endōmāgez. Mais ilz ne furēt gueres loing derriere les trois reuersez, q⁹ les six autres departiz vindrent à toute course de cheuaux à l'encontre d'eux, tellement que les trois Princes receurēt chacun deux coups de lances en mesme instant, dans leurs escuz, dont ilz ne furēt aucunemēt estonnez, ains les lances brisées, les six passerent outre sans que les Princes se fussent ébranlez dans la selle ny peu ny prou, laissans tous les regardās fort estonnez de leur prouesse. Ce pēdant les freres estoient remontez à cheual, & s'estans iointz avecque les six, vindrent tous d'vne course assaillir les trois Princes, & se rēngerēt esgalement trois contre vn. Alors tous les combatans ayans les espees nuēs aux poingz, lon vid bien en-

I

commen-

commencer vne des plus furieuses meslees qu'il seroit possible de dire, car à les ouïr chamailler & marteller les vns sur les autres, & à voir les ardantes estincelles qui sortoient incessamment de leurs harnois, lon ne les eust point estimez en moindre nombre que de quatre vingtz ou cēt. Durant ce combat l'Infante Griande ne bougea onques les yeux de sur dom Brianges, lequel pour l'amour d'elle auoit choisi le costé duquel elle estoit, & combattoit avecque ces trois assez pres d'elle. Or s'aperceuant qu'elle le regardoit, le courage lui creut au double, & vint descharger vn tant horrible coup sur la teste de l'vn de ses aduersaires, que peu lui seruit de hancer l'escu au deuant, car l'espee du Prince trenchāt le bouclier par la moitié lui vint tomber sur la creste de l'armet de si droit fil, & avec telle fureur, que le Cheualier tomba roide mort par terre, aiant la teste presque separee iusques aux dēts. Ce coup ne depleust aux trois sœurs ny à l'Infante, laquelle esbahie de la force du ieune Prince ne se peut tenir de dire à l'vne des sœurs qui estoient aupres d'elle. M'amie par la foy que vous devez à Dieu dites moy qui sont ces Cheualiers & ie vous prometz de tenir secret, si bon vous semble, tout ce que vous m'en direz. Ma Dame (dist elle) souz la promesse que vous me faites ie vous diray ce qu'il vous plaist me demander. Sçachez donc, ma Dame, que celui qui cōbat au milieu, est le Prince dom Rogel de Grece, duquel la renommee a desia tāt de fois environné toute la terre. Celui qui combat de l'autre costé est dom Florestan filz de l'Empereur de Rome. Cestui que vous voiez au dessouz de nous, est dom Brianges de Beocie Prince & heritier du mesme Roiaume, & neveu de l'Empereur Li suart. L'Infante fort ioyeuse d'ouïr ces nouvelles, lui dist: O combien vous fustes heureuses! m'amie, vous & voz sœurs, d'auoir amené de si preux & adroitiz Cheualiers, avec l'aide desquelz vostre bon

droit commence desia à se monstrer. Cela disoit elle par ce qu'alors dom Rogel auoit de deux coups renuersé par terre, deux des Cheualiers qui cōbatoient cōtre lui, & dom Florestan l'vn des siens, & les trois freres; avecque ceux qui estoient debout estoient tous couuertz de leur sang, & tant nauriez & lassiez que lon cognoissoit à veue d'œil qu'ilz ne pouuoient gueres plus durer contre la prouesse des trois Princes. Voians donc leur mort tant prochaine, & quatre de leurs compagnōs trespassez, les cinq se ioignirent ensemble pēsant en ceste façon se deffendre mieux de leurs ennemis. Mais que leur pouuoit profiter ceste cautelle, ny tous les autres effortz qu'ilz eussent peu faire, contre ceux qui en eussēt facilēmēt deffait trois fois autant si l'ocasion s'y fust offerte: Dō Rogel voiant qu'ilz n'atendoient plus que la mort d'heure en autre, tant ilz estoient desia affoibliz, & lui semblant (cōme piteux qu'il estoit) que le temps fust venu auquel on leur deuoit vsfer de courtoisie, s'ilz la vouloient recevoir en obeissant à la raison, se tira vn peu arriere, & leur dist: Vous voiez Cheualiers, en quelle extremite, vostre peu de iustice, & la faute du bō droit, vous ont reduitz: mais si la force vo^r deffault pour vous deffendre & pour nous vaincre, faites à tout le moins qu'elle ne deffaille point pour vo^r vaincre vousmesmes, & satisfaites à ce, en quoy vous estiez encores obligez par cy deuant, rendans les trois chasteaux que vous auez vsurpez sur ces trois pauvres Damoiselles: car par ce moien outre l'honneur que vous conquerrez de vous estre vousmesmes vaincuz, vous vous assurez encores du danger lequel vous est apareillé, & au lieu de nostre premiere rigueur, vous experimenterez nostre clemence & courtoisie, dont iusques ici no^s n'auons peu vsfer enuers vous, & n'en vsurons si premierement vous n'en vsiez enuers vous mesmes, en faisant ce dont no^s vous requerons, & à quoy la raison vous oblige

oblige. Les freres oyans les courtoyses paroles de dom Rogel, & voyans leur mort prochaine au cas qu'ilz ne lui otroyassent ce qu'il demandoit, rendirēt leurs espees, & deuant le Roy lui acorderent les conditions du cōbat telles qu'elles auoient esté proposees. Adonc avecque le grand plaisir des trois sœurs, les Princes furent en triomphe cōduitz hors du camp, & les vaincuz allerent faire apa-reiller leurs plaies. A l'issuē du combat, le Roy auāt que bouger des fenestres, com-manda que lon eust incontinent à mettre les trois Damoiselles ou leurs gēs en pos-session de leurs chasteaux, puis il manda aux trois Princes que pour se faire guerir ilz ne partissent de son palais, & que lui mesmes les feroit penser par ses chirur-giens. Ce qu'ilz accepterent, & en furēt fort ioyeux, mesmement dom Brianges de Beocie, pour auoir le moien de tous-siours estre aupres de celle belle Infante, qu'il auoit faite Dame de son cuer, & la-quelle aiant veu sa prouesse, & aperceu l'affection dont souuent il l'auoit regar-dee, estoit fort cōtente d'estre aymee d'un si preux Cheualier, & descēdu de si noble lignage. Les Princes estans arriuez au Pa-lais, furent fort bien receuz du Roy, & commanda que lon leur donnast vne bel le chambre bien aēree, qui estoit aslez pres de la sienne, ou s'estans desarmez, ilz furent couchez, chacun d'eux en vn riche pavillon, auquel les Chirurgiens du Roy leur acoustrent quelques petites plaies qu'ilz auoient eues au combat. Aussi tost qu'ilz furent acheuez de medeciner, les trois sœurs les vindrent voir, & en gran-de ioye leur rendirent graces de ce qu'ilz auoiēt fait pour l'amour d'elles, & à leur si grand auantage. Alors dom Brianges apella vne d'elles nommee Andrede, & lui dist: Helas, m'amie, comme en pour-chassant vostre bien, j'ay rencontré mon plus grand mal! Comment monsieur (dit elle) vous sentez vous si durement nauré? ou pourquoy dites vous cela? Je le dy

(respondit il) par ce que ie me sens nauré d'une telle plaie, que ie n'espere que la mort pour tout remede, si celle qui me l'a faite ne m'en donne elle mesme la gue-rison. Andrede pensant qu'il fut ataint de son amour, comme il lui auoit assez de fois raconté par les chemins, lui respon-dit: Helas, monsieur, ie vous supplie, puis que vous m'avez gardé mon bien, que vous me gardiez encores mon honneur, saufs lequel ie suis preste de faire tout ce qu'il vous plaira me commander. Helas, Andrede (dist il) vous n'entendez pas ma maladie, car il y a assez de temps que vo^s me laissastes guery de celle dont vous me parlez, par le bon vouloir que j'ay tous-jours cogneu en vous de garder vostre chasteté. Là, ma chere amie, la douleur que ie souffre vient de la veuē d'une belle Damoiselle qui aujourd'hui estoit aupres de la roine, & pres de laquelle vo^s estiez, & auoit sur ses cheueux, vne belle & ri-che guirlande de fine pierrerie: ie vous supplie me dire qui elle est, & au surplus tenir couuert ce que ie vous viens de di-re, comme celle en laquelle j'ay mainte-nant plus de fiance qu'en autre Damoi-selle que ie cognoisse en tout le monde. Andrede luy respondit gracieusement: Monsieur, ie feray tout ce que vous me commandez & d'auantage s'il m'est pos-sible: Sachez donc que sans raison vous ne prisez & honorez la Damoiselle que vous dites, tant pour sa beauté, comme pour son hault lignage: car vous deuez sçauoir que c'est l'Infante Griande, fille du Roi mon seigneur, vous assurant que vous faites bien & vertueusement de l'ai-mer, moiennant que ce soit avecque le regard qui est deu à son honesteté, & in-tention de la prendre pour espouse, veu que vous estes bien son pareil: & s'il vous plaist qu'avec ces conditions ie lui declare vostre bon vouloir enuers elle, & qui vous estes, ie le feray de bien bon cuer. Las ma bonne amie (dist dom Bri-anges) combien ie doy estimer heureux

le iour auquel premierement ie vous cogneu, puis que vous m'estes cause d'un si grand bien: ie vous donne congé de tout ce que vous dites, mais ie vous supplie que personne n'entende nostre secret. Laissez moy tout ce foucy (dist elle) car i'entreprends sur mon honneur de faire ressortir ceste entreprise à vostre contentement, & au mien. Adoncq les trois sœurs ayants pris congé des trois princes, retournerent au logis de la Roine, & l'Infante estant à vne fenestre qui regardoit sur le iardin en vne petite chambrette à part apella Andrede, car c'estoit elle qui lui auoit donné les Princes à cognoistre. Andrede s'estant mise à genoux, l'Infante lui dit d'une fort bonne grace: Et bien, m'amie, comment se portent voz Cheualiers, car ie serois fort ioyeuse de leur bonne prosperité, pour la grande vertu & haute cheualerie que i'ay recogneue en eux au combat qu'ilz ont gagné en vostre faueur. Ma dame (respond Andrede) vous auez raison de priser & estimer telz Cheualiers tant pour leur prouesse, comme d'autant qu'en quelqu'un d'eux ne manque point le noble courage de vous aimer & seruir, auecq le regard qui est deu à vostre honneur, & à la loyauté de son amour, en vous faisant maistresse de tout ce qu'il pourra auoir en ce monde, comme il vous a desia fait Dame de son cuer. A ces mots l'Infante prit vne couleur au visage qui lui acrut fort sa beauté, & se douta incōtinent que ces paroles venoient de la part du Prince qui par ces regardz amoureux, & par l'experience de sa vertu, auoit desia gagné sur elle vne grande part de son courage. Parquoy l'Infante respondit: Amie Andrede, souz les conditions que vous proposez, j'accepte la gloire d'estre aimée d'un si vertueux personnage, encores que ie recognoisse point en moy la beauté si grande qu'elle puisse gagner le cuer d'un si fort & preux Cheualier. Ma Dame (dist la Damoiselle) la beauté ne deffault point en vous, pour auoir ceste

force ny la cognoissance en dom Briāges Prince de Beocie, pour recognoistre la gloire que ce lui fera d'estre aimé d'une tant belle & excellente Princeesse comme vous estes. Or puis qu'il vous aime d'un chaste & loyal amour, comme il vous enuoye dire par moy, ie vous supplie luy faire quelque faueur souz le gage de la promesse, de n'auoir iamais autre espouse qu'il vous. Il vous plaira donc, ma dame, par vostre response faire que celui qui m'a gardé mon bien, se puisse vanter, que ie lui aye gardé la vie, laquelle il ne tient trop asseuree si celle qui lui a causé son mal, qui est vous ne lui donne pareillement sa guerison. Andrede, dist l'Infante, souz la foy & souz la promesse que vous me donnez de lui, au moins s'il vous a donné charge de ce faire, vous lui pourrez dire que ie l'aime, & que ie me tiens heureuse d'estre aimée d'un tel Cheualier auecques l'esgard qui est deu à mon honneur, & à la gloire de ses pensées, pour s'estre mises en lieu, auquel pour leur vertu, & pour la mienne, elles ne pouuoient estre receues auecque moindres conditions: Dites lui aussi, attendu sa bonne intention, qu'il me semble que lui & ses compagnons se doiuent donner à cognoistre au Roy mon seigneur & pere, afin que la Roine ma mere, & moy ayons occasion de les aller visiter & par ce moyē qu'il me puisse voir & parler à moi si l'opportunité s'y offroit. Andrede baisa les mains à l'Infante pour la faueur qu'elle lui faisoit, & trouua façon que ce soir mesmes ses sœurs & elle allassent reuoir les Princes, ou elle recita à dom Briāges tous les propos que l'Infante lui auoit tenus: dont il fut autant ioyeux qu'il est possible de penser, & lui dist qu'il auoit descouuert ses amours à ses compagnons, craignant qu'ilz le voulussent deuancer en ceste entreprise. Mais comme la Damoiselle lui racontoit les gestes & contenance de l'Infante, quand elle faisoit son message, il cuida presque se palmer de ioye, & embrassa

brassa plusieurs fois Andrede par grand amour: ce que voiant dom Rogel, il lui dit en se gabant, Monsieur mon cousin, ie suis enuieux de ces faueurs, lesquelles vous receuez de ma damoiselle Andrede car ie n'en sçeu iamais tant obtenir de ma Damoiselle Marinde sa sœur encores que ie l'aime autant que vous sçauriez aimer Andrede. Je ne me plains gueres moins de Brenie (dist dom Florestan) de laquelle ie n'ay receu que des angoisses en lieu de la bonne affectiō que ie lui porte. Marinde laquelle estoit fort gracieuse, leur dist en riant: Or sus, Seigneurs Cheualiers, donnez tant seulement ordre à la guerison des plaies du corps, car icelles gueries ie vous assure du danger de celles que vous pouuez auoir en l'esprit à l'ocasion de nostre beauté. Regardez bien, Marinde, la promesse que vous no^s faites (dist dom Rogel) car ie ne tiens point à peu de faueur l'assurance que vous nous donnez. Vous estes assez assurez (dist Marinde) du danger dont ie vous assure par le peu de beauté qui est en nous, cōme vous nous auez bien monstré par les chemins en temperant le peril de telles playes, en la beauté d'Orande, & en celle de ses deux sœurs. Dō Rogel se prit à rire, & lui dit: Depuis leur depart, ma damoiselle Marinde, mes douleurs sont creuës au double, pour auoir mieux consideré en leur absence vostre beauté, que ie n'auois fait auparauāt. Faites seulement (dist Marinde) que vo^s foyez guery de voz plaies, car vous estes en vne ville ou vous pourrez trouuer pour cest autre mal dont vous parlez, assez de medecines semblables à celle que vous donnoit Orande. Las! ma damoiselle m'amie (dist dom Rogel) pour Dieu ne resistez plus desormais à mes passios, si vous desirez ma santé. Pourquoi me demandez vous celà? dist Marinde. A fin de gagner le plaisir (dist dom Rogel) que ie receurois en iouissant de vostre amour Marinde lui respondit en riant: Puis que

vous demâdez vostre ioye pour ma douleur, en bonne foy ie vous laisseray en vostre douleur pour m'entretenir en ma ioye. Mais laissant ces railleries attendez à vostre guerison, car cest ce qⁱ ie vo^s desire le plus avec la bonne renommee, & vous estime au surplus de si bon cuer, que ie ne vous sçauois tāt desirer de biē pour ce regard, que nonobstant tout ce que vous dites par ieu, vous ne m'en desiriez beaucoup d'auantage. Ainsi s'entretenant tousiours en la reputation de sages & vertueuses damoiselles, elles prirēt congé d'eux, laissant dom Brianges assez resiouï, aiant toutesfois au parauant prié Andrede de remercier en son nom l'Infante pour les faueurs qu'elle lui auoit faites, & parce que les deux Princes ses compagnons & lui, ne se vouloient decouurir, qu'il estoit bien content qu'ilz ne fussent donnez à cognoistre à personne du monde fors au Roy, à la roine, & à l'Infante, & encores avec telle conditiō, que dom Rogel ny dō Florestan ne sceussent point qu'on les cogneust. Ces choses ainsi acordees, Andrede alla trouuer l'Infante qui se plaisoit fort en sa cōpagnie, & fit de sorte qu'elle declaira secretemēt au Roy & à la Roine qui estoient les cheualiers estranges, dont ilz furent fort esmerueillez, & la remercièrent de leur auoir dit, à fin de les honorer selon que leur prouesse & haut lignage le meritoit. La Roine remonstra au Roy qu'elle les deuoit aller visiter, encores qu'ilz ne se voulussent autrement donner à cognoistre, disant que leur vertu & haute cheualerie, outie la noblesse de leur sang, meritoit bien telle faueur. C'est bien auisē à vous (dist le Roy) car tant plus nous les honorerons sans faire semblant de les cognoistre, nous les obligerōs tousiours à vne plus grande amitié: & faignant de n'auoir aucune cognoissance d'eux, nous leur pourrons faire plus d'honneur, que nous ne ferions pas en les cognoissant, attendu la grandeur de leur lignage, & la

renommee de leur prouesse. Partant demain au matin allez les visiter avecque vostre fille, & continuez tous les iours iusques à ce qu'ilz soient bien gueriz. Je le feray, dist la Roine. En telz & autres pareilz deuils, ce iour passa. Au soir dom Brianges raconta à ses compagnons ce qui s'estoit traité entre lui & Andrede, mais nō pas qu'il lui eust donné congé de descourir qui ilz estoient.

Comme la Roine de Sparte, & l'Infante sa fille, & apres elles le Roy, allerent voir les Cheualiers naurex, & des paroles qui se passerēt entr'eux.

CHAP. XXXV.

LE lendemain au matin la Roine dist à sa fille qu'elle se vestist de ses plus riches acoustremens pour aller visiter les Princes, ce qui ne lui fut trop desplaisant, au moien de quoy elle prit vne riche robe de drap d'or, semee par carreaux de fines perles, avecque vne fort bonne grace, car vn rang des carreaux qui se suiuoient par la pointe plus aigue estoit de drap d'or frisé, & l'autre sans aucune frisure, comme si la robe eust esté faite de deux diuerses estoifes marquetees l'vne dans l'autre. Elle portoit vn beau carquā au col, avec vne ceinture de mesme ouurage, & vne riche guirlande de fine pierre sur ses cheveux, qui estoient escheuelez par tresses avec vne merueilleuse grace, & sur les temples frisez, & entrelassez par telle industrie qu'ilz exprimoient au naturel vne toile d'Araignee, au mylieu de laquelle pēdoit en l'air vn riche ioyau fait d'vn reluisant diamant avec vn cercle de fins rubis, fort aigus tout à l'entour, tellement qu'on eust dist que de leurs pointes, sortoient les desliez & blons cheveux dont la rouē de l'Araignee estoit tissue. En telle magnificence, la Roine & sa fille suiuiues d'vn grand nombre de Dames & Damoiselles, allerent voir les Princes,

l'Infante aiant aupres d'elle vne Damoiselle de parfaite beauté & de bien bonne grace richement en ordre, comme celle qui estoit fille du Duc de Gande, & seule heritiere de sa Duché. A leur arriuee les Princes les receurent en grande reuerence, reputans ceste visitation à tresgrande faueur: & quand elles furent toutes assises, dom Rogel trouua l'Infante fort belle, & lui sembla qu'elle auoit les cheveux ordonnez en la plus mignonne & estrange façon qu'il estoit possible de voir au monde. Apres elle la beauté de Sarcire fille du Duc de Gande lui fut tant agreable qu'il se delibera la seruir tant qu'il demeureroit en celle cour, Il la regardoit, & elle le regardoit pareillement, autant esbahie de sa beauté, que lui de la sienne. Dom Florestan qui la contemploit aussi de fort bōne affection, & ne se pouuoit aucunement contenter de ce qu'elle n'ostoit iamais la veuē de dessus dom Rogel, Mais que voyrions nous de dom Brianges quād il vid sa Dame avec vne si grande beauté, & qui par fois l'œilladoit à la desrobée d'vne fort bonne grace, & par grande dissimulation? Il estoit tellement rauy du grand plaisir, & de la peine amoureuse qu'il souffroit en mesme instant, qu'il ne sçauoit que dire, ny que faire, sa Dame lui semblant trop pl^e belle sans comparaison qu' auparauant. Apres les hōneurs & reuerences faites d'vne part & d'autre, dom Rogel dist à la Roine: Je ne sçay, ma Dame, pourquoy il vous plaist nous faire tant d'honneur, que de nous daigner visiter en nostre maladie, si ce n'est à fin de nous redre à tout iamais voz redeuables, veu que ceste faueur est si grande, que toutes noz vies nous n'aurons le moien ny le pouoir de la recognoistre. Vous estes telz Cheualiers (dist la Roine) que vostre prouesse merite beaucoup d'auantage. Ma Dame (dist dō Rogel) ie vous remercie tres humblement dont il vous a pleu nous donner par voz paroles, ce qui nous deffailloit de nous-mesmes, pour recevoir vn si grand.

grand honneur comme cestui-cy : car ie ne pense point que nous eussions peu de nous meriter vne telle humanité, si de vostre grace vo' ne no' l'eussiez fait meriter par la faueur que vous nous faites en no' visitant, & en nous donnant le moien de voir la grande beauté de ma Dame l'Infante, & de celle belle Damoiselle, que ie voy assise aupres d'elle comme sa plus chere compagne. L'Infante & Sarcire prirent vn nouveau taint en leur visage, lequel augmenta moult leur premiere beauté, en oyant les paroles de dom Rogel, lesquelles ne despleurent aucunement à Sarcire, ains estoit fort contente de se voir regarder si amoureusement, & d'vn œil tant gracieux, par le plus beau Cheualier qu'elle eust iamais veu de sa vie. Dom Rogel aiant acheué son propos, dō Brianges dist à la Roine: Ma Dame, ie vo' ren graces, & à ma Dame l'Infante de la faueur qu'il vous a pleu no' faire, laquelle nous estimons si grande que nous n'auons aucun autre moien de la recognoistre, sinon en vous remerciant de toute nostre affection. Ce pendant qu'il disoit ces paroles, l'Infante le regardoit, & lui sembla fort gracieux en son parler, & de grande beauté en ceste premiere ieunesse ou il estoit. Mais dō Florestan s'ennuyoit si fort de ce que Sarcire ne l'auoit encores seulement regardé, combien qu'il eust tousiours eu l'œil sur elle, qu'il ne sceust onc dire vn seul mot. Or la Roine aiant demeuré là quelque temps, prit premierement congé de dom Rogel, & ce pendant qu'elle prenoit congé des autres deux Princes, Sarcire s'aprocha du lit de dom Rogel pour prendre congé de lui, lequel la prenant par vne de ses belles mains lui dist tout bas: Ma Dame, puis qu'il vo' a pleu me visiter en ceste petite maladie ou ie suis pour les plaies du corps, ie vous supplie ne m'abandonner point en la plus grande que ie souffre par la force de vostre beauté, & auoir souuenance de moi. Sarcire souzriant, & dissimulant d'vne

bonne grace prit congé de lui, & ainsi la Roine & sa compagnie s'en allerēt demeurant dom Brianges assez triste pour n'auoir peu parler à sa Dame, & assez ioyeux par ce que la Roine lui auoit promis de les aller ainsi visiter tous les iours iusques à ce qu'ilz fussent bien gueriz. La roine n'estoit presque sortie, que Marinde s'aprocha de dom Rogel pour prendre congé & lui dist: il me plaist bien, monsieur, que ces dernieres passions qui se causent en vous pour la beauté de l'Infante rechassent maintenant les premieres que vous faigniez souffrir pour la mienne. Las Marinde (dist il) ie ne suis point hardy iusques là, mais si vous m'aimez, ie vous prie m'aider à trouuer quelque remede à la douleur que ie souffre pour la beauté de l'autre ieune fille qui estoit assise aupres d'elle. Comment (dist elle en riant) il ne vous suffit donc pas de m'auoir laissée pour la seconde fois, si vous ne me faisiez encores vostre messagiere enuers celle pour laquelle vous m'auiez changée. Je vous supplie (dist dom Rogel) ne m'vser point de raillerie en vn mal que ie souffre à bon escient. Et bien (dit elle) encores qu'il me fache bien d'estre ainsi laissée pour vne autre, si est-ce que ie feray tout ce qui me sera possible pour vo' complaire: mais pour maintenant ie vous prie me donner congé, car la Roine est desia bien loing. Dieu vous vueille conduire (dist dom Rogel) & principalement droit au lieu ou i'ay si bien besoing de vostre secours. Elle ne s'en fut si tost allée que le Roy avec vne grande troupe des Cheualiers & Gentilzhommes de sa cour vint pareillement visiter les trois Princes, avec lesquels il tint plusieurs gracieux deuis tant qu'il y fut, & commanda à la sortie à tous les officiers de sa maison qu'ilz eussent à les traiter comme si c'estoient ses propres enfans.

Des propos que Marinde tint à Sarcire en la faueur de dom Rogel: & comme l'Infante, & dom Brianges parlerent ensemble, & de ce qui fut delibéré entr'eux de faire alors que les Princes seroient gueriz.

CHAP. XXXVI.

MArinde estant arriuee au logis de la Roine, tira Sarcire à part, & en souzriant lui dist: O cruelle damoiselle que vous estes, de causer tant de douleur à celui qui ne pourchasse que vostre seruice. Pourquoy dites vous cela? dist Sarcire. Parce (respondit Marinde) que vous faites mourir pour voz amours, celui, duquel pour sa beauté & prouesse ie ne me suis à peine peu defendre: & toutesfois pour le bon vouloir que ie lui porre, & pour l'enuie que i'ay de lui obeir ie viens pourchasser vostre bon heur, & le sien, avec ma plus grand' perte. Sarcire entendant bien ce qu'elle vouloit dire, sans prendre ses paroles en aucun desplaisir, lui dist: Asseurez le seulement de vostre bauté, car l'auantage que vous auez sur moy pour ce regard, vous peut donner, & à lui aussi, assez d'assurance de la mienne. Ma dame (dit Marinde) ie ne croy point que vostre pensée soit telle comme voz paroles le monstrét & puis que la verité est tant aparente, ne me faites point entrer en combat avecq' vous sur ceste querelle. Je vous prie d'ocques laisser maintenant ces railleries, & me donner quelque faueur par laquelle ie puisse conseruer la vie à celui qui ne la desire aucunemēt, sinon avecques vostre bonne grace. Deliberiez vous de me faire ces belles harangues (dist Sarcire) quand n'agueres vous estes demeuree seule avec luy, nous laissant toutes sortir hors de sa chambre? Quand ie me suis aperceue (dit Marinde) que vo⁹ l'auiez laissé tout hors de foy, & oublié de lui mesmes, ie me suis souuenue de combien ie lui suis redeuable & obligee à pourchasser sa guerison:

de laquelle, ma dame, ie vous supplie avecque toute la meilleure affection qu'il m'est possible. Et à fin que vous entédiez qui est celui lequel vous traitez si rigoureusement, ie vous dy à la charge de le tenir secret, que vous estes aimée de dom Rogel de Grece filz du Prince Florisel de Niquee. Sarcire fort ioyeuse de ces propos lui respondit: Sa prouesse & sa beauté le font biē ressembler à celui que vo⁹ dites: & vous assure que ie me prise beaucoup d'auantage pour estre aimée d'un tel Prince. Parquoy vous lui direz de ma part qu'il se guerise le plustost qu'il pourra: & lui estant releué, ie chercheray le moien de parler à lui, pour voir si vous me dites vray: car ie ne l'estime point tant peu sage qu'il m'aime, aiant d'autant plus grand' occasion de vous aimer, que vostre beauté surpasse la mienne. Ne parlons point de cela (dist Marinde) puis que ces differens ne seruent de rien à nostre propos: mais au reste, ie vous remercie tres-humblement des faueurs que i'ay maintenant receues de vous au nom de celui auquel ie ne doy moins que la vie. A tant elles mirēt fin à leurs propos, duquel Sarcire ne receut peu de contentement, se sentant aimée de celui lequel elle aimoit plus que soy mesme. Dom Rogel pareillement ne fut moins resiouy, sçachant ce qui s'estoit passé entr'elles, car au soir Marinde lui en porta les nouuelles, & elle sortie, il le raconta aux autres deux Princes, disant à dom Florestan qu'il cherchast son party avecques quelque autre damoiselle ce pendant qu'ilz demeureroiēt là, puis qu'il ne restoit pl⁹ que lui à pouruoir. En la malle heure (respondit dom Florestan) apres que vous auez choisi le meilleur, vous me direz maintenant cela. Vous auez encores le choiz d'assez d'autres belles damoiselles, dist dom Rogel. Choisissez doncques vne de celles là (dist Florestan) & laissez Sarcire pour moy. Je le ferois volontiers (dist dom Rogel) s'il se pouoit faire à mon honneur: mais il ne seroit

ne seroit pas honneste, lui ayant fait entendre ma bonne volonté, de me changer si soudainement, car ie manifesterois trop mon inconstance. Vous auez de bonnes excuses (dist il) pour paruenir à voz moïens: mais puis qu'ainſi est, ie me prédray à la premiere qui me voudra, puis que ie ne puis auoir celle que ie veux. I'en ay ainſi fait (dist dom Rogel) car ie me suis contenté de Sarcire, voiant que dom Brianges auoit premierement choisi l'Infante, qui est de trop plus excellente beauté. Plaise à Dieu (dit lors dom Brianges) no⁹ donner la victoire de noz entreprises, car autrement ie seray bien venu icy à mon grand malheur. Mais bien moy (dist dom Florestan) encores que vous me laissiez en vn combat ou i'auray bien peu d'affaire, pour sortir d'un si grand danger, comme celui ou vous dites estre. En celà (dist dom Rogel en riât) pouuez vous cognoistre combien nous vous aimôs, puis que nous nous mettons aux plus grands dangers, afin de vous laisser les moindres. Ie ne vous remercie point (dist Florestan) du plaisir que vous me faites en celà, puis que l'honneur & la gloire que l'on acquiert, sont d'autant plus grands, que les entreprises sont perilleuses. En telles & autres pareilles railleries les trois Princes passoient la pluspart du temps, deuissant fort gracieusement de leurs amours. Chacun iour la Roïne, & l'Infante sa fille, acompagnees de Sarcire, les alloient visiter, au moien de quoy leurs passions croissoient tousiours de plus en plus d'une part & d'autre. Or dom Brianges se trouuoit en fort grand' peine, pour n'auoir encores oncques ſeu parler à l'Infante en quinze iours qu'il auoit demeuré dans le lit: mais l'une des dernieres fois que la roïne les alla visiter, la belle & gracieuse Infante se vint ſeoir sur son lit, dôt il receut fort grand contêtement, & voiant que la roïne commēçoit à entrer en propos avec dom Rogel, & les autres damoïſelles avecque dom Florestan, il pensa a-

uoir trouué quelque oportunity pour decourir à sa dame, la ferme & loyalle affection qu'il lui portoit. Parquoy prenant une ſeure hardieſſe en son courage, à fin de bien employer l'ocasion qu'il auoit si long temps attenduë, il lui dit: ie ne ſçay ma dame, comme ie pourray assez vous declarer mes douleurs, ſans grieuement vous offencer: car attendu que la force de vostre grande beauté ne se peut teſmoigner par les œuures, il me sera bien difficile de vous la pouuoir faire entendre par mes paroles. Toutesfois, ma dame, vous pourrez, s'il vous plaist, ſupléer aisément à ce defaut qui est en moy de ne vous pouoir assez teſmoigner ma douleur, par ce qu'en cōprenant en vousmesmes la grandeur de vostre ſouueraine beauté, & de voz bonnes graces, vous comprendrez encores la grandeur de ce mal, lequel m'est autant difficile à dire, comme voz diuines perfections sont impossibles à exprimer. Partant avec toute la reuerence qui est deuë à vostre honneſteté, & de laquelle ie m'oblige à vous comme vray & loyal ſeruiteur, ie vous ſuplie, ma dame, me receuoir pour vostre Cheualier, & cōme à tel me departir quelque faueur, avec laquelle ie puisse ſouſtenir ma vie, & en la gloire que i'auray d'estre vostre, m'employer tellement aux hazardeuses entreprises, que ie puisse iouir de l'honneur lequel est deu à mes penſées, en l'eſperance ou ie me nourriray d'estre vn iour vostre mary & loyal epoux. L'infante ne fut moins troublee, que ioyeuſe de ces propos, troublee pour ne ſçauoir à grand' peine que reſpondre: & ioyeuſe ſe ſentant eſtre aimée en tout honneur de celui que tant elle aimoit. Finablement d'une voix assez baſſe, elle reſpondit: Seigneur dom Brianges, puis que vous m'aimez avec vn amour tant honneſte, & que vous ne voulez rien entreprendre, comme ie voy, de vostre ſeule volonté, ſans le conſentement de la miennē, ie faudrois par trop ſi ie ne vous aimois, & priſois pluſque tout autre

Cheualier de ce monde : attendu mesme-
ment que vostre prouesse, & mon hon-
neur ne sont en rien contraires à vostre
vouloir, ny au mien, & que la noblesse de
vostre sang s'acorde bien à mon haut li-
gnage. Demandez moy doncque desor-
mais toutes les faueurs qu'il vous plaira:
car ie suis deliberee de vous les otroyer,
moiennant que selon vostre promesse el-
les ne diminuēt rien de mon bon renom,
ny de mon honnesteté acoustumee. Alors
dom Brianges autant ioyeux qu'il scau-
roit estre possible, lui dist: Je vous supplie
donc, ma Dame, me donner vne de voz
belles mains, & receuoir l'vne des mien-
nes pour le gage de me prendre vn iour
pour espoux, & moy vous pour espouse:
& aussi à fin qu'en baisant vostre blanche
main, ie recognoisse les faueurs que vous
m'avez faites, & que ie commence à vo^r
faire hommage de la Seigneurie, laquel-
le vous aurez tousiours sur moy, iusques
à ce q̄ le trespas ayt mis fin à mes amours
& à ma vie. Adoncq' l'Infante d'vne fort
bonne grace, & sans que personne s'en
aperceust, presenta vne de ses delicates
mains à dom Brianges, lequel la baisant,
lui dist: Ma Dame, s'il vous plaist me pré-
dre pour vostre mary & seruiteur, ie vous
reçoy pareillement pour espouse: Je vous
accepte, dist l'Infante, pour tel que vous
vous donnez à moy, & me donne à vous
pour telle que vous me demandez. Ainsi
dom Brianges baisant la main de l'Infan-
te, elle dist: Il ne reste plus maintenant
pour l'entretien de nostre amour, sinon
que toutes les fois que l'ocasion s'offrira,
nous iouissions de la presence l'un de l'au-
tre, iusques à ce que pour les publicques
solemnitez du mariage, noz desirs se puis-
sent entierement accomplir. Entr'eux se
passerent plusieurs autres semblables pa-
roles au grand contentement des deux,
pour les gages de l'amour, & du futur ma-
riage qu'ilz s'estoient donnez l'un à l'au-
tre. Ce pendant dom Rogel ne receuoit
moindre plaisir de la veüe de Sarcire, la-

quelle le caressoit avecques toutes les gra-
cieuses œillades qu'il lui estoit possible,
car Marinde auoit desia acordé avec elle
que dom Rogel estant guery, elle & lui
parleroient ensemble tout à loisir à la fe-
nestre qui regardoit sur le iardin du Roy.
Or la Roine & sa cōpagnie estant retour-
née à son logis, l'Infante Griande descou-
urist à Sarcire tout son secret, & Sarcire
lui raconta pareillement la ferme amitié
qui estoit entre dom Rogel & elle, de sor-
te que de là en auant ces deux ieunes Da-
moiselles prenoient vn grand plaisir en la
compagnie l'vne de l'autre, pour deuiser
ensemblement de leurs amours. Mais les
Cheualiers estans gueriz, & faignans de
vouloir s'en aller, aux prieres du Roy &
de la Roine, ilz dirēt qu'ilz demeureroiēt
encores quelque tēps, & les alloient tous
les iours visiter assez souuent en leurs lo-
gis avecque grande resiouissance. En ces
entrefaites Marinde gouuerna tant bien
ses entreprises, qu'elle fit acorder l'Infan-
te & Sarcire qu'elles parleroient la nuit
prochaine à dom Rogel & à dom Brian-
ges, par la fenestre dont nous vous auons
parlé cy dessus: ce qu'elle pouuoit facile-
ment moiennier, car elle couchoit en la
chambre de l'Infante & Sarcire avecques
elle. Les Princes auertiz de cest acord, pas-
serent tout ce iour en grand' ioye, excep-
te dom Florestan, lequel encores qu'il le
dissimulast, s'ennuyoit fort en la ville de
Sparte, d'autant qu'il n'y auoit voulu fai-
re aucune amie, estimant que routes les
autres Damoiselles de la cité ne fussent di-
gnes de lui, fors l'Infante & Sarcire, que
les deux compagnons auoient desia rete-
nuës pour eux.

*De la bonne fortune que dom Rogel, &
dom Brianges receurent de l'infante Grian-
de & de la Duchesse Sarcire: & comme
ilz se departirent de Sparte au
grand regret de leurs
amyes.*

L'heure

CHAP. XXXVII.

L'Heure assignee entre ces amans ne fut si tost venue, que dom Rogel & dom Brianges crocheterent subtilement la serrure d'une porte de leur chambre, de laquelle lon descendoit dans le iardin du Roy, par vne petite vis toute droite, desrobée dans l'épaisseur de la muraille du Palais, avec l'excellente industrie de l'Architecteur qui l'auoit basti. Or n'eurent ilz demeuré long temps à la fenestre de la chambre de l'Infante, qu'elle & Sarcire les y vindrent trouuer : & là deuiferēt de maintz gracieux propos l'espace de trois nuitz qu'ilz les allerent ainsi voir & les sceurent tant bien supplier, qu'elles leur promirent de sortir la nuit ensuiuant dans le iardin, par vne faulx porte qui estoit en vn coing de leur chambre dōt Sarcire auoit la clef. Au moie de quoy la prochaine nuit venue, les Princes ne faillirēt à se trouuer dans le iardin, & se vindrent apuyer contre la porte par laquelle leurs Dames deuoient sortir, lesquelles ilz atendoient en bonne deuotion, comme esperans receuoir d'elles celle nuit le bien auquel ilz estoient tant affectionnez. En les attendant dom Brianges qui scauoit le secret de dom Rogel, & comme il aimoit l'Infante Leonide, lui dist en riant: le m'esbahis comme en aimant vne si belle Infante, vous lui gardez tant peu de loiauté. Et vous (dist dom Rogel) que ne l'avez vous gardee à l'une de ces Damoiselles q nous conquistmes sur les trois Cheualiers. Je n'vlay point lors de desloyauté enuers ma Dame (dist dom Brianges) car ie ne l'auois encores veüe. Maintenant ie ne voy non plus la mienne (dist dom Rogel) & elle voit encores moins ce que ie fais, & ne le verra si vous ne luy raporte, car ie m'assure bien tant de Sarcire qu'elle ne lui en dira mot. Que ne me dites vous encores (dist dom Brianges) que vous ne ressemblez en rien à voz ayeulx en loiauté. Je ne me fouciay iamais gueres de ces folies, dist dom Rogel. Il me semble (dist

dom Brianges) que vous n'aimez point si parfaitement comme moy: car autrement vous n'estimeriez point la loiauté que lō doit à sa Dame, estre folie. Dom Rogel lui respondit: le vous prie ne parlons plus de ces loiautez, car vous en parlez ainsi à vostre aise, par ce que vous estes aupres de vostre Dame: mais en vous esloignant d'elle, vous vous esloignerez encores de l'opinion ou ie vous voy à present: & quant à moy, me trouuant en la compagnie de ma Dame, ie fais ainsi, car il me semble que ie l'aime tant que iamais ie n'en dois aimer d'autre. Vous semble il donc pas, estant aupres d'elle (dist dom Brianges) que vous feriez mal d'en aimer encores vne autre? Ouy bien alors, dist dō Rogel. Pourquoi faites vous maintenāt le contraire? dist dom Brianges. Par ce (respondit dom Rogel) que quand ie ne suis point en sa presence, ie trouue encores les autres si belles, qu'il me semble que ce me seroit vne folie de les laisser, & mesmemēt quand elles sont pareilles à Sarcire, qui ne me desplaist en rien du monde. A ce que ie voy (dist son compagnon) pour chose dont ie vous puisse reprendre, vous ne laisserez point à iouir ceste nuit de sa beauté, au moins si elle s'y veult acorder. J'aimerois mieux (dist dom Rogel) qu'el les fussent desia venues, car ie songe plus à leur arriuee, que ie ne fais à vous respondre: & crains fort qu'elles ne nous ayent fait vne si belle promesse, pour se gaudir de nous, & nous faire icy attendre pour leur plaisir: toutesfois s'il vous semble que ie doie, comme vous dites, garder tant de loiauté à ma Dame, ie feray bien si vous voulez que vous en garderez ceste nuit encores autant à la vostre, en ne me separāt de vous: car si ie demeu rois seul avec Sarcire, elle auroit ocasion de m'estimer vn couard & lasche Cheualier, si ie ne faisois autre cas avec elle, sinō exercer la folie de ma loiauté. A quoy dō Brianges lui respondit: Il fera beaucoup meilleur, puis que vous n'en auez point gardé.

gardé iusques icy, que vous n'en gardiez point encores à présent. Dom Rogel aiât entendu quelque petit remuement de piedz comme celui qui auoit fort bonne oreille en telles auentures, dist à son cōpagnon: Taisons nous, de par Dieu, afin qu'elles n'entendent à nostre grand ennui, ce que nous disons pour nostre plaisir. Et de fait l'Infante & Sarcire s'approchoient, & estant arriuees aupres de la porte, l'Infante disoit à sa compagne: Ouurez vistement Sarcire, car en bonne foy i'ay si grand peur, que ie ne sçay que ie doy faire. Comment, ma damè (dist Sarcire) auez vous si peu de courage vous qui estes fille de Roy? vrayement atendu vostre hault lignage, il vous auient fort mal de craindre les hautes entreprises. L'infante lui respondit en riant, Vous vous abusez, car i'ay tousiours ouï dire que la plus grande prouesse est de sçauoir resister à la crainte. Puis que ie n'ay donc point de crainte (dist Sarcire) comment nommerez vous ce que ie fais? Temerité dist l'Infante. Qu'est-ce à dire temerité? dist Sarcire. Folle hardiesse, respondit elle. Folle hardiesse (dit Sarcire) me semble il bien de faire ce que vous faites avec crainte, & ce que ie fais en assurance, puis que nous nous allons hazarder à vn fort dangereux combat, ou nous ne pouuons acquerir que bien peu d'honneur: toutesfois nous pouuons trouuer quelque excuse, en disant que le vray amour ne peut receuoir aucun conseil. Faites semblant (dist l'Infante) d'estre bien empeschee à vous defendre contre vostre amāt car il y a bien peu de gloire, & encores moins de plaisir, en la victoire qui est cōquise sans trauail. Faites ce que vous pourrez (dist Sarcire) car quāt à moy ie feray comme ie l'entendray. L'infante se prit à rire, & lui dist: Parlez plus bas, ilz nous pourroient bien escouter, & ouurez, si vous deuez ouurir, car i'ay si grand peur en ces tenebres, & suis tant troublee en moymesmes, que par ma foy ie ne sçay

là ou ie suis. Pour Dieu, ma dame, parlez vous mesmes plus bas (dist Sarcire) car ie suis assuree que les deux Princes nous peuuent auoir ouies, au moins ie les ay entenduz bien pres d'icy. Helas, Sarcire, m'amie (dist l'Infante) retournons donc, i'aurois honte qu'ilz eussent ouï ce que nous auons dit ensemble. En bonne foy, ma dame (dist Sarcire) encores qu'ilz nous ayent ouis, puis que nous auons oublié de plus grandes choses, nous oublierons bien encores la honte, & ne ferons point si mal que de nous laisser quelque occasion de repentance à l'auenir, pour ne leur auoir tenu promesse. Cessez voz iazeries (dist l'Infante) & ouurez auant qu'ilz arriuent, afin qu'ilz ne nous oyent. Atant Sarcire ouurit la porte: mais les Princes qui auoient entendu tous leurs deus, s'estoient vn peu reculez arriere, afin qu'elles ne pensassent qu'ilz les eussent peu ouïr puis les voiant sortir aux rayons de la lune avecque vne grande beauté, & fort gente disposition de corps, dom Brianges se mit à genoux deuāt l'Infante, & lui dist: Je vous supplie, ma dame, me presenter voz belles mains, à fin qu'elles baissant ie recognoisse la faueur laquelle maintenant vous me faites. Elles sont desia vostres (dist l'Infante) avecque la condition que vous me les auez demandees, & que ie les vous pouuois donner. Pour ceste raison, ma dame, ie baise voz belles mains, puis qu'il vous a plu par voz gracieuses paroles, me donner la hardiesse laquelle autrement me defailloit. Mais ne prenez sur moy (dist elle) autre auantage que cestui cy: car tout ainsi qu'il vous auendroit mal de me le demander, il me seroit encores plus mal seant de le vous otroyer pour ceste heure. Dō Brianges lui respondit fort gracieusement: Ma dame, ie n'entreprendray rien sans auoir premierement demandé vostre congé. Alors dom Rogel prit Sarcire par la main, & dist à l'infante luy aiant premierement fait vne grande reuerence: Ma da
me, par

me, par ce qu'avecque la faueur que vo^s nous faites ceste nuit, à mon cousin & à moy, il seroit desraisonnable de m'en faire encores vne si grande, que de me presenter voz belles mains, il vous plaira donner congé à ma Dame Sarcire, afin qu'elle me presente les siennes, & me vienne vn peu monstrier les singularitez de ce iardin, lequel me semble fort beau & plaisant: & par ce, ma Dame, que de vostre part vous estes bien assuree avec vostre espoux, ie lui prometz aussi toute l'assurance qu'une Damoiselle peut auoir en la compagnie d'un Cheualier. L'infante se prit à rire, & dist: Ie vous donne congé, Sarcire, de vous promener avec le Prince dom Rogel, au moins si vous auez tât de hardiesse. Il me semble, ma Dame (dist elle) que vous en ayez beaucoup meilleur besoyn que moy: car souz la confiance de la loyauté des Princes de son sang, ie suis bien assez hardie pour faire de mon autorité seule, ce dont il vous a pleu me donner congé. Alors dom Rogel la prit par dessouz vn bras, & la mena dans le iardin, lui semblât estre en la compagnie de la plus gracieuse Damoiselle qu'il eust encores oncques veüe. Eux arriuez en vne petite coudraye, ilz s'assirent aupres d'une belle fontaine: & lors dom Rogel prenant par grand amour Sarcire entre ses bras, lui dist: Commēt sera il possible, ma Dame, que ie puisse iamais recognoistre la faueur que vous me faites maintenant? Ce sera (dist elle) en gardāt à vostre amie la loyauté que les Princes de vostre lignage ont en si grande recommandation. Ie le feray (dist il) & vous prometz, ma Dame, que ie vous seray loyal toute ma vie, comme à celle qui auez eu mes premieres amours, & qui aurez encores les dernieres. En bonne foy (dist Sarcire) ie ne vous croiray plus de chose que vous me disiez, car c'est vne mensonge trop claire de dire que vous veigniez d'un lieu ou il y a tant de belles Princesses comme en la cour de Constantinople, pour venir ici

donner à moy, & à la ville de Sparte, la gloire de voz premieres amours. Dom Rogel lui respondit en soufrian: A fin dōc ma Dame, que ie face trouuer veritable l'opinion laquelle vous auez de moy, que ie ne laisse point perdre les bonnes occasions qui s'offrent, & aussi pour vous satisfaire au surplus, ie vous donneray, s'il plaist, le gage assure de la vraye affection que ie vous porte. Ie ne me veux point fier en ce gage (respondit elle) & partant contentez vous d'vser enuers moy de paroles: car l'effect de ce que vous dites est trop contraire à mon honneur. Dom Rogel l'ayāt baissée plusieurs fois, & cognoissant qu'en telz hazardz les Dames aimēt plustost estre forcees par les œuures, que consentir aucunement par leurs respōses, il lui dist: Ma Dame en prenant par vne gracieuse force, ce dont vous ne me voulez donner congé, vous demeurerez sans faute, & moy sans le tourment lequel me pourroit passionner si maintenant ie ne scauois iouir de ceste oportunité tant desirée. Adonc le ieune Cheualier prit d'elle contre sa volonté le gage qu'il deuoit prendre pour se faire tousiours aimer d'une telle Damoiselle à l'auenir dont elle commença fort à se passionner, mais il lui monstroir vne si grande affection, & lui scauoit remonstrier tant de belles raisons, qu'elle fut bien tost apaisée, tellement qu'elle qui l'aimoit fort, quelque semblāt qu'elle fist, passa assez volōtiers vne grād^e partie de la nuit en ce soulas. Ce pendant dom Brianges estant demeuré seul avecques l'Infante, la tenoit embrassée, avec si grand plaisir qu'il ne songeoit presque à prendre d'elle celui qui est le plus desiré des vrayz amans. O ma Dame (disoit il) pleut à Dieu que ie vous peusse monstrier l'extreme ioye que ie reçoÿ, afin de vous monstrier pareillement combien a esté grande la douleur laquelle me l'a apareillee. O combien ie doy aimer les trois cheualiers lesquelz en faisant tort aux trois sœurs, m'ont esté cause d'un si grād heur!

L'infante.

L'infante lui respondit: Mon Seigneur & cher amy, ie vous supplie garder l'honneur qui est deuë à vne telle Damoiselle comme ie suis, ou si vous ne me la voulez garder pour la reuerence de mon lignage, gardez la moy à tout le moins pour l'honneur que vous me devez desirer, comme à vostre espouse: & ne rompez point le preuilege qui est deu à telles personnes, iusques à ce que les solemnitez du mariage vous permettent l'entier accomplissement de voz plus affectionnez desirs. Ma Dame (dist il) le temps present & le temps duquel vous parlez, nous reuiennent tous deux à vn, & n'y a aucun tēps à venir qui ne m'accusast à bō droit, si i'auois mal employé le temps present, & l'oportunité que i'ay de iouir du plus grād heur que ie pourrois iamais desirer, veu mesmement que souz le tiltre de vostre espoux, le preuilege de ceste iouissance m'est permis. Je vous supplie donc, ma Dame, puis que desormais ie ne pourray plus me plaindre du temps, que ie ne lui laisse pareillemēt aucun moie de se plaindre de moy. Acheuant ces paroles, encores que l'Infante lui fit resistance de tout son pouuoir, il recueillit entierement les premieres fleurs de sa beauté, puis les courroux apaisez, avecques vne double ioye, cōme ceux qui s'entr'aimoient d'un loyal & ardent amour, ilz continuèrent ce plaisir iusques à ce que la douce musique des oiseaux du iardin leur annonça la prochaine aube du iour, qui les contrainit à se departir avecques maintes reuerences & caresses d'une part & d'autre. Ainsi les deux Princes se retirerēt en leur logis, & leurs amies au leur, lesquelles s'allerent recoucher, & demurerent long tēps au lit sans oser dire mot l'une à l'autre. Finablement l'Infante dist: En malle heure, Sarcire, me laissastes vous oncques toute seule, car ie vous voy maintenant tant muette, que ce silence ne me promet rien de bon. Je vous supplie, ma Dame (respondit elle) ne me dire mot: car vous

estes cause du tout, m'ayant ainsi enuoiee seule avec vn tel Cheualier: puis doncques que ie souffre assez de peine pour ce que i'ay fait, ie vous prie ne m'en donner d'auantage pour ce que vous me pourriez dire. Qu'est à dire cela, dit l'Infante. C'est à dire (respondit elle) que i'ay fait la mesme faute que vous avez faite: mais laissons ces railleries puis que nous les auōs achetees si cher, & donnons ordre à faire si bien que nous en puissions iouir desormais sans que personne s'en aperçoie. Ce qu'elles firent depuis, car elles passerent presque toutes les nuitz des quatre mois ensuiuans en tel plaisir. Dom Brian ges le plus souuent demouroit seul dans le lit de l'Infante, & dom Rogel emmenoit secretement Sarcire avecque lui dās sa chābre, puis la ramenoit sur l'aube du iour. S'estans oubliez en ces delices assez lōg tēps l'honneur cōmença à les acuser en eux mesmes, cōsiderans la grande honte que ce leur seroit de consumer ainsi leur ieunesse. Par tant avecque assez de peine, ilz se departirent de leurs amies, prometans de biē tost les retourner voir, ou d'enuoyer ambassadeurs pour demander l'Infante en mariage, laquelle emmeneroit avec elle, Sarcire, qui estoit triste iusques à la mort pour se voir ainsi separer de son Rogel. La fortune les frauorisa fort de ce qu'elles ne se trouuerēt poir grosses apres leur depart, auāt lequel ilz moiēnerēt le mariage des trois sœurs, & des trois freres qui leur auoiēt osté leurs trois chasteaux, parce qu'ilz les en firent prier, & aussi qu'ilz estoient des pl⁹ grāds Seigneurs du Roiaume de Sparte. Les Princes donc aians pris congé du Roy, & s'estant fort offerts à lui, & lui à eux, ilz delibererēt de s'en aller en l'Isle de Guindaie, sans se donner à cognoistre, pour les grandes & estranges auentures, qu'ilz auoient entendu y arriuer de iour en iour esquelles ilz esperoient esprouuer leur haute cheualerie. Selon ceste deliberation ilz s'embarquerent au plus prochain port de mer, &

mer, & prindrent la route de Guindaye; ou nous les laisserons singler avec bon vent iusques à ce que l'ocasion s'offre de reparler encores d'eulx.

Comme dom Florisel de Niquee & Daraïde furent ietez par la tempeste en vne Isle, ou ilz trouuerent vne fort estrange auenture.

CHAP. XXXVIII.

DOm Florisel & Daraïde nauiguerent avec bon vent cinq iours entiers, pendant lesquelz elle lui faisoit tout l'honneur qu'il luy estoit possible de faire? & lui à elle, en façon que le grād amour qu'il lui portoit, ne sembloit point lui deuoir permettre d'entrer au combat duquel il pensoit qu'elle le deust requerrir. Continuans ainsi leur nauigation, le temps commença à se changer, & la tempeste à s'enleuer de façon, que par l'espace de huit iours ilz furent en grand danger de perir, mais finablement leur nef surgit en vne belle Isle, ou ilz prindrēt terre en vn port, auquel y auoit vne autre nef ancree, en laquelle ilz n'aperceurent que quelques matelotz, par ce que ceux qui l'auoient là conduite, estoient sur le riuage souz des tentes garnies de diuerses sortes d'armes. Alors dō Florisel & Daraïde las du travail de la tormente, delibererent de s'armer, & s'aller eux mesmes enquerir en quel pais ilz estoient, par ce que leurs mariniers ne leur en pouuoient rien dire: à raison dequoy ayans pris leurs harnois, commanderent que lon tirast leurs cheuaux, ce pendant qu'ilz parleroient à ceux qui estoient sur le riuage: puis estant arriuez pres des tentes, trouuerēt plusieurs Dames & Cheualiers lesquelz esmerueillez de leur belle representation, les saluerēt, & eux les aiāt pareillementaluez, Dom Florisel leur dit Bons Seigneurs, ie vous prie nous dire s'il vous plaist qu'elle contree est ceste-cy en

laquelle nous sommes venuz sans la cognoistre, & quelle fortune vous y a ainsi amenez? Vne damoiselle la plus belle de toutes, & pl⁹ richemēt acoustree encores qu'elle fut vn peu amaigrie & deffaite, leur respōdit, Seigneurs Cheualiers, ceste cōtree se nomme l'Isle d'Artadeffe, de laquelle pour maintenāt est Seignr vn fort & horrible Geant, lequel a avecque lui trois siens freres autant inhumains & espouuentables qu'il pourroit estre. Or en ceste Isle, sur vn hault rocher y a vn beau chasteau, dās lequel on voit la plus estrange & pitoyable auenture qu'il sçauroit estre possible de penser: mais par ce que le recit en est vn peu lōg, il vous plaira vo⁹ assoir, aumoins s'il ne vo⁹ ennuye de l'entendre. Nous ne pourrions nous ennuyer (dist dom Florisel) car ce nous sera grande faueur d'auoir appris ceste tāt memorable auenture, d'vne tant belle & gracieuse Damoiselle comme vous estes. Adonc on leur aporta deux chaizes dans lesquelles ilz s'assirent, & la Damoiselle continua ainsi son propos: Sachez mes bons Seigneurs, qu'en ceste Isle y auoit vn Roy lequel aimoit fort vne sienne fille nommee Danistee, tant pour sa parfaite beauté & bonne grace, cōme pour n'auoir autre heritiere qu'elle de sa lignee. En ce temps vint en sa cour vn Cheualier estrange, nō moins adroit aux armes, que beau & bien proportionné de tout son corps, tellemēt que le Roi fut cōtēt de le retenir en sa compagnie, & lui fit beaucoup d'hōneur en tout ce qu'il lui fat possible. Ce Cheualier, cōme lon sceut depuis, aimoit l'Infante Danistee, fille du Roy, laquelle ne l'aimoit moins que soi-mesmes, & en ce contentement qu'ilz receuoient iouissans des amours l'vn de l'autre, ilz ne se sceurent tant bien couvrir, que le Roy ne fut auerti du tout, & entra en telle colere qu'il ne sçauoit quelle vengeance prēdre, ny de sa fille, qu'il auoit tant aimee, ny du Cheualier qui lui auoit fait tel deshonneur, en recompense de l'hōneur & du bō

traite.

traitement, qu'il auoit receu en sa maison. En ceste douleur il fit appeler vn magicié qui pour lors demouroit en son Isle, & lui descourrit son vouloir, le priât trouuer quelque moien par lequel il peust prèdre du Cheualier, & de sa fille, vne vengeance pire que la mort, & condigne à leurs demerites. Le Magicien respondit au Roy qu'il lui laistast ce soucy, & qu'il en feroit son deuoir, lui promettant qu'il mettroit les deux amans en vn fort douloureux estat, duquel ilz ne pourroient estre deliurez iusques à ce que certaine prophecie fut acomplie, laquelle il laisteroit escrite aupres d'eux. Les choses ainsi arrestees, auint vn iour, le Roy estant dás le chasteau de Belleueüe: car ainsi se nome le chasteau qui est sur le sommet du rocher, que l'Infante Danistee, & le Cheualier estrange, se trouuerent seulz par fortune en vne des plus riches chambres du chasteau, par ce qu'ilz s'entr'aimoient de grand amour, ilz coururent soudain s'embrasser & acoller fort affectueusement. Mais tandis qu'ilz s'embrassoient ainsi, il leur auint vne des plus estranges auentures, ou plustost desauentures, de laquelle on ouit iamais parler: car il sembla à l'Infante que le Cheualier fust soudainement mort entre ses bras, & sembla pareillemēt au Cheualier que l'Infante estoit trespassee entre les siens: tellement que les deux loyaux amans commencerent chacun à leur tour, à faire l'vn pour l'amour de l'autre, les plus douloureuses plaintes que l'ſçauroit penser. Estás ainsi embrassez en ceste mortelle angoisse, le Magicien les mit par ses enchantemens en vn grād vase de cristal, qui n'a aucune ouuerture, ou ilz sont tous deux renfermez comme en vne chasse, puis les mit sur vn riche autel qu'il fit apareiller en la mesme chambre, avecque douze grands chandeliers d'argent, qui sont à l'entour de douze degrez par ou lon monte iusques à l'autel: & dás ces douze chandeliers, y a douze flambeaux de cire vierge, qui ardent continuel-

lement, & acouplent toutes leurs flames sur la teste des deux amans enchantez. Les ceremonies ainsi soleminisees, le Magicien commanda que de la en auāt on les nōmast, LES DIEUX DES FLAMES INFERNELLES D'AMOUR, & que pour telz ilz fussent adorez, disant que tous ceux qui seroiēt passionnez par trop aimer, receuroient grande allegeance de leurs martires, en les adorant pour Dieux & en leur faisant leur offrandes. A ceste raison de tous les roiaumes circōuifines ceux qui sont embrassez de l'amour, viennent icy rendre leurs veux. Biē tost apres que les deux amants furent enchātez en leurs eternelles lamentations, ceste Isle fut prise du Geant qui maintenant en est seigneur, & le Roy d'icelle mis en prison: & y a enuiron douze ans que dure ceste tyrannie, laquelle se maintient principalement dans le fort chasteau de Belleueüe, ou lon ne laisse entrer personne pour esprouuer l'aucture, qu'on ne leur face laisser les armes, & iurer qu'ilz ne feront autre chose sinon prier LES DIEUX DES FLAMES INFERNALES D'AMOUR & leur rendre leurs offrandes: & souz telles condicions, deux des Geans armez de toutes pieces les y conduisent: ce qu'ilz font à fin que l'enchantement ne se deface, pour la grande richesse des offrandes qu'ilz en reçoient tous les iours. Voylà seigneurs Cheualiers, la respōse de ce que vous m'avez demandé, & quelle fortune m'a icy amenee, car tous ceux & celles que vous voyez icy, sont du païs de Lidie, lesquelz naurez de l'amour, ainsi que moi m'ont acompagnee en ce mien voyage, vous assurant qu'apres auoir fait noz offrandes, nous auons senty grande allegeance de noz passions. Maintenant nous atendons la disposition du temps pour retourner chacun en sa maison: Quant à moy ie suis duchesse de Galte, & ces deux prochaines tentes sont pleines de gentilz hommes, & de Damoiselles que i'ay amedez avecque moy pour mon seruice. Regardez

gardez si vous auez besoing de ce qui est en ma puissance, car ie vous prie ne l'espargner. A tant la Duchesse se teut, laissant les deux Princes fort esmerueillez de ceste auenture, & trescontens de ses gracieux offres, dont ilz la remercierent, puis dom Florisel lui dit: Veritablement, ma Dame la Duchesse, vous nous auez recité des choses fort estranges, & desire fort esprouuer ceste auenture: mais ie vous supplie me dire encores si dans le chasteau n'y a autre deffence que des Geans. Non (respondit la Duchesse) excepté quelques seruiteurs, qui sont suffisans, veu l'assiete du lieu, pour le deffendre par force contre tout le monde. Vray est que du hault du chasteau lo voit plusieurs fortes places de l'Isle, & maints villages deçà & delà, qui est chose tresplaisante à voir. Alors dô Florisel dist à Daraïde: Voulez-vous que nous aillions voir que c'est? Il n'y a chose (respondit elle) que ie face plus volontiers, au moins s'il vous semble bon. No^s estions de pareille volonté (dist dom Florisel) car sachant combien est grande la douleur des passions amoureuses, ie m'essayeray à mettre en liberté ceux qui par la rigueur de l'amour sont si miserablement abusez en vne tant pitoyable doléance: mesmement qu'avec vostre ayde, ie n'auray crainte de m'essayer aux plus hazardeuses entreprises, desquelles on ait encores ouy parler. I'y feray ce qui me sera possible (dist Daraïde) car si vous estes bien experiimété aux passions de l'amour, la beauté de ma Dame Diane ne m'en a moins donné d'experience, pour me faire prendre pitié de ceux qui viuét en telles angouilles. La Duchesse voiant leur delibération, & pensant que ce fust folie & temerité d'entreprendre vne chose tant impossible, leur dit: Je n'estime point que ce soit prouesse de vous hazarder à vn peril, ou l'esperance de la victoire est si petite, & duquel le peu de seurété qui s'y trouue, vous peut assez deliurer, sans faire aucune tache à vostre honneur. Puis dôc

que personne ne vous force d'entreprendre ceste auenture, ne forcez point tant vostre volonté en vn combat si mal comparty, que par vostre outrecuidance vous viegnez à souffrir la force que souz couleur d'vne hardiesse peu profitable vous apareillez à autrui. Dom Florisel lui respondit, Vous dites bien, mais la force ne nous mâque point, ny pour forcer nostre volôte, ny pour faire reparer la force qui se fait ici à deux miserables amans, & à vn pauvre Roy prisonnier iniustement depose de son Roiaume. Partant nous vo^s recommandôs à Dieu, avec l'aide duquel nous esperons faire aujourd'hui cesser les violences qui se cômettent en ceste Isle. Les Dieux vous vueillent secourir (dist la Duchesse) car vous en auez bon besoing, veu le peril euidant auquel vous vous allez auenturer. Adonc on amena leurs cheuaux, sur lesquels ilz monterent, & prendrent leur chemin en vne espoisse forest, par laquelle on leur dist que lon alloit au chasteau de Belleveue. Ilz auoient leurs armetz en teste, & les escuz au col: mais ilz n'eurent gueres long temps cheminé, qu'ilz rencontrerent vne grande compagnie de Cheualiers, de Dames & Damoïselles routes vestuës de robes de fine escarlade, semees de plusieurs boutons d'or sur le milieu des decoupures. Apres elles venoit vn riche chariot branlant, couuert de velours cramoisi figuré, & mené par deux blanches Licornes, ayans les selles & garnitures de pareille façon que la couverture du chariot. Daraïde pensoit bien auoir veu en quelque part ailleurs aucuns de ceux qu'elle rencontroit, puis estant aupres du chariot, elle auisa dedans vn Cheualier & vne Dame de grande beauté tous deux richement vestuz de pourpre embellie de diuers ourrages d'orfauerie, lesquels ne l'eurent si tost aperceue avecque dom Florisel, qu'ilz dirent à haute voix: O Deesse Venus, soys nous en aide, côme l'vn de ces deux Cheualiers ressemble bien en grandeur de corps, & en son

braue maintien à la victorieuse & renommee Daraïde! Quand Daraïde les ouït ainsi parler, elle les regarda plus ententiuement, & les recogneut tout soudain, car le Cheualier, estoit le Roy, & la dame, la Roine de Galdap, lesquels naurez de l'amour de Daraïde, & fort tristes & douloureux pour son absence, estoient venuz en celle Isle pour allegger leurs passions, incontinent apres qu'un Magicien les eut fait retourner en leur bon sens, comme il vous a esté deduit sur la fin du precedent volume de ceste grãde histoire: & lors ilz retournoïent en un autre prochain port, où ilz auoient fix nefz bien fretees & equipees. Daraïde les aiant recogneuz, dist tout bas à dom Florisel, qui estoit fort enuieux de les cognoistre, le vo⁹ prie ne vous arrester point, car ie ne veux pas estre cogneuë pour quelque raison que ie vous diray maintenant. Ainsi estans passez tout outre, Daraïde dist à dom Florisel: Sçachez monsieur que ceux cy sont le Roy & la Roine du Roiaume de Galdap, auquel m'auint vne chose fort estrange: car la Roine pensant que ie fusse un Cheualier deguisé en Damoiselle, & le Roy me prenant pour telle que ie suis, furent fort mal traitez en mes amours, de sorte qu'ilz sortirēt tous deux hors de leurs sens: maintenant ie suis fort ioyeuse de les reuoir sains & en bonne disposition. Puis à la requeste de dom Florisel, elle poursuiuit tout le surpl⁹ qui lui estoit auenu dans le Roiaume de Galdap, & partant dom Florisel lui dist: Le m'esbahis donc, ma Dame Daraïde, comme vous ne reparez premierement la force que vo⁹ faites à ce Roy & à ceste Roine auant que d'en vouloir reparer vne laquelle n'est point si bien en vostre puissance comme ceste-cy. Comment cela? monsieur, dit Daraïde. Parce (respondit il) qu'il me semble que vo⁹ soyez trop cruelle de passer ainsi outre sans parler à ceux, lesquels vo⁹ portent vne si bonne affection que ie pense, selon ce que vous m'avez dist, que vous soyez la seule ocaïon pour laquelle ilz sont

icy venuz faire leurs offrandes. Veritablement (dist Daraïde) ie serois encores plus cruelle que vous ne dites, si en me donnāt à cognoistre à eux, & en leur tenant propos, mon regard ne leur deuoit point renoueller ny acroistre leur maladie, plustost que leur donner aucun allegement: veu que pour le regard du Roy, l'honneur & la bonne renommee m'en empeschent & pour le regard de la Roine, ie n'en ay aucune puissance pour n'estre du sexe qu'il me conuiendroït estre pour satisfaire à ses desirs. Ainsi deuïsans gracieusement sur ce propos, ilz sortirēt de la forest, & aperceurent au milieu de la plaine, les hautes roches sur le coupeau desquelles estoit le plaisant chasteau de Belleueuë environné de plusieurs belles tours couuertes de plomb, diuersement ouuré, & doré, & fort reluisant aux rayons du soleil qui reuerberoient à l'encōtre. Au mylieu du chasteau aparoiïoit vne autre grosse tour, laquelle estoit tant haute par dessus tout l'edifice, que la pointe estoit meslee entre les nuës. Lon voyoit au bas dans la plaine plusieurs petits marescages, peuplez de toutes especes d'oyseaux de riuiera, avecques quelques petits arbrisseaux. Les Princes trouuoïent la contree fort plaisante, & suiuant toujours leur chemin, arriuerent au pied des roches, par lesquelles ilz peurent monter à cheual vironans toujours à l'entour assez long temps, iusques à ce qu'ilz se trouuerent à un droit & estroit sentier, auquel ilz mirent pied à terre & atacherent leurs cheuaux au tronc d'un arbre, & ainsi montāt à pied ce peu de chemin qui leur restoit, dom Florisel disoit à Daraïde: S'ilz ne viennent que deux ou trois desgeans contre nous, il faut que nous combatons vis à vis, ou à tout le moins flanc à flanc l'un de l'autre: mais s'ilz venoient en grand multitude, il nous faudra rāger dos contre dos, à fin de nous tenir plus asseurez. Il me semble (respondit Daraïde) que vostre seule compagnie me rend assez asseuree sans vser d'autre discretiō toutes-

fois.

fois ie feray ce qu'il vous plaira me commander. C'est moy (dist dom Florisel) qui me tiens le plus aisé pour la confiance que i'ay en vostre prouesse, toutesfois l'on ne peut iamais faillir à faire grand cas des entreprises pour faciles qu'elles puissent estre: car bien souuent par l'oubly auquel on se trouue pour les auoir en peu d'estime, l'on perd encores la raison, & l'entendement, qui estoient necessaires pour en venir au dessus: tellement que ce qui estoit estimé facile au commencement, se trouue tresmalaisé & impossible sur la fin. Or par ce que la force de l'ame, qui est la raison, est la chose principale qui soit en l'homme, il se fault dōner garde de iamais ne s'oublier en cest endroit, à fin de ne mettre nostre fiāce en la temeraire force du corps, qui nous est commune avec les bestes, & laquelle peut estre surmontee d'une plus grande force, ou paraenture d'une moindre, qui sera aidee d'un bon conseil, & d'une sage discretiō: ce qui ne peut auenir en la force de l'ame, laquelle bien acompagnee d'industrie, & de ruzes, se fonde entieremēt sur la prudence, moderant aussi tost les petites entreprises, comme les plus grandes, par une raison bien deliberee: car par tel moien les grāds dangers sont amoindriz, & les choses faciles sont encores rendues plus aisees. A raison de quoi les sages chefs de guerre ne craignēt seulement la meslee de la bataille, mais ilz craignēt encores que l'issue (cōbien qu'elle soit heureuse) ne se trouue autre qu'ilz l'auoient premierement deliberee en leur conseil: car alors la victoire ne doit point estre tāt attribuee à leur vertu, comme à l'inconstance de la fortune. Monsieur (dit lors Daraide) vous avez tant bien parlé, q'ie n'estime moins vostre prudēce, que vostre force m'aiāt fort bien dōné a cognoistre que celui qui accompagne la prouesse du corps avecque la dexterité de l'esprit, ne se peut employer en aucune forte entreprise, que sa mort, ou sa vie avec la victoire, ne lui acquierent une immortelle

renōmee. Il ne me semble point (dist Florisel) qu'en ces propos ie vous aye fait aucune faueur, veu q'ie ne sçauois estre si eloquent pour bien les dire, que vous ne soyiez trop plus sage & cheualereuse pour les executer encores mieux. Acheuāt ces paroles ilz arriuerēt à l'entree du chasteau, ou ilz trouuerent souz le portail qui estoit ouuert, douze vilains armez de haches, & de cabassetz, lesquelz n'eurent si tost auisé les deux Cheualiers, qu'ilz se leuerent, & leur dirent: Sçavez vous pas la volonte du Roy Galfambrof nostre maistre, qui est que si vous voulez venir ceās faire voz offrandes, il vous conuient laisser les armes? Si nous les eussions voulu laisser (dist dom Florisel) nous n'eussions esté gueres sages de prendre le trauail de les apporter iusques icy hault, car nous les pouuions biē laisser en bas. Que veut-on dire par cela? dirent les vilains. Que vous nous laissez entrer tous armez, respondit dom Florisel. Vous serez autant bien excusez de ce trauail (dit l'un d'eux) comme vous vo^s fussiez excusez de celui que vo^s avez pris en aportāt icy voz armes, si vo^s eussiez esté autant sages, comme ie vous pense estre solz: car l'on ne peut entrer ceans armé. Et si l'on peut (dist le Prince) nous serons excusez d'auoir pris le trauail que tu dis. En disant ces paroles, & passant souz le portail du chasteau, les vilains se mirent au deuant: mais il en poussa vn de telle roideur, qu'il l'enuoya, & celui qui estoit derriere lui, heurter de l'eschine cōtre terre. Puis mettant la main à l'espee, les vilains commencerent à le charger & par ce que deux d'entr'eux se ietterent d'entree trop pres de lui, de deux coups il fit sauter leurs deux cabassetz, & leurs deux testes dans la place. Daraide qui n'auoit encores fait que regarder la belle maniere de fraper qu'auoit dom Florisel, mit pareillement la main à l'espee, & par ce q' quelques vns des vilains la pēsoiēt embrasser corps à corps, pour la jetter bas elle donna deux relz coups de pōneau d'espee sur

deux de leurs morrions que les pieces & la ceruelle des deux vilains demeurèrent meslees ensemblement, de sorte qu'ilz trebucherent mortz par terre aians les testes enfondrees. Leurs compagnons ne pouuans guerres plus durer cōtre les deux Princes, commencerent à fuir vers le premier mur & principale porte du chasteau ou l'un d'eux sonna en passant vne trompette qui estoit pendante contre vn perron de marbre. A ce son vn fier & demesuré Geant se monstra à la fenestre, & voiant la tuerie de ses valletz, tout esbahi de la hardiesse des deux Cheualiers, leur dist d'une voix horrible & espouventable: O creatures viles & folles, qui vous a fait si outrecuidees que de venir icy chercher vostre miserable mort: Attendez moy, car si vous m'attendez, elle ne vous maquera, & si vous fuiez, vous ne la pourrez elchaper en aucun endroit de ceste Isle. Geant (dist Daraïde) si ainsi comme dites nous deuons mourir, nous ne voulons estre si folz que de prendre le trauail de la fuite, outre la grande couardie que ce nous seroit de fuir vne mort contrainte, attendu la differēce qui est entre vne mort honorable, & entre celle de ceux qui meurent par faute de cuer. Partant descens icy bas & laisse ton outrecuidee arrogance, si tu nous veux faire plus de peur. Atens moy (dist le Geant) car ta folie te coustera bien cher. Adone le Geant s'osta de la fenestre, & tous les vilains s'en estās fuïs, les Princes entrerent dans la basse court du chasteau, ou ilz trouuerēt fermees les portes par lesquelles on montoit dans les grandes galleries: lors Daraïde dist à Florisel: Mōsieur ie vous supplie me laisser cōbatre seule contre celui auquel i'ay promis de l'atēdre, à fin que ie puisse auourd'hui acquerir ce peu d'honneur entre la grāde gloire laquelle ie vous voy apareillee, attendu qu'en vostre compagnie ie ne puis autrement meriter aucune louange, sinon de vous auoir fait quelque petit seruice, duquel vous vous fussiez facilement

passé pour la haute cheualerie dont vous estes renomé par dessus to⁹ les Princes du monde. Tresexcellente Daraïde (dist dom Florisel) ie suis ioyeux dont vous me donnez cest honneur par voz paroles, comme sachant que par l'effect vous conquerrez la premiere gloire de ceste entreprise: & partant reposons nous vn peu, car i'entens bien ce que vous demandez. Ainsi s'apuyās sur la croisee de leur espees ilz atendoient la sortie du fier Geant.

Du cruel combat que Florisel, & Daraïde eurent avecque les Geans dans le chasteau de Belleueñ. & comme par leur sçauoir plus que par force d'armes ilz sortirent du grand danger, ou ilz estoient apres leur victoire.

CHAP. XXXIX.

Bien tost apres s'aparurent dans les galleries qui regardoient sur la cour du chasteau, trois Geans de desmesuree grandeur, c'estoit le Roy Galfambrof & ses deux freres: puis celui qui premier s'estoit monstré à la fenestre, ayans pris ses armes faites de fortes escailles d'acier, & vn grād pauois dās le bras gauche, avec vn large coutelas en la main droite, ouurit la porte des degrez, & descendant en la basse court, dist d'une voix espouventable, Miserables Cheualiers, afin que le combat soit plus tost acheué, & que ie ne face tant d'honneur à ceux dont ie doy tenir si peu de conte, venez vous en tous deux ensemble contre moy: car parce moien ie vous dōneray plustost le guerdon de vostre outrecuidāce, & à moy l'esfay de ma haute cheualerie. Daraïde qui ne s'estonnoit aucunemēt de son orgueil, lui respondit Geant, la vaine gloire de tes propos m'a osté la crainte que ie pouuois auoir de ta force: & sçaches que tu es maintenant en lieu ou tu perdras la folle opinion dont ton arrogance, t'abuse: Mais tu t'abuseras encores beaucoup plus, si tu penſes que nous nous estimions tant peu, & que nous faciōs si grād conte

conte de tes brauades & vanteries, que nous daignons nous mettre deux ensemble contre toy. Adoncq' bien couuerte de son escu, elle s'aprocha du Geant, & commencerent entr'eux vn fort beau combat: car Daraïde voulant môstrer sa prouesse deuant le Prince, faisoit merueille de fraper, ietât par grande puissance maints horribles coups, & rabatant par nô moindre dexterité ceux du Geant, si qu'en peu de tēps il estoit tout couuert de son sang, sans qu'elle fust encores aucunemēt blesee. Dom Florisel estoit fort esbahy de sa force, & encores plus de son adresse, & ne lui sembloit point (excepté l'Empereur Amadis de Grece) iamais auoir veu combattre Cheualier d'une si bonne grace, ny qui se peut comparer à elle: de sorte qu'ayant quelque fois raconté ce combat à son pere, il en demeura tout estonné ainsi que tesmoigne Galeris. Or continuans leur escrime le Geant haüça son coutelas de toute sa puissance, pensant ataindre Daraïde sur la teste: mais elle voyant venir le coup, se tira vn peu à quartier, & croisa le coutelas avec son espee, se rencontrans de telle roideur taillant cōtre taillant, que le coutelas du Geant fut taillé par la moitié: En quoy lon peut cognoistre la force de Daraïde, & la bonté de son espee au grand esbahissement de tous ceux qui les regardoient combattre. Le Geant qui cognoissoit que veu la legereté, & boté des armes de son aduersaire, il n'en pourroit venir au dessus par tel moien, ieta le reste de son coutelas en terre, & vint ioindre Daraïde corps à corps, pensant emporter à la luyte, ce que le combat de l'espee luy auoit denié. Mais l'issue n'en fut telle comme il pensoit: car ayant desia perdu beaucoup de son sang, il se trouua tellement affoibly, qu'à la seconde secoussē que Daraïde lui donna, elle le fit tomber en terre, & elle tomba quant & quant sur luy, par ce qu'il ne voulut onc habandonner sa prinse: puis sans lui donner aucun loisir de se releuer, lui fourra par le dessouz

de la maille, son espee iusques aux gardes: de sorte qu'en meisme instant le Geant auēc vn hurlement effroyable laissa sortir l'ame despitée de son corps, & Daraïde d'entre ses bras. Adonc le Roy & ses deux freres fort tristes, & faisans plus d'estime des Cheualiers qu'ilz n'auoient pas fait auparauant, coururent prendre leurs armes: & ce pendant dom Florisel s'aprocha de Daraïde, & lui dist: Il sera bon que vous reposiez, & que vous me laissiez traualier à mon tour: car vous auez fait pour maintenant. Je ne pense pas (respondit elle) qu'ilz nous vueillent laisser en repos, & partant, monsieur, montons là hault si vous le trouuez bon, car ie ne suis point en tel estat que ie ne vous puisse bien encores aider. Montons, dist dom Florisel. Alors ilz monterent dans la galerie, ou ilz trouuerēt à l'entree d'une grande sale plus de vingt hommes avecques ceux qui s'en estoient premierement fuis to' arméz de hallebardes, & de cabassetz: mais en peu de temps ilz firent vne telle boucherie des vns, que les autres s'en fuirent en la mesme salle de laquelle ilz estoient sortiz, ou les Princes ne les eurent gueres suiui, que l'un des Geans armé de toutes pieces faillit de l'autre costé de la salle. Dom Florisel l'aperceuant, dist à Daraïde qu'il la prioit de le laisser combattre seul contre ceste grande beste, iusques à ce qu'ils fussent vënuz en plus grād nombre: & ainsi marcha vers le Geant, lequel groumeloit mille horribles menasses. Adonc ilz commencerent à s'entrechamailler si rudement, que Daraïde estoit toute estonnée de la prouesse de dom Florisel, car il sçauoit fort bien rabatre les coups du Geant, & lui faire sentir les siens, sans en ieter vn seul en vain. Bien tost apres le Roy & son autre frere, tous arméz, avec toute la canaille qui s'en estoit premierement fuie, commencerent à entrer dans la sale: mais dom Florisel les voyant venir, se ioignit assez pres du Geant contre lequel il combattoit, & le prenant au des-

couvert de son pauois, lui donna tel coup d'estoc dans l'estomach, que les armes traspicees, l'espee lui entra iusques dans l'espine du dos, & s'arresta contre l'armure de derriere. Le geant le voulut refraper, mais il ne sceust onc, par ce qu'il estoit trop pres de lui, seulement il lui donna du pommeau sur son escu, qu'il tenoit dessus la teste, & fut le coup si pesant que le Prince tomba presque tout estourdy, toutesfois se tirant vn peu à quartier, & retirant son espee, le geant sentant la rage de la mort, laissa tomber la sienne, & hurlant avec vne horreur dont tout le chasteau retentist, il alloit chancelant deçà & delà, versant vn si large ruisseau de sang, que les parois & le planchier de la salle estoient tous arrosez: de sorte que biē tost apres il s'en alla tomber roide mort deuant les autres deux geans ses freres. Eux enflamez de colere & de despit: & blasphemans tous leurs Dieux ensemble, vindrent comme lyōs enragez assaillir avec que leur suite dō Florisel & Daraide, qui les receurent courageusement, & commencerent vne tant furieuse meslee, & avec tel bruit des armes, & des brans d'acier qu'on les eust estimez estre plus de deux cens Cheualiers en nombre. Ce combat estoit fort mal departy, & douteux pour les Princes, à cause des vilains qui les assailloient sur les costez, & les empeschoient de ne pouoir si biē rabatre les coups des geans comme ilz eussent voulu: & partāt ilz ne se pouoient garder d'estre aucunement blesez. Toutesfois les vilains aīās par deux autres fois expérimenté leurs pesans coups, ne s'osoient pas aprocher trop pres d'eux, ains les vns les frapoint de loing, & les autres leur ietoient quelques dards, & leurs propres hallebardes. Les deux Princes voulans faire voir leur prouesse l'vn à l'autre, faisoient merueilles de fraper, chacun s'esmerueillant de son compagnon. Et par ce que les vilains n'auoient plus riē que leur ietter, ny de quoy les assaillir, dom Florisel & Daraide

tenoient tous leurs dards & haches sous les piedz, sans que les vilains s'osassent aprocher d'eux pour les releuer. Au moie de quoy ilz combatoient contre les geans assez à plaisir, & les auoient desia tant naurez, qu'ilz estoient tous couuertz de leur sang, & fort lassez & affoibliz: & cōbien que les Princes eussent aussi receu quelques plaies, ilz ne laissoient pourtant à les poursuiure tousiours de pres, s'aperceuant de leur auantage. Ainsi se continua leur combat enuiron deux grosses heures: mais finablement les geants cognerent leur mort prochaine, car ilz estoient tant foibles pour la perte de leur sang, qu'ilz ne pouoient plus manier leurs espees, & leur tournoient en la main, en facon qu'ilz ne iettoient aucun coup qui leur seruiſt de rien. Parquoy se voyans blesez à mort, ilz firent signe à leurs gēs, & se retirerent tous ensemble dans la porte par laquelle ilz estoient venuz: puis la fermerent assez rudement, laissant dehors les deux Princes, lesquelz encores qu'ilz eussent meilleur besoing de se reposer, que de combattre, neantmoins voyant les geans retirez, ilz remirent les espees en leurs fourreaux, & prirent chacun vne des hallebardes qui estoient en terre, & commencerent à marteler la porte de la chambre ou les fuyartz s'estoient muslez: mais elle estoit si bien bandee & soustenuē par le derriere des barres de fer, que leur travail ne leur fut de riens profitable en cest endroit. Au moien de quoy dom Florisel commença à dire: Roy Galfambros, rends toy à nous comme vaincu, & nous te ferōs telle grace que tu voudras, en laissant ceste Isle à celui à qui elle est: sinon, viens t'en acheuer le combat, & ne t'enfermes point ainsi, comme vn lasche & couard Cheualier. Le Roy lui respondit du dedans de la chambre: Atens moy seulement, car tu payeras bien tost le dommage que tu m'as fait, & celui qui est avec toy: & puis q̄ les Dieux ne m'ont voulu otroyer celle vengeance par mes mains, il s'en trou

trouuera tantost assez qui la viendront prendre pour moy. Ainsi sans vouloir respondre autrement à chose ny à iniure qu'ilz lui peussent dire, il commanda secretement à ses gens qu'ilz allassent faire vne certaine grosse fumee sur le feste du chasteau, qui estoit signe aux habitans de l'Isle d'y acourir tous en armes, comme pour quelque grande necessité: & de fait ilz commencerent à y venir de toutes partz. Ce pendant les Princes delibererent de chercher vne autre entree, par laquelle lon peut monter au haut du chasteau: & comme ilz se promenoient deçà & delà, pour trouuer par ou entrer, ilz aperceurent par vne fenestre, les chemins pleins de gens armez: puis ausans la fumee qui sortoit du feste d'une tour & se mesloit parmy les nuës, ilz penserent incontinct que c'estoit signe de secours, auquel les habitans de l'Isle acouroient. Et partant aiât premieremēt traîné dehors les deux geans occis, & quelques vns des vilains, afin d'espouuenter ceux qui viendroient, ilz fermerent & barrent les premieres portes du chasteau, qu'ilz auoient gaignees. Apres ilz monterent dans vne chambre qui estoit sur le portail, ou ilz trouuerent vn lit, & quelques draps, dont ilz banderent leurs plaies, n'estans moins esbahis des merueilles qu'ilz s'estoient veuz faire l'un à l'autre, qu'estōnez pour ne sçauoir quel conseil ilz pourroient prendre, à fin de resister à toute la multitude qu'ilz voioiēt arriuer. Ainsi n'aiās meilleur esperance que de s'acomoder aux occasions qui s'offriroient, ilz s'apuyerēt aux fenestres qui regardeient sur la premiere porte du chasteau: & là atendirent assez long temps, iusques à ce qu'une petite plaine, qui estoit deuant l'entree, fust presque remplie de peuple armé, qui s'esbahissoit fort voyāt les deux geans occis. Or le Roy les voyant assemblez en vn assez grand nombre se môstra à eux à vne autre fenestre qui estoit plus haute à costé du portail, & leur crioit qu'ilz brussassent les por-

tes du chasteau: & qu'ilz le vinsent venger de deux Cheualiers qui estoient entrez par trahison, & lui auoiēt tue ses freres & ses gens. Adoncq' tous les habitans commencerent à ietter vne grande huee, & à demander du feu, qu'on leur aporta incontinent: mais s'apochans de la porte ilz furent repoussez quelque temps par dom Florisel & Daraide, qui leur ietoient les dardz & hallebardes demeurees en la grand' sale, combien que pareillement on leur tira d'embas, quelques fleches, & que le peuple creust tousiours de plus en plus. Ce qu'aperceuant dom Florisel, & cognoissant qu'à la lōgue la force ne leur seroit suffisante, si elle n'estoit secourue par quelque ruze, il leur fist signe de vouloir parlementer: Partant chacun se tenāt coy, & faisant silence pour escouter ce qu'il vouloit dire, il parla à eux en ceste sorte: Mes amys, si en ceste vostre miserable seruitude, il vous reste encores quelque souuenance de la fidelité, & du surpl^s en quoy comme loyaux sugetz vous estes redevables au Roy vostre Seign^r, lequel est maintenāt pauvre prisonnier par l'orgueil & tyrannie de l'iniuste Galfambros: Je ne pense point qu'avecques vostre honneur & encores moins à bonne occasion, vous preigniez maintenant les armes contre ceux qui pourchassent sa liberté & la vostre. Or auons nous comme vray Cheualiers, & non comme trahistres, defait vne partie de voz tyrans, & tenons les autres enfermez avec telle crainte, qu'ilz n'ont seulement le courage d'une simple femme, tant ilz sont lasches & couardz. Si doncq' vous aimez vostre honneur, si vous voulez garder la loyauté que vous deuez au Roy vostre maistre: & si la nature, & le commun droit des gens vous obligent à pourchasser vostre liberté, & la sienne, & à vous deliurer de la miserable tyrannie ou vous estes tourmentez par les Geans: sçachez maintenant cognoistre & employer le temps auquel la chose que vous desiriez la plus desirer en

sirer en ce monde, qui est l'ineestimable liberté, vous est apareillée, avec vne louange immortelle d'auoir deliuré vostre Roy des tenebreuses chartres où il est cruellement detenu : Ou bien si vous faites le contraire, preparez vous à suer deormais patiemment, comme bestes, deffous le ioug du cruel seruage des Geans : car ven que nous nous offrons de vous en deliurer avecque vostre aide, à l'auenir vous n'aurez ocaſion de vous plaindre du temps ny de l'oportunité, ains de vostre lâcheté seule. Or auisez doncques lequel vous aimez d'auantage, ou la seruitude à vostre perpetuelle honte, & misere, ou la liberté de vous, & de vostre Roy, avec vostre honneur immortel : car vous avez maintenant & l'un & l'autre en vostre choix. Comme dom Florisel acheuoit ces paroles, les habitans de l'Isle commencerent à murmurer entr'eux, & leuerent tellement leur courage à la liberté, qu'ilz se mirent tous à crier alaigrement par grande ioye: Liberté, liberté, nous demandons nostre liberté avec celle de nostre Roy. Ainsi crians ilz mirent tous la main aux armes, & sur le champ taillèrent en pieces environ deux cens de ceux qui estoient fouldoyez par les Geas pour la garde des forteresses de l'Isle: puis se separans en deux troupes, les vns coururent aux lieux circonuifins pour faire armer tout le surplus en leur deffence, crians incessamment liberté, & annonçans que les Geans estoient mortz, & leur ancien Roy hors de prison: Les autres qui estoient demeurez, crioient que lon leur ouurist pour prendre la vengeance de ceux qui s'estoient enfermez es hautes chambres. Quelques vns du chasteau voians ce desordre ouurirent les portes à dom Florisel & à Daraïde, & bientôt apres les deux Geans desarmez se vindrent ietter à genoux deuant eux, les priant qu'ilz leur sauassent les vies, & à leurs seruiteurs qui n'estoient plus qu'en bien petit nombre, & qu'au reste ilz fissent d'eux ce qui bon leur sembleroit. Dom Flo-

risel leur respondit : Vous pouuez & deuez m'auoir d'asia requis l'assurance que vous me demandez, car ie vous eusse octroye d'auantage: mais puis que vous estes opiniaſtrez si auant, nous vous sauuerons seulement la vie, & du reste, le roy que vous avez tant offensé en disposera à son plaisir. Adonc Daraïde se mit à la fenestre du portail, & ayant fait entendre à ceux qui estoient en bas, les conditions de l'accord, & pris assurance d'eux, leur enuoya ouurir la porte: Il seroit impossible de vous reciter leur ioye & les graces qu'ilz rendirent aux deux Princes à leur arriuee, les priant deuant toutes choses de leur faire rendre leur Roy : Alors Galfambrof l'enuoia tirer d'une basse fosse, où il l'auoit tenu douze ans, sans lui laisser voir la clarté du iour. Mais quand le bon Roy qui auoit les cheueux & la barbe aussi blâcz que neige, & longs iusques à la ceinture, se trouua en la compagnie des Princes & de ses loyaux sugetz, en sentant la lumiere desacoustumee du Soleil, & sa liberté ensemblement, avecque le recouurement de sa couronne, & de son ancien honneur, il demeura assez long temps sans pouuoir faire autre chose sino pleurer de grande ioye. Puis ayant remercié de tout son pouuoir, ceux qui luy estoient causes de ce bon heur, dom Florisel commanda que les deux Geans fussent menez & couchez dans le lit qui estoit dans la basse fosse, où le Roy estoit prisonnier au parauant, & que là on fist appareiller leurs plaies. Ce pendant Daraïde ayant prié le Roy de pardonner à Danistee & à son amant, le Roy lui respondit : Nobles & preux Cheualiers, Seigneurs de ma vie & de moy, ie vous supplie vous assurer que ie metz maintenant en vostre puissance tout ce que vous avez mis en la mienne. Quant à ma fille Danistee, & à son amy, c'est moy qui gaigne le plus en leur pardonnant: à ceste raison ie leur pardone, & vous prie que les aillons voir tout à ceste heure; car ie croy que si ia-

mais.

mais ilz doiuent estre deliurez du cruel enchantement ou ilz sont, que ce sera par le moien de telz Cheualiers comme vous estes. Or allons doncques, & si les Dieux ne trompent mon esperance, aujourd'hui vous m'aurez remis en la plus grãde gloire ou ie me vy onc, Allons (dist dom Florisel) car nous ne sommes venuz icy sinõ pour vostre liberte & pour celle de vostre fille. Adoncques le bon Roy prenant Florisel d'une main, & Daraide de l'autre, les conduit par plusieurs larges degrez iusques deuant la chambre enchantee.

Comme l'aventure des Dieux des flammes infernales d'Amour fut acheuee, & comme le Prince dom Florisel recognoit le Cheualier enchanté dedans le vase de Cristal.

CHAP. XL.

LEs Princes estans arrivez deuant l'entree de la chambre, virent sur la porte vn tableau d'argent, dans lequel estoient engrauees certaines lettres Grecques à l'antique, & de couleur noire, desquelles le sens estoit tel.

Les Dieux des flammes infernales d'Amour dureront en ce present sacrifice, au grand soulagement de ceux qui en les adorant tempereront la furie de leurs amours, par la secreete vertu de la lueur, iusques à ce que la braue Serpente avecques vn feu dont elle les surpassera, & par vne plus extreme loyauté, ayt avecques le filz du braue Lyon, passé & domté, les domteurs, & deffendeurs de l'entree infernale, & à la grand louange des Princes enchantez, & à la gloire immortelle de celuy qui sera authheur de leur deliurance.

Cest escripteu acheué de lire, dom Florisel dist à Daraide : Il me semble ma Dame, que l'accomplissement de ceste profecie soit bien proche, tant à vostre honneur, comme à celui des enchantez. Adonc tenant tous ceux qui la regardoiēt esbahiz

de sa grande beauté, elle luy respondit. Si quelque gloire m'est ici apareillee, ce sera pour vn plus grand commencement de la vostre : car l'issue de voz entreprises, a acoustumé d'estre telle, que vous en receuez entierement la louange, pour apres en faire participans ceux qui vous ont acompagnez au danger. Je tiens voz propos à grand faueur (dist dō Florisel) mais en mon auis j'acquerray icy bien peu d'honneur, si vous ne me faites participant du vostre, car la iouissance de celle de la Roine Sidonie, me priuera de ceste-cy, & par ce moien i'en seray puny d'une double peine, selon la vengeance laquelle ie lui voy pourchasser à l'encontre de moy. Cecy disoit dom Florisel pour les paroles de loiauté qui estoient contenues dans le tableau. Laissons ces deuiz (dist lors Daraide) & me dites s'il vous plaist de vous essayer en ceste aventure. Oyons premierement (dist il) la lamentatiō de ces deux amans, puis nous ferōs ce qui sera en no^r. Adoncques ilz se mirent sur le seuil de la porte de la chambre, laquelle ilz trouuerent fort belle, & enrichie de diuers fueillages d'or. Ilz virent les douze degrez par lesquels on montoit aupres de l'autel, & les douze grands chandeliers d'argent, & les douze flambeaux ardantz en la façon que nous auons dit, avecques plus de cinquante lampes dorees, qui estoient pendues tout à l'etour de la chābre. L'autel & les degrez estoient couuertz de drap d'or, & sur l'autel estoit la chaise de cristal qui renfermoit les deux Princes enchantez. Ceste chaise estoit faite en forme d'un encensouër deuers le pied, à petites colonnes d'or massif, & au trauers du cristal lon voyoit facilement les deux Princes embrassez, vestuz de robes de veloux cramois, decoupé sur vn fons de toyle d'or rayonné de fil d'argent, laquelle ressembloit fin esmail à raison de la clarté du cristal, qui reuerberoit dessus entre les decoupures. L'Infante auoit ses beaux cheueux espars des deux costez du visage, &

& pendans sur son feing à demy descouvert: Les vns estoient eparpillez sans aucune industrie, & les autres entrelassez en las d'amours auecques plusieurs riches ioyaux parmi les noëuz. Sur son chef elle auoit comme vn cercle d'or, ouuré par grande industrie, & semé de plusieurs fines perles & riches pierreries de diuerses splendeurs, tellement que leurs clartez sembloient combatre l'une contre l'autre pour la varieté d'icelles. A ses oreilles pendoient deux beaux ioyaux de valeur inestimable. Le Cheualier auoit ses cheveux espars çà & là sans aucun art, aussi reluisans que fin or. Ces deux amans tenoient leurs testes apuyees l'une sur l'autre, & se plaignoient incessamment de iour & de nuit, mais tandis que l'un se lamentoit, l'autre se taisoit, semblant estre mort: puis quand celui qui s'estoit long tēps lamenté auoit acheué ses plaintes, il sembloit trespasser, ou esuanouir sans aucun sentiment, & ce pendant l'autre faisoit ses doléances, lequel aiant aussi acheué, l'autre comme retournant de palmoison, recommençoit ses premieres douleurs. Tout autour de la chambre estoient penduz infiniz cueurs d'or & d'argent, selon la puissance de ceux qui en auoient fait leur offrande: entre lesquels y en auoit deux les plus grands, qui estoient ceux du Roy & de la Roine de Galdap. Dom Florisel & Daraïde aiās veu de la porte tous ces misteres, le Roy leur dist qu'ilz entrassent pour voir les choses plus excellentes qui leur restoiēt encor à voir, & pour ouir les lamentations des deux amans, d'autant qu'ilz pouuoient s'aprocher d'eux iusques à la montee des degrez: mais de là en allant vers l'autel, l'essay de l'auenture commençoit. Adoncques chascun aiant la larme à l'œil, tous entrèrent en la chambre, & le Roy, & toute sa compagnie se mirent à genoux, adorant les Princes enchantez comme Dieux, de quoi dom Florisel & Daraïde ne se peurent tenir de rire qu'auec grand' peine, voyant

vne folie & vanité tant aparente. Estans arriuez au pied des degrez, dom Florisel aperceuant le visage du Cheualier, dist à haute voix: Dieu me soit en aide, quelle estrange auenture est cecy! O qu'il y a de bien renfermé dessouz ce tourment! En disant ces paroles, il ploroit à grosses larmes. Pourquoi dites vous celà, monsieur? dist lors Daraïde. Par ce (dist Florisel) que ie recognois sans aucun doute, ce Prince enchanté, & y a desia si long temps que lon n'ouit de ses nouvelles, que lon le tient plus pour mort que pour vi: partāt ie vous prie oyons ce qu'il dira, afin de voir si ie ne suis point abusé. Alors chascun faisant silence, & la Pinceſſe aiant acheué de lamenter, le Prince comme reuenant de palmoison, commença à se plaindre en ceste maniere dessus l'Infante, laquelle comme morte estoit esuanouie entre ses bras: Helas! ma chere Danistee, d'autant que les Dieux ont voulu faire vostre beauté grande, d'autant ilz ont rendu grand mon amour, à fin que par la grandeur de vostre beauté, & de mon affection, ilz peussent rendre d'autant plus douloureux le mal que ie souffre, pour souffrir en la plus grand' gloire que ie receu onc de voz bras, & des miēs la plus grand' douleur que lon eut iamais veüe ny ouye, puis qu'auecque la faueur de voz premieres embrassemens, j'ay receu la cruelle mort par celle de ma Danistee. O cruel amour! pourquoi me dōnes tu maintenant le mal de la vie, veu que tu m'as par cy deuant donné tant de fois le bien de mourir, lors que tu me mettois à mort par la beauté de ceste belle Infante que ie tiens morte entre mes bras? Helas! à fin que ie mourusse, il estoit necessaire qu'elle receut la mort, par laquelle ie pouuois seulement mourir, attendu que pour moy il ne se pouoit trouuer autre mort (excepté celle que ie recoy par la sienne) qui ne m'eust esté vne tresgracieuse vie. Et tout ainsi que miēs trespas me donnoient la vie en me faisant mourir

mourir pour son amour, ainsi maintenât ma vie me donne la mort, en me faisant viure auecques ces mortelles angoisses. O ma loyale Danistee! pleust à Dieu que ie peusse taire ce peu de douleur que i'exprime en me plaignant, pour m'offencer celle que ie souffre, & qui est deuë à la perte de vostre beauté. Helas ma dame, quelle grace l'amour vous afaite en vous ostant la vie, si en vostre viuant il me deuoit oster la mienne, afin que vous receussiez par ma mort autant de douleur comme i'en reçoys maintenant par la vostre. Le Cheualier acheuant ses regretz demeura pasiné entre les bras de sa Dame laquelle se resueillant comme d'un profond sommeil, commença à plover, & à jeter maintz ardëts soupirs pour mieux solemniser ses plaintes, qui estoient telles: O noble Prince! qui par vostre beauré & prouesse m'avez peu faire transgresser les loix de mon deuoir, en embrassant m'oisible cuer de ce cruel feu duquel le vostre estoit espris: Helas, combien maintenant ie suis bien chasticee de n'auoir gardé ce que ie deuois, & que ie n'ay voulu garder à la reuerence de ma grandeur, ostant descouurir mon amour à celui qui m'aimoit plus que luy mesmes. Or pleust aux Dieux que quelque cruelle mort eut esté le chastiment de mon offence, car ie ne pouuois autrement estre assez chasticee de la folle hardiesse que i'en en decelant l'amour que ie souffrois, laissant par ce moien la vergongne que ie deuois auoir pour resister à ses furies. Helas mon vray amy! si vous auies quelques sentimens pour comprendre ce que ie souffre, combien vous souffririez de mal, en cognoissant ce que i'ay souffert pour vous, en vostre vie: puis que forcee de vostre amour ie n'ay point voulu recognoistre ce que ie deuois à mon honneur, afin d'en recevoir maintenant la punition condigne à m'ois demerite par vostre mort: en laquelle toutesfois i'ay vne seule consolation, qui est que vous estes deliuré de celle ex-

treme douleur, laquelle vous eust passionné, si en vostre vie vous m'eussiez veu morte entre voz bras, comme maintenant ie vous voy mort entre les miens: car ie m'alleure bien parce que ie souffre pour vous, que vous eussiez autant souffert pour moy. O amour cruel, qui m'escaule de tant de mal, comme ne te retournes tu en haine? O mort tant desirée, comme ne metz tu fin à ceste miserable vie? O vie rigoureuse, comme te peux tu si long temps deffendre contre les douleurs de la mort? O forcené desespoir, que ne me fais tu desesperer iusques à faire quelque acte desesperé, par lequel auecques mes malheurs ie puisse encores acheuer ma vie desesperée? O frivoles desirs, dites moy que c'est que vous desirez, afin qu'en le desirant, sans rien en pouuoir obtenir, i'obtienne ce que tant ie desire, & que ie ne puis trouuer, qui est la mort! L'infante demeura esuanouie apres auoir acheué ses regretz: puis le Cheualier commença de nouveau les siës à raison de quoy les yeux des escoutans estoient arrosés d'autant de larmes, comme ceux des miserables Princes enchantez qui lamentoient leurs destinees. Daraide prenât grande compassiō des cruelz martires de ces deux amans, ausi en vn tableau longuet, au pied de la chaise ou ilz estoient enserrez, quelques vers Arabiques, qu'elle leur, comme celle qui entendoit toutes langues, & les trouua de tel sens:

*Celuy qui tout son sieclé en loyauté surpasse
Icy pent à son gloire esprouuer sa valeur,
Car cassant ce cristal hors de la clere chaise
Il chassera l'ennuy, la pene & la douleur.*

Daraide aiāt lëu ces vers à tout par elle, dist à dom Florisel, Monsieur, veu la cruauté de ce tourmēt, il ne nous reitte plus aucune ocasiō de delayer l'espreuue de ceste:

de ceste aventure: & partant il vous plaira commencer. Dom Florisel estimât que par force d'armes les enchâtemens se peussent acheuer & craignant que Daraïde n'en emportast l'honneur si elle marchoit la premiere, lui respondit: Je feray ce qu'il vo^{us} plaira encores que ie sçache bien que la gloire vous en est reseruee. Adonc le Roy l'ayant aduertie qu'il faillloit briser le cristal pour paracheuer l'aventure, il lassa son armet, & ferrât l'espee dâs le poing commença à monter par les degrez: mais tout soudain il se sentit fraper de plusieurs horions derriere & deuant, de sorte qu'il estoit contraint de parer son espee deça & delà, pensant rabatre quelques coups. Ceux qui estoient dans la chambre voyoient bien plusieurs espees nuës, lesquelles frapoient sur lui, sans toutesfois apercevoir qui les manioit si rudement. Dom Florisel se trouuant au plus grand rrauil ou il s'estoit encores iamais veu, monta iusques aupres de l'autel, ou il ne fust si tost arriué, qu'il sembla que l'Infante passast vne de ses belles mains au trauers de la chaste, & lui mit sur l'armet, disant: Si tu eusses eu assez de loiauté, la prouesse ne te manquoit point. En disant ces paroles elle le repoussa si roidement que malgré lui il fut contraint de descendre tous les degrez, beaucoup plus viste qu'il ne les auoit montez: & combien qu'il y voulust encores retourner, si est ce que iamais il ne sceut remôter vn seul pas, pour quelque effort qu'il peut faire: & partant tout coléré & honteux se retira arriere avec le Roy. Alors Daraïde ayant lassé son heaume, & tenant son espee nuë au poing monta à grand travail iusques aupres de l'autel, & soudain la flame des torches & des lampes commença à croistre avec vn bruyt tant effrayant que le toit du chasteau brisa, & sembla que les flames se communiquassent iusques entre les plus hautes nuës. A cest espouventable bruit, chacun s'en fuyt de la chambre: & n'y demoura que Daraïde seule, laquelle ayant toute

son intention à caïsser le cristal, lui vint donner tel coup du pommeau de son espee, qu'il se brisa en plus de mille pieces, avec vn tant horrible tonnerre, & tant de foudres & d'esclairs, qu'elle, & tous ceux qui estoient dans le chasteau, & en toute l'Isle, tomberent esuanouis contre terre, ou ilz demeurerent assez long temps, de la grande frayeur qu'ilz auoient, n'osans presque se releuer. Ce pendant l'autel, les degrez, les chandeliers, les flambeaux, & les lampes disparurent: & ne demeura en la châtre autre chose que ce qui y estoit deuant les enchantemens, excepté les cueurs & offrandes que lon y auoit apanduz, car au surplus elle retourna en son premier estre, fort belle & claire pour les fenestres qui estoient ouuerres. Le Cheualier & l'Infante Danistee furent alors desenchantez, & se trouuerent avec tous leurs sentimens entre les bras l'un de l'autre, en la mesme façon que le Magicien les auoit surpris. Que vous dirons nous de leur ioye, quand ilz se virent ainsi resuscitez, & tirez hors du cruel tombeau ou ilz estoient enseuehiz tous vifz, avec vne extreme douleur: & aussi quand ilz aperceurent Daraïde palmeë sur le plancher & dom Florisel, & le Roy esuanouis hors de la chambre? Les deux amans les voyoient, & neantmoins ilz n'en pouoient rien croire, tant ilz estoient hors d'eux mesmes: partie pour le grand plaisir, partie aussi pour la vergongne qu'ilz auoient d'auoir ainsi esté veuz embrassez, car il leur souuenoit bien de toutes les choses passees: En tel estat ilz demeurerent quelque temps sans se pouuoir dire vn seul mot l'un à l'autre, plorans à grosses larmes de grande ioye.

Comme

Comme Garinter fut reconnu, & marié avecque l'Infante Danistee fille du Roy de l'Isle Artadefse: & du depart de dom Florisel & Daraïde.

CHAP. XLII.

CEux qui s'estoient pasmez au bruit du tonnerre estās reuenuz en leurs sentimens, & releuez debout, dom Florisel courut embrasser le Cheualier des enchanté: car vous deuez sçauoir que c'estoit le Prince Garinter, duquel long tēps au parauant lon n'auoit eu aucunes nouvelles: & apres maintes grandes auentures acheuees, estoit arriué en l'Isle d'Artadefse, ou il trouua le Roy pere de Danistee fort empesché en vne cruelle guerre que luy faisoit vn Geant, pere de celui qui depuis le deposleda de son Roiaume, & lequel auoit desia vsuré sur lui vne grand' partie de l'Isle. Le Prince Garinter aiant deffié, & vaincu le Geant en camp clos, remit à son arriuee le Roy en toutes ses anciennes fortes places & seigneuries, dont il l'obligea fort à lui: & partant les guerres finies, le Roy sans le cognoistre, le receut en grand honneur en son chasteau ou biē tost apres il s'enamoura de la belle Infante Danistee, esperāt que si quelquefois elle estoit faite Chrestienne, il la prendroit en mariage, tant pour sa grande beauté, comme pour la noblesse de son sang, estant tout le surplus de ces amours auenu ainsi qu'il vous a esté recité cy deuant: Au moien dequoy l'histoire a esté long temps sans faire mention de ce Prince, lequel se voiant embrasser de dom Florisel qu'il ne cognoissoit point, d'autant qu'il auoit son armet, il lui dist comme tout estonné: Helas, auray-ie point le bien de cognoistre celui qui m'a deliuré de tant d'angoisses, & qui m'a ainsi resuscité ma Danistee. Monsieur mon cousin Garinter (dist dom Florisel) ne me cognoissiez vous point? cognoissiez moy, & dites que vous auez maintenant entre voz bras dom Flo

risel de Nicquee. Mais quand à vostre liberté, rendez-en graces à celle qui vous l'a rendue, qui est l'excellēte Daraïde que voicy, à laquelle ceste auenture a esté otoyee, comme à celle pour qui tout le monde semble estre apareillé pour accroistre son honneur, Garinter l'ayant embrassé par grand amour, regarda Daraïde, qui auoit desia osté son armet, & pensant à sa grandeur & beauté, que ce fust la Roine Alastraxeree qui eust pris ce nom pour n'estre cogneue, comme hors de soy, s'approcha d'elle, & lui dist: Ma Dame Alastraxeree, il vous plaira me presenter voz belles mains dignes d'une si grande gloire, puis que vous ne me deuez les refuser, à fin qu'en les baisant ie recognoisse le bien que vous en auez fait à ma Dame Danistee & à moy. Daraïde voiant que le Prince ne la cognoissoit point, & qu'il la prenoit pour sa mere, aiant desia sçeu qu'il estoit, lui dist: Ce sera vous, mōsieur qui me presenterez voz mains, s'il vous plaist, tant pour vostre grandeur, comme pour la faueur que vous m'auez faite en me prenant pour celle fotte Roine, de laquelle cōme estāt sa suiēte, ie tiens toute ma cheualerie s'il y en a aucune en moy. Garinter presque rai de grande ioye, cogneut que ce n'estoit pas la Roine Alastraxeree, & l'embrassant lui dist. Ie ne vous demanderay point pardon de vous auoir pris pour l'une des plus belles & plus cheualereuses Princesses du monde, puis que vous lui estes si ressemblante & en beauté & en prouesse. Quant à vous presenter les mains, elles sont à vous, à fin de les employer en vostre seruice, & pour recognoistre ce dont ie vous suis reueuable, & qui vous est deu de tous pour vostre extreme vertu: vous asseurant que pour ceste seule occasion, outre vostre souveraine beauté, il n'y a si grand Prince en toute la terre qui ne doie plustost baiser voz victorieuses mains, que non pas vous presenter les siennes. Ilz laisserent leur gracieux deuis pour la suruenue du Roy, lequel

quel ſçachant qui eſtoit le Cheualier deſ-
 enchanté (que iuſques là, ſi Danſtee ne le
 cognoilloit, perſonne n'auoit encores co-
 gneu) le pria de lui pardonner, ſ'il ne lui
 auoit fait l'honneur qui eſtoit deu à vn ſi
 grand Prince: puis il alla baiſer ſa fille en
 plorant à groſſes larmes, & elle lui baiſa
 les mains. Mais entendez que le Roy ne
 leur voulut iamais dire que par ſon moié
 ilz auoient eſté enchantez ſi cruellement
 ains que le Magicien auoit fait tous ces
 charmes de ſa ſeule volonté. Ce pendant
 dom Floriſel & Daraïde furent deſarmez
 & couchez dans deux riches litz, ou leurs
 playes furent medecinees en la preſence
 du Roy, auquel lon vint dire qu'en vne
 petite ville qui eſtoit au pied du rocher,
 ſes gens auoient mis à mort la plus grand'
 part de la garniſon qu'y tenoit le geant
 Galfambrof, & que le reſte eſtoit retiré
 dans vn temple, ou ilz ſeroient tous ſacca-
 gez, ſ'il ne luy plaiſoit y mettre quelque
 ordre, d'autant que les ſiens crians liberté
 de toutes partz, ne laiſſoiēt aucun de ceux
 qui auoient ſuiui le party des geans, qu'ils
 ne les miſſent tous au fil de l'eſpee. Le
 Roy y alla en perſonne avecques cent des
 plus nobles & anciens Cheualiers de ſa
 maiſon, qui lui eſtoient venuz faire la re-
 uerence aians entendu les nouuelles de ſa
 liberté. Mais ilz ne furent ſi toſt partis de
 la chambre ou dom Floriſel & Daraïde e-
 ſtoient couchez, que le Prince Garinter
 & l'Infante Danſtee les laiſſant repoſer,
 ſe retirerent à l'autre coſté de la chambre
 & s'afiſſirent tous deux aupres d'une ſe-
 ſtre, avec ſi grand plaiſir qu'ilz demeure-
 rēt aſſez long temps ſans dire mot, & ſans
 faire autre choſe ſinon ſe regarder fort a-
 moureuſement l'vn l'autre. Finablement
 ſçachans bien tout ce qu'il leur eſtoit au-
 enu, le Prince diſt à l'Infante: Helas! ma
 dame, combien i'ay receu de faueur du ſa-
 ge Magicien, pour m'auoir mis en vn lieu
 auquel ſans offencer ny vous ny moy par
 mes cōplaintes, i'ay fait cognoiſtre à tout
 le monde, le grand & extreme amour que

ie vous porte, & pareillement cogneu de
 ma part voſtre bōne affectiō enuers moy.
 Or ia à Dieu ne plaiſe, que i'vſe en vne a-
 mitié ſi chaſtement encommencee d'au-
 cune ingratitude & inſtance: ce que ie
 ferois, ſi deſormais ie voulois pourſuiure
 voſtre bonne grace, avec autre condition
 que d'eſtre voſtre mary & eſpoux. Partāt,
 ma dame, ſouz le tiltre de noſtre futur ma-
 riage, ie vous ſuplie acorder voſtre volon-
 té à la mienne, & prendre pareillemēt ma
 loy, puis que la loy d'une ſi belle Princeſ-
 ſe comme vous, ne doit point eſtre ſuget-
 te à celle des faux Dieux: car en me reſu-
 ſant, ou otroyant ceſte demande, ie co-
 gnoiſtray ſi vous recōpenſez encores mō
 loyal amour d'une pareille affection. Mais
 auant que me reſpōdre, ie vous ſuplieray,
 puis que ie ſuis nouuellemēt ſorty d'une
 ſi cruelle douleur, de ne me mettre point
 maintenant en vne plus grande, ce que
 vous ferez ſi vous deniez à mon mal le re-
 mede de ma gueriſon, en la ſorte que ie
 vous ay dit: car en autre maniere ie ne le
 pourrois obtenir, quand ie le voudrois,
 & ne le voudrois, quand ie le pourrois,
 veu que ny voſtre honneſteté, ny ma loy-
 auté ne le pourroient permettre, & enco-
 res moins l'honneur & la reuerence que
 ie doy & porte à vne tant belle & illuſtre
 Princeſſe comme vous eſtes. Or ma dame
 ie vous ay dit mon vouloir, il vous plaira
 me dire le voſtre. Monſieur (diſt l'Infan-
 te) ie me tiens bienheureuſe puis que l'a-
 mour le deuoit ſi peu eſpargner, qu'il
 m'ait pour le moins gardé ce qui m'eſtoit
 deu pour ſatisfaire honneſtemēt à la grā-
 de affection que ie vous porte. Si donc
 avec ma loyauté & autres cōditions que
 vous dites, vous demandez ma yolonté ie
 vous l'otroye, & vous prometz de prēdre
 voſtre loy, comme celle laquelle me ſem-
 ble fort ſainte, veu qu'elle vous cōmande
 d'aimer avecques ſi ſaint & chaſte amour,
 lequel me fera eſtre voſtre eſpouſe, & vo-
 ſon mary & eſpoux. Maintenant vous
 entendez ma volōté, laquelle depuis que
 ie vous

ie vous ay cogneu , a tousiours esté telle comme ie vous l'ay declaree : & partant pour executer la vostre & la mienne, il ne nous reste plus que le consentement du Roy, à fin que ie lui garde toute la reuerence qu'une obeissante fille doit à son pere. Garinter fott ioyeux de la responce de l'Infante, lui baïsa les mains pour l'en remercier, encores qu'elle ne le voulut permettre : puis aiant communiqué le tout à dom Florisel & Daraïde , le Roy ne fust si tost venu d'apaiser les troubles de l'Isle, que dom Florisel luy declara ce qui estoit acordé entre le Prince Garinter & sa fille, moiennant que ce fut sa volonté. Le Roy estât fort ioyeux de recouurer vn tel Prince pour son gendre, apres la guerison de dom Florisel & de Daraïde , se fit baptiser avec sa fille, & tous ses sugetz pareillemēt laissant la vaine religion des faux Dieux. Puis en grand pompe & magnificēce les nopces de Garinter & de sa fille furēt célébrées en la principale cité de l'Isle , ou apres vne lōgue peine les deux amans receurent la desirée iouissance de leurs desirs. La feste & solemnité des nopces acheuee , dom Florisel & Daraïde aians pris congé du Roy & des nouveaux mariez, retournerēt en leur nef, reprenans la route de Guindaye, ou nous les laisserons voguer iusques à ce que nostre histoire en face encores mention. Le Prince Garinter les conduit iusques au port , & les eut volontiers suivis, mais ilz ne le voulurēt permettre : partant apres mille reuerences , il retourna vers sa chere espouse & ce pendant qu'il iouyssoit de ses premiers embrassemēs, il fit armer vne grosse flote de nauires, avec laquelle il passa dās vne Isle de Galfambrof, qu'il conquist par force d'armes, & avecque ceste victoire s'en retourna en Artadefse , ou il fut receu en grande ioye du Roy & de sa Danistee , avec laquelle nous le laisserons en bonne reputation de preux & hardy Cheualier, changeans quelques mauuaises conditiōs indignes de son lignage, dont il auoit souuentefois esté repris en sa ieunesse.

Comme les Roys de Russie, & de Gaze, & plusieurs autres Roys leurs cōfederex et alliez prindrent port à grande puissance en l'Isle de Guindaye : & de la lettre qu'ilz escriuirent à la Roine Sidonie, avec la responce.

CHAP. XLII.

VOus auez desia entendu quelle ysuiē prirēt les entreprises de Bulthazar Roy de Russie, autrement nommée Bugie, & de Bruzerbe ou Bruzeō Roi de Gaze quand ilz enuoierent dom Galthazar de Barbarouffe, & ses deux freres, pour leur gagner au combat , le mariage de la Roine Sidonie & de sa fille. Or eux n'aïans point oublié la beauté de la Roine & de la Princesse, voians combien peu leur auoir profité la force de dom Galthazar, & se sentās fort outragez de dom Florisel, pour auoir esté eux, & leurs predecesseurs, maintefois vaincuz de luy en diuerses rencontres, ilz delibererent essayer encores la fortune, & employer toutes leurs forces, pour auoir à femme, l'vn la Roine & l'autre la Princesse sa fille. Pour leur aider en ceste entreprise, ilz manderēt tous les Roys Orientaulx qu'ilz peurent rendre de leur party, avec lesquelz vint Bruzerbe le crespelu Roy des Massagettes, & Oran Duc de Galde, filz de l'autre Duc q̄ dom Florarlan auoit vaincu & occis. Ainsī avec vne grosse armee de plus de six cens nauires, ilz vindrent tous prendre port en l'Isle de Guindaye, conduisāns leur deliberation si secretement que iamais lon n'en ouit aucunes nouuelles iusques à ce qu'ils eussent pris terre en l'Isle, & qu'ilz se fussent campez à vint lieues pres de la cité. Le principal chef de l'armee estoit Bulthazar Roy de Russie, cōme celui auquel ceste entreprise touchoit le plus. Leur camp estoit de vingt mille hommes à cheual & de soixante mille à pied, avec trente grands elephans, portans chacun sa tour pleine d'archiers & arbalestriers, en ce non compris ceux qui conduisoient le bagage.

bagage & les munitions du camp. Auant que de faire aucun dommage, ilz acorderent entr'eux d'enuoier vers la Roine pour la demander en mariage, avecque sa fille: à fin qu'apres leur refus, ilz eussent meilleure ocalion d'vser de force, & de mettre à feu & à sang tout son Roiaume. Oran Duc de Galde fut commis pour faire ceste ambassade, du consentement de tous les Roys qui l'enuoierent avec vnes lettres patêtes signees & scellées de leurs mains, & de tous leurs seaux. Mais il ne fut si tost arriué en la cité de Guindaie, que la Roine estoit desia auertie de ceste grosse armee, & auoit donné charge aux Ducz d'Alfarce & de Gauies, de retirer en la cité tel nombre de gens de guerre & autât de viures qui leur seroit possible pour soutenir vn long siege. Et combien qu'elle dissimulast fort sagement sa douleur, si est-ce que l'impourueüe arriuee, & la surprise de l'ennemy, la rendirent fort estonnée: tellement que sa derniere esperance estoit de se retirer elle & sa fille dans la tour enchantée de Diane, ou ny par force ny autrement aucun ne pourroit entrer contre son gré. Partant elle y fit porter plusieurs prouisions, estant fort ennuyee que Daraide n'estoit en ce temps avec elle. La Roine estant ainsi troublee, & deuisant de ses affaires avecque plusieurs Cheualiers, les vns estrangers, & les autres originelz de son Roiaume, le Duc de Galde vint entrer en la grand' sale de son palais acompagné de six gentilzhommes richement vestuz & bien en ordre. Adonc aiant présenté la lettre à la Roine, il lui dist qu'elle la fist lire: & qu'il diroit de bouche le surplus en quoy la lettre ne lui auroit satisfait. La Roine comanda qu'on la leust tout haut, & la trouua telle qu'il s'ensuyt.

Bulthazar Roy de Russie, & les autres souuerains Roys Orientaulx, desquelz le seing & le scel est aposé en ceste lettre: A Sidonie Roine de l'Isle de Guindaye, en-

uoient le salut, qu'elle peut receuoir si bon luy semble, en receuant de son bon gré pour espoux, ceux qui autrement sont deliberez d'accomplir leur volonte par force. Sachez donc Roine de Guindaye, que ny l'iniure receüe pour l'amour de vous, ny vostre beauté, ny celle de vostre fille Diane, ne sont point encores hors de la souuenance de Bulthazar, & de Bruzerbe Roy de Russie, & de Gaze. Parquoy nous auons pris terre en vostre Isle avec vne puissante armee, vo' requérant auât toutes choses, de nous ottroyer la paix, en nous ottroyant vous & vostre fille en mariage: Ou si vous ne le faites, iusques à ce que la force nous ayt fait la raison de ce que la courtoisie nous pourroit auoir refusé. Nous vous denonçons la guerre à feu & à sang: & faisons les Dieux immortelz iuges des pertes, & calamitez qui auiendront à vostre occasion, inuouans la fortune à nostre ayde, qui veu nostre admirable armee nous a desia donné l'asseurance laquelle deffault entierement à voz sūgerz, si vous ne les assurez, en nous assurant la guerison des playes, dont la douleur, l'amour & les iniures cy deuant souffertes, ont nauré noz courages à mort, en nous detenant vous & vostre fille par voz beautez, en vne trop plus cruelle guerre, que celle qui vous est tres-cruellement apareillee, si vostre gracieuseté ne nous donne la paix laquelle nous sommes deliberez de conquerre par force d'armes.

Combié que la Roine Sidonie fut fort troublee par la lecture de ceste lettre, toutesfois elle dissimula sagement la deffiance qu'elle auoit de soy, pour souffrir vne si furieuse guerre, & demanda au Duc s'il ne luy restoit plus rien que dire. Le Duc lui respondit que non, & que seulement il l'amonnestoit de faire de son bon gré, ce qu'à la parfin elle seroit tenuë de faire par contrainte. Duc de Galde (dist lors la Roine) il me semble qu'il seroit beaucoup mieux

mieux feant à vn tel Cheualier comme vous estes, de faire reparer vne iniure, que de la vouloir soustenir. Toutesfois si vostre vouloir est contraire au mien, & à la raison: à tout le moins souuenez vous de ne donner aucun aduis à ceux qui ne le vous demandent, & qui en ont bien peu à faire. Quant au reste de vostre ambassade, i'y auiseray: & partant vous attendrez quelque temps, pendant lequel ie delibereray en mon conseil de ce que i'ay à respondre pour le regard de ceux qui vous ont ehuoyé par deuers moy. La Roine lui fist ceste respôce à fin de pouruoir ce pendant sa ville de gens de guerre, & autres choses necessaires pour se deffendre de l'ennemy, entretenant le Duc de paroles, & faisant souuentefois assembler son conseil, sans pouuoir prendre aucune resolution, à fin de repaître tousiours le maladiisé Ambassadeur de vaines & frivoles esperances. Ainsi elle le tint plus de huit iours, montrant quelque signe d'accord, & faignant estre fort incertaine de ce qu'elle deuoit respondre. Ce pendant les Ducz d'Alfarce & de Gauies mirēt en la ville toutes les prouisions necessaires pour soustenir le trauail d'un long siege: Parquoy la Roine donna vne lettre au Duc de Galde, lequel s'en retourna fort honteux, cognoissant la cautelle dont il s'estoit laissé abuser: car il s'aperceut alors facilement pourquoy la Roine l'auoit si long temps detenu. Or estant arriué au camp du Roy Bulthazar, en la presence de tous les autres Rois, il lui presenta la lettre qu'il aportoit pour la response de son Ambassade. Soudain elle fut leuë publiquement, & estoit de telle teneur:

Sidonie Roine de Guindaye, à Bulthazar Roy de Ruffie, & à to^s les autres Rois de sa ligue, lesquelz iniustement sont venus avecques lui enuahir son Isle, enuioie le salut que les Dieux ne leur doiuent garder longuement, en vne tant desraisonnable querelle.

Je ne feray point tant espouuētee, Roy Bulthazar, s'il me conuient à l'auenir esprouuer contre ma poitrine, l'espee de Lucresse: comme la chasteté m'oblige maintenant à me deffendre contre la tienne. Mais si n'y l'amour que ie porte au Prince Grec, ny la crainte de sa grādeur, n'ont peu mettre, ny paix, ny treues à la forte guerre que ie lui ay apareillce: à pene que la moindre guerre dont le Roy de Ruffie me menasse, me puisse causer aucune crainte, & encores moins est il possible que la haine que ie lui porte, puisse par son outrecuidance estre conuertie en amour. N'estime point ma volonté si volage, ny inconstante, que la haine me face chercher la paix avecques toy à mon deshonneur, puis que l'amour pour mon honneur me contraint de faire la guerre à l'encontre du Prince Grec. Ia aux Dieux ne plaise que Sidonie estime moins la noblesse de son courage, q̄ la grande force des armes avec lesquelles tu me menasses à feu & à sang, car avec le feu, & avecq' le sang ie defendray ma chaste volonté: & m'esfayeray à la garder de la mesme force par laquelle les Dieux ont quelque fois permis qu'elle fust gardee contre eux mesmes. Saches qu'en me faisant la guerre, tu la fais beaucoup plus rigoureuse à tō honneur, & qu'en voulant consumer mō pais avec tes feux, tu ne pourras consumer le feu dont le Prince Grec m'a enflammee. Peut estre que tu respādras le sang de mes sugetz, les mettant au fil de l'espee: mais quand tu l'auras fait, les espees ne defaundront point ny à ma fille, ny à moy, pour respandre encores le nostre, car nous aimerons beaucoup mieux mourir en nostre chaste liberté, que viure en vne vile seruitude. La haine qui fit mourir la Roine de Carthage pour Enee, ne fera point mourir Sidonie pour Dom Florisel: mais elle la defendra bien de la crainte de la mort, à fin de defendre la loyauté qu'elle luy doit pour le ferme & ardent amour qu'elle lui . . . tousiours porté, & qu'elle lui

L

porte

porte encore à présent. Considéré donc, Roy Bulthazar, qu'en me pensant gagner tu me perdras: & en me pensant offencer, tu ne m'offenceras en rié, car l'espée ne me manquera point, pour résister à ton offense: mais bien offenceras tu de tes armes, les loix des Dieux immortelz qui gouvernēt l'espée de la iustice, laquelle a de beaucoup plus grande force que la tienne: & offenceras pareillement ce Prince Grec, auquel tu veux violer le droit de son mariage, car encores qu'il en ait ioui par tromperie, si est-ce que pour son honneur il ne laissera point passer les iniures que tu me feras, sans en demander la vengeance. Et puis que pour la reuerence qu'il me porte, il a gardé en ma faueur la vie à ceux qui pourchassoient de lui ôter sa teste, comme les Rois de Gaze, & des Massagettes, & autres de ta compagnie, en rendront assésuré tesmoignage, tu peux bien penser qu'il sera maintenant autant prest à leur faire perdre les testes pour me cōplaire, cōme il a autresfois esté prest à les leur garder pour l'amour de moy. Pourquoy, Roy Bulthazar, n'entreprend point vne guerre par laquelle tu ayes espoir de gagner par haine, celle qui se hait & se guerroye soymesmes, contraignant le grand amour qui l'enflame, afin de ne laisser guerroyer son honneur. Ne demande point l'amour, ny la paix de celle qui n'a ny paix ny amour avecques elle, & encores moins avec toy. Ainsi donc ie suis deliberée de defendre ma volonté, & de résister à la tienne, & en gardant tousiours ma chasteté acoustumée, ie soustiendray mon cher Roiaume, inuoquant les Dieux à ma iustice, & les hommes à ma defence. Or en me pourchassant ceste paix, ie suis prest de soutenir la guerre telle que tu me l'as denoncée.

Les Rois de Ruffie & de Gaze se despitèrent fort de ceste responce, & soudain firent publier la guerre à feu & sang, commandans en leur ost, que chacun s'apa-

reillast pour aller prendre d'assault la ville de Guindaie, vers laquelle ilz commencerent le lendemain à marcher en armes, prenans toutes les places qu'ilz rencontroient, sans résistance, & sans leur faire aucun dommage, par ce que la Roine leur auoit mandé qu'ilz se rendissent. Or les laisserons nous marcher quelque temps, pour dire ce que faisoit la Roine Sidonie, pendant que ses ennemis commençoient à dresser leurs aproches.

De ce que fit la Roine Sidonie apres le depart du Duc de Galdes: & des propos que Diane & Lardenie eurent ensemble sur la longue absence de Daraide.

CHAP. XLIII.

LE Duc de Galde ne fut si tost departy, que la Roine Sidonie fit dresser en la grande place de la ville vn eschauffaut couuert de draps d'or frisez, avecq' vne riche chaire, dans laquelle elle s'assit n'ayant point ses acoustumées robes de dueil, mais bien ses plus superbes ornemens Roiaux, avec vne precieuse couronne de pierrerie inestimable sur son chef monstrant à tous les regardans vne granité & beauté tant bien temperees l'une par l'autre, qu'il n'y auoit celui qui ne fust rayuy en la contemplation de sa bonne grace, & hautaine contenance. Cecy fit elle de propos deliberé à fin de croistre par son bon cueur, celui de ses loyaux sugetz, ausquelz estans là tous assemblez à son mandement elle commença à parler en ceste sorte:

Harengue de la Roine Sidonie, à ses sugetz.

Si le deuoir dont nous sommes redevables à la vertu (mes chers amys & fideles citoyens) ne nous commandoit de perdre plustost noz vies pour la conseruation de nostre honneur, que de la laisser en rien corrom-

corrompre d'autant que l'honneur perdu nous ne pouvons plus auoir rien de bon durant ceste vie mortelle : ceux pourroient se plaindre de l'issue incertaine des choses qui avecques bon droit, & pour soutenir leur ancienne renommée, se feroient d'un franc courage abandonnez aux incertitudes de la fortune. Mais puis que nous sommes obligez à deffendre nostre honneur iusques a la mort, la multitude des ennemis, ny l'euénement douloureux d'une bataille, ne nous doit de rien espoüenter. Seulement nous deuons craindre que la faute de cueur ne nous face encourir quelque infamie : & que l'injustice de l'ennemy ne nous donne plus de peur, que nostre bon droit de confiance : car par telle lâcheté lon pourroit redouter l'expérience de la fortune, laquelle donna iadis à six mille Grecz, la victoire d'un million de Perses, dont il en demeura deux cens mille mortz en la plaine. La mesme fortune ottoia au Romain Lucule, n'ait que dix mille soldatz en ses tentes, de vaincre par sa vertu, & par son bon droit, le Roy Tigrane, & ses infinis milliers de combatans, entre lesquels y en auoit cinquante mille à cheual. Ceste grosse armee fut deffaite & rompue en bataille rangée, à enseigne desployée, & en ouuerte campagne par ceux qui estoient bien peu en nombre, mais beaucoup en magnanimité de courage : car par la raison de leur bon droit, ilz suppléerent à la faute du nombre, & par la force de leur bras, ilz résisterent à la crainte de la fortune : comme sçachant, que la multitude des hommes armez ne rend point la victoire plus assurée, & que pour estre en moindre nombre que les ennemis, lon ne doit point perdre l'assurance, & encores moins l'esperance de gagner la gloire du combat. Il n'y a celui qui puisse fuir la mort quand elle lui est destinée par les haultz Dieux : mais aussi n'y a il celui qui ne soit obligé en mourant, à garder sa bonne renommée, afin que la honte & l'infamie de sa mort,

ne souille l'ancien honneur de sa vie.

Vous cognoissez le bon droit que j'ay en ceste guerre. Il vous peut souuenir de l'obeissance que iusques icy vous m'avez rendue, comme à vostre Roine : Et si ie ne suis trompée, il vous souuient encores des guerdons que vous avez receuz de vostre loiauté. Je croy que vous aiez la tyrannie en horreur, & pense que chacun de vous est autant prest à la rechasser de foy, comme apareillé & obligé à recevoir la mort pour l'entretenement de la liberté, en laquelle ie vous ay tousiours entretenuz & defenduz iusques icy. Nous aurons à nostre aide les Dieux immortels, comme ceux qui sont les certains vengeurs des outrages, & les assurez protecteurs de l'innocence. Si doncques la raison, le bon droit, & l'aide des Dieux ne nous defaillent point en ceste querelle, faisons que le bon courage ne nous soit encores point deffaillant, & quand la fortune voudroit estre enuieuse de nostre bon heur, choisissons plustost une mort honorable, qu'une vie honteuse avecque une miserable seruitude. Considérez aussi de vostre part, que moy refusant les alliances de ces Rois Barbares, vous ne defendrez seulement ma querelle priuée, mais encores la vostre publique, avecques voz biens, vostre liberté, voz femmes & enfans, attendu les calamitez que vous endurez à l'auenir, si vous n'avez de telz tyrans pour voz Seigneurs : Prenez donc cueur mes amis, & montrez maintenant la prouesse & la vertu que vous n'avez, & qu'il vous est besoing de montrer, pour vous defendre de ceux qui ont entrepris vostre ruine. Faites que lon voie leurs despoilles pendues dans nos temples pour immortel trophée de vostre victoire : & croiez que le Roy de Russie ne triomphera iamais de la loiauté, laquelle Sidonie doit à celui qu'elle a premierement receu pour mary : ains au contraire que l'espee du Barbare n'aparoistra si tost entre nos murs, que la miene n'aparoisse

incontinent dans la poitrine de ma fille, & de moy, afin que par ceste fraîche mort ie deliure ma vie de subiection, laissant le corps sans aucune tache trespassé sur la froide terre, & satisfaisant par l'immortalité de ce sacrifice, à celui lequel (comme j'espere en vostre vertu) vous aurez fait de vous-mesmes avant que ie me voye en vne telle extremité. Mais ie suis tant asseuree de la iustice des Dieux, & de la force de voz dextres, que ie m'asseure encores d'estre excusée de ce sacrifice dont ie parle, & que vous le ferez tomber sur noz ennemis à leur grande confusion, & à vostre perpetuelle louange. Or en ceste confiance ie feray fin à mes paroles, pour en voir commencer l'effet, & inuoyeray à la defence de nostre liberté, la faueur des Diex, & le secours des Cheualiers estranges qui sont maintenāt en ma cour: & parce q mes tresors, pour grands qu'ilz soient, ne seroient suffisans pour recompenser leur vertu, ie les supplie auoir esgard à l'honneur, & à l'immortel renom qui leur est apareillé pour la vraye & meilleure recompense du travail qu'ilz quierent tous les iours errans par le monde, afin d'employer la force de leur haute cheualerie: car maintenāt ilz en ont trouué vne tresiuste occasion en ceste guerre.

Tandis que la Roine parloit ainsi, les ciotoiens entrèrent en telle ardeur, qu'ilz n'eurent presque la patience de la laisser acheuer ses propos, afin de lui respondre qu'ilz estoient prestz à hazarder franchement leurs vies à toutes sortes de dāgers, pour monstrier ce qu'ilz deuoiēt à son seruice, & au desir de leur liberté: & tant commencerent à s'orgueillir, & à concevoir vne si furieuse audace, qu'ilz supplioiēt desia leurs Capitaines, les Ducz d'Alfarce, & de Gamez, de les conduire à l'encontre des ennemys. Mais la Roine leur remonstra qu'elle ne vouloit rien estre fait temerairement, & qui ne fut bien deliberé en son conseil, parce qu'à la verité leur force ne pouuoit seruir que bien peu, si

elle n'eust esté acompagnée d'une sage & discrete pouruoyance. Ainsi la Roine descendit de son eschaufault, & le peuple rapaisé de sa premiere fureur, la conduisit iusques dans son palais, auquel se vindrēt presenter à elle plusieurs Cheualiers estranges, lesquelz se trouuerēt là presens, pour les hautes auentures qu'ilz auoient enten du arriuer tous les iours en l'Isle. Les plus renommez & estimez d'entr'eux estoient ceux qui s'ensuyuent: Dom Timbres d'Egypte, filz de Bramart Roy de Sircie, dom Elperan de Chipres, filz du Roy Orizee, dom Armines de Suisse, filz du Roy Cliniaud, dom Balard de Comagene, filz du Roy Ballados, dom Espes de Fenicee, filz du Roy dom Quedragant, dom Astibel de Pentapolin, filz du Roy Balan, dom Balart de Tatabamon, filz du Roy Manely, dom Arnaud de la Serracenicque, filz du Roy Garamont, dom Lucidan de Numidie, filz du Roy Sarquiles, dom Herme de Gragamant, filz du Roy Frandalo, dom Albior de Iubie, filz du Roy Ambor de Gadel, dom Frisel d'Arcadie, filz du Roy Girontes, dom Astibel d'Antioche, filz du Prince Abies, dom Fenix de Corinthe, filz du Roy Gionte, dom Astibel de Mesopotamie filz du Roy Galuanes. Tous ces Princes & vaillans Cheualiers apres auoir acheué plusieurs hautes & estranges auentures se trouuerent en la cour de la Roine Sidonie, laquelle cognoissant leur prouesse, & voiant le bon courage dont ilz s'offroient à son seruice, commença à croistre les premieres esperances qu'elle auoit conceuës de la victoire: & commanda aux plus grands Seigneurs de son Royaume, de leur faire honneur, & les appeler tousiours au conseil avec eux. Puis les ayant fait loger honorablement en son palais, elle les remercia de leur bonne volonté, & prenant congé d'eux, alla voir sa fille, qu'elle trouua avecques la Roine Briāgie, qui estoit fort triste & dolente, par ce qu'elle auoit entēdu que le Roy de Cores estoit venu au secours des autres Rois, & qu'il

qu'il lui auoient promis de la lui faire redre. La Roine Sidonie la cōsola au mieux qu'elle peut, lui remōstrant qu'elle estoit assuree, encores que tout son Roiaume se perdist, combien qu'elle eust bonne esperance qu'il n'auientroit ainsi, & qu'elle sortiroit à son hōneur de toutes ces guerres, & que sa plus grande facherie estoit de ce que Daraïde demeueroit si long tēps à retourner sans lui faire sçauoir de ses nouvelles. Diane receuant vne grande tristesse de leurs deuils, les laissa seules ensemble, & s'en alla dās le iardin avecques Lardenie, ou elle lui dit: Le m'esbahy fort ma chere Lardenie, de la longue demeure de Daraïde, & ne sçay qu'en penser en moy-mesmes. Qu'en voulez vous penser autre chose (dist Lardenie) sinon qu'elle a la mer à passer, qui ne la laissera pas venir par deuers vous si tost cōme elle voudroit bien. Helas! Lardenie (dist Diane) ie ne croy point cela, mais ie pense qu'elle doit auoir cōbatu avecque le Prince mon seigneur, & que tous deux soient mortz au cōbat, car ie ne puis esperer autre chose de leur rencontre. Ne croyez point (dit la Duchesse) qu'Agésilā soit si peu discret qu'il ne sçache bien s'employer à vostre seruice, & sortir de plus extremes dāgers à son honneur & à vostre contentement. Ah (dist Diane) il se departist tant faché d'avecque moy, que ie crains beaucoup qu'il n'aura aucun esgard à ce que vous dites. Sauf vostre grace (dist Lardenie) car il n'y a ennuy, ny courroux, qui peut detourner le bon vouloir, & loyal amour d'Agésilan. Je pense bien (dist Diane) que s'il sçauoit la grande force que ie me fy à son depart, a fin de la lui faire beaucoup moindre, il croistroit de beaucoup plus son amour enuers moy, en recompense de celui que ie lui porte. Il ne sçauoit vous aimer plus qu'il vous aime (dist la Duchesse) & si vostre amour eust esté pareil au sien, vous n'eussiez point eu tāt de liberté sur vous, que d'vser enuers luy d'une telle cruauté à son depart. Vous a-

uez tort (dest Diane) de me dire vne chose qui me rend encores plus triste que ie n'estois, car ie ne pense qu'il y ait au monde, amour plus grand que celui lequel ie porte à Daraïde, & vous assure que ie n'ay vñé enuers elle de cruauté, que ie n'aye vñé premierement d'une trop plus grande enuers moy-mesmes. Je vous prie (dist la Duchesse) ne me donnez point à entendre ce que j'entens bien sans que vous me le disiez. Qu'entendez vous? dist Diane. J'entēs (respōdit elle) q si vous eussiez autant aimé Agésilan, comme il vous aimoit, l'amour ne vous eust donné la liberté de faire ce que vous avez fait, ny pour vostre regard, ny pour le siē. O quelles resueries vous me contez (dist Diane) & comment eusse ie mieux satisfait à l'amour que me porte Agésilan, & à ce dont ie luy suis obligee, sinon en satisfaisant à mon honneur, & en gardant le deuoir d'une telle Princesse comme ie suis? Je vous supplie, ma Dame, (dist Lardenie) ne me parlez point, ny de ce deuoir, ny de cest honneur: car si vous eussiez esté veritablement nauree de l'amour, vous lui eussiez encores payé le tribut de sa playe, laquelle ne seuffre aucun cōseil, & encores moins de raison, veu que les meilleures raisons de l'amour, sont iniustices, & forceneries: de sorte que la veuē ne lui sert d'autre chose, sinon de ne voir goutte, qui est la cause pourquoy lon le paint auueugle. Puis donc que vo' avez eu la raison, & la veuē pour auoir egard à vostre honneur, & au deuoir d'une telle Princesse que vo' estes estimez que vous n'estes enflammee d'aucun amour: car s'il estoit ainsi, il vous eut esté impossible de regarder iamais Agésilan d'un mauuais œil, tant s'en fault que vous eussiez vñé enuers luy d'une si grande cruauté. Daraïde fut tant contristee des paroles de la Duchesse, que de grande douleur elle fut contrainte de plover, & dist: Helas! Duchesse Lardenie, combien vous recompensez mal la bonne affectiō que ie vous porte, puis que vous m'osez

tourmenter iusques à me dire que ie n'aime point Agefilan. N'auililez, ie vous prie, & ne diminuez point la gloire que ie pense auoir gaignee pour m'estre vaincu moy-mesmes, en combatant contre les cruelles forces de l'amour, & ne faites point par voz pensees Agefilan indigne des sienes: par ce que ie ne meritois estre tant aimee de lui, si ie ne sçauois bien observer les solennitez dont ie suis redevable à moy-mesmes. Quelle reputation pourroit-il auoir de moy, s'il ne l'auoit premierement de ma vertu? Quelle gloire seroit-ce d'aimer vne si haute Damoiselle comme ie suis, si l'auois le courage si bas, comme vous voulez que ie l'aye? Quelle belle victoire se vantoit-il d'auoir gaigné en vne guerre, ou il n'auoit point trouué de resistance? Quel honneur receuroit-il de mon mariage, si deuant qu'estre espousez, ie lui otroyois ce qu'il ne m'est permis de lui ôttroyer auant la solennité de noz nopces? Croyez moy, Lardenie, que d'autant que ma resistance sera grande contre la volonté d'Agefilan, & contre les assaultz de l'amour, d'autant il estimera sa felicité plus grande, en iouissant du mariage qu'il aura si long temps desiré d'une si ferme & constante espouse: car celles qui donnēt trop tost la dernière faueur de l'amour à ceux qu'elles esperent vn iour pour maris leur donnent pareillement iuste occasion de soupçonner, qu'elles pourront encores faire à vn autre, la faueur qu'elles leur ont faite auant l'accomplissement des solennitez, qui sont requises en vn ferme & loyal mariage, la force duquel n'est suffisante pour defendre sa chasteté, si premierement on ne l'a defendue par sa vertu. Je vous prie doncques, Lardenie, ne croistre point les playes dont ie suis naturee, afin qu'en gaignant la victoire sur moy-mesmes, & en laissant Agefilan nauré de mesme sorte que ie suis, sans lui pouoir donner aucun secours, ie lui puisse apareiller l'honneur & le triophe de ceste

victoire, au plus grand contentement, & à la plus grande gloire de ses pensees & des miennes. Lardenie estoit fort compassionnee de voir ainsi pleurer & lamenter la Princesse: au moien dequoi avec autāt de larmes elle lui dist: Je vous supplie, ma dame, ne prendre point en mauuaise part mes paroles, puis qu'elles vous ont meū à dire les vostres, dont vous & moy auons receu vne si grande gloire: vous pour les auoir tant biē dites, & moy pour les auoir ouïes. Vous sçauēz bien, ma Dame, que la vertu n'est point cogneuē, si elle n'est experimētē par son cotraire: ainsi ie n'eusse peu cognoistre vostre sagesse & discretiō, si ie ne l'eusse esprouuē à la touche de l'amour, à laquelle vous auez monstřé les cleres estincelles de vostre grādeur, & les viues flammes de vostre Royale chastetē. Je cognois bien, ma Dame, vostre viay & parfait amour, qui est d'autāt à priser, qu'il n'aproche en rien du vice, ny de chose qui soit cotraire à la vertu. O heureux amour lequel est rendu cler-voiat par les rayons de vostre chastetē, & capable de raison, par vostre discrete sagesse! combiē que par cy deuant il eust tousiours acoustumē d'estre aueugle, & de se gouverner selon l'inconstance de la fragilité humaine. Lon verra doncques deormais (ma Dame) en vostre parfaite beauté & vertu l'amour & la raison iointz ensemble, afin que lon voie en vous, ce qui iusques au iourd'hui ne fut encores veu au monde, à la grande gloire & extreme felicitē d'Agefilan. O vous bienheureuse, à qui les Dieux ont fait la faueur d'estre la plus belle & vertueuse Princesse de toutes les Princesses de la terre! Et bienheureux Agefilan! pour estre né le plus cheualereux & noble Prince de tous les Princes de son aage. Moy aussi bienheureuse! qui seray le moien de vous assembler tous deux en vn vray & fidele amour, avecque l'honneur & la reuerence que vous deuez au noble lignage dont vous estes yssuz l'un & l'autre. O bienheureuses encores les larmes.

larmes qui se respendēt maintenant! puis que d'elles se doit recueillir le fruit de la gloire que i'espere d'un tant noble & illustre mariage. Or ma Dame si pour vous auoir declaré en ces miennes paroles, la verité de ce que ie pensois, i'ay meritē aucun pardon, ie vous supplie le me donner, & croire que ie suis l'une des Damoiselles plus affectionnees à vostre seruice, que vous ayez en vostre cour. Diane l'embrassa & la baisant, lui dist: Ma bien aimee Lardenie, l'amour que vous portez à Agésilas, vous excuse de ce que vous auez dit. Ainsi passant maintes gracieuses paroles sur ce propos, apres auoir essuyé leurs larmes, elles s'en retournerent vers les Roines, & nous retournerons vers les Roys lesquels esperans iouir bien tost de la beauté des Princeesses pour l'amour desquelles ilz sont venuz, marchent en bataille rangée, vers la cité de Guindaie, avecques telle brauade qu'il ne leur semble deuoir trouuer aucune resistance, qui puisse empescher leurs entreprises.

De l'auenture qui auint aux auant-coureurs des Roys, ce pendant qu'ilz marchoient en bataille rangée vers la cité de Guindaie.

CHAP. XLIIII.

LEs Roys auoient enuoié assez loing deuant leur armee, vingt auant-coureurs, pour descouurir le pais, & leur rapporter s'il n'y auoit point quelque embusche, dot ilz se doutoient fort d'autant qu'ilz estoient bien auertiz du grand nombre des bons Cheualiers qui estoient lors en la cour de la Roine Sidonie. Or deux de ces vingt les mieux montez galopans, plus de demie lieue deuant leurs compagnons, trouuerent vn Cheualier venant vers eux, lequel les salua, & eux luy: puis desirans commencer leur entreprise, & scauoir des nouuelles des ennemis, ilz lui demanderent ou il alloit. Il leur respondit qu'ayant entendu la venue des Rois, il s'al-

loit ioindre à leur armee, & qu'il estoit fort grand ennemy de la Roine Sidonie, & de tous les siés. Les deux auant-coureurs remercierent les Dieux d'une si bonne premiere rencontre, & demanderent au Cheualier s'il estoit du pais. Pourquoi le demandez vous? dist-il. Par ce (dirent ilz) que nous sommes enuoiez pour nous enquerir des passages, & pour nous donner garde que les ennemis ne nous ayent dressé quelque embusche, afin d'en auertir ceux qui viennent apres nous. Je ne suis pas de ce pais (dist lors le Cheualier) mais ie l'ay bien tant frequenté qu'il n'y a chemin ny sentier que ie ne sçache: Et s'il y a lieu en tout ce quartier ou lon puisse dresser quelque imboscade, & sans grand danger faire beaucoup de mal à son ennemy, ce sera à l'oree d'un petit boys qui est delà ce rocher que vous voyez si droit, & dont la montee est assez difficile. Mais ie vous assure bien que si les ennemis auoient gaigné le bois, ie leur sçauois bien iouer vne contre ruzé, car ie sçay les endroitz par ou ie les pourrois enuironner, & leur clorre les passages, de telle sorte qu'il n'en reschaperoit iamais vn seul. Les auant-coureurs fort ioyeux de cest auertissement, le prierent de retourner, & de leur aider à descouurir l'embusche, & scauoir combien il y pourroit auoir de gens. Suuez moy, dist le Cheualier. Adonc il marcha deuant, & deux siens valletz à pied, qu'il auoit avecques lui, & ne cessa de picquer iusques à ce qu'ilz fussent tous arriuez au pied du rocher, lequel estoit bien pen hault, mais aspre & mal aisé à monter, & fort estendu en long. Derriere ce roc (dist lors le Cheualier) nous trouuerons l'imboscade, & me semble que ce sera le meilleur d'y faire monter mes gés, afin de voir que ce sera: toutesfois ie crains qu'ilz ne soient assez subtilz pour scauoir regarder les ennemis sans estre veuz, ou pour nous en rapporter le nombre au vray car ilz ne sont pas trop bien experimentez, au fait de la guerre. Il vaudra mieux

(dirent les auant-coureurs) que nous y aillons nous-mesmes, car c'est nostre vray mestier: mais par ce que la montee est vn peu roide, vous nous atendrez icy avecques voz gens qui tiendront ce pendant noz cheuaux. Faites ainsi comme il vous plaira (dist le Cheualier) car pour vous oster de trauail, i'y eusse enuoyé mes seruiteurs, ou y fusse allé moy-mesmes, n'eut esté que ie suis blessé en vne iâbe, & vois assez mal à pied. Il n'y a homme au monde (dirent les auant-coureurs) qui sçache si bien faire ce mestier comme nous, ny mieux considerer toutes les tromperies d'un ennemy. Ainsi ilz descendirent incontinēt à pied, & laissans leurs cheuaux aux deux seruiteurs, commencerent à monter contre le rocher avecques grand peine: mais ilz n'estoient encores gueres loing que les vallerz monterent sur leurs cheuaux, & le Cheualier leur dist à haute voix: O Seigneurs Cheualiers, que vous estes mal auisez pour auant-coureurs! Pourquoy cela? dirent ilz. Comment (respondit le Cheualier) vo⁹ ne voyez donc point l'embusche? Et comment la verrions no⁹ (dirent ilz) nous ne sommes encores mōtez assez hault. Et si vous y estes desia tōbez (dist le Cheualier) que vous sert-il de monter plus auant? Ilz furent tous scandalizez de ces propos, & regardans deçà & delà à l'entour d'eux sans rien apercevoir, ilz lui dirent: Nous ne voyons icy aucune embusche, & nous esbahissons comme vous dites que nous sommes tombez dedans. Par les Dieux (dist lors le Cheualier) ie ne veÿ oncques de si borgnes auant-coureurs comme vous estes, puis qu'en voulāt descourir les surprises d'autrui, vous vous estes laissez surprendre vous-mesmes, sans encores vous apercevoir de la ruze. Or escoutez moy, & faites maintenant l'office d'escoutes, car selon mon auis, vous y profiterez beaucoup pl⁹ que vous n'avez pas fait à estre auant-coureurs, veu que pour bien courir, & descourir le pais, il vous estoit trop mieux

seant d'estre à cheual que non pas à pied. Adonc se colerans encores plus que deuāt ilz lui dirent: Et bien nous vous escoutons, dites tout ce qu'il vous plaira. Or escoutez doncques messieurs les escoutes (dist le Cheualier) car ce que vous deuez escouter, est que vous estes tombez en vne embusche, de laquelle vous vous aperceurez plus aisement; si vous regardez mes vallerz montez sur voz deux Cheuaux, lesquelz sont perduz pour vous, comme estans pris au filetz de mon embuscade, & si bon vous semble, vous vous pourrez colerer d'estre tombez en ceste ruze: mais si vous me voulez croire, vous vous tourmenterez encores d'auātage d'estre demeurez à pied par faute de discretion. Or par ce que i'ay dit que si vo⁹ m'escoutiez vous profiteriez plus comme escoutes, que non pas comme auant-coureurs, ie vo⁹ prie escouter encores quelque peu: car ie vous veux donner vn auis, lequel vous deuez suivre, par ce que comme l'on dit, il faut tousiours prendre le premier conseil de son ennemy. Je vous conseille donc de descendre tout bellemēt, de peur de tomber: & maintenant que vous auez descouvert l'imboscade, en aller auertir ceux qui viennent apres vous, à fin qu'ilz ne soient si mal auisez comme vous, qui estans en la terre de vostre ennemy, auez donné voz cheuaux en garde à tel que vous ne cognoissez point. Par le Dieu Mahom (dirent ils lors fort colerez) vous estes le plus faux & trompeur Cheualier que nous ayons encores cogneu. Je suis autant trompeur (dist il) comme vous mal auisez pour auant-coureurs, attendu que i'emmeine voz cheuaux: & ne me desplaist, sinon que vous ne m'ayez laissé encores voz armes en garde, afin de monter plus aisement contre le roc, & pour vous en retourner plus legerement vers vostre grosse troupe. Vous les eussiez payees (dirent ils) autant bien comme vous payerez noz cheuaux. Voulez vous doncques bien faire (dist le Cheualier) laissez les moy

les moy encorés en garde, puis que vous estes si asseurez du payement. Mais afin que ceux qui viennent les derniers apres vous, n'ayent en rien meilleure fortune que les premiers, ie m'en vois deuant, les conseiller de ce qu'ils ont à faire pour des couvrir leurs imboscades. Or demeurez en la malencontre, & regardez comme ie suis de beaucoup meilleur auant-coureur que vous n'estes pas. A tant le Cheualier donna de l'esperon à son cheual, & s'en courut au grād gallop avecques ses deux seruiteurs. Il ne fut gueres loing, que les auant-coureurs lui esclierent qu'il retour nait: ce qu'il fist, aiant toutesfois cōman dé à ses seruiteurs de s'en aller tousiours leur train. Estant retourné aupres du ro cher, il dist: Seigneurs Cheualiers afin que vous ne me puissiez blasmer d'estre trop mal gracieux, ie suis venu voir que c'est que vous demandez par voz huees. Ce que nous vous demandōns (dirent ils) est que vous nous rendiez noz cheualx, & que vous vous gardiez de nous. Ie ne pē sois point (respondit il) que vous fussiez si folz, car vous pouuiez bien vous excu ser de m'appeller pour deux choses tāt mal à propos comme sont celles que vous me demandez. Pourquoi? dirent ilz: Or es coutez messieurs les escloutes (respondit le Cheualier) & entendez que vous ne me deuiez point faire retourner, afin de me demāder voz cheualx, puis que vous pou uiez bien penser que ie ne les ay pas pris pour vous les rendre. Encorés moins me deuiez vous appeller à fin de me dire que ie me gardasse de vous, car ie vous asseu re bien que deormais i'auray plus de sou cy de m'en garder, que vous n'en aurez de me chercher: mais si vous vous fussiez bien gardez vous-mesmes en prenant le con seil pour vous, aussi bien que vous me le donnez, vous ne vous en fussiez trouuez que mieux: car sçachez que vous auiez à faire avec l'Affronteur des ruses, qui préd tout son passetemps en ces petites ioyeu sētez Vn temps viendra (dirent ilz) que

vous vous en repentirez, ce pendant al lez vous reposer & resiouir si vous estes sage. Ainsi le pense ie bien faire (dist le Cheualier) & afin que vous ne me repro chiez de n'auoir voulu suiure vn si bon conseil, ie m'en retourne à mon hostel, ou ie me refraischiray & resiouiray: ce pendant s'il vous plaist de demeurer à ce Soleil, il vous pourra donner plus de cha leur que vous n'avez eu de sagesse. Vraye ment (dirent ilz) la sagesse ne vous man que point afin d'abuser les passans. O Dieux (respondit l'Affronteur) que vous auez bien peu de consideration! puis que ie vous ay auertiz que tout mon plaisir est de tromper le monde, pourquoy me dites vous ce que ie sçay beaucoup mieux que vous. Toutesfois en recompense ie vous veux dire vne chose, laquelle vous ignorez, c'est que vous estes tant ignorās, & tant mal pouruoyās à voz affaires, que vous auez mis mes seruiteurs à cheual, à fin que vous demeurissiez à pied: mais de peur que ie ne demeuré moy-mesmes ain si cōme vous estes demeurez si ie demeu rois icy trop long temps, il vault mieux que ie me retire avec voz cheualx, pour essayer si ie pourray point encorés recou rir ceux de voz autres compagnons. Ainsi s'en alla l'Affronteur à bride abatuē, laissant les abusez en grande confusion. Tantost apres quatre autres des vingt a uant-coureurs arriuerent au mesme lieu, & voyans leurs deux compagnons à pied apres auoir sceu leur malencontre, ilz di rent qu'ilz vouloient suiure celuy qui les auoit ainsi abusez, & qu'ils leur monstra sēnt le chemin qu'il auoit pris, ce qu'ils firent, & ainsi ceux qui estoient à cheual, commencerent à poursuiure la vengean ce de leurs compagnons demeurez à pié. Sachez que ce pendant le Fraudeur estoit arriué en vn certain chasteau, ou il auoit changé ses armes, & laissé son cheual, de peur d'estre cogneu, & s'en retournoit monté sur vne lument, par le mesme che min que venoient les auant-coureurs tel lement

lement qu'il rencontra l'un d'eux, lequel de grand desir qu'il auoit de le trouuer, s'estoit assez esloigné de ses compagnons & n'eust si tost auisé l'Affronteur, qu'il lui demanda s'il n'auoit point veu celui qu'il cherchoit, & lui en remarqua toutes les enseignes. Maudit soit celui que vous demandez (respondit l'Affronteur) car il m'a desarçonné icy deuant sans m'auoir aduertty que ie me gardasse de lui, & vous assure que ie desire fort à me venger du tort qu'il m'a fait. Menez moy là ou il est (dist l'auant-coureur) car ie satisferay à vostre volonté & à la mienne. Graces aux Dieux (dist l'Affronteur) car il n'y a chose laquelle ie desire plus que de vous mettre en la compagnie, à fin que ie demeure content : suuez moy donc, seigneur Cheualier. Adonc il le mena passer au trauers d'une forest, & dissimulant fort cautelement, tourna le visage deuers lui, & dist: Escoutez vn peu vne finesse, de laquelle ie vous veux auertir. L'auant-coureur escoutoit fort ententifuelement pour ouir les paroles de son conducteur, lequel lui dist: Je croy, seigneur, que vous estes quelque espie. Pourquoi cela? dist l'autre. Parce (respondit il) que vous escoutez de fort bonne volonté ce que lon vous veut dire. Sachez donc qu'il me fault faire en ceste sorte, à fin que ie demeure content de vostre promesse, & q par mesme moie ie satisface la mienne. En disant ces paroles, il lui passa la bride de son cheual par dessus les oreilles, & la ietta à terre. L'auant-coureur se mit incontinent à pied pour la ramasser, lui demandant pourquoy il lui auoit debridé son cheual. Afin que noz promesses s'accomplissent, dit l'Affronteur. Pourquoi? dist l'autre. Vous auois ie pas promis (respondit il) de vous mettre avec le Cheualier que vous demandiez, & vo^s, de satisfaire à ma volonté. Il est vray, dist l'auant-coureur. Sachez maintenant (dist l'Affronteur) que i'ay accompli ma promesse, & vous la vostre. Comment (dit il) faites moy entendre ce secret. Le Fraudeur

lui respondit, Je vous dy que ie vous ay desia fait trouuer le Cheualier lequel vous cherchez, car ie suis celui: & pour vostre regard, vous auez satisfait à ma volonté en me donnant vostre cheual, lequel n'est moins amoureux de ma lumet, que moy de lui, qui est vn grand signe qu'il ne me laissera point, mais bien vous, afin que vostre promesse demeure accomplie: car par ce qu'il est fol de l'amour d'une si belle Damoiselle, il s'en vient gambadant d'extreme plaisir, herissant les crins d'alegresse, remuant la queue de gayeté, & hannissant pour la grand'ioye qu'il a de se trouuer en ma compagnie, & de s'esloigner de la vostre. Et de fait le cheual suiuoit la iument en ceste façon. L'auant-coureur qui demouroit à pied, se colerant fort de ceste tromperie, lui dist: Par le Dieu Teruagant, trahistre Cheualier, si ie peux vous achetez mon cheual bien cher. L'affronteur ne fist que rire, & dist: Vrayement, seigneur Cheualier, ie vous eusse bié creu de ce que vous me dites sans iurer, & pense bien que si vous pouuez, vous me rendrez la pareille: en quoy ie trouue vostre promesse bien cōsideree, car vous ne promettez rien, sinō en cas que vous en ayez la puissance. Laissez ces railleries (dist celui qui estoit à pied) & me rendez mon cheual. Je n'eusse iamais pensé (dist l'Affronteur) qu'un homme suiuant les armes comme vous, eust esté si fol de vouloir recouurer en paix ce que son ennemy a gagné de si bonne guerre. Pourquoi dites vous cela? dit le pieton. Estes vous pas (dit l'Affronteur) des ennemis de la Roine Sidorie? Oy, dist il. Pourquoi donc (dit l'autre) auez vous esté si fol de me receuoir sans aucunes treues en vostre compagnie veu que ie suis vassal de la Roine, pour maintenant me demander ce que i'ay cōquis sur vous en vne si bone guerre. Mais par ce que vo^s me semblez estre quelque auant-coureur, il vault mieux que pour maintenant vous changez vn peu vostre office, & que là ou vous sonliez courir deuant

nant vostre armee, vous courez maintenant apres vostre cheual, lui tenant en sa course la mesme compagnie que vous lui voiez tenir à ma iument. A tant l'Affronteur s'en coutut à bride abatuë par la forest, & le cheual apres lui, iusques à ce qu'il fust arriué au chasteau, ou il se fist fort bien ferrer avec les autres. L'auant-coureur fort coléré s'en retourna à pied par le mesme chemin qu'il estoit venu & les autres trois suivirent l'Affronteur au trac du cheual, iusques à ce qu'ilz fussent arriuez au chasteau, mais parce qu'il les auoit veuz venir de loing, il s'estoit mis en embuscche en leur chemin, avecq' cinq autres Cheualiers, de sorte que deux des auantcoureurs furent abatus par terre à l'impourueü, & l'autre se sauua de viffesse, auquel l'Affronteur dist à haute voix, Seigneur Cheualier, puis que vous auez descouuert nostre imboscade, dites à voz compagnons que nous scauons bië qu'ilz en seront bien tost aduertiz : & partant ne vous esbahissez point si vous ne nous retrouuez plus en ce chasteau, car nous allons mener l'escuirie que nous auons ce iourd'huy gaignee, en quelque part à sauueté. Acheuant ces motz, les Cheualiers abatus, & leurs cheuaux furent emmenez dans le chasteau, n'estant l'Affronteur moins ioyeux d'auoir eu en vn mesme iour l'ysuë heureuse de trois finesses, que glorieux de la proye qu'il auoit conquis par ses ruzes. Celui qui estoit fuy, & les autres qui estoient demeurez à pied, firēt assez rire les Rois, leur aiant recité ces tromperies : car ilz auoient assez oy parler du Cheualier Affronteur, & disoient que quand bien ilz le tiendroient en leur puissance, ilz ne lui feroient aucun mal, ains tout honneur, comme à celui qui n'auoit moins de grace à iouer ses tours de souplesses, que les braues Cheualiers à executer leurs hautz faitz d'armes. Ainsi deuifans de ce propos, ilz marcherent tousiours en bataille iusques à ce qu'ilz descouurirent la ville de Guindaie, & lors

aians vn peu laissé reposer leurs gens, ilz delibererent de donner l'ailault à la cité tout incontinent, à fin que les confederrez & alliez de la Roine, n'eussent le loisir de lui enuoier aucun secours.

Des aspres & cruelz assaulx qui furent donnez à la cité de Guindaye, & comme la magnanimité & hardiesse de la Roine Sidoronie empescha la ville d'estre prinse des ennemys.

CHAP. XLV.

LEs Roys estans arriuez deuant la cité departirent leur armee par escadrons, & choisirent les endroitz des murailles, ou les Elephans, avec les chasteletz remplis d'hommes armez pourroient encommencer l'assault. Puis commanderēt que les fossez fussent comblez aux lieux plus profonds, les eschelles dressées es endroitz ou l'ocasion s'en offriroit les moutons, & autres machines mises en ordre pour abatre les murs, & que ce pendant les arbalestriers & archiers eussent à faire si bien leur deuoir, qu'aucun ne s'osast monstrier dans les creneaux : lesquelles choses furent soudainement mises à execution, avecque vne fureur merueilleuse, & de telle aspreté qu'il seroit difficile à croire. Ceux du dedans commencerent pareillement à se deffendre par grande vertu, renuerser les eschelles, darder de gros quartiers de pierre, ietter des fagotz enflammez, verser de l'huyle bouillant, & de la poix ardante, sans oublier rien de ce qu'ilz auoient preparé pour endommager les ennemys. Ce pendant, du camp, & de la ville, les fleches, & les dards commencerent à voler en l'air avecq' telle espesleur, que les premiers pouuoient facilement combattre à l'ombre, mesmement ceux des Elephans, qui s'estoient tellement atachez avecq' ceux de la ville, qu'ilz combatoient main à main par dessus la muraille, aussi aisement que s'il eussent

eussent esté en pleine campagne, & desia le bruyt des armes, les coups des moutons, les criz des mourans & des naurez, retentissoiét par si grãd' horreur de tous costez, que lon ne se pouuoit plus ouyr les vns les autres. Adóc selon ce qui auoit premierement esté deliberé au conseil, l'ouurit vne porte de la cité, nommee l'Aquiloine, qui respondoit à celle partie du temple ou la Roine vid premierement Florisel de Nicquee & Falanges d'Astre, & estoit assez pres des tours de Phœbus, & Diane, d'ou les Roines & la Princeesse regardoient le combat. Par ceste porte, deuant laquelle y auoit vne belle plaine, sortit le Duc d'Alfarce avecque deux mile Cheualiers, entre lesquelz estoient dom Fenix de Corinthe, dom Astibel de Mesopotamie, dō Arnaud de la Sarracenicque, dom Lucidan de Numidie, dom Frisel d'Arcadie, & plusieurs autres de noblesse ancienne, & de grand renom au fait des armes, lesquelz vindrēt tous d'une course donner dans les flancz des escadrons Russiens, qu'ilz rompirent à leur arriuee, & les desarrengerent de sorte que les mieux auisēz prindrent la fuite, voyans le desordre ou ilz estoient, & cognoissans qu'il ne leur restoit plus aucun moyen de combattre à forces pareilles, pour la confusio des rangs, qui estoient si esclarcis en vn endroit, que leurs ennemis se trouuoient quelque fois trois contre vn, & en l'autre tant pressez que la foule de leurs compagnons les empeschoit de se bien deffendre, & de manier leurs armes ainsi qu'ilz eussent bien voulu. Les Rois de Gaze, & de Cores, voyans ce trouble, & l'occision de leurs gens, acoururent celle part à grãde haste avecque toutes leurs forces, & lors se commença entre les Cheualiers, vne des plus belles batailles, qu'il eut esté possible de voir, car encores que ceux de la ville fussent bien peu en nombre, si est ce qu'ilz estoient tant en vertu & en bon courage, que le long temps ilz ne laisserēt prendre aux ennemis aucun auantage sur

eux. Toutesfois voyant qu'ilz s'assembloient tous en ce lieu avec grãdes huees & qu'ilz abandonnoient l'assault de la ville pour venir charger sur eulx, ilz considererent qu'à la longue ilz pourroient estre renfermez & entournez. Partant tenans tousiours vne contenance asseuree, & sans iamais perdre leur rang, ilz se retirerent peu à peu dans la ville, & combattirent assez long temps deuant la porte, sans monstrier aucune aparence d'estre vaincuz, en façon que les Russiens abandonnerent ce combat par le commandement de leurs Capitaines, pour retourner à l'assault des murailles. Le Duc d'Alfarce ne fut si tost r'entré dans la ville, que le Duc de Games sortit par la porte Apollinnee, avec deux mile autres Cheualiers, deuant lesquelz marchoiēt aux premiers rangs dom Timbres d'Egypte, dom Esperan de Chipres, dom Hermes de Suisse, dom Balart de Comagene, dom Espes de Fenicie, dō Albior de Iubie, & dom Astibel d'Antioche, avec plusieurs autres nobles & Cheualereux personnages, qui commencerent d'entree vne fort belle escarmouche, car donnans le grand' bataillon des Messagettes & des Corois, qui ne pensoient qu'aucun osast plus saillir de la cité, ilz renuerferent leurs premiers rāgs iusques au sixiesme. Le Duc de Gamez pēfant continuer sa bonne fortune, print deux centz Cheualiers d'elité avecque lui & dont il auoit assez de fois experimenté la prouesse & extreme hardiesse, puis alla assaillir le dextre flanc du bataillon, afin de le mettre en route, ce qu'il fit, car les Malsagettes qui estoient en celle part, ayans veu tuer deuant eux les plus excellens de leurs compagnons, commencerēt à entrer en telle crainte, qu'ilz n'auoient plus aucun courage de se deffendre. Adonc ceux de la ville se fourrerent par telle fureur au trauers, qu'il n'y eut celui d'eux qui n'ensanglantast son espee du sang des Messagettes & des Corois, de sorte qu'en moins d'une heure que dura la meslee

la meslee, ce grand bataillon estoit à demy taillé en pieces, & eut esté du tout sac-
cagé, si le Roy de Gaze & le Roy Bruzer-
be le crespelu, avecque toute la fleur de
leur caualerie ne fussent acouruz au se-
cours. Ce que voyant le Duc de Gaméz, &
sachant qu'il n'estoit pour resister à ceste
grosse troupe, s'il laissoit ces gens ainsi es-
pars à la poursuite d'une faine victoire,
il fist sonner vn clairon, au son duquel se-
lon sa deliberation premierement prinse,
tous ceux de la cité se rallierent ensemble
ment, & firent vn escadron en forme de
triangle, dont l'une des pointes respôdoit
dans la porte de la ville, pour se retirer
quand bon leur sembleroit, & les autres
deux pointes du triangle estoient pour
faire teste aux ennemis. En ceste sorte ilz
atendirent le choc de la grosse troupe, &
parce que la premiere rencontre fut con-
duite par les plus braues & hardis Cheu-
liers qui fussent des deux partz, la plaine
fut incontinent couverte de mortz. A ce-
ste meslee acoururent de rechef tous les
Russiens & abandonnerent l'assault des
murailles pour s'y trouver, & mesmemet
ceux qui premierement auoient esté mis
en route, pensans regagner leur honneur
& rendre la pareille à ceux de la cité: car
la honte d'auoir esté vaincuz, & l'enuie
de se venger, leur auoit tellement acru le
courage, qu'ilz n'auoient plus d'esgard à
aucun peril ou ilz se peussent hazarder.
Avec ceux-cy le reste du grand bataillon
des Massagettes & des Corois, apres plu-
sieurs iniures & reproches dôt leurs Roys
les auoient enflammez & encouragez au
combat, vindrent assaillir le fenestre flanc
du triangle, ou ilz furent soustenuz ver-
tueusement par dom Timbres d'Egypte,
& dom Atibél d'Antioche qui auoient
pris ce costé à deffendre. Ainsi se maintint
le combat deuant la porte Apollinee, ius-
ques à la nuit, que les Russiens & les Mas-
sagettes s'estoient tellement enuolepez
parmy ceux de la cité, qu'ilz tuoient sou-
uent leurs cōpagnons pensans tuer leurs

aduersaires, & la retraite sonnee d'une
part & d'autre, ilz entrerēt en assez grād
nombre dans la ville parmy la foule, ou
ilz ne furent si tost recogneuz, qu'on les
meit à mort, depuis on les ietta dans les
fossez pour essayer d'autant ceux qui re-
tourneroient escheler les murailles. Ainsi
se finit le premier assault puis toutes les
portes de la ville fermées, & le guet assis
avec la ronde & les sentinelles acoustu-
mées, les Ducs d'Alfarce & de Gamez a-
uéc les Princes estrangers entrerent au cō-
seil, ou apres autres diuerses deliberations
il fut arresté que de là en auant sans autre
ocasion, ilz ne feroient plus aucune saillie:
car encores qu'ilz eussent fort endomma-
gé les ennemys & gaigné l'honneur de
l'escarmouche, si est-ce qu'ilz auoient per-
du plusieurs hardis personages, dont ilz
pouuoient bien auoir affaire à l'auenir
pour soustenir la longueur du siege. A la
sortie du conseil chacun se retira en son
hostel pour reposer, & mesmement ceux
qui estoient lassez du trauail du iour: &
lors la Roine alla visiter les Princes &
Cheualiers que nous vous auons cy des-
sus nommez, lesquels estoient logez en
vn quartier de son chasteau, puis les aiant
remerciez de ce qu'ilz s'estoient ce iour
employez tant vertueusement en sa fa-
ueur, elle se retira avecques sa fille Diane.
Celle nuit ne fut à grād peine passée, que
l'alarme sonna par toute la ville, car les
ennemys estoient desia aux murailles, &
continuerent l'assault huit iours entiers,
sans prendre aucun repos sinon la nuit:
pendant lequel temps ilz abatirent vne
grande partie des murs de la cité, de sorte
que lon n'atendoit que l'heure qu'ilz en-
traissent dedans, car ilz l'eussent facilement
fait, n'eust esté que lon dressa certaines
terrasles de blocage derrierere les murs
qui les pouuoient encores arrester quel-
que temps. Ainsi les citoiés se defendoiēt
à grād trauail cōtre les ennemis, & n'auā
aucune esperance de secours, ilz s'estoient
tous resoluz de mourir, tant pour obeir à
leurs

leur Roine, que pour entretenir leur liberté. Le neuuiesme iour de l'assault, le Roy Bulthazar aiant recogneu la ville sur la matinee, fit transporter les moutons & autres engins de baterie en vn endroit des murailles qu'il auoit aperceu le plus foible, & là le heurt fut tel, & la roideur des coups si violente, que sur le midy, la muraille & la terrasse qui estoit derriere, tomberent par terre, tellemēt que la breche se trouua de biē quarante hommes de front. Alors les plus braues des ennemis vindrent courageusement au combat, & sans doute ilz fussent tous entrez ce iour dans la ville, si les preux Cheualiers de la grand' Bretagne, & leurs alliez n'eussent entrepris la defence de la breche, à laquelle ilz s'offrirent tous franchement aians chascun la picque au poing, & renuersoiēt autāt d'ennemis comme il s'en presentoit deuant eux. Mais à la fin la foudre fut si grande que bō gré malgré, quelques vns entrèrent dedans dont le peuple fut fort effrayé, & tandis que ces nobles Princes seruoient de rempart à tous ceux de la ville, la Roine oiant le bruit, se mit à vne fenestre de son palais, & voiant vne grande troupe de ses citoiens assemblez en la grand' place tous tremblans de peur, elle leur demanda quel bruit c'estoit qu'elle auoit entendu. Helas! ma Dame (dirent ilz) nous sommes tous perduz: car la cité est prise. La Roine monstrant vn visage constant & assuré, sans estre aucunemēt troublee, leur respondit: Voulez vous donc mes chers citoiens, si les armes vo⁹ manquent pour vous defendre des ennemis, qu'elles vous māquent encores pour vous defendre de la seruitude qui vo⁹ est apareillee, en laissant perdre la liberté, laquelle vous vous pouuez donner de voz propres mains? Retournez, retournez au combat, & confidez que si voz armes, & les forces de voz bras, ne nous defendent en ceste extremité, qu'il n'y a plus en ceste Isle ny forteresse, ny chasteau qui vous defende deormais. Elisez plustost

vne honorable mort, qu'une vie vergogneuse, ou à tout le moins faites vostre deuoir de vous entretenir en vne honorable vie par la mort de voz ennemis, en laquelle vo⁹ deuez auoir toute vostre esperance, si mieux vous ne la voulez auoir en la vostre. Adonc la Roine sortit de son palais, & monta sur vne Licorne richement patee, tenant vne espee nue en sa main, & estant vestuē d'un acoustrement de drap d'or frisé, avec vne precieuse couronne de pierrerie sur son chef. Quelques siennes Damoiselles l'accompagnerent en cest estat iusques à la breche, ou le bruit estoit si grand qu'à peine eust on ouy tonner. Là sa beauté, & sa graue & hautaine contenance, donna tel cueur au siens, & tant de crainte à ses ennemis, que comme tost estonnez de la reuerence que lon doit à vne telle personne, leurs bras se debilitèrent & languirent, sans plus auoir la puissance de ruer vn seul coup d'espee, tellement que lon eust d'est qu'ilz mouroier d'une mort volontaire, tant ilz faisoient peu de resistāce à ceux de la cité, lesquels au rebours s'encourageoient de plus en plus, car la presence de leur Roine qu'ilz veoient disposee de mourir, en cas que la ville se prist, tellement que la crainte que les bons subietz auoient de la mort de leur Princesse, leur auoit fait perdre la crainte de la leur propre, de laquelle toutesfois ilz se garātirent par celle de leurs ennemis. Tāt fut grande leur fureur, que de tous ceux qui estoient entrez dans la ville, il n'en eschapa vn seul qui ne fut mis au fil de l'espee, & poursuivirent les autres plus de deux cens pas hors de la porte, iusques à ce que la nuit les contraignit de se retirer. La plus grande part des historiographes qui ont parlé de ceste guerre, tiennent que la Roine sortit avecque ses gens pour rechasser les assaillans, & que la splendeur des armes qui lui rayonnaient en façon d'esclairs sur son beau visage, la faisoient aparoir aux ennemis, comme vne Deesse descendue des cieux en leur

en leur ruine : au moien dequoy ilz perdirent le courage, & s'enfuirent tous treblans dedans leurs tentes. Toutesfois Galerfis soustieut qu'ilz s'estoient ainsi reculez deuant la Roine par le commandement du Roy de Gaze, qui craignoit qu'elle ne receut quelque mal, comme celui qui l'esperoit auoir en mariage. Tant y a que la victoire gaignee, & les lieux ou l'on auoit combattu tous pavez de mortz, la Roine retourna comme en triomphe dans son palais avecq' les Princes estrangers, au son de plusieurs tabours, fifres, trompettes & clairons, & à la lumiere de plus de mille flambeaux, qui chassoient les tenebres de la nuyt : lesquelz parauenture furent occasion avecque sa merueilleuse beauté, & la remembrance de sa hardiesse, que par les rues tout le peuple se mit à genoux deuant elle, & l'adora comme Deesse, estimant que par sa seule deité, elle eust sauué sa ville, & la vie de ses subietz. Partant depuis entre tous les payens, elle fut nommée la Deesse guerriere, chacun d'eux croiant par l'experience de ce iour, qu'elle auoit puissance sur les batailles : à raison dequoy en diuers lieux de l'Isle on bastit plusieurs temples qui furent dediez A LA DEESSE GUERRIERE, esquelz elle estoit representee au vif sur le principal autel, en la mesme façon qu'elle estoit sortie ce iour au combat, & le peuple lui sacrifioit tous les iours en temps de guerre, afin d'estre deliuré du tourment, & de la calamité qui lui en aduient. Incontinent apres ceste belle victoire, la breche fut ramparee tout le long de la nuit, avec telle diligence que le lendemain il estoit facile de la descendre. La Roine donc estant retournée dās son palais, soupa en la grande salle avecque les plus renommez Cheualiers, qui n'estoient encores blesez, donnant à toute assurance, qu'il n'y auoit celui en toute la ville, qui fist plus aucun semblāt de craindre en ceste extrēmité, en laquelle celle nuit mesme Dieu leur enuoya en-

core vn autre secours, non moins miraculeux que celui lequel n'agueres auoit sauué la ville de la force des ennemis.

Comme dom Florisel de Nicquee & Daraïde arriuerent sans se donner à cognoistre en la cite de Guindaye, & furent logez dans le Palais par le commandement de la Roine.

CHAP. XLVI.

DE puis que dom Florisel & Daraïde furent embarquez en l'Isle d'Artadeffe, le vent commença derechef à leur estre tellement contraire, qu'ilz demeurèrent enuiron quatre mois par plusieurs incertaines Isles, ou ilz acheuerent de hautes & estranges auentures, & vainquirent maints horribles geans. Finablement ilz arriuerēt en l'Isle de Guindaye, & prindrent terre au mesme lieu ou les Rois avec leur armee auoient pris port, au moien dequoy ilz furent soudain aduertis de la grand' puissance avec laquelle ilz estoient venuz assaillir l'Isle, dont ilz furent fort tristes, encores qu'ilz eussent quelque ioye d'estre arriuez là en vn temps si oportun, auquel ilz auoient le moien de s'emploier au seruice de la Roine. Estans sortis de la nef, Daraïde dist à ses Damoselles qu'elles l'attendissent au port, & que ce pendant le Prince & elle iroient essaiier s'ilz pourroient entrer dās la ville. Ainsi sortans du port, & estans montez à cheual armez de toutes leurs armes, Daraïde dist à dō Florisel qu'elle le prioit qu'ilz ne se donnassent point à cognoistre, iusques à ce qu'elle l'eust aduertuy du temps qu'il seroit bon de ce faire. Le Prince lui respondit qu'elle gouuernast les choses ainsi que bon luy sembleroit, & qu'il n'estoit venu avecque elle sinon à fin de lui obeir, & se regler entierement selon sa volonté. A raison dequoy, ayans changé leurs armes, & leurs escuz dans leur nef, tant cheminerent que la nuyt mesmes, en laquelle la Roine estoit

estoit portee si vertueusement au combat, ilz arriuerent au camp des ennemys, ou ilz se sceurent si bien desguiser, & parler la langue Persicque, que lon les laissa passer tout outre, sans aucun empeschement, & vindrent iusques à la porte Apollinee, ou ilz dirent aux gardes qu'ilz estoient subietz de la Roine qui la venoient seruir en ceste guerre, & que lon leur fist abatre le pont & ouurir la petite porte. Les gardes voyans qu'ilz parloient tresbien le langage de l'Isle, & qu'ilz n'estoient que deux sans aucune suite, abatirent le pont, & leur ouurirent la porte, laquelle ilz refermerent tout soudain, puis leur racontèrent avec grande ioye la hardiesse par laquelle la Roine auoit sceu sauuer sa ville d'estre prise: dequoy dom Florisel & Daraïde furent fort esmerueillez, & trescontens, l'un pour auoir eu vne fille d'une si excellente Roine, l'autre, pour aimer vne Princeesse nee de deux si excellens personnages. Deuisans de ce propos, ilz arriuerent en la grand' place deuant le palais, ou ilz s'arrestèrent assez long temps pour regarder la tour de dom Rolaran, & de la Duchesse de Bauiere, car Daraïde auoit desia recité à dom Florisel celle auenture, & le pria s'il ne la vouloit esprouuer qu'il l'attendist vn peu, & que deuant toutes choses elle en vouloit faire l'experience, Dom Florisel lui respondit qu'il le fist ce que bon lui sembleroit, & qu'il n'auoit autre volonté que la sienne. Adonc estant descendue de cheual, elle monta en la tour enchantee, avec si grand desir de voir sa Diane, & d'entendre le secret de son courage, qu'il vous seroit impossible de l'exprimer. Estant donc arriuee deuant la Duchesse, & lui aiant demandé l'occasion de sa plainte, La Duchesse prit la ressemblance de Diane, & lui dist: Agefilan, l'amour extreme duquel ie vous aime, ne peut endurer vne si longue demeure, comme la vostre. Ie souffre la pene que ie vous causay à vostre depart: trop plus rigoureux se que vous ne faites, & la souffry pre-

miere que vous, car ie forçay mes propres affections, pour mieux resister aux vostres, & à fin de n'oublier rien de ce que ie doy au lieu que ie tiens. Parquoy, mon loyal amy, ie vous prie prendre en vostre douleur, la mesme patience que ie prens en la mienne, & considerer que vous n'estes point tant tonrmété pour mon amour que ie ne sois de beaucoup plus tourmentee pour le vostre. Acheuant ce propos la Duchesse tourna sa premiere façon, donnant tant de plaisir à Daraïde, que comme hors de soy elle lui baïsa les mains, & dist: Ma Dame, ie vous prometz de reconnoistre bien tost la faueur que vous m'auiez faite, en vous rendant le seruice, lequel apres vn long travail i'ay deliberé en moy mesmes. Adonc elle se trouua hors de la tour, avec vne extreme liesse & retourna vers dom Florisel, lequel lui dist que pour lors il ne vouloit point esprouuer l'auenture: Mais ce n'estoit tant par faute de bonne volonté, comme par faute de hardiesse: car il lui souuenoit comme en ce lieu il auoit offensé les loix de la loiauté, & regardant le palais de la Roine, il ramenteuoit en ses pensees le temps heurenx, auquel il peut iouir de ses amours, aiant trop plus de crainte des plaies qu'il pouuoit encores receuoir de sa beauté, que de celles lesquelles il esperoit du combat qu'il pensoit auoir avec Daraïde, combien qu'il redoutast ceste rencontre plus qu'aucune autre, ou il se fust iamais trouué pour la cognoissance qu'il auoit de la prouesse, & haute cheualerie de celle excellente pucelle. Il estoit encores esbahy comme elle lui faisoit tant de seruites, & portoit vn si grand amour, veu qu'elle le deuoit combattre, & n'en pouuoit penser autre chose, sinon que c'estoit pour auoir desia long temps demeuré en la compagnie l'un de l'autre. Partant il luy sembloit que ny luy, ny elle ne pourroient auoir en leur combat, l'orgueil & la felonnie, que lon doit auoir en vn camp clos à l'encontre de son ennemy. Ce pendant

dant que le confus Florisel se toutmêtoit en ces pées, Daraide remôta sur son cheual, & prenant le Prince par la main, s'en allerent deuisans iusques à la porte du Palais, ou ilz trouuerent vn grand nombre d'hommes armez de la garde de la Roine, au premier desquelz Daraide dist : Mon amy allez vo' en dire à la Roine, que no' sommes icy deux Cheualiers estrâges qui sommes venuz apres plusieurs dangers nous rendre à son seruice, & que nous ne voulons nous doner à cognoistre iusques à ce que par l'experiece de noz faitz d'armes, nous meritions d'estre cogneuz : au reste que nous la supliions nous donner logis en son palais : car ie l'assure que no' sommes telz personages, que nous cognoissant, elle ne sera point marrie de no' auoir fait ceste faueur. La garde s'en alla incontinent dire ce message à la Roine, laquelle en fut fort ioyeue, & commanda que lon leur donnast vne belle chambre, assez pres de la sienne, dans laquelle y auoit deux riches litz : & afin de leur faire plus d'honneur, elle enuoya le Duc d'Alfarce pour les receuoir, avecque plusieurs flambeaux ce qu'il fit vsant d'vne grand' courtoisie enuers eux, & les aiant cõduit par la main iusques dans leur chambre, apres leur auoir fait tout le bõ acueil qu'il lui fut possible, il print congé d'eux, par ce que pour ce soir ilz ne vouloient aller faire la reuerence à la Roine, & ainsi s'en alla fort esbahi de leur belle representation. Incontinent apres il commanda que lon leur couurist pour le souper : ce qui fut fait avecq' vn bel ordre de seruice. Les tables leuees ilz fermerêt la porte sur eux & se coucherêt chacun en son lit, laissant deux flambeaux alumez au mylieu de la chambre, & leurs armes bien ordonnees, afin que selon le besoin, ilz peussent estre plustost prestz, s'il auenoit que les ennemis qui tenoient la ville assiegee, voulussent entreprendre de faire de nuit, ce qu'il auoient presque acheuè des le soir.

De la sage maniere par laquelle Daraide accomplit la promesse qu'elle auoit faite à la Roine Sidonie de combattre dom Florisel de Niquee.

CHAP. XLVII.

LE trauail des iours passez, & l'assurance des paroles de Daraide, peurent tant sur l'excellent Prince dom Florisel de Niquee, que bien tost apres s'estre mis au lit, il commença à dormir d'vn profond sommeil. Mais Daraide aiât fait semblant de dormir la premiere, pour le rendre plus assuré de tout son soupçon : & voiant l'ocasion d'accomplir ses desseins plus desirez, se leua promptement, & tira de sa valise vne belle robe de drap d'or, avecques vn riche carquant, & vne ceinture de mesme ourage, dont elle s'acoustra assez à la haste, & desliant ses beaux cheveux, prit vne guirlande de fine pierrerie sur son chef, & pendit son espee en escharpe à sa façon acoustumee, puis avecq' vn flambeau en la main sortit tout bellemēt de la chambre, & s'en vint vers celle de la Roine, laquelle d'autant que chacun estoit retiré, vouloit laisser les vestemens royaux, avec lesquels elle estoit sortie ce iour au combat. Daraide n'eut si tost frappé à la porte, que l'vne des damoiselles vint demander qui c'estoit. M'amie (respondit elle) ouurez moy, car ie suis Darai de, qui suis arriuee ceste nuit, & fault par necessité qu'auant que ie dorme ie parle à la Roine. La Damoiselle fort resiouye de ces nouvelles, & recognoissant Daraide à sa parole, lui ouurist l'huis incontinent sans retourner dire qui c'estoit. Adoncques elle entra faisant esbahir de son excellente beauté, toutes celles qui la regardoient, & mesmemēt la Roine, laquelle voiant l'alegresse, & ioyeuseté de son visage, tressaillit toute de grande frayeur pensant qu'elle luy aportast la teste de dō Florisel : au moien dequoy les extremités de la ioye & de la douleur furent si gran-

des en sa pensée, que bien peu s'en falut qu'elle ne mourust en même instant. Tant y a que la confusion & le trouble de son esprit, lui fit changer de cent couleurs, avecque des gestes fort variables & inconstans: ne se montrant moins alterée en son courage, qu'incertaine de ce qu'elle devoit dire. Daraïde se mit à genoux devant elle, & lui baisa les mains: puis la Roine tant hors de foy qu'elle ne pouvoit presque parler, lui dist: Las! Daraïde, qu'elle arrivée est celle cy? si vous avez acheué vostre promesse en me vengeance de mon honneur, acheuez maintenant ce qui reste encor' à faire, qui est de me couper la teste, afin que ie puisse acheuer ma vie en ce contentement de ma gloire, avant que i'oye les tristes nouvelles de ma mort. Puis donc que vous m'avez esté occasion d'un si grand heur, ne me causez point maintenant un tourment si cruel, que de me faire mourir en vie par l'absence de l'accomplissement de mes desirs, duquel aujourdhui i'auois eu un certain presage, si ie l'eusse sceu cognoistre: car la gloire d'auoir vaincu tant de Cheualiers par ma presence, ne me pouvoit signifier autre chose que la victoire de mon principal ennemy. Madame (respondit Daraïde) avant que i'accomplisse celle seconde promesse dont vous me requerez, s'il vous plaist vous accomplirez la promesse que vous m'avez promis accomplir, avant que i'accomplisse la mienne dernière: ce que ie vous supplie faire, d'autant plus que les paroles d'une telle Princesse comme vous estes ne doiuent point estre violees. La Roine fut encores plus troublée de ces propos, tenant la teste de dom Florisel pour assée, & partant elle respondit: Ah Daraïde, i'accompliray tout ce que ie vous ay promis, mais ie vous prie accomplir pareillement ce que vous devez à l'amour de dō Florisel, & à celui dont vous m'estes redevable, afin qu'en voyant ensemblement sa mort & la mienne, ie me voie pareillement satisfaite de ce que ie doy à

mon honneur, & à l'amour que ie lui porte. Ma dame (dit Daraïde) ie feray tout ce qu'il me sera possible pour vous rendre le seruice dont ie vous suis redevable: mais s'il vous plaist, vous viendrez maintenant avecque moy pour accomplir ce que vous m'avez promis. Allons ou il vous plaira, dist la Roine. Adonques elle se leua vestue des mêmes acoutremens qu'elles auoit portez au combat, & dist à Daraïde qu'elle la prit par la main, & lui aidast à cheminer, par ce qu'elle estoit tant troublée qu'elle ne se pouvoit soutenir, comme celle qui craignoit une double mort, la sienne, & celle de dom Florisel. Daraïde la prit dessous un bras, & donna son flambeau à une des damoiselles, laquelle avec cinq autres aïas chacune leur flambeau, marcherent devant la Roine & Daraïde, & toutes les autres apreselles. Ainsi s'en allerent tout bellement en la chambre de dom Florisel. Il dormoit lors d'un profond sommeil, & auoit la poitrine à demy nue hors du lit, & ses beaux cheveux recueillis en une coiffe de fil d'or, faite en forme de retz: & prenoit son repos coy & paisible, montrant en tout ce qui aparoissoit de lui une extreme beauté & fort bonne grace. La Roine & sa suite estant arrivée dans sa chambre, & les damoiselles qui portoient les flambeaux, arrangees autour de son lit, Daraïde tira les courtines, & la Roine s'aprocha tout aupres du cheuet, laquelle voyant & recognoissant dom Florisel, sans bouger d'une place, ny se remuer en façon du monde, comme toute esperdue, commença à le regarder, arrosant de maintes grosses larmes les lis & les roses de son beau visage. Adonque Daraïde tenant son espee nue en la main, se mit à genoux devant elle, & lui dist: Excellente & vertueuse Roine, i'ay accompli la premiere promesse que i'auois faite à votre grandeur, de vous donner la teste de dom Florisel, en vous le liurant entierement en vostre puissance comme mort: car tel se peut il esti-

il estimer, puis qu'il n'y a si foible damoiselle, qui ne puisse maintenant prendre de lui, la teste, & la vengeance, que vous en auez desirée par si long temps. Or le don que vous me devez faire, si vous voulez que j'accomplisse ma seconde promesse, c'est que de ceste espee vous tranchez la teste de ce Prince tant pour vostre contentement, en vous vengeant du tort lequel vous dites qu'il vous a fait, comme pour sa gloire immortelle, en recevant la mort d'une si noble & excellente main. Regardez doncques ma dame, si en lui tranchant la teste, vous me voulez obliger à trancher la vostre, car en n'accomplissant vostre promesse que ie laisse en vostre libre volonté, ie ne suis point obligée à l'accomplissement de la mienne. Pendant ces propos, la Roine ne sceut jamais retirer ses yeux de dessus dom Florisel, ny cesser de plorer: & finalement prenant l'espee de Daraïde, & s'approchant plus pres du lit du Prince, ainsi que chacun pensoit qu'elle lui voulust trancher la teste, elle commença à parler en ceste sorte: O amour! ô obligation de ma grandeur! quel moiien me restera il plus désormais pour atorder deux si cruels inimitiez? O chasteté combien est grande la violence par laquelle tu m'obliges maintenant à me venger de mon inuie! O Amour combien est grande la force par laquelle tu contredis à mon deuoir! O Moraïzel, ymage de dom Florisel, mais plustost la vraie ame de Sidonie, las combien ie voy peu soucieux en ce soucy qui me tourmente! Helas! Daraïde, pourquoy m'auez vous mis en telle necessité ou ie ne puis trouver de conseil? Ah! ie cognois bien maintenant que l'amour n'en est aucunement capable, & encores moins de la raison! O Daraïde, vous auez bien monstré combien vous portiez plus d'amour à ma fille, que non pas à moy, puis que par ma mort vous auez asseuré celle de son pere, & pensé asseurer celle que sa mere pensoit recevoir par voz mains.

Vous auez accompli vostre promesse, puis que vous auez mis le Prince Grec en ma puissance pour en disposer à ma volonté: mais de ma part ie ne puis rien accomplir de ce que ie desirois, voyant mon cher Moraïzel ainsi endormy, pour la confiance de la seureté que vous lui auez promise par voz paroles, comme asseurée de ma vertu. Helas! Daraïde, d'autant que ie suis vostre redeuable, d'autant ie me sens foible pour satisfaire à ce dont ie deurois maintenant satisfaire à dom Florisel, à vous & à moy: A dom Florisel pour l'amour que ie lui porte: à vous, pour l'assurance que vous lui auez donnée: & à moy, pour la haine, & pour l'amour qui me tourmentēt avec une cruauté beaucoup plus grande, qu'ilz ne m'auoient encores tourmentée par cy deuant: Puis dōc que j'ay folement aimé, & folement poursuivy ma vengeance, il me sera bien seant de mourir encore d'une sole mort pour le guerdon de ma folie. Or ne peux ie plus rien faire en ceste extremité ou ie suis, sinon recommander mon ame aux Dieux immortelz, aux hommes l'immortalité de ce vertueux acte, à vous Daraïde la defence de ma fille Diane, & à Moraïzel le soucy de la marier en recompense de sa teste que ie lui sauue, & de la mienne que ie sacrifie à son amour, afin qu'à pres ma mort, il sollennise le mariage que j'ay voulu celebrer apres la sienne, & duquel ie n'ay eu la puissance durant ma vie. Apres ces propos la Roine Sidonie enflammée de la fureur, & delibérée de mourir, s'apareilloit la pointe de l'espee de Daraïde contre la gorge, pour s'enfermer, esperant par sa fin finir pareillement sa douleur. Mais Daraïde qui auoit bien pris esgard à toutes ses paroles, ietta la main sur les gardes de l'espee, & la tira rudement à costé, de sorte que la Roine (pour quelque force dont elle peut user) ne sceut oncques accomplir sa deliberation. Or ce pendant qu'elle se pourchassoit sa mort, & que Daraïde

l'empeschoit, les Damoiselles ietterent vn si grand bruit, que dom Florisel s'esueilla tout en sursault : & voiant l'effort de la Roine, & la resistance de Daraïde, il pensa qu'elle le voulut mettre à mort ; & que Daraïde, la voulust empescher, pour garder la feureté qu'elle lui auoit promise. Au moien de quoy se leuant du lit, il s'agenouilla deuant la Roine, & lui dist : Si ma mort peut satisfaire à vostre ennui, ie vous supplie, ma Dame, que ie la reçoie par vos mains, afin que ie reçoie semblablement la gloire qui m'est deuë, pour estre vostre Cheualier, en mourant d'une tant agreable mort, que ie ne la pourrois estimer sinon vne vie tresheureuse. Ie priray aussi Daraïde ne destourner point vostre volonté, ny la faueur que vous me voulez faire, en prenant de moy le seruice que ie vous doy, puis que ie ne vous suis de moins redevable que de la vie : Toutesfois si ma bonne affection, & la force de vostre beauté, avecques le desir q'i'auois de sauuer vn mié amy de la mort, me peuent aider de quelque excuse, en l'offence que i'ay commise contre vous: ie vous supplie, ma Dame, par cest amour que vous m'avez tousiours porté, & que ie vous porte, & par la confiance que i'ay eue en vostre vertu, me venant mettre entre vos mains, me donner le pardon, duquel ie vous supplie, & que vous ne me deuez refuser selon vostre bonté acoustumee. La Roine toute esperdue lui respondit : Ah Moraïzel, pourquoy m'estes vous ainsi venu aneantir la gloire que i'auois aujourdhui gaignee au combat, en me faisant par voz prières prédre la reputation d'une foible & craintive femmelette, pour n'oser renanger l'iniure laquelle vous avez faite à mon honneur. Pourquoy m'avez vous voulu rendre indigne de la victoire que i'ay conquis sur mes ennemis? Pourquoi donnez vous occasion à la fortune, qu'elle se puisse à l'auenir plaindre de moy, en lieu que par cy deuant ie me pouois plaindre d'elle, pour n'auoir eu le moien

de la vengeance qu'elle m'a maintenant moiennee, & que ie ne veux & ne puis receuoir d'elle, apres lui auoir demandé par si long temps? Ne pensez point que i'aye pris l'espee contre vous, mais contre moy : car ie ne vous peux donner la mort pour ma vengeance, veu qu'en asfugettant vostre volonté à la mienne, & que moy ne pouuant iouir de l'obeissance laquelle vous me rendez, ie demeure entierement satisfaite pour vostre regard. Mais bien veux-je me faire mourir moy-mesme, afin qu'en mourant, ie face encores mourir l'amour lequel ie vous porte, & praigne de lui par sa mort, & par la mienne, la vengeance dont il est redevable enuers moy, & moy enuers lui, pour auoir corrompu les loix, & la reuerence que ie deuois porter à ma roiale maïesté. Ie vous prie d'oc Florisel, ne m'empescher point le passage de ceste mort, & me la laisser prédre par mes mains, en guerdon de ce qu'elles n'ont peu estre les ministres de la vostre. Daraïde aiant desia osté l'espee à la Roine, & les Damoiselles aiant couuert dom Florisel d'un manteau d'escarlata, il se trouua tellement espris de sa beauté, qu'il ne se peut onc tenir de l'embrasser par grand amour : & cognoissant qu'elle ne lui portoit moindre affection, comme hors de soy, la voulut baiser, mais elle destournant le visage, lui dist rigoureusement : Ah, Moraïzel, contentez vous d'auoir par voz tromperies abusé de mes faueurs par cy deuant, sans encores en vouloir abuser maintenant que voz fraudes sont descouuertes, & sçachez que sans mariage il ne m'est permis de souffrir telle tache à mon honneur, & beaucoup moins à vous de l'entreprendre. Dom Florisel comme refueillé de quelque songe, la pria lui pardonner, & lors avecques la grand' peine de chacun d'eux, ilz se separerent. La Roine retournant en sa chambre, Daraïde commanda à deux Damoiselles de prédre bien garde qu'elle n'entreprist rien contre elle mesmes en la fureur ou elle estoit.

estoit : & leur dist qu'ayant parlé dō Florisel, elle l'iroit rapaiser au mieux qu'il lui seroit possible, & s'excuser de ce qu'elle l'auoit destournée de la furieuse mort qu'elle se preparoit : car veritablement elle se fust meurdrie de ses propres mains si Daraïde n'eust empesché la felonnie qu'elle auoit conceuë cōtre elle mesmes.

Comme Daraïde apres auoir tenu quelques propos avec dom Florisel, alla trouuer la Roïne en sa chambre, ou depuis dom Florisel fust encor' apellé.

CHAP. XLVIII.

LA Roïne estant sortie, Daraïde dist à dom Florisel: Monsieur, si ceste nuit i'ay ozé faire sans vostre sceu ce que i'auois deliberé long temps en moy-mesmes par cy deuant, il vous plaira me pardonner, puis que ie n'ay rié fait de ce que i'ay fait, à autre fin, sinon pour mettre en repos ma dame Diane, & pour ne me mettre en dāger de receuoir vn plus mauuais traitement au combat, lequel i'eusse esté contrainte auoir avecque vous, si ie n'eusse acomply la promesse dont i'estois obligee enuers la Roïne, par le moien que vous auez veu: ioint aussi qu'en voulant acheuer les inimitiez qui estoient entre vous & elle, i'ay penlé pour ce regard m'employer autāt en vostre faueur comme en la sienne. Regardez encores comme les Dieux ont voulu guerdonner mon bon vouloir, car ilz vous ont icy conduit en vn temps, auquel vous pouuez beaucoup aider à la Roïne, & à ma Dame la Princesse Diane veu la necessité de la guerre ou nous les auons rencōtreés. Or maintenant que ie vous ay dit mon intention, il vous plaira me donner congé d'aller trouuer la Roïne, par ce que selon mon auis elle doit auoir grand besoing de cōpagnie, & de consolation. Dom Florisel lui respondit fort gracieusement: Tresexcellente Daraïde, ie puis à ceste heure co-

gnoistre comme le bon amour lequel ie vous ay tousiours porté depuis la premiere fois que ie vous vy, a esté tresbien employé en vostre endroit, qui en vne seule nuit par vostre prouesse & sage discretiō, auez sceu gagner la victoire de trois telles personnes cōme de la Roïne, de moy, & de vous: de la Roïne, en apaisant la colere & la fureur qu'elle auoit conceuës contre moy, qui estoit vne chose autant difficile à faire, comme facile à entreprendre: de moy, en me rendant toute ma vie vostre redevable: de vous, en vous vainquant vousmesmes par la resistance que vous auez faite à la crainte, laquelle vous pouuiez auoir du courroux de la Roïne. Mais parce qu'avec ces trois belles victoires, la quatriesme vous est encor' deuë, qui est de rapaiser, & rendre tranquille l'esprit troublé de la Roïne, il sera bon que vous l'alliez trouuer, & que vous employez encores en ceste auenture voz fortes & victorieuses mains, auxquelles ie voue tout le seruice des miennes pour vous en seruir tāt que ie viuray, tout ainsi qu'il vous plaira d'en disposer. Daraïde lui voulut baiser les mains pour le remercier de ces faueurs: mais il ne le voulut souffrir, ains l'embrassant avec autant d'amour qu'il embrassa oncques Cheualier, elle s'en alla vers la Roïne qui estoit lors assise en vne chaire basse, & auoit la teste apuyee contre son lit, leuant les yeux au ciel, & aiant les deux bras estenduz sur sa poitrine, comme celle qui demenoit en son courage mille pensees contraires. Ses Damoiselles estoient vn peu reculees, & y en auoit quelques vnes qui tenoient des flambeaux en la main. Adoncques Daraïde se mettant à genoux deuant la Roïne, lui dist: Si les Dieux vous ont donné vne aussi grāde force de courage pour vous vaincre vousmesmes, comme vous en auez au iourd'hui eu pour vaincre voz ennemis, ie vous supplie, ma Dame, acompagner vostre premiere victoire de la seconde, & ne refuser point à voz su-

getz la perfection de leur ioye, en demeurant seule desolée parmy tât de bons Cheualiers qui se resiouissent tous extremement pour la gloire, laquelle vous auez au iourdhui conquise par vostre vertu & magnanimité. Las! Daraïde (respondit la Roine) le sang qui sort des plaies receuës au combat duquel on a conquis la victoire, ne peut sortir sans grande peine, encores que par telle douleur la gloire premierement acquise ne soit en rien diminuee. Je cognois la grande victoire que i'ay gagnée sur moy-mesmes; en contraignant mon courroux acoustumé pour garder la teste de dom Florisel, de l'espee laquelle vous m'auiez mise en la main. Mais helas ceste gloire m'est entierement ostee par ce cruel amour, qui par l'objet du Prince Grec me rend beaucoup plus miserablement vaincuë, que ie n'ay esté glorieusement victorieuse. Partant, Daraïde, veu que l'honneur lui en demeure, l'ennui ne peut faillir à m'en demeurer: & puis que vous lui auez osté l'ocasion d'acquérir vne si grande gloire par la perte de la miëne, ne reprenez point maintenant ma douleur, ny mes pleurs qui croissent, & annoblissent le souverain triomphe que vous & amour, par vostre moien, auez au iourd'hui conquis sur moy. Ma dame (dist Daraïde) tout ce qu'il vous a pleu dire, accroist de beaucoup voz louanges, en monstrant par voz paroles la sagesse & discretion, dont la force de vostre courage est heureusement acompagnée. Vo⁹ dites fort bien que le sang qui coule des plaies receuës au combat ne peut sortir que le victorieux ne souffre, mais en souffrant avec vne constance asseurée qui fait receler la souffrance, la gloire laissant sortir de la plaie, le sang & la peine ensemblement, sacrifie le corps à l'immortalité; & dispose l'ame au plus souverain triomphe qui se reçoit de la renommée, laquelle n'a point acoustumé de se laisser acquérir sinon avec vn grand

travail, & en auenturant sa vie à infiny nombre de dangers. Partant, ma dame, ie ne suis delibérée de me releuer iusques à ce que ie vous voie sans ennui: & moy avec le pardon que ie demande, pour auoir esté l'ocasion de voz douleurs. La Roine souzriant d'vne fort bonne grace, prit par la main Daraïde, qui estoit agenouillée deuant elle, & la baisant lui dit: Ma chere Daraïde, la personne seroit bien forte ou bien courroucée, qui ne seroit vaincuë par la force de voz bras, ou rapaisée par la douceur de voz paroles. Partât leuez vous: car puis qu'en m'ostant l'espee de la main, vous m'auiez encores osté la victoire que ie pouuois gagner sur moy-mesmes en me donnant la mort: ie suis demeurée vostre vaincuë, & ne puis pl⁹ faire autre chose, sinon acôplir vostre volonté, encores qu'elle soit contraire à la mienne. Puis donc que la fortune m'a voulu reduire en ses termes, me rendant esclau de l'amour, sans me laisser plus aucune puissance sur moy: i'obeiray à celui qu'elle m'a donné pour seigneur, & vous donneray le pardon que vous me demandez puis qu'il me le commande. Mais maintenant que ie n'ay autre raison pour m'excuser, sinon le tort que me fait Amour, en me refusant la iustice qui m'estoit deuë, faites moy venir dom Florisel, & nous passerons ensemble ce qui nous reste de la nuit: car quant à moy ie ne scaurois ny dormir, ny reposer: & quant à lui, il lui seroit trop mal seant de prendre son repos pendant mon travail. Ma dame (dist Daraïde) il vous plaira me présenter voz belles mains, afin qu'en les baisant ie vous rende graces des faueurs que vo⁹ m'auiez faites ceste nuit. Adonques lui aiant baïsé les mains plusieurs fois, elle alla querir dom Florisel, lequel sautant alegrement hors du lit, & prenant vn manteau que lon lui auoit apporté, vint deuers la Roine, laquelle se leua à son arriuee, & il s'agenouilla deuant

uant elle, & lui dist: Puis que ie ne merite point, ma dame, la faueur de vostre belle bouche, ie vous supplie ne me refuser celle de voz blanches mains, à fin qu'auecque la reuerence que ie vous doy, ie vous rende graces de la grace que vous m'auez faite, en me daignant apeller en vostre compagnie. La Roine demeura long temps, sans faire autre chose sinon regarder la beauté & le gracieux & humble maintien de l'excellent Prince dom Florisel de Niquee: puis trouuillant beaucoup à auoir sa parole, elle lui dist: Ay! Moraizel, auecques combien de ruzes vous m'auez priee de ma chasteté, & destournée de mon deuoir. Helas! comme vous auez trouué moien que sans demeurer satisfaite, ie prisse mon contentement en l'amour duquel vous me tenez nauree. Leuez-vous, car vostre grandeur ne vous permet point de demeurer en ceste sorte, ny la mienne de vous oïroyer ce que me demandez: par ce que vous aiant iadis iouy des faueurs de ma bouche comme mon seigneur & espoux, maintenant que vous les auez perduës, en n'estant plus celui que vous estiez, il ne faut penser que ie vous octroye comme à vn mien seruiteur, celles que vous pourriez receuoir en me baïsant les mains. Point ne vous refuseray ie le plaisir d'estre en ma compagnie, en recompense de celui que ie prens estat en la vostre: mais outre la veüë & la parole, vous ne pourrez rien prendre d'auantage de moy, ny moy de vous, car quand bien vous seriez si outrecuidé que de me requérir d'une plus grande faueur, ie ne serois si volage que de la vous octroyer. Ce pendant que la Roine disoit ces paroles, dom Florisel la regardoit, sans tourner les yeux ny çà ny là, & se souuenant du temps passé, & des plaisirs amoureux qu'il auoit pris avec elle, & contemplant la perfection de ses beautez & bonnes graces, il se sentoît cruellement enflammé de son amour. Adonc la Roine le

prit par la main, & le fit assoir aupres d'elle, & Daraïde de l'autre part: puis le Prince la regardant tousiours avecque vn extreme passion amoureuse, lui dist: Encores n'estce rien, ma dame, que vous ayez pris pitié de ma vie, pour le regard du corps s'il ne vous plaist encores en recompense des rigueurs passées, prendre pitié de la mort laquelle ie souffre en l'ame pour vostre souveraine beauté. Ah! dom Florisel (dist la Roine) ie seray contrainte de renouveler mes premieres loix, à fin que la crainte d'icelles modere la hardiesse de voz paroles: Ma dame (respondit il) ie vous supplie ainsi le faire, afin que par le remede de la mort, vous m'ostiez du travail que ie sens en la vie: car estant desormais sans aucune esperance de iouir de voz diuines beantez, en me refusant ceste gloire, vous ne m'en pourriez octroyer vne plus grande, sinon que de m'oster la vie, à fin qu'en me l'ostant, vous m'ostiez encores la peine laquelle ie souffre en viuât, pour ne pouuoir iouir du bien, duquel ie me sens maintenant autant esloigné, cōme i'en ay autresfois esté pres. Parlons de ce dont nous auons meilleur besoing de parler (dist la Roine) puis que pour l'amour que ie vous porte, lon me tient icy assiegee, & laissons ces propos dont nous nous pouuons bien passer pour ceste heure. Helas! ma dame (respondit le Prince) si ie pouuois aussi bien remédier à mon mal, comme lon remediera à ce dōt vous parlez, i'aurois beaucoup plus d'assurance de vostre cruauté, en ce trop plus rigoureux siege que ie souffre, estant iour & nuit combattu des cruelles & ardantes fleches de voz beaux yeux. Mais puis qu'il vous plaist que ie taise ma necessité pour entendre à la vostre, ie me tairay, & vous suppliray prendre mon tairer pour le dire, afin que vous cognoissiez ce que i'endure en me taisant. Doresenauant (dist la Roine) pensez à deffendre la terre de vostre fille, & lui donnez vn mari à vostre volonté, puis q' vo' m'auez

osté le souci de la marier à la mienne. Ma dame (dist lors Daraïde) ie ne puis souffrir que vostre parole soit violée. Pourquoy dites vous cela? dist la Roine. Auez vous pas promis (respondit Daraïde) de donner pour espouse ma Dame Diane, à quiconque vous doneroit la teste de l'excellent Prince dom Florisel? Il est vray, dist la Roine. Acomplissez donc maintenant (dist Daraïde) vostre promesse envers moy, puis que i'ay acomply la mienne envers vous, en mettant ceste nuit en vostre puissance la teste du victorieux Prince, que vous auiez tant desirée. La Roine se prit à rire, & lui dist: Vous dites bien Daraïde, & en cecy ie vous prometz donner tout ce dont i'ay puissance sur Diane. Je vous remercie mille fois (dist Daraïde) de la promesse que vous m'avez faite, & vous prie en auoir souuenance, car ie vous supplieray de l'accomplir incontinent que i'en auray trouué l'ocasion. Dom Florisel en riant lui dit: Je serois marry, ma Dame Daraïde, que pour ce regard vous peussiez trouuer moins de gracieuseté en moi qu'en la Roine. Je vous remercie encores de la faueur que vous m'otroiez par voz paroles (dist Daraïde) car en accomplissant vostre promesse ie me tiendray asseuree que ma Dame Diane sera espousée avecque moy, & non avecque aucun autre Prince. La Roine en riant lui dit: A ce que ie vois Daraïde, vous ne voulez point que nous nous resiouissions aux nopces de ma fille. Sauf vostre grace, ma Dame (dist Daraïde) & vous asseure que ie n'accepte point ces faueurs pour autre que pour moy mesmes. Ainsi deuissans gracieusement sur ce propos, & prenans en ieu ce qui depuis fut trouué veritable, ilz passerēt toute la nuit iusques au iour, & lors la Roine dist à dom Florisel qu'il s'allast reposer, & que sur l'apresdinee elle vouloit qu'il vist le gage que de pieça il lui auoit laissé de son amour, & de ses nopces, afin qu'en voiant la beauté de la fille, il montrast la passion qu'il se disoit souffrir pour

celle de la mere. Adonc le Prince dom Florisel se retira en sa chambre, ou Daraïde le conduist, puis retourna soudain vers la Roine, & lui aiant fait promettre qu'elle n'useroit d'aucune force contre elle mesmes, elle la laissa, & s'en reuint avecque dom Florisel.

De la grande ioye qui estoit en la cité de Guindaye pour la venue de Daraïde, & des propos que Lardenie eut avec elle, & depuis avec Diane, & comme dom Florisel & Diane s'estans vœux il fut acordé que de nuit on feroit vne saillie sur les ennemis.

CHAP. XLIX.

Estant desia assez haute heure, & chacun de la cité se resiouissant de l'arriuee de Daraïde, & de ce qu'elle auoit fait, d'autant que la renommee en estoit espandue par toute la ville, tous s'assurans que la presence de deux si excellens personnages comme de ceux qui leur estoient nouuellement venuz à secours, feroit tourner sur les ennemis, la crainte qu'ilz auoient au parauant eue d'eux: la Roine fit porter à dom Florisel plusieurs riches acoustremens, par ce que les plus estimez Cheualiers de toute l'Isle de Guindaye, commençoient à l'aller voir en sa chambre: & lui aiant enuoié tout ce qui pouuoit estre necessaire à son seruice, elle manda querir Daraïde, & lui dist qu'elle allast avec elle voir Diane. Ma Dame (respondit Daraïde) ie vous supplie m'excuser, & dire à ma Dame Diane ces nouuelles, desquelles (comme ie croy) elle se resiouira autant, que d'autres qui lui furent onc rapportees, c'est que i'ay iuré de nel'aller iamais voir (encores que ce soit la chose laquelle ie desire plus en ce monde) que premierement ie ne l'aye deliuree de l'ennui auquel elle pourroit estre pour voir vostre principale ville assiegee de tant d'ennemis. La Roine s'esmerueillla fort des paroles de Daraïde, & lui dist

lui dist puis qu'elle auoit fait ce iurement que la volonté ne lui defaudoit point de deliurer la cité des assaültz du Roy Bulthazar & de ses alliez: & ainsi s'en alla voir sa fille, laquelle auoit desia esté auertie par quelques siennes Damoiselles de tout ce qui auoit esté fait la nuit passée.

Au moié de quoi elle n'estoit moins ioieuse que contente, pour aimer & estre aimée d'un tel Cheualier, qui auoit en soy la prudence, & la prouesse tant bien correspondante l'une à l'autre, & à la perfection de sa beauté, tellement que la ieune Princesse n'atendoit sinon l'heure de voir sa Daraïde. Mais quand elle vit venir la Roïne seule, elle fust assez estonnée, & encores plus quand la Roïne lui en eust descouuert l'ocasion: car ces nouvelles ne lui toucherent moins qu'iusques au cuer, en sorte qu'elle perdit soudainement sa premiere ioye, & la Roïne s'aperceuant de sa tristesse, lui dist: Ma fille Diane, il apert bien que vous estes dolente de ce que Daraïde n'est icy venue avec moy. Ma dame (respondit elle) ie serois fort ioyeuse de la voir: mais ma principale douleur m'est venue par la souuenance que vous m'avez donnée de l'extremité en laquelle nous sommes reduites, veu que Daraïde a iuré de ne me venir voir que premierement elle n'ait fait leuer le siege à noz ennemis. Ne vous souciez point de cela (dist la Roïne) puis que nous auons icy vostre pere, & vostre Daraïde qui prennent ce soucy sur eux. Mais plus tost (respondit Diane) ilz me font soucier d'auantage, pour le dâger auquel ie crains qu'ilz soient. La Duchesse Lardenie, cognoissant bien à quelle fin les paroles de Daraïde & de Diane tendoient, dist à la Roïne: Ma Dame, ie vous supplie puis que Daraïde ne peut venir icy, me donner congé de l'aller trouuer: car l'amitié que ie lui porte, ne me pourroit permettre d'estre tant près d'elle gueres long temps sans l'aller voir. La Roïne lui respondit qu'elle trouueroit Daraïde en sa châbre.

Diane ne fut aucunement mal contente de ce que faisoit Lardenie, laquelle sortit incontinent, & s'en alla en la chambre de la Roïne, ou elle trouua Daraïde avecque les autres Damoiselles, & soudain la courut embrasser plorant de grande ioye. Adonc Daraïde non moins ioyeuse de voir la Duchesse, lui dist: Ma Dame ie vous prie me presenter voz belles mains, à fin que ie vous remercie de la faueur que vous m'avez faite en me venant voir. Ce n'est pas à moy (dist la Duchesse) à presenter les mains à personnage de si grande prouesse comme vous estes. La puissance que vous avez sur moy est bien assez grande pour me les presenter, dist Daraïde. En telz & autres deuis elles demurerent long temps embrassées, puis se tirant apart des autres Damoiselles, Lardenie lui dist: Vous avez donné grand ennui à madame Diane, de ne l'aller point voir avecque la Roïne. Je ne pense point (dist Daraïde) qu'elle recoiue aucun ennui de ce que ie fais pour accomplir ses commandemens. Et ie vous dy (respondit la Duchesse) qu'elle en a esté fort dolente. Comment le sçavez vous? dist Daraïde. Je le sçay (respondit elle) par la tristesse qu'elle a monstree soudain que la Roïne lui a euidit l'ocasion pourquoy vous ne l'estiez point venue voir. Ma dame (dist Daraïde) ie croy que vous soyez deceuë en ce que vous dites: car ie penserois plustost qu'en m'oiant nommer, elle receust quelque grande facherie, pour la souuenance laquelle on lui donnoit de ce qu'elle hait le plus en ce monde. De ma part ie vous assure bien que ie ne desire rien tant comme de la voir: mais ia à Dieu ne plaise, que sans son congé, & contre son commandement ie me trouue iamais en lieu ou elle soit: & partât i'ay delibéré ces guerres acheues, de m'en aller en lieu ou elle ne puisse iamais auoir aucunes nouvelles de moy, à fin que lui ayant osté toute la deffiance de me renouir encor' un coup, elle viue ioyeuse, & moy dolent & triste, faisant vne rigoureuse.

goureuse penitence de la faute que j'ay commise en m'osant descourir à elle: car ie vous confesse volontairement que la seule felicité en laquelle ie me voyois pour auoir adressé mes pensees en si bon lieu, me deuoit contenter, veu qu'elle surpassoit tous mes merites, sans estre si outre-cuidé que d'entreprendre d'auantage: mais si j'ay commis quelque offence en cest endroit, j'ay delibéré d'en faire moy-mesme la punition contre moy-mesme, à fin que par mon continuel tourment ie me venge de ma temerité. Cecy disoit il avec maintes larmes, que la duchesse acompagna des siennes, & lui dist: Monsieur, ie ne vous veux point contredire en ce que vous dites: mais ie vous puis bien tesmoigner asseurement la ioye que ma dame receut, quand elle sceut vostre venuë, & la peine qu'elle endura, quand elle entendit l'ocasiõ pourquoy vous ne l'alliez voir: car veritablement la rudesse dont elle vsa à vostre depart, ne vint point de faute d'amour, mais pour vouloir trop obseruer la grauité dont elle estoit redevable à sa grandeur. Vous vous abusez en cela (dist Daraïde) car ie ne lui fey aucune requeste, sinon avec tout le respect qu'il me fut possible d'observer, & me souuiens fort biẽ que la douleur en laquelle ie me retrouuois, combien qu'elle fut grande, ne me fit oublier vn seul point de mō deuoir. Je ne pense point estre abusée (respondit la duchesse) toutesfois ie parleray à elle, & ce pendant que vous ne la viendrez point voir, ie vous apporteray souuēt de ses nouuelles. Je vous en remercie tres-humblement, dist Daraïde, & puis qu'il vous plaist me faire tant de faueur, ie vous prie ne la differer longuement: car ma douloureuse maladie ne scauroit recevoir si prompt remede qu'il ne soit encores trop tardif. Adonc la Duchesse Lardenie prit cōgé, & s'en retourna en la chambre de Diane, ou elle trouua la Roine Sidonie qui alors lui disoit: Diane, ne soyez desormais plus en soucy d'estre mariee: car

quant est de moy ie ne m'en soucie plus, si ce n'estoit que voulussiez espouser Daraïde, à laquelle ie vous ay promise, & elle vous a demandee, comme ayant accompli les promesses qu'elle m'auoit faites ayant cōsigné la teste du Prince dom Florisel en ma puissance. Ces paroles de la Roine pleurent assez à Diane, & riât fort gracieusement elle lui dit: Ma dame, ie vous remercie tres-humblement de ceste faueur, & suis ioyeuse que Daraïde m'ait moienné vn tel mariage, lequel j'ay tousiours desiré tant pour mon contentement comme pour l'entretien de ma chasteté acoustumée: mais il me semble qu'elle me traite fort mal en espousée, attendu qu'elle fuit ma presence. En disant ces paroles, elle se prit à rire, & regarda la duchesse, laquelle lui dist: Ma dame, ce que Daraïde fait, c'est pour vous complaire d'auantage: car les Dieux scauent cōbien elle a bonne enuie de vous voir. Elle le montre bien, dist Diane. Aians ainsi deuise quelque temps avecq' maintes risées de ce mariage, la Roine Briangie dist, Je me contenterois volontiers d'vn autre pareil mariage, si le Roy de Cores en estoit content. Entendons ce secret, dist Diane. La Roine en riant lui dist: Ne cognoissez vous point, ma dame, comme ie serois bien mariee en vostre compagnie, ainsi que Daraïde le vent estre. La Princeesse lui respondit: Je pense que Daraïde ne se soucie point de se laisser voir à moy, car sachant que j'ay tousiours son vray portrait deuant les yeux, elle se contente que vostre beauté me face souuenir de la sienne: & me plaist bien, veu que Daraïde & moy deuons estre mariees ensemble, que pour mieux souffrir son absence, ie puisse iouir de la veuë de son image. Desia voz propos me rendent ialouse (dist la Roine) car encores que ie vous aime de tout mō cuer, vous ne me voulez recevoir que pour l'image de Daraïde. Ce me seroit trèsgrande faueur (dist Diane) que d'estre mariee avecq' vous, & le serois tresvolontiers.

lontiers, si ie ne l'estois point ailleurs: mais par ce que ie ne puis vous auoir comme espoux, ie fay ce qui m'est possible au surplus, & vous aime & honore avecq' l'amitié qui se doit à vne damoiselle tant ressemblante à mon mary. Apres maintes pareilles railleries sur ce propos, la Roine Sidonie dist à Diane: Ma fille, pensez vn peu à vous acoustre de voz plus riches acoustremēs, & de la meilleure grace qu'il vous sera possible, car ie veux qu'auourd'hui vostre pere vous voye. A quel propos, ma dame (respondit Diane en riāt) me parerai-ie de si riches habitz, puis que mon espoux doit estre absent? toutesfois ie vous obeiray, comme à vn commandement qui m'est fait contre mon vouloir. Adonc la Roine s'en retournant en son logis, Diane dist que pour lui obeir elle se vouloit conseiller avec Lardenie: A raison dequoy elle laissa la Roine Briangie avecque la Marquisē & les autres damoiselles & prenant la Duchesse par la main, la mena dans le iardin, ou elles s'assirent ensemble aupres de la fontaine. Que vous semble il Lardenie (dist lors la Princeesse) du peu d'amour qu'Agésilan me porte, qui aiant demeuré si long temps sans m'auoir veuē, ne tient aucun conte de me venir voir? Il me semble (dist elle) qu'vne mauuaise opinion en engendre plusieurs autres encores pires. Pourquoy dites vous cela? dist Diane. Parce (respondit Lardenie) que si vous n'eussiez point esté malauisée en lui commandant ce que vous lui auez commandé, il n'eust point esté si malauisé que d'obeir à vostre commandement. Vous ne sçavez que vous dites (respondit Diane) car s'il m'aimoit autant comme ie l'aime il n'y auroit auis ny commandement qui le peust destourner de me venir voir aiant le moien de ce faire comme il ha. Les Dieux vous vueillent garder (dist Lardenie) des deffaueurs de l'amour car il n'y a celui, pour cruel ou courageux qu'il peut estre, qui voulust contredire aux commandemens d'vne si grande Prin

cesse comme vous estes. Partant sachez qu'Agésilan ne se trouuera iamais deuant vous sans vostre congé, ains au contraire il m'a dist que ces guerres acheuees, il estoit delibéré de s'en aller en tel lieu que iamais vo' n'aurez aucunes nouuelles de lui, tāt afin que sa souuenāce ne vous donast aucune facherie, comme pour obeir à ce que vous lui auez commandé. Diane sentit ces paroles iulques dans l'ame, & dist: Qu'estes vous donc d'auis que ie face, Lardenie, afin qu'vn tel malheur ne m'auiegne? Qu'vne briefue vergongne du vilage (dist la Duchesse) ne vous laisse point au cueur vne tristesse perpetuelle. Que voulez vous dire par là (dist Diane) que ie lui donne congé de me venir voir? Ouy, respondit la Duchesse. Vous estes plus mal auisée (dist Diane) que ie ne vous auois oncques veuē: car si pour l'entretien de mon honneur ie lui ay commandé de ne se trouuer iamais deuant moy, en lui donnant vn congé contraire à ce commandement, outre ce qu'il me trouueroit volage & inconstante en mes affections, ie ferois vne chose toute contraire à la conseruation de mon honneur auquel i'ay dedié ma volonté, & me suis deliberee plustost que de le laisser en aucun soupçon tant soit il petit, prendre la meilleure patience qu'il me sera possible pour le reconfort de mes douleurs. Ce sera bien fait à vous (dist Lardenie) si vous le pouuez faire, & que l'amour vo' le permette. Tant moins amour me le permettra (dist Diane) & tant plus ie lui feray de resistance, d'autant plus Agésilan aura occasion d'estre content en l'amour lequel il me doit plus tost comme à son espouse, que non pas comme à son amie: & puis qu'il a desia la promesse d'estre mon mary, & moy de le pouoir prendre pour tel, souz cest espoir nous prendrons tous deux patience en nostre calamité, & abandonnerons à la mercy du temps qui fait & defait toutes choses, ce que pour le present nous n'auōs point en nostre

nostre puissance. Parlons donc d'autre cas & me dites en quelle façon ie me dois acoustre pour receuoir au iourd'huy mon seigneur & pere. Il me semble (dist Lardene) que vous deuez prendre vostre vestement de satin blanc, qui est decoupé sur vn fons de toile d'or, & enrichi de diuers ourrages d'orfauerie sur les bords. Vous aurez les cheueux esparpillez sur les espaulles, & vne riche couronne de fine pierrie sur le chef, atachee à petitz lassetz empruntez de vostre mesme cheuelure, ausquelz pendrôt de voz plus riches ioyaux, & porterez vne ceinture & vn carquant de mesme façon que la guirlande. La Marquise & moy vestuës de vostre liuree, vo⁹ porterons la queue à la sortie, afin que vostre pere vous voiant en tel ordre, puisse cognoistre l'excellence de vostre diuine beauté, & combien les Dieux vous ont departy de leurs celestes perfections. Le tout fut promptement executé selon la deliberation de la Duchesse. Les tables leuees le Prince dom Florisel vestu d'un habillement de drap d'or frisé, vint au logis de la Roine: & Daraïde estant demeuree avecque les Cheualiers qu'il auoit amenez avec lui, la Roine le prit par la main, & le mena au logis de Diane, & soudain qu'il fut entré en la sale, trouuant la Roine Briangie, & s'esmerueillant de sa beauté, & elle de la sienne, apres s'estre fait les reuerences acoustumees entre telles personnes, en regardant d'un ioyeux visage la Roine Sidonie, il lui dist: Ma dame, si nous ne venions de laisser Daraïde tout maintenant, ie penserois que ceste belle Roine fust elle, & qu'elle fist semblant de ne me recognoistre point. Il seroit impossible que ie vous peusse mescognoistre (dist Briangie) pour la cognoissance que i'ay de voz haultz faitz d'armes, lesquelz vous rendent cogneu par tout le monde. Ma Dame (respondit dom Florisel) vous me faites vne grande faueur par voz paroles, mais si ie puis, ie la recognoistray par effect. Ces gracieux propos furent in-

terrompuz par la venue de Diane, laquelle sortoit de sa chambre dedans la sale, avec vne si excellēte beauté & gēte disposition de corps, que sa bonne grace, avec la grauité & maiesté bien conuenable à sa grandeur, rendirent le Prince dom Florisel tout esbahi, comme celui qui pensoit voir deuant lui vne chose trop plus diuine qu'humaine. La Duchesse & la Marquise portoient la queue de la Princeesse, & dom Florisel l'allant embrasser, elle se mit à genoux deuant lui, & le pria de lui presenter les mains, mais le noble Prince son pere l'embrassant & baisant fort gracieusement, la releua & lui dist: Ma fille, i'estime beaucoup plus le priuilege que i'ay de vous baiser comme estant vostre pere, que celui lequel vous me voulez donner en me baisant les mains. Veritablement ie ne blasme plus les Cheualiers qui hazardoient franchement leur vie, à fin de conquerir ma teste, veu qu'ilz en esperoient vne si precieuse recompense: car ie cognois maintenant que Dieu a employé & mis en vous toutes les plus excellentes & diuines perfections, par lesquelles il no⁹ vouloit faire cognoistre sa puissance. Monsieur (dist Diane) ie vous remercie des faueurs que ie reçois par voz paroles, & puis que pour estre fille d'un tel pere, & d'une telle mere, ie suis obligee à receuoir toute louange, ie ne refuseray point encores celle que vous me donnez, ny celle laquelle pour estre vostre fille on me pourroit otroyer à l'auenir. Dom Florisel l'embrassa de rechef puis la prenant par la main, la mena assis aupres des deux Roines sans iamais pouuoir retirer sa veue de dessus elle, ny elle de dessus lui, tāt elle estoit esmerueillée de sa belle representation. Adonc il lui dist: Ma fille vous pouuez scauoir comme vous estes mariee par la volonté de la Roine, & par la mienne, car en accomplissant sa promesse avecque la noble & cheualereuse Daraïde, qui lui a mis ma teste en sa puissance, elle lui a promis que pour guerdon vous seriez espousee avec

avec elle. Diane prit alors vne couleur qui luy acrent beaucoup sa naïue beauté, & dist, Je ne me sens peu fauorisée, ny de vous, ny de la Roïne, pour me voir tant bien pouruenü de mary, selon le contentement que ie reçoÿ de la prouesse & haute Cheualerie de Daraïde. Vous auez raison (dist il) & serois de ma part encores beaucoup plus content & satisfait, si Daraïde tant acomplie en toutes vertuz, estoit aussi bien Cheualier cōme Damoysselle. Diane prit extreme plaisir en ces paroles, & riant d'une bone grace, luy respondit, Je suis trop plus ioyeuse qu'elle soit Damoysselle, car par ce moyen ie seray mieux espousée à ma volonté. C'est bien dit à vous, ma fille (dist dom Florisel) car puis qu'il ne se trouue aujourdhuy Cheualier au monde qui soit digne de vous espouser, il estoit bien raison que vous fussiez espousée avecque la plus excellente Damoysselle qui naquist iamais sur la terre. La Roïne Briangie esmerueillée de la bonne grace du Prince, lui dist, Monsieur, vous auez fort bien parlé, car vous ne pouuant estre ioint par mariage à ma dame la Princesse à cause de vostre parenté, elle est demeurée sans Cheualier qui peust estre assez digne d'elle: & puis que celui qui seul la meritoit pour sa grandeur & prouesse, qui est vous, luy deuoit estre denié, c'estoit bien raison que la mere iouist de la gloire qui estoit refusée à la fille, à fin que luy & elle fussent excusées de leur acoïntance pour en auoir produit vne tant belle & excellente lignée. Ma dame (dist dom Florisel) ie baise voz belles mains pour la faueur que vous m'auez faite en voz propos, car par iceux vous auez descouuert la raison pour laquelle la Roïne me doit otroyer le pardon duquel elle m'est redeuable. Ce ne m'est peu de gloire (dist la Roïne Sidonie) que vous ayez fondé vostre excuse sur les paroles d'une tant excellente Roïne: car en vous excusant, elle m'a encores excusée du peu de courage que j'ay eu pour ne pouuoir

satisfaire à mon iuste courroux, en vous otroyant le pardon, au lieu que ie deuois prendre la vengeance. Ma Dame (dist il) vostre grande beauté, & l'amour qui à causé d'icelle vous est deu, me laisse entièrement sans coulpe, encores que l'amitié du Prince dom Falanges, ne m'eust point obligé à faire ce q'ie fey pour l'amour de lui. Il me plaist bien (dist la Roïne) que vous ayez quelque raison afin que vous demeuriez sans coulpe, & voudrois fort qu'il y eut encores quelque moien afin que ie demeurasse sans peine. Aians ainsi deuisé long temps, dom Florisel prit congé d'elles, & dist à sa departie: Ma fille, que voulez-vous que ie die de vostre part à vostre Daraïde? Rien (dist Diane) car il n'est point raisonnable que ie face aucune faueur à celle qui fuit ma presence.

Cecy disoit elle en regardant la Duchesse Lardenie, laquelle se contentoit fort de la bonne grace du Prince, & lui sembloit qu'il estoit fort semblable à Agefilan. Alors dom Florisel s'en retourna vers Daraïde & la trouua acōpagnée de plusieurs Cheualiers autant vaincuz de sa beauté, comme ilz pensoient tous les Cheualiers du monde pouuoir estre vaincuz par sa prouesse. Le Prince estant arriué avec eux il fut acordé, à cause de ceux qui auoient esté blesez aux assaulz precedens, que si les ennemis ne les assailloient, lon ne feroit sans ocaïon aucune saillie sur eux: ce que le Duc d'Alfarce trouua fort bon, disant que de iour en iour quelque nouueau secours arriuoit en la cité, & que s'ilz atendoient encores vn peu, ilz auroient tousiours meilleur moien de se defendre, & d'endommager les ennemis. Or les Russiens aduertiz de la venue de dom Florisel & de Daraïde, ne s'en resiouissoient aucunement, toutesfois la grandeur de leur armee diminueoit vn peu la crainte qu'ilz pouuoient auoir de deux personnes tant renommées: & apres auoir demeuré au conseil deux iours entiers sans prendre aucune certaine deliberation, au

troisiel.

troisiesme le Roy de Frigie qui se sentoît fort offencé de la Roine Sidonie, se joignit à leur camp, & amena huit mile hommes à cheual, & quatorze mile d'infanterie. Ce nouveau rentort de leur armee fit prendre nouveau conseil, & arresterent entr'eux que le lendemain lon donneroit l'assault à la ville, sans abandonner la muraille ny nuit ny iour iusques à ce qu'ilz fussent entrez dedans: & furent ces nouvelles publiees parmy toute leur armee, dont les souldatz se resiouïrent fort, montrans assez à la gayeté de leur visage, le bon vouloir qu'ilz auoient de venger le deshonneur receu aux precedens combatz. Mais ceux de la ville estans aduertis par leurs espies de ceste deliberation, arresterent entr'eux de ne leur donner loisir de l'executer, & la nuit les assaillir dedans leur camp incontinent que la Lune seroit leuee. Pour ce faire ilz acorderent de se departir en deux escadrons, de l'un desquelz dom Florisel seroit conducteur, & de l'autre Daraide, afin de sortir en mesme temps par la porte Apollinee, & par celle d'Aquillon, sur leurs auersaires, & essayer à les prédre au despourueu. Apres auoir arresté ceste deliberation, ilz preparerent tout ce qui leur pouuoit estre necessaire pour l'executer: & ce pendant les ennemis au semblable faisoient tous leurs aprestz pour assaillir la ville, sans auoir autre esperance que de mourir à la muraille, en cas qu'ilz ne peussent venir à chef de leurs desseings.

Comme l'excellent Prince dom Florisel de Niquee, & Daraide sortirent de nuit sur les ennemis, & de la grande extremité ou la cité de Guindaye se trouua reduite.

CHAP. L.

LA clere Lune commençoit à resandre ses beaux rayons dessus la terre, quand les excellens Princes aiās chacun deux mile hommes à cheual, & six

mile à pied, sortirent de la grand' cité de Guindaye, par la porte Apollinee, & par celle d'Aquillon, marchans avecque le moindre bruit qu'il leur estoit possible pour n'estre aperceuz des ennemis. Mais ilz ne peurent faire si secretement qu'ilz ne fussent aperceuz du guet auant qu'estre arriuez au camp, dont les ennemis se trouuerent tous troublez & confus, chacun criant à larme avecque si horrible bruit, qu'à peine eut on ouï tonner, comme il auient souuent quand lon se trouue ainsi pris en sursaut & au despourueu. Dom Florisel qui estoit sorty par la porte d'Aquillon, oiant ce bruit, & se trouuant plus pres des aduersaires que Daraide qui estoit sortie par la porte Apollinee, apres auoir encouragé les siens au combat, commanda que lon sonnast les trompettes, & à bride abatué tous les gens de cheual commencerent à donner dans le camp, à la garde duquel le Roy de Cores auoit esté commis celle nuit, avecques quatre mile Cheualiers d'eslite: & partât il sortit pour receuoir ceux de la cité, qui venoient de telle fureur qu'à la rencontre, il demeura bien peu de lances entieres, & d'escuz qui ne fussent faulcez: puis encommencerent asprement le combat des espees aux rais de la Lune, qui luisoit si cler qu'ilz se pouuoient facilement recognoistre les uns des autres. Mais combien que les gens du Roy de Cores fussent deux fois autant en nombre, si estce qu'ilz n'estoient pour resister à l'incroyable force de dom Florisel, & des Princes de la grand' Bretagne dont il estoit acompagné. Entre autres, les merueilles que fit dom Florisel à l'aborder, seroient difficiles à croire qui les reciteroit par le menu, car il ne donnoit coup d'espee qu'il ne fit mourir vn Cheualier, ou à tout le moins qu'il ne le renuerlast par terre. Dom Fenix de Corinthe, dom Astibel de Mesopotamie, dom Albion de Bugie, & dom Frisel d'Arcadie, le suiuiôient avec maintz autres Cheualiers, qui faisoient tous tant bien leur deuoir, que lon les eust

les eust estimé combattre à l'ennui l'un de l'autre. Ce pendant Daraïde donna dedans l'autre costé du camp, & y entra de telle roideur que toute la campagne fut puee de mortz, auant qu'elle eust iamais donné loisir aux ennemis de se mettre en defense: & poursuivit si courageusement sa premiere fortune, qu'elle vint avecques ses deux-mille Cheualiers iusques à la tête du Roy de Russie, autour de laquelle s'estoiēt assemblez au son des trôpettes, environ six mille hommes de cheual afin de la recueillir. Adoncq' aiant encouragé ses gens à faire leur deuoir, elle courut la premiere à bride abatuë, & la lance baissée dedans l'escadrō des ennemis, au premier rang duquel se trouuerent par fortune les Rois de Russie, de Gaze & des Massagettes, qui soustindrent courageusement le choc de ceux de la cité, plusieurs tombās mortz ou desarçonnez par terre d'une part & d'autre. Les merueilleux faitz d'armes des Cheualiers de la grād' Bretagne qui acompagnoient Daraïde en ceste faille, ne vous pourroient estre bien recitez particulièrement, à cause de la foule des ennemis, au milieu desquelz ilz se trouuerent, mesmes nous ne pouuons vous dire autre chose de Daraïde, sinon qu'elle n'ataignoit aucun Cheualier Rusien, qui ne receust la mort avec le coup, tellemēt que de l'un s'adressant à l'autre elle récontra dom Bulthazar Roy de Russie, & le commença à chamailler avecque telle horreur, que s'il n'eust trouué le moien de s'enueloper parmy les siens, il auoit trouué l'heure en laquelle sa vie, & les pensées de son mariage eussent pris vne mesme fin. Ainsi ceux de la cité par la vertu des Cheualiers estranges, se maintindrent assez long temps contre la grande multitude des ennemis: mais depuis que les bataillons des Perles, qui estoient tous de gens de trait, commencerent à secourir leur cauallerie, & assaillir de loing l'Infanterie de leurs auersaires, ceux de Guindaie maugré qu'ilz en eussent, se retirerēt

peu à peu tousiours cōbatans iusques aux portes de la ville, ou dom Florisel & Daraïde fort colerez de ce desordre, commanderent à leurs gens de pied arbalestriers de r'entrer au dedans, & monter dessus le rampart & aux creneaux de la muraille. Adoncq' le cler Soleil descourant sur la terre ses beaux rayons, descouurit pareillement la cruelle boucherie qui auoit esté faite la nuit estant la plaine toute tainte de sang, & couuerte des corps des Cheualiers occis. Mais les Russiens & les Perles voians leur victoire deuant les yeux, recommencerent plus que deuant à courir avecques grandes huees sur ceux de la cité, qu'ilz chargerent tellement, & avecques si grāde multitude, qu'ilz furent cōtrains de se retirer iusques au pied de leurs ramparts: & là tenans les espaules asseurees avecque l'aide q' ceux du dessus leur donoient tirans vne infinité de fleches, qui pleuuoient aussi menu que gresle dessus leurs ennemis, ilz resisterent long temps à la grande troupe des Russiens, dont le nōbre croissoit tousiours à l'entour d'eux. Or est il possible de vous dire les merueilleux faitz d'armes que les preux Cheualiers dont nous auōs parlé cy dessus firēt en cest endroit: mesmement les excellēs Florisel & Daraïde, car ilz seruoient d'escu à tous les autres, & se maintenoient au combat tant courageusement, & avec telle vertu, qu'il n'y auoit celui des habitans de Guindaie qui ne les estimast plusloft estre dieux qu'hommes mortelz. En ces entrefaites Daraïde qui depuis le soleil leué auoit tousiours cherché le Roy de Russie, & desiroit fort se trouuer avec lui, pour satisfaire à la haine qu'elle lui portoit, à cause du mariage de Diane, pour le quel il auoit pris les armes, l'aperceut assez auant entre les siēs: car il lui fut facile de le recognoistre à son riche hocqueton, & à l'escu, & aux autres enseignes q'lo lui en auoit donnees. A raison dequoy comme forcenee & hors de soy elle fendit la presse des Russiēs, se faisant faire avec l'es-

pec vne

pee vne aussi large voye, que si la foudre y eust passé : & aiant abordé le Roy Bulthazar, haussa le bras pour lui fendre la teste en deux, & lui dist : A ceste heure verras-tu, Roy de Russie, le mariage que ie t'ay apareillé avec mon espee, afin de ne t'abuser plus desormais à celui de Diane. Le Roy l'aperceuant venir, & craignant ses horribles coups qu'il auoit desia expérimentez vne fois sans qu'elle le cogneut haussa son escu pour receuoir le coup qu'elle lui ruoit, qui fut tel que l'escu & l'armet tranchez iusques à la chair viue, le Roy tomba tout esuanoui par terre, & en meisme instant Daraïde fut enuironnee d'un infini nombre de Cheualiers qui lui occirent son cheual, de sorte qu'elle tomba avecque lui, mais soudainement elle se releua autant furieuse comme vn lyon eschauffé, & rouant son espee, maintenât deuant, tantost derriere, elle fist vn assez large cercle de Cheualiers & de cheuaux occis à l'entour d'elle les vns parmy les autres, tellement que les Russiens lui donnerent vn peu loisir de prendre alaine : & s'amuserent à releuer leur Roy, & le porterent en sa tente tout esuanoui : dont la plus grande part de l'armee, pensant qu'il fut mort, commencerent à charger Daraïde avec telle rage qu'elle eüst de là en auant, eu assez d'affaire à se deffendre sans la suruenüe de dom Fenix de Corinthe, dom Arnaud de la Sarracenicque, dom Albior de Iubie, Astibel de Mesopotamie, dom Lucidan de Numidie, & dom Frisel d'Arcadie, lesquels estoient acouruz en cest endroit, estans desia les troupes de dom Florisel & de Daraïde vnies ensemble. Ces braues Cheualiers endommagerent fort à leur arriuee les Russiens, qui enuironnoient Daraïde, & furent fort esmerueillez de voir tant de Cheualiers mortz autour d'elle : mais combien qu'ilz combattissent autant vertueusement qu'il estoit possible, si est-ce que les enneinis se renforçoient en si grand nombre à l'entour d'eux qu'ilz estoient tous en danger de

mourir là : si l'excellent Prince dom Florisel n'y fust arriué, auquel la multitude des Barbares cedit de toutes partz, le souffrant passer par tout ou bon lui sembloit. A son arriuee la bataille recommença trop plus cruelle qu'elle n'auoit encores esté au parauant, car de la part des ennemis suruindrent Bruzerbe Roy des Massagettes, le Roy de Cores, & le Roy de Gaze, avecques trois Geans freres, seigneurs de l'Isle Fornasace. Et la fut si grande la foule des Cheualiers qui acoururent de tous costez, que la plus part du temps ilz ne pouuoient combattre ny tourner leurs espees ny ça ny là, tant ilz estoient pressez les vns entre les autres. Bien tost apres le cheual de dom Florisel lui fut tué entre ses iambes, dont il fut contraint se renger avec Daraïde qui estoit encores à pied : & parce que tous les principaux Cheualiers estoient en ceste meslee, il sembloit que la bataille deüst prédre fin en cest endroit par la mort des vns ou des autres. Ce pendant les gens de pied Massagettes, voyant que tout le combat des lances, & des espees demouroit aux gens de cheual, afin de n'estre oisifs ilz retournerent de leur bon gré sans aucun conducteur à l'assaut des murailles, & commencerent à rouler vne de leurs machines par telle violence contre vn petit portail assez foible, qui estoit rémply de quelque blocage qu'ilz l'effondrerent & abatrent rez de terre, avecque le rampart qui estoit derriere, & firent vne breche assez large, commençant à courir parmy la cité, & à crier ville gagnée, avecq' des hucées si hautes, que ceux qui combattoient dehors en furent tous effrayez, ne sachans que ce pouuoit estre. Bien tost la Roine entendit ces nouvelles, & voyant ce piteux desordre, & ses gens courir par les rues tous esperduz, elle se retira assez estonnée dedans la tour de Diane, pour delibérer de ses affaires. Certainement à ce iour la superbe cité de Guindaye estoit mise à feu & à sang, si lors q' les Russiens commençoient à entrer dedans

dedans par la breche, ils n'eussent entendu sonner la retraite par leurs trompettes, avec plusieurs de leurs compagnons qui leur escrivoient qu'ilz eussent à sortir dehors, & se retirer chacun souz son enseigne, pour la raison que maintenant vous entendrez.

Du secours inespéré qui vint durant la bataille à la Roynie Sidonie, & qui empescha que la cité de Guindaye ne fut point prise.

CHAP. LI.

LE Roy de Russie & ses alliez, ne sceurent tant secretemēt assembler vne si grāde armee, qu'il ne fut sceu en quelques lieux, mesmement en l'Isle de Colchos: à raison dequoy le Roy dom Falanges & la Roynie Alastraxerec, pensans auoir trouué le moyen de recompenser la Roynie Sidonie du tort qu'elle disoit luy auoir esté fait par dom Florisel, delibererent de leuer vne bonne troupe de gens d'élite pour aller à son secours. Ce qu'ilz firent, & avecque vne bonne flotte de nauires bien armez & equippez, passerent en l'Isle de Guindaye, ayants huit mil hommes à cheual, & vingt mil à pié, desquelz il y en auoit six mil autant bien experimenter à tirer de l'arc, que lon eust sceu choisir en tout le reste du monde. Par fortune ilz prindrent port au mesme lieu ou estoit la flotte des nauires ennemyes, & par-ce qu'il n'y auoit grand' garde, d'autant que lon ne se doutoit de rien, avecque peu de resistance, ilz meirent le feu dans les vnes, & feirent enfondrer toutes les autres, excepté deux qui à grand travail se sauuerent à la fuyte, à force d'auirons. Ayants pris terre ilz vindrent en la plus extreme diligence qu'il leur fut possible, vers la grand' cité de Guindaye, faisant tousiours marcher leurs gēs en bataille rangee. Il vous conuient aussi scauoir que bien demie heure auparavant, les excellents Princes dō Rogel de Grece, dom Florestan, & dom Briāges de

Béocie estoient abordez à vn autre port pres de celuy, ou la flotte du Roy dom Falanges auoit pris terre, & ayants endossé leurs armes, & monté sur leurs destriers, ilz arriuerent vn peu deuant le Roy dom Falāges à la cruelle meslee, ou dom Florisel & Daraide estoient enuironnez de tous les Cheualiers Russiens. Voyās les choses en tel estat, ilz s'aprocherēt de la foule, puis courās au mylieu de l'escadrē des ennemys de toute la force de leurs cheualx, & les lances en arrest, ilz abattirēt chacun le leur par terre, & ne cesserent iusques à ce que leurs boys fussent volez en esclats. Adonc metans la main aux espees, voulans scauoir ce qui se faisoit au mylieu de la troupe, ilz cōmencerēt à fraper à tors & à trauers, à dextre & à senestre, & fendirēt tellemens la foule, que par le continuel chapelis dont ilz tuoient ou renuersoient les Russiens, ilz parvindrent finablement iusques au lieu ou dom Florisel & Daraide cōbatoient à pié. Mais si tost que dō Rogel eut reconnu son pere, le voyant ainsi mal mené, il commēça à forcener à tout par soy, & frapa l'vn des geās de l'Isle de Fornaface avecq' telle fureur, sur la creste de l'armet, qu'il le fit trebucher roide mort par terre. Dom Florisel se esmerueillāt de ce coup, regarda dom Rogel dās l'escu, & le reconneut incontinent, car il y portoit pour sa deuse, vne liōne qui tenoit cruellement les ongles sur vn lion, & cobien que la lionne monstra vne fort grande felonnie, neantmoins le lion sembloit estre doux & paciēt, sans vser d'aucune resistance. Par laquelle peinture dō Rogel vouloit entēdre l'infante Leonide & lui, pour monstrier qu'il estoit ainsi cruellement traicté d'elle, encores qu'il luy fust en tout obeissant. Or n'eut-il si tost abatu, & occis le premier geant, au grand esbahissement de tous ceux qui le virent, que les deux Princes ses cōpagnons cōmencerent à s'atacher aux autres deux, & auoient desia l'auantage, quād la retraite

sonnee par le commandement du Roy de Ruffie, qui estoit lors retourné à soy, empescha les Princes de plus cōbatre, & la ville d'estre prise: car le Roy ayant veu ordonner la braue & puissante armee du Roy dom Falanges, se doutant bien que c'estoit quelque nouveau secours, voulut que chacun se retirast souz son enseigne, à fin que les gens ne fussent prins en desarray, & partant tous ceux de son party se retirerent, & abandonnerent la poursuyte de la victoire qu'ilz auoient au parauant estimee certaine. Dom Florisel & Daraïde remonterēt à cheual incōtinent que les ennemys leur en eurent donné le moyen, & ne sçauoient que ce pouuoit estre qui les auoit ainsi fait reculer, alors qu'ilz estoient les plus fauorisez de la fortune. Mais tandis qu'ilz les regardoient rassembler en bataille biē serree, on leur escria de dessus le rāpart qu'ilz voyoient aprocher vne armee assez grāde biē pres de là, & deslors ceux de la citē auoient laissé sortir les ennemys qui estoient entrez dedās, sans leur faire que bien peu de dommage, & réparé la breche au mieux qu'il leur auoit esté possible. Adōc l'excellent Prince dom Florisel, & la cheualeresse Daraïde, sachans la raison pourquoy leurs ennemys se remettoient en ordonnance, firent le semblable, & au son des trompettes recueillirent tous leurs gens en vn escadron quarré, qu'il faisoit tresbeau voir, encores qu'ilz eussēt desia perdu enuiron quinze cens hommes de leur cauallerie, & biē trois mile de gēs de pié. Estās ainsi assemblez face à face de leurs aduersaires, dom Florisel cōmença à les encourager au combat par ces paroles: Mes amys, si la fortune nous a esté quelque peu contraire au iourd'huy, à fin de nous fauoriser cy apres (selon ce que ie puis aperceuoir) avec autāt plus grande gloire: il me semble q̄ nous ne la deuons point acuser du tort qu'elle nō a fait, si auant la venue de ceste autre armee nous ne luy donnōs à cognoistre combien est

grāde la faute dont elle nous a outragē, en refusant la victoire à vostre prouelle & haute cheualerie, pour l'otroyer à la desordōnee multitude des ennemys. Et puis que nous ne sçauons si l'armee qui s'aproche se rengera de nostre costé, ou de celuy de noz aduersaires, auāt q̄ nous en asseurer, vendons noz vies, qui sont mortelles, pour le pris, duquel chacun de nous est redeuable à son immortelle renommee, & considerons que par vne si honorable mort, ou par la victoire qui sortira de nostre hardiesse, nous ferons tousiours retourner l'euenemēt de ceste bataille, ou à nostre hōneur, ou à nostre profit, ou à l'vn & l'autre. N'estimez point pourtant, nobles & vertueux cheualiers, que mes paroles ayent plus de temerité que de discretion, car quand bien vostre bon cueur & franc courage ne vous inciteroit à suyure mon cōseil, si est-ce que nous y serions contraints par la necessité ou nous sommes, d'autāt q̄ si ceste armee qui sera tātost icy, viēt en nostre faueur, nostre hardiesse ne demeurera point sans secours: Et si elle vient pour nous endōmager, faisons de sorte en mourant volontairement, que nous forcions la mort cōtrainte, laquelle maugré nō, en quelque façō que se puisse estre, nous est desia apareillee, veu que nous ne deuōs esperer aucune pitié ny honnesteté de ces Barbares. Puis donc qu'ils ne sont pour prendre pitié de noz vies, prenons-la de nostre hōneur: mourons, & croyōs que nostre mort suyue de la clere renommee, nous donnera vne vie trop plus certaine, que celle laquelle les couards pourroient desirer se trouuās en vne telle extremite. Je vous ay declaré mon vouloir: Regardez maintenant en ces menasses de la fortune, lequel vous aymeriez le mieux, ou repousser la force & violence que la fortune, vous apareille, sur le dos de voz ennemys, ou bien l'endurer d'eux, & encores de la fortune. Dom Florisel ayant mis fin à son parler, il n'y eut celuy de la troupe

troupe qui ne luy respôdist à haute voix, qu'il estoit prest de mourir & viure avecque luy: & partât au pas des cheualx, ilz commécerent à marcher à l'encontre de leurs ennemis en fort braue cōtenance, comme ceux qui esperoient mourir dans le cāp sans plus retourner en la cité. Adōc l'armee du roy Falanges estoit desia aslez près: mais à cause de la poussiere lon ne pouuoit encores recognoistre ny les enseignes ny les cornettes. Et sachant par ses auant-coureurs les affaires de la ville estre telles que nous vous les auons recitees, fit arrester ses gēs, & parla à eux en ceste sorte: L'experience que j'ay de vostre prouesse & fidelité (preux & excellēs Cheualiers) m'oste presque la volonté de vous remonstrier les causes pour lesquelles nous deuons au iourd'huy vaincre noz ennemis, ou biē mourir en la bataille. Mais pour acomplir chacun nostre charge, moy en parlant, vous en m'escoutant cōme vostre capitaine, ie vous veux remettre en memoire quelques points, que long temps a vous auez appris par le long vsage de la guerre. Ne soyez donc point estonnez pour la multitude des ennemis, car le desordre ou ie les voy à nostre impourueue arriuee, nous assure de la victoire: & quand bien les bonnes raisons ne nous pourroiet entierement redre certains de l'aduenir, siest ce que la fortune n'est point à craindre quand on s'abandonne a ses hazards avecque bonne occasion. Je le dy, mes amys, par-ce que la disposition du temps present que noz aduersaires sont desia las & trauallez, nous donne plus grand auantage sur eux, que nous n'aurons par auenture iamaïs si nous les laissons guere en repos. Et puis que la raison bien ordōnee en vn petit nōbre, est suffisāte pour vaincre vne desordonnee multitude, il ne fault point craindre la fortune, là ou la raison laisse la hardiesse sans aucune temerité. Croyez que ce qui auient en vn combat particulier de deux Cheualiers, auient aussi en

vne bataille generale de plusieurs reduitz souz la charge & volonté de deux capitaines: car tout ainsi qu'entre deux combatans, chacun tache par tous moyens à ruer bien ses coups, à fin qu'ilz ne passent en vain, & à bien rabatre ceux de son enemy, à fin qu'ilz demeurent sans effet, & que celui qui se descouure par trop, donne l'auantage & le moyen à l'autre de le naurer, ce qu'autremēt il n'eust peu faire: Ainsi entre les capitaines il conuient par prudence chercher le moyen de trouuer ses ennemis en desordre, soit en gaignāt l'auantage du lieu, ou en leur donnant le soleil, le vent, la pluye, ou la poudre au visage, à fin qu'ayant la veue empeschee, les bras ne puissent faire leur office si dextrement. Or puis que ces auantages se doiuent chercher avecque l'oportunité, & qu'aujourd'huy nous les auons en nostre puissance; estans noz ennemis en desordre: & les rays du soleil, le vent, & la poudre marchais avecques nous à l'encontre d'eux, prenons pour gaige de nostre prochaine victoire, l'ocasion que la fortune nous presente, & l'emploiōs si courageusement qu'à l'auenir elle ne se puisse plaindre de nous, ny nous de nous mesmes par la repētance en laquelle no^r pourrions rōber pour auoir mal-vlé d'vn temps tant apareillé en nostre faueur. Quand le Roy dom Falanges eut acheuē son parler, tous ses escadrons cōmencerent à marcher fort orgueilleusement à l'encontre des Russiens. Mais desia dom Florisel avec tout ce qu'il auoit de gens, estoit couru sus aux ennemis, les assailant d'vne merueilleuse fureur, & supleāt au deffault des lances par la roydeur de la course des cheualx, s'entreheurtans de toutes leurs forces. C'estoit chose fort belle & plaisāte, que voir les espees nuēs flamboyātes, aux rayons du Soleil, comme esclairs soudainement elācez par l'air en temps d'orage. Le Roy de Russie enuoya seulement vne partie de ses gēs pour resister à dō Florisel, & retint le reste en

bataille pour receuoir la nouuelle armee qui s'aprochoit, sans que personne sceust encores de quel party elle se deuoit ranger. Or veit-on en ce nouuel assault entre les Rustiens & ceux de la cité, vne fort nouuelle & estrange façon de combattre car par faute de lances, il y en eut assez qui à la premiere course, mirent la croisée de leurs espees dans l'arrest, tellement qu'à la récontre le cháp fut tout semé de lames d'acier, & plusieurs cheualx toberét par terre, s'estans entreheurtez teste contre teste en façon de belliers. Là eust-on veu principalement les merueilleux faitz d'armes des cheualereux Princes dō Florisel de Niquee, dō Rogel de Grece, Daraïde, & des deux autres Princes dom Florestan & dom Brianges de Beocie, desquelz Daraïde estoit fort esmerueillée, car elle ne les cognoissoit point, & n'auoit onc esté en lieu ou elle eust le moyen de les cognoistre. Le Roy de Gaze, & le Roy de Frigie, faisoient pareillement vne merueilleuse ouuerture par tout ou ilz passoient, tellement que des deux costez la bataille se maintenoit fort aspre, sans pouoir cognoistre lequel auoit l'auantage sur son ennemi: En ces entrefaites le Roi dom Falanges, & la cheualereuse royne Alastraxeree suyuis de toute leur armee, se vindrent fourer à bride abatuë, la lance baissée, & de toute la roydeur des cheualx, dans l'escadron des ennemis, qui n'auoit encores point bougé: & par ce q̃ les Rois de Cores & des Messagettes en estoient principaux conducteurs, ilz s'aparurent au premier rang pour soustenir la furie de leurs aduersaires. A ceste cruelle rencontre tomberent plus de deux mille Cheualiers en la campagne, les vns se meslans parmy les autres en telle foule, & avec si horrible bruit & tant espesse poudriere, qu'il est impossible de raconter par le menules prouesses, & les braues faitz d'armes qui s'y firent des deux costez. Tāt de cheualx sans maistre sortoient continuellement de la foule, & tant d'autres

s'enfuyoient trainans leurs seigneurs perdus par les piedz aux estriuières, qu'à l'entour de la bataille la plaine en estoit toute peuplée: car celuy qui estoit vne fois renuersé n'auoit plus aucun moyen de se releuer. L'excellente roine Alastraxeree, & le Roy son espoux marchans deuant toute leur armee, marteloient si courageusement les ennemis qui les osoient attendre, que bon gré maugré ilz furent contraintz de reculer iusques entre les bataillons de leurs gens de pié, ce qui bien peu leur profita, par-ce qu'ilz auoient desia perdu leurs rangs, & ne tenoient aucun ordre de combattre. Et ainsi que la royne Alastraxeree couroit deçà & delà, naurāt les vns, & reuersant les autres, elle aperceut vn des geans de l'isle Fornaface, qui faisoit vne pituëse boucherie de ses subietz, & s'adressant frōt à frōt deuant luy, au second coup elle luy donna d'vn reuers sur le col avecq̃ telle force, que l'armet & la teste du geāt volerent ensemblement en terre. Adonc le frere du geāt qui aperceut trebucher le corps, s'en venoit tout desesperé & coléré, ietāt vne espoille fumee par la visiere, assaillir la Royne (qui lors ne se gardoit de luy) esperat veger la mort de son frere: & de fait il l'eust cruellement nauree, si le Roi dom Falanges qui auoit tousiours l'œil sur sa bien-aymee espouse, ne fust venu au deuant du geāt, lequel le frapa dans l'escu & en emporta vn grand quartier: mais si le geant fut prompt à ferir le Roi ne fut pas tardif à lui rendre, car il l'ataignit dās le bras duquel il balançoit son espouventable cimetière, & le blessa avec si grande douleur, que comme hors de soy il tourna le dos, & se cacha entre les siens. Adonc le Roy dom Falanges & la Royne son espouse poursuivirent leur pointe, donnans par leur exemple vn si grand courage aux leurs, qu'ilz faisoient peu à peu abandonner aux ennemis, la campagne toute couuerte de leurs compagnons occis, & ruisselante du sang de leurs playes.

plaies. Ce pendant dom Florisel & les siés poursuivirent tellement de l'autre part, ceux qui s'estoient departis de la grosse troupe pour les venir combattre, qu'ilz firent toirner visage aux vns, & mirent les autres en grand branle. Et comme la fortune eust lors apareillé le temps, auquel les profecies fatales, & les destinees de l'Imperiale maison de Grece, devoient estre accomplies, ces braues Princes aculerent tellement leurs ennemis, que ne pouans plus soustenir leur force, & leur quirsans la victoire, ilz commencerent à s'en courir à vau de route pesse mesle, prenās vne honteuse fuite tant esperduz que la plus grand part d'entr'eux se ieta comme à sauueté dans les bataillons du Roy de Colchos, lesquelz estoient desia meslez avecque l'Infanterie des Massagettes, & en faisoient vn terrible carnage. Dom Florisel le poursuivit tousiours, avecque les deux Princes de Romme & de Beocie, & les autres qui fuyoient à main droite furent pourchassez par vne troupe de ceux de la cité, par dom Rogel de Grece, & Daraïde, qui pour faire cognoistre leur vertu l'un à l'autre marchoient tous deux de front ensemblement, & firent de sorte qu'ilz chasserent leurs ennemis iusques aupres de la tour de Phebus, ou ilz tournerent visage pour leur faire teste, à raison de la vergongne que le Roy de Russie leur fit, leur reprochant leur couardie: & les voyant vn peu rassurez, lui mesmes avecque le Roy de Gaze se vint ioindre à dom Rogel & Daraïde, & commencerent vn assez furieux combat. Mais Daraïde qui s'estoit atachee avecque le Roy Bulthazar, lui dōna bien tost vn coup sur l'armet, duquel elle l'abatit tout estourdy du cheual en bas, & par ce qu'elle le hayoit mortellement, d'autant qu'il pretendoit au mariage de Diane, elle l'auta legeremēt en terre, afin de lui trancher la teste, ce qu'elle eust fait, n'eust esté que quelques Cheualiers acompagnans le Roy de Russie, se mirent courageusement au deuant

d'elle, afin de defendre leur Prince: & l'empescherent de telle sorte, que le Roy retourna en son sentiment alors que Daraïde lui venoit sus, aiant occis deux ou trois de ceux qui l'auoient empeschee qu'elle n'acomplist son vouloir.

Comme l'excellente Daraïde poursuivit le Roy de Russie iusques dans la tour de Phebus & de ce qui auint de son entree en l'auenture de la tour de Diane.

CHAP. LII.

DOm Bulthazar Roy de Russie ne pouuant plus soustenir les forces de Daraïde, tourna les espaules & s'enfuit dans la porte de la tour de Pheb^s: mais Daraïde montant à tastons par les degrez qui se rendoient en la chambre ou estoit la grande statuē, le poursuivit tousiours, lui disant: Il ne te sert rien de fuir, Roy de Russie, car tout le monde ne te scauroit maintenāt deliurer de mes maīs. Estans tous deux arriuez dans la chābre, le Roy se ietta dans la bouche de la caue, s'y pensant sauuer, mais estant entré dix ou douze pas, il lui fut impossible de passer plus outre & tomba tout estourdy en terre. Daraïde qui le suiuiot pensant qu'il allast tousiours deuant, ne l'aperceust point en ces tenebres, tellement qu'elle passa outre, le laissant renuersé à vn costé de la caue, par laquelle gueres long tēps elle n'eust cheminé, que la statuē qui estoit en la chambre; comme vous auez entendu, osta la teste de la fenestre qu'elle tenoit estoupee, & soudain en sortit vne clarté & splendeur toute pareille aux flamboyans rayons du cler soleil, alors qu'il commence à se descouurir sur la terre. A raison dequoy la tenebreuse & obscure Diane, qui estoit peinte en l'autre chambre, comme il vous a esté recité au liure precedent, prit la mesme lueur & beauté que si c'eust esté la vraye lune luisante dans le ciel: ce qui fit grandement estō-

ner tous ceux qui se trouuerēt en ce quartier. Mais cōme la statuē s'osta, & que la clarté vint dās la chābre, il fit encores aussi cler dedans la caue cōme de plain iour & y aparurent peintes au naturel les effigies de ceux & celles qui auoient esprouuē l'auenture. Or la statuē tenant l'espee nuē au poing, courut apres Daraïde, laquelle elmerueillée de ceste soudaine clarté, & poursuivant tousiours le Roy à grande haste, pensant qu'il fust passé deuant elle, ne s'arresta iusques à ce qu'elle fust en la sale de la tour de Diane: & lāc trouuant point le Roy, elle passa encores outre, & vint en la grand' sale du logis de Diane, ou la Princeſſe, & les deux Roines Sidonie & Briangie, avecque la Duchesse la Marquise, & toutes les autres Damoiselles estoient en grande tristesse regardās la perte de leur cité, car la Roine y estoit entree à l'heure que la bataille estoit en estat d'estre perdue, & la ville d'estre prinſe: & apres plusieurs autres regretz, diuerſes plaintes, & lamentations, estant veſtue de ſes habillemens royaux, & tenant vne espee nuē dans la main, elle auoit dit telles ou ſemblables paroles: Si la gloire des braues faitz est otroyee aux Cheualiers, Dames, & Damoiselles pour offrir vertueuſement leurs vies à l'immortalité de la renommee, & ſi plusieurs Dames Romaines & Grecques ſe ſont à ceste occasion de leurs propres mains, & ſans s'effrayer, donné vne mort volontaire, reſiſtant par l'effuſion de leur ſang, à l'infamie dont les tyrans pourchaſſoient à les tacher & ſouiller. Combien plus, ma fille Diane, ſommes nous obligees & vous & moy en ceste noſtre miſerable calamité, à reſpandre & eſpancher noſtre royal & diuin ſang, deſcendu des ſouuerains Dieux, & ioint au glorieux ſang de Grece, plus toſt que d'endurer vne ſeruitude perpetuelle, laquelle nous ne pouuons fuir autrement! Or puis qu'il eſt force que nous ſoyons vaincus, & que la fortune, & noz plus cruelz ennemis ſolenniffent deſia les

triumphes de la victoire, mourons vertueuſement, afin qu'en nous vainquant nous-meſmes, nous arrachions d'entre les mains de noz iniuſtes ennemis, & de l'inconſtante fortune, la victoire qu'ilz ont eſpereee long temps & tiennēt maintenant pour aſſeuree. Helas ma chere Diane, premiere du monde en beauté, & ſeconde à nule en grandeur de lignage, iusques icy i'auois tousiours eſperé vous laiſſer heritiere de mon Royaume: mais ce me ſera aſſez ſi vous ſuccedez à ma vertu, par laquelle avecque l'aide de ceste espee, i'eſperē au iourd'huy mettre mō nom en perpetuelle memoire, & mō chaſte corps en liberté. Je vous prie donc en obeiffant à ma volonté derniere, que vous me ſoyez heritiere en ce vertueux & courageux acte, & que tirant de ma poitrine l'espee que i'y vois planter, vous la replantez dans la voſtre, à fin que laiſſans noz corps froids à la froide terre, noz ames glorieuſes pour le loyer de leur vertu, viuent icy bas par vne immortelle renommee, & au ciel en gloire immortelle avecque les Dieux immortelz. Comme la Roine acheuoit ces paroles, & en preparoit l'exécution, Daraïde toute couuerte de ſang & de poudre caillez enſemble en teſmoignage des haultz faitz d'armes de ce iour, entra dans la grand' ſale & trouuant la Roine, & la Princeſſe, & toutes les autres qui estoient avecque elles ainſi eſplorees comme nous auons dit, elle ne fuſt moins eſtonnee voiant leurs plaintes, qu'elles eſbahies de la voir entrer ſi ſurieuſement. Adonc Daraïde leur diſt: Mes Dames il me ſemble que vous ne deuez point reſpandre tant de larmes en vn temps de ſi grande ioye, veu que vous eſtes vengees de voz ennemis, & eux chaſtiez de leur folie par la victoire que no^s auōs au iourd'huy gaignee. Qui vo^s pourroit dire le plaisir qu'elles receurent à ces nouuelles, recognoiſſant Daraïde à la parole? ſinon que l'extremité de la ioye eſtoit ſuſſante pour les faire mourir, plus toſt que

toſt que le dueil auquel elles eſtoient, ſi ceſte ſoudaine lieſſe ne leur eut eſté tem-
peree par vne nouuelle douleur: car Da-
raïde n'auoit à grãd pene acheué ſon pro-
pos, quand la ſtatue enchantee entra or-
gueilleuſement, & diſt: Comment, Daraï-
de, penſes tu donc ſi facilement iouiſſe de
la gloire de Diane en vn lieu duquel i'ay
la garde? Atens moy, car bien toſt ie te fe-
ray experimenter ma prouéſſe, & reco-
gnoiſtre ton erreur. Adonc Daraïde eſti-
mant qu'en la preſence de ſa dame il n'y
auoit choſe qui peut longuement durer
deuant elle, mit la main à l'eſpee, & com-
mença vn ſi braue & perilleux combat que
toute la compagnie ſ'en eſbahieſſoit: mais
il ne dura gueres que Diane perdit ſa ver-
meille couleur, craignant le danger de ſa
Daraïde, laquelle l'aperceuant ainſi pal-
le entra en extreme colere, & deſchar-
gea vn ſi peſant coup ſur ſon aduerſaire,
qu'elle le fit tomber ſur les mains tout e-
ſtourdy contre terre, & voyant ſon col au
deſcouuert, ſeut ſi bien adreſſer le ſecõd
coup entre l'armet & la cuiraffe, qu'elle
lui ſepara la teſte du corps, & ſ'en alla tou-
ſiours bondiſſant iuſques dans le giron de
la Roine, ou eſtant tiree de dedans le he-
aume, il ſembla naturellement que ce fuſt
la teſte de dom Floriſel. La Roine l'aper-
ceuant, & recognoiſſant le chef du noble
Prince, ietta vn hault & douloureux cry,
& diſt: Helas Daraïde, puis que vous a-
uez tant veritablement ſatisfait à ce que
vous m'auiez promis ſur la vengeance de
mon honneur, ſatisfaites encores au ſur-
plus, & me tenez la teſte, afin que ie
ſatisface pareillement à l'amour duquel
l'excellent Prince dom Floriſel m'a touſ-
iours tenuë, & tient encores embrasée. A
peine eut elle acheué ces paroles, qu'elle
tomba eſuanouie dans le giron de la Prin-
ceſſe ſa fille, laquelle enſemble toutes les
autres Damoifelles, lamentoient en gran-
de abondance de larmes, la mort du Prin-
ce ſon pere, n'attendãt que celle de la Roi-
ne ſa mere. En ces entrefaites auant que

Daraïde euſt peu dire vn ſeul mot, tant el-
le eſtoit eſperdue pour la faute qu'elle pẽ-
ſoit auoir faite, auit vne autre merueilleu-
ſe rēcõtre cõme maintenãt vo⁹ entẽdrez.

*Du cruel & haxardeux combat que dom
Rogel de Grece & Daraïde eurent enſemble,
ſur la ſtatue decapitee.*

CHAP. LIII.

DOm Rogel de Grece ayant long
temps combatu deuant la tour de
Phebus à l'encõtre du Roy de Ga-
ze, le pourſuiuit ſi roidement qu'il fut cõ-
traint reculer iuſques dans le chaſteau, &
la deſcendant de cheual ſe mit à courir a-
mont des degrez, & dom Rogel à le ſui-
ure ſ'eſtãt pareillemẽt mis à pied. Le Roy
eſtant monté en la chambre, ſe fourra dãs
la caue, ou il aperceut le Roy de Ruſſie eſ-
uanouï, qu'il penſoit eſtre mort, & paſſant
aupres de lui, vint iuſques là ou les Roi-
nes eſtoient en l'eſtat que nous vous auõs
diſt, bien peu apres que Daraïde eut cou-
pé la teſte à la ſtatue. Dom Rogel aiant
ataint le Roy de Gaze, lui donna tel coup
ſur l'armet qu'il lui fendit la teſte en
deux, & l'abatit roide mort deuant toute
la compagnie. Puis adreſſant ſa veuë vers
Diane, & ſ'eſmerueillant de ſa beauté, il
aperceut la teſte enchãtee ſur le plancher
& Daraïde auecque l'eſpee toute ſanglan-
te en la main. Adonc penſant voir la teſte
de ſon pere, il courut ſus à Daraïde, & lui
dit en grande fureur: Ou ie verray ma fin
ou ie la donneray à celle qui l'a donnée à
celui lequel l'a peu donner aux plus ma-
gnanimes entrepriſes de tout le monde.
Daraïde comme reueillee d'vn profond
ſommeil, & ſans autrement recognoi-
ſtre dom Rogel, par ce qu'elle n'auoit
entendu ce qu'il auoit diſt, le receut
courageuſement, & lors commença le
plus furieux & eſpouventable combat
qui fut iamais veu entre deux Cheua-
liers, car ilz ſ'entrechamailloient de telle

roideur, & avec si peu de cesse, qu'il sembloit qu'il y eust cent Cheualiers combatans dedans la sale. Alors qui les eust vus tailler leurs escuz, decouper leur harnois, depiecer les cotes de maille, & se tirer à chacun coup le pur sang l'un de l'autre, lo eust bien estimé ceste rencontre la plus cruelle & impitoyable qu'il seroit possible de penser. Or voyans qu'ilz ne se pouuoient vaincre avecque l'espee, ilz s'empoignerent corps à corps, & à la seconde secousse qu'ilz s'entredonnerent, tous deux tomberent en terre, & se culbuterent maintenant dessus tantost dessous avec telle tempeste, que les espees leur sortirent des poings, & ne cesserent iusques à ce qu'ilz furent tant las & travailliez que force leur fut se laisser & se releuer: puis dom Rogel aiant pris l'espee de Daraide & Daraide celle de dom Rogel, ilz recommencerent le combat encores plus cruel que deuant, le sang leur degoutant de tous costez: & le plus souuent s'aprochoient si pres l'un de l'autre qu'ils s'entrefrappoient des pommes des espees sur la teste en sorte que quelquefois ilz estoient contrains de mettre maintenât vne main, & tantost vn genou en terre.

Qui vous pourroit exprimer les douleurs & la souffrance qu'enduroit Diane, voiant deuant elle la teste de son pere occis, la Roine sa mere presque morte en son giron & sa Daraide en si grand danger. Elle s'esuanouissoit à toutes heures, se montrant beaucoup plus morte que viue, tellement que la Roine Briangie, & la Duchesse toutes troubles ne scauoient que dire ny que faire, comme celles qui ne lui pouuoient donner auenne consolation, aiant bon besoing d'estre consolees elles mesmes. Or les deux Cheualiers combatans, n'esperas plus acheuer le combat qu'avec leur vie, apres auoir demeuré deux grosses heures sans aucun repos en ceste extremité, & estans tous affoiblis, tant par le long travail qu'ilz auoient souffert tout ce iour, que par la perte de leur sang, ilz commen-

cerent tellement à chanceler & tournoier par la sale, comme sentans les douleurs de la mort, qu'en vn mesme instant l'un tomba d'un costé & l'autre de l'autre, faisant les mesmes gestes qu'ont acoustumé faire ceux qui rendent l'esprit. Diane voiant ceste pitoyable fortune de son amy, tomba palmeée dans le giron de la Roine Briangie, & ce pendât la Duchesse courut vers Daraide, & lui aiant osté l'armet, lui apuya la teste en son giron. Quelques autres damoiselles en hrêt autant à dom Rogel: & par ce qu'on les estimoit mors, chascune se mit à faire grand dueil pour Daraide, mesmement la Duchesse Lardenie, laquelle arrosant sa face de grosses larmes, & se tordant les mains, disoit: O extreme prouesse, iointe avecques extreme beauté, comme maintenant vous n'oubliez en vne extreme douleur? Helas! qui pourroit assez plaindre la perte de celle, en qui les Dieux auoient si bien employé & montré leur plus souueraine puissance. Las! ma Dame Diane, combien au iourdhui vous receurez vne mauuaise fortune pour l'amour que vous portez à Daraide, en perdant ce que vous aimez le plus en ce monde, & en vous perdant encores vousmesmes. O combien me seroit maintenant heureuse la mort, qui en acheuant ma vie, pourroit encores acheuer les douleurs, lesquels ie me voy apareillees. Telles & plusieurs semblables plaintes faisoit Lardenie, & les autres Damoiselles, qui prenoient aussi fort grande pitié de dom Rogel pour la grande beauté & bonne grace qu'elles voyoient en luy.

Comme

Comme ce qui auoit esté prophetizé de Diane s'accomplissant, la Roine Alastraxeree recongneut le Prince Agefilan son filz alors qu'on le pleuroit pour mort.

CHAP. LIIII.

DEsia le temps estoit venu auquel les profeties de Diane se deuoient accomplir quand les Russiës ne pouans plus endurer les forces de l'excellent Roy dom Falanges, & de la forte Alastraxeree, auquelz s'estoit ioint dom Florisel en la poursuite de la victoire, perdirent entierement leur cuer, sçachans que les principaux chefs de leur armee estoient morts & qu'ilz ne leur restoit aucune esperance de secours : à raison dequoy congnoussans la prouesse de ceux qui les poursuioient, ilz commencerent à tourner les espaules, & s'enfuir dedans leur camp sans auoir aucune souuenance de resister à l'ennui : mais on les pourchassa avecq' telle ardeur & viffesse, qu'ilz furent tous mis au fil de l'espee dedans leurs tentes, sans qu'aucun d'eux fut pris à mercy, excepté le Roy de Cores, lequel apres auoir long temps combattu fort courageusement fut pris & emmené prisonnier, & depuis mourut en la prison d'un coup que Daraï de lui auoit donné dedans la teste. Ce pendant que la victoire se poursuiuoit en ceste sorte, dom Florisel, & le Roy dom Falanges avecque la Roine Alastraxeree, voiant la bataille acheuee, & estimans qu'ilz deuoient laisser l'execution du surplus à leurs souldatz, sans considerer combien ilz estoient naurez & trauaillez, se receurent l'un l'autre, & embrasserent avecq' autant de plaisir qu'il seroit possible de penser, se retrouvans ensemble victorieux apres vne si dangereuse rencontre. Puis aians entédu que dom Rogel & Daraïde estoient entrez dans la tour de Febus, & que depuis ilz n'en estoient saillis, ilz s'en allerent apres eux, & arriuant assez pres de la tour, virent la beauté de

l'image de la deesse Diane. Apres l'auoir quelque temps regardée, dom Florisel, le Roy & la Roine de Colchos, les Princes dom Florestan, & dom Brianges, avecques quelques autres Cheualiers du sang de Bretagne, mirent pied à terre, & monterent seulz en la tour, ou ilz virent la beauté & la splendeur qui venoit de la part d'ou la statue auoit oité la teste : & voiant la caue tant belle & clere qu'elle ressembloit fin cristal, avecq' les peintures de ceux & celles qui auoient esprouué l'aucture representées au vif dans la muraille, ilz entrerent dedans, & y trouuerent le Roy de Russie qui estoit reuenue de prison lequel ilz prindrent, & le donnerent en garde à ceux qui estoient demeurez dehors, puis retournerent dans la clere & luisante caue, par laquelle ilz cheminerent iusques à ce qu'ilz fussent arriuez dans la grande sale, ou ilz trouuerent les Princes, les Roines, & Princesses en la façon que vous auez entendu. Aians oité leurs armetz, & aperceus leurs extremes doleances, ilz furent fort troublez en leur courage : mais sçachez que dom Florisel ne fut si tost entré, que la statue, & la teste de sa ressemblance disparurent. Or la Roine Alastraxeree voiant Daraïde au giron de la Duchesse, encores que de long temps elle ne l'eust veu, neantmoins tant pour la force de l'amour qu'elle lui portoit, que pour auoir sa vraye image bien empreinte en sa souuenance, elle recongneut que celui estoit son filz Agefilan, lequel on lamentoit pour mort souz le nom de Daraïde. Et partant s'oublant de soy & de sa grandeur, afin que les profeties d'Alquis, Vrgande & Cinistide fussent accomplies, elle commença de grande angouille avecq' vne voix fort douloureuse, à se plaindre, & lamenter son desastre disant telles ou semblables paroles, accompagnées de maints soupirs, & de pleurs infinis, qui lui ruiselloient sur le visage : Helas ! mon cher filz Agefilan, ie vous ay trouué & perdu en vn mesme instât, & voy avec-

que vostre perte, la perte de la fleur, de la maison de Grece, laquelle est morte avecque vous. Je vous voy par vostre mesconnoissance sacrifiez l'un à l'autre, à fin que ce cruel sacrifice rendist beaucoup plus douloureux celui lequel ie fais de mon cuer, en voyant ce que ie desirois plus de voir, & ce dont j'auois le plus de crainte. Helas les sages m'auoient bien predit en l'Isle perdue, que ie ne vous retrouverois point, iusques à ce que Daraïde eut perdu son nom. O cruelz destins! il estoit dōc necessaire que le nom de Daraïde se perdant, ie perdisse toute ma ioye & que vous reprenant celui d'Agésilas, ie prisse la douleur qui m'est trop plus douloureuse que ne vo^r a esté la mort receüe par tant de plaies. Helas! mon filz, & vo^r mon neveu dom Rogel, voz grandes prouesses m'ont apareillé ceste grande amertume, & mon malheur a voulu que ie me soye trouuee à la fin d'une si piteuse rencontre. Grande angoisse sentirent tous ceux qui oyent les plaintes de la desolee Roine de Colchos, principalemēt dom Florisel, & dom Falanges, qui avecque autant de pleurs regrettoient la mort de leurs enfans, acroissans de beaucoup leur ennui, tant par celui de la Roine, comme pour la resistance qu'ilz faisoient à la douleur voulans tousiours se maintenir fermes & constans en la force de leur courage: & tant furent compassionnees pour la tristesse de la Roine Alastraxere, celles qui tenoient les deux Princes pasmez en leurs giron, que l'abondance des larmes qu'elle respendirent sur leur visages, les fit reuenir tout en vn mesme temps de pasmoison, & comme reueillez d'un profond sommeil, se souuenans de la colere qu'ilz auoient conceüe l'un contre l'autre, tous esourdis & mesconnoissans toute la compagnie, se releuerent en sursault, & prindrent chacun leur espee pour recommencer leur combat, s'entrecherchans avecque telle fureur que dom Florisel & dom Falanges eurent assez d'af

faire à retenir chascun leur filz. Mais comme dom Rogel se fust quelque temps debatu entre les bras de son pere, voulant eschaper à toute force, & le regardant par grande colere acompagnée de menasses, il le recogneut, & tout effrayé s'escria à haute voix, disant: O Dieu qu'est-ce que ie regarde, ie vous ay nagueres veu occis, aiant la teste tranchée, & pour prendre la vengeance de vostre mort, il me semble veritablement auoir vne fois perdu la vie au combat, & toutesfois ie ne sçay en quelle façon me voicy encores vif ie vous prie me faire entendre cecy, & si vous n'estes mon seigneur mon pere, ne me destourner point que par ma mort, ou par celle de son meurtrier, ie ne face ce que ie doy pour la vengeance de la siene. Mon filz Rogel (dist le Prince) ie suis celui que vous pensiez estre mort, & ce qui vo^r a mis en telle resuerie, a esté fait par enchantement, afin que vous & vostre excellent cousin desguisé en Daraïde, vous traitissiez ainsi rigoureusement que vous auez fait: car vous deuez sçauoir que la Roine Alastraxere ma sœur a recogneu Daraïde, & trouué en elle le filz qu'elle auoit perdu alors que nous vous tenions tous deux pour mortz. O Dieu (dist dom Rogel) est il possible que nostre combat si cruellement encommencé pregne vne si douce & heureuse fin, & que nostre inimitié retourne en vn si grād amour? il est ainsi comme ie vous le dy, respondit dom Florisel. Alors le Roy & la Roine de Colchos auoient desia dist à leur filz qui ilz estoient, & qui estoit celui contre lequel il s'estoit combatu, au moien dequoy voyant qu'il estoit decouvert, & qu'il ne luy restoit plus aucun moien ny occasion de se desguiser à l'auenir, il s'agenouilla deuant eux, & leur dist: Mes seigneurs ie vous supplie me pardonner si pour vn temps ie me suis perdu en vostre endroit, pour m'auantager d'autant en vn autre: & puis que ie me voy maintenant retrouué par vostre moien, alors

alors q̄ ie cognoissois ma plus grande perte, il vous plaira me presenter les mains, afin qu'en les baissant avecque l'obeissance que ie vous doy, ie vous rende graces de la faueur laquelle vous m'avez faite en me sauuant la vie, veu qu'autrement ie n'estois pour durer plus gueres contre la prouesse de monsieur mon cousin l'excellent Prince dom Rogel, frere de ma dame Diane, laquelle par son excellence m'a fait perdre le nom d'Agefilan, pour souz le nom & habit de Daraide gagner sa bonne grace, avecque toute la reuerence, laquelle au milieu de mes plus aspres douleurs, i'ay tousiours gardé à l'honneur d'une si haute & excellente Princesse. En ces entrefaites dō Rogel arriua & l'ébrasa par grād amour, se donās le pris du cōbat l'un à l'autre : & lors fut si grand le bruit de ceux qui se resioissoient de ceste bonne auenture, que la Roine Sidonie & Diane retournerent de pasmoison, & voiant en vie ceux qu'elles auoient pleurez pour mortz, se trouuerent si esbahies, & tant aises de les voir qu'elles pensoient n'auoir rien fait que dormir & songer auparauant. Alors dom Florisel dist à la Roine: Ma Dame il vous plaira prendre quelque resioissance pour l'arriuee de ces nobles & victorieux Princes lesquelz vo^s sont venuz visiter apres auoir vaincu voz ennemis, & departy le cruel combat de Daraide & dom Rogel, en ostant à Daraide les armes lesquelles comme Damoiselle elle auoit prises en la plus cruelle bataille de l'amour de Diane, pour mieux defendre Agefilan du peril ou il estoit, si elle l'eust cogneu, ou s'il eut esté priué de sa presence. Maintenant donc, ma Dame, en vous descourant ses pere & mere que voicy, c'est à sçauoir le preux Roy dom Falanges d'Astre, & la forte & cheualereuse Roine Alastraxeree, il a meritē ce que ces pensées seules n'eussent peu meriter, sinon en les raissant, & souffrant patiemment son martire, sans rien entreprendre (tant soit peu) contre l'hon

neur & reuerence qu'on deuoit garder à vne telle Princesse comme est nostre fille Diane. Partant attendu la fidelité & loyauté de son amour, & qu'il a mis ma tēte en vostre puissance, ioint que vous lui auez donné vostre promesse, & moy la mienne, il demeure sans coulpe, & merite iouir de la gloire d'auoir gagné par sa vertu & discretion, vne si excellente espouse, laquelle des maintenant ie vous supplie lui acorder de vostre coste, car ie lui acorde du mien, à la charge toutesfoiſ que pour acomplir le bon heur, de ce iour en toutes ses perfectiōs, vous laissez la vaine loy de voz Dieux apostez, & prendrez celle de nostre Sauueur Iesus-CHRIST, avec laquelle Diane demeurera son espouse par promesse seulement, en attendant, à raison du prochain lignage, la dispense de celui lequel represente en la terre, nostre Dieu puissant qui est au ciel. Diane & Agefilan receurent si grand plaisir de ces propos, que si elle ne l'eust temperé par le piteux estat auquel elle vōyoit son amant, & lui pour voir retarder le iour tant désiré de son mariage, ilz fussent tous deux trespassez de grand'ioye. Mais ainsi que dom Florisel acheuoit son propos, la Roine qui l'auoit escouté fort ententiuelement, lui respondit: Il apert bien maintenant dom Florisel, combien vous auez la fortune à vostre plaisir, puis qu'elle ne vous apareille aucune auersité, que pour vostre plus grand contentement, ny à moy aucun cōtētement, que pour ma plus grande auersité: car cest en vostre faueur, & non pas en la mienne qu'elle a voulu que le preux Roy dom Falanges me fust auourd'hui cause d'un grād bien, tout ainsi que par cy deuant il m'a esté cause d'un grand mal. Puis donc que tout mon honneur, & ma gloire n'est que pour augmēter la vostre, & celle de vostre lignage: disposez ainsi cōme il vous plaira, des nopces que vous pourchassez pour le Prince Agefilā, afin q̄ Diane recoiue de lui le cōtētemēt que

que ie n'ay peu receuoir de vous: car quāt à moy, veu que le mariage tant honorable excuse la cautelle dont Agefilan nous a si long temps abusées, ie lui pardonne, & le prens des maintenant pour mō filz, & veux que comme a tel on lui apareille les plaies, ce pendant que ie m'apareilleray à receuoir la plus necessaire guerison de l'ame, en prenant la loy Chrestienne, qui descouure assez la tromperie dont les faux dieux m'ont abusée iusques icy. En acheuant ces propos Agefilan ioyeux au possible, lui baïsa les mains, & soudain la Roine & Diane, avec la Roine Briangie recueillirent ces nobles Princes qui estoient fort esmerueillez de la grande beauté de la ieune Princeesse. Mais le Prince dom Florestan n'eust si tost aperceu la Roine Briangie, qu'il la fist maistresse de son cueur, & delibera n'en prédre iamais autre à femme, moienant qu'elle le voulust accepter pour mary. Adonc estant arresté que tous ces Princes iroient faire penser leurs plaies, la Roine dist que pour donner fin à l'auenture de la tour de Phebus, & qu'Agefilan eust l'honneur de l'auoir acheuée, il leur conuenoit passer par la caue d'autant que sa fille Diane ne pouoit sortir de là par autre costé quelconque. Ainsi selon le vouloir de la Roine, Agefilan prit la Princeesse par la main, & entrerent dans la caue, laquelle estoit si plaine de clarté qu'il n'y auoit celui qui n'en eust la veüe esblouye. Et de là, entrans dans la chambre de la tour de Phebus, la caue perdit sa clarté, & depuis n'y en aparut aucune, sinon quand Agefilan & Diane y passoient. Estans descenduz en bas, le soleil estant presque couché, les Princes monterent à cheual, & les dames sur leurs pallefrois, prenans leur chemin vers la cité au mylieu des bataillons de leurs gens, qui estoient arrestez en ce lieu, comme tous esbahis de leur victoire, faisant sonner leurs trompettes, fifres & tabours, en signe de resiouissance. Or Diane passant par les troupes des morts, &

voiant tout à la ronde les champs rouges de sang, commença à pleurer de grande pitié, & dist: Helas! quelle resiouissance est il possible d'auoir, en vn lieu ou il y a si iuste ocasion de tristesse! Ainsi marcherent tout bellement vers la cité, chacun s'esbahissant de la grande beauté de Diane, que dom Rogel conduisoit & tant estoit grande la ioye que chacun faisoit aux champs & à la ville, à raison de la victoire, que tout le menu peuple sembloit estre hors de son sens. Il estoit desia nuit quand ilz arriuerent au palais, auquel ilz monterent à la clarté de plusieurs flambeaux, puis soudain tous les Princes furent desarmez, & couchez en riches litz, car il n'y auoit celui qui n'eust bon besoin d'estre pensé: mais ainsi que dom Rogel se desarmoit, aperceuant l'espee d'Agefilan en sa main, il lui va souuenir des paroles qu'Alquif lui auoit dites, les voiant accomplies par le sang que ceste espee auoit tiré de son corps, & de celui d'Agefilan. Les plaies des Princes estans apareillees par maistres sçauans & bien experimentez, ilz furent fort resiouiz, car ilz n'auoient aucune plaie mortelle. Adoncq' les deux Roines & la Princeesse aiant pris congé d'eux, s'en retournerent en leur logis & passerent la pluspart de la nuit avec autant de ioye qu'il sçauoit estre possible de penser. Le lendemain la Roine commanda que les despouilles des ennemis fussent departies aux soldatz, & fit d'auantage plusieurs beaux dons à ceux qui auoient le mieux fait leur deuoir. Le mesme iour par son commandement furent aussi enterrez les mortz, qui gisoient en la cāpagne, afin que l'infection de l'air n'engendrast quelque pestilence.

Des deuis que Diane eut avecque Lardenie sur l'aventure passée, & comme elle alloir Agesilan.

CHAP. LV.

INcontinent que Diane se veit seule avecque la Duchesse Lardenie, elle l'embrassa & lui dit: Que vous semble il ma grand'amy de des inconstances de la fortune, qui apres m'auoir fait souffrir mille tempestes en la cruelle mer d'amour, m'a finablement cōduit au port de salut: lors que ie pensois estre plus asseurée de mon naufrage, voyant deuant moy la perte des deux personnes, lesquelles j'aymois le mieux en ce monde: & pensant encores perdre la Royne, & moy avec elle: toutesfois vous voyez comme le tout est retourné à nostre bon heur. Certainement si vne seule chose ne me tēperoit la ioye de ce iour, elle seroit suffisante pour me faire mourir de trop grand plaisir. Ma Dame (dist Lardenie) quelle chose peut ainsi temperer vostre ioye comme vous dites? C'est (respondit Diane) la crainte qui me demeurera à iamais que lon pensera Agesilan n'auoir point demeuré si long temps en ma compagnie, & avecque telle pensées, sans me les auoir descouuertes: au moyen dequoy lon pourra imputer à des honnesteté ce qui m'a cousté tant cher pour m'en defendre, mesmes par le commandement que ie lui fi lors qu'il me d'escourrit qui il estoit. Lardenie luy respondit: Ma Dame, n'ayez aucun soucy de celà, car si vous estes satisfaite de vostre honneur enuers vous-mesmes, vous l'estes encores enuers tous les autres: par-ce qu'es choses qui touchent l'honneur & les offenses des dieux, lon ne scauroit trouver meilleur iuge pour demeurer satisfait, que la propre conscience, de laquelle on doit prendre le principal conseil du contentement que lon desire. Et à la verité celui qui se sent coupable & se mal con-

tente de soy-mesmes, à peine trouuera qui se contente de luy, & au rebours s'il se contente en sa preud'hómie, chacun aussi s'en cōtentera: par ce qu'en balançant l'honneur, avec la vergongne, la propre conscience est le veritable pois, qui s'encline naturellement à la verité, pour monstrier la bonté & l'innocence du personnage, ou les vices qui sont en luy. Parquoy encores que les Dieux ny les homes ne peussent estre auertis d'un forfait, lon ne doit pourtant iamais offenser, ny les Dieux, ny la vertu, à fin d'estre toujours franc & libre du cōtinuel surfaut qui guerroye les malfaiteurs en leurs pensées, par la representation de l'offense commise contr'eux mesmes, & contre les loix de la preud'hommie: car combien que la faute du coupable soit cachée à tout le monde, si est-ce qu'il ne se peut cacher à soy mesmes, ny fuir la vergongne qu'il doit auoir à tout par soy, pour auoir faict ce que l'honneur & la raison luy defendoyent. Or puis que l'homme est plus redevable enuers soy-mesmes qu'enuers aucun estranger & qu'il peut beaucoup moins se cacher de soy que d'un autre, il se doit bien garder de faillir, soit en public ou en secret, veu que si les hommes ne l'accusent enuers les hommes, la vertu & la conscience l'accuseront continuëlement enuers luy-mesmes. Puis donc, ma Dame, que vous estes à tout par vous contente de vostre vertu, ne vous tourmentez point pour le contentement d'autrui. Ah! Lardenie (dist Diane) iusques auourd'huy vous ne m'auiez point ainsi conseillée. Ma Dame (dist-elle en riant) c'estoit par ce que le mal d'amour ne peut bien endurer un tel conseil, & qu'il ny a meilleure science au monde pour bien guerir vne maladie, que la cognoistre premierement. A raison de quoy ie vous voulois medeciner par la iouissance de voz desirs, sachant que pour guerir les playes de l'amour il ny a pire appareil

que

que l'honneur & la chasteté : car à ceux qui sont atains d'un tel mal, les Dieux ont ordonné pour toute medicine l'exécution de leur volonté : & ont voulu que d'autant plus qu'on cherche le remede avecque bon conseil, d'autant moins on le puisse trouver. Mais Lardenie (dist Diane) puis que vous avez tant de sçavoir, ne le souillez point en aprouvant la vaine puissance des faux dieux : veu que nous devons si tost laver de nous ceste tache, & demeurer nettes & pures en la vraie foy Chrestienne, par l'eau sacree que le Dieu tout puissant a destinee à un tel baing. Parquoy en attendant le saint Baptême, mettons nous en bon estat, & chassons l'adoration des vaines idoles pour adorer ce Dieu qui seul merite estre adoré. Ma Dame (dist Lardenie) d'autant que le conseil donné à l'ame, excède celui lequel on donne au corps, d'autant voz saintes paroles ont surmôté les miennes profanes. Mais veu que par l'apointement de vostre mariage le remede est apareillé à l'un & à l'autre, n'en parlons plus pour ceste heure, & nous en allons vers la Roynie. Adoncq' elles s'en allerent là ou les deux Roynes estoient, & les trouverent fort ioyeuses. En telz & autres deuiz, visitant souvent les Cheualiers blesez, elles passerent tout le tēps qu'ilz furent au lit malades : mais dom Rogel & Agefilan ne guerirent que quinze iours entiers apres que tous les autres furent releuez : & comme ilz fussent tous deux pensez en vne mesme chambre, & aussi à cause de leur prochain lignage, ilz s'entr'aymerent depuis d'une fort grande amytié. Les Roynes les alloient voir tous les iours, & aussi la Princesse Diane, laquelle pour l'entretien de son honnesteté ne tenoit iamais aucun propos secret avec Agefilan, & s'amusoit plustost à deuiser de maintes gracieuses railleries avec son frere dom Rogel : toutesfois un iour estant demeuree seule avec Lardenie en la chambre des Princes,

Agefilan luy dist : Helàs ! ma Dame, combien i'eusse esté plus heureux de ne perdre point le nom de Daraide, pour retrouver celui d'Agefilan, puis que sous tel habit desguisé vous me donniez comme à Damoysselle la faueur de vostre compagnie laquelle maintenant vous me refusez comme à Cheualier, & la donnez à monsieur le Prince dom Rogel. Dom Rogel luy dist en riant : Vous estes plus fauorisé, monsieur mon cousin, vous estant ceste faueur refusée comme à Cheualier, que non pas quand elle vous estoit ottroyée cōme à Damoysselle : car ce peu de faueur que ie reçois de ma Dame la Princesse, pour estre son frere, vous promet la plus grand' gloire des secretes faueurs que bien tost vous esperez auoir d'elle. A ces paroles Diane prit vne couleur au visage qui de beaucoup luy creut son excellente beauté, & dist en riant : Vrayement vous avez tort de dire celà, car il n'y a faueur au monde qui puisse égaler l'amour que ie vous porte. Puis qu'il est ainsi (dist dom Rogel) ie vous supplie, ma Dame, faire vne seule chose pour l'amour de moi. C'est à vous de me commander, respondit Diane. Ma Dame (dist-il) ie vous rends mille mercis de me donner le pouuoir de commander, au lieu que ie vous deuerois obeir : toutesfois en iouissant de la puissance que vous m'avez donnée sur vous pour recompense de celle q' vous avez sur moy, ie vous prie de vous en aller parler quelque tēps avec monsieur mon cousin, à ce que le nom d'Agefilan ne luy face point perdre la faueur que vous luy donniez sous celui de Daraide. Diane comme bien auisée & sage, se leua & luy dist en riant : le me ry monsieur mon frere, que vous ayez voulu faire sembler grand cas que ie face avecque monsieur le Prince Agefilan, ce que ie fais avecq' vous, veu que le prochain lignage qui est entre luy & moy, le commande autant bien comme vous me le commandez. Et puis que vous en

voulez voir l'experience, ie vous en offerai le soucy par la ialousie que ie vous donneray en faisant plus de faueurs à monsieur Agefilan, comme à mon cousin, que non pas à vous comme à mon frere. Adoncelle s'alla assoir sur le bord du lit d'Agefilan, lequel en receut si grand plaisir qu'il ne pouuoit respondre vn seul mot aux propos qu'elle auoit tenus en sa faueur. Ce pendant la Duchesse Lardenie se mit à deuiler auecque dom Rogel, à fin de donner à Agefilan meilleure opportunité de parler auecque Diane : & partant en ayant trouué l'ocasion, il luy dist: Ma Dame, ie vous supplie me donner cōgé de vous parler de mes passions, & me pardonner l'ennui dont ie vous ay esté cause par cy deuant, car si i'ay commis quelque faute, vostre absence, & le repentir m'en ont suffisamment chastié. Diane luy respondit: Vous pouuez assez cognoistre, que ie ne vous puis donner le congé que demandez, ny vous le recevoir: veu que pour ce regard ie ne doy accomplir vostre volonté, ny vous me requerrir de la mienne, iusques à ce que celle de Dieu & de mes pere & mere vous ayent otroyé le contentement de ce qui à bonne raison vous doit estre ce pendāt refusé. Agefilan fut en partie ioyeux de ses paroles, à raison de l'esperance qui luy en estoit donnee pour l'auenir: & en partie triste, voyant que la Princesse desguisoit & dissimuloit ainsi l'amour qu'elle luy souloit monstrer souz le nom & habit de Daraide. Ayant demeuré quelque temps en ceste alteration, il luy dist: Ma Dame, puis que vous me refusez ceste faueur, à fin de me faire trouuer plus douce celle que i'atens pour le guerdon du vray & loyal amour que ie vous porte, ie vous supplie au moins ne me refuser point voz belles mains, car par ce moien vous receurez le seruice que ie vous doy, & moy le bien duquel vous m'estes redevable pour engarder le corps de mourir en ce tourment quel'ame endu-

re, voyant ainsi delayer & retarder l'heureux acomplissement de ses desirs. Si vous auez (respondit Diane) l'esperance que vous deuez auoir, vostre mal n'est point si dangereux que lon n'y puisse donner remede assez à temps. Ma Dame (dist-il) voz paroles tant bien dites ne me blessent en aucun endroit, que la plaie ne me descouure incontinent combien les defauteurs presentes me promettent de faueurs à l'auenir. Ie vous supplie donc, ma Dame, continuer tousiours vostre rigueur, puis qu'en m'acroissant maintenant la peine, vous ne faites que m'apareiller vne plus grande ioie, laquelle ie receurai lors que mes esperances & voz dissimulations auront trouué la fin que i'ay tant attendu. Ne prenez point (dist Diane) mes paroles pour dissimulations, ny les defauteurs que vous dites pour faueur: car vous sçauiez que le lieu que ie tiens ne vous permet de me demander, ny à moy de vous otroyer plus que mes seigneurs pere & mere vous ont otroyé cy deuant par leurs promesses. Mais laissons ces propos, & me dites comme se portent voz playes. Mieux que ie ne voudrois, ma Dame, dist il. Pourquoi celà? dist Diane. Par ce (respondit Agefilan) que les ayant receues à vostre seruice la peine m'en est si plaisante, & la douleur tant agreable, que i'en recoi la gloire & la faueur laquelle vous m'auiez deniee. Diane en riant d'une fort bonne grace, luy dist: La peine de voz playes m'est autant douloureuse, comme la gloire de ne vous otroyer point les faueurs q̄ vous demandez, m'est plaisante. Ie vous rens graces, ma Dame (dist Agefilan) de la faueur que vous me faites en plaignant vne petite douleur q̄ ie souffre au corps, & vous resjouissant de l'extremie angosse dont mon ame est martyree par vostre diuine beauté. Reposez-vous auecques ceste faueur (dist Diane) car il me plaist bien de vous l'auoir otroyee sans y penser. Ce pendant que Diane & Agefilan con-

con-

continuoient en ces gracieux deuis, don Rogel qui estoit fort content de la beauté & bonne grace de la Duchesse, lui dit: Ma Dame, vous avez veu combien i'ay voulu acheter vostre compagnie, puis qu'elle ma fait laisser celle de ma Dame Diane: & partant vous pouvez considerer qu'elle est la peine qui m'a contrainct à chercher le moyen d'un tel bon-heur, à fin de vous faire sçauoir que vostre diuine beauté, & excellente bonne grace m'a nauré trop plus rigoureusement, qu'oncq' ne feit Daraïde par sa prouesse. Lardenie luy respondit en souz-riant: Monsieur, si ie voyois autant bien le tesmoignage des playes de ma beauté, comme ie le voy de celles que vous avez receuës de Daraïde, ie ne douterois tant cōme ie doute du peu de vostre mal, ny de l'excellence que vous trouuez en ma bōne grace. Ma Dame (dist dom Rogel) i'eusse bien voulu que vous ne m'eussiez point maintenant donné plus de douleur que vous m'en auiez donné par cy deuant. Pourquoi dites vous cela? dist la Duchesse. Par-ce (dist il) que sans vous contenter de m'auoir si cruellement nauré de vostre bonne grace, vous prenez encores en ieu les douleurs que i'endure à bō escient. Dieu soit loué (dist-elle) car si ie n'auois grande beauté pour estre aimée de vous, ie cognoy par voz paroles que ce default est recompensé par ma bonne grace. Je ne dy pas ainsi (respondit dom Rogel) car les deux ensemble, & la beauté, & la bonne grace m'ont entierement rendu vostre. Comment le croyrois-je, dist Lardenie. Comment? dit dom Rogel, en cognoissant vous-mêmes vostre beauté & bōne grace, & vous persuadant que i'en ay bonne cognoissance. Ceste raison n'est pas trop bonne, dist Lardenie. Si elle n'est bonne à escouter (dist dom Rogel) elle est pour le moins assez bonne à exprimer ce que i'endure: mais pourquoi dites vous qu'elle n'est pas bonne? Par-ce (respondit la Duchesse)

se) que personne ne peut estre bon iuge en sa propre cause: à raison de quoy me regardant dans vn mirouer, l'amour de moy-mêmes me pourroit causer vne tromperie, qui ne seroit point en ceux lesquels contempleroyent ma beauté & bonne grace avecq' moindre affection que ie ne l'aurois regardée. Sauf vostre grace (dit dom Rogel) ie n'ay point esté abusé en vostre excellence, & si suis certain que ie ne vous sceu onc regarder sans affection. Je remercie Dieu (dist la Duchesse) dont il m'a donné vn si bon tesmoing de ma beauté. Maintenant que vous en avez telle assurance (dist dom Rogel) & que vous avez si bien esproué sur moy voz diuines perfections, ie vous supplie, ma Dame, prendre pitié de ma vie, en recompense des douleurs que vous me faictes souffrir. Je ne pensois point dist elle, que vous voulussiez rien acheter à si bon marché. Pourquoi dites vous cela? dit dom Rogel. Par-ce (respondit elle) que vous avez fait si grand'estime de ma beauté, & neantmoins vous la voulez presque auoir pour neant. Estimez vous doncques tant peu (dist-il) la peine que i'endure, que vous la vueillez conter pour neant? A tant la Princesse, & la Duchesse, se retirerent, apres plusieurs autres gracieux propos d'une part & d'autre, & ainsi les deux Princes estās au lit passerent le temps receuans grande consolation d'une si douce & agreable compagnie, iusques à ce qu'ils furent entierement gueris. Pendant lequel temps lon ne vous pourroit reciter combien estoyent grandes les passions que dom Florestan souffroit pour l'amour de la Royne Briangie, se delibérant de la prendre à sa femme, s'il lui plaisoit de le receuoir pour mary. Dom Rogel n'estoit en moindre fantasia pour la beauté de celle mesme Royne, & l'eust volontiers espousée sans la promesse qu'il auoit desia faite à l'Infante Leonide.

*Des cruelles douleurs que dom Florisel en-
duroit pour l'amour de la Roine Sidonte.*

CHAP. LVI.

GRande estoit la peine que dom Florisel souffroit pour la beauté de la Roine Sidonie: & telle qu'il passoit douloureusement le iour en continuël travail, & la nuit sans aucun repos. La Royne pareillement sentoit iusques dans l'ame la force, & la violence, par laquelle elle s'effaioit de résister à l'amour, ne considerant qu'il ne peut souffrir la résistance, & encores moins le bon conseil: tellement que la faute du remede redoit la peine des deux égale. Or auint que dô Florisel estant guery de ses playes la Roine richemēt habillée se promenoit vn iour avec lui dans le beau iardin de la tour de Diane, fort ioyeuse de ce qu'elle, & sa fille, & tous les habitans de l'Isle s'estoient nouvellement faitz Chrestiens: & partant elle auoit enuoyé vers le saint Pere pour auoir vne dispense sur le mariage de la Princesse Diane, & du Prince Agesilan. Ce pendant que les autres Princes & Princesses se promenoient çà & là à leur plaisir, dom Florisel se trouuant seul avec la Royne, la mena seoir auprès de la fontaine du iardin, & voyât le temps oportun, luy dist: Ma Dame, ie vous supplie de m'otroyer vne faueur. Il n'y a chose en moy (dist la Roine) qui ne soit à vous: partant demandez ce qu'il vous plaira, car ie ne sçache chose que vous me puissiez demander, laquelle ie ne vous aye desia otroyee. Helàs! ma Dame (dist-il) pour auoir receu voz plus grandes faueurs parcy deuant, ie suis maintenant en ceste, grande tristesse, pour me voir autant esloigné de mon bon-heur, comme autresfois i'en ay esté pres. Ce dont ie vous veux supplier, ma Dame, est que pour me deliurer de telle angoisse, il vous plaise m'otroyer vn de

ces deux remedes: ou bien m'alonger la vie en prenant pitié de mon mal ou bien avec ceste espee, mettre fin par vne seule mort, à tant de mortz qui me tourmentent, à fin qu'en m'ostant la vie de voz propres mains, ie satisfasse à l'offence que j'ay faite en la defendant tous ces ans passez contre vous & contre les vostres, veu mesmemēt qu'alors il m'estoit beaucoup meilleur de mourir, que non pas viure d'auantage pour endurer tant de cruelles douleurs cōme i'ē souffre maintenant pour vostre excellente beauté. O que ces Romains furent bien-heureux, qui au mylieu des aduersitez pouuoient sacrifier leur vie à l'immortalité de la renommee! Le vo⁹ supplie, ma Dame, puis que ma loy ne me permet faire vn tel sacrifice de moy-mesmes par mes propres mains, que vous le faciez par les vostres, tant pour vous vanger des offenses, lesquelles j'ay commises contre vous, que pour remedier à mes martyres. Il disoit ces paroles avecques tant de larmes, que sa face, & les mains de la Royne, lesquelles il tenoit entre les siennes, en estoient toutes arrosees. La Royne acompagnant sa doulueur d'autant de pleurs & de soupirs, luy respondoit: L'om Florisel, ie prens ceste vëgeance de moi-mesme, par la contrainte dont i'vse sur moy, à fin de ne faire ce dont vous me priez. Mais puis qu'en la loy laquelle j'ay nouvellement receuë, il m'est autant peu permis comme à vous, faire le sacrifice duquel vous parlez, ne me requerez point d'vne chose qui ne m'estant defenduë par la loy diuine, me seroit encores impossible par la loy humaine, à cause de l'extreme amour que ie vous porte. Et quant au remede que vous demandez à vostre doulleur, & que ie pourrois desirer à la mienne, vous souuienne qu'il n'est permis ny à moy ny à vous d'en vser, tant pour la chasteté en laquelle ie me doi contregarder en vostre endroit pour n'estre vostre femme, comme pour la foy dont vous estes

estes redeuable à vostre espouse, & laquelle ie ne voudrois estre violée par mon moyé. Je vous prie donc desormais, en vous faignant quelque bon droit, ne me donner plus de tourment, que celui lequel ie souffre pour le veritable tort, dont amour me moleste iour & nuit : & au reste croyez qu'en ceste miennereponse, j'ay premierement resisté à ma propre volonté, à fin de mieux resister à la vostre. Dom Florisel ne pouuant plus souffrir ces dissimulations de la Royné, s'esuanouit comme mort dans son giron parquoy le voyant en si piteux estat, & contéplant sa grande beauté vaincue de l'ardent & ferme amour qu'elle luy portoit, se mit à tordre ses blanches mains, pleurer, & gemir par grande angoisse : & finablement à proferer avecq' maints iouspirs ces douloureuses lamentations : O ame passionnée, pourquoy m'accompagnes-tu si longuement en tant de mal-heurs ! O vie sàs laquelle ie vy pourquoy me refuses-tu la mort ? O amour volage, pourquoy permes-tu que j'aye égard à la raison de ma grâdeur ? O grandeur royalle, pourquoy t'es-tu rendue serue de l'amour ? O douleur angoisseuse, que ne m'otroyes-tu à la parfin quelque plaisir en ma douleur ? O bien-heureux plaisir, pourquoy est-ce que ie t'ay en si grande hayne ? Helàs ! dom Florisel, pourquoy pris-tu le nom de Moraïsel ? & toy, Moraïzel, pourquoy te voulus-tu recharger en dom, Florisel, pour t'esloigner de ta Sidonie ? En disant ces paroles, comme hors de soy & abandonnée de la raison, elle embrassa autât amoureusement qu'il estoit possible, dom Florisel, & tenant sa belle bouche iointe sur la sienne, sans auoir aucun sentiment, respandit tant de larmes sur le visage du Prince, qu'il reuint de pasmoïson, & se trouuant en tel estat avecque vne ioye incroyable, comme ça à dire : le vous supplie, ma Dame, me dire si vous m'avez fait tant de bien par pitié q' vous ayez eue de moy, ou par plus

grande cruauté, à fin qu'ayant receu de vous vne si grande faueur, j'augmente d'autant plus mon ennuy alors qu'il me la conuiendra perdre ? Mais dom Florisel voyant qu'elle ne respondoit point, comme celle qui estoit pasmée sans se mouuoir aucunement, la leua entre ses bras, & luy baisant continuellement les yeux, le front, & la bouche, disoit, O moy miserable, comme le cruel amour à voulu que sans y penser, & priuee de tous sentimens, vous me fissiez vne telle grace pour me faire d'autant plus sentir ma douleur ! O sage magicien Cinistide, qui as basti ces belles tours & ce beau iardin par ton sçauoir, ie te prie en vsant de tes arts, qu'à tout iamais tu nous faces demeurer en cest estat, ma dame Sidonie, & moy, à fin que sans sentimens elle m'otroye tousiours ceste faueur, & qu'avec tous mès sentimens ie puisse tousiours sentir la gloire d'une si grande felicité. Mais ainsi qu'il disoit ces paroles la Royné retourna de pasmoïson, & se trouuant le visage tout baigné des larmes du Prince, luy dist à grand trauail, Helàs ! dom Florisel, pourquoy iettez vous l'eau de voz yeux dans l'ardente fournaïe de mon cueur, à fin de rendre plus aspres les flâmes lesquelles desia y sont allumees ? Coment auez-vous sceu, que voz larmes deuoient augmenter le feu, duquel vostre amour me tient embrasée, iusques à faire perdre en moy ma semblâce, pour mieux y engrauer la vostre, à fin qu'en obeissant à vostre volonté assez legiere, ie misse en oubly la miennere qui a esté tant constante iusques icy ? Contentez-vous, ie vous supplie, de ceste faueur, & si vous m'aymez, ayez pareillement mon deuoir, & ne permettez point que ie m'offense moy-mêmes d'auantage : car en defendant mon honneur pour ce regard, vous defendrez encores celui dont vous estes redeuable à vostre Helene : Last dô Florisel, puis que vous m'avez du tout ren-

rendue vostre serfue en vous faisant entièrement seigneur de moy, au moins faites comme preux Cheualier ce que ie ne puis faire comme foyble Damoyse, & me defendez à l'encôtre du cruel amour, lequel à desia vaincu ma resistance, me trouuant autant delicate & fragile pour me defendre de luy, comme ses forces ont esté grandes pour me vaincre. Faites que vostre vertu suplee à mon imbecilité. Recompensez mon peu de force par vostre valeur & prouesse. Otroyez moy en resistant à vostre volonté, la resistance qui me deffault pour resister à la mienne. Supleez par vostre hautain courage, à ce, en quoy le mien se treuve maintenant vaincu: & puis que ie vous ay aymé plus que moy-mesme, en vous donnant vne tant grande faueur, aymez moy aussi plus que vous mesmes, en ne permettant qu'à mon deshonneur ie vous obeisse d'auantage que ie vous ay desia obey. Dom Florisel ayant ouy ces paroles de la Roynie, luy respondit, Vous dites tresbien, ma Dame, si l'amour m'auoit otroyé la liberté laquelle de long temps il m'a ostée. Mais si (comme disent les sages) l'amour est autant violent que la mort, & s'il n'y a vertu ny prouesse qui contre la mort puissent trouuer aucune resistance, il est bien certain que ie ne peux estre assez fort pour resister contre l'amour. Je suis son prisonnier. Je me suis randu à luy. Je suis son vassal. Je luy paye vn tribut ordinaire. Il tient incessamment mon vouloir esclau sous le sien à fin de rendre ma captiuité plus certaine, & la seigneurie qu'il a conquis sur moi, plus asseurée. Or puis qu'estant ainsi surmonté, il ne me denie point en sa victoire la gloire & le bien que ie pouuois esperer estant vaincu, ie me montrerois trop peu hardy, si ie ne prenois maintenant la iouissance de la glorieuse possession, dont il m'a aujourd'huy donné la souveraine seigneurie, en recompense de mon ancien seruiçe, Adonc le Prince prit

la Roynie entre ses bras, & commença à la baiser & rebaiser fort amoureusement, avecque toutes les caresses & mignardises dont vn amant se peut auiser. Toutesfois Galeris afferme que pour lors il n'eut autres faueurs de la belle & vertueuse Roynie, outre celles qu'il pouuoit recueillir sur la belle & vermeille bouche: neantmoins quant à moy, en cas que le dire de Galeris fust veritable, ie péserois que ce fut à raison des Princes & Princesses qui suruindrent à la fontaine, lors qu'il vouloit donner commencement à la plus affectionnée iouissance de ses desirs, ce qui luy auroit esté empeschement de passer plus outre, & à la Roynie de luy en permettre d'auantage. Or apres que tous les Princes & Princesses eurent deuié de plusieurs gracieux propos, ilz accorderent qu'au troisieme iour ensuyuant, Agefilan seroit publicquement fiancé avecque Diane: ce qui fut fait avecq' tout le plaisir & resiouissance que vous pouuez desia penser en vous mesmes, & que nous vous reciterons maintenant.

Comme Agefilan & Diane, le Prince de Romme & le Roynie Briangie furēt fiancez, & comme Agefilan fit la duchesse Lardenie Roynie de Cores.

CHAP. LVII.

LE troisieme iour ensuyuant, le Palais fut tendu de riches tapisseries faites de soie cramoisie, & de fil d'or de Cypre, pour solenniser les fiançailles du Prince Agefilan & de la Princessie Diane: & partant tous les Princes & les Roynes habillez de leurs plus riches acoustremens, s'assemblerent en la grande salle ou bien tost apres Diane sortit vestue en telle maniere: Elle auoit vne robe faite d'escailles d'or, embellies de fin esmail de plusieurs & diuerses couleurs fort belles

les & naïfues. Ceste robe estoit doublee de fine pourpre rase, comme il sembloit à voir au trauers des de coupeures de ses manches lesquelles estoient fort estroites sur le poingnet, & autour du bras ouurees de riche orfauerie semee de grosses perles orientales: & sortoit par trois des plus grandes decoupeures, vn taffetas changeant, bouffant assez amplement, & en chacune des bouffes y auoit quatre autres ouuertes, & sur le mylieu de chacune, vn riche ioyau, qui diuisoit en deux ce peu de la chemise que lon voyoit blanchir entre les decoupeures. Le bas de la robe estoit si large & ample qu'il trainoit plus de deux grandes brasses en terre. Elle portoit vne ceinture, & vn carquant au col, faitz de fins & precieux diamas de valeur inestimable. Ses beaux cheveux estoient espars sur ses espauls, & reluysoient comme fil d'or: sur iceux flamboyoit vne riche guirlande faite de rubis & de perles arrangez d'une fort bonne grace en maniere de giroflees blanches & rouges. Ceste guirlande estoit atachee des deux costez à six tresses de ses cheveux, & de chacune tresse pendoit vn ioyau de gros diamans, si excellents & tant ingenieusement mis en ceur, qu'il seroit impossible de vous en exprimer le pris. Elle portoit aussi vne escharpe faite de toilé d'or tant clere & delicee, que lon pouuoit voir tous les autres habitz au trauers, & toutesfois elle estoit tellemēt bigarree d'azur, de verd, & autrement, que la couleur qui en sortoit n'estoit moins changeante que celle qui sort du col des paons opolee aux rayons du soleil. En tel habit la diuine & excellente Princeesse Diane entra dans la grand' salle: le Prince dom Rogel, & le Prince dom Florestan habillez de riche drap d'or, la conduisoient par desous les bras: la duchesse Lardenie & la marquise de Lastes vestues de mesme liuree que la Princeesse, luy portoient la queue. A l'entree elle tenoit vn maintien

de Deesse avecque si grande beauté & bone grace, que ceux qui la regarderent en furent long temps esbahis, & comme rauis hors d'eux mesmes, ne pensans voir vne creature mortelle, ains quelque deité descendue des cieus. Apres Diane, sortit la royne Briangie, tant belle que chacun s'en esmerueilloit. Elle estoit vestue d'une robe de satin blanc, decoupee assez menu sur vn fons de toile d'or, & couuert d'un retz de fil d'or & de soye cramoisie, sur chacun neu duquel y auoit vne grosse perle. Sa ceinture & le carquant qu'elle portoit au col, estoient de fins rubis. La couronne qu'elle eut lors sur son chef, fut assez basse, & ouuree sur vne riche guirlande faite de diuerse pierrierie. Sur chacun temple, elle auoit tissu avec ses cheveux, la façon d'une petite tourelle, encerclée par le dessous d'une petite roue d'or, couuerte de fines pointes de diamans. Quand elle entra en la salle, tous penserent que ce fust Daraide, & de fait chacun la tint pour telle, iusques à ce que le Prince Agesilan vint entrer, tant richement acoultre, & avecque vne si grande beauté & bonne grace, qu'il seroit impossible de le reciter, & encores plus difficile à croire, à quiconques le pourroit comprendre en la pensée. Adonc au son de diuers instrumens, & avecque la grande resiouissance d'un chacun, Diane & luy furent fiancez, puis s'allèrent assoir, & Agesilan estant au giron de sa Dame, avecque toute la felicité qu'il seroit possible de penser, prit ses belles mains entre les siennes, & luy dist, Ma dame, de tant hautes & cheualeresques entreprises, comme sont celles que ces belles mains m'ont heureusement fait mettre à fin, pour m'auoir nauré iusques dans le cuer, il ne pouuoit estre qu'apres vn long trauail, ie ne receusse ceste felicité de vous, avecque vostre clemence si long temps atendue, en recompense de tant de rigueurs que i'ay souffertes en vostre seruice. Diane luy respondit,

Mon

Mon vray Seigneur & amy, ie ne veux point que vous faciez si grand cas d'auoir obtenu vne chose laquelle de long temps vous auiez meritee, car puis que elle vous estoit deuë à tresbonne occasion, le payement ne vous en pouuoit estre refusé : aussi suis-je trop plus content de vous, que vous n'estes de la felicité que vous dites, en laquelle ie prens ce seul contentement de pouuoir resister à l'amour, iusques à ce que par le moyen de nostre mariage, ie soye satisfaite de mon honnesteté, & vous satisfait de voz pensées pour les auoir adreſſées en si bon lieu. Ma Dame (dist-il) ie vous remercie de l'assurance que vous me donnez de vostre bon vouloir: mais attendu que ie puis cognoistre ceste bone fortune, c'est bien raison que i'en face participas ceux qui m'ont accôpagné és trauaux lesquels il m'a cōuenü souffrir auant que d'y estre parvenu. Acheuant ces paroles il se leua, & ayant fait signe à chacun de luy dōner audience, s'agenouilla deuant le Roy dō Falanges, & le Prince dom Florisel, les suppliant de mettre le Royaume de Cores en sa puissance : mais les deux Princes le ayans releué fort gracieusement, luy respondirent que le Royaume lequel il demandoit, estoit sien, veu qu'il auoit eu la meilleure part du trauail en la cōqueste, & partant qu'il en pouuoit disposer ainsi que bon luy sembleroit. Il les remercia, & vint vers la duchesse Lardenie, laquelle se leua à son arriuee, & luy faisant vne grande reuerence, le Prince la prit par la main, & luy ayant rendu son salut. C'est a vous (dist-il) ma Dame, à qui le Royaume de Cores est deu, & vous prie le receuoir d'aussi bon cueur comme ie le vous dōne. Tout ainsi dōc que vous auez tousiours eu vostre part des douleurs, & trauaux que i'ay soufferts par le passé, ayez la encores maintenant de mon bon-heur auquel i'ay esté enleué avecque vostre ayde. Monsieur (dist Lardenie) ie vous remercie du grand bien qu'il vous plaist

me faire, vous asseurant toutesfois que i'estime beaucoup plus l'amitié avec laquelle vous me faictes ce don, que la grande valeur d'iceluy : veu que le bon desir que i'ay tousiours eu, & auray toute ma vie de m'employer en vostre seruice, ne pouuoit receuoir autre moindre recompense que vostre amitié, & bonne grace, laquelle pour venir d'un tel Prince comme vous estes, i'estime beaucoup plus que toute la Seigneurie du monde. En disant ces paroles elle s'agenouilla deuant luy pour luy baiser les mains, & luy pareillement deuant elle, disant Royne de Cores ma trescher Dame : il me sera trop mieux seant vous estant Damoyſelle tant vertueuse, & si haute Princesse, que ie baise voz belles mains, que non pas vous les miennes. Adonc il l'embrassa, & la prenant par la main, la mena seoir avecques les deux autres Roynes & Diane, lesquelles la receurent en grand plaisir de ce qu'Ageſilan auoit fait, mesmement la Princesse, car elle aymoît de tout son cueur la roine Lardenie, laquelle se mit à genoux deuant elle, & lui voulut baiser les mains pour la remercier de la liberalité dont son fiancé auoit vsé enuers elle. Mais la Princesse Diane plorant de ioye, la baisa & embrassa par grand amour, & la fit rasseoir aupres d'elle. Adonc la Royne Briangie dist au Prince Ageſilan : Monsieur, ie ne me sens moins vostre redevable, pource que vous m'avez donné vne tât vertueuse roine pour ma voisine, que pour m'auoir deliuree des menasses du Roy de Cores. Puis retournant son propos vers la Royne Lardenie, luy dist: Vraiment, ma Dame, vous vous pouuez vanter que vous estes Roynes de l'un des plus beaux & riches roiaumes de toute la grand'Asie. A quoy la Roine Lardenie respondit, I'estime plus que tous les Royaumes du monde, l'amitié que l'excellent prince Ageſilâ & ma dame Diane me portent, & le moyen que ie me voy d'auoir

puissance en lieu, ou peüst estre, j'auray l'occasion de vous faire quelque service. C'est à moy (dist la Roïne Briangie) à vous rendre le service duquel vous parlez, car vous le meritez trop mieux : neantmoins ie vous remercie de tout mon cueur de vostre bonne volonté envers moy. Je veux departir ce ieu, dist le Prince Agefilan. Comment ? Monsieur, dist la roïne Briangie en riant. Demandez vous comment (dit Agefilan) c'est que ie vous veux faire Imperatrix de Rome, car Agefilan estant parvenu à si grande & extreme felicité, il n'est raisõ que Daraïde qui lui en a esté le moyen, demeure sans aucune recompense. Et par-ce, ma dame, que vous tenez le lieu de Daraïde, c'est à vous à qui est deu ce guerdon. La roïne qui par la contenance du prince dom Florestã entendoit desia fort bien les paroles d'Agefilan, prit vne couleur au visage qui de beaucoup lui fit accroistre sa premiere beauté & lui dist : Helàs, Monsieur, vous m'avez mis en vn estat auquel ie suis desmariee de tous les Princes du monde. Comment cela ? ma dame, dist Agefilan. Vous sçavez (dist la Roïne) que Daraïde n'a iamais abaissé ses pensées en moindre lieu que Diane, ou elle les à encores : parquoy tenant sa place en iouissant de la cõpagnie de madame la princeesse, ie garderay encores le hautain courage de Daraïde, & ne laisseray le plus grand bien, à fin de m'adonner au moindre. Ma dame (dist Agefilan d'une fort bonne grace) ie vous remercie de la bõne reputation que vous avez de Daraïde, & m'estime bien-heureux tant pour l'auoir peu mettre en lieu tel que ses hautes pensées le meritoient, que pour le noble portrait qu'elle presente à la grande gloire d'Agefilan. C'est moy (dist la Roïne) qui suis la plus heureuse pour succeder à tel bon-heur, & à fin que ie ne perde ce plaisir de nõm, non plus que de representation, ie veux que desormais lon ne m'appelle point autrement que Daraïde. Ma dame (dist

Agefilan) ie vous supplie me presenter voz belles mains, à fin qu'en les baisant ie vous rende graces du bon vouloir que vous auez à soustenir ainsi le nom de Daraïde en sa premiere excellence. O biē-heureux nõ, qui s'est trouué digne de tant de faueurs. Alors Diane dist : Mais moy trop plus heureuse ! qui puis demeurer avec Daraïde & Agefilan ensemblement, en vn si chaste & pudique amour ! avecq' Daraïde, comme damoiselle, & avecq' Agefilan comme mon espoux : & veritablement ma felicité n'est point petite en ce qu'Agefilan : comme damoiselle, a gardé en ses amours toute l'honnesteré avecque laquelle ie l'ay aimée, croyant son sexe estre conforme à son habit, iusques à ce qu'il à peu comme Agefilan & vertueux prince, gagner mon amour avecque tout l'égard & reuerence qui estoit deuë à ma grandeur. Maintenant doncq' voy-ie bien que ma bonne fortune est accomplie en toutes les perfections puis que Dieu tout puissant m'a voulu ottroyer Agefilan, sans me priver de la presence de Daraïde. Sur ces propos ils demenerent plusieurs autres gracieuses railleries, & depuis la Roïne Briangie retint tousiours le nom de Daraïde, sans consentir que lon la nommast autrement (& ainsi l'appellerons nous desormais en nostre histoire) au moyen dequoy le grand' amour qu'Agefilan & Diane luy portoyent fust de beaucoup augmenté : Bien tost apres tous les princes & renommez Cheualiers qui estoient en la cour de Guindaye, vindrent parler à Lardenie, comme à Roïne de Cores, puis au son de diuers instrumens, Agefilan & Diane, dancerent ensemble, dom Rogel & la Roïne Lardenie, dom Florestan Prince de Rome & la belle Roïne Daraïde, à laquelle il dist en commençant le bal : Ma Dame, ie vous supplie accepter mō cueur lequel ie vous presente, & me tenir pour vostre Cheualier, vous offrât de ma part toute la reuerence q' ie doi à vostre grandeur

deur, comme à celle qui doit vn iour estre Imperatrix de Romme, car souz vne telle promesse seulement, ie vous ay ozé requérir de me donner ceste faueur. A ces paroles la Royne prit vne couleur qui luy acceut moult sa beauté, & ne fust aucunement mal contente d'estre ainsi aymée d'un tel Prince, & tant grand seigneur, nō moins riche de biens, que beau preux, & adroit de sa personne : partant en souzriant d'une fort bonne grace elle luy respondit: Ie ne pense point, mōsieur que Daraide puisse receuoir vn autre cuer que celui de Diane, car l'excellence d'une telle Princesse à laquelle i'ay desia donné mon cuer, ne souffre que i'en puisse accepter vn autre. Ayant acheué leur bal ils se retournerent asseoir, & dō Brianges dança avec la Marquise de Lastes, & dom Florisel supplia la Royne Sidonie de dancer avecque luy, ce qu'elle lui ottroya plus à la requeste d'Agefilan, que non pas à la sienne : le Roy dom Falanges & la Roine Alastraxeree sa femme dancèrent pareillemēt ensemble. Ce pendant que ces Roys & Princes dançoient dom Florestan trouua l'opportunité de parler à la belle Royne Daraide, & luy dist : Ma Dame, puis que vo⁹ auez tant bien sceu forcer ma volonté, ie vous supplie en recompense m'ottroyer la vostre, en vous gardant tout l'honneur dont vn espoux est redevable à son epouse: car s'il vous plaist me receuoir pour tel, ie vous iure que iamais autre que vous ne fera maistresse de mon cuer. La Royne luy respondit d'une fort bonne grace: Nous verrons s'il vous plaist en ce que demandez, le cōgé que ma Dame Diane, me voudra donner, car estant Daraide ie suis du tout esclauē, & ne puis rien faire sinon par la volonté de celle à qui i'ay ottroyé la mienne. Ma Dame (dist-il) ie suis fort ioyeux de vostre response, & suis tres-content (moyennant que vous en soyez aussi contente) que ma Dame Diane face de ceste mienne demande

ainsi qu'il luy semblera pour le mieux. La Royne le regardant d'une fort bonne grace, lui dist: Ie tiendray pour fait tout ce que ma Dame Diane en fera. I'en suis tres-content, respondit le Prince, & tout ioyeux adressa son parler à Diane, & luy dist: Ie vous supplie, ma Dame, donner à la Royne Daraide, congé de m'ottroyer ce que ie lui demande. Diane lui dist en souzriant. Ie veux sçauoir que c'est que vous demandez, auant que lui bailler aucun congé. C'est (dist dom Florestan) que elle me reçoie pour sien comme Imperatrix de Rome. Adonc la Princesse dist, Si le cuer de Daraide, dont elle m'a parcy deuant donné assez bon gage, le peut souffrir, ie luy donne ce congé souz les conditions que vous auez proposées. Agefilan qui entendit ce propos, s'en voulut entremesler, & dist: Agefilā à aujourd'hui receu le gage avec lequel il lascia Daraide en liberte: parquoy en souuenance du temps que i'ay demeuré en sa compagnie, ie la prie bien fort ottroyer à Monsieur le Prince de Rome ce qu'il luy demande. Ie ne sçay que respondre (dist la Royne) sinon que ie suis prestē d'obeir à ma dame Diane. Diane voyāt le vouloir du Prince Agefilan, dist à la Roine: Que vous pourrois-ie commander autre chose, puis que la volonté qui est en moy ne peut contreuenir à celle du Prince Agefilan mon seigneur & espoux? Avecque ce commandement (dit le Prince Agefilan) ie prens la volonté de ma Daraide, & la donne à Monsieur mon cousin le Prince de Rome: Adonc publiquement en grande ioye & resiouissance, ils furent fiancez, au grand contentement de toute la compagnie: car vous deuez sçauoir que la Roine auoit esté baptizée avec Diane. Les solennitez des fiançailles acheues, les Princes fiancez entrèrent, avecque leurs Dames en vne chambre à part, ou ils passerent le surplus du iour, prenant d'elles les faueurs que la promesse du futur mariage leur permettoit & Agefilan

iouissant de la belle bouche de sa chere Diane, comme rauy hors de ce monde, luy disoit : Ma Dame, j'ay maintenant toute la felicité, qu'il me seroit possible de souhaiter, & me resiouis tellement de en iouir, que la mesme ioye m'oste vne grand' partie de ma resiouissance, car mon bon heur me semble si grand, qu'il m'est impossible de le comprendre bien en ma pensée. Las ! ma Dame, qui veid oncq ce que ie voy en vous voyant, & tenant entre mes bras, qui est de pouoir regarder son ame avecque les yeux corporels ? ce que ie fay, car ainsi que vostre bouche s'esloigne de la mienne, ie sens pareillement mon ame & ma vie se esloigner de moy, & veritablement elle s'enfueroit du tout, si l'esperance de iouir encores d'une telle faueur, ne la retenoit en son premier estre. Le Prince de Rome disoit maintes semblables paroles de grand'amour à la Royne Briangie, la caressant avecq' toute la gracieuseté dont il se pouuoit auiser : ce que Diane aperceuant, dist au Prince Agesilan : Je vous prie, Mōsieur, mon bō ami, ne le prendre point en raillerie, car tout le cueur me tres-saille, & ne puis souffrir qu'un autre que moy ayt la iouissance d'une chose tant bien ressemblante à ma Daraïde.

Agesilan se prit à rire, & luy dist : M'ayāt avecque vous, ma Dame, vous n'avez aucune occasion d'estre jalouse des Damoyselles, & encores moins des Cheualiers. Apres auoir tenu maints autres gracieux denis sur ce propos, ils retournerent en la salle, ou lon auoit desia couuert pour le souper, apres lequel toute la nuyt fut presque employee en yeux, dances, & autres passe-temps, tellement qu'il ne s'allerent coucher que bien peu deuant le iour, & se reposerent iusques à ce qu'il fust desia fort haute heure.

Comme les Princes fiancez esprouuerent l'auenture de l'Infant dom Rozaran, & de la Duchesse de Bauieres.

CHAP. LVIII.

LE lendemain les Princes, les Roy-
nes & Prinçesses aians ouy la metle
ensemblement & diné en la grand
salle avec grand triomphe & magnificen-
ce, les Princes fiancez & leurs fiancees
delibererent aller esprouuer l'auenture
de l'Infant dom Rozaran, & de la Du-
chesse de Bauieres, du consentement des
autres Princes, qui ne voulurent sortir
du Palais, par-ce que le Roy dom Falan-
ges disoit qu'il n'auoit aucun besoin de
essayer ce dont il estoit tant asseuré par
infinies autres experiences de l'amour
de la roine sa femme, laquelle dit le sem-
blable. Parquoy les fiancez furent seule-
ment accompagnez de dom Rogel de
Grece, qui menoit la Royne Lardenie, &
du Prince dom Brianges, qui conduisoit
la Marquise de Lastes, lesquels n'auoyēt
aucunement deliberé d'esprouuer l'auē-
ture. Estans arriuez deuant la tour en-
chantee, Diane dist que chacun esprou-
uaſt l'auenture qui voudroit, faignant
quāt à elle, qu'elle ne la vouloit esprou-
uer iusques au lendemain : partant dom
Rogel dist à la Royne Lardenie : Ma da-
me il sera fort bon que vous entriez là
dedās, à fin de vous mettre hors du dou-
te q̄ vous pourriez auoir du vray amour
que ie vous porte. Elle respondit en riāt.
Tout ainsi que iusques à maintenāt vo^s
n'avez point esté en doute de mō amour
aussi n'ay-ic point douté du vostre, au
moyē de quoy ie n'ay que faire d'esprou-
uer l'auenture. Dom Rogel en riant luy
dist : Vous m'estimerez tel qu'il vous plai-
ra, mais si est-ce que l'amour duquel vo^s
m'avez nauré, est si grand, que ie ne suis
deliberé d'abandoner vostre compagnie
sinon le plus tard qu'il me sera possible.
Ce pendant le belle Roine Daraïde estāt
entrée

entree dans le chasteau enchanté, au son de diuers instrumens, se trouua dans la chambre de l'infant Rozaran, & prenant pitié de son mal, luy demanda l'ocasion de sa douleur, mais en ouurant les yeux deuers elle, il prit la semblance de dom Florestan, & dist à la Roynes, fort esmerueillée de ce soudain changement: Ma dame Briangie, & la nouvelle Daraide, sont les deux Princesses en vne, qui ont l'entiere seigneurie de mon courage, par le veritable & loyal amour que ie porte à celle, laquelle doit vn iour estre Imperatrix de Rome, qui me trouuera enuers elle autant accompli en loyauté, comme elle est en beauté & bonne grace. En acheuant ces motz il reprit sa premiere semblance, estant la Roynes fort ioyeuse de sçauoir le bon amour que luy portoit son espoux, lequel elle aymoît pareillemēt de tout son cuer: Incontinēt apres l'éclair suruint, qui fit son office acoustumé, & la fit trouuer deuant l'entree du chasteau, avecque le grād plaisir des autres Princes qui la voyoient toute estonnée. Dom Florestan monta le second en la tour, & se trouuant en la chambre de la Duchesse, luy ayant demandé la raison de ses doleāces: elle prit la vraye semblance de la Roynes Daraide son espouse, & avecq' vn ioyeux semblant, luy dist: Mon vray Seigneur & bon amy, ie vous ayme de tout mon cuer, autant que Princesse ayma onc Prince: estimez au reste, tout ainsi que vo⁹ auez esté le premier auquel i'ay donné mon amour, que vous serez pareillement le dernier qui en iouirez, sans que aucun autre q' vous ayt iamais puissance sur moy. Adoncq' elle se teut, & le Prince dom Florestan, luy disoit: Ma Dame, ie iugeois vostre cuer par le mien, duquel iusques icy ie ne fus oncques abusé. En disant ces motz il la voulut embrasser, mais elle retourna en sa premiere semblance, & l'éclair suruenant l'emporta avecques les autres Princesses, ou il fut fort ioyeusement receu de son

espouse. Apres luy, Diane & Agefilan deliberez d'esprouuer l'aucture s'aprocherent de la porte du chasteau, aupres de laquelle Diane dist au Prince Agefilan: Monsieur ie suis contrainte de vous laisser icy puis que nous ne pouuons aller tous deux ensemble. Ma Dame (respondit-il) vous ne me pourrez desormais laisser loing de vous, car il est fort iuste que le corps suyue l'ame q' ne vo⁹ pourra iamais abandonner: & puis que vostre merueilleuse beauté, peut, & doit entreprendre les choses merueilleuses, essayons à ne nous esloigner point en ceste espreuue de noz amours, veu que les miēs ne s'esloignerent iamais des vostres. Faisons comme il vous plaira, dist Diane. Adonc s'estant pris par les mains, ilz entrerent ensemblément dans le chasteau, & le son des instrumens fut si doux & melodieux à leur entree, qu'il n'y eut ce luy qui n'en fust esmeruillé & presque rauy hors de soy. Mais vous deuez sçauoir qu'ilz ne furent si tost entrez, qu'ilz trouuerent deuant eux l'Infant Rozaran, & la Duchesse de Bauiere desenchantez, qui les receurent avecques fort grandes reuerēces, leur disant: Bien venuz soient ceux q' par leur extreme beauté & loyauté, nous donnent la liberté qu'ilz perdent, pour la trouuer en l'heureux accomplissement de leurs desirs: car ilz en iouiront, sans auoir aucun moyen de sortir, iusques à ce que les deux autres les plus parfaits de tout le monde en beauté, & en loyauté, d'amour, se viennent icy assembler avec eux, pour leur rendre la liberté, & pour les priuer de leur ioye. Ainsi qu'ilz acheuoient ces motz, ilz sortirent dehors par la porte du chasteau, se trouuans en tous leurs sentimens: mais ilz ne furent si tost sortiz que les portes se fermerent avecq' vn tresespouuentable bruit, & sur icelles s'aparut soudainement vn tableau de marbre noir, engrané de lettres d'or, qui disoyent ainsi:

La sortie des deux plus excellens en amour & en beauté, sera defendue, iusques à ce que deux autres avecquela souveraine excellẽce de leur excellence, ayent moyenné leur sortie par leur entree: & iusques alors ilz demeureront renfermez en leur gloire, iouissans de leurs loyallẽs amours, & du repos tant desiré.

Tous furent effrayez de ceste fortune & comme ravis hors de leurs sentimens, ne sçachans bonnement que dire ny que faire: & combien qu'ilz essayassent à ouvrir les portes, toutesfois iamaiz ilz ne les sceurent tant soit peu faire mouvoir: au moyen dequoy emmenans avec eux l'Infant dom Rozaran, & la Duchesse desenchâtez, s'en retournerent au Palais ou chacun fut fort esbahy de ces nouvelles. Mais le Roy dom Falanges dist qu'ẽces accidens qui auenoient par cõtainte il n'y auoit autre meilleure medicine que la patience: & puis qu'ilz estoient si bien acompagnez ensemble, qu'il ne falloit point estre enuieux de leur bonheur, adioustant que selon son opinion, il ne leur seroit permis de sortir iusques à ce que l'excellent Roy Amadis, & la royne Oriane, par l'extremité de leurs amours, les eussent mis en liberté selon ce qui estoit contenu dans le tableau: & partant que lon leur deuoit enuoyer Embassadeurs, pour les supplier de se venir esproüuer à l'auanture, & deliurer leurs enfans de ceste prison. Chacun s'acorda au conseil du Roy dom Falanges, & souz cest espoir, la royne Sidonie fut aucunement consolee de l'absence de sa fille, & commanda incontinent au Duc d'Alfarce de faire equiper vne nef, pour s'en aller en Constantinople, avec vne lettre de tous ces nobles Princes, pour supplier le Roy Amadis de venir mettre deux des plus excellens personnages de sa lignee en liberté. Avecque ceste lettre le Duc d'Alfarce partit, laissant la cour en grand tristesse, & nous le laisserons aller son

chemin, pour vous reciter ce qui auint aux deux excellens Princes apres qu'ilz furent entrez dans la tour enchantee. Mais ce pendant vous deuez sçauoir que l'infant dom Rozaran descouurit tout son secret, & celuy de la Duchesse de Baviere son espouse: parquoy estans recongneuz des Princes, ilz furent fort bien acueillis, & avecque grand honneur la royne Sidonie luy fit donner vn bon logis en son Palais, & de là à quelques iours ilz furent espousez en grande solennité, avec la resiouissance de toute la cour, ou lon ne faisoit mention que de ieux & passe temps, en atendant la venue, ou à tout le moins des nouvelles du roy Amadis & de la royne Oriane, car il n'y auoit celuy qui pour le recouurement de la liberté d'Agésilan & de Diane, ne tint les paroles du Roy dom Falanges pour vne veritable profecie.

De la glorieuse fin des amours du Prince Agésilan & de la Princesse Diane, renfermez dans le chasteau de la Duchesse de Baviere.

CHAPITRE LIX.

INcontinent que l'Infant dom Rozaran, & la Duchesse furent sortiz du chasteau enchanté, les portes s'estant refermees, Agésilan & Diane se trouuerẽt en vne belle chãbre, laquelle estoit toute enuironnee de tresreluyfantes verrieres, & en icelle estoit paint au naturel tout l'euẽnement de leurs amours, & au milieu de la chãbre y auoit vn lit, les courtines duquel estoient de toile d'or rayonnee de fil d'argent. Se voyans en tel estat, & oyans vne fort douce melodie de plusieurs & diuers oyseaux, qui s'entendoit comme hors de la chambre, Agésilan avecq' tant de plaisir qu'il seroit impossible de l'exprimer, embrassa la Dame Diane, & à fin de ne laisser perdre la bon-

ne oportunité qui s'estoit presentee, luy commença à dire: Vous pouuez maintenant voir, ma Dame, comme Dieu a cogné le guerdon q'ie meritois pour mes peines passées, puis qu'il me l'a voulu apareiller en si beau lieu, & en vn temps tant à propos. Or puis que vous voyez en ces verrieres tant bien representez au vif, les traux, & les douleurs avec lesquelles Daraide à sceu courir vostre Agefilan souz son habit desguisé, s'aydât des armes d'une Damoysele, pour resister à voz dissimulations, ie vous supplie, ma Dame, puis que d'une si excessiue peine, il m'est maintenant permis de recueillir vne si extreme ioye, ne me blasmer si ie ne laisse passer en vain l'ocasio qui se presente, veu la plainte que ie pourrois faire à l'auenir de moy-mesmes, si par couardie ie perdois le temps qui m'est apresté pour le nouveau repos de mes anciennes douleurs. Diane estoit tant troublee de se voir seule avec Agefilan, & de luy ouïr dire telles paroles, qu'elle ne scauoit que dire, ny que respondre: neantmoins, quelque peu après elle luy dist: Monsieur, veu que me prenant à femme, vous auez encores pris sur vous l'etiere charge de m'honneur, ie vous supplie ne m'oster ce que vous estes tant obligé à me garder, & par vostre vertu supleer à celle qui me pourroit defaillir, destournant de vous celle vaine & volage voloté que ie puis cognoistre en vostre visage, à fin que par tel moyen ie demeure satisfaite de ce qui est hors de ma puissance, cōbien qu'il soit en mon vouloir. Car encores q'vous vueillez vser enuers moy de force, si est-ce que ie ne vous souffriray prédre riens de moy, outre ce que vous en auez eu par cy deuant, iusques à ce que la solennité de noz noces, me puisse deliurer du deshonneur, lequel autrement ie pourrois encourir. Agefilan luy respondit: Ma Dame, si ie pensois aucunement offenser vostre hōneur en cecy, ne croyez que ie peusse auoir le courage de tōber

en telle infamie. Mais puis que souz le tiltre de mary, il m'est permis vser de la force, de laquelle vous ne voulez vser pour forcer vostre voloté, ie vous supplie, ma Dame, ne me laisser aucune ocasio de me plaindre vn iour de moy-mesme: car veritablemēt la gloire de mes aduantesures passées, auroit esté trefmal employee en moy, si pouuant maintenant iouir de la fin pour laquelle ie les auois entreprises, la couardie me faisoit perdre vn bon-heur si long temps attendu. La Princeesse fort troublee luy dist: Ie vous supplie ne m'importuner d'auantage, car vous me donneriez trop grand ennuy, si vous entrepreniez sur moy pl⁹ que ie ne voudrois vous otroyer. Agefilā estimant que le temps plus oportun ne luy defauidroit point, selon la disposition qu'il en voyoit apareillee, ne la voulut presser plus auant, craignant de l'ennuyer, cōme il auient souuētesfoi à ceux qui loyallment aiment, qu'ilz se mōstrent les plus craintifz, es lieux ou ilz deuroient estre les plus hardiz. En ces pensées il luy dist: Puis qu'ainsi est, ma Dame, que ma voloté se reigle entieremēt selon la vostre, ie ne puis faire autre chose sinon ce qu'il vous plaira me commander. Ie tiens à grand faueur (respōdit elle) ce que vous me venez de dire: vous priant auoir tousiours en souuenance, ce mien honneur, dont ie vous ay entierement donné la garde. Adonc ilz s'assirent en deux basses chaizes qui estoient aupres du lit, ou ilz demeurerēt tout le reste du iour, deuisās de maints gracieux propos. Et ainsi que la nuit cōmençoit à s'obscurfir, deux trefbelles Damoyseles vestues de robes de drap d'or frizé entrerēt en la chābre, tenans chacune vn flambeau en la main, qu'elles mirent, s'enclinant iusques en terre, en deux chandeliers d'argent, que portoient deux autres Damoyseles vestues en mesme maniere. Apres elles, entrerent plusieurs autres Damoyseles en pareil habit que les premieres, & mirent deuant

deuant les Princes vne table, & sur icelle quatre autres chadeliers d'argent, avecq' quatre flambeaux de cire vierge : puis leur apporterent maintes viandes exquis-es, & de plusieurs sortes de confitures, avec vn fort bel ordre de seruice : & à chacune fois qu'elles entroient pour seruir, lon entendoit vne fort douce musique de plusieurs instrumens : & ce pendant les Damoyelles ne disoient ne respondoient vn seul mot, à chose que lon leur peust dire, ains faisoient leur seruice en grande reuerence, monstrant au surplus assez de grauité en leurs maintiens. Mais sçachez qu'Agésilas ne prit goust en aucune des viandes qui furent seruies, estimant que desormais il n'auroit plus l'occasion qu'il auoit laissé passer, dont la Princesse Diane, n'estoit moins ioyeuse, que luy triste & melancolique. Apres le souper, les tables furent leuees, & lors au son de diuers instrumens entrèrent en la chambre plusieurs belles Damoyelles, qui dançoient en maintes estranges manieres, & apres qu'elles eurent ainsi dancé quelque espace de temps, s'en allerent faisant grande reuerence au Prince & à la Princesse. Bien tost apres, les Damoyelles qui auoient seruy au souper retournerent, apportant des conserues de diuerses sortes, dõt les Princes prindrent ce qui bon leur sembla : & la colation acheuee, elles sortirent, puis rentrèrent tantost apres, & l'une d'elles prit Diane par la main, l'éménant avecq' elle, sans qu'Agésilas peust auoir la hardiesse de luy dire vn seul mot : & ainsi la conduisit en vne autre belle chambre, & apres luy auoir despouillé ses habillemens, la coucha en vn riche lit, laissant vn flambeau allumé aupres d'elle. Diane ne fut moins estonnée que resiouïe, pensant estre deliurée de l'importunité du ieune Prince, lequel se voyant seul, & priué de sa Diane, à peu qu'il ne mourut de tristesse, accusant sa couardie, & disant Moy mal-heureux ! qu'il me seroit bien

employé que iamais ie ne reuiffe ma Dame, puis que par ma faute de cuer, i'ay laissé perdre la felicité que l'ocasiõ m'auoit apareillée. Disant ces paroles & plusieurs autres semblables, il demeura pêsif tout vn long temps iusques à ce que les Damoyelles qui auoient emmené Diane reuindrent vers luy, & l'ayant despouillé le mirent au lit, laissant pareillement vn autre flambeau allumé aupres de luy. Adoncq' il se trouua tant hors de foy qu'il ne sçauoit quel conseil prendre, & fut long temps sans pouuoir dormir : puis comme retournant de pasmoïson : Que fay-ie (dist-il) fol que ie suis ? que me seruent tant de souciz ? puis-ie bien endurer d'auoir perdu ma Dame sans faire mon deuoir de la chercher ? Alors il se leua en sursault, & sortant de la chambre sans s'apercevoir qu'il estoit nu, entra en vne grand' sale, & en vn coing d'icelle aperceut de la lumiere entre la tapisserie, aupres de laquelle arriuant il la leua, & entra en vne fort belle chambre ou Diane estoit couchee : mais il ne l'eut si tost aperceüe & recogneüe, qu'il tressaillit de grande ioye, & dist : O bien-heureux enchantement qui m'as apareillé tant de bon-heur ! Acheuant ces motz, il se coucha dedans le lit avecq' sa Dame, laquelle l'ayant senty aupres d'elle fut fort troublee : mais neantmoins il la prist entre ses bras, & comme hors de soi pour l'extremité de la ioye, voyant en sa puissance toute la felicité qu'il auoit iamais desirée, emporta presque par force le par fait gaigne de son amour : & cueillant la fleur de sa virginité, acomplit le plus ardent des ses desirs. Adonc Diane monstrant vn fort grand courroux, luy dist : Je n'oublierai iamais le tort que ceste nuit vous m'avez fait, puis que vous auez voulu auoir de moy par force, ce que le temps sans offenser ma chasteté, vous pouuoit otroyer de mon propre vouloir. Maintenant vous me donnez bonne occasion de me plaindre du loyal amour que

que ie vous ay porté iusques icy, puis que vous m'en rendez si mauuaise recôpense, car vous sâtisfaire à vostre volonté, vous m'avez ozé laisser sans la satisfaction de la mienne, laquelle rachoit à m'entretenir tousiours en mon premier honneur, & neantmoins sans craindre ceste offence, & encores moins celle que vous avez commise contre Dieu, vous avez entrepris sans son congé, ce que vostre deuoir, ni le mien ne vous pouuoient aucunement promettre. Agefilan voyant sa Dame tant ennuiee, lui dist : ie vous supplie, ma dame, n'acourcir la ioye que i'ay receüe : n'accusez point le bon-heur que m'a ottoyé la fortune : ne blasmez ma victoire apres laquelle lō ne me pouuoit iustement denier le triomphe : ne m'estimez indigne de la recompense que mes hautes pensées m'ont faict meriter : ne me vueillez oster le plaisir que i'ay acquis par mes douleurs, ny le repos de mes tourmens, ni l'alegemēt de mes souciz, ni la consolation de mes trauaulx : & ne faites, ie vous supplie, qu'apres auoir iouy de la fin de mon plus grand bien, ie me renuoye au commencement de mon plus grand mal Diane oyant telles paroles proferées, avecque vn si grand amour d'Agefilan, qu'elle aimoit (quelque semblant qu'elle fist) plus que Damoiselle n'aima oncques Cheualier, lui dist : Or sūz, ie vous pardonne ce que vous auez fait contre moi, & l'ennui que vous m'avez donné, si vous pouuez laisser celui duquel en m'offensant vous vous estes offensé vous-mesme. Agefilan le embrassa fort amoureuxment, & lui dit : Lās ! ma Dame, comme pourray-ie vous rendre les seruices que ie vous doy, & recognoistre vn si grand bien cōme celui duquel maintenant vous me faictes iouissant ? En ce plaisir voyant les beautez secretes de sa Dame, estre egalles à celles, qui se monstroyent par dehors, comme hors de soy, il disoit : O bien-heureuse peine de laquelle peut sortir

vnē si grande ioye ! O bien-heureux mal, qui m'a esté cause d'vn si extreme bien ! O bien-heureuse Daraide, qui avecque ses armes à peu donner vne si belle victoire à Agefilan ! O bien-heureux Agefilan, qui pour auoir esté vaincu de l'amour à peu meriter vn si beau triomphe Helās ! ma dame, les paroles me detaillent pour exprimer ma ioye : qu'il pleust à Dieu nous laisser tousiours icy renfermez, pour iouir de la vraye & plus grande seigneurie qu'on pourroit penser, qui est le contentement. Lās ! mon plaisir est si extreme qu'il suffiroit pour imposer fin à ma vie, s'il n'estoit temperé par la crainte que i'ay de me veoir, & peut estre bien tost, esloigner de ceste felicité : mais ie me console par l'esperoir qui me promet de iouir au ciel eternellement de vostre tant aimée presence, san auoir plus la crainte de vous perdre, comme ie pourrois auoir en ce monde. Monsieur (respondoit la Princeesse) ie n'eusse point esté moins heureuse que vous heureux, si vous n'eussiez temperé mon bon-heur, en me le faisant receuoir plustost q̄ mon honnesteté ne le permettoit. Helās ! ma Dame (disoit-il) ie vous supplie ne renoueller plus mon tourment, si vous voulez que ie demeure plus long temps en vie. En ces propos & autres amoureux deuis, ils passerent toute la nuit, avecque tout le plaisir qu'il scauroit estre possible de comprendre. Or sçachez que pour la perfection de leurs amours, la Duchesse de Bauieres auoit dressé cest enchantement, pour donner à Agefilan le bien si long temps attendu, lequel par autre moyen il n'eust peu receuoir si long tēps ny les deux loyaux amans iouir de l'accomplissement de leurs desirs, à raison des grandes & merueilleuses choses, qui auindrent depuis, comme il vous sera recité au trezieme liure de ceste histoire. Ayant donc passé la nuit & vne grande partie du iour suiuant en ceste recreation, les damoiselles qui les auoyent ser-

seruiz au soir, entrèrent en la chambre, portant plusieurs riches accoutremens, desquels elles reuestirēt les deux Princes Diane se trouuant toute vergongneuse à son leuer. Apres qu'ils furēt habillez, elles les menerēt en la grande sale, & leur donnerent plusieurs exquisēs & delicatēs viandes, & apres le repas, les tables estant leuees, vne porte de la sale s'ouurit & s'aparut aux deux amās, vn fort grād & beau iardin, peuplé de plusieurs sortes d'arbres, & ayant le par terre embelli de diuerses fleurs, sur lesquelles volletoyent maints petits oyssillons degoisāns fort doucement leur ramage. Adoncque les Princes se prenans par la main, entrerent au iardin, ou ils trouuerēt plusieurs belles fontaines dont les bassins estoient d'albastre, de cristal, de porfire, de iāpe, ou des pareilles riches matieres mises tres-ingeuieusement en œuvre. Ainsi avecque toute la felicité que lon pourroit penser, les deux ieunes amans iouissoient de leurs amours, estans seruiz autant excellentement par les damoiselles enchantees, cōme leur grandeur le meritoit. Toute la nuyt ils estoient ensemble, & tout le iour ils ne se pouuoient separer: & si quelque fois par fortune ils se perdoient de veüe, le temps n'eust sceu estre si brief, qu'il ne leur semblast durer plus de mil ans. Or en ceste bienheureuse vie, & estrange fin de leurs amours, nous les laisserons iusques à ce q̄ l'ocasion se presente pour les remettre en liberte, & leur interrōpre ce bō-heur.

Des propos que tint dom Filisfel avecque deux Damoiselles en retournant de la cité de Athenes: & comme le Duc d'Alfarce arriva en Constantinople.

CHAP. LX.

DOm Filisfel de Montespīn, demeuralong tems en la cité d'Athenes attendant quelque changement

de ses infortunes: mais voyans que tous les iours la belle Māfire deuenoit plus superbe contre lui, & que d'autant plus il la supplioit, d'autant plus elle lui estoit cruelle: Il delibera de retourner en Constantinople: & de fait ayant pris cōgé du Duc & de la Duchesse, se mit en chemin, sur lequel le troisieme iour il rencontra deux damoiselles richement en ordre, & d'assez grande beauté, qui tenoyent pareillement le chemin de Constantinople, & s'en alloient à vn leur chasteau. Le cheualier les ayant saluees, & elle lui, leur dit: Mes Dames en qu'elle part s'adresse vostre chemin? Icy deuant (respondirent elles) à vn chasteau qui est sur le grand chemin de Constantinople. Je vois pareillement là, dist le cheualier. Dieu soit loué (dit la plus belle des deux) car à tout le moins nous serons bien acompagnees en nostre voyage. Je ne sçay comme ce sera pour mon regard (dist dom Filisfel) car mes destinees ne sont point telles.

Comment entendez vous cela? dit Carpenle, car ainsi auoit nom la damoiselle. Par-cē (dist-il) que selon la cruauté de mes destinees, ie crains de cheminer lōg temps en la compagnie de deux si belles damoiselles comme vous estes. Carpenle le regarda, & le trouua selon sa fantasie le plus beau & disposé Cheualier, qu'elle eust encores iamais veu, combien qu'il fust aucunement meigre & triste: parquoy elle lui dist: le ne puis penser, Seigneur Cheualier, vous estant de tant bonne grace, & de si haute cheualerie, ainsi que ie presume par vostre belle proportion de corps, comme vous estes ainsi mal traité d'aucune damoiselle. Je le suis si mal (dist il) qu'il me seroit impossible de vous le pouuoir assez exprimer, car il semble qu'amour m'eust pour vn rēs mis au plus hault de mō cōtētemēt, pour me faire trebucher en la plus grāde douleur, qu'hōme ayt iamais experimentee: pour ce que le desir d'attaindre en vn hault lieu, ne donne point tant d'ennuy,

com.

comme lon à de douleur si lon en trebuché apres y estre paruenü avec grād travail. Faictes moy bien entendre celà: dit l'autre damoiselle nommee Larice. Je suis content de le vous dire (respondit le Cheualier) à fin que vous entendiez la plus grande cruauté, de laquelle vous ayez encores ouy parler: & soudain il leur conta tout ce qui s'estoit passé entre lui & Marfire, ainsi qu'il vous à esté recité cy dessus: & ayāt acheué son propos, leur dist: Je souffre beaucoup plus pour le peu d'amour que ma dame à monsté auoir à son honnesteré, que pour la grāde haine qu'elle ma monstree, alors que ie l'aimois le plus: veu qu'une telle dame s'estant obligée à m'aymer toute sa vie, ne pouoit autrement me garder de mon amour, que par vne amour reciproque. Elle donc ayant failly à son deuoir, i'ay plus de tourment pour sa faute, que pour ma perte: & toutesfois ie ne puis m'engarder de l'aimer encores que i'aye tresbonne occasion de la hair. O Dieu (dist Carpēte) cōbien celle dame dont vous parlez à mal fait son deuoir enuers vous! Si mal (dist dom Filisfel) que ie crains de plus mettre mō affection en aucune dame ny damoiselle. Ha, Seigneur Cheualier (dist elle) pour vne seule ne condamnez toutes les autres: car ie ne pense point qu'en tout le monde se peust trouuer damoiselle d'honneur, qui voulust estre tāt ingrate: & ne puis croire que celle dont vous parlez n'aimast en plus que d'un endroit: car pour departir l'amour en plusieurs parties à la parfin il vient à neant, & comme vous pouuez sçauoir, si la mer estoit separée en beaucoup de parts, elle seroit conuertie en ruisseaux. Encores m'à elle (dist le Cheualier) refusé l'eau de ces ruisseaux dōt vo^s parlez, sans auoir iamais commis aucune offence contre elle, apres l'auoir seruie avec toute la reuerence qu'il est possible à un loyal amoureux de garder à sa Dame. Si elle aime en autre part, ie n'e sçay

rien, car ie l'ay cogneuē tāt rigoureuse, tāt rude, qu'il me semble impossible que elle puisse aimer en aucū lieu, veu qu'elle n'a poinr aimé celui à l'amour duquel elle-mesme s'estoit obligee. Laissez la, Seigneur Cheualier (dit Larice) pour telle qu'elle est, & ne parlons plus de sa cruauté, car i'auois honte, moy estant Damoiselle, d'ouyr dire qu'une Dame de valeur eust peu commettre telle faute, Parlons doncques de ce qu'il vous plaira (dist le Cheualier) & poson le cas que le mal-heur ayt plus esté cause de mon tourment, que la cruelle hayne de ma Dame. Veritablement (dist Carpente) vous la devez beaucoup aimer. Pourquoi? dist-il. Par-ce (respondit la damoiselle) que vous ne vous pouuez tenir de en parler. Or bien (dist-il) puis qu'il vous plaist, n'en parlons plus: si est-ce que ie vous assure bien que la raison de la plainte, plus que la force de l'amour, m'en à fait dire ce que ie vous en ay dist. Laissons doncque ce propos, Seigneur Cheualier (dist Carpente) & nous racontes des nouuelles des damoiselles d'Athenes, car elles ont le renom d'estre belles par dessus toutes les Dames des autres citez de Grece. Elles me semblent fort belles (dist le Cheualier) mais ie les estime bien autant rigoureuses & mal gracieuses qu'il seroit possible de croire, selon ce que i'en ay veu experience. Adonc les Damoiselles se prirent à rire, & continuerent sur ce propos plusieurs gracieuses railleries. Dom Filisfel quelque fois leur disoit qu'il n'auoit point veu tant de belles Damoiselles, ny de tant bonne grace, comme elles estoient, & que certainement en ceste sienne triste Dieu luy auoit enuoyé vne si bonne compagnie pour le resioir. Toutesfois (dist Carpente) il me semble que vous retourniez, tousiours à voz premieres lamentations, en vous plaignant de celle qui tient vostre cuer tant passionné. Ma bone dame, dit-il, l'homme qui
à senu-

à sentiment, est cōtraint de sentir la douleur, mais le temps guerist toutes choses & defaict souuentefois ce dont il auoit esté auteur. Il est ainsi (dist la damoiselle) car toutes les choses de ce monde se font & defont avec le temps : mais retournez vous à Dieu, Seigneur Cheualier & ne vous tormentez plus pour ceste folie, car par ce moyen vous serez bien tost hors de l'ennui ou ie vous voy. Vous me conseillez tres-bien, ma Dame (respondit-il) puis que ie n'ay iamais eu le temps me pouuoir repétir de ma faute si bien comme à ceste heure, ayant aimé de tout mō cueur celle que i'ay trouuee tant ingrate à m'en donner la récompense ? car assurément il n'y a pris de si haute valeur, qui puisse bien recompenser le vray amour qu'une pareille & aussi seruante affection. Sur ma foy, dit Carpente, vous me semblez de tant bonne grace, & de si bonne compagnie, que ie ne puis pēser aucune raison pour laquelle vostre Dame vous ait abandonné, si ce n'est pour en aimer vn autre, qu'elle pouuoit autres-fois auoir aimé deuant vous. Je n'en sçay point l'occasion (respondit-il) mais l'effet en donne quelque tesmoignage, toutes-fois si i'en ay eu quelque doute, ie ne fus iamais si fol que de faire aucun semblant de rien en cognoistre. En celà (dist Carpente) vous fistes fort sagement, car il n'y a chose qui plus desplaie aux femmes, que le soupçon qu'on monstre auoir d'elles. Je suis de cest aduis, dist-il, & en quelque part que i'aime, ie vous assure bien que ie ne parleray iamais vn seul mot de ialousie à bon escient, mais bien par ieux, comme on a accoustumé en deuissant de ses amours : car ie sçay bien que les Dames & damoiselles se sentent incontīnēt scandalisées quand lon monstre quelque desfiance de leur vertu. Par tant les ialousies doiuent estre legierement disputees entre l'amant & son amante, & quand on se trouue avec les personnes d'hon-

neur, l'on n'en doit parler en aucune maniere, principalement avecque les femmes mariees, tant à fin qu'elles ne pensent que leur amans croient qu'elles aiment aucun autre plusqu'eux, cōme aussi pour ne leur dōner ocaion de se faire delaisser d'elles, en leur monstrent la tache que par tel moyen elles font à leur honneur. Ce qui faict souuentefois indiner les Dames contre leurs propres maris, desquels elles font peu de conte, s'ilz monstrent auoir aucun soupçon de leur chasteté : car ils doiuent aimer l'honneur de leur femme, & non en estre ialoux, à fin qu'ayant leur honneur en recommandation, elles n'ayent aucun moyen de le tenir en peu de conte, aussi à ce qu'elles mesmes ne s'estiment moins de ce qu'il leur semble estre estimees de leur maris : car il n'y a chose qui entretienne mieux l'honneur entre les hommes & entre les femmes, que la honte que lon a de le perdre. Parquoy les maris ne doiuent parler avecque leurs femmes de ce qui peut diminuer leur vergongne. Ains plustost de ce qui leur peut augmenter, d'autant que celui qui n'a honte de mal faire, & est du tout effronté, ne peut prendre que mauuaise fin. I'ay esté vn peu long en ce propos, par ce que i'en puis donneur cōseil, comme celui qui à l'experimenté. Veritablement, Sire Cheualier (dirent les damoiselles) ce que vous nous auez dit nous pourra beaucoup profiter si nous sommes quelques-fois mariees. Ainsi deuisans de maints gracieux propos, ils arriuerent au chasteau des damoiselles, ou dom Filisel fut bien hebergé, & le lendemain apres auoir pris congé d'elles, il retourna à son chemin, sur lequel lui auindrent plusieurs belles aduentures. Estant finalement arriué à Constantinople, il fut bien receu de tous mesmement de ses pere & mere, & la se remit à aymer plus que deuant l'Infante Anaxarte, avecque deliberation de ne dōner iamais son amour à autre. Trois iours apres la venue

auë de dom Filisfel, le Duc d'Alfarce enuoyé de la part de la Royné Sidonie se presenta en la grand' salle du Palais, deuant tous les Princes qui lors y estoient, & apres auoir esté receu comme il meritoit, il presenta au Roy Amadis, & à la Royné Oriane, la lettre de sa maistresse, & l'ayant descachetee on la trouua de telle teneur.

Lettre de la royné Sidonie.

Aux treshauts, trefillustres, & trefexcellens Princes le Roy Amadis de Gaule, & la royné Oriane: Sidonie Roine de l'Isle de Guindaie, & tous les Princes, Rois & Roynes assemblez en sa grande cité, enuoyent le salut q̃ Dieu leur a ottoyé apres plusieurs calamitez passees. Sachez donc, trefexcellent Roy, que l'inconstante fortune depuis que la déguisee Daraïde eut mis le Prince Grec en ma puissance; reduisit nostre estat en telle extremité, que nous & les nostres estions tombez en vne miserable seruitude, si les victorieux Princes, le Roy dom Falanges d'Astre, & la cheualeresse royné Alastraxeree, ne nous eussent secouru en ce besoing, car ma cité estant presque prise des ennemys, qui ia commençoient à entrer dedans ces deux nobles Princes, n'osterent seulement aux Roys de Russie, & de Gaze, la cité, & la victoire qu'ilz estimoient desia certaine, mais encores les mirent en route, eux & leur confederrez, de façon qu'ilz nous remirent en nostre premiere liberté. Au moyen dequoy selon les propheties precedentes, Daraïde ayant païé la caue de Febus, decapita en ma presence dedans la tour de Diane, la statue de dom Florisfel, la teste duquel me priua de tous sentimens, & fir efforcer dom Rogel de Grece, à vanger la mort de son pere par le trespas de Daraïde. Et tant aspre fut le combat entre eux deux, & avec telle effusion de leur sang, outre celuy lequel ilz auoient perdu

ce mesme iour, que finalement ilz tomberét tous deux par terre comme mors, iusques à ce que la braue & victorieuse Royné, recognosiant, selon les propheties son cher enfant souz l'habit de Daraïde, le reueilla par ses douloureux cris & gemissemens mortelz, ce qui luy fut occasion de perdre le nom de Daraïde, & recouurer celuy d'Agésilas, avecque ma fille Diane pour son espouse, laquelle il auoit ia gaignee par la loyauté & constance de son amour, en vertu duquel ilz mirent en liberté, & hors de prison, l'Infant dom Rozaran, & la Duchesse de Baviere, en la tour enchantee desquelz ilz demeureroient prisonniers, sans en pouuoir sortir, iusques à ce que les deux les plus accomplis en loyauté d'amour, leur en pussent dōner le moien, & à nous la consolation de la tristesse que nous souffrōs pour leur absence, laquelle durera iusques à ce que les excellens Roy & Royné de la grand' Bretaigne ayent entré au chasteau enchanté, en les deliurant de prison, à la grand' gloire de leur amours loyales, & à la consolation de nous tous. Pour donc trouuer quelque paix en ceste guerre, nous vous prions & supplions la nous moyenner par vostre venue: ce qui retournera à vostre grande louange, & à nostre repos, sans lequel nous demurerons, iusques à ce que par vostre arriuee vous ayez donné fin à cest enchantement, & mis en liberté ces deux loyaux amans de vostre lignage.

La lettre leuë chacun fut esmerueillé de ceste estrange aduanture, prians le Duc d'Alfarce la leur raconter plus au long: mais le Roy Amadis menant grande ioye de sçauoir qu'un si excellent personnage estoit yssu de sa lignee, commanda que les lettres de la Royné Sidonie fussent publiees à son de trōpe par tout l'Empire & par les autres terres & seigneuries tant de luy que de ses confederrez & alliez.

Comme la royne Cleofile & dom Arlanges furent fiancez, & du depart du roy Amadis & de la royne Oriane pour s'en aller en l'isle de Guindaye.

CHAP. LXI.

A Pres auoir leu la lettre de la roine Sidonie, Garaie qui estoit presente se leua debout, & la compagnie cognoissant qu'elle vouloit parler, chacun se teut, puis elle commença ainsi: Si le deuoir de l'amitié, ô excellens Princes, fait que l'amy soit tousiours conforme à l'amy, ce a esté chose tresraisonnable que dom Arlanges d'Espagne tint compagnie à dom Agefilan, es perils de sa peine, & pareillement en la gloire de ses pensées, à fin qu'en vne telle guerre ilz se retrouuaissent tous deux armez de mesmes armes, pour emporter finalement le bien desiré de la victoire. Or puis qu'Agefilan est sorty victorieux auecq' la gloire d'une tant louable entreprise, & a desia quitté les armes avec lesquelles il a gaigné son triomfe, c'est bien raison qu'en vne si glorieuse paix, dom Arlanges quitte encor les armes, ensemble le nom de Garaye, qu'il a retenu par si long temps. Et par ce que iusque icy ie ne me suis donné à cognoistre au fort Prince Anaxartes monseigneur & Pere, ny à la souveraine Princesse Oriane ma mere, ie les supplie me pardonner, puis que l'obligation de l'amitié d'Agefilan me cōtraignoit n'abandonner ceste ruze, iusques à ce que Daraï de eust recouuert le nom qu'elle auoit perdu, rendant pareillement à Garaye le nom qu'elle a recouuert auecque les plaisantes nouuelles de son mariage: car c'est bien raison que celui qui luy a tenu compagnie en son amoureuse guerre, l'accompagne encor en sa victoire. On ne vous pourroit reciter la grande ioye que tous ces Princes receurent quand dom Arlanges eut acheué son propos, mesmement les pere & mere, deuant lesquelz il estoit lors à genoux pour leur baiser les mains,

mais en plorant à grosses larmes de grād' plaisir, ilz l'embrasserent fort amyablement: & apres eux tous les autres Princes & Princesses firent le semblable. Incontinent dom Arlanges fut reuestu de riches acoustremens de Cheualier, & estant retourné en la sale, la roine Cleofile parla en ceste sorte au roy Amadis, Souuerain Roi de la grand' Bretagne, il vous peut souuenir du gage que ie vous ay laissé, de ne recognoistre iamais personne pour mary, puis que ie n'auois peu estre espousee auecque celui qui pouuoit seul m'espouser auecque mon contentement. Et toutesfois vous n'avez voulu, excellent Roy, prendre ce gage de ma parole sans vous reseruer qu'il vous fust permis de me marier auecq' quelqu'un de vostre lignage. Or puis que la cheualeuse Daraïde a merité la belle Diane en recompence de ses seruices, il n'est point raisonnable que Cleofile soit refusee à Garaie pour la recompence des siens, puis qu'auec nō moindre trauail & non moindre reuerence à mon honneur, elle a peu meriter vne telle felicité. Par tant tres-excellent Roy, c'est mainrenant à vous à me donner cōgé de me marier auecque vn des personnages de vostre sang, & ensemblement me permettre de choisir entre eux, celui qui bon me semblera pour mon espoux. Vous avez entendu ma volonté, mais sans la vostre il ne m'est permis de riens entreprendre d'auantage. Le roi Amadis fort ioyeux des paroles de la Royne, luy respondit, Tres-excellente Royne de Lemnos, ie vous remercie tres-humblement de la faueur que par voz paroles vous avez monstree à mon filz le Prince dom Arlanges d'Espagne, & à moy pareillement. Je vous donne le congé que me demandez. quant au personnage, vous l'avez esleu tel que ie le desirois pour vostre espoux: & puis que pour acomplir le tour il ne reste pl⁹ riens à faire autre chose, sinon que vous ma dame, laissant la vanité de voz Dieux, preniez nostre

nostre sainte foy catolique, Je vous supplie me faire ceste faueur de prendre ce don de moy, en recompense de ce dont ie vous suis redevable pour auoir esté tant bié voulu d'une si belle & excellente Roine comme vous estes. Elle lui respondit, Il apert bien maintenant, tresvictorieux Roi, que le guerdon de l'amour que vous m'otroyez, à pris sa naissance du vray & chaste amour que ie vous porte, Je suis presté à faire ce que vous me commâdez, & à fin que Garaye ne soit priuée de la gloire que Daraide à eu laissant la belle Briangie Roine de Corit heritiere de son nom, puis que Cleofile ne doit estre autre que dom Arlanges d'Espagne, elle laissera le nom de Cleofile pour prendre celui de Garaye, à fin que par ce moyen i'herite à son nom tout ainsi que parcy deuant i'ay herité aux seruices lesquels i'ay receu d'elle. Comme elle acheuoit son propos, dom Arlanges se mit à genoux deuant elle, & luy dist, Ma dame, ie vous supplie me presenter voz belles mains, à fin qu'en les baissant ie vous remercie de tant de faueurs. La Roine en l'embrassant lui dist, Monsieur, la puissance que vous auez sur moy, ne permet point que ie vous presente les mains, puis que comme mô espoux vous devez auoir seigneurie de ma personne & de tout ce qui est en mon pouuoir. Apres auoir deuisé quelque temps sur telz propos la Roine fut baptisée, & prit pour ses parains & marraines les Princes & Princesses quelle voulut eslire pour ce faire & fut nommée Garaye, & ainsi nous l'appellerons desormais. Estant retournée de la chapelle de l'Empereur en la grand' sale, elle fut fiancée avecque le Prince dom Arlanges d'Espagne, par le Patriarche de Ierusalem, & apres les solennitez en tel cas requises, le Prince Arlanges étant assis au giron de sa Dame avec tout le plaisir qu'il est possible de penser, luy dist, Helàs, ma dame, combien il me seroit meilleur de taire ma ioye, que la vouloir

exprimer par mes paroles, veu que les secondes defraudront au premieres en voulant declairer de bouche ce qu'à grâd peine ie puis comprendre en ma pensée. La Roine luy respondit d'une fort bonne grace, Monsieur & vray amy, les paroles sont superflues en mon endroit, veu que par effet vous m'auiez souuentefois fait cognoistre le loyal amour duquel vous m'aymiez, au moyen dequoy ie vous ay rendu mon affection esclaué par l'experience de la vostre. En ce deuis ilz demurerent quelque temps parlans de maints gracieux propos. Ce pendant le roy Amadis dist qu'il vouloit que lon mist ordre à son embarquement pour s'en aller en l'Isle de Guindaye, disant qu'il ne pouuoit riens mieux faire que d'obeir aux lettres des tresexcellens Princes qui luy auoient rescrit. Parquoy le depart fut accordé au troisieme iour ensuiuant, & en ce voyage le Roy eut pour compagnie l'Empereur Amadis de Grece, dom Arlanges d'Espagne, dô Florarlan de Thrace, & le prince Artaxerxes de Montibel. Pareillement la belle roine Garaye, & la Princessse Lucenie dirét qu'elles vouloient acôpagner la Roine Oriane, ioint qu'elles ne vouloient s'elongner de leurs espoux. Avec ceste troupe marcherent plusieurs autres Damoyelles & Cheualiers iusques au nombre de vingt nauires, & au troisieme iour ensuyuant, au grand contentement du Duc d'Alfarce, prirent congé de ceux qui demeuroient, le roy Amadis leur promettant que bien tost ilz seroient de retour. La roine Finistee eust suiuy Amadis de Grece, n'eust esté que l'infante Fortune pleuroit si amerement la voyant en aller, que pour ceste raison elle fut contrainte de demeurer en Constantinople. Les Princes estans embarquez, & les nochers voyans le temps propre pour nauiguer, ilz firent haulser les voiles, & sortirent du port, prenans la route de l'Isle de Guindaye.

Comme le Roy Amadis & l'Empereur Amadis de Grece, furent poussez par la tēpeste en l'Isle Solstice, ou ilz trouverent vne estrange aventure.

CHAP. LXII.

LE Roy Amadis ayant nauigé quelques iours par bon temps, la fortune voulut laisser son inconstance accoustumee, ains fit leuer de nuit vne si obscure & horrible tēpeste, que les vaisseaux ne se pouuans apercevoir les vns les autres, coururent toute nuyt la part ou il pleut au vent de les pousser: Et ne cessa cest orage iusques au lendemain matin que le soleil commença à luyre sur la marine: & lors se rouua la nef du Roy Amadis separee de toutes les autres ayās les nochiers abandoné leur voloté propre pour obeir à celle de la tēpeste. La nauire du Roy ayant demouré l'espace de six iours en telle tourmente, finablement sur le midy elle aborda en vne belle Isle, ou ilz prindrent port rendit graces à Dieu de ce qu'il les auoit tirez d'un si grand peril & mis à sauueté. Et par-ce qu'ilz estoient fort trauailliez de l'agitation de la mer, ils prindrent vne barque & descendirent en terre, puis firent dresser vne tēte armee sur le riuage, ne sachās en quelle terre ilz estoient, ny à qui le demander: & comme ilz eussent fort grand desir de le sçauoir, l'Empereur Amadis de Grece dit qu'il vouloit se promener vn peu dedans l'Isle par vn sentier qui passoit apres de leur tante, & que bien toist il leur sçauroit dire en quelle part ilz estoient. Adonc chacun voyant que sa volonté estoit telle, ilz le laisserent aller, & prenāt incontinent ses armes & son cheual, commença à cheminer par le sentier que nous auons dist: Ayant marché long temps, il trouua vn chemi qui trauersoit vne belle & vmbreuse forest, par lequel il n'eust beaucoup cheminé qu'il rencontra deux damoyelles assez belles & richement en

ordre, avecque vne coifure autāt estrange qu'il eut encores iamais veuē en quel que part ou il fut allē: car elles auoyent deux coifes des deux costez de la teste, pendantes sur chacun temple en la maniere de deux rouēs, & du milieu de chacune d'icelles sortoit vne pointe lōguette, semblable à vne corne de Licorne, laquelle estoit marquetee de maintes pierrieres & grauee de diuers fueillages d'or d'argent, & d'azur. Leurs cheveux blōds & crespes sortoyēt par dessouz leurs coifes sur chacun tēple, & de là, estans gallōnez à double rang d'un passemēt de fil de argent passoient es enuirs de chacune coife, & le surplus estoit espandu par le derriere voletant sur leurs espauls. L'Empereur s'esmerueillā de voir ces damoyelles habillees si estrangemēt & elles pareillement de le voir marcher armé dedans la forest. S'estans entre-saluez en langue Persicque, par-ce que les damoyelles parloient ainsi, l'Empereur leur dit en mesme langage: Mes damoyelles, ie vous prie me dire en quel país ie suis, & qui en est Seigneur. Les damoiselles fort esmerueillees de sa belle representation & de luy voir ainsi bien parler leur langage, la plus belle d'elles luy respondit, Seigneur Cheualier, vous m'interrogez d'une si bone grace, & avec tant de courtoisie, que nous serions trop mal gracieuses si nous vous laissions sans vous respondre. Parrant s'il vous plaist de nousuyre, nous vous raconterons vne des plus estranges auentures de laquelle vous ayez encores ouy parler. Au nō de Dieu soit, dist l'Empereur. Alors les damoyelles l'ayant mis au mylieu d'elles, la plus belle luy dist: Sachez, Seigneur Cheualier, que ceste Isle se nomme l'Isle Solstice à raison qu'il s'y trouue plusieurs fines pierres aussi cleres q̄ cristal, lesquelles mises au rayons du soleil, alument le feu en tout ce qui est propre pour le receuoir: & tant est grande l'abondance de ces pierreries en ceste Isle, que lō en voit plusieurs

plusieurs môtagnes & rochers, & maints chasteaux élabourez de diuers ouurages, dont ilz reluyfent si fort qu'il seroit impossible de les pouuoir regarder sans s'éblouir. Maintenant que vous sçaez en quel país vous estes, ie vous vueil dire le defastre qui y regne, car il y a plus de deux ans que nous viuons en vne cruelle guerre, au moins la moytié de l'Isle qui est la plus grande & la mieux peuplée, & en laquelle se trouuent tant de belles Dames, que selon mon auis il est impossible d'en trouuer autât de pareilles en vn mesme lieu. Vous deuez d'oc sçauoir, seigneur, Cheualier, que ceste Isle appartient à deux Roys, qui souloient anciennement en posséder chacun la moytié, d'autant qu'elle est departie de deux grandes riuieres qui sortent d'une fontaine, laquelle prent sa source dans vn roc au milieu de l'Isle, car l'une des riuieres descend vers l'orient & l'autre vers l'occidēt, en façon qu'elles diuisent l'Isle en deux moytiez, l'un des Roys estant seigneur de l'une, & l'autre estant seigneur de l'autre. Or combien que ces deux Roys ayent tousiours esté en guerre trefoutageuse, neantmoins depuis deux ans ença qu'ilz viuent en paix & frequentent ensemblément, il est auenu en leur maison vne des plus merueilleuses choses dont lon ayt iamais ouy parler. Et pour bien entendre le tout, vous deuez sçauoir, que l'un de ces deux Roys auoit deux enfans iumeaux fort adroitiz aux armes. L'autre auoit deux filles aussi nées en mesme iour, & trefexcellentes en toute perfection de beauté. Ces deux Princes s'enamourerēt de ces deux Princesses, les aymants d'un extreme amour. L'un auoit nom dom Galdes de la forest. & l'autre dom Finistel du Solstice. L'une des Princesses se nommoit Grindaye, & l'autre Filisee. Dom Galdes de la forest aymoît extremement Grindaye & dom Finistel du Solstice n'aymoit Filisee de moindre affection. Mais comme il

auient souuentefois que les Dieux font aduenir les choses toutes au rebours de noz desseings, chacune d'elles ayma au cōtraire qu'elle n'estoit aymee ayant en horreur celui qui plus l'aimoit: de sorte q d'autant que dom Galdes aymoît Grindaye, d'autant Grindaye aymoît dom Finistel, & d'autant que dom Finistel aymoît Filisee, d'autāt Filisee aymoît dom Galdes. Or auint que leurs peres pour le bien de la paix, s'acorderent que toute l'Isle demeurast à l'un des Princes & à l'une des Princesses, & pour ce faire, ordonnerent que chacune d'elles choisiroit pour espoux celui des Princes que bon luy sembleroit, sans que l'une sceust riens de l'autre, avecque condition que celle qui auroit le plus raisonnablement choisi l'un des deux Princes, elle le prendroit pour espoux, & demeureroiēt tous deux ensemble seigneurs de l'isle: & les autres deux seroient renfermez en deux chasteaux avecque bonne garde, iusques au iour de leur deces. Ces choses ainsi acordees, la fortune voulut que les deux Princesses choisissent pour mary dom Finistel du Solstice: partant son frere fut incōtinent renfermé dedās vn chasteau, & entre les deux sœurs (le Royaume leur ayant esté departy egallement par les deux Roys) y a au iourd'huy vne cruelle guerre sur le different ou elles sont, laquelle des deux doit estre Royn: car chacune des deux soustient qu'elle a eu plus de raison d'eslire dom Finistel, l'une, par-ce qu'elle l'aymoit plus que chose de ce monde, encores qu'il ne l'aymast point: l'autre pour l'auoir choisi, encores qu'elle l'eust en haine, & pour la seule raison qu'il l'auoit long temps aymee. Or par-ce qu'il n'y a personne qui les mette d'acord, chacune à son recours aux armes pour auoir la raison de son bon droit: & ce pendant le Royaume est diuisé en deux, & chacune des Princesses se tient à part en vne cité, & dom Finistel avecque son pere, sans oser fauoriser au-

cune des parties, ne sachât avec laquelle il doit demourer, ny à laquelle il est le pl^s obligé pour auoir esté choisi des deux d'autant que l'une la aimé sans qu'il aimast, & l'autre qui l'auoit en haine, l'auoit elleu pour son mari en recompense de ce qu'il l'auoit fidellemēt aīmee & seruie par vn long tems. Le vous ay raconté Sire cheualier, les plus grandes nouuelles de ceste Isle. Maintēāt regardez s'il vo^s plaist me commāder quelque chose d'auantage, & puis que ie vous ay dit ce que vous vouliez sçauoir de moy: Le vo^s prie me dire qui vous estes, car i'ay fort grāde enuie de le sçauoir, pour-ce q̄ ie n'ay iamais veu cheualier qui tāt me fut agreable comme vous. Vous n'estes point trōpee en celā, dist l'Empereur. Elle luy dist en riant: O Dieux immortels, que nous ferions bien tost d'accord, si vous estiez au lieu des Princes, & que ie fusse en la place des Princesses, toutes-fois ie vous prie auant que voir les autres damoyelles de ceste Isle, ne vous abuser point en celle ou il y a si peu de beauté, car ie vous assure bien que vous verrez en ceste cōtree les plus belles damoyelles de tout le monde. L'epereur se prit à rire, & lui dit: Ie le croy bien, & ay bonne experience en vous voyant: mais prenez mes paroles en bonne part, car ie vous ayme d'un bon amour d'autant que vous me semblez tres sage & gracieuse Damoyelle. En la malle heure, Sire Cheualier (dist-elle) m'auez vous onques voulu mettre hors de la bonne reputation que i'auois de ma beauté. Pourquoi dites vous celā? dist l'Empereur. Par-ce respondit elle) que me voulant donner consolation du peu de beauté qui est en moy, vous me dites que ie suis sage & gracieuse, & partant que vous m'aymez de bon amour. L'Empereur se prit à rire & luy dist: Si ie vous ayme de bonne amour, estimez-vous pourtant que vous ne soyez tres-belle? ie ne sçay (respondit la damoyelle) comme vous apellez celā bon amour,

car ie n'en vey iamais vn pire, au moins pour l'auantage de ma beauté. Et cōme elle disoit ces paroles d'une fort bonne grace, & avecque vn peu de risée, l'Empereur lui dit en souzriāt. N'estimez-vous donc pas mon amour plus vray & constant, puisq̄ ie vous aime en toute chasteté. Lās, Sire Cheualier (dist elle) ne soyez point tant mal-aiusē qu'ē me parlant d'amours, vous entremellez la chasteté parmy voz propos, puis que la chasteté & le amour sont deux choses toutes contraires l'une à l'autre, mais veu q̄ vous m'auez desia assez long tems amusee à babiller: Ie vous prie me dire ce que ie vo^s demande, & nous laisser aller, car nous auons haste. Mais ie vous prie, dist l'Empereur, me dire quel party vous tenez en ceste querelle dōt vous me parliez maintenant. Nous sommes, dist-elle, damoyelles de la mere du Prince dom Finistel, lequel nous a cōmandé d'aller voir les Princesses Filisee, & Grindaye, pour leur remonstrer que d'autant qu'il est redeuable à toutes deux, il n'est deliberé de fauoriser aucune d'elles, & auons charge de les suplier de sa part, de donner ordre le plustost qu'elles pourront à ce que si long tems il ne soit priuē de leur presence, & si elles ne se veulent accorder pour prendre mary, qu'aumoins elles s'accordent pour ne se faire guerre l'une à l'autre, à fin que par la paix d'elles deux, il puisse auoir le moyen de reuoir leur excellente beauté, encōres que il estime la plus perilleuse guerre du monde celle paix, qui luy osterā le moyē d'auoir d'elles ce qu'il en a si long tems desiré. L'Empereur, luy dist: Veritablement, Monsieur le Prince dom Finistel, faict comme celuy qui veult contenter les deux Princesses ensemblement & selon ce que i'en puis penser, leur beauté merite bien ceste courtoysie. O Seigneur Cheualier (dist elle) que vous diriez biē de meilleur cueur ce que vous dites, si vous auiez veu les deux Infantes

car il ny à aucune difference de la beauté du soleil à la leur. Comment, dist l'Empereur, sont elles tant belles? Tant, respondit la damoyelle, que si vous les voyiez, vous ne les aymeriez point de vn si bon amour comme vous m'aymiez n'aguières. L'Empereur se prit fort à rire de ces paroles, & luy dist: Peut estre que si & que vous estes abusée en ce que vous dites, car vous ne cognoissiez encores pas bien ma complexion. Je ne sçay (dist la damoyelle) quelle est vostre complexion, mais ie sçai bien que l'excellence des deux Infantes est telle qu'elle feroit bien tomber les plus loyaux en la mesme oubliance dont les autres damoyelles s'oublient en s'abandonnant à l'amour de ceux qui les ayment. Certainement (dist-il) vous avez loué au possible les deux Infantes: mais si elles sont excellentes en beauté, ie croy que vous ne l'estes moins en bien dire: au moyen dequoy ie vous prie me dire vostre nom, car i'ay grand' enuie de le sçauoir. Seigneur cheualier (dit elle) ie croy que vous m'estimiez tant pour mō bien dire, à fin de me consoler en ce deffault de ma beauté: mais puis qu'il vous plaist entendre mon nom, & qui ie suis, sçachez que i'ay nom Sirisie, & ma compagne Mylaine, & suis fille du Duc Dagauiis: & ceste cy vient en ma compagnie, par ce, que ie porte l'ambassade de la part du Prince, & estāt seule ie ne pourrois cheminer si asseurement, comme ayant compagnie auecque moy. Vostre beauté (dist l'Empereur) vous empesche d'estre si asseuree comme vous pensez estre par le moyen de vostre compagne. Vous monstrez (respōdit la damoyelle) vne assez maigre experience de ce que vous dites, veu que ie chemine asseurement auecque vous sans que vous ayez encores fait semblant de me faire peur, tant s'en fault que ma beauté vous ayt riens fait entreprēdre sur moy. Mais laissons ces railleries, & puis que ie vous ay

dit mon nom, faictes moy pareillement ce bien de me dire le vostre: & vous monstrez autant courtois en ceste requeste q'ie vous fais, comme vous auez esté en la louange de ma sagesse, beauté, & bonne grace. L'Empereur se prit à rire, & lui dit le ferois vne trop grande faute, si ie faillois de dire la verité à vne tant honneste damoiselle: & puis que ie ne sçay desia qui vous estes, ie suis content de vous dire aussi qui ie suis: à la charge toutesfois, que vous & vostre compagne me promettez de le tenir secret. Or ius dōcque, Seigneur Cheualier (dit la damoyelle) dites nous ce qui en est, & ne nous baillez point occasion de nous plaindre, que vous vous soyiez depouillé de verité pour nous reuestir de mensonge, car ie vous accorde les conditions que demandez pour recompense de la faueur que nous receurons de vous s'il vous plaist nous dire qui vous estes. Sçachez (dist l'Empereur) que ceux qui me cognoissent m'appellent Amadis de Grece. O Dieux immortels (dist elle) est-il possible que vous dissiez la verité, & que vous soyiez ce souuerain Empereur Amadis de Grece la renommee duquel à desia tant de fois enuironné tout le monde? Je ne sçay, dit il, quelle renommee ie puis auoir, mais tant y à que ie suis celuy le quel ie vous dy, & ay esté ieté en ceste Isle par la force de la tēpeste. Helàs, monseigneur, dist elle, ie uous supplie me presenter voz victorieuses mains, car ie m'estimeray tres-heureuse si ie puis auoir ceste faueur d'vn si grand Prince comme vous estes, vous suppliant tres-humblement me pardonner les folies dont i'ay vſé n'aguières enuers vous, ne cognoissant vostre grandeur, & me donner congé de dire au Prince dom Finistel monseigneur, que vous elies icy: car ie suis asseuree qu'il ny à Prince au mōde le quel il aime, prise, honore, & ayt tant enuie de cognoistre comme vous. Puis donc que vous estes en sa terre, il ne seroit raisonnable que vo⁹ en departiez

sans luy donner, en l'alant voir, quelque recompense du bon vouloir qu'il a de vous obeir: car par les Dieux immortelz ie vous iure que lon ne scauroit rapporter à monsieur le Prince, nouuelles dont il recoiue plus de ioye: & si vous me donnez ce congé, ie m'en retourneray sur le champ pour gaigner l'estreine de ce message: car j'ay laissé monseigneur dom Finistel en la cite de Gandes qui ne scauroit estre qu'à vne lieuë d'icy, & croy maintenant que les Dieux immortelz ont amené vn si excellent personnage en ce pais pour y faire la paix que tout le peuple a desirée en vain par si long tēps. Je serois le pl^s heureux de tous (dist l'Empereur) si ie pouuois gaigner l'honneur d'auoir moienné ceste paix! Neantmoins là ou ie ne serois suffisant, ie suis venu en la compagnie de tel qui est pour ce faire beaucoup mieux que moy, & lors il luy nomma tous ceux qu'il auoit laissé sur le riuage. Làs, monseigneur (dist elle quand elle l'eut entendu) combien nous auons maintenant d'excellens Princes en nostre contree. Je vous supplie me pardonner car quelque promesse que ie vous aye faite, & quelque serment que i'aye iuré, ie ne me puis plus tenir d'aller porter ces nouuelles au Prince dom Finistel monseigneur. Puis qu'ainsi est (dist l'Empereur) vous luy direz que pour la bonne volonté laquelle vous m'avez asseurée qu'il me portoit, ie vous ay descouuert qui i'estois, & puis que ie suis en sa terre que ce me seroit vn grand plaisir de le voir, & cognoistre pour mon bon frere & amy. Allez donc, car ie retourne à ma compagnie: & au surplus ne vous souciez des propos que nous auons tenuz ensemble, & vous asseurez que de ma vie ie ne deuifay auecq' Damoysselle qui me donna tant de recreation cōme vous avez fait. O monseigneur (dist elle) ie tiens mes folies pour bien employées, puis qu'elles m'ont esté ocasion de descourir vn si grand Prince, & me tiens tresheu-

reuse de ce qu'elles vous ont esté agreables. Adoncq' ayant pris congé de l'Empereur, elle s'en alla à grand haste dire ces nouuelles au Prince dom Finistel, & à son pere, qui en menerent vne tresmerueilleuse ioye: & tout soudain acompagnez de plusieurs Cheualiers richement en ordre, s'en allerent la ou la Duchesse Sirisie leur auoit dit que le roy Amadis & l'Empereur auoient pris terre.

Comme le Roy de Gandes bien acompagné vint au deuant du roy Amadis, & du bon accueil qu'il luy fit à l'arriuee.

CHAP. LXIII.

LEs Damoysselles estant departies d'auec l'Empereur, il retourna à la tente, là ou il auoit laissé le roy Amadis, & les autres Princes: & leur conta tout ce qu'il auoit entendu par les Damoysselles, dont chacun s'esmerueillait: & soudainement firent tirer a grand' haste hors de la nau, leurs cheuaulx & palefrois, auecques leurs royaulx & plus riches acoustremens. Estans en l'ordre qu'ilz auoient delibéré se mettre, ilz n'attendirent guieres long temps, que le Roi de Gandes, & dom Finistel son filz, acompagnez de plusieurs Cheualiers richement acoustrez les vindrent trouuer ou ilz estoient. Et apres s'estre receuz d'une part & d'autre selon les ceremonies acoustumées en telles rencontres, chacun s'esbahissant de la grande beauté de la royne Oriane, & de la royne Garaye, & de la Princesse Lucenie, le Prince dom Finistel dist: O Dieu immortel, ie pensois que vous eussiez mis en la Princesse Filisee, & es Damoysselles de Solstice toutes les beautez de la terre, sans auoir rien laissé ailleurs qui se peust comparer à elles, mais ie voy maintenant que vous auez voulu monstrier toute vostre puissance en ces belles Roines & excellētes Princeses, à fin que desormais nous ne puissions plus

plus nous donner vne telle gloire. Et non sans raison le ieune Prince disoit ces propos, car les damoyelles de l'Isle Solstice, & mesmemēt les Princesses estoient renommées en excellence de beauté par dessus les damoyelles de tous les Royaumes cir conuoyfins. Or apres auoir deuisé ensemblement de maints gracieux propos, à la requeste du Roy de Gandes & du Prince son fils, le Roy Amadis, & tous ceux de sa compagnie monterēt sur leurs cheuaulx, & palléfrois, & s'en allerent en la grand' cité de Gades, qui estoit lors fort belle, de grand' estendue, & bien peuplée : à raison dequoy lon n'appelloit communément le Roy sinon roy de Gades encores qu'il fust Seigneur de plusieurs autres contrees. Mais auant qu'entrer en la cité, chacun fut esmerueillé de voir vne haute roche, & sur icelle vn chasteau qui rendoit si grande clarté qu'il estoit impossible de le regarder que bien peu sans s'esblouir la veüe : car il estoit fait des pierres dont les damoyelles auoyent parlé à l'Empereur : & en la cité apparoyssoyent pareillement plusieurs belles tours de mesme ouurage, lesquelles rendoyent vne merueilleuse splendeur mesmement le palais du Roy, lequel estoit entierement basti de ces pierres, & estoit fait à huit angles, à chacun desquels y auoit vne fort belle tour, tellement que tout le palais estoit diuisé en huit principales parties, & la grande court d'iceluy estoit fort large & ample & faite en mesme façon que le dehors. La principale vis par laquelle on montoit en hault, estoit assise au mylieu de la court, & faite en forme d'vne belle tour, de la quelle sortoyent quatre arceaux qui seruoient de galleries pour aller par tout le chasteau. Sur le feste de la vis, lō voyoit vn bel encensier enleué sur petites colonnes tant hautes & delicates qu'il sembloit que l'encensier se soustint miraculeusement en l'air, pour faire la pointe de la tour. Le pavé de la court estoit tout de marbre

blanc, & sous les quatre coings ou se rendoyent les quatre arceaux sortās en croix de la grande vis, y auoit quatre belles fontaines d'vn ouurage fort laborieux, avecque plusieurs gros canals d'eau qui en ruisseloient continuellement : & à l'entour de chacune des fontaines, y auoit douze Cyprés tous d'vne grande & pareille hauteur. Les sales & les chambres estoient faictes de moult riche matiere, peintes, fueillagees, & lambrissées avecque telle excellence qu'il estoit impossible de mieux. Or les Princes estans arriuez en la ville les citoyens s'esmerueillās de leur venue, & eux de la grand beauté qu'ils voioient parmy les ruēs, leur semblant voir le plus beau peuple qu'ils eussent encores veu, vindrent au grand palais ou ils descendirent, non sans s'estonner grandement de la magnificence de l'edifice. Puis montans par la grande viz en vne des galleries de la croix, entrerent dedans vne sale, ou ils trouuerent la royne bien accompagnee qui les receut avec fort grande reuerence : & ainsi entrerent dedans le logis qu'on leur auoit apareillé, soudain, qu'on auoit sceu leur venue. Apres le souper auquel ils furent traitez magnifiquement & en somptueux ordre de seruite, le Roy Amadis remerciant le roy de Gandes, la Roine, & le Prince leur fils, du bon traitement & de l'honneur qu'ilz luy faisoient en leur maison, commença à dire qu'il scauoit desia bien les differens qui estoient entre les deux princesses, & puis qu'il estoit là arriué, & l'Empereur son fils, en temps si oportun, que ils s'essayeroyent à les mettre d'acord, & estre iuges de leur cōtention, & que partant ils auoyent deliberé de leur en escrire vne lettre. Le Roy, la Roine & le prince dom Finistel les remercierent de leur bon vouloir : & à la requeste de l'Empereur, la charge de ceste ambassade fust donnée à la Duchesse Sirisie, laquelle accompagnée de six damoiselles richement habillees, porta les lettres du Roy Ama-

dis & de l'Empereur. Ce pendant qu'elle exécutoit la charge de son ambassade, le Roy de Gandes fit à ces grands Seigneurs & Dames, plusieurs festins, & banquets, n'oubliant rien des bons traitemens & honneurs desquels on se peut auiser pour complaire à Princes estranges. Entre les autres festins, il en fit un dedans son iardin royal, auquel il inuita toutes les plus excellentes Dames & Damoiselles de la ville, lesquelles y vindrent, & se trouuerent iusques au nombre de trois cens cinquante, toutes richement habillées selon la maniere du pais, & belles par excellence. A ce conuy, pour d'auantage l'honorer, assista la belle Roïne Garaye, & la Princesse Lucenie, veuës entièrement selon la façon du pais, des plus précieuses robes qu'il estoit possible de voir monstrant en elles une si merueilleuse beauté, que toutes les Dames & damoyselles de Gandes tenoyent incessamment les yeux sur elles, comme rauyes en leur contemplation, & tindrent à grand faueur que les Princeses estrangeres se fussent vestuës à leur mode. Après que le solennel banquet fut acheué, & les tables leuees, plusieurs bons musiciens entrèrent iouans de diuers instrumens, au son desquels les damoiseilles de Gandes balloient toutes d'ordre selon leur maniere, & estant desia nuit, la Roïne Garaye, & Lucenie dancierent à la clarté de plusieurs flambeaux, à la mode de Grece, & pour encores plus auctoriser le festin du Roy, la Roïne de Garaye & son espoux dom Arlanges d'Espaigne prindrent chacun une harpe & iouerēt, & chanterēt maintes chansons tant melodieuses & si plaisantes que tous les oyans sembloient estre rauiz en la ioye de Paradis. Mais pour solemniser encores plus leur musique, l'Empereur Amadis de Grece les ayda, & à sa requeste chanterent eux trois ensemble une chanson qu'il auoit faicte en l'Isle ou il demeura en grand solitude tout un long temps, avec Finissee, esperant y

acheuer ses iours, & aller tenir compagnie en l'autre monde à sa Dame Niquee,

Sa chanson fut telle:

CHANSON.

*Pour aspre douleur qui m'opresse
Cent fois le iour ie meurs sans cesse,
Soit lors que le tombant soleil
Va plonger au mylieu de l'onde
Del' Ocean sa teste blonde,
Annonçant l'heure du sommeil:
Soit qu'à son char il appareille,
Le col ardent de ses destriers,
Ramenant sa clarté vermeille,
Aux tristes hommes iournalliers.*

*Les Dieux ma Niquee ont ravie
Hors de ceste mortelle vie,
Et guerdonnans leur cruauté,
Leurs spheres de Cristal voylees,
Et leurs regions estoilées
S'embellissent de sa beauté:
Mais las, ce douloureux encombre
Ne laisse outre le desconfort,
En moy, de moy, qu'une faulce ombre
Et le vray portrait de la mort.*

*Quand sur la zuree marine
Te vois en l'air la courue eschine,
Du Dauphin royal sauteller,
Je ne croy point qu'il nous presage,
Les frotz & les vents que l'orage
Doit pesle mesle omonceller,
Ains la furieuse tempeste,
Qui bouillonnant dedans mon cueur,
Le dernier naufrage m'appreste
M'ostant de vie & de langueur.*

*Mais vous, ma chere Finissee
Venez plorante & contristee,
Venez souz ces bocages vers,
Après ma mortelle auenture
Dresser ma triste sepulture,
Et l'environnez de ces vers,
AMADIS EN CESTE CONTREE,
PLAIN D'ENNVY PRIVE DE
CONFORT,
MOURVT POVR LA MORT DE
NIQUEE,*

BORNANT SON MALHEUR PAR
SA MORT.

Ceste chanson accompagnée de maintes larmes, & souspirs de l'Empereur, meut vn chacun de la compagnie à prendre compassion de ses douleurs : puis la musique acheuée lon courut pour le souper, apres lequel le bal se recommença encores plus solennel qu'au parauant :

En ces deuils les Princes passerēt le tēps avec fort grande recreation, iusques à ce que Sirisie retournaist de son ambassade, & pour vous dire ce qu'elle y fit nous laisserons tous ces Princes en la grand' cité de Gandes avecq le bon Roy qui ne sçauoit bonnement comme les traicter, tant il estoit curieux de leur complaire.

Comme la Duchesse Sirisie fit accorder les deux Princesses de Iuges, & comme chacune d'elles plaida les raisons de sa cause en la presence du Roy & de l'Empereur Amadis.

CHAP. LXIIII.

LA Duchesse Sirisie portant la lettre du Roy Amadis, & de l'Empereur Amadis de Grece, s'e alla aux deux citez ou estoient les deux Princesses & fit lecture à chacune d'elles, de la lettre, laquelle disoit ainsi.

LETTRE.

Aux tresexcellentes & tresbelles Princesses de l'Isle Solstice, Amadis de Gaule Roy de la grand' Bretagne, & Amadis de Grece Empereur de Trebisonde, Prince de Grece, de la grand' Bretagne, de Gaule, Roy de Rhodes : Salut, & avecq iceluy, paix & repos à vostre perilleuse guerre. Sachez que la fortune & la tempeste nous ayāt poussez en ceste isle avec les Roynes & Princes de nostre compagnie, nous auons entendu la guerre que vous faictes l'une cōtre l'autre : parquoy desirans vous mettre en amytié, nous

vous enuoyons la belle Duchesse Sirisie, laquelle vous dira de nostre part ce que luy auons donné en charge : vous prians la croire comme nous mesmes. Ainsi desirans mettre fin à vostre trauail nous vous enuoyons la paix, laquelle vous ne pouuez refuser ny l'une ny l'autre, au moins si vous auez encores quelque charité de sœurs deuant les yeux.

Sirisie ayant leu ceste lettre à chacune des deux Princesses, leur dist de bouche que ces deux excellens Princes auoyent deliberé de les acorder, & que si elles se vouloyent arrester à leur iugement, il leur conuenoit faire trefues, & s'assembler en tel lieu qu'elles voudroient eslire, à fin que le Roy & l'Empereur allassent ouyr les raisons de chacune d'elles. Les Princesses receurent Sirisie fort humainement, & accorderent de bon cueur les trefues pour vn mois, durant lequel elles s'yroyent rendre en la ville de Beauregard, de laquelle leur pere se nommoit Roy, à fin d'atēdre la, les deux Princes, & se soumettre à leur iugement. Et pour le gage de leur promesse, donnerent lettres d'assurance, signees & sceelées des seings & seaux des deux parties : dont le Roy leur pere fut fort ioyeux, apres en auoir entendu les nouuelles. Avec ceste responce, Sirisie s'en retourna & fut fort bien recueillie à sa venue pour auoir tant dextrement executé son message : & des lors tous les Princes ensemble prirent leur chemin vers la ville de Beauregard ou ils furent receuz avecq grande ioye d'un chacun, mesmemēt des deux princesses, lesquelles se tenant par les mains, comme si elles n'eussent eu aucun different, sortirent iusques à la grand' porte du palais, pour les recevoir, & leur faire la reuerence à l'arriuee : & tant elles se sembloiēt qu'il étoit impossible de les cōnoistre l'un de l'autre, aussi n'auoit il aucune diferēce entr'elles fors du nō. Elles estoient habillees d'une pareille & fort estrange maniere : car le corps de leurs robes

estoit fait comme vn corselet de harnois, tout de fin or semé de plusieurs precieuses perles, & fines pierreries, enchasées dedans, & estoit fort estroit vers la sainture, de laquelle descendoit en bas en maniere de robe qui sembloit estre attachee au corselet d'or, vne toile plyee bien menu, toute faite de fin or, & rayonnee de fil d'argent, & de soye bleuë dedans les plys, estant les couleurs si bien apropiées qu'elles rendoyēt vne fort belle couleur changeante. Ceste robe estoit si large & longue qu'elle trainoit plus d'une brassée & demye par derriere en terre, & estoit ceste queue departie en trois pointes, à chacune desquelles y auoit vn boutō fait de grosses perles, & trois belles Damoyelles portoient ce qui pendoit de la robe, chacune tenant en la main l'un de ces boutons. Leurs manches estoient faictes de mesme toile, flotante, à grandes bouffes autour du bras, & depuis les espaulles, elles se venoyent tousiours estreceissant iusques sur le poignet de la main: & ce qui diuisoit les plys de la toile bouffante, ressembloit à petits brasselers faits d'escailles d'or, dedans lesquels y auoit maintes perles, & pierres precieuses, avecque vn esmail de diuerses couleurs ordonnees de vne fort bonne grace. Les bouffes de ces manches auoyent chacune six decoupeures, le bord desquelles estoit enrichy de orfauerie fort riche & delicate, & au trauers sortoit la chemise des princesses ouuree de soye cramoyssi fort deliée: & des poignets de chacune manche, sortoit vne pointe qui pendoit iusques en terre. Leurs saintures estoient faictes des plus precieuses pierres qu'il seroit possible de voir, toutes arrangees en bel ordre, & rendantes vne clarté fort plaisante & re-creatifue à la veüe. La façon de leur acoustrement de teste estoit encores plus estrange, car sur chacune oreille elles auoient vne rouë assez grande, & du haut de chacune rouë, descendoient deux pointes esquelles se venoyent assembler vers les

espaulles encores qu'elles fussent hautes par dessus de plus d'un pié. Ces deux rouës faites de lames d'or assez deliees estoient bornees tout autour de fine pierrerie rangee en maniere de testes de cloux: dans leur circonference y auoit maintes riches peintures d'esmail, & dedās le centre vn gros dyamant en lieu de noyau: Par dessus la teste sortoyent pareillemēt des deux costez, deux pointes hautes de trois pieds, faites en la façon que nous auons recitee des deux damoyelles: chacune pointe estoit d'or bien elabouré avec tant d'artifice & de bonne grace que c'estoit chose merueilleuse à voir: & sur le sommet de chacune de ces deux petites pyramides reluysoit vne perle grosse comme vn œuf avec tant de clarté & splendeur, qu'elle éblouissoit les yeux des regardans. A tous ces atours de teste pendoient au bout de trois cordōs sur leurs espaulles trois riches & precieux ioiaux. Sur leur frōt elles auoient vne moitié de courōne royale faite de toutes especes de tresriche pierrerie mises en euure par singuliere excellence. Leurs blōds cheueux faisoient es deux costez du visage cōme vn ret subtil & delié, tissū à fort petites mailles & le reste des cheueux tournoyant en diuerses façons parmy la coiffure, s'alloit esparpiller derriere les espaulles, & pendoit iusques au dessous de la sainture. Chacune d'elles portoit en la main vn euentouer fait de plusieurs belles plumes, & de chacun costé y auoit vn miroir de fin crystal enchassé en or esmaillé de diuerses couleurs. En tel esquipage sortirent les deux sœurs au deuant des princes & princesses, & apres s'estre fait la reuerence selon que la grandeur des personages le meritoit, ils entrerent tous ensemble en vne grande sale ou les deux sœurs remercièrent les princes de leur venue, & bonne volonté, puis tout le reste du iour fut employé à banqueter & à dancer, s'entretenans des plus gracieux propos qu'il leur estoit possible: & sur le soir fut accordé

cordé que le lendemain on procederoit au iugement de leurs affaires, & que chacune des deux Princesses deduiroit les raisons pour lesquelles elle auoit choysi pour mary le Prince dô Finistel, plustost que dom Galdes. Partant lon dressa en la grâd place de la ville, vn magnifique eschauffaut tapissé de toile d'or & couuert d'vn poile de velours cramoyssi, pour resister à la chaleur du soleil: Au dessouz y auoit vn trosne pour les iuges, & à chacū costé assez bas deux riches chaizes pour les deux sœurs: & tout à l'entour du trosne plusieurs autres sieges faits par degrez couuerts de rapiz de pannes de velours, pour assoir les Roynes & les Princesses, & hors des degrez à l'entour du trosne y auoit vn grand nombre de chaizes pour les autres Princes & Seigneurs, les places estant departies à chacun d'eux selon sa grandeur. Le lendemain en grande maicsteté au son de plusieurs trompettes & clairons, tous les princes furent conduits à l'eschauffaut, ainsi que le soleil commençoit à se leuer, & chacun ayant pris sa place, & faisant vn mesme silence que s'il n'y eut eu personne, le Roy Amadis comença à parler en ceste sorte:

Tresexcellentes & tresbelles Princesses, l'Empereur mon filz & moy sachans les questions qui sont entre vous, auons voulu prendre la charge de ce iugement à fin de vous mettre en paix & en concorde, veu que vostre prochaine parenté vous deffend entierement la guerre. Et à fin que nostre entreprise puisse mieux sortir son effect, il conuient que chacune de vous die les raisons de son bon droit & qui vous meut à choisir dom Finistel pour mary, à fin que vous ayant ouyes nous puissions avec meilleure deliberation prononcer nostre arrest sur voz differents. Mais en deduisant voz raisons vous souuienne de garder la modestie & l'auctorité qui conuient à vostre grandeur & à la nostre, en parlant l'vne apres autre, & vous respondant paisiblement,

sans vous entrerrompre iusques à ce que nous ayons bien entendu vostre playdoyé pour en deliberer entre nous. Comme le Roy acheuoit ces paroles, les Princesses se demanderent l'vne à l'autre qui parleroit la premiere, & en ce debat demeurèrent quelque tēps, tellement que il fallut venir au sort lequel tomba sur Filisee, & partant elle commença à parler en ceste sorte: Vous ne me pouuez nyer, Grindaye, que la plus grande force de l'homme, & de la femme, ne consiste en la force, par laquelle il se force luy mesmes, & restraint sa volonté pour obeir à la vertu, & suyure le vray chemin qui nous conduit à la raison. S'il est ainsi moyennât que lon sache l'amour extreme que ie portois, & porte à dom Galdes, & la haine en laquelle i'ay tousiours eu dom Finistel, lon entendra assez que la seule vertu m'a incitee à choisir dom Finistel pour mon mary, puis qu'en resistât à moy-mesmes & au ferme amour que ie portois à dom Galdes, le laissant pour celuy que i'auois en hayne, i'ay esté meue à eslire dom Finistel, à raison de la seule vertu, qui m'a incitee à aymer celuy qui m'aymoit, & à laisser celui qui me haïssoit, encores que ie luy eusse donné l'entiere seigneurie de mon cuer. Il s'ensuyt donc que la vertu de force, qui se voit clerement en moy, m'a faict vertueusement resister à mon propre vouloir, à fin de mieux obeir à la raison, & choisir à tres bō droit do Finistel, lequel premierement i'auois en haine: & laisser dom Galdes auquel i'auois au parauant donné tout amour. Filisee n'eust si tost acheué son propos, que Grindaye comença à luy respondre:

Nous ne sommes point en diferent, Filisee, si la vertu de force est plus grande en vous qu'en moy, mais bien l'election que vous auez faite est fondee sur meilleure raison que la mienne. Vous scauez bien que l'amour n'a moindre violence que la mort, & si ne pouuez nier l'amour violent

lent que i'ay tousiours porté à dom Finistel : partant si la mort n'a aucun remede aussi ne peut on remedier à l'amour qui est de mesme complexion, ny resister à ce qu'il nous commande. Si donc contraincte par la violence d'amour i'ay esleu dom Finistel, la raison de mon bon droit demeure assez euidente, & pareillemēt l'auantage que i'ay sur vous en ceste electiō, à fin que l'arrest de mes-Seigneurs noz Iuges, soit prononcé en ma faueur. Filisee luy respondit : O Grindaye, comme vous vous condamnez par vostre dire mesme ! Car si vous auez aymé dom finistel, ie n'ay porte moindre affection à dom Galdes, & la mesme force qui vous à cōtrainte à eslire dom Finistel, me deuoit pareillement contraindre à eslire dom Galdes. Mais moy resissant à la force de cest amour par ma seule vertu, i'ay beaucoup meritē plus de louange que vous, en forçant l'inclination naturelle de mō desir, pour suyure la raison, laquelle m'assure de mon bon droit, d'autant quel'ayant suyue, elle ne peust faillir à me donner le gaing du iugement auquel elle preside la premiere : ioint celuy merite beaucoup plus, qui force celuy, qui veut forcer la raison, que celuy qui se laissant forcer à la force, se rend finablement ennemy des-raisonnable de la raison. Grindaye luy respondit : Les raisons que vous alleguez, Filisee, son beaucoup plus pour moy, que pour vous. Vous dites que vous auez forcé l'amour, mais ie ne vous accorde que iamais vous luy ayez fait telle iniure : ou autrement le propos du sage demeureroit sans la verité, qui dist quel'amour n'est moins violent que la mort. Je vous confesse bien que vous aymiez aucunement dom Galdes, mais non pas ainsi comme i'aymois dom Finistel, car si vous l'eussiez autant aymé, l'amour duquel vous eussiez esté plaine, ne eust laissé en vous aucune place vuide, pour receuoir son contraire. Ne scauez

vous point Filisee, que souuētes fois deux personnes sont malades d'une mesme maladie, & que donnant aux deux vne mesme medecine, l'un en guerist, & l'autre en meurt : Dites moy d'ou viēt eclā ? veritablement il n'y à autre raison, sinon celle qui vous à meu à choisir celuy que vous auiez en hayne, & moy à choisir celuy que i'aymois : par-ce que la malignité de la maladie peut estre si grande, qu'il ny à aucun remede pour garantir le patient de la mort, d'autant que l'humeur venimeuse abondant en la personne, estoufe la vertu naturelle, laquelle estainte il est impossible de resister a la maladie. En ceste maniere le loyal amour estoufe la raison, laquelle estainte, il n'y à plus de remede pour se deffendre contre la cruelle sagette d'amour, qui vise de premier sault à transpercer tout ce quelle voit de raisonnable, tout ainsi comme la mort qui à vne fois infecté le cueur de son venin, empesche que les medecines ne luy puissent plus resister. Lās, Filisee, si l'amour que vous portiez à dom Galdes vous eust nō seulement touché au cueur, mais transperceé iusques dans l'ame, comme l'amour de dom Finistel me tient cruellement nauree, combien vous eussiez eu peu de raison pour vous vanter maintenant de la force avecque laquelle vous auez resisté à l'amour. Il demeure donc tout euident que vostre peu d'amour, vous à laissé la liberté d'eslire vn autre pour mary, que celuy lequel vous auiez premieremēt esleu pour amy : mais la raison qui m'a osté ceste liberté, au moyen du vray amour que ie portois à dom Finistel en toute chasteté & hōneur, me donne pareillement la raison de mon bon droit, & l'auantage sur vous en ceste dispute. Filisee luy respondit : Certainement, Grindaye, vous auez fort bien argumenté, si nous disputions ensemble à la façon des bestes brutes : car vous comparez les forces du corps à celles de l'ame. Mais ie vous dy, Grindaie, qu'il n'y à for-

ce que lon face au corps, qui puisse forcer la liberté de l'esprit, si l'esprit mesme ne se laisse forcer pour auoir faute de vertu. Il n'y a chose qui puisse tuer l'ame, si de soy-mesme elle ne reçoit la mort, & n'y a maladie qui la puisse rendre malade, si ce n'est faute de raison. Ne comparez d'onc plus, Grindaye, si inconsidérément les diuines & immortelles forces de l'ame hautaine, aux terrestres & mortelles forces du corps pusillanime & sujet à toutes les maladies & changements de la fortune. Partant n'auilisez point magloire, n'abaissez point ma victoire obtenuë contre l'amour. ne m'estimez indigne de la raison: & sachez, si vous ne le sçauiez que les dieux, de tout temps, ont donné à l'esprit la liberté, avec laquelle il peut résister au forces du corps & ainsi par ma vertu i'ay peu résister à la force d'amour, sonz laquelle, comme foible & debile, vous vous estes laissée acabler. Considérez d'auantage qu'en méprisant le trophée que i'ay gagné sur moy-mesmes, vous méprisez encores la clere renommée & la louange éternelle des braues Princes & Cheualiers, qui ont volontairement sacrifié leurs vies à leur renom, non obstant toutes craintes naturelles, en s'aydant, lors qu'on leur vouloit forcer le corps, de la courageuse liberté de l'esprit. Et ainsi se sacrifiant à la renommée, ilz ont franchement habandonné le mortel pour l'immortel, recompensans ceste mortelle vie par vne louange immortelle. Le mesme ont fait plusieurs Dames & Damoiselles Romaines & Grecques, qui contre les inclinations desordonnées de l'amour, garderent leur chasteté par la perte de leur vie. Regardez vnp eu Grindaye, la belle question qu'on pourroit faire sur le corps violé de la chaste Lucrese: car si le corps a esté violé, comme à elle peu estre chaste? ou si elle a esté chaste, comment esse qu'on la peu violer? O Dieu immortel, qui eust peu voir l'ame de Lucrese s'escrimer a-

uec vn couteau contre les forces dont le corps se vouloit deffendre aiant la crainte de la mort deuant les yeux! Regardez Grindaye, que là y auoit deux combattans: c'est à sçauoir le corps, & l'ame de Lucrese: mais ie iure par Iupiter que la raison de la liberté & de l'esprit fut si grande, qu'elle ne dompta seulement les forces du corps, mais encores luy donna la mort de ses propres mains, pour dōner vne perpetuelle vie à sa renommée. Le vous demande maintenant, Grindaye, quel moindre debat il y a eu en moy, entre mon desir & ma volonté? veu la force que ie receuois en ayment dom Galles, lequel i'ay neantmoins laissé pour dom Finistel, à fin qu'en forçant mon desir, ie luy rendisse la recompense du loyal amour qu'il me portoit. Car vous sçauiez bien, Grindaye, que d'autant que l'ame est plus excellente que le corps, on la doit d'autant plus aimer: & ainsi i'ay mieux aimé la vertu de l'ame, en ayment celuy que ie hayssois, par-ce qu'il m'aymoit, que le desir du corps, en ce que i'eusse peu essire celuy qui me hayssoit, par ce que ie l'aymois. Et si iusques à present vous n'avez eu la cognoissance de ceste vertu, & qu'au moië de vostre ignorance vous ne vous en soyiez peu ayder, accusez vous de n'auoir seu obeir à la raison comme i'ay fait, & vous preparez à emporter vne autre-fois en semblable entreprise la secōde gloire, puis que vous n'avez aucun moien d'emporter maintenant la premiere. Grindaye luy respondit en ceste maniere: O Filisee ie m'esbahis comme si indiscretement vous osez alleguer des raisons qui sont beaucoup plus en ma faueur que nō pas en la vostre: car en ayment dom Finistel, i'ay fait tout ce que vous venez de dire, & pour vous le mōstrer, ie ne nieray point la vertu, ny la force de l'ame dont vous parlez, quand les desirs restiuent contre la raison: mais celle gloire est beaucoup plus grāde qui s'aquiert par les desirs bien confor-

mes à la vertu, que non pas celle, laquelle on gaigne par vne violente contrainte. Ie dy cecy par-ce que vous ne pouuez nyer que la plus grande excellence qui puisse estre en l'homme, ne soit d'auoir naturellement les desirs conformes à la raison, car autrement, si les desirs & la raison sont en vn debat continuel, ceste guerre ne sera moins perilleuse à l'homme, qu'aux Romains celle en laquelle apres plusieurs triomfantes victoires, ilz prirent les armes contr'eux mesmes dedans les champs de Pharsalie. Car si les guerres ciuiles se font entre plusieurs citoyens dedans vne mesme cité, la guerre du desir & de la raison, qui sont to^u deux citoyens de l'homme se fait au milieu de sa propre ame. Sçauiez-vous par celà que ie veux dire, Filisee? Ie ne veux point diminuer vostre gloire, ny amoindrir vostre victoire, ains ie la veux louer à mon possible, à fin qu'en manifestant voz louenges, ie publie pareillement les miennes, lesquelles pour estre de beaucoup plus grande excellence ne peuuent recevoir aucune cōparaison avec les vostres. Ne sçauiez-vous point Filisee, que si i'ay esleu dom Finistel pour mon mari, ie l'ay esleu encores qu'il m'eust en hayne, & ay laissé dom Galdes encores qu'il m'aymast de tout son cueur? Si donc i'ay esleu dom Finistel encores qu'il me hayst, l'ame n'a point laissé d'obeir à la raison en ayant celuy qui me haïssoit. Car ceste vertu d'aymer son ennemy, n'est contre la raison naturelle, ains tant s'en fault, que c'est vn des meilleurs commandemens qui se lise entre les loix des Chrestiens. Si donc la volonté, la raison, le desir d'amour, & la vertu m'ont faict eslire dom Finistel, lon cognoist euidamment l'auantage que i'ai sur vous, veu que vous n'avez (si vous l'avez) que par vne violente guerre, ce que la seule paix m'ostroye sans aucun effort. Et cecy, Filisee, ne diminue point le renom des Princes, & Cheualiers, Dames, & Damoiselles dont vous

avez parlé, encores qu'il accroisse mon merite : car avec vne vertueuse paix qui est entre mon desir & entre la raison, ie gaigne ce qu'ils n'ont peu gaigner, sinon avecque vne cruelle bataille de ces deux. O! si vous pouuiez voir, Filisee, ce repos, & celle tranquillité qui est entre mon desir, & entre mon vouloir & la raison, vous ne prendriez point tant de plaisir à voir Lucretie chacier du couteau la desobeissance que le corps faisoit cōtre la raison, & ne vous vâteriez point tât de la vertu qu'il vous dites estre en vous, pour auoir esleu dom Finistel, veu que la vraye paix & tranquillité qui est en moy, deuroit non seulement faire repaiser la guerre de deux armées, mais encores les questions sur lesquelles nous nous debatons en ce iugement, à fin qu'avec moins de fâcherie, ces tres-excellents Princes nous peussent donner leur iugement. O Grindaye (dist lors Filisee) ie vous voy tant repugnant à vous mesmes en ce que vous dites & voz derniers propos tant contraires aux premiers, que i'espere en descourant l'incōstance de voz argumens, vous mettre à ce coup hors de dispute & du camp ou nous combatons, monstrant maintenant ma victoire autant assuee, comme par cy deuant on la pourroit auoir estimée douteuse. Si il vous en souuient bien, vous auez nyé auoir eu en vous la liberté de l'election, tellement que le desir desordonné du corps, auoit eu beaucoup plus de puissance sur vous, que non pas la raison de l'ame: & neantmoins maintenant vous dites que le desir & la raison sont tant conformes en vous, qu'il est impossible de plus. Parquoy en vous contrariant, vous vous estes condamnée par voz propres raisons, & beaucoup plus par l'election que vous auez faicte, qui descouvre à l'œil le peu de puissance & de raison qui a esté en vous pour resister aux assaulx de la chair fragile. Si donc lon doit iuger selon ce que lon voit, il n'y a point de doute que vostre election a esté faite en la

la maniere que vous-mesmes auez confessée, c'est à sçauoir contrainte par l'amour de dom Finistel. Mais quât à moy la raison, & la vertu me l'ont fait choisir par-ce qu'il m'aymoit, encores que ie le eusse en hayne, & ay laissé, & abandonné dom Galdes, par-ce qu'il me hayssoit, encores que ie luy portasse extreme amitié. Regardez bien, & vous verrez que vous vous estes condamnée par vostre propre bouche, car confessant la gloire, qui naist de la force faite en moy, & en ces Cheualiers & Dames dont nous auons parlé, vous aprouuez mô bõ droit, & m'otroyez ce que ie demandois. Mais quant à ceste force plus grande, laquelle vous maintenez estre en vous auec vne paix si vertueuse & tant bien acõpagnée de la raison & de voz desirs, nous n'en voyons rien, & n'y à personne qui puisse attribuer ce que vous dites à autre intention, qu'à la seule satisfaciõ de l'amour duquel vous aimez dom Finistel. Puis donc que chacun cognoist la force & la violence que ie me suis faite à moy mesme pour obeir à la raison, & à la vertu, ne vueillez plus par voz cautelles, & contrariez, calumnier ma bonne cause, laquelle à haute voix demande l'arrest de messeigneurs les Iuges en ma faueur, & à vostre confusion. Partant-je metz fin à mon propos, en attendant vostre respõse, auecque protestation de ne vous dire riens d'auantage. Grindaye luy respõdit: Si vous mesmes, o Filisee, pouuiez iuger vostre cause par voz raisons, & sãs auoir esgard aux miènes, il n'y a point de doute, que ie serois bien tost cõdānee: Mais par-ce que ce iugemēt n'est point en vostre puissance, ie m'efforcerai de faire cõnoistre la verité, & diray que vous auez esleu celuy qui vous aimoit, encores que vous l'eussiez en hayne, & que i'ay esleu celui que i'aymois cõbien qu'il me haist, & veu que de vostre part, & de la miēne, il se trouue de la haine & de l'amour: Ie soustiens que mon election est plus rai-

sonnable que la vostre, veu qu'en aymāt i'ay peu faire ce que vous auez faict en haissant, & ay esleu auecque paix celuy que vous auez esleu auecque guerre, & pourchassé auec amour celuy que vous auez pourchassé auecque haine, & pris celuy que i'aimois, & vous celui que vo^s auez en horreur: I'ay esleu celuy que ie aymois, & qui me haissoit, & vous celuy mesme que i'aimois, encores que le haissiez. Si ce fut vertu à vous d'eslire celuy, qui vous aimoit, lequel toutesfois vous n'aimiez point: ce ne fut moindre vertu à moy de choisir celuy que i'aymois, lequel toutesfois ne m'aymoit point. Si ie ay pris celuy qui vous aymoit, i'ay esleu celuy qui me haissoit, & si vous auez esleu celuy que vous haissiez, vous auez pris celuy que i'aimois, tellement qu'en toutes ces differēces nostre cause est pareille des deux costez, fors en la seule raison qui me donne l'auantage. cat quand vous, ou moy, aurons dom Finistel pour mari, si la femme l'aime, il la haïra, & si la femme le haït, il l'aymera. Toutefois encores qu'en ceste election les conditiõs soyent egalles, si esse qu'il n'y aura celuy qui ne me donne le meilleur droit, & la meilleure raison, veu que i'ay choisi celuy que i'aymois, & que vous auez esleu celuy que vous haissiez. Or puis que mô amour fut vertueux, & tendant à fin de mariage, il apert bien que la raison a esté conforme à mon vertueux desir, qui obeissoit à la puissance, que l'amour à autant grāde que la mort, sur les humains. Veu donc que la vertu n'a point esté outragée aymant si loyellement, & pour si hõnestē fin, l'offence ne peut empescher mon bon droit, lequel ie requiers auecque paix en ceste presente guerre ou nous sommes, vous supliant, tresexcellēs Princes, suyuant vostre bonne renõmee, prononcer vostre arrest selon la raison, laquelle s'encline entieremēt à ma faueur. Quād les Princesses eurent acheué leurs plaidoyez, le Roy Amadis, & l'Empereur

Q

dirent

dirent qu'elles auoyent tresbien declaré tous les poins de leur cause, & qu'il les auoit fort bien entenduz: mais que pour en deliberer à loysir, & auecq bon conseil, ilz ne prononceroient leur iugement iusques au troisieme iour d'apres. Adonc au son de plusieurs instrumens, ilz descendirent de leur eschafaut, & retournerent au palais. Pendant les trois iours en toute la cité ne se parloit d'autre chose entre les Cheualiers, Dames & damoyelles, sinon de ce different les vns fauorisans à l'une des Princesses, & les autres à l'autre. Surquoy chacū amenoit plusieurs raisons pour son party, lesquelles ilz debatoient souuentefois deuant le Roy & l'Empereur, qui les escoutoyent volōtiers sans leur respondre vn seul mot. Et ainsi chacun atendoit le troisieme iour, pour ouir ce que les Iuges en prononceroient: mais ce pendant les deux Princesses se retirerent l'une en vne tour, & l'autre en l'autre, ayant chacune d'elles deliberé, si l'arrest estoit dōne contre elle, de ne se monstrier iamais, ains se faire secretement conduire au lieu ou elle deuoit estre prisonniere iusques à la mort.

Comme le Roy Amadis & l'Empereur Amadis de Grece, firent prononcer leur arrest sur le different des deux Princesses: puis se departirent de l'Isle Solstice.

CHAP. LXV

AV troisieme iour ensuyuant, le Roy Amadis, & l'Empereur remonterent en vn eschauffaut, & s'assirent en leurs sieges, puis à leur mandement les deux Princesses retournerent fort richement acoustrees, & en presence de tout le peuple chacun se tenant coy, le Roy & l'Empereur commanderent à vn de leurs secretaires, de lire l'arrest lequel estoit signé de leurs seings: ce que le

secretaire fit & le prononça à haute & clere voix en ceste sorte:

Nous Amadis de Gaule, Roy de la grād Bretagne & de Gaule, & Amadis de Grece, Empereur de Trebisonde, Prince de l'Empire Grec, de la grād Bretagne, & de Gaule & roy de Rodas: Apres auoir entendu les raisons des tresexcellētes Princesses, Filisee, & Grindaye, en eslisant pour mary le Prince dom Finistel, considerans que selon l'auis des sages, la plus grande force de l'homme preux, est de forcer sa volonté pour suyure la vertu, & resister aux vains desirs de la nature: Disons que la Princesse Filisee à beaucoup meritē ayant choyi pour son mary dom Finistel qu'elle auoit en hayne, & pour la seule cause qu'il la seruoit, aymeroit, & honoroit de tout son cuer. A raison dequoy, **N O U S O R D O N N O N S** par nostre souuerain iugement & arrest, que dom Finistel prendra pour espouse la Princesse Filisee, & demeureront ensemblement Seigneurs & Roys de l'Isle Solstice. Toutesfois par-ce que le loyal amour de Grindaye nous a sēblé ne deuoir demeurer sans recompense, & que souuentefois es parties ou regnel'amour le plus grand tort, est la meilleure Iustice **N O U S**, cōme bien experts en telles maladies, & ne voulans desnier a la Princesse Grindaye. le guerdon qu'elle merire pour auoir acceptē nostre iugement v sans de nostre grandeur & liberalité accoustumee: Ordonnons que la Princesse Grindaye s'en viendra auecque nous cōme Royne de l'Isle de Rodas, de laquelle nous luy faisons don, & la prions pour recompense de prendre pour mary, celui qui la tāt aymee, a fin que par-ce moyen elle merite ce que sa sœur a meritē & octroye à dom Galdes le guerdon dont elle luy est redevable, pour l'auoir aymee par si long tēps d'un tant ferme & loyal amour. Mandons & commandons à noz subgetz prions & requerons ceux qui ne sont

sont de nostre obeïssance, qu'ilz ayent à promptemēt executer ou faire executer nostre present arrest selon la forme & teneur.

Comme le Roy Amadis & sa compagnie prindrent port en l'Isle de Guindaye, ou ilz rencontrerent sur leur chemin vne fort plaisante aventure.

CHAP. LXVI.

Après la lecture de l'arrest, les trompettes & clerons commencerent à sonner, & les deux Princesses voulurent baiser les mains au Roy & à l'Empereur, pour les remercier du bon iugement, qu'ilz leur auoyent donné: mais ilz ne le voulurent souffrir. Tantost apres furent amenez les deux freres, & fiancez en grande ioye avecque les deux sœurs. Les noces faictes en grande solénité (auquel iour les deux sœurs commencerent à aimer extremement leurs marys) dō Gal-des & Grindaye apres auoir esté baptisez, furent couronnez, & proclamez Roys de Rodes, & à la requeste du Roy Amadis, & de l'Empereur, les Roys du pais & les Princes dom Finistel & Filisee, avecque tous les habitans de l'Isle, receurent pareillement le saint sacrement de baptisme. Enuirō vn moys entier le Roy Amadis & sa compagnie demeura avecq eux en grand plaisir, mais finablement emmenāt avecque soy le Roy & la Roynne de Rodes, au grand dueil & tristesse de tous ilz se departirent de l'Isle, & ayās le vent à gré s'embarquerēt au prochain port pour passer en l'Isle de Guindaye. Les Roys & les Princes de l'Isle les conduisirent iusques dedans leur nauire, ou avec maintes larmes ilz prirent congé les vns des autres: & par-ce que la Roynne Grindaye aymoit bien la Duchesse Sirisie, elle l'emmena avec elle, & plusieurs autres belles Dames, & Damoysselles pour luy tenir compagnie. Semblablement le nouveau Roy de Rodes emmena plusieurs Cheualiers avecque luy en vne nef qu'il leur auoit expressēmēt fait appareiller. Ayans donc haulcé les voiles, ilz sortirent du port & prindrent la route de de l'Isle de Guindaye.

CEs excellens Princes nauiguerent tousiours par bon vent iusques à ce qu'ils eussent prins port en l'Isle de Guindaye, ou avecq grand plaisir ilz descendirent de leurs nauires, & ce pendant qu'on apareilloit leurs cheuaulx & palefrois avec le surpl^s qui leur estoit necessaire pour étrer magnifiquemēt en la ville, ilz firent dresser en vne belle prairie qui estoit sur le riuage, leurs tentes & pauillons, dedans lesquelz ilz demorerent l'espace de deux iours. Au troisieme chacun de la troupe estant richement en ordre, mesmement les Princesses, ilz monterent à cheual, & prirent le chemin de la cité de Guindaye, dont ilz estoient loing de deux iournees. Le Duc d'Alfarce estoit fort ioyeux d'amener avecque luy vne si belle compagnie pour monstrer l'execution de son ambassade. Enuiron deux heures apres midy sortans d'une grande forest en vne belle prairie, ilz trouuerent vne fort gracieuse rencontre qui fut que dom Rosafar & Artifire roys de Thessalie, sachans qu'Agésilan auoir esté recogneu de ses pere & mere, & fiancé avec Diane, auoyent enuoyé pour le visiter la Damoysselle Galtasire, & cinq autres Damoysselles en sa compagnie, lesquelles s'estoyent desembarquées en vn autre port vn peu plus bas, & s'en venoyent richement habillees & bien montées ayant chacune vn voile de taffetas deuant le visage, tant pour se garder du hale, que pour n'estre cogneues. Car la Damoysselle Galtasire auoit deliberé si elle se rencōtroit avecque le Fraudeur, de lui faire quelque tromperie, & tenoit ses cōpagnes toutes apareillees à cete fin. Or auint qu'au lieu ou nous vous auons dit,

Q 2 elles

elles le rencontrèrent armé de toutes ses armes, ayant l'armet en teste, & monté sur vn bon destrier. Incontinent qu'il vid les damoiselles en riche equipage, esperant d'auoir d'elles leurs palefrois, ou quelque autre chose selō ses ruses acoustumées, il les salua, & elles luy, & s'aprouchant de Galtasire par-ce qu'il l'estimoit la maistresse & plus excellente de toutes luy dist: Ma Dame, ie vous supplie me dire ou s'adresse vostre chemin. En la cité de Guindaye, respondit elle. Dieu soit loué (dist-il) car ie m'y en voys aussi, & pourrons s'il vous plaist heberger ce soir en vn chasteau, qui n'est trop loū d'ici, ou lon vous fera fort bonne chere. Galtasire se soupçonant qui il estoit tant à sa contenance, comme à sa parole, fut fort ioyeuse de l'auoir rencontré, & luy dist: Ie vous remercie, Seigneur Cheualier, du bon traictement que vous m'offrez, & vous supplie bien fort haulser vostre visiere, à fin que nous iouissions de la venue d'un Cheualier tant preud'homme cōme vous estes. A quoy le Fraudeur: Ce me seroit trop plus grande faueur, se il vous plaisoit haulser vostre voyle, car vous me semblez à vostre maintien, & à vostre acoustrement, damoyelle de fort grande beauté & bone grace, mais quant à moy, ie ne puis pour maintenant me descouurir iusques à ce que ie me soye acquité de certaine promesse, que i'ay faite à vne damoyelle. Par ces propos Galtasire s'assurant que celui auquel elle parloit, estoit le cheualier affronteur, lui dit: Ie vous remercie de m'auoir declaré ce secret, car ie serois bien marri de vous estre ocaſiō de faulser vostre promesse: toutesfois puis que vous ne voulez leuer votre visiere pour ne faire tort à vne damoyelle, ie ne me descouuriray non plus à fin de ne faire tort à vous-mesmes. Et quel tort me scauriez vous faire, ma Dame? dist le Cheualier. Quel tort? respōdit elle, ie vous pourrois cruellement naurer de ma beauté. O dit-il, est

ce de ce mal dont vous parlez? quād vous me donneriez des coups de pierres, ie les prendrois en patiēce. Elle luy dit en riāt. Vous souuienne bien de ceste parole, car par la vous me promettez de prendre en gré tout le mal que ie vous pourrois faire. Il se prit à rire, & lui dit: Ie suis appareillé a souffrir ce mal, pour le profit que i'espere de vostre cōnoissance, car voz riches habillemēs me dōnent à cognoistre vne partie de ce que ie puis gagner avec vous. Elle entendit tresbiē a quelle fin tendoyēt ses paroles, & lui dit: Ie suis fort ioyeuse de ce que vous dites, mais gardez vous bien qu'en lieu de profiter à ma cognoissāce, vous ne vo⁹ plaignez biē fort de m'auoir cogneue. Ie pēse, dit il, que vous vous repentirez plustost de m'auoir cogneue, que non pas moy de vous auoir cogneue. Pourquoy? dit la damoyelle. Par-ce (respondit-il en riant) que ie crains a ce soir de ne vous loger point si biē cōme ie voudrois. C'est tout vn (dit la damoyelle) la bone volōté recōpēsera le deffaut de la puissance: car ie pense vous payer en semblable monoye du bō vouloir lequel ie voy que me portez, aumoins si ie n'ay autrement le pouuoir de vous satisfaire. Ie vous en supplie bien fort (dit le Cheualier) & pour commencer ce paiement, ie vous prie & reprie d'abatre vostre voile, & me monstrier le beau visage, lequel selon mō aduis est caché deſſouz. En disant ces mots il sortoit de la foret dans le pré que nous vo⁹ auōs dit. Puis que ie vous ay desia fait tāt d'offres, dit lors Galtasire, ie veux cōmencer à vous en monstrier l'effet, a fin que vous cognoissiez ma bone volōté. Neatmoins, Sire Cheualier, si vous voulez que ie face ce dont vous me priez, detachez-moy dōc vous mesmes les epingles auxquelles mon voile est ataché. Tresvolōtiets, dit il. Adōc s'arresterēt, & oubliant le soucy qu'il auoit premierement eu de la tromper, & ne pensant à la tromperie qu'elle luy appareilloit, s'aprocha le plus pres

pres qu'il peut, & laissant les resnes, il s'amusoit à chercher les epingles pour les arracher. Mais Galtasire passant souplement la main par dessus la teste de son cheual, le desbrida & luy fit tomber la bride en terre, & lors le cheual se sentant en liberté, commença à courir deçà & delà, ruant, sautant & regimbant de toute sa force. Le fraudeur craignant de tomber, descendit le plus tost qu'il peut pour se garder de plus grand danger. Ce pendant Galtasire & les damoyelles auoyent leué leurs voiles de dessus le visage, & s'estoyent mises tout autour de luy avecques leurs palefrois. Mais il ne les eut si tost veües au descouvert qu'il reconeust Galtasire, & luy dit, ma damoiselle pourquoy auez vous abatu la bride de mon cheual? Pour vous brider vous mesmes (respondit elle) & puis que vous auez maintenant vn si bon frain, il fault que nous vous donnons des esperons, pour voir si vous les sentirez aussi bien cōme vo^{us} les faites sentir à vostre cheual quād vous auez fait quelque trahison. Et ce disant les damoyelles passerent la main dans les resnes de leurs palefrois, & commencerent à tirer de leurs bougettes qu'elles auoyent expressément appareillees sur l'arçon de la selle à ceste fin, grande quantité de pierres les ruant assez rudement à l'encontre de l'Afronteur, lequel estant chargé de ses armes ne se pouuoit remuer que malaisément, toutesfois faisant le furieux, il mit l'espee nuë au poing s'escrimant tout à l'entour avec vne nō trop grāde d'exterité. C'estoit chose tresplaisante, de voir les damoyelles avancer, & reculer leurs palefrois, par grande viffesse, selon que le Fraudeur les poursuuyoit, ou se reculoit, & ce pendant ne cesserent de luy ruer grande quantité de cailloux de routes leurs forces, tellement qu'en peu de temps il fut tant las, qu'il ne pouuoit plus bouger d'un lieu, & si n'osoit se desarmer craignant d'estre ataint au descouvert: A raison dequoy el-

les l'environnerent avecques leurs palefrois en se riant, & moquant de luy, & commencerēt à faire la procession tout à l'entour en chantant ceste chanson.

Chanson.

*Ores gagné nous auons
Cent mille ans de vrays pardons,
Trompant souz fines excuses
L'affronteur des affronteurs,
Et le menteur des menteurs,
Et le monarque des ruses.*

*Ores en toy s'accomplist
Ce que tous les iours on list
Dans les sacrees escoles,
Que les pierres parleront
Quant les malins se tairont,
Ce sont les saintes paroles.*

*Puisse donc dessus ton chef
Le mal-heur, & le meschef,
Et l'orage, & la tempeste
Retomber si rudement
Que nous voyons promptement
Ton cerueau hors de ta teste.*

Le pauvre mal. heureux se sentant beaucoup plus outragé par ces paroles, que pour les coups qu'il auoit receuz, leur dist: Mes damoyelles, ie vous prie que ie parle à vous vn mot, à fin qu'en me taisant, les pierres ne continuent de parler sur mon dos, & les faites cesser au nom de Dieu. Ozez-vous bien dire celà (respondit Galtasire.) Vn tant preux cheualier, & tant bien aduisé comme vous, ne doit point si tost se desdire de ce qu'il à dist. Comment ma Dame? dit l'Afronteur. O, ô, dist elle, vous m'appellez donc maintenant ma Dame? vrayement c'est raison que vous soyez exalté, puis que vous vous humiliez en ceste sorte: partant ie vous vois respondre à ce que vous me demādez. Vous souuienne dōc q̄ tantost que ie vous ay recontré, en me

priant de me descourrir, vous me disiez que quand ie vous donnerois des coups de pierres, vous les prendriez en patience. A raison dequoy vous n'avez maintenant aucune occasion de vous plaindre, veu que pour me complaire, vous vous vantiez de recevoir de moy tresvolontiers, la peine ou ie vous tiens maintenant. Celle peine) respondit le Fraudeur) s'entendoit de celle que lon reçoit par amour, & non par hayne. Sçavez-vous pas bien (dist la Damoiselle) que personne ne peut donner sinon ce qu'il reçoit? Ne vous esbahissez donc point si vous recevez maintenant ce dont autresfois vous avez esté si prodigue envers moy. Ce pendant qu'elle disoit ces paroles, l'Afronteur se trouvant vn peu reposé, & pensant qu'elle ne se tint si bien sur ses gardes, sauta à l'impourueü contre elle cuidant lui surprendre la bride de son palefroy. Mais il ne sceut estre si prompt qu'elle ne s'en aperceust, & se tira arriere, puis avec ses compagnes comença de rechef à faire la procession autour de lui & à lui ruer force pierres, en adoucissant sa douleur par la musique de leur premiere chanson. En ces entrefaites les Roys & les Roynes sortirent de la forest dedás le pré & voiât ceste belle escarmouche, & la furie de laquelle le Chevalier Afrôteur s'escrimoit contre les Damoyelles, & la dexterité de laquelle elles l'environnoient, & le frapoient à grands coups de cailloux, ilz ne se peurent tenir de rire, chacun y prenant si grand plaisir que l'Empereur Amadis de Grece, & dom Arlanges d'Espagne passerent vn peu plus outre, pour mieux en auoir leur passetemps. Mais si tost que les Damoyelles les aperceurent (estant l'Afronteur de grand travail tombé en terre) elles s'arrestèrent, & en riant les saluerent par vne grande courtoisie. L'empereur les voyant tant belles & en si riche equipage leur dist, le vous prie, mes Damoyelles me dire quelle belle auanture est ceste-cy? Mais

plus-tost male auanture, dist l'Afronteur Galtalire voyant les deux Princes de fort grande beauté, par ce quilz auoient les visieres de leurs armetz haillées, leur dist en riant, Seigneurs Cheualiers, il vous plaita vous retirer vn peu arriere, & nous laisser acheuer nostre combat. L'Empereur en souzriant leur dist, Le deuoir de cheualerie nous oblige à nous enquerir pourquoy vous six assaillez ainsi vn homme seul, pour sçauoir s'il y a raison de ce faire. Nous le faisons (dist-elle) avec autár de raison, comme ce miserable trompeur à sans aucune cause fait plusieurs tors à maints bons Cheualiers errants en passant par ceste forest. Damoyelle m'amy (dist lors l'Empereur) il se rend desia à vous, & puis que vous le tenez en tel estat, il est desormais temps d'vser de clemence envers luy, car les magnanimes personnes doiuent auoir autant de pitié du vaincu apres la victoire, comme de rigueur autant que de l'auoir peu vaincre. Vous dites bien (dist-elle) & pour vser envers luy de pitié, puis qu'il n'a aucun mal que de fouteures, nous le desarmerôs & le ietterons dedans ce mareít, car le boubier luy sera vne fort propre medicine pour le guerir. Et non, ma Damoyelle (dist l'Empereur) car cela ne vaudroit riens pour lui. Donnez moy donc vn meilleur aui (respondit elle) car ie suiuray vostre conseil. Las seigneur Cheualier (dist l'Afronteur) ie vous prie leur doner le conseil tel que ie le dois esperer de vo^s. Ce feray ie bien (dist lors dō Arlanges) & pour vo^s recompenser de ce que ie vous doy. Je ne leur conseille de vous ietter dedans la bouë, car elle seroit trop honneste pour vous, mais bien dás les plus puantes & infectes ordures qu'il sera possible de trouuer, car autrement vne si traystresse creature comme vous estes, ne sçauroit estre assez chastice, L'afronteur le regarda, & cogneut que c'estoit celuy qu'il auoit laissé attaché en vne chaire dedans la tête coiffé en maniere de vieille, comme il

vous a esté recité cy dessus: partant il luy dist, Ma dame Garaye, vne si excellente Damoyelle come vous, ne se doit point prendre à ceux qui se sont desia rendus. Je confirme (dist dō Arlanges) le premier conseil que ie leur ay donné, à fin que par tel chastiment vous apreniez desormais à estre moins malicieux: L'épeneur cognoist desia qui il estoit par les nouvelles qu'il auoit autresfois entēduēs de luy, leur dist, Tout beau, mes Damoyelles, & ie vous prometz que desormais il commencera à s'amender. Alors le roy Amadis arriua avec toute sa compagnie, & Galtasire sachant qui il estoit, s'ap procha pour luy faire la reuerence. Mais le Roy sachant que c'estoit le Fraudeur lequel estoit ainsi martiré, commanda qu'on luy ostat l'armet pour luy faire prendre aleine, ce que lon fit, & lors le Fraudeur fagnāt estre fort cassé & rompu, feit semblant de ne se pouuoit releuer, & chacun estant à l'entour de luy, le Roy luy demanda quel dommage il auoit fait à ces Damoyelles, veu qu'elles le traitoient tant rigoureusement. Je ne fey iamais dommage à personne (respondit il) & pour vn à qui ie pourrois auoir donné quelque chastiment, i'ay profité à plus de mil autres. Declarez-nous ce secret, dist le Roy. Sachez mōseigneur (dist-il) que iamais ie ne pris cheual, ny palefroy, à Cheualier, ny à Damoyelle, que ie ne les laissasse auisez pour long temps de la maniere come ilz se deuoiet gouverner en passāt pais, si que beaucoup d'autres par leur exemple ont esté rédus trop plus sages qu'au parauant, sans toutesfois auoir iamais fait mal à personne. Or puis que les loix permettent le chastimēt, voirez quelquefois la mort d'un seul, pour le bien general de tous, il est trop raisonnable qu'il soit semblablement permis à vn seul d'vser de tromperie, à fin que tous ceux qui vont par pais, se sachent mieux garder des dangers ou ilz peuuent tomber d'heure en autre. Cha-

cun se prit à rire de ces paroles, & lors le Roy dist, Certainement il a bien fonde sa iurisdiction, & me semble qu'il sera meilleur de luy redre son cheual, & l'em mener avecque no' pour nous faire passer le temps, car la grace ne luy manque point à fin de nous aprestre assez à rire par les chemins. Dieu vous vueille rendre la pareille, dist l'Afronteur. Et adonc on luy amena son cheual bien bridé, & le monterent dessus à grande peine, car il faisoit semblant de ne se pouuoit tenir dedans les arçons, se plaignant qu'il estoit tout rōpu. Les Princes l'ayant mis au my lieu d'eux, Galtasire fort ioyeuse de ce qu'elle auoit fait, se mesla en leur compagnie, & lors le roy Amadis luy demanda en quoy le Fraudeur l'auoit ofensee. Monseigneur (respondit elle) ce bon rustre trouua moyē que deux Cheualiers fort aagez, lesquelz par honneur ie menois en ma compagnie, de vieux qu'ilz estoient deuinsent ieunes & assez folatres. Que dites vous, monseigneur (dist l'Afronteur voyāt que le Roy auoit la barbe & les cheveux blancs) que donneriez vous pour recompēse à celuy qui vous seroit auteur d'un si grand bien? Le roy se prit à rire, & luy dist, Veritablemēt ie luy otroyrois tout ce qu'il me voudroit demander. Or voyez donc, sire (dist le Fraudeur) comme les bōs seruices sont bien guerdonnez en ceste contree: car pour luy auoir fait deuenir ses deux Cheualiers ieunes, elle s'est essayee à me faire deuenir vieillart. Chacun se prenant à rire, le Roy luy dist, Comment entendez vous celā? Fort bien (dist-il) car si ie n'eusse esté plus ieune qu'il ne m'estoit besoing, i'eusse bien sceu quelque tromperie pour la tromper, en lieu que i'ay esté trompé. Toutefois si elle a encores quelque ocasiō de se plaindre de moy, qu'elle me le dye, car ie luy respondray aussi bien à toutes ses questions comme i'ay fait à la premiere. Galtasire fort ioyeuse luy dist, Si ay vraymēt i'ay encores à me

plaindre de vous car outre ce que vous fistes deuenir ieunes mes vieux Cheualiers, vous les enfermaistes en vne cage, comme si vous leur eussiez voulu apprendre à parler. Et vous semble-il (respondit l'Afronteur) qu'en celà ie leur eusse fait peu de grace pour m'en donner vne si mauuaise recompense? Vous sçavez bien encores que ie ne leur aye rié appris en ma cage, par ce qu'ilz n'y voulurent arrester qu'à tout le moins ie leur ay donné le moyen de faire rire vn grand nombre de personnes à qui ilz le peuuent auoir conté depuis. Toute la troupe se print fort à rire de ces propos: ce qui fust occasion à Galtasire de luy dire: Puis que vous respondes si bien à tout, dites moy encores s'il vous plait qui vous mouuoit à pendre les deux pauures vieillars avec le caualion aux fenestres de vostre logis, & à les laisser là toute la nuit & vne grande partie du iour. Ie le fi (respondit-il) par ce qu'apres leur auoir faict en ma maison, tout le bon traitement & tout l'honneur duquel ie m'estimois peu auiser, ilz vouloyēt, les ingrats, escheller ma forteresse, & enleuer à la desrobee, mes sœurs qui estoient dedās. Mais apres que de vieux ie les eu rendu ieunes, ie leur voulois faire prédre vn peu le serain, tāt pour les acoustumer à porter les armes, que pour leur apprendre à ne craindre les tenebres de la nuit, par ce q̄ cest le vray office des gēs ieunes & amoureux, cōme ilz estoient, & cōme vous sçavez, la coustume est vne autre nature: partant si ie les eusse peu acoustumer à endurer le serain, ilz n'eussent plus eu crainte de demourer au guet toute vne nuytee. C'estoit la raison (dit Galtasire) qui vous les fit mettre en chausses & en pourpoint comme sauuages, & au mylieu d'eux, le caualion en lieu d'armoiries. Pésiez vous ma Dame, dist-il, qu'ilz fussent mal propres à cest office? Non veritablement (dit elle, selon l'aage qu'ilz auoyent, & la folie qu'ilz monstrerent en cest endroit:

mais puis que i'ay commencé à vous faire mes plaintes, ie vueil acheuer, & sçauoir de vo' pourquoy vous fistes si mauuais traictement au Cheualier noir, qui vouloit deliurer les deux vieillars, en le faisant attendre plus de deux grosses heures pensant auoir combat contre vous. Ie vous diray, respondit il, ie ne luy fi en celà aucun mal qui ne luy fist tresgrand bien, au moins s'il l'eust peu cognoistre? Quel bien? dist Galtasire. Demandez vous quel bien? respondit il, vrayement ie vous le vueil apprendre, puis que vous ne le sçavez encores point, c'ēt que voyant arriuer vn si beau corbeau, ie pensay qu'il se voulust venir repaistre des viandes qui estoient pendues deuant luy c'est assauoir des deux vieillars & du mostre, partant à fin de ne l'espouuenter, ie m'ostay de la fenestre, pour luy donner meilleur loisir de prendre son repas: mais depuis, voyant qu'il estoit party tout affamé, nous luy escriames qu'il retournaist, & qu'il ne s'eslognaist point du lieu ou il pouuoit tant bien faire son profit. Si en celà ie fi mal mon deuoir, ie m'en raport à tous ces bons Seigneurs. Il n'y auoit celuy en la troupe, qui ne fust fort ioyeux d'ouyr les railleries de l'Afronteur, car il les disoit d'vne fort bonne grace: ce que voyant dom Arlanges, à fin d'acroitre leur passe-temps d'autant d'auantage, il luy dist: Mais quelle raison auiez vous, beau Sire, de mettre Daraide & la damoyelle qui la conduisoit en vn boubier, d'ou elle ne se peut rauoir qu'à grande peine, & peu s'en fallut qu'elle ny demeurast pour toute la nuyt. Ie voulois (respondit-il) la guerir d'vn plus grand mal & ou il se trouue moins de remede qu'en aucune autre maladie, c'est du feu incurable de l'amour qui la tenoit cruellement embrasée. Et quelle belle cure luy vouliez vous faire? dist dom Arlanges. Vrayement (respondit l'Afronteur) veu que vous auez autres-fois passé par mes mains, ie ne pésois point vous auoir laissé

laissé si mal aisé, que maintenant vous me deussiez faire vne demande tant mal à propos. Pourquoi? dist dom Arlanges. Ne sçavez vous point (dist-il) que la froidure de la nuit & l'humidité de l'eau sont choses fort propres pour temperer la chaleur. Dites, s'il vous plaît, ne l'avez vous iamais expérimenté. Ouy bien, respondit dom Arlanges en secouant la teste. Si vous le sçavez (dist l'Afronteur) pourquoy me demandez vous vne si folle raison de la medecine que i'auois appareillee pour guerir la chaleur amoureuse de Daraïde. Par-ce (dist dom Arlanges) que pour vne telle medecine, il n'estoit point besoin d'y apliquer du boubier. De quel besoing parlez vous (dist il) pour bié l'entendre vous auriez besoing de l'expérimenter, puis que vous avez l'esprit si estourdy. Mais ie vous prie, Seigneur cheualier (dist dom Arlanges en riant) me declarer à quoy ceste bouë seruoit en vostre recepte? C'estoit (respondit-il) par ce que la faim, le trauail du iour, le serain, la froidure de l'eau, & la pesanteur des armes eussent esté cause de faire bien tost retirer Daraïde, & de ne vouloir prendre ma medecine, si elle n'eust esté atachee par les piedz & par les mains dedans le boubier. Et la damoysele qui la guidoit (dist dom Arlanges) de quoy luy pouuoit elle seruir aupres d'elle. Je vous le diray (respondit il) puis que vous voulez tout sçauoir, c'estoit à fin qu'elle seruist de sage femme à Daraïde, car i'auois entédu que souuentefois elle se laissoit esuanouyr de trop grande douleur: parquoy craignant que le trauail & la sueur de cete medecine ne la fist tomber en quelque palmoison, ce qui l'eut peu metre en peril de se noier dedans l'eau, ie luy voulu dōner celle damoysele pour compagnie, à fin qu'elle la soustint en ces esuanouissmens, & qu'elle luy peust ietter de l'eau au visage pour la faire retourner à soy. Voiez maintenāt si vous avez aucune occasion, de vous plaindre pour ce regard? Par Dieu non

(dist dom Arlanges) mais ie vous prie puis que vous m'avez si bien satisfait en ce qui touche Daraïde me satisfaire pareillement en ce qui me touche moy mesmes, & me dire pourquoy vous me laissez attaché dedans vostre tante, habillé comme vne vieille forcieri. Estes vous Garaye? dist l'Afronteur. Je l'estois pour le moins (respondit-il) en ce temps là, & m'en souuent fort bien. Maintenant (dist l'Afronteur) que vous m'interrogez à bonne occasion, ie prendray plaisir à vous respondre. Je le fy par-ce que vous estant si belle Damoysele, me sembleriez courir les champs assez dissolument, sans auoir bien peu d'esgard à vostre hōneur, vous ozant déguiser dessous l'habit d'un Cheualier. Moy donc prenant pitié de voz folies, vous voulu remettre en vostre sens, & partant ie vous fy asfoir. Je voulu aussi vous acoustrer honorablement, ce qui me fust occasion de vous faire coiffer comme vne matrosne: & si vous me demandiez pourquoy ie vous laissay la attachee, ce fust pour ce que les commencemens de toutes choses sont vn peu difficiles, & ne les peut-on apprendre que par coustume, vous assurant que si iusques à ceste heure vous fussiez demeuree là, vostre colere se fust si bien temperee & rapaysee, que vous ne eussiez point repris les armes comme ie voy que vous avez fait. Adōc tous ceux qui estoient en la compagnie se prirent à rire, & l'Afronteur voyant qu'ilz y estoient si ententifz qu'ilz ne songeoyēt à autre chose, donna en sursault des esperons à son cheual, & à bride abbatue, se desmella d'entr'eux, courant en poste vers vne forest qui estoit à main senestre sans que personne le suyuit, d'autant qu'il auoit desia gaigné si grand auantage, qu'il leur eust esté impossible de le rattraindre au moyen de son cheual qui courroit fort bié, car il auoit tousiours accoustumé en telles entreprises d'estre monté à l'auantage. Vray est que quelques vns

qui alloient à pied luy escrierent qu'il retournaist, mais il ne leur fit aucune response, & ne cessa de courir ayant la teste nue, & l'espee desgaingee, iusques à ce qu'il fut entré dedans la forest, ne faisant moins rire toute la compagnie par sa fuyte, qu'il l'auoit au parauant faict rire par ses paroles. Ainsi s'en allerent ces nobles Princes deuifans de celle récôte, iusques à ce qu'ilz arriuerēt en vn chasteau ou ilz repeurent en grande ioye, & sur la fin du dîner entra vn homme à pied, qui leur presenta vne lettre, laquelle ilz descheterent incontinent, & la trouuerēt de telle teneur.

LETTRE.

Aux tresexcellens Princes & Princesses de Grece, l'Affronteur des ruses, Seigneur des cautellès, chasteur des nonchalans, cōseiller des voyageurs, & trompeur des mieux conseillez : Salut vous enuoye, à fin qu'aucq iceluy vous vous puissiez maintenir en repos, iusques à ce que vous ayez faict l'experience de mes stratagemmes. Je suis sorty de vostre puissance, & me retrouve maintenant en la mienne, apres auoir esté autant bien traicté par les damoysselles, comme iay delibere de les traiter, si quelquefois ie les puis auoir en mon pouuoir, pour leur en rendre la pareille. Ce qui me fait souhaitter, mes Seigneurs, de vous tenir bien tost tant que vous estes, entre mes mains, comme ie pense qu'il auindra, si les profeties de mes Dieux ne me deçoiuēt: car ie trouue par icelles, & vous en souuienne si bon vous semble, que bien les forces affrontereffes, domteront par vne secreete imboscade, la maison de Grece, & que les braues Lyons du Cheualier Liebrastron ferōt subiuguez, & les forces de leurs ongles affoyblies, iusques à ce que le Seigneur des Ruses, les remette en liberté, par les obscures nuees de son sçauoir, à sa grande gloire & à la louenge de celuy qui les fera iouyr de celle clemence, pour

le guerdon de la rigueur passée : & en attendant celle guerre, ie vous enuoyeray la paix, sans laquelle il est impossible de bien dresser ce qui est necessaire à vne armee.

Chacun fut fort resiouy par ceste lettre du Fraudeur, disans qu'apres les auoir auiléz de son entreprinse, ilz n'auroyent aucun moyen de se plaindre s'il auenoit qu'il les trompast. Et ayans interrogé le messager ou il l'auoit laissé, il respondit qu'il luy auoit donné la lettre en vn chasteau, qui estoit assez pres de là, & qu'incontinent apres il s'en estoit entré dedās vne epouille forest. Adōc les Princes tous ioyeux retournerent à leur chemin, & Galtasire accompagnée de ses Damoysselles marcha deuant au grand galop pour faire sçauoir en la cité de Guindaye la venue d'vne si noble compaignie.

Comme les Princes cheuauchans vers la cité de Guindaye furent mis en grand confusion par le moyen d'un Cheualier qu'ilz rencontrerent par les chemins.

CHAP. LXVII.

GAltasire & ses Damoysselles qui alloient deuant la grosse troupe, comme il vous à esté dit, à fin de porter les nouuelles à la Royne Sidonie de la venue de ces Princes, enuiron soleil couché, virent venir deuers la cité de Guindaye, vn Cheualier armé d'vnes armes iaunes & monté sur vn grand cheual tout couuert de sueur pour la grand' haste dont il cheminoit. Galtasire, estant le Cheualier aupres d'elle, luy dist: Là! Seigneur Cheualier, qui vous fait marcher en si grande diligence. C'est, dist-il, la plus grande deffortune du monde, & la plus malheureuse trahison dōt iamais lon ayt ouy parler: car vous deuez sçauoir, mes damoysselles, que ceste nuit, nous ne sçaurions dire, commēt ny de quelle part, vne grande armee, sans estre aperceue, est venue enuironner la cité & luy à donné l'assault

l'assault si furieusement, qu'aujourd'hui sur les trois heures, nonobstant la résistance qu'on ayt peu faire, les ennemis sont entrez dedans, & ont mis au fil de l'espee tous ceux qu'ilz ont peu rencontrer. Et apres plusieurs execrables meurtres, ilz sont sortis victorieux par quatre portes, à fin qu'en vne mesme temps ilz puissent courir par les quatre parties de l'Isle, pour la destruire, & ruyner, & mettre à mort tous les habitans. Quant à moy ie suis à grand'peine eschapé des dangers, & m'en vois maintenât icy pres en vn myen chasteau, ou ie retireray tel nombre de gens qu'il me sera possible, mesmement ceux qui auront enuie de se sauuer, car i'espere que nous pourrôs faire quelque bon acord avec celle partie de l'armee qui est desia assez pres'd'icy, tuant & sacageant tous ceux & celles qui se trouuent au deuant, sans en prendre aucun à mercy. Galtasire moult estonnée de ces nouvelles s'escria. O Dieu quel malheur s'il est ainsi cômme vous dites ? Il n'y a point de doute, respondit il, partant si vo' aimez vostre vie, suitez moi, car pour mon regard ie ne suis delibere d'atendre icy vne impitoyable mort. Et ce disant, donna des esperons à son cheual, suyuant son chemin en aussi grande haste qu'au parauant. Les Damoyelles en pleurant chassoyent de leurs houffines leurs palefrois à la plus grand' vistesse qu'il leur estoit possible, tellement qu'en peu de temps en suyuant le Cheualier qui courroit deuant, estant desia nuyt noire, elles retrouvèrent le Roy Amadis & sa compagnie qui alloient vers la cité. Et comme ilz eussent demandé au Cheualier qui luy faisoit vsr de si grande diligence, il leur respondit : Ie ne puis m'arrester, ny vous passer plus auant, si vous estes sages, mais vous pourrez sçauoir de ces Damoyelles, si bon vous semble, ce que vous demandez : toutesfois si vous voulez croire mon bon conseil, suyuez moy comme elles font, & vous ne sçau-

riez que vous en trouueriez bien. Avec ces paroles il brocha des esperons, comme si la foudre l'eust emporté, dont les princes se troublerent fort, & beaucoup plus qu'ad ilz entendirent de Galtasire la cause pourquoy il s'enfuyoit tant hastiement. En ce trouble, ilz accorderent de suyure le Cheualier, pour se metre avecque lui, & tenir fort dedans son chasteau, pensans que ce fust le meilleur conseil, iusques à ce qu'ilz eussent entendu plus au long la verité de ces nouvelles. Selon ceste deliberation, chacun pleurant le malheur auenu à la Roine Sidonie, & à leurs amys & compagnons qui estoient avec elle, ilz suivirent le cheualier, pensans que les Princes de leur parantage qui estoient en la cité de Guindaye, eussent esté tuez, ou à tout le moins pris prisonniers. Ainsi cheuauchâs, le Cheualier se destourna du grand chemin en vne petite dressiere, par laquelle les Princes suyuirent iusques iur la minuyt qu'ilz arriuerent avec les Princesses fort lassees & esplorees, en vn chasteau ou ilz pensoient que le Cheualier fust entré, par ce que l'obscurité de la nuyt leur auoit fait perdre de veüe, ioint qu'il alloit fort loing deuant eux & que les palefrois des Princesses que les Princes n'ozoyent laisser, ne pouuoient courir si hastiement. Les tristes Dames ne se pouuoient aucunement consoler en leur douleur, bien que les Princes en fissent leur deuoir, disans que dom Florisel, & la roine Alastraxere, & son mari auoyent esté occis, qu'ilz prendroient la plus cruelle vengeance de laquelle on eust iamais ouy parler. Or estans arriuez au chasteau, ilz trouuerent la porte bien fermee & barree par dedans, & entendirent quelques gardes ou autres qui faisoient la rôde, à raison dequoy l'Empereur crya à haute voix. Qui est à la garde ? L'un de ceulx du chasteau luy respondit, mais vous, que faictes vous là ? Mon amy, dist l'Empereur, ie vous prie me dire si ceans est point entré vn Cheualier, qui

qui portoit vnes armes iaunes. Ouy, dist celuy du chasteau. Allez luy donc dire s'il vous plaist (dist lors l'Empereur) que nous le prions de nous faire ouurir la porte, car nous l'auons suyui ainsi comme il auoit dit à noz Damoysselles. Atendez vn peu (dist la garde) car ie le feray parler à vous. Tantost apres entre les creneaux de la muraille, se monstra vn Cheualier armé de toutes pieces, fors que la teste, & leur dist, Seigneurs Cheualiers, Grandanis mon maistre dit que le temps ny l'heure ne permet point de recevoir en son chasteau des Cheualiers en armes sans autrement les cognoistre: & partant que vous luy pardônez, car vous ne pouuez entrer ceans qu'il n'ayt meilleure assurance de vous: & quand bien vous y seriez le chasteau est tant plain de Cheualiers, & de cheuaulx, que voz montures ne pourroient estre logees qu'en quelque court. Ces paroles ne pleurent pas beaucoup aux Princes, neantmoins l'Empereur dist à celuy du dedans, Mon bon amy, dites à Grādanis que nous sommes gens auquelz il se peut fier, & que nous sommes pour bien luy ayder à garder son chasteau: car sachez que le roy Amadis mōseigneur est icy, avec plusieurs autres Roys & Princes qui luy tiennent compagnie. Ainsi que l'Empereur acheuoit ses paroles, vn autre Cheualier s'apparut sur la muraille qui luy dist, Seigneur Cheualier, ie suis Grandanis, sachez qu'en tēps de guerre & de si grand peril, lon ne se doit fier en ceux que lon ne cognoist, car quelle assurance puis ie auoir que vous soyez ceux que vous dites, aussi me semble-il vn peu estrange que vous venez en si bon equipage deuant mon chasteau. Quelle assurance voulez vous que nous vous donnons? dist l'Empereur. Que vous laissez les armes (dist Grandanis) si vous voulez entrer ceans, car sans vous cognoistre autrement, ie n'ay garde de vous faire ouurir les portes. L'empereur se tournant

vers le Roy, luy dist, Monsieur, que vous plaist-il que nous facions? Il me semble (dist le Roy) que nous nous devons accommoder au temps, & puis qu'en autre maniere nous ne pouuons auoir logis, il nous conuient entrer leans souz les conditions qui nous sont proposees: car si lon prend les armes pour deffendre sa vie, on les peut bien aussi laisser pour l'assurance d'icelle mesme: comme maintenant, que la necessité, & le peril ou nous sommes, nous contraignent de nous y acorder. Adonc l'Empereur dist à haute voix, Seigneur Grandanis, s'il vous plaist nous entrerons souz les conditions que vous auez dites, iusques à ce que vous soyez mienx assuré de nous, partant il vous plaira nous faire ouurir. I'en suis content (respondit Grandanis) mais ce pendant que ie descendray, laissez voz armes, & les mettez toutes en vn monceau en ces buissons, que vous voyez là pres, à fin que si par cas d'auanture les ennemys venoient, ilz ne les puissent trouuer. Acheuant ces paroles, il se retira au dedans: & ce pendant les Princes laisserēt leurs armetz & leurs espees dedans la haye qu'il leur auoit monstre, puis s'approcherent de la premiere porte du chasteau, qui leur fut incontinent ouuerte par vn Cheualier, & entrans en la basse court, ilz trouuerent à la seconde porte du Chasteau, six ou sept Cheualiers armez qui leur dirent qu'ilz se missent à pied, & entrassent, ce qu'ilz firent, & prenant les Princesses par la main, passerent par dessouz ce portail, dedans vne autre court. Mais si tost qu'ilz furent tous entrez, les Cheualiers qui estoient souz le portail demurerent derriere, & fermerent la porte sur les Princes, avec vn grād verrouil & deux barres de fer, puis mettant la main aux espees coururent vers les seruiteurs des Princes qui tenoient leurs cheuaulx, & les palefrois des Princesses, disans qu'ilz les laissassent: ce qu'ilz firent, & de grād' peur s'enfuyrent dehors,

dehors. Adonc les seruiteurs du chasteau prirent les cheuaux & les palefrois, & les sept cheualiers tirerent les leurs hors de vne estable qui estoit la pres, & avec vn bon nombre de leurs seruiteurs s'en allerent vers la haye, ou les Princes auoyent laissé leurs armets & leurs espees, lesquelles ilz prindrent, & s'en allerent au trauers des chāps sans tenir voye ny sentier. Ce pendant les Roys & les Roynes qui atendoient leur hoite & ses gens en la seconde court, apres auoir demeuré là long temps, voyans qu'ilz tardoyent beaucoup a venir, l'Empereur & dō Arlanges d'Espaigne tournans vers le portail par lequel ilz estoyēt entrez & trouuans la porte fermee par dehors, apellerent a haute voix les seruiteurs de leans mais voyant que lon ne leur respondoit point, & qu'ilz n'entendoyent aucun bruyt, ilz retournerent a la compagnie, a laquelle l'Empereur dist: Je croy que nous auons esté abusez. Pleust à Dieu, qu'il fust ainsi (dist la Roine Oriane) & que par ceste tromperie les mauuaises nouuelles, que nous auons eues de la prinse de Guindaye, ne fust autre chose que mensonge. Pourquoi dites vous, que nous sommes abusez? dit le Roy. Alors l'Empereur luy en dist les raisons. Il ne sera dōc point mauuais (dist lors le Roy) que nous montons la hault, a fin de mieux nous enquester de la verité. C'est tresbien dit, respondit Amadis de Grece. Et ainsi les Princes monterēt dedans le chasteau, laissant les princesses en la court, mais sachez qu'ilz ne trouuerent corps ny ame en toutes les chābres & n'y auoit aucun meuble, ny chose de quoy on se peut aider, estant le plancher en plusieurs endroitz a demy fondu & ruyné. Et par-ce qu'ilz virent quelque lumiere en vne chambre, ilz allerent celle part, & y trouuerent vne chandelle de poix rezine ardente, plantee dedans vn gazon de terre qui seruoit de chādelier, ioignant lequel y auoit vn escriteau

contenant certains vers que l'Empereur leut incontinent, & dit: Par Dieu voycy vne des plus belles ruses dōt nous ayōs encores ouy parler. Qu'est cela? dist le Roy Amadis: Escoutez (dit l'Empereur) ce que contient cest escriteau. Adonc il le leut deuant tous en ceste façon.

*Garde toy mienx, Roy de la grād Bretagne,
Vn autrefois quand tu trauerseras
La bocageuse & plaisante compaignie,
Ou l'Afronteur tendiour & nuyt ses las:*

*Et te repais maintenant de sornettes
Ainsi qu'au soir, car en tout mon chasteau,
Il n'y a pot, napes, ny seruiettes,
Table ny banc, ny pain, ny vin, ny eau.*

*Le vent & l'air tu auras pour viandes,
Et pour ton lit la terre & le plancher,
Celuy qui fuyt auant que voir les bandes
Des ennemys, merite ainsi coucher.*

Ayant acheué de lres ces vers, ilz prindrent la chandelle, & les allerent monstrier aux Princes qui estoyent en la basse court. Mais par-ce qu'ilz entendirent cryer quelqu'un hors du chasteau, ilz mōterēt a vne haute fenestre, qui regardoit celle part d'ou estoit venu le cry & virent vn cheualier biē armé, & encores mieux mōté qui cryoit a haute voix: O, o, Seigneur Roy Amadis. Et par-ce qu'on luy demanda ce qu'il vouloit, il respondit: Je voudrois fort sçauoir s'il est bien seant a vn Roy de telle reputation de prendre ainsi contre tout droit, la seigneurie d'un chasteau qui ne luy appartient, & chasser le vray Seigneur dehors: & encores en vn temps de si grosse guerre, & laisser les murailles sans faire bon guet toute la nuyt. Je m'esbahys aussi cōme luy estant si aagé, & tant bien auisé il à eu si tost mis en oubly la prophetie que ie luy auois mandee par ma lettre & le veux encore auertir que s'il prit
hier

hier au soir vn grand passe-temps à mes railleries, qu'il face maintenant vne fricassée pour son souper & pour ses compagnons, les supliant toutesfois prendre patience, puis qu'ilz ont assez souuēt expérimenté les inconstances de la fortune. A ces paroles ilz cogneurent, que c'estoit l'Afronteur, qui les auoit ainsi abusez: partant dom Arlanges luy dist: Je pensois que pour auoir esté si mal accoustré le dernier soir, vous eussiez abandonné cest office. Je pensois aussi (respondit il) que ma lettre vous eust laissé mieux aisé & plus sage que vous n'estes: neantmoins ie suis fort ioyeux que en recompense du passetemps lequel vous pristés de moi par raillerie le soir passé, ie preigne maintenant de vous à bon esciant, la recreation de vous auoir laissé sans cheuault & sans palefrois: car si vo^s me laissastes accôpagné de coups de pierres, maintenât ie vous laisse acompagné de pulces, & de poulx, & d'autres semblables animaux, qui ne faudrôt point à vo^s aller faire la reuerence en bonne compagnie, en quelque part de mon chasteau, que vous puissiez coucher. Or deormais s'il vous plaist nous demourerons bons amys, puis que nous nous sommes si bié satisfaitz d'une part & d'autre: car quât à moy ie vous promets de ne dire iamais à personne comme les Princes de Grece, tremblans de peur tournerét le dos aux ennemys, & que de grande crainte ilz se mirent à fuyr sans voir aucune raison pourquoy. Ce qui m'a esté occasion de vous laisser sans aucuns litz, car ie ne vous ay voulu donner le moyen d'estre trop endormys & paresseux, voyant la grande diligence de laquelle vous auez v^{lé} pour vous sauuer. Nous prendrons tout en patience (dirent les Princes en riant) moyennant que vous nous rendez noz cheuaults & palefrois, à fin de pouoir fuyure nostre chemin: & si vous ne les voulez rendre de vostre seule liberalité, à tout le moins rendez les à rançon

puis que vous les auez pris en si bonne guerre. Il me semble (respondit le Fraudéur) que vous ne dites point trop mal, & vous mettant à la raison, peust estre que ie m'y mettray aussi, maintenât que ie suis recompensé de la tromperie que vous m'avez faicte, & que i'ay gagné l'auantagé sur vous. Ce pendant qu'il estoit fort ententif à ces deuils, trois escuyers des Princes, du nombre de ceux qui s'en estoient fuiz au parauant qu'ad on leur auoit osté leurs cheuaults, sortiront d'une haye ou ilz s'estoient cachez & voyans qu'il n'y auoit plus que luy seul, vindrent si tout bellement par derriere qu'ilz eurent le loysir de couper les iaretz de son cheual, & ainsi que le pauvre malheureux tomboit, les trois Escuyers l'embrasserét au trauers du corps & commencerent à crier à haute voix, le Regnard est pris au piege. Les Princes leur ayans commandé qu'ilz ne l'occissent: Ne ferons-nous non (respondirét ilz) car par-ce moyen il ne scauroit estre si bien chastié comme il merite: mais nous voulons essayer à donner à sa folie vne medecine pareille à celle qu'il receut hier. Et lors sans plus long delay, encores que les Princes leur dissent que ilz vinssent ouurir, ilz prirent l'Afrôteur & le disposillerent tout nu: puis le lierét à vn arbre, & luy ayans deschiqueté toute la peau à coups destruiueres, ilz aporтерent d'un fossé grâde quantité de bouë, de laquelle ilz le gresserent de toutes parts, en lui disât. Tu ne te pourras plaindre monsieur le Regnard, que nous ne te facions fort beau & sage. Mais il ne respondoit à chose qu'ilz luy peussent dire ains ne faisoit que se laméter. Pourquoy les Escuyers lui dirét: Sus sus maistre Cameleon, soupe toi d'air ainsi côme tu no^s as fais souper, ou si tu n'es Cameleon, & que l'air ne te puisse repaistre, à tout le moins côme corbeau vy de vent pour quelque temps, puis que nous te laissons comme le corbeau, & que tu ne pourrois estre

estre plus noir. Auresce garde toi bien de dormir, car nous te laissons pour sentinelle de l'armee, de laquelle tu nous as au iourd'huy apporté les premieres nouvelles: Acheuant ces paroles, l'un des autres Escuyers dist à ses compagnons, Puis que nous le laissons pour sentinelle, il ne fault pas le laisser sans fumee. Et incontinent tirans leur fuzil, duquel ilz n'estoient iamais despourueuz, allumerent du feu dedans vne poignée de paille, lequel ilz estaignirent soudainement, puis luy atacherent au menton, à fin que la fumee luy en montast au nez: & ainsi le laisserent fort trauaillé, puis retournerent au chasteau, par-ce que les Princes leur cryoyēt qu'ilz vinsent ouurir & qu'ilz ne fissent aucun mal à l'Afronteur. Ilz y allerēt mais ilz ne sceurēt oncques ouurir la porte, d'autant qu'apres auoir osté les barres il y auoit encores vne serrure qui fermoit à ressort, de laquelle les gens de l'Afronteur auoient emporté les clefz en emmenant leurs cheuaults. Partant Amadis de Grece leur dist qu'ilz y missent le feu ce qu'ilz firent, dont l'Afronteur se trouua fort bien, car ilz luy osterent la poignée de paille qui lui fumoit deffous le nez, pour en allumer le feu aux portes. Ce pendant qu'elles se brusloient les Princes descendirent en bas, & conterent aux Princesses tout ce qui se faisoit dehors, dōr elles furent si ioyeuses, mesmement de sçauoir que ce qu'on leur auoit dit de la prinse de Guindaye estoit mensonge, qu'elles ne pēsoient plus au trauail ny à la faim qu'elles enduroient, se prenant souuentes-fois à rire de la trousse qu'on leur auoit iouee. Adoncq' Galtasire leur dist, Veritablement, messeigneurs, vous fistes fort mal d'auoir destournee ce que mes Damoyelles & moi auions appareillé à ce traystre, car si vous n'eussiez laissé faire, vous n'eussiez point ainsi esté trompez, & les Escuyers n'eussent gagné sur luy la victoire qui iustement nous estoit deuë. Il vault mieuz (dist le roy Ama-

dis) que les choses aillent ainsi, à fin que la punition de son forfait luy soit donnee par la main des Escuyers, & la misericorde de le detacher par celle des Damoyselles: car c'est à elles à qui la pitié & la douceur sont principalemēt bien scantes. Sur ma foy (dist Galtasire) ie ne veux point qu'on trouue en moy de pitié, car il m'est redeuable de beaucoup plus qu'on ne lui a encores fait souffrir. De ces paroles toute la cōpagnie se prit à rire, & continuans en ces gracieux deuis, Amadis de Grece se sachant d'estre si long temps enfermé, s'en alla au portail pour voir en quel estat les portes estoient: mais à son arriuee les gonds estoient desia separez des portes, au moien de quoi elles tomberent, & il sortit dehors, laissant deuiser les Princes de la tromperie que l'Afronteur leur auoit faite, & de la pareille que les Escuyers luy auoient rendue.

De ce qui auint à l'Empereur Amadis de Grece apres qu'il fut sorty du chasteau.

CHAP. LXVIII.

Incontinent que les portes du chasteau furent tombees, l'Empereur sauta legerement par dessus la flamme, & prenant l'armet & l'Espee de l'Afronteur, s'en alla au lieu ou il estoit ataché, & luy dist en haussant l'espee, Par Dieu maistre pendart, ie vous trancheray la teste, si promptement vous ne me dites ou sont ceux qui ont emmené noz cheuaults. L'afronteur craignāt de mourir luy respondit, Pour Dieu, Seigneur, ayez pitié de moi, & me destachez, car ie vo^s meneray moimesmes là ou ilz sont, vous assurant qu'ilz ne sont pas loing d'icy. L'empereur coupant les saintures des Escuyers, avec lesquelles il estoit ataché, luy dist, Or sus marchez donc deuant, & m'y conduisez. Mais il ne se sentit si tost en liberté qu'il s'enfuyt legerement, par vn petit sentier, & luy dist en courant. Atendez moy tant seulement, car ie reuiendray tout à ceste heure,

heure, pour vous mettre au lieu dont vous m'avez osté. Il luy fut assez facile de s'enfuyr, par-ce que les Escuyers estoient à l'entour des portes, pour en oster le feu, à fin que lon peust passer, & si tost qu'ilz virent l'Afronteur detaché fuyant avecque vne telle allegresse, ilz commencerent à crier à haute voix apres luy, Voyla le Regnard delié qui s'en va encores machiner quelque autre trahyson. L'epereur ne cogneut la faute qu'il auoit faite, iusques à ce qu'il le vist fuyr par le sentier, neantmoins il le suyuit pësant qu'il allast vers ses compagnons, comme à la verité il s'y en alloit: & d'autant plus l'Empereur le creut, quand il vid non guieres loing de là, vn feu allumé, aupres duquel ilz soupoient s'esbahissans cōme le Fraudeur ne retournoit plustost. Or Amadis de Grece taschoit fort à les surprendre au despourueu, car ilz estoient huyt Cheualiers, & dix vilains, mais l'Afronteur qui couroit plus legierement, arriua le premier aupres d'eux, & commença à crier, Armes, armes, puis qu'ilz n'en ont point, à fin que nous les recompensions de l'iniure qu'ilz m'ont faite. Quand ilz le virent nu, & ainsi emboué tout le corps, ilz lasserent soudainement leurs armetz, & les vilains s'armerent d'arcz, de haches, & capelines, & l'Afronteur prit vn armet & vne espee de ceux que lon auoit vollez aux Princes. Ainsi marchans tous ensemble à l'encontre de l'Empereur, deux des Cheualiers alloient deuant, & l'Afronteur apres eux, & bien tost rencontrerent Amadis de Grece, ayant son espee en la main, & venant vers eux fort hardiment. Si les assaillit avecque telle fureur que des deux premiers coups, il abarit les deux premiers rencontrez, roydes morts par terre: ce que voyant l'Afronteur, sans plus attendre faulta à trauers les hayes, fuyant de toute sa course, & ietta son armet par terre, à fin qu'il ne luy empeschast la veüe: puis se mit en lieu du-

quel il pouuoit facilement regarder ce qui auendroit de la meslee, pour s'enfuyr si la necessité l'y contraignoit. Cependant ceux qui estoient enuironnerent l'Empereur de tous costez, le blessant en plusieurs endroitz, mais il faipoit si courageusement à dextre & à senestre, que celuy qu'il pouuoit ataindre, n'auoit aucun meltier d'estre frapé de pl^{us} d'vn seul coup, pour passer promptement de ce monde en l'autre: de sorte qu'en peu de temps aucun des Cheualiers ne demeura en vie, & les vilains qui estoient desarmez, craignāts ses horribles coups, ne s'osoient aprocher de luy, encores qu'il n'y en eust que deux morts, & vn blessé. L'afronteur fut fort desolé voyant ses compagnons occis, & les merueilles que faisoit l'Empereur, & que les vilains ne s'osoient aprocher de luy, d'autant qu'ilz luy auoient tiré toutes leurs fleches, lesquelles il auoit receuës sur son escu, car il auoit trouué le moyen de combattre, ayant le dos tourné contre le pied d'vn gros chesne, à fin de n'estre assaillly par derriere. En ceste extremité le Fraudeur s'auisa d'vne autre ruse, & sortant du buisson ou il estoit, cria à haute voix aux païsans, Sus, sus compagnons mes amys, puis que nous n'en pouuons autrement venir à bout, traitons le en la mesme façon que les Damoysselles me traitèrent hier. Adōc ilz commencerent tous ensemble à luy ruer force pierres, dont le lieu estoit assez bien garny, & scauoient si bien se gouverner entre les hayes, qu'il luy estoit impossible de les ataindre, ny tāt soit peu aprocher d'eux: à raison dequoy il s'en retourna vers le chasteau prenāt le chemin du sentier par lequel il estoit venu. Alors les rayōs du soleil cōmençoient à se resprendre sur la terre, & les autres Princes à sortir du chasteau, estāt les portes toutes reduites en cēdre: & auoient deliberé de suiure l'Empereur, car les Escuiers leur mōstrerēt le sentier par lequel ilz luy auoient veu pēdre son

fuyre l'Empereur, car les Escuyers leur monstrent le sentier par lequel ilz luy auoyent veu prendre son chemin. Mais les Princes ne furent guieres auant, qu'il le rencontrèrent avecque la chasle que l'Afronteur & ses gens s'esfayoyent de lui donner, & comme ilz aperceurent la compagnie, ilz s'enfuirent l'un çà l'autre là, tellement que l'Afronteur qui s'estoit séparé d'eux en fuyant, demeura tout nu iusques au soir, quel'un de ses seruiteurs lui apporta quelque meschant saye pour se vestir. Or l'Empereur s'estant rassemblé avecque les autres Princes, il leur conta tout ce qui luy estoit aduenü, & s'en allerent de compagnie iusques au lieu ou il auoit trouué les compagnons du Fraudeur, chacun se esmerueillant de tant de morts, & ces estranges coups dont ilz auoient esté occis. Puis ayant retrouué leurs cheuaux, & palefrois atachez par les resnes à quelques arbres, avec plusieurs viandes que l'Afronteur & ces compagnons y auoyent laissées, ilz en firent emporter vne partie & monterent à cheual pour retourner arriere, faisās emmener les palefrois par les Escuyers. Estās arriuez deuant le chasteau, ilz trouuerent les Princesses assises en vn beau pré sur l'herbe verde, desquelles ilz furent tresbiē recueillis, & mettās pied à terre, se repeurent tous ensemble de ce qu'ilz auoyent apporté, car ilz en auoyent bon besoing, trouuans beaucoup meilleur goust en ces rustiques & champestres viandes, qu'en celles que lon auoit acoustumé de leur seruir sur leurs tables Royales. Cependant qu'ilz repaissoient, les Escuyers appellerent tous les autres seruiteurs qui s'estoyent cachez deçà & de là : & estans tous rassemblez, les Princes monterent sur leurs cheuaux, & les Princesses sur leurs palefrois, puis retournerent à leur chemin. Galtasire avec ses damoyelles partirent des premieres, à fin de s'en allet deuant, porter les nouuelles de leur

uenü, & raconter ce qui leur estoit aduenü dedans le chasteau desert, car il auoit nom ainsi : par-ce que long temps au parauant aucun n'y auoit habité à cause des, esprits malins qui y auoyent esté veuz, tellement que, fors l'Afronteur des Rufes, & ceux de sa compagnie qui l'aidoyent en ses entreprises, il n'y auoit personne qui oüst entrer dedans, de là il auoit escrit la lettre profeticque, & ordonné en son conseil de prédre vn autre cheual, & changer ses armes, faignant venir de la cité de Guindaye, pour iouer les Rufes, dont vous auez ouy l'issüe.

L'arriuee du Roy Amadis, & de la Roynne Oriane, en la cité de Guindaye, & comme ilz furent receuz par la Roynne Sidonie.

CHAP. LXVIII.

EN grand' langueur viuoit la Roynne Sidonie, pensant que le Roy Amadis & ceux qui estoient avecque luy en la maistresse nef, eussent fait naufrage, car toutes les autres nauz auoyent plus d'un mois au parauant, pris port en l'Isle de Guindaye, & ceux qui estoient veuz, en icelles s'estoyent retiré en la grande cité. Et ainsi que la Roynne parloit de enuoyer gens en queste, pour en entendre quelques nouuelles, Galtasire avecq ses damoyelles entra dedans la grand' sale, & s'agenouillant deuant la Roynne lui dist: Ma Dame, ie vous supplie me presenter voz belles mains, à fin qu'en les baisant ie vous face la reuerence que vostre grandeur merite, & que vous me doniez le guerdon des bonnes nouuelles que ie vous aporte. Car vous deuez sçauoir que vous aurez aujourd'huy en vostre cour, le tres excellent Roy Amadis de Gaule, l'Empereur Amadis de Grece, les Princes dom Arlanges d'Espagne, & dō Artexerxes de Monribel, le preux dom Florarlā de Thrace, & le nouveau Roy de Rodes, dom Galdes de Solstice, avecque l'excel-

R

lente

lente Royne Oriane, la belle Royne Garze, la Princeſſe Lucenie, & la Royne Grindaye. L'on ne vous pourroit exprimer la ioye, & le plaisir que dom Florisel & dō Rogel de Grece, & tous les autres eurent de la venue de ces Princes, apres les auoir tenuz assez long réps pour perduz. Et ayās demandé a Galtasire en quelle part elles les auoit laissez, elle leur raconta le tout à la verité sans oublier ce qui leur estoit aduenü avecque le Cheualier Afronteur, dont la risée fut grande, & lors la royne Sidonie dit d'une fort bonne grace : Maudit soit-il, car ce n'est ainsi qu'il doit receuoir en ma terre les personnes de telle renommée; & de si bonne reputatiō : parquoy il me semble que nous deuons, en leur donnant vn tresbō logis, recompenser le pauvre traitement qu'ilz ont receu la nuit precedēte. Et deſors elle commāda que lon aprestast vn magnifique logis au roy, & à l'empereur en la tour de Diane, & que to⁹ les autres Princes fussent logez dedans son Palais. Tantost apres, elle & la Royne Daraide Princeſſe de Rome, avecque la Royne Lardenie, & toutes les autres Dames & Damoyſelles se vestirent richemēt, & en pareil arroy dom Florisel, dom Rogel, dom Florestan, & dom Brianges de Beocie, avecque plusieurs autres Cheualiers acompagnans le Roy dom Falanges, & la Royne Alaſtraxeree, sortirent tous ensemble hors de la ville, pour receuoir le Roy Amadis, & l'Empereur Amadis de Grece avecque leurs compagnies. A vne lieuē de la cité ilz se rencontrerent à grande ioye, & apres plusieurs reuerences faictes d'une part & d'autre, vindrēt en la cité, ou les ruēs estoient toutes plaines de peuple, & les fenestres de tres belles Damoyſelles, qui auoyent tresgrād desir de voir ces cheualeux Princes, dont la renommee auoit tant de fois enuironē toute la terre. En ceste maniere au ſon de plusieurs instrumēs ilz vindrent iusques au palais, & auāt qu'entrer

demeurerent long temps regardans la beauté de la tour enchantee, ou Ageſilā, & Diane estoient renfermez, & entrans dedans les haultes galleries du Palais, trouuerent les Roynes, & la Duchesse de Bauieres fort belles & richement en ordre. & en meſme appareil sortit son espoux dom Roſaran, & se ſaluans les vns les autres, il n'y eut celuy ny celle en la compagnie qui ne s'esmerueillast des beautez qui se representoyēt deuāt ſes yeux. Adonc la Royne Sidonie dist au Roy Amadis, & à la Royne Oriane. Comment ſera il poſſible, Mōſieur, que ie me puiſſe acquiter de la faueur que vous & madame m'avez faite en me venant voir, puis que ie ne voy en moy choſe ſuffiſante pour ſatisfaire à vne ſi grande obligation, meſmement que l'acueil lequel vous à fait le Fraudeur n'eſt pour beaucoup m'aider en ceſt endroit. Ma Dame (dist la Royne Oriane) le ſeul regard de voſtre beauté eſt recompēſe tresſuffiſante de tout le trauail qu'on pourroit prendre de vous venir voir, quand la liberté de meſſieurs noz enfans Ageſilā & Diane, n'auroient eſté la principale ocaſion de noſtre venue. Pour doncq accroistre le trauail qui ſe deuoit employer en vne ſi plaiſante entreprinſe, il a eſté plus que raiſonnable que l'Afronteur ceſte nuyt paſſee nous ait fait vn peu experimenter ſes cautelles, non pour ſon mauuais traitement, mais pour les mauuiſes nouuelles dont il nous à tourmentez. Maudit soit-il, dit la Royne, car il à trop deſpleu à ceux, auſquelz par tous moyens il deuoit taſcher à complaire. Adonc ſe prenant par les mains, le Roy & les deux Roynes entrèrent en la grand ſalle, ou ils ſouperent avec toute la magnificence, & ordre de ſeruice qu'il auoit eſté poſſible d'apareiller pour leur grādeur. Apres que les tables furent leuees, chacun eſtant eſmerueillé de la beauté & bonne grace de la Royne Daraide, les Princes & les Princeſſes furent cōduitz en leurs chambres,

avec

avec deliberation que le Roy Amadis & la Royne Oriane esproueroyent le lendemain l'aventure de la tour enchantee. Ilz dormirent tout le long de la nuyt en vn fort paisible repos, & ne se leuerent qu'il ne fust ia haute heure, recompensans par le dormir de celle nuyt la veille de la precedente.

Comme le Roy Amadis & la Royne Oriane esprouerent l'aventure de la tour enchantee, & de ce qui en auint.

CHAP. LIX.

LE iour ensuyuant les Princes & Princesses se vestirent de leurs plus riches habitz, par ce que le Roy Amadis & la Royne Oriane vouloyēt esprouer l'aventure de la tour enchantee, & apres auoir ouy la messe, sortirent du palais au son de plusieurs & diuers instrumens, puis estans arriuez deuant la tour, le Roy Amadis print sa belle Oriane par la main, & tous les autres leur ayans fait vne grande reuerēce, & eux pareillemēt leur ayant rendu leur salut, ilz s'aprocherent de la tour, & lors le tresexcellent & victorieux Roy parla en ceste sorte à la Royne: Ma Dame, si au tēps que la cruelle douleur de voz amours estoit la gracieuse ioye de ma vie, à raison de vostre extreme beauté, qui cauſoit l'extremité de mon mal, j'ay peu par le moyen de voz faueurs acheuer tant de belles & hautes auentures: Et si apres auoir iouy du cōble de mon bon-heur, la gloire de ceste entreprinſe est deuē à noz chastes & loyales affectiōs: Je vous supplie, puis qu'en aucun temps vous ne me deuez refuser la grace de voz faueurs, ne me la denier en cest endroit, & r'enforcer les efforts de mon courage, lequel a entierement esté en vostre puissance, depuis l'heure que ie vy vostre celeste & deuine beauté. La belle Royne Oriane luy respondit: Mōsieur ie m'assure bien que pour le vrai & fer-

me amour lequel ie vous ay tousiours porté, j'ay esté suffisammēt recompensee par le vostre. Il vous peult aussi souuenir comme en vostre compagnie, ie gaignay la gloire de la guirlande, passay touz l'arc d'Apolidon & mis fin aux auentures de la chambre deffenduē, enquoy se mōstra lamoureuse flāme de mō cueur lequel ie vous donnay en recompense de celuy que vous m'auiez donné: de sorte que les cueurs que nous auons maintenant son changez, vous ayant le myen, & moy le vostre, d'autant que la conformité, de vostre vouloir, & du myen, a tousiours esté si grāde, que vostre volōté & la mienne ne pouuoient iustement estre contees que pour vne. Ainsi donc, Mōsieur, vous auez tousiours en la parfaite cōnoissance de mō extreme & loial amour, tout ainsi que ie l'ay euē de vostre ardente affection, par le moyen de laquelle ie vous ay toute ma vie ottroyé toutes les faueurs qu'il m'a esté possible, encores q̄ de vous mēmes vous les deussiez prédre, comme vne chose qui estoit entieremēt à vous. Quāt aux efforts que me demādez, receuez-les de vōtre cueur q̄ est le mien cōme de celuy qui en prouesse & loyauté d'amour, iamais n'a eu, & iamais n'aura son pareil. Acheuant ces paroles ilz s'embrasierent & baisèrent avecque relle affection qu'il seroit impossible de l'exprimer: puis se reprenans par la main, cōmencerent à marcher vers la tour, à la porte de laquelle ilz ne furent si tost arriuez, qu'vne espoisse nuee les vint soudainement enueloper, & la tour ensemblēmēt, sans rien voir, ny ouir, que le son de plusieurs & melodieux instrumens. Et commençans à entrer dans la porte, la nuee sauta tout d'vn coup iusques en la moyenne region de l'air, & de la, trebucha de rechef avec vn fort espouuentable bruit, rendant plusieurs éclers, & infinies grosses flāmes de feu, qui s'arresterēt finablemēt sur le feste de la tour. Tantost apres la mēme nuee se coula

R 2

par

par le dedans d'une fenestre, & se changea en une tresbelle & reluisante flâme, semblât au passer le feu sortant de quelque grosse piece d'artillerie : & en un instant qu'elle fut disparuë, la tour avec un horrible tonnerre s'ouvrit par la moitié en la façon d'un tabernacle, & chacune des parties print soudain la semblance d'une belle & grande chapelle, d'où sortoit une fort & pure clere flâme, qui se extendoit iusques dedans les nuës, & estoit plaine d'un infiny nombre de preux Cheualiers, & de tres-belles Damoyseles, eux iouans du luth, & elles de la harpe, & adioustâs à leur musique la gracieuseté de la voix, avec telle douceur & armonie, que iamais depuis homme viuât n'entendit la pareille. Ilz sembloient tous des Seraphins, ou Cherubins, tant ilz auoyent la couleur allumee & enflammee : car les flâmes de l'amour, qui iadis les auoient enflammez durant la premiere vie, flamboyent encores dans leurs vermeilles faces en ceste leur immortalité de la vie seconde & immortelle. Et deuez sçauoir que les Cheualiers, Dames, & Damoiselles qui aparoiſsoient en celle flâme, estoient tous ceux qui auoient este fermes, constans, & loyaux en leurs amours, & la flâme en laquelle ilz estoient enuelopez, sortoit de deux riches chaires, dans lesquelles on voyoit facilement Ageſilan & Diane tous écheuelez, sans aucun ornement de teste, ayans souz eux un carreau couuert de drap d'or frizé, & estans vestus de si riches habillemens, qu'il estoit impossible d'en estimer la valeur. En ces entrefaictes bien hault en l'air, s'aparurent huyt, Damoyseles de grande beauté, ayant des aisles en façon d'Ange & tenoyent en la main quatre couronnes, tant riches, belles & resplendissantes qu'il estoit impossible de plus. Ces Damoyseles descendirent en bas, & vindrent mettre les quatre couronnes en la teste du Roy, de la Roynne, du Prince Ageſilan, & de la Princesse

Diane: & ce pendant les amans enflammez qui ardoient en maniere de Seraphins dans la flâme celeste, chantoient fort doucement & melodieusement, ces vers:

CHANSON.

O bien-heureux amans, dont l'extreme
beauté
Pour sa compagne à pris l'extreme loyauté,
Qui par un frâc amour auez doné voz ames
Aux brâdôs eternelz des amoureuses flâmes,
Receuez maintenât ces couronnes, l'honneur
De vostre sainte gloire,
Et apres les trauaux, iouyſſez du bon-heur
De la chere victoire.
La loyauté, la foy, la constance, l'amour
De ces quatre à vaincu dans ce mortel seiour
Tous ceux q le soleil depuis l'aube vermeille,
Peut voir iusques aux bords des mers ou il
sommeille
De la fortune iree, & du cruel destin,
Ilz ont eu la victoire.
Et ores pour guerdon, ilz ont ce cher butin.
Ces couronnes de gloire.
Gloire au Dieu des amans, louange à
Cupidon
Soit chantee de tous, & de tous son brandon,
Soit loué à iamais, & à iamais prisees
Ses fleches vers la pointe en fin or esguisees:
Il change les ennys, & les tristes douleurs
En bien heureuse gloire,
En heur il fait chäger lespl' aspres malheurs,
Et la guerre en victoire.
A nous par luy reuient la vie apres la
mort,
Par luy le desespoir fait place au reconfort,
Le seruage par luy se fait liberté chere,
Par luy d'obscurité nous sortons en lumiere,
Il resiouyt la terre, il embellist les ciens,
Tout tremble soubz sa gloire,
En triomphe il condnit les hommes & les
Dieux
Vaincux à la victoire.
Facent donc à ce Dieu Dames, & Iou-
uenceaux,

*Tous les iours de leurs cueurs sacrifices nou-
neaux,*

*Que chacun de ses ans le beau printemps luy
donne*

Chacun soit à iamais vassal de sa couronne.

Et vous qui surpassez tous les amans loyaux,

Prenez en la victoire,

Pour immortal guerdō de rox aspres travaux

Ces couronnes de gloire.

Aussi tost que ceste chanson fut ache-
uee, les Damoiselles ayās mys leurs cou-
ronnes, remonterent en hault, puis Age-
sila prenā Diane par la main, & luy
ayant dit qui estoit le Roy & la Royne.
se leua de son trosne, & elle ensemblē-
ment, & ainsi vindrent s'agenouiller
deuant eux, & leur baiser les mains. Eux
esmerueillē de l'extreme beauté de Dia-
ne, apres les auoir tous deux baisez, &
embrassez plusieurs fois, les releuerent
fort gracieusement. Ce pendant suruint
de rechef vne autre nuee qui les couurit,
de sorte qu'ō ne les eust sceu apercevoir:
puis publiquement vn soudain ēcler ayāt
frapē dessus, la desfit & en vn instant le
chasteau enchantē, & tout le surplus dis-
parut, les Roys & les Princes demeurās
en tel estat qu'au parauant. Or la Roy-
ne Oriane ne pouuoit cesser d'embrasser
la Princesse Diane, ny oster la bouche de
dessus sa iouē, tant elle auoit grand' ioye
de voir vne si belle Princesse sortie de son
lignage. Mais tantost la Royne Sidonie
auec vn extreme plaisir, luy vint presque
tirer d'entre les bras, luy disant: Last ma
chere fille, comment auez vous peu gar-
der si bien vostre excellente beauté en
mon absence, car ie vous assure que du-
rant la vostre i'ay eu tant de trauail &
de soucy, que ie m'esbahys comment ie
ay peu viure iusques à present. Helās! ma
Dame, respondit la Princesse: Ie vous su-
plie ne vous resouuenir point des choses
douloureuses en ce temps de ioye, auquel
i'ay encores la felicitē de vous voir. Adōc
tous les autres Princes & Princesses atri-

uerent, & se receurent les vns les autres
auec tāt de gracieuses paroles qu'il seroit
impossible de les pouoir rēciter par le
menu. Agesila baisa les mains de l'Em-
pereur, & luy dist: Ie vous supplie, mon
Seigneur, me pardonner si en l'habit de
Daraide, ie ne me suis point donnē à co-
gnoistre à vous, & si estant en Constan-
tinople, ie ne vous fy, à vous, ny à ma
Dame l'Imperatrix, la reuerence que ie
deuoīs, & que vostre grandeur meritoit:
car la presumption que i'auois soubz l'y-
mage & ressemblance de la Royne Brian-
gie, la nouuelle Daraide & Princesse de
Rome, ne me la permettoit, & mes pēses
sacrees à ma Dame Diane me le deffen-
doient, par-cē que ie n'estois moins ob-
ligē à les celer, que contraint par la ne-
cessitē à les taire, veu qu'autrement que
auec la mort, ie ne les pouois descouurir
estant en habit de Cheualier & qu'il m'e-
stoit impossible d'ētretenir la gloire que
i'auois pour aymer en si hault lieu, sinon
en habit de Damoysele. L'Empereur le
tenant embrassē luy respondit: Monsieur
mon filz, Daraide n'à aucun besoing de
s'excuser vers moy pour ce regard, puis
que ie me suis veu ainsi que vous fort
cruellement blessē d'vne pareille playe,
ayant si bien experimentē telz desguise-
mens, que maintenant ie serois vn tres-
bon maistre pour guerir semblables ma-
ladies: & d'auantage veu que la raison
vous à rendu victorieux en vsant de tel-
les armes pour paruenir à vn si grand hō-
neur, il n'y a faute de laquelle on vous
puisse blāmer désormais. Et ces paroles
disoit-il fort esmerueillē de la grāde be-
auté de Diane, pensant auoir sa Niquee
deuant ses yeux. De là, Agesila ayant
faict la reuerence au Roy son pere, & à la
Royne sa mere, la Royne Lardenie acou-
rut a luy & a Diane semblablement pour
leur faire la reuerence, auec tant de ioye,
qu'il sembloit qu'elle fust hors du sens:
& lors Agesila l'embrassant, luy dist: Ma
Dame, celle qui m'a mis en la bonne grā-

ce de ma Dame Diane aura toute sa vie plus d'avantage sur moy pour me presenter les mains, que ie n'auray jamais sur elle pour luy presenter les miennes. Vostre prouesse, mon Seigneur, respondit elle, vous a mis & moy pareillement en ce bon-heur ou nous l'ommes, à raison de quoy vous m'avez laissée en vne perpetuelle obligation de vous servir & honorer toute ma vie : car la plus souveraine vertu que ie desire garder en ce monde, est d'estre toute ma vie servante de celuy qui m'a fait maistresse, par ce que le plus naturel bon-heur de l'homme est de faire tousiours vertueusement ce qu'il est obligé de faire : & d'autant plus que le bon-heur de la nature surpasse le bon-heur de la fortune d'autant plus ce bon-heur duquel ie vous parle excède & surpasse tous les autres. Puis donc, mon Seigneur, que i'ay ceste cognoissance, ne estimez que iour de ma vie l'acroisemēt de mes estats puisse estre la diminutiō du service dont ie suis redeuable. Entre ces gracieuses paroles, le Duc don Rosarā se dōna à cognoistre à toute la compagnie, laquelle fut fort ioyeuse de sa cognoissance, par ce qu'il estoit de grande prouesse, & apres les acoustumées reuerences faites d'une part & d'autre, tous les Princes s'en retournerent au palais au son de plusieurs instrumens, estant chacun tres-ioyeux de ce qui auoit esté fait ce iour par le Roy Amadis, & la Royne Oriane. A leur arrivée lon courut pour le souper ou ilz furent festoyez en grande pompe & magnificence, & les tables leuees, Agefilan assis dedans le giro de la dame Diane, luy dist : Ma Dame, la gloire que ie reçois pour estre vostre espoux, est si grande, que ce plaisir me fait perdre tous les sentimens, & la memoire des choses passees, ne voyant, ny pensant, ny me souvenant, sinon de la grande beauté laquelle i'ay maintenant deuant mes yeux. La Royne Lardenie qui estoit aupres d'eux, leur dist tout bellement d'une fort bon-

ne grace : Monseigneur ie ne vous estime point si vergongneux que ayant demeuré tous deux seuls ensemble, par si long tēps vous n'ayez pris la iouissance du plus grand bien que vous pourriez desirer, pour faire maintenant si grand cas de cestuy cy, qui me semble fort petit à la comparaison de l'autre. Vous deuriez auoir honte, respondit Diane, de dire ces folies, car en m'estimant deshoneste, vous bailliez occasion d'estre estimée telle si vous en auiez le moyen comme i'ay eu. Lardenie en souzriant luy respondit, I'ayme beaucoup mieux, ma Dame, que vous & moy soyons condamnées pour ce regard, que non pas mon Seigneur Agefilan, pour la faulte qu'il portoit auoir faite s'il n'auoit bien sceu employer les belles occasions qui lui ont esté offerres depuis que ie ne l'auois veu. Ma Dame, dist Agefilan, i'ayme mieux auoir mal employé mes occasions à ma honte, que de les auoir employées à l'ennuy de ma Dame Diane. Je croy (dist Lardenie en riant) qu'en laissant l'habit de Daraide, vous avez pareillemēt laissé ces simplesses, car l'ennuy dont vous parlez est vne chose fort facile à oublier, & encores plus gracieuse à recommencer. Vrayement, dit Diane faisant la courroucée. Je m'esbahis de vous, & que vous ne faictes conscience de iuger mon cuer par le vostre : Je vous dy, puis que vous le voulez sçauoir, & à fin de vous oster de tout soupçon, que nous estions enchantez. A quoy Lardenie respondit en riant : Sur ma foy ie pense que vous fussiez plus qu'enchantez, si ce que vous dites tous deux est veritable. Or sus, ma Dame, dist Agefilan. Je vous prie ne croire autre chose, sinon ce qu'il plaira à ma Dame Diane : car vous sçavez que ma volonté à tousiours esté cōformē à la sienne. D'autant plus tost (respondit Lardenie) aura elle cōformé la sienne à la vostre : toutefois si vous vous estes entiere-

en honneste Damoyſelle, plus que vous n'avez ſaiſt en hardy Cheualier. En telles autres gracieuſes railleries, & en tous les paſſe-temps dont il eſtoit poſſible de ſ'auiſer ilz paſſerent huyt iours entiers, durant leſquelz Ageſilan eſtoit en grand ſouci pour ne pouuoir iouir de ſa Dame ainſi qu'il auoit accouſtumé en la tour enchantee, au moyen dequoy il luy diſoit qu'il ne ſçauoit qui auoit meu le Roy Amadis de le mettre en vne ſi grande ſeruitude, penſant le mettre en liberté. Le Prince de Rome eſtoit auſſi ſouuentefois en la compagnie de ſon eſpouſe, & pareillement dom Arlanges d'Eſpaigne, & auoyent accordé avec Ageſilan d'autant que lon appareilloit leur depart pour aller en Conſtantinople, que les noces ſe feroient la. Mais parce qu'ilz ne pouuoient ſi toſt partir, parce que la Royne Sidonie vouloit que ſa fille Diane y allaſt en grande magnificence, dom Rogel de Grece, & dom Brangés de Beocie ſe delibèrent d'aller voir l'Iſle, & y chercher leurs auentures en attendant que tout fuſt preſt. Partant ilz demanderent congé à ces nobles Princes qu'ilz leur oſtroyerent, & ayant pris leurs armes & leurs cheualx, avec leurs Eſcuers, ſe départirent de la cour, & entre autres choſes, dom Rogel prenant congé de la Royne Lardenie, luy dit tout bas: Ma Dame, vous plaïſt-il me donner quelque bague, ou autre petit ioyau à fin qu'en ce voyage, ayant la faueur de eſtre voſtre comme ie ſuis, ie puiſſe par mes hautes penſées recompenſer le deſſault de ma prouèſſe. Elle luy reſpondit en ſouzriant: Puis que vous avez tant ioye comme i'en voy en vous, qu'avez vous affaire d'un petit ioyau? Pourquoi dites vous cela? diſt dom Rogel, ie voy bien (reſpondit elle) que vous ne ſçavez pas trop bien que vous dites. Ne vous eſbahiffez point, ma Dame (reſpondit-il) ſi ceux la perdent l'entendement, qui l'ont entierement mis en vous, car leur

peine ne peut eſtre moins angoiſſeuſe, qu'voſtre beauté eſt excellente. Je penſe, dit-elle, que vous n'avez point trop bien mis voſtre entendement en moy. Comment pouuez vous dire cela, ma Dame, diſt dom Rogel, car en nyant la force de voſtre beauté, vous n'yez voſtre beauté meſme, ce qui eſt contre le naturel des Dames. Vous vous eſtes condamné par voſtre propre bouche: diſt Lardenie. Comment? diſt-il. Par-ce (reſpondit elle) car ſi vous auiez les penſées que vous dites, la gloire de ſouffrir la douleur, vous oſtroyoit l'occaſion de la plainte d'autant que l'accroïſſement de la douleur euſt pareillement eſté l'accroïſſement de voſtre gloire. Mais par faute des penſées que vous dites, vous me demandez un ioyau, ce que vous n'euffiez fait ſi ce ne euſt eſté de peur d'oubliance: car ayant ma beauté bien engrâcee en voſtre mémoire, vous n'avez que faire de ioyau, veu que celui qui à la plus grande choſe à ſon commandement, à bien la moindre en ſon pouuoir. Parquoy ie ne veux point vous donner congé d'exécuter vos aduentures ſouſ le tiltre de ma faueur, iuſques à ce que ie cognoiſſe par expérience que vous en auez obtenu la victoire par le moyen de vos hautes penſées leſquelles vous dites auoir miſes en moy. Ce pendant, n'ayant point autre aſſurance que vous ſoyez mien, ie demureray voſtre comme ie doy, c'eſt à ſçauoir preſte à vous obeir en toute raiſon, comme eſtant frere de ma Dame Diane. Ma Dame (diſt dom Rogel.) Je prens en grande faueur les paroles que vous avez dites, & vous en remercie tres humblement, eſperant faire ſi bien mon deuoir avec l'ayde de voſtre ſouuenance que bien toſt ie vous auray oſté toute occaſion de douter de mon bon vouloir, avec telles & autres gracieuſes paroles ilz prirent congé, & monterent à cheual, laiſſans la court fort triſte pour leur abſence.

Comme dom Rogel & dom Brianges estās. sortis de la ville de Guindaye, trouuerent vne Damoysselle morte en vn carrefour, & de ce qui en auint.

CHAP. LXX.

DOm Rogel de Grece, & dō Brianges de Beocie estans sortis de la ville de Guindaye, commencerēt sur le chemin à parler des choses qui plus leur venoyent à gré. O que ie serois ioyeux (disoit dom Rogel) si en cestuy nostre voyage il plaisoit à dieu nous enuoyer deux si belles Damoysselles, que nous peussions vn peu temperer le feu dont noz Dames nous tiennent continuellement embrasēz. Ne parlez point de cela, dist dom Brianges, car l'amour que ie porte à ma Dame, ne me permet de pouuoir appliquer mon cueur en autre part. Je voy bien (dist dom Rogel) la loyauté commence desia à vous embabouiner de ces folies. Ne croiez poit (dit dom Brianges) que la loyauté vienne de folie, car elle prend sa naissance du vray & ferme amour, lequel ne pourroit estre tel s'il estoit departy en plusieurs endroits. Comment ce peut il doncq faire (dist dom Rogel) que ie donne mon amour à toutes les belles Damoysselles, qui en veulent, sans en riens diminuer l'affection que ie porte à ma Dame Leonide. Ne dites iamais celà (dist dō Brianges) car si vous l'aymiez de vray amour, vous ne pourriez aimer en autre lieu.

Qu'apellez-vous vray amour? dist dom Rogel. Auoir donné sa volonté à sa Dame (dist dom Brianges) & ne se pouuoir gouverner par autre volonté que par la sienne, en l'aymant entierement de tout son cueur. C'est en ceste façon (dist dom Rogel) qu'il fault aymer Dieu, non pas les femmes: & me semble que garder tel le cerimonies en leur endroit, ne procede que de faute de sens: car quel besoing ay-ic de cōtraindre ma volonté, & de ne

viure librement selon mon naturel; es choses dont elle ne peult estre auertie. Si vous le pouuez faire (dist dom Brianges) faictes-le: car quant à moy, pour riens du monde ie ne voudrois faulcer le loyal amour que ie doys à ma Dame. Si vous estes tāt loyal (dit dō Rogel) pourquoy preniez vous vostre passetemps de l'vne de ces Damoysselles, que nous trouuāsmes sur le chemin de Sparte. O ie croy bien (respondit-il) ie n'estois encores amoureux en aucun lieu, & ne se fault esbahir si lors ie pris ma bonne fortune: car ie n'vsois de desloyauté enuers personne. Par Dieu (dist dom Rogel) Agestilan & Diane perdirent beaucoup pour n'estre aduertis de voz loyalles amours, car vous ayans si pres d'eux, ilz n'eussent point esté en peine d'enuoyer querir si loing le Roy Amadis & la Royne Oriane. Vous semble-il pas pour le moins (dit dom Brianges) qu'ilz ayent gagné plus de louange pour estre loyaux en leurs amours, que vous pour auoir faict le contraire? Non par ma foy, dist dom Rogel. Comment l'entendez vous? dit dom Brianges. Demandez vous comment (respondit dom Rogel) par ce que s'ilz ont gagné en deux ou trois auentures, pour leur loyauté, l'honneur de les auoir acheuees: l'ay gagné pour estre tel que ie suis, vne infinité de recreation avecque plusieurs belles & gracieuses Damoysselles de l'amour desquelles i'ay iouy: & n'en ay seulement iouy, car i'espere encores en iouir, & d'autres avec, toutes les fois que la fortune me presentera l'opportunité d'vn tel bon-heur. Alors dom Brianges luy dist en riant, or bien la premiere fois que ie parleray à vostre Dame, ie lui raconteray voz conditions, puis vous verrez combien elles vous causeront de bon-heur. Et bien (dist dom Rogel en riant) pour vous payer en mesme monnoye ie raconteray à vostre Dame combien vous avez autrefois esté loyal, qu'il pleust à Dieu nous enuoyer maintenant quel-

quelque belle Damoysselle, pour voir si la crainte de voz paroles empescheroit magracieuseté accoustumee. Ainsi deui- sans en vne forest qui estoit à trois lie- ues de la cité, ilz trouuerent en vn carre- four ou leur chemi se fourchoit en deux, vne Damoysselle morte, laquelle sembloit assez belle, & estoit vestue d'une robe de satin blanc, & auoit vn coup d'espee au trauers du corps. Dom Brianges, encores qu'il eust grand pitié d'elle, neantmoins continuans leur premier propos, ne se peut contenir de dire à dom Rogel: En bonne foy vostre desir est accompli, car voicy vne fort belle Damoiselle, & comme ie pense, Dieu vous en veult enuoier de mortes, par-ce que toutes les viues ne suffiroient pas pour vous cōtenter. Dom Rogel ayant grande pitié de la Damoy- selle, respondit: Je vous prie, beau Sire, laissons les railleries, & entendons à ce qui est d'importance: car en mon aduis ceste damoysselle doit auoir esté tuee par quelque meschant hōme, & vo' promets pour l'ordre de cheualerie le quel i'ay re- ceu que s'il est ainsi ie vengeray sa mort si ie puis. Parquoy puis que vous n'estes moins obligé à ce faire que moy, prenez le chemin qui bon vous semblera, & ie prendray l'autre: à la charge que dedans deux moys nous nous retrouvons en ce mesme lieu si nous pouons, à fin de nous raconter l'un à l'autre ce qui nous sera adueni en nostre queste. Car veri- tablement si nous deuons nous separer l'un de l'autre contre nostre volonté, ce ne scauroit pas estre à meilleure ocation que pour venger vn tel oultrage. Il me semble (dist dom Brianges) que vous parlez mieux maintenant de ceste ma- tiere, que vous ne parliez tantost de la loyauté: partant à Dieu vous dy, car ie m'en vois prendre le chemin de main- droicte. Dieu vous vueille conduire, dist dom Rogel, & vous fauoriser en vne si iuste entreprise: Adoncq chacun print son chemin, desirant fort de voir par

quelle auenture ceste Damoysselle auoit ainsi esté meurtie.

Comme dom Rogel de Grece rencontra vne Damoysselle qui portoit vn Esparuiet, à rai- son dequoy il fut mis en vne fort belle & pe- rilleuse auenture.

CHAP. LXXII.

LExcellent Prince dom Rogel de Grece chemina trois iours entiers avec son escuyer Sirind sans trou- uer aucunes nouuelles de ce qu'il deman- doit. Au quatriesme iour assez matin, ayant rencontré vne Damoiselle montée sur vn palefroy, qui portoit vn Esparuiet apres l'auoir saluée, & elle luy, commen- ça à l'arraisonner, & entre autres choses, luy demanda ou son chemin s'adressoit. Je m'en vois, respondit elle, chasser avec- que cest Esparuiet: car ie l'ayme fort, de- autant qu'il est tres-excellent à prendre toutes proyes, & mesmement à la chasse despies: Je viés d'un mien chasteau, & me en vois à celuy que vous voyez là deuât, par ce que pres du iardin qui y est, ie trou- ue souuentefois grand nombre de pies. Dieu soit loué, dist dom Rogel, car ie suis fort affectionné à la chasse dont vous parlez, & m'en veux aller avecque vous pour voir volder vostre oyseau, puis que ie ne trouue point ce que ie demande. La damoiselle esmerueillée de sa beauté par ce qu'il auoit la visiere de son armet leuee luy dist: Allons donc, car ie suis asseüree que vous prendrez grand plaisir à voir volder mon Esparuiet. Ainsi tenans le chemin vers le chasteau, la Damoysselle, qui prenoit grand plaisir en la bonne gra- ce de dom Rogel, lui dist: Seigneur Che- ualier, ne cherchez vous point quelque belle Damoysselle? Il en est quelque cho- se, respondit-il, mais pourquoy me le de- mandez vous! Je vous le demande, dist elle, par-ce que vous me semblez beau- coup plus propre à telle chasse, que mon-

Esparuier à celle des Pies. Je ne sçay si i'y suis propre ou non (dist dom Rogel) car mon excellence n'est point telle que i'en aye encores sceu prendre aucune.

Mais la queste ou ie m'en allois estoit pour faire reparer vn tort lequel a esté fait à vne Damoysele que r'ay trouuee morte bien loing d'icy. La damoisele lui dist: Vrayemēt, sire cheualier, veu vostre grande beauté, ie pense que vous seriez assez plus empesché à reparer le tort que vous mesmes faictes aux damoiselles viues, que non pas à reparer celui que les autres ont faict aux mortes. Sauf vostre grace (dist dom Rogel) car c'est le tort qu'elles me font, plus-tost que celui lequel ie leur fais, que lon deuroit faire reparer. Je voudrois bien estre si belle (dist la damoisele) que ie peusse vous faire ce tort, car ie l'aurois réparé bien tost. Il la regarda, & lui dist: Veritablement ma Dame, vous n'estes aucunemēt l'aide: & ne sçay pourquoy vous desirez tant ce qui n'est point hors de vostre puissance. Elle lui respondit en souzriāt: Ce n'est pas assez de n'estre point laide: car avec celā, il faut auoir vne demesurée beauté. Et qui la (dist dom Rogel) celle extreme beauté que vous dites. La Princesse Diane (respondit la damoisele) car elle n'a point sa pareille au monde. Il ne m'en chault (dist-il) car ie ne sçauois guieres profiter à vne si grande beauté. Ainsi deuifans de maints gracieux propos, ilz arriuerent aupres du iardin, qui estoit à vn costé du chasteau, tout entourné de murailles de brique, faictes à creneaux par le dessus, & de la hauteur deux toises. Là, ilz ne faillirent à trouuer des Pies, sur lesquelles la damoisele lacha son Esparuier, qui commença à en poursuyure vne fort courageusement, de sorte que la Pie pour se sauuer se ietta dans vn arbre du iardin, ou l'Esparuier la suyuit, & l'enleua assez hault avecq' les ongles: mais la Pie se debatoit si fort que finablement tous deux tomberent

assez lōg dans le iardin. Mais la damoysele (dist lors dom Rogel) il me semble que ce sera pour le meilleur, puis qu'il n'y a point d'entree par icy, que vous alliez passer par la porte du chasteau pour secourir vostre Esparuier. Je ne serai point en ceste peine (dist-elle) car on ne laisse entrer personne dans le chasteau. Il ne sera doncq point mauuais (dist dom Rogel) que mon Escuyer monte debout sur son cheual, & s'essaye à passer par dessus les creneaux & lors commanda à son Escuyer de ce faire mais pour trauail qu'il peut prendre, il ne sceut iamais faire ce que son maistre luy commandoit. Dom Rogel riant de voir son Escuyer tant mal habille, luy dist: Je n'eusse iamais pense, Sirind, que tu fusses tant alegre. Regarde, s'il y auoit vne damoysele qui t'attendist en ce iardin se confiant en ta legiereté, comme tu la contenterois ioyeusement. L'Escuyer ennuyé des paroles de son maistre, luy dist: Monsieur par Dieu le mur est trop hault & est fort malaisé à passer sans echelle, & voudrois bien voir si vous estes plus dispos. Il sera force que ie le mōstre, diçdō Rogel, car à te voir faire le plus grand honneur que tu y sçauois acquerir par ton allegresse, seroit de t'estre laissé tomber par terre. Et ce disant fit aprocher son cheual de la muraille, & monta debout sur la selle: mais la damoysele voyāt que il s'efforçoit à monter, lui dit. Lās? Seigneur Cheualier, ne vous mettez point en si grand peril pour si peu de chose, car estant passé dedans le iardin vous ne sçauiez ce qui vous y pourra aduenir. En auienne ce qui pourra, dit-il, car vn si bon oiseau comme le vostre n'est point à perdre. Comme il disoit ces motz, il se print d'vne main à l'vn des creneaux, dedans lequel il se ietta aussi legerement, comme s'il n'eust pesé plus d'vne once. La damoisele esbahie de son allegresse, luy dist: Seigneur Cheualier, pour Dieu ne laissez point voz armēs, car vous ne sçauiez

sçavez si vous en devez avoir affaire. C'est tresbien dit à vous (dit-il) & suis delibéré de suyvre en celà vostre conseil. Adonc il demanda son armet à son Escuyer, lequel il lassa, iettât son escu derriere les espaulles, & trouuant vn arbre aupres du mur se coula le long du tronc iusques en terre. Or cheminant vers l'endroit ou il pensoit que l'esparuiier fust tombé, il aperceut à l'entour d'une fontaine qui estoit dedans le iardin, trois belles Damoyelles vestues de drap d'or, l'une desquelles tenoit l'esparuiier sur le poing, & le passoit d'une cuisse de la Pie. Dom Rogel esmerueillé d'une si belle cōpagnie, s'ap procha d'elles, & les ayant saluées, la plus belle des trois, encores que toutes fussent extremement belles, luy dist en langue persicque, Helas, bon Cheualier, quelle fortune, ou plus-tost infortune, vous a amené en ce lieu? Dom Rogel trouuant les Damoyelles fort à son gré, mesme mēt celle qui auoit parlé la premiere, luy respondit en mesme langue. Ma dame, la fortune, qui m'a amené icy, ne peut tourner en infortune, puis qu'elle m'a esté cause de voir vne si extreme beauté: n'estoit que le commencement de ce bonheur me fust occasion d'une plus grande infelicité, pour ne pouuoir iouyr du remede conuenable à la cruelle playe, dont vostre beauté excellēte ma nauré iusques dedans l'ame. La Damoyelle & ses compagnes en souzriant lui dirent, Nous vo^s supliions, beau sire, oster vostre armet, pour voir si vous estes tel comme la hardiesse de voz paroles le monstre. Dō Rogel leur respondit, A celà ne tiendra, ny à plus grande chose, que ie n'obeisse à vostre volonté. Regardez bien, seigneur Cheualier, ce que vous dites, car icy vous aurez bien plus d'affaire, que vous ne pourriez, peut estre penser. Enmourant (dist-il) ie satisferay tousiours à ce, en quoy mes forces ne vous pourroient, rendre le seruice dont ie vous suis redevable. En ce disant il delassa son armet, & des-

courrit son visage monstrant vne tant singuliere beauté, que les trois sœurs en furent esbahies: car iusques alors elles n'auoient veu si beau Cheualier. Parquoy celle qui premierement l'auoit mis en propos, luy dist, Sur ma foy si vostre prouesse aproche en quelque chose de vostre beauté, ie pense bien que vous pourrez satisfaire à voz promesses, & nous deliurer de la grande calamité ou nous sommes icy detenues. Dom Rogel les oyant ainsi parler, eut trop plus grande volonté de sçauoir qui elles estoient, qu'au parauant, & leur dist, Mes Dames, ma prouesse est telle qu'il a pleu à Dieu me la dōner, & quād il vous plaira, vous en verrez l'experience en la vengeance que ie m'essayerai faire de la calamité en laquelle vous dites estre detenues. Car ie vous assure bien que le bon vouloir que ie vous porte, & le desir que i'ay de vous faire seruice, me fera tousiours franchement abandonner la vie en vostre faueur. Nous le verrons bien tost, dirent elles, mais si vous sçauiez le dāger auquel vous vous mettez, peut estre que vo^s ne seriez si liberal de vostre prouesse à fin d'ēachepter si cheremēt vne si grievue douleur, comme celle laquelle vous vous apareillez par voz promesses. Je ne crains, respondit-il, aucune douleur, si nō celle que ie pourrois recevoir pour estre mal recompensé, non du trauail que i'espere prendre pour vous: mais de celui auquel ie suis par l'excellence de vostre beauté & bonne grace. Faites seulement de sorte, dist l'une des Damoyelles, que vous nous pussiez tirer hors de ceste prison: car apres il ne tiendra à nous que vous ne soyez satisfait de tout ce en quoi nous vous pourrions estre redevables, & voulons bien que vous sachez que nous ne sommes point personnes ingrates, & n'auons acoustumé, de recevoir les plaisirs & les seruices que lon nous fait, sans en rendre honneste & condigne recōpense, par ce q̄ la coustume de noz ancestres

à tou-

à tousiours esté de recompenser les biens faits, & si nous ne leur auons peu heriter en tout le sur-plus, à tout le moins nous leur heriterons en vne chose tant louable, & rechasierons de nous tant loing que nous pourrons, l'infame vice d'ingratitude. Mais par-ce que ce n'est maintenant l'heure pour vous rendre compte de noz affaires, ie vous prie penser en quelle maniere vous nous pourrez tirer hors d'icy, car il vous seroit impossible de nous en mettre hors par la porte du chasteau. I'y ay desia auisé (dist-il) car nous pourrons monter sur la muraille de ce iardin, & de là ie vous mettray entre les mains d'un mien Escuyer qui m'y atent avecq'ne vne Damoysselle. Au nom de Dieu soit, dist l'une des sœurs, & commencez par l'une de mes compagnes, car quand à moi ie veux demeurer la dernière avec cest Esparquier, à fin qu'ayant un tel gage, vous ne me peussiez mettre en oubly. Vous auez, ma dame (dist dom Rogel) un trop plus grand gage de moy que celuy là: car mon iueur est entiere-ment en vostre puissance, & en pourrez disposer toute ma vie ainsi comme bon vous semblera. Nous cognoissons tantost, dist-elle, si l'effet de ce que vous dites sera semblable à voz promesses. Adonc dom Rogel print vne de ses Damoysselles par la main, & la vouloit emmener.

Des haultz faitz d'armes que fit dom Rogel pour tirer les trois Damoysselles dehors du chasteau.

CHAP. LXXIII.

A Peine dom Rogel auoit pris les Damoysselles par la main, pour la conduire sur les murailles du iardin, quand elle commença à s'escrier à haute voix, demandant secours, & disant qu'on la vouloit emmener outre son gré. Par Dieu, dist dom Rogel, ie ne vy jamais une plus galante Damoysselle que vous e-

stes: & pourquoi m'auiez vous tant suplié de vous emmener hors d'icy si vous vouliez faire telles folies. Mais ce pendant qu'il estoit en ces propos, voicy venir un Cheualier sortant du chasteau, armé de toutes pieces, hault & grand, & bien proportionné de tous ses membres. Dom Rogel l'aperceuant lassa soudain son armet, & à l'arriuee le Cheualier du chasteau dist, Vous pouuez bien maudire l'heure, miserable homme que vous estes d'auoir ainsi voulu enleuer ceste Damoysselle qui est en ma garde. Dom Rogel lui respondit, Sur ma foy, mon amy, si elle ne m'en eust bien fort prié ie me souciois bien peu de l'emmener hors d'icy, mais maintenant que ie cognois sa volonté, ne vous trauallez point d'auantage, car ce n'est pas ma coustume de faire rien aux Damoysselles outre leur vouloir, ains les seruir & honorer à mon possible. Ce n'est icy, dist le Cheualier, que la courtoisie & les paroles vous doiuent garantir de la mort, car tout le monde ne scauroit estre assez puissant, pour vous tirer vif d'entre mes mains, par ce que i'ay deliberé de donner vostre teste à ceste Damoysselle, en recompense de l'outrage que vous luy auez voulu faire. Je defendray ma teste (dist dom Rogel) le mieux qu'il me sera possible, & gardez bien la vostre si vous voulez, puis que vous estes si fol de vous hazarder à un combat duquel vous vous pourriez bien passer. Adonc ilz mirent la main aux espees, & embrasserent leurs escus commençans entre eux une tresfurieuse escrime, mais elle dura bien peu: car la Damoysselle qui s'estoit escriee s'estant retiree dans le chasteau, les laissant au mylieu de leur noyse, Dom Rogel se trouua tant coléré qu'incontinent il eut abatu le Cheualier en terre, & en mesme instant luy treucha la teste d'un reuers, disant. Si ne me trencheras-tu plus la mienne. Adonc l'autre Damoysselle qui estoit avec celle laquelle tenoit l'espar-

quier,

uier, esmerueillce de la prouesse de dom Rogel, luy dit : Helàs, Seigneur Cheualier, vous plaist-il pas m'emmener puis que ma copagne a esté si opiniastre que de ne vous vouloir suyure, Suyuez moy donc, dist-il. Je ne puis (respondit-elle) si vous ne m'aydez. A celà ne tiendra, dist le Prince. Et lors il la print par la main : mais elle commença à cryer tout ne plus ne moins que la premiere. Dom Rogel fort ennuyé la lascia aller, & dist : Au diable soyent dōnees toutes celles qui vous ressemblent, tant vous estes peu courtoises & priuees de vostre bon sens. Ainsi se en alloit dom Rogel, & commençoit desia à monter le long de l'arbre par lequel il estoit descendu, quand il vid sortir vn autre Cheualier du chasteau, qui luy crya à haute voix. Ce n'est pas maintenant l'heure, Cheualier outrecuydé de prendre la fuyte par dessus les murailles : mais bien de payer par vostre mort la trahison que vous auez faite. S'entendant menasser de paroles tant iniurieuses, il retourna bien coléré à l'encontre du Cheualier, & commença entr'eux vn cruel & aspre combat, pendant lequel la damoiselle qui s'estoit escriee s'enfuit dedans le chasteau tout ainsi que la premiere. Mais ce pendant dom Rogel par son excellente prouesse fit du second cheualier en luy trenchant la teste, ce qu'il auoit fait du premier, & essuyant son espee la remit au fourreau prenāt son chemin vers le mur dont il estoit descendu. Adonc la belle Damoysele qui tenoit le Esparuier luy dist : Comment, Seigneur Cheualier, vous en allez vous donc sans moy me laissant icy prisonniere ? Est-ce le gage de vostre cueur que vous disiez me laissera fin de vous employer à toutes heures à mon secours. Ma Damoysele, respondit-il, ie ne voudrois que vous me fissiez comme voz compagnes, car ie vous assure que j'auois tres-bonne volonté de vous faire seruice, & non de vous outrager comme elles ont dit, ce qui a

esté cause de la mort de ces deux Cheualiers, dont il me desplaist fort. Parquoy a fin qu'il ne m'auieue avec vous, ce qui m'est auenu avec les deux autres damoiselles, ie vous dy à Dieu, vous laissant le gage lequel vous dites que ie vous ay donné, car j'ayme mienx m'en aller nature de vostre beauté, q̄ d'estre aculé tant soit peu de vous auoir fait tort. Alors la damoysele commença à pleurer, & voyant qu'ils s'en alloit sans elle, luy dist. Làs! Cheualier, pourquoy vsez vous enuers moy d'vne si grande felonnie, car vous me pouuez bien remettre en liberté, & neantmoins vous me laissez en seruitude. A ces morz dom Rogel eut si grand' pitié d'elle, qu'il ne peut endurer plus long temps ces regretz, & luy dist : Il ne tiendra point à moy que ie ne vous emmene, & suis tres-content de voir ce qui en auendra. Et lors il la prit par la main & l'emmena vers la porte du chasteau. Hé Dieu! sire Cheualier (dit-elle) ou me menez vous ? Vers le chasteau, dist il, pour sçauoir s'il y a quelqu'un qui me puisse empescher le passage : car avec la faueur de vostre bonne grace il n'y a si grād peril qui puisse donner aucune crainte, Helàs (dit-elle) mettez celà hors de vostre fantasie, car tout le monde ensemble ne seroit suffisant pour faire ce que vous entreprenez tout seul. Sauf vostre grace (dit-il) la faueur que j'espere de vous pour recompense de vous auoir obey, me feroit entreprendre vne chose beaucoup plus impossible que ceste cy. Je n'iray point avecque vous (dist-elle). Demeurez donc là (dist dom Rogel) & ie m'en iray essayer le passage, puis retourneray vers vous. Adonc il luy lascia la main, & elle s'assit en terre, tant desolee qu'il estoit impossible de plus. dom Rogel la voyant en tel estat, eut fort grande compassion de sa douleur, & mettant vn genou en terre, la reprint par la main, & luy dist, Je vous supplie, ma dame, que ie ne vous voye plus en ceste langueur,

car

car les larmes de voz yeux , en contemplant vostre beauté, me blessent beaucoup plus cruellement, que ne pourroient faire les plus trenchâtes espees des ennemis qui sont dedans le chasteau. Le vous supplie, ma dame, regarder ce qu'il vous plaist que ie face, car ie forceray plus-tost ma volonté à fin d'obeir à la vostre. Plusieurs telles & autres semblables paroles dist dom Rogel à la Damoyfelle: mais elle ne luy respondoit vn seul mot, & ne cessoit de se plaindre & lamenter. O dieu (dist dō Rogel) quel miracle est cecy. Et ostant son armet, vaincu de la beauté de la Damoyfelle, luy dist en baisant souuesfois la main qu'il tenoit entre les siennes, le vous supplie pour Dieu, ma dame, prendre pitié de vous, sinon de vous, à tout le moins de moy, & ne soyez point cause par vostre mort de faire encores mourir celuy qui tāt vous ayme, car vous ne pourrez faire sacrifice de vous par vne telle & si extreme cruauté, que vous ne faciez encores vn plus cruel sacrifice de moy. Regardez, ie vous prie, que ie ne sçauois receuoir vne si cruelle mort pour l'amour de vous, que ie ne l'estime vne tresheureuse vie, moyennāt que par vostre mort vous ne soyez point occasion de la miēne. Telles & autres paroles luy dist dom Rogel, mais elle ne luy respondoit vn seul mot, semblant estre trespassee, au moyen dequoy dom Rogel fort desdaigné lassa son armet, & s'en alla vers le portail du chasteau qui respondoit sur le iardin, disant en luy mesme, Et par sainte marie ie mourray en ceste auāture, ou bien i'en sçauray le secret. Arriuant apres du portail, il vid à vne haute fenestre du chasteau, les deux Damoyfelles qu'il auoit premierement voulu emmener, lesquelles luy dirent, O seigneur Cheualier, que vous avez bien fait de trencher la teste à ces deux trahistres lesquels vous avez cōbatus: & vous prions bien fort, puis que vostre prouesse est si grāde, que pour aucun trauail qui se puis-

se offrir vous ne laissiez à faire vostre effort pour nous mettre en liberté, car si nous deuōs estre deliurees par la prouesse de quelque Cheualier, ce ne pourra estre que par la vostre. Nōn non (dist dom Rogel) n'vsons point de flateries, car vous ne m'abuserez plus. Et ce disant il entra dedans le chasteau, mais il ne fut si tost dedans la basse court, qu'il se trouua enuironné de huit Cheualiers tous armez, qui vindrent à l'encontre de luy, le menaçant de le faire mourir, & se commença entr'eux vne rude & cruelle meslee, les huit frapans sur luy de toutes leur puissances, & luy sur les huit de toute sa force, tellement qu'il sembloit à les ouyr marteller en celle basse court, que ce fust vn grand nombre de mareschaux en vne forge. Or seruit bien à dom Rogel que ses armes fussent de bonne trempe, car finablement apres auoir long temps soutenu leur furie, il les mit tous à mort, sans qu'un seul des huit peust eschaper d'entre ses mains. Apres ce combat, encores que le Prince dō Rogel fust fort las, il passa outre trauerfant le chasteau iusques à la porte de deuant qu'il desbarra, & ayant faulcé & brisé les serrures, sortit dehors, & apella son Escuyer, lequel estoit fort troublé pour le retardement de son maistre, mesmement qu'il auoit ouy vn terrible chamaillis de coups dedans le chasteau: à raison dequoy la Damoyfelle qui estoit demeuree avec luy, s'en estoit fuyee de grande crainte: & comme il vid les armes & espee de son maistre toutes taintes en sang, luy dist tout effrayé, Helàs mō maistre, avez vous receu quelque playe? Non (dist-il) sinon celle qu'une Damoyfelle qui est leans ma donné au cueur par sa beauté: par tant atens moy seulement icy, car puis qu'il n'y a personne dedās le chasteau qui me puisse maintenir contredire, ie l'emmeneray avecq' moy si ie puis. Las, monseigneur (dist l'Escuyer) le vous prie regarder bien à ce que vous ferez, à fin que la grādeur de vostre coura-

courage, ne vous abuse, car à ce que ie puis cognoistre à voz armes ainsi taintes de sang, vous auez beaucoup meilleur besoing de vous reposer, que de chercher nouvelle rencontre. Dom Rogel se prit à rire, & luy dist : N'ayez point de peur, car ie ne suis aucunement blessé, comme aussi n'estoit il à la verité, car le sang dôt il estoit couuert estoit sauté contre luy des playes des Cheualiers morts : & ce iour bien luy seruirent les armes que les sages luy auoyent donnees, mais par ce qu'il ne voyoit point la Damoysselle que il auoit laissée avec son Escuyer, luy demanda ou elle estoit. Elle s'é est fuyee (respondit l'Escuyer) incontinent qu'elle à entendu le bruyt des armes : que le diable la puisse emporter, car elle est cause dont nous sommes en ce tourmēt. Dom Rogel en riant luy dit : Aten moy là, car ie sortiray bien tost. Et ainsi rentra dedās le chasteau pour en tirer la belle damoysselle qu'il y auoit laissée.

Comme dom Rogel en continuant l'auenture des trois Damoysselles, monta en l'estude du Magicien Gandistin, & du furieux combat qu'il eut à l'encontre d'une espouventable beste.

CHAP. LX XIII.

Estant entré dom Rogel dans le chasteau, s'en retourna au lieu ou il auoit laissé la Damoysselle, & la retrouua en mesme état qu'au parauāt, fors qu'elle ne se lamentoit plus, ains tenoit les yeux fermez, & auoit le visage tout couuert de larmes, estant acoudee sur la main fenestre. A la voir en ceste sorte, il pensa qu'elle se fust endormie comme agrauée de la douleur, & delaçant son armet, mit vn genou en terre, & la baisa fort amoureusement, car il estoit nauré au vif de son amour. Mais la damoysselle se resueillant en sursault cōme d'un profond sommeil, dit en soupirant : O Dieu

quel outrecuidance de Cheualier ! Ma Dame (dit il) ie vous supplie ne m'accuser de ceste offense : car ie n'ay peu faire autrement, ayant perdu la liberté, & la raison, tāt ie me sens cruellemēt ataint de vostre souueraine beauté. Ne blasmez donc point ma hardiesse, puis que la douleur que ie souffre me sert d'excuse tres-suffisante, vous priant au surplus, Madame, vous en venir avec moy. Adonc monstrant vn visage fort courroucé, elle luy dit : Et vrayement, Seigneur Cheualier, à fin que vous receuiez le chastimēt de vostre audace, ie suis contente de faire pour vous ce que ie n'auois point voulu faire par cy deuant ayant pitié de vostre malheur. Je me tiens tresheureux, Madame (dit dom Rogel) d'aucturer ma vie pour vostre seruice, & d'estre châtié de l'ennuy que ie vous pourrois auoir faict.

Ainsi sans luy dire autre chose, de ce qui luy estoit aduenü en la court du chasteau, la print par la main, & l'emmena deuers la porte, mais en passant, il aperceut les deux autres damoysselles à vne fenestre qui pleuroient fort ameremēt, & luy disoyent : Pour Dieu, Seigneur cheualier, n'emenez point cete damoysselle hors de ceans sans nous en deliurer aussi. En bōne foy, dit il, ie ne vous ferai poinr cest honneur, car par cy deuant vous me auez appris comme ie me deuois gouverner avec vous. En disāt ces paroles, il entra soubz le portail, & passa en la court du chasteau, ou la damoysselle voyant les corps des cheualiers occis, dit tout effrayee. O Dieu qui à peu faire vne telle cruauté ! Vous, Madame, dit dom Rogel, car pour vous mettre hors de ceās, il m'a esté besoing d'y entrer avec vne telle effusion de sang. Adonc le regardant, elle ne fut moins esmerueillée de sa prouesse, q̄ nauree de sō amour, & toute troublée, de le voir sanglant de toutes parts, lui demāda s'il estoit blessé : Nō, Madame dist-il, & ne sens, Dieu mercy, autre douleur, sinō celle que ie souffre pour l'enuy
lequel

lequel vous dites que ie vous ay donné. Il est tresraisonnable (respondit-elle) que ie pardonne vne si petite offense a celuy à qui ie suis tant redevable. Et acheuant ces motz, ilz sortirent du chasteau, & dom Rogel dist à son Escuyer, Voys-tu, Sirind, quelle prinse i'ay faite avecque l'esparuiier? as-tu iamais veu vne plus belle proye? L'escuyer oyant parler ainsi son maistre, se print à rire: car vous devez sçauoir que la Damoysselle n'eut si tost passé le sueil de la porte du chasteau, qu'elle deuint aussi noire, ou plus, qu'une More Aethyopienne, ce qui fut occasion de la rusee de l'Escuyer, par-ce qu'il ne l'auoit veüe au parauant. Mais dom Rogel ne sachant pourquoy son Escuyer rioit, lui dist, Pourquoy rys-tu, Sirind? on diroit que tu te moques de moy. Le merxy (dist l'Escuyer) par-ce que vous me semblez auoir prins ceste Damoysselle pour sa seule couleur, car si sa robe estoit d'aussi belle tainture comme elle est, il n'y a chose que vous deussiez plus desirer en ce monde. Laisse ce iargon, dist dom Rogel, & descens de cheual, iusques à ce que nous ayons trouué autre monture pour ceste Damoysselle, & ce pendant, toy comme bien appris entre les Dames, marcheras apres elle à pied. Il me semble, dist l'Escuyer, qu'il lui seroit trop mieux seant d'aller à pied que non pas à moi, si ce n'est de peur qu'elle se halle d'auantage: car l'offense seroit tresgrande de traiter mal vne si belle & excellente Cornueille. Dom Rogel riant de son Escuyer comme se gaudissant de luy, tourna le visage vers la Damoysselle, car il ne l'auoit pas regardée depuis la sortie du chasteau, par-ce qu'il s'estoit tousiours amuse à parler à son Escuyer: Mais quand il l'aperceut si noire, il fut tout esmerueillé, & dist, Certainement voicy la plus estrange chose que i'aye iamais veüe, & ne pense point que par sa laydure Dieu n'ayt voulu remedier au mal qu'elle m'auoit fait par sa beauté. Partant, Sirind, allons nous en

du lieu ou l'on se mocque ainsi de nous. A dieu ma Damoysselle (dist-il en la regardant) car il me desplaist de demeurer si long temps icy, veu que i'y suis abusé à tous propos. Et ce disant mōta à cheual, & commença à s'en aller tout faché de ce changement: mais la Damoysselle more vestue de drap d'or le suyuoit tousiours, & luy disoit en plorāt. Helàs! seigneur Cheualier, ne me laissez point, & ne vueillez donner ceste liberté à vostre cueur, pour emporter avecque vous le mien, lequel vous tenez prisonnier. Las! quelle chose pouuez vous auoir veüe en moy pour changer si tost de vouloir, & m'vser de telle cruauté? Sirind en riant dist à son maistre, Veritablement, monseigneur, vous auez tort, puis que vous tenez le cueur d'une tant belle Dame, vser enuers elle d'une si grande cruauté. Mais dom Rogel s'en alloit tant effrayé & despité, qu'il ne sçauoit que dire, & encores moins que respondre: & en ces entrefaites il ouyt quelque hault cry dedans le chasteau, & tournāt la teste pour voir que c'estoit, il aperceut les deux belles Damoysselles à vne fenestre qui pleuroient comme toutes desolees & disoient, Helàs! seigneur, Cheualier, nous vous supplions, & coniuons par la foy que vous deuez à Dieu, & par celle que vous aimez le mieux en ce monde, de ne nous laisser en ceste captiuité. Voylā vne coniuration (dist Sirind) à laquelle monsieur mon maistre n'a garde de desobeir, mesmemēt si la Damoysselle qui le suy est celle qu'il aime mieux en ce monde. Puis se retournant vers dom Rogel, luy dist, Certainement, monsieur, vous ferez mal si emmenant vne si belle Damoysselle vous mettez en hazard de la perdre pour retourner à ces autres laydes qui vous appellent de ceste fenestre: & pense à mon auis qu'en pensant prendre l'une d'elles, vous ayez amené celle cy avecque vous. Dom Rogel ne se peut tenir de rire, oyāt les paroles de son Escuyer, & luy dist:

Mais

Mais par ta foy, que ferois-tu toy-mesme, Sirind, si tu estois en mon lieu? Moy (respond il) i'aymerois mieux en auoir vne de celles que vous laissez, que cent pareilles à celle que vous emmenez. Et bien (dist dom Rogel.) Le vueil croire ton conseil pour ceste foys, encores que i'eusse deliberé de faire tout au contraire. Adonc il s'en retourna dedans le chasteau ou il descendit de cheual, & monta en hault pour amener les deux damoyelles, mais ainsi qu'il vouloit entrer en vne salle, il fut assaillly de douze vilains armez de corseletz, de haches & de morions, lesquelz il eut en peu de temps reduit à tel compte, que la pluspart de eux estans morts les autres sauuerent leurs vies par la fuyte, tellemēt que sans trouuer personne qui luy contredit, il alla prendre les deux damoyelles par la main, & leur dit: Venez vous en avecque moy, aumoins si vous en estes cōtentes. Si sommes (respondirent elles) & vous supplions bien fort de nous emmener. Ainsi s'en allerent, & en passant, vn des vilains qui luy auoit demande mercy, luy dit: Emmenez, emmenez-les hardiment car vous n'en ferez pas beaucoup vostre profit. Mais sans se soucier de ces paroles, il passa outre, & emmena les damoyelles hors du chasteau duquel elles ne furent si tost sorties, qu'elles deuindrent ainsi Mores & Etiopiennes cōme la premiere. Sirind qui veid les damoyelles si horribles, dit en riant: Par sainte Marie nous aurons tantost force belles damoyelles, mais que nous puissions reconuer des montures. Dom Rogel esmerueillé de ceste auenture, dist à l'vn des vilains: Mon amy ie te prie me dire la raison pourquoy ces damoyelles deuennent ainsi noires. Cest (dist le vilain) par-ce qu'elles sortent du chasteau. I'en vueil voir l'experience, dist dom Rogel. Et adonc il les fit rentrer au dedans, & elles deuindrent aussi belles que iamais. Or ie ne veux iamais sortir de ceans (dist lors

dom Rogel) iusques à ce que i'aye donné remede à ce malheur, aumoins s'il est possible de ce faire. Et acheuant son propos, il demanda à l'vn des vilains s'il scauoit point par quel moyen lon y pourroit remedier, lequel luy respondit que non. Au moyen dequoy, dom Rogel mettant la main à l'espee faignit de luy vouloir trencher la teste, & luy dit: Par mon Dieu, maistre galland, si vous ne me dites ce que ie vous demande, ie vous osteray ce que vous tenez le plus cher en ce monde, qui est la vie. Las! Seigneur (dit le vilain craignant de mourir) ie vous prie ne me frapez point, ie vous en dirai tout ce que i'en scay. Dy-le donc, dist dom Rogel. Selon mon auis, dit lors le paissant, la raison de ceste auenture est contenue en vn tableau d'erain que mon maistre le sage Gandistin tient à la porte de son estude: autre chose ne scaurois-je qu'en dire. Monstre moy ou est ceste estude, dist dom Rogel. Elle est au plus hault du chasteau (dit le vilain) en vne chambre en laquelle l'on va en trauersant vne grande salle. Et ou est ce Magicien? dist le Prince. Il est dedans son estude, respondit le vilain. Or sus, sus (dist dom Rogel) guide moy iusques là, que nous voyons ce miracle. Las! Seigneur, dit la plus belle des damoyelles, ne mōtrez point là hault, car si vous y allez tout le mōde ne vous scauroit sauuer. Et tout le monde, dit dom Rogel, ne me scauroit destourner que ie ne vous rende en vostre premiere liberté, avec vostre premiere beauté, ou que ie ne perde la vie sur ceste querelle. Ainsi les laissant routes desolees, commanda à l'vn des seruiteurs du chasteau de le mener à l'estude du Magicien, & estant mōté tout au plus hault dedans la salle qu'on luy auoit dit, il aperceut en vn coing d'icelle, la porte de l'estude du Magicien, sur laquelle en vn petit tableau de brōze estoient engrauees certaines lettres Grecques, dont la substance estoit telle:

La beauté des trois belles Infantes se perdra hors du chasteau d'Alcazen, & ne se pourra recouvrer sinon par le moyen de leur mariage avec Gandistin & ses enfans, ou par le meslange du sang du Magicien avec le sang de la fiere & espouventable Lyonce gardienne de son estude, laquelle ne se pourra domter, sinon par l'un des plus preux & cheualereux de tout le monde. Sans l'un de ces deux moyens la sortie de ce chasteau sera la perte de leur beauté & a voulu le sage Gandistin user contre elles de ceste rigueur, en recompense de celle qu'elles ont tenue à luy & à ses enfans pour refuser leur mariage.

Après que dom Rogel eut leu ces lettres, & entendu la teneur d'icelles, il frappa contre la porte de l'enchâteur avecq' le pommeau de son espee : mais aussi tost que les vilains l'eurent aperceu heurter, ilz s'enfuyrent à grand' haste hors de la salle. Ce pendant lon demanda du dedans de la chambre, Qui est là, qui est là ? C'est dom Rogel de Grece (dist-il) qui veult entrer là dedans. Regarde bien, luy cria-lon, que c'est que tu veux faire, car tu cherches bien ton malheur : mais cōment esse que les gardes t'ont laissé entrer iusques icy ? Peu leur à seruy leur volōté (dist dom Rogel) pour m'en détourner, & encores moins la tienne. Acheuant ces paroles, il vid ouurir la porte de l'estude, & luy sembla vn hōme d'autant fier & horrible regard, qu'il en eust iamais veu, tellement que son seul visage luy causa vne fort grande crainte. Mais il ne fut tardif à mettre les mains en besongne, & comme hors de foy luy dressa la pointe de son espee à l'édroit du cueur, luy fourrant dans l'estomach iusques à la croisee, & ainsi qu'il la vouloit retirer, l'homme hurlant & iettant vne horrible voix, de laquelle tous le chasteau commença à retantir, tomba mort par terre, ayant pris la forme d'un homme d'assez beau visage, de l'age de quarante cinq

ans. A la cheute du Magicien se rompit vne fauce porte, hors de laquelle sauta vn des plus espouventables monstres duquel on eust iamais ouy parler, nommé Lionce, par-ce qu'il participoit de la nature du Lyon & de l'Once ensemblémēt. Il estoit grand comme vn cheual, & auoit les ongles & les dens desmesurément longues, & hideuses à voir. Quand dom Rogel l'aperceut, il n'eut point tant de courage qu'il ne se sentist assaillir de quelque peur : neantmoins avec celle prouesse, prudence, & dexterité qui le rendoit si parfaitement acomply au fait des armes, il se retira en la grand' sale, & là atendit la cruelle Lionce, laquelle fort legerement, & par grande fureur lui vint incontinent courir sus, pensant le prendre & estoufer entre ses griffes. Mais dō Rogel avec vne grande dexterité se retira a costé, & au passer luy donna tel coup d'espee dedans la teste qu'il l'estourdit aucunement, & ce qui profita le plus au Cheualier, fut le sang qui descendoit de la playe dedans les yeulx du monstre, de sorte qu'il luy faisoit perdre l'office de la veüe. A raison dequoy, la Lionce estant ainsi estonnee & aveuglee s'en alla heurter de la teste contre la porte de la grand' salle, laquelle elle mit toute en pieces avec les ongles. Dom Rogel la voyant ainsi amusee, vint hastiuement la fraper dessus vne espaule, ou il luy fit vne large playe, qui luy fit ietter vn douloureux & furieux cry, se tournant par grande rage deuers le lieu duquel elle s'estoit sentie blesser. Alors dom Rogel voulut gauchir au coup, comme à la premiere foys, mais il ne sceut si bien faire, que la beste n'enfermast les ongles dedans son escu, & le deschira en plus de cent pieces. Ce pendant dom Rogel prenant tousiours son oportunité, luy donna tel coup d'espee sur la teste, qu'il la luy fendit iusques à l'os, & l'estourdit tellement du coup, que sans scauoir, ny voir quel chemin tenir, elle entra dedans

dedans la chambre de l'enchanteur, & n'y laissa liure, ny papier, ny autre chose, qu'elle rompist tout par pieces avecq les ongles & avec les dens. Autant elle en fit du corps du Magiciē qui estoit mort: car c'estoit celuy qui premierement s'estoit aparū tant furieux & espouventable, pensant estonner, par son fier & hautain regard, le preux dom Rogel, lequel voyant la beste si enragee, la laissa faire pour quelque temps, mais n'ayant plus que deschirer, sortit de la chambre & aveuglee du sang, se iette furieusement sur vne fenestre, & avec la rage qui la tourmentoit en esbranla tellement la croisee, qu'elle la fit tomber, & elle semblablement dedans la rue, deuant la porte du chasteau, de sorte que pour la hauteur du lieu, & pesanteur du fardeau qui tomba sur son estomach, elle fut acraūtée, mourut incontinent. Les Damoyelles & les Escuyers, & les vilains qui estoient souz le portail, furent tellement espouventez voyans ceste hideuse beste qu'ilz se mirent tous à fuyr apres auoir fermé la porte du chasteau, ne pensant point qu'il leur fut iamais possible de pouuoir eschaper des griffes de la terrible Lionce, encores qu'elle fut morte par l'admirable & estrange prouesse de dom Rogel, mesmement par sa dextérité, laquelle luy seruit principalement en cest endroit.

Comme dom Rogel apres auoir occis la cruelle Lionce fit sortir les trois Damoyelles hors du chasteau pour sçauoir si l'auenture estoit achuee.

CHAP. LXXV.

DOm Rogel voyāt la Lionce morte & luy deliuré du grād peril ou il estoit, mit les genoulx en terre & en rendit graces à Dieu, puis remettāt l'espee au fourreau, ouurit vne porte des degrez que le vilain auoit fermee en s'e-

fuyant, & estant descendu, fut receu des trois Damoifelles, & de son Escuyer avec grande ioye, & trop plus grand esbahissement de sa haulte cheualerie. Les Damoyelles le remercioyent avec toutes les gracieusetez qu'il leur estoit possible de ce qu'il auoit fait pour elles. Mes bonnes Dames (dit il lors) sortons, ie vous prie, pour essayer s'il ne me reste plus rien à faire. Las! Seigneur Cheualier (dirent elles) comment voulez vous que nous sortions, veu que deuant la porte y a vne si horrible & mōstrueuse beste? Ne ayez paour (dit le prince) car elle est morte. Encores qu'elle fut viue (dit la plus belle) ie n'aurois point de peur estant en vostre compagnie. Adōc les portes estāt ouuertes, chacun fut estonné de voir la desmesuree grandeur du monstre, & sachez que les Damoyelles ne perdirent aucunement leur beauté, encores qu'elles fussent hors du chasteau plus de demye lieue iognant vne belle fontaine. Dom Rogel fort ioyeux dont vn si malheureux enchantement estoit mis à fin, cōmanda à son Escuyer qu'il allast chercher de la viande, & sur tout qu'il ne s'oubliait d'apporter l'Esparuiet, lequel luy auoit esté occasion de prendre vne si belle proye. Tandis que l'Escuyer estoit allé executer sa charge, dom Rogel s'estant desarmé, pour se rafraichir, & ayāt pendu ses armes sanglantes à vn saule, fit asseoir les Damoyelles sur l'herbe verde, & se mit aupres de la plus belle, à laquelle il estoit fort affectionné, & elle beaucoup plus à luy, tellement qu'ainsi comme il luy faisoit quelques caresses prenant la hardiesse de la baiser, elle commença le premier propos, & luy dit: Seigneur Cheualier, comment osez vous prendre tant de faueurs d'vne Damoyelle, laquelle vous auez naguieres tant defauorisee: car i'ayme beaucoup mieux estre aymee pour l'amour de moy-mesme, que non pas pour ma seule beauté. Ie vous supplie, ma Dame (respondit il) ne

parlons point de celà, & ne vueillez par voz paroles renforcer le martire dont ie suis affligé par vostre amour. Regardez que les Cheualiers, les vilains, & les bestes monstrueuses ont gardé le priuilege dont elles m'estoyent redeuables pour estre vostre, & ne m'ont aucunement blessé: Ie vous supplie donc, ma Dame, que vòtre beauté & gracieuseté me garde le mesme priuilege, & premierement me dire la raison de ceste auéture, car sur ma foy elle est estrange. Seigneur Cheualier (dist-elle) ie vous prie de rechef vous souuenir de ce que i'ay dit: car par là ie vous veux monster que vous ne deuez point mettre vostre affection es choses, que le temps, ou la maladie vous peuuent quelque iour faire repentir d'auoir aymeës. Pourquoy dites vous celà, dist le Prince. Ie le dy (respondit-elle) par-ce que vous deuez tousiours plus aymer & honorer en l'amour des Damoyelles, leur vertu & leur prudence, que la beauté qui est sujette à infinis changemens, car l'amour des choses qu'on ayme, ne dure non plus que la raison pour laquelle elles sont aymeës. Or sachez que nous sommes nieces du Soudan de Perse, & filles de la belle Persilee sa fille, laquelle fut deliuree d'entre les mains des Geans du chasteau des rochers par les excellens Prince Anaxartes, & la belle Infante Alastraxeree: & deuez sçauoir que nostre mere fust mariee avecq le Roy de Torrin duquel nous sommes filles, & suis laisnee des trois. Mon nom est Sidere, la plus aagée de mes autres deux sœurs à nom Fleurinde, & la plus petite Sindayde. Nous fusmes prinsees ensemblement par cest enchanteur & par ses enfans entrahison: car luy estant en la cour du Roy mon pere, il auoit vne maniere de tour qui se mouuoit d'elle mesme, & disoit que si nous entrions dedans, nous verrions la plus belle & estrange auenture qui fut iamais veüe. Le Roy mon pere en voulant voir l'expé-

rience, nous fit entrer toutes trois dedans la tour, & l'enchanteur entra apres nous avec ses deux enfans, lesquelz auioird'huy vous auez occis dans le iardin. Et apres estre entrees, & eux avecque nous, ie ne sçay par quelle façon nous sommes trouuees icy, & ne sçauois vous en dire autre chose, sinon que depuis dix iours en ça le Magicien nous sollicitoit fort de mariage, moy pour lui & mes deux sœurs pour ses deux enfans. Et par-ce que nous ne voulusmes luy consentir, l'Enchanteur vsa de ses artz, & nous dist que nous ne pourrions iamais sortir de son chasteau sans perdre nostre beauté accoustumee, iusques à ce que nous eussions accepté les mariages qu'il nous proposoit, ou que son sang fust meslé avec celui de la hideuse beste par la force d'un seul Cheualier, à fin que nous vissions par là, combien il nous estoit impossible de recouurer la liberté sans obeir à son vouloir. Neantmoins nous ne lui auons iamais voulu acorder, ains dismes que iamais nous ne prendrions telz marys: & à ceste cause de desdaing nous n'auons iamais voulu coucher sinon toutes vestuës, de sorte que voicy les robes avecq lesquelles nous fusmes prises. Ilz nous permettoient de nous promener librement dans le chasteau, & deffendoyent qu'hòme du monde ny entrast. Ce pendant nous allions la plus part du tēps plorer nostre malheur à la fontaine ou vous no⁹ auez trouuees, & eux pensans gaigner nostre volonté avec le temps, nous faisoient tous les seruices desquelz ilz se pouuoient auiser. Voylà en bref le discours de nostre fortune. Maintenan^t puis qu'il à pleu à Dieu nous mettre en vostre puissance, nous vous supplions nous donner le moyen de estre rendus en la maison de nostre pere & nous faire entendre entre les mains de qui nous sommes tombees, pour sçauoir si auioird'huy la fortune commēce à nous estre autant fauorable cōme elle nous

nous à esté ennemye par cy deuant. Vrayement, ma Dame (dit dom Rogel) vous m'avez conté merueilles, & me tiens fort heureux de m'estre trouué, en lieu ou ie vous aye peu faire vn si gracieux seruice, vous asseurât que ie ne prédray aucun repos, iusques à ce que ie vo^s aye renduë au lieu dont vous m'avez requis. Mais pour autant, ma Dame, que ie ferois tresmal de me celer à vne si excellente Princeesse, sachez que lon me nôme Rogel de Grece. O dieu, dit l'Infante, quelle bône fortune! estes vous dôc ce filz de dom Florisel de Niquee, duquel pour voz triomphans haults faitz d'armes, la renommee à desia tant de foys enuironné toute la terre. Ie ne sçay que elle est ma renommee (dist dom Rogel) tant y à que celuy que vous dites, est mon pere, & moy vostre seruiteur s'il vous plaist par tout ou il vous plaira me commander, n'estimant en toute ma vie iour plus heureux, que celuy auquel ie auray eu le moyen de vous faire quelque agreable seruice. Dieu soit loué, dist l'Infante, qui nous à voulu oster d'vne telle facherie, pour nous mettre en si grande ioye: car estant auecque vous il me semble que ie soye encores en la maison de mon pere. Ainsi qu'ilz deuisoient de telz & autres gracieux propos, l'Escuyer & les seruiteurs du chasteau leur apporterent plusieurs viandes, & l'Esparuiier ensemblément: & lors l'Infante Sidera fort ioyeuse, dit qu'elle le voudroit bien auoir pour le traiter, & honorer côme celui qui estoit cause d'vn si grand bien: & le prenant sur le poing luy osta le chaperon, les longes, & les sonnettes, puis luy bailla la vollee, disant: Ia Dieu ne playse que tu soyes prisonnier de celle, que tu as deliuree de prison. Ma Dame (dist lors dom Rogel voyant ce que l'Infante auoit fait) vous auez bien môstré la grandeur & magnificence de vostre royale lignee, en guerdonnant les oyseaux de leur bien fait, à fin de ne

laisser aucun moyen aux hômes de vous pouuoir estimer ingrate. Apres plusieurs autres gracieux deuïs, ilz prindrent leur repas, & delibererent de retourner au chasteau pour dōner ordre à leur depart, par ce que dom Rogel leur promit de ne les abandonner iamais iusques à ce qu'il les eust conduites en la maison du Roy leur pere. Estant donc retournez au chasteau, ilz firent enseuelir les morts, puis se mirent à donner ordre à leurs affaires esquelz nous les laisserons pour vn tēps, à fin de vous dire ce qui auint à dom Brianges apres s'estre séparé de dom Rogel.

Comme dom Brianges de Beocie trouua l'ocasion de l'auenture qu'il cherchoit, & de l'estrange vengeance qui en aduint.

CHAP. LXXVI.

DOm Brianges & dom Rogel s'estans departis l'vn de l'autre en la maniere que vous auez entendu, dom Brianges n'eut cheminé guieres long temps, qu'il se trouua aupres d'vn petit bocage, dedans lequel il ouït hanner vn cheual. Parquoy desirant sçauoir la raison de ce qu'il cherchoit, brocha à trauers le boys, s'adressant au plus pres qu'il pouuoit au lieu ou le cheual auoit hanny. Mais il ne fut guieres auant, qu'il ouyt pleurer vne damoyelle fort passionnee, ainsi qu'on pouuoit coniecturer par sa voix, & s'aprochant tout bellement auec son Escuyer, il aperceut d'assez loing vn Cheualier qui pleuroit semblablement auecque la damoyelle, le palefroy de laquelle & le destrier du Cheualier, encores qu'ilz fussent bridez alloient broustans les arbrisseaux par le bocage. Dom Brianges ayant quelque temps escouté les plaintes & lamentations de la damoyelle eut grande pitié de sa douleur, car elle luy sembloit fort belle & de bône grace, & estoit vestuë en la mesme maniere

S 3

que

que celle laquelle il auoit laissée morte dedans le carrefour. La pauvette auoit son giron tout couuert de cheueux que elle s'estoit arraché de grand dueil : & si en auoit encores espandu vne grande partie en terre tout autour d'elle. Ses yeux, & tout son visage estoient arrolez de grosses larmes, qu'elle versoit en grande abondance : & se tordant les mains avecque grand trauail de son cuer, auoit tousiours les yeux fichez sur vn Cheualier qui estoit estendu sus le herbe, & combien qu'il pleurast avecq elle, neantmoins en le blasmant de sa cruauté, elle se plaignoit fort douloureusement, & luy disoit : Ha trahistre & malheureux Cheualier, comme as-tu peu estre si cruel que de tuer de ta propre main, celle qui en sa chasteté t'aymoit plus que soy-mesmes ! O Agricee, ma chere sœur, la fleur de l'Isle de Guindaye helàs comme ta grande beauté, & l'honneur que tu auois en si grande recommandation, ont esté les couteaux par lesquels deuant tes iours tu as acheué ta vie, que tu as mieux aymé perdre, que de complaire à l'amoureux desir de celuy que tu aymois le plus en ce monde. O Dieu tout puissant, comme as-tu cōsenti q̄ ma chere sœur mourut à si grand tort ? O trahistre Filastre, si l'amour qu'elle te portoit, & que tu luy portois, ne suffisoit pour arrester ta cruelle main, à tout le moins la beauté de ma miserable sœur te deuoit esmouuoir à pitié, à fin de ne violer avec la pointe de ton espee le sang innocent, qui estoit trop plus propre à inciter les plus Barbares cueurs à l'amour, qu'à vne si grande cruauté. O meschant que tu es, tu as voulu faire de sa poitrine, douce fontaine de chasteté, vne autre fontaine de sang, à fin que mes yeux deuinsent fontaines de larmes, iusques à ce que la vëgeance de ton forfait m'ait donné quelque consolation en ma douleur. Acheuant ces paroles elle cōmença à s'arracher les cheueux, à se tordre les

maines, & à se desespérer encores plus que au parauant. Dom Brianges prenant pitié du tourment de la damoiselle, & s'asseyant que le Cheualier estandu sur le herbe estoit celuy qu'il cherchoit, ne se voulut plus cacher, ains se monstrant apertement, luy dist : Malheureux Cheualier, qui apres auoit fait vne telle infamie demeure ainsi estandu sur l'herbe, lieue toy viste, & prens tes armes, si tu n'aymes mieux ainsi desarmé que tu es recevoir la recompense de ta trahison. Le Cheualier entendant ces paroles, parce qu'il n'estoit moins triste pour la faute qu'il auoit faite, que la damoiselle mesme qui se lamentoit aupres de lui, respondit à dom Brianges : Certainement, Cheualier mon amy, ie ferois grandemēt si ie laissois prendre à vn autre qu'à moy mesme la vengeance de mon demerite, & puis que mes mains ont esté la raison de ma faute, à bon droit elles mesmes en feront reparer l'offense, à fin que le mesme amour de ma dame Agricee qui m'a fait faillir en son viuant, me face biē faire apres sa mort, en recompensant le trop violent amour que ie luy ay porté, par la violente hayne que i'exerceray contre moy-mesme. Comme il acheuoit ces paroles, il se leua sur les piedz, & tenant en sa main l'espee encores sanglante du sang de sa Dame, il tendit les yeux au ciel, & dit : O cruelle espee qui as peu commettre vne si grande cruauté entre mes mains ! il est bien raisonnable que tu vses maintenant enuers moy de la pitié de laquelle ie n'ay sceu vser enuers ma dame, à fin q̄ en assemblant son sang avecque le mien ie retraigne les larmes de sa sœur, & acheue mon douloureux tourment par la fin de ma miserable vie, & ne me malcōtenteray point, si outre le chastimēt que ie prendray maintenant de moy mesmes l'ame souffre dedans les flammes infernales apres ma mort, ce à quoy le corps n'aura peu satisfaire en son viuant. Acheuant ses paroles il se donna prome-

ment avec grande rage, de l'espee dedans la gorge, & tomba mort par terre. Dom Brianges & son Escuyer esmerueilliez de ceste fortune, demeurèrent long temps estonnez ne faisans autre chose que regarder le Cheualier mort, sur lequel la Damoyelle commença à se plaindre & lamenter fort douloureusement en ceste sorte, Helàs! Filastre, avec quel amour pourray-ie recompenser la hayne & vengeance que tu t'es portee a toy mesme, pour satisfaire à l'amour lequel tu portois à mon infortunee & miserable sœur. Avec quelz ruisseaux de larmes, pourray-ie accompagner ceux de ton sang? Avec-que quelles paroles pourrai-ie assez louer le hardy courage de ton noble cueur? Par quel moyen pourray-ie maintenant monstrer combien ie t'ayme ayant tourné en parfait amour apres ta mort, la cruelle inimytié que ie te portois durant ta vie, pour auoir meurtry de ta propre main, la poitrine de ma deffortunee sœur. Helàs, amour, comme tu as par ces deux cruelz coups despee montré en vne tres-grande cruauté, vne pitié encoires plus grande, & en vn tresgrand desir de me vanger, vne beaucoup plus grande satisfaction que (peut estre) ie n'eusse demandee, & en vne extreme douleur, vne plus grande occasion de soulas, aumoins si le soulas pouuoit auoir quelque lieu en ce malheur qui me tourmente. O fortune, comme en mes plus grandes deffortunes tu m'as encoires voulu deffortuner d'auantage, en me faisant aymer mon mortel ennemy, pour la hayne dont il s'est hay lui mesme, à fin de montrer l'amour qu'il portoit à celle, à laquelle i'estois reueuable de toutes mes affections. Ainsi, Filastre, tu as fait ton deuoir, & as satisfait à ta cruauté & à l'occasion de ma douleur, sans neantmoins m'auoir donné que bien peu d'allegeance à la comparaison de mon travail. A peine acheuoit elle de dire ces paroles, quand deux Cheualiers armez arriuerent en sursaut aux

plaintes de la Damoyelle: & voyans le Cheualier mort, & celle qui se lamentoit aupres de luy, ilz penserent que dom Brianges l'eust occis, & luy dirent en grand colere, Cheualier, il est temps que vous vous reueillez vn peu, & que vous preniez en vous le soucy de satisfaire à celuy que vous avez tué par si grande trahison. A ces paroles sans luy donner loysir de prendre sa lance, l'vn d'eux, le vint rencontrer a course de cheual, dedans l'escau, si rudement que pour l'auoir prins à l'impourueue, & auoir couru de fort droit fil, il le fit sauter par dessus la croupe de son cheual en terre: mais par ce qu'il n'auoit point lasché les resnes du cheual, il remonta incontinent, & tout allumé d'extreme courroux mit la main à l'espee, & s'adressa à l'autre qui couroit contre luy la lance baissée, luy disant à haute voix, Trahistre & malheureux Cheualier, ie vous feray cherement acheter, si ie puis, vostre lascheté & villanie. Et ce disant le vint rencontrer, & rompit sur luy: puis soudainement vint avecq' son compagnon presenter à dom Brianges le combat des espees. Alors se commença entr'eux vn aspre & cruel combat: mais le Prince de Beocie qui estoit fort cheualereux & en grande colere, en vint ataindre l'vn dessus l'armet avec telle force, qu'il luy fendit la teste iusques aux yeux, & le Cheualier tomba mort par terre l'vn des piedz luy demeurant en l'estrier, tellement que son cheual le traina long temps, iusques à ce que l'estriuiere estant rompue, le Cheualier demeura tout estandu par terre. Son compagnon espouuenté de ce merueilleux coup, n'osa atendre d'auantage, ains tournant bride, commença à s'enfuyr trop plus hastiuement qu'il n'estoit venu. Dom Brianges se soucia bien peu de le suyure, ains retournant vers la Damoyelle qui estoit fort esbahie de sa prouesse, luy dist, Ma dame, i'estois icy

venu pour la pitié que j'auois eu de vostre sœur, laquelle j'ay trouuee morte en mon chemin, & auois bonne intention de faire mon deuoir pour prédre la vengeance d'un tel outrage ce que ie pouois bien faire comme vous auez veu, si ce Cheualier de la propre main qui auoit fait la faute, ne m'eust deuancé en ceste vengeance. Or puis que vous estes satisfaite de ce enquoy il estoit possible vous satisfaire, prenez vostre palefroy, & allés en quelque part ou nous puissions enuoyer querir vostre sœur pour la faire en terrer, & vous essayez par vne ferme patience à remedier à ce, ou vous ne pouuez trouuer autre remede. La Damoysele le remerciant de ce qu'il disoit, luy dist, Je sçai bien seigneur Cheualier, que vous estes tel comme l'experience la monstre: & puis que maintenant ie n'ay autre moyen pour recognoistre ce qu'il vous à pleu faire pour ma sœur, à tout le moins ie m'essayeray à vous obeir en ce que vo^s me dites: partant allons ou il vous plaira me commander, priant Dieu vous satisfaire (puis que ie n'en ay la puissance) de ce qu'il vous à pleu faire pour moy, & a quoy vous vous apareillez encores. Adonc l'Escuyer du Prince ayant aydé la Damoysele à monter sur son palefroy, elles les pria de venir avecq' elle à un chasteau de sa mere qui estoit vesue, duquel elle estoit partie le matin, pour s'aller esbatre: & que là ilz pouruoiroient à ce qui seroit necessaire pour l'enterrement de sa sœur: ce qu'ilz firent & sur le chemin dom Brianges luy demanda comme sa sœur auoit ainsi esté occise: Celà vous diray-je tresvolontiers, respondit la Damoysele. Sachez donc que ce Cheualier long temps a, aymoit extremement ma sœur, car c'estoit vne des belles Damoyseles de toute l'Isle: ma sœur aussi l'aymoit de fort bonne amour: mais par-ce qu'il estoit marié, elle ne voulut iamais obtemperer à son vouloir: au moyen dequoy il deuint autant fol

& desperdu pour son extreme passion, comme la folle qu'il a faite nous en a donné tesmoignage. Car nous aiant rencontrees ce matin, & voyant que ma sœur ne vouloit aucunement obeir à son desir, il luy dist qu'elle se deliberaist de satisfaire à sa volonté, ou de mourir incontinent, à fin quelle souffrist en la mort, ce qu'elle luy auoit fait souffrir en la vie. Ma sœur metant arriere toute la crainte qu'elle eust peu receuoir de ces paroles, luy dist, Je vous promes, Filastre, que tât que ie sçaurai que l'honneur nous doit estre plus cher que la vie, ie demeurerai tousiours en ma volonté pour mieux resister à la vostre. Adonc fort colléré de ceste responce, luy dist comme hors de soi, Et par Dieu ie me vengeray de vostre refus, & puis que vo^s ne voulez receuoir mon amour de vostre bon gré, vous sentirez ma haine par force. Auecque ces paroles il tira l'Espee, & fit le coup que vous auez veu laissant ma sœur morte, & tenant l'espee toute sanglante en la main, s'en vint iusques au lieu auquel vous nous auez trouuez, ou il se laissa tomber de son cheual en terre. Quand à moy ie l'ay suyuy tousiours me plaignant de sa cruauté, & lamentant mon infortune que vous auez veu. Voylà, seigneur Cheualier, ce que vous vouliez sçauoir. Certainement (dist dom Brianges) ce Cheualier deuoit estre fol comme il à bien monstre par sa derniere folie: car encores qu'il eust fait vne si grande faute qu'il estoit impossible d'en faire vne plus grande, si est-ce que la perte d'un corps, & d'une brieue vie, ne se doit point venger par la perte d'une ame, & d'une vie perdurable: parce qu'il estoit iuste qu'avec la douleur & repentance de sa faute il vesquist en mourant, à fin de ne mourir en vivant, & demeurer a tout iamais en vne mort eternelle. Vous dites tresbien (dist la Damoysele) mais la raison veult que les meschans facent la fin que leur mauuaises œures meritent. Sur-ce

propos ilz arriuerent au chasteau ou ilz furent tresbien receuz de la Dame d'iceluy, qui estoit mere des deux Damoyelles, laquelle ayant entendu la mort de sa fille, après les regretz & plaintes accoustumees en telz accidens, la bone mere enuoya querir le corps & avec maintes ceremonies & lamentations, luy fit dresser vn tombeau, à l'entour duquel toute l'histoire de sa mort estoit peinte: au moyen dequoy dom Brianges estimant ceste fortune digne de memoire, fit engrauer sur son tombeau, les vers ensuyuant pour epitaphe:

*Ainsi que le Fenix sa vie renouuelle,
Sacrifiant son corps aux rayons du soleil,
Ainsi sacrifiant ceste vie mortelle,
A mon chaste renom, ie domte le sommeil,
Du riage oublieux, & trôpe la nuit sombre,
Car ie suis immortelle, & ne pers que mon ombre.*

Après les funerailles faites, & toutes les solennitez acheuees, dom Brianges print congé de ces bonnes Dames, & les ayant consolees au mieux qu'il luy fust possible, reprit le chemin que dom Rogel auoit tenu, esperant le retrouver, & luy raconter ceste fortune.

Des propos que dom Rogel & l'Infante Sidere eurent ensemble sur leurs amours aupres d'une plaisante riuere.

CHAP. LXXVII.

L'Excellent Prince dom Rogel de Grece demeura avecq les Infantes dedans le chasteau l'espace de deux iours, pendant lesquels il fut naure des amours de l'Infante Sidere, beaucoup plus qu'il n'auoit esté au parauant: Elle au semblable n'estoit moins atainte de son amour, toutefois encores qu'il la suppliait de luy otroyer la guerison de son mal. elle resistoit & dissimuloit fort discrete-

ment sa passion. Il demanda aussi aux deux Infantes la raison pourquoy elles s'estoyent escriees quand il les auoit voulu emmener du iardin, & luy dirent que elles n'en scauoient autre chose, sinon qu'elles furent contraintes à ce faire par la force des enchantemens. Pendant ces deux mesmes iours dom Rogel fit rendre le chasteau à vne damoiselle & à vne sienne fille, sur lesquelles l'enchanteur le auoit vsuré. Et ce fait, il print le chemin du prochain port avecq les Infantes montees sur trois bons palefrois, & son Escuyer, bien deliberé de s'embarquer incontinent qu'ilz auroient trouué vaisseau pour passer au Royaume de Perse. Sur les chemins dom Rogel ne se separoit iamais de l'Infante son amoureuse, la suppliât prendre pitié son de mal, & elle luy resistât de fort bonne grace, & le paissant de plusieurs vaines esperances. Or auint qu'un iour entre autres la nuyt les surprint en vn petit bocage, pres duquel passoit fort belle & plaisante riuere: au moyen dequoy, tant pour les tenebres de la nuyt, que pour la beauté du lieu, delibererent de se reposer là, & y attendre la venue du iour: & apres auoir soupé des viandes qu'ilz peurent recouurer, dom Rogel prenant l'Infante par la main, la mena promener à la fraischeur le long de la riuere. Ce pendât ses deux sœurs se mirent ensemble en diuers propos, & ne voulurent point les suyure, par-ce qu'elles n'estoyent trop contentes que dom Rogel fust plus affectionné à leur sœur, que non pas à elles. A raison dequoy se prenant par la main, laisserent Sirind entre les cheuaulx & palefrois, & s'allerent promener le long de la riuere prenant le chemin tout au rebours de l'Infante leur sœur. Avec laquelle dom Rogel se voyant ainsi seulet, forcé de la flamme amoureuse qui l'opressoit commença à luy dire: Ma Dame, ie n'eusse iamais pensé que par telle rigueur vous eussiez voulu recompenser le serme &

loyal amour que ie vous porte, avecque le service que ie me suis essayé de vous faire: & vous supplie bien fort ne me causer plus vne si grande douleur, ou à tout le moins ne me blasmer si i'yse enuers vous de quelque petite force, pour remedier à la force violente dont ie me sens forcé par vostre diuine & souueraine beauté & bonne grace. L'Infante fort troublée de ces paroles, luy dist: Ie vous supplie, Seigneur dom Rogel, ne me priver de la gloire que ie reçois en moy-mesmes pour estre aymée d'un tel Cheualier, & pour luy auoir semblablement donné mon amour avecque toute l'honnesteté dont ie suis redevable à ma grandeur: Considérez aussi que m'ayant pris en vostre garde, vous n'estes moins tenu de defendre mon honneur contre vous mesme, que contre les autres. Partant, Monsieur, permettez (ie vous supplie) que le temps, la longue conuersation, & l'amour que ie vous porte, vous octroyent ce que le peu de temps qu'il y a que ie vous cognois, & le lieu dont ie suis, ne vous peuuent octroyer pour le present qu'à ma grande honte. Prenez de moy ce que mon honnesteté vous peut donner, ie ne le refuseray point, mais si par force & violence vous voulez auoir un plus grand gage de mon amour ie ne suis pour vous resister, car si vostre deuoir ne vous donne assez de force contre vous mesmes, pour me garder ma chasteté, à peine pourrois-je auoir la force de la garder par ma resistance. Ie suis seule avecque vous, mais vous n'estes point si seul avecque moy, que vous ne ayez avecque vous qui puisse resister à vous mesmes, avec beaucoup plus grande force que celle avec laquelle vous me pourriez offencer: cest la vertu, & la souuenance de vostre deuoir, choses si fortes qu'elles sont suffisantes pour forcer les forces desquelles amour vous force pour me forcer. Ce qui me fait croire que vous ne voudrez point perdre en la presente entreprise, la gloire de sçauoir forcer vo-

sire desir, qui est vne vertu par laquelle tant de hautes & estranges aduentures vous ont esté otroyées par cy deuant. Puis donc que dom Rogel a esté victorieux sur tant d'autres, qu'il soit encores maintenant victorieux sur luy mesmes: n'estât dom Rogel vaincu par autre que par dō Rogel, & par l'Infante Sidere, à fin de luy garder son entiere virginité gagnât pour estre ainsi vaincu, vne des plus belles victoires qu'un tel Prince comme lui pourroit desirer d'une telle Princeesse comme ie suis: laquelle louange ne vous pourroit auenir, mon cher Seigneur, si en desobeissant à vostre deuoir, vous vouliez obeir à vostre volonté. Dom Rogel non moins enflâmé de l'amour qu'il luy portoit, que vaincu par sa prudence, & par ces paroles qu'elle proferoit de fort bonne grace, se mit à genoux deuant elle, & luy dist: Ma Dame, c'est vostre beauté qui m'a fait la force, laquelle veut forcer en moy, la raison, & l'obeissance que ie vous doys, s'il ne vous plaist de vostre bon gré prendre celle pitié de mon mal que vous en deuez auoir, à fin de ne me laisser mourir en ceste cruelle passion qui m'est beaucoup plus griesue que la mort. Mais si ceste force que ie vous di, ne force vostre rudesse, ie ne voy & ne cognoys en moy aucune force qui ne se soit renduë à la mercy de la mort, laquelle i'atens à vostre occasion, si par vostre pitié en vertu de l'amour que ie vous porte, vous ne secourez ma vie laquelle est maintenant entre vos mains pour en disposer ainsi qu'il plaira à vostre bonne grace. Parquoy ma Dame ie vous supplie, ne me causer si tost la fin des mes iours, puis que ie ne demande la vie que pour auoir moyen de m'employer à vostre service. L'Infante voyant dom Rogel en cest estat, n'estoit moins guerroyée de la pitié qu'elle prenoit de luy, qu'enflamée de l'extreme amour qu'elle luy portoit, & se debatât entre son honneur, & entre l'amour, & la pitié dont elle estoit

sur-

surprise, voulant satisfaire à tout par vn
 meisme mouen, embrassa tres-amoureu-
 sement dom Rogel, & le baisant luy dist:
 Monseigneur, ie vous supplie puis que i'ay
 pris pitié de vostre mal en vous octroyant
 ceste grande faueur que pareillement
 vous preignez pitié de vostre deuoir &
 de mon honneur, lequel vous ne me de-
 neez point oster m'ayant receu en vostre
 garde. Dom Rogel oyant les paroles de
 l'Infante perdit la hardiesse de l'importu-
 ner plus auant, comme il auient sou-
 uentesfois à ceux qui ayment parfaitem-
 ment qui pour crainte qu'ilz ont d'en-
 nuier celles auxquelles ilz ne pourroyent
 faire chose qui ne leur fust tresagreable,
 laissent eschaper les occasions mieux apa-
 reillees à receuoir le contentement de
 leur desirs. Ainsi dom Rogel cōtent d'vne
 faueur si petite à la comparaiſon de
 celle qu'il pouuoit prendre, dist à la belle
 Princesse craignant de l'ennuyer: Ma
 Dame, ie suis content pour ceste heure
 de temperer avecque ceste faueur, la force
 du feu dont vous me tenez enflammé
 iusques à ce qu'ayant rendu l'ame entre
 voz mains, le corps transi tombe à voz
 piedz pour tesmoignage de vostre rigueur.
 Et plaist à Dieu que ce soit bien tost,
 à fin qu'en acheuant ma vie ie puisse
 sortir d'vne si grande douleur, & satisfaire
 à ce dont ie me suis redeuable pour
 auoir veu vostre excellente beauté, puis
 que ce m'est vne trop grande folie de vi-
 ure plus longuement, ayant si iuste occasion
 de mourir. Veritablemēt vous mesmes
 deuriez estre estonnee comme avec
 ceste cognoissance, i'ay peu demeurer en
 vie iusques icy. Toutes-fois ie ne m'en
 estonne pas trop: car ie pense que la pitié
 de laquelle vous deuriez vser enuers moy,
 est conuertie en toute cruauté: les treues,
 & tres-impitoyable guerre, & la clemence,
 en la plus extreme rudesse. Helàs, ma
 Dame, encores auez vous quelque raison:
 car vostre grande beauté merite bien
 que ie meure pour elle,

sans vser d'aucune raison enuers mes
 raisons & encores moins enuers mes pa-
 roles. Parquoy ie n'ay plus deliberé vous
 monstrer autrement mes douleurs, que
 par ma mort, à fin que le deffault de mes
 paroles n'offense vostre souueraine be-
 auté, & se face tort pour trop peu dire
 au regard de mon affection, & de l'angoisse
 de mes douleurs. L'Infante l'ayant ouy
 en grande compassion, luy respondit:
 Mon Seigneur, & vray amy: Ie me tiens
 bien-heureuse d'auoir resisté par mon hon-
 nesteté, à ce en quoy la beauté m'estoit
 la plus cruelle ennemye, car par autre
 moyen que par le respect de mon honneur
 ie ne me fusse peu deffendre contre voz
 belles parolles, & excellente bonne grace,
 qui n'ont moins de force pour enflāmer
 de vostre amour les damoyelles, que ma
 beauté, laquelle vous auez fait si grande,
 pour naurer les Cheualiers de mon amour.
 Mais avecque la gloire de deffendre mon
 honneur ie deffendray pareillement ma
 vie, en la guerre que vostre beauté me
 fait d'heure en heure: vous priant, mon
 seigneur, faire le semblable en vostre
 endroit, & resister à vostre desir pour
 la conseruation de ma chasteté, en la
 patience de voz douleurs. Et si la beauté
 du corps par le desir de la iouissance,
 vous veult priuer de la raison, faites
 que la beauté de l'ame, qui est la vertu,
 vous deffende courageusement de telz
 assaulx, & considererez le triumphe
 qui vous est apareillé apres vne telle
 victoire. Helàs ma Dame (dist dom
 Rogel) en pensant remedier à mon mal
 par vostre prudence, l'excellente gracieu-
 seté de vos propos l'acroist encores
 d'auantage: car si vostre beauté me met
 au mourir, vostre discretion me fait
 perdre la vie, & voz raisons font qu'en
 vous voulant demāder pitié, ie demeure
 sans aucune raison, sans en auoir en moy
 autre q̃ celle qui me demeure pour
 mettre bien tost fin à mes iours. Puis
 donc que ie n'ay aucun remede pour
 remedier

aux playes de vostre beauté, & que les raisons me deffaillent pour me deffendre contre les vostres, le m'essayeray à respandre l'eau de mes larmes dedans le cruel feu qui me tourmente, à fin que par la resistace de l'un à l'autre ie me puisse maintenir en vie, me contentant de la gloire de ceste faueur. Et ainsi, ma Dame, ie vous supplie ne me la dénier, ou à tout le moins me permettre de la prendre par force s'il ne vous plaist que bien tost ie meure. Force ne me pourriez vous faire (respondit-elle) puis que d'un tel Cheualier comme vous estes, ie ne pourrois rien souffrir outre mon vouloir: ains au rebours pour me deffendre de la force que ie pourrois receuoir de vostre beauté & prouesse, craignant que comme foible Damoysselle ie ne peusse resister à l'amour, ie me mes entierement en vostre sauuegarde, à fin que par vostre vertu vous me defendiez de moy contre vous, & de vous contre moy, & encores de vous contre vous mesmes. Car par-ce moye vous gagnerez deux belles victoires, l'une pour vous, & l'autre pour moy, tellement que nous serons l'un & l'autre satisfaitz, tant du grand amour que nous nous portôs, comme de l'honneur & du deuoir duquel ie vous suis redevable, & moy à vous semblablement. Entre telles & autres semblables paroles dom Rogel iouyt tout un long temps de la compagnie de la belle Infante luy baissant souuentefois les mains & sa vermeille bouche, & apres auoir demeuré longuement en ceste façon, ilz retournerent vers les autres deux Infantes, & estandans leur manteaux sur l'herbe verde, dormirent le surplus de la nuyt iusques au iour, puis retournerent à leur chemin.

Comme dom Rogel de Grece combatit trois Cheualiers, pour deliurer trois Damoysselles qu'ilz emmenioient, & de ce qui en auint.

CHAP. LXXVIII.

LEs Infantes acompagnees de dom Rogel estant retournees à leur chemin, sur lapresdinee entrerent en vne forest, en laquelle trouuerent trois Damoysselles fort belles & richement acoutrees, mesmemet l'une d'elles qui sembloit estre la maistresse des autres deux. Elle s'en alloit plorant en grâd' douleur, par-ce que trois Cheualiers les emmenioient outre leur gré, & tenoient leurs palefrois par les resnes. Dom Rogel les voyant de pres pensa auoir veu la plus belle en quelque lieu, encores qu'il ne luy souuint point ou, & dist, Ces Cheualiers doiuent auoir fait quelque villannie à ces Damoysselles, ou leur veulent faire quelque outage: car ilz les emmenent par force. Puis estant arriué aupres d'eux, leur demâda à quelle ocaïon ilz les traitoient si rudement. Ce n'est à toy (dist l'un d'eux) à qui nous en deuons rendre compte: mais au contraire nous voulons auoir encores les trois que tu menes. Dom Rogel ayant l'armet en teste, & s'estant apareillé au combat deslors qu'il auoit veu les Damoysselles, respôdit, Mais quel compte vous doy-je rendre de celles qui me suyuent de leur bon gré. Je croy que vous me faites ceste demande à fin de ne respondre à la mienne. L'un des trois luy dist, Nous ne voulons point que vous nous rendiez compte de ces Damoysselles, mais bien que vous les mettez entre noz mains, car elles nous semblent beaucoup plus belles que celles qui viennent avec nous, & si vous les voulez mettre en nostre puissance, celles que nous emmenons demeureront en liberté. Et que vous profitera-il (dist dom Rogel) que nous les metiôs en vostre puissance, si elles ne sont d'acord avec vous. Nous les emmenerons (respôdirêt ilz to') & en ferôs à nostre volôté, car nous nous souciôs bié peu de la leur. Vo³ venez de dire vne chose (dist dom Rogel) qui sera cause que vous ne les emmenerez ny de leur volenté, ny de la mienne: ains au contraire

traire il vous conuiendra laisser celles que vous emmenez par force: Adonc les trois Cheualiers fort colerez vindrent contre luy les lances baissées, disans, Maintenant, fol que tu es, nous te ferons faire la penitence de ta folie. Dom Rogel ne se souciant beaucoup de leurs menaces, leur vint pareillement à l'encontre. Mais ce pendant les trois Damoiselles se voyant en liberté commencerent à chasser leurs palefrois au grand galop, retournant sur le chemin par lequel elles estoient venues. Or dom Rogel & les Cheualiers se rencontrèrent si rudement, que les trois rompirent sur luy: mais il en ataignit l'un par le milieu du corps de si droit fil qu'il le fit tresbucher mort en terre, ayant un tronçon de lance au trauers de l'estomach. Puis mettant la main à l'épée retourna vers les autres deux, & commencerent un assez furieux combat: mais finalement dom Rogel les reduisit à tel le extremité, que bien tost apres ilz tomberent morts sur la pleine: & lors ayant commandé à son Escuyer d'emmener leurs cheuaults avecque luy, les Infantes estant fort esmerueillées de sa prouesse, ilz continuerent leur chemin, & n'eurent marché guieres long temps, qu'ilz rencontrèrent un Cheualier ayant deux seruiteurs apres luy, qui emmenaient les trois palefrois des Damoiselles, lesquelles s'en estoient premierement fuyes & estans aprochez l'un de l'autre, dom Rogel luy demanda, Cheualier, ou auez vous laissé les Damoiselles à qui estoient ces palefrois. Je les ay laissées (respondit il) en un chasteau duquel ce matin trois meschans Cheualiers les auoient emmenées par force, & m'auoient desrobé les trois palefrois que voicy lesquels elles ont rendu estant deliurees d'entre leurs mains. Je vous assure, seigneur Cheualier (dist lors dom Rogel) qu'ilz ont esté assez bien chastiez de leur trahison, & pour recompense de la rigueur dont ilz vouloient user vers ces Damoiselles, Je

vous prie puis que vous sçauiez ou elles sont leur enuoyer ces cheuaults de ma part. Et bien (respondit-il) soudain que j'auray mené ces palefrois en mon chasteau, ie ne faudray de leur faire enuoyer ces cheuaults, priant Dieu qu'il vous vueille conduire puis que vous estes si gracieux. Acheuant ces paroles il s'en alla à grand haste, & dom Rogel & les Infantes deuisans de la rencontre passée, poursuivir leur chemin par lequel ilz n'eurent long temps cheminé qu'ilz rencontrèrent les trois Damoiselles assises à terre & fort tristes. Dom Rogel qui les recogneut leur demanda qui les auoit ainsi mises à pied. Vous deuez sçauoir (respondit la plus belle) qu'en cherchant un Cheualier lequel j'aime beaucoup, la fortune nostre mortelle ennemye nous a mises au iourd'hui entre les mains des Cheualiers que vous auez veuz, lesquels nous emmenaient par force à fin de faire leur volonté de nous, si à ce grand besoing nostre seigneur ne vous eust enuoyé pour destourner leur entreprise. Or si tost que nous vous auons veuz ensemble en combat, estimant que ce fust chose hors de raison qu'un seul peust durer long temps contre trois, nous auons pris la fuyte. Mais le malheur a voulu qu'un meschant Cheualier, lequel (comme ie croy) vous auez veu passer cy deuant, nous ayt rencontrées en son chemin: & si tost qu'il nous a eu aperceues, nous a crié que nous estions prisonnières. Au moyen dequoy nous commençâmes à pleurer voyant que nous n'estions à peine eschapees d'une mauuaise fortune, & que neantmoins nous estions desia retombées en une autre. Adonc il nous dist, Ne pleurez point: car ie ne veux de vous autre chose que voz palefrois, d'autant qu'ilz me semblent tresbons. Parquoy nous auons esté contraintes de les luy laisser, le donnant à la malle auenture apres estre eschapees de ses mains à si bon marché. Voylà, seigneur, Cheualier comme nous

nous sommes demeurees à pied, vous assurent qu'en part du monde il n'est possible de trouver tant de meschantes gens comme en ce pais. Ce pendant que la Damoysele faisoit ce conte, dom Rogel la contemploit ententiuement, car elle estoit fort belle, & tousiours de plus en plus pensoit l'auoir veüe en quelque autre part. Ma Damoysele (dist-il lors) le Cheualier duquel vous parlez nous à trompez aussi bien comme vous, car avec voz palefrois il nous à encores emmené les trois cheualx des Cheualiers, qui vous vouloyent forcer, lesquels nous enuoyons, car il disoit que vous estiez en vn vostre chasteau, & leur ayant conté le tout au long, les Infantes leur raconterent, comme les trois Cheualiers estoient demeurez morts. O Dieu soit loué (dist lors la Damoysele) car puis que nous sommes vangees de ces malheureux en nous separât de leur compagnie, nous tenons pour bien employer les palefrois que nous auons perdus. Vous ne les perdrez pas si ie puis (dit dom Rogel) & si ferai achepter bien cherement au Cheualier, son peu de courtouysie : car estant ataint au vif des playes de l'amour, ie veux remedier s'il m'est possible, au dommage que l'amour vous à fait. Ce sera beaucoup fait à vous (dist la Damoysele) si vous le pouuez faire, car il n'y à personne qui ne me puisse bien recompenser du mal que me cause l'amour, sinon celui seul qui en est occasion. Alors dom Rogel leur dit qu'elles l'attendissent là, & qu'il retourneroit incontinent, & rencontrant Sirind qui estoit demeuré derriere, & luy commanda que il ne s'esloignast de l'Infante, & qu'il n'arresteroit que bien peu. Adonc l'Escuyer s'estant aproché des Damoyseles, fut incontinent recogneu de la plus belle comme aussi elle eust peu facilement recognoistre dom Rogel, s'il eust eu le visage descouvert, Toutesfois l'Escuyer ne la recogneut point, encores qu'il luy

souuint quelque peu de l'auoir autrefois veüe. Il luy estoit bien auis qu'elle ressembloit à celle mesme qui elle estoit : mais il ne pouuoit penser qu'à la verité ce fut elle. Or sachez que c'estoit la belle Sardenie Dame des quatre chasteaux, celle qui auoit iouy des premieres amours de dom Rogel : laquelle cruellement tourmentee pour l'amour qu'elle luy portoit, apres l'auoir cherché en plusieurs parts sans se donner à cognoistre, prit port finablement en l'Isle de Guindaye ou elle receut grand plaisir à l'arriuee pour auoir entendu que son amant estoit en la cour de la Roynie, & depuis luy auint ce qui vous à esté dit cy dessus. Or n'eut-elle si tost aperceu l'Escuyer, que le cueur commença à luy tresfaillir de grande ioye, & d'extreme crainte, pensant que celui fust dom Rogel qui se en alloit apres les palefrois. Mais elle fut bien encores plus alteree en son courage, aperceuant vne si belle compagnie qu'il emmenoit avecque luy, car elle estimoit que si par fortune il estoit amoureux de l'une de trois Infantes, il feroit bien petit compte d'elle. Ce qui luy fust occasion de ne se vouloir donner à cognoistre iusques à ce qu'elle eust veu l'issue de ceste auenture, & se retira à part avec ses deux Damoyseles, leur commandât de ne dire mot : & ainsi assises toutes trois sur l'herbe verde attendirent assez long temps dom Rogel. Neantmoins Sardenie ne se sceut tenir bien tost apres de s'aprocher des Infantes, & leur demander comme se nommoit le bon Cheualier qui leur tenoit compagnie. Car (disoit elle) il est tresraisonnable qui ie cognoisse celui qui m'a fait tant d'honneur & auquel ie suis tant obligee. Adonc les Infantes luy satisfirent à tout ce qu'elle demandoit : au moyen dequoy elle sentit en son esprit vne telle confusion, que chacun peut estimer, s'esforçant toutesfois de la couvrir au mieux qu'il luy estoit possible. Or Dieu soit loué (dist elle
lors en

lors en fouspirant) qui à voulu que nous ayons esté si bien secourues par vn si bon Cheualier : & suis fort ioyeuse d'auoir trouué si bonne rencontre, car ie desire fort le cognoistre pour labonne renommee que i'ay entëdu de luy en plusieurs endroitz. En ces deuis & autres semblables qui plaisoyent fort aux Infantes, pour la gracieuseté de Sardenie, nous les laisserons quelque temps pour vous dire ce qui auint à dom Rogel.

Qui estoit le Cheualier lequel emmenoit les palefrois des Damoyelles & les cheuaulx des Cheualiers occis, & de ce qui en auint à Rogel en le poursuyuant.

CHAP. LXXIX.

Desia fort long temps & à grande haste dom Rogel auoit poursuiuy les palefrois des Damoyelles, quand il les aperceut de loing entre les arbres d'une forest. Et ainsi qu'il descendoit vne petite vallee continuant tousiours sa pointe il vid vn Cheualier tombé de son cheual, qui auoit vn pied ataché dedans l'estrier tenant les resnes en la main, & si tost qu'il eut aperceu dom Rogel, commença à luy escrier à haulte voix: Pour Dieu, Seigneur Cheualier, secourez moy par courtoisie, & ne me laissez entraîner à mon cheual, & sur tout ie vous prie ne vous approcher guiere pres de moy avecq le vostre, à fin que le myen ne s'espouente. Dom Rogel ayant pitié du Cheualier mit pied à terre, & estant accouru à son secours luy osta le pied de l'estrier, & luy dist: Las! comment estes vous ainsi tombé? C'est vn meschant Cheualier (dist-il) qui s'en va là deuant avecque plusieurs cheuaulx & palefrois, lequel par ce que ie luy demandois ou il les auoit pris, m'à ainsi renuerse à l'impourueü, & m'esbahys

comment mon cheual ne m'à entraistré. Pour Dieu, ie vous supplie m'ayder à remonter, car ie me trouue fort cassé. Maudit soit le meschant Cheualier (dist dom Rogel) car ie vous iure que si ie le puis ataindre, ie luy feray reparer le tort qu'il vous a faict, & pareillement aux Damoyelles, auxquelles il a desrobé leurs palefrois. Dieu vous en sache gré (dist il) puis que ie ne puis autrement vous en recompenser, car il n'y a chose que ie desire d'auantage que de me voir satisfaiet. Adonc le Prince dom Rogel l'ayda à monter sur son cheual, & tournant visage pour s'en aller remonter sur le sien, il le vid courir de toute sa force, ruant & hannissant, sur le chemin par lequel il estoit venu. Je n'ay jamais veu autrement (dist dom Rogel) sinon que ceux qui font bien endurent tousiours quelque mal. Or puis qu'ainsi est Seigneur Cheualier: Je vous prie m'ayder de vostre cheual & m'attendre icy à fin que i'aille satisfaire à vostre volonté. Je me tiës beaucoup mieux satisfait en ceste sorte, dit-il. Comment celà? dit dom Rogel. Vous estes donc entre les ongles du Candon (dit il) & vous ne vous en aperceuez point. Je ne sçay que vous voulez dire, dit dom Rogel. Vous sçauiez donc point (dit-il) la nature de l'oyseau qui vous a pris, & à fin que vous le sachiez, vous deuez sçauoir qu'il y a vn oyseau nommé Candon, lequel se pend malicieusement par le pied, & cryant & siffant fait acourir les oyseaux à l'entour de luy pour le secourir, puis enferme avec que les ongles celui qui est le plus près de luy, & s'en repaist. Ainsi me voulois-ie repaistre de vostre cheual, s'il n'eust fuy me laissant seulement la plume en la main, à laquelle ie vous compare. Et puis q̃ vous auez esté si mal aduisé que de me secourir, encores que vous ayez acōpli la promesse q̃ vous m'auiez faite, qui estoit de satisfaire à mô vouloir cōme vous auez fait en demeurant à pied, si esse que i'eusse bien

bien encores esté satisfait d'auantage si i'eusse peu empoigner vostre cheual, puis que vous veniez à si grand haste me demander ceux que vous m'auiez donnez: car d'autant loing que ie vous ay veu, ie me suis incontinent douté de vostre deliberation, & vous auois dresse mon imboscade en ceste valee. A ces paroles & autres contenance du personnage, dom Rogel cogneut que cestuy estoit l'Afron teur des Rufes, & se sentant fort desdai gné de ceste tromperie, voyant qu'il n'auoit autre meilleur moyen, se delibera de l'abuser de paroles, & luy dit: Vrayemēt, Seigneur Cheualier, vous m'auiez appris vne chasse autant belle que ie vy oncque Elle vous eust bien sembler plus belle (dit il) si i'eusse peu prendre vostre cheual. Le vous le donneray de bon cueur (dist dom Rogel) s'il vous plaist me prester l'un de ceux que ie vous ay donnez pour retourner en ma compagnie, & vous prometx qu'incontinent que i'y seray retourné, ie vous le renuoyray & si m'au rez autant satisfait que i'aye iamais esté de Cheualier. L'ayme beaucoup mieux (dit l'Afron teur) estre satisfait, que non pas vous: car à voz paroles ie cognois bien que vous ne voulez sinon trouuer moyen de me rēdre la pareille de ce que ie vous ay fait, à fin qu'en despouillant vostre sotise vous vous essayez à m'en reuestir. Vous suffise que ie vous ay passé maistre, à fin que desormais allant à la chasse que ie vous ay apprise, vous puissiez prendre d'autres cheualx en la maniere que i'auois pris le vostre s'il ne me fut point eschappé d'entre les ongles. Quoy (dit dom Rogel) vous me voulez donc laisser à pied? En doutez vous? respondit-il: Vrayement il vous feroit beau voir (vous qui estes tant bien taillé au seruice des damoysselles) si vous alliez à cheual, & qu'elles vous suiussēt à pied. Mais à fin que les autres trois qui estoient en vostre compagnie, ne se puissent glorifier d'auoir sceu mieux garder leurs

cheualx que leurs compaignes, ny vous vostre cheual, attendez moy icy, car ie m'en voys les mettre à pied comme les autres, & d'autant q'ie sçay, que le tarder est fort facheux à qui atent, ie feray toute la diligence q'vous verrez, car ie vous assure, si ie ne retourne par vn autre chemin que ie seray avecque vous auant qu'il soit nuyt. Acheuant ces paroles il s'en alla en bonne deliberatiō d'oster les cheualx aux Infantes, pensant qu'il n'y eut personne qui l'en deust destourner, & desia proposoit en luy mēme de reuenir par vn autre chemin, laissant ainsi dom Rogel sans monture ennuyé au possible & tournant visage vers luy, crya à haulte voix, Cheualier, demeurez avecque vostre malle fortune, ce pendant que ie voys chercher la bonne pour moy. Et ce disant donnoit des esperons à son cheual prenāt le chemin vers les Infantes, mais le malheur voulut que son cheual marchant sur vne racine d'arbre qui sortoit hors de terre, & trauesoit le chemin, bruncha si rudement, que luy & son maistre tomberent l'un sur l'autre. Dom Rogel en souzriant de fort grand plaisir, & craignant que son cheual ne s'en fuyst: car il esperoit s'il le pouuoit ataindre de auoir biē tost mis son entreprise à fin, luy courut sus en vn instant, de sorte que le cheual n'estoit encores à grand peine leué qu'il le tenoit desia par la bride, & se ietta legerement dans les arçons, & mettant la main à l'espee s'en va à l'encontre de l'Afrôteur, qui se leua le plustost qu'il peut & se mit derriere le troncd'un vieil ormeau. Dom Rogel fort coléré & courroucé contre luy tournoyoit tout à l'entour de l'arbre pour le fraper, mais l'Afron teur sautoit si allegrement deçā & delā, & se sçauoit tant bien garder, qu'il estoit impossible de mieux: & apres auoir fait deux ou trois tours, s'auisa de tirer l'espee pensant couper les iarez au cheual: & estoit vne fort belle chasse de les voir ainsi tourner tous deux à l'entour du

du tronc, dom Rogel, pour garder son cheual, & pour fraper l'Afrôteur, & l'Afrôteur pour se garder de luy, & pour luy tuer son cheual. Ce pendant qu'ilz tournoyoyent ainsi l'un après l'autre, le Fraudeur luy dit : Seigneur Cheualier sçavez vous que vous me semblez ? Et que te semble-je ? dit dom Rogel. Vous me semblez (dit-il) vn gros toreau qui me vueillez fraper, & ie semble vn homme qui me sois retiré à cest arbre pour me garantir de vostre fureur. Dom Rogel oyant ainsi parler l'Afronteur ne se peut tenir de rire, & s'arrestant vn peu, & tirant son cheual à quartier luy dit. Tu me sembles beaucoup mieux vn singe, que ie ne te sçauois ressembler vn toreau : & par ce que si ie te laissois ainsi tu serois trop fier & orgueilleux, atë-moi, car ie retourneray plustost q tu ne fusses retourné vers moy Pour Dieu (respondit-il) Seigneur Cheualier, dites moy, ie vous prie, auant que partir, quel est vostre intention ? Mō intention est (dit dom Rogel) de ne bouger d'icy que ie ne t'aye vn peu chastié de tes folies, & que ie ne t'aye satisfait. Non, non (dit le Fraudeur) ie vous quite de vostre promesse, & me tiens pour tresbien satisfait : ce pendant vous vous en pouuez aller en plaisir avec mon cheual : car ie vous promets que si ie l'auois vous ne gagneriez point auourd' huy sur moy l'honneur de ce combat. A fin que tu ne te puisses Plaindre de celà (dit dom Rogel) ie mettray pied à terre. Adonc sautant legerement en bas, & attachant les resnes du cheual à vn arbre, marcha hardiment vers l'Afronteur qui vint à l'encontre de luy embrassant son escu, mais du premier coup que dom Rogel luy donna il trebucha par terre tout estourdy, encores qu'il ne l'eust aucunement blessé pour la bonté de son harnois & luy arrachant l'armet haussa l'espee pour luy trancher le chef, ce qu'il eust fait, si le miserable Afronteur ne luy eust demandé mercy. Dom Rogel qui n'e-

stoit moins doux apres la victoire, que rude pendant le combat, luy dit : Ie vous octroyray la vie : mais ce sera avec condition que si vous pouuez prédre quelque chose à la chaille que vous m'avez apprise vous n'aurez faute de moyen pour l'experimenter, aumoins s'il se trouue quelqu'un autre que moy qu'il se vueille laisser abuser à voz cautelles, & ce disant print vn cheuestre qui estoit à l'arçon du cheual, & le pendit ioignant le chemin par le pied à vne grosse branche d'arbre, tellement que le pauvre malheureux n'auoit que bien peu la teste appuyee en terre. Estant ainsi attaché, dom Rogel luy dist. Or attendez moy icy, car ie retourneray incontinent, & verray si vous n'avez rien pris. Et lors montant hastiement sur son cheual, suyuit les seruiteurs de l'Afronteur qu'il rencontra incontinent, car leur maistre leur auoit commandé de les attendre, & qu'il seroit bien tost de retour, avec le cheual du cheualier, qu'il veoyt venir, car il esperoit laisser dom Rogel à pied par le moyen de la ruse que vous avez entenduë. Or dom Rogel les ayant atains leur commanda de retourner leurs cheuaux & palefrois, & ainsi qu'ilz arriuerent au lieu ou l'Afronteur estoit pendu, il leur demanda de l'ancre & du papier, qu'ilz luy donnerent incontinent, & lors dom Rogel escriuit l'epigramme qui s'ensuyt, lequel il atacha contre l'arbre auquel l'Afronteur pendoit par le pied.

*De mes forfaitz receuant le guerdon,
Icy ie fais moy Fraudeur le Caudon,
Mais si quelq'un par pitié me destie,
Sans bon loyer ie ne le laisseray,
Car son cheual soudain i'emmeneray:
Mes bienfaiteurs ainsi ie remercie.*

Dom Rogel l'ayant laissé en cest estat & fort ioyeux d'auoir trouué le moyen d'une si ioyeuse vengeance, fit marcher les seruiteurs qui conduysoient les che-

T naulx,

uaulx & palefrois: Mais il ne fust allé guieres loing que par là passerent trois Cheualiers, ausquelz l'Afronteur commença à cryer qu'ilz voulussent auoir pitié de luy: partant ilz acoururent à son cry, & le trouuant en ceste maniere luy demanderent qui luy auoit faict cest outrage. Las! Seigneur Cheualiers (dist-il) pour Dieu deliurez moy de ceste peine, & me vengez d'un trahistre Cheualier qui s'en va deuant nous, lequel pour me desrober trois cheuaulx & trois palefrois ce pendant que ie m'estois icy endormy à la fraischeur ne me doutant de sa meschanceté, m'a pris en trahison, & m'a laissé ainsi comme vous me voyez, emmenant auecque luy mes cheuaulx, & mes palefrois. Les Cheualiers ayans pitié de luy, descendirent, & le deslièrent: mais il ne fut si tost detaché que il se ieta legierement, come celuy qui estoit fort disposé, dedans la selle de l'un de leurs cheuaulx, & auant que les Cheualiers eussent peu ataindre les autres, il les frapa auecque l'espee tellement qu'ilz commencerent à fuyr tant qu'ilz peurent de l'autre costé, & lors il leur dit: Seigneurs Cheualiers apres que vous auez pris les deux cheuaulx que ie vous laisse en recompense de celuy que i'emmeine, vous pourrez trouuer contre cest arbre vne recepte que celuy qui m'auoit icy mis y a laissée, & par là vous apprendrez la maniere de prendre les cheuaulx d'autrui, ainsi comme i'ay maintenât pris l'un des vostres. En disant ces paroles il piqua son cheual, & s'enfuyt tant qu'il peut à trauers les arbres de la forest. Les Cheualiers demurerent à pied plains de grand courroux: mais apres auoir leu les vers, qui estoient contre l'arbre, qu'ilz n'auoyent point encores aperceuz, ilz furent fort ennuyez qu'ilz ne les auoyent leuz premierement: car souuentes-foys le renom du Cheualier Afronteur estoit parueni iusques à eux, à raison dequoy le maudissât pour sa meschanceté, & pour

la tromperie qu'il leur auoit faite, ilz s'effayerent à prendre leurs cheuaulx, pour l'aller chercher, & le mettre à mort s'ilz le pouuoient rencontrer. Et de fait ayans recouuert leurs montures, encores qu'ilz fussent fort trauaillez, se mirent à le chercher de toutes parts: mais leur trauail fut en vain, car il ne s'arrestoit iamais en vn lieu, & changeoit à toutes heures d'armes, & de cheuaulx pour mieux conduire ses entreprises: ce qui fut l'occasion pour laquelle ilz ne peurent trouuer celuy qu'ilz cherchoyent iusques à ce qu'ilz fussent encores trompez de nouueau. Mais puis qu'il ne se veult aucunement chastier ny muer sa maniere de viure, nous l'abandonnerons pour le present, & luy laisserons songer plusieurs nouuelles ruses, qu'il executera dans le tresiesme liure de ceste grâde hystoire, ou ses faitz & gestes vous serons recitez plus amplement.

De ce que firent les trois Infantes & Sardenie en attendant la venue de dom Rogel.

CHAP. LXXX.

LEs Infantes & Sardenie Dame des quatre chasteaux, estant demourees en la forest en atendant dom Rogel (comme vous auez entendu) deuilerent de plusieurs propos, & entre autres Sidera dist à Sardenie: Veritablement, ma Damoyelle, la force d'amour doit estre grande, puis qu'estant tant bien pourueüe de beauté & de bonne grace comme vous estes, elle vous a fait oublier vostre grandeur, abandonner vostre pais passer tant de perilz, & endurer tant de trauaux. Elle est si grande (dist-elle) que ceux qui sont veritablement naurez de l'amour, n'ont aucune raison pour resister à ses forces, ains la raison demeure sujette à tous les tors, & à tous les iniustices, qui peuuent suruenir ce pendant: car en toute la source d'amour il n'y

il n'y à chose qui monstre mieux sa puissance, que de voir ceux, qui fermement ayment, luy obeïr entierement, laisser leur propre volonté, & abandonner la raison pour faire ce qu'il leur commande. Aussi, ma Dame, si vous estiez atainte de ce mal, vous ne diriez point telles folies, & me les laisseriez dire : car il est permis à ceux qui ayment de dire & faire tout ce que l'amour leur met en charge : par-ce qu'amour en ses païs à tout ainsi que les Grecz & les Latins, vne langue particuliere de laquelle les amans ont accoustumé d'vser pour s'entendre les vns les autres. Par-ce moyen en la langue d'amour alors on entend vne personne estre entierement sujette à ses forces, quand elle commence à dire & à faire des folies, car d'autant qu'elles sont plus grandes, d'autant l'amour est plus grand & d'autant que l'amour est plus grand, d'autant les folies qu'il nous fait faire sont plus facilement excusées. Sur ma foy (dist l'Infante) celui que vous ayez vous est bien tenu, & seroit fort peu courtoys s'il ne vous aymoit, veule bon amour que vous luy portez. Helàs ! ma Dame (dist Sardenie) vous pensez donc faire obeïr l'amour à la raison. Mais vous estes fort eslongnee de vostre compte : car les Royaumes d'amour ne se gouvernēt point par les loix, ny par aucune reigle raisonnable : car si la raison y auoit lieu celui que l'ayme, feroit l'office que ie fais en le cherchant, & quand il ne le feroit, ie me soucierois bien peu de luy, veu que le deuoir d'une telle Damoyelle comme ie suis, me obligeroit plus à mon honneur, qu'à la vaine poursuyte d'un volage iouuenceau. Sachez doncq que le plus grand mal que ie trouue en l'amour, c'est que il garde autant de priuilege à l'iniustice de celui qui hayt, comme à la raison de celui qui ayme : car celui qui à vne fois la hayne imprimée en son cueur, n'à soucy, & ne fait aucun compte, des paroles

amoureuses, ny des larmes, ny des passions, ny des tourmens, ny des ialousies, ny des tristesses, ny d'aucune chose que celle qui l'ayme puisse faire, ou endurer pour l'amour de luy : tellement que toutes les raisons d'aymer ne luy font qu'accroistre sa hayne, tant amour à de force sur les choses qui dependent de son pouuoir. Au contraire celui qui ayme ardemment ne peut receuoir aucun empeschement des ennuyes, ny des dédaings, ny des iniures, ny des langueurs, ny des tourmens, ny d'autre chose quelconque, qui luy puisse destourner son amour : car tout ce qui le deuroit faire hayr, le fait aymer d'auantage, de sorte que finalement il ne peut attendre à ces douleurs autre remede que la mort. Or tout ainsi que le bon conseil ne doit point estre cherché là ou il n'y en à point, ny la sagesse, es lieux d'ou elle est chassée, ny la raison, es endroitz ou l'iniustice est la plus forte : Ainsi au Royaume d'amour qui est ennemy de toutes les bonnes loix, lon ne doit chercher ny conseil, ny sagesse, ny raison, ains tant seulement leurs contraires : car ie vous dy que l'amour ne se trouue que bien peu en son mesme Royaume, & encores moins es lieux ou il deuroit auoir quelque particuliere puissance. Ce que ie voy ay voulu dire, ma Dame, à fin que vous recognoissiez combiē vous auez eu peu de raison de me faire vne telle demande pensant accuser ma folie. L'Infante Siderre qui commençoit à goustier les amers breuuages de l'amour, cogneut que Sardenie disoit verité, car par elle mesme elle commençoit desia à experimenter cōme les raisons qu'elle cherchoit pour resister à l'amour, ne faisoient que l'accroistre d'auantage, d'autant que l'amour & la mort estant d'une mesme nature, les remedes que lon y applique ne peuvent finalement empescher que l'un & l'autre ne viegne à son entier effect. L'Infante & Sardenie demeurèrent en

ses deuis iusques à la nuyt que dō Rogel arriua avec les cheuaulx & palefrois, dōt toute la compagnie fut fort ioyeuse, meismement Sardenie, qui toutesfoys n'en voulut faire aucun semblât pour voir s'il la recognoistroit, & pour mieux s'équerrir s'il aymeroit la Damoiselle qu'il emmenoit avecq' lui. Estant montees sur leurs palefrois, elles s'en allerent heberger ce soir en la maison d'un forestier qui estoit au mylieu du boys, & tout le long du chemin receurent vn fort grand plaisir d'ouyr conter à dom Rogel ce qui luy estoit auenu. Mais sachez que durant le souper dom Rogel ne partit iamais les yeux de dessus Sardenie, pensant autresfoys l'auoir veüe, & ne se pouuoit souuenir en quel lieu. Sardenie pareillement ne cessa de le regarder, tant qu'elle en eut le moyē: desquelz regards Sidere n'estoit vn seul brin contente, pensant que dom Rogel fust affectionné à Sardenie, d'autant qu'elle luy sembloit fort belle & de bonne grace. Celle nuyt ilz furent assez bien logez, & lendemain ilz retournerent à leur chemin, auquel Sardenie les accompagna faignant qu'elle leur vouloit faire compagnie iusques à la sortie de l'Isle puis qu'elle ne pouuoit trouuer celuy qu'elle demandoit, & estoit aucunement ioyeuse de ce que tout le soir dom Rogel n'auoit cessé de la regarder: mais elle estoit bien abusée: car ce n'estoit pour autre intention, sinon parce qu'il pensoit l'auoir veüe en quelque autre lieu. Au moyen dequoy il luy dist par les chemins, Ma Damoiselle, il me semble vous auoir veüe quelque autrefois: mais il ne me souuiert point en quel lieu ce fut. Vrayement, seigneur Cheualier, vous me deuiez donc regarder avecque bien peu de souci, au moins si vous m'avez quelque autrefois veüe, puis que vous avez si tost perdu la memoire du lieu ou vous me vistes. Si esse (dist dom Rogel) que vostre beauté est bien assez grande, à fin de ne vous auoir point si

tost mise en oubli. Vous en donnez mauvais tesmoignage (dist elle) si ce n'est que la memoire d'une autre grande beauté vous face ainsi oublier la mienne. Sidere n'estoit aucunement ioyeuse de telz deuis: & toutesfoys dom Rogel n'en receuoit aucun dommage, car il est certain que les ialousies accroissent de beaucoup l'amour, encores que pour lors elles semblent causer quelque dedaing, & par elles se renforce tousiours secretement la maladie amoureuse, en ceux qui esguillonnez de la ialousie pensent le pouuoir departir de l'amour, à l'ocasion du dedaing qu'ilz en ont nouuellement conceu: car combien que lors ilz veuillent dissimuler leur ennuy, si esse que leur discretion ne le peut faire, d'autant que l'amour ne le permet, estant vn tyran en sa seigneurie. Ainsi Sidere ne peut tant dissimuler sa douleur, que la tristesse de son visage ne fist apercevoir dom Rogel de ce nouveau changement: à raison dequoy il s'aprocha d'elle, & luy dist tout bellement, Ma dame, ie vous supplie me dire l'ocasion de vostre tristesse, à fin que ie cognoisse pareillement l'ocasion de la mienne. Si vous sentiez ma tristesse (respondit-elle) vous en cognoistriez facilement l'ocasion, puis qu'en ma presence ie vous voy departir en tant de lieux. Ma Dame (dist-il) ie ne sçay de quel departement vous parlez, si ce n'est qu'estant separé en plusieurs parties, mon ame est avecq' vous, & l'oubly avecque moy: l'amour en vous, & la hayne en moy. En pensant parler en vostre faueur (respondit l'Infante) vous vous estes condamné vous mesmes, & avez fort bien dit la verité: car si vos paroles sont bien entendues, veritablement l'oubly, & la hayne sont avecque vous, & les pensees de l'ame, & l'amour sont avecque moy. Car vous avez laissé tout l'amour en moy, & avez pris en vous tout le contraire, comme vos yeux me donnerent hier au soir bon tesmoignage, lesquelz vous tintes

tout

tout le long du souper sur la Damoyfelle qui vint avec nous. Ce qui ne me desplaist point, ains suis ioyeuse que vous ayez trouué vne si belle Damoyfelle, qui par mesme moyen vous deliure de mon amour, & moy de vostre importunité. Dom Rogel sentit iusques en l'ame les paroles de l'Infante, & luy dit: Helàs ma Dame, ie vous supplie naurez moy le corps tant qu'il vous plaira, & ne touchez point à l'esprit qui est vostre, & a seulement puïssance de sentir la cruauté de voz paroles: Aussi ne puis ie penser à quel propos vous parlez des autres parties, veu que vous auez mō cueur entier, & que vostre beauté, vertu, & bonne grace ne laisse aucune partie de moy en liberté pour m'adonner à vn autre seruice qu'au vostre: Croyez (ie vous supplie) que i'ay assez de cognoissance pour cognoistre ce que ie doy à vostre grandeur car puis que vous me tenez vostre prisonnier & esclaue, le deuoir ne vous peut permettre d'vser enuers moy de rigueur, en lieu de la pitié de laquelle pour mon loyal amour vous m'estes redevable. La raison que i'ay de vous aimer n'est point si petite en vous, que ie soye priuilegié en moy, pour me garder de toutes les iniustices d'amour. Vostre grande beauté ne cesse de me naurer par vostre presence, & est impossible q̄ vous ayant deuant mes yeux, ou en ma memoire, comme i'auray toute ma vie, ie puis mettre mon affection en autre part. Je vous supplie donc, ma Dame, & vous coniure par ce dont ie suis redevable à vostre grandeur, de n'auoir point telle opinion de moy, & rapaisez l'ennuy auquel sans occasion vous estes entree, car ie vous promes que vous ne sçauriez faire plus grand tort à la loyauté & constance de l'amour que ie vous porte, que de penser que i'aye quelque liberté outre celle qu'il vous plaira me donner. L'Infante fut fort ioyeuse de ces paroles de dom Rogel, & luy dist: S'il est ainsi com-

me vous dites, que vous m'ayez donné vostre liberté, ie vous prie ne la prenez plus si grande, ny en voz paroles, ny en voz œillades comme vous auez fait iusques à present: car autrement vous me mettriez au mourir. Ainsi ie vous le promes, ma Dame (respondit il) & ainsi ie vous supplie me moyenner le remede de ma langueur, si vous ne voulez que par ma mort, ie me deliure de peine, & vous d'importunité: car tant que ie demeureray en vne telle douleur, il sera bien difficile que ie garde la reuerence dont ie suis redevable à vostre grandeur, pour estre tourmenté d'une si griue maladie. Vous ne m'ayez point encores tant satisfaiet (dist-elle) de l'ennuy que i'ay receu, que maintenant vous deuiez prendre la hardiesse de me demander ce que vous me demandez: par tant contentez vous que ie vous pardonne le passé, & ne l'estimez à petite faueur, veu l'ennuy auquel vous m'ayez mise. Dom Rogel dit qu'il la remercioit treshumblement: & ainsi passerent tout le iour ensemble en gracieuses paroles, dont Sardenie estoit autant triste, comme Sidere ioyeuse. La nuyct ensuyvante ilz hebergerent aupres d'une fraische riuere peuplee de plusieurs beaux arbres, ou Sardenie enflammee de ialousie extreme, ne voulut boire, ny manger, & ainsi demeura tout vn long temps, chacun croyant que sa tristesse vint pour ne pouuoir trouuer celuy qui luy auoit fait abandonner son pais pour le chercher.

Comme Sardenie se descouurit à dom Rogel, & se departirent l'un de l'autre, & comme dom Rogel s'embarqua avecque les trois Infantes pour passer au Royaume de Perse.

LA nuyt estoit desia voylee des plus obscures tenebres, quand Sardenie suplia dom Rogel ouyr certaines paroles qu'elle lui vouloit dire en secret. Parquoy à fin de ne sembler estre trop peu courtois, il luy accorda auecq grand' peine, craignant de desplaire à l'Infante: neantmoins se tirant à part auecque elle commencerēt à se pourmener tous deux contremont la riuere, en lieu que personne ne les pouuoit ouyr ny voir, & lors Sardenie commença à parler à luy en ceste sorte: Si l'amour & ses loix, ô dom Rogel de Grece, me permettoient de me plaindre de vous, estimez que les raisons de mes doleances ne pourroyēt estre que bien receuës: veu l'oubly auquel ie voy que m'avez mise: & veritablement ie ne me plaindroys point à tort, attendu l'outrage que ie reçois, en suyuant celuy lequel ne tasche qu'à me fuir. Làs! dom Rogel mesconnoissant de mon loyal amour, peu souuenant de ma beauté, guerre de mon honneur, cause de mes trauaux, repos de mes tourmens, allegiance de mes ennuy, recherché & recherché & trouué, mais las! perdu pour moy auant que ie vous aye peu recouurer: Ie ne veux point accuser vostre hayne, ny représenter deuant voz yeux vostre oubliance, car ie sçay que vous me haïssant, il n'y a raison qui vous puisse contraindre à m'aymer: tout ainsi que moy vous ayant, les torts que vous me faites ne me peuuent esmouuoir à vous haïr. Mais ie vous veu dire ce que i'ay peu faire par le passé vous absent, & ce que ie souffre encores maintenant en vostre presence, non à fin que vous en preignez quelque dueil, car ie sçay bien que vous ne vous en soucierez que bien peu: mais à fin seulement que ie reçoie quelque repos en recitant mes doleances à celuy qui en est l'occasion. Sachez donc que vous auez maintenant deuant vous celle Sardenie Dame des quatre chasteaux, qui vous donna son amour

pour sa haine, sa liberté pour sa seruitude son honneur pour son deshonneur, son repos pour son trauail, & son auctorité pour le mespris auquel elle s'est mise, vous venant chercher elle mesme, à fin de vous retrouver pour vous perdre, & se trouuer perduë pour l'amour de vous, tout ainsi que vous estes perdu pour l'amour d'une autre: Finablement ie suis celle qui vous ay donné la vie pour receuoir la mort, & qui en viuant, meurs mille fois le iour, pour ne pouuoir mourir. Ie vous ay dist ce que i'endure, & que i'endureray, dont toutesfois vous vous soucierez bien peu pour estre pris en une autre part encores que ma douleur & mon trauail vous ayent entierement rendu mien, & ensemble le gage de vostre parole par la promesse que vous me fistes de me retourner voir, & l'autre plus grand gage de vostre amour lequel me motraistes, lors que vous cueillistes la fleur de ma virginité en emportant mon cuer, & ma foy auecque vous, & me laissant la vostre, laquelle depuis vous auez rompue. Mais helas! moy miserable! pourquoy déclaré-ie mon mal à celuy qui n'en a aucun soucy, encores qu'il en soit toute l'occasion? & quel malheur m'a fait chercher pour mon remede, celuy que i'ay trouué pour ma mort? Et ce disant, les larmes & les soupirs auecque la mortelle douleur l'empescherent de parler d'auantage, & la contraindrēt de mettre fin à son parler. Dom Rogel la recognoissant ne peut estre retardé par les promesses qu'il auoit faites à l'Infante, ioint la naturelle faute de loiauté qui estoit en luy, qu'il ne fust beaucoup esmeu par la douce souuenance du temps auquel il auoit peu exercer la iouissance de ses premieres amours auecque ceste belle damoyelle. Parquoy il la print entre ses bras, & la baisant par grande affection, luy dit: Helàs, ma Dame Sardenie, par quel moyen pourray-ie satisfaire au grand amour que vous me portez, & au trauail que vous auez pris

pour

pour me chercher? Je vous supplie, ma dame, n'estimer que la faute d'amour m'ait esté cause de vo' mescognoistre, car ç'a esté le peu de tēps que i'ay demeuré avecque vous, & le long temps qu'il y à que ie ne vous auois veüé, d'autant que les estranges trauaux par lesquelz il m'à fallu passer m'ont empêché de retourner si tost que i'eusse bien voulu. Vous sçauiez trop mieux que celuy qui ayme son honneur, se doit despouiller de ses volontez, & de ses plaisirs, pour se reueftr du trauail, & des hasars que la fortune bonne ou mauuaise luy apppareille.

Telles & autres plusieurs parolles d'amour dist dom Rogel à Sardenie, & elle à luy, de sorte qu'auant qu'ilz retournaissent à leur compagnie, ilz donnerent allègement à la douleur de leurs cueurs passionnez, & combien que le temps leur semblast fort brief, si est-ce qu'il fut trouué fort long par l'Infante Sidere, laquelle le receut avec forte grande tristesse, à raison qu'elle voyoit Sardenie ioyeuse, qui s'en estoit allee toute triste. Dom Rogel estoit fort ennuyé de son ennuy, & bien peu apres qu'il fut retourné, s'aprocha d'elle & luy dist: Ma Dame, ie vous supplie me dire d'ou procede vostre douleur. Vous n'avez aucune occasion, respondit elle, de me faire telle demande, ny moy de vous y faire aucune respōse partant ie vous quite en effect, la promesse que vous m'auiez donnee de parolles: à fin que vous faciez désormais tout ce qui vous plaira à vostre volonté, puis que vous vous souciez tant peu de la mienne. Dom Rogel cognoissant l'occasion du dueil de l'Infante, luy dit: Comment, ma Dame, vouliez vous donc que ie fusse si peu courtois, que de n'ouyr vne Damoyelle laquelle me vouloit cōter quelque sien affaire pour en entendre mon auis? Ce que vous en avez fait (dist l'Infante) n'à esté que pour faire tout au cōtraire de ce que ie vous auois commandé aujourd'huy: & quand bien

ç'auoit esté à fin de luy donner quelque conseil, ie pense que le long temps lequel vous avez demeuré avecque elle, estoit plus pour luy parler de voz affaires, que pour entendre les siennes. Je croy ma Dame (dit dom Rogel) que tout ce que vous faites en ce mode n'est que songer la maniere comme vous me pourrez reprendre des choses, ou ie ne voudrois seulement auoir pensé: mais ie vous assure qu'avec le temps vous apriendrez à ne vous abuser plus en ceste sorte.

Vraiemēt (dit elle) vous ne m'avez point voulu abuser à ceste fois, puis que si manifestemēt vous avez fait contre ce que ie vous auois cōmandé, & me laisse maintenant à pēser ce que vous feriez en mon absence, puis que vous estes si outrecuydé deuant mes yeux. Or puis que vous m'avez voulu faire si certaine de vostre amour, ie ferois trop mal de vous laisser en doute du mien, parquoy assurez vo⁹ que désormais ie me donneray garde de n'estre plus abusée en voz promesses. Depuis qu'elle eut acheué ses parolles, pour chose que dom Rogel luy peust dire, elle ne luy voulut rendre aucune response, ains toute fachee passa la plus part de ceste nuyt en grand' tristesse. Sardenie ne fut guieres plus ioyeuse voyant dō Rogel tout triste & pēsis sans la regarder aucunement. Ainsi demurerent tous trois sans se resiouir pour sornettes, ny gracieux deuis que peussent tenir les autres deux Infantes entre elles, de sorte qu'ilz continuerent en ceste melancolie iusques à ce que chacun commēça à se reposer sur leurs manteaux, estant les trois Infantes retirees à part de Sardenie & de ses Damoyelles. Dom Rogel encores qu'il fut fort espris de l'amour de Sidere, apres plusieurs autres deliberations. Voyant que toutes les Infantes dormoyent d'un profond somme, s'en alla trouuer la belle Sardenie, & l'ayāt tiré vn peu à l'escart demeura avec elle vne grand' partie de la nuit, s'etrecaressans de tous les plaisirs &

deduys, desquelz l'amour se peut auiser. Et au depart il luy dist qu'il seroit bon, à fin que lon ne s'aperceust de leurs amours, qu'elle s'en allast en la cité de Guindaye, & l'attendist là, & que bien tost il seroit de retour par deuers elle, c'est à sçauoir incontinent qu'il auroit conduit les trois Infantes en la maison du Roy leur pere, par-ce qu'il ne pouuoit faire autrement, d'autant qu'il leur auoit promis. Adonc il raconta à Sardenie comme il les auoit deliurees, & qui elles estoient, luy remonstrant tant de raisons, & avecque si grand' amour, qu'il la mit hors de tout soupçon, & la fit cōdescendre à son vouloir. Estans separez avec ceste conclusion, le lendemain matin elle prit congé des Infantes, disant qu'elle retournoit en la queste de son amy, & si tost qu'elle s'en fut allée, dom Rogel dit à Sidere: A ceste heure, ma Dame, pourrez-vous laisser le dedaing que hyer au soir vous auiez conceu contre moy, puis que le depart de la Damoysele vous doit auoir mis hors de toute suspicion. L'Infante se rapaisa par ces paroles, & le pria luy pardonner: puis deuifans de mains gracieux propos, arriuerent à vn port de mer, ou ilz s'embarquerent pour passer au Royaume de Perse. Mais sachez qu'auant leur embarquement dom Brianges qui les cherchoit, arriua par fortune avec son Escuyer sur le haïre, partant s'embarqua avec eux, & r'enuoya son Escuyer à la cour, pour faire sçauoir l'occasion de leur depart, & les excuses de ce qu'ilz ne retournoient point. Ainsi s'embarquerent les deux Princes, & les trois Infantes au port de Gandif, & haussèrent les voyles voyant le temps propre pour nauiguer qui bien peu leur dura, comme vous entendrez cy apres.

De l'espouventable & estrange auenture qui auint en la cité de Guindaye, au moyen de laquelle les Princes furent mis en grande confusion, & en grand danger de leurs personnes.

CHAP. LXXXII.

LEs Princes passoyent le temps en grand plaisir & resiouissance dedās la cité de Guindaye, ce pendāt que on apareilloit les choses necessaires pour leur depart: Mais Agefilan estoit en grād angosse ne pouuant auoir aucune faueur de sa Dame, outre la parole, & la compagnie: car encores qu'il la supliaست souuentes-foys luy donner le moyen de pouuoir parler à elle seule à seul, si est-ce que iamais il ne le sceut obtenir, par ce que Diane faisoit entendre à chacun qu'estans renfermez en la tour enchantee, ilz estoient pareillement enchantez, & le prioit de sa part faire entendre à chacun que la verité estoit telle. Voyant donc que ny les prieres ny les messages de la Royne Lardenie ne pouuoient aucunement seruir, il luy disoit comme hors soy-mesmes. Las ma Dame, ie ne sçay qui fut l'inuenteur souz la fainte de nostre enchantement & de nostre liberté de me mettre en vne telle prison & seruitude. La Royne Lardenie luy disoit en riant qu'il prit patience, & que bien tost il yroit en Constantinople ou leurs nopces seroyent celebrees, par-ce que Diane ne voudroit pour chose du monde tomber en la moindre suspicion qu'il seroit possible, d'auoir rien faict contre sa virginité iusques au temps que la permission de Dieu la pourroit descharger de toute offense. Et quelquefois Agefilan se trouuant en sa compagnie à part des'autres, elle luy disoit: Regardez, mon cher amy, que les mariages se font pour obeir à Dieu, & non pour obtemperer aux vanitez de ses desirs. Ne me priez donc plus, ie vous supplie d'offenser Dieu & mon honneur tout ensemble, en faisant

faisant en secret, ce que le mariage permet estre manifeste si nous voulons attendre le temps qui desia nous est assez prochain. A quoy la Princesse adionstoit qu'il deuoit considerer que chacune foyz que lon fait secretement vne chose, pour la honte laquelle on a qu'elle soit sceue, lon se fait honte à soy-mesme, veu que lon ne se peut cacher de soy. Et puis que lon est beaucoup plus obligé à soy-mesmes, qu'à autry, ilz deuoient plus craindre qu'eux-mesmes eussent la honte de leur faute, que non pas se traualier à la couvrir pour le regard des estrangers. Ainsi se deffendoit la Princesse Diane à l'encôtre d'Agésilan, tellement qu'il n'auoit d'elle nom plus que les autres Princes fiancez auoient de leurs fiancees, auquelz la royne Sidonie faisoit tout le bon traitement dont elle se pouuoit auiser, & chacun iour arriuoient en la cour plusieurs belles & estranges auantures, & y auoit tant de Cheualiers en la cité de Guindaye qu'à peine pouuoit-on aller par les rues : car il y estoient venuz de toutes parts pour voir vne si belle compagnie de Princes & Princesses. Or vn soir sur l'apres soupee chacun estant en grand soulas & resiouyssance, passât le tés en plusieurs gracieux deuis, quatre Geas de desmesuree grandeur armez de toutes pieces entrèrent en la grande salle. Deuant eux marchoiēt douze belles Damoyelles, vestues de drap d'or à la Sarmatienne & autant grandes comme les Geans. Chacune d'elles portoit en la main senestre vne torche allumee, & en la dextre vne clere & reluyfante espee. Leur entree & estrange venue fit grandement esbahir toute la compagnie, & n'y eut celuy qui peust se mouuoir de sa place tant soit peu. Or les quatre Geans s'adresserēt au lieu ou les Princesses fiancees estoient assises avecque les Princes leurs espoux, & leur dirent avecque vne voix fort effroyante, Ca, ça, mes amours venez vous en avecque nous, & nous

vous conduirons en lieu ou vostre beauté sera trop mieux employee que non pas icy. En disant ces paroles l'un d'eux prit entre ces bras la princesse Diane, l'autre la Royne Daraïde, le tiers la royne Garaye, & le quatriesme la belle Princesse Lucenie, auxquelles il sembloit estre entre les bras de leurs espoux, qui sentoient vne douleur mortelle les voyans ainsi emporter, mesmement qu'il sembloit que de leur bon gré elles suyussent ces contréfaites creatures : Neantmoins de tous ceux qui estoient en la salle, il n'y en eut vn seul qui peust bouger du lieu ou il estoit, iusques à ce que les Geas eurent passé la porte, & les Damoyelles apres eux. Incontinent qu'ilz furent sortis ilz descendirent en la basse court, & tous les Cheualiers qui estoient en la salle fort effroyez de ceste fortune, sortirent à grande haste ayans les espees nuës au poing, & les capes entortillees autour du bras. Les Roynes avecque toutes les Damoyelles en plorant à grosses larmes, se mirent en la gallerie, & le bruit avecq' l'esmotion des Cheualiers, faisoient tellement retentir le chasteau, qu'il estoit impossible de s'entendre les vns les autres. Agésilan, dom Arlanges le Prince de Rome, & dom Florarlan de Trace, comme ceux qui estoient les plus offensez, arriuerent les premiers dans la cour du Palays, tenans les espees nues en la main. Or les quatre Geans tournans le dos l'un contre l'autre, se preparerent à recevoir les Princes, tenant leurs horribles coutelas en la main dextre, & en la senestre chacū d'eux tenoit vne des Princesses en lieu de bouclier. Ce pendant les douze Damoyelles qui portoient les torches enuironnerent comme au mylieu d'une dance les quatre Geans, & les quatre Princes, en façon de murs, à fin que personne ne se peust aprocher plus auāt, faisant vn grand cercle à l'environ des Geans & des Princes, de pareille rondeur comme s'il eust esté fait au compas. Or

faisoit-il fort beau voir ces douze Damoyelles ayât les espees nuës en la main, tornoyer aussi hastiuement comme vne rouë de chariot branlant trainé par quatre courtiers, tellement que les lumieres des torches sembloient vn cercle de feu, & la splendeur des espees en ressembloit encores vn autre. Le roy Amadis, l'Empereur Amadis de Grece, & dom Florisel de Niquee estoient les premiers deuât tous les autres, tenant chacun l'espee au poing fort desdaigne de ne pouoir donner secours aux quatre Princesses q̄ cryoient à l'ayde, pour la grande crainte des rouës de feu que les douze Damoyelles faisoient avecque leur torches. Aussi quand ilz se fussent aprochez ilz n'eussent peu recevoir moins que la mort, veu qu'ilz n'auoient autres armes que leurs espees, dont ilz estoient en fort grand ennuy. Là eussiez vo^r veu entre les quatre Geas & les quatre Princes vn des plus beaux combats, qu'il scauroit estre possible de penser, car les Princes ne tiroient coup que les Geans ne presentassent incontinent les Princesses à l'encontre en maniere d'escu, tellement que pour la crainte de les fraper, ilz n'osoient auanturer aucun coup d'espee : & s'ilz pensoient se ioindre corps à corps avec les Geans, incontinent leurs coutelas se presentoient sur leur teste, de sorte qu'ilz n'osoient passer plus outre, par ce qu'ilz estoient desarmez : & s'ilz pensoient rabatre les coups avec leurs espees, ilz trouuoient les coutelas de telle violence, qu'il leur seruoit bien peu de s'essayer à les rabatre. Or estoient tous les assistans tellement troublez d'une si estrange & impourueue rencontre, qu'à les voir au visage, on eust dit qu'ilz estoient au dernier iour du iugement, & demurerent en ceste maniere vn long espace de tēps, sans scauoir que dire ny q̄ faire, ny de quel remede s'ayder en vne si grāde necessité, sinō qu'ilz auoient fermé les portes du Palais pensans leur empêcher la sortie. Mais ce pēdāt qu'ilz

tenoient la porte fermee, arriuerēt deux autres grans & terribles Geans armez de toutes pieces & portant deux espouventables masses de fer en la main, desquelles en vn instant ilz briserent toutes les portes du Palais aussi facilement comme si elles eussent esté de verre, & entrèrent dedans la court : puis sans aucune crainte, passerent à trauers le cercle de feu que faisoient les Damoyelles, lesquelles neantmoins ilz ne sceurent mettre en desordre. Estant donc entrez au mylieu, les quatre Geans mirent les Princesses en terre, & embrassans leur escu qui leur pēdoit au col, commencèrent avec ces deux le plus beau combat que lon vid iamais, pendant lequel l'un des deux Geans cria a haute voix, Armes, armes, Princes, de Grece, & qu'aucun ne s'aproche d'icy estant desarmé : car nous deffendrons la sortie iusques à vostre retour, & ce disant les douze Damoyelles qui tournoyoient à l'entour d'eux avec leurs torches, se changerent en douze Geans armez de toutes pieces, lesquels s'en allerent incontinent à l'encontre des deux derniers venuz, qui s'estoient desia retirez dedās la porte, pour engarder que lon ne peust sortir dehors. En ces entrefaites quelques vns des douze Geans prirent encores dessouz leurs bras les quatre Princesses : & le tintamarre de ceux qui demandoient & apportoient les armes, estoit si grand que lon n'eust pas ouy tonner : car les Princes n'eurent si tost entendu, la voix du Geant qui leur cōmādoit qu'ilz s'armassent, qu'ilz firent soudain apporter leurs armes, puis estans armez commencerent vn des plus cruelz & furieux combats avecque les douze Geans, que lon auoit iamais encores veu : car les quatre autres ne faisoient sinon chercher moyen pour sortir : mais les deux derniers les empêchoient de passer outre. Or estoit ce vne chose merueilleuse de voir les hault faitz d'armes du roy Amadis de Gaule, & de l'Empereur son filz, & des quatre

quatre Princes, ausquelz on auoit rany leurs espoules : car ilz estoient en si grande collere que les douze Geans qui soustenoyent le combat eurent en peu de temps chacun la teste trenchee. D'autant que ceux contre lesquelz ilz auoyent affaire estoient souverains & excellens au fait des armes, encores qu'ilz fussent fort naurez. La Roïne Sidonie & les autres Princesses auoyent fait porter plusieurs flambeaux es galleries, pour voir ce qui pourroit aduenir d'une si perilleuse auenture, mais les quatre Princesses qui auoyent esté enleuees gisoient toutes esparduës en vn coing de la court. Or sachez que selon tous le historiens le victorieux & triumpfant Roy Amadis de Gaule fut le premier qui trencha la teste à l'un des Geans, encores que Galeris ayt voulu dire que ce fut l'Empereur Amadis de Grece, tant y à qu'il n'y eut celui de tous les Princes, qui ne fist si bien son deuoir que chacun estoit esmerueillé de son compagnon, & entre autres les merueilleux & haultz faitz d'armes de Florisel & d'Agefilan estoient chose difficile à croire à qui ne les eut veuz. Apres que les douze Geans furent ainsi descapitez, les autres quatre reprindrent la semblance de quatre magiciens : leurs escus se changerent en liures, & leurs espées en chandelles : mais quand ilz s'aperceurent en cest estat, ilz commencerent à palir, & lors les deux Geans qui defendoyent la porte, escrierēt aux Princes, Estaignez leurs chandelles, car apres ilz n'auront aucune puissance. A ceste parole les Princes s'aprocherent d'eux, & estaignirent leurs chandelles, & lors les deux Geans qui gardoyent la porte leur dirent qu'ilz ne les missent à mort, ains les gardassent en vie. Neantmoins ceste derniere parole ne profita de guieres, car il y auoit là à l'entour plusieurs cheualiers, tenans les espées nuës & les manteaux autour du bras, qui n'auoyent encores rien fait, & voulurēt descharger

leur collere sur eux, tellement qu'ilz mirent les miserables Magiciens en plus de mille pieces. Apres que tous les Geans furent ainsi passez au fil de l'espee, les deux qui gardoyent la porte se retournerēt en leur naturelle semblance : car vous deuez sçauoir que c'estoit l'honorable vieillard Alquif & Vrgande la descogneuë, Adonc en vn instant leurs masses de fer se changerent en grosses chandelles, & leurs escus en liures. Estans retournez en leur premiere forme, chacun s'esbahissant de la boucherie qui auoit esté faicte en la court du Palais. Alquif leur dist : En vn tel secours comme cestuy-cy, les arts ne meritent moins de louange que les armes. Allons, mes bons Seigneurs, pour uoir à voz playes, & à nostre repos : car vous deuez sçauoir que depuis douze heures, nous auons fait plus de mille lieues pour vous secourir en ce besoing. Le Roy Amadis s'en alla au deuant d'eux pour les recevoir, & leur dit en les embrassant : Ce n'est de maintenāt, mes bōs amys, que vous commencez à faire ces plaisirs tant à moy comme à ceux de mō lignage, & vous assure qu'encores que voz bienfaitz nous obligent fort à vous en rendre la recompense, si est-ce que la plus forte obligation vient de nostre bōne volonté, selon laquelle n'y a celui de nous qui ne soit prest à faire tout ce en quoy il vous plaira nous employer. Adōc vindrent les autres Princes les recevoir pareillemēt avec grande reuerence, & Alquif aperceuant Agefilan, luy dit : Mon Seigneur Agefilan, Dieu a voulu que nous ne vous cogneussions point sinō avec la cognoissāce & experiēce de vostre prouesse, & avecq le tesmoignage du seruice que nous auons enuie de vous faire. Puis aperceuant le Roy dō Falāges tout taint de sang, & blessé en quelque partie du corps, luy dist : Mon Seigneur, ie suis fort ioyeux que vous vous soyiez trouué en vn endroit ou le pere deuant le filz, & le filz deuant le pere, ayent peu donner

vn si cler tesmoignage de leur vertu. Ilz le remercierent de sa bonne volonté, puis il commença à parler aux Princesses & Roines, & entre autres à la royne Alastraxere, qui donnant courage à la Royne Sidonie l'auoit engardee de mourir de grande douleur, voyant enleuer sa fille Diane, laquelle & les autres Princesses estoient tant troubles & confuses en leur esprit, que de toute la nuit elles ne peurēt retourner en leur premier estat. Or les sages ayans esté receuz en grande ioye, & chacun leur ayant rendu grace de ce bon secours, & le tumulte de la ville qui estoit toute en armes, estant rapaisé, les Princes se desarmerēt & furent couchez en riches litz, ou ilz prièrent les sages de leur racompter l'ocasion de celle auanture. Sachez, messeigneurs (dirent-ilz) que vous la pouuez bien apeller auanture, car ce fut bien vne grāde aduenture que nous ayās tousiours le soing de vostre seruice, hier au soir estans en nostre Isle, aperceumes dās la pomme de la tour ou est planté nostre miroër magic, ceste trahison que le nouveau Roy de Russie vous auoit appareillee. Au moyen de quoy les quatre magiciens qui ont esté tuez auoient ordonné que ses douze Geās en semblance de Damoysselles, viendroient faire ce que vous auez veu, pensans prendre les quatre Princesses, & les quatre Princes, puis tailler les testes aux Princes & vous les enuoyer retenant leurs espouses pour amyes. Or sachez que s'ilz fussēt fortishors de la court de ce Palais, tout le monde n'eust pas esté suffisant pour destourner leur entreprinse mais en icelle iusques à nostre arriuee ilz n'auoient aucun pouuoir de vous y endommager, à raison d'vne certaine vertu que le sage Cinistide auoit mise souz le fueil de la porre, lequel enchantement nous auons deffait par noz ars, à fin que vous eussiez le moyen de tailler les testes aux geans: car les magiciens de Russie auoient dressé leurs charmes de telle sorte qu'ilz ne pouuoient estre deffais, que pre-

mierement les douze Geans ne fussent tous decapitez: car par ce moien il sembla aux magiciens que leur entreprinse fust certaine, & leurs personnes asseurees. Mais estans aduertys du tout, nous vîmes bien preparez, à fin de leur empescher la sortie par nostre science, & donner ordre à ce que vous nous auez veu faire à vostre seruice, par-ce qu'en tel art celuy qui est le plus sçauāt demeure victorieux sur l'autre. Voylà, noz bons seigneurs, ce que nous en sçauons, & ce qu'il nous est permis de vous en dire, vous auertissans de vous tenir tousiours sur voz gardes, car pour nostre regard, nous nous tiendrons tousiours sur les nostres, d'autant que celui n'est pas sage qui ayant plusieurs ennemys passe sa vie sans soucy. Adonc ilz mirent fin à leurs propos, laissans la compagnie fort estonnee de ces nouuelles, & les ayans remerciez encores vne autre fois de ce bon secours, lon commanda que le lendemain les quatre sages, & les Geans fussent bruslez, & de là en auant il y eut tousiours bonne garde aux portes du Palais. Tandis que les princes furent au lict atendants que leurs playes fussent gueries, ilz passerent le temps assez ioieusement prenant sur tout vn singulier plaisir en la compagnie des sages Alquif & Vrgande la descogneuë. En ces entrefaites arriua à la cour l'Escuyer de dom Brian ges, qui raconta à ces excellens Princes les aduantures, qui estoient aduenues à doñ Rogel, & à son maistre, dont ilz furent fort esmerueillez, non sans rire de ce qui leur estoit auenu avec le Cheualier Affronteur, encores que toute la cour fust assez fachee de leur absence, & de ce qu'ilz auoient entrepris vn si long & perilleux voyage. Mais les sages leur dirent qu'ilz n'en receussent aucun ennuy, d'autant que par tel moyen les profecies de dom Rogel se deuoient acomplir, en se trouuant apres plusieurs hautes & espouuentables aduantures en celle grāde iournee, ou toutes les forces des crestiens se-

roient

royent assemblees contre toutes celles des payens, en l'Empire de Grece. Les autres deuis qui se tenoyent entre eulx, n'estoyent sinon de leur depart pour se en aller en Constantinople : ce que les Princes fiancez pourchassoyent le plus qu'il leur estoit possible, pour bien tost iouyr des amours de leurs espouses.

Comme le Roy Amadis & les autres Princes partirent de l'Isle de Guindaye, laissant la Royne Sidonie en grand' solitude, & comme la belle Royne de Galdap l'alla voir.

CHAP. LXXXIII.

L On appareilla avec grande magnificence vne grosse flotte de nauires pour le partemēt de Diane, auquel la Royne Sidonie voulut montrer sa grādeur plus qu'elle n'auoit encores fait au parauant. Le tout estant en bon ordre selon la deliberatiō qui en auoit esté faite, les Roys & Princes s'en vindrent au port ou la Royne Sidonie les accompagna iusques à ce qu'ilz fussent embarquez, & avec plusieurs larmes se departirent elle & sa fille. Mais lon ne vous pourroit dire combien estoit grande la douleur de la Royne au plus profond de son cuer pour le depart de dom Florisel : auquel ainsi comme il prenoit son congé, elle dit à basse voix : Helàs ! dom Florisel, si iamaïs vous me laissastes aucun gage de vostre amour, vous me l'ostez maintenāt, puis que vous emmener ma Diane. Ma Dame (respondit il) ie vous laisse vn trop plus grand gage de mon affection que celuy que i'emmeine, car si ma fille s'en vient avecque moy mon cuer demeure avecque vous, lequel ie vous supplie, ma Dame, traiter non comme myen, mais comme vostre, veu que vous auez toute puissance sur moy. Las dom Florisel (dist elle) si vous m'aymiez d'une si ardente amour, cōme ie vous aime, vous ne me prieriez point

de traiter vostre cuer comme le myen, puis que le miē est beaucoup plus à vous qu'à moy : sachez donc que vous m'emenez encores avecque vous, & ne vous abusez point si vous voyez mon corps demeurer, car mon ame & ma vie viuēt & viuront à iamaïs en vous, beaucoup plus qu'en moy. Ma Dame (dist-il) ie ne puis cōsentir que vous disiez auoir quelque auantage sur moy on m'aimant, puis que vostre beauté & vostre grandeur, avec vostre vertu, qui sont les fondemens de mon amour, me font d'autant vous surpasser en ayment comme ie suis moins dre que vous en tout le surplus : & par ce moyen vous auez moins d'ocasion de m'aymer, aumoins si par raison il m'est permis d'acuser l'iniustice de voz paroles. Mais ilz laisserent ces propos à raison que les autres Princes & Princesses suruindrent, & chacun ayant pris congé, la Royne Lardenie, & la Marquise de Lastes qui s'en alloient avec Diane, vindrent baïser les mains à la Royne Sidonie, laquelle en embrassant Lardenie luy dist : Ie vous supplie auoir ma fille en recommandation comme vous auez tousiours eu iusques icy, car ie vous assure que ce qui me console le plus en ce sien depart, c'est qu'elle s'en va en vostre compagnie, qu'elle ayme & estime entre toutes. Lardenie ne luy sceut oncque respondre, tant elle estoit aggrauée de douleur puis la Royne se tournant vers la Marquise de Lastes, luy dit : Ie vous prie, ma chere Galardie, auoir le seruice de ma fille Diane pour recommandé. Ma Dame (respondit elle) il n'est besoing de me recommander vne chose que i'ay en si grand soucy. Incontinent apres, les sages Alquif & Vrgande prindrent congé de la Royne & laisserent contre vn rocher, lequel estoit aupres du port, vn grand tableau de marbre soustenu par deux statues de bronze, qui les representoyēt au naturel, avec certaines lettres Grecques de telle teneur,

Quand

Quand la belle Diane retournera en la maison de Febus, pour faire la coniection de l'opposition passée, la maison de Grece, au moyē de celle coniection perdra sa splendeur, par vne nouvelle clarté, & effusion de sang, de laquelle les campagnes de Grece serōt taintes de toutes pars, à la grāde gloire du Royal sang de Bretaigne: Puis le braue Lion sorty de la forest, avec la force de ses ongles experimentera sa vertu en la maison de sa naissance, & avec la mesme force deschirera les fiers Tigres vsurpateurs de l'Isle mise souz le climat de Diane.

Chacun fut fort estonné de ceste profecie, car on ne la peut entendre iusques à ce qu'elle fust mise en effet comme vous pourrez voir par le discours de la presente histoire. Apres les congez pris d'une part & d'autre avecque plusieurs larmes, les Princes & Princesses entrèrent en vne grande nau, acompagnez de plus de cent autres vaisseaux tout à l'entour, & avec vn grand bruiet de trompes & clairons, sortirent du port, & haussèrent les voyles, avec temps fort propre pour nauiguer, qui leur dura bien peu comme vous entendrez. La Roïne les suyuit des yeux iusques à ce qu'elle les eust perduz de veüe, puis s'en retourna en la cité si fachee pour l'absence de sa Diane, quil luy sembloit estre en vn desert. Et ainsi passa quinze iours en grande solitude, laquelle estoit suffisante pour la mettre bien tost à la fin de ses iours, si elle n'eust esté consolée par la venue de la belle Roïne de Galdap, laquelle son mari estant decédé pour l'extreme amour qu'il portoit à Daraïde s'estoit mise à la chercher acompagnée de plusieurs Cheualiers, Dames, & Damoysselles. La roïne Sidonie la receut fort gracieusement avec grande consolation de l'une & de l'autre en deuissant de leurs amours assez familièrement, & des autres propos ou elles prenoient plus de plaisir. Neantmoins leur plus grand passe-temps estoit de se aller pourmener par

la cauerne de la tour de Diane, regardant les ymages de ceux qu'elles aymoient le plus en ce monde. Mais quand la roïne de Galdap aperceut la belle Diane, tant bien accomplie en toutes les perfections de beauté, elle dist à haute voix, Helas! Daraïde, combien tu auoys de raison lors que ie te tenoys entre mes bras, ayant mon cueur en ta puissance, d'auoir le tien enchassé en vn si beau reliquaïre. Vrayemēt tu auois raison d'aller habillée en Damoysselle, veu que l'amour auoit forcé tō cueur à se mettre en vne si belle Damoysselle. Las! que les dieux m'ont esté cruelz de m'auoir fait aymer celuy, qui a si bonne occasion de ne me porter aucun amour. Telles & autres paroles disoit la Roïne, parlant aux ymages de Diane & d'Agésilan, & demeura long temps en l'Isle de Guindaye iusques à ce que la fortune y amena le Prince dom Rogel à son retour de Perse. Mais en attendant que ces choses vous soyent deduites plus au long, nous laisserōs ces deux Roynes ensemble, pour vous parler de ce qui auint aux Princes, lesquelz auoient pris leur route vers Constantinople.

Du grand danger ou se trouuerent tous ces nobles Princes pour la tempeste, & comme Agésilan & Diane separez des autres nauis, furent estrangement secourus apres leur naufrage, par vn Cheualier volant.

CHAP. LXXXIII.

LEs Princes qui s'estoiēt embarquez au port de Guindaye auoient desia nauigué trois iours par bon vent, quand la mer lassée de plus leur donner les faueurs, commença à leur tourner son noir visage, changeant le beau tēps qui les auoit acompagnez iusques-là, en vne hideuse tempeste, selon son inconstance acoustumée. Les mariniers bien auisez preuoians le futur danger, apareillerent tout ce qui leur pouuoit estre necessaire pour resister à la tourmente: mais sentens les vagues s'enfler tousiours de plus en plus,

plus, & les vents contraires enleuer entre eux vne forte guerre, ilz commencerent à n'auoir trop d'assurance en leur sçauoir, pour les presages qu'ilz auoient de la tempeste plus cruelle ou ilz se fussent encorés trouuez. Desia les vagues batoiēt les flancs de leurs vaisseaux par grand' violence, & les vents tourmentās les voyles en diuerses sortes, les faisoient vireuoster de toutes parts, lors qu'une obscure pluye entremeslee de tonnerres espouuentables vint enuironner le ciel & la mer d'une si tenebreuse nyct, qu'ilz n'auoient aucune clarté, outre celle que les esclairs leur donnoient entre les continuelles fantes des nuës, lesquelles s'ouuroient le plus sonuēt par telle horreur, qu'il sembloit qu'à l'instāt le ciel se deust briser en deux parties. A raison dequoy bien tost apres tous les vaisseaux se separerent, l'un çà l'autre là, sans plus se reuoir, ensemble iusques à vn fort long temps apres, & demeura la grāde nau ou estoient les Princes & princesses, toute seule. Le Pilote de laquelle, la voyant par foys iusques au fons de la mer entre les ondes, & quelques foys la sentāt enleuer en terrible hauteur dessus les vagues, puis retomber de rechef, cognoissant que toutes choses luy annonçoient le prochain naufrage, fit abatre toutes les voyles, iettant diuers criz ausquelz les matelotz couroient maintenant en vn lieu, tantost en l'autre, selon le signe qui leur en estoit donné. Les sages Alquif & Vrgande assez troublez de ceste impourueüe tempeste, ne sçauoient que dire, sinon quilz ne trouuoient point par leurs sciences, que telz si grands Princes deussent finir leurs vies en tel endroit : & neantmoins, que pour lors il ne leur estoit permis de destourner les fatales destinees de la diuine volōté. Le Pilote sans plus auoir aucune esperance de salut, roulant des pleurs ardantes de ses yeux, s'en vint au lieu ou estoient les Princes, & comme il eust rencontré le Prince Agefilā & Diane les pre-

miers, les fit passer en vn des esquifz qui estoient attachez à la grande nau : mais ilz ne furent si tost entrez que vne vague portee du vent par grande roydeur, vint tellement heurter entre la nau & l'esquif que les cordages rompuz, la nau s'enfuyt d'un costé, & l'esquif de l'autre en grand danger d'estre renuersez dessus dessous. Je vous laisse à penser si la Princessē fut esperduē se voyant esloignee de la grand' troupe, & abandonnee à la mercy des vagues, sans auoir autre Nautonnier que son Agefilā, auquel estoit restee vne seule petite rame pour se secourir en l'extremité ou il estoit. Or le Roy Amadis pour quelque remōstrance que luy fist le pilote, ne voulut iamais sortir de la Nef, encorés qu'il y vist entrer l'eau en grande abondance par vne infinité de creuaces. Dieu tout puissant (disoit le noble Roy) ne m'a reserué la vie entre tant de perilleuses auantures qui me sont auenues, pour maintenant me la faire finir entre les ondes. Ou s'il luy plaist que ie meure, ayant desia parfait plus que l'entier cours de mon aage, avecque sa grace & l'ayde que m'ōt donné les sages Alquif & Vrgande, il me sera trop plus aysé d'obeir frāchement à son vouloir, que de chercher les moyens d'alonger ma vie contre l'ordre de la nature. Voulant continuer son propos, vne sifflante vague vint embrasser toute la prouē du nauire, avec telle fureur que le vaisseau estant prett à enfoncer, les miserables Nochiers se mirent à crier misericorde, abandonnans tous leurs offices pour la crainte dont ilz estoient surpris, voyans fuyr leur Nef plus d'un grand iet darc maugré eux, avecque vn tant horrible batement de vagues, qu'il sembloit qu'elle voguast entre des rochiers. A ceste secousse la plus grand' part des belles tours & petis chasteletz dont on auoit embelly la nef, trebucherent dans la mer, soit pour l'impetuosité de la tempeste, ou pource q̄ les matelotz laisserēt
eschaper

eschaper les cordes qui les soustenoyent. Au moyen dequoy les Princes ayant cōclud d'atendre pareille fortune que le Roy Amadis, se mirent tous en besoigne au lieu des mariniers. Dom Falang's de Astre, la Royne Alastraxeree, & dom Florestan Prince de Rome prindrent la charge de la sentine du Nauire, ou auecques leurs gens & quelques matelotz qui auoyent repris courage, firent merueilles de vuyder l'eau retournans la mer dans la mer. Le Prince dom Florisel auec tous les autres Princes retenoyent les cordages du mast par grande puissance: ce que voyant le pilote, commença à reprendre cueur, & à gouverner les efforts de ces Princes par son sçauoir maintenāt les faisant tirer d'un costé, & tantost de l'autre, selon que la necessité des vagues suruenantes le requeroit. Alquif & Vrgande, encores qu'ilz fussent fort mal disposez de leurs personnes, tirerēt quelques vnguens qu'ilz portoyent auec eux lesquels ilz destremperent en façō qu'ilz s'en peurent seruir pour estouper les fantes par lesquelles l'eau entroit en leur nauire. En cest estat se maintenoyent ceux qui estoient en la grand' Nef, sans s'apercevoir de l'absence d'Agésilas que la tourmente auoit desia emporté à plus de six lieues long d'eux, auecque la Princesse Diane. Les deux ieunes amans tous trempes de l'eau marine & las du perilleux travail qu'ilz auoyent souffert parmy les vagues, estoient reduitz en telle extremité qu'ilz n'atendoyent plus sinō l'heure de leur prochaine mort, prenans grād cōpassiō l'un de l'autre, quād ilz decouurirent à vne lieuē loing quelques roches couertes de verdure, qui leur firent penser que la deuoit auoir quelque Isle. Agésilas vn peu resiouy, & confortant la Princesse au mieux qu'il pouuoit, se mit à guider son esquif celle part, maniant sa rame selon que la necessité luy auoit appris. Mais ainsi qu'il conceuoit en son cueur la ioye de se reuoir biē tost

en terre, vn grand tourbillon d'eau luy vint tellement pouffier son esquif qu'il l'enuoya heurter contre vn roc, ou il se fendit par la moytié, & abādonna le Prince & la Princesse au mylieu des ondes, presque auant que s'estre aperceuz de leur naufrage. Incontinent que le Prince vid les deux pieces de son esquif flotter de deux diuerfes parts, il ne pensa pl^{us} à autre chose sinon à secourir la Dame, que l'eau eut soudain engloutie si la prenant dessouz vn bras, il ne l'eut tiree en nageant vers le rocher, lequel ne paroissoit que bien peu hors de l'eau, à raison des vagues qui flotoient & reflotoient sans cesse tout à l'entour. Diane palmee de grand frayeur, & priuee de tous sens mens pendoit entre les bras de son amy, lequel tendant les yeux contre le ciel, inuoquoit Dieu à son secours sans plus auoir esperance en autre qu'en luy, le suppliant ne l'abandonner en ce piteux naufrage. La Princesse retournée à soy fut fort esbahie de se voir en tel danger, & se mit à faire de si piteux regretz, que l'air & la mer semblerent en prendre quelque compassion. La pluye estoit du tout cessée, & le triste soleil se couchant monstrois quelques foibles rayons parmy l'obscurité des nuës, quand ils virent venir parmy le ciel, vn Cheualier armé de toutes pieces, monté sur vn horrible monstre volant, qu'il conduisoit par l'air à son plaisir, ne plus ne moins que s'il eust esté à cheual dessus la terre. Or aperceuant les deux amans abādonnez de tout secours, il commença à voler à fleur de eau, à la façon des arondelles quand elles sentent le temps de pluye, & vint par le derriere du Prince tout esperdu en ses douleurs, & luy acrocha le gantelet dans les decoupures de sa cazaque, l'enleuant en l'air, & la Princesse ensemblément, car Agésilas la tenoit fermement embrassée du bras droit par le milieu du corps. Auecque vne si belle proye, le Cheualier celeste prit le chemin de l'Isle verte, ou estant

estant arriué, fit descendre son cheual en terre, laissant sa prinse à l'entree de l'Isle ioignant vn beau bocage, puis prenant la vallee, & entrant en vne profonde forest se disparut incontinent. Si le Prince Agesilan & la princesse furent effraiez de cest impourueu secours, ie vous le laisse à pēser: bien vous diray-ie qu'ilz ne pensoient estre tombez en autres mains que entre celles de quelque ennemy d'enter, voyans son incroyable force, & sa tant estrange façon de voler. Apres s'estre vn peu rassurez de leur crainte, ilz entrerent au prochain boys, ou ilz trouuerent d'assez bons fruietz, & quelques petites sources d'eau douce, dont ilz repeurent pour ce soir: puis ayans passé vne grand' part de la nuyt en deuisant du peril ou ilz auoyent esté de tout le long de la iournee, & ou ilz auoyent laissé le Roy Amadis, ilz entrerent en vne petite cauerne taillée naturellement dans le prochain roc. Là ayans espanduz des rameaux par terre, & dressé quelques oreillers d'herbe verde, commencerent à sommeiller, comme ceux qui pour l'extreme travail du iour, & pour les dangers passés, qu'ilz auoyent encores deuant les yeux, ne peurent dormir d'un bon sommeil iusques à ce qu'estans delassez & rassurez de leur crainte, l'aube du iour commença à bigarrer les ondes marines de sa gracieuse clarté.

Qui estoit le Cheualier volant, & de la penitence qu'il faisoit en l'Isle verde pour auoir occis son pere.

CHAP. LXXXV.

EN l'Isle de Misloc, la plus prochaine des Isles Canaries, autremēt dites les Isles fortunées, regnoit vn bon Roy nommée Tichandre, enuiron le temps que Lucidor des Végeances mena sa puissante armee deuant Constan-

tinople. Ce Roy estoit fort & puissant, comme celuy lequel estoit du lignage de Famongomad, & Mandafabui encores qu'il fut de moindre corpulence que de Geant. Il eut vn filz nommé Patrifond, lequel il fit instruire par grād travail aux bonnes lettres, mesmement en l'Astronomie, & pareillement luy donna maistres pour l'exercer au fait des armes. Patrifond ayant pris l'ordre de cheualerie sur le vingt & deuxiesme an de son aage, eut l'annee ensuyuante fort heureuse en ses entreprises, tellemēt qu'en douze moys de l'an (comme la fortune le vouloit) il eut douze combatz singuliers, esquelz il demoura douze fois victorieux deuant les yeux du bon Roy son pere, & de tous subgetz, qui n'estoyent moins resiouys de la prouesse & vaillance du filz qu'ilz esperoyent vn iour pour Seigneur, que contés de la preud'hommie & iustice du pere. Ce filz voyant le bon-heur de son ieune aage, prit congé de son pere pour suyure les auentures, par les pais estranges, ou il fit tāt de prouesses souz le nom du Cheualier libre, que le renom en vint assez de foys iusques en l'Isle de Misloc, sans que pourtāt on sceut que Patrifond fut ce Cheualier qui portoit le surnom de la liberté. Or s'estoit il ainsi voulu nōmer par-ce qu'il n'ayma iamais aucune des belles Princesses qu'il auoit veues en la cour du Roy son pere, & ailleurs, disāt que ce n'estoit chose bien seante au bon cueur d'un ieune Cheualier, né pour les hautes & difficiles entreprises, que de s'assubietir à la mercy d'une foible & inconstante femme. D'autāt (disoit il) que c'est vne trop manifeste folie de se passionner pour vne chose qui ne le merite. Ainsi ce ieune Prince blasphemoit contre la puissance d'amour, combien qu'il fut fort gracieux & bien pailant entre les Dames: en la compagnie desquelles il estoit tres-bien venu, tant pour son lignage, & pour sa prouesse, comme aussi pour sa beauté, & autres perfections que

la nature & son industrie luy auoient acquises en grand' abondance. Apres donc auoir obtenu plusieurs nobles victoires, & laissé maints immortelz trophées en tous les lieux ou il auoit passé, souz le nom du Cheualier libre, il luy prit enuie de reuoir son pere Tichandre, qui long temps auoit esté sans ouyr de ses nouvelles: mais il le trouua beaucoup plus tost qu'il n'eust voulu. Car Tichadre qui estoit renommé l'un des meilleurs Roys, & un des plus adroitx Cheualiers qui fust entre tous les payens, à la priere de la Duchesse de Taralle (laquelle l'abusoit par ses mensonges, & par l'amour que trahistremēt elle faignoit luy porter) entreprit de combattre tous ceux qui voudroient soutenir le party d'une Damoysele, laquelle se disoit auoir esté iniustement dechassée par la Duchesse hors de trois chasteaux de plaissance, que son pere luy auoit laissez par succession. Tichandre pour mieux executer son entreprise, partit de sa cour en habit de simple Cheualier errant; sans prendre autre compagnie que deux siens Escuyers, ausquelz il se fioit comme en luy mesmes: & en peu de temps artina au chateau de la Duchesse, la supliant ne le donner a cognoistre à hōme du monde. Elle le receut fort gracieusement, parce qu'elle estoit tant asseuree de la force de ce Roy, qu'elle esperoit que sa prouesse deust supleer à la faute de son bon droit. Bref Tichandre fit publier le combat, avecque condition que s'il ne se trouuoit Cheualier qui le peust vaincre durant trois moys (pendans lesquelz il auoit deliberé soutenir le droit de la Duchesse) que ce tēps passé la Damoysele ne pourroit plus quereller les trois chasteaux, dont elle se disoit desheritee: Et s'il auenoit qu'il fust vaincu, que la Duchesse abandonneroit les chasteaux au bon vouloir de la Damoysele. Le lieu ou se deuoit faire le combat, estoit vne petite forest, au trauers de laquelle y auoit un droit chemin assez lar-

ge, enuironné de grans chesnes, qui rendoient un umbrage fort gracieux. La forest n'auoit plus de longueur qu'il en falloit pour donner vne bonne carriere aux cheualx des combatā: & estoit loing de deux lieues du chateau de la Duchesse & de la Damoysele, de sorte qu'elle estoit cōme en mychemin. D'un costé de la forest estoit la tente du roy Tichandre, de l'autre costé y auoit un assez grand paillon pour ceux qui le voudroient venir combattre: & au mylieu de la forest des deux costez du chemin, y auoit deux autres grandes tates pour le Seigneur d'Ar-laigne, & quatre vieux Cheualiers, lesquels auoient esté esleuz par la Duchesse, & par la Damoysele avecques cent halebardiens pour la seureté du camp, & pour estre iuges des combats. Maints vaillans Cheualiers vindrent là s'esprouuer avecque leur honte, n'estant leur bon droit suffisant pour resister à la prouesse de Tichandre, lequel neantmoins ne leur fit iamais autre ennuy que de leur faire laisser leur escuz, qu'il pandoit par ordre aux enuirs de sa tente. Et par ce qu'il ne s'estoit donné autre nom, il estoit communément apellé le Cheualier de Taralle par ceux qui cognoissoient sa prouesse, lesquels l'eurent bien tost fait entendre au Cheualier Libre, qui desia commençoit à s'aprocher de Misloc. Luy ayant conceu quelque secrette ialousie contre celui duquel il oyait tant de louanges, apres auoir esté aduertý de tout ce qui vous a esté recité cy dessus, vint un soir heberger au chateau de la Damoysele desheritee: & aussi tost qu'elle luy eut au vray dict sa iuste querelle, il delibera combattre le Cheualier de Taralle, pour faire rendre ce qui apartenoit à la pauvre Damoysele. Et pour vous dire en brieft toute la verité de l'histoire, Patrifond surnommé le Cheualier libre, eut combat contre le Cheualier de Taralle, son pere incogneu, lequel certainement n'auoit son pareil aux armes, si luy mesmes n'eust engen-

engendré celuy qui le deuoit surmonter. Or apres vn long & cruel combat, le filz n'estant moins encouragé pour son bon droit, que par l'acoustumâce qu'il auoit d'estre tousiours victorieux reduysit son pere en telle extremité, qu'il le renuerſa par terre tout paſmé, & eſuanouy. Mais luy ayant oſté l'armet, ſoit pour l'enuie qu'il euſt d'executer entieremēt ſa victoire, ou pource qu'il lui vouloit donner air & lui faire reprendre ſon alaine plus ayſément, il fuſt fort eſtonné quand il recogneut celuy qu'il auoit vaincu pour ſon pere, meſmemēt qu'il le voyoit deſſaillir peu à peu, tellement que bien toſt il treſpaſſa entre ſes bras, auāt que lō euſt pris le loyſir d'appareiller aucunement ſes playes. La douleur que Patriſond receut de ce deſaſtre, fut ſi de meſurée, que ſans iamais plus vouloir retourner aux Palais royaux de ſon pere, ny à la couronne qui luy eſtoit deſtinee, il commença à ſuyure les lieux ſolitaires & deſerts, meſmement les Iſles qui eſtoient depeuplees d'hommes, eſquelles ſouuent il s'exerçoit cōtre la furie de maintes cruelles beſtes ſauuages. Et ſi quelque fois luy prenoit enuie de retourner en ſon Iſle de Miſloc ſoudain il deliberaoit tout au contraire de s'en eſloigner encores d'auantage, n'eſtimant que le filz fuſt digne d'heriter aux biens du pere, lequel il auoit deſherité de ſa vie. Ainſi faiſant la penitence de ſon peché, ſuyoit toutes compagnies, pour mieux obeir à ſes douleurs, paſſant inceſſamment d'Iſle en Iſle, & traueſant la terre ferme en toute diligence, ſi par fortune il la venoit à rencontrer. Or apres autres longs voyages luy eſtant arriué aux montagnes de la lune, eſquelles le Nil prend ſa ſource, il ſe trouua aucunement plus reſiouy que de couſtume : & ayant vn peu monté contre les roches, rencontra vne aſſez belle vouſte où il y auoit vne fontaine fort plaiſante, ce qui l'incita à demeurer là quelque temps, ſe recreant à la chaſſe, & aux eſtudes de l'A-

ſtronomie, & de Magie. Mais il n'eut lōg temps demeuré en ce deſert qu'il n'eut combat contre vn Griphon & contre vne Lionne, qui auoient acouſtumé de venir boire à la fontaine de la vouſte. Les ayant defaitz avec grand danger de ſa perſonne, il penſoit eſtre en aſſurance, lors que ſur le midy eſtant retiré au ſons de ſa cauerne, il vid aprocher vne beſte de la grandeur d'vne biche, qui vint pareillement boire à la fontaine ſans faire autre mal au Cheualier, puis s'en alla. Cette beſte auoit la teſte, la queue, & les deux patēs de derriere à la ſemblāce d'vn Lyon : ſur le mylieu du dos elle auoit deux ailles aſſes longues, & les patēs de deuant fort crochues, dont le cheualier eſtima qu'elle deuſt eſtre engendree du Griphon & de la Lyonne que nauigueres il auoit occis, & qu'elle eſtoit ieune, pour n'auoir encores la corpulence ny du pere ny de la mere. Au moyen dequoy il delibera de la prendre viſue à l'entree de la cauerne, ce qu'il fit facilement, & la nomma Grifaleō par ce qu'elle auoit la reſſemblance d'vn Griphon & d'vn Lyon. Mais le voyant croiſtre à veue d'œil, il le ſeut ſi bien apriuoyer, qu'il l'acouſtuma à porter premieremēt la bride en la bouche, & la ſelle ou pluſtoſt vn coſſinet ſur celle partie du dos, ou les deux ailles commençoient à ſe joindre. La bride eſtoit faite de cordes leſquelles il corda luy meſmes de tendres eſcorces d'arbriffeaux, & n'ayant la ſemblāce que d'vn ſimple cheueſtre. Le coſſinet eſtoit tout d'herbes bien entrelaſſées & ramalſſées enſemble : puis le Cheualier voyant ce Grifaleon aſſez puiſſant commēça à mōter deſſus, & à le promener par la plaine qui eſtoit au pied des montaignes : ce que le Grifaleon enduroit patiemment volāt quelquefois biē vn iet d'arc à fleur de terre, dont Patriſond eſtoit fort eſmerueillé. Mais eſtant en ſa plaine force, alors il commença à voler en hault trop plus facilement que

s'il eust marché sur la campagne, tellement qu'après vn lōg vol que Patrifond uy faisoit tournoyer à son plaisir autour de leur repaire, il ne se monstroit non plus lassé que si de tout le iour il ne eust branlé les ailles. Le Cheualier tant pour la confiance qu'il auoit en son bon courage & en sa magie comme aussi pour n'auoir aucune crainte de la mort laquelle il pensoit auoir meritee, delibera avec que l'ayde du Grifaleon changer sa demeure: & de fait s'arma de toutes pieces & s'assit sur le coiffinet comme s'il eust esté à cheual, puis lâchant la bride au Grifaleon, s'achemina par l'air iusques au soir tout tard qu'il vint heberger en vne petite ville qui estoit sur la riuere du Nil, ou il fit acoustrer ses armes, & enharnacher sa monture, de selle, d'estriers, & de bride selon que l'estrange façon de la beste le pouuoit permettre. Puis abandonnant la terre retourna en l'air, par lequel il fit tant de diuers pelesrinages, voyant souz luy les grands fleuues, les larges mers, & maintes opulentes villes, que finablement il aborda en l'Isle verte, incogneüe à tous mariniens à causes des roches, qui estoient cachees dans la mer deux ou trois lieues à l'entour. L'Isle en tout tēps estoit telle que son nom le monstre, assez bien fournie de bestes rouffes, & de diuerses sortes de bons fruyts, avec plusieurs petites fontaines d'eau douce q font vn assez large ruisseau, lequel arrouse tout l'Isle. Il y a aussi maints beaux bocages entremeslez de quelques grands arbres, rendans vn fort plaisant vmbrage. Patrifond voyant le lieu propre à la vie qu'il vouloit désormais mener, se delibera de passer le reste de ses iours en ce lieu, & choisit pour sa principale retraite, vne caverne laquelle estoit en vne profōde & obscure forest, en vne vallee, sur le mylieu de l'Isle, ou il auoit acoustumé de laisser ses armes, & son escu, avecques son Grifaleon. Sur l'entree de ceste caverne il

auoit graué certains vers Arabiques, en memoire de son malheur & de sa repentance: lesquelz en brief sens contenoient ce qui c'ensuyt:

*Voicy le desolé repaire
D'un filz, que les sorts inhumains
Firent dans le sang de son pere,
Souiller ses ignorantes mains.*

Or Patrifond n'ayant la plus part du temps autre chose sur son cueur, que le meurtre de son pere, à fin de purger son peché venoit tous les iours à vne grosse source d'eau, qui estoit vn peu hors de la forest pres d'un grand arbre. Là leuant la teste vers le ciel, & faisoit à genoux ses oraisons aux Dieux selon sa religiō, en habit d'heremite, se lauoit les mains, & le visage de l'eau viue, pour le netoyer de son offense. Apres ses prieres quelquesfois il montoit sur son Grifaleon, & s'en alloit chasser es prochaines Isles, à fin de ne depopler la sienne: puis retournoit sur le soir. Dont il auint que selon sa coustume reuenāt en son isle verte, il salua le prince Agefilan & la Princeesse Diane estans demeurez sur la roche marine au mylieu des ondes, apres que leur esquif fut volé en pieces.

Comme Patrifond essaya par diuers enchantemens à iour de la beile princeesse Diane, & des auentures qui en auindrent.

CHAP. LXXXVI.

S'Il vous plaist, mes damoiselles qui lisez ceste mienne histoire, considerer icy le passetemps que prend ce petit Dieu Amour à tourmēter les cueurs humains de variables fantasies, & mesmemēt ceux qui lui ont osé nyer en leur ieunes ans l'hommage deu à son empire, ie pēse que ie vous laisseray autant bien persuadees d'otroyer les faueurs de vostre florissante ieunesse, à ceux q pour l'affectiō qu'ilz vous portent, ou leur bōne grace, les mritēt, cōme biē apprises de vostre deuoir, vous ayant mōstré par experience q ceux qui en leur ieune aage se rebellēt cōtre l'amour, sōt cōtraires de lui obteir en leur

leur vieillesse, lors que les rides, & le poil grison, les rendent fort mal auenans aux amoureuses entreprises. Patrifond vous pourra bien seruir d'exemple, lequel ayât passé toute sa ieunesse en blasphémant cōtre la maïesté de Cupidon, se sembloit estre reserué à suyure les passions de l'amour, lors que son infortune l'auroit fait absenter du monde, l'ayant reduyt en vn desert solitaire, pour y acheuer le surplus de ses miserables iours. Car vous deuez sçauoir qu'il s'estoit tellement enflammé de la beauté de Diane ainsi qu'il la portoit en l'air: & sentoît son courage tant alteré de ses nouvelles affections, que toute la nuyt ensuyuant il ne peut prendre aucun repos, & ne fit que se lamenter, se trouuant d'autant plus desesperé de son remede, par-ce qu'il croyoit que ce fust le mary & la femme qu'il eust apporté dans ceste Isle. Or apres auoir toute la nuyt arrosé sa passe face de maintes larmes, & s'estant long temps plaint à luy mesme de ce que l'amour le contraignoit d'aiouster vn forfait d'adultere avecque le meurtre de son pere, il delibera quelque chose qui en peult auenir, s'essayer à iouir de la beauté de la Princesse, & par-ce qu'il ne vouloit vser de force & violence, eut recours à sa magie. Parquoy incontinent que le cler soleil eut commençé à respandre ses rayons sur les beaux bocages de l'Isle, Patrifond cōmença pareillement ses charmes, tellement qu'Agésilan se resueillant vn peu deuant la Princesse, auisa vn cerf passer deuant la cauerne ou ilz estoient couchés: apres lequel se mit à courir, avec lespee nuë (car il n'auoit autres armes) pensant qu'il leur pourroit seruir pour eux repaître. Mais tandis qu'il estoit en ceste queste, la Princesse non acoustumée à reposer en vn lit si dur, se resueilla: & ne voyant point son cher amy, sortit toute esperduë de la cauerne, pres de laquelle elle vid vn cheual sellé & bridé: puis estandant sa veuë plus loing, luy

sembla entendre la voix du ieune Prince qu'elle pensoit entreuoir parmy l'espoif leur d'vn bocage: & ayant vn cheual apres de soy tant à propos, sans se douter quelle creature ce pouuoit estre, monta hardimēt dessus, le chassant à bride auallee celle part ou elle pēsoit auoir veu Agésilan. Mais le cerf & le cheual (qui estoient deux espritz couuerts souz vne telle ressemblance par le cōmandement du magicien Patrifond) eurent tantost executé leur office: car le cerf s'estât disparu, & ayant fait égare le Prince sans plus sçauoir en quel lieu il estoit, le cheual arriva au bout de l'Isle pres du ruisseau qui la trauersoit, & faignant auoir soif, cōmença à entrer peu à peu dans le ruisseau, & se iettant tout à coup à trauers les ondes passa iusques dās la mer en nageant, fort ioyeux d'auoir sur luy vne tant belle proye. La princesse toute esperduë ne sçauoit que faire autre chose, sinō se tenir ferme sur la selle, car tant plus elle pensoit tirer la bride pour faire tourner le cheual arriere, il s'efuyoit tousiours plus auāt par la profonde mer. Elle troussoit sa robe au mieux qu'elle pouuoit, de peur de la mouiller, & enleuoit les piedz en hault, estans ses blonds cheueux esparpillez aux plus doux vens, qui sembloient s'ebatre entr'eux à les faire mignonnement voleter autour de son chef, de sorte qu'on les eust dit, & la mer pareillement estre tous ententifz à contempler la parfaite beauté de la Princesse, q regardoit piteusement le riuage dont elle se voioit tousiours éloingner de plus en plus. Apres que le cheual eut nagé tout le long du iour, il aborda à Soleil couchant en vn lieu ou il abandonna sa charge entre des roches tresobscures, pleines de hideuses & espouuentables cauernes. La pauurette se trouuant seule en ce triste desert a l'heure que la nuyt cōmençoit à chasser la clarté du iour, elle ioingnit les mains, & rendit les yeux moytes de larmes contre le ciel, cōme si elle eust voulu

accuser le souverain createur, pour luy auoir ordonné vne tant cruelle destinee, Puis ayant demeuré quelque temps si es-perduë que lon n'enst peu iuger si elle estoit viue, ou si c'estoit quelque statue de marbre taillee en ceste façon, se mit à plorer & à gemir fort piteusement, ne se plaignant moins de ses miserables destins, que de l'excellence de sa beauté, qu'elle estimoit estre la cause de ses malheurs. O maudite Fortune (disoit-elle) que te reste-il plus maintenant à me faire pour estre assouuie de mes calamitez, sinon à me priuer de ceste malheureuse vie, laquelle tu m'as desia deux foys gardée entre les ondes, à fin de te garder aussi le moyen de me tourmenter tousiours de plus en plus? Tu m'as éloignée de la fidelle compagnie de ma mere, & de mon ayeulle le grand Roy Amadis, abandonnant ma vie à la mercy des vagues, & maintenāt helàs ie ne sçay à qui tu abandonnes mon hōneur. O beauté, don trop detestable, & duquel ie ne rens plus graces à Dieu, puis que par toy ie sens perir le doux renō de ma chasteté, auant que d'auoir commis vne tāt execrable offense! car encores que ie ne me soye point laissé vaincre aux volōtez desordonnees, si est-ce qu'estant ainsi vagabonde, il n'y aura désormais celuy qui ne face grand doute si j'auray tousiours biē gardé l'hōnesteté acoustumee entre les Princesses de mon lignage. O trop cruelle Fortune! si tu me veux oster mon bon bruyt, si tu m'as fait perdre l'esperāce de plus retourner es maisons Royales des Roys & Empereur mes parens, & si tu les as, peust estre, fait perir par la tempestē en laquelle ie les ay abandonnez avecque trop peu de consideration, à quelz malheurs astu encores deliberé de me reseruer, si la douleur de ceux-cy m'est trop plus grieve que celle de la mesme mort? Or puis que tu n'as point trouué la fin de mes iours assez cruelle en me faisant ensevelir entre les ondes, ie n'empesche point

maintenant que tu ne m'enuoyes quelque horrible beste sauage de ce desert, qui me deuore car ie me sens desia reduite à telle extremité, que ie ne sçay pl^{us} aucun martire duquel ie ne te remercierr es affectueusement, moyennant que par luy tu me donnes avecques la fin de ma vie, la fin desirée de mes miseres. Ainsi se pleignoit la belle Princeesse, quād elle vid aparoir à son costé le magicien Patrifond, lequel estoit là arriué long temps deuant elle, s'estant fait porter par des espritz, car il auoit laissé son Grifaleon dans la cauerne de l'Isle Verde: soit par-ce qu'il vouloit venir plus tost que la nature du destrier volant ne le permettoit, ou par-ce qu'il n'eust peu le tirer de son estable qu'Agefilan ne l'aperceust, qui estoit lors bien pres de luy quād il se mit à suyure sa nouuelle amie. Or le magicien ayant vn peu consolé Diane par ces propos, luy dist, Sachez, ma Dame, que tel que vous me voyez, ie suis enfant du Roy de Misloc, autāt bien appris aux sciences cachees, comme bien experimenté au fait des armes. Et si vous auez quelquefois ouy parler du cheualier Libre, vous le voyez maintenāt deuant vous, ayant perdu son ancienne liberté, à fin de l'employer à vostre seruice, auquel ie vo^{us} supplie me recenoir avecque la mesme volōté que ie m'y offre, au moins si pour vous auoir deliuree du naufrage ou ie vous trouuay hier entre les vagues, ie merite maintenāt quelque faueur pour le guerdon de mon bien-fait, car en vous sauuant la vie, j'ay mis la mienne en grande angoisse, me sentant embraser d'un feu à moy incogneu par cy deuāt, mais duquel j'ay desia plus d'experience que ie ne voudrois, par la douce force de vostre diuine beauté. La princeesse n'ayāt tant d'égard à son lignage, ny à les autres remontrances, cōme à la chasteté qu'elle auoit tresrecommandee, luy respondit, Ha, ie ne vous croiray point estre sorty de celle race dont vous vous

vantez,

vantez, ny que vous soyez ce Cheualier Libre, auquel sa pudicité gardee entre les Dames, n'à moins acquis de bruyt par tout le monde, que ses cheualeureuses prouesses, puis que maintenant vous estes si outrecuydé de vous vouloir payer d'une briefue vie que vous m'avez sauuee, par mon perpetuel deshonneur. La Princesse vouloit continuer ses lamentatiōs en ces tenebres, si le Cheualier ne se fut mis à l'accoller & embrasser par telle violence qu'apres luy auoir desfiarauy par force quelques baisers, il luy donna trop plus d'ocasion de resister par effet, que de se deffendre de paroles. Mais qu'eust peu faire à la longue ceste foible Princesse contre les efforts d'un preux Cheualier tant enflammé de son amour, & ne passant que de bien peu la fleur de son aage viril. Elle s'estoit desfi si long temps deffenduë de tout son peu de pouuoir, qu'elle estoit presque hors d'alaine, laissant à son nouvel amoureux bonne esperance de la prochaine victoire, quand elle vid passer aupres de la roche ou elle estoit, vn brigantin, dans lequel y auoit vn peu de feu, & quelques gens armez deuers la prouë, qui s'en retournoyent du dāger ou la tempeste des iours precedens les auoit iettez. Incontinent que le Cheualier les eut aperceuz, de honte il abandonna sa prinse : mais la Princesse se voyāt desliee d'entre ses bras courut incontinent sur le riuage, & s'escria à ceux du brigantin : Helās! gens de bien, si lō peut encores trouuer quelque pitié en ces desers, ie vous supplie secourir vne pauvre Damoyelle que lon veut violer. Elle n'eut si tost acheué ces motz que le vaisseau estoit desfi à bord, dans lequel elle se ietta, pensant y trouuer des Cheualiers, & non des corsaires, lesquels toutes-foys ne faisoient autre mal sinon que d'enleuer toutes les vierges qu'ilz pouuoient rencontrer. A l'entree du brigantin ilz demanderent à la Princesse si il n'i auoit autres femmes dans ce-

ste Isle. Elle respondit que non, ains seulement vn Cheualier lequel l'auoit voulu forcer. Adonc les corsaires reprindrēt incontinent la route qu'ilz auoyent laissée, abandonnans Patrifond en grand ennuy, lequel neantmoins se consola peu à peu, estimant que toutes ces choses estoient auenues, par la volonté des Dieux, à ce qu'il n'eust à commettre vne telle offense. En ces pēsees rapella ses espritz & celle nuyt mesmes retourna en l'Isle Verde dans sa cauerne acoustumee. Mais il se trouua fort estonné, quand il vid que lon luy auoit pris son Grifaleon & ses armes lesquelles estoient enchantees de telle façon qu'il estoit impossible les faucher. Car vo⁹ deuez sçauoir que soudain qu'Agésilā se fut aperceu de l'absence de sa Dame, il cuyda forcener de despit, tant par-ce qu'il se doutoit bien que lon luy auroit enleuee comme aussi par-ce qu'il auoit deliberé de la prier ce iour mesme de donner quelque allegeance à ses passions, esperant faire par vne petite force, ce que ses grandes prieres luy denieroyent. Or se voyant abandonné d'elle, apres plusieurs & diuerfes complaints, & l'ayant cherchee par toute l'Isle, il arriva par fortune en la cauerne de Patrifond, & trouua ses armes & son Grifaleon. S'estant reuestu de ce bō har-noys, & ayant tiré le Grifaleon dehors. il fust fort effrayé de sa façon. Mais la beste qui sembloit estre ioyeuse de tomber entre les mains d'un si bon Cheualier, se monstra si fort obeissante, que le ieune Prince luy ayant mis la bride, monta dessus en la façon que le iour au parauant il l'auoit veu cheuaucher à son maître, tellement qu'on l'eust facilement pris pour Patrifond. Puy ayant essayé à petites traites la volée du cheual, d'une hardiesse iointe auecque la necessité & l'enuye qu'il auoit de trouuer sa Dame, il lacha la bride à son destrier, lequel prit premieremēt la course en terre, puis peu à peu commença à s'enleuer au ciel, en la

mesme façon que lon voit les grues pafagieres premierement marcher par grâde roydeur quatre ou cinq pas, puis s'enleuer de terre, ores d'une brasle, ores de deux iusques à ce qu'estans toutes arrâgees hautement au ciel, elles monstrent la grande viffesse de leur vol. Ainsi le Griffaleon s'enleua en l'air avec le Prince Agefilan n'estant Patrifond si douloureux de sa perte, qu'il ne s'apaisast assez facilement, disant que les Dieux luy auoyent enuoyé vn tel mechef, pour le punir de la force qu'il auoit voulu faire à vne vierge de sang Royal, & de haute & noble lignee, comme il auoit entendu par ses doleances. Or le laisserôs nous dans son Isle mener sa vie solitaire, & dom Agefilan voler tout au plus pres des nuës, à fin que nous puissions suyure la Princeffe Diane, & vous reciter qui estoient les coursaïres, lesquelz éloignez de leur route par la tempeste l'auoyent deliuree d'entre les mains de Patrifond, pour mettre sa vie en vn pareil danger, comme estoit alors son honneur.

Da cruel sacrifice qui se faisoit au Dieu Teruagant en l'Isle Desolee, ou les coursaïres auoyent emmené la Princeffe Diane.

CHAP. LXXXVII.

EN celle grande mer ou la tempeste auoit tât tourmenté la nef du Roy Amadis, y eut anciennement vne Isle qu'on apelloit la Desolee. Les habitants croyoyent au Dieu Teruagant, & à ceste raison on luy auoit erigé vn beau temple, dont l'entree regardoit sur le riuage de la mer qui n'estoit guieres loing de là. En celle Isle y eut iadis vn Roy homme de bien, & se gouuernant fort honorablement en son Royaume, mesmement en l'estat de iustice: Il auoit vne femme nommée Theiphile, non moins renommee pour sa beauté, que son mary pour sa preud'hommie. Or dit-on se-

lon la plus commune renommee, qu'un iour tandis que chacun estoit en priere dans le temple, le Dieu Teruagant s'enamoura de ceste belle Dame: & neantmoins cacha son amour quelque temps, pour quelquefois le descourir avecque plus grande violence: car ne pouuant plus celer le feu auquel il se sentoit consumer, manda par ses prestres, au Roy, qu'il luy enuoyast sa belle Theiphile, parce qu'il luy vouloit faire l'honneur d'auoir sa compagnie, comme de celle qu'il aymeroit & estimeroit grandement pour la perfection de sa beauté. Les prestres remontrèrent en leur message le bien qui pourroit auenir à toute la lignee, de laquelle vn si grand Dieu auroit daigné prendre l'acointance. Mais le Roy courroucé par grande ialousie, & ne voulant moins garder son bon droit, qu'il auoit acoustumé de garder celui d'un chacun, respondit aux Sacrificateurs, ie croyrois plustost que quelqu'un de vous par vn appetit desordonné, voulust souz telle couuerture souiller la chasteté de ma femme, que ie ne penserois seulement, qu'un si grand Dieu comme celui lequel nous adorôs tous ensemble, voulust entacher sa diuinité d'un tant execrable adultere. Allez donc, malheureux, & aprenez desormais à ne couurir voz meschancetez souz vn tel blasphemé, si vous ne voulez en receuoir le chastiment condigne à vostre demerite. Les prestres estônnez de ces paroles, les rapporterent au Dieu Teruagant, lequel (apres auoir enuoyé trois autres messages sans auoir eu meilleure responce qu'au premier) entra en grand courroux, & ordonna que tout le peuple fust assemblé au Temple, ce qui fust fait incontinent, puis ayant par ses prestres remontré son vouloir, & la rebellio du Roy, apres diuerses menaces si le peuple ne luy portoit obeissance, commanda que par force d'armes on luy amenast au mesme instant la belle Theiphile. Le peuple n'ayant esgard à autre chose qu'à

exe-

executer la volonté du Dieu, courut soudain au logis du Roy, & luy enleuerent sa chere espouse par force, s'essayans à l'emmener deuers le Temple. Son mary forcené de colere, print secretement vne courte espee souz sa robe, & deuant le peuple à l'entree du Temple treucha la teste à son aymee Theiphile, luy sauuant son honneur par la perte de sa vie: puis à fin d'eiter la fureur, & la force que le peuple luy appareilloit, se passa l'espee au trauers du corps vengeant la mort de son espouse par la sienne. Que vous diray-ie du Dieu Teruagant? sinon qu'il fut si fort enragé contre son peuple par-ce qu'il n'auoit sceu executer sa volonté, que l'espace de trois iours il ne fit autre chose que pēser par quel moyen il se pourroit venger de ceste offense. A la parfin estimāt la peste, & la famine, estre trop petites punitions, il delibera les priuer entieremēt de repos, & de tout plaisir: & tout incontinent enuoia vn si grād nōbre de Farfadets en tout l'Isle, qu'en bref ilz eurent abatu vne grand' partie des maisons, excepté les cheminees que ilz se reseruoient pour leur demeure. La nuyt ilz venoyent descouurir ceux qui reposoyent, les iettans tout à plat sur le plancher, & s'essayans quelque fois de forcer les filles, & les femmes qu'ilz trouuoient en leur chemin, sans auoir honte de personne. Le iour ilz couroyent apres les troupeaux, tuoyent les beufz, trepignoyent les iardinages, & faisoient autres infiniz maux, tellemēt qu'en bref ilz eurent reduitz tous les habitans de l'Isle en si piteux estat, que la mort leur eust esté beaucoup plus gracieuse qu'vne si miserable vie. Apres auoir ainsi esté tourmentez, & affligez par vn long tēps, ilz firent diuers sacrifices au Dieu Teruagant, le supplians rapaiser son ire, ou leur donner quelque autre penitēce pour les purger de leur forfait. A la fin de leurs prieres l'oracle du Dieu respondit que tous les iours ilz luy offrisent au

pied de la roche, qui estoit sur le bord de la mer, pres de son Temple, vne femme ou vne fille, & qu'ilz continuassent celle offrande, iusques à ce qu'ilz en eussent trouué vne, qui luy fust autant agreable comme celle qu'ilz luy auoyent laissé meurtrir, autrement qu'ilz n'esperassent aucune fin à leurs calamitez. Depuis ceste cruelle response, la coustume continua tousiours en ce païs, d'offrir & atacher chacun iour au pié de la roche, vne fille, ou vne femme des plus belles que lō peult choisir pour cōtenter le Dieu Teruagant: ce qu'ilz n'auoyent encores peu faire, car autant que lon luy en offroit, il enuoyoit vn horrible monstre, lequel les venoit deuorer incontinent, comme n'estant plainfantes au Dieu. Ainsi les habitans de l'Isle perdirent presque toutes leurs fēmes, & leurs filles, de sorte qu'ilz furent contrains d'enuoyer trois galeres bien equipées sur mer, en diuerses parts, pour continuer leur cruelle coustume. A raison dequoy leurs coursaïres s'en alloient iour & nuyt desrobans & en leuans toutes celles qu'ilz pouuoÿe trouuer, ou si leur force n'estoit suffisante, ilz les achetoyent, ou abusoyēt par quelque tromperie. Ainsi vāguans par diuerses mers, vn de leurs brigantins poussé par la tempeste estoit abordé au lieu ou Patrifond vouloit iouyr par la Princesse Diane qu'ilz prirent en leur vaisseau selon qu'il vous a esté dit, l'emmenerēt en leur Isle, ou ilz la renfermerent en vne spacieuse prison plaine d'vn grand nombre d'autres miserables femmes, vouées à la pasture du monstre. Par auenture que la beauté & bonne grace de la Princesse peut retarder quelque temps ceste barbare nation de leur cruauté accoustumee, mais le sort estant retombé deux ou trois fois sur elle, les sergens vaincuz par leurs loix, l'emmenerēt, & à la façon des autres l'attacherent toute nuë contre la froide roche sur le bord de la mer pour en repaistre le monstre espouventable.

O trop cruelle fortune ! est il possible que tu ayes tant de puissance sur les choses humaines ? As-tu bien peu d'auoir le courage d'abandonner vne tant belle Princeſſe à vne ſi grande cruauté ? Oſes-tu bien preſenter ceſte tant douce & delicieuſe viande digne ſeulement de la table des Dieux, à l'horrible gueule de ceſte furie infernale ? Helas celle grande beauté qui auoit fait armer les plus grâs Roys & Princes de l'Orient pour ſon amour, & qui tant de fois auoit fait enſanglâtir les campagnes du ſuperbe ſang de Ruſſie, & qui pouuoit encores faire embraser vne ſeconde Troye, eſt tellement abandonnee de tout ſecours, qu'elle n'a perſonne à l'entour d'elle qui ſeulement la puiſſe conſoler d'une parole. Je vous dirois l'extreme angoiſſe, les tendres larmes, les piteux regretz, & les douloureuſes plaintes dont les meſmes habitans de l'Iſle ſembloyent accuſer l'injuſtice de leur cruel Dieu, lors qu'ilz virent la Princeſſe tremblante aſſiſe ſur la froide roche, en attendant vne mort la plus abominable qu'il ſeroit poſſible de penſer : mais la doulueur, & la compaſſion que ie reçoys de ce tant malheureux deſaſtre, me contraignent à laiſſer ces propos iuſques à ce q'aye receu nouuelles forces, pour mieux ſuporter mon ennuy.

Comme la tempeſte renuerſa le Prince dō Rogel dedans vn gouffre de mer, au grand regret de l'Infante Sidere, & de dom Brianges de Beocie, & de ce qui en auint.

CHAP. LXXXVIII.

AV meſme temps que la flotte du Roy Amadis fut tant tourmentee & combatuë de la tempeſte, la nef ou eſtoit dom Rogel, dom Brianges, & les Infantes de Perſe fut ſi furieusement aſſaillie de l'orage, qu'il ſ'en fallut bien peu qu'elle ne fut effondree & enſoncee

Finablement apres que la tourmente eut fait ſes effortz l'eſpace de quatre iours, & quatre nuytz, chacun eſtât embesongné pour reſiſter à la fureur des vêts qui combatoyent dans vn gouffre, le Prince dom Rogel tenant vne des cordes du maſt, fut emporté par vne vague, & renuerſé dedans la mer, d'autant que la corde qu'il tenoit rompit en pieces, tellement qu'il demeura d'un coſté du gouffre, & la Nef ſ'enfuit de l'autre. Vous pouuez penſer ſi l'Infante Sidere & le Prince de Beocie receurent grand ennuy de ce mal-heur impourueu bien vous aſſeuré-ie que l'Infante ce fut iettée apres ſon cher Rogel, ſi la frayeur qu'elle eut le voyant tomber, ne l'eut pareillemēt fait rôber toute paſmee dans le giron de ſes deux ſœurs. Dom Brianges à toute force cryoit aux mariniers de guider la nef vers le lieu où dom Rogel eſtoit treſbuché à fin de le ſecourir, mais il leur fut impoſſible tant pour la tempeſte qui les deſtouroit, comme auſſi pour ne ſçauoir en quelle part eſtoit cheut le Prince, lequel ilz n'auoyent onc ſceu reuoir depuis qu'ilz l'auoyent premierement perdu de veüe. Alors dom Brianges eſtimant qu'il fut pery, commença tellement à ſe deſconforter, plaindre, & l'amenter que tous ceux qui eſtoient dans la nef en eurent grand compaſſion, & tantost apres l'Infante Sidere retournant à ſoy, eſpardué de l'extreme doulueur & fondant en larmes, diſt avec grand travail : Suis-ie doncq née en ce monde à fin d'eſtre malheureuſe toute ma vie, & de rendre encores malheureux ceux qui s'employent en ma faueur ?

O Dieux cruelz ! pourquoy m'avez vous mis hors de ſeruitude, ſi celui qui eſtoit autheur de ma liberté deuoit par mon moyen eſtre fait eſclaue de la mer ? Helàs ! ie cognois bien maintenāt q'vous ne m'avez miſe en eſtre, ſinon pour me faire ſouffrir des doulours trop pl'rigoureuſes q'la meſme mort. Mais ſi eſpere-ie bien toſt rôpre l'ordre de ma cruelle deſti-

finée, & mettre vne fin cōtrainte à mes infelicitéz, en auançant la fin de ma vie. Aussi serois-je trop ingrate, voire ennemye de toute pitié, si ie vouloys auoir la fortune plus fauorable que celuy qui à mon ocasion est tombé en son dernier malheur. Puis dōc qu'il est enseveli entre les vagues, ia aux Dieux ne plaie qu'il demeure seul inhumé en vn si large tombeau, car veu qu'il m'a tenu si fidelle cōpagnie en viuant, c'est bien raison que ie l'accompagne en mourant. A ces motz elle se leua comme forcenee, preste à se ieter dans l'eau, si dom Brianges & ses deux sœurs ne l'eussent retenuë bon gré malgré, la consolans au mieux qu'il leur estoit possible, encores que eux mesmes n'eussent guieres moindre besoing de consolation. Toutesfois ilz ne sceurent tant faire, qu'elle ne demourast euanouie plus de deux heures, sans se remuer ny peu, ny prou, non plus que si elle enst passé de ce monde en l'autre : & encores en retournant de pasmoison elle se trouua tant surmontee de la douleur, & son esprit en si grande confusion que long temps apres, vne fieuue continuë & freneticque la tint, si aspre, & vehemente, qu'aucune cognoissance ne luy estoit restee. Ainsi la miserable Infante ne cessoit de resuer & rauasser, monstrant assez par les in constans propos qu'elle tenoit de dom Rogel & de son desastre, combien son esprit estoit debilité, & sa fantasie troublee. Ce pendant dom Brianges voyant le Nocher, & ses matelotz, presque transis de grande crainte, abandonner leur deuoir, & ieter maints crys lamentables cōme n'attendans que leur prochain naufrage, commanda assez rudement que chacun reprist son ofice, chastiât de paroles, & par effet tous ceux qui se trouuoient oyfifz deuant luy. Et pour leur donner plus de courage, luy mesmes commença à leur ayder, monstrant vn regard si assuré, que chacun prit cueur : & ainsi tous ensemble s'esuertuerent de

forte que sur la mynuict ensuyuant, ilz se trouuerent à l'abry d'vne haute couste, ou les flotz & les vens ne leur faisoient que bië peu de nuyfance. Au moyë dequoy le pilote voyant le lieu propre pour attendre l'oportunité de nauiguer, fit ieter les ancres, & dist à dom Brianges & aux Infantes que chacun se pourroit bië reposer qui voudroit, iusques au iour qu'ilz auroient auisé le lieu auquel lon pourroit prendre port dans l'Isle prochaine. Mais dom Brianges s'en retourna vers l'Infante Sidere, & la voyant en telle angoisse, & pensant son compagnon estre noyé, ne cessa de se passionner & desconforter iusques au matin qu'il ouyt assez loing vne voix plaintifue & douloureuse : partant pour scauoir que c'estoit, descendit en vn petit esquif, & ramant le long de la couste, aperceut sur vn coupeau de roche qui regardoit sur la mer vne Damoiselle vestuë richemēt à la Sarmatique & tenant l'espee penduë en escharpe en la mesme façon que Daraïde la souloit porter. Ceste Damoiselle, qui estoit presque Geante, ne pensant estre veue de personne, se plaignoit & lamentoit fort piteusement, à raison dequoy dom Brianges se voulut tenir vn peu loing pour escouter ses plaintes : mais il n'eut si tost fait cesser les rames, que la Damoiselle comme desesperée se lança furieusement dans la mer, la teste la premiere, descourant à l'œil par celle follie, la rage qui la tourmentoit. Alors le bon Prince prenant cōpassion d'vn tel meschef, fit voguer son esquif le plus hastiement qu'il peut, au lieu ou elle estoit tōbee, & la sceut si bien secourir qu'il la tira dans son vaisseau à la seconde foys qu'elle aparut dessus la mer. Mais la Damoiselle en lieu de le remercier de son secours l'eust volontiers outragé de paroles, si l'abōdance de l'eau qui luy regorgeoit par la bouche, ne luy eust defendu le parler, auecque l'aprehension de la mort que desia elle auoit engrauée au cueur, & representee au visage.

O Dieu

O Dieu (dist lors dom Brianges) & en quelle malheureuse cōtree sommes nous venuz ? Helàs ! mon cher compagnon dom Rogel est pery par la force del'orage, & ie voy que maintenant ceste belle damoyſelle ſe veult noyer de ſon bō gré. Le Prince de Beocie acheuant ces mots, hucha à ceux de ſa nef qu'ilz vinſſent celle part, d'autant qu'il voyoit aſſez pres de là, vn endroit aſſez propre pour prendre port, & luy meſmes paſſa deuant avecque ſon eſquif, & deſcendit en terre. Autant en firent ceux de la nefleſquelz aians dreſſé quelques rātes & pauillons; dom Brianges donna la Damoyſelle incogneue en garde aux deux plus ieunes Infantes, pour la traicter avecques leur ſœur le mieux qu'elles pourroient, puis il employa tout le ſurplus de ce iour à plaindre l'infortune de ſon compagnon, qu'il eſtimoit perdu, encores que le contraire fuſt verité, car eſtant tombé dans la mer, il ſ'ayda ſi biē des bras & des iambes, qu'il vint aborder en nageant en la meſme Ile ou le Prince de Beocie auoit pris port, combien que ce fuſt aſſez loing de là. Ainſi dom Rogel eſchapé du peril, ſ'en vint tout gōtant, à pied, & ſans aucunes armes, en vne petite foreſt aſſez pres du riuage de la mer, ou il trouua qu'elque fontaine d'eau douce, pres de laquelle il ſ'aſſeit pour ſe reposer: mais il n'y eut guieres demeuré qu'vne tresbelle dame veſtue de ducil, & fort biē acompagnee de cheualiers & de damoyſelles, vint paſſer par là, & cognoiſſant par les habitz de dom Rogel, encores qu'ilz fuſſent tous deſchirez, qu'il eſtoit eſtranger, luy demanda qui l'auoit conduyt en ce lieu, qu'il queroit, qui il eſtoit, de quoy il ſe meſſoit, & ſ'il auoit point faute de choſe qui fuſt en ſa poiſſance. Madame (reſpondit dom Rogel) ie ſuis Cheualier natif de Grece, icy pouſſé par la tempeſte, n'ayant moindre beſoing de conſolation en mes infortunes, que de ſecours en mon indigence. Ie ne ſçay (diſt la Da-

me) ſi ie vous pourray aſſez bien conſoler en voz infortunes, mais ie vous aſſeure bien que l'indigēce ne vous cauſera aucun ennuy en ce miē royaume. Ainſi paſſa la belle & gracieuſe Royne, & cōmanda à vn ſien maiſtre d'hoſtel, prendre le Cheualier Grec en croupe, & incōtinent qu'il ſeroit arriué au logis, luy donner cheual, & armes, & tout ce qui luy pourroit eſtre neceſſaire pour l'entretenir en ſon premier honneur. Ce qui fut fait entieremēt: mais quelque gracieuſeté dont lon peult vſer enuers dom Rogel en la maiſon de la Royne, la douleur de ſe voir eſloigné de l'Infante Sidere luy donnoit tel ennuy, qu'il ne reſpoſoit nuyt ny iour, & ne ceſſa d'aller touſiours en empirant, iuſques à ce que la preſence d'vne nouuelle amye luy euſt fait oublier l'abſence de l'autre. Ce pendant il atendoit l'opportunité de ſon depart, ou de monſtrer ſa haute cheualerie en quelque vertueux acte: dont il eut bien toſt trouué l'oçaſiō telle qu'elle vous ſera deduyte, apres vous auoir premierement recité ce qui auint à dom Briāges, le quel nous auons laiſſé dans ſa tante ſur le riuage de la mer avecque les Infantes de Perſe.

Comme la Damoyſelle que dom Brianges auoit empeſchee de ſe noyer, luy deſroba ſon cheual & ſes armes: & de l'oçaſion qui le fit ſeparer des Infantes de Perſe pour aller en la cité de Gamal.

CHAP. LXXXIX.

LA maladie de l'Infāte Sidere, la mer tempeſtueuſe, & la perte de dō Rogel, furent oçaſion que le Prince de Beocie demeura pluſieurs iours dedās ſes tantes, en attendant le temps propre pour nauiguer, ou quelques bonnes nouuelles de ſon compagnon: car encores qu'il l'eũt veu tomber dedans l'eau, il ne pouuoit croire que Dieu tout poiſſant euſt voulu laiſſer vn ſi excellent perſonnage enſeuely

ensevely deffouz les ondes, sans autre plus honorable sepulture. Or vn soir que le Soleil commençoit desia à faire place aux tenebres de la nuit, en se promenant tout pensif autour de sa tante, il aperceut deux veneurs habillez assez estrange-ment, & tous effeminez de visage & de contenance, tellement qu'ilz ressembloient quelques vieilles matrosnes ainsi desguisees en hommes. Adonc pour leur impouruee arriuee le Prince se souuint de s'enquerir à eux en quelle terre il estoit, & dissimulant sa douleur, les salua, & leur dist, Je vous prie, mes bons amys, me dire comme s'appelle ceste contrée. Les veneurs luy ayans rendu fort gracieusement son salut, respondirent, Sachez, seigneur Cheualier, que vous estes en l'Isle de Canabee, dont vne tresbelle Dame nommee Florelle, est Roine, vous assurant que si vous l'allez trouver en sa cité de Gamal, elle vous fera tout le bon traitement qu'il luy sera possible, car elle a acoustumé de faire grand honneur aux Cheualiers errans, comme vous estes, & mesmement aux estrangers. Partant s'il vous plaist venir avecques nous (car nous sommes de sa maison) vous pouuez vous assurer de nostre promesse, & si nous ferez vn singulier plaisir, d'autant que vous pourriez par auanture consoler la Roine nostre maistresse du dueil qu'elle meine, pour la mort de son feu mary, qui est decedé il y a vn mois ou enuiron, & pour quelque autre defortune qui luy est encores aue- nu ces iours passez. Je vous remercie (dist dom Briages) car pour ce soir ie ne pour- rois abandonner ma compagnie: mais ie vous prie me dire quel est ce defortune de la Roine, & si en ce pais se trouuent quelques auantures, ou les hommes cou- rageux puissent esprouuer leur prouesse. Assez, assez (dirent les veneurs) pour- rez vous trouuer de rencontres en ces prochaines forestz: mais tout ainsi qu'el- les sont plaines d'vmbre & d'obscurité,

aussi les haultz faitz d'armes qui s'y font demeurent obscurs & sans aucune louan- ge: parquoy il seroit beaucoup meilleur de vous emploier en lieu ou vostre vertu- fust cogneue à tous, à fin que le peril & le trauail fussent suyuis de quelque bon- ne renommee. Et s'il vous plaist faire es- say de nostre vertu, nous vous dirons bien vne des plus belles & hasardeuses entre- prises que vous scauriez desirer: car si vo- stre hardiesse & puissance vous otroyent l'heur d'en venir au dessus, vous aurez re- medié à l'Infortune nouuellement aue- nu à nostre Roine, & si aurez gagné au- tant d'honneur qu'autre duquel nous ayons encores ouy parler. Alors dom Brianges conuoyleux de scauoir quelle auanture ce pouuoit estre, leur dist, Sur- mon Dieu, mes bons amys, ie serois fort ioyeux de pouuoir m'emploier en lieu ou ie fisse quelque agreable seruice à ma- dame Florelle vostre maistresse, & vous prie me raconter au long l'entreprise dõt vous parlez. Sachez donc, sire Cheualier (dirent les veneurs) que ceste Isle na- guieres estoit peuplee d'Amazones, fem- mes trefadextres à la guerre, mesme- ment à tirer de l'arc: & de leur temps n'e- stoit permis aux hommes de porter les armes en ceste Isle, ny d'administrer la iu- stice, ains ne s'entremesloient d'aucunes affaires, viuans oyfifz & paresseux sans auoir soucy de chose quelconque, sinon de se tiffer & mignarder cōme plusieurs d'entre nous font encores maintenant. Or telle coustume à duré iusques à ce que Zahara Roine de Caucafe, eut mandé que lon luy enuoyast iusques à quinze mille femmes archieres, pour secourir A- bra Roine de Babilone à l'encontre de Lisuart de Grece, & de l'Imperatrix Axia- ne, lors que la guerre fut menee si cruel- le d'vne part & d'autre deuant Trebison- de. Car alors tant de femmes allerent au mandement de Zahara, que les hommes demurerent presque seulz, tellement qu'ilz entreprendrent d'vsurper le gou- uer-

uernement des villes & le maniment des affaires, selon la coustume des autres regions. A raison dequoy il y eut quelques legieres escarmouches dressées entre les hommes, pour se mettre en plaine liberté, & entre les femmes, pour conseruer leur ancienne préeminence. Mais ce discord dura bien peu: car toute la guerre fut incontinct apaisée, au moyen de l'amour que Filogene capitaine des hommes, & Andragathe, lors Royne des femmes, & mere de nostre maistresse, se portoient l'un à l'autre, de sorte que leur mariage moyenna vne ferme & stable concorde, avecque condition que les hommes & les femmes domineroient egalemēt en tout & par tout, excepté que les enfans masles n'heriteroiēt point au Royaume, ains seulement les filles, qui feroient leurs marys Roys si bon leur sembloit de se marier: & au surplus demeurerent en leur entier toutes les anciennes loix de l'Isle, entre lesquelles y en a vne qui commande que tout homme lequel aura eu la compagnie d'une femme, non estant son espouse, encores qu'elle fust consentante au fait, soit ietté dedans les vifues flammes pour le chastiment de sa temerité, & punition de son offense. Or le malheur a voulu que le frere de la Royne Florelle, ayt esté aculé ces iours passez d'auoir forfait cōtre ceste loy, par vne Damoysselle Geante nommée Larmelle, laquelle avecque trois autres Geans de sa paranté, à entrepris le combat sur ceste querelle, contre les quatre qui oseroient defendre le iouuenceau Royal. Et par ce qu'il est tant beau, & de si bonne grace qu'il est impossible de plus, la Royne sa sœur l'ayme comme sa propre ame, car c'estoit toute sa consolation apres auoir perdu Neophone son mary. A raison dequoy elle a fait publier que si dedans le quinziésme de ce moys, il se trouue quelques personnages qui estaignent la calumnie imposée à son frere, elle leur donnera recom-

pense condigne à leur merite, & promet à celui qui entre tous aura le mieux fait son deuoir, de le tenir avec elle comme Roy, & luy donner la mesme puissance, excepté seulement le mariage, d'autant que pour lamour de son feu mary, elle ne pourroit auoir le cueur d'experimenter les secondes nopces: Et s'il ne se trouue personne qui preigne le combat pour son miserable frere, qu'elle obeira à la rigueur de ses loix, & s'essayera à prendre ses malheurs en patience. Voylà sire Cheualier vne entreprise digne d'eternelle gloire, & s'il vous plaist vous y trouuer vous voyez d'icy le donion du Palays: mais par ce que le chemin est tortueux il, vous fault prendre vostre chemin l'orée de ceste prochaine forest, car estant sur la petite combe que voila, vous commencerez à descouurir les murs de la cité de Gamal, en la grand' place de laquelle vous pourrez pour le moins voir la iustice qui se fera du miserable iouuenceau, si son innocence, & l'ordre de cheualerie ne vous peuuent esmouuoir à faire d'auantage pour luy. A tant les veneurs se teurent & commençoient à s'en aller, mais dom Brianges tout esbahy de la nouveauté du fait les suyuit assez loing, & demeura aucunement pensif en soy puis dist en grand' colere, Maudites soiēt les malheureuses creatures qui ont peu inuenter si malheureuses loix: & fault-il donc qu'un iouuenceau pour auoir donné plaisir à vne Dame, en reçoie la mort pour recompense? Soit vray, ou non que le frere de vostre Royne ayt fait ce, dont il est accusé, ie ne m'en soucie point, & ne veux asseurer ny l'un ny l'autre: car ne sachant la verité, ie pourrois prendre querelle pour vne mensonge: mais tant y a que ie maintiendray contre tous, que vn tel acte ne merite vne si cruelle mort, & que ceux furent iniustes, ou hors de leur sens, qui establirent telle loy: partant, qu'elle se doit reuocquer comme inicque, ou corriger de sorte que elle

qu'elle ne soit point du tout à l'auantage des vns, & à l'entiere ruine des autres. Si vne pareille ardeur, si vn mesme desir, si vne semblable affection, enflamment en amour les femmes & les hommes, pourquoy est-ce que lon defendra l'un aux hommes, & qu'on le permettra aux femmes? C'est vnè folie manifeste, & vous assure, mes amis, que telle iniustice ne deuoit point estre enduree si long temps, & m'essayeray demain fusse-je seul contre les quatre, à faire abolir celle malheureuse coustume. Telles & plusieurs autres paroles dit dō Brianges, selon que la collere luy commandoit, & les veneurs consentans à son dire luy donnerent le bon soir pour retourner à la maison de leur maistresse, tres-joyeux de lui porter ces bōnes nouvelles. Mais sachez que la Damoysele qui s'estoit iettée dans la mer, & à qui tout ce faict touchoit de pres, auoit fort ententifuelement escouté les paroles des veneurs, mais non la respōse du Prince, d'autant qu'il estoit trop loing de la tante. A raison dequoy ne pēsant que luy seul oīst entreprendre le combat contre quatre, elle se leua sur la minuyt tandis que lui & les Infantes reposoyēt d'un profond sommeil, & s'en vint tout bellement dans le paillon ou estoient les armes & le destrier de dom Briāges, puis s'estant armee au mieux qu'il lui fut possible, mōta à cheual sans rien oublier des armes du Prince, sinon l'espee par-ce que la sienne luy sembloit meilleure. Ainsi s'en alla en grande silence, tellement que l'on ne s'en aperceut iusques au lēdemain matin, que dom Briāges se voulut armer pour aller secourir le frere de la Royne: mais ne trouuant point ses armes, ny la Damoysele, il pensa incontinent qu'elle les luy auoit desrobees, & se souuint des tours du Fraudeur des ruses. A l'ocasion dequoy il delibera prendre vn des cheuaux des Infantes, & son espee seulemēt esperant trouuer tout ce qui luy seroit

necessaire dans la cité de Gamal. Toutes fois auant que partir il alla visiter l'Infante Sidere laquelle il trouua en assez bonne disposition, si la douleur luy eust donné quelque relasche, & la consolant au mieux qu'il luy estoit possible, luy de manda comme elle se portoit Helās mō sieur (respondit elle) ie me trouue beaucoup mieux que ie ne voudrois, car les Dieux me font grand tort qu'ilz ne me laissent mourir, veu que ie n'ay plus aucune ocaſion de viure. Ayez bō courage (dit dom Brianges) car ie ne puis croire que mō cousin dom Rogel ne soit en vie veu le bon-heur qui à tousiours acoustumé de l'acōpagner. Je vous croyrois (dist l'infante) si i'ōis adiouter quelquefoÿ à ce que i'ay songé ceste nuyt: car il m'estoit auis que ie le voyois dedans vn bel arbre, auquel y auoit vn beau fruyt, sans qu'il eust aucun soucy d'en gouster: toutesfois finablement il s'en est aproché & en a gousté plusieurs fois, puis est descendu de l'arbre pour retourner vers moy, & lors ma semblé que le beau fruyt estoit tombé en terre tout flectri. Cest arbre (dit dom Briāges) auquel vous l'auiez veu est quelque petit vaisseau qu'il aura rencontré pour se sauuer, ioint que souuentefois ie l'ay veu nager autant bien, que lō ſçauroit croire. A tant dō Brianges print congé de l'Infante, luy promettant d'estre de retour sur le soir sans dire autrement sa deliberation.

Comme dom Brianges de Beocie sauua la vie à vn ieune Damoyseau que deux trahistres vouloient mettre à mort, & de ce qui en auint.

CHAP. XC.

LE Prince de Beocie arriuant aupres de la forest que les veneurs luy auoyēt enseignee, trouua vn paſſant mōté sur vn cheual, auquel il s'enquit de sō chemin pour aller à la ville de Gamal.

S'il

S'il vous plaist y venir (dist le païsant) ie vous seruirai de guide, car ie sçay tous les sentiers & adresses, & vous acourciray le chemin de la moytié pour le moins. Ce me sera vn grand plaisir, dist dom Brianges. Suyuez moy donc, dist le païsant, adonc il entra dans la forest, mais le Prince ne l'eut guieres suyui qu'il ouyt vne voix fort piteuse criant à l'aide: au moyé de quoy luy & le païsant tirerent celle part ou ilz entendoient le bruyt, & tantost apres arriuerent entre deux petites collines, ou la forest estoit fort espoisse & umbrageuse, & là aperceurent vn iouuenceau aagé de dixsept ou dixhuit ans que deux Cheualiers auoient lyé contre vn arbre, & se preparoient pour luy trancher la teste. Le pauvre ne sçauoit que faire autre chose sinon plorer à tendres larmes pour les esmouuoir à pitié: mais si tost que dom Brianges l'aperceut en tel estat il leur cria à haute voix, Tout beau, tout beau, trahistres paillards, laissez ce gētilhomme si vous ne voulez promptement perdre la vie. Nous le laisserons (dirent les deux) mais ie croy que tu n'y profiteras guieres. Et ce disans vindrent contre luy, & lui contre eux encores qu'il n'eust autres armes que son espee, & le manteau autour du bras: mais ce pendant qu'il s'aprochoit, le païsant qui estoit caché derriere vn buysson ataignit l'vn des deux Cheualiers si viuement, d'vn coup de caillou, qu'il le renuersa tout estourdy cul sus teste, & presque en mesme instant le Prince ayant choisi l'autre à son auantage, lui tailla le genou dans la jointure & le fit trebucher de son cheual en bas: & aiant appellé le païsant mirent tous deux pié à terre, & desarmerent les deux trahistres, puis les lierent & garroterent bon gré maugré des mesmes cordages qu'ilz auoient lyé le iouuenceau. Et parce que le cheual de l'vn des Cheualiers estoit puissant, & de bonne taille, dom Brianges monta dessus, & s'arma assez proprement des armes qu'il auoit nou-

uellement recouuertes. Adonc retournerent ensemblément à leur chemin encores que les deux prisonniers en fissent difficulté: & dom Brianges voyant le iouuenceau qu'il auoit deliuré, de bonne grace, & beau en toute perfection encores qu'il fust aucunement estonné de la crainte qu'il auoit eue de mourir, luy demanda à quelle ocacion ces deux trahistres le vouloient ainsi tuer, & quel desastre l'auoit fait tomber en leur puissance. A quoy le ieune Damoyseau respondit, Helas s'il vous plaist m'escouter, vous entendrez bien vne des plus barbares cruantez que vous ayez encores iamais ouye, car tout ainsi que c'est vne chose cōmune de pourchasser mal à son ennemy, aussi est-ce felonnie trop execrable de vouloir oster la vie à celuy duquel on n'a receu que tout plaisir & seruice. Sachez donc, sire Cheualier, que pour l'ancienne noblesse de ma parenté, ie fu receu enfant d'honneur, des l'age de dix ans, en la maison du prince Bruzanges frere de la royne Florelle, ou ie pouuois estre l'vne des plus heureuses personnes du monde, si l'amour qui portoit enuie à ma felicité, ne m'eust reduit au nombre de ses subgetz, me faisant aimer entre toutes les Dames de la cour, la duchesse Polinecque qui me mōstroit vn fort gracieux semblant, & m'otroyoit toutes les faueurs qu'vn ieune amoureux pouuoit desirer de son amy. Helas! on peut bien voir le ioyeux maintien d'vn riant visage, & onyr la douceur des parolles emmiellees, mais il est fort malaylé à cognoistre ce qu'vne femme cauteleuse tient recelé dans son courage. Ainsi Polinecque déguisant son impudicité souz le prétexte d'vn extreme amour, me fit par l'espace de demi an iouir du comble de mes desirs, & m'en alloys presque toutes les nuytz en sa chambre, ou elle me faisoit monter par vne fenestre qui regardoit sur son iardin, duquel expressément elle m'auoit donné vne clef,

pour

pour auoir meilleure commodité de l'aller voir: à raison dequoy ie fu tellement enflammé de son amour, & tant auéglé de mes desirs, qu'il me fut impossible d'apercevoir qu'elle faignoit beaucoup, & aymoit bien peu, encores que ie deusse cognoistre son faulx semblant, & son mauuais courage à mille manieres de faire, ou elle descouuroit à l'œil son inconstance, & peu d'affection enuers moy. Or depuis peu de temps, elle faignit estre nouvellement amoureuse du Prince Bruzanges mon Seigneur & maistre, & ne sçay si elle auoit commence à l'aymer deuant moy, ou apres: mais tant y a qu'elle fut si arrogante en mon endroit, & se pensa auoit telle domination sur mon cuer, qu'elle se descourrit à moy: & n'eut point de hôte, l'effrontee, de me demander ayde pour luy moyenner la iouissance de ses nouvelles amours: me disant toutesfois qu'elles n'estoyent en rien pareilles à l'amitié qu'elle me portoit, & que ce qu'elle en faisoit n'estoit sinon à fin obtenir par ses dissimulations le frere de la royne en mariage: ce qui lui sembloit chose assez facile, par-ce qu'en tout ce Royaume il n'y auoit Dame qui fut plus excellente qu'elle en richesse, beauté, & ancienneté de lignage, si ce n'estoit la Royne mesmes. Et pour mieux m'induire à luy obeir, elle adioustoit à ses prieres mille promesses, disant que si ie pouuois la faire venir à chef de son entreprise, iamais iour de ma vie ne se passeroit sans experimenter sa liberalité, m'octroyant telle recompense, que ie la luy voudrois demander. Moy qui n'estois intentif sinon à luy satisfaire, & qui ne mesurois mon contentement que par le sien, ne sceu oncq luy contredire, ains m'essayay par tous moyens à rendre mon Seigneur Bruzanges amoureux de mon amoureuse: ce que toutesfois pour chose que ie luy peusse dire à la louange de mon amy, ie ne sceu iamais obtenir: par ce que d'assez long temps il aymoit vne

belle Damoyse de Sarmatie, nommee Arfleure, qui estoit venue avecque vne sienne seur au seruice de la Royne Florelle: & estoient ces deux seurs autant bien accomplies au fait des armes, come parfaites en toute excellence de beauté. A raison dequoy la Royne ayma tellement Arfleure, qu'elle l'enleua en richesses & grandeur d'estatz, iusques à l'esgal des plus grands Seigneurs de ce Royaume: mais si elle estoit aymee de la Royne ce n'estoit rien à comparaison de l'amour que luy portoit le Prince Bruzanges, lequel estoit semblablement assez auerty & assure de l'extreme amour de la belle Arfleure: car elle estoit tellement enflammee de luy en tout honneur de mariage, qu'elle ne pouuoit reposer le iour sans le tenir deuant ses yeux, ny la nuyt sans l'auoir continuellement en sa pensée. Ceste extremité d'amour, autant grande qu'il seroit possible de penser entre deux amans, fut cause que ie fusse mal ouy de mon Seigneur & maistre: car iamais il ne me donna aucune réponse par laquelle la miserable Polinecque peust concevoir tant soit peu d'esperance, pour paruenir à ce ou elle pretendoit, ains d'autant plus que ie la louois, & recommandois au Prince Bruzanges, d'autant plus il la depressoit & haïssoit iusques à me deffendre assez rigoureusement de iamais ne lui parler d'elle iour de ma vie si ie ne voulois encourir sa male grace. Ayant ainsi fait pour mon amy beaucoup plus que le deuoir ne me commandoit, & voyant que ie n'auois aucun autre moyen pour luy complaire, ie la consolay souuentefois en ses passions, & l'amonestay de laisser celle entreprise: à fin de mieux luy donner à cognoistre qu'elle s'y employoit en vain, ie luy descouury entierement l'amour que mon Seigneur portoit à la belle Arfleure, & lui remonstray que son affection estoit si grande enuers elle, que toute l'eau de la mer n'eust suffy pour estaindre la moindre

dre estincelle de son ardeur. Apres que Polinecque eut ouy souuentefois mes remontrances, & cogneu la pure verité de mes propos au peu de conte que le Prince Bruzanges faisoit de ses messages, & d'elle mesmes: elle ne despouilla seulement la premiere affection qu'elle sembloit luy porter, ains la couuertit en vn cruel desir de vengeance & aspre felonnie, tant elle estoit despitée & enflammée de hayne, pour auoir veu vne estrangere gaigner la preeminence sur elle. Et pour mieux mettre sa rancune à execution, elle delibera de braffer telle inimitié entre la belle Arfleure & son amant, & de semer tant de discordes, de noyses, & de querellets entr'eux, qu'il seroit impossible de iamais les rapaiser, ny reconcilier ensemble: & d'auantage se proposa de mettre le Prince Bruzanges en tel desroy, qu'elle luy feroit perdre l'honneur avecque la vie, sans toutesfois iamais parler de sa deliberation avecque moy, ny avecque aucun autre, sinon avecque elle mesme. Ayant tandu ces lacs & préparé tous les aguerz qui luy sembloient necessaires pour venir à chef de sa trahison, vn iour entre les autres elle me dit. Anurge mon amy (car mon nom est tel) sachez que tout ainsi comme l'arbre à tousiours acoustumé de renaistre de sa racine, encores qu'on l'ayt coupé trois & quatre foys, aussi l'opiniastreté malheureuse de mes amours (encores qu'elle ayt assez de foys esté retranchée par les euenemens contraires à mon vouloir) ne cesse de renaistre en moy de heure en heure, & est force que ie m'effaye à paruenir en quelque sorte que ce soit, à la iouissance que i'en desire combien que mes desirs ne tendent point tât au plaisir qui y pourroit estre, comme au contentement que i'en espere receuoir par l'experience. Et par-ce que ie ne puis aucunement iouyr de mes amours par effet, i'ay proposé d'en iouyr par imagination: car quelque fois vne mensonge

bien deguisee, donne autant de plaisir comme la propre verité. Parquoy ie vous prie que deormais quand vous me viendrez voir, vous attendiez que dom Bruzanges vostre maistre soit couché, & lors vous vestirez de ses accoustremens, & vous essayerez à le ressembler à vostre possible, en gestes, en paroles, & en maniere de faire: & quand à moy en vous receuant par la fenestre de mon iardin, ie m'imagineray que vous soyez celuy duquel vous aurez l'habillement, de sorte qu'en me trompant ainsi moy-mesme, ie donneray parauanture quelque soulas à ma langueur. Ainsi me dit Polinecque, & par-ce que ie ne me doutois de rien, ie ne m'auisay de la malheureuse trahison, qu'elle machinoit par telles ruses, à raison dequoy ie luy obeï, & l'allay trouuer ainsi habillée comme dom Bruzanges, sans m'apercevoir de la tromperie, que tout le mal-heur & le dommage qui en deuoyent sortir, ne fussent desia auenuz. Or deuez vous sçauoir, Seigneur cheualier, que quelques iours au parauant, la duchesse Polinecque alla trouuer Arfleure en son logis, car elle estoit sa voyfine, & auoyent grande familiarité ensemble, ce qui fut occasion à la Duchesse de dire hardiment à la belle Arfleure telles ou semblables paroles.

Des propos que la Duchesse Polinecque, & la belle Arfleure eurent ensemblement sur la querelle de leurs Amours, & de la trahison que Polinecque machina pour se venger du Prince dom Bruzanges.

CHAP. XCI.

VRayement ma voyfine (dit Polinecque ie suis esmerueillée veu que ie vous ay tousiours aimée & prisee sur toutes mes cōpagnes, cōme maintenant vous m'en recōpensez si mal. Vous sçanez bien l'anciēne amitié qu'est entre moy & le prince dō Bruzanges, & qu'un de

de ces iours ie le doy demander à la Royne pour mary, pourqoy me troublez vo⁹ en mon entreprinse? qui vous meut à perdre ainsi vostre temps à la vaine poursuyte d'un amour, ou il vous est impossible d'ataindre? par les Dieux immortelz vous deuriez auoir egard à ma grandeur, & vous assure que ie ne voudroys point tant entreprendre sur vous, si vo⁹ estiez en tel degré comme ie suis, & que ie fusse en celuy ou vous estes, Adonc Arfleure luy respondit, Si vous estes esmerueillée de moy, ma dame la Duchesse, ie suis encores beaucoup plus esmerueillée de vous, & des propos que me tenez: car vous ne pouuez nyer que deuant vous ie n'aye aymé le Prince dom Bruzanges, plus pour l'amour qu'il m'a porté reciproquement, que pour sa beauté & bonne grace, encores quelles soient grandes en luy. Si vous dites que ie deurois auoir egard à vostre grandeur, aussi deuriez vous auoir egard à l'amitié qui parcy deuant a esté entre nous, & si ie suis parauanture moindre en biens que vous n'estes, si est-ce que ie ne m'estime point moins digne d'espouser le Prince dom Bruzanges que vous: Je ne suis moins en la grace de la Royne que vous pourriez estre, mais ie suis bié assurée, que le Prince son frere m'ayme sans comparaison beaucoup plus que vous. O Dieux (dist la Duchesse) combien est vaine l'opinion que la folie de l'amour vous a persuadée! vous pensez estre la plus aymée, & ie croy le semblable: mais l'experience peut descouurer la verité du tout: Je iureray par noz Dieux de ne descouurer vostre secret: & vo⁹ iurerez aussi de ne descouurer point le mien puis vous me direz quelle assurance vous auez de l'amour du Prince dom Bruzanges, & ie vous diray par reillemét quelles faueurs ie reçoÿ de luy & lors celle de nous deux qui sera la moins fauorisee, quitera la victoire à sa compagne, & se pouruoyra en autre part si bon luy semble. Ces conditions furent

trouuées fort raisonnables, au moyen dequoy apres auoir iuré d'une part & d'autre de ne rien deceler de leur secret, Arfleure commença la premiere, & recita l'extreme amour que le Prince luy portoit, & que souuent il luy auoit iuré de bouche, & promis par lettres de iamais ne prendre autre espouse qu'elle, & ou la Royne sa sœur, ou ses prochains parens luy en voudroient faire espouser d'autre qu'il leur contrediroit entierement. Partant Arfleure se disoit la plus fauorisee veu que sa chasteté empeschoit les plus grandes faueurs, & que leurs loix les defendoient avec grande rigueur, & si estoit impossible que le Prince eust peu faire telles promesses à deux ensemblement. Apres qu'elle eut ainsi discouru au vray combien elle auoit part en la bonne grace de son amy, Polinecque qui ne tédloit qu'à executer sa malice, luy dit en souzriât, O pauvre damoyelle, vrayemét ie vous feray cōfesser par vostre propre bouche, combien i'ay d'auantage sur vo⁹ en cest endroit & si cognoisttez par mesme moyē que le prince Bruzāges n'vse enuers vous que de dissimulatiōs & qu'il ne vous ayme, ny estime en aucune maniere, ains vous paist seulement de vaines paroles, & de friuolles esperances, & de fait quand nous deuison ensemblemēt, il ne cesse de se gaudir des mines amoureuses que vous luy monstrez, & encores qu'il vous face beau semblant en public, si est ce qu'il se mocque de vous en secret, & fait Par tout les contes de voz amours comme les imputāt à vne temeraire folie. Certainement l'assurance que i'ay de son affection, est bien fondée sur vn autre essay, que sur des fornettes: & souz le sermēt que vous auez fait de taire ce que ie vous diray, ie suis contēte de vous faire le discours du tout, encores qu'il me seroit parauanture mieux seant de n'en dire rien. Sachez donc qu'outre les promesses que vous vous dites auoir, lesquelles i'ay aussi bien comme vous, il ne se

paſſe moy, que le Prince dom Bruzanges ne veigne de trois nuytz l'une pour le moins, me viſiter en ma chambre, & coucher avec moy pour eſtancher l'ardeur dont il eſt embrasé pour mon amour. Regardez maintenāt ſi les gaberies que vous avez alleguees ſont pareilles à ceſte faueur, & puis que j'ay vn ſi grād heur par deſſus vous, quitez moy la victoire ſelon les conuenāces q̄ no^s auōs faites. A ces paroles Arfleure enflāmee de collere lui diſt, Vous avez menty de tout ce que vous dites, & quand la couſtume de manjer les armes ſeroit en vous, auſſi bien cōme en moy, ie vous promes que des maintenant ceſte eſpee me donneroit la vengeance de voz menſonges. Toutesfois cherchez qui maintiegne voſtre querelle, car autrement ie ſuis deliberee de vous faire punir publicquement d'vn tel blapheme, veu que vous ne pouuez dire verité en ce que vous dites, que par meſme moien vous ne faciez le beau prince Bruzanges coupable d'vn crime de mort, d'autant que vous n'eſtes point ſa femme. Tout beau, tout beau (diſt la Duchefſe) il ne fault point que vous entreprengiez le cōbat contre ce que ie m'offre vous monſtrer eſtre vray toutesfois & quantes qu'il vous plaira le voir. Alors Arfleure ſurpriſe d'vne froide crainte, & palliſſante d'extreme douleur, luy diſt d'vne voix tremblante & mal aſſeuree, Quand vous me ferez voir ce que vous dites, ie le croiray, & abandonneray la pourſuyte de celui qui aura eſté ſi prodigue de ſoy-meſmes en voſtre endroit. Ie vous le feray voir de voz propres yeux (diſt la Duchefſe) quād ce viendra à tēps & ainſi ſ'en alla ſans tenir autre propos. Or la deuxieſme ou troiſieſme nuyt enſuyuante, il fut acordé entre elle & moy que ie l'irois voir en l'habit de monſigneur & maiſtre: & pour commencer à mettre ſa trahiſon en eſſet, elle manda à la belle Arfleure que ſur les dix heures du ſoir, elle vint dans ſon jardin, duquel

on luy ouuriroit la porte, & que là elle ſe muſſaſt en vne petite coudraye pour voir à l'œil la verité de ce qui premiere-ment luy auoit eſté dit. Mais Arfleure ſe ſouſpōnant qu'elle la vouluſt faire tuer ſouz telle fainte, par-ce que la choſe qu'on luy vouloit monſtrer lui ſembloit impossible, ſe delibera d'y aller en tel équipage qu'eſant aſſaillie elle peult auoir le moyen de ſe deffendre. Or auoir elle vne ſœur preſque Geante nommee Larmelle, la plus renommee aux armes dont on euſt encores ouy parler entre les Amozones: à raiſon de quoy Arfleure ſe tenoit plus aſſeuree en ſa compagnie que ſi elle euſt eu dix Cheualiers pour ſa deffence. L'ayant donc apellee avecque ſoy, & luy ayant fait prendre ſes armes, ſās toutesfois luy dire rien de ſon ſecret, elle la mena dans le iardin dōt elles trouuerent la porte ouuerte, & la fermāt ſur elles ſ'allerent muſſer dās la cōudraie, ou Arfleure fit retirer ſa ſœur aſſez loing l'a-uertiffant de la ſecourir ſi elle l'oyoit crier, & de ne ſe bouger en façon du mōde ſi elle n'entendoit premiere-ment ſon cry Bien toſt apres ne ſachant rien de la trahiſon ie prins vn manteau de damas blanc, dont les bords eſtoient enrichis de fins diamās ordonnez en œuvre par grāde industrie: & prins ſur ma teſte vn turban verd, violé de retz faitz de fil d'or & d'argent, avecque vn hault panache iaune: car tel eſtoit l'habit que le Prince mon maiſtre portoit le plus ſouuent, & autre que luy n'auoit le pareil en toute ceſte Iſle. Penſant par ceſt acouſtrement ſatisfaire au deſir de la Duchefſe, ie vins ouurir le iardin, & le tra-uerſay: mais ſachez que ce pendant Larmelle qui craignoit eſtre trop eſloignee de ſa ſœur pour la ſecourir au beſoing, ſ'aprocha tout bellement ſi pres d'elle que facilement elle peut voir comme la duchefſe Polinecque me coula vne petite eſchelle, par laquelle j'auois acouſtūmé de monter à la prochaine fenestre

fire, & me voyant aux raiz de la lune habillé de mesme façon que le Prince Bruzanges, & n'estant de stature, de grosseur, ny de visage, trop mal semblable à celui que ie m'efforçois ressembler, il fut facile aux deux sœurs cachees dans le bocage de prendre vn personnage pour l'autre, & croire que le seruiteur fust le maistre. Si tost que ie fus monté, la Duchesse ne me donna à peine le loisir de retirer l'eschelle apres moy ains commença à m'embrasser, acoller, & caresser sur la croisee de la fenestre, beaucoup plus affectueusement qu'elle n'auoit accoustumé, aydant à sa trôperie au mieux qu'elle pouuoit, à fin de faire que la mesonge fust estimee verité. Mais si mon amye me faisoit vn tant gratieux traitement, sachez q'ie m'efforçois à n'oublier aucun des signes d'amour, dont vn ieune iouuëceau peut complaire à sa Dame, & en telles caresses nous maintinsmes estans tousiours apuyez contre la croisee de la fenestre, iusques à ce que l'ardeur du plaisir amoureux nous contraignit elle & moy de nous retirer dans le lit. Maintenant ie vous laisse à penser, si celle qui estoit mussée dans la coudraye, & auoit veu tous noz embrassemens fut enflammée de douleur, & de ialousie. Elle entra en telle rage, & retint si peu de raison, qu'elle se delibera mourir sur le champ, & de fait ayant desgainé l'espee qui luy pèdoit en escharpé, elle mit le pommeau contre terre, & s'apuya de l'estomac sur la pointe, preste à s'enfermer de toute sa force, si sa sœur Larmelle qui auoit veu le tout, ne l'eust destournée pour lors de ce cruel acte, la reprenant aigrement de sa folie. Mais encores qu'elle eust empesché l'effect, si ne peut elle faire que l'intention de sa sœur ne demeurast tousiours pareille, combien qu'elle déguist ces mortelles angoisses au mieux qu'il luy estoit possible. Ainsi s'en alla du iardin la belle Arfleure tant troublee en son esprit, que la mort presente luy eust

esté beaucoup plus agreable qu'vne plus longue vie, comme elle tesmoigna assez le lendemain au matin: car sans dire mot à sa sœur ny à autre quelconque, elle departit secretement, n'ayant autre guyde ny compagnie, que le seul desespoir, & la constante volonté de mourir, de sorte que personne, outre la Duchesse & sa sœur Larmelle, ne peurét sçauoir l'occasion de son depart, combien qu'en la maison de la Royne on ne parlast presque d'autre chose que de son absence. Or quel que tēps apres vn passant vint à la cour, & dist à dom Bruzanges qu'Arfleure s'estoit noyée volontairement dans la mer: Et sachez (disoit le passant) que m'ayant par fortune rencontré en son chemin auant que d'executer sa deliberation, elle me pria aller avec elle, à fin de voir l'ysuë de la douleur en laquelle vous l'auiez reduite, & qu'aiāt veu ce qu'elle feroit, ie vous vinsse dire que ce malheur lui estoit causé pour auoir trop veu: & qu'elle eust esté tres-heureuse si iamais iour de sa vie ses yeux n'eussent fait leur office, d'autant qu'ilz luy estoient occasion de mourir. Ainsi qu'elle acheuoit son propos nous estions sur la coste de Capdebois, & ne me donnay garde qu'elle se ietta du hault de la roche dedās la mer: à raison dequoy tout éperdu de son mechef, ie vous suis venu dire le plus-tost qu'il m'a esté possible, ce qu'elle m'auoit commandé par ces dernières paroles. A ses mortz le triste dom Bruzanges demeura à demy mort, & se retirant en son logis, commença à faire ses plaintes & doléances fort pitoyables, resongeāt à part luy tout ce qui iamais luy estoit auenu en sa vie, pour sçauoir s'il auoit fait chose qui aiāt esté veuë de sa Dame, lui eust peu donner occasion de mourir: car il auoit tousiours ces dernières paroles en sa pensée, que son malheur lui estoit causé pour auoir trop veu. Ce pendant la renommee courut que la belle Arfleure s'estoit elle mesmes donné la mort pour

mettre fin à sa douleur : dont la Royne & toutes les Dames & Gentilz-hommes de la cour furent beaucoup dolens : mais par dessus toutes s'en monstra déplaisante la forte Larmelle, car peu s'en fallut qu'à l'exemple de sa sœur, elle ne tournast son espee contre elle mesmes, & apres auoir long temps pensé & repensé que dom Bruzanges par sa desloyauté estoit l'ocasion de la mort d'Arfleure, il luy prit telle enuie de s'en venger, que de là en auant elle ne se soucia de perdre la bonne grace de la Royne, voire d'encourir sa haine, moyennant que son desir de vengeance fust executé. Parquoy apres auoir parlementé de sa deliberation avecques trois forts Geans, ses proches parens, comme lon dit, elle vint en leur compagnie deuant la royne Florelle, alors qu'elle estoit le mieux a compagnie, & luy dist tout hault, & en presence de tous, Sachez, ma Dame, que Bruzanges vostre frere par sa desloyauté & inconstance, a esté ocasion que ma sœur se soit volontairement offerte à la mort : car elle l'aymoit, & ne le veut celer, par-ce que son amour estoit chaste & honneste : mais Bruzanges transgressant le droit de sa promesse, violant noz saintes loix, & méprisant l'honesteté en luy requise, n'a eu honte de se joindre charnellement à vne autre qu'à son espouse, & lors elle recita tout ce que ie vous ay dit cy deuant puis continua son defy en ceste sorte, Parquoy, madame, ie suis presté & mes trois cousins icy presens, de maintenir contre quatre autres les armes au poing, ce q' i'affirme de paroles, & dy que dom Bruzanges doit estre bruslé vif, tât pour auoir esté ocasion de la mort de ma sœur, que pour auoir impudiquement eu compagnie avec vne autre que son espouse. Ainsi noz loix le comandēt, Ainsi nous l'auons tousiours obserué, ainsi ie suis presté à le maintenir, Et vous & vostre conseil comme Iuges droituriers le deuez ainsi ordonner. Ain-

si parla Larmelle à la Royne, laquelle fort contristee de ce piteux accident, luy respondit qu'elle vouloit faire garder les loix de l'Isle contre soy mesmes, & contre son frere propre, à fin de donner exemple à chacun de ne les auoir en mespris : & veu que noz loix condemnoient à estre bruslé vif celuy qui auroit eu la cōpagnie d'autre que de la femme qu'elle n'empeschoit la rigueur de la loy estre executée contre son frere, si dans certain temps par elle prefix il ne se trouuoit qui maintint son bon droit, & le purgeast du forfait à luy imposé. La Royne ayant fait sa responce, fit apeller son frere, lequel n'ya l'acusation, & dist qu'il estoit innocent du tout, neantmoins par l'ordonnance du conseil on le mena prisonnier en vne tour du Palais, ou la Roine sa sœur l'alla voir de rechef fort dolente de son infortune, & apres auoir fait promettre par toute l'Isle maints beaux dons à ceux qui deliureroient son frere de ce peril, elle s'auisa encores de faire mettre tous les seruiteurs de son frere en prison, pour mieux s'enquerir de la verité du fait, & par qui telle menee pourroit auoir esté conduite : car elle croyoit asseurement que l'acusation estoit faulse & mensongiere. A raison dequoy preuoyant l'inconuenient qui pouoit auenir à la duchesse Polinecque, & à moy, ie trouuay le moyē de m'euaider de nuyt, & me retiray vers elle, remonstrant combien il luy importoit que ie ne fusse pris avec les autres. Elle loua fort mon bon vouloir, & me dist que pour estre mieux en assurance, elle m'enuoyroit le lendemain acompagné de deux Cheualiers à vne sienne fortteresse qui est icy pres. Or auez vous ouy seigneur Cheualier combien de foys i'auois monstré à Polinecque ma bonne affection, & de combien elle m'estoit redeuable : Maintenant ie vous prie voir quel guerdon elle m'auoit apareillé pour recompense de mon traual. La trahistresse cōmença à se
soup-

soupçonner de moy, & eut crainte qu'à la longue sa meschanceté ne fust manifestée par mon moyen: Parquoy fignant me vouloir faire absenter iusques à ce que les choses fussent aucunement rapaisées, elle dist qu'il me falloit retirer ce pendant en vne sienne forteresse & fignant m'y faire conduire, elle me faisoit conduire à la mort, car ces deux Cheualiers qu'elle m'auoit donné pour compagnie, auoient charge de m'occire: ce qu'ilz eussent fait si vous ne fussiez acouru à mon secours.

Comme le Prince de Beocie arriva en la cité de Gamal, ou il descouurit les trahisons de Polinecque à la royne Florelle, & fit cesser le combat entrepris sur la mort du Prince dom Bruzanges.

CHAP. XCII.

Ainsi parla tout vn long temps le iouuenceau Anurge au Prince de Béocie, lequel fut fort ioyeux de sçauoir ces nouvelles, car s'il auoit deliberé de deffendre le frere de la Roine encores que l'accusation fust veritable, lon peut pèser qu'il entreprit beaucoup plus courageusement le combat, voiant la calumnie manifeste. Toutesfois pour s'en asseurer d'auantage, il demâda aux deux cheualiers qu'il emmenoit si ce qu'auoit dict le iouuenceau estoit vrai: & ilz lui respondirent qu'oui, mais que de leur part il n'y auoit aucune offese, par-ce que Polinecque les eust fait mourir s'ilz n'eussent obeï à son commandement, & qu'ilz n'auoient rien fait que par contrainte. Oseriez-vous dire celà deuant elle? dist dô Bruzanges. A peine (respondirent ilz) car sa seule presence nous estonne. Pourquoi, dist le Prince, il ne fault point craindre de dire la verité, car si vous voulez maintenir en presence de tous ce q vous dites à moy seul, ie vous assure de la duchesse Polinecque, & si prometz vous

sauuer la vie, laquelle vous meritez perdre pour auoir voulu trahistrement tuer ce ieune iouuenceau. Nous ferons tout ce qu'il vous plaira (dirent ilz) veu que par autre moyen que par l'accomplissement de vostre promesse, il nous est impossible d'echaper, car si nous ne sommes mis à mort pour nostre forfait, la cruelle Polinecque ne faudra à nous faire mourir, par-ce que nous n'auons peu executer son cōmandemēt. Dieu y pouruoir, dist dom Brianges. Ainsi deuisans & suyans tousiours leur chemin, ilz rencontrerent assez pres de la cité de Gamal ou le combat se deuoit faire, vn Escuyer lequel leur dist que deux Cheualiers incogneuz estoient venuz l'un apres l'autre au secours du Prince dom Bruzanges & qu'ilz auoient desia commencé le combat, sans autrement s'estre donnez à cognoistre, ny auoir voulu dire qui ilz estoient. Ces nouuelles firent encores hastier d'auantage le Prince de Béocie, tellement que tantost apres il arriva en la cité, & laissa à la prochaine maison le iouuenceau Anurge, lequel n'osoit le suivre, puis menant tousiours avecque luy le paisant qui luy seruoit de guide, & les Cheualiers qu'il auoit pris en la forest, s'en vint en la grand' place ou le combat se faisoit, & vid les deux Cheualiers incogneuz combatans courageusement contre les trois Geas, & contre la forte Larmelle, sans que d'une part n'y d'autre lon vist aucune aparence de couardie encores que le combat fust tresmal departy. A costé du camp y auoit deux eschauffaux, l'un ou estoit la Royne, avecque ses officiers, & le conseil du Royaume, l'autre ou estoit le prince Bruzanges, & assez pres de luy lon auoit desia apareillé le bois & le feu pour le faire brusler vif, s'il auenoit que les deux qui soustenoient son droit, fussent vaincus. En l'eschauffault de la Royne, estoit pareillement la duchesse Polinecque, fort ioyeuse & superbe de voir en tel danger de

sa personne, celui qui auoit desdaigné son amour. Adonc le Prince de Beocie acompagné des trois qui le suyuoient, commença à fendre la presse, & descourant assez par son braue maintien, & par l'assurance de son visage, quelle deuoit estre sa prouesse, s'arresta quoy deuant la Roynes, & luy dist chacun faisant silence pour l'escouter : Ne souffrés, ma Dame, que ce combat soit continué plus outre, car vous deuez sçauoir qu'aucun de ceux qui combattent, ne peuuent mourir sinon à tort : Larmelle pense auoir bõ droit, & toutes-fois elle est trompee, & ne cognoist sa mentiere d'autant que le mesme abus qui a esté ocasion à sa sœur de mourir, luy a pareillement esté ocasion de prendre les armes pour la véger. Quád aux deux Cheualiers incogneuz, ilz ne sçauent s'ilz ont tort ou droit, ains de gayeté de cuer seulemēt, se sont mis en dāger de mourir pour ne laisser mourir vostre frere. Or suis-ie celui, ma Dame, qui viens donner salut à l'innocence, & malencontre à la trahison : mais ie vous supplie faire premierement cesser le combat, puis me donner audience pour vous reciter le surpl^s. La Roine meüē des propos & de la hautaine representatiō de dō Brianges, fit incontīnēt signe que lon differast le combat, & lors chacun escoutant ententifuelement ce que le Prince de Beocie vouloit raconter, il leur manifesta de point en point les trahisons de Polinecque, puis s'offrit à les prouuer tant par force d'armes, comme par ceux qu'elle mesme auoit esleuz pour complices de sa meschanceré. Adonc Polinecque qui estoit presente, commença à nyer audacieusement le forfait : mais la confusion de ces paroles, le taint inconstant de son visage, le commun bruyt de sa malice, le tesmoignage des deux Cheualiers qu'elle auoit enchargez de tuer Anurge, & le bon renom du Prince accusé, eurent tant de pouuoir enuers le conseil, que sur le champ elle fut condamnée à estre bru-

slee vifue, dans le mesme feu qui auoit esté appareillé pour le Prince dom Bruzanges, & voyant qu'il n'y auoit plus de moyen pour se sauuer, elle confessa entierement la verité. A raison dequoy le arrest des iuges fut promptement executé, elle bruslee, & les cendres espanduës au vent. Or la Roynes voyant son frere deliuree de ce peril, fut si ioyeuse, & tant contente en elle mesme, qu'il seroit impossible d'exprimer la centiesme partie du plaisir qu'elle receut de ce bõ-heur impourueu : Et à fin de ne se monstrier aucunement ingrate enuers ceux qui ce iour auoyent secouru son frere en vn si grand desastre, elle mesmes si tost qu'elle fut descendue de son eschaffaut, print dom Brianges par la main & vint aux deux Cheualiers incogneuz qui estoient demeurez dans le camp avecq' Larmelle, & les trois Geans pour voir l'euenement du tout. Adonc la Roynes pria les deux Cheualiers estranges de luy dire leurs noms, & qui ilz estoient, ou à tout le moins de se laisser voir descouuert à fin de recognoistre ceux à qui elle estoit tant redevable : & apres plusieurs prieres de la Roynes, & maintes importunités de dom Brianges qui desiroit fort les voir en face, ilz osterent leurs armetz & furent recogneuz pour ceux que maintenant vous entendrez.

Qui estoient les deux Cheualiers lesquelz auoyent entrepris le combat en la faueur du Prince Bruzanges & comme dom Rogel de Grece s'enamoura de la belle Florelle Roynes de Canabee.

CHAP. XCIII.

Ombien malheureux est celui lequel ayant commis quelque offense, estime à par soy qu'elle doiue à iamais demeurer secreete & impunie : car lors qu'on s'efforce le plus à tenir ses fautes en silence, & à couvrir tous les moyen

moyens par leſquelz elles pourroyent eſtre decelees, alors dieu tout puisſât juſte gouverneur des choſes humaines, commande au forfait de conduire ſon auteur, en lieu ou à l'impourueuë, ſa meſchanceté ſoit d'elle meſme manifeſtee à tout le monde. Ce que vous avez veu arriuer à Polinecque, laquelle eſtimât ſa trahiſon ne deuoir iamais eſtre decouverte ſinon par Anurge qui ſçauoit tout ſon ſecret, s'eſforça à luy faire oſter la vie, & au contraire elle ſe fit oſter la ſienne & voulât adiouſter offenſe ſur offenſe, par la ſecôde elle deſcourrit la premiere, de laquelle par autre moien elle n'eut par auëture ſeulement eſté ſoupçonnée. Ainſi en vn inſtât, elle perdit ſa vie, ſes biens, ſes amys, & l'honneur de la bonne renommee, lequel ſe doit beaucoup plus eſtimer que tout le reſte du bon-heur qui nous pourroit auenir en ce monde. Mais pour retourner à noſtre hiſtoire, apres que l'un des Cheualiers incogneuz eut oſté ſon armet deuant la Royne, il n'y eut celuy qui ne treſſaillit ſoudainement de grande ioye, meſmement le Prince dom Brianges, qui aperceut ſes armes qu'on luy auoit deſfrobes : car vous deuez ſçauoir que c'eſtoit la belle Arfleure qui par cy deuant auoit eſté pleuree pour morte en tout le païs, & n'auoit-on aucune eſperance de plus la reuoir. Et combien que celuy qui auoit aporté les nouuelles de ſa mort, ſemblaſt alors auoir rapporté vne menſonge, ſi eſſe qu'à la verité elle s'eſtoit lancee dans la mer, ainſi que dom Brianges vouloit aller ouir ſes plaintes, à raiſon dequoy il l'engarda de ſe noyer & l'ayant tiree d'entre les ondes, la recueillit en ſa fuſte, & la mena au prochain port, ou apres auoir demeuré quelque temps avecque les Infantes de Perſe, vne nuyt entre les autres, elle deſroba les armes de dom Brianges pour aller ſecourir ſon amy cõtre ſa propre ſœur, apres qu'elle eut entendu par les veneurs, le diſcours tel que nous vous

l'auons deduit cy deſſus. Et combien qu'elle eſtimât le prince Bruzages coupable de ce dont il eſtoit aculé, neantmoins l'amour l'auoit tellemēt aueuglee, qu'elle ſeule entreprit le combat contre les quatre qui auoient ſa ſœur Larmelle pour leur chef. A quoy elle fut encores incitee d'auantage, quand elle entendit que perſonne ne s'eſtoit preſenté au combat pour ſon amy, & ſongeant & reſongeant à par ſoy mille fantaſies, elle diſoit, Helàs ! moy miſerable, ie ne puis, & ne veux ſouffrir que celuy qui m'a offenſee iuſques à la mort, meure à mon ocaſion, tandis que ie ſeray en vie, car la mort me ſeroit trop douloureuse, ſ'il me la falloir endurer apres la ſienne. Il eſt monſeigneur, il eſt la lumiere de mes yeux, il eſt le Dieu que j'idolatre, & l'idole, que j'adore, & ſuis cõtainte à tort ou à droit, de prendre la querelle pour luy, & de mourir pour luy dans le camp. Je ſçay bien que j'ay tort, & qu'eſtant ſeule contre quatre ie ne puis faillir à mourir : mais pour celà ie ne me deſcõforte point, ains ſuis ſeulement marrie que ma mort fera mourir celuy que j'honore, & eſtime ſur tous les viuans qui ſont au monde. J'ay vne ſeule conſolation en ma miſere, c'eſt que Polinecque à qui il a monſtré tant d'amour, n'aura daigné employer le moindre de ces gentils-hommes pour le defendre, & il me verra (moy qu'il a tant offenſee) recevoir la mort dans le camp, pour luy auoir voulu ſauuer la vie. Auſſi me vengeray-je de ma ſœur Larmelle qui eſt ſi fort enflammee contre luy, & la feray repentir promptement de ſa cruelle entrepriſe, car la fin du combat luy fera cognoiſtre qu'en voulant venger la mort de ſa ſœur, elle l'aura occiſe de ſa propre main. En telle deliberation la belle Arfleure vint au combat, ou elle n'eut à peine tiré le premier coup d'eſpee, que l'autre Cheualier lequel vous ne cognoiſſez encore ſuruint à ſon ſecours. C'eſtoit le preux dom Rogel de

Grece, lequel à son rang se descourrit deuant la royne, & le prince dom Brianges son cousin, qui fut si extremement ioyeux de le reuoir en vie, que perdant toute contenance, il laissa la main de la Royne, & le courut embrasser, disant. O mō cher frere dom Rogel de Grece. Helàs esse vous que ie tiens entre mes bras, ou si ie suis ainsi abusé par quelque fantôme? Mais sachez que la roine Florelle n'eut si tost ouy le nō de Rogel, qu'elle changea de couleur, voyant en sa presence, celuy dont tant de foys elle auoit ouy la renommee: & fut encores plus honteuse s'aperceuant q's'estoit le Cheualier qu'elle auoit trouué pres du riuage de la mer quelques iours au parauant & pour s'excuser le vint prendre par la main, & luy dist, Je vous supplie tres excellent Prince, me pardonner si ne vous cognoissant, ie ne vous ay fait l'honneur que ie denois, & à l'auenir ie vous promets que ie m'essayeray à recompenser ceste faute, vous faisant tout le traitemēt dont ie me pourray auiser. Dom Rogel surpris des gracieuses paroles de la Royne, & sentant quelques nouvelles flammes de son amour, luy respondit, C'est moy, madame, qui vous doy supplier de prendre en gré le seruice qu'auourd'huy ie me suis essayé à vo^r faire pour gagner quelque part en vostre bonne grace. Alors la Royne le regarda mieux qu'elle n'auoit encores oncques fait, & le voyāt tant beau, & se souuenant de sa prouesse qu'elle auoit assez cogneuē, l'ayant veu seul combattre trois fors Geans, elle luy dist: Vostre illustre lignage, & vostre beauté, acompagnée de la prouesse qui vous fait renommer par tout l'vniuers, peuuent bien vous acquerir ma bonne grace, mais quand est de moy ie ne scay comme ie pourray acquerir le moyen de recompenser ce qu'auourd'huy vous auez fait en ma faueur, vous & vostre frere icy present. En telz & autres semblables deuis la Royne s'enflammant

secretement des amours du Prince dom Rogel, le mena avec dom Brianges, & la belle Arfleure, en son Palais, ou le prince dom Bruzanges auoit desia esté conduit par les iuges du camp. Et là estans les tables dressees, dīnerent en grande solemnité & magnificence, avec vn ordre de seruice nōpareil & fort sumptueux. Durant le dīner la belle royne ne sceut onc retirer sa veuē de dessus dom Rogel, ny luy de dessus elle, de sorte qu'ilz donnoient assez à cognoistre par leurs œillades, combien ilz estoient passionnez l'vn pour l'autre. Toutesfois pensans deguiser les matieres, ilz tenoient maints propos ensemble, & entre autres ilz deuilerent longuement des amours de la belle Arfleure, & du prince Bruzanges, tellement que les nopces furent acordees au lendemain au grand contentement des deux amans. Les tables estāt leuees, dom Brianges dist à dom Rogel qu'il s'en alloit trouuer les Infantes, & luy demanda s'il ne leur vouloit rien mander. Je vous prie (respondit dom Rogel) dire à l'Infante Sidere que vous auez ouy nouvelles de moy, & que ie suis en ceste Ile sans routesfoys luy descourir autrement ou ie suis. Pourquoi, dist dom Brianges. Par-ce (respondit dom Rogel) que ie suis fort content de demeurer quelques iours en ceste cour. Alors dom Brianges s'assura de ce dont il s'estoit aucunement douté, voyant la Royne & dō Rogel s'entre-regarder en table si affectueusement, & apres luy auoir raconté la maladie de l'infante, & ou il l'auoit laissée avec ses sœurs, il prit congé de la Royne & luy promit d'estre le lendemain de retour. Le surplus de ce iour fut employé à l'apareil des nopces, pendant lequel la Royne ne sceut onc abandonner le Prince dom Rogel, ains le mit en diuers propos luy demandant qu'elle estoit la royne Sidonie, s'il l'auoit veuē, & pourquoy tant de fois elle auoit pourchassé la mort de Florelle

fel son pere, comme ilz s'estoient reconciliez ensemble, si Diane estoit si belle cōme le bruit en couroit, & quelle yssue auoit prise la derniere guerre de Guindaye, ou toutes les forces de Russie & de l'Orient estoient assemblees. A quoy dom Rogel respōdoit de point en point sans oublier vn seul mot, ny vn seul geste de ceux qui pouuoient seruir pour gagner le cuer de la royne. Il luy raconta aussi comme il auoit deliurē les Infantes de Perse de la miserable seruitude ou elles estoiet detenues par le magicien Gandistin, & comme il auoit occis l'espouuentable Lionce, sans toutesfoie dire mot des amours de l'Infante Sidere, d'autant qu'elles ne seruoient de rien pour paruenir ou il pretēdoit. Ainsi la Royne escoutoit les propos de dom Rogel, ne se donnant garde de la force que le Dieu Amour secretement luy appareilloit par vne telle conuersation, car desia elle commençoit à oublier son premier mary Neophone, & la chasteté qu'elle auoit vouee à son sepulchre, & sentoit aucunement amolir la premiere rigueur de son courage. Le lendemain dō Brianges retourna à la court & raconta à dom Rogel l'extreme lieffe de l'Infante Sidere, pour auoir sceu de ses nouuelles, le l'ay laissée (disoit-il) autant ioyeuse qu'il seroit possible de penser, & en beaucoup meilleure dispositiō qu'elle n'estoit au parauant. I'en suis ioyeux (dist dom Rogel) & l'irois voir trelvolōtiers, mais ie ne m'oserois absenter d'icy pour maintenant. Or la royne Florelle voulut qu'à ce iour rien ne fust oublié de tout ce qui pouuoit rēdre la feste plus solemnelle, & de fait elle se para de ses plus riches acoustremens, & precieux ioyaux, laissant son acoustumé habit de dueil, de sorte qu'elle ressembloit trop mieux vne Deesse du ciel qu'une femme mortelle: ce qui enflammoit tellement dom Rogel qu'il ne scauoit quelle contenance tenir. Apres que le Prince dom Bruzanges &

la belle Arfleure furent espousez selon la mode acoustumee en l'Isle, les tables furent dressees, & durant le dīner le son des instrumens, & la douceur de la musique rendoient vne telle armonie en la grand' salle ou se faisoit la pompe, que celle douceur ne pouuoit mieux estre comparee qu'à vne des ioyes de Paradis. Les tables lenees, le bal fut commencé par dom Rogel qui dāça premierement avecques la Royne, puis dom Brianges avec Arfleure l'espousee, & à l'yssue du bal le Prince dom Bruzanges presenta à dom Rogel vn Diamant de la grosseur d'un œuf, mis en œuvre par grand artifice, & dās iceluy estoit entaillē fort industrieusemēt, la figure de Cupidō assis en vn trosne de magestē, ayant en sa main dextre vn arc, & en la fenestre vn brandon, & à ses piedz gisoient plusieurs couronnes de Roys, & de Roynes, & maints sceptres brisez par la moytiē avecque quelques chapeaux de triūphe, entrelassez les vns dans les autres. Le prince Bruzanges donna pareillement au Prince de Bēocie, vn vase d'esmerande, ayant presque la forme d'une courge, & l'endroit ou le ventre commençoit à s'estrecir, ceinturé d'une frize entaillēe de belles figures. Le reste du vase deuers le fons estoit cizelē à feuilles de pampre, & du bord sortoient deux Viperes de coulal bigarrē en façon d'aūses. Dom Rogel & dom Brianges de Bēocie n'auoyent à peine encores remerciē le ieune Prince de ces beaux presens, qu'ilz virēt entrer en la sale vn escuyer apportant vnes armes toutes de fin or, & semees de diuerses pierreries. Adonc Arfleure s'adressant à dom Brianges de Beocie luy dist, Je vous prie, monsieur, prendre de moy ces armes en recompense des vostres, & ie vous assure que vous ne perdrez rien au chāge: car elles sont de telle trampe qu'il n'y a fil d'espee qui les puisse trancher, ny fer de lance qui les puisse faucher: & si sōt de telle propriētē qu'ē to

endroitz

endroitz ou elles sont portees, les enchâremens disparoissent, & perdent entiere-ment leur vertu. Ma Dame (dit dom Brianges) ie vous remercie tres affectueusement d'un si precieux don, & vous prometz que tant que ie viuray-ie m'en sentiray de beaucoup vostre redeuable, veu que ie m'en pourray seruir en tel endroit ou il ne me vaudra moins que la vie.

Ainsi se passoit le temps en l'Isle de Canabee, la Royne s'enflammant tousiours de plus en plus des amours de dom Rogel & luy pareillement de l'amour de la Royne : & ce pendant dom Brianges amena les trois Infantes de Perse en vn chasteau qui estoit à demye lieue de la cité en attendant que l'Infante Sidere fust guerrie de sa fievre, qui peu à peu s'amoindrissoit selon que l'esperance de voir son Rogel luy accroissoit. Or les laisserons-nous pour vn tems en tel estat, à fin que nous ne perdôs de veuë le prince Agefilâ lequel nous auons laissé volât par l'air avec bonne intentiō de recouurer sa perte, ou bien de se perdre luy mesmes. Partant nous raconterons vne partie des admirables auentures, qui luy auindrent dans le ciel: car le croniqueur Galeris ne les a voulu escrire toutes, combien que son histoire soit fort ample, disant en ce lieu qu'il aymoit beaucoup mieux se taire, que reciter plusieurs choses veritables lesquelles pour tout guerdon, la rude ignorance des hommes luy pourroit imputer à mensonge.

Des merueilleuses auentures qui auindrēt à dom Agefilan de Colchos en la queste de la princesse Diane, & comme il deliura le Roy des Garamantes de la miserable faim en laquelle le detenoit vn Dragon volant.

CHAP. XCIIII.

A Gesilan guydant son Grifaleon par l'air, tout ainsi qu'il eust faict vn cheual sur la terre, apres auoir

long temps cherché sa Dame aux prochains desers de l'Isle Verde, commença à haster le vol de son destrier avec telle viffesse que le faucon pourfuyt sa proye, quand il la voit long deuant luy: de sorte qu'en peu d'heure il passa la mer, ou il aperceut la nef des sages Alquist & Vrgande, en laquelle estoit le grand Roy Amadis de Gaule, & les autres Princes de son sang fort ennuyez pour la perte qu'ilz pensoient auoir faite de luy & de Diane durât la tempeste, qui pour lors estoit entierement cessée. Puis tournant son vol à main droite, trauersâ la grande riuere de Boristene, la Sarmatie, l'Hôgrie, puis l'Alemaigne, les Alpes, & la belle France iusques en la grand Bretaigne, & assez loing par dela l'Isle de Thules, qui est la derniere terre que lon trouue en la mer Septentrionale. Mais ne pouuant endurer l'extreme froidure de ce païs, il retourna par dessus la mer Oceane deuers les blancs coupeaux des montaignes Pirenees, & ayant trauersé l'Espagne, passa le destroit de Gibraltar, & les coulōnes q'l'invincible Hercule auoit données pour bornes aux anciens mariniers. De là, passant la mer, il trauersâ Africque les deserts de Libie, l'Egipte, retourna contre les Indes, & apres auoir presque tournoyé tous les païs de Leuant, se rendit dans le Royaume de Garamantes, qui pour lors estoient Chrestiens, souz le Roy Trasathee, homme superbe & arrogant, & de mauuaise conscience en sa premiere ieunesse, mais assez humble & modeste, depuis que le Dieu tout puissant eut dardé son ire sur les ouurages qu'il auoit entrepris contre la maiesté diuine, le chastiant asprement de son orgueil, & de sa fole outrecuydance. Car vous deuez sçauoir que ce preux, & hardy Roy à son auenement à la couronne auoit eu vne cruelle guerre contre les Psyllois, les infidelles & mescreans, viuans la plus part du temps de venin & de viperes. Ceste guerre fut conduite avecque telle fureur

fureur, que s'estant les deux armées donné la bataille, les Psyllois furent occis la pluspart avecq' leur Roy, & les autres pris prisonniers iusques au nôbre de quarante mille. Le roy Trasatheë fort enorgueilly de sa victoire, sans en rendre graces à celuy qui luy auoit octroyée, commanda à ses gens d'armes d'encadener tous les captifs, ausquelz certain temps apres il donna liberté, à la charge qu'auant leur depart ilz luy bastiroiēt souz la conduite de ses architecteurs, vne tour en forme de Pyramide ainsi qu'il plairoit aux maistres de l'œuvre la deuiser. Les soldatz Psyllois furent contens d'acheter leur liberté par leur trauail, par-ce qu'ilz n'auoient dequoy payer autrement leur rançon. Si fut la tour encommencee, tant par les subgetz du Roy, qui auoient les plus honneſtes offices en ceste entreprise, cōme par les soldatz captifs. Et telle fut la multitude des manouuriers, que dans le premier an la tour fut enleuee sur terre plus de quatre grandes lieues de hauteur, & sur la fin de la seconde année, ilz auoient tellement creu leur besongne, que l'vmbre de la tour s'estendoit iusques dans la mer rouge, qui estoit fort loing de là: tellement que les mesmes ouuriers s'ebahissoiēt de leur ouurage, & Trasatheë pareillement, lequel se vantoit deſia si sa demeure n'estoit dans le ciel, que d'ormais il en seroit pl^{us} proche qu'aucū autre Roy qui se peust trouuer en tout le monde, adioustant qu'il se vouloit eslongner des hommes, pour se faire voyſin des Dieux. Le ſouuerain createur des choses voyant la rebellion dont ce ieune Roy vſoit à l'encontre de ſa diuinité, le fit trois diuers matins enſuyuans admonneſter en ſonge par vn ſien ange qu'il euſt à ſe deporter de ce qu'il auoit commencé, l'auertiffant qu'il trouueroit pluſtoſt la ruyne de luy & de ſon ouurage, que la perfection d'vne chose qu'il auoit entreprise contre la volonté diuine. Trasatheë ne fit conte d'obeïr

aux commandemens de l'Ange, au moyen dequoy le ſouuerain Dieux indigna tellement contre luy, qu'il fit abifmer dans la terre ceste superbe Pyramide, ſans en laiſſer aucune aparence ſinon vn lac de feu ardent de meſme largeur qu'elle eſtoit: qui teſmoingna long temps apres le pouuoir de la celeſte vengeance. D'auantage il enuoya vn monſtre hideux & eſpouuentable, pour faire repentir ce superbe Roy tout à loyſir, de l'offenſe qu'il auoit trop haſtiuement commiſe. Car incontinent que Trasatheë ſe penſoit mettre à table, ce monſtre horrible (qui eſtoit vn Dragon volant) luy venoit ſoudain rapiner & deuorer la plus part de ces viandes, laiſſant le ſurplus tellement infect de ſa puanteur, qu'il eſtoit impoſſible d'en pouuoir gouſter. Le miſerable Roy vn iour voulant reſiſter à ce monſtre, fit griller de forts barreaux de fer toutes les fenestres de la ſalle, ou il prenoit ſon repas: mais le Dragon les brifa & paſſa à trauers auſſi facilement comme ſi lon luy euſt rendu vne araignee: ſoit que la beſte fuſt de ſi grād^e force, ou bien que le fer laiſſat ſa durté acouſtume'e pour faire place au diuin vouloir. Trasatheë continuant en ſon opiniaſtre'té, penſant touſiours ſe deſfendre de la beſte ailee, fit expreſſement murer de forts parois la ſalle ou il vouloit repaiſtre, ſans y donner autre clarté que celle des flambeaux qui y ardoient continuellement. Mais incontinent que lon commença à ſeruir, vn grand quartier de la muraille tomba miraculeuſement par terre, & en meſme inſtant fut ouy vne effroyante voix qui diſoit, N'acroyſ point (Roy obſtiné) ta rebellion, ſi tu ne veux accoiſtre tes martires. Soudainement apres ces paroles le monſtre entra, & le malheureux Roy tomba paſmé dans la place dont il fut releué avecque vn nouveau tourment: car il auoit perdu la veuë: Quelques bons Archeueſques qu'il n'auoit encores voulu croire,

croire, entrèrent lors dans la salle, & l'amonnestèrent de ne résister plus contre les volôtez de Dieu, veu qu'il seroit toujours contraint à les souffrir en patience. Il les remercia de leur bon aui, les supliant de se tenir iour & nuyt auprès de luy, à fin de se gouverner à l'auenir selon le conseil qu'il leur plairoit luy donner. Dom Agésilâ auerty par la commune renommée de ces merueilles, delibera d'aller visiter le Roy des Garamantes, & s'en vint volant à grandes roues descendre en la court du chasteau, au grand esbahissement d'un chacun. Les Archeuesques estimans que ce fust saint Michel, ou saint George, ou quelque autre messager de Dieu, en dirent les nouvelles au roy, & l'auertissant de faire ses prieres au Cheualier celeste, le menerent par dessouz les bras tout deuant luy, ou ilz le firêt mettre à genoux, & s'agenouillèrent ensemblément vn peu plus arriere. Alors le Roy ioignant les mains, & tendant ses yeux auueugles deuers le ciel, commença à dire, Helâs! nouveau Messie, si les offenses que j'ay commises sont si outrageuses qu'elles ne meritent aucun pardon, au moins plaise vous souuenir qu'entre nous hommes sommes coutumieres de forfaire contre vous, tout ainsi que vous de pardonner à ceux, qui ont en leurs courages vne ferme repentance de leurs forfaitz. Or combien que ie soye autant assuré de vostre pouuoir, comme ie me sens coupable de mes fautes, si est ce que ie ne vous veux prier de me rendre la veuë que mon demerite m'a fait perdre : ains tant seulement ie vous supplie vous contenter du grâd martire que ie souffre estant auueugle, & priué de toute ioye : & ne permettre qu'une cruelle faim me tourmente miserablement auprès de mes viandes, sans auoir le moyen d'en pouuoir prendre ma naturelle refection. Au moins deliurez moy du cruel monstre, lequel à tous mes repas vient piller ma table, & empuan-

tir de son venin le peu qu'il laisse à deuorer : & s'il vous plaist me departir ceste grace, tant pour la recognoistre, comme pour purger mes anciens pechez, ie vous bastiray vn beau temple de fin marbre, dont les voustes & les portes seront d'or massif, & le dedieray & consacreray à vostre saint nom, vous donnant sur chacun autel vne statue enrichie de toutes fines pierreries, avecq' vn tableau auquel sera paint le miracle qu'il vo' aura pleu faire en ma faueur. Ainsi prioit ce Roy auueugle & cherchoit en vain les piedz de dom Agésilâ pour les baiser, lequel luy respondit, Je ne suis point ce nouveau Messie si prochain de la deité, comme vous m'avez fait par voz paroles : mais tant y a, sire, que tel que ie suis ie vous monstreray à l'essay s'il a pleu à Dieu d'adreser mô vol en vostre royaume, à fin de vous deliurer de l'horrible monstre qui vous detient en vne faim perpetuelle. Et si la volonté que j'ay de m'employer en vostre seruice, peut auoir l'ysuë telle que ie desire, remerciez en Dieu tout puissant, & luy dressez les temples, & les autelz dont vous parlez, à fin de vous le rendre tousiours d'autant plus fauorable. Ainsi deuifans s'en allerent au chasteau, que dom Rogel trouua fort superbe, tât en l'architecture du bastimēt, comme en la diuersité des richesses dôt il estoit embelly tout à l'entour. L'edifice estoit de fin Marbre blanc, les coulannes de Iaspe & de Porphire, les portes & les fenestres d'or & d'argēt subtillement esmaillez de fort naïfues couleurs, les vitres de cler cristal figuré par delicates portraictures faites d'or moulu & d'azur avecques maintes riches pierreries & fines perles, non moins admirables par le dehors du chasteau, que reluyfantes par le dedâs des salles & des chambres. Et neâtmoins avecques ces richesses, & autres infinies, il estoit impossible au triste Roy de pouuoir rechasser la faim qui le tourmentoit. Or incontinent que les

que ses seruiteurs le virent aprocher avec dom Agefilan, ilz cōmencerent à ordonner leur seruice pour courir : car le Roy leur auoit ainsi commandé, esperant que l'arriuee du Cheualier volant lui deuoit porter quelque bō-heur. Le lieu où le dîner fut apareillé, estoit vne riche salle enuironnée de fines tapisseries de soie rayonnée de fil d'or & d'argent, esquelles estoient peintes au vif toutes les braues auantures qui estoient auenues à ce Roy en son ieune aage du temps qu'il estoit Cheualier errant. Au mylieu de la sale y auoit vne fontaine, dont le pié montant deuers le bassin estoit fait de blanc Albastre enléué de riches fueillages d'or dont les bors estoient émailléz des plus fines perles de l'Orient : tout le surplus de la fontaine excepte les canaux, estoit de diamans, rubis, & saphirs, taillez par rangs d'une mesme grandeur, & en mesme ourage, entrelassez avec vn tel ordre les vns parmy les autres qu'il estoit difficile à iuger lequel des deux estoit de plus grand' estime, ou la matiere, ou l'artifice qu'on auoit employé à l'approprier par vne si grande excellence. Le Roy donc estant assis à table sans autre compagnie que d'Agefilan qui estoit tout armé ayāt seulement la visiere haucée, lon entēdit assez loing le siflement des aëles de l'horrible Dragon, lequel comme tiré par l'odeur des viandes, menant vn bruyt espouuentable par l'air, entra soudain dans la salle en sa façon acoustumée. Il auoit la teste en la façon d'un singe, toute palle & transie de faim, avecque vne creste flotante dessus, ses griffes estoient crochues, & recouruees, le ventre plat & empunaïsi pendant deuers l'extremité : l'estomac sec & essuyé sinon qu'il y auoit vn estroit pertuis, dont en deuorant il iettoit sans cesse vn venin glué, puant, & tant infect qu'il estoit impossible d'en pouoir guieres souffrir l'odeur sans estoufer : Ses aëles estoient faites de quelques estranges escailles du-

res comme lames d'acier bien trempées : il auoit la queue assez longue, pointuë, & entortillée, faite d'une pareille façon que les aëles. Or quand Agefilan vid ceste infame beste rauer les viandes, renuerfer les beaux vases, & infecter toutes choses de son ordure & de son vilain atouchemēt, par grād' colere il se leua de table, mit la main à l'espee & ferut le Dragon de si grāde force sur les escailles du col qu'il luy separa la teste du corps, qui tōba incontīnēt sur le plancher : mais pensant estre hors de peine il le vid soudain venir contre luy par plus grande force qu'au parauant, ayant deux testes au lieu de la premiere, sans faire semblāt de se resentir de la playe. Alors commença dans la salle vn fort aspre & cruel cōbat entre le Dragon, & Agefilan lequel ce pendant qu'il abatoit la visiere de son armet, receut vn tel heurt de griffe dans l'estomac qu'il s'acula contre la table, laquelle il renuerfa par la secousse deuant le Roi. La honte fit entrer le ieune Prince en telle fureur, que donnant le second coup sur le col du monstre, il luy ttencha de rechef ses deux nouuelles testes, au lieu desquelles il en vid renaistre autres quatre, tandis qu'en vain il s'essayoit à luy couper les dures aëles des coups continuelz dont il le rechargeoit. Ce pendant dix des Cheualiers du Roy, pēsans que ceste meslee se peust acheuer par force, entrerent dans la sale, les vns avec les espees degainees, les autres avec que longues halebardes, dont ilz s'essayoiēt à occire le Dragon, tellement qu'à leur arriuee il print le combat contre les dix, mōstrant n'auoir tāt de crainte de toutes leurs forces, comme du seul regard d'Agefilan qui au mesme instant que l'assault des dix Cheualiers cōmençoit, donna le troisiēme coup sur la queue du Dragon, & le naura avecque si grande douleur qu'il commença à s'en voler par la fenestre par laquelle il estoit entré. Dom Agefilan demanda son

son Grifaleon sur lequel il monta legierement & s'en vola apres le Dragon, lequel retournant à l'impourueue contre luy, le vint tellement assaillir des ailles, & des pates, que bien peu s'en falut qu'à ceste rencontre il ne fust renuersé par terre, car il luy ferroit tellement les griffes sur l'armet, qu'il luy eust facilement escarbouillé la teste, si la bonté, des armes de Patrifond ne l'eust preserué pour ce coup. A ce combat qui se faisoit en l'air au milieu de la court du chasteau, sortirēt tous les Princes, Barons & Gentilz-hommes de la maison du Roy fort esmerueillez de la prouesse du Cheualier, lequel ayant empoigné vne des ailes du Dragon le tira en bas par si grand force qu'il le renuersa par terre, luy faisant descendre à plomb son destrier volant sur le dos, en mesme maniere que le faucon hault enleué en l'air se laisse fondre sur la colombelle, qu'il voit voler au dessouz de luy. Le Dragon fut tellement estonné de ceste cheute, que sans plus penser à se deffendre, apres auoir receu diuers coups & estre blessé en maints endroitz, si tost qu'il peut s'eschaper du Cheualier, il reprit son vol fuyant d'une telle roydeur que quelque diligence, que peust faire dom Agefilan il ne sceut suyure que de veüe. Le Roy Trasathee auerty de l'euenement du combat, fit appareiller d'autres viandes en vne autre salle, ou il se repeut avec si merueilleuse volupté, qu'il seroit impossible de l'exprimer. Et ayant le lendemain encores receu le mesme plaisir de manger qui luy estoit presque incogneu, combien qu'il ne fust du tout asseuré si le mōstre ne retourneroit plus: par-ce que pour lors il ne pouuoit rendre autre recompense à celuy qui luy auoit esté autheur de ce bien, il fit leuer au milieu de sa court, ou la cruelle beste auoit esté abatue, vn magnificque trophée, soustenu en vne lance, painte de diuerses couleurs, dans le fer de laquelle estoient plantees les trois testes, que le

Cheualier auoit coupees au Dragon, & vn peu par dessouz, vne cuiraille, deux targes de fin acier, vne masse d'armes, & vn ancien braquemart, selon la mode du pais. Et à l'endroit de la hauteur d'un homme y auoit vn chapeau de triomphe deux rameaux de palme entrelassez avec deux cornes d'abondance, qui y apuyoient les deux bouts d'un rouleau contenant ces vers :

*Au Cheualier volant, l'auengle Trasathee
Delivré du Dragon, à s'acré ce trophée.*

Or Agefilan poursuyuit tellement sa proye, que deux iours & deux nuitz passez obstinément en la poursuyte, ayant trauersé diuerses mers, il vid reposer le Dragon ailé sur des hautes roches, en vne Isle ou il n'auoit son repaire, parce que la peur luy en auoit fait perdre la cognoissance. Mais voyant son ennemy qui le suyuoit tousiours de pres, il se cacha dans vne caverne non beaucoup profonde, tellement que la queue apparoissoit quelque peu entre les tenebres. Le Cheualier ayant aperceu quelques bergiers, les appella, & leur fit apporter grand nombre de busches & de fagotz, dont ilz estouperent la caverne puis mirent le feu dedans, laissant par la mort du Dragon la table de Trasathee en assurance. Or par ce qu'Agefilan auoit grand necessité de repaistre, il s'en vint heberger en quelques petites cabanes de pasteurs qui estoient tous estōnez de voir l'estrange forme de son cheual: mais les ayant vn peu rassurez de leur crainte, il commença à leur conter le cruel combat qu'il auoit eu contre le monstre que ilz auoyent fait brusler: puis leur demanda comme lon nommoit l'Isle ou ilz estoient, quelle loi on y obseruoit, & pourquoy il ne voioit point de bergeres entre eux selon la coustume des autres pais. Les tristes pasteurs ou estoient tous esperduz, les vns de ioye pour l'esperance qu'ilz

qu'ilz auoyent en luy qu'il mettroit à fin la cruelle destinee de l'Isle : les autres de tristesse pour la souuenance du malheur par lequel ilz auoyent perdu leurs femmes & leurs filles, esquelles gisoit toute leur consolation. A la parfin le plus ancien des bergers arrosant sa barbe grise de chaudes larmes, commença à luy reciter maintes choses que iedelaissé pour le present, d'autant qu'elles vous seront assez cogneuës par-ce que maintenant vous entendrez.

Comme dom Agefilan occit l'horrible monstre marin de l'Isle Desolee, & affranchit les habitans du cruel hommage qu'ilz deuoyent au Dieu Teruagant.

CHAP. XCV.

OR deuez vous sçauoir que l'Isle en laquelle le Dragõ volât auoit conduit le Prince Agefilan, estoit celle Isle Desolee dont nous auons parlé cy dessus en laquelle vn horrible monstre marin deuoroit tous les iours vne femme qu'on donoit pour offrande au dieu Teruagant. Dequoy Agefilan auerty par les paroles du vieil pasteur se delibera de occire le monstre, & en ceste fantasie apres auoir repeu legierement de quelque fromage & de pommes, s'en alla reposer sur vn lit de feuilles tel que les bergers luy auoyët apareillé. Mais il n'eust si tost commencé à sommeiller, qu'à la souuenance de sa Dame qu'il auoit perdue, luy osta toute l'enuie du repos, toutesfois à la fin, agraué du travail, des iours passez, il s'endormit en ses pensées. Alors luy fut auis en songe qu'il voyoit son cuer pendu sur l'eau au bout de la ligne d'un pescheur qui en vouloit apaster vn poisson fort grand & demesuré : ce qu'ayant resongé plusieurs fois, il eust le repos paisible sans estre plus troublé d'aucunes visions, sinon au point du iour, qu'il

recommença encôres le mesme songe, puis se rendormit de rechef iusques à ce qu'il fut haute-heure. O bon Cheualier si tu eusses peu entendre la verité de ce que les continuelz fantaumes de là nuit te signifioyent, tu n'eusses atëdu que les Bergers te fussent venuz reueiller pour aller voir ce qui se preparoit à ton grand malheur sur le riuage, deuant le Temple de Teruagant. Luy donc s'estant leué en grand haste à la persuation des pasteurs, apres s'estre reuestu des bonnes armes de Patrifond, mōta sur le destrier aillé, & prit son vol deuers celle part que ses hostes luy enseignèrent, qui n'estoyët moins esbahis que ioyeux de le voir en tel equipage : car ilz auoyent autresfois entendu secretelement par l'un de leurs prestres, que le courroux de Teruagant seroit apaisé quād le Cheualier porté par vn destrier volāt, passeroit par dessus son temple. Et par ce qu'ilz auoyët tousiours estimé ceste profetie estre fōdee sur vne condition impossible, ilz perdirët l'esperance de voir iamais la fin de leur misere toutes-fois recognoissans ce qui estoit profetizé pouuoir auenir en la personne du Cheualier qu'ilz anoyent hebergé, ilz commencerent à prendre quelque bon courage. Or Agefilan volant bien hault à l'entour du riuage & du Temple, aperceut vne tendre Damoyelle attachee contre la dure roche, aussi nuë comme nature l'auoit produitte à sa naissance, sans auoir vn seul voire pour couvrir les blancs lis, & les vermeilles roses dont son corps delicat estoit embellly. Lors enuieux de voir de plus pres vne si excellente beauté, il abaissa vn peu son vol, & voyant la pauvre toute esperduë sans se remuer ny çà ny là, il eust facilement creu que ce fust quelque statuë d'Albastre, ou de fin marbre blanc, ainsi taillee sur ceste roche par la main de quelque excellent ouurier, si les cheveux voletans doucement en l'air, & les larmes roulantes en façon de perles sur ces

dures pommelettes de sa tendre poitrine ne luy eussent doné certain tesmoignage de la verité. Puis s'apochant de plus pres, & recognoissant la celeste beauté de celle Diane qu'il cherchoit avecq' si grand travail, ie ne sçay s'il eut iamais plus d'ennuy de l'auoir perdué, qu'il auoit lors de mortelles angoisses la voyât en si piteux estat. Faisant donc descendre son destrier en terre, il haussa sa visiere, & luy dist à grande peine, Reconnoissez, ma Dame, vostre Agefilā non moins miserable pour la douleur ou il vo⁹ voit, que malheureux pour ses cruelles destinees: & me dites, ie vous supplie, par quel infortune vous estes ainsi detenuë entre ces chaines. Il fut force à ces paroles que la triste Princesse reprist la mesme couleur que l'iuoir arroulé de pourpre, s'aperceuant les parties nuës, lesquelles, encôres qu'elles soient belles, la vergogne veult estre cachees. Elle voulut estendre les mains pour couvrir la honte de son visage, mais la pauuerete s'auiſa qu'elles estoient enchainees contre la roche. Lors tesmoignant par ses pleurs & par ses sanglotz combien estoit grande sa douleur, elle commença avecque vne voix entrerompue & debile, à luy dire: Helàs! monsieur, qui vous a conduit à vn tant malheureux spectacle, auquel ny à vous, ny à moy, vous ne pourrez de rien profiter sinō en me donnant le moyen de dire mes dernieres paroles en lieu ou elles puissent estre entendues. Elle vouloit continuer, mais l'horrible bruit que lon entendit dans la mer, luy fit abreger ses propos, & redoubler sa premiere crainte. Car lon cōmença à descourir le desmesuré mōstre, moytié sur l'eau, moytié dessouz, fendant les ondes en mesme façon que la Gallere poussee par vne grand' multitude de rameurs. Ceste espouventable beste couuroit tout vn grand pais de mer dessouz son large ventre, & n'auoit autre forme que d'vne lourde masse de

chair, excepté deuers la teste, ou les yeux enſlez par le dehors, & les horribles dents, avec la grande fante de la gueule qu'elle entrebailloit incessamment, faisoient quelque difference du reste du corps. Desia elle: aparoiſſoit à vn trait d'arc du riuage, quād dom Ageſilan laissant sa Dame toute esperdue print son vol en l'air, ayant premieremet osté par grāde force, vne longue hallebarde ferrée des deux costez, à vn des sergens qui auoient conduit la Princesse à ce cruel martire. Puis voyāt le monstre souz luy, il descendit par grād' roydeur, & luy vint donner vn coup sur l'eschine, dont il perça aucunement les dures escailles sans toutesfoys autrēment l'endommager: & le chamailant sans prendre cesse, il fut assez esbahy voyant qu'il ne profitoit guieres pl⁹ que s'il eust frappe sur vne dure roche: car le monstre ne faisoit aucun semblant de rien en sentir, sinon qu'ayāt aperueu l'ombre des grandes ailes du Grifaleon tourner çà & là dessus les vagues, il commença vn peu à laisser son droit chemin beāt la gueulé cōtre l'ombre aperceue, & s'eslayant à la deuorer. Or comme l'Aygle qui a veu du ciel le Serpent liſſant ses escailles dorees au soleil, se donne garde de l'assaillir par l'endroit auquel il puisse destourner ses dēts enuenimees, ains luy vient enfermer le bec crochu dans le derriere de la teste, pour ne luy laisser aucun moyē de se defendre: Ainsī dō Ageſilan frapoit le monstre, tantost entre les oreilles, & maintenant deuers la queue & sur l'echine, selon qu'il se voyoit mieux asseuré. A la parſin il l'ataignit sur le museau, ou il luy fit vne playe fort douloureuse, qui mit le mōstre en telle rage qu'il se ietta bien à moitié hors de l'eau puis de rechef se refonça par deux ou trois foys, se tremoussant dos sur ventre avecque vne force tant espouventable que lon eust dit qu'il faisoit sauter les ondes iusques au ciel. Le Cheualier euitoit fort dextre-

deuxiement ses aspres morsures, montant en l'air, & descendant en bas, se tournant tantost çà, & tantost là, ainsi que la nécessité le requeroit. Vn pareil combat fait la bouche importune, sur le mois d'Aoust, à l'etour du chien villageois, qu'elle point maintenant dans les yeux; tantost sur le muse, puis dans les oreilles, luy volant & reuolât tout à l'entour sans s'eslongner, ce pendant qu'il fait cracquer en vain ses dents par l'air pensant haper son ennemye. Mais l'eau que le monstre faisoit sauter en hault, auoit desia tellement abreuvé les plumes du Grifaleon que son vol en commençoit de beaucoup à affoiblir: de sorte qu'Agefilan ne pouuoit plus continuer son alaigresse & agilité acoustumee, Au moyen dequoy en peu de temps le monstre s'aprochoit du bord de la mer pour aller deuorer sa proye, quand le Cheualier delibera d'acheuer le reste du combat à pic, quelque fortune qui en peust auenir. Et partant ayant laissé son destrier volant tout mouillé sur l'arene du riuage, & renforçant son bon cueur par la presence de sa Dame qu'il voyoit passee de grande crainte sur la froide roche ou elle estoit assise, il prit sa longue hallebarde à deux mains & en ietta tel coup dās l'inférieure machouere du monstre, que tout le bord de la marine fut taint en rouge, par le sang que commença à ruisseler de la playe. Le monstre forcé par l'aspre douleur, se ietta rudement contre le Cheualier, auquel il saisit avecque les dents le fer de la hellebarde qu'il guindoit contre luy, d'une horrible secousse l'enuoya tomber assez loing avec son baston qu'il ne voulut onc abandonner. Alors l'espouuentable beste pensant auoir gagné victoire, commença à sortir hors de la mer & à ramper sur le sablon à gueule ouuerte pour aller deuorer la Princesse: mais Agefilan desesperé, & estimant que sa force ne pourroit estre suffisante pour resister à vn tel effort, entra en telle rage, qu'il

delibera de s'enfeuelir le premier dans le sepulchre que lon auoit apareillé à sa Dame: & ne pensant à la bonne fortune qui luy deuoit auenir, se ietta dans la gueule du monstre, ou il entra, comme dans vne grande cauerne avecque sa hallebarde toute droite, & dist à haute voix: Puis que ie n'ay sceu defendre vostre vie, prenez en gré, ma Dame, le piteux sacrifice que ie fais de la mienne, à fin qu'apres auoir si long temps esté separé par le malheur en nostre viuant, nous soyons aumoins apres la mort assembles dans ce triste tombeau: Il n'eust si tost acheué ces paroles que le monstre voulut rudement fermer la gueule pour l'engloutir, mais ayant rencontré assez pres de la gorge la hallebarde toute droite en facon de baillonneau, il s'enferra tellement la machouere de dessus du plus grand fer, & celle de dessous du plus petit, que la douleur l'empescha de les pouuoir ioindre, demonrant la gueule bée sans auoir la puissance de l'ouurer, ny de la fermer d'auantage. A ceste nouvelle occasion de la victoire, Agefilan reprit cueur à la facon de ceux qui retournent de pasmoison: & mettant la main à l'espee pendante à son costé, il la repassa quatre ou cinq fois iusques à la croisée par le dedans de la gorge du monstre, qui commença à reuomir par ces nouvelles playes, vne si grande abondance de sang, que le Cheualier fut contraint de saillir dehors, le laissant debatre sur le riuage iusques à ce que ses yeux clos & ternis eussent donné le signe de sa mort. Or les habitans de l'Isle meuz d'une vaine religiō, encores qu'ilz fussēt fort esbahis de la prouesse du Cheualier inconnu, qui auoit occis celle espouuentable beste, neantmoins ilz estimerēt que ce seroit vne nouvelle occasion au dieu Teruagāt de se courroucer, & d'enuoyer encore vn coup son armee de Farfadetz pour piller & fourager leur Isle, tellement qu'ils conclurēt entr'eux de lui faire diuers sacrifices

& pour plus facilement l'apaiser arrestèrent qu'ilz luy immoleroient le Cheualier qui auoit occis le mostre ministre de sa vengeance. En ceste deliberations pensans prendre Agefilan tout vif, ilz le vindrent enuironer de longues picques, & de haches, luy crians qu'il se rendist autrement qu'il estoit mort. Dom Agefilan fut fort estonné quand en lieu des graces que ces vilains luy deuoyent rendre pour les auoir deliurez d'une telle captiuité, il se vid ainsi assaillir meschâtemēt: Si estraignit l'espee au poing, & mesprisant telle canaille se vint lancer au mylieu de l'endroit ou il vid les armes plusepoisses, faisant voler à son arriere les testes de deux archiers qui estoient vn peu trop pres de luy: puis fauchant de son espee par grande force, en tailla deux autres en deux pieces par la moytié du corps, & eut encores acheué le tiers, n'eust esté qu'il rencontra la hante d'une hallebarde qui engarda de passer le coup. Mais comme cestuy là le vouloit ferir sur l'armet, il receut le coup sur son escu, & luy iettant vn estoc par le dessouz luy fourra l'espee dans l'estomach iusques aux gardes, tellement qu'il en transperça encores vn autre qui estoit derriere luy, & ainsi tōberent ces deux morts sur le sablon. Je ne sçay à qui lon peust comparer ceste façon de cōbat, sinon à celuy que le Loup & l'Aigle font entre les brebis & colombes: car Agefilā ne rua coup qu'il n'en renuerfast deux par terre, & quelquefois trois en façon que ce quartier du riage estoit tout rouge de sang, & tout couuert des corps occis. Les prestres du dieu Teruagant vindrent à ceste tuerie, & reprindrent fort aygrement le peuple d'assaillir ainsi celuy par lequel leur dieu auoit voulu imposer fin à son courroux. Chacun donc se tenant quoy, Agefilan retourna vers sa Dame, qu'il dechaina hastiuement, taillant quelquefois les chesnettes de fer avec son poingnard, quand il ne les pouuoit desnouer à son aysé. Ce

pendant les prestres arriuerent deuers luy, & s'agenouillās le voulurent adorer comme cōpagnon & prophete de Teruagant: & de fait avecque leurs encensoirs ilz commencerent à le parfumer des diuines odeurs. Mais le bon Agefilan les leuant gracieusēmēt par la main, leur respondit que ces honneurs apartenoient au seul Dieu immortel, & non à luy, qui estoit vn pauvre pecheur. Alors les prestres luy dirēt, sachez, seigneur cheualier, que la cruelle coustume obseruee de si lōg temps en ceste Isle, ne pouuoit estre mise à fin sinō par le cheualier qui y viendrait sur vn destrier volāt: & ainsi le trouuions-nous dans les secretz que nostre dieu Teruagant nous a laissez par escript. Et par-ce q̄ c'estoit vne chose impossible à hōme mortel de faire ce que vous auez fait pour acōplir la profecie, nous auōs estimé que vous soyiez mahomet, ou Iuppin, les deux cōpagnōs du dieu que nous adorons, qui en tel habit soyiez venu deliurer nostre pauvre peuple de son anciēne misere. Au moyen de quoy il vous plaira nous permettre d'adorer & honorer selō nostre petit pouuoir, vostre puissāte diuinité cachee souz ceste figure de cheualier. A ces motz ilz s'agenouillerēt de rechef deuant luy: mais Agefilan les releua incontinent, & leur dist, mes amys, ie suis vn hōme mortel cōme vous qui par ma hardiesse, & mō bōheur me suis acquis ce que vo' imputez à la diuinité, de laquelle ie ne suis en riē participant. Et à ceste cause reseruez ces hōneurs a celuy auquel ilz apartiēnent: car quant à moy, si i'ay meritē quelque chose enuers vo', ie me cōtenteray pour toute recompēse de quelque voyle qu'il vous plaira me faire dōner, pour couvrir ceste damoyelle que vo' voyez icy toute nuē. Les prestres mirēt incontinent la main à vn petit esclin duquel ilz tirerent maints precieux atours, les vns faitz de corō & de fine soye, les autres de fil d'or & de fil d'argēt, & entre autres choses y auoir

auoit vne riche coiffe de soye cramoisie faite par carreaux, en chacun desquelz lon voyoit vne fine perle, atachee à petis cordons de fil d'or de Cypre. De ces paremens dont les prestres auoyent acoustumé d'orner leurs Idoles, la Princesse Diane se reuestit avec telle grace, qu'estant ainsi habillée lon ne l'eust peu proprement cōparer sinon à ces belles Nymphes que les excellens ouuriers paignent acoustrees de linges volans, au trauers desquelz lon peut comprendre & voir quelquefois la perfection de leurs plus secretes beautez. Agefilan ayant remercié les sacrificateurs de ce qu'il leur auoit pleu faire en sa faueur, remonta sur son Grifaleon, & assit sa Dame deuant luy entre ses bras sur vn petit coiffinet, qui s'estoit trouué dans l'escriu des prestres tout à propos : puis prenant son vol par la celeste contree, il laissa autant d'esbahissement à ceux qui le regardoyent, cōme il emportoit avecques luy de contentement, tenant fort amoureusement embrassée, celle qu'il aimoit mieux que sa propre vie. La Princesse encores estonnée du peril d'ou elle sortoit, se laissoit baiser & acoler au plaisir de son amy, lequel desiroit fort à descendre en terre pour prendre le dernier point de ses affectiones. Mais elle reuenüe à soy, ne voulut permettre au ieune Prince de souuēt continuer ses lascifs atouchemens, & luy dit : Helàs ! mon Seigneur mon ami, encores que vostre ardent amour enuers moy, & le myen non moindre enuers vous, atiecque les traux que vous auez soufferts pour me deffendre de mon malheur, m'ayent entierement renduë vostre, si ne craindray-ie à vous supplier affectueusement pour ceste heure, qu'apres n'auoir osté d'vne crainte, vous ne m'en vueillez point si tost redonner vne nouuelle, outre celle que i'ay de me voir ainsi emporter en vne façon non acoustumée. Je feray tout ce qu'il vous plaira, ma Dame (respōdit Agefilan) moyen-

nant que de vostre part, vous me recitiez en quelle façon vous estes tombee au danger ou ie vous ay trouuee, & apres, ie vous diray par quel moyen i'ay recouuert ce cheual volant, avec les autres auētures qui me sont auenües depuis que ie vous perdy dans l'Isle Verde. En celà vous obeiray tresvolontiers (dit la Princesse) & ainsi commencerent à se reciter l'vn à l'autre, ce qui leur estoit auenu depuis leur separation. En ce gracieux deuis ilz auiserent vne petite Isle assez plaisante, dont les habitans estoient Chrestiens, & par-ce que le soleil rommençoit à se coucher, ilz s'en allerent heberger au chasteau d'vn vieil gentil homme fort honorable & de bonne renommee, lequel les recut humainement, & fit coucher le Cheualier avec luy, & la Princesse en vne autre chambre à part avec vne sienne fille. Toute la nuyt Agefilan ne fit que songer à sa Dame faisant maints beaux discours à tout par soy.

Helàs (disoit-il) receuray-ie donc tant de belles occasions pour adoucir celle flamme amoureuse qui tant me tourmente, sans toutesfois oser prendre la hardiesse d'exccuter ma volenté avecque vne chaste intétion de mariage ? O couardie trop grande ! Desormais ie ne suis plus pour imiter la crainte que i'eue en l'Isle Verde de troubler le sommeil de ma Dame, ce matin que ie la perdy, la delaisant seul pour courir apres vn cerf : car si tost que le soleil aura rechassé les tenebres de ceste nuit, ie la cōduiray en lieu ou ie pourray recueillir les vermeilles roses de son beau printemps, lesquelles pour trop tarder pourroyent perdre leur saison, & la beauté dont la tendre rousée les rend maintenant de beaucoup plus gracieuses qu'il ne seroit possible de penser. Je suis assez certain que lon ne sçauroit faire aucun seruice aux Dames, qui leur soit plus doux ny plus fauoureux que cestuy cy, encores que quelques-fois elles facent semblant d'en esire desdaignees, mon-

stant quelques faulſes larmes ſur le viſage, pour couvrir l'extreme ioye qu'elles en reçoient au cuer. Or ne ſuis-je plus deliberé de laiſſer pour vn foible refus, ou pour vne fainte colere, à acôplir ce qu'auecques tant de trauail i'ay maintenant en ma puiffance: car i'aime mieux (ſi en ceci ie deuois faire quelque faute) qu'on me reproche ma trop grande hardieſſe, que de me laiſſer aucun moyen pour me plaindre à l'auenir de moy-meſmes & de ma laſche couardie. Ainſi diſoit Ageſilan, ayant deliberé de faire encores mieux qu'il ne diſoit, ſi l'oçaſion du iour enſuyuant euſt eſté pareille à ſa volonté. Eſtant donc le matin venu, apres auoir remercié ſon hoſte, il partit auecques ſa belle Nimphe deuant luy, prenant le chemin de l'air au grand eſbahifſement de tous ceux qui le regardoient. Mais au departir de l'Iſle, il entra en vne grâde mer, par laquelle tât ſ'en fault qu'il peult iouyr de ſes amours côme il auoit deliberé, qu'il ne peult apercevoir tout ce iour, ny toute la nuit eſuiuât, aucune terre, cōbien qu'il euſt haſté le vol de ſon deſtrier trop plus prōptemēt que de couſtume, à fin de trouuer lieu propre pour executer ce que ſes paſſions amoureuſes luy commandoient. Il auoit deſia volé tout le long du deuxieſme iour quand de loing il aperceut vne grande Nef flotante à trois voyles peintes: dans laquelle il ſe delibera de deſcendre tant pour ſe repaiſſre, comme auſſi pour ſe reposer luy & ſa Dame qui ne ſe pouoit plus tenir ſur ſon coiffinet, tât elle eſtoit laſſe, & affoyblie par le trauail, & par la faim qu'elle auoit enduré en ces deux iours. Ceux du dedans de la Nef voyant de loing voler le Grifaleon, furent fort eſbahis penſans que ce fuſt quelque ennemy d'enfer qui habitaſt en celle mer, & ſortirent quelques vns en armes ſur le tillac: mais aperceuant la princeſſe Diane embrasſée par le Cheualier qui la tenoit deuant luy, ilz ſe retirerent à fin de

n'eſpouuenter le deſtrier volant & pour laiſſer entrer la Damoyſelle. Or ſi toſt que le Grifaleon fut deſcendu dedans la nef, la Roine Lardenie aperceut ſa chere maiſtreſſe qu'elle auoit tant regretee comme penſant l'auoir perdue. Si la courut prendre entre ſes bras par grand amour, & diſt au Cheualier, Rendez-moi ma bien aymee maiſtreſſe, car elle m'appartient, & non à vous. Ageſilan voyant aſſez pres de luy dom Falanges d'Altres ſon pere, & vn peu plus auant le Roy Amadis de Gaule, & la Roine Oriane, recogneut incōtinent que c'eſtoit la nef de laquelle ilz s'eſtoient ſeparez par la tempeſte. Lors non moins ioieux pour auoir recouert ſi belle compagnie, que faché pour auoir perdu l'oçaſion de iouyr de ſa Dame, il deſcendit de deſſus le Grifaleon & hauſſa la viſiere de ſon armet, ſe donnant à cognoiſſre à tous les Princes, qui furent fort eſtonnez & aylés de ſon eſtrange arriuee. Puis apres les reuerences & careſſes qui ſe peuuent trop mieux pēſer que dire, ilz nauiguerent tous enſemble en extreme ioye, deuifans par grand merueille des eſtranges & incredibles auentures du Prince Ageſilan & de la princeſſe Diane. Or pour le preſent nous les laiſſerons voguer en ce plaifir, à fin de vous reciter la triſteſſe en laquelle eſtoit l'infante Sidere pour l'abſence de ſon Rogel, qui eſtoit lors enuelopé es nouuelles amours de la Roine de Canabee.

Du dueil que menoit l'Infante Sidere pour l'abſence de dom Rogel & comme elle ſe mit en ſa queſte avec ſes deux ſœurs.

CHAP. XCIIII.

TAndis que dom Rogel employoit tout ſon ſoucy à gagner la bonne grace de la royne Florelle de Canabee, la triſte infante Sidere éploioit tout ſon

son temps à regretter, plaindre, gémir, & lamenter son absence: tellement que vn iour, estant dom Brianges en la cité de Gamal, elle delibera s'en aller avecques ses deux sœurs sans autre compagnie en toutes les villes, chasteaux, bourgs, & villages de l'Isle, à fin de s'asseurer si son Rogel estoit encores en vie ou non. Et de fait si tost qu'elle fut aucunement guerrie de sa fièvre, elle sortit du chasteau ou dom Brianges l'auoit conduyte, & commença à faire sa queste: & par ce que elle scauoit bien que dom Brianges estoit dans Gamal & qu'il la voudroit destourner de son entreprise, comme il auoit fait plusieurs fois en vsant de maintes dissimulations, elle ne voulut aller en la cité, ains print son chemin à costé gauche de Gamal, & commença à s'esloigner de son amy, pensant s'en aprocher le plus. Ce pendât dom Rogel auoit si bien sceu harâguer enuers sa nouvelle Dame, qu'elle n'auoit autre que luy en sa pensée, & ne parloit que de luy, & de sa vertu, ramenant de iour & de nuict sa prouesse, ses haultz faitz d'armes, sa beauté, & l'ancienne renommée de son illustre sang. Ainsi la royne Florelie auenglee de l'amour du ieune prince, & ne pouuant plus souffrir son ardeur sans la descouurir, apella vn matin en sa châtre plus secreete, vne vieille dame nomme Garlonne, en qui elle se fioit de ses plus secretes affaires, comme en celle qui l'auoit alaitée en son enfance, & serui de nourrice. Si tost qu'elle fut venue, la Royne apres quelques autres deuis, comença à parler de dom Rogel, & apres en auoir dit infinies, louanges, elle cōtinua ainsi son propos, Certainement, m'amy Garlonne, si ie n'auois pris en moy vne ferme resolution de iamais ne me marier, & si l'amour de mon premier espoux ne m'eust fait auoir en horreur les secondes nopces, peut estre q̄ maintenât ce beau ieune Prince eust gagné vne partie de mō affectiō, car ie vous iure, ma chere nourrice, q̄ depuis la mort

de mō mary Neophone, cestuy seul à peu flechir ma rigueur, & contraindre ma poitrine obeïllante à resentir & recognoistre quelques estincelles de mes premieres flammes amoureuses. Mais plus-tost la terre me puisse engloutir en ses abîmes, & les dieux me perdre de leur foudre, que ie viole celle sacree chasteté laquelle i'ay iurée aux cēdres de mon cher mary. Il a eu mes premieres amours en son viuant, il les a emportees avecque luy en mourant, & maintenant ie veux qu'il les garde encores avecque luy dans son tombeau. A ces mortz la belle Royne commença à plorer à grosses larmes, & lors sa nourrice pour la cōsoler, luy dist, Et comment, madame, estes-vous donc deliberee de passer ainsi la fleur de vostre ieunesse sans plus experimenter les plaisirs de l'amour, & sans iamais sentir la ioye que les enfans donnent à leurs meres en leur enfance par mille petites folatrics? Pensez-vous que ceux qui sont au tombeau, ayent aucun soucy de telles simpleesses, & friuoles superstitions? Je ne dy pas que si le Roy Dardanin de Canarie, & le Prince de Malerne, vous ont semblé de mauuaise grace & indignes de vostre beauté, vo^s les deussiez accepter pour espoux: mais à quelle occasiō contredirez-vous à vostre plaisir? pourquoy prendrez vous les armes cōtre l'affection qui vous est la plus douce & agreable? quelle raison vous empeschera d'aymer celuy lequel seul entre tous les autres vous à peu plaire? Vous souuient-il point en quelle contree vous estes? car toutes les Isles circonuoyfines vous sont ennemyes, & n'y a aucun de ceux qui regnent en icelles, lequel ne desire vostre ruyne, & qui ne soit prest (peut estre plus tost que ne pensez) à vous mener vne cruelle guerre. O quel apuy ce vo^s seroit, si vn ieune prince tant courageux, & duquel vous auez experimenté la prouesse à l'œil, se trouuoit lors à vostre secours! O combien vous seriez redoutée de voz

ennemys, si vous estiez alliee avecque ce superbe & illustre sang de Grece, dont le seul renom fait estonner toute la terre! Certainement, madame, ie pense que les dieux enclins du tout à vostre faueur, vous ont voulu enuoyer ainsi miraculeusement le prince Grec, à fin de mettre vostre frere en liberté, & vostre royaume en assurance. De telz propos la dame Garlonne enflamma tellement le cuer embrasé de la Royne, que de là en auant elle n'eut plus aucune honte deuant les yeux, ny crainte quelconque en sa pensee. Partant soudain elle commanda que lon appellast ses prestres, & s'en alla en son oratoire, ou apres auoir prié les Dieux de bienheurer son futur mariage, elle fit sacrifier trois moutons blâcs, & trois brebis noires, considerant avecque ses deuins dans les entrailles souspirantes des bestes sacrifiees, si quelque encombrer ne luy auendroit point de son entreprise. Mais helâs! de quoy seruent les veuz, les temples, & les oracles à celuy qui auéglé par l'amour n'à plus aucuns yeux pour preuoir son futur dōmage, ny sens quelconque pour se gouverner par raison? Ainsi la miserable Royne peu certaine de ce qu'elle deuoit faire, & dire, pensoit & repensoit mille diuerses pensees en sa fantasie: de iour elle menoit dom Rogel par la cité, luy montrant ses richesses & superbes edifices, & sur le soir le ramenoit en son Palais, ou les tables dressees, luy faisoit redire tout ce dont au parauant elle l'auoit ouy parler: Quelquefoys elle commençoit vn propos, puis soudain le laissoit à moytié, & l'heure venue que chacun estoit retiré pour reposer, la triste Florelle ploroit, gémissoit, & soupiroit incessamment, sans pouuoir dormir tant soit peu, ayant tousiours deuant les yeux la bonne grace & la beauté de son amy. Or dom Rogel s'aperceuant combien il estoit aymé de la Royne, se delibera d'essayer par tous moyens à prendre d'elle le dernier

gage de son amour: Et de fait estant vne apresdinee seul avec elle en sa chambre, & voyant le temps & le lieu aucunement oportuns pour executer ses desseings, il commença à luy tenir maints propos amoureux, montrant vne extreme affection: puis aioustant l'effort à la parole, la prit entre ses bras, & s'enflamma tellement, & elle aussi, que bié tost ilz eurent pris l'vn de l'autre tout le comble de la felicité que les amans peuuent attendre de leurs amours & cōtinuerēt si bien deormais en tel deduyt que les marques en aparurent. Ce pendant l'Infante Siderre qui s'estoit mise en queste de dom Rogel, voyant qu'elle n'en pouuoit sçauoir nouuelles en aucune part de l'Isle, delibera retourner à Gamal pour de là s'ēbarquer avecque le Prince dom Brianges, pensant que dom Rogel fust iamonté sur mer, & eust pris la route de Perse pour la luyure. Mais si tost q̃ l'Infante fut arriuee à deux lieues de la cité, le commun bruyt luy fit entendre qu'un ieune Prince de Grece estoit arriué à la cour, auquel la Royne faisoit maintes faueurs, & se plaisoit fort en sa compagnie, de sorte que chacun pensoit que bien tost ilz se marieroient ensemble. Adōc l'Infante se douta que ce ieune Prince de Grece fust dom Brianges, & partant pour sçauoir si ses nouuelles amours ne l'empêcheroient point de la conduire iusques en Perse, elle enuoya sa sœur Sindaïde en la cité, pour entendre l'intentions de dom Brianges. Le lendemain de grand matin l'Infante Sindaïde, guidée par le filz de celuy en la maison duquel ses deux sœurs l'atendoient, print son chemin vers Gamal, ou elle arriua à l'heure que la Royne conduite par dom Rogel & dom Brianges, sortoit de son Palais pour aller au tēple de Iupiter faire ses prieres acoustumees: Elle estoit acoustree d'un habillemeēt de toyle d'argent fort clere, & doublee de satin iauune, & luy pendoit sur le seing vn diamant de va-

de valeur inestimable. Ses cheveux estoient entrelasiez avec vne guirlande de fine pierrerie, montrant au reste vne cōtenance tāt gaye & amoureuse, que chacun pouoit aysement cognoistre combien elle s'estimoit contente de sa felicité. Dom Rogel estoit habillé beaucoup plus richement & brauement que non pas elle: car il portoit vn manteau fait de soye blanche & de fil d'or que la belle Florelle auoit fait & tissü de sa propre main: Son col estoit enuironné d'un carcan d'esmeraude, ayant double fermail, l'un deuant taillé en vn gros ruby, l'autre derriere, caché souz vn large safir qui rendoit vne merueilleuse clarté. A ce mesme carcan pendoit à vn ruban de soye incarnate, vne medaille de fine Porcelaine enchaissée en or esmaillé à petis fueillages, qui representoit au naturel la belle Roine de Canabre qu'il acompagnoit: A chacune de ses oreilles pendoit vn pirope mis en œuvre fort industrieusement: Ses cheveux estoient frisez, cresprez, anellez & embaumez des plus souuesues odeurs de l'Arabie: ses yeux estincellans, & lascifz, son visage frais & poly, tous ses gestes amoureux & folastres, comme s'il eust seulement esté produit au monde pour faire la court aux Dames; & laisser flestrir la plus excellente fleur de sa ieunesse en oyssifues mignardises dans le giron des Damoysselles. Vous pouuez penser en quelle reputation l'eut l'Infante Sindaide, quand elle l'aperceut en tel equipage: mais voyant que lors n'estoit l'heure de parler à luy, elle le suyuit iusques à la porte du temple, ou il laissa entrer la Roine, par-ce que sa religion ne permettoit qu'il passast plus outre. Adonc Sindaide le tira à part, & se soupçonant assez de la verité, comença à luy dire en la presence de dom Brianges, Je croy monsieur, que vous estes assez auerty de la peine, du travail, & du peril de la vie ou ma sœur Sidere a esté reduite pour vostre infortune, & ne puis penser

que le Prince de Bèocie icy present ne vous en ayt dit la verité. L'extreme & chaste amour duquel elle vous ayme plus qu'aucune Damoiselle n'aima Cheualier, vous peut assez estre cogneu par l'essay que vous en auez veu en vostre presence, par la douleur qu'elle a soufferte pour vostre desastre, & par les plaintes qu'elle fait maintenant de vostre absence. Et quand bien son ardente affection ne seroit suffisante pour me faire obtenir de vous, la requeste que ie vous veux faire de sa part, si est-ce qu'il vous doit souuenir de la foy & promesse, laquelle vous lui auez donnée de la cōduire & rendre en la maison du Roy son pere, & nous aussi: car si vous estes tel que vous devez estre vous prefererez vostre foi iustement prestee en la faueur de trois patures Princesses estrangeres, à toutes les particulieres affections, & de vous, & de la Roine Florelle, lesquelles (selon l'incōstance acoustumee des choses humaines) seront aussi aysees de sa part à finir, comme elles ont esté faciles à commencer. I'ay veu les gracieusetez & caresses desquelles la Roine vous entretenoit, & l'humble & gracieux maintien par lequel vous taschiez à luy complaire, & en voyant ce que vous osez faire en public, ie puis aysement coniecturer ce que vous faites en secret, & au surplus, croire ce que la renommee à desia semé par toute l'Isle, & par les Royaumes circonuoyfins. Si donc vous auez delibéré d'abandonner la miserable Sidere en sa langueur, & vous donner entierement à celle qui pour le peu de cognoissance que vous auez d'elle, & elle de vous ne deuoit point estre si liberalle de sa personne en vostre endroit, à tout le moins souuiengne vous de la promesse que vous nous auez faite, & nous rendez en la maison de nostre pere, à fin qu'apres nous auoir mises en liberté, vous ne nous laissiez tōber en vne plus cruelle seruitude, & plus extreme malheur

que nous ne fumes oncq : ce qui auientra, si vous, auquel nous auons mis toute nostre esperance, nous delaissez ainsi seules & sans secours à ce besoing. Dom Rogel oyant ces propos se resouuint tellement de la beauté & bonne grace de l'Infante Sidere, & de leur mutuel amour, qu'il demeura tout perdu ne sachant que faire ny que dire, craignât que ses nouvelles affections ne luy eussent esté descouuertes : & fut encores en plus grand soucy voyant qu'il n'auoit aucun moyen de prendre honnestement congé de la Roïne pour faire son voyage de Perse : neantmoins apres auoir pensé & repensé maintes deliberations, il pria dom Brianges de s'en aller sur l'heure mesmes avecques Sindaide vers l'Infante Sidere, & la mener avecques ses deux sœurs au port ou leur Nef estoit ancrée & qu'apres auoir fait acoustrer leur vaisseau, & appareiller tout ce qui estoit nécessaire à leur nauigage, il l'en vint auertir, & que ce pendant il choisiroit le tēps plus propre pour declarer son intention à la Roïne, & pour son regard qu'il dissimulast le tout au mieux qu'il luy seroit possible, & fist ses excuses enuers l'Infante selon la discrétion accoustumée, de sorte qu'elle ne trouuast point mauuaise son absence. Mais pendant leur deuis, la Roïne ayant acheué ses prieres, sortit du temple, & voyant dom Rogel si confuses en ses gestes, & paroles, luy en demanda l'ocasion. Ma Dame (respondit-il) ceste Damoyelle me prioit de de m'en aller avecq elle pour soutenir quelque sienne querelle, dont elle me parloit, & par-ce que ce me seroit chose trop griefue de me eslongner maintenant de vous, ie priois mon compagnon vouloir prendre celle charge pour moy : ce qu'il m'a promis faire moiennât qu'il vous plaise lui donner congé. Le luy donne (respondit la Roïne) à la charge que incontinent apres auoir acheué son entreprinse, luy mesmes nous en viendra ra-

porter les nouuelles. Adonc le Prince dom Brianges lui voulut baiser les mains, mais elle ne le permit, ains l'embrassa, puis en la compagnie de l'Infante Sindaide, il alla en son logis prendre ses armes de fin or, & estant monté à cheual sortit de la ville pour aller trouuer l'Infante Sidere. Et fit si bien son meslage par l'intelligence qu'il auoit gaignee par les chemins avec Sindaide, que pour lors elle ne sceut rien du secret de dom Rogel & la mena avec ses sœurs au port ou estoit leur nef, à fin d'executer le surplus de sa charge.

Comme dom Rogel de Grece, dom Brianges de Beocie, & les Infantes de Perse, departirent de Canabee : & comme la Roïne Florelle mourut de douleur pour le depart de dom Rogel.

CHAP. XC VII.

L'Amour contrainant souuentefois ses esclaves, à se douter le plus des choses, desquelles ilz se deuroient tenir les plus assurez : & la renommée coustumière de diuulguer les plus secretes entreprises auant qu'elles ayēt à peine esté conclues & bien deliberees, furent occasion à la Roïne Florelle de se soupçonner du depart de son Rogel : car aperceuant à son visage combien estoit refroidie sa premiere affection enuers elle, & ayant entēdu que le Cheualier aux armes d'or dom Brianges de Beocie faisoit equiper vne nef, elle ne peut moins penser sinon que son amant assouuy & lassé de ses delices, voulut s'embarquer à la desrobee. A raison dequoy l'amour, la fureur, & la colere commencerent tellement à luy tourmenter l'esprit, qu'il luy resta bien peu de discretion, ny pour dissimuler son ennui, ny pour y pourchasser quelque bon remede : & le meilleur moyen dōt elle s'auisa en ce trouble, fut de se retirer en sa chambre pour y plaindre son malheur à tout par elle, à fin de

ne

ne faire en public quelque acte indigne de sa maiesté. Ce pendât dom Rogel qui ne faisoit sinon elpier l'heure plus oportune pour luy descouvrir son entteprise, & sachant qu'elle estoit seule, monta en sa chambre, alors qu'elle estoit plus passionnee, mais ainsi qu'il pensoit luy faire la reuerence selon sa coustume, & luy tenir quelque propos, elle interrompit sa parole, & commença furieusement à luy dire. A-vous bié peu, Cheualier desloyal & infidelle, entreprendre de vous departir ainsi de moy sans mon congé? Auez-vous si facilement mis en oubly nostre amour, voz promesses, & la miserable Florelle laquelle vous ne pouuez priuer de vostre presence, que vous ne la priuez pareillemét de la vie? Quelle ocasion vous ay-ie donnee, quel mauuais traitement vous ay-ie fait, pour vous en fuyr ainsi? Ou allez-vous? Quelle est la raison de vostre depart? Ou pensez-vous trouuer creature au monde qui vous porte telle affection que moy? Helàs! ie vous prie par ces larmes, par voz promesses, & par nostre mariage encōmancé, si iamais i'ay meritè quelque chose enuers vous, si iamais i'ay fait chose qui vous fust agreable, & si iamais vous fustes flechy par prieres, prenez pitié de moy, ayez cōpassion de ma ruine, & abandonnez l'entreprisè de vostre depart. Pour vous le roy Dardanin de Canarie m'a en haine: pour vous le Prince de Malerne m'a en horreur: pour vous tous leurs confederes & allies s'apareillent à la destruction de mon Royaume: & pour vous ma bonne renommee qui me faisoit exceller sur toutes les Princesses du monde, est miserablement estainte. Que feray-ie apres vous auoir perdu? Pourray-ie voir ardre ma cité deuant mes yeux? Attendray-ie que mes ennemys m'emmeinent captiue en mon viuant? Suplieray-ie de mariage ceux que i'ay declarez par mes embassadeurs indignes de moy? Regardez ie vous supplie, comme apres vostre depart

ie n'auray autre moyen de me consoler en ma douleur, sinon par vne miserable fin de ma vie. Dom Rogel combatu de diuerfes passions, ayant cuy parler la Royne, demeura quelque temps tenant les yeux fichez en terre, sans estre certain de ce qu'il deuoit respondre: Finablement l'Infante Sidere eut à ce coup le plus de puissance sur luy: & partant il respondit à la Royne en telz ou semblables propos: Je ne veux point nyer, ma Dame (cōme vous scauez trop mieux dire) que ie ne vous soys de beaucoup redeuable, & vous assure que tant que ie viuray, le nom, l'honneur, les bien faitz, & la courtoysie de la roine Florelle demeureront constamment en mon souuenir, pour les recognoistre à chacune foys que l'ocasion m'en sera offerte. Quand à ma fuytè, Je vous assure bien que iamais mon intention ne fut de partir de vostre cour sans auoir premierement pris conge de vous, & quand au mariage, ie ne vous en fis onc aucune promesse, comme de fait ie ne pourrois, car il ne me seroit bien seant de contracter vne alliance sans le consentement de tant de grans Princes ausquelz i'apartiens, mesmemét auecq' vne personne de religion cōtraire à la mienne. Mais puis que vous auez tant loué l'entretienement des promesses, vous ne deuez vous plaindre de mon depart: veu que l'ocasion d'iceluy est fondee sur la foy que i'ay iuree & promise aux trois Infantes de Perse de les rendre en la maison du Roy leur pere, & les acompagner en leur voyage pour les ayder de mon secours, s'il auient qu'elles en ayent besoing. La Royne ne pouuant souffrir qu'il continuast sa responce plus outre, regarda sa façon de faire, & enflammee d'une extreme furie, luy dist, Ah! desloyal, iamais vous ne sortistes de celle illustre lignee d'Amadis de Gaule, dont vous vous vantiez: & onc les flancs de la belle Princesse d'Apollonie ne furent empéschez de vostre malheureux

corps: ains ie croy plustost que quelques durs rochers vous ayent produit en lumiere, & les Tigres & Liepards allaité dedans leurs cauernes. O Dieu Iupiter! peux tu bien voir, & souffrir vne telle indignité deuant tes yeux sans en prendre la iuste vengeance? Ie l'ay trouué nu, tremblant, & affamé sur le riuage: Ie l'ay secouru en plus grande necessité ou il fut oncq: Ie l'ay receu (ò moy misérable) pour Seigneur de mon Royaume, & de moy: Et ores pour toute recompense il me vient chanter vne religion contraire, sa foy iuree, des Infantes de Perse, & autres telles calumnieuses resueries. Mais pourquoy dissimule-je mes plaintes? A-il ietté vne seule larme me voiant presque consumée en mes pleurs? A-il seulement tasché à me consoler de paroles? A-il montré le moindre signe de douleur, me voyant atteinte de ceste mortelle tristesse? O cruel! O felon! Va va, passe au Royaume de Perse, fais hauffer les voiles, ie ne te tiens point, car ie ay bonne esperance que si tost tu ne feras entré dans la mer, que l'hyuer les vens, les vagues, les rochers, qui ont esté vne fois plus gracieux en t'õ endroit, que tu n'es maintenant au mien, t'aprestierõt le second & dernier naufrage, & ne te laisseront plus si facilement eschaper la punition de la mort, que mille fois (cõme ie puis coniecturer) tu as merites par cy deuant. Et bien qu'alors la douleur de t'õ depart m'ait fait mourir, si elle que le bruit de ton naufrage qui viendra iusques à moy aux champs Elisees, me donnera quelque contentement: Ou quand les Dieux voudroyët estre si iniustes que de te laisser passer en vie au Roiaume de Perse: saches qu'aussi tost que mon esprit aura abandonné ceste chair fragile, il se trouuera nuit, & iour deuant toy, & te tourmentera de fantômes, & amenera avecques soy les furies pour son aide, de forte que la mort te seroit lors beaucoup plus gracieuse qu'une vie tant trauaillee

Mais helàs! que dis-je? ou suis-je? que fais-je? O cruelle & desraisonnable force d'Amour! encores que ce desloyal par sa desloyauté me cause le mourir, ie ne puis, sinon contre ma volonté, souhaiter la vengeance de son forfait. Non, non, Dieux immortelz, pardonnez à son inconstance, & vous souueigne qu'en tout ce monde vous n'avez creé vn seul homme parfait, & que vostre misericorde doit estre autant grande, comme les offenses humaines sont execrables. La Roynne auoit à pene acheué ces propos. quãd la douleur extreme, & les angoisses mortelles, qui l'oppressoient, la firent tomber pasmee de sa hauteur: & lors ses Damoyelles luy acoururent & la mirent sur son lit, luy arrosãt le visage d'eau froide pour la faire retourner à soy. Ce pendant vn Escuyer enuoyé par dom Brianges, arriva au Palais, & ayant fait appeller dom Rogel, lui dit que la nef estoit preste, & que l'Infãte Sidere & les nochers voyãs le vent propre, l'atendoyent en bõne deuotion pour departir incontinent. A ces nouuelles dom Rogel sachant bien qu'il ne pourroit auoir autre respõse de la Roynne, fit la reuerence à toute la compagnie & s'en alla avec l'Escuyer, encores qu'il eust fort voulu donner quelque bonne consolation à la desolee Florelle, luy promettant de bien tost retourner pour obeir à tous ses commandemens. Tantost après la Roynne retourna de pasmoison, & ne voyant plus son amant deuant elle, à peu qu'elle ne forcena: puis ayant pris pour toute compagnie sa nourrice Garlonne, monta au plus haut du donion de son Palais, d'ou elle voyoit assez à cler, le port, & la nef toute preste ayant vne bâderolle ou estoient les armes de dom Brianges, voletante dessus le mast: Et selon que disent tous les historiens en ce lieu, encores que tout ce iour, & les autres precedens il n'eut cessé de pleuoir, toutes fois la bruine & les pluyes cesserēt enuiron l'heure que la triste Roynne ache-

uoit

uoit ses plaintes, comme si par telles doléances elle eust flechi & apaisé les vés'les pluyes, & orages pour entendre ses regrez. Au moyen dequoy elle peut voir (comme ie vous ay dit) la nef de dom Rogel preste à voguer: & partant à fin de n'oublier aucune des experiences, qui sembloient lui pouuoir donner quelque consolation, elle voulut de rechef s'essayer à vaincre par humbles prieres, la rudeſſe de son amant, & dit à sa nourrice Garlonne: Vous voyez, ma grande amye comme ce desloyal m'abandonne: toutes les choses necessaires à sa nauigation sont appareillees, & ne lui reste qu'à s'embarker: Ie vous prie m'ottroyer ce dernier seruice, car il vous souloit honorer, prifer, & se fier en vous plus qu'en aucune autre de ma maison: & vo' seule pouuez en son endroit beaucoup plus que toutes mes Damoyſelles ensemble. Vous luy irez donc remonstrer que ie ne suis parente ny alliee des Roys de Russie, de Gaze, ou des Messagettes qui maintes-fois se sont essayez à saccager ses terres, & occir son pere & ses ayeulx: qu'il n'a aucune occasion de me refuser ce que ie luy demande, & dont ie le supplie: que ie ne le requiers d'autre chose pour la dernière faueur qu'il octroyera à celle qui l'ayme plus que soy-mesmes, sinon qu'il laisse passer le temps mal propre à son nauigage, & qu'il attende à venir le printemps en ma cour. Ie ne le supplie plus du mariage qu'il a promis, & ne veux point empescher qu'il ne tienne sa promesse aux Infantes de Perse, Ie ne luy demande sinon qu'il passe avecq' moy le temps, qu'il ne peut seurement employer ailleurs: à fin que ce pendant ie me puisse acoustumer à souffrir mes infortunes en patience. La Royne ayant avec maintes larmes prié sa nourrice de faire ce message vers dom Rogel, fut incontinent obeie, & combien que l'ancienne Dame Garlonne eut acoustumé d'aller en litier, toutes-fois pour aller plus diligem-

ment, elle monta sur vne haquenee, & au grand gallop prit le chemin qui conduisoit vers la mer: mais elle ne peut si tost estre arriuee que les deux Princes ne fussent embarquez, & entrez bien loing en la haute mer, tellemēt qu'elle ne peut faire son message. Mais la miserable Florelle ayant veu démarer la nef de son amant, & enfler les voyles d'un vent, qui leur donnoit droittement en poupe, comença à se desesperer avecq' vne angoisse si mortelle, qu'il n'y eut chose en elle assez puissante pour resister à la douleur, de sorte qu'apres maintes autres lamentations, elle se pasma iettant premiere-ment un hault & effroyable cry, auquel toutes ses Damoiselles acoururent, & l'eporтерent toute transie sur son lit, ou à force d'eau froide & de vinaigre elles la firent retourner aucunemēt à soy, & lors iettant un hault soupir, elle dit, pensant encores voir son amant: Demeure, cruel, demeure encores ce seul iour avec moy, à fin que si tu ne m'as voulu durant la vie departir aucune faueur, tu aides pour le moins apres ma mort, à mettre mes froides cendres en leur tóbeau. La Royne à pene auoit acheué ces paroles, que la voix & la vie l'abandonnerent, laissant toute sa cour effrayee d'un si piteux accident. Et comme le Prince Bruzanges & la belle Arſeure la pleuroyent à l'entour du lit, un Geant de demesuree grandeur s'aparut pres le seuil de l'huis de la chambre, & sans demener aucunement les piedz, vint comme glissant, iusques au lit ou gisoit le corps de la Royne, lequel il descourrit, & avecque un rasouer qu'il tenoit en la main dextre, comença à luy fendre l'estomac disant aux assistans, Pourquoi pleurez-vous? quand elle ne fust trepassee aujourd'huy, l'enfant que ie luy viens tirer du corps, Peult faict mourir à son acouchement. Ainsi le Geant prit son fruyt duquel elle estoit grosse de quatre moys & l'ayant enuolopé en certain parchemin vierge, & mis

dans

dans son sein, sans qu'aucun de la compagnie luy peust resister n'y contredire, se disparut au grand esbahissement de tous. C'est enfant fut depuis nourry en façon fort estrange, & eust nom Foulgorât à raison d'une espee de foudre, qui luy sembloit embrasser la mammelle senestre, & fut tant adroit aux armes qu'il ne peut oncq trouver son pareil de tout son temps, & persecuta fort les Chrestiens comme il vous sera deduit plus au long es prochains liures. Si tost que le Geant fut disparu, le corps de la Roïne par le commandement de Bruzanges fut ars & brulé devant le temple de Jupiter, selon la coustume de l'Isle, & les cendres recueillies en vne fiole de cristall, & mises dans le tombeau des Roynes de Canabee. Et par ce que les plaintes de Florelle, & sa façon de mourir furent par plusieurs estimees vne de plus pitoyables & miraculeuses choses qui eussent onc esté veues au monde, le croniqueur Galeris en fit quelques vers sur le commencement dequelz il introduisoit la Roïne parlante ainsi:

Plainte de la Roïne Florelle sur l'embarquement de dom Rogel.

N'a doncques peu mon amytié.
 Rogel, t'émouvoir à pitié
 Ny mes regretz, ny mes douleurs,
 Ny celle rage
 Qui transist les fraiches couleurs
 De mon visage?
 Le ciel pour rompre ton depart
 S'est tout noircy de part en part
 L'hyuer de pitié depourueu
 Roule ses pluyes.
 Mais de rien ne te chaut, pourueu
 Que tu me fuyes.
 D'un mesme vol aux vens te voy
 Emporter ta nef, & ta foy,
 Et suis en soupçon si les Dieux
 En ton iniure

Nont point ainsi troublé les cieux
 Pour ton pariure
 A moy ton bien, à toy mon mal
 Est plaisant, d'un sort inegal.
 O cruel! tu ne craignis onc
 Ma mort certaine,
 Las! ores pour quoy crains-ie donc
 Ta iuste peine?
 La mort transie de ses dars
 M'environne de toutes pars,
 De toutes pars ie sens en moy
 Qu'elle m'opresse,
 Pour toy, miserable, pour toy
 Qui me delaisse?
 Je voy desia sur l'Acheron
 Voguer vers moy le vieil Charon,
 Et m'aguigner de son bateau
 Pres de la rine,
 Croyant que telle du tombeau
 Vers luy l'arrive.
 Veuillent les Dieux te pardonner:
 Là mort que tu me viens donner:
 Face le ciel en ma faueur:
 Cesser l'orage,
 Sois tousiours suiuy du bon-heur
 En ton voyage
 Quand Florelle eut chanté ces vers,
 Lon vid en paix tout l'Univers:
 Les vens prirent trefues entr'eux
 Cessans leur guerre,
 La pluye au soleil radieux
 Ceda la terre.
 Rogel las de plus demeurer,
 Seul la peut onyr sans pleurer
 Et la voir à son partement
 Pasmee & morte:
 D'un froid adieu tant seulement
 Il la conforte.
 Elle donc en la proche mort
 Ayant mis son dernier confort,
 N'esperant que ses dars meurtriers
 Pour sa responce,
 A grand travail ces motz derniers
 Elle prononce:
 Fais encores pour ce seul iour
 Amant cruel, icy seiour:
 Si d'Amour n'a peu le flambeau,

Piteux

*Piteux te rendre,
Aide au moins à mettre au tombeau,
Ma froide cendre.
Aces mortz d'une mesme fois
Se finit sa vie & sa voix:
La mort les yeux luy éblouit
Ternis & sombres:
L'ame gemissante fuyt
Deffous les ombres.*

Tandis que le corps de la Roïne ardoit dom Rogel aperceuoit acunement les flames & la fumee volantes en l'air, fans toutesfois en penser l'ocasion: & combien qu'il fust fort triste, si dissimula il sa douleur le mieux qu'il peut deuant l'Infante Sidere. Or les laisserons-nous voguer, sans vous dire autrement les careffes qu'ilz se firent l'un à l'autre à leur rencontre, par-ce que vous les pouuez trop mieux coniecturer: & les abandonnans sur la marine, nous nous contenterons pour maintenant de faire prendre terre au roy Amadis, & à sa flote, qui s'estoit embarquee au port de Guyndaye.

Comme les Princes partis de la cité de Guindaye prindrent port deuant Constantinople, & de la façon que Diane fit son entree dans la ville.

CHAP. XCVIII.

LE printéps auoit desia embelly les boys & les campagnes de sa verdure acoustumee, quand les excellens Princes & leur flote aborderent deuant la cité de Constantinople. Et par-ce qu'ilz furent soudain recogneuz aux enseignes Imperialles qui volletoient dessus les hunes de leurs nauires, ou les receut sur le haure avecq' route la magesté & magnificence qu'il fut possible en vne impourueüe & soudaine arriuee. Adonc les Princes & Princeffes auant que se desembarquer, s'abillerent de leurs plus riches acoustremens pour prendre terre, & pa-

reillement les Princes qui estoient en la cité, se mirent au meilleur equipage d'ot ilz se peurent auiser, pour les receuoir honorablemēt. Lon auoit apareillé pour Diane vn char triomfal d'estrange beauté & de fort bonne grace: Il estoit couuert de cinq arcs de triomfe, dans lesquels estoiet paints au naturel les haultz & cheualereux faitz d'armes d'Agefilan: & au dessus des cinq arcs estoit la statuē de Daraide releuee au naturel, ayant son espee pendue au col, tout ainsi qu'elle la souloit porter. Ce char triomfal estoit trayné par douze Licornes enharnachees fort richement. Neantmoins Diane ne voulut y monter, à fin d'aller en la compagnie des autres Princeffes: au moyen dequoy on luy apresta vne belle Licorne tant richement equipée qu'il estoit impossible de plus. Sa selle & sa garniture estoient la plus-part de fin or esmaillé fort industrieusement: La corne estoit toute couuerte de toille d'or tournoyee de fines perles, & emaillee de diuerses couleurs, & sur la pointe de la corne y auoit vn gros diamant d'ineestimable valeur. Sur ceste triomfante beste la belle Diane fut montée, & habillee en telle maniere: Elle auoit vne robe faite à petites pointes d'or richement emaillees de blanc & de bleu: ses pointes ne se touchoient l'une à l'autre: ains y auoit entre deux autant de lieu vuide comme elles en pouuoient remplir: ce qu'on voyoit facilement par-ce que le fons de la robe estoit fait de satin verd. La queue d'icelle traynoit deux grandes brasses en terre, & estoit portée par deux fort belles Damoysselles montees sur deux haquenees aussi blanches que nege. Elle auoit vn collier, vne sainture, & deux brasseletz de fins rubis de telle excellence qu'il estoit impossible de trouuer pareille chose au monde. Ses beaux cheueux estoient respandus sur ses espaulles, & de chacun costé du visage y auoit six tresses entre lesquelles

sees en las d'amour, dont les liaisons se couuroient souz six fines perles orientales ordonnees d'une fort bone grace: Sur sa teste elle portoit vne maniere de coiffe semee à lōgues pointes de coural entortillees de petites l'ames d'or, lesquelles estoient couuertes de fin email, & de pierrierie inestimable: & sur chacune pointe y auoit des safirs, escarboucles, & diamans rendans vne si excellente clarté que chacun en estoit esbahy. Ceste coiffe estoit attachee sur les deux tēples avecque deux lassetz faitz de ses propres cheueux, au bout desquelz pendoient deux gros rubis vn peu par dessouz les ioyaux qui luy pendoient pareillement des oreilles. Or incontinent que la princesse Diane fut montee sur sa Licorne, l'Empereur Amadis de Grece commença à la conduire: le Roy Amadis conduisoit la princesse Daraïde vestuë d'un estrange acoustrement à la façon de son païs: dom Florisel menoit la royne Garaye, dom Arlāges d'Espagne, la royne Oriane, Agefilan, la Roine sa mere: dom Florestan prince de Rome, la princesse Lucenie, & dom Florallan de Trace, la royne Lardenie. Apres Diane, marchoient cinquante autres Damoysselles montees sur des haqueenes blanches, & habillees en mesme façon que la princesse. Le char triomfal marchoit bien loing deuant, & en l'ordre que nous vous auons dit, les Princes & Princesses cōmencerent à cheminer par la cité, les rues & les fenestres estant si plaines de monde qu'il estoit fort difficile à passer. Mais en tous les endroitz ou Diane estoit, le peuple tout estonné faisoit infinies exclamations, comme pēfant plus-tost voir vne chose diuine que humaine. En tel arroy marcherent iusques au grand Palais, ou les Empereurs Esplandian, & Lisuart les atēdoiet pour les receuoir, & furent fort esmerueillez quand ilz virēt l'extreme beauté de Diane, qu'Amadis de Grece auoit laissée au

mylieu d'eux pour parler à la princesse Daraïde. Adonc Diane suplia les deux Empereurs de luy presenter les mains, mais ilz l'embrasserent & baisèrent, l'entretenans de maints gracieux propos. Or ainsi qu'ilz entrerent dedans la grand' court du Palais, le bruit des trompettes, des clerons, & haultz-boys acordez ensemble, estoit si grand qu'il estoit impossible de s'entendre les vns les autres. Ce pendant les Imperatrices s'estoient mises aux fenestres pour les voir arriuer, & avec elles estoit la Princesse Helaine, & la tresexcellente Lucelle, avecque la vraye perfection de beauté, egale à Diane, l'Infante Fortune, estant entre les bras de la Roine Finistee, coiffée d'un mesme ornement de teste que celui de la Princesse Diane. Comme elles se virent les vnes les autres, elles furent fort esmerueillees de leur beauté, & pour monter dans le Palais Diane descendit de dessus sa Licorne, & la Marquise de Lastes anecq' toutes les autres Damoysselles de leurs haqueenes, & ny auoit aucune d'elles qui ne fust conduite par vn Prince ou par quelque excellent Cheualier.

Comme les trois Imperatrices, avecque les autres Roynes & Princesses sortirent en la gallerie du Palais pour receuoir la compagnie nouvellement arriuee.

CHAP. XCIX.

EStans les Princes & Princesses mōtez dans les hautes galleries, ilz trouuerent les trois Imperatrices avecque leur suyte, lesquelles firent la reuerce à la royne Oriane, & lors Diane, s'estant aprochee d'elles mit les genoux en terre à fin de leur baiser les mains, mais elles l'embrasserent & baisèrent par grand amour: & ainsi que Nicquee & Diane s'aperceurēt, elles furēt si eston-

estonnées de leur beauté, qu'elles demeurèrent long temps sans faire autre chose que se regarder l'une l'autre. Tantost apres suruindrent la princesse Helaine, Lucelle, Arlande, & Finissee qui portoit l'infante Fortune entre ses bras: & si tost que les deux Princesses, Helaine & Lucelle eurent acueilly Diane, esmerueillées les vnes des autres, l'infante Fortune s'aprocha, laquelle Diane prit entre ses bras fort esbahie d'une telle perfection de beauté, la baisant, & rebaisant souuentefois: mais la petite fillette cōme estōnee la regardoit, chacun disant qu'elles se ressembloient si bien, que l'une fust la ressemblance de l'autre representee en vn miroër, ce que le Roy mesmes assura à Diane & elle luy respondit, Je ne serois point trompee, mōsieur, si le miroër me representoit au naturel, car j'aurois bōne occasion de m'estimer en toute perfection: & si ainsi estoit, ie serois au mesme peril q̄ fut celuy qui mourut par sa propre beauté, se regardant en la fontaine. Incontinent toutes les autres Roines & Princesses se receurēt les vnes les autres par grād amour: mais l'Infante Fortune n'eut si tost aperceu la royne Daraïde, pensāt que ce fust Daraïde mesmes, qu'avec vne grāde gayeté elle la courut embrasser, & baiser, sautelāt à l'entour d'elle de grande ioye. Adonc la Royne qui biē en scauoit la cause l'embrassa pareillement, & en la baisant luy dist, O madame, combien vous me faites de faueur, pour estre ainsi abusée par ma semblāce, toutefois vous ne faites point mal, veu que le nom de Daraïde me fait meriter les faueurs lesquelles autrement ie ne pourrois meriter de moy-mesme. Apres maintes gracieuses paroles passees entre ces princes avec toutes les ceremonies & reuerēces acoustumées entre telles personnes à vne nouuelle arriuee, Ilz entrerent tous ensemble dans la grand' salle, ou oir leur auoit apareillé plusieurs riches sieges pour s'asseoir: mais sachez que

l'Infante Fortune ne voulut iamais s'elongner de la royne Daraïde, ny retourner à Finissee, encores qu'elle l'apellast, & quād elle la pensoit prēdre, elle cryoit de toute sa force, acollant & embrassant tousiours plus estroitement la royne, dont toute la cōpagnie se prenoit à rire. Puis ayāt demeuré ainsi quelque temps entre ses bras, luy dist, Et vous, vous en allastes à l'autre foys sans m'emmener: maintenēt, ne m'emmenerez-vo⁹ point avecque vous? Je vous prometz, madame (dist la Royne) de ne retourner iamais que ie ne vo⁹ emmaine. Ce qu'oyāt le petit dom Silues de la forest, luy dist, Et moy, ne m'emmenerez vous pas aussi? Ouy vrayement dist la Royne. Adonc l'Infante faisoit semblāt de vouloir pleurer dist, Je ne veux point que vous y veniez. Et lors la Royne à fin qu'elle ne pleurast commença à luy dire, Ne vous ennuyez point, madame, car ie n'emmenay que vous. Alors le petit enfant se prit à pleurer, l'Infante, demourant fort ioyeuse: mais la royne donna vn petit ioyau à l'Infante à fin qu'elle s'acordast de laisser venir le petit dom Silues en sa compagnie: & ainsi demurerent tous deux cōtens. Les princesses Lucenie & Helaine estoient avec Diane en maints gracieux deuis, & leur fut dressée vne table à part, ou elles trois seules disnerent, & apres se retirerēt en leur logis qui leur auoit esté fort richement apareillé, ou elles demurerent plus de quinze iours entiers durant lesquels on n'entendoit parler d'autre chose que de festins, de bāquetz, & de tous passetemps ausquelz il estoit possible de se recreer. Ce pendant Agesilan & les autres Princes fiancez auoient grand desir que les solennitez de leurs nocces se fissent, mais il auint tout au rebours, pour les causes que maintenant vous entendrez.

Comme les sages *Alquif & Vrgande* se departirent de Constantinople, & d'une lettre de deffi que douze nains apporterent aux Princes de Grece.

CHAP. C.

VN iour à la sortie du disner des Roys & Empereurs, les sages *Alquif & Vrgande* prirent congé pour s'en retourner en leur Isle, & laisserent à leur depart dans le Palais deux perrons de marbre, & sur chacun vn tableau de bronze, dedans lequel estoient escrites certaines profecies en langue Hebraïque. Celle d'*Alquif* estoit de telle teneur.

Quand la donteresse & indontee Lionne, aura parfaitement ataint la force de sa veue, elle emplira par sa force desmesuree, toute la Grece de la demande de sa Fortune & continuera le Palais imperial en morts cruelles, iusques à ce que le basilicq' de la nature humaine prenant le diuin mariage, & mesprisant celui des hommes ne pourra voir ny estre veu, pour son éternel remede & pour le remede temporel de ceux que viuoient en ce monde

La profecie d'*Vrgande* disoit ainsi.

Quant la belle *Diane* sera pleine du tresreluisant *Apollon*, en la gloire de leur conjunction ilz produiront le *Lion* puissant & vertueux, qui par la force de ses ongles fera que les haultz faitz d'armes du premier *Lion* seront mis en oubly. Et quand le second *Lion*, heritier du nom premier, s'assemblera avec le troisieme, avec la force de leurs ongles, en grande obscurité & sur la fin de leur lumiere, non sans grande effusion de leur sang, ilz luiseront la maison de Grece en grandes tenebres de douleur, autant meslee de sang & d'eau, comme deux si braues Lions auront occasion d'en repandre sur leur fin, & de celle qui a engendré le mortel basilicq' en l'amou-

reuse acointance, & compagnie tresagreable du hautain & superbe *Lion*.

Moult furent espouuentez tous les Princes de ces profecies, car ilz ne les pouoient entēdre qu'elque diligence qu'ilz y employassent aussi ne furent elles entendues iusques à ce qu'elles fussent executees. La premiere s'entendoit de l'Infante *Fortune*, la seconde, du troisieme *Amad's*, filz de l'excellēt *Agésilas* & de la princesse *Diane*, duquel en la quatriesme partie de ceste grande histoire sera faite ample mention, ou la fin de ceste profecie sera celebree avec le sang & l'eau qui en auindra. Trois iours apres le parlement des sages, entrèrent en la salle du Palais douze Nains portans vnes cottes d'armes semees des armes Royales de *Russie*, & celui d'eux qui marchoit deuant portoit vne lettre de parchemin en la main, fellee de cent soixante feaux de fin or pendans en lacs de soye, esquelz estoient grauees les armes d'autant de roys parens de l'*Asie* & de l'*Orient*. Quand les Nains furent entrez en la salle, l'un d'eux commença à parler en ceste sorte, Seigneurs & Princes de Grece, les lettres que ie porte en la main viennent de la part du nouveau roy de *Russie*, dom *Bruzarte*, & des autres Roys Orientaux dont les feaux sont icy atachez: partant vous orrez ce qu'ilz ont arresté contre vous en leur conseil. Adonc il commença à lire les lettres qui estoient en langue Grecque, & contenoient en substance ce qui s'ensuyt.

Dom *Bruzarte* Roy de *Russie* confederé avec cent soixante Roys de l'*Orient*, par le conseil & diuine permission de noz souueraines Dieux dedaignez de tant d'offenses qui leur ont esté faites par la maison de Grece, ayant tant de foys arrousé les campagnes du sang de leurs seruiteurs, & mis le feu dans leurs Mosques, ont maintenant assem-

assemblé leur armée ensemble: par-ce que la fumée des temples bruslez, comme sortant d'un enclôier, est montée devant les diuines magestés, pour en requérir la vengeance, & a passé iusques dedans leur plus souverain ciel Empiree. Parquoi nous auons ordonné selon la puissance à nous octroyée de par les Dieux, que toute la maison de Grece passera au fil de noz espées, & toutes leurs citez seront arses de noz flambeaux, à fin que puis apres les Russiens les fassent de rechef rebastir à la grand' gloire de leur vertu, & à l'honneur immortel de noz Dieux. Desquelz inuquant le nom, nous vous enuoyons denoncer nostre entreprise, sans autrement vous auertir du iour, ny de l'heure que nous la mettrons à execution: & à fin que vous adioustiez entiere croyance à nostre lettre nous l'auons signée de noz seings, & sellée de noz armes Royales, & vous l'auons voulu enuoyer par ces creatures autant petites, comme celles qui la doiuent executer seront grandes. Et iusques à ce nous prions noz Dieux vous conseruer en santé pour vostre plus grande maladie, vous assurant qu'apres vne briefue paix, vous aurez vne longue guerre, en laquelle nous prometons aux grandes mers, & aux larges campagnes, les courir de noz armées, & les faire rougir de vostre sang.

Ceste lettre leue & delaissee deuant les

Princes, les nains s'en rerournerent, & monterent sur leurs cheualx laissant la cour en assez grand trouble, partie pour ces nouuelles, partie aussi pour les protecies des sages, sur lesquelles chacun donnoit son iugement à sa fantasie. Mais ces cheualereux Princes accoustumez de se trouuer en telz hasartz, ne s'espouenterent en riens de leur menace, ains apres auoir tenu conseil, acorderent d'enuoyer leurs ambassadeurs vers tous les Roys Chrestiens, à fin qu'ilz eussent à s'assembler en brief dans Constantinople, & es environs, pour leur ayder en telle necessité selon le besoing qu'ilz verroient estre requis, & resister à la force des aduersaires, beaucoup plus grande (ainsi que lon pouuoit preuoir) qu'autre de laquelle on eust encores iamais ouy parler. De ceste nouuelle entreprise auindrent plusieurs grâds traualx en toute l'Europe, mesmement en la Grece, pour la longue & cruelle guerre qui y fut menée, au grand traual, & au grand honneur des Princes & Roys qui s'y trouuerent comme vous entendrez au prochain liure. A ceste raison les nopces des Princes furent differees en vne saison plus oportune, & voulut Galeris en cest endroit mettre fin à la presente partie de ceste histoire, pour commencer la subsequente par choses tant dignes de memoire, & de si grande importance pour tous les Princes de la Chrestienté.

*Fin du douziesme liure d'Amadis
de Gaule.*

LA TABLE DES CHAPITRES CONTENVS EN CE PRESENT

LIVRE.

Et premierement.



Comme dom Rogel de Grece acompagné de l'Infante Leonide alla es-
prouuer l'aventure de la roche enflammee, & comme il vainquit tou-
tes les gardes du chasteau, & le cruel Geant Galpatraf. chap. i. fueil. 1.

Comme dom Rogel perdit l'Infante Leonide, puis se ietta dans l'ar-
dente bouche de la roche enflammee pour la recouurer. chap. ii. fu. 6.

Comme le Prince Agefilan continuant ses haultz faitz d'armes souz le nom &
habit de Daraïde, eut vn perilleux combat contre vn Cheualier incogneu : & de la
grande passion que souffroit dom Galtazar de Barberousse pour son amour. cha-
pitre iii. fueillet 13.

Comme Daraïde, Garaye, dom Galtazar, & ses freres estant débarquez en l'Isle
de Guindaye, se departirent par le moyen d'une Damoysele, & d'un Cheualier à de-
mi mort, qu'ilz rencontrèrent en leur chemin. chap. iiii. fueil. 18.

Des estranges rencontres qui auindrent à Daraïde, à Garaye, & à dom Galtazar
en la queste de l'escrin que le magicien Cinistide enuoioit à la Princesse Diane. cha-
pitre v. fueil. 22.

De la triste vie que la Princesse Diane menoit pour l'absence de Daraïde, & com-
me le Roy de Cores, & la belle Royne de Corit arriuerent en la cité de Guindaie.
chap. vi. fueil. 27.

Du cruel combat qu'eut Daraïde contre le Roy de Cores : & comme apres sa vi-
ctoire elle se donna à cognoistre la Royne Sidonie, qui la mena en grad' ioye vers
la Princesse Diane. chap. vii. fueil. 32.

Des propos que Diane & la Duchesse Lardenie eurent ensemble sur les amours
de Daraïde, & comme elles l'allerent visiter tous les iours iusques à ce qu'elle fust
guerrie des playes receuës au combat precedent. chap. viii. fueil. 34.

Comme Diane & la Royne Briangie allerent vne nuyt espier ce que faisoit Daraï-
de dans le iardin avecque les autres Damoyseles. chap. ix. fueil. 46.

Comme la nef des sages Alquif & Virgande, avecques les nobles Princes qui e-
stoyent en icelle, vint surgir deuant la cité de Constantinople. chap. x. fueil. 47.

Des gracieuses paroles que dom Rogel tint par les chemins à la damoysele Agre-
ste qui le conduisoit. chap. xi. fueil. 49.

Comme dom Rogel & dom Florisel estans arriuez en Athenes, dom Filisel s'ena-
moura d'une belle & gracieuse Dame, nommee Marfire, & d'une lettre qu'il luy es-
criuit. chap. xii. fueil. 52.

Comme la belle & gracieuse Marfire enuoya vne sienne loyalle Damoysele no-
mee Cardoine vers dom Filisel pour le consoler en sa langueur, & du surplus qui en
auint. chap. xiii. fueil. 56.

Comme le iour d'une grand' feste dom Filisel s'en alla en habit desguisé voir ma-
Dame Marfire dans sa chambre selon qu'elle luy auoit mandé par sa damoysele
Cardoine. cha. xiiii. fueil. 62.

Comme dom Filisel alla voir de nuit la belle Marfire, & des gracieux propos
qu'il

L A T A B L E.

- qu'il eut avec elle, & la damoyelle Carie. chap. xv. fueil. 64.
- Comme dom Filisfel alla voir de iour la belle Marfire, & des gracieux propos que il eut avec elle, & la Damoyelle Carie. chap. xvi. fueil. 67.
- Comme Bruzerbe le Crespelu Roi des Massagettes, vint à Constantinople deffier le Prince dom Florisfel sur l'offense de la royne Sidonie. chap. xvii. fueil. 68.
- Du cruel combat que dom Florisfel eut à l'encontre du roy Bruzerbe le Crespelu en la presence des Princes & Princesses de Grece. chap. xviii. fueil. 70.
- Comme le roy Amadis s'estant esgaré à la suyte d'un sanglier, rencontra vne Damoyelle laquelle ploroit un Cheualier mort, & de ce qui en auint. chapitre xix. fueil. 73.
- Comme le roy Amadis recogneut la belle Dame qu'il auoit deliuree d'entre les mains du fier geant Bruzo Corho, & le Cheualier qu'il l'auoit secouru. chap. xx. fueil. 78.
- Comme Bruzerbe le Crespelu Roy des Massagettes se presenta à la royne: Sidonie, & comme l'extreme douleur qu'elle en receut, luy fit demander un don à Daraïde, dont elle se mit, & toute sa cour en vne merueilleuse confusion. chapitre. xxi. fueil. 80.
- Des propos que Diane eut avec Daraïde sur la promesse qu'elle auoit faite à la Royne: & comme elle se donna à cognoistre à sa Dame Diane pour Agesilan de Colchos. chap. xxii. fueil. 85.
- Comme par le conseil de Garaye Daraïde esprouua l'auenture de la tour de la Duchesse de Bauiere, dont elle receut grande consolation. chap. xxiii. fueil. 92.
- De l'estrange tromperie que deux Damoiselles firent à Garaye, apres que Daraïde l'eut laissée. chap. xxiiii. fueil. 93.
- Comme les deux vaillans Cheualiers, dom Florarlan de Trace, & Artaxerxe, furent iettez par la tempeste en l'Isle de Colchos au moyen de quoi lon cogneut dom Falanges estre filz du Roy Gradamart. chap. xxv. fueil. 99.
- Comme la belle Marfire habandonna les amours de dom Filisfel, & de la triste & douloureuse vie qu'il en menoit. chap. xxvi. fueil. 102.
- Comme apres que le Roy dom Falanges & sa chere espouse, furent partis de la cour, Daraïde & Garaye prindrent port deuant la cité de Constantinople, & des caresses que les Princes & Princesses leur firent à l'arriuee. chap. xxvii. fueil. 104.
- Comme Daraïde, & Garaye furent receues des Princesses de Grece, & de ce qui se passa entre Daraïde, & entre la belle Infante Fortune. chap. xxviii. fueil. 107.
- Comme en la presence de tous les Princes & Princesses de Grece, Daraïde demanda un don au prince Florisfel, lequel luy otroya, au grand desplaisir & ennuy de toute la cour. chap. xxix. fueil. 113.
- Comme le Roi Amadis donna l'ordre de cheualerie au filz del'Empereur de Rome, & au filz du Roy de Beocie, lesquelz ce iour mesmes prindrent leur chemin vers la cité de Sparte, en la compagnie de dom Rogel, à la requeste de trois Damoiselles. chap. xxx. fueil. 115.
- Des propos que dom Rogel tint avecq' l'une des damoyelles: & comme luy & ses compagnons en gaignerent encores trois autres en vne certaine auenture. chapitre xxxi. fueil. 117.
- Des gracieuses trôperies que la Dame d'un chasteau ou les trois Princes estoient logez, & vne Damoyelle firent à dom Rogel, & à son Escuyer. chapitre xxxii. fueil. 121.

L A T A B L E.

Comme les trois Princes se separerent des trois Damoiselles qu'ilz auoient conquises, & comme ilz arriuerent en la ville de Sparte, & declarerent au Roy l'ocasion de leur venuë. chap. xxxiii. fueil. 127.

Du combat que les trois Princes eurent contre les neuf Cheualiers, & comme dom Briāges s'enamoura de l'infante Griande fille du Roi de Sparte. chap. xxxiiii. fueillet 129.

Comme la Royne de Sparte, & l'Infante sa fille, & apres elles, le Roy, allerent voir les Cheualiers naurez, & des paroles qui se passerent entr'eux. chapitre xxxv. fueillet 134.

Des propos que Marinde tint à Sarcire en la faueur de dom Rogel, & comme l'infante, & dom Brianges parlerent ensemble, & de ce qui fut deliberé entr'eux de faire alors que les Princes seroient gueris. chap. xxxvi. fueil. 136.

De la bonne fortune que dom Rogel, & dom Brianges receurent de l'infante Griande & de la duchesse Sarcire, & comme ilz se despartirent de Sparte au grand regret de leurs amyes. chap. xxxvii. fueil. 139.

Comme dom Florisel de Nicquee & Daraïde furent iettez par tempeste en vne Isle, ou ilz trouuerent vne fort estrange auenture. cha. xxxviii. fueil. 143.

Du cruel combat que Florisel, & Daraïde eurent avec les Geans dans le chasteau de Belleueu, & cōme par leur sçauoir plus que par force d'armes, ilz sortirent du grand danger ou ilz estoient apres leur victoires. chap. xxxix. fueil. 48.

Comme l'auenture des Dieux des flammes infernales d'Amour fut acheuee, & comme le Prince dom Florisel recogneut le Cheualier enchanté dedans le vase de Cristal. chap. xl. fueil. 153.

Comme Garinter fut recogneu, & marié avecque l'infante Danistee fille du Roy de l'Isle Artadeffe, & du depart de dom Florisel & Daraïde. chap. xli. fueil. 157.

Comme les Roys de Ruffie, & de Gaze, & plusieurs autres Roys leurs confederes & allies prindrent port à grand' puissance en l'Isle de Guindaye & de la lettre qu'ilz escriuirent à la royne Sidonie, avecq' la responce. chap. xlii. fueil. 159.

De ce que fit la Roine Sidonie apres le départ du Duc de Galde & des propos que Diane & Lardenie eurent ensemble sur la longue absence de Daraïde. cha. xliii. fueillet 162.

De l'auenture qui auint aux auant-coureurs des Roys, ce pendāt qu'ilz marchoiēt en bataille rangee vers la cité de Guindaye. chap. xliiii. fueil. 167.

Des aspres & cruelz assaultz qui furent donnez à la cité de Guindaye: & comme la magnanimité & hardiesse de la royne Sidonie empescha la ville d'estre prise des ennemys. chap. xlv. fueil. 171.

Comme dom Florisel de Nicquee, & Daraïde, arriuerent sans se donner à cognoistre en la cité de Guindaye, & furent logez dans le Palais par le commandement de la Roine. chap. xlvi. fueil. 175.

De la sage maniere par laquelle Daraïde acomplit la promesse qu'elle auoit faite à la Royne Sidonie de combattre dom Florisel de Nicquee. chapitre xlvii. fueillet. 177.

Comme Daraïde apres auoir tenu quelques propos avec dom Florisel, alla trouuer la Roine en sa chambre ou depuis dō Florisel fut encores apellé. cha. xlviii. fueillet. 181.

De la grande ioye qui estoit en la cité de Guindaye pour la venuë de Daraïde, & des propos que Lardenie eut avec elle, & depuis avecque Diane, & comme dō Florisel

L A T A B L E.

rifel & Diane s'estans veuz, il fut acordé que de nuyt lon feroit vne saillie sur les ennemis. chap. XLIX. fueil. 184.

Comme l'excellent Prince dom Florisel de Nicquee & Daraïde sortirent de nuyt sur les ennemis & de la grande extremité ou la cité de Guindaye se trouua reduicte. chap. L. fueil. 190.

Du secours inespéré qui vint durant la bataille à la royne Sidonie, & qui empecha que la cité de Guindaye ne fut point prise. chap. LI. fueil. 193.

Comme l'excellente Daraïde poursuyuit le Roy de Ruffie, iusques dans la tour de Phebus, & de ce qui auint de son entree en l'auenture de la tour de Diane. chap. LII. fueillet. 197.

Du cruel & hazardeux combat que dom Rogel de Grece & Daraïde eurent ensemble, sur la statuë decapitee. chap. LIII. fueil. 199.

Comme ce qui auoit esté profetizé de Diane s'accomplissant, la Royne Alastraxeree reconneut le prince Agefilan son filz alors qu'on le ploroit pour mort. chapitre LIIII. fueil. 201.

Des deuils que Diane eut avecq' Lardenie sur l'auanture passée, & comme elle ala voir Agefilan. chap. LV. fueil. 205.

Des cruelles douleurs que dom Florisel enduroit pour l'amour de la royne Sidonie. chap. LVI. fueil. 209.

Comme Agefilan & Diane, le Prince de Rome & la royne Briangie furent fiancez, & comme Agefilan fit la duchesse Lardenie Royne de Cores. chapitre LVII. fueillet 211.

Comme les Princes fiancez esprouuerent l'auéture de l'infant dom Rosaran, & de la Duchesse de Bauiere. chapitre LVIII. fueil. 216.

De la glorieuse fin des amours du prince Agefilan & la princesse Diane renfermez dans le chasteau de la Duchesse de Bauieres. chap. LIX. fueil. 218.

Des propos que tint dom Filisfel avec deux Damoysselles en retournant de la cité d'Athenes, & comme le duc d'Alfarce arriua en Constantinople. chapitre LX. fueillet 222.

Comme la royne Cleofile & dom Arlanges furent fiancez, & du départ du roy Amadis, & de la royne Oriane pour s'en aller en l'Isle de Guindaye. chapitre LXI. fueillet 226.

Comme le roy Amadis & l'Empereur Amadis de Grece, furēt poussez par la tempeste en l'Isle Solstice, ou ilz trouuerent vne estrange auenture. chapitre LXII. fueillet 228.

Comme le Roy de Gandes bien acompagné vint au deuant du roy Amadis, & du bon acueil qu'il luy fit à l'arriuee. chap. LXIII. fueil. 232.

Comme la duchesse Sirisie fit acorder les deux Princesses des Iuges, & cōme chacune d'elles playda les raisons de sa cause en la presence du Roy & de l'Empereur Amadis. chap. LXIII. fueil 235.

Comme le roy Amadis & l'Empereur Amadis de Grece, firent prononcer leur arrest sur le different des deux Princesses, & comme ilz se partirent de l'Isle Solstice. chapitre LXV. fueillet 242.

Comme le roy Amadis & sa compagnie prindrent port en l'Isle de Guindaye ou ilz rencontrèrent sur leur chemin vne fort plaisante auanture. chap. LXVI. fueil. 243.

Comme les Princes cheuauchans vers la cité de Guindaye furent mis en grande confusion par le moyen d'un Cheualier qu'ilz rencontrèrent par les chemins. chapitre LXVII. fueillet 244.

LA TABLE.

pitre LXVII. fueillet 250.

De ce qui auint à l'Empereur Amadis de Grece apres qu'il fut sorty du chasteau.
chapitre LXVIII. fueillet 255.

Larriuee du roy Amadis, & de la royne Oriane, en la cité de Guindaye ou ilz furent tresbien receuz par la royne Sidonie. chap. LXIX. fueil. 257.

Comme le roy Amadis, & la royne Oriane esprouerent l'auenture de la tour enchantee, & de ce qui en auint. chap. LXX. fueil. 259.

Comme dom Rogel & dom Brianges estans sortis de la ville de Guindaye, trouuerent vne Damoyfelle morte en vn carrefour, & de ce qui en auint. chap. LXXI. fueillet 264.

Comme dom Rogel de Grece rencontra vne Damoyfelle qui portoit vn esparuir, à raison dequoy il fut mis en vne fort belle & perilleuse auanture. chap. LXXII. fueillet 265.

Des haultz fairtz d'armes que fit dom Rogel pour tirer les trois Damoyfelles dehors du chasteau. chap. LXXIII. fu. 268.

Comme dom Rogel en continuant l'auenture des trois Damoyfelles, mōta en l'estude du Magicien Gandistin, & du furieux combat qu'il eut à l'encontre d'une espouuentable beste. chap. LXXIII. fueil. 272.

Comme dom Rogel apres auoir occis la cruelle Lionce fit sortir les trois Damoyfelles hors du chasteau pour sçauoir si l'auenture estoit acheuee. chapitre LXXV. fueillet. 275.

Comme dom Brianges de Beocie trouua l'ocasion de l'auenture qu'il cherchoit, & de l'estrange vengeance qui en auint. chap. LXXVI. fueil. 277.

Des propos que dom Rogel & l'infante Sidere eurent ensemble sur leurs amours aupres d'une plaisante riuere. cha. LXXVII. fueil. 281.

Comme dom Rogel de Grece combatit trois Cheualiers, pour deliurer trois Damoyfelles qu'ilz emmenoit, & de ce qui en auint. chap. LXXVIII. fueil. 284.

Qui estoit le Cheualier lequel emmenoit les palefrois des Damoyfelles, & les cheualx des Cheualiers occis, & de ce qui auint à dom Rogel en le poursuyuant. chapitre LXXIX. fueillet 287.

De ce que firent les trois Infantes & Sardenie en attendant la venue de dom Rogel. chapitre LXXX. fueil. 290.

Comme Sardenie se descouurit à dom Rogel, puis se departirent l'un de l'autre, & comme dom Rogel s'embarqua avecque les trois Infantes pour passer au royaume de Perse. chapitre LXXXI. fueil. 294.

De l'espouuentable & estrange auenture qui auint en la cité de Guindaye, au moyen de laquelle les Princes furent mis en grande confusion, & en grand danger de leurs personnes. chapitre LXXXII. fueil. 296.

Comme le Roy Amadis & les autres Princes partirent de l'Isle de Guindaye, laissant la royne Sidonie en grand' solitude, & comme la belle Royne de Galdap l'alla voir. chap. LXXXIII. fue. 301.

Du grand danger ou se trouuerent tous ces nobles Princes pour la tempeste, & comme Agefilan & Diane separez des autres nauz, furent estrangement secourus apres leur naufrage, par vn Cheualier volant. chap. LXXXIII. fueillet 302.

Qui estoit le Cheualier volāt, & de la penitence qu'il faisoit en l'Isle Verde pour auoir occis son pere. chap. LXXXV. fueil 305.

Comme Patrifond essaya par diuers enchantemens à iouyr de la belle Princesse Diane

LA TABLE.

Diane, & des auentures qui auindrent. chap. LXXXVI. fue. 308.

Du cruel sacrifice qui se faisoit au dieu Teruagant en l'Isle Desolee, ou les cour-
saires auoient emmené la princesse Diane chap. LXXXVII. fu. 312.

Comme la tempeste renuersa le prince dom Rogel dedans vn goffre de mer, au
grand regret de l'infante Sidere, & de dom Briāges de Beocie, & de ce qui en auint.
chapitre LXXXVIII. fueil. 314.

Comme la Damoysele que dom Briāges auoit empechee de se noyer, lui desfro-
ba son cheual & ses armes: & de l'ocasiō qui le fit separer des Infantes de Perse pour
aller en la cité de Gamal. chap. LXXXIX. fueil. 316.

Comme dom Brianges de Beocie sauua la vie à vn ieune Damoyseau que deux
trahistres vouloient mettre à mort, & de ce qui en auint. chap. xc. fueil. 319.

Des propos que la duchesse Polinecque, & la belle Arfleure eurent ensemblément
sur la querelle de leurs amours, & de la traison que Polinecque machina pour se van-
ger du Prince dom Bruzanges. chap. xci. fueil. 322.

Comme le Prince de Beocie arriua en la cité de Gamal, ou il descouurit les trahi-
sons de Polinecque à la Roynne Florelle, & fit cesser le combat entrepris sur la mort
du Prince dom Bruzanges. chap. xcii. fueil. 327.

Qui estoient les deux Cheualiers lesquelz auoient entrepris le combat en la faueur
du Prince Bruzanges, & comme dom Rogel de Grece s'enamoura de la belle Flo-
relle roynne de Canabee. chapitre. xciii. fueil. 328.

Des merueilleuses auentures qui auindrent à dom Agefilan de Colcos en la queste
de la princesse Diane, & comme il deliura le Roy des Gramantes de la miserable
faim en la quelle le detenoit vn Dragon vollant. chapitre xciiii. fueil. 332.

Comme dom Agefilan occit l'horrible monstre marin de l'Isle desolee, & affran-
chit les habitant du cruel hommaige qu'ilz deuoient au dieu Teruagant. chapitre
xcv. fueillet 337.

Du dueil que menoit l'infante Sidere pour l'absence de dom Rogel, & comme el-
le se mit en sa queste avec ses deux seurs. chap. xcvi. fueillet 342.


Comme dom Rogel de Grece & dom Brianges de Beocie, & les Infantes de Per-
se, departirent de Canabee: & comme la roynne Florelle mourut de douleur pour le
depart de dom Rogel. chapitre xcvi. fueillet 346.


Comme les Princes partis de la cité de Guindaye prindrent port deuant Con-
stantinople, & de la façon que Diane fit son entree dedans la ville. chapitre. xcvi. i.
fueil. 350.


Comme les trois Imperatrices, avec les autres roynes & princesses sortirent en
la galerie du Palais pour receuoir la cōpagnie nouuellement arriuee. chapitre xcix.
fueillet 352.

Comme les sages Alquif & Vrgande se departirent de Constantinople, & d'une
lettre de deffy que douze Nains apporterent aux Prince de Grece. chapitre. c.
fueillet 354.

FIN DE LA TABLE.







LE TREZIEME LI-
VRE D'AMADIS DE GAVLE,
TRADVIT NOUVELLEMENT
D'ESPAIGNOL EN FRAN-
ÇOIS, PAR I. G. P.



Traittant les hauts faits d'armes du Gentil Cheua-
lier SYLVES de la Selue filz del'Empereur Ama-
dis de Grece, & de la Royne de Thebes Finistee:
avec les auentures estranges d'armes & d'amours
de Rogel de Grece, Agesilan de Colcos & autres,
aenues sur l'entreprise & cours de la guerre du
grand Roy Bulthazar de Ruffie, contre les Chre-
stiens. Et apres, les mariages de Diane, Leonide
& autres.

Adressé a Madame la Contesse de Retz.



SCRV

TAMINI.

EN ANVERS,
Par Guillaume Silvius, imprimeur
du Roy.

L'AN M. D. LXXIII.

A L'ILLUSTRE ET VERTUEUSE
DAME CATHERINE DE
CLEREMONT CONTESSE
DE RETZ.



MA DAME le gentil Cheualier Silues de la Selue vous va saluer de ma part, accompagné de Princes & Dames de Grece & d'une Amazone Pentasilee la fleur de toutes, sa bien-aimée. La quelle ie vous puis parangonner à bon droit (hormis les armes & sa targe luee) en beauté, bonne grace & en la cognoissance des langues diuerses à elle attribuee, qui vous sont tresfamilieres. I'espere qu'ils trouueront bon accueil en vostre endroit (estât si courtoise humaine) & qu'ils m'y feront place & ouuerture de gracieux accez. Nompas pour le merite de ce qui y est de ma façon (que ie sens estre bas, tenue & leger) mais pour l'inuention de ce Rommant, fort recreatiue soit en guerres, ioustes & tournois (dont les loix & ordonnances de la table ronde sur les cheualiers errans y sont singulierement deduites) soit en merueilles d'auentures, soit en traits d'amour qui y sont couuerts d'honesteté. Car à ces esperits reuesches & rebarbatifs ennemis de toute ioyeuseté qui les estiment inutiles ou reprehensibles, nous satisferons amplement en nostre preface: seulement toucherons icy (trois mots du bien qui en prouiet non pour vous en auertir (Madame) qui sans cela ne me l'eussiez commandé à traduire, mais pour ceux qui n'en sont pas deuement informez. Car vous qui estes instruite en la lague Grecque & Latine, en laquelle surpassez Lelia, Cornelia, Muria en leurs langues naturelles, iusques à auoir un iour estonné un medecin du Roy (au rapport qu'il m'en a fait) par le discours Latin de vostre maladie, vous ne prendriez pas plaisir en telles euures (estant stylee & accoustumee aux meilleures) si vous n'y sentiez quelque iolyeté d'artifice garny parmy la gayeté des cōptes, de quelque suc & moelle de doctrine. Et le grand Roy François n'eust pareillement desiré la composition du Gyron le courtois en Italian de la main du docte Luigi Alemani (qui tant aimoit le sien en François comme sauent les courtisans de son tēps) qui est ouurage tout semblable à l'Amadis, si luy doué de si bon sens & literature eust iugé tels Rommans vains & friuoles. Au contraire ray ouy raconter autresfois à un grād Seigneur de ses plus fauoris, que quand il s'en faisoit lire en sa chambre, il amon estoit les gentilshommes là presens de les manier aucunes fois en leurs maisons: leur remonstrant par sa Royale eloquence, Que sous l'ecorce de ces ioyeuses narrations y gisoit de bones instructiōs morales pour la noblesse, en exaulsant les vertueux faits & blasmat les vicieux, en recommandat tousiours l'adoration & reuerence de Dieu, la defense du bon droit principalemēt des personnes pitoiables, damoyelles, veufues, & orfelins: Qu'ils cōseillent le travail & exercice de guerre, abhorrent l'oyfuieté, louent largesse & liberalité, & taxēt l'auarice: dont le monde

E P I S T R E.

de est aujourd'huy abominablement remply & la vertu rebutee plus leur affermoit q̄ mieux ils gousteroiēt les enseignemens des meurs parmy ceste douce volupté de comptes plaisans & heroïques, que dedans les auteurs des Ethiques, epineux, secs & ethiques. Or soit pour toute raison de ce mien labeur que ie vous aye voulu obeir (Madame) comme le Seigneur Alemani à son Roy, d'autāt que (selō le poëte),

Complaire à Prince est vn acte louable,

Ce me seroit beaucoup que ie pleusse à vous seule cōme la preude femme à son mari: mais ie suis certain qu'en vous plaisant ie satisferay à toutes personnes de bon & sain entendement, & parauenture par vostre moyen à nostre tres excellent Roy Charles neuueme, amateur de poësie, de musique, d'histoire, & de la chasse singulierement. Laquelle est icy amplemēt de scritte; cōme l'exercice auquel fut aduit le Prince Sylues de la Selue en sa prime ieunesse, ayāt esté né & nourry longuement dans les bois: cōme y furēt pareillemēt dressez les deux braues damoyseaux Sferamōd & Amadis d'Astre au quatorzieme liure ensuiuant. Aussi que c'est en l'aage tēdre le vray aprentissage de la guerre, ou n'est changé que le suget de l'homme au lieu de la belle: que tant a recommādé Xenofon en son Cyrus, & nostre Machiauel Florētin en son Prince, Ie feray doncques fin à ce discours par vne demonstrence de l'art Rethoricaie qui consiſte en la composition ou construction des Rommās, non croyable qu'à ceux qui en contemplent de prez toute l'architecture. Lesquels connoissent certainement que la delectation y estāt pour fin proposee au Rommanceur, selon les institutions oratoires de Ciceron, le style aussi y est floride, net & coulant: quant au suget, que l'ordre des temps y est obserué, la description des lieux, les conseils des entreprises y vont deuāt, puis le fait, les euenemens apres, Qu'il ne traite pas seulement les actes mais les modes & manieres d'iceux, des effectz il assine les causes, ou de cas fortuit ou de pouruoyance ou de temerité, Et quāt aux gestes des hommes, il touche de ceux qui excellent en los & renom la vie & les cōplexions, Or pour rendre le Rommanceur sa narratiō plus plaisante il met en auāt choses nouuelles ou nō iamais ouies ne veuēs, il la rend plus agreable par admirations, attētes, issues inopinées, passios entremeslees, deuis des personnes, douleurs, coleres, craintes, ioyes desirs ardens. Quant à la disposition, il monte aucunes fois des petites choses aux grandes, autres fois il descēd des grādes aux petites autres fois il les mesle les vnes parmy les autres, & les simples avec les composees, les obscures avec les claires, les tristes avec les gayer, les incroyables parmy les vray semblables: qui n'est pas besongne de legere industrie.

Recenez dōnques nostre Sylues Madame de bon visage & amyable regard: lequel ie luy espere meilleur de vous & plus heureux que n'ont eu par cy deuant mon Agesilan & sa Diane de celle à qui ie les ay adressez en l'vnzieme liure, ne Florisel & son Helene pareillemēt au dixieme. Aussi m'asseurent les plus sages que vous m'ayant mādē de bouche par vostre modestie accoustumee (la clause formulaire des Princes anciens es denōcemens de tournoys) que bien ie le pourrois presenter à autre plus haute

E P I S T R E.

dame : mais non qui mieux le receust & fauorifast à son pouoir . Que sur cette tant humaine parolle ie doibs prendre certaine confiance de veoir à la fin par vous eclaircir les tenebres de la solitude, à laquelle me suis rengé depuis longues annees par vn demy desespoir procedant de l'ingratitude & malefoy de ceux soubz lesquels i'ay fait seruice à nos Roys en leurs Embassades en diuerses regions : sans toutesfois (par suppression de mô nom & faute de faueur & appuy en cour) en auoir senty aucune recompense. Et m'en demeure point en doubte en vostre endroit, si ce n'est à faute de bonne sollicitation à ce requise, fort elongnee du naturel d'un philosophe solitaire, si vous seule de vostre debonnaireté ne la suppleez.

Ainsi Dieu vous accroisse Madame vostre prosperité, faisant par icelle comme vn beau Soleil disparoir l'obscur nuage de ma longue infelicité. De Paris ce iour Sainct Ian Baptiste. 1571.

ENVIE D'ENVIE ENVIE.

Vostre tres-humble seruiteur
Iaques Gohory Parisien.
LE SOLITAIRE.

P R E F A C E A V X L E C T E U R S.

LA plainte ie vous feray (lecteurs debonnaires) de la perplexité d'esperit ou ie me suis trouué, de traduire ou non ce trezieme liure d'Amadis, pour les opinions opposites à poiser en la balance de raison: lesquelles estoient fondees tant sur la cōsideration de ma personne que de la qualité de l'euvre. Car d'un costé estant ores paruenue en aage plus meure que ie n'estois quand ie fey les dixieme & onzieme, il sembloit à aucuns que me deuois contéter de ces deux coups d'essay de iuennesse, regeant desormais mes estudes en subiets plus serieux & arduz. Que les armes qui se traittoient icy estoient fabuleuses, que les amourettes y estoient vn peu gages & lasciuies, le tout de peu d'instruction. D'autre costé aucuns m'excusoient d'auoir aussi composé des liures plus graues & conformes à mes ans, comme en Latin Compendium philosophiæ & medicinæ Theophrasti Paracelsi, Et, scholia in libros tres de vita longa. Librum 1. de Mysterijs notarum. Et en François la traduction de Tite Liue Latin, dès la fondation de Rōme, les discours de Machiavel Italian sur icelle histoire Romaine. Le liure de la toison d'or de l'ason figuré en vers Latins & François. Et que ie trauaillois encore à present sur un latin intitulé, Animaduersiones omnis generis antiquitatum, duquel le Segment poétique est acheué, & celui, de re nūmaria. Pourtant m'estoit loysible de m'ebatre par interualles en ces legers ouurages comme

les

P R E F A C E.

les Cheualiers de ce Rommant n'estoyent pas tousiours en la guerre à outrāce, ains sebatoyoient aucunesfois en ioustes & tournois, ne combatoyent pas tousiours de lances à fer emoulu & espees trenchantes, mais par fois aux lances mornes, espees, brutes d'escrime ou mousses & rabbatues pour la barriere. A ceste cause que ce peu que i'aurois acquis de reputation n'y tomberoit en inconuenient, & que les plus doctes Italiens s'estoient bien ebaus en tels suiets comme Bocace en son Decameron, Bembe en ses *Azolans*, l'*Arioste* en son *Rollant* furieux, & nagueres le-sauant *Luigi Alemani* au liure de *Giron le Courtois*: Lequel est vn Rommant tout semblable à nostre *Amadis*. Et quand à *Amadis* specialement, i'ay autrefois entendu que feu *Merlin de S. Gelais* personnage docte & poëte excellent en auoit ietté les premiers traits en lumiere, que d'autres ont continuez, qu'un grand secretaire des commandemens en auoit traduit quelques liures pour donner plaisir au grand Roy François son maistre en vne maladie de fieure. Et le Seigneur *Baltazar de Castillon* en son *Courtisan Italian*, à fait honorable mention d'*Amadis* à propos de l'arc des loyaux amans. Que doibs-je donc craindre de deshonneur au maniement de cest ouurage? des doctes François paraenture: mais le gentil *Remy Belleau*, *Ian Aurat*, *I. A. de Baif*, *Ioachim du Bellay*, *Anthoine Muret*, *Estienne Pasquier* I. P. de Mesme *Astronome* & autres plusieurs de grand doctrine ont approuué les trois liures miens, par le tesmoignage de leurs vers polis & limez en Grec, Latin, Italian, François. Desquels le sain iugement doit preualoir celuy du commun peuple, quand il seroit contraire, comme le poëte estima plus celuy de *Platon* demeurant seul à la recitation de son poëme, que d'une centaine d'auditeurs qui l'abandonnoient. Mais encore m'y pourrois-je assurer de la bonne opinion populaire en ce que de tant de milliers moulez à plusieurs-fois en diuerses feuilles & caracteres, il s'en recouure auourd'hui à peine. Parquoy cessent de mesdire ceux qui ne font cas que des histoires qu'on tient pour vrayes (dont il est aussi peu que de *Fenix*.) Car la pluspart des ces croniqueurs sont plus à blasonner faux, en faisant profession notoire de verité, neantmoins inserent beaucoup de fauceté ou par hayne & enuie des nations à eux contraires, ou par adulation des Princes viuans ou de leurs successeurs, que ces Rommans recreatifs confessans clairement par leur tilre leur inuention fabuleuse. En quoy ils sont imitateurs de la Poësie, fondee selon *Aristote* en fiction, contenant toute-fois des secrets d'erudition profonde. A quoy i'ajouste qu'en cecy semble considerable la distinction subtile de mentir selon *Aule Gelle* & de dire mensonge, le premier appartenant à ces beaux historiens qui meslent maintes choses contraires parmy les vrayes à leur esciët, contre leur conscience: le second aux iolis Rommans, lesquels disans choses faictes, ils vous en auertissent, & d'autant sont veritables. Lesquels deux mots sont aussi d'importance (estans bien entendu) à discerner & demesler les parolles des

P R E F A C E.

combats, lesquelles ne portent pas tousiours de mentir, si l'on maintient ne dire pas verité, d'autant qu'elle peut estre rapportee au fait ou dit d'autrui, non de celui qui parle. Si est-ce qu'en ceste multitude de populaire grossiere & ignorante & en quelques scrupuleux & facheux il se peut trouuer des esperits reuesches & rebarbatifs ennemis de noſ Rommans recreatifs: contre lesquels force nous sera d'vser de la clause accoustumee es prefacs de la religion antique: hors d'icy tous profanes. C'est assauoir n'y entrez pas bigots ne bigotes, chagrins ne frongnez, ne ceux qu'ont banny la rſee propre a la seule humaine nature. Fuyez toutes rencherſes & resſerrees, ouiettez l'œil sur voſtre ouurage en ouurant l'oreille au recit de quelques tours d'amourettes, ou bien faictes vous marquer par ceux à qui vous portez respect les chapires en la table capitulaire qui ne seront point chatouilleux & suspects, à fin que vous lſiez ſeulement les autres à part vous. Ainsi auertit l'Arioſte les dames en ſon chant de Rodomont d'y boucher leurs oreilles, lequel elles liſent plus volontiers: Ainsi auertit Martial, les Rommaines de ſon cinquieme liure d'Epigrammes qu'il eſt tout chaſte & digne de la lecture de ſon Empereur & de la deeſſe vierge Minerue, qui d'autant tindrent moindre compte de le lire ſe ruans ſur les autres farcis de traits veneriques. Fuyez d'icy marchans vſuriers, legiſtes lucratiſ, medecins mercenaires: ce n'eſt pas voſtre gibier, il n'y a gueres d'aqueſt pour vous. Fuyez petits poëtaſtres ou rimailleurs enuieux & medſans, nom-pas les bons qui ſont enuiez & à nous cōformes en eſtoſe ſinon en façon voſtre car vous à preparé Galerſis le Croniqueur en ſon quatorzieme enſuiuant au voyage que ſit Silue de la Selue en Teſſalie. Ou ſon gouverneur Perot & Suaue ſon precepteur le perſuaderent de veoir le mont Helicō & ſa ſōtaine Cabaline avecques Febus preſident du lieu & les neuf ſeurs les Muſes conſeilleres, pour y reconoiſtre (ſelon Pline) l'antique fabuloſité: luy remonſtrans que les loix des cheualiers errans portoient de ſubiuguer les monſtres qui ſe rencontroient en leurs queſtes, dont il luy conuenoit debeller au Parnaſe Bellorofon ſur ſon cheual volant Pegaſus. Là Galerſis racompte que viſitant la cuiſine d'Apolon pour veoir ſ'ils y trouueroient de quoy frire, ils y veirent force petits ſouillons poetaſtres, marmitons, tournebroches, croquelardons. Auſſi qu'en la haute croupe fourchue ils veirent les nobles & fameux poëtes aſſemblez honorablement & aſſis ſelon leurs degrez de ſuffiſance au conſiſtoire poëtique en chapitre general de toutes nations & qui y eut le brin ſeul de l'yerre pour petites euures, qui le chapeau pour grandes. Puis la complainte qui y fut formee par le procureur ſpecial des chefs de guerre & capitaines contre ceux d'entreux qui trop glorieuſement par leurs plumes pretendoient le rameau de laurier, deu à eux ſeuls en cas de triomphe. Dont en fut priué. F. Petrarque ſur le champ par arreſt, combien que par ſon plaidoyer il ſe vantaſt l'auoir receu au Capitole de Rome, ayant reſuſe ce luy qui luy eſtoit offert à Paris. Là ou furent incidemment ſes vers Tuſcans aprouuez

P R E F A C E.

prouuez, hautement & ses Latins reprouuez & exterminiez de la biblioteque Hely coniane. Il y en eut pareillemēt des François censurez mais à cause de brieue
 té ie vous renuoye aux chapitres exprez du liure ensuiuant. Or pour reuenir à
 noz autres accusateurs & calomnieurs : il y a certainement quelques rechi
 guez hypocrites qui ne blasment pas du tout noz Rōmans c'est assauoir en public
 seulemēt, & les lisent diligēmēt en secret, sans y peragner les damoiselles qui ont
 confessé à leurs amans que le soir que leur maitresse cōmandoit d'estaindre les
 lumieres, elles les auoiet leuē à la lueur des risons, lesquelles neātmoins à d'autres
 gentils hommes qui loucient les Amadis les disoient estre trop dissolus : ô les suc
 crees, ô les tendrettes, pour ainsi deguiser sous le masque de grauité ou fiel desueuerité
 le doux miel qu'elles y auoient saouuré des amoureuses delices. Voila le plaidoyer
 desēsis pour nostre gentil Prince Sylues de la Selue cōtre vn tas de lourdauts loups
 garoux, vieilles rosses, melācoliques formeē, facheux, rideē rustiques, ausquelē en
 nemis capitaux de la risibilité humaine nous dirons encore ce mot pour nostre der
 niere main que si ses Rommans ne portoyent nul autre biē que le riz & la gayeté
 honneste, si pourrois-ie maintenir que c'est le souuerain point de l'heureuse vie se
 lon le prouerbe de Salomon: Biē viure en resiouissance, selon le vulgaire: fy de
 bien qui n'a ioye, selon les Medecins que le riz dilate le cueur & toutes choses cor
 diales causent vn aise certain, par compassion du corps, l'ame, comme telles herbes
 selon Theophraste, Dioscoride, Galien assaisonnent le vin de volupté. ainsi donc
 ques n'estant plus receus à la lecture de nostre liure que lecteurs à luy conforme
 nous serons assureē de leur faueur n'estant loysible aux autres de donner leur sen
 tence sur icelle à eux expressement prohibee & defenduē. Mais aux gaillards, &
 debonnaire lecteurs ie feray ceste seule requeste de vouloir tout lire auant que
 sententier, pour la varieté des Conseils, Cartels, Combats, Batailles, Ioustes, Tour
 noys passions & lettres d'amours auentures estranges, dont selon les diuerses hu
 meurs des hommes, l'un plaira à l'un, l'autre à l'autre, ou qu'ils seruent de plain
 vol sur la matiere qui leur sera plus agreable. Reste vne occupation Rethorique sur
 s fantastiques & differentes opinions du langage, laquelle ne veux tant contre
 roller n'y accuser en ceux qui ont escrit les autres liures precedens, d'y auoir usē
 des termes Espagnols contre raison, comme d'infante, infanterie, don, Imperatrix
 &c. mais ie m'en veux seulement excuser en passant à ceux qui pēseroient que ie
 les eusse oubliez ou obmis par ignorance: non plus que le surnom de mon Sylues de
 la Selue qu'aucun à dit vne fois, de la forest, vne autre fois, du desert: comme si
 les nom propres & surnoms des personnes se deuoient changer par exposition, ou
 il deuoit pareillement tourner le nom de Sylues en Florestan ou forestier. Quant à
 Don qui vient de Dominus Latin ie ne l'attribue qu'au seul Don Arlan
 ges natif d'Espagne: en quoy m'ont fait tort les Imprimeurs du dixieme au ti
 tre qu'ils ont fait composer par quelqu'un en mon absence, y nommant Don Flo
 riset

P R E F A C E.

risel de Niquee, qui ne se trouuera ainsi appellé par le cours du liure. Car ie suis de l'opinion du docte traducteur de Plutarque, & d'autres en nostre langue Francoise, qu'elle doit estre maintenue en sa pureté, simplesse, integrité nay sue: non pas d'en faire vne Corneille ridicule enmâtellée des plumes des oyseaux Latins, Italiens, Espagnols, voulans aucuns qu'elle face en cela acte de fille & heritiere de la langue Latine sa mere, & qu'elle vse de droit de communauté avecques les deux autres ses seurs & coheritières: mais aussi ne souffriray-ie pas qu'en lieu de tetter la mammelle de sa mere, elle luy ecorche ou arrache du tout. Au surplus quât à la difficulté de cest euvre, ie dy que c'est vne folie que paraenture ces tant sages seroient bien empechez de faire: dont me rapporte aux iustes estimateurs, qui cognoistront qu'il fault souuent que la version supplée à l'inuention: & quât au stile qu'elle varie infiniment par copie és deux sugets principaux des armes & d'amour. Enquoy l'auteur Espagnol à esté peu curieux de cōtenter la friande & delicate oreille, spécialement en la continuation finale des chapitres, & en la queuë des comments ou sommaires qui sont en luy tousiours d'un mesme langage.

A V SEIGNEVR I. GOHORY SVR
SA VERSION DV I3. D'AMADIS.

*Vn repos bien choisi, afoiblis nous soustient,
Et decharge l'esprit d'un grand nombre de peines,
Car le travail altere, & susse dans les veines:
Vne moitte chaleur qui le corps entretient
Doncq' apres ce labeur qui collé te retient
Sur les graues discours, & conduittes certaines
Du Prince, & sur le vray des vaillances Rommaines
Sage, prens le plaisir, qui gailhards nous maintient.
Car ayant repolli tant de nobles sciences,
Cherché tant de secrets, fait tant d'experiences,
Tu refraischis ton ame en ce doux paſsetemps.
Ainsi vas eueillant la Francoise ieunesse,
Puis te donnant plaisir, la mets en alaigresse,
Et ne perdant un iour, tu mesnages le temps.*

R. Belleau.

2

LE TREZIESME LIVRE D'AMADIS DE GAULE, CONTENANT
PRINCIPALEMENT LES HAVLTZ FAITZ D'ARMES
& auentures merueilleuses du trespieux & gentil Prince Silues
de la Selue, filz de l'Empereur Amadis de Grece, & de
la Roine Finistee: avec les gestes cheualereux de
maints grands Seigneurs & vaillans Che
ualiers. Aussi les fortunes estran-
ges d'amours de plusieurs
Princesses & Da-
mes.

*De l'ordre que donnerent les Princes qui estoient à Constantinople, sur le cartel de deffy
du grand Roy Bulthazar de Russie, qu'ilz auoient receu par ses douze Nains: & comme ilz
enuoyerent requerrir le secours de tous leurs alliez & vassaux.*

CHAPITRE PREMIER.



V XII^{me}. liure
pcedēt de ceste
histoire vous a
esté racōté, cō-
me vn des dou-
ze Nains, he-
rautz du grād
Roy Bulthazar
de Russie, feit
lecture au Cartel de deffy, en la presēce
des Princes de Grece à Constantinople.
Auquel cartel pendoient (au dessouz du
plus grād seau d'or principal du Roy Bul-
thazar) cent soixante autres moindres
seaux, tous semblablement de fin or, à las
de soye: c'est à sçauoir des Roys d'Orient
ses vassaux ou confederez. Ce cartel por-
toit en soy grande ocasion de trouble &
espouuementement, s'il eust esté adressé en
quelque autre endroit, que de ces magna-
nimes Seigneurs: ausquelz en telz effrois
le courage & hardiesse auoit acoustumé
de croistre & augmēter, qui se troubloit
& confondoit en tous autres. Seulement
dit le Roy Amadis: Ce m'aistdieux ces ma-
stins mescreans sont biē acharnez sur no^s:

mais i'espere en nostre Seigneur les rece-
uoir à ce coup & traiter en sorte que le
coust leur en face perdre le goust à iamais
Vray est que les tendres Princesses & Da-
mes en tomberent en grande perplexité,
& en perdirent bien le beau lustre de la
viue couleur de leurs faces: mesmement
celles qui estoient fiancees s'y trouuerent
fort esperduës, pour en voir le fruit de
leurs ardents desirs trop eslongné & re-
tardé. Quant à noz Princes ilz ne s'en es-
tonnerēt hors de raison, pour y oublier
aucun point de leur deuoir (ainçois sans
se confier à la rouë variable de fortune)
en tindrent incontīnēt le conseil de tout
ce qui estoit conuenable de faire & ordō-
ner en tel cas. Et apres plusieurs auis, fut
acordé & determiné, suiuant l'opiniō du
grand Roy Amadis de Gaule, qu'on pour-
uiroit aux portz de mer, & aux frontie-
res de toute munition de gens & fortifica-
tions necessaires: & que la charge en fust
donnee à bons capitaines qui entēdis-
sent bien le fait: aussi que tous les manans &
habitans des places non tenables eussent
à soy retirer en celles qui seroiēt en meil-
leur

leur estat de deffense, abandonnant les autres au surplus, que sans delay on depescheast courriers en toutes partz avecques lettres à tous leurs amiz & vassaux, pour auoir d'eux tel secours & aide que telle extremité requeroit. A quoy fut donné ordre en diligence, tant sur l'euitaillement & garnisons des places qui estoient situes du costé par ou l'ennemi pouuoit arriuer, que sur la depesche des messagers avec leurs paquets, portans article de creance: qui furent certains Cheualiers d'elite, ayans commandemens expres de s'aquiter diligemment de leurs charges, sans foy diuertir ny entremettre en autre action ou negotiation quelconque. Or la teneur des lettres fut telle que s'ensuit.

Lettre en forme generale. A tous les Princes, &c.

Nous le Roy Amadis de Gaule, les Emperours Esplandian & Amadis de Grece, avec tous les Rois, Princes & Cheualiers assemblez en la cité de Constantinople, à to⁹ noz amis & vassaux salut. Nous vous faisons à sçauoir que l'ennemi de l'humain lignage a inspiré au cueur du Roi de Russie de venir avec armee infinie & incroyable, de cent & soixante Rois couronnez, sans les Califes, Soudans & Tamarlans, contre nostre ville Imperiale, à intentiō de la destruire & exterminer, ensemble le nom de Iesus Christ, & d'eleuer sur sa ruine celui de leur faulx prophete Mahomet: si comme il nous est apparu à plain par vn cartel de deffi, à nous sur ce enuoyé de sa part. Et d'autant que pouuez entendre l'importance de l'affaire & en quel danger y gist la clef de la Chrestienté: Nous vous prions noz bons amis & commātons & enioignons à vous noz vassaux, que vous ayez en la plus grande diligence, que possible vous sera, vous redre en icelle nostre cité avecques l'arriere ban de toute vostre puissance. Et du surplus adiouster telle foi au cheualier pre-

sent porteur que vous feriez à noz propres personnes, &c.

De telle substance furent enuoyees plusieurs lettres à tous les Rois & grands potentats de la Chrestienté: mais vne speciale à l'Empereur de Rome, de laquelle la forme fut telle.

[Lettre speciale à l'Empereur de Rome.

Hault Empereur de Rome, Nous le Roi Amadis de Gaule, vostre frere & ami especial, avec tous les Rois, Princes & Cheualiers estās de present assemblez en nostre cité de Constantinople vous presentons salut. Vous avez à sçauoir, q̄ sur le point des nopces arrestees entre le magnanime Prince vostre filz, & la belle roine Daraide (ayant perdu le nom de Brianie) arriua à nostre port vn cartel de deffi de la part du Roy de Russie: lequel accompagné de cent & soixante Rois Orientaux, sans plusieurs autres grands Seigneurs avec nombre de gens infini, s'apdareille de venir contre icelle nostre cité imperiale. Or puis que vous comme le pilier occidental de nostre foi, estes obligé à sa protection & deffence, cōtre tels enuahissemens & assaux. Nous vous prions & requerons de nous y vouloir secourir avec la plus grande gent que vous pourrez leuer & assembler és terres de vostre obeissance: nous recommandans treshumblement aux bonnes prieres du tressainct pere.

Après que les courriers furent depeschez, les Princes demurerent à consulter & ordonner tout ce que besoin estoit en tel affaire, mesmement à reconforter les delicates dames cōtre telle occasion de frayeur & estonnement: lesquelles apres auoir vn peu reprins leurs espritz, fonderent grande assurance de leur consolation sur la magnanimité inuincible de leurs bons Seigneurs. Mais ce iour mesme iceux estans en leur grand palais, y entra vne damoiselle: laquelle s'agenouil-

lant deuât le Roy Amadis (auecques deuê reuerence à tous les grandz Seigneurs) lui presente vne lettre qu'elle portoit, apres l'auoir baïsee: lequel l'ouurant aussi tost, la leut à par soi, puis dōnant vn grād coup de la main sur sa chaire, s'escria en haute voix: Or face nostre Seigneur Dieu ce qui sera pour son seruice, puis qu'à ceste fin sommes nez: lors la baille à l'Empereur Amadis de Grece qui la leut hault & cler en telles parolles.

*Lettre du sage Alquif & de Vrgande
la mesconneüe.*

Alquif & Vrgande voz vassaux (tres-haultz & puïssantz Princes) vous auertissent que leur infirmité & indispositiō de leurs personnes ne leur permet de visiter vostre Cour sur l'aduerité presente: noint qu'il ne leur est loïsie de tāscher à destourner la volōte diuine en ses destinees fatales. Ne laissez toutesfois prosterner à ce coup voz cueurs hautains (valereux Princes) Car,

PROPHETIE.

Quant l'ours marin sailli de la forest Rusiane, foudroyera les campagnes Gregeoises, & par feu & flamme sa fureur executera: ayant le grand lyon tollulés chefs aux deux corbeaux marins: à l'ayde de l'autre lyon faon des deux plus braues lyons, ils seront rembarrez & repousez auec horribles hurlemens en la forest de leur saillie. D'ou ils n'oseront plus s'ir iusqu'à ce que l'aygle Royal à double chef tousiours victorieuse, & le Coq auec autres petitx aiglerons & multitude d'oïssillons niex, viendront en extreme furie, auec leurs serres aigues liurer tant de beccades aux lous marins qu'ilz les chasseront de la cauerne qu'ilz tenoyent rsurpee, auecq horrible carnage de tous. Et incontinant la tourtre conuertie sera assemblee à son enigneur, eflant apparue la colombe d'Apolonie.

faites doute aucune: car, ainsi en auendra, comme vous predifons.

Ceste lettre acheuee de lire: combien que chacū en restast en grand esmoi, neāt moins remeirent le tout en la volōte de Dieu. Et la damoiselle print congé des Princes & Princesses, qui la chargerēt de force recommandations au sage Alquif, & Vrgande la fee. Elle partie, il ne nous conuient ienquerir si tous demeurerent estonnez, principalement les dames, veu les estranges menaces de la prophetie. Parquoy chacun se renga à tout deuoir de deuotion de bon Chrestien: employant toute l'humaine pouruoyance au fait de la guerre, recommandant le surplus à le merci diuine: quoi qu'ils eussēt autrefois veu d'autres grandes armées, comme du Roy Armat de Perse, deuant la ville mesme de Constantinople. Ce que nous remettrons à son temps & lieu, pour toucher les poincts, qui ce pendant affierent à la presente histoire.

Comme les Tournois de Constantinople furent publiez à son de trompe & par lettres es pays circonuoisins pour les nopces des Princes: & de ce qui passa par l'effroy du deffy precedent, entre le Prince Agefilan & Diane.

CHAP. 2.

Entre les frayeurs souffertes par les grandes Dames estants à Constantinople, sur le denoncemēt de la cruelle guerre du Roi de Russie, & l'aduertissement des deux sages conforme à iceluy: celle de la Princesse Diane fut la plus grande de toutes. A laquelle le cueur faillit, tel le mēt qu'elle en toba euanouie, entre les bras de la roine Lardenie: qui de fois de larmes lui arrofa le visage. Mais soudain y arriua Agefilan, qui la saisissant entre ses bras, lui vsa de tant de remedes, auec lar

Or de cecy, tres-haults Seigneurs ne

mes coulans de ses yeux, comme de fontaines, qu'ilz surent à la faire reuenir de pasmoison. Lors elle ieta ses motz, avec vn grand soupir. Seigneur Dieu, lassé, qu'onques ne nasquit au mode fille de mere pl^{us} infortunee que moy: qui iamais n'y ay peu gouter que toute amertume & tristesse, veu qu'à peine suis-je sortie hors de la tour, q^{ue} ie mevoi acablee de mille angoisses, Agefilā voiant sa dame en tel estat, lui dit la larme en l'œil: Helas ma dame, pour Dieu ne vo^{us} passionnez ainsi, si ne voulez voir, ma mort soudaine. Auisez, ma dame, que vous tenez avecques vous vostre Agefilan, qui par la faueur de vostre beauté ne sentit onques-mais crainte, ne peur de danger quelconque. Et d'auantage, que de vostre part y en a tant de bons & vaillās Cheualiers disposez à vo^{us} faire seruice, qu'ilz ne delirent que de voir l'heure d'estre affrôtez à voz aduersaires. Renforcez vous & prenez cueur, ma dame: car trop plus dure mort me semble celle d'estre séparé de vo^{us} q^{ue} celle que mes ennemis mortelz me pourroient liurer en camp de bataille. Ottroyez moy seulement la grace, que ie puisse iouir de la gloire, dont vostre seul merite m'a rendu digne & capable: veu que le tiltre & manteau de mariage la peut couvrir. Las mon seigneur & amy (dist la Princesse) ne confiderez vous point, que dans peu de temps vous pouuez cueillir le fruit de ce qui tant vous est deu, sans offence de mon hōneur? ne vous assurez vous pas que ie suis plus vostre que mienne? A quoy respondit Agefilan: ha ma dame ne recherchez excuse en ce qui n'en a point en soy: toutesfois puis que tel est vostre plaisir duquel ie suis resolu de iamais ne me departir: vostre bonne volonté soit faite. Don Arlanges d'Espagne & la Roine Garaye sa femme n'estoient gueres en autre deuis ensemble, ne Florestan avecques sa Daraide, ne Florarlan & sa Lucenie. Ces seigneurs remettant le cueur aux foibles dames qui leur defailloit. Or estat en telz

termes le Prince Agefilan avec la Princesse son espouse: il se leua d'aupres d'elle & se va poser à genoux deuant le Roy Amadis son ayeul, & deuant les autres Empe- reurs & Rois les supliant de lui ottroyer vn dō. Le Roy le leua par la main, disant: Gentil Prince demandez ce que bon vous semblera. Ce que ie desire mon seigneur (dist il) c'est qu'on mande à publier vn tournoy au iour saint Marc prochain (qui sera dans vingt iours d'icy) par tous les royaumes circonuoisins: tant à fin que noz ennemis pensent que tenions peu de compte d'eux, que par tel genre d'armes atraire deçà de maintes contrees plusieurs Cheualiers errāns, lesquels no^{us} pourront donner grand confort & aide en ceste guerre. Le Roy Amadis eut en ce dessein fort agreable le hardy courage du Prince Agefilan dont se print (au rapport du croniqueur Galeris) à exclamer. O Dieu, comme tu ne peux gentil Prince, desguiser la valeur de la haute Roine Zahare ne dementir le bon sang de la souueraine Roine Alastraxeree ta mere. Lors le Prince lui baissant les mains, sortit de la sale avec les autres cheualiers pour auiser ensemble sur ce qui seroit à faire pour les ioustes. Si se mirent à depescher lettres & heraultz pour le denoncer en plusieurs pais, aussi y vindrent maints grands Seigneurs & braues Cheualiers: les vns pour l'esbat seulement des ioustes & tournois, les autres pour se trouuer en la grande bataille contre les Mores. A tant les laisserons dresser leur apareil de tournoy, pour toucher ce qui mieux escheoit au suget principal de l'histoire.

D'AMADIS DE GAVLE.

Comme le Roy Bulibazar de Russie soy representant de l'offence & outrage receu du Prince Florisel de Nicquec, entra en conseil sur ce qu'il auoit à faire, & comme il l'executa.

CHAP. III.

SUR ce qu'au prochain liure douziesme vo⁹ auoit esté deduit comme Bulibazar Roy de Russie, vaincu en camp clos par l'excellent Prince Florisel de Nicquec, sur la demande & pourchas de la Roine Sidonie, il auoit esté par lui enuoié à elle mesme pour son prisonnier : & comme il la requit de mariage, & par elle en fut escondit. En haine dequoy il dressa la grande armee pour venir sur l'Isle de Guindaie, d'ou il fut repoussé à sa perte & confusion, par l'effort du Prince Florisel & du vaillant Agesilan, soubz le nom de Daraide & de l'excellent Prince Falanges d'Astre & de la souueraine Princesse Alastraxeree. Lesquelz lui mirent toute sa gent en route, & toute sa personne mesme en extremite de soy sauuer seul de viuesse en vne barque. Or aiant ainsi malheureusemēt regagné son pais, vous pouuez imaginer si son esprit eut aucune occasion d'aile ou liesse. A peu que le cuer ne lui failloit de duel, il n'auoit aucun repos iour ne nuit : rien ne se representoit à son ame que ennui & melencolie, tellement qu'il ne rendoit qu'à la mort, s'il n'eust vomi son creuecueur au sein du personnage, qu'il auoit le plus familier & cordial en tout son Roiaume, qui estoit le Comte de Nesde. A lui descouure le Roy le grand despit qui l'oppressoit : lequel (de la malice dont estoit plein) ne l'eust pas plustost receu en sa poitrine, que tel conseil, selon son naturel, ne lui sortit de la bouche. Je suis (dist il) Sire, si eslongné de m'esbahir de l'ennui dont vous ressentez, des dommages & encōbres qu'avez soufferts de ces chiens mastins Chrestiens, que (tant s'en fault) ie m'esmerueille, comme vous respirez encore, & que n'en estes

mort de mere angosse. Veu que bien scauez que non seulement auez perdu, par leurs mains, vostre propre pere : mais encore vostre ayeul le bon Roy Breon, par celles du trahistre Florisel, & nagueres que vous mesmes estes deceu de vostre honneur par leur trahison, en combat singulier, auquel vous estiez présenté sur la demande de Diane : car autremēt ne pouuoient ilz obtenir le dessus de vostre robuste & vertueuse personne. Remettez aussi deuant vos yeux à quelle puissance vous fustes enuahir l'isle de Guindaie en vain : voire comme la Roine d'icelle, Sidonie non seulement mettant en oubli les iniures que d'eux elle auoit receuës : ains renōçāt à la loy de noz haultz dieux & cōuertie en la foy du crucifié, elle refusa & mesprisa vostre digne & sacré mariage : avec tant d'autres torts & outrages faicts à vostre magesté, que le cuer me creue presque, en y pensant, comme à celui qui le sent par dessus tous les vostres. Or n'est tout ceci commis par eux seulement contre nous autres, & continuellement contre ceux de nostre Loy, ainçois contre noz dieux mesmes qu'ils blasphemement & honnissent en plusieurs manieres : lesquels nous laissent, à bon droit porter toutes ces pertes, hontes & dommages, comme courroucez & indignez contre nous. de ce que souffrons, ainsi auiler & souiller leur precieux nom & reuerence, sans executer leur iustice. Parquoy resueillez vous, Sire, auertissez voz barons, priez voz amis, mandez voz vassaux & sugets, & assemblez à vn coup toutes voz forces, pour destruire tous ces faux Chrestiens ennemis de Mahomet. Le Roy ayant entendu patiemment tout le discours de ce bon conseiller, l'embrassa plusieurs fois par grande amour. Si manda sans delay six Rois de ses plus affectionnez : lesquels accompagnez de plusieurs autres grans seigneurs obeirent à son mandement, & il les receut en grande magnificence. Or apres qu'ils les

eut laissez vn peu rafraichir du chemin, les appella en cōseil: ou il leur descourir entierement son dessein & intention. Ce que tous approuuerent d'une voix, fors le Roy seul de Cacidoine: lequel pendant que les autres deschiffoient leurs auiz, estoit tousiours en pleurs & larmes contēplant le ciel. De quoy les autres estants merueilleusement esbahis, le Roy luy dist, qu'il eust à declarer son opinion sur le faict poposé. Lequel se leuant sur les piedz, pleurant comme parauant, commença à dire: Hault & puissant Seigneur, ie Roy de Cacidoine, le moindre des Rois tes vassaux, proteste que ia aux Dieux ne plaise que ie lusinge, & abuse mon Seigneur lige, ne que ie lui flagorne aux oreilles quelque faux conseil: Car ie vous assure que ceux qui vous incitent à l'entreprinse dont est question, ou n'aiment pas vostre honneur ou ne sçauent pas ce que ie sçai & presens d'icelle, c'est à sçauoir, que si au tēps delibéré, vous entrez en terre des Chrestiens, ne vous ne nul de ceux qui vous y feront compagnie, en retournera iamais en la terre: ains y passeront tous par le fil de l'espee & le sang Russian teindra les champs Gregeois.

PROPHETIE.

Les Corbeaux marins tenans la Cauerne usurpee des plus anciens & braues Lyons serōt elancez & iettez hors d'icelle à coups de bec horribles avecques occision de la pluspart d'entreux, & ce à layde des deux plus sages ours. Finalement des blancs oyssillons, avec l'aygle Royal & autres moindres aiglerons, ayant le Coq couronné, viendront au secours des Lyons affliges: à l'arriuee desquels sera consommee la destruction finale des Corbeaux marins.

A ceste cause vous prie instamment par voz dieux (hault & puissant Seigneur) que vous deportiez de ceste entreprinse. Et ne pensez que crainte de la mort me face passer de ce langage, laquelle ne me toucha

in estonna iamais en la grāde guerre que le Roy Armat mena contre Constantinople, avec presque aussi grand ost que vous y pourriez mener: pource croyez moy.

PROPHETIE.

Que ie voy le Dieu Mars en son opposition avec Saturne y escrimant d'une espee sanglante contre l'orient. Et si tant vous est à cuer la vengeance de vos iniures & des nostres, comme la vie de vos vassaux, differez à autre tēps attendant que ces planettes arriuent en constellation d'aspects opposites: lors en verrez isir fin heurieuse.

Ce dict, il se rasseit en son siege, lamentant en grande destresse. Ce sage Roi de Cacidoine rengoit plusieurs de la compagnie en son opinion pour la reputation de son grād sçauoir, esprouné en maintes autres occurrences: mais la folle & estourdie ieunesse cōuoiteuse de remuement de mesnage & affamee de gloire (comme est volōtier son naturel) conferma l'opinion contraire: remonstrans au Roi Bultazar qu'il n'y auoit apparence de croire qu'il tombast en la connoissance des hommes mortelz, ce que les Dieux immortelz auoyent ordonné & disposé en leur hault consistoire. Parquoy le Roy de Russie pour les mettre hors de debat & dispute & eūiter la dissension qui entre eux en pouuoit soudre, leur faict signe de silence & leur dist,

Harangue du Roy Bultazar.

Nobles Rois, barons, mes amis & vassaux, vous ne deuez ignorer de combien nous sommes plus obligez à l'honneur & renommee (qui ne perit point) qu'à la miserable vie qui a à prendre fin, d'autant que l'une nous promet vne eternité infinie & l'autre n'est qu'une chose peu durable, bien connoissans que trop mieulx vaut la mort qui nous assure d'une autre belle

*Lettre de Bultazar Roy de
Russie.*

belle vie, que la vie deshonorée, qui traîne le lien d'une mort honteuse, ou de perpétuelle oubliance. Ce que ie vous dy, mes amis & vassaux sur les propos de ce vieil Roy tadotté, craignant la mort & non encore saoul de viure, duquel ne les fots discours, ne les faulx propheties me destourneront de la vengeance que j'ay pourpensée sur mes ennemis mortels les Princes de Grece, vsurpateurs de ce qui à moy seul estoit deu, comme descendant de la celeste lignee des dieux, pour ce qui m'aimera si me suiue & s'y dispose & appreste dans trois mois, au bout desquelz ie suis resolu de desployer tant les enseignes que les voiles au vent. A quoy tous les Seigneurs assistens respondirent qu'ilz estoient bien deliberez de l'accompagner & marcher avecques toute leur gent & puissance. Sur ces entrefaites auint un cas piteux de ce bon vieillard, le Roy de Cacidoin, lequel outré iusques au cueur des paroles outrageuses du Roy Bultazar, si mal recognoissant sa fidelité & sage auertissement, redouble si piteusement ses plaintes & doleances qu'en se recommandant à ses Dieux, il ilcheoit roide mort emmi la sale du conseil. Ce que plusieurs des plus discretz fort espouuentez, prindrent à mauuais presage du succez de ceste guerre, mais la plus grande partie des iouuenceaux follastres & euentez qui (communement surmonte la meilleure) tant desireux de vaine gloire, de butins & pillages, que pleins de rancunes contre les Chrestiens, tint peu de conte de cest accident. Si firent enterrer le cors, & depecher de ce pas tât les douze nains vers Constantinople pour y porter le cartel de deffi, que vous auez desia entendu, que pareillemēt plusieurs autres messagers en diuerses contrees avecques lettres à tous les Rois, Califes, Tamurlans, Soudans, çafies de la moree, qui furent de telle forme & teneur.

A vous tous honorables Rois noz confederez & aliez, & à vous Califes, Soudans, Tamurlans de payenerie, exalteurs de la secte de noz dieux, destructeurs de la foi du crucifié. Nous Bultazar Roi de Russie, Empereur de Constantinople, de Trebisonde & de Rome, en esperance prochaine des Courones de Gaule, de la grād Bretagne, Rhodes & d'autres Royaumes Chrestiens, &c. Nous vous faisons sçauoir que par inspiration des dieux à nous a esté notifiée vne sentence donnée en leur hault consistoire, laquelle nous cōme executeurs d'icelle, auons enuoyé signifier à Constantinople, dont la somme est telle.

REVELATION.

Que les champs Gregeois avecques toutes leurs villes soient rasces & passees par le feu, tellement qu'il n'y demeure pierre sur pierre, & tous les peuples baptisez passent par les glaiues tranchans & leurs Princes & seigneurs soient liurez à morts cruelles & honteuses.

A l'execution de laquelle sentence nous appareillons avecq tout nostre pouuoir pour marcher dedans trois mois de la date de la presente, vous mandans d'y venir comparoir & assister pour tesmoins & cōsorts d'icelle, en la plus grande & meilleure compagnie que possible vous fera, & vous rendre en nostre grande cité de Russie, la ou nous vous attendrons. Donné en nostre consistoire par commission & mandement des hautz Dieux.

Tous les Rois & Barrons sortiz du conseil prindrent cōgé du Roi Bultazar pour s'acheminer chacun en son païs, & diligenter l'appareil de leur voyage tel que vous entendrez cy apres. Quant à lui, il demeura en la cité, pouruoyant à tout ce que mestier estoit à l'entreprinse de sa

fin

fiere & horrible guerre qu'onques par les siecles reuoluz n'en fut mentio de telle: c'est à sçauoir en prouision d'armes, cheuaux, engins de baterie, trefs, tentes & pavillons: & aussi de nefz, galeres, fustes, carraques, d'elefans garniz de chasteaux, de bois, & de maintes autres choses qui trop lōgues seroient à reciter. Or pour reuenir à nostre propos prealable: plusieurs cheualiers furent depeschez en toute diligence, qui rendirēt les paquerz là ou ilz estoiet enuoyez, ainsi que maintenant vous sera raconté.

Comme les courriers enuoyez par le Roy Bultazar, presenterent les paquetz aux Roys à qui ilz estoient adressez: & qui furent les Roys qui se rendirent en la ville de Russie, & avec quel nombre de gens tant de pied que de cheual ilz marcherent ensemble vers Constantinople.

CHAP. I I I I,

Les messagers du grand Roy de Russie depeschez comme vous a esté dit vers les Rois, Califes Tamurlans & tous autres ses vassaux & sugetz, pour leur denoncer qu'ilz eussent à se trouuer dedans le terme prefix en sa ville capitale avec tout le pouuoir qu'ilz pourroient assembler: souz promesse de Roy de grandes terres, villes & prouinces des Chrestiens à departir à chascun d'eux selon son degré. Ces messagers furent fort bien receuz portans telles nouuelles, & chascun de ces Rois & grands Seigneurs donna promptement & alaigrement bon ordre à tout l'equipage qui faisoit besoing pour telle expedition: les vns en aprest de guerre nauale, les autres de la terrestre. Que vous le feray-ie long? que dedans les trois mois, il se rendit vne gent innombrable à l'entour de la cité de Russie, remplissant les plaines, bourgs & villages, que telle n'auoit onques esté veüe ny entendue de la memoire des hommes: & tous

vnanimement si entalentez de combattre les Chrestiens, qu'il ne leur sembloit de pouoir iamais voir l'heure d'estre meslez avec eux. Que vous diray-ie du Roy Bultazar? Il estoit si ioyeux de ceste infinie assemblee (par laquelle il faisoit desia estat de la destruction vniuerselle de la Chrestienté) qu'il ne vaquoit à autre chose qu'à diligenter l'apareil de son voiage à la plus grand haste du monde, c'est à sçauoir, naus, galeres, brigantins & tous autres vaisseaux à passer gēs de guerre (avec la munition & artillerie necessaire) qui montoient bien iusques au nombre de huit mille, à compter tant ceux du Roy de Russie, que ceux qu'auoient amenez les autres Princes & Seigneurs de sa ligue, tellement qu'ilz tenoient bien en ordonnance six lieues de mer. Le premier de to⁹ qui arriua, fut le Soudan de Bulgarie, qui n'estoit pas droitement Geant, mais bien peu s'en faloit, lequel y amena vingt cornettes fort bien armees, à raison des grandes mines de fer, dont leur pais abonde, & estoient montez sur certaines bestes ap prochans de nature cheualine domptees par eux & appriuoisees, & au surplus fort hardies & bonnes au combat: aussi menoit vingt mille archers de pied, fort adroitiz à la guerre. Celui qui vint apres lui fut le Roy de Lande, menant dix mille hommes de cheual, armez de morions & cuirasses, avecques lances gaies à la genete & six legions cōpletes de gens de pied. Le troiesme fut le Roy de Pilapele, qui estoit vn robuste Geant nommé Librant, de hauteur demesuree, menant avecques lui dix autres fiers Geans ses parens, & seize mille cheuaux sans la grosse pietonnerie. Apres arriua le Roy de Bulgarie la grande accompagnē de trente enseignes de Bulgares, gens de trauail incroyable. Guerres ne tarda apres lui le vieil Roy entre les plus vaillans de Bulgarie la moindre, suiui de douze mille cheuaux legers, vray est qūe mal armez, seulement de hachettes & cabacetz avecques vne targe de

ais, mais il auoit entour sa personne deux geans grands comme deux tours, veluz comme ours, avecques lesquelz tous seuls il presumoit subiuguer tout le monde. Pareillement y vindrent les deux Rois d'Armenie maieur & mineur avec trente mille Armeniens, combien qu'il y en eut grande partie de mal armez fors de boucliers, dardz & massues, spécialement les gens de pied qui portoient des paons, le Roy des Georges n'y faillit pas, ne menant seulement que huit mille hommes de cheual, mais gens fort exercez aux armes, & aussi deux geans ses garde-corps, de la race des Cyclopes. Le Roy de Corie y vint à temps & celui de Tartarie, celui de Cazane, celui de Campestrie, de Zaqueie, de Catocie, le Roi de Safficie, le grand Roy de Morarie, le Calife de Mosquinter, celui de Mosanie, de Bugie, Serene, le grand Calife de Moranes, tous Princes couronnez marchans avecques si grande puissance qu'on y comptoit soubz chacun plus de douze mille combatans, sauf que la plupart estoient fondeurs & gens de trait, le Roy de Tarisme y vint avecques geas & maintes compagnies de soldatz, & le Roy de Testarg, & le fort Roy de Taldes, & celui de Caldie avec cinq Rois ses vassaux, & celui de Coralan: avec lesquelz, maintz geans y auoit de corpulence incroyable. Le Soldan d'Alape & celui de Talman furent les derniers. Brief tant de Rois s'y trouuerent & de grands Seigneurs, qu'il seroit trop enuieux à les vous dechiffrer icy tous par le menu. Mais sur tout y estoient plus de douze cens geans, aussi roides, nerveux & ossuz, qu'il en eust esté iamais veu. Lesquelz estoient si fiers & outrecuidez de se voir ainsi ensemble, qu'ilz pensoient tenir desia tous les Barons Chrestiens soubz leurs patés: tellement qu'ilz departoient des l'heure les Empires & Roiaumes entr'eux, non plus ne moins que s'ilz les eussent ia conquis. Mais ilz comptoient (comme on dit) sans leurs hostes: d'autant que noz bons Prin-

ces Chrestiens de leur costé n'estoient pas endormis, ains sans trop s'en estonner donnoient ordre à tout ce qui faisoit besoing à leur defence, non sans bons espions parmy les mescreans, par lesquelz ilz entendoient toutes nouuelles de leur fait & conduite. A tant nous deporterons vn peu de ce propos pour compter ce qui suruint sur ces entrefaites à Costantinople.

D'une Damoysele qui vint à la Cour de Costantinople avec vne estrange auenture d'un armet: & qui elle estoit.

CHAP. V.

L'Histoire nous raconte que les Princes Grecz atendoient leurs aduersaires en bonne deuotion avec cinquante mille que cheualiers que soldatz, soubz l'esperoir du secours de la plupart des Rois Chrestiens qui de iour à autre pouuoient estre auertiz de la venue des ennemis de la foy. Toutesfois cela n'en gardoit pas le Prince Agesilan, Dom Arlanges d'Espagne & Florestá avec aucuns autres Princes de sentir en leurs cœurs des angoisses mortelles, de ne tenir en leur puissance les motiues d'icelles, & en especial, Filisél de Montespín. Car posé le cas que la pucelle Anaxare l'aimast ardamment (comme la verité estoit) neantmoins ne lui monstrois elle plus grande faueur, que de dire qu'elle estoit contente de l'espouser, souz le consentement du Roy son pere & des Empereurs ses Seigneurs. Mais la belle Princesse Leonide portoit grande tristesse pour l'amour du Prince Rogel de Grece, qu'elle aimoit plus que soi-mesme, tellement qu'environnee de mille doulleurs, disoit: Ha Prince Rogel fleur de Cheualerie & de beauté du mode, qu'est-il de toy? mais hélas qu'est-il plustost de moy, sans moy pour toy? Puis que tu me tiens ainsi en oubly, ie ne puis croire sinón que tes paroles estoient faulces: mais est

B

il pos-

il possible qu'en si grande valeur ne gise pareille loiauté? comme celle qui oncques n'a defaillly en ceux de ton lignage. Telz discours & plusieurs autres faisoit à part elle la belle Princesse, attendant la venue de son Rogel, de qui elle s'asseuroit que quelque part qu'il fust, iamais ne failloit, sçachât les nouuelles de ceste guerre, de venir au secours de son sang & son pais. Or auint qu'estans les choses en l'estat que vous avez entendu, entra en la grand sale imperiale vne Damoiselle sans aucune compagnie: laquelle estoit fort richement habillée, & portoit en sa main vn armet my-parti, de couleur, à sçauoir la moitié d'azur d'acre, l'autre de fin or reluisant. Et aprochant des degrez des trofnes royaux, meit les gnoix en terre & commença à dire à haulte voix: Roy de la grande Bretaigne, haultz Empereurs & Princes excellens, la hautesse de voz vertuz & de vostre renommee, volant aux quatre coings du monde, & montée iusques au ciel, est venuë à ma connoissance apres auoir couru & recherché les principales cours des Rois & grands Seigneurs de l'Europe, en queste de la fin de mon auenture. Car vous devez sçauoir que ie suis fille d'un Cheualier Seigneur d'un bon chasteau, qui est bien l'un des plus sages de la terre. Lequel connoissant par les artz que son chasteau me deuoit estre tollu apres sa mort, forgea ce heaume & auant sa fin me le baila, disant que quand l'infortune m'auendroit de telle perte, que ie me meisse par le monde en queste du ieune Cheualier qui par sa haulte bonté pourroit enlacer cest armet en sa teste: à la charge, que ce cheualier m'otroyroit vn don, à sçauoir, de venir avec moy pour me faire obtenir droit de celui qui m'auroit priuee de mon heritage. A quoy respondit le Roy Amadis: Bonne damoiselle, nous tous serions tref-aïses que vostre auenture eust à prendre fin en ceste cour, à fin qu'eussiez icy remede à vostre ennui, plustost qu'en

autre endroit. Et pource qu'il s'en va tard, la preuue en sursera iusques à demain le matin. A l'instant fut conduite la damoiselle en bon logis ou elle fut bien traittee. Maintenant vous veut l'histoire conter qui estoit la Damoiselle, & la cause de sa venue. Vous avez desia entendu en l'vnziesme partie de ce grand Roman: comme vne Damoiselle estoit venue en l'Isle de Guindaye, requerant secours contre vn cheualier qui l'auoit chassée hors de son chasteau paternel, estant situé en la terre du Duc d'Athenes, & comme allerent avecques elle Rogel de Grece & Filisfel de Montespin: Aussi comme estant là pour le combat, Filisfel s'enamoura de la cointe & iolie Marfire. De laquelle estant paruenue au comble de ses desirs, il auroit depuis esté si mal traité & avecques telle rigueur que tout desesperé s'en estoit retourné à Constantinople. Apres deduit nostre histoire, que party Filisfel d'Athenes, la gente Marfire demeura en si grand desplaisir de l'auoir ainsi traité & rudoyé, qu'elle desiroit mourir de dueil tellement que quasi plus ne mangeoit, plus ne reposoit iour ne nuit en aucune maniere: dont sa beauté alloit fort decheant & amoindrisant. Elle en cheut au lit malade, ou de iour à autre sa maladie augmentoit, iusques à ce que se voïât pres du tiquet de la mort, print Cardonie la Damoiselle par la main & avecques grands sanglotz lui commença à dire: Cardonie m'amie, vous sçavez bien que iamais ie ne vous ay rien celé de ce que i'ay eu sus mon cuer, & moins ores le feray-ie. Pourtant vous devez sçauoir m'amie, que la raison de mon honneur, ne la grandeur de ma beauté, ne la rigueur dont i'ay vsé à l'endroit du vaillant Prince Filisfel, n'ont peu auoir tant de pouuoir, que l'excellence de sa beauté n'ayt tout mis soubz le pied, & moy reduite au piteux estat que me voiez, Auquel ie ne sens en moy force ne vertu de pouuoir plus gueres prolonger ma vie,

aussi

aussi n'en ay-ie plus de desir: vne seule requeste ie vous fais pour la derniere, sur la fidelité dont vous m'estes redeuable, que ne faillez se tost que ie seray passée, de me tirer le cuer & aller à Constantinople ou la part que sera Filisfel mon Seigneur, le lui presenter, pour sur lui executer la vengeance du tort & rigoureux traitement que lui ay visé, en recompense de l'amour qu'il me portoit. Ce disant tomba esvanouie dedans le giron de Cardonie (Car ce iour là, la colere extreme lui auoit donné vigueur de foy leuer du lit, s'enueloppant seulement d'un riche manteau de satin noir, fourré de martres sebelines.) La pource Damoiselle s'en trouua fort estonnée, toutesfois courut aux eaux de senteurs dont elle lui baignait la face qu'à chef de piece elle reuint de palmoison: mais avec tant de gros soupirs & de sanglotz menuz, qu'il sembloit que le cuer lui deur creuer en la poitrine. Cardonie la reconforta au mieux que possible lui fut, disant la larme à l'œil, ma dame, ne vous tourmentez point en ceste façon, à Dieu ne plaise que ce miroir de beauté si tolt perisse & define, pour Dieu prenez courage ma dame: car j'espere en peu d'heure redre voire cœur content. Lors lui disant comme elle auoit vne tante de grand sçauoir, qui releuoit son fief de Marfire, & qui facilement par ses artz inuenteroit quelque expédient à son affaire: par ce propos la laissa vn peu consolee, & de ce pas alla trouuer sa tante. A laquelle ayant dechiffré le cas en peu de paroles, eut réponse que par ses fortz elle auoit ia cogneu la maladie de Marfire sa dame lige, & volontiers auoit pourpensé le remede, lui disant: rien ma niece pren cest armet que i'ay forgé avec telle propriété, que nul autre que le Prince Filisfel de Montespain ne le peut mettre en teste. Si le porte à Constantinople, à telle condition que celui qui le pourra enlacer sera obligé à te suivre la part que le voudras conduire. Ce que fit Cardo-

nie, & cōbien que Filisfel l'eust veüe maintesfois avecques sa dame Marfire, toutesfois il ne la recogneut aucunement, à cause de certaines eauës artificielles dont sa tante lui desguisa le visage, voire le chageant si biē en mieux de teint & de lustre, qu'il n'y eut eu cheualier qui se fust réputé fort heureux de l'accompagner par tous pais. Or venons à deuiser de l'esprouue qui l'endemain fut faite de l'aventure de l'armet par elle aporté.

Comme le iour ensuiuant l'aventure de l'armet enchaîé fut esprouuée par plusieurs Princes & Cheualiers, & comme Filisfel de Montespain l'acheua, puis partit de la cour avecques la Damoiselle messagere.

CHAP. VI.

ALORS que la claire & luisante aurore accompagnée des ardens rayōs de Phebus auoit monstřé sa splendeur au monde, comme quant au lyon il fait son sejour, le Roy Amadis avec tous les Empereurs, Rois & autres Princes & grandz Seigneurs s'estoient leuez & fort richement parez estoient descenduz en la grande sale du palais. Et guerres ne tarderent apres à s'y rendre les belles Emperies, Roines & Princesses avecques leurs beaux acoustremēs (comme on dit) du hault apareil, qu'elles auoient acoustumē de porter es iours solemnelz, ou de quelque festin Roial, auquel se tenoit Cour planiere. Specialement y vint la tresillustre Diane, & l'outrepasse Fortunie, & incontinent la deuotion Chrestienne y fust celebree par vn grand prelat, à laquelle ilz assisterent tous & toutes avecques fort grande contrition, en requérant le Dieu tout-puissant, Dieu Sabaoth, Dieu des batailles, de les vouloir preseruer & garder contre les ennemis de la foy de IESVS CHRIST

son filz. Ce fait vint la Damoiselle son heaume au poing, & ploiant les genoux deuant le Roy Amadis (comme celui à qui comme pere & Seigneur de tous ceste reuerence estoit due) le suplia vouloir commander qu'on esprouuast l'aventure: qui à l'heure print lui mesme l'heaume en main, & se le posa sur la teste: Pourtant vous fais-je sçauoir que d'autant qu'il n'estoit pas forgé pour lui, il n'en sçeut mettre l'aventure à chef, ainçois sentit l'armet fort leger (car il auoit telle propriété q̄ selon le degré de la bôté des Cheualiers il monstroït la pesanteur) Et qui eust esté celui qui eut acheué telle auēture plutoist que ce grand Roy Amadis, le Cheualier nōpareil, le preux des preux, si par valeur d'armes elle eust deu estre accomplie. Pour retourner à nostre propos, il faillit hors tel esclat de splendeur de ce heaume qu'il n'y auoit qui la peut regarder. Alors le Roy Amadis le bailla à l'Empereur Esplan dian son filz, qui le receuant en ses mains, lui dist: Je croy bien mon Seigneur que là ou vostre grandeur faillira ie ne suis pas pour conquerir grand honneur. Toutesfois le mit sur sa teste, & autant lui en auint qu'au Roy Amadis son pere. Apres, lui le print l'Empereur Lisuart qui ne pl^s ne moins en fit que les deux premiers. Si le bailla à l'Empereur Amadis de Grece qui apres pareille excuse de presumption d'entreprendre ce à quoy les precedens n'auoient peu paruenir, essaya de l'enlancer en sa teste, d'ou il sembla à l'instant qu'il en sortit lumiere comme de plus de cinquante torches ardentes: pourtāt n'en peut il armer son chef. Ainsi de main en main le bailla au Prince Falanges d'Astre, lequel le receuant se tourna vers sa chere Alastraxere, disant: ma souueraine dame vueillez à ce coup departir vostre faueur à ce Cheualier vostre, à qui ne l'avez iamais deniee, par laquelle il a opinion de mettre fin à toutes les auentures du monde. A quoy lui respondit la Princesse: mon Seigneur vous en pouuez bien as-

seurer comme de chose vostre pour telle valeur qu'elle peut estre. Ainsi meit l'armet sur sa teste & y fit aussi peu que les autres: dont le liura à la messagere disant par facherie. Mais iecroy bonne damoiselle que vous auez icy aporté cest armet pour vous truffer & mocquer de nous. A quoy elle lui respondit promptement, qu'elle ne sçauoit s'il estoit memoratif des paroles qu'elle auoit tenuës au commencement, à sçauoir, que ceste auenture ne s'adressoit qu'à vn ieune Cheualier, A ceste cause qu'il ne le deuoit autremēt prendre à desplaisir: d'autant que sa prouesse estoit assez conneue par tout le monde. Je voy bien (replique le Prince Falanges) qu'il fault si ne suis content, que (comme on dit) ie me contente sur les cartes: partant meit l'armet entre les mains du Prince Florisel de Niquee, lequel ietta les yeux sur Heleine sa dame, le voulant enlancer, mais il lui en auint ainsi qu'à Amadis de Grece: depuis passa par les mains de plusieurs Cheualiers iettant vne grāde lueur pour les vns & nule pour les autres selon la differēce de leur prouesse & vaillance. Sinon quand il echeut à Agefilā, qu'il flamboya de telle sorte que chacun des assiltās eut grand doute qu'il acheueroit l'aventure. Lequel se tournāt vers sa dame, lui dist: ma souueraine maistresse ores me sont bien necessaires voz faueurs que iamais ne refusastes à vostre Daraide: Monsieur (respondit la Princesse) comme à Agefilā ie les otroieray, qui ne se peuuent acorder telles qu'à Daraide, au tēps qu'avec tant chaste & nette Amour vous en auez peu iouir. A l'instant print Agefilā l'heaume duquel faillit aussi grande clarté qu'on eust encore veuē, toutesfois il en demeura en pareil estat que les autres precedens. Or voicy venir Filisel de Montespīn le prendre en son reng, lequel destournant son regard vers la pucelle Anaxare, qui l'auoit mutuel fiché sur lui, le pose sur sa teste, & soudain s'ouure l'armet miraculeusēment par le milieu.

ou estoit le departement de l'or & de l'azur. Dequoy ie ne vous sçauois affermer, si la pucelle receut plus de plaisir ou de mal contentement, l'un de veoir son cheualier auoir emporté ce pris par dessus tous les autres, l'autre pour l'obligation que cest hōneur emportoit de se departir d'elle. Incontinent la Damoiselle monstrant grād ioye s'humilia à genoux pour lui baiser les mains, requerant qu'il lui eust à otroyer le don, lequel la relevant par la main, lui dist qu'elle demandast ce que mieux lui plairoit, d'autant qu'il estoit prest à l'accomplir. Ce que ie vous requiers (respond elle) c'est que sans autrement sejourner, vous ayez à me suivre, la part que ie vous guideray. Ce que lui acordant, se fait apporter ses armes, desquelles armé de toutes pieces print congé de tous les Empereurs & Rois qui lui enchargerent de ne faire longue demeure en ce voyage : moins n'en fait sa Dame Anaxare lui faisant assez entendre par ses yeux la tristesse qu'elle portoit de son departement. Le Prince Anastarax, & la Princesse Siluie ses pere & mere, lui disant: A Dieu, la larme en l'œil ne lui recommanderent pas moins son brief retour. Ainsi monte Filisfel sur son courfier & Cardonie sur son palefroy, suiuan le chemin qu'elle le guidoit. Lesqueiz nous laisserons iusques à leur temps pour deduire ce pendant autre point qui plus couuient maintenant à nostre histoire.

De la grande angoisse que les Princes Agefilan & don Arlanges souffroient pour leurs fiances : & comme ilz s'entretenirent de nuit, & de ce qui passa entr'eux.

CHAP. VII.

LEs nouuelles de la venuë des Turez, ne le soyn qu'en auoit le Prince Agefilan ne lui pouuoiet diuettir les angoisses mortelles qu'il souffroit pour sa Diane, voire non moins ardentes. & en-

flambees que du temps qu'il se desguisoit du nom de Daraïde. Sa passion estoit redoublée, à cause que parauant il n'en sçauoit qu'autant que nature pouuoit decourir : & à présent disoit maintesfois à part lui quasi demy mort. O cruelle Duchesse, que ne m'as tu laissé en la gloire dont ie iouïssois sans me la faire quitter à fin que iamais la fin n'en fut accomplie. O que ie t'estois redevable, si i'eusse peu toujours auoir la fruition de ceste perfectiō souveraine. Las que ie te dois sçauoir peu de gré du contraire. A chacun coup qu'il tomboit en ces doleances, ils s'esuanouïssoit ne la consolation de don Arlanges, ne celle de la Roine Lardenie ne l'en pouuoit detourner, ne la priuauté mesmement ordinaire qu'il auoit avec la Princesse selon l'vsance des fiancez. A laquelle prenant aucunes fois les mains il disoit: Ie ne sçay, ma dame, cōme vous me pouuez ainsi tenir ceste rigueur & cruauté, sans auoir autrement pitié de vostre Daraïde, au moins si n'en auez de moy Agefilan. A quoy elle respondit: Monsieur, si telle faueur qui estoit loisible avecques Daraïde m'estoit aussi bien permise avecques Agefilan, i'en serois fort contente. Mais maintenant depuis le tiltre de fiançailles, telles caresses & priuantez me sont desordres par honneur, iusques à la celebration des nopces : & sur ces paroles lui baisoit sa bouche vermeille, lui ayant estendu sa liberté iusqu'à ce point. La belle Roine Garaye qui pres de Diane estoit oyant le propos d'Agefilan & d'elle, combien qu'elle ne fut moins trauaillée de l'amour de dom Arlanges, se tournant vers elle avec vn soubris gracieux, lui dit: Sus ma dame, acceptons le deffuy de ces Cheualiers: qu'ilz ne nous tiennent pour si couardes que ne les oziois attendre & puis qu'il m'est permis de declarer le camp, ie l'elis au petit iardin de nostre logis: quant aux armes i'en laisse l'election à vous autres. Les armes, ma dame (dist lors Agefilan) les offensiuës seront les tourmens

que Diane me fait continuellement souffrir pour elle, les defensives seront mes larmes. Ay pour Dieu m'amie (dist Diane) ie ne veux point accepter ce combat, d'autant que ie suis trop ferue & nauree pour entrer en camp clos, là ou ie me vaincrois moi-mesme: ne vous en chaille (dist la Roine Garaie) il vous conuient ietter vostre gage: & ostant du col de Diane vn collier d'or ou pendoit vn cœur de rubis, le baille à Agefilan, disant: Cheualier receuez en gage de nostre conflit: Auisez si estes assez hardy pour entreprendre vn si grand fait d'armes, Agefilan le print & le mit en son col, lui baissant les mains par forme de remerciement. Lors la Roine soy tournant vers Dom Arlanges, lui dist: Et vous Seigneur cheualier si vous osez accepter le camp, ores receuez mon gage, qui fut vn anneau d'un diamant de grand pris qu'elle lui mit au doigt, & il lui baisa la main dont elle le presentoit. Ainsi passerent ces Princes & Princesses le surplus de ce iour en grand desir de la nuit ne voyant l'heure qu'elle vint. Laquelle venue, Agefilan & Don Arlanges se retirerent en leur logis, qu'ilz ne faisoient qu'un ensemble, & laissant reposer leurs gens, ilz se leuent & ouurerent vne poterne qui descendoit à trauers vne galerie au iardin que la Roine Garaie leur auoit dist: car le logis qu'ilz tenoient estoit celui ou logeoit Rogel quand il estoit là. Or pour reuenir à nostre propos, Don Arlanges ouurit l'huisset par lequel ilz entrerent au iardin, & de là se rendirēt souz vne fenestre à treilliz de fer qui respondoit là du logis de Diane, ou ilz se mirent à attendre: mais gueres n'y furent que dist Arlanges. Ce m'aïd Dieu monsieur i'oy qu'on parle la haut & ie voy la lumiere & entens la parole. Parquoy grimps ces Princes aux treilliz de fer de la fenestre, ilz ouïrent que la Roine Garaye disoit: ma Dame il m'est aduis qu'il est heure que nous allions au camp, car noz aduersaires y seront desia à nous

attendre: ie ne voudrois qu'ilz gagnassent aucun point d'honneur sur nous: Ha pour Dieu (respond Diane) m'amie n'y allons point: en bonne foy ilz sont trop hardiz & presomptueux. Et qu'est ce-cy (dist la Roine Lardenie qui là estoit) ie vous voy en mauuais train de bien combattre, quand vous y marchez à regret. Si la tire par le bras à demie force, à laquelle Diane respōd: laschez, laschez la prise, ma grande amie, car ie suis preste à faire de bon gré ce que vous conseillez: & allons donc. Lors ouurerent les fenestres basses ou elles se presenterent à la lumiere des flambeaux qui en la sale estoient allumez: Si trouuerent les deux Princes es fenestres, qui tous rauiz de leurs beautez à l'ouerture, pour offre de telle courtoisie, mirent les genoux en terre, ou ilz se tindrent vn grand espace en suspens sans pouuoir delacher vn seul mot: La roine & la Princesse n'estoient guerres en meilleur estat, dont Lardenie commença en soubzriant à adresser sa parole à Agefilan, disant: & comment mon bon Seigneur, en si perilleux conflit la force vous est elle si tost faillie? Ne croiez pas ma dame (respond Agefilan) qu'il y ait des armes defensives assez fortes pour resister à si cruelles flesches, mesinement de la part de ceux qui n'ont pas pensé à soy defendre pour la gloire qui redodoit sur eux de telle victoire. Alors leur estant commandé de se releuer, ilz commencerent par grand amour à leur baiser les blanches & douces mains: Et à leur grande ioye & priuauté honneste passerent celle nuit ensemble qui à la mesure de leur plaisir leur sembla courte: iusques à ce que l'auatcoureuse du soleil les menaçoit par sa course hastiue, qui les fit retirer en leurs logis. D'ou aians ainsi apprins le chemin ilz le rebattirent quelques autres nuictz si secretement qu'onques personne ne s'en aperceut. A tant les laisserons en ce deduit, pour mettre en auant le train de la ieunesse du Prince Silues de la Selue (cō-

me de chef principal de la presente histoire lequel hors de la cour de Constantinople estoit nourry, & instruit en la maniere qui vous sera presentement racontee.

*Comme le Damoyzel Sylues de la Selue
en sa prime ieunesse prenoit son
exercice à la chasse.*

CHAPITRE VIII.

NOUS vous auons raconté au dixieme liure de ceste histoire, comme l'Empereur Amadis de Grece fust transporté par fortune de mer en l'isle deserte avec la Rome de Thebes Finistee, laquelle par certaine occasion estrange hors de son gré & son escient y fust enceinte de lui & acoucha à chef de terme du plus bel enfant du monde, qu'ilz surnommerent Sylues de la Selue, à raison de sa naissance auenuë en vne forest. Aussi comme ilz y furent vn si long temps, que ilz auoient du tout perdu l'esperance de iamais en sortir y pensant bien acheuer leurs iours ensemble. Dont l'Empereur y viuoit ou plustost languissoit miserablement en continuel regre de sa Niquee: dequoy il composa le lay piteux que luy auez ouy chanter au douzieme liure. La ilz prenoient leur esbat à leur petit mignon, qu'ilz façonnerent de leur main en toute cointise de gestes & contenance, tellement que sa bonne grace enrichissoit merueilleusement sa beauté & la nourriture d'Amadis, son adresse. Lequel lui vfit tousiours depuis le nom de filz en son commun langage (comme vous apparostro cy apres en ce present liure) iacoit qu'il supprimast & tint secrete son origine. Mais quicôque le pouuoit voir à nud, s'en deuoit bië aileuer par son seing & marque de l'ardente espee, qu'il portoit totalement semblable à celle de son pere & en pareil endroit de son corps. Or ce nom & surnom de Sylues de la Selue t enan

(comme vous sentez) de la forest, aussi fust il fort adonné à la chasse en sa premiere ieunesse, auant qu'il eust encor la force suffisante au faitz des armes. En l'usage d'vnze à douze ans, il commença à prendre grand plaisir à la chasse du lieure selon sa tendre puissance: ou il monstroient desia son gentil esprit contre les ruses de ce petit animal, & son adresse à cheual à deuaner la pluspart des meilleurs piqueurs de sa troupe. Vray est que la ou il se trouuoit, il mandoit tousiours quelques paisans qui auoient le bruit de tendre colletz ou de tirer de l'arbaleste sur les lieures en forme, ne trouuans rien plus desplaisant & diminuant ce deduit, que le long temps qu'on employe souuent à trouuer le giste du lieure: combien qu'il ait plaisir à essaier les chiens au sentiment du viandi & à voir deffaire la nuit du lieure, & qu'on ne faille gueres à bien adresser au gaignage de la saison. Ceste chasse il aimoit lors non seulement comme la plus douce & la plus aisée pour son aage: ains comme celle qu'il disoit plus plaisante que la venerie des grandes bestes rousles ou noires: d'autant qu'il conduisoit tousiours ses chiens à l'œil sans les perdre de veü, & y auoit le plaisir de pouoir iuger les mieux requierans & forcenans: aussi que c'est comme vn certain apprentissage des grandes chasses, tant à esueille l'esprit du piqueur, qu'à dresser & affiner le nez des chiens à toutes autres bestes, & apprendre toutes ruses & houruatis. Vn iour il en rencontra vn vieil & malicieux, qui apres maintz deffaultz retournant sur soy se sauua à la fin mal mené & lassé sur vn haut creux d'vne vieille muraille: tellement qu'il le trauailla avec tous les gens iusqu'à bien pres de la nuit & n'y fut descouuert que par lui mesme. Vne autre fois s'en presenta vn, lequel aussi tost qu'il sentit le son de la trompe (que le Damoisel scauoit fort bien entonner selon les poinctz des occurrences) le ga-

le galant se leua du giste, & se forpaifa tellement qu'il met long temps les chiës en grande peine, iusques à ce qu'un vieil piqueur s'en auisa qui le trouua relaisé bien auant en vn estang dedäs des iongs. D'ou ne voulät deloger pour chose qu'on lui tirast, le gentil Damoisel par colere de vengeance de trauail qu'il lui auoit donné & à la meute de lieures & chiens courans, met pied à terre & se despouillant, l'alla gagner à nage & faire vider hors de l'estag & le liure à la mercy de ses chiës decouplez tout à l'entour d'icelui. Dequoy au retour il estoit fort loué des Princes, Seigneurs & dames par le recit des chafseurs. Aussi deuez vous entendre qu'en ce temps là, tous enfans non seulement de Princes mais de sages gentils hommes, estoient instruits à la cognoissance des lettres & de nager, pour les inconueniens que souuēt par voies lointaines & diuers encombriers ilz pourroient encourir: Il est vray que par aucuns preud'hōmes fort duitz à cest exercice il y fut conduit: Mais il y deuint bien tost plus sçauant que ses maistres par subtilité d'esprit & son propre naturel qui y estoit fort enclin: en sorte qu'il y faisoit honte quelques fois aux Princes qui s'y ebaroiēt avec lui: mesmement vne fois qu'il se leua vn lieure, que les autres qui estoient contre vn vent rude de Nort qui lors souffloit, vne autrefois contre le vent de Su, lesquelz lui seul costoiänt, y forhua les chiens & le print à force. Il y auoit aussi fort bonne grace à hupper de la voix, & par le iargon parler aux chiens & leur donner courage, & sonner de la trompe ores le gros ores le gresle en la queste & quand il estoit lâcé. Mais quand il se sentit plus fort, il marcha bien d'autre pied aux grands forestz, y exploitant gaillardement l'effect du nō qu'il en portoit.

Des bons gouuerneurs qu'ent le Damoisel Sylues de la Selue en son ieune age, tant pour l'instruction de son esprit, que pour l'exercice de son corps.

L'Empereur Amadis de Grece anoie baillé à Silues son filz vn gouuerneur nommé Leon de Suaue pour les lettres, instruit en maintes langues & sciences, & vn cheualier nommé Perrot fort prudent, & autant du corps dispos, & adroit en tous honnestes exercices, qui l'accompagnoit tousiours à la chasse, & iamais ne l'abandonnoit en chose ou il y eust quelque apparence de danger. Leon lui enseignoit les lettres & artz dignes de l'institution d'un Prince. A Perot estoit commis le reste de sa conduite hors du palais. Le damoisel les tenoit en bonne affection pour la douceur & humanité dōt ilz le gouuernoient: tellement que l'un le pdāt de veuē, il estoit entre les mains de l'autre, en tel repos d'esprit à chacun que s'ilz l'eussent tousiours tenu en leur garde ensemble, & ne s'en fust iamais chascū d'eux ainsi assuré s'il eust esté es mains d'un autre. Or combien que l'exploit des armes semble seul digne d'un Prince, voire d'un simple gentilhomme, qui en doit faire principale profession: Toutesfois il y doit adiouster quelque bonne connoissance des lettres politiques & historiques, mesmement vn grand Seigneur (afin qu'il ait dequoy paier (comme l'on dit) en compagnie des autres Princes & ce point d'honneur, sur ceux qui moins en sçauent, & sur les inferieurs, par dessus lesquelz il doit auoir autant d'auantage de sagesse & prudence, qu'il a de puissance & commandement: aussi pour respondre de son chef aux ambassadeurs des potentatz estranges, & auant l'age de telle suffisance, leur sçauoir bien exprimer la responce auisée & arrestee par son conseil. Mais pas ne fault demander si le Cheualier Perot qui cognoissoit le naturel de son Seigneur tāt adonné à la venerie, estoit soigneux & curieux des chiens par dessus le veneur qui en auoit la charge, pour lui en faire venir de bons de toutes partz, comme chiens beaux de Barbarie, endurans les chaleurs

chaleurs comme les fauves de Bretaigne plus vistes & plus ardans, comme les chiés gris communs à toutes bestes, & qui de plus grand cueur les poursuivent iulques à la mort. Aussi les chiens noirs des Ardenes, puissans de corsage, chassans de forlonge, moindres de vistes que les autres precedens: mais bons aux regnardz & sangliers, bestes plus lourdes & pesantes. Le Cheualier Perot estoit soigneux, non seulement des bonnes races des chiés à faire venir de toutes partz à son maistre, ains de ce qu'ilz fussent bien pensez, bien traictez en leurs maladies de drogues & compositions qu'il faisoit pour icelles. Mesmement les lices qui estoient couuertes, pour porter les bons chiens à ce qu'elles fussent gouuenees comme il appartenoit, & les chiés qui en sortoiēt nourriz de tel pain & carnage qu'il leur falloir. A ceste cause il vsurpoit ie ne sçay quelle surintēdence par dessus le veneur, de situer & accommoder le chien plus proprement & commodément que somptueusement, de s'ingerer de leur bon traictement au retour de la chasse. Or se trouua il mieux pour le plaisir de son seigneur en la chasse du Cerf, des chiens qu'il auoit premieremēt dressez pour le lieure au commencement de son deduit de la tendre ieunesse (estans accoustumez à tous forhus à toutes ruses & chemins & campagnes) que de ceux qui propremēt estoient dressez pour le cerf: car ceux-là quand on vouloit abandonnoient aisēmēt le lieure pour le cerf, à cause de sa chair qu'ilz sentent beaucoup plus friande en la curee & du vent & sentiment en la queste, qu'il a plus grand que le lieure. Le veneur commandoit tresbien aux piqueurs & valetz des chiens, & faisoit fort bien le deuoir de sa charge. Mais le precepteur Leon luy enseignoit d'abondant les grandes vertuz & proprietiez du cerf, les medecines qui sortoient de ses membres, son naturel & subtilité, la longueur de sa vie: Brief tout ce qui s'en pourroit cōprendre par liures:

cōme le veneur tout ce qui s'en cognoissoit par l'usage, cōme de l'aage par leurs testes ou ramures, du rut & mut des cerfs des complectiōs du pelage: auoit le iugement bon du pié, contrepie, des portees, des fumees, des allures, des abbatures & foulures, & des frayoirs. Il ne failloit à soy trouuer le soir en la chambre du grād veneur pour entendre le depart des questes, puis le matin alloit se mettre en queste au tailliz avecques son limier, ne se fondant tant sur la façon du chien qu'il y oubliast son œil pour s'asseuer sur l'egail abbatu ou sur les foulées franchies, ou le iugemēt de la forme du pié enleuee que le cerf va de bon temps. Or l'auant trouué & rembusché il tenoit son chien de court, puis iettoit ses brisées hautes & basses, en reuoiant toutes les connoissances du pied des portees & foulées. Il alloit en queste aux gaignages pour choisir le cerf à veuē il alloit pareillement aux hautes fustayes & aux petites couronnes des taillis derobbez, qui sont par le milieu des forts, n'y oubliant rien de ce qui concernoit son office: dont deuint le Damoisel Silues sous telz maistres le plus parfait chasseur de tous les Princes de son temps.

Comme le Damoisel Silues de la Selue hantoit les grandes forestz en l'aage de quinze ans. Et des estranges auētures qu'il y rencōtra.

CHAP. X.

AVTANT aima le Damoisel Silues les bois & les bestes à chasser en l'aage de quinze ans, que depuis il rechercha les champs & les Cheualiers à combattre. C'estoit vn deduit de voir l'assemblée dedans la forest, en quelque lieu touffu & vmbrageux pres de quelque source de fontaine s'ils y en rencontroit, là ou le sommelier deschargeoit fiascons & bouteilles qu'il mettoit rafraichir en l'eau, & s'il ne la trouuoit assez froide, il y mettoit du Sapestre d'auance. Le cuis-
nier

nier aussi arriuoit qui sur vne nappe esten due sur la verdure, mettoit diuerles fournitures de iambons, ceruelatz, langues de bœuf fumees & autres esguillons de vin. Le Damoisel Sylues, Perot & les autres gentilz-hommes ses fauoris qui l'accompagnoient en cest esbat, iettoient tous leurs manteaux sus l'herbe, & se couchoient dessus, mangeans & beuuans, & disans sonnettes plus gayement que dedans les palais es tables roiales: l'un brocardoit l'autre de quelque tour d'amour ou d'autre ioyeuseté, ou cas d'abus de chasse sans offenser l'honneur de personne, attendant le rapport des veneurs par le grand veneur, presentoient leurs fumees formees, en torche ou en planteau au Damoisel, en racontant ce qu'ilz auoient veu. Lequel choissoit le cerf estant le plus courable, qui plus lui agreoit à courre comme de dixhuit cors, & en la plur belle meure aduertissant celui qui l'auoit destourné, qu'il vouloit aller à la brie. Alors beuuoiert & railloient puis montoient sur leurs courtaux dont Perot ne failloit d'auoir le meilleur apres celui du damoisel, pour le suiure tousiours de pres & ne l'abandonner iamais de veüe: combien que l'ardeur du iouuenceau le transportast souuent apres le cerf à piquer à bride abatuë, reuenant plusieurs fois, au logis ecorché de visage, & derôpu d'habillemens dõt il ne faisoit qu'rire avec les damoiselles qui le gaudissoient de gaster ainsi le riche miroir de leurs beautez. Il prenoit aucune fois plaisir à courre le cerf à force: Autrefois estoit bien aise de le destourner & lui trancher chemin: Hardy estoit à l'assaillir de l'espee aux abbois. Toutesfois bien adroit à soy garder & son cheual de dâger. Or s'en leua vn iour vn qui se pouoit dire grand vieil cerf qui bondit par dessus les toilles, & se fit poursuiure bien deux iours & deux nuictz, hebergeant le Damoisel avec trois des mieux montez en burons sur des fueilles pour toute couche, & y mangeans des chastaignes & beu

uans de l'eau des marez comme les pauvres gens de forest demy sauuages, neantmoins qui lui sembloient d'aussi bon goust que les vins & viandes delicieuses de son ordinaire: Tousiours suiuant les chiens avecques Perot par la menee ou ilz alloient sans s'escarter ne croiser de peur de lancer le change, & pour releuer les deffaux. Esquelz Perot d'un costé menaçoit les chiens, le Damoisel au lieu du deffault les appelloit, resioüissoit & encourageoit. Le troisieme iour il fust trouué par l'enseignement des vilains du pais (qui l'auoient veu passer) en vne petite Islette couuerte de saux au milieu d'une riuiere là ou il s'estoit retiré las & recru, n'ayant plus de fiance en ses iambes, pour courre, ne d'espoir en ses fortz pour soy cacher, d'ou il estoit forpaïsé, Perot qui passa l'eau avec quelques autres l'y trouua couché sur le ventre les piedz desous, sans que par là venuë il bougeast en aucune maniere: tant estoit defaillly de force & vigueur. Lors estant deliberé de le ferir de l'espee au trauers des flancz, s'aperceut de l'esclat d'un large collier d'or qu'il auoit au col, combien que couuert en partie par les deux bordz de la chair qui par succe de tēps les auoit surmontez. Si le fit prendre sans autre effort & par vne lesse attachee au collier mener au damoisel, avec aduis du collier: deuant lequel comme miraculeusement il s'agenouilla, & si print à manger de sa main. Le collier regardé de pres se trouua graué de lettres Grecques capitales ou maiusculs: cest à sçauoir deux ΣΣ au commencement.

ΑΙΩΝΑΣ ΣΗΣΕΙ ΦΗΜΗ
ΣΕΟ ΑΝΤΕΝΙΑΥΤΩΝ.

Signifiant par l'exposition de Suane son gouuerneur.

Siecles pour ans viura ta renommee.

Aus surplus du tour du collier estoit le temps

temps marqué auquel, le grand Alexandre lui auoit mis, qui montoit plus de mille cinq cens ans, qui n'est pas la moitié selon quelques philosophes de ce que ilz peuuent viure par cours de nature. Les deux SS. Suaue accommoda sans doute à Silues de la Selue, à qui grandes merueilles estoient promises par maintes propheties. Lequel ne fut moins content & resiouy de la prinse de ce cerf, que l'Empereur son pere eust esté de la conqueste d'une riche cité : voyant mesmement que il s'appriuoisa à lui si naïuement, le suivant par les cours & iardins du chasteau comme vn chien domesticque, sans y blesser & offencer personne. Or ne voulut estre moins hardy le Damoisel Silues contre les fiers ours & furieux sangliers que furent iadis le bel adonis & Meleager en tel aage, que le sien (combien que lui en meilleur succez) se presentant à eux l'espieu au poing, entre les dogues & autres chiens dechirez souuent & eurent par les defences des vieux sangliers. Entendez donc qu'un iour que les veneurs auoient fait leur rapport à l'assemblée, d'auoir destourné vn porc entier & sans refus, dont ilz faisoient iugement par le pied, les bontis & le fouil. Dieu sçait quand d'arriuee on le chargeoit de chiens à la mode acoustumee, comme il se mesloit parmy eux pour presser la beste & lui faire perdre le cuer: tousiours s'y trouuoit des premiers, ne monstrant contenance de plus les redouter que simples brebis. Vous eussiez veu quand il conuenoit leur courre sus à cheual avecques les picqueurs, l'adresse qu'il y auoit à tenir la main haute (pour ne donner sur la hure (tirant les coups d'espee en plongeant. Ces vieux sangliers qu'il assailloit si hardiement tant à pied qu'à cheual ne failloient gueres à descoudre quelques chiens, ou veneurs en tenans les abbois, son courtault y receut bien aucunes fois quelque atteinte & dentee, ainsi qu'il donnoit à vn port du quart

an quelques coups de passades en vne plaine. Surquoy lui remonstra le Cheualier Perot qu'il ne deuoit auoir tiré le coup du costé de son cheual, par ce que la beste se sentant feruë y adresse volontiers sa vengeance: voire qu'à vn besoing, il le deuoit courir de son manteau: remontrant ce qu'il receut fort bien de lui pour le regret qu'il eust à ce courtault hardy & de longue haleine & bien duit à sa main. Ses veneurs vne autrefois en destournerent vn ieune, & fuant apres lequel s'obstina tellement, & s'acharna le damoisel (suiu seulement de Perot.) comme apres lui monté à l'auantage) que la nuit le surprint dedans la forest à la poursuite. Besoyn leur fust de chercher à trauers le bois quelque maison ou buron de forestier pour se mettre à couuert: Et tant qu'ils aperceurent quelque petite lumiere, ou ilz tirent de bon courage, y esperans trouuer quelque commodité d'hebergement.

Mais à l'arriuee ilz furent bien estonnez de rencontrer deux ieunes sauages en vne cauerne tous veluz de pied en cap, tellement qu'on ne leur voyoit de la face que les yeux, au demeurant de belle taille & proportion. Or faisoient du feu en vne petite loge qu'ilz auoient enleuee sur quatre fourches & couuerte de branchage, n'ayant sur leur corps autre couuerture ny habillement que de leur poil tout blond, à l'aborder, on ne tira d'eux aucun langage, sinon vn marmonnement de gosier avecques signes de leur presenter quelque membre de faon de biche qu'ilz rotissoient sur des bastons bien enfumez. Perot fut esbahy qu'ilz ne s'enfuirent: mais le Damoisel Silue n'en fut aucunement esmerueillé, comme par quelque instinct de foy sentir féé, & que toutes choses luy deuoient quasi obeissance. Si lui sautèrent au col avecques caresses fort plaisantes, sautellans & ricanans d'une façon bien estrange: Que vous en diray-je plus?

plus ? Silues & Perot se coucherent sur le tueillage avec eux & rongerēt de la grād venaison des Cheualiers errans du Roiaume de Logres , ou, non gueres meilleure, pour appaiser leur faim . Et apres se coucherent au mieux qu'ilz peurent : aiant atachē leurs cheuaux par les licolz aux prochains arbres pour paistre l'herbe . L'endemain chacun d'eux lia vn des sauages aux licolz, & ainsi les emmenerent avec eux , errans par la forest sans connoistre voye ne sentier : iusqu'à ce que sur le soir ilz sentirent le son d'une trompē de leurs picqueurs , qui s'estoient mis en leur queste . Mais à l'arriuee au chasteau, la risēe fut du Damoisel contre Leon son gouuerneur , à qui il crioit Becus, pour la doctrine qu'il lui auoit racontee de l'opinion d'aucuns : que l'homme auoit la lāgue des Caldeens naturelle & sans maistrise , ainsi qu'il auoit esté esprouuē par certain Roy qui auoit fait alaitter deux enfans par deux nourices muettes , lesquels toutesfois en aage de former paroles auoient dit naturellement Becus qui est le pain en langage Caldaïque ou Sarmatique, arguant que nature ne parleroit plustost l'artifice qui est au pain que le bled qui est naturel. Or prenoit le damoisel Silues grand passetemps à ces deux sauages les voiant boire, manger, iouer ensemble & faire tous autres actes naturellement sans aucun desguisement . Ilz s'entr'aimoiēt vniquemēt & d'eux à chef de temps sortit la race toute semblable. A tant laisserons le Damoisel en son aise cōtētement des deux nouueautez qu'il auoit rencontres en sa chasse : laquelle il continua iusques à ce qu'il fut mandē à Constantinople, comme l'exercice le plus propre pour aguerrir le corps à toute peine & trauail du fait des armes : auquel il mēnoit volontiers quand & lui ces deux sauages qui lui seruoient beaucoup plus que ses lumieres ne tous ses valetz de venerie . Là ou nous le laisserons encore quelque temps pour traiter les auentu-

res estranges qui suruindrent au Prince Rogel de Grece son cousin, auant la guerre de Russie.

Comme les deux Princes Rogel de Grece & Brianges de Beocie, s'estans embarquez avec les trois filles Royales de Perse, relacherēt par tempeste en vne rade deserte , ou la belle Sydere l'aisnee leur fut enleuee par des Corsaires.

CHAP. XI.

Nous auons à vous ramenteuoir sommairement ce qui vous a esté amplement deduit au douziēme liure prochain, touchant l'auenture merueilleuse auenuē au Prince Rogel de Grece à la suite de la damoiselle portant vn espreuiet sur le poing : pour le recourement duquel en vn vol pour pie , il entra dans le chasteau du magicien Gandistin, ou il trouua les trois nieces du Soudan de Perse , qui y auoient esté transportees inuisiblement en la tour mobile enchātee. En laquelle le Roy Torrin leur pere , & Persilee fille du Soudan leur mere abusez par Gandistin , les auoient laissē entrer par maniere de passetemps : duquel chasteau Rogel (apres maintz cheualiers y occis de sa main & l'espouuentable monstre) les auoit deliurees. Mais depuis vaincu de l'amour de l'aisnee Sydere , qui surpassoit de beaucoup Fleurinde & Syndaide ses deux autres sœurs en beauté, en faueur d'elle auoit promis de les accompagner & reconduire en Perse . Or vous dit maintenant la presente Cronique qu'ilz s'embarquerent à certain port d'ou ilz nauiguerēt le Prince Brianges & lui avec elles trois iours par vent propice : mais au quatriēme iour s'esleua la tourmēte qui les trauailla perilleusement dont à la fin ilz relacherent à vne rade deserte (situee selon leur bussolle & leur quarte marine) en la ligne mesme du port d'ou ilz estoient partiz, combiē que costier de plus de dix lieues. De mesme vent y auoit esté poussē vn bri-

vn brigantin de Corsaires, qui estoit lors à l'ancre, à l'abri d'un cap d'une Isle nō si lointaine de là, que bien ne les descourussent, si les veirent saillir de leur vaisseau (ou ilz laisserent leurs nochers) eux desirans rafraichir sur terre, mesmement à l'ocasion des tendres pucelles, pour l'enluy de la marine la ré peste estoit. aquoise, les deux Princes avecques les dames se mettent dedans vn bois qui estoit pres du riuage, ou ilz choisissent vn lieu fort touffu & vmbrageux pres d'une source: auquel ilz repaissent de ce peu que Fleurinde en vne seruiette auoit porté de la nef, & boient de l'eau claire. Puis travaillent qu'ilz estoient, se tirans vn peu les cheualiers à l'escart des pucelles ne tarderēt: gueres tous de peine & lasseté à s'endormir. Les corsaires qui estoient tousiours: au guet, estimās auoir rencontré la proye en terre ferme, qu'ilz alloient querans sur les ondes, si tost qu'ilz voient la nuit close vont douze en leur esquif à la rame descendre vn peu plus bas, en lieu toutesfois mal accessible. ou ilz grimperent: à quelque peine, & au petit pas allerent surprendre les deux cheualiers endormiz profondement comme en leur premier somme. Lesquelz trouuans en tel estat couchez sur l'herbe, leur testes defarmees de leurs heaumes gisantz pres d'eux, sans faire bruit les prennent les premiers, puis leur tirent doucement leurs espees hors des fourreaux, desrobent leurs escuz: de là s'en vont aux deux pucelles Fleurinde & Sindaide, leur tirer ce qu'ilz peurent de chaines d'or, & pierres precieuses: car le capitaine voiant la singuliere beauté de Sidere feit dessein de l'enleuer enchainee & baguée pour son butin. Ce qu'il commanda à deux des plus robustes de ses gens (lui demeurāt avecques les neuf autres pour leur faire espaule) qui vrayement l'emportèrent ainsi fort endormie plus de vingt pas sans esveiller, voire plus loing l'eussent portee, sans vn faux pas que feit l'un d'eux sur vn gros caillou qu'il ne

voyoit pas en telle haste ioinct l'obscurité de la nuit. Alors s'esueilla la pucelle, & se voiant en telle sorte entre les mains de gens rustaux hideux de visage à elle incogneuz, s'escrie à haute voix: A l'aide, à l'aide. Iupin, Apollon, Teruagant sauuez moy, ie suis perdue. Ces sœurs qui plus prochaines estoient de ce costé, s'esueillirent en sursault les premieres à son cri, qui ne la trouuans point aupres d'elles, s'escrierent pareillement. Adoncques s'esueillirent les deux Princes fort estonnez & plus encore quand ilz entendirent par les deux filles le rapt de leur ainee: spécialement Rogel qui l'auoit si viuement empreinte en son cueur. Il ne fault point demander de quelle sorte il fut esmeu, & voulant desgainer son espee pour aller à la recouffe comme il fut perdu de ne la trouuer point, & autant de son escu & plus encore de son armet: moins aussi ne le fust Brianges de son costé. Toutesfois ainsi mal en point n'ayant en teste que la coiffe d'acier courant apres les brigantz pour recouurer Sidere, mais ilz voient le capitaine en chemin & les neuf autres en armes qui leur defendent le pas pendant que les deux gaignoier leur vaisseau avec leur proye. Si s'auiserent à l'extremité les deux Princes de rompre chascun en diligence vne grosse branche d'arbre, & ainsi embastonnez vont trouuer les Corsaires, lesquelz leur iettent de grosses pierres de loing, puis se mettent en deffense le capitaine & vn autre garniz des deux espees des Princes (qu'ilz iugeoient à bon droit meilleures que les leurs) la lune comme sur la fin de son decours auoit lors peu de lueur, sinon ce qu'y adioustoit la splendeur des armes: dont fut la meslee d'autant plus dangereuse aux deux cheualiers que les pautonniers assailloient de tous costez & les endommagerent en diuers endroitz de leurs corps, à faute de leurs armes tant offensives que deffensives. Mais à la longue ilz s'auiserent tous deux de charger de leurs leuiez sur leurs

espees mesmes, si bien qu'ilz leur firent voler des poings : ce fust le pis à les ramasser, qu'ilz ne peurent faire, ainsi environnez de toutes partz sans receuoir de pesants coups des huit, tandis que les deux qui faisoient teste mettoient les mains à leurs espees propres. Mais les Princes refaisis de leurs bons brancz d'acier, leur firent bien faire targue, autrement que des rameaux de bois, tellement que Rogel eiarta le capitaine d'un tailant, qui trebucha sur le sable, & Brianges separa d'un coup le bras droit de l'espaule de son second : puis se ruant iointz tousiours & adossez ensemble à trauers le reste, ilz les mirent bien tost en fuite estans faillis de courage par la perte de leur chef. Si les poursuiuent les Princes roidement iusqu'à leur vaisseau là ou les brigans pensans se sauuer, partie se noya à la foule en mer, & l'autre se sauua avec vn peu d'aide. Les deux gallans de l'esquif se voyans ainsi demeurez seulz, voians la nef des Princes prochaine à les pouuoir poursuiure, ne se mirent en aucun deuoir de se sauuer à la rame, redoubtās la mort à l'exemple de leurs compagnons. Parquoy s'esslongnans vn peu du riuage seulement escrient les mains iointes à testes nuës : mercy, mercy Cheualiers, & nous vous rendrons la Damoiselle. Ce qui leur fust volontiers acordé par les deux Princes qui se sentoient fort blesez, & craignoient que telz vilains ne feissent quelque outrage à la royalle pucelle. Si font signe aux Corsaires de remolquer, & de mettre Sidere à terre avecques les bagues & ioyaux desrobbez, leur otroyant la vie & liberté promises. Si est est-ce (dit Briāges) qu'il fault que l'un de vous deux courre à nostre nef, pour nous amener vn marinier : à quoy l'un s'offrit qui trouua sur le chemin son capitaine prest à rendre l'ame par la grande effusion de sang du iarrer, & son compagnon en pareil estat de l'espaule, dont fust belle de pesche, pour les maux & pillages qu'ilz faisoient

en celle coste. Cependant Rogel se met à reconforter Sidere, qui toute espleuree lui respond que lui mesme auoit plus grand besoing d'estre restoré pour ses plaies par le sang qu'elle en voyoit couler & de celles de Brianges pareillement. Pource s'en vont avec elle retrouver ses deux sœurs, qui s'en estoient fuyes fort auant dans l'espeueur du bois, estimans que ce fust fait des Princes & de leur sœur semblablement. Pas ilz n'oublierent en repassant de recueillir leurs armes & escuz gifans pres des deux grands pendardz qui acheuoient les hocquetz de la mort desquelz recommanderent à Dieu les ames. Pour abreger, au cry de Sidere ses sœurs reuindrent, puis ensemble desarmerent les deux Princes pres de la fontaine, & leurs playes lauees & esluées, les banderent de ce qu'elles eurent de linge avec quelques herbes du bois que Fleurin de cognoissoit pour les estancher.

Comme les deux Princes accompagnez des trois Royales pucelles de Perse se meirent en route de la forêt pour trouuer lieu à appareiller leurs playes: & cōme ilz y rencontrent le Frandeur qui leur ioua vn tour de ses ruses.

CHAP. XII.

LE Corsaire ne tarda gueres à amener non pas vn marinier seul, mais plusieurs des plus fortz qui y vindrent avec le pilote, portans des materras & autres choses de secours dont ilz se peurent auiser, ayans entendu l'estrange auenture auenuë aux Princes & Dames. Si les aiserent au mieux que possible leur fust : puis faisans deux bieres cheualeresques de branches d'arbres, les porterent à bras en leur nef. D'ou ilz maderēt au port à Sirind escuier de Rogel de les venir trouuer là en diligēce avecques leurs cheuaux & palefrois qu'ilz lui auoient laissez en garde

garde pour leur brief retour. Lequel arrivé: ils delibererent de partir de là pour aller chercher guerison à leurs playes qui estoient fort griesues & perilleuses. Si monterent Brianges qui estoit le plus blessé, sur le traquenard de Sirind, luy prenant son cheual, Et le cheualier des pucelles (non que Rogel s'estoit donné sur son destrier) cheuaucha au petit pas entrans au premier sentier qu'ils apperceurent aucunement froyé avecques les belles pucelles montees sur leurs palefrois lesquelles auoient bien leurs beaux visages apalis de frayeur. Ainsi cheuaucherent enuiron deux iours sans prendre leur repas & repos que par la forest au moins mal qu'ils pouuoient ne trouuer bourg ne village ny vne seule personne de qui ils en peussent apprendre aucune adresse iusqu'à ce qu'au troisieme iour ils decoururent vn cheualier venant à l'encontre d'eux monté sur vn cheual moreau & armé d'un harnois iau-ne: lequel à l'approcher ils saluerent courtoisement & il leur rendit leur salut. Beau Sire (luy dit Rogel) nous sauriez vous par courtoisie enseigner au plus pres, quelque lieu ou le cheualier que voyez & moi puissions estre pensez de noz playes? Seigneur (respond le cheualier iaune) pour l'apparence que ie voy de preud'homme en vous, vrayement ie me consens à vous mener en vn mien chasteau, auquel sera donné bon appareil à voz blessures. Et si ce n'est avecques tel traitement que pourriez bien desirer, au moins sera-ce de tel que i'ay accoustumé d'vser à voz semblables. Grand merci Sire Cheualier (dit Rogel) si Dieu me sauue la vie, vous n'y perdrez rien, ie n'en fay pas doute (respond il) moins ne peut on esperer d'honorables personnes dont vous portez la chere. A cette cause vous veulx bien auertir, puis que marchez en ma compagnie, de vous garder des ruses du fraudeur, que ie serois deplaisant qu'il vous fait aucunui.

Ie vous en remercie grandement (respond Rogel) mais depuis le iour qu'il me planta à pied, il m'a laissé pour suffisamment aduerti de me garder de mesprendre. Point, point (replique le Cheualier) ce n'est rien dit: vne personne qu'il a abusé vne fois, ne se peut encore bonnement sauuer de ses mains iusques à la troisieme. Sur ces propos descoururent de loing vn chasteau de fort belle architecture: auquel estans arriuez, se presenterent soudain six hommes en la basse Cour. Lors dit le Cheualier iaune: Seigneurs ores mettez pied à terre & pendant que ie donne ordre pour voz cheuaux, vous ponuez entrer dedans. Ils obeirent à son commandement: & les filles descendues de cheual & le Seigneur Brianges allerent ensemble à la sale du chasteau, qui mieux sembloit hebergement d'araignees que de gens, dont ils se trouuerent assez ebahis. Mais à l'instant mesme ils sentirent vne grande huee vers la porte de ce chasteau: ou sortant Rogel avec son Sirind pour voir que c'estoit, apperceurent le cheualier sur son cheual & ses hommes sur leurs autres cheuaux & palefrois. Que demandez vous par ce cry (dit le Prince Rogel) au fraudeur, qui estoit le Cheualier iaune. Quoy? (respond) que vous estes mal auisez du fraudeur en la terre de ses ruses: Et pour le vous faire connoistre au certain il emmene de ce pas voz montures. Sire Cheualier (luy dit Rogel) cuidant le gangner par belles paroles, En bonne foy la bourde est gentile, & i'en prens le second, aus en tresbonne part: duquel ie me condamne à payer la folle enchere en quelque bonne monnoye. Mais ie vous prie de grace me vouloir encore pour cette fois faire courtoisie de mon destrier à cause de l'indisposition de mes blessures. O que ie suis ayse! (luy replique le fraudeur) que soyiez auisé comme Daraide vostre cousin: & pour entrer en commencement de
payement:

payement pour ce mien auis, ie me faisi-
ray de voz cheuaux, & pour vous en four-
nir acquit, ie vous prometz de retourner
à voz armes. Parquoy vous demeurant
ainsi auisé de ma part, ne vous plaignez
si ie me suis voulu paier par mes mains. A
ce mbt tournant bride le fraudeur & ses
autres bons complices apres lui, s'en alle-
rent de là au gallop. Grand creuecueur
sentit le Prince Rogel de voir ainsi emme-
ner leurs cheuaux qu'à peu qu'il ne force-
noit voire non tant pour foy que pour le
regard du seigneur Brianges qu'il voyoit
si durement nauré. Si entre dedans, & lui
dist: O Sauueur, de quelle sorte nous som-
mes engaignez. Comment (dist Brianges
est-ce donc le Fraudeur des ruses, ce che-
ualier qu'ici nous a si bien guidez, qui
nous vient de desmonter tant mal à pro-
pos: en malaventure puisse il entrer qui
m'auoit desia trompé moi-mesme vne au-
tre fois. Si nous eussions eu tant soit peu
de sens (dist Sidere) nous le deuions reco-
gnostre, veu qu'il nous auertissoit en per-
sonne nous garder de lui. Ce ne me poise
de foy (dist Rogel) sinon pour le piteux
estat ou vous estes, mon bon ami, & pour
ces belles filles. Pource suis delibéré eûtât
le moins nauré d'aller apres, essaier si
pourray recouurer noz cheuaux & palle-
frois. Et ie vous fiance ma foy qu'il n'en
eschappera ainsi de mes mains, comme il
fit de celles de messeigneurs le Roy Ama-
dis & l'Empereur Amadis quand il eschap-
pa en la bourbe & fange. Sur ces entre-
faites ilz ouïrent des cris nouveaux: &
fortans tous dehors, veirent que c'estoit
le cheualier Iauue, qui leur dist: Seignrs
Cheualiers il m'est souueni vous auoir
dit sur le chemin que seriez appareillez de
voz plaies en mon chasteau: & par ce que
i'ay oublié sur le lieu à vous en declarer
la maniere, Ie suis retourné en diligence
pour vous dire que n'espargniez les toiles
d'araignees dont est abondamment tapif-
fé mon chasteau, qui sont propres à estan-
cher le sang. Surquoi demeurez y à la mal-

heure, & ie m'en vois à la bonne, vous
laissant en estat de gens bien auisez, moy
qui desloge pour vous auiser. Adonc pi-
que le cheual des esperons, se bourdant
& riant à gorge desployee. Et Rogel au
contraire presque se desesperant. Toute-
fois considéré que la chole ne pouuoit pl'
aller autrement, à la requeste du Sei-
gneur Brianges ilz se mirent tous en che-
min à la suite du Fraudeur, au grand tour-
ment des deux cheualiers naurez & tra-
uail des tendres pucelles qui n'auoient
gueres acoustumé ce mestier de laquais.
Et ainsi cheminerent long temps, se rians
par fois de la trôperie, par fois s'en cour-
rouçans amerement, iusques à ce qu'ilz
veirent venir vers eux sur la route qu'ilz
tenoient vne damoiselle sur vne haque-
nee. Dequoy ilz furent grandement re-
siouïz pour apprendre des nouuelles du
Fraudeur: à la rencontre ilz s'entrefalue-
rent. Ma Damoiselle (dit Rogel) nous
sçauriez vous rien dire d'un cheualier aux
armes iaunes qui s'en va ce chemin deuât
nous? A la verité Seigneur (respond elle)
vous ne pouuez pas trouuer qui vous en
peut rendre meilleur conte que moy, car
ie le viens de voir presentement entrer en
vn chasteau qui n'est pas fort loing d'icy
en ceste forest: Et d'autant que me sem-
blez compagnie honorable, ie vous y
guideray volontiers. Dequoy la remer-
ciant se mirent en chemin auecques elle,
& à la grande importunité de tous Brian-
ges (qui estoit bleffé fut mis sur la croupe
du palefroy de la damoiselle.

*Comme la Damoiselle qui guidoit les cheua-
liers deuant le Prince Rogel malement, & luy
apres, le Fraudeur: puis partirent pour trouuer
remede à leurs plaies.*

CHAP. XIII,

ILZ n'eurent gueres marché ceste car-
riere, que la damoiselle qui les condui-
soit laissa le droit chemin destournant
à la main

à la main gauche en vne sente assez estroite, laquelle aiant fuiuy vn espace de tēps, ilz delcourirēt vn chasteau de belle monstre, bien entouré de carneaux avec vne grosse tour au milieu. Voi-là (dist elle) Seigneurs ou i'ay veu entrer le cheualier que demâdez: mais il me sembleroit simplesse d'aller hurer à la porte du chasteau par ce que ie suis certaine que ceux de dedans ne vous l'ouuriront pas. Mais s'il vous plaist d'aller icy pres en vne vieille mine (qui seruoit d'entree secrete au chasteau en temps de guerre) vous y pourrez commodément entrer à sauueté. Mille mercis (dist Rogel à la Damoiselle) ie vous prie donc de nous y vouloir seruir de guide, & i'espere de bien recognoistre le plaisir que nous y ferez. Elle de ce pas les conduire en la bouche d'une cauerne par laquelle ne pouuoit passer qu'une seule personne de front: par la Sire cheualier pouuez vous bien entrer, dit la Damoiselle puis que i'ay acomply vostre commandement, à Dieu vous commande, par ce que plus ne puis icy seiourner. A luy soiez vous recommandee (dirent ilz) si s'en va & sans qu'aucunement ilz l'aperceussent, elle rentra par vne poterne dedans le chasteau mesme. A peine fut elle partie que le Prince Rogel se fourra dans la cauerne, & Sirind apres lui. Car le Prince Brianges estoit si mal de ses playes qu'il n'y auoit ordre de les suiure: ains demeura assis sur l'herbe avec ces ieunes filles prians Dieu vouloir prēdre Rogel en sa sainte garde. Lequel entré en la cauerne, & y marcha environ vingt pas en telle obscurité qu'il ne scauoit nullement ou il alloit iusques à ce que sans scauoir comment il tomba en vn trou punais ou il enfondra iusques à la moitié du corps, lieu si puant & infect, que de son odeur seule il pouuoit donner la mort: Sirind y cheut en vn autre pareillement. Qui vous pourroit suffisamment reciter la douleur q̄ le Prince Rogel souffroit la? peu s'en faloit que de mere angaille il ne s'occist de ses propres mains,

de se voir ainsi deceu malheureusement & abusé. Sirind qui sent son maistre en tel arroy & soi-mesme semblablement se print à lui dire. Car (combien qu'il ne le veid, si l'oyoit il.) Par Dieu, moieieur, ie ne scay que dire ne penser de cecy, sinon que ceste bonne damoiselle nous a voulu prendre en guise d'oiseau aux gluaux: d'ou nous ne nous despētrons pas trop aisément, toutesfois me semble qu'il ne sentent pas le musc. Le Prince ne se peut (oiant le propos de Sirind) contenir de rire en ceste griesue destresse, si dist: En mal an soit le Cheualier, que bien nous deuions contenter de la perte de noz cheuaux sans me veoir icy plongé tout vif en enfer. Sur ces paroles, ilz virent ouurir vne petite fenestre à gros treillis de fer, à laquelle le cheualier aux armes iaunes passa la teste & les mains desarmees. Et s'asseant en vne selle qui y fut apportee, dit au Prince Rogel: Qu'est cecy Dam cheualier, en tems de paix voulez vous miner mô chasteau? Ce n'est pas acte digne de Prince tel que vous estes, & de si preux & vaillant Cheualier que vous auez le renom d'encomencer ainsi la guerre sans l'auoir auant denoncee. Sire cheualier (respōd Rogel) laissons là les bourdes & me rendez noz cheuaux. Ce seroit contre raison (dit l'autre) puis que ie les ay conquis de bonne guerre, aussi q̄ nul n'est obligé à fournir d'armes son ennemy, pourtant afin que ne vous plaignez que vous surprenant sur le fait de miner mon chasteau, ie ne vous aye rendu la contremine, receuez ores ce qui va à vous: & à l'instant leuerent la bonde d'une rauine d'eau la plus orde, sale & puante du monde, qui les alla incontinent baigner iusques à la gorge. Ce fait le Fraudeur se remōstra à la fenestre, disant: C'en'est pas la raison sire cheualier que vous demeuriez sans chandelle à miner, à tout le moins sans quelque flam-bart pour dōner cognoissance à voz compagnons du bō deuoir que vous y auriez fait. Alors on mit vn brasier plein de pierre à fou-

re à souffre & de plusieurs autres drogues puantes, dont le parfum ne leur fut gueres moins grief à souffrir que la mort.

Ay traistre (dist le Prince Rogel) & de quelle sorte tu me payeras les torts que tu as faitz iusques à present à tant de bös cheualiers. Ne vous faschez que bien à point, Seigneur cheualier (respond le Fraudeur) Car puis que ie vous tiens prins en ma cage, comme vostre cousine Daraïde ie vous veux apprendre à parler. Lors lui fut apporté vn luth, duquel il commença à sonner & chanter, & ses gës à dancier la chanson en branle rond.

Puis que vous estes en cage

Prins ainsi qu'un passereau,

Je vous apprendray ramage

D'un hiboult ou faux oyseau.

Et d'autant que faites mine

En mon chasteau en la paix.

Pour contreminer, rachine

D'eau vous baigne au trou punais.

Or apres leur dance & chant ilz eleurent de grandes rifees, puis vindrent fermer la fenestrelle. Lors le gentil Prince Rogel avec l'aide de Sirind (qui comme desarmé plus legerement sortit de la fondriere) se tira du boubier & regaigna la bouche de la cauerne retrouvant sa compagnie. Laquelle le voiant venir en tel estat ne se peut bonnement tenir de rire: mesmement les ieunes filles qui les gaudirent aucunement, dont Rogel estoit fâché à merueilles. Toutesfois voiant que il n'y auoit autre remede, & que le iour failloit, s'en allerent à vne fontaine, ou lui & Sirind se laverent de leurs ordures. Car c'estoit vn vieil canal par ou l'on vuidoit toutes les immondices du chasteau, pour lequel nettoyer ilz lachoiert l'eau par la bonde. En ceste maniere passerent la plus part de la nuit avecques grand ennuï & griue douleur de ses plaies qui estoient toutes souillees & embourbees. Le Prince Brianges souffroit encore plus

& estoit comme demi mort de l'aspre mal des coups qu'il auoit sur son corps. Alors Rogel eguilloné de demie rage se leue de dessous vne haye dehous ou il s'estoit vn peu couché: & prenant sa lance & son armer en ses mains: tire droit vers le chasteau la ou guignant si quelqu'un paroistroit, ne sentit personne. Adonc se desarme des cuissortz & avecques les courroyes d'iceux & le ceinturon de son espee souleué par son escuyer à la combrefelle, grimpe amont sa lance qu'il auoit dreslee contre le mur, tellement que par sa legereté gaigna le hault de la muraille. Puis se va pourmenant par le rempart du chasteau, tant qu'il trouua vn homme à qui il donna du pied: lequel s'eueillant luy dist: Qui es tu? Celui qui vous tollira la vie à tous (respond Rogel.) Parquoy baille moy les clefs & me conduis là ou est le Fraudeur. L'homme qui reconnoist quel cheualier c'estoit, se met à esclier hautement, à raison dequoy Rogel lui dechargea tel coup de son branc d'acier qui le pourfendit par le milieu & le culebûta à terre. Alors se saisit des clefs qu'il veid au clair de la Lune pendues à sa ceinture, & ainsi marche dans le chasteau, ou il n'auança gueres de pas qu'il rencontra dix gros vilains armez en vne gallerie, venäs au cry de leur sentinelle. Sur lesquelz le vaillant Prince se rua comme vn lyon enragé sans aucun sentiment de ses plaies. Entre lesquelz choisissant le cheualier iarne, tira droit à lui, sans que null'en peüst destourner, & lui donna tel coup sur la teste qu'il le ietta tout estourdy emmy la place. Ce fait se lance à trauers les autres de telle furie que de trois coups il en abatit autant de mortz par terre, & voulant s'atacher aux autres apercent le Fraudeur (s'estant releué) qui se sauuoit de vitesse & les autres apres lui. Parquoy auant qu'ilz passassent vne porte de fer ou le Fraudeur estoit entré, & la lui fermaissent au nez, les deuança tellement qu'il en depescha sur le champ trois autres.

Alors

Alors voiant qu'il n'auoit plus à qui combattre, & qu'il ne voyoit moien de pouuoir entrer là dedans ne forcer la porte qui de fer estoit fort espes, s'auisa de descendre en bas, vne torche allumee en sa main qu'il auisa en vn coing, & s'en alla en l'estable ou il trouua ses destriers & palefrois. Ausquelz mettans les selles & à douze autres cheuaux pareillement, les meilleurs de l'escuirie, darda apres, l'attache en vn grenier plein de foin & depaille, ou le feu se print incontinent qui alla peu à peu gagner le chasteau. Adonc saillit Rogel dehors & alla retrouver sa compagnie qui estoit endormie profondement. Si les resueilla, disant: Sus sus debout mes amis, logeons d'icy. Car le Seigneur Fraudeur nous fournit de montures, voire plus qu'il ne nous en fault. Eux esueillez, voiant tant de cheuaux & haquenees en furēt esmerueillez, mesmement de voir ainsi le chasteau en feu. Lors leur conta Rogel de point en point comme la chose auoit passé: il me semble (dist la pucelle Sidere) que n'aurons mesluy faulte de montures, en ayant tant qu'il semblera que soyons marchans de cheuaux qui les menions à la foire. Ainsi s'en vont bien resouiz d'estre remontez tenant leur chemin à la main droite, & à grand plaisir de voir les gens du Fraudeur bien empeschez à estaindre le feu, iusques à ce qu'ilz les perdirent de veüe. A l'heure le iour commençoit à poindre, quand ilz descouurirēt de loing vn beau manoir de fort bonne estoffe de maçonnerie, auquel tirans y furent fort humainement receuz par le Seigneur: qui estoit vn vieil gentil-homme accoustumé d'heberger les cheualiers errans: duquel la fille scauoit tant de chirurgie qu'elle appliqua telz vnguens & baume à leurs plaies, que combien qu'elles fussent fort grandes & dangereuses, elle en guerit Rogel du tout en douze iours, & Brianges en trente. Pendant la guerison desquel-à les, le Prince Rogel ne perdoit le tēps à

pourchasser remede à vn autre plaie qu'il auoit au cuer de l'amour de la pucelle Sidere: laquelle atermoyoit son esperance iusques à ce qu'ilz fussent arriuez à la cour de son pere. Estans doncques bien gueris, donnerent les douze cheuaux, & autres ioyaux precieux à la fille de l'hoste leur bonne mire, duquel le congé prins, entrèrent en vn chemin qui les rendoit au port de mer le plus prochain.

*Comme estans les deux Princes partiz du chasteau suruint certaine auenture qui fit de-
partir Brianges de la compagnie
& comme il fut prins par vn
geant, & du surplus qui
luy auint.*

CHAP. XIII.

SIX iournees cheuaucherēt ces deux Princes & leurs ieunes filles, le chemin qui tendoit au port de mer que leur hoste leur auoit enseigné, sans auenture trouuer digne de memoire. A la septiesme sur le midy, ilz veirent venir au trauers de la route qu'ilz tenoient vne damoiselle aigrement espleuree. Laquelle s'arrachoit les blondz cheveux en telle maniere & dechiroit aux ongles sa delicate face, qu'elle leur causa grande compassion & desir ensemble d'en entendre l'occasion: & principalement au Seigneur Brianges, qui pria le Prince Rogel affectueusement de lui quitter ceste auenture comme estant suffisante pour soy, & qui ne pouuoit accroistre la gloire de luy tant grande peust elle estre. Ce que Rogel luy accorda volontiers, & il print son heaume & sa lance avecques cōgé d'eux: à la charge de retourner à sa suite si l'auenture n'estoit pas grande. Et au cas qu'elle fust pour detenir longuement qu'il l'iroit retrouver en la cour du Soudan de Perse, ou il tendoit. Ce dist brocha son destrier des esperons, suivant le train

le train de la damoiselle qui s'estoit desfi-
 tât eslongnee, qu'il mit plus de deux heu-
 res auant que la pouuoir atandre. Or à
 l'arriuee, la trouuant continuer tousiours
 son dueil & lamentation, lui dist: Ma Da-
 moiselle s'il vous plaist degorger vostre
 ennui en mon sein, ie vous iure par l'or-
 dre de cheualerie que i'ay receu de met-
 tre tout mon effort à la poursuite de vo-
 stre droit & accomplissement de vostre
 desir. Helas Seigneur Cheualier (respond
 elle) mon mal est de telle sorte qu'il ne re-
 çoit point de remede, & en telz maux
 toute la cure gist au seul oubly. Mais moy
 chetue, qui ne puis prendre en moy ceit
 oubly, qui seroit la medecine vnique de
 la maladie qui m'afflige. Ma damoiselle
 (dist Brianges) plus vous engregez vostre
 melancolie, plus vous augmentez mon
 enuie, à sçauoir la cause d'icelle pour y re-
 medier à mon pouuoir. Sire Cheualier
 (dist elle) puis qu'ainsi le desirez: vous a-
 uiez à sçauoir, qu'en vn chasteau situé en
 ceste forest vn mien cousin me faisant co-
 pagnie avecques trois autres Cheualiers
 ses amis pour aller en vne maison de plai-
 sance qui nous appartient, nous rencontra-
 mes vn geant, lequel nonobstant leur re-
 sistance les print & moy pareillement. Si
 nous enleuerent en vne forteresse, ou ie
 vey de mes propres yeux fouetter mon
 cousin bourellement & apres le mettre
 en vne cruelle prison. Lors il me mena en
 vne chambre ou il me força outrageuse-
 ment, puis me mit dehors, disant qu'en
 faueur du soulas qu'il auoit prins avec-
 ques moy, il ne me vouloit pas liurer la
 mort. Arrestez vous icy donc cheualier,
 car mon angoisse n'est capable de reme-
 de. Damoiselle (respond Brianges) condui-
 fez moy seulement à ce chasteau. Et ie
 vous iure la foy que ie doy à Dieu, que ie
 vous vengeray de l'outrage du Geant ou
 i'y perdray la vie. A a Seigneur (dist elle)
 Dieu vous sçache gré de la bonne oeuvre
 que voulez exploiter pour moy. Mais ne
 entrez pas (de grace) en si folle emprise.

Car de cent telz que vous il n'en feroit
 pas plus de compte que de festuz. Ne vo-
 chaille (replique Brianges) que les meschâs
 leur outrecuidance & meichanceté les cha-
 stie. Sur ce propos la Damoiselle iectant
 l'œil sur lui, le iuge à sa care plein de rou-
 te bonté & cheualerie, Si se consent à re-
 brousser avecques lui le chemin qu'elle
 estoit venue, lequel ilz teindrent ensen-
 ble si longuement que la nuit les y sur-
 print, tellement que force leur fust de
 coucher en la forest, apres auoir prins tel-
 le quelle refection de ce que la damoisel-
 le portoit de prouision. Or s'alla reposer
 Brianges en vn endroit & elle en vn au-
 tre, qui ne se tenoit de lui pour gueres
 bien consolee Et y passerent toute la nuit
 iusques à l'aube du iour qui fust fort belle
 & clere: laquelle venue, ilz monterent à
 cheual & poursuirerent leur chemin ius-
 ques à vnze heures du iour, qu'ilz veyrēt le
 chasteau qui estoit des pl⁹ beaux & des pl⁹
 fortz qu'on eut peu voir, car il estoit enui-
 roné de trois fossez, aiant chascun son pont
 leuis & sa grosse tour au bout. Au deuant
 du chasteau y auoit vn perro, auquel pen-
 doit vn cor attaché à vne chaisne de fer,
 que le Prince Brianges saisit à l'arriuee &
 entonna brusquement. Gueres ne tarda
 qu'au son du cor on vint abbaissier le pont
 leuis, par lequel Brianges sans aucune pa-
 our en la premiere cour qui estoit entre
 les deux fossez: Et incontinent s'ouurit
 vne porte de la petite tour d'ou issirent
 dix Cheualiers armez: lesquels vindrent
 les lances baissées affronter le Prince Bri-
 anges, & lui eux, de telle randon que ce-
 lui qu'il ataignit, il lui passa vne braille de
 lance à trauers le corps & l'estendit mort
 par terre. Lors lui arrachant la sienne qui
 saine & entiere lui estoit demeuree, en-
 rencontra vn autre qui n'eust plus besoin
 de mire: mais les autres le chargerent si
 rudement qu'ilz lui cuiderent faire vider
 les arçons: mais il se tint ferme & mettāt
 la main à l'espee leur dressa vn combat
 fort furieux, non toutesfois sans receuoir
 quelques:

quelques plaies d'eux en ses membres: de-
quoy il fut tellement irrité que s'ierant à
trauers d'eux d'estoc & de taille à dextre
& senestre les escarmoucha si fierement
qu'il en coucha en peu d'heure deux na-
urez mortellement sur le quareau: Dot
le reste espouuenté tourna le dos, se ren-
fermant dans la tour. A l'instant sonna vn
autre cor & le second pont leuis fut abaif-
sé lequel Brianges alla passer hardiement
rencontrant en la place dix vilains garniz
de haches & sallades d'acier, qui lui defen-
doient le pas. Mais celui qui voyoit sa
mort à l'œil; s'il n'employoit toutes ses
forces à ce besoing, leur rua de telz coups
d'entree, qu'ilz redoutoient grandement
à l'aprocher, fors vn des plus hardis, au-
quel s'auançant plus que les autres, il en
dechargea vn si horrible sur la salade, que
il lui pourfendit iusques aux dens: puis
s'adressant à vn qui lui auoit donné vn
coup de sa hache, il lui trencha d'vn tra-
uers tout le faux du corps, n'y trouuant
obstacle, d'aucunes armures: de ce pas
entre dedans ou il escrime d'estrange ma-
niere sur les deux premiers, que la fraieur
de ce carnage rembarra les six autres dans
le chasteau. Adonc sonne la troisieme
trompe, & se monstre vn geant de corpu-
lence desmesurée couuert de grosses la-
mes d'acier esferiant à Brianges: chetif
mastin, attends moy pour receuoir prom-
ptement la mort de mes mains, que tu as
liuree des tiennes à mes bons & feaux sol-
datz. A l'instant fut abaissé le tiers pont.
Et le gentil Prince va au deuant du geant,
lui disant: Geant si tu voulois quitter les
vanitez de tes idoles, te conuertissant à
la foy du vray Dieu du ciel Iesus Christ,
ie serois content de ne te poursuiure de cō-
bat: à la charge aussi de deliurer les pri-
sonniers que tu detiens icy, & t'abstenir
dorenauant de tant de maux que tu com-
metz. O Apollon (escue le geant) que ta
Deité doit estre vaine quand vne si che-
tiue creature ose bien gargouiller à ma
barbe tel sot iargon, que ie pensois faire

transir de mon seul regard: Or m'attend
chetif bestion: ce disant auance sa marche
& leuant sa grosse masse de fer cuide bien
du premier coup finir leur combat, com-
me certes il eust fait, si Brianges ne se fust
destourné d'vn sault à costé qui quand &
quand lui ietta vn estocade de toute sa
puissance au flanc (mais elle ne peut trans-
percer la forte cu race du geant. Lequel
voulant redoubler de sa lourde masse sur
le bon cheualier, ainsi qu'il l'auoit haul-
sée, se lancerent par derriere lunt gros paï-
sans qui vindrent embrasser Brianges en
telle façon qu'il n'auoit pouuoir de re-
muer, & l'attachât soudain de grosses cor-
des le porterent dans le chasteau en vne
sale: là ou le geant commanda qu'il fust
despouillé nud & fouetté: ce qu'il y fust si
cruellement que le sang lui ruiselloit de
toutes les partz de son corps, elisant ce
tourment (qui lui estoit renouuellé par
chascun iour) pour plus cruel que la mort
mesme qu'il lui eust peu liurer à vne fois.
Il fit aussi empoigner la damoiselle & lo-
ger en basse fosse avec les autres prison-
niers: Là ou nous les laisserons iusqu'à
leur deliurance pour retourner sur noz
brisees au Prince Rogel, & vous compter
ce qui lui auint depuis cheminant avec les
pucelles de Perse.

*Comme reprenant Rogel le chemin de la
mer avecques les pucelles de Perse, ilz rencon-
trèrent vne auenture en certaines tentes.*

CHAP. XV.

LE iour tout entier que le Seigneur
Brianges se departit de la compagnie,
ilz cheminerent sans auenture trou-
uer digne d'en estre faite mention, iusques
à l'heure de tierce du iour ensuiuant qu'ilz
entendirent vne piteuse voix comme de
femme, qui angoisseusement se plaignoit.
Et à l'approcher aperceurent deux Che-
ualiers faisans tout leur effort à forcer v-
ne belle Damoiselle en la battant & ru-
doiant.

doyant outrageusement. Laquelle si tost qu'elle veid le Prince Rogel, s'escria: Las pour Dieu sire Cheualier, ie vous supplie par l'ordre de cheualerie, & par la creature du monde que plus vous aimez de me deliurer des mains de ces mauuais cheualiers. C'est bien vn serment que iamais ie n'enfraindray (dist Rogel) combien que ie ne fusse és liens d'autre obligation. A ce mot s'adresse à eux, disant: Cheualiers par l'ordre que vous auez receu, qui vous oblige à maintenir l'honneur des dames, laschez ceste Damoiselle. Ne vous entremettez plus auant de nostre fait (respondent ilz) ains nous quittez deux de celles que vous menez qui nous semblent plus belles que la nostre. Ce ne feray-je pas (dist Rogel) s'il ne leur vient de leur bon gré. Sans leur bon vouloir (dist l'un d'eux) ne le tien les aurons nous à nostre plaisir: Or sus frere tandis que ie chassie ce fol outrecuidé de sa folie, saisi toy d'elles, Lors il degaine l'espee: Ce que Rogel voiant, lui dist qu'il eust vn peu de patience à receuoir le payement de sa trahison: & le laissant de ce pas, court sus à celui qui alloit prendre le palefroy de la pucelle Sidere, auquel de son espee il abbatit le bras en terre, dont il vouloit empoigner la bride: puis tourne vers l'autre qui lui auoit tiré vn coup par derriere, à qui d'un reuers il tranche vn iaret. Adonc les laissant en tel estat s'en va vers la Damoiselle, laquelle lui baïsa le bord de sa cuirace, & il la fit remonter sur sa haquenée, la priant de lui conter à quelle occasion ilz lui auoient voulu pourchasser son deshonneur. A quoy elle luy respondit: vous auez à sçauoir Cheualier, que ie suis fille d'un Seigneur d'un chasteau, non gueres distant d'icy: auquel hantant celui que vous auez occis le dernier, me persuada par ses faictes menées d'estre extrêmement passionné de ma beauté: tellement qu'il me rengea à grande compassion de son amour, souz la promesse qu'il me faisoit de m'espouser. Sur laquelle il

me tira ceste nuit mesme hors de l'hostel de mon pere avecques son frere, d'ou me aiant amenee en ce lieu, me descendit du palefroy, & me dit qu'il me falloit accomplir la volonté de l'un & de l'autre: En quoy aperceuant sa damnable intention, contraire à sa promesse, ie ne me voulu accorder, dont il m'ont accoutree en tel estat, me deshonrant, si la bonté de Dieu (qui à pitié des innocens affligez) ne m'eust enuoyé ceste part, Seigneur, vostre bon secours à poinct nommé. Sur ces entrefaites veirent venir vers eux six cheualiers, lesquelz sans autre deffy vindrent charger le Prince Rogel (qu'à peine eust il loisir de mettre l'armet en teste) Si rompirent sur lui leurs lances: mais celui qu'il rencontra de la sienne, versa en terre, nauré profondement. La Damoiselle qui recogneut les cheualiers, comme Rogel les alloit rechercher l'espee au poiz, se meit au deuant & s'escria: Pour Dieu seigneur Cheualier, deportez vous, puis que m'avez desia fait tant de bien de me sauuer des mains de ces deux trahistres qui me vouloient honnir, ne souillez pas ce bien fait par le plus grief outrage, si prochain que me pourriez onques faire, si vous mettiez à mort ce cheualier, qui est mon pere propre. Adonc elle faisant entendre à son pere en peu de paroles le secours qu'elle auoit presentement receu de Rogel, ietta ses armes bas & lui voulut baiser les mains: mais il ne le consentit. Ainsi en grand plaisir s'acheminèrent tous ensemble vers le chasteau, là ou ilz furent promptement desarmez & reuestuz de riches manteaux: Brief y fust Rogel aussi bien serui & traité que s'il eust esté à Constantinople, & les pucelles aussi de sa compagnie fort honorablement. L'endemain partirent pour leur chemin poursuiure lequel ilz continuerent iusques à iour faillant, qu'ilz descouuurent vn chasteau, deuant lequel estoient tenduz trois pavillons de guerre, & contre l'un d'iceux grand nombre de lances appuyees

puices & vingt escuz penduz tous d'une diuise, laquelle portoit, La vaincuë de la vaincuë. Soudain veirent saillir d'un paillon une damoiselle sur un palefroy, qui vint au deuant de Rogel lui signifier un mandement : c'est à sçauoir que s'il vouloit par là passer, il lui conuenoit iouster contre les champions de la vaincuë, qui estoit la Roine de Galdap, selon la coutume du pas : sinon lui aller baiser les mains tant lui que les Damoiselles de sa suite : à faute dequoy leur faloit reprendre la voye qu'ilz estoient venuz. Damoiselle (respond Rogel avecques sa courtoisie accoustumee) Vous direz aux Cheualiers, qu'ilz n'ont droit de mettre destourbier sur les chemins passans qui doiuent estre francz & ouuertz : quant à aller baiser les mains à une si belle Roine, que ce n'estoit pas chose trop auentureuse : toutesfoies ces pucelles (dist il) qui sont plus siennes que miennes, ie cuide qu'elles auront plus agreable à prendre quelque tour de chemin qu'à se soubmettre à vostre loy & condition : avecques mon dire vous pouuez retourner à qui vous a icy enuoyee. La damoiselle rapporte sa response à la Roine & ses cheualiers, qui leur appresta à rire, estimans qu'elle lui procedast de couardie ; & d'auantage, que ilz lui veirent tourner bride arriere. Alors dist un cheualier (qui estoit amoureux de la Roine & plein de grand orgueil) Ie m'en vois à belle chasse, faire rendre compte à ce lieure de sa fuite, & ou il va regagner son giste. Ainsi monte sur son coursier & va apres le Prince Rogel, qui desia estoit eslongné : auquel il escrie : ho, ho dam Cheualier attendez un peu, & ne pensez ainsi eschapper. Rogel à ceste voix tourne son destrier vers lui, non sans grande colere : lequel lui recharge : sire Arlot, il vous conuient retourner au mandement de la Roine & que vous cheuauchiez au rebours de la selle, tenant en la main la queue de vostre cheual, vostre armet sur la teste, trainant la lance, & por-

tant l'escu sur le dos. Or soit doncques nostre compte à ceste condition, dit Rogel. Soit (respond le cheualier). Sur ceste conuenance ilz retournent vers les tentes, là ou en presence de la Roine ilz conferment leur passion : laquelle sans delay ilz vont executer. Le cheualier du paillon rompit sa lance sur Rogel : lequel l'empoigna de trauers par faissant sa pointe si rudement qu'il le tire par terre ; tellement elourdé qu'il le roulla mal froissé un espace de tés sur le sable. Il n'est pas, dit la damoiselle des tentes si chetif & recreu, comme il paroissoit, ce cheualier estrange. S'il est bon (respond un d'entre eux) bon besoing lui fera : lors donnerent ordre à en despescher un autre, lequel (pour le vous faire court) ne fait gueres de honte au premier. Apres y vint le tiers, puis le quart, puis le quint & tout le reste à la file, dont nul ne tendit aucunement à fouler l'honneur de ses compagnons. Adonc s'en va Rogel vers le premier qu'il auoit desarçonné & lui presentant le fer de la lance à la visiere (qui lui estoit demeurée entiere) lui dist : Sus, sus cheualier accomplissez presentement la condition : sinon vous estes mort. Ce cheualier se releua sus les piedz, voyant les autres venir les espees nuës sur l'estrange, lequel (comme vous auons déclaré au commencement de la tierce partie, de cest excellent Prince) estoit de son naturel fort doux & gracieux : mais quand une fois il estoit irrité, n'estoit pas aisé à appaiser. Pource, reuenant à nostre propos. Rogel se voyant ainsi assaillie de toutes partz se va lancer parmy la troupe comme un lyon enragé, ou il se defend & les offense de tel art d'escrime que il en abbat de deux horions deux à ses piedz. Ce qui espouuenta tellement les autres qu'ilz ne l'osoient plus atacher de si pres. A lors saillit la damoiselle qui avec le mandement estoit premierement venuë au deuant de lui, qui le pria de moderer son

son ire à ne passer outre en la vengeance sur leurs champions, auquelz elle feroit accomplir la condition. A la requeste incô- tinent Rogel qui trescourtois estoit mes- mement enuers les dames, remeit son es- pee au fourreau, & les cheualiers se reti- rerent à l'escart. A l'instant la damoiselle somma le premier de faire le deuoir en- uers l'estranger, qui à grande vergongne le fit, se mettant en guise de bon genet: de quoy fut grande la risée entr'eux. Mais Rogel à la requeste de la damoiselle osta son armet, dont apparut à tous son extre- me beauté. Et sans plus seiourner là, s'en partit gay auecques les pucelles. Si che- uaucherent ensemble plusieurs iournees (auec quelques autres rencontres moins remarquables tant qu'ilz paruindrent à vn port de mer auquel ilz s'embarquerēt en vn petit vaisseau. Ou nous les laisserōs vōguer vn temps pour retourner sur noz erres de Filisfel de Montespın à racompter ce qui lui auint en la compagnie de la Da- moiselle, qui auecl'armet fēc l'auoit ti- ré hors de Constantinople.

*Comme Filisfel de Montespın avec la Da-
moiselle messagere arriua au chasteau de la
Magicienne, laquelle le charma & fit iouyr
Marfire de ses amours, & de la trahison
que brassa depuis la Damoiselle
contre Marfire sa mai-
stresse.*

CHAP. XVI.

NOUS vous auons cy dessus expo- sé comme le Prince Filisfel de Mon- respın & la damoiselle partirent de la cour par le moien de l'armet enchanté: auquelz sur leur chemin escheurent plu- sieurs auentures (dont nostre cronique se passe pour briueté) vous auisant seule- ment que le gentil cheualier les acheua toutes de telle vaillance & hardiesse que du bon sens du Roy Amadis lui pouuoit prouenir. Neantmoins qui seroit curieux

de les sçauoir recourre aux histoires des Soudans de Niquee là ou il les trouuera. Ce que nous laisserons à part, pour pour- suivre nostre principale intention, linon à vous deduire: que Filisfel estans lors en sa fleur de ieunesse, & la damoiselle sa gui- de belle aussi & de bonne grace, ilz ne peurent bonnement tant seiourner en- semble, sans que sa beauté ne lui touchast au cuer tellement que par les chemins, ils entrèrent en maints deuils de grand plaisir & priuauté: Entre lesquels Filisfel s'enquist d'elle en quel lieu elle le condui- soit au combat, contre vn puissant cheua- lier (respond.) Pleust à Dieu, dit Filisfel, Ma damoiselle q̄ vostre gaye beauté ne me naurast plus grieuement que le che- ualier que i'ay à combattre. Et quelle plaie pouuez vous receuoir de moy (dit elle.) C'est vne playe (respond Filisfel) à laquel- le si vous ne remediez bien tost, ie me sens en danger de ne la faire pas longue. Pourrions nous veoir ceste playe, dit la damoiselle. Ouy (respond il) en regar- dant vostre belle personne. En bonne foy Seigneur Cheualier (dit elle) vous ne ré- dez pas grande vostre affliction, si vous la rengez à la mesure de ma beauté: Elle est si grande (dit il) que verrez bien tost cleremēt par l'experience de ma mort brieue, si vostre courtoisie ne m'y appre- ste brief secours. En telle maniere ils se tindrent à leurs amoureux propos vne iournee auec plusieurs plaisantes raille- ries & sornettes tellement que la Damoi- selle mesme surprise du beau pourfil de visage & belle taille du Cheualier, la nuit prochaine se liura à sa volonté. Ain- si continuerent tout leur voyage cette ioyeuse conuersation iusques à ce qu'ilz arriuerent à vne lieuë pres du chasteau de la Magicienne laquelle sentant bien leur venue, enuoya vn sien escayer au deuant bien viegnier Filisfel, lequel le conduit en la chambre qui lui estoit preparee en vne tour quarree. En laquelle il ne fust pas plustost entré qu'il perdit à l'heure tout sentiment

sentiment, fors qu'il se pourmenoit bien par la chambre & mangeoit & beuvoit de ce qui lui estoit apporté, sans toutesfois auoir connoissance de l'huys par ou les gens entroient qui le seruoient au doigt & à l'œil. Ce fait, la Magicienne mande incontinent à Marsire quelle se transporte la en diligence. A quoy elle ne faillit pas d'obeir y venant en petite troupe. A son arriuee, elle ne s'amusa ne ça ne la en sale ne chambre du logis, ains monta droit à celle ou Filisfel estoit. En laquelle entrant, du vouloir de la sorciere (chose autrement à nul possible) elle fut rauie de telle aise de voir à sa disposition celuy que tant elle aimoit, qu'elle lui alla incontinent saulter au col & l'embrasser estroitement: si bien qu'il fust esmeu à lui rendre la pareille & passer celle nuit en grande volupté ensemble & plusieurs autres semblablement. Mais fortune qui iamais ne laisse les choses humaines en vn estre, voulut exercer son office, qui fut en ceste maniere. Nous auons cy deuant narré comme la Damoiselle que Marsire auoit enuoiee pour conduire là Filisfel de Montespín estoit par le chemin entree en telle familiarité avecques lui que de fille il l'auoit renduë femme. A ceste cause estoit si ardemment esprinse de son amour que depuis qu'elle veid sa maistresse posseder du tout son desir & qu'elle en fust totalement priuee, elle conceut vne telle ialousie, vne telle rage d'enuie en son courrage qu'elle n'auoit plus ne bien ne repos de corps de l'ame vn seul moment de iour ne de nuit. Ce qui la meut à faire ce que vous entendrez. En la cité d'Athenes: dont fut natif le grand Philosophe Platon y auoit vne loy inuiolable, que toute femme mariee qui seroit trouuee en forfaire d'adultere fust sans remission arse toute viue. A ceste occasion la Damoiselle qui ne voyoit autre moien s'en alla à Athenes, là ou elle communiqua avecques vn fort beau ieune Cheualier nommé Patronion en grand secret qui

estoit cousin du Duc d'icelle cité. Lequel elle scauoit auoir long temps languy au pourchas de Marsire sans en auoir peu obtenir la moindre faueur du monde. Si l'auertit comme sa maistresse estoit plongee demesurement es delices amoureuses de vn certain Cheualier, ce qu'elle lui iura & assermenta suffisamment iusqu'à lui faire croire: sans toutesfois lui vouloir oncques declarer qui ne d'ou il estoit, de quoy Patronion receut vn tel sursault en son cuer qu'il en tomba euanouy en la place: & à chef de piece qu'il reuint de pasmoison, s'escria avecques gros soursirs. Aa Cardonie m'amie est-ce chose vraye & certaine que vous dictes? Si, certainement, respond elle. Or y dōnez tel ordre que bon vous semblera, a l'ocasion de son mary, dont elle s'est separee, comme scauez, sans vouloir conuerser avecques lui: & y procedez discrettement. Car il fault que ie m'en aille de paour qu'il ne me mesauienne. Mais l'affection que ie vous porte avecques le despit du desdain, dont elle a vſé si indignement en vostre endroit (qui meritez trop plus que celui à qui elle s'est si vilainement abandonnee) m'a incitee à vous en venir donner l'auertissement. Ce dist, elle s'en part, & Patronion demeure le plus triste & angoisseux homme de la terre, voire tant qu'il en allita bien six mois durant, & plus. Mais vn iour considerant en soy-mesme que plus il alloit en auant plus il effoiblissoit & tendoit à la mort, se print seulet à dire: He quelle occasion y a il que ie m'en aille ainsi mourant par celle qui a tenu si peu de compte de ma vie en m'estant si desloyale & ingrate? Surquoy il entra en telle furie que se faisant apporter de riches accoustremens, il se leua & se vestist aussi gaillard que si malade il n'eust aucunement esté. Si s'en va trouuer le Duc son cousin en son palais, lequel receut grande ioye de sa bonne conualeſcence: Et Patronion mettant vn genouil en terre lui comença à dire: Mon Seigneur ie con-

nois de long temps la iustice que vous administrez à voz subietz (desquelz ie me rendray toute ma vie des plus obeissans) soit à recompenser les bons, soit à punir les meschans. Pource vous supplie de vouloir faire assembler vostre conseil afin de leur exposer l'occasion qui m'ameine. Le Duc alors qui bien l'aimoit le leua par la main & le faisant asseoir au dessous de lui, manda à l'instant son conseil. Deuant lequel Patronion intenta l'accusation d'adultere contre Marfire. Car comme cy dessus vous a esté recité, elle estoit mariee à vn riche Seigneur gouverneur d'une Isle du Duc. Mais depuis l'excessiue fantaisie qu'elle auoit mise en Filisfel de Montespín, n'auoit oncques esté possible à son mari d'en auoir compagnie ne conuersation quelconque de mariage, combien que de sa part il ne lui defaillist d'amitié, ne de bon traitement. Or pour reuenir à nostre propos : Marfire fust mandee par le Duc, contre laquelle presente Patronion forma de rechef l'accusation, dont elle fut d'entree fort troublee en son esprit. Mais reprenant cuer ce troublement conuertit en ire, lui respondit. Si à tes peruerfes menees, Patronion, Marfire eust voulu consentir, ta langue ne se desployeroit pas maintenant pour degorger telle iniquité & ta trahison ne tendroit à charger mon honneur & innocence. Desistez vous dame (respond Patronion) du babil féminin, icy n'ont lieu les parolles frivoles, en negoce qui se doit determiner par iugement. Sur ce le Duc commande Marfire estre menee en vne tour, puis consultant l'affaire fut ordonné, qu'elle fourniroit de champion pour soustenir en camp clos sa querelle. Lequel gagnant la victoire, elle s'en iroit absoute à pur & à plain, au contraire, si vaincu estoit, elle seroit arse. Cest arrest fust enuoyé prononcer à Marfire : c'est à sçauoir de presenter dans six iours precisement vn cheualier à combattre pour elle, à faute de quoy, elle passeroit par la rigueur de la loy. Qui vous

pourroit suffisamment declarer la douleur que sentit Marfire de ceste sentence, en considerant la mort qui lui estoit proposée d'un costé, de l'autre, le danger d'icelle auquel elle exposeroit Filisfel de Montespín son cher amy en la defence de son droit par combat, & le tiers point qui ne lui estoit gueres moins grier que les deux autres, la necessité de le relacher de la douce prison où elle le detenoit à son singulier contentement, en lui donnant la clef des champs pour combattre ce qu'elle s'asseuroit sur sa bonté qu'il ne refuseroit pas. Dequoy elle enuoya auertir la Magicienne, qui ne faillit d'accomplir son mandement, ainsi que si apres vous entendrez.

Comme Filisfel de Montespín entra en combat pour Marfire: & apres le congé prins du Duc d'Athenes, de la rencontre qu'il eut des parens de Patronion.

CHAP. XVII.

LA Magicienne tante de la Damoselle si tost qu'elle eust receu les nouvelles de la condamnation de Marfire & ce qu'elle lui mandoit touchant Filisfel de le deliurer pour le besoing urgent de sa defence, ne lui laissa qu'un seul iour de repos auant que l'aller voir en sa chambre enchantee. En laquelle si tost qu'elle fust entree, s'agenouilla deuant Filisfel luy demandant les mains à baiser, lequel la leua par icelles : mais elle lui dit qu'elle ne se leueroit point de là iusques à ce qu'il lui eust ottroyé vn don. Ce qu'il lui promist promptement. Adonc la Magicienne dit : Le don Seigneur que m'auuez ottroyé, est de nous pardonner, c'est assauoir à Marfire de vous auoir mandé à faulces enseignes pour l'amour extreme qu'elle vous porte, & à moy de vous auoir icy enfermé sous clef sans clef, pour

demeurer

demeurer captif en sa prison d'amour. Filisfel fut grandement esmerueillé de ces paroles, & lui reuint en memoire son arriuee au chasteau & entree en la chambre, & ce que lui disoit la dame de certaines choses, mesmement de la pucelle Anaxare sa dame: rendant graces à Dieu en son cuer, de l'auoir resueillé de ce sommeil auquel il auoit esté endormy iusques à l'heure: puis d'un visage gay lui dist: Ce poise moy bonne dame, que Marfire ma maistresse se soit seruie de moy par ceste voye qui n'eusse voulu faillir de me presenter à son seruice, à son plus simple mandement. Mais laissons ce qui est fait, qui ne peut plus estre non fait, & auisons à donner ordre à ce qui s'offre à faire. Si me faites donner mes armes & mon destrier pour l'aller seruir en son affaire & recompenser son affection du hazard de ma vie. Alors le tire la Magicienne hors de la chambre, & lui fait endosser vn harnois fait & trempé de sa main, puis lui baille son escu bié doré & diapré, auquel estoit vne M. seule fort enuelppee de las d'amours. Or s'en va le gentil Filisfel hors du chasteau monté sur son bon destrier, qui tient la route de la forest pour aller nieux couuert & incogneu à la cité, remerciant le haut Dieu de lui auoir presté faueur à sortir de ceste captiuité enforcelee par vn moien quoy que perilleux trop plus agreable. A tant va passer la iournee pres d'une fontaine qu'il trouue dedas le bois, ne se voulant point monstrier en la ville iusques à ce que Marfire fust mise sur l'eschaufaut. Qui fust le iour ensuiuant, & y fut conduite (estant icelui tout couuert de velours noir) elle vestuë de dueil (qui neantmoins n'estrangeoit ne desguisoit sa grande beauté) accompagnée de belle suite des dames de la cité, comme celle qui y estoit fort aimée & honorée. Ainsi fust elle montée sur l'eschaufaut, aupres duquel estoit le camp appareillé & fermé tout à l'entour de grosses chaines de fer, par ordonnance des iuges du camp, qui

estoyent deux des plus grands Seigneurs de la cour du Duc. A costé aussi de son eschaufaut fut dressé vn tas d'espines pour le supplice de Marfire, au cas que son champion ne se presentast dans le iour prefix pour elle, ou qu'il fust vaincu. Ainsi se mettent les iuges en hourt: Et Patronion aussi tost armé richement & acompagné de son parrain, ses confidans & autres parés & amis fut mis dans le camp. Ou il fust quelque espace de temps attendant, vomissant de sa bouche force traits fiers & outrageux, & Marfire d'autre part de bien tristes & pitoyables, ne voiat point arriuer son champion, lequel elle doubtoit s'en estre allé mal content du tour artificiel qu'on lui auoit ioué, aiant esté aduertie par vne de ses Damoiselles, qu'il auoit esté mis hors du chasteau, Sur ces doleances, voicy venir le chevalier à la M. la lance au poing, & aiant mis l'armet en teste de peur d'estre cogneu il se presenta deuant les iuges, leur disant que il estoit la venu pour maintenir le droit de Marfire leur requerant d'estre mis dās le camp. Loīs demanderent les iuges à Marfire, si elle acceptoit ce chevalier pour defenseur de sa cause: ce qu'elle accorda, recognoissant bien Filisfel. A l'heure il fut mis par les iuges dans le camp. Toutes les ceremonies obseruees en tel cas requises & le soleil party entr'eux: Patronion commença à tenir à Filisfel ce langage. Confesse Cheualier ce que ie maintiens estre veritable & tu seras exempt de la mort, & ceste malheureuse sera bruslee. Ores verras-tu ce que ie confesse (respōd Filisfel) qui à ce mot couche sa lance en l'arrest & broche son destrier contre Patronion venant vers lui. Celle rencontre fust si impetueuse, tant des chevaliers que des cheuaux, que Patronion rompit sa lance sur Filisfel si lourdement, qu'il en fut tout estonné, lequel faulsa l'escu à Patronion de la siēe & lui trāspērça le brāçal à iour, tellement que lui & son cheual sur lui, tomberent en vn monceau, dōt il

demeura grandement foulé & acrauanté: Filisfel partaisant gaillardement sa pointe. Lequel retourna vers lui, & le voiant ainsi chargé de son destrier sans qu'il s'en peust tirer de dessoubz descendit vistemēt du sien. Si s'en va droit à lui, les assistans estimans qu'il alloit pour l'occir, mais son intention estoit toute autre: car il leua le cheual de dessus lui & lui aida à se releuer, puis mettant la main à l'espee, lui dit, Maintenant cognoistras, Patronion, de quelle faulseté tu as suscité ceste accusation: & ce disant lui descharge vn grand coup sur le heaume, si Patronion n'eust pare de l'escu au deuant, duquel il luy tailla vne grande piece. Ainsi fust le combat fort alpre entr'eux (estant Patronion le plus excellent cheualier de toute la cōtree) toutesfois qui se sentoit fort moulu de la cheute & charge de son cheual, & auoit à faite à l'vn des meilleurs cheualiers du monde, descendant de ce sang d'Amadis de Gaule, lequel lui tiroit rāt de coups sans relascher & tant le mal menoit, puis deçà puis delà, que Patronion pensoit pl^{us} à soy defendre qu'à l'offenser. Alors se tira Filisfel vn peu arriere, lui disant: Or sus Patronion confesse maintenant que tu as mis en auant vne mensonge si tu veux euitier la mort que tu te vois si prochaine, & sauuer ta vie. Ia Dieu ne plaise (respōd il) que ie iouisse de tel priuilege avecques si souueraine infamie. Quand & quand se marche pour ramener vn coup sur Filisfel, mais il estoit ia tant debilité par l'effusiō de son sang que l'espee lui tomba de la main, & il fondit lui mesme à terre. Soudain se lance Filisfel sur lui & lui oste l'armet, chascun pensant qu'il lui alloit trancher la teste. Parquoy esclia le Duc, qu'il s'en deportast, & qu'il le lui ostroyoit pour vaincu & Marsire pour libre & abtoute. Ce qu'oyant Filisfel, remonte incontinent sur son destrier & lui donnant des esperons regaigne à la course la forest pl^{us} prochaine de la cité. Aussi tost qu'il fust parti, Marsire fut descendue de l'eschau-

fault avecques son de trompettes & cle-
rons & fort honorable compagnie, mais non sans vn douloureux remordz du departement de son amy. Patronion fut soudain emmené du camp & ses plaies appareillees, lequel nous laisserōs guerir avecques son duc, pour vous acheuer le surplus qui auint à Filisfel. Si dist le compte, que huit cheualiers parens de Patronion voiant l'estat du dueil auquel ilz ne pouuoient asseoir autre iugement, que de sa mort ilz s'en allerent secretement armer, puis se remeirent en la foule pour en voir l'issue. A laquelle ilz choisirent de l'œil quelle part Filisfel tira, puis le suivirent en toute diligence: & quand ilz le virent assez auant en la forest, lui retterent de haultz cris: lui qui bien imaginait en tel cas que ce pouuoit estre, tourne bride vers eux se courant de son escu en la fuite qui estoit de lance. Ces cheualiers rompirent sur lui tant qu'ilz l'esbranlerent prest à vider les arçons: mais se renforçant en la remembrance de son hault lignage, tint ferme. Si les va recercher l'espee au poing & eux lui, avec tel chamailis sur leurs harnois, qu'au retentissement du bois, sembloit qu'il y eust cent cheualiers en confit, Lequel ilz maintindrent pl^{us} de deux heures ensemble, en tombant puis vn puis deux des Atheniens, tant que les autres craignoient depuis à l'aborder de pres, pour la pesanteur de ses coups. Mais à la fin s'ennuiant trop Filisfel de la longueur du combat qui le pourroit mettre hors de haleine, recueille ses forces en soy & entre parmy eux de pied & de teste aussi furieusement que si c'eust esté le commencement de l'estour: dequoy les six cheualiers estonnez perdirent le cueur, se sentans chargez comme d'vn champion tout frais, qui les escarmouche si vüemēt que quatre d'eux ne demeurèrent long temps en pieds deuant lui. Parquoy les deux derniers prindrent la fuite, & se sauuerent par la vistesse de leurs cheuaux. Quoy voiant Filisfel, retourne vers ceux qui gi-

ui gisoient estenduz sur l'herbe & s'a-
ressant à vn d'eux à lui delàter l'armet,
signant de lui trancher la teste, il s'escria:
Ielas pour Dieu Seigneur ne m'occie: Iure-
onques (dist Filisfel) de me dire l'occa-
on qui vous a meuz à me venir assaillir
& de faire ce que ie vous commanderay.
Ce qu'il luy promit volontiers, en luy
comptant l'entreprinse que dessus, & il
lui comanda & à deux autres qui estoient
encore, en vie de s'aller presenter de sa

part à Marfire: lors leur aida à remonter
sur leurs cheuaux & il reprint son chemin
vers Constantinople ou il fut fort bien
receu de tous les Princes & dames & d'A-
anaxare spécialement: comme fust peu a-
pres le vaillant Prince Rogel pour le be-
soin extreme qu'on y auoit de telz che-
ualiers (lequel il nous y conuient pareil-
lement ramener par ses iournees & auen-
tures au plustost que possible sera.

*Comme le Prince Rogel vogant avec les pucelles sur la Mer, rencontra deux Brigantins
de Corsaires, des mains desquelz il deliura le Soudan de Perse.*

CHAPITRE XVIII.



A PRES que Rogel de Grece eust
vaincu (comme vous a esté n'a-
gues recité) les cheualiers des
tentés de la Roine de Galdap, il arriua le
iour ensuiuant à vn port de mer avecques
ses damoiselles, auquel trouuant vne nau-
preste à faire voile, ilz s'y embarquerent
ensemble, tenans la route de Perse. Trois
iours voguerent par bonace au grand plai-
sir des pucelles pour le desir extreme que

elles auoient de voir leur pere, & de Ro-
gel pour le contentement qu'il eseroit
en Perse, suiuant la promesse de Sidere.
Mais au quatriesme iour la muable fortu-
ne oï donna que la mer se troublast si hor-
riblement que les pilotes bien experts
y perdirent tous sens & industrie en ce
peril. Ceste fortune ilz coururent deux
iours & deux nuitz: au bout desquelz ilz
rencontrerent deux Brigantins qu'ilz co-

gneurent aux banderoles estre de Mores. A l'aborder d'iceux le cry s'esleua merueilleux en la nau ou Rogel estoit, des mariniers & autres, crians à Dieu mercy de leurs vies: ce qui le fit en haste prendre ses armes, & l'oudain saillit sur le rilac du nauire, auquel trouua de ses Mores montans (qui l'auoient enfermé de leurs agaffes) estans bien au nombre de trente. Ilz y venoient de grand orgueil n'y aians senty aucune resistance à le ioindre, quand le cheualier des pucelles, qui veid que le besoing y estoit ne fust paresseux à mettre la main à son glaive trenchant, duquel il les va recevoir avecques vne hardiesse incroyable, abbatant testes bras, iambes, fierant à tort & à trauers, tant qu'il les arresta vn peu sus cul. Mais la grande foule de leur multitude le contraignit vn peu de demarcher en arriere iusques à s'adosser au chasteau de poupe: la ou il recommença à faire tant d'armes & leur tirer de si estranges coups, que malheureux estoit qui les ioustenoit: mesmement vn des plus hardis lui haussant sa hache pour lui donner, qu'il pourfendit d'vn seul coup iusques au pis, à vn autre qui plus l'ahurtoit trencha d'vn reuers tout le faux du corps. Toutesfois s'apperceuant que demeurant là aculé, il auançoit peu la besongne comme vn sanglier eschauffé entre les chiens il se lance non plus ne moins parmy eux ne iettant coup qui ne leur oste la vie ou quelque membre. Dont ia en auoit vne douzaine de iouchez à ses piedz, quand leur Capitaine qui ne s'en estoit encore daigné mouuoir de son vaisseau, cuidant que ses gens se fussent emparez du nauire qu'ilz auoient ioint, sans defense, mais auerti du massacre qu'vn seul Cheualier y auoit fait des siens, si en va furieusement le trouver, vne fort riche espee au poing avec contenance en luy de toute bonté leur escriant à l'arriuee: Sus sus hors d'icy vile canaille, si me laissez prendre vengeance de ce Cheualier. Alors lui & le

Prince commencerent vn fier conflit entre eux, chamaillant dru & menu l'vn sur l'autre, taillant maintes pieces de leurs harnois & dura le combat long temps, pour la prouesse qui en ce capitaine estoit, mais non esgale de beaucoup à celle de Rogel tellement qu'à la fin il perdoit le sang de plus de dix endroitz de son corps, sans toutesfois môstrer vn seul point de cœur failly. Adonc va le Prince le recharger de tant de telz coups, qu'il le fait tourner virer à toutes partz, & le reste de ses soldatz reuiennent sur Rogel escrians: Sus, sus, à mort, à mort, diable d'enfer, car autre creature ne peut tant auoir resisté à la vaillance de nostre Seigneur: lors le gentil Prince se voiant en telle extremité de danger, adioute l'autre main à son espee, dont il decharge sur le cabacet du Capitaine vn coup si pesant, que sans la fine trempe de l'acier il l'eust certainement occis: si ne peust il destourner qu'il ne fust detrenché voire iusques au tais dont il cheut en la place sans aucun sentiment. Puis recharge vn trauers sur son plus proche voisin duquel il lui fit voler la teste avec le bras qu'il auoit leué pour le ferir roulant par le nauire. Adonc murmurent ensemble de se mettre seulement en defence pour soy retraire en leur vaisseau. Ce qu'entendu par le Prince, les va poursuivant si chaudement, les assommant & acrauentât des corps mortz mesmes gisans de leurs compagnons, qu'ilz voient bien à la fin qu'ilz gagneront pl^{us} à soy liurer à sa misericorde (qui ne peut defaillir en si preux & vaillant Cheualier) que de plus s'opposer à sa vertu, dôt ilz auoient desia faict si suffisante preuue, Parquoy tous d'vn commun accord mettent bas leurs armes & les genoux en terre, lui requerant mercy de leurs vies: laquelle il leur ottroye. Alors il commande à ses mariniers de s'aller emparer de leurs Brigantins: ce qui fut fait diligemment. A ce point, saillirent les pucelles du bas de la nef toutes tremblantes de frayeur

frayeur, qui furēt merueilleusement esbahies de l'estrange boucherie qu'elles virent là, de la main d'un seul Cheualier. Mais leur ioye fust beaucoup diminuee de voir le harnois du Prince tout teint en sang: principalement à Sidere, pensant que ce fust de l'effusion de ses plaies, dont elle se print à lui dire: Helas mon seigneur, faites vous promptement desarmer, à ce qu'on vous appareille, lequel lui respondit: Madame c'est peu de chose des plaies de mon corps au pris de celles que vostre beaulté fait souffrir à mon ame: toutesfois soit vostre commandement accompli. Mais avant qu'on le desarmast il fust appeller un des Corsaires pour sçavoir quelz gens ilz auoient en leurs Brigantins: & à quelle occasion ilz les estoient venu assaillir: qui lui respondit, que le bon cheualier contre qui il auoit si long temps combattu estoit Seigneur des deux vaisseaux filz du Roy de Russie, lequel leue la grande armee contre les Chrestiens. Pendant l'appareil de laquelle à tirer à Constantinople, il auoit armé six vaisseaux seulement pour aller escumer les Chrestiens qu'il pourroit surprendre. Or voulut son auenture qu'il rencontra le Soudan de Perse venant en vne seule Nau de visiter vne sienne Isle accompagné de douze cheualiers. Lequel nous prîmes, par ce que iacoit qu'il fust de sa loy, il sçauoit que neantmoins qu'il auoit grand amitié avecques Anaxartes & la Roine Alastraxeree & autres Roys Chrestiens. A tant sçachez Seigneur que ie vous ay narré tout ce qui en est à la verité sans varier d'un seul point. Qui vous pourroit icy exprimer la ioye que receut la pucelle Sydere & ses sœurs de ces nouuelles, lesquelles comme hors de leur sens, demanderent incontinent d'estre menees ou leur ayeul estoit. Sus guide nous là, dist Rogel au cheualier. Lors entra en un des Brigantins desquelz leurs mariniers s'estoient desia emparez par force: Le Prince & les filles

apres lui. Si va allumer un flambeau de cire au fougion & les conduisant au fond du Brigantin, ilz y virent le Soudan avecques ses douze Cheualiers. attachez à grosses chaines. Lequel soudain elles recognoissans s'agenouillerent deuant luy pour lui baiser les mains: mais luy qui d'ennui & destresse d'auoir esté ainsi prins & enchainé gisoit la comme transporté de son esprit, voyant ces petites filles à ses piedz qui bien il cogneut, non plus ne moins que s'il fust reueillé d'un profond somme, iette un hault cry, disant: O Iupiter! est ce-cy chose vraye ou est-ce songe? que ie voye cy maintenant deuant moy Sidere & ses sœurs mes trescheres nieces: leur iettant les bras au col il les baise & rebaise plusieurs fois, avecques maintes paroles d'extreme amour. Las mes pauvres fillettes, vous estes doncques princes aussi bien que moy: dites le moy promptement sans me tenir plus en suspend: declarez moy si celui qui m'a prins est celui mesme qui vous enleua de mon palais? A tout cecy les tant dolentes que ioyeuses filles ne lui respondoient que de larmes & baisers: sinon à la fin Sidere lui disant, vous plaise mon Seigneur faire honneur à ce cheualier lequel les dieux ont fauorisé & exalté en prouesse par dessus tous les humains de son temps: par laquelle il nous a tous restitués en liberté. Alors aprocha Rogel du Soudan lui prenant les mains à baiser, qu'il retira à soy, l'embrassant de grand amour & les filles lui raconterent tout ce qui estoit passé de leur fait, dont le bon pere remercioit hautement ses dieux, en donnant grande louange au Prince Rogel, lequel s'en monstrois tout honteux. Mais sur le bon champ commanda de declouer les chaines, ce qui fut fait & tout le meilleur qui se trouuaés Brigantins mis en leur nau, en iettât tous les corps mortz en la mer. Apres il enioint que le cheualier fut pélé cōtre qui il auoit si longuement cobatu lequel depuis le tēps n'estoit

n'estoit pas encore reuenu de l'amortissement. Puis aiant donné ordre à tout le surplus qui estoit necessaire, commande donner la terriere aux Brigantins. Finalement fut desarmé par les mains des pucelles, & couché en vn riche lit de ceux que le Roy des sept rochers y auoit fait mettre, puis appareillé de ses plaies par la pucelle Fleurinde de ce que promptement elle peut trouuer en attendant mieux. Or ne vous pourroit on deduire à suffisance la ioye & liesse infinie du bon Soudan, en considerant sa captiuité & sa prompte deliurance, ensemble la perte de ses nieces, & le recouurement: (car il aimoit tendrement les enfans de Persilee sa fille, n'ait aucun filz masle.) Ainsis'en vont singlans à plein voile la droite route de Perse par bon temps, tellement que dedans quatre iours ilz decouurirent la cité capitale, laquelle estoit en grande tristesse de la perte de son Seigneur.

De la triomphante reception du Soudan par la Soudane sa femme & ses subiectz, & du grand honneur qui y fut fait au Prince Rogel avec amoureuse priuanté de Sidere laquelle fust entrerompue par la lettre apportee de Constantinople.

CHAP. XIX.

SI tost que le Soudan de Perse avecques ses nieces & Rogel de Grece fut arriué à port de salut, vn duc des siés monta à cheual (qui estoit connu de chacun) à qui par les rues tout le peuple demandoit des nouuelles de leur Seigneur. Car ilz auoient desia entendu, par vn de ses gens eschappé en l'esquif de la nef comme il auoit esté prins sur la mer. Mais le Duc leur respondoit qu'ilz se rendissent au palais, & là ilz entendoient toutes nouuelles. Le monde y courroit de toutes parts, tellement qu'il ne pouuoit à peine passer pour aller vers la Soudane: la-

quelle il trouua en sa chambre tapissée de veloux noir, estans les fenestres closes, sans y receuoir autre lumiere que de cierges allumez, elle mesme vestue de dueil & desconfortee outre mesure, tant pour la perte de son bon mary, que de ses petites filles. A l'arriuee le Duc mit les genoux en terre deuant celle qui comme en sursault, lui dist: Helas Duc qu'est-il de mon Seigneur? il lui respond, ma dame il est icy question de maints beaux gands des bonnes nouuelles, car elles sont tres-bonnes voire doublement bonnes, la Soudane qui ne se pouuoit douter de la rencontre de ses nieces. A a (dit elle) bien me contente des simples, que mon bon Seigneur soit hors de danger & captiuité. Ma dame (respond le Duc) le Soudan mon maistre est sain & sauf & en pure & plaine liberté: aussi sont voz trois belles nieces, le tout par la main d'un seul cheualier.

Qui vous pourroit raconter la ioye dont la bonne dame fut rauie à ces nouuelles? Elle tend les bras au col du Duc, disant: Mais est-ce verité ce que me dites? Certainement ma dame (respond il.) Lors elle tire vn anneau d'un riche diamant de son doigt, avecques parolles que c'estoit en signe & tesmoignage du plaisir qu'elle desiroit lui faire. Dequoy le Duc la remerciant humblement, elle sans attendre monture ce fait mener à pied par lui sous le bras le chemin de la marine: là ou trouuant le Soudan desia descendu de la nef, ilz se baissent & embrassent les larmes aux yeux de grande amour, ses petites filles agenouillees les departirent qu'elle alla baïser & accoller l'une apres l'autre avecques telle liesse que langue d'homme ne scauroit exprimer. Mais Sydere lui dist: Las ma dame: c'est à ce cheualier que vous deuez les grandes caresses & accollades, tant pour la vertu & prouesse dont il surmonte tous les autres du monde, que pour le bien de nostre vie, honneur & liberté qu'auons tous receuz de lui. Adonc tourne la Soudane le chef vers Rogel, lequel

quel aiant mis vn genouil en terre elle le releue, & l'embrassant s'escrie de ioye en contemplant la raille & parfaite beauté du Prince : ie ne puis croire que ce ne soit icy le belliqueux Dieu Mars ; ou quelque autre de noz Dieux qui de sa seule personne ait tât peu faire. Qui que ie puisse estre ma dame (respond Rogel) ie suis vostre. Alors monterent tous ensemble sur traquenardz & haque nees qui leur furent amenez en diligence. Les trompettes & clairons sonnoïent, le peuple s'epandoit par les rues de leur passage en telle foule, qu'ilz y passassent en grande difficulté sans les archers de leur garde, qui marchoiert deuât pour fendre la presse. Chascun crioit : Vue le Soudan, Vue le Soudan : & auertiz de Rogel qui le leur auoit restitué, iettoïert ces voix d'honneur : Bien-vienne le gentil Prince de Grece, bien-vienne le meilleur cheualier du mode : Tellement que Rogel en estoit tout honteux. A la descente au palais Royal, les hautbois, cornetz & saqueboutes les receurent, qu'ilz trouuerent tapissé & appareillé en toute magnificence. Là ou furent dressees les tables pour le festin tenât ce iour le Soudan & les trois autres ensuiuans sa cour planiere : Ie ne feray point icy plus long discours du traitement sinon qu'ilz furent assiz seuls en la haute table : c'est à sçauoir le Soudan, sa femme, ses trois nieces, & Rogel vis à vis de Sidere sa dame, ou ilz furent largement seruis de tous mets & entremets. A l'issuë du banquet, les tables furent leuees & apres cōmencerent les dances, mommeries, & morisques sous grande melodie d'instrumēs de Musique, mais pas ne faut obmettre que le Prince Rogel, en se rafraichissant en vne chābre pour se reuestir de riches & somptueux accoustremēs qui lui furent portez, tint propos au Duc, d'auertir le Soudan de mādē le Prince de Russie estre amené de la nef en la ville par courtoisie digne de sa grandeur : Ce qui

fut incontinent accomply, & lui conduit en vn bon logis ou il iust traitté honorablement avecques bonne garde, Mais peu de temps apres il fust mis hors de prison, dont auindrent par lui de grāds maux (apres la mort du Roy Balthazar son pere) sur les Chrestiens ainsi que vo⁹ sera deduit en la presente chronique. Or pour retourner au festoimēt de la cour le Prince Rogel mena Sidere au bal & autres grans Seigneurs ses deux sœurs, puis plusieurs barons & cheualiers les autres dames & damoiselles, chacun celle qui plus lui aggreoit. Mais Rogel és paulēs & interualles du son des menestriers ne faillit pas à descouurir son ardent desir à sa dame, lui ramēteuant la remise qu'elle lui auoit faite en leur voiage de bon & gracieux traitement quand ilz seroient en Perse. Souuienne vous ma dame, disoit lui serrant le doigt, de vostre promesse, laquelle a soustenu iusques icy mon ame en langueur, qui fust pieça trāsie & passee le pas sans le confort de ceste esperance. A qnoy Sidere comme biē apprinse, rendoit douce & amiable response dissimulant toutesfois par froideur, l'ardeur dont elle n'estoit moins que lui embrassee. Sans lui franchir le mot tout net, sans aussi du tout l'escondire. Mais les iours consecutifz de la feste & reiouissance publique (à laquelle suruint Persilee sa mere) dont elle fut réforcee, Rogel battit si bien le fer qu'il sentoit chaud & tellement poursuuiuit s'amie qu'il la rehgea au point de la promesse de l'amoureuse mercy. Sur ces entrefaites voicy arriuer au troisiēme iour en la cour du palais vn cheualier armé de toutes pieces fors le chef & les mains lequel fust mené au Soudan, à qui apres la reuerence accoustumee il presenta ses lettres : desquelles le contenu estoit
tel.

F

Lettre.

*Lettre du Roy Anaxartes & de la
Reine Alafraxeree.*

A vous grand Soudan de Perse. Nous, le Roy Anaxartes & ma souveraine sœur Alafraxeree. Salut.

Vous avez à sçavoir, que le Roy de Russie amy de voz Dieux (desquelz il se vante estre issu) & ennemi de Iesu Christ crucifié, sans aucun droit qu'il puisse pretendre à l'Empire Grec, a conspiré & suscité la plus grande part des adorateurs de Mahomet contre nous: lesquelz sans avoir esgard à l'injustice de son entreprinse, s'assemblent avecques luy à grande puissance. A ceste cause nous vous prions de nous enuoyer le plus grand secours que vous sera possible: considerant plus le bon droit de nostre querelle & defence, à la conseruation duquel vous avez tousiours tenu la main tant enuers les vostres que les estrangers, qu'à la conuenance estant entre vous & lui de vostre loy: à quoy vertu nous oblige, qui passe toutes les obligations du monde.

Le Soudan aiant leu la lettre, la bailla au Prince Rogel, lequel iettant l'œil sur icelle, se tourna vers lui, disant: S'ilz y viennent, à leur malencontre, y viendront car leur peu de iustice sera leur grande vergongne. Puis se mit à en deuiser avecques le cheualier de Constantinople, pour sçavoir quelz Princes il y auoit laissez à son partement, quel ordre on auoit commencé à y donner de quoy lui aiant rendu bon compte fut enuoyé au logis qui lui estoit appresté ou il fut bien traité par vn Gentil-homme Persan qui en eut la charge. Le Soudan de sa part assembla son conseil pour auiser en diligence de la leuee des gens par tous ses pais, & des capitaines qui en auroient la conduite: laquelle vous sera cy apres deduite en son lieu. Mais qui qu'en fut ioyeux ou marry de ceste nouuelle, la pucelle Sidere en fut estrangement troublee en

son cœur qui auoit trouué l'inuention d'un iardin pres de son logis, auquel elle s'attendoit d'auoir dans peu de iours familiere communication avecques Rogel. Toutesfois les moiens en furent rompus par la suruenue de ce courrier, & sa volonté aucunement refroidie, en discourant à part elle, que plus lui causeroit de regret que de consolation vn si soudain partement de son amy si elle fust entree avecques lui en plus amoureuse priuauté. Neantmoins l'endemain que Rogel estoit delibéré de partir apres qu'il eust prins congé du Soudan (qui lui promist diligenter le secours des Princes Chrestiens) & qui lui offrit tout ce qu'il luy plairoit de lui & de son royaume. Il l'alla prendre pareillement de la Soudane, de sa fille Perfilee, & de ses nieces: mais le congé de Sidere fut vn peu plus long que des autres, auquel elle eut grande peine à dissimuler & couvrir son amour extreme que son ayeule & mere ne le conceussent, & Rogel grand regret de son costé, que si belle occasion lui fust eschappée des mains à l'heure de la bonne prinse.

Toutesfois il lui mit secrettement vne escarboucle tresprecieuse au doigt pour gage de son brief retour, auquel il obtint promesse certaine de Sidere de l'accomplissement final de son desir, avecques vn Rubis tesmoignage de l'assurance, luy faisant de sa part toutes les protestations & sermens qu'un vray amy en tel cas pourroit faire. Mais la longueur de leur deuis fut aucunement excusé par la familiarité estreite que leur long voyage ensemble leur pouuoit auoir causé. Or ce dur congé prins, Rogel fit la derniere reuerence à la Soudane, qui le pria tres affectueusement de sa part, de les reuenir bien tost veoir en Perse apres l'issue de ceste guerre, Ce qu'il luy promit fort volontiers, mais à bien autre fin que la bonne Dame n'imaginoit. Si s'en va de la en son logis s'armer de toutes pieces & monter à cheual, & le Cheualier de Gre-

Crece quād et luy. Mais il fut esbahi que le Soudan le vint accōpagner à suite fort honorable iusques au port, : ou il le pria pareillement de leur donner à sa premiere opportunité vne visitation plus ample: le voyant monter en la nef qu'il luy

auoir fait garnir abōdamment de toutes prouisions necessaires à son voyage: sans auoir oublié le Soudan au partir de donner vne chaine d'or au Cheualier de la valeur de cinq cens escus.

Comme le Prince Rogel party de Perse rencontra sur mer la flotte de la Roine Sidonie, avec laquelle il surgit au port de Constantinople, ou ilz furent magnifiquement receuz.

CHAP. XX.



LE Prince Rogel estant ainsi que vous a esté recité parti de Perse y laissant telle odeur de soy que grās & petites estoiet tous troublez de si soudain departement de celuy à qui ils estoient generalemēt tous tant obligez qu'il ne leur sembloit pas auoir eu du loisir à demi pour deploier sur lui, les caresses & honneurs dōt ilz se sentoiet redeuables. Specialement Sidere viuoit en griesue desplaissance de ne lui auoir plustost ottrōié sō amoureuse requeste, se plaignāt en ses regretz de l'honneur, comme de bourreau, comme de meurdrier des mise

rables amantes, principalement de celles de son estat royal qui s'y estimoient plus obligees pour seruir d'exemple aux autres. Ha (disoit elle à part soy) que ne lui auois-ie tranché le mot à nostre arriuee de trouuer le lieu de commodité, dont tāt il m'importunoit qu'avec l'obligatiō de ma deliurance, ie pouuois estre trop excusée de le consentir: Las (discouroit elle) la maison du Soudan mon ayeul ne me donnoit tant d'opportunité que pouuoit mieux celle de Persilee ma mere ou i'esperois le tirer pour acheuer du tout par luy ma conduite iusqu'au gy-

ron d'elle. Mais ie deuois plustost sans attendre tant de dangers, tant de regardz & conterolles fust en l'vne fust en l'autre, le recompenser de ses bien-faits en la commodité du long voiage que nous faisions ensemble. Puis recommençoit, ha faux honneur, garde de la chasteté des Dames, il ne fust oncques de plus cruel tiran que toy qui les geshes, tourmentes & fais mourir à petit feu, O que ie lui en escrirois volôtiers ce que ie n'ay osé lui dire de bouche: la main estât plus hardie qui ne rougist point que la langue si prochaine de la face honteuse, mais la lettre escrite demeure, en danger d'estre veuë & descouuerte, portant suffisante preuue en soy de la condamnation de nostre honnesteté. Le Prince Rogel (à vray dire) combien qu'il fust plus iuger aux passions d'amour que Prince ne grand cheualier de son temps, & qu'il s'embrasât aisément de toutes les beautés qui se presentoient, si est-ce qu'il en sentit vne plus grande & non vulgaire amorse à l'endroit de la belle Sidere, qu'il n'auoit accoustumé pour les autres (excepté sa Leonide) par les rares perfectiones qu'il auoit connues en elle avec le moien de la longue conuersation: tellement qu'il y reluoit nuit & iour en sa nauigation, bien deliberé de ne faillir à la premiere occasion qui s'offriroit, de retourner en Perse pour en esclarcir son cueur, comme vous entendrez qu'il fit apres la guerre, lui escriuant ce pendant vne lettre tesmoing de son affection & elle la responsiue de la siene reciproque. Mais comme il voguoit si auant enfoncé en telles pensees, il descouurit en mer au quatriesme iour vne flotte qui le mit premierement en doute si c'estoit de la ligue de Russie, qui l'enuelopast si mal à propos en ce petit equipage: mais quand elle vint si pres en veuë, que ses nochers peurent iuger les banderoles, ilz l'assurerent qu'elles estoient de Guindaye, dont fust incontinent sa crainte tournée

en ioye de rencontrer tant à souhait la Roine Sidonie, & le bon secours qu'elle menoit à Constantinople. Laquelle à le approcher ne receut pas moins d'aide de trouuer ainsi celui qu'elle aimoit & estimoit par raison entre tous les Princes de Grece. Ie ne feray le compte plus log de leurs caresses mutuelles, ne des menus accidens de leur voyage marin, pour nous haster de les rendre au port de la cité imperiale, ou leur venue estoit grandement desirée, combien que la veuë premiere de leur flotte, y causast quelque trouble, ne sçachant si c'estoient ennemis ou amis. A ceste cause les Princes auertis se mirent soudain en armes, & toute la ville pareillement. Si monterent à cheual armez de toutes pieces (suiuiz de vne cheualerie pour son nombre la plus braue du monde) le Roy nompareil Amadis de Gaule, les Empereurs Esplandian, Lisuart, Amadis de Grece, l'excellent Prince Florisel de Niquee, le Roy Anaxartes avecques son filz don Arlanges, le Prince Anastarax avec Filisel de Montespín son filz, le gentil Falanges d'Astre avec sa belliqueuse Alastraxerec, l'incomparable Agefilan, & le vaillant Roy Florarlan. Mais s'estans ses treuvaillans Seigneurs mis sur le port en defense, ilz veirent ietter de la grosse Caraque vn esquif en mer & y descendre quelque Cheualier & deux apres, avec vne dame, desarmez de chef & de mains. Lesquelz à l'aborder furent aussi tost reconneuz de tous estre le Prince Rogel de Grece, le Prince Brianges de Beocie & la belle Roine Sidonie. Dequoy chacun receut merueilleuse ioye, spécialement Florisel de Niquee, & Agefilan, lesquels impatiens d'attendre se mirent en l'eau à cheual au deuant de l'esquif: Auquel ilz entrerent, & leuant la veuë de leurs armetz, firent humble reuerence à la Roine. Lors Sidonie iettant les yeux sur Florisel se print à dire: Ha Florisel, comme en toutes choses vous voulez tous-

toujours gagner l'avantage de l'honneur sur moy, iusques au point qui à vo⁹ seul & à celui qu'avez engendré, est otroyé du ciel de iouir de mes triumphes en me delurant par deux fois de la mort certaine. A quoy il respondit : Je meties bien-heureux : Ma dame & en rends graces à Dieu de ce que moy ou chose mienne puisse estre employee en quelque service vostre : Aux occasions duquel ie vo⁹ feray toujours apparostre la vraye & sincere amour que ie vo⁹ porte excusant seulement la faute que ie vous y puis auoir commise, par l'obligation de loiauté qui estoit deuë à ma souveraine espouse. Sur ce il lui baise les mains : ce qu'elle cōsentit avec vn soubris gracieux, disant : Je vous laisseray iouir de ce priuilege pour le deuoir dont m'estes redeuable en vertu de l'affection que ie vous porte, puis qu'en autre maniere, ne vostre grandeur le requiert, ny à la mienne estoit obligee de telle reuerence. Alors s'en va saisir Agefilan entre ses bras, encliné d'un genouil deuant elle & le baise amoureuxment en la face. Aussi s'adressa Florisel à Rogel à le bien-viennier de paroles amiables, puis de lui au Prince Brianges & aux deux Ducz qui acompagnoient la Roine Sidonie, & ainsi deuisans arriuerent au port : là ou elle fut honorablement receuë des Rois & Emperereurs, ceux qui ne l'auoient iamais veuë grandement esbahis de sa beauté qui egalloit celle de Niquee, & surpassoit toutes les autres fors que de Fortunie, Leonide & Diane : Lesquelles semblablement la receurent en telle ceremonie de fait & de paroles qu'accoustumee estoit entre telles personnes, sans les dechiffrer en plus grande prolixité. Ce fait fust amené à Sidonie vne belle & puissante haquenee blāche richemēt enharnachee, sur laquelle elle monta & le Roy Amadis en saisit les resnes, puis monterent pareillement les autres Cheualiers sur les cheuaux qui leur furent presentez : ainsi s'en

allans ensemble vers le palais, là ou à l'arriuee le Roy Amadis descend le premier, reçoit Sidonie entre ses bras : Puis luy & l'Emperereur Amadis la prenant des deux costez par les mains montent ensemble le grand escalier du palais, au bout duquel ilz trouuent toutes ces grādes Princesses, c'est à sçauoir la Roine Oriane, l'Emperiere Leonorine, l'Emperiere Onolorie, l'Emperiere Abra, la Princesse Siluie, la Roine Onorie d'Espagne, la Princesse Diane, la Roine Lardenie, qui par son merite estoit mise au rang des Princesses. Plus la Princesse Anaxare & l'outrepasse Fortunie, qui estoit desia en l'aage de huit ans. Plus, la belle Niquee avecques la Princesse Helene. Entre elles passerent telz recueils & caresses que vous pouuez imaginer : mesmement entre Sidonie & Diane, desquelles les beaux visages perdirent vn peu de leurs viue couleur à la mutuelle rencontre : puis la mere en signe de grande amour embrasse sa fille, & la tenant ainsi longuement entre ses bras la baise & rebaise plusieurs fois en sa polie & delicate face. D'elle passe Sidonie à accoller Lardenie tres affectueusement, & Rogel s'estant pareillement acquitté de ses reuerences enuers toutes les Emperieres & Roines selon leur degré, & spécialement à sa chere sœur Diane, s'arreste à sa Leonide deuant laquelle il fut vne espace sans lui pouoir dire vn seul mot non plus qu'elle à lui, tant ilz estoient troublez & ravis de ioye à ce veoir depuis vne si trellongue absence l'un deuant l'autre. La Roine Sidonie à la fin print la petite Fortunie entre ses bras, qui se pendoit à son col avec maintes iolies mignardises & la Roine la baisa tāt en sa petite bouche vermeillette, q̄ ne se pouoit saouler de contempler ceste fleur de beauté parfaite qui deuoit vn iour raiir de admiration tout le monde. Or entrent tous & toutes en la grande sale ou les tables furent dressees pour le soupper qui

fut pour le vous faire court tresmagnifique, avecques dances apres, comedies & autres diuers esbatemens, Pour desquels prendre part nous y conuient presentement conduire le gentil Prince Sylues de la Selue, celui des gestes duquel depend le principal ornement de nostre hittoire.

Comme le gentil Prince Sylues de la Selue au mandement de l'Empereur Amadis de Grece partit de Thebes pour venir à Constantinople, chassant par le chemin, en la compagnie de la Roine Finistee sa mere.

CHAP. XXI.

LA feste n'estoit entiere & accôplie en la grande cité de Constantinople en defaut de la Roine de Thebes Finistee & de son gentil & genereux filz Sylues de la Selue. A quoy auisant l'Empereur Amadis de Grece son pere manda à la Roine sa mere par vn gentil-homme de sa maison qu'elle y estoit fort desirée & Sylues pareillement. A ceste cause que elle donnast ordre à lui dresser son train & l'y emmener au plustost qu'il lui seroit possible : que ia temps estoit de le dresser au fait des armes en ensuiuant la trace de ses ancestres, pour estre employé au seruice de nostre Dieu & redempteur, & en la defence de la Chrestienté. Dequoy la bonne Roine receut vne ioye incroyable de veoir les occasions preparer à l'honneur & gloire de son filz. Si lui fit aprestre & mettre en ordre armes & cheuaux & vne garderobe de riches & somptueux accoustremens. Quant à lui il tressaillir d'aise à ceste nouuelle, accolant le gentil-homme qui la porta : auquel il fit à Thebes la meilleure chere dont il se peult auiser, l'arraisonnant sur tout ce qui se faisoit en la cour des Princes. Mais considerant sur son partement que son arroy seroit de peu de grace, à faute de l'ordre de cheualerie qu'il n'auoit pas encore, delibera (sous le cōgé

de la Roine) d'y aller à tout le moins en son equipage de chasse, avecques ses veneurs, piqueurs & sa meute de chiens. Le cheualier Perot (lequel par faueur speciale il appelloit son seruiteur) donna ordre à tous, sans oublier ses deux sauuaiges, voire ne le vieil cerf. Suaue son gouuerneur ne voulut pas demeurer derriere, preuoiant les affaires ou il alloit entrer esquelz il auroit besoing de son conseil. Ainsi se mettent en chemin la Roine Finistee en sa lictiere de veloux, allât tousiours deuant avec sa suite droit au logis de la traitte : le Prince Sylues avec vne partie de son train, chassant tousiours de costé & d'autre. Or cheuaucherent ils tant par leurs iournees, qu'ilz arriuerent à six lieues pres de Constantinople : dequoy la Roine estima raisonnable d'aduertir l'Empereur Amadis, & ce par le gentil homme mesme qu'il auoit enuoié. Par lequel leur venuë entendue & communiquee à toute la Seigneurie, les ieunes Princes Agesilan, Rogel, Florarlan, & les autres accompagnez de grand nombre de bons cheualiers monterent à cheual pour aller au deuant de celui qui, auoit desia espandu vne odeur de foy en la cour imperiale de fort grande esperance. Les bienvenuees & caresses furent grandes à la rencontre d'vne part & d'autre (sans no^r y estendre icy plus amplemēt) Agesilan & Rogel fort bien accompagnèrent la Roine aux deux costez de sa lictiere, & Florarlan & Filifel de Montespín, Silues entr'eux deux, qui suiuiroient per à per Perot & Suaue ses gouuerneurs. Grande liesse fut par la ville à leur arriuee, treshonorable sur la reception qui lui fut faite par le Roy Amadis & les Empereurs en la grande sale du palais. Mais auant qu'il y entraist, les dames se mirent aux fenestres pour le voir en son equipage de chasse avecques son cerf & ses deux sauuaiges qui auoient bien donné du passe-temps par les rues. L'Empereur Amadis les alla attendre au hault de l'escalier de la

de la cour, pour en prendre par droit les premiers baisers & aussi les accolades (car il aimoit certes la Roine Finistee & son filz de grand amour.) Ce faict il la conduit souz le bras iusques à la sale, Silues le suiuant à costé vn peu derriere: ou ilz furent de nouveau carressez par les hauts Princes & souveraines dames, à qui mieux mieux. Mais le grand plaisir fust de lui & de l'unique Fortunie, qui le trouua fort beau, & le caressa comme plus approchant de son petit aage que tous les autres. La feste en fust renforcée, après laquelle les nouvellement veuz furent conduitz par les ieunes Seigneurs courtoisement au logis qui leur fut appareillé. Si les laisserons tous reposer iusques au lendemain qu'arriva l'estrange auenture, que vous orrez maintenant.

De l'estrange auenture qui arriva de la fontaine Meduse à Constantinople: laquelle troubla toute la cour, & puis fut mise à fin par la Roine Si tonie.

CHAPITRE XXII.

SI les Seigneurs & dames de Constantinople prindrēt plaisir des deux sauages presentez par le Prince Silues de la Selue en la sale le soir apres les tables leuees du festin plus eurent d'admiration du grand vieil Cerf fatal, contenant si hautes propheties de la gloire future de celui par qui il auoit esté prins, au beau collier d'or graué de lettres grecques (comme cy dessus a esté déchifré) lesquelles furent bien leuës & releuës & considerees. L'endemain au disner les paroles s'en continuoient encores, quand ilz furent bien plus esbahiz d'une autre estrange auenture qui leur suruint. Car ainsi qu'ilz estoient sur l'issue du banquet entra en la grande sale vne très-belle damoiselle portant couronne de Roine sur son chef, vestuë d'accoustremēs de dueil:

apres laquelle venoient quatre lyons de bronze, portans sur leurs doz vne precieuse fontaine de fin or, sur vn fond de vn bacin d'or. Au mylieu duquel tout plein d'eau cristaline s'eleuoit vne grosse coulonne d'argent de bel ouurage, sur icelle vne autre moindre coulonne de iaspé de laquelle sortoient douze tuyaux d'eau, qui tomboient sur le maistre pilastre: toute l'eau sonroit du tronc d'un corps de femme d'albastre, posé sur la cime de la seconde colonne, c'est à sçauoir de ses deux mammelles, d'ou sembloit que deux filletz d'eau saillissent naturellement. En ses mains elle tenoit vne harpe d'albastre mesme, & sur sa teste portoit vne couronne d'or tresprecieuse. Toute l'assistance fut grandement esbahie de ce spectacle, tellement que chacun se teut pour ouir ce que la pucelle voudroit dire qui marchoit deuant, laquelle s'agenouillant sur les marches du trosne Imperial, parla en ceste maniere.

Treshautz Princes & tresexcellentes Princesses, voz magestez ont à sçauoir, que ie suis fille du Roy nommé Tarnes de Medie: lequel n'eust de la Roine sa femme autres filz ne filles que moy. Or estoit il en son viuant si expert es artz de Magie que par son sçauoir il paruint iusques à connoistre que ie serois apres son decez deheritee de son Royaume. A ceste cause fit le bel ouurage que voiez deuant voz yeux, me commandant de l'aller incontinent apres son trespas porter par le monde, en queste d'un cheualier, dame ou damoiselle qui en puisse acheuer l'auenture. Et qu'auant l'esprouue d'icelle, ie demandasse vn don, c'est à sçauoir ma restitution en mon royaume. Ce disant il finit ensemble sa parole & sa vie: & ne furent vaines ses paroles: car à peine auoit il les yeux clos par la mort qu'un mien cousin pourchassa à m'occir, pour crainte duquel ie m'en fuy en vne forest, ou ie ne fus pas entree plus d'une demi-

de mi-lieuë, que i'apperceu venir vers moy ceste merueilleuse fontaine, non plus ne moins que cy vous la voyez. Avec laquelle i'ay delia rodé vne partie de la terre habitable sans auoir encores trouué personne qui peust mettre fin à l'aenture, dont la façon est telle.

Que le cheualier, dame ou damoiselle qui pourra leuer la couronne du chef de la statue tenant la harpe aura l'aenture de la fontaine acheuee : & en ce cas, le cheualier m'otroyera le don que lui requerray, ou la Dame & Damoiselle fournira cheualier qui pour elle me l'accorde.

Reste maintenant à voz magestez d'auiser s'il leur plaist que l'esprouue en soit faite en vostre cour. Le Roy Amadis (comme celui auquel appartenoit de prendre la parolle pour tous) lui respondit: la belle nous nous tiendrons bienheureux que nostre cour recoiue l'honneur de l'acheuement de l'aenture & vous par mesme moyen, l'heur de la fin de voz travaux. Et de ma part, le don ie vous otroye. Apres lui tous les autres Princes lui en promirent autant & apres eux toutes les dames. Or donc (dist le Roy Amadis) puis que premier i'ay este à en otroyer le don, premier aussi ie m'en vois à l'esprouue: Adonc print sa chere Oriane par la main: mais à l'approcher voiat au bord du bacin d'or vn escriteau en grosses lettres, le voulut lire, dont le contenu estoit tel.

*Escriteau de la fontaine
Meduse.*

Au temps que la desheritee Princesse en la quëste de sa demande au parquet des braves lions inlomptez entrera, estans en pierres avecques les siens onces conuertiz de grande confusion l'aigle excellente engiznee luy estant en don par son engizneur otroyé,

pourra tollir la couronne & la fontaine Meduse restera desengiznee.

L'escriteau parleu le Roy Amadis adressa à son Oriane sa parole, disant: Ie m'assure ma dame si la loyauté d'amour a lieu en ceste aenture qu'en obtiendrez la gloire par dessus toutes les autres dames du monde. A quoy elle respondit: mon bon Seigneur ne croyez pas que ie soys auioind'hui moins enflambee du feu ardent de vostre beauté que i'estois au tēps de mes premieres amours quand nous passions sous l'arc des loyaux Amans, ainsi que l'esprouue des tours de noz enfans Agesilan & Diane en donnerent tesmoignage: ainsi s'auance la Roine Oriane pour leuer la couronne hors de la teste de l'image: laquelle se print à sonner de la harpe par telle melodie que la Roine en demeura comme toute ravie & hors de soy: aussi en peu d'espace elle fut conuertie en pierre de marbre, sans toutesfois changer aucunement de traict ne de proportion de ses membres. Dequoy fut fort troublé le Roy Amadis tant que comme sans sentiment il essaya à tollir la couronne à la statue. Mais elle se print à toucher l'instrument comme deuant en pareille douceur d'harmonie & il fut tourné en semblable pierre que sa chere Oriane. Grand fut le trouble de cest accident par le palais, tellement qu'il y en eut qui voulurent mettre les mains sur la pucelle, doubtais que ce fust quelque trahison, Mais elle leur certifia qu'il n'y auoit danger quelconque & que si tost que toute la compagnie auroit esté à l'esprouue si l'aenture n'estoit acheuee, la fontaine sortiroit incontinent d'elle mesme hors de la sale & chacun retourneroit sans offense en sa premiere forme. Pour assurance de quoy elle mesme alla tascher à otter la couronne à l'image, dont elle demeura marbrinee comme estoient le Roy & la Roine. A son exemple plusieurs Princes & Cheualiers allerent

allerent à l'instant esprouuer l'aventure, voiant qu'il n'y auoit point de peril, qui tous demeueroient conuertiz en marbre, & ne s'y espargnerēt les Empereurs mesmes Esplandian, Lisuart & Amadis de Grece & à leur queuē tous les autres grands Princes dont la presente histoire fait mention. Or deuez entendre que quand Lisuart, Agefilan & Rogel se presenterent à l'espreuue, iamais il n'y peut auenir: parquoy s'auisant que cela procedoit de leurs espees, lesquelles resistoient (comme vous a esté dit és liures precedens) aux enchantemens: ilz les osterent de leurs costez & les baillans en garde, marcherent à la fontaine dont l'image leur donna l'aubade de musique telle qu'au Roy Amadis & Oriane, & ilz deuindrent marbre comme les autres. A tant vous dy-ie que nul ne fust en toute l'assistance qui n'y feist son pouuoir, iusques à y comprendre les dames, lesquelles apres s'estre entrepries & l'honneur deferé les vnes aux autres d'y marcher deuant, l'Emperiere Leonorine y alla la premiere, apres elle, Abra, Niquee, Helene, & consequemmēt toutes les autres Princesses, qui y furent toutes transformees, que plus ne restoit que la Roine Sidonie. Laquelle iettant l'œil sur son Moraizel, combien que trāsmué en pierre cōme les autres, retenant neantmoins tout son naturel pourfil & lineature, se print à lamenter: Las Florisel de Niquee que mieux eust esté à ma triste fortune que nous eussions esté toy & moy conuertiz en ceste matiere insensible, que d'auoir à soustenir tous les iours les assaultz de la mort par ta beauté. Toutesfois l'amour que ie te portē m'incite presentement à pourchasser ta vie. Car si l'escriteau contient verité, à qui à meilleur titre qu'à moy doit estre ceste aventure permise? veu qu'en amour enuers toy nulle ne me passe, & à me faulser amour nul ne t'esgale. A ce mot marche vers la fontaine, & dist à l'image: Belle Roine

donnez moy ceste couronne, à fin que ie puisse iouir du biē ou du mal qui peut resulter de l'aventure. Alors l'image haufant la main à sa teste prend sa couronne & la pose sur celle de la Roine Sidonie. Ce fait elle sonne de sa harpe plus melodieusement que n'auoit encores fait avecques le doux bruit de l'eau saillante, tellement que tous les Princes & Princesses enchantez & transformez reuindrēt à l'instant en leur premier estat & sentiment, & Sidonie se trouua lors augmentee en toute perfection de beauté par dessus toutes les dames Grecques, sauf seulement sa fille Diane, & la Fortunie sans pair. Adonc tous les Seigneurs & Princesses lui allerent rendre grace de leur restitution & deliurance, dont le Roy Amadis fut le premier, disant: Ma dame vous deuez estre fort contente, d'auoir seule obtenu la gloire de ceste merueilleuse aventure. Monsieur (respondit) vous auriez raison de le dire, si avec l'honneur de ceste espreuue m'estoit quand & quand ottroyé ce qui fust à ceste tres-excellente Roine au chasteau de fleurs en la chambre defenduē: mais l'encombre en la loiauté de Florisel ne le pouoit permettre. Ce dist, s'en allerent tous & toutes rasseoir en leurs sieges comme ilz estoient parauant l'espreuue. Adoncques voiant la fontaine se mouuoir avecques vn son plaisant par la sale iusqu'à ce que elle fut venuē au droit milieu d'icelle: la ou elle s'arresta toute quoye, & en sailloit & courroit, alors incessammēt l'eau cristaline sans que personne peust apperceuoir que deuenoit celle qui tomboit. Mais ceux qui l'allerent reuoir de pres, y veirent vn autre escriteau contenant ces paroles.

*Escriteau second de la fontaine
Meduse.*

*Au temps que mes artz paroistront en la
cité Gregeoise pour remede de la pucelle des-
beritee*

heritee par la main de celle à qui l'amour a esté ingrat, la fontaine demeura sans onques-mais se mouuoir, iusques à ce que seront coniointz les plus excellens en force & beauté du monde. En ce temps l'eau claire & blanche sera conuertie en sang (quand quelqu'un auec trahison entrera au lieu du sejour de l'image) & le son melodieux & delectable se tournera en triste & piteux.

Leu cesecond escriteau de la fontaine Meduse, chascun en fut eprins d'admiration tant pour l'estrangeté de son auenture que pour l'excellence de sa propriété en ce deuxiesme point, Alors la pucelle de Medie se va encliner de genoux deuant la Roine Sidonie, lui disant : Ma dame vous auez entendu le droit de mon auenture que vous auez acheuee, reste s'il vous plaist d'acomplir le don qui m'a esté ottroyé c'est à sçauoir du champion que me deuez bailler suffisant à me restituer & restablir en mon Roiaume. A quoi Sidonie voulant respondre: Florisel s'auance qui prend la parole, lui disant: Ma dame de la charge qui est tombee sur vous, ie receurois offense qu'elle fust adressee à autre que moy pour vostre decharge. La Roine lui respondit, qu'elle ne pouuoit refuser l'honneur qui lui redondoit de sa parole, de s'oy reclaimer plus obligé à son seruice que nul autre, comme pour satisfaction de la foy qu'il lui auoit faussee. Car puis (dit elle) que ie ne puis autrement iouir de vous pour amy par le droit de ceste belle Roine (monstrant Helene) faut que ie sois contentee d'en vser pour seruiteur. Ainsi vous donne le congé que me requerez d'entreprendre la querelle de ceste pucelle. Dequoy lui & elle ensemble remercient Sidonie. Or dist apres Florisel à la pucelle. Ma belle amie, auisez quand voulez que nous partions, me voila prest. Grâd mercy Monsieur (respond) j'accepte vostre offre & promesse pour la confiance que j'ay en vostre vertu: de laquelle ie

vous sommeray quand l'opportunité sera venuë: Car ie dois bien auoir encore quelque peu de patience, puis que j'en ay iusques icy tant souffert, en consideration de l'vrgente necessité qui se presente. Ainsi part la pucelle de Constantinople pour y retourner en temps conuenable dont la cour fut grandement reioiue de ce qu'elle n'auoit emmené Florisel en saison si importante de la guerre qu'ilz attendoient. Mais lui sortant d'un encombrer, tomba à l'instant en un autre, tel que vous entendrez presentement.

Comme se dressoit à Constantinople l'appareil solennel pour les noces, lequel fut rompu par la mort d'Helene.

CHAPITRE XXIII.

LEs ieunes Princes fiancez commençoient à demener grâde ioye à Constantinople & leurs dames fiancees sur l'appareil solennel qu'ilz voient dresser pour leurs nopces prochaines, c'est à sçauoir à estre celebrees à la feste. Sainct Iaques non distante que de six iours: si fortune la renuerseuse de tous accidens, tresorier de tous biens & maux eust tenu sa rouë ferme & stable, sans lui donner un si mauuais tour de sa main, qu'elle fit. Mais comme toutes choses dependent de la pouruoiance diuine, la Princesse Helene lors qu'elle estoit en son plus grand triomphe auecques son Florisel, estant pour la seconde fois enceinte de trois mois, vint à auoir un flux de sang de matrice si violent & impetueux qu'il ne se trouua sage femme ne medecin qui le peut estancer, comme contre le medecin d'en haut nulle medecine n'a puissance. On croit bien que ceste auenture de la Fontaine de Meduse en pouuoit bien auoir donné le bond, tant par la ialousie de tant de caresses qu'elle y veit de son espoux auec la Roine Sidonie, que

nie, que de le voir si franchement soy presenter pour elle à l'exécution, dont elle estoit chargée, sans auoir egard n'y à sa grossesse n'y à l'urgent affaire de la Grece voire de toute la Chrestienté. Toutesfois si tost que Florisel fut aduertie de cest inconuenient, il y employa tous les remedes qui lui furent possibles, & voiant qu'il ne s'en trouuoit aucun qui de rien y seruiſt, se ietta sur vn lit, faisant les plus tristes & piteuses lamentations qu'on eust oncques ouyes de la bouche d'un Cheualier, mesmement magnanime comme lui. Ha Helene m'amie (disoit il) me voulez vous si tost en fleur d'age abandonner? Emmenez moy doncques quād & vous? Je ne croy pas Helene que ne soyez bien certaine de l'amour extreme que ie vous porte, or ayez donc quelque pitié & compassion de moy, Les Princes l'allerent prendre ainsi dèconfortee & le menerent en la chambre de la malade, ou approché de son lit, il cheut tout estendu de dessus elle, voire si amorty qu'il y fust en cest estat plus d'une heure sans pouuoir reuenir de pasmoison. Alors il l'embrace tout baignant en larmes, luy disant: Las m'amie reprenez courage, ne me laissez icy seul, ou ie ne la feray pas longue apres vous. Car la mort qui tout separe ne doit pas separer le lien indissoluble de nostre chaste & sainte amytié. Considérez que ie suis vostre Florisel de Niquee. A quoy elle en fin de voix foible & tremblante respondit: mon vray & loyal ami, ie ne voulois pas vous faulser si tost cōpagnie: mais force m'est d'obeir à la volété de celui qui m'a crée, & puis qu'ainsi est mon cher ami, ne me faites redoubler la mort, en sentant par voz doleances la vostre & la mienne. O Seigneur Dieu si c'eust esté ton seruice, que ie desirois ne laisser si tost ce mode: mais Seigneur vostre tressainte volonté soit faite non pas la mienne. O mort comme tu viens à ceux qui pas ne te quierent, & faiz ceux qui te cherchent. O monde im-

monde & abuseur & trop abusé celui qui en toy se confie. Tu m'auois rendu la plus heureuse de la terre en m'assortissant de tel mary & confort, si vaillant cheualier, si haut Prince & Seigneur terrié. Tu m'as donné ce dequoy les folz mortelz plus se glorifient, la beauté mondaine. Je ne te renie ce qui est à toy, ains cōme tel ie te le rends, & il retourne à toy, puis q'ie ne l'ay receu que par prest. Et ie supplie nostre sauueur Iesus Christ, ne me vouloir exiger compte rigoureux au dernier iour de mon iugement. Alors disant: In manus &c. sa bouche iointe à celle de Florisel (qui estoit là demi mort) elle rendit l'ame à son Createur. Et Florisel la voiant trespassée cheut du bord du lit sur le tapis de la chambre esuanouy voire en telle sorte que chascun cuidoit qu'il fust vraiment mort & passé, & pour telles bons Princes le ploroient. Si le firent prendre & Rogel son filz demy trāsi sur vne chaire, & trāsporter de là en vne autre chambre, en sortant eux-mesmes, & y laissant les tendres Princesses que c'estoit grande pitié de voir & ouir ce qu'elles y disoient & faisoient, ce que chascun peut mieux penser que langue ne scauroit exprimer. Et d'autre part tous ces grands Princes estoient bien empeschez à l'entour de Florisel, & faisoient sur luy de grieues doleances non plus ne moins que s'il fust du tout passé de ceste vie en l'autre. Auquel estat il demeura pres de six heures d'ou reuenāt à soy comme s'il se fust reueillé d'un profond somme, demanda tristement à ceux qu'il veid à l'entour de soy ou estoit sa dame Helene, que c'estoit, qu'on auoit fait d'elle, & s'il estoit possible qu'elle fust morte lui en vie ne croiant pas que sa fortune le peut consentir, se leua de bout comme personne hors du sens: Mais to⁹ ces Princes le retindrēt en le cōsolant au mieux qu'il leur fut possible. Le corps de la Princesse Helene fut enterré sumptueusement, en telle ceremonie que sa grandeur re-

queroit estant enbaumé & mis en vne queisse d'or, en grande pompe de conuoy de bons Seigneurs avecques tout le clergé, fust porté en la chapelle des Empe- reurs. Puis retournerent les Princes au palais, la laissant, au lieu de sa perpe- ruelle demeure: ou ilz retournerét vraie- ment accompagnez d'aussi grande tri- stesse que pouuoit estre, qui estoit sem- blablement epanuë par toute la cité, dont n'y auoit homme ne femme qui n'en portast grand dueil. Florisel se reti- ra en sa chambre ou il commença de nou- ueaux plaintes & regretz, dequoy les dames auerties y vindrent pour le recô- forter, & s'assirent tout à l'entour de son lit: en especial la Roine Sidonie qui lui commença à dire: Gentil Prince mon- strez icy vostre genereux courage, en tel coup de l'ennemie Fortune que cestuy. Considérez monsieur que c'est que du monde, auquel nous auons receu la vie à telle condition que la deuons laisser quand il plaira à Dieu: Ne soyez mon- sieur meurdrier de vous-mesmes, ains pa- rez contre ce dur coup, de l'escu de pa- tience. Plusieurs telz propos lui tindrét ces bonnes dames: mais plus lui faisoient de remonstrances, plus souffroit de douleur en son cœur. Dont à chef de piece leur respôdit au mieux qu'il peut: Mes dames, qui est la force qui peut re- sister à si roide preuue, ne qui est le bou- clier si fort qui ne fust taillé & mis en pieces par vn si mortel coup? que i'ay le cueur ouuert par la moitié sans remede d'estre iamais consolidé & reprins. En telz & maintz autres termes passa quel- ques iours Florisel, deplorant tousiours sa perte irreparable, & les Princes le con- solant à leur pouuoir, qui auoient eux mesmes grand besoing d'estre consolez (tant estoit de tous aimée la gentille

Helene) iusques à ce que sur- uint ce que vous enten- drez à ceste heu- re.

Des nouuelles certaines qu'eurent les Prin- ces de Grece de la venue de leurs ennemis & de l'estat de defence auquel ilz se mirent pour les recevoir.

CHAP. XXIIII.

LA destresse estoit telle qui tous les oppressoit en la grande cité de Cō- stantinople à l'occasion de ceste mort inesperee de si bonne, belle & ieune Princesse, que non seulement les fe- stes en cesserent & tournois qui desia es- toient demy preparez: ains les nopces solempnelles des Princes fiancez: telle- ment qu'on gasta plus d'une semaine en pleurs & larmes. Au bout de laquelle vint surgir vne galere Geneuoise au port de Constantinople laquelle apporta nou- uelles que le Roy de Russie estoit party de son port avecques si grâde flotte que elle tenoit bien tant en ordonnance des bataillons qu'en suite de munition & bagage de dix à vnze lieues de mer. Aus- quelles nouuelles ces magnanimes Prin- ces, ne monstrerent aucun signe de peur ny effroy: ains vn tresfort & vertueux courage en donnant bon ordre à toutes choses necessaires, & commandant incō- tinent que toute leur gent eust à soy re- tirer dedans la cité. Qui fut tant de che- ualiers & soldatz naturelz que du se- cours estrangier amené par la Roine Si- donie (ou celui de la Roine de Galdap estoit comprins) enuiron le nombre de soixante mille hommes. Lequel fut de- party en trois bataillons. L'auantgarde cōduit le Prince Florisel de Niquee avec Rogel de Grece, Agefilâ de Colcos & Flo- rarlan. L'arriere-garde mena le Prince Anaxartes avecques le Prince Falanges d'Astre & sa braue Alastraxeree, Flore- stan de Romme, don Arlanges d'Espai- gne & maints autres bons cheualiers de pris. La bataille conduirent le trespreux Roy Amadis de Gaule (avec les cheuale- reux Empereurs Esplandian, Lisuart & Amadis

Amadis de Grece chacun baraillon de vingt mille hommes tant de sugetz de l'Empire que d'auenturiers & de bon nombre de cheualiers d'elite, avecques diuerses bannieres & estendartz qu'ilz auoient à suiure & à s'y retraire & rallier. Ce fait & ordonné furent pionniers emploiez en diligēce à renforcer les bouleuars & les rempars des murailles: aussi es plus prochains logis d'icelles furent

mis force caques pleins de poix, resines & poudres & pots de cōposition de feuz artificielz & autres choses semblables. Aussi fournirent ilz leurs naus & galeeres de toutes prouisions necessaires, les arrangeant du costé ou la mer battoit le mur de la ville. Les choses ainsi disposees & ordonnees, ilz se mirent en estat d'attendre de pied coy leurs ennemis, quand ilz les voudroient venir assaillir.

Comme les Mores s'embarquerent & singlerent la route de Constantinople, & comme à leur abordee le port leur fut defendu & la gent qui y mourut d'une part & d'autre.

CHAP. XXV.



AV commencement du present liure consecutif à la fin du precedēt vousa esté deduit comme le grād Roy Bulthazar de Russie auoit depesché douze nains pour heraults vers les Princes de Grece reuestuz de cottes d'armes: si petites & viles personnes comme portables (disoit-il) à ceux à qui il les adressoit, lesquelz il estimoit encore moindres au parangon de sa grandeur. Et comme

ces nains apporterent à Constantinople le superbe Cartel de deffy, contenant en somme les plus horribles & cruelles menaces de guerre dont eust esté memoire: c'est à sçauoir de mettre toute l'Europe, la Grece preallablement: à feu & à sang, cōme iuste executeur de l'ire de ses dieux irritez contre les Chrestiens par la vapeur du sang de leurs sugetz espandu par eux, criant vengeance, & la fumee de

leurs Mosquées par eux bruslées montee iusques à leur ciel Empiree.

Pour l'exploit de ce deffuy Balthazar assembla vn ost incroyable tant de Rois, que de Califes, Tamurlans (comme dict vous a esté) & que de Rois, sans autres grands potentatz il y en eut cent soixante qui apposerent leurs seaux à ce cartel. Si n'attendirent apres qu'ilz furent tous assemblez, sinõ le temps favorable pour deployer les voiles au vent, qui leur vint au bout de vingt iours à souffler du rum qui leur estoit propice à ceste nauigatiõ. Soubs lequel ilz s'embarquerent en leurs nauez pleines de richesses infinies, & singlerent à huit mille voiles de diuerses manieres la route de Constantinople.

Or leur dura si biẽ le vent frais en poupe par bonnace que sans fortune leur flotte arriua à la veüe de la grande cité. Alors Phebus entendoit ses blonds cheveux sur la marine quand les premiers se mirent à attendre les derniers, menant rel bruit & tintamarre de toutes sortes d'instrumens & engins que la mer s'en enflait & esmouuoit. Leur premier bataillon menoit le Soudan de Bulgarie maieur avecques le Roy de Pilapele qui estoit amiral de l'armee. Pas n'estoit à l'heure saison de prendre soulas aux bõs Princes Grecz, ains en bataille regee marcherent vers la playe, alors qu'en vne infinité de barques les ennemis s'efforçoient à prendre terre, en tirant tant de dardz que de fleches & autre trait les vns sur les autres qu'ilz en obscurcissoient la lumiere du Soleil, & qu'ilz en combattoient à l'ymbre comme d'une espoisse nue, dont en toboit vn nombre incroiable de mortz & de naurez d'un costé & d'autre. Mais à la longue telle multitude des Mores y arriua, qu'il ne fust possible aux Chrestiens de les soustenir ne de les empescher de descendre en terre vray est que les Princes Grecz (la fleur de cheualerie du monde) seruoient de targue à leur gent en faisant teste aux ennemis,

dont ilz en abbatirent si grand nombre à leur descente que ce leur fut comme vne leuee ou rempar sur le riuage. Là vous eussiez veu les horribles coups du preux Agesilan, là l'escrime braue du vail lât Rogel, qui n'attingnoient payen qu'ilz n'occissent ou laissassent malicru. Quāt à Florisel il se fourroit si auant dedans les ennemis que bien il monstroient que peu il redoubtoit la mort, & bien se faisoit redoubter la part ou il adressoit des mecreans, accroissans au contraire la force & hardiesse aux siens, Filisæl & Brianges n'en faisoient gueres mois, donnans bõ exemple à leurs cheualiers de les suiure. Brief eux & les autres princes de nom y firent ce iour telles armes que ce n'estoit point chose croiable pouoir proceder de corps humains, sinon que du grand Dieu Sabaoth ils eussent du ciel vne nouvelle vertu infuse. Je ne vous feray autre discours par le menu des actes cheualeux d'Anaxartes, Florarlan & des autres (pour euitier prolixité) fors que par leur ayde & effort soixante mille hõmes furent suffisans à soustenir & reparer la furie & violence ce cinq cens milles Mores combatans (sans y coprendre les pioniers & gastadours qui estoient sans nombre) Ce voiant le Roy Balthazar & que ia le midy approchoit commanda que l'autre moitié de son armee qui passoit quatre mille nauez allast descendre en vne rade distante du port lieüe & demie, d'ou l'on les fit marcher au grand pas vers Constantinople, & y arriuerent à l'heure que son auantgarde s'en alloit à vau de route, partie aiant ia fait leur retraite en leurs vaisseaux, partie soustenans encore aucunement l'estour. Adõc par ceste surprise Balthazar charge les Chrestiens à dos, aias encore leurs autres ennemis de frõs (qui fut vne chose pitoiable de les voir ainsi assaillis d'un ost tout frais derriere, tellement qu'ilz furent enuoloppez au mylieu des deux: à laquelle charge ne peurent les Grecz si bien faire qu'il n'y en de-

en demeurast plus de vingt mille en la place & de si horrible boucherie sans les merueilleuses prouesses de ces inuincibles Princes, n'en fust pas rechappé vn seul corps de Chrestien, Car ceux qui auoient regaigné leurs barques, apperceuans ce grand secours, auoient repris cueur & estoient descenduz en terre. Si fut force aux nostres à la fin ne pouuans plus soutenir ce nombre de gens infiny, de soy retraire tousiours faisans teste iusques à la porte de la ville, là ou ilz reprindrent vn peu d'haleine, au moié du traict & autres engins de batterie dont on tira des tours & murailles à foison sur les Mores: Or tant y donnerent & receurent de coups noz vaillans cheualiers qu'il sembloit proprement qu'ilz fussent de fer nō de chair & os, sans onques mōstrer vn seul point de lascheté ou couardie. Mais sur tous le Roy Amadis de Gaule, auquel nul de sa race ne se paragonna (au rapport de Galeris le Croniqueur) en vertu, force ny hardiesse, se voyant pressé du Roy de Pilapele, lui tira dru & menu tant de coups qu'il l'estourdit tout, mais les Mores lui tuerent son cheual souz lui. Ce que sentant & qu'il estoit prest à choir prend son espee à deux mains, dont il dechargea sur l'armet de ce Roy vn si pesant coup qu'il lui pourfendit la teste en deux parts. Lors se trouuāt à pied des abbatus vn tel monceau deuāt lui que lui seruiſt assez de bō rempar. Ce pendant les autres Princes se retirerent dedans la cité, sous faueur de leur artillerie, las & trauaillez cōme pouuez estimer ou quand ilz furent ralliez ensemble, ilz trouuerēt defaillir leur chef souverain le Roy Amadis de Gaule. Alors firent tous bon serment que s'il y estoit mort, sa mort leur seroit cher vendue & enuoiant à la recherche, leur fut annoncé du hault des murailles, qu'il y auoit encore dehors vn Cheualier qui seul faisoit teste aux ennemis: lequel incontinent ilz s'assurerēt deuoir estre lui tel effort

& magnanimité ne pouuant estre en nul autre viuant. Parquoy sans delay tous ces Princes & les plus illustres & renommez cheualiers enuiron cinquante en vn ost sans autre gent quelconque retournent à la porte de la ville, laquelle ouuerte s'ē vont d'aussi fiere marche, que si du iour ilz n'eussent combatur' entrer en la bataille, leurs espees aux poings desquelles ilz esclairent si bien les reings, qu'ilz vindrēt iusqu'au lieu ou le bō roy maintenoit encore l'estour, avec la faueur (cōme dit a esté) des corps mortz d'hōmes & bestes qui le remparoient. aucunemēt contre les ennemis, Toutesfois si las & mat qu'il n'auoit pl⁹ de vigueur au bras pour brandir l'espee, Ce que voyant Agésilas se iette du cheual en terre & le saisissant entre ses bras, le met en selle avec l'aide & support des autres Princes qui ce pendant escrimoient sur les paiens d'vne terrible maniere, sans donner coup qui n'en abatit vn mort en la place. Ainsi s'en vont regaigner la porte (d'ou le traict des fortereilles rechailla les Mores) & ce à l'heure de nuict toute close. Si assèrent bonne garde sur les murs, & aux bouleuars & pleins d'aide d'auoir recouré ce grand Roy leur chef, sans y auoir perdu aucun des principaux cheualiers (combien que maints milliers d'autres) s'en vont au palais imperial: là ou ils furent desarmez par les mains de leurs tres-excellentes Princeſſes & Dames, & mis bon appareil à leurs playes par myres & chirurgiens fort experts, spécialement à celles du Roi Amadis de Gaule, qui estoit beaucoup plus nauré que tous, ayant fait plus d'effort, & supporté plus de trauail en ceste bataille que iamais pourroit estre croyable d'vn corps mortel. D'autre costé, les Russiens sonnerent la retraite donnāt ordre à tout ce que besoing leur estoit.

Comme

*Comme les Russiens vindrent conseil de li-
brer l'assault à la ville: & comme elle fust
par eux assaillie & par les Grecz deffenduë.*

CHAP. XXVI.

LA nuit ayant couuert la terre de ses tenebres les Mores se retirerent de la bataille, avecques fort grande tristesse de la perte qu'ilz y auoient fait de leurs gens, de plus de dix pour un mesmement de quelques Rois & grands Seigneurs de leur ost. L'endemain Bulthazar commanda que toutes les nauz, galeres, carraques fussent vuidées de gës & dechargées en terre & fait asseoir son camp tout à l'entour de la ville, qui en fut circuie & enuironnée entierement, fors le costé de la marine. C'estoit chose espouuenable à veoir ce camp qui s'estendoit plus de trois lieues de lez, & de voir le nombre incroyable des trefz, tentes & pauillons qui y estoient. Ilz n'oublirent d'y employer leurs pionniers & gastadours infiniz à le fossoyer, remparer & fortifier de bouleuars, bastions & fossez: ce que toutesfois ceste grande multitude ne peust acheuer en moins de troins bons iours. Durant lesquelz on ne vacqua à autre chose qu'à enseuelir les morts & penser les plaies des naurez. Ce fait le Roy Bulthazar comme chef general de l'armee manda tous les grans seigneurs & capitaines de son camp & eux assis en son pauillon Royal chascun selon son degré, leur fit telle harengue.

Harengue du Roy Bulthazar.

Tresmagnanimes Rois, Soudans, Tamurlans, Califes de Saracinesme, qui estes icy assemblez. Je croy que n'ignoriez pas les fins & intentiôs de nostre venue en ceste contree, qui sont deux: c'est à sçauoir la premiere & principale pour exaucer le nom de nostre prophete Mahomet: la seconde pour prendre ven-

geance des Princes Grecz noz ennemis. Car il n'y a nul icy à mon aduis, qui n'ait receu quelque tort, iniure & outrage de ces mastins Chrestiens ou en sa propre personne ou de ses ayeulz, peres ou autres parens ou amis. Parquoy nous conuient proceder de maniere en ce siege, que les puissions chastier selon leurs demerites & nous bien venger de noz offenses: surquoy ie vous requier mes freres, mes feaux compagnons de me declarer franchement & loyaument voz opinions.

Tous les Princes paiens defererent le honneur de la responce au Roy de Carçan, comme le plus ancien de la compagnie: lequel leué sur pieds print ainsi la parole.

Responce du Roy de Carçan.

Souuerain Seigneur & vous tresvillans Princes, si vous eussiez plus fait estat de voz plaisirs & voluptez que la gloire & renommee immortelle, vous seriez tous en voz Roialles maisons à vous donner du bon temps, à vous veautrer en delices, pompes & bobans, Mais le point d'honneur ou tout hault & noble cuer aspire, vous à fait quitter ces soulas & aises plus sortables à femmes & effeminez pour marcher par ce sentier de vertu rude, pierreux & espineux, en exposant voz vies aux dâgers & trauaux de la guerre, venans ceste part pour les acquerir. Parquoy treshault & trespuissant Seigneur c'est à toy à nous commander, c'est à toy à nous renger & poser en lieu ou nous puissions nostre iuste desir & vengeance executer. Ce dit le Roy de Carçan se rasseit en sa place.

Le Roy de Russie ouy ce propos, les remercia grandement, disant que de si braves & hardis courages, il ne deuoit pas moins esperer. Au moien dequoy ilz ar-
resterent ensemble, de liurer l'assault à
la ville,

la ville, puis (disoyent-ils) qu'ils se sont refermez les paillards & acatanez sans plus nous oser monstrier visage ne sortir en campagne. Il les nous faut doncques aller trouuer en leurs nids & à beccades les dénicher, puis qu'ils n'osent plus prendre leur volu effor.

Ainsi fut le conseil prins & l'assaut cōclu au l'endemain. Parquoy chacun d'eux se retira en sa tente pour dōner bon ordre à tout ce quē mestier seroit. Les bons Princes Chrestiens estants auertis par leurs espions de ceste deliberation ne furent pas endormis à y pouruoir au cōtraire à tous les moyens de deffense necessaires en tel cas. Et donnerent la charge de la porte Aguilene au Prince Rogel & de la porte du puis à Agefilan, departant à chacun cinq millé quē Cheualiers quē Soldats à qui ils commāderoyent pour la garde d'icelles, non pour soy hazarder à faire sallie sur les ennemis, considéré q̄ la perte d'un seul homme leur estoit de plus d'importance que de cent hommes aux autres. Si se mit chacun par la cité en bon estar de toute deuotiō enuers Dieu inuoquant sa diuine faueur à leur protection & sauuegarde. A la diane les rois Payens se leuerent & firent sonner cors buccines, trōpettes & tabours en si grād nombre par tout leur camp (qui estoit de si grāde estendue) qu'on n'y eust pas ouy Dieu tonner. Ces Rois sortirent de leurs têtes armez de riches, fortes & reluisantes armes pour animer leur gent, & la mettre en arroy. Auquel le premier ordre fut, de faire marcher cinq cent Elephans au plus pres de la muraille, tous portans chastelets de bois capables chacun de vingt hommes armez ayant de gros arcs en leurs mains. Mais pas ne trouuerent les murs de la ville de garnis de gens, ne de toute munition dequoy bien leur faire. Car les Grecs y estoient auant l'aube du iour bien entalentez de se deffendre, & de vendre cher leurs vies. Or commencerent les Russiens par

beau soleil vne pluye des fleches si drue qu'elle lui offusquoit sa clarté, combien que lors fort radieuse selon la saison. Toutesfois bien leur estoit respondu de dedans, tellement que ceux de dehors y auoyent du pire, pour la faueur des murs dont le Grecs faisoient pauois au trait: & le plus grand dommage qu'ils y pouoyent recevoir, venoit des chastelets qui estoient assis sur le bord du fosse. Là ou commencerent diligemment les pionniers & gastadours à trauailler (qui estoient plus de cent mille) avecques leurs pics, houyaux, paeles à remuer terre, puis ietter facines & autres choses pour remplir le fosse: & les Chrestiens cōtre, pour empescher qu'ils ne le remplissent. Sur quoy y eut vn fier & dur confit auquel tant de pionniers tomberent mors qu'à peu qu'ils ne le combloyēt desia de leurs corps. Mais quelque resistance que les nostres y fissent, à la longue il fut rempli: car ceste canaille infinie encouragée par leurs Seigneurs là presens & assistés n'y espargnoient leurs vies: tellemēt qu'ils firent approcher leurs Elefans avecq leurs chastelets à l'egal du mur. La furēt les vns si pres des autres qu'ils y combattoyent aux espees: & certainement en ceste premiere furie des Mores la muraille cuida estre forcee, & l'eust esté sans le merueilleux effort des bōs Princes Grecs qui auoyent chascun mille Soldats d'élite à leur suite pour donner secours en tous les endroits ou ils verroyent estre besoin: principalement de Florisel de Niquee, au quartier duquel s'adressa la plus forte charge, & l'autre en celui d'Agefilā. Lesquels estans denuez de gens par le trait des chasteaux des Elefans qui les chargeoit viuement, donna commodité à mille Mores de gagner le mur par escallade. Ce que voyans ces deux vaillans Princes, ne demandez pas s'ils employerent toute leur puissance à l'encōtre qui fut bien telle, que de tous les mille entrez dedans il n'en rechappa vn seul

H

pour

pour en aller porter nouuelles à leur compagnons de dehors:ains furent tous taillez en pieces par Florifel & Agefilan avec l'aide de leurs bons cheualiers. Toutesfois tant des ennemis y arriuoient tât par échelles que par le moié de ces gros animaux, plusieurs y montans & passans par les huissets des chasteaux, qles morts n'estoient. pour rien comptez, aussi ne pouuoient pas tous combattre à vn coup ains les premiers rangs seulement, Mais les preux Empereurs Esplandian & Lisuart de Grece, apperceuans celle part la plus grande presse, y firent porter en diligence force chaudieres de poix & resine bouillantes qu'ils firent verser sur les Elefans. Lesquels sentans tels espergets trâsperçans leur cuir quelque dur qu'il fust iusques au profond de leur chair viue, se meirét à faire tels saults & ruades, qu'ils enuoyerent leurs chasteaux au ioing & leurs hommes quand & quand, tuant & fraquassant leurs gés mesmes autât qu'ils en rencôtroient, de mere rage de la douleur qui les epoinçnoit. Ce que voyant leurs Capitaines cōmanderent à r'enforcer l'escalade en tant de lieux qu'ils cuidoient bien que ceux de la ville ne pourroient pas tous en defendre. Toutesfois s'y mettoient ils en grand deuoir, & estoit le combat aspre & cruel des deux costez, & y en tōboit assez des vns & des autres. Mais ce n'estoit bille pareille, d'autât que la perte (comme dit est) d'un des assiegez monte plus qu'au centuple des assiegeans. Au mesme temps que la ville estoit ainsi oppresse par terre, la flotte des Russiens, n'affailloit pas moins la Chrestienne: qui se tenoit tousiours en se defendant sous l'abri des forteresses assises sur le costé de la Marine, dont on tiroit & lançoit aux autres plusieurs choses de grande nuisance. Neantmoins ne demurerent pas les nostres és simples termes de defense, ains mirent beaucoup des Nauz Moresques en fond & leur jetterent force grenades & autres pots

de feu (de leur inuention) appelez Gregeois: dont plus de cēt de leurs vaisseaux furent brulez & bien y en eust eu d'auantage s'ils ne se fûsēt auilez de les estaindre & garentir par le moyé de la terriere. Alors estoit le conflit de terre en sa grande force & vigueur, ou noz Princes faisoient merueilles d'armes: & eussent plus desiré d'estre mêlez à leurs ennemis par faillie en camp de bataille que d'estre là enferrez: mais il n'y auoit ordre de l'entreprendre contre ceste armee innombrable. Le Roy Bultazar y voyât le grād carnage qui s'y continuoît des siens, cōmanda qu'on disposast cōtre le mur des beliers & autres engins de batterie, pour l'abattre & y faire bresche: aussi d'y faire traîner des machines sur rouës qui estoient couuertes de grandes lames & pieces de fer avecques trente mille hommes garniz de gros pics qui sous la faueur d'icelles machines allerent picquer au mur si terriblement, que nonobstant tout le iect & autre artifice de defence de ceux de dedans (combien que nō sans grand massacre des autres) Les Mores à la fin enfondrerēt & abbatirent vn grād pan de muraille, Dequoy si les princes Grecs furent effroyez, il ne le conuient demander: mais ils en furēt aucunement resiouis de veoir que le mur bouleuerfa sur les machines de fer mesmes, & icelles sur les Russiens qui c'en estoient voulu seruir tellement que la grande ruine tant de la lourde maçonnerie de pierre de taille que de ses pesantes machines acablerent & acrauantèrent plus de six mille Mores dans le fossé. Alors le Roy de Caçan fort irrité de ce grand dommage de leurs gens y accourt avecques trente mille homes, ausquels ceux de Constantinople en opposerent dix mille tous frais de reserve. La fut l'estour à venir aux mains plus fier & horrible que pardeuant, ou bien fut besoin aux princes Grecz de deploier tout ce qu'ilz sauoient faire, aussi y tuerent ilz en peu d'heu-

d'heure tous ceux qui estoient entrez, & repoulsèrent viuement ceux qui s'efforçoient d'y entrer, de sorte que les Mores qui pensoient desia crier ville gaignee, furent bien estonnez de ce veoir la arrestez comme d'un rempart de cueurs indomptables de Cheualiers trop plus fort que ne leur auoit esté le mur si dur & espois. Or estoit le mur comblé de corps iusques à la creste, quand voycy se presenter ce Roy de Caçan (qui estoit Geât) vne grosse massue de fer en sa main, escriant aux Grecz : ça ça cauaille que ie vous depesche à ce coup sans plus temporiser: car c'est faict de vous, & moy seul vous iray battant iusques entre les bras du crucifix, ou ne faillez tantost à vous aller mettre en franchise, si ne l'estimez d'auenture plus seure aux gironz de voz dames. Ce sera maintenant que le feu fera, mis au temple de vostre Sophie en satisfaction de noz Mosquées que vous auez ruinées: ça ça (poursuit) chetiuës creatures que ie vous chastie presentement de ceste verge, A tant se rue sur les premiers, qu'il rencontre auecques sa massue, dont nul ne rechappa qu'il en peut attraindre, & en auoit assommé plus de douze quand Agefilan qui l'aperceut se lance au deuant des siens, luy criant. Fier pautonnier, tes folles ventances n'estonnent pas ceux qui ont eu plusieurs prinſes auecques tels grands diables comme toy, la vertu faux Geant ne se mesure pas à l'aune. Nostre Dieu dont tu te railles, & gaudis est celuy qui depart les victoires à ceux qui en luy se confient. Il n'est pas temps (respond Caçan) de tant harenguer: ce disant il luy cuide de charger vn coup de sa masse, mais Agefilan qui trop la redoute, gauchit au coup (autrement c'estoit fait de luy) & luy rameine de son espee, qu'il tenoit à deux mains vn taillant de toute sa force sur l'armet, nonobstant la bonne trêpe de l'acier espois, le lui pourfendi tout net, & la teste ensemble en deux pieces. A sa cheute il fit

bien aussi grand bruit qu'auoit faict peu auant la ruine d'une tourelle de la muraille. Ceste mort autant qu'elle osta de cueur aux Mores qui fondoient en luy leur principale confiance, autant en redoubla aux Chrestiens qui ne le craignoient pas sans cause. Toutesfois les gens se meissent en quelque effort de la venger, mais Agefilan auecques ses Cheualiers leur fit teste, de mode qu'ilz n'y peurent gueres profiter. Et le bon Dieu qui n'oublie les siens au besoin les preserua de la charge nouuelle des Mores, iusques à ce que le Soleil s'absconsa, & la nuit par son obscur vmbrage les cōtraignit à la retraicte. Le Roy Bultazar demeura de cet assault fort mal content d'y auoir si peu gaigné, & blasmoit fort ses capitainés d'y auoir exploitté laschement. De la sepulture des morts il ne tint compte, disant que c'estoit toute canaille qui ne valoit qu'à estre pasture & nourriture des loups & corbeaux qui estoient plus de cent contre vn, sans obtenir vne si facile victoire. Aussi que Caçan le ieune frere du mort (à qui il en auoit continué la couronne, & qui en promettoit belle & brieue vengeance, luy conseilla de les laisser dedans la ville, & les fossez pour y estre matiere de pestilence, ioint que la puissance d'enſeuellir les morts attribuerait aux Grecz (les ayant par leur congé & permission) le titre de victorieux. Celle nuit, les Russiens ne se soucierent grandement, d'asseoir à l'entour de leur camp bon corps de garde n'y escoutes, ne sentinelles pour la confiance qu'ilz auoient en leur multitude, aussi grande que les Chrestiens l'auoient en la faneur & grace diuine. Les chefs desquelz auant que se desarmer, allerent donner ordre à faire la nuit mesme reparer & restablir les ruines, & fortifier les lieux les plus foibles. Ce fait, le retirerēt au palais où ilz furent desarmez par les maïs des bones pïcesses (q tout le iour n'auoient bougé de priere & oraison.) Et apres

auoir esté appareillez de leurs playes, se reposerent en leurs lits : fors Rogel de Grece & Agefilan lesquels prindrent la charge des reparations de la breche que ils firent remettre en estat par grande vigilance, faislans apres porter les corps des Chrestiens és cimetieres, & ietter au long ceux des Mores.

Comme les Chrestiens donnerent la nuit vne aspre camifade aux Mores, & de l'horrible carnage qu'ilz y firent.

CHAP. XXVII.

LE jour ensuiuant de l'assaüt de Constantinople, les Russiens n'entendirent qu'à faire penser les blesez & aucüs à enterrer ceux qu'ils recouurerent de leurs parens ou amis occis : comme aussi ceux de la ville firent de leur costé. Mais ce pendant les Princes s'assemblerent en conseil pour deliberer de ce qu'ils auoyent à faire : auquel fut resolu que la nuit prochaine ceux qui pourroyent porter armes s'armeroient : dont se trouua cinquante mille cheuaux de seruice sans la gent de pied. Et qu'ils feroient vne sallie par trois portes, Cecy accordé ils preparerent tout ce que besoin leur estoit & en bon silence (tous reuestus sur leurs harnois de chemises blanches pour s'entrecognoistre) les capitaines rengez sous leurs colonnels, Rogel & Brianges issirent par vne des portes avec dix mille cheuaux, par l'autre Florisel, Agefilan, Falanges avec sa chere Alastraxeree avec quinze mille, par la tierce sortirent Amadis de Grece, Anaxartes & don Arlanges d'Espagne avec autre quinze mille. La nuit estoit demi sombre & propre à telle entreprise : le premier qui donna l'aubade ou resueil aux Mores fut Amadis de Grece y arriuant sans estre senti. Si donna dedans ceux qui estoient logez de son costé si furieusement qu'il n'y eut celui de sa trouppé qui n'en tuast sa de-

mie douzaine. Moins n'en fist du sien le braue Anaxartes, bien secondé par don Arlanges de son filz, qui ne le voulut iamais perdre de veüe, que malheureux fut celui, qui attendit leurs coups. Mais Amadis sur tous y faisoit vne droicte boucherie. A chef de piece, leur camp s'emeut & les capitaines firent sonner leurs cors & tabours à la Moresque : Au son desquels furent promptement assemblez & reunis plus de quatre cens mille hommes. Lors aperceuant le petit nombre qui tant les auoit espouuentez, faisoient leur compte à la prime abordee d'en tailler la plus grand part en pieces & mener le reste de captifs & esclaves. A tant les viennent charger avecques cris & hurlemens, quand Rogel & Brianges qui les voient en la meslee viennent du costé de la porte du Dragon avecques tant de trompettes & tabours qu'il sembloit que ce fut vn bien grand ost. Si les chargea à dos d'vne fort rude rencontre, & leur porta grand dommage : sans que nul de ses gens se debandaist des troupes. Filisel de Montepin voyant vn Geant qui auoit occis vn Cheualier voulut adresser à lui : mais le paillard lui donna si pensant coup, qu'il demeura tout estourdi. Et sur ce point y arriue Rogel, qui de son branc d'acier esclarcissoit les rangs, en ayant son harnois tout teint du sang de ses ennemis. Lequel voyant Filisel son cousin en ce danger (qu'il aimoit singulierement) lui dit destournez vous beau cousin, & me laissez cheuir de ceste grosse beste. Lors tire quelque estoquade au Geant qui ne porte point, & s'aussant qu'il n'estoit pas faison de perdre là le tems, se leuant sur ses estriers dechargea tel coup sur le haut de l'espaule fenestre à decouvert de toute sa puissance qu'il lui trancha tout ce quartier là iusqu'à l'ouuerture du cuer. De là se fourre avecques les autres ou il fit de grandes merueilles d'armes. Toutesfois sur ses entrefaictes, il arriuoit

arriuoit de nouueau sur eux vn si gros esquadron, qu'ils y eussent esté enclos, sans le bataillon frais de Florisel qui suruint, accompagné d'Agésilas, Anastarax, Falanges & la loyalle cōpaigne qui chargerent les Russiens en flanc. La fut grād le froissis des lances, grand l'abbatis d'hommes & cheuaux, & n'y eust celuy qui ne renuerlast le sien par terre, desquels leur gens de pied qui les suiuyoient faisoient apres l'execution. La sont abatuës tentes & pauillons, & le feu mis au magasin de leur munition. Ainsi les Mores quoy qu'ilz fussent vn nombre de gens incroyable, toutesfois se voyant ainsi assaillis si chaudement par surprise & enuahis de toutes parts ne sauoient quel conseil prendre tant ils estoient troublez & esperdus. Ce que bien aperceuant le Roy Bulthazar, se tirant à l'escart fit sonner ses aguafles, pour rallier sa gent, autant en firent les Grecs qui bō besoin auoyent de retraite & de repos. Lesquels se retirerent en ordonnance de bataille vers la cité, ou quelque esquadron de Mores plus obstiné les voulant poursuiure, à l'approcher des murs leur commença à pleuuoir autre Manne & pl^u aigre, que celle que Dieu enuoia aux Iuifs es deserts, qui les fist bien tost retirer. Vray est que ces Princes de Grèce cheualereux en reculant, s'auançoient aucunes-fois à en accrocher tousiours quelqu'vn des plus hardis fols, comme l'asne que la vieille chasse de son iardin d'vn baston, lequel en s'en allant croque neātmoins vn chou de ça vn chou dela, ainsirentrent ils en la ville, faisant bien fermer, verrouiller & barrer les portes apres eux, affermant encores icy le compte, que du traict & iect des tours & murailles il y fut massacré plus de mille des aduersaires. Adonc s'en retournent à leur camp avecques leur courte honte du grand dommage qu'ils auoyent receu de plus de quarante mille soldats, iurans & maugreans par fin despit, de ne

deloger iamais delà, qu'ils n'eussent premier fait passer tous les Chrestiens au fil de leurs espees, spécialement les parens des geans, dont y en estoit demeuré plus de vingt morts estenduz sur la place. Au contraire alloit des Grecs qui n'auoyent perdu en cest estour nul de leurs cheualiers de marque, mais bien d'autres soldats communs enuiron cinq cens seulement de ceux qui se trouuerent à la faille. Parquoi apres auoir bonne garde assise es portes & sur la muraille ils s'en alerent vn peu reposer sur l'heure que l'aube commençoit desia à poindre, estans receuz de ces excellentes dames en telle aise & amitié q̄ pouuez estimer. Outre ce qu'ilz se cōsолоient en esperācedu bon & brief secours qui leur deuoit venir des autres potentats de la Chrestienté, & icelui venu liurer aux payēns la bataille. Lesquels de leur costé fort malcontens tiindrent le iour ensuiuant leur conseil de ce qui seroit bon de faire: auquel ils furent partis en diuerfes opinions. Mais le Geant nouueau Roy de Caçan se leua de bout avecques telle remonstrance.

*Harengue de Monleon Roy de
Caçan.*

Grand Monarque & vous autres hauts & pūissant Roys, bien sçauiez tous les grands outrages que moy & ceux de mon lignage auons par tant de fois receu de ces faux Chrestiens, sans en auoir iamais peu prendre aucune vengeance. Aussi voyez vous la grande perte que nous y souffrons de noz gens en toutes noz batailles & rencontres. Pource ie se rois d'aduis de leur enuoyer demander trefues pour quatre iours. Durant lesquelles i'entens avec Mondragon mon cousin deffier deux cheualiers Gregéois s'il s'en trouue de si hardis quil'osent accepter.

Ce conseil de Mōleon fut approuué

du Roy Bultazar & de toute l'assistance. Or estoit il lui & son cousin de hauteur si demesuree qu'ils surpassoyent tous les autres Geans de leur camp d'une grand coudee, & leur testes surmontoient les plus hauts pavillons qui y fussent tenduz: & estoit ce Mondragon surnomé le laid tant il estoit hideux & difforme, aiant en lieu d'ongles des griffes comme vn lion dont quelque fois il déchiroit & demébroit les hommes tous vifs. Adonc Bultazar mada ses douze Nains, ces braues heraultz de ceste guerre: entre lesquels fut choisi le plus beau à fine force d'être laid lequel fut depesché avecques lettre de creance pour obtenir les trefues sous les seuretez accoustumees. Le nouveau Roy Monleon lui bailla apres son cartel de deffi. Ainsi mettant vn panonceau de raffetas blanc au bout d'une verge s'en va le Nain bossu vers la ville dont les portes lui furent incontinent ouvertes. Et disant qu'il vouloit parler aux capitaines, il fut conduit au palais, ou il trouua les Princes Grecs se resiouissans encore tous du bon exploit de la nuit. Si entre le beau herault reuestu de sa cotte des armes royales de Russie, lequel sans autre honneur ne reuerence leur dit.

Harangue du Nain.

Le grand Roy de Russie Bultazar que noz Dieux sauuent & gardent Empereur de Constantinople & de Trebisonde, & Roy de tous les Royaumes Chrestiens vous mède par moi qu'il vous veult prolonger voz vies de quatre iours: pource vous veut dōner autant de iours de trefue si vous les acceptez. Pour certitude de quoi lisez la presente. Si prend l'Empereur Esplandian la lettre qu'il veid estre de creance: dont il lui dit: mon bel ami vous pouuez attendre vn peu tandis qu'on deliberera vostre respōce. Ce dit on fit sortir le Nain hors de la sale, ou les Princes sans grande controuerse determine-

rent d'ottroyer les trefues: lors fut rappellé le Nain pour le lui dire. Ce qu'iait entendu: il tire de l'escarcelle vne seconde lettre, disant que c'estoit bien vne autre chose à consulter: dont la teneur estoit telle.

Cartel de Monleon le grand & Mondragon le laid.

Le grand Geant Monleon nouveau Roi de Caçan & Mondragon son cousin a tous les capitaines cheualiers de Constantinople mandons que s'il y a quelqu'un d'eux si hardi & presumtueux d'oser entrer contre nous en combat singulier tāt sur la querelle de noz dieux que des outrages par eux faitz & commis à nostre lignage, ilz nous trouueront demain pres de la porte à la veuë de leur ville & de nostre camp prest à les recevoir sous les seuretez de la trefue entre le grand Monarque Bultazar & eux accordee.

Le Roy Amadis ce Cartel entendu, lui respondit: Gentil Herault vous direz à vostre maistre, qu'il ne presume pas que ses parolles puissent eslonner ceux qui ont suffisante connoissance de ses œures: & que s'il y viēt, il trouuera à qui parler. Atant part le Nain bossu, lequel arriué au camp, fit la respōse des trefues & du deffi: qui donna l'opportunité à tous derefraischir leurs personnes & dōner ordre au sur plus.

Comme passa le combat d'entre le Geant Monleon & Agesilan & le Geant Mondragon & Rogel avec l'issue d'iceluy.

CHAP. XXVIII.

L'Aurore les tenebres dechassees decouuroit les diuerses couleurs des fleurs par la prairie quand chacun quittoit le repos nocturne. D'un costé les

les Geans Mores, Monleon Roy de Caçan & Mondragon le laid son cousin furent armez de grosses & forces lames de fin acier, puis monterent sur deux ieunes elefants fort isnels & legers s'allerent (en compaignie de leurs plus grâds Princes) planter à la veüe de la cité. Là Monleon print vn grand cor de marbre, qu'il estoit si hautement qu'il fust clairement entendu du palais Imperial. Lors approchant pres d'une des portes, se print à dire: S'il y a aucun cheualier la dedans qui ose faillir pour combatre contre moy Monleon & Mondragon mon cousin, nous sommes icy au camp pour les attendre: mais si nul ne s'y presente, ie iure Mahom le me publier par le monde. Or vienne auant celui qui par traison occit le roi Atan mô frere, pour en prédre sur lui quelque petite vengeance. Ceci entendu par les Princes Grecs Rogel de Grece & Agefilan de Colcos aussi cousins furent incontinant armez de bonnes & riches armes (combien que nous sans regret de Diane & de Leonide qui les voyoyent aller en vn si grand danger.) L'armet diamantin de l'Empereur Lisuart fut baillé à Agefilan de Colcos, lequel comme vous avez ouy au septieme liure de ceste histoire) outre son pris & richesse, estoit de grande propriété & vertu: Et à Rogel fut baillé pareillement vn autre non moindre en bonté, que l'Empereur Espladian auoit gagné en la roche de la damoiselle enchanteresse (comme vous a aussi esté recité au cinquieme liure.) Ainsi armez monterent sur deux adroits & puissans destriers, chacun la grosse lance à vn large fer sur la cuisse, & l'escu de fin acier pendu au col: accompagniez des autres Princes Grecs. Or ne vous fault deguiser que Rogel & Agefilan ne fussent aucunement emerveillez de la corpulence desmesuree de ces deux Geans, combien que chacū d'eux en eust bien tué d'autres. Car ils n'en auoyent iamais veu de si grands ne si membruz,

mesmement qu'estoit Mondragon, qui surpassoit son cousin de plus d'un pied de hault, contre lequel Rogel s'adressa. Mais à leur arriuee les deux Princes s'en vindrent pas à pas vers les Geans, & Agefilan commença à leur dire.

Si vous desirez (Geans) racheter voz vies à bon marché avec vostre grand auantage, nous vous certifions de vous recevoir en amitié moyennant que vous conuertissiez à la foy du Sauueur du mô de Iesus Christ: au refus dequoi nous vous protestons de laisser en ceste campagne voz charongnes à la pasture des fieres bestes & des oiseaux de proye.

Tu nous en as bien compté en peu d'heure (respond Monleon) mais dy moy par ta vie si tu es iangleur entre les Chrestiens, ou serlatan, ou leur prescheur, & ie te iure par tous mes dieux que pour la grace de ton plaisant babil ie te voudrois plustost faire plaisir que dommahe. Laisson le plaid (dit Agefilan) car ie te vois faire cognoistre presentement quel iangleur ie suis. Adonc tourne bride, & Rogel pareillement pour aller prendre carriere, surquoi tout leur camp leua la huee cuidans qu'ilz s'en fuissent: dequoi les deux braues Princes irritiez d'auantage brochent leurs destriers des esperons, & viennent de randon leurs lances en l'arrest rencontrer les deux Geans, lesquels n'en font pas moins de leur costé sur leurs Elephans. En quoi nul ne faillit d'atteinte. Car Monleon adressa à Agefilan de telle sorte qu'il lui passa le tronçon de sa lance de l'autre part: mais bien lui auint que ce ne fut qu'entre le haubert & le corps, dont il lui defleura la peau seulement. Et lui de son costé faulsa l'escu à iour à Monleon, & lui laissa pareillement vn grand esclat de sa lance dedans sa cuirace sans l'offencer en la chair. Mais bien si lourde fut leur course q̄ le cheual d'Agefilan y fut tué & l'elefant de son aduersaire



trebucha avec son maistre, & en trebuchant le froissa bien fort contre l'esclat. D'autre costé Rogel & Mondragon menoyent leur conflit, lesquels vuiderent tous deux les arçons, Rogel estant vn peu blessé au droit flanc : gueres ne se iournerent à terre tous quatre sans se releuer & s'aller ioindre, les Geans avec leurs lourdes masses de fer, les deux Princes avec leurs espees flamboyantes: dont ils commencerent vn tres-rude & aspre combat. Auquel les Geans dechargeoient tels coups de leurs masses que s'ils en eussent vne fois atteints noz bons cheualiers ne la bonté de leurs harnois ne l'enchantement de leurs heaumes, ne les eussent oncques peu garentir qu'ils ne les enfondraissent avecques les testes en mille pieces. Pourquoi euter les gentils Princes alloyent demarchans & sautelans à toutes mains de telle legereté, que si se fussent oiseaux, à qui mieux mieux, iettant neantmoins quelques coups de taille & estoc à leurs ennemis la ou ilz voioient les pouoir mieux offenser. Ceste adresse & promptitude de noz champions lassâ merueilleusement les Geans n leur faisant par ce moyen tōber tous

leurs coups en vain. De quoi ilz estoient si desplaisans que l'escume leur en sortoit des bouches de male rage, d'autant qu'ilz faisoient leur compte au commencement de finir leur combat du premier coup : mais il auoit ia duré pres de deux heures, sans y apperceuoir auantage plus d'vne part que d'autre. A Mondragō ennuiroit fort ceste longueur, lequel adresse à Rogel vn coup pour final, qui faict lors contenance feinte de le vouloir attendre: mais en le regardant descendre il se trouue surpris de ne s'en pouoir destourner, tellement que force lui est d'y parer de son escu (en gaicheant la teste seulement) qui lui fut eparpillé en menues pieces (demeurant le bras si estour qu'il ne le sentoît aucunemēt) & la masse descend sur le genouil du geant, dont elle lui fracasse les os, tellement qu'il est contraint de l'encliner à terre, & elle lui chet des poings de plus grand douleur : ou il escume comme vn verrat reniant ses Dieux à gueule bée. Alors degaigne vn gros coutelas qui pendoit à sa ceinture à dos d'asne ne tranchant que d'vn costé, d'vne paulme & demie d'epes seur: duquel il se prend à escrimer contre

Rogel

Rogel, iettant vne grosse fumee par la visiere & disant; mes dieux ne me feront pas tant contraires que ie ne prenne ceste petite vengeance, tirant vn coup sus Rogel, en parlât à qui il fut facile de s'en garder, voire en flechissant de donner à deux mains de son espee sur le heaume du geant de toute sa force, mais l'espee vola en deux pieces, ne lui demeura que la poignée es mains. O quelle destresse pensez vo⁹ qu'en sentirét les b⁹s Princes Chrestiens qui les regardoyent, de veoir leur champion sans espee & plus encores les dames mesmement sa Leonide : mais ils se reconfortoyent de ce que le Geant estoit par terre. Si s'auise Rogel en ceste necessité de s'aller saisir de la masse de fer, de laquelle il va festoyer Mondrago de tant de horions qu'il le rendit tout herné & moulu : si n'estoit ce pas assez qui ne faisoit plus parquoy il se hausse sur ses pieds & decharge de la masse sur le geant tel coup qu'il le renuerse sur le dos tout elourde sans plus remuer bras ne iambes. Alors s'approche & lui delace le heaume, & de son propre coutelas luy trenche la grosse hure. Apres tout las & rompu s'assied sur le corps mesme de Mondragon. Si regarde le dur conflit d'entré Agefilan son cousin & le Roy Monleon qui ne gaignoyent encores guerres l'un sur l'autre. Agefilan se gardant par legereté des coups de son aduersaire quasi comme vn espreuier voletant. Dequoy estoit le geant si fâché que plus ne pouuoit, qu'il n'exécutoit autrement sa volonté. Si lui rue vn coup de sa masse de fer sur l'armet que sans la grande bonté d'icelui & la lasseté du bras mesme de Monleon (pour tant de coups qu'il en auoit tiré à faux) sans doute c'estoit fait de lui. Neantmoins ne fut ce coup si vain qu'il n'enuoyast Agefilan tout estourdi par terre. Helas quelle fut alors langoisse de la Roine Sidonie & plus encore de la belle Diane qui estoient es creneaux regardât avec les autres Prin-

cesses: Diane cheut plus morte que viue au giron de Niquee & Sidonie en celui de l'Emperiere Leonorine. Adoncques le Geant s'en va vers le bon Prince, & Rogel qui le veoit en tel point le cuidât mort le va vanger avec le coutelas de son cousin; mais à l'heure Agefilan se releua & se remembrant de l'estat ou il auoit esté, vient affronter son ennemi, escriant à Rogel : Monsieur mon frere, retirez vous & me laissez acheuer mon combat contre ce diable. Dequoy Rogel fust grandement esioi le voyant de bout en vie (qu'il auoit pleuré pour mort sous son armet à chaudes larmes) car ses deux cousins germains ne s'entramoyent pas moins que deux propres freres, comme il approcha par le discours de toute ceste histoire. Or pour retourner à nostre propos, desirant Agefilan mettre fin à ce dueil qui lui duroit trop longuement va feindre d'attendre de pied quoy le coup de Monleon : mais en le voyant hausser le bras se lance d'un sault à luy, & le va ioindre de l'espee dont il lui enfonce plus de la moitié dans ce grand corps : puis, auant que lui donner loisir de l'empoigner entre ses bras faulte en arriere, & d'un trauers lui tranche le cuir sot & la cuisse iusques bien auant en l'os. Qui fut cause au geant de s'agenouiller ne se pouuant soustenir sur celle iambe, luy sortant les bouillons de sang tant de la playe du corps que de l'autre. Alors Agefilan se voyant en meilleur moyen d'en auoir la raison, le charge de tous costez, & le gros mastin recourt à son coutelas, pareil à celui de son cousin : duquel il se defend en blasphemant ses dieux en tel langage. O faulx traistres, & qui est-cecy que deux Chrestiens ayent peu faire ce que cent Cheualiers n'eussent osé entreprendre? Je renie vostre pouuoir ainçois loy & creance sans pouuoir. Ainsi par longue effusion du sang saillant tant des deux premieres playes, que des autres derniers, il tomba à la fin

Mort estendu emmi le champ. Lors ne fut paresseux Agefilan de se jeter sur lui, & arrachât le Heaume, lui trenche la tēte. A ce coup se leuent les criz de ioye de ceux de la cité, aussi ioyeux que ceux du camp estoient tristes & mornes : Et adioulte ici Galeris le croniqueur que sans aucuns Rois Payens droicturiers & preud hommes en leur loy, le faulx Bultazar comme filz & vray hoir de Breon (qui fut plein de toute iniquité & peruersité) vouloit rompre la trefue, & massacrer traistreusement les deux Princes victorieux. Lesquelz furent aussi tost menez hors du camp par les autres Princes Grecz avec maintes trôpettes, & conuoiez par le peuple en grand triomphe au palais. Ou ilz furent promptement desarmez, Rogel de la main de sa Leonide & Agefilan de celle de sa Diane, puis appareillez de leur natures par bons chirurgiens, qui n'estoyēt pas si grieues que les meurtrissures furent couchez chacun en vn lit. Mais Rogel s'auisa de faire garder la poignée de son espee (qui auoit esté rompue) pour y adiouster autre fueil le excellente que l'Emperiere Abra luy donna, qui auoit esté au Soudan son frere.

Comme estans les payens fort desplaisans de la mort des deux Geans, ilz enuoyerent en la cité vn deffy de vingt contre vingt, lequel fut accepté: & qui furent les quarante combatans tant d'une part que d'autre.

CHAPITRE XXIX.

AVtant de ioye & plaisir que les Princes Grecz auoyent à Constantinople de la victoire de leurs braves champions, autant de dueil & ennui en portoyent les Rois, & potentatz du camp. Lesquelz à ceste cause s'assemblerent en vne lōgue tente à ce destinee, là ou apres plusieurs differentes opiniōs, dont nulle ne plaisoit à Bultazar, comme

tout forcené & mal memoratif d'auoir lui-même esté vaincu par Florisel, sans soy leuer autrement de sa chaire, leur dit de voix effroyante.

Haults & puissans Seigneurs ne vous esbahissez trop, ne laissez espouuenter voz braves courages, de veoir noz ennemiz estre ainsi echappez par deux fois de noz mains. Car souuent les Dieux immortelz permettent les hommes s'e-leuer pour leur plus grande ruine. Et nous sommes tant & telz qu'il n'est possible à eux de plus guerres durer contre nous. La fortune aide aux hardis & les couards recule. Quāt à moy ie vous iure par noz grands Dieux Iupin, Apolon, Teruagant de ne vouloir iamais retourner en Russie, ainçois de demeurer en la Grece ou mort ou dominateur d'icelle. Or à ce que ces Gregeois connoissent le peu de compte que nous faisons d'eux, ie suis d'aus de leur enuier vn defi (tādis q̄ les trefues durēt) de 20. de nostres cōtre 20. de leurs, afin de les diminuer tousiour d'autāt, mesmemēt de leurs chefs principaux qui ne falliront de s'y hazarder, lesquelz estans deconfiz, nous aurons marché du reste comme de paille. En laquelle entreprise (comme i'ai esté autheur de la guerre) aussi veux-ie le premier employer ma personne.

Tous les assistans approuuerent vnamiment ce conseil, sinon pour le regard de la maiesté du Roy Bultazar, luy remonstrans qu'il n'estoit raisonnable d'ainsi aventurer celui de qui tout dependoit : mais il ne fut en leur puissance de l'en distraire pour quelques raisons qu'ilz peussent alleguer, de sorte que contrains furent de le consentir : dont il despescha vn cartel de ceste teneur.

Cartel du Roy de Russie.

Bultazar Roy de Russie, Empereur de Grece

Grece, de Trebisonde, de Rome, Roy de la Gaule, grand Bretagne & de Rhodes, brieu, monarque vniuersel du monde. A vous Princes Constantinopolitains. Pour mettre à execution l'obligation dont à mon hault sang suis redevable, de la vengeance que i'ay à prendre sur voz testes par ma tranchante espee, pour les torts & outrages que moy & les miens auons de vous receu par la permission des Dieux du hault ciel (qui maintenant en sont ennuyez ne les voulant plus souffrir, ains vous en faire payer l'vsure.) Je vous deffie & denonce vn combat mortel à outrance, de vingt de nous contre vingt de vous autres. Lequel si vous osez accepter, ie vous proteste de toute seurété de la part de moy & des miens, quant à l'election des armes, telles que chacun voudra choisir, le camp de bataille, deuant ceste cité: le iour à vostre discretion.

Le cartel escrit fut baillé au Nain mesme porteur du precedent: lequel auecques seurétés s'en alla à la ville, & conduit au grand palais y ietta sa veuë de toutes parts, puis le presenta sans le baisier & sans autre reuerence, à l'Empereur Esplanadian. L'Empereur brisant le seel la leut si hault que chacun l'entendit, & apres commanda au Nain de soy retirer. Lors ilz en tindrent le conseil, auquel le deffi fut accepté & la charge de faire la response, adressée à l'Empereur Amadis de Grece, qui la fist de ceste forme.

Response de l'Empereur Amadis de Grece au Cartel.

Amadis de Grece Prince des deux Empires de Gaule & de la grand Bretagne, &c. Au nom des Princes Constantinopolitains: A toy Bultazar Roy de Russie simplement.

Nous te faisons response à la clause de ton cartel, contenant que nous t'a-

uons fait tort & outrage à toy & aux tiens, que nous ne t'en auont oncques pourchassé, ains soustenu seulement tes assaux iniustes & iniques contre noz Princes ou Princeesses Chrestiennes, en te chastiant sur les termes de nostre deffense de ta temerité, peruersité, & outrecuidance: vices & crimes qui te sont heretaires descendans en toy de droicte ligne de ce faulx Roy Breon ton pere.

Quant aux menaces que tu nous fais tant de tes dieux (qui sont vrais diables) que des chefs principaux de ton armee, nous te respondons, que bien sauons qu'ilz sont ennuyez de nous, comme aussi nostre Souuerain Dieu du ciel l'est de toy & des tiens, t'ayant icy amené ce coup, pour y receuoir le dernier guerdon de tous tes demerites. Quant à ta personne & des Seigneurs tes alliez ou vassaux, Florisel mon filz t'y respondra auec son espee laquelle tu doibs bien sauoir à tes despens comme elle trenche, & ses compaignons d'armes aux tiens. Parquoi n'y eschet plus de langage, sinon d'accepter le deffi. Du camp & des armes nous sommes d'accord auecques toy: le iour, puis que tu le remets à nous soit demain au matin: les seurtez nous te promettons de tous les nostres, hormis les vingt combatans.

La response du cartel escrite fut baillie au Nain, lequel deslogea incontinct pour la rapporter au Roy de Russie son maistre, qui bien cuida forcener des paroles qu'il y trouua à son vitupere: mais quel lendemain il en feroit bon chastiment. Adonc se mit à elire les vingt qui le deuoyent accompagner en ceste bataille, entre tous ceux qui s'y presentent qui furent ceux cy.

Le Roy Bultazar de Russie, le Soudan de Bulgarie qui estoit geant, nommé Armont, le Roy de Cord trespuissant cheualier, le Roy de Pilapele aussi Geant nommé Librand & deux siens cousins

de non moindre stature, le fort Roy de Mor Moranteon, le Roy de Taldas. Pareillemēt furent de la retenue deux cousins du Roy de Bulgarie mineur, Geans veluz, voire si fortz que souuent on leur en auoit veu demembrer entre leurs mains, les ours, lyons, tygres, dont leur contree abonde: aussi en fut le roi de Parosif Geant, avecq deux siens cousins moult fiers, de mesme taille le Roy de Rosie, les deux Califes de Noy, & de Mosquinter roides cheualiers avec sept horribles Geans de leurs pais, qui sembloient estre de hautes tours.

Ces vingt personages ainsi eleuz, se meirent à penser le iour de tout l'appareil qui leur estoit necessaire tant d'armes que de cheuaux & autres choses, ne pensant iamais veoir assez tost la matinee prochaine pour attacher leurs ennemis. Lésquelz de leur costé entendoient semblablement à l'elite de leurs vingt champions, qu'ilz remeirent totalemēt au iugement du Roy Amadis. Lequel apres vne brieue remonstance, que ceux qu'il n'y comprendroit n'eussent à en prendre aucun mal-contentement, au moyen qn'il y resteroit encorez assez ou les employer, il nomma doncques les Princes & Cheualiers qui s'ensuiuent.

Le premier nommé fut l'Empereur Esplandian, apres lui les Empereurs Lisuarr & Amadis de Grece, le Prince Florisel de Niquee, lequel depuis le deces de sa chere Helene porta tousiours ses armes noires en signe dedueil. Apres lui, le fort Roy Anaxartes & don Arlanges d'Espagne son filz, Falanges d'Astre avec sa chere Alastraxeree qui ne l'abandonnoit iamais nomplus, au camp mortel qu'au list nuptial. Apres eux Anastarax Soudan de Niquee, Filisil de Montespín Florestan de Rome, Brianges de Beocie: l'excellent Prince Agesilan nonobstant que ses playes ne fussent encoré totalement reconsolidées, ne voulut pas pour

cela estre excluz de ce nombre d'honneur, quelque priere que lui en fist le roi Amadis & les autres Princes pour l'en demouuoir: duquel fut aussi Galdes roi de Rhodes, Florarlan de Thrace, Artaxerxes filz du Roi Gradamart, qui fut bié l'un des meilleurs cheualiers de son tems. Tous lesquelz veillerent vne partie de la nuit en la chapelle imperiale se mettans en bon estat de vrais Chrestiens pour commencer par ce moyen d'armer leurs ames de bonnes armes deffensives.

Comme passa la cruelle & furieuse bataille des vingt champions paiens cōtre les vingt Chrestiens: & ausquels demeura la victoire.

CHAP. XXX.

A Pres que les bons Princes de Constantinople se furent ainsi garniz des saintes armes deffensives envers Dieu, ilz munirent leurs corps aussi des autres qui propres y estoient par les mains de leurs belles dames, puis accompagnes des autres Princes & grands Seigneurs (qui portoyent leurs lances, armetz & escuz) s'allerent rendre au lieu ordonné pour le camp, à la veüe comme dit est, de la cité, & n'y furent oubliez les rois d'armes, heraultz, poursuuians en ce noble arroi, ne les tabours trompettes & clairons, qui aduertirent leurs aduersaires de leur y trouuer. Les Princesses & grandes Dames ne faillirēt pas aussi à se rendre en vne tour du portail pour veoir la bataille & fut donnée la charge de la seureté du camp au Duc d'Alafont, comme l'un des iuges avec deux mille cheuaux: & autāt en eut de leur part un de leurs grands Signeurs Mores comme iuge. Or estans les vingt champions mis dedans le camp (avecques toutes les ceremonies & solennitez accoustumees) y arriuerent les vingt payens avecques grand pompe & fanfare de diuers instrumens de leur pais, desquelz

quelz les dix & sept estoient tous geans d'incroyable grandeur & les trois autres les plus fortz & puissans cheualiers de toute leur armee. Ces Geans n'estoyent pas montez sur des cheuaux, pour leur pesanteur que nul cheual n'eut peu supporter, ains sur autres plus gros animaux qu'ilz auoyent dressez & façonnez à la guerre. Les iuges donc les ayant mis dedans le camp (qui estoit pour barriere circui de grosses chaines de fer attachées à quatre poteaux plantez és quatre coings) ilz departirent le soleil, & ainsi qu'ilz estoient ia rengez tous de front les vns vis à vis des autres, le roi Amadis lequel (nonobstât qu'il ne se sentist encores pas du tout affermi des playes de la premiere iournee, en voulut estre, y voyant de leur costé le chef principal de leur ost Bultazar) se print à leur demander s'ilz vouloyet que les ioustes se fissent des vns apres les autres, afin d'estre mieux veuës & iugees, puis que la meslee se feroit de tous ensemble? Estât ainsi par eux accordé: voici s'auācer le premier sur les rengs le geant Bastron Soudan de Bulgarie, auquel adressa le roi Amadis, ayant beaucoup plus d'egard à l'auantage des siens, d'y soustenir l'effort de ce grand diable, qu'à l'honneur de s'apparier au roi de Russie, pour en emporter en cas de victoire les despouilles que les anciens appellerent opimes. Or s'en viennent donques le geant Bastron & luy l'un contre l'autre les lances baissées de telle furie & randon qu'elles ne volent seulement en esc'artz: mais le Roy de Bulgarie de la roideur du choc fut porté par terre nauré mortellement, & au Roi Amadis par la force de l'enorme monture de son ennemis, le poitrail, sangles & crouppiere de son cheual furent rompues, dont lui conuient aussi tomber bien que de bout avecques la selle. Ce faict il se tira à quartier. Lors deslogé l'Empereur Esplandian d'un costé & le fort Roi de Lande de l'autre, lesquelz

au milieu de leur carriere se rencontrèrent de droit fil si rudement que l'Empereur sentit seulement le fer de l'autre en sa chair viue, mais il lui fit paroistre le tronçō de sa lance de l'autre part de son corps (au grād desplaisir des spectateurs de leur camp) & ce faict, il se tira à part incontinant se presente de leur costé Ditrاند le fort geant (qui estoit Roi de Pilapele) contre lequel courut l'Empereur Lisuart, qui au milieu de leur carriere lui adressa si iustement au pis qu'il lui fit faire le sault en la place, parfaissant brauement sa pointe, puis se retira. Apres se meit sur les rengs le fort Roi de Morarie contre lequel brocha l'Empereur Amadis de Grece en fierté de lion, tellement qu'à la rencontre il faufa l'escu du payen & sa lance demeura dedans son corps de cuirace, qui estoit bon & fort, & l'Empereur passa outre en cheualier fort adroit, puis se tira à costé. Voici venir apres vn terrible gean neveu du Roi de Pilapele, auquel s'opposa Rogel de Grece, qui l'attaingnit de sa lance droit à la veuë de l'armet, qu'il lui transperça à iour, tellement qu'il tomba roide mort en la place & Rogel vuida les arçons pareillement tout elourdé: mais sans autre blessure qui se retira. Alors vint vn autre geant son cousin biē deliberé d'en faire sur le champ reparer l'offense à celui qui se presenteroit: qui fut le Prince Agefilan, lequel lui fit bien cōnoistre que trop remaint de ce que fol pense: car il le choqua si viuemēt q le fer de sa lance lui rompit haubert & maille & lui entra plus de deux doigtz (glissant sur l'escu) au costé, dont il bondit sur le sable, & moins n'en fit Agefilan par l'impuissance de son cheual ne pouuant soustenir si grand fais. Le Roi de Taldas lui succeda contre le fort Anaxartes, lesquelz rompirent l'un sur l'autre & de la roideur de leurs coups s'entre desarçonnerent. Mais pour le vous faire court: tous les autres coururent semblablement, qui tous bri-

ferent leurs bois sans que nul par la rudesse des coups demeurast en selle: toutesfois sans playe mortelle, sinõ des trois qui auoyent esté accouplez au Roy Amadis, Esplandian & Rogel. Or s'en vont maintenant mesler tous à pied en fiere bataille: car ceux des Chrestiens à qui les cheuaux estoient demeurez sains & entiers, ne s'en voulurent seruir suyuant la coustume des cheualiers de la grand Bretaigne & de tous ceux du lignage de Amadis, qui ne combatoyent iamais avecques auantage. Ainsi s'en viennent affronter les vns aux autres de telle furie & aspreté, qu'à leui chamailliz il sembloit que ce fut vne iuste armee, ou quel que millier de boscherons en vn bois, les estincelles sortoyēt dru & menu de leurs harnois, des mailles desquelz & pieces des escuz la terre estoit semee, qui fust bien tost teinte & rougie de leur sang. Les payens mesmement leurs Geans donoyent horribles coups de leurs masses grands coutelas & cimeterres, lesquelz bõ besoin estoit aux gētilz Princes Grecs d'eiter souuent par dexterité & vistesse sinon brief eust esté l'estour, s'ilz ne leur eussent fait perdre en vain la pluspart de leurs coups. Et ainsi combattirent furieusement pres de deux heures sans qu'on peust connoistre ausquelz la fortune seroit plus fauorable: quand l'Empereur Amadis de Grece qui en auoit contre le fort Roi de Morarie lui tire vn estoc sous l'acelle ainsi qu'il haulsoit le bras pour le ferir, auquel la bonté de la cuirace ne peust resister qu'il ne lui mist trois poulces de l'espee dās le corps, mais ce roi lui decharge sa masse sur la creste de son armet, que sans doute il lui eust enfoncé en la teste sans la debilité que le coup de l'Empereur lui causa au bras: toutefois il en chācela & mit vn genouil en terre. Le cōbat dura encore entr'eux vn espace, Amadis aiāt taillé l'escu de son aduersaire en tant de pieces, que le reste lui seruoit peu, tellement qu'il le ietta au

loing pour prendre sa masse à deux mains. Le gentil Prince depuis la faulte de l'escu eut plus de moyē de le ferir souuent au vif: mais il ne lui en prestoit guerres, que l'autre ne lui rendist son change mesmement d'un coup qu'il lui dōna de la masse à deux mains, que nonobstāt la foiblesse du bras droit, lui fit encliner le chef presque à donner du nez en terre. Or à beau ieu beau retour, Amadis luy tirant de rechef vn estoc adressa de bon heur à l'ouuerture mesme qui lui auoit ia faicte sous l'eselle, tellement que l'espee ne trouuāt nul obstacle y entra biē demie: dont le Payen cheut à la renuerse tout de son long. Dequoy l'Empereur rendant graces à Dieu, iette l'œil sur l'estour, ou il choisit Galdes le roi de Rhodes, qu'un Geant d'un coup de cimeterre estendit en la place: & de la marchoit vers le Roi Amadis pour lui donner sur la teste. Si y saulte l'Empereur legèrement au deuant & parant de son escu au coup (q en fut tout de brisé) il lui fourre l'espee en l'aine à l'endroit ou le cuissot aboutissoit, iusques aux gardes: dōt le geā tomba sur lui qui le cuida bien acrauantter. Alors le Roy Amadis de Gaule auoit prou d'affaires avecq vn des plus grands, & puillans Geans, parce que pour sa haulteur il ne le pouuoit atteindre plus hault que le pis, & l'autre auoit l'auantage sur lui à ramener ses coups en bas. Si est ce que par son adresse, luy faisant perdre vne partie de son escrime en l'air, & le chatouillant souuent au vif par la sienne, il en eut à chef de piece la raison, par l'abondance du sang qui luy sortit des grosses veines coupees: Dont alla prōptement au secours des plus chargez, lesquelz par son aide reduirent bien tost le nombre de leurs ennemis à huit, tous les autres estans morts ou gifans prests à expirer, sans qu'il y eust du costé des Chrestiens autres que les cheualiers occiz, combien que tous, non denomez naurez. Dequoy s'aperceuant le

Roy

Roy Bultazar qui estoit accouplé avec la vaillante Alastraxeree, se print tellement à effrayer, que l'espee lui tournoit au poing & n'auoit quasi plus le sens de parer aux coups de la roine: laquelle par ce moyen eut à la fin bon marché de son corps, qui par lasseté & effusion de sang tomba bien tost à ses pieds. Lequel n'estimant autre que mort, le laissa là, & ieta l'œil par tout pour choisir son cher Falanges d'Astre qu'elle aperceut sur vn Gean estendu en la place, auquel il decramponoit le cabacet pour lui oster la teste. Le surplus de noz Princes & cheualiers animez du bon exemple de leurs compagnons, se voyans si petit nombre d'ennemis tant durer deuant eux, reprindrent cueur & les allerent charger impetueusement (ia demi decōfists par la perte des leurs) dont n'y eurent pas grand peine à en depescher les pais: cōme ilz firent sans enprēdre vn seul à merci, ensuiuant le vieil dicton, plus de morts moins d'ennemis. Ainsi se rallient tous ces vaillans cōbatans & remettans leurs espees auāt essuies du sang és fourreaux, apres vn peu d'aleine prinse, s'en vont ensemble aux Iuges demander s'ilz s'estoyent acquittez de leur deuoir. Aquoi le Prince More respondit que trop, ayant suffi la victoire sans telle occision, car il ne cōuiēt enquerir, s'il en auoit le cueur rāsi, cōme tout leur ost entierement duquel on oyoit leuer telle rumeur de criz, & hucces douloureuses & plaintes qu'il sembloit que le camp deust fondre. D'autre costé, au retour des Princes Grecz victorieux, ne fault demander quelles voix de ioye retētissoiēt sur les portes & murailles de la ville, ne quelle aise sentoyēt les belles Princesses, qui estoyent és creneaux de veoir ainsi retourner à honneur leurs mariz & amiz d'une si perilleuse bataille, combien que non du tout sans aucuns fourfaits amoureux procedans de la crainte de leurs playes & blessures. Or rentrent les vaillans cheualiers

en la cité pleine de liesse, avecques son de plusieurs instrumēs deuant euz: & furent suiuiiz du peuple iusques au temple saincte Sophie ou fut sonné le *Te Deum*, hymne de l'action de graces pour la victoire, de là s'en allerent au grand palais dont chacū se departit pour se retirer en son logis, à se rafraichir & faire visiter ses playes. Desquelles le grand Dieu preserua les bons champions de sa querelle, si bien qu'il n'y en eut par sa grace aucune mortelle. Mais quand à Rogel, estant Leonide presente à la visitation des siennes, qui lui demandoit comme il se sentoit, il lui respondit: Madame ie ne sens à present (Dieu merci) playe sur moy dangereuse, si à celle qui est de vostre main, vous daigniez aussi vous mesme appliquer la medecine que deuez à mon merite, cōme du scorpion sort la piqueure & le remede ensemble. Aquoi (elle respondit en le defarmant) c'est bien la raison Monsieur que ie sois tenue à la guarison de celle que ie vous puis auoir liuree, & de ceste heure m'y condamne, protestant que nul ne iouira de ce qui le auroit peu causer qu'un Rogel, moyennant qu'il en differe le appareil à celui du mariage, pour n'en liurer vne pl'grieue à mon hōneur par ardeur precipitee. A ceste parolle il lui saisit la main qu'elle auoit sur son espaule comme elle le defarmoit (qu'il baissa, sans que personne en veist rien que le Roy Amadis qui plus pres d'eux estoit. Et de la print fantasie de faire ce que vous entendrez cy apres, lui repliquant seulement: Ma chere amie se n'estoit ceste esperance qui foustient ma vie, comme le Fenix ie me consumerois en mon propre feu. De ces Princes, les vns furēt couchez en leurs litz à cause de leurs playes qui requeroient le repos, les autres en qui elle estoiet plus legeres n'en daignerēt aliter: c'est assauoir le Roi Amadis, les Empereurs Esplādian, Lisuart & Amadis de Grece, le Prince Rogel, & la Royne Alastraxeree: deme-

nans telle ioye en leur cueur pour ceste victoire, comme s'ilz neussent plus esté assiegez. En laquelle nous les laisserons pour reuenir aux payens, qui tristes & desolez (comme est aisé à croire) si tost qu'ilz veirent les Princes ysluz hors du camp de la bataille, ilz y vindrent pour emporter les corps de leurs geans & autres grandz Seigneurs pour leur donner sepulture. Mais quand ilz s'adresserēt au Roi de Russie, & qu'ilz lui eurent osté le heaume si tost qu'il eut prins l'air, il reprit ses espritz & retourna en soi. Toutesfois quand il veid la place ainsi couuverte des cors de ses geans & cheualiers, le cueur de mere angoissé lui faillit de rechief ioint le defalut du sang qu'il auoit perdu: dont le salut porter en son pavillon & secourit en diligence. Des autres rois le corps furēt enbaumez & enuoiez en leurs pais, en demeurant le camp en tresgrande tristesse, comme de perte de tel nombre de personages de marque & signalez: cōbien qu'il leur en restast encore tant d'autres que peu en sentoient de faute. A tant cesserēt leur dueil, pour n'en augmēter d'autant la ioye des Chrestiens en la cité.

Du conseil que tindrent les Rois Mores, par lequel ilz iurerent tous le siege & beurent le sang humain en confirmation de l'entreprise.

CHAP. XXXI.

LA tristesse des Payens estoit bien fort grande pour la perte de tant de leurs Geans & bons cheualiers en ceste bataille: mais ilz furent quelque peu reconfortez de la vie du roi Bulthazar chef general de l'armee. Si iuroyēt & protestoyēt entre eux d'y mourir tost ou d'emporter la ville: & d'y faire passer tous leurs ennemis au fil de l'espee. Sur ces entrefaites les nouuelles leur viennent de deux grosses armées qui leur arriuoient de secours, dont l'une estoit du

Roy de Tartarie avec quarante mille hommes, l'autre du Roy de Cora avecq vingt mille. Mais vo^s auez à sçauoir que les Tartares excēdoient la taille commune des hommes, & estoient fort bons archers, & si auoyent entr'eux cinquante fortz & fiers geans, specialemēt deux dont l'un estoit nommé Bracin le grand & l'autre bracas le hideux. Ces deux rois furent bien receuz par Bultazar, qui cōmençoit à se porter vn peu mieux de sa personne, combien que tousiours affligē en son ame de despit & courroux de la deffaite des siens, & plus encore de la finne, qu'il eut certainement portee plus patiemment s'il eust bien sceu que c'eust esté de la main de l'excellente Roine Alastraxeree. Or receut il grand plaisir de la venue de ces cinquante geans mesmement quand ces deux se vanterent à luy, de laisser reposer son ost, d'autant qu'ilz se tenoyent suffisans avecques leurs compagnōs seulz à deffaite & ruiner les Chrestiens. Car à la verité, ilz surmontoyēt eux deux de haulteur les creneaux des murs de la ville. Or iusques à ce que le dernier iour des trefues fut expiré, on n'entendoit à rien au camp, à cause de l'indisposition du Roy de Russie. Lequel reuenu à quelque degré de conualescence, manda rous les potentatz & colonelz de son ost à soy rendre en la tente du conseil. En laquelle estans assemblez & assiz chascun selon son estat, Bultazar se leua debout, puis rassiz, leur commença à dire:

Harangue du Roy Bulthazar.

Si les Dieux immortelz nobles & vailans Princes & Barons nous ont donné sens & vie, nous deuonsestimer que c'est à fin de leur sacrifier en ce ou la gloire & renommee soit augmentee nompas diminuee. A quoy nous qu'ilz ont constituez es grandz estatz de principauté sommes plus obligez comme exemplaires



res, que ceux de basse & vile condition: ayant mesmement à maintenir l'honneur que noz ancestres nous ont desia acquis & comme laissè par succession, pour ne forligner & dementir nostre illustre race. Cecy vous veulx-ie ramenteuoir Princes & cheualiers heroiques pour l'occasion qui nous est apprestee à la vengeance de ces mastins Chrestiens, en exigeât la satisfaction à ceste lignee d'Amadis & reparation de toutes les iniures & offenses qu'ilz ont commises & commettent iournellement cōtre nous & les nostres: sinon, que nous y deuons payer le pris de noz vies à la renommee, en deffault de force & puissance.

Ce dit, le Roy de Russie se teut & le Roy de Tartarie nouvellement arriué, se leuant de son siege print la parole.

• *Harangue du Roy Tartarie.*

Le propos que nous venez de tenir Roy souuerain, est certainement plein de toute bonté & raison: à l'execution, duquel outre la droicture commune de iustice tendant à punition des malfaitteurs, ie me sens particulièrement redevable, d'autant que i'ay perdu en ce chāp mesme deuant ceste cité de Constantinople mon propre pere Roy auant moy

de Tartarie, quand le Roy Armat de Perse la vint assieger, comme nous faisons à present. Et y demurerent pareillement plusieurs autres grans Seigneurs de mô lignage ausli bien que du vostre. Pour la vengeance desquelz nous sommes icy transportez avecques toutes noz forces & ne faisons moindre armee que celle qu'autresfois le grād Xerxes amena semblablement en la Grece qui tarissoit les grandes riuieres, & avecques ausli iuste cause de guerre que les Gregeois au contraire eurent iadis à assieger en Asie Troie la grande. Quāt à moy, ie iure & fais veués presences de voz maiestez de mourir icy ainçois que ie ne voye ceste superbe cité mise à sac & tous ses edefices sublimes rasez rez pied rez terre.

Ce dit, il se rasseid en son siege: & tous les autres Rois & Barōs assistens approuuerent vnanimement la conclusion des deux harangues: & pour plus l'authortiser & consermer, le Roi Bultazar fit tirer du sang de quelques cheualiers captifz en bonne quantité qu'il fit verser dedās de grands hanaps & coupes d'or massif (à l'exemple de Catilina en sa comuration contre Romme.) Si en beut lui mesme le premier, & fit porter à tous par ordre selon leurs dignitez, remonstrant que c'estoit pour vne commune vnion

& accord indissoluble. Or depuis c'est horrible bruillage les diables les inspirerent & animerent tellement à la ruine & destruction de la Chrestienté, qu'ilz leur y firent sans delay, iour & nuit employer corps & ame tripes & boiaux cōme vous verrez cy apres. Pour à quoy paruenir, ils ordonnerent que tout leur ost fust reparti en six bataillons, qui furent chacun de cent mille hommes (sans les pionniers & gastadours, dont on ne tient le compte) tant estoit leur armee accreüe par le renfort suruenü. Ainsi que la ville seroit à ce coup assaillie en six endroits: & que cinq cens Elephās garniz de leurs chasteletz seroyent aussi disposez au circuit de la muraille, à fin que ce pendant que les pionniers la sapperoyēt de leurs pics, on ne leur peust rien ietter ne darder d'en haut au moyen du trait des chastelets. Pareillement que les Elephans ne fussent régez si pres du mur que les poishuilles bouillātes & autres telles choses iettees par ceux de dedans les peussent endommager comme au premier assaut. Ceci accordé & resolu, ainsi qu'ilz étoiēt pour sortir de la tente du conseil, voicy arriuer les nouuelles d'une grāde armee qui venoit en leur faueur: c'est assauoir de la tresbelle Amazone Pēthasilee, roine des monts sur monts de l'Inde, avecques tous les païs que la grande riuierē Ganges arroule de ses sept bras & autres royaumes limitrophes. Penthasilee n'auoit encore alors passé l'aage de douze ans, estans douee & accomplie de tous les traits de parfaite beauté, tant qu'elle n'eut sa pareille au monde, sinon la Fortunie sans pair. Auecq elle venoit la roine Calpēdre sa mere, qui estoit merueilleusement adroicte aux armes: & l'accōpagnoyēt sept fort belles Roines ses subiettes avecques quarante mille femmes guerrieres toutes en harnois dorez (car leur prouince abōde fort en mine d'or.) Les Rois payens receurent grand plaisir de sa venuē, pour le bon secours que ce

leure estoit de ces Amazones bien duittes aux armes & roides au combat, mesmement qu'ilz les sauoyent estre capitales ennemies de la roine Calasie & de Pintiquinestre: desquelles ceste huitoire a fait cy deuant mention & fera encores. Or vont les Princes Barons de l'ost montez sur leurs courriers bien caparaçonnez, au deuant d'elles, les receuant en toute magnificence deuē à leur grandeur puis les conduirent vers le pauillon roial de Bultazar, qu'ils rencontrerent à vn trait d'arc d'icellui, les allant bienuienner & recueillir. Si leur fit promptement assigner leur quartier, ainsi qu'elles desiroient, loing de tous les esquadrons des hommes, pour y estre dressees leurs tentes: ce pendant qu'il les mena descendre es siennes pour se rafraichir: c'est assauoir Calpendre, Penthasilee & les sept belles Roines: Lesquelles descendirent de leurs Licornes, & autres montures estranges, toutes fois propres à la guerre. Bultazar, nonobstant toute sa fureur bellique fut à l'instant rai de la grace & beauté extreme de Penthasilee, & plus encore depuis, de la sagesse & discretion qu'il conneut en son parler, comme fust apres tout le monde de sa force & vaillance quand elle fust paruenue à vn peu plus grand aage. Car combien que desia lors elle alloit armee (d'armes si riches & precieuses garnies de perles & pierrieres qu'on ne les sauoit estimer) si est-ce qu'elle ne cōbatoit pas encore, ains Calpendre sa mere qui estoit chef general de leur armee, mais quand elle fut en aage plus fort, elle ne redouta cheualier quelconque fors le Prince Sylues sans pair, iusqu'à ce que les deux lumieres de vertu & beauté apparurent au monde. Dequoy nous tairons à present pour parler de l'entreprise des Mores.

Du second horrible & incroyable assault qui fut liuré par les Russiens à la ville de Constantinople: & de la bonne resistance de ceux de dedans au moyen des merueilles d'armes de leurs Princes.

CHAP. XXXII.

LE Roy Bultazar apres l'honorable reception de la belle Roine Penthafilee, commanda estre faict le cry à son de trompe par le camp, de l'assault à liurer l'endemain à la ville, à la diane. A laquelle le grand paintre sur la venue du prochain soleil, couloura les nuës matinales du vermillon de son pinceau. Ce que les Payens, s'apprestans à l'heure au combat, iugerēt estre presage de la grand'effusion de sang estre toute preste à arriuer par leurs mains. Leur ost fut departi en six bataillons (comme au parauāt auoit esté delibéré) & avecques le son d'une infinité d'instrumēs, ilz s'allerent planter sur le bord du fossé de la ville. Lequel depuis le premier assault auoit esté vuidé pendant les trefues. Et lors commencerent les pionniers & gastadours à le vouloir remplir & les chevaliers de dedans à les empêcher de ce faire, la commēça le trait à plouuoir des deux costez si dru & menu que les fleches mesmes s'entrebrisoient en l'air: en quoy le plus grand deuoir fut des femmes Indiennes de Penthafilee, qui s'y monstrerent plus promptes à ce mestier que to^s autres archers qu'on eut iamais veu. En ceste maniere estoit la ville assailie en six endroits en tregrieue souffrance des bōs Princes Grecs, ausquelz il ne tenoit alors de reposer, bien entalentez en tout euenement de faire comparer bien cheremēt la victoire aux Mores aux pris de leur sang. Si se departirent trois à trois d'eux en chacun quartier de la muraille pour y secourir & encourager leurs gēs. Mais le quartier plus peellé d'ennemis fut celui dont auoit le roi Amadis prins

la charge, accompagné de Rogel & d'Agésilan, auquel s'estoyent adressees les Amazones. Si est ce que les payens perdirent leur temps & peine en cest endroit à combler le fossé par la merueilleuse resistance de ces trois Princes. Lesquels ne se contentoyent de tout ce que le lieu leur permettoit d'y faire d'armes, desirāt plus tost estre en la plaine meslez parmi les Mores pour y desployer les bras à commandement. Mais au quartier que gardoit don Arlanges d'Espagne avecques le Prince Anaxartes & la roine Alastraxeree, il ne fut en leur puissance d'empêcher que le fossé ne fust répli par les assaillans: au moien de l'arriuee des deux desmesurez geans Bracin le grand & Bracaf le hideux, qui egaloyent de hauteur les tours de la muraille, & de leurs grosses massues de fer en abatirēt en vn moment les creneaux. O Dieu puissant (s'escria Anaxartes) preserve nous de ces diables d'enfer qui nous courent sus, car hommes ne peuvent ilz pas estre si essairai-ie de scauoir s'ilz sont de chair & os: lors donne d'une hache à toute sa force sur le cabacet de Bracin (qui estoit si espois qu'il ne le peut pourfendre) & le grand mastin auāce le bras pourempoigner Anaxartes lequel Alastraxeree auisant lui tire vn coup qui lui separa trois doigts de la main avec grāde douleur, neātmoīs il lui vouloit donner vn coup de massue quād la roine redoubla d'un étoc de son espee en l'œil du geant qu'elle lui creua: dont il sentit vne telle rage de mal qu'il fut contraint de quitter la place: ou son compaguō Bracaf demeura seul, qui toutesfois ne laissa de dōner prou affaire aux trois bons Princes. Que le vous ferai-ie long? L'assaut auoit ia duré plus de trois heures qu'on ne cognoissoit encorē qui en auoit du meilleur: Mores y mouroyēt à milliers quasi suffisans à cōbler le fossé & y seruir de planche aux assaillans, bien qu'il en demeurast assez sur les rampars, de ceux de la ville: mais quelque quātité

qu'on y deffist des payens, quand on iettoit l'œil sur ceste armee innumerable on n'y voyoit apparence de diminution quelconque. La vertu extreme de ces nobles & vaillans Cheualiers Chrestiens maintint le cōbat cōtre ceste gēt infinie iusques à midy, quand les Elephans vindrent au renfort iouer leur ieu qui porterent de leurs chastelets (estans caualiers à la muraille) grand dommage à ceux de dedans, leur ostant l'abry ou ilz se tapissoient parauant. Plus, firent approcher les tortues au mur quartier où les Empereurs Esplandian, Lisuart & Amadis de Grece estoient: sous la faueur desquelles les pionniers firent en peu d'heure par leur sap vne telle breche qu'une charette y pouuoit aisément passer. Ceste breche estoit raisonnable, à laquelle le gros flot des assaillans arriuoit, quand ces trois vertueux Princes sortiront par là mesme, qui bien en clongnerent les conducteurs des tortues, y faisant rempar de leurs courages inuincibles ou la pierre defailloit, par telles armes, que langue ne plume ne sçauoyēt exprimer. Bien vaillamment, aussi s'employèrent Anastarax, & Filisiel en leur quartier, combien que possible ne leur fut de rembarrer leurs ennemis qu'ilz n'y abbatissent pareillement plus de trête brasses muraille. Toutefois y tenoyēt ilz tousiours bon: cōme aussi faisoient Florisiel, Brianges, Florestan en leur endroit ou bieu peu gaignoyent & auançoient les assaillās. Mais au lieu que gardoyent Florarlan, Galdes Artaxerxe la ville y fut plus denuee, combien qu'ils y deffendirent à leur pouuoir. La grande merueille fut au quartier du vieil roi Amadis, qui estoit soutenu de deux forts & roides bastōs de sa vieillesse, Rogel & Agesilan deux vrayes foudres de guerre, là s'adressa la grosse troupe des Geans, qui enchasserent les Amazones, leur reprochans qu'elles y combatoyent cōme en tournoy par amourettes. Le roi Ama-

dis les voyant aborder de furie, fut d'auis d'en laisser trois entrer, & pendant que lui & ces deux cheualiers sans pair les chargeoyent, les autres de leur esquadre se presenterent à la deffence de la breche contre les autres Geans, en quoy ilz firent vrayemēt grād deuoir vn espace de temps, mais l'opinion que prindrent les ennemis qu'il n'y eust plus de resistance derriere, y voyant les trois Geans entrez leur fit reprendre cueur tellement que la bresche sans doute s'en alloit forcee. Ce que sentant ce grand Roi decharge si horrible coup d'une halebarde sur le cabacet d'un des geans qu'il le pour fendit iusques à la poitrine. Aucuns historiens attribuent ce coup à Rogel de Grece: mais qui que ce fust, les deux autres Princes à cest exemple pleins de grand ire de deux autres coups mortelz estendirent les deux autres geans morts à leurs piés: & de ce pas marchent diligemēt à la breche qui auoit à l'heure bon besoing de leurs secours. Lors donnerent sur les payens nom plus ne moins que vrais lyons enragez, faisant voler testes, bras, iambes, & pieces de harnois en l'air tellement qu'ilz firent reculer les assaillans & reperdre ce qu'ilz auoyent gagné de terre en leur absence. Là fut le plus aspre cōflit par l'effort de ces ourds geans qui s'eueruoyent à entrer, & les Princes à les rembarrer: tellement qu'ainsi que la fortune en estoit encore en balance, la Lune compassionnee à tant de morts vint estendre le manteau de son obscurité telle, qu'ilz ne se pouuoient plus entreueoir n'y entre connoistre les vns les autres. Mais tant estoient les courages des payens enflambez du tison de la forcenerie par le sanglant breuage de la coniuration, que la nuyt noire, & sombre ne les peult detourner ne reuoyer de l'ardeur de l'assault.

Comme

Comme la nuit mesme l'assaut fut continué par les Mores, & à la fin les Chrestiens se retirerent au chasteau, leur ennemis demeurans maistres de la ville.

CHAP. XXXIII.

LEs payens (comme dit est) estoient tellement acharnez au combat sur les Grecs, que pour l'obscurité de la nuit suruenât ilz ne ceisèrent leur poursuite : ains l'enforcerent plus qu'onque mais, estimans que par la multitude de leurs gens, dont on faisoit retraire les escadrons qui auoyent donné la premiere charge y en renuoyant tousiours d'autres frais, ilz laisseroyent tant ceux de la cité qu'ilz les mettroient à la fin hors d'aleine, & sans pouuoir plus haulser les bras pour les ferir. Et certainemēt il n'y auoit force humaine qui peut sans relasche soustenir vn si gros effort : tant il y auoit de breches en la muraille. C'estoit horreur de veoir les vns trebucher, les autres crier, & tant chamailler des deux costez sur l'acier cler & poly que la splendeur avec les estincelles qu'ilz en faisoient sortir, leur seruoit de quelque lumiere à cōbatre. Le bruit estoit si grand que nuls ne se pouuoient plus ent'ouir pour appeller secours, ou dōner quelque ordre ou ils escheoit. Ce que voyant le grand Roi Amadis, tournant les yeulx vers le ciel, desquelz les grosses larmes lui couloyent par la face, se print à exclamer. O Seigneur Dieu par ta bonté & misericorde ayes maintenant pitié de ton peuple, lās Seigneur ne cōsens qu'il perisse ainsi par les mains des ennemis de ta sainte foy, ains qu'il viue & se conuertisse à toi en obseruance de tes commandemens. Je recognois bien que noz faultes sōn grandes, mais ta merci est pl⁹ grande beaucoup. Ce disant aperceut vn Geant qui alloit donner d'vn reuers de sa masse de fer à Rogel qui combattoit contre vn sien cousin, auquel il se para le

bras droit d'avecq le coude, qui cheut quand & la masse sur le rempar. Rogel alors d'vne taille tranche la iambe du tiē qui cheut si lourdement en arriere qu'il enfondra plus d'vne douzaine de ses pl⁹ proches voisins. C'estoit droicte merueille de ce que ces deux Princes y faisoient & Agefilan semblablement. Mais Galeris quelque peine qu'il y print à les regarder, pour entenir bon compte plus n'en peust tesmoigner des particularitez auenues depuis que la nuit fust toute close sinon que tant firent les mecreans à la longue, qu'il ne fut plus en la puissance des Chrestiens de resister : ains leur salut deguerpir la place : Alors les Mores entrerent par les breches, & autres par les chastelets des Elephans es lieux ou la muraille estoit encor entiere. Ainsi auant qu'il fut minuit, y auoit plus de cēt mille payens parmi la ville, tuans, massacras, saccageans tout ce qu'ils pouuoient rencontrer. O quelle desolation, O quelle piteuse boucherie par les rues. Ce que voyant l'Empereur Esplandian, & qu'il n'y auoit esperance ne ressource prenant avecques lui Rogel, Galdes & Brianges, s'en vont ensemble gagner le chasteau pour preseruer les vies des bonnes Princesses, qui y estoient, ne se souciant gueres des leurs propres, estimans que tous les autres Princes & bons cheualiers les y eussent desia perduës, qui ne en euitoyent rien du hazard. Comme ilz approchoient du chasteau, ilz y virent bien mille Mores entrer sous la conduite du Geant Bracaf le hydeux : sur lesquelz ilz se ruerent comme desespererez eux quatre avecques quelque nōbre de cheualiers qui s'y rallierent, là ou l'Empereur plonge sa espee dedans le ventre du Geant, qu'elle trouua desarmé iusques à la croisee, qui estonna beaucoup ses soldats par sa cheute, dont ilz eurent apres meilleure raison des autres si bien qu'ilz les repoulerent hors du chasteau. Voila doncques les deux mon-

stres depeschez, qui menaçoient seulz de prendre la ville, car Bracin le grand depuis la perte de son œil & des doigts de sa dextre ne fit oncques beau faict: Si auoyent ilz faict grande nuisance à l'assault, abbatant la muraille, tuant tous ceux qui se trouuoient deuant eux, & encourageant leur gens par leur exemple. L'Emperer se voyant donques maistre du chasteau y laisse Brianges & Galdes à la garde avecques tout ce qui se trouua là de Chrestiens: & lui & Rogel sortent pour aller retrouver les autres Princes si d'auentur'ilz estoient encor en vie. Tât allerent par les ruës y tuant tousiours quelqu'un qu'ilz trouuoient debadé, qu'ilz arriuent à la grande place ou estoient quatorze cheualiers enuironnez d'un nombre infini de Mores, taschant à les tailler en pieces. Lors Esplandian & Rogel, avecques l'aide de cent cinquante qui se rengerent avecques eux par les ruës, avec leurs espees trenchantes fendirent la presse, crians Grece Grece, tant qu'ilz se ioignirent à eux. Lesquelz ne plus ne moins que sangliers echaufez, que les alans & gros leuriers ont acculez & mis aux abbois rompent iaques, & dechirent ventres & cuir, ainsi faisoient sur les Mores à dextre & fenestre, aualloient telles, bras & iambes: brief y faisoient merueilles d'armes incroyables. Mais bié auoient besoing de ce petit secours qu'ilz receurent comme enuoyé de Dieu. Car les vns estoient si las qu'ilz ne se pouuoient plus soustenir sur les pieds & combattoient à genoulx, les autres estoient adossez pour n'estre assaillis par derriere: bref ilz se tenoient desia tous pour morts n'en attendans que l'heure. Au ray de la Lune, Esplandian & Rogel les reconnurent & à leur arriuee Amadis de Grece reprint tel cueur que foudroyant tous ceux qu'il trouua au deuant, se fit place du costé d'ou le secours leur estoit venu paraisant sa carriere iusques au pont du chasteau, comme s'ilz n'eussent rencon-

tré aucun obstacle. Tousiours s'en rallioit avecques eux des egarez par la ville qui defendoyent sur la queue: dont il n'en resta guere qui n'y laissassent les vies gagnans glorieusement l'eternelle. On ne sauroit vous racompter dignement les haults faicts de Florisel en celle iournee, lequel souuēt tournoit visage en chemin pour repousser les ennemis: ce qu'il fit vertueusement quand ilz approcherent du pont du chasteau, qui leur fut promptement abaissé. Car il demeura tout le dernier à y entrer, y ayant faict si bon morceau de corps morts que difficilement les autres y peurent aborder pour y entrer pesle mesle: ce qui leur estoit le plus à craindre. Ceste deconfiture dura toute la nuit entierement, semblable à celle qui estoit auenuë iadis à Troye la grande: sans cesser de tuer, piller, forcer filles, femmes: iusques à ce que l'aube du iour commençast à poindre, le Roy Bultazar fit sonner la retraicte de peur (disoit il) que les Princes ne fussent tuez, lesquels il vouloit auoir vifs pour en faire punition horrible & exemplaire. Si commanda qu'on logeast le plus qu'on pourroit de l'armee en la cité, restant le remanant au camp: & à l'occasion de la victoire ne fit par nonchallance assieoir ne guer, ne sentinelles n'y escoutes: comme aussi des le commencement ilz auoyent tenu aussi peu de cōpte à raison de leur multitude infinie, de fortifier leur camp en aucune maniere ne fossoyer ne remparer n'y faire aucuns bastions ne trenchées. Lesquelz nous y laisserons dormir les vns, iouer & yurôguer les autres pour reuenir à noz bons Priuces qui s'estoyent sauuez en la forteresse. Pas n'y oublierent à leuer le pont leuis, & serrer & barrer les portes: puis faisant reueué de la troupe qui restoit peu à peu recueil lie la trouuerent de trois mille hommes de fait. Lors donnerent ordre à faire peler les naurez, laissant la garde du chasteau aux autres. Si montent la part ou estoient

estoyent leurs dames, qu'ils trouuerent autant desplorees selon l'occasion qu'elles en auoyent par la prinse de leur ville comme parauant elles les auoyent tousiours receuz en ioye & liesse tandis que la fortune les fauorisoit. Mais vous deuez entendre que sur les pleurs & doleances, on apperceut la Roine de la fontaine Meduse sonner sa harpe par grande melodie, dont ils reprindrent quelque consolation par esperance de brief changement de ceste disgrâce en mieux. Aussi que grand reconfort fut à ces Princesses en tel meschef, de reueoir la ensemble tous leurs chefs principaux reduits, leurs maris & fiancez. Or furent ilz desarmez en diligence de leurs armes tant brisees & depees & teintes de sang, qu'elles faisoient bien cognoistre combien elles estoient rouillees au croc: leurs playes furēt bien appareillees de baume de Iudee (dont ilz n'estoiēt pas degarniz pour le besoing frequent qu'ilz en auoyent) puis endosserent de tresbeaux harnois vermeilz croisez qui furent tirez de l'enchantement, dont la septieme partie de l'histoire a faict mention, quand ilz estoient au pouuoir d'Vrgande la melconue. Desquelles armes reuestuz, pourueurent au surplus qui leur fut necessaire à leur nouveau dessein.

Comme les Princes Grecs firent vne saillie sur leurs ennemis, & comme d'autre part le chasteau fut forcé & du secours mesperé, qui suruint aux Chrestiens.

CHAP. XXXIIII.

Deux iours entiers furēt les pries Grecs assiegez & enfermez dedas le chasteau, sans qu'iceulx durant rien s'emeust d'une part ne d'autre: d'autant que la deliberation du Roy de Russie estoit de les contraindre à soy rendre

par famine. Aussi à la verité ilz n'y auoit pas des viures pour quatre iours encores. Or ces braues courages ne pouuoient durer en leur peau à estre ainsi enterrez sans pouuoir faire bien à leurs ennemis. Parquoy teindrent ensemble conseil de leur iouer quelque trouffe, c'est assauoir la nuit prochaine de les aller reueiller chauldement sans les laisser dormir tant à leurs aises es lits des pauvres citoyens morts ou captifs. Pource commirent au Prince Artaxerxe avecques quelque petit nombre d'hommes la garde de la foreste & des Dames nō sans piteux regrets & gemissemēs d'elles, de leur veoir tousiours trauailler ainsi leurs personnes tant mattes & moulues sans aucune cefse: remonstrans qu'ilz se deuoient contenir es termes de defese sous la faueur des pierres, sans aller exposer leurs corps au peril non necessaire. Mais rien n'y seruirent les remonstrances, ne les pleurs memmement de la belle Leonide enuers son Rogel sur l'ardeur de leurs premieres amours, qu'ilz ne fissent celle nuit abbaissier le pont & ne tirassent droit à la grande place. Les mastins infidelles ne s'estoyent donné peine de vider & nettoyer les rues des corps dont elles estoient ionchees s'estans addonnez au pillage, gourmandie, rapt & violement des citoyennes, sur lesquelles les bons Cheualiers auoyent horreur de passer. Or y marcherent ilz à pas si secret, qu'ilz les surprindrēt endormis à l'impourueu, au moyen dequoi tant ilz en meurdrirent, & massacrent d'entree sans resistance que le sang en couloit en abondance par les ruisseaux des rues, vne demie heure apres, l'alarme s'echaufa au son des trompettes & clairōs: mais auant que les Mores fussent ralliez en ordonnance sous leurs enseignes ilz auoient fait perte de 20 mille homes, avecques l'aide de quelques bourgeois de la cité qui suiuiēt ce petit ost à effectuer l'execution mortelle des abbatus. Quelque bataillō reuni des payens,

payés, voici commencer vn chapelis horrible, les Princes & leur suite y martelloiēt comme sur enclume. Ceux de la ville qui latitoiēt en quelques lieux sousterrainsy accoururent à la clameur pour acheuer de viure & mourir, avecques leurs bons Seigneurs, toutesfois en bon propos de cher vendre leurs vies. Les Princes ne s'estonnerent trop quand ilz les veirent en ordonnance de bataille (dont ilz n'estoyent pas apprentiz) ains les accosterent bien serré ensemble sans se debander (selon la resolution qu'ilz en auoyent arrestee) & furent tous plantez és premiers rengs. Mais le Roi de Russie voyant les Chrestiens acharnez à la meslee contre les siens, print secretemēt vn escadron de trois à quatre mille Mores, considerant qu'il ne pouuoit estre demeuré grande garnison en la forteresse. Si s'en va celle part comme faignant vne forme de retraicte de combat iusques à la porte d'icelle. Ce que voyant Galdes (qui pensoit que ce fust leur troupe repoullée par les ennemis, commande aussi tost d'abaisser le pont & ouurir la porte à ceux qui gueres ne se firent prier pour entrer. Or quand il y en eut desia dedans quelque bon nombre, crians : Russie, Russie, tard fut à apercevoir sa faute & à vouloir fermer la porte entre ceux de dehors & les autres estans ia dedans qui lui en en osterent le moyen. Si gaigne pour dernier refuge par vn escalier derobé, le logiz des Dames, tandis que le Prince Anaxerxes faisoit avecques peu de gens qu'o lui auoit laisse tout ce qui estoit possible de faire & auiser en vne telle surprinse. Galdes doncques monte en la grande chambre des Dames, qui furent bien esperduës du cueur & de couleur quand elles le veirēt venir en effray & suivi de tant de gens en armes: aussi s'esleuoit ia le bruit par tout le chasteau. A ceste cause il se fiche à l'entree de l'huis vne halebarde és poings dont il charpente tellement sur

les plus hastifs des Russiens, qu'il en eust bien tost abbattu dix à ses pieds. Mais vo icy arriuer en haut deux Geans Capitaines de ces bandes, qui se firent faire place à leurs soldats, dont l'un du premier coup de son coutelas trancha l'han te de la halebarde & rechargeant fiert sur l'armet de Galdes, qu'il ne fendir pas pour la fine trempe d'icelui, mais fit à Galdes estinceller les yeux & fremier les oreilles, cheant hors de sentiment sur le plancher : Les Geans passent par dessus qui vont saisir ces belles dames, l'une déchirant ses vestemens, l'autre s'ecorchant la face aux mains, l'autre s'arrachant les blonds cheueux du chef. Si les vont toutes enfermer en vne chambrette desolées & demi-mortes, cōme pouuez imaginer, se iettans toutes par terre se recomandans à la diuine bonté: laquelle aussi n'oublia les siens en ceste extrémité, où toute puissance humaine leur estoit de faillie, par la maniere que ie vous diray. Sachant par leurs artz les sages Alquif & Vigande la femme le mechef ou estoit reduit l'estat des Princes de Grece, & q le secours des autres Rois & potentatz Chrestiens estoit trop tardif pour y venir assez à temps: tellement que comme leur longue defence indefatigable iusques là, estoit vn vray miracle de Dieu, aussi qu'ilz ne pouuoient plus fournir à chasser leurs mouches de leur seul euentail. A ceste cause prenant le grand Caracon des Tours ilz s'embarquerent dedans avecques dix mille Cinges de l'isle des Cinges. Car comme vous a esté deduit autresfois en la septieme & la dixieme partie le l'histoire, ils en faisoient tout ce qu'ilz vouloyent. Ainsi vont en vn moment aborder à Constantinople: mais ilz se firent passage par le milieu de la flotte des payens vn peu esloignée de l'abouchement, fendant les ondes cōme vn tourbillon impetueux, si bien qu'ilz mirent à fond plus de vingt grosses nauz de Russie, par des traits de poudre in-

inconnuz lors & inuſitez au monde, lōg temps apres par nullaine d'ans venuz en cognoiſſance qu'on appelle adiourd'hui canons d'artillerie. De là aborderent paſſiblement au mur de l'enceinte du palais ou la mer battoit : là les deux ſages ſe conuertirent par leurs ſorts en deux fiers geans les maſſes aux poings, & bien ſix mille de leurs Cinges en pareille figure, la poupe du Carracon egalait la ſummité des murs de hauteur ou ilz deſchargerent leur gent qui s'en va entour le circuit d'iceux, tuant culebutant, precipitant du haut en bas, tous cenx des Ruſſiens qu'ilz y rencontroyent. Tant vōt par tout, montent, deſcendent & y font ſi grand carnage & ſi braue exploit d'armes, que dās la demie heure, ils ne trouuoient plus aucune perſonne à qui combattre: ſinon les deux Geans qui eſtoient avecques les Princeſſes, s'adreſſans à Niquee & à la Roine Sidonie pour en faire leurs maiſtreſſes. Leſquels voyans venir ſes deux Geans vers eux leurs harnois eſtans tous rouges de ſang, cuidans qu'ils fuſſent de leur compagnie leur dirent. Compagnons choiſiſſez en d'autres icy à qui preſenter voſtre ſeruiſſe: car ces deux icy ſont de noſtre retenue. Ha traîtres (reſpondent les nouueaux venuz) vous y pourriez biē eſtre fruſtrez de voſtre attente: lors leur dechargēt de leurs maſſes d'acier ſur les teſtes qu'ilz auoient nuës (ſe penſans eſtre là en toute ſeureté) qu'il leur debrifēt en pieces: puis ſans deſcouurir les leurs ilz s'agenouillēt deuant les Emperieres & Princeſſes, diſans: Mes dames reueillez voz eſprits eſgarez & iettez arriere tout effrai: car vo⁹ voila deliurees des mains de voz ennemis, & le chaſteau qui eſtoit perdu, reconquis à l'Empereur Eſplandian qui n'a point de plus grands ſeruiteurs que nous lui ſommes. Ha à mon bon ami (dirent Oriane & Leonorine) Dieu vous en rende le loyer: que ſi vous diſtes verité, & que le Roi Amadis & ſes enfans ſoyent en

vie vous ſerez ſi bien recompensé qu'en deurez demeurer content. Autant leur en promettoient les autres Princeſſes les embrasſans par grande ioye, quand ilz ſe depeſcherent d'elles ſous couleur d'aller donner ordre au chaſteau. Si ietterent leur ſort par lequel ilz feirent, que promptement tout le circuit des creneaux eſtoit planté, & peuplé, de luminaires infinis, avecques des voix & cris d'organe de Geans, qui eſtoient pour causer plaisir à qui n'eut pas eſté trop triſte & dolent. Or deuez ſauoir que la fontaine Meduſe (qui auoit piſſé le ſang en la ſale quand les Ruſſiens entrerent) quand les deux ſages y arriuerent elle ietta le lait & la pucelle harpa melodieuſement: choſe qui authoriſa la parole des Geas enuers les dames. Mais pour reuenir aux vaillans Princes: apres auoir maintenu l'eſtour ceſte petite poignee de gens l'eſpace de trois heures cōtre vne ſi groſſe armee, à la fin ilz y perdirent tous leurs Cheualiers & ſoldats d'experiēce & de marque, ſans perte toutefois d'un ſeul des principaux. Quoy voyans firent leur retraicte vers le chaſteau. Ce fut alors que les ennemis le tenoient par emblee, qu'ilz auoyent regagné iuſqu'au foſſé. Leſquelz ſe prirent à leur eſcrier, Ruſſie, Ruſſie: de quoi les Princes Grecs receurent tel creue-cœur qu'ilz en reſterent plus morts que viſs toutefois comploterent & reſolurēt en ſoy tenans toujours ſerrez en rouē ſans ſe ſeparer ne deſioindre, de vendre leurs vies aux meſcreans au pris qu'ilz eſtimoyent deuoir au ſouſtien de la Foy de leur Dieu & à l'immortelle renommee. Si ſe deffendirent là encore lōgement au deſtroit d'un canton ou peu de gens les pouuoient aborder de front iuſqu'à l'heure qu'ilz aperceurent les lumieres & giradoles au tour des creneaux de la fortereſſe avec la hūee des Geans ia q̄cōmēçoit le iour à poindre. Les Princes eſtoient bien lors plongez en tout deſef-

desespoir, quand mesmement ilz les virent sortir du chasteau ne pouuans penser que ce fussent autres que de leurs ennemis : tellement que pour leur derniere main, ilz alloyent opposer à eux qui estoient plus de trois mille combatans sous la conduite de deux difformes geas. Et en guise de loups affamez se fourrent comme parmi vn troupeau de moutons pour se faire ouuerture à l'encontre des autres, lesquelz à l'approcher escrierent Grece Grece, Cheualiers rentrez en vostre fort qui vous est ouuert, & vous allez resfranchir, selo le bon besoin que vous en auez, & nous laissez cheuir du remanant. A quoy les bons Princes qui vraiment plus n'en pouuoient, obeirent volontiers : & les Geans nouueaux s'allerent ruer sur les payens, dont ilz firent en peu d'heure vne fort estrange boucherie. Ce fait l'un des deux geans entona vn grand cor, au son duquel tout leur bataillon fit retraite au chasteau ayant fait vn grand meurtre & carnage des mescreans par la ville. Les Princes s'y estoient auant retirez (come dit est) & monter en la grand sale, y auoyent trouué les bonnes Princesses à qui les cueurs tressaillirent de ioye en reuoyant ceux de qui elles s'estoyent tantost veues ne faire plus d'estat. Mais le bon Dieu regarda les siens de son oeil de misericorde, si leur reciterent les dames par le menu de point en point tout ce qui estoit passé dedans le palais en leur absence, dont ilz leuerent tous les mains au ciel, remerciant nostre Seigneur d'auoir si tost appaisé son ire, sans les punir selon leurs desertes. Mais la premiere chose à quoy l'on pensa ce fut de Galdes qu'on trouua n'estre pas mort, ains seulement hors de sentiment, lequel fut porté sur vn lit, & traité de tous remedes conuenables : combié que le roi Amadis le blasma fort de sa legereté trop precipitée par laquelle il auoit tout mis en peril de ruine extreme.

Après se tira le Roy vers les deux ca-

pitaines Geans, disant : mes bons amis (bien vous puis-je nommer telz à bon droit) pardonnez moy ma discourtoisie en ce que ie desire vous cognoistre par force, & en parlât oste le heaume à l'un des Geans, qu'il recogneut estre le sage venerable Alquif, tenant vn liure en sa main & vne bougie de cire. Autant en fist l'Empereur Esplandian à l'autre Geant, qui estoit Vrgande la mesconuë. Sur lesquels se mirent si bien tous ces Princes, & ces Princesses à les remercier de leur bon secours, qu'ilz ne scauoient de quel costé se tourner. Or en soit Dieu loué (dit le Roi Amadis) qui tant de scauoir vous a donné, pour subuenir aux siens à la necessité : car, si vous eussiez encore tât soit peu tardé, la partie estoit perdue. Les sages alors leur compterent toute la forme de leur venue, dont ilz furent esbahis & resiouis ensemble. A tât ilz sceurent que tout estoit en estat de seureté par le chasteau, & ilz se firent desarmer en attendant qu'on eut couuert pour le souper & appareiller leurs playes par les mains des deux sages, qui penserent pareillement le Roi Galdes, & l'assurerent estre hors de danger : de quoy les autres Seigneurs furent tressaies. Au commencement du repas, des le premier seruice, dit Alquif à l'assistance : Messieurs ie vous veux icy seruir pour vne bonne entree de table, d'vne ioyeuse nouuelle qui vous fera repaistre plus gayement, c'est du secours qui vous va arriuer des Rois Chrestiens. La nouuelle est tres-bonne mon grand ami (respond l'Empereur Esplandian) mais tandis que nous sommes pourueuz du vostre, guerres d'autre ne nous doit chaloir. Ainsi ont à passer les destinees du siecle, dit Vrgande la mesconuë, & l'homme ne peut aller au contraire : soit en tout (respond le Roi Amadis beuant aux deux sages) la volonte de Dieu accomplie, & s'y serue de nous à son plaisir. A tant nous tairons maintenant des Princes de Constantinople pour parler

parler des bons Rois Chrestiens qui venoyēt à leur secours pour leuer le siēge.

Comme les Rois Chrestiens estrangers arriuerent à la montaigne deffenduē, & de là surgirent à Constantinople en grande allegresse: & de ce qui en auint.

CHAP. XXXV.

IL vous a esté deduit au commencement du present liure cōme les Princes de Grece ayans esté deffiez à toute outrāce de feu & sang par le Roi Bul-tazar de Russie accompagné de tant de Rois & Califes Payens, ilz auroient aussi de leur part depesché courriers vers tous les Rois & potētats de la chrestieté pour requerir leur secours contre tel enuahissement des infideles. A quoi les bōs Princes Chrestiens ne faillirent pas à s'acheminer avecques toute leur puissance: mais ilz ne peurent si tost arriuer, que les mescreans ne les preuinssent, & n'y feissent les efforts & dommages que vous auez entendu, & les Grecz la plus braue resistance dont il fust iamais memoire.

Le premier qui y vint fut le Roi Galior menant quant & soy sa chere Briolaine à grāde flōte de naux, portās leurs gens de guerre bien armez du royaume de Sobradise, lequel fut bien tost receu de l'Admiral Frandal, comme venant aussi à propos, que si Dieu l'eust mandé, lequel estoit en la montaigne deffenduē, ou il les attendoit. Apres lui vint le Roi de Cerdenie avecques sa femme amēās dix mille cheuaux de leur Isle. Et l'Empereur de Rome Arquifil cent vaisseaux que galeres que fregates bien fournies. Guerres ne tarda apres le secours de Trapelonde que les Empereurs Lisuart & Amadis auoyent mandé qui estoit en grād nombre. Puis y arriuerent les Rois d'Irlande, de Boeme d'Eſcote le bon roi d'Eſpaigne beau-pere d'Anaxartes, le roi

Norandel de Thesifonte, ceux de Sanſuegue, de Norgales, de Suece, de Naples le bon vieillard Angriote d'Eſtrauauz avec son cousin Sarquiles menant la gēt de Bretaigne, le Roi Agrayes avecques sa femme Olinde venant pour estre es nopces des Princes apres la guerre, le bō Geāt Balan duval craintif & son cousin Brauart, Fruelus d'Auſtrice avecques vingt enseignes des habitans de son duché le Roi Brimon d'Arabie, l'Emperiere Axiane acompagnee de Lucentio son mari, & Perion son pere menant Gricerie sa femme avec dix cornettes & trēte compagnies de gens de pied, le Prince Birmartes y vint aussi, combien que non sans grieue tristesse de la mort de sa fille Helene. Pas n'y faillit Olorius d'Eſpaigne ne sa chere dame, ne la belle Oriane pareillement, mere de don Arlāges n'y aussi son Ayeul Luciane & sa mere femme de Florarlan ſuiuiuz d'un bon oſt de Dardanie: la roine Arlande y enuoya vne belle armee de son royaume de Trace. Seules y faillirent des Princesses dont ceste histoire fait mention, les roines Calafie & Pintiquineſtre avecques leurs deux mariz Perion & Talanque. Tous ces Rois, Ducs & grands Seigneurs, auoyent eu le vent si à propos en leur voyage, qu'ilz estoient la venuz en moins d'un mois, bien deliberez de faire payer l'vsure aux Mores du traictement barbare dont ilz auoyent vsé enuers les Chrestiens. Si grand'estoit leur flōte quand'elle fust toute assemblee tant de Naux & galeres que de galiotes, fustes, fregates, mahōs, brigantins & barques, qu'elle courroit plus d'une grande lieuē de Mer.

Or si tost que les pillotes veirent souffler un vent propice, ne furent paresseux à faire leuer les anctes: mais alors ilz decoururent vne grosse armee singlāt vers eux à la queuē, qu'ilz attendirent pour ſçauoir qu'elle gent e'estoit, qui à l'approcher escrierent Perſe, Perſe, dont ilz



firent des deux costez fanfares d'algresse. Puis apres les caresses & bienvenues voguerent tous ioints ensemble la route de Cōstantinople n'y iugeās auoir occasion d'alentissement, ou plus ilz craignoient venir à tard au secours. Le traict de la montaigne defenduë n'estoit pas grand, parquoy à soleil couchant arriuerent à veuë de la cité, sans qu'un seul vaisseau des ennemis se presentast à l'écoultre. Si sonnerent alors tant de trompettes, clairons, aguafilles, doucines, atabales que ceux de la ville en receurent vne merueilleuse liesse, qui leur respondirent de mesme du hault du donjon de leur palais. Leurs cris estoient fort grāds les vns crians Romme, Rōme, les autres Trapesonde, Trapesonde, Perse, Babylo-ne, France, Arabie, Espagne & autres, les autres noms dessus deduits. Au contraire les Mores en furent grandement espou- uentez, cognoissans le peu de gaing qu'ilz auoyent faict iusques à l'heure contre les Grecs seulz se chassans (comme dist est) leurs mouches de leurs seules mains, voire que par tant de batailles &

assaults leur grāde multitude se veoyoit appetissée. Au moyen dequoy à la surue- nue de si fresche & florissante armee, ilz ne perdoyent pas seulement l'esperance de pouuoir venir à chef de leur entre- prise : ains tomboyent en crainte d'es- tre rudement battus & deconfitz. Sur quoy ilz tindrent conseil & resolurent d'abandonner la ville tant à cause du cha- steau qui y commandoit, que de leur gēt, qui s'y tiendrait malunie. Ce qu'ilz exe- cuterent hastiuement, & y mettāt le feu en plusieurs endroits, se retirerēt en leur camp, pouruoyant à regarnir leur flotte de cinquante mille hommes. Le feu cō- mençoit à s'espandre, avec grand effroy des Princes sans l'ayde prompte des sa- ges, qui par leurs arts firent telle- ment eleuer les ondes & pleu- uoir du ciel, qu'il fut incontinent e- staint.

Comme

Comme la flotte du secours des Rois Chrestiens rompit & deffit celle des Mores: puis comme ilz desembarquerent & firent descente à terre nonobstant la resistance des ennemis lesquels ilz mirent presque à rai de route.

CHAPITRE XXXVI.

LE Roy Amadis & les autres Princes de son sang receurent grand recōfort de l'arriuee de ce bon secours des Rois Chrestiens, dont ilz passerent toute la nuit en soulas à regarder les paiens qui sortoyent de la cité, & les Sages qui estaingnoient le feu par leurs sorts, qu'ilz y auoyent mis à leurs delogemēt. Les Princes Grecs ne veirēt plutoist leurs ennemis hors de la ville, qu'ilz issirēt de leur palais, pour aller donner ordre & police par tout, principalement à faire vider les corps, dōt les maisons & ruēs estoient ionchees. Ce qui fust fait à l'aide d'vne partie du menu peuple, qui s'estoit fui par quelques poternes opposites aux breches par ou les ennemis entroyent. En quoi nous ne nous estendrōs d'auantage sur le discours de la pitié & desolation de ce sac de Constantinople, mesmemēt des petits enfans partie tuez par la cruauté barbaresque partie mangez par ces fiers Geans en guise de gorrez. Quant à eux ilz allerent en personne reuisciter les portes & tours, & y asseoir telle garde qu'ilz en eūrēt le moyē que les ennemis de bon heur n'auoyent endommagees, comme les conseruans pour eux mesmes suyuant la conclusion arrestee par le roi Bultazar (telle q̄ ci dessus vous à esté dist) d'y establir le siege de la souueraineté de son Empire. Le pi^r grand trauail fut à reparer les bresches, ou ilz furent ententifz à besongner par œuvre tumultuaire, c'est assauoir par terraces remplies de blocage. Le matin des l'aube du iour, ilz eurent vn singulier cōtētemēt de veoir les deux armées de mer contraires se venir ioindre par

merueilleuse furie: qui commença par le traiēt tombant deçà & delà aussi menu que gresle: Apres lequel le ieu fut à ier de lances à feu, à grenades, pots sulfureux, finalement aux griffes & agrafes de fer. L'horreur y estoit trop plus grande qu'en bataille de terre, quand ceux qui craignoyēt le feu espris es vaisseaux par telles compositions artificielles, estoient contrains de chercher leur remede en l'eau ou ilz trouuoient la mort en ce noyant. La Mer changeoit de couleur par la teinture du sang des blesez qui de bon gré ou malgré y tomboient: le cry estoit si horrible qu'il sembloit q̄ tout deust fondre & abîmer, quand les naux & galeres s'entr'acrocherent, & qu'on vint aux mains sur les bords d'icelles, puis sur les rembades. Le conte Frandalo qui nonobstant sa barbe cheunuē, auoit tousiours le cuer hault & vigoureux comme bien experimenté en guerre nauale, donnoit ordre à tout qui aussi estoit vaillamment executé par ces gentils Princes & hardis cheualiers, qu'on pouuoit bien estimer le choi de toute l'Europe. Lesquelz y feirent telles apertiffes d'armes qu'ilz ne trouuoient payens qui les peussent soustenir, & auoyent le mot du guet ensemble de n'en prendre aucun à merci. Frandalo estoit de beaucoup pi^r subtil ingenieux & Mercurial que Martial & guerrier, qui leur vīa de tant de ruses & contreruses qu'ilz ne sauoyent les moyens de s'en depettr. Car il mit des mariniers plus de cēt à nager entre deux eaux sur l'ardeur du conflit (qu'on appelle vrinateurs) garnis de terrieres & vibrequis: lesquels allerent occultemēt percer les vaisseaux aduersaires, qui apres insensiblement faisoient eau, & en combattant alloient à fond. Aussi tant il fit ietter de feu Gregeois dedans les vaisseaux des ennemis, que si les vns estoient noyez & submergez en mer, les autres ardoient de vives flambes. Qui fust vne inuention

trouuee par les Grecs mesmes en ceste guerre (dont elle porte le nom) & aujourd'hui fort vſitee. Sur ces entrefaites Frandalo en ſa Galere Imperiale, alla inueſtir la reale de l'Admiral de Ruſſie en ſanc, laquelle il eſſonça de l'eſperon de la ſienne, toutesſois ne ſ'en impatroniſa facilement d'autant qu'elle portoit la fleur de leur cheualerie, qui d'entree repouſſa les Chreſtiens rudement & les euſt longuement arreſtez ſans l'yriateur qui perça le vaiſſeau dans eau. Ceste capitainerieſſe ainſi enſonçee fit brâſſer toutes les autres, donnant occaſion à la deſaite generale tellement que plus ne penſerent les payens qu'à leur ſauuete, ſe iettans la pluſpart des ſoldatz en bateaux & eſquifs à la merci des ondes, ne redoutans pas tant ceſt element barbare que le fer & le feu trop plus cruels.

Or voyant les Mores qui eſtoient en terre ferme, le mechef & infortune de leur armee de mer eſtans ſans ordre ne cōduite ſ'en vont tous ſur le riuage qu'ilz occupoyent bien encore enuiron deux lieues de long. La flotte Chreſtienne victorieuſe ſur la mer, ne veult temporifer autrement à pouſſuivre ſa victoire ſur terre: ou elle tire incontinant pour faire deſcente. Mais elle y trouue vne infinite d'ennemis qui l'en veult empêcher. Toutefois ceste multitude n'eſtonne ceux qui ſ'aſſeurēt auoir dieu de leur coſté & qui en auoyent aſſez veu d'autres. Si ſ'euertuent Chreſtiens à débarquer à terre & payens à les repouſſer rudement, melinemet de leurs fleches dorrees qui voloyent drues des arcz des Amazones: mais à la verité celles que les hommes Perſans tiroient eſtans decochees de nerfz plus roides entroyent dedans les mal armez iuſques aux empēons. Eolus alors laſcha de ſes priſons cauerneuſe vne bande de ſes vens impetueux qui tourmentoient aucunemet l'armee Chreſtienne, les vaiſſeaux ſ'entre-

choquans les eſperons de quelques galeres labourans: ce qui retarda quelque temps leur deſcente. Mais ilz ſe raquoyſerent ſur la brune, & auant porterēt les Naux du Prince Olorius, du Roi Perion de Birmartes, de Fruelus & du bon Gean Balan, Seigneur de la tour vermeille, en vne rade à pouge non occupee par les meſcreans. En laquelle ilz dechargerent leurs ſoldats ſans deſtoubier n'y empêchement quelconque: puis les arrangeāt en bataille allerēt ſurprendre les Mores & les charger à l'impourueu aux eſpaulles: qui les mit en trouble & confulion, penſans que ce fut encore quelque nouuelle armee ſuſtenuē au ſecours de Conſtatinople. Grād fuſt l'abbatiz de payēs à l'arriuee, mais peu apres leurs colonelz firent à quelques eſcadrons tourner viſage: ce qui rendit plus foible la reſiſtence des autres contre la flotte, tellement que les plus gaillards ſe meirent dās des barques qui peurent approcher rez terre. Là commença le combat aux picques halebardes, eſpees, trop plus cruel & furieux, que n'auoit eſté parauant celui de trait & iet plus lointain. Toutefois par la prouēſſe & hardieſſe d'aucuns capitaines des mores la bataille fut maintenue longuement ſans pouuoir en attribuer l'honneur aux vns plus qu'aux autres. Alors les valeureux Princes qui eſtoiet dedans la citē ſe ſentans deſia trop ſejourner par ce peu de reſaſche de trauail ne voulurēt pas ſouffrir la partie eſtre acheuee ſans eux. Parquoy ſortant de la citē ce petit eſquadron en nombre qui n'auoit pas ſon pareil au monde en vertu & valeur, ſ'en va d'autre coſté par terre, charger leurs ennemis: crians à l'arriuee Grece, Grece: cry qui plus effraya les Ruſſiens (aiant tant & ſi ſouuent ſenti la peſanteur de leurs bras) que tous les autres crys, Perſe, Rōme, Boēme, Irlande & autres de l'oſt Chreſtien. Or ſ'adreſſent la part ou ilz voient le plus grād effort des payens: c'eſt à ſçauoir, ou leurs Geans eſtoient

estoyent : ausquelz le bon Geant Balan s'attachoit comme à bille pareille à qui le courage renforça à leur sutenue, en telle sorte que tant ilz abbatirent de ses gros monstres qu'ilz ne pouuoient outrepasser sur les monceaux des corps. Ses harnois vermeilz croisez se firēt biē tost cognoistre & leurs glaiues flamboyās au Soleil comme vray esclair. Ce seroit chose impossible de descrire les merueilles d'armes qui y furent faictes des mains d'environ cinquante cheualiers plus grādes que cinq cēs autres n'eussent peu exploiter. A l'occasion dequoi toute l'armee de mer eut moyen de prendre terre & de se mesler parmy la payenne: ou sur le grand meurdre & occision des mecreans au centuple des nostres: & eust esté le coup pour eux d'eschec & mar si le soleil ia fort abbaissé, eust presté plus d'opportunité aux Chrestiens. Ainsi contraignent les tenebres ne s'entreuoyans plus les vns des autres au combat, chacū soy retraire à sa chacune, c'est à sçauoir les Mores en leur cāp, les Princes Grecz en leur cité, apres auoir toutesfois bienveigné les bōs Rois venuz à leur secours qui (sans la commune querelle de la religion) s'entreportoient singuliere amitié. Apres lesquelles caresses, ilz emmenerēt seulement avec eux les Roines & Princesses cy dessus nommees qui auoyēt en ce voyage accompagné leurs mariz: lesquels manderent par elles, leurs affectueuses recommandations aux bonnes grāces des Dames de Constantinople s'excusās de ne les aller veoir iusques à ce qu'ilz eussent prins la vengeance finale de leurs ennemis qui tant leur auoyent fait de maux & dommages. Si planterēt ces Rois leur camp entre la cité & celui des Russiens, ou furent dressez trefs, tētes & pauillons en fort grand nōbre de couleurs diuerses. Il n'est point besoin de vous deduire icy plus amplement les baisers & accolées d'entre les Princes Grecs & les Princesses nouuellement arriuees.

Lesquelles ilz auoyent esté recevoir iusques en la Nef ou toutes estoyent ensemble, & au débarquer les auoyent mōtees sur de beaux palefrois amenez de la ville : nomplus, qu'elles bienvenuees leur firent les Emperieres & Dames de Grece que pouuez considerer selon l'honneur qui estoit deu à leur haultesse. Car tems est que nous parlions du gentil damoisel Silues de la Selue, & apres de l'estrange naissance des deux Princes Amadis d'Astre & Sferamond, si tost que nous aurons vuidé le surplus des euenemens de ceste guerre.

Du conseil que tindrent les Mores apres leur retraicte en leur camp, & des cartelz de deffy que le Geant Astroband & ses deux freres ennoyerent aux Princes de Grece.

CHAP. XXXVII.

EN grand dueil & deplaisir les payēs firent leur retraicte en leur camp. pour la grande perte, qu'ilz auoyēt faicte tant par mer, que par terre. Car le Roy Bultazar auoit toute la confiance de son refuge en sa flotte: combien qu'il en dissimulast prudemment la douleur qu'il en sentoit au cueur, monstrant toujours aux siens braue & assuree contenance. A ceste cause tindrent sur ce leur conseil, auquel apres diuerses & differentes opinions, fust à la fin resolu deliurer bataille assignee aux Chrestiens, & d'enuoyer messager vers eux pour arrester la iournee. Si en fit Bultazar depescher promptemēt le cartel, qui fut baillé au Nain accoustumé pour le porter au camp des ennemis. Adoncques se leua le Roi de Tartarie nōmé Astroband, demandant congé de leur enuoyer par mesme moyen, vn deffy de sa part. Ce que lui estant accordé, il en fist escrire le Cartel, qu'il bailla au Nain mesme. Or ne fust point à ce conseil appelée la Roynes

la Roine Calpendre ne sa fille la belle Penthasilee, d'autant qu'elles auoyent tenu quelque propos de trouuer ceste guerre iniuste, esmeuës d'admiratiõ ensemble & compassion de l'excellẽte vertu des Princes Grecs tāt oppressee & affligee. Or pour reuenir au braue herault il vint au camp des rois Chrestiens, alors qu'ilz s'entrecheroyēt encore, & fut ouy sa glorieuse Embasiade en vn fort riche pauillon qui desia estoit tendu, ou ilz estoient assis : qui fut de telle substance.

Le Roi de Russie Monarque vniuersel de toute la terre constitué & estably par les Dieux, vous mande par moy, qu'il a receu grand aise du secours nouueau surtenu qui lui appreste moyen de plus grande vengeance à prendre en la bataille prochaine qu'il vous denonce, en la iustification du droit de son entreprinse, alors presenta le cartel de son maistre tel que s'ensuit.

Cartel du Roy Bultazar.

Bultazar Roi de Russie procree de la race sublime des haults Dieux, dominateur vniuersel de tout ce que le Soleil par son cours ordinaire tournoye. A vo⁹ Constantinopolitains, & autres voz cõplices de tenteurs & vsurpateurs iniustes de partie de mes prouinces & seigneuries : Salut, à fin que par icelle i'aye le moyen de ma iuste punition & vengeance tant sur vous icy manans & habitants, que sur les consorts de vostre querelle que i'y trouue tous portez, sans auoir la peine de les aller chastier sur les lieux. Or pour mettre vne derniere fin à nostre entreprinse, & faire cognoistre à laquelle le droit & la iustice enclinent, ie vous denonce bataille mortelle d'ost contre ost dedans quatre iours apres la presente, si vous l'osez accepter, donnant en ce cas plain pouuoir à mō Nain de la signer & souscrire.

Ce cartel leu par le Roi Amadis, il dit

au Nain. Beau Sire vostre Roi est coustumier d'vser de parolles superbes & outrageuses : mais nous lui feront response : encore à vous specialement s'adresse ce cartel (respond le Nain) & luy tendit à la main, qui estoit de ceste teneur.

Cartel du Geant Astrobant, &c.

Le Astrobant le Geant, Roi de Tartarie maieur & mineur, & des autres prouinces adiacentes, doué par les Dieux de haute stature & vertu plus qu'humaine : A vous Amadis de Gaule, Roi de la grãd Bretagne, & à vous Amadis de Grece, Florisel de Niquee : Je vous fais à sauoir, que l'obligation de parenté dont i'attains en prochain degré à Futio Cornelio, occis malheureusement de ta main, m'a induit à me transporter en Grece, pour venger le iuste sang de lui par toy espandu à la satisfaction de nostre illustre & noble lignage, s'il y a en toy tant de hardiesse & force que tu oses entrer en combat de ta personne à la mienne, & les deux autres de ta race contre deux de la nostre : te donnant seureté de ta vie, de tous autres de nostre camp fors que de moy qui pretends ta mort pour accroistre & augmenter mes louanges par adionction des tiennes, si les miennes peuuent recevoir accroissement. Le iour soit demain au matin, le champ & les armes à ton election, les iuges de ma part serõt la Roine Calpendre & la fleur de beauté Penthasilee sa fille.

La lecture faicte de ce cartel : chacun s'esmerueilla de l'orgueil & outrecuidance de ces payens : surquoy ayant consulté, la response fut laissée à faire au Roy Amadis, telle que bon lui sembleroit : ce qu'il fit promptement, deliurāt les deux cartels au Nain, tant le responsif à celui du Roi de Russie que l'autre au Roy de Tartarie. Lesquelz le Nain reporta en leur

leur camp en diligence : ou elles furent leuës en la presence de tous leurs potentats contenant tel langage.

Cartel responsif des Princes de Grece, au Roy Bultazar.

Les Souuerains Princes de Grece & les autres Seigneurs & Barons Chrestiens assemblez à Constantinople : A toy Bultazar Roi de Russie seulement : Salut, afin que puisses receuoir le payemēt que tes œures meritent.

Vn cartel nous a esté apporté de ta part, plein de parolles fieres & outrageuses de ton style ordinaire, par lequel tu nous veux faire entendre vne force en toy, plus que ne portent tes propres bras. Aussi nous trouuons estrange que vueilles estaindre le feu tant embrasé de ton ambition & conuoitise, par le sacrifice du sang innocent de tes vassaux & alliez : car raison veult que chacun porte son fardeau aussi semblablement ne doiuent point estre exposez au danger ceux qui n'en tiennent point de coulpe. Toutefois puis qu'ainsi tu le veux, nous acceptons la bataille, &c.

Trop furēt courrousez les Seigneurs Payens, principalement les fiers Geans, par la lecture de la response des Princes Chrestiens (lesquelz Geans y estoient bien encore au nombre de trois cens) si iurerent tous qu'ilz leur abbatroyēt biē tost le caquet. Mais bien furēt d'auantage irritez, quand ilz eurent oui l'autre addressée au Roy de Tartarie, dont la teneur fut telle.

Cartel responsif du Roy Amadis de Gaule, &c. Au Roy de Tartarie Astroband, &c.

Amadis de Gaule Roy de la grand Bretagne, Amadis de Grece Empereur de Trapezonde, & Florisel Prince des deux

Royaumes de Gaule & Bretagne. A toy Astroband Roy de Tartarie. Tu fondes tes menaces à tort sur la mort de Furio Cornelio ton parent qui a esté occis par nous de bonne guerre. Quant aux gloires que tu t'attribues si grandes, nous sommes contens de les croire, pour les adioindre au peu des nostres par la victoire que nous esperons en Dieu d'obtenir sur toy & tes freres tant valereux. Le combat nous acceptons, au iour que tu nous assignes, avecques telles armes, que bon vous semblera, & le camp soit mis entre les deux armées. Pour iuge de nostre part nous nommons la Roïne Alastraxeree comme sortable compagnie à voz Roynes.

Après la lecture de ces deux cartels, la bataille fut publiée par leur camp à son de trompe au quatrieme iour prochain : & le Roy Astroband & ses deux freres s'appresterent pour le iour ensuiuant (comme firēt de leur costé les trois Princes Chrestiens) considerant contre qui ilz auroyent à faire.

Du combat entre Amadis de Gaule Amadis de Grece, Florisel de Niquee d'une part, contre Astroband le Geant & ses deux freres d'autre : & qu'elle en fut l'issue.

CHAP. XXXVIII.

Sur le poinct de l'aube du iour se leuerent à Constantinople les trois Princes qui auoyent à combattre, & allerent faire leur deuotion, en la chapelle imperiale priant le Seigneur de tenir en sa protection les champions de sa sainte querelle. Puis ayans prins la soupe en vin, furent armez des armes vermeilles à la croix, fors que Florisel qui ne changea les siennes noires de dueil, sinon y adioustant la croix blanche. Lors monterent sur leurs destriers, & marcherent les trompettes deuant eux, puis la cheualereuse Roïne Alastraxeree

M

armée



armee de toutes pieces sur vn braue coursier avecq's mille homes d'armes de bonne elite ordonnez pour la garde du camp dont elle estoit iuge de leur costé. Apres marcherent aussi les trois Princes portans l'armet, lance & escu du Roi Amadis : c'est à sçauoir l'Empereur de Romme Arquifil, le Roy Galaor, Florestā puis lui : & deuant l'Empereur Amadis de Grece les Empereurs Esplandian son ayeul, & Lisuart son pere, & le Prince Falanges portans les siennes. Deuant le Prince Florisel de Niquee alloient pareillement avecques ses armes Rogel de Grece, Agefilan de Colcos, Filisil de Montespīn. Ainsi arriuerent au camp des Roys Chrestiens, qui les receurent en toute magnificence & les conduirent au camp clos de chaines ou auoyent esté ia faict's les combats precedens : Si mist Alastraxeree dedans le camp leurs trois braues champions par la porte du leuant qui y attendirent quelque espace de leurs aduersaires. Or voicy venir premiere-ment la Royne Calpendre & la belle des belles Penthasilee sa fille, chacune armee & cheuauchant deux puissantes Lycor-nes caperaçonnees de drap d'or enrichy de perles & pierrerie d'ineestimable valeur. Mais la belle Penthasilee ne portoit

armet n'espee ny escu d'autant qu'elle n'auoit receu l'ordre de cheualerie, Calpendre sa mere portant en son escu pour deuise deux grands serpens entortillez qu'elle auoit occis de sa main. Elles y vindrent accompagnees comme iuges du camp, de mille de leurs Amazones de choix. Apres marcha le fier Roy de Tartarie Astroband & ses deux freres geans chacun sur vn Elephant (ne se pouuant trouuer autre monture qui peust soustenir leur lourde corpulence) estans ces Elephans dressez au combat, comme les plus dociles animaux de la terre. Et deuant eux autres gros Geans portoyent semblablement leurs lāces (qui n'estoient moins grosses que beaux mast's de nauires) & leurs heaumes & escus. Esquels escus ces Geans portoyent vne mesme deuise, qui estoit d'vn cimenterre sanglant avecques lettre alentour, vengeance. Si furent introduits au camp par les deux Roines iuges, de la magnificēce desquelles les Chrestiens furēt émerueillez mesmement de l'excellēte beauté de Pentasilee ainsi que les payens estoient de la maiesté & cōme diuine representation d'Alastraxeree. Laquelle s'estant, rēgee pres de Pentasilee pour communiquer ensemble des incidens à iuger l'arraisonna en

ces

ces termes : belle Princesse ie tombe en grande doute de la victoire de noz Princes en ce cōbat plus pour les traits qu'ilz pourroyent receuoir de vostre souveraine beauté q̄ pour les coups de voz geans leurs ennemis. A quoy lui respondit Pētafilee, qu'elle melme nē lui en deuoit guerres pour tant magnifier la sienne. Lors elles ayans comme iuges mi-parti le soleil & fait crier que nul sous peine de la hart eust à fauoriser les champions de fait ne dit, commanderēt aux trompettes de sonner, & aux herauts de crier le dicton solennel, laissez aller les vaillans combatans. Alors se meurent les vns cōtre les autres, c'est à sçauoir le Roy Amadis contre Astrobant, Amadis de Grece contre Aigolant, Florisel contre Margō : qui estoient les trois plus puissans Geās de toute leur armee, apres Bracī le grād demeurē de l'assault dernier borgne. & demi manchot, & Bracaf le hideux. Dōcques le Roy Amadis & les deux autres Princes delogerent tous en vn moment cōtre leurs aduersaires & eux semblablement, qui ne faisoient pas roide course sur leurs elephās, ains le galop seulemēt. Si adressa le roy contre Astrobant & to⁹ deux s'entreportērent par terre Amadis estant aucunement bleś en la poitrine, le Geant percē depart en autre tant que l'on voyoit le trōçon lui resortir par derriere : mais biē lui print, q̄ ce ne fut pas du droit fil, ains en gauchant, dont la playe fut beaucoup moins, perilleuse. Or se releuant soudain l'un & l'autre, Astrobant s'arrachant le tronçon hors du haubert, puis mettant la main à vn grand coute-las, qui lui pendoit en escharpe, que trois hommes eussent fort ahañné à souleuer de terre, duquel s'en vient ioinde Amadis faisant son compte de le foudroyer du premier coup. Ce que certainement il eust fait, si ce gētil Roy ne l'eust euitē d'un sault à quartier (car plus y faisoit mestier l'adresse que la force.) Ainsi cheut le coup à terre, qui donna loisir à

Amadis de lui en tirer vn de toute sa puissance au dessous du ventre, si le geāt n'eust mis son escu au deuant, duquel quelque lourd & massif qu'il fut, il en abatit vn quartier. Ce pendāt pas ne dormoyent de leur costē Amadis de Grece contre Aigolant ne Florisel contre Margon, lesquelz (pour le vous faire court) en leurs courses viderent tous pareillement les arçons, leur quatre lances volans en esclats, puis s'en vindrent recherchieusement aux glaues, ou bien fut besoing aux deux Princes de n'oublier rien de leur escrime. Car tout ce que ces deux geans ataignoyēt de leurs cimenterres, alloit en pieces tellemēt qu'à noz cheualiers en peu d'heure ne restèrent que les courroyes de leurs escuz & leur voyoid on en plusieurs endroits la chair nuē. La fut exemple euidēte, que subtilité passe force : car noz champions n'entendoyent qu'à sauteler çà & là, faisant perdre les coups à leurs aduersaires, & leur en tirāt tousiours quelqu'un à la derobee. Ce que considerant la belle Pētāfilee, se print à dire en la presence de la Roine Alastraxeree qui estoit assise aupres d'elle au hourtides iuges (au raport de Galerfis.) O dieux souverains de quel le bontē auez voulu douer ce vaillāt roi & tous ceux de son lignage ? qu'il semble qu'ayez mis en eux toutes les gloires de prouesse sans m'en laisser pl⁹ aucune que ie puisse conquerir. Parquoy ie iure par vostre deitē que ie ne receuray iamais l'ordre de cheualerie d'autre main que de ce grand roi s'il peult echapper de ce combat. A quoy respondit Alastraxeree. Sans point de faute Madame vous auez biē raison en la louenge q̄ vous proferez de ceste illustre race : en laq̄lle gist vrayement toute la bōté du monde. Et est leur alliance dequoy ie me tiens plus fiere & cōtēte que quād ie m'estimois estre nee de dieu Mars meme. Or sus, dit Pētāfilee Madame, ie requiers aux dieux qu'ilz me permettēt de faire mō premier coup

d'essay de cheualerie avecques vne si belle & si renommee princesse que vous estes: vous promettât que les premieres armes que ie feray, ce sera contre vous, afin que si la fortune m'y estoit fauorable, ie puisse triompher de voz glorieuses victoires: pour gage de quoy, elle lui bailla vn quartier de sa riche cotte d'armes, qu'Alastraxeree print en lui disant. Belle Princesse ie ne refuseray pas la lice comme Cheualier contre celle, de la main de laquelle i'ay bien opinion qu'un iour tous les cheualiers du monde demeureront vaincuz, donques receuez aussi mon gage: lors lui bailla semblablement vne des manches de sa cotte d'armes. La Roine Calpendre qui auoit entendu tout ce deuis n'estant pas fort contente que sa fille si ieune & tendre adressast son apprentissage d'armes contre si robuste & fameuse dame au fait de guerre, remontra à Alastraxeree, qu'elle trouuerroit plus raisonnable ceste emprise à departir avec elle. Mais puis que Pentasilee lui auoit ainsi fiancé & ia baillé la main, elle ne le pouuoit destourner. A quoy la Roine lui fit response, qu'elle ne s'en donnast autrement peine, d'autant que si elle sortoit viue du combat d'avecques sa fille, elle lui en redroit le cuer net & s'en desir satisfait. Sur ce deuis, elles regardent la bataille de ces six braues champions, qui estoit encore en vn estat sans cognoissance d'auantage des vns sur les autres, à lors que le roi Amadis enuuyé de ceste longueur de confit, ayant ia duré plus de deux heures: les herbes estâs là tournees de leur verde couleur en rouge par leur sang, la terre y estant labouree des horribles coups de cimeterres ou coutelas des Geans qui y tomboient souuent par la dexterité des cheualiers Grecs, qui frustrait leurs attaintes. Toutesfoies ne peult le Roi Amadis à la longue tant faire qu'Astrobaid ne lui dechargeast vn coup sur le heaulme, lequel brisa tout ce qu'il rencontra du reste de l'escu dont il

para au deuant, puis y descendit de costé tellement que la polissure de lacier le fit glisser sur l'espaule fenestre qui en demeura si estourdie que le bon Roi en perdit le sentiment d'icelle & le playe entra profondement en terre (quelque dure qu'elle fust) bien sa moitié ou enuiron. Ce que voyant le Roi Amadis lui tira vne taille sur le poignet, qui luy fit voler la main emmi la place. Astrobaid qui se veoid ainsi manchot, iettant vn haut cry de douleur, essaye à tirer le coutelas de l'autre main, sur laquelle le roi decharge & en fait autant que de la dextre. Lors auoit il beau ieu, & le, vouloit acheuer d'occir, quand Astrobaid lui requiert mercy de la vie, ce qu'ouy & entendu par les iuges, le Roi Amadis se retira à quartier, & celui de Tartarie fut de leur commandement mené hors du camp & pensé de ses playes. Si se tint quoy Amadis pour regarder ce que les autres faisoient vous declarant Galeris que les deux Princes Grecs auoyent eu prou affaire contre les deux fors Geans lesquels par leur legereté & prôitute ilz auoient lassés en faisant perdre leurs coups en vain, chacun aussi desquels ne leur pouoit estre moins que mortel: dont comença Aigolid à dire à Amadis de Grece, cheualier repose vn peu, afin de mettre meilleur fin à nostre combat. A quoy il lui respondit: Gean, bien suis certain que si tu me tenois reduit en tel estat que ie te tiens tu ne m'userois pas de courtoisie, neantmoins à ce que ie gangne tous les points d'honneur sur toy, ie te l'accorde. A tant se retirerent vn peu arriere l'un de l'autre: Et Florisel fit pareille grace à Margon à sa requeste, ne se voulant pas monstrer moins courtois que son compagnon. Adonc voians les deux geans les deux mains d'Astrobaid à terre, qu'on auoit emmené vaincu, comme outrez d'ire & de mal talent, reuont vers leurs ennemis de trop plus grande furie sans comparaison qu'ilz n'auoyent fait au parauant. Lors

voioient les pieces des harnois quand & la chair, & bié tost eussent fait & par fait ces deux puiffans monstres, s'ils eussent à faire à autres que ces deux cheualiers, qui iamais n'auoyent eu crainte ne frayeur de danger quelconque & à qui on n'eust peu parangonner deux autres en prouesse. Si en sentirent ilz maintes meurtrissures sur leurs corps, & y furent saignez de lourdes lancestes, tant qu'Amadis irrité d'une, & de se veoir si long temps mal mené par vne seule personne à la veüe de la fleur de la cheualerie du monde, il recueille ses forces & charge vn tel coup à Aigoland sur la iâbe que l'armure ne la peut garentir qu'elle ne fust trenchee bien auant en l'os, duquel coup il tomba estendu de son long, ou avecq l'ayde de ses autres playes, il ne demeura gueres sans rendre l'ame à tous les diables, qui en firent vne gorge chaude. Adonc demande Alastraxeree à la belle Princeesse qu'il luy sembloit de la bonté de telz Cheualiers, qui luy respondit, qu'elle la tenoit telle, que la beauté de leurs Dames, qu'elle voyoit en la prochaine tour regardans le combat. Florisel auoit honte de demeurer long temps derriere apres les autres, qui se delibera de iouer à quitte & à double, tellement que voyant Margon leuer son cimenterre à deux mains, comme pour congé prendre par vn dernier coup, se lance de viffesse à costé, puis lui fourre son espee d'un estoc (le pommeau appuyé contre sa poitrine) dedans la sienne voire iusques à la croisee. A tant les iuges Calpedre, Penthasilee, & Alastraxeree descendans de leur eschaufault, s'en vont selon la ceremonie des dueilz, mettre hors du camp les trois Princes Grecs comme victorieux. Qui furent apres conduits en pompe solennelle en leur cité, ou les chirurgiens iugerent de leurs plaies, que dans les trois iours, qui restoyent ilz pourroyent entrer en bataille.

Comme sur le grief ennuy que portoyent les payens de la deffaite de leurs trois Geans en camp cios, la belle Princeesse Penthasilee enuoya vne lettre aux Princes Grecs par vne de ses Amazones pour obtenir d'eux vn sauf conduit, & du surplus qui en aduint.

CHAP. XXXIX.

LE combat fini comme vous à esté deduit du Roy Amadis de Gaule & des deux autres Princes contre les trois Geans, soudain Astroband le Roy de Tartarie fut porté en son pauillon, & par bons chirurgiens penché de ses playes & ses deux cōpagnons enterrez en quelque solennité selon leur estat & la forme militaire avecques grands regrets & douloureux gemissemens de tout le cāp, voyants qu'ilz en auoyent desia perdu tant d'autres de leur capitaines de marque & renom en tous les combats singuliers, & tant de leur peuple en toutes les batailles, assaults & rencontres, que leur multitude qui sembloit au commencement presque infinie se monstroit alors grandement appetissée. Le Roy Bultazar comme celui à qui plus le cas touchoit, en estoit aussi sur tous le plus alteré en son courage, combien que prudemment il le dissimulast pour ne mettre son ost au desespoir. Lors lui reuenoit en memoire le bon conseil que lui auoit donné le vieil Roy de Cacidoine de rompre ou differer ceste entreprise. Lequel il n'auoit voulu croire nō plus que les Troyés leur diuine Cassandre, & pour toute recompense par ses iniures & reproches, il lui auoit liuré la mort presente: tellement qu'en son secret, seul quelquefois en son pauillon, il en larmoyoit angoisseusement de compassion ensemble de repentance. Mais en public parmy les siens il monstroit bon maintien & contenance ailleuree leur disant: Et bien mes amis, la fortune à desia par plusieurs-fois fauorisé nos ennemis en quelques rencontres,

c'est à nous maintenant qu'elle doit son bon visage & bonne chere, puis que son naturel est d'estre tousiours inconstante & muable. Il ne nous fault pas cōme les mauuais ioueurs (qui ne sauuent pas attēdre le tour de sa rouē) nous retirer sur nostre pertē. Elle aide volontiers aux pl^r hardis : Sus sus, reprenons cueur & hardiesse, en cōsiderant les vers de nostre Poète ancien, parlant d'elle.

Fortune la fausse traistresse

L'homme ore chatouille ore blesse:

A sa dextre pleine d'orgueil

Voulut les humains mettre en dueil.

Plus soudainement les surprend,

Que le flot de mer ne s'estend.

D'un tour de main baisse & sublime,

Que le plus bas monte à la cime

Et au dessus vient le plus hault.

Ne de leurs pleurs rien ne luy chault

Et quand plus ont douleur & ire,

Soudain en ioye les attire.

Son plaisir est qu'en peu d'espace

Le chetif le plus heureux passe.

Voila mes freres & compagnons disoit le Roy de Russie, la complexion de dame Fortune, que nous faisons deesse à bō droit: d'autāt qu'elle gouerne toutes les choses humaines, & sur tout domine principalement en la guerre. Parquoy souuent m'auēz ouy dire quād quelque Seigneur estrāger m'enqueroit de quelques miens colonels, capitaines ou cheualiers de nom, qui ils estoient que c'estoit tel qui auoit fort bien fait en vne telle bataille, ou tel qui auoit biē defendu & gardē vne telle place, dequoy s'estbahissoit l'estranger de ma parolle, à ne les blasonner generalmente preux & vaillans. A quoy ie leur respondois que quand vn cheualier veoid te qu'il ne veid oncques, souuent fait ce qu'il ne fit oncques. Puis la Fortune se fourre parmy noz actions, & deportement aujourdhuy mere de main marastre.

Reprenons noz esprits (compagnons ce qui est aduenū de malheur en noz derniers combats, est procedē de la folle ou treuidance d'aucuns de nous qui cuidēt la vertu estre mesuree à l'aune, & deuoyent estre assez aduertiz par les conflits precedens, de la dexteritē de ces emerillons Grecs qui volent quād les autres marchent. Il n'est (dit-on) si bō qui ne faille, & leurs deuons sauoir bon grē sinon de ce qu'ilz y ont fait, au moins de ce qu'ilz y ont voulu faire, cōme la bonne volōtē en maintes choses est reputeē pour le fait. Partie de ces propos tenoit il entre les Rois & Barons en son pailillon: partie il tint en son ost sur la remōstrance de la bataille prochaine s'y faisant eleuer vn hault trosne, duquel il estoit entendu d'un grand nombre: c'est assauoir de tous les chefs, lieutenās, maistres de cāp & autres des principaux qui auoyent à conduire & encourager les soldats. Aufquels il dit d'auantage, qu'il ne pouuoit deguiser ne vouloit le deplaisir qu'il sētoit au cueur, de la mort de leurs cheualiers auēnū en quelques combats les iours. passez contre les Princes Grecs mais que c'estoit peu de chose & nō digne à en faire grand compte & moins à s'en estonner. Car à la veritē assez auoiet fait de preuues de la haute cheualerie qui estoit en eux, sans laquelle aussi il n'eust pas adressē ses armes d'autant que le los & honneur ne se peut acquerir cōtre les lasches & recreuz, ains seulement ou florit la renommee. Lesquels Princes (comme tous sauēt sont en fort petit nombre & desia, sinon morts au moins tant affligez & debilitēz du long trauail de ceste guerre & de playes qu'ilz y ont receuēs sur leurs corps, qu'il ne sont plus que demis de ce qu'ils ont estē. Mais qu'il à maintenant auisē avec les bons Rois & Seigneurs de l'ost de donner vne plaine bataille à quitrance, en laquelle ils se doiuent asseurer d'obtenir indubitablement la victoire, tant par le nōbre dont
encore

encore ils les surmontent de beaucoup que par leur corpulence & force le bras. Là vous serez trente ou quarante à combattre contre un, là en estour pressé, leur adresse & legereté n'aura point de lieu. Pource donnez bon ordre tant capitaines que soldats à tout vostre appareil & suiuez courageusement voz enseignes, esperât ce coup la bône grace de la fortune variable apres tant de rudesse. Suiuez nous de tel cueur que nous vous conduirons en marchant les premiers pour vous rompre les rangs, & vous faire pauois de noz personnes: Quoi faisant, vous pouuez tenir la bataille gaignee.

Ceste harangue de Bultazar à son armee, renforça les plus decouragez, comme ils lui demonstrent par leurs clameurs & applodissemens militaires: Au sortir de laquelle ils rencontrèrent le roi de Tartarie qu'on portoit en vne litiere cheualeresse pour aller embarquer en vn vaisseau de mer à plus de trois mille loing à fin d'estre rédu en son pais pour mieulx guerir en son air naturel par le conseil des Physiciens & mires. Si lui dirent à Dieu Bultazar & tous leurs Rois honorablement, lequel nous laisserons aller en sa terre ou il fut receu de sa femme en telle tristesse qu'on pouez penser. Aussi guerres ne dura sans passer de ceste vie en l'autre, laissant deux filz qui n'estoyent pas Geans, mais tresvaillans & adroits aux armes: ainsi que bien firent cy apres apparoir en l'entreprise de la vengeance de leur pere. Sur ces entrefaites voici arriuer la Roine Calpendre & la nompareille Pétasilee au pavillon du roi Bultazar accompagnees de quelque nombre de leurs Amazones toutes montees sur Lycornes (dont leurs marches son fort peu peules.) Dont le Roy auerti s'y en retourna promptement avecques les autres rois qui estoient lors avecques lui. Si les trouverent tant richement parees & gaillardes de port & geste que rien plus, dont

amour lui refraischit bien & rentama la playe faite d'une de ses fleches plombee en son cueur. Il n'oublia rien de tout l'honneur & racueil qui lui fut possible de leur faire, & apres qui furent tous & toutes assis selon leurs degrez & qualitez la Roine Calpendre leur commença à dire.

Souuerain Roy de Russie & vous autres Rois & grands Seigneurs le secours vous est notoire que j'ay cy amené en vostre faueur, cobien que ne vous en soyez encores guerres seruy pour le peu de besoin qui vous en estoit. Maintenant nous auons à demesler quelque chose avecques les Princes Gregeois que ne pouons faire commodément ne voulons attenter qu'avec vostre bon congé & vouloir: vous priant à ceste fin qu'il vous plaise nous octroyer un saufconduit pour seurement avec eux negocier. A tant elle se teut: & le Roy Bultazar se leuant de bout, puis se rasleuant print la parole. Tresnoble & vertueuse Roine: nous confessons à bon droit vous estre tous grandement redevables du secours que nous auez donné, tant pour l'exaucement de la maiesté de noz Dieux que pour accroissement de vostre gloire & reputation immortelle: de quoy vous rends graces, & le recognoissons tous perpetuellement, tant en general qu'en particulier quand vous voudriez requerir le nostre. Quant au saufconduit, vous l'avez de vostre pouuoir mesme, & en tant que desirez le nostre, il vous est volontiers accordé. Lors fut enioint aux secretaires d'estat de le depescher sur le champ & leur estant présenté fut signé de tous & scellé de leurs sceaux, puis deliuré à la roine Calpendre qui le bailla incontinct à vne de ses Amazones fort cointe & iolie & de gentil esprit à manier negoces. Laquelle armee de toutes armes fors du chef & des mains & montée sur sa licorne s'en va vers Constantinople, & Bultazar va recôduire la princesse Pétasilee en son camp deuisant

deuisant en chemin de propos gracieux & amoureux avecques elle, qui faisoit souuent l'oreille sourde, autres-fois respondoit des chansons n'ayant pas sa florissante jeunesse son cuer enclin à ce vieillard fanné & flety. Or s'en va l'Amazone droit au camp des Rois Chrestiens, s'adressant à la tente ou ilz estoient assemblez : ausquelz apres la reuerence deuë, elle demanda si le grand Roy Amadis de Gaule y estoit, par ce qu'elle auoit parole à lui porter: A quoy lui fut respondu par Arquifil Empereur de Rome qu'il estoit au liēt au palais, pour les playes qu'il auoit receuës d'Astrobant au combat. Si l'y firent cōduire par deux cheualiers là ou elle le trouuant enuironné des Princes & Princesses en s'humiliant lui presenta sa lettre, dont la substance estoit telle.

Lettre de la Princesse Penthasilee au Roy Amadis de Gaule.

Penthasilee Princesse, de tous les mōs qui circuyent l'Inde ensemble, de toutes les marches que la riuere de Ganges de ses sept bras arrose. A vous treshault & tres-puissant Prince Amadis Roi de la grand Brétaigne, &c. Salut avec accroissance de toute prosperité & louange si voz noppareilles Cheualeries en peuuent receuoir. Sachez que l'incomparable renommee de voz genereux & magnanimes faits paruenue iusques à nostre lointaine contree nous à transporter iusques à la vostre, pour en prendre le tesmoignage oculaire, lequel nous en auons delia prins à nostre grād admiration & contentement. Or ne pouuant iouir de la gloire de voz gestes illustres, desquels le triomphe n'a esté permis à nul mortel, au moins espere ie iouir d'un bien que selon vostre grandeur ne me pouuez desnier, qui est de receuoir de vostre tant excellente main l'ordre de

cheualerie en assemblee de telle centaine de Rois.

Le Roy Amadis ayant leu ceste lettre en la preience des Princes, y fit appeller les Princesses par passe-tēps tant les domestiques que les estrangeres leur mandant que c'estoit affaire de Dames, ou elles pouuoient bien. Lesquelles venues il respondit à la damoiselle messagere, que touchant le saulconduit que sa maistresse lui requeroit, il ne scauoit quelle seureté lui mesme pourroit trouuer en elle, selon le retrait qui pourroit estre de sa beauté à la sienne, toutes-foies que le lendemain au matin on verroit de quoy. Qu'il alloit faire depescher sa responce ce pendant qu'elle se tiendrait vn peu dehors. Rogel & Brianges de Beocie qui furent incontinsens espris de la gentille grace de l'Amazone aserent de leur courtoisie accoustumee à la conduire hors la grand sale & l'entretenir pendant que se tiendrait le conseil, & elle estoit toute esmerueillée de la singuliere beauté des dames qu'elle voyoit là principalement comme elle leur dist, de Diane, Daraide, Leonide, Garaye, & sur toutes de celle de la pucelle Fortunie qui lors ataignoit les douze ans. Pareillement se trouua esbahie de la gentillesse, belle taille & dispositiō seigneuriale des Princes. Le Roi apres auoir fait la consultation ioyeuse sur la lettre de Penthasilee avecques les Seigneurs & Dames, dist en souriant: Hé comme ce bon Dieu nous adoucit noz miseres & calamitez par ces gracieux entremets d'honneste plaisir nous enuoyant apres tant de durs & furieux Cartelz de champions ennemis, de tant souefues & amiables lettres, de si belles & vertueuses Dames. Lors commanda la responce à vn de ses secretaires, laquelle il feit bailler à l'Amazone qfut rappelée & s'agenouillāt deuant le Roi print cōgé de lui & de toute la noble assistance d'une si gaye façon & air du pays qu'ilz en demeurerēt tous

ualiers, tant de belles (ie dy) tresbelles Dames que ce ne semble pas vne cour ains vn vray Paradis & assemblée de Dieux & deesses. Ha mes Dames ce n'a rien esté à vous de les auoir choisies de loing comme de vostre eschafault és creneaux de leur Tour quand vous estiez ces iours cy iuges du camp, ce sont choses à veoir & contempler de pres pour y asseoir vray iugement. Pentasilee & Calpendre estoient rauiz d'admiration par ce rapport de leur gentille meslagere, esueillée au possible & qui n'auoit le bec gelé. A tant decachetent & ouurent la lettre, baisans l'une & l'autre le seing de ce precieux nom d'Amadis, par veneration : puis la leut la Princeesse qui la langue Grecque scauoit, & plusieurs autres, dont estoit telle la teneur.

Amadis de Gaule Roi de la grand Bretagne, &c. A vous tresillustre, tresvertueuse & tresbelle Dame Pentasilee Princesse d'Inde & de tout l'enclos du grand fleuve Ganges, Salut. La gloire que par vostre lettre vous attribuez à mes faits d'armes si i'y consens aucunement, ce sera à raison de l'honorable main dont elle vient, qui tant ayme & reuerse la vertu que pour petite qu'elle soit, elle l'exalte iusques au ciel. Mais telles qu'e peuvent estre mes œuvres elles reçoient leur iuste estimation d'estre acceptees & tenuës de vous pour agreables. Au sur plus quand à l'ordre de cheualerie que desirez receuoir demain, ie le tiens à grand heur & honneur en esperance de conuoir des triumphes, qui par voz mains seront conquis. Ce qui sera par moy accompli tresvolontiers au premier iour qu'il vous plaira mais auecques peu de secreté pour nous de vostre beauté souveraine.

La lettre leuë, on commanda aussi
N tost

toit de donner ordre à tout l'equipage necessaire en ce cas pour le iour ensuiuant en tel triomphe que vous entendrez presentement.

De l'ordre de cheualerie qui fut donné à l'excellente Princeesse Pentasilee de la main du Roy Amadis de Gaule, au plus sumptueux & magnifique triomphe qui eust iamais esté veu: puis du combat accordé entr'elle contre la Roynie Alastraxeree & la Roynie Calpendre contre Agefilan.

CHAP. XL.

L'Aurore pourprine faisant peu à peu disparoïr les nuës obscures par my la spatiofité de l'air anonçoit la venue du rayonnant Febus lui marchant presque sur les talons, quand la Roynie Calpendre & la nompareille Pentasilee sa fille se leuerent pour s'atourner en la magnificence qu'elles auoyent pourpensee & ordonnee, qui vous sera descritte briuelement. Le lieu de la descente estant assigné en la grande & spatieuse plaine qui estoit entre les deux camps des Mores & des Chrestiens, premierement marcherent vingt mille Amazones toutes motees sur leurs Licornes, desquelles les chanfrains estoient garnis de pennaches de diuerses couleurs comme aussi les armets des femmes: desquelles les dix mille premieres estoient armees à la legere, avec laces gaies, & leur arc & trousses de fleches la pluspart dorees, monteës sur legeres Licornes: les dix autres mille cheuauchoyent des Licornes plus puissantes à bardes biẽ dorees avec les grosses laces sur la cuisse, fournies de banderolles de taffetas au bout, q̃ pour ce iour estoÿẽt toutes mornes non à fer emoulu. Bien vous sauez sans vous en faire pl^{us} long discours, que l'on leur brusle en basage les mammelles droictes pour ne les empescher à coucher les lances. C'estoit vn grand plaisir de veoir vndoyer par le

vent leurs guidons & enseignes de taffetas avecques les figures & deuises ou l'or n'estoit point espargné, deuant lesquelles sonnoÿẽt les atabales & anafles instrumens de leur cõttee. Apres ces vingt mille premieres Amazones venoit le char triumphal tiré par quatre Rhinoceros, animaux d'Etiopie qui combattent les Elefans, longs de dixhuits pieds, & haults d'vnze avecq leurs gros nez rebroucez. Duquel char les rouages, limons & tout l'attelage estoÿẽt reueffus de lames d'or, & enrichis de moulures, frises, cornices & autres ouurages delicats. Mais au deuant d'icelui marchoyẽt de ieunes filles Amazones, leurs pages du costé droit toutes vestues de toille d'or, montees sur des plus belles Licornes de toute la troupe, enharnachees de mesme, les vnes portãt les mortions des Roines, grauez d'or brasé, les autres les rodelles, les autres leurs arcs & trousses. Et du costé gauche autant marchoyẽt de ces pages feminins portãs les manteaux & chappeaux Royaux, & les coffrets ou escrins aux bagues: pour mōstrer le double equipage de ces Roines l'vn conforme à leur sexe dont elles vsoÿent en tẽps de paix, l'autre viril conuenable à leur exercice de gnerre. Apres ces pages marchoyent, les sept belles Roynes leurs vassales deux à deux, toutes vestuës de draps d'or, leurs Lycornes caperaçonnees de mesme, les vnes portans les gantelets les autres les armets courōnez couuerts de mantelets, les autres les espees de parade en escharpe, les dernieres portans toutes les espees nuës en leurs mains. A leur queue venoyent leurs Licornes de parade couuertes entierement de caperaçons de velours pers semez d'estoilles d'or trait, trainãs en terre & estoÿẽt menees par deux Amazones escuieres d'escuirie à pié. La septiesme ieune Roïne portoit vn guidon auquel estoit pourtrait d'vn costé vn corps my party du Dieu Mars & de la deesse Venus, & de l'autre

l'autre à vn miroir attaché vn arc turquois avecques deuises à l'entour en leur langage sonnât HERMAPHRODITIQUE VALEVR.

Les maïestez de la Roïne Calpendre & de la Princesse Pentasilee estoient assises en ce char triomphal, la mere à la dextre, la fille à la fenestre. Elles estoient armées chacune de riche harnois, celui de la Roïne poly & subtilement gravé, surgetté d'or dans la graueure qui causoit diuers lustres, celui de la Princesse estoffé d'argent & relief. Le saye à Pentasilee estoit de drap d'argent frizé, garny de dessus d'un l'arge bord de frisons de canetille d'argēt à les chiffres & deuises, le surplus du saye es coupures r'attaché de boutons & guippures de mesme, doublé de toile d'argent : celui de Calpendre estoit tout de mesme façō, mais toute l'estoffe & enrichissure de drap, toile & boutons d'or, comme aussi furent différentes les ferrures & garnitures de leurs espees & ceintures, le chapeau de la Princesse fut de toile d'argēt, celui de la Roïne de toile d'or : leurs courōnes pendoient au dosier du char vn peu plus haut que leur chefs enrichies de tāt de pierrerie de Rubis, Diamās, Emeraudes & les pennaches d'algrerte de leurs chapeaux femez de tāt de perles, avecques vne enseigne en celui de Pētasilee d'un grand Diamāt d'ineestimable valeur que le lustre de sa blanche polie & reluisante face avec le bril estincellant de ces deux beaux clairs jeux, sembloient combattre à l'eclat de l'or, argent & pierrerie. Ceste pōpe estoit si magnifique & sumptueuse, qu'elle sembloit plus vne droite faerie q̄ chose humaine. Apres le char venoit l'arriere garde contenant autres vingt mille Amazones, c'est-à-sauoir la moitié armées à la legere, & l'autre de femmes d'armes en tel ordre & equipage l'auāt garde precedēte. Les deux cāps estoient tous ententifs à regarder ce ra-

re & digne spectacle pour le plus beau qu'ilz eussent oncques veu en leurs vies fust-ce es entrees & couronnemens de leurs Empereurs ou Rois. Or quand le char fut arriué iusques à la place assignee, les Princes Chrestiens allerent au deuant monter sur braues courriers, armez de toutes pieces fors les mains & le chef qu'ils eurent couuert de riches chapeaux empēnachez d'Austruche, reuestus de cottes d'armes de drap d'or ou d'argent ou velours de couleur ricamez precieusement de broderie. L'auantgarde des Amazones s'ouurit à leur donner passage, avecques salutations & reuerences deuës, & leurs phifres & tabours deuant, approcherent le char sur leurs gentils courriers bondissans & voltigeans à plaisir. Puis ostans leurs chapeaux, leurs baisèrent les mains, & le Roy Amadis accompagnant Pentasilee & l'Empereur Esplandian costoyant Calpendre & les autres ieunes Princes les sept Roines les cōduirēt iusques au lieu preparé, qui estoit comme vn droit palais fait & drēssé de tress, tentes & paillōs. Estās là arriuez, ilz firent aux Princeses estrāgeres tout le racueil conuenable à leur grandeur : mais bien confessoient que la magnificence de leur pompe auoit de trop passé celles qu'ils auoyēt autrefois veues d'autres magnifiques Roines, comme de Calasie & de Pintiquinestre à leur arriuee à Constantinople (descrite en la septiesme partie de ceste histoire) & de la tresillustre roïne Zahare & d'Alastraxeree quād elles vindrent au secours du Prince Lucidor des vengeance, dont la dixieme partie a fait mention. Le compte icy ne sera plus long de toute la ceremonie qui fust obseruee en ceste reception, sinon du ioyeux propos qui fut tenu par le Roi Amadis à la belle Pētasilee sur l'occasiō du dieu cupidō d'or massif qu'il cōtēploit en chemin au sōmet du char, ayāt plusieurs Rois & Princes abbatus de ses fleches les vnes d'or barbeles, les autres plōbeles

à ses pieds. Madame (dist le Roy) ie ne sçay si nous vous deüons remercier de l'honneur que nous faites, de vous transporter vers nous, ou plustost que nous en plaindre & doulour: dequoy Pentasilee lui enquerant la raison. Par ce (respondit) que ie crains que ce soit vne mennee de trahison du Roy Bultazar, lequel cōnoissant de ne no^r pouuoir vaincre & subiugner par force d'armes, nous ourdit ceste trame pour nous dompter par vostre exquisite beauté. De laquelle ie ne sçay cōme l'ardeur de la ieunesse de noz Princes ne s'embrasera viuemēt, quād ie sens par elles attirer en moy les reliques des petites flammeches que l'aage me peut auoir laissées. Ainsi sembleroit que le Roy de Russie nous brasserait ceste ruse semblable à celle des antiques grecs en l'inuētion de leur cheual de bois, par lequel ils prindrent Troye. A quoy la belle Princesse en soubriant respondit, qu'elle en premier lieu ne desiroit pas la ruine & destructiō de ceux à qui elle s'adressoit si volontairement.

Quant à sa beauté que si haut il louoit, qu'ilz ne l'auoyent à craindre en la cité où ils estoient pratics de trop plus belle qu'elle, selon le raport de sa messagere. A à, dit le Roy alors, vostre discretion & eloquence empennē terriblemēt les fleches de vostre beauté dont vous representez icy ce dieu Cupidon naurer les Rois & Empereurs: de sorte que no^r tomberions encore de sieure en chaud mal, & ne doutons point que ne dressiez tels troffees de noz depouilles. Apres ces plaisans & gracieux deuis, temps fut d'exploiter l'affaire dont estoit question. Parquoy l'Empereur de Romme Arquifil les receut en son pauillon Imperial (sur lequel pendoyent les armes de l'aygle double de sable) ou Pentasilee qui auoit fait sa veille le iour precedent en priere enuers ses dieux à la mode de sa religion s'enclina humblement deuant le Roy Amadis. Alaquelle il demanda:

Belle Princesse selon la coustume de vostre region vous plait il receuoir l'ordre de cheualerie, ouy (Mōseigneur dit elle) Iurez doncques (dit Amadis) que bien & droictement la maintiendrez sans faire tort n'y iniure à personne, ains soustenant le droit des affligez mesmement des Dāmes & Damoyelles. Cela vous promets-ie & iure (dist la Princesse.) Et en ceste foy (dist le Roy en lui donnant l'accollée) ie vous fais cheualiere au nō de Dieu qui tout crea, le suppliant vous pourueoir d'autāt de force & vertu qu'il a desia mis en vous de beauté & bonne grace. Apres qu'il lui eut doncques de l'ēspée d'armes (qu'elle lui auoit presentee) donné du plat sur l'espaule: Or pouuez desormais (dit il) prendre le reste des armes de qui les aurez plus agreables. A ceste parolle iettant sa veuē sur l'Empereur Amadis de Grece, le requit de lui ceindre l'ēspée, puis à sa requeste Florisel lui enlaça l'armet. Rogel lui pendit l'escu au col, Filisel lui chaussa les esperons: chacun d'eux s'y employant fort volōtiers pour l'extreme perfection qu'ils voyoyent en elle. Ce fait les Princes & Princeses eurent hors les pauillons force belles chaires à s'asseoir: lors sonnerēt vne infinité d'instrumens gros & gresles qui resiouirent la compagnie, & firēt pa-reillemēt entēdre à l'armee des Amazones q̄ la ceremonie de l'ordre estoit accōplie. Parquoy se mit leur auant-garde à faire vn tournoy contre l'arriere garde dont les sept Roines estoient capitaines: lequel commēça aux lances mortes dont innumerables esclats voloyent en l'air, & femmes & licornes par terre, les autres y vserēt des arcs à fleches sans fer, toutēfois y en demeura grand nombre de blesees & mehaignees. Ce qui meut l'Empereur Arquifil de dire à la Roine Calpendre assise pres de luy, que c'estoit vrayement vn exercice trop rude & violent pour ieu, trop peu pour faire à bon escient. Et le plus grand dommage y ad-

y aduînt entre les licornes qui s'entrehurtoient dangereusement de leurs cornes, dont elles offensoient grandement les cheuaux & autres bestes en bataille. Ce tournoy & behour fut fait par les Amazones de fort gente grace, iusques à ce que la Roine Calpendre pour ceste occasion leur fit cesser : & les bataillons s'allèrent reniger en leur ordre au son de retraitte de leurs anaquils. Adonc la belle Pentasilee se leue & va vers Alastraxeree qui estoit là armee comme les autres Princes en la presence desquels elle luy commença à dire : Madame pour employer chaudement l'ordre que ie vien de receuoir de si excellente main, i'en veuls aussi adresser le coup d'essay en bõ lieu. Dont meilleur ne me semble pouuoir trouuer qu'en vostre endroit, mesmement de dame à dame, suiuant le premier pourparlé que nous en fîmes en l'e chautout ou nous estions iuges ensemble du premier combat : avecques les gages qu'à ceste fin nous entre-donnâmes. En vertu desquels ie vous requiers de rechef Madame d'accepter mon deffi, non pour mal ou deplaisir que ie vous pretēde, ains seulement par honneste ialousie sur la generosité de voz faits & haute renommee que ie desirois m'approprier par la victoire, si mon bon heur me la veut attribuer. Mais quelques gages que nous soyōs lors entrebailliez, par ce que ie n'estois pas en estat de pouuoir contracter & conuenir de fait d'armes, main tenant que i'y suis paruenue, ie vous presente de nouveau mon gage : ce disant lui rend vn de ces gants pourfitez d'or, & parfumez, lequel Alastraxeree print en lui respondant : Ma belle Dame bien suis-ie memoratiue de tout ce que mettez cy en auant. Mais i'eusse volontiers souhaitte que l'eussiez mis en oubli : toutesfois puis qu'ainsi vous plaist, ie ne vous ose pas refuser. Soit donques nostre combat à demain le matin sans plus long delay, en ce propre lieu avecques

les seuretez requises d'une part & d'autre. Ce dist, elle se r'assit en sa chaire, & la Roine Calpendre se leua de la sienne avec ce langage. Il ne me semble pas raisonnable Messeigneurs ne bien leant à moy que voyant ma trescherie fille s'exposer au travail, ie mē tienne en ieux & delices. Pource quiconque voudra prendre mon gage, le voila, & elle iette vn gâtelet qu'elle s'estoit fait apporter expres, en la place. Adonc se leue le Prince Agefilan sur les pieds & le va saisir, disant : Plaise à voz hauteesses me pardonner ceste presumption d'auoir emprins ce combat sans vostre conge & licence : d'autant que voyant la mere y accompagner sa fille, il me sembloit aussi d'auoir droit par dessus tous, que comme filz ie y tinisse compagnie à la mienne. Chacun le trouua fort bõ : Et ainsi estant accordé la Roine & la Princesse sa fille prindrent conge iusques au lendemain, remonstrās en leur char triumphal, & retournans en leur cāp en pareil ordre qu'elles estoient venuēs, & les Princes estrangers demeurans en leur camp, les Grecs r'entrans de dans leur cité.

Comme passa le combat singulier de Pentasilee contre Alastraxeree, & d'Agefilan contre Calpendre, & de l'issuē d'iceluy en cōfederation & amitiē entr'eux.

CHAP. XLI.

LE iour ensuyuant commençoit à poindre fut cler & serain par la volonté de Dieu comme pour fauoriser ce combat qui deuoit tourner le mal en bien & au prouffit de la Chrestienté. La Roine Calpendre & Pentasilee ne furent paresseuses à se leuer pour aller faire leurs armes. Lesquelles vindrent au lieu assigné en leur char triumphal en toute telle pompe, que le iour precedent fors de que la grāde suitte de leurs Amazones dont elles n'amenerent que mille d'elite,

delite, avecques leurs six Roines portâts leurs armets, escus & lances, la septiesme estant esleue pour iuge du camp avecq mille femmes pour la garde d'icelui. Alastraxeree & Agefilan son fils, pour observer les bonnes, & louables coustumes plus que pour crainte qu'ilz eussent du danger (qui ne tomba iamais en leurs cueurs) se mirent en bon estat de Chrestiens s'armant ainsi des armes spirituelles anât que de celles du corps. Les deux camps vindrent d'un costé & d'autre au spectacle comme rare & nouveau entre des dames. Et y fut le premier plaisir des Amazones qui firent vne course de six reings en guise de palisade, & estant d'un costé vne ouuerture comme vne porte. Apres laquelle la Roine Calpédre se vint presenter & la Princesse Pétasilee armee de forts & riches harnois, ayant speciale ment la Princesse la cresse de son heaume en figure d'un fier dragon à gueule bee. A l'arriuee, la Roine Alastraxeree, & le Prince Agefilan saluerent leurs belles ennemies gracieusemēt, comme aussi fit le Roy Amadis qui fut iuge du camp de leur costé, & tous les autres Princes, qui portoyent par honneur les armes de l'une, & de l'autre. Car ce n'estoit pas un combat entrepris à outrance, ains plustost vne iouste & escrime.

Or estans là venuz les quatre champions ils furent mis dans le camp par les iuges, le soleil my-party, puis le silence fust imposé par le cry accoustumé, la trompette sonna & la Royne Calpendre tenant son arc & trois fleches, en entayse incontinent vne contre Agefilan, qui luy perce l'escu & le haubett, mais ne luy entame point la chair. Lors met les autres ius, & empoigne sa lance courant contre luy de toute la force de sa Lycorne : sur lequel elle rompit sa lance, sans toutes-fois le mouuoir de la selle : & luy au rencontrer haulse le bois ne la voulant ferir. D'autre costé

Penthasilee brocha contre Alastraxeree de telle randon qu'elle luy fit perdre un des estrieffs, sa lance volant pareillement en eclats (car la Princesse estoit pour son aage de fort belle taille & roide de nerfs nonobstant la delicatessē de sa charnure) Alastraxeree au ioinde fit alte semblablement de son bois: mais la Licorne de Penthasilee donnant de droit fil contre le chanfrain de son roucin, sa corne luy glissa en l'œil qui lui passa de l'autre part de la teste. Ce que sentant Alastraxeree, se lance à terre de peur d'estre chatgee de la cheute du cheual, lequel ne tarda gueres à cheoir apres. Comment Alastraxeree luy dist: Penthasilee) ne m'vsez point de ces gentilleses, car ie ne vous en sçay point de gré, voulant par ce moyen acquerir plus grande gloire sur la mienne. Belle Princesse (luy respond) exploitez en ainsi que l'entendez: mais ie ne me departiray du respect que ie doibs à vostre excellence & beauté. Lors mettent les mains aux espees & la pucelle descend de sa Lycorne, voyant son aduersaire à pied. Mais Calpendre & Agefilan de leur costé s'escrimoyent des leurs à cheual, les deux Amazones dechargeant de grands coups sur leurs ennemis, qui n'y faisoient que parer de leurs escus & espees. Dequoy Penthasilee malcôtete vient ferir de toute sa puissance Alastraxeree sur l'armet, disant: maintenant vous sentirez Royne de Colcos dequoy vous seruironz voz honnestetez & courtoisies. Lequel coup fut le plus pesant par sa confession, qu'il luy souuint auoir soutenu depuis celui que lui auoit donné Florisel son cousin en un combat qu'ils eurent ensemble, tellement qu'il luy en conuint ployer un genouil en terre. Et elle luy donnoit aux occasions vne fois à autre du plat de son espee, en telle sorte qu'elle ne peult eiter en se maintenant tousiours es simples termes de se deffendre sans offendre, qu'elle n'y receust quelques petites playes.

De-

Dequoy commença Pentasilee à la gaudir par la veüe de son sang, disant qu'à la fin par tant d'assaults elle irriteroit sa patience. Si recharge si brusquement que son espee se brise en deux pieces (au grãd plaisir des Princes Chrestiens qui en redoutoyent aucunement l'issüe) considérans la gaillardise de l'Amazone & la perseuerance d'Alastraxeree à ne la vouloit offenser. Lors se voyant Pentasilee degarnie de glaive veult aller saisir son champion au corps, qui estoit par raison d'age trop plus fermie de reins. A ceste cause se destourne vn peu à quartier, & prenant son espee par la pointe, luy dit: Si vous eites (belle Princesse) si desiruse d'epandre mon sang, tenez ma propre espee pour en faire le sacrifice q. n'est deu à autres mais que les vostres. Aux dieux ne plaise (respõd elle) que gagniez ainsi double victoire sur moi, la premiere des armes, la secõde de courtoisie, puis qu'ils vous ont voulu ottroyer tel auantage sur moy: or receuez ce qui me reste de mon espee en signe de l'honneur que vous emportez: qui n'est pas chose estrange que celle l'obtienne sur moy, qui ne trouua iamais en tout le mōde qui la peust vaincre. Adõc flechit vn genouil lui presentāt celle piece de sa lame, & Alastraxeree son espee, s'être deferāt le los du cōbat à qui mieux mieux. L'vne disant qu'on l'auoit espargnee sans y employer l'effort, l'autre qu'elle lui auoit premier quitté l'auantage de sa monture ayant mis pied à terre volontairement contre elle qui l'auoit mis par contrainte: la pucelle repliquant que c'estoit mal-heur des cheuaux non à imputer aux personnes. Dõt elles de ce discord entrerēt en accord & amitiē cordiale ensemble, qui onque puis ne fut separee, ainsi que par le cours de ceste histoire vous sera manifeste. Or sus allon (dit Pentasilee) departir ces cheualiers à fin que ie deliure ma procreatrice des mains de vostre creature. Allon (respõd Alastraxeree) combien que notoire soit

l'auantage que tient vostre mere sur mō fils. Aussi chargeoit Calpendre, Agefilan & poursuuiuoit de toute sa force celuy qui n'entendoit qu'à se deffendre d'elle & luy rabbatre ses coups: dont il auoit son escu fort depeché & le sang luy sortoit de quelques endroits de son corps: Calpēdre estant de son costé si lasse que plus ne se pouuoit tenir en pieds. Alors viennent les deux Princesses sans pair se mettre entre deux, les priant de vouloir cesser leur cōflit à leur requeste: lequel il falloit tourner en vraye & parfaite amitiē pour l'auenir. Alors Agefilan se retire arriere, & veult offrir pareillement son espee à la Roine se confessant vaincu, & elle à luy la sienne auecq' semblable protestation dont ils se vindrent à la fin à embrasser par amiable concorde. A tant sont mis hors du cāp par les iuges, le Roi Amadis & les autres Princes chrestiens demonsttrans euidentement le plaisir qu'ils auoyent d'vne dure assemblee cōuertie en tant heureuse issüe. Parquoy ils obtindrent de la Roine & de sa fille de soy venir rasrechir en la cité: elles cōmādant à leurs Colōnelles de se retraire en leur camp: en quoy elles n'vserēt d'autre changemēt à l'occasion de ceste nouuelle alliance que de ne s'employer du tout pour vn party ne l'autre. Arriuez à la ville Alastraxeree & Agefilā furēt soudain desarmez & pēsez de leurs blessures qui n'estoiēt pas fort grieues, & de Pētasilee pas ne fault demāder quel racueil lui firent les Dames de Constantinople, à raison de celle parfaite beauté asloocie de telle disposition & prouesse en si tendre aage qui n'excedoit pas les douze ans, mais à qui elle pleust, sur tous le beau Damoyse Sylues de la Selue en fust extrememēt rauy: Cupidon prenant son passietēs sur ceste ieune & tēdre couple à décocher sur luy vne de ses amoureuses fleches, dont fut la playe si profonde en son cueur que nul vnguent humain ne fust suffisant à la guerir: nom-

nom plus que celle qu'il liura tout d'une tire à la tresbelle Princeſſe par leurs mutuels regards & deuis, qui luy cauſa de cruelles paſſions, comme l'hiſtoire en ſon progrez vous rendra plein teſmoi-gnage. Ce que nous remettrons à ſon temps, pour compter ce que les Payens firent en haine de ceſte confederation, & amitié qu'ils veirent contractee entre la Roine & Princeſſe, & les Chreſtiens.

De l'ennuy que receurent les Payens de l'amitié de Calpendre & Pentafilee avecques les Chreſtiens: & du deffy qu'en hayne de celes trois Geans des Iſles Cyclades manderent à la mere & la fille, qui fut accepté par elles avec vn tiers.

CHAPITRE XLII.

IL ne ſeroit poſſible d'exprimer le deſplaiſir que receurent les payens de l'amitié conciliee à leur veu & ſceu entre la Roine des Amazones & leurs ennemis. Sur quoy ilz entrerent en conſultation, ſe plaignant grandement d'elle le Roy Bultazar, qui eſtoit venuë à leurs ſecours, puis leur auoit faulcé la foy. De quoy lui ſembloit expedient d'en faire brief chaſtiment pour ne laiſſer les Chreſtiens coniouir long temps de ceſte nouvelle alliance. Sur quoy ſe leua le ieune Calife de Noy en ſe decourant, puis ſe ralleid en ſon ſiege, diſant pour ſon opinion: Si la fortune (trespuiffant Monarque & vous Seigneurs, & vaillans Cheualiers) vſe de ſon droit & ne corrompt du tout ſon naturel, apres tant de faueurs qu'elle a preſtees aux barons de Conſtantinople, elle tournera quelques fois ſon bon viſage vers nous, nous montrant ſon front cheuelu pour la prendre au poil. Car ie n'eſtime pas qu'elle les ayt exaltez ſi haut au ſommet de ſa rouë ſinon pour leur donner d'autant le ſaut de cheute plus lourde: elle qui chatouille ſouuent ceux qui s'endorment en ſon

giron, pour apres leur couper la gorge. Auſſi les viſtoires (Seigneurs) retombēt ſouuent à la ruine de ceux qui les ont acquiſes & au bien & profit de ceux qui en ont ſenty la perte. Ce que ie ne mets icy en auant pour aucune crainte q'aye d'eux (choſe trop eſlognee de mon courage, veu la belle armee que nous auons encore remplie de tant de preux & hardis cōbatans: mais i'eſpere en noz dieux que dans quatre iours la verité en ſera connuë. Vne ſeule choſe vous requiers que m'ottroyez de faire la punition de ces faulſes Amazones par vn deffy en cāclos ma perſōne avecques mes deux couſins contre Calpendre, Pentafilee & tel cheualier qu'elles voudrōt aſſocier pour vn tiers. Car mon cuer ne peut ſouffrir telle laſcheté comme ſe deuant noz yeux qu'elles ayent nō ſeulement voulu prendre l'ordre de cheualerie de la main de noz mortels ennemis, ains oſé faire paix & confederation avec eux. Ce dit, il ſe teut, & le Roy de Ruſſie print la parole, le remerciant au nom de toute l'aſſiſtēce de ſon magnanime vouloir, lui accordant le ſaufconduit & toute autre ſeureté en ce cas neceſſaire car bien cognoiſſoyent la haute cheualerie de ce Calife nouveau de Noy & de ſes deux parens demy Geans, qui n'auoyent leurs pareils en prouēſſe & vaillance en tout le Sarraſineſme. Parquoy il depeſcha ſur le champ vn cheualier avecques ſon cartel lequel paſſant par le camp des Rois chreſtiens, fut conduit en la cité ou la Roine Calpendre & ſa fille eſtoyent: laquelle trouuant en la grāde ſale du palais avecques les Princes & Dames, ſans autre reuerence il le lui preſenta. Si fut leu tout haut par Pētaſilee, puis expoſé aux Princes Grecs eſtant de telle ſubſtance.

Cartel du Calife de Noy. &c. à la Roine Calpendre, &c.

Valandos grand Calife de Noy nagueres

guerres cree par la succession de mon Royal frere assassiné malheureusement en la campagne Gregeoise. A toy Calpendre iniuste detentrice de la courone des montaignes d'Inde & des ruisseaux de Ganges.

Le sang fraternel epandu par les trahistres Grecs dont tu t'es nouvellement accointee, iour & nuit me crie vengeance & à ses autres proches parens. Mais la commune cause de la loy de noz Dieux que tu as vendue & ta foi que tu as violée & mentie & ta fille semblablement, nous irritent particulieremēt contre toy & elle, à vous faire cherement comparer ceste detestable infidelité, de vous ioindre à noz aduersaires & de laisser le secours, duquel à noz dieux estes redeuables. Ce que pas ne fit la vaillāte Pētasilee venue à l'aide des Troyēs, de laquelle ta fille est indigne de porter le nom, pour ses euers contraires au renom de celle de qui le los dure & durera par le monde en perpetuelle memoire. Pourtant ie dy que vous deux avez commis acte de trahison & deloyauté : ce que ie maintiendrai avecques mes deux hardis cousins Balart & Baluerd contre vous deux & tel cheualier que voudrez choisir. Le camp sera entre les deux osts, le iour, à demain à la diane, avec armes vītees : la seureté vous porte ce cheualier de nostre part si vous luy en osez deliurer de la vostre.

La Royne Calpendre & Pentasilee furent esmerueilleusement fachees & esmuēs par le cartel du Calife, dont elles dirent & iurerent par leurs Dieux au cheualier, que leur intention estoit de ne porter les armes en ceste guerre pour vne part ne l'autre, combien qu'elles eussent assez de regret de ne supporter le bon droit & la iustice. Lors appella vne de ses Amazones à qui elle commanda en sa presence d'aller faire plāter son ost ioinquant la cité : & faict sortir de la sale

le Cheualier pour luy depescher sa response, mais le gentil Prince Sylue de la Selue qui anoit entendu la teneur du cartel de deffi, estant alors de l'aage de quinze ans, rapportant en toutes choses nayement, du port, de la face, de contenances iusques à la marque de l'ardente espee à l'Empereur Amadis de Grece son pere, s'enclina de genoux deuant luy le suppliant luy vouloir octroyer vn don lequel de la grand amour qu'il luy portoit, le luy accorda promptement. Le dō Monseigneur que m'avez octroyé (dit il) est de me donner congé de receuoir l'ordre de cheualerie de la main de ceste belle Princeesse Pentasilee, à fin que ie luy puisse seruir de tiers en ce combat. Ay Sylues mon mignon (respond l'Empereur ia mal-content de son octroy) ne cōsiderez vous pas bien que l'aage vous denie ce à quoy le cueur vous enhorté, vous me reduisez es termes de Febus enuers Faeton son fils. Monseigneur, dit le Damoyse, conuient il pas que la figure de si hault Prince demonstre le Karat de sa valeur ? & ainsi l'espere-ie en Dieu. Amadis qui le contemple & veoid si biē proportionné de ses membres & de si belle taille, le baissant en la face luy respondit : plaie à Dieu mon fils (car tousiours ainsi le nōma, bien qu'il n'en publiast le secret) que voz faits portent témoignage de vostre sublime naissance : Ainsi ie prie ceste excellente Princeesse vous vouloir honorer de cest ordre d'autant qu'il vous y pourra venir quelque faueur de son extieme beauté. Fort agreable fut à toute la compagnie de veoir armer cheualier celui de qui tant de grādes choses estoient chantees par les prophetes : fors qu'à la Roine de Thebes Rīnistee sa mere qui craignoit la tendrētē de son aage : mais puis qu'elle veid qu'ainsi plaisoit à l'Empereur son Seigneur elle n'insista au cōtraire, ayant tousiours rengé sa volonté à la sienne. La tresbelle Pentasilee le regardant de bon œil

O

rougit

rougit des louenges qu'on lui attribuoit & d'autant enrichit la viue couleur nuât la blanche face. Mais bien plus lui enflamba le cueur l'honneste desir qu'adreffoit à elle si belle, si beau ieune Prince conforme à son aage. A qui de pareil amour & parolle respondit: Beau Damoisel icy y en à d'autres de qui à plus iuste tiltre vous pourriez receuoir ce que voulez de moy: mais puis que tel est vostre vouloir, ie ne quiers faillir à la iouissance de telle gloire: sur quoy le gentil Prince s'enclinant reueremment lui baïsa les mollement grossettes mains par demy force. Ce fait, la response au cartel fut depeschee & soudain deliuree au messager: lequel ne tarda de l'aller rédre au camp à son maistre, qui la fit lire estant escripte en telles parolles.

Response de Calpendre, &c. Au cartel de Valendos Calife de Noy, &c.

Calpendre & Pentasilee Roines d'Inde la maieur avec tous les haults mons qui l'ombragent & les sept bras du fleuve Ganges qui l'arrosent. A toy Calife de Noy. I'ay veu ton cartel iniurieux & diffamatoire par lequel tu taxes iniquement l'honneur de moy & de ma fille: auquel ie ne respondray autrement sinõ que i'en espere prendre, bonne & brieue vengeance: & telle que ton outrage geantail m'exige & que ie doy à l'estat que ie tiens. Ie ne m'estendray en plus ample langage, remettant à celui que ie m'attends de rescrire de la plume de mon espee mouillee en ton sang. Le iour soit & le camp comme tu veux. Les seuretez ne defailleront point.

Le Calife Valendos & ses deux cousins furent merueilleusement outrez de colere par la lecture de la response des Amazones, bien entalentez de la leur faire cognoistre l'endemain par effect.

Comme le ieune Prince Sylues de la Sele ne fut armé Cheualier: & apres entra au combat contre Valendos & ses deux cousins Brannart & Baluerd, avec Calpendre & Pentasilee, & à quel succez.

CHAP. XLIII.

LE combat doncques ainsi accordé combien que contre l'aduis du Roi Bultazar (comme vous avez peu comprendre par son discours precedent sur la bataille generale) ne trouuant bon de hazarder en peu de gens la reputatiõ de tous & que plus leur falloit confier en la multitude dont ilz surmontoient leurs ennemis: mais les autres l'y firent condescendre encore pour celle fois, remonstrans que c'estoit contre des femmes qui ne dureroient deuant eux nom plus que feroit de la paille au feu.

Or apres le partement du messager, la nuit survenue le Prince Sylues de la Sele alla faire la veille accoustumee en la chappelle Imperiale, ou la Roine Oriane & les Emperieres & Princesses l'accompagnerent par honneur, prians dieu lui vouloir bien-heurer l'ordre ou il aspireroit, à si glorieux euenemens que les propheties d'Alquif & Vrgade & autres lui promettoient. Lesquelz estoient encore en la cité non moins honnorez & reuerrez que s'ils eussent esté vrais Princes. A iour poignant se leuerent tous les Seigneurs de Costantinople, & la Roine Calpendre & la Princesse Pentasilee des premiers, qui vindrent en la grande sale du palais armees de toutes pieces fors le chef & les mains. Lors se presenta le damoisel Sylues deuant Pentasilee avecques reuerence qui lui demanda s'il vouloit estre cheualier: à quoy il luy respondit que c'estoit le plus grand de ses desirs. Lors elle luy bailla l'accollee & le baïsa en la ionè (pour son honneur) exigeant de luy les sermens accoustumez, puis luy



luy dist : Beau Damoyfel vous voila cheualier de ma main, ores vous est loysible de prendre le surplus de telle autre qu'il vous plaira . Vueille la diuine puissance faire paroistre en vous autant de vertu qu'elle y a mis de beauté, qui puisse redonder à mon honneur & à l'augmentation de la maison de Grece. Tout ce ne fist & dit la pucelle sans monstrier par la nouvelle couleur de son beau visage l'emotion que son cueur souffroit de l'amour du Damoyfel, lequel luy respondit. Ceci espere-ie Madame, & quoy que ce soit, le tout est voué & dedié à vostre seruicé. Si vous supplie Madame me recevoir pour vostre Cheualier. Ainsi qu'elle vouloit respondre, la suruenue de la belle Fortunie entrerompit la parolle, laquelle le Roy Amadis enuoyoit pour luy ceindre l'espee. Ce qu'elle vint faire de la bonne grace qui accompagnoit desia toutes ses petites actions, avec l'amour que comme seur elle lui portoit. Adonc les menestriers sonnerét à plaisir, non sans ennui de Pentasilee qui n'auoit eu le moyen de satisfaire au dernier propos de Silues à l'occasiõ que tous & toutes le venoyét arraisonner. Ce fait les dames monterent sur leurs hacquenees, pour aller aux tours de la ville les plus

prochaines du camp pour veoir le combat des creneaux: entre lesquelles la Princesse Amazone mena de resne la pucelle Fortunie son parangon: de qui la beauté fut si souueraine que le nom luy en fut imposé de Basilic du genre humain (cõme par le discours de l'histoire amplement apparoistra.) Ces deux pucelles sembloit proprement que nature eust forgee en vn mesme moule, rompu apres pour n'en laisser veoir de pareilles au monde. Estans doncques les Princesses conduites au lieu de spectacle nõ sans plusieurs deuis gracieux par le chemin: les trois combatans, Calpendre, Silues, Pentasilee, sailirent hors de la ville accompagnez des Princes & redoutez Cheualiers qui leur portoyent leurs armes, & arriuerent à l'heure que leurs aduersaires venoyét & tout l'ost quand & quand pour veoir leur bataille. Les Amazones eurent la garde du camp, incontinant les iuges y mirent le Calife & ses deux cousins dedans, & apres la Roine, sa fille, & Silues de la Selue duquel chacun estoit esbahy, de veoir en lui si grãde beauté avecques telle stature pour son aage. Or leurs armets enlacez, les iuges sortirent & en aussi grand silence du peuple, comme s'il n'y eust eu la personne, la trõpette sonna

Au son de laquelle la Roine décocha vne fleche sur Valendos qui luy perça & le braçal & le bras, puis brocherent l'un contre l'autre de telle furie que se rencontrant des corps cheualiers & môtures, ils cheurēt ensemble à la réuerse: Lors se retirerēt à quartier pour veoir la iouste de leurs compagnōs. Et sonna de rechef la trompette. Et Pentasilee entaise sa fleche contre Balart qui luy alla entrer biē auant en l'epaule: Si couchent leurs lances en l'arrest & se viennent entrecharger si rudement que la princesse mit le fer en la poitrine de Balart le portāt par terre, & sa Licorne ploya sur les iarrets, dont elle sauta à bas legerement, puis se tira à costé, & la trōpette entōne, qui fait deloger Baluerd (le pl⁹ puiffāt des trois) & Silues de la Selue d'austre costé, sur lequel donna Baluerd droit en l'escu ou il rompit sa lance, & Silues l'atraignit iuste au pis si lourdement qu'il abbatit homme & cheual ensemble, y demeurant dessous, la cuisse du Payē engagee. Car Silues auoit esté par bons escuyers fort biē dressé à la iouste, qui parfournit brauement sa carriere: puis tournant bride vint retrouver Baluerd malemēt oppressé sous son cheual qui lui fut cause de descendre du sien & l'en deliurer, luy prestant la main à le souleuer: chose qui tourna au Prince Silues à tresgrāde louēge de tous les spectateurs, le prenans à bon seigneur de haute cheualerie & courtoisie: dont Pentasilee entre les autres demeura fort contente. Laquelle alors s'adressoit pareillement à Ballart son champion & Calpendre à son Calife en aspre & cruel conflit, s'entre iurans de durs assauts les vns aux autres: qui tant durerent que la Roine commençoit à estre aucunement lasse, tant estoit tenue de court par Valēdos. Or iettoit Silues souuent sa veuē sur elle & sur la ieune Princesse quād son ennemy luy en laissoit quelque loisir, contre lequel il se maintenoit si hardiment que les assistans en estoient grandement

emerueillez veu le personnage à qu'il auoit affaire, estant le plus redouté de tout leur ost. Si luy ramena Silues vn tel coup sur le heaume descendāt sur l'epaule fenestre que l'espee y entra pres de deux doigts dōt on veid le sang cler raisseler le long du braçal, & il en demeura estourdi hors de toute cōnoissance. Lors tourna l'œil Silues à costé, ou il apperceut le Calife de Noy haussant son cimeterre à deux mains pour depešcher la Roine. Là se lāce Silues d'un saut & iettāt son escu au deuant soustiet le coup, qui fut si pesant, qu'il le separe en deux, & luy tombe sur l'armet iusques à luy faire flechir les genoux pres de terre, dequoy Silues irrité luy rue vne iarretade d'une taille telle qu'il ne se pouuoit bonnement soustenir sur celle iambe, puis redoubla sur le bras qu'il lui engourdit toalemēt. Adonc auoit Baluerd reprins ses esprits contre lequel il retourna prōptement, mais pendāt leur conflit, Calpēdre trouua Valēdos si mal traitté par l'aide du ieune Prince, qu'il lui fut aisé d'en auoir la raison finale, car le voyant chanceler de ce sanglant iartier, elle luy tira vn estoc si à ferme qu'il trebucha à ses pieds: Et de ce pas elle luy en met vn sur le ventre & luy sonde si bien le dessous du hausse col qu'elle y enfonce son espee qui luy coupe la gorge: Ce fait: elle s'appuie sur son escu pour reprendre haleine: à tant elle veoid Silues faisant merueilles d'armes tāt en offendāt qu'en deffendāt, dōt elle le prisoit moult en son cuer, iugeāt sa fille heureuse de l'amour de tel Cheualier. Laquelle de son costé estoit assez mal menee par Balart demy Geāt, si ieune pucelle, à qui les forces des nerfs n'estoient encore nouees cōme elles furent apres par bien peu d'auance d'age: Toutes-fois bien luy monstroit que la vertu gisoit principalement au gentil cuer, si le gros buffe ne se fust auisé de soustenir vn de ses coups pour l'aller saisir au corps, comme il exécutoit,

eutoit, quand Silues l'aperceuant laissant son aduersaire luy courut sus, & amour luy redoublant la force du bias, d'un estoc luy trauerse le flanc iusqu'au cueur. Puis ressaute brandissant son glaiue contre Baluerd, qui s'escrimoit plus rudement qu'il n'auoit fait d'entree. Et tellement auoyent atourné leurs escus qu'à peine leur couuroyent la poignée, dont estoient leurs hauberts demaillez piteusement & leur chair viue souuent atteinte, Baluerd estoit à la verité vn ties vaillant cheualier & qui eust bien tost accablé Silues, si comme plus deliure de sa personne il ne luy eust fait souuēt passer ses coups en vain, tournât, virant, puis auant, puis arriere, par l'art d'escrime dôt l'Empereur Amadis de Grece luy auoit donné les premiers enseignemens en l'isle deserte, & depuis bons escrimeurs l'auoient rendu maistre parfait. Or y auoit plus de quatre heures que le combat duroit, lequel par la longueur des ceremonies pompeuses auoit esté tard encomencé. Si se print Sylues à colerer en soy-mesme & eschauffer en son harnois, de honte qu'il auoit de faire si maigre chef d'euure d'armes mesmement en la presence de celle de qui seule desormais il tenoit la vie. Et plus confideroit, que s'il ne se hastoit autrement, la nuit le pourroit frustrer de sa legitime victoire combien qu'autrement les assaillans les deussent vaincre entre deux soleils. Parquoy si iré que merueille resolut de iouer à quitte & à double, & iettant sa veuë sur celle fleur de beauté, reprend nouveau courage & va recharger si dru son ennemi affoibli de quelque perte de son sang que lui haussant le bras pour le ferir, il le preuient par promptitude d'un roide estoc sous l'esselle dont il cheut mort estendu en la place. Adonc viennent les iuges qui les mettent hors du cāp en grād honneur d'ou ils furent conuoyez avec trompettes & clairons iusques à la cité. Là ou ils furent couchez pour prendre

repos & guarir de leurs playes qui Dieu merci ne furent telles qu'elles les peussent empescher de comparoir en la grande bataille assignee au troizieme iour ensuiuant. A tant les laisserons rafreschir auecques maints propos de ioye & contentement, comme au contraire estoient les Payens pleins d'amere tristesse pour la perte continuëlle de leurs principaux cheualiers. Si enleuerēt les corps de ceux cy, qu'ilz brulerent à leur mode selon leur loy, en grongnans tous & murmurans entre leurs dents d'en prendre belle & brieue vëgeance dans le terme si prochain de la bataille, qui vous sera presentement racomptee.

Comme les Payens ordonnerent leurs bataillons de leur costé, & les Chrestiens du leur pareillement, & saillirent les vns & les autres en campagne.

CHAP. XLIIII.

DVrant les trois iours nul ne fust oysif ne paresseux tant au camp des payens qu'en celui des Chrestiens en la cité mesme, à pourueoir à tout son equipage de guerre tāt de leurs cheuaux q̄ de leurs armes, à fin qu'e vn si grād & si virēt affaire il n'y eust fautede fer ne clou, de boucle ne hardillon, l'vn y fourbissoit habilemēt son harnois l'autre picquoit son courtault ou courfier l'vn forgeoit, l'autre mateloit: tout y estoit emeu en bruit & en cris pour mettre chascū son cas enpoint. Or pour cōmencer à parler de l'ordonāce des Mores pour dresser la bataille, le Roy de Russie departit toute son armee en trois bataillōs, c'est à sçauoir cent mille hōmes de pied, & cinquante mille hommes du cheual en chacun. L'auant-garde fut conduite par le puissant Roy de nouveau de Pilapele acompagné de cinquāte Geans. En la bataille commanda le Roy Bultazar mesme, qui eut vingt Rois & cent Geans d'elite pour sa garde, luy remōstrans les au-

tres seigneurs qu'il n'eust à hazarder sa personne, d'autant que celuy qui estoit d'importâce quasi de tout, & qui valoit plus que cent esquadrons, s'il n'estoit compté que pour vn estoit mal employé en despêche. L'auant-garde cōduit le Roy d'Armenie qui n'estoit moins prudent q̄ hardy. Mais en chacun bataillon ils ordonnerent trois cens Elefans garnis de chastelets avec archers dedans, qui estoient pour porter grāde nuisance à leurs ennemis. Et sur les aelles ils mirent leurs archers & frondeurs en incroyable nōbre, les Chrestiens d'autre costé disposerent leur ost en semblable maniere en trois bataillons, chacun de cinquāte mille tant hommes d'armes que cheuaux legers, & de vingt mille hommes de pied.

Le premier fut conduit par les Empe- reurs Lisuart & Amadis de Grece, accompagnés de Florisel de Niquee, armé toujours de son noir harnois, de Rogel de Grece, Agefilan, Falanges d'Astre son pere, & la cheualereuse Alastraxeree. Le Prince Sylues de la Selue y estoit colonel des cheuaux legers Chresties, & Calpendre & Pentafillee de leurs licornes legeres. Car le reste de son armee elle auoit laissée à mener aux sept roines Amazones, pour resister aux Elefans, dont ils auoient esté auertis par leurs espiōs, ayant assemblé tous les chariots qui se peurent recouurer qui furent remplis de fagots secs pour y mettre le feu au besoin, avecques vn bon nombre de gens de pied garnis de partisanes pour dōner aux vêtres & iarrêts de ces animaux. En la bataille commanda le grand Roy Amadis de Gaule avecques l'Empereur Esplandian, Galaor, Florarlan, Quedragan d'Irlande, le Géant Balan, l'Amiral Frandalo fut à la queue avecques les troupes des marchaux de camp pour rallier les bandes.

Le dernier bataillon conduit l'Empereur de Romme Arquifil suiuy du

Prince Florestan son fils, d'Anaxarees, Brianges de Beocie, Galdes de Rhodes, Filisel de Montespīn menoit mille cheuaux legers. Tous alloient en bonne deuotion de bien ce coup festoyer les payens. Et ordonnerent d'auantage leur gent de trait, arbalestriers, & archers sur les aelles, à la forme de leurs ennemis. Chacun se mit par la ville & aussi generalemēt par tout le camp des Rois Chrestiens, en estat de bonne reconnoissance enuers Dieu de ses fautes & offenses, fors les Amazones, en attendant le succez qu'il lui plairoit leur donner l'endemain de la bataille.

Comme les deux armées sortirent aux champs en bataille rangée, & comme leurs chefs les enhortèrent par leurs harangues à bien faire.

CHAP. XLV.

AV quatrieme iour prefix à la iournee nommee, à peine le Soleil se monstroient encores qui estoit tout rougeastre (comme par signal de la grande & prochaine effusion de sang) quand les deux osts se rangerent à la grāde plaine en bataille, là ou faisoit bō veoir ventiller tant de bannieres & estendarts de diuerses couleurs, tant de harnois polis reluire cōtre la splendeur du Soleil, ouyr tant de hannissemens de cheuaux & autres bestes, tant de tabours, sifres, trompettes, & clairōs, qui sembloient à l'heure rendre ie ne sçay quel son autre que l'accoustumé, lequel faisoit bondir le cuer aux vns de peur aux autres de hardiesse. Or auant que les armées vinssent pour entrer à la meslee, les chefs principaux se meirent à bien enhorter leur gēt, & à les animer grādemēt chacun de son costé: dont le Roy Bultazar, à qui fut dressé vn haut siege, harangua aux siens en ceste maniere.

Harangue

*Harangue du Roy Bultazar à son
armée.*

Pas n'estes ignorans Seigneurs, Barons mes vassaux & bons amis, de la iuste occasion qui nous a incitez d'abandonner noz maisons, femmes & enfans, & mesmes nostre repos & aise pour nous transporter en region si lointaine à fort grand travail & au dâger de noz personnes. Car l'entreprinse est meüe pour la grande reuerence & exaltation de noz dieux, tât de fois offensez par ces chiens mastins Chrestiens, bruleurs, incédiaires & demolisseurs de leurs temples, meurtriers de tant de bons Monarques, qui gouuernoient leurs peuples. Ainsi ne deuons nous deffier du succez de la querelle qui este certainemēt soustenue par leurs deitez outre la puissance & vertu qui gist en noz bras & noz courages. Et si le point d'honneur les eguilonne en vous, comme en rend tesmoignage le hazard ordinaire auquel si volotaiemēt vous exposez voz vies, ne doutez de l'acquiescer ici le plus grand & plus ample qu'onques acquirent voz ancestres d'autant qu'ils n'eurent iamais affaire à plus preux & vaillans Princes & Cheualiers qu'il y en a maintenât d'assemblez pour leuer nostre siege ny en plus grâd nombre par mer & par terre ny en meilleur equipage de guerre. A fin donques que la longueur du siege ne nous rende matz & harassez nous & noz montures, sans plus nous amuser & abuser à legeres escarmouches, ny à ces combats singuliers iettons le dé, couchons à ce coup de nostre reste, sans tât marchander & employon courageusement toutes noz forces à ruiner & exterminer cette Chrestienté, seule contraire au Sarrafinesme. Car bié appert que noz dieux l'ont déterminé en leur celeste cōsistoire, en ayant ici assemblé tous leurs dominateurs, piliers appuis & fondemēs d'icelle pour y prendre fin par noz mains tous ensemble.

A ces paroles fnt ouy par leur ost Bataille, bataille, avec vne demonstrence de courage si ardent que chacun d'eux en conceuoit vne grâde esperance de victoire. En l'ost des Chrestiens le Roy Amadis de Gaule n'en fin pas moins, duquel l'enhortement fut en ce langage au mylieu de son armée,

*Harangue du Roy Amadis de Gaule
à son armée.*

Les anciens Romains (mes freres, enfans & amis) ont achené en leurs tēps des gestes fort genereux & memorables non à autre fin que pour acquerir los & renommee immortelle en ce monde, ne se promettant rien en l'autre d'aucune autre immortalité. Ce qui meut Muce Scevola à sacrifier sa main au brasier ardent, au moyen de quoy il deliura sa ville du siege du Roy Porfena: ce qui meut aussi pareillement Curce leur Cheualier à se lancer dans l'abisme pestilentieux, pour laisser perpetuelle memoire de soy à la posterité. Mais Annibal au contraire les vainquit & battit maintes-fois, sur la iuste querelle qu'il auoit contre eux de l'vsurpation par eux attentee sur son pays de Cartage. Car lors les precipitoit l'auarice trop plus indigne de tout noble cueur que n'est la conuoitise de la gloire. Ce qui nous sert d'exemple presentemēt touchât l'entreprinse de Bultazar & des siens cōtre nous, qui n'est autre en ce siege que pour nous priuer de noz estats & s'ē emparer, nous tollir les vies, & à noz femmes & enfans par leur cruauté barbare (comme ils auoyent n'aguères commencé à exécuter, à la surprinse de nostre ville, si la disgrâce ne fust auenuē la nuit, qui garantit vne partie du peuple par suite & latitation soubs la faueur des tenebres. Or nous a-il (comme chacun scait) desia grandement trauaillé & affligé par
ce mi-

ce miserable & calamiteux siege, maintenant Dieu permet qu'il nous presente vne generale bataille sans plus nous miner & consumer en loqueur & langueur. Quelques voix m'ont esté rapportees epandues par la ville, d'aucuns qui disoient estre plus seur de se tenir sous l'enclos des murailles nous estans en plus petit nombre qu'eux avec quelques autres legeres raisons. Mais ils ne sauent pas ce qui est reserue à nostre connoissance que sommes contrains de publier & manifester maintenant, que les munitions de guerre commencent à nous defaillir, & que la region ne scauroit plus nourrir & alimenter longuement cette multitude infinie amassée icy des deux costez. Pource ont ceux là à changer d'opinion, laquelle toutesfois i'estime estre plus conceüe en eux par egard de ne hazarder temerairement les choses que par autre paour ou timidité combattre. Si considerent ores avecques moy la iustice & equité de nostre cause, qui est la conseruation de l'honneur de nostre Dieu, la protection de toute la Chrestienté brief la defense de noz propres personnes, de noz familles, biens & possessions. Cest en luy que nous fondons nostre confiance, qui a miraculeusement soustenu iusques icy de sa main diuine vne petite poingnee que nous estions (auant ce bon secours) contre ce nombre infiny de payens. C'est luy qui a resisté pour nous contre telles forces des plus puissans Monarques & potentats de toute payennerie liguez & vnis ensemble. Bien il à fait paroistre sur nous sa debonaireté & clemence, quant à la prinse recente de nostre ville il nous à aucunement visitez & chastiez sans nous auoir voulu accabler du tout, pour nous monstrier à ne nous glorifier trop en la force de noz bras. Il se monstre bon pere qui chastie de la verge nompas iuge seuer par punition & supplice. Depuis il nous à enuoyé à point nomme le se-

cours de ces bons Rois & Princes, depuis il a rengé vers nous en nous fortifiant grandement l'illustre Roine Calpendre & la tresbelle & tresuertueuse Princesse Pentasilee sa fille & affoiblissant d'autant noz aduersaires. Ce qui nous doit fermement asseurer qu'il nous veut à la fin tant assister que de nous donner sur nos ennemis vne victoire absolue.

Ce dit fut ouye vne clameur publique de tout l'ost Marchon, Marchon, à eux, à eux & l'Empereur Amadis de Grece, Florisel, Rogel, Agesilan Sylues de la Selue, s'en vont par chacune cornette & esquadrō animer & encourager tous les colonels, capitaines & soldats à soy porter vertueusement & combattre pour la gloire de Dieu, establissement de son regne & conseruation de la patrie. Quoy fait, chacun d'eux se retira en son lieu à son enseigne, se plantans ces valeureux Princes & Cheualiers de grand renom tousiours és premiers rengs. Mais il ne faut pas obmettre, que lors des deux costez entre les deux osts, apparurent deux bataillons sans aucuns blasons enseignes plaines, de vingt mille hommes de cheual d'un costé fort bien armez, & de vingt cinq mille de pied, de l'autre, que chacune partie desiroit tourner à sa faueur: mais ils se maintenoient sans contenance d'encliner ne ça ne là. Surquoy les trôpettes sonnerent la bataille, comme maintenant vous entendrez.

De la treshorrible & tres cruelle bataille entre les Payens & les Chrestiens: & du secours inesperé qui suruint aux Grecs des Roynes Calasie & Pintiquinestre & du seigneur Galtazar de Tarsis & quelle fut l'issue.

CHAP. XLVI.

AINSI que les trompettes sonnoient & que les deux auantgardes estoient en estat de se ioindre, le grand

le grād Roy Amadis de Gaule qui estoit entré en la bataille (comme celuy sur qui reposoit le soing principal de toute l'affaire) leuoit les mains iointes vers le ciel, disant Seigneur regarde maintenāt de l'œil de misericorde ton peuple: car il en est tems, c'est ta querelle tu es le dieu des batailles, ce n'est rien de noz forces, si tu ne les augmentes, ils sont hommes comme nous, & si sont beaucoup plus membrus, nerueuz & ossius que nous, & en trop plus grand nombre que ne sommes, l'aduantage euidēt est de leur costé, si de toy ne vient le nostre, ie sçay bien que ce ne sera la force & efficace de mes remonstrances, qui imprimera l'ardeur de combattre és cueurs de noz hommes si tu ne mets la main à echauffer les refroidis, à encourager les craintifs contre les forces, à éclaircir les aueuglez contre les ruses de nostre ennemi. Or puis que ie voy icy l'affection si grande és miens de l'assaillir cōtre toute raison & puissance humaine. Ie recognois plus qu'oque mais que tu manies de ta main les cueurs & volonteiz de hommes, les tournant à magnanimité ou pusillanimité comme il te plaist: voyant que tu nous fortifies ainsi interieurement, i'ay à esperer que nous renforceras aussi de quelques forces exterieures que tu peux susciter des os des morts si bō te semble pour ne perdre toute la semence d'Abrahā & le peuple que tu as eleu pour riē, à vn seul coup: Or ainsi soit. Ceux qui assez pres estoient de lui pour entendre ceste priere, ne pouuoient contenir la larme de tomber de leurs yeux, ensemble sentoient vne emotion extraordinaire, & plus-que humaine en leur cueur de combattre. Cependant le gentil Prince Silues de la Selue alloit fierement avec sa cheualerense dame Pétasilee & la Roine Calpendre sa mere montez sur leurs braves licornes attacher l'escarmouche avec leurs troupes de cheuaux legers, & les ennemis les receurent hardiement

combien que nō de telle adresse. La bien mōstra le nouveau cheualier quelle esperance vouloit donner de soy à l'aduenir y rompāt plusieurs lances qu'un escuyer lui portoit, & en abbatāt autant de paies que deuant lui se rencontrent: la belle Princeesse y faisoit aussi merueilleux deuoir, à l'enui l'un de l'autre. Amour leur emmanchoit leurs glaiues d'une force nouvelle: & Calpendre s'y employoit de sa part fort brusquement, avecques l'élite de ses Amazones renuersans Cheualiers & tuans ou blessans des cornes de leurs bestes la pluspart des cheuaux de leurs ennemis qui auoyent oublié leurs chanfrains au logis. Mais les Mores impatiens de tant voltiger en escarmouche, voulurent dōner la charge entiere. Si marcha le premier bataillon que conduisoit le Roi de Pilapele contre l'auant garde des Chrestiens conduite par les Empereurs Lisuart & Amadis de Grece, lesquels à la premiere rencontre se firēt bien cognoistre à leurs ennemis, à leurs armes vermeilles & croix blāches, & Rogel, Agefilan, Falāges & son Alastraxeree qui iamais ne l'abandonnoit qui y firent des actes plus que heroïques, sans s'y faindre nom plus Florisel de Niquee, cōbien que differēt de parure en les armes noires, qu'il ne tarda gueres à coulourer de mesme par le sang partie sien, partie de ses ennemis ruisselāt contre. Les Geās qui estoient à l'entour des enseignes firent vne rude charge, & meslez parmy les Soldats Grecs y besongnoient nom plus ne mois que des loups affamez parmy vn troupeau de moutons, fendans, assommans, creuans, mutillans tout ce qui se trouuoit deuant eux. Or marcherent ils fort larges par la plaine spacieuse qui leur en donnoit le moyen pour leur grande multitude & en forme de croissant, affin d'envelopper le bataillon des Chrestiens par les cornes du leur, qui estoit beaucoup plus petit & estroit. Mais ayant este attirée leur gendarmerie par

l'escarmouche de la caualerie legere, à marcher, ils s'auancerent plustost que leurs archers & frondeurs de pied, tellement, qu'ils ne leur peurent seruir, les trouuât à leur arriuee desia meslez avecques les Grecs, & au contraire les gés de trait chrestiens qui estoient sur les ailes de l'auantgarde, porterēt grand nuiscance des deux costez sur les cornes de leur croissât. Le bruit & tintamarre y estoit si horrible à ce choc de deux telles armées que plus fortes & furieuses n'auoyent iamais esté veuës, que la terre en trébloit, le ciel retétissoit, la pousiere estoit si espaisse qu'ils s'entreuoioient à peine, dôt frappoyēt aucunesfois sur leurs propres compagnons, les cris & huees si grandes qu'ils ne s'entrentendoyent point. Vous eussiez dit q̄ Eolus auoit lasché tous ses vens à souffler ensemble & tempester le mode. Là veissiez plus de vingt mille cheuaux & autres montures sans cheuaucheurs courir & sauter par la campagne, desquels les maistres autāt qu'il en étoit tōbé, onque puis n'en releuoyent, estant foullez & fracassez des pieds des autres cheuaux, mesmement des trois cens Elefans qui suruindrēt reuersant tout à leur venuee avec le donnage que portoyēt les archers de leurs chatelets, dequels le trait cōme à plob d'enhaut estoit d'une estrāge force. Contre quoy bien seruit le bon ordre qui auoit esté donné des Amazones, qui vindrēt dix mille sur leurs licornes les assaillir en flāc, tirās de leurs arcs à ceux des chastelets, lesquels estans mal armez pour le faix dont ils chargeroyēt trop les animaux, elles larderent tellement de leurs fleches dorces qu'ils sembloient vrais herissons. Lors entrerent leurs chariots enflambez parmi, par la voye que leurs gens de pied leur firēt de leurs partisans dont ils detrenchoient ventres & iābes aux Elefans qui par leur cheute froissoient & crauantoient leurs chasteillains. Mais quand le feu & flambe eust couru à bon escient parmy eux

ils rompirent en fuyant & reculant tout le derriere de leur auātgarde, auenāt ainsi leur routte de ce en quoy ils auoyent fondé leur pl^r grād esperāce. Quoi voiant le Roy Bultazar ne pensa plus auoir raison de seiourner (car les Amazones faisoient vne grāde boucherie des abbatus Parquoy il commāde aux siens de marcher au grand pas, & qu'on meist les Elefans de la bataille sur les flācs soustenuz par leurs gens de trait qui resisteroyent aux Amazones & à leurs chariage. A l'arriuee du Roy de Russie il n'y auoit ordre à l'Empereur Lisuart de pouuoir soustenir la charge de la bataille, si le Roy Amadis n'eust fait diligēter le pas à la sienne, Mais Filisfel de Montespain la deuança avecques ses troupes de cheuaux legers amusant les ennemis par vne bonne & viue escarmouche. A ceste rencontre ou estoient les deux chefs fut le plus furieux estour qui eut encore esté, Amadis, Balan & Quedragan s'adressans aux plus fiers Geans: & l'Empereur Esplādian, Galaor, Florarlā, Artaxerxes aux autres. Ici exclame Galeris le Croniqueur q̄ s'il eust eu autant de yeux qu'Argus, n'eust sceu veoir par le menu tous les hauts faits d'armes d'une part & d'autre: voire si tout le sablon de Lybie se tournoit en papier & toute la mer en encre qu'ils ne suffiroient à y coucher par escrit particulierement tous les merueilleux coups, tous les estranges traits de prouesse qui furent faits en ceste meslee des deux batailles. Car les Princes & Cheualiers desusnommez, y firent tant de prudēce militaire que de leurs mains si vaillāment qu'il seroit impossible de mieux, aussi les Rois & forts Geās qui accompagnoient Bultazar y combattoient si furieusement qu'on ne vied iamais gens aller plus resolumement à la guerre. Là veissiez tāt d'ecclats de lances voler en l'air, tant d'hommes & cheuaux reuerser à terre, tant separer de testes, bras & iambes du tronc de leurs corps mesmement des payés qui estoient

estoyent la pluspart mal armez & entre leurs gens de pied plus de picques seches que d'autres, fort peu de Brigandinez ou couverts de vieux halecrets, avecques leurs targues de bois. Ce qui fit que les Chrestiens quand ils furēt meslez parmi eux, en eurent bō marché estans tous bien couverts de corcelers, bourguignotes ou morions dont facilement ils les deha-choient en pieces. Aussi sans ce defaut il leur eust esté impossible d'ē auoir là raison pour l'auantage du nombre que les autres auoient sur eux de plus de trente contre vn. Mais les Princes Grecs parmi les cheualiers faisoient telles merueilles qu'on les croiroit à peine, n'estant là nul d'eux qui n'en eust tué ou nauré plus de cinquante de sa main. Que vous dirai de Florisel, Rogel, Agesilan, Falāges, Alastraxeree qui tāt en auoiēt fait se tenās toujours en vn petit esquadrō ensemble, al- lans puis ça puis là soulager les plus fou- lez, secourir les pl^o oppressez, qu'ils com- ploterent de sortir vn peu de la meslee pour prēdre air & haleine, Dōt biē print au Prince SYLVES & à Pentasilee & Calpendre, qu'ils trouuerent par la voye qu'ils se firēt à trauers des ennemis, en- uelopperez en vn cercle de trois Geās qui les pressoiēt fort & de quelques salades q^u leur dardoiet de loing ne les osant abor- der. Car à la verité ces trois gentils chā- pions n'attendoient plus que la mort, ne plaignans & regrettans chacun la siē- ne seulement, ains beaucoup plus celle des autres, comme la mere de la fille, & au reciproque, SYLVES celle de sa che- re dame, & elle seule en gemissant d'eux de la mere & de l'ami plus que la siēne propre. O q̄lle perte c'eust esté de ceste belle couple, si elle fust ruinee en sa fleur auant q̄ produire les precieux fruits des bons actes qui en sortirēt en plus meure saison: mais Dieu qui les auoit produits pour la merueille de leur siecle inspira aux cueurs de ces Princes de sortir ainsi de l'erour (pour leur enuoyer secours si à

point) y laissant les deux Empereurs Li- liuart & Amadis de Grece avecques Ana- xartes pour soustenir lesq̄ls se reposoiet par fois au derriere de quelques rengs. Au cry que les Geans faisoient adreie- rent de bon heur ces braues Cheualiers, qui bien y eclaircirent la foule de leurs brancs d'acier & trouuerēt ces trois per- sonnes encloses à qui ils ecrierent à leur venue, Grece Grece: on leur auoit occis leurs cheuaux sous eux, & auoiēt com- battu à pié si longuement qu'il ne leur restoit plus de force qu'à se defendre & rabbatre les coups des ennemis. La pre- miere y entra la cheualeuse Alastraxe- ree, ecryant sus sus Pentasilee ma douce ennemie, tirez vous arriere to^o, & repo- sez à l'abry de la monioye des corps que vous auez abbatus, & nous laissez cōue- nir du remanant. Las la bonne Royne & les autres de sa suite n'auoient gueres moins mestier d'eux reposer: mais leur cueur inuincible ne pouuoit laisser leurs amis en peine. Que le vous feray- ie lōg? Ces gentils Cheualiers comme lions en- ragez à qui on a volé leurs faons courēt sus aux Geans, qui leur durerent peu & deliurās SYLVES & les deux dames les menerēt hors la bataille, ou ils se rafrai- chirēt vn peu sur l'herbe anec eux, hauf- sant la veuē de leurs armets, puis les re- comanderēt à quelque troupe de leurs arbalestriers qui là estoient (tirans droit cōtre les Mores qu'ils voyoiēt s'ecarter) avecques inhibition & deffence expresse de ne r'ētrier de ce iour en la meslee, à rai- son du sexe & de la jeunesse, en ayāt des- ia assez voire trop fait, Si s'en retournēt diligēment ces branes princes au secours des autres, ayant reprins des meilleurs cheuaux qu'ils trouuerent en la compa- gnie au lieu des leurs qu'ils auoient per- dus & aussi des lances nouuelles & elcus semez par la place leur ayant tout esté brisé & derōpu au cōflit vous eussiez dit à les voir retourner q̄ c'estoient des che- ualiers tous frais q̄ venoiēt à la bataille,

aussi en monstrent ils les œuvres. Car ou ils trouuerent les bons Empereurs Lisuart & Amadis de Grece enuironnez de Geans & autres cheualiers mescreans qui se defendoyent au mieux que possible leur estoit, toute fois si las & mattez qu'ilz ne pouuoient quasi plus leuer les bras pour ferir, ne faisans plus que parer aux coups, là voyans la plus grãde presse ils tirent droit faisans targue par ou ilz passoyent comme vne droitte foudre du ciel: ilz escrient à l'arriuer Grece, Grece, Si entrerent dedans & font targue aux deux Empereurs, menās les paiens à telle raison, qu'ils les tirent hors de là & les mettant au milieu d'eux s'en vont là ou ils deconurēt la pl^e grãd foule des ennemis. Car sans point de faute le ieu estoit mal party estans les payens si grand nōbre que les Chrestiens commençoient à perdre la place, sans la venuē de l'Amiral Frandalo qui estoit demeuré derriere avecques les troupes des marechaux de camp pour rallier, cōme il fit & vint prendre vn tour pour charger les Russiens en flanc, mais il receut vn coup de fleche au visage des archers des Elefans qui les decoururent de loing, pour lequel il ne laissa d'entrer parmi les ennemis ou il fit tel deuoir qu'il les repoulsa bien loing. A ceste cause Bultazar mādā soudain au roi d'Armenie qu'il fit haster de marcher sō arrieregarde. ce qu'il executa prōptemēt le Roy Amadis auertit l'Empereur de Romme Arquifil de faire le semblable: Sur la réconte des deux derniers bataillons l'Amiral Frandalo ayant percé avec son esquadron iusques au lieu ou le Roy estoit avecques tous les Princes Grecs, tant il les importuna qu'il leur fit faire avecques les siens vne retraite à la main gauche sans se rompre, d'ou les gentiles Amazones avec la caualerie de Filisfel auoyent chassé les Elefans de la bataille. Et fit ceste caualerie legere de Filisfel ce iour fort grand occision de tous les Mores qui se debandoyent voltigeant tou-

siours à l'entour des bataillons, dont il r'emporta fort grand louange. Or pour reuenir à nostre propos: à ceste charge qui fut bien la plus rude de toutes, tel fut l'abatis des lances & tel le chamaillis sur les harnois: tel le hānissemēt des cheuaux qu'on ne y eut pas ouy dieu tōner. Tant y martelloyent & charpentoyent les vns & les autres qu'ils sembloient estre dit Galerfis en l'isle de Lemnos au bruit de la forge de Vulcan ou tous ses forgerons cognassent ensemble sur leurs enclumes. Là furēt tellement employees haches, masses, espees, cimeterres, coutelas, partisans, halebardes & tāt d'hōmes tuez & massacrez d'vne part & d'autre, que l'effusion de ce nouveau sang ioint à celui qui dormoit là espendu par les deux pcedentes batailles, lui dōna renfort & cours iusques à la mer proche qui en fut teinte & coulōree en grand estēstue, & n'y auoit si petite fondriere ou l'ō ne fast au sang iusq'à la ceinture. C'estoit chose estrange de ce que faisoient du coste des Payens, le Roy Bultazar de Russie, & le Roy de Pilapele fort Geant, qui estoient si puissās de leurs corps qu'ils ne s'y trouuerent las ne recreuz, combattans, vaillamment de leurs mains, & allās par les esquadrons, courager les vns, rallier les autres: tellement qu'ils meriterēt grand hōneur de les auoir maintenuz si longuement à faire teste aux Chrestiens sans se rōpre ne tourner dos. Aussi auoient pratiqué vrayement les trois points de guerre de leuriers à l'assault, de sangliers à la deffence, & de loups pratiquerent à la retraite. Or estoit encores la bataille en estat sans pouuoir asseoir iugement certain de la victoire, quand le Prince Silues de la Selue se trouuant trop reposé de la moitié, en iettant l'œil sur l'estour ou l'Empereur Amadis de Grece sō pere estoit se leua de furie, disant à Pentasilee: Madame ie vous supplie d'auoir encore icy quelque patience de vous rafraischir avecques la Roynie: car il m'est

venu

venu vn soursaut au cuer pour la personne qui de plus pres me touche, qu'il fault que promptement ie r'entre en la bataille, quoy entendu par Pentasilee & Calpendre qui desia tant l'aimoiēt qu'elles ne le pouuoient elongner ne perdre de veuē, luy respondirent, que puis qu'il vouloit retourner resolutement que ce ne seroit pas sans elles qui aussi en auoient pareille volonté. Si vont reprendre des cheuaux dispersez par la pleine & des lances & des escus: & Calpendre montee leur dit qu'elle est d'auis d'aller essayer à rallier quelques troupes de ses Amazones, puis qu'ils iront à la charge ensemble, d'autāt que l'effort de si peu de personnes estoit vain en telle foule de mille milliers d'hommes. Ce qu'elle fait retrouvāt les plus prochaines qui auoient deffait les Elefants sans grandes pertes d'elles. Lors les cōduit Calpēdre là ou elle auoit laissé Sylues & sa fille, qui l'attēdoient en bonne deuotion.

Or s'en vont ensemble donner à trauers le bataillon de l'arriere garde ou Sylues de la Selue les guida, & desia y estoient tous rentrez les Empereurs & Princes Grecs l'vn menant vne cornette en vn endroit, l'autre en vn autre: mais de bon heur en allant rencontrerent vn Cheualier Grec à demy mort (auquel Sylues fit bander ses playes par vne Amazone) qui estoit eschappé du lieu ou Amadis de Grece estoit endos parmi les gēs de pied Russiēs qui lui auoiēt tué à coups de piques son cheual & à tous ceux de sa compagnie, qui en dit à Sylues (s'enquerant de l'Empereur) ces nouvelles certaines. Là là, allons à la bonne heure. Si broche à l'instant tant que le cheual le peut porter & les dames apres avecques leur troupe, qui abbatent à leur arriuee tout ce qu'elles rencontrent d'armeniens, criant Sylues Thebes, Thebes, ça paillards vous y montrerez tous à ce coup, vostre fin est venue, & tant fit avecques l'aide de sa

suitte qu'il trouue l'Empereur Amadis, combatāt à genoux avec dix Cheualiers Grecs tant il estoit las & rompu de la lōgueur du combat, qui auoit duré depuis l'aube du iour iusques apres midy lequel au cry de Thebes se releua de bout, connoissant que c'estoit Sylues son fils, louuant Dieu d'auoir donné vie à celui qui luy sauuoit alors la sienne. Que vous y diray-ie d'auantage, Sylues fiert à dextre & à fenestre de telle sorte, & Pentasilee & Calpendre, que non seulement ils deliurerent Amadis de Grece de ce peril imminent, mais rompirent ce gros ost de gēs de pied qui n'estoit soustenu d'aucune cauallerie, partāt laissé en proye à l'ēnemi, qui aussi tailla tout en pieces sans en prédre nul à mercy. Or à l'endroit ou le Roy de Russie estoit, se rencontra Florisel de Niquee qui l'apperceuant luy courut sus, luy reprochant les amours de Diane: mais Bultazar qui le recongnut à ce propos, se lance parmi les siens cōsiderant qu'il n'estoit pas temps à luy de combattre homme à homme, qui auoit à regir & gouuerner toute l'armee. Quoy voyant Florisel luy escrie, ha faux Payen ce n'est que ta coustume de fuir ainsi deuant moy comme tu fis à Guindaye. Il ne seroit possible de reciter de point en point les hautes prouesses de tous ces Princes, meismement du grand deuoir qu'y fit l'Empereur de Rōme Arquifil, Angriote d'Estrauans, Olori d'Espaigne, & le bō Sarquil. Si est ce que l'estour balançoit encore cōme entre deux fers sans auātage notoire des vns sur les autres: tant estoit grand l'effort de leurs Geans, tāt de troupes fresches & entieres venoient réforer celles qui auoient chargé. Adonc les deux osts q nous auons compté des le cōmencement de la iournee, qui s'estoiēt plantez es deux costez, entre les auant-gardes sans qu'on ceust qui ils estoient ny ausquels ils porteroient faueur Adoncques ces deux osts voyāt la victoire encore incertaine pour

les Chrestiens, & qu'au fort elle leur pourroit bien estre à la fin trop sanglante & de grande perte, font sonner hies, tabours & trompettes, & leur enseignes deployees au vent, vont attacher les payens par les deux flancs, crians à l'aborder Sisornie, Californie, Saba, Tarsis, Arabie, car les chefs estoient le Prince Galtazar fils du Roy Fulurtin de Tarsis, &c. & les excellentes Roines Calasie & Pintiquenestre avecques leurs maris (de qui ceste histoire a fait ample mention) lesquelles auerties du siege de Constantinople auoyent fait leuee de vingt mille de leurs femmes tant des blâches que des noires. Et s'estans embarquées sur mer auoyent rencontré en leur route la flotte du Roy de Tarsis & s'estoyent joints ensemble : mais par fortune de temps auoyent esté portez hors de la voye qu'ils tenoyent. Qui fut cause que leurs secours arriua si tard, combien que fort à point : de quoy aucuns auoyent murmuré, à la venue des autres Roys Chrestiens, disans que ceux n'estoyent pas de la nasselle de Iesus Christ qui n'y entroyent dedans cōme les autres & ne la secouroient, contre l'orage & tourmente dont ils la voyoyent en peril d'estre acablee. Et qu'il n'estoit decēt ne raisonnable de soy tenir en son plaisir & aise terrestre, tandis qu'il estoit question de l'establissement & protection du regne de Dieu qui leur auoit donné les Royaume & puissances. Joint qu'ils estoient mal auisez de ne considerer que la cause leur estoit commune de l'hostilité payenne & le danger pareillement commun ainsi que du feu qu'ils voioyēt espris à la porte de leur maison sans y porter l'eau à l'estaindre : d'autant que si ces potentats Chrestiens estoient subiuguez & vaincuz leurs petites seigneuries ne seroient pas pour vn desuiner de leurs goujars. Mais leur arriuee (dōt la demeure estoit forcée & excusable) purgea leur innocence avec le grād bien qu'elle porta

de la victoire. Car sur leur renfort, les Chrestiens reprindrēt courage & rechargerent viuement leurs ennemis. Et ayant Amadis auisé que les Geans estoient ceux qui maintenoient l'estour, lesquels estoient ralliez à l'entour des Rois de Russie, de Pilapele & d'Armenie, il fit reunir tous les Princes & cheualiers signalez, mandant à Galtazar de Tarsis d'adrefier celle part pour rompre la presse, puis ils y entrerēt comme lions echaufez & n'y eut celui d'eux qui n'abbatit le sien par terre, vray est qu'un des Geans, le Roy de Taldas (car Bultazar & les autres Roys pouruoient de successeurs à ceux qui decedoyent au cāp) ce Taldas dechargea vn coup de massie sur l'heaume de Pentaflee à qui il fit encliner le chef sur l'arçon : ce que voyant Silues lui donna si grand coup de son espee sur le bras mesme qu'il le lui separa de l'epeule, puis redoubla de mi forcené en telle sorte que d'un reuers il lui treucha le col tout net. Adoncques tira à soy la pucelle encores toute elourdee s'enquerant cōme elle se sentoît, qui lui respondit (voyant le Geant estendu) que fort bien, puis qu'elle estoit biē vēgee de ce gros buffe. Florisel alors recherchoit tousiours à l'œil son Bultazar, lequel apperceuant il lui escrie : ore m'attens faux Tyran, pour recevoir le loyer de ta longue tirāie & cruauté barbare : plus ne m'echappetas. Si le va ioindre Florisel furieusement & Bultazar le reçoit de grāde hardiesse (qui preux & hardy Cheualier estoit) mais à la fin Florisel lui donna le coup de la mort : & apres luy guerres ne durerent les deux autres Roys chefs des deux bataillōs entre les mains d'Amadis de Gaule & de Rogel, Agesilan, Don Arlanges & leurs compagnons & les autres Geans aussi peu, en telle maniere que le reste del'armee despourueu de chefs, & de conduite, & n'ayant plus personne à qui porter respect & obeissance, avecques l'ombre de la nuit, qui n'a point de hôte, s'en alla bien tost

à van de route, par l'effort des deux osts nouveaux. Cy conclud Galeris que depuis que Dieu crea le ciel & la terre ne fut bataille plus aspre sanglante & cruelle ne mieux combatue des deux costez, ou pour la spacieuseté de la campagne chacun combatit qui voulut. A tant fut aui-sé que les plus trauaillez & blesez se reposassent, tandis que les autres poursuivroyent la victoire : en laquelle poursuite nonobstant la suruenue de la nuit, fut tellement continué iusques à quatre grandes lieues que le meordre & carnage s'y trouua beauconp plus grand qu'au camp de la bataille. Ce pendant le Roy Amadis donna charge au Conte Gandelin d'aller avecques quelques troupes garder le camp des Payens : auquel y auoit vn tresor incroyable d'or, d'argent & de pierrerie, apportez par tant de Rois : Et aussi, de faire enterrer les morts de peur de l'infection de l'air. Peu apres monta Amadis à cheual & les autres Princes demeurerez avecques lui, pour se trouuer à la chasse, & receuoir à l'œil le contentement de la deffaitte entiere de leurs ennemis, & si bien suivre le train de leurs gens qui toute la nuit ne cessoyent de tuer & massacrer, que sur la pointe du iour ils se trouuerēt pres de la ville de Coron. Ou ils fient leurs desseins d'aller heberger, pour y prendre quelque repos & appareiller leurs plaies. Et se retrouvās tous les Princes : sans perte d'un seul, ils rendirent graces à Dieu de les auoir deliurez du plus grand peril ou ils s'estoient iamaïs trouuez.

De l'estrange maniere de la venue des Sages Alquif & Vrgande en la plaine de Coron ou les Princes estoient, qui y furent guaris de leurs playes.

CHAP. XLVII.

L'Ordre donné au camp par le Conte Gandelin & la richesse infinie portee en la cité la reueue fust faite de l'armee, ou fust trouué estre morts de Chrestiens environ six vingts mille & la plus part du reste blesez, hoyez, naurez. Il auoit donné auis incontinent aux Dames de Constantinople de la victoire, combien qu'elle la sceussent par le venerable vieillart Alquif. Dequoy ne conuient demander la ioye qu'elles demenerent, & les actions de graces qu'elles en allerent rendre publiquement à Dieu au temple sainte Sophie, n'ayant bougé presque tout le iour de la bataille de la chappelle du palais en continuelles prieres & oraisons. Or les auertirent d'auantage les sages, comme les Princes estoient pres de la ville de Coron, & que besoing estoit de les aller penser sur le lieu de leurs playes, qui trop empireroient au transport & mouuement de leurs personnes s'ils venoyent si tost à Constantinople. A ceste cause delibererent les Princesses d'aller à Coron, avecq Alquif, & Vrgande la mescogneue, & se parerent en diligence de fort sumptueux accoustremens. Si les enuoloperent les Sages avec eux en vne nuë en laquelle ils fendoient l'air, a l'heure que les Princes faisoient les caresses & bien-venuees aux Roines Calasie & Pintiquinestre, & au Prince Galtazar de Tarsis fils du Roy Fulartin pour le bon secours, & opportun qu'ils leur auoyent amené. Et estoient sur le point de s'acheminer à Coron, quand ils decoururent vne armee marchant à l'encontre d'eux qui paroissoit de quatre cens milles hommes, dont sembloit que toutes ces vertes campagnes fussent couuertes à perte de veue : & estoient les bannieres & estendarts des armes de la grande Tartarie & de quelques autres potentats de Mauritanie. Leur cry, & huee fust si grande qu'elle causa effroy au bataillon, qui s'estoit

s'estoit rallié de la chasse de la desroute montant à vingt mille combatans ou environ avecques autant d'Amazones. He Dieu (disoit le Roy Amadis de Gaulle) à peine sômes nous sortis d'un boubier que nous recheons incontinent en un autre : toutesfois Seigneur ta volonté sur nous soit accomplie. Adonc rengent leurs gens en bataille, se disposant à la charge comme les autres sembloient aussi faire de leur costé. Mais quand ils eurent marché cinquante pas pour les approcher, ils furent tous ebahis qu'ils ne veirent plus rien deuant eux. Dequoy ils se seignirent par merueille : & à l'instant voyent en l'air une grosse nuë qui leur lance tant d'eclairs, tant de coups de foudre qu'ils en estoient tous epouuentez leur semblant qu'ils tôboient sur chacun d'eux, toutesfois sâs que personne en fust offensé, puis quelque espace de tēps ils voyēt la nuë s'abaisser & s'ouurir à terre, en laquelle ils reconnoissent leurs belles dames & le vieil Alquif avec Vrgande. Qui vous pourroit descire le plaisir qui leur sourdit à la quēue de cet effroy precedent? Quel contentement ce leur fut de se reuoir sains & saufs ensemble (hormis les playes) apres un si dur & cruel siege. Entre les princesses de Grece & les belles Roines nouvellement arriuee furent les baisers & les accolades en grand soulas, lesquelles s'emerveillerēt fort des extremes beautez de la pucelle Fortunie & de la forte Pentasilee. Ainsi s'en vont à Coron : ou ils furent assez bien logez & traittez selon le tēps de la guerre. Les Seigneurs naurez furēt desarmez par les mains de celles qu'ils aymoient le mieux : En quoy fut l'ebat de la belle Fortunie, qui s'adresse à Pentasilee en luy disant : Madame ie vous veux oster les armes par lesquelles vous vaincrez tous les cheualiers du monde, puis qu'en celles de damoiselle dont vous les surmontez toutes, nulle ne peut auoir la presumption

de vous vaincre par les siennes. Quant aux secondes (respond elle) ma grand amie vous n'avez occasiō de vous plaindre, d'autant que telles sont voz offenses, qu'elles suffiroient à rompre, & destruire les miennes tant premieres que secondes. En telles railleries de plaisir, les Princes naurez furent mis en leurs lits, ou leurs playes furent appareillees par les deux sages avec si precieux vnguens, qu'elles furent bien tost gueries, combien qu'il y en eust de fort grieues & perilleuses : & tandis qu'ils garderent la chambre, ils passerent le temps en maints ioieux & amoureux deuis. Mais entre les autres la Roine Sidonie souffroit grande peine en son cueur, discourant que si la Fortune la vouloit favoriser, l'opportunité se presentoit de la pouoir exalter en son plus grād triomphe.

Des propos qu'eut Rogel de Grece estant au lit à cause de ses playes avec la Princesse Leonide, ou ils conclurent qu'il la demanderoit en mariage : Et de ceux qui passerent entre Florisel & la Roine Sidonie.

CHAP. XLVIII.

Les Princes estâs blesez se tindrent quatorze iours en leurs lits, qui furent dressez tous en une mesme sale, pour auoir plus de plaisir les uns avecques les autres par le temps qu'ils acheueroient de guarir. Là les sages Alquif & Vrgade leur dōnerēt maint pāssetemps de leur art, une fois mettant sous le seuil de la porte certains bulletins de parchemin avecques caracteres qui faisoient danser tous ceux & celles qui entroient, iacōit qu'il n'en eussent point d'enuie : une autre fois y faisant sourdre une fontaine qui remplissoit la sale d'eau si haute que les Dames estoient contraintes de leuer leurs cottes beaucoup par dessus le genouil, dont la risée fut fort grande. Une autre fois (pour donner

ner ebat sortable aux Seigneurs aussi bien qu'aux Dames) faisant descendre les neuf preux des tapisseries, dont la sale estoit tendue avecques leur armes & parure antique: qui causerent vne certaine frayeur es cueurs des Princes plus que ne faisoient les vrais champions en bataille. Au moyen de quoy l'Empereur Esplandian fit signe à Alquis sur Alexandre le grand qui se pourmenoit le troisième sus son bucéfal, de cesser sans plus faire descendre les autres. Mais entre les autres Rogel & Florisel son pere auoient leur plaisir à part, c'est assauoir du feu d'amour qui s'attisoit en eux p la veue de leurs Dames, Leonide à l'vn Sidonie à l'autre. Car l'affectio qu'il auoit portee à s^e Helene ne pouuoit plus diuertir celle de la Roine, cōme chose passée & sans retour contre la presente d'autant que l'absent euanouit, du present on iouit. Ainsi auint qu'un iour que Sidonie estoit assise aupres de son lit, Florisel voyant que personne ne les pouuoit entendre, luy dit à basse voix aussi tremblant que s'il eust eu vn millier d'hommes deuant soy à cōbatre: en se souuenant d'auoir oublyé ceste grande beauté, combien que desia elle luy eust pardonné. Donques il lui dit en iettāt vn gros soupir du fōd du cuer. Si vo^s auez onques receu madame quel que seruice de vostre Morayzel qui vous ayt esté agreable serue maintenāt entiers vous, à vous tirer à cōpassion de la mortelle douleur que ie souffre, sinon faites demoy le sacrifice qu'autresfois auez ordonné. O Agésilas que mieux eust valu que tu eusses par ta force extremē accōply sur moy le don que tu luy auois promis, q̄ par vne feinte l'auoir pratiqué à mon plus grief dōmage. O vie pour plus grāde mort, O mort pour plus grāde vie, O mort retardee pour plus l'accroistre mort plāche (si tu fusses venue) de meilleure vie. Cecy proferoit Florisel avecques tant de larmes qu'il n'en faisoit pas moins distiller des yeux de Sidonie, qui

tournoient à elle en allegeance. Dont elle luy commença à respondre à Morayzel (à mieux dire) Florisel l'infra-cteur & violateur des antiques loix de mō Royaume & plus encore de celles de mon honneur, cōme requerez vous misericorde & pitié dōt n'avez pas vſé vous mesme: cōme voulez vous que ie vueille ce q̄ ie ne puis & ne doibs? Car ne la loy de mō hōnesteté ne votre grauité royale ne peuuent permettre à Florisel ce que Morayzel refusa à Sidonie: ioint q̄ la mémoire de la princesse Helene ne doit estre en vous si tost estainte, & ie ne doibs octroyer selon ma grandeur telle faueur à moindre tiltre que de mariage: ce que quād bien ie voudrois, ne pourroit estre, les dieux en separans le pouuoir de la volonté. Alors se teut & Florisel demeurāt en pareille passion que parauāt, luy prēd la main qu'il lui baigne toute en larmes, repliquant; qu'elle ne deuoit mettre sus la compte de ce que le corps commettoit, à l'ame, qui ne faisoit point de faute, puis que sans telle erreur il ne pouuoit autrement sauuer la vie à l'excellent Prince Falanges d'Astre à raison des loix rigoureuses de son Royaume. En quoy deuez auoir egard (disoit) que quand vous eussiez voulu vous cōuertir à nostre loy pour paruenir au lien de vray mariage, ie n'e auois pas lors la puissance du viuāt d'Helene ma femme. Parquoy ie vous supplie madame d'auoir pitié de vostre Florisel & que ce qu'il ne pouuoit alors accomplir, vous l'acceptez maintenant que le moyē y est sans aucun destourbier & empeschement, de le pouuoir faire. Et en signal de ce, me baillēz à baiser voz blanches & delicātes mains. A à Florisel (elle respond) que les dieux vous ont doué de grande sagesse aussi bien que de beauté. Mais quant au point de mariage, puis qu'ils ne me l'ont permis au tēps de nostre premiere accointance, ie me tien plus glorieuse & heureuse d'estre vostre maistresse par celle obligatiō dont vous

me estes redeuable, que d'estre vostre legitime espouse, en teimoignage dequoy ie vous tends les mains; & les porte iusques à la bouche de celui qui les baïsa par grand amour. Ces derniers propos entendit Agefilâ q. n'estoit pas loing d'eux dont il fut trefaïse, avec le complot qu'il en auoit fait, qui sera déclaré cy après en son lieu pour traictier ce pendant les amoureux deuis qui passerent semblablement entre Rogel & la Princesse Leonide tandis qu'il gardoit le lit, luy, l'importunant tousiours tant qu'il estoit possible, à son remede elle s'en defendait de mesme par bonne dissimulation. Mais un iour qu'il commençoit de la se sentir mieux des playes du corps, & plus affligé de celles de l'ame. Leonide l'étreignant pres de son lit; il luy print ses douces & molletes mains, qu'il luy serre entre les siennes: le cuer luy fremissant, la face bloussissant & luy dit ma tres chere Dame: si ne vous pouuois démonstrer le moins du plus que ie sens, ie me réputerois le plus heureux de tous les vians: mais helas ie souffre trop pour bien le scauoir dire, ie meurs à faulte de remede vostre beauté & bonne grace m'attrait, mon malheur me recule, amour me combat, vostre froideur y resiste. Las les asfauts sont rudes contre moi ou ie ne puis parer que du bouchier de votre pitié & de la mercy: de laquelle ie vous supplie d'vser enuers moy m'acceptant pour vostre loyal espoux autrement ces derniers traits de ma plainte serot. come le dernier dourchant du cigne annonceur de sa mort. Ce propos finit Rogel avecques grosses larmes luy decoullans des yeux, qui n'eurent moindre force sur Leonide que l'eau iettée en la fournaïse pour augmētation du feu. Ce qui contraignit la belle pucelle de luy liurer les clefs de la forteresse de son honneur, en lui respondant à voix basse & trouble vous n'avez pas cause de vous plaindre monseigneur & ami Rogel, car ie ne souffre pas moins que vous

ie ne resiste pas moins aux alarmes de mon desir, ie sens autant vostre mal que le mien propre. Et puis que me requerez à tel titre d'honesteté, ie m'offre à vous presentement pour vostre parfaïtte amie & vraie espouse. Dequoy Rogel la remercia tres-affectueusement, en la resolution d'en tenir propos public si tost qu'ils seroient à Constantinople. Lendemain tous les Princes blesez estant gueris, se leuerent & delibererent de partir le iour ensuiuant. Par quoy SYLVES de la Selue avecques Pentafilee sa maiestresse sortirent de la ville si couuertement, menant chacun son escuier seulement, que de nul ne furent apperceus, pour exploiter vne chose qu'ils auoient pourpensée ensemble, qui vous sera tantost racontée. Car ils s'entre aymoient eperduement, sans toutes-fois que la Princesse luy decouurist son affection en euidence.

De ce qui auint aux Princes cheuauchans vers Constantinople au bois de leur premiere traitte et de la iouste qu'ils eurent apres en la seconde contre deux cheualiers.

CHAPITRE XLII.

LES Princes armez & les Dames attournées partirent en grand deuot duit de la ville de Coron & auoit commandé l'Empereur Esplandian des le soir à son maître d'hostel pour commencer à festoier les Princes estrangers, de leur aprester le dîner en la prochaine forest pres de la fontaine (ou estoit la premiere traitte). Les Dames estoient montées au char triumphal de la Roine Calpendre qui fut couuert d'un dars de toile d'or qui leur rompit la chaleur, du soleil (car c'estoit à la saison qu'il approchoit de la maison de l'ecrenice celle sortait de celle des gemeaux) ainsi arriuēt la ou la grosse fontaine bouillonoit ou ils trouuerent les tables mises à l'obres



des arbres : & s'affirent tous & toutes sur les pierres vives à la mode des cheualiers errans, y faisant plus gaye chere la moitié qu'ils n'eussent fait en leurs palais royaux. Et sur la fin du repas en lieu de Morisques Alquist leur dressa du passe-temps, de deux fiers lions iubés qu'il fit issir de l'épessueur du bois & adresser celle part, ou arriuez se pridrēt à rouiller leurs gros yeux flāboyans vers la compagnie. Quoy voyant le Roy Amadis : quelque belle auenture (dit il) se dresse icy pour nous. Or qui aura belle amie si le mostre & s'aïlle attacher aux lios : à telle loy, que s'il en presente les hures à sa dame, elle soit obligee à lui donner quelque ioyau precieux. Ceux qui estoient là du nobre des amoureux, allerent en haste rechercher leurs cheuaux : mais Rogel à q trop tardoit, s'y en va chaudement (oubliant mesme son armet) le simple chapeau empennaché en teste. Ainsi va trouuer les deux grands lions, desquels l'un se battāt de sa grosse queue, herisse sa criniere & rugissant jette les pattes de deuant cōtre Rogel, lequel ayant l'espee nuë au poing les lui trēche toutes nettes & ce lion luy empoigne l'escu aux dens, l'autre lui faute au collet, dequoy il se trouue en grād danger à faute d'armet : mais il lui fourre la pointe sous le ventre qu'il luy va

fendre le cuer en deux. L'autre retient sur lui à gueule bee (dont lions sont fendus iusques aux oreilles) pour l'engloutir : à qui Rogel (voyant sa dame deuant lui & la fleur de cheualerie dōt le renom estoit semē par tous les climats de l'univers) prenant à deux mains son espee & se lançant à costé luy décharge tel horizon sur les reins qu'il le pourfend en deux parts. Puis de deux coups trenche les deux testes, qu'il empoigne par les iubes & vn genouil en terre les va presenter à Leonide, disant. Je vous supplie Madame, me pardonner par vostre debonnaireté si i'ose ainsi publier mon secret pensēment, à quoy elle respondit, Monsieur ie vous remercie bien fort du present plus agreable pour la main dōt il vient & suis preste d'accomplir le don, à quoi le Roi nous à condānces, soy tirant à l'instant vn riche carqūan de Diamans qu'elle lui met au bras, au grand plaisir & contentement de lui principalement, & de toute l'assistance, & entre tous, du Prince Anastarax & de la Princessse Sylisne fort contents que leur fille fust colloquée avecques ce Prince qui ne cedoit en prouesse & hardiesse à nul cheualier de son tēps, ioint les grands estats & feigneuries qui lui apertenoyēt si est-ce (au dit de Galeris) que Filis de Montespīn

frere d'elle n'en fut pas des derniers cōtens. Or cet esbat failli, ils monterent à cheual & les dames en leur char couuert, & tant cheminerent qu'ils arriuerent à la riuere ou il falloit passer le pōt qui estoit fort bien basti de marbre blanc & poli, à l'entree duquel ils voient vn beau pavillon tendu, cōtre lequel estoient appuiees force lances mornes sans qu'il y en eust vne seule à fer aigu ny acéré, aussi deux Cheualiers mōtez sur deux braues courriers armez de toutes pieces, avec petis soleils d'or semez sur leurs harnois. A l'instant les voient parlans à vn escuier, mōté sur vn traquenart alezan, lequel s'en vient de ce pas vers eux & apres humble salut, leur dit. Seigneurs cheualiers mes maistres que vōyez là mēnuoyent vous aduertir qu'ils gardent ce pas cōtre tout homme portant armes, pour l'amour de leurs maistresses. Lesquelles ils ne veulent pas maintenir de paour de fâcher les autres dames & damoïselles, estre les plus belles de la terre, mais bien que la beauté de leurs amies surmonte la bonté de tous les cheualiers du monde.

Les conditions de la iouste sur ceste querelle seront, que chacun courra tant de carrieres que l'vn ou l'autre tombe, & que celuy qui sera cheut ne pourra demander combat à l'espee, son cheual demeurāt pour le pris du vainqueur. Mōami (respondit le Roi Amadis) les cheualiers sont fort courtois & gracieux, qui si bien exaucent l'honneur des dames, & pour ce vous leur direz donques de nostre part, que nous essayons à bien deliurer leur veu, afin de n'auoir la peine de chercher plus loing quelque endroit de la riuere, gueable. Surquoy l'escuyer s'eretourna: & incontinent se presenta l'vn des cheualiers sur les reings, cōtre lequel Galdes faisi de lance courut le premier qui fut porté par terre. Adonc Busend le Nain de Florisel se print à dire en

riāt. Au nom de Dieu que ces Cheualiers commencent à enseigner aux nostres à voler & bondir. Lors piqua Brianges la lāce morne baillée qui la rompit à demy pied pres du bout, & le cheualier du pas brisa la sienne en trois pieces. Si coururent vne autre fois l'vn contre l'autre à laquelle Brianges faussa compagnie à son cheual (qui fut emmené par l'escuier en la tente avecques le premier.) Apres marcha auant Filisel de Montespīn qui rōpit en ses deux courses aussi gaillardement que le cheualier du pont lequel n'y fut nomplus esbranlé que si c'eust esté vn escueil ou rocher, mais à la tierce Filisel voida les arçons, & l'autre perdit les estrieffs & chancela de telle sorte que s'il ne se fust tenu aux erins de son coursier il luy faisoit compagnie. A la cheute de Filisel, l'escuier vint prendre son destrier, & les princes furent grandement esbahis de la vigueur de celuy, qui auoit peu abbatre vn si gentil cheualier. Mais l'autre cheualier du pas ne voulut souffrir que son compagnon des soleils ioustast plus. Si se mit sur les reings pour attendre qui viendrait cōtre luy: dont faillit auant le prince Florestan, mais il laissa son cheual à la premiere carriere en proye à l'escuier du pont. Surquoy disoit la princesse Siluie, ie croi q'ces deux cheualiers amasseront assez de cheuaux pour mener à la foire, & son propos luy fut rōpu par la course du braue Artaxerxe qui fut belle & à son hōneur avecq's la seconde: mais à la troisieme il fit le fault à terre, cōme les autres. Que dirai ie pour ne le faire long, si nō q' Birmartes y fut abbatu, puis Galtazar de Tarsis, puis Anaxartes, Florarlā, Anastarax, brief iusqu'au nōbre de quarāte cheualiers de pris. Toute la cōpagnie estoit fort esbahie de la vertu de ces deux cheualiers aux soleils specialement du second: dont par vne gaye risée en dissimulant dit la Roine Oriane à Calpédre. Ce n'eust pas esté mal fait madame, si nous eussions

amené

amené encor' vn autre chariot pour ces cheualiers que ie voy en danger d'aller à pié, & si sot de mauuaise taille de laquais. A quicôque cela pleust, il depleut à l'Empereur Amadis, pour ce se mit sur les rêgs la lance en l'arrest (qu'à chacun son écuyer alloit prédre en la tente) & broche son destrier furieusement en intèrion de véger la hôte des assaillans, mais au point de la rencontre le tenât qui le reconnut fit alte, & l'Empereur aussi leua son bois: & le gentil cheualier aux soleils leua la veue de son heaume, paroissant en tres-grād beauté par la couleur que la iouste luy auoit augmentee, & fut aussi tost cōnuë estre le Prince Sylues de la Selue, cōme le premier iousteur estoit l'outrepasse des belles Pétasilee: dont ils furent tous emerueillez & les recueillirent en grand plaisir & soulas, leur disant Amadis de Grece en riant: A vous est vailante pucelle & à vous noble iouuenceau de seruir ces gentilshommes de courretiers de cheuaux pour les remonter, autrement les voila du degré de caualerie decheus en celuy de fanterie. A tât apres telle rîsee & resiouissance de tous, chacun reprend qui son cheual Turc, qui son genet d'Espaigne, q son double courtait, & s'en vôt au trot gagner la ville: puis voyant la nuit se clore auancerent au galop: louans grandement par le chemin la iolie ètreprise de ceste belle & incomparable paire, mesmemēt la verueur de si ieune pucelle: & de Sylues discourroit l'Empereur Amadis en sō cueur qu'il ne desauoieroit pas à fils, & les autres Princes se tenoient fort contents d'auoir vn si gentil cheualier en leur lignee, de si petit aage: mais sur tous la ioye de la bonne Roïne de Thebes Finistee estoit la plus grande. Si arriuerent à iour failly à Constantinople: ou ils allerēt descendre droit en la grande Eglise & faire sonner le *Te Deum laudamus*, en rendant graces à Dieu de les auoir sauuez & preseruez d'vne telle extremité.

De fiançailles qui furent faïttes la guerre estât finie, de Florisel de Niquee avec la Roïne Sidonie, de Rogel de Grece avec la princesse Leonide & d'autres à Constantinople.

CHAP. L.

VOus auez cy deuant entendu cōme le Soudan de Perse auoit enuoyé vn fort grand secours de Persans au siege de Constantinople sous la cōduite du duc de Soran son lieutenāt: lequel fut chargé de ses recommandatiōs speciales & de la Soudane, Persilee. leur fille & de Sidere & ses deux sœurs enuers Rogel de Grece, avecques lettres expresses le sommant amiablement de s'acquitter de la promesse qu'il leur auoit faïtte au partir, de retourner les veoir apres l'issuë de la guerre. Car le bon Soudā & ses dames ne pouuoient oublier la grāde obligation dont ils estoient redeuables de leurs propres vies à ce gentil Prince. Et auoiēt luy & la Soudane pourpensé n'en pouuoir faire meilleure satisfactiō que de leur couronne mesme, en luy presentāt Sidere en mariage qui l'heriteroit à faute d'hoir male. Las le bon seigneur ne sauoit pas le brouet q se brassoit avec autre mariee, de quoi le Duc en auoit veu à descouuert sur le lieu les approches. Si est-ce qu'apres que les Princes de Grece eurent tenu leur cour planiere & traité & festoié plantureusement les Princes estrangers qui estoïēt venuz à leur aide, le premier qui vint prendre congé pour s'en retourner fut le Duc selon le cōmīdemēt expres qu'il auoit de son maître de ne seiourner apres la guerre q le moins qu'il luy seroit possible. Or y eut en sa compagnie vn gentilhōme Persan de la nourriture de Persilee, & d'autant fort priuē de Sydere sa fille, qui auoit apporté à Rogel vn liuret de deuotions en langue Perlique, n'ayant autre charge à luy dire de bouche q ses tresaffectueuses recommandations en luy presentant

le liure qu'elle luy auoit fait accoustre à sa requeste dorer & garnir les fermans d'argent & emeraudes au nombril de la couuerture. Car il luy auoit donné ce secret pour luy escrire toutes choses sans escripture par vn moyen dont personne ne s'auiseroit à decouurer leur chyfre. Lequel Rogel leur incontinent, ou il connut que la belle princesse souffroit mortelle agonie pour son amour, & le prioit de luy en enuoyer vn en langue Grecque s'il n'en estoit luy mesme le porteur (pour mieux desguiser la matiere) Ce qui le munt à vouloir entreprendre le voyage pour reconforter celle qui par sa grandeur & extreme affection le meritoit, esperant de luy diuertir ceste passion par la remonstrance qu'il luy feroit du lieu nouveau dont il estoit depuis astraint par conseil du Roy Amadis des Emperours à la Princesse Leonide. Laquelle aussi vous pourrez penser quelle destresse elle sentit en son cuer quand sur le point de leur mariage elle le veid embarquer à la route de Perse. Les Princes mesmes & dames estoient fort mal contens de son si soudain partement. A quoy le sage Roy Amadis qui congnoissoit & craignoit le naturel du pelerin & auoit senty quelque vent des dames qu'il auoit conduites, pour luy donner vn accroc en iambe, le second iour du festin royal en celle haute assemblee, les tables leues commença à entamer ce propos: Hauts Princes & seigneurs mes enfans, mes parens & amis i'ay à vous mettre ici en auant, que ie considere que mon neveu Rogel de Grece fils de Florisel de Niquee estant legitime successeur d'Empire, doit estre conioint par mariage en lieu digne de luy, & aussi d'autres princes que ie voy ici assemblez en bonne encontre, pour ainsi tourner la saison calamiteuse qui est passée en toute liesse & heureux contentement. Ce que ie ferois fort volontiers si voz plaisirs en cela s'accordoient au nostre. A quoy cha-

cun prestant consentement, le Roy se leua & prend Rogel par la main, qu'il mene vers la Princesse Leonide disant: Belle princesse ie vous prie d'accepter ce chevalier pour mari à ma requeste, à quoy elle respondit qu'elle ne pouuoit aller au contraire de sa volonté & de celle noble assistance. A ce mot est appellé le patriarche de Constantinople qui les fiance ensemble: Et apres Filisel de Montespain avecques la pucelle Anazare & le prince Artaxerxe avecques la roine Lardenie, qui estoit bien entre les belles dames de la cour. Adonc sonnerent menestriers & la ioye renforça grande par le palais principalement entre les fiancez & leurs fiancees, iouissant des arres qui leur sont permises du principal marché.

Or pour la rendre encores plus cōplette Rogel de Grece & Agefilan s'en allerent au lieu ou estoit la Royne Sidonie assise, à laquelle Agefilan avec tres humble reuerence commença à dire: Ma-dame puis que ls fortune m'a tant fauorisé en la premiere requeste que autresfois vous ay faite, ie vous supplie de ne me vouloir refuser la seconde, à laquelle me reenge vne necessité extreme: A quoy elle respondit, qu'ils requissent ce qu'il leur plairoit, & qu'elle leur otroyoit franchement: de ce pas autant en vont demander au Prince Florisel, qui leur accorda pareillement. Alors dirent tout hault, que leur requeste ne rendoit à autre fin qu'à ce qu'ils fussent mariez ensemble: de quoy toute la cour fut esbahie, mesmement le Roy Bimartes à qui il en pesoit moult, pour la playe trop fresche qui sembloit saigner encore de la mort de sa fille Heleine: toutes-fois il le dūsimula au mieux qu'il peut & le passa sous silence: Et la Roine Sidonie dit à Agefilan: Dieu souverain que merueilleux sont voz secrets, qu'il vous ayt pleu que Sidonie fust abusée par Moraizel, & que sa teste
par

par mes propos mains fust rachetee de mort pour mon plus grand dommage, afin que maintenant en si grand honneur nous fussions coïoints. Las chetive, que ie ne sçay bonnement que doive faire ne quel parti prèdre, mon honneur me crie vengeance, la royale puissance me la denie, toutes-fois ma parole ne peut estre faulsee : O Agefilan, ou mieux dire Daraide, puis que tousiours en vous comme Daraide i'ay trouué tout cōseil & cōfort ie te requiers conseil en foy de Prince, & cōme de Daraide ie l'espere. A ce mot la Roïne Daraide qui parauāt souloit estre appelée Briolaine, se tourna vers Sidonie lui remontrant que puis que de Daraide elle portoit ia le nom qu'elle en deuoit iouir des œures, & puis que vo^s arraisonnez maintenant Daraide, Daraide vous respond que ce qui est arresté par ces vertueux & sages Princes, est biē arresté, & ie les prie de ne se departir de leur parole. Puis qu'ainsi va (dit Sidonie) en soit doncques demandé l'avis & opinion au Prince Florisel, d'autant que desia ma parole me lie & suis disposée à l'effect. Que diray-ie (respond Florisel) sinon qu'en cecy ie reçoÿ le plus grand bien qui m'eust peu auenir en toute ma vie ? par ce que ie suis prest de l'accomplir. Ce dit fut appelé le Patriarche qui les fiança sur le champ : dont la feste encore renouuellee plus grande, au singulier contentemēt de la roïne qui voyoit son affaire ainsi mis à chef à son honneur. A tant fut conclud & arresté que la solennité des nopces seroit celebree à la feste saint Iean prochaine, qui escherroit dans quinze iours & que lon crieroit à son de trompe cour planiere pour les espousailles de tant de Princes & Princesses. Ainsi passerent ce iour en soulas & en dances, ou les fiancez s'acouplerent ioyeusement, attendans en bonne deuotion le iour assigné de leur gloire : combien que Don Arlanges & Agefilan en iouissent desia à la pluspart

des nuyts. Mais le terme estoit bien court pour le voyage de Perse que Rogel auoit entrepris irreuocablement : auquel l'histoire en cest endroit nous appelle.

Comme le Prince Rogel de Grece pendāt le terme des mariages s'embarqua suiuant sa promesse pour tuer en Perse avecques l'armée du Soudan : Et du compte que rendit Brianges de Beocie aux Princes, des auentures de leur dernier voyage, mesmement de celle de la deliurance de la Roïne Sidonie & de luy des prisons d'un Geant.

CHAP. LI.

LE Prince Rogel de Grece estant resolu de faire le voyage de Perse avec le Duc lieutenant du Soudan, quand il le veid prest de s'embarquer en communiqua avecques Florisel son pere & lui au Roi Amadis, remōstrant qu'ainsi l'auoit promis au Soudan lequel aussi auoit enuoyé le secours à ceste charge. D'auātage qu'il en auoit receu lettres expresses qu'il leur exhiba. Et sur ce qu'il lui fut obietté du iour solēnel des mariages si prochain, il promet ne seiourner point en Perse que le mois qu'il pourroit pour honnestemēt s'aquitter de sa foy. Autrement ne fut possible au Roy de l'en demouoir, qui y mit grand peine, ayant senty par quelques propos superficialz vne partie de l'enclouure. Or print congé de lui Rogel & apres des Emperours, & des dames, sans oublier la Leonide qui par ses pleurs & plaintes le cuida plus destourner que toutes les raisons & suasions des autres : mais sur la promesse de son brief retour il l'appaisa aucunement. Lequel nous laisserōs singler en haute mer quelque temps, pour acheuer les bonnes cheres & magnificences qui se faisoient à Constantinople. Mais vn iour à l'issuē d'un festin, le propos estant du
parce-



partement de Rogel, avecques louenge merueilleuse par chacū de ses hauts faits d'armes, le Prince Brianges, tesmoigna de ceux qu'il lui auoit veu faire en leur dernier voyage: dōt n'y auoit celuy qui n'en fut estrangemēt esbahi, mesmemēt de la prouesse dont il auoit vsé à la deliurance de la Roine de Galdap, de la roine Sidonie & de lui mesme du chasteau d'vn Gean. A quoy Sidonie adiousta son tesmoignage. Ce que Galeris auoit differé de traiter (aussi bien que des nouvelles de Perse apportees à Rogel) pour l'vrgent affaire qui l'occupoit de la descente des Russiens en la Grece. Adōc leur compra Brianges par le menu toutes les auentures des Corsaires, du Fraudeur & les autres que vous auez cy dessus entendues, puis tombans sur le Geant qui l'auoit tenu en ses prisons leur en deduit l'auenture en ceste maniere.

Le Prince Rogel apres que ie leu laissé en la compagnie de Sydere niece du Sou dan de Perse & de ses deux seurs (lesquel les il auoit deliurees du chasteau de l'enchanteur qui les auoit volees en la cour de leur ayeul par vne inuētiō d'vne tour mobile qui les emporta en l'air visible-

mēt) il les accompagna tousiours depuis iusques à les remener en Perse: là ou suruenant vn courrier de Grece requerant secours contre les Russiens, il s'embarqua soudain avecques lui sans attendre la leuee des gens qu'on lui vouloit bail-ler à conduire, craignant la longueur de l'embarquement de l'armee, & ne vou-
lant faillir à soy trouuer aux premiers coups. Or à ce retour (de bon heur pour la roine Sidonie & Fusilee de Galdap & moy) il fut ietté par fortune hors de sa route en rade costiere, la ou descendu, il eut quelques auētures non de grāde im-
portāce, mais de l'vne à l'autre il se trou-ua pres du chasteau ou i'estois allé quād ie departi d'avecques lui pour veger vne
dameiselle que nous auions rencontree soy plaignant amèrement d'vn Geant qu'elle disoit lui auoir fait outrage. Con-
tre lequel ainsi que ie combattois en la cour de la troisieme tour, ayāt eu princi-
palement affaire contre les gardes des deux premiere & secōde tours, ie fu sur-
pris par derriere par de gros valets qui me porterēt en vne basse & obscure fos-
se. Dieu y amena le gentil Prince Rogel par ses iournees, qui trouua de bonne

encon-

encontre la porte du chasteau ouuerte les ponts leuis abbatus, dont il passa de tour en tour iusques à la troisieme: car on ne s'y doubtoit lors de personne, & on faisoit entrer des prouisions & munitions dedans le chasteau. Aussi le Geant ne se deffioit de rien au moyen de cinquante cheualiers qu'il y tenoit par les tours de garnison ordinaire. Estant donc entré Rogel en la basse cour, & de là en la portique ouallee ronde percee au milieu sur pilastres, en se pourmenant il entroit vne voix d'une sale cōme de femme disant: Geant fay ce que tu voudras pour me tollir la vie (la sacrifiant à ma gloire & renommee) car les dieux ne permettront que ie fausse iamais l'amour de mon Moraizel: Ha traistres, disoit vne autre voix aussi de femme, & pensez vo⁹ que Sidonie ne moi quittiōs l'affection que nous portons à Moraizel, & Agefilan. Rogel oyant ces propos, ou ie suis (dit il) hors de mon entendemēt, ou c'est là Sidonie qui parle. Le surplus Madame (dit Brianges se tournant vers elle) ce seroit mieux à vous qui y estiez presente à le reciter qu'à moi qui ne l'ay aprins que de vostre bouche mesme: mais elle s'en excusa sur lui comme de fait d'armes qui estoit de son gibier pour mieux le sauoir dire qu'elle. Sur ce point (poursuit Brianges) il entre en la sale ou il veoid la Royne assise à terre, & aupres d'elle vne des plus belles dames qu'il eust onques veu en sa vie, & sur le bord de leurs robbes, deux Geans sur leurs genouls. Les belles Dames tordoiēt leurs mains, s'arrachoiēt les cheueux & versoiēt larmes de leurs yeux en abondance. Ha bestes mōstreuses (ecrye Rogel) vous reparez prōptement l'offense que vous faites à si haute princesse, & vous tresillustre Royne Sidonie ne vo⁹ esmaiez en riē, voici vostre Rogel de Grece. Alors se leue vn des Geans qui va prēdre sa salade & vn grād coutelas disant, maintenant verrons nous que tu feras: car bien ie m'asseure que tu es

icy entré d'ēblee. Sur ce mot le Geāt luy tire vn grand coup que Rogel euite d'vn saut à costé, en luy en tirant vn autre qui gueres ne l'endōmagea à cause de la bōté du harnois. Surquoy va l'autre Geant par derriere avec vne grosse masse de fer pour l'assommer, si Sidonie ne luy eut ecry de se garder. Parquoy se lāça d'autre costé, ayant les deux Geans de front lesquels luy ruerēt de horribles coups, qu'il destournoit de vifesse & habileté non toutefois tāt bien peut, il tousiours gauchir, qu'il ne receust quelques horions orbes de la masse de l'vn sur sa chair, & des trenches du coutelas de l'autre. Je ne le vous feray plus long: messeigneurs disoit Brianges, sinō qu'il s'adossa à vne paroy, & fendit la teste à l'vn, puis couppa les iarrets à l'autre, & le renuersant d'vn coup de pied lui trencha le col de son espee. Aux cris horribles de la mort que ieterent les Geās l'alarme fut chaude par le chasteau, dont accoururent Cheualiers & vilains, armez de cabacets & vouges à la haste. Parquoi se presenta Rogel à la porte pour n'estre enuahy de tous costez, demeurans les deux Dames en la sale en piteux regrets & prieres à Dieu (qui tousiours ayde au bon droit) de preseruer le gentil Prince de ce grand peril ou elles le veoyent. Hā (disoit Sidonie) Rogel, image de celui qui tient tousiours mon cuer captif, que ta bonté & appertisse est grande que certainement tu ne peux faillir d'estre issu de ce Moraizel l'outrepieux de tous les Cheualiers du monde. A à Moraizel comme il t'est bien ottroyé du ciel de triomfer sur moi en toutes choses non toy seulement, mais encore ceux qui de toy dependent, La Royne de Galdap de son costé ne faisoit gueres moindres doleances, Rogel la remettant par sa taille & disposition en la souuenance de sa Darayde, de laquelle (la rencontrant vn iour à la chassē combattant contre ses Cheualiers) elle s'enamoura l'estimant homme. Or pour

retourner à nostre propos le combat fut long du Prince contre ces rustres & malfins: mais il se tenoit quelque fois à l'entree de la porte autrefois il se lâçoit parmi eux tant qu'à la longue il en eut la place de tous que morts que naurez, fors du dernier qui lui requit merci de la vie, & il luy ottroya pour lui seruir de guide par le chasteau. Alors s'assied Rogel de lasseté sur le seuil de l'huis, & les deux Roines vindrent à lui, Sidonie lui demandant s'il auoit aucune playe qui fust grievue: & lui, ostant son armet pour leur faire la reuerence, elle ne se peut tenir de le saisir entre ses bras & le baïser doucement en la face, non sans l'arroser de ses chaudes larmes. Et lui declairant que sa compagne estoit la Roine de Galdap, il la salua de rechef fort humblement & elle en fut plus esmeuë que parauant pour la semblance plus grande à la deconuëe à son Agefilan. Adonc s'assied Rogel entre elles, & commanda au valet du chasteau de lui amener incontinent tous les autres prisonniers de leans. A quoy il obeit & allumant vne torche de cire, alla aux basses fosses, & à l'ouuerture du gros huis de fer, leur escrya, ça ça venez tous pourez captifs, car l'heure de vostre liberté est venue: à quoy ie respondi pour to⁹ que la mort voirement nous estoit suffisante liberté que tât nous souhaitions (pensant qu'il nous menast au dernier supplice.) Non non (dit il) vous estes au iourd'huy mis en plaine & entiere deliurance, & par la main d'un seul Cheualier, qui tout a occis ceans, maistres, cheualiers, valets, qui portoyent armes, fors que moy. De quoy nous voyans bien asseurez par sa parolle, sortons à la file comme en procession, chantans *Te Deum laudamus*. Alors la Roine Sidonie print la parolle: Certainement les pourez prisonniers estoient si palles, si maigres & decharnez qu'ils sembloient plus fantomes que creatures viues: & ainsi vindrēt iusques au lieu ou estoit Rogel aupres

de nous se prosternās tous en terre pour lui baïser les pieds. Qui lors leur dit, qu'ils auoyent à en rendre graces à Dieu (de qui lui en estoit venu le moyen) nō à lui. Et lui & nous deux à plus forte raison nous mīmes à pleurer de compassion, qui auions senti nostre part du mesaise. Car vous veissiez alors les vns à qui par la longueur de la prison les habillemens estoient si pourris qu'ils ne leur couuroient pas le ventre, les autres eblouis de la lumiere si long temps desaccoustumee cheoir comme aueugles en la place. Et estoient bien enuiron cent Cheualiers, cinquante Damoyelles (à nous mettre du compte) & autant d'escuyers. A tant Brianges reprit le propos, disant: C'est à moy maintenant mes Seigneurs & Dames, à vous dire l'aise, que i'y receu outre ma liberté, quand ie reconnu le Prince Rogel, qui m'en estoit la cause: lequel m'aperceuant entre les autres se leua sur les pieds si mat & trauaillé qu'il estoit & à bras ouuerts me vient acoller: las est-ce vous Brianges mon grand amy? Dieu ma il fait la grace de vous tirer de ceste miserable captiuité? A quoy ie lui respondi comme demy transporte de ioye, que bien ie m'attendois d'en estre deliuré par ses mains ou par nulles, comme de celui à qui toutes les bonnes auentures du monde sembloient estre reseruees. Depuis, la Roine Sidonie s'en alla à Guindayē faire la leuee des gens qu'elle a amené à vostre secours, la Roine de Galdap se retira en ses terres dont pareillement elle vous a enuoyé de ses sujets, & Rogel en Perse. Or touche à la Roine (regardant Sidonie) de vous dire qu'elle auoit esté l'occasion de sa prise. Lors elle compta, comme allant visiter vne sienne ville distante de vingt lieues de la pour quelque trouble & esclandre dont elle auoit eu auis, estant accompagnée de trentre Cheualiers seulement, elle eut la mal'encōtre de ces deux Geas qui

qui deffirent tous les gens sans qu'il en restast vn seul pour en porter les nouuelles : puis l'un d'eux la print sur son cheual entre ses bras : & estoient en propos de les renger à leur orde volonté & forcer quand si à point Rogel sureint à leur deliurance.

De l'amour qui s'embrasa entre le Prince Rogel de Grece & la belle Royne Fusilee de Galdap, & de ce qui en auint.

CHAP. LII.

EN continuât ce propos dit Galerfis que Brianges de Beocie ne voulut passer outre à toucher l'amour dôt Rogel fut esprins de la belle Royne de Galdap, pour l'assistance des Dames qui en eussent eu les oreilles offensées (comme les eut Leonide cueur & tout) à ouir faire mention du long voyage qu'il auoit fait en la compagnie de Sidere & ses seurs (qu'on disoit estre douee de rare beauté) veu celui qu'il entreprenoit encore de nouveau en son pays: tellemēt qu'elle ne peut estre bien rappaisée iusques à son retour & l'accomplissement parfait de leur mariage. Or dit Galerfis: Que, apres auoir Rogel donné ordre à tout par le chasteau, & fait faire bō traitement de ce qui s'y trouuoit tant aux Roines & aux Prince Brianges, & autres Cheualiers de marque qu'à tous les prisonniers: il s'en trouua vn expert en chirurgie qui lui appareilla ses playes & luy conseilla de garder deux ou trois iours la chambre & le lit pour en estre plustost guerī. Ce qu'il fit fort enuis, ne les estimant dignes de si songneux gouuernement & regime. Mais entre les premiers qui plus se resiouirent à la feste, fut Sirind son escuyer qu'il auoit laissé dehors (quand il entra au chasteau) à la garde de son coursier, qui n'en bougea iusques à ce qu'on l'appella, ayant ouy le bruit

& tintamarte qui se faisoit dedans, qui le mettoit en grand esmoy de son bō maistre. Tādīs qu'il fut au lit, les deux Roines luy tenoyent bonne compagnie, & il fut ardemment espris de la grand beauté de celle de Galdap, qui n'en sentoit gueres moins de son costé pour la sienne. Et n'attendoit que l'opportunité de se trouuer seul avec elle pour luy decouurir le fond de sa pensēe : en quoy l'empeschoit Brianges qui ne s'elognoit gueres de lui. Si lui compta lors Rogel par maniere de deuils les grandes approches & batteries qu'il auoit faictes enuers Sidere pres d'aller à la breche liurer l'assault: & comme lors il estoit merueilleusement rai de la bōne grace & coïntise de la Roine de Galdap. A quoy Brianges dit: vsez en à vostre mode, ie ne gaignerois rien à vous faire remonstrance d'estre loyal, puis que ie cognois le peu de compte que faictes de loyauté. Laissez ses vertus là à noz vieux peres (respond Rogel) car tant que la verte veine durera, ie ne perdray pas ce plaisir. Pensez vous que quand mon Seigneur le Roy Amadis n'eust esté si loyal, qu'il eut failli pour cela, d'obtenir la Roine Oriane à femme? Au moins (dit Brianges) n'eust il pas entré en la chābre defendue, ne gaigné l'honneur de l'arc des loyaux amans, du chapeau de fleurs, & n'eust tiré Diane hors de l'enchantement. Ne vous en arrestez pas là (respond Rogel) car Galaor son frere, s'il n'a mis à chef tant de preuues de sa preud'hommeie, il a aussi acquis de hautes victoires sur force belles dames: Ainsi dit on en cōmun proverbe (replique Brianges) que chacū est fol à sa guise, & à se mot il se retire vers la Roine Sidonie, voiant celle de Galdap venir deuiler avecques lui. Laquelle à son arriuee lui demanda cōme il se sentoit, & il lui respōdit qu'il estoit en estat de ne la faire pas longue: Ia à Dieu ne plaise dit elle, que tel incōuenient adueniēne au mōde: Et quelle est vostre plaie?

incurable (respond) & au milieu du cueur, dont le remede ne gist qu'en la main d'une seule dame. La Roine qui entendit le cas en vn mot & à qui s'adref-soit la presente, se façōna en la plus gen-tile contenance qu'elle peut, & en se sou-riant de fort bonne grace, luy respondit: ne vous tourmentez point tant mon sei-gneur, car qui vous cause la plaie ou ma-ladie vous y fournira la medecine. Dieu le vueille (dit Rogel) en luy serrant la main. Et à l'heure suruint Sidonie qui les departit, & entama vn autre propos, puis firent couvrir pour le soupper en la chambre mesme, à fin de mieux re-siour leur malade. Lequel ordonna l'en-demain que par le chasteau fust recher-ché & amassé tout le butin & pillage & rēdu à chacun des prisonniers à qui il ap-partenoit. Puis se fit apporter par Sirind & autres, to⁹ les tresors du Geāt seigneur de la place qui estoient tresgrāds, lesquels d'auātage il departit entre eux tous. Car tels princes (dont encore dure la me-moire illustre) n'estoiēt adonnez à l'aua-ricie & ne faisoient compte des riches-ses, sinon à les distribuer liberalement à ceux qui les meritoient & en auoient besoing : non pas comme autres font (dit Galeris) qui pillēt les biens de leurs pauvres sugets pour en emplir leurs co-fres. Parquoi se retira chacun en sa cōtree prenant congé du bon prince, & epan-dirent le los de sa vaillance & de sa lar-gesse par tout ou ils se trouuerent toute leur vie. Comme aussi fit de Rogel, Ga-leris, & des autres vertueux princes, dont il fait mention en ceste histoire, e-ternisant leur gloire par sa plume pour les grans bienfaits qu'il receut de la mai-son de Grece. Or pour reprendre nostre propos touchant la passion d'amour, ou Rogel estoit plongé profondement à l'endroit de la Roine de Galdap (qui Fusilee estoit nommee) vn soir cōme ils souppoient estans vis à vis l'un de l'autre (non sans quelque attouchement de

pieds sous la table) Rogel la contem-plant ententiuement, luy vint à ramen-teoir si elle auoit point souuenāce d'un cheualier qui en auoit combattu pres d'une tente à reculon sur son cheual en estrange maniere, & elle le remarquant (parce que lors il ne fit cōnoistre son nō) s'apperceut que c'estoit luy mesme qui auoit fait telle hôte à ses cheualiers (qui vous a esté ci dessus recitee,) de quoy Si-donie rit de bon courage : mais celle de Galdap en changea couleur par la souue-nance de sa prinse qui y estoit auenue par les Geans en ce pas qu'elle faisoit garder par vn beau mignon de couchette tren-chant de l'amoureux, qui y fit mauuaise garde de sa maistresse. Apres le soupper Brianges entretint la roine de Guindaye & Rogel qui estoit desia en bōne conua-lescence, sa dame par amour, dōt il depar-tit (s'allant chacun reposer) feru iusques aux étrailles, & elle deux ou trois doigts d'auantage. Or s'estans apres le bon soir donné les dames & Brianges retirez, Ro-gel se coucha assez mal content de la se-paration de sa nouvelle amie avec la-quelle le contrat estoit bien passé de pa-role ne restant plus que la prinse de pos-session: dont il trauailla fort à s'endormir ayant ceste Puce en l'oreille, mais à la fin le sommeil le surprint : & gueres ne l'a-uoit encores tenu: quand la belle Roine qui cōbattoit d'autre costé en son lit cō-tre la plume, ne pouuant prendre aucun repos, se leue sur la minuit deliberee de franchir le fault, Si iette vn riche mâteau de toile d'or fourré d'ermes sur sa che-mise bien ouuree de belle soye cramoi-sie & prenant vne bougie de cire en sa main, s'en va tout doucement toucher à l'huis de la chambre de Rogel. Lequel y sentant heurter se leue en sursault en son manteau de nuit l'espee au poing & son escu au col, & va ouuir sa porte. Qui fut bien esbahy quand il veid la roine ce fut luy & ioyeux ensemble, à q elle dit en fermāt l'huis, Monsieur vous n'avez que faire

faire d'armes contre celle qui se liure toute vaincue: & moy madame (dit-il) ie me rens à vous dague & tout. Si pose les armes ius & lui dit en iettant les bras au col: Ma chere amie, comme pourray-ie recognoistre la grace que vous me faites par dessus mon merite, en ce que ne me payez, respond, d'un dedain, en tenant moins de compte de moi, par ce que i'ay fait: en quoy si i'ay fait faute en soit la coulpe sur l'amour: Ha ma douce deesse (dit Rogel) en la baisant ne me tenez point ce langage, car vous m'obligez de la vie, & plustost m'oublieray-ie moy-mesme que tel bien-fait que ie reçois de vous. Lors furent maints baisers dōnez maints baisers renduz de bouches emmiellees au plus grand soulas & contentemēt qu'ils eussent oncq'eu en leur vie avec tāt de traits de volupté, d'accolées, & mignotises, farcies de petits mots de mesme que forgent les chatouillemes saououreux, q̄ la nuit leur sembla trop courte & la lumière du iour trop hastiue & enuieuse. Car Fusilee outre sa beauté auoit vne certaine gayeté naïue qu'elle couuroit de modestie deuant les gens, mais en priuē lachant la bride donnoit à l'ami folatremēt mille attraitis de plaisir. Auant le iour elle se retira bellement en sa chambre, & se remit en son lit, ou elle se laissa trouuer assez tard par Sidonie & Brianges y faisoit bōne mine de meilleur ieu. Quelques iours encore furēt ensemble esquels ils continuerent secretemēt leurs amours iusques à ce qu'il se cōuint separer & s'en aller chacun à sa chacune, c'est assauoir la Roine Sidonie à Guidaie & Fusilee à Galdap: ou elle acoucha à chef de terme d'un bel enfant qui fut baptisé Argantes, & fit de hautes cheualeries en son tems, lesquelles serōt traictées au quatorzieme liure de l'histoire. Mais pas ne deuons ici oublier qu'il auoit des sa naissance des lettres grauees en sa poitrine qui ne furent leues ni entēdues de lōg tems, & contenoient telles paroles.

PROPHETIE.

Quand les deux engendrez du Lyon se iointront avec la tierce engendree, le petit enfant recouurerā son pere.

A tant les laisserons pour deduire le second voyage de Rogel en Perse.

Comme Rogel impatient de la longue & tardine traitte de la flotte du Soudan se mit en un leger vaisseau avec Sirind son escuyer pour la deuancer en Perse.

CHAP. LIII.

Retournant dōcques sur les brises de Rogel de Grece, quand il s'embarqua avecques le Duc il n'oublia le liure de prieres en langue Grecque que la Princesse Sidere lui mandoit, par lequel il lui feroit tenir de ses nouuelles. Mais des le premier iour de leur nauigation estant retiré en la chābre de poupe, se mit à gouuerner ses pensees, discourant sur le train de son amour de se veoir ainsi enueloppé de celui de la gēte Fusilee de Galdap qui estoit demeurée de lui enceinte, maintenant de la trauerse de celui de la belle Sidere de Perse, sans le principal de tous qu'il portoit à sa fiancée Leonide. Las toi (disoit-il) Rogel que ta destinee t'est contraire de demembrer ainsi ton cueur en tant de parts, en aimant ensemble tant de belles dames. Ne serois-tu pas beaucoup plus heureux de souffrir pour vne seule? comme ont fait tes genereux ancestres, qui ont autāt acquis d'honneur par leur loyauté que par leur prouesse. Au moins si tu pouuois oublier par interualle Leonide tandis q̄ Sidere te traueille. Mais si Sidere m'assaut, Leonide me liure la mort: i'ay tāt continué de temps avecques Sidere par nostre long voyage que ie ne la puis si tost effacer de ma memoire, ioint l'amorce qu'elle me laissa du feu amoureux par sa gracieuse promesse à nostre departemēt. O amour (exclame ici Galeris) que

tu es d'estrange nature, qui ne permets
 iamaïs tes sugets iouir d'un plaisir ferme
 & entier (comme ces deux amâs experi-
 menterêt) dont l'un bruloit d'ardent de-
 sir, l'autre estoit passionnée de soupçons
 & ialousies qui l'auoiēt induite à perdre
 la honte virginal pour luy escrire. Or
 considerant Rogel en soy le brief retour
 qu'il auoit promis au Roy Amadis & spe-
 cialemēt à sa fiancée, estoit en grâde per-
 plexité cōme il satisferoit aux vns & aux
 autres. Parquoy resolut pour euitier la lō-
 gueur de la traite de l'armee du Soudan,
 de se mettre en vne fuste legere pour la
 deuâcer en Perse. Ce qu'il obtint du duc
 à grande difficulté pour le danger ou il se
 mettoit plus grand à voguer en ce petit
 vaisseau. Par lequel il paruint en Perse en
 moins de quatre iournees que la flotte.
 Et s'en voyant approcher de la demye, il
 print le liuret Grec, auquel il marque sa
 respōse à la lettre de Sydere (par leur mo-
 de secrette) q̄ estoit telle, *Trouuez le moyen*
de parler ensemble ceste nuit sans contrerolle.
 (car en telle escriture la briueté est re-
 quise) leq̄l liuret il donna charge à Sirind
 de porter sur soy quād il yroit faire la re-
 uerence au Soudan & aux Dames. Si tost
 qu'il arriua au port, le vaisseau estant vi-
 sité, il fut reconnu, & le bruit porté ius-
 ques au palais, auant qu'il se fust mis en
 equipage pour descēdre à terre. Dont la
 ioye fut si grande par la ville & au palais
 du Soudā, de luy, de la Soudane & d'une
 de ses nieces entre autres, que ce n'est pas
 chose croiable: & sembloit que le pere, le
 protecteur cōmun du païs y fust arriué:
 de telle sorte qu'incontinent il trouua
 escuiers à sa descente avecques braues
 coursiers richement caperaçonnez, pour
 monter dessus luy & son escuier. Je ne
 vous feray longues les caresses qu'il re-
 ceut du Seigneur & des dames, mesme-
 mēt de Persilee qui s'y trouua d'auēture,
 qui l'entretint plus que nul pour le point
 ou elle esperoit, voire avec assurance de
 son alliāce par les propos du Soudan son

pere: mais il estoit ia voué (comme a-
 uiez entendu) à autre sainte, dont ils ne
 pouuoient encore estre auertis en l'ab-
 sence du Duc qui bien le sauoit en aian-
 veu les fiançailles, Le Soudan tint cour
 planiere à la venue de Rogel qu'il n'ai-
 moit pas moins que soy mēme tāt pour
 si grande vertu que pour les biensfaits
 qu'il auoit receu de luy en soy & les siens:
 par la cité la liesse en fut telle, q̄ les bou-
 tiques furent closes comme à iour de fe-
 ste: qui dura tant que le prince Rogel y
 seiourna. Je ne parleray point du magni-
 fique traitement des festins sinon qu'ils
 furent fournis de toutes les viandes ex-
 quisēs & vins delicieux qu'on peut recou-
 urer: seulemēt vous diray que le bon Sou-
 dan non content de l'auoir embrassé à la
 premiere rencontre par si grand & pure
 amour, que la larme luy en couloit sur sa
 barbe grise & ne le pouuoit lascher si la
 Soudāne ne les eust separez pour en prē-
 dre sa part toutesfois non assouui, plus
 de dix fois encore le rembrassa la iour-
 nee, luy disant qu'il s'assurast d'estre le
 mieux que bienueu, & qu'il pouuoit
 faire estat de sa personne, de son empire
 & de sa couronne cōme de chose vraye-
 ment sienne. Or apres le soupper Sirind
 se tint pres de son maistre avec le liuret
 qui vint fort à propos à le presenter par
 Rogel à Sydere en la presence de Persi-
 lee, q̄ ne s'elōgnoit point de luy vne seu-
 le minute, & le mania & ouurit par plai-
 sir, dōt tressaillit sa fille aisnee de frayeur,
 craignant ce qui estoit à craindre, qu'elle
 peust decouurir leur chifre qui y estoit
 caché: car q̄ n'y seroit stilé ne s'en doute-
 roit iamaïs & le mary s'en feroit porteur
 à sa femme. Aussi Persilee le bailla à sa fil-
 le, à qui le prince dit q̄ il luy estoit dedié
 en recōpēse de celui qu'elle luy auoit en-
 uoyé en langue Persique. Dequoy bien
 leur print, d'autant q̄ la mere ne lascha de
 tout le soir Rogel de ses mains, le menant
 mēme au bal, ou il s'attēdoit biē de me-
 ner sa fille & lui cōpter de ses nouuelles es

pauses des haults bois: mais il ne leur fut onques possible de parler l'un à l'autre que des yeux. Apres les dances, on apporta le vin de cōgé avec les epices, puis Rogel fut conduit par le maistre d'hostel au logis qui luy estoit preparé au palais mesme, qui estoit celuy ou souloit loger le Roi Torrin, quand il y venoit, respondant à celui des Dames par vne galerie qu'il alloit rendre à leur iardin: & de bon heur leur mere ce soir coucha avecques la Soudane pour deuïser familièrement ensemble de ceste alliance, estimant que le Prince ne les en refuseroit iamais veu le grand estat qu'il heriteroit, & l'honneste amitié qu'elles cōnoissoient biē qu'il portoit à Sidere. Mais elle d'autre costé ne s'endormit pas des premieres, sachāt le logis qu'on lui auoit apresté: ains ayāt regardé le chiffre au liuret si tost qu'elle fut en sa chambre, incontīnāt y marqua le sien & par vne de ses damoiselles le rēuoia à Sirind pour lui dire qu'elle y auoit trouué des passages Grecs des le cōmencement que ne pouuoit bonnement entendre sans l'exposition qu'elle en pourroit auoir l'endemain de son maistre ou de luy, auquel elle mandoit le bon soir de sa part & de ses seurs. Rogel l'en remercia affectueusement par la damoiselle luy souhaitant la bonne nuit, puis saisit le liuret si tost qu'il la perdit de veüe, & voyāt le mandement qu'il contenoit de l'aller veoir sur la mynuit par la galerie, & qu'il trouueroit l'huis du iardin ouuert, il fut si rauy, qu'il ne pensoit que iamais celle heure deust sonner, tant il receuoit d'ayse de l'offre que Sydere luy faisoit de communication priuee, Laquelle fut contrainte de declarer ce pendant sa venuē à ses seurs qui tant aimoient Rogel que chacune leust volontiers desiré pour elle. Il ne faillit à y venir à l'heure precise, s'estant ietté en l'attendant tout vestu sur son lit. Et à l'arriuee les trouua toutes trois au iardin qui lui sauterent au col de ioye, ne sachant quelle

chere luy faire par la grande familiarité qu'elles auoient avecques lui à raison de leur longue conuersation precedente.

Or apres, laisserent les deux seurs Rogel avecques Sydere, qui s'estoit paree à son auantage de cōtion & d'un riche manteau de satin blanc fourré de martres sebelines, brief le plus mignonnement & gorgiasement qu'il luy fut possible: se retirerent à l'escart sous des rofiers, & luy prenant Sydere par la main la pourmeineiusques à vne tonelle couuerte de iossemin: ou ils commencerent entre eux les sauoureux baisers, meslez de regrets de l'absence. Mais quand Rogel se voulut hazarder de passer outre aux accolles, elle se courouça si grieuement contre luy, qu'il eust voulu estre mort, luy remonstrant sur ceste emotion feruente, sa bonne promesse qui l'auoit ramené de si loing pour l'accomplir: elle debattant qu'elle l'entēdoit sauf le point de son honneur & s'il seroit bien si presumptueux d'attenter telle vilanie à l'endroit d'une Princeesse de si haute maison. & iouer telle trahison à son ayeul son bō hoste, qui ne se desioit pas de telle entreprise. Parquoi si sa volōté estoit aussi pure & nette que la sienne, à la vouloir prédre pour sa vraie & loiale elpouse, elle se sentoit tant vaincūe de sa beauté, tant epriue de son amour, qu'elle luy en representoit les arres selon sa parole. Rogel qui ne s'attendoit pas à tel sermon, se trouua terriblement estonné & plus que si Dieu eust tonnē, ruminant d'un costé qu'il ne pouoit plus satisfaire à la cōdition que Sydere luy proposoit à cause de l'obligation dont il estoit desia lyé à Leonide, d'autre costé estoit si enflambé d'ardeur d'jouir de la belle vierge qu'il tenoit prinse entre ses bras, qu'il en estoit tout pertroublé ne sachant que faire ne dire. Adonc les bras croisez se jette à genoux deuant elle qui sous le voïlle de sa dissimulation estoit autant ou plus passionnée que luy, la priant d'estendre sa pitié sur celuy à qui

qui tel refus rigoureux liureroit la mort certaine, quand & quand degaine son espée & la prenant par la pointe la presente à Sidere, disant demy transi, qu'il luy pleut doncques immoler son amant à sa beauté, qui ne pouuoit aussi bien faillir. d'en mourir d'une sorte, ou d'autre.

Les grosses perles de larmes sur ces paroles couloyent des beaux yeux de Sidere, à qui amour auoit cousu la bouche (dit Galeris) de son aiguille enfilee d'honte: qui leur eust lors manié à tous deux les poux, à l'un il batoit violemment, à l'autre il ne se sentoît quasi point de destresse. Lors Rogel qui la veoit ainsi muette, lui dit force est Madame que ie vous declare icy mon impuissance touchant la condition que pretendez imposer à nostre amour: Car ie serois le plus lasche & honny Cheualier du monde si ie n'acceptois l'offre si haute, & si honorable qu'il vous plait me faire de vostre legitime compagnie, digne du plus grand Prince de la terre: n'estoit que le pouuoir par preuention d'autre m'en est osté. Lors luy racompte en trois mots, l'alliance commencée entre lui & Leonide par promesse faite long temps auoit à son deceu au Prince Anastarax & Siluie ses père & mere par le Roy Amadis, les Empereurs, & Florisel mesme de Niquee son pere: lesquels l'auoient naguères bridé par fiançailles auant son embarquement pour la venir trouuer, n'ayant esté en sa puissance de resister à tels Seigneurs de qui il dependoit: mais qu'il lui monstroît bien par sa venue de qu'elle sorte son affectiō enuers elle estoit empreinte en son cuer de l'auoir l'aissee pour venir à elle, lui iurant & protestant, que ce lien avecques Leonide estoit de honnesteté publique, procedé plus du vouloir de ses parens que du sien, mais qu'à Sidere il portoit vraye, pure, entiere & parfaite amour. Surquoy dit Galeris, que les Poëtes chantoient. Iupiter se rit au ciel des parieurs des amans. Sidere se trouuoit là en

merueilleuse perplexité, se voyant hors de l'esperance qu'elle auoit pretenduë de mariage, dont on lui auoit apporté secrettemēt quelques parolles qu'en tenoit le Soudan: d'autre part ne pouuoit deguiser l'extreme passion dont elle estoit embrasée, qui lui serra si bien la langue qu'elle fust long temps sans parler & en fin cheut sur vn siege verd toute palmeë à la renuerse. Quoy voyant Rogel se souuint à lors du Poëte Suaue qui disoit:

L'ettincelle d'auoir en femme est par nature:

*Honte bryde d'honneur par loy & nouiture
Pour ce cil perd son temps, qui l'assaut par priere:*

La demy force y vaut pour couvrir la maniere

De refus deguisé: de violence on use.

A ce qu'au sexe fraile elle serue d'excuse.

Puis au contraire il ramenteuoit vn autre Poëte, disant:

*Las d'on viendroit la force & la contrainte,
Du corps, dont l'ame est de langueur atteinte,*

Et sa vertu par amour abbatue.

Toutesfois en ceste agonie d'amour, la baissant mille fois pour tacher à la faire reuenir de pasmoison, il se sentit si furieusement eprins & transporté que sans plus de discretion il l'embrace & cueille la prime fleur de sa beauté, &

La rend de pucelle

Femme entiere & belle.

La Princesse qui reuint à soy se cognoissant ainsi desfleuree mene le plus piteux deuil qui eust esté iamais veu, pleurant, lamentant, comme desesperée. En quoy Rogel la consoloit à son pouuoir disant, que s'il y auoit faute, elle estoit à imputer à l'amour, qui maistrissoit les plus grands

grands du monde, & de qui les loix n'estoient sugettes à celles de ce faux honneur n'y autres. Au surplus qu'elle auoit acquis vn chevalier obligé à luy rendre toute sa vie treshumble service, sans iamais se departir d'un seul point de son vouloir & commandement. Mais elle nonobstant toutes les remonstrances, perseuerant en ses pleurs & doleances entremellees de durs soupirs, il tira de rechef son espee, luy presentant d'une main, ensemble posant le chef en son gyron, & luy dit prenez (madame) la vengeance du crime que ie puis auoir commis en vostre endroit, immolez ma teste si bon vous semble pour victime à vostre honneur. Aussi bien si vous n'appaisez vostre ire contre moy, ma main propre en fera l'office. Voulez vous madame, que ie fusse en tel feu sans echauffer? s'il y a eu de la force, le premier effort vient de vostre beauté. Estre en lieu si priué par vostre grace sans s'emouuoir de tel obiet, il faudroit estre vn marbre froid & insensible: tels mouuemens ne sont en la puissance d'homme charnel. Alquif mesme n'y feroit rien sur moy à m'y redre impotent en tel endroit avecques tous ses sortileges & malefices. La belle Princesse qui considere que ce qui est fait est desormais irreuocable, commence à attremper sa colere en priant Rogel d'auoir egard à l'outrage qu'il luy a fait & que si elle ne peut estre son espouse, au moins il la tienne dorenavant pour s'amie. Ce qu'il luy promet asseurement, faisant bon veu de ne faillir par chacun an à la visirer sous couleur de quelques autres entreprises. Et pour clore & sceller ce bon appointment s'entredonnerent maints autres gracieux baisers iusques à ce qu'ils apperceurent les tenebres faillir qui les contraignoient de se retirer chacun en sa chambre, iusques à la nuit ensuiuant qu'ils s'y trouuerent encore & par deux autres semblablement en tel plaisir & soulas que tous amoureux peuvent imaginer par leur experience. Mais

à la dernière le congé fut prins avec les angoisseux regrets, qui furent aucunement moderez par l'esperance de leur brieue reueuë. Et le duc arriva auant le parlement de Rogel, qui fut bien receu du Soudan pour le deuoir qu'il auoit fait en son voyage par le rapport du Prince, duquel il recita les gestes incroyables en icelle guerre par dessus le surplus des actes memorables du siege que Rogel leur auoit amplement racomptez. Enquoy n'oublia le duc à dechiffrer le bon festoyement des Princes de Grece qui fut par eux fait à tous les Seigneurs estrangers qui leur auoient mené secours: finalement les ioyeuses fiançailles de Florisel de Niquee, de Filisel de Montespain, qui auoient couronné l'euure & de Rogel mesme avec la belle princesse Leonide. Auquel mot le Soudan, sa femme, & Persilee leur fille furent grandement troublez en leur dessein. Ce qui leur garda d'entamer le propos à Rogel du mariage pourpensé de Sydere, à leur grand regret. Lequel print congé d'eux, estant bien marris nonobstant leur esperance perdue de son alliance qu'il ne seiournoit avecques eux plus longuement: tant sa conuersation estoit gaye, amiable & recreatiue. Et n'est à oublier, que il y fit des ioustes, desquelles le mieux faisant auoit vne riche chesne de toute sorte de pierrerie, du Soudan: laquelle Rogel ayant gaignee par le iugement des Seigneurs & des Dames, il l'alla mettre en presence de tous au col de Sydere, disant à elle appartenir de qui la beauté auoit renforcé en luy si peu qu'il y auoit de valeur, Ce que chacun trouua bon & elle encor meilleur, gardant ce pris pour tesmoignage de leur amour secrette, luy ayant donné au departir vn dyamant de grande eslime enchassé en vn anneau de or (duquel elle auoit esperé l'epouser) lequel il receut pour gage d'amour & obligation de son retour. Mais elle eust mieux fait (dit Galeris) d'y faire enchasser vn dyamant faux avecq' le diction

Lamma sabachthani, pour luy seruir de reproche en ses deportemens egarez, dy *amant faux*, *pourquoy mas tu l'aissee*. Si s'embarque avecque son escuyer & eut vent si propice qu'il vint surgir en peu de iours au port de Constantinople, y arriuant au temps de l'estrange auenture qui sera presentement deduite.

Comme vint à la cour vne estrange auenture du chastelet de Cupidon pour les loyaux amans, & par qui elle fut eprouuee, par qui mise à fin, & du surplus qui en auint.

CHAP. LIIII.

LEs Seigneurs fiancez ne furent paresseux à se leuer matin pour gouverner leurs fiancees tant ceux qui desia les entretenoient paisiblement que ceux qui ne iouissoient encor' du fruit de leurs travaux. Car ou il y a amour, la cōuersation ne le diminue pas, ains d'autāt plus s'enflābe comme le bois qui s'aprouche du feu. Or apres le seruice diuin ainsi que tous ses Princes estoient en la sale du palais en grand soulas : mesmement Rogel qui desia estoit arriué de Perse, ils furent tous esbahis de veoir entrer en la sale vn petit chasteau mouuant, sans estre trayné de personne, lequel estoit basti de pierres de grand valeur par le dehors qui se pouuoit veoir, le portail de deuant se tenoit fermé, auquel pendoit vn marteau d'or, & en la frize estoit graué ce dicton.

DICTON.

Cy est la gloire des loyaux amans, & le purgatoire des desloyaux: nul n'entrepreigne d'y entrer, qui ne sente sa conscience nette.

Et plus bas y auoit vn cartouche escrit en lettres d'or contenant ces mots:

DICTON.

Quand le braue Lyon de Bretagne avecques l'Once souveraine, heurteront à la porte du chastelet, ils parviendront à la gloire

des amans, & l'aduenture sera acheuee.

Chacun fut estonné de tels ecriteaux & plusieurs de la compagnie n'en estoient gueres contens & en maudioient l'auteur, ceux qui de loyauté n'auoient que leur prouision ou enuiron. Les autres en estoient fort aises, d'auoir occasion par ce moyen de faire cognoistre leur fidelité à leurs dames. Surquoy y eut vn plaisant debat entr'eux iusques au disner. Apres lequel il fut question d'aller esprouuer l'adueture. Et le premier qui s'y presenta, fut l'Empereur de Romme Arquifil, leq̃l alla empoigner le marteau de la porte & hurer. Lors fut ouie de dedās vne melodie de musique qui rauit toute l'assistance & Arquifil plus q̃ tous, puis s'ouuir la porte avecques vn doux bruit, & l'empereur entra qui se trouua en la plus riche sale ou il eust onques mis le pied. Il y veid vn trosne d'or eleué, au feste duquel estoit vn cupidon tel que les anciens l'ont depeint, & derriere à coste du trosne seioient garnis de harpes tous les anciens qui auoient esté du nombre des loyaux amās, & faisoient la douce musique qu'on y auoit entendue. Si mōte Arquifil les degrez, & on luy vient poser sur le chef vn chapeau de belles roses quand & quand se sentit poulsier hors du chasteau. Dont la cōpagnie fut esbahie de l'en veoir ainsi sortir sa teste ornee de fleurs. On luy demanda assez ce qu'il y auoit veu, mais il leur respondit bien promptement qu'ils l'allassent veoir eux mesmes. Parquoy y marcha apres luy le Roy Birmartes, q̃ congna du marteau, & la porte luy fut ouuerte, avecques seblable armonie, & quād il fut entré en la sale du cupidon, il iouit de telle gloire qu'il n'en eut iamais voulu issir: puis se mettāt à genoux deuant ce petit Dieu, on luy mit en la teste vn chapeau de roses beaucoup pl⁹ vermeilles que celles de Arquifil (car chacun y estoit remuneré selon son merite en amour) toutesfois il fut tout estonné qu'il se trouua dehors & la musi-

musique cessa. Apres luy alla eprouuer l'adventure le Roy Galaor : mais alors que il heurta à la porte, sonna leans la plus triste & mal plaisante musique qu'o eust iamais ouye, & le chasteau sembla plein de viues flambes comme s'il deust tout brusler: & il se trouua assis en vn escabeau aussi noir que charbō, & derriere luy estoit vn rang de sieges, esquels estoient assis plusieurs tant hommes que femmes, qui n'auoient gardé la fermeté à leurs amans. Des testes desquels sortoient les flambes dont le chasteau se voyoit tout enuironné: & y auoit en vne niche haute de leur costé vn Iupiter comme le Dieu plus inconstant & variable en l'amour que tous les autres. Si forte fut la chaleur dont Galaor se sentit embrasé qu'il s'enfuit hors de la plus viste que le pas, garni d'vn magnifique chapeau à l'entour du front: c'est à sçauoir de chardons & orties grieches noires comme fine poix & bien fleuries, dont il fut assez rit, En bonne foy mon bon seigneur (dit la Roine Briolaine sa femme) estois deuëment certioree de vostre loyauté sans en donner ce tesmoignage publique. En malencontre puisse entrer (respond Galaor) qui a fait ce beau chef d'œuvre, par lequel tāt de bōs Cheualiers qui sont ici tenus pour preud'hommes seront malement decouverts. Et il arrache le chapelet noir de sa teste qu'il met en cent pieces par despit, au grand plaisir de tous qui le voioiēt si faché de l'auenture qui decouuroit ainsi le pot aux roses. Apres y alla l'Empereur Esplandian, qui fut festoïé encore de meilleure musique que les precedens & fut dedans assouui d'vne grande gloire, & enchapelé de sonnet fleurantes & fort vermeilles roses: si est-ce qu'il en fut mis dehors comme les autres: & tout semblablement en print à l'Empereur Lisuart Amadis de Grece fut assez prié d'aller tēter la fortune, mais il s'e excusa (disant) que c'estoit à la jeunesse de soder ce gué, & autāt en dit Florisel

de Niquee, s'asseyrans bien qu'ils n'eussent sortiroyent gueres à leur hōneur, ne leurs bagues sauues, ce fut le bon de Rogel qui en fut importuné par les dames, mais il ne luy tenoit d'y aller, sentant son cas trop sale: Mais Leonide sa fiancée l'e pres sa tāt, qu'il aima autāt y aller à quelque honte que ce fust que de l'econduire (cōme elle disoit) de la premiere requeste qu'elle luy eust encore faite. Iamais en lieu il n'auoit marché plus enuis, sa conscience le iugeant aussi, si tost qu'il y fut entré les flambes se vont allumer les plus viues & ardentes du monde, qui l'e firent deloger soudain, ses temples retieuses d'vn fringāt chapeau d'epines aussi noires qu'encre. Dont il estoit deplaisant à merueilles, & maugreoir les sorciers & leur forcelerie à tous les diables. Dequoy le sage Alquif luy fit sur le chāp vne reprimade, disant qu'ils meritoient los nom-pas blāme de manifester ainsi le vice & honnorer la vertu, & que s'il eust esté du nombre des loyaux il eust réporté chapeau cōforme, mais y auoit trouué chaussure à son pied: dont il s'en deuoit prendre à luy mesme & à sa faute non-pas en blāmer les arts. Don Arlanges d'Espagne y fut apres Rogel qui receut la faueur de la melodie fort douce & en rapporta vne belle guirlande. Agésilan le suivit qui fut encore mieux traité tant de armonie que de fleurs: dont leurs fiancées se contentoient fort de n'auoir pas mal hazardé en leur endroit l'auance de leurs desirs. Brianges y fut assez mal coiffé de fleurs telles quelles, demy-fannees & esteintes de couleur: mais Filisfel de Montespain eut bien pis, qui fut assaillly horriblement des flambes & enguirlandé de rosiers & groseliers poignans blāsonnez de sable en champ de poil doré. De quoy Anaxare sa fiancée estoit aussi malcontente que Leonide: Mais les bons gentilhommes les vindrent rappaiser, à dire que cela ne deuoit estre pour rien compté qui leur estoit

échappé & auenu auant leur acointance. Autres Rois & Princes eprouuerent pareillement l'auenture (que nous omettons pour brieueté) excepté le Roi Amadis qui la tenoit desia pour toute acheuee pour luy, & dit qu'à fin d'en auoir le passeremps entier il falloit que les dames y fissent leur essai aussi bien que les hommes mais par ce qu'il estoit desia tard, cela fut remis au lendemain, & chacun se retira au repos ou la nuit les semonnoit. Le matin les dames vindrent de bonne heure à la grãd sale en deuotion d'esprouuer le chastelet de loyauté, pour faire connoistre à leurs amans leur foy ferme & constante. Mais il y eut encore quelques Seigneurs & Cheualiers de marque qui s'y essayèrent, qui n'auoient pas eu le loisir le iour precedent : Apres lesquels le gentil Prince Sylues de la Selue y alla à grand pas, & ayant tiré premierement vn regard de sa bien aimée Pentasilee. Brief, il heurte au marteau, la melodie s'y fait excellente à son entree, il y iouit vne espace de la gloire du lieu, puis en sort le chef couronné de passeuelours, roses incarnates, & autres fleurs de couleur de fine pourpre & odeur plus souef que musc ny ambre: en ropportant d'auantage vne certaine grace qui donna grand contentement à tous de sa personne, principalement à la belle Pentasilee. Lui depesché, le ieux commença des Dames & Damoiselles qui asséurerent leurs amis de leur loyalle amitié. En especial l'emperiere Abra, la Roine Sidonie, Niquee, Leonide, Diane & plusieurs autres, q en reuenoiēt garnies de guirlandes de couleurs viues, donnant grand plaisir à leurs amoureux: fors que la Roine de Thebes. Finistee qui l'eut de roses blanches d'autant que son amour n'estoit couuert du manteau de mariage: & semblables aussi les rapporta la tresbelle Fortunie, d'autant qu'elle n'aimoit personne encores. La Roine des Amazones Calpendre receut grand honneur au chasteau mouuant

tant de la Musique que du chapeau de fleurs à cause de l'amour loyal qu'elle portoit au Prince Zair frere de l'emperiere Abra (dont ceste histoire fait grand mention) de qui elle eut, l'excellente Pentasilee. Depuis se leuerent les Princesses, Alastraxeree, Calasie, Pintiquinestre & Pentasilee se prenās par les mains, & apres s'estre assez entrepriees à qui marcheroit deuant, Alastraxeree y fut la premiere, bien receuē de son & guirlande, & les deux Roynes estrangeres semblablement. Puis la passe belle Pentasilee y alla, iettant sa veuē sur Sylues de la Selue qu'elle aymoît souuerainement, & entra dans le chastelet avec si singuliere armonie que ce sembloit vn paradis terrestre, & en sortit atournee d'vn chapeau de fleurs nompareilles accoustré en forme de couronne: dont Sylues fut tout resioni qui assez cognoissoit à ses contenāces la grande amour qu'elle luy portoit. Apres elle y allerent toutes les autres Dames & Damoiselles qui estoiet en la sale imperiale iusques à ce q l'heure vint de couuitir pour le disner sur le midi. Auquel ils furent seruis droit & par ordre, comme en continuation de festins, les tables estās leuées, le Roy Amadis se leua & prenant sa chere Oriane par la main s'en alla au chastelet luy disant que si l'auenture estoit ottroiee à la loyauté elle ne pouuoit estre donnée à autre quelconque à plus iuste titre qu'à luy, comme la chambre defendue, larc, d'Apolidon en portoient tesmoignage avec assez d'autres preuues & essais pour plus affiner les Karats de sa loyauté. A quoy respondit Oriane qu'elle estoit certainemēt assez conuē à elle & a tous que pource elle ne tenoit point en doute pour eux ceste auenture. A tant viennent au chastelet heurter du marteau d'or, lequel s'ouurit en maniere d'vn tabernacle apparoiſſant la sale avecques le troſne de Cupidon, & au circuit du comble maintes ieunes Nymphes gar-

garnies d'instrumens dont elles sonnerēt fort melodieusement. Adonc entrerent dedans le Roy Amadis de Gaule & la Royne Oriane, & tous les anciens loyaux amans qui la estoient assis s'agenouillerent pour leur faire hommage, puis disparurent totalement : & alors Cupidon se leua à l'encontre d'eux qui les decora de chapeaux de triôphe formez en courônes closes à l'Imperiale, tissus des plus nayues & plus odorantes fleurs de la terre. Et lors Cupidon disparut & le chastelet mesme & tout le surplus qui estoit dedans. Au lieu duquel fut veu vn petit perron ou estoit vn tableau contenant ceste Prophetie escrite en lettres d'or sur vn fond noir.

TABLEAU DE PROPHETIE.

Arlendos le Magicien a dressé par ses arts ceste fabrique pour manifester l'insigne loyauté des Princes Grecs, les aduertissant d'avantage. Quand le Corbeau noir volera en leuant, de ses serres aigues il empietera les palombes Gregeoises & les transportera en vne fuye, d'ou ny effort ne saoir humain les pourront tirer, tant que le braue Lyon avecques nombre d'aygneaux brisera les perilieuses portes de leur prison, d'ou il tirera les forts Lyons avec leurs faons masles & femelles nouveaux nex. Ainsi auendra infalliblement.

Tout l'assemblee fut espouuente des menaces de la Prophetie & sur tous, les sages Alquis & Vrgande, voyans mesme la lettre si fresche de si antique date. Toutesfois remettant tout à la pourvoyance diuine, ils attendoyent en bonne deuotion le iour Sainct Iean à venir, auquel les noces de tous les fiancez deuoyent estre celebrees. Mais ce pendant nous vous dirons les nouuelles que la Royne de Galdap (qui en estoit auertie) manda a Rogel de Grece.

Des lettres que la Royne de Galdap auertie des fiançailles de Rogel de Grece luy enuoya par vn gentil-homme expres, & de la responce qu'il remporta.

CHAP. LV.

LA cour estoit assez troublee de la Prophetie combien qu'elle ne fust pas totalement entendue, quand arriua à Constantinople vn gentil homme venant de la part de la belle Royne de Galdap, qui toutesfois ne s'adressa qu'au Prince Rogel secretement sans s'aller presenter au Palais de peur qu'on s'enquist trop auant de l'occasion de sa venue. Or auez à sçauoir, que si tost que la Roine Fusilee fut retournée au pais, & qu'elle eut entendu par son Lieutenant general, l'issue de la guerre, puis le voyage de Rogel en Perse, plus ses fiançailles avec la Princesse Leonide, elle cuida creuer de dueil de se veoir tellement mesprisee au pris de la niece du Soudan. Et apres en auoir assez pleuré & l'amenté pour mieux descharger son cuer delibera de lui en escrire vne lettre ou elle yomiroit tout le fiel de sa ialousie avecques belles iniures & reproches, laquelle luy seroit portee couuertement par quelqu'un des plus fideles de ses domestiques, dont tel estoit le contenu.

Misrine de Fusilee Royne de Galdap, au Prince Rogel de Grece.

J'ay beaucoup pensé & contrepensé Prince Rogel auant que vous auoir traissé ce petit mot d'escrit si ie le deuois faire ou nom. D'un costé ie considérois que c'estoit autât de peine perdue, patce que peu feroit de compte d'une lettre, qui en faisoit si peu de la personne. D'autre costé, que la perte à tout le moins n'en seroit pas grande, bien pouuant auenturer ce traict de plume, celle qui auoit exposé son honneur (trop plus cher que la

vie) en proye d'un traistre & deloyal tel que vous estes. Car qui eust esté la dame voyant tant de prouesse & vertu en un Cheualier qui se fust deffiee d'y trouuer aucun point de trahison ne deloyauté? Les loix de l'ordre des cheualiers errans que l'on celebre tant par le monde (desquels vous vsurpez le nom) qui s'vissent tant en la grãd Bretaigne, qu'au pays de Grece & de Frãce, leur recommandent apres Dieu, leur Roy & leur region, sur tout l'honneur des dames, à soustenir leurs querelles, à les conduire par mons & vaux au hazard de leurs vies, à ne les offenser n'y outrager, n'y vser d'aucune violence, (iaçoit qu'ils les eussent cõquises par armes sans leur gré & consentemẽt: & que quiconque feroit autrement il seroit degradé de l'ordre. Comme auez vous pratiqué (Rogel) ceste loy & vsance en mon endroit? Vous m'auiez trouué avecques la Roine Sidonie es prisons d'un Geant, vous nous en auez deliurees, dequoy ie ne desauoue quelque obligation, cõbien que vous l'ayez fait en faueur de la Roine de Guindaye que vous cognoissiez, & qui attouchoit de si pres à vostre propre pere, que l'effect recent des fiançailles demonstre. Ce n'a pas esté pour l'amour de moy que vous ne cognoissiez pas, que vous y estes employé & travaillé que incidemment. Et moy qui n'estant point de cuer ingrat, vous en fauorisat de gré que si vous eussiez tout entrepris pour ma deliurance, vous y eussiez porté d'amitié que sur le voile de feintise & simulation de la vostre (simple femmelette, trop gracieuse & debonnaire) i'ay passé borne. Enquoy ie m'armerois neantmoins de patience comme en chose faicte qui est desormais irreuable, si c'estoit comme d'un vol d'un oyseau par l'air, d'un poisson ou vaisseau par l'onde, d'un serpent passant par dessus la pierre, sans qu'il en restast trace ne vestige qui portast tesmoignage de vostre outrage & de mon abus & illusion.

Mais helas les marques en ressentent trop grande, estant demeuree enceinte, dont tost ou tard sortira le fait en euidence à ma grande honte & confusion. Celles à qui priuement ie m'en suis degorgée, me conseillent un brief & leger remede, à faire estaindre le fruct de si mauuaise semence (cest œuf de si mauuais corbeau) par certaines herbes & autres remedes. Mais le franc cuer qui m'a rendu tant pitoyable enuers le pere, que ie voyois nauré au liẽt en partie pour ma cause, qui se disoit trop plus oppressé au cuer de maladie qui estoit incurable sans le secours procedant de ma main, qui se faignoit n'attendre plus que l'heure de la mort si ie n'y appliquois medecine. Ceste mesme pitié dont i'ay trop vsé enuers le pere, ie n'epargneray pas à l'endroit du fils innocent & incouable, nompas pour l'amour de toy (faux Prince abuseur de Dames qui ne merites nopl' d'amour que tu en portes: mais pour la part que i'y ay, par laquelle i'espere la vengeance de la tienne. Car ie mettray toute peine & soin à si bien l'elever nourrir & faire instruire & duiure aux armes (ia asseuree par signes certains estre un masle) qu'il se pourra un iour ressetir de l'outrage fait à sa dolente mere, & en faire reparer l'offence à toy ou aux tiẽs. Je ne me plains pas que tu m'ayes apres telle demonstrence d'amitié abandonnee, pour les excuses que tu peux prẽdre sur la guerre de Grece: mais de ce q tu as reconduit l'armee de Perse, plustost que la mienne que ie n'y auois enuoyé qu'à ta faueur, le Souda y ayant enuoyé la sienne à la requeste du Roi Anaxartes & Alastraxeree la sœur ses anciens amis. Je ne me plains d'auantage que tu y es allé visiter sa niece Sidere que tu auois si long temps accõpagnée par mer & par terre, par forets & campagnes, dedaignant Fufilee de qui tu auois desia receu telles artes de vraye amour. Je me plains outre cela des fiançailles ia contractees

aucc-

avecques Leonide, m'ayant ainsi deshonorée, & chargée d'un bastard, qui meritois bien autant qu'elle (soit en quelque grace de la personne dont Dieu ne ma moins douée, soit en estats & Seigneuries que ie tiens plus grandes & riches qu'elle) d'auoir eu ta compagnie legitime. Surquoy ie ne sçay si ie puis esperer de toy quelque responce, veu que ne la peux fonder en aucune couleur ny ombre de raison. Ainsi te traite Dieu selon ta deserte.

Telle fut la missiue de la Royne de Galdap: sur laquelle elle ne mit aucune surscription à Rogel, &c. ne pareillemēt souscription de son seing ou son nom.

Rogel l'ayant leue en fut aucunement troublé, par la souuenance de son exquisite beaulté & du gracieux traictemēt qu'il auoit receu d'elle qu'il ne pouuoit pas du tout mettre en oubly. Pour ce deliberra de lui faire responce pour la contenter aucunement & appaiser la grād'ire qu'elle auoit conceu cōtre lui. Laquelle il mit entre les mains du porteur aussi celement qu'il auoit receu de lui la precedēte. Et l'ayāt fait fort bien traitter & defrayer en l'hostellerie, luy donna au partir vne chaine d'or de cinq cens escus, le chargeant de ses tres-humbles recommandations à la bonne grace de sa maistresse. Alaquelle en toute diligence il la rendit & elle la trouua de ceste teneur.

*Lettre resposiue de Rogel, à la
Royne Fusilee.*

Madame i'ay esté bien aise de receuoir de voz nouuelles par ce porteur, pour la bonne disposition en quoy vous estes au double, tant de vostre personne que de celle qui est créée & croist en vous: Alaquelle ie vous assure de me faire vn iour cognoistre tel que ie suis & doibs estre. Mais i'ay esté ensemble fort marry & troublé de la grāde colere en laquelle

vous y entrez contre celuy qui n'eut iamais & n'aura autre volonté que de vous seruir & obeir. Car ie ne voy point que vous en ayez aucune iuste occasion sinon de quelque souspeçon tel quel qui volontiers accōpagne tout vray amour, dont ie vous excuse ainçois que vous accuser. Vray est que i'ay esté en Perse à la requeste du Soudan qui me mandoit de vouloir accōpagner sa flottē au retour de paour de quelq'enuahie des Mores, qui la pourroit assaillir sur la route, en haynē du secours qu'il nous auoit donné en ce siege. Si i'ay fait ce voyage volontairement ou non, assez le pouez vous iuger par les fiāçailles recentes faites aussi de l'auis ou plustost commādemēt de tous les Empereurs & Roys estans à Constantinople, lesquelles m'obligeoient au brief terme des nopces. Aussi mon soudain retour porte tēmoignage du peu de seiour que i'y ay voulu faire, combien que i'en fusse assez requis par le Soudan & la Soudane, qui m'y ont fait aussi honorable racueil que si i'eusse esté le plus grand monarque du monde. Quant au mariage de Leonide il a esté comme ie vous ay dit) cōtracté entre les rois quasi à mō desceu, ausquels ne m'a esté loysible desobeir. Au surpl^s ne m'arguez point d'ingratitude que i'estime le plus execrable de tous les vices enuers Dieu & les hommes, ne d'oubliance de vostre beaulté, car plustost m'oublierois ie moy mesme. Quant à la legereté & inconstance dont semblez taiblement me taxer ie me pourrois excuser par l'exemple des plus grands Seigneurs & des meilleurs Cheualiers de la terre, & par l'attrait des beautez qui se presentent à nous en noz questes & auentures, ausquelles les plus vertueux combattans cedent, qui resistent à tous les efforts des hommes. Vous sauez la puissance de l'amour qui a subiugué & dompté les plus grands personnages qui ayent iamais esté & selon les poētes les dieux mesmes

mesmes. Parquoy n'exigez pas si rigoureusement en moy ce qui se rencontre si rarement au Roy Amadis ou peu d'autres, qu'il semble que ce loyal amant soit vn fenix vnique, ou quelque monstre qui tienne de la durté & insensibleté moins qu'humaine, comme on parle de ie ne say qu'el Philosophe Xenocrates q̄ la plus belle courtilane d'Athenes par gageure ne sceut onques emouuoir, disant que c'estoit vne statue de pierre sous figure d'homme. Quāt à moi ie me sens vrai homme & sujet aux passiōs humaines, principalement à celle d'amour, qui prise vne dame pour sa belle taille, trait & lineature, vne autre pour sa bone grace & beau maintien, l'autre pour sa gentillesse & sauoir à sonner, chanter & danser. Mais au lieu qui cōtient beaucoup de merite (cōme celuy dont est question) là sçay-ie bien arrester mon cuer, qui y demeurera ferme & stable comme vn rocher en mer, quoy qu'il soit battu de vens & ondes. A quoy en vostre endroit Madame vous me mandez auoir vn gage qui vo' en doit à iamais assurer de ma part: vous promettant qu'à la premiere emprise qui s'offrira ie ne failleray à prendre mon vol vers Galdap à la derobbee, pour vous en passer sur le lieu vn cōtract signé & scellé authentiquement, vous priant ce pendant chasser deuil & ennuy & vous resiouir sur ceste confiance que ie vous iure & promets sur l'ordre que i'ay receu de Cheualerie que ie ne fauseray pour la vie, nonobstant voz belles reproches du contraire. Ainsi me recommande affectueusement à vostre bonne grace, ensemble nostre petit fruit de vie que Dieu sauue & gard avecques vous. De Constantinople.

*Celuy qui est plus vostre que
sien. R. G*

Ceste lettre consola aucunement la belle Fuslee, principalemēt la promesse

de sa brieue venuē laquelle la tenoit en haleine. A tant la laisserons en celle attente, pour descrire la solennité des nocces de ces Princes, & Princesses, qui leur tardoit beaucoup à venir depuis leurs fiançailles.

De la magnifique solennité des nocces des Princes & Princesses celebrees à Constantinople & de quelles inuētiōs nouvelles eues & elles vserent en leurs accoustremens, & de surplus.

CHAPITRE LVI.

LE iour saint Ian fut tant souhaité pour les fiancez & fiancees pour la consommation des nocces, qu'il echeut. Mais des la veille les Princesses s'estudierent bien à essayer les habillemens nuptiaux à fin qu'il n'y eust faulte de rien au iour de leur hault appareil. Le temps estoit clair & serain, les pres depains & emaillez de toutes couleurs de fleurettes, és iardins les arbres chargez de toutes sortes de fruits, brief la saison conuioit toute personne à plaisir & soulas. Les Princes fiancez ne s'oublierent pas aussi à bien faire auiser à leur parure & ceux mesmes qui auoyent à les accompagner. Les aubades furent baillees par les menestriers de l'Empereur d'vne pavenne fort graue en son chant, nouuellement composee par Suaue precepteur de Sylues, en forme de souhait nuptial poetique: qui fut aussi arrestee pour le bal de laquelle la lettre estoit.

CHANT NVPTIAL.

*O Iuno Royne espouse du hant Dieu
Royne conserueicy d'autre Roynee,
Et femme à Roy de ce terrestre lieu.
Hymen Hymen ô Hymen Hymence.*

*Iuno nociere or assiste en bon heur.
A ce nosail de Nymphe couronnée,*



Et à l'epoux Royal preste faueur.

Hymen Hymen, &c.

Iuno Lucine, ayant rompu Venu

Le chaste ceint en doux fruit de lignee

Ta main auance aux enfans non venus:

Hymen Hymen, &c.

Dieu Nuptial maintien en mariage

Chacune Nymphe en blanc voile atournee.

En soueue paix d'amour vray par long aage

Hymen, &c.

Le nombre des fiancez estoit Florisel de Niquee, Rogel de Grece, Agefilan de Colcos, don Arlanges d'Espagne, Florestan de Romme, Filisel de Montespín, Galdes Roy de Rhodes, le Prince Artaxerxes, Florarlan Roy de Trace. Lesquels tous furent vestus de fort riches & sumptueux accoustremens, dont i'en dechireray quelque partie: Premièrement sortit Florisel de sa châtre ayant vn saye de drap d'argêt, le manteau de drap d'or frize dessus, enrichy de mainte pierrerie, les chausses de velours cramoyssi avecques cordons & canetille d'or doubles de toile d'argent, reprinses de boutons d'or de nouvelle façon és decoupures. Apres sortit Rogel vestu d'un saye de toile d'argent, avecques le manteau de drap d'argent double de satin broché, les chausses de velours pers boufants la toile

d'or, non sans beaux compartimens & feuillages entrelacez des chyfres de son nom. Agefilan suyuit, vestu de velours verd decouppé & reprins de rubis & esmeraudes de grand eclat, avecques des bandes larges de croissans d'argêt, deuises de sa dame. Don Arlanges sortit vestu de soye: de satin cramoyssi double de pannes de soye violette, les chausses de mesme avecques la cappe & la toque à l'Espaignole, le tout enrichy de pierrerie de boutons d'or avecques compartimés à ses chyfres & la toque garnie d'un petit plumail garni de grosses perles. Filisel de Montespín estoit habillé de satin blanc ricamié d'or avecques force diamans & saphirs és decoupures. Florestan le Prince de Romme fut accoustré à l'Italienne tout de satin cramoyssi violet avecques enrichissemens de cordon, & canetille d'argent & force pierrerie de grande valeur. Le Prince Artaxerxes, de velours blanc avecques beaux compartimens & feuillages à ses deuises. Florarlan fut vestu de taffetas incarnat avecques pourfillure d'or au manteau d'argêt au pourpoint & chausses. Galdes de Rhodes accoustré de damas cramoyssi fort couuert de broderie d'or à ses chyfres. Peu apres descendirent en la grand sale les Empe-

T

pereurs

reurs, Rois & autres Princes parens des fiancez & gueres depuis ne tarderent à y venir les Emperieres, Roines & Princesses avecques les fiancees. Or pour aller espouser au temple de sainte Sofie elles marcherent en telle ordonnance: La premiere fut Diane accoustree d'une cotte de satin verd (de mesme couleur que son Agefilan) enrichi de broderie d'argent à des deuises de croissance, le surcot tout chargé de gros diamans, rubis & emeraudes avec le collir de mesme en son col plus blanc que nege) que l'œil ne s'y pouuoit arrester sans s'ebloir, son vilage mesme plus resplendissant que la Diane celeste de qui elle portoit le nom: Ces cheueux blonds espars combatans contre la lueur iaune du soleil, qui toutesfois estoient trahez à l'entour du chef d'une rets de fil d'or qui n'eust peu estre discernée pour la conformité de la couleur sans les grosses perles orietales y semées en tous les neuds. Son manteau Royal estoit de velours verd, aussi semé de petits croissans d'argent, duquel la longue queue trainant à terre fut portée par le duc de Galdes. Qui telle la voioit estimoit Agefilan heureux en la iouissance de telle Nymphe, & tous ses longs travaux d'armes bien employez en telle conquête. Elle fut menée sous le bras au temple par le grand Roy Amadis de Gaule. Apres elle marcha la Princesse Leonide que gueres ne luy cedit en beauté, vestue en corset & grand manteau de drap d'argent de la parure mesme de son fiancé, avecques les bades à l'entour à petits lyonceaux d'or. Elle auoit un carquin sur son sein demy decouvert (ou ondoyent les deux pommes d'amours) de pierre d'incaluable valeur, dont le surcot pareillement estoit bien garny: & la menerent sous les bras, les Empereurs Espladian & Lisuart. Apres marcha la Roine Sidonie en tein si frais & beau qu'elle sembloit plustost seur de Diane que mere qui fut parée de mesme estoffe que Flori

sel, le corset de drap d'argent & le manteau royal de drap d'or, sans autre enrichissement à cause de son veufage. Et fut menée par l'epereur Amadis de Grece. La Roine Garaye la suivit accoustree de satin cramoisi comme don Arlanges d'Espagne son fiancé tant en la cotte qu'en son grand manteau avec diuers compartimens & feuillages d'or à ses chiffres: & fut menée par le roy Galaor. Apres marcha la Roine Daraide, vestue (pour le voir faire brief) de mesme estoffe & couleur que son fiancé, comme aussi furent la Princesse Lucenie de Dardanie de semblable à Floraride de Trace, la Princesse Guindave & la Roine Lardenie à leurs consorts, toutes avecques canetilles & cordons d'or ou d'argent à leurs chiffres & deuises en la façon chacun & chacune de la nation dont ils estoient, elles menées par tous les plus grands Seigneurs de la cour. En telle pompe & magnificence furent les princes fiancez & les Princesses conduits en la maiestresse Eglise dedans laquelle ils furent solennellement espousez par le patriarche de Constantinople: & apres furent remenez au Palais Imperial en pareil ordre. Là ou ils s'asseierent au festin, auquel durant l'affiette des mets & entre mets sonnerent harmonieusement les menestriers de la grande bande, sinon au dessert que sonna la harpe de la fontaine de Meduse d'une melodie incroyable. Le bal & aussi les dances furent apres le dîner qu'durerent iusques à l'heure du soupper: apres lequel y eut de fort belles feintes de monstres marins Tritons & Nereides & les neuf preux apres en leur haut appareil selon les diuerses guises de leurs contrees balerent la pyrrhonique. Mais apres ces feintes & mommeries, Darinel le plaisant de Syluie, & Busend le nain de Florisel voulurent donner plaisir à la compagnie tel qui leur sembla que la matiere des nopces meritoit: c'est à scauoir à chanter de la beauté de l'amour

mour ainsi s'en alla Darinel avec sa cornemuse au lieu où le Roy Amadis entretenoit la Roïne Calpendre & Pentasilee. Là où apres auoir quelque peu sonné, il commença à chanter ce qui s'ensuit qui auoit esté freschement composé par Sualue precepteur de SYLVES de la Selue en faueur de sa maistresse.

CHANSON DE LA BEAUTE.

*Quinconque veult les trente beautez veoir,
Pentasee y sert de vray miroir.
Blanche est sa chair, ses dens, blöds ses cheueux:
Ses sourcils noirs, noire chose & les yeux.
Vermeils la bouche & ioue & ongles sont,
Longs les cheueux & mains & le corps long,
Le ventre court, courte oreille & dentee.
Large le front, l'entre-œil & la croisee:
La chose estroite & bouche & le corsage:
Leure grossette & la fesse & cuissage:
Les doigts menus, le nez, le poil ainsi:
Le chef petit, le tetin pied aussi.
La dame ayant ces trente points en elle.
Dire se peut la parfaitement belle:
Telle on disoit l'antique Helene à Troye.
Qui ne le croit Pentasee il roye.*

Ces vers firent rougir Pentasee de fort bonne grace qui eust bien voulu estre hors de là, par ce que cela donnoit occasion à tous (qui s'y rallierent de toute la sale au son de la musette) de la contempler de pied en cap, en danger si elle n'eust esté trop bien apprinse, de perdre contenance: mais chacun y print grand plaisir, mesmement les fiancez à qui cela faisoit plus desirer l'heure qu'ils peussent faire vne telle anatomie de beauté sur leurs dames. Las SYLVES qui ne se tenoit pas des plus loing d'elle, en estoit ravi, en estoit transi, mal content de n'estre desia du nombre des autres pour faire veüe sur les lieux de ce que là chanson contenoit: ceux qui s'entendoient en poësie firent grand cas de ces vers tant en l'inuëction qu'en la disposition de trois

pointcs tousiours exprimez en vn seul, y causans tresgrande difficulté. Ainsi que ce chant s'acheuoit, au bas de la sale commença Busend le nain, le sien, qu'il recita sur vn cistre en la troupe des damoisselles & des princesses & des gentil-hömes de la cour, avec si grande rïsee que les seigneurs & dames, y voulurēt aller prendre part chacun à l'occasion des nopces s'addönant volötiers à toute resiouissance, voire aucunemēt excusable si elle passoit le moins du monde les bornes de la modestie en tels lieux acoustumee. Or alläs ouir le Nain, desia estoit fini son chāt, mais nō pas la rïsee: dont luy fut cōmandé de le recommencer, ce qu'il refusa long temps iusqu'à ce que Florisel son maistre luy enioignit de le faire sous caution de garentie des bastonnades s'il n'estoit agreable à tous, & estoit telle la chanson extraitte d'un vieil Romain.

CHANSON DE L'AMOVR.

*Au temps iadis n'auoit à ce qu'on dit
Femme au tetin le rouge boutonnet
Et Priapus qui estoit en credit,
Oreilles eut sous son petit bonnet.
Mais quelque Dieu les luy couppa tout net
Et en forgea la tetine gentille,
Qui fait aller superbe mainte fille
Sentant qu'elle a du masle la desponille,
Et de là vient que chacun coup que fouille
Vn amoureux au sein de son amie
Incontinent ce bon galand fremie
De grand plaisir & s'estend à merueilles
Comme disant, ie r'auray mes oreilles.*

De ce chant celles des Dames qui n'en rurent pas à decouuert sous le masque de grauité ne laisserent pas d'en estre chatouillees en la ratte. Le Prince Galtazar de Tarsis auoit en sa suite vne Negre de Sabee Baladine fort plaisante, la quelle garnie de sonnettes es bras & iambes & sonnans des cymbales, chanta & dança le cantique de l'antique Roïne de

de la region en son langage, traduit par Oeil parcelle du Soleil.
Suaue en ceste maniere.

CANTIQUE DE LA
ROINE SABA

Filles de la cité sainte,
Ne me blasmez ma couleur,
C'est le soleil qui m'a teinte
De son ardente chaleur.

Encore que ie sois brune.
Grace & beauté ne deffault:
Ie ne crains de nuit la Lune,
Ne de iour le Soleil chant.

Long temps ma vigne ay gardee.
Halant mon tein tout l'esté.
Vous auez contregardee.
En chambre vostre beauté.

Guet o guet rueillez moy dire.
Depuis qu'estes amassé.
Celuy que mon cuer desire,
Est il point par cy passé?

Il est de haute taille.
De tein blanc, poil crepelu
Sans que rien de beau luy faille,
Dittes moy si lauez ven.

Ie souffre au cuer telle angosse,
Que si bien tost ne le voy,
Fandra que chacun connoisse.
Qu'amour est meurdrier de moy.

RESPONSE DE
SALOMON.

Saute mignonne en ma couche,
Et te coule entre les draps:
Sus approche moy ta bouche,
Lye mon corps de tes bras.

sa gorge que ie te baise,
sa leures de vin vermeil:
sa tetin au bout de fraise,

Bouche tu me succe l'ame,
De ta langue la liqueur,
Et de ton aleine vn basme.
Me fait fondre tout le cuer.

Et apres toutes ces manieres de de-
duit public, l'heure vint qu'il falut que
les nouueaux mariez se retirassent en leur
soulas priué avecques leurs espousees. A
cette nuit dit Galeris que furent en-
gendrez des enfans parfaits en vertu &
beauté spécialement Sferamond & A-
madis d'Astre, desquels le quatorzieme
liure contient les gestes treisgenereux &
memorables.

Du brane Tournoy qui fut fait en la cité
l'endemain des nopces: et des anciennes ordon-
nances d'icelluy en la grand Bretaigne avec
les Statutz des cheualiers de la table ronde.

CHAP. LVII.

IL est à croire que la nuit sembla de
beaucoup trop courte aux nouueaux
mariez, & qu'ils eussent bien voulu
auoir le moyen de l'alonger au double
comme auoit fait Iupiter celle ou il en-
gendra Hercules. Aussi de racompter en-
tièrement tout ce qui passa entr'eux, la
chose pourroit estre trop lögue mesme-
mēt sur ceste fin qui me conuie à abbre-
ger. Or les mariees estans leuees & atour-
nees, elles vindrent en la grande sale du
Palais avecques vne petite contenance
de honte nomplus virginale mais deuir-
ginee.

Dieu auant tout prié en la chappelle
Imperiale, selon la coustume annuelle
du iour saint Iean Baptiste (auquel à rai-
son du solstice maintes choses merueil-
leuses & vertueuses se font au ciel & en
la terre) furent recitees les loix & or-
donnances des Cheualiers errans par le
greffier



greffier de l'ordre: chose qui bien seruoit aux Cheualiers nouveaux faits & à faire, & pour entendre l'usage du present tournoy: dont les principales sont telles.

Status de l'ordre des Cheualiers errans.

Le premier article estoit que quand vn Cheualier errant auoit faict vn veu ou promesse d'aller en quelque queste, ou aduventure estrange, durant ce temps il ne lui estoit loisible de depouiller les armes sinon aucunes fois pour la necessité du repos de la nuit.

Qu'en la poursuite de leur queste ou auenture, ils n'eueroyent les perilleux passages ne se destordroyent du droit chemin de peur de réconter les Cheualiers puissans, ou de peur de trouuer monstres, bestes sauvages, esprits ou autre destourbier epouuëtable que le corps d'un seul homme peult mener à chef.

Que tousiours ils sousteinsissent le bon droit des plus foibles, comme veufues, orphelins & Damoiselles en bonne querelle, en s'exposant pour eux (si besoin estoit) en tres-mortelle bataille, si se n'estoit encontre leur honneur propre, ou contre leur Roy.

Qu'ils n'eussent à offenser aucune personne n'y vsurper l'autrui, ainçois à combattre contrè ceux qui le feroient.

Qu'ils deuoyent porter foy inuiolable à leurs compagnons, soustenant leur honneur & prouit entierement non seulement en leur presence mais absence lointaine.

Qu'ils s'entreporteront toute amitié confort, & ayde, & ne combattront l'un contre l'autre si ce n'estoit par mesconnoissance.

Qu'ils exposeront leurs vies & biens pour le seruice du Roy & du pays.

Que l'auarice & le gaing ne les renga à acte aucū, ains la seule gloire & vertu.

Qu'ils reuerent Dieu religieusement.

Qu'ils ne prennent gage d'aucun seruitice. Et en leurs pays propre ne facent domage à personne de leurs plus grands ennemis, ains les gardent de tout domage au danger de leurs vies mesmes.

Que quand ils auront entrepris à conduire vne Dame, ils y mourront ou la sauueront de toute offense.

Qu'estans recherchez de combat pareil ils ne le refuseront point sans playe ou autre empeschement raisonnable.

Que touchant vne emprise, ils la mettront à chef ou y vacqueront an & iour, s'ils n'en sont rappelez pour

le service du Roy ou du pais.

Que s'ils font vn veu pour acquerir quelque honneur ils ne s'en retireront point qu'ils ne l'ayent accompli ou l'equiuaieur.

Que retournes en cour ils rendront compte veritable de leurs questes & auentures (fussent elles aucunes fois à leur honte) au Roy & au greffier de l'ordre, sous peine de priuation de cheualerie.

Qu'estans prins en vn tournoy prisonniers, outre ce qu'ils rendront au vainqueur armes & cheuaux, ils ne pourront combattre en guerre sans son congé.

Qu'ils ne combattront iamais accompaignez contre vn seul.

Qu'ils ne porteront point deux espees s'ils ne veulent combattre contre deux ou plusieurs.

Qu'en tournoy ils ne frapperont pas de pointe.

Qu'ils ne feront point de violence à Dames ne damoiselles (combien qu'ils les eussent gaignees par armes) sans leur vouloir & consentement.

Que sur toutes choses ils ne failliront iamais de leur parole, pour incouuenient qui leur en peult auenir.

La mode & ceremonie des Tournois estoit, que le Roy ou Prince enuoyoit vn Herault accompaigné de deux damoiselles portant son escu à son blason au Roy ou Prince contre lequel il vouloit s'eprouuer, avecques vn cartel contenant sa volonté, qui estoit de desirer faire vn Tournoy avecques lui pour le hault renom de sa prouesse & vertu en tel lieu pour pris & honneur des Cheualiers & plaisir & soulas des Dames. Le lieu s'elisoit en vne bonne ville, qui eust vne riniere ou vne forest prochaine. Et apres il faisoit pendre l'escu au plus eminent lieu de la grand sale de son palais avecques le cartel y attaché, afin d'estre veu & leu par les Cheualiers de sa prouince: en acceptant le mandement sous hon-

neste excuse, qu'il l'eust bien peu adresser à plus digne Prince & plus vaillant que lui & avecques telle responce renuoyoit le Herault & les Damoiselles honorez de beaux presens. Le iour du camp estoit volontiers assigné dedas les trois semaines de la presentation du cartel. Mais incontinant on faisoit publier solennellement & crier le Tournoy à son de trompe tant en la cour de l'appellant qu'en celle de l'acceptant, & l'on mandoit courriers & damoiselles par le pays circonuoisin en queste de Cheualiers desireux de gloire pour soy trouuer au lieu & temps déterminé: mesment aux iouuenceaux qui pretendoyent à l'ordre de cheualerie: l'assiete du camp estoit telle que la ville le fermoit d'un costé, la forest de l'autre, les deux autres parts estoient closes de barrieres de bois comme lice, & dehors estoient tendus les pavillons des Princes chefs du tournoy. Et estoit loisible les premiers iours d'entrer en la cité, pour s'y pourueoir de cheuaux, armes & autres choses necessaires. Le Prince appellant se presentoit long temps deuant en gaye reception des cheualiers qui arriuoient pour soustenir son party, leur aydant de tout ce que mestier leur estoit. Les Cheualiers de plus haut estat y portoyent telles couleurs & blasons que bon leur sembloit sur leurs armes, sauf quelque petite marque du Prince, pour lequel ils combattoient, les moindres ne portoyent que celles du Prince. Nulles banieres ne s'y deployoyent que de ceux qui estoient chefs de bandes, lesquelles le plus souuent estoient departies en trois bataillons, selon leur nombre diuisé en trois parties egales & au dernier on mettoit les meilleurs cheualiers à fin que par leur vertu, fust l'effort mieus soustenu, & la fin du combat vaincüe.

L'acceptant se presentoit seulement trois ou quatre iours auant le temps qui se logeoit tout à l'opposite de la ville, par ce

par ce qu'il ne luy estoit permis d'entrer dans la ceinte des murs iusques après le Tournoy.

Les eschaufauds des Dames pour regarder estoient plantez à l'endroit où les deux lices venoyent aboutir, qui estoient communement deuant les murs de la ville, où s'adresoient les premières rencontres des combatans: & vis à vis n'y auoit autre closture q̃ de riuere ou bois.

En chacune lisse y auoit trois grandes portes & spacieuses par où les cheualiers entroyent au camp six à six pour se ranger en bataille sous leur enseigne.

Chacun Cheualier pouuoit aller visiter les Dames ou amis à son plaisir auant le iour escheu du Tournoy: mais non les Princes sinon en habit de guise: ce qui estoit bien permis aussi aux officiers d'armes, aux damoïselles & gioliers des deux costez, iusques à la veille du Tournoy.

Car alors estoit inhibé & defendu à tout de ne sortir de leurs places sans le commandement du Prince qu'ils seruoient.

Le iour de la veille tous les Damoiseaux qui aspiroyent à l'ordre de cheualerie, se rengeoient tous ensemble, estans le iour de deuant tous vestus d'une mesme liuree, & disnoient pres de la table de leurs Seigneurs selon l'ordre & dignité de chacun: Apres ils alloient ouyr vespres en la compagnie & conduite des vieux Cheualiers.

Le Prince alors les admonestoit amiablement comme ils deuoient garder la foy & loiauté sur toutes choses reuerer l'Eglise, soustenir les veufues & orfelins, hanter les guerres, s'exposer avecques les armes pour droit de raison iusques à victoire ou mort, honorer noblesse, aimer les vaillans hommes, estre doux & gracieux aux bons & fiers aux meschans.

Ce fait s'en retournoyent à l'Eglise où ils veilloient la nuit deuotement iusques au matin qu'estoit celebree la messe du saint esprit.

Après laquelle s'estans vn peu reposez

en leurs logis, ils accompagnoient le Prince à la grand messe, marchans deuant lui deux à deux, chacun assis au siege qui lui estoit ordonné par le maistre des ceremonies, incontinant que l'epistre estoit chantée avecques les benedictions en tel cas acoustumées, le Prince leur ceignoit les espees, & certains Cheualiers leur chaussoient les sperons. De là ils s'alloient rasseoir en leur premiers lieux, & le sacrifice acheué ils reconduisoient le Prince en son pavillon. Là où ils disnoient en la maniere honorable du iour precedent.

A l'heure de Nonne les cors sonnoient pour le Tournoy du soir, & ils comparoïssent par couples au camp armez, vestus & montez richement: mais à nul d'eux n'estoit permis de porter escu que d'une couleur ou metails: ne ceindre espee ains seulement auoir vne lance de sapin, à fer court brut non poly ne trenchant: & ainsi chacun de son costé courir & rompre lances iusques au soir que les cors sonnoient la retraite: alors ils s'alloient desarmer, & reuestus sumptueusement retournoyent au souper, où ils estoient receuz & caressez par le Prince selon leurs merites. Et celui qui estoit iugé le mieux faisant estoit assis en la table mesme, y festoyé & loué sans cesse.

L'vance estoit apres le soupper que les chefs alloient visiter les Dames par plaisir y menant avecques eux pour faueur le iouvenceau vainqueur, y ebatans iusques à l'heure de repos.

Al'aube du iour la messe ouye, & deuenant qui en auoit volonte, à l'heure de prime se monstroient au camp tous les combattans en armes sous leur enseigne.

Au Tournoy chacun portoit telle devise qu'il luy plaisoit moyennant qu'il monstrast quelque petit signal du Prince sous le quel il marchoit, excepté ceux qui suruenoyent & ne vouloyent estre connus.

Les

Les armures estoient, heaume, haubert, escu, fer aygu mis en tel bois qu'ils vouloient, espees trenchantes, & le surplus tout ainsi qu'en bataille mortelle, reserué de ferir d'estoc, & de ne battre que du pommeau. celui qui seroit desarmé au combat pour le faire rendre: Ce sous peine de perdre l'honneur du Tournoy.

Les Dames se reduisoient és houts ou echaufauts, lesquelles venoient sous les grandes Princesses, ou couuertement conduittes par leurs propres parens: & n'estoit loysible de les faire decourir par force nom plus qu'aux Cheualiers estranges & inconnus, qui vouloient tenir le party qui mieux leur agreoit.

Cecy ordonné de telle sorte, & le signe donné par les cors & buccines, les premiers rangs des Cheualiers entroient au camp, ou se faisoient maints beaux coups, & maints Cheualiers estoient abbatus, tant que l'un des bataillons alloit à deconfiture s'il n'estoit releué & soustenu par autre nouveau suruenât en pareil nombre & autant en faisoient les autres selon que besoin leur en auenoit se multiplioient, renforçant de bande à bande, & melioroient en puissance (estans les Cheualiers de pris au dernier esquadron) tellement que tous meslez ensemble en bataille, c'estoit chose merueilleuse à veoir l'effort & la vertu de chacun pour defendre leur hōneur propre & conquerrir l'autrui. Or aucune-fois que l'un party sembloit du tout deffait par l'autre, alors y entroient les Cheualiers inconnus tres-valereux qui aydoient tellement les plus foulez & oppressez que ils leur mettoient és mains la victoire, si par autres nouvellement arriués ils n'estoient derechef renuersez à routte finale: tellement que d'un costé & d'autre le plus souuent variât la fortune muable, les vainqueurs se voyoient vaincus: Et le cri du peuple se iettoit sur ces Cheualiers

estrangers, disant, celui à tel blason vainc tout.

A la fin le party qui estoit totalement rompu & deffait abandonnant le camp s'enfuoit dans la forest, sans plus se presenter sinon vn à vn à pied & desarmé: & les vainqueurs sans plus mener les mains, en acte de ioye & liesse se ralioient tous sous leur enseigne.

Souuent aduenoit que les Cheualiers inconnus se partoient (combien que victorieux) si celément du Tournoy, que nul sinon par coniecture pouuoit iuger qui ils estoient à ceste cause plusieurs se mettoient en quete pour les retrouver & reconduire en la cour du Roy pour y estre receuz par luy & reconnuz à grand honneur.

Vray est que quelquefois, le tournoy finy, au party vaincu estoit loysible de requerir nouveau combat au lendemain, ou à autre iour qu'il aduisoit pour le mieux, moyennant que l'assemblee ne fust ecore departie & retournée en leurs maisons.

La maniere de donner le pris estoit, que, quand le Cheualier mesconnu se retrouuoit, qui estoit vainqueur ou que ce fust un connu, le Prince vainqueur, entendu les rapports, des spectateurs à ce experts des officiers d'armes, des Cheualiers anciens, mesmement de ceux qui estoient des combattans, selon l'aduis de plusieurs communiqué aux Dames, prenant le vainqueur par la main, luy proferoit telles parolles.

Mes sire tel, pour le grand effort que chascun vous a veu faire aujourdhuy, & à raison que par vostre prouesse & valeur vostre party principalement a esté victorieux, par le consentement de tous les meilleurs avecques le vouloir des Dames, le pris & los vous en est adiugé comme à celui à qui le droit appartient, auquel le Cheualier respondoit en ce langage.

Mon treshonoré Seigneur (ou, souverain, s'il estoit son subiet) le plus humblement que faire

*faire se peult ie vous rend graces infinies & aux Dames & aux Cheualiers cy presens, de l'honneur qu'il vous à pleu me deferer. Et i'a-
goit que ie cognoisse ne l'auoir aucunement
gagné, neantmoins pouroir à voz bons
commandemens & des Dames, puis que tel
est vostre vouloir, ie le prend & accepte.*

Le Cheualier estoit ce soir & tout le iour ensuiuant assis à costé du Prince au plus haut de la table, seruy ne plus ne moins que luy, voire vestu de pareille cotte d'armes & manteau: & de luy mesme & de tous les Cheualiers d'honneur il receuoit de beaux dons.

Le troiesme iour les Princes se departoyent aucunesfois en grand amour, autres-fois avecques quelque aygreur en leur courage mais bien conuerte: à l'occasion de laquelle se renouelloient souuent des tournois: tellement qu'on passoit peu de mois en la grand Bretagne sans en faire, & les bons Cheualiers estoient à ceste cause tant prizez & caresez en ce tems là, que plusieurs y estoient plus estimez & honorez que les Princes mesmes. Ce qui fut cause de produire tant de Cheualiers preux & hardix aux armes.

De l'auenture horrible suruenüe au tournoy de Constantinople: & comme les Dames le regardant y furent volees & enleuees par estrange maniere.

CHAP. LVIII.

VOyla les vz & status des Cheualiers errans ou compagnons de la table rôtée, qui depuis ont esté moderez (comme il appert au present tournoy) quand aux armes de lances & espees. vray est qu'il n'estoit pas desfié à Prince voisin ou estranger: mais seulement entre ceux d'une cité & cour mesme pour recreation des nopces.

Les loix & ordonnances de l'ordre des Cheualiers errans ainsi recitees, le disner

fut prest: auquel on remarqua que les sages Alquist & Vrgande ne beuoyent ne mangeoyent: leur esprit profetique leur preiugeant quelque malheur à venir sur eux, duquel toutesfois ils ne pouuoient destourner les destinées. Si fut ieger le disner à cause du Tournoy ou chacun se vouloit trouuer, dont l'appareil estoit dressé en grande magnificence: mesmement les hours & eschaufaux, tant des Empereurs, que des Dames. Car les anciens cheualiers ne voulurent pas empescher la place aux ieunes de qui estoit la feste. Les dames monterent sur leurs palefrois pour y aller: & y trouuerent desia sur les rangs les tenans d'un costé & les assaillans de l'autre. Les tenans furent Rogel, Agesilan, dō Arlanges, Florarlan, Brianges, Galdes avecques quelq nombre des ieunes cheualiers de Grece. Des assaillans fut Silues de la Selue, Florestan Prince de Romme, Lucendus fils du Roy Lucendor de France, & le cheualier Perot aussi François, gouuerneur du prince Sylues, lequel tousiours le seconda en toutes ses entreprinies d'armes, estat son lieutenant es compagnies qu'il menoit en guerre. Et d'autant qu'il portoit vne croix d'argent à cinq coquilles de sable en champ d'or, fut depuis surnommé le Cheualier à la croix: duquel ie vous puis dire que apres Sylues, Lucendus & Florestan il fut le mieux faisant en la iouste, de tous les assaillans. En laquelle furent les lances mornes, & les espees non trenchantes. Sylues se presentant bien empennaché sur les rengs avecques la devise de Pentasilee en son escu à l'entour du miroir & de l'arc. HERMAIROTIQUE VALEVR. Il y eut des lances rompues vne infinité d'un costé & d'autre, & y acquirent grand honneur les assaillans de se maintenir si bien contre la fleur de la Cheualerie du monde. Car nul de ses quatre n'y fut abbatu & se porterent aussi vaillamment apres au combat des espees mousses & rabbatues.

Car il n'estoit possible de trouuer Cheualiers en toute la terre qui se peussent mieux paragonner aux Grecs que les François: qui bien aussi l'auoyent montré en la bataille contre les Armeniens. Aussi est-ce la premiere & plus antique noblesse de la Chrestienté tousiours duite de pere en fils aux armes, & qui a fait trembler de tous temps la gendarmerie de toutes les autres nations tât prochaines que lointaines: estant (armée, montée & bardée à sa mode ancienne) comme vne place forte imprenable au milieu d'une armée, & à la charge ne trouuant rien qu'elle n'enfonce. Au moyen dequoy eut depuis Lucendus l'honneur de paruenir à l'amour de la nompareille Fortunie, pour laquelle furent faites de la en auant des armes incroyables auquel tres-florissant Royaume de Frâce: auquel sont adressées les merueilleuses auentures du liure ensuyuant. Pour reuenir aux Princes tenans, ils furent assez excusés (comme travaillez d'amours) de n'y auoir pas tant fait d'effort que les braves iouuenceaux amoureux Sylues de la Selue & Lucendus de France, regardans souuent leurs Dames en l'eschaufaut, qui les eschaufoyent & renforçoient à bien faire. Aussi ces guerriers tant expérimentez aux affaires ardues & sérieux, ne tenoyent gueres leur honneur foulé de laisser gagner los à la ieunesse en ces légers actes de passe-temps: lequel certainement s'alloit deferer à ces deux ieunes Princes: quand la Fortune donnant vn tour de la main gauche à sa roué, tourna le hault plaisir, ou estoit ceste cour au fond de deplaisir & tristesse. Car venans les Princes de Grece d'estre deliurez du cruel siege de payens, & maintenant se resiouissant en nopces, festins, dances, Ioustes & Tournoys: voicy soudain arriuer vn cas le plus piteux, le plus mal-heureux & estrange d'ot on eust iamais ouy parler: & souhaite Garsis que sa plume mal taillee, estat auf-

si bien hernee de la longue escriture se puisse icy arrester sans passer plus outre à toucher cest horrible accident, qui fut semence de tant de maux, de morts, de questes & traualx par le monde. Mais à ce dernier trait (pour acheuer d'obeir à l'excellente & vertueusse Contese qui m'a la traduction commandee) l'encre sera detrempé de mes larmes, coulans de mes yeux le long de la plume. Estans doncques ces valoureux Princes & Cheualiers exploictans à qui mieux mieux au Tournoy, & les Seigneurs & Dames en leurs eschaufauts ententifs à regarder voicy tout en vn moment le ciel commencer a soy troubler & obscurcir par grosses nuës & espoissés, voicy tonner horriblement les esclairs elancer auecques vn espouuement de chacun, si grief que nul ne se pouuoit mouuoir n'y aller en auant ou en arriere hors de sa place. Peu à peu l'obscurité rengrege en telle sorte que le clair iour est conuertty en noire & obscure nuit: sans que plus on se peust entrecognoistre l'un l'autre: sinon que l'on voyoit par les eclairs descendre de l'air vn fort grand chariot de couleur celeste ou bleue, auquel estoient vingt & quatre harpyes attelées, iettans crys hydeux de hybous ou chahuans & dedans assis vn vieil Geant & vne vieille Geante: les lymons & rouages estoient de fer noir & la couuerture d'enhaut de mesme metal, en la cime de laquelle estoit vne fortune bien proprement representee selon que par les anciens elle est pourtraicte. Ce chariot fondit de l'air tout en vn coup sur le comble des eschaufauts, d'ou sortirent aussi tost les deux vieulx Geans qui empoignerent l'un le sage Alquif, l'autre Vrgande la mescogneue, sans qu'ils se peussent aucunement aider de leurs arts: & à l'instant descendent auecques eux au milieu de la place, ou ils firent vn cercle d'une verge puis ouurant vn liure & faisant quelques autres ceremonies, s'e-

leue

lene vn tourbillon de feu montant iusques aux nuës & au fond d'icelui se voïent deux noires coulannes dressées, sur les chapiteaux desquelles ils posent les deux sages avecques deux espees trenchantes à chacun au poing, leur disant.

Icy vous demeurerez tant que le braue Lyon sailly de la forest vous en tire, estant sa vie presque perdue.

Là delaissez ils commencent à escrimer l'un sur l'autre à grands coups des espees, s'entre-liurans de cruelles playes. Puis furent pres de la base des pilastres quatre gros mastins enchesnez, lesquels en sautant leur mordoyent grièvement pieds & jambes, dont les coulannes noires furent bien tost rougies de leur sang.

Ce fait s'en vont les deux faux Geans aux echafaults empieter toutes les principales Dames qui y estoient, à compter d'Oriane iusques à la dernière de toutes celles qui sont mentionnees en l'histoire. Lesquelles ils chargent en leur chariot, sans que nul des Princes les peust secourir de fait ne d't. Puis eux memes se lancent dedans & les harpyes battans l'air des ailes, les portēt en lieu que décrit le liure ensuiuant : dont aduindrent des maux infinis par le mode. A tant couient dit Galeris abbatre & ployer les voiles & ietter les ancres en ceste

mer tempestueuse, ou nous
auons vogué assez
long voya
ge.

*Fin du tresiesme liure d'Amadis
de Gaule.*

T A B L E.

T A B L E D E S C H A P I -
T R E S D V T R E Z I E M E
liure d'Amadis de
Gaule.

DE l'ordre que donnerent les Princes qui estoient à Constantinople sur le cartel de deffy du grand Roy Bultazar de Russie qu'ils auoyent receu par ses douze Nains & comme ilz enuoyèrent requérir le secours de tous leurs alliez & vassaux.

Chapitre 1. feuillet 1.

Comme les Tournois de Constantinople furent publiez à son de trompe, & par lettres es pays circonuoisins pour les noces des Princes, & de ce qui passa sur l'effroy du deffy precedent entre le Prince Agesilan & Diane.

chap. 2. feuillet 3.

Comme le Roy Bultazar de Russie soyresentât de l'offence & outrage receu du Prince Florisel de Niquee entra en conseil sur ce qu'il auroit à faire, & comme il l'exécuta.

chap. 3. feuillet 5.

Comme les courriers enuoyez par le Roy Bultazar, presenterent les pacquets aux Roys à qui ils estoient adressez, & qui furent les Rois qui se rendirent en la ville de Russie & avec quel nombre de gens tant de pied que de cheval ils marcherent ensemble vers Constantinople.

chap. 4. feuil. 8.

D'une damoiselle qui vint en la cour de Constantinople avec vne estrange auenture d'un armet, & qui elle estoit.

chap. 5. feuil. 9.

Comme le iour ensuiuant l'auenture de l'armet enchanté fut eprouuee par plusieurs Princes & Cheualiers, & comme Filisel de Montespín l'acheta, puis partit de la cour avec la Damoiselle messagere.

chap. 6. feuil. 11.

De la grande angoisse que les Princes Agesilan & don Arlanges souffroyent pour leurs fiancées, & comme ils s'entreurent de nuit, & de ce qui passa entr'eux.

chap. 7. feuillet 13.

Comme le Damoisel Sylues de la Selue en sa prime ieunesse prenoit son exercice à la chasse es forestz de Thebes.

chap. 8. feuil. 15.

Des bons gouuerneurs qu'eut le Damoisel

Sylues de la Selue en son ieune age tant pour l'instruction de son esprit que pour l'exercice du corps.

chap. 9. feuil. 16.

Comme le Damoisel Sylues de la Selue hantoit les grandes forests en l'age de quinze ans, & des estranges auentures qu'il y rencontra.

chap. 10. feuil. 17.

Comme les deux Princes Rogel de Grece, & Brianges de Beocie s'estans embarquez avec les trois filles Royales de Perse relacherent par tempeste en vne rade deserte, ou la belle Sidere l'aisnee leur fut enleuee par des corsaires.

chap. 11. feuil. 20.

Comme les deux Princes accompagnez de trois Royales pucelles de Perse, se mirent en route de la forest pour trouuer lieu à appareiller leurs playes & comme ils rencontrèrent le fraudeur qui leur ioua vn tour de ses ruses.

chap. 12. feuil. 22.

Comme la damoiselle qui guidoit les cheualiers, deceut le Prince Rogel malement, & luy apres, le Fraudeur, puis partirent pour trouuer remede à leurs playes.

chap. 13. f. 24.

Comme estans les deux Princes partis du chasteau leur suruint certaine auenture qui fit departir Brianges de la compagnie, & come il fut prins par vn Geant, & du surplus qui luy auint.

chap. 14. feuil. 27.

Comme reprenant Rogel le chemin de la Mer avec les pucelles de Perse ils rencontrèrent vne auenture en certaines tentes.

chapitre 15. feuil. 29.

Comme Filisel de Montespín avec la damoiselle messagere arriua au chasteau de la magicienne laquelle le charma & fit iouir Marsire de ses amours: & de la trahison que brassa depuis la Damoiselle contre Marsire sa maistresse.

chap. 16. feuil. 32.

Comme Filisel de Montespín entra en combat pour Marsire & apres le cōgé prins du duc d'Athenes, de la rencontre qu'il eut des parens de Patronion.

chap. 17. feuil. 34.

Comme le Prince Rogel vogant avec les pucelles sur la mer rencontra deux Brigantins de corsaires, des mains desquels ils deliura le Soudan de Perse.

chap. 18. feuil. 37.

De la triomfante reception du Soudan par la Sou-

T A B L E.

la Soudane sa femme & ses sugets, & du grand honneur qui y fut fait au Prince Rogel avec amoureuse primauté de Sydere: laquel le fut entrecompue par une lettre apportee de Constantinople. chap. 19. feuil. 40.

Comme le Prince Rogel party de Perse rencontra sur mer la flotte de la Roynie Sidonie avec laquelle il surgit au port de Constantinople: ou ils furent magnifiquement receuz. chap. 20. feuil. 43.

Comme le Gentil Prince Sylues de la Selue au mandement de l'Empereur Amadis de Grece partit de Thebes pour venir à Constantinople chassant par le chemin en la compagnie de la Roynie Finistee sa mere. chap. 21. feuil. 46.

De l'estrange auenture qui arriva de la fontaine Meduse à Constantinople laquelle troubla toute la cour, puis fut mise à fin par la Roynie Sidonie. chap. 22. feuil. 47.

Comme se dressoit à Constantinople l'appareil solennel pour les nocces lequel fut rompu par la mort de la Princesse Heleine. chap. 23. feuil. 50.

Des nouvelles certaines qu'eurent les Princes de Grece de la venue de leurs ennemis, & l'estat de desence auquel ils se mirent pour les recevoir. chap. 24. feuil. 52.

Comme les Mores s'embarquerent & s'engagerent la route de Constantinople, & comme à leur abordee le port leur fut deffendu & la gent qui y mourut d'une part & d'autre. chap. 25. feuil. 53.

Comme les Russiens tindrent conseil de liurer l'assaut à la ville, & comme elle fut par eux assaillie & par les Grecs deffendue. chap. 26. feuil. 56.

Comme les Chrestiens donnerent la nuit une aspre camifade aux Mores, & de l'horrible carnage qu'ils y firent. chap. 27. feuil. 60.

Comme passa le combat d'entre le Geant Monleon & Agesilan, le Geant Mondragon & Rogel, avec l'issue d'iceluy. chap. 28. feuil. 62.

Comme estans les Payens fort deplaisans de la mort des deux Geans, ils enuoyerent en la cité un deffuy de vingt contre vingt lequel

fut accepté, & qui furent les quarante combattans tant d'une part que d'autre. chapitre. 29. feuil. 66.

Comme passa la cruelle & furieuse bataille des vingt champions Payens contre les vingt Chrestiens, & ausquels demeura la victoire. chap. 30. feuil. 68.

Du conseil que tindrent les Roys Mores, par lequel ils iurerent tous le siege & bevrer le sang humain en confirmation de l'entreprise. chap. 31. feuil. 72.

Du second horrible & incroyable assaut, qui fut liure par les Russiens à la ville de Constantinople, & de la bonne resistance de ceux de dedans au moyen des merueilles d'armes de leurs Princes. chap. 32. feuil. 75.

Comme la nuit mesme l'assaut fut continué par les Mores & a la fin les Chrestiens se retirerent au chasteau, leurs ennemis demeurans maistres de la ville, & ce qui ensuiuit. chap. 33. feuil. 77.

Comme les Princes Grecs firent une saillie sur leurs ennemis & cōme d'autre part le chasteau fut forcé, & du secours inesperé qui survint aux Chrestiens. chap. 34. feuil. 79.

Comme les Roys Chrestiens arriverent à la montaigne descendue, & de la surgirent à Constantinople en grande alegresse, & de ce qui avint. chap. 35. feuil. 87.

Comme la flotte du secours des Roys chrestiens rompit & deffit celle des Mores, puis comme ils desembarquerent & firent descende à terre nonobstant la resistance des ennemis, lesquels ils mirent presqu'à rai de route. chap. 36. feuil. 89.

Du conseil que tindrent les Mores apres leur retraite en leur camp, & des cartels de deffuy que le Geant Astroband & ses deux freres enuoyerent aux Princes de Grece. chap. 37. feuil. 91.

Du combat entre Amadis de Gaule, Amadis de Grece, Florisel de Niquee d'une part: contre Astroband le Geant & ses deux freres d'autre & quelle en fut l'issue. chap. 38. feuil. 93.

Comme sur le grief ennuy que portoyent les Payens de la deffaitte de leurs trois Geans

T A B L E.

en camp clos, la belle Princeſſe Pentafilee
enuoya vne lettre aux Princes Grecs par
vne de ſes Amazones pour obtenir d'eux vn
ſauf conduit, & du ſurplus qui en auint.

chap. 39. feuil. 97.

De l'ordre de cheualerie qui fut donné à l'ex-
cellente Princeſſe Pentafilee de la main du
Roy Amadis de Gaule au plus ſumptueux
& magnifique triomphe qui euſt iamais eſté
veu, puis du combat accordé entre elle & la
Royne Alaſtraxeree & entre la Roine Cal-
pendre & Agesilan. chap. 40. feuil. 102.

Comme paſſa le combat ſingulier de Pen-
tafilee contre Alaſtraxeree, & de Agesi-
lan contre Calpendre, & de l'iſſue d'iceluy en
confederation & amitié entr'eux.

chap. 41. feuil. 105.

De l'ennuy que receurent les Payens de
l'amitié de Calpendre & Pentafilee avec-
ques les chreſtiens, & du deſſi qu'en baine
d'icelle les trois Geans des iſles cyclades man-
derent à la mere & la fille, qui fut accepté
par elles avec vn tiers. chap. 42. feuil. 108.

Comme le ieune Prince Sylues de la Sel-
ue fut armé cheualier, & apres entra au
combat contre Valendos & ſes deux couſins
Brauart & Baluerd avec Calpendre & Pen-
tafilee, & à quel ſuccez. chap. 43. feuil. 110.

Comme les Payens ordonnerent leurs ba-
tailions de leur coſté, & les Chreſtiens du leur
pareillement, & ſaillirent les vns & les au-
tres en campagne. chap. 44. feuil. 113.

Comme les deux armées ſortirent aux
champs en bataille rengee, & comme leurs
chefs les enhorterent par leurs harangues à
bien faire. chap. 45. feuil. 114.

De la tres-horrible & tres-cruelle bataille
entre le Payens & les Chreſtiens, & du ſe-
cours ineſſeré qui ſuruint aux Grecs des Roi-
nes de Calafie & Pintiquineſtre & du Sei-
gneur Galtazar de Tarſis: & quelle fut l'iſ-
ſue. chap. 46. feuil. 116.

De l'eſtrange maniere de la venue des ſa-
ges Alquiſ & d'Vrgade en la plaine de Co-
ron ou les Princes eſtoient, qui y furent gua-
ris de leurs playes. chap. 47. feuil. 123.

Des propos qu'eut Rogel de Grece eſtant

au lit à cauſe de ſes playes avec la Princeſſe
Leonide, ou ils conclurent qu'il la demãderoit
en mariage, & de ceux qui paſſerent entre
Florifel & la Royne Sidonie. cha. 48. f. 124.

De ce qui auint aux Princes cheuauchant
vers Conſtantinople au bois de leur premiere
traicte: & de la iouſte qu'ils eurent apres en
la ſecôde cõtre deux cheualiers.

chap. 49. feuil. 126.

Des fiançailles qui furent faites la guer-
re finie de Florifel & Niquee avec la Roy-
ne Sydonie, de Rogel de Grece avec la Prin-
ceſſe Leonide & d'autres à Conſtantinople.

chap. 50. feuil. 129.

Comme le Prince Rogel de Grece pendãt
le terme des mariages ſ'embarqua ſuyuant ſa
promeſſe pour tirer en Perſe avec l'armée du
Soudan, & du compte que rendit Brianges
de Beotie aux Princes des auentures de leur
dernier voyage, meſmement de celle de la de-
liurance de la Royne Sidonie & luy des pri-
ſons d'un Geant. chap. 51. feuil. 131.

De l'amour qui ſ'embraſa entre le Prin-
ce Rogel de Grece & la belle Royne Fuſilee
de Galdap & de ce qui en auint. chap. 52.
feuil. 135.

Comme Rogel impatient de la longue &
tardine traicte de la flotte du Soudan ſe mit
en vne fregate avec Sirind ſon eſcuyer pour
la deuancer en Perſe. chap. 53. feuil. 137.

Comme vint à la cour vne eſtrange auen-
ture du chaſtellet de Cupidon pour les loyaux
amans, & par qui elle fut eprouuee, par qui
miſe à fin, & du ſurplus qui en auint. cha-
pit. 54. feuil. 142.

Des lettres que la Royne de Galdap auer-
tie des fiançailles de Rogel de Grece luy en-
nuoya par vn gentil-homme expreſ, & de la
reſponce qu'il remporta. chapit. 55.
feuil. 145.

De la magnifique ſolennité des nopces des
Princes & Princeſſes celebrees à Conſtan-
tinople, & de quelles inuentions nouvelles
eux & elles uſerent en leurs accouſtrements
& deuifes, & du ſurplus. chapit. 56.
feuil. 148.


Du brane Tournoy qui fut fait en la cité
l'ende-

T A B L E.

l'endemain des nopces : & des anciennes or-
donnances d'icelluy en la grand Bretaigne,
avec les Statuts des Cheualiers de la table
ronde, chap. 57. feuil. 152. De l'horrible auenture survenue au Tour-
noy de Constantinople: & comme les Dames
y regardant furent volees, & enleuees par
estrange maniere. chap. 58. feuil. 157.

*Fin de la table des chapitres, du trezieme liure
d'Amadis de Gaule.*





GEO. PEABODY

861

.3

Am12

1560

v.3.1

6741626
03A617

